

史记四库本

司马迁

文硕阁

wenshuoge.com

关于我们	6
御制重刻二十一史序	8
史记集解序	17
史记索隐序	20
史记索隐后序	21
史记正义序	22
史记序考证	23
目录	24
卷一	48
卷二	68
卷三	84
卷四	92
卷五	115
卷六	135
卷七	160
卷八	176
卷九	194
卷十	201
卷十一	211
卷十二	215
卷十三	227
卷十四	233
卷十五	247
卷十六	256
卷十七	260
卷十八	265
卷十九	271
卷二十	275
卷二十一	284
卷二十二	289
卷二十三	293
卷二十四	301
卷二十五	322
卷二十六	330
卷二十七	347
卷二十八	374

卷二十九	390
卷三十	394
卷三十一	403
卷三十二	414
卷三十三	426
卷三十四	437
卷三十五	442
卷三十六	447
卷三十七	452
卷三十八	459
卷三十九	469
卷四十	486
卷四十一	503
卷四十二	510
卷四十三	518
卷四十四	536
卷四十五	546
卷四十六	552
卷四十七	561
卷四十八	575
卷四十九	581
卷五十	588
卷五十一	590
卷五十二	593
卷五十三	598
卷五十四	601
卷五十五	606
卷五十六	613
卷五十七	618
卷五十八	624
卷五十九	629
卷六十	634
卷六十一	640
卷六十二	644
卷六十三	647
卷六十四	654
卷六十五	656
卷六十六	660

卷六十七	665
卷六十八	679
卷六十九	684
卷七十	696
卷七十一	705
卷七十二	710
卷七十三	713
卷七十四	718
卷七十五	722
卷七十六	728
卷七十七	733
卷七十八	737
卷七十九	742
卷八十	751
卷八十一	755
卷八十二	760
卷八十三	763
卷八十四	771
卷八十五	778
卷八十六	782
卷八十七	791
卷八十八	800
卷八十九	803
卷九十	809
卷九十一	812
卷九十二	816
卷九十三	823
卷九十四	828
卷九十五	831
卷九十六	839
卷九十七	845
卷九十八	851
卷九十九	854
卷一百	859
卷一百一	862
卷一百二	867
卷一百三	871
卷一百四	875

卷一百五	879
卷一百六	892
卷一百七	898
卷一百八	905
卷一百九	909
卷一百十	914
卷一百十一	928
卷一百十二	938
卷一百十三	944
卷一百十四	948
卷一百十五	951
卷一百十六	954
卷一百十七	957
卷一百十八	980
卷一百十九	989
卷一百二十	992
卷一百二十一	996
卷一百二十二	1.001
卷一百二十三	1.009
卷一百二十四	1.018
卷一百二十五	1.022
卷一百二十六	1.025
卷一百二十七	1.032
卷一百二十八	1.036
卷一百二十九	1.047
卷一百三十	1.057
补史记序	1.073
补史记	1.074
史记正义论例諡法解列国分野	1.076

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

御制重刻二十一史序

<史部,正史类,史记>

钦定四库全书

御制重刻二十一史序

七录之目首列经史四库因之史者辅经以垂训者也尚书春秋内外传尚矣司马迁创为纪表书传之体以成史记班固以下因之累朝载笔之人类皆嫺掌故贯旧闻旁罗博采以成信史後之述事考文者咸取徵焉朕既命校刊十三经注疏定本复念史为经翼监本亦日渐残缺并勅校讐以广刊布其辨譌别异是正为多卷末考证一视诸经之例明史先经告竣合之为二十二史焕乎册府之大观矣夫史以示劝惩昭法戒上下数千年治乱安危之故忠贤奸佞之实是非得失具可考见居今而知古鉴往以察来扬子云曰多闻则守之以约多见则守之以卓岂不在善读者之能自得师也哉

乾隆十二年二月朔

御制读史汉书有感

两人促膝语彼此不泄露所语竟谁传而史以为据甚至惟一人心迹隐未吐祇恐他或知炳然乃传後【叶】发潜信赖史纪讹亦屡屡尽信不如无不求甚解悟此皆非常人卓识有别具固远不逮迂翻訾有抵牾【叶】後人复不逮而更妄非固呜呼圣贤门却成是非路

御制读史记随笔

迁史始自黄帝类皆网罗旧闻其世职卓才则备见於汉兴以来诸纪载所谓千秋良史信无愧焉壬申秋猕塞上率以寅往哨鹿及晡罢围虎帐几余辄快读终卷因掇汉君臣事蹟关于治乱者纪之他不复及畧分世代随得即书不为詮次云

业定关中治已周山河带砺建诸刘小嫌何足伤亲谊栢釜翻为羹颉侯

指示功人第一宜所嘉更在举宗随酈侯剑履登朝日可忆鲍生进策时

善骂无妨仍好士一时割爱重须眉恢宏大度有如此岂系留侯计出奇

借箸前筹才数语汉家基业巩千年趣销趣刻如儿戏从善端知若转圜

贩缯屠狗自婴樊附骥恩流逮子孙摭拾成编端委具却因他广备为言
三议堂堂建宋昌大横吉兆应重光文休景养培元气何异周家或与康
五利文成叠受封公孙才见大人踪惟应驾海神鞭石一节还教让祖龙
故衣独步越丰姿俛泣低头恨可知尹亦自饶真藻监褚先生论更堪思
田窦相倾势利关灌夫引重为居间却因杯酒媒深祸首鼠辕驹尽腆颜
数奇受诫部书催岂大将军特忌猜责簿刎身人尽惜杀降应悔有由来
鉤弋云阳遇暴风娥姁肇祸实无穷少孙漫许为贤圣岂是千秋定论公
一文一质变相生陈粟相因露积羸黠武求仙平準创炎刘治乱此分明

御制读史记文帝纪

文帝信云仁清静以为治惻隐除肉刑民租每蠲赐此已足千古史贵传正义而何司马迁博
载失精粹如云慎夫人衣乃不曳地设诚敦朴俭铜山又何谓张武受金钱加赏使心愧瘁恶
尽若斯尚廉谁则励观其任复土母乃有深意慨然叹史难寧云责贤备

御制读汉文帝赞率题

罢台自属敦勤俭记载寧无稍失真设使蜀山畧分赐早教衣蔽慎夫人

御制读史

晏子为齐相驷马驾高轩旄旗夹两途大盖拥其前御者尚扬扬意气甚哆然乃其自不足深
心在式轅智哉御者妻识之闚门间读此可自警匪为婴荐贤

御制读平原君传

公子称?贤食客至数千高楼临民家璧者行盘跚美人忽临见倩兮巧破颜明日璧者至谒君
抗辞前愿得笑者头君哂未许焉舍人稍引去怪问始知然爱色而贱士谁肯相周旋爰斩美
人头谢罪自造门门下乃复来相倾文歇间卒得颖脱力定从自楚还一笑知何人其事况经
年美人诚然乎胡乃致客还史公每好奇于斯见一斑

御制咏史

范叔因王稽奔秦号张禄使舍食草具岁余未见録言外观俯仰稍以中其欲既信乃言深言行穰侯逐拜相受土封显荣快衷曲微服给须贾莖豆明示辱一饭德既报睚眦怨亦复郑安平云叛河东守乃戮临朝叹昭王辩计两窘束蔡泽闻之来志匪同庸碌持梁刺齿肥四十三年足雄谈悟应侯知止全身福罢相遂代之数月退何速二子蹟畧同因时互倾覆鄙哉势利徒明鉴昭往牒

御制咏史

范叔困说力担石乏自资夤缘事须贾客乘筏之齐牛酒不敢受贾闻犹怒私告相相亦怒折脇行刑答佯死卷以箠乃得免祸危姓名易张禄伏匿恐人知幸得郑安平荐剡归王稽橐载避秦相待命复岁余【叶】上书慢言外观王俯仰姿计行乃言深封侯不逾时微行谗须贾终?怜赐之御以入相府先入怪久溪门下告之故肉袒谢罪迟三罪既庭数马食纵以归德必偿一饭怨亦报睚眦【叶】安平旋降赵王稽坐法诛【叶】蔡泽遂适秦相位竟夺其机谋夸百变时穷安能为是始还是终小智真火痴

御制咏史

战国多说客秦汉风尚存茅焦感始皇邹阳悟长君知心以说当秘诀韩吃论触讐悦燕媼或嘉纳牖言苟其尽忠款诤在口给便帝尧斥囂讼视子共驩伦

御制读季布传

季布无二诺岂非任侠士受辱不为羞犹曰欲信【去声】已冒顿遗汉书漫言轻吕雉以有易所无主辱臣谊死高后亦发怒议欲诛其使樊哙愿横行十万兵足矣布曰哙可斩平城祸堪指恶言不足怒美言不足喜卑辞奉车驷无罪幸赦耳一时患固弭万古羞难洗史迁乃韪之大失遵养旨

御制读史记大宛传

大宛之迹见张骞去汉万里俗耕田多善马号天马子属邑七十余城焉迁仅耳闻非目覩以今证古多讹传哈萨克或康居是【旧传哈萨克为古大宛向已辨其非今考哈萨克不但无城郭与大宛异且其地当准噶尔西北两面准噶尔为汉乌孙证以汉书乌孙西北与康居接之文则今哈萨克当为古康居也】大宛则实安集延【安集延北控葱岭其东与布鲁特错处汉书称休循出葱岭西捐毒与葱岭属西北皆当大宛按休循捐毒本塞种无城郭当即今布鲁特又西北为安集延诸部皆有城郭土着与史记所言相合自当为古大宛地】善马率出哈萨克伊犁来鬻岁数千【哈萨克每岁驱马数千至伊犁以內地綢緞易之价廉而多得良马详见旧作及白居易陰山道乐府诗注】安集延虽亦有马素乏良骑来天闲且哈萨克无城郭安集延原村落连昔之大宛今鲜马今哈萨克非大宛彼其汉事尚谬记何况异域悬天边皇輿西域辑图志一一徵实登诸篇但考古即误於古【平定準部回部以後分命大臣

驻守其道里土俗衆皆熟悉且曾遣使测量是以皇輿西域图志所载悉由核实惟考古仍不能不资史汉诸书而迂固辈记中国事尚不免失诬其言异域必更传讹习诞今虽据为考证恐所订究不足信耳】斯之未信吾殷然

御制读伯夷列传

夷齐不食周粟盖谓义不仕周受禄贫饿以终其身而死耳自司马迁有采薇食之遂饿死首阳山之言而譙周古史考遂举野妇之语以实之後世率谓夷齐果不食而饿馁以死夫夷齐大节固在不仕周而不在死与不死也而迁乃更举顔渊盗跖之事谓天之报施善恶有或爽者夷齐之死有或怨者此则大谬而不可以不辨也盖穷通壽夭人事之适然而善恶邪正天道之至公千载之下以夷齐顔渊为何如人以盗跖为何如人则夷齐之死固不怨使其怨当早食周粟而求生矣杀身成仁者岂皆怨乎孔子曰不怨天不尤人迂实未知此耳彼其犯国法身残处秽动而见尤愤懣不堪怨天尤人谬论天道之是非是以迁之心为夷齐之心而夷齐必不若是也余故以为大谬而不可以不辨也

御制读史记儒林传

司马迁曰周室衰而关雎作王应麟撰玉海因引扬子周康王时颂声作乎下关雎作乎上习治也习治则伤始乱谓齐鲁韩三家以为康王政衰之诗又引杨赐传云康王一朝晏起关雎见几而作夫康王晏起不见於经书是误用宣王之事实之也齐鲁韩三家之诗虽先出於史记然总出於夫子之後信三家不如信夫子子曰关雎乐而不淫哀而不伤是诚王化之始岂有衰世之讥哉司马迁所云盖指孔子伤周室衰微王道不行故即继之曰论次诗书修起礼乐云云关雎作者周南之首章即删诗之义耳且如称尧典可以贯全书则称关雎亦可以该全诗而于康王始衰乎何有况举守成之善者必曰周有成康亦不见其有荒政也朱子谓诗传直以为文王后妃时所作盖本毛萇之义可谓具有卓识而未言三家之失於传讹兹故申而论之

和硕和亲王【臣】弘昼等上言【臣】等奉

勅校刻二十一史告竣恭呈

睿鉴【臣】等谨奉

表恭

进者伏以

帝治综百王宏啓汗青之简

皇图轶三古重辉竹素之书

大一统以垂麻遍蒐柱下

录千秋而作监悉发名山刻玉镂琼丕焕龙盘之宝字披云拨雾聿新蠹落之残编艺林气蔚文昌册府光腾奕?窃惟神圣传心之要莫重於经帝王致治之规必详於史识大识小始同出於一源记事记言後分标於四库左氏因春秋之笔编年附经以存马迁仿尚书之裁纪传立史之局班范後出悉踵前规划李代兴必遵先路虽篇目或有增减而体例不致纷殊自史汉以及宋元効修明而若画一凡专门名家之私着不入故府之藏集通监纲目而求详必以正史为断若十七史若廿一史各有成书为南监本为北监本旧称佳刻然而校讐疎畧不独鲁鱼亥豕之讹加以岁月侵寻更多蝨蚀虫蠹之损以是郢书燕说貽误丹青野乘稗官翻新梨枣不有精良秘本谁罗放失旧闻钦惟

皇帝陛下

学隆稽古

道合传心

同文以式万方彝伦攸叙

执中而徧天下礼乐为昭由百世而等百王统归定论自皇初以迄近古总揽宏猷莫不仰

圣世之鸿规固已成

盛朝之至治乃以图书大备典训咸昭既刻全经必罗诸史明朝史新已告竣具有成模旧唐书向者单行亦宜并列统雕二十二史以配一十三经承

恩命以鳧趋引清班而雀跃善本

颁从秘阁纷纶羣玉之编直庐密迓

禁廷清切蕊珠之馆然脂夕校月已窥帘砥墨晨书风为展页喜值文林盛事浑忘素业辛勤唯是诸史考证之难较之羣经异同尤剧前史之後乘即後史之肇端南史之牵连亦北史之缀辑各人撰述自不必同互有淆讹岂无一是一是摘录易滋繁冗辨正务在简明积少而多由博归约时呈

钦定悉仰

睿裁繙校之业几更梓绣之工日进经七年之寒暑次第成书合千古之典章完全插架熔经兼之铸史仰巨制於

天章考古因以证今沐鸿功於

大治四海识先民矩矱万年为後学津梁臣等学慙淹雅才谢宏通深思往籍有阙文传疑传信犹恐校书如落叶旋扫旋生仅云循览数行未足効愚一得伏愿

瑶函啓瑞

宝籙凝庥

乘运会之光昌郅隆文教

式典章之明备广励儒修损益因革顺乎时懋建中和之极忠敬质文推其意长留淳古之风则至诚裕天下之经纶远迈观图於河洛盛治罗古今之道法不烦刻玉於云亭矣计校刻告竣二十一史共二千七百三十一卷六十五函谨奉

表随

进以

闻

乾隆十一年十二月十七日

和硕和亲王【臣】弘昼

（字位过密无法显示）【臣】张廷玉吏部右侍郎【臣】德龄兵部右侍郎【臣】王会汾国子监祭酒【臣】陆宗楷

奉

旨开列校刻二十一史诸臣职名

监理

和硕和亲王【臣】弘昼总阅

（字位过密 无法显示）【臣】鄂尔泰

（字位过密 无法显示）张廷玉

总裁

原任经筵讲官刑部尚书【臣】张照原任礼部右侍郎【臣】李清植兵部右侍郎【臣】王会汾原任刑部右侍郎【臣】励宗万国子监祭酒【臣】陆宗楷原任翰林院侍讲职衔【臣】方苞提调

原任日讲官起居注詹事府詹事兼翰林院侍读学士【臣】陈浩原任日讲官起居注左春坊左庶子兼翰林院侍读【臣】朱良裘署日讲官起居注右春坊右庶子兼翰林院侍讲【臣】林蒲封翰林院编修【臣】孙人龙编校

内阁学士兼礼部侍郎【臣】沈德潜

日讲官起居注詹事府少詹事兼翰林院侍讲学士【臣】裘曰修日讲官起居注翰林院侍读学士【臣】董邦达日讲官起居注翰林院侍讲学士【臣】周长发原任日讲官起居注翰林院侍讲学士【臣】万承苍翰林院侍读【臣】周玉章日讲官起居注翰林院侍读【臣】齐召南

日讲官起居注司经局洗马【臣】韩彦曾

原任翰林院编修【臣】吴兆雯翰林院编修【臣】柏谦翰林院编修【臣】张映斗翰林院编修【臣】潘乙震翰林院编修【臣】何其睿翰林院编修【臣】钱琦翰林院编修【臣】李龙官翰林院编修【臣】朱荃翰林院编修【臣】叶酉翰林院编修【臣】姚范原任翰林院编修【臣】杭世骏署日讲官起居注翰林院检讨【臣】郭肇璜翰林院检讨【臣】万松龄翰林院编修今任监察御史【臣】沈廷芳

翰林院编修今任监察御史【臣】杨开鼎

翰林院编修今任奉天锦州府知府【臣】金文淳宗人府主事【臣】王文清候补主事今任山西隰州直隶州知州【臣】王祖庚翰林院待诏【臣】卢明楷钦天监博士【臣】张永祚校录

贡生【臣】廖名扬

贡生【臣】叶环

贡生【臣】费应泰

贡生【臣】杨茂迁

贡生【臣】张本

贡生【臣】王济师

贡生【臣】王积光

贡生【臣】萧梅

贡生【臣】郭世璨

贡生【臣】龚元朱

贡生【臣】杜炳星

贡生【臣】曾尚渭监造

内务府南苑郎中兼佐领加六级纪录十八次【臣】雅尔岱内务府钱粮衙门郎中兼佐领加五级纪录十三次【臣】永保内务府钱粮衙门员外郎兼佐领纪录一次【臣】永忠内务府广储司司库加一级纪录三次【臣】三格监造加一级【臣】李保监造加一级【臣】姚文彬

库掌【臣】尚琮

库掌【臣】亮保

库掌【臣】虎什泰

库掌【臣】观音保

库掌【臣】常福

库掌【臣】高永仁

执事人【臣】文殊保

执事人【臣】佛纶

执事人【臣】弥勒保

执事人【臣】金笃生

执事人【臣】李延舜

执事人【臣】保庆

执事人【臣】佛纶

执事人【臣】弥勒保

执事人【臣】金笃生

执事人【臣】李延舜

执事人【臣】保庆

史记集解序

钦定四库全书

史记集解序

裴駰【索隐駰字龙驹河东闻喜人宋中郎外兵曹参军父松之字世期太中大夫注三国志宋书父子同传正义裴駰采九经诸史并汉书音义及衆书之目而解史记故题史记集解序序绪也孙炎云谓端绪也孔子作易卦子夏作诗序之义其来尚矣】

班固有言曰【索隐固撰汉书作司马迁传评其作史记所采之书兼论其得失故裴駰此序先引之为说也按固字孟坚扶风人後汉明帝时仕至中护军祖穉广平太守父彪徐令续太史公书】司马迁【正义字子长左冯翊人也汉武帝时为太史令撰史记百三十篇父谈亦为太史令】据左氏国语【索隐仲尼作春秋经鲁史左丘明作传合三十篇故曰左氏传国语亦丘明所撰上起周穆王下迄敬王其诸侯之事起鲁庄公迄春秋末凡二十一篇】采世本战国策【索隐刘向云世本古史官明於古事者之所记也录黄帝以来帝王诸侯及卿大夫系谥名号凡十五篇也战国策高诱云六国时纵横之说也一曰短长书亦曰国事刘向撰为三十三篇名曰战国策按此是班固取其後名而书之非迁时已名战国策】述楚汉春秋【索隐汉太中大夫楚人陆贾所撰记项氏与汉高祖初起及说惠文间事】接其後事迄于天汉【索隐武帝年号言太史公所记迄至武帝天汉之年也】其言秦汉详矣至於采经摭传【索隐按字书摭拾也音之赤反】分散数家之事甚多疏略或有抵牾【索隐抵音丁礼反牾音吾故反抵者触也牾亦斜相抵触之名按今屋梁上斜柱是也斜触谓之牾下触谓之抵牾言其参差也以言彼此二文同出一家而自相乖舛】亦其所涉猎者广博贯穿经传驰骋古今上下数千载间斯已勤矣【正义言作史记采经传百家之事上下二千余年此其甚勤於撰录也】又其是非颇缪於圣人【索隐圣人谓周公孔子也言周孔之教皆宗儒尚德今太史公乃先黄老崇势利是缪於圣人正义太史公史记各显六家之宗黄老道家之宗六经儒家之首序游侠则退处士述货殖则崇势利处士贱贫原宪非病夫作史之体务涉多时有国之规备陈臧否天人地理咸使该通而迁天纵之才述作无滞故异周孔之道班固诋之裴駰引序亦通人之蔽也而固作汉书与史记同者五十余卷谨写史记少加异者不弱即劣何更非驳史记乃是後士妄非前贤又史记五十二万六千五百言叙二千四百一十三年事汉书八十一万言叙二百二十五年事司马迁引父致意班固父修而蔽之优劣可知矣】论大道则先黄老而後六经【正义大道者皆禀乎自然不可称道也道在天地之前先天地生不知其名字之曰道黄帝老子遵崇斯道故太史公论大道须先黄老而後六经】序游侠则退处士而进奸雄【索隐游侠谓轻死重气如荆轲豫让之辈也游从也行也侠挟也持也言能相从游行挟持之事又曰同是非曰侠正义奸雄奸滑雄豪之人】述货殖【正义殖生也言货物滋生也】则崇势利而羞贱贫【正义趋利之人】此其所蔽也【正义此三者是司马迁不达理也】然自刘向扬雄博极羣书皆称迁有良史之才服其善序事理辨而不华

质而不俚【索隐俚音里刘德曰俚即鄙也崔浩云世有鄙俚之语则俚亦野也谓词不鄙朴】其文直其事核不虚美不隐恶故谓之实录駟以为固之所言世称其当【正义駟音因当音丁浪反裴駟以班固所论司马迁史记是非世人称班固之言】虽时有纰缪【索隐纰音匹之反纰犹错也亦作悞字书云织者两丝同齿曰悞缪亦与谬同】实勒成一家【正义虽有小纰缪实编勒成一家之书矣】总其大较【索隐较音角较犹略也则大较犹言大略也正义较明也】信命世之宏才也【索隐按孟子云五百年之间必有名世者赵岐曰名世次圣之才物来能名此言命者名也言贤人有名於世也宏才大才谓史迁】考较此书文句不同有多有少莫辩其实而世之惑者定彼从此是非相贸真伪舛杂【正义贸音茂舛音昌转反言世之迷惑浅识之人或定彼从此本更相贸易真伪杂乱不能辩其是非】故中散大夫东莞徐广研核衆本为作音义【正义作音义十三卷裴駟为注散入百三十篇】具列异同兼述训解【正义徐作音义具列异同之本兼述训解释也】粗有所发明而殊恨省略【索隐殊絶也左传曰斩其木不殊言絶恨其所撰太省略也正义省音山景反】聊以愚管【小索隐按东方朔云以管窥天以蠡测海皆喻也然此语本出庄子文今云愚管者是駟谦言已愚陋管见所识不能远大也】增演徐氏【正义演音羊善反增益也言裴駟更增益演徐氏之说】采经传百家并先儒之说【正义采取也或取传说采诸子百家兼取先儒之义先儒谓孔安国郑玄服虔贾逵等是也言百家广其非一】豫是有益悉皆抄内【正义并采经传之说有裨益史记尽抄内其中抄音楚交反】删其游辞取其要实【正义删音师颜反删除也去经传诸家浮游之辞取其精要之实】或义在可疑则数家兼列【正义兼列数家之说不同各有道理致生疑惑不敢偏弃故皆兼列】汉书音义称臣瓚者莫知姓氏【索隐按即傅瓚而刘孝标以为于瓚非也据何法盛晋书于瓚以穆帝时为大将军诛死不言有注汉书之事又其注汉书有引禄秩令及茂陵书然彼二书亡於西晋非于所见也必知是傅瓚者按穆天子传目录云傅瓚为校书郎与荀勗同校定穆天子传即当西晋之朝在于之前尚见茂陵等书又称臣者以其职典秘书故也瓚音残岸反】今直云瓚曰又都无姓名者但云汉书音义【正义汉书音义中有全无姓名者裴氏注史记直云汉书音义按大颜以为无名义今有六卷题云孟康或云服虔盖後所加皆非其实未详指归也】时见微意有所裨补【正义见音贤见反裨音卑又音频移反裨益也裴氏云时见已之微意亦有所补益也】譬嚳星之继朝阳【索隐嚳微小貌也诗云嚳彼小星三五在东言衆无名微小之星各随三心五嚳出在东方亦能继朝阳之光嚳音火彗反朝阳日也嚳星继朝阳喻已浅薄而注史记也】飞尘之集华岳【正义西岳华山极高大裴氏自喻材藻轻小如飞尘之集华岳亦能成其高大管子云海不辞水故能成其大山不辞土故能成其高华音故化反又如字】以徐为本【正义徐广音义辨诸家异同故以徐为本也】号曰集解未详则阙弗敢臆说【正义有未详审之处则阙而弗论不敢以胷臆之见而妄为说也】人心不同【正义言人心既不同所见亦殊别也】闻见异辞【正义耳闻目见心意既乖其辞所以各异也】班氏所谓疏略抵牾者依违不悉辩也【索隐裴氏言今或依违不复更辩明之也按周公世家叙传曰依之违之周公绥之】愧非胥臣之多闻【索隐晋大夫臼季名曰胥臣按国语称晋文公使赵衰为卿辞曰栾枝贞慎先轸有谋胥臣多闻皆可以为辅又胥臣对文公黄帝二十五子及屯谿皆八等事是多闻也】子产之博物【索隐郑卿公孙侨字子产按左氏传子产聘晋言晋侯之疾非实沈台骀之祟乃说饮食哀乐及内官不及同姓反则能生疾晋侯闻子产之言曰博物君子也】妄言末学芜秽旧史岂足以关诸畜德庶贤无所用心而已【索隐关预也畜德谓积德多学之

人也裴氏谦言已今此集解岂足关预於积学多识之士乎正是冀望圣贤胜於饱食终日无所用心愈於论语不有博奕者乎之人耳】

史记集解序

史记索隐序

史记索隐序

朝散大夫国子博士弘文馆学士河内司马贞

史记者汉太史司马迁父子之所述也迁自以承五百之运继春秋而纂是史其褒贬核实颇亚於丘明之书於是上始轩辕下讫天汉作十二本纪十表八书三十系家七十列传凡一百三十篇始变左氏之体而年载悠邈简册阙遗勒成一家其勤至矣又其属稿先据左氏国语系本战国策楚汉春秋及诸子百家之书而後贯穿经传驰骋古今错综櫟括各使成一国一家之事故其意难究详矣比於班书微为古质故汉晋名贤未知见重所以魏文侯听古乐则唯恐卧良有以也逮至晋末有中散大夫东莞徐广始考异同作音义十三卷宋外兵参军裴駰又取经传训释作集解合为八十卷虽粗见微意而未穷讨论南齐轻车録事邹诞生亦作音义三卷音则微殊义乃更略尔後其学中废贞观中谏议大夫崇贤馆学士刘伯庄达学宏才钩深探赜又作音义二十卷比於徐邹音则具矣残文错节异旨微义虽知独善不见傍通欲使後人从何準的贞諛闻陋识颇事钻研而家传是书不敢失坠初欲改更舛错裨补疎遗义有未通兼重注述然以此书残缺虽多实为古史忽加穿凿难允物情今止探求异闻采摭典故解其所未解申其所未申者释文演注又为述赞凡三十卷号曰史记索隐虽未敢藏之书府亦欲以貽厥孙谋云

史记索隐序

史记索隐后序

史记索隐後序

夫太史公记事上始轩辕下迄天汉虽博采古文及传记诸子其间残缺盖多或访搜异闻以成其说然其人好奇而词省故事核而文微是以後之学者多所未究其班氏之书成於後汉彪既依迁而述所以条流更明且又兼采衆贤羣理毕备故其旨富其词文是以近代诸儒共所鑽仰其训诂盖亦多门蔡謨集解之时已有二十四家之说所以於文无所滞於理无所遗而太史公之书既上序轩黄中述战国或得之於名山坏宅或取之以旧俗风謡故其残文断句难究详矣然古今为注解者絶省音义亦希始後汉延笃乃有音义一卷又别有音隐五卷不记作者何人近代鲜有二家之本宋中散大夫徐广作音义一十卷唯记诸本异同於义少有解释又中兵郎裴駙亦名家之子也作集解注本合为八十卷见行於代仍云亦有音义前代久已散亡南齐轻车録事邹诞生亦撰音义三卷音则尚奇义则罕说隋秘书监柳顾言尤善此史刘伯庄云其先人曾从彼公受业或音解随而记录凡三十卷隋季丧乱遂失此书伯庄以贞观之初奉勅於弘文馆讲授遂采邹徐二说兼记忆柳公音旨遂作音义三十卷音乃周备义则更畧惜哉古史微文遂由数贤秘宝故其学殆絶前朝吏部侍郎许子儒亦作注义不覩其书崇文馆学士张嘉会独善此书而无注义贞少从张学晚更研寻初以残缺处多兼鄙褚少孙误谬因愤发而补史记遂兼注之然其功殆半乃自唯曰千载古史良难紬绎於是更撰音义重作述赞盖欲以剖盘根之错节导北轅於司南也凡为三十卷号曰史记索隐云

史记索隐後序

史记正义序

史记正义序

诸王侍读宣议郎守右清道率府长史张守节上

史记者汉太史公司马迁作迁生龙门耕牧河山之阳南游江淮讲学齐鲁之郡绍太史继春秋括文鲁史而包左氏国语采世本战国策而摭楚汉春秋贯紬经传旁搜史子上起轩辕下暨天汉作十二本纪帝王兴废悉详三十世家君国存亡毕着八书赞陰阳礼乐十表定代系年封七十列传忠臣孝子之诚备矣笔削冠於史籍题目足以经邦裴駰服其善序事理辩而不华质而不俚其文直其事核不虚美不隐恶故谓之实录自刘向扬雄皆称良史之才况坟典湮灭简册阙遗比之春秋言辞古质方之两汉文省理幽守节涉学三十余年六籍九流地里苍雅銳心观采评史汉詮衆训释而作正义郡国城邑委曲申明古典幽微窃探其美索理允愜次旧书之旨兼音解注引致旁通凡成三十卷名曰史记正义发挥膏肓之辞思济沧溟之海未敢侔诸秘府冀训诂而齐流庶貽厥子孙世畴兹史于时岁次丙子开元二十四年八月杀青斯竟

史记正义序

史记序考证

史记序考证

史记集解序裴駰○【臣照】按监本此序列於第四先索隐序次索隐後序次补史记序然後刊列此篇此篇之後则刊张守节论史例论注例论字例论音例音字例发字例謚发解七篇又不刊张守节正义序纷然淆乱絕无义例今依时代次第定此篇为第一索隐序第二索隐後序第三正义序第四终焉其补史记序则司马贞自叙其补三皇本纪作述赞改定篇目等事也今既不用其篇第则无庸并诸简端与张守节论史例謚法解诸篇并移置末卷之後

又索隐○【臣照】按司马贞索隐张守节正义皆书名犹裴駰之有集解也监本於索隐正义则称索隐曰正义曰於集解则不载书名直称徐广曰如淳曰之类遂使曰字相混而且集解之文混入索隐索隐之文混入正义又正义之文十缺四五颠倒错乱不可枚举今集解索隐正义并依十三经例刻陰文字删去曰字补刻阙文不下千百条而正义十居其九不能逐条详载考证内顾正义无古刻原本可据各本彼此多寡不同今校定刊刻之後时或又得数条其不可少者重钁添入其无关紧要者仍从割弃盖即更数年搜罗终不能信为正义全本也但校之明代监本稍为详备焉

又妄言末学○末监本讹作未今改正【臣照】按明监本讹字甚多而小注尤甚今改正者以万计惟大字本文讹者则着之小注不能详也其无别本可考明知其讹不敢臆改者则着其说以存疑

索隐序虽粗见微意而未穷讨论○讨监本讹作计今改正

又残文错节异旨微义○旨监本讹作音今改正索隐後序或得之於名山坏宅○坏监本讹作壤今改正

又遂作音义十三卷音乃周备○乃监本讹作及今改正

又乃自惟曰千载古史良难紬绎於是更撰音义重作述赞○监本讹作乃自唯曰千载古良史难更然因退撰音义重作赞述今改正

史记序考证

目录

钦定四库全书 史部一

史记目录 正史类

汉太史令司马迁撰

本纪一十二

年表一十

八书八

世家三十

列传七十 共一百三十卷

本纪

史纪卷一

本纪第一

五帝

史记卷二

本纪第二

夏

史记卷三

本纪第三

殷

史记卷四

本纪第四

周

史记卷五

本纪第五

秦昭襄王

庄襄王

史记卷六

本纪第六

秦始皇帝

二世皇帝

史记卷七

本纪第七

项羽

史记卷八

本纪第八

汉高祖

史记卷九

本纪第九

吕太后

史记卷十

本纪第十

孝文帝

史记卷十一

本纪第十一

孝景帝

史记卷十二

本纪第十二

孝武帝

表

史记卷十三

表第一

三代世表

史记卷十四

表第二

十二诸侯年表

史记卷十五

表第三

六国表

史记卷十六

表第四

秦楚之际月表

史记卷十七

表第五

汉兴以来诸侯年表

史记卷十八

表第六

高祖功臣侯年表

史记卷十九

表第七

惠景间侯者年表

史记卷二十

表第八

建元以来侯者年表

史记卷二十一

表第九

建元以来王子侯者年表

史记卷二十二

表第十

汉兴以来将相名臣年表

八书

史记卷二十三

八书第一

礼

史记卷二十四

八书第二

乐

史记卷二十五

八书第三

律

史记卷二十六

八书第四

历

史记卷二十七

八书第五

天官

史记卷二十八

八书第六

封禅

史记卷二十九

八书第七

河渠

史记卷三十

八书第八

平準

世家

史记卷三十一

世家第一

吴太伯

史记卷三十二

世家第二

齐太公

史记卷三十三

世家第三

鲁周公

史记卷三十四

世家第四

燕召公

史记卷三十五

世家第五

管蔡

史记卷三十六

世家第六

陈?

史记卷三十七

世家第七

卫康叔

史记卷三十八

世家第八

宋微子

史记卷三十九

世家第九

晋

史记卷四十

世家第十

楚

史记卷四十一

世家第十一

越王句践

史记卷四十二

世家第十二

郑

史记卷四十三

世家第十三

赵

史记卷四十四

世家第十四

魏

史记卷四十五

世家第十五

韩

史记卷四十六

世家第十六

田敬仲完

史记卷四十七

世家第十七

孔子

史记卷四十八

世家第十八

陈涉

史记卷四十九

世家第十九

外戚

史记卷五十

世家第二十

楚元王

史记卷五十一

世家第二十一

荆燕

史记卷五十二

世家第二十二

齐悼惠王

史记卷五十三

世家第二十三

萧相国

史记卷五十四

世家第二十四

曹相国

史记卷五十五

世家第二十五

留侯

史记卷五十六

世家第二十六

陈丞相

史记卷五十七

世家第二十七

绛侯

史记卷五十八

世家第二十八

梁孝王

史记卷五十九

世家第二十九

五宗

史记卷六十

世家第三十

三王

列传

史记卷六十一

列传第一

伯夷

史记卷六十二

列传第二

管晏

史记卷六十三

列传第三

老子 庄子

申不害 韩非

史记卷六十四

列传第四

司马穰苴

史记卷六十五

列传第五

孙武 吴起

史记卷六十六

列传第六

伍子胥

史记卷六十七

列传第七

仲尼弟子

史记卷六十八

列传第八

商君鞅

史记卷六十九

列传第九

苏秦

史记卷七十

列传第十

张仪 陈轸

犀首

史记卷七十一

列传第十一

樗里子 甘茂

甘罗

史记卷七十二

列传第十二

穰侯

史记卷七十三

列传第十三

白起 王翦

史记卷七十四

列传第十四

孟轲 淳于髡

慎到 驺奭

荀卿

史记卷七十五

列传第十五

孟尝君

史记卷七十六

列传第十六

平原君 虞卿

史记卷七十七

列传第十七

信陵君

史记卷七十八

列传第十八

春申君

史记卷七十九

列传第十九

范雎 蔡泽

史记卷八十

列传第二十

乐毅

史记卷八十一

列传第二十一

廉颇 蔺相如

赵奢 李牧

史记卷八十二

列传第二十二

田单

史记卷八十三

列传第二十三

鲁仲连 邹阳

史记卷八十四

列传第二十四

屈原 贾谊

史记卷八十五

列传第二十五

吕不韦

史记卷八十六

列传第二十六刺客

曹沫 专诸

豫让 聂政

荆轲

史记卷八十七

列传第二十七

李斯

史记卷八十八

列传第二十八

蒙恬

史记卷八十九

列传第二十九

张耳 陈余

史记卷九十

列传第三十

魏豹 彭越

史记卷九十一

列传第三十一

黥布

史记卷九十二

列传第三十二

淮阴侯

史记卷九十三

列传第三十三

韩王信 卢绾

史记卷九十四

列传第三十四

田儋 田横

史记卷九十五

列传第三十五

樊哙 酈商

夏侯婴 灌婴

史记卷九十六

列传第三十六

张苍 周昌

任敖 申屠嘉

附韦贤 魏相

酈吉 黄霸

韦玄成 匡衡

史记卷九十七

列传第三十七

酈食其 陆贾

朱建

史记卷九十八

列传第三十八

傅寬 靳歙

周緤

史记卷九十九

列传第三十九

刘敬 叔孙通

史记卷一百

列传第四十

季布 栾布

史记卷一百一

列传第四十一

袁盎 ?错

史记卷一百二

列传第四十二

张释之 冯唐

史记卷一百三

列传第四十三

石奋 卫綰

直不疑 周文

张叔

史记卷一百四

列传第四十四

田叔【子仁】

附任安

史记卷一百五

列传第四十五

扁鹊 仓公

史记卷一百六

列传第四十六

吴王濞

史记卷一百七

列传第四十七

窦婴 田蚡

灌夫

史记卷一百八

列传第四十八

韩安国

史记卷一百九

列传第四十九

李广

史记卷一百十

列传第五十

匈奴

史记卷一百一十一

列传第五十一

卫青 霍去病

【公孙贺 李息 公孙敖 李沮张次公 苏建 赵信 张骞】

【李蔡 曹襄 韩说 郭昌赵食其 荀彘 路博德 赵破奴】

史记卷一百一十二

列传第五十二

公孙弘 主父偃

史记卷一百一十三

列传第五十三

南越尉佗

史记卷一百一十四

列传第五十四

东越

史记卷一百一十五

列传第五十五

朝鲜

史记卷一百一十六

列传第五十六

西南夷

史记卷一百一十七

列传第五十七

司马相如

史记卷一百一十八

列传第五十八

淮南厉王 淮南王安

衡山王

史记卷一百一十九

列传第五十九循吏

孙叔敖 子产

公仪休 石奢

李离

史记卷一百二十

列传第六十

汲黯 郑当时

史记卷一百二十一

列传第六十一儒林

申公 辕固生

韩生 伏胜

董仲舒 胡毋生

史记卷一百二十二

列传第六十二酷吏

郅都 甯成

周阳由 赵禹

张汤 义纵

王温舒 杨仆

减宣 杜周

史记卷一百二十三

列传第六十三

大宛

【乌孙 康居 奄蔡 大月氏 安息】

史记卷一百二十四

列传第六十四游侠

朱家 剧孟

郭解

史记卷一百二十五

列传第六十五佞幸

邓通 韩嫣

李延年

史记卷一百二十六

列传第六十六滑稽

淳于髡 优孟

优旃

附东方朔 东郭先生

王先生 西门豹

史记卷一百二十七

列传第六十七日者

司马季主

史记卷一百二十八

列传第六十八

龟策

史记卷一百二十九

列传第六十九货殖

范蠡 子贡

白圭 猗顿

卓氏 程郑

宛孔氏 师史

任氏

史记卷一百三十

列传第七十

太史公自序

附司马贞补史记

三皇本纪

【臣】等谨案汉司马迁史记一百三十卷虽班固讥其尚黄老传游侠货殖为悖於道郑樵以为上下数千年局踣於七八书中博雅犹有所未足而纪传表书之体百世莫能易焉第其词旨古奥又年月地理间多疎舛晋徐广有音义三十卷宋裴駰作集解合八十卷唐司马贞有索隐三十卷张守节有正义三十卷向来虽多合刻絶少校勘我

皇上以明南北监板渐就漫漶厘正付梓卷附考证一如十三经之例而史记为诸史冠冕校讐精审皆非以前官私诸刻所得比也乾隆三十九年二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

史记目录

史记目录考证

史记目录○【臣照】按监本此行前三行一曰史记补目录一曰唐弘文馆学士河内司马贞着一曰三皇本纪以补书而先正书以唐司马贞而先汉司马迁乖舛倒置总因三皇必在五帝前也夫删书断自唐虞孔子岂未见黄帝之书谓其荒远难稽不欲传疑於後世也迁史始黄帝已失孔子之指贞复等而上之及於伏羲益又甚矣顾迁之所以始黄帝者盖以武帝好神仙神仙家言并托之黄帝封禅书载帝语我若得如黄帝视弃妻子如敝屣耳迁是以

据古史着黄帝事实以言黄帝亦人耳非能乘云驾风长生不死如彼所言神仙者也故五帝中独着黄帝之葬桥山余并不书葬者言黄帝之死有冢可据也贞之补三皇并失迁之旨矣今依古本刊去此三行附补书於正书之末庶不改龙门之旧云

本纪一十二表一十书八世家三十列传七十○监本作本纪卷一十二年表卷一十八书卷八世家卷三十列传卷七十【臣照】按十表中有世表有月表今日年表卷一十其谬可知也卷一十二卷一十则是第十二卷第十卷也八书卷八更不可通盖坊肆书贾之所为而传谬至今者且司马迁报任安书云为十表本纪十二书八章世家三十列传七十云云更为确据今俱依古本改正

史记目录考证

卷一

<史部,正史类,史记>

钦定四库全书

史记卷一

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

五帝本纪第一

【集解裴駙曰凡是徐氏义称徐姓名以别之余者悉是駙注解并集衆家义索隐纪者记也本其事而记之故曰本纪又纪理也丝缕有纪而帝王书称纪者言为後代纲纪也正义郑玄注中候敕省图云德合五帝坐星者称帝又坤灵图云德配天地在正不在私曰帝按太史公依世本大戴礼以黄帝颛顼帝啇唐尧虞舜为五帝譙周应劭宋均皆同而孔安国尚书序皇甫谧帝王世纪孙氏注世本并以伏牺神农黄帝为三皇少昊颛顼高辛唐虞为五帝裴松之史目云天子称本纪诸侯曰世家本者系其本系故曰本纪者理也统理衆事系之年月名之曰纪第者次序之目一者举数之由故曰五帝本纪第一礼云动则左史书之言则右史书之左阳故记动右陰故记言言为尚书事为春秋按春秋时置左右史故云史记】

黄帝者【集解徐广曰号有熊索隐按有土德之瑞土色黄故称黄帝犹神农火德王而称炎帝然也此以黄帝为五帝之首盖依大戴礼五帝德又譙周宋均亦以为然而孔安国皇甫谧帝王代纪及孙氏注系本并以伏牺神农黄帝为三皇少昊高阳高辛唐虞为五帝注号有熊者以其本是有熊国君之子故也都轩辕之丘因以为名又以为号又据左传亦号帝鸿氏也正义輿地志云涿鹿本名彭城黄帝初都迁有熊也按黄帝有熊国君乃少典国君之次子号曰有熊氏又曰缙云氏又曰帝鸿氏亦曰帝轩氏母曰附宝之祁野见大电绕北斗枢星感而怀孕二十四月而生黄帝於寿丘壽丘在鲁东门之北今在兗州曲阜县东北六里生日角龙顔有景云之瑞以土德王故曰黄帝封泰山禅亭亭在牟陰】少典之子【集解譙周曰有熊国君少典之子也皇甫谧曰有熊今河南新郑是也索隐少典者诸侯国号非人名也又按国语云少典娶有蟠氏女而生炎帝然则炎帝亦少典之子炎黄二帝虽则承帝王代纪中

间凡隔八帝五百余年若以少典是其父名岂黄帝经五百余年而始代炎帝後为天子乎何其年之长也又按秦本纪云颛顼氏之裔孙曰女修吞玄鸟之卵而生大业大业娶少典氏而生栢翳明少典是国号非人名也黄帝者少典氏後代之子孙贾逵亦以左传高阳氏有才子八人亦谓其後代子孙而称为子是也谯周字允南蜀人魏散骑常侍徵不拜此注所引者是其人所着古史考之说也皇甫谧字士安晋人号玄晏先生今所引者是其所作帝王世纪也】姓公孙名曰轩辕【索隐按皇甫谧云黄帝生於寿丘长於姬水因以为姓居轩辕之丘因以为名又以为号是本姓公孙长居姬水因改姓姬】生而神灵弱而能言【索隐弱谓幼弱时也盖未合能言之时而黄帝即言所以为神异也潘岳有哀弱子篇其子未七旬曰弱正义言神异也易曰陰阳不测之谓神书曰人惟万物之灵故谓之神灵也】幼而徇齐【集解徐广曰墨子曰年踰十五则聪明心虑无不徇通矣駟案徇疾齐速也言圣德幼而疾速也索隐斯文未明今案徇齐皆德也书曰聪明齐圣左传曰子虽齐圣齐谓圣德齐肃又按孔子家语及大戴礼并作叡齐一本作慧齐叡慧皆智也太史公采大戴礼而为此纪今彼文无作徇者史记旧本亦有作濬齐盖古字假借徇为濬濬深也义亦并通尔雅齐速俱训为疾尚书大传曰多闻而齐给郑注云齐疾也今裴氏注云徇亦训疾未见所出或当读徇为迅迅於尔雅与齐俱训疾则迅濬虽异字而音同也又尔雅曰宣徇遍也濬通也是遍之与通义亦相近言黄帝幼而才智周徧且辩给也故墨子亦云年踰五十则聪明心虑不徇通矣俗本作十五非是按谓年老踰五十不聪明何得云十五】长而敦敏成而聪明【正义成谓年二十冠成人也聪明闻见明辩也此以上至轩辕皆大戴礼文】轩辕之时神农氏世衰【集解皇甫谧曰易称庖牺氏没神农氏作是为炎帝班固曰教民耕农故号曰神农索隐世衰谓神农氏後代子孙道德衰薄非指炎帝之身即班固所谓参虚皇甫谧所云帝榆罔是也正义帝王世纪云神农氏姜姓也母曰任姒有蟠氏女登为少典妃游华阳有神龙首感生炎帝人身牛首长於姜水有圣德以火德王故号炎帝初都陈又徙鲁又曰魁隗氏又曰连山氏又曰列山氏括地志云厉山在随州随县北百里山东有石穴曰神农生於厉乡所谓列山氏也春秋时为厉国】诸侯相侵伐暴虐百姓而神农氏弗能征於是轩辕乃习用干戈?征不享【索隐谓用干戈以征诸侯之不朝享者一本或作亭亭训直以征诸侯之不直者】诸侯咸来宾从而蚩尤最为暴莫能伐【集解应劭曰蚩尤古天子璘曰孔子三朝记曰蚩尤庶人之贪者索隐按此纪云诸侯相侵伐蚩尤最为暴则蚩尤非为天子也又管子曰蚩尤受卢山之金而作五兵明非庶人盖诸侯号也刘向别录云孔子见鲁哀公问政比三朝退而为此记故曰三朝凡七篇并入大戴礼今此文见用兵篇也正义龙鱼河图云黄帝摄政有蚩尤兄弟八十一人并兽身人语铜头铁额食沙造五兵仗刀戟大弩威振天下诛杀无道万民钦命黄帝行天子事黄帝以仁义不能禁止蚩尤乃仰天而叹天遣玄女下授黄帝兵符伏蚩尤後天下复扰乱黄帝遂画蚩尤形像以威天下咸谓蚩尤不死八方皆为殄灭山海经云黄帝令应龙攻蚩尤蚩尤请风伯雨师以从大风雨黄帝乃下天女曰魃以止雨雨止遂杀蚩尤孔安国曰九黎君号蚩尤是也】炎帝欲侵陵诸侯诸侯咸归轩辕轩辕乃修德振兵【正义振整也】治五气【集解王肃曰五行之气索隐谓春甲乙木气夏丙丁火气之属是五气也】蓺五种【集解蓺树也诗云蓺之荏菹周礼曰谷宜五种郑玄曰五种黍稷菽麦稻也索隐蓺音艺艺种也树也五种即五谷也音朱用反此注所引见诗大雅生民之篇尔雅云荏菹戎菹也郭璞曰今之胡豆郑氏曰豆之大者是也正义蓺音鱼曳反种音肿】抚万民度四方【集解王肃曰度四方而安抚之正义度音徒洛反】教熊罴貔貅羆虎【索隐书云如虎如貔尔雅云貔白狐礼曰前有摯兽

则载貔貅是也尔雅又曰貔獬似狸此六者猛兽可以教战周礼有服不氏掌教扰猛兽即古服牛乘马亦其类也正义熊音?黑音碑貔音毗貅音休羆音丑于反黑如熊黄白色郭璞云貔执夷虎属也按言教士卒习战以猛兽之名名之用威敌也】以与炎帝战於阪泉之野【集解服?曰阪泉地名皇甫谧曰在上谷正义阪音白板反括地志云阪泉今名黄帝泉在妫州怀戎县东五十六里出五里至涿鹿东北与涿水合又有涿鹿故城在妫州东南五十里本黄帝所都也晋太康地里志云涿鹿城东一里有阪泉上有黄帝祠按阪泉之野则平野之地也】三战然後得其志【正义谓黄帝克炎帝之後】蚩尤作乱不用帝命【正义言蚩尤不用黄帝之命也】於是黄帝乃徵师诸侯与蚩尤战於涿鹿之野【集解服?曰涿鹿山名在涿郡张晏曰涿鹿在上谷索隐或作浊鹿古今字异耳按地理志上谷有涿鹿县然则服?云在涿郡者误也】遂禽杀蚩尤【集解皇览曰蚩尤冢在东平郡壽张县阚乡城中高七丈民常十月祀之有赤气出如匹绛帛民名为蚩尤旗肩髀冢在山阳郡钜野县重聚大小与阚冢等传言黄帝与蚩尤战於涿鹿之野黄帝杀之身体异处故别葬之索隐按皇甫谧云黄帝使应龙杀蚩尤于凶黎之谷或曰黄帝斩蚩尤于中冀因名其地曰絶轡之野皇览书名也记先代冢墓之处宜皇王之省览故曰皇览是魏人王象繆袭等所撰】而诸侯咸尊轩辕为天子代神农氏是为黄帝天下有不顺者黄帝从而征之平者去之【正义平服者即去之】披山通道【集解徐广曰披他本亦作陂字盖当为諛諛者旁其边之谓也披语诚合今世然古今不必同也索隐披音如字谓披山林草木而行以通道也徐广音諛恐稍迂也】未尝寧居东至于海登丸山【集解徐广曰丸一作凡駟案地理志曰丸山在琅邪朱虚县索隐凡音扶严反正义丸音桓括地志云丸山即丹山在青州临朐县界朱虚故县西北二十里丹水出焉丸音纨守节按地志唯有凡山盖凡山丸山是一山耳诸处字误咸丸或凡也汉书郊祀志云禅丸山顔师古云在朱虚亦与括地志相合明丸山是也】及岱宗【正义泰山东岳也在兖州博城县西北三十里也】西至于空桐【集解应劭曰山名韦昭曰在陇右】登鸡头【索隐山名也後汉王孟塞鸡头道在陇西一曰崆峒山之别名正义括地志云空桐山在肃州福祿县东南六十里抱朴子内篇云黄帝西见中黄子受九品之方过空桐从广成子受自然之经即此山括地志又云笄头山一名崆峒山在原州平阳县西百里禹贡涇水所出輿地志云或即鸡头山也酈元云盖大陇山异名也庄子云广成子学道崆峒山黄帝问道於广成子盖在此按二处崆峒皆云黄帝登之未详孰是】南至于江登熊湘【集解駟案封禅书曰南伐至于召陵登熊山地理志曰湘山在长沙益阳县正义括地志云熊耳山在商州上洛县西十里齐桓公登之以望江汉也湘山一名鰲山在岳州巴陵县南十八里也】北逐荤粥【集解匈奴传曰唐虞以上有山戎獫狁荤粥居于北蛮索隐匈奴别名也唐虞已上曰山戎亦曰熏粥夏曰淳维殷曰鬼方周曰玁狁汉曰匈奴正义荤音薰粥音育】合符釜山【索隐合诸侯符契圭瑞而朝之於釜山犹禹会诸侯於涂山然也又按郭子横洞冥记称东方朔云东海大明之墟有釜山山出瑞云应王者之符命如尧时有赤云之祥之类盖黄帝黄云之瑞故曰合符应於釜山也正义括地志云釜山在妫州怀戎县北三里山上有舜庙】而邑于涿鹿之阿【正义广平曰阿涿鹿山名已见上涿鹿故城在山下即黄帝所都之邑于山下平地】迁徙往来无常处以师兵为营卫【正义环绕军兵为营以自卫若辕门即其遗象】官名皆以云命为云师【集解应劭曰黄帝受命有云瑞故以云纪事也春官为青云夏官为缙云秋官为白云冬官为黑云中官为黄云张晏曰黄帝有景云之应因以名师与官】置左右大监监于万国【正义监上监去声下监平声若周邵分陕也】万国和而鬼神山川封禅与为多焉【集解徐广曰

多一作朋索隐与音羊汝反与犹许也言万国和同而鬼神山川封禅祭祀之事自古以来帝王之中推许黄帝以为多多犹大也】获宝鼎迎日推策【集解晋灼曰策数也迎数之也璘曰日月朔望未来而推之故曰迎日索隐封禅书曰黄帝得宝鼎神策下云於是推策迎日则神策者神蓍也黄帝得蓍以推算历数於是逆知节气日辰之将来故曰推策迎日也正义策音策迎逆也黄帝受神策命大挠造甲子容成造历是也】举风后力牧常先大鸿以治民【集解郑玄曰风后黄帝三公也班固曰力牧黄帝相也大鸿见封禅书正义举任用四人皆帝臣也帝王世纪云黄帝梦大风吹天下之尘垢皆去又梦人执千钧之弩驱羊万羣帝寤而叹曰风为号令执政者也垢去土后在也天下岂有姓风名后者哉夫千钧之弩异力者也驱羊数万羣能牧民为善者也天下岂有姓力名牧者也於是依二占而求之得风后於海隅登以为相得力牧於大泽进以为将黄帝因着占梦经十一卷艺文志云风后兵法十三篇图三卷孤虚二十卷力牧兵法十五篇郑玄云风后黄帝之三公也按黄帝仰天地置列侯衆官以风后配上台天老配中台五圣配下台谓之三公也封禅书云鬼臿区号大鸿黄帝大臣也死葬雍故鸿冢是艺文志云鬼容区兵法三篇也】顺天地之纪【正义言黄帝顺天地陰阳四时之纪也】幽明之占【正义幽陰明阳也占数也言陰阳五行黄帝占数而知之此文见大戴礼】死生之说【集解徐广曰一云幽明之数合死生之说正义谓仪制也民之死生此谓作仪制礼则之说】存亡之难【索隐存亡犹安危也易曰危者安其位亡者保其存是也难犹说也凡事是非未尽假以往来之词则曰难又上文有死生之说故此云存亡之难所以韩非着书有说林说难也正义难音乃憚反存亡犹生死也黄帝之前未有衣裳屋宇及黄帝造屋宇制衣服营殡葬万民故免存亡之难】时播百谷草木【集解王肃曰时是也索隐为一句正义言顺四时之所宜而布种百谷草木也】淳化鸟兽虫蛾【索隐为一句蛾音牛绮反一作豸豸言淳化广被及之正义蛾音鱼起反又音豸豸音直氏反蚁蚍蜉也尔雅曰有足曰虫无足曰豸】旁罗日月星辰水波【集解徐广曰一作沃】土石金玉【索隐旁非一方罗广布也今按大戴礼作历离离即罗也言帝德旁罗日月星辰水波及至土石金玉谓日月扬光海水不波山不藏珍皆是帝德广被也正义旁罗犹徧布也日月陰阳时节也星二十八宿也辰日月所会也水波澜漪也言天不异灾土无别害水少波浪山出珍宝】劳勤心力耳目节用水火材物【正义节时节也水陂障决泄也火山野禁放也材木也物事也言黄帝教民江湖陂泽山林原隰皆收采禁捕以时用之有节令得其利也】有土德之瑞故号黄帝【索隐炎帝火黄帝土代之即黄龙地螾见是也螾土精大五六围长十余丈螾音引正义螾音以刃反】黄帝二十五子其得姓者十四人【索隐旧解破四为三言得姓十三人耳今按国语胥臣云黄帝之子二十五宗其得姓者十四人为十二姓姬酉祁已滕葢任荀僖姁依是也唯青阳与夷鼓同已姓又云青阳与苍林为姬姓是则十四人为十二姓其文甚明唯姬姓再称青阳与苍林盖国语文误所以致令前儒共疑其姬姓青阳当为玄器是帝嘗祖本与黄帝同姬姓其国语上文青阳即是少昊金天氏为已姓者耳既理在不疑无烦破四为三正义僖音力其反姁音其吉反嫫音在宣反】黄帝居轩辕之丘【集解皇甫谧曰受国於有熊居轩辕之丘故因以为名又以为号山海经曰在穷山之际西射之南张晏曰作轩冕之服故谓之轩辕】而娶於西陵之女【正义西陵国名也】是为嫫祖【集解徐广曰祖一作俎嫫力追反索隐一曰雷祖音力堆反正义一作僂】嫫祖为黄帝正妃【索隐按皇帝立四妃象后妃四星皇甫谧云元妃西陵氏女曰嫫祖生昌意次妃方雷氏女曰女节生青阳次妃彤鱼氏女生夷鼓一名苍林次妃嫫母班在三人之下按国语夷鼓苍林是二人又按汉书古今人表彤鱼

氏生夷鼓嫫母生苍林不得如謚所说】生二子其後皆有天下其一曰玄器是为青阳【集解駟案太史公乃据大戴礼以嫫祖生昌意及玄器玄器即青阳也皇甫謐以青阳为少昊乃方雷氏所生是其所见异也索隐玄器帝啻之祖按皇甫謐及宋衷皆云玄器青阳即少昊也今此纪下云玄器不得在帝位则太史公意青阳非少昊明矣而此又云玄器是为青阳当是误也谓二人皆黄帝子并列其名所以前史因误以玄器青阳为一耳宋衷又云玄器青阳是为少昊继黄帝立者而史不叙盖少昊金德王非五运之次故叙五帝不数之也】青阳降居江水其二曰昌意降居若水【索隐降下也言帝子为诸侯降居江水江水若水皆在蜀即所封国也水经曰水出旄牛徼外东南至故关为若水南过邛都又东北至朱提县为泸江水是蜀有此二水也正义括地志云安阳故城在豫州新息县西南八十里应劭云古江国也地理志亦云安阳古江国也】昌意娶蜀山氏女曰昌仆生高阳高阳有圣德焉【正义华阳国志及十三州志云蜀之先肇於人皇之际黄帝为子昌意娶蜀山氏後子孙因封焉帝颡顓高阳氏黄帝之孙昌意之子母曰昌仆亦谓之女枢河图云瑶光如蜺贯月正白感女枢於幽房之宫生颡顓首戴干戈有德文也】黄帝崩【集解皇甫謐曰在位百年而崩年百一十一岁索隐按大戴礼宰我问孔子曰荣伊言黄帝三百年请问黄帝何人也抑非人也何以至三百年乎对曰生而人得其利百年死而人畏其神百年亡而人用其教百年则士安之说略可凭矣正义列仙传云轩辕自择亡日与羣臣辞还葬桥山山崩棺空惟有劒舄在棺焉】葬桥山【集解駟案皇览曰黄帝冢在上郡桥山索隐地理志桥山在上郡阳周县山有黄帝冢也正义括地志云黄帝陵在寧州罗川县东八十里子午山地理志云上郡阳周县桥山南有黄帝冢按阳周隋改为罗川尔雅云山锐而高曰桥也】其孙昌意之子高阳立是为帝颡顓也

帝颡顓高阳者【集解皇甫謐曰都帝丘今东郡濮阳是也索隐宋忠云颡顓名高阳有天下号也张晏曰高阳者所兴地名也】黄帝之孙而昌意之子也静渊以有谋疏通而知事养材以任地【索隐言能养材物以任地大戴礼作养财】载时以象天【索隐载行也言行四时以象天大戴礼作履时以象天履亦践而行也】依鬼神以制义【索隐鬼神聪明正直当尽心敬事因制尊卑之义故礼曰降於祖庙之谓仁义是也正义鬼之灵者曰神也鬼神谓山川之神也能兴云致雨润养万物也故已依凭之制义也制古制字】治气以教化【索隐谓理四时五行之气以教化万人也】絜诚以祭祀北至于幽陵【正义幽州也】南至于交趾【正义趾音止交州也】西至于流沙【集解地理志曰流沙在张掖居延县正义济渡也括地志云居延海南甘州张掖县东北千六十四里是】东至于蟠木【集解駟案海外经曰东海中有山焉名曰度索上有大桃树屈蟠三千里东北有门名曰鬼门万鬼所聚也天帝使神人守之一名郁垒主閱领万鬼若害人之鬼以苇索缚之射以桃弧投虎食也】动静之物【正义动物谓鸟兽之类静物谓草木之类】小大之神【正义大谓五岳四渎小谓邱陵坟衍】日月所照莫不砥属【集解王肃曰砥平也四远皆平而来服属索隐依王肃音止属据大戴礼作砥砺也】帝颡顓生子曰穷蝉【索隐系本作穷系宋衷云一云穷系謚也正义帝舜之高祖也】颡顓崩【集解皇甫謐曰在位七十八年年九十八皇览曰颡顓冢在东郡濮阳顿丘城门外广阳里中顿丘者城門名顿丘道索隐皇甫謐云据左氏岁在鹑火而崩葬东郡又山海经曰颡顓葬鲋鱼山之阳九殡葬其陰也】而玄器之孙高辛立是为帝啻

帝啻高辛者【集解张晏曰少昊之前天下之号象其德颡顓以来天下之号因其名高阳高

辛皆所兴之地名颡项与訾皆以字为号上古质故也索隐宋衷曰高辛地名因以为号訾名也皇甫谧云帝訾名姒也正义帝王纪云佹母无闻焉】黄帝之曾孙也高辛父曰蟠极【正义蟠音居兆反本作桥音同又巨遥反帝尧之祖也】蟠极父曰玄嚣玄嚣父曰黄帝自玄嚣与蟠极皆不得在位至高辛即帝位【集解皇甫谧曰都亳今河南偃师是】高辛於颡项为族子高辛生而神灵自言其名【正义帝王纪云帝佹高辛姬姓也其母生见其神异自言其名曰姒韶訾有德年十五而佐颡项三十登位都亳以人事纪官也】普施利物不於其身聪以知远明以察微顺天之义知民之急仁而威惠而信修身而天下服取地之财而节用之抚教万民而利诲之历日月而迎送之【正义言作历弦望晦朔日月未至而迎之过而送之上迎日推策是也】明鬼神而敬事之【正义天神曰神人神曰鬼又云圣人之精气谓之神贤人之精气谓之鬼言明识鬼神而敬事也】其色郁郁其德嶷嶷【索隐郁郁犹穆穆也嶷嶷德高也今按大戴礼郁作神嶷作俟】其动也时其服也土【索隐举动应天时衣服服土服言其公且廉也】帝訾溉执中而徧天下【集解徐广曰古既字作水旁徧字一作尹索隐即尚书允执厥中是也正义溉音既言帝訾治民若水之溉灌平等而执中正徧於天下也】日月所照风雨所至莫不从服【正义以上大戴礼文也】帝訾娶陈锋氏女【正义锋音峯又作丰帝王纪云帝訾有四妃卜其子皆有天下元妃有郃氏女曰姜嫄生后稷次妃有娥氏女曰简狄生高次妃陈丰氏女曰庆都生放勋次妃姬訾氏女曰常仪生帝摯也】生放勋【正义放音方往反勲亦作勋音许云反言尧能放上代之功故曰放勋谥尧姓伊祁氏帝纪云帝尧陶唐氏祁姓也母庆都十四月生尧】娶姬訾氏女生摯【索隐案皇甫谧云女名常仪也正义姬足须反訾紫移反】帝訾崩【集解皇甫谧曰在位七十年年百五岁皇览曰帝訾冢在东郡濮阳县顿丘城南台阴野中】而摯代立帝摯立不善崩【索隐古本作不着音张虑反俗本作不善不善谓微弱不着犹不着明卫宏云摯立九年而唐侯德盛因禅位焉正义帝王纪云帝摯之母於四人中班最在下而摯於兄弟最长得登帝位封异母弟放勋为唐侯摯在位九年政微弱而唐侯德盛诸侯归之摯服其义乃率羣臣造唐而致禅唐侯自知有天命乃受帝禅乃封摯於高辛今定州唐县也】而弟放勲立是为帝尧

帝尧者【集解駉案谥法曰翼善传圣曰尧索隐尧谥也放勲名帝訾之子姓伊祁氏案皇甫谧云尧初生时其母在三阿之南寄於伊长孺之家故从母所居为姓也正义徐广云号陶唐帝王纪云尧都平阳於诗为唐国徐才宗国都城记云唐国帝尧之裔子所封其北帝夏禹都汉曰太原郡在古冀州太行恒山之西其南有晋水括地志云今晋州所理平阳故城是也平阳河水一名晋水也】放勲【集解徐广曰号陶唐皇甫谧曰尧以甲申岁生甲辰即帝位甲午徵舜甲寅舜代行天子事辛巳崩年百十八在位九十八年】其仁如天【索隐如天之涵养也】其知如神【索隐如神之微妙也】就之如日【索隐如日之照临人咸依就之若葵藿倾心以向日也】望之如云【索隐如云之覆渥言德化广大而浸润生人人咸仰望之故曰如百谷之仰膏雨也】富而不骄贵而不舒【索隐舒犹慢也大戴礼作不豫】黄收纯衣【集解徐广曰纯一作绞駉案太古冠冕图云夏名冕曰收礼记曰野夫黄冠郑玄曰纯衣士之祭服索隐收冕名其色黄故曰黄收象古质素也纯读曰缙】彤车乘白马能明驯德【集解徐广曰驯古训字索隐史记驯字徐广皆读曰训训顺也言圣德能顺人也案尚书作俊德孔安国云能明用俊德之士与此文意别也】以亲九族九族既睦便章百姓【集解徐广曰下云便程东作然则训平为便也駉案尚书并作平字孔安国曰百姓百官郑玄曰百姓羣臣

之父子兄弟索隐古文尚书作平此文盖读平为浦耕反平既训便因作便章其今文作辩章古平字亦作便音婢缘反便则训辩遂为辩章邹诞生本亦同也】百姓昭明合和万国乃命羲和【集解孔安国曰重黎之後羲氏和氏世掌天地之官正义吕刑传云重即羲黎即和虽别为氏族而出自重黎也按圣人不独治必须贤辅乃命相天地之官若周礼天官卿地官卿也】敬顺昊天【正义敬犹恭勤也元气昊然广大故云昊天释天云春为苍天夏为昊天秋为旻天冬为上天而独言昊天者以尧能敬天大故以昊天言之】数法日月星辰【正义历数之法日之甲乙月之大小昏明通中之星日月所会之辰定其天数以为一岁之历】敬授民时【索隐尚书作历象日月则此言数法是训历象二字谓命羲和以历数之法观察日月星辰之早晚以敬授人时也正义尚书考灵耀云主春者张昏中可以种稷主夏者火昏中可以种黍菽主秋者虚昏中可以种麦主冬者昴昏中可以收歛也天子视四星之中知民缓急故云敬授民时也】分命羲仲居郁夷曰阳谷【集解駰案尚书作嵎夷孔安国曰东表之地称嵎夷日出於阳谷羲仲治东方之官索隐史记旧本作汤谷今并依尚书字案淮南子曰日出汤谷浴於咸池则汤谷亦有他证明矣又下曰昧谷徐广云一作柳柳亦日入处地名太史公博采经记而为此史广记异闻不必皆依尚书盖郁夷亦地之别名也正义郁音隅阳或作阳禹贡青州云嵎夷既略按嵎夷青州也尧命羲仲理东方青州嵎夷之地日所出处名曰阳明之谷羲仲主东方之官若周礼春官卿】敬道日出便程东作【集解孔安国曰敬道出日平均次序东作之事以务农也索隐刘伯庄传皆依古史作平秩音然尚书大传曰辩秩东作则是训秩为程言便课其作程者也正义道音导便程并如字後同导训也三春主东故言日出耕作在春故言东作命羲仲恭勤道训万民东作之事使有程期】日中星鸟以殷中春【集解孔安国曰日中谓春分之日也鸟南方朱鸟七宿也殷正也春分之昏鸟星毕见以正仲春之气节转以推孟季则可知也正义下中音仲夏秋冬并同】其民析鸟兽字微【集解孔安国曰春事既起丁壮就功言其民老壮分析也乳化曰字尚书微作尾字说文云尾交接也】申命羲叔居南交【集解孔安国曰夏与春交此治南方之官也索隐孔注未是然则冬与秋交何故下无其文且东嵎夷西昧谷北幽都三方皆言地而夏独不言地乃云与春交斯不例之甚也然南方地有名交趾者或古文略举一字名地南交则是交趾不疑也正义羲叔主南方之官若周礼夏官卿也】便程南为敬致【集解孔安国曰为化也平序分南方化育之事敬行其教以致其功也索隐为依字读春言东作夏言南为皆是耕作营为劝农之事孔安国强读为讹字虽则训化解释亦甚纡回也正义譌音于伪反命羲叔宜恭勤民事致其种植使有程期也】日永星火以正中夏【集解孔安国曰永长也谓夏至之日火苍龙之中星举中则七星见可知也以正中夏之节马融王肃谓日长昼漏六十刻郑玄曰五十五刻】其民因鸟兽希革【集解孔安国曰因谓老弱因就在田之丁壮以助农也夏时鸟兽毛羽希少改易也革改也】申命和仲居西土【集解徐广曰一无土字以为西者今天水之西县也駰案郑玄曰西者陇西之西今人谓之兑山】日昧谷【集解徐广曰一作柳谷駰案孔安国曰日入于谷而天下冥故曰昧谷此居治西方之官掌秋天之政也正义和仲主西方之官若周礼秋官卿也】敬道日入便程西成【集解孔安国曰秋西方万物成也】夜中星虚以正中秋【集解孔安国曰春言日秋言夜互相备也虚玄武之中星亦言七星皆以秋分日见以正三秋也索隐虚旧依字读而邹诞生音墟案虚星主坟墓邹氏颇得其理】其民夷易鸟兽毛毳【集解孔安国曰夷平也老壮者在田与夏平也毳理也毛更生曰毳理】申命和叔居北方曰幽都【集解孔安国曰北称幽都谓所聚也索隐案山海经曰北海之内有山名幽都盖是

也正义按北方幽州陰聚之地命和叔居理之北方之官若周礼冬官卿】便在伏物【索隐使和叔察北方藏伏之物谓人畜积聚等冬皆藏伏尸子亦曰北方者伏方也尚书作平在朔易今案大传云便在伏物太史公据之而书】日短星昴以正中冬【集解孔安国曰日短冬至之日也昴白虎之中星亦以七星并见以正冬节也马融王肃谓日短昼漏四十刻郑玄曰四十五刻】其民燠鸟兽氄毛【集解徐广曰氄音茸駟案孔安国曰民入室处鸟兽皆生氄毳细毛以自温也】岁三百六十六日以闰月正四时【索隐夫周天三百六十五度四分度之一是天度数也而日行迟一岁一周天月行疾一月一周天日一日行一度月一日行十三度十九分度之七至二十九日半强月行天一匝又逐及日而与会一年十二会是为十二月每月二十九日过半年分出小月六日是每岁余六日又大岁三百六十六日小岁三百六十五日举全数云六十六日其实一岁唯余十一日弱未滿三岁已成一月则置闰若三年不置闰则正月为二月九年差三月则以春为夏十七年差六月则四时皆反以此四时不正岁不成矣故传曰归余於终事则不悖是也】信饬百官【集解徐广曰古勅字】衆功皆兴尧曰谁可顺此事【正义言将登用之嗣位也】放齐曰嗣子丹朱开明【集解孔安国曰放齐臣名正义放音方往反郑玄云帝尧胤嗣之子名曰丹朱开明也按开解而達也帝王纪云尧娶散宜氏女曰女皇生丹朱汲冢纪年云后稷放帝子丹朱范汪荆州记云丹水县在丹川尧子朱之所封也括地志云丹水故城在邓州内乡县西南百三十里丹水故为县】尧曰吁顽凶不用【集解孔安国曰吁疑怪之辞正义左传云口不道忠信之言为嚚心不则德义之经为顽凶讼也言丹朱心既顽嚚又好争讼不可用之】尧又曰谁可者讙兜曰共工旁聚布功可用【集解孔安国曰讙兜臣名郑玄曰共工水官名正义兜音升侯反】尧曰共工善言其用僻似恭漫天不可【正义漫音莫干反共王善为言语用意邪僻也似於恭敬罪恶漫天不可用也】尧又曰嗟四岳【集解郑玄曰四岳四时官主方岳之事正义嗟叹鸿水问四岳谁能理也孔安国云四岳即上羲和四子也分掌四岳之诸侯故称焉】汤汤洪水滔天浩浩怀山襄陵【集解孔安国曰怀包裹上也正义汤音商今读如字荡荡广平之貌言水奔突有所涤除地上之物为水漂流荡荡然按怀藏包裹之义故怀为包释言以襄为驾驾乘牛马皆在上也言水襄上乘陵浩浩盛大势若漫天】下民其忧有能使治者皆曰鲧可【集解马融曰鲧臣名禹父】尧曰鲧负命毁族不可【正义负音佩依字通负违也族类也鲧性狠戾违负教命毁败善类不可用也诗云贪人败类也】岳曰异哉试不可用而已【正义异音异孔安国云异已也退也言余人尽已唯鲧可试无成乃退】尧於是听岳用鲧九载功用不成【正义尔雅释天云载岁也夏日祀周日年唐虞曰载李巡云各自纪事不相袭也孙炎云?取星行一次也祀取四时祭祀一讫也年取年谷一熟也载取万物始更终也载者年之别名故以载为年也按功用不成水害不息故放退也至明年得舜乃殛之羽山而用其子禹也】尧曰嗟四岳朕在位七十载汝能庸命践朕位【集解郑玄曰言汝诸侯之中有能顺事用天命者入处我位统治天子之事者乎正义孔安国云尧年十六以唐侯升为天子在位七十载时八十六老将求代也】岳应曰鄙德忝帝位【正义四岳皆云鄙里无德若便行天子事是辱帝位言已等不堪也】尧曰悉举贵戚及疏远隐匿者衆皆言於尧曰有矜在民间曰虞舜【集解孔安国曰无妻曰矜正义矜古顽反】尧曰然朕闻之其何如岳曰盲者子父顽母嚚弟傲能和以孝烝烝治不至奸【集解孔安国曰不至於奸恶正义烝之升反进也言父顽母嚚弟傲舜皆和以孝进之於善不至於奸恶也】尧曰吾其试哉【正义欲以二女试舜观其理家之道也】於是尧妻之二女【正义妻音七计反二女娥皇女英也娥皇无子女英生商均舜升天子

娥皇为后女英为妃】观其德於二女【正义视其为德行於二女以理家而观国也】舜飭下二女於妫汭【集解孔安国曰舜所居妫水之汭索隐列女传云二女长曰娥皇次曰女英系本作女莹大戴礼作女匭皇甫谧云妫水在河东虞乡县历山西汭水涯也犹洛汭渭汭然也正义飭音勅下音胡亚反汭音芮舜能整齐二女以义理下二女之心於妫汭使行妇道於虞氏也括地志云妫源汭水出蒲州河东南山许慎云水涯曰汭按地记云河东郡青山东山中有二泉下南流者妫水北流者汭水二水异原合流出谷西注河妫水北曰汭也又云河东县二里故蒲坂城舜所都也城中有舜庙城外有舜宅及二妃坛】如妇礼尧善之乃使舜慎和五典【集解郑玄曰五典五教也盖试以司徒之职】五典能从乃徧入百官百官时序宾於四门四门穆穆诸侯远方宾客皆敬【集解马融曰四门四方之门诸侯羣臣朝者舜宾迎之皆有美德也】尧使舜入山林川泽暴风雷雨舜行不迷【索隐尚书云纳于大麓谷梁传云林属於山曰麓是山足曰麓故此以为入山林不迷孔氏以麓训録言令舜大录万机之政与此不同】尧以为圣召舜曰女谋事至而言可绩三年矣【集解郑玄曰三年者宾四门之後三年也】女登帝位舜让於德不怿【集解徐广曰音亦今文尚书作不怡怡怿也索隐古文作不嗣今文作不怡怡即怿也谓辞让於德不堪所以心意不悦怿也】正月上日【集解马融曰上日朔日也正义郑玄云帝王易代莫不改正建朔舜正建子此时未改故依尧正月上日也】舜受终於文祖文祖者尧大祖也【集解郑玄曰文祖者五府之大名犹周之明堂索隐尚书帝命验曰五府五帝之庙苍曰灵府赤曰文祖黄曰神斗白曰显纪黑曰玄矩正义舜受尧终帝之事於文祖也尚书帝命验云帝者承天立府以尊天重象也五府者唐虞谓之五府夏谓之世室殷谓之重屋周谓之明堂皆祀五帝之所也文祖者赤帝嫫怒之府名曰文祖火精光明文章之祖故谓之文祖周曰明堂神斗者黄帝舍枢纽之府名曰神斗斗主也土精澄静四行之主故谓之神斗周曰太室显纪者白帝招拒之府名显纪纪法也金精断割万物故谓之显纪周曰总章玄矩者黑帝汁光纪之府名曰玄矩矩法也水精玄昧能权轻重故谓之玄矩周曰玄堂灵府者苍帝灵威仰之府名曰灵府周曰青阳】於是帝尧老命舜摄行天子之政以观天命舜乃在璿玑玉衡以齐七政【集解郑玄曰璿玑玉衡浑天仪也七政日月五星也正义说文云璿美玉也按舜虽受尧命犹不自安更以璿玑玉衡以正天文玑为运转衡为横箫运玑使动於下以衡望之是王者正天文器也观其齐与不齐今七政齐则已受禅为是蔡邕云玉衡长八尺孔径一寸下端望之以视星宿盖县玑以象天而以衡望之转玑窥衡以知星宿玑径八尺圆周二尺五寸而强也郑玄云运转者为玑持正者为衡尚书大传云政者齐中也谓春夏秋冬天文地理人道所以为政也道正而万事顺成故天道政之大也】遂类於上帝【集解郑玄曰礼祭上帝於圆丘正义五经异义云非时祭天谓之类言以事类告也时舜告摄非常祭也王制云天子将出类于上帝郑玄云昊天上帝谓天皇大帝北辰之星】禋于六宗【集解郑玄曰六宗星辰司中司命风师雨师也駟案六宗义衆矣愚谓郑说为长正义周语云精意以享曰禋也孙炎云禋洁敬之祭也按星五星纬也辰日月所会十二次也司中司命文昌第五第四星也风师箕星也雨师毕星也孔安国云四时寒暑也日月星也水旱也礼祭法云埋少牢於大昭祭时也穰祈於坎坛祭寒暑也王宫祭日也夜明祭月也幽祭祭星也雩祭祭水旱也司马彪续汉书云安帝立六宗祀於洛阳城西北亥地礼比大社魏因之至晋初荀顗言新祀以六宗之神诸家说不同乃废之】望于山川【正义望者遥望而祭山川也山川五岳四渎也尔雅云梁山晋望也】辩於羣神【集解徐广曰辩音班駟案郑玄曰羣神若丘陵坟衍正义辩音遍谓祭羣神也】揖五瑞择吉月日见四岳诸牧班瑞

【集解马融曰揖歛也五瑞公侯伯子男所执以为瑞信也尧将禅舜使羣牧歛之使舜亲往班之正义揖音集周礼典瑞云王执镇圭尺二寸公执桓圭九寸侯执信圭七寸伯执躬圭五寸子执谷璧男执蒲璧皆五寸言五瑞者王不在中也孔文祥云宋末会稽修禹庙於庙庭山土中得五等圭璧百余枚形与周礼同皆短小此即禹会诸侯於会稽执以礼山神而埋之其璧今犹有在也】岁二月东巡狩至於岱宗柴【集解马融曰舜受终後五年之二月郑玄曰建卯之月也柴祭东岳者考绩柴燎也正义按既班瑞羣后即东巡者守土之诸侯会岱宗之岳焚柴告至也王者巡狩以诸侯自专一国威福任已恐其壅遏上命泽不下流故巡行问人病苦也风俗通云太山之尊者一曰岱宗始也长也万物之始陰阳交代故为五岳之长也按二月仲月也仲中也言得其中也】望秩於山川【正义乃以秩望祭东方诸侯境内之名山大川也言秩者五岳视三公四渎视诸侯】遂见东方君长合时月正日【集解郑玄曰协正四时之月数及日名备有失悞正义既见东方君长乃合同四时气节月之大小日之甲乙使齐一也周礼太史掌正岁年以序事颁正朔於邦国则节气晦朔皆天子颁之犹恐诸侯国异或不齐同因巡狩合正之】同律度量衡【集解郑玄曰同音律度丈尺量斗斛衡斤两也正义律之十二律度之丈尺量之斗斛衡之斤两皆使天下相同无制度长短轻重异也汉律历志虞书云同律度量衡所以齐远近立民信也律有十二阳六为律陰六为吕律以统气类物一曰黄鍾二曰太簇三曰姑洗四曰蕤宾五曰夷则六曰无射吕以旅阳宣气一曰林鍾二曰南吕三曰应鍾四曰大吕五曰夹鍾六曰中吕度者分寸尺丈引也所以度长短也本起黄鍾之长以子谷秬黍中者一黍之起积千二百黍之广度之九十分一为一分十分为寸十寸为尺十尺为丈十丈为引而五度审矣量者龠合升斗斛也所以量多少也本起黄鍾之龠以子谷秬黍中者千有二百实为一龠合龠为合十合为升十升为斗十斗为斛而五量嘉矣衡权者铢两斤钧石也所以秤物轻重也本起於黄鍾之重一龠容千二百黍重十二铢二十四铢为两十六两为斤三十斤为钧四钧为石而五权谨矣衡平也权重也】修五礼【集解马融曰吉凶宾军嘉也正义周礼以吉礼事邦国之鬼神只以凶礼哀邦国之忧以宾礼亲邦国以军礼同邦国以嘉礼亲万民也尚书尧典云类于上帝吉礼也如丧考妣凶礼也羣后四朝宾礼也大禹谟云汝徂征军礼也尧典云女于时嘉礼也女音女虐反】五玉【集解郑玄曰即五瑞也执之曰瑞陈列曰玉】三帛【集解马融曰三孤所执也郑玄曰帛所以荐玉也必三者高阳氏後用赤纁高辛氏後用黑纁其余诸侯皆用白纁正义孔安国云诸侯世子执纁公之孤执玄附庸之君执黄也按三统纪推伏羲为天统色尚赤神农为地统色尚黑黄帝为人统色尚白少昊黄帝子亦尚白故高阳氏为天统亦尚赤尧为人统故用白】二生【正义羔鴈也郑玄注周礼大宗伯云羔小羊也取其羣不失其类也鴈取其候时而行也卿执羔大夫执鴈按羔鴈性驯可生为贄】一死【正义雉也马融云一死雉士所执也按雉不可生为贄故死雉取其守介死不失节也】为摯【集解马融曰摯二生羔鴈卿大夫所执一死雉士所执正义摯音至摯执也郑玄云贄之言至所以自致也韦昭云贄六贄孤执皮帛卿执羔大夫执鴈士执雉庶人执鹩工商执鷄也】如五器卒乃复【集解马融曰五器上五玉五玉礼终则还之三帛已下不还也正义卒音子律反反复音伏】五月南巡狩八月西巡狩十一月北巡狩皆如初归至于祖祢庙【正义祢音乃礼反何休云生曰父死曰考庙曰祢】用特牛礼五岁一巡狩羣后四朝【集解郑玄曰巡狩九年诸侯见於方岳之下其间四年四方诸侯分来朝於京师也】徧告以言【正义徧音遍言徧告天子治理之言也】明试以功车服以庸【正义孔安国云功成则锡车服以表显其能用也】肇十有二州决川【集解马融曰禹平水

土置九州舜以冀州之北广大分置并州燕齐辽远分燕置幽州分齐为营州於是十二州也郑玄曰更为之定界濬水害也】象以典刑【集解马融曰言咎繇制五常之刑无犯之者但其象无其人也正义孔安国云象法也法用常刑用不越法也】流宥五刑【集解马融曰流放宥宽也一曰幼少二曰老耄三曰蠢愚五刑墨劓剕宫大辟正义孔安国云以流放之法宽五刑也郑玄云三宥一曰弗识二曰过失三曰遗忘也】鞭作官刑【集解马融曰为辨治官事者为刑】扑作教刑【集解郑玄曰扑檠楚也扑为教官为刑者】金作赎刑【集解马融曰金黄金也意善功恶使出金赎罪坐不戒慎者】眚眚过赦【集解郑玄曰眚眚为人作患者也过失虽有害则赦之】怙终【集解徐广曰一作衆】贼刑【集解郑玄曰怙其奸邪终身以为残贼则用刑之】钦哉钦哉惟刑之静哉【集解徐广曰今文云惟刑之谧哉尔雅曰谧静也索隐案古文作恤哉且今文是伏生口诵恤谧声近遂作谧也】讙兜进言共工【正义讙兜浑沌也共工穷奇也鯀檣机也三苗饕餮也左传云舜臣尧流四凶投诸四裔以御魑魅也】尧曰不可而试之工师【正义工师若今大匠卿也】共工果淫辟【正义正亦反】四岳举鯀治鸿水尧以为不可岳强请试之试之而无功故百姓不便三苗在江淮荆州【集解马融曰三苗国名也正义左传云自古诸侯不用王命虞有三苗夏有观扈孔安国云缙云氏之後为诸侯号饕餮也吴起云三苗之国左洞庭而右彭蠡按洞庭湖名在岳州巴陵西南一里南与青草湖连彭蠡湖名在江州浔阳县东南五十二里以天子在北故洞庭在西为左彭蠡在东为右今江州鄂州岳州三苗之地也准读曰汇音胡罪反今彭蠡湖也本属荆州尚书云南入于江东汇泽为彭蠡是也】数为乱於是舜归而言於帝请流共工于幽陵【集解马融曰幽陵北裔也正义尚书及大戴礼皆作幽洲括地志云故龚城在檀州燕乐县界故老传云舜流共工幽洲居此城神异经云西北荒有人焉人面朱髯蛇身人手足而食五谷禽兽顽愚名曰共工】以变北狄【集解徐广曰变一作變索隐变谓变其形及衣服同於夷狄也徐广云作變變和也正义言四凶流四裔各於四夷放共工等为中国之风俗也】放驩兜於崇山【集解马融曰崇山南裔也正义神异经云南方荒中有人焉人面鸟喙而有翼两手足扶翼而行食海中鱼为人很恶不畏风雨禽兽犯死乃休名曰讙兜也】以变南蛮迁三苗於三危【集解马融曰三危西裔也正义括地志云三危山有峰故曰三危俗亦名卑羽山在沙州炖煌县东南三十里神异经云西荒中有人焉面目手足皆人形而腋下翼不能飞为人饕餮淫逸无理名曰苗民又山海经大荒北经云黑水之北有人有翼名曰苗民也】以变西戎殛鯀於羽山【集解马融曰殛诛也羽山东裔也正义殛音纪力反孔安国云殛窜放流皆诛也括地志云羽山在沂州临沂县界神异经云东方有人焉人形而身多毛自解水土知通塞为人自用欲为欲息皆曰云是鯀也】以变东夷四皐而天下咸服尧立七十年得舜二十年而老令舜摄行天子之政荐之於天尧辟位凡二十八年而崩【集解徐广曰尧在位凡九十八年駟案皇览曰尧冢在济陰城阳刘向曰尧葬济陰丘隴山吕氏春秋曰尧葬谷林皇甫谧曰谷林即城阳尧都平阳於诗为唐国正义皇甫谧云尧即位九十八年通舜摄二十八年也凡年百一十七岁孔安国云尧壽百一十六岁括地志云尧陵在濮州雷泽县西三里郭缘生述征记云城阳县东有尧冢亦曰尧陵有碑是也括地志云雷泽县本汉城阳县也】百姓悲哀如丧父母三年四方莫举乐【正义尚书三载四海遏密八音是也】以思尧尧知子丹朱之不肖不足授天下【索隐郑玄曰肖似也不似言不如人也皇甫谧云尧娶散宜氏之女曰女皇生丹朱又有庶子九人皆不肖也】於是乃权授舜【索隐父子继立常道也求贤而禅权道也权者反常而合道正义五帝官天下老则禅贤故权试舜也】授舜则天下

得其利而丹朱病授丹朱则天下病而丹朱得其利尧曰终不以天下之病而利一人而卒授舜以天下尧崩三年之丧毕舜让辟丹朱於南河之南【集解刘熙曰南河九河之最在南者正义括地志云故尧城在濮州鄆城县东北十五里竹书云昔尧德衰为舜所囚也又有偃朱故城在县西北十五里竹书云舜囚尧复偃塞丹朱使不与父相见也按濮州北临漯大川也河在尧都之南故曰南河禹贡至于南河是也其偃朱城所居即舜让避丹朱於南河之南处也】诸侯朝覲者不之丹朱而之舜狱讼者不之丹朱而之舜讴歌者不讴歌丹朱而讴歌舜舜曰天也夫而後之中国践天子位焉【集解刘熙曰天子之位不可旷年於是遂反格於文祖而当帝位帝王所都为中故曰中国】是为帝舜

虞舜者【集解駰案谥法曰仁圣盛明曰舜索隐虞国名在河东大阳县舜谥也皇甫谧云舜字都君也正义括地志云故虞城在陕州河北县东北五十里虞山之上酈元注水经云轸桥东北有虞城尧以女嫫于虞之地也又宋州虞城大襄国所封之邑杜预云舜後诸侯也又越州余姚县顾野王云舜後支庶所封之地舜姚姓故云余姚县西七十里汉上虞故县会稽旧记云舜上虞人去虞三十里有姚丘即舜所生也周处风土记云舜东夷之人生姚丘括地志又云姚墟在濮州雷泽县东十三里孝经援神契云舜生於姚墟按二所未详也】名曰重华【集解徐广曰皇甫谧云舜以尧之二十一年甲子生三十一年甲午徵用七十九年壬午即真百岁癸卯崩正义尚书云重华协於帝孔安国云华谓文德也言其光又重合於尧瞽瞍姓妸妻曰握登见大虹意感而生舜於姚墟故姓姚曰重瞳子故曰重华字都君龙颜大口黑色身長六尺一寸】重华父曰瞽瞍【正义先后反孔安国云无目曰瞽舜父有目不能分别好恶故时人谓之瞽配字曰瞍瞍无目之称也】瞽瞍父曰桥牛【正义桥又音娇】桥牛父曰句望【正义句古侯反望音亡】句望父曰敬康敬康父曰穷蝉穷蝉父曰帝顓頊顓頊父曰昌意以至舜七世矣自从穷蝉以至帝舜皆微为庶人舜父瞽瞍盲而舜母死【索隐皇甫谧云舜母名握登生舜於姚墟因姓姚氏也】瞽瞍更娶妻而生象象傲瞽瞍爱後妻子常欲杀舜舜避逃及有小过则受罪顺事父及後母与弟日以笃谨匪有懈舜冀州之人也【正义蒲州河东县本属冀州宋永初山川记云蒲坂城中有舜庙城外有舜宅及二妃坛括地志云妸州有妸水源出城中耆旧传云即舜厘降二女於妸汭之所外城中有舜井城北有历山山上有舜庙未详按妸州亦冀州城是也】舜耕历山【集解郑玄曰在河东正义括地志云蒲州河东县雷首山一名中条山亦名历山亦名首阳山亦名蒲山亦名襄山亦名甘枣山亦名猪山亦名狗头山亦名薄山亦名吴山此山西起雷首山东至吴坂凡十一名随州县分之历山南有舜井又云越州余姚县有历山舜井濮州雷泽县有历山舜井二所又有姚墟云生舜处也及妸州历山舜井皆云舜所耕处未详也】渔雷泽【集解郑玄曰雷夏兖州泽今属济陰正义括地志云雷夏泽在濮州雷泽县郭外西北山海经云雷泽有雷神龙首人頰鼓其腹则雷也】陶河滨【集解皇甫谧曰济陰定陶西南陶丘亭是也正义按於曹州滨河作瓦器也括地志云陶城在蒲州河东县北三十里即舜所都也南去历山不远或陶所在则可何必定陶方得为陶舜之陶也斯或一焉】作什器於壽丘【集解皇甫谧曰在鲁东门之北索隐什器什数也盖人家常用之器非一故以什为数犹今云什物也壽丘地名黄帝生处正义壽音受顔师古云军法五人为伍二伍为什则共器物故谓生生之具为什器亦犹从军及作?者十人为火共畜调度也】就时於负夏【集解郑玄曰负夏卫地索隐就时犹逐时若言乘时射利也尚书大传曰贩於顿丘就时负夏孟子曰迁於负夏是也】舜父瞽瞍顽母嚚弟象傲

皆欲杀舜舜顺适不失子道兄弟孝慈欲杀不可得即求尝在侧舜年二十以孝闻三十而帝尧问可用者【正义可用谓可为天子也】四岳咸荐虞舜曰可於是尧乃以二女妻舜以观其内使九男与处以观其外舜居妫汭内行弥谨尧二女不敢以贵骄事舜亲戚【正义亲戚谓父瞽叟後母弟象妹颖手等也颖音古果反】甚有妇道尧九男皆益笃【正义笃悖也非唯二女恭勤妇道九男事舜皆益悖厚谨敬也】舜耕历山历山之人皆让畔【正义韩子历云农相侵畔舜往耕耨年耕者让畔也】渔雷泽雷泽上人皆让居陶河滨河滨器皆不苦窳【集解史记音义曰音游甫反駟谓窳病也正义苦读如鹽音古鹽羸也窳音庾】一年而所居成聚【正义聚在喻反谓村落也】二年成邑三年成都【正义周礼郊野法云九夫为井四井为邑四邑为丘四丘为甸四甸为县四县为都也】尧乃赐舜絺衣与琴【正义絺勑迟反细葛布衣也邹氏音竹几反】为筑仓廩予牛羊瞽叟尚复欲杀之使舜上涂廩瞽叟从下纵火焚廩舜乃以两笠自扞而下去得不死【索隐言以笠自扞已身有似鸟张翅而轻下得不损伤皇甫谧云两繖繖笠类列女传云二女教舜鸟工上廩是也正义通史云瞽叟使舜涂廩舜告尧二女女曰时其焚汝鹄汝衣裳鸟工往舜既登廩得免去也】後瞽叟又使舜穿井舜穿井为匿空旁出【集解刘熙曰舜以权谋自免亦大圣有神人之助也索隐空音孔列女传所谓龙工入井是也正义言舜潜匿穿孔旁从他井而出也通史云舜穿井又告二女二女曰去汝裳衣龙工往入井瞽叟与象下土实井舜从他井出去也括地志云舜井在妫州怀戎县西外城中其西又有一井耆旧传云并舜井也舜自中出帝王纪云河东有舜井未详】舜既入深瞽叟与象共下土实井舜从匿空出去瞽叟象喜以舜为已死象曰本谋者象象与其父母分【正义扶问反】於是曰舜妻尧二女与琴象取之牛羊仓廩予父母象乃止舜宫居【正义宫即室也尔雅云室谓之宫礼云命士以上父子异宫也】鼓其琴舜往见之象愕不恠曰我思舜正郁陶舜曰然尔其庶矣【索隐言汝犹当庶几於友悌之情义也如孟子取尚书文又云惟兹臣庶女其于予治盖欲令象共我理臣庶也】舜复事瞽叟爱弟弥谨於是尧乃试舜五典百官皆治昔高阳氏有才子八人世得其利谓之八恺【集解贾逵曰恺和也索隐左传史克对鲁宣公曰昔高阳氏有才子八人苍舒隤鬻檮戴大临彫降庭坚仲容叔逵】高辛氏有才子八人世谓之八元【集解贾逵曰元善也索隐左传高辛氏有才子八人伯翳仲堪叔献季仲伯虎仲熊叔豹季狸】此十六族者世济其美【索隐谓元恺各有亲族故称族也济成也言後代成前代也】不陨其名至於尧尧未能举舜举八恺使主后土【集解王肃曰君治九土之宜杜预曰后土地也索隐禹为司空司空主土则禹在八恺之中正义春秋正义云后君也天曰皇天地曰后土】以揆百事莫不时序【正义言禹度九土之宜无不以时得其次序也】举八元使布五教于四方【索隐契为司徒司徒敷五教则契在八元之数也】父义母慈兄友弟恭子孝内平外成【正义杜预云内诸夏外夷狄也按契作五常之教诸夏太平夷狄向化也】昔帝鸿氏有不才子【集解贾逵曰帝鸿黄帝也不才子其苗裔讎兜也】掩义隐贼好行凶慝天下谓之浑沌【正义慝恶也一本云天下之民谓之浑沌浑沌即讎兜也言掩义事陰为贼害而好凶恶故谓之浑沌也杜预云浑沌不开通之貌神异经云崑仑西有兽焉其状如犬长毛四足似黑而无爪有目而不见行不开有两耳而不闻有人知往有腹无五藏有颈直短食径过人有德行而往抵角有凶恶而行依凭之名浑沌又庄子云南海之帝为儵北海之帝为忽中央之帝为浑沌儵忽时相遇於浑沌之地浑沌待之甚善儵与忽谋欲报浑沌之德曰人皆有七窍以视听食息此独无有尝试凿之曰凿一窍七日而浑沌死按言讎兜性似故号之也】少皞氏【集解服虔曰金天氏帝号】有不才子毁信恶忠崇

饰恶言天下谓之穷奇【集解服虔曰谓共工氏也其行穷而好奇正义谓共工言毁败信行恶其忠直有恶言语高粉饰之故谓之穷奇按常行终必穷极好谄谀奇异于人也神异经云西北有兽其状似虎有翼能飞便剿食人知人言语闻人鬬辄食直者闻人忠信辄食其鼻闻人恶逆不善辄杀兽往馈之名曰穷奇按言共工性似故号之】颡顓氏有不才子不可教训不知话言天下谓之檇机【集解贾逵曰檇机顽凶无畴匹之貌谓鲧也正义檇音道刀反机音五骨反谓鲧也凶顽不可教训不从诏令故谓之檇机按言无畴匹言自纵恣也神异经云西方荒中有兽焉其状如虎而大毛长二尺人面虎足猪口牙尾长一丈八尺搅乱荒中名檇机一名傲假一名难训按言鲧性似故号之】此三族世忧之至于尧尧未能去缙云氏有不才子【集解贾逵曰缙云氏姜姓也炎帝之苗裔当黄帝时在缙云之官也正义今括州缙云县盖其所封也书云缙赤缙也谓三苗也言贪饮食冒货贿故谓之饕餮神异经云西南有人焉身多毛上头戴豕性很恶好息积财而不用善夺人谷物强者畏羣而单名饕餮言三苗性似故号之】贪於饮食冒于货贿天下谓之饕餮天下恶之比之三凶【集解杜预曰非帝子孙故别之以比三凶也】舜宾於四门【正义杜预云辟四门达四聪以宾衆贤也】乃流四凶族迁于四裔以御魑魅【集解贾逵曰四裔之地去王城四千里服虔曰魑魅人面兽身四足好惑人山林异气所生以为人害正义御音鱼吕反魑音丑知反魅音媚按御魑魅恐更有邪谄之人故流放四凶以御之也故下云无凶人也】於是四门辟言毋凶人也舜入于大麓烈风雷雨不迷尧乃知舜之足授天下尧老使舜摄行天子政巡狩舜得举用事二十年而尧使摄政摄政八年而尧崩三年丧毕让丹朱天下归舜而禹皋陶契后稷伯夷夔龙垂益彭祖【索隐彭祖即陆终氏之第三子錢铿之後後为大彭亦称彭祖正义高姚二音皋陶字庭坚英六二国是其後也契音薛殷之祖也伯夷齐太公之祖也夔巨龟反乐官也垂音垂亦作垂内言之官也益伯翳也即秦赵之祖彭祖自尧时举用历夏殷封於大彭】自尧时而皆举用未有分职【正义分音符问反又如字分谓封疆爵土也】於是舜乃至於文祖谋于四岳辟四门明通四方耳目命十二牧论帝德行厚德远佞人【正义舜命十二牧论帝尧之德又敦之于民远离邪佞之人言能如此则夷狄亦服从也】则蛮夷率服舜谓四岳曰有能奋庸【集解马融曰奋明庸功也】美尧之事者使居官相事皆曰伯禹为司空可美帝功舜曰嗟然禹汝平水土维是勉哉禹拜稽首让於稷契与皋陶舜曰然往矣【集解郑玄曰然其举得其人汝往居此官不聽其所让也】舜曰弃黎民始饥【集解徐广曰今文尚书作祖饥祖始也索隐古文作阻饥孔氏以为阻难也祖阻声相近未知谁得】汝后稷播时百谷【集解郑玄曰时读曰蒔正义稷农官也播时谓顺四时而种百谷】舜曰契百姓不亲五品不驯【集解郑玄曰五品父母兄弟子也王肃曰五品五常也正义驯音训】汝为司徒而敬敷五教在寛【集解马融曰五品之教】舜曰皋陶蛮夷猾夏【集解郑玄曰猾夏侵乱中国也】寇贼奸轨【集解郑玄曰由内为奸起外为轨正义亦作宄】汝作士【集解马融曰狱官之长正义按若大理卿也】五刑有服五服三就【集解马融曰五刑墨劓剕宫大辟三就谓大罪陈诸原野次罪於市朝同族适甸师氏既服五刑当就三处正义孔安国云服从也言轻重之中正也按墨点凿其额涅以墨劓截鼻也剕刖足也宫淫刑也男子割势妇人幽闭也大辟死刑也】五流有度【正义度音徒洛反尚书作宅孔安国云五刑之流各有所居也】五度三居【正义按谓度其远近为三等之居也】维明能信【集解马融曰谓在八议君不忍刑宥之以远五等之差亦有三等之居大罪投四裔次九州之外次中国之外当明其罪能使信服之】舜曰谁能驯予工【集解马融曰谓主百工之官也】皆曰垂可於是垂以垂为共工【集解马融曰

为司空共理百工之事】舜曰谁能川马予上下草木鸟兽【集解马融曰上谓原下谓隰】皆曰益可於是益为朕虞【集解马融曰虞掌山泽之官名】益拜稽首让于诸臣朱虎熊罴【索隐即高辛氏之子伯虎仲熊也正义孔安国云朱虎熊罴二臣也垂益所让四人皆在元愷之中也】舜曰往矣汝谐遂以朱虎熊罴为佐【正义为益之佐也】舜曰嗟四岳有能典朕三礼【集解马融曰三礼天神地祇人鬼之礼也郑玄曰天事地事人事之礼也】皆曰伯夷可舜曰嗟伯夷以汝为秩宗【集解郑玄曰主次秩尊卑正义若太常也汉书百官表云王莽太常曰秩宗依古也孔安国云秩序宗尊也主郊庙之官也】夙夜维敬直哉维静絜【正义静清也絜明也孔安国云职典礼施政教使正直而清明】伯夷让夔龙舜曰然【正义孔安国云然其推贤不许其让也】以夔为典乐教胥子【集解郑玄曰国子也案尚书作胄子孔安国曰胥胄声相近正义稚胄雉反孔安国云胄长也谓元子以下至卿大夫子弟以歌诗蹈之舞之教长国子中和祇庸孝友】直而温【集解马融曰正直而色温和】宽而栗【集解马融曰宽大而谨敬战栗也】刚而无虐简而无傲【正义孔安国云刚失之虐简失之傲教之以防其失也】诗言意歌长言【集解马融曰歌所以长言诗之意也正义孔安国云诗言志以导其心歌咏其义以长其言也】声依永律和声【集解郑玄曰声之曲折又依长言声中律乃为和也正义孔安国云声五声宫商角徵羽也律为六律六吕十二月之音气也当依声律和乐也】八音能谐母相夺伦神人以和【集解郑玄曰祖考来格羣后德让其一隅也正义八音金石丝竹匏土革木也孔安国云伦理也八音能谐理不错夺则神人咸和命夔使勉也】夔曰於予击石拊石百兽率舞【集解郑玄曰百兽服不氏所养者也率舞言音和也正义於音乌孔安国云石磬音之清者拊亦击也举清者和则其余皆从矣乐感百兽使相率而舞则神人和可知也按磬一片黑石也不音福尤反周礼云夏官有服不氏掌服猛兽下士一人徒四人郑玄云服不服之兽也】舜曰龙朕畏忌谗说殄伪振惊朕衆【集解徐广曰一云齐说殄行振惊衆駟案郑玄曰所谓色取仁而行违是惊动我之衆臣使之疑惑正义伪音危睡反言畏恶利口谗说之人兼殄絶奸伪人党恐其惊动我衆使龙遏絶之出入其命维信实也此伪字太史公变尚书文也尚书伪字作行音下孟反言已畏忌有利口谗说之人殄絶无德行之官也】命汝为纳言夙夜出入朕命惟信【正义孔安国云纳言喉舌之官也聽下言纳于上受上言宣于下必信也】舜曰嗟女二十有二人【集解马融曰稷契皋陶皆居官久有成功但述而美之无所复勅禹及垂已下皆初命凡六人与上十二牧四岳凡二十二人郑玄曰皆格于文祖时所勅命也】敬哉惟时相天事【正义相视也舜命二十二人各敬行其职惟在顺时视天所宜而行事也】三岁一考功三考绌陟远近衆功咸兴分北三苗【集解郑玄曰所窜三苗为西裔诸侯者犹为恶乃复分析流之】此二十二人咸成厥功皋陶为大理平【正义皋陶作士正平天下罪恶也】民各伏得其实伯夷主礼上下咸让垂主工师【正义工师若今大匠卿也】百工致功益主虞山泽辟【正义婢亦反开也】弃主稷百谷时茂契主司徒百姓亲和龙主宾客远人至十二牧行而九州莫敢辟违【正义禹九州之民无敢辟违舜十二牧也】唯禹之功为大披九山【正义披音皮义反谓傍其山边以通】通九泽决九河定九州各以其职来贡不失厥宜方五千里至于荒服南抚交趾北发【索隐一句】西戎析枝渠廋氐羌【索隐一句】北山戎发息慎【集解郑玄曰息慎或谓之肃慎东北夷】东长鸟夷【索隐此言帝舜之德皆抚及四方夷人故先以抚字总之北发当云北户南方有地名北户又按汉书北发是北方国名今以北发为南方之国误也此文省略四夷之名错乱西戎上少一西字山戎下少一北字长字下少一夷字长夷也鸟夷也其意宜然】

今按大戴礼亦云长夷则长是夷号又云鲜支渠搜则鲜支当此析枝也鲜析音相近邹氏刘氏云息并音肃非也且夷狄之名古书不必皆同今读如字也正义注鸟或作岛括地志云百济国西南海中有大岛十五所皆置邑有人居属百济又倭国西南大海中岛居凡百余小国在京南万三千五百里按武后改倭国为日本国】四海之内【正义尔雅云九夷八狄七戎六蛮谓之四海】咸戴帝舜之功於是禹乃兴九招之乐【索隐招音韶即舜乐箫韶九成故曰九招】致异物凤皇来翔天下明德皆自虞帝始舜年二十以孝闻年三十尧举之年五十摄行天子事年五十八尧崩年六十一代尧践帝位【集解皇甫谧曰舜所都或言蒲阪或言平阳或言潘潘今上谷也正义括地志云平阳今晋州城是也潘今妫州城是也蒲坂今蒲州南二里河东县界蒲坂故城是也】践帝位三十九年南巡狩崩於苍梧之野葬於江南九疑是为零陵【集解駰案皇览曰舜冢在零陵营浦县其山九谿皆相似故曰九疑传曰舜葬苍梧象为之耕礼记曰舜葬苍梧三妃不从山海经曰苍梧山帝舜葬于阳丹朱葬於陰皇甫谧曰或曰二妃葬衡山】舜之践帝位载天子旗往朝父瞽叟夔夔唯谨【集解徐广曰和敬貌】如子道封弟象为诸侯【集解駰案孟子曰封之有庠音鼻正义帝王纪云舜弟象封於有鼻括地志云鼻亭神在道县北六十里故老传云舜葬九疑象来至此後人立祠名为鼻亭神輿地志云零陵郡应阳县东有山山有象庙王隐晋书云此大泉陵县北部东五里有鼻墟象所封也】舜子商均亦不肖【集解皇甫谧曰娥皇无子女英生商均正义譙周云以虞封舜子今宋州虞城县括地志云虞国舜後所封邑也或云封舜子均於商故号商均也】舜乃豫荐禹於天【索隐谓告天使之摄位也】十七年而崩三年丧毕禹亦乃让舜子如舜让尧子【正义括地志云禹居洛州阳城者避商均非时久居也】诸侯归之然後禹践天子位尧子丹朱舜子商均皆有疆土以奉先祀【集解譙周曰以唐封尧之子以虞封舜之子索隐汉书律历志云封尧子朱於丹渊为诸侯商均封虞在梁国今虞城县也正义括地志云定州唐县尧後所封宋州虞城县舜後所封也】服其服礼乐如之以客见天子【正义为天子之宾客也】天子弗臣示不敢专也自黄帝至舜禹皆同姓而异其国号以章明德【集解徐广曰外传曰黄帝二十五子其得姓者十四人虞翻云以德为氏姓又虞说以凡有二十五人其二人同姓姬又十一人为十一姓西祁已滕葢任荀厘姑嫫依是也余十二姓德薄不纪录】故黄帝为有熊帝颡顓为高阳帝啍为高辛帝尧为陶唐【集解韦昭曰陶唐皆国名犹汤称殷商矣张晏曰尧为唐侯国於中山唐县是也】帝舜为有虞【集解皇甫谧曰舜嫔于虞因以为氏今河东大阳西山上虞城是也】帝禹为夏后而别氏姓姁氏契为商姓子氏【索隐礼纬曰禹母修已吞薏苡而生禹因姓姁氏而契姓子氏者亦以其母吞馑子而生】弃为周姓姬氏【集解駰案郑玄駁许慎五经异义曰春秋左传无骇卒羽父请谥与族公问族於衆仲衆仲对曰天子建德因生以赐姓胙之土而命之氏诸侯以字为氏因以为族官有世功则有官族邑亦如之公命以字为展氏以此言之天子赐姓命氏诸侯命族族者氏之别名也姓者所以统系百世使不别也氏者所以别子孙之所出故世本之篇言姓则在上言氏则在下也】

太史公曰【正义太史公司马迁自谓也自叙传云太史公曰先人有言又云太史公曰余闻之董生又云太史公遭李陵之祸明太史公司马迁自号也迁为太史公官题赞首也虞喜云古者主天官者皆上公非独迁】学者多称五帝尚矣【索隐尚上也言久远也然尚矣文出大戴礼】然尚书独载尧以来而百家言黄帝其文不雅驯【正义驯训也谓百家之言皆非典雅之训】荐绅先生难言之【集解徐广曰荐绅即缙绅也古字假借】孔子所传宰予问

五帝德及帝系姓【正义繫音奚计反】儒者或不传【索隐五帝德帝系姓皆大戴礼及孔子家语篇名以二者皆非正经故汉时儒者以为非圣人之言故多不传学也】余尝西至空峒【正义余太史公自称也尝曾也空峒山在原州平高县西百里黄帝问道於广成子处】北过涿鹿【正义涿鹿山在妫州东南五十里山侧有涿鹿城即黄帝尧舜之都】东渐於海南浮江淮矣至长老皆各往往称黄帝尧舜之处风教固殊焉总之不离古文者近是【索隐古文即帝德帝系二书也近是圣人之说】予观春秋国语其发明五帝德帝系姓章矣【索隐太史公言已以春秋国语古书博加考验益以发明五帝德等说甚章着也】顾弟弗深考【集解徐广曰弟但也史说汉书见此者非一又左思蜀都赋曰弟如滇池而不详者多以为字误学者安可不博观乎正义顾念也弟且也太史公言博考古文择其言表见之不虚甚章着矣思念亦且不须更深考论】其所表见皆不虚【索隐言帝德帝系所有表见者皆不为虚妄也】书缺有间矣【正义言古文尚书缺失其间多矣而无说黄帝之语】其轶乃时时见於他说【索隐言古典残缺有年载故曰有间然帝皇遗事散轶乃时时旁见於他记说即帝德帝系等说也故已今采按而备论黄帝已来事耳】非好学深思心知其意固难为浅见寡闻道也余并论次择其言尤雅者故着为本纪书首【正义太史公据古文并诸子百家论次择其言语典雅者故着为五帝本纪在史记百三十篇书之首】

【索隐述赞曰帝出少典居于轩丘既代炎历遂禽蚩尤高阳嗣位静深有谋小大远近莫不怀柔爰泊帝尝列圣同休帝摯之弟其号放勳就之如日望之如云郁夷东作昧谷西嚳明?仄陋玄德升闻能让天下贤哉二君】

【右述赞之体深所不安何者失叙事美功合有首末惩恶劝善是称褒贬观太史公赞论之中或国有数君或士兼百行不能备论终始自可略申梗概遂乃颇取一事偏引一奇即为一篇之赞将为龟镜诚所不取斯亦明月之珠不能无類矣今并重为一百三十篇之赞云】

史记卷一

史记卷一考证

五帝本纪黄帝者正义亭亭在牟阴○牟陰汉唐皆无其县汉地理志泰山郡钜平县下云有亭亭山祠然则牟陰是钜平二字之误又监本作封太山禅亭亭在牟阴推寻文义应复举亭亭二字今添

而蚩尤最为暴莫能伐集解瓚曰孔子三朝记曰蚩尤庶人之贪者○周礼肆师疏亦引三朝记云庶人之强者与此异

又正义并兽身人语铜头铁额监本作铜铁额○【臣照】按徐陵文铜头铁额兴暴轩年头字缺今添

遂禽杀蚩尤集解皇览曰蚩尤冢在东平郡壽张县阚乡城中高七丈○东平郡依後汉郡国

志宜为东平国水经注引此则竟作东郡阚乡县城郡国志注引皇览作阚城高七丈水经注引皇览作高七尺

黄帝居轩辕之邱集解山海经曰在穷山之际西射之南○【臣世骏】按山海经西山经曰轩辕之邱洵水出焉南流注於黑水郭璞注黄帝居此邱娶西陵氏女因号轩辕邱又海外西经曰轩辕之国在此穷山之际在女子国北穷山在其北不敢西射畏轩辕之邱郭璞注言敬畏黄帝威灵故不敢向西而射也集解不引西山轩辕之邱而引海外轩辕之国为证已为失误至以西射为地名则尤误之误也

是为青阳集解太史公乃据大戴礼以嫫祖生昌意及元嚣○【臣世骏】按戴德礼有孝昭冠辞则其後於太史公明矣集解竟以为太史公乃据大戴礼疑有误

青阳降居江水○大戴礼帝系篇作降居泝水

昌意娶蜀山氏女曰昌仆○大戴礼帝系篇作昌濮路史後纪作景

依鬼神以制义○制监本作制正义曰制古制字则本文应作制明矣今改正

帝尧者放勳○【臣德龄】按柯维骐曰太史公本五帝德以放勳重华文命为尧舜禹之名窃考尧纪放勳二字似与尧典同旨言尧之功无所不至以为一篇总冒至舜之名曰重华禹之名曰文命则名曰二字亦可属之当时颂美之词不必为舜禹之命名也此论似为得之

敬授民时正义尚书考灵耀云主春者张昏中可以种稷主夏者火昏中可以种黍菽○尚书疏引书传云张昏中可以种谷火昏中可以种黍

便程南为敬致集解孔安国曰平序分南方化育之事○尚书孔传无分字

鸟兽毛毳集解孔安国曰毛更生曰毳理○尚书孔传作毛更生整理

鸟兽毳毛集解孔安国曰鸟兽皆生毳毳细毛以自温也○尚书孔传毳作栗

九载功用不成○载监本作岁正义详释载字义则本文不得作岁也今改正

朕在位七十载汝能庸命践朕位正义孔安国云尧年十六以唐侯升为天子在位七十载时八十六老将求代也○徐孚远曰据皇甫谧所记尧崩年百十八岁在位九十八年则是二十方即位也与此不同

舜乃在璿玕玉衡以齐七政○在监本讹为作今改正又正义玕径八尺圆周二尺五寸而强○【臣照】按尚书疏作圆周二丈五尺而强径一者围三有奇径八尺圆周岂当二尺五寸

正义误

至於岱宗柴正义风俗通云泰山之尊者一曰岱宗始也长也○风俗通本文云岱始也宗长也

同律度量衡正义本起黄钟之长以子谷秬黍中者一黍之起积千二百黍之广度之九十分一为一分十分为寸○监本作本起黄钟之管长以子谷秬黍中者一黍为一分十分为一寸【臣照】按今汉书律历志亦同此讹遂不可解宋史律志详之今照宋史改

丹朱之不肖不足授天下○此下监本落於是乃权授舜句并索隐正义注今添

虞舜者正义宋州虞城大襄国所封之邑○大襄疑虞思二字之误见路史国名纪

瞽叟父曰桥牛桥牛父曰句望句望父曰敬康敬康父曰穷蝉穷蝉父曰帝顓琐顓琐父曰昌意以至舜七世矣○路史余论曰吕梁碑刘耽作碑中叙纪虞帝之世云舜祖幕幕生穷蝉穷蝉生敬康敬康生乔牛乔牛生瞽叟瞽叟产舜命禹行水道吕梁特此节完备为可考质之於传惟无句望且不言出自黄帝

陶河滨正义或陶所在则可○或陶上脱或耕二字语见水经注言无地不可耕且陶也

历山之人皆让畔正义韩子历云○历字疑衍

使主后土集解杜预曰后土地也○左传杜预注云后土地官与此异

缙云氏有不才子正义书云缙赤缙也○春秋疏云字书云赤缙也此明脱字字

禹臯陶契后稷伯夷夔龙垂益彭祖○【臣德龄】按自禹至彭祖为十人而下文叙其分职则惟九官而无彭祖又下文舜曰嗟汝二十有二人注引书传谓四岳九官十二牧也亦无彭祖窃疑彭祖二字是衍文

寇贼奸轨集解郑元曰由内为奸起外为轨○尚书孔传曰在外曰奸在内曰宄盖本成十七年传文与郑义相反

於是垂为共工集解马融曰为司空共理百工之事○徐孚远曰是时禹为司空宅百揆垂何得亦为司空抑禹自宅揆解司空之職以授垂耶将共工别为一官与司空分職而马说误耶

教穉子集解孔安国曰穉胄声相近○今尚书孔传无此语

於是禹乃兴九招之乐○【臣德齡】按禹字疑当作?字盖夔为典乐之官而禹无作乐之事九招乐作致异物凤凰来翔不归其功於夔不可其叙二十二人之成功除四岳无有分职不叙外而独遗典乐之夔亦不可且其叙禹於诸臣之後者以禹之功为最大也而大乐之作所以告成功故又叙?於禹之後其次序固秩然不紊也夏本纪舜德大明於是?行乐一段尤为?字明证

封弟象为诸侯正义王隐晋书云此大泉陵县北部东五里有鼻墟○此大泉三字疑是零陵二字之误

孔子所传宰予问五帝德及帝系姓○监本误将下文索隐五帝德帝系姓皆大戴礼云云复见於此标作正义今删

史记卷一考证

卷二

钦定四库全书

史记卷二

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

夏本纪第二

夏禹【集解駙案谥法曰受禅成功曰禹正义夏者帝禹封国号也帝王纪云禹受封为夏伯在豫州外方之南今河南阳翟是也】名曰文命【索隐尚书云文命敷于四海孔安国云外布文德教命不云是禹名太史公皆以放勳重华文命为名孔又云虞氏舜名则尧舜禹汤皆名矣盖古质帝王之号皆以名後代因其行追而为谥其实禹是名故张晏云少昊已前天下之号象其德颡顓已来天下之号因其名又按系本鲧取有莘氏女谓之女志是生高密宋忠云高密禹所封国正义帝王纪云父鲧妻修已见流星贯?梦接意感又吞神珠薏苡胷坼而生禹名文命字密身九尺二寸长本西夷人也大戴礼云高阳之孙鲧之子曰文命扬雄蜀王本纪云禹本汶山郡广柔县人也生於石纽括地志云茂州汶川县石纽山在县西七十三里华阳国志云今夷人共营其地方百里不敢居牧至今犹不敢放六畜按广柔隋改曰汶川】禹之父曰鲧鲧之父曰帝颡顓【索隐皇甫谧云鲧帝颡顓之子字熙又连山易云鲧封於崇故国语谓之崇伯鲧系本亦以鲧为颡顓子汉书律历志则云颡顓五代而生鲧按鲧既仕尧与舜代系殊悬舜即颡顓六代孙则鲧非是颡顓之子盖班氏之言近得其实】颡顓之父曰昌意昌意之父曰黄帝禹者黄帝之玄孙而帝颡顓之孙也禹之曾大父昌意及父鲧皆不得在帝位为人臣当帝尧之时鸿水?天【索隐一作洪鸿大也以鸟大曰鸿小曰鴈故近代文字大义者皆作鸿】浩浩怀山襄陵下民其忧尧求能治水者羣臣四岳皆曰鲧可尧曰鲧为人负命毁族不可四岳曰等之未有贤於鲧者愿帝试之於是尧听四岳用鲧治水九年而水不息功用不成於是帝尧乃求人更得舜舜登用摄行天子之政巡狩行视鲧之治水无状【索隐言无功状】乃殛鲧於羽山以死【正义殛音纪力反鲧之羽山化为黄熊入于羽渊熊音乃来反下三点为三足也束皙发蒙记云鼈三足曰熊】天下皆以舜之诛为是於是舜举鲧子禹而使续鲧之业尧崩帝舜问四岳曰有能成美尧之事者使居官皆曰伯禹为司空可成美尧之功舜曰嗟然命禹女平水土维是勉之禹拜稽首让於契后稷臯陶舜曰女其往视尔事

矣禹为人敏给克勤其德不违其仁可亲其言可信声为律【索隐言禹声音应钟律】身为度【集解王肃曰以身为法度索隐按今巫犹称禹步】称以出【集解徐广一作士索隐按大戴礼见作士又一解云上声与身为律度则权衡亦出於其身故云称以出也】亹亹穆穆为纲为纪禹乃遂与益后稷奉帝命命诸侯百姓兴人徒以傅土行山表木【集解駉案尚书传字作敷马融曰敷分也索隐大戴礼作传土故此纪依之传即付也谓付功属役之事谓令人分布理九州之土地也表木谓刊木立为表记尚书作随山刊木】定高山大川【集解马融曰定其差秩祀礼所视也駉案尚书大传曰高山大川五岳四渎之属】禹伤先人父鲧功之不成受诛乃劳身焦思居外十三年过家门不敢入薄衣食致孝于鬼神【集解马融曰祭祀丰洁】卑宫室致费於沟洫【集解包氏曰方里为井井间有沟沟广深四尺十里为成成间有洫洫广深八尺】陆行乘车水行乘船泥行乘橇【集解徐广曰他书作藪駉案孟康曰橇形如箕撻行泥上如淳曰橇音茅藪之藪谓以板置其泥上以通行路也正义按橇形如船而短小两头微起人曲一脚泥上撻进用拾泥上之物今杭州温州海边有之也】山行乘橦【集解徐广曰橦一作桥音丘遥反駉案如淳曰橦车谓以铁如锥头长半寸施之履下上山不蹉跌也又音纪录反正义按上山前齿短後齿长下山前齿长後齿短也橦音与上同也】左準绳右规矩【集解王肃曰左右言常用也索隐左所运用堪为人之準绳右所举动必应规矩也】载四时【集解王肃曰所以行不违四时之宜也】以开九州通九道陂九泽度九山令益予衆庶稻可种卑湿命后稷予衆庶难得之食食少调有余相给以均诸侯禹乃行相地宜所有以贡及山川之便利禹行自冀州始冀州既载【正义按理水及贡赋从帝都为始也黄河自胜州东直南至华陰即东至怀州南又东北至平州碣石山入海也东河之西南河之东南河之北皆冀州也】壶口治梁及岐【集解孔安国曰冀州尧所都也先施贡赋役载於书也郑玄曰两河间曰冀州地理志壶口在河东北屈梁山在左冯翊夏阳岐山在右扶风美阳正义括地志云壶口山在慈州吉昌县西南五十里冀州境也梁山在同州韩城县东南十九里岐山岐州岐山县东北十里二山雍州境也孔安国曰从东循山理水而西也】既修太原至于岳阳【集解孔安国曰太原今为郡名太岳在太原西南山南曰阳索隐岳太岳即冀州之镇霍太山也按地理志霍太山在河东彘县东凡如此类不引书者皆地理志文正义括地志云霍山在沁州沁原县西七八十里】覃怀致功【集解孔安国曰覃怀近河地名郑玄曰怀县属河内索隐按河内有怀县今验地无名覃者盖覃怀二字或当时共为一地之名】至於衡漳【集解孔安国曰漳水横流索隐案孔注以衡为横非王肃云衡漳二水名地理志清漳水出上党沾县东北至阜城县入河浊漳水出上党长子县东至邺入清漳也正义括地志云故怀城在怀州武陟县西十一里衡漳水在瀛州东北百二十五里平舒县界也】其土白壤【集解孔安国曰土无块曰壤】赋上上错【集解孔安国曰上上第一错杂也杂出第二之赋】田中中【集解孔安国曰九州之中为第五】常卫既从大陆既为【集解郑玄曰地理志恒水出恒山卫水在灵壽大陆泽在钜鹿索隐此文改恒山恒水皆作常避汉文帝讳故也常水出常山上曲阳县东入滹水卫水出常山灵壽县东入滹沱】鸟夷皮服【集解郑玄曰鸟夷东北之民搏食鸟兽者孔安国曰服其皮明水害除正义括地志云靺鞨国古肃慎也在京东北万里已下东及北各抵大海其国南有白山鸟兽草木皆白其人处山林间土气极寒常为穴居以深为贵至接九梯养豕食肉衣其皮冬以猪膏涂身厚数分以御风寒贵臭秽不洁作厕於中圜之而居多勇力善射弓长四尺如弩矢用楛长一尺八寸青石为镞葬则交木作椁杀猪积椁上富者至数百贫者数十以为死人之粮以土上覆之以绳系於椁

头出土上以酒灌酹绳腐而止无四时祭祀也】夹右碣石【集解孔安国曰碣石海畔山也】入于海【集解徐广曰海一作河索隐地理志云碣石山在北平骊城县西南太康地理志云乐浪遂城县有碣石山长城所起又水经云在辽西临渝县南水中盖碣石山有二此云夹右碣石入於海当非北平之碣石】济河维沅州【集解郑玄二言沅州之界在此两水之间】九河既道【集解马融曰九河名徒骇太史马颊覆釜胡苏简沽钩盘鬲津】雷夏既泽雍沮会同【集解郑玄曰雍水沮水相触而合入此泽中地理志曰雷泽在济陰城阳县西北索隐尔雅云水自河出为雍也正义括地志云雷夏泽在濮州雷泽县郭外西北雍沮二水在雷泽西北平地也】桑土既蚕於是民得下丘居土【集解孔安国曰大水去民下丘居平土就桑蚕】其土黑坟【集解孔安国曰色黑而坟起】草繇木条【集解孔安国曰繇茂条长也】田中下【集解孔安国曰第六】赋贞作十有三年乃同【集解郑玄曰贞正也治此州正作不休十三年乃有赋与八州同言功难也其赋下下】其贡漆丝其筐织文【集解孔安国曰地宜漆林又宜桑蚕织文锦绮之属盛之筐筐而贡焉】浮於济漯通於河【集解郑玄曰地理志云漯水出东郡东武阳索隐济水出河东垣县王屋山东其流至济陰故应劭云济水出平原漯陰县东漯水出东郡东武阳县北至千乘县而入于海】海岱维青州【集解郑玄曰东自海西至岱东岳曰岱山正义按舜分青州为营州辽西及辽东】嵎夷既略【集解马融曰嵎夷地名用功少曰畧索隐孔安国曰东表之地称嵎夷按今文尚书及帝命验并作禺鍤在辽西鍤古夷字也】淮溜既道【集解郑玄曰地理志淮水出琅邪溜水出泰山莱芜县原山正义括地志云密州莒县山淮水所出溜州溜川县东北七十里原山溜水所出俗传云禹理水功毕土石黑数里之中波若漆故谓之溜水也】其土白坟海滨广泻【集解徐广曰一作泽又作斥】厥田斥卤【集解郑玄曰斥谓地咸卤索隐卤音鲁说文云卤咸地东方谓之斥西方谓之卤】田上下赋中上【集解孔安国曰田第三赋第四】厥贡盐絺海物维错【集解孔安国曰絺细葛错杂非一种郑玄曰海物海鱼也鱼种类尤杂】岱畎丝枲鈆松怪石【集解孔安国曰畎谷也怪异好石似玉者岱山之谷出此五物皆贡之】莱夷为牧【集解孔安国曰莱夷地名可以牧放索隐按左传云莱人劫孔子孔子称夷不乱华又云齐侯伐莱服?以为东莱黄县是今按地理志黄县有莱山恐即此地之夷】其筐?丝【集解孔安国曰?桑蚕?中为琴瑟弦索隐尔雅云槩山桑是蚕食槩之?也】浮於汶通於济【集解郑玄曰地理志汶水出泰山莱芜县原山西南入济】海岱及淮维徐州【集解孔安国曰东至海北至岱南及淮】淮沂其治蒙羽其艺【集解郑玄曰地理志沂水出泰山盖县蒙羽二山名孔安国曰二水已治二山可以种艺索隐水经云淮水出南阳平氏县胎簪山北过桐柏山沂水出泰山盖县艾山南过下邳县入泗蒙山在泰山蒙陰县西羽山在东海祝其县南殳鯨之地】大野既都【集解郑玄曰大野在山阳钜野北名钜野泽孔安国曰水所停曰都】东原底平【集解郑玄曰东原地名今东平郡即东原索隐张华博物志云兖州东平郡即尚书之东原也正义广平曰原徐州在东故曰东原水去已致平复言可耕种也】其土赤埴坟【集解徐广曰埴黏土也】草木渐包【集解孔安国曰渐长进包丛生也】其田上中赋中中【集解孔安国曰田第二赋第五】贡维土五色【集解郑玄曰土五色者所以为太社之封正义韩诗外传云天子社广五丈东方青南方赤西方白北方黑上冒以黄土将封诸侯各取方土苴以白茅以为社也太康地记云城阳姑幕有五色土封诸侯锡之茅土用为社此土即禹贡徐州土也今属密州莒县】羽畎夏翟【集解孔安国曰夏翟翟雉名也羽中旌旄羽山之谷有之】峯阳孤桐【集解孔安国曰峯山之阳特生桐中琴瑟郑玄曰地理志峯山在下邳正

义括地志云峰山在兖州邹县南二十二里邹山记云邹山古之峰山言络绎相连属也今犹多桐树按今独生桐尚微一偏似琴瑟】泗滨浮磬【集解孔安国曰泗水涯水中见石可以为磬郑玄曰泗水出济陰乘氏也正义括地志云泗水至彭城吕梁出石磬】淮夷蠙珠泉鱼【集解孔安国曰淮夷二水出蠙珠及美鱼郑玄曰淮夷淮水之上民也索隐按尚书云徂兹淮夷徐戎并兴今徐州言淮夷则郑解为得蠙一作玼并步玄反泉古暨字泉与也言夷人所居淮水之处有此蠙珠与鱼也又作滨滨畔也】其筐玄纁縞【集解郑玄曰纤细也祭服之材尚细正义玄黑纁细縞白纁以细纁染为黑色】浮于淮泗通于河【正义括地志云泗水源在兖州泗水县东陪尾山其源有四道因以为名】淮海维扬州【集解孔安国曰北据淮南距海】彭蠡既都阳鸟所居【集解郑玄曰地理志彭蠡泽在豫章彭泽西孔安国曰随阳之鸟鸿鴈之属冬月居此泽也索隐都古文尚书作猪孔安国云水所停曰猪郑玄云南方谓都为猪则是水聚会之义正义蠡音礼括地志云彭蠡湖在江州浔阳县东南五十二里】三江既入【索隐韦昭云三江谓松江钱塘江浦阳江按地理志有南江中江北江是为三江其南江从会稽吴县南东入海中江从丹阳芜湖东北至会稽阳羡县东入海北江从会稽毗陵县北东入海故下文东为中江又东为北江孔安国云有北有中南可知也】震泽致定【集解孔安国曰震泽吴南太湖名言三江已入致定为震泽索隐震一作振地理志云会稽吴县故周太伯所封国具区在其西古文以为震泽又左传称笠泽亦谓此也正义泽在苏州西四十五里三江者在苏州东南三十里名三江口一江西南上七十里至太湖名曰松江古笠泽江一江东南上七十里曰蚬湖名曰上江亦曰东江一江东北下三百余里入海名曰下江亦曰娄江於其分处号曰三江口顾夷吴地记云松江东北行七十里得三江口东北入海为娄江东南入海为东江并松江为三江是也言理三江入海非入震泽也按太湖西南湖州诸溪从天目山下西北宣州诸山有溪并下太湖太湖东北流各至三江口入海其湖无通彭蠡湖及太湖处并阻山陆诸儒及地志等解三江既入皆非也周礼职方氏云扬州薮曰具区川曰三江按五湖三江者韦昭注非也其源俱不通太湖引解三江既入失之远矣五湖者菱湖游湖莫湖贡湖胥湖皆太湖东岸五湾为五湖盖古时应别今并相连菱湖在莫厘山东周回三十余里西口濶二里其口南则莫厘山北则徐侯山西与莫湖连莫湖在莫厘山西及北北与胥湖连胥湖在胥山西南与莫湖连各周回五六十里西连太湖游湖在北二十里在长山东湖西口濶二里其口东南岸树里山西北岸长山湖周回五六十里贡湖在长山西其口濶四五里口东南长山山南即山阳村西北连常州无锡县老岸湖周回一百九十里已上湖身向东北长七十余里两湖西亦连太湖河渠书云於吴则通渠三江五湖货殖传云夫吴有三江五湖之利又太史公自叙传云登姑苏望五湖是也】竹箭既布【集解孔安国云水去布生】其草惟夭其木惟乔【集解孔安国曰少长曰夭乔高也】其土涂泥【集解马融曰渐洳也】田下下赋下上上杂【集解孔安国曰田第九赋第七杂出第六】贡金三品【集解孔安国曰金银铜郑玄曰金三色也】瑶琨竹箭【集解孔安国曰瑶琨皆美玉也】齿革羽毛【集解孔安国曰象牙犀皮鸟羽旄牛尾也正义周礼考工记云犀甲七属兕甲六属郭云犀似水牛猪头大腹庠脚橢角好食棘也亦有一角者按西南夷常贡旄牛尾为旌旗之饰书诗通谓之旄故尚书云右秉白旄诗云建旄设旄皆此牛也】岛夷卉服【集解孔安国曰南海岛夷草服葛越正义括地志云百济国西南渤海中有大岛十五所皆邑落有人居属百济又倭国武皇后改曰日本国在百济南隔海依岛而居凡百余小国此皆扬州之东岛夷也按东南之夷草服葛越焦竹之属越即苾苾也】其筐织贝【集解孔安国曰织细紵也贝水物也】

郑玄曰贝锦名也诗云成是贝锦凡织者先染其?织之即成矣【集解孔安国曰小曰橘大曰柚锡命乃贡言不常也郑玄曰有锡则贡之或时乏则不贡锡所以柔金也】均江海通淮泗【集解郑玄曰均读曰沿沿顺水行也】荆及衡阳维荆州【集解孔安国曰北据荆山南及衡山之阳】江汉朝宗于海【集解孔安国曰二水经此州而入海有似於朝百川以海为宗宗尊也正义括地志云江水源出岷州南岷山南流至益州即东南流入蜀至泸州东流经三峡过荆州与汉水合孙卿子云江水其源可以滥觞也又云汉水源出梁州金牛县东二十八里嶓冢山】九江甚中【集解孔安国曰江於此州界分为九道甚得地势之中郑玄曰地理志九江在寻阳南皆东合为九江索隐按寻阳记九江者乌江?江乌白江嘉靡江源江岷江廪江提江箴江又张浚九江图所载有三里五岷乌土白?九江之名不同】沱沔已道【集解孔安国曰沱江别名沔水名郑玄曰水出江为沱汉为沔索隐沔亦作潜沱由蜀郡郫县西东入江潜出汉中安阳县西北入汉故尔雅云水自江出为沱汉出为潜正义括地志云繁江水受郫江禹贡曰岷山导江东别为沱源出益州新繁县潜水一名复水今名龙门水源出利州绵谷县东龙门山大石穴下也】云土梦为治【集解孔安国曰云梦之泽在江南其中有平土丘水去可为耕作畎亩之治索隐梦一作曹邹诞生又音蒙按云土梦本二泽名盖人以二泽相近?合称云梦耳知者据左传云昭王寝于云中又楚子郑伯田于江南之梦则是二泽各别也韦昭曰云土今为县属江夏南郡华容今按地理志云江夏有云杜县是】其土涂泥田下中赋上下【集解孔安国曰田第八赋第三】贡羽旄齿革金三品柁干栝栢【集解郑玄曰四木名孔安国曰干栝也栝叶松身曰栝】斲砥斲丹【集解孔安国曰砥细於斲皆磨石也斲石中矢鏃丹朱类也】维箴箠栝【集解徐广曰一作箭足杆杆即栝也音怙箭足者矢鏃也或以箭足训释箴箠乎駟案郑玄曰箴箠聆风也】三国致贡其名【集解马融曰言箴箠栝三国所致贡其名善也】包匭菁茅【集解郑玄曰匭?结也菁茅茅有毛刺者给宗庙缩酒重之故包裹又?结也正义括地志云辰州卢溪县西南三百五十里有包茅山武阳记云山际出包茅有刺而三脊因名包茅山】其筐玄纁玕组【集解孔安国曰此州染玄纁色善故贡之玕珠类生於水中组绶类也】九江入赐大龟【集解孔安国曰尺二寸曰大龟出於九江山中龟不常用赐命而纳之】浮於江沱沔於汉踰于雒至於南河荆河惟豫州【集解孔安国曰西南至荆山北距河水正义括地志云荆山在襄州荆山县西八十里韩子云卞和得玉璞於楚之荆山即此也河洛州北河也】伊雒瀍涧既入於河【集解孔安国曰伊出陆浑山洛出上洛山涧出澠池山瀍出河南北山四水合流而入河索隐伊水出弘农卢氏县东洛水出弘农上洛县冢岭山瀍水出河南谷成县替亭北涧水出弘农新安县东皆入于河正义括地志云伊水出虢州卢氏县东冢山东北流入洛洛水出商州洛南县冢岭山东流经洛州郭内又各合伊水瀍水出洛州新安县东南流至洛州郭内南入洛涧水源出洛州新安县东白石山东北与谷水合流经洛州郭内东流入洛也】荥播既都【集解孔安国曰荥泽名波水已成遏都索隐古文尚书作荥波此及今文并云荥播播是水播溢之义荥是泽名故左传云狄及卫战於荥泽郑玄云今塞为平地荥阳人犹谓其处为荥播】道荷泽被明都【集解孔安国曰荷泽在胡陵明都泽名在河东北水流洪覆被之索隐荷泽在济陰定陶县东明都音孟猪孟猪泽在梁国睢阳县东北尔雅左传谓之诸今文亦为然唯周礼称望诸皆此地之一名正义括地志云荷泽在曹州济陰县东北九十里定陶城东今名龙池亦名九卿陂】其土壤下土坟垆【集解孔安国曰垆疏也马融曰豫州地有三等下者坟垆也】田中上赋杂上中【集解孔安国曰田第四赋第二又杂出第一】贡漆丝絺紵其筐織絮

【集解孔安国曰细绵也】锡贡磬错【集解孔安国曰治玉石曰错治磬错也】浮於雒达於河华阳黑水惟梁州【集解孔安国曰东据华山之南西距黑水正义括地志云黑水源出梁州城固县西北太山】汶嶓既艺【集解郑玄曰地理志岷山在蜀郡湔氐道嶓冢山在汉阳西索隐汶一作?又作??山封禅书一云读在蜀郡湔氐道西徼江水所出嶓冢山在陇西西县汉水所出也正义括地志云岷山在岷州溢乐南一里连绵至蜀二千里皆名岷山嶓冢山在梁州金牛县东二十八里湔音子践反氐音丁奚反】沱涔既道【集解孔安国曰沱潜发源此州入荊州】蔡蒙旅平【集解孔安国曰蔡蒙二山名祭山曰旅平言治功毕也郑玄曰地理志蔡蒙在汉嘉县索隐此非徐州之蒙在蜀郡青衣县青衣後改为汉嘉蔡山不知所在也正义括地志云蒙山在雅州严道县南十里】和夷底绩【集解马融曰和夷地名也】其土青骊【集解孔安国曰色青黑也】田下上赋下中三错【集解孔安国曰田第七赋第八杂出第七第九三等】贡璆铁银镂磬磬【集解孔安国曰璆玉名郑玄曰黄金之美者谓之鏐鏐刚铁可以刻鏐也】熊罴狐狸织皮【集解孔安国曰贡四兽之皮也织皮今罽也】西倾因桓是来【集解马融曰治西倾山因桓水是来言无余道也郑玄曰地理志西倾山在陇西临洮索隐桓水出蜀郡?山西南行羌中入海也正义括地志云西倾山今嶓台山在洮州临洮县西南三百三十六里】浮于潜踰于沔【集解孔安国曰汉上水为沔郑玄曰或谓汉为沔】入于渭乱于河【集解孔安国曰正絶流曰乱】黑水西河惟雍州【集解孔安国曰西距黑水东据河龙门之河在冀州西索隐地理志益州滇池有黑水祠郑玄引地说云三危山黑水出其南山海经黑水出崦嵫墟西北隅也】弱水既西【集解孔安国曰导之西流至於合黎郑玄曰衆水皆东此独西流也索隐水经云弱水出张掖删丹县西北至酒泉会水县入合黎山腹山海经云弱水出崦嵫墟西南隅也】泾属渭汭【集解孔安国曰属逮也水北曰汭言治泾水入于渭也郑玄曰地理志泾水出安定泾阳索隐渭水出首阳县鸟鼠同穴山说文云水相入曰汭正义括地志云泾水源出原州百泉县西南笄头山泾谷渭水源出渭原县西七十六里鸟鼠山今名青雀山渭有三源并出鸟鼠山东流入河按言理泾水及至渭水又理漆沮亦从渭流复理泂水亦同入渭者也】漆沮既从【正义括地志云漆水源出岐州普闰县东南岐漆山漆溪东入渭沮水一名川水源出雍州富平县东入栌阳县南汉高帝於栌阳置万年县十三州地理志云万年县南有泾渭北有小河即沮水也诗云古公去邠度漆沮即此二水】泂水所同【集解泂音丰孔安国曰漆沮之水已从入渭泂水所同同於渭也索隐漆沮二水漆水出右扶风漆县西沮水地理志无文而水经以沮水出北地直路县东过冯翊祿县入洛说文亦以漆沮各是一水名孔安国独以为一又云是洛水泂水出右扶风鄠县南东北过上林苑正义括地志云雍州鄠县终南山泂水出焉】荆岐已旅【集解孔安国曰荆在岐东非荊州之荆也正义括地志云荆山在雍州富平县今名掘陵原岐山在岐州岐山县东北十里尚书正义云洪水时祭祀礼废已旅祭言理水功毕也按雍州荆山即黄帝及禹铸鼎地也襄州荆山县西荆山即卞和得玉璞者】终南敦物至于鸟鼠【集解孔安国曰三山名言相望也郑玄曰地理志终南敦物皆在右扶风武功也索隐按左传中南山杜预以为终南山地理志云太一山古文以为终南华山古文以为敦物皆在扶风武功县东正义括地志云终南山一名中南山一名太一山一名南山一名橘山一名楚山一名秦山一名周南山一名地肺山在雍州万年县南五十里】原隰底绩至于都野【集解郑玄曰地理志都野在武威名曰休屠泽正义原隰豳州地也按原高平地也隰低下地也言从渭州致功西北至凉州都野沙州三危山也括地志云都野泽在凉州姑臧县东北二百八十里】三危既度【

索隐郑玄引河图及地说云三危山在鸟鼠西南与岐山相连度刘伯庄音田各反尚书作宅】三苗大序【集解孔安国曰西裔之山已可居三苗之族大有次序禹之功也】其土黄壤田上上赋中下【集解孔安国曰田第一赋第六人功少】贡璆琳琅玕【集解孔安国曰璆琳皆玉名琅玕石名而似珠者】浮于积石至于龙门西河【集解孔安国曰积石山在金城西南河所经也龙门山在河东之西界索隐积石在金城河关县西南龙门山在左冯翊夏阳县西北正义括地志云积石山今名小积山在河州抱罕县西七里河州在京西一千四百七十二里龙门山在同州韩城县北五十里李奇云禹凿通河水处广八十步三秦记云龙门水悬船而行两旁有山水陆不通龟鱼集龙门下数千不得上上则为龙故云暴鳃点额龙门下按河在冀州西故云西河也禹发源河水小积石山浮河东北下历灵胜北而南行至於龙门皆雍州地也】会于渭汭【正义水经云河水又南至潼关渭水从西注之也】织皮昆仑析支渠搜西戎即序【集解孔安国曰织皮毛布此四国在荒服之外流沙之内羌髳之属皆就次序之美禹之功及戎狄也索隐郑玄以为衣皮之人居昆仑析支渠搜三山皆在西戎王肃曰昆仑在临羌西析支在河关西西戎西域王肃以为地名而不言渠搜今按地理志金城临羌县有昆仑祠敦煌广至县有昆仑障朔方有渠搜县】道九山【索隐汧壶口砥柱太行西倾熊耳嶓冢内方岐是九山也古分为三条故地理志有北条之荆山马融以汧为北条西倾为中条嶓冢为南条郑玄分四列汧为陰列西倾次陰列嶓冢为阳列?山次阳列】汧及岐至于荆山【集解郑玄曰地理志汧在右扶风也索隐汧一作岍按有汧水故其字或从山或从水犹岐山然也地理志云吴山在右扶风美阳县西荆山在左冯翊怀德县南也正义括地志云汧山在陇州汧源县西六十里其山东隣汶岫西接陇冈汧水出焉岐山在岐州】踰于河壶口雷首【索隐雷首山在河东蒲坂县东南】至于太岳【集解孔安国曰三山在冀州太岳在上党西也索隐即霍太山也已见上正义括地志云壶口在慈州吉昌县西南雷首山在蒲州河东县太岳霍山也在沁州沁源县】砥柱析城至于王屋【集解孔安国曰此三山在冀州之南河之北索隐析城山在河东濩泽县西南王屋山在河东垣县东北水经云砥柱山在河东大阳县南河水中也正义括地志云底柱山俗名三门山硖石县东北五十里黄河之中孔安国云底柱山名河水分流包山而过山见水中若柱然也括地志云析城山在泽州西南七十里注水经云析城山甚高峻上平坦有二水东浊西清左右不生草木括地志云王屋山在怀州王屋县北十里古今地名云山方七百里山高万仞本冀州之河阳山也】太行常山至于碣石入于海【集解孔安国曰此二山连延东北接碣石而入于沧海索隐太行山在河内山阳县西北常山恒山是也在常山郡上曲阳县西北正义括地志云太行山在怀州河内县北二十五里有羊肠坡恒山在定州恒阳县西北百四十里道书福地记云恒山高三千三】

【百丈上方二十里有太玄之泉神草十九种可度俗】西倾朱圉鸟鼠至于太华【集解郑玄曰地理志云朱圉在汉阳南太华山在弘农华陰南孔安国曰鸟鼠山渭水所出在陇西之西索隐圉一作囿朱圉山在天水冀县南鸟鼠山在陇西首阳县西南太华即敦物山】熊耳外方桐栢至于负尾【集解郑玄曰地理志熊耳在卢氏东外方在颍川嵩高山桐栢山在南阳平氏东南陪尾在江夏安陆东北若横尾者索隐熊耳山在弘农卢氏县东伊水所出外方山即颍川嵩高县嵩高山古文尚书亦以为外方山桐栢山一名大复山在南阳平氏县东南陪尾山在江夏安陆县东北地理志谓之横尾山负音陪也正义括地志云华山在华州华陰

县界八里熊耳山在虢州卢氏县南五十里嵩高山亦名太室山亦名外方山在洛州城阳县北二十三里也桐栢山在唐州东南五十里淮水出焉横尾山古陪尾山也在安州安陆县北六十里】道嶓冢至于荆山【集解郑玄曰地理志荆山在南郡临沮正义括地志云嶓冢山在梁州荆山在襄州荆山县西八十里也又云荆山县本汉临沮县地也沮水即汉水也按县孙叔敖激沮水为云梦泽是也】内方至于大别【集解郑玄曰地理志内方在竟陵名立章山大别在庐江安丰县索隐内方山在竟陵县东北大别山在六安国安丰县今土人谓之甌山正义括地志云章山在荆州长林县东北六十里今汉水附章山之东与经史符合按大别山今沙洲在山上汉江经其左今俗犹云甌山注云在安丰非汉所经也】汶山之阳至于衡山【索隐在长沙湘南县东南广雅云岫嵎谓之衡山正义括地志云岷山在茂州汶川县衡山在衡州湘潭县西四十一里】过九江至于敷浅原【集解徐广曰浅一作灭駟孔安国曰敷浅原一名博阳山在豫章】道九川【索隐弱黑河瀋江沅淮渭洛为九川】弱水至于合黎【集解郑玄曰地理志弱水出张掖孔安国曰合黎水名在流沙东索隐水经云合黎山在酒泉会水县东北郑玄引地说亦以为然孔安国云水名当是其山出弱水故所记各不同正义括地志云兰门山一名合黎一名穷石山在甘州删丹县西南七里淮南子云弱水源出穷石山又云合黎一名羌谷水一名鲜水一名覆表水今名副投河亦名张掖河南自吐谷浑界流入甘州张掖县今按合黎水出临路松山东而北流历张掖故城下又北流经张掖县二十三里又北流经合黎山折而北流经流沙碛之西入居延海行千五百里合黎山张掖县西北二百里也】余波入于流沙【集解孔安国曰弱水余波西溢入流沙郑玄曰地理志流沙居延西北名居延泽地记曰弱水西流入合黎山腹余波入于流沙通於南海马融王肃皆云合黎流沙是地名索隐地理志张掖居延县西北有居延泽古文以为流沙广志流沙在玉门关外有居延泽居延城又山海经云流沙出锺山西南行昆仑墟入海按是地兼有水故一云地名一云水名马郑不同抑有由也】道黑水至于三危入于南海【集解郑玄曰地理志益州滇池有黑水祠而不记此山水所在地记曰三危山在鸟鼠之西南孔安国曰黑水自北而南经三危过梁州入南海也正义括地志云黑水源出伊吴县北百二十里又南流二十里而絶三危山在沙州炖煌县东南四十里按南海即扬州东大海岷江下至扬州东入海也其黑水源在伊州从伊州东南三千余里至鄯州鄯州东南四百余里至河州入黄河河州有小积石山即禹贡浮於积石至于龙门者然黄河源从西南下出大崑仑东北隅东北流经于阗入盐泽即东南潜行入吐谷浑界大积石山又东北流至小积石山又东北流来处极远其黑水当洪水时合从黄河而行何得入于南海南海去此甚远阻隔南山陇山岷山之属当是洪水浩浩处西戎不深致功古文故有疏畧也】道河积石【索隐尔雅云河出昆仑墟其色白汉书西域传云河有两源一出葱岭一出于阗于阗河北流与葱岭河合东注蒲昌海一名盐泽其水停冬夏不增减其南出积石为中国河是河源发昆仑禹导河自积石而加功也】至于龙门南至华陰【集解孔安国曰至华陰山北而东行正义华陰县在华山北本魏之陰晋县秦惠文王更名寧秦汉高帝改曰华陰】东至砥柱【集解孔安国曰砥柱山名河水分流包山而过山见水中若柱然也在西虢之界正义砥柱山俗名三门山禹凿北山三道河水故曰三门也】又东至于盟津【集解孔安国曰在洛北索隐盟古孟字孟津在河阳十三州记云河阳县在於河上即孟津是也正义杜预云盟河内郡河阳县南孟津也在洛阳城北都道所湊古今为津武王渡之近代呼为武济括地志云盟津周武王伐纣与八百诸侯会盟津亦曰孟津又曰富平津水经云小平津今云河阳津是也】东过雒汭至于大邳【集解孔安国曰洛

汭洛入河处山再成曰邳索隐尔雅云山一成曰邳或以为成臯山是正义李巡云山再重曰英一重曰邳括地志云大邳山今名黎阳东山又曰青坛山在卫州黎阳南七里张揖云今成臯非也】北过降水至于大陆【集解郑玄曰地理志降水在信都南孔安国曰大陆泽名索隐地理志绌水字从系出信都国与虢池漳河水并流入海大陆在钜鹿郡尔雅云晋有大陆郭璞以为此泽也正义括地志云降水源出潞州屯留县西南方东北流冀州入海】北播为九河同为逆河【集解郑玄曰下尾合名曰逆河言相逆受也】入于海【正义播布也河至冀州分布为九河下至沧州更同合为一大河名曰逆河而夹右碣石入于渤海也】蟠冢道潏东流为汉【集解郑玄曰地理志潏水出洺西氏道至武都为汉至江夏谓之夏水索隐水经云潏水出洺西氏道县蟠冢山东至武都沮县为汉水地理志云至江夏谓之夏水山海经亦以汉出蟠冢山故孔安国云泉始出山为潏水东南流为洺水至汉中东行为汉水正义括地志云蟠冢山水始出山沮洳故曰沮水东南为潏水又为洺水至汉中为汉水至均州为沧浪水始欲出大江为夏口又为洺口汉江一名洺江也】又东为沧浪之水【集解孔安国曰别流也在荆州索隐马融郑玄皆以沧浪为夏水即汉河之别流也渔父謠曰沧浪之水清兮可以濯吾缨是此水也正义括地志云均州武当县有沧浪水庾仲雍汉水记云武当县西四十里汉水中有洲名沧浪洲也地记云水出荆山东南流为沧浪水】过三澨入于大别【集解孔安国曰三澨水名郑玄曰在江夏竟陵之界索隐水经云三澨地名在南郡郢县北孔安国郑玄以为水名今竟陵有三参水俗云是三澨水参音去声】南入于江东汇泽为彭蠡【集解孔安国曰汇圉也水东回为彭蠡大泽】东为北江入于海【集解孔安国曰自彭蠡江分为三道入震泽遂为北江而入海】汶山道江东别为沱又东至于醴【集解孔安国及马融王肃皆以醴为水名郑玄曰醴陵名也大阜曰陵长沙有醴陵县索隐按骚人所歌濯余佩於醴浦明醴是水孔安国马融解得其实又虞喜志林以醴是江沅之别流而醴字作澧也】过九江至于东陵【集解孔安国曰东陵地名】东迤北会于汇【集解孔安国曰迤溢也东溢分流都共北会彭蠡】东为中江入于海【集解孔安国曰有北有中南可知也正义括地志云禹贡三江俱会於彭蠡合为一江入于海】道沔水东为济入于河洙为荥【集解郑玄曰地理志沔水出河东垣县王屋山东至河内武德入河洙为荥孔安国曰济在温西北荥泽在敖仓东南索隐水经云自河东垣县王屋山东流为沔水至温县西北为济水正义括地志云沔水出怀州王屋县北十里王屋山顶岩下石泉亭不流其深不测至县西北二里平地其源重发而东南流为沔水水经云沔东至温县西北为洧水又南当巩之北南入于河释名云济者济也下济子细反按济水入河而南截度河南岸溢荥泽在郑州荥泽县西北四里今无水成平地】东出陶丘北【集解孔安国曰陶丘丘再成者也郑玄曰地理志陶丘在济陰定陶西北正义括地志云陶丘在濮州鄆城西南二十四里又云在曹州城中徐才宗国都城记云此城中高丘即古之陶丘】又东至于荷【集解孔安国曰荷泽之水】又东北会于汶【正义汶音问地理志云汶水出泰山郡莱芜县原山西南入济】又北东入于海道淮自桐栢【正义地理志云桐栢山在南阳平氏县东南淮水所出按在唐州东五十余里】东会于泗沂东入于海【集解孔安国曰与泗沂二水合入海也】道渭自鸟鼠同穴【集解孔安国曰鸟鼠共为雌雄同穴处此山遂名曰鸟鼠渭水出焉正义括地志云鸟鼠山今名青雀山在渭州渭源县西七十六里山海经云鸟鼠同穴之山渭水出焉郭璞注云今在陇西首阳县西南山有鸟鼠同穴鸟名?鼠名獾如人家鼠而短尾?似鷄而小黄黑色穴入地三四尺鼠在内鸟在外?音余獾扶废反鷄音丁刮反似雉也】东会于沔【正义沔音丰括地志云雍州郿县终

南山沔水出焉北入渭也】又东北至于泾【正义括地志云泾水出原州百泉县西南笄头山泾谷东南流入渭也】东过漆沮入于河【集解孔安国曰漆沮二水名亦曰洛水出冯翊北】道雒自熊耳【集解孔安国曰在宜阳之西正义括地志云洛水出商州洛南县西冢岭山东北流入河熊耳山在虢州卢氏县南五十里洛所经】东北会于涧瀍【集解孔安国曰会于河南城南正义括地志云涧水出洛州新安县东白石山之陰地理志云瀍水出河南谷城县替亭北东南入于洛】又东会于伊【集解孔安国曰会於洛阳之南】东北入于河【集解孔安国曰合於巩之东也】於是九州攸同四奥既居【集解孔安国曰四方之宅已可居也】九山棗旅【集解孔安国曰九州名山已槎木通道而旅祭也】九川涤原【集解孔安国曰九州之川已涤除无壅塞也】九泽既陂【集解孔安国曰九州之泽皆已陂障无决溢也】四海会同六府甚修【集解孔安国曰六府金木水火土谷】衆土交正致慎财赋【集解郑玄曰衆土美恶及高下得其正矣亦致其贡篚慎奉其财物之税皆法定制而入之也】咸则三壤成赋【集解郑玄曰三壤上中下各三等也】中国赐土姓祗台德先不距朕行【集解郑玄曰中即九州也天子建其国诸侯胙之土赐之姓命之氏其敬悦天子之德既先又不距违我天子政教所行】令天子之国以外五百里甸服【集解孔安国曰为天子之服治田去王城面五百里内】百里赋纳总【集解孔安国曰甸内近王城者禾稌曰总饲供国马也索隐说文云总聚束草也】二百里纳銍【集解孔安国曰所銍刈谓禾穗索隐说文云銍获禾短鎌也】三百里纳秸服【集解孔安国曰秸稌也服藁役索隐礼郊特牲云蒲越稌秸之美则秸是稌之类也】四百里粟五百里米【集解孔安国曰所纳精者少麤者多】甸服外五百里侯服【集解孔安国曰侯侯也斥侯而服事也】百里采【集解马融曰采事也各受王事者】二百里任国【集解孔安国曰任王事者】三百里诸侯【集解孔安国曰三百里同为王者斥侯故合三为一名】侯服外五百里绥服【集解孔安国曰绥安也服王者政教】三百里揆文教【集解孔安国曰揆度也度王者文教而行之三百里皆同】二百里奋武卫【集解孔安国曰文教外之二百里奋武卫天子所以安】绥服外五百里要服【集解孔安国曰要束以文教也】三百里夷【集解孔安国曰守平常之教事王者而已】二百里蔡【集解马融曰蔡法也受王者刑法而已】要服外五百里荒服【集解马融曰政教荒忽因其故俗而治之】三百里蛮【集解马融曰蛮慢也礼简怠慢来不距去不禁】二百里流【集解马融曰流行无城郭常居】东渐于海西被于流沙朔南暨【集解郑玄曰朔北方】声教讫于四海於是帝锡禹玄圭以告成功于天下【正义帝尧也玄水色以禹理水功成故锡玄圭以表显之自此以上并尚书禹贡文】天下於是太平治皐陶作士以理民帝舜朝禹伯夷皐陶相与语帝前皐陶述其谋曰信其道德谋明辅和禹曰然如何皐陶曰於【正义音乌叹美之辞】慎其身修【正义以为絶句】思长【集解孔安国曰慎修其身思为长久之道】敦序九族衆明高翼近可远在已【集解郑玄曰次序九族而亲之以衆明作羽翼之臣此政由近可以及远也】禹拜美言曰然皐陶曰於在知人在安民禹曰吁皆若是惟帝其难之【集解孔安国曰言帝尧亦以为难】知人则智能官人能安民则惠黎民怀之能知能惠何忧乎驩兜何迁乎有苗何畏乎巧言善色佞人【集解郑玄曰禹为父隐故言不及鯀】皐陶曰然於亦行有九德亦言其有德乃言曰始事事【集解孔安国曰言其人有德必言其所行事因事以为验】宽而栗【集解孔安国曰性寬弘而能庄栗】柔而立【集解孔安国曰和柔而能立事】愿而共【集解孔安国曰慤愿而敬】治而敬扰而毅【集解徐广曰扰一作柔駟案孔安国曰扰顺也致果为毅】直而温简而廉刚而实强而义章其有常吉哉【

集解孔安国曰章明也吉善也】日宣三德蚤夜翊明有家【集解孔安国曰三德九德之中有其三也卿大夫称家明行之可以为卿大夫】日严振敬六德亮采有国【集解孔安国曰严敬也行六德以信治政事可为诸侯也马融曰亮信采事也】翕受普施九德咸事俊乂在官【集解孔安国曰翕合也能合受三六之德而用之以布施政教使九德之人皆用事谓天子也如此则俊德理能之士并皆在官也】百吏肃谨毋教邪淫奇谋非其人居其官是谓乱天事【索隐此取尚书皋陶谟为文断绝殊无次序即班固所谓踈畧抵牾是也今亦不能深考】天讨有罪五刑五用哉【集解孔安国曰言用五刑必当】吾言底可行乎禹曰女言致可绩行皋陶曰余未有知思赞道哉【正义皋陶云我未有所知思之审赞於古道耳谦辞也已上并尚书皋陶谟文畧其经不全备也】帝舜谓禹曰汝亦昌言禹拜曰於予何言予思曰孳孳皋陶难禹曰何谓孳孳禹曰鸿水滔天浩浩怀山襄陵下民皆服於水予陆行乘车水行乘舟泥行乘橇山行乘撵行山茱木【正义行寒孟反茱口寒反】与益予衆庶稻鲜食【集解孔安国曰鸟兽新杀曰鲜索隐予音与上与谓同与之与下予谓施予之予此禹言其与益施予衆庶之稻粮】以决九州致四海浚畎浹【集解郑玄曰畎浹田间沟也】致之川与稷予衆庶难得之食食少调有余补不足徙居衆民乃定万国为治皋陶曰然此而美也禹曰於帝慎乃在位安尔止【集解郑玄曰安汝之所止无妄动动则扰民】辅德天下大应清意以昭待上帝命天其重命用休【集解郑玄曰天将重命汝以美应谓符瑞也】帝曰吁臣哉臣哉臣作朕股肱耳目予欲左右有民女辅之【集解马融曰我欲左右助民汝当翼成我也】余欲观古人之象日月星辰作文绣服色女明之予欲闻六律五声八音来始滑以出入五言女听【集解駉案尚书滑字作留音忽郑玄曰留者臣见君所秉书思对命者也君亦有焉以出纳政教於五官索隐古文尚书作在治忽今文作采政忽先儒各随字解之今此云来始滑於义无所通盖来采字相近滑忽声相乱始又与治相似因误为来始滑今依今文音采政忽三字刘伯庄云听诸侯能为政及忽怠者是也五言谓仁义礼智信五德之言郑玄以为出纳政教五官非也】予即辟女匡拂予女无面谀退而谤予敬四辅臣【集解駉案尚书大传曰古者天子必有四邻前曰疑後曰丞左曰辅右曰弼】诸衆谗嬖臣君【集解徐广曰臣一作吾索隐诸衆谗嬖臣为一句君字宜属下文】德诚施皆清矣禹曰然帝即不时布同善恶则毋功【集解孔安国曰帝用臣不是则贤愚并位优劣同流故也】帝曰【正义此二字及下禹曰尚书并无太史公有四字帝及禹相答极为次序当应别见书】毋若丹朱傲维慢游是好母水行舟朋淫于家【集解郑玄曰朋淫淫内内】用絶其世予不能顺是禹曰予辛壬娶涂山癸甲生啓【集解孔安国曰涂山国名辛日娶妻至於甲四日复往治水索隐杜预云涂山在壽春东北皇甫谧云今九江当涂有禹庙则涂山在江南也系本日涂山氏女名女嬀是禹娶涂山氏号女嬀也又按尚书云娶于涂山辛壬癸甲啓而泣予弗子今此云辛壬娶涂山癸甲生啓盖今文尚书脱陋太史公取为言亦不稽其本意岂有辛壬娶妻经二日生子不经之甚】予不子【正义此三字为一句禹辛日娶至甲四日往理水及生啓不入门我不得名子以故能成水土之功又一云过门不入不得有子爱之心帝系云禹娶涂山氏之子谓之女嬀是生啓也】以故能成水土功辅成五服至于五千里州十二师外薄四海【集解孔安国曰薄迫言至海也正义尔雅云九夷八狄七戎六蛮谓之四海释名云海晦也按夷蛮晦昧无知故云四海也】咸建五长【集解孔安国曰诸侯五国立贤者一人为方伯谓之五长以相统治】各道有功苗顽不即功【集解孔安国曰三苗顽凶不得就官善恶分别】帝其念哉帝曰道吾德乃女功序之也皋陶於是敬禹之德令民皆则禹不如言刑从之【索隐谓不

用命之人则亦以刑罚从之】舜德大明於是夔行乐祖考至羣后相让鸟兽翔舞箫韶九成凤皇来仪【集解孔安国曰箫韶舜乐名备乐九奏而致凤皇也】百兽率舞百官信谐帝用此作歌曰陟天之命维时维几【集解孔安国曰奉正天命以临民惟在顺时惟在慎微】乃歌曰股肱喜哉元首起哉百工熙哉【集解孔安国曰股肱之臣喜乐尽忠君之治功乃起百官之业乃广】皋陶拜手稽首扬言曰念哉【集解郑玄曰使羣臣念帝之戒】率为兴事慎乃宪敬哉【集解孔安国曰率臣下为起治之事当慎汝法度敬其职】乃更为歌曰元首明哉股肱良哉庶事康哉又歌曰元首丛脞哉股肱惰哉万事堕哉【集解孔安国曰丛脞细碎无大略也君如此则臣懈惰万事堕废也】帝拜曰然往钦哉於是天下皆宗禹之明度数声乐【集解徐广曰舜本纪云禹乃兴九韶之乐】为山川神主帝舜荐禹於天为嗣十七年【集解刘熙曰若此则舜格于文祖三年之後摄禹使得祭祀与】而帝舜崩三年丧毕禹辞避舜之子商均於阳城【集解刘熙曰今颍川阳城是也】天下诸侯皆去商均而朝禹禹於是遂即天子位【集解皇甫谧曰都平阳或在安邑或在晋阳】南面朝天下国号曰夏后姓姁氏【集解駰案礼纬曰祖以吞薏苡生】帝禹立而举皋陶荐之且授政焉而皋陶卒【正义帝王纪云皋陶生於曲阜曲阜偃地故帝因之而以赐姓曰偃尧禅舜命之作士舜禅禹禹即帝位以咎陶?贤荐之於天将有禅之意未及禅会皋陶卒括地志云咎繇墓在壽州安丰县南一百三十里故六城东都陂内大冢也】封皋陶之後於英六【集解徐广曰史记皆作英字而以英布是此苗裔索隐地理志六安国六县咎繇後偃姓所封国英地阙不知所在以为黥布是其後也正义英盖蓼也括地志云光州固始县本春秋时蓼国偃姓皋陶之後也左传云子燮灭蓼太康地志云蓼国先在南阳故县今豫州鄆县界故胡城是後徙於此括地志云故六城在壽州安丰县南一百三十二里春秋文五年秋楚成大心灭之】或在许【集解駰案皇覽曰皋陶冢在庐江六县索隐许在颍川正义括地志云许故城在许州许昌县南三十里本汉许县故许国也】而后举益任之政十年帝禹东巡狩至于会稽而崩【集解皇甫谧曰年百岁也】以天下授益三年之丧毕益让帝禹之子啓而辟居箕山之阳【集解駰案孟子阳字作陰刘熙曰密高之北正义按阳即阳城也括地志云阳城县在箕山北十三里又恐箕字误本是嵩字而字相似其阳城县在嵩山南二十三里则为嵩山之阳也】禹子啓贤天下属意焉及禹崩虽授益益之佐禹日浅天下未洽故诸侯皆去益而朝啓曰吾君帝禹之子也於是啓遂即天子之位是为夏后帝啓夏后帝啓禹之子其母涂山氏之女也有扈氏不服【索隐地理志曰扶风鄆县是扈国正义括地志云雍州南鄆县本夏之扈国也地理志云鄆县古扈国有户亭训纂云户扈鄆三字一也古今字不同耳】啓伐之大战於甘【集解马融曰甘有扈氏南郊地名索隐夏啓所伐鄆南有甘亭】将战作甘誓乃召六卿申之【集解孔安国曰天子六军其将皆命卿也】啓曰嗟六事之人【集解孔安国曰各有军事故曰六事】予誓告汝有扈氏威侮五行怠弃三正【集解郑玄曰五行四时盛德所行之政也威侮暴逆之三正天地人之正道】天用剿絶其命【集解孔安国曰剿截也】今予维共行天之罚【集解孔安国曰共奉也】左不攻于左右不攻于右女不共命【集解郑玄曰左车左右车右】御非其马之政女不共命【集解孔安国曰御以正马为政也三者有失皆不奉我命也】用命赏于祖【集解孔安国曰天子亲征必载迁庙之祖主行有功即赏祖主前示不专也】不用命戮于社【集解孔安国曰又载社主谓之社事奔北则戮之社主前社主陰陰主杀也】予则帑戮汝【集解孔安国曰非但止身辱及汝子言耻累也】遂灭有扈氏天下咸朝夏后帝啓崩【集解徐广曰皇甫谧曰夏啓元年甲辰十年癸丑崩】子帝太康立帝太康失

国【集解孔安国曰盘于游田不恤民事为羿所逐不得反国】昆弟五人【索隐皇甫谧云号五观也】须于洛汭作五子之歌【集解孔安国曰太康五弟与其母待太康于洛水之北怨其不反故作歌】太康崩弟中康立是为帝中康帝中康时羲和湎淫废时乱日【集解孔安国曰羲氏和氏掌天地四时之官太康之後沈湎于酒废天时乱甲乙也】胤往征之作胤征【集解孔安国曰胤国之君受王命往征之郑玄曰胤臣名】中康崩子帝相立帝相崩子帝少康立【索隐左传魏庄子曰昔有夏之衰也后羿自鉏迁于穷石因夏人以代夏政恃其射也不修人事而信用伯明氏之谗子寒浞杀羿亨之以食其子子不忍食死于穷门浞因羿室生浇及豷使浇灭斟灌氏及斟寻氏而相为浇所灭后缙归于有仍生少康有夏之臣靡自有鬲收二国之烬以灭促而立少康少康灭浇于过后杼灭豷于戈有穷遂亡然则帝相自被篡弑中间经羿浞二氏盖三数十年而此纪总不言之直云帝相崩子少康立踈畧之甚正义帝王纪云帝羿有穷氏未闻其姓何先帝啻以上世掌射正至啻赐以彤弓素矢封之於鉏为帝司射历虞夏羿学射于吉甫其臂长故以善射闻及夏之衰自鉏迁于穷石因夏民以伐夏篡帝相徙于商丘依同姓诸侯斟寻羿恃其善射不修民事淫于田兽弃其良臣武罗伯姻熊髡鬻圉而信寒浞寒浞伯明氏之谗子伯明后以谗弃之而羿以为已相寒浞杀羿於桃梧而亨之以食其子其子不忍食之死于穷门促遂代夏立为帝寒浞袭有穷之号因羿之室生豷及豷豷多力能陆地行舟使豷帅师灭斟灌斟寻杀夏帝相封豷於过封豷於戈恃其诈力不恤民事初豷之杀帝相也妃仍氏女曰后缙归有仍生少康初夏之贵臣曰靡事羿羿死逃于有鬲氏收斟寻二国余烬杀寒浞立少康灭豷于过后杼灭豷于戈有穷遂亡也按帝相被篡历羿浞二世四十年而此纪不说亦马迁所为疏畧也豷音五告反豷音许器反括地志云故鉏城在滑州卫城县东十里晋地记云河南有穷谷盖本有穷氏所迁也括地志云商丘今宋州也斟灌故城在青州寿光县东五十四里斟寻故城今青州北海县是也故过乡亭在莱州掖县西北二十里本过国地故鬲城在洛州密县界杜预云国名今平原鬲县也戈在宋郑之间也寒国在北海平寿县东寒亭也伯明其君也臣瓚云斟寻在河南盖後迁北海也汲冢古文云太康居斟寻羿亦居之桀又居之尚书云太康失邦兄弟五人须于洛汭此即太康居之为近洛也又吴起对魏武侯曰夏桀之居左河济右太华伊阙在其南羊肠在其北又周书度邑篇云武王问太公吾将因有夏之居即河南是也括地志云故鄴城在洛州巩县西南五十八里盖桀所居也阳翟县又是禹所封为夏伯】帝少康崩子帝予立【索隐音仁系本云季仁作甲者也左传曰杼灭豷于戈国语云杼能师禹者也】帝予崩子帝槐立【索隐槐音回系本作帝芬】帝槐崩子帝芒立【索隐音七邹诞生又音荒】帝芒崩子帝泄立帝泄崩子帝不降立【索隐系本作帝降】帝不降崩弟帝扃立帝扃崩子帝廑立【索隐音覲邹诞生又音勤】帝廑崩立帝不降之子孔甲是为帝孔甲帝孔甲立好方鬼神事淫乱夏后氏德衰诸侯畔之天降龙二有雌雄孔甲不能食【正义音寺】未得豢龙氏【集解贾逵曰豢养也谷食曰豢】陶唐既衰其後有刘累【集解服虔曰後刘累之为诸侯者夏后赐之姓正义括地志云刘累故城在洛州缑氏县南五十五里乃刘累之故地也】学扰龙【集解应劭曰扰音柔扰驯也能顺养得其嗜慾】于豢龙氏以事孔甲孔甲赐之姓曰御龙氏【集解服虔曰御亦养】受豕韦之後【集解徐广曰受一作更駟案贾逵曰刘累之後至商不絶以代豕韦之後祝融之後封於豕韦殷武丁灭之以刘累之後代之索隐按系本豕韦彭姓】龙一雌死以食夏后夏后使求惧而迁去【集解贾逵曰夏后既飧而又使求致龙刘累不能得而惧也传曰迁于鲁县】孔甲崩子帝皐立帝皐崩【集解駟案左传曰皐墓在穀南陵】子帝发立帝

发崩子帝履癸立是为桀【索隐桀名也按系本帝皐生发及桀此以发生桀皇甫谧同也】帝桀之时【集解駰案諡法贼人多杀曰桀】自孔甲以来而诸侯多畔夏桀不务德而武伤百姓百姓弗堪乃召汤而囚之夏台【索隐狱名夏日钧台皇甫谧云地在阳翟是也】已而释之汤修德诸侯皆归汤汤遂率兵以伐夏桀桀走鸣条【集解孔安国曰地在安邑之西郑玄曰南夷地名】遂放而死【集解徐广曰从禹至桀十七君十四世駰案汲冢纪年曰有王与无王用岁四百七十一年矣正义括地志云庐州巢县有巢湖即尚书成汤伐桀放於南巢者也淮南子云汤败桀於历山与妹喜同舟浮江奔南巢之山而死国语云满於巢湖又云夏桀伐有施人以妹喜女焉女音女虐反】桀谓人曰吾悔不遂杀汤於夏台使至此汤乃践天子位代夏朝天下汤封夏之後【正义括地志云夏亭故城在汝州郟城县东北五十四里盖夏后所封也】至周封於?也【正义括地志云汴州雍丘县古杞国城也周武王封禹後号东楼公也】

太史公曰禹为姒姓其後分封用国为姓故有夏后氏有扈氏有男氏斟寻氏彤城氏褒氏费氏【集解徐广曰一云斟氏寻氏索隐系本男作南寻作鄆费作弗而不云彤城及褒按周有彤伯盖彤城氏之後张敖地理记云济南平壽县其地即古斟寻国又下云斟戈氏按左传系本皆云斟灌氏】?氏缙氏辛氏冥氏斟戈氏孔子正夏时学者多传夏小正云【集解駰案礼运称孔子曰我欲观夏道是故之?而不足徵也吾得夏时焉郑玄曰得夏四时之书其存者有小正索隐小正大戴记篇名正征二音】自虞夏时贡赋备矣或言禹会诸侯江南计功而崩因葬焉命曰会稽会稽者会计也【集解駰案皇覽曰禹冢在山陰县会稽山上会稽山本名苗山在县南去县七里越传曰禹到大越上苗山大会计爵有德封有功因而更名苗山曰会稽因病死葬苁棺穿圻深七尺上无洿泄下无邸水坛高三尺土塔三等周方一亩吕氏春秋曰禹葬会稽不烦人徒墨子曰禹葬会稽衣裘三领桐棺三寸地理志云山上有禹井禹祠相传以为下有羣鸟耘田者也索隐抵至也音丁礼反苁棺者以苁为棺谓籐蓐而斂非也禹虽俭约岂万乘之主而臣子乃以籐蓐裹尸乎墨子言桐棺三寸差近人情正义括地志云禹陵在越州会稽县南十三里庙在县东南十一里索隐述赞曰尧遭洪水黎人阻饥禹勤沟洫手足胼胝言乘四载动履四时娶妻有日过门不私九土既理玄圭锡兹帝啓嗣立有扈违命五子作歌太康失政羿浞斯侮夏室不竟降于孔甲扰龙乖性嗟彼鸣条其终不令】

史记卷二

史记卷二考证

夏本纪禹之父曰鲧鲧之父曰帝颛顼颛顼之父曰昌意昌意之父曰黄帝禹者黄帝之玄孙而帝颛顼之孙也禹之曾大父昌意及父鲧皆不得在帝位为人臣○史通曰颛顼纪中已具云黄帝是颛顼祖矣此篇下云禹是颛顼孙则其上不得更言黄帝之玄孙既上云昌意及鲧不得在帝位则於下文不得复云为人臣【臣照】按夏本纪禹之父曰鲧鲧之父曰帝颛顼五帝纪瞽叟父曰桥牛桥牛父曰句望句望父曰敬康敬康父曰穷蝉穷蝉父曰帝颛顼是禹为帝颛顼之孙而舜为帝颛顼之六世孙矣禹为舜之高祖行得相见已属仅事必年大长於舜矣乃舜命禹治水时禹方娶涂山之女复受舜禪十七年而崩於会稽则禹年幼於舜又可

知岂理也哉欧阳修辞而辟之当矣

壶口治梁及岐正义岐山岐州岐山县东北十里○岐山下脱一在字

常卫既从大陆既为索隐卫水出常山灵寿县东入滹沱○以汉书地理志考之宜云东北入滹沱

鸟夷皮服集解郑元曰鸟夷东北之民○尚书疏引郑元云鸟夷东方之民惟王肃以为东北夷

浮於济漯通於河索隐曰济水出河东垣县王屋山东其流至济陰故应劭云济水出平原漯陰县东漯水出东郡东武阳县北至千乘县而入於海○地理志平原郡漯陰县注应劭曰漯水出东武阳东北入海东郡东武阳县志云禹治漯水东北至千乘县入海注应劭曰武水之阳也索隐误以地理志本文为应劭之说

潍淄既道集解地理志潍水出琅邪淄水出泰山莱芜县原山○琅邪下脱箕屋山三字

蒙羽其艺索隐蒙山在泰山蒙陰县西○以汉书地理志考之西下脱南字

峯阳孤桐正义今独生桐尚徵一偏似琴瑟○推寻文义当作今独生桐尚徵贡偏宜琴瑟

均江海通淮泗集解郑元曰均读曰沿沿顺水行也○陆德明尚书释文引郑元语沿作松松当为沿马本作均云均平此云郑元曰均读曰沿与陆氏释文所引不同

下土坟垆集解孔安国曰垆疏也○今孔传无此文汶嶧既毓索隐封禅书一云渎○封禅书一云渎山蔡蒙旅平集解郑元曰地理志蔡蒙在汉嘉县○【臣世骏】按郑引地理志误汉蜀郡青衣县蒙山所在汉嘉之名至顺帝始改地理志不得有其名一误也蔡山既不知所在而与蒙山并云在汉嘉县二误也

至於负尾索隐负音陪○字书负从力从贝与陪同与负别

道嶧冢至于荆山正义沮水即汉水也按县孙叔敖激沮水为云梦泽是也○县字疑衍当因孙字相近而误

道河积石索隐其水停冬夏不增减○汉书西域传作其水停居停下脱居字

北过降水至於大陆集解郑元曰地理志降水在信都南○汉地理志信都国信都县下但云绛水入海尚书疏引地理志亦云在信都县诸本皆作南字误也

过三澨入於大别索隐水经云三澨地名在南郡鄢县落北○南郡无鄢县当是邛字禹贡锥指云三澨一在襄城北一在樊城南一在三洲口东皆襄阳县地在古邛县之北今改邛

二百里任国集解孔安国曰任王事者○今尚书孔传作任王者事

以告成功於天下天下於是太平治○一本无下天下二字【臣照】按二本皆讹应作以告成功于天天下於是太平治【臣德龄】按禹之功具於禹贡故全载禹贡之文以明禹之功在万世凡史记引用经传全文皆有意义或谓其未及删裁者非

衆明高翼近可远在已集解郑元曰次序九族而亲之以衆明作羽翼之臣○今尚书疏引郑云以衆贤明作羽翼之臣

何畏乎巧言善色佞人集解郑元曰禹为父隐故言不及鯀○禹为父隐云云今尚书疏以为马融之言

予辛壬娶涂山癸甲生啓集解孔安国曰辛日娶妻至於甲四日复往治水○今孔传无四字

天降龙二有雌雄孔甲不能食一段【臣德龄】按载参龙事所以明孔甲之荒淫举其极以概其余也或谓降龙事无关典要似可不载者非

有男氏○路史国名纪曰世本之有男氏潜夫作南周书之有南也

史记卷二考证

卷三

钦定四库全书

史记卷三

汉太史令司马迁撰

宋中郎外兵曹参军裴駰集解唐国子博士弘文馆学士司马贞索隐

唐诸王侍读率府长史张守节正义

殷本纪第三

殷契【索隐契始封商其後裔盘庚迁殷殷在邺南遂为天下号契是殷家始祖故言殷契正义括地志云相州安阳本盘庚所都即北冢殷墟南去朝歌城百四十六里竹书纪年云盘庚自奄迁於北冢曰殷墟南去邺四十里是旧都城西南三十里有洹水南岸三里有安阳城西有城名殷墟所谓北冢者也今按洹水在相州北四里安阳城即相州外城】母曰简狄【索隐狄旧本作易音同又作盪吐历反】有娥氏之女【集解駰案淮南子曰有娥在不周之北正义按记云桀败於有娥之墟有娥当在蒲州也】为帝喾次妃三人行浴见玄鸟堕其卵简狄取吞之因孕生契【索隐譙周云契生尧代舜始举之必非喾子以其父微故不着名其母娥氏女与宗妇三人浴于川玄鸟遗卵简狄吞之则简狄非帝喾次妃明也】契长而佐禹治水有功帝舜乃命契曰百姓不亲五品不训汝为司徒而敬敷五教五教在寛封於商【集解郑玄曰商国在太华之阳皇甫谧曰今上洛商是也索隐尧封契於商即诗商颂云有娥方将帝立子生商是也正义括地志云商州东八十里商洛县本商邑古之商国帝喾之子高所封也】赐姓子氏【集解駰案礼纬曰祖以玄鸟生子也正义括地志云故子城在渭州华城县东北八十里盖子姓之别邑】契兴於唐虞大禹之际功业着於百姓百姓以平契卒子昭明立昭明卒子相土立【集解宋忠曰相土就契封於商春秋左氏传曰阍伯居商邱相土因之索隐相土佐夏功着於商诗颂曰相土烈烈海外有截是也左传曰昔陶唐氏火正阍伯居商邱相土因之是始封商也正义括地志云宋州城古阍伯之墟即商邱也又云羿所封之地】相土卒子昌若立昌若卒子曹圉立【索隐系本作粮圉也】曹圉卒【正义圉音语出系本】子冥立【集解宋忠曰冥为司空勤其官事死于水中殷人郊之索隐礼曰冥勤其官而水死殷人祖契而郊冥也】冥卒子振立【索隐系本作核】振卒子微立【索隐皇甫谧云微字上甲其母以甲日生故也商家生子以日为名盖自微始譙周以为死称庙主曰甲也】微卒子报丁立报丁卒子报乙立报乙卒子报丙立报丙卒子主壬立主壬卒子主癸立主癸卒子天乙立是为成汤【集解张晏曰禹汤皆字也二王去唐虞之文从高阳之质故夏殷之王皆以名为号谥法曰除虐去残曰汤索隐汤名履书曰予小子履是也又称天乙者譙周云夏

殷之礼生称王死称庙主皆以帝名配之天亦帝也殷人尊汤故曰天乙?契至汤凡十四代故国语曰玄王勤商十四代兴玄王契也】成汤自契至汤八迁【集解孔安国曰十四世凡八徙国都】汤始居亳【集解皇甫谧曰梁国谷熟为南亳即汤都也正义括地志云宋州谷熟县西南三十五里南亳故城即南亳汤都也宋州北五十里大蒙城为景亳汤所盟地因景山为名河南偃师为西亳帝尝及汤所都盘庚亦从都之】从先王居【集解孔安国曰契父帝尝都亳汤自商邱迁焉故曰从先王居正义按亳偃师城也商邱宋州也汤即位都南亳後徙西亳也括地志云亳邑故城在洛州偃师县西十四里本帝尝之墟商汤之都也】作帝诰【索隐一作诰上云从先王居故作帝诰孔安国以为作诰告先王言已来居亳也】汤征诸侯【集解孔安国曰为夏方伯得专征伐】葛伯不祀汤始伐之【集解駰案孟子曰汤居亳与葛伯为邻地理志曰葛今梁国寧陵之葛乡】汤曰予有言人视水见形视民知治不伊尹曰明哉言能听道乃进君国子民为善者皆在王官勉哉勉哉汤曰汝不能敬命予大罚殛之无有攸赦作汤征伊尹名阿衡【索隐孙子兵书伊尹名挚孔安国亦曰伊挚然解者以阿衡为官名按阿倚也衡平也言依倚而取平书曰惟嗣王弗惠于阿衡亦曰保衡皆伊尹之官号非名也皇甫谧云伊尹力牧之後生於空桑又吕氏春秋云有旻氏女采桑得婴儿于空桑母居伊水命曰伊尹尹正也谓汤使之正天下】阿衡欲干汤而无由乃为有莘氏媵臣【集解駰案列女传曰汤妃有莘氏之女正义括地志云古莘国在汴州陈留县东五里故莘城是也陈留风俗传云陈留外黄有莘昌亭本宋地莘氏邑也媵翊剩反尔雅云媵将送也】负鼎俎以滋味说汤致于王道或曰伊尹处士汤使人聘迎之五反然後肯往从汤言素王及九主之事【集解駰案刘向别錄曰九主者有法君专君授君劳君等君寄君破君国君三岁社君凡九品图画其形索隐按素王者太素上皇其道质素故称素王九主者三皇五帝及夏禹也或曰九主谓九皇也然按注刘向所称九主载之七錄名称甚奇不知所凭据耳法君谓用法严急之君若秦孝公及始皇等也劳君谓勤劳天下若禹稷等也等君等者平也谓定等威均禄赏若高祖封功臣侯雍齿也授君谓人君不能自理而政归其臣若燕王哙授子之禹授益之比也专君谓专已独断不任贤臣若汉宣之比也破君谓轻敌致寇国灭君死若楚戊吴濞等是也寄君谓人困於下主骄於上离析可待故孟轲谓之寄君也国君国当为固字之讹耳固谓完城郭利甲兵而不修德若三苗智伯之类也三岁社君谓在襁褓而主社稷若周成王汉昭平等是也又注本九主谓法君劳君等君专君授君破君国君以三岁社君为二恐非】汤举任以国政伊尹去汤适夏既丑有夏复归于亳入自北门遇女鸠女房作女鸠女房【集解孔安国曰鸠房二人汤之贤臣也二篇言所以丑夏而还之意也】汤出见野张网四面祝曰自天下四方皆入吾网汤曰嘻尽之矣乃去其三面祝曰欲左左欲右右不用命乃入吾网诸侯闻之曰汤德至矣及禽兽当是时夏桀为虐政淫荒而诸侯昆吾氏为乱【正义帝尝时陆终之长於夏台子昆吾氏之後也世本云昆吾者卫氏是】汤乃兴师率诸侯伊尹从汤汤自把钺以伐昆吾遂伐桀汤曰格汝衆庶来女悉听朕言匪台小子【集解马融曰台我也】敢行举乱有夏多罪予维闻女衆言夏氏有罪予畏上帝不敢不正【集解孔安国曰不敢不正桀之罪而诛之】今夏多罪天命殛之今女有衆女曰我君不恤我衆舍我嗇事而割政【集解孔安国曰夺民农功而为割剥之政】女其曰有罪其奈何夏王率止衆力率夺夏国【集解孔安国曰桀之君臣相率遏止衆力使不得事农相率割剥夏之邑居】有衆率怠不和【集解马融曰衆民相率怠惰不和同】曰是何时丧予与女皆亡【集解駰案尚书大传曰桀云天之有日犹吾之有民日有亡哉日亡吾亦亡矣】夏德若兹今朕必往尔尚及予一人致

天之罰予其大理女【集解駟案尚书理字作賚郑玄云賚賜也】女母不信朕不食言【索隐左传云食言多矣能无肥乎是谓妄言为食言】女不从誓言予则帑戮女无有攸赦以告令师作汤誓於是汤曰吾甚武号曰武王【集解駟案诗云武王载旆有秉钺毛传曰武王汤也】桀败於有娥之虚桀葬於鸣条【正义括地志云高涯原在蒲州安邑县北三十里南坡口即古鸣条陌也鸣条战地在安邑西】夏师败绩汤遂伐三?俘厥宝玉【集解孔安国曰三?国名桀走保之今定陶也俘取也正义括地志云曹州济陰县即古定陶也东有三?亭是也】义伯仲伯作典宝【集解孔安国曰二臣作典宝一篇言国之常宝也】汤既胜夏欲迁其社不可【集解孔安国曰欲变置社稷而後世无及句龙者故不可而止】作夏社【集解孔安国曰言夏社不可迁之义】伊尹报【集解徐广曰一云伊尹报政】於是诸侯服汤乃践天子位平定海内汤归至于泰卷陶【集解徐广曰一无此陶字孔安国曰地名汤自三?而还索隐邹诞生卷作饒又作洞则卷当为垆与尚书同非衍字也其下陶字是衍耳何以知然解尚书者以大垆今定陶是也旧本或傍记其地名後人转写遂衍斯字也正义垆古铭反】中?作诰【集解孔安国曰仲虺汤左相奚仲之後索隐仲虺二音?作叁音如字尚书又作虺也】既继夏命【集解孔安国曰继其王命】还亳作汤诰维三月王自至于东郊告诸侯羣后母不有功于民勤力乃事予乃大罚殛女母予怨曰古禹皐陶久劳于外其有功乎民民乃有安东为江北为济西为河南为淮四渎已修万民乃有居后稷降播农殖百谷三公咸有功于民故后有立【集解徐广曰一作土索隐谓禹皐陶有功於人建立其後故云有立】昔蚩尤与其大夫作乱百姓帝乃弗予【音与】有状【索隐帝天也谓蚩尤作乱上天乃不佑之是为弗与有状言其罪大而有形状故黄帝灭之】先王言不可不勉【索隐先王指黄帝帝尧帝舜等言禹咎繇以久劳于外故後有立及蚩尤作乱天不佑之乃致黄帝灭之皆是先王赏有功诛有罪言今汝不可不勉此汤诫其臣】曰不道母之在国【集解徐广曰之一作政索隐不道犹无道也又诫诸侯云汝为不道我则无令汝之在国】女母我怨以令诸侯伊尹作咸有一德【集解王肃曰言君臣皆有一德索隐按尚书伊尹作咸有一德在太甲时太史公记之於斯谓成汤之日其言又失次序】咎单作明居【集解马融曰咎单汤司空也明居民之法】汤乃改正朔易服色上白朝会以昼汤崩【集解駟案皇覽曰汤冢在济陰亳县北东郭去县三里冢四方各十步高七尺上平处平地汉哀帝建平元年大司空御史长卿案行水灾因行汤冢刘向曰殷汤无葬处皇甫谧曰即位十七年而践天子位为天子十三年年百岁而崩索隐长卿诸本皆作劫姓按风俗通有御氏为汉司空御史其名长卿明劫非也亦有劫弥不得为御史正义括地志云薄城北郭东三里平地有汤冢按在蒙即北薄也又云洛州偃师县东六里有汤冢近桐宫盖此是也】太子太丁未立而卒於是廼立太丁之弟外丙是为帝外丙帝外丙即位二年崩立外丙之弟中壬是为帝中壬【正义仲任二音】帝中壬即位四年崩伊尹乃立太丁之子太甲【正义尚书孔氏序云成汤既没太甲元年不言有外丙仲壬而太史公采世本有外丙仲壬二书不同当是信则传信疑则传疑】太甲成汤适长孙也是为帝太甲帝太甲元年伊尹作伊训作肆命作徂后【集解郑玄曰肆命者陈政教所当为也徂后者言汤之法度也】帝太甲既立三年不明暴虐不遵汤法乱德於是伊尹放之於桐宫【集解孔安国曰汤葬地郑玄曰地名也有王离宫焉正义晋太康地记云尸鄉南有亳坂东有城太甲所放处也按尸乡在洛州偃师县西南五里也】三年伊尹摄行政当国以朝诸侯帝太甲居桐宫三年悔过自责反善於是伊尹乃迎帝太甲而授之政帝太甲修德诸侯咸归殷百姓以寧伊尹嘉之廼作太甲训三篇褒帝太甲称太宗太宗崩子沃丁立帝沃丁之时

伊尹卒既葬伊尹於亳【集解駟案皇覽曰伊尹冢在濟陰己氏平利鄉亳近己氏正義括地志云伊尹墓在洛州偃師縣西北八里又云宋州楚邱縣西北十五里有伊尹墓恐非也帝王世紀伊尹名勢為湯相號阿衡年百歲卒天霧三日沃丁以天子禮葬之】咎單遂訓伊尹事作沃丁沃丁崩弟太庚立是為帝太庚帝太庚崩子帝小甲立【集解徐廣曰世表云帝小甲太庚弟也】帝小甲崩弟雍己立是為帝雍己殷道衰諸侯或不至帝雍己崩弟太戊立是為帝太戊帝太戊立伊陟為相【集解孔安國曰伊陟伊尹之子】亳有祥桑穀共生於朝一暮大拱【集解孔安國曰祥妖怪也二木合生不恭之罰鄭玄曰兩手搯之曰拱索隱此云一暮大拱尚書大傳作七日大拱與此不同】帝太戊懼問伊陟伊陟曰臣聞妖不勝德帝之政其有闕與帝其修德太戊從之而祥桑枯死而去【索隱劉伯莊言枯死而消去不見今以為由帝修德而妖祥遂去】伊陟贊言于巫咸【集解孔安國曰贊告也巫咸臣名也正義按巫咸及子賢冢皆在蘇州常熟縣西海虞山上蓋二子本吳人也】巫咸治王家有成作咸艾【集解馬融曰艾治也】作太戊帝太戊贊伊陟于廟言弗臣伊陟讓作原命【集解馬融曰原臣名也命原以禹湯之道我所修也】殷復興諸侯歸之故稱中宗中宗崩子帝仲丁立帝仲丁遷于囂【集解孔安國曰地名皇甫謐曰或云河南敖倉是索隱囂亦作噐并音敖正義括地志云滎陽故城在鄭州滎澤縣西南十七里殷時敖地也】河亶甲居相【集解孔安國曰地名在河北正義括地志云故殷城在相州內黃縣東南十三里即河亶甲所筑都之故名殷城也】祖乙遷于邢【索隱邢音耿近代本亦作耿今河東皮氏縣有耿鄉正義括地志云絳州龍門縣東南十二里耿城故耿國也】帝仲丁崩弟外壬立是為帝外壬仲丁書闕不具【索隱蓋太史公知旧有仲丁書今已遺闕不具也】帝外壬崩弟河亶甲立是為帝河亶甲河亶甲時殷復衰河亶甲崩子帝祖乙立帝祖乙立殷復興巫賢任職祖乙崩子帝祖辛立帝祖辛崩弟沃甲立是為帝沃甲【索隱系本作開甲也】帝沃甲崩立沃甲兄祖辛之子祖丁是為帝祖丁帝祖丁崩立弟沃甲之子南庚是為帝南庚帝南庚崩立帝祖丁之子陽甲是為帝陽甲帝陽甲之時殷衰自中丁以來廢適而更立諸弟子弟子或爭相代立比九世亂於是諸侯莫朝帝陽甲崩弟盤庚立是為帝盤庚帝盤庚之時殷已都河北盤庚渡河南復居成湯之故居廼五遷無定處【集解孔安國曰自湯至盤庚凡五遷都正義湯自南亳遷西亳仲丁遷敖河亶甲居相祖乙居耿盤庚渡河南居西亳是五遷也】殷民咨胥皆怨不欲徙【集解孔安國曰胥相也民不欲徙皆咨嗟忧愁相與怨其上也】盤庚乃告諭諸侯大臣曰昔高后成湯與爾之先祖俱定天下法則可修舍而弗勉何以成德乃遂涉河南治亳【集解鄭玄曰治於亳之殷地商家自此徙而改號曰殷亳皇甫謐曰今偃師是也】行湯之政然後百姓由寧殷道復興諸侯來朝以其遵成湯之德也帝盤庚崩弟小辛立是為帝小辛帝小辛立殷復衰百姓思盤庚廼作盤庚三篇【索隱尚書盤庚將治亳殷民咨胥怨作盤庚此以盤庚崩弟小辛立百姓思之乃作盤庚由不見古文也】帝小辛崩弟小乙立是為帝小乙帝小乙崩子帝武丁立帝武丁即位思復興殷而未得其佐三年不言政事決定於冢宰【集解鄭玄曰冢宰天官卿貳王事者】以觀國風武丁夜夢得聖人名曰說以夢所見視羣臣百吏皆非也於是廼使百工營求之野得說於傅險中【集解徐廣曰尸子云傅岩在北海之洲索隱旧本作險亦作岩也正義地理志云傅險即傅說版筑之處所隱之處窟名聖人窟在今陝州河北縣北七里即虞國虢國之界又有傳說祠注水經云沙澗水北虞山南經傳岩傅說隱室前俗名聖人窟】是時說為胥靡筑於傅險【集解孔安國曰傅氏之岩在虞虢之界通道所經有澗水坏道常使胥靡刑人筑護此道說賢而隱代胥靡筑之以供食也】見於武丁武丁曰是也得而

与之语果圣人举以为相殷国大治故遂以傅险姓之号曰傅说帝武丁祭成汤明日有飞雉登鼎耳而响【正义音构响雉鸣也诗云雉之朝响】武丁惧祖已曰【集解孔安国曰贤臣名】王勿忧先修政事祖已乃训王曰唯天监下典厥义【集解孔安国曰言天视下民以义为常也】降年有永有不永非天天民中絶其命民有不若德不听罪天既附命正厥德【集解孔安国曰不顺德言无义也不服罪不改修也天以信命正其德谓其有永有不永索隐附依尚书音孚】乃曰其奈何呜呼王嗣敬民罔非天继常祀毋丰于弃道【集解孔安国曰王者主民当敬民事无非天时天时所常祀也祭祀有常不当特丰于近也索隐祭祀有常无为丰杀之礼於是弃常道】武丁修政行德天下咸驩殷道复兴帝武丁崩子帝祖庚立祖已嘉武丁之以祥雉为德立其庙为高宗遂作高宗彤日及训【集解孔安国曰祭之明日又祭殷曰彤周曰绎】帝祖庚崩弟祖甲立是为帝甲帝甲淫乱殷复衰【索隐国语曰帝甲乱之七代而陨是也】帝甲崩子帝廩辛立【索隐汉书古今人表及帝王代纪皆作凭辛】帝廩辛崩弟庚丁立是为帝庚丁帝庚丁崩子帝武乙立殷复去亳徙河北帝武乙无道为偶人【索隐偶音寓亦如字正义偶五苟反偶对也以土木为人对象於人形也】谓之天神与之博令人行为【正义为于伪反行胡孟反】天神不胜乃戮辱之为革囊盛血仰而射之命曰射天武乙猎於河渭之间暴雷武乙震死子帝太丁立帝太丁崩子帝乙立帝乙立殷益衰帝乙长子曰微子啓【索隐微国号爵为子啓名也孔子家语云微或作魏读从微音邹本亦然也】启母贱不得嗣【索隐此以启与纣异母而郑玄称为同母依吕氏春秋言母当生启时犹未正立及生纣时始正为妃故启大而庶纣小而嫡】少子辛辛母正后辛为嗣帝乙崩子辛立是为帝辛天下谓之纣【集解駉案諡法曰残义损善曰纣】帝纣资辨捷疾闻见甚敏材力过人手格猛兽【正义帝王世纪云纣倒曳九牛抚梁易柱也】知足以距谏言足以饰非矜人臣以能高天下以声以为皆出己之下好酒淫乐嬖於妇人爱妲己【集解皇甫谧曰有苏氏美女索隐国语有苏氏女妲字己姓也】妲己之言是从於是使师涓作新淫声北里之舞靡靡之乐厚赋税以实鹿台之钱【集解如淳曰新序曰鹿台其大三里高千尺瓚曰鹿台台名今在朝歌城中正义括地志云鹿台在卫县西南二十二里】而盈钜桥之粟【集解服虔曰钜桥仓名许慎曰钜鹿水之大桥有漕粟也索隐邹诞生云钜大桥器名也纣厚赋税故因器而大其名】益收狗马奇物充内宫室益广沙丘苑台【集解駉案尔雅曰迤迤沙丘也地理志曰在钜鹿东北七十里正义括地志云沙丘台在邢州平乡东北二十里竹书纪年云自盘庚徙殷至纣之灭七百七十三年更不徙都纣时稍大其邑南距朝歌北据邯郸及沙丘皆为离宫别馆】多取野兽蜚鸟置其中慢於鬼神大取乐戏於沙丘【集解徐广曰取一作聚】以酒为池【正义括地志云酒池在卫州卫县西二十三里太公六韬云纣为酒池回船糟丘而牛饮者三千余人为辈】县肉为林【正义县户眠反】使男女倮【正义胡瓦反】相逐其间为长夜之饮百姓怨望而诸侯有畔者於是纣乃重辟刑有炮烙之法【集解駉案列女传曰膏铜柱下加之炭令有罪者行焉辄堕炭中妲己笑名曰炮烙之刑索隐邹诞生烙一音阁又云见蚁布铜斗足废而死於是铜烙炊炭其下使罪人步其上与列女传少异】以西伯昌九侯【集解徐广曰一作鬼侯邳县有九侯城索隐九亦依字读邹诞生音仇也正义括地志云相州滏阳县西南五十里有九侯城亦名鬼侯城盖殷时九侯城也】鄂侯【集解徐广曰一作邶音于野王县有邶城】为三公九侯有好女入之纣九侯女不熹淫【集解徐广曰一云无不熹淫】纣怒杀之而醢九侯鄂侯争之强辨之疾并脯鄂侯西伯昌闻之窃叹崇侯虎知之以告纣纣囚西伯姜里【集解駉案地理志曰河内汤陰有姜里城西伯所拘处

韦昭曰音酉正义牖一作美音酉美城在相州汤陰县北九里纣囚西伯城也帝王世纪云囚文王文王之长子曰伯邑考质於殷为纣御纣烹为羹赐文王曰圣人当不食其子羹文王食之纣曰谁谓西伯圣者食其子羹尚不知也】西伯之臣闳夭之徒求美女奇物善马以献纣纣乃赦西伯西伯出而献洛西之地以请除炮烙之刑【正义洛水一名漆沮水在同州洛西之地谓洛西及丹坊等州也】纣乃许之赐弓矢斧钺使得征伐为西伯而用费中为政【正义费音扶味反中音仲费姓仲名】费中善谀好利殷人弗亲纣又用恶来【索隐秦之祖蜚廉子】恶来善毁谗诸侯以此益疏西伯归乃陰修德行善诸侯多叛纣而往归西伯西伯滋大纣由是稍失权重王子比干諫弗听商容贤者百姓爱之纣废之及西伯伐饥国灭之【集解徐广曰饥一作又作耆】纣之臣祖伊【集解孔安国曰祖已後贤臣也】闻之而咎周【集解孔安国曰咎恶也】恐奔告纣曰天既讖我殷命假人元龟【集解徐广曰元一作卜】无敢知吉【集解马融曰元龟大龟也长尺二寸孔安国曰至人以人事观殷大龟以神灵考之皆无知吉者】非先王不相我後人【集解孔安国曰相助也】维王淫虐用自绝故天弃我不有安食不虞知天性不廸率典【集解郑玄曰王暴虐於民使不得安食逆乱陰阳不度天性傲狠明德不修教法者】今我民罔不欲丧曰天曷不降威大命胡不至今王其奈何纣曰我生不有命在天乎祖伊反曰纣不可諫矣西伯既卒周武王之东伐至盟津诸侯叛殷会周者八百诸侯皆曰纣可伐矣武王曰尔未知天命乃复归纣愈淫乱不止微子数諫不听乃与太师少师谋遂去比干曰为人臣者不得不以死争廼强諫纣怒曰吾闻圣人心有七窍剖比干观其心【正义括地志云比干见微子去箕子狂乃叹曰主过不諫非忠也畏死不言非勇也过则諫不用则死忠之至也进諫不去者三日纣问何以自持比干曰修善行仁以义自持纣怒曰吾闻圣人心有七窍信诸遂杀比干剖视其心也】箕子惧乃详狂为奴纣又囚之殷之太师少师乃持其祭乐器奔周周武王於是遂率诸侯伐纣纣亦发兵距之牧野【集解郑玄曰牧野纣南郊地名也正义括地志云今卫州城即殷牧野之地周武王伐纣筑也】甲子日纣兵败纣走入登鹿台【集解徐广曰鹿一作廩】衣其宝玉衣赴火而死【正义周书云纣取天智玉琰五环身以自焚】周武王遂斩纣头县之白旗杀妲己释箕子之囚封比干之墓表商容之间【索隐皇甫谧云商容与殷人观周军之入则以为人名郑玄云商家乐官知礼容所以礼署称容台】封纣子武庚禄父以续殷祀【集解譙周曰殷凡三十一世六百余年汲冢纪年曰汤灭夏以至于受二十九王用岁四百九十六年也】令修行盘庚之政殷民大说於是周武王为天子其後世贬帝号号为王【索隐按夏殷天子亦皆称帝代以德薄不及五帝始贬帝号号之为王故本纪皆帝而後总曰三王也】而封殷後为诸侯属周【正义即武庚禄父也】周武王崩武庚与管叔蔡叔作乱成王命周公诛之而立微子於宋以续殷後焉

太史公曰余以颂次契之事自成汤以来采於书诗契为子姓其後分封以国为姓有殷氏来氏宋氏空桐氏稚氏【索隐按系本子姓无稚氏】北殷氏【索隐系本作髦氏又有时氏萧氏黎氏然北殷氏盖秦寧公所伐亳主汤之後也】目夷氏孔子曰殷路车为善而色尚白【索隐论语孔子曰乘殷之路礼记曰殷人尚白太史公为赞不取成文遂作此语疎也】

【索隐述赞曰简狄吞乙是为殷祖玄王启商伊尹负俎上开三面下献九主旋师泰卷继相臣扈迁囂圯耿不常厥土武乙无道祸因射天帝辛淫乱拒諫贼贤九侯见醢炮烙兴焉黄钺

斯仗白旗是悬哀哉琮室殷祀用迁】

史记卷三

史记卷三考证

殷本纪汤曰汝不能敬命○监本脱汤字今添

而诸侯昆吾氏为乱正义帝尝时陆终之长於夏台子昆吾氏之後也世本云昆吾者卫氏是○推寻文义宜云陆终之长子封於昆吾夏之昆吾其後也又楚世家集解引世本云昆吾者卫是也盖言卫地本昆吾国此氏字衍

汤遂伐三?○尚书序作三朶

伊尹报於是诸侯服汤○一本作毕服汤一本作心服汤

作汤诰○王若虚辨惑曰维三月王自至於东郊云云今汤诰之书具在曷尝有此迁何所据而载之也

伊尹作咸有一德咎单作明居○王若虚辨惑曰尚书汤诰篇末曰咎单作明居而咸有一德乃伊摯复政将归时所陈在太甲三篇之下次第明甚不可乱也史记乃谓咸有一德作於汤时而列之汤诰之後明居之前岂非误欤

汤崩集解皇覽曰汤冢在济陰亳县北东郭○前汉志济陰郡无亳县後汉志无济陰郡梁国谷熟为南亳蒙为北亳河南偃师为西亳亳本非县名皇覽是魏时人作其所用必後汉地名此云在济陰亳县必有误

伊尹乃立太丁之子太甲○尚书疏曰据经序及太甲之篇太甲必继汤後而殷本纪云汤崩太子太丁未立而卒於是乃立太丁之弟外丙三年崩别立外丙之弟仲壬四年崩伊尹乃立太丁之子太甲与经不同彼必妄也刘歆班固不见古文谬从史记皇甫谧既得此经作帝王世纪乃述马迁之语是其踈也【臣照】按外丙仲壬见於孟子不始於马迁也古今诸儒断断如者祇以桐宫居忧遂谓太甲必继成汤但安知其非为帝仲壬服乎

迺作太甲训三篇褒帝太甲○王若虚辨惑曰三篇之书虽曰伊尹作然自始至终皆史氏所録岂独伊尹褒嘉而作乎

既葬伊尹於亳集解帝王世纪伊尹名摯为汤相号阿衡年百岁卒天雾三日○尚书疏引帝王世纪水经注引皇覽皆作大雾三日

弟太戊立○困学纪闻曰太戊为太甲之孙三代表云太戊小甲弟则亦是沃丁弟太甲子书正义谓本纪世表必有一误

帝阳甲之时殷衰自中丁以来废适而更立诸弟子弟子或争相代立比九世乱○皇王大纪曰以其世考之自沃丁至阳甲立弟者九世中丁之名误也

得说於傳險中正义注水经云沙涧水北虞山南经傳岩○水经注本文作沙涧水北出虞山东南经傳岩

王嗣敬民罔非天继常祀毋丰於弃道集解孔安国曰王者主民当敬民事无非天时天时所常祀也○以孔传考之天时二字不复出

祖己嘉武丁之以祥雉为德立其庙为高宗遂作高宗彤日及训○困学纪闻曰与书序相违王若虚辨惑曰考之於书此篇即祖己训王之辞其曰高宗者史氏追称耳诸篇之体皆然而云武丁既没祖己嘉之而作谬矣且立庙称宗自国家之事岂独出祖己之意哉高宗之训乃书篇名自当全着而但云及训此复失之太简矣

子帝太丁立○徐孚远曰太丁重见疑误

殷之太师少师乃持其祭乐器奔周○王若虚辨惑曰尚书微子篇所谓太师少师即箕子比干也今乃言奔周与书所载异矣而周纪又云纣杀王子比干囚箕子太师疵少师强抱其乐器而奔周则迁所谓太师少师者其乐工邪若殷纪所称亦止於乐工则微子何至与此辈谋决去就而此辈之奔亦为何并持祭器乎至宋世家则曰武王克殷微子持其祭器造於军门前後参差殆不可晓

封纣子武庚禄父以续殷祀集解汲冢纪年曰汤灭夏以至於受二十九王用岁四百九十六年○前正义引竹书纪年云自盘庚徙殷至纣之灭七百七十三年更不徙都其相缪戾如此

史记卷三考证

卷四

<史部,正史类,史记>

钦定四库全书

史记卷四

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

周本纪第四

周后稷名弃【正义因太王所居周原号曰周地理志云右扶风县岐山西北中水乡周太王所邑括地志云故周城一名美阳城在雍州武功县西北二十五里即太王城也】其母有郤氏女曰姜原【集解韩诗章句曰姜姓原字或曰姜原谥号也正义郤天来反亦作?同说文云郤炎帝之後姜姓封郤周弃外家】姜原为帝喾元妃【索隐譙周以为弃帝喾之胄其父亦不着与此纪异也】姜原出野见巨人迹心忻然说欲践之践之而身动如孕者居期而生子以为不祥弃之隘巷【索隐已下皆诗大雅生民篇所云诞寘之隘巷牛羊腓字之诞寘之平林会伐平林诞寘之寒冰鸟覆翼之是其事也】马牛过者皆辟不践徙置之林中适会山林多人迁之而弃渠中冰上飞鸟以其翼覆荐之姜原以为神遂收养长之初欲弃之因名曰弃弃为儿时屹如巨人之志其游戏好种树麻菽麻菽美及为成人遂好耕农相地之宜宜谷者稼穡焉【正义种曰稼歛曰穡】民皆法则之帝尧闻之举弃为农师天下得其利有功帝舜曰弃黎民始饥【集解徐广曰今文尚书云祖饥故此作始饥祖始也】尔后稷播时百谷封弃於郤【集解徐广曰今釐乡在扶风索隐即诗生民曰有郤家室是也郤即釐古今字异耳正义括地志云故釐城一名武功城在雍州县西南二十二里古郤国后稷所封也有后稷及姜原祠毛萇云郤姜嫄国也后稷所生尧见天因郤而生后稷故因封於郤也】号曰后稷别姓姬氏【集解礼纬曰祖以履大迹而生】后稷之兴在陶唐虞夏之际皆有令德后稷卒【集解駰案山海经海内经曰黑水青水之间有广都之野后稷葬焉皇甫谧曰冢去中国三万里也】子不窋立【索隐帝王世纪云后稷纳姁氏生不窋而譙周按国语云世后稷以服事虞夏言世稷官是失其代数也若不窋亲弃之子至文王千余岁唯十四代亦不合事情正义括地志云不窋故城在庆州弘化县南三里即不窋在戎狄所居之城也毛诗疏云虞及夏

殷共有千二百岁每世在位皆八十年乃可充其数耳命之短长古今一也而使十五世君在位皆八十许载子必将老始生不近人情之甚以理而推实难据信也】不窾末年夏后氏政衰去稷不务【集解韦昭曰夏太康失国废稷之官不复务农索隐国语曰弃稷不务此云去稷者是太史公恐弃是后稷之名故变文云去也言夏政衰不窾去稷官不复务农者也】不窾以失其官而犇戎狄之间不窾卒子鞠立鞠卒子公刘立公刘虽在戎狄之间复修后稷之业务耕种行地宜自漆沮渡渭取材用【正义公刘徙漆县漆水南渡渭水至南山取材木为用也括地志云豳州新平县即汉漆县也漆水在岐州普闰县东岐山漆水东入渭】行者有资居者有畜积民赖其庆百姓怀之多徙而保归焉周道之兴自此始故诗人歌乐思其德【索隐即诗大雅篇笃公刘是也】公刘卒子庆节立国於豳【集解徐广曰新平漆县之东北有豳亭索隐豳即邠也古今字异耳正义括地志云豳州新平县即汉漆县诗豳国公刘所邑之地也】庆节卒子皇仆立皇仆卒子差弗立差弗卒子毁隃立【集解音瑜世本作榆索隐世本作僞榆】毁隃卒子公非立【索隐世本作公非辟方皇甫谧云公非字辟方也】公非卒子高圉立【集解宋忠曰高圉能率稷者也周人报之索隐世本云高圉侯倅】高圉卒子亚圉立【集解系本云亚圉云都皇甫谧云云都亚圉字索隐汉书古今表曰云都亚圉弟按如此说则辟方侯倅亦皆二人之名实未能详】亚圉卒子公叔祖类立【索隐世本云太公组绀诸璽三代世表称叔类凡四名皇甫谧云公祖一名组绀诸璽字叔类号曰太公也】公叔祖类卒子古公亶父立古公亶父复修后稷公刘之业积德行义国人皆戴之薰育戎狄攻之欲得财物予之已复攻欲得地与民民皆怒欲战古公曰有民立君将以利之今戎狄所为攻战以吾地与民民之在我与在彼何异民欲以我故战杀人父子而君之予不忍为乃与私属遂去豳度漆沮【集解徐广曰水在杜阳岐山杜阳县在扶风】踰梁山【正义括地志云梁山在雍州好畤县西北十八里郑玄云岐山西南然则梁山横长其东当阳西北临河其西当岐山东北自豳适周当踰之矣】止於岐下【集解徐广曰岐山在扶风美阳西北其南有周原駟案皇甫谧云邑於周地故始改国曰周】豳人举国扶老携弱尽复归古公於岐下及他旁国闻古公仁亦多归之於是古公乃贬戎狄之俗而营筑城郭室屋而邑别居之【集解徐广曰分别而为邑落也】作五官有司【集解駟案礼记曰天子之五官曰司徒司马司空司士司寇典司五衆郑玄曰此殷时制】民皆歌乐之颂其德【索隐即诗颂云后稷之孙实维太王居岐之阳实始剪商是也】古公有长子曰太伯次日虞仲太姜【正义国语注齐许申吕四国皆姜姓也四岳之後太姜之家太姜太王之妃王季之母】生少子季历季历娶太任【集解列女传太姜有吕氏女太任摯任氏中女正义国语摯畴二国任姓奚仲仲虺之後太任之家太任王季之妃文王母也】皆贤妇人【正义列女传云太姜太王娶以为妃生太伯仲雍王季太姜有色而贞顺率导诸子至於成童靡有过失太王谋事必於太姜迁徙必与太任王季娶以为妃太任之性端壹诚庄维德之行及其有身目不视恶色耳不听淫声口不出傲言能以胎教子而生文王此皆有贤行也】生昌有圣瑞【正义尚书帝命验云季秋之月甲子赤爵衔丹书入于鄆止于昌户其书云敬胜怠者吉怠胜敬者灭义胜欲者徙欲胜义者凶凡事不强则不枉不敬则不正枉者废灭敬者万世以仁得之以仁守之其量百世以不仁得之以仁守之其量十世以不仁得之不仁守之不及其世此盖圣瑞】古公曰我世当有兴者其在昌乎长子太伯虞仲知古公欲立季历以传昌乃二人亡如荆蛮文身断髮【正义应劭曰常在水中故断其发文其身以象龙子故不见伤害】以让季历【正义太伯奔吴所居城在苏州北五十里常州无锡县界梅里村其城及冢见存而云亡荆蛮者楚灭越其地

属楚秦灭楚其地属秦秦讳楚改曰荆故通号吴越之地为荆及北人书史加云蛮势之然也【古公卒季历立是为公季公季修古公遗道笃於行义诸侯顺之公季卒【集解皇甫谧曰葬郿县之南山】子昌立是为西伯西伯曰文王【正义帝王世纪云文王龙颜虎眉身长十尺有四乳雒书灵听云苍帝姬昌曰角鸟鼻高长八尺二寸圣智慈理也】遵后稷公刘之业则古公公季之法笃仁敬老慈少礼下贤者日中不暇食以待士士以此多归之伯夷叔齐在孤竹【集解应劭曰在辽西令支正义括地志云孤竹故城在平州卢龙县南十二里殷时诸侯孤竹国也姓墨氏也】闻西伯善养老盍往归之太颠闳夭散宜生鬻子辛甲大夫之徒皆往归之【集解駉案刘向别录曰鬻子名熊封於楚辛甲故殷之臣事纣盖七十五谏而不听去至周召公与语贤之告文王文王亲自迎之以为公卿封长子长子今上党所治县是也】崇侯虎谮西伯於殷纣曰西伯积善累德诸侯皆向之将不利於帝帝纣乃囚西伯於羑里闳夭之徒患之乃求有莘氏美女【正义括地志云古?国城在同州河西县南二十里世本云莘国姒姓夏禹之後即散宜生等求有莘美女献纣者】骊戎之文马【正义括地志云骊戎故城在雍州新丰县东南十六里殷周时骊戎国城也按骏马赤鬣縞身目如黄金文王以献纣也】有熊九驂【正义括地志云郑州新郑县本有熊氏之墟也按九驂三十六匹马也】他奇怪物因殷嬖臣费仲而献之纣纣大悦曰此一物足以释西伯况其多乎【索隐一物谓?氏之美女也】乃赦西伯赐之弓矢斧钺使西伯得征伐曰谮西伯者崇侯虎也西伯乃献洛西之地以请纣去炮烙之刑纣许之西伯阴行善诸侯皆来决平於是虞芮之人【集解駉案地理志虞在河东大阳县芮在冯翊临晋县正义括地志云故虞城在陕州河北县东北五十里虞山之上古虞国也故芮城县西二十里古芮国也晋太康地记云虞西百四十里有芮城括地志云又闲原在河北县西六十五里诗云虞芮质厥成毛茌云虞芮之君相与争田久而不平乃相谓曰西伯仁人盍往质焉乃相与朝周二国君相谓曰我等小人不可履君子之庭乃相让所争地以为闲原至今尚在注引地理志芮在临晋者恐疎然闲原在河东复与虞芮相接临晋在河西同州非临晋芮城明矣】有狱不能决乃如周入界耕者皆让畔民俗皆让长虞芮之人未见西伯皆慙相谓曰吾所争周人所耻何往为祗取辱耳遂还俱让而去诸侯闻之曰西伯盖受命之君明年伐犬戎【集解駉案山海经曰有人人面兽身名曰犬戎正义又云黄帝生苗龙苗龙生融吾融吾生并明并明生白犬白犬有二是为犬戎说文云赤狄本犬种故字从犬又後汉书云犬戎盘瓠之後也今长沙武陵之郡大半是也又毛诗疏云犬戎昆夷是也】明年伐密须【集解应劭曰密须氏姁姓之国瓚曰安定阴密县是正义括地志云阴密故城在泾州鹑觚县西其东接县城即古密国杜预云姁姓国在安定阴密县也】明年败耆国【集解徐广曰一作 正义即黎国也邹诞生云本或作黎孔安国云黎在上党东北括地志云故黎城黎侯国也在潞州黎城县东北十八里尚书云西伯既戡黎是也】殷之祖伊闻之惧以告帝纣纣曰不有天命乎是何能为明年伐邳【集解徐广曰邳城在野王县西北音于正义括地志云故邳城在怀州河内县西北二十七里古邳国城也左传云邳晋应韩武之穆也】明年伐崇侯虎【正义皇甫谧曰夏鯀封虞夏商周皆有崇国崇国盖在丰镐之间诗云既伐于崇作邑于丰是国之地也】而作丰邑【集解徐广曰丰在京兆鄠县东有灵台镐在上林昆明北有镐池去丰二十五里皆在长安南数十里正义括地志云周丰宫周文王宫也在雍州鄠县东三十五里镐在雍州西南三十二里】自岐下而徙都丰明年西伯崩【集解徐广曰文王九十七乃崩正义括地志云周文王墓在雍州万年县西南二十八里原上也】太子发立是为武王西伯盖即位五十年其囚羑里盖益易之八卦为六十四卦【正

义乾凿度云垂皇策者羲益卦演德者文成命者孔也易正义云伏羲制卦文王卦辞周公爻辞孔十翼也按太史公言盖者乃疑辞也文王着演易之功作周纪方赞其美不敢专定重易故称盖也】诗人道西伯盖受命之年称王而断虞芮之讼【正义二国相让後诸侯归西伯者四十余国咸尊西伯为王盖此年受命之年称王也帝王世纪云文王即位四十二年岁在鹑火文王更为受命之元年始称王矣又毛诗云文王九十七而终终时受命九年则受命之元年年八十九也】後七年而崩【正义七当为九其说在後】諡为文王【正义諡法经纬天地曰文】改法度制正朔矣追尊古公为太王公季为王季【正义易纬云文王受命改正朔有王号於天下郑玄信而用之言文王称王已改正朔布王号矣按天无二日土无二王岂殷纣尚存而周称王哉若文王自称王改正朔则是功业成矣武王何复得云大勳未集欲卒父业也礼记大传云牧之野武成大事而退追王大王亶父王季历文王昌据此文乃是追王为王何得文王自称王改正朔也】盖王瑞自太王兴【正义古公在邠被戎狄攻战夺民太王曰民之在我与彼何异杀人父子而君之予不忍为遂远去邠止於岐下邠人举国尽归古公他国闻古公仁亦多归之乃贬戎狄之俗为室屋邑落而分别居之季历又生昌有圣瑞盖是王瑞自太王时而兴起也然自西伯盖即位五十年以下至太王兴在西伯崩後重述其事为经传不同不可全弃乃略而书之引次其下事必可疑故数言盖也】武王即位【正义諡法克定祸乱曰武春秋元命包云武王骍鬣是谓刚强也】太公望为师周公旦为辅召公毕公之徒左右王师修文王绪业九年武王上祭于毕【集解马融曰毕文王墓地名也索隐按文云上祭于毕则毕天星之名毕星主兵故师出而祭毕星也正义上音时掌反尚书武成篇云我文考文王诞膺天命以抚方夏惟九年大统未集太誓篇序云惟十有一年武王伐殷太誓篇云惟十有三年春大会于孟津大戴礼云文王十五而生武王则武王少文王十四岁矣礼记文王世子云文王九十七而终武王九十三而终按文王崩时武王已八十三矣八十四即位至九十三崩武王即位适满十年言十三年伐纣者续文王受命年欲明其卒父业故也金縢篇云惟克商二年王有疾不愈按文王受命九年而崩十一年武王服阕观兵孟津十三年克纣十五年有疾周公请命王有瘳後四年而崩则武王年九十三矣而太史公云九年王观兵十一年伐纣则以为武王即位年数与尚书违甚疎矣】东观兵至于盟津【集解徐广曰谯周云史记武王十一年东观兵十三年克纣】为文王木主载以车中军武王自称太子发言奉文王以伐不敢自专乃告司马司徒司空诸节【集解马融曰诸受符节有司也】齐栗信哉予无知以先祖有德臣小子受先功【集解徐广曰一云予小子受先公功】毕立赏罚以定其功遂兴师师尚父号曰【集解郑玄曰号令之军法重者】总尔衆庶与尔舟楫後至者斩武王渡河中流白鱼跃入王舟中【集解马融曰鱼者介鳞之物兵象也白者殷家之正色言殷之兵衆与周之象也索隐此已下至火复王屋流为乌皆见周书及今文泰誓】武王俯取以祭既渡有火自上复于下至于王屋流为乌其色赤其声魄云【集解马融曰王屋王所居屋流行也魄然安定意也郑玄曰书说云乌有孝名武王卒父大业故乌瑞臻赤者周之正色也索隐按今文泰誓流为鵬鵬摯鸟也马融云明武王能伐纣郑玄云乌是孝鸟言武王能终父业亦各随文而解也】是时诸侯不期而会盟津者八百诸侯诸侯皆曰纣可伐矣武王曰女未知天命未可也乃还师归居二年闻纣昏乱暴虐滋甚杀王子比干囚箕子太师疵少师强抱其乐器而犇周於是武王徧告诸侯曰殷有重罪不可以不毕伐【集解徐广曰一作灭】乃遵文王遂率戎车三百乘虎贲三千人【集解孔安国曰虎贲勇士称也若虎贲言其猛也】甲士四万五千人以东伐纣十一年十二月戊午师毕渡盟津【正义毕尽也】

尽从河南渡河北】诸侯咸会曰孳孳无怠武王乃作太誓告于衆庶今殷王纣乃用其妇人之言自絶于天毁坏其三正【集解马融曰动逆天地人也正义按三正三统也周以建子为天统殷以建丑为地统夏以建寅为人统也】离遏其王父母弟【集解郑玄曰王父母弟祖父母之族必言母弟举亲者言之也】乃断弃其先祖之乐乃为淫声用变乱正声怡说妇人【集解徐广曰怡一作辞】故今予发维共行天罚勉哉夫子【集解郑玄曰夫子丈夫之称】不可再不可三二月甲子昧爽武王朝至于商郊牧野乃誓【集解徐广曰一作正此建丑之月殷之正月周之二月也孔安国曰昧冥也爽明朝旦也癸亥夜陈甲子朝誓之正义括地志云卫州城故老云周武王伐纣至于商郊牧野乃筑此城酈元注水经云自朝歌南至清水土地平衍据臯跨泽悉牧野也括地志又云纣都朝歌在卫州东北七十三里朝歌故城是也本妹邑殷王武丁始都之帝王世纪云帝乙复济河北徙朝歌其子纣仍都焉】武王左杖黄钺右秉白旄以麾【集解孔安国曰钺以黄金饰斧左手杖钺示无事於诛右手把旄示有事於教令】曰远矣西土之人【集解孔安国曰劳苦之】武王曰嗟我有国家君【集解马融曰豕大也】司徒司马司空亚旅师氏【集解孔安国曰亚次旅衆大夫也其位次卿师氏大夫官以兵守门】千夫长百夫长【集解孔安国曰师率卒率】及庸蜀羌髳微纁彭濮人【集解孔安国曰八国皆蛮夷戎狄羌在西蜀髳微在巴蜀纁彭在西北庸濮在江汉之南马融曰武王所率将来伐纣也正义髳音矛括地志云房州竹山县及金州古卢国益州及巴利等州皆古蜀国陇右岷洮丛等州以西羌也姚府以南古髳国之地戎府之南古微卢彭三国之地濮在楚西南有髳州微濮州卢州彭州焉武王率西南夷诸州伐纣也】称尔戈【集解孔安国曰称举也】比尔干立尔矛予其誓王曰古人有言牝鸡无晨牝鸡之晨惟家之索【集解孔安国曰索尽也喻妇人知外事雌代雄鸣则家尽也】今殷王纣维妇人言是用自弃其先祖肆祀不答【集解郑玄曰肆祭名答问也】昏弃其家国遗其王父母弟不用乃维四方之多罪逋逃是崇是长是信是使【集解孔安国曰言纣弃其贤臣而尊长逃亡罪人信用之也】俾暴虐于百姓以奸轨于商国今予发维共行天之罚今日之事不过六步七步乃止齐焉夫子勉哉【集解孔安国曰今日战事不过六步七步乃止相齐言当旅进一心也】不过於四伐五伐六伐七伐乃止齐焉勉哉夫子【集解孔安国曰伐谓击刺也少则四五多则六七以为例也】尚桓桓【集解郑玄曰威武貌】如虎如罴如豺如离【集解徐广曰此训与螭同】于商郊不御克犇以役西土勉哉夫子【集解郑玄曰御强御谓强暴也克杀也不得暴杀纣师之犇走者当以为周之役也】尔所不勉其于尔身有戮【集解郑玄曰所言且也】誓已诸侯兵会者车四千乘陈师牧野帝纣闻武王来亦发兵七十万人距武王武王使师尚父与百夫致师【集解駉案周礼环人掌致师郑玄曰致师者致其必战之志也古者将战先使勇力之士犯敌焉春秋传曰楚许伯御乐伯摄叔为右以致晋师许伯曰吾闻致师者御靡旌摩垒而还乐伯曰吾闻致师者左射以鼓代御执轡御下捩马掉鞅而还摄叔曰吾闻致师者右入垒折馘执俘而还皆行其所闻而复】以大卒驰帝纣师【集解徐广曰帝一作商正义大卒谓戎车三百五十乘士卒二万六千二百五十人有虎贲三千人】纣师虽衆皆无战之心心欲武王亟入纣师皆倒兵以战以开武王武王驰之纣兵皆崩畔纣纣走反入登于鹿台之上蒙衣其珠玉自燔于火而死【正义衣音於既反周书云甲子夕纣取天智玉琰五环身以自焚注天智玉之善者缝环其身自厚也凡焚四千玉也庶玉则销天智玉不销纣身不尽也】武王持大白旗以麾诸侯诸侯毕拜武王武王乃揖诸侯【正义武王率诸侯伐天子天子已死诸侯毕贺故武王揖诸侯言先拊循其心也】诸侯毕从武王至商国【正义谓

至朝歌】商国百姓咸待於郊於是武王使羣臣告语商百姓曰上天降休商人皆再拜稽首武王亦答拜【索隐武王虽以臣伐君颇有慙德不应答商人之拜太史公失辞耳寻上文诸侯毕拜贺武王武王尚且报揖无容遂下拜商人】遂入至纣死所武王自射之三发而後下车以轻劒击之【正义周书作轻吕击之轻吕劒名也】以黄钺斩纣头县太白之旗已而至纣之嬖妾二女二女皆经自杀武王又射三发击以劒斩以玄钺【集解駰案司马法曰夏执玄钺宋均曰玄钺周铁不磨砺】县其头小白之旗武王已乃出复军其明日除道修社及商纣宫及期百夫荷罕旗以先驱【集解駰案蔡邕独断曰前驱有九旒云罕东京赋曰云罕九旒薛综曰旒旗名】武王弟叔振铎奉陈常车周公旦把大钺毕公把小钺以夹武王散宜生太顛閎夭皆执劒以卫武王既入立于社南大卒之左右毕从毛叔郑奉明水【集解駰案周礼曰司烜氏以监取明水於月郑玄曰监镜属也取月之水欲得陰阳之絜气陈明水以为玄酒索隐明明水也旧本皆无水字今本有水字若惟云奉明其义未见不知是明何物也烜音毀】卫康叔封布兹【集解徐广曰兹者籍席之名诸侯病曰负兹索隐兹一作苙公明草也言兹举成器言苙见洁草也】召公奭赞采【正义赞佐也采币也】师尚父牵牲尹佚筮祝曰【正义尹佚读筮书祝文以祭社也】殷之末孙季纣【正义周书作末孙受德受德纣字也】殄废先王明德侮蔑神祇不祀昏暴商邑百姓其章显闻于天上帝於是武王再拜稽首曰膺更【监本作受】大命革殷受天明命武王又再拜稽首乃出封商纣子禄父殷之余民武王为殷初定未集乃使其弟管叔鲜蔡叔度相禄父治殷【正义地理志云河内殷之旧都周既灭殷分其畿内为三国诗邶鄘卫是邶以封纣子武庚鄘管叔尹之以监殷民谓之三监帝王世纪云自殷都以东为卫管叔监之殷都以西为鄘蔡叔监之殷都以北为邶霍叔监之是为三监按二说各异未详也】已而命召公释箕子之囚【集解徐广曰释一作原】命毕公释百姓之囚表商容之间命南宫括散鹿台之财发钜桥之粟以振贫弱萌隸命南宫括史佚展九鼎保玉【集解徐广曰保一作宝】命閎夭封比干之墓【正义封谓益其土及画疆界括地志云比干墓在卫州汲县北十里二百五十步】命宗祝享祠于军乃罢兵西归行狩记政事作武成【集解孔安国曰武功成也】封诸侯班赐宗彝作分殷之器物【集解郑玄曰宗彝宗庙樽也作分器着王之命及所受物也】武王追思先圣王乃褒封神农之後於焦【集解駰案地理志弘农陕县有焦城故焦国也】黄帝之後於祝【正义左传云祝其实夹谷杜预云夹谷即祝其也服虔云东海郡祝其县也】帝尧之後於蓟【集解駰案地理志燕国有蓟县】帝舜之後於陈【正义括地志云陈州宛丘县在陈城中即古陈国也帝舜後遏父为周武王陶正武王赖其器用封其子妘满於陈都宛丘之侧】大禹之後於杞【正义括地志云汴州雍丘县古杞国地理志云古杞国理此城周武王封禹後於?号东楼公二十一代为楚所灭】於是封功臣谋士而师尚父为首封封尚父於营丘曰齐【集解駰案尔雅曰水出其前而左曰营丘郭璞曰今齐之营丘淄水过其南乃东正义水经注今临菑城中有邱云古县邱之地吕望所封齐之都也营邱在县北百步外城中輿地志云秦立为县城临淄水故曰临淄也】封弟周公旦於曲阜曰鲁【集解应劭曰曲阜在鲁城中委曲长七八里正义帝王世纪云炎帝自陈营都於鲁曲阜黄帝自穷桑登帝位後徙曲阜少昊邑于穷桑以登帝位都曲阜顓頊始都穷桑徙商丘穷桑在鲁北或云穷桑即曲阜也又为大庭氏之故国又是商奄之地皇甫谧云黄帝生於壽丘在鲁城东门之北居轩辕之丘於山海经云此地穷桑之际西射之南是也括地志云兗州曲阜县外城即周公旦子伯禽所筑古鲁城也】封召公奭於燕【正义封帝尧之後於蓟封召公奭於燕观其文稍似重也水经注云蓟城西

北隅有蓊丘因取名焉括地志云燕山幽州渔阳县东南六十里宗国都城记云周武王封召公奭於燕地在燕山之野故国取名焉按周封以五等之爵蓊燕二国俱武王立因燕山蓊丘为名其地足自立国蓊微燕盛乃并蓊居之蓊名遂絶焉今幽州蓊县古燕国也】封弟叔鲜於管【正义括地志云郑州管城县外城古管国城也周武王弟叔所封】弟叔度於蔡【正义括地志云豫州北七十里上蔡县古蔡国武王封弟叔度於蔡是也县东十里有蔡冈因名也】余各以次受封武王徵九牧之君登幽之阜以望商邑【正义括地志云幽州三水县西十里有幽原周先公刘所都之地也幽城在此原上因公为名按盖武王登此城望商邑】武王至于周自夜不寐周公旦即王所曰曷为不寐【正义周镐京也武王伐纣还至镐京忧未定天之保安故自夜不得寐也】王曰告女维天不飡殷自发未生於今六十年麋鹿在牧【集解徐广曰此事出周书及随巢子云夷羊在牧牧郊也夷羊怪物也】蜚鸿满野【索隐按高诱曰蜚鸿蟻蠓也言飞虫蔽田满野故为灾非是鸿鴈也随巢子作飞拾飞拾虫也正义蜚音飞古飞字也於今犹当今於今六十年从帝乙十年至伐纣年也麋鹿在牧喻谗佞小人在朝位也飞鸿满野喻忠贤君子见放弃也言纣父帝乙立後殷国益衰至伐纣六十年间谄佞小人在于朝位忠贤君子放迁于野故诗云鸿鴈于飞肃肃其羽之子于征劬劳于野毛萁云之子侯伯卿士也郑玄云鸿鴈之避阴阳寒暑喻民知去无道就有道也】天不享殷乃今有成【索隐言上天不歆享殷家故见灾异我周今乃有成王业者也】维王建殷其登名民三百六十夫不显亦不宾灭【集解徐广曰一云不顾亦不宾灭一又云不顾亦不恤也索隐言天初建殷国亦登进名贤之人三百六十夫既无非大贤未能兴化致理故殷家不大光昭亦不即摈灭以至于今也亦见周书及随巢子颇复脱错而刘氏音破六为古其字义亦无所通徐广云一本作不顾亦不宾盖是学者以周书及随巢不同逐音改易耳随巢子曰天鬼不顾亦不宾灭天鬼即天神也】以至今我未定天保何暇寐王曰定天保依天室悉求夫恶贬从殷王受【索隐言今悉求取夫恶人不知天命不顺周家者咸贬责之与纣同罪故曰贬从殷王受】日夜劳来我西土【集解徐广曰一云肯来索隐七字连作一句读】我维显服及德方明【正义服事也武王答周公云定知天之安保我位得依天之宫室退除殷纣之恶日夜劳民又安定我之西土我维明於事及我之德教施四方明行之乃可至於寢寐也自此已上为至周自夜不寐周公问之故先书】自洛汭延于伊汭居易毋固其有夏之居【集解徐广曰夏居河南初在阳城後居阳翟索隐言自洛汭及伊汭其地平易无险固是有夏之旧居正义括地志云自禹至太康与唐虞皆不易都城然则居阳城为禹避商均时之都也帝王世纪云禹封夏伯今河南阳翟是汲冢古文云太康居斟寻羿亦居之桀又居之括地志云故鄆城在洛州巩县西南五十八里也】我南望三涂北望岳鄙顾瞻有河【集解徐广曰周书度邑曰武王问太公曰吾将因有夏之居也南望过于三涂北瞻望于有河索隐杜预曰三涂在陆浑南岳盖河北太行山鄙都鄙谓近岳之邑度邑周书篇名度音徒各反正义括地志云太行恒山连延东北接碣石接岳山言北望太行恒山之边鄙都邑也又晋州霍山一名太岳在洛西北山在洛东北二说皆通】粤詹雒伊母远天室【正义粤者审慎之辞也言审慎瞻雒伊二水之阳无远离此为天室也】营周居于雒邑而後去【正义括地志云故王城一名河南城本郑鄆周公新筑在洛州河南县北九里苑内东北隅自平王以下十二王皆都此城至敬王乃迁都成周至赧王又居王城也帝王世纪云王城西有郑鄆陌左传云成王定鼎於郑鄆京相璠地名云郑山名鄆邑名】纵马於华山之阳【正义华山在华陰县南八里山南曰阳也】牧牛於桃林之虚【集解孔安国曰桃林在华山东正义括地志云桃林在陕州桃林县

西山海经云夸父之山其北有林焉名曰桃林广圆三百里中多马湖水出焉北流入河也【集解驺案公羊传曰入曰振旅】示天下不复用也武王已克殷後二年问箕子殷所以亡箕子不忍言殷恶以存亡国宜告【集解徐广曰存一作前索隐六字连一句读正义箕子殷人不忍言殷恶以周国之所宜言告武王为洪范九类武王以类问天道】武王亦丑故问以天道武王病天下未集羣公惧穆卜【集解孔安国曰穆敬也】周公乃祓斋【正义祓音废又音拂斋音扎皆反祓谓除不祥求福也】自为质【正义音至周公祓斋自以贄币告三王请代武王武王病乃瘳也】欲代武王武王有瘳後而崩【集解徐广曰封禅书曰武王克殷二年天下未宁而崩皇甫谧曰武王定位元年岁在乙酉六年庚寅崩驺案皇覽曰文王武王周公冢皆在京兆长安镐聚东社中也正义括地志云武王墓在雍州万年县西南二十八里毕原上也】太子诵代立是为成王成王少周初定天下周公恐诸侯畔周公乃摄行政当国管叔蔡叔羣弟疑周公与武庚作乱畔周周公奉成王命伐诛武庚管叔放蔡叔以微子开代殷後国於宋【正义今宋州也】颇收殷余民以封武王少弟封为卫康叔【正义尚书洛诰云我卜瀍水东亦惟洛食以居邶鄘卫之衆又多士篇序云成周既成迁殷顽民按是为东周古洛阳城也括地志云洛阳故城在洛州洛阳县东北二十六里周公所筑即成周城也輿地志云以周地在王城东故曰东周敬王避子朝乱自洛邑东居此以其迫厄不受王都故坏翟泉而广之按武王灭殷国为邶鄘卫三监尹之武庚作乱周公灭之徙三监之民於成周颇收其余衆以封康叔为卫侯即今卫州是也孔安国云以三监之余民国康叔为卫侯周公惩其数叛故使贤母弟主之也】晋唐叔得嘉谷【集解郑玄云二苗同为一穗】献之成王成王以归周公于兵所【集解徐广曰归一作馈】周公受禾东土鲁天子之命【集解徐广曰尚书序云旅天子之命】初管蔡畔周周公讨之三年而毕定故初作大诰次作微子之命【集解孔安国曰封命之书】次归禾次嘉禾次康诰酒诰梓材【集解孔安国曰告康叔以为政之道亦如梓人之治材也】其事在周公之篇周公行政七年成王长周公反政成王北面就羣臣之位成王在丰使召公复营洛邑如武王之意周公复卜申视卒营筑居九鼎焉曰此天下之中四方入贡道里均作召诰洛诰成王既迁殷遗民周公以王命告作多士无佚召公为保周公为师东伐淮夷残奄【集解郑玄曰奄国在淮夷之北正义奄音於险反括地志云泗水徐城县北三十里古徐国即淮夷也兖州曲阜县奄至即奄国之地也】迁其君薄姑【集解马融曰齐地正义括地志云薄姑故城在青州博昌县东北六十里薄姑氏殷诸侯封於此周灭之也】成王自奄归在宗周【正义伐奄归镐京也】作多方【集解孔安国曰告衆方天下诸侯】既紕殷命袭淮夷归在丰作周官【集解孔安国曰言周家设官分职用人之法古文尚书叙周官书篇名】兴正礼乐度制於是改而民和睦颂声兴【集解何休曰颂声者太平歌颂之声帝王之高致也】成王既伐东夷息慎来贺王赐荣伯作贿息慎之命【集解孔安国曰贿赐也马融曰荣伯周同姓畿内诸侯为卿大夫也】成王将崩惧太子钊之不任乃命召公毕公率诸侯以相太子而立之成王既崩二公率诸侯以太子钊见於先王庙申告以文王武王之所以为王业之不易务在节俭毋多欲以笃信临之作顾命【集解郑玄曰临终出命故谓之顾顾将去之意也】太子钊遂立是为康王康王即位徧告诸侯宣告以文武之业以申之作康诰故成康之际天下安宁刑错四十余年不用【集解应劭曰错置也民不犯法无所置刑】康王命作策毕公分居里成周郊【集解孔安国曰分别民之居里异其善恶也成定东周郊境使有保护也】作毕命康王卒子昭王瑕立昭王之时王道微缺昭王南巡狩不返卒於江上其卒不赴告讳之也【正义帝王世纪云昭王德衰南

征济于汭，船人恶之，以胶船进。王御船至中流，胶液船解，王及祭公俱没于水中而崩。其右卒游靡，长臂且多力，游振得王。周人讳之。立昭王子满，是为穆王。穆王即位，春秋已五十矣。王道衰微，穆王闵文武之道缺，乃命伯冏【集解孔安国曰：伯冏，臣名】申诫【集解徐广曰：一作部】太仆【集解应劭曰：太仆，周穆王所置，盖太御，衆仆之长，中大夫也】。国之政作冏命【正义尚书序云：穆王令伯冏为太仆，正】。复宁穆王将征犬戎【集解徐广曰：一作畎】。祭公谋父谏曰【集解韦昭曰：祭畿内之国，周公之後为王卿士，谋父，字也。正义括地志云：故蔡城在郑州管城县东北十五里，郑大夫祭仲邑也。释例云：祭城在河南，上有敖仓，周公後所封也】。不可先王耀德，不观兵，夫兵戢而时动，动则威，观则玩，玩则无震【集解韦昭曰：震，惧也】。是故周文公之颂曰【集解韦昭曰：文公，周公旦之諡】。载戢干戈，载櫜弓矢【集解唐固曰：櫜，韬也】。我求懿德，肆于时夏，允王保之【集解韦昭曰：言武王常求美德，故陈其功，於是夏而歌之，信哉。武王能保此时夏之美，乐章大者曰夏】。先王之於民也，茂正其德而厚其性，阜其财求而利其器用，明利害之乡【集解韦昭曰：乡，方也】。以文修之，使之务利而辟害，怀德而畏威，故能保世以滋大。昔我先王世后稷【集解韦昭曰：谓弃与不窾也。唐固曰：父子相继曰世】。以服事虞夏及夏之衰也【正义谓太康也】。弃稷不务【正义言太康弃废稷官】。我先王不窾，用失其官，而自窜於戎狄之间，不敢怠业，时序其德，遵修其绪【集解徐广曰：遵，一作选】。修其训典，朝夕恪勤，守以敦笃，奉以忠信，奕世载德，不忝前人【正义前人谓后稷也。言不窾亦世载德，不忝后稷及文王、武王，无不务农事】。至于文王、武王，昭前之光明，而加之以慈和，事神保民，无不欣喜。商王帝辛，大恶于民，庶民不忍，欣载武王，以致戎于商牧【正义紂近郊地名，牧野】。是故先王非务武也，勤恤民隐，而除其害也。夫先王之制邦内甸，服邦外侯，侯卫宾服【集解韦昭曰：此总言之也。侯，侯圻；卫，卫圻也】。夷蛮要服，戎翟荒服，甸服者祭【集解韦昭曰：供日祭】。侯服者祀【集解韦昭曰：供月祀】。宾服者享【集解韦昭曰：供时享】。要服者贡【集解韦昭曰：供岁贡】。荒服者王【集解韦昭曰：王，王事天子也。诗曰：莫敢不来王】。日祭月祀，时享岁贡，终王先王之顺祀也【集解徐广曰：外传云：先王之训】。有不祭，则修意【集解韦昭曰：先修志意以自责也。畿内近知王意也】。有不祀，则修言【集解韦昭曰：言号令也】。有不享，则修文【集解韦昭曰：文，典法也】。有不贡，则修名【集解韦昭曰：名，谓尊卑职贡之名号也】。有不王，则修德【集解韦昭曰：远人不服，则修文德以来之】。序成而有不至，则修刑【集解韦昭曰：序成，谓上五者次序已成，有不至，则有刑罚也】。於是有刑，不祭，伐；不祀，征；不享，让；不贡，告；不王，於是刑罚之辟有攻伐之兵，有征讨之备，有威让之命，有文告之辞，布令陈辞，而有不至，则增修於德，无勤民於远，是以近无不听，远无不服，今自大毕、伯士之终也【集解徐广曰：犬戎之君】。犬戎氏以其职来王【正义贾逵云：大毕、伯士，犬戎氏之二君也。白狼、白鹿，犬戎之职贡也。按大毕、伯士，终後犬戎氏常以其职来王】。天子曰【正义祭公申穆王之意，故云天子曰】。予必以不享征之，且观之，兵无乃废先王之训，而王几顿乎【正义几，音祈】。吾闻犬戎树敦【集解徐广曰：树一作駟。案韦昭曰：树立也。言犬戎立性敦笃也】。率旧德而守终纯固，其有以御我矣。王遂征之，得四白狼、四白鹿以归。自是荒服者不至。诸侯有不睦者，有侯言於王，作修刑辟【集解郑玄曰：书说云：周穆王以甫侯为相】。王曰：吁，来！有国有土，告汝祥刑【集解孔安国曰：告汝善用刑之道也】。在今尔安百姓，何择非其人【集解王肃曰：训以安百姓之道，当何所选择乎？非当选择贤人乎】。何敬非其刑，何居非其宜与【集解孔安国曰：当何所敬，非唯五刑乎？当何所居，非唯及世轻重所宜乎】。两造具备【集解徐广曰：造，一作遭】。师听五辞【集解孔安国曰：两，谓囚证】。

造至也两至具备则衆狱官听其入五刑辞正义汉书刑法志云五听一曰辞听二曰色听三曰气听四曰耳听五曰目听周礼注辞不直则言繁目不直则视眇耳不直则对答惑色不直则貌赧气不直则数喘也】五辞简信正於五刑【集解孔安国曰五辞简核信有罪验则正之於五刑矣】五刑不简正於五罚【集解孔安国曰不简核谓不应五刑当正五罚出金赎罪也】五罚不服正於五过【集解孔安国曰不服不应罚也正於五过从赦免之】五过之疵官狱内狱閱实其罪【集解孔安国曰使与罚名相当索隐按吕刑云惟反惟内惟货惟来今此似阙少或从省文】惟钩其过【集解马融曰以此五过出入人罪与犯法者等】五刑之疑有赦五罚之疑有赦其审克之【集解孔安国曰刑疑赦从罚罚疑赦从免其当清察能得其理也】简信有衆惟讯有稽【集解孔安国曰简核诚信有合衆心惟察其貌有所考合重之至也索隐讯依尚书音貌也】无简不疑共严天威【集解孔安国曰无简核诚信不听治其狱当严敬天威无轻用刑】黥辟疑赦其罚百率【集解徐广曰率即鍰也音刷孔安国曰六两曰鍰鍰黄铁也索隐鍰黄铁钊亦六两故马融曰钊量名与吕刑鍰同旧本率亦作选】閱实其罪剕辟疑赦其罚倍洒【集解徐广曰一作徒五倍曰徒孔安国曰倍百为二百鍰也索隐洒音戾徒音所解反】閱实其罪膺辟疑赦其罚倍差【集解马融曰倍二百为四百鍰也差者又加四百之三分一凡五百三十三三分一也正义倍中之差二百去三分一合三百三十三鍰二而也宫刑其罚五百膺刑既轻其数岂加故知孔马之说非也】閱实其罪宫辟疑赦其罚五百【集解徐广曰一作六】率閱实其罪大辟疑赦其罚千率閱实其罪墨罚之属千剕罚之属千膺罚之属五百宫罚之属三百大辟之罚其属二百五刑之属三千命曰甫刑穆王立五十五年崩子共王繄扈立【索隐世本作伊扈】共王游於泾上密康公从【集解韦昭曰康公密国之君姬姓也正义括地志云陰密故城在泾州鹑觚县西东接县城故密国也】有三女犇之其母曰必致之王【集解駰案列女传曰康公母姓隗氏】夫兽三为羣人三为衆女三为粲王田不取羣【正义曹大家云羣衆粲皆多之名也田猎得三兽王不尽收以其害深也】公行不下衆【正义曹大家云公诸侯也公之所与衆人共议也】王御不参一族【集解韦昭曰御妇官也参三也一族一父子也故取侄娣以备三不参一族之女也】夫粲美之物也衆以美物归女而何德以堪之王犹不堪况尔之小丑乎小丑备物终必亡康公不献一年共王灭密共王崩子懿王囂立【索隐世本作坚】懿王之时王室遂衰诗人作刺【集解宋忠曰懿王自镐徙都犬丘一曰废丘今槐里是也时王室衰始作诗也】懿王崩共王弟辟方立是为孝王孝王崩诸侯复立懿王太子燹是为夷王【正义纪年云三年致诸侯翦齐哀公昴帝王世纪云十六年崩也】夷王崩子厉王胡立厉王即位三十年好利近荣夷公大夫芮良夫【正义芮伯也】谏厉王曰王室其将卑乎夫荣公好专利而不知大难夫利百物之所生也天地之所载也而有专之其害多矣天地百物皆将取焉何可专也所怒甚多而不备大难以是教王王其能久乎夫王人者将导利而布之上下者也使神人百物无不得极【集解韦昭曰极中也】犹曰怵惕惧怨之来也故颂曰思文后稷克配彼天立我烝民莫匪尔极大雅曰陈锡载周【集解唐固曰言文王布锡施利以载成周道也】是不布利而惧难乎故能载周以至于今今王学专利其可乎匹夫专利犹谓之盗王而行之其归鲜矣荣公若用周必败也厉王不听卒以荣公为卿士用事王行暴虐侈傲国人谤王召公谏曰【集解韦昭曰召康王之後穆公虎为王卿士也】民不堪命矣王怒得卫巫使监谤者【集解韦昭曰卫国之巫也正义监音口衔反监察也以巫人神灵有谤毁必察也】以告则杀之其谤鲜矣诸侯不朝三十四年王益严国人莫敢言道路以目【集解韦昭曰以目相盼而已

】厉王喜告召公曰吾能弭谤矣乃不敢言召公曰是鄣之也防民之口甚於防水水壅而溃伤人必多民亦如之是故为水者决之使导为民者宣之使言故天子听政使公卿至於列士献诗【正义上诗风刺】瞽献典【集解韦昭曰典乐典】史献书【正义史太史也上书谏】师箴【正义音针师乐太师也上箴戒之文】?赋【集解韦昭曰无眸子曰?赋公卿列士所献诗也】蒙诵【集解韦昭曰有眸子而无见曰蒙周礼蒙主弦歌讽诵箴谏之语也】百工谏庶人传语【集解韦昭曰庶人卑贱见时得失不得言传以语士正义传音逐缘反庶人微贱见时得失不得上言乃在街巷相传语】近臣尽规【集解韦昭曰近臣驂仆之属】亲戚补察【正义言亲戚补王过失及察是非也】瞽史教诲【集解韦昭曰瞽乐太师史太史也】耆艾修之【集解韦昭曰耆艾师傅也修理瞽史之教以闻於王】而後王斟酌焉是以事行而不悖民之有口也犹土之有山川也财用於是乎出犹其有原隰衍沃也【集解唐固曰下平曰衍有溉曰沃】衣食於是乎生口之宣言也善败於是乎兴行善而备败所以产财用衣食者也夫民虑之於心而宣之於口成而行之若壅其口其与能几何王不听於是国莫敢出言三年乃相与畔袭厉王厉王出奔於彘【集解韦昭曰彘晋地汉为县属河东今日永安正义括地志云晋州霍邑县本汉彘县後改彘曰永安从鄙犇晋也】厉王太子静匿召公之家国人闻之乃围之召公曰昔吾骤谏王王不从以及此难也今杀王太子王其以我为讎而怱怒乎夫事君者险而不讎怱【集解韦昭曰在危险之中】怨而不怒况事王乎乃以其子代王太子太子竟得脱召公周公二相行政号曰共和【索隐共音如字若汲冢纪年则云共伯干王位共音恭共国伯爵言共伯摄王政故云干王位也正义共音巨用反韦昭曰彘之乱公卿相与和而修政事号曰共和也鲁连子云卫州共城县本周共伯之国也共伯名和好行仁义诸侯贤之周厉王无道国人作难王犇於彘诸侯奉和以行天子事号曰共和元年十四年厉王死於彘共伯使诸侯奉王子靖为宣王而共伯复归国於卫也卫世家云厘侯十三年周厉王出犇於彘共和行政焉二十八年周宣王立四十二年厘侯卒太子共伯余立为君共伯弟和袭攻共伯於墓上共伯入厘侯冢自杀卫人因葬厘侯旁谥曰共伯而立和为卫侯是为武公按此文共伯不得立而和立为武公武公之立在共伯卒後年岁又不相当年表亦同明纪年及鲁连子非也】共和十四年厉王死于彘太子静长於召公家二相乃共立之为王是为宣王宣王即位二相辅之修政法文武成康之遗风诸侯复宗周十二年鲁武公来朝宣王不修籍於千亩【集解应劭云古者天子耕籍田千亩为天下先瓚曰籍蹈籍也按宣王不修亲耕之礼也】虢文公谏曰【集解贾逵曰文公文王母弟虢仲之後为王卿士也韦昭曰文公虢叔之後西虢也宣王都镐在畿内也正义括地志云虢故城在岐州陈仓县东南十里又云千亩原在晋州岳阳县北九十里也】不可王弗听【索隐国语曰虢文公谏云夫人之大事在农上帝之粢盛於是乎出事之繁庶於是乎生人之供给於是乎取事具载国语】三十九年战于千亩【索隐地名在西河介休县】王师败绩于姜氏之戎【集解韦昭曰西夷别种四岳之後也】宣王既亡南国之师乃料民於太原【集解韦昭曰败於姜戎时所亡也南国汉江之间料数也唐固曰南国南阳也】仲山甫谏曰【正义毛萼云仲山甫樊穆仲也括地志云汉樊县城在兖州瑕丘县西南古樊国仲山甫所封也】民不可料也宣王不听卒料民四十六年宣王崩【正义周春秋云宣王杀杜伯而无辜後三年宣王会诸侯田于圃日中杜伯起於道左衣朱衣冠操朱弓矢射宣王中心折脊而死国语云杜伯射王於鄙】子幽王宫涅立【集解徐广曰一作生】幽王二年西州三川皆震【集解徐广曰泾渭洛也駟案韦昭曰西州镐京地震动故三川亦动正义按泾渭二水在雍州北洛水一名漆沮在雍州

东北南流入渭此时以王城为东周镐京为西周】伯阳甫曰周将亡矣【集解韦昭曰伯阳甫周大夫也唐固曰伯阳甫周柱下史老子也】夫天地之气不失其序若过其序民乱之也【集解韦昭曰过失也言民不敢斥王者也】阳伏而不能出阴迫而不能蒸【集解韦昭曰蒸升也阳气在下阴气迫之使不能升也】於是地震今三川实震是阳失其所而填陰也【集解韦昭曰为陰所填笮也】阳失而在陰【集解韦昭曰在陰下也】原必塞原塞国必亡夫水土演而民用也【集解韦昭曰水土气通为演演犹润也演则生物民得用之】土无所演民乏财用不亡何待昔伊洛竭而夏亡【集解韦昭曰禹都阳城伊洛所近也】河竭而商亡【集解韦昭曰商人都卫河水所经也】今周德若二代之季矣其川原又塞塞必竭夫国必依山川山崩川竭亡国之徵也川竭必山崩【集解韦昭曰水泉不润枯朽而崩也】若国亡不过十年数之纪也【集解韦昭曰数起於一終於十十则更故曰纪也】天之所弃不过其纪是岁也三川竭岐山崩三年幽王嬖爱褒姒【索隐褒国名夏同姓姓姒氏礼妇人称国及姓其女是龙漦妖子为人所收褒人纳之于王故曰褒姒正义括地志云褒国故城在梁州褒城县东二百步古褒国也】褒姒生子伯服幽王欲废太子太子母申侯女而为后後幽王得褒姒爱之欲废申后并去太子宜臼以褒姒为后以伯服为太子周太史伯阳读史记曰【正义诸国皆有史以记事故曰史记】周亡矣昔自夏后氏之衰也有二神龙止於夏帝庭而言曰余褒之二君【集解虞翻曰龙自号褒之二先君也】夏帝卜杀之与去之与止之莫吉卜请其漦而藏之乃吉【集解韦昭曰漦龙所吐沫沫龙之精气也】於是布币而策告之【集解韦昭曰以简策之书告龙而请其漦也】龙亡而漦在桀而去之【集解韦昭曰桀匱也】夏亡传此器殷殷亡又传此器周比三代莫敢发之至厉王之末【集解虞翻曰末年王流彘之岁】发而观之漦流于庭不可除厉王使妇人裸而噪之【集解韦昭曰噪谁呼也唐固曰羣呼曰噪】漦化为玄黿以入王後宫【索隐亦作蜃音元玄蜃蜃蜴也】後宫之童妾既亂而遭之【集解韦昭曰毀齿曰亂女七岁而毀齿也】既笄而孕【正义笄音鸡礼记云女子许嫁而笄郑玄云笄今簪】无夫而生子惧而弃之宣王之时童女谣曰檠弧箕服实亡周国【集解韦昭曰山桑曰檠弧弓也箕木名服矢房也】於是宣王闻之有夫妇卖是器者宣王使执而戮之逃於道而见乡者後宫童妾所弃妖子出於路者【集解徐广曰妖一作夭夭幼小也正义夫妇卖檠弧者宣王欲执戮之遂逃于路遇此妖子哀而收之】闻其夜啼哀而收之夫妇遂亡犇於褒褒人有罪请入童妾所弃女子者於王以赎罪【正义国语云周幽王伐有褒褒人以褒姒女焉与虢石甫比也】弃女子出於褒是为褒姒当幽王三年王之後宫见而爱之生子伯服竟废申后及太子以褒姒为后伯服为太子【索隐左传所谓携王奸命是也】太史伯阳曰祸成矣无可奈何褒姒不好笑幽王欲其笑万方故不笑幽王为燧燧【正义峯遂二音画曰燃燧以望火烟夜举燧以望火光也?土櫓也?炬火也皆山上安之有寇举之】大鼓有寇至则举燧火诸侯悉至至而无寇褒姒乃大笑幽王说之为数举燧火其後不信诸侯益亦不至幽王以虢石父为卿用事国人皆怨石父为人佞巧【集解徐广曰佞一作谄】善谀好利王用之又废申后去太子也申侯怒与缙西夷犬戎攻幽王【正义缙自陵反国语云缙姒姓夏禹後括地志云缙县在沂州承县古侯国】幽王举燧火徵兵兵莫至遂杀幽王骊山下【索隐骊在雍州新丰县南故骊戎国也旧音黎徐广曰力知反正义括地志云骊山在雍州新丰县南十里土地记云骊山即蓝田山按骊山之阳即蓝田山】虜褒姒尽取周赂而去【集解駰案汲冢纪年曰自武王灭殷以至幽王凡二百五十七年也正义按汲冢书晋咸和五年汲郡汲县发魏襄王冢得古书册七十五卷】於是诸侯乃即申侯而共

立故幽王太子宜臼是为平王以奉周祀平王立东迁于雒邑【正义即王城也平王以前号东都至敬王以後及战国为西周】辟戎寇平王之时周室衰微诸侯强并弱齐楚秦晋始大政由方伯【集解駟案周礼曰九命作伯郑衆云长诸侯为方伯】四十九年鲁隐公即位五十一年平王崩太子泄父【正义音甫】蚤死立其子林是为桓王桓王平王孙也桓王三年郑庄公朝桓王不礼【索隐在鲁隐六年】五年郑宛与鲁易许田许田天子之用事太山田也【索隐左传郑伯以璧假许田卒易祊祊是郑祀太山之田许是鲁朝京师之汤沐邑有周公庙郑以其近故易取之此云许田天子用事太山田误矣正义杜预云成王营王城有迁都之志故赐周公许田以为鲁国朝宿之邑後世因而立周公别庙焉郑桓公友周宣王之母弟封郑有助祭太山汤沐邑在祊郑以天子不复巡狩故欲以祊易许田各从本国所近之宜也恐鲁以周公别庙为疑故云已废大山之祀而欲为鲁祀周公逊辞以求也括地志云许州许昌县南四十里有鲁城周公庙在城中祊田在沂州费县东南按宛郑大夫】八年鲁杀隐公【正义子允令公子翬杀隐公也】立桓公十三年伐郑【索隐在鲁桓五年】郑射伤桓王桓王去归【索隐左传繻葛之役祝聃射王中肩是也】二十三年桓王崩子庄王佗立庄王四年周公黑肩欲杀庄王而立王子克【集解贾逵曰庄王弟子仪也】辛伯告王【集解贾逵曰辛伯周大夫也】王杀周公【索隐左传云初子仪有宠於桓王桓王属诸周公辛伯諫曰并后匹嫡而政耦国乱之本也周公不从故及於难然周公阿先王旨自取诛夷辛伯正君臣之义卒安王业二卿优劣诚可识也】王子克犇燕【正义杜预云南燕姑姓也】十五年庄王崩子厘王胡齐立【正义厘音僖】厘王三年齐桓公始霸五年厘王崩子惠王阍立【索隐世本名母凉】惠王二年初庄王嬖姬姚【正义杜预云姚姓也】生子頹【索隐庄王子厘王弟惠王之叔父也】頹有宠及惠王即位夺其大臣园以为囿【集解駟案左传曰大臣蔦园也】故大夫边伯等五人作乱【集解駟案左传曰五人者蔦园边伯詹父子禽祝跪也】谋召燕卫师【正义南燕滑州胙城卫澶州卫南也】伐惠王惠王犇温【正义左传云苏忿生十二邑桓王夺苏子十二邑与郑故苏子同五大夫伐惠王温十二邑之一也杜预云河内温县也】已居郑之栢【集解服虔曰栢郑大都正义杜预云栢今河南阳翟县也】立厘王弟頹为王乐及徧舞【集解贾逵曰徧舞皆舞六代之乐也】郑虢君怒四年郑与虢君伐杀王頹【正义贾逵云郑厉公突虢公林父也】复入惠王惠王十年赐齐桓公为伯二十五年惠王崩子襄王郑立襄王母早死後母曰惠后【集解駟案左传曰陈妫归于京师实惠后也正义按陈国舜後妫姓也】惠后生叔带【索隐惠王子襄王弟封於甘故左传称甘昭公正义惠王子襄王弟封之於甘括地志云故甘城在洛州河南县西南二十五里左传云甘昭公王子叔带也洛阳记云河南县西南二十五里有水出焉北流入洛山上有甘城即甘公采邑也】有宠於惠王襄王畏之三年叔带与戎翟谋伐襄王襄王欲诛叔带叔带犇齐齐桓公使管仲平戎于周使隰朋平戎于晋【集解服虔曰戎伐周晋伐戎救周故和也】王以上卿礼管仲管仲辞曰臣贱有司也有天子之二守国高在【集解杜预曰国子高子天子所命为齐守臣皆上卿也】若节春秋来承王命何以礼焉【集解贾逵曰节时也王肃曰春秋聘享之节也】陪臣敢辞【集解服虔曰陪重也诸侯之臣於天子故曰陪臣】王曰舅氏余嘉乃勲【集解贾逵曰舅氏言伯舅之使也正义武王娶太公女为后故呼舅氏言我善汝有平戎之功勲】母逆朕命管仲卒受下卿之礼而还【正义杜预云管仲不敢以职自高卒受本位之礼也】九年齐桓公卒十二年叔带复归于周【集解駟案左传曰王召之】十三年郑伐滑【集解贾逵曰滑姬姓之国駟案左传曰滑人叛郑而服於卫也正义杜预云滑故国都河南缑

氏县为秦所灭时属郑晋後属周事在鲁厘公二十年括地志云缑氏故城本费城也在洛州缑氏县南东二十五里也】王使游孙伯服请滑【集解贾逵曰二子周大夫】郑人囚之郑文公怨惠王之入不与厉公爵【集解服虔曰惠王以后之鞶鉴与郑厉公而独与虢公玉爵正义左传云庄公二十一年王巡虢狩虢公为王宫于珪王与之酒泉郑伯之享王王以后之鞶鉴与之虢公请器王与之爵郑伯由是怨王也杜预云后鞶带而以镜为饰也爵饮酒器也珪地名酒泉周邑】又怨襄王之与卫滑【集解服虔曰滑小国近郑世世服从而更违叛郑师伐之听命後自愬於王王以与卫】故囚伯服王怒将以翟伐郑富辰谏【集解服虔曰富辰周大夫】曰凡我周之东徙晋郑焉依子颓之乱又郑之由定今以小怨弃之王不听十五年王降翟师以伐郑王德翟人将以其女为后富辰谏曰平桓庄惠皆受郑劳王弃亲亲翟不可从王不听十六年王绌翟后翟人来诛杀谭伯【集解唐固曰谭伯周大夫原伯毛伯也索隐按国语亦云杀谭伯而左传太叔之难获周公忌父原伯毛伯唐固据传文读谭为原然春秋有谭何妨此时亦仕王朝预获被杀国语既云杀谭伯故太史公依之不从左传说也】富辰曰吾数谏不从如是不出王以我为怱乎乃以其属死之初惠后欲立王子带故以党开翟人翟人遂入周襄王出奔郑【正义公羊传云王者无外此其言出何不能事母也】郑居王于泛【集解杜预曰郑南泛在襄城县南正义泛音凡括地志云故泛城在许州襄城县一里左传云天王出居於郑处於泛是】子带立为王取襄王所绌翟后与居温【正义括地志云故温城在怀州温县西三十里汉晋为县本周司寇苏忿生之邑地理志云温县故国已姓苏忿生所封也】十七年襄王告急于晋晋文公纳王而诛叔带襄王乃赐晋文公珪鬯弓矢为伯以河内地与晋【集解贾逵曰晋有功赏之以地杨樊温原櫜茅之田也】二十年晋文公召襄王襄王会之河阳践土【集解贾逵曰河阳晋之温也践土郑地名在河内正义括地志云故王宫在郑州荥泽县西北十五里王宫城中左传云晋文公败楚於城濮至於衡雍作王宫於践土也按王城则所作在践土城内东北隅有践土台东去衡雍三十余里也】诸侯毕朝书讳曰天王狩于河阳【集解駉案左传云仲尼曰以臣召君不可以训故书曰狩】二十四年晋文公卒三十一年秦穆公卒三十二年襄王崩子顷王壬臣立顷王六年崩子匡王班立匡王六年崩弟瑜立是为定王定王元年楚庄王伐陆浑之戎【集解駉案地理志陆浑县属弘农郡正义浑音魂杜预云允姓之戎居陆浑在秦晋西北二国诱而徙伊川遂从戎号今洛州陆浑县取其号也後汉书云陆浑戎自瓜州迁於伊川左传云初平王之东迁也辛有适伊川见被发而祭於野者曰不及百年此其戎乎其礼先亡矣按至僖公二十二年秋秦晋迁陆浑之戎于伊川计至辛有言适百年也括地志云故麻城谓之蛮中在汝州梁县界左传单浮余围蛮氏杜预云城在河南新城东南伊洛之戎陆浑蛮氏城也俗以为麻蛮声相近故耳按新城今伊阙县是也】次洛使人问九鼎王使王孙满应设以辞【集解贾逵曰王孙满周大夫也】楚兵乃去十年楚庄王围郑郑伯降已而复之十六年楚庄王卒二十一年定王崩子简王夷立简王十三年晋杀其君厉公迎子周於周立为悼公十四年简王崩子灵王泄心立灵王二十四年齐崔杼弑其君庄公二十七年灵王崩【集解駉案皇覽曰灵王冢在河南城西南栢亭西周山上盖以灵王生而有髭而神故谥灵王其冢民祀之不絶】子景王贵立【索隐名贵按国语景王二十一年铸大钱及无射单穆公及冷州鸠各设辞以谏今此不言亦其略耳】景王十八年后太子圣而早卒二十年景王爱子朝【集解贾逵曰景王之长庶子】欲立之【正义左传云子朝用成周之宝珪沉於河津人得诸河上杜预云祷河求福也珪自水出也按河神不敢受故也】会崩【集解駉案皇覽曰景王冢在洛阳太仓中秦封吕不韦洛

阳十万户故大其城并围景王冢也】子丐之党与争立国人立长子猛为王子朝攻杀猛猛为悼王晋人攻子朝而立丐是为敬王【集解贾逵曰敬王猛母弟】敬王元年晋人入敬王子朝自立敬王不得入居泽【集解贾逵曰泽邑周地也】四年晋率诸侯入敬王于周子朝为臣【集解駰案春秋曰子朝犇楚皇览曰子朝冢在南阳西鄂县今西鄂晁氏自谓子朝复也】诸侯城周十六年子朝之徒复作乱敬王犇于晋十七年晋定公遂入敬王于周三十九年齐田常杀其君简公四十一年楚灭陈孔子卒四十二年敬王崩【集解徐广曰皇甫谧曰敬王四十四年元己卯崩壬戌也】子元王仁立【集解徐广曰世本云贞王介也】元王八年崩子定王介立【集解徐广曰世本云元王赤也皇甫谧曰元王十一年癸未三晋灭智伯二十八年崩三子争立立应为贞定王索隐世本云元王赤皇甫谧曰贞定王考据二文则是元有两名一名仁一名赤如史记则元王为定王父定王即贞王也依世本则元王是贞王子必有一乖误然此定当为贞字误耳岂周家有两定王代数又非远乎皇甫谧见此疑而不决遂弥缝史记世本之错谬因谓为贞定王未为得也】定王十六年三晋灭智伯分有其地二十八年定王崩【集解徐广曰皇甫谧曰贞定王十年元癸亥崩壬申】长子去疾立是为哀王哀王立三月弟叔袭杀哀王而自立是为思王思王立五月少弟嵬攻杀思王而自立是为考王此三王皆定王之子考王十五年崩【集解徐广曰皇甫谧曰考哲王元辛丑崩乙卯】子威烈王午立考王封其弟于河南【正义帝王世纪云考哲王封弟揭於河南续周公之官是为西周桓公按自敬王迁都成周号东周也桓公都王城号西周桓公】是为桓公以续周公之官职桓公卒子威公代立威公卒子惠公代立乃封其少子於巩【集解徐广曰惠公之子也正义巩奇拱反郭缘生述征记巩县周地巩伯邑史记周显王二年西周惠公封少子班於巩以奉王室为东周惠公也子武公为秦所灭】以奉王号东周惠公【索隐考王封其弟于河南为桓公卒子威公立卒子惠公立长子曰西周公又封少子於巩仍袭父号曰东周惠公於是有东西二周也按世本西周桓公名揭居河南东周惠公名班居洛阳是也】威烈王二十三年九鼎震命韩魏赵为诸侯二十四年崩【集解徐广曰皇甫谧曰元丙辰崩己卯駰案宋忠曰威烈王葬洛阳城中东北隅也】子安王骄立是岁盗杀楚声王安王立二十六年崩【集解皇甫谧曰安王元庚辰崩乙巳】子烈王喜立烈王二年周太史儋【索隐老子列传曰儋即老子耳又曰非也验其年代是别人正义幽王时有伯阳甫唐固曰伯阳甫老子也按幽王元年至孔子卒三百余年孔子卒後一百二十九年儋见秦献公然老子当孔子时唐固说非也】见秦献公曰【正义秦本纪云献公十一年见後十五年周显王致文武胙於秦孝公是复合时也】始周与秦国合而别别五百载复合【集解应劭曰周孝王封伯翳之後为侯伯与周别五百载至昭王时西周君臣自归受罪献其邑三十六城合也韦昭曰周封秦为始别谓秦仲也五百岁谓从秦仲至孝公强大显王致伯与之亲合也索隐按周封非子为附庸邑之秦号曰秦嬴是始合也及秦襄公始列为诸侯是别之也自秦列为诸侯至昭王五十二年西周君臣献邑三十六城以入於秦凡五百一十六年是合也云王百举其大数】合十七岁而霸王者出焉【集解徐广曰从此後十七年而秦昭王立駰案韦昭曰武王昭王皆伯至始皇而王天下索隐霸王谓始皇也自周以邑入秦至始皇初立政由太后嫪毐至九年诛毐正十七年正义周始与秦国合者谓周秦俱黄帝之後至非子未别封是合也而别者谓非子末年周封非子为附庸邑秦後二十九君至秦孝公二年五百载周显王致文武胙於秦孝公复与之亲是复合也合十七岁而霸王者出谓从秦孝公三年至十九年周显王致胙於秦孝公是霸也孝公子惠王称王是王者出也然五百载者非子生秦侯已下二十八君至

孝公二年都合四百八十六年兼非子邑秦之後十四年则成五百载】十年烈王崩弟扁立【正义扁边典反】是为显王显王五年贺秦献公献公称伯九年致文武胙於秦孝公【集解駟案胙膳肉也左传曰王使宰孔赐齐侯胙曰天子有事於文武】二十五年秦会诸侯於周二十六年周致伯於秦孝公三十三年贺秦惠王三十五年致文武胙於秦惠王四十四年秦惠王称王【正义秦本纪云惠王十三年与韩魏赵并称王】其後诸侯皆为王【索隐谓韩魏齐赵也】四十八年显王崩子慎靓王定立慎靓王立六年崩子赧王延立【索隐皇甫谧曰名诞赧非谧法无赧正以微弱窃鉄逃债赧然慙愧故号曰赧耳又按尚书中侯以赧为然郑玄云然读曰赧王劭按古音人扇反今音奴板反尔雅面慙曰赧】王赧时东西周分治【索隐西周河南也东周巩也王赧微弱西周与东分主政理各居一都故曰东西周按高诱曰西周王城今河南东周成周故洛阳之地】王赧徙都西周【正义敬王徙王城东从成周十世至王赧徙成周西从王城西周武公居焉】西周武公之共太子死【集解徐广曰惠公之长子索隐按战国策作东周武公】有五庶子母适立司马翦【正义翦音子践反楚臣也】谓楚王曰不如以地资公子咎为请太子左成曰【正义楚臣也】不可周不听是公之知困而交疎於周也【正义言以地资公子咎请为太子周若不许是楚於周交益疎】不如请周君孰欲立以微告翦【正义楚命翦适周讽周君欲立谁以微言告於翦令楚贺之以地周果立咎为太子也此以上至西周武公是楚令周立公子咎为太子也】翦请令楚贺之以地果立公子咎为太子八年秦攻宜阳【正义括地志云故韩城一名宜阳城在洛州福昌县东十四里即韩宜阳县城也】楚救之而楚以周为秦故将伐之【索隐宜阳韩地秦攻而楚救之周为韩出兵而楚疑周为秦因加兵伐周】苏代为周说楚王曰何以周为秦之祸也【索隐苏代为周说楚王王何以道周为秦周实不为秦今王责周为秦周惧楚必入秦是为祸也】言周之为秦甚於楚者欲令周入秦也故谓周秦也【索隐周秦相近秦欲并周而外睦於周故当时诸侯咸谓周秦】周知其不可解必入於秦此为秦取周之精者也【正义解音纪买反代言周若知楚疑亲秦其计定不可解免周必亲於秦也是为秦取周精妙之计】为王计者周於秦因善之不於秦亦言善之以疏之於秦【正义代言为王计者周亲我因而善之周不亲亦言善之楚若善周周必疏於秦也】周絶於秦必入於郢矣【正义郢楚都也楚既亲周秦必絶周亲楚矣以上至八年苏代说楚合周】秦借道两周之间【正义上借音精夕反下音子夜反】将以伐韩周恐借之畏於韩不借畏於秦史厌谓周君曰【正义厌乌减反又於点反索隐周君西周武公也时王赧微弱不主盟会寄居西周耳】何不令人谓韩公叔曰【集解徐广曰一作何应劭曰氏姓谱云以何姓为韩後】秦之敢絶周而伐韩者信东周也公何不与周地发质使之楚【正义质音竹利反使音所吏反质使令公子及重臣等往楚为质使秦疑楚又得不信周也质平敌不相负也】秦必疑楚不信周是韩不伐也又谓秦曰韩强与周地将以疑周於秦也周不敢不受秦必无辞而令周不受【正义又谓秦曰韩强与周地令秦疑周亲则周不敢不受秦必无巧辞而令周不敢不受韩地也】是受地於韩而听於秦【索隐此史厌说韩令与周地使质於楚令秦疑楚不信周得不假道伐韩而犹听命於秦】秦召西周君西周君恶往故令人谓韩王曰【索隐按战国策云或人为周君谓魏王】秦召西周君将以使攻王之南阳也王何不出兵於南阳周君将以为辞於秦【索隐高诱注战国策曰以魏兵在河南为辞周君不往朝秦也】周君不入秦秦必不敢踰河而攻南阳矣【正义南阳今怀州也杜预云在晋山南以上至秦召西周君是西周君说韩令出兵河南谋秦也】东周与西周战韩救西周或为东周说韩王曰【正义为音于伪反盖或人为东周

说王令按兵毋出则周德韩矣】西周故天子之国多名器重宝王案兵毋出可以德东周【正义韩按兵不出伐东周而东周甚媿韩之恩德也】而西周之宝必可以尽矣【正义韩出兵助西周虽不攻东周西周媿其佐助宝器必尽归於韩以上至东周与西周战是或人说韩令无救西周也】王赧谓成君楚围雍氏【集解徐广曰阳翟雍氏城也战国策曰韩兵入西周西周令成君辩说秦求救当是说此事而脱误也索隐如徐此说自合当改而注结之不合与楚围雍氏连注正义雍音於?反括地志云故雍城在洛州阳翟县东北二十五里故老云黄帝臣雍父作杵臼所封也按其地时属韩也】韩徵甲与粟於东周东周君恐召苏代而告之代曰君何患於是臣能使韩毋徵甲与粟於周又能为君得高都【集解徐广曰今河南新城县高都城也索隐高诱曰高都韩邑今属上党也正义括地志云高都故城一名郛都城在洛州伊阙县北三十五里】周君曰子苟能请以国听子代见韩相国曰【集解汉书百官表曰相国秦官駟谓韩亦有相国然则诸国共放秦也索隐相国公仲侈也】楚围雍氏期三月也今五月不能拔是楚病也【正义谓楚兵弊弱也】今相国乃徵甲与粟於周是告楚病也韩相国曰善使者已行矣【索隐已止也】代曰何不与周高都韩相国大怒曰吾毋徵甲与粟於周亦已多矣【正义言幸甚也】何故与周高都也代曰与周高都是周折而入於韩也秦闻之必大怒忿周即不通周使是以弊高都得完周也曷为不与相国曰善果与周高都【正义以上至楚围雍氏是苏代为东周说韩令不徵甲而得高都】三十四年苏厉谓周君曰秦破韩魏扑师武【集解徐广曰扑一作仆战国策曰秦败魏将犀武於伊阙】北取赵藺离石者【集解地理志曰西河有藺离石二县正义藺音力刃反括地志云离石县今石州所理县也藺近离石皆赵二邑】皆白起也是善用兵又有天命今又将兵出塞攻梁【正义谓伊阙塞也在洛州南十九里伊阙山今名锺山酈元注水经云两山相对望之若阙伊水历其间故谓之伊阙按今谓之龙门禹凿以通水也】梁破则周危矣君何不令人说白起乎曰楚有养由基者善射者也去柳叶百步而射之百发而百中之左右观者数千人皆曰善射有一夫立其旁曰善可教射矣养由基怒释弓搯劒曰客安能教我射乎客曰非吾能教子支左诎右也【索隐按列女传曰左手如拒右手如附枝右手发之左手不知此射之道也又越絶书曰左手如附太山右手如抱婴儿】夫去柳叶百步而射之百发而百中之不以善息【索隐言不以其善而且停息息止也】少焉气衰力倦弓拨矢钩一发不中者百发尽息【索隐息犹弃言并弃前射】今破韩魏扑师武北取赵藺离石者公之功多矣今又将兵出塞过两周倍韩攻梁一举不得前功尽弃公不如称病而无出【正义以上至三十四年是苏厉为周说白起无伐梁也】四十二年秦破华阳约【集解徐广曰一作厄正义六国年表云白起击魏华阳芒卯走括地志云故华阳城在郑州管城县南四十里是】马犯谓周君曰请令梁城周【索隐华阳地名司马彪曰华阳亭名在密县秦昭王三十三年秦背魏约使客卿胡伤击魏将芒卯华阳破之是马犯见秦破魏约惧周危故谓周君请梁城周而设诡计也】乃谓梁王曰周王病若死则犯必死矣【正义马犯周臣也乃说梁王曰秦破魏华阳之军去周甚近周王忧惧国破犹身之重病若死则犯必死也】犯请以九鼎自入於王王受九鼎而图犯【索隐图谋也犯谓梁王我方入鼎於王王当谋救援已也】梁王曰善遂与之卒言戍周【正义戍守也周虽未入九鼎於梁而梁信马犯矫言遂与之卒令守周】因谓秦王曰【正义梁兵非戍周也将渐伐周而取九鼎宝器王若不信试出师於境以观梁王之变也】梁非戍周也将伐周也王试出兵境以观之秦果出兵又谓梁王曰【正义马犯说秦得秦出兵於境又重归说梁王也】周王病甚矣犯请後可而复之【索隐按战国策甚作瘡犯请後可而复之者言王

病愈所图不遂请得在後有可之时以鼎入梁也正义复音扶富反复重也秦既破华阳军今又出兵境上是周国病秦久矣犯前请卒戍周诸侯皆心疑梁取周後可更重请益卒守周乎】今王使卒之周诸侯皆生心後举事且不信不若令卒为周城以匿事端【索隐梁实图周九鼎且外遣卒戍周和合秦举兵欲侵周梁不救周是本无善周之事止是欲周危而取九鼎故诸侯皆心不信梁矣故不如匿事端使卒为周城正义既诸侯生心不如令卒便为筑城以隐置疑伐周之事端絶诸侯不信之心梁王遂使城周解诸侯之疑也】梁王曰善遂使城周【正义以上至四十二年是马犯说梁王为周筑城也】四十五年周君之秦客谓周最曰【索隐最音词喻反周之公子也】公不若誉秦王之孝因以应为太后养地【集解徐广曰地理志云应今颍川城父县应乡是也索隐战国策作原原周地太后秦昭王母宣太后芊氏也正义括地志云故应城殷时应国在城父按应城此时属周】秦王必喜是公有秦交交善周君必以为公功交恶劝周君入秦者必有罪矣【正义客谓周最曰周君与秦交善是最之功也与秦交恶劝周君入秦者周最今必得劝周君之罪也以上四十五年是周客说周最令周君以应入秦得交善而归也】秦攻周而周最谓秦王曰为王计者不攻周攻周实不足以利声畏天下天下以声畏秦必东合於齐兵弊於周合天下於齐则秦不王矣天下欲弊秦劝王攻周秦与天下弊则令不行矣【正义令音力政反秦欲攻周最说秦曰周天子之国虽有重器名宝土地狭少不足利秦国王若攻之乃有攻天子之声而令天下以攻天子之声畏秦使诸侯归於齐秦兵空弊於周则秦不王矣是天下欲弊秦故劝王攻周令秦受天下弊而令教命不行於诸侯矣以上秦攻周是周最说秦也】五十八年三晋距秦周令其相国之秦以秦之轻也还其行【正义以秦轻易周相故相国於是反归周也】客谓相国曰秦之轻重未可知也【正义言秦之轻相国重相国亦未可知】秦欲知三国之情公不如急见秦王曰请为王听东方之变秦王必重公重公是秦重周周以取秦也齐重则固有周聚以收齐【集解徐广曰一作最最亦古之聚字】是周常不失重国之交也【正义按周聚事齐而和於齐周故得齐重今相国又得秦重是相国收秦周聚收齐周常不失大国之交也】秦信周发兵攻三晋【正义三晋韩魏赵也以上至五十八年是客说周相国令报三国之情得秦重也】五十九年秦取韩阳城负黍【集解徐广曰阳城有负黍聚正义括地志云阳城洛州县也负黍亭在阳城县西南三十五里故周邑左传云郑伐周负黍是也今属韩国也】西周恐倍秦与诸侯约从【集解文颖曰关东为从关西为横孟康曰南北为从东西为横瓚曰以利合曰从以威势相胁曰横正义按诸说未允閼东地南北长长为从六国共居之关西地东西广广为横秦独居之】将天下锐师出伊阙攻秦【正义西周以秦取韩阳城负黍恐惧倍秦之约共诸侯连从领天下锐师从洛州南出伊阙攻秦军令不得通阳城】令秦无得通阳城秦昭王怒使将军嫪毐攻西周【集解駰案汉书百官表曰前後左右将军皆周末官也正义嫪音紕虬反】西周君犇秦【正义谓西周武公】顿首受罪尽献其邑三十六口三万【索隐秦昭王之五十一年】秦受其献归其君於周周君王赧卒【集解宋忠曰谥曰西周武公索隐非也徐以西周武公是惠公之长子此周君即西周武公也盖此时武公与王赧皆卒故连言也正义刘伯庄云赧是慙耻之甚轻微危弱寄住东西足为慙赧故号之曰赧帝王世纪云名诞虽居天子之位号为诸侯之所役逼与家人无异名负责於民无以得归乃上台避之故周人名其台曰逃责台】周民遂东亡秦取九鼎宝器而迁西周公於 狐【集解徐广曰 音憚 狐聚与阳人聚相近在洛阳南百五十里梁新城之间索隐西周盖武公之太子文公也武公卒而立为秦所迁而东周亦不知其名号战国策虽有周文君亦不知灭时定当何主盖周室衰

微略无纪录故太史公虽考衆书以卒其事然二国代系甚不分明正义括地志云汝州外古梁城即 狐聚也阳人故城即阳人聚也在汝州梁县西四十里秦迁东周君也梁亦古梁城也在汝州梁县西南十五里新城今洛州伊阙县也按 狐阳人傍在三城之间】後七岁秦庄襄王灭东西周【集解徐广曰周比亡之时凡七县河南洛阳谷城平陰偃师巩緱氏正义括地志云故谷城在洛州河南县西北十八里苑中河阴县城本汉平阴县在洛州洛阳县东北五十里十三州志云在平津大河之南也魏文帝改曰河阴】东西周皆入于秦周既不祀【集解皇甫谧曰周凡三十七王八百六十七年索隐既尽也日食尽曰既言周祚尽灭无主祭祀正义按王赧卒後天下无主三十五年七雄并争至秦始皇立天下一统十五年海内咸归於汉矣】

太史公曰学者皆称周伐纣居洛邑综其实不然武王成王使召公卜居居九鼎焉而周复都丰镐至犬

戎败幽王周乃东徙于洛邑所谓周公葬我毕毕在镐东南杜中【集解徐广曰一作社】秦灭周汉兴九十有余载天子将封泰山东巡狩至河南求周苗裔封其後嘉三十里地号曰周子南君【集解瓚曰汲冢古文谓卫将军文子为子南弥牟其後有子南劲朝于魏後惠成王如卫命子南为侯秦并六国卫最为後疑嘉是卫後故氏子南而称君也正义括地志云周承休城一名梁雀坞在汝州梁县东北二十六里帝王世纪云汉武帝元鼎四年东巡河洛思周德乃封姬嘉三千户地方三十里为周子南君以奉周祀元鼎三年嘉弟昭进爵为承休侯在此城也平帝元始四年进为郑公光武建武三年封姬观为卫公顔师古云子南其封邑之号故总言周子南君按自嘉以下皆姓姬氏着在史传瓚言子南为氏恐非】比列侯以奉其先祭祀【集解徐广曰自周亡乙巳至元鼎四年戊辰一百四十四年汉之九十四年也汉武元鼎四年封周後也】

【索隐述赞曰后稷居邠太王作周丹开雀録火降鸟流三分既有八百不谋苍兕誓衆白鱼入舟太师抱乐箕子拘囚成康之日政简刑措南巡不还西服莫附共和之後王室多故繫弧兴谣龙燄作蠹頽带挂祸实倾周祚】

史记卷四

史记卷四考证

周本纪周后稷正义地理志云右扶风县岐山西北中水乡○汉书地理志右扶风美阳县下云岐山在西北中水乡似脱一在字

曰姜原○监本将集解韩诗章句文混入正义内今改正

践之而身动如孕者居期而生子○毛诗生民疏曰马迁之言未可信也

号曰后稷○困学纪闻曰诗正义曰稷之功成实在尧时其封于郃必是尧之封故笺传皆以为尧本纪以后稷之号亦起舜时其言不可信也【臣照】按弃为农师固在尧时而舜典明有汝后稷播时百谷之文本纪之言何不可信

亚圉卒子公叔祖类立○路史发挥曰杜预释例云高圉仆窋九世孙而史索亦以辟方侯侔为皆二人斯得之矣独史记乃无辟方侯侔云都诸暨至皇甫谧遂以为公非高圉亚圉祖绌之字盖牵于单穆公十四世之说乃合二人以为一耳【臣照】按三代以还典籍湮没非诗书所载但可存而弗论必欲伸此绌彼有如捕风

踰梁山正义梁山横长其东当阳西北临河○推寻文义阳字上脱一字据地理志宜是栎阳

季历娶太任正义国语曰挚畴二国任姓奚仲仲虺之後○此非国语文乃韦昭注国语文也

此一物足以释西伯况其多乎索隐一物谓?氏之美女也○别本此下有以殷纣淫昏好色故知然十字

于是虞芮之人正义括地志云故芮城县西二十里古芮国也○推寻文义应云故芮城在芮城县西二十里

後七年而崩○毛诗文王疏曰尚书武成篇曰我文考文王克成厥勲诞膺天命惟九年大统未集孔安国云言诸侯归之九年而卒故大业未就刘歆作三统历考上世帝王以为文王受命九年而崩班固作汉书律历志载其说于是贾逵马融王肃韦昭皇甫谧皆悉同之文王九十七而终终时受命九年受命之元年年八十九其即诸侯之位已四十二年矣故帝王世纪云文王即位四十二年岁在鹑火文王于是更为受命之元年始称王矣乃引周书称文王受命九年惟暮之春在镐召太子发作文传九年犹召太子明其七年未崩故诸儒皆以为九年而崩其伏生司马迁以为文王受命七年而崩故尚书周传云文王受命一年断虞芮之讼二年伐邾三年伐密须四年伐犬夷五年伐耆六年伐崇七年而崩史记周本纪云西伯陰行善诸侯皆来决平虞芮既让诸侯闻之曰西伯盖受命之君也此是受命一年之事又曰明年伐犬夷明年伐密须明年败耆国明年伐邾明年伐崇侯虎而作丰邑明年西伯崩此虽伐犬夷与伐耆伐邾其年与书传不次要亦七年崩也又尚书武成疏曰伏生司马迁韩婴之徒不见此书以为文王受命七年而崩故郑玄等皆依用之然则史记本文是七年而正义则依尚书武成等书谓当是九年故曰七当为九也监本七字皆讹作十字今俱改正

百夫荷罕旗以先驱○汲冢周书作百夫荷素质之旗於王前

命南宫括散鹿台之财○汲冢周书作南宫忽

命南宫括史佚展九鼎保玉○汲冢周书作乃命南宫百达史佚迁九鼎三巫注云三巫地名

黄帝之後於祝帝尧之後於蓯○乐记封黄帝之後於蓯封帝尧之後於祝与此异

登幽之阜以望商邑○汲冢周书作升汾之阜

维天建殷其登名民三百六十夫不显亦不宾灭以至今○【臣照】按向以宾灭断句而又不可得其解故索隐改宾为摈言不即摈灭若然则是武王灭殷之後又以纣子武庚未殄而不暇寐也岂圣人之心哉且於上文登名民三百六十句又如何可通窃谓灭字应从下句读言惟天建殷而登名民三百六十可谓济济多士矣殷王不能显之亦不能宾之是故灭以至今即诗殷鉴不远之意故下文云我未定天保何暇寐求贤以自辅而辗转反侧也三百六十断句夫不显亦不宾断句乃可通

日夜劳来我西土索隐七字连作一句读○汲冢周书度邑解文今其文曰四方赤宜未之我於西土益讹易不可解又一本我字上有定字索隐七字作八字

东伐淮夷残奄集解郑玄曰奄国在淮夷之北○尚书疏引郑云奄盖在淮夷之地故孔颖达以为亦未能详

申告以文王武王之所以为王业之不易务在节俭毋多欲以笃信临之作顾命○王若虚辨惑曰今其书但载成王末命使之率循大卞燮和天下以荅扬文武之训而已曷尝有二公申告之事哉【臣照】按马迁之意即指康王之诰上半篇所言太保暨芮伯咸进相揖曰敢告天子云云耳盖顾命与康王之诰本相连属或古本於惟予一人钊报诰以下为康王之诰以上皆属顾命亦未可定不得据以訾迁也

康王即位徧告诸侯宣告以文武之业以申之作康诰○王若虚辨惑曰以书考之此篇乃康王之诰耳若康诰则成王所以命康叔者也其谬误如此且本纪既先序周公作康诰酒诰等篇而於此复云书岂有两康诰耶【臣照】按马迁或本作康王之诰而相传之讹致脱王之二字或此篇本亦名康诰後世以两康诰而改此为康王之诰俱未可定不得指为惑而强辨也

穆王即位春秋已五十矣○孔安国书传云穆王即位过四十矣孔疏云不知出何书也

共王弟辟方立○三代世表无辟字

瞽献典○【臣照】按今国语及此纪皆作瞽献典襄十四年左传瞽为诗正义引周语作瞽陈曲韦昭云瞽陈乐曲献之於王字书册置几上曰典册即册字六即几字如尧典舜典之属非瞽之所应献瞽陈乐曲於义为长

幽王二年西周三川皆震○国语作幽王三年

郑宛与鲁易许田○宛监本讹作怨今改正

二十五年惠王崩○年表在二十四年

襄王母早死後母曰惠后惠后生叔带○左传疏曰二十四年传曰不谷不德得罪於母氏之宠子带书曰天王出居於郑辟母弟之难也如彼传文则襄王与子带俱是惠后所出但其母鍾爱其少子故欲废太子而立之周本纪云襄王母早死後母曰惠后生叔带与传不同

叔带奔齐○襄王四年鲁僖十二年也叔带奔齐在四年此入三年年表亦然皆与左传不符

十二年叔带复归於周○左传叔带复归在鲁僖二十二年於襄王为十四年年表亦然此作十二年盖误

十三年郑伐滑○春秋经伐滑在鲁僖二十年於襄王为十二年

十五年王降翟师以伐郑王德翟人将以其女为后○左传鲁僖二十四年夏狄伐郑取栢於襄王为十六年国语作十七年此与王绌翟后玩左传文似一年事史记分载两年

襄王乃赐晋文公珪鬯弓矢为伯以河内地与晋○左传鲁僖二十八年天王狩於河阳赐晋文公珪鬯弓矢为伯此是後事

三十二年襄王崩○此是三十二年之误合左传及年表证之自知

子灵王泄心立○晋语作大心

二十年景王爱子朝欲立之会崩○左传及年表景王二十五年崩此云二十年盖脱五字

四十二年敬王崩○【臣世骏】按陆德明左传释文曰按传敬王崩在此年世本亦尔世族谱云敬王四十二年崩敬王子元王十年春秋之传终矣据此则敬王崩当在哀公十七年史记周本纪及十二诸侯年表敬王四十二年崩子元王仁立则敬王是鲁哀十八年崩也六国年表起自元王及本纪皆云元王八年崩子定王介立定王元年是鲁哀公之二十七年与杜预世族谱为异又世本云鲁哀公二十年是定王介崩子元王赤立则定王之崩年是鲁哀公之二十七年也衆说不同未详孰是

王赧时东西周分治索隐西周河南也东周巩也王赧微弱西周与东分主政理各居一都故曰东西周按高诱曰西周王城今河南东周成周故洛阳之地○大事记曰周贞定王二十八年考王初立封其弟揭于河南是为河南桓公河南即郟鄏武王迁九鼎周公营以为都是为王城洛阳周公所营下都以迁顽民是为成周平王东迁定都王城王子朝之乱敬王徙都成周至是考王以王城故地封桓公焉平王东迁之後所谓西周者丰镐也东周者洛阳也何以

称河南为西周自洛阳下都视王城则在西也何以称洛阳为东周自河南王城视下都则在东也河南桓公卒子威公立威公卒子惠公立考王十五年河南惠公复自封其少子班于巩以奉王号东周没亦諡惠是时东西周虽未分治河南惠公既号奉王者为东周亦必自号西周矣显王二年赵与韩分周为二于是东西各为列国显王虽在东周特建空名是後史传所载致伯赐胙之类者周王也征伐谋策称东西周君者皆谓二周也周本纪云赧王时东西周分治非也赧王特徙都西周耳当以赵世家为正

史厌谓周君○战国策作史黡

还其行○徐孚远曰按战国策作留其行注?不进也此还字恐是迟字之误

史记卷四考证

卷五

钦定四库全书

史记卷五

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

秦本纪第五

【索隐秦虽嬴政之祖本西戎附庸之君岂以诸侯之邦而与五帝三王同称本纪斯必不可降为秦世家】

秦之先帝颛顼之苗裔【正义黄帝之孙号高阳氏】孙曰女修女修织玄鸟陨卵女修吞之生子大业【索隐女修颛顼之裔女吞黿子而生大业其父不着而秦赵以母族而祖颛顼非生人之义也按左传郯国少昊之後而嬴姓盖其族也则秦赵宜祖少昊氏正义列女传云陶子生五岁而佐禹曹大家注云陶子者皐陶之子伯益也按此即知大业是皐陶】大业取少典之子曰女华女华生大费【索隐扶味反一音秘寻费後以为氏则扶味反为得此即秦赵之祖嬴姓之先一名伯翳尚书谓之伯益系本汉书谓之伯益是也寻检史记上下诸文伯翳与伯益是一人不疑而陈?系家即叙伯翳与伯益为二未知太史公疑而未决邪抑亦谬误尔】与禹平水土已成帝锡玄圭禹受曰非予能成亦大费为辅帝舜曰咨尔费赞禹功其赐尔皐游【索隐游音旒谓赐以皐色旌旆之旒色与玄圭色副言其大功成也然其事亦当有所出】尔後嗣将大出【索隐出犹生也言尔後嗣繁昌将大生出子孙也故左传亦云晋公子姬出也】乃妻之姚姓之玉女【集解徐广曰皇甫谧云赐之玄玉妻以姚姓之女也】大费拜受佐舜调驯鸟兽鸟兽多驯服是为栢翳舜赐姓嬴氏大费生子二人一曰大廉实鸟俗氏二曰若木实费氏【索隐以仲衍鸟身人言故为鸟俗氏俗一作洛若木以王父字为费氏也】其玄孙曰费昌子孙或在中国或在夷狄【索隐殷纣时费仲即昌之後也】费昌当夏桀之时去夏归商为汤御以败桀於鸣条大廉玄孙曰孟戏中衍【索隐旧解以孟戏仲衍是一人今以孟仲分字当是二人名也】鸟身人言【正义身体是鸟而能人言又云口及手足似鸟也】帝太戊闻而卜之使御吉遂致使御而妻之自太戊以下仲衍之後遂世有功【正义谓费昌及仲衍】以佐殷国故嬴姓多显遂为诸侯其玄孙曰中湣【集解徐广曰一作滑正

义中音仲潘音决宋忠注世本云仲滑生飞廉】在西戎保西垂生蜚廉蜚廉生恶来恶来有力【集解駟案晏子春秋曰手裂虎兕】蜚廉善走父子俱以材力事殷纣周武王之伐纣并杀恶来是时蜚廉为纣石北方【集解徐广曰皇甫谧云作石椁於北方索隐石下无字则不成文意亦无所见必是史记本脱皇甫谧尚得其说徐虽引之而竟不云是脱何字专质之甚也正义为于伪反刘伯庄云霍太山纣都之北也霍太山在晋州霍邑县按在卫州朝歌之西方】还无所报为坛霍太山【集解駟案地理志霍太山在河东彘县】而报得石棺【正义纣既以崩无所归报故为坛就霍太山而祭纣报云作得石椁】铭曰帝令处父不与殷乱【索隐处父蜚廉别号】赐尔石棺以华氏死遂葬於霍太山【集解皇甫谧云去彘县十五里有冢常祠之索隐言处父至忠国灭君死而不忘臣节故天赐石棺以光华其族事盖非实谯周深所不信】蜚廉复有子曰季胜【正义音升】季胜生孟增孟增幸於周成王是为宅臯狼【正义地理志云西河郡臯狼县也按孟增居臯狼而生衡父】臯狼生衡父衡父生造父造父以善御幸於周穆王得骥温骊【集解徐广曰温一作盗駟案郭璞云为马细颈骊黑色索隐温音盗徐广亦作盗邹诞生本作駟音陶刘氏音义云盗窃也窃浅青色八骏既因色为名窃骊为得之也】骊騊【集解郭璞曰色如华而赤今名马骊赤者为枣騊騊赤马也】騊耳之驷【集解郭璞曰纪年云北唐之君来见以一驷马是生騊耳八骏皆因其毛色以为名号駟案穆天子传穆王有八骏之乘此纪不具者也索隐按穆王传曰赤骥盗骊白义渠黄骊騊驒騊耳山子】西巡狩乐而忘归【集解郭璞曰纪年云穆王十七年西征於崑仑丘见西王母正义括地志云崑仑山在肃州酒泉县南八十里十六国春秋前凉张骏酒泉守马岌上言酒泉南山即崑仑之丘也周穆王见西王母乐而忘归即谓此有石室王母堂珠玑楼严饰焕若神宫按肃州在京西北二千九百六十里即小崑仑也非河源出处者】徐偃王作乱【集解駟案地理志曰临淮有徐县云故徐国尸子曰徐偃王有?而无骨駟谓号偃由此正义括地志云大徐城在泗州徐城县北三十里古徐国也博物志云徐君宫人有娠而生卵以为不祥弃於水滨孤独母有犬鹄苍衔所弃卵以归覆煖之乃成小儿生偃故宫人闻之更取养之及长袭为徐君後鹄苍临死生角而九尾化为黄龙鹄苍或名后苍括地志又云徐城在越州鄞县东南入海二百里夏侯志云翁洲上有徐偃王城传云昔周穆王巡狩诸侯共尊偃王穆王闻之令造父御乘驪褭之马日行千里自还讨之或云命楚王帅师伐之偃王乃於此处立城以终】造父为穆王御长驱归周一日千里以救乱【正义古史考云徐偃王与楚文王同时去周穆王远矣且王者行有周卫岂得救乱而独长驱日行千里乎并言此事非实按年表穆王元年去楚文王元年三百一十八年】穆王以赵城封造父【集解徐广曰赵城在河东永安县正义括地志云赵城今晋州赵城县是本彘县地後改曰永安即造父之邑】造父族由此为赵氏自蜚廉生季胜已下五世至造父别居赵赵衰其後也恶来革者蜚廉子也早死有子曰女防女防生旁臯旁臯生太几太几生大骆大骆生非子以造父之宠皆蒙赵城姓赵氏非子居犬丘【集解徐广曰今槐里也正义括地志云犬丘故城一名槐里亦曰废丘在雍州始平县东南十里地理志云扶风槐里县周曰犬丘懿王都之秦更名废丘高祖三年更名槐里也】好马及畜【正义好火到反畜许救反】善养息之犬丘人言之周孝王孝王召使主马于汧渭之间【正义汧音牵言於二水之间在陇州以东】马大蕃息孝王欲以为大骆适嗣申侯之女为大骆妻生子成为适申侯乃言孝王曰昔我先酈山之女【正义申侯之先娶於酈山】为戎胥轩妻【正义胥轩仲衍曾孙也】生中潘以亲故归周保西垂西垂以其故和睦今我复与大骆妻生适子成申骆重婚西戎皆服以为王【正义言申骆重婚重

直龙反西戎皆从所以得为王王即孝王】王其图之於是孝王曰昔栢翳为舜主畜畜多息故有土赐姓嬴今其後世亦为朕息马朕其分土为附庸邑之秦【集解徐广曰今天水陇西县秦亭也正义括地志云秦州清水县本名秦嬴姓邑十三州志云秦亭秦谷是也周太史儋云始周与秦国合而别故天子邑之秦】使复续嬴氏祀号曰秦嬴亦不废申侯之女子为骆适者以和西戎秦嬴生秦侯秦侯立十年卒生公伯公伯立三年卒生秦仲秦仲立三年周厉王无道诸侯或叛之西戎反王室灭犬丘大骆之族周宣王即位【集解徐广曰秦仲之十八年也】乃以秦仲为大夫诛西戎西戎杀秦仲秦仲立二十三年死於戎【集解駉案毛诗序曰秦仲始大有车马礼乐侍御之好也】有子五人其长者曰庄公周宣王乃召庄公昆弟五人与兵七千人使伐西戎破之於是复予秦仲後及其先大骆地犬丘并有之为西垂大夫【正义注水经云秦庄公伐西戎破之周宣王与大骆犬丘之地为西垂大夫括地志云秦州上邽县西南九十里汉陇西郡西县是也】庄公居其故西犬丘生子三人其长男世父世父曰戎杀我大父仲我非杀戎王则不敢入邑遂将击戎让其弟襄公襄公为太子庄公立四十四年卒太子襄公代立襄公元年以女弟缪嬴为丰王妻襄公二年【正义括地志云故汧城在陇州汧源县东南三里帝王世纪云秦襄公二年徙都汧即此城】戎围犬丘世父世父击之为戎人所虏岁余复归世父七年春周幽王用褒姒废太子立褒姒子为适数欺诸侯诸侯叛之西戎犬戎与申侯伐周杀幽王酈山下而秦襄公将兵救周战甚力有功周避犬戎难东徙雒邑【正义周平王徙居王城即雒诰云我卜涧水东瀍水西者也】襄公以兵送周平王平王封襄公为诸侯赐之岐以西之地曰戎无道侵夺我岐丰之地秦能攻逐戎即有其地与誓封爵之襄公於是始国与诸侯通使聘享之礼乃用駟驹【集解徐广曰赤马黑鬣曰駟】黄牛羝羊各三祠上帝西時【集解徐广曰年表云立西時祠白帝索隐襄公始列为诸侯自以居西時西時县名故作西時祠白帝時止也言神灵之所依止也亦音市谓为坛以祭天也】十二年伐戎而至岐卒生文公文公元年居西垂宫【正义即上西县是也】三年文公以兵七百人东猎四年至汧渭之会曰昔周邑我先秦嬴於此後卒获为诸侯乃卜居之占曰吉【正义括地志云郿县故城在岐州郿县东北十五里毛萇云郿地名也秦文公东猎汧渭之会卜居之乃营邑焉即此城也】即营邑之十年初为郿時【集解徐广曰郿县属冯翊索隐音敷亦县名於郿地作時故曰郿時故封禪书曰秦文公梦黄蛇自天而下属之地止於郿衍史敦以为神故立時正义括地志云三時原在岐州雍县南二十里封禪书云秦文公作郿時襄公作西時灵公作吴阳上時并此原上因名也】用三牢十三年初有史以纪事民多化者十六年文公以兵伐戎戎败走於是文公遂牧周余民有之地至岐岐以东献之周十九年得陈宝【索隐按汉书郊祀志云文公获若石云于陈仓北坂城祠之其神来若雉其声殷殷云野鸡夜鸣以一牢祠之号曰陈宝又臣瓚云陈仓县有宝夫人祠岁与叶君神会也苏林云质如石似肝云语辞正义括地志云宝鸡神在岐州陈仓县东二十里故陈仓城中晋太康地志云秦文公时陈仓人猎得兽若鼯不知名牵以献之逢二童子童子曰此名为媚常在地中食死人脑即欲杀之拍捶其首媚亦语曰二童子名陈宝得雄者王得雌者霸陈仓人乃逐二童子化为雉雌上陈仓北坂为石秦祠之搜神记云其雄者飞至南阳其後光武起於南阳皆如其言也】二十年法初有三族之罪【集解张晏曰父母兄弟妻子也如淳曰父族母族妻族也】二十七年伐南山大梓丰大特【集解徐广曰今武都故道有怒特祠图大牛上生树本有牛从木中出後见於丰水之中正义括地志云大梓树在岐州陈仓县南十里仓山上録异传云秦文公时雍南山有大梓树文公伐之辄有大风雨树生合不断时有一人病夜往山中闻

有鬼语树神曰秦若使人被髮以朱丝绕树伐汝汝得不困耶树神无言明日病人语闻公如其言伐树断中有一青牛出走入丰水中其後牛出丰水中使骑擊之不胜有骑堕地复上髮解牛畏之入不出故置髦头汉魏晋因之武都郡立怒特祠是大梓牛神也按今俗画青牛障是】四十八年文公太子卒赐谥为靖公【集解徐广曰文公之四十四年鲁隐之元年】靖公之长子为太子是文公孙也五十年文公卒葬西山【集解徐广曰皇甫谧云葬於西山在今陇西之西县】靖公子立是为宁公【集解徐广曰一作曼】宁公二年公徙居平阳【集解徐广曰郿之平阳县正义帝王世纪云秦宁公都平阳按岐山县有阳平乡乡内有平阳聚括地志云平阳故城在岐州岐山县西四十六里秦宁公徙都之处】遣兵伐荡社【集解徐广曰荡音汤社一作杜索隐西戎之君号曰亳王盖成汤之胤其邑曰荡社徐广云一作汤杜言汤邑在杜县之界故曰汤杜也正义括地志云雍州三原县有汤陵又有汤台在始平县西北八里按其国盖在三原始平之界矣】三年与亳战亳王奔戎遂灭荡社【集解皇甫谧云亳王号汤西夷之国也】四年鲁公子翬【正义音晖即羽父也】弑其君隐公十二年伐荡氏取之宁公生十岁立立十二年卒葬西山【正义括地志云秦宁公墓在岐州陈仓县西北三十七里秦陵山帝王世纪云秦宁公葬西山大麓故号秦陵山也按文公亦葬西山盖秦陵山也】生子三人长男武公为太子武公弟德公同母鲁姬子生出子【正义德公母号鲁姬子】宁公卒大庶长弗忌威垒【正义音力追反】三父废太子而立出子为君出子六年三父等复共令人贼杀出子出子生五岁立立六年卒三父等乃复立故太子武公武公元年伐彭戏氏【正义戏音许宜反戎号也盖同州彭衙故城是也】至於华山下【正义即华岳之下也】居平阳封宫【正义宫名在岐州平阳城内也】三年诛三父等而夷三族以其杀出子也郑高渠昧杀其君昭公【索隐春秋鲁桓公十七年左传作高渠弥也】十年伐邽冀戎初县之【集解駰案地理志陇西有上邽县应劭曰即邽戎邑冀县属天水郡】十一年初县杜郑【集解駰案地理志京兆有郑县杜县正义括地志云下杜故城在雍州长安县东南九里古杜伯国华州郑县也毛诗谱云郑国者周畿内之地宣王封其弟於咸林之地是为郑桓公按秦得皆县之】灭小虢【集解駰案班固曰西虢在雍州正义虢音古伯反括地志云故虢城在岐州陈仓县东四十里次西十余里又有城亦名虢城輿地志云此虢文王母弟虢叔所封是曰西虢按此虢灭时陕州之虢犹谓之小虢又云小虢羌之别种】十三年齐人管至父连称等杀其君襄公而立公孙无知晋灭霍魏耿【索隐春秋鲁闵公元年左传云晋灭耿灭魏灭霍又曰赐赵夙耿赐毕万魏杜预注曰平阳皮氏县东南有耿乡永安县东北有霍太山三国皆姬姓正义括地志云霍晋州霍邑县又春秋时霍伯国韦昭云霍姬姓也括地志云故耿城今名耿仓城在绛州龙门县东南十二里故耿国都城记云耿嬴姓国也】齐雍廩【正义雍於宫反廩力甚反是雍林邑人姓名也】杀无知管至父等而立齐桓公齐晋为强国十九年晋曲沃始为晋侯【索隐晋穆侯少子成师居曲沃号曲沃桓叔至武公称灭晋侯缙始为晋君也】齐桓公伯於鄆【正义伯音霸】二十年武公卒葬雍平阳初以人从死从死者六十六人有子一人名曰白白不立封平阳【正义即雍平阳也平阳时属雍并在岐州解在上也】立其弟德公德公元年初居雍城【集解徐广曰今县在扶风】大郑宫【正义括地志云岐州雍县南七里故雍城秦德公大郑宫城也】以牺三百牢祠鄜畤卜居雍後子孙饮马於河【正义卜居雍之後国益广大後代子孙得东饮马於龙门之河】梁伯芮伯来朝【索隐梁嬴姓芮姬姓梁国冯翊夏阳芮国冯翊临晋正义括地志云南芮乡故城在同州朝邑县南三十里又有北芮城皆古芮伯国郑玄云周同姓之国在畿内为王卿士者左传云桓

公三年芮伯万之母芮姜恶芮伯之多宠人故逐之出居魏今按州芮城县界有芮国城盖是殷末虞芮争田之芮国是也】二年初伏【集解孟康曰六月伏日初也周时无至此乃有之正义六月三伏之节起秦德公为之故云初伏伏者隐伏避盛暑也历忌释云伏者何以金气伏藏之日也四时代谢皆以相生立春木代水水生木立夏火代木木生火立冬水代金金生水立秋以金代火故至庚日必伏庚者金故曰伏也】以狗御蛊【集解徐广曰年表云初作伏祠社磔狗邑四门也正义蛊者热毒恶气为伤害人故磔狗以御之年表云初作伏祠社磔狗邑四门按磔禳也狗阳畜也以狗张磔於郭四门禳却热毒气也左传云皿虫为蛊顾野王云谷皆积变为飞蛊也】德公生三十三岁而立立二年卒生子三人长子宣公中子成公少子穆公长子宣公立宣公元年卫燕伐周【正义卫惠公都即今卫州也燕南燕也周天王也括地志云滑州故城古南燕国应劭云南燕姑姓之国黄帝之後】出惠王立王子颓三年郑伯虢叔【正义括地志云洛州汜水县古东虢国亦郑之制邑汉之成臯即周穆王虎牢城左传云宫之奇曰号仲虢叔王季之穆也】杀子颓而入惠王四年作密時【正义括地志云汉有五時在岐州雍县南则鄜時吴阳上時下時密時北時秦文公梦黄蛇自天而下属地其口止於鄜衍作時郊祭白帝曰鄜時秦宣公作密時於渭南祭青帝秦灵公作吴阳上時祭黄帝作下時亦祠黄帝汉高帝曰天有五帝今四何也待我而具五遂立黑帝曰北時是也】与晋战河阳胜之十二年宣公卒生子九人莫立立其弟成公成公元年梁伯【正义括地志云同州韩城县南二十二里少梁故城古少梁国都城记云梁伯国嬴姓之後与秦同祖秦穆公二十二年灭之】芮伯来朝齐桓公伐山戎次于孤竹【正义括地志云孤竹故城在平州卢龙县十二里殷时诸侯孤竹国也】成公立四年卒子七人莫立立其弟繆公【索隐秦自宣公已上皆史失其名今按世本古史考得繆公名任好】繆公任好元年自将伐茅津【正义刘伯庄云戎号也括地志云茅津及茅城在陕州河北县西二十里注水经云茅亭茅戎号】胜之四年迎妇於晋晋太子申生姊也其岁齐桓公伐楚至邵陵五年晋献公灭虞虢虢虞君与其大夫百里奚以璧马赂於虞故也既虢百里奚以为秦繆公夫人媵於秦百里奚亡秦走宛【集解駰按地理志南阳有宛县正义宛於元反今邓州县】楚鄙人执之繆公闻百里奚贤欲重赎之恐楚人不与乃使人谓楚曰吾媵臣百里奚在焉请以五羖羊皮赎之楚人遂许与之当是时百里奚年已七十余繆公释其囚与语国事谢曰臣亡国之臣何足问繆公曰虞君不用子故亡非子罪也固问语三日繆公大说授之国政号曰五羖大夫百里奚让曰臣不及臣友蹇叔蹇叔贤而世莫知臣常游困於齐而乞食于人【集解徐广曰一作銍正义銍音珍栗反銍地名在沛县】蹇叔收臣臣因而欲事齐君无知蹇叔止臣臣得脱齐难遂之周周王子颓好牛臣以养牛干之及颓欲用臣蹇叔止臣臣去得不诛事虞君蹇叔止臣臣知虞君不用臣臣诚私利禄爵且留再用其言得脱一不用及虞君难是以知其贤於是繆公使人厚币迎蹇叔以为上大夫秋繆公自将伐晋战於河曲【集解徐广曰一作西駰案公羊传曰河千里而一曲也服虔曰河曲晋地杜预曰河曲在蒲坂南正义按河曲在华陰县界也】晋骊姬作乱太子申生死新城【正义韦昭云曲沃新为太子城括地志云绛州曲沃县有曲沃故城土人以为晋曲沃新城】重耳夷吾出犇【正义重耳奔翟夷吾奔少梁也】九年齐桓公会诸侯於葵丘【正义括地志云葵丘在曹州考城县东南一里一百五十步郭内即桓公会处又青州临淄县有葵丘即传连称管至父所戍处】晋献公卒立骊姬子奚齐其臣里克杀奚齐荀息立卓子【集解徐广曰一作倬】克又杀卓子及荀息夷吾使人请秦求入晋於是繆公许之使百里奚将兵送夷吾夷吾谓曰诚得立请割晋之河西八城【正义谓同华等州地】

与秦及至已立而使丕郑谢秦背约不与河西城而杀里克丕郑闻之恐因与繆公谋曰晋人不欲夷吾实欲重耳今背秦约而杀里克皆吕甥郤芮之计也愿君以利急召吕甥吕郤至则更入重耳便繆公许之使人与丕郑归召吕甥吕郤等疑丕郑有间乃言夷吾杀丕郑丕郑子丕豹奔秦说繆公曰晋君无道百姓不亲可伐也繆公曰百姓苟不便何故能诛其大臣能诛其大臣此其调也【正义调音徒聊反言能诛大臣丕郑云是夷吾於百姓调和也刘伯庄音徒吊反按调选也邪臣诛忠臣用是夷吾能调选两通也】不听而陰用豹十二年齐管仲隰朋死晋早来请粟丕豹说繆公勿与因其饥而伐之繆公问公孙支【集解服虔曰秦大夫公孙子桑】支曰饥穰更事耳不可不与问百里傒傒曰夷吾得罪於君其百姓何罪於是用百里傒公孙支言卒与之粟以船漕车转自雍相望至绛【集解贾逵曰雍秦国都绛晋国都也】十四年秦饥请粟於晋晋君谋之羣臣虢射曰【正义射音石也】因其饥伐之可有大功晋君从之十五年兴兵将攻秦繆公发兵使丕豹将自往击之九月壬戌与晋惠公夷吾合战於韩地【正义左传云僖公十五年秦晋战於韩原秦获晋侯以归括地志云韩原在同州韩城县西南十八里十六国春秋云魏颗梦父结草抗秦将杜回亦在韩原】晋君弃其军与秦争利还而马驚【正义驚音致又勅利反国语云晋师溃戎马还泞而止韦昭云泞深泥也】繆公与麾下驰追之不能得晋君反为晋军所围晋击繆公繆公伤於是岐下食善马者三百人驰冒晋军晋军解围遂脱繆公而反生得晋君初繆公亡善马岐下野人共得而食之者三百余人【正义括地志云野人坞在岐州雍县东北二十里按野人盗马食处因名焉】吏逐得欲法之繆公曰君子不以畜产害人吾闻食善马肉不饮酒伤人乃皆赐酒而赦之三百人者闻秦击晋皆求从从而见繆公窘亦皆推锋争死以报食马之德於是繆公虏晋君以归令於国斋宿吾将以晋君祠上帝周天子闻之曰晋我同姓为请晋君夷吾姊亦为穆公夫人夫人闻之乃衰絰跣曰妾兄弟不能相救以辱君命繆公曰我得晋君以为功今天子为请夫人是忧乃与晋君盟许归之更舍上舍而馈之七牢【集解贾逵曰诸侯饗飮七牢牛一羊一豕一为一牢也】十一月归晋君夷吾夷吾献其河西地使太子圉为质於秦秦妻子圉以宗女是时秦地东至河【正义晋河西八城入秦秦东境至河即龙门河也】十八年齐桓公卒二十年秦灭梁芮【正义梁芮国皆在同州秦得其地故灭二国之君】二十二年晋公子圉闻晋君病曰梁我母家也【正义子圉母梁伯之女也】而秦灭之我兄弟多即君百岁後秦必留我而晋轻亦更立他子子圉乃亡归晋二十三年晋惠公卒子圉立为君秦怨圉亡去乃迎晋公子重耳於楚而妻以故子圉妻重耳初谢後乃受繆公益礼厚遇之二十四年春秦使人告晋大臣欲入重耳晋许之於是使人送重耳二月重耳立为晋君是为文公文公使人杀子圉子圉是为怀公其秋周襄王弟带以翟伐王王出居郑【正义王居于泛邑也】二十五年周王使人告难於晋秦秦繆公将兵助晋文公入襄王杀王弟带二十八年晋文公败楚於城濮【正义卫地也今濮州】三十年繆公助晋文公围郑【正义左传僖公三十年晋侯秦伯围郑杜预云文公过郑郑不礼之】郑使人言繆公曰亡郑厚晋於晋而得矣而秦未有利晋之强秦之忧也繆公乃罢兵归晋亦罢三十二年冬晋文公卒郑人有卖郑於秦曰我主其城门郑可袭也繆公问蹇叔百里傒对曰径数国千里而袭人希有得利者且人卖郑庸知我国人不有以我情告郑者乎不可繆公曰子不知也吾已决矣遂发兵使百里傒子孟明视蹇叔子西乞术及白乙丙将兵行日百里傒蹇叔二人哭之繆公闻怒曰孤发兵而子沮哭吾军何也【正义沮自吕反沮毁也左传云蹇叔哭之曰孟子吾见师之出不见其入也】二老曰臣非敢沮君军军行臣子与往【正义与音预】臣老迟还恐不相见故哭耳二老退谓其子曰汝

军即败必於殽厄矣【正义殽音故交反厄音厄春秋云鲁僖公三十三年晋人及姜戎败秦师於殽括地志云三殽山又名嶽岑山在洛州永宁县西北二十里即古之殽道也】三十三年春秦兵遂东更晋地过周北门周王孙满曰秦师无礼【正义左传云秦师过周北门左右免胄而下超乘者三百乘王孙满尚幼观之言於王曰秦师轻而无礼必败杜预云王城北门也谓过天子门不卷甲束兵超乘示勇也】不败何待兵至滑【正义为八反括地志云缑氏故城在洛州缑氏县东二十五里滑伯国也韦昭云姬姓小国也】郑贩卖贾人【正义卖麦卦反贾音古左传作商人也】弦高【集解人姓名】持十二牛将卖之周见秦兵恐死虜因献其牛曰闻大国将诛郑郑君谨修守御备使臣以牛十二劳军士秦三将军相谓曰将袭郑郑今已觉之往无及已灭滑滑晋之边邑也当是时晋文公丧尚未葬太子襄公怒曰秦侮我孤因丧破我滑遂墨衰絰发兵遮秦兵於殽击之大破秦军无一人得脱者虜秦三将以归文公夫人秦女也【集解服虔曰繆公女也】为秦三囚将请曰繆公之怨此三人入於骨髓愿令此三人归令我君得自快烹之晋君许之归秦三将三将至繆公素服郊迎向三人哭曰孤以不用百里奚蹇叔言以辱三子三子何罪乎子其悉心雪耻毋怠遂复三人官秩如故愈益厚之三十四年楚太子商臣弑其父成王代立繆公於是复使孟明视等将兵伐晋战於彭衙【集解杜预曰冯翊合阳县西北有衙城正义括地志云彭衙故城在同州白水縣东北六十里】秦不利引兵归戎王使由余【正义戎人姓名】於秦由余其先晋人也亡入戎能晋言闻繆公贤故使由余观秦秦繆公示以宫室积聚由余曰使鬼为之则劳神矣使人为之亦苦民矣繆公怪之问曰中国以诗书礼乐法度为政然尚时乱今戎夷无此何以为治不亦难乎由余笑曰此乃中国所以乱也夫自上圣黄帝作为礼乐法度身以先之仅以小治及其後世日以骄淫阻法度之威以责督於下下罢极【正义罢音皮】则以仁义怨望於上上下下交争怨而相篡弑至於灭宗皆以此类也夫戎夷不然上含淳德以遇其下下怀忠信以事其上一国之政犹一身之治不知所以治此真圣人之治也於是繆公退而问内史廖曰【集解駰案汉书百官表曰内史周官也】孤闻邻国有圣人敌国之忧也今由余贤寡人之害将柰之何内史廖曰戎王处辟匿未闻中国之声君试遗其女乐以夺其志【集解徐广曰夺一作徇】为由余请以疏其间留而莫遣以失其期戎王怪之必疑由余君臣有间乃可虜也且戎王好乐必怠於政繆公曰善因与由余曲席而坐【正义按牀在繆公左右相连而坐谓之曲席也】传器而食问其地形与其兵势尽觞而後令内史廖以女乐二八遗戎王戎王受而说之终年不还於是秦乃归由余由余数谏不听繆公又数使人间要由余由余遂去降秦繆公以客礼礼之问伐戎之形【正义韩国云秦繆公都地方三百里并国十四辟地千里陇西北地郡是也】三十六年繆公复益厚孟明等使将兵伐晋渡河焚舩大败晋人取王官及郃【集解徐广曰左传作郊駰案服虔曰此晋地不能有正义郃音郊左传作郊杜预云书取言易也括地志云王官故城在同州澄城县西北九十里又云南郊故城在县北十七里又有北郊故城又有西郊古城左传云文公三年秦伯伐晋济河焚舟取王官及郊也括地志云蒲州猗氏县南二里又有王官故城亦秦伯取者上文云秦地东至河盖猗氏王官是也】以报殽之役晋人皆城守不敢出於是繆公乃自茅津【集解徐广曰在大阳正义括地志云茅津在陕州河北县大阳县也】渡河【正义自茅津南渡河也】封殽中尸【集解贾逵曰封识之正义左传云秦伯伐晋济河焚舟晋人不出遂自茅津济封殽尸而还杜预云封埋藏也】为发丧哭之三日乃誓於军曰嗟士卒听无譁余誓告汝古之人谋黄髮番番【正义音婆字当作皤皤白头貌言髮白而更黄故云黄髮番番以申思谓蹇叔百里奚也】则无所过以申思不用蹇叔百

里侯之谋故作此誓令後世以记余过君子闻之皆为垂涕曰嗟乎秦繆公之与人周也【集解服?曰周备也】卒得孟明之庆三十七年秦用由余谋伐戎王益国十二开地千里遂霸西戎天子使召公过贺繆公以金鼓三十九年繆公卒葬雍【集解駟案皇览曰秦繆公冢在橐泉宫祈年观下正义庙记云橐泉宫秦孝公造祈年观德公起盖在雍州城内括地志云秦穆公冢在岐州雍县东南二里】从死者百七十七人秦之良臣子舆氏三人【正义毛萇云良善也三善臣也本传云子车氏之三子杜预云子车秦大夫也】名曰奄息仲行鍼虎亦在从死之中【正义行音胡郎反鍼音其廉反应劭云秦穆公与羣臣饮酒酣公曰生共此乐死共此哀於是奄息仲行鍼虎许诺及公薨皆从死黄鸟诗所为作也杜预云以人葬为殉也括地志云三良冢在岐州雍县一里故城内】秦人哀之为作歌黄鸟之诗君子曰秦繆公广地益国东服强晋西霸戎夷然不为诸侯盟主亦宜哉死而弃民收其良臣而从死且先王崩尚犹遗德垂法况夺之善人良臣百姓所哀者乎是以知秦不能复东征也穆公子四十人其太子罃代立是为康公康公元年往岁繆公之卒晋襄公亦卒襄公之弟名雍秦出也【正义雍母秦女故言秦出也】在秦晋赵盾欲立之使随会【正义韩昭云晋正卿士蒍之孙成伯之子季武子也食采於随范故曰随会或曰范会季范子字也】来迎雍秦以兵送至令狐【集解杜预曰在河东正义令音零括地志云令狐故城在蒲州猗氏县界十五里也】晋立襄公子而反击秦师秦师败随会来奔二年秦伐晋於武城【正义括地志云故武城一名武平城在华州郑县东北十三里也】报令狐之役四年晋伐秦取少梁【正义前入秦後归晋今秦又取之】六年秦伐晋取羈马【集解服?曰晋邑也】战於河曲大败晋军晋人患随会在秦为乱乃使魏贇余详反【集解服?曰晋之魏邑大夫正义贇音受又作贇音同详音羊】合谋会诈而得会会遂归晋康公立十二年卒子共公立【索隐名猗十代至灵公又并失名】共公二年晋赵穿弑其君灵公三年楚庄王强北兵至雒问周鼎共公立五年卒子桓公立桓公三年晋败我一将十年楚庄王服郑北败晋兵於河上当是之时楚霸为会盟合诸侯二十四年晋厉公初立与秦桓公夹河而盟归而秦倍盟与翟合谋击晋二十六年晋率诸侯伐秦秦军败走追至泾而还桓公立二十七年卒子景公立【集解徐广曰世本云景公名后伯车也索隐景公已下名又错乱始皇本纪作哀公】景公四年晋栾书弑其君厉公十五年救郑败晋兵於栎【集解杜预曰晋地也正义栎音历括地志云洛州阳翟县古栎邑也】是时晋悼公为盟主十八年晋悼公强数会诸侯率以伐秦败秦军秦军走晋兵追之遂渡泾至殽林而还【集解徐广曰殽音域駟案杜预曰秦地也】二十七年景公如晋与平公盟已而背之三十六年楚公子围弑其君而自立是为灵王景公母弟后子鍼【正义音钳】有宠景公母弟富或譖之恐诛乃奔晋车重千乘晋平公曰后子富如此何以自亡对曰秦公无道畏诛欲待其後世乃归三十九年楚灵王强会诸侯於申【正义在邓州南阳县三十里】为盟主杀齐庆封景公立四十年卒子哀公立【索隐始皇本纪作?公】后子复来归秦哀公八年楚公子弃疾弑灵王而自立是为平王十一年楚平王来求秦女为太子建妻至国女好而自娶之十五年楚平王欲诛建建亡【正义太子建亡之郑郑杀之】伍子胥奔吴晋公室卑而六卿强欲内相攻是以久秦晋不相攻三十一年吴王阖闾与伍子胥伐楚楚王亡奔随吴遂入郢楚大夫申包胥来告急【正义包胥姓公孙封於申故号申包胥左传云申包胥如秦乞师曰吴为封豕长蛇以荐食上国虐始於楚寡君失守社稷越在草莽使下臣告急曰夷德无厌若邻於君疆场之患也逮吴之未定君其取分焉若楚之遂亡君之土也若以君灵抚之世以事君】七日不食日夜哭泣【正义左传云申包胥对秦伯曰寡君越在草莽未获所伏下臣何敢即

安立依於庭牆而哭日夜不絕声勺饮不入口七日秦哀公为赋无衣九顿首而坐秦师乃出
【於是秦乃发五百乘救楚【正义左传鲁定公五年秦子蒲子虎帅车五百乘以救楚败吴师於军祥】败吴师吴师归楚昭王乃得复入郢哀公立三十六年卒太子夷公夷公蚤死不得立立夷公子是为惠公惠公元年孔子行鲁相事五年晋卿中行范氏反晋晋使智氏赵简子攻之范中行氏亡奔齐惠公立十年卒子悼公立悼公二年齐臣田乞弑其君孺子立其兄阳生为悼公六年吴败齐师齐人弑悼公立其子简公九年晋定公与吴王夫差盟争长於黄池卒先吴【集解徐广曰外传云吴王先?】吴强陵中国十二年齐田常弑简公立其弟平公常相之十三年楚灭陈秦悼公立十四年卒子厉共公立孔子以悼公十二年卒厉共公二年蜀人来赂十六年灃河旁以兵二万伐大荔取其王城【集解徐广曰今之临晋也临晋有王城正义荔音戾括地志云同州东三十里朝邑县东三十步故王城大荔近王城邑】二十一年初县频阳【集解駰案地理志冯翊有频阳县正义括地志云频阳故城在雍州同官县界古频阳县城也】晋取武成二十四年晋乱杀智伯分其国与赵韩魏二十五年智开与邑人来奔【集解徐广曰一本二十六年城南郑也正义开智伯子伯被赵襄子等灭其国其子与从属来奔秦】三十三年伐义渠虜其王【集解应劭曰义渠北地也正义括地志云宁庆二州春秋及战国时为义渠戎国之地也】三十四年日食厉共公卒子躁公立躁公二年南郑反【正义南郑今梁州所理县也春秋及战国时其地属於楚也】十三年义渠来伐至渭南十四年躁公卒立其弟怀公【索隐厉共公子也生昭太子未立而卒太子之子是为灵公】怀公四年庶长毚【正义长丁丈反毚竹遥反毚人名也刘伯庄音潮】与大臣围怀公怀公自杀怀公太子曰昭子蚤死大臣乃立太子昭子之子是为灵公【索隐生献公也】灵公怀公孙也灵公六年晋城少梁秦击之十三年城籍姑【正义括地志云籍姑故城在同州韩城县北三十五里】灵公卒子献公不得立【索隐献公名师隰】立灵公季父悼子是为简公简公昭子之弟而怀公子也【索隐简公怀公弟灵公季父也子惠公立始皇本纪云灵公生简公误也又纪年云简公九年卒次敬公立十二年卒乃立惠公正义刘伯庄云简公是昭子之弟怀公之子厉公之孙今史记谓简公是厉公子者抄写之误】简公六年令吏初带劔【正义春秋官吏各得带劔】灃洛城重泉【集解駰案地理志重泉县属冯翊正义重直龙反括地志云重泉故城在同州蒲城县东南四十五里也】十六年卒【集解徐广曰表云十五年也】子惠公立惠公十二年子出子生十三年伐蜀取南郑惠公卒出子立出子二年庶长改迎灵公之子献公于河西而立之【正义西者秦州西县秦之旧地时献公在西县故迎立之】杀出子及其母沈之渊旁秦以往者数易君君臣乖乱故晋复强夺秦河西地【正义夺前所上八城也】献公元年【集解徐广曰丁酉】止从死二年城栎阳【集解徐广曰徙都之今万年是也正义括地志云栎阳故城一名万年城在雍州东北百二十里栎阳汉七年分栎阳城内为万年县隋文帝开皇三年迁都于龙首川今京城也改万年为大兴县至唐武德元年又改曰万年置在州东七里】四年正月庚寅孝公生十一年周太史儋见献公曰周故与秦国合而别别五百岁复合合七十七岁而霸王出十六年桃冬花十八年雨金栎阳【正义言雨金於秦国都明金瑞见也】二十一年与晋战於石门【正义括地志云尧门山俗名石门在雍州三原县西北三十三里上有路其状若门故老云尧凿山为门因名之武德年中於此山南置石门县贞观年中改为云阳县】斩首六万天子贺以黼黻【集解駰案周礼曰白与黑谓之黼黑与青谓之黻】二十三年与魏晋战少梁虜其将公孙痤【正义座在戈反】二十四年献公卒【集解徐广曰表云二十三年】子孝公立【索隐名渠梁】年已二十

一岁矣孝公元年【集解徐广曰庚申也】河山以东强国六与齐威楚宣魏惠燕悼韩哀赵成侯并淮泗之间【正义并白浪反谓淮泗二水】小国十余楚魏与秦接界【正义楚北及魏西与秦相接北自梁州汉中郡南有巴渝过江南有黔中巫郡也魏西界与秦相接南自华州郑县西北过渭水滨洛水东岸向北有上郡鄜州之地皆筑长城以界秦境洛即漆沮水也】魏筑长城自郑滨洛以北有上郡楚自汉中南有巴黔中周室微诸侯力政争相并秦僻在雍州不与中国诸侯之会盟夷翟遇之孝公於是布惠振孤寡招战士明功赏下令国中曰昔我穆公自岐雍之间修德行武东平晋乱以河为界【正义即龙门河也】西霸戎翟广地千里天子致伯诸侯毕贺为後世开业甚光美会往者厉躁简公出子之不宁国家内忧未遑外事三晋攻夺我先君河西地诸侯卑秦丑莫大焉献公即位镇抚边境徙治栎阳且欲东伐复穆公之故地修穆公之政令寡人思念先君之意常痛於心宾客羣臣有能出奇计强秦者吾且尊官与之分土於是乃出兵东围陕城西斩戎之獮王【集解駰案地理志天水有獮道县应劭曰獮戎邑音桓】卫鞅闻是令下西入秦因景监【正义监甲暂反阉人也】求见孝公二年天子致胙三年卫鞅说孝公变法修刑内务耕稼外劝战死之赏罚孝公善之甘龙杜挚等弗然相与争之卒用鞅法百姓苦之居三年百姓便之乃拜鞅为左庶长其事在商君语中七年与魏惠王会杜平【正义在同州澄城县界也】八年与魏战元里【正义祁城在同州澄城县界】有功十年卫鞅为大良造将兵围魏安邑降之【集解駰案地理志曰河东有安邑县正义括地志云安邑故城在绛州夏县东北十五里本夏之都】十二年作为咸阳【正义括地志云咸阳故城亦名渭城在雍州咸阳县东十五里京城北四十五里即秦公徙都之者今咸阳县古之杜邮白起死处】筑冀阙【正义刘伯庄云冀犹记事阙即象魏也】秦徙都之并诸小乡聚【正义万二千五百家为乡聚犹村落之类也】集为大县县一令【集解駰案汉书百官表曰县令长皆秦官万户以上为令秩千石至六百石减万户为长秩五百石至三百石皆有丞尉】四十一县为田开阡陌【索隐风俗通曰南北曰阡东西曰陌河东以东西为阡南北为陌】东地渡洛十四年初为赋【集解徐广曰制贡赋之法也索隐谯周云初为军赋也】十九年天子致伯【正义伯音霸又如字孝公十九年天子始封爵为霸即太史儋云合七十七岁而霸王出之年故天子致伯桓谭新论云夫上古称三皇五帝而次有三王五伯此天下君之冠首也故言三皇以道理而五帝用德化三王由仁义五伯以权智其说之曰无制令刑罚谓之皇有制令而无刑罚谓之帝赏善诛恶诸侯朝事谓之王兴兵约盟以信义矫世谓之伯】二十年诸侯毕贺秦使公子少官率师会诸侯逢泽【集解徐广曰开封东北有逢泽正义括地志云逢泽亦名逢池在汴州浚仪县东南十四里】朝天子二十一年齐败魏马陵【正义虞喜志林云濮州甄城县东北六十余里有马陵涧谷深可以置伏按龐涓败即此也】二十二年卫鞅击魏虏魏公子卬封鞅为列侯号商君【正义商州商洛县在州东八十九里鞅所封也契所封地】二十四年与晋战鴈门【索隐纪年云与魏战岸门此云鴈门恐声悞也又下云败韩岸门盖一地也寻秦与韩魏战不当远至鴈门也正义括地志云岸门在许州长社县西北二十八里今名西武亭】虏其将魏错【正义七故反】孝公卒子惠文君立【索隐名驪】是岁诛卫鞅鞅之初为秦施法【正义为于伪反】法不行太子犯禁鞅曰法之不行自於贵戚君必欲行法先於太子太子不可黥黥其傅师於是法大用秦人治及孝公卒太子立宗室多怨鞅鞅亡因以为反而卒车裂以徇秦国【集解駰案汉书曰商君为法於秦战斩一首赐爵一级欲为官者五千石其爵名一为公士二上造三簪袅四不更五大夫六公大夫七官大夫八公乘九五大夫十左庶长十一右庶长十二左更十三中更

十四右更十五少上造十六大上造十七驷车庶长十八大庶长十九关内侯二十彻侯】惠文君元年楚韩赵蜀人来朝二年天子贺三年王冠【正义冠音馆礼记云年二十行冠礼也】四年天子致文武胙齐魏为王【索隐齐威王魏惠王】五年陰晋人犀首【正义犀音西地理志云华陰县故陰晋秦惠王五年更名宁秦高祖八年更名华陰】为大良造【集解駰案犀首官名姓公孙名衍索隐官名若虎牙之类姓公孙名衍魏人也】六年魏纳陰晋陰晋更名宁秦【集解徐广曰今之华陰也】七年公子卬与魏战虜其将龙贾斩首八万八年魏纳河西地九年渡河取汾陰皮氏【集解駰按地理志云二县属河东正义渡河东取之括地志云汾陰故城俗名殷汤城在蒲州汾陰县北也皮氏在绛州龙门县西一百八十步即古皮氏城也】与魏王会应【正义应乙陵反括地志云故应城因应山为名古之应国在汝州鲁山县东三十里左传云邲晋应韩武之穆也】围焦降之【正义括地志云焦城在陕州城内东北百步因焦水为名周同姓所封左传云虞虢焦滑霍阳韩魏皆姬姓也杜预云八国皆为晋所灭按武王克商封神农之後于焦而後封姬姓也】十年张仪相秦魏纳上郡十五县【正义今鄜绥等州也魏前纳陰晋次纳同丹二州今纳上郡而尽河西滨洛之地矣】十一年县义渠【正义地理志云北地郡义渠道秦县也括地志云宁原庆三州秦北地郡战国及春秋时为义渠戎国之地周先公刘不窋居之古西戎也】归魏焦曲沃【正义括地志云曲沃在陕州县西南三十二里因曲沃水为名按焦曲沃二城相近本魏地适属秦今还魏故言归也】义渠君为臣更名少梁曰夏阳十二年初腊【正义腊卢盍反十二月腊日也秦惠文王始效中国为之故云初腊猎禽兽以岁终祭先祖因立此日也风俗通云礼传云夏曰嘉平殷曰清祀周曰蜡汉改曰腊礼曰天子大蜡八伊耆氏始为蜡蜡者索也岁十二月合聚万物而索飨之】十三年四月戊午魏君为王韩亦为王【正义魏襄王韩宣惠王也】使张仪伐取陕出其人与魏十四年更为元年二年张仪与齐楚大臣会啗桑三年韩魏太子来朝张仪相魏五年王游至北河【集解徐广曰戎地在河上正义按王游观北河至灵夏州之黄河也】七年乐池相秦【正义乐音岳池徒何反裴氏音池】韩赵魏燕齐帅匈奴共攻秦秦使庶长疾与战修鱼虜其将申差【正义修鱼韩邑也年表云秦败我修鱼得韩将?申差】败赵公子渴韩太子奂斩首八万二千八年张仪复相秦九年司马错伐蜀灭之【索隐蜀西南夷旧有君长故昌意娶蜀山氏女也其後有杜宇自立为王号曰望帝蜀王元年秦惠本纪曰张仪伐蜀蜀王开战不胜为仪所灭也】伐取赵中都西阳【集解駰案地理志太原有中都县正义括地志云中都故县在汾州平遥县西十二里即西都也西阳即中阳也在汾州隰城县南十里地理志云西都中阳属西河郡此云伐取赵中都西阳赵世家云秦即取我西都及中阳年表云秦惠文王後元九年取赵中都西阳安邑赵武灵王十年秦取中都安阳本纪世家年表其县名异年岁实同所伐唯一处故具録之以示後学】十年韩太子苍来质伐取韩石章【正义韩地名也】伐败赵将泥【集解徐广曰将一作庄正义赵将名也】伐取义渠二十五城十一年?里疾攻魏焦降之败韩岸门斩首万其将犀首走公子通封於蜀【集解徐广曰是岁王赧元年索隐华阳国志曰赧王元年秦惠王封子通国为蜀侯以陈庄为相徐广所云亦据国志而言之】燕君让其臣子之十二年王与梁王会临晋庶长疾攻赵虜赵将庄张仪相楚十三年庶长章击楚於丹阳虜其将屈匄斩首八万又攻楚汉中取地六百里置汉中郡楚围雍氏秦使庶长疾助韩而东攻齐到满助魏攻燕【正义满或作蒲秦将姓名也】十四年伐楚取召陵丹犁臣蜀【正义二戎号也臣伏於蜀蜀相杀蜀侯并丹犁二国降秦在蜀西南姚府管内本西南夷战国时蜀滇国唐初置犁州丹州也】相壮【集解徐广曰一作状】杀

蜀侯来降惠王卒子武王立【索隐名荡】韩魏齐楚越【集解徐广曰一作赵】皆宾从武王元年与魏惠王会临晋【集解徐广曰表云哀王正义按魏惠王卒已二十五年矣】诛蜀相壮张仪魏章皆东出之魏伐义渠丹犁二年初置丞相【集解应劭曰丞者承也相者助也】?里疾甘茂为左右丞相张仪死於魏三年与韩襄王会临晋外【正义外谓临晋城外外字一作水】南公揭卒?里疾相韩武王谓甘茂曰寡人欲容车通三川窥周室死不恨矣其秋使甘茂庶长封伐宜阳【正义在河南府福昌县东故韩城是也此韩之大郡伐取之三川路乃通也】四年拔宜阳斩首六万涉河城武遂【集解徐广曰韩邑也正义按此邑本属韩近平阳韩世家云贞子居平阳九世至哀侯徙郑楚世家云而韩犹服事秦者以先王墓在平阳而秦之武遂去之七十里故知近平阳】魏太子来朝武王有力好戏力士任鄙乌获孟说皆至大官王与孟说举鼎絶脰【集解徐广曰一作脉正义脰音频忍反絶断也脰胫骨也】八月武王死【集解駉案皇览曰秦武王冢在扶风安陵县西北毕陌中大冢是也人以为周文王冢非也周文王冢在杜中正义括地志云秦悼武王陵在雍州咸阳县西北十五里也】族孟说武王取魏女为后无子立异母弟是为昭襄王【索隐名则一名稷武王弟】昭襄母楚人姓芈氏号宣太后武王死时昭襄王为质於燕燕人送归得立昭襄王元年严君疾为相【正义盖封蜀郡严道县因号严君疾名也】甘茂出之魏二年彗星见【正义彗似岁反又先到反】庶长壮与大臣诸侯公子为逆皆诛及惠文后皆不得良死【集解徐广曰迎妇於楚者】悼武王后出归魏三年王冠与楚王会黄棘【正义棘纪力反盖在房襄二州也】与楚上庸【集解駉案地理志汉中有上庸县正义括地志云上庸今房州竹山县及金州是也】四年取蒲坂【正义括地志云蒲坂故城在蒲州河东县南尧舜所都也】彗星见五年魏王来朝应亭【集解徐广曰魏世家云会临晋正义应音乙陵反】复与魏蒲坂六年蜀侯煇反【索隐煇音晖华阳国志曰秦封王子晖为蜀侯蜀侯祭归胙於王後母疾之加毒以进王大怒使司马错赐晖劒此煇不同也】司马错定蜀庶长奂伐楚斩首二万涇阳君质於齐【索隐名市】日食画晦七年拔新城【正义楚世家云怀王二十九年秦复伐楚大破楚军楚军死二万杀我将军景缺年表云秦败我襄城杀景缺括地志云许州襄城县即古新城县也按世家年表则新字误作襄字】?里子卒八年使将军芈戎攻楚取新市【集解駉按晋帝纪曰江夏有新市县】齐使章子魏使公孙喜韩使暴鸢共攻楚方城取唐昧【索隐暴鸢韩将姓名】赵破中山其君亡竟死齐魏公子劲韩公子长为诸侯【索隐别封之邑比之诸侯犹商君赵长安君然】九年孟尝君薛文来相秦奂攻楚取八城杀其将景缺十年楚怀王入朝秦秦留之薛文以金受免【正义金受秦丞相姓名免夺其丞相】楼缓为丞相十一年齐韩魏赵宋中山五国共攻秦【正义盖中山此时属赵故云五国也】至盐氏而还【集解徐广曰盐一作监正义括地志云盐故城一名司盐城在蒲州安邑县按掌盐池之官因称氏】秦与韩魏河北及封陵以和【正义年表云秦与魏封陵与韩武遂以和按河外陕虢曲沃等地封陵在古蒲坂县西南河曲之中武遂平阳地也】彗星见楚怀王走之赵赵不受还之秦即死归葬十二年楼缓免穰侯魏冉为相【正义括地志云穰邓州所理县即古穰侯国】予楚粟五万石十三年向寿伐韩取武始【集解駉案地理志魏郡有武始县正义括地志云武始故城在洛州武始县西南十里】左更白起攻新城【正义白起传云白起为左庶长将兵击韩之新城括地志云洛州伊阙县本是汉新城县隋文帝改为伊阙在洛州南七十里】五大夫礼出亡奔魏任鄙为汉中守【集解駉案汉书百官表曰郡守秦官】十四年左更白起攻韩魏於伊阙【正义括地志云伊阙在洛州南十九里注水经云昔大禹疏龙门以通水两山相对

望之若阙伊水历其间故谓之伊阙按今洛南犹谓之龙门也】斩首二十四万虜公孙喜拔五城十五年大良造白起攻魏取垣复予之【正义垣音袁前秦取蒲坂复以蒲坂与魏魏以为垣今又取魏垣复与之后秦以为蒲坂皮氏】攻楚取宛十六年左更错取轹及邓【集解駰案地理志河南有轹县南阳有邓县正义括地志云故轹城在怀州济源县东南十三里故邓城在怀州河阳县西三十一里并六国时魏邑也按二城相连故云及也】冉免封公子市宛公子悝邓【索隐悝号高陵君初封於彭昭襄王弟也】魏冉陶为诸侯十七年城阳君入朝【正义括地志云濮州雷泽县本汉鄆阳县古鄆伯姬姓之国周武王封弟季载於鄆其后迁城之阳也】及东周君来朝秦以垣为蒲坂皮氏【索隐为当为易盖字讹也正义蒲坂今河东县也皮氏故城在绛州龙门县西一里八十步】王之宜阳十八年错攻垣【正义盖蒲坂皮氏又归魏魏复以为垣今重攻取之也】河雍决桥取之【集解徐广曰汲冢纪年云魏哀王二十四年改宜阳曰河雍改向曰高平向在轹之西】十九年王为西帝齐为东帝皆复去之吕礼来自归齐破宋宋王在魏死温任鄙卒二十年【集解徐广曰秦地有父马生驹】王之汉中又之上郡北河二十一年【集解徐广曰有牡马生牛而死】错攻魏河内魏献安邑秦出其人募徙河东赐爵赦罪人迁之泾阳君封宛二十二年蒙武伐齐河东为九县与楚王会宛与赵王会中阳【集解駰案地理志西河有中阳县】二十三年尉斯离【正义尉都尉斯离名也】与三晋燕伐齐【索隐尉秦官斯离其姓名】破之济西王与魏王会宜阳与韩王会新城二十四年与楚王会鄆【正义鄆於建反又音偃括地志云故偃城在襄州安养县北三里古偃子之国】又会穰秦取魏安城【集解駰案地理志云汝南有安城县正义括地志云安城在豫州汝阳县东南十七里】至大梁燕赵救之秦军去魏冉免相二十五年拔赵二城与韩王会新城与魏王会新明邑二十六年赦罪人迁之穰侯冉复相二十七年错攻楚赦罪人迁之南阳【正义南阳及上迁之穰皆今邓州也】白起攻赵取代光狼城【正义括地志云光狼故城在泽州高平县西二十里】又使司马错发陇西因蜀攻楚黔中【正义今黔府也】拔之二十八年大良造白起攻楚取鄆邓【正义鄆邓二城并在襄州】赦罪人迁之二十九年大良造白起攻楚取郢为南郡【正义括地志云郢城在荆州江陵县东北六里楚平王筑都之地也】楚王走周君来王与楚王会襄陵【集解駰案地理志河东有襄陵县正义括地志云襄陵在晋州临汾县东南三十五里阌駰十三州志云襄陵晋大夫犇邑也】白起为武安君【正义言能抚养军士战必克得百姓安集故号武安故城在潞州武安县西南五十里七国时赵邑即赵奢救阌与处也】三十年蜀守若伐取巫郡【正义华阳国志张若为蜀中郡守括地志云巫郡在夔州东百里】及江南为黔中郡【正义括地志云黔中故城在辰州沅陵县西二十里江南今黔府亦其地也】三十一年白起伐魏取两城楚人反我江南【正义黔中郡反归楚】三十二年相穰侯攻魏至大梁破暴鸢斩首四万鸢走魏入三县请和三十三年客卿胡伤攻魏卷【集解駰案地理志河南有卷县正义卷音丘袁反括地志云故卷城在郑州原武县西北即衡雍也】蔡阳长社取之【集解駰案地理志颍川有长社县正义括地志云蔡阳今豫州上蔡水之阳古城在豫州北七十里长社故城在许州长社县西一里皆魏邑也】击芒卯华阳破之【集解司马彪曰华阳亭名在密县索隐芒卯魏将譙周云孟卯也正义括地志云故华城在郑州管城县南三十里国语云史伯对郑桓公虢郃十邑华其一也华阳即此城也按是时韩赵聚兵于华阳攻秦即此矣】斩首十五万魏入南阳以和【集解徐广曰河内修武古曰南阳秦始皇更名河内属魏地荆州之南阳郡本属韩地正义括地志云怀获嘉县即古之南阳杜预云在晋州山南河北故曰南阳秦破芒卯军

斩首十五万魏入南阳以和】三十四年秦与魏韩上庸地为一郡南阳免臣迁居之三十五年佐韩魏楚伐燕初置南阳郡【正义今邓州也前已属秦秦置南阳郡在汉水之北释名云在中国之南旧名阳地故以为名焉张衡南都赋云陪京之南居汉之阳】三十六年客卿竈攻齐取刚寿【正义括地志云故刚城在兖州褒丘县界寿郢州之县】予穰侯三十八年中更胡伤攻赵阨与【集解孟康曰音焉与邑名在上党涅县西正义阨於達反与音预阨与聚城一名乌苏城在潞州铜鞮县西北二十里赵奢破秦军处又仪州和顺县即古阨与城亦云赵奢破秦军处然仪州与潞州相近二所未详又阨与山在潞州武安县西南五十里赵奢拒秦军於阨与即山北也按阨与山在武安故城西南又近武安故城盖仪州是所封故地】不能取四十年悼太子死魏归葬芷阳【集解徐广曰今霸陵正义括地志云芷阳在雍州蓝田县西六里三秦记云鹿原东有霸川之西坂故芷阳也】四十一年夏攻魏取邢丘怀【集解徐广曰邢丘在平臯駟案韩诗外传武王代纣到于邢丘勒兵於甯更名邢丘曰怀甯曰修武正义括地志云平臯故城本邢丘邑汉置平臯县在怀州武德县东南二十里故怀城周之怀邑在怀州武陟县西十一里】四十二年安国君为太子十月宣太后薨【集解徐广曰芊氏】葬芷阳酈山【正义酈力知反在雍州新丰县南十四里也】九月穰侯出之陶四十三年武安君白起攻韩拔九城斩首五万四十四年攻韩南郡取之四十五年五大夫贲【正义音奔五大夫官疑贲名也】攻韩取十城叶阳君【集解一云华阳正义叶车涉反】愷出之国未至而死四十七年秦攻韩上党上党降赵秦因攻赵赵发兵击秦相距秦使武安君白起击大破赵於长平四十余万尽杀之四十八年十月韩献垣雍【集解司马彪曰河南卷县有垣雍城】秦军分为三军武安君归王齮将伐赵武安皮牢拔之司马梗北定太原尽有韩上党正月兵罢复守上党其十月五大夫陵攻赵邯鄲四十九年正月益发卒佐陵陵战不善免王齮代将其十月将军张唐攻魏为蔡尉捐弗守【正义为于伪反蔡姓尉名】还斩之五十年十月武安君白起有罪为士伍迁陰密【集解如淳曰尝有爵而以罪夺爵皆称士伍正义括地志云陰密故城在泾州鹑觚县西即古密须国也】张唐攻郑拔之十二月益发卒军汾城旁【正义括地志云临汾故城在绛州正平县东北二十五里即古临汾县城也按汾城即此城是也】武安君白起有罪死齮攻邯鄲不拔去还奔汾军二月余攻晋军斩首六千晋楚流死河二万人【集解徐广曰楚一作走正义按此时无楚军走字是也】攻汾城即从唐拔宁新中【集解徐广曰一作曼此赵邑也正义唐今晋州平阳尧都也括地志云宁新中七国时魏邑秦昭襄王拔魏宁新中更名安阳城即今相州外城是也】宁新中更名安阳【集解徐广曰魏郡有安阳县正义今相州外城古安阳城】初作河桥【正义此桥在同州临晋县东渡河至蒲州今蒲津桥也】五十一年将军嫪毐攻韩取阳城负黍【正义今河南府县也负黍亭在阳城县西南三十五里本周邑亦时属韩也】斩首四万攻赵取二十余县首虜九万西周君【正义武公】背秦与诸侯约从将天下銳兵出伊阙攻秦令秦毋得通阳城於是秦使将军嫪毐攻西周西周君走来自归顿首受罪尽献其邑三十六城口三万秦王受献归其君於周五十二年周民东亡其器九鼎入秦【正义器谓宝器也禹贡金九牧铸鼎於荆山下各象九州之物历殷至周赧王十九年秦昭王取九鼎然一飞入泗水余八入於秦中】周初亡五十三年天下来宾魏後秦使嫪毐伐魏取吴城【集解徐广曰在大阳正义括地志云虞城故城在陕州河北县东北五十里虞山之上亦名吴山周武王封弟虞仲於周之北故夏墟吴城即此城也】韩王入朝魏委国聽令五十四年王郊见上帝於雍五十六年秋昭襄王卒子孝文王立【索隐名柱五十三而立立一年卒葬壽陵子庄襄王】尊唐八子为唐太后【集解徐

广曰八子者妾媵之号姓唐正义孝文王之母也先死故尊之晋灼云除皇后自昭仪以下秩至百石凡十四等汉书外戚传云八子视千石比中更】而合其葬於先王【正义以其母唐太后与昭王合葬】韩王衰經入吊祠诸侯皆使其将相来吊祠视丧事孝文王元年赦罪人修先王功臣褒厚亲戚?苑囿孝文王除丧十月己亥即位三日辛丑卒子庄襄王立【索隐名子楚三十二而立立四年卒葬阳陵子始皇帝】庄襄王元年大赦罪人修先王功臣施德厚骨肉而布惠於民东周君与诸侯谋秦秦使相国吕不韦诛之尽入其国秦不絶其祀以阳人地【集解駰案地理志河南梁县有阳人聚】赐周君奉其祭祀使蒙骃伐韩韩献成臯巩【正义括地志云洛州汜水县古之虢国亦郑之制邑又名虎牢汉之成臯巩恭勇反今洛州巩县尔时秦灭东周韩亦得其地又献於秦】秦界至大梁初置三川郡【集解韦昭曰有河洛伊故曰三川駰案地理志汉高祖更名河南郡】二年使蒙骃攻赵定太原三年蒙骃攻魏高都汲【集解徐广曰一作波波县亦在河内正义汲音急括地志云高都故城今泽州是汲故城在卫州所理汲县西南二十五里孟康云汉波县今郗城是也括地志云故郗城在怀州河内县西三十二里左传云苏忿生十二邑郗其一也】拔之攻赵榆次新城狼孟【正义括地志云榆次并州县即古榆次地也新城一名小平城在朔州善阳县西南四十七里狼孟故城在并州阳曲县东北二十六里按取三十七城并代朔三州之地矣】取三十七城四月日食四年王齮攻上党【正义上党又反秦故攻之】初置太原郡【正义上党以北皆太原地即上三十七城也】魏将无忌率五国兵击秦【正义信陵君也率燕赵韩楚魏之兵击秦也】秦郤於河外【正义蒙骃被五国兵败遂解而却至於河外河外陕华二州也】蒙骃败解而去五月丙午庄襄王卒子政立是为秦始皇帝【索隐十三而立立三十七年崩葬郿邑子二世皇帝】秦王政立二十六年初并天下为三十六郡号为始皇帝始皇帝五十一年而崩子胡亥立是为二世皇帝【索隐十二而立纪云二十一立三年葬宜春秦自襄公至二世凡六百一十七岁此实本纪而注别举之以非本文耳】三年诸侯并起叛秦赵高杀二世立子婴子婴立月余诸侯诛之遂灭秦其语在始皇本纪中

太史公曰秦之先为嬴姓其後分封以国为姓有徐氏郯氏莒氏终黎氏【集解徐广曰世本作鍾离应劭曰氏姓注云有姓终黎者是也】运奄氏菟裘氏将梁氏黄氏江氏修鱼氏白冥氏蜚廉氏秦氏然秦以其先造父封赵城为赵氏

【索隐述赞曰栢翳佐舜皂游是旌蜚廉事纣石椁斯营造父善馭封之赵城非子息马厥号秦嬴礼乐射御西垂有声襄公救周始命列国金祠白帝龙祚水德祥应陈宝妖除丰特里奚致霸卫鞅任刻厥后吞并卒成凶慝】

史记卷五

史记卷五考证

秦本纪○【臣德龄】按殷周之兴以先世积德始皇之帝则以先世积强所致太史公作殷周本纪皆推原先世功德以昭一代之统系至秦则分而二之曰秦本纪曰始皇本纪其褒贬之意显然或曰秦与始皇分纪所以别嬴吕也其论虽纖理亦不诬

恶来革者蜚廉子也早死○余有丁曰恶来革者岂即恶来耶但不宜复曰蜚廉子既为武王诛死又不宜曰蚤死【臣照】按史迁纪秦赵之同出蜚廉上文云蜚廉复有子曰季胜季胜之後为赵乃云恶来革者蜚廉子也言子则宜为嗣者也大宗也言蚤死则宜若无子矣而有子曰女防其後为秦且言为武王所诛时年尚少也余有丁之议过矣

平王封襄公为诸侯赐之岐以西之地○毛诗秦风疏孔颖達云本纪曰赐襄公岐以西之地襄公生文公於是文公遂收周余民有之地至岐岐以东献之周如本纪之言则襄公所得自岐以西如以郑言横有西都八百里之地则是全得西畿言与本纪异者按终南之山在岐之东南大夫之戒襄公已引终南为喻则襄公亦得岐东非唯自岐以西也即如本纪之言文公收周余民又献岐东於周则秦之东境终不过岐而春秋之时秦境东至於河襄公已後更无功德之君复是何世得之也明襄公救周即得之矣本纪之言不可信也

十三年齐人管至父连称等杀其君襄公○左传弑襄公秦武十二年事立齐桓公秦武十三年事与年表同与此异

晋灭霍魏耿○晋世家献公之十六年灭霍魏耿据年表是年为秦成之三年此作武公十三年相隔二十四年

梁伯芮伯来朝正义今按州芮城县界有芮国城○州上脱一字唐书地理志芮城县武德初属芮州贞观时属陕州当是陕字

既虏百里奚以为秦缪公夫人媵於秦○困学纪闻曰朱文公曰按左氏媵秦穆姬者乃井伯非百里奚也太原阎若璩曰按孟子言百里奚先去虞自不至为晋所虏益知井伯者另一人且史载缪公四年乙丑迎妇于晋左传僖五年丙寅以媵秦缪姬亦差一年

太子申生死新城○僖四年左传十二月戊申缢于新城是年据年表为秦缪之四年此入於五年後

十二年齐管仲隰朋死○齐世家秦穆公虏晋惠公复归之是岁管仲隰朋卒据年表是年为秦穆之十五年也此入于十二年

晋旱来请粟○僖十三年左传冬晋荐饥使乞糒于秦据年表是年为缪公之十三年此入十二年

十八年齐桓公卒○春秋经僖十七年冬十有二月乙亥齐侯小白卒是年于秦穆亦为十七年

二十年秦灭梁芮○僖十九年左传秦遂取梁年表亦载入秦缪十九年与传同

使百里奚子孟明视蹇叔子西乞术及白乙丙将○吕氏春秋蹇叔有子曰申与视与师偕行高诱注曰申白乙丙也视孟明视也左传疏曰世族谱以百里孟明视为百里奚之子则姓百里名视字孟明也古人之言名字者皆先字後名而连言之其术丙必是名西乞白乙或字或氏不可明也或以为西乞术白乙丙为蹇叔子按传称蹇叔之子与师言其在师中而已若是西乞白乙则为将帅不得云与也或说必妄记异闻耳王若虚辨惑曰秦穆公伐郑之役考之左传其谏而止之哭而送其子者独蹇叔而已故晋原轸曰秦违蹇叔而以贪勤民穆公曰孤违蹇叔以辱二三子何尝有百里奚预其间哉而司马迁记此以为二老同辞不知其何据也左氏云公召孟明视西乞术白乙丙使出师又云蹇叔之子与师蹇叔谓孟子曰孟子吾见师之出而不见其入也哭送其子曰吾收尔骨焉盖孟明辈自为将帅而蹇叔之子则士卒之属也此亦不相涉而迁以孟明为百里奚子西乞白乙为蹇叔子又何邪或曰孔疏引世族谱云或谓西乞术白乙丙为蹇叔子安知子长别无所据而必以左氏为质乎曰此或有之然是役也主其谋者孟明也再败不沮卒以得逞使果为百里奚子何奚能苦谏其君而无一言以罪其子也以书观之穆公自殽败归即作秦誓以自悔而迁以为取王官封殽尸之後不亦异乎又云君子闻之皆为垂涕曰嗟乎秦穆之与人周也按左氏曰君子是以知秦穆之为君也举人之周也与人之一也至于孟明子桑皆有赞美之辞凡左氏所谓君子者盖假之为褒贬之主而非指乎当时之士也安有所谓闻之垂涕者哉

於是繆公退而问内史廖○韩诗外传作内史王繆以女乐二八遗戎王○说苑作三九

繆公以客礼礼之问伐戎之形正义韩国云秦穆公都地方三百里○国字是子字之误

乃使魏犇余详反○左传及晋世家皆作寿余

共公立五年卒○春秋宣四年秦伯稻卒则共公立四年非五年矣考春秋自明

十八年晋悼公强数会诸侯率以伐秦败秦军秦军走晋兵追之遂渡泾至棫林而还○是役也襄十四年左传诸侯之师济泾而次秦人毒泾上流师人多死晋之诸帅不和谓之迁延之役此云败秦军秦军走年表亦然与左传相反

二十七年景公如晋与平公盟已而背之○三传皆无此盟

十一年楚平王来求秦女为太子建妻○楚世家及年表在秦哀之十年

惠公立十年卒○春秋经哀三年冬十月癸卯秦伯卒总计在位只得九年此与年表及始皇本纪皆作十年

十二年齐田常弑简公○事在秦悼之十年今此作十二年与春秋及年表不合

智开与邑人来奔正义开智伯子○【臣照】按赵襄子曰智伯死无後又史载唯辅果在正

义以开为智伯子无据也盖智伯之族人

十三年城籍姑灵公卒○六国年表及始皇本纪灵公在位十年卒

合七十七岁而霸王出○此与周本纪及封禅书不同与晋战於石门○赵世家作石阿

与魏晋战少梁虜其将公孙痤○魏世家同六国年表作虜其太子赵世家作太子痤商君传作公孙痤

孝公元年河山以东强国六与齐威楚宣魏惠燕悼韩哀赵成侯并淮泗之间○据年表孝公元年燕为文公韩为懿侯

齐魏为王○齐威二十六年自称为王以令天下于秦为孝公九年此因魏连言之耳

虜其将龙贾斩首八万○魏世家作四万五千

十一年县义渠○【臣世骏】按此时义渠不得为县犀首传云其後五国伐秦陰以文绣千纯妇人百人遗义渠君义渠君起兵袭秦大败秦李伯之下若义渠已为县秦必更置令长何至十年之後反为所败年表云义渠君为臣似可据

魏君为王韩亦为王正义魏襄王韩宣惠王也○【臣世骏】按惠文君四年齐魏为王索隐曰齐威王魏惠王魏世家云惠王卒子襄王立襄王元年与诸侯会徐州相王也追尊父惠王为王与此互异岂惠王始尝称王後又降号如称帝归帝之说耶否则秦纪但应有十三年之书不应有四年之书矣魏世家於惠王时亦不着称王事

韩赵魏燕齐帅匈奴共攻秦○【臣世骏】按战国策补注曰按秦纪书韩赵魏燕齐帅匈奴伐秦年表韩魏赵楚燕五国伐秦不胜楚世家书苏秦约从六国共攻秦楚怀王为从长至函谷关秦击之六国皆引归齐独後互有不同通监据年表大事记据楚世家按楚世家特详者以从长故当以为正年表诸国皆书不胜齐独後而不败故畧不书与纪不书楚者岂以世家文已明与修鱼之战虜韩申差年表在次年而纪於此连书之则纪诚有误也高诱注五国作齐宋韩魏赵尤误

十年韩太子苍来质○韩世家在宣惠十九年据年表是年为秦惠後十一年

伐取义渠二十五城○六国年表在十一年

公子通封於蜀○六国年表在十二年作公子繇通燕君让其臣子之○六国年表此事在後九年

虜趙將莊○趙世家及穰里子傳作虜趙將軍莊豹涇陽君質於齊○田完世家及年表俱在秦昭之七年此入六年

八年使將軍?戎攻楚取新市齊使章子魏使公孫喜韓使暴鸞共攻楚方城取唐昧○楚世家二十八年秦乃與齊韓魏共攻楚殺楚將唐昧取我重兵而去年表及各世家俱同是年于秦昭為六年

趙破中山其君亡竟死齊○趙世家及年表攻中山在秦昭六年滅中山在秦昭十二年田完世家亦同此叙入八年內

九年孟嘗君薛文來相○年表及田完世家薛文相秦在秦昭八年

秦奐攻楚取八城殺其將景缺○楚世家懷王二十九年秦復攻楚大破楚軍楚軍死二萬殺我將軍景缺懷王恐乃使太子為質齊以求平三十年秦復伐楚取八城據年表為秦昭七八兩年事也各記不同

十年楚懷王入朝秦秦留之○楚世家年表皆在秦昭八年

十一年齊韓魏趙宋中山五國共攻秦至鹽氏而還○以諸世家証年表為秦昭之九年

左更白起攻新城○白起傳昭王十三年起為左庶長將而擊韓之新城其明年乃為左更

五大夫禮出亡奔魏○禮姓呂見穰侯傳彼云出奔齊冉免○六國年表及穰侯傳冉謝病免相在昭十五年此入十六年內

封公子市宛公子悝鄧索隱悝號高陵君○穰侯傳昭王同母弟曰高陵君涇陽君索隱曰高陵名顯涇陽名悝兩注自相抵牾

齊破宋宋王在魏死溫○田完世家齊湣三十八年伐宋宋王出亡死於溫魏世家魏昭十年齊滅宋宋王死我溫年表亦同是年在秦為昭之二十一年此入於十九年內

涇陽君封宛○十六年已封公子市宛矣此復封涇陽君疑有一誤

蒙武伐齊河東為九縣○徐孚遠曰古史河東上有取字

魏入南陽以和正義括地志懷獲嘉縣即古之南陽○懷字下宜有州字

四十一年夏攻魏取邢丘懷○魏世家安王九年秦拔我懷是年為秦昭之三十九年十一年拔我鄴丘即秦四十一年也此兩年事併入一年

四十三年武安君白起攻韩拔九城○白起传昭王四十三年白起攻韩陁城拔五城韩世家
惠王九年秦拔我泾城汾旁

取阳城负黍正义今河南府县也○府字误以唐书地理志考之或应作告成二字

韩献成臯巩○韩世家秦拔我成臯荥阳不曰献年表亦同

始皇帝五十一年而崩○【臣世骏】按始皇十三年而立立三十七年而崩当得四十九年

史记卷五考证

卷六

<史部,正史类,史记>

钦定四库全书

史记卷六

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

秦始皇本纪第六

秦始皇帝者秦庄襄王子也【索隐庄襄王者孝文王之中子昭襄王之孙也名子楚按战国策本名子异後为华阳夫人嗣夫人楚人因改名子楚也】庄襄王为秦质子於赵【正义质音致国强欲待弱之来相事故遣子及贵臣为质如上音国弱惧其侵伐令子及贵臣往为质音直实反又二国敌亦为交质音致左传云周郑交质王子狐为质於郑郑公子忽为质於周是也】见吕不韦姬悦而取之【索隐按不韦传云不韦阳翟大贾也其姬邯郸豪家女善歌舞有娠而献於子楚】生始皇以秦昭王四十八年正月生於邯郸及生名为政姓赵氏【集解徐广曰一作正宋忠云以正月旦生故名正索隐系本作政又生於赵故曰赵政一曰秦与赵同祖以赵城为荣故姓赵氏正义正音政周正建子之正也始皇以正月旦生於赵因为政後以始皇讳故音征】年十三岁庄襄王死政代立为秦王当是之时秦地已并巴蜀汉中越宛有郢置南郡矣北收上郡以东有河东太原上党郡东至荥阳灭二周置三川郡吕不韦为相封十万户号曰文信侯招致宾客游士欲以并天下李斯为舍人【集解文颖曰主廐内小吏官名或曰侍从宾客谓之舍人也】蒙骜王齮庶公等为将军【集解徐广曰齮一作𪔐应劭曰庶秦邑索隐蒙骜齐人蒙武之父蒙恬之祖王齮即王𪔐昭王四十九年代大夫陵伐赵者庶公盖庶邑公史失其姓名正义齮鱼绮反刘伯庄云音绮後同庶彼苗反盖秦之县邑大夫称公若楚制】王年少初即位委国事大臣晋阳反

元年将军蒙骜击定之

二年庶公将卒攻卷【正义将子匠反卒子必反卷丘员反】斩首三万三年蒙骜攻韩取十

三城王齮死十月将军蒙骜攻魏氏暘有诡【集解徐广曰暘音场索隐音畅魏之邑名】岁大饥

四年拔暘有诡三月军罢秦质子归自赵赵太子出归国十月庚寅蝗虫从东方来蔽天下疫百姓内粟千石拜爵一级

五年将军骜攻魏定酸枣【集解駰案地理志陈留有酸枣县正义括地志云酸枣故城在滑州酸枣县北十五里古酸枣县南】燕虚长平【集解徐广曰一作千駰案地理志汝南有长平县也索隐三邑名春秋桓十二年会于虚又战国策曰拔燕酸枣虚桃人桃人亦魏邑虚地今阙盖与诸县相近按今东郡燕县东三十里有故桃城则亦非远正义燕乌田反括地志云南燕城古燕国也滑州胙城县是也姚虚在濮州雷泽县东十三里孝经援神契云帝舜生於姚墟即东郡也长平故城在陈州宛丘县西六十六里】雍丘山阳城【集解駰案地理志陈留有雍丘县河内有山阳县正义雍於用反汴州县】皆拔之取二十城初置东郡冬雷

六年韩魏赵卫楚共击秦取寿陵【正义徐广云在常山按本赵邑也】秦出兵五国兵罢拔卫迫东郡其君角率其支属徙居野王阻其山以保魏之河内

七年彗星先出东方见北方五月见西方【正义彗音似岁反见并音行练反孝经内记云彗出北斗兵大起彗在三台臣害君彗在大微君害臣彗在天狱诸侯作乱所指其处大恶彗在日旁子欲杀父】将军骜死以攻龙孤庆都【集解徐广曰庆一作麀正义括地志云定州?阳县西南四十里有白龙水又有挟龙山又定州唐县东北五十四里有孤山盖都山也帝王纪云望尧母庆都所居张晏云尧山在北尧母庆都山在南相去五十里北登尧山南望庆都山也注水经云望都故城东有山不连陵名之曰孤孤都声相近疑即都山孤山及望都故城三处相近】还兵攻汲彗星复见西方十六日夏太后死【索隐庄襄王所生母正义子楚母也】八年王弟长安君成蟜【正义蟜音纪兆反成蟜者长安君名也号为长安君】将军击赵反【正义将如字将犹领也又子匠反】死屯留【正义括地志云屯留故城在潞州长子县东北三十里汉屯留吁国也】军吏皆斩死迁其民於临洮【正义临洮水故名临洮洮州在陇右去京千五百五十一里言屯留之民被成蟜畧衆共反故迁之於临洮郡】将军壁死【正义壁边覓反言成蟜自杀壁垒之内】卒屯留蒲鶮反戮其屍【集解徐广曰鶮一作鶮屯留蒲鶮皆地名也壁於此地时士卒死者皆戮其屍索隐临洮在陇西高诱云屯留上党之县名谓成蟜为将军而反秦兵击之而蟜壁於屯留而死屯留蒲鶮二邑之反卒虽死犹皆戮其屍鶮古鹤字正义卒子忽反鶮音高注同蒲鶮皆地名】河鱼大上【索隐谓河水溢鱼大上平地亦言遭水害也即汉书五行志刘向所谓鱼虫之孽明年嫪毐诛鱼陰类小人象正义始皇八年黄河之鱼西上入渭渭水也汉书五行志云鱼者阴类臣民之象也十七年灭韩二十六年尽并天下自灭韩至并天下盖十年矣周本纪云十年数之纪也天下之所弃不过其纪明关东後属秦其象类先见也】轻车重马东就食【索隐言河鱼大上秦人皆轻车重马并就食於东言往河旁食鱼也一云河鱼大上为灾人遂东就食皆轻车重马而去】嫪毐【正义上躬虬反下酷改反】封为长信侯予之山阳地【正义予音与括地志云山阳故城在怀州修武县西北太行山东南】令毐居之【索隐嫪姓毐字按汉书嫪氏出邯鄲王劭云贾

侍中说秦始皇母予嫪毐淫坐诛故世人骂淫曰嫪毐也】宫室车马衣服苑囿驰猎恣毒事无大小皆决於毒又以河西【集解徐广曰河一作汾】大原郡更为毒国

九年彗星见或竟天攻魏垣蒲阳【正义垣作□□音袁括地志云故□城汉县治本魏王□也在绛州□县西北二十里蒲邑故城在隰州县北四十五里在蒲水之北故言蒲阳即晋公子重耳所居邑也】四月上宿雍【集解蔡邕曰上者尊位所在也駟案司马迁记事当言帝则依违但言上不敢媒言尊尊之意也】己酉王冠带劔【集解徐广曰年二十二正义冠音灌礼记云年二十而冠按年二十一也】长信侯毒作乱而觉矫王御玺【集解蔡邕曰御者进也凡衣服加於身饮食入於口妃妾接於寝皆曰御御之亲爱者曰幸玺者印信也天子玺白玉螭虎钮古者尊卑共之月令曰固封玺左传曰季武子玺书追而与之此诸侯大夫印称玺也卫宏曰秦以前民皆以金玉为印龙虎钮唯其所好秦以来天子独以印称玺又独以玉羣臣莫敢用正义崔浩云李斯磨和璧作之汉诸帝世传服之谓传国玺韦曜吴书云玺方四寸上勾交五龙文曰受命于天既寿永昌汉书云文曰昊天之命皇帝寿昌按二文不同汉书元后传云王莽令王舜逼太后取玺王太后怒投地其角小缺吴志云孙坚入洛扫除汉陵庙军於甄官井得玺後归魏晋怀帝永嘉五年六月帝蒙尘平阳玺入前赵刘聪至东晋成帝咸和四年石勒灭前赵得玺穆帝永和八年石勒为慕容俊灭濮阳太守戴施入邺得玺使何融送晋传宋宋传南齐南齐传梁梁传至天正二年侯景破梁至广陵北齐将辛术定广陵得玺送北齐至周建德六年正月平北齐玺入周周传隋隋传唐也】及太后玺以发县卒及卫卒官骑戎翟君公舍人将欲攻蕲年宫为乱【集解駟案地理志蕲年宫在雍正义蕲巨衣反括地志云蕲年宫在岐州城西故城内】王知之令相国昌平君昌文君发卒攻毒【索隐昌平君楚之公子立以为相後徙於郢项燕立为荆王史失其名昌文君名亦不知也】战咸阳【正义括地志云咸阳故城亦名渭城在雍州北五里今咸阳县东十五里秦孝公已下并都此城始皇铸金人十二於咸阳即此也】斩首数百皆拜爵及宦者皆在战中亦拜爵一级毒等败走即令国中有生得毒赐钱百万杀之五十万尽得毒等卫尉竭【集解駟案汉书百官表曰卫尉秦官】内史肆佐弋竭【集解駟案汉书百官表曰秦时少府有佐弋汉武帝改为伙飞掌弋射者】中大夫令齐等【正义令力政反中大夫令秦官也齐名也】二十人皆梟首【集解駟案县首於木上曰梟】车裂以徇灭其宗【正义说苑云秦始皇太后不谨幸郎嫪毐始皇取毐四支车裂之取两弟扑杀之取太后迁之咸阳宫下令曰以太后事谏者戮而杀之蒺藜其脊谏而死者二十七人茅焦乃上说曰齐客茅焦愿以太后事谏皇帝曰走告若不见阙下积死人耶使者问焦焦曰陛下车裂假父有嫉妬之心囊扑两弟有不慈之名迁母咸阳有不孝之行蒺藜谏士有桀纣之治天下闻之尽瓦解无向秦者王乃自迎太后归咸阳立茅焦为傅又爵之上卿括地志云茅焦沧州人也】及其舍人轻者为鬼薪【集解应劭曰取薪给宗庙为鬼薪也如淳曰律说鬼薪作三岁正义言毒舍人罪重者已刑戮轻者罚徒役三岁】及夺爵迁蜀四千余家房陵【正义括地志云房陵即今房州房陵县古楚汉中郡地也是巴蜀之境地理志云房陵县属汉中郡在益州部接东南一千三百一十里也】四月寒冻有死者【正义四月建巳之月孟夏寒冻民有死者以秦法酷急则天应之而史书之故尚书洪范云急常寒若孔注云君行急则常寒顺之】杨端和攻衍氏【索隐端和秦将衍氏魏邑正义衍羊善反在郑州】彗星见西方又见北方从斗以南八十日

十年【集解徐广曰甲子】相国吕不韦坐嫪毐免桓齮为将军齐赵来置酒齐人茅焦说秦王曰秦方以天下为事而大王有迁母太后之名恐诸侯闻之由此倍秦也秦王乃迎太后於雍而入咸阳【集解駰案说苑曰始皇帝立茅焦为傅又爵之上卿太后大喜曰天下亢直使败复成安秦社稷使妾母子复相见者茅君之力也】复居甘泉宫【集解徐广曰表云咸阳南宫也】大索逐客李斯上书说乃止逐客令李斯因说秦王请先取韩以恐他国於是使斯下韩韩王患之与韩非谋弱秦大梁人尉繚来说秦王曰以秦之强诸侯譬如郡县之君臣但恐诸侯合从翕而出不意此乃智伯夫差湣王之所以亡也愿大王母爱财物赂其豪臣以乱其谋不过亡三十万金则诸侯可尽秦王从其计见尉繚亢礼衣服食饮与繚同繚曰秦王为人蜂準【集解徐广曰蜂一作隆正义蜂孚逢反準章允反蜂蛰也高鼻也文穎曰準鼻也】长目挚鸟膺【正义挚鸟鹖膺突向前其性悍勇】豺声少恩而虎狼心居约易出人下【正义易以豉反言始皇居俭约之时易以谦卑】得志亦轻食人【正义言始皇得天下之志亦轻易而啖食於人】我布衣然见我常身自下我诚使秦王得志於天下天下皆为虏矣不可与久游乃亡去秦王觉固止以为秦国尉【正义若汉太尉大将军之比也】卒用其计策而李斯用事十一年王翦桓齮杨端和攻邲取九城王翦攻阬与櫟阳【集解徐广曰櫟音老在并州正义汉表在清河十三州志云櫟阳上党西北百八十里也】皆并为一军翦将十八日军归斗食以下【集解駰案汉书百官表曰百石以下有斗食佐史之秩正义一日得斗粟为科】什推二人从军【索隐言王翦为将军中皆归斗食以下无功佐史什中唯择二人令从军耳】取邲安阳桓齮将

十二年文信侯不韦死窃葬【索隐按不韦饮鸩死其宾客数千人窃共葬於洛阳北芒山】其舍人临者晋人也逐出之【正义临力禁反临哭也若是三晋之人逐出令归也】秦人六百石以上夺爵迁【正义上音时掌反若是秦人哭临者夺其官爵迁移於房陵】五百石以下不临迁勿夺爵【正义若是秦人不哭临不韦者不夺官爵亦迁移於房陵】自今以来操国事不道如嫪毐不韦者籍其门视此【集解徐广曰门一作文索隐谓籍没其一门皆为徒隶後并视此为常正义籍录其子孙禁不得仕宦】秋复嫪毐舍人迁蜀者当是之时天下大旱六月至八月乃雨

十三年桓齮攻赵平阳【正义括地志云平阳故城在相州临漳县西二十五里又云平阳战国时属韩後属赵】杀赵将扈辄【正义扈音户辄张猎反赵之将军】斩首十万王之河南正月彗星见东方十月桓齮攻赵

十四年攻赵军於平阳取宜安【正义括地志云宜安故城在常州藁城县西南二十五里也】破之杀其将军桓齮定平阳武城【正义即贝州武城县外城是也七国时赵邑】韩非使秦秦用李斯谋留非非死云阳【正义括地志云云阳城在雍州云阳县西八十里秦始皇甘泉宫在焉】韩王请为臣

十五年大兴兵一军至邲一军至太原取狼孟【集解駰案地理志太原有狼孟县】地动

十六年九月发卒受地韩南阳假守【正义假格雅反守音狩】腾初令男子书年魏献地於

秦秦置丽邑【正义丽力知反括地志云雍州新丰县本周时骊戎邑左传云晋献公伐骊戎杜注云在京兆新丰县其後秦灭之以为邑】

十七年内史腾攻韩得韩王安尽纳其地【正义韩王安之九年秦尽灭之】以其地为郡命曰颍川地动华阳太后卒民大饥十八年【集解徐广曰巴郡出大人长二十五丈六尺】大兴兵攻赵王翦将上地【正义上郡上县今绥州等是也】下井陘【集解服虔曰山名在常山今为县音刑】端和将河内羌羗伐赵端和围邯鄲城

十九年王翦羌羗【正义胡罪反】尽定取赵地东阳得赵王【索隐赵王迁也正义赵幽缪王迁八年秦取赵地至平阳平阳在贝州历亭县界迁王於房陵】引兵欲攻燕屯中山秦王之邯鄲诸尝与王生赵时母家有仇怨皆阬之秦王还从太原上郡归始皇帝母太后崩赵公子嘉率其宗数百人之代自立为代王东与燕合兵军上谷大饥

二十年燕太子丹患秦兵至国恐使荆轲刺秦王秦王觉之体解轲以徇而使王翦辛胜攻燕燕代发兵击秦军秦军破燕易水之西

二十一年王贲【正义音奔】攻蓟乃益发卒诣王翦军遂破燕太子军取燕蓟城得太子丹之首燕王东收辽东而王之王翦谢病老归新郑反昌平君徙於郢大雨雪【正义雨于遇反】深二尺五寸

二十二年王贲攻魏引河沟灌大梁大梁城坏其王请降【索隐魏王假也】尽取其地

二十三年秦王复召王翦强起之使将击荆【正义秦号楚为荆者以庄襄王名子楚讳之故言荆也】取陈以南至平舆【集解駰案地理志汝南有平舆县正义舆音余平舆豫州县也楚淮北之地尽入於秦】虏荆王【索隐荆王负刍也】秦王游至郢陈荆将项燕立昌平君为荆王反秦於淮南【集解徐广曰淮一作江正义昌平也】

二十四年王翦蒙武攻荆破荆军昌平君死项燕遂自杀

二十五年大兴兵使王贲将攻燕辽东得燕王喜【正义燕王喜之五十三年燕亡】还攻代虏代王嘉王翦遂定荆江南地降越君【正义降闲江反楚威王已灭其余自称君长今降秦】置会稽郡五月天下大酺【集解服虔曰酺音蒲文穎曰酺周礼族师掌春秋祭酺为物灾害之神苏林曰陈留俗三月上巳水上饮食为酺正义天下欢乐大饮酒也秦既平韩赵魏燕楚五国故天下大酺也】

二十六年齐王建与其相后胜【正义音升齐相姓名】发兵守其西界不通秦秦使将军王贲从燕南攻齐得齐王建【索隐六国皆灭也十七年得韩王安十九年得赵王迁二十二年魏王假降二十三年虏荆王负刍二十五年得燕王喜二十六年得齐王建正义齐王建之三十四年齐国亡】秦初并天下令丞相御史【正义令力政反乃今之赦令赦书】曰异日韩

王纳地效玺请为藩臣已而倍约与赵魏合从畔秦故兴兵诛之虜其王寡人以为善庶几息兵革赵王使其相李牧来约盟故归其质子已而倍盟反我太原故兴兵诛之得其王赵公子嘉乃自立为代王故举兵击灭之魏王始约服入秦已而与韩赵谋袭秦秦兵吏诛遂破之荆王献青阳以西【集解駟案汉书邹阳传曰越水长沙还舟青阳张晏曰青阳地名苏林曰青阳长沙县是也】已而畔约击我南郡故发兵诛得其王遂定其荆地燕王昏乱其太子丹乃陰令荆轲为贼兵吏诛灭其国齐王用后胜计絕秦使欲为乱兵吏诛虜其王平齐地寡人以眇眇之身兴兵诛暴乱赖宗庙之灵六王咸伏其辜天下大定今名号不更无以称成功传後世其议帝号丞相綰御史大夫劫【集解駟案汉书百官表曰御史大夫秦官应劭曰侍御史之率故称大夫也索隐綰姓王劫姓冯】廷尉斯等【集解駟案汉书百官表曰廷尉秦官应劭曰听狱必质诸朝廷与衆共之兵狱同制故称廷尉】皆曰昔者五帝地方千里其外侯服夷服诸侯或朝或否天子不能制今陛下【集解蔡邕曰陛阶也所由升堂也天子必有近臣立於陛侧以戒不虞谓之陛下者羣臣与天子言不敢指斥故呼在陛下者与之言因卑达尊之意也上书亦如之】兴义兵诛残贼平定天下海内为郡县【正义郡人所羣聚也】法令由一统自上古?来未尝有五帝所不及臣等谨与博士议曰【集解駟案汉书百官表曰博士秦官掌通古今】古有天皇有地皇有泰皇【索隐按天皇地皇之下即云泰皇当人皇也而封禅书云昔者太帝使素女鼓瑟而悲盖三皇已前称泰皇一云泰皇太昊也】泰皇最贵臣等昧死上尊号王为泰皇命为制令为诏【集解蔡邕曰制书帝者制度之命也其文曰制诏诏书诏告正义令音力政反制诏三代无文秦始有之】天子自称曰朕【集解蔡邕曰朕我也古者上下共称之贵贱不嫌则可以同号之义也臯陶与舜言朕言惠可底行屈原曰朕皇考至秦然後天子独以为称汉因而不改】王曰去泰【正义去音丘吕反】着皇采上古帝位号号曰皇帝他如议制曰可【集解蔡邕曰羣臣有所奏请尚书令奏之下有司曰制天子荅之曰可】追尊庄襄王为太上皇【集解駟案汉高祖尊父曰太上皇亦放此也】制曰朕闻太古有号母谥中古有号死而以行为谥如此则子议父臣议君也甚无谓朕弗取焉自今已来除谥法【集解駟案谥法周公所作】朕为始皇帝後世以计数【正义色主反】二世三世至千万世传之无穷始皇推终始五德之传【集解郑玄曰音亭传索隐音张恋反传次也谓五行之德始终相次也汉书郊祀志曰齐人邹子之徒论着终始五德之运始皇采用】以为周得火德秦代周德从所不胜【正义胜申证反秦以周为火德能灭火者水也故称从其所不胜於秦】方今水德之始【索隐封禅书曰秦文公获黑龙以为水瑞秦皇因自谓为水德也】改年始朝贺【正义周以建子之月为正秦以建亥之月为正故其年始用十月而朝贺】皆自十月朔衣服旄旌节旗皆上黑【正义周礼云析羽为旄熊虎为旗旄节者编毛为之以象竹节汉书云苏武执节在匈奴牧羊节毛尽落是也韦昭云节者山国用人节泽国用龙节皆以金为之道路以旄节门关用符节都鄙用管节皆用竹为之以水德属北方故上黑】数以六为纪符法冠皆六寸而輿六尺六尺为步乘六马【集解张晏曰水北方黑终数六故以六寸为符六尺为步瓚曰水数六故以六为名譙周曰步以人足为数非独秦制然索隐管子司马法皆云六尺为步譙周以为步以人足非独秦制又按礼记王制曰古者八尺为步今以周尺六尺四寸为步步之尺数亦不同】更名河曰德水以为水德之始刚毅戾深事皆决於法刻削毋仁恩和义然後合五德之数【索隐水主陰陰刑杀故急法刻削以合五德之数】於是急法久者不赦丞相綰等言诸侯初破燕齐荆地远不为【正义于伪反】置王母以填之请立诸子唯上幸许始皇下其议於羣臣羣臣皆以为便廷尉李斯议曰周文武所

封子弟同姓甚衆然後属疏远相攻击如仇讎诸侯更相诛伐周天子弗能禁止今海内赖陛下神灵一统皆为郡县诸子功臣以公赋税重赏赐之甚足易制天下无异意【正义易音以职反】则安宁之术也置诸侯不便始皇曰天下共苦战鬪不休以有侯王赖宗庙天下初定又复立国是树兵也而求其宁息岂不难哉廷尉议是分天下以为三十六郡【集解駰案三十六郡者三川河东南阳南郡九江鄣郡会稽潁川碭郡泗水薛郡东郡琅邪齐郡上谷渔阳右北平辽西辽东代郡钜鹿邯鄲上党太原云中九原鴈门上郡陇西北地汉中巴郡蜀郡黔中长沙凡三十五与内史为三十六郡正义风俗通云周制天子方千里分为百县县有四郡故左传云上大夫受县下大夫受郡秦始皇初置三十六郡以监县也】郡置守尉监【集解駰案汉书百官表曰秦郡守掌治其郡有丞尉掌佐守典武职甲卒监御史掌监郡】更名民曰黔首【集解应劭曰黔亦黎黑也】大酺收天下兵【集解应劭曰古者以铜为兵】聚之咸阳销以为锺鐻【集解徐广曰音巨】金人十二重各千石置廷宫中【正义汉书五行志云二十六年有大人长五丈足履六尺皆夷狄服凡十二人见于临洮故销兵器铸而象之谢承後汉书云铜人翁仲其名也三辅旧事云聚天下兵器铸铜人十二各重二十四万斤汉世在长乐宫门魏志董卓传云椎破铜人十及钟鐻以铸小钱关中记云董卓坏铜人余二枚徙清门里魏明帝欲将诣洛载到霸城重不可致後石季龙徙之邺苻坚又徙入长安而销之英雄记云昔大人见临洮而铜人铸至董卓而铜人毁也】一法度衡石丈尺车同轨书同文字地东至海暨朝鲜【正义暨其记反朝音潮朝鲜音仙海谓渤海南至扬苏台等州之东海也暨及也东北朝鲜国括地志云高丽治平壤城本汉乐浪郡王险城即古朝鲜也】西至临洮羌中【正义洮吐高反括地志云临洮郡即今洮州亦古西羌之地在京西千五百五十一里羌中从临洮西南芳州扶松府以西并古诸羌地也】南至北向户【集解駰案吴都赋曰开北户以向日刘逵曰日南之北户犹日北之南户也】北据河为塞并陰山至辽东【集解駰案地理志西河有陰山县正义塞先代反并白浪反谓灵夏胜等州之北黄河陰山在朔州北塞外从河傍陰山东至辽东筑长城为北界】徙天下豪富於咸阳十二万户诸庙及章台上林皆在渭南秦每破诸侯写放其宫室作之咸阳北阪上【集解徐广曰在长安西北汉武时别名渭城正义今咸阳县北阪上】南临渭自雍门【集解徐广曰在高陵县正义今岐州雍县东】以东至泾渭殿屋复道周阁相属【正义复音福属之欲反庙记云北至九?甘泉南至长杨五柞东至河西至汧渭之交东西八百里离宫别馆相望属也木衣绋绣土被朱紫宫人不徙穷年忘归犹不能遍也】所得诸侯美人钟鼓以充入之【正义三辅旧事云始皇表河以为秦东门表汧以为秦西门表中外殿观百四十五後宫列女万余人气上冲于天】

二十七年始皇巡陇西【正义陇西今陇右】北地【正义今宁州也】出鸡头山【正义括地志云鸡头山在成州上禄县东北二十里在京西南九百六十里酈元云盖大陇山异名也後汉书隗嚣传云王孟塞鸡头即此也按原州平高县西百里亦有笄头山在京西北八百里黄帝鸡山之所】过回中焉【集解应劭曰回中在安定高平孟康曰回中在北地正义括地志云回中宫在雍州西四十里言始皇欲西巡陇西之北从咸阳向西北出宁州西南行至成州出鸡头山东还过岐州回中宫】作信宫渭南已更命信宫为极庙象天极【索隐为宫庙象天极故曰极庙天官书曰中宫曰天极是也】自极庙道通酈山作甘泉前殿筑甬道【集解应劭曰筑垣墙如街巷正义筑音竹甬音勇应劭曰谓於驰道外筑墙天子於中行外人不见】自咸阳属之是岁赐爵一级治驰道【集解应劭曰驰道天子道也道若今之中道然汉

书贾山传曰秦为驰道於天下东穷燕齐南极吴楚江湖之上滨海之观毕至道广五十步三丈而树厚筑其外隐以金椎树以青松】

二十八年始皇东行郡县上邹峰山【集解韦昭曰邹鲁县山在其北正义上时掌反邹侧留反峰音亦国系云邾峰山亦名邹山在兖州邹县南三十二里鲁穆公改邾作邹其山遂从邑变山北去黄河三百余里】立石与鲁诸儒生议刻石颂秦德议封禅望祭山川之事【正义晋太康地记云为坛於泰山以祭天示增高也为壇於梁父以祭地示增广也祭尚玄酒而俎鱼醢皆广长十二丈坛高三尺阶三等而树石太山之上高三丈一尺广三尺秦之刻石云】乃遂上泰山【正义泰山一曰岱宗东岳也在兖州博城县西北三十里山海经云泰山其上多玉其下多石郭璞云从泰山下至山头百四十八里三百步道书福地记云泰山高四千九百丈二尺周回二千里多芝草玉石长津甘泉仙人室又有地狱六曰鬼神之神府从西上下有洞天周回三千里鬼神考謫之神府】立石封祠祀【集解服虔曰增天之高归功於天张晏曰天高不可及於泰山上立封禅而祭之冀近神灵也瓚曰积土为封谓负土於泰山上为坛而祭之】下风雨暴至休於树下因封其树为五大夫【正义封一作复音福】禅梁父【集解服虔曰禅闡广土地也瓚曰古者圣王封泰山禅亭亭或梁父皆泰山下小山除地为壇祭於梁父後改壇曰禅正义父音甫在兖州泗水县北八十里】刻所立石其辞曰皇帝临位作制明法臣下修饬【索隐此泰山刻石铭其词每三句为韵凡十二韵下之罾碣石会稽三铭皆然正义饬音勅】二十有六年初并天下罔不宾服亲巡远方黎民登兹泰山周览东极从臣思迹【正义从音才用反】本原事业祇诵功德治道运行诸产得宜皆有法式大义休明垂于後世顺承勿革皇帝躬圣既平天下不懈於治夙兴夜寐建设长利【正义长直良反】专隆教诲训经宣达远近毕理咸承圣志贵贱分明男女礼顺慎遵职事昭隔内外【集解徐广曰隔一作融】靡不清净施於後嗣化及无穷遵奉遗诏永承重戒於是乃并勃海以东【正义并白浪反勃作渤蒲忽反】过黄腠【集解駰案地理志东莱有黄县腠县正义腠逐瑞反字或作陲括地志云黄县故城在莱州城以东南二十五里古莱子国也牟平县城在黄县南百三十里十三州志云牟平县古腠县也】穷成山登之罾【集解駰案地理志之罾山山在腠县正义罾音浮括地志云在莱州文登县东北百八十里成山在文登县西北百九十里穷犹登极也封禅书云八神五曰阳主祠之罾七曰日主祠成山成山斗入海又云之罾山在海中文登县古腠县也】立石颂秦德焉而去南登琅邪【正义今兖州东沂州密州即古琅邪也】大乐之留三月乃徙黔首三万户琅邪台下【集解駰案地理志越王勾践尝治琅邪县起台馆索隐山海经琅邪台在渤海间盖海畔有山形如台在琅邪故曰琅邪台正义括地志云密州诸城县东南百七十里琅邪台越王勾践观台也台西北十里有琅邪吴越春秋云越王勾践二十五年徙都琅邪立观台以望东海遂号令秦晋齐楚以尊辅周室血盟即勾践起台处括地志云琅邪山在密州诸城县东南百四十里始皇立层台於山上谓之琅邪台孤立衆山之上秦王乐之留三月立石山上颂秦德】复十二岁【正义复音福复三万户徙台下者】作琅邪台立石刻颂秦德明德意曰【索隐二句为韵】维二十六年皇帝作始端平法度万物之纪以明人事合同父子圣智仁义显白道理东抚东土以省卒士【正义省山井反卒子忽反】事已大毕乃临于海皇帝之功勤劳本事上农除末黔首是富普天之下抁心揖志【索隐抁古专字左传云如琴瑟之抁一揖音集】器械一量【正义内成曰器甲冑兜鍪之属外成曰械戈矛弓戟之属一量者同度量也】同书文字日月所照舟輿所载皆终其命莫

不得意应时动事是维皇帝匡饬异俗陵水经地【正义陵作凌犹历也经界也】忧恤黔首朝夕不懈除疑定法咸知所辟【正义音避】方伯分职诸治经易【正义易音以豉反言方伯分职治所理常在平易】举错必当莫不如画【正义画音户卦反谓政理齐整分明若画无邪恶】皇帝之明临察四方尊卑贵贱不踰次行【正义音胡郎反】奸邪不容皆务贞良细大尽力莫敢怠荒远迩辟隐【正义辟匹亦反】专务肃庄端直敦忠事业有常皇帝之德存定四极诛乱除害兴利致福节事以时诸产繁殖黔首安寧不用兵革【正义协韵音棘】六亲相保终无寇贼驩欣奉教尽知法式六合之内皇帝之土西涉流沙【正义解见夏纪】南尽北户东有东海北过大夏【索隐协韵音户下无不臣者音堵泽及牛马音姥正义杜预云大夏太原晋阳县按在今并州迁实沉於大夏主参即此也】人迹所至无不臣者功盖五帝泽及牛马莫不受德各安其宇维秦王兼有天下立名为皇帝乃抚东土至于琅邪列侯【集解张晏曰列侯解见序例】武城侯王离列侯通武侯王贲伦侯【索隐爵卑於列侯无封邑者伦类也亦列侯之类】建成侯赵亥伦侯昌武侯成伦侯武信侯冯毋择丞相隗状【索隐隗姓状名有本作林者非顔之推云隋开皇初京师穿地得铸秤权有铭云始皇时量器丞相隗状王绾二人列名其作状貌之字时令校写亲所按验王劭亦云然斯远古之证也正义隗音五罪反】丞相王绾卿李斯卿王戊五大夫赵婴五大夫杨樛从与议於海上【正义樛音居虬反从才用反与音预言王离以下十人从始皇咸与始皇议功德於海上立石於琅邪台下十人名字并刻颂此颂前後序两句为韵此三句为韵】曰古之帝者地不过千里【正义过音戈千里谓王畿】诸侯各守其封域或朝或否相侵暴乱残伐不止犹刻金石以自为纪古之五帝三王知教不同法度不明假威鬼神【正义言五帝三王假借鬼神之威以欺服远方之民若苌弘之比也】以欺远方实不称名【正义称尺证反】故不久长其身未殁诸侯倍叛法令不行今皇帝并一海内以为郡县天下和平昭明宗庙体道行德尊号大成羣臣相与诵皇帝功德刻于金石以为表经既已齐人徐市等上书言海中有三神山名曰蓬萊方丈瀛洲【正义汉书郊祀志云此三神山者其传在勃海中去人不远盖曾有至者诸仙人及不死之药皆在焉其物禽兽尽白而黄金白银为宫阙未至望之如云及至三神山乃居水下临之患且至风辄引船而去终莫能至云世主莫不甘心焉】僊人居之请得斋戒与童男女求之於是遣徐市发童男女数千人入海求僊人【正义括地志云亶洲在东海中秦始皇使徐福将童男女入海求僊人止住此洲共数万家至今洲上人有至会稽市易者吴人外国图云亶洲去琅邪万里】始皇还过彭城【正义彭城徐州所理县也州东外城古之彭国也搜神记云陆终第三子曰錢鏗封於彭为商伯外传云殷末灭彭祖氏】斋戒祷祠欲出周鼎泗水使千人没水求之弗得乃西南渡淮水之衡山【正义括地志云衡山一名岫崦山在衡州湘潭县西四十一里岫音苟崦音楼】南郡【正义今荆州也言欲向衡山即西北过南郡入武关至咸阳】浮江至湘山祠【正义括地志云黄陵庙在岳州湘陰县北五十七里舜二妃之神二妃塚在湘陰北一百六十里青草山上盛弘之荆州记云青草湖南有青草山湖因山名焉列女传云舜陟方死於苍梧二妃死於江湘之间因葬焉按湘山者乃青草山山近湘水庙在山南故言湘山祠】逢大风几不得渡上问博士曰湘君何神博士对曰闻之尧女舜之妻而葬此【索隐列女传亦以湘君为尧女按楚祠九歌有湘君湘夫人夫人是尧女则湘君当是舜今此文以湘君为尧女是总而言之】於是始皇大怒使刑徒三千人皆伐湘山树赭其山上自南郡由武关归【集解应劭曰武关秦南关通南阳文穎曰武关在析西百七十里弘农界正义括地志云故武关在商州商洛县东九十里春秋时少习也杜预云少习商县武

关也】二十九年始皇东游至阳武博狼沙中【集解駰案地理志河南阳武县有博狼沙正义狼音浪】为盗所惊求弗得乃令天下大索十日登之罾刻石其辞曰【索隐三句为韵】维二十九年时在中春【正义中音仲古者帝王巡狩常以仲月】阳和方起皇帝东游巡登之罾临照于海从臣嘉观【正义从才用反观音琯】原念休烈追诵本始大圣作治建定法度显着纲纪外教诸侯光施文惠明以义理六国回辟【正义必亦反】贪戾无厌【正义於廉反】虐杀不已皇帝哀衆遂发讨师奋扬武德义诛信行威燁旁达【集解徐广曰燁充善反】莫不宾服烹灭强暴振救黔首周定四极普施明法经纬天下永为仪则大矣哉宇县之中【集解駰案字宇宙县赤县】承顺圣意【索隐协韵音忆】羣臣诵功请刻于石表垂于常式其东观曰维二十九年皇帝春游览省远方逮于海隅遂登之罾昭临朝阳观望广丽从臣咸念原道至明圣法初兴清理疆内外诛暴强武威旁畅振动四极禽灭六王阡并天下菑害絶息永偃戎兵皇帝明德经理宇内视听不怠【索隐怠协旗疑韵怠音铜綦反故国语范蠡曰得时不怠时不再来亦以怠与台为韵】作立大义昭设备器咸有章旗职臣遵分各知所行事无嫌疑黔首改化远迩同度临古絶尤常职既定後嗣循业长承圣治羣臣嘉德祗诵圣烈请刻之罾旋遂之琅邪道上党入【索隐道犹从也】

三十年无事

三十一年【集解徐广曰使黔首自实田也】十二月更名腊曰嘉平【集解駰案太原真人茅盈内纪曰始皇三十一年九月庚子盈曾祖父蒙乃於华山之中乘云驾龙白日升天先是其邑谣歌曰神仙得者茅初成驾龙上升入泰清时下玄洲戏赤城继世而往在我盈帝若学之腊嘉平始皇闻谣歌而问其故父老具对此仙人之谣歌劝帝求长生之术於是始皇欣然乃有寻仙之志因改腊曰嘉平索隐广雅曰夏曰清祀殷曰嘉平周曰大蜡亦曰腊秦更曰嘉平盖应歌謡之词而改从殷号也道书茅蒙字初成今此云茅蒙初成者为神仙之道其意失也盖由裴氏所引不明或後人增益蒙字遂令七言之词有衍尔】赐黔首里六石米二羊始皇为微行咸阳【集解张晏曰若微贱之所为故曰微行也】与武士四人俱夜出逢盗兰池【集解駰案地理志渭城县有兰池宫正义括地志云兰池陂即古之兰池在咸阳县界秦记云始皇都长安引渭水为池筑为蓬瀛刻石为鲸长二百丈逢盗之处也】见窘武士击杀盗关中大索二十日米石千六百

三十二年始皇之碣石使燕人卢生求羡门【集解韦昭曰古仙人】高誓【正义亦古仙人】刻碣石门【集解徐广曰一作盟】坏城郭决通堤防其辞曰【正义此一颂三句为韵】遂兴师旅诛戮无道为逆灭息武殄暴逆文复无罪【集解徐广曰复一作优正义复音福言秦以武力能殄息暴逆以文训道令无罪失故复除之】庶心咸服惠论功劳赏及牛马恩肥土域皇帝奋威德并诸侯初一泰平堕坏城郭【正义堕音许规反坏音怪堕毁也坏圯也言始皇毁圯关东诸侯旧城郭也夫自颓曰坏音户怪反】决通川防夷去险阻地势既定黎庶无繇【正义音遥】天下咸抚男乐其畴女修其业事各有序惠被诸产久并来田【集解徐广曰久一作分】莫不安所羣臣诵烈请刻此石垂着仪矩因使韩终侯公石生求僊人不死之药始皇巡北边从上郡入燕人卢生使【正义音所吏反】入海还以鬼神事因奏录图书曰亡秦者胡也【集解郑玄曰胡胡亥秦二世名也秦见图书不知此为人名反备北胡】始

皇乃使将军蒙恬发兵三十万人北击胡畧取河南地【正义今灵夏胜等州秦畧取之】三十三年发诸尝逋亡人贅墉贾人畧取陆梁地【集解瓚曰贅谓居穷有子使就其妇家为贅墉索隐南方之人其性陆梁故曰陆梁正义岭南之人多处山陆其性强梁故曰陆梁】为桂林【集解韦昭曰今郁林是也】象郡【集解韦昭曰今日南】南海【正义即广州南海县】以适遣戍【集解徐广曰五十万人守五岭正义适音直革反戍守也广州记云五岭者大庾始安临贺揭阳桂阳舆地志云一曰台岭亦名塞上今名大庾二曰骑田三曰都隴四曰萌诸五曰越岭】西北斥逐匈奴自榆中【集解徐广曰在金城】并河以东【集解服虔曰并音傍傍依也】属之陰山【集解徐广曰在五原北正义五原今胜州也】以为三十四县城河上为塞又使蒙恬渡河取高阙【正义山名在五原北两山相对若阙甚高故言高阙】陶山北假中【集解晋灼曰王莽传云五原北假膏壤殖谷北假地名也索隐高阙山名北假地名近五原正义酈元注水经云黄河迳河目县故城西县在北假中北假地名按河目县属胜州今名河北汉书地理志云属五原郡】筑亭障逐戎人徙谪实之初县【索隐徙有罪而谪之以实初县即上自榆中属陰山以为三十四县是也故汉七科谪亦因於秦】禁不得祠明星出西方【集解徐广曰皇甫谧云彗星见】

三十四年适治狱吏不直者筑长城及南越地【正义谓戍五岭是南方越地】始皇置酒咸阳宫博士七十人前为壽仆射周青臣【集解駰案汉书百官表曰仆射秦官古者重武官有主射以督课之应劭曰仆主也射音夜】进颂曰他时秦地不过千里赖陛下神灵明圣平定海内放逐蛮夷日月所照莫不宾服以诸侯为郡县人自安乐无战争之患传之万世自上古不及陛下威德始皇悦博士齐人淳于越进曰臣闻殷周之王千余岁封子弟功臣自为枝辅今陛下有海内而子弟为匹夫卒有田常六卿之臣无辅拂【正义蒲笔反】何以相救哉事不师古而能长久者非所闻也今青臣又面谀以重陛下之过非忠臣始皇下其议丞相李斯曰五帝不相复三代之事何足法也异时诸侯并争厚招游学今天下已定法令出一百姓当家则力农工士则学习法令辟禁【正义力令性反辟音避】今诸生不师今而学古以非当世惑乱黔首丞相臣斯昧死言古者天下散乱莫之能一是以诸侯并作语皆道古以害今饰虚言以乱实人善其所私学【集解徐广曰私一作知】以非上之所建立今皇帝并有天下别黑白而定一尊私学而相与非法教人闻令下则各以其学议之入则心非出则巷议夸主【正义音口瓜反】以为名异取以为高率羣下以造谤如此弗禁则主势降乎上党与成乎下禁之便臣请史官非秦纪皆烧之非博士官所职天下敢有藏诗书百家语者悉诣守尉杂烧之有敢偶语诗书弃市【集解应劭曰禁民聚语畏其谤已正义偶对也】以古非今者族吏见知不举者与同罪令下三十日不烧黥为城旦【集解如淳曰律说论决为髡钳输边筑长城昼日伺寇虏夜暮筑长城城旦四岁也】所不去者医药卜筮种树之书若欲有学法令【集解徐广曰一无法令二字】以吏为师制曰可三十五年除道道九原【集解駰案地理志五原郡有九原县】抵云阳【集解徐广曰表云道九原通甘泉】塹山堙谷直通之於是始皇以为咸阳人多先王之宫廷小吾闻周文王都丰武王都镐丰镐之闲帝王之都也乃营作朝宫渭南上林苑中先作前殿阿房【正义房白郎反括地志云秦阿房宫亦曰阿城在雍州长安县西北一十四里按宫在上林苑中雍州郭城西南面即阿房宫城东面也顔师古云阿近也以其去咸阳近且号阿房】东西五百步南北五十丈上可以坐万人下可以建

五丈旗【索隱此以其形名宮也言其宮四阿旁廣也故云下可建五丈之旗也阿房後為宮名正義三輔舊事云阿房宮東西三里南北五百步庭中可受萬人又鑄銅人十二於宮前阿房宮以慈石為門阿房宮之北闕門也】周馳為閣道自殿下直抵南山表南山之顛以為闕為復道自阿房渡渭屬之咸陽以象天極閣道絕漢抵營室也【索隱謂為復道渡渭屬咸陽象天文閣道絕漢抵營室也天官書曰天極紫宮後十七星絕漢抵營室曰閣道】阿房宮未成欲更擇令名名之作宮阿房故天下謂之阿房宮隱宮徒刑者七十余萬人【正義余刑見於市朝宮刑一百日隱於?室養之乃可故曰隱宮下蚕室是】乃分作阿房宮或作麗山發北山石椁乃寫蜀荆地材皆至關中計宮三百關外四百余於是立石東海上胸界中以為秦東門因徙三萬家麗邑【正義麗音離】五萬家云陽皆復不事十歲盧生說始皇曰臣等求芝奇藥仙者常弗遇類物有害之者方中人主時為微行以辟惡鬼惡鬼辟真人至人主所居而人臣知之則害於神真人者入水不濡入火不焚【正義而說反】陵云氣與天地久長今上治天下未能恬惓愿上所居宮毋令人知然後不死之藥殆可得也於是始皇曰吾慕真人自謂真人不稱朕乃令咸陽之旁二百里內宮觀二百七十復道甬道相連帷帳鐘鼓美人充之各案署不移徙行所幸有言其處者罪死始皇帝幸梁山宮【集解徐廣曰在好時正義括地志云俗名望宮山在雍州好時縣西十二里北去梁山九里秦始皇起從山上見丞相車騎衆弗善即此山也】從山上見丞相車騎衆弗善也中人或告丞相丞相後損車騎始皇怒曰此中人泄吾語案問莫服當是時詔捕諸時在旁者皆殺之自是後莫知行之所在听事羣臣受決事悉於咸陽宮侯生【集解駟案說苑曰韓客侯生也】盧生相與謀曰始皇為人天性剛戾自用起諸侯并天下意得欲從以為自古莫及已專任獄吏獄吏得親幸博士虽七十人特備員弗用丞相諸大臣皆受成事倚辦於上上樂以刑殺為威天下畏罪持祿莫敢盡忠上不聞過而日驕下懾伏謾欺以取容秦法不得兼方【集解徐廣曰一云并力正義言秦施法不得兼方者令民之有方伎不得兼兩齊試不驗輒賜死言法酷】不驗輒死然候星氣者至三百人皆良士畏忌諱諛不敢端言其過天下之事无大小皆決於上上至以衡石量書【集解駟案石百二十斤正義衡秤衡也言表牋奏請秤取一石日夜有程期不滿不休息】日夜有呈不中呈【正義中竹仲反】不得休息貪於權勢至如此未可為求僊藥於是乃亡去始皇聞亡乃大怒曰吾前收天下書不中用者盡去之悉召文學方術士甚衆欲以興太平方士欲練以求奇藥【集解徐廣曰一云欲以練求】今聞韓衆【正義音終】去不報徐市等費以巨萬計終不得藥徒奸利相告日聞【集解徐廣曰一作問】盧生等吾尊賜之甚厚今乃誹謗我以重吾不德也諸生在咸陽者吾使人廉問或為詖言以亂黔首於是使御史悉案問諸生諸生傳相告引乃自除犯禁者四百六十余人皆阬之咸陽使天下知之以懲後益發謫徙邊【集解徐廣曰表云徙於北河榆中耐徒三處拜爵一級】始皇長子扶蘇諫曰天下初定遠方黔首未集諸生皆誦法孔子今上皆重法繩之臣恐天下不安唯上察之始皇怒使扶蘇北監蒙恬於上郡【正義括地志云上郡故城在綏州上縣東南五十里秦之上郡城也】三十六年荧惑守心有墜星下東郡至地為石【集解徐廣曰表云石昼隕】黔首或刻其石曰始皇帝死而地分始皇聞之遣御史逐問莫服盡取石旁居人誅之因燔銷其石始皇不樂使博士為僊真人詩及行所游天下傳令【正義傳逐恋反令力呈反】樂人調弦之秋使者從關東夜過華陰平舒道【正義括地志云平舒故城在華州華陰縣西北六里水經注云渭水又東經平舒北城枕渭濱半破沦水南面通衢昔秦之將亡也江神返璧于華陰平舒道即其處也】有人持璧遮使者曰為吾遺滈池君【集解服?曰水神也張晏曰武王居鎬鎬池君

则武王也武王伐商故神云始皇荒淫若纣矣今亦可伐也孟康曰长安西南有漓池索隐按服?云水神是也江神以璧遗镐池之神告始皇之将终也且秦水德王故其君将亡水神先自相告也正义遗庾季反漓湖老反括地志云漓水源出雍州长安县西北漓池酈元注水经云漓水承漓池北流入渭今按漓池水流入来通渠盖酈元误矣】因言曰今年祖龙死【集解苏林曰祖始也龙人君象谓始皇也】使者问其故因忽不见置其璧去使者奉璧具以闻始皇默然良久曰山鬼固不过知一岁事也退言曰祖龙者人之先也【集解服?曰龙人之先象也言王亦人之先也应劭曰祖人之先龙君之象】使御府视璧乃二十八年行渡江所沈璧也於是始皇卜之卦得游徙吉迁北河榆中三万家【正义谓北河胜州也榆中即今胜州榆林县也言徙三万家以应卜卦游徙吉也】拜爵一级

三十七年十月癸丑始皇出游左丞相斯从右丞相去疾守少子胡亥爱慕请从上许之十一月行至云梦望祀虞舜於九疑山【正义括地志云九疑山在永州唐兴县东南一百里皇览冢墓记云舜冢在零陵郡营浦县九疑山言始皇至云梦望祭虞舜於九疑山也】浮江下观籍柯渡海渚【正义括地志云舒州同安县东按舒州在江中疑海字误即此州也】过丹阳【正义括地志云丹阳郡故在润州江宁县东南五里秦兼并天下以为鄣郡也】至钱唐【正义钱唐今杭州县】临浙江【集解晋灼曰江水至会稽山陰为浙江音折】水波恶乃西百二十里从狭中渡【集解徐广曰盖在余杭也顾夷曰余杭者秦始皇至会稽经此立为县】上会稽祭大禹【正义上音上掌反越州会稽山上有夏禹穴及庙】望于南海而立石刻颂秦德【索隐三句为韵凡二十四韵】其文曰【正义此二颂三句为韵其碑见在会稽山上其文及书皆李斯其字四寸画如小指圆镌今文字整顿是小篆字】皇帝休烈平一宇内德惠修长【索隐修亦长也重文耳王劭按张徽所录会稽南山秦始皇碑文修作攸】三十有七年来巡天下周览远方遂登会稽宣省习俗黔首斋庄羣臣诵功本原事迹追首高明【索隐今检会稽刻石文首字作道雅符人情也】秦圣临国始定刑名显陈旧彰【正义彰作章碑文作画璋也】初平法式审别职任以立恒常六王专倍贪戾傲猛率衆自强【正义碑文作率衆邦强】暴虐恣行【正义寒彭反】负力而骄数动甲兵【正义数音朔】陰通间使【正义间纪菟反又如字使所吏反】以事合从【正义合音合从子容反】行为辟方【正义行下孟反辟匹亦反】内饰诈谋【索隐刻石文谋作计】外来侵边遂起祸殃义威诛之殄熄暴悖【集解徐广曰熄音息正义殄音田典反暴音白报反悖音背】乱贼灭亡圣德广密六合之中被泽无疆皇帝并宇兼听万事远近毕清运理羣物考验事实各载其名贵贱并通善否陈前靡有隐情饰省宣义【集解徐广曰省一作非正义饰音式省音山景反饰谓文饰也省过也】有子而嫁【正义谓夫死有子弃之而嫁】倍死不贞防隔内外禁止淫泆男女絜诚夫为寄猓【索隐猓牡猪也言夫淫他室若寄猓之猪也猓音加】杀之无罪男秉义程妻为逃嫁【正义谓弃夫而逃嫁於人】子不得母【正义言妻弃夫逃嫁子乃失母】咸化廉清大治濯俗天下承风蒙被休经皆遵度轨和安敦勉莫不顺令【正义力呈反】黔首修洁人乐同则【正义乐音岳】嘉保太平後敬奉法常治无极輿舟不倾从臣诵烈【正义从音才用反烈美也所随巡从诸臣咸诵美请刻此石】请刻此石光垂休铭还过吴从江乘渡【集解駟案地理志丹阳有江乘县正义乘音时升反江乘故县在润州句容县北六十里本秦旧县也渡谓济渡也】并海上北至琅邪方士徐市等入海求神药数岁不得费多恐譴乃诈曰蓬莱药可得然常为大蛟鱼所苦【正义蛟音交苦音若故反】故不得至愿请善

射与俱见则以连弩射之始皇梦与海神战如人状问占梦博士曰水神不可见以大鱼蛟龙为 今上祷祠备谨而有此恶神当除去而善神可致乃令入海者齎捕巨鱼具而自以连弩大鱼出射之自琅邪北至荣成山【正义即山也在莱州】弗见至之罘见巨鱼射杀一鱼遂并海西至平原津而病【集解徐广曰渡河而西正义今德州平原县南六十里有张公故城城东有水津焉後名张公渡恐此平原郡古津也汉书公孙弘平津侯亦近此盖平津即此津始皇渡此津而疾】始皇恶言死羣臣莫敢言死事上病益甚乃为玺书赐公子扶苏曰与丧会咸阳而葬书已封在中车府令赵高【集解伏俨曰主乘輿路车】行符玺事所未授使者七月丙寅始皇崩於沙丘平台【集解徐广曰年五十沙丘去长安二千余里赵有沙丘宫在钜鹿武灵王之死处正义括地志云沙丘台在邢州平乡县东北二十里又云平乡县东北四十里按始皇崩在沙丘之宫平台之中邢州去京一千六百五十里】丞相斯为上崩在外【正义为于伪反】恐诸公子及天下有变乃秘之不发丧棺载輶凉车中【正义棺音馆又古患反】故幸宦者参乘所至上食百官奏事如故宦者辄从輶凉车中可其奏事独子胡亥赵高及所幸宦者五六人知上死赵高故尝教胡亥书及狱律令法事胡亥私幸之高乃与公子胡亥丞相斯陰谋破去始皇所封书【正义去丘吕反】赐公子扶苏者而更诈为丞相斯受始皇遗诏沙丘立子胡亥为太子更为书赐公子扶苏蒙恬数以罪【正义数音色具反】其赐死语具在李斯传中行遂从井陘【集解徐广曰在常山】抵九原【正义抵丁礼反抵至也从沙丘至胜州三千里】会暑上輶车臭乃诏从官令车载一石鲍鱼【正义鲍白卯反】以乱其臭行从直道至咸阳发丧太子胡亥袭位为二世皇帝九月葬始皇郿山始皇初即位穿治郿山及并天下天下徒送诣七十余万人穿三泉下铜而致椁宫观百官奇器珍怪徙臧满之【集解徐广曰铜一作锢锢铸塞也正义顔师古云三重之泉言至水也臧才浪反言冢内作宫观及百官位次奇器珍怪徙满冢中】令匠作机弩矢有所穿近者辄射之以水银为百川江河大海机相灌输【正义灌音馆输音戌】上具天文下具地理以人鱼膏为烛【集解徐广曰人鱼似鮎四脚正义广志云鮎鱼声如小儿啼有四足形如鱧可以治牛出伊水异物志云人鱼似人形长尺余不堪食皮利於鮫鱼锯材木入项上有小穿气从中出秦始皇冢中以人鱼膏为烛即此鱼也出东海中今台州有之按今帝王用漆灯冢中则火不灭】度不灭者久之【正义度音田洛反】二世曰先帝後宫非有子者出焉不宜皆令从死死者甚衆葬既已下或言工匠为机藏皆知之藏重即泄大事毕已藏闭中羡【正义音延下同谓冢中神道】下外羡门尽闭工匠藏者无复出者树草木以象山【集解駉案皇览曰坟高五十余丈周回五里余正义关中记云始皇陵在骊山泉本北流障使东西流有土无石取大石於渭山诸山括地志云秦始皇陵在雍州新丰县西南十里】

二世皇帝元年年二十一【集解徐广曰表云十月戊寅大赦罪人】赵高为郎中令【集解駉案汉书百官表曰秦官掌宫殿门户】任用事二世下诏增始皇寝庙牺牲及山川百祀之礼令羣臣议尊始皇庙羣臣皆顿首言曰古者天子七庙诸侯五大夫三虽万世世不祢毁【正义祢音徒结反】今始皇为极庙四海之内皆献贡职增牺牲礼咸备毋以加先王庙或在西雍【正义於用反西雍在咸阳西今岐州雍县故城是也又一云西雍雍西县也】或在咸阳天子仪当独奉酌祠始皇庙自襄公已下祢毁所置凡七庙羣臣以礼进祠以尊始皇庙为帝者祖庙皇帝复自称朕二世与赵高谋曰朕年少初即位黔首未集附先帝巡行郡县以示强威服海内今晏然不巡行即见弱毋以臣畜天下春二世东行郡县李斯从到碣石并海南

至会稽而尽刻始皇所立刻石石旁着【正义着丁畧反】大臣从者名以章先帝成功盛德焉皇帝曰金石刻尽始皇帝所为也今袭号而金石刻辞不称【正义尺证反】始皇帝其於久远也【正义二世言始灭六国威振古今自五帝三王未及既已袭位而见金石尽刻其颂不称始皇成功盛德甚远矣】如後嗣为之者不称成功盛德丞相臣斯臣去疾【集解徐广曰姓冯正义去丘吕反】御史大夫臣德昧死言臣请具刻诏书刻石因明白矣臣昧死请制曰可遂至辽东而还於是二世乃遵用赵高申法令乃陰与赵高谋曰大臣不服官吏尚强及诸公子必与我争为之奈何高曰臣固愿言而未敢也先帝之大臣皆天下累世名贵人也积功劳世以相传久矣今高素小贱陛下幸称举令在上位管中事大臣鞅鞅特以貌从臣其心实不服今上出不因此时案郡县守尉有罪者诛之上以振威天下下以除去上生平所不可者今时不师文而决於武力愿陛下遂从时毋疑即羣臣不及谋明主收举余民贱者贵之贫者富之远者近之则上下集而国安矣二世曰善乃行诛大臣及诸公子以罪过连逮少近官三郎无得立者【索隐逮训及也谓连及俱被捕故云连逮少小也近近侍之臣三郎谓中郎外郎散郎也正义汉书百官表云有议郎中郎散郎又有左右三将谓郎中车郎户郎】而六公子戮死於杜公子将闾昆弟三人囚於内宫议其罪独後二世使使令将闾曰公子不臣罪当死吏致法焉将闾曰阙廷之礼吾未尝敢不从宾赞也廊庙之位吾未尝敢失节也受命应对吾未尝敢失辞也何谓不臣愿闻罪而死使者曰臣不得与谋奉书从事将闾乃仰天大呼天者三曰天乎吾无罪昆弟三人皆流涕拔劔自杀宗室振恐羣臣諫者以为诽谤大吏持禄取容黔首振恐四月二世还至咸阳曰先帝为咸阳朝廷小故营阿房宫为室堂未就会上崩罢其作者复土郿山【正义谓出土为陵既成还复其土故言复土】郿山事大毕今释阿房宫弗就则是章先帝举事过也复作阿房宫外抚四夷如始皇计尽徵其材士【正义谓材官蹶张之士】五万人为屯卫咸阳令教射狗马禽兽当食者多【正义谓材士及狗马】度不足下调【正义度田洛反下行嫁反调田吊反谓下令调敛也】郡县转输菽粟刍藁皆令自齎粮食咸阳三百里内不得食其谷用法益刻深七月戌卒陈胜【正义音升】等反故荆地为张楚【集解李奇曰张大楚国也】胜自立为楚王居陈遣诸将徇地山东郡县少年苦秦吏皆杀其守尉令丞反以应陈涉相立为侯王合从西乡名为伐秦不可胜数也谒者使东方来【集解駰案汉书百官表曰谒者秦官掌宾赞受事】以反者闻二世二世怒下吏後使者至上问对曰羣盗郡守尉方逐捕今尽得不足忧上悦武臣自立为赵王魏咎为魏王田儋【集解服虔曰音负担】为齐王沛公起沛项梁举兵会稽郡

二年冬陈涉所遣周章等将西至戏【集解应劭曰戏弘农湖西界孟康曰水名今戏亭是也苏林曰邑名在新丰东南三十里正义戏音许宜反括地志云戏水源出雍州新丰县西南骊山水经注云戏水出骊山冯公谷东北流今新丰县东北十一里戏水当官道即其处】兵数十万二世大惊与羣臣谋曰奈何少府章邯曰【集解駰案汉书百官表曰少府秦官应劭曰掌山泽陂池之税名曰禁钱以给私养自别为藏少者小也故称少府正义邯胡甘反】盗已至衆强今发近县不及矣郿山徒多请赦之授兵以击之二世乃大赦天下使章邯将击破周章军而走遂杀章曹阳【集解晋灼曰亭名在弘农东十三里魏武帝改曰好阳正义括地志云曹阳故亭一名好阳亭在陕州桃林县东南十四里即章邯杀周章处】二世益遣长史司马欣董翳佐章邯击盗杀陈胜城父【正义父音甫括地志云城父亳州所理县】破项梁定陶【正义今曹州定陶县】灭魏咎临济【正义今齐州县】楚地盗名将已死章邯乃北渡

河击赵王歇等於钜鹿【正义括地志云邢州平乡县城本钜鹿离围赵王歇即此城】赵高说二世曰先帝临制天下久故羣臣不敢为非进邪说今陛下富於春秋初即位奈何与公卿廷决事事即有失误示羣臣短也天子称朕固不【索隐言天子常处禁中臣下属望才有兆朕耳不见其形也】於是二世常居禁中【集解蔡邕曰禁中者门户有禁非侍御者不得入故曰禁中】与高决诸事其後公卿希得朝见盗贼益多而关中卒发东击盗者毋已右丞相去疾左丞相斯将军冯劫进谏曰关东羣盗并起秦发兵诛击所杀亡甚衆然犹不止盗多皆以戍漕转作事苦赋税大也请且止阿房宫作者减省【正义上色反】四边戍转二世曰吾闻之韩子曰尧舜采椽不刮【索隐采木名刮音栝】茅茨不翦饭土墼【集解徐广曰吕静曰饭器谓之簋索隐如字一音镂不作簋】啜土形【集解如淳曰土形饭器之属瓦器索隐饭器以瓦为之】虽监门之养【正义以让反】不殫於此【索隐谓监门之卒养即卒也有廝养卒殫音学谓尽也又古学反正义又苦角反尔雅云殫尽也言尧舜采椽不刮茅茨不翦饭土墼啜土形虽监守门之人供养亦不尽此之疎陋也】禹凿龙门通大夏【正义括地志云大夏今并州晋阳及汾绛等州是昔高辛氏子实沈居之西近河言禹凿龙门河水道得大通并州之地不壅溢也】决河亭水【正义亭平也又云决亭壅之水】放之海身自持筑甬【正义甬音初洽反筑墙杵也甬锹也尔雅云锹谓之甬】胫毋毛臣虏之劳不烈於此矣【正义烈美也言臣虏之劳犹不美於此矣又烈酷也禹凿龙门通大夏道决黄河洪水放之海身持锹杵使膝胫无毛贱臣奴虏之勤劳不酷烈於此辛苦矣】凡所为贵有天下者得肆意极欲主重【正义直拱反】明法下不敢为非以制御海内矣夫虞夏之主贵为天子亲处穷苦之实以徇百姓尚何於法朕尊万乘母其实吾欲造千乘之驾万乘之属充吾号名且先帝起诸侯兼天下天下已定外攘四夷以安边境作宫室以章得意而君观先帝功业有绪今朕即位二年之间羣盗并起君不能禁又欲罢先帝之所为是上毋以报先帝次不为朕尽忠力何以在位下去疾斯劫吏案责他罪去疾劫曰将相不辱自杀斯卒囚【正义卒子律反囚在由反谓禁锢也】就五刑

三年章邯等将其卒围钜鹿楚上将军项羽将楚卒往救钜鹿冬赵高为丞相竟案李斯杀之夏章邯等战数却二世使人让邯邯恐使长史欣请事赵高弗见又弗信欣恐亡去高使人追捕不及欣见邯曰赵高用事於中将军有功亦诛无功亦诛项羽急击秦军虏王离邯等遂以兵降诸侯八月己亥【集解徐广曰一作卯】赵高欲为乱恐羣臣不听乃先设验持鹿献於二世曰马也二世笑曰丞相误邪谓鹿为马问左右左右或默或言马以阿顺赵高或言鹿者高因陰中诸言鹿者以法後羣臣皆畏高高前数言关东盗毋能为也及项羽虏秦将王离等钜鹿下而前章邯等军数却上书请益助燕赵齐楚韩魏皆立为王自关以东大氏【正义音丁礼反犹畧也】尽畔秦吏应诸侯诸侯咸率其衆西乡沛公将数万人已屠武关使人私於高高恐二世怒诛及其身乃谢病不朝见二世梦白虎啣其左骖马杀之心不乐怪问占梦卜曰泾水为祟【正义音虽遂反】二世乃斋於望夷宫【集解张晏曰宫在长陵西北长平观道东故亭处是也临泾水作之以望北夷正义括地志云秦望夷宫在雍州咸阳县东南八里】欲祠泾沈四白马使使责让高以盗贼事高惧乃陰与其壻咸阳令阎乐其弟赵成谋曰上不听谏今事急欲归祸於吾宗吾欲易置上更立公子婴子婴仁俭百姓皆载其言使郎中令为内应【集解徐广曰一云郎中令赵成】诈为有大贼令乐召吏发卒追劫乐母置高舍遣乐将吏卒千余人至望夷宫殿门缚卫令仆射曰贼入此何不止卫令曰周庐设卒甚谨【集

解駟案西京賦曰徼道外周千庑內傳薛綜曰士傳宮外內為庑舍晝則巡行非常夜則警備不虞】安得賊敢入宮樂遂斬衛令直將吏入行射郎宦者大驚或走或格格者輒死死數十人郎中令與樂俱入射上幄坐帟二世怒召左右左右皆惶擾不鬪旁有宦者一人侍不敢去二世入內謂曰公何不蚤告我乃至於此宦者曰臣不敢言故得全使臣蚤言皆已誅安得至今閹樂前即二世數曰足下驕恣【集解蔡邕曰羣臣士庶相與言曰殿下閣下足下侍者執事皆謙類】誅殺無道天下共畔足下足下其自為計二世曰丞相可得見否樂曰不可二世曰吾愿得一郡為王弗許又曰愿為万户侯弗許曰愿與妻子為黔首比諸公子閹樂曰臣受命於丞相為天下誅足下足下虽多言臣不敢報麾其兵進二世自殺閹樂歸報趙高趙高乃悉召諸大臣公子告以誅二世之狀曰秦故王國始皇君天下故稱帝今六國復自立秦地益小乃以空名為帝不可宜為王如故便立二世之兄子公子嬰為秦王以黔首葬二世杜南宜春苑中令子嬰齋當廟見受玉玺齋五日子嬰與其子二人謀曰丞相高殺二世望夷宮恐羣臣誅之乃詳以義立我我聞趙高乃與楚約滅秦宗室而王關中今使我齋見廟此欲因廟中殺我我稱病不行丞相必自來來則殺之高使人請子嬰數輩子嬰不行高果自往曰宗廟重事王奈何不行子嬰遂刺殺高於齋宮三族高家以徇咸陽子嬰為秦王四十六日楚將沛公破秦軍入武關遂至霸上【集解應劭曰霸水上地名在長安東三十里古名滋水秦穆公更名霸水】使人約降子嬰子嬰即系頸以組白馬素車【集解應劭曰組者天子轂也系頸者言欲自殺也素車白馬喪人之服也】奉天子玺符降軹道旁【集解徐廣曰在霸陵駟案蘇林曰亭名在長安東三十里】沛公遂入咸陽封宮室府庫還軍霸上居月余諸侯兵至項籍為從長【索隱謂合關東為從長也】殺子嬰及秦諸公子宗族遂屠咸陽燒其宮室虜其子女收其珍寶貨財諸侯共分之滅秦之後各分其地為三名曰雍王塞王翟王号曰三秦項羽為西楚霸王主命分天下王諸侯秦竟滅矣後五年天下定於漢

太史公曰秦之先伯翳嘗有勲於唐虞之際受土賜姓及殷夏之間微散至周之衰秦興邑于西垂自繆公以來稍蚕食諸侯竟成始皇始皇自以為功過五帝地廣三王而羞與之侔善哉乎賈生推言之也曰秦并兼諸侯山東三十余郡繕津關据險塞修甲兵而守之然陳涉以戍卒散亂之衆數百奋臂大呼不用弓戟之兵鉏耰白梃【集解徐廣曰耰田器音忧索隱徐以耰為田器非也孟康以耰為鉏柄蓋得其近也】望屋而食【索隱言其兵蚕食天下不裹糧而行】橫行天下【索隱謂輕前敵不部伍旅進也舞陽侯曰橫行匈奴中也】秦人阻險不守關梁不闔長戟不刺强弩不射楚師深入戰於鴻門曾无藩籬之艰於是山東大扰諸侯并起豪俊相立【集解駟案鵩冠子曰德萬人者謂之俊德千人者謂之豪德百人者謂之英索隱謂武臣田儋魏豹之屬】秦使章邯將而東征章邯因以三軍之衆要市於外以謀其上【索隱此評失也章邯之降由趙高用事不信任軍將一則恐誅二則楚兵既盛王離見虜遂降耳非三軍要市於外以求封明矣】羣臣之不信可見於此矣子嬰立遂不寤藉使子嬰有庸主之材僅得中佐山東虽亂秦之地可全而有宗廟之祀未當絕也秦地被山帶河以為固四塞之國也自繆公以來至於秦王二十余君常為諸侯雄豈世世賢哉其勢居然也且天下嘗同心并力而攻秦矣當此之世賢智并列良將行其師賢相通其謀然困於阻險而不能進秦乃延入戰而為之开关百萬之徒逃北而遂坏豈勇力智慧不足哉形不利勢不便也秦小邑并大城【集解徐廣曰大一作小】守險塞而軍高垒毋戰閉關据厄荷戟而守之諸侯起於匹夫以利合非有素王之行也其交未親其下未附名為亡秦其實利之也彼見秦阻之難犯

也必退师安土息民以待其敝【索隐贾谊书安作案】收弱扶罢以令大国之君不患不得意於海内贵为天子富有天下而身为禽者其救败非也秦王足已不问遂过而不变二世受之因而不改暴虐以重祸子婴孤立无亲危弱无辅三主惑而终身不悟亡不亦宜乎当此时也世非无深虑知化之士也然所以不敢尽忠拂过者秦俗多忌讳之禁忠言未卒於口而身为戮没矣故使天下之士倾耳而听重足而立拊口而不言是以三主失道忠臣不敢谏智士不敢谋天下已乱奸不上闻岂不哀哉先王知雍蔽之伤国也故置公卿大夫士以饰法设刑而天下治其强也禁暴诛乱而天下服其弱也五伯征而诸侯从其削也内守外附而社稷存故秦之盛也繁法严刑而天下振及其衰也百姓怨望而海内畔矣故周五【索隐贾谊书五作王】序得其道而千余岁不絶秦本末竝失故不长久由此观之安危之统相去远矣野谚曰前事之不忘後事之师也是以君子为国观之上古验之当世参以人事察盛衰之理审权势之宜去就有序变化有时故旷日长久而社稷安矣秦孝公据殽函之固拥雍州之地君臣固守而窥周室有席卷天下【索隐按春秋纬曰诸侯水散席卷也】包举宇内囊括四海之志【集解张晏曰括括囊也言其能包含天下】并吞八荒之心当是时商君佐之【索隐商君卫公孙鞅仕秦为左庶长遂为秦制法孝公致霸封之於商号商君】内立法度务耕织修守战之备外连衡而鬪诸侯【索隐高诱曰合关东从道之秦故曰连衡也】於是秦人拱手而取西河之外孝公既没惠王武王蒙故业因遗策南兼汉中西举巴蜀东割膏腴之地收要害之郡诸侯恐惧会盟而谋弱秦不爱珍器重宝肥美之地以致天下之士合从缔交【集解駰案汉书音义曰缔结也】相与为一当是时齐有孟尝赵有平原楚有春申魏有信陵此四君者皆明知而忠信寛厚而爱人尊贤重士约从离衡【索隐言孟尝等四君皆为其国共相约结为从以离散秦之横】并韩魏燕楚齐赵宋卫中山之衆於是六国之士【索隐六国者韩魏赵燕楚齐是也与秦为七雄又六国与宋卫中山为九国其三国盖微又前亡】有宁越徐尚苏秦杜赫之属为之谋【集解徐广曰越一作经或自别有此人不必甯越也索隐宁越赵人贾谊作甯越徐尚未详苏秦东周洛阳人吕氏春秋杜赫以安天下说周昭文君高诱曰杜赫周人也】齐明周最陈轸昭滑楼缓翟景苏厉乐毅之徒通其意【索隐战国策齐明东周臣後仕秦楚及韩周最周之公子亦仕秦陈轸夏人亦仕秦昭滑楚人楼缓魏文侯之弟所谓楼子也苏厉秦之弟仕齐乐毅本齐臣入燕燕昭王以客礼待之以为亚卿翟景未详也】吴起孙臏带佗儿良王廖田忌廉颇赵奢之朋制其兵【索隐吴起卫人事魏文侯为将孙臏孙武之後也春秋曰王廖贵先儿良贵後二人皆天下之豪士田忌齐将也廉颇赵奢皆赵之将也】常以十倍之地百万之衆叩关而攻秦秦人开关延敌九国之师逡巡遁逃而不敢进秦无亡矢遗鏃之费而天下诸侯已困矣於是散约解争割地而奉秦秦有余力而制其敝追亡逐北伏尸百万流血漂卤【集解徐广曰卤楯也】因利乘便宰割天下分裂河山强国请服弱国入朝廷及孝文王庄襄王享国日浅国家无事及至秦王续六世之余烈【集解张晏曰孝公惠文王武王昭王孝文王庄襄王】振长策而御宇内吞二周而亡诸侯履至尊而制六合执捶拊以鞭笞天下【集解徐广曰拊拍也音府一作搞朴素隐贾本论作搞朴】威振四海南取百越之地【集解韦昭曰越有百邑】以为桂林象郡百越之君俛首系颈委命下吏乃使蒙恬北筑长城而守藩篱却匈奴七百余里胡人不敢南下而牧马士不敢弯弓而报怨於是废先王之道焚百家之言以愚黔首堕名城【集解应劭曰坏坚城恐人复阻以害已也】杀豪杰收天下之兵聚之咸阳销锋铸鐻以为金人十二以弱黔首之民然後斩华为城【集解徐广曰斩一作践駰案服虔曰断华山为城索隐践亦出贾本论又崔浩云践登也】

因河为津据亿丈之城临不测之谿以为固良将劲弩守要害之处信臣精卒陈利兵而谁何【集解如淳曰何犹问也索隐崔浩云何或为呵汉旧仪宿卫郎官分五夜谁呵呵夜行者谁也何呵字同】天下以定秦王之心自以为关中之固金城千里【索隐金城言其实且坚也韩子曰虽有金城汤池汉书张良亦曰关中国所谓金城千里天府之国】子孙帝王万世之业也秦王既没余威振於殊俗陈涉甿牖绳枢之子【集解服虔曰以绳系户枢也孟康曰瓦甿为窻也】甿隶之人【集解如淳曰甿古氓字氓民也】而迁徙之徒才能不及中人非有仲尼墨翟之贤陶朱猗顿之富蹶足行伍之间而倔起什伯之中【集解駰案汉书音义曰首出十长百长之中如淳曰时皆辟屈在十百之中】率罢散之卒将数百之衆而转攻秦斩木为兵揭竿为旗天下云集响应贏粮而景从山东豪俊遂并起而亡秦族矣且夫天下非小弱也雍州之地殽函之固自若也【集解韦昭曰殽谓二殽函函谷关也】陈涉之位非尊於齐楚燕赵韩魏宋卫中山之君鉏耰棘矜【集解服虔曰以鉏柄及棘作矛槩也如淳曰耰椎块椎也】非铍於句戟长铍也【集解徐广曰铍一作鉏駰案如淳曰长刃矛也又曰矛刃下有铁横方上曲勾铍音所拜反】适戍之衆非抗於九国之师深谋远虑行军用兵之道非及乡时之士也然而成败异变功业相反也试使山东之国与陈涉度长絜大【集解駰案汉书音义曰絜束之絜】比权量力则不可同年而语矣然秦以区区之地千乘之权招八州而朝同列百有余年矣然後以六合为家殽函为宫一夫作难而七庙堕身死人手为天下笑者何也仁义不施而攻守之势异也秦并海内兼诸侯南面称帝【集解徐广曰一本有此篇无前者秦孝公已下而又以秦并兼诸侯山东三十余郡继此末也索隐按贾谊过秦论以孝公已下为上篇秦兼并诸侯三十余郡为下篇邹诞生云太史公删贾谊过秦论着此论当其义而省其辞褚先生增续既已混殽而世俗小智不惟删省之旨合写本论於此故不同也今颇亦不可分别】以养四海天下之士斐然乡风若是者何也曰近古之无王者久矣周室卑微五霸既殽令不行於天下是以诸侯力政强侵弱衆暴寡兵革不休士民罢敝今秦南面而王天下是上有天子也既元元之民冀得安其性命莫不虚心而仰上当此之时守威定功安危之本在於此矣秦王怀贪鄙之心行自奋之智不信功臣不亲士民废王道立私权禁文书而酷刑法先诈力而後仁义以暴虐为天下始夫并兼者高诈力安定者贵顺权此言取与守不同术也秦离战国而王天下其道不易其政不改是其所以取之守之者异也孤独而有之故其亡可立而待借使秦王计上世之事并殷周之迹以制御其政後虽有淫骄之主而未有倾危之患也故三王之建天下名号显美功业长久今秦二世立天下莫不引领而观其政夫寒者利短褐【集解徐广曰一作短小襦也音竖索隐赵岐曰褐以毛毳织之若马衣或以褐编衣也短一音竖盖谓褐布竖裁为劳役之衣短而且狭故谓之短褐亦曰竖褐】而饥者甘糟糠天下之戢戢新主之资也此言劳民之易为仁也乡使二世有庸主之行而任忠贤臣主一心而忧海内之患縞素而正先帝之过裂地分民以封功臣之後建国立君以礼天下虚囹圄而免刑戮除去收帑污秽之罪使各反其乡里发仓廩散财币以振孤独穷困之士轻赋少事以佐百姓之急约法省刑以持其後使天下之人皆得自新更节修行各慎其身塞万民之望而以威德与天下天下集矣即四海之内皆讙然各自安乐其处唯恐有变虽有狡猾之民无离上之心则不轨之臣无以饰其智而暴乱之奸止矣二世不行此术而重之以无道坏宗庙与民【集解徐广曰一无此上五字】更始作阿房宫繁刑严诛吏治刻深赏罚不当赋敛无度天下多事吏弗能纪百姓困穷而主弗收恤然後奸伪并起而上下相遁蒙罪者衆刑戮相望於道而天下苦之自君卿以下至於衆庶人怀自危之心亲处穷苦之实咸不安其位故易动也是以陈

涉不用汤武之贤不藉公侯之尊奋臂於大泽而天下响应者其民危也故先王见始终之变知存亡之机是以牧民之道务在安之而已天下虽有逆行之臣必无响应之助矣故曰安民可与行义而危民易与为非此之谓也贵为天子富有天下身不免於戮杀者正倾非也是二世之过也

襄公立享国十二年初为西畴葬西垂【索隐此已下重序列秦之先君立年及葬处皆当据秦纪为说与正史小有不同今取异说重列於後襄公秦仲孙庄公子救周周始命为诸侯初为西畴祠白帝立十三年葬西土】生文公文公立居西垂宫五十年死葬西垂【索隐作酈畴又作陈宝祠】生静公静公不享国而死生宪公宪公享国十二年居西新邑死葬衙【集解酈案地理志冯翊有衙县索隐宪公灭荡社居新邑葬衙本纪宪公徙居平阳葬西山】生武公德公出子出子享国六年居西陵【索隐一云居西陂葬衙本纪不云】庶长弗忌威累参父三人率贼贼出子鄙衍葬衙武公立武公享国二十年居平阳封宫【集解徐广曰一云居平封宫】葬宣阳聚东南【索隐纪云葬平阳初以人从死】三庶长伏其罪德公立德公享国二年居雍大郑宫生宣公成公繆公葬阳初伏以御蛊【索隐二年初伏本纪此已下居葬絶不言也】宣公享国十二年居阳宫葬阳【索隐四年作密畴】初志闰月成公享国四年居雍之宫【集解徐广曰之一作走】葬阳齐伐山戎孤竹繆公享国三十九年天子致霸葬雍繆公学着人【索隐着音贮又音宁着即宁也门屏之间曰宁谓学於宁门之人故诗云俟我於着乎而是也】生康公康公享国十二年居雍高寝葬洵社生共公共公享国五年居雍高寝葬康公南生桓公桓公享国二十七年居雍太寝葬义里丘北生景公【索隐一作僖公系本云名后伯车】景公享国四十年居雍高寝葬丘里南【正义丘一作二也】生毕公【集解徐广曰春秋作哀公】毕分享国三十六年【正义一作三十七年】葬车里北生夷公夷公不享国死葬左宫生惠公【正义十年葬车里元年孔子行鲁相事】惠公享国十年葬车里康景生悼公悼公享国十五年【正义雍本纪作十四年】葬僖公西城雍生刺【正义一作利】龚公【索隐一作厉共公】刺龚公享国三十四年葬入里【集解徐广曰一作人】生躁公【索隐又作?公正义十四年居受寝葬悼公南也】怀公【正义四年葬栎圉氏】其十年彗星见躁公享国十四年居受寝葬悼公南其元年彗星见【集解徐广曰年表云星昼见】怀公从晋来享国四年葬栎圉氏生灵公诸臣围怀公怀公自杀肃灵公昭子子也【集解徐广曰怀公生昭子昭子生灵公索隐纪年及系本无肃字立十年表同纪十二年】居泾阳享国十年葬悼公西生简公简公从晋来享国十五年葬僖公西【索隐按本纪简公名悼子即刺龚公之子怀公弟也且纪及系本皆以为然今此文云灵公谬也立十六年葬僖公西】生惠公其七年百姓初带剑惠公享国十三年葬陵圉【索隐王劭按纪年云简公後次敬公敬公立十三年乃至惠公辞即难凭时参异说】生出公出公享国二年【索隐系本谓少主】出公自杀葬雍献公享国二十三年【集解徐广曰灵公子索隐系本称元献公立二十二年表同纪二十四年】葬器圉生孝公孝公享国二十四年【索隐本纪十二年】葬弟圉生惠文王其十三年始都咸阳【正义本纪云十二年作咸阳筑冀阙是十三年始都之】惠文王享国二十七年【索隐十九而立】葬公陵【正义括地志云秦惠文王陵在雍州咸阳县西北一十四里】生悼武王悼武王享国四年葬永陵【集解徐广曰皇甫谧曰葬毕今安陵西毕陌索隐系本作武烈王十九而立立三年本纪曰四年正义括地志云秦悼武王陵在雍州咸阳县西十里俗名周武王陵非也】昭襄王享国五十六年葬茝阳【索隐十九

年而立葬芷陵也】生孝文王孝文王享国一年葬壽陵生庄襄王庄襄王享国三年葬茝阳【正义括地志云秦庄襄王陵在雍州新丰县西南三十五里俗亦谓为子楚始皇陵在北故亦谓为见子陵】生始皇帝吕不韦相献公立七年初行为市十年为户籍相伍孝公立十六年时桃李冬华惠文王生十九年而立立二年初行钱有新生婴儿曰秦且王悼武王生十九年而立立三年渭水赤三日昭襄王生十九年而立立四年初为田开阡陌孝文王生五十三年而立庄襄王生三十二年而立立二年取太原地庄襄王元年大赦修先王功臣施德厚骨肉布惠於民东周与诸侯谋秦秦使相国不韦诛之尽入其国秦不絕其祀以阳人地赐周君奉其祭祀始皇享国三十七年葬郿邑【正义郿力知反】生二世皇帝始皇生十三年而立二世皇帝享国三年葬宜春【正义括地志云秦故胡亥陵在雍州万年县南三十四里上文葬以黔首也】赵高为丞相安武侯二世生十二年而立【集解徐广曰本纪云二十一】右秦襄公至二世六百一十岁【正义秦本纪自襄公至二世五百七十六年矣年表自襄公至二世五百六十一年三说并不同未知孰是】

孝明皇帝十七年十月十五日乙丑日【索隐此已下是汉孝明帝访班固评贾马赞中论秦二世亡天下之得失後人因取其说附之此末】周历已移【正义周初卜世三十卜年七百以五序得其道故王至三十七岁至八百六十七历数既过秦并天下是周历已移也】仁不代母秦直其位【索隐周历已移周亡也仁不代母谓周得木德木生火周为汉母也言历运之道仁恩之情子不代母而王谓火不代木言汉不合即代周也秦值其闰位得在木火之间也此论者之辞也正义始皇以为周火德秦代周从所不胜为水德之始也按周木德也秦水德也五行之运水生木木生火火生土土生金金生水所生者为母出者为子帝王之次子代母秦称水是母代子故言若有德之君相代不母承其子直音值言秦并天下称帝是秦德值帝王之位】吕政残虐然以诸侯十三【集解駟案始皇初为秦王年十三也索隐吕政者始皇名政是吕不韦幸姬有娠献庄襄王而生始皇故云吕政】并兼天下极情纵欲养育宗亲三十七年兵无所不加制作政令施於後王【正义谓置郡县坏井田开阡陌不立侯王始为伏腊又置丞相太尉御史大夫奉常郎中令仆射廷尉典客宗正少府中尉将作詹事水衡都尉监守县令丞等皆施於後王至于隋唐矣】盖得圣人之威河神授图【正义盖者疑辞也言始皇之威能吞并天下称帝疑得圣人之威灵河神之图录】据狼狐蹈参伐佐攻驱除【正义狼音郎狼狐主弓矢星天官书云参伐主斩艾事言秦据蹈狼狐参伐之气驱灭天下】距之称始皇【正义距音巨之至也】始皇既歿胡亥极愚郿山未毕复作阿房以遂前策云凡所为贵有天下者肆意极欲大臣至欲罢先君所为诛斯去疾任用赵高痛哉言乎人头畜鸣【正义畜许又反言胡亥人身有头面口能言语不辨好恶若六畜之鸣】不威不伐恶【正义此五字为一句也】不笃不虚亡【正义言胡亥藉帝王之威器残酷暴虐滋已恶恶既深笃以至灭亡岂其虚哉】距之不得留残虐以促期虽居形便之国犹不得存子婴度次得嗣冠【正义音馆】玉冠佩华绂【正义音拂】车黄屋【集解蔡邕曰黄屋者盖以黄为里】从百司【正义才用反】谒七庙小人乘非位莫不怵忽失守偷安日日独能长念却虑父子作权近取於户牖之间竟诛猾臣为君讨贼高死之後宾婚未得尽相劳餐未及下咽酒未及濡唇楚兵已屠关中真人翔霸上素车婴组奉其符玺以归帝者郑伯茅旌鸾刀严王退舍【集解駟案公羊传曰楚庄王伐郑郑伯肉袒左执茅旌右执鸾刀以逆庄王庄王退舍七里何休曰茅旌鸾刀祭祀宗庙所用也执宗庙器者示以宗庙血食自归正义旌音精严音庄】

河决不可复壅鱼烂不可复全【索隐宋均曰言如鱼之烂从内而出】贾谊司马迁曰向使
要有庸主之才仅得中佐山东虽乱秦之地可全而有宗庙之祀未当絶也秦之积衰天下土
崩瓦解虽有周旦之材无所复陈其巧而以责一日之孤【正义曰音駟一日之孤谓子婴】
误哉俗传秦始皇起罪恶胡亥极得其理矣复责小子【正义亦谓子婴】云秦地可全所谓
不通时变者矣纪季以鄫春秋不名【集解駢案春秋曰纪季以鄫入于齐公羊传曰何以不
名贤之也谓设五庙以存姑姊妹也正义鄫音户圭反括地志云安平城在青州临淄县东十
九里古纪之鄫邑帝王纪云周之纪国姜姓也纪侯潜齐哀公於周懿王王烹之外传曰纪侯
入为周士竹书云齐襄公灭纪邢鄆鄆又括地志云邢城在青州临朐县东三十里鄆城在北
海县东北七十里鄆城在密州安丘县界邢音骈鄆音訾按秦始皇起罪恶胡亥极得其理国
既崩絶箕子比干尚不能存殷庸主子婴焉能救秦之败以贾谊史迁不通时变不如纪季之
深识也季纪侯少弟不书名故曰纪季】吾读秦纪至於子婴车裂赵高未尝不健其决怜其
志婴死生之义备矣【集解徐广曰班固典引曰永平十七年诏问臣固太史迁赞语中宁有
非邪臣对贾谊言子婴得中佐秦未絶也此言非是臣素知之耳】

【索隐述赞曰六国陵替二周沦亡并一天下号为始皇阿房云构金狄成行南游勒石东瞰
浮梁瀉池见遗沙丘告丧二世矫制赵高是与诈因指鹿灾生噬虎子婴见推恩报君父下乏
中佐上乃庸主欲振颓网云谁克补】

史记卷六

史记卷六考证

秦始皇本纪蒙骜攻韩取十三城○六国年表云取十二城

六年韩魏赵卫楚共击秦取壽陵○赵世家悼襄王元年龐煖将赵楚魏燕之锐师攻秦蕞不
拔徐广曰蕞在新丰今此云取壽陵所将之师一作卫一作燕亦不同

其君角率其支属徙居野王○六国年表卫君角以始皇十八年立此是卫元君十二年不名
角

死屯留正义汉屯留吁国也○汉屯疑春秋二字之误将军壁死正义壁边覓反言成蟜自杀
壁垒之内○徐孚远曰上言成蟜死屯留矣此又言将军壁死注作壁垒恐非是壁者疑是成
蟜副将名壁蟜死壁不归故又戮其士卒也【臣照】按徐孚远驳正义谓将军壁死非成蟜
自杀於壁垒之内是也顾谓疑是蟜副将名壁则似不应叙在迁其民於临洮之下或是将军
壁讨成蟜而死所将屯留蒲鶮之卒死者尽以反罪罪之而戮其屍耳

攻魏垣蒲阳正义蒲邑故城在隰州县北四十五里○县字上疑脱蒲字

乙酉王冠集解徐广曰年二十二正义按年二十有一也○【臣世骏】按徐广云二十二者

以踰年改元计也正义云二十一者以当年改元计也徐广以是年为二十二故三十七年崩时注云年五十如正义之说则崩年止四十九六国表周赧王五十九年秦昭王五十一年徐广曰乙巳则始皇生年当是壬寅十三岁时当是甲寅项羽本纪注徐广曰项王以始皇十五年乙巳岁生则始皇元年当是乙卯此处自当以踰年改元计作二十二岁为是但秦本纪云献公立二十四年卒子孝公立徐广曰献公元年丁酉孝公元年庚申则献之末即孝之初又不拘踰年改元之说矣

矫王御玺正义梁传至天正二年侯景破梁○【臣照】按梁无天正年号侯景破梁为简文帝大宝元年则天正是大宝二字之误

与韩非谋弱秦○徐孚远曰韩非韩公子以不用於韩欲干秦王其後使秦为李斯所譖死今云谋弱秦非也疑即李斯譖非之辞载於秦史记耳

十四年攻赵军於平阳取宜安破之杀其将军桓齮定平阳武城○赵世家赵迁三年秦攻赤丽宜安李牧率师与战肥下却之李牧传赵乃以牧为大将军击秦军於宜安大破秦军走秦将桓齮与此齮齮

不用兵革正义协韵音棘○革与棘古通不必协也诗匪棘其欲礼记作匪革

既已齐人徐市等上书○何孟春曰徐市又作徐福非有两名市乃古黻字汉时未有翻切但以声相近字音注其下後人读市作市?字故疑福为别名

始皇还过彭城斋戒祷祠欲出周鼎泗水使千人没水求之弗得○困学纪闻曰周本纪秦取九鼎宝器而迁西周君於 狐秦始皇本纪还过彭城斋戒祷祠欲出周鼎泗水使千人没水求之弗得潘水李氏曰是时泗水在彭城宋之分九鼎何缘而至宋夫取九鼎者秦昭襄王也始皇乃庄襄之子也世数年岁相去不远始皇东游过彭城於泗水欲出周鼎竟不得两说抵牾如此

博浪沙中○浪一本作狼注同

逢盗兰池正义秦记云始皇都长安○秦记本名三秦记或本作三秦记而脱三字

夜过华阴平舒道正义水经注云又东经平舒北○水经注作平舒城北

三十有七年来巡天下周览远方○容斋随笔曰今人书二十字为廿三十为卉四十为册皆说文本字也廿音入二十并也卉音先合反三十之省便古文也册音先立反数名今直以为四十字按秦始皇凡石刻颂德之辞皆四字一句泰山辞曰皇帝临位二十有六年琅琊台颂曰维二十六年皇帝始作之罾颂曰维二十九年时在中春东观颂曰维二十九年皇帝春游会稽颂曰德会修长三十有七年此史记所载每称年者辄五字一句尝得泰山辞石本乃

书为廿有六年想其余皆如是而太史公误易之或後人传写之讹耳其实四字句也

树草木以象山正义取大石於渭山诸山○渭山山字疑有误或是城字或是水字

击赵王歇等於钜鹿正义离围赵王歇即此城○离上宜有王字

虽监门之养不穀於此○余有丁曰穀当作犝训为粗公羊传曰犝者曰侵精者曰伐

秦孝公据殽函之固○困学纪闻曰春秋时殽桃林晋地非秦有也

陈轸索隐陈轸夏人○【臣照】按陈轸夏人虽本国策语但鲍彪注曰夏中国也然则固不可以为国名而注陈轸为夏人矣

儿良王廖索隐春秋曰王廖贵先儿良贵後○二语出吕氏春秋盖春秋上脱吕氏二字

逡巡遁逃○金石文字记曰逡巡遁逃之异文也管子桓公蹇然逡遁汉书平当传赞逡遁有耻叙传逡遁致仕周礼司士注王揖之皆逡遁既复位仪礼士昏礼大射礼公食大夫礼注辟逡遁乡射礼注少退少逡遁也聘礼注辟位逡遁又三退三逡遁也又辟位逡遁又辟於其东西位逡遁也又退为大夫降逡遁士丧礼注辟逡遁辟位也特牲馈食礼注辟位逡遁礼记玉藻注俛逡遁而退着屨也皆同此文则隶释以为读如本字者非也又按晏子春秋晏子逡循对曰汉书万章传章逡循甚惧外戚传逡循固让遁又作循尔雅释诂注循亦巡也集古以为当作循者是也遁与循同说文彳之字亦或从辵如往为往後为逡很为?之类从辵之字亦或从彳如?如徂延为征返为假之类汉书王莽传後俭隆约以矫世俗师古曰俊音千旬反即逡字也逡之为後犹循之为遁耳

吞二周而亡诸侯○宜斋野乘曰贾谊过秦论言始皇吞二周而亡诸侯按秦昭王五十一年灭西周其後七年庄襄王灭东周四年庄襄王卒始皇方即位则吞二周乃始皇之曾祖与父非始皇也

以养四海天下之士○新书作以四海养天下之士是其所以取之守之者异也○余有丁曰贾书作是其所以取之文意甚明史添守之者异四字似误

生宪公○余有丁曰宪公秦纪作宁公葬西山

葬车里康景○凌稚隆曰康景二字疑衍或下有阙文按秦纪及此纪无僖公疑即景公也

悼公享国十五年正义雍本纪作十四年○雍衍文不然宜云葬雍落雍字

二世生十二年而立○徐孚远曰二世未立时已习法律及立後恣行不义当已在成人之年

矣此云生十二年而立非实也

孝明皇帝十七年以下○【臣照】按此班固典引之文後人书於本纪之後裴駙等亦作注解遂混入史记中今低刻一字以别之至贾生过秦论三篇马迁全录之似亦後人所增入恐马迁本文亦止善哉乎贾生推言之也一句耳

史记卷六考证

卷七

<史部,正史类,史记>

钦定四库全书

史记卷七

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

项羽本纪第七

【索隐项羽崛起争雄一朝假号西楚竟未践天子之位而身首别离斯亦不可称本纪宜降为世家】

项籍者下相人也【集解駙案地理志临淮有下相县索隐县名属临淮案应劭云相水名出沛国沛国有相县其水下流又因置县故名下相也正义括地志云相故城在泗州宿预县西北七十里秦县项胡讲反籍秦昔反】字羽【索隐按序传籍字子羽也】初起时年二十四其季父项梁【索隐崔浩云伯仲叔季兄弟之次故叔云叔父季云季父】梁父即楚将项燕【正义燕乌贤反】为秦将王翦所戮者也【集解駙案始皇本纪云项燕自杀索隐此云为王翦所杀与楚汉春秋同而始皇本纪云项燕自杀不同者盖燕为王翦所围乃而自杀故不同也】项氏世世为楚将封於项【索隐地理志项城县属汝南正义括地志云今陈州项城县城即古项子国】故姓项氏项籍少时学书不成去学劒又不成项梁怒之籍曰书足以记名姓而已劒一人敌不足学学万人敌於是项梁乃教籍兵法籍大喜略知其意又不肯竟学项梁尝有栎阳逮捕【索隐按逮训及谓有罪相连及为栎阳县所逮录也故汉史制狱有逮捕正义栎音药逮音代】乃请蕲【集解苏林曰蕲音机县属沛国】狱掾曹咎书抵栎阳狱掾司马欣以故事得已【集解应劭曰项梁曾坐事传系栎阳狱从蕲狱掾曹咎取书与司马欣抵归已止也韦昭曰抵至也谓梁尝被栎阳县逮捕梁乃请蕲狱掾曹咎书至栎阳狱掾司马欣事故得止息也索隐服?云抵归也刘伯庄云抵相凭托也】项梁杀人与籍避仇於吴中吴中贤士大夫皆出项梁下每吴中有大繇役及丧项梁尝为主办陰以兵法部勒宾客及子弟以是知其能秦始皇帝游会稽渡浙江【索隐韦昭云浙江在今钱塘浙音折晋灼音逝非

也盖其流曲折庄子所谓制河即其水也制折声相近】梁与籍俱观籍曰彼可取而代也梁掩其口曰毋妄言族矣梁以此奇籍籍长八尺余力能扛鼎【集解韦昭曰扛举也索隐说文云扛横关对举也音江】才气过人虽吴中子弟皆已惮籍矣秦二世元年七月陈涉等起大泽中【索隐徐氏云在沛郡蕲县】其九月会稽守【集解徐广曰尔时未言太守正义守音狩汉书云景帝中二年七月史郡守为太守】通谓梁曰【集解駰案楚汉春秋曰会稽假守殷通正义言假者兼摄之也】江西皆反此亦天亡秦之时也吾闻先即制人後则为人所制【索隐谓先举兵能制得人後则为人所制故荀子曰制人之与为人制也相去远矣】吾欲发兵使公及桓楚【正义张晏云项羽杀宋义时桓楚为羽使怀王】将是时桓楚亡在泽中梁曰桓楚亡人莫知其处独籍知之耳梁乃出诫籍持劔居外待梁复入与守坐曰请召籍使受命召桓楚守曰诺梁召籍入须臾梁眴籍曰可行矣於是籍遂拔劔斩守头项梁持守头佩其印绶门下大惊扰乱籍所击杀数十百人【索隐此不定数也自百已下或至八十九十故云数十百】一府中皆愕伏【索隐说文云訾失气也愕音之涉反】莫敢起梁乃召故所知豪吏谕以所为起大事遂举吴中兵使人收下县得精兵八千人梁部署吴中豪杰为校尉司马有一人不得用自言於梁梁曰前时某丧使公主某事不能办以此不任用公衆乃皆伏於是梁为会稽守籍为裨将徇下县【集解李奇曰徇略也如淳曰徇音抚徇之徇徇其人民】广陵人召平於是陈王徇广陵【正义扬州】未能下【正义下胡嫁反以兵威服之曰下】闻陈王败走秦兵又且至乃渡江矫陈王命【正义矫纪兆反召平从广陵渡京口江至吴诈陈王命拜梁】拜梁为楚王上柱国【集解徐广曰二世之二年正月也駰案应劭曰上柱国上卿官若今相国也】曰江东已定急引兵西击秦项梁乃以八千人渡江而西闻陈婴已下东阳【集解晋灼曰东阳县本属临淮郡汉明帝分属下邳後复分属广陵索隐下音如字按以兵威服之曰下胡嫁反彼自归服曰下如字读他皆仿此东阳县名属广陵正义括地志云东阳故城在楚州盱眙县东七十里秦东阳县城也在淮水南】使使欲与连和俱西陈婴者故东阳令史【集解駰案晋灼曰汉仪注曰令史曰令史丞史曰丞史正义楚汉春秋云东阳狱史陈婴】居县中素信谨称为长者东阳少年杀其令相聚数千人欲置长无适用乃请陈婴婴谢不能遂强立婴为长县中从者得二万人少年欲立婴便为王异军苍头特起【集解应劭曰苍头特起言与衆异也苍头谓士卒卑巾若赤眉青领以相别也如淳曰魏军兵卒之号战国策魏有苍头二十万索隐晋灼曰殊异其军为苍头谓着青帽如淳云特起犹言新起也按为苍头军特起欲立陈婴为王婴母不许婴称王言天下方乱未知瞻乌所止】陈婴母谓婴曰自我为汝家妇未尝闻汝先古之有贵者今暴得大名不祥不如有所属事成犹得封侯事败易以亡非世所指名也【集解张晏曰陈婴母潘旌人墓在潘旌索隐潘旌是邑聚之名後为县属临淮】婴乃不敢为王谓其军吏曰项氏世世将家有名於楚今欲举大事将非其人不可我倚名族亡秦必矣於是衆从其言以兵属项梁项梁渡淮黥布蒲将军亦以兵属焉【集解服虔曰英布起於蒲地因以为号如淳曰言当阳君蒲将军皆属项羽此自更有蒲将军索隐按布姓英咎繇之後後以罪被黥故改姓黥以应相者之言韦昭云蒲姓也是英布与蒲将军二人共以兵属项梁也故服虔以为英布起蒲非也按黥布初起於江湖之间】凡六七万人军下邳【正义被悲反下邳泗水县也应劭云邳在薛徙此故曰下邳按有上邳故曰下邳】当是时秦嘉已立景驹为楚王【集解駰案陈涉世家曰秦嘉广陵人文颖曰景驹楚族景氏驹名】军彭城东【正义括地志云徐州彭城县古彭祖国也秦嘉军于此城之东】欲距项梁项梁谓军吏曰陈王先首事战不利未闻所在今秦嘉倍陈王而立景驹逆无道

乃进兵击秦嘉秦嘉军败走追之至胡陵【集解邓展曰今胡陵属山阳汉章帝改曰胡陆】嘉还战一日嘉死军降景驹走死梁地项梁已并秦嘉军军胡陵将引军而西章邯军至栗【集解徐广曰县名在沛】项梁使别将朱鸡石余樊君与战余樊君死朱鸡石军败亡走胡陵项梁乃引兵入薛【正义括地志云故薛城古薛侯国也在徐州滕国县界黄帝之所封也左传定公元年薛宰云薛之祖奚仲居薛为夏车正後为孟尝君田文封邑也】诛鸡石项梁前使项羽别攻襄城【正义许州襄城县】襄城坚守不下已拔皆阬之还报项梁项梁闻陈王定死召诸别将会薛计事此时沛公亦起沛往焉居鄆人范增【索隐晋灼音剿絶之剿地理志居鄆县在庐江郡音巢是故巢国夏桀所奔苟悦汉纪云范增阜陵人】年七十素居家好奇计往说项梁曰陈胜败固当【正义顾着作云固宜当应败也当音如字】夫秦灭六国楚最无罪自怀王入秦不反楚人怜之至今故楚南公曰【集解徐广曰楚人也善言陰阳駟按文颖曰南方老人也正义虞喜志林云南公者道士识废兴之数知亡秦者必於楚汉书艺文志云南公十三篇六国时人在阴阳家流】楚虽三户亡秦必楚也【集解瓚曰楚人怨秦虽三户犹足以亡秦也索隐臣瓚与苏林解同韦昭以为三户楚三大姓昭屈景也二说皆非按左氏以畀楚师於三户杜预注云今丹水县北三户亭则是地名不疑正义按服虔云三户漳水津也孟康云津峡名也在邳西三十里括地志云浊漳水又东经葛公亭北经三户峡为三户津在相州滏阳县界然则南公辨阴阳识废兴之数知秦亡必於三户故出此言後项羽果渡三户津破章邯军降章邯秦遂亡是南公之善识】今陈胜首事不立楚後而自立其势不长今君起江东楚蠡起之将【集解如淳曰蠡起犹言蠡午也衆蠡飞起交横若午言其多也索隐凡物交横为午言蠡之起交横屯聚也故刘向传注云蜂午杂沓也郑玄云一纵一横为午】皆争附君者以君世世楚将为能复立楚之後也【正义为于伪反】於是项梁然其言乃求楚怀王孙心民间为人牧羊立以为楚怀王【集解徐广曰此时二世之二年六月】从民所望也【集解应劭曰以祖谥为号者顺民望】陈婴为楚上柱国封五县与怀王都盱台【集解郑玄曰音煦怡正义盱况于反盱以之反盱眙今楚州临淮水怀王都之】项梁自号为武信君居数月引兵攻亢父【正义亢音刚又苦浪反父音甫括地志云亢父故城在兖州任城县南五十一里】与齐田荣司马龙且【正义子余反】军救东阿【正义括地志云东阿故城在济州东阿县西南二十五里汉东阿县城秦时齐之阿也】大破秦军於东阿田荣即引兵归逐其王假假亡走楚假相田角亡走赵角弟田间故齐将居赵不敢归田荣立田儋子市为齐王项梁已破东阿下军遂追秦军数使使趣齐兵欲与俱西【正义下使色吏反趣音促】田荣曰楚杀田假赵杀田角田间乃发兵项梁曰田假为与国之王【集解如淳曰相与交善为与国党与也索隐高诱注战国策云与国同福之国也】穷来从我不忍杀之赵亦不杀田角田间以市於齐【集解张晏曰若市买相贸易以利也梁救荣难犹不用命梁念杀假等荣未必多出兵不如依春秋寄公待以礼也又可以贸易他利以除己害遂背德可辅假以伐齐故曰市贸易也晋灼曰假故齐王建之弟欲令楚杀之以为己利而楚保全不杀以买其计故曰市也索隐韦昭云市利於齐也刘氏亦云市犹要也留田假而不杀欲以要胁田荣也】齐遂不肯发兵助楚项梁使沛公及项羽别攻城阳【正义括地志云濮州雷泽县本汉城阳在州东九十一里地理志云城阳属济陰郡古郕伯国姬姓之国史记周武王封季弟载于郕其後迁于城之阳故曰城阳】屠之西破秦军濮阳县【正义括地志云濮阳县在濮州西八十六里濮县也古吴之国别攻城阳屠之西破秦军濮阳县也东即此县东】秦兵收入濮阳沛公项羽乃攻定陶【正义定陶曹州城也从濮阳南攻定陶】定陶未下去西畧地至譙

丘【正义雍丘今汴州县也地理志云古?国武王封禹後於杞号东楼公二十一世简公为楚所灭即此城也】大破秦军斩李由【集解应劭曰由李斯子也】还攻外黄【正义括地志云故周城即外黄之地在雍丘县东张晏曰魏郡有内黄县故加外也臣瓚曰县有黄沟故名】外黄未下项梁起东阿西北至定陶再破秦军项羽等又斩李由益轻秦有骄色宋义乃谏项梁曰战胜而将骄卒惰者败今卒少惰矣秦兵日益臣为君畏之项梁弗听乃使宋义使於齐道遇齐使者高陵君显【集解张晏曰显名也高陵县名索隐晋灼云高陵属琅邪】曰公将见武信君乎曰然曰臣论武信君军必败公徐行即免死疾行则及祸秦果悉起兵益章邯击楚军大破之定陶项梁死沛公项羽去外黄攻陈留陈留坚守不能下沛公项羽相与谋曰今项梁军破士卒恐乃与吕臣军俱引兵而东吕臣军彭城东项羽军彭城西沛公军碭【集解应劭曰碭属梁国苏林曰碭音唐正义括地志云宋州碭山县本汉碭县也在宋州东百五十里】章邯已破项梁军则以为楚地兵不足忧乃渡河击赵大破之当此时赵歇为王陈余为将张耳为相皆走入钜鹿城章邯令王离涉闲围钜鹿【集解张晏曰涉姓闲名秦将也】章邯军其南筑甬道而输之粟【集解应劭曰恐敌抄辎重故筑墙垣如街巷也】陈余为将卒数万人而军钜鹿之北此所谓河北之军也楚兵已破於定陶怀王恐从盱台之彭城并项羽吕臣军自将之以吕臣为司徒以其父吕青为令尹【集解应劭曰天子曰师尹诸侯曰令尹时去六国尚近故置令尹瓚曰诸侯之卿唯楚称令尹时立楚之後故置官司皆如楚旧】以沛公为碭郡长【集解苏林曰长如郡守也】封为武安侯将碭郡兵初宋义所遇齐使者高陵君显在楚军见楚王曰宋义论武信君之军必败居数日军果败兵未战而先见败徵此可谓知兵矣王召宋义与计事而大悦之因置以为上将军项羽为鲁公为次将范增为末将救赵诸别将皆属宋义号为卿【集解徐广曰一作庆】子冠军【集解文颖曰卿子时人相褒尊之辞犹言公子也上将故言冠军张晏曰若霍去病功冠三军因封为冠军侯至今为县名】行至安阳【索隐傅寛传云从攻安阳扛里则安阳与扛里俱在河南顔师古以为今相州安阳县按此兵犹未渡河不应即至相州安阳今检後魏书地形志云已氏有安阳城改已氏为楚邱今宋州楚邱西北四十里有安阳故城是也正义括地志云安阳县相州所理县七国时魏宁新中邑秦昭王拔魏寧新中更名安阳张耳传云章邯军钜鹿南筑甬道属河饷王离项羽数絶邯甬道王离军乏食项羽悉引兵渡河遂破章邯围钜鹿下又云渡河湛船持三日粮按从滑州白马津齎三日粮不至邢州明此渡河相州漳河也宋义遣其子襄相齐送之至无盐即今郅州之东宿城是也若依顔监说在相州安阳宋义送子不可弃军渡河南向齐西南入鲁界饮酒高会非入齐之路义虽知送子曲由宋州安阳理顺然向钜鹿甚远不能数絶章邯甬道及持三日粮至也均之二理安阳送子至无盐为长济河絶甬道持三日粮宁有迟留史家多不委曲说之也】留四十六日不进项羽曰吾闻秦军围赵王钜鹿疾引兵渡河楚击其外赵应其内破秦军必矣宋义曰不然夫搏牛之蝱不可以破虬蝱【集解如淳曰用力多而不可以破虬蝱犹言欲以大力伐秦而不可以救赵也索隐张晏云搏音博韦昭云蝱大在外蝱小在内故顔师古言以手击牛之背可以杀其上蝱而不能破其内蝱喻方欲灭秦不可与章邯即战也邹氏博音附今按言蝱之搏牛本不拟破其上之虬蝱以言志在大不在小也】今秦攻赵战胜则兵罢我承其敝不胜则我引兵鼓行而西必举秦矣故不如先鬪秦赵夫被坚执锐义不如公坐而运策公不如义因下令军中曰猛如虎很如羊【正义很何忌反】贪如狼强不可使者皆斩之乃遣其子宋襄相齐身送之至无盐【索隐按地理志东平郡之县在今郅州之东】饮酒高会【集解韦昭曰皆召尊爵故云高索隐服?云高会大会

也】天寒大雨士卒冻饥项羽曰将戮力而攻秦久留不行今岁饥民贫士卒食芋菽【集解徐广曰芋一作半半五升器也駟按瓚曰士卒食蔬菜以菽杂半之索隐芋蹲鴟也菽豆也臣瓚义亦通汉书作半菽王劭曰言半量器名容半升也】军无见粮【正义胡练反顔监云无见在之粮】乃饮酒高会不引兵渡河因赵食与赵并力攻秦乃曰承其敝夫以秦之强攻新造之赵其势必举赵赵举而秦强何敝之承且国兵新破王坐不安席扫境内而专属於将军国家安危在此一举今不恤士卒而徇其私【索隐谓使其子相齐是徇其私情崔浩云徇营也】非社稷之臣项羽晨朝上将军宋义即其帐中斩宋义头出令军中曰宋义与齐谋反楚楚王陰令羽诛之当是时诸将皆惛服莫敢枝梧【集解如淳曰梧音悟枝梧犹枝扞也瓚曰小柱为枝邪柱为梧今屋梧邪柱是也正义枝音之移反梧音悟】皆曰首立楚者将军家也今将军诛乱乃相与共立羽为假上将军【正义未得怀王命也假摄也】使人追宋义子及之齐杀之使桓楚报命於怀王怀王因使项羽为上将军【集解徐广曰二世三年十一月】当阳君蒲将军皆属项羽项羽已杀卿子冠军威震楚国名闻诸侯乃遣当阳君蒲将军将卒二万渡河【正义漳水】救钜鹿战少利陈余复请兵项羽乃悉引兵渡河皆沈船破釜烧庐舍持三日粮以示士卒必死无一还心於是至则围王离与秦军遇九战絶其甬道大破之杀苏角【集解文颖曰秦将也】虜王离涉闲不降楚自烧杀当是时楚兵冠诸侯诸侯军救钜鹿下者十余壁莫敢纵兵及楚击秦诸将皆从壁上观楚战士无不一以当十楚兵呼声动天诸侯军无不人人惛恐【集解駟案汉书音义曰惛音章瑞反】於是已破秦军项羽召见诸侯将诸侯将入辕门【集解张晏曰军行以车为陈辕相向为门故曰辕门】无不膝行而前莫敢仰视项羽由是始为诸侯上将军诸侯皆属焉章邯军棘原【集解张晏曰在漳南晋灼曰地名在钜鹿南】项羽军漳南【正义括地志云浊漳水一名漳水今俗名柳河在邢州平乡县南注水经云漳水一名大漳水兼有 水之目也】相持未战秦军数却二世使人让章邯章邯恐使长史欣请事至咸阳留司马门三日【集解駟案凡言司马门者宫垣之内兵卫所在四面皆有司马主武事总言之外门为司马门也索隐按天子门有兵栏曰司马门也】赵高不见有不信之心长史欣恐还走其军不敢出故道【正义走音奏】赵高果使人追之不及欣至军报曰赵高用事於中下无可为者今战能胜高必疾妒吾功战不能胜不免於死愿将军孰计之陈余亦遗章邯书曰白起为秦将南征鄢郢北阬马服【索隐韦昭云赵奢子括也代号马服崔浩云马服赵官名言服武事】攻城畧地不可胜计而竟赐死蒙恬为秦将北逐戎人开榆中地数千里【索隐服?云金城县所治苏林曰在上郡崔浩云蒙恬树榆为塞也】竟斩阳周【集解孟康曰县名地属上郡正义括地志云宁州罗川县在州东南七十里汉阳周县】何者功多秦不能尽封因以法诛之今将军为秦将三岁矣所亡失以十万数而诸侯并起滋益多彼赵高素谀日久今事急亦恐二世诛之故欲以法诛将军以塞责使人更代将军以脱其祸夫将军居外久多内郤有功亦诛无功亦诛且天之亡秦无愚智皆知之今将军内不能直諫外为亡国将孤特独立而欲常存岂不哀哉将军何不还兵与诸侯为从【索隐此诸侯谓关东诸侯也何以知然文颖曰关东为从关西为横高诱曰关东地形从长苏秦相六国号为合从关西地形横长张仪相秦坏关东从使与秦合号曰连横】约共攻秦分王其地南面称孤此孰与身伏鈇质妻子为戮乎【索隐公羊传云加之鈇质何休云要斩之罪崔浩云质斩人榘也又郭注三苍云质莖榘也】章邯狐疑陰使候始成【集解张晏曰候军候索隐候军候官名始成其名】使项羽欲约约未成项羽使蒲将军日夜引兵度三户【集解服?曰漳水津也张晏曰三户地名在梁淇西南孟康曰津峡名也在邳西三十里索隐

水经注云漳水东经三户峡为三户津也淇当为湛按晋八王故事云王浚伐邲前至梁湛孟康云在邲西四十里又阚骠十三州志云邲北五十里梁期故县也字又不同】军漳南与秦战再破之项羽悉引兵击秦军污水上【集解徐广曰在邲西索隐污音于郡国志邲县有污城酈元云污水出武安山东南经污城北入漳正义括地志云污水源出怀州河内县北大行山又云故邲城在河内县西北二十七里古邲国地也左传云邲晋应韩武之穆也】大破之章邯使人见项羽欲约项羽召军吏谋曰粮少欲听其约军吏皆曰善项羽乃与期洹水南殷虚上【集解徐广曰二世三年七月也酈按应劭曰洹水在汤阴界殷虚故殷都也瓚曰洹水在今安阳县北去朝歌殷都一百五十里然则此殷虚非朝歌也汲冢古文曰盘庚迁於北冢曰殷虚南去邲三十里是旧殷虚然则朝歌非盘庚所迁者索隐按释例云洹水出汲郡林虑县东北至长乐入清水是也汲冢古文云盘庚自奄迁于北冢曰殷虚南去邲州三十里是殷虚南旧地名号北冢也】已盟章邯见项羽而流涕为言赵高项羽乃立章邯为雍王置楚军中使长史欣为上将军将秦军为前行到新安【正义括地志云新安故城在洛州澠池县东一十三里汉新安县城也即坑秦卒处】诸侯吏卒异时故繇使屯戍过秦中秦中吏卒遇之多无状及秦军降诸侯诸侯吏卒乘胜多奴虏使之轻折辱秦吏卒秦吏卒多窃言曰章将军等诈吾属降诸侯今能入关破秦大善即不能诸侯虏吾属而东秦必尽诛吾父母妻子诸将微闻其计以告项羽项羽乃召黥布蒲将军计曰秦吏卒尚衆其心不服至关中不听事必危不如击杀之而独与章邯长史欣都尉翳入秦於是楚军夜击阬秦卒二十余万人新安城南【集解徐广曰汉元年十一月】行略定秦地函谷关有兵守关不得入【集解文颖曰时关在弘农县衡山岭今移在河南谷城县索隐顔师古云今桃林县南有洪溜涧水即古之函关按山形如函故称函关正义括地志云函谷关在陕州桃林县西南十二里秦函谷关也图记云西去长安四百余里路在谷中故以为名】又闻沛公已破咸阳项羽大怒使当阳君等击关项羽遂入至于戏西沛公军霸上未得与项羽相见沛公左司马曹无伤使人言於项羽曰沛公欲王关中使子婴为相珍宝尽有之项羽大怒曰旦日飨士卒为击破沛公军当是时项羽兵四十万在新丰鸿门【集解孟康曰在新丰东十七里旧大道北下阪口名】沛公兵十万在霸上范增说项羽曰沛公居山东时贪於财货好美姬今入关财物无所取妇女无所幸此其志不在小吾令人望其气皆为龙虎成五采此天子气也急击勿失楚左尹项伯者项羽季父也【索隐名纒字伯後封射阳侯】素善留侯张良张良是时从沛公项伯乃夜驰之沛公军私见张良具告以事欲呼张良与俱去曰毋从俱死也张良曰臣为韩王送沛公【正义为于伪反】沛公今事有急亡去不义不可不语良乃入具告沛公沛公大惊曰为之奈何张良曰谁为大王为此计者曰鲋生说我曰距关毋内诸侯秦地可尽王也故听之【集解徐广曰鲋音土垢反鱼名酈案服?曰鲋音浅鲋小人貌也瓚曰楚汉春秋鲋姓也】良曰料大王士卒足以当项王乎沛公默然曰固不如也且为之奈何张良曰请往谓项伯言沛公不敢背项王也沛公曰君安与项伯有故张良曰秦时与臣游项伯杀人臣活之今事有急故幸来告良沛公曰孰与君少长良曰长於臣沛公曰君为我呼入吾得兄事之张良出要项伯项伯即入见沛公沛公奉卮酒为寿约为婚姻曰吾入关秋毫不敢有所近籍吏民封府库而待将军所以遣将守关者备他盗之出入与非常也日夜望将军至岂敢反乎愿伯具言臣之不敢倍德也项伯许诺谓沛公曰旦日不可不蚤自来谢项王沛公曰诺於是项伯复夜去至军中具以沛公言报项王因言曰沛公不先破关中公岂敢入乎今人有大功而击之不义也不如因善遇之项王许诺沛公旦日从百余骑来见项王至鸿门谢曰臣与将军戮力而攻秦将军战河

北臣战河南然不自意能先入关破秦得复见将军於此今者有小人之言令将军与臣有郤项王曰此沛公左司马曹无伤言之不然籍何以至此项王即日因留沛公与饮项王项伯东向坐亚父南向坐亚父者范增也【集解如淳曰亚次也尊敬之次父犹管仲为仲父】沛公北向坐张良西向侍范增数目项王举所佩玉玦以示之者三项王默然不应范增起出召项庄【正义项羽从弟】谓曰君王为人不忍若入前为寿寿毕请以劔舞因击沛公於坐杀之不者若属皆且为所虏庄则入为寿寿毕曰君王与沛公饮军中无以为乐请以劔舞项王曰诺项庄拔劔起舞项伯亦拔劔起舞常以身翼蔽沛公庄不得击於是张良至军门见樊哙樊哙曰今日之事何如良曰甚急今者项庄拔劔舞其意常在沛公也哙曰此迫矣臣请入与之同命哙即带劔拥盾入军门【正义拥紆拱反盾食允反】交戟之卫士欲止不内樊哙侧其盾以撞【正义撞直江反】卫士仆地哙遂入披帷西向立瞋目视项王【正义瞋昌真反】头发上指目眦尽裂【正义眦自赐反】项王按劔而跽曰【索隐其纪反谓长跪】客何为者张良曰沛公之参乘樊哙者也项王曰壮士赐之卮酒则与斗卮酒哙拜谢起立而饮之项王曰赐之彘肩则与一生彘肩樊哙覆其盾於地加彘肩上拔劔切而?之【索隐?徒覽反凡以食餒人则去声自食则上声】项王曰壮士能复饮乎樊哙曰臣死且不避卮酒安足辞夫秦王有虎狼之心杀人如不能举刑人如恐不胜天下皆叛之怀王与诸将约曰先破秦入咸阳者王之今沛公先破秦入咸阳毫毛不敢有所近封闭宫室还军霸上以待大王来故遣将守关者备他盗出入与非常也劳苦而功高如此未有封侯之赏而听细说欲诛有功之人此亡秦之续耳窃为大王不取也项王未有以应曰坐樊哙从良坐坐须臾沛公起如厕因招樊哙出沛公已出项王使都尉陈平【集解徐广曰一本无都字】召沛公沛公曰今者出未辞也为之奈何樊哙曰大行不顾细谨大礼不辞小让如今人方为刀俎我为鱼肉何辞为於是遂去乃令张良留谢良问曰大王来何操曰我持白璧一双欲献项王玉斗一双欲与亚父会其怒不敢献公为我献之张良曰谨诺当是时项王军在鸿门下沛公军在霸上相去四十里沛公则置车骑脱身独骑与樊哙夏侯婴靳强纪信等【索隐汉书作纪通通纪成之子】四人持劔盾步走从酈山下道芷阳间行沛公谓张良曰从此道至吾军不过二十里耳度我至军中公乃入沛公已去间至军中张良入谢曰沛公不胜桮杓不能辞谨使臣良奉白璧一双再拜献大王足下玉斗一双再拜奉大将军足下项王曰沛公安在良曰闻大王有意督过之脱身独去已至军矣【集解如淳曰脱身逃还其军】项王则受璧置之坐上亚父受玉斗置之地拔劔撞而破之曰唉【集解徐广曰唉乌来反索隐音虚其反皆叹恨发声之辞】竖子不足与谋夺项王天下者必沛公也吾属今为之虏矣沛公至军立诛杀曹无伤居数日项羽引兵西屠咸阳杀秦降王子婴烧秦宫室火三月不灭收其货宝妇女而东人或说项王曰关中阻山河四塞【集解徐广曰东函谷南武关西散关北萧关】地肥饶可都霸项王见秦宫室皆以烧残破又心怀思欲东归曰富贵不归故乡如衣绣夜行谁知之者说者曰人言楚人沐猴而冠耳果然【集解张晏曰沐猴猕猴也索隐言猕猴不任久着冠带以喻楚人性躁暴果然言果如人言也】项王闻之烹说者【集解駰案楚汉春秋扬子法言云说者是蔡生汉书云是韩生】项王使人致命怀王怀王曰如约乃尊怀王为义帝项王欲自王先王诸将相谓曰天下初发难时【集解服?曰兵初起时正义难乃憚反】假立诸侯後以伐秦然身被坚执锐首事暴露於野【正义暴蒲北反】三年灭秦定天下者皆将相诸君与籍之力也义帝虽无功故当分其地而王之诸将皆曰善乃分天下立诸将为侯王项王范增疑沛公之有天下业已讲解【集解苏林曰讲和也索隐服?云解折伏也说文云讲和解也汉书作媾解苏

林云媾和也是媾之与讲俱训和也业事也言虽有疑心然事已和解也】又恶负约恐诸侯叛之乃陰谋曰巴蜀道险秦之迁人皆居蜀乃曰巴蜀亦关中地也故立沛公为汉王【集解徐广曰以正月立】王巴蜀汉中都南郑【正义括地志云南郑梁州所理县也】而三分关中王秦降将以距塞汉王项王乃立章邯为雍王王咸阳以西都废邱【索隐孟康曰县名今槐里是也韦昭曰周时名犬邱懿王所都秦欲废之故曰废邱正义括地志云犬邱故城一名废邱古城在雍州始平县东南十里地理志云汉高二年引水灌废邱章邯自杀更废邱曰槐里】长史欣者故为栎阳狱掾尝有德於项梁都尉董翳者本劝章邯降楚故立司马欣为塞王【集解韦昭曰在长安东名桃林塞】王咸阳以东至河都栎阳【集解苏林曰栎音药正义括地志云栎阳故城一名万年城在雍州栎阳东北二十五里秦献公之城栎阳即此也】立董翳为翟王王上郡都高奴【集解文颖曰上郡秦所置项羽以董翳为翟王更名为翟索隐按今鄜州有高奴城正义括地志云延州州城即汉高奴县】徙魏王豹为西魏王王河东都平阳瑕邱申阳者【集解徐广曰一云瑕邱公也服?曰瑕邱县属山阳申姓阳名文颖曰姓瑕邱字申阳瓚曰瑕邱公申阳是瑕邱县名】张耳嬖臣也先下河南郡迎楚河上故立申阳为河南王都雒阳【正义括地志云洛阳故城在洛州洛阳县东北二十六里周公所筑即成周城也輿地志云成周之地秦庄襄王以为洛阳县三川守理之後汉都洛阳改为雒汉以火德忌水故去洛旁水而加佳魏於行次为土土水之忌也水得土而流土得水而柔故除佳以加水】韩王成因故都都阳翟【正义括地志云阳翟洛州县也左传云郑伯突入于栎杜预云栎郑别都今河南阳翟县是也地理志云阳翟县是属颍川郡夏禹之国】赵将司马卬定河内数有功故立卬为殷王王河内都朝歌徙赵王歇为代王赵相张耳素贤又从入关故立耳为常山王王赵地都襄国【正义括地志云邢州城本汉襄国县秦置三十六郡於此置信都县属钜鹿郡项羽改曰襄国立张耳为常山王理信都地理志云故邢侯国也帝王世纪云邢侯为纣三公以忠谏被诛史记云周武王封周公旦之子为邢侯左传云凡蒋邢茅周公之胤也】当阳君黥布为楚将常冠军故立布为九江王都六【正义括地志云故六城在壽州安丰县南百三十二里本六国偃姓皐繇之後所封也黥布亦皐繇之後居六也】鄱君吴芮率百越佐诸侯又从入关故立芮为衡山王都邾【集解韦昭曰鄱音蒲河反初吴芮为鄱令故号曰鄱君今鄱阳县是也文颖曰邾音朱县名属江夏正义鄱作番音婆说文云邾音诛括地志云故邾城在黄州黄冈县东南二十里本春秋时邾国邾子曹姓狭居至鲁隐公徙蕲音机】义帝柱国共敖【正义共音恭】将兵击南郡功多因立敖为临江王都江陵【集解駉案汉书音义曰本南郡改为临江国正义江陵荆州县史记江陵故郢都也】徙燕王韩广为辽东王【集解徐广曰都无终】燕将臧荼从楚救赵因从入关故立荼为燕王都蓟徙齐王田市为胶东王【集解徐广曰都即墨正义括地志云即墨故城在萊州胶水县南六十里古齐地本汉旧县胶音交在胶水之东】齐将田都从共敖赵因从入关故立都为齐王都临菑【索隐按高纪及田儋传云临济此言临菑误正义菑侧其反括地志云青州临旧县地即古临菑地也一名齐城古营邱之地所封齐之都也少昊时有爽鸠氏虞夏时有季荝殷时有逢伯陵殷末有薄姑氏为诸侯国此地後太公封方五百里】故秦所灭齐王建孙田安项羽方渡河救赵田安下济北数城引其兵降项羽故立安为济北王都博阳【正义在济北】田荣者数负项梁又不肯将兵从楚击秦以故不封成安君【正义案地理志云成安县在颍川郡属豫州】陈余弃将印去不从入关然素闻其贤有功於赵闻其在南皮故因环封三县【集解駉案汉书音义曰绕南皮三县以封之正义括地志云故南皮城在沧州南皮县北四里本

汉皮县城即陈余所封也】番君将梅鋗【集解韦昭曰呼玄反】功多故封十万户侯项王自立为西楚霸王【正义货殖传云淮南北沛郡汝南郡为西楚也彭城以东东海吴广陵为东楚也衡山九江江南豫章长沙为南楚】王九郡都彭城【集解孟康曰旧名江陵为南楚吴为东楚彭城为西楚正义彭城徐州县】汉之元年四月诸侯罢戏下各就国【索隐戏音义水名也言下者如许下洛下然也按上文云项羽入至戏西鸿门沛公还军霸上是羽初停军於戏水下今言诸侯罢戏下是各受封邑号令讫自戏下各就国何须假借文字以为旌麾之下乎顔师古刘伯庄之说皆非】项王出之国使人徙义帝曰古之帝者地方千里必居上游【集解文颖曰居水之上流也游或作流】乃使徙义帝长沙郴县【集解如淳曰郴音綌】趣义帝行其羣臣稍稍背叛之乃陰令衡山临江王击杀之江中【集解文颖曰郴县有义帝冢岁时常祠不絶】韩王成无军功项王不使之国与俱至彭城废以为侯已又杀之臧荼之国因逐韩广之辽东广弗聽荼击杀广无终并王其地田荣闻项羽徙齐王市胶东而立齐将田都为齐王乃大怒不肯遣齐王之胶东因以齐反迎击田都田都走楚齐王市畏项王乃亡之胶东就国田荣怒追击杀之即墨荣因自立为齐王而西击杀济北王田安并王三齐【集解駰案汉书音义曰齐与济北胶东正义三齐记云右即墨中临淄左平陆谓之三齐】荣与彭越将军印令反梁地陈余陰使张同夏说说齐王田荣曰项羽为天下宰不平今尽王故王於丑地而王其羣臣诸将善地逐其故主赵王乃北居代余以为不可闻大王起兵且不听不义愿大王资余兵请以击常山以复赵王请以国为扞蔽齐王许之因遣兵之赵陈余悉发三县兵与齐并力击常山大破之张耳走归汉陈余迎故赵王歇於代反之赵赵王因立陈余为代王是时汉还定三秦项羽闻汉王皆已并关中且东齐赵叛之大怒乃以故吴令郑昌为韩王以距汉令萧公角等【集解苏林曰官号也或曰萧令也时令皆称公】击彭越彭越败萧公角等汉使张良徇韩乃遗项王书曰汉王失职欲得关中如约即止不敢东又以齐梁反书遗项王曰齐欲与赵并灭楚楚以此故无西意而北击齐徵兵九江王布布称疾不往使将将数千人行项王由此怨布也汉之二年冬项羽遂北至城阳田荣亦将兵会战田荣不胜走至平原平原民杀之遂北烧夷齐城郭室屋皆阬田荣降卒系虏其老弱妇女徇齐至北海多所残灭齐人相聚而叛之於是田荣弟田横收齐亡卒得数万人反城阳项王因留连战未能下春汉王部【集解徐广曰一作刼索隐按汉书作刼字】诸侯兵【集解徐广曰塞翟魏殷河南駰按应劭曰雍翟塞殷韩也韦昭曰塞翟殷韩魏雍时已败也索隐按徐广韦昭皆数翟塞及殷韩等顔师古不数三秦谓常山河南韩魏殷顾胤意畧同乃以陈余兵为五未知孰是鄙意按韩王郑昌拒汉汉使韩信击破之则是韩兵不下而已破散也韩不在此数五诸侯者塞翟河南魏殷也正义师古云诸家之说皆非张良遗羽书曰汉王欲得关中如约即止不敢复东谓出关之东也今羽乃闻汉王东之时汉固已得三秦矣五诸侯者谓常山河南韩魏殷也此年十月常山王张耳降河南王申阳降韩王郑昌降魏王豹降虜殷王卬皆汉东之後故知谓此为五诸侯时虽未得常山之地功臣年表云张耳弃国与大臣归汉则当亦有士卒尔时雍王犹在废邱被围即非五诸侯之数也寻此纪文昭然可晓前贤注释并失指趣高纪及汉书皆言刼五诸侯兵凡兵初降士卒未有自指麾故须刼略而行又云发关中兵收三河士发谓差点拨发也收谓刼略收敛也韦昭云河南河东河内申阳都雒阳韩王成都阳翟皆河南也魏豹都平阳河东也司马卬都朝歌张耳都襄国河内也此三河士则五诸侯兵也更着雍塞翟则成八诸侯矣重明顔公之说是故韩信传云汉二年出关收魏河南韩殷王皆降是】凡五十六万人东伐楚项王闻之即令诸将击齐而自以精兵三万人南从鲁出胡陵【

正义括地志云徐州鲁兖州曲阜县也地理志云胡陵在山阳县属也】四月汉皆已入彭城收其货宝美人日置酒高会项王乃西从萧【正义括地志云徐州萧县古萧叔之国春秋时为宋附庸帝王世纪云周封子姓之别为附庸也】晨击汉军而东至彭城日中大破汉军【集解张晏曰一日之中也或曰旦击之至日中大破】汉军皆走相随入谷泗水【集解瓚曰二水皆在沛郡彭城】杀汉卒十余万人汉卒皆南走山【正义走音奏】楚又追击至灵壁东【集解徐广曰在彭城索隐孟康曰故小县在彭城南正义括地志云灵壁故城在徐州符离县西北九十里】睢水上【集解徐广曰睢水於彭城入泗水正义睢音虽括地志云睢水首受浚仪县茆荡水东经取虑入泗过郡其西行至一千二百六十里者矣】汉军却为楚所挤【集解服虔曰挤音济民之济瓚曰排挤也】多杀汉卒十余万人皆入睢水睢水为之不流【正义为干伪反】围汉王三匝於是大风从西北而起折木发屋扬沙石窃冥昼晦【集解徐广曰窃亦作宵字】逢迎楚军楚军大乱坏散而汉王乃得与数十骑遁去欲过沛收家室而西楚亦使人追之沛取汉王家家皆亡不与汉王相见汉王道逢得孝惠鲁元【集解服虔曰元长也食邑於鲁韦昭曰元谥也】乃载行楚骑追汉王汉王急推堕孝惠鲁元车下滕公常下收载之如是者三曰虽急不可以驱奈何弃之於是遂得脱求太公吕后不相遇审食其从太公吕后间行求汉王【集解瓚曰其音基如淳曰间出间步微行皆同义也索隐食音异按酈审赵三人同名其音合并同以六国时卫有司马食其并慕其名】反遇楚军楚军遂与归报项王项王常置军中是时吕后兄周吕侯【集解徐广曰名泽正义苏林云以姓名侯也晋灼云外戚表周吕令武侯泽也吕县名封於吕以为国颜师古云周吕封名令武其谥也苏云以姓名侯非也】为汉将兵居下邑【集解徐广曰在梁正义括地志云宋州砀山县本下邑县也在宋州东一百五十里按今下邑在宋州东一百一十里】汉王间往从之稍稍收其士卒至荥阳诸败军皆会萧何亦发关中老弱未傅悉诣荥阳【集解服虔曰傅音附孟康曰古者二十而傅三年耕有一年储故二十三年而後役之如淳曰律年二十三傅之畴官各从其父畴内学之高不满六尺二寸以下为罢癯汉仪注民年二十三为正一岁为卫士一岁为材官骑士习射御骑驰战阵又曰年五十六衰老乃得免为庶民就田里今老弱未尝傅者皆发之未二十三为弱过五十六为老食货志曰月为更卒已复为正一岁屯戍一岁力役三十倍於古者索隐按姚氏云古者更卒不过一月践更五月而休文颖云五当为三言一岁之中三月居更三日戍边总九十三日古者役人岁不过三日此所谓一岁力役三十倍於古也斯说得之】复大振楚起於彭城常乘胜逐北与汉战荥阳南京索间汉败楚【集解应劭曰京县名属河南有索亭晋灼曰索音栅正义括地志云京县城在郑州荥阳县东南二十里郑之京邑也晋太康地志云郑太叔段所居邑荥阳县即大索城杜预云成臯东有大索城又有小索故城在荥阳县北四里京相璠地名云京县有大索亭小索亭大小氏兄弟居之故有小大之号按楚与汉战荥阳南京索间即此三城耳】楚以故不能过荥阳而西项王之救彭城追汉王至荥阳田横亦得收齐立田荣子广为齐王汉王之败彭城诸侯皆复与楚而背汉汉军荥阳筑甬道属之河以取敖仓粟【集解瓚曰敖地名在荥阳西北山临河有太仓正义括地志云敖仓在郑州荥阳县西十五里县门之东北临汴水南带三皇山秦时置仓于敖山名敖仓云】汉之三年项王数侵夺汉甬道汉王食乏恐请和割荥阳以西为汉项王欲听之历阳侯范增曰【正义括地志云和州历阳县本汉旧县也淮南子云历阳之都一夕而为湖汉帝时历阳沦为历湖】汉易与耳今释弗取後必悔之项王乃与范增急围荥阳汉王患之乃用陈平计间项王项王使者来为太牢具举欲进之见使者详惊愕曰吾以为亚父使者乃反项王使

者更持去以恶食食项王使者【正义上食如字下音寺】使者归报项王项王乃疑范增与汉有私稍夺之权范增大怒曰天下事大定矣君王自为之愿赐骸骨归卒伍项王许之行未至彭城疽发背而死【集解駰案皇览曰亚父冢在庐江居巢县郭东居巢廷中有亚父井吏民皆祭亚父於居巢廷上长吏初视事皆祭然後从政後更造祠於郭东至今祠之正义疽七余反崔浩云疽附骨痛也括地志云髑髅山在庐州巢县东北五里昔范增居此山之阳後佐项羽】汉将纪信说汉王曰事已急矣请为王诳楚为王王可以间出於是汉王夜出女子荥阳东门被甲二千人楚兵四面击之纪信乘黄屋【正义李斐云天子车以黄繒为盖里】车傅左纛【集解李斐曰纛毛羽幢也在乘輿车衡左方上注之蔡邕曰以犁牛尾为之如斗或在駟头或在衡上也】曰城中食尽汉王降楚军皆呼万岁汉王亦与数十骑从城西门出走成臯【正义括地志云成臯故县在洛州汜水县西南二里】项王见纪信问汉王安在信曰汉王已出矣项王烧杀纪信汉王使御史大夫周苛枞公【集解駰案枞音七从反】魏豹守荥阳周苛枞公谋曰反国之王难与守城乃共杀魏豹楚下荥阳城生得周苛项王谓周苛曰为我将我以公为上将军封三万户周苛骂曰若不趣降汉汉今虏若若非汉敌也项王怒烹周苛并杀枞公汉王出荥阳南走宛叶得九江王布行收兵复入保成臯汉之四年项王进兵围成臯汉王逃【集解晋灼曰独出意索隐音徒凋及汉书作跳字】独与滕公出成臯北门【集解徐广曰北门名玉门】渡河走修武从张耳韩信军诸将稍稍得出成臯从汉王楚遂拔成臯欲西汉使兵距之巩令其不得西是时彭越渡河击楚东阿杀楚将军薛公项王乃自东击彭越汉王得淮陰侯兵欲渡河南郑忠说汉王乃止壁河内使刘贾将兵佐彭越烧楚积聚【正义积音积赐反】项王东击破之走彭越汉王则引兵渡河复取成臯军广武就敖仓食项王已定东海来西与汉俱临广武而军【集解孟康曰於荥阳筑两城相对为广武在敖仓西三皇山上正义括地志云东广武西广武在郑州荥阳县西二十里戴延之侧西征记云三皇山上有二城东曰东广武西曰西广武各在一山头相去百步汴水从广涧中东南流今涸无水城各有三面在敖仓西郭缘生述征记云一涧横絶上过名曰广武相对皆立城塹遂号东西广武】相守数月当此时彭越数反梁地絶楚粮食项王患之为高俎置太公其上【集解如淳曰高俎几之上李奇曰军中巢櫓方面人谓之俎也索隐俎亦机之类故夏侯湛新论为机机犹俎也比太公於牲肉故置之俎上姚察按左氏楚子登巢车以望晋军杜预谓车上櫓也故李氏云军中巢櫓又引时人亦谓此为俎也正义括地志云东广武城有高坛即是项羽坐太公俎上者今名项羽堆亦呼为太公亭顔师古云俎者所以荐肉示欲烹之故置俎上】告汉王曰今不急下吾烹太公汉王曰吾与项羽俱北面受命怀王曰约为兄弟吾翁即若翁必欲烹而翁则幸分我一桮羹项王怒欲杀之项伯曰天下事未可知且为天下者不顾家虽杀之无益祇益祸耳项王从之楚汉久相持未决丁壮苦军旅老弱罢转漕项王谓汉王曰天下匈匈数岁者徒以吾两人耳愿与汉王挑战【集解李奇曰挑身独战不复须衆也挑音茶了反瓚曰挑战撻挠敌求战古谓之致师】决雌雄毋徒苦天下之民父子为也汉王笑谢曰吾宁鬪智不能鬪力项王令壮士出挑战汉有善骑射者楼烦【集解应劭曰楼烦胡也今楼烦县】楚挑战三合楼烦辄射杀之项王大怒乃自被甲持戟挑战楼烦欲射之项王瞋目叱之楼烦目不敢视手不敢发遂走还入壁不敢复出汉王使人间问之乃项王也汉王大惊於是项王乃即汉王相与临广武间而语汉王数之项王怒欲一战汉王不听项王伏弩射中汉王汉王伤走入成臯项王闻淮陰侯已举河北破齐赵且欲击楚乃使龙且【集解韦昭曰音子闾反】往击之淮陰侯与战骑将灌婴击之大破楚军杀龙且韩信因自立为齐王

项王闻龙且军破则恐使盱台人武涉往说淮陰侯淮陰侯弗听是时彭越复反下梁地絕楚粮项王乃谓海春侯大司马曹咎等曰谨守成臯则汉欲挑战慎勿与战毋令得东而已我十五日必诛彭越定梁地复从将军乃东行击陈留【正义括地志云陈留汴州县也在州东五十里本汉陈留郡及陈留县之地孟康云留郑邑也後为陈所并故曰陈留臣瓚又按宋有留彭城留是也此留属陈故曰陈留】外黄外黄不下数日已降项王怒悉令男子年十五已上诣城东欲阬之外黄令舍人儿年十三【集解苏林曰令之舍人儿也瓚曰称儿者以其幼弱故系其父春秋传曰仍叔之子是也】往说项王曰彭越强劫外黄【正义强其两反】外黄恐故且降待大王大王至又皆阬之百姓岂有归心从此以东梁地十余城皆恐莫肯下矣项王然其言乃赦外黄当阬者东至睢阳【正义括地志云宋州外城本汉睢阳县也地理志云睢阳县故宋国也】闻之皆争下项王汉果数挑楚军战楚军不出使人辱之五六日大司马怒渡兵泛水【集解张晏曰泛水在济陰界如淳曰汜音祀左传曰鄙在郑地汜瓚曰高祖攻曹咎成臯渡泛水而战今成臯城东汜水是也索隐案今此水见名泛水音似张晏云在济阴亦未全失按古济水当此截河而南又东流溢为滎泽然水南曰陰此亦在济之陰非彼济陰郡耳臣瓚之说是正义括地志云汜水源出洛州汜水县东南三十二里方山山海经云浮戏之山汜水出焉】士卒半渡汉击之大破楚军尽得楚国货赂大司马咎长史翳塞王欣皆自刳汜水上【集解郑玄曰刳音经鼎反以刀割颈为刳】大司马咎者故蕲狱掾长史欣亦故栢阳狱吏两人尝有德於项梁是以项王信任之当是时项王在睢阳闻海春侯军败则引兵还汉军方围钜鹿於滎阳东【集解駰案汉书音义曰昧音未】项王至汉军畏楚尽走险阻是时汉兵盛

食【多】项王兵罢食絕汉遣陆贾说项王请太公项王弗听汉王复使侯公往说项王项王乃与汉约中分天下割鸿沟以西者为汉【集解文颖曰於滎阳下引河东南为鸿沟以通宋郑陈蔡曹卫与济汝淮泗会於楚即今官渡水也正义应劭云在滎阳东二十里张华云大梁城在浚仪县北县西北渠水东经此城南又北屈分为二渠其一渠东南流始皇凿引河水以灌大梁谓之鸿沟楚汉会此处也其一渠东经阳武县南为官渡水按张华此说是】鸿沟而东者为楚项王许之即归汉王父母妻子军皆呼万岁汉王乃封侯公为平国君【正义楚汉春秋云上欲封之乃肯见曰此天下之辨士所居倾国故号曰平国君按说归太公吕后能和平郡国】匿弗肯复见曰此天下辩士所居倾国故号为平国君项王已约乃引兵解而东归汉欲西归张良陈平说曰汉有天下太半【集解韦昭曰凡数三分有二为太半一为少半】而诸侯皆附之楚兵罢食尽此天亡楚之时也不如因其机而遂取之今释弗击此所谓养虎自遗患也【正义遗唯季反】汉王听之汉五年汉王乃追项王至阳夏南【集解如淳曰夏音贾正义括地志云陈州大康县本汉阳夏县也续汉书郡国志云阳夏县属陈国按太康县城夏后太康所筑隋改阳夏为太康】止军与淮陰侯韩信建成侯彭越期会而击楚军至固陵【集解徐广曰在阳夏駰按晋灼曰即固始也正义括地志云固陵县名也在陈州宛邱县西北四十二里】而信越之兵不会楚击汉军大破之汉王复入壁深堑而自守谓张子房曰诸侯不从约为之奈何对曰楚兵且破信越未有分地【集解李奇曰信越等未有益地之分也韦昭曰信等虽名为王未有所画经界】其不至固宜君王能与共分天下今可立致也即不能事未可知也君王能自陈以东傅海尽与韩信【正义傅音附着也陈即陈州古陈国都也自陈着海并齐旧地尽与齐王韩信也】睢阳以北至谷城以与彭越【正义括地志云谷

城故在齐州东阿县东二十六里睢阳宋州也自宋州以北至济州谷城际黄河尽与相国彭越【使各自为战【正义为于伪反】则楚易败也汉王曰善於是乃发使者告韩信彭越曰并力击楚楚破自陈以东傅海与齐王睢阳以北至谷城与彭相国使者至韩信彭越皆报曰请今进兵韩信乃从齐往刘贾军从寿春并行屠城父【集解如淳曰并行并击之正义父音甫寿州寿春县也城父亳州县也屠谓多刑杀也刘贾入围寿州引兵过淮北屠杀亳州城父而东北至垓下】至垓下【集解徐广曰在沛之浚县浚下交切駟按应劭曰垓音该李奇曰沛浚县聚邑名也索隐张揖三苍注云垓堤名在沛郡正义按垓下是高冈絶岩今犹高三四丈其聚邑及堤在垓之侧因取名焉今在亳州真源县东十里与老君相接浚音户交反】大司马周殷叛楚以舒屠六【集解如淳曰以舒之衆屠破六县正义括地志云舒今庐江则故舒城是也故六城在寿州安丰南百三十二里廛姓咎繇之後按周殷叛楚兼举九江郡之兵随刘贾而至垓下】举九江兵【正义九江郡壽州也楚考烈王二十二年自陈徙寿春号云郢至王负刍为秦将王翦蒙武所灭於是置九江郡应劭云自庐江?阳分为北江】随刘贾彭越皆会垓下诣项王项王军壁垓下兵少食尽汉军及诸侯兵围之数重夜闻汉军四面皆楚歌【集解应劭曰楚歌者谓鷄鸣歌也汉已略得其地故楚歌者多鷄鸣时歌也正义顔师古云楚人之歌也犹言吴讴越吟若鷄鸣为歌之名於理则可不得云鷄鸣时也高祖戚夫人楚舞自为楚歌岂亦鷄鸣时乎按顔说是也】项王乃大惊曰汉皆已得楚乎是何楚人之多也项王则夜起饮帐中有美人名虞【集解徐广曰一云姓虞氏正义括地志云虞姬墓在濠州定远县东六十里长老传云项羽美人冢也】常幸从骏马名骓【正义音佳顾野王云青白色也释畜云苍白杂毛骓也】常骑之於是项王乃悲歌慷慨自为诗曰力拔山兮气盖世时不利兮骓不逝骓不逝兮可奈何虞兮虞兮奈若何歌数阕美人和之【正义和音胡卧反楚汉春秋云歌曰汉兵已畧地四方楚歌声大王意气尽贱妾何聊生】项王泣数行下【正义数色庾反行色郎反】左右皆泣莫能仰视於是项王乃上马骑【正义其倚反凡单乘曰骑後同】麾下【正义麾亦作戏同呼危反】壮士骑从者八百余人直夜溃围南出驰走平明汉军乃觉之令骑将灌婴以五千骑追之项王渡淮骑能属者百余人耳【正义属音烛】项王至陰陵【集解徐广曰在淮南正义括地志云陰陵县故城在濠州定远县西北六十里地理志云陰陵县属九江郡】迷失道问一田父田父给曰左【集解文穎曰给欺也欺令左去】左乃陷大泽中以故汉追及之项王乃复引兵而东至东城【集解駟案汉书音义曰县名属临淮正义括地志云东城县故城在濠州定远县东南五十里地理志云东城县属九江郡】乃有二十八骑汉骑追者数千人项王自度不得脱谓其骑曰吾起兵至今八岁矣身七十余战所当者破所击者服未尝败北遂霸有天下然今卒困於此【正义卒子律反】此天之亡我非战之罪也今日固决死愿为诸君决战必三胜之为诸君溃围斩将刈旗令诸君知天亡我非战之罪也乃分其骑以为四队四向汉军围之数重项王谓其骑曰吾为公取彼一将令四面骑驰下期山东为三处【正义期遇山东分为三处汉军不知项羽处括地志云九头山在滁州全椒县西北九十六里江表传云项羽败至乌江汉兵追羽至此一日九战因名】於是项王大呼【正义火故反】驰下汉军皆披靡【正义上坡彼反靡言精体低垂】遂斩汉一将是时赤泉侯为骑将追项王项王瞋目叱之赤泉侯人马俱惊辟易数里【正义言人马俱惊开张易旧处乃至数里】与其骑会为三处汉军不知项王所在乃分军为三复围之项王乃驰复斩汉一都尉杀数十百人复聚其骑亡其两骑耳乃谓其骑曰何如骑皆伏曰如大王言於是项王乃欲东渡乌江【集解瓚曰在牛渚索隐按晋初属临淮正义括地志云乌

江亭即和州乌江县是也晋初为县注水经云水又北左传黄律口汉书所谓乌江亭长?船以待项羽即此也】乌江亭长?船待【集解徐广曰?音仪一音俄駟案应劭曰?正也孟康曰?音蚁附也附船着岸也如淳曰南方人谓整船向岸曰?索隐?字诸家各以意解尔邹诞本作样船以尚反刘氏亦有此音】谓项王曰江东虽小地方千里衆数十万人亦足王也愿大王急渡今独臣有船汉军至无以渡项王笑曰天之亡我我何渡为且籍与江东子弟八千人渡江而西今无一人还纵江东父兄怜而王我我何面目见之纵彼不言籍独不愧於心乎乃谓亭长曰吾知公长者吾骑此马五岁【正义骑音奇】所当无敌尝一日行千里不忍杀之以赐公乃令骑皆下马步行持短兵接战独籍所杀汉军数百人项王身亦被十余创顾见汉骑司马吕马童曰若非吾故人乎马童面之【集解张晏曰以故人故难视斫之故背之如淳曰面不正视也】指王翳曰此项王也【集解如淳曰指示王翳】项王乃曰吾闻汉购我头千金【正义汉以一斤金为一金当一万钱也】邑万户吾为若德【集解徐广曰亦可是功德之德正义为于伪反言吕马童与项羽先是故人旧有恩德於羽一云德行也】乃自刎而死王翳取其头余骑相蹂践争项王相杀者数十人最其後郎中骑杨喜骑司马吕马童郎中吕胜杨武各得其一体五人共会其体皆是分其地为五封吕马童为中水侯【索隐按晋书地道记其中水县属河间正义地理志云中水县属涿郡应劭云在易 二水之中故曰中水】封王翳为杜衍侯【索隐按地理志县在南阳按表作王翥也正义括地志云杜衍侯故县在邓州南阳县西八里】封杨喜为赤泉侯【索隐南阳有丹水县疑赤泉後改按汉书表及後汉作熹音火志反】封杨武为吴防侯【索隐地理志县名属汝南故房子国正义吴防豫州县括地志云吴房县本汉旧县孟康云吴王阖庐弟夫概奔楚楚封於此为堂谿氏本房子国以封吴故曰吴房】封吕胜为?阳侯【集解徐广曰五人後卒皆谥壮侯索隐地理志南阳县名正义涅年结反括地志云涅阳故地城在邓州穰县东北六十里本汉旧县也应劭云在?水之阳】项王已死【集解徐广曰汉五年之十二月也项王以始皇十五年己巳岁生死时年三十一】楚地皆降汉独鲁不下汉乃引天下兵欲屠之为其守礼义为主死节乃持项王头示鲁鲁父兄乃降始楚怀王初封项籍为鲁公及其死鲁最後下故以鲁公礼葬项王谷城【集解駟案皇览曰项羽冢在东郡谷城东去县十五里正义括地志云项羽墓在济州东阿县东二十七里谷城西三里述征记项羽墓任谷城西北三里半许毁坏有碣石项王之墓】汉王为发哀泣之而去诸项氏枝属汉王皆不诛乃封项伯为射阳侯【集解徐广曰项伯名?字伯正义射音食夜反括地志云楚州山阳本汉射阳县吴地志云在射水之阳故曰射阳】桃侯【集解徐广曰名襄其子舍为丞相正义括地志云故城在滑州胙城县东四十里汉书云高祖十二年封刘襄为桃侯也】平臯侯【集解徐广曰名佗正义括地志云平臯故城在怀州武德县东二十里汉平臯县按佗音徒何反】玄武侯【集解徐广曰诸侯表中不见】皆项氏赐姓刘氏

太史公曰吾闻之周生曰【集解文穎曰周时贤者正义孔文祥云周生汉时儒者姓周也按太史公云吾闻之周生则是汉人与太史公耳目相接明矣】舜目盖重瞳子【集解駟按尸子曰舜两眸子是谓重瞳】又闻项羽亦重瞳子羽岂其苗裔邪何兴之暴也夫秦失其政陈涉首难豪杰蠭起相与并争不可胜数然羽非有尺寸乘势起陇亩之中三年遂将五诸侯灭秦【集解駟案此时山东六国而齐赵韩魏燕五国并起从伐秦故云五诸侯】分裂天下而封王侯政由羽出号为霸王位虽不终近古以来未尝有也及羽背关怀楚【正义顔师古云

背关背约不王高祖於关中怀楚谓思东归而都彭城】放逐义帝而自立怨王侯叛已难矣自矜功伐奋其私智而不师古谓霸王之业欲以力征经营天下五年卒亡其国【正义卒音子律反五年谓高帝元年至五年杀项羽东城】身死东城尚不觉寤而不自责过矣乃引天亡我非用兵之罪也岂不谬哉

【索隐述赞曰亡秦鹿走伪楚?鸣云郁沛父劒挺吴城勲开鲁甸势合殪兵卿子无罪亚父推诚始救赵歇终诛子婴违约王汉背关怀楚帝迁上游臣迫故主灵壁大振成臯久拒战非无功天实不与嗟彼盖代卒为凶竖】

史记卷七

史记卷七考证

项羽本纪索隐项羽不可称本纪宜降为世家○【臣照】按史法天子则称本纪者盖祖述马迁之文马迁之前固无所为本纪也但马迁之意并非以本纪为天子之服物采章若黄屋左纁然非天子不可用也特以天下之权之所在则其人系天下之本即谓之本纪若秦本纪言秦未得天下之先天下之势已在秦也吕后本纪吕后固亦未若武氏之篡也而天下之势固在吕后则亦曰本纪也後世史官以君为本纪臣为列传固亦无可议者但是宗马迁之史法而小变之固不得转据後以议前也索隐之说谬矣

项梁尝有栎阳逮捕○诸本皆无捕字惟北监本有之广陵人召平○【臣世骏】按水经注广陵城楚汉之间为东阳郡高祖六年为荆国十一年为吴城景帝四年更名江都武帝元狩三年更曰广陵此纪言广陵者盖史家追书之也

楚虽三户亡秦必楚也集解瓚曰楚人怨秦虽三户犹足以亡秦也索隐臣瓚与苏林解同韦昭以为三户楚三大姓昭屈景也二说皆非按左氏以畀楚师於三户杜预注云今丹水县北三户亭则是地名不疑正义按服?云三户漳水津也孟康云津峡名也在邳西三十里括地志云浊漳水又东经葛公亭北经三户峡为三户津在相州?阳县界然则南公辨陰阳识废兴之数知秦亡必于三户故出此言後项羽果渡三户津破章邯军降章邯秦遂亡是南公之善识○【臣照】按三户只依瓚说为是作地名解迂矣曰虽曰必其义何居其後兵渡三户亦偶合耳正义亦是曲为傅会

西破秦军濮阳东正义括地志云濮阳县在濮州西八十六里濮县也古吴之国○古吴是昆吾二字之误

赵歇为王陈余为将张耳为相皆走入钜鹿城○或云此处余耳皆走入城下云余军於外岂入而复出耶张耳陈余传云张耳与赵王歇走入钜鹿城王离围之陈余北收常山兵得数万人军钜鹿北则余固未尝入城也盖下文陈余为将句与此处王相二句照应此处陈余为将句当是刊落未尽耳【臣照】按赵王将相皆入钜鹿城故章邯令王离涉间围钜鹿陈余为

将故北收常山兵数万军钜鹿北围固非顷刻可合也余之得出而收兵固也叙王与将相固不得独舍将不言而余之军钜鹿北以为将故则又不得不重叙也以为刊落未尽过矣

项羽召见诸侯将诸侯将入辕门○一本无下诸侯将三字

故立申阳为河南王都雒阳正义汉都洛阳改为雒汉以火德忌水故去洛旁水而加佳魏于行次为土土水之忌也水得土而流土得水而柔故除佳以加水○此鱼豢典略语水经注及魏志注中亦引之火德作火行水之忌也作水之牡也

故立芮为衡山王都邾正义春秋时邾国曹姓狭居至鲁隐公徙蕲○春秋隐公世无邾徙蕲事

故立都为齐王都临菑正义括地志云青州临菑县地即古临菑地也一名齐城古营邱之地所封齐之都也○文有舛误据汉书地理志宜云青州临菑县地一名齐城即古营邱之地师尚父所封齐之都也

使刘贾将兵佐彭越烧楚积聚项王东击破之走彭越汉王则引兵渡河复取成臯○归有光曰汉高纪使刘贾佐彭越烧楚积聚羽乃令曹咎守成臯而引兵定梁地汉破咎兵汜水上复取成臯是一事而此纪前後倒置遂作两段若汉先取成臯楚无缘得令咎守之也考汉书纪传自明

与汉俱临广武而军正义戴延之侧西征记云○侧字衍

睢阳以北至谷城以与彭越正义括地志云谷城故在齐州东阿县东二十六里○故下宜有城字

至垓下正义与老君相接○老君下宜有庙字

於是项王乃欲东渡乌江正义注水经云水又北左传黄律口汉书所谓乌江亭长?船以待项羽即此也○此条今本水经注无之

封吕胜为涅阳侯正义括地志云涅阳故地城在邓州穰县东北六十里○涅阳故地城地字衍文

及羽背关怀楚正义顔师古云背约不王高祖於关中怀楚谓思东归而都彭城○顾炎武曰谓舍关中形胜之地而都彭城若如师古之解乃背约非背关也

史记卷七考证

卷八

<史部,正史类,史记>

钦定四库全书

史记卷八

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

高祖本纪第八

高祖【集解駙案汉书音义曰讳邦张晏曰礼谥法无高以为功最高而为汉帝之太祖故特起名焉】沛丰邑中阳里人姓刘氏【集解李斐曰沛小沛也刘氏随魏徙大梁移在丰居中阳里孟康曰後沛为郡丰为县索隐按高祖刘累之後别食邑於范士会之裔留秦不反更为刘氏刘氏随魏徙大梁後居丰今言姓刘氏者是左传天子建德因生以赐姓胙之土命之氏诸侯以字为谥因以为族说者以为天子赐姓命氏诸侯命族族者氏之别名也然则因生赐姓若舜生姚墟以为姚姓封之於虞即号有虞氏是也若其後子孙更不得赐姓即遂以虞为姓云姓虞氏今此云姓刘氏亦其义也故姓者所以统系百代使不别也氏者所以别子孙之所出又系本篇言姓则在上言氏则在下故五帝本纪云禹姓姒氏契姓子氏弃姓姬氏是也按汉改泗水为沛郡治相城故注以沛为小沛也】字季【索隐按汉书名邦字季此单云字亦有可疑按汉高祖长兄名伯次名仲不见别名则季亦是名也故项岱云高祖小字季即位易名邦後因讳邦不讳季所以季布犹称姓】父曰太公【索隐皇甫谧云名执嘉王符云太上皇名煇与湍同音正义春秋握成图云刘媪梦赤鸟如龙戏已生执嘉】母曰刘媪【集解文穎曰幽州及汉中皆谓老嫗为媪孟康曰长老尊称也左师谓太后曰媪爱燕后贤长安君礼乐志地神曰媪媪母别名也音乌老反索隐韦昭云媪妇人长老之称皇甫谧云媪盖姓王氏又据春秋握成图以为执嘉妻含始游洛池生刘季诗含神雾亦云姓字皆非正史所出盖无可取今近有人云母温氏贞时打得班固泗水亭长古碑文其字分明作温字云母温氏贞与贾膺复徐彦伯魏奉古等执对反覆沉汉古人未闻聊记异见於何取实也孟康注地神曰媪者礼乐志云后土富媪张晏云坤为母故称媪也正义帝王世纪云汉昭灵后含始游洛池有宝鸡衔赤珠出炫日后吞之生高祖诗含神雾亦云含始即昭灵后也陈留风俗传云沛公

起兵野战丧皇妣於黄乡天下平定使使者以梓宫招幽魂於是丹蛇在水自洒跃入梓宫其浴处有遗髮諡曰昭灵夫人汉仪注云高帝母起兵时死小黄城後於小黄立陵庙括地志云小黄故城在汴州陈留县东北三十三里顔师古云皇甫谧等妄引讖记好奇骋博强为高祖父母名字皆非正史所说盖无取焉宁有刘媪本姓实存史迁肯不详载即理而言断可知矣】其先刘媪尝息大泽之陂梦与神遇是时雷电晦冥太公往视则见蛟龙於其上【索隐按诗含神雾云赤龙感女媪刘季兴又广雅云有鳞曰蛟龙】已而有身遂产高祖高祖为人隆準而龙顔【集解服虔曰準音拙应劭曰隆高也準颊权準也顔頤颞也齐人谓之颞汝南淮泗之间曰顔文颖曰準鼻也索隐始皇蜂目长準盖鼻高起文颖说是高祖感龙而生故其顔貌似龙长颈而高鼻】美须髯左股有七十二黑子【正义河图云帝刘季曰角戴胜斗臂龟背龙股长七尺八寸握成图云赤帝体为朱鸟其表龙顔多黑子按左阳也七十二黑子者赤帝七十二日之数也木火土金水各居一方一岁三百六十日四方分之各得九十日土居中央并索四季各十八日俱成七十二日故高祖七十二黑子者应火德七十二日之徵也有一本七十日者非也许北人呼为黥子吴楚谓之志志记也】仁而爱人喜施【正义喜许记反施尸跂反】意豁如也【集解服虔曰豁达也】常有大度不事家人生产作业及壮试为吏【集解应劭曰试补吏】为泗水亭长【正义秦法十里一亭十亭一乡亭长主亭之吏高祖为泗水亭长也国语有寓室即今之亭也亭长盖今里长也民有讼诤吏留平辨得成其政括地志云泗水亭在徐州沛县东一百步有高祖庙也】廷中吏无所不狎侮好酒及色常从王媪武负贯酒【集解韦昭曰贯赊也索隐邹诞生贯音世与字林声韵并同又音时夜反广雅云贯赊也说文云贯贷也临淮有贯阳县汉书功臣表贯阳侯刘纆而此纪作射阳则贯亦射也】醉卧武负王媪见其上常有龙怪之高祖每酤留饮酒雠数倍【集解如淳曰雠亦售索隐乐彦云借雠为售盖古字少假借耳今亦依字读盖高祖大度既贯饮且雠其数倍价也】及见怪岁竟此两家常折券弃责【索隐周礼小司寇聽称责以傳别郑司农云傳别券书也郑元云傳别谓大手书於札中而别之也然则古用简札书故可折至岁终总弃不贵也】高祖常繇咸阳【集解应劭曰繇役也索隐韦昭云秦所都武帝更名渭城应劭云今长安也按关中记云孝公都咸阳今渭城是在渭北始皇都咸阳今城南大城是也名咸阳者山南曰阳水北亦曰阳其地在渭水之北又在九嶷诸山之南故曰咸阳】纵观观秦皇帝【正义包恺云上音馆下音官恣意故纵观也】喟然太息曰嗟乎大丈夫当如此也单父人吕公【集解駰案汉书音义曰单音善父音斧索隐韦昭云单父县名属山阳崔浩云史失其名但举姓而言公又按汉旧仪云吕公汝南新蔡人又相经云魏人吕公名文字叔平也】善沛令避仇从之客因家沛焉沛中豪杰吏闻令有重客皆往贺萧何为主吏【集解孟康曰主吏功曹也】主进【集解文颖曰主赋歛礼进为之帅索隐郑氏云主赋歛礼钱也顔师古曰进者会礼之财字本作費声转为进宣帝数负进义与此同】令诸大夫曰【正义曰大夫客之贵者总称之】进不满千钱坐之堂下高祖为亭长素易诸吏乃给为谒曰贺钱万实不持一钱【集解应劭曰给欺也音殆索隐韦昭云给诈也刘氏云给欺负也何休云给疑也谓高祖素狎易诸吏乃诈为谒谒谓以札书姓名若今之通刺而兼载钱谷也】谒入吕公大惊起迎之门吕公者好相人见高祖状貌因重敬之引入坐萧何曰刘季固多大言少成事高祖因狎侮诸客遂坐上坐【正义上在果反下在卧反】无所诘【正义音丘忽反】酒阑【集解文颖曰阑言希也谓饮酒者半罢半在谓之阑】吕公因目固留高祖【正义不敢对衆显言故目动而留之】高祖竟酒後吕公曰臣少好相人【集解张晏曰古人相与语多自称臣自卑下之道若今人

相与语皆自称仆】相人多矣无如季相愿季自爱臣有息女【正义息生也谓所生之女也】愿为季箕帚妾酒罢吕媪怒吕公曰公始常欲奇此女与贵人沛令善公求之不与何自妄许与刘季吕公曰此非儿女子所知也卒与刘季吕公女乃吕后也生孝惠鲁元公主【集解服?曰元长也食邑於鲁韦昭曰元谥也正义汉帝制女曰公主仪比诸侯姊妹曰长公主仪比诸侯王姑曰大长公主仪比诸侯王】高祖为亭长时常告归之田【集解服?曰告音如嗥呼之嗥李斐曰休谒之名也吉日告凶曰宁孟康曰古者名吏休假曰告告又音啻汉律吏二千石有予告赐告予告者在官有功最法所当得者也赐告者病满三月当免天子优赐复其告使得带印绶将官属归家治疾也索隐韦昭云告请归乞假也音告语之告战国策曰商君告归延笃以为告归今之归宁也刘伯庄颜师古并音古笃反服音如嗥呼之嗥按东观汉记田邑传云邑年三十历卿大夫号归罢厌事少所嗜欲寻号与嗥同古者当有此语今服?虽据田邑号归亦恐未为得然此告字当音诰诰号声相近故後告归号归遂变也】吕后与两子居田中耨有一老父过请饮吕后因餽之【正义必捕反以食饲人也父本请饮吕后因饲之国语云国中童子无不餽】老父相吕后曰夫人天下贵人令相两子见孝惠曰夫人所以贵者乃此男也相鲁元亦皆贵老父已去高祖适从旁舍来吕后具言客有过相我子母皆大贵高祖问曰未远乃追及问老父老父曰乡者夫人婴儿皆似君君相贵不可言高祖乃谢曰诚如父言不敢忘德及高祖贵遂不知老父处高祖为亭长乃以竹皮为冠令求盗之薛治之【集解应劭曰以竹始生皮作冠今鹄尾冠是也求盗者旧时亭有两卒其一为亭父掌开闭扫除一为求盗掌逐捕盗贼薛鲁国县也有作冠师故往治之索隐应劭曰一名长冠侧竹皮裹以纵前高七寸广三寸如板又蔡邕独断云长冠楚制也高祖以竹皮为之谓之刘氏冠司马彪舆服志亦以刘氏冠为鹄尾冠应劭云旧亭卒名弩父陈楚谓之亭父或云亭部淮泗谓之求盗也】时时冠之【正义音馆】及贵常冠所谓刘氏冠【正义音官颜师古云後号为刘氏冠其後诏曰爵非公乘以上不得冠刘氏冠即此】乃是也高祖以亭长为县送徒酈山徒多道亡自度比至皆亡之【正义度田洛反比必寐反】至丰西泽中止饮夜乃解纵所送徒曰公等皆去吾亦从此逝矣徒中壮士愿从者十余人高祖被酒【正义被加也】夜径泽中【索隐旧音经按广雅云径小道音古定反言酒後放徒夜径行泽中不敢由正路且从小径】令一人行前【正义行音下孟反】行前者还报曰前有大蛇当径【索隐郑玄云步道曰径】愿还高祖醉曰壮士行何畏乃前拔劔击斩蛇【索隐汉旧仪云斩蛇劔长七尺又高祖云吾以布衣提三尺劔取天下二文不同者崔豹古今注当高祖为亭长理应提三尺劔耳及贵当别得七尺宝劔故仪因言之正义按其蛇大理须别求是劔斩之三尺劔者常佩之劔括地志云斩蛇沟源出徐州丰县中平地故老云高祖斩蛇处至县西十五里入泡水也】蛇遂分为两【索隐谓斩蛇分为两段】径开行数里醉因卧後人来至蛇所有一老嫗夜哭人问何哭嫗曰人杀吾子故哭之人曰嫗子何为见杀嫗曰吾子白帝子也化为蛇当道今为赤帝子斩之【集解应劭曰秦襄公自以居西戎主少昊之神作西時祠白帝至献公时栎阳雨金以为瑞又作畦時祠白帝少昊金德也赤帝尧後谓汉也杀之者明汉当灭秦也秦自谓水汉初自谓土皆失之至光武乃改定索隐按太康地理志云時在栎阳故城内其時若畦故曰畦時畦音户圭反应注云秦自谓水者按秦文公获黑龙命河为德水是也又按春秋合诚图云水神哭子褒败宋均以为高祖斩白蛇而神母哭则此母水精也此皆谬说又注云至光武乃改者谓改汉为火德秦为金德与雨金及赤帝子之理合者也】故哭人乃以嫗为不诚欲答之【集解徐广曰一作苦索隐说文云答击也汉书作苦谓欲困辱之】嫗因忽不见後人至高

祖觉【索隐包恺伯庄音古孝反】後人告高祖高祖乃心独喜自负【集解应劭曰负恃也索隐晋灼云自恃斩蛇事】诸从者日益畏之秦始皇帝常曰东南有天子气於是因东游以厌之【索隐厌音一涉反又一冉反广雅云厌镇也】高祖即自疑亡匿隐於芒砀山泽岩石之间【集解徐广曰芒今临淮县也砀县在梁颰按应劭曰二县之界有山泽之固故隐於其间也正义括地志云宋州砀山县在州东一百五十里本汉砀阳县也砀山在县东】吕后与人俱求常得之高祖怪问之吕后曰季所居上常有云气【正义顔师古曰京房易兆候云何以知贤人隐四方常有大云五色具而不雨其下有贤人隐矣故吕后望云气而得之】故从往常得季高祖心喜沛中子弟或闻之多欲附者矣秦二世元年【集解徐广曰高祖时年四十八索隐应劭云始皇欲以一至万示不相袭始者一故至子称二世崔浩云二世始皇子胡亥又按善文称隐士云赵高为二世杀十七兄而立为王则二世是第十八子也】秋陈胜等起蕲至陈而王号为张楚【索隐蕲县名属沛音机又音祈】诸郡县皆多杀其长吏以应陈涉沛令恐欲以沛应涉掾主吏萧何曹参【索隐按汉书萧曹传参为狱掾何为主吏】乃曰君为秦吏今欲背之率沛子弟恐不听愿君召诸亡在外者可得数百人因劫衆【索隐说文云以力胁之也】衆不敢不听乃令樊哙召刘季刘季之衆已数十百人矣【索隐汉书作数百人刘伯庄云数十人或至百人则是百人已下也】於是樊哙从刘季来沛令後悔恐其有变乃闭城城守欲诛萧曹萧曹恐踰城保刘季【集解韦昭曰以为保鄣】刘季乃书帛射城上谓沛父老曰天下苦秦久矣今父老虽为沛令守诸侯并起今屠沛【索隐范曄谓克城多所诛杀故云屠】沛令共诛令择子弟可立者立之以应诸侯则家室完不然父子俱屠无为也父老乃率子弟共杀沛令开城门迎刘季欲以为沛令刘季曰天下方扰诸侯并起今置将不善壹败涂地【索隐言一朝破败使肝脑涂地】吾非敢自爱恐能薄【正义能才能也高祖谦言才能薄劣不能完全其衆能者兽形色似熊足似鹿为物坚中而强力人之有贤才者皆谓之能也】不能完父兄子弟此大事愿更相推择可者萧曹等皆文吏自爱恐事不就後秦种族其家尽让刘季诸父老皆曰平生所闻刘季诸珍怪当贵且卜筮之莫如刘季最吉於是刘季数让衆莫敢为乃立季为沛公【集解徐广曰九月也颰按汉书音义曰旧楚僭称王其县宰为公陈涉为楚王沛公起应涉故从楚制称曰公】祠黄帝祭蚩尤於沛庭【集解应劭曰左传曰黄帝战於阪泉以定天下蚩尤好五兵故祠祭之求福祥也瓚曰管仲云葛卢山交而出水金从之出蚩尤受之以作劒戟索隐按管子云葛卢之山发而出金今注引发作交误也】而衅鼓【集解应劭曰衅祭也杀牲以血涂鼓曰衅瓚曰按礼记及大戴礼有衅庙之礼皆无祭事索隐说文云衅血祭也司马法曰血于鼙鼓者神戎器也顔师古曰杀牲以血祭者皆名为衅臣瓚以为皆无祭事非也又古人新成锺鼎亦必衅之应劭曰衅呼为酺马融注周礼灼龟之兆云谓其象似玉瓦原之衅?是用名之此说皆非?音火稼反】旗帜皆赤【索隐墨翟云帜帛长丈五广半幅字诂云帜标也字林又云熊旗五旂谓与士卒为期於其下故曰旗也帜或作识或作志嵇康音试萧该音炽】由所杀蛇白帝子杀者赤帝子故上赤於是少年豪吏如萧曹樊哙等皆为收沛子弟二三千人攻胡陵方与【集解郑德曰音房豫属山阳郡索隐邓展曰胡陵县名属山阳章帝改曰胡陆】还守丰秦二世二年陈涉之将周章军西至戏而还【索隐应劭云章字文陈人文颖云戏在新丰东二十里戏亭北孟康云水名也又述征记云戏水自骊山冯公谷北流历戏亭东入渭按今其水东惟有戏驿存还谓为章邯所破而还邯音酣】燕赵齐魏皆自立为王【索隐按汉书高纪二世二年八月武臣自立为赵王田儋自立为齐王韩广自立为燕王魏咎自立为魏王】项氏起吴秦泗川监平【集解

文颖曰泗川今沛郡也高祖更名沛秦时御史监郡若今刺史平名也索隐如淳云秦并天下为三十六郡置守尉监故此有监平下有守壮则平壮皆名也】将兵围丰二日出与战破之命雍齿守丰引兵之薛泗川守壮败於薛走至戚【集解如淳曰壮名也戚音将毒反索隐晋灼云东海县也郑德包恺并如字读李登音千笠反正义括地志云沂州临沂县有汉戚县故城地理志云临沂县属东海郡】沛公左司马得泗川守壮杀之【索隐颜师古云得司马之名非也按後云左司马曹无伤自此已下更不见替易处盖是左司马无伤得泗川守壮而杀之】沛公还军亢父【集解郑德曰亢音人相亢答父音甫属任城郡索隐旧音刚刘伯庄包恺并音苦浪反正义音刚又苦浪反括地志云亢父县也沛公屯军於此】至方与周市来攻方与未战陈王使魏人周市畧地周市使人谓雍齿曰丰故梁徙也【集解文颖曰梁惠王孙假为秦所灭转东徙於丰故曰丰梁徙】今魏地已定者数十城齿今下魏魏以齿为侯守丰不下且屠丰雍齿雅不欲属沛公【集解服虔曰雅故也苏林曰雅素也】及魏招之即反为魏守丰沛公引兵攻丰不能取沛公病还之沛沛公怨雍齿与丰子弟叛之闻东阳甯君秦嘉【集解文颖曰秦嘉东阳郡人也为甯县君瓚曰陈胜传曰广陵人秦嘉然则嘉非东阳人也秦嘉初起兵於郟号曰大司马又不为甯县君东阳甯君自一人秦嘉又自一人索隐按下文直云东阳甯君又别言秦嘉则臣瓚之说为得颜师古以甯是姓君者时人号之】立景驹为假王在留【索隐韦昭云今彭城留县也正义括地志云留城在徐州沛县东南五十里即张良所封处】乃往从之欲请兵以攻丰是时秦将章邯从陈别将司马尼【集解如淳曰从陈涉将也涉在陈其将相别在他许皆称陈尼章邯司马索隐谓章邯从陈别将将兵向他处而遣司马尼将领兵士北定楚地孔文祥曰邯别遣尼屠相又一说云从谓追逐之言章邯讨逐陈别将而司马尼别将兵北定楚地此理亦通也】将兵北定楚地屠相至碭【索隐韦昭云相沛县应劭云碭梁国苏林音唐又音宕正义括地志云故相城在徐州符离县西北九十里碭在宋州东一百五十里】东阳甯君沛公引兵西与战萧西【索隐韦昭云萧沛之县名谓在萧县之西】不利还收兵聚留引兵攻碭三日乃取碭因收碭兵得五六千人攻下邑拔之【索隐范曄云得城为拔韦昭云下邑县名属梁国也】还军丰闻项梁在薛【正义今徐州滕县故薛城也】从骑百余往见之【集解徐广曰三月】项梁益沛公卒五千人五大夫将十人【集解苏林曰五大夫第九爵也以五大夫为将凡十人也】沛公还引兵攻丰【集解徐广曰表云拔之雍齿奔魏】从项梁月余项羽已拔襄城【索隐韦昭云颍川县正义襄城许州县】还项梁尽召别将居薛闻陈王定死因立楚後怀王孙心为楚王治盱台【索隐韦昭云临淮县音吁夷正义楚县也】项梁号武信君居数月北攻亢父救东阿【索隐韦昭云东郡之县名正义济州县也】破秦军齐军归楚独追北【集解服虔曰师败曰北】使沛公项羽别攻城阳屠之【索隐地理志城阳属济阴】军濮阳之东【正义濮阳故城在濮州西八十六里本汉濮阳县】与秦军战破之秦军复振【集解李奇曰振整也如淳曰振起也收败卒自振迅而复起也】守濮阳环水【集解文颖曰决水以自环守为固也张晏曰依河水以自环绕作垒正义按二说皆通其濮阳县北临黄河言秦军北阻黄河南凿沟引黄河水环绕作壁垒为固楚军乃去】楚军去而攻定陶【索隐地理志云济阴县】定陶未下沛公与项羽西畧地至雍丘之下【索隐韦昭云故杞国今陈留县】与秦军战大破之斩李由还攻外黄【索隐韦昭云上陈留县正义在雍丘东】外黄未下项梁再破秦军有骄色宋义谏不聽【索隐荀悦汉纪云故楚令尹宋义当别有所出】秦益章邯兵夜衔枚击项梁【集解駰案周礼有衔枚氏郑玄曰衔枚止言语器讙也枚状如着横衔之縵结於项者縵音获】大破之定

陶项梁死沛公与项羽方攻陈留闻项梁死引兵与吕将军俱东吕臣军彭城东项羽军彭城西沛公军砀章邯已破项梁军则以为楚地兵不足忧乃渡河北击赵大破之当是之时赵歇为王【索隐歇苏林音如字郑德音遏絶之遏徐广音乌辖反今依字读】秦将王离围之钜鹿城此所谓河北之军也秦二世三年楚怀王见项梁军破恐徙盱台都彭城并吕臣项羽军自将之以沛公为砀郡长【正义括地志云宋州本秦砀郡苏林云长如郡守韦昭云秦名曰守是时改曰长】封为武安侯将砀郡兵封项羽为长安侯号为鲁公吕臣为司徒其父吕青为令尹【索隐按表青封信阳侯正义应劭云天子曰师尹诸侯曰令尹时去六国近故置令尹臣瓚曰诸侯之卿唯楚称令尹其余国不称时立楚之後故置官司皆如楚旧也】赵数请救怀王乃以宋义为上将军项羽为次将范增为末将北救赵令沛公西畧地入关与诸将约先入定关中者王之【索隐韦昭云函谷武关也又三辅旧事云西以散关为限东以函谷为界二关之中谓之关中】当是时秦兵强常乘胜逐北诸将莫利先入关独项羽怨秦破项梁军奋【索隐韦昭云愤激也】愿与沛公西入关怀王诸老将皆曰项羽为人僇悍猾贼【索隐说文云僇疾也悍勇也一云僇轻也音匹妙反汉书作祸贼也】项羽尝攻襄城襄城无遗类皆阬之【集解徐广曰遗一作噍噍食也音在妙反駰按如淳曰类无复有活而噍食者也青州俗言无子遗为无噍类】诸所过无不残灭且楚数进取【集解如淳曰楚谓陈涉也数进取多所攻取】前陈王【集解駰按汉书音义曰陈涉也】项梁皆败不如更遣长者扶义而西【正义遣长者扶持仁义而西告谕秦长少令降下也】告谕秦父兄秦父兄苦其主久矣今诚得长者往毋侵暴宜可下今项羽僇悍今【集解徐广曰无此字】不可遣独沛公素宽大长者可遣卒不许项羽而遣沛公西畧地收陈王项梁散卒乃道砀至成阳与杠里【集解駰案汉书音义曰道由砀也成阳杠里二县名索隐成阳县名在济阴韦昭云在颍州非也服?云杠里县名如淳云秦军所屯地名】秦军夹壁破魏二军楚军出兵击王离大破之【集解徐广曰表云三年十月攻破东郡尉及王离军於成武南】沛公引兵西遇彭越昌邑【正义地理志云昌邑属山阳括地志云在曹州成武县东北三十二里有梁邱故城是也】因与俱攻秦军战不利还至栗【索隐韦昭云县名属沛也】遇刚武侯【集解应劭曰楚怀王将也駰案汉书音义曰功臣表云棘蒲刚侯陈武武一姓柴刚武侯宜为刚侯武魏将也瓚曰功臣表柴武以将军起薛别救东阿至霸上入汉中非怀王将也又非魏将也例未有称谥正义颜师古云史失其名姓唯识其爵号不知谁也不当改为刚侯武应氏以为怀王将又云魏将无据矣表六年三月封孟颜二人说是】夺其军可四千余人并之与魏将皇欣魏申徒武蒲之军【正义并魏将也欣字或作欣音许斤反蒲汉书作满并通也】并攻昌邑昌邑未拔西过高阳【集解文颖曰聚邑名也属陈留圉县瓚曰陈留传曰在雍丘西南】酈食其【集解郑德曰音历异基】谓监门曰诸将过此者多吾视沛公大人长者乃求见说沛公沛公方踞牀使两女子洗足酈生不拜长揖曰足下必欲诛无道秦不宜踞见长者於是沛公起摄衣谢之延上坐食其说沛公袭陈留【集解駰案汉书音义曰春秋传曰轻行无钲鼓曰袭】得秦积粟乃以酈食其为广野君【索隐韦昭云在山阳】酈商为将将陈留兵与偕攻开封【索隐韦昭云河南县】开封未拔西与秦将杨熊战白马【索隐韦昭云东郡县正义括地志云白马故城在滑州卫南县西南二十四里戴延之西征记云白马故城卫之漕邑】又战曲遇东大破之【索隐徐广云曲遇在中牟韦昭云志不载司马彪郡国志中牟有曲遇聚也】杨熊走之荥阳【索隐韦昭云故卫地河南县也】二世使使者斩以徇【集解徐广曰四月】南攻颍阳屠之因张良遂略韩地轘轅【集解文颖曰河南新郑南至颍川南北皆韩地也以

良累世相韩故因之瓚曰轘辕险道名在缙氏东南索隐按十三州志云河南缙氏县以山为名一云轘辕为九十二曲是险道也】当是时别将司马卬方欲渡河入关沛公乃北攻平阴【集解駰案地理志河南有平陰县今河陰是也】絕河津南战雒阳东军不利还至阳城【正义今洛州夏禹所都】收军中马骑与南阳守龔战犍东【集解駰案地理志南阳有犍县索隐龔音蚁许慎以为侧啮也】破之略南阳郡南阳守龔走保城守宛【正义守音狩宛於元反括地志云南阳故城在宛大城之南隅其西南有二面皆故宛城】沛公引兵过而西张良谏曰沛公虽欲急入关秦兵尚衆距险今不下宛宛从後击强秦在前此危道也於是沛公乃夜引兵从他道还更旗帜黎明围宛城三匝【索隐黎音犁黎犹比也谓比至天明也汉书作迟音值待也谓待天明时皆言早意也楚汉春秋曰上南攻宛匿旌旗人衔枚马束舌鸡未鸣已围宛城三匝】南阳守欲自剄其舍人陈恢曰死未晚也乃踰城见沛公曰臣闻足下约先入咸阳者王之今足下留守宛宛大郡之都也连城数十人民衆积蓄多吏人自以为降必死故皆坚守乘城【索隐李奇曰乘守也韦昭曰乘登也】今足下尽日止攻士死伤者必多引兵去宛宛必随足下後足下前则失咸阳之约後又有强宛之患为足下计莫若约降封其守因使止守引其甲卒与之西诸城未下者闻声争开门而待足下通行无所累沛公曰善【集解徐广曰七月也】乃以宛守为殷侯【索隐韦昭曰在河内】封陈恢千户引兵西无不下者至丹水【正义括地志云故丹城在邓州内乡县西南百三十里南去丹水二百步汲冢纪年云后稷放帝子丹朱于丹水是也輿地志云秦为丹水县也地理志云丹水县属弘农郡抱朴子云丹水出丹鱼先夏至十日夜伺之鱼浮水侧光照如火网而取之割其血以涂足可以步行水上长居川中不溺】高武侯鳧【集解苏林曰鳧音鱼鳧之鳧晋灼曰功臣表戚鳧也】襄侯王陵降西陵【集解韦昭曰汉封王陵为安国侯初起兵时在南阳南阳有穰县疑襄当为穰而无禾字省耳今邵公或作召字此类多矣瓚曰时韩成封穰侯江夏有襄是所封索隐按王陵封安国侯是定天下为丞相时封耳此言襄侯当如臣瓚解盖初封江夏之襄也】还攻胡阳【集解一云陵索隐韦昭云南阳县】遇番君别将梅鋗与皆降析郦【集解如淳曰持益反索隐邹诞生音锡历苏林如淳音掷析属弘农郦属南阳出地理志而左传云析一名白羽析今内乡县郦今菊潭县也】遣魏人甯昌使秦使者未来是时章邯已以军降项羽於赵矣初项羽与宋义北救赵及项羽杀宋义代为上将军诸将黥布皆属破秦将王离军降章邯诸侯皆附及赵高已杀二世使人来欲约分王关中沛公以为诈乃用张良计使郦生陆贾往说秦将?以利因袭攻武关破之【索隐左传云楚司马起营所以临上雒谓晋人曰将通於少习杜预以为商县武关又太康地理志武关当冠军县西峽关在武关之西】又与秦军战於蓝田南益张疑兵旗帜诸所过毋得掠卤【集解应劭曰卤与虏同】秦人憚秦军解因大破之又战其北大破之乘胜遂破之

汉元年十月【集解如淳曰张苍传云以高祖十月至霸上故因秦以十月为岁首正义沛公已未年七月至霸上项羽封十八诸侯沛公封汉王後刘项五年战鬪汉遂灭楚天下归汉故却书初至霸上战之月】沛公兵遂先诸侯至霸上【正义故霸陵在雍州万年县东北二十五里汉霸陵文帝之陵邑也东南去霸陵十里地理志云霸陵故芷阳文帝更名三秦记云霸城秦穆公筑为宫因名霸城汉於北置霸陵庙记云霸城汉文帝筑沛公入关遂至霸上即此也】秦王子婴素车白马系颈以组封皇帝玺符节【索隐韦昭云天子印称玺又独以玉符发兵将也节使者所拥也说文云符信也汉制以竹长六寸分而相合释名云节为号令赏罚

之节也又节毛上下相重取象竹节又汉官仪曰子婴上始皇玺因服御之代代传受号又汉传国玺正义按天子有六玺皇帝行玺皇帝之玺皇帝信玺天子行玺天子之玺天子信玺皇帝信玺凡事皆用之玺令施行天子信玺以迁拜封王侯之玺以发兵皆以都紫泥封青布索白素两端无缝三秦记云紫泥水 今成州輿地志云汉封诏玺用紫泥则此水之泥也】降轺道旁【索隐轺音只汉书宫殿疏云枳道亭东去霸城观四里观东去霸水百步苏林云在长安东十三里正义轺音纸括地志云轺道在雍州万年县东北十六里苑中】诸将或言诛秦王【索隐楚汉春秋曰樊哙请杀之】沛公曰始怀王遣我固以能宽容且人已服降又杀之不祥乃以秦王属吏【正义属之欲反属付也】遂西入咸阳欲止宫休舍【正义休息也言欲居止宫殿中而息也】樊哙张良谏乃封秦重宝财物府库还军霸上召诸县父老豪杰曰父老苦秦苛法久矣诽谤者族【索隐刘伯庄乐彦同音方未反】偶语者弃市【集解应劭曰秦禁民聚语偶对也瓚曰始皇本纪曰偶语经书者弃市索隐按礼云刑人於市与衆弃之故今律谓绞刑为弃也】吾与诸侯约先入关者王之吾当王关中与父老约法三章耳杀人者死伤人及盗抵罪【集解应劭曰抵至也又当也除秦酷政但至於罪也李斐曰伤人有曲直盗贼有多少罪名不可预定故凡言抵罪未知抵何罪也张晏曰秦法一人犯罪举家及隣伍坐之今但当其身坐合於康诰父子兄弟罪不相及也索隐韦昭云抵当也谓使各当其罪今按秦法有三族之刑汉但约法三章耳杀人者死伤人及盗者使之抵罪余并不论其辜以言省刑也则抵训为至杀人以外唯伤人及盗使至罪名耳】余悉除去秦法诸吏人皆案堵如故【集解应劭曰案次第堵墙堵也】凡吾所以来为父老除害非有所侵暴无恐且吾所以还军霸上待诸侯至而定约束耳乃使人与秦吏行县乡邑告谕之秦人大喜争持牛羊酒食献飧军士沛公又让不受曰仓粟多非乏不欲费人人又益喜唯恐沛公不为秦王或说沛公【索隐楚汉春秋云解先生云遣守函谷无内项王而张良世家云酈生说我言酈小也小生即解生】曰秦富十倍天下地形强今闻章邯降项羽项羽乃号为雍王王关中今则来沛公恐不得有此可急使兵守函谷关【正义顔师古曰今桃林南有洪溜涧古函谷也其水北流入河西岸犹有旧关余迹西征记云道形如函也其水山原壁立数十仞谷中容一车】无内诸侯军稍微关中兵以自益距之沛公然其计从之十一月中项羽果率诸侯兵西欲入关关门闭闻沛公已定关中大怒使黥布等攻破函谷关十二月中遂至戏【正义许宜反】沛公左司马曹无伤闻项王怒欲攻沛公使人言项羽曰沛公欲王关中令子婴为相珍宝尽有之欲以求封【正义曹无伤欲就项羽求封】亚父劝项羽击沛公【索隐范增也项羽得范增号曰亚父言尊之亚於父犹管仲齐谓仲父父并音甫】方飧士旦日合战是时项羽兵四十万号百万沛公兵十万号二十万力不敌会项伯欲活张良夜往见良因以文谕项羽【正义项羽本纪云项伯曰沛公不先破关中公岂敢入乎今人有大功击之不义此以文谕之】项羽乃止沛公从百余骑驱之鸿门【索隐姚察云在新丰古城东未至戏水道南有断原南北洞门是也】见谢项羽项羽曰此沛公左司马曹无伤言之不然籍何以至此沛公以樊哙张良故得解归立诛曹无伤项羽遂西屠烧咸阳秦宫室所过无不残破秦人大失望然恐不敢不服耳项羽使人还报怀王怀王曰如约项羽怨怀王不肯令与沛公俱西入关而北救赵後天下约【正义怀王初约先入咸阳者王之令羽北救赵故失约在後也】乃曰怀王者吾家项梁所立耳非有功伐何以得主约本定天下诸将及籍也乃佯尊怀王为义帝实不用其命正月【正义崔浩云史官以正月纪四时故书正月也荀悦云先春後正月也顔师古云凡此诸月号皆大初正历之後记事者追改之非当时本称也以十月为岁

首即以十月为正月今此正月当是谓之四月也他皆放此】项羽自立为西楚霸王王梁楚地九郡都彭城负约更立沛公为汉王【正义梁州本汉中郡以汉水为名】王巴蜀汉中【集解徐广曰三十二县】都南郑三分关中立秦三将章邯为雍王【正义以岐州雍县为名】都废丘司马欣为塞王【正义塞先代反韦昭云在长安东名桃林塞按桃林塞今华州潼关也颜师古云取河华之固为扼塞耳非桃林】都栎阳【索隐因葬太上皇改名曰万年】董翳为翟王【正义文颖云本上郡秦所置项羽以董翳为王更名曰翟也】都高奴楚将瑕丘申阳为河南王【正义在黄河之南故曰河南即今河南府】都洛阳赵将司马卬为殷王【正义以商帝盘庚国殷中之地改商为殷在相州安阳县即北豕殷墟南去朝歌百三十六里故号殷王都朝歌】都朝歌赵王歇徙王代赵相张耳为常山王都襄国当阳君黥布为九江王都六【索隐韦昭云当阳南郡县名地理志六县属六安国】怀王柱国共敖为临江王【正义孟康云本南郡改为临江国是也】都江陵番君吴芮为衡山王都邾【索隐太康地理志云楚灭邾迁其人於江南因名县】燕将臧荼为燕王都蓟故燕王韩广徙王辽东广不聽臧荼攻杀之无终封成安君陈余河间三县居南皮封梅鋗十万户四月兵罢戏下【正义戏音麾许慎注淮南子云戏大旗也】诸侯各就国汉王之国项王使卒三万人从楚与诸侯之慕从者数万人从杜南【正义韦昭云今陵邑括地志云杜陵故城在雍州万年县东南十五里汉杜陵县宣帝陵邑也北去宣帝陵五里庙记云故杜伯国】入蚀中【集解季奇曰蚀音力在杜南如淳曰蚀入汉中道川谷名索隐孟康音食王劭按说文作锤器名也地形似器故名之】去辄烧絶栈道【索隐按系家是用张良计也栈道阁道也音士谏反包恺音士版反崔浩云险绝之处傍凿山岩而施版梁为阁】以备诸侯盗兵袭之亦示项羽无东意至南郑诸将及士卒多道亡归士卒皆歌思东归韩信说汉王曰【集解徐广曰韩王信非淮陰侯信也】项羽王诸将之有功者而王独居南郑是迁也【集解韦昭曰若有罪见迁徙】军吏士卒皆山东之人也日夜跂而望归【正义跂音丘赐反说文云跂举踵也司马彪云跂望也】及其锋而用之可以有大功天下已定人皆自宁不可复用不如决策东乡争权天下项羽出关使人徙义帝曰古之帝者地方千里必居上游【正义音流】乃使徙义帝长沙郴县趣义帝行【正义趣音促】羣臣稍倍叛之乃阴令衡山王临江王击之杀义帝江南项羽怨田荣立齐将田都为齐王田荣怒因自立为齐王杀田都而反楚予彭越将军印令反梁地楚令萧公角击彭越彭越大破之陈余怨项羽之弗王已也令夏说说田荣【正义上音悦下音税】请兵击张耳齐予陈余兵击破常山王张耳张耳亡归汉迎赵王歇於代复立为赵王赵王因立陈余为代王项羽大怒北击齐八月汉王用韩信之计从故道【索隐駟案地理志武都有故道县】还袭雍王章邯邯迎击汉陈仓【正义今岐州县也】雍兵败还走止战好畤【集解孟康曰畤音止神灵之所在也县名属右扶风】又复败走废丘汉王遂定雍地东至咸阳引兵围雍王废丘【索隐按荀悦汉纪令樊哙围之】而遣诸将略定陇西北地上郡令将军薛欧【正义音恶后反】王吸出武关【索隐按表欧以舍人从为将军封广平侯吸以中涓从为将军封清阳侯】因王陵兵南阳【集解如淳曰王陵亦聚党数千人居南阳正义括地志云王陵故城在商州上洛县南三十一里荆州记云昔汉高祖入秦王陵起兵丹水以应之此城王陵所筑因名也】以迎太公吕后於沛楚闻之发兵距之阳夏【索隐韦昭云县名属淮阳後属陈夏音更雅反】不得前令故吴令郑昌为韩王距汉兵

二年汉王东略地塞王欣翟王翳河南王申阳皆降韩王昌不聽使韩信击破之於是置陇西

北地上郡渭南【集解徐广曰後曰京兆】河上【集解徐广曰冯翊】中地郡【集解徐广曰扶风】关外置河南郡【集解徐广曰十月汉王至陕】更立韩太尉信为韩王诸将以万人若以一郡降者封万户缮治河上塞【集解晋灼曰晁错传秦时北攻胡筑河上塞】诸故秦苑囿园池皆令人得田之正月虏雍王弟章平大赦罪人汉王之出关至陕抚关外父老还张耳来见汉王厚遇之二月令除秦社稷更立汉社稷三月汉王从临晋渡魏王豹将兵从下河内虏殷王置河内郡南渡平阴津至雒阳新城【正义括地志云洛州伊阙县在州南七十里本汉新城也隋文帝改新城为伊阙取伊阙山为名也】三老董公遮说汉王【正义百官表云十里一亭亭有长十亭一乡乡有三老掌教化皆秦制也又乐彦云横道自言曰遮楚汉春秋云董公八十二遂封为成侯】以义帝死故汉王闻之袒而大哭【集解如淳曰袒亦如礼袒踊】遂为义帝发丧临三日发使者告诸侯曰天下共立义帝北面事之今项羽放杀义帝於江南大逆无道寡人亲为发丧诸侯皆缟素悉发关内兵收三河士【集解韦昭曰河南河东河内】南浮江汉以下【正义南收三河士发关内兵从雍州入子午道至汉中历汉水而下从是东行至徐州击楚】愿从诸侯王击楚之杀义帝者是时项王北击齐田荣与战城阳田荣败走平原【正义德州平原县是】平原民杀之齐皆降楚楚因焚烧其城郭系虏其子女齐人叛之田荣弟横立荣子广为齐王齐王反楚城阳项羽虽闻汉东既已连齐兵欲遂破之而击汉汉王以故得劫五诸侯兵遂入彭城项羽闻之乃引兵去齐从鲁【正义兖州曲阜也】出胡陵【正义地理志云胡陵在山阳郡】至萧【正义徐州萧县】与汉大战彭城灵壁东【正义在徐州符离县西北九十里】睢水上大破汉军多杀士卒睢水为之不流乃取汉王父母妻子於沛置之军中以为质当是时诸侯见楚强汉败还皆去汉复为楚塞王欣亡入楚吕后兄周吕侯为汉将兵居下邳【集解徐广曰在梁】汉王从之稍收士卒军碭汉王乃西过梁地至虞【集解徐广曰在梁】使谒者随何之九江王布所曰公能令布举兵叛楚项羽必留击之得留数月吾取天下必矣随何往说九江王布布果背楚楚使龙且往击之汉王之败彭城而西行使人求家室家室亦亡不相得败後乃独得孝惠六月立为太子大赦罪人令太子守栎阳诸侯子在关中者皆集栎阳为卫引水灌废丘废丘降章邯自杀更名废丘为槐里於是令祠官祀天地四方上帝山川以时祀之兴关内卒乘塞【集解李奇曰乘守也】是时九江王布与龙且战不胜与随何间行归汉汉王稍收士卒与诸将及关中卒益出是以兵大振荥阳破楚京索间

三年魏王豹谒归视亲疾至即絶河津反为楚汉王使郦生说豹豹不聽汉王遣将军韩信击大破之虏豹遂定魏地置三郡曰河东【正义今蒲州也】太原【正义今并州】上党【正义今潞州】汉王乃令张耳与韩信遂东下井陘击赵斩陈余赵王歇其明年立张耳为赵王汉王军荥阳南筑甬道【集解甬音勇韦昭云起土筑墙中间为道应劭云恐敌抄輜重故筑垣墙如街巷】属之河以取敖仓【正义孟康云敖地名在荥阳西北山上临河有大仓太康地理志云秦建敖仓於成臯】与项羽相距岁余项羽数侵夺汉甬道汉军乏食遂围汉王汉王请和割荥阳以西者为汉项王不聽汉王患之乃用陈平之计予陈平金四万斤以间疏楚君臣於是项羽乃疑亚父亚父是时劝项羽遂下荥阳及其见疑乃怒辞老愿赐骸骨归卒伍未至彭城而死汉军絶食乃夜出女子东门二千余人被甲楚因四面击之将军纪信乃乘王驾诈为汉王诳楚楚皆呼万岁之城东观以故汉王得与数十骑出西门遁令御史大夫周苛魏豹枹公守荥阳诸将卒不能从者尽在城中周苛枹公相谓曰反国之王难与守城因杀魏

豹【集解徐广曰按月表三年七月王出荥阳八月杀魏豹而又云四年三月周苛死四月魏豹死二者不同项羽杀纪信周苛枞公皆是三年中】汉王之出荥阳入关收兵欲复东袁生说汉王曰汉与楚相距荥阳数岁汉常困愿君王出武关项羽必引兵南走王深壁令荥阳成臯间且得休使韩信等辑河北赵地连燕齐君王乃复走荥阳未晚也如此则楚所备者多力分汉得休复与之战破楚必矣汉王从其计出军宛叶间【正义宛於元反叶式涉反宛邓州县也叶汝州县水经注云本楚惠王封诸梁子兼号曰叶城即子高之故邑也】与黥布行收兵项羽闻汉王在宛果引兵南汉王坚壁不与战是时彭越渡睢水与项声薛公战下邳彭越大破楚军项羽乃引兵东击彭越汉王亦引兵北军成臯项羽已破走彭越闻汉王复军成臯乃复引兵西拔荥阳诛周苛枞公而虏韩王信遂围成臯汉王跳【集解徐广曰音逃索隐如淳云跳走也晋灼按刘泽传跳驱至长安说文音徒调反通俗文云超通为跳】独与滕公共车出成臯玉门【集解徐广曰项羽纪云北门名玉门索隐夏侯婴为滕令故呼为滕公】北渡河驰宿修武自称使者晨驰入张耳韩信壁而夺之军乃使张耳北益收兵赵地使韩信东击齐汉王得韩信军则复振引兵临河南飡军小修武南【集解晋灼曰在大修武城东】欲复战郎中郑忠乃说止汉王使高垒深堑勿与战汉王听其计使卢绾【集解苏林曰绾音以绳绾结物之绾】刘贾将卒二万人骑数百渡白马津【索隐即黎阳津也南界东郡白马县】入楚地与彭越复击破楚军燕郭西【索隐故南燕国也在东郡秦以为县】遂复下梁地十余城淮阴已受命东未渡平原汉王使酈生往说齐王田广广叛楚与汉和共击项羽韩信用蒯通计遂袭破齐齐王烹酈生东走高密项羽闻韩信已举河北兵破齐赵且欲击楚则使龙且周兰【集解徐广曰一作简】往击之韩信与战骑将灌婴击大破楚军杀龙且齐王广犇彭越当此时彭越将兵居梁地往来苦楚兵绝其粮食

四年项羽乃谓海春侯大司马曹咎曰谨守成臯若汉挑战【正义挑田吊反下同】慎勿与战无令得东而已我十五日必定梁地复从将军乃行击陈留外黄睢阳下之汉果数挑楚军楚军不出使人辱之五六日大司马怒渡兵汜水【正义汜音祀在成臯故城东】士卒半渡汉击之大破楚军尽得楚国金玉货赂大司马咎长史欣皆自刭汜水上项羽至睢阳闻海春侯破乃引兵还汉军方围钟离昧於荥阳东项羽至尽走险阻韩信已破齐使人言曰齐边楚【集解文颖曰边近也】权轻不为假王恐不能安齐汉王欲攻之留侯曰不如因而立之使自为守乃遣张良操印绶立韩信为齐王【集解徐广曰三月】项羽闻龙且军破则恐使盱台人武涉往说韩信韩信不聽楚汉久相持未决丁壮苦军旅老弱罢转饟汉王项羽相与临广武之间而语项羽欲与汉王独身挑战汉王数项羽曰始与项羽俱受命怀王曰先入定关中者王之项羽负约王我於蜀汉罪一【索隐负音佩也】项羽矫杀卿子冠军而自尊罪二【集解徐广曰卿一作庆索隐韦昭云宋义之号如淳曰卿者卿大夫之尊子者子男之爵冠者人之首也尊宋义故加此号】项羽已救赵当还报而擅劫诸侯兵入关罪三怀王约入秦无暴掠项羽烧秦宫室掘始皇帝冢私收其财物罪四又强杀秦降王子婴罪五诈阬秦子弟新安二十万王其将罪六项羽皆王诸将善地【索隐谓章邯等】而徙逐故主【索隐谓田氏赵歇韩广之属也】令臣下争叛逆罪七项羽出逐义帝彭城自都之夺韩王地并王梁楚多自予罪八项羽使人阴弑义帝江南罪九夫为人臣而弑其主杀已降为政不平主约不信天下所不容大逆无道罪十也吾以义兵从诸侯诛残贼使刑余罪人击杀项羽何苦乃与公挑战项羽大怒伏弩射中汉王汉王伤胷乃扞足曰虏中吾指【索隐扞摸也中胷而扞足者

盖以矢初中痛闷不知所在故尔或云胷而扞足权以安士卒之心也】汉王病创卧张良强请汉王起行劳军以安士卒毋命楚乘胜於汉汉王出行军【正义行寒孟反】病甚因驰入成皋【索隐三辅故事曰楚汉相距於京索间六年身被大创十二矢石通中过者有四言汉王病创也】病愈西入关至栎阳存问父老置酒泉故塞王欣头栎阳市【索隐泉县首於木也欣自到於汜水上今泉之於栎阳者以旧都故泉以示之也】留四日复如军军广武关中兵益出当此时彭越将兵居梁地往来苦楚兵絶其粮食田横往从之项羽数击彭越等齐王信又进击楚项羽恐乃与汉王约中分天下割鸿沟而西者为汉鸿沟而东者为楚【索隐应劭云在荥阳东南二十里盖引河东南入淮泗也张华云一渠东流经浚仪是始皇所凿引河灌大梁谓之鸿沟一渠东至阳武南为官渡水北征记云中牟台下临汴水是为官渡水也】项王归汉王父母妻子军中皆呼万岁乃归而别去项羽解而东归汉王欲引而西归用留侯陈平计乃进兵追项羽至阳夏南止军与齐王信建成侯彭越期会而击楚军至固陵不会楚击汉军大破之汉王复入壁深堑而守之用张良计於是韩信彭越皆往及刘贾入楚地围寿春【正义今壽州】汉王败固陵【集解晋灼曰即固始】乃使使者召大司马周殷举九江兵而迎之【集解徐广曰周殷以兵随刘贾】武王行屠城父【正义父音甫今亳州县】随何刘贾齐梁诸侯皆大会垓下【集解徐广曰七月】立武王布为淮南王

五年高祖与诸侯兵共击楚军与项羽决胜垓下淮阴侯将三十万自当之孔将军居左费将军居右皇帝在後绛侯柴将军在皇帝後项羽之卒可十万淮阴先合不利却孔将军费将军纵【正义二人韩信将也纵兵击项羽也以纵字为絶句孔将军蓼侯孔熙费将军费侯陈贺也】楚兵不利淮阴侯复乘之【正义复侯富反乘犹登也进也】大败垓下项羽卒闻汉军楚歌【索隐应劭云楚歌今鷄鸣歌也颜游秦云楚歌犹吴讴也按高祖令戚夫人楚舞自为楚歌是楚人之歌声也】以为汉尽得楚地项羽乃败而走是以兵大败使骑将灌婴追杀项羽东城【集解徐广曰十二月】斩首八万遂畧定楚地鲁为楚坚守不下汉王引诸侯兵北示鲁父老项羽头鲁乃降遂以鲁公号葬项羽谷城还至定陶驰入齐王壁夺其军正月诸侯及将相相与共请尊汉王为皇帝汉王曰吾闻帝贤者有也空言虚语非所守也吾不敢当帝位羣臣皆曰大王起微细诛暴逆平定四海有功者辄裂地而封为王侯大王不尊号皆疑不信臣等以死守之汉王三让不得已曰诸君必以为便便国家甲午【集解徐广曰月甲午】乃即皇帝位汜水之阳【集解蔡邕曰上古天子称皇其次称帝其次称王秦承三王之末为汉驱除自以德兼三皇五帝故并以为号汉高祖受命功德宜之因而不改正义汜音敷劔反括地志云高祖即位坛在曹州济阴县界张晏曰汜水在济阴界取其汜爱弘大而润下】皇帝曰义帝无後齐王韩信习楚风俗徙为楚王都下邳【正义音被悲反泗州下邳县是楚王韩信之都】立建成侯彭越为梁王都定陶【正义曹州济阴县城是梁王彭越之都】故韩王信为韩王都阳翟【正义洛州阳翟县是韩王信之都】徙衡山王吴芮为长沙王都临湘【正义括地志云潭州长沙县本汉临湘县长沙王吴芮都之芮墓在长沙县北四里】番君之将梅鋗有功从入武关故德番君淮南王布燕王臧荼赵王敖皆如故天下大定高祖都雒阳诸侯皆臣属故临江王驩【集解徐广曰一作尉】为项羽叛汉令卢绾刘贾围之不下数月而降杀之雒阳五月兵皆罢归家诸侯子在关中者复之十二岁其归者复之六岁食之【正义食音寺】一岁高祖置酒雒阳南宫【正义括地志云南宫在雒州雒阳县东北二十六里洛阳故城中輿地志云秦时已有南北宫】高祖曰列侯诸将无敢隐朕皆言其情吾所

以有天下者何项氏之所以失天下者何高起王陵对曰【集解孟康曰姓高名起瓚曰汉帝年纪高帝时有信平侯臣陵都武侯臣起魏相丙吉奏事高帝时奏事有将军臣陵臣起】陛下慢而侮人项羽仁而爱人然陛下使人攻城略地所降下者因以予之与天下同利也项羽妬贤嫉能有功者害之贤者疑之战胜而不予人功得地而不予人利此所以失天下也高祖曰公知其一未知其二夫运筹策帷帐之中决胜於千里之外吾不如子房镇国家抚百姓给饷餼不絶粮道吾不如萧何连百万之军战必胜攻必取吾不如韩信此三人皆人杰也吾能用之此吾所以取天下也项羽有一范增而不能用此其所以为我擒也高祖欲长都雒阳齐人刘敬说及留侯劝上入都关中高祖是日驾入都关中六月大赦天下十月燕王臧荼反攻下代地高祖自将击之得燕王臧荼即立太尉卢绾为燕王使丞相哙将兵攻代其秋利几反【正义几音机姓名也项羽之将为陈县令降汉高帝徵诸侯利几恐故反】高祖自将兵击之利几走利几者项氏之将项氏败利几为陈公不随项羽亡降高祖高祖侯之颍川高祖至雒阳举通侯籍召之【集解如淳曰得在通侯之籍】而利几恐故反

六年高祖五日一朝太公如家人父子礼太公家令说太公曰天无二日土无二王今高祖虽子人主也太公虽父人臣也奈何令人主拜人臣如此则威重不行後高祖朝太公拥篲【集解李奇曰为恭也如今卒持帚者也】迎门却行高祖大惊下扶太公太公曰帝人主也奈何以我乱天下法於是高祖乃尊太公为太上皇【集解蔡邕曰不言帝非天子也索隐按本纪秦始皇追尊庄襄王为太上皇已有故事矣盖太上者无上也皇者德大於帝故尊其父号太上皇也】心善家令言赐金五百斤【索隐顾氏按荀悦云故虽天子必有尊也无父犹设三老况其存乎家令之言过矣晋刘宝云善其发悟己心因得尊崇父号也】十二月人有上变事告楚王信谋反上问左右左右争欲击之用陈平计乃伪游云梦【集解韦昭曰在南郡华容县】会诸侯於陈楚王信迎即因执之是日大赦天下田肯贺【索隐汉纪及汉书作宵刘显云相传作肯也】因说高祖曰甚善陛下得韩信又治秦中【集解如淳曰时山东人谓关中为秦中】秦形胜之国【集解张晏曰秦地带山河得形势之胜便者索隐韦昭云地形险固故能胜人也】带河山之险县隔千里持戟百万秦得百二焉【集解应劭曰河山之险与诸侯相悬隔地絶千里所以能禽诸侯者得天下之利百二也李斐曰河山之险由地势高顺流而下易故天下於秦悬隔千里持戟百万秦得百二焉苏林曰得百中之二焉秦地险固二万人足当诸侯百万人也索隐服?云谓函谷关去长安千里为悬隔按文以河山险固形胜其势如隔千里虞喜云百二者得百之二言诸侯持戟百万秦地险固百倍於天下故云得百二焉言倍之也盖言秦兵当二百万也齐得十二亦如之故为东西秦言势相敌但立文相避故云十二言余诸侯十万齐地形胜亦倍於他国当二十万人】地势便利其以下兵於诸侯譬犹居高屋之上建瓴水也【集解如淳曰瓴盛水瓶也居高屋之上而翻瓴水言其向下之势易也建音蹇晋灼曰许慎曰瓴甕似瓶者】夫齐东有琅邪即墨之饶南有泰山之固西有浊河之限【集解晋灼曰齐西有平原河水东北过高唐高唐即平原也孟津号黄河故曰浊河】北有勃海之利【索隐崔浩云勃旁跌也旁跌出者横在济北故齐都赋云海旁出为勃名曰勃海郡】地方二千里持戟百万县隔千里之外【索隐千里之外言齐境濶不啻千里故云千里之外】齐得十二焉【集解应劭曰齐得十之二故齐愍王称东帝後复归之卒为秦所灭者利钝之势异也李斐曰齐有山河之限地方二千里是与天下悬隔也设有持戟百万之衆齐得十中之二焉百万十分之二亦二十万也但文相避尔故言东西秦其势亦敌也苏

林曰十二得十中之二二十万人当百万言齐虽固不如秦二万乃当百万】故此东西秦也非亲子弟莫可使王齐矣高祖曰善赐黄金五百斤後十余日封韩信为淮阴侯分其地为二国高祖曰将军刘贾数有功以为荆王【索隐乃王吴地在淮东也姚察按虞喜云总言吴别言荆者以山命国也今西南有荆山在阳羨界贾封吴地而号荆王指取此义太康地理志阳羨县本名荆溪】王淮东弟交为楚王王淮西子肥为齐王王七十余城民能齐言者皆属齐【集解駰案汉书音义曰此言时民流移故使齐言者还齐也正义按言齐之远国次秦中故封子肥七十余城近齐城邑能齐言者咸割属齐亲子故大其都也孟说恐非】乃论功与诸列侯剖符行封徙韩王信太原【索隐信初都阳翟也】

七年匈奴攻韩王信马邑【正义搜神记云昔秦人筑城於武周塞以备胡城将成而崩者数矣有马驰走周旋反覆父老异之因依以筑城乃不崩遂名马邑括地志云朔州城汉鴈门即马邑县城也攻韩信於马邑即此城】信因与同谋反太原白土【集解徐广曰在上郡】曼丘臣王黄立故赵将赵利为王以反高祖自往击之会天寒士卒堕指者什二三遂至平城【正义括地志云朔州定襄县本汉平城县县东北三十里有白登山山上有台名曰白登台汉书匈奴传云冒顿围高帝於白登七日即此也服虔云白登台名去平城七里李穆叔赵记云平城东七里有土山高百余尺方十余里亦谓此也】匈奴围我平城七日而後罢去令樊噲止定代地立兄刘仲为代王二月高祖自平城过赵雒阳至长安长乐宫成丞相已下徙治长安【索隐汉仪注高祖六年更名咸阳曰长安三辅旧事渭城本咸阳地高帝为新城七年属长安也】

八年高祖东击韩王信余反寇於东垣【集解駰案地理志曰东垣高帝更名曰真定】萧丞相营作未央宫【正义括地志云未央宫在雍州长安县西北十里长安故城中颜师古云未央殿虽南向而当上书奏事谒见之徒皆诣北阙公车司亦在北焉是则以北阙为正门而又有东门东阙至於西南两面无门阙也萧何初立未央宫以厌胜之术理宜然乎按北阙为正者盖象秦作前殿渡渭水属之咸阳以象天极阁道絶汉抵营室】立东阙北阙【集解駰案关中记曰东有苍龙阙北有玄武阙玄武所谓北阙索隐东阙名苍龙北阙名玄武无西南二阙者盖萧何以厌胜之法故不立说文云阙门观也秦家旧宫皆在渭北而立东阙北阙盖取其便】前殿武库太仓高祖还见宫阙壮甚怒谓萧何曰天下匈匈苦战数岁成败未可知是何治宫室过度也萧何曰天下方未定故可因遂就宫室且夫天子以四海为家非壮丽无以重威且无令後世有以加也高祖乃说高祖之东垣过栢人【正义括地志云栢人故城在邢州栢人县西北十二里汉栢人属赵国】赵相贯高等谋弑高祖高祖心动因不留代王刘仲弃国亡自归雒阳废以为合阳侯【正义括地志云合阳故城在同州河西县二里魏文侯十七年攻秦至郑而还筑在合水之阳也】

九年赵相贯高等事发觉夷三族废赵王敖为宣平侯是岁徙贵族楚昭屈景怀齐田氏关中未央宫成高祖大朝诸侯羣臣置酒未央前殿高祖奉玉卮【集解应劭曰乡饮酒礼器也受四升】起为太上皇寿曰始大人常以臣无赖【集解晋灼曰许慎曰赖利也无利入於家也或曰江湖之间谓小儿多诈狡猾为无赖】不能治产业不如仲力今某之业所就孰与仲多殿上羣臣皆呼万岁大笑为乐

十年十月淮南王黥布梁王彭越燕王卢绾荆王刘贾楚王刘交齐王刘肥长沙王吴芮皆来朝长乐宫【正义括地志秦栎阳故宫在雍州栎阳县北三十五里秦献公所造三辅黄图云高祖都长安未有宫室居栎阳宫也】春夏无事七月太上皇崩栎阳宫楚王梁王皆来送葬【集解駰案汉书云葬万年】赦栎阳囚更命酈邑曰新丰【正义酈音力知反括地志云新丰故城在雍州新丰县西南四里汉新丰宫也太上皇时凄怆不乐高祖窃因左右问故荅以平生所好皆屠贩少年酤酒卖饼鬪鸡蹴鞠以此为欢今皆无此故不乐高祖乃作新丰徙诸故人实之太上皇乃悦按前于酈邑筑城寺徙其民实之未改其名太上皇崩後命曰新丰】八月赵相国陈豨【集解邓展曰东海人名猪曰豨】反代地上曰豨尝为吾使甚有信代地吾所急也故封豨为列侯【集解徐广曰豨攻定臧荼有功封阳夏侯】以相国守代今乃与王黄等劫掠代地代地吏民非有罪也其赦代吏民九月上自东往击之至邯鄲上喜曰豨不南据邯鄲而阻漳水吾知其无能为也闻豨将皆故贾人也上曰吾知所以与之乃多以金豨将豨将多降者十一年高祖在邯鄲诛豨等未毕豨将侯敞将万余人游行王黄军曲逆【集解文颖曰今中山蒲阴是】张春渡河【正义陈豨将也又刘伯庄云彼时聊城在黄河之东王莽时乾今浊河西北也今在博州西北深丘道里记云王莽元城人居近河侧祖父坟墓为水所冲引河入深川此王莽河因枯也】击聊城【集解徐广曰在平原正义括地志云故聊城在博州聊城县西二十里春秋时齐之西界聊摄也战国时亦为齐地秦汉皆为东郡之聊城也】汉使将军郭蒙与齐将击大破之太尉周勃【集解駰案汉书百官表曰太尉秦官应劭曰自上安下曰尉武官悉以为称】道太原入代地【集解韦昭曰道犹从】至马邑马邑不下即攻残之豨将赵利守东垣高祖攻之不下月余卒骂高祖高祖怒城降令出骂者斩之不骂者原之於是乃分赵山北立子恒以为代王都晋阳【集解如淳曰文纪言都中都又文帝过太原复晋阳中都二岁以迁都於中都也】春淮阴侯韩信谋反关中夷三族夏梁王彭越谋反废迁蜀复欲反遂夷三族立子恢为梁王子友为淮阳王秋七月淮南王黥布反东并荆王刘贾地北渡淮楚王交走入薛高祖自往击之立子长为淮南王

十二年十月高祖已击布军会甄【集解徐广曰在蕲县西駰案汉书音义曰会音侔保邑名甄音直伪反索隐汉书甄作缶音保非也】布走令别将追之高祖还归过沛留置酒沛宫【正义括地志云沛宫故地在徐州沛县东南二十里一步】悉召故人父老子弟纵酒发沛中儿得百二十人教之歌酒酣【集解应劭曰不醒不醉曰酣一曰酣洽也】高祖击筑【集解韦昭曰筑古乐有弦击之不鼓正义音竹应劭云状似瑟而大头安弦以竹击之故名曰筑颜师古云今筑形似瑟而小细项】自为歌诗曰大风起兮云飞扬威加海内兮归故乡安得猛士兮守四方令儿皆和习之高祖乃起舞慷慨伤怀泣数行下谓沛父兄曰游子悲故乡吾虽都关中万岁後吾魂魄犹乐思沛且朕自沛公以诛暴逆遂有天下其以沛为朕汤沐邑【集解駰案风俗通义曰汉书注沛人语初发声皆言其其者楚言也高祖始登帝位教令言其後以为常尔】复其民世世无有所与沛父兄诸母故人日乐饮极驩道旧故为笑乐十余日高祖欲去沛父兄固请留高祖高祖曰吾人衆多父兄不能给乃去沛中空县皆之邑西献【集解如淳曰献牛酒】高祖复留止张【集解张晏曰张帷帐正义音张亮反】饮三日沛父兄皆顿首曰沛幸得复丰未复唯陛下哀怜之高祖曰丰吾所生长极不忘尔吾特为其以雍齿故反我为魏沛父兄固请乃并复丰比沛於是拜沛侯刘濞【集解服虔曰濞音帔】为吴王汉将别击布军洮水南北【集解徐广曰洮音道在江淮间】皆大破之追得斩布鄱阳樊噲别

将兵定代斩陈豨当城【索隐代之县名正义括地志云当城在朔州定襄县界土地十三州记云当城在高柳东八十里县当常山故曰当城】十一月高祖自布军至长安十二月高祖曰秦始皇帝楚隐王【索隐世家作幽王名桀负刍之兄】陈涉魏安厘王【索隐史阙名昭王之子王假之祖】齐湣王【索隐名地宣王子王建祖】赵悼襄王【索隐名偃孝成王丹之子幽王迁之父】皆绝无後予守冢各十家秦皇帝二十家魏公子无忌五家赦代地吏民为陈豨赵利所刼掠者皆赦之陈豨降将言豨反时燕王卢绾使人之豨所与阴谋上使辟阳侯迎绾【正义审食其也括地志云辟阳故城在冀州信都县西三十五里汉旧县】绾称病辟阳侯归具言绾反有端矣二月使樊噲周勃将兵击燕王绾赦燕吏民与反者立皇子建为燕王高祖击布时为流矢所中行道病病甚吕后迎良医医入见高祖问医医曰病可治於是高祖嫚骂之曰吾以布衣提三尺劔取天下此非天命乎命乃在天虽扁鹊何益遂不使治病赐金五十斤罢之已而吕后问曰陛下百岁後萧相国即死令谁代之上曰曹参可问其次上曰王陵可然陵少戇陈平可以助之陈平智有余然难以独任周勃重厚少文然安刘氏者必勃也可令为太尉吕后复问其次上曰此後亦非而所知也卢绾与数千骑居塞下候伺幸上病愈自入谢四月甲辰高祖崩长乐宫【集解皇甫谧曰高祖以秦昭王五十一年生至汉十二年六十三】四日不发丧吕后与审食其谋曰诸将与帝为编户民今北面为臣此常怏怏今乃事少主非尽族是天下不安人或闻之语酈将军【集解酈案汉书曰酈商】酈将军往见审食其曰吾闻帝已崩四日不发丧欲诛诸将诚如此天下危矣陈平灌婴将十万守荥阳樊噲周勃将二十万定燕代此闻帝崩诸将皆诛必连兵还乡以攻关中大臣内叛诸侯外反亡可翘足而待也审食其入言之乃以丁未发丧大赦天下卢绾闻高祖崩遂亡入匈奴丙寅葬【集解徐广曰五月】己巳立太子【正义丙寅葬後四日至己巳即立太子为帝有本脱己字者妄引汉书云己下者非】至太上皇庙【正义三辅黄图云太上皇庙在长安城香室南冯翊府北括地志云汉太上皇庙在雍州长安县西北长安故城中酒池之北高祖庙北高帝庙亦在故城中也】羣臣皆曰高祖起微细拨乱世反之正平定天下为汉太祖功最高上尊号为高皇帝太子袭号为皇帝孝惠帝也令郡国诸侯各立高祖庙以岁时祠及孝惠五年思高祖之悲乐沛以沛宫为高祖原庙【集解徐广曰光武纪曰上幸丰祠高祖於原庙酈按谓原者再也先既已立庙今又再立故谓之原庙】高祖所教歌儿百二十人皆令为吹乐後有缺辄补之高祖八男长庶齐悼惠王肥次孝惠吕后子次戚夫人子赵隐王如意次代王恒已立为孝文帝薄太后子次梁王恢吕太后时徙为赵共王次淮阳王友吕太后时徙为赵幽王次淮南厉王长次燕王建

太史公曰夏之政忠忠之敝小人以野【集解郑玄曰忠质厚也野少礼节也】故殷人承之以敬敬之敝小人以鬼【集解郑玄曰多威仪如事鬼神】故周人承之以文文之敝小人以僇【集解徐广曰一作薄酈按史记音隐曰僇音西志反郑玄曰文尊卑之差也薄苟习文法无愆诚也索隐郑音先代反邹本作薄音扶各反本一作僇而徐广云一作薄是本互不同也然此语本出礼表記作其民之敝利而巧文而不慙贼而蔽也裴又引音隐云僇音西志者蔽僇声相近故以蔽为僇尔】故救僇莫若以忠【集解郑玄曰复反始】三王之道若循环终而复始周秦之间可谓文敝矣秦政不改反酷刑法岂不缪乎故汉兴承敝易变使人不倦得天统矣朝以十月车服黄屋左纛葬长陵【集解皇甫谧曰长陵山东西广百二十丈高十三丈在渭水北去长安城三十五里正义括地志云长陵在雍州咸阳县东三十里索隐述赞曰

高祖初起始自徒中言从泗上即号沛公啸命豪杰奋发材雄彤云郁砀素灵告丰龙变星聚蛇分径空项氏主命负约弃功王我巴蜀实愤于衷三秦既北五兵遂东汜水即位咸阳筑宫威加四海还歌大风】

史记卷八

史记卷八考证

高祖本纪姓刘氏索隐因生赐姓若舜生姚墟以为姚姓封之於虞号有虞氏其後子孙即遂以虞为姓云姓虞氏今此云姓刘氏亦其义也○吴仁杰两汉刊误补遗曰索隐之说非也姓与氏相近而不同古者赐姓命氏如赐姓曰董氏曰豢龙析姓氏而二之则固有别矣刘氏本陶唐氏之後则刘者氏也非姓也於此当云高祖刘氏出自祁姓可也此误自太史公启之

常从王媪武负贯酒索隐邹诞生贯音世与字林声韵并同又音时夜反广雅云贯賒也说文云贯贷也临淮有贯阳丝汉书功臣表贯阳侯刘纆而此记射阳则贯亦射也○顏师古曰贯賒也李登吕忱并音式制反而今之读者谓与射同乃引地名射阳其字作贯以为证验此说非也假令地名为射自是假借当时所呼别有意义岂得即定其字以为正音乎

此两家常折券弃责索隐周礼小司寇听称责以傳别○周礼小司寇但有正之以傳别约剂之文聽称责以傳别本小宰职中语

生孝惠鲁元公主正义汉帝制【句】女曰公主【句】仪比诸侯【句】○推寻文义宜云汉制【句】帝女曰公主【句】

乃以竹皮为冠索隐应劭曰一名长冠侧竹皮裹以纵前高七寸广三寸如板○後汉书舆服志云高七寸广三寸促漆纚为之制如板然则侧竹皮裹以纵前七字应是竹皮裹以纚之讹

吾子白帝子也化为蛇当道今为赤帝子斩之集解应劭曰秦襄公自以居西戎主少昊之神作西時祠白帝至献公时栢阳雨金以为瑞又作畦時祠白帝少昊金德也赤帝尧後谓汉也杀之者明当汉灭秦也秦自谓水汉初自谓土皆失之至光武乃改定○黄氏日抄曰白帝子注谓指秦叶碧庵先生以为西楚徐孚远曰沈休文以为白帝金也金生水白帝之子水赤帝火也火生土赤帝之子土也然则秦自谓水汉自谓土不为失也失在误以赤帝子为赤帝也

高祖觉索隐包恺伯庄音古孝反○伯庄上宜有刘字隐於芒砀山泽岩石之间正义括地志云宋州砀山县在州东一百五十里本汉砀阳县也○阳字疑衍

季所居上常有云气正义顏师古曰京房易兆候云○隋书经籍志作易飞候

还攻外黄索隐韦昭云上陈留县○上字衍外黄县属陈留郡盖云陈留之县耳或上字系在

字之讹下县字衍

因袭攻武关破之索隐左传云楚司马起营所以临上雒○哀四年左传云司马起丰析与狄戎以临上雒

封皇帝玺符节正义天子信玺以迁拜封王侯之玺以发兵○据唐书礼志之玺上有天子二字

汉王坚壁不与战○一本无王字

十月燕王臧荼反○凌稚隆曰十月字疑误高祖用秦正十月後事当属次年

高祖虽子人主也○王若虚辨惑曰是时未有高祖号刘子元辨之诚中其病汉书改为皇帝是矣

其以沛为朕汤沐邑集解駟案风俗通义曰汉书注沛人语初发声皆言其其者楚言也高祖始登帝位教令言其後以为常尔○王若虚辨惑曰予谓不然戒辞用其字自是本法古文如是者何可胜举而云楚语独尔不亦妄乎

楚隐王陈涉索隐世家作幽王名择负刍之兄○【臣世骏】按此五字相连始皇本纪云陈胜自立为楚王月表云二世元年七月楚隐王陈涉起兵入秦陈涉世家云陈胜葬碭諡曰隐王高祖时为陈涉置守冢三十家碭至今血食索隐乃截楚隐王三字另作一人而楚无此王则以幽王当之殊属牵强且幽王亦名悼不名择也或以六国为疑则燕韩业已不与安见楚之必不可遗哉

高祖崩长乐宫集解皇甫谧曰高祖以秦昭王五十一年生至汉十二年年六十三○【臣世骏】按高祖生年乙巳至是年丙午当是六十二

朝以十月车服黄屋左纛○左监本讹作志今改正

史记卷八考证

卷九

<史部,正史类,史记>

钦定四库全书

史记卷九

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐唐诸王侍读率府长史张守节正义

吕后本纪第九

【索隐吕太后本以女主临朝自孝惠崩後立少帝而始称制正合附惠纪而论之不然或别为吕后本纪岂得全没孝惠而独称吕后本纪合依班氏分为二纪焉】

吕太后者【集解徐广曰吕后父吕公汉元年为临泗侯四年卒高后元年追谥曰吕宣王】高祖微时妃也【集解駙案汉书音义曰讳雉索隐字娥姁也】生孝惠帝【集解駙案汉书音义曰讳盈】女鲁元太后及高祖为汉王得定陶戚姬【集解如淳曰姬音怡衆妾之总称也汉官曰姬妾数百苏林曰清河国有妃里而题门作姬璚曰汉秩禄令及茂陵书姬内官也秩比二千石位次婕妤下在七子八子之上索隐如淳音怡非也茂陵书云姬是内官是矣然官号及妇人通称姬者姬周之姓所以左传称伯姬叔姬以言天子之宗女贵于他姓故遂以姬为妇人美号故诗曰虽有姬姜不弃顛悴是也】爱幸生赵隐王如意孝惠为人仁弱高祖以爲不类我常欲废太子立戚姬子如意如意类我戚姬幸常从上之关东日夜啼泣欲立其子代太子吕后年长常留守希见上益疏如意立爲赵王後几代太子者数矣【索隐几音其纪反又音祈】赖大臣争之及留侯策【索隐谓张良叔孙通等令太子卑词安车以迎四皓也】太子得母废吕后爲人刚毅佐高祖定天下所诛大臣多吕后力吕后兄二人皆爲将长兄周吕侯【集解徐广曰名泽高祖八年卒谥令武侯追谥曰悼武王】死事封其子吕台爲酈侯【集解徐广曰酈一乍酈索隐郑邹台并音怡苏林音胎】子产爲交侯【集解徐广曰台弟也】次兄吕释之爲建成侯【集解徐广曰惠帝二年卒谥康王】高祖十二年四月甲辰崩长乐宫太子袭号爲帝是时高祖八子长男肥孝惠兄也异母【索隐母曰曹姬】肥爲齐王余皆孝惠弟戚姬子如意爲赵王薄夫人子恒爲代王诸姬子子恢爲梁王子友爲淮阳王子长爲淮南王子建爲燕王高祖弟交爲楚王兄子濞爲吴王非刘氏功臣番君吴芮子臣爲长沙王吕后最怨戚夫人及其子赵王乃令永巷囚戚夫人而召赵王【集解如淳曰列女

传曰周宣王后脱簪珥待罪永巷後改爲掖庭索隱永巷別宮名有長巷故名之也韋昭云以爲在掖門內故謂之掖庭也】使者三反趙相建平侯周昌謂使者曰高帝屬臣趙王趙王年少竊聞太后怨戚夫人欲召趙王并誅之臣不敢遣王王且亦病不能奉詔呂后大怒乃使人召趙相趙相徵至長安乃使人復召趙王王來未到孝惠帝慈仁知太后怒自迎趙王霸上與入宮自挾與趙王起居飲食太后欲殺之不得間孝惠元年十二月帝晨出射趙王少不能蚤起太后聞其獨居使人持酖飲之【集解應劭曰酖鳥食蝮以其羽画酒中飲之立死】犁明孝惠還【集解徐廣曰犁猶比也諸言犁明者將明之時】趙王已死於是乃徙淮陽王友爲趙王夏詔賜酈侯父追謚爲令武侯【索隱音齡】令太后遂斷戚夫人手足去眼燬耳飲瘡藥使居廁中命曰人彘居數日乃召孝惠帝觀人彘孝惠見問知其戚夫人乃大哭因病歲余不能起使人請太后曰此非人所爲臣爲太后子終不能治天下孝惠以此日飲爲淫樂不聽政故有病也二年楚元王齊悼惠王皆來朝十月孝惠與齊王燕飲太后前孝惠以爲齊王兄置上坐如家人之禮太后怒乃令酌兩卮酖置前令齊王起爲壽齊王起孝惠亦起取卮欲俱爲壽太后乃恐自起泛孝惠卮【索隱泛音捧泛也】齊王怪之因不敢飲詳醉去問知其酖齊王恐自以爲不得脫長安憂齊內史士【集解徐廣曰一作出】說王曰太后独有孝惠與魯元公主【集解如淳曰公羊傳曰天子嫁女於諸侯必使諸侯同姓者主之故謂之公主百官表列侯所食曰國皇后公主所食曰邑諸侯王女曰翁主蘇林曰公五等尊爵也春秋听臣子以稱君父婦人稱主有主孟我之比故云公主瓚曰天子之女虽食湯沐之邑不君其民索隱音徒濫反主是謂里克妻即优施之語事見國語孟者且也言且我物我教汝婦事夫之道此即婦人稱主之意耳比音必二反】今王有七十余城而公主乃食數城王誠以一郡上太后爲公主湯沐邑太后必喜王必无忧於是齊王乃上城陽之郡尊公主爲王太后【集解如淳曰張敖子偃爲魯王故公主得爲太后】呂后喜許之乃置酒齊邸【正義漢法諸侯各起邸第於京師】樂飲罷歸齊王三年方筑長安城四年就半五年六年城就【索隱漢宮闕疏四年筑東面五年筑北面漢旧儀城方六十三里经纬各十二里三輔旧事云城形似北斗也】諸侯來會十月朝賀七年秋八月戊寅孝惠帝崩【集解皇甫謐曰帝以秦始皇三十七年生崩時年二十三】發喪太后哭泣不下留侯子張辟强爲侍中【集解應劭曰入侍天子故曰侍】中年十五謂丞相曰太后独有孝惠今崩哭不悲君知其解乎【正義解紀賣反言哭解惰有所思也又音戶賣反解節解也又紀買反謂解說也】丞相曰何解辟强曰帝母壯子【正義母音无】太后畏君等君今請拜呂台呂產呂祿爲將將兵居南北軍及諸呂皆入宮居中用事如此則太后心安君等幸得脫禍矣丞相乃如辟强計太后說其哭乃哀呂氏权由此起乃大赦天下九月辛丑葬【集解駟案漢書云葬安陵皇覽曰山高三十二丈广袤百二十步居地六十畝皇甫謐曰去長陵十里去長安北三十五里】太子即位爲帝謁高廟元年号令一出太后太后稱制議欲立諸呂爲王問右丞相王陵王陵曰高帝刑白馬盟曰非劉氏而王天下共擊之今王呂氏非約也太后不說問左丞相陳平絳侯周勃等對曰高帝定天下王子弟今太后稱制王昆弟諸呂无所不可太后喜罷朝王陵讓陳平絳侯曰始與高帝噎血盟【索隱噎邹音使接反又云或作唾又音丁牒反】諸君不在邪今高帝崩太后女主欲王呂氏諸君纵欲阿意背約何面目見高帝地下陳平絳侯曰於今面折廷爭臣不如君夫全社稷定劉氏之後君亦不如臣王陵无以應之十一月太后欲廢王陵乃拜爲帝太傅【集解應劭曰古官傅者覆也瓚曰大戴禮曰傅之德義】奪之相权王陵遂病免歸乃以左丞相平爲右丞相以辟陽侯審食其爲左丞相【索隱韋昭云辟陽信都之縣名】左丞相不治事

令监宫中如郎中令食其故得幸太后常用事公卿皆因而决事乃追尊酈侯父为悼武王欲以王诸吕爲漸四月太后欲侯诸吕乃先封高祖之功臣郎中令无择【集解徐广曰姓冯】爲博城侯【正义括地志云兖州博城本汉博城县城】鲁元公主薨赐谥爲鲁元太后子偃为鲁王鲁王父宣平侯张敖也封齐悼惠王子章为朱虚侯【索隐虚音墟琅邪县也正义括地志云朱虚故城在青州临朐县东六十里汉朱虚也十三州志云丹朱游故虚故云朱虚也虚犹邱也朱犹丹也】以吕禄女妻之齐丞相壽爲平定侯【集解徐广曰姓齐】少府延爲梧侯【集解徐广曰姓阳成也延以军匠起作宫筑城也】乃封吕种爲沛侯【集解徐广曰释之之子也正义括地志云徐州沛县古城也】吕平为扶柳侯【集解徐广曰太后姊子也母字长姁正义括地志云扶柳故城在冀州信都县西三十里泽中多柳故曰扶柳】张买爲南宫侯【集解徐广曰其父越人爲高祖骑将】太后欲王吕氏先立孝惠後宫子强爲淮阳王【集解韦昭曰今陈留郡】子不疑爲常山王【正义括地志云常山故城在恒州真定县南八里本汉东垣邑也】子山为襄城侯【索隐按下文更名义又改名弘农汉书襄城侯唯云名弘盖史省文按志襄城属颍川】子朝为轹侯【索隐韦昭云河内有轹县音纸正义括地志云故轹城在怀州济源县东南十三里七国时魏邑】子武爲壶关侯太后风大臣大臣请立酈侯吕台爲吕王【正义初吕台为吕王後吕产王梁更名梁曰吕】太后许之建成康侯释之卒嗣子有罪废立其弟吕禄为胡陵侯【正义县名属山阳章帝改曰胡陆】续康侯【集解徐广曰禄释之之少子】後二年常山王薨以其弟襄城侯山为常山王更名义十一月吕王台薨諡为肃王太子嘉代立爲王三年无事【集解駰案汉书云秋星昼见】四年封吕?爲临光侯吕他爲俞侯【索隐他音陟俞音输正义括地志云故鄆城在德州平原县西南三十里汉鄆县吕他邑也】吕更始爲贅其侯【集解徐广曰表云吕后弟子淮阳丞相吕胜爲贅其侯索隐按表贅其在临淮】吕忿爲吕城侯【正义括地志云故吕城在邓州南阳县西三十里吕尚先祖封】及诸侯丞相五人【集解徐广曰中邑侯朱通山都侯王恬开松兹侯徐厉滕侯吕更始酈陵侯越】宣平侯女爲孝惠皇后时无子佯爲有身取美人子名之【正义刘伯庄云诸美人元幸吕氏怀身而入宫生子】杀其母立所名子为太子孝惠崩太子立爲帝帝壮或闻其母死非真皇后子乃出言曰后安能杀吾母而名我我未壮壮即为变太后闻而患之恐其爲乱乃幽之永巷中言帝病甚左右莫得见太后曰凡有天下治爲万民命【集解徐广曰一无此字】者盖之如天容之如地上有懼心以安百姓百姓欣然以事其上懼欣交通而天下治今皇帝病久不已乃失惑昏乱不能继嗣奉宗庙祭祀不可属天下其代之羣臣皆顿首言皇太后为天下齐民计所以安宗庙社稷甚深羣臣顿首奉诏帝废位太后幽杀之五月丙辰立常山王义爲帝更名曰弘不称元年者以太后制天下事也以轹侯朝爲常山王置太尉官绛侯勃爲太尉五年八月淮阳王薨以弟壶关侯武爲淮阳王六年十月太后曰吕王嘉居处骄恣废之以肃王台弟吕产爲吕王夏赦天下封齐悼惠王子兴居爲东牟侯【索隐韦昭云东莱县】七年正月太后召赵王友友以诸吕女爲后弗爱爱他姬诸吕女妬怒去谗之於太后诬以罪过曰吕氏安得王太后百岁後吾必擊之太后怒以故召赵王赵王至置邸不见令卫围守之弗与食其羣臣或窃馈輒捕论之赵王饿乃歌曰诸吕用事兮刘氏危迫胁王侯兮强授我妃我妃既妬兮诬我以恶谗女乱国兮上曾不寤我无忠臣兮何故弃国自决中野兮苍天举直【集解徐广曰举一作与】于嗟不可悔兮宁蚤自财为王而饿死兮谁者怜之吕氏絶理兮托天报仇丁丑赵王幽死以民礼葬之长安民冢次己丑日食昼晦太后恶之心不乐乃谓左右曰此爲我也二月徙梁王恢爲赵王吕王产徙爲梁王梁王不之

国爲帝太傅立皇子平昌侯太爲吕王更名梁曰吕吕曰济川太后女弟吕?【索隐韦昭云樊吟妻封临光侯】有女爲营陵侯刘泽妻泽爲大将军太后王诸吕恐即崩後刘将军爲害乃以刘泽爲琅邪王以慰其心梁王恢之徙王赵心怀不乐太后以吕产女爲赵王后王后从官皆诸吕擅权微伺赵王赵王不得自恣王有所爱姬王后使人酖杀之王乃爲歌诗四章令乐人歌之王悲六月即自杀太后闻之以爲王用妇人弃宗庙礼废其嗣宣平侯张敖卒以子偃爲鲁王敖赐谥爲鲁元王秋太后使使告代王欲徙王赵代王谢愿守代边太傅产丞相平等言武信侯吕禄【集解徐广曰吕后兄子也前封胡陵侯盖号曰武信】上侯位次第一【集解如淳曰功大者位在上功臣侯表有第一第二之次也】请立爲赵王太后许之追尊禄父康侯爲赵昭王九月燕灵王建薨有美人子太后使人杀之无後国除八年十月立吕肃王子东平侯吕通爲燕王封通弟吕庄爲东平侯三月中吕后祓还【正义祓芳弗反又音废後同】过轺道见物如苍犬据高后掖【集解徐广曰据音戟】忽弗复见卜之云赵王如意爲祟高后遂病掖伤高后爲外孙鲁元王偃年少蚤失父母孤弱乃封张敖前姬两子侈爲新都侯壽爲乐昌侯【集解徐广曰今细阳之池阳乡】以辅鲁元王偃及封中大谒者张释爲建陵侯【集解徐广曰一云张释卿駟案如淳曰百官表谒者掌宾赞受事灌婴为中谒者後常以奄人为之诸官加中者多奄人也】吕荣爲祝兹侯【集解徐广曰吕后昆弟子】诸中宦者令丞皆爲关内侯食邑五百户【集解如淳曰列侯出关就国关内侯但爵其身有加异者与关内之邑食其租税也风俗通义曰秦时六国未平将帅皆家关中称关内侯】七月中高后病甚乃令赵王吕禄为上将军军北军吕王产居南军吕太后诫产禄曰高帝已定天下与大臣约曰非刘氏王者天下共擊之今吕氏王大臣弗平我即崩帝年少大臣恐为变必据兵卫宫慎毋送丧毋为人所制辛巳高后崩遗诏赐诸侯王各千金【集解察邕曰皇子封为王者其实古诸侯也加号称王故谓之诸侯王王子封为侯者谓之诸侯】将相列侯郎吏皆以秩赐金大赦天下以吕王产为相国以吕禄女为帝后高后已葬【集解皇甫谧曰合葬长陵皇览曰高帝吕后山各一所也】以左丞相审食其为帝太傅朱虚侯刘章有气力东牟侯兴居其弟也皆齐哀王弟居长安当是时诸吕用事擅权欲为乱畏高帝故大臣绛灌等未敢发朱虚侯妇吕禄女陰知其谋恐见诛乃陰令人告其兄齐王欲令发兵西诛诸吕而立朱虚侯欲从中与大臣为应齐王欲发兵其相弗听八月丙午齐王欲使人诛相相召平乃反举兵欲围王王因杀其相遂发兵东诈夺琅邪王兵并将之而西语在齐王语中齐王乃遗诸侯王书曰高帝平定天下王诸子弟悼惠王王齐悼惠王薨孝惠帝使留侯良立臣爲齐王孝惠崩高后用事春秋高听诸吕擅废帝更立又比杀三赵王【索隐比音如字比犹频也赵隐王如意赵幽王友赵王恢是三赵王也】灭梁赵燕以王诸吕分齐爲四忠臣进谏上惑乱弗听今高后崩而帝春秋富未能治天下固恃大臣诸侯而诸吕又擅自尊官聚兵严威劫列侯忠臣矫制以令天下宗庙所以危寡人率兵入诛不当爲王者汉闻之相国吕产等乃遣颍陰侯灌婴将兵擊之灌婴至荥阳乃谋曰诸吕权兵关中欲危刘氏而自立今我破齐还报此益吕氏之资也乃留屯荥阳使使谕齐王及诸侯与连和以待吕氏变共诛之齐王闻之乃还兵西界待约吕禄吕产欲发乱关中内惮绛侯朱虚等外畏齐楚兵又恐灌婴畔之欲待灌婴兵与齐合而发犹与未决【索隐犹邹音以兽反与音预又作豫崔浩云犹猿类也印鼻长尾性多疑又说文云犹兽名多疑故比之也按孤性亦多疑度冰而听水声故云狐疑也今解者又引老子与犹予冬涉川犹予若畏四隣故以爲犹与且按狐听水而此云犹予冬涉川则犹与是狐类不疑若畏四隣则犹定是兽自不保同类故云畏四隣也】当是时济川王太淮阳王武常山王

朝名爲少帝弟及魯元王呂后外孫皆年少未之國居長安趙王祿梁王產各將兵居南北軍皆呂氏之人列侯羣臣莫自堅其命太尉絳侯勃不得入軍中主兵曲周侯酈商老病其子寄與呂祿善絳侯乃與丞相陳平謀使人劫酈商令其子寄往給說呂祿曰高帝與呂后共定天下劉氏所立九王【索隱吳楚齊淮南琅邪代常山王朝淮陽王武濟川王太是九王也】呂氏立三王【索隱梁王產趙王祿燕王通也】皆大臣之議事已布告諸侯諸侯皆以爲宜今太后崩帝少而足下佩趙王印不急之國守藩乃爲上將將兵留此爲大臣諸侯所疑足下何不歸將印以兵屬太尉請梁王歸相國印與大臣盟而之國齊兵必罷大臣得安足下高枕而王千里此萬世之利也呂祿信然其計欲歸將印以兵屬太尉使人報呂產及諸呂老人或以爲便或曰不便計猶豫未有所決呂祿信酈寄時與出游獵過其姑呂嬃大怒曰若爲將而棄軍呂氏今無處矣【索隱顏師古以爲言見誅滅無處所也】乃悉出珠玉寶器散堂下曰無爲他人守也左丞相食其免八月庚申旦平陽侯窋行御史大夫事見相國產計事郎中令賈壽使從齊來因數產曰王不蚤之國今雖欲行尚可得邪具以灌嬰與齊楚合從欲誅諸呂告產乃趣產急入宮平陽侯頗聞其語乃馳告丞相太尉太尉欲入北軍不得入襄平侯通尚符節【集解徐廣曰姓紀張晏曰紀信子也尚主也今符節令索隱張晏云紀信子又晉灼云信被焚死不見有後按功臣表襄平侯紀通父成以將軍定三秦死事子侯則通非信子張說謬誤】乃令持節矯內太尉北軍太尉復令酈寄與典客劉揭【集解駰案漢書百官表曰典客秦官也掌諸侯歸義蠻夷】先說呂祿曰帝使太尉守北軍欲足下之國急歸將印辭去不然禍且起呂祿以爲酈兄【集解徐廣曰音況字也名寄】不欺已遂解印屬典客而以兵授太尉太尉將之入軍門行令軍中曰爲呂氏右袒爲劉氏左袒軍中皆左袒爲劉氏太尉行至將軍呂祿亦已解上將印去太尉遂將北軍然尚有南軍平陽侯聞之以呂產謀告丞相平丞相平乃召朱虛侯佐太尉太尉令朱虛侯監軍門令平陽侯告衛尉毋入相國產殿門呂產不知呂祿已去北軍乃入未央宮欲爲亂殿門弗得入徘徊往來平陽侯恐弗勝馳語太尉太尉尚恐不勝諸呂未敢訟言誅之【集解徐廣曰訟一作公駰按韋昭曰訟猶公也索隱韋昭以訟爲公徐廣亦云然蓋公爲得之公言猶明言也又解者云訟誦說也】乃遣朱虛侯謂曰急入宮衛帝朱虛侯請卒太尉予卒千余人入未央宮門遂見產廷中日餽時遂擊產產走天風大起以故其從官亂莫敢鬪逐產殺之郎中府吏廁中【集解如淳曰百官表郎中令掌宮殿門戶故其府在宮中後轉爲光祿勳也】朱虛侯已殺產帝命謁者持節勞朱虛侯朱虛侯欲奪節信謁者不肯朱虛侯則從與載因節信馳走斬長樂衛尉呂更始還馳入北軍報太尉太尉起拜賀朱虛侯曰所患獨呂產今已誅天下定矣遂遣人分部悉捕諸呂男女無少長皆斬之辛酉捕斬呂祿而答殺呂嬃使人誅燕王呂通而廢魯王偃壬戌以帝太傅食其復爲左丞相戊辰徙濟川王王梁立趙幽王子遂爲趙王遣朱虛侯章以誅諸呂氏事告齊王令罷兵灌嬰兵亦罷滎陽而歸諸大臣相與陰謀曰少帝及梁淮陽常山王皆非真孝惠子也呂后以計詐名他人子殺其母養後宮令孝惠子之立以爲後及諸王以強呂氏今皆已夷滅諸呂而置所立即長用事吾屬無類矣不如視諸王最賢者立之或言齊悼惠王高帝長子今其適子爲齊王推本言之高帝適長孫可立也大臣皆曰呂氏以外家惡而几危宗廟亂功臣今齊王母家驪鉤驪鉤惡人也即立齊王則復爲呂氏欲立淮南王以爲少母家又惡乃曰代王方今高帝見子最長仁孝寬厚太后家薄氏謹良且立長故順以仁孝聞於天下便乃相與共陰使人召代王代王使人辭謝再反然後乘六乘傳【集解張晏曰備漢朝有變欲馳還也或曰傳車六乘】後九月【集解文穎曰即閏九月也時律歷廢不知閏謂之後九月也以十月爲歲首至九

月则岁终後九月则闰月】晦日己酉至长安舍代邸大臣皆往谒奉天子玺上代王共尊立爲天子代王数让羣臣固请然後听东牟侯兴居曰诛吕氏吾无功请得除官乃与太仆汝陰侯滕公入宫前谓少帝曰足下非刘氏不当立乃顾麾左右执戟者扈兵罢去【集解徐广曰扈音仆】有数人不肯去兵宦者令张泽谕告亦去兵滕公乃召乘輿车载少帝出【集解蔡邕曰律曰敢盗乘輿服御物天子至尊不敢渫渎言之故托於乘輿也乘犹载也輿犹车也天子以天下为家不以京师宫室为常处则当乘车輿以行天下故羣臣托乘輿以言之也故或谓之车驾】少帝曰欲将我安之乎滕公曰出就舍舍少府乃奉天子法驾【集解蔡邕曰天子有大驾小驾法驾上乘金根车驾六马有五时副车驾四马侍中参乘属车三十六乘】迎代王於邸报曰宫谨除代王即夕入未央宫有谒者十人持戟卫端门曰天子在也足下何爲者而入代王乃谓太尉太尉往谕谒者十人皆扈兵而去代王遂入而听政夜有司分部诛灭梁淮阳常山王及少帝於邸代王立爲天子二十三年崩谥为孝文皇帝

太史公曰孝惠皇帝高后之时黎民得离战国之苦君臣俱欲休息乎无为故惠帝垂拱高后女主称制政不出房户天下晏然刑罚罕用罪人是希民务稼穡衣食滋殖

【索隐述赞曰高祖犹微吕氏作妃及正轩掖尚私食其志怀安忍性挟猜疑置鸩齐悼残屍戚姬孝惠崩殒其哭不悲诸吕用事天下示私大臣菹醢支孽芟夷祸盈斯验苍狗为菑】

史记卷九

史记卷九考证

吕后本纪乃令酌两卮酹置前○酹监本讹作酌今改正

太后欲侯诸吕乃先封高祖之功臣郎中令无择为博城侯正义括地志云兖州博城本汉博城县城○二城字皆误宜云本汉博县汉博县属泰山郡

齐丞相壽为平定侯集解徐广曰姓齐○功臣表作齐受此作壽

封吕?为临光侯吕他为俞侯更始为贅其侯集解徐广曰表云吕后弟子淮阳丞相吕胜为贅其侯又吕忿为吕成侯及诸侯丞相五人集解徐广曰中邑侯朱通山都侯王恬开松兹侯徐厉滕侯吕更始酆陵侯越○【臣世骏】按贅其侯名似应从年表作胜侯更始自属滕侯之名本文偶误耳否则同时受封者有两吕更始未必然也滕侯与贅其皆诸侯相贅其吕侯昆弟子滕侯不详支属而皆以八年坐吕后事诛则其为同宗可知然贅其不入侯相之例而滕侯不附诸吕之中其以亲疏别欤

取美人子名之正义刘伯庄云诸美人元幸吕氏怀身而入宫生子○徐孚远曰本言张皇后无子不言惠帝无子美人子即後宫所生非必元幸吕氏怀身而入宫者【臣照】按年表孝惠後宫子在吕后时为王者至孝文时并以非皇子诛此纪云夜有司分部诛灭梁淮阳常山

王及少帝於邸如果孝惠子则古今儒者能不议絳灌为篡弑耶且孝文寬仁岂有诛戮孝惠子孙之理刘伯庄语岂为无据徐孚远驳之非也

见物如苍犬据高后掖○后监本讹作氏今改正封张敖前姬两子侈为新都侯壽为乐昌侯○年表新都作信都壽作受张耳陈余传云壽为乐昌侯与此同侈为信都侯与年表同三处互异

吕荣为祝兹侯○【臣世骏】按年表祝兹侯吕荣注索隐曰汉书作琅琊松兹侯徐厉注徐广曰松一作祝广盖以文帝纪云祝兹侯军棘门而絳侯世家亦云祝兹侯徐厉军棘门也徐厉封於高后四年在吕荣前中间未尝失封则荣不得封于祝兹明矣似应从汉书为是但上年方以刘泽为琅邪王而荣复为琅邪侯岂琅邪有王国又侯国耶

史记卷九考证

卷十

钦定四库全书

史记卷十

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

孝文本纪第十

孝文皇帝【集解駰案汉书音义曰讳恒】高祖中子也高祖十一年春已破陈豨军定代地立爲代王都中都【正义括地志云中都故城在汾州平遥县西南十二里秦属太原郡也】太后薄氏子即位十七年高后八年七月高后崩九月诸吕吕产等欲爲乱以危刘氏大臣共诛之谋召立代王事在吕后语中丞相陈平太尉周勃等使人迎代王代王问左右郎中令张武等张武等议曰汉大臣皆故高帝时大将习兵多谋诈此其属意非止此也特畏高帝吕太后威耳今已诛诸吕新嗟血京师【集解駰案公羊传曰京大师衆也天子之居必以衆大之辞言也索隐汉书嗟作喋音跼丁牒反汉书陈汤杜业皆言喋血无盟歃事广雅云喋履也谓履涉之】此以迎大王爲名实不可信愿大王称疾毋往以观其变中尉宋昌进曰【索隐东观汉记宋杨传宋义後有宋昌又会稽典录昌宋义孙也】羣臣之议皆非也夫秦失其政诸侯豪杰并起人人自以爲得之者以万数然卒践天子之位者刘氏也天下絶望一矣高帝封王子弟地犬牙相制【索隐言封子弟境土交接若犬之牙不正相当而相衔入也】此所谓磐石之宗也【索隐言其固如磐石此语见太公六韬】天下服其强二矣汉兴除秦苛政约法令施德惠人人自安难动摇三矣夫以吕太后之严立诸吕爲三王擅权专制然而太尉以一节入北军【索隐即纪通所矫帝之节】一呼士皆左袒爲刘氏叛诸吕卒以灭之此乃天授非人力也今大臣虽欲爲变百姓弗为使其党宁能专一耶方今内有朱虚东牟之亲外畏吴楚淮南琅邪齐代之强方今高帝子独淮南王与大王大王又长贤圣仁孝闻於天下故大臣因天下之心而欲迎立大王大王勿疑也代王报太后计之犹与未定卜之龟卦兆得大横【集解应劭曰以荆灼龟文正横】占曰大横庚庚余为天王夏啓以光【集解服虔曰庚横貌也李奇曰庚其繇文也张晏曰横行无思不服庚更也言去诸侯而即帝位也先是五帝官天下老则禅贤王啓始传父爵乃能光洽先君之基业文帝亦袭父迹言似夏啓者也索隐荀悦云大横龟兆横理也按庚犹更言以诸侯更帝位也繇抽也所以抽出吉凶之情也杜预云

繇兆辞也音胄汉书盖寛饶云五帝官天下三王家天下官以传贤人家以传子孙官犹公也谓不私也】代王曰寡人固已为王矣又何王卜人曰所谓天王者乃天子於是代王乃遣太后弟薄昭往见绛侯绛侯等具为昭言所以迎立王意薄昭还报曰信矣母可疑者代王乃笑谓宋昌曰果如公言乃命宋昌参乘张武等六人乘传诣长安至高陵休止【正义括地志云高陵故城在雍州高陵县西南一里本名横桥驾渭水上三辅旧事云秦於渭南有兴乐宫渭北有咸阳宫秦昭王欲通二宫之间造长横桥三百八十步桥北京石水中旧有忖留神像此神曾与鲁班语班令其出留曰我貌丑卿善图物容不出班於是拱手与语曰出头见我留乃出首班以脚画地忖留觉之便没水故置其像於水上唯有腰以上魏太祖马见而惊命移下之】而使宋昌先驰之长安观变昌至渭桥【集解苏林曰渭桥在长安北三里索隐三辅故事咸阳宫在渭北兴乐宫在渭南秦昭王通两宫之间作渭桥长三百八十步又关中记云石柱以北属扶风石柱以南属京兆也】丞相以下皆迎宋昌还报代王驰至渭桥羣臣拜谒称臣代王下车拜太尉勃进曰愿请间言【索隐包恺音闲言欲向空闲处语顔师古云间容也犹言中间请容暇之顷当有所陈不欲即公论也】宋昌曰所言公公言之所言私王者不受私太尉乃跪上天子玺符代王谢曰至代邸而议之【索隐说文云邸属国舍】遂驰入代邸羣臣从至丞相陈平太尉周勃大将军陈武御史大夫张苍宗正刘郢【集解駰案汉书百官表曰宗正秦官应劭曰周成王时彤伯入为宗正】朱虚侯刘章东牟侯刘兴居典客刘揭皆再拜言曰子弘等皆非孝惠帝子不当奉宗庙臣谨请与陰安侯【集解苏林曰高帝兄伯妻?颀侯信母丘嫂也】列侯顷王后【集解徐广曰代顷王刘仲之妻駰按苏林曰仲子濞为吴王故追谥为顷王也如淳曰顷王后封陰安侯时吕?为临光侯萧何夫人亦为酈侯又宗室表此时无陰安知其为顷王后也索隐按苏林徐广韦昭以为二人封号而乐彦如淳以顷王后别封陰安侯与汉祠令相会今以陰安是别人封爵非也顷王后是代顷王后文帝之伯母代王降为合阳侯故云列侯顷王后韦昭曰陰安属魏郡也】与琅邪王宗室大臣列侯吏二千石议曰大王高帝长子宜为高帝嗣愿大王即天子位代王曰奉高帝宗庙重事也寡人不佞不足以称宗庙愿请楚王计宜者【集解苏林曰楚王名交高帝弟索隐交高帝弟最尊言更请楚王计宜者故下云皆为宜也】寡人不敢当羣臣皆伏固请代王西乡让者三南乡让者再【集解如淳曰让羣臣也或曰宾主位东西面君臣位南北面故西乡坐三让不受羣臣犹称宜乃更迴坐示变即君位之渐也】丞相平等皆曰臣伏计之大王奉高帝宗庙最宜称虽天下诸侯万民以爲宜臣等为宗庙社稷计不敢忽愿大王幸听臣等臣谨奉天子玺符再拜上代王曰宗室将相王列侯以为莫宜寡人寡人不敢辞遂即天子位羣臣以礼次侍乃使太仆婴与东牟侯兴居清宫【集解应劭曰旧典天子行幸所至必遣静宫令先案行清静殿中以虞非常索隐按汉仪云皇帝起居索室清宫而後行】奉天子法驾迎于代邸【索隐汉官仪云天子卤簿有大驾法驾小驾大驾公卿奉引大将军参乘属车八十一乘法驾公卿不在卤簿中惟京兆尹执金吾长安令奉引侍中参乘属车三十六乘】皇帝即日夕入未央宫乃夜拜宋昌为卫将军镇抚南北军以张武为郎中令行殿中还坐前殿於是夜下诏书曰间者诸吕用事擅权谋为大逆欲以危刘氏宗庙赖将相列侯宗室大臣诛之皆伏其辜朕初即位其赦天下赐民爵一级女子百户牛酒【集解苏林曰男赐爵女子赐牛酒索隐按封禅书云百户牛一头酒十石乐彦云妇人无夫或无子不沾爵故赐之】酺五日【集解文颖曰汉律三人已上无故羣饮罚金四两今诏横赐得令会聚饮食五日索隐说文云酺王者布德大饮酒也出钱为醪出食为酺又按赵武灵王灭中山酺五日是其所起远也】

孝文皇帝元年十月庚戌徙立故琅邪王泽为燕王辛亥皇帝即阼【正义主人阶也】谒高庙右丞相平徙爲左丞相【正义此时尚右】太尉勃为右丞相大将军灌婴为太尉诸吕所夺齐楚故地皆复与之壬子遣车骑将军薄昭迎皇太后于代皇帝曰吕产自置为相国吕禄为上将军擅矫遣灌将军婴将兵擊齐欲代刘氏婴留荥阳弗擊与诸侯合谋以诛吕氏吕产欲为不善丞相陈平与太尉周勃谋夺吕产等军朱虚侯刘章首先捕吕产等太尉身率襄平侯通持节承诏入北军典客刘揭身夺赵王吕禄印益封太尉勃万户赐金五千斤丞相陈平灌将军婴各三千户金二千斤朱虚侯刘章襄平侯通东牟侯刘兴居各二千户金千斤【集解徐广曰十一月辛丑】封典客揭为阳信侯【索隐韦昭云勃海县正义括地志云阳信故城在沧州无棣县东南三十里汉阳信县】赐金千斤十二月上曰法者治之正也所以禁暴而率善人也今犯法已论而使母罪之父母妻子同产坐之及为收拏朕甚不取其议之有司皆曰民不能自治故为法以禁之相坐坐收所以累其心使重犯法所从来远矣如故便上曰朕闻法正则民慤罪当则民从且夫牧民而导之善者吏也其既不能导又以不正之法罪之是反害於民为暴者也何以禁之朕未见其便其孰计之有司皆曰陛下加大惠德甚盛非臣等所及也请奉诏书除收拏诸相坐律令【集解应劭曰拏子也秦法一人有罪并坐其家室今除此律】正月有司言曰蚤建太子所以尊宗庙请立太子上曰朕既不德上帝神明未歆享天下人民未有嚙志【索隐嚙者不满之意也未有嚙志言天下皆志不满也汉书嚙作愿音篋】今纵不能博求天下贤圣有德之人而禅天下焉而曰豫建太子是重吾不德也谓天下何其安之【索隐言何以谓於天下也其发声也安者徐也言徐徐以待也】有司曰豫建太子所以重宗庙社稷不忘天下也上曰楚王季父也春秋高阅天下之义理多矣【集解如淳曰阅犹言多所更历也】明於国家之大体吴王於朕兄也惠仁以好德淮南王弟也秉德以陪朕【集解文颖曰陪辅也】岂为不豫哉诸侯王宗室昆弟有功臣多贤及有德义者若举有德以陪朕之不能终是社稷之灵天下之福也今不选举焉而曰必子人其以朕为忘贤有德者而专於子非所以忧天下也朕甚不取也有司皆固请曰古者殷周有国治安皆千余岁古之有天下者莫不长焉用此道也【索隐言古之有天下者无长於立子故云莫长焉用此道者用殷周立子之道故安治千有余岁也】立嗣必子所从来远矣高帝亲率士大夫始平天下建诸侯为帝者太祖诸侯王及列侯始受国者皆亦为其国祖子孙继嗣世世弗絶天下之大义也故高帝设之以抚海内今释宜建而更选於诸侯及宗室非高帝之志也更议不宜【索隐言不宜更别议】子某最长纯厚慈仁请建以为太子上乃许之因赐天下民当代父後者爵各一级【集解韦昭曰文帝以立子为後不欲独飨其福故赐天下为父後者爵】封将军薄昭为轹侯【集解徐广曰正月乙巳也】三月有司请立皇后薄太后曰诸侯皆同姓立太子母为皇后【索隐谓帝之子为诸侯王皆同姓姓生也言皆同母生故立太子母也】皇后姓窦氏上为立后故赐天下鰥寡孤独穷困及年八十已上孤儿九岁已下布帛米肉各有数上从代来初即位施德惠天下填抚诸侯四夷皆洽驩乃循从代来功臣上曰方大臣之诛诸吕迎朕朕狐疑皆止朕唯中尉宋昌劝朕朕以得保奉宗庙己尊昌为卫将军其封昌为壮武侯【集解徐广曰四月辛亥封封三十四年景帝中四年夺侯国除索隐韦昭云胶东县正义括地志云壮武故城在莱州即墨县西六十里古莱夷国有汉壮武县故城】诸从朕六人官皆至九卿【正义汉置九卿一曰太常二曰光禄三曰卫尉四曰太仆五曰廷尉六曰大鸿胪七曰宗正八曰大司农九曰少府是为九卿也】上曰列侯从高帝入蜀汉中者六十八人皆益封各三百户故吏二千石以上从高帝颍川守尊等十人食邑六百户淮阳守

申屠嘉等十人五百户卫尉定等十人四百户封淮南王舅父赵兼为周阳侯【正义括地志云周阳故城在绛州闻喜县东二十九里】齐王舅父驸钩为清郭侯【集解如淳曰邑名六国时齐有清郭君清音静索隐按表驸钩封郾侯不同者盖後徙封於郾郾属钜鹿】秋封故常山丞相蔡兼为樊侯【索隐韦昭云樊东平县名正义括地志云汉樊县城在兖州瑕邱西南二十五里地理志云樊县古樊国仲山甫所封】人或说右丞相曰君本诛诸吕迎代王今又矜其功受上赏处尊位祸且及身右丞相勃乃谢病免罢左丞相平专为丞相【集解徐广曰八月中】

二年十月丞相平卒复以绛侯勃为丞相上曰朕闻古者诸侯建国千余岁各守其地以时入贡民不劳苦上下驩欣靡有遗德今列侯多居长安邑远吏卒给输费苦而列侯亦无由教驯其民【正义驯古训字】其令列侯之国为吏及诏所止者遣太子【集解张晏曰为吏谓以卿大夫为兼官者诏所止特以恩爱见留者】十一月晦日有食之【正义按说文云日蚀则朔月蚀则望而云晦日食之恐历错误】十二月望日又食【集解徐广曰此云望日又食按汉书及五行志无此日蚀文也一本作月食然史书不纪月蚀】上曰朕闻之天生蒸民为之置君以养治之人主不德布政不均则天示之以菑以诫不治乃十一月晦日有食之适见于天菑孰大焉朕获保宗庙以微眇之身托于兆民君王之上天下治乱在朕一人唯二三执政犹吾股肱也朕下不能理育羣生上以累三光之明其不德大矣令至其悉思朕之过失及知见思之所不及白以告朕及举贤良方正能直言极谏者以匡朕之不逮因各飭其职务省繇费以便民朕既不能远德故然念外人之有非【集解駰案汉书音义曰然犹介然也非奸非也索隐苏林云寝视不安之貌盖近其意余说皆踈音下板反】是以设备未息今纵不能罢边屯戍而又飭兵厚卫其罢卫将军军太仆见马遗财足【索隐遗犹留也财字与才同言太仆见在之马今留才足充事也】余皆以给置传【索隐按广雅云置驿也续汉书云驿马三十里一置故乐彦亦云传置一也言乘传者以传次受名乘置者以马取匹传音丁恋反如淳云律四马高足为传置四马中足为驰置下足为乘置一马二马为軺置急乘一马曰乘也】正月上曰农天下之本其开籍田【集解应劭曰古者天子耕籍田千亩为天下先籍者帝王典籍之常韦昭曰籍借也借民力以治之以奉宗庙且以劝率天下使务农也瓚曰景帝诏曰朕亲耕后亲桑为天下先本以躬亲为义不得以假借为称也籍蹈籍也】朕亲率耕以给宗庙粢盛【集解应劭曰黍稷曰粢在器中曰盛】三月有司请立皇子为诸侯王上曰赵幽王幽死朕甚怜之已立其长子遂为赵王遂弟辟强及齐悼惠王子朱虚侯章东牟侯兴居有功可王乃立赵幽王少子辟强为河间王以齐剧郡立朱虚侯为城阳王立东牟侯为济北王皇子武为代王子参为太原王子揖为梁王上曰古之治天下朝有进善之旌【集解应劭曰旌旛也尧设之五达之道令民进善也如淳曰欲有进善者立於旌下言之】诽谤之木【集解服虔曰尧作之桥梁交午柱头应劭曰桥梁边板所以书政治之愆失也至秦去之今乃复施也索隐按尸子云尧立诽谤之木非音非亦音沸韦昭曰虑政有阙失使书於木此尧时然也後代因以为饰今宫外桥梁头四柱木是郑玄注礼云一纵一横为午谓以木贯表柱四出即今之华表崔浩以为木贯柱四出名桓陈楚俗桓声近和又云和表则华与和又相讹也】所以通治道而来谏者今法有诽谤妖言之罪是使衆臣不敢尽情而上无由闻过失也将何以来远方之贤良其除之民或祝诅上以相约结而後相谩【集解駰案汉书音义曰民相结共祝诅上也谩者而後谩而止之不毕祝诅也索隐韦昭云谩相抵阑也说文云谩欺

也谓初相约共行祝後相欺诳中道而止之也】吏以为大逆其有他言而吏又以为诽谤此细民之愚无知抵死朕甚不取自今以来有犯此者勿听治九月初与郡国守相为铜虎符竹使符【集解应劭曰铜虎符第一至第五国家当发兵遣使者至郡合符符合乃听受之竹使符皆以竹箭五枚长五寸镌刻篆书第一至第五张晏曰符以代古之珪璋从简易也索隐汉旧仪铜虎符发兵长六寸竹使符出入徵发说文云符分而合之小颜云右留京师左与之古今注云铜虎符银错书之张晏云铜取其同心也】

三年十月丁酉晦日有食之十一月上曰前日计遣列侯之国或辞未行丞相朕之所重其为朕率列侯之国绌侯勃免丞相就国以太尉颍阴侯婴为丞相罢太尉官属丞相四月城阳王章薨淮南王长与从者魏敬杀辟阳侯审食其五月匈奴入北地居河南为寇帝初幸甘泉【集解蔡邕曰天子车驾所至民臣以为侥幸故曰幸至见令长三老官属亲临轩作乐赐食帛越巾刀佩带民爵有级数或赐田租之半故因是谓之幸索隐应劭云甘泉宫名在云阳一名林光臣瓚云甘泉山名林光秦离宫名又顾氏按邢承宗西征赋注云甘泉水名今按因地有甘泉以名山则山水皆通也】六月帝曰汉与匈奴约为昆弟毋使害边境所以输遗匈奴甚厚今右贤王离其国将衆居河南降地非常故往来近塞捕杀吏卒驱保塞蛮夷令不得居其故陵辄边吏入盗甚敖无道非约也其发边吏骑八万五千诣高奴遣丞相颍阴侯灌婴击匈奴匈奴去发中尉【集解駰案汉书百官表曰中尉秦官】材官属卫将军军长安辛卯帝自甘泉之高奴因幸太原见故羣臣皆赐之举功行赏诸民里赐牛酒复晋阳中都民【正义晋阳故城在汾州平遥县西南十三里】三岁留游太原十余日济北王兴居闻帝之代欲往擊胡乃反发兵欲袭荥阳於是诏罢丞相兵遣棘蒲侯陈武为大将军将十万往擊之祁侯贺为将军军荥阳【集解徐广曰贺姓繒以文帝十一年卒谥曰敬索隐汉书音义祁音迟贺姓繒繒古国夏同姓也正义括地志云并州祁县城晋大夫祁奚之邑】七月辛亥帝自太原至长安乃诏有司曰济北王背德反上誡误吏民为大逆济北吏民兵未至先自定及以军地邑降者皆赦之复官爵与王兴居去来亦赦之【集解徐广曰乍去乍来也駰按张晏曰虽始与兴居反今降赦之】八月破济北军虏其王赦济北诸吏民与王反者

六年有司言淮南王长废先帝法不听天子诏居处母度出入拟於天子擅为法令与棘蒲侯太子奇谋反遣人使闽越及匈奴发其兵欲以危宗庙社稷羣臣议皆曰长当弃市帝不忍致法於王赦其罪废勿王羣臣请处王蜀严道邛都【集解徐广曰汉书本或作邛字或直云邛僰邛都乃本是西南夷尔时未通严道有邛僰山正义邛其恭反括地志云严道今为县即邛州所理县也县有蛮夷曰道故曰严道邛都县本邛都国汉为县今嵩州也西南夷传云滇池以北君长以十数邛都最大是也按羣臣请处淮南王长蜀之严道不尔更远邛都西有邛僰山也又云邛僰山在雅州荣经县界荣经武德年间置本秦严地华阳国志云邛笮山故邛人笮人界也山岩峭峻曲回九折乃至上下有凝冰按即王尊登者也今从九折西南行至嵩州山多雨少晴俗呼名为漏天】帝许之长未到处所行病死上怜之後十六年追尊淮南王长谥为厉王立其子三人为淮南王【索隐名安阜陵侯也】衡山王【索隐名勃安阳侯也】庐江王【索隐名赐周阳侯也】

十三年夏上曰盖闻天道祸自怨起而福繇德兴百官之非宜由朕躬今秘祝之官移过于下

【集解应劭曰秘祝之官移过于下国家讳之故曰秘】以彰吾之不德朕甚不取其除之五月齐太仓令淳于公有罪当刑【索隐名意为齐太仓令故谓太仓公也】诏狱逮徙系长安太仓公无男有女五人太仓公将行会逮骂其女曰生子不生男有缓急非有益也其少女缇萦【索隐缇音啼邹氏音体也】自伤泣乃随其父至长安上书曰妾父为吏齐中皆称其廉平今坐法当刑妾伤夫死者不可复生刑者不可复属虽复欲改过自新其道无由也妾愿没入为官婢赎父刑罪使得自新书奏天子天子怜悲其意乃下诏曰盖闻有虞帝之时画衣冠异章服以爲戮【正义晋书刑法志云三皇设言而民不违五帝画衣冠而民知禁犯黥者皐其巾犯劓者丹其服犯腓者墨其体犯宫者杂其屨大辟之罪殊刑之极布其衣裾而无领缘投之於市与衆弃之】而民不犯何则至治也今法有肉刑三而奸不止【集解李奇曰约法三章无肉刑文帝则有肉刑孟康曰黥劓二左右趾合一凡三索隐韦昭云断趾黥劓之属崔浩汉律序云文帝除肉刑而宫不易张斐注云以淫乱人族类故不易之也】其咎安在非乃朕德薄而教不明欤吾甚自愧故夫驯道不纯而愚民焉诗曰恺悌君子民之父母今人有过教未施而刑加焉或欲改行为善而道无由也朕甚怜之夫刑至断支体刻肌肤终身不息何其楚痛而不德也岂称为民父母之意哉其除肉刑上曰农天下之本务莫大焉今勤身从事而有租税之赋是为本末者无以异其於劝农之道未备其除田之租税【集解李奇曰本农也末贾也言农与贾俱出租无异也故除田租】

十四年冬匈奴谋入边为寇攻朝那塞杀北地都尉卬【集解徐广曰姓孙封其子单为骍侯匈奴所杀】上乃遣三将军军陇西北地郡中尉周舍为卫将军郎中令张武为车骑将军军渭北车千乘骑卒十万帝亲自劳军勒兵申教令赐军吏卒帝欲自将撃匈奴羣臣諫皆不听皇太后固要帝【集解如淳曰必不得自征也】帝乃止於是以东阳侯张相如为大将军成侯赤为内史【集解徐广曰赤姓董】栾布为将军撃匈奴匈奴遁走春上曰朕获执牺牲珪币以事上帝宗庙十四年于今历日县长以不敏不明而久抚临天下朕甚自愧其广增诸祀墠场珪币昔先王远施不求其报望祀不祈其福右贤左戚【集解韦昭曰右犹高左犹下也索隐刘德云先贤後亲也】先民後已至明之极也今吾闻祠官祝厘【集解如淳曰厘福也贾谊传受厘坐宣室索隐音僖福也】皆归福朕躬不为百姓朕甚愧之夫以朕不德而躬享独美其福百姓不与焉是重吾不德其令祠官致敬毋有所祈是时北平侯张苍为丞相方明律历鲁人公孙臣上书陈终始传五德事【索隐五行之德帝王相承传易终而复始故云终始传五德之事传音转也】言方今土德时土德应黄龙见当改正朔服色制度天子下其事与丞相议丞相推以为今水德始明正十月上黑事以为其言非是请罢之

十五年黄龙见成纪【集解韦昭曰成纪县属天水】天子乃复召鲁公孙臣以为博士申明土德事於是上乃下诏曰有异物之神见於成纪无害於民岁以有年朕亲郊祀上帝诸神礼官议毋讳以劳朕【集解駰案汉书音义曰言无所讳勿以朕为劳】有司礼官皆曰古者天子夏躬亲礼祀上帝於郊故曰郊於是天子始幸雍郊见五帝以孟夏四月答礼焉赵人新垣平以望气见因说上设立渭阳五庙【集解韦昭曰在渭城】欲出周鼎当有玉英见【集解駰案瑞应图云玉英五常并修则见】

十六年上亲郊见渭阳五帝庙亦以夏答礼而尚赤十七年得玉杯【集解应劭曰新垣平诤

令人献之】刻曰人主延寿於是天子始更为元年【索隐秦本纪惠文王十四年更为元年又汲冢竹书魏惠王亦有後元当取法於此又按封禅书以新垣平候日再中故改元也】令天下大酺其岁新垣平事觉夷三族後二年上曰朕既不明不能远德是以使方外之国或不宁息夫四荒之外不安其生【索隐顾胤按尔雅孤竹北户西王母日下谓之四荒】封畿之内勤劳不处二者之咎皆自於朕之德薄而不能远達也间者累年匈奴并暴边境多杀吏民边臣兵吏又不能谕吾内志以重吾不德也夫久结难连兵中外之国将何以自宁今朕夙兴夜寐勤劳天下忧苦万民为之怛惕不安未尝一日忘於心故遣使者冠盖相望结轶【音轍】於道以谕朕意於单于【集解韦昭曰使车往还故轍如结也相如曰结轨还辕索隐邹氏轶音逸汉书作轍顾氏按司马彪云结谓车轍回旋错结也】今单于反古之道计社稷之安便万民之利亲与朕俱弃细过偕之大道结兄弟之义以全天下元元之民【索隐战国策云制海内子元元非兵不可高诱注云元元善也又按姚察云古者谓人云善人也因善为元故云黎元其言元元者非一人也顾野王云元元犹喁喁可怜爱貌未安其说聊记异也】和亲已定始于今年後六年冬匈奴三万人入上郡三万人入云中以中大夫令勉【集解徐广曰卫尉改名也駟案汉书百官表景帝初改卫尉为中大夫令非此年也索隐中大夫令是官号勉其名後此官改为光禄勳虞世南以此称中大夫令是史家追书尔顔游秦以令是姓勉是名为中大夫据风俗通令姓令尹子文之後】为车骑将军军飞狐【集解如淳曰在代郡苏林曰在上党】故楚相苏意为将军军句注【集解应劭曰山险名也鴈门陰馆索隐伏俨句音俱包恺音钩也】将军张武屯北地河内守周亚夫为将军居细柳【集解徐广曰在长安西駟按如淳曰长安图细柳仓在渭北近石徼张揖曰在昆明池南今有柳市是也索隐按三辅故事细柳在直城门外阿房宫西北维又匈奴传云细柳在长安西如淳云在渭北非也】宗正刘礼为将军居霸上祝兹侯【集解徐广曰表作松兹侯姓徐名悍】军棘门【集解徐广曰在渭北駟按孟康曰在长安北秦时宫门也如淳曰三辅黄图棘门在横门外】以备胡数月胡人去亦罢天下旱蝗帝加惠令诸侯毋入贡弛山泽【集解韦昭曰弛废废其常禁以利民】减诸服御狗马损郎吏员发仓庾以振贫民【集解应劭曰水漕仓曰庾胡公曰在邑曰仓在野曰庾索隐郭璞注三苍云庾仓无屋也胡公名广後汉太尉作汉官解诂也】民得卖爵【索隐崔浩云富人欲爵贫人欲钱故听买卖】孝文帝从代来即位二十三年宫室苑囿狗马服御无所增益有不便辄弛以利民尝欲作露台【集解徐广曰露一作灵索隐顾氏按新丰南骊山上犹有台之旧趾也】召匠计之直百金上曰百金中民十家之产吾奉先帝宫室常恐羞之何以台为上常衣绨衣【集解如淳曰贾谊云身衣皂绨】所幸慎夫人令衣不得曳地帟帐不得文绣以示敦朴为天下先治霸陵皆以瓦器不得以金银铜锡为饰不治坟欲为省毋烦民南越王尉佗自立为武帝然上召贵尉佗兄弟以德报之佗遂去帝称臣与匈奴和亲匈奴背约入盗然令边备守不发兵深入恶烦苦百姓吴王诈病不朝就赐几杖羣臣如袁盎等称说虽切常假借用之【集解苏林曰假音休假借者以物借人】羣臣如张武等受赂遗金钱觉上乃发御府金钱赐之以愧其心弗下吏专务以德化民是以海内殷富兴於礼义後七年六月己亥帝崩於未央宫【集解徐广曰年四十七】遗诏曰朕闻盖天下万物之萌生靡不有死死於天地之理物之自然者奚可甚哀当今之时世咸嘉生而恶死厚葬以破业重服以伤生吾甚不取且朕既不德无以佐百姓今崩又使重服久临以离寒暑之数哀人之父子伤长幼之志损其饮食絶鬼神之祭祀以重吾不德也谓天下何朕获保宗庙以眇眇之身托于天下君王之上二十有余年矣赖天地之灵社稷之福方内安宁【集解瓚曰

方四方也内中也犹云中外也】靡有兵革【集解徐广曰一云方内安兵革息】朕既不敏常畏过行以羞先帝之遗德维年之久长惧于不终今乃幸以天年得复供养于高庙朕之不明与嘉之【集解如淳曰与发声也得卒天年已善矣】其奚哀悲之有其令天下吏民令到出临三日皆释服毋禁取妇嫁女祠祀饮酒食肉者自当给丧事服临者皆无践【集解服虔曰践翦也谓无斩衰也孟康曰践跌也晋灼曰汉语作跌跌徒跌也索隐汉语是书名荀爽所作】經带无过三寸毋布车及兵器【集解应劭曰无以布衣车及兵器也不施轻车介士也】毋发人男女哭临宫殿中当临者皆以旦夕各十五举声礼毕罢非旦夕临时禁毋得擅哭已下服大红十五日小红十四日纈七日释服【集解服虔曰当言大功小功布也纈细布衣也应劭曰红者中祥大祥以红为领缘也纈者禫也凡三十六日而释服索隐已下谓柩已下於圻刘德云红功也男功非一故以工力为字而女工唯在於丝故以系工为字三十六日以日易月也】佗不在令中者皆以此令比率从事布告天下使明知朕意霸陵山川因其故【集解应劭曰因山为藏不复起坟山下川流不遏絶也就其水名以为陵号索隐霸是水名水径於山亦曰霸山即芷阳地也】毋有所改归夫人以下至少使【集解应劭曰夫人以下有美人良人八子七子长使少使凡七辈皆遣归家重絶人类也】令中尉亚夫为车骑将军属国悍为将屯将军【集解徐广曰悍姓徐駟按汉书百官表典属国秦官掌蛮夷降者李奇曰冯奉世为右将军以将屯将军为名此监主诸屯也】郎中令武为复土将军【集解如淳曰主穿圻填瘞事者索隐复音伏谓穿圻出土下棺已而填之即以为坟故云复土复反还也又音福】发近县见卒万六千人发内史卒万五千人【索隐百官表云内史掌理京师之官景帝更名京兆尹】藏郭穿复土属将军武乙巳【集解駟案汉书云乙巳葬皇甫谧曰霸陵去长安七十里】羣臣皆顿首上尊号曰孝文皇帝太子即位于高庙丁未袭号曰皇帝孝景皇帝元年十月制诏御史盖闻古者祖有功而宗有德【集解应劭曰始取天下者为祖高帝称高祖是也始治天下者为宗文帝称太宗是也】制礼乐各有由闻歌者所以发德也舞者所以明功也高庙酎【集解张晏曰正月旦作酒八月成名曰酎酎之言纯也至武帝时因八月尝酎会诸侯庙中出金助祭所谓酎金也】奏武德文始五行之舞【集解孟康曰武德高祖所作也文始舜舞也五行周舞也武德者其舞人执干戚文始舞执羽龠五行舞冠冕服法五行色见礼乐志索隐应劭云礼乐志文始舞本舜韶舞高祖更名文始示不相袭五行舞本周武舞秦始皇更名五行舞按今言奏武德文始五行之舞者其乐总象武王乐言高祖以武定天下既示不相袭其作乐之始先奏文始以羽龠衣文绣居先次即奏五行五行即武舞执干戚而衣有五行之色也】孝惠庙酎奏文始五行之舞孝文皇帝临天下通关梁不异远方【集解张晏曰孝文十二年除关不用传令远近若一】除诽谤去肉刑赏赐长老收恤孤独以育羣生减嗜欲不受献【集解徐广曰減一作灭】不私其利也罪人不帑【集解苏林曰刑不及妻子】不诛无罪除肉刑出美人重絶人之世朕既不敏不能识此皆上古之所不及而孝文皇帝亲行之德厚侔天地【集解李奇曰侔齐等】利泽施四海靡不获福焉明象乎日月而庙乐不称朕甚惧焉其为孝文皇帝庙为昭德之舞【集解文穎曰景帝采高祖武德舞作昭德舞舞之於文帝庙见礼乐志】以明休德然後祖宗之功德着於竹帛施於万世永永无穷朕甚嘉之其与丞相列侯中二千石礼官具为礼仪奏丞相臣嘉等言陛下永思孝道立昭德之舞以明孝文皇帝之盛德皆臣嘉等愚所不及臣谨议曰功莫大於高皇帝德莫盛於孝文皇帝高皇帝庙宜为帝者太祖之庙孝文皇帝庙宜为帝者太宗之庙天子宜世世献祖宗之庙郡国诸侯宜各为孝文皇帝立太宗之庙诸侯王列侯使者侍祠天子岁献祖宗之

庙【集解张晏曰王及列侯岁时遣使诣京师侍祠助祭也如淳曰若光武庙在章陵南阳太守称使者往祭是也不使侯王祭者诸侯不得祖天子也凡临祭祀宗庙皆为侍祭】请着之竹帛宣布天下制曰可

太史公曰孔子言必世然後仁【集解孔安国曰三十年曰世如有受命王者必三十年仁政乃成】善人之治国百年亦可以胜残去杀【集解王肃曰胜残暴之人使不为恶去杀不用杀也】诚哉是言汉兴至孝文四十有余载德至盛也廩廩乡改正服封禅矣谦让未成於今呜呼岂不仁哉

【索隐述赞曰孝文在代兆遇大横宋昌建策绛侯奉迎南面而让天下归诚务农先籍布德偃兵除帑削谤政简刑清绋衣率俗露台不营法寛张武狱恤缙紫霸陵如故千年颂声】

史记卷十

史记卷十考证

孝文本纪至高陵休止正义三辅旧事云秦於渭南有兴乐宫渭北有咸阳宫秦昭王欲通二宫之间造横长桥三百八十步桥北京石水中有忖留神像○京石二字不可解水经注云桥之南北有堤激立石柱柱南京兆主之柱北冯翊主之有令丞各领徒一千五百人桥之北首垒石水中故谓之石柱桥也则京石或系垒石之讹

羣臣以礼次侍○侍监本讹作待今改正

天下人民未有谦志○顾炎武曰此与乐毅传先王以为谦於志同皆厌足之意荀子惻然不谦又曰由俗谓之道尽谦也又曰向万物之美而不能谦也又曰不自谦其行者言滥过战国策齐桓公夜半不谦又膳之谦於口并是谦字而误从口大学此之谓自谦亦谦字而误从言吕氏春秋苟可以谦剂貌辨者吾无辞为也亦谦字而误从人

诸侯皆同姓立太子母为皇母索隐谓帝之子为诸侯王皆同姓姓生也言皆同母生故立太子母也○顾炎武曰文帝前后死窦氏妾也诸侯皆同姓谓无甥舅之国可娶索隐解非

乃循从代来功臣○余有丁曰循谓次及之也汉书作修字

封齐王舅父驸钩为清郭侯索隐按表驸钩封郾侯不同者盖後徙封於郾○【臣世骏】按年表作清都徐广曰一作□索隐曰汉表作郾此注误脱汉字但年表驸钩以文帝元年封前六年有罪国除享国甚短并无徙封之说年表例凡始封某後别封者俱次第详载并注明转徙絶续之由钩果徙封纪与表何以止录其前封而表则直书其以清都失国耶恐郭都□郾俱以偏傍形似而差如曹畴曹壽曹时之类其作□与郾者又并清字脱去耳

白以告朕○徐孚远曰白宜作丐疑字讹也

复晋阳中都民三岁正义晋阳故城在汾州平遥县西南○顾炎武曰此当言中都故城在汾州平遥县西南言晋阳误也然此注已见卷首中都下

画衣冠异章服以为戮正义晋书刑法志云三皇设言而民不违五帝画衣冠而民知禁○晋书刑法志云五帝画象而民知禁

祝兹侯军棘门集解徐广曰表作松兹侯姓徐名悍○【臣祖庚】按年表松兹侯徐厉始封厉传子悼文帝七年侯悼元年也棘门之屯文帝後六年事自当是悼为将军其时厉死久矣然周勃世家又明云祝兹侯徐厉军棘门岂悼嗣侯於文帝後七年年表脱一後字耶二者必有一误悼之与悍亦未知孰是

史记卷十考证

<史部,正史类,史记>

卷十一

钦定四库全书

史记卷十一

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

孝景本纪第十一

孝景皇帝者【集解駙案汉书音义曰讳啓正义谥法曰繇义而济曰景】孝文之中子也母窦太后孝文在代时前后有三男及窦太后得幸前后死及三子更死故孝景得立

元年四月乙卯赦天下乙巳赐民爵一级五月除田半租为孝文立太宗庙令羣臣无朝贺匈奴入代与约和亲

二年春封故相国萧何孙系为武陵侯【集解徐广曰汉书亦作系邹诞生本作傒音奚又按汉书功臣表及萧何传皆云孙嘉疑其人有二名】男子二十而得傅【索隐音附荀悦云傅正卒也小颜云旧法二十三而傅今改也】四月壬午孝文太后崩【索隐薄后也葬芷阳西曰少陵也】广川长沙王皆之国【索隐广川王彭祖长沙王发皆景帝子遣就国】丞相申屠嘉卒八月以御史大夫开封侯陶青为丞相彗星出东北秋衡山雨雹【正义雨于付反】大者五寸深者二尺荧惑逆行守北辰月出北辰间岁星逆行天庭中置南陵及内史祲裯为县【集解徐广曰地理志云文帝七年置駙按地理志百官表南陵县文帝置也分内史为左右及祲裯为县皆景帝二年不得皆如徐所云索隐邹诞生祲音都会反又音丁活反裯音羽又音诩】

三年正月乙巳赦天下长星出西方天火燔雒阳东宫大殿城室【集解徐广曰雒一作淮索隐汉书作淮阳王宫灾故徙王於鲁也】吴王濞【正义音披备反高祖兄仲子故汉高祖十二年封三十三年反年表云都吴其实在江都也】楚王戊【正义高祖弟楚王交孙嗣二十一年反都彭城】赵王遂【正义高祖孙幽王友子嗣二十六年反都邯鄲】胶西王卬【正义卬五郎反高祖孙齐悼惠王子故平昌侯十年反都密州高密县】济南王辟光【正义辟

音壁高祖孙齐悼惠王子故枋侯立十一年反括地志云济南故城在淄川长山县西北三十里】菑川王贤【正义高祖孙齐悼惠王子故武成侯立十一年反都剧括地志云菑川县也故剧城在青州壽光县南三十一里故纪国】胶东王雄渠【正义高祖孙齐悼惠王子故白石侯立十一年反都即墨括地志云即墨故城在密州胶水县东南六十里即胶东国也】反发兵西乡天子为诛晁错遣袁盎谕告不止遂西围梁上乃遣大将军窦婴太尉周亚夫将兵诛之六月乙亥赦亡军及楚元王子艺等【正义艺鱼曳反字亦作艺音同】与谋反者封大将军窦婴为魏其侯【正义地理志云魏其属琅邪】立楚元王子平陆侯刘礼为楚王【索隐韦昭云平陆西河县礼即向之从曾祖王父也】立皇子端为胶西王子胜为中山王徙济北王志【正义济子礼反济北国今济州卢县即济北王所都】为菑川王淮阳王余【正义淮阳国今陈州】为鲁王【正义今兖州曲阜县】汝南王非【正义汝南国今豫州】为江都王【正义江都国今扬州也吴王濞所都反诛景帝改为江都国封皇子非也】齐王将庐【正义齐国青州临淄也将庐齐悼惠王之孙襄王之子年表云】燕王嘉皆薨【集解徐广曰表云五年薨索隐庐悼惠王孙齐王襄之子汉书作间嘉刘泽之子】

四年夏立太子立皇子彻为胶东王六月甲戌赦天下後九月更以弋阳为阳陵【正义括地志云汉景帝陵也在雍州咸阳县东三十里按杜作壽陵也】复置津关用传出入【集解应劭云文帝十二年除关无用传至此复置传以七国新反备非常也张晏曰传信也若今过所也如淳曰传音檄传之传两行书繒帛分持其一出入关合之乃得过谓之传索隐传音丁恋反】冬以赵国为邯鄲郡【集解駮案地理志赵国景帝以为邯鄲郡】

五年三月作阳陵渭桥【索隐景帝豫作壽陵也按赵系家赵肃侯十五年起壽陵後代因之也】五月募徙阳陵予钱二十万江都大暴风从西方来坏城十二丈丁卯封长公主子蟜为隆虑侯【索隐音林间避殇帝讳改之】徙广川王为赵王

六年春封中尉赵绾为建陵侯【正义括地志云建陵故县在沂州承县界】江都丞相嘉为建平侯【集解徐广曰姓程】陇西太守浑邪为平曲侯【正义括地志云平曲县故城在瀛州文安县北七十里】赵丞相嘉为江陵侯【集解徐广曰姓苏】故将军布为酈侯梁楚二王皆薨後九月伐驰道树殖兰池【集解徐广曰殖一作填】

七年冬废栗太子为临江王【正义临江忠州县虽王临江而都江陵】十二月晦日有食之春免徒隶作阳陵者丞相青免二月乙巳以太尉条侯【正义条田雕反字亦作蓀音同】周亚夫为丞相四月乙巳立胶东王太后为皇后【索隐按系家太后槐里人父仲兄信封盖侯后故金氏妻女弟儿也】姁丁巳立胶东王为太子名彻

中元年封故御史大夫周苛孙平为绳侯【集解徐广曰平一作应索隐苛周昌之兄】故御史大夫周昌子左军为安阳侯四月乙巳赦天下赐爵一级除禁锢地动衡山原都雨雹大者尺八寸

中二年二月匈奴入燕遂不和亲三月召临江王来即死中尉府中夏立皇子越为广川王子

寄为胶东王封四侯【集解文颖曰楚相张尚太傅赵夷吾赵相建德内史王悍此四人各谏其王无使反不听皆杀之故封其子索隐韦昭云张尚子当居赵夷吾子周建德子横王悍子弃】九月甲戌日食中三年冬罢诸侯御史中丞春匈奴王二人率其徒来降皆封为列侯【正义汉书表云中三年安陵侯子军桓侯赐遼侯陆强容城侯徐卢易侯仆□范阳侯代翕侯邯鄲七人以匈奴王降皆封为列侯按纪言二人者是匈奴二王为首降】立皇子方乘为清河王三月彗星出西北丞相周亚夫免以御史大夫桃侯刘舍为丞相四月地动九月戊戌晦日食军东都门外【集解按三辅黄图东出北第一门曰宣平门外曰东都门】

中四年三月置德阳宫【集解瓚曰是景帝庙也帝自作之讳不言庙故言宫西京故事云景帝庙为德阳宫】大蝗秋赦徒作阳陵者

中五年夏立皇子舜为常山王封十侯【正义惠景间年表云亚谷侯卢他之隆虑侯陈蟠乘氏侯刘买桓邑侯刘明盖侯王信按其五人是中元五年封余检不获中元三年匈奴王二人降封为列侯惠景间表云匈奴王降为侯者有七人疑其五人是十侯之数】六月丁巳赦天下赐爵一级天下大潦更命诸侯丞相曰相秋地动中六年二月己卯行幸雍郊见五帝三月雨雹四月梁孝王城阳共王【正义城阳今濮州雷泽县古城阳也共音恭谥法严敬故事曰恭】汝南王皆薨立梁孝王子明为济川王【正义表云分梁置也】子彭离为济东王【正义表云分梁置也】子定为山阳王【正义地理志云景帝中六年别为山阳国属兖州】子不识为济阴王【正义地理志云景帝中六年别为济阴国属兖州案今曹州是也】梁分为五封四侯更命廷尉为大理将作少府为将作大匠主爵中尉为都尉【集解駰案汉书百官表曰主爵中尉秦官掌列侯】长信詹事为长信少府【集解駰案汉书百官表曰詹事秦官掌皇后太子家应劭曰詹省也给也瓚曰茂陵书詹事秩二千石也张晏曰以太后所居宫为名长信宫则曰长信少府长乐宫则曰长乐少府】将行为大长秋【集解駰案汉书百官表曰将行秦官应劭曰长秋皇后卿】大行为行人【集解服虔曰天子死未有谥称大行晋灼曰礼有大行小行主谥官故以此名之如淳曰不反之辞也瓚曰大行是官名掌九仪之制以宾诸侯索隐郑玄云命者五谓公侯伯子男爵者四孤卿大夫士是九也】奉常为太常【集解駰案汉书百官表曰奉常秦官掌宗庙礼仪】典客为大行【索隐韦昭云大行官名秦时云典客景帝初改云大行後更名大鸿胪武帝因而不改故汉书景纪有大鸿胪百官表又云武帝改名大鸿胪胪附也以言其掌四夷宾客若皮肤之在外附於身也复有大行令故诸侯薨大鸿胪奏谥列侯薨则大行奏谏按大行令即鸿胪之属官也】治粟内史为大农【集解駰案汉书百官表曰治粟内史秦官掌谷货也】以大内为二千石【集解韦昭曰大内京师府藏】置左右内官属大内【索隐主天子之私财曰小内小内即属大内也】七月辛亥日食八月匈奴入上郡

後元年冬更命中大夫为卫尉【正义汉书百官表云卫尉秦官掌宫闾门卫屯兵景帝初更名中大夫後元年复为卫尉】三月丁酉赦天下赐爵一级中二千石诸侯相爵右庶长四月大酺五月丙戌地动【集解徐广曰丙作甲】一其蚤食时复动上庸地动二十二日坏城垣七月乙巳日食丞相刘舍免八月壬辰以御史大夫绾为丞相封为建陵侯【索隐姓卫】

後二年正月地一日三动郅将军擊匈奴【正义郅真栗反郅都传云匈奴刻木为郅都而射不中】酺五日令内史郡不得食马粟没入县官令徒隶衣七纁布【正义衣於既反纁祖工反纁八十缕也与升相似七升布用五百六十缝】止马舂【索隐止人为马舂粟为岁不登也】为岁不登禁天下食不造岁省列侯遣之国【集解晋灼曰文纪遣列侯之国今又省之】三月匈奴入鴈门十月租长陵田大旱衡山国河东云中郡【正义衡山国今衡州河东今蒲州云中郡今胜州】民疫

後三年十月日月皆食赤五日十二月晦雷【集解徐广曰一作雷字又作图字实所未详】日如紫五星逆行守太微月贯天庭中【索隐天庭即龙星右角也按石氏星传曰龙星左角曰天田右角曰天庭】正月甲寅皇太子冠甲子孝景皇帝崩【集解皇甫谧曰帝以孝惠七年生年四十八】遗诏赐诸侯王以下至民为父後爵一级天下户百钱出宫人归其家复无所与太子即位是为孝武皇帝【集解駰案汉书云二月癸酉帝葬阳陵皇甫谧曰阳陵山方百二十步高十四丈去长安四十五里】三月封皇太后弟蚡为武安侯弟胜为周阳侯置阳陵【集解苏林曰蚡音𧈧索隐蚡音扶粉反按外戚世家皇太后母臧儿初嫔王氏生子信而寡更嫁长陵田氏生蚡及胜】

太史公曰汉兴孝文施大德天下怀安至孝景不复忧异姓而晁错刻削诸侯遂使七国俱起合从而西乡以诸侯大盛而错为之不以渐也及主父偃言之而诸侯以弱卒以安【索隐主父偃上言令天子下推恩之令令诸侯各得分邑其子弟於是遂弱卒以安也】安危之机岂不以谋哉

【索隐述赞曰景帝即位因修静默勉人於农率下以德制度斯创礼法可则一朝吴楚乍起凶慝提局成臺拒轮致惑晁错虽诛梁城未克条侯出将追奔逐北坐见梟刺立翦牟贼如何太尉後卒下狱惜哉明君斯功不录】

史记卷十一

史记卷十一考证

孝景本纪二年春封故相国萧何孙系为武陵侯集解徐广曰汉书亦作系邹诞生本作傒音奚又按汉书功臣表及萧何传皆云孙嘉疑其人有二名○表亦作嘉与此互异表又作武阳并封邑亦不同

以御史大夫绾为丞相封为建陵侯○余有丁曰绾即前六年用中尉封者此复出

令徒隶衣七纁布正义七升布用五百六十缝○缝系缕字之误

史记卷十一考证

卷十二

钦定四库全书

史记卷十二

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

孝武本纪第十二

【集解駙案太史公自序曰作今上本纪其述事皆云今上今天子或言孝武帝者悉後人所定也张晏曰武纪褚先生补作也先生名少孙汉博士索隐褚先生补史记合集武帝事以编年今止取封禅书补之信其才之薄也张晏云褚先生颍川人仕元成间韦棣云褚顗家传褚少孙梁相褚大弟之孙宣帝时为博士寓居沛事大儒王式故号先生续太史公书阮孝绪亦以为然】

孝武皇帝者【集解駙案汉书音义曰讳彻正义谥法云克定祸乱曰武】孝景中子也【索隐按景十三王传广川王以上皆是武帝兄自河间王德以至广川凡有八人则帝第九也】母曰王太后孝景四年以皇子为胶东王孝景七年栗太子废为临江王以胶东王为太子孝景十六年崩太子即位为孝武皇帝【集解张晏曰武帝以景帝元年生七岁为太子为太子十岁而景帝崩时年十六矣】孝武皇帝初即位尤敬鬼神之祀元年汉兴已六十余岁矣【集解徐广曰六十七年岁在辛丑】天下乂安荐绅之属【索隐荐音搢搢挺也言挺笏於绅带之间事出礼内则今作荐者古字假借尔汉书作缙绅】皆望天子封禅改正度也而上乡儒术招贤良赵绾王臧等以文学为公卿欲议古立明堂城南以朝诸侯【索隐城南长安城南门外也关中记云明堂在长安城门外杜门之西】草巡狩封禅改历服色事未就会窦太后治黄老言不好儒术使人微伺得赵绾等奸利事【集解徐广曰纤微伺察之】召案绾臧绾臧自杀【正义汉书孝武二年御史大夫赵绾坐请无奏事太皇太后及郎中令王臧皆下狱自杀应劭曰王臧儒者欲立明堂辟雍太后素好黄老术非薄六经因欲絶奏事太后太后怒故令自杀】诸所兴为者皆废後六年窦太后崩其明年上徵文学之士公孙弘等明年上初至雍郊见五畤【正义畤音止括地志云汉五帝畤在岐州雍县南孟康云畤者神灵之所止按五畤者鄠畤密畤吴阳畤北畤先是秦文公作鄠畤祭白帝秦宣公作密畤祭青帝秦灵

公作吴阳上時祭黄帝下時祭赤帝汉高祖作北時祭黑帝是五時也】後常三岁一郊是時上求神君舍之上林中蹠氏观【集解徐广曰蹠音啼索隐邹诞生音斯观名也】神君者长陵女子以子死悲哀故见神於先後宛若【集解孟康曰产乳而死兄弟妻相谓先後宛若字索隐邹诞生音先後并去声即今妯娌也韦昭云先妯後娣宛音冤】宛若祠之其室民多往祠平原君往祠【集解徐广曰武帝外祖母也駟案蔡邕曰异姓妇人以恩泽封者曰君仪比长公主索隐徐云武帝外祖母则是臧儿也】其後子孙以尊显及武帝即位则厚礼置祠之内中闻其言不见其人云是时而李少君亦以祠竈谷道郤老方见上【集解李奇曰食谷道引或曰辟谷不食之道索隐如淳云祠竈可以致福按礼竈者老妇之祭盛於盆尊於瓶说文周礼以竈祠祝融淮南子炎帝作火官死为今之竈神司马彪注庄子云浩竈神也如美女衣赤李弘范音诰】上尊之少君者故深泽侯【集解徐广曰姓赵景帝时絶封】入以主方【集解徐广曰进纳於天子而主方一云侯人主方駟按如淳曰侯家人主方药者也】匿其年及所生长常自谓七十能使物郤老【集解如淳曰物鬼物也瓚曰物药物也】其游以方徧诸侯无妻子人闻其能使物及不死更馈遗之常余金钱帛衣食人皆以为不治产业而饶给又不知其何所人愈信争事之少君资好方善为巧发奇中【集解如淳曰时时发言有所中也】尝从武安侯饮【索隐服虔云田蚡也韦昭云武安属魏郡】坐中有年九十余老人少君乃言与其大父游射处老人为儿时从其大父行识其处一坐尽惊少君见上上有故铜器问少君少君曰此器齐桓公十年陈於栢寝【集解服虔曰地名有台也瓚曰晏子书栢寝台名也正义括地志云栢寝台在青州千乘县东北二十一里韩子云景公与晏子游於少海登栢寝之台而望其国公曰美哉堂乎後代孰将有此晏子曰其田氏乎公曰寡人有国而田氏家柰何对曰夺之则近贤远不肖治其烦乱轻其刑罚助穷乏恤孤寡行恩惠崇节俭虽十田氏其如堂何即此也】已而案其刻果齐桓公器一宫尽骇以少君为神数百岁人也少君言於上曰祠竈则致物致物而丹砂可化为黄金黄金成以为饮食器则益寿益寿而海中蓬莱僊者可见见之以封禅则不死黄帝是也臣尝游海上见安期生【索隐服虔云古之真人】食巨枣大如瓜安期生僊者通蓬莱中合则见人不合则隐於是天子始亲祠竈而遣方士入海求蓬莱安期生之属而事化丹砂诸药齐为黄金矣【索隐齐音分剂之剂】居久之李少君病死天子以为化去不死也而使黄锤【集解韦昭曰人姓名正义音直伪反】史寬舒受其方【集解駟案汉书音义曰二人皆方士】求蓬莱安期生莫能得而海上燕齐怪迂之方士多相效更言神事矣亳人薄诱忌【集解徐广曰一云亳人谬忌也索隐亳山阳县名姓谬名忌居亳故下称薄忌此文则衍薄字而谬又误作诱也】奏祠泰一方曰天神贵者泰一【索隐按乐汁微图云紫微宫北极天一泰一宋均以为天一泰一北极之别名春秋纬云紫极之别名又名紫宫天皇曜魄宝之所理也】泰一佐曰五帝【正义五帝五天帝也春秋纬云苍帝灵威仰赤帝赤熛怒白帝白招拒黑帝叶光纪黄帝含枢纽尚书帝命验云苍帝名灵威仰赤帝名文祖黄帝名神斗白帝名显纪黑帝名玄矩佐者谓配祭也】古者天子以春秋祭泰一东南郊用太牢具七日【集解徐广曰一云日一太牢具七日】为坛开八通之鬼道於是天子令太祝立其祠长安东南郊常奉祠如忌方其後人有上书言古者天子三年一用太牢具祠神三一天一地一泰一天子许之令太祝领祠之於忌泰一坛上如其方後人复有上书言古者天子常以春秋解祠祠黄帝用一梟破镜【集解孟康曰梟鸟名食母破镜兽名食父黄帝欲絶其类使百物祠皆用之破镜如羆而虎眼或云直用破镜如淳曰汉使东郡送梟五月五日为梟羹以赐百官以恶鸟故食之】冥羊【集解服虔曰神名也】用羊祠马行【正义神

名】用一青牡马泰一臯山山君地长【正义丁丈反三并神名】用牛武夷君【正义神名】用乾鱼阴阳使者以一牛【集解駰案汉书音义曰阴阳之神也】令祠官领之如其方而祠於忌泰一坛旁其後天子苑有白鹿以其皮为币【索隐按食货志币以白鹿皮方尺缘以绩以荐璧得以黄金一斤代之又汉律皮币率鹿皮方尺直金一斤】以发瑞应造白金焉【正义白金三品武帝所铸也如淳曰杂铸银锡为白金也平準书云造银锡为白金以为天用莫如龙地用莫如马人用莫如龟故曰白金三品其一曰重八两圆之其文龙名曰白选直三千二曰重差小方之其文马直五百三曰复小橢之其文龟直三百钱谱云白金第一其形圆如钱肉好圆文为一龙白银第二其形方小长肉好亦小长好上下文为二马白银第三其形似龟肉好小是文为龟甲也】其明年郊雍获一角兽若麋然【集解韦昭曰楚人谓麋为麋索隐麋音步交反按韦昭云体若?而一角春秋所谓有?而角是也楚人谓麋为麋又周书王会云麋者若鹿尔雅云麋大鹿也牛尾一角郭璞云汉武获一角兽若麋谓之麟是也】有司曰陛下肃祇郊祀上帝报享锡一角兽盖麟云【正义汉书终军传云从上雍获白麟一角戴肉设武备而不为害所以为仁兽】於是以荐五時時加一牛以燎【正义力召反焚也】赐诸侯白金以风符应合于天地【集解晋灼曰符瑞也瓚曰风示诸侯以此符瑞之应】於是济北王以为天子且封禅乃上书献泰山及其旁邑天子受之更以他县偿之常山王有臯迁天子封其弟於真定以续先王祀而以常山为郡然後五岳皆在天子之郡其明年齐人少翁【正义汉武故事云少翁年二百岁色如童子】以鬼神方见上上有所幸王夫人【集解徐广曰齐怀王閔之母也駰按桓谭新论云武帝有所爱幸姬王夫人窈窕好容质性嫿佞正义汉书作李夫人】夫人卒少翁以方术盖夜致王夫人及竈鬼之貌云天子自帷中望见焉於是乃拜少翁为文成将军赏赐甚多以客礼礼之文成言曰上即欲与神通宫室被服不象神神物不至乃作画云气车及驾以胜日【集解駰案汉书音义曰如火胜金用丙与丁日不用庚辛】驾车辟恶鬼又作甘泉宫中为台室画天地泰一诸神而置祭具以致天神居岁余其方益衰神不至乃为帛书以饭牛【正义饭房晚反书绢帛上为怪言语以饲牛】详弗知也言此牛腹中有奇杀而视之得书书言甚怪天子疑之有识其手书问之人果伪书於是诛文成将军【正义汉书故事云文成诛月余日使者籍货关东还逢之於漕亭还见言之上乃疑发其棺无所见唯有竹筒一枚捕验间无踪迹也】而隐之其後则又作栢梁铜柱承露僊人掌之属矣【集解苏林曰僊人以手掌擎盘承甘露也索隐服?云用梁百头按今字皆作栢三辅故事云台高二十丈用香栢为殿梁香闻十里中建章宫承露盘高三十丈大七围以铜为之有僊人掌承露和玉屑饮之故张衡赋曰立修茎之僊掌承云表之清露是也】文成死明年天子病鼎湖甚【集解晋灼曰在湖县韦昭曰地名近宜春索隐湖县名属京兆後属弘农昔黄帝采首阳山铜铸鼎於湖曰鼎湖即今之湖城县也韦昭以为近宜春亦甚疎】巫医无所不致至不愈游水发根【集解服?曰游水县名发根人姓名晋灼曰地理志游水水名在临淮淮浦索隐颜师古以游水姓发根名盖或因水为姓或曰发树根也】乃言曰上郡有巫病而鬼下之上召置祠之甘泉及病使人问神君【集解韦昭曰即病巫之神】神君言曰天子母忧病少愈强与我会甘泉於是病愈遂幸甘泉病良已【集解孟康曰良已盖已愈也】大赦天下置寿宫神君【集解服?曰立此便宫也瓚曰宫奉神之宫也楚辞曰蹇将澹兮寿宫】神君最贵者大夫其佐曰大禁司命之属皆从之非可得见闻其音与人言等时去时来来则风肃然也居室帷中时昼言然常以夜天子祓然後入【集解駰案汉书音义曰崇洁自祓除然後入】因巫为夫人关饮食所欲者言行下【集解李奇曰神所欲言上辄为下之】又

置寿宫北宫【正义括地志云寿宫北宫皆在雍州长安县西北三十里长安故城中汉书云武帝寿宫以处神君】张羽旗设供具以礼神君神君所言上使人受书其言命之曰书法【集解駰案汉书音义曰或云策书之法也正义书音画按画一之法】其所语世俗之所知也毋絶殊者而天子独喜其事秘世莫知也其後三年有司言元宜以天瑞命不宜以一二数【集解苏林曰得黄龙凤皇诸瑞以名年正义孝景以前即位以一二数年至其终武帝即位初有年号改元以建元为始】一元曰建元二元以长星曰元光三元以郊得一角兽曰元狩云【集解徐广曰按诸纪元光後有元朔元朔後得元狩】其明年冬天子郊雍议曰今上帝朕亲郊而后土母祀则礼不答也有司与太史公【集解韦昭曰说者以谈为太史公失之矣史记称迁为太史公者是外孙杨惲所称索隐姚察按司马迁传亦以谈为太史公非惲所加又按虞喜志林云古者主天官皆上公自周至汉其职转卑然朝会坐位犹居公上尊天之道其官属仍以旧名尊而称公公名当起於此故如淳云太史公位在丞相上天下郡国计书先上太史公副上丞相其义是也而桓谭新论以为太史公造书书成示东方朔朔为平定因署其下太史公者皆东方朔所加之也杨惲继此而称尔】祠官宽舒等议天地牲角茧栗今陛下亲祀后土后土宜於泽中圜丘为五坛坛一黄犢太牢具已祠尽瘞而从祠衣上黄於是天子遂东始立后土祠汾阴脽上【集解徐广曰元鼎四年时也駰按苏林曰脽音谁如淳曰河之东岸特堆堀长四五里广二里余高十余丈汾阴县在脽之上后土祠在县西汾在脽之北西流与河合也索隐汉书旧仪作葵上者盖河东人呼谁与葵同故尔】如宽舒等议上亲望拜如上帝礼礼毕天子遂至荥阳而还过雒阳下诏曰三代邈绝远矣难存其以三十里地封周後为周子南君以奉先王祀焉是岁天子始巡郡县侵寻於泰山矣【索隐侵?即浸淫也故晋灼云遂往之意也小颜云侵淫渐染之义盖?淫声相近假借用尔师古叔父游秦亦解汉书故称师古为小颜也】其春乐成侯【集解徐广曰姓丁名义後与栾大俱诛也索隐韦昭云河间县按郊祀志乐成侯登而徐广据表云姓丁名义未详尔】上书言栾大栾大胶东宫人【集解服?曰王家人】故尝与文成将军同师已而为胶东王尚方而乐成侯姊为康王后【集解孟康曰胶东王后也】母子康王死他姬子立为王而康后有淫行与王不相中得相危以法康后闻文成已死而欲自媚於上乃遣栾大因乐成侯求见言方天子既诛文成後悔恨其早死惜其方不尽及见栾大大悦大为入长美言多方略而敢为大言处之不疑大言曰臣尝往来海中见安期羡门之属【索隐韦昭云羡门古仙人应劭曰名子高】顾以为臣贱不信臣又以为康王诸侯尔不足予方臣数言康王康王又不用臣臣之师曰黄金可成而河决可塞不死之药可得僊人可致也臣恐效文成则方士皆掩口恶敢言方哉上曰文成食马肝死尔子诚能修其方我何爱乎大曰臣师非有求人主求之陛下必欲致之则贵其使者令为亲属以客礼待之勿卑使各佩其信印乃可使通言於神人神人尚肯邪不邪致尊其使然後可致也於是上使先验小方鬬旗旗自相触击【正义音其又本或作棊说文云棊博棊也高诱注淮南子云取鸡血与针磨捣之以和磁石用涂碁头曝乾之置局上即相拒不止也】是时上方忧河决而黄金不就【正义链丹砂鋈锡为黄金不就】乃拜大为五利将军居月余得四金印佩天士将军地士将军大通将军天道将军印制诏御史昔禹疏九江决四渎间者河溢臯陆堤繇不息【正义颜师古云臯水旁地也广平曰陆言水大泛溢自臯及陆而筑作堤徭役甚多不暇休息也】朕临天下二十有八年天若遗朕士而大通焉【集解韦昭曰言栾大能通天意故封乐通索隐乐通在临淮高平县】乾称蜚龙鸿渐于般【集解駰案汉书音义曰般水涯堆也渐进也武帝云得栾大如鸿进於般一举千里得道若飞龙在天】意庶

几与焉其以二千户封地土将军大为乐通侯【集解韦昭曰乐通临淮高平也】赐列侯甲第【集解駰案汉书音义曰有甲乙第次故曰第】僮千人乘輿斥车马帷帐器物以充其家【集解駰案汉书音义曰或云斥不用也韦昭曰尝在服御索隐孟康云斥不用之车马是也】又以卫长公主妻之【集解孟康曰卫太子妹如淳曰卫太子姊也蔡邕曰帝女曰公主公主仪比诸侯姊妹曰长公主仪比诸侯王駰按此帝女也而云长公主未详】齎金万斤更名其邑曰当利公主【集解地理志云东莱有当利县】天子亲如五利之第使者存问所给连属於道自大主将相以下皆置酒其家献遗之【集解徐广曰太主武帝姑也駰按韦昭曰窦太后之女也】於是天子又刻玉印曰天道将军使使衣羽衣夜立白茅上五利将军亦衣羽衣立白茅上受印以示弗臣也而佩天道者且为天子道天神也於是五利常夜祠其家欲以下神神未至而百鬼集矣然颇能使之其後治装行东入海求其师云大见数月佩六印贵振天下而海上燕齐之间莫不搢腕而自言有禁方能神僊矣【集解服?曰满手曰搢瓚曰搢执持也】其夏六月中汾阴巫锦【集解应劭曰锦巫名】为民祠魏睢后土营旁【集解应劭曰魏故魏国也睢若丘之类】见地如钩状掇视得鼎【索隐说文掇把也音步沟反】鼎大异於衆鼎文镂无款识【集解韦昭曰款刻也索隐识犹表识】怪之言吏吏告河东太守胜以闻天子使使验问巫锦得鼎无奸诈乃以礼祠迎鼎至甘泉从行上荐之【集解如淳曰以鼎从行上至甘泉将荐之於天也】至中山【集解徐广曰河渠书凿泾水自中山西索隐此山在冯翊谷口县西近九嵎山土人呼为中山河渠书韩使水工郑国说秦凿泾水自中山西即此山也】晏温【集解如淳曰三辅谓日出清霁为晏晏而温也索隐许慎注淮南云晏无云也】有黄云盖焉有鹿过上自射之因以祭云至长安【集解徐广曰上言从行荐之或曰祭鼎也】公卿大夫皆议请尊宝鼎天子曰间者河溢岁数不登故巡祭后土祈为百姓育谷今年丰庾未有报鼎曷为出哉有司皆曰闻昔太帝兴神鼎一【索隐师古以太帝即太昊伏羲氏以文在黄帝之前故也】一者一统天地万物所系终也黄帝作宝鼎三象天地人也禹收九牧之金铸九鼎皆尝鬯烹【集解徐广曰烹煮也鬯音觴皆尝以烹牲牢而祭祀也索隐言鼎以烹牲而飨尝也觴字又作觴音殤汉书郊祀志云鼎空足曰鬲以象三德鬲音历谓足中不实者名之也】上帝鬼神【集解服?曰以祭祀上帝或曰尝烹酌也】遭圣则兴【正义遭逢也鼎虽沦泗水逢圣兴起故出汾阴西至甘泉也】迁于夏商周德衰宋之社亡【正义社主民也社以石为之宋社即亳社也周武王伐纣乃立亳社以为监戒覆上栈下使通天地阴阳之气周礼衰国将危民故宋之社为亡殷复也】鼎乃沦伏而不见颂云自堂徂基【正义此以下至胡考之休是周颂丝衣之诗自堂从内往外基门内塾也郑玄云门侧之堂谓之塾绎礼经使士升堂视壶濯及笾豆之属降往於塾牲自羊徂牛充庖乃举鼎告洁礼之次也】自羊徂牛【正义自堂往塾先视羊後及牛也毛萇云先小後大也】鼐鼎及鼐【集解韦昭曰尔雅云鼎絶大谓之鼐圜奄上谓之鼐】不虞不醵胡考之休【索隐毛诗传云吴諱也姚氏按何承天云此虞当为?音洪霸反说文以?一口大言也此作虞者與吴声相近故假借也或者本文借此虞为驩娱字也】今鼎至甘泉光润龙变承休无疆合兹中山有黄白云降【集解韦昭曰与中山所见黄云之气合也】盖若兽为符【集解服?曰云若兽在车盖也晋灼曰盖辞也或曰符谓瑞应也】路弓乘矢【集解韦昭曰路大也四矢为乘】集获坛下报祠大飨【集解徐广曰一云大报飨祠也】惟受命而帝者心知其意【集解服?曰高祖受命知之也宜见鼎於其庙】而合德焉鼎宜见於祖祢藏於帝廷以合明应制曰可入海求蓬萊者【正义蓬萊方丈瀛洲勃海中三神山也】言蓬萊不远而不能至者殆不见其气上乃

遣望气佐候其气云其秋上幸雍且郊【索隐以雍地形高故云】或曰五帝泰一之佐也宜立泰一而上亲郊之上疑未定齐人公孙卿曰今年得宝鼎其冬辛巳朔旦冬至与黄帝时等卿有礼书曰黄帝得宝鼎宛侯问於鬼臿区【集解駰案汉书音义曰区黄帝时人索隐郑玄云黄帝佐也李奇曰黄帝时诸侯本作申区者非艺文志作鬼容区也】区对曰黄帝得宝鼎神策是岁己酉朔旦冬至得天之纪终而复始於是黄帝迎日推策後率二十岁【正义率音律又音类又所律反三音并通後皆放此也】得朔旦冬至凡二十推三百八十年黄帝僊登于天卿因所忠欲奏之所忠视其书不经疑其妄书谢曰宝鼎事已决矣尚何以为卿因嬖人奏之上大悦召问卿对曰受此书申功【集解駰案封禅书功字作公】申功已死上曰申功何人也卿曰申功齐人也与安期生通受黄帝言无书独有此鼎书曰汉兴复当黄帝之时汉之圣者在高祖之孙且曾孙也宝鼎出而与神通封禅封禅七十二王【正义河图云王者封太山禅梁父易姓登崇有七十二君也】唯黄帝得上泰山封申功曰汉主亦当上封上封则能僊登天矣黄帝时万诸侯而神灵之封居七千【集解应劭曰黄帝时诸侯会封禅者七千人李奇曰说仙道得封者七千国张晏曰神灵之封谓山川之守】天下名山八而三在蛮夷五在中国中国华山首山太室泰山东莱此五山黄帝之所常游与神会黄帝且战且学僊患百姓非其道乃断斩非鬼神者百余岁然後得与神通黄帝郊雍上帝宿三月鬼臿区号大鸿死葬雍故鸿冢是也【集解苏林曰今雍有鸿冢】其後黄帝接万灵明廷明廷者甘泉也所谓寒门者谷口也【集解徐广曰寒一作塞汉书音义曰黄帝仙於寒门也索隐服?云寒门黄帝所僊之处小颜云谷中山之谷口汉时为县今呼为冶谷去甘泉八十里盛夏凜然故曰寒门】黄帝采首山铜铸鼎於荆山下【集解晋灼曰地理志首山属河东蒲坂荆山在冯翊怀德县】鼎既成有龙垂胡?下迎黄帝【索隐颜师古云胡谓颌下垂肉也?其毛也故童谣曰何当为君鼓龙胡是也】黄帝上骑羣臣後宫从上龙七千余人龙乃上去余小臣不得上乃悉持龙?龙?拔堕黄帝之弓百姓仰望黄帝既上天乃抱其弓与龙胡?号故後世因名其处曰鼎湖【正义括地志云湖水源出虢州湖城县南三十五里夸父山北流入河即鼎湖也】其弓曰乌号於是天子曰嗟乎吾诚得如黄帝吾视去妻子如脱屣耳乃拜卿为郎东使候神於太室上遂郊雍至陇西西登空桐【正义空桐山在原州平高县西一百里】幸甘泉令祠官寬舒等具泰一祠坛坛放薄忌泰一坛坛三垓【集解徐广曰垓次也駰按李奇曰垓重也三重坛也索隐邹氏曰垓一作陔言坛阶三重】五帝坛环居其下各如其方黄帝西南除八通鬼道【集解服?曰坤位在未黄帝从土位】泰一所用如雍一時物而加醴枣脯之属杀一犁牛以为俎豆牢具而五帝独有俎豆【集解韦昭曰无犁牛醴之属】醴进【索隐师古云具俎豆酒醴而进之一曰进谓杂物之具所以加礼也】其下四方地为餼食【索隐餼音竹芮反谓连续而祭之汉志作胾古字亦通说文曰餼祭酹也正义刘伯庄云谓绕坛设诸神祭座相连缀也】羣神从者及北斗云已祠胾余皆燎之其牛色白鹿居其中餼在鹿中水而泊之【集解徐广曰泊音居器反肉汁也駰案晋灼曰此说合牲物燎之也正义刘伯庄云以太羹和祭食燎之按以鹿内牛中以餼内鹿中水玄酒也】祭日以牛祭月以羊餼特【索隐特一牲也言若牛若羊若餼止一特也】泰一祝宰则衣紫及绣五帝各如其色日赤月白十一月辛巳朔旦冬至昧爽天子始郊拜泰一朝朝日夕夕月【集解应劭曰天子春朝日秋夕月拜日东门之外朝日以朝夕月以夕瓚曰汉仪郊泰一时皇帝平旦出竹宫东揖日其夕西向揖月使用郊日不用春秋也】向则揖而见泰一如雍礼其赞飧曰天始以宝鼎神策授皇帝朔而又朔终而复始皇帝敬拜见焉而衣上黄其祠列火满坛旁坛旁烹炊具有司云祠上有光

焉公卿言皇帝始郊见泰一云阳【正义括地志云汉云阳宫在雍州云阳县北八十一里有通天台即黄帝以来祭天圜丘之处武帝以五月避暑八月乃还】有司奉瑱玉【集解孟康曰璧大六寸谓之瑱索隐瑱音宣】嘉牲荐飧【正义汉旧仪曰祭天养牛五岁至二千斤】是夜有美光及昼黄气上属天太史公祠官宽舒等曰神灵之休佑福兆祥宜因此地光域【集解徐广曰地一作夜】立泰畤坛以明应令太祝领祀及腊间祠三岁天子一郊见其秋为伐南粤告祝泰一以牡【集解徐广曰一作牝】荆画旛【集解如淳曰荆之无子者皆以洁齐之道也晋灼曰牡荆节间不相当者韦昭曰以牡荆为柄者也】日月北斗登龙以象天一三星为泰一锋【集解徐广曰天官书曰天极星明者泰一常居也斗口三星曰天一駟按晋灼曰画一星在後三星在前为太一锋也】名曰灵旗【正义李奇云画旗树泰一坛上名灵旗画日月北斗登龙等】为兵祷则太史奉以指所伐国【正义韦昭云牡刚也荆强按用牡荆指伐国取其刚为称故画此旗指之】而五利将军使不敢入海之泰山祠上使人微随验实无所见五利妄言见其师其方尽多不讐上乃诛五利【正义汉武故事云东方朔言栾大无状上发怒乃斩之】其冬公孙卿候神河南见僊人迹缙氏城上有物若雉往来城上天子亲幸缙氏城视迹问卿得无效文成五利乎卿曰僊者非有求人主人主求之其道非少宽假神不来言神事事如迂诞【正义迂音于诞音但迂远也诞大也】积以岁乃可致於是郡国各除道缮治宫观名山神祠所以望幸矣其年既灭南越上有嬖臣李延年以好音见上善之下公卿议曰民间祠尚有鼓舞之乐今郊祠而无乐岂称乎公卿曰古者祀天地皆有乐而神祇可得而礼或曰泰帝使素女【索隐亦谓太昊正义泰帝谓太昊伏羲氏】鼓五十弦瑟悲帝禁不止故破其瑟为二十五弦於是塞南越祷祠泰一后土始用乐舞益召歌儿作二十五弦【集解徐广曰瑟也】及箜篌瑟自此起【集解徐广曰应劭云武帝令乐人侯调始造箜篌】其来年冬上议曰古者先振兵泽旅【集解徐广曰古释字作泽】然後封禅乃遂北巡朔方勒兵十余万还祭黄帝冢桥山泽兵须如【集解李奇曰地名也】上曰吾闻黄帝不死今有冢何也或对曰黄帝已僊上天羣臣葬其衣冠既至甘泉为且用事泰山【正义道书福地记云泰山高四千九百丈二尺周回二千里】先类祠泰一自得宝鼎上与公卿诸生议封禅【正义白虎通云王者易姓而起天下太平功成封禅以告太平禅梁父之址广厚也刻石纪号着己之功绩天以高为尊地以厚为德故曾泰山之高以效天禅梁父之趾以报地封者附广之禅者将以功相传授之】封禅用希旷絶莫知其仪礼而羣儒采封禅尚书周官王制之望祀射牛事【集解苏林曰当祭庙射其牲以除不祥瓚曰射牛示亲杀也索隐天子射牛示亲杀也事见国语】齐人丁公年九十余曰封者合不死之名也秦皇帝不得上封陛下必欲上稍上即无风雨遂上封矣上於是乃令诸儒习射牛草封禅仪【索隐见应劭汉官仪也】数年至且行天子既闻公孙卿及方士之言黄帝以上封禅皆致怪物与神通欲放黄帝以尝接神僊人蓬莱士高世比德於九皇【集解张晏曰三皇之前有人皇九首韦昭曰上古人皇者九人也】而颇采儒术以文之羣儒既以不能辩明封禅事又牵拘於诗书古文而不敢骋上为封祠器示羣儒羣儒或曰不与古同徐偃又曰太常诸生行礼不如鲁善周霸属图封事【集解服虔曰属会也会诸儒图封事】於是上绌偃霸尽罢诸儒弗用三月遂东幸缙氏礼登中岳【集解文颖曰崧高山也在颍川阳城县】太室【集解韦昭曰崧高山有太室少室之山山有石室故以名之】从官在山下闻若有言万岁云【正义汉仪注云有称万岁可十万人声】问上上不言问下下不言於是以三百户封太室奉祠命曰崇高邑【正义顔师古云以崇奉崧高山故谓之崇高也】东上泰山山之草木叶未生乃令人上石立之泰山巔上

遂东巡海上行礼祠八神【集解文颖曰武帝登泰山祭太一并祭名山於泰坛西南开除八通鬼道故言八神也一曰八方之神索隐韦昭云八神谓天地阴阳日月星辰主四时之属今按郊祀志一曰天主祠天齐二曰地主祠太山梁父三曰兵主祠蚩尤四曰阴主祠三山五曰阳主祠之罘六曰月主祠之莱山七曰日主祠成山八曰四时主祠琅邪】齐人之上疏言神怪奇方者以万数然无验者乃益发船令言海中神山者数千人求蓬莱神人公孙卿持节常先行候名山至东莱言夜见一人长数丈就之则不见见其迹甚大类禽兽云羣臣有言见一老父牵狗言吾欲见巨公【集解駰案汉书音义曰巨公谓武帝】已忽不见上既见大迹未信及羣臣有言老父则大以为僊人也宿留海上与方士传车及间使求僊人以千数四月还至奉高上念诸儒及方士言封禅人人殊不经难施行天子至梁父礼祠地主乙卯令侍中儒者皮弁荐绅射牛行事封泰山下东方如郊祠泰一之礼封广丈二尺高九尺其下则有玉牒书书秘礼毕天子独与侍中奉车子侯【集解駰案汉书百官表曰奉车都尉掌乘舆车武帝初置韦昭曰子侯霍去病之子也】上泰山亦有封其事皆禁明日下阴道丙辰禅泰山下址东北肃然山如祭后土礼天子皆亲拜见衣上黄而尽用乐焉江淮闲一茅三脊【集解孟康曰所谓灵茅也】为神藉五色土益杂封纵远方奇兽蜚禽及白雉诸物颇以加祠兕旄牛犀象之属弗用皆至泰山然後去封禅祠其夜若有光昼有白云起封中天子从封禅还坐明堂【集解汉书音义曰天子初封泰山山东北址古时有明堂处则此所坐者明年秋乃作明堂】羣臣更上寿於是制诏御史朕以眇眇之身承至尊兢兢焉惧弗任维德菲薄不明于礼乐修祀泰一若有象景光屑如有望【集解瓚曰闻呼万岁者三】依依震於怪物欲止不敢遂登封泰山至於梁父而后禅肃然【集解服虔曰肃然山名在梁父】自新嘉与士大夫更始赐民百户牛一酒十石加年八十孤寡布帛二匹复博奉高蛇丘【集解郑玄曰蛇音移】历城毋出今年租税其赦天下如乙卯赦令行所过毋有复作事在二年前皆勿听治又下诏曰古者天子五载一巡狩用事泰山诸侯有朝宿地其令诸侯各治邸泰山下【正义诸侯各於泰山朝宿地起第准拟天子用事泰山而居止】天子既已封禅泰山既无风雨苗而方士更言蓬莱诸神山若将可得於是上欣然庶几遇之乃复东至海上望冀遇蓬莱焉奉车子侯暴病一日死上乃遂去并海上北至碣石巡自辽西历北边至九原五月返至甘泉【集解駰案汉书音义曰周万八千里也】有司言宝鼎出为元鼎以今年为元封元年其秋有星茀于东井【集解韦昭曰秦分野也後卫太子兵乱茀音佩】後十余日有星茀于三能【集解韦昭曰三能三公後连坐诛之】望气王朔言候独见其星出如瓠【索隐郊祀志填星出如瓠故颜师古以德星即镇星今按此纪惟止言德星则德星岁星也岁星所在有福故曰德星】食顷复入焉有司言曰陛下建汉家封禅天其报德星云其来年冬郊雍五帝还拜祝祠泰一赞飨曰德星昭衍厥维休祥寿星仍出【索隐寿星南极老人星也见则天下理安故言之也】渊耀光明信星昭见【索隐信星镇星也信属土土曰镇星汉志为得之】皇帝敬拜泰【集解徐广曰一无此字】祝之飨其春公孙卿言见神人东莱山若云见天子天子於是幸缙氏城拜卿为中大夫遂至东莱宿留之【索隐音秀溜宿留迟待之意若依字读则言宿而留亦是有所待并通】数日毋所见见大人迹复遣方士求神怪采芝药以千数是岁旱於是天子既出母名乃祷万里沙【集解应劭曰万里沙神祠也在东莱曲城孟康曰沙径三百余里】过祠泰山【集解邓展曰泰山自东复有小泰山瓚曰即今之泰山】还至瓠子【集解服虔曰瓠子堤名苏林曰在甄城以南濮阳以北广百步深五丈许瓚曰所决河名】自临塞决河【索隐按河渠书武帝自临塞决河将军以下皆负薪填之】留二日沈祠而去【索隐按沈白马

祭河决於是作瓠子歌见河渠书】使二卿将卒塞决河河徙二渠复禹之故迹焉是时既灭南越越人勇之【集解韦昭曰越地人名也】乃言越人俗信鬼而其祠皆见鬼数有效昔东瓯王敬鬼寿至百六十岁後世谩怠故衰耗乃令越巫立越祝祠安台无坛亦祠天神上帝百鬼而以鸡卜【集解駰案汉书音义曰持鸡骨卜如鼠卜正义鸡卜法用鸡一狗一生祝愿讫即杀鸡狗煮熟又祭独取鸡两眼骨上自有孔裂似人物形则吉不足则凶今岭南犹行此法也】上信之越祠鸡卜始用焉公孙卿曰僊人可见而上往常遽以故不见今陛下可为观如缙氏城【集解韦昭曰如犹比也】置脯枣神人宜可致且僊人好楼居於是上令长安则作蜚廉桂观【集解应劭曰飞廉神禽能致风气晋灼曰身如鹿头如雀有角而蛇尾文如豹文也】甘泉则作益延壽观使卿持节设具而候神人乃作通天台【集解徐广曰在甘泉索隐汉书作通天台於甘泉宫按汉书旧仪台高五十丈去长安二百里望见长安城】置祠具其下将招来神僊之属於是甘泉更置前殿始广诸宫室【索隐姚氏案扬雄云甘泉本因秦离宫既奢泰武帝复增通天高光迎风宫外近则有洪厓旁皇储胥弩陆远则有石关封峦枝鹊露寒棠梨师得游观屈奇瑰伟又有高华温德法相曾成宫白虎走狗天梯瑤台仙人弩思观皆壮丽也】夏有芝生殿防内中【集解徐广曰元封二年也索隐按生芝九茎作芝房歌】天子为塞河兴通天台若有光云【集解李奇曰为此作事而有光应璩曰作通天台也】乃下诏曰甘泉防生芝九茎【集解应劭曰芝芝草也其叶相连如淳曰瑞应图云王者敬事耆老不失旧故则芝草生】赦天下毋有复作其明年伐朝鲜夏旱公孙卿曰黄帝时封则天旱乾封【正义乾音干颜师古云三岁不雨暴所封之土令乾】三年上乃下诏曰天旱意乾封乎【集解苏林曰天旱欲使封土乾燥如淳曰但祭不立尸为乾封】其令天下尊祠灵星焉【正义灵星即龙星也张晏云龙星左角曰天田则农祥也见而祭之】其明年上郊雍通回中道巡之【集解徐广曰在扶风汧县】春至鸣泽【集解服虔曰鸣泽泽名也在涿郡遒县北界】从西河归其明年冬上巡南郡【集解徐广曰元封五年也】至江陵而东登礼潜之天柱山号曰南岳【集解应劭曰潜县属庐江南岳霍山也文颖曰天柱山在潜县南有祠】浮江自寻阳出枞阳【集解駰案地理志庐江有枞阳县】过彭蠡祀其名山川北至琅邪并海上四月中至奉高修封焉初天子封泰山泰山东北址古时有明堂处处险不敞上欲治明堂奉高旁未晓其制度济南人公玉带上黄帝时明堂图【索隐玉或音肃公玉姓带名姚氏按风俗通齐湣王臣有公玉冉其後也音语录反三辅决录云杜陵有玉氏音肃说文以为从玉音畜牧之畜今读公玉与决录音同然二姓单复有异单姓者音肃後汉司徒玉况是其後也】明堂图中有一殿四面无壁以茅盖通水圜宫垣为复道上有楼从西南入命曰昆仑【索隐玉带明堂图中为复道有楼从西南入名其道曰昆仑言其似昆仑山之五城十二楼故名之也】天子从之入以拜祠上帝焉於是上令奉高作明堂汶上【集解徐广曰在元封二年秋】如带图及五年修封则祠泰一五帝於明堂上坐令高皇帝祠坐对之祠后土於下房以二十太牢天子从昆仑道入始拜明堂如郊礼礼毕燎堂下而上又上泰山有秘祠其颠而泰山下祠五帝各如其方黄帝并赤帝而有司侍祠焉泰山上举火下悉应之其後二岁十一月甲子朔旦冬至推历者以本统天子亲至泰山以十一月甲子朔旦冬至日祠上帝明堂每修封禪其赞飧曰天增授皇帝泰元神策【索隐按赞飧之辞言天授皇帝泰元神策周而复始又按黄帝得宝鼎神策则泰元者古昔上皇创历之号故此云泰元神策者周而复始也】周而复始皇帝敬拜泰一东至海上考入海及方士求神者莫验然益遣冀遇之十一月乙酉【集解徐广曰二十二日也】栢梁戡十二月甲午朔上亲禪高里【集解伏俨曰山名在泰山

下】祠后土临渤海将以望祠蓬莱之属冀至殊庭焉【集解駰案汉书音义曰蓬莱庭索隐冀汉书作几几近也冀望也并通服?曰蓬莱中僊人殊庭者异也言入僊人异域也】上还以栢梁裁故朝受计甘泉【正义顾胤云栢梁被烧故受计献之物於甘泉也颜师古曰受郡国计簿也】公孙卿曰黄帝就青灵台十二日烧【集解徐广曰日一作月】黄帝乃治明庭明庭甘泉也方士多言古帝王有都甘泉者其後天子又朝诸侯甘泉甘泉作诸侯邸勇之乃曰越俗有火裁复起屋必以大用胜服之於是作建章宫【正义括地志云建章宫在雍州长安县西二十里长安故城西】度为千门万户前殿度高未央其东则凤阙高二十余丈【索隐三辅黄图曰武帝营建章起凤阙高二十五丈关中记一名别风阙以言别四方之风西京赋曰闾阖之内别风嶢嶢是也三辅故事云北有圜阙高二十丈上有铜凤皇故曰凤阙也】其西则唐中数十里虎圈【索隐如淳曰诗云中堂有璧郑玄云唐堂庭也尔雅以庙中路谓之唐西京赋曰前开唐中弥望广豫也正义圈其远反括地志云虎圈今在长安城中西偏也】其北治大池渐台【正义颜师古云渐浸也台在池中为水所浸故曰渐按王莽死此台也】高二十余丈名曰泰液【正义臣瓚云泰液言象阴阳津液以作池也】池中有蓬莱方丈瀛洲壶梁象海中神山龟鱼之属【索隐三辅故事云殿北海池北岸有石鱼长二丈广五尺西岸有石龟二枚各长六尺】其南有玉堂壁门大鸟之属【索隐汉武故事玉堂其与未央前殿等去地十二丈】乃立神明台【索隐汉宫阙疏云台高五十丈上有九室常置九天道士百人】井干楼度五十余丈辇道相属焉【索隐关中记宫北有井干台高五十丈积木为楼言筑累万木转相交架如井干司马彪注庄子云井干井栏也又崔譔云井以四边为干犹筑墙之有桢干又诸本多作干一本作?音说文云干井桥】夏汉改历以正月为岁首而色尚黄官名【集解徐广曰一无名字】更印章以五字【集解张晏曰汉据土德土数五故用五爲印文也若丞相曰丞相之印章诸卿及守相印文不足五字者以之足也】因为太初元年是岁西伐大宛蝗大起丁夫人【集解韦昭曰丁姓夫人名】雒阳虞初等以方祠诅匈奴大宛焉其明年有司言雍五时无牢熟具芬芳不备乃命祠官进时犊牢具五色食所胜【集解孟康曰若火胜金则祠赤帝以白牡】而以木耦马代驹焉【索隐一音偶孟康云寓寄龙形於木又姚氏云寓假也以言假木龙马一驷非寄寓龙马形於木也】独五帝用驹行亲郊用驹及诸名山川用驹者悉以木耦马代行过乃用驹他礼如故其明年东巡海上考神仙之属未有验者方士有言黄帝时为五城十二楼【集解应地曰崑仑县圃五城十二楼仙人之所常居也】以候神人於执期【集解駰案汉书音义曰执期地名也】命曰迎年【正义颜师古云迎年若言祈年】上许作之如方明年上亲礼祠上帝衣上黄焉公玉带曰黄帝时虽封泰山然风后封钜【集解应劭曰封钜黄帝师】岐伯【正义张揖云岐伯黄帝太医】令黄帝封东泰山禅凡山【集解徐广曰在琅邪朱虚县汶水所出凡山亦在朱虚】合符然後不死焉天子既令设祠具至东泰山东泰山卑小不称其声乃令祠官礼之而不封禅焉其後令带奉祠候神物夏遂还泰山修五年之礼如前而加禅祠石闾石闾者在泰山下址南方方士多言此僊人之间也故上亲禅焉其後五年复至泰山修封【集解徐广曰天汉三年李陵以天汉二年败也】还过祭常山今天子所兴祠泰一后土三年亲郊祠建汉家封禅五年一修封薄忌泰一及三一冥羊马行赤星五寛舒之祠官【集解李奇曰祀名也索隐赤星即上灵星祠灵星龙左角赤故曰赤星五者太一也三一也冥羊也马行也赤星也凡五并令祠官寛舒领之】以岁时致礼凡六祠【索隐五者之外有正太一后土祠故云六也】皆太祝领之至如八神诸神明年凡山他名祠行过则祀去则已方士所兴祠各自主其人终则已祠官弗主

他祠皆如其故今上封禪其後十二岁而还徧於五岳四渎矣而方士之候祠神人入海求蓬萊终无有验而公孙卿之候神者犹以大人迹为解无其效天子益怠厌方士之怪迂语矣然终羈縻弗絕冀遇其真自此之後方士言祠神者弥衆然其效可睹矣【集解徐广曰犹今人云其事已可知矣皆不信之耳】太史公曰余从巡祭天地诸神名山川而封禪焉入寿宫侍祠神语究观方士祠官之言於是退而论次自古以来用事於鬼神者具见其表里後有君子得以览焉至若俎豆珪币之详献酬之礼则有司存焉【索隐述赞曰孝武纂极四海承平志尚奢丽尤敬神明坛开八道接通五城朝亲五利夕拜文成祭非祀典巡乖卜征登嵩勒岱望景传声迎年祀日改历定正疲耗中土事彼边兵日不暇给人无聊生俯观嬴政几欲齐衡】

史记卷十二

史记卷十二考证

孝武本纪○魏书王肃传云武帝闻其述史记取孝景及已本纪览之於是大怒削而投之於今此两纪有录无书卫宏汉旧仪注云太史公作景帝本纪极言其短及武帝过武帝怒而削去後坐举李陵降匈奴故下太史公蚕室有怨言下狱死此纪乃元成间褚先生取班书补之【臣照】按汉书司马迁传云十篇缺有录无书张晏曰迁没之後亡景纪武纪礼书乐书兵书汉兴以来将相年表日者列传三王世家龟策列传傳靳列传元成之间褚先生补缺作武帝纪三王世家龟策日者传言辞鄙陋非迁本意也而颜师古则云序日本无兵书张晏云亡失此说非也信矣顾张晏所称褚先生补书惟一纪一世家二传而余六篇并未着为谁氏所补又六篇中兵书既属本无则止九篇与班固所云十篇缺者又不符合然则其五篇之果缺与否并亦难信也今择其如孝武本纪等灼然无疑者则低一行刻以别之余并存疑子曰吾犹及史之阙文也古人疑以传疑其为功後世岂浅耶今不听史记之阙而补之鱼目明珠混不可辨亦可惜已顾班固作史时十篇虽亡而或後人得之若河内女子舜典二十八字之类亦属事之所有或今之所缺转不至十篇之多惜载籍阙如不可得而考也至若孝武本纪更与余篇不同自叙目内并不云孝武本纪也迁死於武帝之前安得有孝武之称目云作今上本纪夫既曰今上本纪则自当有目无书且迁作本纪自黄帝以至武帝则自当无书而有其目班固云十篇缺并不载何十篇缺则固意数今上本纪与否尚未可知後人奋起补之补之而又全録封禪书以为孝武本纪愚陋妄谬极矣恐褚先生亦不至於此张晏所谓褚先生补者亦臆说也至迁传云迁死後其书稍出宣帝时迁外孙杨恽祖述其书遂宣布焉乃魏书王肃传谓武帝闻其述史记取孝景及已本纪览之大怒削而投之於今此两纪有录无书诚齐东之语矣又迁腐刑後为中书令尊宠任事故人任安责其不能荐天下豪俊迁报书云云具载本传书云仆诚已着此书藏之名山传之其人通邑大都则偿仆前辱之失虽万被戮岂有悔哉是迁被腐刑久而书尚未成也乃卫宏汉旧仪注云太史公作景纪极言其短及武帝过武帝怒而削去後坐举李陵降匈奴故下蚕室是书成於救李陵之前何其谬哉且马迁本传但云迁死其书稍出并不言其下狱死而卫宏又以为武帝以迁有怨言下狱死皆所无稽之谈也

少君者故深泽侯入以主方集解徐广曰进纳於天子而主方一云侯人主方駟案如淳曰侯

家人主方药者也○【臣世骏】按封禅书作深泽侯舍人此明脱舍人二字徐裴纷纷持疑未相核对耳

而使黄锤史宽舒受其方集解韦昭曰人姓名駟案汉书音义曰二人皆方士○【臣召南】按始皇纪云过黄腠注云地理志东莱有黄县腠县恐史宽舒盖黄腠间人锤与腠字体小异或传写各别只是地名非别有黄锤其人也年表有锤侯索隐曰县属东莱字亦从金不从月

神君最贵者大夫○封禅书言最贵者太一此作大夫疑传写之误

得四金印佩天士将军地士将军大通将军天道将军印○【臣照】按封禅书无天道将军四字此有之疑天道即大通传写之误後人不知妄加以此为四金印耳其实合五利将军为四也下文云天若遗朕士而大通焉即天土地士大通之解也下天道将军则刻玉印立白茅上受之

上帝鬼神集解服?曰以祭祀上帝或曰尝烹酌也○或曰尝烹酌也六字宜在前徐广曰皆尝以烹牲牢而祭祀也下错简在此

宋之社亡正义覆上栈下使通天地阴阳之气○通上宜有不字

於是甘泉更置前殿始广诸宫室索隐姚氏按扬雄云○云字宜作传下乃班固汉书之文非甘泉赋中语也

芝生殿防内中○【臣照】按隶辨曰校官碑董竝字公□按即□字唐公房碑君字公□房亦作□隶释云隶法房字其户皆在侧故人多不晓或作防或作昉皆误也据此则今本史记武帝纪芝生殿内防中汉书沟洫志筑宫其上名曰宣防皆□字传写之误内中二字必有一衍或曰按尔雅防即今屏风防若是屏风诸儒必有注解今无之知防为房之讹也

史记卷十二考证

卷十三

钦定四库全书

史记卷十三

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

三代世表第一

【索隐应劭云表者录其事而见之按礼有表记而郑玄云表明也谓事微而不着须表明也故言表正义言代者以五帝久古传记少见夏殷以来乃有尚书略有年月比於五帝事迹易明故举三代为首表表者明也明言事仪】

太史公曰五帝三代之记尚矣【索隐按此表依帝系及系本其实叙五帝三代而篇唯名三代系表者以三代代系长远宜以名篇且三代皆出自五帝故叙三代要从五帝而起首也刘氏云尚犹久古也尚矣之文元出大戴礼彼云黄帝尚矣】自殷以前诸侯不可得而谱【正义谱布也列其事也】周以来乃颇可着孔子因史文次春秋纪元年正时日月盖其详哉至於序尚书则略无年月或颇有然多阙不可録故疑则传疑盖其慎也余读谍【索隐谍音牒谍者记系諡之书也下云稽历谱谍谓历代之谱谍也】记黄帝以来皆有年数稽其历谱谍终始五德之传【索隐音啗谓帝王更王以金木水火土之五德传次相承终而复始故云终始五德之传也】古文咸不同乖异夫子之弗论次其年月岂虚哉於是以五帝系谍尚书集世纪黄帝以来迄共和为世表【索隐按大戴礼有五帝德及帝系篇盖太史公取此二篇之谍及尚书集而纪黄帝以来为系表也厉王奔彘周召二公共相王室故曰共和皇甫谧云共伯和干王位则以共国伯爵和其名也干王位言篡也与史迁之说不同盖异说耳】

<史部,正史类,史记,卷十三>

<史部,正史类,史记,卷十三>

帝泄【索隐音薛】

帝不降

帝局【不降弟索隐古莢反】

帝廑【索隐其靳反又音勤】

帝孔甲【不降子好鬼神淫乱不好德二龙去】

帝皐【索隐宋忠云墓在崤南陵】

帝发【索隐帝皐子也系本云帝皐生发及履癸履癸一名桀】

帝履癸【是为桀】

从禹至桀十七世从黄帝至桀二十世

殷汤代夏氏【从黄帝至汤十七世】

帝外丙【汤太子太丁蚤卒故立次弟外丙】

帝仲壬【外丙弟】

帝太甲【故太子太丁子淫伊尹放之桐宫三年悔过自责伊尹乃迎之复位】

帝沃丁【伊尹卒】

帝太庚【沃丁弟】

帝小甲【太庚弟殷道衰诸侯或不至索隐殷本纪及系本皆云小甲太庚子】

帝雍己【小甲弟】

帝太戊【雍己弟以桑穀生称中宗】

帝中丁

帝外壬【中丁弟】

帝河亶甲【外壬弟】

帝祖乙

帝祖辛

帝沃甲【祖辛弟索隐系本作开甲】

帝祖丁【祖辛子】

帝南庚【沃甲子】

帝阳甲【祖丁子】

帝盘庚【阳甲弟徙河南】

帝小辛【盘庚弟】

帝小乙【小辛弟】

帝武丁【雉升鼎耳雉得传说称高宗】

帝祖庚

帝甲【祖庚弟淫集解徐广曰一云淫德殷衰】

帝廩辛【索隐或作冯辛系本作祖辛误也按上祖乙已生祖辛故知非也】

帝庚丁【廩辛弟殷徙河北】

帝武乙【慢神震死】

帝太丁

帝乙【殷益衰】

帝辛【是为纣弑】

从汤至纣二十九世从黄帝至纣四十六世

周武王伐殷【从黄帝至武王十九世】

张夫子问褚先生曰【索隐褚先生名少孙元成间为博士张夫子未详】诗言契后稷皆无父而生今按诸传记咸言有父父皆黄帝子也【索隐按上契及后稷皆帝啻子此云黄帝子者谓是黄帝之子孙耳按啻是黄帝曾孙而契弃是玄孙也】得无与诗谬乎褚先生曰不然诗言契生於卵后稷人迹者欲见其有天命精诚之意耳鬼神不能自成须人而生奈何无父而生乎一言有父一言无父信以传信疑以传疑故两言之尧知契稷皆贤人天之所生故封之契七十里後十余世至汤王天下尧知后稷子孙之後王也故益封之百里其後世且千岁至文王而有天下诗传曰汤之先为契无父而生契母与姊妹浴於玄丘水有燕衔卵堕之契母得故含之误吞之即生契【索隐按史所引出诗纬故曰诗传殷本纪云玄鸟翔水遗卵娥简狄取而吞之】契生而贤尧立为司徒姓之曰子氏子者兹兹益大也诗人美而颂之曰殷社【诗云土】芒芒天命玄鸟降而生商商者质殷号也文王之先为后稷后稷亦无父而生后稷母为姜嫄【索隐有郤氏之女也韦昭云姜姓嫄字也】出见大人蹟而履踐之知於身则生后稷姜嫄以为无父贱而弃之道中牛羊避不踐也抱之山中【抱音普茅反索隐抱又如字】山者养之又捐之大泽鸟覆席食之姜嫄怪之於是知其天子乃取长之尧知其贤才立以为大农姓之曰姬氏姬者本也诗人美而颂之曰厥初生民深修益成而道后稷之始也孔子曰昔者尧命契为子氏为有汤也命后稷为姬氏为有文王也太王命季历明天瑞也太伯之吴遂生源也【索隐言太伯之让季历居吴不返者欲使传文王武王拨乱反正成周道遂天下生生之源本也】天命难言非圣人莫能见舜禹契后稷皆黄帝子孙也黄帝策天命而治天下德泽深後世故其子孙皆复立为天子是天之报有德也人不知以为汜从布衣匹夫起耳夫布衣匹夫安能无故而起王天下乎其有天命然黄帝後世何王天下之久远邪曰传云天下之君王为万夫之黔首请赎民之命者帝有福万世黄帝是也五政明则修礼义因天时举兵征伐而利者王有福千世蜀王黄帝後世也【索隐按系本蜀无姓相承云黄帝後世子孙也且黄帝二十五子分封赐姓或於蛮夷盖当然也蜀王本纪云朱提有男子杜宇从天而下自称望帝亦蜀王也则杜姓出唐杜氏盖陆终氏之胤亦黄帝之後也正义谱记普云蜀之先肇於人皇之际黄帝之子昌意娶蜀山氏女生帝啻立封其支庶於蜀历虞夏商周衰先称王者蚕丛国破子孙居姚隳等处】至今在汉西南五千里常来朝降输献於汉非以其先之有德泽流後世邪行道德岂可以忽乎哉人君王者举而观之汉大将军霍子孟名光者亦黄帝後世也【索隐按系本云霍国真姓後周武王封弟叔处於霍是姬姓亦黄帝後也】此可为博闻远见者言固难为浅闻者说也何以言之古诸侯以国为姓霍者国名也武王封弟叔处於霍後世晋献公灭霍公後世为庶民往来居平阳平阳在河东河东晋地分为魏国以诗言之亦可为周世周起后稷后稷无父而生以三代世传言之后稷有父名高辛高辛黄帝曾孙黄帝终始传曰【索隐盖谓五行讖纬之说若今之童谣也】汉兴百有余年有人不短不长出白燕之乡【正义一本作白彘按霍光平阳人平阳今晋州霍邑本秦时霍伯国汉为彘县後汉改彘曰永安隋又改为霍邑遍检记传无白燕之名疑白彘是乡之名】持天下之政时有婴儿主【索隐谓昭帝也】郤行车【索隐言霍光持政擅权遏帝令如郤行车使不前也】霍将军者本居平阳白燕臣为郎时与方士考功【正义谓年老为方士最功也】会旗亭下【西京赋曰旗亭五里薛综曰旗亭市楼也立旗於上故取名焉】为臣言岂不伟哉【索隐褚先生盖腐儒也设主客引诗传云契弃无父及据帝系皆帝啻之子是也而未引

蜀王霍光竟欲证何事而言之不经芜秽正史辄云岂不伟哉亦何诬也】

【索隐述赞曰高辛之?大啓禎祥修己吞薏石纽兴王天命玄鸟简狄生商姜嫄履迹祚流岐昌俱膺历运互有兴亡风余周召刑措成康出彘之後诸侯日强】

史记卷十三

史记卷十三考证

三代世表○【臣德龄】按五帝时以天下为公器子贤则传子子不贤则更择人故黄帝不立其子元嚣昌意而立其孙高阳高阳不立其子穷蝉而立其族子高辛高辛以长而立摯摯崩尧践大位内外咸服略无疑阻及尧禅舜舜禅禹举大统之传若行所无事公天下之势使之然也自禹底定山川咸则三壤成赋中邦势乃不得不家天下盖运会自然而然非禹有所利於其间自是而大统归於一姓禅让不可复行曰夏曰殷曰周远绍五帝列为三代立隆万世史迁表而叙之所以作以後万万世有天下者之模范也以本纪首述五帝而三代世系又皆出於黄帝故仍自黄帝叙起而名其篇则曰三代世表司马贞索隐但以三代代系计论似未竟其义

周属

差弗生毀渝○本纪渝作隳

夏

帝芒索隐音亡一作荒○监本作一作 人今改正殷

帝小甲索隐小甲大庚子○监本庚讹作康今改正帝中丁○监本注云俗本作仲丁【臣照】按此注既非集解亦非索隐正义不知为谁氏之语且中即仲古字作中耳非有异义也史记内古字甚多不应独注此一字今删

帝廩辛索隐或作冯辛系本作祖辛误也按上祖乙已生祖辛故知非也○【臣照】按礼记云周人以讳事神是讳名之典始于周人殷未有也自廩辛以前莫不以十干为名则同名者多矣何独疑焉虽系本作祖辛未知是否然索隐之说固非也

周

周武王伐殷○【臣照】按上文云殷汤代夏氏则此亦应云周武王代殷

昭王瑕索隐宋忠云昭王南伐楚辛由靡为左○本纪由作游

楚

熊鸞红○世家鸞作摯

殷社芒芒○秦藩本有诗云土三字注今从之【臣照】按毛诗本文作宅殷土芒芒今日殷社不得谓之芒芒也先儒必有引诗以证其失者特此三字不知其为集解欤索隐欤正义欤姑仍秦藩本之旧俾後世有考凡卷内未经添明集解等阴文字者俱放此

史记卷十三考证

<史部,正史类,史记>

卷十四

钦定四库全书

史记卷十四

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

十二诸侯年表第二

【索隐篇言十二实叙十三者贱夷狄不数吴又霸在後故也不数吴而叙之者闔閭霸盟上国故也】

太史公读春秋历谱谍【索隐按刘杳云三代系表旁行邪上并效周谱谱起周代艺文志有古帝王谱又自古为春秋学者有年历谱谍之说故杜元凯作春秋长历及公子谱盖因於旧说故太史公得读焉也】至周厉王未尝不废书而叹也曰呜呼师挚见之矣【郑玄曰师挚太师之名周道衰微郑卫之音作正乐废而失节鲁太师挚识关雎之声首理其乱也】纣为象箸而箕子唏【索隐邹氏及刘氏箸皆音直虑反即筯也今按箕子云为象箸必为玉杯则箸者是樽也音治略反唏叹声音许既反又音希希亦声余故记曰夫子曰嘻其甚也亦音饬】周道缺诗人本之衽席关雎作仁义陵迟鹿鸣刺焉及至厉王以恶闻其过【索隐恶音乌故反过音古卧反故国语云厉王止谤道路以目】公卿惧诛而祸作厉王遂奔于彘【索隐彘地名在河东後为永安县也】乱自京师始而共和行政焉是後或力政强乘弱兴师不请天子然挟王室之义【索隐挟音协】以讨伐为会盟主政由五伯【索隐伯音霸五伯者齐桓公晋文公秦穆公宋襄公楚庄王也】诸侯恣行【索隐行音下孟反】淫侈不轨贼臣篡子滋起矣齐晋秦楚其在成周微甚封或百里或五十里晋阻三河齐负东海楚介江淮【索隐介音界言楚以江淮为介一云介者夹也】秦因雍州之固四国迭兴更为伯主文武所褒大封皆威而服焉是以孔子明王道干七十余君莫能用故西观周室论史记旧闻兴於鲁而次春秋上记隐下至哀之获麟约其辞文去其烦重【索隐去音羌吕反重音逐龙反言约史记修春秋去其重复之文也】以制义法王道备人事决七十子之徒口受其传指【索隐传音逐宣反】为有所刺讥褒讳挹损之文辞不可以书见也鲁君子左丘明惧弟子人人异端各安其意失其真故因孔子史记具论其语成左氏春秋铎椒为楚威王傅为王不能尽观春

秋采取成败卒四十章为铎氏微【索隐铎椒所撰名铎氏微者春秋有微婉之辞故也】赵孝成王时其相虞卿上采春秋下观近世亦着八篇为虞氏春秋【正义按其文八篇艺文志云十五篇虞卿撰】吕不韦者秦庄襄王相亦上观尚古删拾春秋集六国时事以为八览六论十二纪为吕氏春秋及如荀卿孟子公孙固韩非之徒各往往捃摭春秋之文以着书不可胜纪【索隐荀况孟轲韩非皆着书自称子宋有公孙固无所述此固盖齐人韩固传诗者也】汉相张苍历谱五德【索隐按张苍着终始五德传也】上大夫董仲舒推春秋义颇着文焉【索隐作春秋繁露是】

太史公曰儒者断其义驰说者骋其辞不务综其终始历人取其年月数家【索隐数音疎具反谓阴阳术数之家也】隆於神运【集解徐广曰一作通】谱谍独记世諡其辞略欲一观诸要难【索隐观音官难音奴丹反】於是谱十二诸侯自共和讫孔子表见春秋国语学者所讥盛衰大指着于篇为成学治古文者【集解徐广曰一云治国闻者也】要删焉【索隐言表见春秋国语本为成学之人攻文之士以欲览其要故删为此篇焉】

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

<史部,正史类,史记,卷十四>

【索隐述赞曰太史表次抑有条理起自共和讫於孔子十二诸侯各编年纪兴亡继及盛衰臧否恶不揜过善必扬美絶笔获麟义取同耻】

史记卷十四

史记卷十四考证

十二诸侯年表索隐篇言十二实叙十三者贱夷狄不数吴○【臣德龄】按是表主春秋吴于春秋之季始通上国而寿梦以前自不得列于是表然则十二之号固不得不仍其旧司马贞之论凿矣

周

皇甫谧曰二十四年惠王崩○春秋僖八年为惠王二十五年冬十有二月丁未天王崩左氏以僖七年闰月惠王崩八年十二月告丧谧之说依左氏也赵匡以左氏为不足凭吴澄曰惠王前年冬有疾今年岁终乃崩此不知何所本也

襄王十四年叔带复归於周○本纪十二年春秋左传与表同

三十三年襄王崩○本纪三十二年春秋文八年秋八月戊申天王崩左传秋襄王崩与表同

顷王五年崩○本纪六年春秋与纪同

敬王十六年王子朝之徒作乱故王奔晋○本纪同左传天王处於姑莠辟儋翩之乱也杜注姑莠周地据此则王未尝奔晋也

四十三年敬王崩○本纪四十二年左传哀十九年冬叔青如京师敬王崩故也据此则敬王四十四年崩无疑徐广曰岁在甲子非一本又作徐广曰皇甫谧曰敬王四十四年崩元己卯崩壬戌按通监敬王元年壬午崩年乙丑己卯乃景王二十三年敬王乌得称元壬戌乃敬王

四十一年岂有崩後三年元王方即位乎其误不辨而明矣

鲁

孝公立三十八年卒○世家二十七年按周宣王诛伯御立孝公在伯御之十一年其年乃孝公元年而表以伯御元年为孝公元年故孝公多十一年矣

桓公十六年公会晋谋伐郑○世家会于曹谋伐郑春秋公会宋公蔡侯卫侯于曹左传会于曹谋伐郑也则晋当是曹

僖公十五年五月日有食之不书史官失之○世家不载左传不书朔与日官失之也不书下疑脱朔与日三字

文公八年王使卫来求金○世家不载春秋九年事成公元年春齐取我隆○世家二年春秋左传与世家同隆作龙

昭公稠○世家作稠徐广曰一作昭春秋与表同十年四月日蚀○世家不载春秋亦无其事

二十四年鸛鹄来巢○世家二十五年春秋左传与世家同

二十五年公出居郛○世家二十六年春秋昭二十五年九月己亥公孙於齐次於阳州十有二月齐侯取郛二十六年公至自齐居於郛据此则取郛在二十五年居郛在二十六年表与世家小有参差耳

哀公七年公会吴王於缙○春秋缙作鄆谷梁作缙齐

庄公赎○世家赎作购

厘公二十五年山戎伐我○世家山作北

桓公七年会诸侯於鄆○春秋同世家鄆作甄

昭公二十年卒○世家十九年春秋文十四年为齐昭二十年夏五月乙亥齐侯潘卒与表同

懿公四年公别邴馯父而夺閭职妻○左传同世家邴馯作丙戎閭作庸

惠公二年王子成父败长翟○世家成作城

晋

孝侯十六年曲沃庄伯杀孝侯○世家十五年

晋侯潜○世家春秋俱作缙

献公二十六年公卒立奚齐里克杀之及卓子立夷吾○世家同卓子作悼子按春秋僖九年晋里克杀其君之子奚齐左传里克杀公子卓又春秋僖十年晋里克弑其君卓及其大夫荀息经传不同表云及卓子盖依传也

襄公三年秦报我殽败於汪○世家秦使孟明伐晋报殽之役取晋汪以归按春秋文二年为晋襄三年秦穆三十五年春王二月甲子晋侯及秦师战於彭衙秦师败绩左传春秦孟明视帅师伐晋以报殽之役又春秋冬晋人宋人陈人郑人伐秦左传伐秦取汪以报彭衙之役据此则报殽败汪自是两事而表与世家连类而及耳又彭衙之战秦本纪在穆三十四年与春秋异郑世家穆公三年从晋伐秦败秦於汪又与秦本纪晋世家经传不同

景公据○世家同春秋据作獮

厉公寿曼○世家同春秋寿曼作州蒲

顷公弃疾○世家春秋弃疾俱作去疾

秦

穆公十六年为河东置官司○左传秦始征晋河东置官司焉系十五年事本纪与传同

三十年围郑有奇言即去○本纪三十年助晋人围郑郑使人言於繆公秦乃罢兵春秋僖十三年晋人秦人围郑左传甲午晋侯秦伯围郑佚之狐言於郑伯曰若使烛之武见秦君师必退纪与经传事同文异奇言二字太史公断文也

三十五年伐晋报殽败我於汪○本纪三十六年以报殽之役无败汪事说详晋襄三年

共公五年卒○本纪文也表因之春秋宣四年秦伯稻卒则共公立四年非五年矣

桓公元年○当在鲁宣五年

二十七年卒○本纪文也春秋成十四年秦伯卒则桓公立二十八年明矣表因本纪之误是以秦桓之事俱与春秋异而递误一年耳

楚

文王五年息夫人陈女过蔡○世家不载春秋左传在庄十年为楚文六年是当与伐蔡获哀侯以归同入六年

十三年卒○世家文也春秋庄二十年为堵敖元年则文王立十五年堵敖立三年表因世家之误也

成王恽○春秋恽作顓谷梁作髡

二十六年灭六英○世家云灭英无六字徐广曰一本作黄春秋楚成二十四年灭黄二十九年齐人徐人伐英楚穆四年秋楚人灭六据此则楚成二十六年六英俱未灭当从灭黄其编年亦当从春秋

庄王侶○春秋侶作旅谷梁作吕

六年伐宋陈○世家云伐宋无陈左传楚子侵陈遂侵宋与表同

康王招○春秋招作昭

灵王围○春秋围作?

七年就章华台内亡人实之○世家同左传昭七年为楚灵六年为章华之台纳亡人以实之据此即六年表内执尹亡人入章华之事此为美文

灭陈○世家八年春秋左传与表同左传昭十一年楚公子弃疾帅师围蔡韩宣子问於叔向对曰楚王奉孙吴以讨於陈曰将定而国陈人听命然则定陈者灭陈之诈词也且定陈之言在楚灵七经文无八年定陈之文

昭王珍○春秋珍作轸

四年吴三公子来奔○世家同左传鲁昭三十年吴子使徐人执掩余使鍾吾人执烛庸二公子奔楚据此则三字误

七年囊瓦伐吴○世家同春秋左传定二年秋楚人伐吴据此当是楚灵八年

惠王四年伐郑○世家六年白公请兵令子西伐郑无四年伐郑之事春秋哀十年冬楚公子结帅师伐陈年同事异疑陈郑音近而误耳

宋

惠公○世家三十年卒子哀公立哀公元年卒子戴公立与表异又戴公世家无名则立字立君之谓也表误以为戴公名耳

殇公十年华督杀公○世家春秋同

庄公冯元年○春秋在桓三年至庄二年乙酉宋公冯卒据此则宋庄立十八年明矣乃世家误以十九年卒表遂以殇公被弑之年为庄公元年故有十九年耳

桓公御说○世家御作御

成公王臣○谷梁王作壬

文公鲍○世家鲍作鲍革

共公瑕○春秋瑕作固

平公成○公羊成作戌

景公头曼○春秋头曼作栾

二十九年侵郑卫鲁○世家不载春秋春宋皇瑗帅师侵郑无侵卫鲁之文秋宋人围曹则鲁当是曹是年晋曼多帅师侵卫则侵卫当是晋事

卫

庄公十七年州吁长好兵○世家十八年

宣公元年晋共立之讨州吁○世家卫桓十六年春秋隐四年九月卫人杀州吁於濮冬十有二月卫人立晋与世家同

惠公三年朔奔齐立黔牟○世家四年春秋桓十六年十有一月卫侯朔出奔齐与世家同

朔复入十四年○按惠公立四年亡八年通十二年世家云通凡十三年

懿公八年翟伐我○世家九年春秋闵二年狄入卫与

文公二十三年重耳从齐过无礼○世家十六年左传与表同第按左传重耳处狄十二年而行过卫卫文公不礼焉及齐齐桓公妻之然则重耳从狄过卫非从齐过卫也

成公三十一年楚伐郑与我平晋中行桓子距楚救郑伐我○世家不载春秋宣五年为陈灵十年楚人伐郑左传楚子伐郑陈及楚平晋荀林父救郑伐陈据此当是陈灵之事

献公十五年救郑败晋师栢○世家不载春秋襄十一年夏晋率诸侯伐郑卫与之秋晋率诸侯伐郑会於萧鱼卫亦与之无救郑之文冬秦人伐晋左传秦庶长鲍庶长武帅师伐晋以救郑己丑秦晋战於栢晋师败绩据此当是秦景十五年事

殇公狄○春秋狄作剽

灵公三十七年伐鲁○世家不载春秋定十二年卫公孟彊帅师伐曹鲁当是曹

出公十二年父蒯聩入辄出亡○世家同春秋哀十六年春己卯卫世子蒯聩自戚入卫卫侯辄来奔据此则哀十六年为出十四年非十二年明甚而蒯聩元年亦非哀十五年矣

陈

弟他杀太子免代立国乱再赴陈厉公他元年陈大夫五父後立为厉公○左传桓五年文公子他杀太子免而代之公疾病而乱作则杀免在陈桓三十八年又春秋桓六年蔡人杀陈佗则是年佗不得称元也桓十二年为陈厉七年八月壬辰陈侯跃卒则厉公名跃而非佗也孔穎達曰跃为厉公世家本文也庄二十二年传陈厉公蔡出也故蔡人杀五父而立之五父即佗六年杀佗而厉公立也陈世家以佗与五父为二人言蔡人为佗杀五父及桓公太子免而立佗是为厉公立七年太子免之三弟跃林杵臼共弑厉公而立跃是为利公利公立五月卒林立是为庄公按传五父佗一人而世家以为二人按经蔡人杀佗在桓公卒之明年不得为佗立七年也佗以鲁桓六年见杀跃以鲁桓十二年始卒不得为跃立五月也既以佗为厉公又妄称跃为利公世本本无利公皆是马迁妄说也据孔氏之辨则表仍世家之误明矣至七年表云公淫蔡蔡杀公俱非厉公跃徐广曰班氏云桓公之弟

成公二十九年倍楚盟楚侵我○世家二十九年倍楚盟三十年楚共王伐陈春秋襄三年陈侯使袁侨如会左传楚子辛为令尹欲侵於小国陈成公使袁侨如会求成据此则是年陈为请盟非倍盟也且经传俱无楚侵陈之文又襄四年左传春楚师为陈叛故将伐陈三月陈成公卒闻丧乃止夏楚彭名侵陈据此则当在陈成三十年

哀公弱○春秋弱作溺

湣公二十三年楚灭陈○世家二十四年左传哀十七年秋七月己卯楚公孙朝帅师灭陈与世家同

蔡

宣侯措父○春秋作宣公考父

景侯固○世家固作同春秋与表同

二十八年晋率我伐郑○世家不载春秋襄九年蔡景二十八年曹成十四年也冬公会晋侯宋公卫侯曹伯莒子邾子滕子薛伯?伯小邾子齐世子光伐郑不及蔡据此疑是曹成之事误入於蔡者

灵侯班○世家春秋班俱作般

蔡侯庐○世家春秋同左传庐作卢

元年○世家灭蔡三岁楚平王立庐为平侯春秋昭十一年冬十有一月丁酉楚师灭蔡十三年蔡侯庐归于蔡据此则昭十二年庐不得称为元也

悼侯东国○春秋昭二十一年蔡侯朱出奔楚二十三年蔡侯东国卒於楚朱谷梁作东第考朱无归入葬之文东国无出奔之事汪克寛曰东即东国误为朱也

曹

戴伯鲜○世家鲜作苏

宣公卢○世家卢作疆春秋卢作庐

成公二十二年伐卫○世家不载春秋襄十七年夏卫石买帅师伐曹无曹伐卫之文

平公须○世家须作顷春秋与表同

靖公路○世家春秋路俱作露

郑

桓公周宣王母弟○世家云宣王庶弟

庄公寤生元年祭仲生○世家封弟段於京祭仲諫之左传同生疑是諫

二十九年与鲁璧易许田○世家云与鲁祊易许田春秋隐八年三月郑伯使宛来归祊左传郑伯请释泰山之祀而祀周公以泰山之祊易许田据此璧当是祊又春秋桓元年为庄三十三年郑伯以璧假许田表同世家不载

昭公元年忽母邓女祭仲取之○文义未详按世家初祭仲甚有宠于庄公公使娶邓女生太子忽故祭仲立之则太史公书之者见立忽之由此也取当是娶

子婴○世家同春秋子婴作子仪

厉公亡後七岁复入○世家厉公初立四岁居栎十七岁复入立七岁与亡凡二十八年与左传同表误

襄公元年楚伐晋来救○世家五年事元年楚纵宋伐郑非楚伐也亦无晋救之文

十八年晋栾书取我范○世家不载左传取汜祭杜注郑地成臯县东有泛水范字当误

成公三年与楚盟○世家楚共王使人来与盟郑人私与盟据此则春秋郑成元年马陵之盟自是两事

厘公恹○世家同春秋作髡頑

简公喜○世家春秋喜俱作嘉

二年诛子驷○左传襄十年冬十月戊辰杀子驷据此是郑简三年世家与传同

十七年子产曰范宣子为政我请伐陈○世家不载左传范宣子为政子产寓书于子西以告宣子宣子说乃轻币是行也郑伯朝晋为重币故且请伐陈也据此则子产曰三字似美文

二十八年子产曰三国不会○世家不载左传夏诸侯如楚晋卫曹邾不会郑伯先待于申楚王使问礼於左师与子产子产曰小国共职敢不荐守献伯子男会公之礼六据此不会者四国三字当误子产曰下疑有脱文

定公四年火欲禳之子产曰不如修德○左传昭十八年事是郑定六年也世家与传同

十一年楚建作乱杀之○世家十年

献公蚤○公羊蚤作囓

燕

宣公五年楚围我我卑辞以解○世家不载春秋宣十二年楚子围郑左传郑伯肉袒牵羊以迎王曰其君能下人必能信用其民矣退三十里而许之平疑是郑襄八年误入於燕者

平公六年公如晋请内王○世家不载左传昭二十四年郑伯如晋子太叔相曰王室之不宁晋之耻也献子乃徵会於诸侯期以明年二十五年会於黄池谋王室也疑是郑定十二年误入於燕者

简公十一年败宋师○世家不载春秋哀十三年春郑罕达帅师取宋师於岩左传同无燕败宋师之文疑是郑声十九年误入於燕者

吴

余祭十七年余昧四年○按春秋襄二十九年閼弑吴子余祭则余祭止四年也襄十三年为余昧元年昭十五年春王正月吴子夷末卒则余昧凡十七年也世家误编年岁表遂因之故余昧之事皆误属余祭耳

余昧○春秋作夷末公羊作夷昧

闾閻四年伐楚六潜○世家潜作濞

夫差十八年楚败我○世家越败吴师于笠泽左传哀十七年三月越子伐吴吴师大乱遂败之据此楚当是越

史记卷十四考证

卷十五

<史部,正史类,史记>

钦定四库全书

史记卷十五

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

六国表第三

【索隐六国乃魏韩赵楚燕齐并秦凡七国号曰七雄】

太史公读秦记【索隐即秦国之史记也故下云秦烧诗书诸侯史记尤甚独有秦记又不载日月是也】至犬戎败幽王周东徙洛邑秦襄公始封为诸侯作西時用事上帝僭端见矣礼曰天子祭天地诸侯祭其域内名山大川今秦杂戎翟之俗先暴戾後仁义位在藩臣而胪於郊祀君子惧焉【索隐按胪字训陈也出尔雅又以言秦是诸侯而陈天子郊祀实僭也犹季氏旅於泰山然正义胪作音旅祭名又旅陈也】及文公踰陇攘夷狄尊陈宝营岐雍之间而穆公修政东竟至河则与齐桓晋文中国侯伯侔矣是後陪臣执政大夫世禄六卿擅晋权征伐会盟威重於诸侯及田常杀简公而相齐国诸侯晏然弗讨海内争於战功矣三国终之卒分晋田和亦灭齐而有之六国之盛自此始务在强兵并敌谋诈用而从衡短长之说起矫称蠹出誓盟不信虽置质剖符犹不能约束也秦始小国僻远诸夏宾之比於戎翟至献公之後常雄诸侯论秦之德义不如鲁卫之暴戾者量秦之兵不如三晋之强也然卒并天下非必险固便形势利也盖若天所助焉或曰东方物所始生西方物之成熟夫作事者必於东南收功实者常於西北故禹兴於西羌【皇甫谧曰孟子称禹生石纽西夷人也传曰禹生自西羌是也正义禹生於茂州汶川县本冉駹国皆西羌】汤起于亳【集解徐广曰京兆杜县有亳亭】周之王也以丰镐伐殷秦之帝用雍州兴汉之兴自蜀汉秦既得意烧天下诗书诸侯史记尤甚为其有所刺讥也诗书所以复见者多藏人家而史记独藏周室以故灭惜哉惜哉独有秦记又不载日月其文略不具然战国之权变亦有可颇采者何必上古秦取天下多暴然世异变成功大【索隐以言人君制法当随时代之异而变易其政则其成功大若居今行古

犹胶柱而调瑟也】传曰法後王何也以其近己而俗变相类议卑而易行也【正义易以豉反後王近代之王法与已连接世俗之变及相类也故议卑浅而易识行耳】学者牵於所闻见秦在帝位日浅不察其终始因举而笑之【索隐举犹皆也】不敢道此与以耳食无异【索隐按言俗学浅识举而笑秦此犹耳食不能知味也】悲夫余於是因秦记踵春秋之後起周元王【索隐按此表起周元王元年春秋迄元王八年】表六国时事讫二世凡二百七十年着诸所闻兴坏之端後有君子以览观焉

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

<史部,正史类,史记,卷十五>

【索隐述赞曰春秋之後王室益卑楚强南服秦霸西垂三卿分晋八代兴妨逖主盟会互为雄雌二周前灭六国後隳壮哉嬴氏吞并若斯】

史记卷十五

史记卷十五考证

六国年表

周

元王元年徐广曰乙丑○【臣祖庚】按通监元年丙寅则乙丑乃敬王四十四年徐广以敬王崩在甲子故以乙丑为元索隐元王八年崩亦误以乙丑为元耳皇甫谧曰元年癸酉二十八年庚子崩按通监元王在位七年癸酉乃定王元年在位二十八年应入定王表内误列于此

定王元年皇甫谧曰元年癸亥十年壬申崩○【臣祖庚】按通监癸亥乃敬王四十二年壬申则元王崩年也又本纪敬王四十二年崩谧盖?本纪即以癸亥为元耳应入元王表内误列于此

安王三年王子定奔晋○本纪不载

秦

厉共公元年○【臣祖庚】按通监在敬王四十四年则元王元年乃厉共二年也

五年楚人来赂○本纪不载【臣照】按年表有而本纪无者六国都有而秦表为最此下六年义渠来赂繇诸乞来援七年彗星见十年庶长将兵拔魏城彗星见十四年晋人楚人来赂十六年补廪戏城二十年公将师与绵诸战二十六六年左庶长城南郑二十八年越人来迎女二十九年晋大夫知伯寬率其邑人来奔躁公八年六月雨雪日月蚀怀公元年生灵公灵公元年生献公三年作上下畤八年城塹河濒初以君主妻河十年补廪城简公二年与晋战败郑下五年日蚀十四年伐魏至阳狐惠公三年日蚀五年伐诸繇九年伐韩宜阳取六邑十年与晋战武城县陝献公三年日蚀书晦六年初县蒲蓝田善明氏十年日蚀十一年县栎阳十六年民大疫日蚀十九年败韩魏洛阳孝公元年彗星见西方十一年城商塞卫鞅围固阳降之十三年初为县有秩史十九年城武城从东方壮邱来归二十一年马生人二十四年秦大荔围合阳惠文王二年宋太邱社亡三年拔韩宜阳四年魏夫人来七年义渠内乱庶长操将兵定之十二年会龙门昭王十七年魏入河东四百里二十七年地动坏城五十二年王稽弃市十一年吕不韦之河南十二年发四郡兵助魏击楚本纪皆不载古人之意今不可得而见矣今彙列于此其他异同仍分条各着焉

灵公七年与魏战少梁○本纪作六年大事记曰出师在六年而战在七年也

十年○城籍姑灵公卒立其季父悼子是为简公本纪俱作十三年

简公十五年简公卒○本纪作十六年

惠公十一年太子生○本纪作十二年

十三年蜀取我南郑○本纪作伐蜀取南郑

献公十七年栎阳雨金四月至八月○本纪作十八年而不纪月

二十三年与魏战少梁虜其太子○本纪与魏晋战少梁虜其将公孙痤无太子之文

孝公十二年初取小邑为三十一县○本纪作四十一二十三年与晋战岸门○本纪作二十四年岸门作鴈门

惠文王八年与韩赵战斩首八万○本纪七年共击秦当即此事通监七年五国皆败走八大败韩师於修鱼无赵则属两事未悉温公所?

九年取赵中都西阳安邑○本纪无安邑前十年卫鞅围魏安邑降之安邑非赵地表盖衍文

耳赵世家作西都中阳与秦纪表互异

十一年侵义渠得二十五城○本纪作十年

十二年樗里子击藺阳虜赵将公子繇通封於蜀○本纪十一年樗里疾攻魏焦降之非藺阳也十二年虜将庄又本纪十一年公子通封於蜀无繇字

武王元年张仪魏章皆死於魏○本纪张仪魏章东出之魏魏世家张仪魏章皆归於魏死字疑误

昭王七年魏冉为相○本纪作十二年

十年楚怀王亡之赵○本纪作十一年

十五年魏冉免相○本纪作十六年

十八年客卿错击魏至軹取城大小六十一○本纪作十六年又祇称左更错取軹及邓无取城大小六十一之文通监亦作十八年云秦大良造白起伐魏取六十一城又似两事

三十年白起封武安君○本纪作二十九年

四十四年秦攻韩取南阳○本纪作南郡

五十二年取西周王○本纪云周初亡【臣祖庚】按通监迁西周公於 狐之聚取疑是迁王疑是公传写之讹也

始皇帝二十一年王贲击楚○本纪王贲攻蓟不云击楚

二十三年杀其将项燕○本纪作二十四年

二十七年更命河为德水为金人十二命民曰黔首同天下书分为三十六郡○本纪作二十六年

二十八年为阿房宫○本纪三十五年二十六年筑宫咸阳北阪上二十七年作信宫总非二十八年事也

三十三年西北取戎为四十四县○本纪作三十四县魏

卫悼公○世家作怀公

文侯斯○世家作都

五年魏诛晋幽公○世家作盗杀幽公

十七年雒阴合阳○通监合作合

十八年受经子夏过段干木之间常式○世家作二十五年

二十年卜相李克○世家作二十五年

二十四年伐秦至阳狐○世家作秦伐我至阳狐晋孝公倾○世家作颀

三十六年秦侵晋○世家作秦侵我阴晋表盖脱我阴二字

惠王五年与韩会宅阳城武都○世家都作堵

九年与秦战少梁虜我太子○详见秦献二十三年十六年与秦孝公会杜平○监本讹有十六年年下有徐广曰三字衍文今去

襄王二年秦败我雕阴○此与五年魏献少梁河西地於秦自是两事通监与表同世家则并入五年

哀王六年秦来立公子政为太子○世家来作求七年虜声子於濮○世家徐广注声子作赘子

安厘王十一年秦拔我廩丘○世家作鄴丘

韩

文侯七年郑败晋○世家败作反

哀侯六年韩严杀其君○世家同通监韩严遂弑其君哀侯以韩廐为相而爱严遂二人相害遂刺廐於朝并中哀侯据此则表与世家俱脱遂字

昭侯六年取陵观廩丘○世家廩作邢

宣惠王十年君为王○世家作十一年

襄王十六年与齐魏击秦秦与我武遂和○【臣祖庚】按通监齐韩魏伐秦秦割河东三城

以和即十四年事也世家击秦事与通监同已见十四年表内此又书击秦者美文也

厘王二十一年暴鸢救魏○世家鸢作?

桓惠王二十九年秦拔我十二城○世家作十三城赵

襄子元年以金斗杀代王○世家斗作料

烈侯元年魏使太子伐中山○世家魏文侯伐中山使太子击守之通监晋魏斯击宋使乐羊伐中山使其子击守中山据此伐当是守

敬侯八年袭卫不克○世家不载

成侯六年败魏涿泽○世家涿作淶正义曰音浊盖齐康公会晋卫於浊泽齐威王败魏於浊泽即此地也

武灵王二年城鄗○世家作三年

十年秦取我中都西阳安邑○说见秦惠文後九年十二年立燕公子职○世家作十一年

二十五年赵攻中山○世家作二十三年

惠文王元年以公子胜为相封平原君○世家不载二年楚怀王亡来弗内○世家不载

四年围杀主父与齐燕共灭中山○世家三年灭中山四年围主父饿死

七年迎妇秦○【臣祖庚】按赵无迎妇于秦之事惟楚世家楚迎妇於秦通监亦云楚君迎妇於秦楚顷襄七年事也表文下格即楚顷襄七年悞入上格赵惠文七年耳

十五年取齐昔阳○世家作十六年

孝成王元年平原君相○世家不载通监赵以公子胜为相在赧王四十九年惠文三十三年也其非孝成元年明矣且惠文元年表内已书为相至此又书舛讹可知

九年秦围我邯郸○世家在七年

楚魏救我○世家在八年

十五年平原君卒○世家作十四年

赵王迁○世家作幽

二年秦拔我平阳败扈辄斩首十万○世家秦攻武城扈辄率师救之军败死焉

三年秦拔我宜安○世家秦攻宜安李牧率师却之与表异通监秦伐赵取宜安平阳武城与表同据此则李牧却之者二年事也拔平阳拔宜安俱三年事世家误其年故表前後参差耳

楚

惠王二十二年鲁哀公卒○通监贞定王元年鲁哀公卒於有山氏世家同据此则二十一年也

悼王二年三晋来伐我至桑丘○世家作乘丘

怀王二十四年秦来迎妇○世家云秦昭王初立乃厚赂於楚楚往迎妇【臣祖庚】按秦来秦来赂楚也迎妇楚往迎妇也当作两句读

顷襄王元年秦取我十六城○世家云取析十五城而去徐广曰既取析又并左右十五城也广盖因表为十六城而迁就其词

二十年秦拔鄢西陵○世家拔我西陵不云鄢

考烈王十四年楚灭鲁顷公迁下邑○鲁世家作卞邑徐广注一作卞通监迁其君於卞卞春秋鲁邑名即古卞明国也战国时属楚则下邑应作卞邑

燕

燕人共立公子平○【臣照】按燕王哙七年已为齐所杀死二年而燕乃立平燕国二年无君则表内七格後八格不应书八字九格不应书九字哙已死矣谁之八年九年耶

齐

宣公四十四年伐鲁莒及安阳○世家莒作葛阳作陵湣王三年封田婴於薛○世家同【臣祖庚】按显王四十八年为湣王三年齐号薛公田文为孟尝君初齐王封田婴於薛婴卒文嗣立号孟尝君据此则是年田文号孟尝君非封田婴於薛也

史记卷十五考证

<史部,正史类,史记>

卷十六

钦定四库全书

史记卷十六

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

秦楚之际月表第四

【索隐张晏云时天下未定参错变易不可以年记故列其月今按秦楚之际扰攘僭篡运数又促故以月纪事而名表也】

太史公读秦楚之际曰初作难发於陈涉虐戾灭秦自项氏拨乱诛暴平定海内卒践帝祚成於汉家五年之间号令三嬗【音善索隐古禅字音市战反三嬗谓陈涉项氏汉高祖也】自生民以来未始有受命若斯之亟也【索隐音已力反亟训急也】昔虞夏之兴积善累功数十年德洽百姓摄行政事考之於天【韦昭曰谓舜受禅在璇玑玉衡以齐七政】然後在位汤武之王乃由契后稷修仁行义十余世不期而会孟津八百诸侯犹以为未可其後乃放弑【索隐按谓汤放桀武王讨纣也】秦起襄公章於文繆献孝之後稍以蚕食六国百有余载至始皇乃能并冠带之伦以德若彼【索隐即契后稷及秦襄公文公穆公也】用力如此【索隐谓汤武及始皇也】盖一统若斯之难也秦既称帝患兵革不休以有诸侯也於是无尺土之封墮坏名城销锋镝【集解徐广曰镝作鋌索隐镝音的注鋌字亦音的按秦销锋镝作金人十二以弱天下之兵也】鉏豪杰维万世之安【索隐维训度谓计度令万世安也】然王迹之兴起於闾巷合从讨伐轶於三代乡秦之禁适足以资贤者为驱除难耳【索隐乡音向许亮反谓秦前时之禁兵及不封树诸侯适足以资後之贤者即高帝也言为之驱除患难也】故愤发其所为天下雄【索隐指汉高祖】安在无土不王【白虎通曰圣人无土不王使舜不遭尧当如夫子老於阙里也】此乃传之所谓大圣乎【索隐高祖起布衣卒传之天位实所谓大圣】岂非天哉岂非天哉非大圣孰能当此受命而帝者乎

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

<史部,正史类,史记,卷十六>

【索隐述赞曰秦失其鹿羣雄竞逐狐鸣楚祠龙兴沛谷武臣自王魏豹必复田儋据齐英布居六项王主命义帝见戮以月系年道悠运速汹汹天下瞻乌谁屋真人霸上卒享天禄】

史记卷十六

史记卷十六考证

秦楚之际月表○【臣照】按古人之书用卷轴後世易为篇帙便於省览然表宜卷轴篇帙转不便也史记十表中此表最为舛误无一善本可从如既称月表矣忽又称某年某月定非龙门本文推寻其理盖後人以汉王当自纪年号不当同於凡诸侯王而韩信等汉臣自当奉汉朔因而纪年也传袭之久又误将非汉臣而亦改称年者甚且以二世之三年五月为楚怀王之二年一月则其纪年纪月诚不可得而解夫秦楚之间惟不得尽以汉元纪年是以纪月今谓之纪年欤则非一月谓之纪月欤则应称十三月究其为何月则一月乃秦正之七月夏正之五月其二月则秦正之八月夏正之十月天时人事俱舛读者目眩心迷且既谓之一月则从一至百之称是以十八王之一月赵歇便称三十一月韩成便称二十一月魏豹便称十九月若纪之以年则一年若干月理不可通矣今将显明易改者一一定正至于通体仍依旧式刊刻不敢臆专也惟仿蔡沈尚书考定武成之例别为表文刊之于後以备参观庶可识太史公之本意云至篇内改正之处既难枚举且大段规模从旧细处不足缕陈

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

<史部,正史类,史记,卷十六考证>

史记卷十六考证

卷十七

钦定四库全书

史记卷十七

汉太史令司马迁撰

宋中郎外兵曹参军裴駰集解唐国子博士弘文馆学士司马贞索隐

唐诸王侍读率府长史张守节正义

汉兴以来诸侯年表第五

【索隐应劭云虽名为王其实如古之诸侯】

太史公曰殷以前尚矣周封五等公侯伯子男然封伯禽康叔於鲁卫地各四百里亲亲之义褒有德也太公於齐兼五侯地尊勤劳也武王成康所封数百而同姓五十五【索隐按汉书封国八百同姓五十余顾氏据左传魏子谓成鱄云武王克商光有天下兄弟之国十有五人姬姓之国四十人是也】地上不过百里下三十里以辅卫王室管蔡康叔曹郑或过或损幽厉之後王室缺侯伯强国兴焉天子微弗能正非德不纯形势弱也【索隐纯善也亦云纯一言周王非德不纯一形势弱也】汉兴序二等【韦昭曰汉封功臣大者王小者侯也】高祖末年非刘氏而王者若无功上所不置【集解徐广曰一云非有功上所置】而侯者天下共诛之高祖子弟同姓为王者九国【集解徐广曰齐楚荆淮南燕赵梁代淮阳索隐徐氏九国不数吴盖以荆絶乃封吴故也仍以淮阳为九今按下文所列有十国者以长沙异姓故言九国也】唯独长沙异姓而功臣侯者百余人自鴈门太原以东至辽阳【韦昭曰辽东阳县】为燕代国常山以南太行左转度河济阿甄以东薄海为齐赵国自陈以西南至九疑东带江淮谷泗【集解徐广曰谷水在沛】薄会稽为梁楚吴淮南长沙国皆外接於胡越而内地北距山以东尽诸侯地大者或五六郡连城数十置百官宫观僭於天子独汉有三河东郡颍川南阳自江陵以西至蜀北自云中至陇西与内史【正义京兆也】凡十五郡而公主列侯颇食邑其中何者天下初定骨肉同姓少故广强庶孽以鎮抚四海用承卫天子也汉定百年之间亲属益疎诸侯或骄奢邪臣计谋为淫乱【索隐?音誓?训习言习於邪臣之谋计故尔雅云?犹狃也狃亦训习】大者叛逆小者不轨于法以危其命殒身亡国天子观於上古然後加惠使诸侯得推恩分子弟国邑【索隐按武帝用主父偃言而下推恩之令也】故齐分为七【集解徐广曰城阳济北济南菑川胶东胶西是分为七】赵分为六【集解徐广曰河间广川中山常山清河】梁分为五【集解徐广曰济阴济川济东山阳也】淮南分三【集解徐广曰庐江衡山】及天子支庶子为王王子支庶为侯百有余焉吴楚时前後诸侯或以适削

地【索隐适音宅或作过】是以燕代无北边郡吴淮南长沙无南边郡【如淳曰长沙之南更置郡燕代以北更置缘边郡其所有饶利兵马器械三国皆失之也正义景帝时汉境北至燕代燕代之北未列为郡吴长沙之国南至岭南岭南越未平亦无南边郡】齐赵梁楚支郡名山陂海咸纳於汉诸侯稍微大国不过十余城小侯不过数十里上足以奉贡职下足以供养祭祀以蕃辅京师而汉郡八九十形错诸侯间犬牙相临【索隐错音七各反错谓交错相御如犬牙故云犬牙相制言犬牙参差也】秉其阨塞地利强本干弱枝叶之势也尊卑明而万事各得其所矣臣迁谨记高祖以来至太初诸侯谱其下益损之时令後世得览形势虽强要之以仁义为本

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

<史部,正史类,史记,卷十七>

【集解徐广曰孝武太始二年广陵中山真定王来朝孝宣本始元年赵来朝二年广川来朝

四年清河来朝孝宣地节元年梁来朝二年河间来朝三年济北来朝济北分平原太山二郡】

【索隐述赞曰汉有天下爰鉴兴亡始誓河岳言峻宠章淮阴就楚彭越封梁荆燕懿戚齐赵棣棠犬牙相制麟趾有光降及文景代有英王鲁恭梁孝济北城阳仁贤足纪忠烈斯彰】

史记卷十七

史记卷十七考证

汉兴以来诸侯年表○【臣照】按此表格数既多年代又远邦国分并又屡更且集解索隐正义参杂其间一字一行连篇累牍使阅者心懵目迷业未半而思去其间是否难定今将讹字之显者改正仍将旧本刻於前而别为考定表文於後以便参观其集解等注已经见前故不着也

高帝

<史部,正史类,史记,卷十七考证>

吕后

孝文帝【废鲁初分齐为城阳济北国後又分为济南菑川胶东胶西并齐为七国分赵为河间都乐成置太原国都晋阳复置梁国废琅邪徙王王燕废淮阳】

<史部,正史类,史记,卷十七考证>

<史部,正史类,史记,卷十七考证>

孝景帝【复置鲁河间淮阳长沙常山初置广川中山临江汝南江都清河济川济东山阳济阴】

<史部,正史类,史记,卷十七考证>

<史部,正史类,史记,卷十七考证>

孝武帝

<史部,正史类,史记,卷十七考证>

<史部,正史类,史记,卷十七考证>

<史部,正史类,史记,卷十七考证>

史记卷十七考证

<史部,正史类,史记>

卷十八

钦定四库全书

史记卷十八

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

高祖功臣侯年表第六

【正义高祖初定天下表明有功之臣而侯之若萧曹等】

太史公曰古者人臣功有五品以德立宗庙定社稷曰勳以言曰劳用力曰功明其等曰伐积曰曰阅封爵之誓曰使河如带泰山若厉【集解应劭曰封爵之誓国家欲使功臣传祚无穷带衣带也厉砥石也河当何时如衣带山当何时如厉石言如带砥国乃絶耳】国以永宁爰及苗裔始未尝不欲固其根本而枝叶稍陵夷衰微也余读高祖侯功臣察其首封所以失之者曰异哉所闻书曰协和万国迁于夏商或数千岁盖周封八百幽厉之後见於春秋尚书有唐虞之侯伯历三代千有余载自全以蕃卫天子岂非笃於仁义奉上法哉汉兴功臣受封者百有余人【索隐按下文高祖功臣百三十七人兼外戚及王子凡一百四十三人受封】天下初定故大城名都散亡户口可得而数者十二三【索隐言十分才二三在耳】是以大侯不过万家小者五六百户後数世民咸归乡里户益息萧曹绛灌之属或至四万小侯自倍【索隐倍其初封时户数也】富厚如之子孙骄溢忘其先淫嬖至太初百年之间见侯五【正义谓平阳侯曹宗曲周侯酈终根阳河侯齐仁戴侯秘蒙谷陵侯冯偃也】余皆坐法陨命亡国耗矣罔亦少密焉然皆身无兢兢於当世之禁云居今之世志古之道所以自镜也【索隐言居今之代志识古之道得以自镜当代之存亡也】未必尽同帝王者各殊礼而异务要以成功为统纪岂可诃乎观所以得尊宠及所以废辱亦当世得失之林也【索隐言观今人臣所以得尊宠者必由忠厚被废辱者亦由骄淫是言现在兴废亦当代得失之林也】何必旧闻於是谨其终始表见其文颇有所不尽本末着其明疑者阙之後有君子欲推而列之得以览焉

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

<史部,正史类,史记,卷十八>

【索隐述赞曰圣贤影响风云潛契高祖膺籙功臣命世起沛入秦凭谋仗计纪勳书爵河盟

山誓萧曹轻重绌灌权势咸就封国式盟罪戾仁贤者祀昏虐者替永鉴前修良慙固蒂】

史记卷十八

史记卷十八考证

高祖功臣侯年表高祖十二〇【臣召南】按此表格式与汉表不同此表以天子纪年为主高惠吕后文景及武帝一朝自为一格如高祖在位十二年凡系六年所封概书七字以此侯自六年至十二年实七年也其七年封者用六字八年封者用五字以次而减其大例也汉表以侯之世次为主是以每一世为一格

侯第〇【臣召南】按此表位次有重见者如东武侯郭蒙及高苑侯丙倩皆四十一东茅侯刘钊及菑侯张平皆四十八肥如侯蔡寅及高粱侯酈疥皆六十六强侯留胜及宁陵侯吕臣皆七十二棘阳侯杜得臣及新阳侯吕清皆八十一武原侯卫胠及磨侯程黑高陵侯王周皆九十二邳侯黄极忠及平州侯昭涉掉尾皆百十一即汉表亦有重见其误盖无可考今自酈侯第一数至陆梁侯一百三十七其中位次阙者二十一也三十八也五十六也六十八也九十七也百二十八也百二十九也虽汉表较为详备可以补史表所不及然其阙者自如徧校各本并合

平阳征和二年侯宗〇顾炎武日知录曰史记作於太初中平阳侯下元鼎三年今侯宗者作史记时见为侯也下又云征和二年云云则後人所加也卷中书征和者二後元者一

阳陵索隐县属冯翊〇【臣召南】按此阳陵别是一地必非左冯翊之阳陵以地理志证之阳陵故弋阳景帝更名是汉初不名阳陵也

广严侯吕毳〇吕汉表作召当是字形相近而误堂邑侯定豫章折江都折自立为王壮思〇【臣召南】按折即浙字汉表又作渐亦浙字也壮思汉表作壮息

留侯万户〇【臣召南】按是时列侯户数惟平阳万六百户次即留侯万户为最大虽酈侯绌侯其户皆不满万此高祖之特厚子房也

酈同禄母〇【臣召南】按汉表作封何夫人禄母同为侯孝文元年罢较此表为明但不言同諡懿侯又汉表筑阳高后二年定侯延以何少子封孝文元年更为酈亦详於此表

颍陰定济淮南及下邑〇济汉表作齐是

汾陰〇按第三格有建平二字以汉表核之无有汉表是

费〇【臣召南】按此侯阙位次汉表作三十一以本纪证之费将军与孔将军分居左右功

应相类蓼侯第三十则费侯第三十一是也史表脱耳

新阳侯吕清八十一○【臣召南】按汉表作吕青位次八十七据表中有比堂邑侯语堂邑侯第八十六则汉表是也此表一字讹

东武以户卫○监本以集解徐广曰文杂厕叙功中遂不可句以汉表证之史表本文当云以户卫起薛属悼武王破秦军杠里杨熊军曲遇入汉为越将定三秦以都尉坚守敖仓为将军破籍军功侯二千户徐广疑卫字或作从又据汉表作为城将附书其下既以集解杂入本文又於入汉之上衍一汉字今皆改正

贯齐侯吕○吕汉表作传胡害

淮陰为连敖典客索隐汉表作粟客○【臣召南】按汉表作票客故师古音频妙反注云或者以其票疾而宾客礼之故云票客也据索隐所云粟客又与顏本不同

东茅补韩信为将军○汉表作捕韩信是也此侯刘钊汉表作刘到

安国以客从起丰云云○【臣召南】按此表所叙与汉表不同汉表盖从陈丞相世家也然使陵从最後高帝何以列之於十八侯中耶史表亦或可信

甯侯魏选○选汉表作邀

襄平功定平侯○【臣召南】按汉书表作功比平定侯是也平定侯即齐受吕后元年所封此侯之封在前而云功比某人者其辞皆吕后二年陈平等所差次也又接此表襄平侯阙位次汉表作六十六未知是否

宣平侯三○【臣召南】按高祖作十八侯位次惟萧曹灼然可知张敖无功而第三师古谓吕后曲升之是也但不知高祖所定谁第三耳

博阳索隐县名属彭城○【臣召南】按博阳既封陈濞不应复封周聚索隐云属彭城则应作傅阳即春秋之偃阳国也傅博字形相近而误

壮索隐汉作严避明帝讳○据此则壮应作庄

史记卷十八考证

<史部,正史类,史记>

卷十九

钦定四库全书

史记卷十九

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

惠景间侯者年表第七

太史公读列封至便侯【索隐便音鞭县名吴浅所封】曰有以也夫长沙王者着令甲称其忠焉【邓展曰汉约非刘氏不王如芮王故着令使特王或曰以芮至忠故着令也□曰汉以芮忠故特王之以非制故特着令】昔高祖定天下功臣非同姓疆土而王者八国【索隐谓齐王韩信韩王韩信燕王卢绾梁王彭越赵王张耳淮南王英布临江王共敖长沙王吴芮也】至孝惠时唯独长沙全禅五世以无嗣絶【集解徐广曰孝文後七年靖王薨无嗣索隐禅者传也按诸侯王表芮国至五世而絶也】竟无过为藩守职信矣故其泽流枝庶母功而侯者数人【索隐按此表芮子浅封便侯传至玄孙又封成王臣之子为沅临侯亦至曾孙】及孝惠迄孝景间五十载追修高祖时遗功臣及从代来吴楚之劳诸侯子弟若肺腑【索隐肺音柿腑音附柿木札也附木皮也以喻人主疎末之亲如木札出於木树皮附於树也诗云如涂涂附注云附木皮是也】外国归义封者九十有余咸表始终当世仁义成功之着者也【异姓国八王者吴芮英布张耳共敖韩王信彭越卢绾韩信也】

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

<史部,正史类,史记,卷十九>

右孝景时三十一

【索隐述赞曰惠景之际天下已平诸吕构祸吴楚连兵条侯出讨壮武奉迎薄宴恩泽张赵忠贞本枝分肺腑归诚新市死事建陵勲荣咸开青社俱受丹旌旋窥甲令吴芮有声】

史记卷十九

史记卷十九考证

惠景间侯者年表功臣非同姓疆土而王者八国注吴芮英布张耳共敖韩王信彭越卢绾韩信也○【臣召南】按注以共敖当八国之数非也高祖灭项氏之月即虏敖子驩临江国属汉为南郡矣安得数之当是二燕前臧荼後卢绾耳

軫侯仓○按汉表作黎朱仓

郊索隐县名属沛郡○【臣召南】按地理志沛郡有洨县无郊县则唐以前本作洨不误也吕后本纪作交汉表作汶皆系传写之失

中邑侯朱通○按表作朱进

乐平侯卫无择○按乐平汉表作乐成无择各本俱作无泽盖误

松兹侯徐厉徐广曰松一作祝○【臣召南】按将相名臣表文帝後六年祝兹侯徐厉军棘门与本纪合汉表作祝兹侯是也但索隐云县属庐江则唐以前本已作松兹矣

锤索隐县名属东莱○按如索隐说当依地理志作腫壮武侯以都尉从之荥阳○【臣召南】按汉表无之字以文义推测此之字当是守字

犁索隐县名属东郡○【臣召南】按地理志东郡有黎县无犁县则汉表作黎是也

餅索隐县名属琅邪○按汉表作餅以地理志证之字应从缶

故安侯食邑五百户○【臣召南】按申屠嘉之食邑五百户乃文帝元年録高祖功臣赐嘉爵关内侯食邑耳非列侯之侯也本纪及传甚明食邑五百户上侯字盖衍文汉表可证

新市侯以赵内史王慎○【臣召南】按楚元王世家作内史王悍汉表亦然则此表作王慎又云慎不听二慎字皆悍字之讹

遒○【臣召南】按地理志应作迺又按侯隆疆汉表作陆疆

客成索隐县名属涿郡○【臣召南】按汉表作容成以地理志证之此亦应作容城又按侯

名攜徐卢汉表无攜字

范阳端侯代○按汉表作靖侯范代

亚谷征和二年○顾炎武日知录曰此表书征和者一後元者三皆後人所加也

史记卷十九考证

卷二十

钦定四库全书

史记卷二十

汉太史令司马迁撰

宋中郎外兵曹参军裴駰集解唐国子博士弘文馆学士司马贞索隐

唐诸王侍读率府长史张守节正义

建元以来侯者年表第八

【索隐七十二国太史公旧余四十五国褚先生补也】

太史公曰匈奴絶和亲攻当路塞闽越擅伐东瓯请降二夷交侵当盛汉之隆以此知功臣受封侔於祖考矣何者自诗书称三代戎狄是应荆荼是徵【毛诗传曰应当也郑玄曰徵艾索隐荼音舒徵音澄】齐桓越燕伐山戎武灵王以区区赵服单于秦繆用百里霸西戎吴楚之君以诸侯役百越况乃以中国一统明天子在上兼文武席卷四海内辑亿万之衆岂以晏然不为边境征伐哉自是後遂出师北讨强胡南诛劲越将卒以次封矣

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

<史部,正史类,史记,卷二十>

右太史公本表

当涂【索隐表在九江】魏不害以圉守尉捕淮阳反者公孙勇等

侯

蒲【索隐表在琅邪】薛昌以圉尉史捕淮阳反者公孙勇等侯濠阳【索隐濠音辽表在清河】江德以圉廐啬夫共捕淮阳反者公

孙勇等侯

富民【索隐表在蕲】田千秋家在长陵以故高庙寝郎上书谏孝武曰子弄父兵罪当笞父子之怒自古有之蚩尤畔父黄帝涉江上书至意拜为大鸿胪征和四年为丞相封三千户至

昭帝时病死子顺代立为虎牙将军击匈奴不至质诛死国除【汉书音义曰质所期处也】
右孝武封国名

後进好事儒者褚先生曰太史公记事尽於孝武之事故复修记孝昭以来功臣侯者编於左方令後好事者得览观成败长短絶世之适得以自戒焉当世之君子行权合变度时施宜希世用事以建功有土封侯立名当世岂不盛哉观其持满守成之道皆不谦让骄蹇争权喜扬声誉知进不知退终以杀身灭国以三得之【以三得之者即上所谓行权合变度时施宜希世用事也】及身失之不能传功於後世令恩德流子孙岂不悲哉夫龙頡侯曾为前将军世俗顺善厚重谨信不与政事退让爱人其先起於晋六卿之世有土君国以来为王侯子孙相承不絶历年经世以至於今凡八百余岁岂可与功臣及身失之者同日而语之哉悲夫後世其戒之

博陆霍光家在平阳以兄骠骑将军故贵前事武帝觉捕得侍中谋反者马何罗等功侯三千户【文穎曰博广陆平取其嘉名无此县也食邑北海河东瓚曰渔阳有博陆城也】中辅幼主昭帝为大将军谨信用事擅治尊为大司马益封邑万户後事宣帝历事三主天下信郷之益封二万户子禹代立谋反族灭国除

秭【汉书音义曰音妬在济阴成武今有亭】金翁叔名曰礪以匈奴休屠王太子从浑邪王将衆五万降汉归义侍中事武帝觉捕侍中谋反者马何罗等功侯三千户中事昭帝谨厚益封三千户子弘代立为奉车都尉事宣帝

安阳【索隐表在荡阴志属汝南】上官桀家在陇西以善骑射从军稍贵事武帝为左将军觉捕斩侍中谋反者马何罗弟重合侯通功侯三千户中事昭帝与大将军霍光争权因以谋反族灭国除

桑乐【索隐表在千乘】上官安以父桀为将军故贵侍中事昭帝安女为昭帝夫人立为皇后故侯三千户骄蹇与大将军霍光争权因以父子谋反族灭国除

富平【索隐志属平原】张安世家在杜陵以故御史大夫张汤子武帝时给事尚书为尚书令事昭帝谨厚习事为光禄勳右将军辅政十三年无适过侯三千户及事宣帝代霍光为大司马用事益封万六千户子延壽代立为太仆侍中

义阳【索隐表在平氏】傅介子家在北地以从军为郎为平乐监昭帝时刺杀外国王天子下诏书曰平乐监传介子使外国杀楼兰王以直报怨不烦师有功其以邑千三百户封介子为义阳侯子厉代立争财相告有罪国除

商利【索隐表在徐郡】王山齐人也故为丞相史会骑将军上官安谋反山说安与俱入丞相斩安山以军功为侯三千户上书愿治民为代太守为人所上书言系狱当死会赦出为庶人国除

建平【索隐表在济阳】杜延年以故御史大夫杜周子给事大将军幕府发觉谋反者骑将军上官安等罪封为侯邑二千七百户拜为太仆元年出为西河太守五凤三年入为御史大夫

弋阳【索隐志属汝南】任官以故上林尉捕格谋反者左将军上官桀杀之便门封为侯二千户後为太常及行卫尉事节俭谨信以壽终传於子孙

宜城【索隐表在济阴】燕仓以故大将军幕府军吏发谋反者骑将军上官安罪有功封侯邑二千户为汝南太守有能名

宜春【索隐志属汝南】王欣家在齐本小吏佐史稍迁至右辅都尉武帝数幸扶风郡欣共置办拜为右扶风至孝昭时代桑弘羊为御史大夫元凤三年代田千秋为丞相封二千户立二年为人所上书言暴自杀不殊子代立为属国都尉

安平【索隐表在汝南志属涿郡】杨敞家在华陰故给事大将军幕府稍迁至大司农为御史大夫元凤六年代王欣为丞相封二千户立二年病死子贲代立十三年病死子翁君代立为典属国三岁以季父恠故出恶言系狱当死得免为庶人国除

右孝昭时所封国名

阳平【索隐志属东郡】蔡义家在温故师受韩诗为博士给事大将军幕府为杜城门候入侍中授昭帝韩诗为御史大夫是时年八十衰老常两人扶持乃能行然公卿大臣议以为为人主师当以为相以元平元年代杨敞为丞相封二千户病死絕无後国除

扶阳【索隐志属沛郡表在萧】韦贤家在鲁通诗礼尚书为博士授鲁大儒入侍中为昭帝师迁为光禄大夫大鸿胪长信少府以为人主师本始三年代蔡义为丞相封扶阳侯千八百户为丞相五岁多恩不习吏事免相就第病死子玄成代立为太常坐祠庙骑夺爵为关内侯

平陵【索隐表在武当】范明友家在陇西以家世习外国事使护西羌事昭帝拜为度辽将军击乌桓功侯二千户取霍光女为妻地节四年与诸霍子禹等谋反族灭国除

营平【索隐表在济南】赵充国以陇西骑士从军得官侍中事武帝数将兵击匈奴有功为护军都尉中事昭帝昭帝崩议立宣帝决疑定策以安宗庙功侯封二千五百户

阳成【索隐表在济阴非也且济陰有城阳县耳而颍川汝南又各有阳城县城字从土在阳之下今此似误不可分别也】田延年以军吏事昭帝发觉上官桀谋反事後留迟不得封为大司农本造废昌邑王议立宣帝决疑定策以安宗庙功侯二千七百户逢昭帝崩方上事并急因以盗都内钱三千万【汉书百官表曰司农属官有都内】发觉自杀国除

平丘【索隐志属陈留表在肥城】王迁家在卫【索隐一作衙音牙地理志衙县在冯翊】为尚书郎习刀笔之文侍中事昭帝帝崩立宣帝决疑定策以安宗庙功侯二千户为光禄大夫秩中二千石坐受诸侯王金钱财漏泄中事诛死国除

乐成【索隐表在平氏志属南阳】霍山者大将军光兄子也光未死时上书曰臣兄骠骑将军去病从军有功病死赐谥景桓侯絶无後臣光愿以所封东武阳邑三千五百户分与山天子许之拜山为侯後坐谋反族灭国除

冠军【索隐志属南阳】霍云以大将军兄骠骑将军适孙为侯地节三年天子下诏书曰骠骑将军去病击匈奴有功封为冠军侯薨卒子侯代立病死无後春秋之义善善及子孙其以邑三千户封云为冠军侯後坐谋反族灭国除

平恩【索隐志属魏郡】许广汉家昌邑坐事下蚕室独有一女嫁之宣帝未立时素与广汉出入相通卜相者言当大贵以故广汉施恩甚厚地节三年封为侯邑三千户病死无後国除

昌水【索隐表在於陵】田广明故郎为司马稍迁至南郡都尉淮阳太守鸿胪左冯翊昭帝崩议废昌邑王立宣帝决疑定策以安宗庙本始三年封为侯邑二千三百户为御史大夫後为祁连将军击匈奴军不至质当死自杀国除

高平【索隐志属临淮】魏相家在济阴少学易为府卒史以贤良举为茂陵令迁河南太守坐贼杀不辜系狱当死会赦免为庶人有诏守茂陵令为扬州刺史入为谏议大夫复为河南太守迁为大司农御史大夫地节三年谮毁韦贤代为丞相封千五百户病死长子宾代立坐祠庙失侯

博望【索隐志属南阳】许中翁【名舜】以平恩侯许广汉弟封为侯邑二千户亦故有私恩为长乐卫尉死子延年代立

乐平许翁孙以平恩侯许广汉少弟故为侯封二千户拜为强弩将军击破西羌还更拜为大司马光禄勳亦故有私恩故得封嗜酒好色以早病死子汤代立

将陵史子回【名曾】以宣帝大母家封为侯二千六百户与平台侯昆弟行也子回妻宜君故成王孙嫉妬绞杀侍婢四十余人盗断妇人初产子臂膝以为媚道为人所上书言论弃市子回以外家故不失侯

平台【索隐志属常山】史子叔【名玄】以宣帝大母家封为侯二千五百户卫太子时史氏内一女於太子嫁一女鲁王今见鲁王亦史氏外孙也外家有亲以故贵数得赏赐

乐陵【索隐志属临淮平原亦有乐陵】史子长【名高】以宣帝大母家贵侍中重厚忠信以发觉霍氏谋反事封三千五百户

博城【索隐表在临淮】张章父故颍川人为长安亭长失官之北阙上书寄宿霍氏第舍卧马枥间夜闻养马奴相与语言诸霍氏子孙欲谋反状因上书告反为侯封三千户

都城【索隐志属颍川】金安上先故匈奴以发觉故大将军霍光子禹等谋反事有功封侯二千八百户安上者奉车都尉秬侯从羣子行谨善退让以自持欲传功德於子孙

平通【索隐表在博阳】杨恽家在华阴故丞相杨敞少子任为郎好士自喜知人居衆人中常与人顔色以故高昌侯董忠引与屏语言霍氏谋反状共发觉告反侯二千户为光禄勳到五凤四年作为妖言大逆罪腰斩国除

高昌【索隐志属千乘】董忠父故颍川阳翟人以习书诣长安忠有材力能骑射用短兵给事期门【汉书东方朔传曰武帝微行出与侍中常侍武骑及待诏陇西北地良家子能骑射者期诸殿门故有期门之号】与张章相习知章告语忠霍禹谋反状忠以语常侍骑郎杨恽共发觉告反侯二千户今为臬骑都尉侍中坐祠宗庙乘小车夺百户

爰戚赵成【索隐汉表作赵长平】用发觉楚国事侯二千三百户地节元年楚王与广陵王谋反成发觉反状天子推恩广德义下诏书曰无治广陵王广陵王不变更後复坐祝诅灭国自杀国除今帝复立子为广陵王

鄼地节三年天子下诏书曰朕闻汉之兴相国萧何功第一今絶无後朕甚怜之其以邑三千户封萧何玄孙建世为鄼侯

平昌王长君【名无故】家在赵国常山广望邑人也卫太子时嫁太子家为太子男史皇孙为配生子男絶不闻声问行且四十余岁至今元康元年中诏徵立以为侯封五千户宣帝舅父也

乐昌【索隐表在汝南】王稚君【名武】家在赵国常山广望邑人也以宣帝舅父外家封为侯邑五千户平昌侯王长君弟也

邛城【索隐表在济阴】王奉光家在房陵以女立为宣帝皇后故封千五百户言奉光初生时夜见光其上传闻者以为当贵云後果以女故为侯

安远【索隐表在慎】郑吉家在会稽以卒伍起从军为郎使护将弛刑士田渠黎会匈奴单于死国乱相攻日逐王将衆来降汉先使语吉吉将吏卒数百人往迎之衆颇有欲还者因斩杀其渠率遂与俱入汉以军功侯二千户

博阳【索隐表在南顿】邴吉家在鲁本以治狱为御史属给事大将军幕府常施旧恩宣帝迁为御史大夫封侯二千户神爵二年代魏相为丞相立五岁病死子翁孟代立为将军侍中甘露元年坐祠宗庙不乘大车而骑至庙门有罪夺爵为关内侯

建成【索隐表在沛】黄霸家在阳夏以役使徙云阳以廉吏为河内守丞迁为廷尉监行丞相长史事坐见知夏侯胜非诏书大不敬罪久系狱三岁从胜学尚书会故以贤良举为扬州刺史颍川太守善化男女异路耕者让畔赐黄金百斤秩中二千石居颍川入为太子大傅迁御史大夫五凤三年代邴吉为丞相封千八百户

西平【索隐表在临淮】于定国家在东海本以治狱给事为廷尉史稍迁御史中丞上书諫昌邑王迁为光禄大夫为廷尉乃师受春秋变道行化谨厚爱人迁为御史大夫代黄霸为丞相

右孝宣时所封

阳平【索隐表在东郡】王稚君【名杰索隐汉表名禁】家在魏郡故丞相史女为太子妃太子立为帝女为皇后故侯千二百户初元以来方盛贵用事游宦求官於京师者多得其力未闻其有知畧广宣於国家也

【索隐述赞曰孝武之代天下多虞南讨闽越北击单于长平鞠旅冠军前駟术阳衔璧临蔡破禺博陆上宰平津巨儒金章且佩紫绶行纓昭帝已後勳宠不殊惜哉絶笔褚氏补诸】

史记卷二十

史记卷二十考证

建元以来侯者年表长平○【臣召南】按汉表列长平冠军於外戚恩泽甚为失平夫以卫霍之战伐功勳其将校得封者皆称功臣岂可以吕窦王田例哉史记叙功於长平不曰皇后弟於冠军不曰皇后姊子可谓公论

乐安○【臣召南】按传与此同汉表作安乐盖误

随成○按汉表作随城

潦侯赵王煖訾○按汉表煖作援

下麾○按汉表作下摩

輝渠悼侯扁訾○【臣召南】按匈奴传作鷹庀而此表作扁訾索隐既以汉表应庀注之又为扁訾定音则旧本已然久矣

河綦康侯乌犁索隐汉书作禽犁○【臣召南】按骠骑传作禽犁

常乐侯稠雕○骠骑传作铜离汉书作雕离

符离索隐县名属沛郡○【臣召南】按地理志沛郡有符离县骠骑传封博德为符离侯与表正合汉表作邳离云在朱虚

壮索隐表在东平○按汉表作杜索隐表字衍

衆利质侯伊即轩○【臣召南】按骠骑传作伊即軒是也軒𨔵字形相似而误耳

义阳侯卫山○传作邢山

臧马康侯延年○按汉表作雕延年

安道侯揭阳令定○【臣召南】按此侯初为南越揭阳令故以官冠其名汉表径作揭阳定则似姓揭阳矣又如湘成侯监居翁以其本为桂林监故称之非姓监也汉初人往往以官连名如称赵佗为尉佗

北石索隐汉表作外石○按东越传亦作北石

蘂儿索隐韦昭曰在吴越界今为乡也○【臣召南】按蘂儿应作御儿即所云勾踐之地至於御儿者是也东越传钱塘辕终古斩狗北将军为御儿侯汉书音义曰御儿今吴南亭是则知此作蘂儿盖传写之讹

开陵侯建成○【臣召南】按东越传封建成侯敖为开陵侯则建成乃此侯故爵而其名曰敖也此及汉表并误以其故爵为名

临蔡侯孙都○【臣召南】按南越传越郎都稽得嘉封为临蔡侯则此侯姓都名稽如此表则姓孙名都矣

平州侯峽○【臣召南】按汉表作王峽以朝鲜传证之汉表是此表脱王字

澧清侯朝鲜尼谿相侯参○【臣召南】按汉表作参以传证之朝鲜尼谿相乃其故官此表三年六月丙辰下但当云侯参元年不当有侯朝鲜尼谿相六字也汉表是

几侯张?归义○【臣召南】按朝鲜传此侯名长以汉表证之此侯姓张名?然则此表张?下归义二字衍文也

湟阳○按朝鲜传作温阳以汉表证之湟阳是

史记卷二十考证

<史部,正史类,史记>

卷二十一

钦定四库全书

史记卷二十一

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

建元以来王子侯者年表第九

制诏御史诸侯王或欲推私恩分子弟邑者令各条上朕且临定其号名

太史公曰盛哉天子之德一人有庆天下赖之

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

<史部,正史类,史记,卷二十一>

【索隐述賈曰汉氏之初矫枉过正欲大本枝先封同姓建元已後藩翰克盛主父上言推恩下令长沙济北中山赵敬分邑广封振振在咏扞城御海晔晔辉映百足不僵一人有庆】

史记卷二十一

史记卷二十一考证

建元以来王子侯者年表○【臣召南】按汉书直题曰王子侯表起自高祖之封羹颉而史记截自建元最有深意盖武帝以前即有王子封侯出自特恩非通例也至主父偃之策行则王子无不封侯而诸侯益弱矣

安成○按汉表作安城

浮邱侯刘不审○【臣召南】按汉表作不害是也汉人名不害者颇多如高祖功臣有公上不害武帝功臣有魏不害

丹杨○【臣召南】按地理志丹阳县属丹阳郡皆作阳字至沈约宋志始作丹杨盖丹阳者

丹水之阳後又以多杨改称丹杨也说见前

盱台○地理志作盱眙

壤○汉表作怀昌

剧魁侯刘墨○汉表作黑

平度侯刘衍○汉表作行

雷侯刘稀○汉表作豨

辟○汉表作辟土

封斯侯刘胡阳○【臣召南】按汉表作胡伤是也汉时多以不害无伤为名

望广侯刘安中○汉表作忠则此侯单名也

距阳侯刘白○白汉表作句当由字形相似而异耳成平○汉表作平城

陪安索隐在魏郡○【臣召南】按汉表作阴安以地理志证之阴安县属魏郡索隐云在魏郡则古本亦作阴安後传写误耳

周坚○汉表作周望

安阳侯刘桀○汉表作乐

富侯刘袭○汉表作龙

陪侯刘明○汉表作则

邵侯刘慎○汉表作顺

蒯侯刘熹○汉表作罢军

宁阳侯刘恢○汉表作恬

瑕丘侯刘贞○汉表作政

郁狼侯刘骑○汉表作骄

洛陵侯刘章○【臣召南】按汉表作童当是汉世诸王如城阳王章功在帝室海内所共闻必不至犯其名也

叶侯刘嘉○汉表作喜

钧邱侯刘宪○汉表作寛

披阳索隐志属千乘○【臣召南】按地理志千乘郡有被阳县然则此表披阳当作被阳

柳侯刘阳○阳汉表作阳已

樊輿侯刘条○条汉表作修

安郭侯刘博○博汉表作傅富

都梁侯刘遂○遂汉表作定

父城索隐志在辽西○【臣召南】按地理志辽西有文城县则索隐以前本作文城与汉表同後来传写误耳

祝兹侯刘延○延汉表作延年

史记卷二十一考证

卷二十二

钦定四库全书

史记卷二十二

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

汉兴以来将相名臣年表第十

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

<史部,正史类,史记,卷二十二>

【索隐述赞曰高祖初起啸命羣雄天下未定王我汉中三杰既得六奇献功章邯已破萧何筑宫周勃厚重朱虚至忠陈平作相条侯总戎丙魏立志汤尧饰躬天汉之後表述非功】

史记卷二十二

史记卷二十二考证

汉兴以来将相名臣年表与楚界洪渠○【臣召南】按洪渠即鸿沟也後书郡国志曰荥阳有鸿沟水即楚汉约分界处古字洪鸿通用故每以洪范为鸿范

王践皇帝位定陶索隐在济阴沉水之阳○按沉水当作汜水各本俱误

立大市更名咸阳曰长安○【臣召南】按此表多可以补本纪之阙如立大市本纪所无也又按汉书地理志长安高帝五年置此作六年更名咸阳曰长安必得其实汉志盖追书耳但咸阳自汉元年即更名新城汉志与曹参传合

孝惠元年除诸侯丞相为相○【臣召南】按本纪无此事至孝景本纪中五年书更命诸侯丞相曰相此汉书百官公卿表所据也且以本纪证之吕太后元年封齐丞相壽为平定侯则此事不在惠帝世明矣

蜀湔氐反击之○按此事本纪无

立太仓西市○按此事本纪无汉书纪即据此书起西市修敖仓

孝文四年关中侯申屠嘉为御史大夫○【臣召南】按汉表此年张苍为丞相其御史大夫名圉至七年冯敬为御史大夫至十六年嘉始为御史大夫则此表误也张丞相列传曰苍已为丞相嘉迁为御史大夫盖十六年苍犹为相耳

七年初置南陵○【臣召南】按地理志南陵文帝七年置即据此文但孝景本纪二年又书置南陵

温室钟自鸣○【臣召南】按此及十年之诸侯王皆至长安後三年之置谷口邑皆本纪所无而地理志於谷口县亦不言置自文帝

以芷阳乡为霸陵索隐地理志有芷阳县○按索隐此句误地理志曰霸陵故芷阳文帝更名志未尝有芷阳县也

詹事戎奴为车骑将军侍太后○【臣召南】按本纪无此句又一时不得有两车骑将军必传写之误也

孝景元年置司徒官○【臣召南】按此文不可解前汉总称丞相至哀帝元壽二年始更名大司徒汉书本纪及公卿表可徵也

栾布为大将军○【臣召南】按是时栾布为将军非大将军也大字疑衍

御史大夫阳陵侯岑迈○【臣召南】按汉表无此文於七年即曰太仆刘舍为御史大夫是也功臣侯表并无岑迈姓名而是时阳陵侯为博寛曾孙傅偃可知此文之误於後二年书岑迈卒亦误也

元光三年决河於瓠子○按文义当云河决於瓠子

史记卷二十二考证

<史部,正史类,史记>

卷二十三

钦定四库全书

史记卷二十三

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

礼书第一

【索隐书者五经六籍总名也此之八书纪国家大体班氏谓之志志亦记也正义天地位日月明四时序陰阳和风雨节羣品滋茂万物宰制君臣朝仪尊卑贵贱有序咸谓之礼五经六籍咸谓之书故曲礼云道德仁义非礼不成教训正俗非礼不备分争辨讼非礼不决云云】

太史公曰洋洋美德乎【索隐洋洋音羊洋洋美盛貌邹诞生音翔非也】宰制万物役使羣衆岂人力也哉【正义言天地宰制万物役使羣品顺四时而动咸有成功岂藉人力营为哉是美善盛大衆多之德也故孔子曰四时行焉百物生焉】余至大行礼官【索隐大行秦官主礼仪汉景帝改曰大鸿胪鸿胪者掌九宾之仪也】观三代损益乃知缘人情而制礼依人性而作仪其所由来尚矣人道经纬万端规矩无所不贯诱进以仁义束缚以刑罰故德厚者位尊禄重者宠荣所以总一海内而整齐万民也人体安驾乘【正义时证反】为之金舆错衡以繁其饰【集解駰案周礼王之五路有金路郑元曰以金饰诸木索隐错镂衡軛为文饰也诗曰约軛错衡毛传云错衡文衡也正义为于伪反错作鑣七公反】目好五色为之黼黻文章以表其能耳乐鍾磬为之调谐八音以荡其心口甘五味为之庶羞酸醎以致其美【集解駰案周礼曰羞用百有二十品郑元曰羞出于牲及禽兽以备其滋味谓之庶羞郑衆曰羞者进也】情好珍善为之琢磨圭璧以通其意故大路越席【集解服虔曰大路祀天车也越席结括草以为席也王肃曰不缘也正义按括草蒲草越户括反】皮弁布裳【集解駰案周礼曰王视朝则皮弁之服郑元曰皮弁之服十五升白布衣素积为裳也正义以鹿子皮为弁也按褻积素布为裳也】朱弦洞越【集解郑元曰朱弦练朱丝弦也越瑟底孔】大羹元酒【集解郑元曰大羹肉湑不调以盐菜也元酒水也】所以防其淫侈救其雕敝【索隐雕谓雕饰也言雕饰是奢侈之弊也】是以君臣朝廷尊卑贵贱之序下及黎庶车舆衣服宫室饮食嫁娶丧祭之分事有宜适物有节文仲尼曰禘自既灌而往者吾不欲观之矣【集解孔安国曰

禘祫之礼为序昭穆也故毁庙之主及羣庙之主皆合食於太祖灌者酌郁鬯灌於太祖以降神也既灌之後列尊卑序昭穆而鲁逆祀跻僖公乱昭穆故不欲观之】周衰礼废乐坏大小相踰管仲之家兼备三归【集解包氏曰三归娶三姓女也妇人谓嫁曰归】循法守正者见侮於世奢溢僭差者谓之显荣自子夏门人之高弟也【索隐言子夏是乃孔子门人之中高弟者谓才优而品第高也故论语四科有文学子游子夏也】犹云出见纷华盛丽而说入闻夫子之道而乐二者心战未能自决而况中庸以下渐渍於失教被服於成俗乎孔子曰必也正名於卫【集解駟案论语子路曰卫君待子而为政子将奚先子曰必也正名乎马融曰正百事之名】所居不合仲尼没後受业之徒沈湮而不举或适齐楚或入河海【正义论语云太师挚适齐亚饭干适楚鼓方叔入於河少师阳击磬襄入於海鲁哀公时礼乐崩人皆去也】岂不痛哉至秦有天下悉内六国礼仪采择其善虽不合圣制其尊君抑臣朝廷济济依古以来【正义秦采择六国礼仪尊君抑臣朝廷济济依古以来典法行之】至于高祖光有四海叔孙通颇有所增益减损大抵皆袭秦故【集解应劭曰抵至也臣瓚曰抵归也索隐按大抵犹大略也臣瓚以抵训为归则是大略大归其义皆通於一】自天子称号【正义称尺证反】下至佐僚及宫室官名少所变改孝文即位有司议欲定仪礼孝文好道家之学以为繁礼饰貌无益於治躬化谓何耳【正义孝文本纪云上身衣弋绋所幸慎夫人令衣不曳地帟帐不得文绣治霸陵皆以瓦器是躬化节俭谓何嫌耳不须繁礼饰貌也】故罢去之孝景时御史大夫鼂错明於世务刑名数千谏孝景曰诸侯藩辅臣子一例古今之制也今大国专治异政不禀京师恐不可传後孝景用其计而六国畔逆【正义吴楚赵菑川济南胶西为六国也齐孝王狐疑城守三国兵围齐齐使路中大夫告天子故不言七国】以错首名天子诛错以解难【正义上纪买反下乃憚反】事在袁盎语中是後官者养交安禄而已莫敢复议今上即位招致儒术之士令共定仪十余年不就或言古者太平万民和喜瑞应辨至【正义辨音遍】乃采风俗定制作上闻之制诏御史曰盖受命而王各有所由兴殊路而同归谓因民而作追俗为制也议者咸称太古百姓何望汉亦一家之事典法不传谓子孙何化隆者閎博治浅者褊狭可不勉与乃以太初之元改正朔【集解应劭曰初用夏正以正月为岁首改年为太初】易服色封泰山定宗庙百官之仪以为典常垂之於後云

礼由人起人生有欲欲而不得则不能无忿忿而无度量则争【正义音诤】争则乱先王恶其乱故制礼义以分之养人之欲给人之求使欲不穷於物物不屈於欲【正义屈羣物反】二者相待而长是礼之所起也故礼者养也稻粱五味所以养口也椒兰芬茝所以养鼻也【索隐茝音止又音昌改反】锺鼓管弦所以养耳也刻镂文章所以养目也疏房牀第几席所以养体也【集解服?曰簟谓之第索隐疏谓窗也正义第侧里反】故礼者养也君子既得其养又好其辨也所谓辨者贵贱有等长少有差贫富轻重皆有称也故天子大路越席所以养体也【正义谓蒲草为席既洁且柔洁可以祀神柔可以养体也】侧载臭茝所以养鼻也【索隐刘氏云侧持也臭香也茝香草也言天子行持得以香草自随也其余则否臭为香者山海经云臭如蘼芜易曰其臭如兰是臭为草之香也今以侧为边侧载者置也言天子之侧常置芳香於左右】前有错衡所以养目也【注见前】和鸾之声【集解郑元曰和鸾皆铃也所以为车行节也韩诗内传曰鸾在衡和在轼前升车则马动马动则鸾鸣鸾鸣则和应服?曰鸾在鑣和在衡续汉书輿服志曰鸾雀立衡也正义皇侃云鸾以金为鸾悬铃其中於衡上以为迟疾之节所以正威仪行舒疾也】步中武象骤中韶濩所以养耳也【集解郑元曰武武

王乐也象武舞也韶舜乐也濩汤乐也正义步犹缓缓车则和鸾之音中於武象骤车中於韶濩也】龙旗九旂所以养信也【集解駟案周礼曰交龙为旗正义旂音旒】寝兕持虎蛟韞【集解徐广曰蛟鱼皮可以饰服器音交韞者当焉掖之革音呼见反索隐寝兕者以兕牛皮为席持虎者以猛兽皮文饰倚较及伏轼故云持虎刘氏云画於旌竿及楯杖等以今所见为说也蛟韞者以蛟鱼皮饰韞韞马腹带也正义兕音似尔雅云兕似牛】弥龙所以养威也【集解徐广曰乘舆车金薄璆龙为舆倚较文虎伏轼龙首銜轡索隐弥亦音弭谓金饰銜轡为龙此皆王者服御崇饰所以示威武故云所以养威也此文皆出大戴礼盖是荀卿所说刘氏云薄犹饰也璆然龙貌音虬】故大路之马必信至教顺然後乘之所以养安也孰知夫士出死要节之所以养生也【索隐言人谁知夫志士推诚守死要立名节仍是养生安身之本故下云人苟生之为见若者必死是解上意言人苟以贪生之为见不能见危致命若者必死若犹如也言执心为见如此者必刑戮及身故云必死下文皆放此也正义夫音扶要音腰孰知犹审知也出死犹处死也审知志士推诚处死要立名节若曹沫茅焦所以养生命也】孰知夫轻费用之所以养财也【正义费音芳味反轻犹薄言审知斟酌费用则能畜聚所以养财货也】孰知夫恭敬辞让之所以养安也【正义言审知恭敬辞让所以养体安身】孰知夫礼义文理之所以养情也【正义言审知礼义文章道理所以养其情性此四科是儒者有礼义故两得之也】人苟生之为见若者必死【正义苟且若如此也言平凡好生之人且见操节之士以礼义处死养得其生有劾如此者必死也】苟利之为见若者必害【正义言平凡好利之人且见礼义之士以轻省费用养得其财有劾如此者必害身也】怠惰之为安若者必危【正义惰徒卧反言平凡怠惰之人且见有礼之士以恭敬礼让养得安乐有劬如此者必危亡也】情胜之为安若者必灭【索隐覆解上礼义文理之所以养情也正义言平凡好胜之人且见利义之士礼义文理养得其情性有劬如此者必灭亡也此四科是墨者无礼义故两失之也】故圣人一之於礼义则两得之矣一之於情性则两失之矣故儒者将使人两得之者也墨者将使人两失之者也【索隐墨者不尚礼义而任俭嗇无仁恩故使人两失之易曰悦以使人人忘其死是也】是儒墨之分【正义分音扶问反分犹等也若儒等者是治辨之极疆固之本威行之道功名之总则天下归矣】治辨之极也疆固之本也【索隐自此已下皆是儒分之功也正义固坚固也言国以礼义四方钦仰无有攻伐故为强而且坚固之本也】威行之道也【正义以礼义导天下天下伏而归之故为威行之道也】功名之总也【正义以礼义率天下天下咸遵之故为功名之总总合也聚也】王公由之【正义由礼义也】所以一天下臣诸侯也弗由之所以捐社稷也故坚革利兵不足以为胜【索隐覆上功名之总也】高城深池不足以为固严令繁刑不足以为威由其道则行不由其道则废楚人蛟革犀兕所以为甲坚如金石宛之钜铁【集解徐广曰大刚曰钜正义宛城今邓州南阳县城是音於元反钜刚铁也】施钻如蠹蚤【索隐钻谓矛刃及矢鏃也】轻利剽遯【正义上匹妙反下音速剽遯疾也】卒如燹风【正义卒村忽反燹必遥反燹风疾也】然而兵殆於垂涉唐昧死焉【集解许慎曰垂涉地名也】庄躑起楚分而为四【索隐躑音其畧反楚将之名言其起兵乱後楚遂分为四按汉志滇王庄躑之後也正义以起字为絶句或云楚庄王苗裔也括地志云师州黎州在京西南五千六百七十里战国楚威王时庄躑王滇则为滇国之地楚昭王徙都郢都庄躑王滇楚襄王徙都陈楚考烈王徙都壽春咸被秦逼乃四分也然昭王虽在庄躑之前故荀卿兼言之也】参是岂无坚革利兵哉【索隐参者验也言验是楚岂无利兵哉正义参七含反言躑楚国岂无坚甲利兵哉为其不由礼义故衆分也】其所以统

之者非其道故也汝颖以为险【正义括地志云汝水源出汝州鲁山县西伏牛山亦名猛山汝水至豫州鄆城县名潰水尔雅云河有滌汝有潰亦汝之别名颖水源出洛州嵩高县东南三十五里阳乾山俗名颖山地理志高陵山汝水出东南至新蔡县入淮阳乾江山颖水出东至下蔡入淮地】江汉以为池【正义江即岷江从蜀入楚在荆州南汉江从汉中东南入江四水为楚之险固也】阻之以邓林缘之以方城【集解駰案山海经曰夸父与日逐走入日渴欲得饮饮於河渭不足北饮大泽未至道渴而死弃其杖化为邓林駰谓邓林後遂为林名索隐按裴氏引山海经以为夸父弃杖为邓林其言北饮大泽盖非在中国也刘氏以为今襄州南凤林山是古邓祁侯之国在楚之北境故云阻以邓林也正义括地志云方城房州竹山县东南四十一里其山顶上平四面险峻山南有城长十余里名为方城即此山也】然而秦师至鄆郢举若振槁【索隐振动也击也槁乾叶也正义鄆音鄆括地志云古城在襄州安养县北三里古鄆子之国邓之南鄙也又率道县南九里有故鄆城汉惠帝改曰宜城也郢城荆州江陵县东北六里即吴公子光伐楚楚平王恐城郢者也又楚武王始都郢纪南故城是也在江陵北十五里】是岂无固塞险阻哉其所以统之者非其道故也紂剖比干囚箕子为炮烙刑杀无辜时臣下懍然莫必其命【索隐言无人必保其性命】然而周师至而令不行乎下不能用其民是岂令不严刑不峻哉其所以统之者非其道故也古者之兵戈矛弓矢而已然而敌国不待试而诘【集解徐广曰试一作诚也正义诘邱勿反试用也】城郭不集沟池不掘【正义掘音求勿反又音求厥反】固塞不树机变不张然而国晏然不畏外而固者无他故焉明道而均分之【正义分音扶问反言明儒墨之分使礼义均等则下应之如影响耳】时使而诚爱之则下应之如影响有不由命者然後俟之以刑则民知臯矣【正义事君以礼义民有不由礼义者然後待之以刑则民知罪伏刑矣】故刑一人而天下服臯人不尤其上知臯之在已也是故刑罚省而威行如流无他故焉由其道故也故由其道则行不由其道则废古者帝尧之治天下也盖杀一人刑二人而天下治传曰威厉而不试刑措而不用天地者生之本也先祖者类之本也【正义类种类也】君师者治之本也无天地恶生【正义恶音乌】无先祖恶出无君师恶治三者偏亡则无安人【索隐邹氏偏音遍正义偏疋然反】故礼上事天下事地尊先祖而隆君师是礼之三本也故王者天太祖【集解駰案毛诗叙曰文武之功起於后稷故推以配天焉】诸侯不敢怀【索隐怀思也言诸侯不敢思以太祖配天而食也又一解王之子孙为诸侯不思祀其父祖故礼云诸侯不敢祖天子盖与此同意】大夫士有常宗【集解駰案礼记曰别子为祖继别为宗百世不迁者谓别子之後也】所以辨贵贱贵贱治得之本也郊疇乎天子【索隐疇类也天子类得郊天余并不合祭今大戴礼作郊止乎天子当是也止或作疇因误耳】社至乎诸侯【索隐言天子已下至诸侯得立社】函及士大夫【集解函音含索隐含谓包容诸侯已下至士大夫得祭社故礼云大夫成羣立社曰置社亦曰里社也邹诞生音?徒濫及意义亦通但不见古文各以意为说耳今按大戴礼作导及士大夫导亦通也今此为陷者当以导与蹈同後足字失止惟有口存故使解者得以穿凿而用也】所以辨尊者事尊卑者事卑宜钜者钜宜小者小故有天下者事七世有一国者事五世有五乘之地者事三世【集解郑元曰古者方十里其中六十四井出兵车一乘此兵法之赋】有三乘之地者事二世【集解駰案谷梁传曰天子至於士皆有庙天子七诸侯五大夫三士二始封之者必为其太祖】有特牲而食者不得立宗庙【集解駰案礼记曰庶人祭於寝】所以辨积厚者流泽广积薄者流泽狭也大飨上元尊俎上腥鱼【集解郑元曰大享祫祭先王以腥鱼为俎实不臠熟之也】先大羹贵食饮之本也大飨上元尊而用薄

酒食先黍稷而饭稻粱祭哂先大羹【集解郑元曰哂至齿】而饱庶羞贵本而亲用也贵本之谓文亲用之谓理两者合而成文以归太一是谓太隆【索隐贵本亲用两者合而成文以归於太一太一者天地之本也得礼之文理是合於太一也隆者盛也高也得礼文理归於太一是谓礼之盛也】故尊之上元尊也【正义皇侃云元酒水也上古未有酒而始之祭但酌水用之至晚世虽有酒存古礼尚用水代酒也】俎之上腥鱼也豆之上太羹一也【索隐尊之上元尊俎之上腥鱼豆之上大羹三者如一皆是本故云一也】利爵弗啐也【集解郑元曰啐入口也索隐按仪礼祭毕献祝西面告成是为利爵祭初未行无算爵故不啐入口也】成事俎弗尝也【索隐成事卒哭之祭故记曰卒哭曰成事既是卒哭始从吉祭故受胾爵而不尝俎也】三宥之弗食也【索隐礼祭必立宥以劝尸食至三饭而後止每饭有宥一人故有三宥既是劝尸故不相食也】大昏之未废齐也【索隐废齐谓?礼父亲醮子而迎之前故曲礼云齐戒以告鬼神是昏礼有齐也】大庙之未内尸也始絶之未小斂一也【索隐此五者皆以礼之初始质而朱备亦是贵本之义故云一也】大路之素幬也【集解駉案礼记曰乘素车贵其质也郑元曰素车殷辂也索隐幬音稠谓车盖以素帷亦质之也】郊之麻纁【集解駉案周礼曰王祀昊天上帝服大裘而冕论语曰麻冕礼也孔安国曰冕缁布冠古者绩麻三十升布以为之正义纁音免亦作冕】丧服之先散麻一也【集解駉案仪礼士丧礼曰始死主人散带垂之三尺礼记曰大功已上散带也索隐大路已下三事相似如一故云一也散麻取其质无文饰亦贵本也】三年哭之不反也【集解駉案礼记曰斩衰之哭若往而不反】清庙之歌【集解郑元曰清庙谓作乐歌清庙】一倡而三叹【集解郑元曰倡发歌句者三叹三人从叹】县一锺尚拊膈【集解徐广曰一作搏膈索隐县音悬拊音抚膈音格膈县锺格也不击其锺而拊其格不取其声亦质也邹氏膈音膊盖依大戴礼也而郑注礼云搏拊祝敌也】朱弦而通越一也【索隐大瑟而练朱其弦又通其下孔使声浊且迟上质而贵本不取其声文自三年已下四事皆不取其声也】凡礼始乎脱【索隐脱犹疎略也始初也言礼之初尚疏略也】成乎文【索隐言礼成就有文饰也】终乎税【集解徐广曰一作悦索隐税音悦言礼终卒和悦人情大戴礼作终於隆隆盛也】故至备情文俱尽【集解徐广曰古情字或假借作请诸子中多有此比正义言情文俱尽言是礼之至备也】其次情文代胜【索隐音昇又音尸证反或文胜情情胜文是情文更代相胜大戴礼作迭兴】其下复情以归太一【索隐言其次情文俱失归心浑沌天地之初复礼之本是归太一也】天地以合日月以明四时以序星辰以行江河以流万物以昌好恶以节喜怒以当以为下则顺以为上则明【正义自天地以下八事大礼之备情文俱尽故用为下则顺用为上则明也】太史公曰至矣哉【索隐已下亦是太史公取荀卿礼论之意极言礼之损益以结礼书之论也】立隆以为极而天下莫之能益损也本末相顺【索隐谓礼之盛文理合以归太一至礼之杀复情以归太一隆杀皆归太一者是本末相顺也】终始相应【索隐礼始於脱畧终於税税亦杀也杀与脱畧是始终相应也正义应乙陵反当也】至文有以辨【索隐言礼之至文能辨尊卑贵贱故云有以辨也】至察有以说【索隐言礼之至察有以明隆杀损益委曲情文足以悦人心故云有以说也】天下从之者治不从者乱从之者安不从者危小人不能则也【正义小人犹庶人也则法也言天下士以上至於帝王能从礼者则治安不能从礼者则危乱庶人据於事不能法礼也】礼之貌诚深矣坚白同异之察入焉而弱【索隐有本作恳诚深者非也正义言礼之貌信深厚矣虽有邹子坚白同异之辨明察入於礼义之中自然成懦弱败坏之体也】其貌诚大矣擅作典制褊陋之说入焉而喙【索隐言擅作典制褊陋之说入

礼则自嗛望知其小矣正义言礼之貌信广大矣虽有擅作典制褊陋之说文辞入於礼义之中自然成淫俗褊陋之言】其貌诚高矣暴慢恣睢轻俗以为高之属入焉而坠【索隐恣睢犹毁訾也言訾毁礼者自取坠灭正义言礼之貌信尊高矣虽有暴慢恣睢轻俗以为高之属入於礼义之中自然成坠落暴慢轻俗之人】故绳诚陈【集解郑元曰诚犹审也陈设也谓弹画也】则不可欺以曲直衡诚县【集解郑元曰衡称也县谓锤也正义音悬】则不可欺以轻重矩诚错【索隐错置也?车也矩曲尺也正义错七故反】则不可欺以方员君子审礼则不可欺以诈伪【正义诈伪谓坚白同异擅作典制暴戾恣睢自高也故陈绳曲直定悬衡轻重分错?矩方员自消灭矣】故绳者直之至也衡者平之至也?矩者方员之至也礼者人道之极也然而不法礼者不足礼谓之无方之民【集解郑元曰方犹道也】法礼足礼谓之有方之士礼之中能思索【索隐索求也】谓之能虑能虑勿易【正义易谓轻易也】谓之能固能虑能固加好之焉圣矣【正义好火到反言人以得礼之中又能思审索求其礼谓之能思虑又不轻易其礼谓之能坚固能虑能固其礼更加好之乃圣人矣】天者高之极也地者下之极也日月者明之极也无穷者广大之极也圣人者道之极也【正义道谓礼义也言人有礼义则为圣人比於天地日月广大之极也】以财物为用以贵贱为文以多少为异以隆杀为要【索隐隆犹厚也杀犹薄也】文貌繁情欲省礼之隆也文貌省情欲繁礼之杀也文貌情欲相为内外表里并行而杂礼之中流也【正义言文饰情用表里外内合於儒墨是得礼情之中而流行不息也】君子上致其隆下尽其杀而中处其中【正义中谓情文也】步骤驰骋广骛不外【正义骛音务言君子之人上存文饰下务减省而合情文处得其中纵有战阵杀戮邪恶则不弃於礼义矣三皇步五帝骤三王驰五伯骛也】是以君子之性守宫庭也【索隐言其性守正不谩远行如常守宫庭也正义宫庭听朝处喻君子心内常守礼义若宫庭焉】人域是域士君子也【索隐域居也言君子之行非人居弗居也正义处平凡人域之中能知礼义之域限即为士及君子也】外是民也【索隐外谓人域之外非人所居之地以喻礼义之外别为他行即是小人故云外是人也】於是中焉房皇周浹曲直得其次序圣人也【索隐房音旁旁皇犹徘徊也周浹犹周匝言徘徊周浹委曲得礼之序动不失中则是圣人之行也】故厚者礼之积也大者礼之广也【索隐言君子圣人有厚大之德则为理之所归积益弘广也故曰甘受和白受采忠信之人可以学礼苟无忠信之人则礼不虚道然此文皆荀卿礼论之所载者也】高者礼之隆也明者礼之尽也【正义言君子内守其礼德厚大积广至於高尊明礼则是礼之终竟也此书是褚先生取荀卿礼论兼为之索隐述赞曰礼因人心非从天下合诚饰貌救弊兴雅以制黎甿以事宗社情文可重丰杀难假仲尼坐树孙通蒯野圣人作教罔不由者】

史记卷二十三

史记卷二十三考证

礼书故制礼义以分之○秦藩本凌本皆无分之二字二者相待而长○荀子礼论作相持而长

疏房牀第几席所以养体也○别本无几席二字凌本以为二字疑衍【臣照】按礼论疏房

檣类牀第几筵所以养体也此特删撮之耳未必衍也

侧载臭茝○按荀子礼论作侧载皋芷

寝兕持虎蛟鞶弥龙集解徐广曰乘輿车金薄璆龙为輿倚较○【臣世骏】徐广所云盖本续汉书輿服志文刘昭注又引徐广曰璆交错之形也则字作璆不作璆明矣索隐云璆然龙貌非是

必信至教顺○礼论作倍至教顺

情胜之为安○礼论作情说一本作情性

是儒墨之分索隐易曰悦以使人人忘其死是也○易作说以先民民忘其劳说以犯难民忘其死

强固之本也○荀子议兵篇作强国

弗由之所以捐社稷也○议兵篇捐作陨

宛之钜铁施钁如蠹蚤○【臣照】按议兵篇云宛钜铁钁惨如蠹蚤杨倞注云钁与鏃同矛也正义断句误

然而兵殆於垂涉○议兵篇作垂沙杨倞曰汉地志沛国有垂乡

庄躋起楚分而为四正义括地志云师州黎州在京西南五千六百七十里○唐无师州地理志云黎州至京师二千九百五十里

参是岂无坚甲利兵哉○【臣照】按议兵篇云庄躋起楚分而为四参盖参即三字原属上句索隐正义盖仍传袭之讹而强为之解

汝颖以为险正义地理志阳乾江山颍水出东至下蔡入淮地○阳乾山名江字衍

不畏外而固者○议兵篇作不畏外而明内

诸侯不敢怀○礼论作坏杨倞注云司马贞云思也盖误耳

所以辨贵贱贵贱治得之本也○礼论作所以别贵始贵始得之本也杨倞注云得当为德言德之本在贵始谷梁传有此语

函及士大夫○函?字之误礼论杨倞注引司马贞曰?音含苞也言士大夫皆得苞立社

有特牲而食者○礼论作持手而食者

利爵弗啐也○礼论啐作醯

三宥之弗食也○礼论作三臭

大昏之未废齐也○礼论作发齐

大路之素帟也○礼论作大路之素未集也

朱弦而通越○【臣照】按杨倞注礼论引史记作洞越今本作通转与荀子不异倞唐人所见本必不误

始乎脱成乎文终乎税○按礼论作始乎税成乎文终乎悦校

以为下则顺以为上则明太史公曰至矣哉○按礼论以为上则明下云万物变而不乱贰之则丧也礼岂不至矣哉

礼之貌诚深矣○礼论貌作理

入焉而弱○礼论弱作溺

入焉而嚙○礼论嚙作丧

广骛不外○广骛礼论作厉骛

是以君子之性守宫庭也○性守礼论作坛宇

明者礼之尽也正义此书是褚先生取荀卿礼论兼为之○【臣照】按自礼由人起至儒墨之分出於礼论自治辨之极也至刑措而不用出於议兵篇自天地者生之本也至末又出礼论张晏所称褚先生补书惟孝武本纪三王世家日者列传龟荚列传未尝及礼书也今考太史公曰洋洋美德乎以下至垂之於後云句所为太史公礼书当如是止矣其礼由人起以下则後人少其书而取荀卿子文补之耳不知礼意礼制已备举数百言之内不必复补也若夫割裁礼论之文横加太史公曰四字作礼书赞则谬戾已甚恐褚先生不至是

史记卷二十三考证

卷二十四

钦定四库全书

史记卷二十四

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

乐书第二

【正义天有日月星辰地有山陵河海岁有万物成熟国有圣贤宫观周域官僚人有言语衣服体貌端修咸谓之乐乐书者犹乐记也郑元云以其记乐之义也此於别录属乐记盖十一篇合为一篇十一篇者有乐本有乐论有乐施有乐言有乐礼有乐情有乐化有乐象有宾牟贾有师乙有魏文侯今虽合之亦畧有分焉刘向校书得乐书二十三篇着於别录今乐记惟有十一篇其名犹存也】

太史公曰余每读虞书至於君臣相勅维是几安而股肱不良万事堕坏未尝不流涕也成王作颂推已惩艾【正义音刈】悲彼家难【正义乃憚反家难谓文王囚羑里武王伐纣】可不谓战战恐惧善守善终哉【正义言成王作颂悲文王战战恐惧推已戒励为治是善守善终也】君子不为约则修德【正义为于伪反】满则弃礼佚能思初安能惟始沐浴膏泽而歌咏勤苦非大德谁能如斯传曰治定功成礼乐乃兴海内人道益深其德益至所乐者益异满而不损则溢盈而不持则倾凡作乐者所以节乐【正义音洛言不乐至荒淫也】君子以谦退为礼以损减为乐乐其如此也以为州异国殊情习不同故博采风俗协比声律【正义比音鼻】以补短移化助流政教天子躬於明堂临观而万民咸荡涤邪秽斟酌饱满以饰厥性故云雅颂之音理而民正噪噉之声兴而士奋【索隐噪音姑尧反又音叫噉音击】郑卫之曲动而心淫及其调和谐合鸟兽尽感而况怀五常含好恶自然之势也治道亏缺而郑音兴起封君世辟【索隐辟亦君也正义辟并亦反】名显邻州争以相高自仲尼不能与齐优遂容於鲁【索隐齐人归女乐而孔子行言不能遂容於鲁而去也或作逐客误矣】虽退正乐以诱世作五章以刺时【索隐按家语云孔子嗤季桓子作歌引诗曰彼妇之口可以出走彼妇之谒可以死败优哉游哉聊以卒岁此是五章之刺也】犹莫之化陵迟以至六国流沔沈佚遂往不反卒於丧身灭宗并国於秦秦二世尤以为娱丞相李斯进谏曰放弃诗书极意

声色祖伊所以惧也【正义祖伊谏殷纣纣不聽孔安国云祖已後贤臣也】轻积细过恣心长夜纣所以亡也赵高曰五帝三王乐各殊名示不相袭朝廷下至人民得以接欢喜合殷勤非此和说不通解泽不流【正义说音悦解音蟹言非此和适怵悦之事不通解散恩泽之事不流各一世之化也谏二世故名之也】亦各一世之化度时之乐何必华山之騄耳而後行远乎二世然之高祖过沛诗三侯之章令小儿歌之【索隐按过沛诗即大风歌也其辞曰大风起兮云飞扬威加海内兮归故乡安得猛士兮守四方是也侯语辞也诗曰侯其禕而者是也兮亦语辞也沛诗有三兮故云三侯也】高祖崩令沛得以四时歌舞宗庙孝惠孝文孝景无所增更於乐府习常肄旧而已【正义肄音异】至今上即位作十九章【索隐按礼乐志安世房中乐有九章】十令侍中李延年次序其声拜为协律都尉通一经之士不能独知其辞皆集会五经家相与共讲习读之乃能通知其意多尔雅之文汉家常以正月上辛祠太一甘泉以昏时夜祠到明而终常有流星经於祠坛上使僮男僮女七十人俱歌春歌青阳夏歌朱明【集解瓚曰尔雅云春日青阳夏日朱明】秋歌西皞【集解韦昭曰西方少皞也】冬歌元冥【正义礼记月令云元冥水官也】世多有故不论【索隐言四时歌多有其词故此不论载今见汉书礼乐志】又尝得神马渥洼水中【集解李斐曰南阳新野有暴利长当武帝时遭刑屯田炖煌界人数於此水旁见羣野马中有奇异者与凡马异来饮此水傍利长先为土人持勒鞮於水傍後马玩习久之代土人持勒鞮收得其马献之欲神异此马云从水中出苏林曰洼音窞曲之窞也索隐洼音乌花反苏林音窞窞窞也】即复次以为太一之歌歌曲曰太一贡兮天马下【索隐按礼乐志贡作况况与贡意亦通正义大一北极大星也】沾赤汗兮沫流赭【集解应劭曰大宛马汗血沾濡也流沫如赭】骋容与兮跼万里【集解孟康曰跼音逝如淳曰跼谓超踰也索隐邹诞生云跼一作世音跼】今安匹兮龙与友後伐大宛得千里马马名蒲梢【集解应劭曰大宛旧有天马种蹋石汗血汗从前肩膊出如血号一日千里索隐梢音史交反又作骚亦同音】次作以为歌诗曰天马来兮从西极经万里兮归有德承灵威兮降外国涉流沙兮四夷服中尉汲黯进曰凡王者作乐上以承祖宗下以化兆民今陛下得马诗以为歌协於宗庙先帝百姓岂能知其音邪上默然不悦丞相公孙弘曰黯诽谤圣制当族凡音之起由人心生也【正义皇侃云此章有三品故名为乐本备言音声所起故名乐本夫乐之起其事有二一是人心感乐乐声从心而生一是乐感人心心随乐声而变也】人心之动物使之然也【正义物者外境也外有善恶来触於心则应触而动故云物使之然也】感於物而动故形於声【集解郑元曰宫商角徵羽杂比曰音单出曰声形犹见也王肃曰物事也谓哀乐喜怒和敬之事感人而动见於声】声相应故生变【集解郑元曰乐之器弹其宫则衆宫应然而不足乐是以变之使杂也正义崔灵恩云缘五声各自相应不足为乐故变使杂令声音谐和也】变成方谓之音【集解郑元曰方犹文章正义皇侃云单声不足故变杂五声使交错成文乃谓为音也】比音而乐之及干戚羽旄谓之乐也【集解郑元曰干楯也戚斧也武舞所执也羽翟羽也旄旄牛尾文舞所执也正义比音鼻次也音五音也言五音虽杂犹未足为乐复须次比器之音及文武所执之物共相谐会乃是由音得名为乐武阴文阳故所执有轻重异】乐者音之所由生也【正义合音乃成乐是乐由音而生诸乐生起所由之生也】其本在人心感於物也【正义本犹初也物外境也言将欲明乐随心见故更陈此句也】是故其哀心感者其声噍以杀【集解郑元曰噍蹶也索隐噍音如字邹诞生作噍音将妙反正义杀所介反噍蹶急也若外境痛苦则其心哀戚哀戚在心故乐声蹶急而杀也此下六者皆人君见前境来感已而制乐音随心见之也】其乐心感者其声

嘽以缓【集解郑元曰嘽寬綽之貌正义嘽寬也若外境可美则其心欢乐欢乐在心故乐声必随而寬缓也】其喜心感者其声发以散【集解郑元曰发扬也正义若外境会意其心喜悦喜悦在心故乐声发扬也】其怒心感者其声麤以厉【正义若外境乖失故已心怒恚怒随心心随怒而发扬故无辍矻则乐声麤强而严厉也】其敬心感者其声直以廉【正义廉隅也若外境尊高故已心悚敬悚敬在内则乐声直而有廉角也】其爱心感者其声和以柔【正义柔软也若外境怜慕故已心爱惜爱惜在内则乐和柔也】六者非性也【正义性本静?无此六事六事之生由应感见而动故云非性】感於物而後动【集解郑元曰言人声在所见非有常】是故先王慎所以感之【正义六事随见而动非关本性先王圣人在上制正礼以防之故先王慎所以感之者也】故礼以导其志乐以和其声政以一其行【正义胡孟反】刑以防其奸礼乐刑政其极一也【集解郑元曰极至也正义四事防慎所感之由也用礼教尊其志用世乐谐和其声用法律齐其行用刑辟防其凶民不复流僻徒感防之使同其一敬不为非也极至也】所以同民心而出治道也【集解郑元曰此其所谓至也正义上四事功成民同其心俱不邪僻故治道出也民心所触有前六者不同故圣人用後四者制之】凡音者生人心者也【正义此乐本章第二段明乐感人心也人心即君人心也乐音善恶由君上心之所好故云生於人心者也】情动於中故形於声【正义情君之情也中犹心也心既感物而动故形见於声】声成文谓之音【正义谓之音清浊虽异各见於外成於文采并谓之音也】是故治世之音安以乐其政和【正义乐音洛言平理之世其乐音安静而欢乐也】乱世之音怨以怒其政乖【集解徐广曰一作烦正义乱世之音民心怨怒乐声亦怨由其政乖僻故也】亡国之音哀以思其民困【正义思音四亡国谓将欲灭亡之国乐音悲哀而愁思亡国之时民之心哀思其乐音亦哀思由其民困苦故也】声音之道与政通矣【集解郑元曰言以八音和否随政也正义政和则声音安乐政乖则声音怨怒是声音之道与政通矣】宫为君【集解王肃曰居中總四方索隐宫弦最大用八十一丝声重而尊故为君正义宫属土居中央總四方君之象也】商为臣【集解王肃曰秋义断索隐商是金金为决断臣事也弦用七十二丝次宫如臣次君者也】角为民【集解王肃曰春物并生各以区别民之象也索隐弦用六十四丝声居宫羽之中比君为劣比物为优故音清浊中人之象也正义角属木以其清浊中民之象】徵为事【集解王肃曰夏物盛故事多索隐徵属夏夏时生长万物皆成形体事亦有体故配事弦用五十四丝正义徵属火以其徵清事之象也】羽为物【集解王肃曰冬物聚索隐羽为水?清物之象故为物弦用四十八丝】五者不乱则无悖滞之音矣【集解郑元曰悖滞弊败不和之貌也索隐又一本作?懣省也正义悖弊也懣败也君臣民事物五者各得其用不相坏乱则五音之响无弊败也】宫乱则荒其君骄【集解郑元曰荒犹散正义宫乱则其声放散由其君骄溢故也】商乱则槌其臣坏【集解徐广曰槌今礼作陂也索隐槌音都回反陂音陂正义商音乱其声歇邪不正由其臣不理於官坏故也】角乱则忧其民怨【正义角音乱其声忧愁由政虐民怨故也】徵乱则哀其事勤【正义徵音乱其声哀苦由繇役不休其民事勤劳】羽乱则危其财匮【正义羽音乱其声倾危由君赋重於其民贫乏故也】五者皆乱迭相陵谓之慢【正义迭?也陵越也五声并不和则君臣上下?相陵越所以谓之为慢也】如此则国之灭亡无日矣【集解郑元曰君臣民事物也其道乱则其音应而乱也索隐无日犹言无复一日也以言君臣陵慢如此无复一日则国之灭亡朝夕可待也】郑卫之音乱世之音也比於慢矣【集解郑元曰比犹同正义郑音好滥淫志卫音促速烦志并是乱世音虽乱而未灭亡故比慢也比必以反】桑间濮上之音【集解

郑元曰濮水之上地有桑间在濮阳南正义昔殷纣使师延作长夜靡靡之乐以致亡国武王伐纣此乐师师延将乐器投濮水而死後晋国乐师师涓夜过此水闻水中作此乐因聽而写之既得还国为晋平公奏之师旷抚之曰此亡国之音也得此必於桑间濮上乎纣之所由亡也【亡国之音也其政散其民流诬上行私而不可止【正义若用此濮上之音其政必离散而民人流徙逃亡缘臣诬上各行私情国即灭亡而不可禁止也】凡音者生於人心者也【正义此乐本章第三段也前第一段明人心感乐第二段明乐感人心此段圣人制正乐以应之此段自有二重自凡音至反人道为一重却应第二段乐感人心也又自人心生而静至王道备矣为一重却应第一段人心感乐也】乐者通於伦理者也【集解郑元曰伦犹类也理分也正义音初生自君心形而成乐乐成则能通於百姓使各尽其类分故曰通伦理者也】是故知声而不知音者禽兽是也知音而不知乐者衆庶是也唯君子为能知乐【集解郑元曰禽兽知此为声耳不知其宫商之变八音并作克谐曰乐】是故审声以知音【正义声为音本若欲知音当须审定其声然後音可知】审音以知乐【正义音为乐本前审定其音然後可知乐也】审乐以知政【正义乐为政本前审定其乐然後政可知也】而治道备矣【正义前审定其本後识其末则为治之道乃可备也】是故不知声者不可与言音知音者不可与言乐知乐则几於礼矣【集解郑元曰几近也正义礼谓治国之礼包万事万事备具始是礼极今知乐者但正君臣民事物五者之情於礼未极故云几於礼也】礼乐皆得谓之有德德者得也【集解郑元曰聽乐而知政之得失则能正君臣民事物之礼正义若聽乐而知礼则是礼乐皆得二者备具则是有德之君也又言有德之人是能得礼乐之情故云德者得也】是故乐之隆非极音也【集解郑元曰隆犹盛也极犹穷也正义大乐之盛本在移风易俗非穷钟鼓之音故云非极音也故论语乐云乐云钟鼓云乎哉是也】食飧之礼非极味也【正义食音嗣食享谓宗庙祭也大礼之盛本在安上治民非崇玉帛至味故云非极味也故论语礼云礼云玉帛云乎哉是也】清庙之瑟【集解郑元曰清庙谓作乐歌清庙王肃曰於清庙中所鼓之瑟】朱弦而疏越【集解郑元曰越瑟底孔画疏之使声迟】一倡而三叹有遗音者矣【集解郑元曰遗犹余也王肃曰未尽音之极正义倡音唱一唱谓一人始唱歌三叹谓三人讚叹也乐歌此文王之道不极音声故但以熟弦广孔少唱寡和此音有德传於无穷是有多余音不已一云所重在德本不在音是有多余音念之不忘也】大飧之礼【正义大飧即食飧也变食言大崇其名故也不尚重味故食言大也此言礼盛不作至味之事】尚元酒【正义祫祭之礼则列元尊在上五齐在下也】而俎腥鱼【正义凡俎有肴生腊是俎腥鱼者生鱼也俎虽有三牲而兼载生鱼也】大羹不和【正义和胡卧反大羹肉汁也祫祭有肉汁为羹无盐菜之芼和也】有遗味者矣【正义遗亦余也此着质素之食礼人主诚设之道不极滋味故尚明水而腥鱼此礼可重流芳竹帛传之无已有余味一云礼本在德不在甘味故用水鱼而遗味也】是故先王之制礼乐也非以极口腹耳目之欲也将以教民平好恶而反人道之正也【集解郑元曰教之使知好恶正义好火到反恶一故反平均也言先王制礼作乐本是教训浇民平於好恶之理故去恶归善不为口腹耳目之欲令反归人之正道也】人生而静天之性也【正义此第三段第二重也人初生未有情欲其情欲至静稟于自然是天之性也】感於物而动性之颂也【集解徐广曰颂音容今礼作欲正义其心虽静感於外情因物而动是性之贪慾也】物至知知然後好恶形焉【集解王肃曰事至能以智知之然後情之好恶见正义上知音智】好恶无节於内知诱於外不能反已天理灭矣【集解王肃曰内无定节智为物所诱於外情从之动而失其天性正义言好恶不自节量於心唯知

情欲诱之於外不能反还已躬之善则天性灭絕矣】夫物之感人无穷而人之好恶无节则是物至而人化物也【集解郑元曰随物变化正义夫物不一故言无穷也若人心嗜慾无度随好恶不能节之则与之而化故云人化物】人化物也者灭天理而穷人欲者也【集解郑元曰言无所不为正义心随物化则灭天性而恣人心之欲也】於是有悖逆诈伪之心有淫佚作乱之事是故强者胁弱衆者暴寡知者诈愚勇者苦怯疾病不养老幼孤寡不得其所此大乱之道也是故先王制礼乐人为之节【集解郑元曰为作法度以遏其欲也王肃曰以人为之节言得其中也】衰麻哭泣【正义此以下并是陈礼节人之事也制五服哭泣所以纪丧事之节而不使背死忘生也事死者难故以哀哭为前也】所以节丧纪也钟鼓干戚所以和安乐也婚姻冠笄所以别男女也【集解郑元曰男二十而冠女许嫁而笄正义冠音贯笄音鸡】射乡食飧所以正交接也【集解郑元曰射乡大射乡饮酒】礼节民心乐和民声政以行之刑以防之礼乐刑政四达而不悖则王道备矣乐者为同礼者为异【集解郑元曰同谓协好恶也异谓别贵贱正义此第二章名为乐论其中有四段此章论礼乐同异也夫乐使率土合和是同也礼使父子殊别是为异也】同则相亲异则相敬乐胜则流【集解王肃曰流遁不能自还】礼胜则离【集解王肃曰离析而不亲正义胜式证反胜犹过也礼乐虽有同异而又相须也若乐过和同而无礼则流慢无复尊卑之敬若礼过殊隔无乐则亲属离析无复骨肉之爱也】合情饰貌者礼乐之事也【集解郑元曰欲其并行彬彬然正义乐和内是合情也礼检迹是饰貌也】礼义立则贵贱等矣【集解郑元曰等阶级】乐文同则上下和矣【正义文谓声成文也若作乐文采谐同则上下并和是乐和民声也】好恶着则贤不肖别矣【正义好恶并去声又并如字着张虑反若法律分明善恶章着则贤愚斯别是政化行矣】刑禁暴爵举贤则政均矣【正义王者为用刑则禁制暴慢疏爵以举赏贤良则政治均平是刑以防之矣既是禁暴而又言举贤者示刑最为重不宜独行必须赏罚兼明也然礼乐之用非政不行明须四事连行也】仁以爱之义以正之如此则民治行矣【正义言礼乐刑政既均又须仁以爱民义以正民如此则民顺理正行矣】乐由中出【集解郑元曰和在心正义此乐论第二段谓乐功也出犹生也为人中和有未足故生此乐也】礼自外作【集解郑元曰敬在貌正义作犹起也为人外敬有未足故起此礼也】乐由中出故静【正义乐和心在内故云静】礼自外作故文【集解郑元曰文犹动正义礼肃人貌貌在外故云动】大乐必易【正义易以?反朱弦疏越是也】大礼必简【集解郑元曰易简若於清庙大飧然正义玄酒腥鱼是也】乐至则无怨礼至则不争【集解郑元曰至犹达也行也正义乐行主和和达则民无复怨怒也礼行主谦谦达则民不争竞也】揖让而治天下者礼乐之谓也暴民不作诸侯宾服兵革不试【集解郑元曰宾协也试用也】五刑不用百姓无患天子不怒如此则乐达矣合父子之亲【正义前云礼至不争故致天下尊卑之序也礼使父慈子孝是合父子之亲也即父事三老也】明长幼之序【正义长坐幼立是明长幼之序即兄事五更是也】以敬四海之内【正义孝经云教以孝所以敬天下之为人父教以弟所以敬天下之为人兄教以臣所以敬天下之为君即是敬四海之内也】天子如此则礼行矣【正义言天子能躬行礼则臣下必用礼如此则礼行矣合父子以下悉自天子自身行之也】大乐与天地同和【正义此乐论第三段论礼与乐唯圣能识也言天地以气氤氲合生万物大乐之理顺陰阳律吕生养万物是大乐与天地同和也】大礼与天地同节【集解郑元曰言顺天地之气与其数也正义言天有日月地有山川高卑殊形生用各别大礼辩尊卑贵贱等差异别是大礼与天地同节】和故百物不失【集解郑元曰不失其性正义乐与天地同和能

生成性万物】节故祀天祭地【集解郑元曰成物有功报焉正义礼与天地同节有尊卑上下报生成万物之功】明则有礼乐【集解郑元曰教人者也正义明犹外也言圣王能使乐与天地同和礼与天地同节又能显明其礼乐以教人也】幽则有鬼神【集解郑元曰助天地成物者也易曰知鬼神之情状然则圣人精气谓之神贤智之精气谓之鬼也正义幽内也言圣王又能内敬鬼神助天地生成万物】如此则四海之内合敬同爱矣【正义言行礼同节故四海合敬矣乐同和故四海同爱矣】礼者殊事合敬者也【正义尊卑贵贱之别是殊事也施之同以庄敬是合敬也】乐者异文合爱者也【正义宫商错而成文随事而制变是异文同以劝爱是合爱也】礼乐之情同故明王以相沿也【集解郑元曰沿犹因述也殷因於夏周因於殷正义乐情主和礼情主敬致化是同以其致化情同故明王相因述也】故事与时并【集解郑元曰为事在其时也王肃曰有其时然後得立其事正义言圣王所为之事与所当之时并行也若尧舜揖让之事与淳和之时并行汤武干戈之事与浇薄之时并行此句明礼也】名与功偕【集解郑元曰为名在於其功也偕犹俱也王肃曰有功然後得受其名正义名谓乐名也偕俱也功者揖让干戈之功也圣王制乐之名与所建之功俱作也若尧舜乐名咸池大韶汤武乐名大濩大武也】故钟鼓管磬羽龠干戚乐之器也【正义此陈乐事也钟鼓之属是乐之器有形质故为事也】诘信俯仰级兆舒疾【集解徐广曰级今礼作缀駟案郑元曰兆其外营域索隐缀舞者酈列也又按下文其舞行及远及短礼皆作缀盖是字之残缺讹变耳故此为级而下又为及也并依字读义亦虽通恐违古记耳】乐之文也【正义文饰之事也】簠簋俎豆制度文章礼之器也升降上下周旋裼褻礼之文也故知礼乐之情者能作【正义既能穷本知变又能着诚去伪所以能述作故谓之圣也】识礼乐之文者能述【集解郑元曰述谓训其义正义谓上文屈伸俯仰升降上下也】作者之谓圣【正义尧舜禹汤之属是也】述者之谓明【正义游夏之属是也】明圣者述作之谓也乐者天地之和也礼者天地之序也【正义此乐论第四段也谓礼乐之情也乐法天地之气故云天地之和礼法天地之形故云天地之序礼乐从天地而来王者必明於天地然後能兴起礼乐也】和故百物皆化序故羣物皆别【集解郑元曰化犹生也别谓形体异】乐由天作礼以地制【集解郑元曰言法天地正义天用和气化物物从气化是由天作也地有高下区分以生万物礼有品节殊文是由地制也】过制则乱过作则暴【集解郑元曰过犹误也暴失文武意也】明於天地然後能兴礼乐也【正义礼乐既不可误故须明天地者乃可制作也】论伦无患乐之情也【集解王肃曰言能合道论中伦理而无患也正义既云惟圣人识礼乐之情此以下更说其情状不同也伦类也贺瑒云乐使物得类序而无害是乐之情也】欣喜驩爱乐之容也【正义容犹事也贺瑒云八音克谐使物欣喜此乐之事迹也】中正无邪礼之质也【集解郑元曰质犹本正义明礼情也质本也礼以心内中正无有邪僻是礼之本】庄敬恭顺礼之制也【正义明礼情之事也谓容貌庄敬谦恭谨慎是礼之节制也】若夫礼乐之施於金石越於声音用於宗庙社稷事於山川鬼神则此所以与民同也【集解王肃曰自天子至民人皆贵礼之敬乐之和以事鬼神先祖也正义言四者施用祭祀随世而异则前王所不专故又云则此所以与民同言随世也】王者功成作乐治定制礼【集解郑元曰功成治定同时耳功主于王业治主乎教民正义此第三章名乐礼章言明王为治制礼作乐故名乐礼章其中有三段一明礼乐齐其用必对二明礼乐法天地之事三明天地应礼乐也】其功大者其乐备其治辨者其礼具【集解徐广曰辨一作别駟案郑元曰辨徧也正义辨皮勉反又边练反夫礼乐必由功治有大小故礼乐应之而广狭也若上世民淳易化故王者功

治广徧是以礼乐备也而殷周民浇难化故王者功治?狭则礼乐亦不具】干戚之舞非备乐也【集解郑元曰乐以文德为备若咸池也正义证乐不备也干戚周武也乐以文德为备故用朱丝疏越干戚之舞故非备乐也】亨孰而祀非达礼也【集解郑元曰达犹具也至敬不享味而贵气臭正义解礼不具也谓腥俎元尊表诚象古而已不在芬苾孰味是乃浇世为之非达礼也】五帝殊时不相沿乐三王异世不相袭礼【集解郑元曰言其有损益正义庾蔚之云乐兴於五帝礼成於三王乐兴王者之功礼随世之质文崔灵恩云五帝淳浇不同故不得相沿为乐三王文质之不等故不得相袭为礼】乐极则忧礼粗则偏矣【集解郑元曰乐人之所好也害在淫侈礼人之所勤害在倦畧】及夫敦乐而无忧【集解郑元曰敦厚也】礼备而不偏者其唯大圣乎天高地下万物散殊而礼制行也【集解郑元曰礼为异正义天高於上地卑於下万物布散殊别於其中而大圣制礼别异尊卑是衆大而行故云礼制行矣礼以节制为义故云礼制】流而不息合同而化而乐兴也【集解郑元曰乐为同正义天地二气流行不息合同氤氲化生万物而大圣作乐合同人心是以象天地而起故云乐兴也】春作夏长仁也秋敛冬藏义也仁近於乐义近於礼【集解郑元曰言乐法阳而生礼法陰而成正义近其靳反春夏生长万物故为仁爱乐主陶和万姓故仁近於乐也秋则杀敛冬则蛰藏并是义主断割礼为节限故义近於礼也】乐者敦和率神而从天【集解郑元曰敦和乐贵同正义此释仁近乐之义言乐之为体敦厚和同因循圣人之神气而从顺於天】礼者辨宜居鬼而从地【集解郑元曰别宜礼尚异也孙炎曰居鬼品处人鬼之志也正义此解义近礼之由居鬼犹循神也鬼谓先贤也礼之为体尊卑殊别各有其宜因居先贤鬼气而从顺於地分别礼分】故圣人作乐以应天作礼以配地礼乐明备天地官矣【集解郑元曰各得其事也王肃曰各得其位也】天尊地卑君臣定矣【正义此乐礼章第二段也明礼乐法天地事也言君尊於上臣卑於下是象天地定矣】高卑已陈贵贱位矣【集解郑元曰高卑谓山泽也位矣尊卑之位象山泽】动静有常小大殊矣【集解郑元曰动静陰阳用事也小大万物也大者常存小者随陰阳出入也】方以类聚物以羣分则性命不同矣【集解郑元曰方谓行虫物谓殖生者性之言生也命生之长短正义性生也万物各有嗜好谓之性命者长短夭壽也所祖之物既稟大小之殊故性命夭壽不同也】在天成象在地成形【集解郑元曰象光耀形体貌正义言日月星辰之光耀草木鸟兽之体貌也】如此则礼者天地之别也【正义结礼之别也如此则圣人制礼殊别是天地之分别也亦是辨宜居鬼而从地也】地气上躋【集解郑元曰躋升也】天气下降【正义明礼乐法天地气也天地二气之升降合而生物故乐以气法地弦歌声气升降相合以教民也然气从下升此乐象气故从地始也形以上尊故礼象形从天始也】陰阳相摩【正义二气切摩而万物生发作乐亦令声气切摩使民心生敬也】天地相荡【集解郑元曰荡动也正义天地八节荡动也天地化物八节更相感动作乐亦令八音相感动也】鼓之以鼙鼓【正义万物虽以气生而物未发故雷霆以鼓动之如乐用钟鼓以发节也大雷曰霆】奋之以风雨【集解郑元曰奋迅也正义万物皆以风雨奋迅而出如乐用舞奋迅以象之使发人情也】动之以四时【正义万物生长随四时而动如乐各逐心内所须而奏之】煖之以日月【正义煖音暄远反万物之生必须日月煖照如乐有蕴藉使人宣昭也蕴藉者歌不直言而长言嗟叹之属也】而百物化兴焉【集解郑元曰百物化生】如此则乐者天地之和也【正义结乐之和也如此则圣人作乐法天地和同是乐者天地之和也亦是敦和率神而从天也】化不时则不生【正义此乐礼章第三段明天地应於礼乐也前圣人既作礼乐此明天地应乐也若人主行化失时天地应以恶气

毀物故云化不时则不生也】男女无别则乱登【集解郑元曰登成也乐失则害物礼失则乱人正义此明天地应礼也登成也若人君行礼男女无别则天地应而错乱成之也】此天地之情也【正义结随礼得失而应之是天地之情也然乐是气化故云害物礼是形教故言乱人也】及夫礼乐之极乎天而蟠乎地【集解郑元曰极至也蟠犹委也】行乎阴阳而通乎鬼神【正义言陰阳和四时顺以应礼乐礼乐与鬼神并助天地而成化也】穷高极远而测深厚【集解郑元曰高远三辰也深厚山川也言礼乐之道上至於天下委於地则其间无所不之矣】乐着太始而礼居成物【集解王肃曰着明也明太始谓法天也成物谓地也居亦谓法也索隐乐能明太始是法天也地能成万物故礼所以法地也正义着犹处也天为万物之始故曰太始天苍而气化乐亦气化故云处太始也成物地也体盘薄长成万物也在地成形礼亦形教故云居成也地卑故曰居天高故曰着也】着不息者天也着不动者地也【集解郑元曰着犹明白也息谓休止也索隐运生不息者天之功也故易乾卦云天行健君子以自强不息着养万物不动者地之德也故易坤卦云安贞之吉是也正义此美礼乐配天地也着亦处也言乐气化处运生不息者配天也礼制尊卑定位成养万物处不移动者配地也】一动一静者天地之间也【集解郑元曰间谓百物也正义此美礼乐若分则配天地若合则与百物齐一也静动而生万物稟天动地静而生故呼百物为天地之间也】故圣人曰礼云乐云【集解郑元曰言礼乐之法天地也正义引圣证此章也言圣人云明此一章是礼乐法天地也故言圣人曰礼云乐云乐动礼静其并用事如天地间物有动静也】昔者舜作五弦之琴以歌南风【集解郑元曰南风长养之风也言父母之长养已也其辞未闻也王肃曰南风育养民之诗也其辞曰南风之薰兮可以解吾民之愠兮索隐此诗之辞出尸子及家语正义此第四章名乐施明礼乐前备後施布天下也中有三段一明施乐以赐诸侯也二明施乐须节既赐之所以宜节也三明礼乐所施各有本意本德世本神农作琴今云舜作者非谓舜始造也改用五弦琴特歌南风诗始自舜也五弦者无文武二弦唯宫商角徵羽之五弦也南风是孝子之诗也南风养万物而孝子之歌也得父母生长如万物得南风也舜有孝行故以五弦之琴歌南风诗以教理天下之孝也】夔始作乐以赏诸侯【集解郑元曰夔欲舜与天下之君共此乐】故天子之为乐也以赏诸侯之有德者也德盛而教尊五谷时孰然後赏之以乐【正义陈其合赏也若诸侯孝德明盛教化尊严年谷丰稔故天子赏乐也天下因而法之也】故其治民劳者其舞行级远【正义行音胡郎反级音子卫反本或作缀音同此明虽得乐赐而随功德优劣也舞位行列也缀谓鄼列也若诸侯治民劳苦由君德薄王赏之以乐则舞人少不满列去鄼疏远者也】其治民佚者其舞行级短【集解王肃曰远以象民行之劳近以象民行之逸正义佚音逸若诸侯治民暇逸由君德盛王赏舞人多则满列去鄼促近也庾蔚之云此为虞夏礼也虞犹淳故可随功赐乐殷周渐浇易生忿怨不宜犹有优劣是以同制诸侯六佾故与周礼不同也】故观其舞而知其德【正义观其舞位人多少去缀远近即知其君德薄厚也】闻其謚而知其行【集解郑元曰謚者行之迹正义行音故孟反制死謚随君德故闻死謚则知其生行此一句比拟其舞也】泰章章之也【集解郑元曰尧乐名言尧德章明正义既生时舞则知德死则闻謚验行故更引死後闻乐则知行事解之也大章尧乐也章明也民乐尧德大明故名乐曰大章後人闻大章则知尧生时德大明上章是尧德之明下章是後明於尧德白虎通云大章大明天地之道】咸池备也【集解郑元曰黄帝所作乐名尧增修而用之咸皆也池之言施也言德之无不施也王肃曰包容浸润行化自然故曰备也】韶继也【集解郑元曰舜乐名言能继尧之德】夏大也【集解郑元曰禹乐名

言禹能大尧舜之德】殷周之乐尽也【集解郑元曰言尽人事也周礼曰殷曰大濩周曰大武】天地之道寒暑不时则疾【正义此则乐施章第二段明施乐须节也既必须节故引譬例寒暑天地之气也若寒暑不时则民多疾疫也】风雨不节则饥【正义风雨天事也风雨有声形故为事也若飘洒淅厉不有时节则谷损民饥也】教者民之寒暑也【集解郑元曰教谓乐也】教不时则伤世【正义寒暑不时既为民疾苦乐教不时则伤世俗之化也】事者民之风雨也事不节则无功【正义风雨不节则民饥谨礼事不节则治无功也】然则先王之为乐也以法治也【集解王肃曰作乐所以法其治行也】善则行象德矣【集解王肃曰君行善即臣下之行皆象君之德正义此广乐所以须节也言先王为乐必以法制行善则臣下之行皆象君之德也】夫豢豕为酒【集解郑元曰以谷食犬豕曰豢为作也】非以为祸也【正义此言礼须节也豢养也言前王豢犬豕及作酒之事本以为礼祀神祇设宾客和亲族礼贤能而实非为民作祸灾也】而狱讼益烦则酒之流生祸也【集解郑元曰小人饮之善酗以致狱讼正义此礼事也言民得豢酒无复节限卒至沉酗鬪争杀伤而刑狱益生烦多则是酒之流害生其祸也】是故先王因为酒礼一献之礼宾主百拜【集解郑元曰一献士饮酒之礼百拜以喻多也】终日饮酒而不得醉焉此先王之所以备酒祸也故酒食者所以合欢也【正义此结节功也既防酒祸故饮不醉争以时合欢适也】乐者所以象德也【正义此乐施章第三段明礼乐之所施各有本意在於象德也此言乐意也言乐之所施於人本有和爱之德】礼者所以闭淫也【正义此言礼意也言礼之所施於人大止邪淫过失也】是故先王有大事必有礼以哀之【集解郑元曰大事谓死丧正义民有丧则先王制衰麻哭泣之礼以节之使其各遂哀情是礼以哀之也】有大福必有礼以乐之【正义乐音洛大福祭祀者庆也民庆必歌舞饮食庶羞之礼使不过而各遂欢乐是有以乐之也】哀乐之分皆以礼终【正义分扶问反结二事哀乐虽反皆用礼节各终其分故云皆以礼终】乐也者施也礼也者报也【集解郑元曰言乐出而不反而礼有往来正义施式?反此第六段乐象法章第五段不以次第而乱升在此此段明礼乐用别也庾蔚之云乐者所以宣畅四气导达情性功及物而不知其所报即是出而不反所以谓施也礼者所以通彼之意故有往必有来所以谓报也】乐乐其所自生【集解郑元曰自由也正义此广施也乐名所起由民下之心所乐生非有所报也】而礼反其所自始【正义此广报也反犹报也礼生无名但是事耳随时得质文之事而报之】乐章德【正义闻名知德若大章是也】礼报情反始也【集解孙炎曰作乐者缘民所乐於已之德若舜之民乐其绍尧也周之民乐其伐纣而作武也制礼者本已所由得民心殷尚质周尚文是也正义礼报人情而制随质文之始也】所谓大路者天子之舆也【正义此以下广言礼以报为体之事舆车也大路天子之车也诸侯朝天子修其职贡若有勲劳者天子赐之大路也】龙旗九旒天子之旌也【正义庾蔚之云龙旗九旒上公之旌】青黑缘者天子之葆龟也【集解駰案公羊传曰龟青缘何休曰缘甲 也千岁之龟青 明乎吉凶也索隐葆与宝同史记多作此字 音耳占反正义缘以绢反】从之以牛羊之羣则所以赠诸侯也【集解郑元曰赠诸侯谓来朝将去送之以礼也正义合结上诸事皆是天子送诸侯礼也言五等诸侯朝毕反去天子赠之大路龙旗宝龟又送之以牛羊之羣也】乐也者情之不可变者也【正义此第七章明乐之情与之符达鬼神合而不可变也中有三段一明礼乐情达鬼神也二证礼乐达鬼神之事三明识礼乐之本可尊也前第六章明象象必见情故以乐主情乐变则情变故云情之不可变也】礼也者理之不可易者也【集解郑元曰理犹事也正义礼主事礼别也故云事之不可易者也】乐统同【正义解情不变也】

统领也同和合之情者也】礼别异【集解郑元曰统同同和合也辨异异尊卑之位正义解事不可易也礼别於尊卑之事也】礼乐之说贯乎人情矣【正义贯犹通也言人情莫过於同异而礼乐能统同辨异故其说理能通人情】穷本知变乐之情也【正义庾蔚之云乐能通和性分使各不失其所是穷自然之本也使人不失其所守是知变通之情也】着诚去伪礼之经也【正义着竹虑反去丘吕反着明也经常也着明诚信违去诈伪是理之常行也】礼乐见天地之情【正义见胡练反合明礼乐也礼出於地尊卑有序是见地情也乐出於天远近和合是见天之情也】达神明之德【正义达通也礼乐不失则天降甘露地出醴泉是通於神明之德也】降兴上下之神【集解郑元曰降下也兴犹出也正义乐六变天神下八变地祇出是兴降上下之神】而凝是精粗之体领父子君臣之节【集解郑元曰凝犹成也精粗谓万物大小也领犹理治也】是故大人举礼乐则天地将为昭焉【正义为于伪反昭音照此乐情章第二段明礼乐能通达鬼神之事前既云能通鬼神此明其事也大人圣人与天地合德故举礼乐为教而天地从之大明也】天地欣合陰阳相得【正义欣喜也合犹蒸也礼乐化行故天气下地气蒸合陰阳交会故相得也论体谓之天地论气谓之陰阳也】煦妪覆育万物【集解郑元曰气曰煦体曰妪】然後草木茂区萌达【集解郑元曰屈生曰区正义区音勾草木据其成体之茂区萌据其新牙故曰达达犹出也菽豆之属直出曰萌稻稷之属也】羽翮奋角觝生【集解郑元曰无?曰觝索隐牛羊有?曰角麋鹿无?曰觝正义觝加客反羽翮鸟也角觝兽也鸟兽得天地覆育煦妪故飞者则奋翮走者则生角觝也】蛰虫昭苏【集解郑元曰昭晓也凡蛰虫以发出为晓更息曰苏正义蛰虫得陰阳煦妪故皆出地上如夜得晓如死更有气也】羽者妪伏毛者孕鬻【集解郑元曰孕任也鬻生也正义伏房富反羽鸟也毛兽也二气既交万物生乳故鸟生卵妪伏之兽怀孕而生育之者也】胎生者不殯而卵生者不殯【集解郑元曰肉败曰殯殯犹裂也正义殯音读殯音呼覓反胎生兽也卵生鸟也怀任在内而死曰殯卵坼不成子曰殯令和气不殯殯也】则乐之道归焉耳【集解孙炎曰乐和陰阳故归此也正义庾蔚之云一论天地二气万物各得其所乃归於乐耳】乐者非谓黄鍾大吕弦歌干扬也【集解郑元曰扬钺也索隐干楯也扬与錫同皇侃以扬为举恐非也正义此乐情章第三段明识礼乐本者为尊识末者为卑黄鍾大吕之属故云非谓也扬举也谓举楯以为舞也】乐之末节也【正义黄鍾以下是乐之末节也】故童者舞之【正义末事易之不足贵重故使童子小儿僂奏之也】布筵席陈樽俎列笾豆以升降为礼者【正义此亦明末也用礼之本在着诚去伪安上理民不在铺筵席樽俎升降为礼之事也】礼之末节也【正义布筵以下是礼之末节也】故有司掌之【集解郑元曰言礼乐之本由人君也礼本着诚去伪乐本穷本知变正义有司典礼小官也末节事易解不为可重故小官掌其事也】乐师辩乎声诗故北面而弦【集解王肃曰但能别声诗不知其义故北面而弦郑元曰弦谓鼓琴瑟正义此更引事证乐师晓乐者辨别声诗声谓歌也言乐师虽能别歌诗并是末事故北面言坐处卑也】宗祝辩乎宗庙之礼故後尸【正义此礼事也宗祝大祝即有司之属也虽能分别正宗庙之礼然佐於尸而非为敬之主为卑故在尸後也】商祝辩乎丧礼【集解郑元曰商祝祝习商礼者商人教以敬於接神】故後主人【集解郑元曰後尸居後赞礼仪也此言知本者尊知末者卑正义商祝者殷商之神祝习商家神礼以相佐丧事故云辩丧礼其虽掌丧事而非发丧之主故在主人後言立处贱也】是故德成而上【正义上谓堂也德成谓人君礼乐德成则为君故居堂上南面尊之也】艺成而下【正义下堂下也艺成谓乐师伎艺虽成唯识礼乐之末故在堂下北面卑之也】行成而先【正义行胡

孟反先犹前也尸及丧主也行成谓尸尊而人孝故为行成】事成而後【集解郑元曰德三德也行三行也艺才伎也先谓位在上也後谓位在下也正义事为劣故为在宗商二祝也识尸及主人後也】是故先王有上有下有先有後然後可以有制於天下也【集解郑元曰言尊卑备乃可制作以为治正义故先王使上下前後尊卑分乃可制礼作乐以班於天下也如周公六年乃为礼也】乐者圣人之所乐也【正义此乐施章第三段後也误在此阙淫之後又用此章广为象其德故云圣人之所以观德也】而可以善民心其感人深其风移俗易故先王着其教焉【集解郑元曰谓立司乐以下使教国子也】夫人有血气心知之性【正义此第五章名乐言明乐归趣之事中有三段一言人心随王之乐也二明前王制正乐化民也三言邪乐不可化民也前既以施人人必应之言其归趣也此言人心随王之乐也夫人不生则已既已生必有血气心知之性也】而无哀乐喜怒之常【正义性合五常之行有喜怒哀乐之分但其发无常时随外境所触故亦无常也】应感起物而动【正义解所有四事之由也缘外物来感心心触感来起动应之故有上四事也】然後心术形焉【集解郑元曰言在所以感之也术所由也形犹见也】是故志微焦杀之音作而民思忧【集解郑元曰志微意细也吴公子札曰其细已甚正义杀音所界反又色例反思音先利反此以下皆言心乐感而应见外事也若人君丛脞情志细劣其乐音焦戚杀急不舒缓也音既局促故民应之而忧也】嘽缓慢易繁文简节之音作而民康乐【集解郑元曰简节少易也正义嘽昌单反易以鼓反乐音洛嘽绰也缓和也慢疏也繁文多也康和乐安也言人君道德绰和疏易则乐音多文采与节奏简畧而下民所以安】粗厉猛起奋末广贲之音作而民刚毅【集解王肃曰粗厉亢厉猛起发扬奋末浸疾广贲广大之也正义粗音麓贲房粉反又音坟粗略也厉严也猛刚起动也末支体也广大也贲气充也言人君若性麓严刚动而四支奋跃则乐充大民应之所以刚毅也】廉直经正庄诚之音作而民肃敬【集解孙炎曰经法也索隐经今礼本作劲正义经音劲言人君廉直劲而刚正则乐音矜严而诚信故民应之所以肃敬也】宽裕肉好顺成和动之音作而民慈爱【集解王肃曰肉好言音之洪美正义肉仁救反好火到反肉肥也谓音如肉之肥言人君宽裕肥好则乐音顺成而和动故民应之所以慈爱也】流辟邪散狄成滌滥之音作而民淫乱【集解王肃曰狄成言成而似夷狄之音也滌放荡滥僭差也正义辟疋亦反邪音斜狄音惕狄滌皆往来疾速也往来速而成故云狄成往来疾而僭滥故云滌滥也言君上流淫纵僻回邪放散则乐音有往来速疾僭差之响故民应之而淫乱也心本无此六事由随乐而起也】是故先王本之情性【正义此乐言章第二段也前言民随乐变此言先王制正乐化民也言圣人制乐必本人之性情也】稽之度数制之礼义【正义稽考也制乐又考天地度数为之如律吕应十二月八音应八风之属也】合生气之和道五常之行【集解郑元曰生气陰阳也五常五行也正义道音导行胡孟反合应也】使之阳而不散陰而不密【集解郑元曰密之言闭也正义阳谓稟阳气多人也阳气舒散人稟阳多则奢陰气闭密人稟陰多则缜密今以乐通二者之性皆使中和故阳者不散陰者不密也】刚气不怒柔气不慑【集解郑元曰慑犹恐惧也正义慑之涉反惧也性刚者好怒柔者好惧今以乐和使各得其所不至怒惧也】四畅交於中而发於外【正义四陰阳刚柔也畅通也交?也中心也今以乐调和四事通畅交互於中心而行用举动发於外不至散密怒慑者也】皆安其位而不相夺也【正义此结乐为本情性之事也闭阳开阴抑刚引柔悉使中庸故天下安其位无复相侵夺之也】然後立之学等【集解郑元曰等差也各用其材之差学之也正义前用乐陶情和畅然後乃以乐语乐舞二事教之民各随已性才等差而学之以备分也】广其

节奏省其文采【集解郑元曰广增习之也省犹审习之也文采谓节奏合也】以?德厚也【集解郑元曰?犹度也王肃曰?法也法其德厚薄也】类小大之称【集解孙炎曰作乐器大小称十二律索隐类今礼作律】比终始之序【集解郑元曰始於宫终於羽】以象事行【集解郑元曰宫为君商为臣】使亲疏贵贱长幼男女之理皆形见於乐【正义此结本人之情以下缘本而教亲疏以下之理悉章着乐功使闻者皆知而见辑睦情也】故曰乐观其深矣【正义此引古语证观感人之深矣】土敝则草木不长水烦则鱼鼈不大【正义此乐言章第三段言邪乐不可化民将言邪乐之由故此前以天地为譬此以地为譬也敝犹劳熟烦犹数搅动也土过劳熟水过挠动则草木鱼鼈不长大也】气衰则生物不育【正义此以天譬也气者天时气也气若衰微则生物不复成遂也】世乱则礼废而乐淫【正义此合譬也世谓时世乱其礼不备乐不节故流淫过度水土劳敝则草木鱼鼈不长大如时世浊乱之礼乐不可为化矣】是故其声哀而不庄乐而不安【正义乐音洛此证乐淫之事也淫乐则声哀而无庄故虽奏以自乐必致倾危非自安之道故云乐而不安若关雎乐而不淫哀而不伤则是有庄敬而安者也】慢易以犯节【正义易以?反言无庄敬慢易也无节奏故云犯节也即是哀而不庄也】流湎以忘本【正义湎音沔靡靡无穷失於终止故言忘本即乐而不安之义也】广则容奸【正义言淫慝礼乐声无节也广声缓也容舍也其声缓者则含容奸伪也】狭则思欲【集解王肃曰其音广大则容奸伪其狭者则使人思利欲也正义狭声急也其声急者则思欲攻之也】感涤荡之气而灭平和之德【正义感动也言此恶乐能动善人涤荡之善气使失其所而灭善人平和之德也】是以君子贱之也【正义君子用乐调和是故贱於动灭平和之气也】凡奸声感人而逆气应之【正义此第六章名乐象也本第八失次也明人君作乐则天地必法象应之中有五段一明淫乐正乐俱能成象二明君子所从正乐三明邪正皆有本非可假伪四证第三段有本不伪之由五明礼乐之用前有证故明其用别也今此明淫正二乐俱能成象故先言淫乐为习应人事也言君奏奸声之乐以感动人民则天地应之而生逆乱之气也】逆气成象【集解郑元曰成象谓人乐习之也】而淫乐兴焉【正义兴生也若逆气流行於世而民又习之为法故云成象既习乱为法故民之乐声生於淫佚也】正声感人而顺气应之顺气成象而和乐兴焉【正义言顺气流行民习成法故乐声亦生於和也】倡和有应【正义倡音昌尚反和胡卧反君唱之天地和之民应之故云唱和有应也】回邪曲直各归其分【正义分房问反此是有应也回邪不正也曲折也直不邪也言相应和表直影正表曲影邪各归其分也】而万物之理以类相动也【正义奸声致慝正响招顺是以天下万物之理各随君善恶以类而相动也】是故君子反情以和其志【集解郑元曰反犹本也正义此乐象章第二段也明君子从正乐也君子人君也反犹本也民下所习既从於君故君宜本情不使流宕以自安和其志也】比类以成其行【正义行胡孟反万物之理以类相动故君子比於正类以成已行也】奸声乱色不留聪明淫乐废礼不接於心术惰慢邪辟之气不设於身体【正义此以下皆反情性之类事也术道也既本情和志又比类成行故奸声乱色不留视聽淫乐秽礼不与心道相接惰慢邪僻不设置已身也声色是事故云聪明而气无形故於身为设也】使耳目鼻口心知百体皆由顺正以行其义【正义百体谓身体百节既不行奸乱已下诸事故能使诸行并由顺正以行其德美化其天下也不留聪明於奸声乱色故耳目得顺正也不用心术接淫慝礼乐故心知得顺正也不设身於邪僻故百体得顺正也不言鼻口者嗜不一也亦因戒臭味顺正也】然後发以声音文以琴瑟【正义其身已正故然後乃可制乐为化故用歌之音声内发已之德用琴瑟之响外发已

之行歌者在上此是堂上之乐故前明之也】动以干戚饰以羽旄从以箫管【正义又用干戚羽旄箫管从而播之丝竹在下此是堂下之乐故後明之也】奋至德之光动四气之和以着万物之理【集解孙炎曰奋发也至德之光天地之道也四气之和四时之化也着犹诚也】是故清明象天广大象地终始象四时周旋象风雨【集解王肃曰清明广大终始周旋皆乐之节奏容仪发动也正义历解乐所以能通天地言歌声清明是象天气也广大谓钟鼓有形质是象地形也谓奏歌周而复始如四时循环也若乐六变九变谓舞人回旋如风雨从天而下也】五【色】成文而不乱八风从律而不奸百度得数而有常【集解郑元曰五色五行也八风从律应节至也百度百刻也言日月昼夜不失正也王肃曰至乐之极能使然耳】小大相成【正义大小谓日晦小大相通以成岁也贺瑒云十二月律互为宫羽而相成也】终始相生【正义岁月终而更始也贺瑒云五行宫商迭相为终始也】倡和清浊代相为经【集解郑元曰清谓?宾至应钟也浊谓黄钟至仲吕也正义代更也经常也日月半岁阴阳更相为常也即还相为宫也】故乐行而伦清【集解郑元曰伦谓人道也正义谓上正乐之行也谓下事张本也即乐行之事也由正乐既行故人民之道清也】耳目聪明【正义不视聴奸乱故视聴聪明】血气和平【正义口鼻心知百体皆由从正故血气和平】移风易俗天下皆宁【正义既皆由从正以行其义故风移俗革天下阴阳皆安宁移是移徙之名易是改易之称也文王之国自有文王之风桀纣之邦亦有桀纣之风桀纣之後文王之风被於纣民易前之恶俗从今之善俗上行谓之风下习谓之俗】故曰乐者乐也【正义引旧语乐名广证前事也前事邪正之乐虽异并是其所乐故名曰乐也】君子乐得其道【正义虽其所乐而名为乐而人心不同故所乐有异有异而名通故皆名乐君子尧舜也道谓仁义故制乐亦仁义也】小人乐得其欲【正义小人桀纣也人欲邪淫也】以道制欲则乐而不乱【正义若君子在上小人在下君子乐用仁义以制小人之欲则天下安乐而不敢为乱也】以欲忘道则惑而不乐【集解郑元曰道谓仁义也欲谓邪淫也正义若小人在上君子在下则小人肆纵其慾忘正道而天下从化皆为乱惑不得安乐】是故君子反情以和其志【正义若以道制欲则是君子以欲忘道则为小人故君子之人本情修性以和其志不使逐欲忘道反情以至其行也】广乐以成其教【正义内本情和志而外又广於乐以成其教然後发以声音以着万物之理也】乐行而民乡方【正义君上内和志行乐教流行故民皆向君子之道即仁义制欲者故乐行而伦清以至天下安宁也】可以观德矣【集解郑元曰方犹道也正义结乐使人知上之事故观知其德也】德者性之端也【正义此乐象章第三段明邪正有本非可伪也德得理也性之端本也言人禀性皆以得理为本也】乐者德之华也【正义得理於内乐为外故云德华也】金石丝竹乐之器也【正义历解饰所须也乐为德华若莫之能用故须金石之器也】诗言其志也【正义前金石为器须用诗述申其志志在心不述不畅故用诗述之也】歌咏其声也【正义若直述其志则无醞藉之美故又长言歌咏使声音之美可得而闻之也】舞动其容也【正义若直咏歌未畅故又举手蹈足以动其形容也】三者本乎心然後乐气从之【正义三者志声容也乐气诗歌舞也君子前有三德为本乎心後乃诗歌舞可观故云然後乐气从之也】是故情深而文明【正义德为性本故曰情深也乐为德华故云文明】气盛而化神【正义歌舞蹈乐气从之故云气盛天下咸宁故曰化神也】和顺积中而英华发外唯乐不可以为伪【集解郑元曰三者本志也声也容也言无此本於内则不能为乐耳正义内外符合而无有虚假不可以为伪也】乐者心之动也【正义此乐象章第四段也明证前第三段乐本之事缘有前境可乐而心动应之故云乐者心之

动也】声者乐之象也【正义象法也乐舞无声则不彰故声为乐之法也】文采节奏乐之饰也【正义若直有声而无法度故须文采节奏声之仪饰也】君子动其本【正义本德也心之动必应德也】乐其象【正义德行必应法也】然後治其饰【正义饰文采节奏也前动心有德次行乐有法然後乃理其文饰也】是故先鼓以警戒【集解郑元曰将奏乐先擊鼓以警戒衆也正义此引武王伐纣之事证前有德後有饰也武王圣人是前有德也而用此节奏是後有饰也先鼓者为武王伐纣未战之前鸣皮鼓以警戒使军衆逆备也今作武王乐者未奏之前鸣皮鼓以勅人使预备具也是明志後有事也】三步以见方【集解郑元曰将舞必先三举足以见其舞之渐也王肃曰舞武乐三步为一节者以见伐道也正义见胡练反三步足三步也见方谓方战也武王伐纣未战之前兵士乐奋其勇出军阵前三步示勇气方将战也今作乐象之纘列毕而舞者将欲舞先举足三顿为步以表方将舞之势也】再始以着往【集解郑元曰武舞再更始以明伐纣时再往之正义着竹虑反再始谓两过为始也着明也文王受命十一年而武王除丧军至孟津观兵曰纣未可伐也乃还师是一始也至十三年更兴师伐之是再始也今舞武者前成列将欲舞而不舞是一始也去复更来是二过始明象武王再往故云再始着往也】复乱以饰归【集解郑元曰谓鸣铙而退明以整归德也正义复者伏也饰音勅复乱者纣凶乱而安复之饰归者武王伐纣胜鸣金铙慙武而归也以去奏皮鼓归奏金铙者皮文也金武也初示文德使纣自改之则不伐纣既不改因而用兵用兵既竟故鸣金铙而归示用已竟也今奏武舞初皮鼓警衆未鸣铙以归象伐纣已竟也铙铎铎也】奋疾而不拔也【集解王肃曰舞虽奋疾而不失节若树木得疾风而不拔正义谓舞形也奋迅疾速也拔倾侧也伐纣时士卒欢喜奋迅急速以尚威势猛而不倾侧也今武舞亦奋迅急而速不倾倒象】极幽而不隐【集解郑元曰极幽谓歌也正义皆谓文采节奏也】独乐其志不厌其道【集解王肃曰乐能使仁人独乐其志不厌倦其道也正义言武王诸将人各欣悦象武王有德天下之志并无厌干戈君臣之道】备举其道不私其欲【正义缘人人不厌故作乐者事事法之欲备举武王之道耳非为私情之所欲也】是以情见而义立【正义不厌武王之道其情既见则不私其欲义亦立也】乐终而德尊【正义为乐之理既终是象德之事其德亦尊显也】君子以好善小人以息过【正义乐理周足象德可尊以此教世何往而不可君子闻之则好善小人闻之则改过也】故曰生民之道乐为大焉【正义此引旧语结乐道之为大】君子曰礼乐不可以斯须去身【正义此第十章名为乐化章第十以化民故次宾牟贾成第十也其章中皆言乐陶化为善也凡四段一明人生礼乐恒与已俱也二明礼乐不可偏用各有一失也三明圣人制礼作乐之由也四明圣人制礼作乐天下服从此初段人生礼乐恒与已俱也恒故能化化故在前也引君子之言以张本也斯须俄顷也失之者死故俄顷不可去身者也】致乐以治心【集解郑元曰致犹深审也乐由中出故治心也】则易直子谅之心油然而生矣【集解王肃曰易平易直正直子谅爱信也郑元曰油新生好貌】易直子谅之心生则乐乐则安安则久久则天天则神天则不言而信神则不怒而威【集解郑元曰若善心生则寡於利欲寡於利欲则乐矣志明行成不言而见信如天也不怒而见畏如神也】致乐以治心者也【正义结所由也有威信由於深审乐以治心之故】致礼以治躬者也【正义前明乐治心今明礼检迹若深审於礼以治身则庄敬也郑元云礼自外作故治身也】治躬则庄敬庄敬则严威【集解郑元曰礼自外作故治身也正义既身庄敬俨然人望而畏之是威严也治内难见发明乐句多治外易观发明礼句少而又结也】心中斯须不和不乐而鄙诈之心入之矣【集解郑元曰谓利欲生也】外貌斯须不庄不敬而

慢易之心入之矣【集解郑元曰易轻易也】故乐也者动於内者也礼也者动於外者也乐极和礼极顺内和而外顺则民瞻其颜色而弗与争也望其容貌而民不生易慢焉德辉动乎内而民莫不承听理发乎外而民莫不承顺【集解郑元曰德辉颜色润泽也理容貌进止也孙炎曰德辉明惠也理言行也】故曰知礼乐之道举而措之天下无难矣【正义错七故反引旧证民莫不承听莫不承顺也圣王有能详审极致礼乐之道举而措之於天下天下悉从为难为之事也】乐也者动於内者也礼也者动於外者也【正义此乐化章第二段也明礼乐不可偏用各有一失既方明所失故前更言其所发外内不同也动亦感触】故礼主其谦【集解郑元曰人所倦也王肃曰自谦损也】乐主其盈【集解郑元曰人所欢也王肃曰充气志也】礼谦而进以进为文【集解郑元曰进者谓自勉强也文犹美也善也王肃曰礼自减损所以进德修业也】乐盈而反以反为文【集解郑元曰反谓自抑止也王肃曰乐充气志而反本也】礼谦而不进则销乐盈而不反则放【集解郑元曰放淫於声乐不能止也】故礼有报【集解孙炎曰报谓礼尚往来以劝进之王肃曰礼自减损而以进为报也】而乐有反【集解孙炎曰反谓曲终还更始】礼得其报则乐乐得其反则安礼之报乐之反其义一也【集解郑元曰俱起立於中不销不放】夫乐者乐也人情之所不能免也【正义此乐化章第三段也明圣人所以制乐由人乐於歌舞故圣人制乐以和乐之故云乐者乐也但懽乐是人所贪贪不能自止故云人情也】乐必发诸声音形於动静人道也【集解郑元曰人道人之所为也】声音动静性术之变尽於此矣【集解郑元曰不可过】故人不能无乐乐不能无形【集解郑元曰形声音动静也】形而不为道不能无乱先王恶其乱故制雅颂之声以道之使其声足以乐而不流使其文足以纶而不息【集解郑元曰文篇辞也息销也】使其曲直繁省廉肉节奏【集解郑元曰曲直歌之曲折繁省廉肉声之洪杀也】足以感动人之善心而已矣不使放心邪气得接焉是先王立乐之方也【集解郑元曰方道也】是故乐在宗庙之中君臣上下同听之则莫不和敬在族长乡里之中长幼同听之则莫不和顺在闺门之内父子兄弟同听之则莫不和亲故乐者审一以定和比物以饰节节合以成文【集解郑元曰审一审其人声也比物谓杂金革土匏之属以成文五声八音克谐相应和也】所以合和父子君臣附亲万民也是先王立乐之方也故听其雅颂之声志意得广焉【正义前云先王制之声音形於动静故此证其事也此是发於声音也民听正声得益盛德之美志意得广大也】执其干戚习其俯仰诘信容貌得庄焉行其缀兆【集解郑元曰缀表也所以表行列也】要其节奏【集解郑元曰要犹会也】行列得正焉进退得齐焉故乐者天地之齐中和之纪【集解郑元曰纪总要之名】人情之所不能免也夫乐者先王之所以饰喜也【正义此乐化章第四段也明乐惟圣人在上者制作天下乃服也若内有喜则外歌舞以饰之故云王以乐饰喜也】军旅鉞钺者先王之所以饰怒也故先王之喜怒皆得其齐矣喜则天下和之怒则暴乱者畏之先王之道礼乐可谓盛矣魏文侯问於子夏曰【正义此章第八名文侯问也文侯故晋大夫毕万之後见子夏而问於乐也】吾端冕而听古乐【集解郑元曰端玄衣也古乐先王之正乐正义此文侯问事也端冕谓玄冕凡冕服其制正幅袂二尺二寸故称端也着玄冕衣与玄端同色故曰端冕听古乐也此当是庙中听乐玄冕祭服也】则唯恐卧听郑卫之音则不知倦敢问古乐之如彼何也新乐之如此何也子夏荅曰今夫古乐进旅而退旅【集解郑元曰旅犹俱也俱进俱退言其齐一也正义子夏之荅凡有三初则举古礼次新乐以酌问意又因更别说以诱引文侯欲使更问也此是荅述古乐之情旅衆也】和正以广【集解郑元曰无奸声也】弦匏笙簧合守拊鼓【集解郑元曰合皆也皆衆皆待

擊鼓乃作也拊者以韦为表装之以糠也正义拊音数武反拊一名相亦奏古笙乐也弦琴也匏瓠属也四十六簧笙十九至十三簧也簧施於匏笙之管端者也合会也守待也拊者皮为之以糠实如革囊也用手抚之鼓也言奏弦匏笙簧之时若欲令堂上作乐则抚拊堂上乐工闻抚拊乃弦歌也若欲令堂下作乐则擊鼓堂下乐工闻鼓乃吹管播乐也言弦匏笙簧皆待拊为节故言会守拊鼓也】始奏以文止乱以武【集解郑元曰文谓鼓武谓金也】治乱以相讯疾以雅【集解孙炎曰整其乱行节之以相赴敌迅疾趨之以雅郑元曰相即拊也亦以节乐雅亦乐器名状如漆箛中有椎】君子於是语於是道古修身及家平均天下此古乐之发也今夫新乐进俯退俯【集解郑元曰俯犹曲也言不齐一也正义此第二述杂乐也俯曲也新乐行列不齐而进退曲也】奸声以淫溺而不止【集解王肃曰奸声淫使人溺而不能自止】及优侏儒【集解王肃曰俳优短人也】獫狁子女不知父子【集解郑元曰獫狁猴也言舞者如猕猴戏乱男女尊卑也】乐终不可以语不可以道古此新乐之发也【正义此结新乐荅也】今君之所问者乐也所好者音也【正义此第三别诱引文侯更问前故说此句言文侯所问乃是乐而好铿锵之音非律吕克谐之正乐也】夫乐之与音相近而不同【集解郑元曰铿锵之类皆为音应律乃为乐】文侯曰敢问如何【集解郑元曰欲知音乐异意】子夏答曰夫古者天地顺而四时当【正义当丁浪反此荅古乐之由也天地?四时当圣人在上故也】民有德而五谷昌疾疢不作而无祲祥此之谓大当【集解郑元曰当谓不失其所也】然後圣人作为父子君臣以为之纪纲纪纲既正天下大定天下大定然後正六律和五声弦歌诗颂此之谓德音德音之谓乐诗曰莫其德音其德克明克明克类克长克君王此大邦克顺克俾【集解郑元曰德正应和曰莫照临四方曰明勤施无私曰类教诲不倦曰长庆赏刑威曰君慈和徧服曰顺俾当作比择善而?之曰比】俾於文王其德靡悔既受帝社施于孙子此之谓也【集解郑元曰施延也言文王之德皆能如此故受天福延及後世也】今君之所好者其溺音与【集解郑元曰言无文王之德则所好非乐】文侯曰敢问溺音者何?出也子夏荅曰郑音好滥淫志【集解郑元曰滥滥窃奸声也正义子夏历述四国之所由以荅文侯也】宋音燕女溺志【集解王肃曰燕欢悦】卫音趣数烦志【集解孙炎曰趣数音促速而数变化郑元曰烦劳也】齐音骜辟骄志四者皆淫於色而害於德是以祭祀不用也【集解郑元曰言四国出此溺音】诗曰肃雍和鸣先祖是聽夫肃肃敬也雍雍和也夫敬以和何事不行【集解郑元曰古者乐敬且和故无事而不用溺音无所施】为人君者谨其所好恶而已矣君好之则臣为之上行之则民?之诗曰诱民孔易此之谓也【集解郑元曰诱进也孔甚也言民?君之所好恶进之於善无难也】然後圣人作为鞀鼓柷敔圉箎【集解郑元曰柷敔谓祝敌正义圉以土为之大如鷩子形似锤吹之为声箎以竹为之六孔一孔上出名翹横吹之今之横笛是也诗云伯氏吹圉仲氏吹箎是也】此六者德音之音也【集解郑元曰六者为本以其声质】然後鍾磬竽瑟以和之干戚旄狄以舞之此所以祭先王之庙也所以献醑醕酢也所以官序贵贱各得其宜也【集解郑元曰官序贵贱谓尊卑乐器列数有差】此所以示後世有尊卑长幼序也钟声铿铿以立号【集解郑元曰号令所以警衆也王肃曰鍾声高故以之立号也】号以立横【集解郑元曰横充也谓气作充满】横以立武君子聽钟声则思武臣石声磬【集解王肃曰声果劲】磬以立别【集解郑元曰谓分明於节义】别以致死君子聽磬声则思死封疆之臣丝声哀哀以立廉【集解郑元曰廉廉隅】廉以立志君子聽琴瑟之声则思志义之臣竹声滥【集解王肃曰滥会诸音】滥以立会会以聚衆君子聽竽笙箫管之声则思畜聚之臣鼓鼙之声謹謹以立动动以进衆君子聽鼓鼙之

声则思将帅之臣【集解郑元曰闻讙器则人意动作也】君子之聽音非聽其鏗枪而已也彼亦有所合之也【集解郑元曰以声合已意】宾牟贾侍坐於孔子【正义此第九章名宾牟贾问者盖孔子之问本为牟贾而设故云牟贾问也】孔子与之言及乐曰夫武之备戒之已久何也【集解郑元曰武周舞也备戒擊鼓警衆也义此孔子问牟贾及乐之事凡问有五此其一也备戒者谓将欲作乐前鸣鼓警戒使乐人各备容仪言初欲奏乐时既已备戒使有节奏故今武舞者备戒已久疑其迟久故问之也】答曰病不得其衆也【集解郑元曰病犹忧也以不得衆心为忧忧其难正义牟贾答也亦有五而二答是三答非今答是也言武王伐纣时忧不得衆心故前鸣鼓戒衆久之乃出战也故今舞者久久乃出象武王忧不得衆心故也】永叹之淫液之何也【集解郑元曰永叹淫液歌迟之也正义此第二问也】答曰恐不逮事也【集解郑元曰逮及也事戎事也正义此答亦是也言衆士望武王欲伐速恒恐不及戎事之机故有永叹淫液之声】发扬蹈厉之已蚤何也【集解王肃曰厉疾也备戒虽久至其发作又疾也正义第三问也发初也扬举袂也蹈顿足蹋地厉顔色勃然如战色也问乐舞何意发初扬袂又蹈顿足蹋地勃然作色何忽如此也】答曰及时事也【集解郑元曰时至武事当施也王肃曰欲令之事各及时正义此答非也牟贾意言发扬蹈厉象武王一人意欲及时之事故早为此者也郑亦随贾意注之也】武坐致右宪左何也【集解王肃曰右膝至地左膝去地也正义宪音轩第四问也坐跪也致至也轩起也问舞人何忽有时而跪也】答曰非武坐也【集解郑元曰言武之事无坐也正义此答亦非也牟贾言武奋之士不应有坐也】声淫及商何也【集解王肃曰声深淫贪商正义第五问也】答曰非武音也【集解王肃曰言武王不获已为天下除残非贪商也正义此答又非也】子曰若非武音则何音也【正义孔子评其答武音不贪但不知其实解理空言其非反问也】答曰有司失其传也【集解郑元曰有司典乐者传犹说也正义传直缘反贾答言武王非有贪是有司传之谬妄故有此矣】如非有司失其传则武王之志荒矣【集解郑元曰荒老耄也言典乐者失其说时人妄说也正义贾又云假令非传者谬妄则是武王末年年志荒耄之时故有贪商之声也】子曰唯丘之闻诸苾弘亦若吾子之言是也【集解郑元曰苾弘周大夫索隐大戴礼云孔子适周访礼於老?学乐於苾弘是也正义苾音直良反吾子牟贾也言我闻苾弘所言亦如贾今所言之也】宾牟贾起免席而请曰【正义免犹避也前所答四事五不被叩问今疑不知前答之是非故起所疑而问也】夫武之备戒之已久则既闻命矣【集解孙炎曰闻命谓言是】敢问迟之迟而又久何也【集解郑元曰迟之迟谓久立於綴】子曰居吾语汝【集解郑元曰居犹安坐也】夫乐者象成者也【集解王肃曰象成功而为乐】总干而山立【集解王肃曰总持干楯山立不动】武王之事也【正义此下明应象成之事也答所以迟也象武王伐纣持楯立以待诸侯至故云武王之事也】发扬蹈厉太公之志也【集解王肃曰志在鹰扬也正义答迟久已竟而牟贾前答发扬蹈厉以为象武王欲及时事非也言此是太公志耳太公相武王伐纣志愿武王之速得自奋其威勇以助之也】武乱皆坐周召之治也【集解王肃曰武乱武之治也皆坐以象安民无事也正义贾前答武坐非也因又为之说言当伐纣时士卒行伍有乱者周召二公以治正之使其跪敬致右轩左以待处分故今八佾象鬯时之乱挨相正之则俱跪跪乃更起以作行列象周召之事耳非武舞有坐之也】且夫武始而北出【集解郑元曰始奏象观兵盟津时也正义说五事既竟而迟久之意未周故更广其象成之事非答前五事故云且夫也始而北出者谓奏乐象武王观兵孟津之时也王居镐在南纣居朝歌在河北故舞者南来时楯向北尚象之也】再成而灭商【集解郑元曰成犹奏也再

奏象克殷时正义再成谓儻者再来奏时也儻者初始前一向北而不儻象武王前观孟津不伐而反也至再往而向北遂奏成击刺】三成而南【集解王肃曰诛纣已而南正义儻者第三奏往而转向南象武王胜纣向南还镐之时也】四成而南国是疆【集解王肃曰有南国以为疆界正义儻者第四奏象周太平时南方荆蛮并来归服为周之疆界】五成而分陕周公左召公右【集解王肃曰分陕东西而治正义儻者至第五奏而东西中分之为左右二部象周太平後周公召公分职为左右二伯之时】六成复缀以崇天子【集解郑元曰六奏象兵还振旅也复缀反位止也王肃曰以象尊崇天子】夹振之而四伐盛威於中国也【集解王肃曰振威武也四伐者伐四方与纣同恶者一撃一刺为一伐也正义夹音古合反夹振谓武王与大将军夹军而奋铎振动士卒也言当奏武乐时亦两人执铎夹之为节之象也凡四伐到一止当伐纣时士卒皆四伐一止也故牧誓云今日之事不过四伐五伐是也故作武乐舞者亦以干戈伐之象也】分夹而进【集解徐广曰一作迟】事蚤济也【集解王肃曰分部而并进者欲事早成】久立於缀以待诸侯之至也【集解郑元曰象武王伐纣待诸侯也】且夫女独未闻牧野之语乎【集解郑元曰欲语以作武乐之意正义今卫州所理汲县即牧野之地也更欲语牟贾奏武乐迟久之意其语即下所陈是也】武王克殷反商【集解郑元曰反当为及谓至纣都也】未及下车【正义车戎车也军法一车三人乘之步卒七十二牧誓云戎车三百两则二万二千五百人也】而封黄帝之後於蓟封帝尧之後於祝【正义地理志云平原郡祝阿县也蓟音计幽州县是也】封帝舜之後於陈【正义陈州宛丘县故陈城是也】下车而封夏后氏之後於?【正义汴州雍丘县故?国】封殷之後於宋卦王子比干之墓【集解郑元曰积土为封封比干之墓崇贤也】释箕子之囚使之行商容而复其位【集解徐广曰周本纪曰命召公释箕子之囚又曰表商容之间】庶民弛政庶士倍禄【集解郑元曰弛政去纣时苛役倍禄复其纣时薄者】济河而西【正义济渡也河黄河也武王伐纣事毕?怀州河阳县南渡河至洛州洛城而西归镐京也】马散华山之阳【集解郑元曰散犹放】而弗复乘牛散桃林之野【集解徐广曰在弘农县今日桃丘】而不复服【正义示无复用服亦乘也桃林在华山之旁此二处并是牛马放生地初伐就此取之今事竟归之前处故尚书武成篇序云武王伐殷往伐归兽是也】车甲弢【集解徐广曰音韬】而藏之府库而弗复用倒载干戈苞之以虎皮【集解郑元曰包干戈以虎皮明能以武服兵也】将率之士使为诸侯名之曰建橐【集解王肃曰所以能橐弓矢而不用者将率之士力也故建以为诸侯谓之建橐也】然後天下知武王之不用兵也散军而郊射【集解郑元曰郊射为射宫於郊也王肃曰郊有学宫可以习礼也】左射狸首右射驺虞而贯革之射息也【集解郑元曰左东学右西学也狸首驺虞所歌为节也贯革射穿甲革也】裨冕搢笏而虎贲之士税劔也【集解郑元曰裨冕衣裨衣而冠冕也裨衣衮之属也搢插也】祀乎明堂而民知孝【集解郑元曰文王之庙为明堂】朝覲然後诸侯知所以臣耕籍【集解郑元曰耕藉藉田也】然後诸侯知所以敬五者天下之大教也食三老五更於太学【集解郑元曰老更互言之耳皆老人更知三德五事者也周名太学曰东胶】天子袒而割牲执酱而馈执爵而酳冕而总干【集解郑元曰冕而总干在舞位】所以教诸侯之悌也若此则周道四达礼乐交通则夫武之迟久不亦宜乎【集解郑元曰言武迟久为重礼乐也】子贡见师乙而问焉【集解郑元曰师乐官也乙名也】曰赐闻声歌各有宜也【集解郑元曰气顺性】如赐者宜何歌也师乙曰乙贱工也【集解郑元曰乐人称工也】何足以问所宜请诵其所闻而吾子自执焉【集解郑元曰执犹处也】宽而静柔而正者宜歌颂广大而静疏达而信者宜

歌大雅恭俭而好礼者宜歌小雅正直清廉而谦者宜歌国风肆直而慈爱者【集解郑元曰肆正也】宜歌商温良而能断者宜歌齐夫歌者直已而陈德【集解郑元曰各因其德歌所宜】动已而天地应焉四时和焉星辰理焉万物育焉【集解郑元曰育生也】故商者五帝之遗声也商人志之故谓之商齐者三代之遗声也齐人志之故谓之齐明乎商之诗者临事而屡断【集解郑元曰以其肆直】明乎齐之诗者见利而让也【集解郑元曰以其温良而能断也】临事而屡断勇也见利而让义也有勇有义非歌孰能保此故歌者上如抗下如队曲如折止如橐木居中矩句中钩累累乎殷如贯珠【集解郑元曰言歌声之着动人心之审而有此声】故歌之为言也长言之也【集解郑元曰长言引其声】说之故言之言之不足故长言之长言之不足故嗟叹之嗟叹之不足故不知手之舞之足之蹈之【集解郑元曰手舞足蹈懽之至】子贡问乐【正义结此前事悉是答子贡问之事其乐记者公孙尼子次撰也为乐记通天地贯人情辨政治故细解之以前刘向别录篇次与郑目录同而乐记篇次又不依郑目今此又篇次颠倒者以褚先生升降故今乱也今逐旧次第随段记之使後畧知也以後文出褚意耳】凡音由於人心天之与人有以相通如景之象形响之应声故为善者天报之以福为恶者天与之殃其自然者也故舜弹五弦之琴歌南风之诗而天下治纣为朝歌北鄙之音身死国亡舜之道何弘也纣之道何隘也夫南风之诗者生长之音也舜乐好之乐与天地同意得万国之心故天下治也夫朝歌者不时也北者败也鄙者陋也纣乐好之与万国殊心诸侯不附百姓不亲天下畔之故身死国亡而卫灵公之时【正义时卫都楚丘楚故城在宋州楚丘县北三十里卫之楚丘邑也】将之晋至於濮水之上舍【正义括地志云在曹州离狐县界即师延投处也】夜半时闻鼓琴声问左右皆对曰不闻乃召师涓曰吾闻鼓琴音问左右皆不闻其状似鬼神为我听而写之师涓曰诺因端坐援琴听而写之明日曰臣得之矣然未习也请宿习之灵公曰可因复宿明日报曰习矣即去之晋见晋平公平公置酒於施惠之台【正义一本庆祁之堂左传云虎祁之宫杜预云虎祁地名也在绛州西四十里临汾水也】酒酣灵公曰今者来闻新声请奏之平公曰可即令师涓坐师旷旁援琴鼓之未终师旷抚而止之曰此亡国之声也不可听平公曰何道出师旷曰师延所作也与纣为靡靡之乐武王伐纣师延东走自投濮水之中故闻此声必於濮水之上先闻此声者国削平公曰寡人所好者音也愿遂闻之师涓鼓而终之平公曰音无此最悲乎师旷曰有平公曰可得闻乎师旷曰君德义薄不可以听之平公曰寡人所好者音也愿闻之师旷不得已援琴而鼓之一奏之有元鹤二八集乎廊门再奏之延颈而鸣舒翼而舞平公大喜起而为师旷寿反坐问曰音无此最悲乎师旷曰有昔者黄帝以大合鬼神今君德义薄不足以听之听之将败平公曰寡人老矣所好者音也愿遂闻之师旷不得已援琴而鼓之一奏之有白云?西北起再奏之大风至而雨随之飞廊瓦左右皆奔走平公恐惧伏於廊屋之间晋国大旱赤地三年听者或吉或凶夫乐不可妄兴也太史公曰夫上古明王举乐者非以娱心自乐快意恣欲将欲为治也正教者皆始於音音正而行正故音乐者所以动荡血脉通流精神而和正心也故宫动脾而和正圣商动肺而和正义角动肝而和正仁徵动心而和正礼羽动肾而和正智故乐所以内辅正心而外异贵贱也上以事宗庙下以变化黎庶也琴长八尺一寸正度也弦大者为宫而居中央君也商张右傍其余大小相次不失其次序则君臣之位正矣故闻宫音使人温舒而广大闻商音使人方正而好义闻角音使人恻隐而爱人闻徵音使人乐善而好施闻羽音使人整齐而好礼夫礼由外入乐自内出故君子不可须臾离礼须臾离礼则暴慢之行穷外不可须臾离乐须臾离乐则奸邪之行穷内故乐音者君子之所养义也夫古者天子诸侯

听钟声未尝离於庭卿大夫聽琴瑟之音未尝离於前所以养行义而防淫佚也夫淫佚生於无礼故圣王使人耳闻雅颂之音目覩威仪之礼足行恭敬之容口言仁义之道故君子终日言而邪辟无由入也

【索隐述赞曰乐之所兴在乎防欲陶心畅志舞手蹈足舜曰箫韶融称属续审音知政观风变俗端如贯珠清同叩玉洋洋盈耳咸英余曲】

史记卷二十四

史记卷二十四考证

乐书○【臣照】按乐书谓楮先生补者亦出张守节正义今考太史公曰以下叙虞书以至秦二世见古乐之失传自高祖过沛至天马来志汉乐之梗槩後载汲黯正直之言公孙谿谀之语以结之以明汉乐之所以不兴当马迁之时所应作之乐书如是止矣然则乐书未尝不竟也後人复将乐记全写入公孙弘语之下又取晋平公事不经之谈以附益之而马迁之义始晦矣今别而出之

乐者音之所由生也正义合音乃成乐是乐由音而生诸乐生起所由之生也○文似有误宜云诸乐生起之所由也

其声麤以厉正义心随怒而发扬故无辒轳○今礼记疏作辄碍又以发扬无辄碍为喜心所感

是故先王慎所以感之正义六事随见而动非关本性先王圣人在上制正礼以防之○先王二字衍

凡音者生於人心者也正义自人心生而静至王道备矣为一重○心字衍宜云自人生而静

则是物至而人化物也集解郑元曰随物变化○今郑注礼记无此语

和故百物不失正义乐与天地同和能生成性万物○性字衍

欣喜驩爱乐之容也正义贺瑒云八音克谐使物欣喜○礼记疏引贺瑒云使物欢欣

干戚之舞非备乐也正义干戚周武也○周武疑武舞二字之误

夔始作乐以赏诸侯集解郑元曰夔欲舜与天下之君共此乐○今郑注无此语

教者民之寒暑也教不时则伤世事者民之风雨也事不节则无功○卫湜礼记集说引张守

节曰乐以气和民心如天地寒暑以气生化故谓乐为民之寒暑也风雨之事谓之礼也礼以形教故曰事也天地之以风雨奋润万物犹以礼安治万民故谓礼为民之风雨也与今本史记正义不同

礼乐见天地之情○监本作顺天地之诚【臣照】按乐记作礼乐见天地之情正义云见胡练反又云见地之情见天之情可知古本亦作见天地之情也今依乐记改正

胎生者不殯集解郑元曰肉败曰殯○郑注乐记曰内败曰殯陆氏释文云内乃对反或作骨肉之肉者误则唐时本亦有作肉者矣然究是内字

乐者非谓黄钟大吕弦歌干扬也集解郑元曰扬钺也○今郑注乐记无此语

然後可以有制於天下也集解郑元曰言尊卑备乃可制作以为治○郑注乐记作可以为治法

而鄙诈之心入之矣集解郑元曰谓利欲生也○郑注乐记云鄙诈是贪多利伪生

彼亦有所合之也集解郑元曰以声合已意○郑注乐记云以声合成已之志

肆直而慈爱者集解郑元曰肆正也○今郑注乐记无此语

累累乎殷如贯珠集解郑元曰言歌声之着动人心之审而有此声○郑注乐记作如有此事

而卫灵公之时正义时卫都楚邱楚故城在宋州楚邱县北三十里○楚邱下楚字衍

史记卷二十四考证

卷二十五

钦定四库全书

史记卷二十五

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

律书第三

王者制事立法物度轨则壹禀於六律【索隐案律有十二阳六为律黄钟太簇姑洗蕤宾夷则无射陰六为吕大吕夹钟中吕林钟南吕应钟是也名曰律者释名云律述也所以述阳气也律历志云吕旅阳宣气也案古律用竹又用玉汉末以铜为之吕亦称闲故有六律六闲之说元闲大吕二闲夹钟是也汉京房知五音六律之数十二律之变至六十犹八卦之变为六十四卦也故中吕上生执始执始下生去灭上下相生终於南事而六十律毕】六律为万事根本焉【索隐律历志云夫推历生律制器规圆矩方权重衡平準?嘉量探赜索隐钩深致远莫不用焉是万事之根本也】其於兵械尤所重【索隐易称师出以律是於兵械尤重也正义内成曰器外成曰械械谓弓矢殳矛戈戟刘伯庄云吹律审声听乐知政师旷审歌知晋楚之强弱故云兵家尤所重】故云望敌知吉凶【索隐凡敌阵之上皆有气色气强则声强声强则其衆劲律者所以通气故知吉凶也正义凡两军相敌上皆有云气及日晕天官书云晕等力钧厚长大有胜薄短小无胜故望云气知胜负强弱引旧语乃曰故云】闻声效胜负【正义周礼云太史执同律以听军声而诏其吉凶左传云师旷知南风之不竞即其类】百王不易之道也武王伐纣吹律听声【索隐其事当有所出今则未详】推孟春以至于季冬杀气相并【正义人君暴虐酷急即常寒应寒生北方乃杀气也武王伐纣吹律从春至冬杀气相并律亦应之故洪范咎徵云急常寒苦是也】而音尚宫【正义兵书云夫战大师吹律合商则战胜军士强角则军扰多变失士心宫则军和士卒同心徵则将急数怒军士劳羽则兵弱少威焉】同声相从物之自然何足怪哉兵者圣人所以讨强暴平乱世夷险阻救危殆自含血戴角之兽见犯则校而况於人怀好恶喜怒之气喜则爱心生怒则毒螫加【正义螫音释】情性之理也昔黄帝有涿鹿之战以定火灾【集解文颖曰神农子孙暴虐黄帝伐之故以定火灾】颛顼有共工之陈以平水害【集解文颖曰共工主水官也少昊氏衰秉政作虐故颛顼伐之本主水官因为水行也】成汤有南巢之伐以殄夏乱【正义南巢今庐州巢县

是也淮南子云汤伐桀放之历山与末喜同舟浮江奔南巢之山而死按巢即山名古巢伯之国云南巢者在中国之南也】递兴递废胜者用事所受於天也自是之後名士迭兴晋用咎犯【正义狐偃也咎季也又云胥臣也】而齐用王子【索隐徐广云子成父】吴用孙武申明军约赏罚必信卒伯诸侯兼列邦土虽不及三代之诰誓然身宠君尊当世显扬可不谓荣焉岂与世儒闇於大较【索隐大较大法也淳于髡曰车不较则不胜其任是也较音角】不权轻重猥云德化不当用兵大至窘辱失守【索隐徐广云如宋襄公是也】小乃侵犯削弱遂执不移等哉故教咎不可废於家刑罚不可捐於国诛伐不可偃於天下用之有巧拙行之有逆顺耳夏桀殷纣手搏豺狼足追四马勇非微也百战克胜诸侯慑服权非轻也秦二世宿军无用之地【索隐谓常拥兵郊野之外也正义谓三十万备北阙五十万守五岭也云连兵於边陲即是宿军无用之地也】连兵於边陲力非弱也结怨匈奴絪祸於越【正义絪朝卦反顾野王云絪者所碍】势非寡也及其威尽势极间巷之人为敌国咎生穷武之不知足甘得之心不息也高祖有天下三边外畔大国之王虽称蕃辅臣节未尽会高祖厌苦军事亦有萧张之谋故偃武一休息羈縻不备历至孝文即位将军陈武等议曰南越朝鲜【正义潮仙二音高骊平壤城本汉乐浪郡王险城即古朝鲜地时朝鲜王满据之也】自全秦时内属为臣子後且拥兵阻阨选蠕观望【集解阨音戾卖反选音思究反蠕音而究反索隐蠕音软选蠕谓动身欲有进取之状也】高祖时天下新定人民小安未可复兴兵今陛下仁惠抚百姓恩泽加海内宜及士民乐用征讨逆党以一封疆孝文曰朕能任衣冠【正义朕音而禁反】念不到此会吕氏之乱功臣宗室共不羞耻误居正位常战战栗栗恐事之不终且兵凶器虽克所愿动亦耗病谓百姓远方何又先帝知劳民不可烦故不以为意朕岂自谓能今匈奴内侵军吏无功边民父子荷兵日久【正义荷音何我反】朕常为动心伤痛无日忘之今未能销距愿且坚边设 结和通使休宁北陲为功多矣且无议军故百姓无内外之繇得息肩於田亩天下殷富粟至十余钱鸣鸡吠狗烟火万里可谓和乐者乎

太史公曰文帝时会天下新去汤火【索隐谓秦乱楚汉交兵之时如遗坠汤火即书云民坠涂炭也】人民乐业因其欲然能不扰乱故百姓遂安自年六七十翁亦未尝至市井游敖嬉戏如小儿状孔子所谓有德君子者邪【索隐论语曰善人为邦百年亦可以胜残去杀也】书曰七正二十八舍【索隐七正者日月五星也七者可以正天时又孔安国曰七正日月五星各异政二十八舍即二十八宿之所舍也舍止也宿次也言日月五星运行或舍於二十八次之分也】律历天所以通五行八正之气【索隐八正谓八节之气以应八方之风】天所以成熟万物也舍者日月所舍舍者舒气也不周风居西北主杀生东壁居不周风东主辟生气【索隐辟音辟】而东之至於营室【索隐定星也定中而可作室故曰营室正义天官书云营室为清庙曰离宫阁道是有宫室象此言主营胎阳气而产之二说不同】营室者主营胎【集解徐广曰一作含】阳气而产之东至于危危坼也【索隐坼音鬼毁反】言阳气之危坼故曰危十月也律中应钟【正义应乙证反白虎通云应者应也言万物应阳而动下藏也汉初依秦以十月为岁首故起应钟】应钟者阳气之应不用事也其於十二子为亥亥者该也【索隐律历志云该阨於亥正义孟康云阨藏塞也阴杂阳气藏塞为万物作种也】言阳气藏於下故该也广莫风居北方广莫者言阳气在下陰莫阳广大也故曰广莫东至於虚虚者能实能虚言阳气冬则宛藏於虚【正义宛音蕴】日冬至则一陰下藏一阳上舒故曰虚东至于须女【索隐嫫女名也】言万物变动其所陰阳气未相离尚相如胥也故曰须女

十一月也律中黄钟【正义白虎通云黄中和之气言阳气於黄泉之下动养万物也】黄钟者阳气踵黄泉而出也其於十二子为子子者滋也滋者言万物滋於下也其於十母为壬癸壬之为言任也言阳气任养万物於下也癸之为言揆也言万物可揆度故曰癸东至牵牛牵牛者言阳气牵引万物出之也牛者冒也言地虽冻能冒而生也牛者耕植种万物也东至於建星建星者建诸生也十二月律中大吕大吕者其於十二子为丑丑者纽也言阳气在上未降万物厄纽未敢出条风居东北主出万物条之言条治万物而出之故曰条风南至於箕箕者言万物根棋【集解徐广曰一作横】故曰箕正月也律中泰簇【正义簇音千豆反白虎通云泰者大也簇者凑也言万物始大凑地而出之也】泰簇者言万物簇生也故曰泰簇其於十二子为寅【索隐音以真反】寅言万物始生蟺然也【索隐蟺音引又音慎】故曰寅南至於尾言万物始生如尾也南至於心言万物始生有华心也【集解徐广曰一作茎】南至於房房者言万物门户也至於门则出矣明庶风居东方明庶者明衆物尽出也二月也律中夹钟【正义白虎通云夹孚甲也言万物孚甲种类分也】夹钟者言陰阳相夹厠也其於十二子为卯卯之为言茂也言万物茂也其於十母为甲乙甲者言万物剖符甲而出也【集解符音孚索隐符甲犹孚甲也】乙者言万物生轧轧也南至于氐【正义氐音丁礼反】氐者言万物皆至也南至於亢亢者言万物亢见也南至于角角者言万物皆有枝格如角也三月也律中姑洗【正义姑音沽洗音先典反白虎通云姑者故也洗者鲜也言万物去故就新莫不鲜明也】姑洗者言万物洗生其於十二子为辰辰者言万物之蜃也【集解蜃音之慎反索隐蜃音振或作娠同音律历志云振羨於辰】清明风居东南维主风吹万物而西之軫軫者言万物益大而軫軫然西至於翼翼者言万物皆有羽翼也四月也律中中吕【正义中音仲白虎通云言阳气将极中充大也故复中言之也】中吕者言万物尽旅而西行也其於十二子为己己者言阳气之已尽也西至于七星七星者阳数成於七故曰七星西至于张张者言万物皆张也西至于注【索隐注音丁救反注殊也天官书云柳为鸟殊则注柳星也】注者言万物之始衰阳气下注故曰注五月也律中蕤宾【正义蕤音仁佳反白虎通云蕤者下也宾者敬也言阳气上极陰气始宾敬之也】蕤宾者言陰气幼少故曰蕤痿阳不用事故曰宾景风居南方景者言阳气道竟故曰景风其於十二子为午午者陰阳交故曰午【索隐律历志云罟布於午也】其於十母为丙丁丙者言阳道着明故曰丙丁者言万物之丁壮也故曰丁西至于弧弧者言万物之吴落【集解徐广曰吴一作柔】且就死也西至于狼狼者言万物可度量断万物故曰狼凉风居西南维主地地者沈夺万物气也【正义沈一作洗】六月也律中林钟【正义白虎通云林者衆也言万物成熟种类多也】林钟者言万物就死气林林然其於十二子为未未者言万物皆成有滋味也【索隐律历志昧蓂於未其意殊】北至於罚罚者言万物气夺可伐也北至于参【正义音所林反】参言万物可参也故曰参七月也律中夷则【正义白虎通云夷伤也则法也言万物始伤被刑法也】夷则言陰【集解徐广曰一作阳】气之贼【集解徐广曰一作则】万物也其於十二子为申申者言陰用事申贼万物【集解徐广曰一作则索隐律历志物坚於申也】故曰申北至于浊【索隐按尔雅云浊谓之毕】浊者触也言万物皆触死也故曰浊北至于留【索隐留即昴也毛传亦以留为昴】留者言阳气之稽留也故曰留八月也律中南吕【正义白虎通云南任也言阳气尚任包大生荠麦也】南吕者言阳气之旅入藏也其於十二子为酉酉者万物之老也【索隐律历志留熟於酉也】故曰酉闾阖风居西方闾者倡也阖者藏也言阳气道万物闾黄泉也其於十母为庚辛庚者言陰气庚万物故曰庚辛者言万物之辛生故曰辛北至于胃胃

者言阳气就藏皆胃胃也北至于娄娄者呼万物且内之也北至于奎【集解徐广曰一作?索隐天官书奎为沟渎娄为聚衆胃为天仓今此说异及六律十母又与汉书不同各是异家之说也】奎者主毒螫杀万物也奎而藏之九月也律中无射【正义音亦白虎通云射终也言万物随阳而终当复随陰而起无有终已此说六吕十干十二支与汉书不同】无射者陰气盛用事阳气无余也故曰无射其於十二子为戌戌者言万物尽灭故曰戌【索隐律历志毕入於戌也】

律数

九九八十一以为宫

三分去一五十四以为徵

三分益一七十二以为商

三分去一四十八以为羽

三分益一六十四以为角

黄钟长八寸十分一宫【索隐案上文云律九九八十一故云长八寸十分一而汉书云黄钟长九寸者九分之寸也刘歆郑元等皆以长九寸即十分之寸不依此法也云宫者黄钟为律之首宫为五音之长十一月以黄钟为宫则声得其正旧本多作七分盖误也】

大吕长七寸五分三分一【索隐谓十一月以黄钟为宫五行相次大吕为商者大吕所以助阳宣化】

太簇长七寸七分二角

夹钟长六寸一分三分一

姑洗长六寸七分四羽【索隐亦以金生水故也】

仲吕长五寸九分三分二徵

蕤宾长五寸六分三分一

林钟长五寸七分四角【索隐水生木故以为角不用蕤宾者以陰气起阳不用事故去也】

夷则长五寸四分三分二商

南吕长四寸七分八微

无射长四寸四分三分二

应钟长四寸二分三分二羽

生钟分【索隐此算术生钟律之法也正义分音扶问反】

子一分【索隐自此已下十一辰皆以三乘之为黄钟积实之数也】丑三分二【索隐案子律黄钟长九寸林钟为衡衡长六寸以九比六三分少一故云丑三分二即是黄钟三分去一下生林钟数也】寅九分八【索隐十二律以黄钟为主黄钟长九寸太簇长八寸围八分寅九分八即是林钟三分益一上生太簇之义也正义孟康云元气始起於子未分之时天地人混合为一故子数独一汉书律历志云太极元气函三为一行於十二辰始动於子参之於丑得三又参於寅得九又参之於卯得二十七又参之於辰得八十一又参之於巳得二百四十三又参之於午得七百二十九又参之於未得二千一百八十七又参之於申得六千五百六十一又参之於酉得万九千六百八十三又参之於戌得五万九千四十九又参之於亥得十七万七千一百四十七此陰阳合德气鍾於子化生万物者也然丑三分二寅九分八者并是分之余数而汉书不说也】卯二十七分十六【索隐此以丑三乘寅寅三乘卯得二十七南吕为卯衡长五寸三分寸之一以三约二十七得九即黄钟之本数又以三约十六得五县三分之一即南吕之长故云卯二十七分十六亦是太簇三分去一下生南吕之义已下八辰并準此然丑三分二寅九分八者皆分之余数也】辰八十一分六十四巳二百四十三分一百二十八午七百二十九分五百一十二未二千一百八十七分一千二十四申六千五百六十一分四千九十六酉一万九千六百八十三分八千一百九十二戌五万九千四十九分三万二千七百六十八亥十七万七千一百四十七分六万五千五百三十六

生黄钟

术曰以下生者倍其实三其法【索隐案蔡邕云阳生阴为下生陰生阳为上生又律历志云阴阳相生自黄钟始而左旋八八为五孟康注云从子数辰至未得八下生林钟数又自未至寅亦得八上生太簇律是也然上下相生皆以此为率今云以下生者谓黄钟下生林钟黄钟长九寸倍其实者二九十八三其法者以三为法约之得六为林钟之长也】以上生者四其实三其法【索隐四其实者谓林钟上生太簇林钟长六寸以四乘六得二十四以三约之得八即为太簇之长也】上九商八羽七角六宫五徵九【索隐此五声之数亦上生三分益一上生三分宫宫去一下生徵徵益一上生商商去一下生羽羽益一上生角然此文似数错未暇研核也】置一而九三之以为法【索隐汉书律历志曰太极元气函三为一行之於十二辰始动於子参之於丑得三又参之於寅得九是谓置一而九三之也韦昭曰置一而九以三乘之是也乐彦云一气生於子至丑而三是一三也又自丑至酉为九皆以三乘之是九三也】实如法得长一寸【索隐实谓以子一乘丑三至亥得十七万七千一百四十七为实数如法谓以上万九千六百八十三之法除实得九为黄钟之长言得一者算术设法辞也得下有

长一下有寸者皆衍字也韦昭云得九寸之一也姚氏谓得一即黄钟之子数】凡得九寸命曰黄钟之宫故曰音始於宫穷於角【索隐即如上文宫下生徵徵上生商商下生羽羽上生角是其穷也】数始於一終於十成於三气始於冬至周而复生神生於无形【正义无形为太阳气天地未形之时言神本在太虚之中而无形也】成於有形【正义天地既分二仪已质万物之形成於天地之间神在其中】然後数形而成声【正义数谓天数也声谓宫商角徵羽也言天数既形则能成其五声也】故曰神使气气就形形理如类有可类或未形而未类或同形而同类类而可班类而可识圣人知天地识之别故从有以至未有【正义从有谓万物形质也未有谓天地未形也】以得细若气微若声【正义气谓太易之气声谓五声之声也】然圣人因神而存之【正义言圣人因神理其形体寻迹至於太易之气故云因神而存之上云从有以至未有是也】虽妙必効情核其华道者明矣【正义妙谓微妙之性也効犹见也核研核也华道神妙之道也言人虽有微妙之性必须程督己之情理然後研核神妙之道乃能究其形体辨其成声故谓明矣故下云非有圣心以乘聪明孰能存天地之神而形成之情哉是也】非有圣心以乘聪明孰能存天地之神而形成之情哉神者物受之而不能知及其去来【正义言万物受神妙之气不能知觉及神去来亦不能识其往复也】故圣人畏而欲存之唯欲存之神之亦存【正义言圣人畏神妙之理难识而欲常存之惟欲常存之故其神亦存也】其欲存之者故莫贵焉【正义言平凡之人欲得精神存者故亦莫如贵神之妙焉】

太史公曰在璇玑玉衡以齐七政即天地二十八宿【正义宿音息袖反又音肃谓东方角亢氐房心尾箕南方井鬼柳星张翼轸西方奎娄胃昂毕觜参北方斗牛女?危室壁凡二十八宿一百二十八宿星也】十母【正义十干甲乙丙丁戊己庚辛壬癸】十二子【正义十二支子丑寅卯辰巳午未申酉戌亥】钟律调自上古建律运历造日度可据而度也【正义度音田洛反】合符节通道德即从斯之谓也【索隐述赞曰自昔轩后爰命冷纶雄雌是听厚薄伊均以调气候以轨星辰军容取饰乐器斯因自微知着测化穷神大哉虚受含养生人】

史记卷二十五

史记卷二十五考证

律书壹禀於六律索隐汉京房知五音六律之数十二律之变至六十律○【臣照】按律有六而音有五六律之间为六吕而成十二五音之间为变宫变徵而为七然十二仍六也七仍五也若自此律至彼律彼吕则其间分数岂止六十引而伸之百千万亿不能尽犹如入海算沙矣即音又岂止于七大而雷霆小而蚁蠓亦百千万亿不能尽也然而统之五音则尽矣加之以二变则五音旋相为宫矣律亦如之统之以六则尽矣间之以六吕则可以正五音矣音者天也律者地也音者阳也律者陰也以天统地以陰从阳则万物靡不该举于其中若枚举夫物谓天地陰阳莫不在物则物可尽数耶京房六十律何以异是後世律吕之失传由京房始所为求明而反晦

其於兵械尤所重○【臣照】按械字为戒字之讹盖审几察微莫精於律气者生死之根也

气不可见以声察之兵者千万人之死生系焉故于兵戒为尤重也於器械何涉索隐曰师出以律故于兵械为尤重也或索隐之文本亦作戒未可定若正义谓械者弓矢殳矛戈戟则以传讹为械而穿凿附会也

武王伐纣吹律听声索隐其事当有所出今则未详○【臣照】按至今明载周国语何未详也

而音尚宫○正义监本讹舛不可读今据周礼典同注改

成汤有南巢之伐以殄夏乱正义淮南子云汤伐桀放之历山与末喜同舟浮江奔南巢之山而死○【臣世骏】按淮南修务训云整兵鸣条困夏南巢谯以其过放之历山无末喜同舟之语

五月也律中蕤宾蕤宾者言陰气幼少故曰蕤痿阳不用事故曰宾景风居南方景者言阳气道竟故曰景风其於十二子为午午者陰阳交故曰午其於十母为丙丁丙者言阳道着明故曰丙丁者言万物之丁壮也故曰丁西至於弧孤者言万物之吴落且就死也西至於狼狼者言万物可度量断万物故曰狼凉风居西南维主地地者沉夺万物气也六月也律中林钟林钟者言万物就死气林林然其於十二子为未未者言万物皆成有滋味也北至於罚罚者言万物气夺可伐也北至於参参者言万物可参也故曰参七月也○一本作五月也律中蕤宾蕤宾者言陰气幼少故曰蕤痿阳不用事故曰宾其於十二子为午午者陰阳交故曰午其於十母为丙丁丙者言阳道着明故曰丙丁者言万物之丁壮也故曰丁景风居南方景者言阳气道竟故曰景风六月也律中林钟林钟者言万物就死气林林然其於十二子为未未者言万物皆成有滋味也西至於弧孤者言万物之吴落且就死也西至於狼狼者言万物可度量断万物故曰狼凉风居西南维主地地者沉夺万物气也北至於罚罚者言万物气夺可伐也北至於参参者言万物可参也故曰参七月也

律数○蔡元定曰黄钟八寸十分一林钟五寸十分四太簇七寸十分二南吕四寸十分八姑洗六寸十分四应钟四寸二分三分二?宾五寸六分三分二【强四百八十六】大吕七寸五分三分二【强四百□□五】夷则五寸□□三分二【弱二百一十六】夹钟六寸七分三分一【强一百九十八】无射四寸四分三分二【强六百□□二】仲吕五寸九分三分二【强五百八十一】按律书此章所记分寸之法与他说不同以难晓故多误盖取黄钟之律九寸一寸九分凡八十一分而又以十约之为寸故云八寸十分一本作七分一者误也今以相生次序列而正之其应钟以下则有小分小分以三为法如历家太少余分强弱耳其法未密也今以二千一百八十七为全分七百二十九为三分一一千四百五十八为三分二余分之多者为强少者为弱列於逐律之下其误字悉正之隋志引此章中黄钟林钟太簇应钟四律寸分以为与班固司马彪郑氏蔡邕杜夔荀勗所论虽尺有增减而十二律之寸数并同则是时律书尚未误也及司马贞索隐始以旧本作七分一为误其误亦未久也沈括亦曰此章七字皆当作十字误屈中画耳大要律书用相生分数相生之法以黄钟为八十一分今以十为寸法故有八寸一分汉前後志及诸家用审度分数审度之法以黄钟之长为九十分亦以

十为寸法故有九十分法虽不同其长短则一故隋志云寸数并同也

神者物受之而不能知及其去来○【臣照】按及字衍文言物受之而不能知其去来也何以不能知以知者神知之神不知神犹日不见日眼不见眼也虽然神无去来受者物而神者物物则本无去来无知而无不知也

又按张晏数阙书有兵书无律书而顔师古谓自叙目錄本无兵书窃意律之为用兵其大者张晏或即以律书为兵书未可知也其文固太史公之文非後人所能补盖以汉武用兵不以律而推原本始举孝文以为法殆即所谓兵戒者欤

史记卷二十五考证

卷二十六

钦定四库全书

史记卷二十六

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

历书第四

昔自在古历建正作於孟春【索隐案古历者谓黄帝调历以前有上元太初历等皆以建寅为正谓之孟春也及颛顼夏禹亦以建寅为正唯黄帝及殷周鲁并建子为正而秦正建亥汉初因之至武帝元封七年始改用太初历仍以周正建子为十一月朔旦冬至改元太初历焉今案此文至於十二月节皆出大戴礼虞史伯夷之辞也】於时冰泮发蛰百草奋兴秭鴝先【集解徐广曰秭音姊鴝音规子鴝鸟也一名鷦?索隐秭鴝先?谓子鴝鸟春气发动则先出野泽而鸣也又案大戴礼作瑞 无释未测其旨当是字体各有讹变耳鷦音弟?音桂楚辞云虑鷦?之先鸣使夫百草为之不芳解者以鷦?为杜鹃也】物迺岁具生於东次顺四时卒于冬分时【索隐卒音子律反分如字卒尽也言建历起孟春尽季冬则一岁之事具也冬尽之後分为来春故云冬分也】鸡三号卒明【集解徐广曰卒一作平又云卒斯也索隐三号三鸣也言夜至鸡三鸣则天晓乃始为正月一日言异岁也徐广云卒一作平又作斯於文皆便】抚十二节卒于丑【正义抚犹循也自平明寅至鸡鸣丑凡十二辰辰尽丑又至明朝寅使一日一夜故曰幽明】日月成故明也明者孟也幽者幼也幽明者雌雄也雌雄代兴而顺至正之统也日归于西起明于东月归於东起明于西正不率天又不由人【索隐此文出大戴礼是孔子称周太史之词】则凡事易坏而难成矣王者易姓受命必慎始初改正朔易服色推本天元顺承厥意【索隐言王者易姓而兴必当推本天之元气行运所在以定正朔以承天意故云承顺厥意也】

太史公曰神农以前尚矣盖黄帝考定星历【索隐系本及律历志黄帝使羲和占日常仪占月與区占星气泠纶造律吕大桡作甲子隶首作算数容成综此六术而着调历也】建立五行起消息【正义皇侃云乾者阳生为息坤者阴死为消也】正闰余【集解駙案汉书音义曰以岁之余为闰故曰闰余正义邓平落下闳云一月之日二十九日八十一分日之四十三

按计其余分成闰故云正闰余也每一岁三百六十六日余六日小月六月是一岁余十二日
【正义应劭云黄帝受命有云瑞故以云纪官春官为青夏官为缙秋官为白冬官为黑云中官为黄云按黄帝置五官各以物类名其职掌也】各司其序不相乱也民是以能有信神是以能有明德民
神异业敬而不渎故神降之嘉生【集解应劭曰嘉谷也】民以物享【正义刘伯庄云物事也人皆顺事而享福也】灾祸不生所求不匮少皞氏之衰也九黎乱德【集解駰案汉书音义曰少皞时诸侯作乱者】民神杂扰不可放物【索隐放音昉依也】祸菑荐至莫尽其气
【索隐荐音在见反荐集也字或作荐古字假借用尔】颛顼受之乃命南正重司天以属神
命火正黎司地以属民【集解应劭曰黎阴官也火数二二地数也故火正司地以属万民索
隐案左传重为勾芒木正黎为祝融火正此言南者刘氏以为南字误非也盖重黎二人元是
木火之官兼司天地职而天是阳南是阳位故木亦是阳所以木正为南正也而火是地正亦
称北正者火数二二地数地阴主北方故火正亦称北正为此故也臣瓚以为古文火字似北
未为深得也】使复旧常无相侵渎其後三苗服九黎之德【正义孔安国云三苗缙云氏之
後诸侯也按服从也言九黎之君在少皞之世作乱今三苗之君从九黎乱德故南北二官皆
废使曆数失序】故二官咸废所职而闰余乖次孟陬殄灭摄提无纪历数失序【集解駰案
汉书音义曰次十二次也史推历失闰则斗建与月名错正月为孟陬闰余乖错不与正岁相
值谓之殄灭摄提星名随斗杓所指建十二月若历误春三月当指辰而指已是谓失序索隐
案正月为陬陬音邹又作侯反楚词云摄提贞于孟陬言历数乖误乃使孟陬殄灭不得其正
也天官书云摄提三星若鼎足句直斗杓所指以建时节故为摄提格格至也言摄随月建至
故云格也】尧复遂重黎之後不忘旧者使复典之而立羲和之官明时正度则陰阳调风雨
节茂气至民无夭疫年耆禅舜申戒文祖云【集解徐广曰戒一作敕正义言於文祖之庙以
申戒舜也】天之历数在尔躬【集解何晏曰历数谓列次也】舜亦以命禹【集解孔安国
曰舜亦以尧命已之辞命禹也】由是观之王者所重也夏正以正月殷正以十二月周正以
十一月盖三王之正若循环穷则反本天下有道则不失纪序无道则正朔不行於诸侯幽厉
之後周室微陪臣执政史不记时君不告朔【集解郑玄曰礼人君每月告朔於庙有祭谓之
朝享】故畴人子弟分散【集解如淳曰家业世世相传为畴律年二十三传之畴官各从其
父学索隐韦昭云畴类也孟康云同类之人明历者也乐彦云畴昔知星人也】或在诸夏或
在夷狄是以其禋祥废而不统【集解如淳曰吕氏春秋荆人鬼而越人禋今之巫祝祷祠淫
祀之比也晋灼曰禋音珠玕之玕】周襄王二十六年闰三月而春秋非之先王之正时也履
端於始【集解韦昭曰谓正历必先称端始也若十一月朔旦冬至也】举正於中【集解韦
昭曰气在望中则时日昏明皆正也】归邪【集解音余】於终【集解韦昭曰邪余分也终
闰月也中气在晦则後月闰在望是其正中也】履端於始序则不愆举正於中民则不惑归
邪【集解音余】於终事则不悖其後战国并争在於强国禽敌救急解纷而已岂遑念斯哉
是时独有邹衍明於五德之传【正义传音竹恋反五德五行也】而散消息之分以显诸侯
而亦因秦灭六国兵戎极烦又升至尊之日浅未暇遑也而亦颇推五胜【集解駰案汉书音
义曰五行相胜秦以周为火用水胜之也】而自以为获水德之瑞更名河曰德水而正【正
义音征以秦始皇名讳之故改也】以十月色上黑然历度闰余未能睹其真也汉兴高祖曰
北時待我而起亦自以为获水德之瑞虽明习历及张苍等咸以为然是时天下初定方纲纪
大基高后女主皆未遑故袭秦正朔服色至孝文时鲁人公孙臣以终始五德上书言汉得土

德宜更元改正朔易服色当有瑞瑞黄龙见事下丞相张苍张苍亦学律历以为非是罢之其後黄龙见成纪张苍自黜所欲论着不成而新垣平以望气见颇言正历服色事贵幸後作乱故孝文帝废不复问至今上即位招致方士唐都分其天部【集解駰案汉书音义曰谓分部二十八宿为距度】而巴落下閤运算转历【集解徐广曰陈术云徵士巴郡落下閤也索隐姚氏案益部耆旧传云閤字长公明晓天文隐於落下武帝徵待诏太史於地中转浑天改颺颺历作太初历拜侍中不受也】然後日辰之度与夏正同乃改元更官号封泰山因诏御史曰乃者有司言星度之未定也广延宣问以理星度未能詹也【集解徐广曰詹一作售也索隐汉书作𪔐𪔐即售也故徐广作售韦昭云𪔐比较也郑德云相应为𪔐也】盖闻昔者黄帝合而不死名察度验定清浊起五部建气物分数【集解应劭曰言黄帝造历得仙名节会察寒暑致启闭分至定清浊起五部五部金木水火土也建气物分数皆叙历之意也孟康曰合作也黄帝作历历终复始无穷已故曰不死清浊律声之清浊也五部五行也天有四时为五行也气二十四气物万物也分历数之分也瓚曰黄帝圣德与虚合契升龙登仙於天故曰合而不死题名宿度候察进退谓三辰之度吉凶之验也索隐臣瓚解为得案汉书作名察发歛韦昭云发散擎歛也又续汉书以为道之发歛景之长短则发歛是日行道去极盈缩者也】然盖尚矣书缺乐弛朕甚闵焉朕唯未能循明也紬绩日分【索隐紬音宙又如字紬绩者女工紬缉之意以言造历算运者犹若女工缉而织之也】率应水德之胜【集解徐广曰盖以为应土德土胜水】今日顺夏至【索隐谓夏至冬至也】黄钟为宫林钟为徵太簇为商南吕为羽姑洗为角自是以後气复正羽声复清名复正变以至子日当冬至则陰阳离合之道行焉十一月甲子朔旦冬至已詹其更以七年为太初元年【索隐改元封七年为太初元年然汉始以建亥为年首今改以建子故以七年为元年韦昭云汉兴至此百二岁案律历志云乃以前历上元太初四年千六百一十七岁至元封七年复得阙逢摄提之岁中冬十一月甲子朔旦冬至也】年名焉逢摄提格【集解徐广曰岁阴在寅左行岁星在丑右行索隐尔雅云岁在甲曰焉逢寅曰摄提格则此甲寅之年十一月甲子朔旦夜半冬至也此篇末亦云寅名摄提则是甲寅不疑也又据二年名单阙三年名执徐等年次分明而汉志以为其年在丙子当是班固用三统与太初历不同故与太史公说有异而尔雅近代之作所记年名又皆不同也苏林云左行右行岁与星行所在之次】月名毕聚日得甲子夜半朔旦冬至【集解文穎曰律居阴而治阳历居阳而治阴更相治间不容期忽五家文悖异推太初之元也索隐聚音姬案僖公云天元之始於十一月甲子夜半朔旦冬至日月若连珠俱起牵牛之初岁雄在阙逢雌在摄提格月雄在毕雌在訾訾则姬訾之宿日雄在甲雌在子甲子是阳气支干之首也】

历术甲子篇【索隐以十一月朔旦冬至得甲子甲子是阳气支干之首故以甲子命历术为篇首非谓此年岁在甲子也】

太初元年岁名焉逢【索隐甲岁雄也汉书作阙逢亦音焉与此音同】摄提格【索隐寅岁陰也此依尔雅甲寅之岁若据汉志以为丙子之年也】月名毕聚【索隐谓月值毕及姬訾也毕月雄也聚月雌也】日得甲子【索隐谓十一月冬至朔旦得甲子也正义置大余五十四算每年加五十四日满六十日除之奇算留之每至闰後一年加二十三算亦满六十日除之奇算留之若才足六十日明年云无大余无小余也又明年以置五十四算如上法置小余

三百四十八算每年加三百四十八分满九百三十八分成一日归上余算留之若至闰後一年加八百四十七分亦满九百三十八分成日归大余奇留之明年以加三百四十八算如上法也】夜半朔旦冬至【索隐以建子为正故以夜半为朔其至与朔同日故云夜半朔旦冬至若建寅为正则以平旦为朔正义置大余五算加五日满六十日则除之後年更置五算如上法置小余八算每年加八算满三十二分为一日归大余後年更置八算如上法大余者日也小余者日之奇分也】正北【索隐谓郢首十一月甲子朔旦时加子为冬至故云正北也然每岁行周天全度外余有四分之一以十二辰分之冬至常居四仲故子年在子丑年在卯寅年在午卯年在酉至後十九年章首在酉故云正西其正南正东并準此正义黄钟管子时气应称正北顺行四时仲所至为正月一日是岁之始尽一章十九年黄钟管应在酉则称正西他皆放此】十二【索隐岁有十二月有闰则云十三月】无大余 无小余【索隐其岁甲子朔旦日月合於牽牛之初余分皆尽故无大小余正义无大小余者以生闰月之岁有三百五十四日三百四十八分除五甲三百日余有五十四日三百四十八分缘未滿六十日故置为来年大小余亦为大初元年日行甲子朔旦冬至前年无奇日分故无大小余也】无大余 无小余【索隐上大小余朔之大小余此谓冬至大小余冬至亦与朔同日并无余分至与朔法异故重列之】

焉逢摄提格太初元年【索隐汉志太初元年岁在丙子据此则甲寅岁尔雅释天云岁阳者甲乙丙丁戊己庚辛壬癸十干是也岁阴者子丑寅卯辰巳午未申酉戌亥十二支是也岁阳在甲云焉逢谓岁干也岁阴在寅云摄提格谓岁支也正义焉音於乾反後同】十二

大余五十四【索隐岁十二月六大六小合三百五十四日以六除之五六三十除三百日余五十四日故下云大余者日也正义月朔旦甲子日法也】

小余三百四十八【索隐太初历法一月之日二十九日九百四十分日之四百九十九每两月合成五十九日又余五十八今十二月合余六个五十八得此三百四十八数故云小余者月也正义未滿日之分数也其分每满九百四十则成一日即归上成五十日矣大余五十四日每岁除小月六日则成三百五十四日除五甲三百日犹余五十四日为未滿六十日故称大余五十四小余三百四十八者其大数五十四之外更余分三百四十八故称小余三百四十八也此大小余是月朔甲子日朔以非闰月之数一岁则有三百五十四日三百四十八分每六十日之余为未滿六十日故有大小余也是太初元年奇日奇分也】大余五【索隐周天三百六十五度四分度之一日行一度去岁十一月朔在牽牛初为冬至今岁十一月十一日又至牛初为一周以六甲除之六六三十六除三百六十余五故云大余五也正义冬至甲子日法也】

小余八【索隐即四分之一小余满三十二从大余一四八三十二故云小余八明年又加八得十六故下云小余十六次明年又加八得二十四故下云小余二十四又明年加八得三十二为滿故下云无小余并可依太初历法行之也正义未滿日之分数也其分每满三十二则成一日即归上成六日矣大余五者每岁三百六十五日除六甲三百六十日犹余五日故称大余五日也小余八者每岁三百六十五日四分日之一则一日三十二分是一岁三百六十

五日八分故称小余是冬至甲子日法未生闰月之数每六十日除之为未滿六十日故有大
小余也此是太初元年奇日奇分也】

端蒙单阏二年【集解徐广曰单阏一作亶安索隐端蒙乙也尔雅作旃蒙单阏卯也丹遏二
音又音蟬焉岁在乙卯也正义单音丹又音特连反阏音乌葛反又於连反】 闰十三

大余四十八 小余六百九十六

大余十 小余十六

游兆执徐三年【索隐游兆景也尔雅作柔兆执徐辰也正义三年丙辰岁也】 十二

大余十二 小余六百三

大余十五 小余二十四

强梧大荒落四年【索隐强梧丁也大荒落已也正义梧音语四年丁巳岁也】 十二

大余七 小余十一

大余二十一 无小余

徒维敦牂天汉元年【索隐徒维戊也敦牂午也正义牂音作郎反天汉元年戊午岁也】

闰十三

大余一 小余三百五十九

大余二十六 小余八

祝犁协洽二年【索隐祝犁已也尔雅作着雍协洽未也正义二年己未岁也】 十二

大余二十五 小余二百六十六

大余三十一 小余十六

商横涓滩三年【索隐商横庚也尔雅作上章涓滩申也本作赤奋若非也天官书及尔雅申
为涓滩丑为赤奋若非今自太初已来计岁次与天官书不同者有四盖後之历术改也正义涓
音吐魂反滩音吐

丹反又作涪汉字音与上同三年庚申岁也】 十二

大余十九 小余六百一十四

大余三十六 小余二十四

昭阳作噩四年【索隐昭阳辛也尔雅作重光作噩酉也正义四年辛酉岁也】 闰十三

大余十四 小余二十二

大余四十二 无小余

横艾淹茂太始元年【索隐横艾壬也尔雅作玄默淹茂戌也正义太始元年壬戌岁也】

十二

大余三十七 小余八百六十九

大余四十七 小余八

尚章大渊献二年【索隐尚章癸也尔雅作昭阳大渊献亥也一本作困敦非也天官书子为

困敦与尔雅同正义二年癸亥岁也】 闰十三

大余三十二 小余二百七十七

大余五十二 小余一十六

焉逢困敦三年【索隐焉逢甲也困敦子也一本作大渊献非也天官书云亥为大渊献与尔雅

同正义敦音顿三年甲子岁也】 十二

大余五十六 小余一百八十四

大余五十七 小余二十四

端蒙赤奋若四年【索隐端蒙乙也赤奋若丑也一本作涪滩非也天官书申为涪滩与尔雅同四年已後自太始征和已下讫篇末其年次甲乙皆准此并褚先生所续也正义四年乙丑

岁也】十二

大余五十 小余五百三十二

大余三 无小余【正义准前解小余是日之余分也自右曆书已下小余又非是年名复不周备恐褚先生及後人所加】

游兆【集解徐广曰作游桃】摄提格征和元年【正义李巡注云尔雅云万物承阳而起故曰摄提格起也孔文祥云以岁在寅正月出东方为衆星之纪以摄提宿故曰摄提以其为岁月之首起於孟

陬故云格正也】 闰十三

大余四十四 小余八百八十

大余八 小余八

强梧单阏三年【正义李巡云言阳气推万物而起故曰单阏单尽阏止也】十二

大余八 小余七百八十七

大余十三 小余十六

徒维执徐三年【正义李巡云伏蛰之物皆敷舒而出故云执徐也】十二

大余三 小余一百九十五

大余十八 小余二十四

祝犁大芒落四年【集解芒一作荒正义姚察云言万物皆炽盛而大出霍然落之故云荒落】

闰十三

大余五十七 小余五百四十三

大余二十四 无小余

商横敦牂後元元年【正义尔雅云敦盛也牂壮也言万物盛壮也】十二

大余二十一 小余四百五十

大余二十九 小余八

昭阳汁洽二年【集解汁一作协正义李巡云言阴阳化生万物和合故曰协洽也】

闰十三

大余十五 小余七百九十八

大余三十四 小余十六

横艾涿滩始元元年正西【集解涿滩一作芮汉正义孙炎注云尔雅云涿滩万物吐秀倾垂之貌也】 十二

大余三十九 小余七百五

大余三十九 小余二十四

尚章作噩二年【集解噩一作鄂正义李巡云作鄂万物皆落枝起之貌也】 十二

大余三十四 小余一百一十三

大余四十五 无小余

焉逢淹茂三年【集解淹一作阇正义李巡云言万物皆蔽冒故曰阇茂蔽冒也】 闰十三

大余二十八 小余四百六十一

大余五十 小余八

端蒙大渊献四年【正义孙炎云渊献深也献万物於天深於藏盖也】 十二

大余五十二 小余三百六十八

大余五十五 小余十六

游兆困敦五年【正义孙炎云困敦混沌也言万物萌混沌於黄泉之下也】 十二

大余四十六 小余七百一十六

无大余 小余二十四

强梧赤奋若六年【正义李巡云阳气奋迅万物而起无不若其性故曰赤奋若若顺也】

闰十三

大余四十一 小余一百二十四

大余六 无小余

徒维摄提格元凤元年 十二

大余五 小余三十一

大余十一 小余八

祝犁单阏二年 十二

大余五十九 小余三百七十九

大余十六 小余十六

商横执徐三年 闰十三

大余五十三 小余七百二十七

大余二十一 小余二十四

昭阳大荒落四年 十二

大余十七 小余六百三十四

大余二十七 无小余

横艾敦牂五年 闰十三

大余十二 小余四十二

大余三十二 小余八

尚章汁洽六年 十二

大余三十五 小余八百八十九

大余三十七 小余十六

焉逢涓滩元平元年 十二

大余三十 小余二百九十七

大余四十二 小余二十四

端蒙作噩本始元年 闰十三

大余二十四 小余六百四十五

大余四十八 无小余

游兆阉茂二年 十二

大余四十八 小余五百五十二

大余五十三 小余八

强梧大渊献三年 十二

大余四十二 小余九百

大余五十八 小余十六

徒维困敦四年 闰十三

大余三十七 小余三百八

大余三 小余二十四

祝犁赤奋若地节元年 十二

大余一 小余二百一十五

大余九 无小余

商横摄提格二年 闰十三

大余五十五 小余五百六十三

大余十四 小余八

昭阳单阏三年正南 十二

大余十九 小余四百七十

大余十九 小余十六

横艾执徐四年 十二

大余十三 小余八百一十八

大余二十四 小余二十四

尚章大荒落元康元年 闰十三

大余八 小余二百二十六

大余三十 无小余

焉逢敦牂二年 十二

大余三十二 小余一百三十三

大余三十五 小余八

端蒙协洽三年 十二

大余二十六 小余四百八十一

大余四十 小余十六

游兆涪滩四年 闰十三

大余二十 小余八百二十九

大余四十五 小余二十四

强梧作噩神雀元年 十二

大余四十四 小余七百三十六

大余五十一 无小余

徒维淹茂二年 十二

大余三十九 小余一百四十四

大余五十六 小余八

祝犁大渊献三年 闰十三

大余三十二 小余四百九十二

大余一 小余十六

商横困敦四年 十二

大余五十七 小余三百九十九

大余六 小余二十四

昭阳赤奋若五凤元年 闰十三

大余五十一 小余七百四十七

大余十二 无小余

横艾摄提格二年 十二

大余十五 小余六百五十四

大余十七 小余八

尚章单阏三年 十二

大余十 小余六十二

大余二十二 小余十六

焉逢执徐四年 闰十三

大余四 小余四百一十

大余二十七 小余二十四

端蒙大荒落甘露元年 十二

大余二十八 小余三百一十七

大余三十三 无小余

游兆敦牂二年 十二

大余二十二 小余六百六十五

大余三十八 小余八

强梧协洽三年 闰十三

大余十七 小余七十三

大余四十三 小余十六

徒维涸滩四年 十二

大余四十 小余九百二十

大余四十八 小余二十四

祝犁作噩黄龙元年 闰十三

大余三十五 小余三百二十八

大余五十四 无小余

商横淹茂初元元年正东 十二

大余五十九 小余二百二十五

大余五十九 小余八

昭阳大渊献二年 十二

大余五十三 小余五百八十三

大余四 小余十六

横艾困敦三年 闰十三

大余四十七 小余九百三十一

大余九 小余二十四

尚章赤奋若四年 十二

大余十一 小余八百三十八

大余十五 无小余

焉逢摄提格五年 十二

大余六 小余二百四十六

大余二十 小余八

端蒙单阏永光元年 闰十三

无大余 小余五百九十四

大余二十五 小余十六

游兆执徐二年 十二

大余二十四 小余五百一

大余三十 小余二十四

强梧大荒落三年 十二

大余十八 小余八百四十九

大余三十六 无小余

徒维敦牂四年 闰十三

大余十三 小余二百五十七

大余四十一 小余八

祝犁协洽五年 十二

大余三十七 小余一百六十四

大余四十六 小余十六

商横涪滩建昭元年 闰十三

大余三十一 小余五百一十二

大余五十一 小余二十四

昭阳作噩二年 十二

大余五十五 小余四百一十九

大余五十七 无小余

横艾阉茂三年 十二

大余四十九 小余七百六十七

大余二 小余八

尚章大渊献四年 闰十三

大余四十四 小余一百七十五

大余七 小余十六

焉逢困敦五年 十二

大余八 小余八十二

大余十二 小余二十四

端蒙赤奋若竟宁元年 十二

大余二 小余四百三十

大余十八 无小余

游兆摄提格建始元年 闰十三

大余五十六 小余七百七十八

大余二十三 小余八

强梧单阏二年 十二

大余二十 小余六百八十五

大余二十八 小余十六

徒维执徐三年 闰十三

大余十五 小余九十三

大余三十三 小余二十四

祝犁大荒落四年

右历书大余者日也小余者月也端旃蒙者年名也支丑名赤奋若寅名摄提格干丙名游兆正北【冬至加子时】正西【加酉时】正南【加午时】正东【加卯时】

【索隐述赞曰历数之兴其来尚矣重黎是司容成斯纪推步天象消息母子五胜轮环三正互起孟陬贞岁畴人顺轨敬授之方履端为美】

史记卷二十六

史记卷二十六考证

历书正闰余正义一月之日二十九日八十一分日之四十三〇监本误作四十八今改正

又小月六月〇监本误作小月大月今改正

其更以七年为太初元年〇【臣照】按武帝太初元年岁在丁丑非甲寅也此云年名焉逢摄提格月名毕聚日得甲子夜半朔旦冬至者盖着太初历术之元非是年为甲寅年甲寅月十一月甲子朔旦冬至也况年为甲寅月则为丙寅必不得为毕聚也司马贞辈不明历法故纷纷聚讼耳又按历术甲子篇第一章盖後人因上文焉逢至冬至二十一字引而不发难以推步故续此一篇于後以申其义非迁本书也後复有焉逢摄提格太初元年至末祝犁大荒落建始四年则又後人推衍而续增之已不知太初元年甲寅之为托始而直以为武帝太初元年为甲寅矣故所纪甲子无一不悞如建始四年为壬辰而悞以为己巳也其文既叙至成帝建始四年则非马迁本文不待辨矣窃恐尚非褚少孙之笔又按岁在焉逢摄提格甲寅年也月在毕聚甲寅月也甲寅年则正月为丙寅甲寅月则岁为壬癸今日岁在甲寅月在甲寅日得甲子者谓甲寅岁之前十一月则甲子正月建丙寅之十一月则亦甲子也历从夏时则日月在毕聚历从周正则日岁在焉逢摄提格盖夏时周正皆所以敬授人时而历元必从冬至起则一也元必始甲无始壬癸之理则文必如是乃明也是故不特武帝太初元年非岁在甲寅亘古固无甲寅年之甲寅月也

月名毕聚〇按尔雅月在甲曰毕为月阳又曰正月为陬邢昺疏曰正月得甲则曰毕陬若史记历书云月名毕聚也陬古字作聚读为陬音

史记卷二十六考证

<史部,正史类,史记>

卷二十七

钦定四库全书

史记卷二十七

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

天官书第五

【索隐案天文有五官官者星官也星座有尊卑若人之官曹列位故曰天官正义张衡云文曜丽乎天其动者有七日月五星是也日者阳精之宗月者阴精之宗五星五行之精衆星列布体生於地精成於天列居错峙各有所属在野象物在朝象官在人象事其以神着有五列焉是有三十五名一居中央谓之北斗四布於方各七为二十八舍日月运行历示吉凶五纬躔次用告祸福】

中宫天极星【索隐姚氏案春秋元命包云宫之为言宣也宣气立精为神垣又文耀钩曰中宫大帝其精北极星含元出气流精生一也尔雅云北极谓之北辰又春秋合诚图云北辰其星五在紫微中杨泉物理论云北极天之中阳气之北极也极南为太阳极北为太阴日月五星行太阴则无光行太阳则能照故为昏明寒暑之限极也】其一明者太一常居也【索隐案春秋合诚图云紫微大帝室太一之精也正义泰一天帝之别名也刘伯庄云泰一天神之最尊贵者也】旁三星三公或曰子属【正义三公三星在北斗杓东又三公三星在北斗魁西并为太尉司徒司空之象主变出阴阳佐机务占以徙为不吉居常则安金火守之并为咎也】後句四星末大星正妃余三星後宫之属也【索隐句音钩句曲也援神契云辰极横后妃四星从大妃光明又按星经以後句四星名为四辅其句陈六星为六宫亦主六军与此不同也】环之匡卫十二星藩臣皆曰紫宫【索隐元命包曰紫之言此也宫之言中也言天神运动阴阳开闭皆在此中也宋均又以为十二宫中外位各定总谓之紫宫也】前列直斗口三星隋北端兑若见若不曰阴德【索隐刘氏直音如字直当也又音值隋音他果反北一作比案汉书天文志北作比端作端兑作锐锐谓星形尖邪也文耀钩曰阴德为天下纲宋均以为阴行德者道常也正义星经云阴德二星在紫微宫内尚书西主施德惠者故赞阴德遗惠周急赈抚占以不明为宜明新君践极也又云阴德星中宫女主之象星动摇衅起宫掖贵嫔

内妾恶之】或曰天一【正义天一一星疆阃闾外天帝之神主战鬪知人吉凶明而有光则陰阳和万物成人主吉不然反是太一一星次天一南亦天帝之神主使十六神知风水旱兵革饥饉疾疫占以不明及移为灾也星经云天一太一二星主王者即位令诸立赤子而传国位者星不欲微微则废立不当其次宗庙不享食也】紫宫左三星曰天枪右三星曰天棓【集解苏林曰音 打之 索隐枪音七庚反棓音皮韦昭音剖诗纬云天枪三星天棓五星在斗杓左右主枪人棓人石氏星赞云天枪天棓八星备非常之变也正义枪麗掌反天棓五星在女牀东北天子先驱所以御兵也占星不具国兵起也】後六星絕汉抵营室曰阁道【索隐絕度也抵属也又案乐汁图徵云阁道北斗之辅石氏云阁道六星神所乘也正义汉天河也直度曰絕抵至也营室七星天子之宫亦为玄宫亦为清庙主上公亦天子离宫别馆也王者道被草木营室历九象而可观阁道六星在王良北飞阁之道天子欲游别宫之道占一星不见则輶路不通动摇则宫掖之内起兵也】北斗七星所谓璇玑玉衡以齐七政【索隐春秋运斗枢云斗第一天枢第二璇第三玑第四权第五衡第六开阳第七摇光第一至第四为魁第五至第七为杓合而为斗文耀钩云斗者天之喉舌玉衡属杓魁为璇玑徐整长历云北斗七星星间相去九千里其二陰星不见者相去八千里也尚书旋作璿马融云璿美玉也玑浑天仪可转旋故曰璇玑衡其中横笛以璿为玑以玉为衡盖贵天象也郑玄注大传言浑仪其中笛为璿玑外规为玉衡者是也尚书大传云七政谓春夏秋冬夏天文地理人道所以为政也人道正而万事顺成又马融注尚书云七政者北斗七星各有所主第一曰主日法天第二曰主月法地第三曰命火谓荧惑也第四曰煞土谓填星也第五曰伐水谓辰星也第六曰危木谓岁星也第七曰罚金谓太白也日月五星各异故名曰七政也】杓携龙角【集解孟康曰杓北斗杓也龙角东方宿也携连也正义按角星为天关其间天门其内天庭黄道所经七曜所行左角为理主刑其南为太阳道右角为将主兵其北为太陰道也盖天之三门故其星明大则天下太平贤人在位不然反是】衡殷南斗【集解晋灼曰衡斗之中央殷中也索隐宋均云殷当也】魁枕参首【正义枕之禁反衡斗衡也魁斗第一星也言北宫斗斗衡直北当之魁枕於参宿之首北斗之杓连於龙角南斗六星为天庙丞相太宰之位主荐贤良授爵禄又主兵一曰天机南二星天梁中央一星天相北二星天府庭也占斗星盛明王道和平爵禄行不然反是参主斩刈又为天狱主杀罚其中三星横列者三将军东北曰左肩主左将西北曰右肩主右将东南曰左足主後将军西南曰右足主偏将军故轩辕氏占参应七将也中央三小星曰伐天之都尉也主戎狄之国不欲明若明与参等大臣谋乱兵起夷狄内战七将皆明主天下兵振芒角张王道缺参失色军散败参芒角动摇边候有急参左足入玉井中及金火守皆为起兵】用昏建者杓杓自华以西南【集解孟康曰传曰斗第七星法太白主杓斗之尾也尾为陰又其用昏昏陰位在西方故主西南索隐说文云杓斗柄音匹遥反即招摇也正义杓东北第七星也华华山也言北斗昏建用斗杓星指寅也杓华山西南之地也】夜半建者衡【集解徐广曰第五星】衡殷中州河济之间【集解孟康曰假令杓昏建寅衡夜半亦建寅正义衡北斗衡也言北斗夜半建用斗衡指寅殷当也斗衡黄河济水之间地也】平旦建者魁魁海岱以东北也【集解孟康曰传曰斗第一星法於日主齐也魁斗之首首阳也又其用在明阳与明德在东方故主东北齐分正义言北斗旦建用斗魁指寅也海岱代郡也言魁星主海岱之东北地也随三时所指有三建也】斗为帝车运于中央临制四乡分陰阳建四时均五行移节度定诸纪皆系於斗【索隐姚氏案宋均云言是大帝乘车巡狩故无所不纪也】斗魁戴匡六星曰文昌宫【集解晋灼曰似戴故曰戴匡索隐文耀钩云文昌

宫为天府孝经援神契云文者精所聚昌者扬天纪辅拂并居以成天象故曰文昌宫】一曰上将二曰次将三曰贵相四曰司命五曰司中六曰司禄【索隐春秋元命包曰上将建威武次将正左右贵相理文绪司禄赏功进士司命主灾咎司中主左理也】在斗魁中贵人之牢【集解孟康曰传曰天理四星在斗魁中贵人牢名曰天理索隐乐汁图徵曰天理贵人牢宋均曰以理牢狱也正义占明及其中有星此贵人下狱也】魁下六星两两相比者名曰三能【集解苏林曰能音台】三能色齐君臣和不齐为乖戾【索隐案汉书东方朔愿陈泰阶六符孟康曰泰阶三台也台星凡六星六符六星之符验也应劭引黄帝泰阶六符经曰泰阶者天子之三阶上阶上星为男主下星为女主中阶上星为诸侯三公下星为卿大夫下阶上星为士下星为庶人三阶平则阴阳和风雨时不平则稼穡不成冬雷夏霜天行暴令好兴甲兵修宫榭广苑囿则上阶为之坼也】辅星明近辅臣亲强斥小疏弱【集解孟康曰在北斗第六星旁苏林曰斥远也正义大臣象也占欲其小而明若大而明则臣夺君政小而不明则臣不任职明大与斗合国兵暴起暗而远斗臣不死则夺若近臣专赏排贤用佞则辅生角近臣擅国符印将谋社稷则辅生翼不然则死】杓端有两星一内为矛招摇【集解孟康曰近北斗者招摇招摇为天矛晋灼曰梗河三星天矛天锋招摇一星耳索隐案诗汜历枢云梗河中招摇为胡兵宋均云招摇星在梗河内乐汁图徵云梗河天矛星宋均以为梗河名天矛则梗河是星名也】一外为盾天锋【集解晋灼曰外远北斗也在招摇南一名玄戈正义星经云梗河星为戟劒之星若星不见或进退不定锋镝乱起将为边境之患也】有句圜十五星属杓【索隐句音钩圜音员其形如连环即贯索星也正义属音烛】曰贱人之牢其牢中星实则囚多虚则开出【索隐诗汜历枢云贱人牢一曰天狱又乐汁图徵云连营贱人牢宋均以为连营贯索星也正义贯索九星在七公前一曰连索一曰连营一曰天牢主法律禁暴强故为贱人牢也牢口一星为门欲其开也九星悉见则狱事繁不见则刑务简动摇则斧钺用中虚则改元口开则有赦人主忧若闭口及星入牢中有自系死者常夜候之一星不见有小喜二星不见则赐禄三星不见则人主德令且赦远十七日近十六日若有客星出视其小大大有大赦小亦如之】天一枪棓矛盾动摇角大兵起【集解李奇曰角芒角】

东宫苍龙房心心为明堂【索隐文耀钩云东宫苍帝其精为龙尔雅云大辰房心尾也李巡曰大辰苍龙宿体最明也春秋说题辞云房心为明堂天王布政之宫尚书运期授曰所谓房四表之道宋均云四星间有三道日月五星所从出入也】大星天王前後星子属不欲直直则天王失计【索隐鸿范五行传曰心之大星天王也前星太子後星庶子】房为府曰天驷【索隐尔雅云天驷房也诗泛历枢云房为天马主车驾宋均云房既近心为明堂又别为天府及天驷也】其陰右驂【正义房星君之位亦主左驂亦主良马故为驷王者恒祠之是马祖也】旁有两星曰钤【索隐钤音其炎反元命包曰钩钤两星以闲防神府闔舒为主钩距以备非常也正义占明而近房天下同心钩钤房心之间有客星出及疎拆者皆地动之祥也】北一星曰輦【集解徐广曰音辖正义说文云輦车轴端键也两相穿背也星经云键闭一星在房东北掌管龠也占不居其所则宫门不禁居则反是也】东北曲十二星曰旗【正义两旗者左旗九星在河鼓左也右旗九星在河鼓右也皆天之鼓旗所以为旌表占欲其明大光润将军吉不然为兵忧及不居其所则津梁不通动摇则兵起】旗中四星曰天市中六星曰市楼市中星衆者实其虚则耗【正义耗贫无也天市垣二十二星在房心东北主国市聚交易之所一曰天旗明则市吏急商人无利忽然不明反是市中星衆则岁实稀则岁虚荧惑

犯戮不忠之臣彗星出当徙市易都客星入兵大起出之有贵丧也】房南衆星曰骑官左角李右角将【索隐李即理法官也故元命包云左角理物以起右角将率而动又石氏云左角为天田右角为天门也】大角者天王帝廷【索隐援神契云大角为坐候宋均云坐帝坐也正义大角一星在两摄提间人君之象也占其明盛黄润则天下大同也】其两旁各有三星鼎足句之曰摄提摄提者直斗杓所指以建时节故曰摄提格【集解晋灼曰如鼎之句曲索隐元命包云摄提之为言提也言能提斗角以接於下也正义摄提六星夹大角大臣之象恒直斗杓所指纪八节察万事者也占色温温不明而大者人君吉客星入之主人受制也】亢为疏庙主疾【索隐元命包云亢四星为庙廷文耀钩为疏庙宋均以为疏外也庙或为朝也正义听政之所也其占明大则辅臣忠天下寧不然则反是也】其南北两大星曰南门【正义南门二星在库楼南天之外门占明则氏羌贡暗则诸夷叛客星守之外兵且至也】氏为天根主疫【索隐星经云氏四星为路寝听朝所居其占明大则臣下奉度春秋合诚图云氏为宿宫也尔雅云天根氏也孙炎以为角亢下系於氏若木之有根宋均云疫疾也三月榆荚落故主疾疫也然此时物虽生而日宿在奎行毒气故有疫疾也正义氏房心三宿为火於辰在卯宋之分野】尾为九子曰君臣斥絶不和【索隐宋均云属後宫場故得兼子子必九者取尾有九星也元命包云尾九星箕四星为後宫之場也正义尾箕尾为析木之津於辰在寅燕之分野尾九星为後宫亦为九子星近心第一星为后次三星妃次三星嫔末二星妾占均明大小相承则後宫叙而多子不然则不金火守之後宫兵起若明暗不常妃嫡乖乱妾媵失序】箕为敖客曰口舌【索隐宋均云敖调弄也箕以簸扬调弄为象箕又受物有去去来来客之象也诗云维南有箕载翕其舌又诗纬云箕为天口主出气是箕有舌象谗言故诗曰哆兮侈兮成是南箕谓为敖客行请谒也正义敖音傲箕主八风亦后妃之府也移徙入河国人相食金火入守天下乱月宿其野为风起】火犯守角则有战房心王者恶之也【索隐韦昭曰火荧惑正义荧惑犯守箕尾氏星自生芒角则有战阵之事若荧惑守房心及房心自生芒角则王者恶之也】

南宫朱鸟【索隐文耀钩云南宫赤帝其精为朱鸟也正义柳八星为朱鸟昧天之厨宰主尚食和滋味】权衡【集解孟康曰轩辕为权太微为衡正义权四星在轩辕尾西主烽火备警急占以明为安静不明则警急动摇芒角亦如之衡太微之庭也】衡太微三光之廷【索隐宋均曰太微天帝南宫也三光日月五星也】匡卫十二星藩臣【索隐春秋合诚图曰太微主法式陈星十二以备武患也正义太微宫垣十星在翼轸地天子之宫庭五帝之坐十二诸侯之府也其外藩九卿也南藩中二星间为端门次东第一星为左执法廷尉之象第二星为上相第三星为次相第四星为次将第五星为上将端门西第一星为右执法御史大夫之象也第二星为上将第三星为次将第四星为次相第五星为上相其东垣北左执法上相两星间名曰左掖门上将两星间名曰东华门上相次相上将次将间名曰太阳门其西垣右执法上相间名曰右掖门上将间名曰西华门次将次相间名曰中华门次相两星间名曰太阴门各依其名是其职也占与紫宫垣同也】西将东相南四星执法中端门门左右掖门门内六星诸侯【正义内五诸侯五星列在帝庭其星并欲光明润泽若枯燥则各於其处受其灾变大至诛戮小至流亡若动摇则擅命以干主者审其分以占之则无惑也又云五诸侯五星在东井东北近北河主刺举戒不虞又曰理阴阳察得失一曰帝师二曰帝友三曰三公四曰博士五曰太史此五者为天子定疑议也占明大润泽大小齐等则国之福不然则上下相猜忠

臣不用】其内五星五帝坐【索隐诗含神雾云五精星坐其东苍帝坐神名灵威仰精为青龙之类也正义黄帝坐一星在太微宫中含枢纽之神四星夹黄帝坐苍帝东方灵威仰之神赤帝南方赤熛怒之神白帝西方白招矩之神黑帝北方叶光纪之神五帝并设神灵集谋者也占五座明而光则天子得天地之心不然则失位金火来守入太微若顺入轨道司其出之所守则为天子所诛也其逆入若不轨道以所犯命之中坐成形羣下从谋也】後聚一十五星蔚然【集解徐广曰一云哀乌】曰郎位【索隐汉书作哀乌则哀乌蔚然皆星之貌状其星昭然所以象郎位也正义郎位十五星在太微中帝坐东北周之元士汉之光禄中散谏议此三署郎中是今之尚书郎占欲其大小均耀光润有之吉也】傍一大星将位也【索隐宋均云为羣郎之将帅也正义将子象反郎将一星在郎位东北所以为武备今之左右中郎将占大而明角将恣不可当也】月五星顺入轨道【索隐韦昭云谓循轨道不邪逆也顺入从西入也正义谓月五星顺入轨道入太微庭也】司其出所守天子所诛也【索隐宋均云司察日月五星所守列宿若请官属不去十日者於是天子命使诛之也】其逆入若不轨道以所犯命之中坐成形皆羣下从谋也【集解晋灼曰中坐犯帝座也成形祸福之形见也索隐宋均云逆入从东入不轨道不由康衢而入也以其所犯命者亦谓随所犯之位天子必命诛讨其人也正义命名也谓月五星逆入不依轨道司察其所犯太微中帝坐帝坐必成其刑戮皆是羣下相从而谋上也】金火尤甚【索隐案火主销物而金为兵故尤急则水土木为小变也正义若金火逆入不轨道犯帝坐尤甚於月及水土木也】廷藩西有隋星五曰少微士大夫【隋音他果反索隐宋均云南北为隋隋谓垂下也春秋合诚图云少微处士位又天官占云一名处士星也正义廷太微廷藩卫也少微四星在太微南北列第一星处士也第二星议士也第三星博士也第四星大夫也占以明大黄酒润则贤士举不明反是月五星犯守处士忧宰相易也】权轩辕轩辕黄龙体前大星女主象旁小星御者後宫属【集解孟康曰形如腾龙索隐援神契曰轩辕十二星后宫所居石氏星讚以轩辕龙体主后妃也正义轩辕十七星在七星北黄龙之体主雷雨之神後宫之象也阴阳交感雷激为电和为雨怒为风乱为雾凝为霜散为露聚为云气立为虹蜺离为背璫分为抱珥二十四变皆轩辕主之其大星女主也次北一星夫人也次北一星妃也其次诸星皆次妃之属女主南一小星女御也左一星少民后宗也右一星大民太后宗也占欲其小黄而明吉大明则为後宫争竞移徙则国人流迸东西角大张而振后族败水火金守轩辕女主恶也】月五星守犯者如衡占【索隐宋均云责在后党僇谗贼兴占此祥天子亦当诛之】东井为水事【索隐元命包云东井八星主水衡也】其西曲星曰钺【正义东井八星钺一星舆鬼五星一星为质为鹑首於辰在未皆秦之分野一大星黄道所经为天之亭候主水衡事法令所取平也王者用法平则井星明而端列钺一星附井之前主伺奢淫而斩之占不欲明明与井齐或摇动则天子用钺於大臣月宿井有风雨之变】钺北北河南南河【正义南河三星北河三星分夹东井南北置而为戒南河南戒一曰阳门亦曰越门北河北戒一曰阴门亦为胡门两戒间三光之常道也占以南星不见则南道不通北亦如之动摇及火守中国兵起也又云动则胡越为变或连近臣以结之】两河天阙间为关梁【索隐宋均云两河六星知逆邪言关梁之限知邪伪也正义阙丘二星在河南天子之双阙诸侯之两观亦象魏县书之府金火守之主兵战阙下也】舆鬼鬼祠事中白者为质【集解晋灼曰舆鬼五星其中白者为质正义舆鬼五星主祠事天目也主视明察奸谋东北星主积马东南星主积兵西南星主积布帛西北星主积金玉随其变占之中一星为积尸一名质主丧死祠祀占鬼星明大谷成不明百姓散质欲其留留不明明则兵起

大臣诛下人死之】火守南北河兵起谷不登故德成衡观成潢【集解晋灼曰日月五星不轨道也衡大微廷也观占也潢五帝车舍】伤成钺【集解晋灼曰贼伤之占先成形於钺索隐案德成衡衡则能平物故有德公平者先成形於衡观成潢为帝车舍言王者游观亦先成形於潢也伤成钺者伤败也言王者败德亦先成形於钺以言有败乱则有钺诛之形按文耀钩则云德成潢败成钺其意异也又此下文祸成井诛成质皆是东井下义总列於此也】祸成井【集解晋灼曰东井主水事火入之一星居其旁天子且以火败故曰祸也】诛成质【集解晋灼曰荧惑入舆鬼天质占曰大臣有诛】柳为鸟注主木草【索隐案汉书天文志注作昧尔雅云鸟昧谓之柳孙炎云昧朱鸟之口柳其星聚也以注为柳星故主草木也正义昧丁救反一作注柳八星星七星张六星为鹑火於辰在午皆周之分野柳为朱鸟昧天之厨宰主尚食和滋味占以顺明为吉金火守之国兵大起】七星颈为员官主急事【索隐案宋均云颈朱鸟颈也员官咙喉也物在咙喉终不久留故主急事也正义七星为颈一名天都主衣裳文绣主急事以明为吉暗为凶金火守之国兵大起】张素为厨主觞客【索隐素嗟也尔雅云鸟张嗟郭璞云鸟受食之处也正义张六星六为嗟主天厨饮食赏赉觞客占以明为吉暗为凶金火守之国兵大起】翼为羽翮主远客【正义翼二十二星轸四星长沙一星轸二星合轸七星皆为鹑尾於辰在巳楚之分野翼二十二星为天乐府又主夷狄亦主远客占明大礼乐兴四夷服徙则天子举兵以罚乱者】轸为车主风【索隐宋均云轸四星居中又有二星为左右轸车之象也轸与巽同位为风车动行极似之也正义轸四星主冢宰辅臣又主车骑亦主风占明大则车骑用太白守之天下学校散文儒失业兵戈大兴荧惑守之南方有不用命之国当发兵伐之辰星守之徐泗有戮者】其旁有一小星曰长沙【正义长沙一星在轸中主壽命占明主长壽子孙昌也】星星不欲明明与四星等若五星入轸星中兵大起【索隐宋均云五星主行使使动兵车亦动也】轸南衆星曰天库楼库有五车车星角若益衆及不具无处车马

西宫咸池【索隐文耀钩云西宫白帝其精白虎正义咸池三星在五车中天潢南鱼鸟之所托也金犯守之兵起火守之有灾也】曰天五潢五潢五帝车舍【索隐案元命包曰咸池主五谷其星五者各有所职咸池言谷生於水吐秀含实主秋成故一名五帝车舍言以车载谷而贩也正义五车五星三柱九星在毕东北天子五兵车舍也西北大星曰天库主太白秦也次东北曰天狱主辰燕赵也次东曰天仓主岁卫鲁也次东南曰司空主鎮楚也次西南曰卿主荧惑魏也占五车均明柱皆见则仓库实不见其国絶食兵且起五车三柱有变各以其国占之三柱出外兵出柱入兵入柱出一月米贵三倍期二年出三月贵十倍期三年柱出不与天仓相近军出米贵转粟千里柱倒立尤甚火入天下旱金入兵水入水也】火入旱金兵水水中有三柱柱不具兵起【索隐谓火金水入五潢则各致此灾也宋均云不言木土者木土德星於此不为害也】奎曰封豕为沟渎【正义奎苦圭反十六星娄三星为降娄於辰在戌鲁之分野奎天之府库一曰天豕亦曰封豕主沟渎西南大星所谓天豕目占以明为吉星不欲团圆团圆则兵起暗则臣干命之咎亦不欲开阖无常当有白衣称命於山谷者五星犯奎人主爽德权臣擅命不可禁者王者宗祀不洁则奎动摇若焰焰有光则近臣谋上之应亦庶人饥饉之厄大白守奎胡貉之忧可以伐之荧惑星守之则有水之忧连以三年填星岁星守之中国之利外国不利可以兴师动衆斩断无道】娄为聚衆【正义娄三星为苑牧养牺牲以共祭祀亦曰聚衆占动摇则衆兵聚金火守之兵起也】胃为天仓【正义胃三星昂七星

毕八星为大梁於辰在酉赵之分野谓主仓廩五谷之府也占明则天下和平五谷丰稔不然反是】其南衆星曰廕积【集解如淳曰葛藁积为廕也正义葛藁六星在天苑西主积藁草者不见则牛马暴死火守灾起也】昴曰髦头胡星也为白衣会【正义昴七星为髦头胡星亦为狱事明天下狱讼平暗为刑罚滥六星明与大星等大水且至其兵大起摇动若跳跃者胡兵大起一星不见皆兵之忧也】毕曰罕车为边兵主弋猎【索隐尔雅云浊谓之毕也孙炎为掩兔之毕或呼为浊因以名星也正义毕八星曰罕车为边兵主弋猎其大星曰天高一曰边将主四夷之尉也星明大天下安远夷入贡失色边乱毕动兵起月宿则多雨毛萸云毕所谓掩兔也】其大星旁小星为附耳附耳摇动有谗乱臣在侧【正义附耳一星属毕大星之下次天高东南隅主为人主听得失伺???过星明中国微边寇警移动则谗佞行入毕国起兵】昴毕间为天街其陰陰国阳阳国【集解孟康曰陰西南坤维河山已北国阳河山已南国索隐元命包云毕为天阶尔雅云大梁昴孙炎云毕昴之间日月五星出入要道若津梁正义天街三星在毕昴间主国界也街南为华夏之国街北为夷狄之国土金守胡兵入也】参为白虎【正义觜三星参三星外四星为实沉於辰在申魏之分野为白虎形也】三星直者是为衡石【集解孟康曰参三星者白虎宿中西直似称衡】下有三星兑曰罚为斩艾事【集解孟康曰在参间上小下大故曰鋭晋灼曰三星少斜列无锐形正义罚亦作伐春秋运斗枢云参伐事主斩艾】其外四星左右肩股也小三星隅置曰觜觿为虎首主葆旅事【集解如淳曰关中俗谓桑榆孽生为葆晋灼曰葆菜也野生曰旅今之饥民采旅生也索隐姚氏案宋均云葆守也旅犹军旅也言佐参伐以斩除凶也正义觜子思反觿胡规反葆音保觿觿为虎首主收斂葆旅事也葆旅野生之可食者占金木来守国易政灾起也】其南有四星曰天厠【正义天厠四星在屏东主溷也占色黄吉青与白皆凶不见则人寝疾】厠下一星曰天矢矢黄则吉青白黑凶【正义天矢一星在厠南占与天厠同】其西有句曲【正义句音钩】九星三处罗一曰天旗【正义参旗九星在参西天旗也指麾远近以从命者王者斩伐当理则天旗曲直理顺不然则兵动於外可以忧之若明而稀则边寇将动不然则不】二曰天苑【正义天苑十六星如环状在毕南天子养禽兽之所稀暗则多死亡】三曰九斿【集解徐广曰音流正义九斿九星在玉井西南天子之兵旗所以导军进退亦领州列邦并不欲摇动摇动则九州分散人民失业信命亦不通於中国忧金火守之乱起也】其东有大星曰狼狼角变色多盗贼【正义狼一星参东南狼为野将主侵掠占非其处则人相食色黄白而明吉赤角兵起金火守亦如之】下有四星曰弧直狼【正义弧九星在狼东南天之弓也以伐叛怀远又主备贼盗知奸邪者弧矢向狼动移多盗明大变色亦如之矢不直狼多盗引满则天下尽兵也】狼比地有大星曰南极老人老人见治安不见兵起常以秋分时候之于南郊附耳入毕中兵起【集解晋灼曰比地近地也正义老人一星在弧南一曰南极为老人主寿命延长之应常以秋分之曙见於景春分之夕见於丁见则国长命故谓之壽昌天下安寧不见人主忧也】

北宫玄武【索隐文耀鉤云北宫黑帝其精玄武尔雅云玄枵虚也又云北陆虚也解者以陆为道孙炎曰陆中也北方之宿中也正义南斗六星牵牛六星并北宫玄武之宿】虚危【正义虚二星危三星为玄枵於辰在子齐之分野虚主死丧哭泣事又为邑居庙堂祭祀祷祝之事亦天之冢宰主平理天下覆藏万物占动则有死丧哭泣之应火守则天子将兵水守则人饥饉金守臣下兵起危为宗庙祀事主天府天市架屋占动则有土功火守天下兵水守下谋

上也】危为盖屋【索隐宋均云危上一星高旁两星隋下似乎盖屋也正义盖屋二星在危南主天子所居宫室之官也占金火守入国兵起孛尤甚危为架屋盖屋自有星恐文误也】虚为哭泣之事【索隐姚氏案荆州占以为其宿二星南星主哭泣虚中六星不欲明明则有大丧也】其南有众星曰羽林天军【正义羽林四十五星三三而聚散在垒壁南天军也亦天宿卫主兵革不见天下乱金火水入军起也】军西为垒或曰钺【正义垒壁陈十三星横列在营室南天军之垣垒占五星入皆兵起将军死也】旁有一大星为北落北落若微亡军星动角益希及五星犯北落入军军起火金水尤甚火军忧水患木土军吉【集解駸案汉书音义曰木星土星入北落则吉也正义北落师门一星在羽林西南天军之门也长安城北落门以象此也主非常以候兵占明则军安微弱则兵起金火守有兵为虏犯塞土木则吉】危东六星两两相比曰司空【正义比音鼻比近也危东两两相比者是司命等星也司空唯一星耳又不在危东恐命字误为空也司命二星在虚北主丧送司禄二星在司命北主官司危二星在司禄北主危亡司非二星在危北主????过皆冥司之职占大为君忧常则吉也】营室为清庙曰离宫阁道【索隐元命包云营室十星埏陶精类始立纪纲包物为室又尔雅云营室谓之定郭璞云定正也天下作宫室皆以营室中为正也荆州占云阁道王良旗也有六星】汉中四星曰天驷【索隐元命包云汉中四星曰骑一曰天驷也】旁一星曰王良王良策马车骑满野【索隐春秋合诚图云王良主天马也正义王良五星在奎北河中天子奉御官也其动策马则兵骑满野客星守之则津桥不通金火守入皆兵之忧也策一星在王良前主天子仆也占以动摇移易在王良前或居马後则为策马策马而兵动也按豫章周腾字叔达南昌人为侍御史桓帝当南郊平明应出腾仰观曰夫王者象星今宫中星及策马星悉不动上明日必不出至四更皇太子卒遂止也】旁有八星绝汉曰天潢天潢旁江星江星动人涉水【索隐元命包曰潢主河渠所以度神通四方宋均云天潢天津也津凑也主计度也正义天江四星在尾北主太阴也不欲明明而动水暴出其星明大水不禁也】杵臼四星在危南【正义杵臼三星在丈人星旁主军粮占正下直白吉与白不相当军粮绝也白星在南主春其占覆则岁大饥仰则大熟也】匏瓜有青黑星守之鱼盐贵【索隐荆州占云匏瓜一名天鸡在河鼓东匏瓜明则岁大熟也正义匏音白包反匏瓜五星在离珠北天子果园占明大光润岁熟不则包果之实不登客守鱼盐贵也】南斗为庙【正义南斗六星在南也】其北建星建星者旗也【正义建六星在斗北临黄道天之都关也斗建之间七曜之道亦主旗轸占动摇则人劳不然则不月晕蛟龙见牛马疫月五星犯守大臣相谋为关梁不通及大水也】牵牛为牺牲【正义牵牛为牺牲亦为关梁其北二星一曰即路一曰聚火又上一星主道路次二星主关梁次三星主南越占明大关梁通不明不通天下牛疫死移入汉中天下乃乱也】其北河鼓河鼓大星上将左右左右将【索隐尔雅云河鼓谓之牵牛孙炎云河鼓之旗十二星在牵牛北故或名河鼓为牵牛也正义河鼓三星在牵牛北主军鼓盖天子三将军中央大星大将军其南左星左将军其北右星右将军所以备关梁而拒难也占明大光润将军吉动摇差戾乱兵起直将有功曲则将失计也自昔传牵牛织女七月七日相见此星也】婺女【索隐尔雅云须女谓之务女或作婺字正义须女四星亦婺女天少府也南斗牵牛须女皆为星纪於辰在丑越之分野而斗牛为吴之分野也须女贱妾之称妇职之卑者主布帛裁制嫁娶占水守之万物不成火守布帛贵人多死土守有女丧金守兵起也】其北织女织女天女孙也【集解徐广曰孙一作名索隐荆州占云织女一名天女天子女也正义织女三星在河北天纪东天女也主果蓏丝帛珍宝占王者至孝於神明则三星俱明不然则暗而微天

下女工废明则理大星怒而角布帛踊贵不见则兵起晋书天文志云晋太史令陈卓总甘石巫咸三家所着星图大凡二百八十三官一千四百六十四星以为定纪今略其昭昭者以备天官云】

察日月之行以揆岁星顺逆【索隐姚氏案天官占云岁星一曰应星一曰经星一曰纪星物理理论云岁行一次谓之岁星则十二岁而星一周天也正义晋灼云太岁在四仲则岁行三宿太岁在四孟四季则岁行二宿二八十六三四十二而行二十八宿十二岁而周天】曰东方木主春日甲乙义失者罚出岁星【正义天官云岁星者东方木之精苍帝之象也其色明而内黄天下安寧夫岁星欲春不动动则农废岁星赢缩以其舍命国所在之国不可伐可以罚人失次则民多病见则喜其所居国人主有福不可以摇动人主怒无光仁道失岁星顺行仁德加也岁星农官主五谷天文志云春日甲乙四时春也五常仁五事貌也人主仁亏貌失逆时令伤木气则罚见岁星】岁星赢缩以其舍命国所在国不可伐可以罚人【索隐案天文志曰凡五星早出为赢赢为客晚出为缩缩为主人五星赢缩必有天应见杓也正义舍所止宿也命名也】其趋舍而前曰赢【索隐趋音聚谓促也】退舍曰缩赢其国有兵不复缩其国有忧将亡【正义将音子匠反】国倾败其所在五星皆从而聚於一舍其下之国可以义致天下【索隐汉高帝元年五星皆聚东井天文志云其年岁星在东井故四星从而聚也】以摄提格岁【索隐太岁在寅岁星正月晨出东方按尔雅岁在寅为摄提格李巡云言万物承阳起故曰摄提格格起也】岁陰左行在寅岁星右转居丑正月与斗牵牛晨出东方名曰监德【索隐岁星在寅正月晨见东方之名已下皆出石氏星经文云星在斗牵牛失次应见於杓也汉书天文志则载甘氏及太初星历所在之宿不同也】色苍苍有光其失次有应见柳岁早水晚早岁星出东行十二度百日而止反逆行逆行八度百日复东行岁行三十度十六分度之七率日行十二分度之一十二岁而周天出常东方以晨入於西方用昏单阏岁【索隐在卯也岁星二月晨出东方尔雅云卯为单阏李巡云阳气推万物而起故曰单阏单尽也阏止也】岁陰在卯星居子以二月与婺女虚危晨出曰降入【索隐即岁星二月晨见东方之名其余準此】大有光其失次有应见张名曰降入其岁大水执徐岁【索隐尔雅辰为执徐李巡云伏蛰之物皆振舒而出故曰执徐执蛰也徐舒也】岁陰在辰星居亥以三月居与营室东壁晨出曰青章青青甚章其失次有应见轸曰青章岁早早晚水大荒骆岁【索隐尔雅云在巳为大荒骆姚氏云言万物皆炽盛而大出霍然落落故曰荒骆也】岁陰在巳星居戌以四月与奎娄胃昂晨出曰跽踵【集解徐广曰一曰路嶂索隐天文志作路?字诘云?今作踵也正义跽白边反踵之勇反】熊熊赤色有光其失次有应见亢敦牂岁【索隐尔雅云在午为敦牂孙炎云敦盛也牂壮也言万物盛壮韦昭云敦音顿】岁陰在午星居酉以五月与胃昂毕晨出曰开明【集解徐广曰一曰天津索隐天文志作啓明】炎炎有光【正义炎盐验反】偃兵唯利公王不利治兵其失次有应见房岁早早晚水叶洽岁【索隐尔雅云在未为叶洽李巡云阳气欲化万物故曰协洽协和也洽合也】岁陰在未星居申以六月与觜觿【正义觜子斯反觿胡规反】参晨出曰长列昭昭有光利行兵其失次有应见箕涿滩岁【索隐尔雅云在申为涿滩李巡云涿滩物吐秀倾垂之貌涿他昆反滩他丹反】岁陰在申星居未以七月与东井舆鬼晨出曰天音昭昭白其失次有应见牵牛作鄂岁【索隐尔雅在西为作鄂李巡云作鄂皆物芒枝起之貌鄂音愕案下文云作作有芒则李巡解亦近天文志作諮音而恪反与史记及尔雅并异】岁陰在西星居午以八月与柳七星张晨出曰为长

王作作有芒国其昌熟谷其失次有应见危曰大章有旱而昌有女丧民疾阉茂岁【索隐尔雅云在戌曰阉茂孙炎云万物皆蔽冒故曰阉茂阉蔽也茂冒也天文志作掩茂】岁阴在戌星居巳以九月与翼轸晨出曰天睢【索隐刘氏音吁唯反】白色大明其失次有应见东壁岁水女丧大渊献岁【索隐尔雅云在亥为大渊献孙炎云渊深也大献万物於深谓盖藏之於外也】岁阴在亥星居辰以十月与角亢晨出曰大章【集解徐广曰一曰天皇索隐天文志亦作天皇】苍苍然星若跃而阴出旦是谓正平起师旅其率必武其国有德将有四海其失次有应见娄困敦岁【索隐尔雅在子为困敦孙炎云困敦混沌也言万物初萌混沌於黄泉之下】岁阴在子星居卯以十一月与氐房心晨出曰天泉玄色甚明江池其昌不利起兵其失次有应在昴赤奋若岁【索隐尔雅云在丑为赤奋若李巡云言阳气奋迅若顺也】岁阴在丑星居寅以十二月与尾箕晨出曰天皓【索隐音昊汉志亦作昊】黧然黑色甚明【索隐黧音乌闲反】其失次有应见参当居不居居之又左右摇未当去去之与他星会其国凶所居久国有德厚其角动乍小乍大若色数变人主有忧其失次舍以下进而东北三月生天棓长四尺末兑【索隐天文志此皆甘氏星经文而志又兼载石氏此皆不取石氏名申甘氏名德正义棓音蒲讲反岁星之精散而为天枪天棓天冲天猱国皇天搀及登天荆真若天?天垣苍彗皆以应凶灾也天棓者一名觉星本类星末锐长四丈出东北方西方其出则天下兵争也】进而东南三月生彗星长二丈类彗【正义天彗者一名扫星本类星末类彗小者数寸长长或竟天而体无光假日之光故夕见则东指晨见则西指若日南北皆随日光而指光芒所及为灾变见则兵起除旧布新彗所指之处弱也】退而西北三月生天搀长四丈末兑【集解韦昭曰搀音参差之参正义搀楚咸反天搀者在西南长四丈锐京房云天搀为兵赤地千里枯骨籍籍天文志云天搀主兵乱也】退而西南三月生天枪长数丈两头兑【正义枪楚行反天枪者长数丈两头锐出西南方其见不过三月必有破国乱君伏死其辜天文志云孝文时天枪夕出西南占曰为兵丧乱其六年十一月匈奴入上郡云中汉起兵以卫京师也】谨视其所见之国不可举事用兵其出如浮如沉其国有土功如沈如浮其野亡色赤而有角其所居国昌迎【集解徐广曰迎一作御】角而战者不胜星色赤黄而沈所居野大穰【正义穰人羊反丰熟也】色青白而赤灰所居野有忧岁星入月其野有逐相与太白鬪【集解韦昭曰星相击为鬪】其野有破军岁星一曰摄提曰重华曰应星曰纪星营室为清庙岁星庙也

察刚气以处荧惑【集解徐广曰刚一作罚索隐案姚氏引广雅荧惑谓之执法天官占云荧惑方伯象司察妖孽则徐云察罚气为是春秋纬文耀钩云赤帝熛怒之神为荧惑位南方礼失则罚出晋灼云常以十月入太微受制而出行列宿司无道出入无常也】曰南方火主夏日丙丁礼失罚出荧惑荧惑失行是也出则有兵入则兵散以其舍命国荧惑荧惑为勃乱残贼疾丧饥兵【集解徐广曰以下云荧惑为理外则理兵内则理政正义天官占云荧惑为执法之星其行无常以其舍命国为残贼为疾为丧为饥为兵环绕勾曲芒角动摇乍前乍後其殃逾甚荧惑主死丧大鸿胪之象主甲兵大司马之义伺骄奢乱孽执法官也其精为风伯惑童儿歌謡嬉戏也】反道二舍以上居之三月有殃五月受兵七月半亡地九月太半亡地因与俱出入国絶祀居之殃还至虽大当小【索隐案还音旋旋疾也若荧惑反道居其舍所致殃祸速疾则虽大反小】久而至当小反大【索隐久谓行迟也如此祸小反大言久腊毒也】其南为丈夫北为女子丧【索隐宋均云荧惑守舆鬼南为丈夫受其咎北则女子受其凶

也】若角动绕环之及乍前乍後左右殃益大与他星鬪【正义凡五星鬪皆为战鬪兵不在外则为内乱鬪谓光芒相及】光相逮为害不相逮不害五星皆从而聚于一舍其下国可以礼致天下【正义三星若合是谓惊立绝行其国外内有兵与丧人民饥乏改立侯王四星若合是为太阳其国兵丧暴起君子忧小人流五星若合是谓易行有德者受庆奄有四方无德者受殃乃以死亡也】法出东行十六舍而止逆行二舍六旬复东行自所止数十舍十月而入西方伏【集解晋灼曰伏不见】行五月出东方其出西方曰反明主命者恶之东行急一日行一度半其行东西南北疾也兵各聚其下用战顺之胜逆之败荧惑从太白军忧离之军却出太白陰有分军行其阳有偏将战当其行太白逮之破军杀将【索隐宋均云太白宿主军来冲拒也】其入守犯太微【集解孟康曰犯七寸已内光芒相及也韦昭曰自下触之曰犯居其宿曰守】轩辕营室主命恶之心为明堂荧惑庙也谨候此

历斗之会以定填星之位【索隐晋灼曰常以甲辰之元始建斗岁行一宿二十八岁而周天广雅曰填星一名地侯文耀钩曰填黄帝含枢纽之精其体旋玑中宿之分也】曰中央土主季夏日戊巳黄帝主德女主象也岁填一宿其所居国吉未当居而居若已去而复还还居之其国得土不乃得女若当居而不居既已居之又西东去其国失土不乃失女不可举事用兵其居久其国福厚易福薄【集解徐广曰易犹轻速也】其一名曰地侯主岁岁行十二度百十二分度之五日行二十八分度之一二十八岁周天其所居五星皆从而聚于一舍其下之国可重致天下【正义重音逐陇反言五星皆从填星其下之国倚重而致天下以填主本土故也】礼德义杀刑尽失而填星乃为之动摇嬴为王不宁其缩有军不复填星其色黄光芒音曰黄钟宫其失次上二三宿曰嬴有主命不成不乃大水失次下二三宿曰缩有后戚其岁不复不乃天裂若地动斗为文太室填星庙天子之星也木星与土合为内乱饥主勿用战败水则变谋而更事火为旱金为白衣会【正义星经云凡五星木与土合为内乱饥与水合为变谋更事与火合为饥为旱与金合为白衣会也】若木金在南曰牝牡年谷熟金在北岁偏无【索隐晋灼曰岁阳也太白阴也故曰牝牡正义星经云金在南木在北名曰牝牡年谷大熟金在北木在南其年或有或无】火与水合为焯与金合为铄为丧皆不可举事用兵大败土为忧主孽卿【集解晋灼曰火入水故曰焯索隐案谓火与水俱从填星合也正义焯忽内反星经凡五星火与水合为焯用兵举事大败与金合为铄为丧不可举事用兵从军为忧离之军却与土合为忧主孽卿与木合饥战败也索隐文耀钩云水土合则成鑪冶鑪冶成则火兴火兴则土之子焯金成销铄金铄则土无子无子辅父则益妖孽故子忧也】大饥战败为北军【正义为北军北也凡军败曰北】军困举事大败土与水合穰而拥阨【正义拥於拱反阨乌葛反】有覆军【集解徐广曰或云木火土三星若合是谓惊立绝行】其国不可举事出亡地入得地金为疾为内兵亡地三星若合其宿地国外内有兵与丧改立公王四星合兵丧并起君子忧小人流五星合是谓易行有德受庆改立大人奄有四方子孙蕃昌无德受殃若亡五星皆大其事亦大皆小事亦小蚤出者为嬴嬴者为客晚出者为缩缩者为主人必有天应见於杓星同舍为合相凌为鬪【集解孟康曰凌相冒占过也韦昭曰突掩为凌】七寸以内必之矣【索隐韦昭云必有祸也】五星色白圜为丧旱赤圜则中不平为兵青圜为忧水黑圜为疾多死黄圜则吉赤角犯我城黄角地之争白角哭泣之声青角有兵忧黑角则水意【集解徐广曰一作志】行穷兵之所终五星同色天下偃兵百姓宁昌春风秋雨冬寒夏暑动摇常以此填星出百二十日而逆西行西行百二十日反东行见三百三十日而入

三十日复出东方太岁在甲寅镇星在东壁故在营室

察日行以处位太白【索隐太白辰出东方曰啓明故察日行以处太白之位韩诗云太白晨出东方为啓明昏见西方为长庚又孙炎注尔雅亦以为晨出东方高三丈命曰啓明昏见西方高三舍命曰太白正义晋灼云常以正月甲寅与荧惑晨出东方二百四十日而入又出西方二百四十日而入入三十五日而复出东方出以寅戌入以丑未天官占云太白者西方金之精白帝之子上公大将军之象也一名殷星一名大正一名荧星一名官星一名梁星一名灭星一名大器一名大衰一名大爽径一百里天文志云其日庚辛四时秋也五常义也五事言也人主义亏言失逆时令伤金气罚见太白春见东方以晨秋见西方以夕也】曰西方秋司兵月行及天矢【正义太白五芒出早为月蚀晚为天矢及彗其精散为天杵天棹伏灵大败司奸天狗贼星天残卒起星是古历星若竹彗墙星?星白藿皆以示变也】曰庚辛主杀杀失者罚出太白太白失行以其舍命国其出行十八舍二百四十日而入入东方伏行十一舍百三十日其入西方伏行三舍十六日而出当出不出当入不入是谓失舍不有破军必有国君之篡其纪上元【正义其纪上元是星古历初起上元之法也】以摄提格之岁与营室晨出东方至角而入与营室夕出西方至角而入与角晨出入毕与角夕出入毕与毕晨出入箕与毕夕出入箕与箕晨出入柳与箕夕出入柳与柳晨出入营室与柳夕出入营室凡出入东西各五为八岁二百三十日【集解徐广曰一云三十二日】复与营室晨出东方其大率岁一周天【索隐案上元是古历之名言用上元纪历法则摄提岁而太白与营室晨出东方至角而入与营室夕出西方至角而入凡出入东西各五为八岁二百三十日复与营室晨出东方大率岁一周天也】其始出东方行迟率日半度一百二十日必逆行一二舍上极而反东行行日一度半一百二十日入其庠近日曰明星柔高远日曰大器【集解徐广曰器一作变】刚其始出西行疾率日一度半百二十日上极而行迟日半度百二十日旦入必逆行一二舍而入其庠近日曰太白柔高远日曰大相刚出以辰戌入以丑未当出不出未当入而入天下偃兵兵在外入未当出而出当入而不入下起兵有破国其当期出也其国昌其出东为东入东为北方出西为西入西为南方所居久其乡利疾【集解苏林曰疾过也】其乡凶出西逆行至东正西国吉出东至西正东国吉其出不经天经天天下革政【索隐孟康曰谓出东入西出西入东也太白阴星出东当伏东出西当伏西过午为经天又晋灼曰日阳也日出则星没太白昼见午上为经天也】小以角动兵起始出大後小兵弱出小後大兵强出高用兵深吉浅凶庠浅吉深凶日方南金居其南日方北金居其北曰赢【正义郑元云方犹向也谓昼漏半而置土圭表陰阳审其南北也影短於土圭谓之日南是也是地於日为近南也长於土圭谓之日北是地於日为近北也凡日影於地千里而差一寸周礼云日南则影短多暑日北则影长多寒孟康云金谓太白也影日中之影也】侯王不宁用兵进吉退凶日方南金居其北日方北金居其南曰缩侯王有忧用兵退吉进凶用兵象太白太白行疾疾行迟迟行角敢战动摇躁躁圜以静静顺角所指吉反之皆凶出则出兵入则入兵赤角有战白角有丧黑圜角忧有水事青圜小角忧有木事黄圜和角有土事有年【正义太白星圆天下和平若芒角有土事有年谓丰熟也】其已出三日而复有微入入三日乃复盛出是谓奕【集解晋灼曰奕退之不进索隐奕音奴乱反】其下国有军败将北其已入三日又复微出出三日而复盛入其下国有忧师有粮食兵革遗人用之【正义遗唯季反】卒虽衆将为人虜其出西失行外国败其出东失行中国败其色大圜黄?【音泽】可为好事其圜大赤兵盛不战太白白

比狼赤比心黄比参左肩苍比参右肩黑比奎大星【正义比卑耳反下同比类也晋书天文志云凡五星有色大小不同各依其行而应时节色变有类凡青比参左肩赤比心大星黄比参右肩白比狼星黑比奎大星不失本色而应其四时者吉色害其行凶也参色林反下同】五星皆从太白而聚乎一舍其下之国可以兵从天下【正义晋书天文志云凡五星所出所行所直之辰其国为得位者岁星以德荧惑为礼镇星有福太白兵强辰阴阳和所行所直之辰顺其色而角者胜其色害者败居实有得居虚无得也色胜位行胜色行得尽胜之】居实有得也居虚无得也【索隐实谓星所合居之宿虚谓羸缩也】行胜色【集解晋灼曰太白行得度者胜色也正义胜音升剩反下同】色胜位有位胜无位有色胜无色行得尽胜之【集解晋灼曰行应天度唯有色得位行尽胜之行重而色位轻星经得字作德】出而留桑榆间【集解晋灼曰行迟而下也凡望云气平望在桑榆上者余二千里】疾其下国【正义疾汉书作病也】上而疾未尽其日过参天【集解晋灼曰三分天过其一此在戌酉之间】疾其对国【集解孟康曰谓出东入西出西入东】上复下下复上有反将其入月将戮金木星合光其下战不合兵虽起而不鬪合相毁野有破军出西方昏而出陰陰兵强暮食出小弱夜半出中弱鸡鸣出大弱是谓陰陷於阳其在东方乘明而出阳阳兵之强鸡鸣出小弱夜半出中弱昏出大弱是谓阳陷於陰太白伏也以出兵兵有殃其出卯南南胜北方出卯北北胜南方正在卯东国利出西北北胜南方出西南南胜北方正在酉西国胜其与列星相犯小战五星大战其相犯太白出其南南国败出其北北国败行疾武不行文色白五芒出蚤为月蚀晚为天矢及彗星将发其国出东为德举事左之迎之吉出西为刑举事右之背之吉反之皆凶太白光见景战胜昼见而经天是谓争明强国弱小国强女主昌亢为疏庙太白庙也太白大臣也其号上公其他名殷星太正营星观星宫星明星大衰大泽终星大相天浩序星月纬大司马位谨候此

察日辰之会以治辰星之位【索隐即正四时以治辰星之位也皇甫谧曰辰星一名鼯星或曰鉤星元命包曰北方辰星水生物布其纪故辰星理四时宋均曰辰星正四时之法得与北辰同名也正义晋灼曰常以二月春分见奎娄五月夏至见东井八月秋分见角亢十一月冬至见牵牛出以辰戌入以丑未二旬而入晨 之东方夕 之西方也】曰北方水太陰之精主冬日壬癸刑失者罚出辰星【正义天官占云辰星北水之精黑帝之子宰相之祥也一名细极一名鉤星一名□星一名伺祠径一百里亦偏将廷尉象也天文志云其日壬癸四时冬也五常智也五事听也人主智亏听失逆时令伤水气则罚见辰星也】以其宿命国是正四时仲春春分夕出郊奎娄胃东五舍为齐仲夏夏至夕出郊东井舆鬼柳东七舍为楚仲秋秋分夕出郊角亢氐房东四舍为汉仲冬冬至晨出郊东方与尾箕斗牵牛俱西为中国其出入常以辰戌丑未其蚤为月蚀晚为彗星及天矢【集解孟康曰辰星月相凌不见者则所蚀也索隐宋均云星辰与月同精月为大臣先期而出是躁也失则当诛故月蚀者所以为灾祥也辰星阴也彗亦阴陰谋未成故晚出也张晏曰彗所以除旧布新】其时宜效不效为失【正义效见也言宜见不见为失罚之也】追兵在外不战一时不出其时不和四时不出天下大饥其当效而出也色白为旱黄为五谷熟赤为兵黑为水出东方大而白有兵於外解常在东方其赤中国胜其西而赤外国利无兵於外而赤兵起其与太白俱出东方皆赤而角外国大败中国胜其与太白俱出西方皆赤而角外国利五星分天之中积於东方中国利积於西方外国用者利五星皆从辰星而聚於一舍其所舍之国可以法致天下辰星不出太白为客其

出太白为主出而与太白不相从野虽有军不战出东方太白出西方若出西方太白出东方为格野虽有兵不战【索隐谓辰星出西方辰水也太白出东方太白金也水生金母子不相从故野有军不战今母子各出一方故为格格谓不和同故野虽有兵不战也】失其时而出为当寒反温当温反寒当出不出是谓击卒兵大起其入太白中而上出破军杀将客军胜下出客亡地辰星来抵太白太白不去将死正旗上出破军杀将客胜下出客亡地视旗所指以命破军【索隐案旗盖太白芒角似旌旗正义旗星名有九星言辰星上则破军杀将客胜也】其绕环太白若与鬬大战客胜免过太白【索隐案广雅云辰星谓之免星则辰星之别名免或作髦也】间可?劒【集解苏林曰?音函函容也其间可容一劒索隐案苏所说则?字本有函音故字从咸也】小战客胜免居太白前军罢出太白左小战摩太白有数万人战主人吏死出太白右去三尺军急约战青角兵忧黑角水赤行穷兵之所终免七命曰小正辰星天搀安周星细爽能星鈎星【索隐谓免星凡有七名命者名也小正一也辰星二也天搀三也安周星四也细爽五也能星六也鈎星七也】其色黄而小出而易处天下之文变而不善矣免五色青圜忧白圜丧赤圜中不平黑圜吉赤角犯我城黄角地之争白角号泣之声其出东方行四舍四十八日其数二十日而反入於东方其出西方行四舍四十八日其数二十日而反入於西方其一候之营室角毕箕柳出房心间地动辰星之色春青黄夏赤白秋青白而岁熟冬黄而不明即变其色其时不昌春不见大风秋则不实夏不见有六十日之旱月蚀秋不见有兵春则不生冬不见陰雨六十日有流邑夏则不长七星为员官辰星庙蚩夷星也

角亢氐兗州房心豫州尾箕幽州斗江湖牵牛婺女扬州虚危青州营室至东壁并州奎娄胃徐州昂毕冀州觜参益州【正义括地志云汉武帝置十三州改梁州为益州广汉广汉今益州咎县是也分今河内上党云中然按星经益州魏地毕觜参之分今河内上党云中是未详也】东井舆鬼雍州柳七星张三河翼轸荆州

两军相当日晕【集解如淳曰晕读曰运】晕等力钧厚长大有胜薄短小无胜重抱大破无抱为和背不和为分离相去直为自立立侯王指晕若曰杀将负且戴有喜圜在中中胜在外外胜青外赤中以和相去赤外青中以恶相去气晕先至而後去居军胜先至先去前利後病後至後去前病後利後至先去前後皆病居军不胜见而去其发疾虽胜无功见半日以上功大白虹屈短【集解李奇曰屈或为尾也韦昭曰短而直】上下兑有者下大流血日晕制胜近期三十日远期六十日其食食所不利复生生所利而食益尽为主位以其直及日所宿加以日时用命其国也月行中道安宁和平陰间多水陰事外北三尺陰星北三尺【索隐案中道房室星之中间也房有四星若人之房三间有四表然故曰房南为阳间北为陰间则中道房星之中间也故房是日月五星之常行道然黄道亦经房星若月行得中道故陰阳和平若行陰间多陰事阳间则人主骄恣若历阴星阳星之南迫太阴太阳之道则有大水若兵及大旱若丧也太阳亦在阳间之南各三尺也】太陰大水兵阳间骄恣阳星多暴狱太阳大旱丧也【索隐太陰太阳皆道也月行近之故有水旱兵丧也】角天门十月为四月十一月为五月十二月为六月水发近三尺远五尺【索隐谓月行入角与天门若十月犯之当为来年四月成灾十一月则主五月也】犯四辅辅臣诛【索隐案谓月犯房星也四辅房四星也房以辅心故曰四辅也】行南北河以陰阳言旱水兵丧【正义南河三星北河三星若月行北河以阴则水兵南河以阳则旱丧也】月蚀岁星其宿地饥若亡荧惑也乱填星也下犯上太白

也强国以战败辰星也女乱【正义孟康云凡星入月见月中为星蚀月月掩星星灭为月蚀星也】食大角【集解徐广曰一云食于大角正义大角一星在两摄提间人君之象也】主命者恶之心则为内贼乱也列星其宿地忧【索隐谓月蚀列星二十八宿当其分地有忧忧谓兵及丧也】月食始日五月者六六月者五五月复六六月者一而五月者凡五百一十三月而复始【索隐始日谓历始起之日也依此文计唯有一百二十一月与元数甚为悬校既无太初历术不可得而推定今以汉志三统历法计则五月者七六月者一又五月者一六月者五五月者一凡一百三十五月而复始耳或术家各异或传写错谬故此不同无以明知也】故月蚀常也日蚀为不臧也甲乙四海之外日月不占【集解晋灼曰海外远甲乙日时不以占】丙丁江淮海岱也戊巳中州河济也庚辛华山以西壬癸恒山以北日蚀国君月蚀将相当之

国皇星【正义国皇星者大而赤类南极老人去地三丈如炬火见则内外有兵丧之难】大而赤【集解孟康曰岁星之精散所为也五星之精散为六十四变记不尽】状类南极【集解徐广曰南极老人星】所出其下起兵兵强其冲不利

昭明星【索隐案春秋合诚图云赤帝之精象如太白七芒释名为笔星气有一枝末锐似笔亦曰日华星也】大而白无角乍上乍下【集解孟康曰形如三足机机上有九彗上向荧惑之精】所出国起兵多变

五残星【索隐孟康云星表有青气如晕有毛填星之精也正义五残一名五锋出正东东方之分野状类辰星去地可六七丈见则五谷毁败之徵大臣诛亡之象】出正东东方之野其星状类辰星去地可六丈大【集解徐广曰大一作六】

贼星【集解孟康曰形如彗九尺太白之精正义天贼星者一名六贼出正南南方之野星去地可六丈大而赤数动有光出则祸合天下】出正南南方之野星去地可六丈大而赤数动有光

司危星【集解孟康曰星大而有尾两角荧惑之精也正义司危者出正西西方分野也大如太白去地可六丈见则以天子不义失国而豪杰起】出正西西方之野星去地可六丈大而白类太白

狱汉星【集解孟康曰青中赤表下有三彗纵横亦填星之精汉书天文志狱汉一名咸汉】出正北北方之野星去地可六丈大而赤数动察之中青此四野星所出出非其方其下有兵冲不利

四镇星所出四隅去地可四丈

地维咸光【正义四镇星出四隅去地可四丈地维咸光星亦出四隅去地可三丈若月始出所见下有乱者亡有德者昌也】亦出四隅去地可三丈若月始出所见下有乱乱者亡有德

者昌

烛星状如太白【集解孟康曰星上有三彗上出亦填星之精】其出也不行见则灭所烛者城邑乱

如星非星如云非云命曰归邪【集解李奇曰邪音蛇孟康曰星有两赤彗上向上有盖状如气下连星】归邪出必有归国者

星者金之散气本曰火【集解孟康曰星石也】星衆国吉少则凶汉者亦金之散气【索隐案水生於金散气即水气河图括地象曰河精为天汉也】其本曰水汉星多多水少则旱【集解孟康曰汉河汉也水生於金多少谓汉中星】其大经也

天鼓有音如雷非雷音在地而下及地其所往者兵发其下

天狗状如大奔星【集解孟康曰星有尾旁有短彗下有如狗形者亦太白之精】有声其下止地类狗所堕及炎火【索隐炎音艶】望之如火光炎炎冲天其下圜如数顷田处上兑者则有黄色千里破军杀将

格泽星者【索隐格泽一音鹤铎又音格泽格胡客反】如炎火之状黄白起地而上下大上兑其见也不种而获不有土功必有大害蚩尤之旗【集解孟康曰荧惑之精也晋灼曰吕氏春秋曰其色黄上白下】类彗而後曲象旗见则王者征伐四方

旬始出於北斗旁【集解徐广曰蚩尤也旬一作营】状如雄鸡其怒青黑象伏鼃【集解李奇曰怒当音帑晋灼曰帑雌也或曰怒色青】

枉矢类大流星虵行而仓黑望之如有毛羽然

长庚如一匹布着天【正义着音直略反】此星见兵起

星坠至地则石也【正义春秋云星陨如雨是也今吴郡西乡见有落星石其石天下多有也】河济之间时有坠星

天精而见景星景星者德星也其状无常常出於有道之国【集解孟康曰精明也有赤方气与青方气相连赤方中有两黄星青方中一黄星凡三星合为景星索隐韦昭云精谓青朗汉书作曜亦作晬郭璞注三苍云曜雨止无云也正义景星状如半月生於晦朔助月为明见则人君有德明圣之庆也】

凡望云气【正义春秋元命包云阴阳聚为云气也释名云云犹云衆盛也气犹飢然也有声即无形也】仰而望之三四百里平望在桑榆上余二千里登高而望之下属地者三千里云

气有兽居上者胜【正义胜音升剩反云雨气相敌也兵书云云或如雄鸡临城有城必降】自华以南气下黑上赤嵩高三河之郊气正赤恒山之北气下黑上青勃碣海岱之间气皆黑江淮之间气皆白徒气白土功气黄车气乍高乍下往往而聚骑气卑而布卒气抟【集解如淳曰抟专也或曰抟音徒端反】前卑而後高者疾前方而高後兑而卑者其气平者其行徐前高而後卑者不止而反气相遇者卑胜高【索隐遇音偶汉书作禺】兑胜方气来卑而循车通者【集解车通车辙也避汉武讳故曰通】不过三四日去之五六里见气来高七八尺者不过五六日去之十余二十余里见气来高丈余二丈者不过三四十日去之五六十里见稍云精白者其将悍其士怯其大根而前絶远者当战青白其前低者战胜其前赤而仰者战不胜

阵云如立垣杼云类杼轴【索隐姚氏案兵书云营上云气如织勿与战也】云传两端兑杓云如绳者居前亘天【索隐刘氏杓音时酌反说文音丁了反许慎注淮南云杓引也】其半半天其蜺者类阙旗故【索隐蜺音五结反亦作蜺音同】钩云句曲【正义句音古侯反】诸此云见以五色合占而泽?宓【正义崔豹古今注云黄帝与蚩尤战於涿鹿之野常有五色云气金枝玉叶止於帝上有花藹之象故因作华盖也京房易飞云视四方常有火云五色见其下贤人隐也青云润蔽日在西北为举贤良也】其见动人乃有占兵必起合鬬其直王朔所候决於日旁日旁云气人主象【正义洛书云有云象人青衣无手在日西天子之气】皆如其形以占故北夷之气如羣畜穹间【索隐邹氏云一作弓间天文志作弓字音穹盖谓以羶为间崇穹然而宋均云穹兽名亦异说也】南夷之气类舟舩幡旗大水处败军场破国之虚下有积钱【集解徐广曰古作泉字】金宝之上皆有气不可不察海旁蜃气象楼台广野气成宫阙然云气各象其山川人民所聚积【正义淮南子云土地各以类生人是故山气多勇泽气多瘠风气多聋林气多翳木气多偃石气多力险阻气多壽谷气多痺丘气多狂庙气多仁陵气多贪轻土多利足重土多迟清水音小浊水音大湍水人重中土多圣人皆象其气皆应其类也】故候息耗者入国邑视封疆田畴之正治【集解如淳曰蔡邕云麻田曰畴】城郭室屋门户之润泽次至车服畜产精华实息者吉虚耗者凶若烟非烟若云非云郁郁纷纷萧索轮囷是谓卿云【正义卿音庆】卿云见喜气也若雾非雾【索隐雾音如字一音蒙又亡遘反尔雅云天气下地不应曰雾言蒙昧不明也】衣冠而不濡见则其域被甲而趋雷电虹蜺辟历夜明者阳气之动者也春夏则发秋冬则藏故候者无不司之天开县物【集解孟康曰谓天裂而见物象天开示县象】地动坼絶【正义赵世家幽缪王迁五年代地动自乐徐以西北至平陰台屋墙垣大半坏地坼东西百三十步】山崩及徙川塞谿壅【集解徐广曰土雍曰壅音服駟案孟康曰谿谷也壅崩也苏林曰壅流也】水澹泽竭地长见象城郭门闾闾臬枯槁宫庙邸第人民所次謡俗车服观民饮食五谷草木观其所属仓府廩库四通之路六畜禽兽所产去就鱼鼃鸟鼠观其所处鬼哭若呼其人逢悟化言诚然【索隐悟迎也刘伯庄曰音五故反逢悟谓相逢而惊也悟亦作迂音同化当为讹字之误耳】

凡候岁美恶谨依岁始岁始或冬至日产气始萌腊明日人衆卒岁一会饮食发阳气故曰初岁正月旦王者岁首立春日四时之卒始也【索隐谓立春日在去年四时之终卒今年之始也】四始者候之日【正义谓正月旦岁之始时之始日之始月之始故云四始言以四时之日候岁吉凶也】而汉魏鲜【集解孟康曰人姓名作占候者】集腊明正月旦决八风风从

南方来大旱西南小旱西方有兵西北戎菽为【集解孟康曰戎菽胡豆也为成也索隐韦昭云戎菽大豆也又郭璞注尔雅亦云胡豆与孟康同】小雨【集解徐广曰一无此两字】趣兵【索隐趣音促谓风从西北来则戎菽成而又有小雨则其国趣兵起也】北方为中岁东北为上岁【集解韦昭曰岁大穰】东方大水东南民有疾疫岁恶故八风各与其冲对课多者为胜多胜少久胜亟疾胜徐旦至食为麦食至日昃为稷昃至餼为黍餼至下餼为菽下餼至日入为麻欲终日有雨有云有风有日【正义正月旦欲其终一日有风有日则一岁之中五谷丰熟无灾害也】当其时者深而多实无云有风日当其时浅而多实有云风无日当其时深而少实有日无云不风当其时者稼有败如食顷小败熟五斗米顷大败风复起有云其稼复起各以其时用云色占种其所宜其雨雪若寒岁恶是日光明听都邑人民之声声宫则岁善吉商则有兵徵旱羽水角岁恶或从正月旦比数两【索隐比音鼻律反数音疎举反谓以比数日以候一岁之雨以知丰穰也】率日食一升至七升而极【集解孟康曰月一日雨民有一升之食二日雨民有二升之食如此至七日】过之不占数至十二日日直其月占水旱【集解孟康曰月一日雨正月水】为其环城千里内占则其为天下候竟正月【集解孟康曰月三十日周天历二十八宿然後可占天下正义按月列宿日风云有变占其国并太岁所在则知其岁丰稔水旱饥馑也】月所离列宿【索隐韦昭云离历也】日风云占其国然必察太岁所在在金穰水毁木饥火旱此其大经也正月上甲风从东方宜蚕风从西方若旦黄云恶冬至短极县土炭【集解孟康曰先冬至三日县土炭於衡两端轻重适均冬至日阳气至则炭重夏至日阴气至则土重晋灼曰蔡邕律历记候钟律权土炭冬至阳气应黄钟通土炭轻而衡仰夏至阴气应蕤宾通土炭重而衡低进退先後五日之中】炭动鹿解角兰根出泉水跃略以知日至要决暑景岁星所在五谷逢昌其对为冲岁乃有殃【正义言暑景岁星行不失次则无灾异五谷逢其昌盛若暑景岁星行而失舍有所冲则岁乃有殃祸灾变也】

太史公曰自初生民以来世主曷尝不历日月星辰及至五家【索隐案谓五纪岁月日星辰历数各有一家颡学习之故曰五家也】三代【正义五家黄帝高阳高辛唐虞尧舜也三代夏殷周也言生民以来何曾不历日月星辰及至五帝三王亦於绍继而明天数阴阳也】绍而明之内冠带外夷狄分中国为十有二州仰则观象於天俯则法类於地天则有日月地则有阴阳天有五星地有五行天则有列宿地则有州域三光者阴阳之精气本在地而圣人统理之幽厉以往尚矣所见天变皆国殊窟穴家占物怪以合时应其文图籍祲祥不法【正义祲音机顾野王云祲祥吉凶之先见也按自古以来所见天变国皆异具所说不同及家占物怪用合时应者书其文并图籍凶吉并不可法则故孔子论六经记异事而说其所应不书变见之踪也】是以孔子论六经纪异而说不书至天道命不传传其人不待告【正义待须也言天道性命忽有志事可传授之则传其大指微妙自在天性不须深告语也】告非其人虽言不着【正义着作虑反着明也言天道性命告非其人虽为言说不得着明微妙晓其意也】昔之传天数者高辛之前重黎【正义左传云蔡墨曰少昊氏之子曰黎为火正号祝融即火行之官知天数】於唐虞羲和【正义羲氏和氏掌天地四时之官也】有夏昆吾【正义昆吾陆终之子虞翻云昆吾名樊为己姓封昆吾世本云昆吾卫是也】殷商巫咸【正义巫咸殷贤臣也本吴人冢在苏州常熟海隅山上子贤亦在此也】周室史佚苾弘【正义史佚周武王时太史尹佚也苾弘周灵王时大夫也】於宋子韦郑则裨竈【正义裨竈郑大夫也】

】在齐甘公【集解徐广曰或曰甘公名德也本是鲁人正义七录云楚人战国时作天文星占八卷】楚唐昧【正义莫葛反】赵尹臯魏石申【正义七录云石申魏人战国时作天文八卷也】夫天运三十岁一小变百年中变五百载大变三大变一纪三纪而大备此其大数也为国者必贵三五【索隐三五谓三十岁一小变五百岁一大变】上下各千岁然後天人之际续备太史公推古天变未有可考于今者盖略以春秋二百四十二年之间【正义谓从隐公元年至哀公十四年获麟也隐公十一年桓公十八年庄公三十一年闵公二年僖公三十三年文公十八年宣公十八年成公十八年襄公三十一年昭公三十二年定公十五年哀公十四年凡二百四十二年也】日蚀三十六【正义谓隐公三年二月乙巳桓公三年七月壬辰朔十七年十月朔庄公十八年三月朔二十五年六月辛未朔二十六年十二月癸亥朔三十年九月庚午朔僖公五年九月戊申朔十二年三月庚午朔十五年五月朔文公元年二月癸亥朔十五年六月辛卯朔宣公八年七月庚子朔十年四月丙辰朔十七年六月癸卯朔成公十六年六月丙辰朔十七年七月丁巳朔襄公十四年二月乙未朔十五年八月丁巳朔二十年十月丙辰朔二十一年九月庚戌朔十月庚辰朔二十三年二月癸酉朔二十四年七月甲子朔八月癸巳朔二十七年十二月乙亥朔昭公七年四月甲辰朔十五年六月丁巳朔十七年六月甲戌朔二十一年七月壬午朔二十二年十二月癸酉朔二十四年五月乙未朔三十年十二月辛亥朔定公五年三月辛亥朔十二年十一月丙寅朔十五年八月庚辰朔凡蚀三十六也】彗星三见【正义谓文公十四年七月有星入于北斗昭公十七年冬有星孛于大辰哀公十三年有星孛于东方】宋襄公时星陨如雨【正义谓僖公十五年正月戊申朔陨石于宋五也】天子微诸侯力政【集解徐广曰一作征】五伯代兴【正义赵岐注孟子云齐桓晋文秦穆宋襄楚庄也】更为主命自是之後衆暴寡大并小秦楚吴越夷狄也为强伯【正义秦祖非子初邑於秦地在西戎楚子鬻熊始封丹阳荆蛮吴太伯居吴周章因封吴号勾吴越祖少康之子初封於越以守禹祀地称东越皆戎狄之地故言夷狄也後秦穆楚庄吴阖闾越勾践皆得封为伯也】田氏篡齐【正义周安王二十三年康公卒田和并齐而立为齐侯】三家分晋【正义周安王二十六年魏武侯韩文侯赵敬侯共灭晋静而三分其地】并为战国争於攻取兵革更起城邑数屠因以饥馑疾疫焦苦臣主共忧患其察祲祥侯星气尤急近世十二诸侯七国相王【正义王于放反谓汉孝景帝三年吴王濞楚王戊赵王遂济南王辟光淄川王贤胶东王雄渠也】言从衡者继踵而臯唐甘石因时务论其书传故其占验凌杂米盐【正义凌杂交乱也米盐细碎也言臯唐甘石等因时务论其书传中灾异所记录者故其占验交乱细碎其语在汉书五行志中也】二十八舍主十二州【正义二十八舍谓东方角亢氐房心尾箕北方斗牛女虚危室壁西方奎娄胃昂毕觜参南方井鬼柳星张翼轸星经云角亢郑之分野兖州氐房心宋之分野豫州尾箕燕之分野幽州南斗牵牛吴越之分野扬州须女虚齐之分野青州危室壁卫之分野并州奎娄鲁之分野徐州胃昂赵之分野冀州毕觜参魏之分野益州东井舆鬼秦之分野雍州柳星张周之分野三河翼轸楚之分野荆州也】斗秉兼之【正义言北斗所建秉十二辰兼十二州二十八宿自古所用从来久远矣】所从来久矣秦之疆也候在太白占於狼弧【正义太白狼弧皆西方之星故秦占候也】吴楚之疆候在荧惑占於鸟衡【正义荧惑鸟衡皆南方之星故吴楚之占候也鸟衡柳星也一本作注张也】燕齐之疆候在辰星占於虚危【正义辰星虚危皆北方之星故燕齐占候也】宋郑之疆候在岁星占於房心【正义岁星房心皆东方之星故宋郑占候也】晋之疆亦候在辰星占於参罚【正义辰星参罚皆北方西方之星故晋占候也】及秦并吞

三晋燕代自河山以南者中国【正义河黄河也山华山也从华山及黄河以南为中国也】中国於四海内则在东南为阳【正义尔雅云九夷八狄七戎六蛮谓之四海之内中国从河山东南为阳也】阳则日岁星荧惑填星【正义日人质反填音鎮日阳也岁星属东方荧惑属南方填星属中央皆在南及东为阳也】占於街南毕主之【正义天街二星主毕昴主国界也街南为华夏之国街北为夷狄之国则毕星主阳也】其西北则胡貉月氏诸衣旃裘引弓之民为陰【正义貉音陌氏音支从河山西北及秦晋为陰也】陰则月太白辰星【正义月阴也太白属西方辰星属北方皆在北及西为陰也】占於街北昴主之【正义天街星北为夷狄之国则昴星主之阴也】故中国山川东北流其维首在陇蜀【正义言中国山及川东北流行若南山首在崑仑葱岭东北行连陇山至南山华山渡河东北尽碣石山黄河首起崑仑山渭水岷江发源出陇山皆东北东入渤海也】尾没于勃碣是以秦晋好用兵【集解韦昭曰秦晋西南维之北为阴犹与胡貉引弓之民同故好用兵】复占太白太白主中国而胡貉数侵掠【正义主犹领也入也星经云太白在北月在南中国败太白在南月在北中国不败也是狐貉数侵掠之也】独占辰星辰星出入躁疾常主夷狄其大经也此更为客主人【正义更格行反下同星经云辰星不出太白为客辰星出太白为主人辰星太白不相从虽有军不战辰星出东方太白出西方若辰星出西方太白出东方为格野虽有兵不战合宿乃战辰星入太白中五日及入而上出破军杀将客胜不出客亡地视旗所指】荧惑为孛外则理兵内则理政故曰虽有明天子必视荧惑所在【索隐此案春秋纬文耀鉤故云故曰也】诸侯更强时菑异记无可录者秦始皇之时十五年彗星四见久者八十日长或竟天其後秦遂以兵灭六王并中国外攘四夷死人如乱麻因以张楚并起三十年之间【正义谓从秦始皇十六年起兵灭韩至汉高祖五年灭项羽则三十六年矣】兵相殆藉【集解苏林曰殆音台登蹶也】不可胜数自蚩尤以来未尝若斯也项羽救钜鹿枉矢西流山东遂合从诸侯西坑秦人诛屠咸阳汉之兴五星聚于东井平城之围【索隐汉高祖之七年】月晕参毕七重【索隐天文志其占者毕昴间天街也街北胡也街南中国也昴为匈奴参为赵毕为边兵是岁高祖自将兵击匈奴至平城为冒顿所围七日乃解则天象有若符契七重者主七日也】诸吕作乱日食昼晦吴楚七国叛逆彗星数丈天狗过梁野及兵起遂伏尸流血其下元光元狩蚩尤之旗再见长则半天其後京师师四出【正义元光元年太中大夫卫青等伐匈奴元狩二年冠军侯霍去病等击胡元鼎五年卫尉路博德等破南越及韩说破东越并破西南夷开十余郡元封元年楼船将军杨仆击朝鲜】诛夷狄者数十年而伐胡尤甚越之亡荧惑守斗【正义南斗为吴越之分野】朝鲜之拔星芴于河戒【索隐芴音佩即孛星也天文志武帝元封之中星孛于河戒其占曰南戒为越门北戒为胡门其後汉兵击拔朝鲜以为乐浪玄菟郡朝鲜在海中越之象居北方胡之域也其河戒即南河北河也】兵征大宛星芴招摇【正义招摇一星次北斗杓端主胡兵也占角变则兵革大行】此其荦荦大者【索隐荦音力卓反荦荦事之分明也】若至委曲小变不可胜道由是观之未有不先形见而应随之者也夫自汉之为天数者星则唐都气则王朔占岁则魏鲜故甘石历五星法唯独荧惑有反逆行逆行所守及他星逆行日月薄蚀【集解孟康曰日月无光曰薄京房易传曰日赤黄为薄或曰不交而蚀曰薄韦昭曰气往迫之为薄亏毁为蚀】皆以为占余观史记考行事百年之中五星无出而不反逆行反逆行尝盛大而变色日月薄蚀行南北有时此其大度也故紫宫【正义中宫也】房心【正义东宫也】权衡【正义南宫也】咸池【正义西宫也】虚危【正义北宫也】列宿部星【正义五宫列宿部内之星也】此天之五官坐位也为经不移徙

大小有差阔狭有常【集解孟康曰阔狭若三台星相去远近】水火金木填星【集解徐广曰木火土三星若合是谓惊立絶行】此五星者天之五佐【正义言水火金木土五星佐天行德也】为经纬【正义五星行南北为经东西为纬也】见伏有时所过行赢缩有度日变修德月变省刑星变结和凡天变过度乃占国君强大有德者昌弱小饰诈者亡大上修德其次修政其次修教其次修禋正下无之夫常星之变希见而三光之占亟用日月晕适【集解徐广曰适者灾变咎徵也李斐曰适见灾于天刘向以为日月蚀及星逆行非太平之常自周衰以来人事乱故天文应之遂变耳駸案孟康曰晕日旁气也适日之将食先有黑气之变】云风此天之客气其发见亦有大运然其与政事俯仰最近大人之符此五者天之感动为天数者必通三五【索隐三谓三辰五谓五星】终始古今深观时变察其精粗则天官备矣

苍帝行德天门为之开【索隐谓王者行春令布德泽被天下则上应灵威仰之帝而天门为之开以发德化也天门即左右角间也正义为於伪反下同苍帝东方灵威仰之帝也春万物开发东作起则天发其德化天门为之开也】

赤帝行德天牢为之空【索隐谓王者行德以应火精之帝谓举大礼封诸侯之地则是赤帝行德夏阳主舒散故天牢为之空虚则人主当赦过宥罪者也正义赤帝南方赤熛怒之帝也夏万物茂盛功作大兴则天施德惠天牢为之空虚也天牢六星在北斗魁下不对中台主秉禁暴亦贵人之牢也】黄帝行德天矢为之起【正义黄帝中央含枢纽之帝季夏万物盛大则当大赦含养羣品也】风从西北来必以庚辛一秋中五至大赦三至小赦白帝行德以正月二十日二十一日月晕围常大赦载谓有太阳也一曰白帝行德【索隐一曰二曰谓占星之家异说太史公兼记之耳】毕昴为之围【正义白帝西方白招矩之帝也秋万物咸成则晕围毕昴三暮帝德乃成也】围三暮德乃成不三暮及围不合德不成二曰以辰围不出其旬

黑帝行德天关为之动【正义黑帝北方协光纪之帝也冬万物闭藏为之动为之开闭也天关一星在五车南毕西北为天门日月五星所道主边事亦为限隔内外障絶往来禁道之作违者占芒角有兵起五星守之主贵人多死也】

天行德天子更立年【索隐案天谓北极紫微宫言王者当天心则北辰有光辉是行德也若北辰有光辉则天子更立年也】不德风雨破石三能三衡者天廷也客星出天廷有奇令【索隐上云南宫朱鸟权衡衡太微三光之廷则三衡者即太微也其谓之三者日月五星也然斗星第六第五亦名衡又参三星亦名衡然并不为天廷正义晋书天文志云三台主开德宣符也所以和阴阳而理万物也三衡者北斗魁四星为璇玑杓三星为玉衡人君之象号令主也又太微天子宫庭也太微为衡衡主平也为天庭理法平辞理也按言三台三衡者皆天帝之庭号令舒散平理也故言三台三衡言若有客星出三台三衡之廷必有奇异教令也】

【索隐述赞曰在天成象有同影响观文察变其来自往天官既书太史攸掌云物必记星辰可仰盈缩匪????应验无爽至哉玄监云谁欲网】

史记卷二十七考证

天官书正义张衡云○此系晋书天文志所载张衡之语而正义引之监本有五列焉句有讹作育又日月运行历示吉凶五纬纏度用告祸福四句脱去历示吉凶五纬纏度八字今俱添改

中宫天极星索隐宣气立精○宣监本讹作宫今改正旁三星三公或曰子属正义主变出阴阳佐机务○出字疑化字之误

後宫之属也索隐辰极横后妃四星端○端一本作从【臣照】按从即纵对横而言端即端直也端与从未审孰是姑仍监本之旧

隋北端兑○【臣照】按北之当为比端之当为端兑之当为銳索隐详之矣唯隋字但云音他果反而未申其义盖隋即椭圆比者斜相连也端直也端銳者直而尖也古字通用者多加以传写之讹遂不可晓

或曰天一正义主王者即位令诸立赤子而传国位者○考星经应作主王者即位及诸立太子而传国位者

絶汉抵营室曰阁道索隐又按乐汁图徵云○乐汁图徵纬书也监本脱徵字今添

以齐七政索隐春秋运斗枢云○枢监本讹作极今改正

又徐整长历云○监本脱徐字今添

魁枕参首正义○【臣照】按张守节此条盖引用天文志参合星经为之岁久传讹舛错殊甚至不可读今依晋书改正而书其原文如左【正义枕之禁反衡斗衡也魁斗第一星也言北方斗斗衡直当北之魁枕於参星之道北斗之杓连於龙角南斗六星为天庙丞相太宰之位主荐贤良授爵禄又主兵天机南二星魁天梁中央一星天相北二星天府庭也占斗星盛明王道和平爵禄行不然反是参主斩刈又为天狱主杀罚其中三星横列者三将军东主後将军西南曰右足主偏将军故轩辕氏占之以北曰左肩主左将军西北曰右肩主右将军东南曰左足应七将也中央三小星曰伐天之都尉也主戎狄之国不欲明若芒角张明与参等大臣谋乱兵起夷狄内战七将皆明天下主兵振王道缺参失色军散败动摇边候有急参左足入玉井中及金火守皆为起兵】

斗为帝车索隐言是大帝乘车巡狩○监本脱言字今添

五曰司中索隐司中主左理也○左理一本作大理贵人之牢索隐乐汁图徵曰○监本脱徵字今添又天理贵人牢○监本作天宝理贵人牢宝字衍今删

辅星明近正义排贤用佞○监本讹作用贤排佞今改正

杓端有两星集解更河三星○查晋书更作梗今依晋书改正

虚则开出索隐诗汜历枢云○汜监本讹作纪今改正又正义九星悉见则狱事繁○九监本讹作占今改正

又视其火小大有大赦○视监本讹作见今改正

旁有两星曰钤○钤监本讹作衿今改正

又索隐钤音其炎反○监本脱钤字今添

北一星曰牵正义占不居其所则宫门不禁居则反是也○监本作占一反不居其所衍一反二字今删又则津梁不通宫门不禁今查津梁不通四字系下文东北曲十二星曰旗注文重出於此今亦删

故曰摄提格正义色温温不明而大者人君吉○吉监本讹作恐今改正

氐为天根主疫索隐氐四星为路寝○路监本讹作露今改正

又正义氐房心三星为火○火监本讹作灾今改正

尾为九子正义次三星夫人次九嫔末为妾○监本讹作次三星并为次九嫔末二星为妾今改正

火犯守角则有战房心王者恶之也正义荧惑犯守箕尾氐星自生芒角则有战阵之事若荧惑守房心及房心自生芒角则王者恶之也○【臣照】按正义以角为芒角之角窃谓马迁之意指角宿而言谓荧惑犯角星或守角星当有战鬪若犯房心或守房心则灾及人君也考之星占亦复如是

权衡正义太微之廷也○微监本讹作尾今改正门内六星诸侯正义诸侯五星在东井东北近北河主刺举戒不虞○【臣照】按旧本作东井在北河主判举东井北河两星名又相离甚远定有讹舛今据宋史及星经知在东井东北近北河也判举宋史作刺举今并改正

其内五星五帝坐○监本正义遗羣下从谋也五字今据本书补

又白招矩○招字监本误作昭以其所犯命之命字监本误作名今俱改正

权轩辕轩辕黄龙体前大星女主象旁小星御者後宫属正义次北一星夫人也○监本脱一字又脱右一星大民太后宗也九字又脱后族二字今据宋史天文志补

其西曲星曰鉞正义輿鬼五星一星为质○监本误作輿鬼四星为质一星今改正

又占不欲明明与井齐或摇动则天子用钺于大臣○监本少一明字今添

钺北北河南南河正义南北置而为戒南河南戒一曰阳门亦曰越门北河北戒一曰阴门亦为胡门○监本脱南河南戒四字今添

中白者为质正义輿鬼五星主祠事天目也○监本五讹作四目讹作田今俱改正

又欲其留留不明○监本讹作欲其没不明今改正

祸成并集解火入之一星居其旁天子且以火败○火入之监本脱之字今添又一星疑应作客星

诛成质○【臣照】按本书云白者为质此云诛成质晋书天文志云鬼中一星名鉄鑽盖质即鑽也古字少後人多加偏傍以分之遂疑为两字耳

柳为鸟注正义星七星○七监本讹作一今改正翼为羽翮○翮监本讹作融今改正

又正义翼二十二星○监本讹作二十星今改正

轸为车主风正义辰星守之徐泗有戮者○监本作徐泗有戮之者之字衍今去

星星不欲明明与四星等若五星入轸星中兵大起○汉书天文志同【臣照】按上星字应作辖星星不欲明句不成文理且五星入轸即五星聚轸矣乃大吉也若五星不拘何星入轸则无岁无之又安得兵大起考晋书天文志乃知上星字为辖字之误盖轸四星旁有辖星若辖星明与四星等即入轸中而视之若五星矣斯兵大起也索隐注宋均云五星主行使行使动兵车亦动也五星五字亦应作辖辖同主行使也

轸南衆星曰天库○监本有正义注天库一星主太白秦也在五星中十三字查系下文五帝车舍正义文重出在此今删

西宫咸池索隐文耀鉤云○耀鉤监本讹作跃钩今改正

五帝车舍索隐吐秀含实主秋成○监本讹作含秀含实主秋垂今改正

又正义次东北曰天狱○曰监本讹作星今改正又其国絶食兵且起○且监本讹作见今改正又三柱出外兵出柱入兵入柱出一月米贵三倍期二年○监本讹作三柱入出一月米贵三倍今改正又柱倒立尤甚○监本讹柱王尤其今改正

奎曰封豕主沟渎正义人主爽德○监本讹作臣主其德今改正

又荧惑星守之○守监本讹作主今改正

其南衆星曰廕积集解曰藁积为廕也正义曰藁六星○藁监本俱讹作蒿今改正

昂曰髦头正义昂七星○七监本讹作一今改正毕曰?车为边兵正义主四夷之尉也○监本脱主字今添

昂毕间为天街正义土金守胡兵入也○土一本作火主葆旅事正义葆旅野生之可食者○者监本讹作也今改正

又国易政○政监讹作正今改正

其南有四星曰天厠正义天厠四星在屏东○监本脱东字今据宋史天文志添

其东有大星曰狼狼角变色多盗贼正义金火守亦如之○旧本作金木火守亦如之【臣照】按星占木为德星守则为休祥木字乃衍文也今删

危为盖屋○屋监本讹作室今改

又正义危为盖屋盖屋自有星恐文误也○监本少下盖屋二字今添

虚为哭泣之事索隐姚氏按荆州占以为其宿二星南星主哭泣虚中六星不欲明明则有大丧也○【臣照】按星图虚南二星为哭哭东二星为泣荆州占既云虚中六星则是合哭泣四星言之矣又以为其宿二星南星主哭泣文必有误

其南有衆星曰羽林天军正义羽林四十五星○监本作三十五星伏查晋书天文志及步天歌皆作四十五星今改正

又正义天军也亦天宿卫主兵革不见天下乱○监本讹作亦天宿卫之兵革出今改正

军西为垒或曰钺正义占五星入皆兵起○监本作占之非故兵起语不可解今据晋书天文志改五星入皆兵起

营室为清庙○【臣照】按二十八宿列于天官书五官者唯二十七壁不与焉尔雅亦同至分野则曰营室至东壁并州较他宿亦多一至字殆室壁本一星若曰室之壁云尔

旁一星曰王良正义金火守入皆兵之忧也○监本讹作皆其之忧也今改正

牵牛为牺牲○正义二星主关梁下脱次三星主南越六字今据宋史天文志添

其北河鼓索隐孙炎云河鼓之旗十二星○【臣照】按星图河鼓左右旗各九星

失者罚出岁星正义岁星盈缩以其舍命国所在之国不可伐○监本脱以其舍命国五字今添

以十月与角亢晨出曰大章集解徐广曰一曰天皇索隐天文志亦作天皇○监本天皇俱讹作大星今改正

长二丈类彗○监本讹作类彗星今改正

荧惑荧惑为勃乱残贼疾丧饥兵○【臣照】按荧惑荧惑句似复出荧惑二字

又正义天官占云○占监本讹作志今改

五星皆从而聚于一舍正义四星若合是为太阳○太阳监本误作大王今据晋书天文志改

谨候此○此三字应在荧惑章下旧本刊於填星章首今改正下太白章谨候此三字亦同

大饥战败为北军军困○【臣照】按正义曰为北军北也凡军败曰北然则张守节时尚无战败为北军之文也惟无战败之字故张守节解此北字曰败若本文有之则不应为此解也疑原文系大饥战为北困六字传写讹谬将注混入耳

曰西方秋司兵月行及天矢正义星是古历星若竹彗墙星?星白藿○【臣照】按正义此文皆櫟括晋书天文志为之其数妖星名尚少三星一曰若星一曰帚星一曰若彗然则星是古历星若六字乃若星帚星若彗之讹也

为八岁二百三十日○八监本讹作百今改正

可以兵从天下正义晋书天文志○监本脱字甚多至不可解今以晋书天文志本文改正

出而留桑榆间集解凡望云气平望在桑榆上者○监本讹作正出气平正出桑榆上者今改正

当出不出是谓击卒○击监本讹作系今改正

正旗上出正义旗星名有九星言辰星上则破军杀将客胜也○辰星上句疑有脱字当作辰星出其上

间可械劒○监本有正义汉书云辰星过太白间太白可械劒明广雅是也略无文理定系传讹今删

七星为员官辰星庙蛮夷星也○按此三句当在夏则不长之下旧错简在翼轸荆州下今改正

居军不胜○军监本讹作晕今改正

见半日以上功大○大监本作太连下白字为太白遂不可解今改正

行南北河以陰阳言旱水兵丧正义若月行北河以陰则水兵南河以阳则旱丧也○监本讹作自行北河以陰则南河以阳则水旱兵丧也今改正

其星状类辰星去地可六丈大集解徐广曰大一作六○【臣照】按大下疑有脱字汉书天文志云五残星大而黄下贼星大而赤司危星大而白狱汉星大而赤可证徐广一作六之说非也

星者金之散气本曰火集解孟康曰星石也○监本讹作星名也今改正

其蜚者类阙旗故○【臣照】按监本将索隐文刻于阙旗之下遂使故字连下句乍读不觉细味之故鈎云句曲故字作何解耶类阙旗故断句盖言杓云之蜚者如阙旗而又色敝败也

而泽?宓其见动人乃有占○【臣照】按宓字不可解盖密字也缺其下半传写至今

天开县物○【臣照】按此节文多讹谬不可强解

四始者候之日正义谓正月旦岁之始时之始日之始月之始故云四始言以四时之日候岁吉凶也○【臣照】按四始本书明指冬至腊明元旦立春四日言正义专以正月旦言又不着所本殊不可凭且谓以四时之日候岁吉凶更不可解

史记卷二十七考证

<史部,正史类,史记>

卷二十八

钦定四库全书

史记卷二十八

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

封禅书第六

【正义泰山上筑土为坛以祭天报天之功故曰封泰山下小山上除地报地之功故曰禅言禅者神之也白虎通云或曰封者金银绳或曰古泥金绳封之印玺也五经通义云易姓而王致太平必封泰山禅梁父荷天命以为王使理羣生告太平於天报羣神之功】

自古受命帝王曷尝不封禅盖有无其应而用事者矣未有睹符瑞见而不臻乎泰山者也虽受命而功不至至矣而德不洽洽矣而日有不暇给是以即事用希传曰三年不为礼礼必废三年不为乐乐必坏每世之隆则封禅答焉及衰而息厥旷远者千有余载近者数百载故其仪阙然堙灭其详不可得而记闻云尚书曰舜在璇玑玉衡以齐七政遂类于上帝禋于六宗望山川徧羣神辑五瑞择吉月日见四岳诸牧还瑞【集解徐广曰还一作班】岁二月东巡狩至于岱宗岱宗泰山也【正义括地志云泰山一曰岱宗东岳也在兖州博城县西北三十里周礼云兖州镇曰岱宗】柴望秩于山川遂觐东后东后者诸侯也合时月正日同律度量衡修五礼五玉三帛二生一死赞五月巡狩至南岳南岳衡山也【正义括地志云衡山一名岿山在衡州湘潭县西四十一里】八月巡狩至西岳西岳华山也【正义括地志云华山在华州华阴县南八里古文以为敦物周礼云豫州镇曰华山】十一月巡狩至北岳北岳恒山也【正义括地志云恒山在定州恒阳县西北百四十里周礼云并州镇曰恒山】皆如岱宗之礼中岳嵩高也【索隐独不言至者盖以天子所都也正义括地志云嵩山亦名太室亦名外方也在洛州阳城县西北二十三里】五载一巡狩禹遵之後十四世至帝孔甲淫德好神神渎二龙去之【索隐如淳案国语二龙縻于夏庭是也】其後三世汤伐桀欲迁夏社不可作夏社後八世至帝太戊有桑穀生於廷一暮大拱惧伊陟【集解徐广曰陟古作敕】曰妖不胜德太戊修德桑穀死伊陟赞巫咸巫咸之兴自此始【索隐尚书伊陟赞于巫咸孔安国云赞告也巫咸臣名今此云巫咸之兴自此始则以巫咸为巫覡然楚词亦以巫咸主神盖

太史以巫咸是殷臣以巫接神事太戊使禳桑穀之灾所以伊陟赞巫咸故云巫咸之兴自此始也】後十四世帝武丁得傳說为相殷复兴焉称高宗有雉【集解徐广曰一作鷩音娇】登鼎耳雉武丁惧祖已曰修德武丁从之位以永寧後五世帝武乙慢神而震死【索隐谓武乙射天後猎于河渭而震死也】後三世帝纣淫乱武王伐之由此观之始未尝不肃祗後稍怠慢也周官曰冬至祀天於南郊迎长日之至夏日至祭地祇皆用乐舞而神乃可得而礼也天子祭天下名山大川五岳视三公四渎视诸侯诸侯祭其疆内名山大川四渎者江河淮济也天子曰明堂辟雍【集解韦昭曰水外四周圆如辟雍盖以节观者也】诸侯曰泮宫【集解张晏曰制度半於天子之辟雍索隐服?云天子水匝为辟雍诸侯水不匝至半为泮宫礼统又云半有水而半有宫是也】周公既相成王郊祀后稷以配天【集解王肃曰配天於南郊祀之】宗祀文王於明堂以配上帝【集解郑元曰上帝者天之别名也神无二主故异其处避后稷也】自禹兴而修社祀后稷稼穡故有稷祠郊社所从来尚矣自周克殷後十四世世益衰礼乐废诸侯恣行而幽王为犬戎所败【集解徐广曰犬一作吠】周东徙雒邑秦襄公攻戎救周始列为诸侯【正义秦襄公周平王元年封也】秦襄公既侯居西垂【正义汉陇西郡西县也今在秦州上邽县西南九十里也】自以主少皞之神作西時祠白帝其牲用騊驹黄牛羝羊各一云【索隐毛诗传云赤马黑鬣曰騊也羝牡羊】其後十六年秦文公东猎汧渭之间卜居之而吉【索隐地理志汧水出汧县西北入渭皇甫谧云文公徙都汧也正义括地志云郿县故城在岐州郿县东北十五里即此城也】文公梦黄虵自天下属地其口止於郿衍【集解李奇曰郿音孚山阪曰衍索隐郿地名後为县属冯翊衍者郑衆注周礼云下平曰衍又李奇云三辅谓山陵间为衍也】文公问史敦敦曰此上帝之徵君其祠之於是作郿時用三牲郊祭白帝焉自未作郿時也而雍旁故有吴阳武時【集解李奇曰於旁有吴阳也】雍东有好時皆废无祠或曰自古以雍州积高神明之隩故立時郊上帝诸神祠皆聚云盖黄帝时尝用事虽晚周亦郊焉其语不经见搢绅者不道【集解李奇曰搢插也插笏於绅绅大带索隐姚氏云搢当作缙郑衆注周礼云搢读曰荐谓垂之於绅带之间今案郑意以搢为荐则荐亦是进进而置於绅带之间故史记亦多作荐字也】作郿時後九年文公获若石云于陈仓北阪城祠之【集解苏林曰质如石也服?曰在北或曰在陈仓北索隐云语辞也正义三秦记云太白山西有陈仓山山有石难与山鸡不别赵高烧山山鸡飞去而石鸡不去晨鸣山头声闻三里或言是玉鸡括地志云陈仓山在岐州陈仓县南又云宝鸡神祠在汉陈仓县故城中今陈仓县东石鸡在陈仓山上祠在陈仓城故言获若石于陈仓北阪城祠之】其神或岁不至或岁数来来也常以夜光辉若流星从东南来集于祠城则若雄鸡其声殷云野鸡夜雉【集解如淳曰野鸡雉也吕后名雉故曰野鸡瓚曰殷声也云足句之辞】以一牢祠命曰陈宝【集解瓚曰陈仓县有宝夫人祠或一岁二岁与叶君合叶神来时天为之殷殷雷鸣雉为雉在长安正西五百里韦昭曰在陈仓县宝而祠之故曰陈宝索隐列异传云陈仓人得异物以献之道遇二童子云此名为媼在地下食死人脑媼乃言彼二童子名陈宝得雄者王得雌者霸乃逐童子化为雉秦穆公大猎果获其雌为立祠祭有光雷电之声雄止南阳有赤光长十余丈来入陈仓祠中所以代俗谓之宝夫人祠抑有由也叶县名在南阳叶君即雄雉之神故时与宝夫人神合也】作郿時後七十八年秦德公既立卜居雍後子孙饮马於河遂都雍雍之诸祠自此兴用三百牢於郿時【索隐秦本纪德公元年以犧三百祠郿時今案百当为白秦君西祀少昊牲尚白牢秦诸侯也虽奢侈僭祭郊本特性不可用三百牢以祭天盖字误】作伏祠【索隐服?云周时无伏秦始作之汉旧仪云伏者万鬼行故闭昼日不

干求也东观汉记和帝初令伏闭昼日是也又历忌释曰伏者何金气伏藏之名四时代谢皆以相生而春木代水水生木也夏火代木木生火也冬水代金金生水也至秋则以金代火金畏於火故凡至庚日必伏庚者金也】磔狗邑四门以御蛊菑【索隐案乐彦云左传皿虫为蛊梟磔之鬼亦为蛊故月令云大雉旁磔注云磔攘也厉鬼亦为蛊将出害人旁磔於四方之门故此亦磔狗邑四门也风俗通云杀犬磔攘也】德公立二年卒其後六年秦宣公作密時於渭南祭青帝其後十四年秦繆公立病卧五日不寤寤乃言梦见上帝上帝命繆公平晋乱史书而记藏之府而後世皆曰秦繆公上天秦繆公即位九年齐桓公既霸会诸侯於葵丘【正义括地志云葵丘在曹州考城县东南一里五十步郭内即桓公所会处也】而欲封禅管仲曰【索隐今管子书封禅篇是】古者封泰山禅梁父者【正义括地志云梁父山在兖州泗水县北八十里也】七十二家【正义韩诗外传云孔子升泰山观易姓而王可得而数者七十余人不得而数者万数也按管仲所记自无怀氏以下十二家其六十家无纪录也】而夷吾所记者十有二焉昔无怀氏【集解服?曰古之王者在伏羲前见庄子】封泰山禅云云【集解李奇曰云云山在梁父东索隐晋灼云云云山在蒙阳县故城东北下有云云亭正义括地志云云云山在兖州博野县西南三十里也】虞羲封泰山禅云云神农封泰山禅云云炎帝封泰山禅云云【索隐邓展云神农後子孙亦称炎帝而登封者律历志黄帝与炎帝战于阪泉岂黄帝与神农身战乎皇甫谧云炎帝传位八代也】黄帝封泰山禅亭亭【集解徐广曰在钜平駟案服?曰亭亭山在牟陰索隐应劭云亭亭在钜平北十余里服?云在牟陰非也正义括地志云亭亭山在兖州博城县西南三十里也】颛顼封泰山禅云云帝嘗封泰山禅云云尧封泰山禅云云舜封泰山禅云云禹封泰山禅会稽【索隐晋灼云本名茅山吴越春秋云禹巡天下登茅山以朝羣臣乃大会计更名茅山为会稽亦曰苗山也正义括地志云会稽山一名衡山在越州会稽县东南一十二里也】汤封泰山禅云云周成王封泰山禅社首【集解应劭曰山名在博县晋灼曰在钜平南十三里】皆受命然後得封禅桓公曰寡人北伐山戎【索隐服?云盖今鲜卑是也】过孤竹【正义括地志云孤竹故城在平州卢龙县南一十里殷时孤竹国也】西伐大夏涉流沙束马悬车上卑耳之山【集解韦昭曰将上山纏束其马悬钩其车也卑耳即齐语所谓辟耳索隐卑耳山名在河东大阳卑读如字也齐语即春秋外传国语之书也辟音僻贾逵云山险也】南伐至召陵【正义召音邵括地志云邵陵故城在豫州郊城县东四十五里也】登熊耳山以望江汉【索隐荆州记顺阳益阳二县东北有熊耳山东西各一峯如熊耳状因以为名齐桓公太史公并登之或云弘农熊耳非也】兵车之会三【索隐案左传兵车之会三谓鲁庄十三年会北杏平宋乱僖四年侵蔡遂伐楚六年伐郑围新城是也】而乘车之会六【索隐案左氏乘车之会六谓庄十四年会于鄆十五年又会鄆十六年盟于幽僖五年会首止八年盟于洮九年会葵丘】九合诸侯一匡天下诸侯莫违我昔三代受命亦何以异乎於是管仲睹桓公不可穷以辞因设之以事曰古之封禅鄒上之黍北里之禾【集解应劭曰鄒上山也鄒音隴苏林曰鄒上北里皆地名索隐韦昭云设以不可得之物应劭云光武改高邑曰鄒姚氏云鄒县属常山一云鄒上山名】所以为盛江淮之间一茅三脊【集解孟康曰所谓灵茅】所以为藉也东海致比目之鱼【集解韦昭曰各有一目不比不行其名曰鰈索隐鰈音答郭璞云如牛脾身薄细鳞紫黑色一眼两片合乃得行今江东呼为王余亦曰阪鱼】西海致比翼之鸟【集解韦昭曰各有一翼不比不飞其名曰鶼鶼索隐山海经云崇丘之山有鸟状如鳬一翼一目相得乃飞名云□郭璞注尔雅亦作鶼鶼】然後物有不召而自至者十有五焉今凤凰麒麟不来嘉谷不生而蓬蒿藜

莠茂鵙梟数至而欲封禪母乃不可乎於是桓公乃止是岁秦繆公内晋君夷吾其後三置晋国之君平其乱【索隐三置晋君谓惠公怀公文公也】繆公立三十九年而卒其後百有余年而孔子论述六艺传略言易姓而王封泰山禪乎梁父者七十余王矣其俎豆之礼不章盖难言之或问禘之说孔子曰不知知禘之说其於天下也视其掌【集解孔安国曰为鲁讳也包氏曰孔子谓或人言知禘之说者於天下之事如指视以掌中之物言其易也】诗云纣在位文王受命政不及泰山武王克殷二年天下未寧而崩爰周德之洽维成王成王之封禪则近之矣及後陪臣执政季氏旅於泰山仲尼讥之【集解马融曰旅祭名礼诸侯祭山川在封内者陪臣祭泰山非礼也】是时苾弘以方事周灵王诸侯莫朝周周力少苾弘乃明鬼神事设射狸首狸首者诸侯之不来者【集解徐广曰狸一名不来】依物怪欲以致诸侯诸侯不从而晋人执杀苾弘【集解駰案皇览曰弘冢在洛阳东北山上】周人之言方怪者自苾弘其後百余年秦灵公作吴阳上時祭黄帝【集解徐广曰距作密時二百五十年】作下時祭炎帝【索隐吴阳地名盖在岳之南又上云雍旁有故吴阳武時今盖因武時又作上下時以祭黄帝炎帝】後四十八年周太史儋见秦献公【索隐儋音丁甘反孟康云即老子也韦昭案年表儋在孔子後百余年非老聃也】曰秦始与周合合而离五百岁当复合【索隐大顏历评诸家而云周平王封襄公始列为诸侯是乃为别至昭王五十二年西周君臣献邑凡五百一十六年是合此言五百年举全数也】合十七年而霸王出焉【索隐自昭王灭周之後至始皇元年诛嫪毐正一十七年孟康云谓周封秦为别秦并周为合此襄公为霸始皇为王故云霸王出者也正义王子放反秦周俱黄帝之後至非子未别封是合也合而离者谓非子末年周封非子为附庸邑之秦是离也五百岁当复合者谓从非子邑秦後二十九君至秦孝公二年五百岁周显王致文武胙於秦孝公复与之亲是复合也十七年霸王出焉者谓从秦孝公三年至十九年周显王致伯於秦孝公是霸出也至惠王称王王者出焉然五百岁者非子生秦侯已下二十八君至孝公二年合四百八十六年兼非子邑秦之後十四年则成五百岁矣诸家解皆非也】栢阳雨金秦献公自以为得金瑞故作畦時栢阳而祀白帝【集解晋灼曰汉注在陇西西县人先祠山下形如种韭畦時各一土封索隐汉旧仪云祭人先於陇西西县人先山山上皆有土人山下有時如种韭畦時中各有一土封故云畦時】其後百二十岁而秦灭周【集解徐广曰去太史儋言时百二十年】周之九鼎入于秦或曰宋太丘社亡【集解駰案尔雅曰古陵太丘索隐应劭云亡沦入地非也案亡谓社主亡也郭璞云宋有太丘社以社名此地也】而鼎没于泗水彭城下其後百一十五年而秦并天下秦始皇既并天下而帝或曰黄帝得土德黄龙地螾见【集解应劭曰螾丘蚓也黄帝土位故地见其神蚓大五六围长十余丈韦昭曰黄者地色螾亦地物故以为瑞索隐此史所记出吕氏春秋也螾音引】夏得木德青龙止於郊草木畅茂殷得金德银自山溢【集解苏林曰流出也】周得火德有赤乌之符【索隐尚书中候及吕氏春秋皆云有火自天止于王屋流为赤乌五至以谷俱来】今秦变周水德之时昔秦文公出猎获黑龙此其水德之瑞於是秦更命河曰德水以冬十月为年首色上黑度以六为名【正义张晏云水北方黑水终数六故以方六寸为符六尺为步】音上大吕事统上法【集解服虔曰政上法令也瓚曰水陰陰主刑杀故上法】即帝位三年东巡郡县祠驂峰山颂秦功业【索隐驂县之峰山驂县本邾国鲁穆公改作邹从征记北岩有秦始皇所勒之铭】於是徵从齐鲁之儒生传士七十人至乎泰山下诸儒生或议曰古者封禪为蒲车恶伤山之土石草木【索隐蒲车谓蒲裹车轮也】埽地而祭席用菰秸【集解应劭曰秸禾稊也去其皮以为席如淳曰菰读曰祖秸读曰憂晋灼曰菰藉也索隐

周礼祭祀供茅苴说文云苴茅藉也】言其易遵也始皇闻此议各乖异难施用由此绌儒生而遂除车道上自泰山阳至巅立石颂秦始皇帝德明其得封也从陰道下禪於梁父其礼颇采太祝之祀雍上帝所用而封藏皆秘之世不得而记也始皇之上泰山中阪遇暴风雨休於大树下诸儒生既绌不得与用於封事之礼闻始皇遇风雨则讥之於是始皇遂东游海上行礼祠名山大川及八神求僊人羡门之属八神将自古而有之或曰太公以来作之齐所以为齐以天齐也【集解苏林曰当天中央齐】其祀絶莫知起时八神一曰天主祠天齐天齐渊水居临菑南郊山下者【索隐顾氏案解道彪齐记云临菑城南有天齐泉五泉并出有异於常言如天之腹脐也小颜云下者谓最下也】二曰地主祠太山梁父盖天好陰祠之必於高山之下小山之上命曰峙【集解徐广曰一云之下上峙命曰峙索隐此之一云与汉书郊祀志文同也】地贵阳祭之必於泽中圆丘云三曰兵主祠蚩尤蚩尤在东平陆监乡齐之西境也【集解徐广曰属东平郡索隐监音阚皇览云蚩尤冢在东平郡壽张县阚乡城中也】四曰陰主祠三山【索隐小颜以为下所谓三神山顾氏案地理志东莱曲成有参山即此三山非海中之三神山也】五曰阳主祠之罘【正义括地志云之罘山在莱州文登县西北九十里】六曰月主祠之莱山【集解韦昭曰在东莱长广县】皆在齐北并勃海七曰日主祠成山成山斗入海【集解韦昭曰成山在东莱不夜斗入海不夜古县名索隐案解道彪齐记云不夜城古有日夜出见於东境故莱子立城以不夜为名也斗入海谓斗絶曲入海也】最居齐东北隅以迎日出云八曰四时主祠琅邪琅邪在齐东方【索隐山海经云琅邪台在勃海间案是山形如台地理志琅邪县有四时祠也】盖岁之所始皆各用一牢具祠而巫祝所损益珪币杂异焉自齐威宣之时【索隐谓威王宣王也】驺子之徒【集解韦昭曰名衍】论着终始五德之运【集解如淳曰今其书有五德终始五德各以所胜为行秦谓周为火德灭火者水故自谓之水德】及秦帝而齐人奏之故始皇采用之而宋毋忌正伯侨充尚羡门子高【集解韦昭曰皆慕古人名效神仙者索隐乐彦引老子道经云月中仙人宋毋忌白泽图云火之精曰宋毋忌盖其人火仙也司马相如云正伯侨古仙人顾氏案裴秀冀州记云缙氏仙人庙者昔有王乔犍为武阳人为栢人令於此得仙非王子乔也充尚无所见羡门高者秦始皇使卢生求羡门子高是也】最後皆燕人【索隐最後犹言甚後也服?说止有四人是小颜云自宋毋忌至最後凡五人刘伯庄亦同此说恐未详】为方僊道形解销化【集解服?曰尸解也张晏曰人老如解去故骨则变化也今山中有龙骨世人谓之龙解骨化去也】依於鬼神之事驺衍以陰阳主运【集解如淳曰今其书有主运五行相次转用事随方面为服索隐主运是邹子之书篇名】显於诸侯而燕齐海上之方士传其术不能通然则怪迂阿諛苟合之徒自此兴不可胜数也自威宣燕昭使人入海求蓬萊方丈瀛州此三神山者其传在勃海中【集解服?曰传音附或曰其传书云尔瓚云世人相传之】去人不远患且至则船风引而去盖尝有至者诸僊人及不死之药皆在焉其物禽兽尽白而黄金银为宫阙未至望之如云及到三神山反居水下临之风辄引去终莫能至云世主莫不甘心焉【索隐谓心甘羡也】及至秦始皇并天下至海上则方士言之不可胜数始皇自以为至海上而恐不及矣使人乃齎童男女入海求之船交海中皆以风为解【索隐顾野王云皆自解说遇风不至也】曰未能至望见之焉其明年始皇复游海上至琅邪过恒山从上党归後三年游碣石考入海方士【集解服?曰疑诈故考之瓚曰考校其虚实也】从上郡归後五年始皇南至湘山遂登会稽并海上冀遇海中三神山之奇药不得还至沙丘崩【正义括地志云沙丘台在邢州平乡东北三十里】二世元年东巡碣石并海南历泰山至会稽皆礼祠之而刻勒始皇所立石

书旁以章始皇之功德【索隐小颜云今此诸山皆有始皇所刻石及胡亥重刻其文并具存也】其秋诸侯畔秦三年而二世弑死始皇封禅之後十三岁秦亡诸儒生疾秦焚诗书诛戮文学百姓怨其法天下畔之皆譌曰始皇上泰山为暴风雨所击不得封禅此岂所谓无其德而用事者邪【索隐即封禅书序云盖有无其应而用事者矣此当有所本太史公再引以为说也】昔三代之君皆在河洛之间【正义世本云夏禹都阳城避商均也又都平阳或在安邑或在晋阳也帝王世纪云殷汤都亳在梁又都偃师至盘庚徙河北又徙偃师也周文武都酆鄩至平王徙都河南按三代之居皆在河洛之间也】故嵩高为中岳而四岳各如其方四渎咸在山东至秦称帝都咸阳则五岳四渎皆并在东方自五帝以至秦轶兴轶衰名山大川或在诸侯或在天子其礼损益世殊不可胜记及秦并天下令祠官所常奉天地名山大川鬼神可得而序也於是自殽以东【索隐殽即崤山杜预云崤在弘农渑池县西南即今之二郾山是也亦音豪】名山五大川祠二曰太室太室嵩高也恒山泰山会稽湘山【索隐地理志湘山在长沙】水曰济曰淮【索隐风俗通云济庙在临邑淮庙在平氏也】春以脯酒为岁祠因泮冻【集解服虔曰解冻索隐为音于伪反】秋涸冻【索隐案字林涸竭也音下各反小颜云涸读与沍同沍凝也音下故反春则解秋则凝】冬赛祷祠【索隐赛音先代反赛谓报神福也】其牲用牛犊各一牢具珪币各异自华以西名山七名川四曰华山【正义括地志云华山在华州华阴县南八里古文以为敦物也注云华岳本一山当河水过而行河神巨灵手荡脚蹋开而为两今脚迹在东首阳下手掌在华山今呼为仙掌河流於二山之间也开山图云巨灵胡者偏得神仙之道能造山川出江河也】薄山薄山者襄山也【集解徐广曰蒲阪县有襄山或字误也索隐应劭云襄山在潼关北十余里穆天子传云自河首襄山酈元水经云薄山统目与襄山不殊在今芮城北与中条山相连是薄襄一山名也正义薄音白落反襄音色眉反括地志云薄山亦名襄山一名寸棘山一名渠山一名雷首山一名独头山一名首阳山一名吴山一名条山在陕州芮县城北十里此山西起雷山东至吴坂凡十名以州县分之多在蒲州今史文云自华以西未详也】岳山岐山【集解徐广曰武功县有大壶山又有岳山索隐地理志岐山在美阳县西北也】吴岳【集解徐广曰在汧也索隐徐说非也案地理志汧有垂山无岳山也】鸿冢渎山渎山蜀之汶山也【索隐黄帝臣大鸿葬雍鸿冢盖因大鸿葬为名也地理志蜀郡湔氐道山在西郭璞注云山在汶阳郡广阳县一名渎山也】水曰河祠临晋【索隐韦昭曰临晋冯翊县地理志临晋有河水祠正义即同州冯翊县本汉临晋县也收大荔秦获之更名括地志云大河祠在同州朝邑县南三十里山海经云冰夷人面乘两龙也太公金匮云冯修也龙鱼河图云河伯姓吕名公子夫人姓冯名夷河伯字也华阴潼乡堤首人水死化为河伯应劭云夷冯夷乃水仙也】沔祠汉中【索隐水经云沔水出武都沮县注云东南注汉所谓汉水故祠之汉中乐彦云汉女者汉神是也】湫渊祠朝那【集解苏林曰湫渊在安定朝那县方四十里停不流冬夏不增减不生草木音将蓼反索隐湫音子小反又音子由反即龙之处也正义括地志云朝那湫祠在原州平高县东南二十里湫谷水源出寧州安定县】江水祠蜀【索隐风俗通云江出岷山山庙在江都地理志江都有江水祠盖汉初祠之於源後祠之於委也广雅云江神谓之奇湘江记云帝女也卒为江神华阳国志云蜀守李冰於彭门关立江神祠三所汉旧仪云祭四渎用三牲圭沉有车马绀盖正义括地志云江渎祠在益州成都县南八里秦并天下江水祠蜀】亦春秋泮涸祷赛如东方名山川而牲牛犊牢具珪币各异而四大冢鸿岐吴岳皆有尝禾【集解孟康曰以新谷祭索隐案谓四山为大冢尔雅云山顶曰冢盖亦因鸿冢而为号也】陈宝节来祠【集解服虔曰

陈宝神应节来也】其河加有尝醪此皆在雍州之域近天子之都故加车一乘駟驹四灋产【正义括地志云灋水古滋水也亦名曰蓝谷水即秦岭水之下流在雍州蓝田县灋水即荆溪狗枷之下流也在雍州万年县也】长水泮【集解徐广曰音劳駟案汉书音义曰水名在鄠县界索隐百官表有长水校尉沈约宋书云营近长水因以为名水经云长水出白鹿原今之荆溪水是也十三州记泮水出鄠县南也正义括地志云泮水源在雍州长安县西南山泮谷】泾渭皆非大川以近咸阳尽得比山川祠而无诸加【集解韦昭曰无车駟之属】汧洛【正义括地志云汧水源出陇州汧源县西南汧山东入渭洛水源出庆州洛源县白於山南流入渭又云洛水商州洛南县西冢岭山东北流入河按有三洛水未知祠何者】二渊【正义地理志云二川源在庆州华池县西子干岭东二川合因名也】鸣泽【索隐服虔云鸣泽在涿郡遒县正义括地志云鸣泽在幽州范阳县西十五里按遒县在易州涿水县北一里故遒城是也泽在遒南】蒲山岳壻山【集解徐广曰音先许反】之属为小山川亦皆岁祷赛泮涸祠礼不必同而雍有日月参辰【索隐汉书旧仪云祭参辰於池阳谷口夹道在右为坛也雍地名也】南北斗荧惑太白岁星填星二十八宿风伯雨师四海九臣【集解晋灼曰自此以下星至天渊玉女凡二十六小神不说】十四臣【索隐九臣十四臣并不见其名数所出故昔贤皆不论也】诸布诸严诸述之属百有余庙【索隐尔雅祭星曰布或云诸布是祭星之处述亦未详汉书作逐】西亦有数十祠【索隐西即陇西之西县秦之旧都故有祠焉】於湖有周天子祠【索隐地理志湖县属京兆有周天子祠二所在】於下邽有天神泮瀹有昭明【索隐案乐彦引河图云荧惑星散为昭明】天子辟池【索隐乐彦云辟池未闻顾氏以为璧池即瀹池所谓华陰平舒道逢使者持璧以遗瀹池君故曰璧池今案谓天子辟池即用天子辟雍之地故周文王都鄠武王都酈既立灵台则亦有辟雍耳张衡亦以辟池为雍也】於杜亳有三社主之祠【集解韦昭曰亳音薄汤所都瓚曰济陰薄县是索隐徐广云京兆杜县有亳亭则社字误合作杜亳且据文列於下皆是地邑则杜是县案秦寧公与亳王战亳王奔戎遂灭汤社皇甫谧亦云周桓王时自有亳王号汤非殷也而臣瓚以亳为成汤之邑故云在於济陰非也案谓社亳二邑有三社主之祠也】壽星祠【索隐壽星盖南极老人星也见则天下理安故祠之以祈福壽也正义角亢在辰为壽星三月之时万物始生建於春气布养各尽其性不罹灾夭故壽】而雍营庙亦有杜主【集解李奇曰营茅也】杜主故周之右将军【索隐地理志杜陵故杜伯国有杜主祠四墨子云周宣王杀杜伯不以罪後宣王田於圃见杜伯执弓矢射宣王伏弋而死故祠之也正义括地志云杜祠雍州长安县西南二十五里】其在秦中最小鬼之神者【索隐谓其鬼虽小而有神灵者也】各以岁时奉祠唯雍四時上帝为尊【索隐雍有五時而言四者顾氏以为兼下文上帝为五非也案四時据秦旧而言秦襄公始列为诸侯而作西時文公卜居汧渭之间而作酈時皆非雍也至秦德公卜居雍而後宣公作密時祠青帝灵公作上時祠黄帝下時祠炎帝献公作畦時祠白帝是为四并高祖增黑帝而五也正义括地志云酈時吴阳上下時是言秦用四時祠上帝青黄赤白最尊贵之也】其光景动人民唯陈宝故雍四時春以为岁祷因泮冻秋涸冻冬赛祠五月尝驹及四仲之月祠若月祠陈宝节来一祠春夏用駟秋冬用駟時驹四匹木禺龙栻车一驷【集解駟案汉书音义曰禺寄也寄生龙形於木也索隐禺音偶谓偶其形於木禺马亦然栻车谓车有铃乃有和栻之节故取名也】木禺车马一驷各如其帝色黄犢羔各四珪币各有数皆生瘞埋无俎豆之具【正义豆以木为之受四升高尺二寸漆其中大夫以上赤云气画诸侯加象饰口足天子玉饰之也】三年一郊秦以冬十月为岁首故常以十月上宿郊见【集解

李奇曰宿犹斋戒也】通权火【集解张晏曰权火烽火也状若井 臯也其法类称故谓之权欲令光明远照通祀所也汉祀五畤於雍五里一烽火如淳曰权举也索隐权如字一音燿周礼有司燿燿火官张晏解非也】拜於咸阳之旁而衣上白其用如经祠云【集解服虔曰经常也】西畤畦畤祠如其故上不亲往诸此祠皆太祝常主以岁时奉祠之至如他名山川诸鬼及八神之属上过则祠去则已郡县远方神祠者民各自奉祠不领於天子之祝官祝官有秘祝即有菑祥辄祝祠移过於下【正义谓有灾祥辄令祝官祠祭移其咎恶於衆官及百姓也】汉兴高祖之微时尝杀大蛇有物曰蛇白帝子也而杀者赤帝子高祖初起祷丰枌榆社【集解张晏曰枌白榆也社在丰东北十五里或曰枌榆乡名高祖里社】徇沛为沛公则祠蚩尤衅鼓旗遂以十月至霸上与诸侯平咸阳立为汉王因以十月为年首而色上赤二年东击项籍而还入关问故秦时上帝祠何帝也对曰四帝有白青黄赤帝之祠高祖曰吾闻天有五帝而有四何也莫知其说於是高祖曰吾知之矣乃待我而具五也乃立黑帝祠命曰北畤有司进祠上不亲往悉召故秦祝官复置太祝太宰如其故仪礼因令县为公社【集解李奇曰犹官社】下诏曰吾甚重祠而敬祭今上帝之祭及山川诸神当祠者各以其时礼祠之如故【集解徐广曰高祖本纪曰二年六月令祠官祀天地四方上帝山川以时祀之】後四岁天下已定诏御史令丰谨治枌榆社常以四时春以羊彘祠之令祝官立蚩尤之祠於长安长安置祠祝官女巫其梁巫祠天地天社天水房中堂上之属【索隐礼乐志有安世房中歌皆谓祭时房中堂上歌先祖之功德也】晋巫祠五帝东君云中司命巫社巫族人先炊之属【索隐广雅云东君日也王逸注楚词云中云也东君云中亦见归藏易也周礼以饔飩祠司命郑衆云司命文昌四星也正义先炊古炊母之神也】秦巫祠社主巫保族累之属【索隐社主即上文三社之主巫保族累二神名累音力追反】荆巫祠堂下巫先司命施糜之属【集解应劭曰先人所在之国及有灵施化民人又贵悉置祠巫祝博求神灵之意文颖曰巫掌神之位次者也范氏世仕於晋故祠祝有晋巫范会支庶留秦为刘氏故有秦巫刘氏随魏都大梁故有梁巫後徙丰丰属荆故有荆巫索隐巫先谓古巫之先有灵者盖巫咸之类也施糜郑玄谓主施糜粥之神】九天巫祠九天【索隐孝武本纪云立九天庙於甘泉三辅故事云胡巫事九天於神明台淮南子云中央曰钧天东方曰苍天东北旻天北方元天西北幽天西方皓天西南朱天南方炎天东南阳天是为九天也正义太元经云一中天二美天三徙天四罚更天五睟天六郭天七咸天八治天九成天也】皆以岁时祠宫中其河巫祠河於临晋而南山巫祠南山秦中秦中者二世皇帝【集解张晏曰子产云匹夫匹妇强死者魄能依人为厉】各有时月其後二岁或曰周兴而邑郃立后稷之祠至今血食天下【正义顔师古云祭有牲牢故言血食遍於天下】於是高祖制诏御史其令郡国县立灵星祠常以岁时祠以牛【集解张晏曰龙星左角曰天田则农祥也晨见而祭正义汉旧仪云五年修复周家旧祠祀后稷於东南为民祈农报厥功夏则龙星见而始雩龙星左角为天田右角为天庭天田为司马教人种百谷为稷灵者神也辰之神为灵星故以壬辰日祠灵星於东南金胜为土相也庙记云灵星祠在长安城东十里】高祖十年春有司请令县常以春三月及时腊祠社稷以羊豕民里社各自财以祠制曰可其後十八年孝文帝即位即位十三年下诏曰今秘祝移过于下朕甚不取自今除之始名山大川在诸侯诸侯祝各自奉祠天子官不领及齐淮南国废令太祝尽以岁时致礼如故【正义齐有泰山淮南有天柱山二山初天子祝官不领遂废其祀令诸侯奉祠今令太祝尽以岁时致礼如秦故仪】是岁制曰朕即位十三年于今赖宗庙之灵社稷之福方内又安民人靡疾间者比年登朕之不德何以飡此皆上帝诸神之赐也盖闻古

者飨其德必报其功欲有增诸神祠有司议增雍五畤路车各一乘驾被具【正义顔师古云驾车被马之饰皆具】西畤畦畤禺车各一乘禺马四匹驾被具其河湫汉水【正义河湫黄河及湫泉】加玉各二【正义言二水祭时各加玉璧二枚】及诸祠各增广坛场珪币俎豆以差加之而祝厘者归福於朕百姓不与焉自今祝致敬毋有所祈鲁人公孙臣上书曰始秦得水德今汉受之推终始传则汉当土德土德之应黄龙见宜改正朔易服色色尚黄是时丞相张苍好律历以为汉乃水德之始故河决金堤【集解駰案汉书音义曰在东郡界】其符也【索隐谓河决乃水德之符应也】年始冬十月色外黑内赤【集解服虔曰十月陰气在外黑阳气尚伏在地故内赤】与德相应如公孙臣言非也罢之後三岁黄龙见成纪【集解徐广曰在文帝十五年春正义按成纪今秦州县也】文帝乃召公孙臣拜为博士与诸生草改历服色事其夏下诏曰异物之神见于成纪无害於民岁以有年朕祈郊上帝诸神礼官议无讳以劳朕有司皆曰古者天子夏亲郊祠上帝於郊故曰郊於是夏四月文帝始郊见雍五畤祠衣皆上赤其明年赵人新垣平以望气见上言长安东北有神气成五采若人冠纓焉或曰东北神明之舍西方神明之墓也【集解张晏曰神明日也日出东方舍谓阳谷日没於西墓谓北谷也】天瑞下宜立祠上帝以合符应於是作渭阳五帝庙同宇帝一殿面各五门各如其帝色祠所用及仪亦如雍五畤【集解韦昭曰宇谓上同下异礼所谓复庙重屋也瓚曰一营宇之中立五庙正义括地志云渭阳五帝庙在雍州咸阳县东三十里宫殿疏云五帝庙一字五殿也按一字之内而设五帝各依其方帝别为一殿而门各如帝色也】夏四月文帝亲拜霸渭之会【集解如淳曰二水之会正义渭阳五庙在二水之合北岸】以郊见渭阳五帝五帝庙南临渭北穿蒲池沟水【正义顔师古云蒲池为池而种蒲也蒲字或作满言其水满恐顔说非按括地志云渭北咸阳县有兰池始皇逢盗兰池者也言穿沟引渭水入兰池也疑兰字误作为蒲重更错失】权火举而祠若光輝然属天焉於是贵平上大夫赐累千金而使博士诸生刺六经中作王制【索隐小顔云刺谓采取之也刘向七録云文帝所造书有本制兵制服制篇刺音七赐反】谋议巡狩封禅事文帝出长安门【集解徐广曰在霸陵駰案如淳曰亭名也正义括地志云长安门故亭在雍州万年县东北苑中後馆陶公主长门園武帝以长门名宫即此】若见五人於道北遂因其直北立五帝坛【集解孟康曰直值也值其立处以作坛】祠以五牢具其明年新垣平使人持玉杯上书阙下献之平言上曰阙下有宝玉气来者已视之果有献玉杯者刻曰人主延壽平又言臣候日再中【索隐晋灼云淮南云鲁阳公与韩构战战酣日暮援戈麾之日为却三舍岂其然乎】居顷之日郤复中於是始更以十七年为元年令天下大酺平言曰周鼎亡在泗水中今河溢通泗臣望东北汾陰直有金宝气意周鼎其出乎兆见不迎则不至於是上使使治庙汾陰南临河欲祠出周鼎【集解徐广曰是後三十七年鼎出汾陰】人有上书告新垣平所言气神事皆诈也下平吏治诛夷新垣平自是之後文帝怠於改正朔服色神明之事而渭阳长门五帝使祠官领以时致礼不往焉明年匈奴数入边兴兵守御後岁少不登数年而孝景即位十六年祠官各以岁时祠如故无有所兴至今天子【集解駰案自此後武帝事褚先生取为武帝本纪注解已在第十二卷今直载徐义】今天子初即位尤敬鬼神之祀元年汉兴已六十余岁矣天下又安搢绅之属皆望天子封禅改正度也而上乡儒术招贤良赵绾王臧等以文学为公卿欲议古立明堂城南以朝诸侯草巡狩封禅改历服色事未就会窦太后治黄老言不好儒术使人微伺得赵绾等奸利事召案绾臧绾臧自杀诸所兴为皆废後六年窦太后崩其明年徵文学之士公孙弘等明年今上初至雍郊见五畤後常三岁一郊【索隐汉旧仪云元年祭天二年祭地三年祭五

時三岁一徧皇帝自行也】是時上求神君舍之上林中蹕氏觀神君者長陵女子以子死見神於先後宛若宛若祠之其室民多往祠平原君往祠其後子孫以尊顯及今上即位則厚禮置祠之內中聞其言不見其人云是時李少君亦以祠竈谷道却老方見上上尊之少君者故深澤侯舍人【索隱案表深澤侯趙將夜以高祖八年封侯至元朔五年夷侯胡薨無後國除】主方匿其年及其生長常自謂七十能使物却老其游以方徧諸侯無妻子人聞其能使物及不死更饋遺之常余金錢衣食人皆以為不治生業而饒給又不知其何所人愈信爭事之少君資好方善為巧發奇中嘗從武安侯飲【索隱武安侯田蚡也】坐中有九十余老人少君乃言與其大父游射處老人為儿时從其大父識其處一坐盡驚少君見上上有故銅器問少君少君曰此器齊桓公十年陳於柏寝【索隱韓子云齊景公與晏子游於少海登柏寝之台而望其國】已而案其刻果齊桓公器一宮盡駭以為少君神數百歲人也少君言上曰祠竈則致物致物而丹沙可化為黃金黃金成為飲食器則益壽益壽而海中蓬萊僊者乃可見見之以封禪則不死黃帝是也臣常游海上見安期生安期生食巨枣大如瓜【索隱包愷云巨或作臣】安期生僊者通蓬萊中合則見人不合則隱於是天子始親祠竈遣方士入海求蓬萊安期生之屬而事化丹沙諸藥齊為黃金矣居久之李少君病死天子以為化去不死而使黃鍾【集解徐廣曰鍾音才悲反鍾縣黃縣皆在東萊】史寬舒受其方求蓬萊安期生莫能得而海上燕齊怪迂之方士多更來言神事矣亳人謬忌奏祠太一方曰天神貴者太一【索隱樂汁徵圖曰天宮紫微北極天一太一宋均云天一太一北極神之別名春秋佐助期曰紫宮天皇曜魄寶之所理也石氏云天一太一各一星在紫宮門外立承事天皇大帝】太一佐曰五帝古者天子以春秋祭太一東南郊用太牢七日為壇開八通之鬼道【索隱司馬彪續漢書祭祀志云壇有八陛通道以為門又三輔黃圖云上帝壇八觚神道八通廣三十步也】於是天子令太祝立其祠長安東南郊常奉祠如忌方其後人有上書言古者天子三年壹用太牢祠神三一天一地一太一天子許之令太祝領祠之於忌太一壇上如其方後人復有上書言古者天子常以春解祠【索隱謂祠祭以解殃咎求福祥也】祠黃帝用一梟破鏡冥羊用羊祠馬行用一青牡馬太一澤【集解徐廣曰澤一作臯】山君地長用牛【索隱此則人上書言古天子祭太一太一天神也澤山本紀作峯山澤山君地長謂祭地於峯山同用太牢故云用牛蓋是異代之法也】武夷君用乾魚【索隱顧氏案地理志建安有武夷山溪有仙人葬處即漢志書所謂武夷君是時既用越巫勇之疑即此神今案其祀用乾魚兼不享牲牢或如顧說也】陰陽使者以一牛令祠官領之如其方而祠於忌太一壇旁其後天子苑有白鹿以其皮為帀以發瑞應造白金焉【索隱樂彥云謂龍馬龜也】其明年郊雍【集解徐廣曰武帝立已十九年】獲一角獸若麒麟然有司曰陛下肅祇郊祀上帝報享錫一角獸蓋麟云於是薦五時時加一牛以燎錫諸侯白金風符應合於天也於是濟北王以為天子且封禪乃上書獻泰山及其旁邑天子以他縣償之常山王有罪遷天子封其弟於真定以續先王祀【集解徐廣曰元鼎四年時】而以常山為郡然後五岳皆在天子之邦其明年齊人少翁以鬼神方見上上有所幸王夫人【集解徐廣曰外戚傳曰趙之王夫人幸有子封為齊王】夫人卒少翁以方蓋夜致王夫人及竈鬼之貌云【索隱漢書作李夫人卒帝悼之李少翁致其形帝為作賦此云王夫人新論亦同未詳】天子自帷中望見焉於是乃拜少翁為文成將軍賞賜甚多以客禮禮之文成言曰上即欲與神通宮室被服非象神神物不至乃作画云氣車及各以勝日駕車辟惡鬼【索隱樂彥云畫以勝日者謂畫青車以甲乙畫赤車以丙丁畫元車以壬癸畫白車以庚辛畫黃車以戊巳將有水事則乘黃車故云駕車辟惡鬼也】又

作甘泉宫中为台室画天地太一诸鬼神而致祭具以致天神居岁余其方益衰神不至乃为帛书以饭牛详不知言曰此牛腹中有奇杀视得书书言甚怪天子识其手书问其人果是伪书於是诛文成将军隐之其後则又作柏梁铜柱【集解徐广曰元鼎二年时】承露仙人掌之属矣文成死明年天子病鼎湖甚【索隐三辅黄图云鼎湖宫名在蓝田韦昭云地名近宜春案湖本属京兆後分属弘农恐非鼎湖处也】巫医无所不致不愈游水发根言上郡有巫病而鬼神下之上召置祠之甘泉及病使人问神君神君言曰天子无忧病病少愈强与我会甘泉於是病愈遂起幸甘泉病良已大赦置酒壽宫神君壽宫神君最贵者太一其佐曰大禁司命之属皆从之弗可得见闻其言言与人音等时去时来来则风肃然居室帷中时昼言然常以夜天子祓然後入因巫为夫人关饮食所以言行下又置壽宫北宫张羽旗设供具以礼神君神君所言上使人受书其言命之曰书法其所语世俗之所知也无絶殊者而天子心独喜其事秘世莫知也其後三年有司言元宜以天瑞命不宜以一二数一元曰建二元以长星曰光三元以郊得一角兽曰犛云其明年冬天子郊雍议曰今上帝朕亲郊而后土无祀则礼不答也有司与太史公祠官寬舒议天地牲角璽栗今陛下亲祠后土后土宜於泽中圆丘为五坛坛一黄犛太牢具已祠尽瘞而从祠衣上黄於是天子遂东始立后土【集解徐广曰元鼎四年】祠汾陰脰丘如寬舒等议上亲望拜如上帝礼礼毕天子遂至荥阳而还过雒阳下诏曰三代邈絶远矣难存其以三十里地封周後为周子南君以奉其先祀焉是岁天子始巡郡县浸寻於泰山矣其春乐成侯上书言栾大栾大胶东宫人故尝与文成将军同师已而为胶东王尚方而乐成侯姊为康王后【索隐康王名寄】无子康王死他姬子立为王【集解徐广曰以元狩二年薨】而康后有淫行与王不相中【索隐三苍云中得也】相危以法康后闻文成已死而欲自媚於上乃遣栾大因乐成侯求见言方天子既诛文成後悔其蚤死惜其方不尽及见变大大说大为入长美言多方略而敢为大言处之不疑大言曰臣常往来海中见安期羡门之属顾以臣为贱不信臣又以为康王诸侯耳不足与方臣数言康王康王又不用臣臣之师曰黄金可成而河决可塞不死之药可得僊人可致也然臣恐效文成则方士皆奄口恶敢言方哉上曰文成食马肝死耳【索隐论衡云气勃而毒盛故食走马肝马肝杀人儒林传曰食?无食马肝是也】子诚能修其方我何爱乎【索隐上语栾大云子诚能修文成方我更何所爱惜乎谓不吝金宝禄位也】大曰臣师非有求人者求之陛下必欲致之则贵其使者令有亲属以客礼待之勿卑使各佩其信印乃可使通言於神人神人尚肯邪不邪致尊其使然後可致也於是上使验小方鬬棊自相触擊【索隐顾氏案万毕术云取鸡血杂磨针铁搗和磁石棊头置局上自相抵击也】是时上方忧河决而黄金不就乃拜大为五利将军居月余得四印【索隐谓五利将军天士将军地士将军大通将军为四也】佩天士将军地士将军大通将军印制诏御史昔禹疏九江决四渎间者河溢臯陆堤繇不息朕临天下二十有八年【集解徐广曰元鼎四年也】天若遗朕士而大通焉乾称蜚龙鸿渐于般朕意庶几与焉其以二千户封地士将军大为乐通侯赐列侯甲第僮千人乘轡斥车马帷幄器物以充其家又以卫长公主妻之【索隐卫子夫之子曰卫太子女曰卫长公主是卫后长女也非如帝姊曰长公主之例也】齎金万斤更命其邑曰当利公主【索隐地理志东莱有当利县】天子亲如五利之第使者存问供给相属於道自大主【集解徐广曰武帝姑】将相以下皆置酒其家献遗之於是天子又刻玉印曰天道将军使使衣羽衣夜立白茅上五利将军亦衣羽衣夜立白茅上受印以示不臣也而佩天道者且为天子道天神也於是五利常夜祠其家欲以下神神未至而百鬼集矣然颇能使之其後装治行东入海求其师云大见数

月佩六印【索隐更加乐通侯及天道将军印为六印】贵震天下而海上燕齐之间莫不搯扼而自言有禁方能神僊矣其夏六月中汾陰巫锦为民祠魏睢后土营旁见地如鉤状掊视得鼎鼎大异於衆鼎文镂无款识怪之言吏吏告河东太守胜胜以闻天子使使验问巫得鼎无奸诈乃以礼祠迎鼎至甘泉从行上荐之至中山【集解徐广曰河渠书曰凿泾水自中山西】嚙?有黄云盖焉有麋过上自射之因以祭云【集解徐广曰上言从行上荐之或者祭鼎也】至长安公卿大夫皆议请尊宝鼎天子曰间者河溢岁数不登故巡祭后土祈为百姓育谷今岁丰庾未报鼎曷为出哉有司皆曰闻昔泰帝兴神鼎一【索隐孔文祥云泰帝太昊也】一者壹统天地万物所系终也黄帝作宝鼎三象天地人禹收九牧之金铸九鼎皆尝亨飗【集解徐广曰飗亨煮也音殇皆尝以亨牲牢而祭祀】上帝鬼神遭圣则兴鼎迁于夏商周德衰宋之社亡鼎乃沦没伏而不见颂云自堂徂基自羊徂牛鼐鼎及鼐不吴不鷖胡考之休今鼎至甘泉光润龙变承休无疆合兹中山【集解徐广曰关中亦复有中山也非鲁中山】有黄白云降盖若兽为符路弓乘矢集获坛下报祠大享【集解徐广曰一云大报祠享】唯受命而帝者心知其意而合德焉鼎宜见於祖祢藏于帝廷以合明应制曰可入海求蓬莱者言蓬莱不远而不能至者殆不见其气上乃遣望气佐 其气云其秋上幸雍且郊或曰五帝太一之佐也宜立太一而上亲郊之上疑未定齐人公孙卿曰今年得宝鼎其冬辛巳朔旦冬至与黄帝时等卿有礼书曰黄帝得宝鼎宛胸问於鬼臿区鬼臿区对曰黄帝得宝鼎神策是岁己酉朔旦冬至得天之纪终而复始於是黄帝迎日推策後率二十岁复朔旦冬至凡二十推三百八十年黄帝僊登于天卿因所忠欲奏之所忠视其书不经疑其妄书谢曰宝鼎事已决矣尚何以为卿因嬖人奏之上大说乃召问卿对曰受此书申公申公已死上曰申公何人也卿曰申公齐人与安期生通受黄帝言无书独有此鼎书曰汉兴复当黄帝之时曰汉之圣者在高祖之孙且曾孙也宝鼎出而与神通封禅封禅七十二王唯黄帝得上泰山封申公曰汉主亦当上封上封则能僊登天矣黄帝时万诸侯而神灵之封居七千【索隐韦昭云黄帝时万国以其修神灵得封者七千国或为七十国乐彦云以舜为神明之後封妣滿於陈之类是也顾氏案国语仲尼云山川之守足以纪纲天下者其守为神汪芒氏之君守封禺之山也】天下名山八而三在蛮夷五在中国中国华山首山太室泰山东莱此五山黄帝之所常游与神会黄帝且战且学僊愚百姓非其道者乃断斩非鬼神者【索隐谓有非毁鬼神之人乃断理而诛斩之】百余岁然後得与神通黄帝郊雍上帝宿三月鬼臿区号大鸿死葬雍故鸿冢是也其後黄帝接万灵明廷明廷者甘泉也所谓寒【集解徐广曰一作塞】门者谷口也黄帝采首山铜铸鼎於荆山下鼎既成有龙垂胡髯下迎黄帝【索隐说文云胡牛垂颌也释名云胡在咽下垂者则所谓龙胡也】黄帝上骑羣臣後宫从上者七十余人龙乃上去余小臣不得上乃悉持龙髯龙髯拔堕堕黄帝之弓百姓仰望黄帝既上天乃抱其弓与胡髯号故後世因名其处曰鼎湖其弓曰乌号於是天子曰嗟乎吾诚得如黄帝吾视去妻子如脱躡耳乃拜卿为郎东使候神於太室上遂郊雍至陇西西登崆峒幸甘泉令祠官寬舒等具太一祠坛祠坛放薄忌太一坛坛三垓【集解徐广曰阶次也】五帝坛环居其下各如其方黄帝西南除八通鬼道太一其所用如雍一罍物而加醴枣脯之属杀一狸牛以为俎豆牢具而五帝独有俎豆醴进其下四方地为醢食羣臣从者及北斗云已祠昨余皆燎之其牛色白鹿居其中斃在鹿中水而泊之【集解徐广曰泊一作酒灌水於釜中曰泊音冀】祭日以牛祭月以羊斃特【索隐乐彦云祭日以太牢月以少牢特不用牝也小顏云牛羊若斃止一牲故云特也】太一祝宰则衣紫及绣五帝各如其色日赤月白十一月辛巳朔旦冬至昧爽天子始郊

拜太一朝朝日夕夕月则揖而见太一如雍郊礼其赞飨曰【索隐顾氏云飨祀祠也汉旧仪云赞飨一人秩六百石是也】天始以宝鼎神策授皇帝朔而又朔终而复始皇帝敬拜见焉而衣上黄其祠列火满坛坛旁亨炊具有司云祠上有光焉公卿言皇帝始郊见太一云阳有司奉瑄玉嘉牲荐飨是夜有美光及昼黄气上属天太史公祠官宽舒等曰神灵之休佑福兆祥宜因此地光域立太畤坛以明应令太祝领秋及腊间祠三岁天子一郊见其秋为伐南越告祷太一以牡荆画幡日月北斗登龙以象太一三星为太一锋【集解徐广曰天官书曰天极星明者太一常居也斗口三星曰太一】命曰灵旗为兵祷则太史奉以指所伐国而五利将军使不敢入海之泰山祠上使人随验实毋所见五利妄言见其师其方尽多不讎【索隐郑德云相应为讎谓其言语不相应无验也】上乃诛五利其冬公孙卿候神河南言见僊人迹缑氏城上有物如雉往来城上天子亲幸缑氏城视迹问卿得毋效文成五利乎卿曰僊者非有求人主人主者求之其道非少宽假神不来言神事事如迂诞积以岁乃可致也於是郡国各除道缮治宫观名山神祠所以望幸也其春既灭南越上有嬖臣李延年被好音见上善之下公卿议曰民间祠尚有鼓舞乐今郊祀而无乐岂称乎公卿曰古者祠天地皆有乐而神祇可得而礼或曰太帝使素女鼓五十弦瑟悲帝禁不止故破其瑟为二十五弦於是赛南越祷祠太一后土始用乐舞益召歌儿作二十五弦【集解徐广曰瑟】及空侯【集解徐广曰应劭云武帝令乐人侯调始造此器】琴瑟自此起其来年冬上议曰古者先振兵释旅【集解徐广曰古释字作泽】然後封禅乃遂北巡朔方勒兵十余万还祭黄帝冢桥山释兵须如【集解徐广曰须一作凉】上曰吾闻黄帝不死今有冢何也或对曰黄帝已僊上天羣臣葬其衣冠既至甘泉为且用事泰山先类祠太一自得宝鼎上与公卿诸生议封禅封禅用希旷絶莫知其仪礼而羣儒采封禅尚书周官王制之望祀射牛事齐人丁公年九十余曰封禅者合不死之名也秦皇帝不得上封陛下必欲上稍上即无风雨遂上封矣上於是乃令诸儒习射牛草封禅仪数年至且行天子既闻公孙卿及方士之言黄帝以上封禅皆致怪物与神通欲放黄帝以上接神僊人蓬莱士高世比德於九皇而颇采儒术以文之羣儒既已不能辨明封禅事又牵拘於诗书古文而不能骋上为封禅祠器示羣儒羣儒或曰不与古同徐偃又曰太常诸生行礼不如鲁善周霸属图封禅事於是上绌偃霸而尽罢诸儒不用三月遂东幸缑氏礼登中岳太室从官在山下闻若有言万岁云问上上不言问下下不言於是以三百户封太室奉祠命曰崇高邑东上泰山泰山之草木叶未生乃令人上石立之泰山巅上遂东巡海上行礼祠八神齐人之上疏言神怪奇方者以万数然无验者乃益发船令言海中神山者数千人求蓬莱神人公孙卿持节常先行候名山至东莱言夜见大人长数丈就之则不见见其迹甚大类禽兽云羣臣有言见一老父牵狗言吾欲见巨公已忽不见上即见大迹未信及羣臣有言老父则大以为僊人也宿留海上予方士传车及间使求僊人以千数四月还至奉高上念诸儒及方士言封禅人人殊不经难施行天子至梁父礼祠地主乙卯令侍中儒者皮弁荐绅射牛行事封泰山下东方如郊祠太一之礼封广丈二尺高九尺其下则有玉牒书书秘礼毕天子独与侍中奉车子侯上泰山亦有封其事皆禁明日下陰道丙辰禅泰山下趾东北肃然山如祭后土礼天子皆亲拜见衣上黄而尽用乐焉江淮间一茅三脊为神藉五色土益杂封纵远方奇兽蜚禽及白雉诸物颇以加礼兕牛犀象之属不用皆至泰山祭后土封禅祠其夜若有光昼有白云起封中天子从禅还坐明堂羣臣更上壽於是制诏御史朕以眇眇之身承至尊兢兢焉惧不任维德菲薄不明于礼乐修祠太一若有象景光?如有望震於怪物欲止不敢遂登封泰山至于梁父而後禅肃然自新嘉与士大夫更始赐民百户牛一酒十石加

年八十孤寡布帛二匹复博奉高蛇丘历城无出今年租税其大赦天下如乙卯赦令行所过毋有复作事在二年前皆勿聽治又下诏曰古者天子五载一巡狩用事泰山诸侯有朝宿地其令诸侯各治邸泰山下天子既已封泰山无风雨灾而方士更言蓬莱诸神若将可得於是上欣然庶几遇之乃复东至海上望冀遇蓬莱焉奉车子侯暴病一日死【索隐新论云武帝出玺印石财有朕兆子侯则没印帝畏恶故杀之风俗通亦云然顾?案武帝集帝与子侯家语云道士皆言子侯得仙不足悲此说是也】上乃遂去并海上北至碣石巡自辽西历北边至九原五月反至甘泉有司言宝鼎出为元鼎以今年为元封元年其秋有星茀于东井後十余日有星茀于三能望气王朔言 独见旗星出如瓜食顷复入焉有司皆曰陛下建汉家封禅天其报德星云【索隐乐彦包恺并作旗星旗星即德星也符瑞图云旗星之极芒艷如旗本亦作旗也】其来年冬郊雍五帝还拜祝祠太一赞飨曰德星昭衍厥维休祥壽星仍出渊耀光明信星昭见皇帝敬拜太祝之享其春公孙卿言见神人东莱山若云欲见天子天子於是幸缙氏城拜卿为中大夫遂至东莱宿留之数日无所见见大人迹云复遣方士求神怪采芝药以千数是岁旱於是天子既出无名乃祷万里沙过祠泰山还至瓠子自临塞决河留二日沈祠而去使二卿将卒塞决河徙二渠复禹之故迹焉是时既灭两越越人勇之乃言越人俗鬼而其祠皆见鬼数有效昔东瓯王敬鬼壽百六十岁後世怠慢故衰耗乃令越巫立越祝祠安台无坛亦祠天神上帝百鬼而以鸡卜上信之越祠鸡卜始用公孙卿曰僊人可见而上往常遽以故不见今陛下可为观如缙城【集解徐广曰一云如缙氏城】置脯枣神人宜可致也且僊人好楼居於是上令长安则作蜚廉桂观甘泉则作益延壽观【索隐小顔以为作益壽延壽二馆汉武故事云作延壽观高二十丈】使卿持节设具而候神人乃作通天茎台【集解徐广曰在甘泉索隐汉书并无茎字疑衍也】置祠具其下将招来僊神人之属於是甘泉更置前殿始广诸宫室夏有芝生殿房内中【集解徐广曰元封二年】天子为塞河兴通天台若见有光云乃下诏甘泉房中生芝九茎赦天下毋有复作其明年伐朝鲜夏旱公孙卿曰黄帝时封则天旱乾封三年上乃下诏曰天旱意乾封乎其令天下尊祠灵星焉其明年上郊雍通回中道巡之春至鸣泽从西河归其明年冬上巡南郡至江陵【集解徐广曰元封五年】而东登礼灋之天柱山号曰南岳浮江自寻阳出枞阳过彭蠡礼其名山川北至琅邪并海上四月中至奉高修封焉初天子封泰山泰山东北趾古时有明堂处处险不敞上欲治明堂奉高旁未晓其制度济南人公玉带上黄帝时明堂图明堂图中有一殿四面无壁以茅盖通水圜宫垣为复道上有楼从西南入命曰昆仑天子从之入以拜祠上帝焉於是上令奉高作明堂汶上【集解徐广曰在元封二年秋】如带图及五年修封则祠太一五帝於明堂上坐令高皇帝祠坐对之祠后土於下房以二十太牢天子从昆仑道入始拜明堂如郊礼礼毕燎堂下而上又上泰山自有秘祠其巔而太山下祠五帝各如其方黄帝并赤帝而有司侍祠焉山上举火下悉应之其後二岁十一月甲子朔旦冬至推历者以本统天子亲至泰山以十一月甲子朔旦冬至日祠上帝明堂毋修封禅【集解徐广曰常五年一修耳今适二年故但祠於明堂】其赞飨曰天增授皇帝太元神策周而复始皇帝敬拜太一东至海上考入海及方士求神者莫验然益遣冀遇之十一月乙酉柏梁裁十二月甲午朔上亲禅高里祠后土临勃海将以望祀蓬莱之属冀至殊廷焉上还以柏梁裁故朝受计甘泉公孙卿曰黄帝就青灵台十二日烧黄帝乃治明廷明廷甘泉也方士多言古帝王有都甘泉者其後天子又朝诸侯甘泉甘泉作诸侯邸勇之乃曰越俗有火裁复起屋必以大用胜服之於是作建章宫度为千门万户前殿度高未央其东则凤阙高二十余丈其西则唐中数十里虎圈其北治大池渐台

高二十余丈命曰太液池中有蓬莱方丈瀛洲壶梁象海中神山龟鱼之属其南有玉堂壁门大鸟之属乃立神明台并干楼度五十丈辇道相属焉夏汉改历以正月为岁首而色上黄官名更印章以五字为太初元年是岁西伐大宛蝗大起丁夫人雒阳虞初等以方祠诅匈奴大宛焉其明年有司上言雍五畤无牢孰具芬芳不备乃令祠官进畤犢牢具色食所胜而以木禺马代驹焉独五月尝驹行亲郊用驹及诸名山川用驹者悉以木禺马代行过乃用驹他礼如故其明年东巡海上考神僊之属未有验者方士有言黄帝时为五城十二楼以神人於执期命曰迎年上许作之如方命曰明年上亲礼祠上帝焉公玉带曰黄帝时虽封泰山然风后封臣歧伯令黄帝封东泰山禅凡【集解徐广曰一作丸】山合符然後不死焉天子既令设祠具至东泰山泰山卑小不称其声乃令祠官礼之而不封禅焉其後令带奉祠神物夏遂还太山修五年之礼如前而加以禅祠石闾石闾者在泰山下址南方方士多言此僊人之间也故上亲禅焉其後五年复至泰山修封【集解徐广曰天汉三年】还过祭恒山今天子所兴祠太一后土三年亲郊祠建汉家封禅五年一修封薄忌太一及三一冥羊马行赤星五宽舒之祠官以岁时致礼【索隐郊祀志云祠官宽舒议祠后土为五坛故谓之五宽舒祠官也】凡六祠皆太祝领之至如八神诸明年凡山他名祠行过则祠行去则已方士所兴祠各自主其人终则已祠官不主他祠皆如其故今上封禅其後十二岁而还徧於五岳四渎矣而方士之伺神人入海求蓬莱终无有验而公孙卿之神者犹以大人之迹为解无有效天子益怠厌方士之怪迂语矣然羈縻不絶冀遇其真自此之後方士言神祠者弥衆然其效可睹矣太史公曰余从巡祭天地诸神名山川而封禅焉入壽宫侍祠神语?观方士祠官之意於是退而论次自古以来用事於鬼神者具见其表里後有君子得以览焉若至俎豆珪币之详献酬之礼则有司存

【索隐述赞曰礼载升中书称肆类古今盛典皇王能事登封报天降禅除地飞英腾实金泥石记汉承遗绪斯道不坠仙闾肃然扬休勒志】

史记卷二十八

史记卷二十八考证

封禅书至矣而德不洽○监本讹作至梁父矣衍梁父二字今改正

视其掌诗云紂在位文王受命○臣照按诗云二字不审所谓注家皆略盖唐时无此文也盖视其掌云为句衍一诗字耳

必於高山之下小山之上命曰畤○集解索隐文俱有脱误不可解

宋毋忌索隐乐彦引老子道经云月中仙人宋毋忌○今五千言中无此语

汧洛正义洛水商州洛南县西冢岭山○推寻文义洛水下脱出字

杜主故周之右将军正义括地志云杜祠雍州长安县西南二十五里○推寻文义杜祠下脱在字

色外黑内赤集解服?曰十月陰气在外黑阳气尚伏在地故内赤○按汉书郊祀志注引服?云十月陰气在外故外黑此脱故外二字

曰天神贵者太一索隐乐汁徵图○当作乐汁图徵碁自相触击索隐碁头置局上○推寻文义碁头上脱涂字

史记卷二十八考证

卷二十九

钦定四库全书

史记卷二十九

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

河渠书第七

夏书曰禹抑鸿水【索隐抑音忆抑者遏也洪水滔天故禹遏之不令害人也汉书沟洫志作堙堙抑皆塞也】十三年过家不入门陆行载车水行载舟泥行蹈屨山行即桥【集解徐广曰桥近遥反一作??直辕车也音已足反尸子曰山行乘櫟音力追反又曰行涂以楯行险以撮行沙以轨又曰乘风车音去乔反索隐屨字亦作屨同音昌芮反注以撮子芮反又子絶反与蒹音同】以别九州随山浚川任土作贡通九道陂九泽【正义顔师古云通九州之道及障遏其泽也】度九山【正义度田洛反释名云山者产也治水以志九州山泽所生物产言於地所宜商而度之以制贡赋】然河菑衍溢害中国也尤甚唯是为务故道河自积石历龙门【正义在同州韩城县北五十里为凿广八十步】南到华陰【正义华陰县也魏之阴晋秦惠文王更名寧秦汉高帝改曰华阴】东下砥柱【正义底柱山俗名三门山在硤石县东北五十里在河之中】及孟津雒汭至于大邳【正义孟津在洛州河阳县南门外孔安国云山再成曰邳按在卫州黎阳县南七里】於是禹以为河所从来者高水湍悍【集解韦昭曰湍疾悍强也】难以行平地数为败乃厮二渠以引其河【集解駙案汉书音义曰厮分也二渠其一出贝丘西南二折者也其一则漯川索隐厮汉书作洒史记旧本亦作洒字从水按韦昭云疏决为洒字音疏跬反厮即分其流泄其怒是也二渠其一则漯川其二王莽时遂空也】北载之高地过降水【正义降水源出潞州屯留县西南方山东北】至于大陆【正义大陆泽在邢州及赵州界一名广河泽一名钜鹿泽也】播为九河【正义言过降水及大陆水之口至冀州分为九河也】同为逆河入于勃海【集解瓚曰禹贡曰夹右碣石入于海然则河口之入海乃在碣石武帝元光二年河徙东郡更注勃海禹时不注勃海也】九川既疏九泽既洒诸夏艾安功施于三代自是之後荥阳下引河东南为鸿沟【索隐楚汉中分之界文颖云即今官渡水也盖为二流一南经阳武为官渡水一东经大梁城即河沟今之汴河是也】以通宋郑陈蔡?卫与济汝淮泗会于楚西方则通渠汉水云梦之野东方则通鸿沟江淮之

间於吴则通渠三江五湖【集解韦昭曰五湖湖名耳实一湖今太湖是也在吴西南索隐三江按地理志北江从会稽毗陵县北东入海中江从丹阳芜湖县东北至会稽阳羡县东入海南江从会稽吴县南东入海故禹贡有北江中江也五湖郭璞江赋云具区洮滈彭蠡青草洞庭又云太湖周五百里故曰五湖】於齐则通菑济之间於蜀蜀守冰【集解駰案汉书曰冰姓李】凿离碓【集解晋灼曰古堆字】辟沫水之害【索隐辟音避沫音末案说文云沫水出蜀西南徼外与青衣合东南入海也】穿二江成都之中【正义括地志云大江一名汶江一名管桥水一名清江亦名水江西南自温江县界流来又云郫江一名成都江一名市桥江亦名中日江亦曰内江西北自新繁县界流来二江并在益州成都县界杜预益州记云二江者郫江流江也风俗通云秦昭王使李冰为蜀守开成都县两江溉田万顷神须取女二人以为妇冰自以为女与神?径至祠劝神酒酒杯澹澹因厉声责之因忽不见良久有两苍牛鬬於江岸有闲辄还流江谓官属曰吾鬬疲极不当相助耶南向腰中正白者我绶也主簿刺杀北面者江神遂死华阳国志云蜀时濯锦流江中则鲜明也】此渠皆可行舟有余则用溉百姓飨其利至于所过往往引其水益用溉田畴之渠以万亿计然莫足数也西门豹引漳水溉邺【正义括地志云漳水一名浊漳水源出潞州长子县西力黄山地理志云浊漳水出长子鹿谷山东至邺入清漳按力黄鹿谷二山北鹿也邺相州之县也】以富魏之河内而韩闻秦之好兴事欲罢之母令东伐【集解如淳曰欲罢劳之息秦伐韩之计】乃使水工郑国【集解韦昭曰郑国能治水故曰水工】间说秦令凿泾水自中山西邸瓠口为渠【索隐小颜云中音仲即今九嵎山之东中山是也邸至也瓠口即谷口郊祀志所谓寒门谷口是也与池阳相近故曰田於何所池阳谷口也正义括地志云中山一名仲山在雍州云阳县西十五里又云焦获薮亦名瓠在泾阳北城外也邸至也至渠首起云阳县西南二十五里今枯也】并北山东注洛【集解徐广曰出冯翊怀德县】三百余里欲以溉田中作而觉秦欲杀郑国郑国曰始臣为间然渠成亦秦之利也【索隐沟洫志郑国曰臣为韩延数岁之命为秦建万世之功是也】秦以为然卒使就渠渠就用注填阡之水溉泽卤之地四万余顷【索隐溉音古代反泽一作舄音昔本或作斥则如字读之】收皆亩一钟於是关中为沃野无凶年秦以富强卒并诸侯因命曰郑国渠汉兴三十九年孝文时河决酸枣东溃金堤【正义括地志云金堤一名十里堤在白马县东五里】於是东郡大兴卒塞之其後四十有余年今天子元光之中而河决於瓠子东南注钜野【正义括地志云郛州钜野县东北大泽是】通於淮泗於是天子使汲黯郑当时兴人徒塞之辄复坏是时武安侯田蚡为丞相其奉邑食郿【索隐郿音输韦昭云清河县也正义贝州县也】郿居河北河决而南则郿无水菑邑收多蚡言於上曰江河之决皆天事未易以人力为强塞塞之未必应天而望气用数者亦以为然於是天子久之不事复塞也是时郑当时为大农言曰异时关东漕粟从渭中上度六月而罢而漕水道九百余里时有难处引渭穿渠起长安并南山下至河三百余里径易漕度可令三月罢而渠下民田万余顷又可得溉田此损漕省卒而益肥关中之地得谷天子以为然令齐人水工徐伯表【索隐旧说徐伯表水工姓名也小颜云表者巡行穿渠之处而表记之若今竖标表不是名也】悉发卒【集解徐广曰一云悉衆】数万人穿漕渠三岁而通通以漕大便利其後漕稍多而渠下之民颇得以溉田矣其後河东守番系言漕从山东西【索隐番音婆又音潘诗小雅云番维司徒番氏也系音系从山东西者谓从山东运漕而西入关也】岁百余万石更砥柱之限败亡甚多而亦烦费穿渠引汾【正义括地志云汾水源出岚州静乐县北百三十里管涔山北东南流入并州即西南流入至绛州蒲州入河也】溉皮氏汾陰【正义括地志

云皮氏故城在绛州龙门县西百三十步自秦汉魏晋皮氏县皆治也汾陰故城俗名殷汤城在蒲州汾陰县北九里汉汾阴县】下引河溉汾陰蒲坂下度可得五千顷五千顷故尽河壩【集解韦昭曰瑞音而缘反谓缘河边地索隐又音人兗反】弃地民菱牧其中耳【索隐菱乾草也谓收菱及牧畜於中】今溉田之度可得谷二百万石以上谷从渭上与关中无异而砥柱之东可无复漕天子以为然发卒数万人作渠田数岁河移徙渠不利则田者不能偿种久之河东渠田废予越人令少府以为稍入【集解如淳曰时越人有徙者以田与之其租税入少府索隐其田既薄越人徙居者习水利故与之而稍少其税入之於少府】其後人有上书欲通褒斜道【集解韦昭曰褒中县也斜谷名音邪瓚曰褒斜二水名正义括地志云褒谷在梁州褒城县北五十里斜水源出褒城县西北九十八里衙岭山与褒水同源而?流汉书沟洫云褒水通沔斜水通渭皆以行船是也按褒城即褒中县也】及漕事下御史大夫张汤汤阿其事因言抵蜀从故道【正义括地志云凤州两当县本汉故道县也在州西五十里】故道多阪回远今穿褒斜道少阪近四百里而褒水通沔斜水通渭皆可以行船漕漕从南阳【正义南阳郡今邓州】上沔入褒褒之絶水至斜间百余里以车转从斜下下渭如此汉中之谷可致山东从沔无限【正义无限言多也山东谓河南之东山南之东及江南淮南皆经砥柱主运今并从沔便於三门之漕也】便於砥柱之漕且褒斜材木竹箭之饶拟於巴蜀天子以为然拜汤子卬为汉中守发数万人作褒斜道五百余里道果便近而水湍石【集解徐广曰湍一作洧】不可漕其後庄熊罴言临晋【正义括地志云同州本临晋城也一名大荔城亦曰冯翊城】民愿穿洛以溉重泉以东万余顷故卤地诚得水可令亩十石【正义洛漆沮水也括地志云重泉故城在同州蒲城县东南四十五里在同州西北亦四十五里】於是发卒万余人穿渠自徵引洛水至商颜下【集解服虔曰颜音崖应劭曰徵在冯翊或曰商颜山名索隐徵音惩县名也小颜云即今之澄城也颜又如字】岸善崩【正义言商原之崖岸土性疎故善崩毁也】乃凿井深者四十余丈往往为井井下相通行水水颓以絶商颜【集解瓚曰下流曰颓】东至山岭十余里闲井渠之生自此始穿渠得龙骨【正义括地志云伏龙祠在同州冯翊县西北四十里故老云汉时自徵穿渠引洛得龙骨其後立祠因以伏龙为名今祠颇有灵验也】故名曰龙首渠作之十余岁渠颇通犹未得其饶自河决瓠子後二十余岁岁因以数不登而梁楚之地尤甚天子既封禅巡祭山川其明年旱乾封少雨天子乃使汲仁郭昌发卒数万人塞瓠子决於是天子已用事万里沙【正义括地志云万里沙在华州郑县东北二十里也】则还自临决河沈白马玉璧于河令羣臣从官自将军已下皆负薪寘决河是时东流郡烧草以故薪柴少而下淇园之竹【集解晋灼曰卫之苑也多竹篠】以为榱【集解如淳曰树竹塞水决之口稍稍布插接树之水稍弱补令密谓之榱以草塞其里乃以土填之有石以石为之索隐榱音其免反榱者树於水中稍下竹及土石者也】天子既临河决悼功之不成乃作歌曰瓠子决兮将柰何皓皓盱盱兮閭殫为河【集解如淳曰殫尽也颶谓州閭尽为河】殫为河兮地不得寧功无已时兮吾山平【集解徐广曰东郡东阿有鱼山或者是手颶案如淳曰恐水渐山使平也韦昭曰凿山以填河也】吾山平兮钜野溢【集解如淳曰瓠子决灌钜野泽使溢也】鱼拂郁兮柏冬日【集解徐广曰柏犹迫也冬日行天边若与水相连矣颶案汉书音义曰钜野满溢则衆鱼拂郁而滋长也迫冬日乃止】延道弛兮离常流【集解徐广曰延一作正颶案晋灼曰河道皆弛坏索隐言河之决由其源道延长弛溢故使其道皆离常流也】蛟龙骋兮方远游归旧川兮神哉沛【集解瓚曰水还旧道则羣害消除神佑滂沛】不封禅兮安知外为我谓河伯兮何不仁泛滥不止兮愁吾人啮桑浮兮

淮泗满【集解张晏曰啮桑地名也如淳曰邑名为水所浮漂】久不反兮水维缓一曰河汤
汤兮激滂潏北渡迥兮浚流难搯长茭兮沈美玉【集解如淳曰搯取也茭草也音郊一曰茭
竿也取长竿树之用着石间以塞决河瓚曰竹苇絙谓之茭下所以引致上石者也索隐搯音
已免反茭一作茭音废邹氏又音绋也】河伯许兮薪不属【集解如淳曰旱烧故薪不足】
薪不属兮卫人罪烧萧条兮噫乎何以御水颓林竹兮榘石菑【集解如淳曰河决榘不能禁
故言留韦昭曰榘柱也木立死曰菑】宣房塞兮万福来於是卒塞瓠子筑宫其上名曰宣房
宫而道河北行二渠复禹旧迹而梁楚之地复寧无水灾自是之後用事者争言水利朔方西
河河西酒泉皆引河及川谷以溉田而关中辅渠灵轺【集解如淳曰地理志陂屋有灵轺渠
索隐案沟洫志儿寛为左内史奏请穿六辅渠小顔云今尚谓之辅渠亦曰六渠也】引堵水
【集解徐广曰一作诸川】汝南九江引淮东海引钜定【集解瓚曰钜定泽名】太山下引
汶水皆穿渠为溉田各万余顷佗小渠披山通道者不可胜言然其着者在宣房

太史公曰余南登庐山观禹疏九江遂至于会稽太湟【集解徐广曰一作湿】上姑苏望五
湖东闚洛汭大邳迎河行淮泗济漯洛渠西瞻蜀之岷山及离碓北自龙门至于朔方曰甚哉
水之为利害也余从负薪塞宣房悲瓠子之诗而作河渠书【集解徐广曰沟洫志行田二百
亩分赋田与一夫二百亩以田恶故更岁耕之索隐述赞曰水之利害自古而然禹疏沟洫随
山濬川云洎後世非无圣贤鸿沟既划龙骨斯穿填阨攸垦黎蒸有年宣房在咏梁楚获全】

史记卷二十九

史记卷二十九考证

河渠书功无已时兮吾山平集解徐广曰东郡东阿有鱼山或者是乎駟按如淳曰恐水渐山
使平也○水经注马颊水又南北流迳山南山即吾山也

史记卷二十九考证

卷三十

钦定四库全书

史记卷三十

汉太史令司马迁撰

宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

平準书第八

【集解駰案汉书百官表曰大司农属官有平準令索隐大司农属官有平準令丞者以均天下郡国输歛贵则榷之贱则买之平赋以相準输归于京都故命曰平準】

汉兴接秦之弊丈夫从军旅老弱转粮饟作业剧而财匱自天子不能具钧駟【索隐天子驾駟马其色宜齐同今言国家贫天子不能具钧色之駟马汉书作醇駟醇与纯一色也或作駢非也】而将相或乘牛车齐民无藏盖【集解如淳曰齐等无有贵贱故谓之齐民若今言平民矣晋灼曰中国被教之民也苏林曰无物可盖藏】於是为秦钱重难用更令民铸钱【集解駰案汉书食货志曰铸榆莢钱索隐顾氏案古今注云秦钱半两径寸二分重十二铢莢钱重三铢钱谱云文为汉兴也】一黄金一斤【索隐如淳云时以钱为货黄金一斤直万钱非也又臣瓚下注云秦以一鎰为一金汉以一斤为一金是其义也】约法省禁而不轨逐利之民蓄积余业以稽市物物踊腾榷【集解李奇曰稽贮滞也如淳曰稽考也考校市物价贵贱有时晋灼曰踊甚也言计市物贱而豫益稽之也物贵而出卖故使物甚腾也汉书榷字作跃索隐李奇云稽贮滞韦昭云稽留待也稽字当如李韦二释晋灼及马融训稽为计及考於义为踈如淳曰踊腾犹伫昂也伫昂者乍贵乍贱也今案汉书榷字作跃者谓物踊贵而价起有如物之腾跃而起也然榷者出卖之名故食货志云大熟则上榷三而舍一是也】米至石万钱马一疋则百金【集解瓚曰秦以一鎰为一金汉以一斤为一金】天下已平高祖乃令贾人不得衣丝乘车重租税以困辱之孝惠高后时为天下初定复弛商贾之律然市井之子孙亦不得仕宦为吏量吏禄度官用以赋於民而山川园池市井【正义古人未有市及井若朝聚井汲水便将货物於井边货卖故言市井】租税之入自天子以至於封君汤沐邑皆各为私奉养焉不领於天下之经费【索隐案经训常言封君已下皆以汤沐邑为私奉养故不领入天子之常税为一年之费也】漕转山东粟以给中都官岁不过数十万石【索隐说文云

漕水转谷也一云车运曰转水运曰漕中都犹都内也皆天子之仓府以给中都官者即今太仓以畜官储者也】至孝文时荚钱益多轻【集解如淳曰如榆荚也】乃更铸四铢钱其文为半两令民纵得自铸钱故吴诸侯也以即山铸钱【索隐案即训就言就出铜之山铸钱故下文云即名铜山是也一解即山山名也】富埒天子【集解徐广曰埒者际畔言邻接相次也】駟案孟康曰富与天子等而微减也或曰埒等也】其後卒以叛逆邓通大夫也以铸钱财过王者故吴邓氏钱布天下而铸钱之禁生焉匈奴数侵盗北边屯戍者多边粟不足给食当食者於是募民能输及转粟於边者拜爵爵得至大庶长【索隐汉书食货志云文帝用晁错言令人入粟边六百石爵上造稍增至四千石为五大夫万二千石为大庶长各以多少为差】孝景时上郡以西旱亦复修卖爵令而贱其价以招民及徒复作得输粟县官以除罪益造苑马以广用【索隐谓增益苑囿造廐而养马以广用则马是军国之用也】而宫室列观舆马益增修矣至今上即位岁数汉兴七十余年之间国家无事非遇水旱之灾民则人给家足都鄙廩庾皆满而府库余货财京师之钱累巨万【集解韦昭曰巨万今万万】贯朽而不可校【集解如淳曰校数也】太仓之粟陈陈相因充溢露积於外至腐败不可食衆庶街巷有马阡陌之间成羣而乘字牝者摈而不得聚会【集解駟案汉书音义曰皆乘父马有牝马间其间则相踉蹌故斥不得出会同】守间阎者食粱肉为吏者长子孙【集解如淳曰时无事吏不数转至於子孙长大而不转任职】居官者以为姓号【集解如淳曰仓氏庾氏是也索隐案如淳注出食货志也】故人人自爱而重犯法先行义而後绌耻辱焉当是之时网疏而民富役财骄溢或至兼并豪党之徒以武断於乡曲【索隐乡曲豪富无官位而以威势主断曲直故曰武断也】宗室有土公卿大夫以下争於奢侈室庐舆服僭於上无限度物盛而衰固其变也自是之後严助朱买臣等招来东瓯【正义乌侯反今台州永宁是也】事两越【正义南越及闽越南越今广州南海也闽越今建州建安也】江淮之间萧然烦费矣唐蒙司马相如开路西南夷凿山通道千余里以广巴蜀巴蜀之民罢焉彭吴贾灭朝鲜置沧海之郡【索隐彭吴贾人姓名始开其道而灭之朝鲜番名】则燕齐之间靡然发动及王恢设谋马邑匈奴絶和亲侵扰北边兵连而不解天下苦其劳而干戈日滋行者賸居者送中外骚扰而相奉百姓抗弊以巧法【索隐三苍抗音五官反邹氏又音五乱反按抗者耗也消耗之名言百姓贫弊故行巧抵之法也】财赂衰耗而不赡入物者补官出货者除罪选举陵迟廉耻相冒武力进用法严令具兴利之臣自此始也【集解韦昭曰弘羊孔仅之属也】其後汉将岁以数万骑出击胡及车骑将军卫青取匈奴河南地【正义谓灵夏三州地取在元朔二年】筑朔方【正义今夏州也括地志云夏州秦上郡汉分置朔方郡魏不改隋置夏州】当是时汉通西南夷道作者数万人千里负担馈粮率十余锺致一石【集解駟案汉书音义曰锺六石四斗】散币於邛僰以集之【索隐应劭云临邛属蜀僰属犍为】数岁道不通蛮夷因以数攻吏发兵诛之【索隐谓发军兴以诛之也】悉巴蜀租赋不足以更之【集解韦昭曰更续也或曰更偿也】乃募豪民田南夷入粟县官而内受钱於都内【集解服虔曰入谷於外县受钱於内府也】东至沧海之郡人徒之费拟於南夷又兴十万余人筑卫朔方转漕甚辽远自山东咸被其劳费数十百巨万府库益虚乃募民能入奴婢得以终身复为郎增秩及入羊为郎始於此其後四年【集解徐广曰元朔五年】而汉遣大将将六将军军十余万击右贤王获首虏万五千级明年大将军将六将军仍再出击胡得首虏万九千级捕斩首虏之士受赐黄金二十余万斤虏数万人皆得厚赏衣食仰给县官而汉军之士马死者十余万兵甲之财转漕之费不与焉於是大农陈藏钱【集解韦昭曰陈久也】经耗赋税既竭犹不足以奉

战士有司言天子曰朕闻五帝之教不相复而治禹汤之法不同道而王所由殊路而建德一也北边未安朕甚悼之日者大将军攻匈奴斩首虏万九千级留蹠无所食【索隐蹠音逝谓贮也韦昭云音滞谓积也又案古今字诂蹠今滞字则蹠与滞同谓富人贮滞积谷则贫者无所食也】议令民得买爵及赎禁锢免减罪请置赏官命曰武功爵【集解瓚曰茂陵中书有武功爵一级曰造士二级曰闲舆卫三级曰良士四级曰元戎士五级曰官首六级曰秉铎七级曰千夫八级曰乐卿九级曰执戎十级曰左庶长十一级曰军卫此武帝所制以宠军功】级十七万凡直三十余万金【索隐大颜云一金万钱也计十一级级十七万合百八十七万金而此云三十余万金其数必有误者顾氏案或解云初一级十七万自此已上每级加二万至十七级合成三十七万也】诸买武功爵官首者试补吏先除【索隐官首武功爵第五也位稍高故得试为吏先除用也】千夫如五大夫【索隐千夫武功十一等爵第七五大夫旧二十等爵第九也言千夫爵秩比於五大夫故杨仆以千夫为吏殆谓此】其有罪又减二等爵得至乐卿【集解徐广曰爵名也駟案汉书音义曰十爵左庶长以上至十八爵为大庶长也名乐卿乐卿者朝位从九卿加乐者别正卿又十九爵为乐公食公卿禄而无职索隐盖此言武功置爵唯得至於乐卿也臣瓚所引茂陵书盖後人记其爵次耳今注称十爵至十八庶长为乐卿十九至二十为乐公乃以旧二十爵释武功爵盖亦臆说尔非也大颜亦以为然】以显军功军功多用越等大者封侯卿大夫小者郎吏吏道杂而多端则官职耗废自公孙弘以春秋之义绳臣下取汉相张汤用峻文决理为廷尉於是见知之法生【集解张晏曰吏见知不举劾为故纵】而废格沮诽穷治之狱用矣【集解如淳曰废格天子文法使不行也诽谓非上所行若顔异反唇之比也索隐格音阁沮音才绪反诽音非谓废格天子之命而不行及沮败诽谤之者皆被穷治故云废格沮诽之狱用矣】其明年淮南衡山江都王谋反迹见而公卿寻端治之竟其党与而坐死者数万人长吏益惨急而法令明察当是之时招尊方正贤良文学之士或至公卿大夫公孙弘以汉相布被食不重味为天下先然无益於俗稍鹜於功利矣其明年骠骑仍再出击胡获首四万其秋浑邪王率数万之衆来降於是汉发车二万乘迎之既至受赏赐及有功之士是岁费凡百余巨万初先是往十余岁河决观【集解徐广曰观县名也属东郡光武改曰卫公国】梁楚之地固已数困而缘河之郡堤塞河辄决坏费不可胜计其後番系欲省砥柱之漕穿汾河渠以为溉田作者数万人郑当时为渭漕渠回远凿直渠自长安至华阴作者数万人朔方亦穿渠作者数万人各历二三朞功未就费亦各巨万十数天子为伐胡盛养马马之来食长安者数万匹卒牵掌者关中不足乃调旁近郡而胡降者皆衣食县官县官不给天子乃损膳解乘舆驷出御府禁藏以贍之其明年山东被水菑民多饥乏於是天子遣使者虚郡国仓廩【集解徐广曰音脰】以振贫民犹不足又募豪富人相贷假尚不能相救乃徙贫民於关以西及充朔方以南新秦中【集解服虔曰地名在北方千里如淳曰长安已北朔方已南瓚曰秦逐匈奴以收河南地徙民以实之谓之新秦今以地空故复徙民以实之】七十余万口衣食皆仰给县官数岁假予产业使者分部护之冠盖相望其费以亿计不可胜数於是县官大空而富商大贾或蹠财役贫【集解駟案汉书音义曰蹠停也一曰贮也索隐萧该案字林云贮尘也音伫此谓居积停滞尘久也子贡发贮鬻财是也】转毂百数【集解李奇曰车也】废居居邑【集解徐广曰废居者贮畜之名也有所废有所畜言其乘时射利也駟案服虔曰居穀於邑也如淳曰居贱物於邑中以待贵索隐刘氏云废出卖也居停蓄也是出卖於居者为废故徐氏曰有所废有所畜是也】封君皆低首仰给【集解晋灼曰低音抵距也服虔曰仰给於商贾索隐服虔说是也而刘伯庄以为封君及大商

皆低首营私以自给不佐天子非也】冶铸煮盐财或累万金而不佐国家之急黎民重困於是天子与公卿议更钱造币以贍用而摧浮淫并兼之徒是时禁苑有白鹿而少府多银锡自孝文更造四铢钱至是岁四十余年从建元以来用少县官往往即多铜山而铸钱民亦间盗铸钱不可胜数钱益多而轻【集解如淳曰磨钱取熔故也瓚曰铸钱者多故钱轻轻亦贱也】物益少而贵【集解如淳曰但铸作钱不作余物】有司言曰古者皮币诸侯以聘享金有三等黄金为上白金为中赤金为下【集解駰案汉书音义曰白金银也赤金丹阳铜索隐说文云铜赤金也注云丹阳铜者神异经云西方金山有丹阳铜也】今半两钱法重四铢【集解韦昭曰文为半两实重四铢】而奸或盗摩钱里取熔【集解徐广曰音容吕静曰冶器法谓之熔】钱益轻薄而物贵则远方用币烦费不省乃以白鹿皮方尺缘以藻绩【集解徐广曰藻一作紫】为皮币直四十万王侯宗室朝覲聘享必以皮币荐璧然後得行又造银锡为白金【集解如淳曰杂铸银锡为白金也】以为天用莫如龙【索隐易云行天莫如龙是也】地用莫如马【索隐易云行地莫如马是也】人用莫如龟【索隐礼云诸侯以龟为宝是也】故白金三品其一曰重八两圜之其文龙名曰白选直三千【索隐顾氏案钱谱其文为龙形隐起肉好皆图文又作云霞之象选苏林音选择之选包恺及刘氏音息恋反尚书大传云夏后氏不杀不刑死罪罚二千饌马融云饌六两汉书作撰二字音同也晋灼案黄图云直三千三百也】二曰重差小方之其文马直五百【索隐谓以八两差为三品此重六两下小橢重四两也云以重差小者谓半两为重故差小重六两而其形方钱谱肉好皆方隐起马形肉好之下又有连珠文也】三曰复小橢之其文龟直三百【索隐橢音汤果反尔雅注橢者狭长也谓长而去四角也钱谱肉圆好方皆隐起龟甲文】令县官销半两钱更铸三铢钱文如其重盗铸诸金钱罪皆死而吏民之盗铸白金者不可胜数於是以东郭咸阳孔仅为大农丞领盐铁事【索隐东郭姓咸阳名也案风俗通东郭牙齐大夫咸阳其後也】桑弘羊以计算用事侍中咸阳齐之大煮盐孔仅南阳大冶皆致生累千金故郑当时进言之弘羊雒阳贾人子以心计年十三侍中故三人言利事析秋毫矣【索隐言百物毫芒至秋皆美细今言弘羊等三人言利事纤悉能分析其秋毫也】法既益严吏多废免兵革数动民多买复及五大夫徵发之士益鲜於是除千夫五大夫为吏不欲者出马故吏皆通适令伐棘上林【集解韦昭曰欲令出马无马者令伐棘索隐谓故吏先免者皆适令伐棘上林不谓无马者韦说非也】作昆明池【索隐案黄图武帝穿昆明池周四十里以习水战荀悦云昆明子居滇河中故习水战以伐之也】其明年大将军骠骑大出击胡【集解徐广曰元狩四年】得首虏八九万级赏赐五十万金汉军马死者十余万匹转漕车马之费不与焉是时财匮战士颇不得禄矣有司言三铢钱轻易奸诈乃更请诸郡国铸五铢钱周郭其下令不可磨取熔焉大农上盐铁丞孔仅咸阳言山海天地之藏也皆宜属少府【索隐韦昭云少府天子私所赐经用也公用属大司农】陛下不私以属大农佐赋愿募民自给费因官器作煮盐官与牢盆【集解如淳曰牢廩食也古者名廩为牢也盆者煮盐盆索隐苏林云牢价直也今世人言雇手牢盆小顔云苏说是乐彦云牢乃盆名其说异也】浮食奇民欲擅管山海之货【集解张晏曰若人执仓库之管龠或曰管固索隐包恺奇音羈谓侯也非农工之俦故言奇也擅音善】以致富羨役利细民【索隐羨音弋战反羨饶也与衍同义】其沮事之议不可胜听【索隐沮止也仅等言山海之藏宜属大农奇人欲擅其利必有沮止之议此不可听许也】敢私铸铁器煮盐者鈇左趾【集解史记音义曰鈇音徒计反韦昭曰鈇以铁为之着左趾以代刖也索隐三苍云鈇踏脚钳也字林音大计反张斐汉晋律序云状如跟衣着足足下重六斤以代刖至

魏武改以灭代鈇也】没入其器物郡不出铁者置小铁官【集解邓展曰铸故铁】便属在所县使孔仅东郭咸阳乘传举行天下盐铁作官府除故盐铁家富者为吏吏道益杂不选而多贾人矣商贾以币之变多积货逐利於是公卿言郡国颇被菑害贫民无产业者募徙广饶之地陛下损膳省用出禁钱以振元元宽贷赋而民不齐出於南亩【集解李奇曰齐皆也】商贾滋衆贫者畜积无有皆仰县官异时算轺车贾人缗钱皆有差请算如故【集解李斐曰缗?也以贯钱也一贯千缗出二十算也诗云维丝伊缗如淳曰胡公名钱为缗者诗云氓之蚩蚩抱布贸?故谓之缗也索隐异时犹前时也说文云轺小车也傅子言汉代贱乘轺今则贵之言算轺车者有轺车使出税一算二算也缗音旻】诸贾人未作贯贷买居邑稽诸物【索隐稽者停留也即上文所谓废居居邑也】及商以取利者虽无市籍各以其物自占【索隐郭璞云占自隐度也谓各自隐度其财物多少为文簿送之官也若不尽皆没入於官占音之贍反】率缗钱二千而一算【集解瓚曰此缗钱为是储缗钱也故随其用所施施於利重者其算亦多】诸作有租及铸【集解如淳曰以手力所作而卖之】率缗钱四千一算非吏比者三老北边骑士【集解如淳曰非吏而得与吏比者官谓三老北边骑士也楼船令边郡选富者为车骑士】轺者以一算商贾人轺车二算【集解如淳曰商贾有轺车使出二算重其赋也】船五丈以上一算匿不自占占不悉戍边一岁没入缗钱【索隐悉尽也具也若通其家财不周悉尽者罚戍边一岁】有能告者以其半畀之贾人有市籍者及其家属皆无得籍名田以便农【索隐谓贾人有市籍不许以名占田也】敢犯令没入田僮【索隐若贫人更占田则没其田及仆僮皆入之於官】天子乃思卜式之言召拜式为中郎爵左庶长赐田十顷布告天下使明知之初卜式者河南人也以田畜为事亲死式有少弟弟壮式脱身出分独取畜羊百余田宅财物尽予弟式入山牧十余岁羊致千余头买田宅而其弟尽破其业式辄复分予弟者数矣是时汉方数使将撃匈奴卜式上书愿输家之半县官助边天子使使问式欲官乎式曰臣少牧不习仕宦不愿也使问曰家岂有冤欲言事乎式曰臣生与人无分争式邑人贫者贷之不善者教顺之所居人皆从式式何故见冤於人无所欲言也使使者曰苟如此子何欲而然式曰天子诛匈奴愚以为贤者宜死节於边有财者宜输委如此而匈奴可灭也使使者具其言入以闻天子以语丞相弘弘曰此非人情不轨之臣不可以为化而乱法愿陛下勿许於是上久不报式数岁乃罢式式归复田牧岁余会军数出浑邪王等降县官费衆仓府空其明年贫民大徙皆仰给县官无以尽贍卜式持钱二十万予河南守以给徙民河南上富人助贫人者籍天子见卜式名识之曰是固前而欲输其家半助边乃赐式外繇四百人【集解駰案汉书音义曰外繇谓戍边也一人出三百钱谓之过更式岁得十二万钱也一说在繇役之外得复除四百人】式又尽复子县官是时富豪皆争匿财唯式尤欲输之助费天子於是以式终长者故尊显以风百姓初式不愿为郎上曰吾有羊上林中欲令子牧之式乃拜为郎布衣赆而牧羊【集解韦昭曰履草也】岁余羊肥息上过见其羊善之式曰非独羊也治民亦犹是也以时起居恶者辄斥去母令败羣上以式为奇拜为缙氏令试之缙氏便之迁为成臯令将漕最上以为式朴忠拜为齐王太傅而孔仅之使天下铸作器三年中拜为大农列於九卿【集解徐广曰元鼎二年时丙寅岁】而桑弘羊为大农丞筦诸会计事稍稍置均输以通货物矣【集解孟康曰谓诸当所输於官者皆令输其土地所饶平其所在时价官更於它处卖之输者既便而官有利汉书百官表大司农属官有均输令】始令吏得入谷补官郎至六百石自造白金五铢钱後五岁赦吏民之坐盗铸金钱死者数十万人其不发觉相杀者不可胜计赦自出者百余万人然不能半自出天下大抵无虑皆铸金钱矣【索隐抵归也刘氏

云大抵犹大畧也案大抵无虑者谓言大略归於铸钱更无他事从虑也】犯者衆吏不能尽诛取於是遣博士褚大徐偃等分曹循行郡国【集解服虔曰分曹职案行】举兼并之徒守相为吏者而御史大夫张汤方隆贵用事减宣杜周等为中丞义纵尹齐王温舒等用惨急刻深为九卿而直指夏兰之属始出矣而大农颜异诛【集解徐广曰元狩四年时壬戌岁也】初异为济南亭长以廉直稍迁至九卿上与张汤既造白鹿皮币问异异曰今王侯朝贺以苍璧直数千而其皮荐反四十万本末不相称天子不说张汤又与异有郤及人有告异以它议事下张汤治异异与客语客语初令下有不便者【集解李奇曰异与客语道诏令初下有不便处也】异不应微反唇汤奏异当九卿见令不便不入言而腹诽论死自是之後有腹诽之法以此而公卿大夫多谄谀取容矣天子既下缙钱令而尊卜式百姓终莫分财佐县官於是杨可告缙钱纵矣郡国多奸铸钱【索隐谓多奸巧杂以铅锡也】钱多轻而公卿请令京师铸钟官赤侧【集解如淳曰以赤铜为其郭也今钱见有赤侧者不知作法云何索隐钟官掌铸赤侧之钱韦昭曰侧边也】一当五赋官用非赤侧不得行【集解酈案汉书音义曰俗所谓紫绀钱也】白金稍贱民不宝用县官以令禁之无益岁余白金终废不行是岁也张汤死【集解徐广曰元鼎三年】而民不思【索隐乐彦云诸所废兴附王罔下皆自汤故人不思也】其後二岁赤侧钱贱民巧法用之不便又废於是悉禁郡国无铸钱专令上林三官【集解酈案汉书百官表水衡都尉武帝元鼎二年初置掌上林苑属官有上林均输钟官辨铜令然则上林三官其是此三令乎】铸钱既多而令天下非三官钱不得行诸郡国所前铸钱皆废销之输其铜三官而民之铸钱益少计其费不能相当唯真工大奸乃盗为之卜式相齐而杨可告缙徧天下【集解瓚曰商贾居积及伎巧之家非桑农所生出谓之缙茂陵中书有缙田奴婢是也索隐杨姓可名也如淳云告缙令杨可所告言】中家以上大抵皆遇告杜周治之狱少反者【集解如淳曰治匿缙之罪其狱少有反者索隐反音幡反谓反使从轻也案刘德为京兆尹每行县多所平反是也】乃分遣御史廷尉正监分曹【索隐如淳云曹辈也谓分曹辈而出为使也】往即治郡国缙钱得民财物以亿计奴婢以千万数田大县数百顷小县百余顷宅亦如之於是商贾中家以上大率破民偷甘食好衣不事畜藏之产业而县官有盐铁缙钱之故用益饶矣益广关置左右辅【集解徐广曰元鼎三年丁卯岁徙函谷关於新安东界】初大农筦盐铁官布多【索隐布谓泉布】置水衡欲以主盐铁及杨可告缙钱上林财物衆乃令水衡主上林上林既充满益广是时越欲与汉用船战逐【集解韦昭曰战鬪驰逐也】乃大修昆明池列观环之治楼船高十余丈旗帜加其上甚壮【索隐盖始穿昆明池欲与滇王战今乃更大修之将与南越吕嘉战逐故作楼船於是杨仆有将军之号又下文云因南方楼船卒二十余万击南越也昆明池有豫章谿豫章地名以言将出军於豫章也】於是天子感之乃作柏梁台高数十丈宫室之修由此日丽乃分缙钱诸官而水衡少府太仆各置农官往往即郡县比没入田田之【索隐谓比者所没入之田也】其没入奴婢分诸苑养狗马禽兽及与诸官诸官益新置多【集解如淳曰水衡少府太仆司农皆有农官是为多】徙奴婢衆而下河漕度四百万石【索隐乐彦云度犹运也】及官自籴乃足【索隐谓天子所给廩食者多故不如官自籴乃足也】所忠言世家子弟【集解如淳曰世世有禄秩家索隐所忠人姓名服虔云掌故官取书於司马相如者封禅书公孙卿因所忠言宝鼎是也唯姚察独以为所患非也】富人或鬪鸡走狗马弋猎博戏乱齐民【索隐晋灼云中国被教齐整之民也】乃徵诸犯令相引数千人命曰株送徒入财者得补郎郎选衰矣【集解应劭曰株根本也送引也如淳曰株根蒂也诸坐博戏事决为徒者能入钱得补郎也或曰先至者为

根索隐李奇曰先至者为魁株也送当作选选引也应李二音是先至之人今之相引似若得其株本则枝叶自穷故曰株送徒又文颖曰凡鬪鸡胜者为株传云阳沟之鸡三岁为株今则鬪鸡走马者用之因其鬪鸡本胜时名故云株选徒者也】是时山东被河菑及岁不登数年人或相食方一二千里天子怜之诏曰江南火耕水耨【集解应劭曰烧草下水种稻草与稻共生高七八寸因悉芟去复下水灌之草死独稻长所谓火耕水耨也】令饥民得流就食江淮间欲留之处遣使冠盖相属於道护之下巴蜀粟以振之其明年天子始巡郡国东渡河河东守不意行至不办自杀行西踰陇西守以行往卒【集解駰案汉书音义曰踰度也卒仓卒】天子从官不得食陇西守自杀於是上北出萧关从数万骑猎新秦中以勒边兵而归新秦中或千里无亭徼【集解如淳曰徼亦卒求盗之属也晋灼曰徼塞也瓚曰既无亭候又不徼巡无卫边之备也】於是诛北地太守以下而令民得畜牧边县【集解駰案汉书音义曰令民得畜牧於边县也瓚曰先是新秦中千里无民畏寇不敢畜牧令设亭徼故民得畜牧也】官假马母三岁而归及息什一以除告缗用充仞新秦中【集解李奇曰边有官马今令民能畜官母马者满三岁归之也及有蕃息与当出缗筭者皆复令居新秦中又充仞之也谓与民母马令得为马种令十母马还官一驹此为息什一也瓚曰前以边用不足故设告缗之令设亭徼边民无警皆得田牧新秦中已充故除告缗不复取於民】既得宝鼎立后土太一祠【集解徐广曰元鼎四年立后土五年立太畤】公卿议封禅事而天下郡国皆豫治道桥繕故宫及当驰道县县治官储设供具而望以待幸其明年南越反西羌侵边为桀於是天子为山东不贍赦天下因南方楼船卒二十余万人击南越数万人发三河以西骑擊西羌又数万人渡河筑令居【索隐令音零姚氏音连韦昭云金城县】初置张掖酒泉郡【集解徐广曰元鼎六年】而上郡朔方西河河西闻田官斥塞卒【集解如淳曰塞 斥卒】六十万人戍田之中国繕道馈粮远者三十近者千余里皆仰给大农边兵不足乃发武库工官兵器以贍之车骑马乏絶县官钱少买马难得乃着令令封君以下至三百石以上吏以差出牝马天下亭亭有畜牝马岁课息齐相卜式上书曰臣闻主忧臣辱而越反臣愿父子与齐习船者往死之天子下诏曰卜式虽躬耕牧不以为利有余辄助县官之用今天下不幸有急而式奋愿父子死之虽未战可谓义形於内赐爵关内侯金六十斤田十顷布告天下天下莫应列侯以百数皆莫求从军击羌越至酎少府省金【集解如淳曰省视诸侯金有轻有重也或曰至尝酎饮宗庙时少府视其金多少也】而列侯坐酎金失侯者百余人【集解如淳曰汉仪注王子为侯侯岁以户口酎黄金於汉庙皇帝临受献金以助祭大祀日饮酎饮酎受金金少不如斤两色恶王削县侯免国索隐刘氏云言列侯多以百而数故坐酎金失侯者一百六人也】乃拜式为御史大夫【集解徐广曰元鼎六年】式既在位见郡国多不便县官作盐铁铁器苦恶【集解瓚曰谓作铁器民患苦其不好】贾贵【索隐言盐既苦而器又恶故买卖贵也苦又音古言器苦窳不好凡病之器云苦窳窳音庾事见本纪苦如字读亦通】或强令民买卖之而船有算商者少物贵乃因孔仅言船算事上由是不悦卜式汉连兵三岁诛羌灭南越番禺以西至蜀南者置初郡十七【集解徐广曰南越为九郡駰案晋灼曰元鼎六年定越地以为南海苍梧鬱林合浦交趾九真日南珠崖儋耳郡定西南夷以为武都?犍越犍沈犍汶山郡及地理志西南夷传所置犍为零陵益州郡凡十七也】且以其故俗治毋赋税南阳汉中以往郡各以地比给初郡【索隐比音鼻南阳汉中已往之郡各以其地比近给初郡初郡即西南初置之郡也】吏卒奉食币物传车马被具【索隐奉音扶用反包氏同】而初郡时时小反杀吏汉发南方吏卒往诛之间岁万余人费皆仰给大农大农以均输调盐铁助赋故能贍

之然兵所过县为以訾给毋乏而已不敢言擅赋法矣【集解徐广曰擅一作经经常也唯取用足耳不暇顾经常法则矣】其明年元封元年卜式贬秩为太子太傅而桑弘羊为治粟都尉领大农尽代仅筦天下盐铁弘羊以诸官各自市相与争物故腾跃而天下赋输或不偿其僦费【索隐服?谓载云僦言所输物不足偿其雇载之费也僦音子就反】乃请置大农部丞数十人分部主郡国各往往县置均输盐铁官令远方各以其物贵时商贾所转贩者为赋而相灌输置平準于京师都受天下委输召工官治车诸器皆仰给大农大农之诸官尽筦天下之货物贵即卖之贱则买之如此富商大贾无所牟大利【集解如淳曰牟取也】则反本而万物不得腾踊故抑天下物名曰平準天子以为然许之於是天子北至朔方东到太山巡海上并北边以归所过赏赐用帛百余万匹钱金以巨万计皆取足大农弘羊又请令吏得入粟补官及罪人赎罪令民能入粟甘泉各有差以复终身不告缗他郡国各输急处【索隐谓他郡能入粟输所在急要之处也】而诸农各致粟山东漕益岁六百万石一岁之中太仓甘泉仓满边余谷诸物均输帛五百万匹民不益赋而天下用饶於是弘羊赐爵左庶长黄金再百斤焉是岁小早上令官求雨卜式言曰县官当食租衣税而已今弘羊令吏坐市列肆【索隐谓吏坐市肆行列之市】贩物求利亨弘羊天乃雨

太史公曰农工商交易之路通而龟贝金钱刀布之币兴焉【索隐钱本名泉言货之流如泉也故周有泉府之官及景王乃铸大钱布泉者言货流布故周礼谓三夫之布食货志货布长二寸五分首长八分足枝长八分刀者钱也食货志有契刀错刀契刀长二寸直五百错刀以黄金错直五千以其形如刀故曰刀以其利於人也又古者货贝宝龟食货志有十朋五贝皆用为货贝各有多少两贝为朋故直二百一十六元龟十朋故直二千一百六十已下各有差也】所从来久远自高辛氏之前尚矣靡得而记云故书道唐虞之际诗述殷周之世安宁则长庠序先本绌末以礼义防于利事变多故而亦反是是以物盛则衰时极而转【集解徐广曰时一作衰】一质一文终始之变也禹贡九州各因其土地所宜人民所多少而纳职焉汤武承弊易变使民不倦各兢兢所以为治而稍陵迟衰微齐桓公用管仲之谋通轻重之权【集解管子有轻重之法】徼山海之业以朝诸侯用区区之齐显成霸名魏用李克尽地力为强君自是之後天下争於战国贵诈力而贱仁义先富有而後推让故庶人之富者或累巨万而贫者或不厌糟糠有国强者或并羣小以臣诸侯而弱国或絶祀而灭世以至於秦卒并海内虞夏之币金为三品【索隐即下或黄或白或赤也黄黄金也白白银也赤赤铜也见食货志】或黄或白或赤或钱或布【集解如淳曰布於民间也】或刀【集解如淳曰名钱为刀者以其利於民】或龟贝及至秦中一国之币为三等黄金以镒名【集解孟康曰二十两为镒】为上币铜钱识曰半两重如其文为下币而珠玉龟贝银锡之属为器饰宝藏不为币然各随时而轻重无常於是外攘夷狄内兴功业海内之士力耕不足粮饷女子纺绩不足衣服古者尝竭天下之资财以奉其上犹自以为不足也无异故云事势之流相激使然曷足怪焉

【索隐述赞曰平準之立通货天下既入县官或振华夏其名刀布其文龙马增筭告缗哀多益寡弘羊心计卜式长者都内克殷取贍郊野】

史记卷三十考证

平準书物踊腾梟索隐按汉书梟字作跃者谓物踊贵而价起有如物之腾跃而起也然梟者出卖之名故食货志云大熟则上梟三而舍一是也○【臣世骏】按作跃则宜属上句作梟则宜属下句

布衣屨而牧羊集解韦昭曰履草也○推寻文义宜云屨草履也

徙奴婢衆○徙一本作徒

名工官治车诸器○名一本作召

史记卷三十考证

卷三十一

<史部,正史类,史记>

钦定四库全书

史记卷三十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

吴太伯世家第一

【索隐系家者记诸侯本系也言其下及子孙常有国故孟子曰陈仲子齐之系家又董仲舒曰王者封诸侯非官之也得以代代爲家者也】

吴太伯【集解韦昭曰後武王追封爲吴伯故曰吴太伯索隐国语黄池之会晋定公使谓吴王夫差曰夫命圭有命固曰吴伯不曰吴王是吴本伯爵也范甯解论语曰太者善大之称伯者长也周太王之元子故曰太伯称仲雍季历皆以字配名则伯亦是字又是爵但其名史籍先阙尔正义吴国号也太伯居梅里在常州无锡县东南六十里至十九世孙寿梦居之号句吴寿梦卒诸樊南徙吴至二十一代孙光使子胥筑阖闾城都之今苏州也】太伯弟仲雍【索隐伯仲季是兄弟次第之字若表德之字意义与名相符则系本曰吴孰哉居藩篱宋忠曰孰哉仲雍字藩篱今吴之余暨也解者云雍是熟食故曰雍字孰哉也】皆周太王之子而王季历之兄也季历贤而有圣子昌太王欲立季历以及昌於是太伯仲雍二人乃犇荆蛮文身断髮示不可用【集解应劭曰常在水中故断其髮文其身以象龙子故不见伤害正义江熙云太伯少弟季历生文王昌有圣德太伯知其必有天下故欲传国於季历以太王病托采药於吴越不反太王薨而季历立一让也季历薨而文王立二让也文王薨而武王立遂有天下三让也又释云太王病托采药生不事之以礼一让也太王薨而不反使季历主丧不葬之以礼二让也断髮文身示不可用使季历主祭祀不祭之以礼三让也】以避季历季历果立是爲王季而昌爲文王太伯之犇荆蛮自号句吴【集解宋忠曰句吴太伯始所居地名索隐荆者楚之旧号以州言之曰荆蛮者闽也南夷之名蛮亦称越此言自号句吴吴名起於太伯明以前未有吴号地在楚越之界故称荆蛮顔师古注汉书以吴言句者夷之发声犹言於越耳此言号句吴当如顔解而注引宋忠以为地名者系本居篇云孰哉居藩篱孰姑徙句吴宋氏见史记有太伯自号句吴之文遂弥缝解彼云是太伯始所居地名裴氏引之恐非其义藩篱

既有其地句吴何总不知真实吴人不闻别有城邑谓名句吴则系本之文或难依信】荆蛮义之从而归之千余家立爲吴太伯太伯卒【集解皇览曰太伯冢在吴县北梅里聚去城十里】无子弟仲雍立是爲吴仲雍仲雍卒【索隐吴地记曰仲雍冢在吴乡常熟县西海虞山上与言偃冢并列】子季简立季简卒子叔达立叔达卒子周章立是时周武王克殷求太伯仲雍之後得周章周章已君吴因而封之乃封周章弟虞仲於周之北故夏虚【集解徐广曰在河东大阳县】是爲虞仲【索隐夏都安邑虞仲都大阳之虞城在安邑南故曰夏虚左传曰太伯虞仲太王之昭则虞仲是太王之子必也又论语称虞仲夷逸隐居放言是仲雍称虞仲今周章之弟亦称虞仲者盖周章之弟字仲始封於虞故曰虞仲则仲雍本字仲而爲吴之始祖故後代亦称虞仲所以祖与孙同号也】列爲诸侯周章卒子熊遂立熊遂卒子柯相立【正义柯音歌相音相匠反】柯相卒子强鸠夷立强鸠夷卒子余桥疑吾立【正义桥音蹻骄反】余桥疑吾卒子柯卢立柯卢卒子周繇立【正义繇音遥又如字】周繇卒子屈羽立【正义屈音居勿反】屈羽卒子夷吾立夷吾卒子禽处立禽处卒子转立【索隐譙周古史考云柯转】转卒子颇高立【索隐古史考作颇梦】颇高卒子句卑立【索隐古史考云毕軫】是时晋献公灭周北虞公以开晋伐虢也【索隐春秋经僖公五年冬晋人执虞公左氏二年传曰晋荀息请以屈产之乘与垂棘之璧假道於虞以伐虢虞公许之且请先伐虢宫之奇諫不聽晋里克荀息帅师会虞师伐虢灭下阳五年传曰晋侯复假道伐虢宫之奇以其族行曰虞不腊矣八月甲午晋侯围上阳冬十有二月灭虢师还遂袭虞灭之】句卑卒子去齐立去齐卒子壽梦立【正义梦莫公反】寿梦立而吴始益大称王自太伯作吴五世而武王克殷封其後爲二其一虞在中国其一吴在夷蛮十二世而晋灭中国之虞中国之虞灭二世而夷蛮之吴兴【正义中国之虞灭後二世合七十一年至壽梦而兴大称王】大凡从太伯至寿梦十九世【索隐寿梦是仲雍十八代孙】王寿梦二年【索隐自寿梦以下始有其年春秋唯记卒计寿梦二年当成公七年】楚之亡大夫申公巫臣怨楚将子反而犇晋自晋使吴教吴用兵乘车令其子爲吴行人【集解服虔曰行人掌国宾客之礼籍以待四方之使宾大客受小客之币辞索隐左氏成二年曰巫臣聘齐及郑使介反币而以夏姬行遂奔晋七年传曰子重子反杀巫臣之族而分其室巫臣遗二子书曰余必使尔罢於奔命以死巫臣使於吴吴子寿梦悦之乃通吴于晋教吴乘车教之战阵教之叛楚寘其子狐庸焉使爲行人吴始伐楚伐巢伐徐马陵之会吴入州来子重子反於是乎一岁七奔命】吴於是始通於中国吴伐楚十六年楚共王伐吴至衡山【集解杜预曰吴兴乌程县南也索隐春秋经襄三年楚公子婴齐帅师伐吴左传曰楚子重伐吴爲简之师克鸠兹至于衡山也】二十五年王寿梦卒【索隐襄十二年轻曰秋九月吴子乘卒左传曰寿梦计从成六年至此正二十五年系本曰吴孰姑徙句吴宋忠曰孰姑壽梦也代谓祝梦乘诸也寿孰音相近姑之言诸也毛诗传读姑爲诸孰姑壽梦是一人又名乘也】寿梦有子四人长曰诸樊【索隐春秋经书吴子遏左传称诸樊盖遏是其名诸樊是其号公羊传遏作谒】次曰余祭次曰余昧【索隐左氏曰閼戕戴吴杜预曰戴吴余祭也又襄二十八年左氏齐庆封奔吴吴句余与之朱方杜预曰句余吴子夷末也按余祭以襄二十九年卒则二十八年赐庆封邑不得是夷末但句余或别是一人杜预误以爲夷末尔惟史记公羊作余昧左氏及谷梁并爲夷末夷末句余音字各异不得爲一正义祭侧界反昧莫葛反】次曰季札【索隐公羊传曰谒也余祭也夷昧也与季子同母者四人季子弱而才兄弟皆爱之同欲以爲君季子犹不受谒请兄弟迭为君而致国乎季子皆曰诺故谒也死余祭也立余祭也死夷昧也立夷昧也死则国宜之季子季子使而亡焉僚者

长庶也即之阖闾曰将从先君之命与则国宜之季子也如不从先君之命则宜立者我也僚恶得爲君乎於是使专诸刺僚史记壽梦四子亦约公羊文但以僚爲余昧子爲异耳左氏其文不明服?用公羊杜预依史记及吴越春秋下注徐广引系本云夷昧生光引吴越春秋云王僚夷昧子今检系本吴越春秋并无此语然按左氏狐庸对赵文子谓夷末甚德而度其天所啓也必此君之子孙实终之若以僚爲夷末子不应此言又光言我王嗣则光是夷昧子明僚是壽梦庶子】季札贤而壽梦欲立之季札让不可於是乃立长子诸樊摄行事当国王诸樊元年【集解駟案系本曰诸樊徙吴也索隐按在左氏襄十四年】诸樊已除丧让位季札季札谢曰曹宣公之卒也诸侯与曹人不义曹君【集解服?曰宣公曹伯庐也以鲁成公十三年会晋侯伐秦卒於师曹君公子负刍也负刍在国闻宣公卒杀太子而自立故曰不义之也】将立子臧子臧去之以成曹君【集解服?曰子臧负刍庶兄索隐成十三年左传曰曹宣公卒于师曹人使公子负刍守使公子欣时逆丧秋负刍杀其太子而自立杜预曰皆宣公庶子也负刍成公也欣时子臧也十五年传曰会于戚讨曹成公也执而归诸京师诸侯将见子臧於王而立之子臧曰前志有之曰圣达节杜预曰圣人应天命不拘常体也次守节杜预曰谓贤者下失节杜预曰愚者妄动也爲君非吾节也虽不能圣敢失守乎遂逃奔宋】君子曰能守节矣君义嗣【集解王肃曰义宜也嫡子嗣国得礼之宜杜预曰诸樊嫡子故曰义嗣索隐君子者左丘明所爲史评仲尼之辞指仲尼为君子也】谁敢干君有国非吾节也札虽不才愿附於子臧之义吴人固立季札季札弃其室而耕乃舍之【正义舍音舍】秋吴伐楚楚败我师四年晋平公初立【索隐左传襄十六年春葬晋悼公平公即位是也】十三年王诸樊卒【索隐春秋经襄二十五年十有二月吴子遏伐楚门于巢卒左氏曰吴子诸樊伐楚以报舟师之役门于巢巢牛臣曰吴王勇而轻若啓之将亲门我获射之必殪是君也死强其少安从之吴子门焉牛臣隐於短墙以射之卒】有命授弟余祭欲传以次必致国於季札而止以称先王壽梦之意且嘉季札之义兄弟皆欲致国令以渐至焉季札封於延陵故号曰延陵季子【索隐襄三十一年左传赵文子问於屈狐庸曰延州来季子其果立乎杜预曰延州来季札邑昭二十七 years 左传曰吴子使延州来季子聘於上国杜预曰季子本封延陵後复封州来故曰延州来成七 years 左传曰吴入州来杜预曰州来楚邑淮南下蔡县是昭十三年传吴伐州来二十三年传吴灭州来则州来本爲楚邑吴伐灭以封季子也地理志云会稽毗陵县季札所居太康地理志曰故延陵邑季札所居粟头有季札祠地理志云沛郡下蔡县古州来国爲楚所灭後吴取之至夫差迁昭侯於州来公羊传曰季子去之延陵终身不入吴国何休曰不入吴朝廷也此云封於延陵谓国而赐之以采邑杜预春秋释例土地名则云延州来阙不知何故而爲是言】王余祭三年齐相庆封有罪自齐来犇吴吴予庆封朱方之县【集解駟案吴地记曰朱方秦改曰丹徒】以爲奉邑以女妻之富於在齐四年吴使季札聘於鲁【集解駟案在春秋鲁襄公二十九年】请观周乐【集解服?曰周乐鲁所受四代之乐也杜预曰鲁以周公故有天子礼乐】爲歌周南召南【集解杜预曰此皆各依其本国歌所常用声曲】曰美哉始基之矣【集解王肃曰言始造王基也】犹未也【集解贾逵曰言未有雅颂之成功也杜预曰犹有商纣未尽善也】然勤而不怨【集解杜预曰未能安乐然其音不怨怒】歌邶鄘卫【集解杜预曰武王伐纣分其地爲三监三监叛周公灭之并三监之地更封康叔故三国尽被康叔之化】曰美哉渊乎忧而不困者也【集解贾逵曰渊深也杜预曰亡国之音哀以思其民困卫康叔武公德化深远虽遭宣公淫乱懿公灭亡民犹秉义不至於困】吾闻卫康叔武公之德如是是其卫风乎【集解贾逵曰康叔遭管叔蔡叔之难武公罹幽王褒姒

之变故曰康叔武公之德如是杜预曰康叔武公皆卫之令德君也聽声以爲别故有疑言】歌王【集解服?曰王室当在雅衰微而列在风故国人犹尊之故称王犹春秋之王人也杜预曰王黍离也】曰美哉思而不惧其周之东乎【集解服?曰平王东迁雒邑杜预曰宗周殒灭故忧思犹有先王之遗风故不惧也正义思音肆】歌郑【集解贾逵曰郑风东郑是】曰其细已甚民不堪也是其先亡乎【集解服?曰其风细弱已甚摄於大国之间无远虑持久之风故曰民不堪将先亡也】歌齐曰美哉泱泱乎大风也哉【集解服?曰泱泱舒缓深远有太和之意其诗风刺辞约而义微体疎而不切故曰大风索隐泱於良反泱泱犹汪洋汪洋美盛貌也杜预曰弘大之声】表东海者其太公乎【集解王肃曰言为东海之表式】国未可量也【集解服?曰国之兴衰世数长短未可量也杜预曰言其或将复兴】歌曰美哉荡荡乎乐而不淫【集解贾逵曰荡然无忧自乐而不荒淫也】其周公之东乎【集解杜预曰周公遭管蔡之变东征为成王陈后稷先公不敢荒淫以成王业故言其周公东乎】歌秦曰此之谓夏声夫能夏则大大之至也其周之旧乎【集解杜预曰秦仲始有车马礼乐去戎狄之音而有诸夏之声故谓之夏声及襄公佐周平王东迁而受其故地故曰周之旧也】歌魏曰美哉颯颯乎大而婉俭而易行以德辅此则盟主也【集解徐广曰盟一作明駟案贾逵曰其志大直而有曲体归中和中庸之德难成而实易行故曰以德辅此则盟主也杜预曰惜其国小而无名君索隐颯音冯又音泛杜预曰中庸之声婉约也大而约则俭节易行左传盟作明故徐广亦云一作明此以聽声知政言其明聽尔非盟会也】歌唐曰思深哉其有陶唐氏之遗风乎不然何忧之远也【集解杜预曰晋本唐国故有尧之遗风忧深思远情发於声也】非令德之後谁能若是歌陈曰国无主其能久乎【集解杜预曰淫声放荡无所畏忌故曰国无主】自郤以下无讥焉【集解服?曰郤以下及曹风也其国小无所刺讥】歌小雅【集解杜预曰小雅小正亦乐歌之章】曰美哉思而不貳【集解杜预曰思文武之德无貳叛之心也】怨而不言【集解王肃曰非不能言畏罪咎也】其周德之衰乎【集解杜预曰衰小也】犹有先王之遗民也【集解杜预曰谓有殷王余俗故未大】歌大雅【集解杜预曰大雅陈文王之德以正天下】曰广哉熙熙乎【集解杜预曰熙熙和乐声】曲而有直体【集解杜预曰论其声】其文王之德乎歌颂【集解杜预曰颂者以其成功告于神明】曰至矣哉【集解贾逵曰言道备至也】直而不倨【集解杜预曰倨傲也】曲而不诎【集解杜预曰诎挠也】近而不偪【集解杜预曰谦退也】远而不携【集解杜预曰携貳也】迁而不淫【集解服?曰迁徙也文王徙鄴武王居鄴杜预曰淫过荡也】复而不厌【集解杜预曰常日新也】哀而不愁【集解杜预曰知命也】乐而不荒【集解杜预曰节之以礼也】用而不匮【集解杜预曰德弘大】广而不宣【集解杜预曰不自显也】施而不费【集解杜预曰因民所利而利之】取而不贪【集解杜预曰义然後取】处而不底【集解杜预曰守之以道】行而不流【集解杜预曰制之以义】五声和八风平【集解杜预曰宫商角徵羽谓之五声八方之气谓之八风】节有度守有序【集解杜预曰八音克谐节有度也无相夺伦守有序也】盛德之所同也【集解杜预曰颂有殷鲁故曰盛德之所同】见舞象箏南籥者【集解贾逵曰象文王之乐武象也箏舞曲也南籥以籥舞也索隐箏音朔又苏雕反】曰美哉犹有憾【集解服?曰憾恨也恨不及已以伐紂而致太平也索隐憾或作感字省尔亦读为憾又音胡暗反】见舞大武【集解贾逵曰大武周公所作武王乐也】曰美哉周之盛也其若此乎见舞韶护者【集解贾逵曰韶护殷成汤乐大护也】曰圣人之弘也【集解贾逵曰弘大也】犹有慙德圣人之难也【集解服?曰慙於始伐而无圣佐故曰圣人之难也】见舞大夏【

集解贾逵曰夏禹之乐大夏也【集解服?曰禹勤其身以治水土也】非禹其谁能及之见舞招箭【集解服?曰有虞氏之乐大韶也索隐韶箫二字体变耳】曰德至矣哉大矣【集解服?曰至帝王之道极於韶也盍美尽善也】如天之无不燝也【集解贾逵曰燝覆也】如地之无不载也虽甚盛德无以加矣观止矣若有他乐吾不敢观【集解服?曰周用六代之乐尧曰咸池黄帝曰云门鲁受四代下周二等故不舞其二季札知之故曰有他乐吾不敢请】去鲁遂使齐说晏平仲曰子速纳邑与政【集解服?曰入邑与政职於公不与国家之事】无邑无政乃免於难齐国之政将有所归未得所归难未息也故晏子因陈桓子以纳政与邑是以免於栾高之难【正义难乃憚反在鲁昭公八年栾施高强二氏作难陈桓子和之乃解也】去齐使於郑见子产如旧交谓子产曰郑之执政侈难将至矣政必及子子爲政慎以礼【集解服?曰礼所以经国家利社稷也】不然郑国将败去郑适卫说蘧瑗史狗史鰌公子荆公叔发公子朝曰卫多君子未有患也自卫如晋将舍於宿【集解駰案左传曰将宿於戚索隐按太史公欲自为一家事虽出於左氏文则随义而换既以舍字替宿遂以宿字替戚尔戚既是邑名理应不易今宜读宿爲戚戚卫邑孙文子旧所食也】闻钟声【集解服?曰孙文子鼓钟作乐也】曰异哉吾闻之辩而不德必加於戮【集解服?曰辩若鬪辩也夫以辩争不以德居之必加于刑戮也】夫子获罪於君以在此【集解贾逵曰夫子孙文子也获罪出献公以戚畔也】惧犹不足而又可以畔乎【索隐按春秋左氏传曰而又何乐此畔字宜读曰乐乐谓闻钟声也畔非其义耳】夫子之在此犹燕之巢於幕也【集解王肃曰言至危也】君在殡而可以乐乎【集解贾逵曰言卫君献公棺在殡未葬】遂去之文子闻之终身不听琴瑟【集解服?曰闻义而改也琴瑟不聽况于钟鼓乎】适晋说赵文子【索隐名武】韩宣子【索隐名起正义世本云名秦】魏献子【索隐名舒】曰晋国其萃於三家乎【集解服?曰言晋国之祚将集於三家】将去谓叔向曰吾子勉之君侈而多良大夫皆富政将在三家【集解杜预曰富必厚施故政在三家也】吾子直【集解服?曰直不能曲挠以从衆】必思自免於难季札之初使北过徐君徐君好季札劔口弗敢言季札心知之爲使上国未献还至徐徐君已死於是乃解其宝劔系之徐君冢树而去【正义括地志云徐君庙在泗州徐城县西南一里卽延陵季子挂劔之徐君也】从者曰徐君已死尚谁予乎季子曰不然始吾心已许之岂以死倍吾心哉七年楚公子围弑其王夹敖而代立是爲灵王【索隐春秋经襄二十五年吴子遏卒二十九年阖杀吴子余祭昭十五年吴子夷末卒是余祭立四年余昧在位十七年系家倒错二王之年此七年正是余昧之三年昭元年经曰冬十有一月楚子麇卒左传曰楚公子围将聘于郑未出境闻王有疾而还入问王疾缢而弑之孙卿曰以冠纓绞之遂杀其二子幕及平夏葬王於郑谓之郑敖】十年楚灵王会诸侯而以伐吴之朱方以诛齐庆封吴亦攻楚取三邑而去【集解駰案左传曰吴伐楚入棘栝麻以报朱方之役索隐杜预注彼云皆楚东鄙邑也譙周云鄆县东北有棘亭汝阴新蔡县东北有栝亭按解者以麻即襄城县故麻城是也】十一年楚伐吴至雩娄【集解服?曰雩娄楚之东邑索隐昭五年左传曰楚子伐吴使沉尹射待命於巢蘧后疆待命雩娄今直言至雩娄略耳】十二年楚复来伐次於乾谿【集解杜预曰乾谿在譙国城父县南楚东境】楚师败走十七年王余祭卒【索隐春秋襄二十九年经曰阖杀吴子余祭左传曰吴人伐越获俘焉以爲阖使守舟吴子余祭观舟阖以刀杀之公羊传曰近刑人则轻死之道也合在季札聘鲁之前倒错於此】弟余昧立王余昧二年楚公子弃疾弑其君灵王代立焉【索隐据春秋即余昧十五年也昭十三年经曰夏四月楚公子比自晋归于楚弑其君?於乾谿楚公子弃疾杀公子比左氏具载词

繁不录公子比弃疾皆灵王弟也比即子干也灵王公子围也即位後易名爲?弃疾即位後易名熊居是爲平王史记以平王遂有楚国故曰弃疾弑君春秋以子干爲王故曰比弑其君彼此各有意义也】四年王余昧卒欲授弟季札季札让逃去於是吴人曰先王有命兄卒弟代立必致季子季子今逃位则王余昧後立今卒其子当代乃立王余昧之子僚爲王【索隐此文以爲余昧子公羊传以爲壽梦庶子】王僚二年公子光伐楚【集解徐广曰世本云夷昧生光吴越春秋曰王僚夷昧子与史记同】败而亡王舟光惧袭楚复得王舟而还【集解駢案左传曰舟名余皇索隐计僚元年当昭十六年比二年公子光亡王舟事在左氏昭十七年】五年楚之亡臣伍子胥来奔公子光客之【索隐左传昭二十年曰伍员如吴言伐楚之利於州于杜预曰州于吴子僚也公子光曰是宗爲戮而欲反其讎不可从也员曰彼将有他志余姑爲之求士而鄙以待之乃见鱄设诸焉而耕於鄙是谓以客礼接之】公子光者王诸樊之子也【索隐此文以爲诸樊子系本以爲夷昧子也】常以爲吾父兄弟四人当传至季子季子即不受国光父先立即不传季子光当立阴纳贤士欲以袭王僚八年吴使公子光伐楚败楚师迎楚故太子建母於居巢以归因北伐败陈蔡之师九年公子光伐楚拔居巢鍾离【集解服?曰鍾离州来西邑也索隐昭二十四年经曰冬吴灭巢左氏曰楚子爲舟师以略吴疆沈尹戌曰此行也楚必亡邑不抚民而劳之吴不动而速之吴人踵楚边人不备遂灭巢及鍾离而还地理志居巢属庐江鍾离属九江应劭曰鍾离子之国也】初楚边邑卑梁氏之处女与吴边邑之女争桑【索隐左氏无其事】二女家怒相灭两国边邑长闻之怒而相攻灭吴之边邑吴王怒故遂伐楚取两都而去【正义两都即鍾离居巢】伍子胥之初犇吴说吴王僚以伐楚之利公子光曰胥之父兄爲戮於楚欲自报其仇耳未见其利於是伍员知光有他志【集解服?曰欲取国】乃求勇士专诸【集解贾逵曰吴勇士索隐专或作劓左传作鱄设诸刺客传曰诸堂邑人也正义吴越春秋专诸丰邑人伍子胥初亡楚如吴时遇之於途专诸方与人鬪甚不可当其妻呼还子胥怪而问其状专诸曰夫屈一人之下必申万人之上胥因而相之雄貌深目侈口熊背知其勇士】见之光光喜乃客伍子胥子胥退而耕於野以待专诸之事【索隐依左传即上五年公子光客之是也事合记於五年不应略彼而更具於此也】十二年冬楚平王卒【索隐昭二十六年春秋经书楚子居卒是也按十二诸侯年表及左传合在僚十二年】十三年春吴欲因楚丧而伐之【索隐据表及左氏僚止合有十二年事并见昭二十七左传】使公子盖余烛庸【集解贾逵曰二公子皆吴王僚之弟索隐春秋作掩余而史记并作盖余音同而字异者或谓太史公被腐刑不欲言掩也贾逵及杜预并刺客传皆云二公子王僚母弟而昭二十三左传曰光帅右掩余帅左杜注云掩余吴王壽梦子又系族谱亦云二公子并壽梦子若依公羊僚爲壽梦子则与系族谱合也】以兵围楚之六灣【集解杜预曰灣在庐江六县西南】使季札於晋以观诸侯之变【集解服?曰察强弱】楚发兵絶吴兵後吴兵不得还於是吴公子光曰此时不可失也【集解贾逵曰时言可杀王时也】告专诸曰不索何获【集解服?曰不索当何时得也】我真王嗣当立吾欲求之季子虽至不吾废也【集解王肃曰聘晋还至也】专诸曰王僚可杀也母老子弱【集解服?曰母老子弱专诸托其母子於光也王肃曰专诸言王母老子弱也索隐依王肃解与史记同於理无失服?杜预见左传下文云我尔身也以其子爲卿遂强解是无若我何犹言我无若是何语不近情过爲迂回非也】而两公子将兵攻楚楚絶其路方今吴外困於楚而内空无骨鯁之臣是无奈我何光曰我身子之身也【集解服?曰言我身犹尔身也】四月丙子光伏甲士於窟室【集解杜预曰掘地爲室也索隐春秋经唯言夏四月左氏亦云丙子当别有按据不

知出何书】而谒王僚饮【索隐谒请也本或作请左氏作飨王】王僚使兵陈於道自王宫至光之家门阶户席皆王僚之亲也人夹持铍【集解音披索隐刘逵注吴都赋铍两刃小刀】公子光详爲足疾入於窟室【集解杜预曰恐难作王党杀已素避之也索隐详音阳爲如字左氏曰光伪足疾详即伪也或读此爲字音伪非也岂佯伪重言耶】使专诸置匕首於炙鱼之中【集解服虔曰全鱼炙也索隐刘氏曰匕首短劔也按盐铁论以爲长尺八寸通俗文云其头类匕故曰匕首短刃可袖者】以进食手匕首刺王僚铍交於匈【集解贾逵曰交专诸匈也】遂弑王僚公子光竟立爲王是爲吴王阖庐阖庐乃以专诸子爲卿季子至曰苟先君无废祀民人无废主社稷有奉乃吾君也吾敢谁怨乎哀死事生以待天命【集解服虔曰待其天命之终也】非我生乱立者从之先人之道也【集解杜预曰吴自诸樊已下兄弟相传而不立适是乱由先人起也季子自知力不能讨光故云】复命哭僚墓【集解服虔曰复命於僚哭其墓也正义复音伏下同】复位而待【集解杜预曰复本位待光命】吴公子烛庸盖余二人将兵遇围於楚者闻公子光弑王僚自立乃以其兵降楚楚封之於舒【索隐左氏昭二十七年曰掩余奔徐烛庸奔鍾吾三十年经曰吴灭徐徐子奔楚左传曰吴子使徐人执掩余使鍾吾人执烛庸二公子奔楚楚子大封而定其徙无封舒之事当是舒徐字乱又且疎畧也】王阖庐元年举伍子胥爲行人而与谋国事楚诛伯州犂其孙伯嚭亡奔吴【集解徐广曰伯嚭州犂孙也史记与吴越春秋同嚭音披美反】吴以爲大夫三年吴王阖庐与子胥伯嚭将兵伐楚拔舒杀吴亡将二公子光谋欲入郢将军孙武曰民劳未可待之【索隐左传此年有子胥对耳无孙武事也】四年伐楚取六与濞五年伐越败之六年楚使子常囊瓦伐吴【正义左传云楚囊瓦爲令尹杜预云囊之孙子常】迎而击之大败楚军於豫章取楚之居巢而还【索隐在左传定十年当爲阖庐七年】九年吴王阖庐谓伍子胥孙武曰始子之言郢未可入今果如何【索隐言今欲果敢伐楚可否也】二子对曰楚将子常贪而唐蔡皆怨之王必欲大伐必得唐蔡乃可阖庐从之悉兴师与唐蔡西伐楚【索隐定四年经蔡侯以吴子及楚人战于柏举楚师败绩吴入郢是也】至於汉水楚亦发兵拒吴夹水陈【正义音阵】吴王阖庐弟夫槩【正义音古代反】欲战阖庐弗许夫槩曰王已属臣兵以利爲上尚何待焉遂以其部五千人袭冒楚楚兵大败走於是吴王遂纵兵追之比至郢五战楚五败楚昭王亡出郢奔鄢【集解服虔曰鄢楚县】鄢公弟【正义左传云鄢公辛之弟怀也】欲弑昭王昭王与鄢公犇随【集解服虔曰随楚与国也】而吴兵遂入郢子胥伯嚭鞭平王之尸以报父讎【索隐左氏无此事】十年春越闻吴王之在郢国空乃伐吴吴使别兵击越楚告急秦秦遣兵救楚击吴吴师败阖庐弟夫槩见秦越交败吴吴王留楚不去夫槩亡归吴而自立爲吴王阖庐闻之乃引兵归攻夫槩夫槩败奔楚楚昭王乃得以九月复入郢而封夫槩於堂谿爲堂谿氏【集解司马彪曰汝南吴房有堂谿亭正义括地志云豫州吴房县在州西北九十里应劭云吴王阖庐弟夫槩奔楚封之于堂谿氏本房子国以封吴故曰吴房】十一年吴王使太子夫差伐楚取番楚恐而去郢徙都【集解服虔曰都楚邑索隐定六年左传四月己丑吴太子终累败楚舟师杜预曰阖庐子夫差兄此以爲夫差当谓名异而一人耳左传又曰获潘子臣小惟子及大夫七人楚於是乎迁郢於都此言番番音潘楚邑名子臣即其邑之大夫也】十五年孔子相鲁【索隐定十年左传曰夏公会齐侯于祝其夹谷孔丘相犂弥言於齐侯曰孔丘知礼而无勇是也杜预以爲相会议也而史迁孔子系家云摄行相事按左氏孔丘以公退曰士兵之又使兹无还揖对盖是摄国相也】十九年夏吴伐越越王句践迎击之槁李【集解贾逵曰槁李越地杜预曰吴郡嘉兴县南有槁李城也槁音醉】越使死士挑战【集

解徐广曰死一作亶越世家亦然或者以爲人名氏乎駟案贾逵曰死士死罪人也郑衆曰死士欲以死报恩者也杜预曰敢死之士也正义挑音田鸟反】三行造吴师呼自刳【集解駟案左传曰使罪人三行属剑於颈】吴师观之越因伐吴败之姑苏【集解駟案越絶书曰阖庐起姑苏台三年聚材五年乃成高见三百里索隐姑苏台名在吴县西三十里】伤吴王阖庐指军却七里吴王病伤而死【索隐左传云定十四年越子大败之灵姑浮以戈击阖庐阖庐伤将指还卒於陞去槁李七里此云击之槁里又云败之姑苏自爲乖异杜预注槁里在嘉兴县南灵姑浮越大夫也】阖庐使立太子夫差谓曰尔而忘句践杀汝父乎对曰不敢三年乃报越【集解駟案越絶书曰阖庐冢在吴县昌门外名曰虎邱下池广六十步水深一丈五尺桐棺三重渰池六尺玉鳧之流扁诸之剑三千方员之口三千盘郢鱼肠之劒在焉卒十余万人治之取土临湖葬之三日白虎居其上故号曰虎邱索隐此以爲阖庐谓夫差夫差对阖庐若左氏传则云对曰者夫差对所使之人也渰音胡贡反以水银爲池】王夫差元年【集解駟案越絶书曰太伯到夫差二十六代且千岁索隐按太伯至壽梦十九代诸樊已下六王唯二十五年】以大夫伯嚭爲太宰【索隐左传定四年伯嚭爲太宰当阖庐九年非夫差代也】习战射常以报越爲志二年吴王悉精兵以伐越败之夫椒【集解贾逵曰夫椒越地杜预曰太湖中椒山也索隐贾逵云越地盖近得之然其地阙不知所在杜预以爲太湖中椒山非战所夫椒与椒山不得爲一旦夫差以报越爲志又伐越当至越地何乃不离吴境近在太湖中又按越语云败五湖也】报姑苏也越王句践乃以甲兵五千人栖於会稽【集解贾逵曰会稽山名索隐鸟所止宿曰栖越爲吴败依山林故以鸟栖爲喻左传作保国语作栖】使大夫种因吴太宰嚭而行成【集解服虔曰行成求成也索隐大夫官也种名也吴越春秋以爲种姓文而刘氏云姓大夫非也正义国语云越饰美女八人纳太宰嚭曰子苟然放越之罪】请委国爲臣妾吴王将许之伍子胥谏曰昔有过氏杀斟灌以伐斟寻【集解贾逵曰过国名也斟灌斟寻夏同姓也夏后相依斟灌而国故曰杀夏后相也索隐过音戈寒浞之子浇所封国也猗姓国晋地道记曰东莱掖县有过乡北有过城是古之过国者也斟灌斟寻夏同姓贾氏据系本而知也按地理志北海壽光县应劭云古?灌禹後今灌亭是也又平壽县云故?寻禹後今?城是也?与斟同】灭夏后帝相【集解服虔曰夏后相啓之孙】帝相之妃后缙方娠【集解贾逵曰缙有仍之姓也杜预曰娠怀身也】逃於有仍【集解贾逵曰有仍国名后缙之家】而生少康【集解服虔曰后缙遗腹子】少康爲有仍牧正【集解王肃曰牧正牧官之长也】有过又欲杀少康少康奔有虞【集解贾逵曰有虞帝舜之後杜预曰梁国虞县】有虞思夏德於是妻之以二女而邑之於纶【集解贾逵曰纶虞邑】有田一成有衆一旅【集解贾逵曰方十里爲成五百人爲旅】後遂收夏衆抚其官职【集解服虔曰因此基业稍收取夏遗民余衆撫修夏之故官宪典】使人诱之遂灭有过氏【索隐传云使女艾谍浇季杼诱豷遂灭过氏杜预曰谍候也】复禹之绩祀夏配天【集解服虔曰以鮒配天也】不失旧物【集解贾逵曰物职也杜预曰物事也】今吴不如有过之强而句践大於少康今不因此而灭之又將寬之不亦难乎且句践爲人能辛苦今不灭後必悔之吴王不听听太宰嚭卒许越平与盟而罢兵去七年吴王夫差闻齐景公死而大臣争宠新君弱乃兴师北伐齐子胥谏曰越王句践食不重味衣不重采吊死问疾且欲有所用其衆此人不死必爲吴患今越在腹心疾而王不先而务齐不亦谬乎吴王不听遂北伐齐败齐师於艾陵【集解杜预曰艾陵齐地索隐此之七年鲁哀公六年也左氏此年无伐齐事哀十一年有败齐师於艾陵】至缙【集解杜预曰琅邪缙县】召鲁哀公而徵百牢季康子使子贡以周礼说太宰嚭乃得止【集解贾

達曰周礼王合诸侯享礼十有二牢上公九牢侯伯七牢子男五牢索隱事在哀七年当夫差八年不应上连七年按左传曰子服景伯对不聽乃与之非谓季康子使子贡说得不用百牢太宰嚭自别召康子乃使子贡辞之耳】因留略地於齐鲁之南九年爲驹伐鲁至与鲁盟乃去【索隱左传驹作邾杜预注左传亦曰邾今鲁国驹县是也驹邾声相近自乱耳驹宜音邾】十年因伐齐而归十一年复北伐齐越王句踐率其衆以朝吴厚献遗之吴王喜唯子胥惧曰是弃吴也【索隱左氏作豢吴豢养也】諫曰越在腹心今得志於齐犹石田无所用【集解王肃曰石田不可耕】且盘庚之诰有顛越勿遗【集解服虔曰顛陨也越坠也顛越无道则割絶无遗也索隱左传曰其顛越不共则剿殄无遗育无俾易种於兹邑是商所以兴也今君易之此即艾陵战时也】商之以兴【集解徐广曰一本作盘庚之诰有顛之越之商之以兴子胥传诰曰有顛越商之兴】吴王不听使子胥於齐子胥属其子於齐鲍氏【集解服虔曰鲍氏齐大夫索隱左传直云使於齐杜预云私使人至齐国属其子按左氏又云反役王闻之明非子胥自使也】还报吴王吴王闻之大怒赐子胥属镂之劍以死【集解服虔曰属镂劍名赐使自刎索隱劍名见越絶书正义属音烛镂音力于反】将死曰树吾墓上以梓令可爲器【索隱传云树吾墓檟檟可材也吴其亡乎梓檟相类因变文耳】抉吾眼置之吴东门以观越之灭吴也【索隱抉乌穴反此国语文彼以抉爲辟又云以手抉之集解王愠曰孤不使大夫得有见乃盛以鸱夷投之江也正义吴俗传云子胥亡後越从松江北开渠至横山东北筑城伐吴子胥乃与越军梦令从东南入破吴越王即移向三江口岸立坛杀白马祭子胥杯动酒尽越乃开渠子胥作涛荡罗城东开入灭吴至今犹号曰示浦门曰??是从东门入灭吴也】齐鲍氏弑齐悼公吴王闻之哭於军门外三日【集解服虔曰诸侯相临之礼索隱公名阳生左传哀十年曰吴伐齐南鄙齐人杀悼公不言鲍氏又鲍叔以哀八年爲悼公所杀今言鲍氏盖其宗党尔且此伐在艾陵战之前年今记於後亦爲顛倒错乱也】乃从海上【集解徐广曰上作中】攻齐齐人败吴吴王乃引兵归十三年吴召鲁卫之君会於橐臯【集解服虔曰橐臯地名也杜预曰在淮南逡遒县东南索隱哀公十二:left传曰公会吴於橐臯卫侯会吴於郕此并言会卫橐臯者按左传吴徵会於卫初卫杀吴行人惧谋於子羽子羽曰不如止也子木曰往也卫侯本不欲赴会故鲁以夏会卫及秋乃会之耳所以太史公言其召鲁卫会於橐臯也郕发阳也广陵海陵县东南有发繇口橐臯县名在壽春橐音吐各反臯音姑逡音七巡反遒音才猷反】十四年春吴王北会诸侯於黄池【集解杜预曰陈留封邱县南有黄亭近济水】欲霸中国以全周室六月戊子越王句踐伐吴乙酉越五千人与吴战丙戌虏吴太子友丁亥入吴吴人告败於王夫差夫差恶其闻也【集解贾逵曰恶其闻诸侯】或泄其语吴王怒斩七人於幕下【集解服虔曰以絶口】七月辛丑吴王与晋定公争长吴王曰於周室我爲长【集解杜预曰吴爲太伯後故爲长】晋定公曰於姬姓我爲伯【集解杜预曰爲侯伯】赵鞅怒将伐吴乃长晋定公【集解徐广曰黄池之盟吴先歃晋次之与外传同駟案贾逵曰外传曰吴先歃晋亚之先叙晋晋有信又所以外吴索隱此依左传文按左传赵鞅呼司马寅曰日肝矣大事未成二臣之罪也建鼓整列二臣死之长幼必可知也是赵鞅怒司马寅对曰请姑视之反曰肉食者无墨今吴王有墨国其胜乎杜预曰墨气色下也国爲敌所胜也又曰太子死乎且夷德轻不忍久请少待之乃先晋人是也徐贾所云据国语不与左传合非也左氏鲁襄之代晋楚爲会先书晋晋有信耳外传即国语也书有二名也外吴者吴夷贱之不许同中国故言外】吴王已盟与晋别欲伐宋太宰嚭曰可胜而不能居也乃引兵归国国亡太子内空王居外久士皆罢敝於是乃使厚币以与越平十五年齐田常杀简公十八年越益强

越王句踐率兵使伐敗吳師於笠澤楚滅陳二十年越王句踐復伐吳【索隱哀十九年左氏曰越人侵楚以誤吳也杜預曰誤吳使不爲備也無伐吳事也】二十一年遂圍吳二十三年十一月丁卯越敗吳越王句踐欲遷吳王夫差於甬東【集解賈逵曰甬東越東鄙甬江東也韋昭曰勾章東海口外州也索隱國語曰甬勾東越地會稽勾章縣東海中州也按今鄞縣即是其處】予百家居之吳王曰孤老矣不能事君王也吾悔不用子胥之言自令陷此遂自剄死【集解駰案越絕書曰夫差冢在猶亭西卑猶位越王使干戈人一土以葬之近太湖去縣五十七里索隱左傳云乃縊越人以歸猶亭亭名卑猶位三字共爲地名吳地記曰徐枕山一名卑猶位是也音路禾反小竹籠以盛土也】越王滅吳誅太宰嚭以爲不忠而歸

太史公曰孔子言太伯可謂至德矣三以天下讓民無得而稱焉【集解王肅曰太伯弟季歷賢又生聖子昌昌必有天下故太伯以天下三讓於王季其讓隱故無得而稱言之者所以爲至德也】余讀春秋古文乃知中國之虞與荆蠻句吳兄弟也延陵季子之仁心慕義無窮見微而知清濁嗚呼又何其閎覽博物君子也【集解駰案皇覽曰延陵季子冢在毘陵縣暨陽鄉至今吏民皆祀事】

【索隱述贊曰太伯作吳高讓雄圖周章受國別封於虞壽夢初霸始用兵車三子遞立延陵不居光既篡位是稱闔閭王僚見殺賊由專諸夫差輕越取敗姑蘇甬東之耻空慙伍胥】

史記卷三十一

史記卷三十一考證

吳太伯世家吳太伯正義至二十一代孫光使子胥筑闔閭城都之○子胥監本訛作子齊今改正

太伯弟仲雍索隱孰哉仲雍字藩籬今吳之余暨也○藩籬監本訛作孰籬今改正

文身斷髮示不可用○困學紀聞曰傳言太伯端委仲雍斷髮史記云二人皆文身斷髮示不可用與傳異

將立子臧索隱愚者妄動也○愚監本訛作懸今改正君子曰能守節矣索隱君子者左邱明所謂史評仲尼之詞指仲尼爲君子也○【臣照】按季札聘魯孔子八歲讓國時孔子未生也其引子臧之事何遽得孔子論斷之語而稱之左氏於孔子論斷類皆明着其說其稱君子曰者是記當時之君子有此語耳或以爲邱明自謂或以君子爲孔子皆未達左氏之義也又正義嫡子嗣國得禮之宜○禮監本訛作體今改正

猶有先王之遺民也集解杜預曰謂有殷王余俗故未大○徐孚遠曰杜注非也蓋言文武之遺民周衰尚在鎬京無緣有殷王余俗

十七年王余祭卒○【臣人龙】按左传及十二诸侯年表余祭於四年爲閻所杀此作十七年是与传表互异然年表既言閻杀余祭而仍书十七年又似余祭死于是年为真

弟余昧立○春秋作夷末公羊传作夷昧

初楚边邑卑梁氏之处女与吴边邑之女争桑○【臣照】按楚世家吴之边邑卑梁与楚边邑锺离小童争桑灭卑梁人卑梁大夫怒发邑兵攻锺离楚王闻之怒发国兵灭卑梁吴王闻之亦大怒发兵灭锺离居巢则卑梁爲吴边邑锺离爲楚边邑明矣此云楚边邑卑梁氏云云则又似卑梁爲楚之边邑也

胥之父兄爲戮于楚欲自报其仇耳○之一本作以人持夹铍索隐曰两刃小刀○监本讹作两刀小刃今改正

有虞思夏德於是妻之以二女而邑之於纶○【臣照】按左传思是虞君名此直作思念之思

十三年吴召鲁卫之君会於橐臯○【臣世骏】按左传橐臯之会但有鲁君年表并同秋徵会於卫乃会于郟耳此并两事为一

史记卷三十一考证

卷三十二

钦定四库全书

史记卷三十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

齐太公世家第二

【正义括地志云天齐池在青州临淄县东南十五里封禅书云齐之所以为齐者以天齐】

太公望吕尚者东海上人【集解駰案吕氏春秋曰东夷之士索隐譙周曰姓姜名牙炎帝之裔伯夷之後掌四岳有功封之於吕子孙从其封姓吕尚其後也按後文王得之渭滨云吾先君太公望子久矣故号太公望盖牙是字尚是其名後武王号为师尚父则尚父官名】其先祖尝为四岳佐禹平水土甚有功虞夏之际封於吕【集解徐广曰吕在南阳宛县西】或封於申姓姜氏【索隐地理志申在南阳宛县申伯之国吕亦在宛县之西也】夏商之时申吕或封枝庶子孙或为庶人尚其後苗裔也本姓姜氏从其封姓故曰吕尚吕尚盖尝穷困年老矣【索隐譙周曰吕望常屠牛於朝歌卖饭於孟津】以鱼钓奸周西伯【正义奸音干括地志云兹泉水源出岐州岐山县西南凡谷吕氏春秋云太公钓於兹泉遇文王酈元云磻溪中有泉谓之兹泉泉水潭积自成渊渚即太公钓处今人谓之凡谷石壁深高幽篁邃密林泽秀阻人迹罕及东南隅有石室盖太公所居也水次有磻石可钓处即太公垂钓之所其投竿跪饵两膝遗迹犹存是有磻溪之称也其水清冷神异北流十二里注于渭说苑云吕望年七十钓于渭渚三日三夜鱼无食者望即忿脱其衣冠上有农人者古之异人谓望曰子姑复钓必细其纶芳其饵徐徐而投无令鱼骇望如其言初下得鲋次得鲤刺鱼腹得书书文曰吕望封于齐望知其异】西伯将出猎卜之曰所获非龙非虺【集解徐广曰勅知反索隐余本亦作虺字】非虎非罴所获霸王之辅於是周西伯猎果遇太公於渭之阳与语大说曰自吾先君太公曰当有圣人适周周以兴子真是邪吾太公望子久矣故号之曰太公望载与俱归立为师或曰太公博闻尝事纣纣无道去之游说诸侯无所遇而卒西归周西伯或曰吕尚处士隐海滨周西伯拘羑里散宜生闢夭素知而招吕尚吕尚亦曰吾闻西伯贤又善养老盍往焉三人者为西伯求美女奇物献之於纣以赎西伯西伯得以出反国言吕尚所以事周虽异然要之为文武师周西伯昌之脱羑里归与吕尚阴谋修德以倾商政其事多兵权与奇计【正义六韬云武王问太公曰律之音声可以知三军之消息乎太公曰深哉王之间也夫律管十二

其要有五宫商角徵羽此其正声也万代不易五行之神道之常也可以知敌金木水火土各以其胜攻之其法以天清静无阴云风雨夜半遣轻骑往至敌人之垒九百步偏持律管横耳大呼惊之有声应管其来甚微角管声应当以白虎徵管声应当以玄武商管声应当以勾陈五管尽不应无有商声当以青龙此五行之府佐胜之徵阴败之机也】故後世之言兵及周之阴权皆宗太公为本谋周西伯政平及断虞芮之讼而诗人称西伯受命曰文王伐崇密须犬夷【索隐郡国志密须在东郡廩邱县北今曰顾城密须姑姓在河南密县东故密城是也与安定姬姓密国各不同】大作丰邑天下三分其二归周者太公之谋计居多文王崩武王即位九年欲修文王业东伐以观诸侯集否师行师尚父【集解駰案刘向别录曰师之尚之父之故曰师尚父父亦男子之美号也】左杖黄钺右把白旄以誓曰苍兕苍兕【索隐本或作苍雉按马融曰苍兕主舟楫官名又王充云苍兕水兽九头今誓衆令急济故言苍兕以惧之】总尔衆庶与尔舟楫後至者斩遂至盟津诸侯不期而会者八百诸侯诸侯皆曰纣可伐也武王曰未可还师与太公作此太誓居二年纣杀王子比干囚箕子武王将伐纣卜龟兆不吉风雨暴至羣公尽惧唯太公强之劝武王武王於是遂行十一年【集解徐广曰一作三年】正月甲子誓於牧野伐商纣纣师败绩纣反走登鹿台遂追斩纣明日武王立于社羣公奉明水【索隐周本纪毛叔郑奉明水】卫康叔封布采席【索隐周本纪卫康叔封布兹兹是席故此亦云采席也】师尚父牵牲史佚策祝以告神讨纣之罪散鹿台之钱发钜桥之粟以振贫民封比干墓释箕子囚迁九鼎修周政与天下更始师尚父谋居多於是武王已平商而王天下封师尚父於齐营邱【正义营邱在青州临淄北百步外城中】东就国道宿行迟逆旅之人曰吾闻时难得而易失客寝甚安殆非就国者也太公闻之夜衣而行黎明至国【索隐犁里奚反犁犹比也又犁犹迟也】莱侯来伐与之争营邱营邱边莱莱人夷也会纣之乱而周初定未能集远方是以与太公争国太公至国修政因其俗简其礼通商工之业便鱼盐之利而人民多归齐齐为大国及周成王少时管蔡作乱淮夷【正义孔安国云淮浦之夷徐州之戎】畔周乃使召康公【集解服虔曰召公奭】命太公曰东至海西至河南至穆陵北至无棣【集解服虔曰是皆太公始受封土地疆境所至也索隐旧说云穆陵在会稽非也按今淮南有故穆陵门是楚之境无棣在辽西孤竹服虔以为太公受封境界所至不然也盖言其征伐所至之域】五侯九伯实得征之【集解杜预曰五等诸侯九州之伯皆得征讨其罪】齐由此得征伐为大国都营邱盖太公之卒百有余年【集解駰案礼记曰太公封於营邱比及五世皆反葬於周郑玄曰太公受封留为太师死葬於周五世之後乃葬齐皇览曰吕尚冢在临菑县城南去县十里】子丁公吕汲【集解徐广曰一作及正义谥法述义不克曰丁】立丁公卒子乙公得立乙公卒子癸公慈母立【索隐系本作祭公慈母譙周亦曰祭公慈心也】癸公卒子哀公不辰立【索隐系本作不臣譙周亦作不辰宋忠曰哀公荒淫田游史作还诗以刺之也】哀公时纪侯谮之周周烹哀公【集解徐广曰周夷王】而立其弟静是为胡公【正义谥法弥年壽考曰胡】胡公徙都薄姑【正义括地志云薄姑城在青州博昌县东北六十里】而当周夷王之时哀公之同母少弟山怨胡公乃与其党率营邱人袭攻杀胡公而自立是为献公【索隐宋忠云其党周马繻人将胡公於贝水杀之而山自立也】献公元年尽逐胡公子因徙薄姑都治临菑九年献公卒子武公壽立武公九年周厉王出奔居彘【正义直厉反括地志云晋州霍邑县也郑玄云霍山在彘本秦时霍伯国】十年王室乱大臣行政号曰共和二十四年周宣王初立二十六年武公卒子厉公无忌立厉公暴虐故胡公子复入齐齐人欲立之乃与攻杀厉公胡公子亦战死齐人乃立厉公子赤为君是为文公而诛杀

厉公者七十人文公十二年卒子成公脱立【索隐系本及譙周皆作说字】成公九年卒子庄公购立【索隐刘氏音神欲反年表及系本并作赎】庄公二十四年犬戎杀幽王周东徙雒秦始列为诸侯五十六年晋弑其君昭侯六十四年庄公卒子厘公禄甫立厘公九年鲁隐公初立十九年鲁桓公弑其兄隐公而自立为君二十五年北戎伐齐郑使太子忽来救齐齐欲妻之忽曰郑小齐大非我敌遂辞之三十二年厘公同母弟夷仲年死其子曰公孙无知厘公爱之令其秩服奉养比太子三十三年厘公卒太子诸儿立是为襄公襄公元年始为太子时尝与无知鬪及立绌无知秩服无知怨四年鲁桓公与夫人如齐齐襄公故尝私通鲁夫人鲁夫人者襄公女弟也自厘公时嫁为鲁桓公妇及桓公来而襄公复通焉鲁桓公知之怒夫人夫人以告齐襄公齐襄公与鲁君饮醉之使力士彭生抱上鲁君车因拉杀鲁桓公【集解駢案公羊传曰撝干而杀之何休曰撝折声也正义拉音力合反】桓公下车则死矣鲁人以为让【索隐让犹责也】而齐襄公杀彭生以谢鲁八年伐纪纪迁去其邑【集解徐广曰年表云去其都邑索隐春秋庄四年纪侯大去其国左氏云违齐难也】十二年初襄公使连称管至父戍葵邱【集解贾逵曰连称管至父皆齐大夫索隐杜预云临淄西有地名葵邱又下三十五年会诸侯於葵邱当鲁僖公九年杜预曰陈留外黄县东有葵邱不同者盖葵邱有两处杜意以戍葵邱当不远出齐境故引临淄县西之葵邱若三十五年会诸侯於葵邱杜之以不合在本国故引外黄东葵邱为注所以不同也】瓜时而往及瓜而代【集解服虔曰瓜时七月及瓜谓後年瓜时】往戍一岁卒瓜时而公弗为发代或为请代公弗许故此二人怒因公孙无知谋作乱连称有从妹在公宫无宠【集解服虔曰为妾在宫也】使之间襄公【集解王肃曰公之间隙】曰事成以女为无知夫人冬十二月襄公游姑棼【集解贾逵曰齐地也正义音扶云反】遂猎沛邱【集解杜预曰乐安博昌县南有地名贝邱正义左传云齐襄公田於贝邱坠车伤足即此也】见彘从者曰彭生【集解服虔曰公见彘从者乃见彭生鬼改形为豕也】公怒射之彘人立而啼公惧坠车伤足失屦反而鞭主屦者蒍【正义非佛反下同蒍主屦者也】三百蒍出宫而无知连称管至父等闻公伤乃遂率其衆袭宫逢主屦蒍蒍曰且无入惊宫惊宫未易入也无知弗信蒍示之创【正义音疮】乃信之待宫外令蒍先入蒍先入即匿襄公户间良久无知等恐遂入宫蒍反与宫中及公之幸臣攻无知等不胜皆死无知入宫求公不得或见人足於户间发视乃襄公遂弑之而无知自立为齐君桓公元年春齐君无知游於雍林【集解贾逵曰渠邱大夫也索隐本亦作雍廩左传曰雍廩杀无知杜预曰雍廩齐大夫此云游雍林雍林人尝有怨无知遂袭杀之盖以雍林为邑名其地有人杀无知贾言渠邱大夫者盖雍林为渠邱大夫也】雍林人尝有怨无知及其往游雍林人袭杀无知告齐大夫曰无知弑襄公自立臣谨行诛唯大夫更立公子之当立者唯命是听初襄公之醉杀鲁桓公通其夫人杀诛数不当淫於妇人数欺大臣羣弟恐祸及故次弟纠奔鲁其母鲁女也管仲召忽傅之次弟小白奔莒鲍叔傅之小白母卫女也有宠於厘公小白自少好善大夫高傒【集解贾逵曰齐正卿高敬仲也正义音奚】及雍林人杀无知议立君高国先阴召小白於莒鲁闻无知死亦发兵送公子纠而使管仲别将兵遮莒道射中小白带钩小白佯死管仲使人驰报鲁鲁送纠者行益迟六日至齐则小白已入高傒立之是为桓公桓公之中钩佯死以误管仲已而载温车中驰行亦有高国内应故得先入立发兵距鲁秋与鲁战于乾时【集解杜预曰乾时齐地也时水在乐安界岐流旱则涸竭故曰乾时】鲁兵败走齐兵掩绝鲁归道齐遗鲁书曰子纠兄弟弗忍诛请鲁自杀之召忽管仲讎也请得而甘心醢之不然将围鲁鲁人患之遂杀子纠于笙渚【集解贾逵曰鲁地句渚也索隐按邹诞生本作莘渚莘笙声

相近笙如字读音豆论语作沟渎盖後代声转而字异故诸文不同也】召忽自杀管仲请囚桓公之立发兵攻鲁心欲杀管仲鲍叔牙曰臣幸得从君君竟以立君之尊臣无以增君君将治齐即高傒与叔牙足也君且欲霸王非管夷吾不可夷吾所居国重不可失也於是桓公从之乃详为召管仲欲甘心实欲用之管仲知之故请往鲍叔牙迎受管仲及堂阜而脱桎梏【集解贾逵曰堂阜鲁北境杜预曰堂阜齐地东莞蒙阴县西北有夷吾亭或曰鲍叔解夷吾縛於此因以为名也】斋祓而见桓公桓公厚礼以为大夫任政桓公既得管仲与鲍叔隰朋【集解徐广曰或作崩也】高傒修齐国政连五家之兵【集解駰案国语曰管子制国五家为轨十轨为里四里为连十连为乡以为军令】设轻重鱼盐之利【索隐管子有理人轻重之法七篇轻重钱也又有捕鱼煮盐法】以赡贫穷禄贤能齐人皆说二年伐灭郯【集解徐广曰一作谭索隐春秋鲁庄十年齐师灭谭是也杜预云谭国在济南平陵县西南然此郯乃东海郯县盖亦不当作郯字也】郯子奔莒初桓公亡时过郯郯无礼故伐之五年伐鲁鲁将师败鲁庄公请献遂邑以平【集解杜预曰遂在济北蛇邱县东北】桓公许与鲁会柯而盟【集解杜预曰此柯今济北东阿齐之阿邑犹祝柯今为祝阿】鲁将盟曹沫以匕首劫桓公於坛上【集解何休曰土基三尺阶三等曰坛会必有坛者为升降揖让称先君以相接也】曰反鲁之侵地桓公许之已而曹沫去匕首北面就臣位桓公後悔欲无与鲁地而杀曹沫管仲曰夫劫许之而倍信杀之【集解徐广曰一云已许之而倍信杀劫也】愈一小快耳而弃信於诸侯失天下之援不可於是遂与曹沫三败所亡地於鲁诸侯闻之皆信齐而欲附焉七年诸侯会桓公於甄【集解杜预曰甄卫地今东郡甄城也】而桓公於是始霸焉十四年陈厉公子完号敬仲来奔齐【正义完音桓】齐桓公欲以为卿让於是以为工正【集解贾逵曰掌百工】田成子常之祖也二十三年山戎伐燕【集解服?曰山戎北狄盖今鲜卑也何休曰山戎者戎中之别名也】燕告急於齐齐桓公救燕遂伐山戎至于孤竹而还燕庄公遂送桓公入齐境桓公曰非天子诸侯相送不出境吾不可以无礼於燕於是分沟割燕君所至与燕命燕君复修召公之政纳贡于周如成康之时诸侯闻之皆从齐二十七年鲁湣公母曰哀姜桓公女弟也哀姜淫於鲁公子庆父庆父弑湣公哀姜欲立庆父鲁人更立厘公【集解徐广曰史记僖字皆作厘】桓公召哀姜杀之二十八年卫文公有狄乱告急於齐齐率诸侯城楚邱而立卫君【集解贾逵曰卫地也索隐杜预曰不言城卫卫未迁楚邱城武县南即今之卫南县是也】二十九年桓公与夫人蔡姬戏船中蔡姬习水荡公【集解贾逵曰荡摇也】公惧止之不止出船怒归蔡姬弗絶蔡亦怒嫁其女桓公闻而怒兴师往伐三十年春齐桓公率诸侯伐蔡蔡溃【集解服?曰民逃其上曰溃也】遂伐楚楚成王兴师问曰何故涉吾地管仲对曰昔召康公命我先君太公曰五侯九伯若实征之以夹辅周室【集解駰案左传曰周公太公股肱周室夹辅成王也】赐我先君履【集解杜预曰所践履之界】东至海西至河南至穆陵北至无棣楚贡包茅不入王祭不共【集解贾逵曰包茅菁茅匭之也以供祭祀杜预曰尚书包匭菁茅茅之为异未审】是以来责昭王南征不复是以来问【集解服?曰周昭王南巡狩涉汉未济船解而溺昭王王室讳之不以赴诸侯不知其故故桓公以为辞责问楚也索隐宋忠云昭王南伐楚辛田靡为右涉汉流而陨由靡逐王遂卒不复周乃侯其後于西翟】楚王曰贡之不入有寡人罪也敢不共乎昭王之出不复君其问之水滨【集解杜预曰昭王时汉非楚境故不受罪】齐师进次于陞【集解杜预曰陞楚地颍川召陵县南有陞亭左传曰凡师一宿为舍再宿为信过信为次】夏楚王使屈完将兵扞齐齐师退次召陵【集解杜预曰召陵颍川县】桓公矜屈完以其衆屈完曰君以道则可若不则楚方城以为

城【集解服虔曰方城山在汉南韦昭曰方城楚北之厄塞杜预曰方城山在南阳叶县南是也索隐地理志叶县南有长城号曰方城则杜预韦昭说为得而服氏云在汉南未知有何依据】江汉以为沟君安能进乎乃与屈完盟而去过陈陈袁涛涂诈齐令出东方觉秋齐伐陈【集解駰案左传曰讨不忠也】是岁晋杀太子申生三十五年夏会诸侯于葵邱【集解杜预曰陈留外黄县东有葵邱也】周襄王使宰孔赐桓公文武胙彤弓矢大路【集解贾逵曰大路诸侯朝服之车谓之金路】命无拜桓公欲许之管仲曰不可乃下拜受赐【集解韦昭曰下堂拜赐也】秋复会诸侯於葵邱益有骄色周使宰孔会诸侯颇有叛者【集解駰案公羊传曰葵邱之会桓公震而矜之叛者九国】晋侯病後遇宰孔宰孔曰齐侯骄矣第无行从之是岁晋献公卒里克杀奚齐淖子【集解徐广曰史记卓多作淖正义卓尹角反】秦穆公以夫人入公子夷吾为晋君桓公於是讨晋乱至高梁【集解服虔曰晋地也杜预曰在平阳县西南】使隰朋立晋君还是时周室微唯齐楚秦晋为强晋初与会【正义与音预下同】献公死国内乱秦穆公辟远不与中国会盟楚成王初收荆蛮有之夷狄自置唯独齐为中国会盟而桓公能宣其德故诸侯宾会於是桓公称曰寡人南伐至召陵望熊山北伐山戎离枝孤竹【集解駰案地理志云令支县有孤竹城疑离枝即令支也令离声相近应劭曰令音铃铃离声亦相近管子亦作离字索隐离枝音零支又音令祇又如字离枝孤竹皆古国名秦以离支为县故地理志云辽西令支县有孤竹城尔雅曰孤竹北户西王母曰下谓之四荒也】西伐大夏涉流沙【正义大夏并州晋阳是也】东马悬车登太行至卑耳山【正义卑音壁刘伯庄及韦昭并如字】而还诸侯莫违寡人寡人兵车之会三【正义左传云鲁庄十三年会北杏以平宋乱僖四年侵蔡遂伐楚六年伐郑围新城也】乘车之会六【正义左传云鲁庄十四年会于鄆十五年又会鄆十六年同盟于幽僖五年会首止八年盟于洮九年会葵邱是也】九合诸侯一匡天下【正义匡正也一匡天下谓定襄王为太子之位】昔三代受命有何以异於此乎吾欲封泰山禅梁父管仲固谏不听乃说桓公以远方珍怪物至乃得封桓公乃止三十八年周襄王弟带与戎翟合谋伐周齐使管仲平戎於周周欲以上卿礼管仲管仲顿首曰臣陪臣安敢三让乃受下卿礼以见三十九年周襄王弟带来奔齐齐使仲孙请王为带谢襄王怒弗听四十一年秦穆公虏晋惠公复归之是岁管仲隰朋皆卒【正义括地志云管仲冢在青州临淄县南二十一里牛山上与桓公冢连隰朋墓在青州临淄县东北七里也】管仲病桓公问曰羣臣谁可相者管仲曰知臣莫如君公曰易牙如何【正义即雍巫也贾逵云雍巫雍人名巫易牙也】对曰杀子以适君非人情不可公曰开方如何【正义管子云卫公子开方去其千乘之太子而臣事君也】对曰倍亲以适君非人情难近公曰竖刁如何【正义刁鸟条反顔师古云竖刁易牙皆齐桓公臣管仲有病桓公往问之曰将何以教寡人管仲曰愿君远易牙竖刁公曰易牙烹其子以快寡人尚可疑耶对曰人之情非不爱其子也其子之忍又将何爱於君公曰竖刁自宫以近寡人犹尚疑耶对曰人之情非不爱其身也其身之忍又将何有於君公曰诺管仲遂尽逐之而公食不甘心不怡者三年公曰仲父不已过乎於是皆即召反明年公有病易牙竖刁相与作乱塞宫门筑高墙不通人有一妇人踰垣入至公所公曰我欲食妇人曰吾无所得又曰我欲饮妇人曰吾无所得公曰何故曰易牙竖刁相与作乱塞宫门筑高墙不通人故无所得公慨然叹涕出曰嗟乎圣人所见岂不远哉若死者有知我将何面目见仲父乎蒙衣袂而死乎壽宫虫流於户盖以杨门之扇二月不殓也】对曰自宫以适君非人情难亲管仲死而桓公不用管仲言卒近用三子三子专权四十二年戎伐周周告急於齐齐令诸侯各发卒戍周是岁晋公子重耳来桓公妻之四十三年初齐桓公

之夫人三曰王姬徐姬蔡姬皆无子【索隐系本徐嬴姓礼妇人称国及姓今此言徐姬者然姬是衆妾之总称故汉禄秩令云姬妾数百妇人亦总称姬未必尽是姓】桓公好内【集解服?曰内妇官也】多内宠如夫人者六人长卫姬生无诡【索隐左氏作无亏】少卫姬生惠公元年郑姬生孝公昭葛嬴生昭公潘密姬生懿公商人宋华子【集解贾逵曰宋华氏之女子姓】生公子雍桓公与管仲属孝公於宋襄公以为太子雍巫有宠於卫共姬【集解贾逵曰雍巫雍人名巫易牙字索隐贾逵以雍巫为易牙字未知何据按管子有棠巫恐与雍巫是一人也】因宦者竖刁以厚献於桓公亦有宠桓公许之立无诡【集解杜预曰易牙既有宠於公为长卫姬请立】管仲卒五公子皆求立冬十月乙亥齐桓公卒易牙入与竖刁因内宠杀羣吏【集解服?曰内宠如夫人者六人羣吏诸大夫也杜预曰内宠内官之有权宠者】而立公子无诡为君太子昭奔宋桓公病五公子各树党争立及桓公卒遂相攻以故宫中空莫敢棺【正义音古患反】桓公尸在牀上六十七日尸虫出于户十二月乙亥无诡立乃棺赴辛巳夜斂殓【集解徐广曰斂一作临也】桓公十有余子要其後立者五人无诡立三月死无谥次孝公次昭公次懿公次惠公孝公元年三月宋襄公率诸侯兵送齐太子昭而伐齐齐人恐杀其君无诡齐人将立太子昭四公子之徒攻太子太子走宋宋遂与齐人四公子战五月宋败齐四公子师而立太子昭是为齐孝公宋以桓公与管仲属之太子故来征之以乱故八月乃葬齐桓公【集解皇览曰桓公冢在临菑城南七里所菑水南正义括地志云齐桓公墓在临菑县南二十一里牛山上亦名鼎足山一名牛首圜一所二坟晋永嘉末人发之初得版次得水银池有气不得入经数日乃牵犬入中得金蚕数十薄珠襦玉匣繒彩军器不可胜数又以人殉葬骸骨狼籍也】六年春齐伐宋以其不同盟于齐也【集解服?曰鲁僖公十九年诸侯盟于齐以无忘桓公之德宋襄公欲行霸道不与盟故伐之】夏宋襄公卒七年晋文公立十年孝公卒孝公弟潘因卫公子开方杀孝公子而立潘是为昭公昭公桓公子也其母曰葛嬴昭公元年晋文公败楚於城濮【正义贾逵云卫地也】而会诸侯践土朝周天子使晋称伯【正义音霸】六年翟侵齐晋文公卒秦兵败於殽十二年秦穆公卒十九年五月昭公卒子舍立为齐君舍之母无宠於昭公国人莫畏昭公之弟商人以桓公死争立而不得阴交贤士附爱百姓百姓说及昭公卒子舍立孤弱即与衆十月即墓上弑齐君舍而商人自立是为懿公懿公桓公子也其母曰密姬懿公四年春初懿公为公子时与丙戎之父猎争获不胜及即位断丙戎父足而使丙戎仆【集解贾逵曰仆御也索隐左氏作邴歃仆正义左传云乃掘而刖之杜预云断其尸足也】庸职之妻好公内之宫使庸职驂乘【索隐左氏作阎职此言庸职不同者传所云阎姓职名也此言庸职庸非姓盖谓受雇职之妻史意不同字亦异耳】五月懿公游於申池【集解杜预曰齐南城门名申门齐城无池惟此门左右有池疑此是也左思齐都赋注曰申池海滨齐藪也】二人浴戏职曰断足子戎曰夺妻者二人俱病此言乃怨谋与公游竹中二人弑懿公车上弃竹中而亡去懿公之立骄民不附齐人废其子而迎公子元於卫立之是为惠公惠公桓公子也其母卫女曰少卫姬避齐乱故在卫惠公二年长翟来【集解駉按谷梁传曰身横九亩断其首而载之眉见於轼】王子城父攻杀之【集解贾逵曰王子城父齐大夫】埋之於北门晋赵穿弑其君灵公十年惠公卒子顷公无野立【正义顷音倾】初崔杼有宠於惠公惠公卒高国畏其偪也逐之崔杼奔卫顷公元年楚庄王强伐陈二年围郑郑伯降已复国郑伯六年春晋使郤克於齐齐使夫人帷中而观之郤克上夫人笑之郤克曰不是报不复涉河归请伐齐晋侯弗许齐使至晋郤克执齐使者四人河内杀之八年晋伐齐齐以公子强质晋晋兵去十年春齐伐鲁卫鲁卫大夫如晋请师皆因郤克

【索隐成二年左传鲁臧宣叔卫孙桓子如晋皆主於郤克是】晋使郤克以车八百乘【集解贾逵曰八百乘六万人】为中军将士燮将上军栾书将下军以救鲁卫伐齐六月壬申与齐侯兵合靡笄下【集解徐广曰靡一作摩贾逵曰靡笄山名也索隐靡如字靡笄山名在济南与代地磨笄不同】癸酉陈于鞶【集解服虔曰鞶齐地名也】逢丑父【集解贾逵曰齐大夫】为齐顷公右顷公曰驰之破晋军会食射伤郤克流血至履克欲还入壁其御曰我始入再伤不敢言疾恐惧士卒愿子忍之遂复战战齐急丑父恐齐侯得乃易处顷公为右车絪於木而止【正义絪胡卦反止也有所碍也】晋小将韩厥伏齐侯车前曰寡君使臣救鲁卫戏之丑父使顷公下取饮【正义左传云及华泉彘絪於木而止丑父使公下如华泉取饮郑周父御佐车宛蒺为右载齐侯以免】因得亡脱去入其军晋郤克欲杀丑父丑父曰代君死而见戮後人臣无忠其君者矣克舍之丑父遂得亡归齐於是晋军追齐至马陵【集解徐广曰一作陘駟案贾逵曰马陘齐地也】齐侯请以宝器谢【集解駟案左传曰赂以纪甗玉磬也】不听必得笑克者萧桐叔子【集解杜预曰桐叔萧君之字齐侯外祖父子女也难斥言其母故远言之贾逵曰萧附庸子姓】令齐东亩【集解服虔曰欲令齐陇亩东行索隐垄亩东行则晋车马东向齐行易也】对曰叔子齐君母齐君母亦犹晋君母子安置之且子以义伐而以暴为後其可乎於是乃许令反鲁卫之侵地【正义左传云晋师及齐国佐盟使齐人归我汶阳之田也】十一年晋初置六卿赏鞶之功齐顷公朝晋欲尊王晋景公【索隐王劭按张衡曰礼诸侯朝天子执玉既授而反之若诸侯自相朝则不授玉齐顷公战败朝晋而授玉是欲尊晋侯为王太史公采其言而书之此文不云授玉王氏之说复有所依聊记异耳】晋景公不敢受乃归归而顷公弛苑囿薄赋歛振孤问疾虚积聚以救民民亦大说厚礼诸侯竟顷公卒百姓附诸侯不犯十七年顷公卒【集解駟案皇览曰顷公冢近吕尚冢】子灵公环立灵公九年晋栾书弑其君厉公十年晋悼公伐齐齐令公子光质晋十九年立子光为太子高厚傅之令会诸侯盟於锤离【正义括地志云锤离故城在沂州承县界】二十七年晋使中行献子伐齐【索隐荀偃祖林父代为中行後改姓为中行氏献子名偃】齐师败灵公走入临菑晏婴止灵公灵公弗从曰君亦无勇矣晋兵遂围临菑临菑城守不敢出晋焚郭中而去二十八年初灵公取鲁女生子光以为太子仲姬戎姬戎姬嬖仲姬生子牙属之戎姬戎姬请以为太子公许之仲姬曰不可光之立列於诸侯矣【集解服虔曰数从诸侯征伐盟会】今无故废之君必悔之公曰在我耳遂东太子光【集解贾逵曰徙之东垂】使高厚傅牙为太子灵公疾崔杼迎故太子光而立之是为庄公庄公杀戎姬五月壬辰灵公卒庄公即位执太子牙於句瀍之邱杀之八月崔杼杀高厚晋闻齐乱伐齐至高唐【集解杜预曰高唐在祝阿县西北】庄公三年晋大夫栾盈【集解徐广曰史记多作逞】奔齐庄公厚客待之晏婴田文子谏公弗听四年齐庄公使栾盈间入晋曲沃【集解贾逵曰栾盈之邑】为内应以兵随之上太行入孟门【集解贾逵曰孟门太行皆晋山隘也索隐孟门山在朝歌东北太行山在河内温县西】栾盈败齐兵还取朝歌【集解贾逵曰晋邑】六年初棠公妻好【集解贾逵曰棠公齐棠邑大夫】棠公死崔杼取之庄公通之数如崔氏以崔杼之冠赐人侍者曰不可崔杼怒因其伐晋欲与晋合谋袭齐而不得间庄公尝答宦者贾举贾举复侍为崔杼间公【集解服虔曰伺公间隙正义间音闲又如字】以报怨五月莒子朝齐齐以甲戌飧之崔杼称病不视事乙亥公问崔杼病遂从崔杼妻崔杼妻入室与崔杼自闭户不出公拥柱而歌【集解服虔曰公以为姜氏不知己在外故歌以命之也一曰公自知见欺恐不得出故歌以自悔】宦者贾举遮公从官而入闭门崔杼之徒持兵从中起公登台而请解不许请盟不许请自杀於庙

不许皆曰君之臣杼疾病不能听命【集解服?曰言不能亲听公命】近於公宫【集解服?曰崔杼之宫近公宫淫者或诈称公】陪臣争趣【集解徐广曰争一作扞索隐左传作扞輓此为争趣者是太史公变左传之文言陪臣但争趣投有淫者耳更不知他命也】有淫者不知二命【集解杜预曰言得淫人受崔子命讨之不知他命也】公踰墙射中公股公反坠遂弑之晏婴立崔杼门外【集解贾逵曰闻难而来】曰君为社稷死则死之为社稷亡则亡之【集解服?曰谓以公义为社稷死亡也如是者臣亦随之死亡】若为己死己亡非其私昵谁敢任之【集解服?曰言君自以己之私欲取死亡之祸则私近之臣所当任也集解杜预曰私昵所亲爱也非所亲爱无为当其祸也】门开而入枕公尸而哭三踊而出人谓崔杼必杀之崔杼曰民之望也舍之得民【集解服?曰置之所以得人心】丁丑崔杼立庄公异母弟杵臼【集解徐广曰史记多作着臼】是为景公景公母鲁叔孙宣伯女也景公立以崔杼为右相庆封为左相二相恐乱起乃与国人盟曰不与崔庆者死晏子仰天曰婴所不获唯忠於君利社稷者是从不肯盟庆封欲杀晏子崔杼曰忠臣也舍之齐太史书曰崔杼弑庄公崔杼杀之其弟复书崔杼复杀之少弟复书崔杼乃舍之景公元年初崔杼生子成及强其母死取东郭女生明东郭女使其前夫子无咎与其弟偃【正义杜预云东郭偃东郭姜之弟也】相崔氏成有罪【正义左传云成有疾而废之杜预云有恶疾也】二相急治之立明为太子成请老於崔杼崔杼许之二相弗听曰崔宗邑不可【集解杜预曰济南东朝阳县西北有崔氏城也】成强怒告庆封【正义左传成强告庆封曰夫子身亦子所知也唯无咎与偃是从父兄莫得进矣恐害夫子敢以告庆封曰苟利夫子必去之难吾助汝乃杀东郭偃棠无咎於崔氏朝也其妻及崔杼皆缢死崔明奔鲁】庆封与崔杼有郤欲其败也成强杀无咎偃於崔杼家家皆奔亡崔杼怒无人使一宦者御见庆封庆封曰请为子诛之使崔杼仇卢蒲癸【集解贾逵曰癸齐大夫庆封之属】攻崔氏杀成强尽灭崔氏崔氏妇自杀崔杼无归亦自杀庆封为相国专权三年十月庆封出猎初庆封已杀崔杼益骄嗜酒好猎不听政令庆舍用政【集解服?曰舍庆封之子也生传其职政与子】已有内郤田文子谓桓子曰乱将作田鲍高栾氏相与谋庆氏庆舍发甲围庆封宫四家徒共击破之庆封还不得入奔鲁齐人让鲁封奔吴吴与之朱方聚其族而居之富於在齐其秋齐人徙葬庄公戮崔杼尸於市以说衆九年景公使晏婴之晋与叔向私语曰齐政卒归田氏田氏虽无大德以公权私有德於民民爱之十二年景公如晋见平公欲与伐燕十八年公复如晋见昭公二十六年猎鲁郊因入鲁与晏婴俱问鲁礼三十一年鲁昭公辟季氏难奔齐齐欲以千社封之【集解贾逵曰二十五家为一社千社二万五千家也】子家止昭公昭公乃请齐伐鲁取郛【正义郛郛城也】以居昭公三十二年彗星见景公坐栢寝叹曰堂堂谁有此乎【集解服?曰景公自恐德薄不能久享齐国故曰谁有此也】羣臣皆泣晏子笑公怒晏子曰臣笑羣臣谀甚景公曰彗星出东北当齐分野寡人以为忧晏子曰君高台深池赋歛如弗得刑罚恐弗胜彗星将出彗星【正义彗音佩谓客星侵近边侧欲相害又曰彗息岁反若帚形见其境有乱也】何惧乎公曰可禳否晏子曰使神可祝而来【正义祝音章受反】亦可禳而去也百姓苦怨以万数而君令一人禳之安能胜衆口乎是时景公好治宫室聚狗马奢侈厚赋重刑故晏子以此谏之四十二年吴王阖闾伐楚入郢四十七年鲁阳虎攻其君不胜奔齐请齐伐鲁鲍子谏景公乃囚阳虎阳虎得亡奔晋四十八年与鲁定公好会夹谷【集解服?曰东海祝其县是也】犁鉏曰孔丘知礼而怯请令莱人为乐【集解杜预曰莱人齐所灭莱夷索隐鉏音即余反即犁弥也】因执鲁君可得志景公害孔丘相鲁惧其霸故从犁鉏之计方会进莱乐孔子历阶上使有司执莱人斩之以礼

让景公景公慙乃归鲁侵地以谢而罢去是岁晏婴卒五十五年范中行反其君於晋晋攻之急来请粟田乞欲为乱树党於逆臣说景公曰范中行数有德於齐不可不救乃使乞救而输之粟五十八年夏景公夫人燕姬适子死景公宠妾芮姬生子荼【索隐左传云鬻姒之子荼嬖则荼母姓姒此作芮姬不同也谯周依左氏作鬻姒邹诞生本作芮姁姁音五句反】荼少其母贱无行诸大夫恐其为嗣乃言愿择诸子长贤者为太子景公老恶言嗣事又爱荼母欲立之惮发之口乃谓诸大夫曰为乐耳国何患无君乎秋景公病命国惠子高昭子【集解杜预曰惠子国夏也昭子高张也】立少子荼为太子逐羣公子迁之莱【集解服虔曰莱齐东鄙邑】景公卒【集解駰案皇览曰景公冢与桓公冢同处】太子荼立是为晏孺子冬未葬而羣公子畏诛皆出亡荼诸异母兄公子壽驹黔奔卫【集解徐广曰一云壽黔奔卫索隐壽一作嘉三人奔卫正义三公子】公子狙阳生奔鲁【索隐左氏作公子鉏二人奔鲁】莱人歌之曰景公死乎弗与埋三军事乎弗与谋【集解服虔曰莱人见五公子远迁鄙邑不得与景公葬埋之事及国三军之谋故愍而歌杜预曰称谥盖葬後而为此歌哀羣公子失所也】师乎师乎胡党之乎【集解服虔曰师衆也党所也言公子徒衆何所适也】晏孺子元年春田乞伪事高国者每朝乞驂乘言曰子得君大夫皆自危欲谋作乱又谓诸大夫曰高昭子可畏及未发先之大夫从之六月田乞鲍牧乃与大夫以兵入公宫攻高昭子昭子闻之与国惠子救公公师败田乞之徒追之国惠子奔莒遂反杀高昭子晏圉奔鲁【集解贾逵曰圉晏婴之子】八月齐秉意兹【集解徐广曰左传八月齐邴意兹奔鲁】田乞败二相乃使人之鲁召公子阳生阳生至齐私匿田乞家十月戊子田乞请诸大夫曰常之母有鱼菽之祭【集解何休曰齐俗妇人首祭事言鱼豆者示薄陋无所有也】幸来会饮会饮田乞盛阳生橐中置坐中央发橐出阳生曰此乃齐君矣大夫皆伏谒将与大夫盟而立之鲍牧醉乞诬大夫曰吾与鲍牧谋共立阳生鲍牧怒曰子忘景公之命乎诸大夫相视欲悔阳生前顿首曰可则立之否则已鲍牧恐祸起乃复曰皆景公子也何为不可乃与盟立阳生是为悼公悼公入宫使人迁晏孺子於骀【集解贾逵曰齐邑】杀之幕下而逐孺子母芮子芮子故贱而孺子少故无权国人轻之悼公元年齐伐鲁取讙阚【集解杜预曰阚在东平刚县北索隐二邑名讙在博城县】初阳生亡在鲁季康子以其妹妻之及归即位使迎之季姬与季魋侯通【集解杜预曰魋侯康子叔父也】言其情鲁弗敢与故齐伐鲁竟迎季姬季姬嬖齐复归鲁侵地鲍子与悼公有郤不善四年吴鲁伐齐南方鲍子弑悼公赴于吴吴王夫差哭於军门外三日将从海入讨齐齐人败之吴师乃去晋赵鞅伐齐至赖而去【集解服虔曰赖齐邑】齐人共立悼公子壬是为简公【集解徐广曰年表云简公壬者景公之子也】简公四年春初简公与父阳生俱在鲁也阚止有宠焉【集解贾逵曰阚止子我也索隐左氏监作阚音苦滥反阚在东平须昌县东南】及即位使为政田成子憚之骤顾於朝【集解杜预曰心不安故数顾也】御鞅言简公【集解贾逵曰鞅齐大夫也索隐鞅名为仆御之官故曰御鞅亦田氏之族按系本陈桓子无字产子亹亹产子猷猷产鞅也】曰田阚不可并也君其择焉【集解杜预曰择用一人也】弗听子我夕【集解服虔曰夕省事】田逆杀人逢之【集解服虔曰子我将往夕省事於君而逢逆之杀人也杜预曰逆子行陈氏宗】遂捕以入【集解杜预曰执逆入至於朝也】田氏方睦【集解服虔曰陈常方欲谋有齐国故和其宗族】使囚病而遗守囚者酒【集解服虔曰使陈逆诈病而遗也】醉而杀守者得亡子我盟诸田於陈宗【集解服虔曰子我见陈逆得生出而恐为陈氏所怨故与盟而请和也陈宗宗长之家】初田豹欲为子我臣【集解贾逵曰豹陈氏族也】使公孙言豹【集解贾逵曰公孙齐大夫也杜预曰言介逵之意】豹有丧而

止後卒以为臣【集解杜预曰终丧也】幸於子我子我谓曰吾尽逐田氏而立女可乎对曰我远田氏矣【集解服?曰言我与陈氏宗疎远也】且其违者不过数人【集解服?曰违者不从子我者】何尽逐焉遂告田氏子行曰彼得君弗先必祸子【集解服?曰彼谓阨止也子谓陈常也】子行舍於公宫【集解服?曰止於公宫为陈氏作内间也】夏五月壬申成子兄弟四乘如公【集解服?曰成子兄弟八人二人共一乘故曰四乘索隐系本陈僖子乞产成子常简子齿宣子其夷穆子安廩丘子尚鑿兹子芒盈惠子得凡七人杜预又取昭子庄以充八人之数按系本昭子是桓子之子成子之叔父又不名庄强相证会言四乘有八人耳今按田完系家云田常兄弟四人如公宫与此事同今此唯称四乘不云人数知四乘谓弟兄四人乘车而入非二人共乘也然其昆弟三人不见者盖时或不在不同入公宫不可强以四乘为八人添叔父为兄弟之数服?杜预之失也】子我在幄【集解杜预曰幄帐也听政之处也】出迎之遂入闭门【集解服?曰成子兄弟见子我出遂突入反闭门子我不得复入】宦者御之【集解服?曰阨竖以兵御陈氏】子行杀宦者【集解服?曰舍於公宫故得杀之】公与妇人饮酒于檀台【集解服?曰当陈氏入时饮酒於此台】成子迁诸寝【集解服?曰欲徙公令居寝也】公执戈将击之【集解杜预曰疑其作乱也】大史子余【集解服?曰齐大夫】曰非不利也将除害也【集解杜预曰言将为公除害也】成子出舍于库【集解杜预曰以公怒故也】闻公犹怒将出【集解服?曰出奔也】曰何所无君子行拔劔曰需事之贼也【集解杜预曰言需疑则害事】谁非田宗【集解杜预曰言陈氏宗族衆多】所不杀子者有如田宗【集解杜预曰言子若欲出我必杀子明如陈宗】乃止子我归属徒【集解服?曰会徒衆】攻闥与大门【集解服?曰宫中之门曰闥大门公门也】皆弗胜乃出田氏追之丰丘人执子我以告【集解贾逵曰丰丘陈氏邑也】杀之郭关【集解服?曰齐关名】成子将杀大陆子方【集解服?曰子方子我之党大夫东郭贾也】田逆请而免之以公命取车於道【集解杜预曰子方取道中行人车】出雍门【集解杜预曰齐城门】田豹与之车弗受曰逆为余请豹与余车余有私焉事子我而有私於其讎何以见鲁卫之士【集解服?曰子方将欲奔鲁卫也左传曰东郭贾奔卫】庚辰田常执简公于徐州【集解春秋作舒州贾逵曰陈氏邑也索隐徐音舒其字从人左氏作舒舒陈氏邑说文作??在薛县也】公曰余蚤从御鞅言不及此甲午田常弑简公于徐州田常乃立简公弟驍是为平公【索隐系本及譙周皆作敬误也】平公即位田常相之专齐之政割齐安平以东为田氏封邑【集解徐广曰年表云平公之时齐自是称田氏索隐曰安平齐邑地理志云涿郡有安平县】平公八年越灭吴二十五年卒子宣公积立宣公五十一年卒子康公贷立田会反廩丘【索隐田会齐大夫廩邑名东郡有廩丘县也】康公二年韩魏赵始列为诸侯十九年田常曾孙田和始为诸侯迁康公海滨二十六年康公卒吕氏遂絶其祀田氏卒有齐国为齐威王强於天下太史公曰吾适齐自泰山属之琅邪北被于海膏壤二千里其民阔達多匿知其天性也太公之圣建国本桓公之盛修善政以为诸侯会盟称伯不亦宜乎洋洋哉固大国之风也

【索隐述赞曰太公佐周实秉阴谋既表东海乃居营丘小白致霸九合诸侯及溺内宠豐鍾虫流庄公失德崔杼作仇陈氏传政厚货轻收悼简邁祸田阨非俦颶颶余烈一变何由】

史记卷三十二考证

齐太公世家虞夏之际封于吕集解徐广曰吕在南阳宛县西○【臣召南】按路史国名纪曰吕侯爵伯夷之封杜预谓在南阳宛西南阳今隶邓宛後周并入南阳而太公乃出东吕吕莒也博物志曲海城有东吕乡东吕里太公望所出也与徐广说异

以渔钓奸周西伯正义凡谷○凡一本作几又正义此条讹脱殊甚今俱考原文改正

献公元年尽逐胡公子因徙薄姑都治临菑○【臣照】按毛诗疏曰古者诸侯之居逼隘则王者迁其邑而定其居时齐居逼隘故王使仲山甫往城而定之也既言所定不知定在何处故毛传云盖去薄姑而迁於临菑也毛时书籍犹多去圣未远虽言盖为疑辞其当有所依约而言也史记云献公徙薄姑都治临菑计献公当夷王之时与此传不合毛公在马迁之前其言当有準据

反而鞭主屨者弗三百○【臣照】按左传作诛屨於徒人费诛责也言责失屨之罪于徒人费也此以为主屨与传异

曹沫以匕首劫桓公于坛上○习学记言曰迂言曹沫以匕首劫齐桓公遂与沫三败所亡地此事公羊先见按左氏鲁庄公九年纳纠败于乾时几获十年有长勺之胜别实主之齐犹未已与宋次乘丘公子偃败宋师齐乃还十三年北杏之会齐将称霸其冬鲁乃会盟于柯是三战而再胜未尝失地三年不交兵何用要劫二十三年曹别复谏观社详其前後词语岂操匕首于坛坫之间者耶

诸侯会桓公於甄○年表作鄆【臣世骏】按经典释文甄音绢一音真或音旃又举然反或作鄆

蔡溃集解民逃其上○上监本讹作土今改正

六年翟侵齐晋文公卒○左传晋文公卒于齐昭公之五年在翟伐齐之前此作六年

十九年五月昭公卒○年表作二十年

即与衆十月即墓上弑齐君舍○按春秋经作九月左传云以七月乙卯夜杜注云书九月从告此云十月疑十为七字之误

懿公桓公子也其母曰密姬○董份曰按上既曰某姬生某公矣则此复曰其母曰某姬恐衍

懿公游于申池集解曰杜预曰齐南城门名申门齐城无池惟此门左右有池疑此是也左思齐都赋注曰申池海滨齐薺也○【臣照】按襄十八年左传晋侯伐齐已亥焚雍门及西郭

南郭刘难士弱率诸侯之师焚申池之竹木申池与西郭南郭近则杜预所谓申门之池者是矣杜预原注称齐南城西门名申门裴駰删去西字耳

六年春晋使郤克於齐○左传及年表郤克使齐在须公七年为鲁宣之十七年

郤克执齐使者四人河内杀之○左传齐侯使高固晏弱蔡朝南郭偃会及斂孟高固逃归晋人执晏弱于野王执蔡朝于原执南郭偃于温苗贲皇言于晋侯晋人缓之逸此云杀之与传异

十年春齐伐鲁卫○【臣照】按左传成公二年春齐侯伐我北鄙卫侯使孙良夫石稷甯相向禽将侵齐是齐伐鲁非伐卫也

皆因郤克索隐卫孙桓子○桓监本讹作相今改正仲姬戎姬○此句上应有脱字

崔杼迎故太子光而立之是为庄公○徐孚远曰前言崔杼奔卫不言其归国又杼非命卿何以得专册立皆阙文

八月崔杼杀高厚晋闻齐乱伐齐至高唐○【臣照】按左传庄公即位执公子牙于句渚之丘以夙沙卫弑己卫奔高唐以叛晋士匄侵齐及谷闻丧而还此皆在崔杼杀高厚前为五月事马迁并二事为一又有晋伐至高唐之文皆与传异

成请老于崔杼○【臣照】按左传成请老於崔杜预注济南东朝阳县西北有崔氏城成欲居崔邑以终老此作崔杼明衍杼字

悼公元年齐伐鲁取讙阇○左传及十二诸侯年表齐取讙阇在悼公二年

吴师乃去晋○监本误作吴帅齐去晋今改正

齐人共立悼公子壬是为简公集解徐广曰年表云简公壬者景公之子也○年表云鲍子杀悼公齐人立其子壬为简公无景公之子语

子宣公积立○积年表作就匝

史记卷三十二考证

<史部,正史类,史记>

卷三十三

钦定四库全书

史记卷三十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

鲁周公世家第三

周公旦者周武王弟也【集解谯周曰以太王所居周地为其采邑故谓周公索隐周地名在岐山之阳本太王所居後以为周公之采邑故曰周公即今之扶风雍东北故周城也諡曰周文公见国语】自文王在时旦为子孝笃仁异於羣子【索隐邹诞生本孝作敬】及武王即位旦常辅翼武王用事居多武王九年东伐至盟津周公辅行十一年伐纣至牧野【正义卫州即牧野之地东北去朝歌七十三里】周公佐武王作牧誓破殷入商宫已杀纣周公把大钺召公把小钺以夹武王衅社告纣之罪於天及殷民释箕子之囚封纣子武庚禄父使管叔蔡叔傅之以续殷祀徧封功臣同姓戚者封周公旦於少昊之虚曲阜【正义括地志云兗州曲阜县外城即鲁公伯禽所筑也】是为鲁公周公不就封留佐武王武王克殷二年天下未集武王有疾不豫羣臣惧太公召公乃繆卜【集解徐广曰古书繆字多作繆】周公曰未可以戚我先王【集解孔安国曰戚近也未可以死近先王也郑玄曰二公欲就文王庙卜戚忧也未可忧怖我先王也】周公於是乃自以为质设三坛周公北面立戴璧秉圭【集解孔安国曰璧以礼神圭以为?】告于大王王季文王【集解孔安国曰告谓祝辞】史策祝【集解孔安国曰史为策书祝词也郑玄曰策周公所作谓简书也祝者读此简书以告三王】曰惟尔元孙王发勤劳阻疾【集解徐广曰阻作淹】若尔三王是有负子之责於天以旦代王发之身【集解孔安国曰太子之责谓疾不可救也不可救于天则当以旦代之死生有命不可请代圣人叙臣子之心以垂世教索隐尚书负为丕今此为负者谓三王负上天之责故我当代之郑玄曰丕读曰负】旦巧能多材多藝能事鬼神【集解孔安国曰言可以代武王之意】乃王发不如旦多材多藝不能事鬼神乃命于帝庭敷佑四方【集解马融曰武王受命于天帝之庭布其道以佑助四方】用能定汝子孙于下地四方之民罔不敬畏【集解孔安国曰言武王用受命帝庭之故能定先人子孙於天下四方之民无不敬畏也】无坠天之降葆命我先王亦永有所依归【集解孔安国曰言不救则坠天宝命也救之则先王长有所依归矣郑玄曰降下也宝犹主也有所依归为宗庙之主也正义坠直类反】今我其即命於元龟【集解孔安国曰就受三王之命於元龟卜知吉凶者也马融曰元龟大龟也】尔之许我我

其以璧与圭归以俟尔命【集解孔安国曰许谓疾瘳待命当以事神也马融曰待汝命武王当愈我当死也】尔不许我我乃屏璧与圭【集解孔安国曰不许不愈也屏藏言不得事神】周公已令史策告大王王季文王欲代武王发於是乃即三王而卜卜人皆曰吉发书视之信吉【集解孔安国曰占兆书也】周公喜开龠乃见书遇吉【集解王肃曰龠藏占兆书管也】周公入贺武王曰王其无害旦新受命三王维长终是图【集解孔安国曰我新受三王命武王维长终是谋周之道】兹道能念予一人【集解马融曰一人天子也郑玄曰兹此也】周公藏其策金縢匮中【集解孔安国曰藏之於匮緘之以金不欲人开也】诚守者勿敢言明日武王有瘳其後武王既崩成王少在强葆之中【索隐强葆即襁褓古字少假借用之正义强阔八寸长八尺用约小儿於背而负行葆小儿被也】周公恐天下闻武王崩而畔周公乃践阼代成王摄行政当国管叔及其羣弟流言於国曰周公将不利於成王【集解孔安国曰放言於国以诬周公以惑成王也】周公乃告太公望召公奭曰我之所以弗辟【正义音避】而摄行政者恐天下畔周无以告我先王大王王季文王三王之忧劳天下久矣於今而后成武王蚤终成王少将以成周我所以为之若此於是卒相成王而使其子伯禽代就封於鲁周公戒伯禽曰我文王之子武王之弟成王之叔父我於天下亦不贱矣然我一沐三握发一饭三吐哺起以待士犹恐失天下之贤人子之鲁慎无以国骄人管蔡武庚等果率淮夷而反周公乃奉成王命兴师东伐作大诰遂诛管叔杀武庚放蔡叔收殷余民以封康叔於卫封微子於宋以奉殷祀宁淮夷东土二年而毕定诸侯咸服宗周天降祉福唐叔得禾异母同颖【集解徐广曰一作穗颖即穗也索隐尚书母作亩此为母义并通】献之成王成王命唐叔以馈周公於东土作馈禾周公既受命禾嘉天子命【集解徐广曰嘉一作鲁今书序作旅也索隐鲁字误史意云周公嘉天子命於文不必作鲁】作嘉禾东土以集周公归报成王乃为诗貽王命之曰鸛鳴【集解駉案毛诗序曰成王未知周公之志公乃为诗以遗王名之曰鸛鳴毛传曰鸛鳴鷕鷕也】王亦未敢训周公【集解徐广曰训一作诮索隐尚书作诮诮让也此作训字误耳义无所通徐氏合定其本何须云一作诮也】成王七年二月乙未王朝步自周至丰【集解马融曰周镐京也丰文王庙所在朝者举事上朝将即土中易都大事故告文王武王庙郑玄曰步行也堂下谓之步丰镐异邑而言步者告武王庙即行出庙入庙不以为远为父恭也索隐丰文王所作邑後武王都镐於丰立文王庙按丰在鄠县东临丰水东去镐二十五里也】使太保召公先之雒相土【集解郑玄曰相视也】其三月周公往营成周雒邑【集解駉案公羊传曰成周者何东周也何休曰名为成周者周道始成王所都也】卜居焉曰吉遂国之成王长能听政於是周公乃还政於成王成王临朝周公之代成王治南面倍依以朝诸侯【集解駉案礼记曰周公朝诸侯于明堂之位天子负斧依南向而立郑玄曰周公摄王位以明堂之礼仪朝诸侯也不於宗庙避王也天子周公也负之为言倍也斧依为斧文屏风於户牖之间周公於前立也】及七年後还政成王北面就臣位惴惴如畏然【集解徐广曰惴惴谨敬貌也见三苍音穷穷一本作□□也】初成王少时病周公乃自揃其蚤沈之河以祝於神曰王少未有识奸神命者乃旦也亦藏其策於府成王病有瘳及成王用事人或谮周公周公奔楚【索隐经典无文其事或别有所出而譙周云秦既燔书时人欲言金縢之事失其本末乃云成王少时病周公祷河欲代王死藏祝策於府成王用事人谗周公周公奔楚成王发府见策乃迎周公又与蒙恬传同事或然也】成王发府见周公祷书乃泣反周公周公归恐成王壮治有所淫佚乃作多士作毋逸母逸称为人父母为业至长久子孙骄奢忘之以亡其家为人子可不慎乎故昔在殷王中宗严恭敬畏天命自度【集解孔安国曰

用法度也】治民震惧不敢荒宁【集解马融曰知民之劳苦不敢荒废自安也】故中宗殯国七十五年其在高宗【正义武丁也】久劳于外为与小人【集解孔安国曰父小乙使之久居人间劳是稼穡与小人出入同事也马融曰武丁为太子时其父小乙使行役有所劳役於外与小人从事知小人艰难劳苦也郑玄曰为父小乙将师役於外也】作其即位乃有亮闇三年不言【集解孔安国曰武丁起其即王位则小乙死乃有信嘿三年不言言孝行着也郑玄曰楣谓之梁闇谓庐也】言乃讙【集解郑玄曰讙喜悦也言乃喜悦则臣民望其言久矣】不敢荒宁密靖殷国【集解马融曰宁安也】至于小大无怨【集解孔安国曰小大之政民无怨者言无非也】故高宗殯国五十五年【集解駰案尚书云五十九年】其在祖甲【集解孔安国曰王肃曰祖甲汤孙太甲也马融曰郑玄曰祖甲武丁子帝甲也索隐按纪年太甲唯得十二年此云祖甲享国三十三年知祖甲是帝甲明矣】不义惟王久为小人【集解孔安国曰为王不义久为小人之行伊尹放之桐宫马融曰祖甲有兄祖庚而祖甲贤武丁欲立之祖甲以王废长立少不义逃亡民间故曰不义惟王久为小人也武丁死祖庚立祖庚死祖甲立】于外知小人之依能保施小民不侮鰥寡【集解孔安国曰小人之所依依仁政也故能安顺於衆民不敢侮慢惇独也】故祖甲殯国三十三年【集解王肃曰先中宗後祖甲先盛德後有过也】多士称曰自汤至于帝乙无不率祀明德帝无不配天者【集解孔安国曰无敢失天道者故无不配天也】在今後嗣王纣诞淫厥佚不顾天及民之从也【集解徐广曰一作敬之也駰案马融曰纣大淫乐其逸无所能顾念於天施显道於民而敬之也】其民皆可诛周多士文王日中昃不暇食殯国五十年作此以诫成王成王在丰天下已安周之官政未次序於是周公作周官官别其宜作立政【集解孔安国曰周公既致政成王恐其怠忽故以君臣立政为戒也】以便百姓百姓说周公在丰病将没曰必葬我成周【集解徐广曰卫世家云管叔欲袭成周然则或说尚书者不以成周为洛阳乎诸侯年表叙曰齐晋楚秦其在成周微之甚也】以明吾不敢离成王周公既卒成王亦让葬周公於毕【正义括地志周公墓在雍州咸阳北十三里毕原上】从文王以明予小子不敢臣周公也周公卒後秋未获暴风雷雨禾尽偃大木尽拔周国大恐成王与大夫朝服以开金縢书【索隐尚书武王崩後有此雷风之异今此言周公卒後更有暴风之变始开金縢之书此不然也盖由史迁不见古文尚书故谬尔】王乃得周公所自以为功代武王之说【集解徐广曰一作简駰案孔安国曰所藏请命策书本也】二公及王乃问史百执事【集解孔安国曰二公倡王启之故先见书也史百执事皆从周公请命者郑玄曰问者问审然否也】史百执事曰信有昔周公命我勿敢言成王执书以泣【集解郑玄曰泣者伤周公忠孝如是而无知之者】曰自今後其无繆卜乎【集解孔安国曰本欲敬卜吉凶今天意可知故止】昔周公勤劳王家惟予幼人弗及知今天动威以彰周公之德惟朕小子其迎我国家礼亦宜之【集解王肃曰亦宜褒有德也正义孔安国云周公以成王未寤故留东未还成王改过自新遣使者迎之亦国家礼有德之宜也王孔二说非也按言成王以开金縢之书知天风雷以彰周公之德故成王亦设郊天之礼以迎我国家先祖配食之礼亦当宜之故成王出郊天乃雨反风也】王出郊天乃雨反风禾尽起【集解孔安国曰郊以玉币谢天也天即反风起禾明郊之是也马融曰反风风还反也】二公命国人凡大木所偃尽起而筑之【集解徐广曰筑拾也駰案马融曰禾为木所偃者起其木拾其下禾乃无所失亡也】岁则大熟於是成王乃命鲁得郊【集解駰案礼记曰鲁君祀帝于郊配以后稷天子之礼】祭文王【集解駰案礼记曰诸侯不得祖天子郑玄曰鲁以周公之故立文王之庙也】鲁有天子礼乐者以褒周公之德也周公卒子伯禽

固已前受封是为鲁公【索隐周公元子就封於鲁次子留相王室代为周公其余食小国者六人凡蒋邢茅胙祭也】鲁公伯禽之初受封之鲁三年而後报政周公周公曰何迟也伯禽曰变其俗革其礼丧三年然後除之故迟大公亦封於齐五月而报政周公周公曰何疾也曰吾简其君臣礼从其俗为也及後闻伯禽报政迟乃叹曰呜呼鲁後世其北面事齐矣夫政不简不易民不有近平易近民民必归之【集解徐广曰一本云政不简不行不行不乐不乐则不平易平易近民民必归之又一本云夫民不简不易有近乎简易民必归之索隐言为政简易者民必附近之近谓亲近也】伯禽即位之後有管蔡等反也淮夷徐戎亦并兴反【集解孔安国曰淮浦之夷徐州之戎并起为寇】於是伯禽率师伐之於盼作盼誓【集解徐广曰一作鲜一作猕駟案尚书作 孔安国曰鲁东郊之地名也索隐尚书作 誓今尚书大传作鲜誓鲜誓即盼誓古今字异义亦变也鲜猕也言於盼地誓衆因行猕田之礼以取鲜兽而祭故字或作鲜或作猕 地名即鲁卿季氏之费邑】曰陈尔甲冑无敢不善无敢伤牯【正义古毒反牯牛马牢也令臣无伤其牢恐牛马逸】马牛其风臣妾逋逃【集解郑玄曰风走逸臣妾厮役之属也】勿敢越逐敬【集解徐广曰一作振】复之【集解孔安国曰勿敢弃越垒伍而求逐也衆人有得佚马牛逃臣妾皆敬还】无敢寇攘踰墙垣【集解郑玄曰寇劫取也因其失亡曰攘】鲁人三郊三隧【集解王肃曰邑外曰郊郊外曰隧不言四者东郊留守故言三也】峙尔刍茭糗粮桢干【集解孔安国曰皆当储峙汝粮使足食多积刍茭供军牛马马融曰桢干皆筑具桢在前干在两傍正义糗去九反桢音真】无敢不逮我甲戌筑而征徐戎【集解孔安国曰甲戌日当筑攻敌垒距堙之属】无敢不及有大刑【集解马融曰大刑死刑】作此盼誓遂平徐戎定鲁鲁公伯禽卒【集解徐广曰皇甫谧云伯禽以成王元年封四十六年康王十六年卒】子考公伋立【索隐系本作就邹本作適】考公四年卒立弟熙是谓炀公【索隐熙一作怡】炀公筑茅【集解徐广曰一作第又作夷】阙门【集解駟案世本曰炀公徙鲁宋忠曰今鲁国】六年卒子幽公宰立【索隐世本名圉】幽公十四年幽公弟?杀幽公而自立是为魏公【集解徐广曰世本作微公索隐系本?作弗音弗魏作微且古书多用魏字作微则太史公意亦不殊】魏公五十年卒子厉公擢立【索隐系本作翟音持角反】厉公三十七年卒鲁人立其弟具是为献公献公三十二年卒【集解徐广曰刘歆云五十年皇甫谧云三十六年】子真公湏立【索隐真音慎本亦作慎公按卫亦有真侯可通也湏系本作摯或作 音匹位反邹诞本作慎公噉也】真公十四年周厉王无道出奔彘共和行政二十九年周宣王即位三十年真公卒弟敖立是为武公武公九年春武公与长子括少子戏【正义许义反又音许宜反後同】西朝周宣王宣王爱戏欲立戏为鲁太子周之樊仲山父谏宣王曰废长立少不顺不顺必犯王命犯王命必诛之故出令不可不顺也令之不行政之不立【集解韦昭曰令不行则政不立】行而不顺民将弃上【集解韦昭曰使长事少故民将弃上】夫下事上少事长所以为顺今天子建诸侯立其少是教民逆也【集解唐固曰言不教之顺而教之逆】若鲁从之诸侯效之王命将有所壅【集解韦昭曰言先王立长之命将壅塞不行也】若弗从而诛之是自诛王命也【集解韦昭曰先王之命立长今鲁亦立长若诛之是自诛王命也】诛之亦失不诛亦失【集解韦昭曰诛之诛王命不诛则王命废】王其图之宣王弗听卒立戏为鲁太子夏武公归而卒【集解徐广曰刘歆云立二年】戏立是为懿公懿公九年懿公兄括之子伯御与鲁人攻弑懿公而立伯御为君【正义伯我嫁反】伯御即位十一年周宣王伐鲁杀其君伯御而问鲁公子能道顺【集解徐广曰顺一作训正义道音导顺音训】诸侯者以为鲁後樊穆仲曰【集解韦昭曰穆仲仲山父

之諡也犹鲁叔孙穆子谓之穆叔也】鲁懿公弟称【正义尺证反】肃恭明神敬事耆老赋事行刑必问於遗训而咨於固实【集解徐广曰固一作故韦昭曰故实故事之是者】不干所问不犯所知宣王曰然能训治其民矣乃立称於夷宫【集解韦昭曰夷宫者宣王祖父夷王之庙古者爵命必於祖庙】是为孝公自是後诸侯多畔王命孝公二十五年诸侯畔周犬戎杀幽王秦始列为诸侯二十七年孝公卒子弗湟立【集解徐广曰表云弗生也索隐系本作弗皇年表作孝公子弗生】是为惠公惠公三十年晋人弑其君昭侯四十五年晋人又弑其君孝侯四十六年惠公卒长庶子息摄当国行君事是为隐公【索隐隐公名息系本名息姑】初惠公适夫人无子【正义适音的】公贱妾声子生子息息长为娶於宋宋女至而好惠公夺而自妻之【索隐左传宋武公生仲子手中有鲁夫人文故归鲁生桓公今此云惠公夺息妇而自妻又经传不言惠公无道左氏文亦分明不知太史公何据而为此说谯周亦深不信】生子允【集解徐广曰一作轨索隐一作兀五忽反】登宋女为夫人以允为太子及惠公卒为允少故鲁人共令息摄政不言即位隐公五年观渔於棠【集解贾逵曰棠鲁地陈渔而观之杜预曰高平方与县北有武棠亭鲁侯观渔台也】八年与郑易天子之太山之邑祊及许田君子讥之【集解駰案谷梁传曰祊者郑伯之所受命於天子而祭太山之邑也许田乃鲁之朝宿之邑天子在上诸侯不得以地相与】十一年冬公子挥谄谓隐公曰百姓便君君其遂立吾请为君杀子允君以我为相【集解駰案左传曰羽父请杀桓公将以求大宰也】隐公曰有先君命吾为允少故摄代今允长矣吾方营菟裘之地而老焉【集解服虔曰菟裘鲁邑也营菟裘以作宫室欲居之以终老也杜预曰菟裘在泰山梁父县南】以授子允政挥惧子允闻而反诛之乃反谮隐公於子允曰隐公欲遂立去子子其图之请为子杀隐公子允许诺十一月隐公祭鍾巫【集解贾逵曰鍾巫祭名也】齐于社圃【集解杜预曰社圃园名】馆于蒧氏【集解服虔曰蒧舍也蒧氏鲁大夫】挥使人弑隐公于蒧氏而立子允为君是为桓公桓公元年郑以璧易天子之许田【集解麋信曰郑以祊不足当许田故复加璧】二年以宋之赂鼎入於太庙君子讥之【集解駰案谷梁传曰桓公内杀其君外成人之乱受赂而退以事其祖非礼也公羊传曰周公庙曰太庙】三年使挥迎妇于齐为夫人六年夫人生子与桓公同日故名曰同同长为太子十六年会于曹伐郑入厉公十八年春公将有行【集解杜预曰始议行事也】遂与夫人如齐申繻谏止公【集解贾逵曰申繻鲁大夫】公不听遂如齐齐襄公通桓公夫人公怒夫人夫人以告齐侯夏四月丙子齐襄公飨公【集解服虔曰为公设享讌之礼】公醉使公子彭生抱鲁桓公因命彭生摺其胁公死于车鲁人告于齐曰寡君畏君之威不敢宁居来修好礼礼成而不反无所归咎请得彭生以除丑於诸侯齐人杀彭生以说鲁立太子同是为庄公庄公母夫人因留齐不敢归鲁庄公五年冬伐卫内卫惠公八年齐公子纠来奔九年鲁欲内子纠於齐後桓公桓公发兵击鲁鲁急杀子纠召忽死齐告鲁生致管仲鲁人施伯曰【正义世本云施伯鲁惠公孙】齐欲得管仲非杀之也将用之用之则为鲁患不如杀以其屍与之【索隐屍亦作死字】庄公不听遂囚管仲与齐齐人相管仲十三年鲁庄公与曹沫会齐桓公於柯曹沫劫齐桓公求鲁侵地已盟而释桓公桓公欲背约管仲谏卒归鲁侵地十五年齐桓公始霸二十三年庄公如齐观社【集解韦昭曰齐因祀社蒐军实以示军容公往观之】三十二年初庄公筑台临党氏【集解贾逵曰党氏鲁大夫任姓】见孟女【集解贾逵曰党氏之女索隐左传云初公筑台临党氏见孟任从之闕杜预曰孟长任字也非姓耳】说而爱之许立为夫人割臂以盟【集解服虔曰割其臂以与公盟】孟女生子斑斑长说梁氏女【集解杜预曰梁氏鲁大夫也】往观圉人萃自墙外与梁氏女

戏【集解服?曰圉人掌养马者萃其名也正义萃力角反】斑怒鞭萃庄公闻之曰萃有力焉遂杀之是未可鞭而置也斑未得杀会庄公有疾庄公有三弟长曰庆父次曰叔牙次曰季友庄公取齐女为夫人曰哀姜哀姜无子哀姜娣【正义音田戾反】曰叔姜生子开庄公无适嗣爱孟女欲立其子斑庄公病而问嗣於弟叔牙叔牙曰一继一及鲁之常也【集解何休曰父死子继兄死弟及】庆父在可为嗣君何忧庄公患叔牙欲立庆父退而问季友季友曰请以死立斑也庄公曰曩者叔牙欲立庆父奈何季友以庄公命命叔牙待於鍼巫氏【集解杜预曰鍼巫氏鲁大夫也】使鍼季劫饮叔牙以鸩【集解服?曰鸩鸟一曰运日鸟】曰饮此则有後奉祀不然死且无後牙遂饮鸩而死鲁立其子为叔孙氏【集解杜预曰不以罪诛故得立後世继其祿也】八月癸亥庄公卒季友竟立子斑为君如庄公命待丧舍于党氏【正义未至公宫止於舅氏】先时庆父与哀姜私通欲立哀姜娣子开及庄公卒而季友立斑十月己未庆父使圉人萃杀鲁公子斑於党氏季友犇陈【集解服?曰季友内知庆父之情力不能诛故避其难出奔】庆父竟立庄公子开是为湣公【索隐系本名曰启今此作开避汉景帝讳耳春秋作闵公也】湣公二年庆父与哀姜通益甚哀姜与庆父谋杀湣公而立庆父庆父使卜齮袭杀湣公於武闾【集解贾逵曰卜齮鲁大夫也宫中之门谓之闾正义齮鱼绮反闾音韦】季友闻之自陈与湣公弟申如邾请鲁求内之鲁人欲诛庆父庆父恐奔莒於是季友奉子申入立之是为厘公【索隐湣公之弟名曰申成季相之鲁国以理於是鲁人为僖公作鲁颂】厘公亦庄公少子哀姜恐奔邾季友以赂如莒求庆父庆父归使人杀庆父庆父请奔弗听乃使大夫奚斯行哭而往庆父闻奚斯音乃自杀齐桓公闻哀姜与庆父乱以危鲁乃召之邾而杀之以其屍归戮之鲁厘公请而葬之季友母陈女故亡在陈陈故佐送季友及子申季友之将生也父鲁桓公使人卜之曰男也其名曰友间于两社为公室辅【集解贾逵曰两社周社亳社也两社之间朝廷执政之臣所在】季文亡则鲁不昌及生有文在掌曰友遂以名之号为成季其後为季氏庆父後为孟氏也厘公元年以汶阳鄆封季友【集解贾逵曰汶阳鄆鲁二邑杜预曰汶阳汶水北地也汶水出泰山莱芜县索隐鄆今作费同音秘按费在汶水之北则汶阳非邑贾言二邑非也地理志东海费县班固云鲁季氏邑盖尚书费誓即是其地】季友为相九年晋里克杀其君奚齐卓子【集解徐广曰卓一作悼】齐桓公率厘公讨晋乱至高梁而还【索隐晋地在平阳县】立晋惠公十七年齐桓公卒二十四年晋文公即位三十三年厘公卒子兴立是为文公文公元年楚太子商臣弑其父成王代立三年文公朝晋襄公十一年十月甲午鲁败翟于咸【集解服?曰鲁地也】获长翟乔如富父终甥春其喉以戈杀之【集解服?曰富父终甥鲁大夫也春犹冲】埋其首於子驹之门【集解贾逵曰子驹鲁郭门名】以命宣伯【集解服?曰宣伯叔孙得臣子乔如也得臣获乔如以名其子使後世旌识其功】初宋武公之世鄭瞞伐宋【集解服?曰武公周平王时在春秋前二十五年鄭瞞长翟国名正义鄭作瘦音所刘反瞞莫寒反】司徒皇父帅师御之以败翟于长邱【集解杜预曰宋地名】获长翟缘斯【集解贾逵曰乔如之祖】晋之灭路【集解在鲁宣公十五年】获乔如弟焚如齐惠公二年鄭瞞伐齐齐王子城父获其弟荣如埋其首於北门【集解駰案年表齐惠公二年鲁宣公之二年】卫人获其季弟简如【集解服?曰获与乔如同时】鄭瞞由是遂亡【集解杜预曰长翟之种絶】十五年季文子使於晋十八年二月文公卒文公有二妃长妃齐女哀姜【索隐此哀非諡盖以哭而过市国人哀之谓之哀姜】生子恶及视次妃敬嬴嬖爱生子倭【集解徐广曰一作倭索隐音人唯反】倭私事襄仲【集解服?曰襄仲公子遂】襄仲欲立之叔仲曰不可【集解服?曰叔仲惠伯】襄仲请齐惠公惠公新

立欲亲鲁许之冬十月襄仲杀子恶及视而立倭是为宣公哀姜归齐哭而过市曰天乎襄仲为不道杀适立庶【正义适音的】市人皆哭鲁人谓之哀姜鲁由此公室卑三桓强【集解服?曰三桓鲁桓公之族仲孙叔孙季孙】宣公倭十二年楚庄王强围郑郑伯降复国之十八年宣公卒子成公黑肱【集解徐广曰肱一作股】立是为成公季文子曰使我杀适立庶失大援者襄仲【集解服?曰援助也仲杀适立庶国政无常邻国非之是失大援助也杜预曰襄仲立宣公南通於楚既不固又不能坚事齐晋故云失大援】襄仲立宣公公孙归父有宠【集解服?曰归父襄仲之子】宣公欲去三桓与晋谋伐三桓会宣公卒季文子怨之归父奔齐成公二年春齐伐取我隆【集解駰案左传作龙杜预曰鲁邑在泰山博县西南】夏公与晋郤克败齐顷公於鞌齐复归我侵地四年成公如晋晋景公不敬鲁鲁欲背晋合於楚或谏乃不十年成公如晋晋景公卒因留成公送葬鲁讳之【索隐经不书其葬唯言公如晋是讳之】十五年始与吴王寿梦会锺离【正义括地志云锺离国故城在濠州锺离县东五里】十六年宣伯告晋欲诛季文子【集解服?曰宣伯叔孙乔如】文子有义晋人弗许十八年成公卒子午立是为襄公是时襄公三岁也襄公元年晋立悼公往年冬晋栾书弑其君厉公四年襄公朝晋五年季文子卒家无衣帛之妾廐无食粟之马府无金玉以相三君【索隐宣成襄也】君子曰季文子廉忠矣九年与晋伐郑晋悼公冠襄公於卫【集解駰案左传曰冠于成公之庙假锺磬焉礼也】季武子从相行礼十一年三桓氏分为三军【集解韦昭曰周礼天子六军诸侯大国三军鲁伯禽之封旧有三军其後削弱二军而已季武子欲专公室故益中军以为三军三家各征其一索隐征谓起徒役也武子为三军故一卿主一军之征赋】十二年朝晋十六年晋平公即位二十一年朝晋平公二十二年孔丘生【正义生在周灵王二十一年鲁襄二十二年晋平七年吴诸樊十年】二十五年齐崔杼弑其君庄公立其弟景公二十九年吴延陵季子使鲁问周乐尽知其意鲁人敬焉三十一年六月襄公卒其九月太子卒【集解駰案左传曰毁也索隐左传云胡女敬归之子子野立三月卒】鲁人立齐归之子裯为君【集解徐广曰裯一作昭服?曰胡归姓之国也齐谥也索隐系本作稠徐广作昭昭音绍也】是为昭公昭公年十九犹有童心【集解服?曰言无成人之志而有童子之心】穆叔不欲立【索隐鲁大夫叔孙豹宣伯侨如之弟】曰太子死有母弟可立不即立长【集解服?曰无母弟则立庶子之长】年钧择贤义钧则卜之【集解杜预曰先人事後卜筮义钧谓贤等】今裯非适嗣且又居丧意不在戚而有喜色若果立必为季氏忧季武子弗听卒立之比及葬三易衰【集解杜预曰言其嬉戏无度】君子曰是不终也昭公三年朝晋至河晋平公谢还之鲁耻焉四年楚灵王会诸侯於申昭公称病不往七年季武子卒八年楚灵王就章华台召昭公昭公往贺【集解駰案春秋云七年三月公如楚】赐昭公宝器已而悔复诈取之【集解駰案左传曰好以大屈服?曰大屈宝金可以为剑一曰大屈弓名鲁连书曰楚子享鲁侯于章华与之大曲之弓既而悔之大屈殆所谓大曲之弓也】十二年朝晋至河晋平公谢还之十三年楚公子弃疾弑其君灵王代立十五年朝晋晋留之葬晋昭公鲁耻之二十年齐景公与晏子狩竟因入鲁问礼【索隐齐系家亦然左传无其事】二十一年朝晋至河晋谢还之二十五年春鸛鹄来巢【集解駰案周礼曰鸛鹄不踰济公羊传曰非中国之禽也宜穴而巢谷梁传曰来者来中国也】师已曰文成之世童謡曰【集解贾逵曰师已鲁大夫也文成鲁文公成公】鸛欲来巢公在乾侯鸛鹄入处公在外野季氏与郈氏【集解徐广曰一本作厚世本亦然】鬪鸡【集解杜预曰季平子郈昭伯二家相近故鬪鸡】季氏芥鸡羽【集解服?曰捣芥子播其鸡羽可以盆郈氏鸡目杜预曰或云以胶沙播之为芥鸡】郈氏金距【集

解服?曰以金鍤距】季平子怒而侵郈氏【集解服?曰怒其不下己也侵郈氏之宫地以自益】郈昭伯亦怒平子【索隐系本昭伯名恶鲁孝公之後称郈氏】臧昭伯之弟会伪谗臧氏匿季氏【集解贾逵曰昭伯臧孙赐也索隐系本臧会臧顷伯也宣叔许之孙与昭伯赐为从父昆弟也】臧昭伯囚季氏人季平子怒囚臧氏老【集解服?曰老臧氏家之大臣】臧郈氏以难告昭公昭公九月戊戌伐季氏遂入平子登台请曰君以谗不察臣罪诛之请迁沂上弗许【集解杜预曰鲁城南自有沂水平子欲出城待罪也大沂水出盖县南入泗水】请囚於鄆弗许【集解服?曰鄆季氏邑】请以五乘亡弗许【集解服?曰言五乘自省约以出】子家驹曰【索隐鲁大夫仲孙氏之族名驹諡懿伯】君其许之政自季氏久矣为徒者衆衆将合谋弗听郈氏曰必杀之叔孙氏之臣辰【集解駰案左传曰驪□】谓其衆曰无季氏与有孰利皆曰无季氏是无叔孙氏□曰然救季氏遂败公师孟懿子【集解贾逵曰懿子仲孙何忌】闻叔孙氏胜亦杀郈昭伯郈昭伯为公使故孟氏得之三家共伐公公遂奔己亥公至于齐齐景公曰请致千社待君子家曰弃周公之业而臣於齐可乎乃止子家曰齐景公无信不如早之晋弗从叔孙见公还见平子平子顿首初欲迎昭公孟孙季孙後悔乃止二十六年春齐伐鲁取郚【集解贾逵曰鲁邑】而居昭公焉夏齐景公将内公令无受鲁赂申丰汝贾【集解贾逵曰申丰汝贾鲁大夫】许齐臣高黻子将粟五千庾【集解贾逵曰十六斗为庾五千庾八万斗索隐一本子将上有货字子将即梁邱据也黻音纡子将家臣也左传子将作子犹】子将言於齐侯曰羣臣不能事鲁君有异焉【集解服?曰异犹恠也】宋元公为鲁如晋求内之道卒【集解駰案春秋曰宋公佐卒于曲棘】叔孙昭子求内其君无病而死【索隐昭子名媯即穆叔子】不知天弃鲁乎抑鲁君有罪于鬼神也愿君且待齐景公从之二十八年昭公如晋求入季平子私於晋六卿六卿受季氏赂諫晋君晋君乃止居昭公乾侯【集解杜预曰乾侯在魏郡斥邱县晋境内邑】二十九年昭公如郚齐景公使人赐昭公书自谓主君【集解服?曰大夫称主比公於大夫故称主君】昭公耻之怒而去乾侯三十一年晋欲内昭公召季平子平子布衣跣行【集解王肃曰示忧戚】因六卿谢罪六卿为言曰晋欲内昭公衆不从晋人止三十二年昭公卒於乾侯鲁人共立昭公弟宋为君是为定公定公立赵简子问史墨【集解服?曰史墨晋史蔡墨】曰季氏亡乎史墨对曰不亡季友有大功於鲁受鄆为上卿至于文子武子世增其业鲁文公卒东门遂【集解服?曰东门遂襄仲也居东门故称东门遂索隐系本竝作述邹诞作 又系本遂产子家归父及昭子子婴也】杀适立庶鲁君於是失国政政在季氏於今四君矣民不知君何以得国是以为君慎器与名不可以假人【集解杜预曰器车服名爵号】定公五年季平子卒阳虎私怒囚季桓子与盟乃舍之七年齐伐我取郚以为鲁阳虎邑以从政八年阳虎欲尽杀三桓适而更立其所善庶子以代之载季桓子将杀之桓子诈而得脱三桓共攻阳虎阳虎居阳关【集解服?曰阳关鲁邑】九年鲁伐阳虎阳虎奔齐已而奔晋赵氏【正义左传云仲尼曰赵氏其世有乱乎杜预云受乱人故】十年定公与齐景公会於夹谷孔子行相事齐欲袭鲁君孔子以礼历阶诛齐淫乐齐侯惧乃止归鲁侵地而谢过十二年使仲由毁三桓城【集解服?曰仲由子路】收其甲兵孟氏不肯堕城【集解杜预曰堕毁】伐之不克而止季桓子受齐女乐孔子去【集解孔安国曰桓子使定公受齐女乐君臣相与观之废朝礼三日】十五年定公卒子将立是为哀公【索隐系本将亦作蒋】哀公五年齐景公卒六年齐田乞弑其君儒子七年吴王夫差强伐齐至缙徵百牢於鲁季康子使子贡说吴王及太宰嚭以礼诎之吴王曰我文身不足责礼乃止八年吴为邹伐鲁至城下盟而去齐伐我取三邑十年伐齐南边十二年齐伐鲁季氏用冉有有功

思孔子孔子自卫归鲁十四年齐田常弑其君简公於徐州孔子请伐之哀公不听十五年使子服景伯子贡为介适齐齐归我侵地田常初相欲亲诸侯十六年孔子卒二十二年越王勾践灭吴王夫差二十七年春季康子卒夏哀公患三桓将欲因诸侯以劫之三桓亦患公作难故君臣多间【集解贾逵曰间隙也】公游于陵阪【集解服虔曰陵阪地名】遇孟武伯於衢【索隐一本作卫非也左传於孟氏之衢】曰请问余及死乎【集解杜预曰问己可得以寿死不】对曰不知也公欲以越伐三桓八月哀公如陞氏【集解杜预曰陞氏即有山氏】三桓攻公公奔於卫去如邹遂如越国人迎哀公复归卒于有山氏【集解徐广曰皇甫谧云哀公元甲辰终庚午】子寧立是为悼公悼公之时三桓胜鲁如小侯畀於三桓之家十三年三晋灭智伯分其地有之三十七年悼公卒【集解徐广曰一本云悼公即位三十年乃於秦惠王卒楚怀王死年合又自悼公以下尽与刘歆曆谱合而反违年表未详何故皇甫谧云悼公四十年元辛未终庚戌】子嘉立是为元公元公二十一年卒【集解徐广曰皇甫谧云元辛亥终辛未】子显立是为穆公【索隐系本显作不衍】穆公三十三年卒【集解徐广曰皇甫谧云元壬申终甲辰】子奋立是为共公共公二十二年卒【集解徐广曰皇甫谧云元乙巳终丙寅】子屯立是为康公【索隐屯音竹伦反】康公九年卒【集解徐广曰皇甫谧云元丁卯终乙亥】子匱立是为景公【索隐匱音偃】景公二十九年卒【集解徐广曰皇甫谧云元丙子终甲辰】子叔立是为平公【索隐系本叔作旅】是时六国皆称王平公十二年秦惠王卒三十二年平公卒【集解徐广曰皇甫谧云元乙巳终甲子】子贾立是为文公【索隐系本作湣公邹诞亦同系家或作文公】文公七年楚怀王死于秦二十三年文公卒【集解徐广曰皇甫谧云元乙丑终丁亥】子伋立是为顷公顷公二年秦拔楚之郢【集解徐广曰年表云文公十八年秦拔郢楚走陈】楚顷王东徙于陈十九年楚伐我取徐州【集解徐广曰徐州在鲁东今薛县索隐说文邾之下邑在鲁东又郡国志曰鲁国薛县六国时曰徐州又纪年云梁惠王三十一年下邳迁于薛故名曰徐州则徐与邾并音舒】二十四年楚考烈王伐灭鲁顷公亡迁於下邳【集解徐广曰下一作卞索隐下邳谓国外之小邑本或作卞邑然鲁有卞邑与此不同】为家人鲁絶祀顷公卒于柯【集解徐广曰皇甫谧云元戊子终辛亥索隐春秋齐及鲁盟于柯杜预云柯齐邑今济北东阿】鲁起周公至顷公凡三十四世太史公曰余闻孔子称曰甚矣鲁道之衰也洙泗之间斷斷如也【集解徐广曰汉书地理志云鲁滨洙泗之间其民涉渡幼者扶老者而代其任俗既薄长老不自安与幼者相让故曰斷斷如也斷鱼斤反东州语也盖幼者患苦长者长者忿愧自守故斷斷争辞所以为道衰也索隐读如论语閭閭如也言鲁道虽微而洙泗之间尚閭閭如也邹诞生亦音银又作断断如尚书读则断断是专一之义徐广又引地理志音五艰反云斷斷是鬪争之貌故繁钦遂行赋云涉洙泗而饮马耻少长之斷斷是也今按下文云至于揖让之礼则从矣鲁尚有揖让之风如论语音閭为得之】观庆父及叔牙闵公之际何其乱也隐桓之事襄仲杀适立庶三家北面为臣亲攻昭公昭公以奔至其揖让之礼则从矣而行事何其戾也

【索隐述赞曰武王既没成王幼孤周公摄政负扆据图及还臣列北面躬如元子封鲁少昊之墟夹辅王室世职不渝降及孝公穆仲致誉隐能让国春秋之初邱明执简褒贬备书】

史记卷三十三考证

鲁周公世家乃为诗貽王命之曰?鴟王亦未敢训周公○徐孚远曰乃为诗至训周公十七字宜在上文我所以为之若此句下

初成王少时病周公乃自揃其蚤沈之河以祝於神曰王少未有识奸神命者乃旦也亦藏其策於府成王病有瘳及成王用事人或譖周公周公奔楚成王发府见周公祷书乃泣反周公○困学纪闻曰吕子进曰考之於书启金縢之书在周公未薨前而无揃蚤事此盖一事传之者不同耳习学记言曰是时楚未有国公奚之焉诗书以为居东而异说以为南奔

周公在丰病将没○徐孚远曰周公作洛後成王治镐京周公治洛尚书甚明曰必葬我成周即其地也无缘在丰

武公九年春武公与长子括少子戏西朝周宣王○年表武公立十年而卒是为周宣王之十二年下文云夏武公归而卒是立九年也与表互异

二十七年孝公卒○年表作三十八年宣王诛伯御在伯御之十一年其年乃孝公元年而表以伯御元年为孝公元年故较世家多十一年

庆父竟立庄公子开是为湣公索隐系本名曰啓○左传疏曰杜世族谱云名啓方

於是季友奉子申入立之是为厘公索隐湣公之弟名曰申○杜预注左传僖公闵公庶兄成风之子

获乔如弟焚如○左传作焚如

襄公元年晋立悼公○左传及年表晋悼公立於成公十八年二月乙酉非襄公元年

季氏芥鸡羽集解服?曰搗芥子播其鸡羽可以盆郈氏鸡目○左传疏引此语是贾逵之说非服?也

齐伐我取三邑○左传八年夏齐人取讙及阐二邑齐世家亦作取二邑

十五年使子服景伯子贡为介适齐齐归我侵地○【臣世骏】按齐归我讙阐在八年春秋经传无十五年归侵地之事大约因归成之语而误耳

卒于有山氏集解徐广曰皇甫谧云哀公元甲辰终庚午○年表甲辰为定公十三年哀公元为丁未左传疏曰传称国人施罪于有山氏不得复归而卒于其家也

史记卷三十三考证

卷三十四

钦定四库全书

史记卷三十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

燕召公世家第四

召公奭与周同姓姓姬氏【集解譙周曰周之支族食邑於召谓之召公索隐召者畿内采地奭始食於召故曰召公或说者以为文王受命取岐周故墟召地分爵二公故诗有周召二南言皆在岐山之阳故言南也後武王封之北燕在今幽州蓟县故城是也亦以元子就封而次子留周室代为召公至宣王时召穆公虎其後也】周武王之灭纣封召公於北燕【集解駰案世本曰居北燕宋忠曰有南燕故云北燕】其在成王时召公为三公自陕以西召公主之自陕以东周公主之【集解何休曰陕者盖今弘农陕县是也】成王既幼周公摄政当国践阼召公疑之作君奭【集解孔安国曰尊之曰君陈古以告之故以名篇】君奭不说周公【集解马融曰召公以周公既摄政致太平功配文武不宜复列在臣位故不说以为周公苟贪宠也】周公乃称汤时有伊尹假于皇天【集解孔安国曰伊摯佐汤功大至天谓致太平也郑玄曰皇天北极大帝也】在太戊时则有若伊陟臣扈假于上帝巫咸治王家【集解孔安国曰伊陟臣扈率伊尹之职使其君不隕祖业故至天之功不隕巫咸治王家言其不及二臣马融曰道至于上帝谓奉天时也郑玄曰上帝太微中其所统也】在祖乙时则有若巫贤【集解孔安国曰时贤臣有如此巫贤也贤咸子巫氏也】在武丁则有若甘般【集解孔安国曰高宗即位甘般佐之後有传说】卒维兹有陈保乂有殷【集解徐广曰一无此九字駰案王肃曰循此数臣有陈列之功安治有殷也】於是召公乃说召公之治西方甚得兆民和召公巡行乡邑有棠树【正义今之棠梨树也括地志云召伯庙在洛州寿安县西北五里召伯听讼甘棠之下周人思之不伐其树後人怀其德因立庙有棠在九曲城东阜上】决狱政事其下自侯伯至庶人各得其所无失职者召公卒而民人思召公之政怀棠树不敢伐歌咏之作甘棠之诗自召公已下九世至惠侯【索隐并国史先失也又自惠侯已下皆无名亦不言属惟昭王父子有名盖在战国时旁见他耳燕四十二代有二惠侯二厘侯二宣侯三桓侯二文侯盖国史微失本諡故重耳】燕惠侯当周厉王奔彘共和之时惠侯卒子厘侯立【正义厘音僖】是岁周宣王初即位厘侯二十一年郑桓公初封於郑三十六年厘侯卒子顷侯立顷侯二十年周幽王淫乱为犬戎所弑秦始列为诸侯二十四年顷侯卒子哀侯立哀侯二

年卒子郑侯立【索隐諡法无郑郑或是名】郑侯三十六年卒子繆侯立繆侯七年而鲁隐公元年也十八年卒子宣侯立【索隐谯周云系本谓燕自宣侯已上皆父子相传故无所疑桓侯已下并不言属以其难明故也按今系本无燕代系宋忠依太史公书以补其阙寻徐广作音尚引系本盖近代始散逸耳】宣侯十三年卒子桓侯立【集解徐广曰古史考曰世家自宣侯已下不说其属以其难明故也】桓侯七年卒【集解駰案系本曰桓侯徙临易宋忠曰今河间易县是也】子庄公立庄公十二年齐桓公始霸十六年与宋卫共伐周惠王惠王出奔温立惠王弟頹为周王【集解谯周曰按春秋传燕与子頹逐周惠王者乃南燕姑姓也系家以为北燕失之索隐谯周云据左氏燕与卫伐周惠王乃是南燕姑姓而系家以为北燕伯故着史考云此燕是姑姓今检左氏庄十九年卫师燕师伐周二十年齐伐山戎传云执燕仲父三十年齐伐山戎传曰谋山戎以其病燕故也据传文及此记元是北燕不疑杜君妄说仲父是南燕伯为伐周故且燕卫俱是姬姓故有伐周纳王之事若是姑燕与卫伐周则郑何以独伐燕而不伐卫乎】十七年郑执燕仲父而内惠王于周二十七年山戎来侵我齐桓公救燕遂北伐山戎而还燕君送齐桓公出境桓公因割燕所至地予燕【正义予音与括地志云燕留故城在沧州长芦县东北十七里即齐桓公分沟割燕君所至地与燕因筑此城故名燕留】使燕共贡天子如成周时职使燕复修召公之法三十三年卒子襄公立襄公二十六年晋文公为践土之会称伯三十一年秦师败于殽三十七年秦穆公卒四十年襄公卒桓公立桓公十六年卒【索隐谯周云系家襄伯生宣伯无桓今检史记并有桓公立十六年又宋忠据此史补系家亦有桓公是允南所见本异则是燕有三桓公也】宣公立宣公十五年卒昭公立昭公十三年卒武公立是岁晋灭三郤大夫武公十九年卒文公立文公六年卒懿公立懿公元年齐崔杼弑其君庄公四年卒子惠公立惠公元年齐高止来奔六年惠公多宠姬公欲去诸大夫而立宠姬宋大夫共诛姬宋【索隐宋其名也或作宗刘氏云其父兄为执政故诸大夫共灭之】惠公惧奔齐四年齐高偃如晋请共伐燕入其君晋平公许与齐伐燕入惠公惠公至燕而死【索隐春秋昭三年北燕伯欵奔齐至六年又云齐伐北燕一与此文合左传无纳欵之文而云将纳简公晏子曰燕君不入矣齐遂受赂而还事与此乖而又以欵为简公简公後惠公四代则与春秋经传不相协未可强言也】燕立悼公悼公七年卒共公立共公五年卒平公立晋公室卑六卿始强大平公十八年吴王阖闾破楚入郢十九年卒简公立简公十二年卒献公立【索隐王劭按纪年简公後次孝公无献公然纪年之书多是伪谬聊记异耳】晋赵鞅围范中行於朝歌献公十二年齐田常弑其君简公十四年孔子卒二十八年献公卒孝公立孝公十二年韩魏赵灭智伯分其地【索隐按纪年智伯灭在成公二年也】三晋强十五年孝公卒成公立成公十六年卒【索隐按纪年成侯名载】湣公立湣公三十一年卒厘公立【索隐年表作厘侯庄徐广云一无庄字按燕失年纪及其君名表言庄者衍字也】是岁三晋列为诸侯【索隐按纪年作文公二十四年卒简公立十三年而三晋命邑为诸侯与此不同】厘公三十年伐齐败于林营【索隐林营地名一云林地名於林地立营故曰林营】厘公卒【索隐纪年作简公四十五年卒妄也按上简公生献公则此当是厘但立年又误耳】桓公立桓公十一年卒文公立【索隐系本已上文公为闵公则湣与闵同而上懿公之父又諡文公】是岁秦献公卒秦益强文公十九年齐威王卒二十八年苏秦始来见说文公文公予车马金帛以至赵赵肃侯用之因约六国为从长【正义从足从反长丁丈反】秦惠王以其女为燕太子妇二十九年文公卒太子立是为易王易王初立齐宣王因燕丧伐我取十城苏秦说齐使复归燕十城十年燕君为王【索隐燕君即易王也言君初

以十年即称王也上言易王者易諡也後追书諡耳】苏秦与燕文公夫人私通惧诛乃说王使齐为反间欲以乱齐【集解駟案孙子兵法曰反间者因敌间而用之者也凡军之所欲击城之所欲攻人之所欲杀必先知其守将左右谒者门者舍人之姓名令吾之间必索敌间之来间我者因而利导舍之故反间可得用也正义使音所史反间音纪范反】易王立十二年卒子燕哙立燕哙既立齐人杀苏秦苏秦之在燕与其相子之为?而苏代与子之交及苏秦死而齐宣王复用苏代燕哙三年与楚三晋攻秦不胜而还子之相燕贵重主断苏代为齐使於燕【索隐按战国策曰子之使苏代侍质子於齐齐使代报燕是也】燕王问曰齐王奚如对曰必不霸燕王曰何也对曰不信其臣苏代欲以激燕王以尊子之也於是燕王大信子之子之因遗苏代百金【正义瓚云秦以一镒为一金孟康云二十四两曰镒】而聽其所使鹿毛寿【集解徐广曰一作厖毛又曰甘陵县本名厖索隐春秋後语亦作厖毛寿又韩子作潘寿】谓燕王不如以国让相子之人之谓尧贤者以其让天下於许由许由不受有让天下之名而实不失天下今王以国让於子之子之必不敢受是王与尧同行也燕王因属国於子之子之大重【索隐大重谓尊贵也】或曰禹荐益己【索隐以己配益则益己是伯益而经传无其文未知所由或曰己语终辞】而以啓人为吏【索隐人犹臣也谓以啓臣为益吏也】及老而以啓为不足任乎天下传之於益己而啓与交党攻益夺之天下谓禹名传天下於益己而实令啓自取之今王言属国於子之而吏无非太子人者【索隐此人亦训臣也】是名属子之而实太子用事也王因收印自三百石吏已上而效之子之【索隐郑玄云效呈也以印呈与子之】子之南面行王事而哙老不听政顾为臣【索隐顾犹反也言哙反为子之臣也有本作愿者非】国事皆决於子之三年国大乱百姓恫恐【索隐恫犹痛也民皆恐惧】将军市被【正义人姓名】与太子平谋将攻子之诸将谓齐湣王曰因而赴之破燕必矣齐王因令人谓燕太子平曰寡人闻太子之义将废私而立公飭君臣之义【正义飭音勅】明父子之位寡人之国小不足以为先後【正义先後并去声】虽然则唯太子所以令之太子因要党聚衆将军市被围公宫攻子之不克将军市被及百姓反攻太子平将军市被死以徇因构难数月死者数万衆人恫恐百姓离志孟轲谓齐王曰今伐燕此文武之时不可失也【索隐谓如武王成文王之业伐纣之时然此语与孟子不同】王因令章子将五都之兵【集解駟案章子齐人见孟子索隐五都即齐也按临淄是五都之一】以因北地之衆以伐燕【索隐北地即齐之北边也】士卒不战城门不闭燕君哙死齐大胜燕子之亡【集解徐广曰年表云君哙及太子相子之皆死駟案汲冢纪年曰齐人禽子之而醢其身也】二年而燕人共立太子平是为燕昭王【集解徐广曰哙立七年而死其九年燕人共立太子平索隐按上文太子平谋攻子之而年表又云君哙及太子相子之皆死纪年又云子之杀公子平今此丈云立太子平是为燕昭王则年表纪年为谬也而赵系家云武灵王闻燕乱召公子职於韩立以为燕王使乐池送之裴駟亦以此系家无赵送公子职之事当是遥立职而送之事竟不就则昭王名平非职明矣进退参详是年表既误而纪年因之而妄说耳】燕昭王於破燕之後即位卑身厚币以招贤者谓郭隗曰齐因孤之国乱而袭破燕孤极知燕小力少不足以报然诚得贤士以共国以雪先王之耻孤之愿也先生视可者得身事之郭隗曰王必欲致士先从隗始况贤於隗者岂远千里哉於是昭王为隗改筑宫而师事之乐毅自魏往邹衍自齐往剧辛自赵往士争趋燕燕王吊死问孤与百姓同甘苦二十八年燕国殷富士卒乐轶轻战於是遂以乐毅为上将军与秦楚三晋合谋以伐齐齐兵败湣王出亡於外燕兵独追北入至临淄尽取齐宝烧其宫室宗庙齐城之不下者独唯聊莒即墨【索隐按余篇及战国策并无聊字】

其余皆属燕六岁昭王三十三年卒子惠王立惠王为太子时与乐毅有隙及即位疑毅使骑劫代将乐毅亡走赵齐田单以即墨击败燕军骑劫死燕兵引归齐悉复得其故城湣王死于莒乃立其子为襄王惠王七年卒【索隐按赵系家惠文王二十八年燕相成安君公孙操弑其王乐资以为即惠王也徐广按年表是年燕武成王元年武成即惠王子则惠王为成安君弑明矣此不言者燕远讳不告或太史公之说疎也】韩魏楚共伐燕燕武成王立武成王七年齐田单伐我拔中阳十三年秦败赵於长平四十余万十四年武成王卒子孝王立孝王元年秦围邯鄲者解去三年卒子今王喜立【索隐今王犹今上也有作金者非也按諡法无金】今王喜四年秦昭王卒燕王命相栗腹约譙赵以五百金为赵王酒还报燕王曰赵王壮者皆死长平其孤未壮可伐也王召昌国君乐间问之对曰赵四战之国【正义赵东隣燕西接秦境南错韩魏北连胡貊故言四战】其民习兵不可伐王曰吾以五而伐一【索隐谓以五人而伐一人】对曰不可燕王怒羣臣皆以为可卒起二军车二千乘栗腹将而攻鄆【集解徐广曰在常山今日高邑索隐邹氏音火角反一音昊】卿秦攻代【正义今代州也】唯独大夫将渠谓燕王曰【索隐人名姓也一云上卿秦及此将渠皆卿将官秦渠其名也国史变文而书遂失姓尔战国策云庆秦庆是姓也卿其官耳】与人通关约交以五百金饮人之王使者报而反攻之不祥兵无成功燕王不听自将偏军随之将渠引燕王绶止之曰王必无自往往无成功王蹙之以足将渠泣曰臣非以自为为王也燕军至宋子【集解徐广曰属钜鹿】赵使廉颇将击破栗腹於鄆破卿秦乐乘於代【索隐战国策曰廉颇以二十万遇栗腹於鄆乐乘以五万遇庆秦於代燕人大败与此不同】乐间奔赵廉颇逐之五百余里围其国燕人请和赵人不许必令将渠处和燕相将渠以处和【集解以将渠为相索隐谓欲令将渠处之使和也】赵听将渠解燕围六年秦灭东西周置三川郡七年秦拔赵榆次三十七城秦置太原郡九年秦王政初即位十年赵使廉颇将攻繁阳【集解徐广曰属魏郡】拔之赵孝成王卒悼襄王立使乐乘代廉颇廉颇不听攻乐乘乐乘走廉颇奔大梁十二年赵使李牧攻燕拔武遂【集解徐广曰属河间】方城【集解徐广曰属涿有督亢亭】剧辛故居赵与龐煖善【索隐煖音况远反】已而亡走燕燕见赵数困于秦而廉颇去令龐煖将也欲因赵弊攻之问剧辛辛曰龐煖易与耳燕使剧辛将击赵赵使龐煖击之取燕军二万杀剧辛秦拔魏二十城置东郡十九年秦拔赵之邺【正义即相州邺县也】九城赵悼襄王卒二十三年太子丹质於秦亡归燕二十五年秦虏灭韩王安置颍川郡二十七年秦虏赵王迁灭赵赵公子嘉自立为代王燕见秦且灭六国秦兵临易水【集解徐广曰出涿郡故安也】祸且至燕太子丹陰养壮士二十人使荆轲献督亢地图於秦【索隐徐广云涿有督亢亭地理志属广阳然督亢之田在燕东甚良沃欲献秦故画其图而献焉】因袭刺秦王秦王觉杀轲使将军王翦击燕二十九年秦攻拔我蓟燕王亡徙居辽东斩丹以献秦三十年秦灭魏三十三年秦拔辽东虏燕王喜卒灭燕是岁秦将王贲【正义贲音奔王翦子】亦虏代王嘉太史公曰召公奭可谓仁矣甘棠且思之况其人乎燕北迫蛮貉内措齐晋【索隐措交杂也又作错刘氏云争错也】崎岖强国之间最为弱小几灭者数矣然社稷血食者八九百岁於姬姓独後亡岂非召公之烈耶

【索隐述赞曰召伯作相分陕而治人惠其德甘棠是思庄送霸主惠罗宠姬文公约赵苏秦骋辞易王初立齐宣我欺燕吟无道禅位子之昭王待士思报临菑督亢不就卒见芟夷】

史记卷三十四

史记卷三十四考证

燕召公世家惠公多宠姬欲去诸大夫而立宠姬宋大夫共诛姬宋○【臣照】按三姬字俱应作臣世表云公欲杀公卿立幸臣公卿诛幸臣公恐出奔齐然则三姬字并为臣字之讹无疑也公欲立宠姬为妃何必去诸大夫而後得立耶

及苏秦死而齐宣王复用苏代○【臣照】按田完世家及六国年表齐宣王卒後四年燕王哙方立齐人杀苏秦及齐破燕并是齐湣王事与孟子异乃此处却谓是齐宣太史公不应首鼠两端盖宣为湣字之讹也顾孟子作齐宣而史记作齐湣其故不可得而考矣

而哙老不听政顾为臣○不监本讹作大今改正齐城之不下者独唯聊莒即墨索隐按余篇及战国策并无聊字○徐孚远曰燕将已下聊城与惠王有郄而不归则聊字衍文且齐城不拔者向惟二也

悉复得其故城○故监本作败今依宋本作故

十三年秦败赵於长平四十余万○六国年表及秦本纪秦昭襄之四十七年于赵孝成王为六年是年秦阬赵卒於燕武成王为十二年此云十三年与赵世家合於秦本纪及年表差一年

杀剧辛○【臣照】按六国年表剧辛死於赵在十三年又按昭王即位剧辛自赵往至此经七十年历五王当有两剧辛耶否则皆传讹也

史记卷三十四考证

卷三十五

钦定四库全书

史记卷三十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

管蔡世家第五

管叔鲜【正义音仙括地志云郑州管城县今州外城即管国城也是叔鲜所封国也】蔡叔度者周文王子而武王弟也武王同母兄弟十人母曰太妣【正义国语云杞缙二国妣姓夏禹之後太妣之家太妣文王之妃武王之母列女传云太妣者武王之母禹後妣氏之女也在合之阳在渭之涘仁而明道文王喜之亲迎于渭造舟为梁及入太妣思齐旦夕勤劳以尽妇道太妣号曰文母文王理外文母治内太妣生十男教诲自少及长未尝见邪僻之事言常以正道持之也】文王正妃也其长子曰伯邑考次曰武王发次曰管叔鲜次曰周公旦次曰蔡叔度次曰曹叔振铎次曰成叔武【正义括地志云濮州雷泽县在东南九十一里汉郾阳县古郾伯姬姓之国其後迁於成之阳】次曰霍叔处【正义处昌汝反括地志云晋州霍邑县本汉彘县也郑玄注周礼云霍山在彘本春秋时霍伯国地】次曰康叔封次曰冉季载【正义冉一作井音奴甘反或作那音同井国名也季载人名也伯邑考最长所以加伯诸中子咸言叔以载最少故言季载】冉季载最少同母昆弟十人【集解徐广曰文王之子为侯者十有六国】唯发旦贤左右辅文王【正义左右并去声】故文王舍伯邑考而以发为太子及文王崩而发立是为武王伯邑考既已前卒矣武王已克殷纣平天下封功臣昆弟於是封叔鲜於管【集解杜预曰管在荥阳京县东北】封叔度於蔡【集解駰案世本曰居上蔡】二人相纣子武庚禄父治殷遗民封叔旦於鲁而相周为周公封叔振铎於曹封叔武於成【索隐按春秋隐五年卫师入郾杜预曰东平刚父县有郾乡後汉地理志以为成本国又地理志云廩丘县南有成故城应劭曰武王封弟季载於成是古之成邑应仲远误云季载封耳】封叔处於霍【索隐春秋闵元年晋灭霍地理志云河东彘县霍太山在东北是霍叔之所封】康叔封冉季载皆少未得封【索隐孔安国曰康畿内国名地阙叔字也封叔名耳】武王既崩成王少周公旦专王室管叔蔡叔疑周公为之不利於成王乃挟武庚以作乱周公旦承成王命伐诛武庚杀管叔而放蔡叔迁之与车十乘徒七十人从而分殷余民为二其一封微子啓於宋以续殷祀其一封康叔为卫君是为卫康叔封季载於冉【索隐冉国也载名也季字也冉或作那国语曰冉由郑姬贾逵曰文王子聃季之国也庄十八年楚武王克权迁於那处

杜预曰那处楚地南郡编县有那口城聃与那皆音奴甘反】冉季康叔皆有驯行【索隐如字音巡驯善也】於是周公举康叔为周司寇冉季为周司空【索隐事见左传定公四年】以佐成王治皆有令名於天下蔡叔度既迁而死其子曰胡胡乃改行率德驯善周公闻之而举胡以为鲁卿士【索隐尚书云蔡仲克庸祗德周公以为卿士叔卒乃命诸王邦之蔡元无仕鲁之文又伯禽居鲁乃是七年致政之後此言乃说居摄政之初未知史迁何凭而有斯言也】鲁国治於是周公言於成王复封胡於蔡以奉蔡叔之祀是为蔡仲【集解宋曰胡徙居新蔡】余五叔皆就国无为天子吏者【索隐五叔管叔蔡叔成叔曹叔霍叔】蔡仲卒子蔡伯荒立蔡伯荒卒子宫侯立宫侯卒子厉侯立厉侯卒子武侯立武侯之时周厉王失国奔彘共和行政诸侯多叛周武侯卒子夷侯立夷侯十一年周宣王即位二十八年夷侯卒子厘侯所事立厘侯三十九年周幽王为犬戎所杀周室卑而东徙秦始得列为诸侯【正义周幽王为犬戎所杀平王东徙洛邑秦襄公以兵救因送平王至洛故平王封襄公】四十八年厘侯卒子共侯立共侯二年卒子戴侯立戴侯十年卒子宣侯措父立宣侯二十八年鲁隐公初立三十五年宣侯卒子桓侯封人立桓侯三年鲁弑其君隐公二十年桓侯卒弟哀侯献舞立哀侯十一年初哀侯娶陈息侯亦娶陈【集解杜预曰息国汝南新息县】息夫人将归过蔡蔡侯不敬息侯怒请楚文王来伐我我求救於蔡蔡必来楚因击之可以有功楚文王从之虜蔡哀侯以归哀侯留九岁死於楚凡立二十年卒蔡人立其子盼是为繆侯繆侯以其女弟为齐桓公夫人十八年齐桓公与蔡女戏船中夫人荡舟桓公止之不止公怒归蔡女而不絶也蔡侯怒嫁其弟【索隐弟女弟即荡舟之姬】齐桓公怒伐蔡蔡溃遂虜繆侯南至楚邵陵已而诸侯为蔡谢齐齐侯归蔡侯二十九年繆侯卒子庄侯甲午立庄侯三年齐桓公卒十四年晋文公败楚於城濮二十年楚太子商臣弑其父成王代立二十五年秦穆公卒三十三年楚庄王即位三十四年庄侯卒子文侯申立文侯十四年楚庄王伐陈杀夏徵舒十五年楚围郑郑降楚楚复醢之【正义醢音释】二十年文侯卒子景侯同立景侯元年楚庄王卒二十九年景侯为太子般娶妇於楚而景侯通焉太子弑景侯而自立是为灵侯灵侯二年楚公子围弑其王郢敖而自立为灵王【正义郢纪洽反敖五高反】九年陈司徒招弑其君哀公【索隐招或作苕又作昭并音时遥反】楚使公子弃疾灭陈而有之十二年楚灵王以灵侯弑其父诱蔡灵侯于申【正义故申城在邓州】伏甲饮之醉而杀之刑其士卒七十人令公子弃疾围蔡十一月灭蔡使弃疾为蔡公【正义蔡之大夫也】楚灭蔡三岁楚公子弃疾弑其君灵王代立为平王平王乃求蔡景侯少子庐立之是为平侯【集解宋忠曰平侯徙下蔡索隐今系本无者近脱耳】是年楚亦复立陈楚平王初立欲亲诸侯故复立陈蔡後【集解駰案世本曰平侯者灵侯般之孙太子友之子】平侯九年卒灵侯般之孙东国攻平侯子而自立是为悼侯悼侯父曰隐太子友隐太子友者灵侯之太子平侯立而杀隐太子故平侯卒而隐太子之子东国攻平侯子而代立是为悼侯悼侯三年卒弟昭侯申立昭侯十年朝楚昭王持美裘二献其一於昭王而自衣其一楚相子常欲之不与子常谗蔡侯留之楚三年蔡侯知之乃献其裘於子常子常受之乃言归蔡侯蔡侯归而之晋请与晋伐楚十三年春与卫灵公会邵陵蔡侯私於周苙弘以求长於卫【集解服虔曰载书使蔡在卫上】卫使史鰌言康叔之功德乃长卫夏为晋灭沈【集解杜预曰汝南平舆县有邲亭】楚怒攻蔡蔡昭侯使其子为质於吴以共伐楚【正义质音致】冬与吴王阖闾遂破楚入郢蔡怨子常子常恐奔郑十四年吴去而楚昭王复国十六年楚令尹为其民泣以谋蔡蔡昭侯惧二十六年孔子如蔡楚昭王伐蔡蔡恐告急于吴吴为蔡远约迁以自近易以相救昭侯私许不与大夫计吴人来救蔡因

迁蔡于州来【索隐州来在淮南下蔡县】二十八年昭侯将朝于吴大夫恐其复迁乃令贼利杀昭侯【索隐利贼名也】已而诛贼利以解过而立昭侯子朔是为成侯【集解徐广曰或作景】成侯四年宋灭曹十年齐田常弑其君简公十三年楚灭陈十九年成侯卒子声侯产立声侯十五年卒子元侯立元侯六年卒子侯齐立侯齐四年楚惠王灭蔡蔡侯齐亡蔡遂絶祀後陈灭三十三年【索隐鲁哀十七年楚灭陈其楚灭蔡絶其祀又在灭陈之後三十三年即在春秋後二十三年】伯邑考其後不知所封武王发其後为周有本纪言管叔鲜作乱诛死无後周公旦其後为鲁有世家言蔡叔度其後为蔡有世家言曹叔振铎其後为曹有世家言【索隐曹亦姬姓之国而文之昭春秋之时颇称强国传数十代而後亡岂可附管蔡亡国之末而没其篇第自合析为一篇】成叔武其後世无所见霍叔处其後晋献公时灭霍康叔封其後为卫有世家言冉季载其後世无所见

太史公曰管叔作乱无足载者然周武王崩成王少天下既疑赖同母之弟成叔冉季之属十人为辅拂是以诸侯卒宗周故附之世家言

曹叔世家【索隐按上文叔振铎其後为曹有系家言即曹亦合题系家今附管蔡之末而不出题者盖以曹小而少事迹因附管蔡之末不别题篇尔且又管虽无後仍是蔡曹之兄故显管蔡而畧曹】曹叔振铎者周武王弟也武王已克殷纣封叔振铎於曹【集解宋忠曰济陰定陶县】叔振铎卒子太伯脾立太伯脾卒子仲君平立仲君平卒子宫伯侯立宫伯侯卒子孝伯云立孝伯云卒子夷伯喜立夷伯二十三年周厉王奔于彘三十年卒弟幽伯强立幽伯九年弟苏杀幽伯代立是为戴伯戴伯元年周宣王已立三岁三十年戴伯卒子惠伯兕立【集解孙检曰兕音徐子反曹惠伯或名雉或名弟或复名弟兕也索隐按年表作惠公伯雉注引孙检未详何代或云齐人亦恐其人不注史记所以王俭七志阮孝绪七录并无不知裴駰何所从录】惠伯二十五年周幽王为犬戎所杀因东徙益卑诸侯畔之秦始列为诸侯三十六年惠伯卒子石甫立其弟武杀之代立是为繆公繆公三年卒子桓公终生立【集解孙检曰一作终渥渥音生】桓公三十五年鲁隐公立四十五年鲁弑其君隐公四十六年宋华父督弑其君殇公及孔父五十五年桓公卒子庄公夕姑立【索隐夕音亦即射姑也同音亦】庄公二十三年齐桓公始霸三十一年庄公卒子厘公夷立厘公九年卒子昭公班立昭公六年齐桓公败蔡遂至楚召陵九年昭公卒子共公襄立共公十六年初晋公子重耳其亡过曹曹君无礼欲观其骈胁【集解韦昭曰骈者并干也正义骈白边反胁许业反】厘负羁谏不听【正义厘音僖曹大夫】私善於重耳二十一年晋文公重耳伐曹虘共公以归令军毋入厘负羁之宗族闻或说晋文公曰昔齐桓公会诸侯复异姓今君囚曹君灭同姓何以令於诸侯晋乃复归共公二十五年晋文公卒三十五年共公卒子文公寿立文公二十三年卒子宣公强立【索隐左传宣公名庐】宣公十七年卒弟成公负刍立成公三年晋厉公伐曹虘成公以归已复释之【索隐案左传成十五年晋厉公执负刍归於京师晋立宣公弟子臧子臧曰圣达节次守节下失节为君非吾节也遂逃奔宋曹人请於晋晋人谓子臧反国吾归而君子臧反晋於是归负刍】五年晋栾书中行偃使程滑弑其君厉公二十三年成公卒子武公胜立武公二十六年楚公子弃疾弑其君灵王代立二十七年武公卒子平公顷立平公四年卒子悼公午立是岁宋卫陈郑皆火悼公八年宋景公立九年悼公朝於宋宋囚之曹立其弟野是为声公悼公死於宋归葬声公五年平公弟通弑声公代立是为隐公【索隐谯周云春秋

无其事今检系本及春秋悼伯卒弟露立谥靖公实无声公隐公盖是彼文自疎也】隐公四年声公弟露弑隐公代立是为靖公靖公四年卒子伯阳立伯阳三年国人有梦衆君子立於社宫【集解贾逵曰社宫社也郑衆曰社宫中有室屋者】谋欲亡曹曹叔振铎止之请待公孙强许之旦求之曹无此人梦者戒其子曰我亡尔闻公孙强为政必去曹无离曹祸【索隐离即罹被也】及伯阳即位好田弋之事六年曹野人公孙强亦好田弋获白鴈而献之且言田弋之说因访政事伯阳大说之有宠使为司城以听政梦者之子乃亡去公孙强言霸说於曹伯十四年曹伯从之乃背晋干宋【集解贾逵曰以小加大索隐干谓犯也言曹因弃晋而犯宋遂至灭也裴氏引贾逵注云以小加大者加陵也小即曹大谓晋及宋也】宋景公伐之晋人不救十五年宋灭曹执曹伯阳及公孙强以归而杀之曹遂絶其祀

太史公曰【索隐检诸本或无此论】余寻曹共公之不用僖负羁乃乘轩者三百人【正义晋世家云晋师入曹数之以其不用僖负羁言而美女乘轩三百人也】知唯德之不建及振铎之梦岂不欲引曹之祀者哉如公孙强不修厥政叔铎之祀忽诸【正义至如公孙强不修霸道之政而伯阳之子立叔铎犹尚飨祭祀岂合忽絶之哉】

【索隐述赞曰武王之弟管蔡及霍周公居相流言是作狼跋致艰鸱鴞讨恶胡能改行克复其爵献舞执楚遇息礼薄穆侯虜齐荡舟乖谗曹共轻晋负羁先觉伯阳梦社祚倾振铎】

史记卷三十五

史记卷三十五考证

管蔡世家其长子曰伯邑考次曰武王发次曰管叔鲜次曰周公旦次曰蔡叔度次曰曹叔振铎次曰成叔武次曰霍叔处次曰康叔封次曰冉季载○【臣照】按十子长次各书不同毛诗疏曰左传云周公为太宰康叔为司寇聃季为司空通武王伯邑考为五人又曰五叔无官则其余五者皆字叔又曰曹为伯甸非尚年也则曹叔振铎是康叔聃季之兄夫管蔡霍为三监蔡与卫争长明其皆母弟也邲于富辰之言当在蔡霍之间五叔者曹管蔡邲霍曹应在管之上皇甫谧则曰文王娶太姒生伯邑考武王发次管叔鲜次蔡叔度次邲叔武次霍叔处次周公旦次曹叔振铎次康叔封次聃季载其名与史记同其次亦异左传疏曰富辰言文之昭十六国蔡在鲁上明以长幼为次贾逵等皆言蔡叔周公兄马迁之言多辟繆云今亦莫定孰是姑列其同异如此

余五叔皆就国索隐五叔管叔蔡叔成叔曹叔霍叔○左传杜预注云五叔管叔鲜蔡叔度成叔武霍叔处毛叔聃也孔穎達疏云史记云聃季载杜云毛叔聃又不数叔振铎者杜以振铎非周公同母故不数之或杜别有所见不以管蔡世家为说

子宣侯措父立○春秋作考父

悼侯父曰隐太子友隐太子友者灵侯之太子○监本少隐太子友四字今添

卫使史鰌言康叔之功德○左传作祝鮀此作史鰌隐公四十六年宋华父督弑其君殇公及孔父○年表作四十七年

史记卷三十五考证

<史部,正史类,史记>

卷三十六

钦定四库全书

史记卷三十六

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

陈杞世家第六

陈胡公满者虞帝舜之後也昔舜为庶人时尧妻之二女居于妫汭其後因为氏姓姓妫氏舜已崩传禹天下而舜子商均为封国【索隐按商均所封虞即今之梁国虞城是也】夏后之时或失或续【索隐按夏代犹封虞思虞遂是也】至于周武王克殷纣乃复求舜後【索隐按左传虞遏父为周陶正以服事武王杜注遏父舜之後陶正官名是生满者也】得妫满封之於陈【索隐左传曰武王以元女太姬配虞胡公而封之陈以备三恪】以奉帝舜祀是为胡公胡公卒子申公犀侯立申公卒弟相公皐羊立相公卒立申公子突是为孝公孝公卒子慎公圉戎立慎公当周厉王时慎公卒子幽公寧立幽公十二年周厉王奔于彘二十三年幽公卒子厘公孝立厘公六年周宣王即位三十六年厘公卒子武公灵立武公十五年卒子夷公说立是岁周幽王即位夷公三年卒弟平公燮立【正义燮先牒反】平公七年周幽王为犬戎所杀周东徙秦始列为诸侯二十三年平公卒子文公圉立文公元年取蔡女生子佗【正义徒何反】十年文公卒长子桓公鲍立桓公二十三年鲁隐公初立二十六年卫杀其君州吁三十三年鲁弑其君隐公三十八年正月甲戌己丑陈桓公鲍卒【索隐陈乱故再赴其日正义甲戌己丑几十六日】桓公弟佗其母蔡女故蔡人为佗杀五父及桓公太子免而立佗【集解谯周曰春秋传谓佗即五父世家与传违索隐谯周云世家与春秋传违者按左传桓公五年文公子佗杀桓公太子免而代立经六年蔡人杀陈佗立桓公子跃为厉公而左传以厉公名跃佗立未踰年故无諡文庄二十二年传云陈厉公蔡出也故蔡人杀五父而立之则佗与五父俱为蔡人所杀其事不异是一人明矣史记既以佗为厉公遂以跃为利公寻厉利声相近遂误以佗为厉公五父为别人是太史公错耳而班固又以厉公为桓公弟又误也】是为厉公桓公病而乱作国人分散故再赴【集解徐广曰班氏云厉公跃者桓公之弟也】厉公二年生子敬仲完周太史过陈陈厉公使以周易筮之卦得观之否【集解贾逵曰坤下巽上观坤下乾上否观爻在六四变而之否】是为观国之光利用宾于王【集解杜预曰此周易观卦六四爻辞也易之为书六爻皆有变象又有互体圣人随其义而论之】此其代陈有国乎不在此其在异国【正义六四变内卦为中国外卦为异国】非此其身在其子孙

【正义内卦为身外卦为子孙变在外故知在子孙也】若在异国必姜姓【正义六四变此爻是辛未观上体巽未为羊巽为女女乘羊故为姜姜齐姓故知在齐】姜姓太岳之後【集解杜预曰姜姓之先为尧四岳也】物莫能两大陈衰此其昌乎【正义周敬王四十一年楚惠王杀陈湣公齐简公周敬王三十九年被田常杀之】厉公取蔡女蔡女与蔡人乱厉公数如蔡淫七年厉公所杀桓公太子免之三弟长曰跃中曰林少曰杵臼共令蔡人诱厉公以好女与蔡人共杀厉公【集解駰案公羊传曰淫于蔡蔡人杀之】而立跃是为利公利公者桓公子也利公立五月卒立中弟林是为庄公庄公七年卒少弟杵臼立是为宣公宣公三年楚武王卒楚始强十七年周惠王取陈女为后二十一年宣公後有嬖姬生子款欲立之乃杀其太子御寇御寇素爱厉公子完完惧祸及已乃奔齐齐桓公欲使陈完为卿完曰羈旅之臣【集解贾逵曰羈寄旅客也】幸得免负担君之惠也不敢当高位桓公使为工正【正义周礼云冬官为考工主器械】齐懿仲欲妻陈敬仲卜之占曰是谓凤皇于飞和鸣锵锵【集解杜预曰雄曰凤雌曰凰雄雌俱飞相和而鸣锵锵然也犹敬仲夫妻有声誉】有妣之後将育于姜【集解杜预曰妣陈姓齐姜姓】五世其昌并于正卿【集解服虔曰言完後五世与卿并列】八世之後莫之与京【集解贾逵曰京大也正义按陈敬仲八代孙田常之子襄子磐也而杜以常为八代者以桓子无宇生武子开与厘子乞皆相继事齐故以常为八代】三十七年齐桓公伐蔡蔡败南侵楚至召陵还过陈陈大夫辕涛涂恶其过陈诈齐令出东道东道恶桓公怒执陈辕涛涂是岁晋献公杀其太子申生四十五年宣公卒子款立是为穆公穆公五年齐桓公卒十六年晋文公败楚师于城濮是岁穆公卒子共公朔立共公六年楚太子商臣弑其父成王代立是为穆王十一年秦穆公卒十八年共公卒子灵公平国立灵公元年楚庄王即位六年楚伐陈十年陈及楚平十四年灵公与其大夫孔宁仪行父皆通於夏姬【正义列女传云陈女夏姬者陈大夫夏徵舒之母御叔之妻也三为王后七为夫人公侯争之莫不迷惑失意杜预云夏姬郑穆公女陈大夫御叔之妻左传云杀御叔弑灵侯戮夏南出孔仪丧陈国】衷其衣以戏於朝【集解駰案左传曰衷其相服谷梁传曰或衣其衣或中其襦】泄冶諫曰君臣淫乱民何效焉灵公以告二子二子请杀泄冶公弗禁遂杀泄冶【集解駰案春秋陈杀其大夫泄冶】十五年灵公与二子饮於夏氏公戏二子曰徵舒似汝二子曰亦似公【集解杜预曰灵公即位十五年徵舒已为卿年大无嫌是公子也盖以夏姬淫枚故谓其子多似以为戏】徵舒怒灵公罢酒出徵舒伏弩廐门射杀灵公【集解駰案左传曰公出自其廐】孔宁仪行父皆奔楚灵公太子午奔晋徵舒自立为陈侯徵舒故陈大夫也夏姬御叔之妻舒之母也成公元年冬楚庄王为夏徵舒杀灵公率诸侯伐陈谓陈曰无惊吾诛徵舒而已已诛徵舒因县陈而有之羣臣毕贺申叔时使於齐来还独不贺【集解贾逵曰叔时楚大夫】庄王问其故对曰鄙语有之牵牛径人田田主夺之牛径则有罪矣夺之牛不亦甚乎今王以徵舒为贼弑君故徵兵诸侯以义伐之已而取之以利其地则後何以令於天下是以不贺庄王曰善乃迎陈灵公太子午於晋而立之复君陈如故是为成公孔子读史记至楚复陈曰贤哉楚庄王轻千乘之国而重一言【索隐谓申叔时之语正义家语云孔子读史记至楚复陈喟然曰贤哉楚庄王轻千乘之国而重一言之信非申叔时之忠弗能建其义非楚庄王之贤不能受其训也】二十八年楚庄王卒二十九年陈倍楚盟三十年楚共王伐陈是岁成公卒子哀公弱立楚以陈丧罢兵去哀公三年楚围陈复释之二十八年楚公子围弑其君郢敖自立为灵王三十四年初哀公娶郑长姬生悼太子师少姬生偃【索隐昭八年经云陈侯之弟招杀陈世子偃师左传曰陈哀公元妃郑姬生悼太子偃师今此云两姬又分偃师为二人亦

恐此非】二嬖妾长妾生留少妾生胜留有宠哀公哀公属之其弟司徒招哀公病三月招杀悼太子立留为太子哀公怒欲诛招招发兵围守哀公哀公自经杀【集解徐广曰三十五年时】招卒立留为陈君四月陈使使赴楚楚灵王闻陈乱乃杀陈使者【索隐即司徒招又名莒】使公子弃疾发兵伐陈陈君留奔郑九月楚围陈十一月灭陈使弃疾为陈公招之杀悼太子也太子之子名吴出奔晋晋平公问太史赵曰陈遂亡乎对曰陈顓頊之族【集解服虔曰陈祖虞舜舜出顓頊故为顓頊之族】陈氏得政於齐乃卒亡【集解贾逵曰物莫能两盛】自幕至于瞽瞍无违命【集解贾逵曰幕舜後虞思也至于瞽瞍无闻违天命以废絶者郑衆曰幕舜之先也駟案国语贾义为长索隐贾逵以幕为虞思非也傳言自幕而至瞽瞍知幕在瞽瞍之前非虞思明矣】舜重之以明德至於遂【集解杜预曰遂舜後盖殷之兴存舜之後而封遂言舜德乃至於遂也索隐重音持用反杜预以谓舜有明德乃至遂有国义亦然也且文云自幕至瞽瞍无违命舜重之以明德是言舜有明德为天子也乃云殷封遂代守之亦舜德也宋忠云虞思之後箕伯直柄中衰殷汤封遂於陈以为舜後是也】世世守之及胡公周赐之姓【集解杜预曰胡公满遂之後也事周武王赐姓曰妣封之陈】使祀虞帝且盛德之後必百世祀虞之世未也其在齐乎楚灵王灭陈五岁楚公子弃疾弑灵王代立是为平王平王初立欲得和诸侯乃求故陈悼太子师之子吴立为陈侯是为惠公惠公立探续哀公卒时年而为元空籍五岁矣【索隐惠公探取哀公死楚陈灭之後为元年故今空经年籍五岁矣一云籍借也为借失国之後年为五年】七年陈火十五年吴王僚使公子光伐陈取胡沈而去【索隐系本云胡归姓沈姬姓沈国在汝南平舆胡亦在汝南】二十八年吴王阖闾与子胥败楚入郢是年惠公卒子怀公柳立怀公元年吴破楚在郢召陈侯陈侯欲往大夫曰吴新得意楚王虽亡与陈有故不可倍怀公乃以疾谢吴四年吴复召怀公怀公恐如吴吴怒其前不往留之因卒吴陈乃立怀公之子越是为湣公【索隐按左传湣公名周是史官记不同也】湣公六年孔子适陈吴王夫差伐陈取三邑而去十三年吴复来伐陈陈告急楚楚昭王来救军於城父吴师去是年楚昭王卒於城父时孔子在陈【索隐按孔子以鲁定公十四年适陈当湣公之六年上文说是此十三年孔子仍在陈凡经八年何其久也】十五年宋灭曹十六年吴王夫差伐齐败之艾陵使人召陈侯陈侯恐如吴楚伐陈二十一年齐田常弑其君简公二十三年楚之白公胜杀令尹子西子綦袭惠王叶公攻败白公白公自杀二十四年楚惠王复国以兵北伐杀陈湣公遂灭陈而有之是岁孔子卒

杞东楼公者夏后禹之後苗裔也【索隐杞国名也东楼公諡号也不名者并史先失耳宋忠曰杞今陈留雍邱县故地理志云雍邱县故杞国周武王封禹後为东楼公是也盖周封杞而居雍邱至春秋时杞已迁东国故左氏隐四年传云莒人伐杞取牟娄牟娄者东邑也僖十四年传云杞迁缘陵地理志北海有营陵淳于公之县臣瓚云即春秋缘陵淳于公所都之邑又州国名杞後改国号曰州而称淳于公故春秋桓五年经云州公如曹传曰淳于公如曹是也然杞後代又称子者以微小又僻居东夷故襄二十九年经称杞子来盟传曰书曰子贱之也】殷时或封或絶周武王克殷纣求禹之後得东楼公封之於杞【集解宋忠曰杞今陈留雍邱县也】以奉夏后氏祀东楼公生西楼公西楼公生题公题公生谋娶公【集解徐广曰谋作谖索隐娶子與反】谋娶公当周厉王时谋娶公生武公武公立四十七年卒子靖公立靖公二十三年卒子共公立共公八年卒子德公立【集解徐广曰世本曰惠公索隐系本谯周并作惠公又云惠公生成公及桓公是此系家脱成公一代下云弟桓公姑容立非也且成公

又见春秋经传故左氏庄二十五年云杞成公娶鲁女有婚姻之好至僖二十二年卒始赴而书左传云成公也未同盟故不书名是杞有成公必当如譙周所说也】德公十八年卒弟桓公姑容立【集解徐广曰世本曰惠公立十八年生成公及桓公成公立十八年桓公立十七年】桓公十七年卒子孝公伋立【索隐伋音盖】孝公十七年卒弟文公益姑立文公十四年卒弟平公郁立【索隐一作郁厘譙周云名郁来盖郁郁厘来声相近遂不同也】平公十八年卒子悼公成立悼公十二年卒子隐公乞立七月隐公弟遂弑隐公自立是为厘公厘公十九年卒子湣公维立湣公十五年楚惠王灭陈十六年湣公弟阍路弑湣公代立是为哀公【索隐阍音遏哀公杀兄湣公而立諡哀譙周云諡懿也】哀公立十年卒湣公子款立【集解徐广曰款一作速】是为出公出公十二年卒子简公春立立一年楚惠王之四十四年灭杞杞後陈亡三十四年杞小微其事不足称述舜之後周武王封之陈至楚惠王灭之有世家言禹之後周武王封之杞楚惠王灭之有世家言契之後为殷殷有本纪言殷破周封其後於宋齐湣王灭之有世家言后稷之後为周秦昭王灭之有本纪言皐陶之後或封英六【索隐本或作蓼六皆通然蓼六皆咎繇之後据系本二国皆偃姓故春秋文五年传云楚人灭六臧文仲闻六与蓼灭曰皐陶庭坚不祀忽诸杜预云蓼与六皆咎繇後地理志云六安故国皐陶後偃姓为楚所灭又僖十七年齐人徐人伐英氏杜预曰英六皆皐陶後国名是有英蓼英六实未能详或者英改号蓼】楚穆王灭之无谱伯夷之後至周武王复封於齐曰太公望陈氏灭之有世家言伯翳之後至周平王封为秦项羽灭之有本纪言【索隐秦祖伯翳解者以翳益则为一人名今言十一人叙伯翳而又别言垂益则是二人也且按舜本纪叙十人无翳而有彭祖彭祖亦坟典不载未知太史公意如何恐多是误然据秦本纪叙翳之功云佐舜驯调鸟兽与舜典命益作虞若予上下草木鸟兽文同则为一人名必矣今未详其所以】垂益夔龙其後不知所封不见也右十一人者皆唐虞之际名有功德臣也其五人之後皆至帝王【索隐舜禹身为帝王其稷契及翳则後代皆为帝王也】余乃为显诸侯滕薛驺夏殷周之间封也小不足齿列弗论也【索隐滕不知本封盖轩辕氏之子有滕姓是其祖也後周封文王子错叔绣於滕故宋忠云今沛国公邱是滕国也薛奚仲之後任姓盖夏殷所封故春秋有滕侯薛侯邾曹姓之国陆终氏之子会人之後邾国今鲁国驺县是也然三国微小春秋时亦预会盟盖史缺无可叙列也又许太叔太岳之胤二邾曹姓之君并通好诸侯同盟大国不宜全没其事亦可叙其本末补许邾世家】周武王时侯伯尚千余人及幽厉之後诸侯力攻相并江黄胡沈之属不可胜数【索隐系本江黄二国并嬴姓又地理志江国在汝南安阳县】故弗采着于传上

太史公曰舜之德可谓至矣禅位於夏而後世血食者历三代及楚灭陈而田常得政於齐卒为建国百世不絕苗裔兹兹有土者不乏焉至禹於周则杞微甚不足数也楚惠王灭杞其後越王勾践兴

【索隐述赞曰盛德之祀必及百世舜禹余烈陈杞是继妣满受封东楼纂世阍路篡逆夏姬淫嬖二国衰微或沦或替前并後虜皆亡楚惠勾践勃兴田和吞噬蝉联血食岂其苗裔】

史记卷三十六考证

陈杞世家其後因为氏姓姓妘氏○【臣照】按左传疏曰世本帝舜姚姓又哀元年传称虞思妻少康以二姚则是自舜以下犹姓姚也昭八年传曰胡公不淫故周赐之姓是胡公之裔乃姓妘史记则以为胡公之前已姓妘与左传异

厘公六年周宣王即位○年表在厘公五年

二十八年楚庄王卒○年表陈成公八年楚庄王薨十六年吴王夫差伐齐败之艾陵○左传及年表俱在陈湣公之八年

二十四年楚惠王复国以兵北伐杀陈湣公遂灭陈而有之是岁孔子卒○年表陈亡于湣公二十三年孔子亦卒於是年此作二十四年与左传合与孔子之卒差一年

以奉夏后氏祀○祀监本讹作杞今改正

滕薛邾夏殷周之间封也索隐周封文王子错叔绣於滕○世本及杜预世族本皆云周文王子错叔绣唯汉地理志以为周懿王子

故弗采着於传上○【臣照】按上当是云字之讹各本皆同故弗改

史记卷三十六考证

卷三十七

钦定四库全书

史记卷三十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

卫康叔世家第七

卫康叔名封周武王同母少弟也【索隐康畿内国名宋忠曰康叔从康徙封卫卫即殷墟定昌之地畿内之康不知所在也】其次尚有冉季冉季最少武王已克殷纣复以殷余民封纣子武庚禄父比诸侯以奉其先祀勿絶为武庚未集【索隐集和也】恐其有贼心武王乃令其弟管叔蔡叔傅相武庚禄父以和其民武王既崩成王少周公旦代成王治当国管叔蔡叔疑周公乃与武庚禄父作乱欲攻成周【索隐成周洛阳其时周公相成王营洛邑犹居西周镐京管蔡欲构难先攻成周於是周公东居洛邑伐管蔡】周公旦以成王命兴师伐殷杀武庚禄父管叔放蔡叔以武庚殷余民封康叔为卫君居河淇间故商墟【索隐宋忠云今定昌也】周公旦惧康叔齿少乃申告康叔曰必求殷之贤人君子长者问其先殷所以兴所以亡而务爱民告以纣所以亡者以淫於酒酒之失妇人是用故纣之乱自此始为梓材【正义若梓人为材君子观为法则也梓匠人也】示君子可法则故谓之康诰酒诰梓材以命之康叔之国既以此命能和集其民民大说成王长用事举康叔为周司寇赐卫宝祭器以章有德【集解駰案左传曰分康叔以大路大旗少帛綌茷旃旌大吕贾逵曰大路金路也少帛杂帛也綌茷大赤也通帛为旃析羽为旌大吕钟名郑衆曰綌茷旃名也】康叔卒子康伯代立【索隐系本曰康伯名髡宋忠曰即王孙牟也事周康王为大夫按左传所称王孙牟父是也牟髡声相近故不同尔雅周古史考无康伯而云子牟伯立盖以不宜父子俱谥康故因其名云牟伯也】康伯卒子孝伯立孝伯卒子嗣伯立嗣伯卒子伯立【集解駰案史记音义曰音捷索隐系本作摯伯】伯卒子靖伯立靖伯卒子贞伯立【索隐系本作箕伯】贞伯卒子顷侯立顷侯厚赂周夷王夷王命卫为侯【索隐康诰称命尔侯于东土又云孟侯朕其弟小子封则康叔初封已为侯也比子康伯即称伯者谓方伯之伯耳非至子即降爵为伯也故孔安国曰孟长也五侯之长谓方伯方伯州牧也故五代孙祖恒为方伯耳至顷侯德衰不监诸侯乃从本爵而称侯非是至子而削爵及顷侯赂夷王而称侯也】顷侯立十二年卒子厘侯立厘侯十三年周厉王出奔于彘共和行政焉二十八年周宣王立四十二年厘侯卒太子共伯余立为君共伯弟和有宠於厘侯多予之赂和以其赂赂士以袭攻共伯於墓上共伯入厘侯

美自杀【索隐美音延延墓道又音以战反恭伯名余也】卫人因葬之厘侯旁諡曰共伯而立和为卫侯是为武公【索隐知杀恭伯代立此说非也按季札美康叔武公之德又国语称武公年九十五矣犹箴诫於国恭恪于朝作抑自儆至於没身谓之叡圣又诸着卫世子恭伯早卒不云被杀若武公杀兄而代立岂可以为训而形之于国史乎盖太史公采杂说而为此记耳】武公即位修康叔之政百姓和集四十二年犬戎杀周幽王武公将兵往佐周平戎甚有功周平王命武公为公五十五年卒子庄公杨立庄公五年取齐女为夫人好而无子又取陈女为夫人生子蚤死陈女女弟亦幸於庄公而生子完【索隐女弟戴妫也子完为州吁所杀戴妫归陈诗燕燕于飞是也】完母死庄公令夫人齐女子之立为太子【索隐子之谓养之为子也齐女即庄姜也诗硕人篇闵之是也】庄公有宠妾生子州吁十八年州吁长好兵庄公使将石碓谏庄公【集解贾逵曰石碓卫上卿】曰庶子好兵使将乱自此起不听二十三年庄公卒太子完立是为桓公桓公二年弟州吁骄奢桓公绌之州吁出奔十三年郑伯弟段攻其兄不胜亡而州吁求与之友十六年州吁收聚卫亡人以袭杀桓公州吁自立为卫君为郑伯弟段欲伐郑请宋陈蔡与俱三国皆许州吁州吁新立好兵弑桓公卫人皆不爱石碓乃因桓公母家於陈详为善州吁至郑郊石碓与陈侯共谋使右宰丑进食因杀州吁于濮【集解服虔曰右宰丑卫大夫濮陈地索隐贾逵云濮陈地按濮水首受河又受汴汴亦受河东北至离狐分为二俱东北至钜野入济则濮在曹卫之间贾言陈地非也若据地理志陈留封邱县濮水受沛当言陈留水也】而迎桓公弟晋於邢而立之【集解贾逵曰邢周公之胤姬姓国】是为宣公宣公七年鲁弑其君隐公九年宋督弑其君殇公及孔父十年晋曲沃庄伯弑其君哀侯十八年初宣公爱夫人夷姜夷姜生子汲以为太子而令右公子傅之右公子为太子取齐女未入室而宣公见所欲为太子妇者好说而自取之更为太子取他女宣公得齐女生子寿子朔令左公子傅之【集解杜预曰左右媵之子因以为号】太子汲母死宣公正夫人与朔共谗恶太子汲宣公自以其夺太子妻也心恶太子欲废之及闻其恶大怒乃使太子汲於齐而令盗遮界上杀之【正义左传云卫宣公使太子汲之齐使盗待诸莘将杀之杜预曰莘卫地】与太子白旄而告界盗见持白旄者杀之且行子朔之兄寿太子异母弟也知朔之恶太子而君欲杀之乃谓太子曰界盗见太子白旄即杀太子太子可毋行太子曰逆父命求生不可遂行寿见太子不止乃盗其白旄而先驰至界界盗见其验即杀之寿已死而太子汲又至谓盗曰所当杀乃我也盗并杀太子汲以报宣公宣公乃以子朔为太子十九年宣公卒太子朔立是为惠公左右公子不平朔之立也惠公四年左右公子怨惠公之谗杀前太子汲而代立乃作乱攻惠公立太子汲之弟黔牟为君惠公犇齐卫君黔牟立八年齐襄公率诸侯奉王命共伐卫纳惠公诛左右公子卫君黔牟犇于周惠公复立惠公立三年出亡亡八年复入与前通年凡十三年矣二十五年惠公怨周之容舍黔牟与燕伐周周惠王犇温卫燕立惠王弟頹为王二十九年郑复纳惠王三十一年惠公卒子懿公赤立懿公即位好鸛【正义括地志云故鸛城在滑州匡城县西南十五里左传云卫懿公好鸛有乘轩者狄伐卫公欲战国人受甲者皆曰使鸛鸛实有禄位余焉能战俗传懿公养鸛於此城因名也】淫乐奢侈九年翟伐卫卫懿公欲发兵兵或畔大臣言曰君好鸛鸛可令击翟翟於是遂入杀懿公懿公之立也百姓大臣皆不服自懿公父惠公朔之谗杀太子汲代立至於懿公常欲败之卒灭惠公之後而更立黔牟之弟昭伯顽之子申为君是为戴公戴公申元年卒齐桓公以卫数乱乃率诸侯伐翟为卫筑楚邱【正义括地志云城武县有楚邱亭】立戴公弟毁为卫君【集解駢案贾谊书曰卫侯朝於周周行人问其名答曰卫侯辟疆周行人还之曰启疆辟疆天子之号

诸侯弗得用卫侯更其名曰毀然後受之正义毀音毀】是为文公文公以乱故犇齐齐人入之初翟杀懿公也卫人怜之思复立宣公前死太子汲之後汲子又死而代汲死者子寿又无子太子汲同母弟二人其一曰黔牟黔牟尝代惠公为君八年复去其二曰昭伯昭伯黔牟皆已前死故立昭伯子申为戴公戴公卒复立其弟毀为文公文公初立轻赋平罪【索隐轻赋税平断刑也平或作卒卒谓士卒也罪字连下读盖亦一家之义尔】身自劳与百姓同苦以收卫民十六年晋公子重耳过无礼十七年齐桓公卒二十五年文公卒子成公郑立成公三年晋欲假道於卫救宋成公不许晋更从南河度【集解服?曰南河济南之东南流河也杜预曰从汲郡南度出卫南】救宋徵师於卫卫大夫欲许成公不肯大夫元咺攻成公成公出犇【索隐犇楚正义咺况远反】晋文公重耳伐卫分其地予宋讨前过无礼及不救宋患也卫成公遂出犇陈【索隐左传卫侯闻楚师败惧出奔楚遂适陈也】二岁如周求入与晋文公会晋使人鸛卫成公成公私於周主鸛令薄得不死【索隐按私谓赂之也】已而周为请晋文公卒入之卫而诛元咺卫君瑕出犇【索隐是元咺所立者成公入而杀之故僖三十年经云卫杀其大夫元咺及公子瑕此言奔非也】七年晋文公卒十二年成公朝晋襄公十四年秦穆公卒二十六年齐邴歜弑其君懿公【索隐邴歜与左氏同而齐系家作邴戎者盖邴歜掌御戎车故号邴戎邴音丙歜亦作?】三十五年成公卒【集解駰案世本曰成公徙濮阳宋忠曰濮阳帝邱地名】子穆公遯立【正义遯音速】穆公二年楚庄王伐陈杀夏徵舒三年楚庄王围郑郑降复释之十一年孙良夫救鲁伐齐复得侵地穆公卒子定公臧立定公十二年卒子献公衎立献公十三年公令师曹教宫妾鼓琴【集解贾逵曰师曹乐人】妾不善曹答之妾以幸恶曹於公公亦答曹三百十八年献公戒孙文子甯惠子食皆往日旰不召【集解服?曰孙文子林父也甯惠子甯殖也敕戒二子欲共晏食皆服朝衣待命旰晏也】而去射鸿於囿二子从之【集解服?曰从公於囿】公不释射服与之言【集解駰案左传曰不释皮冠】二子怒如宿【集解服?曰孙文子邑也索隐左传作戚此亦音戚】孙文子子数侍公饮【集解駰案左传曰文子子即孙蒯也】使师曹歌巧言之卒章【集解杜预曰巧言诗小雅也其卒章曰彼何人斯居河之麋无拳无勇职为乱阶公欲以譬文子居河上而为乱】师曹又怒公之尝答三百乃歌之欲以怒孙文子报卫献公文子语蘧伯玉伯玉曰臣不知也【集解贾逵曰伯玉卫大夫】遂攻出献公献公犇齐齐置卫献公於聚邑孙文子甯惠子共立定公弟秋为卫君是为殇公【集解徐广曰班氏云献公弟焱】殇公秋立封孙文子林父於宿十二年甯喜与孙林父争宠相恶殇公使甯喜攻孙林父林父犇晋复求入故卫献公献公在齐齐景公闻之与卫献公如晋求入晋为伐卫诱与盟卫殇公会晋平公平公执殇公与甯喜而复入卫献公献公亡在外十二年而入献公後元年诛甯喜三年吴延陵季子使过卫见蘧伯玉史鰌曰卫多君子其国无故过宿孙林父为击磬曰不乐音大悲使卫乱乃此矣是年献公卒子襄公恶立襄公六年楚灵王会诸侯襄公称病不往九年襄公卒初襄公有贱妾幸之有身梦有人谓曰我康叔也令若子必有卫名而子曰元妾怪之问孔成子【集解服?曰卫卿孔炀】成子曰康叔者卫祖也及生子男也以告襄公襄公曰天所置也名之曰元襄公夫人无子於是乃立元为嗣是为灵公灵公五年朝晋昭公六年楚公子弃疾弑灵王自立为平王十一年火三十八年孔子来鲁之如鲁後有隙孔子去後复来三十九年太子蒯聩与灵公夫人南子有恶【集解贾逵曰南子宋女】欲杀南子蒯聩与其徒戏阳遯谋朝使杀夫人【集解贾逵曰戏阳遯太子家臣正义戏音羲】戏阳後悔不果蒯聩数日之夫人觉之惧呼曰【正义呼火故反】太子欲杀我灵公怒太子蒯聩犇宋已而之晋赵氏四十二年春灵公游

于郊令子郢仆【集解贾逵曰仆御也】郢灵公少子也字子南灵公怨太子出犇谓郢曰我将立若为後郢对曰郢不足以辱社稷君更图之【集解服虔曰郢自谓己无德不足立以污辱社稷】夏灵公卒夫人命子郢为太子曰此灵公命也郢曰亡人太子蒯聩之子辄在也不敢当於是卫乃以辄为君是为出公六月乙酉赵简子欲入蒯聩乃令阳虎诈命卫十余人衰絰归【集解服虔曰衰絰为若从卫来迎太子也】简子送蒯聩卫人闻之发兵击蒯聩蒯聩不得入入宿而保卫人亦罢兵出公辄四年齐田乞弑其君孺子八年齐鲍子弑其君悼公孔子自陈入卫九年孔文子问兵於仲尼仲尼不对其後鲁迎仲尼仲尼反鲁十二年初孔圉文子取太子蒯聩之姊生愷孔氏之竖浑良夫美好孔文子卒良夫通於愷母太子在宿愷母使良夫於太子太子与良夫言曰苟能入我国报子以乘轩免子三死母所与【集解杜预曰轩大夫车也三死死罪三正义杜预云三罪紫衣袒裘带劔也紫衣君服也热故偏袒不敬也卫侯求令名者与之食焉太子请使良夫良夫紫衣狐裘不释劔而食太子使牵退数之罪而杀之】与之盟许以愷母为妻閏月良夫与太子入舍孔氏之外圃【集解服虔云圃园】昏二人蒙衣而乘【集解服虔曰二人谓良夫太子蒙衣为妇人之服以巾蒙其头而共乘也】宦者罗御如孔氏孔氏之老嫗甯问之【集解服虔曰家臣称老问其姓名】称姻妾以告【集解贾逵曰姻家妾也】遂入适伯姬氏【集解服虔曰入孔氏家适伯姬所居】既食愷母杖戈而先【集解服虔曰先至孔愷所】太子与五人介舆猓从之【集解贾逵曰介被甲也舆猓豚欲以盟故也】伯姬劫愷於厠强盟之遂劫以登台【集解服虔曰於卫台上召卫羣臣】嫗甯将饮酒炙未熟闻乱使告仲由【集解服虔曰季路为孔氏邑宰故告之】召护驾乘车【集解服虔曰召护卫大夫驾乘车不驾兵车也言无距父之意】行爵食炙【集解服虔曰嫗甯使召季路乃行爵食炙】奉出公辄犇鲁【集解服虔曰召护奉卫侯】仲由将入遇子羔将出【集解贾逵曰子羔卫大夫高柴孔子弟子也将出犇】曰门已闭矣子路曰吾姑至矣【集解杜预曰且欲至门】子羔曰不及莫践其难【集解贾逵曰言家臣忧不及国不得践履其难郑衆曰是时辄已出不及事不当践其难子羔言不及以为季路欲死国也】子路曰食焉不辟其难【服虔曰言食愷之禄欲救愷之难此明其不死国也】子羔遂出子路入及门公孙敢阖门曰毋入为也【集解服虔曰公孙敢卫大夫言辄已出无为复入】子路曰是公孙也求利而逃其难由不然利其禄必救其患有使者出子路乃得入曰太子焉用孔愷虽杀之必或继之【集解王肃曰必有继续其後攻太子】且曰太子无勇若燔台必舍孔叔太子闻之惧下石乞孟黶敌子路【集解服虔曰二子蒯聩之臣敌当也正义燔音烦舍音舍黶音乙减反】以戈击之割纓子路曰君子死冠不免【集解服虔曰不使冠在地】结纓而死【正义纓冠綏也】孔子闻卫乱曰嗟乎柴也其来乎由也其死矣孔愷竟立太子蒯聩是为庄公庄公蒯聩者出公父也居外怨大夫莫迎立元年即位欲尽诛大臣曰寡人居外久矣子亦尝闻之乎羣臣欲作乱乃止二年鲁孔丘卒三年庄公上城见戎州【集解贾逵曰戎州戎人之邑索隐左传云戎州人攻之是也隐二年公会戎于潜杜预云陈留济阳县东南有戎城济阳与卫近故庄公登台而望见戎州又七年云戎伐凡伯于楚邱是戎与卫相近也】曰戎虜何为是戎州病之十月戎州告赵简子简子围卫十一月庄公出犇【索隐左传庄公本由晋赵氏纳之立而背晋晋伐卫卫人出庄公立公子般师晋师退庄公复入般师出奔初公登城见戎州已氏之妻髮美髡之以为夫人髡又欲剪戎州兼逐石圃故石圃攻庄公庄公惧踰北墙折股入已氏已氏杀之今系家不言庄公复入及死已氏直云出奔亦其疎也又左传云卫复立般师齐伐卫立公子起执般师明年卫石圃逐其君起起奔齐出公辄复归是左氏详而系家畧也】卫人立公子斑

师为卫君【集解駟案左传曰斑师襄公之孙】齐伐卫虜斑师更立公子起为卫君【集解服虔曰起灵公子】卫君起元年卫石曼专逐其君起【索隐左传作石圃此专音圃谷梁作曼姑专或音姑诸本多无曼字】起犇齐卫出公辄自齐复归立初出公立十二年亡在外四年复入出公後元年赏从亡者立二十一年卒【索隐按出公初立十二年亡在外四年复入九年卒是立二十一年自即位至卒凡经二十五年而卒于越】出公季父黔攻出公子而自立是为悼公悼公五年卒【索隐纪年云四年卒于越系本名?】子敬公弗立【集解駟案世本云敬公费也】敬公十九年卒子昭公纠立【索隐系本云敬公生桡公舟非也】是时三晋强卫如小侯属之【正义属赵也】昭公六年公子亹【正义音尾】弑之代立是为怀公怀公十一年公子伋弑怀公而代立是为慎公慎公父公子适【索隐音的系本适作??悼公也】适父敬公也慎公四十二年卒子声公训立【索隐训亦作驯同休运反系本作圣公驰】声公十一年卒子成侯遯立【索隐音速系本作不逝按上穆公已名遯不可成侯更名则系本是也】成侯十一年公孙鞅入秦【索隐秦本纪云孝公元年鞅入秦又按年表成侯与秦孝公同年然则十一年当为元年字误尔】十六年卫更贬号曰侯二十九年成侯卒子平侯立平侯八年卒子嗣君立【索隐乐资据纪年以嗣君即孝襄侯】嗣君五年更贬号曰君独有濮阳四十二年卒子怀君立怀君三十一年朝魏魏囚杀怀君魏更立嗣君弟是为元君元君为魏壻故魏立之【集解徐广曰班氏云元君者怀君之弟】元君十四年秦拔魏东地秦初置东郡更徙卫野王县而并濮阳为东郡【索隐魏都大梁濮阳黎阳并是魏之东地故立郡名东郡也】二十五年元君卒子君角立【集解駟案年表云元君十一年秦置东郡十二年徙野王三十三年卒索隐年表与此不同徐注备矣】君角九年秦并天下立为始皇帝二十一年二世废君角为庶人卫絶祀

太史公曰余读世家言至於宣公之太子以妇见诛弟寿争死以相让此与晋太子申生不敢明骊姬之过同俱恶伤父之志然卒死亡何其悲也或父子相杀兄弟相灭亦独何哉

【索隐述赞曰司寇受封梓材有作成锡厥器夷加其爵暨武能修从文始约诗美归燕传矜石碣皮冠射鸿乘轩使鹤宣纵淫嬖豐生汲朔蒯聩得罪出公行恶卫祚日衰失於君角】

史记卷三十七

史记卷三十七考证

卫康叔世家告以紂所以亡者以淫於酒酒之失妇人是用故紂之乱自此始○王若虚辨惑曰酒诰之文曷尝有用妇人语

顷侯厚赂周夷王夷王命卫为侯○顾炎武曰是顷侯以前之称伯乃伯子男之伯也索隐以为方伯之伯虽有诗序毛?责卫伯之文可据郑氏笺曰卫康叔封爵称侯今日伯者时为州伯周礼九命作伯然非太史公意也且古亦无以方伯之伯而系諡者周公召公二伯也其諡则曰文公康公【臣照】按卫始封侯见于书为方伯见于诗诗书并有文岂得复疑索隐谓史迁之误是也顾炎武申龙门而难小司马泥矣谓古无以方伯之伯而系諡者安知其无耶何

不即举卫为有之验耶

共伯入厘侯姜自杀○【臣照】按大事记曰武公在位五十五年国语又称武公年九十有五犹箴傲于国计其初即位其齿益已四十余矣使果弑共伯而篡立则共伯见弑之时其齿又加长於武公安得谓之蚤死乎髦者子事父母之饰诸侯既小敛则脱之史记谓厘侯已葬而共伯自杀则是时共伯已脱髦矣诗安得犹谓之髦彼两髦乎是共伯未尝有见弑之事武公未尝有篡弑之恶也

庄公五年取齐女为夫人好而无子又取陈女为夫人生子蚤死陈女女弟亦幸於庄公而生子完完母死○毛诗疏曰礼诸侯不再娶且庄姜仍在左传唯言又娶于陈不言为夫人世家云又娶陈女为夫人非也左传唯言戴妫生桓公庄姜养之以为己子不言其死云完母死亦非也

太子完立是为桓公○左传疏曰石碣言将立州吁乃定之矣请定州吁明太子之位未定卫世家言立完为太子非也

为郑伯弟段欲伐郑○【臣召南】按左传及宋世家郑内公子冯州吁弑君自立欲免诸侯故为公子冯而伐郑此云因州吁友于叔段为段伐郑与彼异

十年晋曲沃庄伯弑其君哀侯○【臣照】按庄伯卒于哀侯之二年是为卫宣之三年此庄伯二字明是武公之误观年表及晋世家自见

惠公立三年出亡○【臣人龙】按上文云四年此云三年又按左传鲁桓公十六年冬惠公奔齐则四年是矣

与前通年凡十三年矣○许应元曰左传卫朔立四年出亡八年复入通年十二此言十三年既与左传不同又与上文年数不合

二十九年郑复纳惠王○左传及年表俱在二十七年齐桓公以卫数乱乃率诸侯伐翟为卫作楚邱立戴公弟毁为卫君○【臣照】按左传鲁僖之二年诸侯城楚邱事在卫文之二年年表亦同此叙在文公立前与彼互异

十六年晋公子重耳过无礼○左传及年表俱在二十三年

成公出奔索隐奔楚○【臣照】按左传卫侯请盟晋人弗许卫侯欲与楚国人不欲故出其君以说于晋卫侯出於襄牛杜预曰襄牛卫地又下文索隐云楚师败惧乃出奔楚此索隐衍文

齐置卫献公于聚邑○【臣世骏】按左传齐人以郕寄卫侯杜预曰郕齐所灭郕国音来此

作聚互异

孙文子甯惠子共立定公弟秋为卫君○秋左传作剽孙林父为击磬曰不乐音大悲使卫乱乃此矣○王若虚辨惑曰吴世家云季札自卫如晋将舍於宿闻钟声曰异哉吾闻之辨而不德必加于戮夫子获罪于君以在此惧犹不足而又可以畔乎夫子之在此犹燕之巢於幕也君在殡而可以乐乎遂去之文子闻之终身不听琴瑟卫世家云季子过宿孙文子为击磬曰不乐音大悲使卫乱乃此矣一以为钟一以为磬此未足深病然如前说则是文子自作乐而季子适闻之也如後说则是文子为札而作也前说则罪其不自愧惧而安于娱乐後说则以音声之悲而知其为乱之愆是何乖异而不同耶按前说本於左氏当是後说正有他据亦相矛盾而不应取也且左氏但言又何乐而史记改之云可以畔乎其义亦乖盖获罪于君即所谓畔也而何在于击钟耶司马贞既知其非矣而曰畔字读为乐亦强为之说也

元君十四年秦拔魏东地秦初置东郡更徙卫野王县而并濮阳为东郡○六国年表作十一年

史记卷三十七考证

卷三十八

钦定四库全书

史记卷三十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

宋微子世家第八

微子开者【集解孔安国曰微畿内国名子爵也为纣卿士索隐按尚书微子之命篇云命微子启代殷後今此名开者避汉景帝讳也】殷帝乙之首子而纣之庶兄也【索隐按尚书亦以为殷王元子而是纣之兄吕氏春秋云生微子时母犹为妾及为妃而生纣故微子为纣同母庶兄】纣既立不明淫乱於政微子数谏纣不聽及祖伊以周西伯昌之修德灭纣【集解徐广曰音耆索隐耆即黎也邹诞云本音黎孔安国云黎在上党东北即今之黎亭】国惧祸至以告纣纣曰我生不有命在天乎是何能为於是微子度纣终不可谏欲死之及去未能自决乃问於太师少师【集解孔安国曰太师三公箕子也少师孤卿比干也】曰殷不有治政不治四方【集解孔安国曰言殷不有治政四方之事将必亡也】我祖遂陈於上【集解马融曰我祖汤也孔安国曰言汤遂其功陈力於上世也】纣沈湎於酒妇人是用乱败汤德於下【集解马融曰下下世也】殷既小大好草窃奸宄【集解孔安国曰草野盗窃又为奸宄於外内】卿士师师非度【集解马融曰非但小人学为奸宄卿士已下转相师效为非法度】皆有罪辜乃无维获【集解郑玄曰获得也羣臣皆有是罪其爵禄又无常得之者言屡相攻夺】小民乃并兴相为敌讐【集解孔安国曰卿士既乱而小民各起共为敌讐言不和同】今殷其典丧若涉水无津涯【集解徐广曰一作涉水无舟航言危也駰谓典国典也索隐尚书典作沦篆字变易其义亦殊丧音息浪反】殷遂丧越至于今【集解马融曰越於也於是至矣於今到矣】曰太师少师【集解马融曰重呼告之】我其发出往【集解郑玄曰发起也纣祸败如此我其起作出往也索隐往尚书作狂盖亦今文尚书意异尔】吾家保于丧【集解徐广曰一云於是家保駰案马融曰卿大夫称家】今女无故告【集解王肃曰无意告我也是微子求教诲也】予颠跻如之何其【集解马融曰跻犹坠也恐颠坠於非义当如之何也郑玄曰其语助也齐鲁之间声如姬记曰何居】太师若曰王子天笃下菑亡殷国【集解孔安国曰微子帝乙子故曰王子天生纣为乱是下菑也郑玄曰少师不答志在必死正义菑音灾】乃母畏畏不用老长【集解孔安国曰上不畏天菑下不畏贤人违戾耆老之长不用其教】今殷民乃陋淫神祇之祀【集解徐广曰一云今殷民侵神牺又一云陋淫侵神

祗駟案马融曰天曰神地曰祗索隐尚书作攘窃刘氏云陋淫犹轻秽也】今诚得治国国治身死不恨为死终不得治不如去遂亡箕子者【集解马融曰箕国名也子爵也】纣亲戚也【索隐司马彪曰箕子名胥余马融王肃以箕子为纣之诸父服?杜预以为纣之庶兄杜预云梁国蒙县有箕子冢】纣始为象箸【索隐箸音持畧反按下文云为象箸必为玉杯杯箸事相近周礼六樽有牺象箸壶泰山箸尊者箸地无足是也刘氏音直虑反则杯箸亦食用之物并通为器】箕子叹曰彼为象箸必为玉栝为栝则必思远方珍怪之物而御之矣舆马宫室之渐自此始不可振也纣为淫佚箕子谏不聽人或曰可以去矣箕子曰为人臣谏不聽而去是彰君之恶而自说於民吾不忍为也乃被髮佯狂而为奴遂隐而鼓琴以自悲故传之曰箕子操【集解駟案风俗通义曰其道闭塞忧愁而作者命其曲曰操操者言遇菑遭害困厄穷迫虽怨恨失意犹守礼义不惧不慑乐道而不改其操也】王子比干者亦纣之亲戚也见箕子谏不聽而为奴则曰君有过而不以死争则百姓何辜乃直言谏纣怒曰吾闻圣人之心有七窍信有诸乎乃遂杀王子比干刳视其心微子曰父子有骨肉而臣主以义属故父有过子三谏不聽则随而号之人臣三谏不聽则其义可以去矣於是太师少师乃劝微子去遂行【集解駟案时比干已死而云少师者似误】周武王伐纣克殷微子乃持其祭器造於军门肉袒面缚【索隐肉袒者袒而露肉也面缚者缚手於背而面向前也刘氏云面即背也义稍迂】左牵羊右把茅膝行而前以告於是武王乃释微子复其位如故武王封纣子武庚禄父以续殷祀使管叔蔡叔傅相之武王既克殷访问箕子武王曰於乎维天陰定下民相和其居【集解孔安国曰天不言而默定下民助合其居使有常生之资也】我不知其常伦所序【集解孔安国曰言我不知天所以定民之常道理次序问何由】箕子对曰在昔鯀陟鸿水汨陈其五行【集解孔安国曰陟塞汨乱也治水失道是乱陈五行】帝乃震怒不从鸿范九等常伦所斲【集解徐广曰一作释駟案郑玄曰帝天也天以鯀如是乃震动其威怒不与天道大法九类言王所问所由败也】鯀则殛死禹乃嗣兴【集解郑玄曰春秋传曰舜之诛也殛鯀其举也兴禹】天乃锡禹鸿范九等常伦所序【集解孔安国曰天与禹洛出书也神龟负文而出列於背有数至于九禹遂因而第之以成九类】初一日五行二曰五事三曰八政四曰五纪五曰皇极六曰三德七曰稽疑八曰庶徵九曰向用五福畏用六极【集解马融曰言天所以畏惧人用六极】五行一曰水二曰火三曰木四曰金五曰土【集解郑玄曰此数本诸陰阳所生之次也】水曰润下火曰炎上【集解孔安国曰言其自然之常性也】木曰曲直【集解孔安国曰木可揉使曲直也】金曰从革【集解马融曰金之性从人而更可销铄】土曰稼穡【集解王肃曰种之曰稼歛之曰穡】润下作咸【集解孔安国曰水卤所生】炎上作苦【集解孔安国曰焦气之味】曲直作酸【集解孔安国曰木实之性】从革作辛【集解孔安国曰金气之味】稼穡作甘【集解孔安国曰甘味生於百谷五行以下箕子所陈】五事一曰貌二曰言三曰视四曰聽五曰思貌曰恭言曰从【集解马融曰发言当使可从】视曰明聽曰聰思曰睿【集解马融曰睿通也】恭作肃从作治【集解马融曰出令而从所以为治也】明作智聰作谋【集解孔安国曰所谋必成审也马融曰上聰则下进其谋】睿作圣【集解孔安国曰於事无不通谓之圣】八政一曰食二曰货三曰祀四曰司空【集解马融曰司空掌营城郭主空土以居民】五曰司徒【集解孔安国曰主徒衆教以礼义】六曰司寇【集解马融曰主诛寇害】七曰宾【集解郑玄曰掌诸侯朝覲之官】八曰师【集解郑玄曰掌军旅之官】五纪一曰岁二曰月三曰日四曰星辰【集解马融曰星二十八宿辰日月之所会也郑玄曰星五星也】五曰历数【集解孔安国曰历数节气之度以为

历数敬授民时】皇极皇建其有极【集解孔安国曰大中之道大立其有中谓行九畴之义】歛时五福用傳锡其庶民【集解马融曰当歛是五福之道用布与衆民】维时其庶民于女极【集解马融曰以其能歛是五福故衆民於汝取中正以归心也】锡女保极【集解郑玄曰又赐女以守中之道】凡厥庶民母有淫朋人母有比德维皇作极【集解孔安国曰民有善则无淫过朋党之恶比周之德惟天下皆大中正也】凡厥庶民有猷有为有守女则念之【集解马融曰凡其庶民有谋有所执守当思念其行有所趣舍也】不协于极不于咎皇则受之【集解孔安国曰凡民之行虽不合於中而不罹於咎恶皆可进用大法受之】而安而色曰予所好德女则锡之福【集解孔安国曰女当安女顔色以谦下人人曰我所好者德也女则与之爵禄】时人斯其维皇之极【集解孔安国曰不合于中之人女与之福则是人此其惟大之中言可勉进也】母侮鰥寡而畏高明【集解马融曰高明显宠者不枉法畏之】人之有能有为使羞其行而国其昌【集解王肃曰使进其行任之以政则国为之昌】凡厥正人既富方谷【集解孔安国曰正直之人既当爵禄富之又当以善道接之】女不能使有好于而家时人斯其辜【集解孔安国曰不能使正人有好於国家则是人斯其诈取罪而去也】于其母好女虽锡之福其作女用咎【集解郑玄曰无好於女家之人虽赐之以爵禄其动作为女用恶谓为天子结怨於民】母偏母颇遵王之义【集解孔安国曰偏不平颇不正言当修先王正义以治民】母有作好遵王之道【集解马融曰好私好】母有作恶遵王之路母偏母党王道荡荡【集解孔安国曰言开辟也郑玄曰党朋党】母党母偏王道平平【集解孔安国曰言辨治也】母反母侧王道正直【集解马融曰反反道也侧倾侧也】会其有极【集解郑玄曰谓君也当会聚有中之人以为臣也】归其有极【集解郑玄曰谓臣也当就有中之君而事之】曰王极之傳言【集解马融曰王者当尽极行之使臣下布陈其言】是夷是训于帝其顺【集解马融曰是大中而常行之用是教训天下於夫为顺也】凡厥庶民极之傳言【集解马融曰亦尽极敷陈其言於上也】是顺是行【集解王肃曰民纳言於上而得中者则顺而行之】以近天子之光【集解王肃曰近犹益也顺行民言所以益天子之光】曰天子作民父母以为天下王【集解王肃曰政教中民善是用所以为民父母而为天下所归往】三德一曰正直【集解郑玄曰中平之人】二曰刚克三曰柔克【集解郑玄曰克能也刚而能柔柔而能刚寬猛相济以成治功】平康正直【集解孔安国曰世平康用正直治之】强不友刚克【集解孔安国曰友顺也世强御不顺以刚能治之】内友柔克【集解孔安国曰世和顺以柔能治之也索隐内当为燮燮和也】沈渐刚克【集解马融曰沈陰也潜伏也陰伏之谋谓贼臣乱子非一朝一夕之渐君亲无将将而诛焉索隐尚书作沈潜此字作渐其义当依马注】高明柔克【集解马融曰高明君子亦以德怀也】维辟作福维辟作威维辟玉食【集解马融曰辟君也玉食美食不言王者关诸侯也郑玄曰作福专爵赏也作威专刑罚也玉食备珍美也】臣无有作福作威玉食臣有作福作威玉食其害于而家凶于而国人用侧颇辟民用僭忒【集解孔安国曰在位不端平则下民僭差】稽疑择建立卜筮人【集解孔安国曰龟曰卜蓍曰筮考正疑事当选择知卜筮人而建立之】乃命卜筮曰雨曰济曰涕【集解駉案尚书作圉索隐涕音亦尚书作驿孔安国曰气骆驿下连续今此文作涕是涕泣亦相连之状】曰雾【集解徐广曰一曰洩曰被索隐雾音蒙然蒙与雾亦通徐氏所见本涕作洩蒙作被义通而字变耳】曰克曰贞曰悔凡七卜五占之用二衍賁【集解郑玄曰卜五占之用谓雨济圉雾克也二衍賁谓贞悔也将立卜筮人乃先命名兆封而分别之兆卦之名凡七龟用五易用二审此道者乃立之也雨者兆之体气如

雨然也济者如雨止之云气在上者也圉者色泽而光明也雾者气不释郁冥冥也克者如禊气之色相犯也内卦曰贞贞正也外卦曰悔悔之言晦也晦犹终也卦象多变故言衍賁】立时人为卜筮【集解郑玄曰立是能分别兆卦之名者以为卜筮人】三人占则从二人之言【集解郑玄曰从其多者蓍龟之道幽微难明慎之深】女则有大疑谋及女心谋及卿士谋及庶人谋及卜筮【集解孔安国曰先尽谋虑然後卜筮以决之】女则从龟从筮从卿士从庶民从是之谓大同【集解孔安国曰大同於吉】而身其康强而子孙其逢吉【集解孔安国曰动不违衆故後世遇吉也】女则从龟从筮从卿士逆庶民逆吉卿士从龟从筮从女则逆庶民逆吉庶民从龟从筮从女则逆卿士逆吉【集解郑玄曰此三者皆从多故为吉】女则从龟从筮逆卿士逆庶民逆作内吉作外凶【集解郑玄曰此逆者多以故举事於境内则吉境外则凶】龟筮共违于人用静吉用作凶【集解孔安国曰安以守常则吉动则凶郑玄曰龟筮皆与人谋相违人虽三从犹不可以举事】庶徵曰雨曰阳曰暍曰寒曰风曰时【集解孔安国曰雨以润物阳以乾物煖以长物寒以成物风以动物五者各以时所以为衆验】五者来备各以其序庶草繁庠【集解孔安国曰言五者备至各以次序则衆草木繁庠滋丰也】一极备凶一极亡凶【集解孔安国曰一者备极过甚则凶一者极无不至亦凶谓其不时失叙之谓也】曰休徵【集解孔安国曰叙美行之验】曰肃时雨若【集解孔安国曰君行敬则时雨顺之】曰治时阳若【集解孔安国曰君政治则时阳顺之】曰知时暍若【集解孔安国曰君昭哲则时煖顺之】曰谋时寒若【集解孔安国曰君能谋则时寒顺之】曰圣时风若【集解孔安国曰君能通理则时风顺之】曰咎徵【集解孔安国曰叙恶行之验】曰狂常雨若【集解孔安国曰君行狂妄则常雨顺之】曰僭常阳若【集解孔安国曰君行僭差则常阳顺之】曰舒常暍若【集解孔安国曰君行逸豫则常煖顺之索隐舒依字读按下有曰急也】曰急常寒若【集解孔安国曰君行急则常寒顺之】曰雾常风若【集解孔安国曰君行雾闇则常风顺之】王胥维岁【集解马融曰言王者所胥职如岁兼四时也】卿士维月【集解孔安国曰卿士各有所掌如月之有别】师尹维日【集解孔安国曰衆正官之吏分治其职如日之有岁月也】岁月曰时母易【集解孔安国曰各顺常】百谷用成治用明【集解孔安国曰岁月无易则百谷成君臣无易则政治明】峻民用章家用平康【集解孔安国曰贤臣显用国家平宁】日月岁时既易百谷用不成治用昏不明峻民用微家用不宁庶民维星【集解孔安国曰星民象故衆民惟若星也】星有好风星有好雨【集解马融曰箕星好风毕星好雨】日月之行有冬有夏【集解孔安国曰日月之行冬夏各有常度】月之从星则以风雨【集解孔安国曰月经于箕则多风离于毕则多雨政教失常以从民欲亦所以乱】五福一曰壽二曰富三曰康宁【集解郑玄曰康宁平安】四曰攸好德【集解孔安国曰所好者德福之道】五曰考终命【集解孔安国曰各成其短长之命以自终不横夭】六极一曰凶短折【集解郑玄曰未亂曰凶未冠曰短未?曰折索隐未亂未毀齿也音楚?反】二曰疾三曰忧四曰贫五曰恶【集解孔安国曰恶丑陋也】六曰弱【集解郑玄曰愚懦不壮毅曰弱】於是武王乃封箕子於朝鲜【索隐朝鲜音潮仙地因水为名】而不臣也其後箕子朝周过故殷虚感宫室毁坏生禾黍箕子伤之欲哭则不可欲泣为其近妇人【索隐妇人之性多涕泣也】乃作麦秀之诗以歌咏之其诗曰麦秀渐渐兮禾黍油油【索隐渐渐麦芒之状音子廉反又依字读油油者禾黍之苗光悦貌】彼狡童兮不与我好兮所谓狡童者纣也殷民闻之皆为流涕【集解杜预曰梁国蒙县有箕子冢】武王崩成王少周公旦代行政当国管蔡疑之乃与武庚作乱欲袭成王周公【集解徐广曰一云欲袭成周

】周公既承成王命诛武庚杀管叔放蔡叔乃命微子开代殷後奉其先祀作微子之命以申之国于宋【集解駟案世本曰宋更曰睢阳】微子故能仁贤乃代武庚故殷之余民甚戴爱之微子开卒立其弟衍是为微仲【集解駟案礼记曰微子舍其孙腄而立衍也郑玄曰微子适子死立其弟衍殷礼也索隐家语微子弟仲思名衍一名泄嗣微子为宋公虽迁爵易位而班级不过其故故以旧官为称故二微虽为宋公犹以微称之至子稽乃称宋公也】微仲卒子宋公稽立【集解譙周云未諡故名之】宋公稽卒子丁公申立丁公申卒子湣公共立湣公共卒弟炆公熙立炆公即位湣公子鮒祀弑炆公而自立【集解徐广曰鮒一作魴索隐譙周亦作魴祀据左氏即湣公庶子也弑炆公欲立太子弗父何何让不受】曰我当立是为厉公厉公卒子厘公举立厘公十七年周厉王出犇彘二十八年厘公卒子惠公颺立【集解吕忱曰颺音古莧反】惠公四年周宣王即位三十年惠公卒子哀公立哀公元年卒子戴公立戴公二十九年周幽王为犬戎所杀秦始列为诸侯三十四年戴公卒子武公司空立武公生女为鲁惠公夫人生鲁桓公十八年武公卒子宣公立宣公有太子与夷十九年宣公病让其弟和曰父死子继兄死弟及天下通义也我其立和和亦三让而受之宣公卒弟和立是为穆公穆公九年病召大司马孔父谓曰先君宣公舍太子与夷而立我我不敢忘我死必立与夷也孔父曰羣臣皆愿立公子冯穆公曰母立冯吾不可以负宣公於是穆公使冯出居于郑八月庚辰穆公卒兄宣公子与夷立是为殇公君子闻之曰宋宣公可谓知人矣立其弟以成义然卒其子复享之殇公元年卫公子州吁弑其君完自立欲得诸侯使告於宋曰冯在郑必为乱可与我伐之宋许之与伐郑至东门而还二年郑伐宋以报东门之役其後诸侯数来侵伐九年大司马孔父嘉妻好出道遇太宰华督【集解服?曰督戴公之孙】督说目而观之【集解服?曰目者极视睛不转也】督利孔父妻乃使人宣言国中曰殇公即位十年尔而十一战【集解贾逵曰一战伐郑围以东门二战取其禾三战取邾田四战邾郑伐宋入其郛五战伐郑围长葛六战郑以王命伐宋七战鲁败宋师于菅八战宋卫入郑九战伐戴十战郑入宋十一战郑伯以虢师大败宋】民苦不堪皆孔父为之我且杀孔父以宁民是岁鲁杀其君隐公十年华督攻杀孔父取其妻殇公怒遂杀殇公而迎穆公子冯於郑而立之是为庄公庄公元年华督为相九年执郑之祭仲要以立突为郑君祭仲许竟立突十九年庄公卒子湣公捷立湣公七年齐桓公即位九年宋水鲁使臧文仲往吊水【集解贾逵曰问凶曰吊】湣公自罪曰寡人以不能事鬼神政不修故水臧文仲善此言此言乃公子子鱼教湣公也十年夏宋伐鲁战於乘丘【集解徐广曰乘一作腰駟案杜预曰乘丘鲁地】鲁生虏宋南宫万【集解贾逵曰南宫氏万名宋卿】宋人请万万归宋十一年秋湣公与南宫万猎因博争行湣公怒辱之曰始吾敬若今若鲁虏也万有力病此言遂以局杀湣公于蒙泽【集解贾逵曰蒙泽宋泽名也杜预曰宋地梁国有蒙县】大夫仇牧闻之以兵造公门万?牧牧齿着门阖死【集解何休曰阖门扇】因杀太宰华督乃更立公子游为君诸公子犇萧公子御说犇毫【集解服?曰萧毫宋邑也杜预曰今沛国有萧县蒙县西北有毫城也】万弟南宫牛将兵围毫冬萧及宋之诸公子共击杀南宫牛弑宋新君游而立湣公弟御说是为桓公宋万犇陈宋人请以赂陈陈人使妇人饮之醇酒【集解服?曰宋万多力勇不可执故先使妇人诱而饮之酒醉而缚之】以革裹之归宋【集解駟案左传曰以犀革裹之】宋人醢万也【集解服?曰醢肉酱】桓公二年诸侯伐宋至郊而去三年齐桓公始霸二十三年迎卫公子毀於齐立之是为卫文公文公女弟为桓公夫人秦穆公即位三十年桓公病太子兹甫让其庶兄目夷为嗣桓公义太子意竟不聽三十一年春桓公卒太子兹甫立是为襄公以其庶兄目夷为相未葬而齐桓

公会诸侯于葵丘襄公往会襄公七年宋地霰星如雨与雨偕下【集解駰案左传曰陨石于宋五陨星也】六鵩退蜚【集解駰案公羊传曰视之则六察之则鵩徐察之则退飞索隐按僖十六年左传霰星于宋五霰星也六鵩退飞过宋都是当宋襄公之时访内史叔兴曰吉凶焉在对曰君将得诸侯而不终也然庄七年传又云恒星不见夜中星霰如雨与雨偕也且与雨偕下自在别年不与霰星退鵩之事同此史以霰星为霰星遂连恒星不见之时与雨偕为文故与左传小异也】风疾也【集解贾逵曰风起於远至宋都高而疾故鵩逢风却退】八年齐桓公卒宋欲为盟会十二年春宋襄公为鹿上之盟【集解杜预曰鹿上宋地汝陰有原鹿县索隐按汝陰原鹿其地在楚僖二十一年宋人楚人齐人盟于鹿上是也然襄公求诸侯于楚楚才许之诈未合至汝陰鹿上今济陰乘氏县北有鹿城盖此地也】以求诸侯於楚楚人许之公子目夷諫曰小国争盟祸也不聽秋诸侯会宋公盟于孟【集解杜预曰孟宋地】目夷曰祸其在此乎君欲已甚何以堪之於是楚执宋襄公以伐宋冬会于亳以释宋公子鱼曰祸犹未也十三年夏宋伐郑子鱼曰祸在此矣秋楚伐宋以救郑襄公将战子鱼諫曰天之弃商久矣不可冬十一月襄公与楚成王战于泓【集解駰案谷梁传曰战于泓水之上】楚人未济目夷曰彼衆我寡及其未济击之公不聽已济未陈又曰可击公曰待其已陈陈成宋人击之宋师大败襄公伤股国人皆怨公公曰君子不困人於厄不鼓不成列【集解何休曰军法以鼓战以金止不鼓不战也不成列未成陈】子鱼曰兵以胜为功何常言与【集解徐广曰一云尚何言与】必如公言即奴事之尔又何战为楚成王已救郑郑享之去而取郑二姬以归【索隐谓郑夫人聃氏姜氏之女既是郑女故云二姬】叔瞻曰成王无礼【正义谓取郑二姬也】其不没乎为礼卒於无别有以知其不遂霸也是年晋公子重耳过宋襄公以伤於楚欲得晋援厚礼重耳以马二十乘【集解服虔曰八十匹】十四年夏襄公病伤於泓而竟卒【索隐春秋战于泓在僖二十三年重耳过宋及襄公卒在二十四年今此文以重耳过与伤泓共岁故云是年又重耳过与宋襄公卒共是一岁则不合更云十四年是进退俱不合於左氏盖太史公之疎尔】子成公王臣立成公元年晋文公即位三年倍楚盟亲晋以有德於文公也四年楚成王伐宋宋告急於晋五年晋文公救宋楚兵去九年晋文公卒十一年楚太子商臣弑其父成王代立十六年秦穆公卒十七年成公卒【正义年表云公孙固杀成公】成公弟御杀太子及大司马公孙固【正义世本云宋庄公孙名固为大司马】而自立为君宋人共杀君御而立成公少子杵臼【正义年表云宋昭元年杵臼襄公之子徐广曰一云成公少子】是为昭公昭公四年宋败长翟缘斯於长丘【集解駰案鲁世家云宋武公之世获缘斯於长丘今云此时未详索隐春秋文公十一年鲁败狄于咸获长狄缘斯於长丘齐系家惠公二年长翟来王子城父攻杀之此竝取左传之说散於诸国系家今考其年岁亦颇相协而鲁系家云武公此云昭公盖此昭当为武然前代虽已有武公此杵臼当亦谥武也若将不然岂下五代公子特为君又岂谥昭乎】七年楚庄王即位九年昭公无道国人不附昭公弟鲍革【集解徐广曰一无革字】贤而下士先襄公夫人欲通於公子鲍不可【集解服虔曰襄公夫人周襄王之姊王姬也不可鲍不肯也】乃助之施於国【正义施貳是反襄夫人助公子鲍布施恩惠於国人也】因大夫华元为右师【正义公子华元鲍因请得为右师华元戴公五代孙华督之曾孙也】昭公出猎夫人王姬使卫伯攻杀昭公杵臼弟鲍革立是为文公文公元年晋率诸侯伐宋责以弑君闻文公定立乃去二年昭公子因文公母弟须与武繆戴庄桓之族为乱文公尽诛之出武繆之族【集解贾逵曰出逐也】四年春郑命楚伐宋宋使华元将郑败宋囚华元华元之将战杀羊以食士其御羊羹不及【集解駰案左传曰御羊

斟也】故怨驰入郑军故宋师败得囚华元宋以兵车百乘文马四百疋【集解贾逵曰文狸文也玉肃曰文马画马也正义按文马者装饰其马四百匹用牵车百乘遗郑赎华元也又云文马赤鬣编身目如黄金】赎华元未尽入华元亡归宋十四年楚庄王围郑郑伯降楚楚复释之十六年楚使过宋宋有前仇执楚使九月楚庄王围宋十七年楚以围宋五月不解宋城中急无食华元乃夜私见楚将子反子反告庄王王问城中何如曰析骨而炊【集解何休曰析破人骨也】易子而食庄王曰诚哉言我军亦有三日粮以信故遂罢兵去二十二年文公卒子共公瑕立始厚葬君子讥华元不臣矣共公九年华元善楚将子重又善晋将栾书两盟晋楚十三年共公卒华元为右师鱼石为左师司马唐山攻杀太子肥欲杀华元华元犇晋鱼石止之至河乃还【集解駰案皇览曰华元冢在陈留小黄县城北】诛唐山乃立共公少子成是为平公【集解駰案左传曰鱼石奔楚】平公三年楚共王拔宋之彭城以封宋左师鱼石四年诸侯共诛鱼石而归彭城於宋三十五年楚公子围弑其君自立为灵王四十四年平公卒子元公佐立元公三年楚公子弃疾弑灵王自立为平王八年宋火十年元公母信诈杀诸公子大夫华向氏作乱楚平王太子建来犇见诸华氏相攻乱建去如郑十五年元公为鲁昭公避季氏居外为之求入鲁行道卒子景公头曼立【索隐按曼立音万】景公十六年鲁阳虎来奔已复去二十五年孔子过宋宋司马桓魋恶之欲杀孔子孔子微服去三十年曹倍宋又倍晋宋伐曹晋不救遂灭曹有之【正义宋景公灭曹在鲁哀公八年周敬王三十三年也】三十六年齐田常弑简公三十七年楚惠王灭陈荧惑守心心宋之分野也景公忧之司星子韦曰可移於相景公曰相吾之股肱曰可移於民景公曰君者待民曰可移於岁景公曰岁饥民困吾谁为君子韦曰天高聽卑君有君人之言三荧惑宜有动於是候之果徙三度六十四年景公卒宋公子特攻杀太子而自立是为昭公【索隐特一作得按左传景公无子取元公庶曾孙公孙周之子得及启畜于公宫及景公卒先立启後立得是为昭公与此全乖未知太史公据何为此说】昭公者元公之曾庶孙也昭公父公孙纠纠父公子湫秦【集解徐广曰湫立端】湫秦即元公少子也景公杀昭公父纠【索隐左传云名周】故昭公怨杀太子而自立昭公四十七年卒子悼公购由立【集解駰案年表云四十九年索隐购音古候反】悼公八年卒【索隐纪年为十八年】子休公田立休公二十三年卒子辟公辟兵立【集解徐广曰一云辟公兵索隐纪年作桓侯璧兵则璧兵諡桓也又庄子云桓侯行未出城门其前驱呼辟蒙人止之後为狂也司马彪云呼辟使人避道蒙人以桓侯名辟而前驱呼辟故为狂也】辟公三年卒子剔成立【集解駰案年表云剔成君也索隐王邵按纪年云宋剔成肝废其君璧而自立】剔成四十一年剔成弟偃攻袭剔成剔成败犇齐偃自立为宋君君偃十一年自立为王【索隐战国策吕氏春秋皆以偃諡康王】东败齐取五城南败楚取地三百里西败魏军乃与齐魏为敌国盛血以韦囊县而射之命曰射天淫於酒妇人羣臣諫者辄射之於是诸侯皆曰桀宋【索隐晋太康地记言其似桀也】宋其复为纣所为不可不诛告齐伐宋王偃立四十七年齐湣王与魏楚伐宋杀王偃遂灭宋而三分其地【集解駰案年表云偃立四十三年】

太史公曰孔子称微子去之箕子为之奴比干諫而死殷有三仁焉【集解何晏曰仁者爱人三人行异而同称仁者何也以其俱在忧乱而宁民也夏侯玄曰微子仕之穷也箕子比干智之穷也故或尽材而止或尽心而留皆其极也致极斯君子之事矣是以三仁不同而其归一揆也】春秋讥宋之乱自宣公废太子而立弟【集解駰案公羊传曰君子大居正宋之祸宣

公为之也】国以不宁者十世【索隐公羊春秋有此说左氏则无讥焉】襄公之时修行仁义欲为盟主其大夫正考父美之故追道契汤高宗殷所以兴作商颂【集解駟案韩诗商颂章句亦美襄公索隐今按毛诗商颂序云正考父於周之大师得商颂十二篇以那为首国语亦同此说今五篇存皆是商家祭祀乐章非考父追作也又考父佐戴武宣则在襄公前且百许岁安得述而美之斯谬说尔】襄公既败於泓而君子或以为多【集解駟案公羊传曰君子大其不鼓不成列临大事而不忘大礼有君而无臣以为虽文王之战亦不过此也】伤中国阙礼义褒之也【索隐襄公临大事不忘大礼而君子或以为多且伤中国之乱阙礼义之举遂不嘉宋襄之盛德太史公褒而述之故云褒之也】宋襄之有礼让也

【索隐述赞曰殷有三仁微箕纣亲一囚一去不顾其身颂美有客书称作宾卒传家嗣或叙彝伦微仲之後世载忠勤穆亦能让实为知人伤泓之役有君无臣偃号桀宋天之弃殷】

史记卷三十八

史记卷三十八考证

宋微子世家及祖伊以周西伯昌之修德灭??国惧祸至以告纣○【臣照】按?国二字疑衍文

於是太师少师乃劝微子去遂行○王若虚辨惑曰微子度纣终不可谏欲死之及去未能自决乃问太师少师曰云云太师若曰云云诚得治国国治身死不恨为死终不得治不如去遂亡则微子既已去矣而复记箕子之所以奴比干之所以死而终之曰微子以为父子有骨肉而臣主以义属父有过子三谏不聽则随而号之人臣三谏不聽则可以去矣于是太师少师乃劝微子去遂行何耶

左牵羊右把茅○孔穎達左传疏曰史记之言多有错缪微子手缚于後故以口衔璧又焉得牵羊把茅也【臣照】按孟子曰尽信书则不如无书此类是也微子适周尚在大会孟津之前则周固殷诸侯以王之庶兄而之其国何面缚衔璧舆櫜而请死乎此春秋时传闻之纰缪而因而袭之者耳亦不止史迁所载手缚於後而又左牵羊右把茅之谓自相矛盾即左氏所载亦不可信也

乃命微子开代殷後奉其先祀作微子之命以申之国于宋○毛诗振鹭疏曰以乐记之文知武王初即封微子于宋矣但未知爵之尊卑国之大小耳至成王既杀武庚命为殷後当爵为公地方百里至制礼之後当受上公之地更方五百里史记以为成王之时始封微子于宋与乐记文乖其说非也

殇公即位十年尔○【臣照】按既云即位十年何得编於九年之下左传此事本在十年则上文九年九字盖十字之讹也

是岁鲁弑其君隐公○左传及鲁世家年表隐公弑于宋殇公之八年

九年执郑之祭仲要以立突为郑君祭仲许竟立突○左传及年表俱作十年

十年夏宋伐鲁战於乘丘○左传宋殇九年为鲁庄之十一年夏宋为乘丘之役秋宋大水公使吊焉此叙战乘丘於大水之後又书曰十年

十一年秋○【臣世骏】按殇公立十年而被弑此云十一年秋一字盖衍文

襄公七年宋地霰星如雨与雨偕下六鵠退蜚○王若虚辨惑曰鲁庄公七年四月辛卯夜中星陨如雨僖公十六年正月戊申陨石于宋五是月六鵠退飞过宋都左氏云陨石于宋陨星也史记世家乃谓宋襄公七年宋地陨星如雨与雨俱下六鵠退蜚按春秋星陨如雨初不指其在宋且庄公七年之四月与僖公十六年之正月相去亦远矣安得并为宋地同时之事乎盖见左氏释陨石为陨星故误志焉而陨石之事反遗而不书

楚成王已救郑郑享之去而取郑二姬以归叔瞻曰成王无礼其不没乎为礼卒于无别有以知其不遂霸也○徐孚远曰以上楚事着於宋传失删正也

子成公王臣立○谷梁传作壬臣

昭公四年宋败长翟缘斯於长丘○【臣清植】按黄震曰钞曰史载宋昭公四年败长翟缘斯於长丘而鲁世家称当宋武公之世武公实为昭公九世祖是史自为矛盾也今考鲁世家文公十一年获长翟侨如史追载宋武获长翟缘斯之事缘斯者侨如之祖也宋昭公之四年正当鲁文公之十一年是获侨如之岁非获缘斯之岁也缘斯於侨如为祖则获缘斯者为宋武公非宋昭公也二事参考则鲁世家所载近是宋世家所载非是也裴駰以为未详或者世次莫定当阙疑与

夫人王姬使卫伯攻杀昭公杵臼弟鲍革立○左传昭公将田孟诸未至夫人王姬使帅甸攻而杀之此云卫伯不知何据又左传及年表皆作鲍此云鲍革亦互异

昭公子因文公母弟须与武縵戴庄桓之族为乱○左传为乱者武縵之族攻之者戴庄桓之族与此异

郑命楚伐宋○徐孚远曰左传云郑公子归生受命於楚伐宋此云郑命楚伐宋恐误【臣照】按此传写倒置耳盖楚命郑伐宋

楚以围宋五月不解○【臣照】按杜预注左传云在宋积九月此云五月不解盖承公羊传夏五月宋人及楚人平之文年表遂云围宋五月其误正与此同吕氏春秋云庄王围宋九月康王围宋五月声王围宋十月

共公瑕立○三传共公名固

共公九年华元善楚将子重又善晋将栾书两盟晋楚○徐孚远曰在左传向戌之事也此言华元为误陈子龙曰宋共公之元年为晋成公之三年传无两盟晋楚之事是时郑方党楚晋宋同伐郑其明年华元始聘鲁其讹为鲁襄二十七年宋之盟无疑

司马唐山○左传作荡泽

乃立共公少子成○公羊传作成

子景公头曼立○春秋作栾

三十七年楚惠王灭陈○左传三十九年鲁哀公之十七年也

襄公之时修行仁义欲为盟主其大夫正考父美之故追道契汤高宗殷所以兴作商颂○朱子曰太史公盖本韩诗之说颂皆天子之事非宋所有其辞古奥亦不类周世之文

史记卷三十八考证

<史部,正史类,史记>

卷三十九

钦定四库全书

史记卷三十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

晋世家第九

唐叔虞者周武王子而成王弟【索隐唐叔以梦及手文而名曰虞至成王诛唐之後因戏削桐而封之叔字也故曰唐叔虞而唐有晋水至于燹改其国号曰晋侯然晋初封于唐故称晋唐叔虞也且唐本尧後封在夏墟而都於鄂鄂今在大夏是也及成王灭唐之後又分徙之於许郢之间故春秋有唐成公是也即今之唐州者也】初武王与叔虞母会时【集解駰案左传曰邑姜方娠太叔服?曰邑姜武王后齐太公女】梦天谓武王曰余命女生子名虞余与之唐及生子文在其手曰虞故遂因命之曰虞武王崩成王立唐有乱【正义括地志云故唐城在绛州翼城县西二十里即尧裔子所封春秋云夏孔甲时有尧苗裔刘累者以豢龙事孔甲夏后嘉之赐氏御龙以更豕韦之後龙一雌死潜醢之以食夏后既而使求之惧而迁於鲁县夏后召孟别封刘累之孙于大夏之墟为侯至周成王时唐人作乱成王灭之而封太叔更迁唐人子孙于杜谓之杜伯即范句所云在周为杜唐氏按鲁县汝州鲁山县是今随州枣阳县东南一百五十里上唐乡故城即後子孙徙於唐】周公诛灭唐成王与叔虞戏削桐叶为珪以与叔虞曰以此封若史佚因请择日立叔虞成王曰吾与之戏尔史佚曰天子无戏言言则史书之礼成之乐歌之於是遂封叔虞於唐唐在河汾之东方百里故曰唐叔虞【集解駰案世本曰居鄂宋忠曰鄂地今在大夏正义括地志云故鄂城在慈州昌宁县东二里按与绛州夏县相近禹都安邑故城在县东北十五里故云在大夏也然封于河汾二水之东方百里正合在晋州平阳县不合在鄂未详】姓姬氏字子于唐叔子燹是为晋侯【正义燹音先牒反括地志云故唐城在并州晋阳县北二里城记云尧筑也宗国都城记唐叔虞之子燹父徙居晋水傍今并理故唐城唐者即燹父初徙之处也毛诗谱云叔虞子燹父以尧墟南有晋水改曰晋侯】晋侯子宁族是为武侯【索隐系本作曼期譙周作曼旗也】武侯之子服人是为成侯成侯子福是为厉侯【索隐系本作辐】厉侯子宜臼是为靖侯靖侯已来年纪可推自唐叔至靖侯五世无其年数靖侯十七年周厉王迷惑暴虐国人作乱厉王出奔于彘大臣行政故曰共和【正义厉王奔彘周召和其百姓行政号曰共和】十八年靖侯卒子厘侯司徒立厘侯十四年周宣王初立十八年厘侯卒子献侯籍立【索隐系本及譙周皆作苏】献侯

十一年卒子穆侯费王立【索隐邹诞本作弗生或作?王并音秘】穆侯四年取齐女姜氏为夫人七年伐条生太子仇【集解杜预曰条晋地】十年伐千亩有功【集解杜预曰西河界休县南有地名千亩】生少子名曰成师【集解杜预曰意取能成其衆也】晋人师服曰【集解贾逵曰晋大夫】异哉君之命子也太子曰仇仇者讐也少子曰成师成师大号成之者也名自命也物自定也今适庶名反逆此後晋其能毋乱乎二十七年穆侯卒弟殇叔自立太子仇出奔殇叔三年周宣王崩四年穆侯太子仇率其徒袭殇叔而立是为文侯文侯十年周幽王无道犬戎杀幽王周东徙而秦襄公始列为诸侯三十五年文侯仇卒子昭侯伯立昭侯元年封文侯弟成师于曲沃【索隐河东之县名汉武帝改曰闻喜也】曲沃邑大於翼翼晋君都邑也【索隐翼本晋都自孝侯已下一号翼侯平阳绛邑县东翼城是也】成师封曲沃号为桓叔靖侯庶孙栾宾【正义世本云栾叔宾父也】相桓叔桓叔是时年五十八矣好德晋国之衆皆附焉君子曰晋之乱其在曲沃矣未大於本而得民心不乱何待七年晋大臣潘父弑其君昭侯而迎曲沃桓叔桓叔欲入晋晋人发兵攻桓叔桓叔败还归曲沃晋人共立昭侯子平为君是为孝侯诛潘父孝侯八年曲沃桓叔卒子靼代桓叔是为曲沃庄伯【索隐靼音时战反又音善又音陟】孝侯十五年曲沃庄伯弑其君晋孝侯于翼晋人攻曲沃庄伯庄伯复入曲沃晋人复立孝侯子郃为君是为鄂侯【索隐系本作郃而他本亦作都正义音邱戟反】鄂侯二年鲁隐公初立鄂侯六年卒曲沃庄伯闻鄂侯卒乃兴兵伐晋周平王使虢公将兵伐曲沃庄伯庄伯走保曲沃晋人共立鄂侯子光是为哀侯哀侯二年曲沃庄伯卒子称代庄伯立【正义称尺证反】是为曲沃武公哀侯六年鲁弑其君隐公哀侯八年晋侵陞廷【集解贾逵曰翼南鄙邑名】陞廷与曲沃武公谋九年伐晋于汾旁【正义白郎反汾水之旁】虜哀侯晋人乃立哀侯子小子为君是为小子侯【集解駰案礼记曰天子未除丧曰余小子生名之死亦名之郑玄曰晋有小子侯是取之天子也】小子元年曲沃武公使韩万杀所虜晋哀侯【集解贾逵曰韩万曲沃桓叔之子庄伯弟】曲沃益强晋无如之何晋小子之四年曲沃武公诱召晋小子杀之周桓王使虢仲【正义马融云周武王克商封文王异母弟虢仲於夏阳】伐曲沃武公武公入于曲沃乃立晋哀侯弟缙为晋侯晋侯缙四年宋执郑祭仲而立突为郑君晋侯十九年齐人管至父弑其君襄公晋侯二十八年齐桓公始霸曲沃武公伐晋侯缙灭之尽以其宝器赂献于周厘王厘王命曲沃武公为晋君列为诸侯於是尽并晋地而有之曲沃武公已即位三十七年矣更号曰晋武公晋武公始都晋国前即位曲沃通年三十八年武公称者先晋穆侯曾孙也【索隐晋有两穆侯言先以别後】曲沃桓叔孙也桓叔者始封曲沃武公庄伯子也自桓叔初封曲沃以至武公灭晋也凡六十七岁而卒代晋为诸侯武公代晋二岁卒与曲沃通年即位凡三十九年而卒子献公诡诸立献公元年周惠王弟颓攻惠王惠王出奔居郑之栢邑【索隐栢郑邑今河南阳翟是也故郑之十邑有栢有华】五年伐骊戎得骊姬【集解韦昭曰西戎之别在骊山也】骊姬弟俱爱幸之八年士蒍说公【集解贾逵曰士蒍晋大夫】曰故晋之羣公子多不诛乱且起乃使尽杀诸公子而城聚都之【集解贾逵曰聚晋邑】命曰绛始都绛【索隐春秋庄二十六年传士蒍城绛是也杜预曰今平阳绛邑县应劭曰绛水出西南也】九年晋羣公子既亡奔虢以其故再伐晋弗克十年晋欲伐虢士蒍曰且待其乱十二年骊姬生奚齐献公有意废太子乃曰曲沃吾先祖宗庙所在而蒲边秦屈边翟【集解韦昭曰蒲今蒲坂屈北屈皆在河东杜预曰蒲今平阳蒲子县是也】不使诸子居之我惧焉於是使太子申生居曲沃公子重耳居蒲公子夷吾居屈献公与骊姬子奚齐居绛晋国以此知太子不立也太子申生其母齐桓公女也曰齐姜早

死申生同母女弟为秦穆公夫人重耳母翟之狐氏女也夷吾母重耳母女弟也献公子八人而太子申生重耳夷吾皆有贤行及得骊姬乃远此三子十六年晋献公作二军【集解駰案左传曰王使虢公命曲沃伯以一军为晋侯今始为二军】公将上军太子申生将下军赵夙御戎毕万为右伐灭霍灭魏灭耿【集解服虔曰三国皆姬姓魏在晋之蒲坂河东也杜预曰平阳皮氏县东南有耿乡永安县东北有霍太山也索隐按永安县西南汾水西有霍城古霍国有霍水出霍太山地理志河东河北县古魏国地记亦以为然服虔云在蒲坂非也地记又曰皮氏县汾水南耿城是故耿国也】还为太子城曲沃赐赵夙耿赐毕万魏以为大夫士蒍曰太子不得立矣分之都城【集解服虔曰邑有先君之主曰都】而位以卿【集解贾逵曰谓将下军】先为之极【集解服虔曰言其禄位极尽於此】又安得立不如逃之无使罪至为吴太伯不亦可乎【集解王肃曰太伯知天命在王季奔吴不反】犹有令名【集解王肃曰虽去犹可有令名何与其坐而及祸也】太子不从卜偃曰毕万之後必大【集解贾逵曰卜偃晋掌卜大夫郭偃】万盈数也魏大名也【集解服虔曰数从一至万为满魏喻巍巍高大也】以是始赏天开之矣【集解服虔曰以魏赏毕万是为天开其福】天子曰兆民诸侯曰万民今命之大以从盈数其必有众【集解杜预曰以魏从万有众多之象】初毕万卜仕於晋国遇屯之比【集解贾逵曰震下坎上屯坤下坎上比屯初九变之比】辛廖占之曰吉【集解贾逵曰辛廖晋大夫】屯固比入吉孰大焉【集解杜预曰屯险难也所以为坚固比亲密所以得入】其後必蕃昌十七年晋侯使太子申生伐东山【集解贾逵曰东山赤狄别种】里克谏献公【集解贾逵曰里克晋卿里季也】曰太子奉冢祀社稷粢盛以朝夕视君膳者也【集解服虔曰厨膳饮食】故曰冢子君行则守有守则从【集解服虔曰有代太子守则从之】从曰抚军【集解服虔曰助君抚循军士】守曰监国古之制也夫率师专行谋也【集解杜预曰率师者必专谋军事】誓军旅【集解杜预曰宣号令】君与国政之所图也【集解贾逵曰国政正卿也】非太子之事也师在制命而已【集解杜预曰命将军所制】稟命则不威专命则不孝故君之嗣适不可以帅师君失其官【集解杜预曰太子统师是失其官】率师不威将安用之【集解杜预曰专命则不孝是为师必不威也】公曰寡人有子未知其太子谁立里克不对而退见太子太子曰吾其废乎里克曰太子勉之教以军旅【集解贾逵曰将下军】不共是惧何故废乎且子惧不孝母惧不得立【集解服虔曰不得立己】修己而不责人则免於难太子帅师公衣之偏衣【集解服虔曰偏褰之衣偏异色駁不纯褰在中左右异故曰偏衣杜预曰偏衣左右异色其半似公服韦昭曰偏半也分身之半以授太子正义上衣去声下衣如字】佩之金玦【集解服虔曰以金为玦也韦昭曰金玦兵要也正义玦音决】里克谢病不从太子太子遂伐东山十九年献公曰始吾先君庄伯武公之诛晋乱而虢常助晋伐我【正义言虢助晋伐曲沃也】又匿晋亡公子果为乱弗诛後遗子孙忧乃使荀息以屈产之乘【集解何休曰屈产出名马之地乘备驷也】假道於虞虞假道遂伐虢【集解贾逵曰虞在晋南虢在虞南】取其下阳以归【索隐服虔曰下阳虢邑也在大阳东北三十里谷梁传曰下阳虞虢之塞邑】献公私谓骊姬曰吾欲废太子以奚齐代之骊姬泣曰太子之立诸侯皆已知之而数将兵百姓附之奈何以贱妾之故废适立庶君必行之妾自杀也骊姬详誉太子而陰令人譖恶太子而欲立其子二十一年骊姬谓太子曰君梦见齐姜太子速祭曲沃【集解服虔曰齐姜庙所在】归厘於君太子於是祭其母齐姜於曲沃上其荐胙於献公献公时出猎置胙於宫中骊姬使人置毒药胙中居二日【索隐传云六日】献公从猎来还宰人上胙献公献公欲飧之骊姬从傍止之曰胙所从来远宜试之祭地地坟【集解韦昭曰将饮先祭

示有先也坟起也】与犬犬死与小臣小臣死【集解韦昭曰小臣官名掌陰事今阉士也】
骊姬泣曰太子何忍也其父而欲弑代之况他人乎且君老矣旦暮之人曾不能待而欲弑之
谓献公曰太子所以然者不过以妾及奚齐之故妾愿子母辟之他国若早自杀母徒使母子
为太子所鱼肉也始君欲废之妾犹恨之至於今妾殊自失於此【索隐太子之行如此妾前
见君欲废而恨之今乃自以恨为失也】太子闻之奔新城【集解韦昭曰新城曲沃也新为
太子城】献公怒乃诛其傅杜原欸或谓太子曰为此药者乃骊姬也太子何不自辞明之太
子曰吾君老矣非骊姬寝不安食不甘即辞之君且怒之不可或谓太子曰可奔他国太子曰
被此恶名以出人谁内我我自杀耳十二月戊申申生自杀於新城【索隐国语云申生乃雉
经於新城庙】此时重耳夷吾来朝人或告骊姬曰二公子怨骊姬谮杀太子骊姬恐因谮二
公子申生之药胙二公子知之二子闻之恐重耳走蒲夷吾走屈保其城自备守初献公使士
蒍为二公子筑蒲屈城弗就【正义蒍为诡反为于伪反】夷吾以告公公怒士蒍士蒍谢曰
边城少寇安用之退而歌曰狐裘蒙茸一国三公吾谁适从【集解服虔曰蒙茸以言乱貌三公
言君与二公子将敌故不知所从】卒就城及申生死二子亦归保其城二十二年献公怒二
子不辞而去果有谋矣乃使兵伐蒲蒲人之宦者勃鞞【集解韦昭曰伯楚寺人勃之字也於
文公时为勃鞞也正义勃白没反鞞都提反】命重耳促自杀重耳踰垣宦者追斩其衣袂【
集解服虔曰袂袂也】重耳遂奔翟使人伐屈屈城守不可下是岁也晋复假道於虞以伐虢虞
之大夫宫之奇諫虞君曰晋不可假道也是且灭虞虞君曰晋我同姓不宜伐我宫之奇曰太
伯虞仲太王之子也太伯亡去是以不嗣虢仲虢叔王季之子也为文王卿士其记勲在王室
藏於盟府【集解杜预曰盟府司盟之官也】将虢是灭何爱于虞且虞之亲能亲於桓庄之
族乎桓庄之族何罪尽灭之虞之与虢唇之与齿唇亡则齿寒虞公不听遂许晋宫之奇以其
族去虞其冬晋灭虢虢公丑奔周【集解駉案皇览曰虢公冢在河内温县郭东济水南大冢
是也其城南有虢公台】还袭灭虞虢虞公及其大夫井伯百里奚【正义南雍州记云百里
奚宋井伯宛人也】以媵秦穆姬【集解杜预曰穆姬献公女送女曰媵以屈辱之】而修虞
祀【集解服虔曰虞所祭祀命祀也】荀息牵曩所遗虞屈产之乘马奉之献公献公笑曰马则
吾马齿亦老矣【集解駉案公羊传曰盖戏之也何休曰以马齿戏喻荀息之年老也】二十
三年献公遂发贾华等伐屈【集解贾逵曰贾华晋右行大夫】屈溃【正义民逃其上曰溃】
夷吾将奔翟冀芮曰不可【集解韦昭曰冀芮晋大夫】重耳已在矣今往晋必移兵伐翟
翟畏晋祸且及不如走梁梁近於秦秦强吾君百岁後可以求入焉遂奔梁二十五年晋伐翟
翟以重耳故亦击晋於啗桑【集解駉案左传作采桑服虔曰翟地索隐裴氏云左传作采桑按
今平阳县南七十里河水有采桑津是晋境服虔云翟地亦颇相近然字作啗桑啗桑卫地恐非
也】晋兵解而去当此时晋强西有河西与秦接境北边翟东至河内【索隐河内河曲也内
音汭】骊姬弟生悼子【索隐左传作卓子音耻角反弟女弟也】二十六年夏齐桓公大会
诸侯於葵邱【正义在曹州考城县东南一里】晋献公病行後未至逢周之宰孔宰孔曰齐
桓公益骄不务德而务远略诸侯弗平君第毋会【索隐第但也】毋如晋何献公亦病复还
归病甚乃谓荀息曰吾以奚齐为後年少诸大臣不服恐乱起子能立之乎荀息曰能献公曰
何以为验对曰使死者复生生者不慙为之验【索隐谓荀息受公命而立奚齐虽复身死不
背生时之命是谓死者复生也言生者见荀息不背君命而死不为之羞慙也】於是遂属奚
齐於荀息荀息为相主国政秋九月献公卒里克邳郑欲内重耳以三公子之徒作乱【集解
贾逵曰邳郑晋大夫三公子申生重耳夷吾】谓荀息曰三怨将起秦晋辅之子将何如荀息

曰吾不可负先君言十月里克杀奚齐于丧次献公未葬也荀息将死之或曰不如立奚齐弟悼子而傅之荀息立悼子而葬献公十一月里克弑悼子于朝【集解駰案列女传曰鞭杀骊姬于市】荀息死之君子曰诗所谓白珪之玷犹可磨也斯言之玷不可为也【集解杜预曰诗大雅言此言之缺难治甚於白珪】其荀息之谓乎不负其言初献公将伐骊戎卜曰齿牙为祸【集解韦昭曰齿牙谓兆端左右畔拆有似齿牙中有纵画以象谗言之为害也】及破骊戎获骊姬爱之竟以乱晋里克等已杀奚齐悼子使人迎公子重耳於翟【正义国语云里克及邳郑使屠岸夷迎公子重耳於翟曰国乱民扰得国在乱治民在扰子盍入乎】欲立之重耳谢曰负父之命【正义负音佩】出奔父死不得修人子之礼侍丧重耳何敢入大夫其更立他子还报里克里克使迎夷吾於梁夷吾欲往吕省【正义省音省杜预云姓瑕吕名饴甥字子金】郤芮【正义郤成子即冀芮】曰内犹有公子可立者而外求难信计非之秦辅强国之威以入恐危乃使郤芮厚赂秦约曰即得入请以晋河西之地与秦乃遗里克书曰诚得立请遂封子於汾阳之邑【集解贾逵曰汾水名汾阳晋地也索隐国语云命里克汾阳之田百万命邳郑以负葵之田七十万今此不言亦疎畧也】秦穆公乃发兵送夷吾於晋齐桓公闻晋内乱亦率诸侯如晋秦兵与夷吾亦至晋齐乃使隰朋会秦俱入夷吾立为晋君是为惠公齐桓公至晋之高梁而还归惠公夷吾元年使邳郑谢秦曰始夷吾以河西地许君今幸得入立大臣曰地者先君之地君亡在外何以得擅许秦者寡人争之弗能得故谢秦亦不与里克汾阳邑而夺之权四月周襄王使周公忌父【集解贾逵曰周卿士】会齐秦大夫共礼晋惠公惠公以重耳在外畏里克为变赐里克死谓曰微里子寡人不得立虽然子亦杀二君一大夫【集解服虔曰奚齐悼子荀息也】为子君者不亦难乎里克对曰不有所废君何以兴欲诛之其无辞乎乃言为此臣闻命矣遂伏劒而死於是邳郑使谢秦未还故不及难晋君改葬恭太子申生【集解韦昭曰献公时申生葬不如礼故改葬之】秋狐突之下国【集解服虔曰晋所灭国以为下邑一曰曲沃有宗庙故谓之国在绛下故曰下国也】遇申生申生与轂而告之【集解杜预曰忽如梦而相见狐突本为申生御故复使登车】曰夷吾无礼余得请於帝【集解服虔曰帝天帝请罚有罪】将以晋与秦秦将祀余狐突对曰臣闻神不食非其宗君其祀母乃绝乎君其图之申生曰诺吾将复请帝後十日【集解駰案左传曰七日】新城西偏将有巫者见我焉【集解杜预曰将因巫以见】许之遂不见【集解杜预曰狐突许其言申生之象亦没】及期而往复见申生告之曰帝许罚有罪矣弊於韩【集解贾逵曰弊败也韩晋韩原】儿乃谣曰恭太子更葬矣【索隐更改也更葬谓改葬】後十四年晋亦不昌昌乃在兄邳郑使秦闻里克诛乃说秦缪公曰吕省郤称冀芮实为不从【集解杜预曰三子晋大夫不从不与秦赂也索隐吕省左传作吕甥】若重赂与谋出晋君入重耳事必就秦缪公许之使人与归报晋厚赂三子三子曰币厚言甘此必邳郑卖我於秦遂杀邳郑及里克邳郑之党七舆大夫【集解韦昭曰七舆申生下军之衆大夫也杜预曰侯伯七命副车七乘】邳郑子豹奔秦言伐晋缪公弗听惠公之立倍秦地及里克诛七舆大夫国人不附二年周使召公过【集解韦昭曰召武公为王卿士】礼晋惠公惠公礼倨【索隐谓受玉惰也事见僖十二年】召公讥之四年晋饥乞糒於秦缪公问百里奚【集解服虔曰秦大夫】百里奚曰天菑流行国家代有救菑恤邻国之道也与之邳郑子豹曰伐之缪公曰其君是恶其民何罪卒与粟自雍属绛五年秦饥请糒於晋晋君谋之庆郑曰【集解杜预曰庆郑晋大夫】以秦得立已而倍其地约晋饥而秦贷我今秦饥请糒与之何疑而谋之虢射曰【集解服虔曰虢射惠公舅】往年天以晋赐秦秦弗知取而贷我今天以秦赐晋晋其可以逆天乎遂伐之惠公用

虢射谋不与秦粟而发兵且伐秦秦大怒亦发兵伐晋六年春秦缪公将兵伐晋晋惠公谓庆郑曰秦师深矣【集解韦昭曰深入境一曰深尤重】奈何郑曰秦内君君倍其赂晋饥秦输粟秦饥而晋倍之乃欲因其饥伐之其深不亦宜乎晋卜御右庆郑皆吉公曰郑不孙【集解服?曰孙顺】乃更令步阳御戎家仆徒为右【集解服?曰二子晋大夫也】进兵九月壬戌秦缪公晋惠公合战韩原【索隐在冯翊夏阳北二十里今之韩城县是】惠公马驚不行【索隐驚音竹二反谓马重而?之於泥】秦兵至公窘召庆郑为御郑曰不用卜败不亦当乎遂去更令梁繇靡御【正义韦昭云梁繇靡大夫也】虢射为右轅秦缪公【集解服?曰轅迎也索隐音五稼反邹诞音或额反】缪公壮士冒败晋军晋军败遂失秦缪公反获晋公以归秦将以祀上帝晋君姊为缪公夫人衰絰涕泣公曰得晋侯将以为乐今乃如此且吾闻箕子见唐叔之初封曰其後必当大矣晋庸可灭乎乃与晋侯盟王城【集解杜预曰冯翊临晋县东有王城】而许之归晋侯亦使吕省等报国人曰孤虽得归母面目见社稷卜日立子圉晋人闻之皆哭秦缪公问吕省晋国和乎对曰不和小人惧失君亡亲【正义君惠公也亲父母也言惧失君国乱恐亡父母不憚立子圉也】不憚立子圉曰必报讐宁事戎狄【正义小人言立子圉为君之後必报秦终不事秦宁事戎狄尔】其君子则爱君而知罪以待秦命曰必报德有此二故不和於是秦缪公更舍晋惠公馈之七牢【正义馈音匱一牛一羊一豕为一牢】十一月归晋侯晋侯至国诛庆郑修政教谋曰重耳在外诸侯多利内之欲使人杀重耳於狄重耳闻之如齐八年使太子圉质秦【正义质音致】初惠公亡在梁梁伯以其女妻之生一男一女梁伯卜之男为人臣女为人妾故名男为圉女为妾【集解服?曰圉人掌养马臣之贱者不聘曰妾】十年秦灭梁梁伯好土功治城沟【集解贾逵曰沟塹也】民力罢【正义音皮】怨其衆数相惊曰秦寇至民恐惑秦竟灭之十三年晋惠公病内有数子太子圉曰吾母家在梁梁今秦灭之我外轻於秦而内无援於国君即不起病大夫轻更立他公子乃谋於其妻俱亡归秦女曰子一国太子辱在此秦使婢子侍【集解服?曰曲礼云世妇以下自称婢子婢子妇人之卑称】以固子之心子亡矣我不从子亦不敢言子圉遂亡归晋十四年九月惠公卒太子圉立是为怀公子圉之亡秦怨之乃求公子重耳欲内之子圉之立畏秦之伐也乃令國中诸从重耳亡者与期期尽不到者尽灭其家狐突之子毛及偃从重耳在秦弗肯召怀公怒囚狐突突曰臣子事重耳有年数矣今召之是教之反君也何以教之怀公卒杀狐突秦缪公乃发兵送内重耳使人告栾郤之党【正义栾枝郤谷之属】为内应杀怀公於高粱入重耳重耳立是为文公晋文公重耳晋献公之子也自少好士年十七有贤士五人曰赵衰狐偃咎犯文公舅也贾佗先轸魏武子自献公为太子时重耳固已成人矣献公即位重耳年二十一献公十三年以骊姬故重耳备蒲城守秦献公二十一年献公杀太子申生骊姬谗之恐不辞献公而守蒲城献公二十二年献公使宦者履鞮趣杀重耳【索隐履鞮即左传之勃鞮亦曰寺人披也】重耳踰垣宦者逐斩其衣袪重耳遂奔狄狄其母国也是时重耳年四十三从此五士其余不名者数十人至狄狄伐咎如【集解贾逵曰赤狄之别隗姓索隐咎音高邹诞本作困如又云或作囚】得二女以长女妻重耳生伯儵【正义直留反】叔刘以少女妻赵衰生盾【索隐左传云伐麇咎如获其二女以叔隗妻赵衰生盾公子取季隗生伯儵叔刘则叔隗长而季隗少乃不同也】居狄五岁而晋献公卒里克已杀奚齐悼子乃使人迎欲立重耳重耳畏杀因固谢不敢入已而晋更迎其弟夷吾立之是为惠公惠公七年畏重耳乃使宦者履鞮与壮士欲杀重耳重耳闻之乃谋赵衰等曰始吾奔狄非以为可用兴【索隐兴起也非狄可用兴起故奔之也】以近易通故且休足休足久矣固愿徙之大国夫齐桓公好

善志在霸王收恤诸侯今闻管仲隰朋死此亦欲得贤佐盍往乎於是遂行重耳谓其妻曰待我二十五年不来乃嫁其妻笑曰犁二十五年【索隐犁犹比也正义杜预云言将死入木也不复成嫁也】吾冢上柏大矣虽然妾待子重耳居狄凡十二年而去过卫卫文公不礼去过五鹿【集解贾逵曰卫地杜预曰今卫县西北有地名五鹿阳平元城县东亦有五鹿】饥而从野人乞食野人盛土器中进之重耳怒赵衰曰土者有土也君其拜受之至齐齐桓公厚礼而以宗女妻之有马二十乘重耳安之重耳至齐二岁而桓公卒会竖刁等为内乱齐孝公之立诸侯兵数至留齐凡五岁重耳爱齐女母去心赵衰咎犯乃於桑下谋行齐女侍者在桑下闻之以告其主其主乃杀侍者【集解服虔曰惧孝公怒故杀之以灭其口】劝重耳趣行重耳曰人生安乐孰知其他必死於此【集解徐广曰一云人生一世必死於此】不能去齐女曰子一国公子穷而来此数士者以子为命子不疾反国报劳臣而怀女德窃为子羞之且不求何时得功乃与赵衰等谋醉重耳载以行行远而觉重耳大怒引戈欲杀咎犯咎犯曰杀臣成子偃之愿也重耳曰事不成我食舅氏之肉咎犯曰事不成犯肉腥臊何足食乃止遂行过曹曹共公不礼欲观重耳骈脇曹大夫厘负羁曰晋公子贤又同姓穷来过我奈何不礼共公不从其谋负羁乃私遗重耳食置璧其下重耳受其食还其璧去过宋宋襄公新困兵於楚伤於泓闻重耳贤乃以国礼礼於重耳【索隐以国君之礼礼之也】宋司马公孙固善於咎犯曰宋小国新困不足以求入更之大国乃去过郑郑文公弗礼郑叔瞻谏其君曰晋公子贤而其从者皆国相且又同姓郑之出自厉王而晋之出自武王郑君曰诸侯亡公子过此者衆安可尽礼叔瞻曰君不礼不如杀之且後为国患郑君不听重耳去之楚楚成王以适诸侯礼待之【索隐适音敌】重耳谢不敢当赵衰曰子亡在外十余年小国轻子况大国乎今楚大国而固遇子子其母让此天开子也遂以客礼见之成王厚遇重耳重耳甚卑成王曰子即反国何以报寡人重耳曰羽毛齿角玉帛君王所余未知所以报王曰虽然何以报不谷重耳曰即不得已与君王以兵车会平原广泽请辟王三舍【集解贾逵曰司马法从邈不过三舍三舍九十里也】楚将子玉怒曰王遇晋公子至厚今重耳言不孙请杀之成王曰晋公子贤而困於外久从者皆国器此天所置庸可杀乎且言何以易之【索隐子玉请杀重耳楚成王不许言人之出言不可轻易之也】居楚数月而晋太子圉亡秦秦怨之闻重耳在楚乃召之成王曰楚远更数国乃至晋秦晋接境秦君贤子其勉行厚送重耳重耳至秦缪公以宗女五人妻重耳故子圉妻与往重耳不欲受司空季子【集解服虔曰胥臣曰季也】曰其国且伐况其故妻乎且受以结秦亲而求入子乃拘小礼忘大丑乎遂受缪公大欢与重耳饮赵衰歌黍苗诗【集解韦昭曰诗云芄芃黍苗陰雨膏之】缪公曰知子欲急反国矣赵衰与重耳下再拜曰孤臣之仰君如百谷之望时雨是时晋惠公十四年秋惠公以九月卒子圉立十一月葬惠公十二月晋国大夫栾郤等闻重耳在秦皆陰来劝重耳赵衰等反国为内应甚衆於是秦缪公乃发兵与重耳归晋晋闻秦兵来亦发兵拒之然皆陰知公子重耳入也唯惠公之故贵臣吕卻之属【正义吕甥郤芮也】不欲立重耳重耳出亡凡十九岁而得入时年六十二矣晋人多附焉文公元年春秦送重耳至河咎犯曰臣从君周旋天下过亦多矣臣犹知之况於君乎请从此去矣重耳曰若反国所不与子犯共者河伯视之【索隐视犹见也】乃投璧河中子犯盟是时介子推从在船中乃笑曰天实开公子而子犯以为己功而要市於君固足羞也吾不忍与同位乃自隐渡河秦兵围令狐晋军于庐柳【集解韦昭曰庐柳晋地名】二月辛丑咎犯与秦晋大夫盟於郇【集解杜预曰解县西北有郇城索隐音荀即文王之子所封又音环】壬寅重耳入于晋师丙午入于曲沃丁未朝于武宫【集解贾逵曰文公之祖武公庙

也】即位为晋君是为文公羣臣皆往怀公圉奔高梁戊申使人杀怀公怀公故大臣吕省郤芮本不附文公文公立恐诛乃欲与其徒谋烧公宫杀文公文公不知始尝欲杀文公宦者履鞮知其谋欲以告文公解前罪求见文公文公不见使人让曰蒲城之事女斩予祛其後我从狄君猎女为惠公来求杀我惠公与女期三日至而女一日至何速也女其念之宦者曰臣刀锯之余不敢以二心事君倍主故得罪於君君已反国其母蒲翟乎且管仲射钩桓公以霸今刑余之人以事告而君不见祸又且及矣於是见之遂以吕郤等告文公文公欲召吕郤吕郤等党多文公恐初入国国人卖已乃为微行会秦繆公於王城【索隐杜预云冯翊临晋县东有故王城今名武乡城】国人莫知三月己丑吕郤等果反焚公宫不得文公文公之卫徒与战吕郤等引兵欲奔秦繆公诱吕郤等杀之河上晋国复而文公得归夏迎夫人於秦秦所与文公妻者卒为夫人秦送三千人为卫以备晋乱文公修政施惠百姓赏从亡者及功臣大者封邑小者尊爵未尽行赏周襄王以弟带难出居郑地来告急晋晋初定欲发兵恐他乱起是以赏从亡未至隐者介子推推亦不言禄禄亦不及推曰献公子九人唯君在矣惠怀无亲外内弃之天未絶晋必将有主主晋祀者非君而谁天实开之二三子以为己力不亦诬乎窃人之财犹曰是盗况贪天之功以为己力乎下冒其罪上赏其奸上下相蒙【集解服虔曰蒙欺也】难与处矣其母曰盍亦求之以死谁忍推曰尤而效之罪有甚焉且出怨言不食其禄母曰亦使知之若何对曰言身之文也身欲隐安用文之文之是求显也其母曰能如此乎与女偕隐至死不复见介子推从者怜之乃悬书宫门曰龙欲上天五蛇为辅【索隐龙喻重耳五蛇即五臣狐偃赵衰魏武子司空季子及子推也旧云五臣有先轸颠颉今恐二人非其数】龙已升云四蛇各入其宇一蛇独怨终不见处所文公出见其书曰此介子推也吾方忧王室未图其功使人召之则亡遂求所在闻其入縣上山中【集解贾逵曰縣上晋地杜预曰西河介休县南有地名縣上】於是文公环縣上山中而封之以为介推田【集解徐广曰一作国】号曰介山以记吾过且旌善人【集解贾逵曰旌表也】从亡贱臣壶叔曰君三行赏赏不及臣敢请罪文公报曰夫导我以仁义防我以德惠此受上赏辅我以行卒以成立此受次赏矢石之难汗马之劳此复受次赏若以力事我而无补吾缺者此受次赏三赏之後故且及子晋人闻之皆说二年春秦军河上将入王【索隐河上晋地】赵衰曰求霸莫如入王尊周周晋同姓晋不先入王後秦入之母以令于天下方今尊王晋之资也三月甲辰晋乃发兵至阳樊【集解服虔曰阳樊周地阳邑名也樊仲山之所居故曰阳樊】围温入襄王于周四月杀王弟带周襄王赐晋河内阳樊之地四年楚成王及诸侯围宋宋公孙固如晋告急先轸曰报施定霸於今在矣【集解杜预曰报宋赠马之施】狐偃曰楚新得曹而初婚於卫若伐曹卫楚必救之则宋免矣於是晋作三军【集解王肃曰始复成国之礼半周军也】赵衰举郤穀将中军郤臻佐之使狐偃将上军狐毛佐之命赵衰为卿栾枝将下军【集解贾逵曰栾枝栾宾之孙】先轸佐之荀息御戎魏犢为右【正义犢昌由反又音受】往伐冬十二月晋兵先下山东而以原封赵衰【集解杜预曰河内沁水县西北有原城】五年春晋文公欲伐曹假道於卫卫人弗许还自河南度侵曹伐卫正月取五鹿二月晋侯齐侯盟于斂孟【集解杜预曰卫地也】卫侯请盟晋晋人不许卫侯欲与楚国人不欲故出其君以说晋卫侯居襄牛【集解服虔曰卫地也】公子买守卫楚救卫不卒【集解徐广曰一作胜】晋侯围曹三月丙午晋师入曹数之以其不用厘负羈言而用美女乘轩者三百人也令军毋入僖负羈宗家以报德楚围宋宋复告急晋文公欲救则攻楚为楚尝有德不欲伐也欲释宋宋又尝有德於晋患之【索隐晋若攻楚则伤楚子送其入秦之德又欲释宋不救乃亏宋公赠马之惠进退有难是

以患之】先轸曰执曹伯分曹卫地以与宋楚急曹卫其势宜释宋【索隐楚初得曹又新於卫今晋执曹伯而分曹卫之地与宋则楚急曹卫其势宜释宋也】於是文公从之而楚成王乃引兵归楚将子玉曰王遇晋至厚今知楚急曹卫而故伐之是轻王王曰晋侯亡在外十九年困日久矣果得反国险厄尽知之能用其民天之所开不可当子玉请曰非敢必有功愿以间执谗慝之口也【集解服虔曰子玉非敢求有大功但欲执蒍贾谗慝之口谓子玉过三百乘不能入也杜预曰执犹塞也】楚王怒少与之兵於是子玉使宛春告晋【集解贾逵曰宛春楚大夫】请复卫侯而封曹臣亦释宋咎犯曰子玉无礼矣君取一臣取二勿许【集解韦昭曰君文公也臣子玉也一谓释宋围二谓复曹卫】先轸曰定人之谓礼楚一言定三国子一言而亡之我则毋礼不许楚是弃宋也不如私许曹卫以诱之执宛春以怒楚【集解韦昭曰怒楚令必战】既战而後图之【集解杜预曰须胜负决乃定计】晋侯乃囚宛春於卫且私许复曹卫曹卫告絶於楚楚得臣怒【集解駰案得臣即子玉】击晋师晋师退军吏曰为何退文公曰昔在楚约退三舍可倍乎楚师欲去得臣不肯四月戊辰宋公齐将秦将与晋侯次城濮【集解贾逵曰卫地也索隐宋公成公王臣齐将国归父秦将小子憖也】己巳与楚兵合战楚兵败得臣收余兵去甲午晋师还至衡雍【集解杜预曰衡雍郑地今荥阳卷县也】作王宫于践土【集解服虔曰既败楚师襄王自往临践土赐命晋侯晋侯闻而为之作宫索隐杜预云践土郑地然据此文晋师还至衡雍衡雍在河南也故刘氏云践土在河南下文践土在河北今元城县西有践土驿义或然也】初郑助楚楚败惧使人请盟晋侯晋侯与郑伯盟五月丁未献楚俘於周【正义俘音孚囚也】驷介百乘徒兵千【集解服虔曰驷介驷马被甲也徒兵步卒也】天子使王子虎命晋侯为伯【集解贾逵曰王子虎周大夫】赐大辂彤弓矢百旅弓矢千【集解贾逵曰大辂金辂彤弓赤旅弓黑也诸侯赐弓矢然後征伐正义彤徒冬反旅音卢】秬鬯一卣珪瓚【集解贾逵曰秬黑黍鬯香酒也所以降神卣器名诸侯赐珪瓚然後为鬯】虎賁三百人【集解贾逵曰天子卒曰虎賁】晋侯三辞然後稽首受之【集解贾逵曰稽首首至地】周作晋文侯命王若曰父义和【集解孔安国曰同姓故称曰父马融曰王顺曰父能以义和我诸侯索隐尚书文侯之命是平王命晋文侯仇之语今此乃是襄王命文公重耳之事代数悬隔勲策全乖太史公虽复弥缝左氏而系家颇亦时有疎谬裴氏集解亦引孔马之注而都不言时代乖角何习迷而同醉也然计平王至襄王为七代仇至重耳为十一代而十三侯又平王元年至鲁僖二十八年当襄二十年为一百三十余岁矣学者颇合讨论之刘伯庄以为盖天子命晋同此一辞尤为非也】丕显文武能慎明德【集解孔安国曰文王武王能详慎显用明德】昭登於上布闻在下【集解马融曰昭明也上谓天下谓人】维时上帝集厥命于文武【集解孔安国曰惟以是故集成其王命德流子孙】恤朕身继予一人永其在位【集解孔安国曰当忧念我身则我一人长安在位】於是晋文公称伯癸亥王子虎盟诸侯於王庭【集解服虔曰王庭践土也索隐服虔知王庭是践土者据二十八年五月公会晋侯盟于践土又此上文四月甲午作王宫于践土王庭即王宫也】晋焚楚军火数日不息文公叹左右曰胜楚而君犹忧何文公曰吾闻能战胜安者唯圣人是以惧且子玉犹在庸可喜乎子玉之败而归楚成王怒其不用其言贪与晋战让责子玉子玉自杀晋文公曰我击其外楚诛其内内外相应於是乃喜六月晋人复入卫侯壬午晋侯度河北归国行赏狐偃为首或曰城濮之事先轸之谋文公曰城濮之事偃说我毋失信先轸曰军事胜为右吾用之以胜然此一时之说偃言万世之功奈何以一时之利而加万世功乎是以先之冬晋侯会诸侯於温欲率之朝周力未能恐其有畔者乃使人言周襄王狩于河阳壬申遂率诸

侯朝王於踐土【索隱左氏五月盟于踐土冬会诸侯于温天王狩于河阳壬申朝于王所此文亦说冬朝于王当合于河阳温地不合取五月踐土之文也】孔子读史记至文公曰诸侯无召王王狩河阳者春秋讳之也丁丑诸侯围许曹伯臣或说晋侯曰齐桓公合诸侯而国异姓今君为会而灭同姓曹叔振铎之後晋唐叔之後合诸侯而灭兄弟非礼晋侯说复曹伯於是晋始作三行【集解服虔曰辟天子六军故谓之三行】荀林父将中行先穀将右行【索隱左传屠击将右行与此文异】先蔑将左行【集解杜预曰三行无佐疑大夫帅也索隱按左传荀林父并是卿而云大夫帅者非也不置佐者当避天子也或新置三行官未备耳】七年晋文公秦穆公共围郑以其无礼於文公亡过时及城濮时郑助楚也围郑欲得叔瞻叔瞻闻之自杀郑持叔瞻告晋晋曰必得郑君而甘心焉郑恐乃间令使谓秦穆公曰【索隱使谓烛之武也】亡郑厚晋於晋得矣而秦未为利君何不解郑得为东道交【索隱交犹好也诸本及左氏皆作主】秦伯说罢兵晋亦罢兵九年冬晋文公卒子襄公欢立是岁郑伯亦卒郑人或卖其国於秦【正义左传云秦晋伐郑烛之武说秦师罢令杞子逢孙杨孙三大夫戍郑杞子自郑使告於秦曰郑人使我掌其北门之管若潜师以来国可得也】秦繆公发兵往袭郑十二月秦兵过我郊襄公元年春秦师过周无礼王孙满讥之兵至滑郑贾人弦高将市于周遇之以十二牛劳秦师秦师惊而还灭滑而去晋先轸曰秦伯不用蹇叔反其衆心此可击栾枝曰未报先君施於秦击之不可先轸曰秦侮我孤伐吾同姓何德之报遂击之襄公墨衰絰【集解贾逵曰墨变凶杜预曰以凶服从戎故墨之】四月败秦师于殽秦三将孟明视西乞术白乙丙以归遂墨以葬文公【集解服虔曰非礼也杜预曰记礼所由变也】文公夫人秦女谓襄公曰秦欲得其三将戮之公许遣之先轸闻之谓襄公曰患生矣轸乃追秦将秦将渡河已在船中顿首谢卒不反後三年秦果使孟明伐晋报殽之败取晋汪以归【索隱左氏传文公二年秦孟明视伐晋报殽之役无取晋汪之事又其年冬晋先且居等伐秦取汪彭衙而还则汪是秦邑止可晋伐秦取之岂得秦伐晋而取汪也或者晋先取之秦今伐晋而取汪是汪从晋来故云取晋汪而归也彭衙在合阳北汪不知所在】四年秦繆公大兴兵伐我渡河取王官【正义括地志云王官故城在同州澄城县西北六十里左传文三年秦伐晋取王官即此先言渡河史文颠倒耳】封殽尸而去晋恐不敢出遂城守五年晋伐秦取新城【集解服虔曰秦邑新所作城也】报王官役也六年赵衰成子栾贞子咎季子犯霍伯皆卒【集解贾逵曰栾贞子栾枝也霍伯先且居也】赵盾代赵衰执政七年八月襄公卒太子夷皋少晋人以难故【集解服虔曰晋国数有患难】欲立长君赵盾曰立襄公弟雍好善而长先君爱之且近於秦秦故好也立善则固事长则顺奉爱则孝结旧好则安贾季曰不如其弟乐辰嬴嬖於二君【集解服虔曰辰嬴怀嬴也二君怀公文公】立其子民必安之赵盾曰辰嬴贱班在九人下【集解服虔曰班次也】其子何震之有【集解贾逵曰震威也】且为二君嬖淫也为先君子【正义乐文公子也】不能求大而出在小国僻也母淫子僻无威【正义僻正亦反言乐僻隐在陈而远三援也】陈小而远无援将何可乎使士会如秦迎公子雍贾季亦使人召公子乐於陈赵盾废贾季以其杀阳处父【集解駰案左传曰此时贾他为太师阳处父为太傅】十月葬襄公十一月贾季奔翟是岁秦穆公亦卒灵公元年四月秦康公曰晋文公之入也无卫故有吕卻之患乃多与公子雍卫太子母繆嬴日夜抱太子以号泣於朝曰先君何罪其嗣亦何罪舍适而外求君将安置此【集解服虔曰此太子】出朝则抱以适赵盾所顿首曰先君奉此子而属之子曰此子材吾受其赐不材吾怨子【集解王肃曰怨其教导不至也】今君卒言犹在耳【集解杜预曰在宣子之耳】而弃之若何赵盾与诸大夫皆患穆嬴且畏诛

乃背所迎而立太子夷臯是为灵公发兵以距秦送公子雍者赵盾为将往击秦败之令狐先蔑随会亡奔秦秋齐宋卫郑曹许君皆会赵盾盟於扈【集解杜预曰郑地荥阳卷县西北有扈亭】以灵公初立故也四年伐秦取少梁秦亦取晋之郤【集解徐广曰年表云北徵也索隐按左传文十年春晋人伐秦取少梁夏秦伯伐晋取北徵北徵即年表所谓今云郤者字误也徵音惩亦冯翊之县名】六年秦康公伐晋取羈马晋侯怒使赵盾赵穿郤缺击秦大战河曲赵穿最有功七年晋六卿患随会之在秦常为晋乱乃详令魏寿余反晋降秦秦使随会之魏因执会以归晋八年周顷王崩公卿争权故不赴【索隐春秋鲁文十二年顷王崩周公闕与王孙苏争政故不赴是也】晋使赵盾以车八百乘平周乱而立匡王【索隐左传文十四年晋赵盾以诸侯之师八百乘纳捷菑于邾不克乃还而周公闕与王孙苏讼于晋赵宣子平王室而复之则以车八百乘自是宣子纳邾捷菑不关王室之事但文相连耳恐此误】是年楚庄王初即位十二年齐人弑其君懿公十四年灵公壮侈厚敛以雕墙【集解贾逵曰雕画也】从台上弹人观其避丸也宰夫胾熊蹯不熟【集解服虔曰蹯熊掌其肉难熟正义胾音而蹯音樊】灵公怒杀宰夫使妇人持其屍出弃之过朝赵盾随会前数谏不听已又见死人手二人前谏随会先谏不听灵公患之使鉏麇刺赵盾【集解贾逵曰鉏麇晋力士正义鉏音锄麇音迷】盾闺门开居处节鉏麇退叹曰杀忠臣弃君命罪一也遂触树而死【集解杜预曰赵盾庭树也】初盾常田首山【集解徐广曰蒲坂县有雷首山】见桑下有饿人饿人示眯明也【索隐邹诞生音示眯为祁弥即左传之提弥明也提音市移反刘氏亦音祁为时移反则祁提二字同音也而凡史记作示者示即周礼古本地神曰只皆作示字邹为祁者盖由祁提音相近字遂变为祁也眯音米移反以眯为弥亦音相近耳又据左氏宣公二年桑下饿人是灵辄也其示眯明是喉嚨者也眯明闕而死今合二人为一人殆非也】盾与之食食其半问其故曰宦三年【集解服虔曰宦官学士也】未知母之存不愿遗母盾义之益与之饭肉已而为晋宰夫赵盾弗复知也九月晋灵公饮赵盾酒伏甲将攻盾公宰示眯明知之恐盾醉不能起而进曰君赐臣觴三行【索隐如字】可以罢欲以去赵盾令先母及难盾既去灵公伏士未会先纵啮狗名敖【集解何休曰犬四尺曰敖索隐纵足用反又作噉又作就同素后反】明为盾搏杀狗盾曰弃人用狗虽猛何为然不知明之为陰德也已而灵公纵伏士出逐赵盾示眯明反击灵公之伏士伏士不能进而竟脱盾盾问其故曰我桑下饿人问其名弗告【集解服虔曰不望报】明亦因亡去盾遂奔未出晋境乙丑盾昆弟将军赵穿袭杀灵公於桃园【集解虞翻曰园名也】而迎赵盾赵盾素贵得民和灵公少侈民不附故为弑易【索隐以豉反】盾复位晋太史董狐书曰赵盾弑其君以视於朝盾曰弑者赵穿我无罪太史曰子为正卿而亡不出境反不诛国乱非子而谁孔子闻之曰董狐古之良史也书法不隐【集解杜预曰不隐盾之罪】宣子良大夫也为法受恶【集解服虔曰闻义则服杜预曰善其为法受屈也正义为于伪反】惜也出疆乃免【集解杜预曰越境则君臣之义絶可以不讨贼也】赵盾使赵穿迎襄公弟黑臀于周而立之是为成公成公者文公少子其母周女也壬申朝于武宫成公元年赐赵氏为公族【集解服虔曰公族大夫也】伐郑郑倍晋故也三年郑伯初立附晋而奔楚楚怒伐郑晋往救之六年伐秦虜秦将赤【索隐赤即斥谓斥候之人也按宣八年左传云晋伐秦获秦谍杀诸絛市盖彼谍即此赤也晋成公六年与鲁宣八年正同故知然也】七年成公与楚庄王争强会诸侯于扈陈畏楚不会晋使中行桓子伐陈【索隐桓子荀林父也】因救郑与楚战败楚师是年成公卒子景公据立景公元年春陈大夫夏徵舒弑其君灵公二年楚庄王伐陈诛徵舒三年楚庄王围郑郑告急晋晋使荀林父将中军随会将上军

赵朔将下军郤克栾书先穀韩厥巩朔佐之六月至河闻楚已服郑郑伯肉袒与盟而去荀林父欲还先穀曰凡来救郑不至不可将率离心卒度河楚已服郑欲饮马于河为名而去楚与晋军大战郑新附楚畏之反助楚攻晋晋军败走河争度船中人指甚衆楚虜我将智罃归而林父曰臣为督将军败当诛请死景公欲许之随会曰昔文公之与楚战城濮成王归杀子玉而文公乃喜今楚已败我师又诛其将是助楚杀仇也乃止四年先穀以首计而败晋军河上恐诛乃奔翟与翟谋伐晋晋觉乃族穀穀先軫子也五年伐郑为助楚故也是时楚庄王强以挫晋兵河上也六年楚伐宋宋来告急晋晋欲救之伯宗谋曰【集解贾逵曰伯宗晋大夫】楚天方开之不可当乃使解扬给为救宋【集解服虔曰解扬晋大夫】郑人执与楚楚厚赐使反其言令宋急下解扬给许之卒致晋君言楚欲杀之或谏乃归解扬七年晋使随会灭赤狄八年使郤克於齐齐顷公母从楼上观而笑之所以然者郤克偻而鲁使蹇卫使眇故齐亦令人如之以导客郤克怒归至河上曰不报齐者河伯视之至国请君欲伐齐景公问知其故曰子之怨安足以烦国弗听魏文子请老休辟郤克克执攻九年楚庄王卒晋伐齐齐使太子强为质於晋晋兵罢十一年春齐伐鲁取隆【索隐刘氏云隆即龙也鲁北有隆山又此年当鲁成二经书齐侯伐我北鄙传曰围龙又邹诞及别本作 字 当作郛文十二年季孙行父帅师城诸及郛郛即 也字变耳地理志云在东宛县东】鲁告急卫卫与鲁皆因郤克告急於晋乃使郤克栾书韩厥以兵车八百乘与鲁卫共伐齐夏与顷公战於鞌【索隐地名】伤困顷公顷公乃与其右易位下取饮以得脱去齐师败走晋追北至齐顷公献宝器以求平不听郤克曰必得萧桐姪子为质【索隐传作叔子】齐使曰萧桐姪子顷公母顷公母犹晋君母奈何必得之不义请复战晋乃许与平而去楚申公巫臣盗夏姬以奔晋晋以巫臣为邢大夫【集解贾逵曰邢晋邑】十二年冬齐顷公如晋欲上尊晋景公为王景公让不敢晋始作六卿【集解贾逵曰初作六军僭王也】韩厥巩朔赵穿荀躒赵括赵旃皆为卿【索隐躒音佳諡文子也】智罃自楚归十三年鲁成公朝晋晋弗敬鲁怒去倍晋晋伐郑取汜十四年梁山崩【集解駰案公羊传曰梁山河上山杜预曰在冯翊夏阳县北也】问伯宗伯宗以为不足怪也【集解徐广曰年表云伯宗隐其人用其言】十六年楚将子反怨巫臣灭其族巫臣怒遗子反书曰必令子罢於奔命乃请使吴令其子为吴行人教吴乘车用兵吴晋始通约伐楚十七年诛赵同赵括族灭之韩厥曰赵衰赵盾之功岂可忘乎奈何絶祀乃复令赵庶子武为赵後复与之邑十九年夏景公病立其太子寿曼为君是为厉公後月余景公卒厉公元年初立欲和诸侯与秦桓公夹河而盟归而秦倍盟与翟谋伐晋三年使吕相让秦【集解贾逵曰吕相晋大夫】因与诸侯伐秦至泾败秦於麻隧虜其将成差五年三郤谗伯宗杀之【集解贾逵曰三郤郤錡郤犇郤至】伯宗以好直谏得此祸国人以是不附厉公六年春郑倍晋与楚盟晋怒栾书曰不可以当吾世而失诸侯乃发兵厉公自将五月渡河闻楚兵来救范文子请公欲还郤至曰发兵诛逆见强辟之无以令诸侯遂与战癸巳射中楚共王目楚兵败於鄢陵【集解徐广曰一作焉服虔曰鄢陵郑之东南地也索隐鄢音偃又於连反】子反收余兵拊循欲复战晋患之共王召子反其侍者竖阳谷进酒子反醉不能见王怒让子反子反死王遂引兵归晋由此威诸侯欲以令天下求霸厉公多外嬖姬归欲尽去羣大夫而立诸姬兄弟宠姬兄曰胥童尝与郤至有怨及栾书又怨郤至不用其计而遂败楚【集解駰案左传曰栾书欲待楚师退而击之郤至云楚有六间不可失也】乃使人间谢楚楚来诈厉公曰鄢陵之战实至召楚欲作乱内子周立之会与国不具是以事不成厉公告栾书栾书曰其殆有矣愿公试使人之周【集解虞翻曰周京师】微考之果使郤至於周栾书又使公子周见郤至郤

至不知见卖也厉公验之信然遂怨郤至欲杀之八年厉公猎与姬饮郤至杀豕奉进宦者夺之【索隐宦者孟张】郤至射杀宦者公怒曰季子欺予【集解杜预曰公反以为郤至夺豕也】将诛三郤未发也郤錡欲攻公曰我虽死公亦病矣郤至曰信不反君智不害民勇不作乱失此三者谁与我我死耳十二月壬午公令胥童以兵八百人袭攻杀三郤胥童因以劫栾书中行偃于朝曰不杀二子患必及公公曰一旦杀三卿寡人不忍益也对曰人将忍君【集解杜预曰人谓书偃】公弗听谢栾书等以诛郤氏罪大夫复位二子顿首曰幸甚幸甚公使胥童为卿闰月乙卯厉公游匠骊氏【集解贾逵曰匠骊氏晋外嬖大夫在翼者】栾书中行偃以其党袭捕厉公囚之杀胥童而使人迎公子周【集解徐广曰一作纠】于周而立之是为悼公悼公元年正月庚申栾书中行偃弑厉公葬之【集解駉案左传曰葬之于翼东门之外】以一乘车【集解杜预曰言不以君礼葬也诸侯葬车七乘】厉公囚六日死死十日庚午智罃迎公子周来至绛刑鸡与大夫盟而立之是为悼公辛巳朝武宫二月乙酉即位悼公周者其大父捷晋襄公少子也不得立号为桓叔桓叔最爱桓叔生惠伯谈谈生悼公周周之立年十四矣悼公曰大父父皆不得立而辟难於周客死焉寡人自以疎远母几为君【索隐几音冀谓望也】今大夫不忘文襄之意而惠立桓叔之後赖宗庙大夫之灵得奉晋祀岂敢不战战乎大夫其亦佐寡人於是逐不臣者七人修旧功施德惠收文公入时功臣後秋伐郑郑师败遂至陈三年晋会诸侯【索隐於鸡泽也】悼公问羣臣可用者祁奚举解狐解狐奚之仇复问举其子祁午君子曰祁奚可谓不党矣外举不隐仇内举不隐子方会诸侯悼公弟杨干乱行【集解贾逵曰行陈也】魏绛戮其仆【集解贾逵曰仆御也】悼公怒或谏公公卒贤绛任之政使和戎戎大亲附十一年悼公曰自吾用魏绛九合诸侯【集解服虔曰九合一谓会于戚二会城棣救陈三会于鄆四会于邢五同盟于戏六会于祖七戌郑虎牢八同盟于亳城北九会于兰鱼】和戎翟魏子之力也赐之乐三让乃受之冬秦取我栎【索隐音历释例云在河北地阙】十四年晋使六卿率诸侯伐秦度泾大败秦军至械林而去十五年悼公问治国於师旷师旷曰唯仁义为本冬悼公卒子平公彪立平公元年伐齐齐灵公与战靡下【集解徐广曰靡一作历索隐刘氏靡音眉绮反即靡笄也】齐师败走晏婴曰君亦毋勇何不止战遂去晋追遂围临菑尽烧屠其郭中东至胶南至沂齐皆城守晋乃引兵归六年鲁襄公朝晋晋栾逞有罪奔齐八年齐庄公微遣栾逞於曲沃以兵随之齐兵上太行栾逞从曲沃中反袭入绛绛不戒平公欲自杀范献子止公以其徒击逞逞败走曲沃曲沃攻逞逞死遂灭栾氏宗逞者栾书孙也【集解駉案左传逞作盈】其入绛与魏氏谋齐庄公闻逞败乃还取晋之朝歌去以报临菑之役也十年齐崔杼弑其君庄公晋因齐乱伐败齐於高唐去报太行之役也十四年吴延陵季子来使与赵文子韩宣子魏献子语曰晋国之政卒归此三家矣十九年齐使晏婴如晋与叔向语叔向曰晋季世也公厚赋为台池而不恤政政在私门其可久乎晏子然之二十二年伐燕二十六年平公卒子昭公夷立昭公六年卒六卿强公室卑【索隐韩赵魏范中行及晋氏为六卿後韩赵魏为三卿而分晋政故曰三晋】子顷公去疾立顷公六年周景王崩王子争立晋六卿平王室乱立敬王九年鲁季氏逐其君昭公昭公居乾侯十一年卫宋使使请晋纳鲁君季平之私赂范献子献子受之乃谓晋君曰季氏无罪不果入鲁君十二年晋之宗家祁奚孙叔向子相恶於君六卿欲弱公室乃遂以法尽灭其族而分其邑为十县各令其子为大夫晋益弱六卿皆大十四年顷公卒子定公午立定公十一年鲁阳虎奔晋赵鞅简子舍之十二年孔子相鲁十五年赵鞅使邯郸大夫午不信欲杀午午与中行寅范吉射亲攻赵鞅【索隐寅荀偃之孙射音亦范献子士鞅之子】鞅走保晋阳定公围

晋阳荀栎韩不信魏侈与范中行为仇乃移兵伐范中行范中行反晋君击之败范中行范中行走朝歌保之韩魏为赵鞅谢晋君乃赦赵鞅复位二十二年晋败范中行氏二子奔齐三十年定公与吴王夫差会黄池争长赵鞅时从卒长吴【集解徐广曰吴世家说黄池之盟云赵鞅怒将战吴乃长晋定公左氏传云乃先晋人外传云吴公先歃晋公次之】三十一年齐田常弑其君简公而立简公弟骈为平公三十三年孔子卒三十七年定公卒子出公蒯立出公十七年【集解徐广曰年表云出公立十八年或云二十年】知伯与赵韩魏共分范中行地以为邑出公怒告齐鲁欲以伐四卿【索隐时赵魏韩共灭范氏及中行氏而分其地犹有智氏与三晋故云四卿】四卿恐遂反攻出公出公奔齐道死故知伯乃立昭公曾孙骄为晋君是为哀公【索隐赵系家云骄是为懿公又年表云出公十八年次哀公忌二年次懿公骄十七年纪年又云出公二十三年奔楚乃立昭公之孙是为敬公系本亦云昭公生礼桓公子雍生忌忌生懿公骄然晋赵系家及年表并皆不同何况纪年之说也】哀公大父雍晋昭公少子也号为戴子【集解徐广曰世本作桓子雍注云戴子】戴子生忌忌善知伯早死故知伯欲尽并晋未敢乃立忌子骄为君当是时晋国政皆决知伯晋哀公不得有所制知伯遂有范中行地最强哀公四年赵襄子韩康子魏桓子共杀知伯尽并其地【索隐如纪年之说此乃出公二十二年事】十八年哀公卒子幽公柳立幽公之时晋畏反朝韩赵魏之君【索隐畏惧也为哀弱故反朝韩赵魏也宋忠引此注系本而畏字作衰】独有绛曲沃余皆入三晋十五年魏文侯初立【索隐按纪年魏文侯初立在敬公十八年】十八年幽公淫妇人夜窃出邑中盗杀幽公【索隐纪年云夫人秦嬴贼公於高寝之上】魏文侯以兵诛晋乱立幽公子止是为烈公【索隐系本幽公生烈成公止又年表云魏诛幽公立其弟止也】烈公十九年周威烈王赐赵韩魏皆命为诸侯二十七年烈公卒子孝公颀立【索隐系本云孝公倾欣纪年以孝公为桓公故韩子有晋桓侯】孝公九年魏武侯初立袭邯郸不胜而去十七年孝公卒【索隐纪年云桓公二十年赵成侯韩共侯迁桓公於屯留已後更无晋事】子静公俱酒立【索隐系本云静公俱也】是岁齐威王元年也静公二年魏武侯韩哀侯赵敬侯灭晋侯而三分其地【索隐纪年云魏武侯以桓公十九年卒韩哀侯赵敬侯并以桓公十五年卒又赵系家列侯十六年与韩分晋封晋君端氏其後十年肃侯徙晋於屯留不同也】静公迁为家人晋绝不祀太史公曰晋文公古所谓明君也亡居外十九年至困约及即位而行赏尚忘介子推况骄主乎灵公既弑其後成景致严至厉太刻大夫惧诛祸作悼公以後日衰六卿专权故君道之御其臣下固不易哉

【索隐述赞曰天命叔虞卒封於唐桐圭既削河汾是荒文侯虽嗣曲沃日强未知本末祚倾桓庄献公昏惑太子罗殃重耳致霸朝周河阳灵既丧德厉亦无防四卿侵侮晋祚遽亡】

史记卷三十九

史记卷三十九考证

晋世家初武王与叔虞母会时梦天谓武王曰余命女生子名虞○左传疏曰世家谓此梦为武王之梦也若是武王之梦此传直云武王方生太叔其文足矣何以须言邑姜方震也邑姜方震而梦明是邑姜梦矣安得以为武王梦也薄姬之梦龙据其身燕姁之梦兰为己子彼皆

梦发于母此何以梦发于父是马迁之妄言耳

史佚曰天子无戏言言则史书之礼成之乐歌之○说苑君道篇又以为周公曰言则史书之工诵之士称之褚先生补梁孝王世家亦作周公

唐叔子燮是为晋侯正义宗国都城记唐叔虞之子燮父徙居晋水傍今并理故唐城唐者即燮父初徙之处○秦藩本此下有其城南半入州城中削为坊城墙北半见在共十七字

孝侯八年曲沃桓叔卒○年表作九年

孝侯十五年曲沃庄伯弑其君晋孝侯于翼○左传鲁惠之四十五年曲沃庄伯伐翼弑孝侯年表作十六年

曲沃庄伯闻鄂侯卒乃兴兵伐晋○毛诗唐风疏曰隐五年左传曲沃庄伯伐翼翼侯奔随秋王命虢父伐曲沃而立哀侯于翼六年传曰翼九宗五正须父之子嘉父逆晋侯于随纳诸鄂晋人谓之鄂侯则哀侯之立鄂侯未卒世家则言卒

晋侯缙四年宋执郑祭仲而立突为郑君○左传此事在鲁桓之十一年於晋侯为五年年表作六年此又作四年

晋侯十九年齐人管至父弑其君襄公○左传及齐世家年表於鲁为庄之八年於齐为襄之十二年合之晋侯当是二十一年此作十九年

先晋穆侯曾孙也索隐晋有两穆侯言先以别後○【臣照】按三代世表及左氏并无两穆侯以别先後索隐不知何据而作此论也然则先者何盖起事之辞犹左传云初也

献公元年周惠王弟颓攻惠王○左传周本纪郑世家年表俱在惠王之二年於献公亦二年

太子申生其母齐桓公女也曰齐姜○【臣照】按左传齐姜为武公之妾献公烝之生秦穆夫人及太子申生晋世家云献公即位重耳年二十一证之年表重耳生年为齐襄之元年後十二年齐桓方立申生为太子其年必长於重耳齐姜二十而生申生在齐桓即位之年已三十余岁矣齐桓在位四十三年即位时亦不过与齐姜之年相上下焉得谓为其女乎孔穎达左传疏亦详辨之

申生同母女弟为秦穆公夫人○秦本纪云太子申生姊左传亦叙在申生上此则云女弟或弟字为曷字之讹

夷吾母重耳母女弟也○【臣照】按左传献公娶二女於戎大戎狐姬生重耳小戎子生夷吾杜预注云大戎唐叔子孙别在戎狄者小戎允姓之戎子女也正义曰晋语云狐氏出自唐

叔狐伯行之子实生重耳狐偃其舅也昭九年传曰先王居櫛机于四裔故允姓之奸居於瓜州知戎为允姓也此以夷吾母即重耳母之女弟盖以大戎子小戎子之称而淆讹也左传疏曰虢射惠公之舅狐偃文公之舅二母固不得为姊妹矣

献公子八人○【臣照】按左传介子推曰献公之子九人即下文叙介子推语亦曰九人也则八字乃九字之讹耳

赵衰曰土者有土也君其拜受之○左传作子犯之言且言何以易之索隐言人之出言不可轻易之也○【臣照】按楚子之意谓重耳言不可易也玉帛之会则有定典无磬国以事人之理唯兵车之会乃得以退避申报而数极于三退三舍以避可以报矣真有国家者之言何以易之犹孟子言圣人不易我言之易非小司马之说也

闻其入绵上山中於是文公环绵上山中而封之以为介推田号曰介山○顾炎武曰左传晋侯求之不获以绵上为之田盖子推既隐求之不得未几而死故以田禄其子耳楚辞九章云思久故之亲身兮因縞素而哭之明文公在时之推已死史记则云闻其入緄上山云云然则受此田者何人乎於义有所不通矣

赵衰曰求霸莫如入王尊周○左传作狐偃之言而用美女乘轩者三百人也○徐孚远曰乘轩三百人盖小人滥位诗所谓三百赤芾也史云美女亦误

六年赵衰成子栾贞子咎季子犯霍伯皆卒○左传是年只书四大夫卒而子犯不书则子犯不死于是年明矣年表亦同子犯二字盖衍

子景公据立○左传据作獮

魏文子请老休辟郤克○左传请老以辟郤克者范文子也

十七年诛赵同赵括族灭之韩厥曰赵衰赵盾之功岂可忘乎奈何絶祀乃复令赵庶子武为赵後复与之邑○徐孚远曰此与赵世家所载不同

立其太子寿曼为君○春秋经寿曼作州蒲

秋伐郑郑师败遂至陈○左传晋韩厥伐郑入其郛败其徒兵于洧上晋师自郑以鄆之师侵楚焦夷及陈在悼公二年之夏五月此作元年秋也

平公元年伐齐○左传伐齐事在鲁襄之十八年於晋平为三年年表同此作元年

九年鲁季氏逐其君昭公昭公居乾侯○左传昭公是年居鄆晋顷之十二年乃居乾侯

十五年赵鞅使邯郸大夫午不信欲杀午午与中行寅范吉射亲攻赵鞅○左传晋赵鞅谓邯郸午曰归我卫贡五百家吾舍诸晋阳午许诺归告其父兄父兄不可赵孟怒召午而囚诸晋阳遂杀午赵稷涉宾以邯郸叛夏六月上军司马籍秦围邯郸邯郸午荀寅之甥也荀寅范吉射之姻也而相与睦故不与围邯郸秋七月范氏中行氏伐赵氏之宫据此是午前死而范中行乃攻赵鞅也此则云午与范中行亲攻赵鞅与范中行为仇

荀栎韩不信魏侈○左传作荀跖魏曼多

三十年定公与吴王夫差会黄池争长赵鞅时从卒长吴○黄震日抄曰黄池之会吴晋争长而史於吴世家曰长晋於晋世家曰长吴自相矛盾未知孰是

子出公凿立○六国年表凿作错

史记卷三十九考证

<史部,正史类,史记>

卷四十

钦定四库全书

史记卷四十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

楚世家第十

楚之先祖出自帝颛顼高阳高阳者黄帝之孙昌意之子也高阳生称【正义音尺证反】称生卷章卷章生重黎【集解徐广曰世本云老童生重黎及吴回譙周曰老童即卷章索隐重氏黎氏二官代司天地重为木正黎为火正据左氏少昊氏之子曰重颛顼氏之子曰黎今以重黎为一人乃是颛顼之子孙者刘氏云少昊氏之後曰重颛顼氏之後曰黎黎对彼重则单称黎若自言当家则称重黎故楚及司马氏皆重黎之後非关少昊之重愚谓此解为当】重黎为帝啻高辛居火正【索隐此重黎为火正彼少昊氏之後重自为木正知此重黎即彼之黎也】甚有功能光融天下帝啻命曰祝融【集解虞翻曰祝大融明也韦昭曰祝始也】共工氏作乱帝啻使重黎诛之而不尽帝乃以庚寅日诛重黎而以其弟吴回为重黎後复居火正为祝融吴回生陆终陆终生子六人坼剖而产马【集解干宝曰先儒学士多疑此事譙允南通才达学精核数理者也作古史考以为作者妄记废而不论余亦尤其生之异也然案六子之世子孙有国升降六代数千年间迭至霸王天将兴之必有尤物乎若夫前志所传修已坼而生禹简狄坼而生契历代久远莫足相证近魏黄初五年汝南屈雍妻王氏生男儿从右脇下水腹上出而平和自若数月创合母子无恙斯盖近事之信也以今况古固知注记者之不妄也天地云为陰阳变化安可守之一端概以常理乎诗云不坼不副无灾无害原诗人之旨明古之妇人尝有坼剖而产者矣又有因产而遇灾害者故美其无害也索隐系本云陆终娶鬼方氏之妹谓之女嬭】其长一曰昆吾【集解虞翻曰昆吾名樊为己姓封昆吾世本曰昆吾者卫是也索隐系本云其一曰樊是为昆吾宋忠曰昆吾国名己姓所出左传曰卫侯梦见披发登昆吾之观今濮阳县中有昆吾台是正义括地志云濮阳县古昆吾国也昆吾故城在县西三十里台在县西百步即昆吾墟也】二曰参胡【集解駰案世本曰参胡者韩是也索隐系本云二曰惠连是为参胡宋忠曰参胡国名斯姓无後】三曰彭祖【集解虞翻曰名翦为彭姓封於大彭世本曰彭祖者彭城是也索隐系本云三曰錢铿是为彭祖虞翻所云是也正义括地志云彭城古彭祖国也外传云殷末灭彭祖国也虞翻云名翦神仙传云彭祖讳铿帝颛顼之玄孙至殷末年已七百六十七而不衰老遂往流沙之西非寿终也】四曰会人

【集解駟案世本曰会人者郃是也索隐系本云四曰求言是为会人宋忠曰求言名也妘姓所出郃国也正义括地志云故郃城在郑州新郑县东北二十二里毛诗谱云昔高辛氏之土祝融之墟历唐至周重黎之後妘姓处其地是为郃国为郑武公所灭也】五曰曹姓【集解駟案世本曰曹姓者邾是也索隐系本云其五曰安是为曹姓宋忠云安名也曹姓者诸曹所出也正义括地志云故邾国在黄州黄冈县东南百二十一里史记云邾子曹姓也】六曰季连芈姓楚其後也【索隐系本云六曰季连是为芈姓季连者楚是也宋忠曰季连名也芈姓诸楚所出楚之先芈音弥是反干羊声也】昆吾氏夏之时尝为侯伯桀之时汤灭之彭祖氏殷之时尝为侯伯殷之末世灭彭祖氏季连生附沮【集解孙检曰一作祖索隐沮音才叙反】附沮生穴熊其後中微或在中国或在蛮夷弗能纪其世周文王之时季连之苗裔曰鬻熊鬻熊子事文王蚤卒其子曰熊丽熊丽生熊狂熊狂生熊绎熊绎当周成王之时举文武勤劳之後嗣而封熊绎於楚蛮封以子男之田姓芈氏居丹阳【集解徐广曰在南郡枝江县正义潁容三传例云楚居丹阳今枝江县故城是括地志云归州巴东县东南四里归故城楚子熊绎之始国也又熊绎墓在归州秭归县輿地志云秭归县东有丹阳城周回八里熊绎始封也】楚子熊绎与鲁公伯禽卫康叔子牟晋侯燹齐太公子吕汲俱事成王熊绎生熊艾熊艾生熊?【索隐一作黹音土感反?音与但反与亶同字亦作亶也】熊?生熊胜熊胜以弟熊杨为後【索隐邹诞本作熊锡錫又作炀】熊杨生熊渠熊渠生子三人当周夷王之时王室微诸侯或不朝相伐熊渠甚得江汉间民和乃兴兵伐庸【集解杜预曰庸今上庸县正义括地志云房州竹山县本汉上庸县古之庸国昔周武王伐纣庸蛮在焉】杨粤【索隐有本作杨雱音吁地名也今音越谯周作杨越】至于鄂【正义五各反刘伯庄云地名在楚之西後徙楚今东鄂州是括地志云邓州向城县南二十里西鄂故城是楚西鄂】熊渠曰我蛮夷也不与中国之号谥乃立其长子康为句亶王【集解张莹曰今江陵也索隐系本康作庸亶作袒地理志江陵南郡之县也楚文王自丹阳徙都之】中子红为鄂王【集解駟案九州记曰鄂今武昌索隐有本作褒红音贙红从下文熊贙红读古史考及邹氏刘氏等无音?红恐非也正义括地志武昌县鄂王旧都今鄂王神即熊渠子之神也】少子执疵为越章王【索隐系本无执字越作就正义即弑鄂王红者也】皆在江上楚蛮之地及周厉王之时暴虐熊渠畏其伐楚亦去其王後为熊母康【集解徐广曰即渠之长子】母康早死熊渠卒子熊挚红立挚红卒其弟弑而代立曰熊延【索隐如此史意即上鄂王红也谯周以为熊渠卒子熊翔立卒长子挚有疾少子熊延立此云挚红卒其弟弑而自立曰熊延欲会此代系则翔亦母康之弟熊渠者既卒母康又早卒其挚红立而被延弑故史考言挚有疾而此言弑也正义谯周言挚有疾此言弑未详宋均注乐纬云熊渠嫡嗣曰熊挚有恶疾不得为後别居於夔为楚附庸後王命曰夔子也】熊延生熊勇熊勇六年而周人作乱攻厉王厉王出奔彘熊勇十年卒弟熊严为後熊严十年卒有子四人长子伯霜中子仲雪次子叔堪【索隐堪一作湛】少子季徇【索隐徇旬俊反】熊严卒长子伯霜代立是为熊霜熊霜元年周宣王初立熊霜六年卒三弟争立仲雪死叔堪亡避难於濮【集解杜预曰建宁郡南有濮夷正义按建宁晋郡在蜀南与蛮相近刘伯庄云濮在楚西南孔安国云庸濮在汉之南按成公元年楚地千里孔说是也】而少弟季徇立是为熊徇熊徇十六年郑桓公初封於郑二十二年熊徇卒子熊罻立【索隐罻音鄂亦作噩】熊罻九年卒子熊仪立是为若敖若敖二十年周幽王为犬戎所弑周东徙而秦襄公始列为诸侯二十七年若敖卒子熊坎立是为霄敖【索隐坎若感反一作菌又作欽】霄敖六年卒子熊眇立【集解徐广曰眇音舜索隐按玉篇眇在口部顾氏云楚之先即

蚡冒也刘音舜其近代本字有从目者故刘氏有舜音非也】是为蚡冒【索隐古本蚡作粉音愤冒音亡北反或亡报反】蚡冒十三年晋始乱以曲沃之故蚡冒十七年卒蚡冒弟熊通弑蚡冒子而代立是为楚武王武王十七年晋之曲沃庄伯弑主国晋孝侯十九年郑伯弟段作乱二十一年郑侵天子之田二十三年卫弑其君桓公二十九年鲁弑其君隐公三十一年宋太宰华督弑其君殇公三十五年楚伐随【集解贾逵曰随姬姓杜预曰随国今义阳随县正义括地志云随州外城古随国地世本云楚武王墓在豫州新息随姬姓也武王卒师中而兵罢括地志云上蔡县东北五十里】随曰我无罪楚曰我蛮夷也今诸侯皆为叛相侵或相杀我有敝甲欲以观中国之政请王室尊吾号随人为之周请尊楚王室不聽还报三十七年楚熊通怒曰吾先鬻熊文王之师也早终成王举我先公乃以子男田令居楚蛮夷皆率服而王不加位我自尊耳乃自立为武王与随人盟而去於是始开濮地而有之五十一年周召随侯数以立楚为王楚怒以随背已伐随武王卒师中而兵罢【集解駰案皇览曰楚武王冢在汝南郡颍阳县葛陂乡城东北民谓之楚王岑汉永平中葛陵城北祝里社下於土中得铜鼎而名曰楚武王由是知楚武王之冢民传言秦项赤眉之时欲发之辄颓坏填压不得发也正义有本注葛陂乡作葛陵乡者误也地理志云新蔡县西北六十里有葛陂乡即费长房投竹成龙之陂因为乡名】子文王熊贲立始都郢【正义括地志云纪南故城在荆州江陵县北五十里杜预云国都於郢今南郡江陵县北纪南城是括地志云又至平王更城郢在江陵县东北六里故郢城是也】文王二年伐申过邓【正义括地志云故申城在邓州南阳县北三十里晋太康地志云周宣王舅所封故邓城在襄州安养县北二十里春秋之邓国庄十六年楚文王灭之】邓人曰楚王易取邓侯不许也【集解服虔曰邓曼姓】六年伐蔡【正义豫州上蔡县在州北七十里古蔡国也县外城蔡国城也】虜蔡哀侯以归已而释之楚强陵江汉间小国小国皆畏之十一年齐桓公始霸楚亦始大十二年伐邓灭之十三年卒子熊羆立【集解駰案史记音隐云古艰字】是为杜敖【索隐杜作壮侧状反】杜敖五年欲杀其弟熊恽【索隐恽音粉反左氏作顔?频反】恽奔随与随袭弑杜敖代立是为成王成王恽元年初即位布德施惠结旧好於诸侯使人献天子天子赐胙曰镇尔南方夷越之乱无侵中国於是楚地千里十六年齐桓公以兵侵楚至降山【正义杜预云降楚地颍川召陵县南有降亭括地志降山在郑州西南一百一十里即此山也】楚成王使将军屈完以兵御之【正义屈曲勿反完音桓楚族也】与桓公盟桓公数以周之赋不入王室楚许之乃去十八年成王以兵北伐许【集解駰案地理志曰颍川许昌县故许国也】许君肉袒谢乃释之二十二年伐黄【索隐汝南弋阳县故黄国正义括地志云黄国故城汉弋阳县也春秋时黄都嬴姓在光州定城县四十里也】二十六年灭英【集解徐广曰年表及他本皆作英一本作黄正义英国在淮南盖蓼国也不知改名时也】三十三年宋襄公欲为盟会召楚楚王怒曰召我我好往袭辱之遂行至孟【正义音于宋地也】遂执辱宋公已而归之三十四年郑文公南朝楚楚成王北伐宋败之泓射伤宋襄公襄公遂病创死三十五年晋公子重耳过楚成王以诸侯客礼飧而厚送之於秦三十九年鲁僖公来请兵以伐齐楚使申侯将兵伐齐取谷【集解杜预曰济北谷城县正义括地志云谷在济州东阿县东二十六里】置齐桓公子雍焉齐桓公七子皆奔楚楚尽以为上大夫灭夔夔不祀祝融鬻熊故也【集解服虔曰夔楚熊渠之孙熊挚之後夔在巫山之阳秭归乡是也索隐譙周作灭归归即夔之地名归县之乡也】夏伐宋宋告急於晋晋救宋成王罢归将军子玉请战成王曰重耳亡居外久卒得反国天之所开不可当子玉固请乃与之少师而去晋果败子玉於城濮成王怒诛子玉四十六年初成王将以

商臣为太子语令尹子上子上曰君之齿未也【集解杜预曰齿年也言尚少】而又多内宠
紂乃乱也楚国之举常在少者【集解贾逵曰举立也】且商臣蠡目而豺声忍人也【集解
服?曰言忍为不义】不可立也王不聽立之後又欲立子职【集解贾逵曰职商臣庶弟也】
而紂太子商臣商臣闻而未审也告其傅潘崇曰何以得其实崇曰飡王之宠姬【集解駰案
姬当作妹】江芊而勿敬也商臣从之江芊【正义芊亡尔反】怒曰宜乎王之欲杀若而立
职也商臣告潘崇曰信矣崇曰能事之乎【集解服?曰若立职子能事之】曰不能能亡去乎
曰不能能行大事乎【集解服?曰谓弑君】曰能冬十月商臣以宫卫兵围成王成王请食熊
蹯而死【集解杜预曰熊掌难熟冀久将有外救之援也】不聽丁未成王自绞杀商臣代立
是为穆王穆王立以其太子宫予潘崇使为太师掌国事穆王三年灭江【集解杜预曰江国
在汝南安阳县】四年灭六蓼六蓼皐陶之後【集解杜预曰六国今庐江六县蓼国今安丰
蓼县】八年伐陈十二年卒子庄王偃立庄王即位三年不出号令日夜为乐令国中曰有敢
諫者死无赦伍举入諫庄王左抱郑姬右抱越女坐钟鼓之间伍举曰愿有进隐【集解駰案
隐谓隐藏其意】曰有鸟在於阜三年不蜚不鸣是何鸟也庄王曰三年不蜚蜚将冲天三年
不鸣鸣将惊人举退矣吾知之矣居数月淫益甚大夫苏从乃入諫王曰若不闻令乎对曰杀
身以明君臣之愿也於是乃罢淫乐聽政所诛者数百人所进者数百人任伍举苏从以政国
人大说是岁灭庸【正义今房州竹山县是也】六年伐宋获五百乘八年伐陆浑戎【集解
服?曰陆浑戎在洛西南正义允姓之戎徙居陆浑】遂至洛观兵於周郊【集解服?曰观兵
陈兵示周也】周定王使王孙满劳楚王【集解服?曰以郊劳礼迎之也】楚王问鼎小大轻
重【集解杜预曰示欲逼周取天下】对曰在德不在鼎庄王曰子无阻九鼎楚国折钩之喙
足以为九鼎【正义喙许卫反凡戟有钩喙鈎口之尖也言楚国戟之鈎口尖有折者足以为
鼎言鼎易得也】王孙满曰呜呼君王其忘之乎昔虞夏之盛远方皆至贡金九牧【集解服?
曰使九州之牧贡金】铸鼎象物【集解贾逵曰象所图物着之於鼎】百物而为之备使民
知神奸【集解杜预曰图鬼神百物之形使民逆备之也】桀有乱德鼎迁於殷载祀六百【
集解贾逵曰载辞也祀年也商曰祀王肃曰载祀者犹言年也】殷纣暴虐鼎迁於周德之休
明虽小必重【集解杜预曰不可迁】其奸回昏乱虽大必轻【集解杜预曰言可移】昔成
王定鼎于郊廓【集解杜预曰郊廓今河南县西有郊廓陌武王迁之成王定之索隐按周书
郊雒北山名音甲廓谓田厚廓故以名焉】卜世三十卜年七百年所命也周德虽衰天命未
改鼎之轻重未可问也楚王乃归九年相若敖氏【集解駰案左传曰子越椒】人或谗之王
恐诛反攻王王击灭若敖氏之族十三年灭舒【集解杜预曰庐江六县东有舒城也】十六
年伐陈杀夏徵舒徵舒弑其君故诛之也已破陈即县之羣臣皆贺申叔时使齐来不贺王问
对曰鄙语曰牵牛径人田田主取其牛径者则不直矣取之牛不亦甚乎且王以陈之乱而率
诸侯伐之以义伐之而贪其县亦何以复令於天下庄王乃复陈国後十七年春楚庄王围郑
三月克之入自皇门【集解贾逵曰郑城门何休曰郭门也】郑伯肉袒牵羊以逆【集解贾
逵曰肉袒牵羊示服为臣隶也】曰孤不天不能事君君用怀怒以及敝邑孤之罪也敢不唯
命是聽宾之南海若以臣妾赐诸侯亦唯命是聽若君不忘厉宣桓武【集解杜预曰周厉王
宣王郑之所自出也郑武公桓公始封之贤君也】不絕其社稷使改事君孤之愿也非所敢
望也敢布腹心楚羣臣曰王勿许庄王曰其君能下人必能信用其民庸可絕乎庄王自手旗
左右麾军引兵去三十里而舍遂许之平【集解杜预曰退一舍而礼郑】潘甝入盟子良出
质【集解駰案潘甝楚大夫子良郑伯弟】夏六月晋救郑与楚战大败晋师河上遂至衡雍

而归二十年围宋以杀楚使也【索隐左传宣十四年楚子使申舟聘于齐曰无假道于宋华元曰过我而不假道鄙我也鄙我亡也杀其使者必伐我伐我亦亡也亡一也乃杀之楚子闻之投袂而起九月围宋是也】围宋五月城中食尽易子而食析骨而炊宋华元出告以情庄王曰君子哉遂罢兵去二十三年庄王卒子共王审立共王十六年晋伐郑郑告急共王救郑与晋兵战鄢陵晋败楚射中共王目共王召将军子反子反嗜酒从者竖阳谷进酒醉王怒射杀子反遂罢兵归三十一年共王卒子康王招立康王立十五年卒子员立【索隐员音云左传作麇】是为郑敖康王宠弟公子围【集解徐广曰史记多作回】子比子皙弃疾郑敖三年以其季父康王弟公子围为令尹主兵事四年围使郑道闻王疾而还十二月己酉围入问王疾绞而弑之【集解荀卿曰以冠纓绞之左传曰葬王于郑谓之郑敖】遂杀其子莫及平夏使使赴於郑伍举问曰谁为後【集解服虔曰问来赴者】对曰寡大夫围伍举更曰共王之子围为长【集解杜预曰伍举更赴辞使从礼告终称嗣不以篡弑赴诸侯】子比奔晋而围立是为灵王灵王三年六月楚使使告晋欲会诸侯诸侯皆会楚於申伍举曰昔夏启有钧台之飧【集解杜预曰河南阳翟县南有钧台陂】商汤有景亳之命周武王有盟津之誓成王有岐阳之蒐【集解贾逵曰岐山之阳】康王有丰宫之朝【集解服虔曰丰宫成王庙所在也杜预曰丰在始平鄠县东有灵台康王於是朝诸侯】穆王有涂山之会齐桓有召陵之师晋文有践土之盟君其何用灵王曰用桓公【集解杜预曰用会召陵之礼也】时郑子产在焉於是晋宋鲁卫不往灵王已盟有骄色伍举曰桀为有仍之会有缙叛之【集解贾逵曰仍缙国名也】纣为黎山之会东夷叛之【集解服虔曰黎东夷国名也子姓】幽王为太室之盟戎翟叛之【集解杜预曰太室中岳也】君其慎终七月楚以诸侯兵伐吴围朱方八月克之囚庆封灭其族以封徇曰无效齐庆封弑其君而弱其孤以盟诸大夫【集解杜预曰齐崔杼弑其君庆封其党故以弑君罪责之也】封反曰莫如楚共王庶子围弑其君兄之子员而代之立【集解駰案谷梁传曰军人粲然皆笑】於是灵王使弃疾杀之七年就章华台【集解杜预曰南郡华容县有台在城内】下令内亡人实之八年使公子弃疾将兵灭陈十年召蔡侯醉而杀之使弃疾定蔡因为陈蔡公十一年伐徐以恐吴【集解駰案左传曰使荡侯等围徐】灵王次於乾谿以待之王曰齐晋鲁卫其封皆受宝器我独不今吾使使周求鼎以为分其予我乎【集解服虔曰有功德受分器】析父对曰其予君王哉【集解贾逵曰析父楚大夫索隐据左氏此是右尹子革之辞史盖误也】昔我先王熊绎辟在荆山芘露蓝蒨【集解徐广曰芘一作暴駰案服虔曰芘露柴车素大辂也蓝蒨言衣敝坏其蒨蓝蒨然也】以处草莽跋涉山林【集解服虔曰草行曰跋水行曰涉】以事天子唯是桃弧棘矢以共王事【集解服虔曰桃弧棘矢所以御其灾言楚地山林无所出也】齐王舅也【集解服虔曰齐吕汲成王之舅】晋及鲁卫王母弟也楚是以无分而彼皆有周今与四国服事君王将唯命是从岂敢爱鼎灵王曰昔我皇祖伯父昆吾旧许是宅【集解服虔曰陆终氏六子长曰昆吾少曰季连季连楚之祖故谓昆吾为伯父也昆吾曾居许地故曰旧许是宅】今郑人贪其田不我予今我求之其予我乎对曰周不爱鼎郑安敢爱田灵王曰昔诸侯远我而畏晋今吾大城陈蔡不羹【集解韦昭曰三国楚别都也颍川定陵有东不羹襄城有西不羹正义括地志云不羹故城在许州襄城县东三十里地理志云此乃西不羹也】赋皆千乘诸侯畏我乎对曰畏哉灵王喜曰析父善言古事焉【正义左传昭十二年析父谓子革曰吾子楚国之望也今与王言如响国其若之何杜预云讥其顺王心如响应声也按此对王言是子革之辞太史公云析父误也析父时为王仆见子革对故叹也】十二年春楚灵王乐乾谿不能去也国人苦役初灵王会兵於

申戮越大夫常寿过【索隐戮辱也】杀蔡大夫观起【索隐观音官观姓起名】起子从亡在吴【索隐从音才松反】乃劝吴王伐楚为间越大夫常寿过而作乱为吴间使矫公子弃疾命召公子比於晋至蔡与吴越兵欲袭蔡令公子比见弃疾与盟於邓【集解杜预曰颍川邵陵县西有邓城正义括地志云故邓城在豫州鄢城县东三十五里按在古召陵县西十里是也】遂入杀灵王太子禄立子比为王公子子皙为令尹弃疾为司马先除王宫观从从师于乾谿令楚衆曰国有王矣先归复爵邑田室後者迁之楚衆皆溃去灵王而归灵王闻太子禄之死也自投车下而曰人之爱子亦如是乎侍者曰甚是王曰余杀人之子多矣能无及此乎右尹曰【集解駟案左传曰右尹子革】请待於郊以聽国人【集解服?曰聽国人欲为谁】王曰衆怒不可犯曰且入大县而乞师於诸侯王曰皆叛矣又曰且奔诸侯以聽大国之虑王曰大福不再祇取辱耳於是王乘舟将欲入鄢【集解服?曰鄢楚别都也杜预曰襄阳宜城县正义音偃括地志云故鄢城在襄州安养县北三里在襄州北五里南去荆州二百五十里按王自夏口从汉水上入鄢也左传云王沿夏将欲入鄢是也括地志云鄢水源出襄州义清县西界托仗山水经云蛮水即鄢水是也】右尹度王不用其计惧俱死亦去王亡灵王於是独傍徨山中野人莫敢入王王行遇其故鍬人【集解韦昭曰今之中?】谓曰为我求食我已不食三日矣鍬人曰新王下法有敢饗王从王者罪及三族且又无所得食王困枕其股而卧鍬人又以土自代逃去王觉而弗见遂饥不能起半尹申无宇之子申亥曰吾父再犯王命【集解服?曰断王旌执人於章华之宫】王弗诛恩孰大焉乃求王遇王饥於厘泽奉之以归夏五月癸丑王死申亥家【正义左传云夏五月癸亥王缢於芊尹申亥是也】申亥以二女从死并葬之是时楚国虽已立比为王畏灵王复来又不闻灵王死故观从谓初王比曰不杀弃疾虽得国犹受祸王曰余不忍从曰人将忍王王不聽乃去弃疾归国人每夜惊曰灵王入矣乙卯夜弃疾使船人从江上走呼曰灵王至矣国人愈惊又使曼成然告初王比及令尹子皙曰王至矣国人将杀君司马将至矣【集解杜预曰司马谓弃疾】君蚤自图无取辱焉衆怒如水火不可救也初王及子皙遂自杀丙辰弃疾即位为王改名熊居是为平王平王以诈弑两王而自立恐国人及诸侯叛之乃施惠百姓复陈蔡之地而立其後如故归郑之侵地存恤国中修政教吴以楚乱故获五率以归【集解服?曰五率荡侯潘子司马督嚭尹午陵尹喜】平王谓观从恣尔所欲欲为卜尹王许之【集解贾逵曰卜尹卜师大夫官】初共王有宠子五人无适立乃望祭羣神请神决之使主社稷而陰与巴姬【集解贾逵曰共王妾】埋璧於室内【正义左传云埋璧於太室之庭杜预云太室祖庙也】召五子斋而入康王跨之【集解服?曰两足各跨璧一边杜预曰过其上】灵王肘加之子比子皙皆远之平王幼抱而入再拜压纽故康王以长立至其子失之围为灵王及身而弑子比为王十余日子皙不得立又俱诛四子皆絶无後唯独弃疾後立为平王竟续楚祀如其神符初子比自晋归韩宣子问叔向曰子比其济乎对曰不就宣子曰同恶相求如市贾焉【集解服?曰谓国人共恶灵王者如市贾之人求利也】何为不就对曰无与同好谁与同恶【集解服?曰言无党於内当与谁共同好恶】取国有五难有宠无人一也【集解杜预曰宠须贤人而固】有人无主二也【集解杜预曰虽有贤人当须内主为应】有主无谋三也【集解杜预曰谋策谋也】有谋而无民四也【集解杜预曰民衆也】有民而无德五也【集解杜预曰四者既备当以德成之】子比在晋十三年矣晋楚之从不闻通者可谓无人矣【集解杜预曰晋楚之士从子比游皆非达人】族尽亲叛可谓无主矣【集解杜预曰无亲族在楚】无衅而动可谓无谋矣【集解服?曰言灵王尚在而妄动取国故谓无谋】为羈终世可谓无民矣【集解杜预曰终身羈客

在於晋是无民】亡无爱徵可谓无德矣【集解杜预曰楚人无爱念者】王虐而不忌【集解杜预曰灵王暴虐无所畏忌将自亡】子比涉五难以弑君谁能济之有楚国者其弃疾乎君陈蔡方城外属焉【正义方城山在许州叶县西十八里也】苛慝不作盗贼伏隐私欲不违【集解服虔曰不以私欲违民心】民无怨心先神命之国民信之半姓有乱必季实立楚之常也子比之官则右尹也数其贵宠则庶子也以神所命则又远之民无怀焉将何以立宣子曰齐桓晋文不亦是乎【集解服虔曰皆庶子而出奔】对曰齐桓卫姬之子也有宠於厘公有鲍叔牙宾须无隰朋以为辅有莒卫以为外主【集解贾逵曰齐桓出奔莒自莒先入卫人助之】有高国以为内主【集解服虔曰高子皆齐之正卿】从善如流【集解服虔曰言其疾】施惠不倦有国不亦宜乎昔我文公狐季姬之子也有宠於献公好学不倦生十七年有士五人有先大夫子余子犯以为腹心【集解贾逵曰子余赵衰】有魏驪贾佗以为股肱有齐宋秦楚以为外主【集解贾逵曰齐以女妻之宋赠之马楚享以九献秦送内之】有栾郤狐先以为内主【集解贾逵曰四姓晋大夫正义杜预云谓栾枝郤穀狐突先軫也】亡十九年守志弥笃惠怀弃民【集解服虔曰皆弃民不恤】民从而与之【正义以怀惠弃民故民相从而归心於文公】故文公有国不亦宜乎子比无施於民无援於外去晋晋不送归楚楚不迎何以有国子比果不终焉卒立者弃疾【正义左传云获神一也有民二也令德三也宠贵四也居常五也有五利以去五难谁能害之杜预云获神当璧拜也有民民信也令德无苛慝也宠贵妃子也居常弃疾季也】如叔向言也平王二年使费无忌如秦【集解服虔曰楚大夫索隐传作无极极忌声相近】为太子建【正义左传云楚子之在蔡也鄢阳之女奔之生太子建杜预云鄢蔡邑也鄢古冤反】娶妇妇好来未至无忌先归说平王曰秦女好可自娶为太子更求平王聽之卒自娶秦女生熊珍更为太子娶是时伍奢为太子太傅无忌为少傅无忌无宠於太子常谗恶太子建建时年十五矣其母蔡女也无宠於王王稍益疏外建也六年使太子建居城父守边【正义父音甫括地志云城父故城在许州叶县东北四十五里即杜预云襄城城父县也又许州襄城县东四十里亦有父城故城一所服虔云城父楚北境乃是父城之名非建所守杜预云言成父又误也传及酈元水经注云楚大城城父使太子建居之即十三州志云太子建所居城父谓今亳州城父县也按今亳州见有城父县是建所守者也地理志云颍川有父城县沛郡有城父县此二名别耳】无忌又日夜谗太子建於王曰自无忌入秦女太子怨亦不能无望於王王少自备焉且太子居城父擅兵外交诸侯且欲入矣平王召其傅伍奢责之伍奢知无忌谗乃曰王奈何以小臣疏骨肉无忌曰今不制後悔也於是王遂囚伍奢而召其二子而告以免父死乃令司马奋扬召太子建欲诛之太子闻之亡奔宋无忌曰伍奢有二子不杀者为楚国患盍以免其父召之必至於是王使使谓奢能致二子则生不能将死奢曰尚至胥不至王曰何也奢曰尚之为人廉死节慈孝而仁闻召而免父必至不顾其死胥之为人智而好谋勇而矜功知来必死必不来然为楚国忧者必此子於是王使人召之曰来吾免尔父伍尚谓伍胥曰闻父免而莫奔不孝也父戮莫报无谋也度能任事智也子其行矣我其归死伍尚遂归伍胥弯弓属矢出见使者曰父有何罪以召其子为将射使者还走遂出奔吴伍奢闻之曰胥亡楚国危哉楚人遂杀伍奢及尚十年楚太子建母在居巢【正义庐州巢县是也】开吴吴使公子光伐楚遂败陈蔡取太子建母而去楚恐城郢【正义在江陵县东北六里已解於前按传城郢在昭公三十三年下重言城郢杜预云楚用子囊遗言以筑郢城矣今畏吴复修以自固也】初吴之边邑卑梁【正义卑梁邑近鍾离也】与楚边邑鍾离小童争桑两家交怒相攻灭卑梁人卑梁大夫怒发邑兵攻鍾离楚王闻之怒发国

兵灭卑梁吴王闻之大怒亦发兵使公子光因建母家攻楚遂灭锺离居巢楚乃恐而城郢【索隐去年已城郢今又重言据左氏昭二十三年城郢二十四年无重城郢之文是史记误也】十三年平王卒将军子常曰太子珍少且其母乃前太子建所当娶也欲立令尹子西子西平王之庶弟也有义子西曰国有常法更立则乱言之则致诛乃立太子珍是为昭王昭王元年楚衆不说费无忌以其谗亡太子建杀伍奢子尚与郤宛宛之宗姓伯氏子嚭及子胥皆奔吴吴兵数侵楚楚人怨无忌甚楚令尹子常【正义名瓦左传云囊瓦伐吴】诛无忌以说衆衆乃喜四年吴三公子【集解駟案昭二十七年二公子奔楚公子掩余奔徐公子烛庸奔锺离此言三公子非】奔楚楚封之以扞吴五年吴伐取楚之六潜【正义故六城在壽州安丰县南百三十二里偃姓皐陶之後所封也潜城楚之潜邑在霍山县东二百步】七年楚使子常伐吴吴大败楚於豫章【正义今洪州也】十年冬吴王阖闾伍子胥伯嚭与唐蔡俱伐楚楚大败吴兵遂入郢辱平王之墓以伍子胥故也吴兵之来楚使子常以兵迎之夹汉水阵吴伐败子常子常亡奔郑楚兵奔吴乘胜逐之五战及郢己卯昭王出奔庚辰吴人入郢【集解駟案春秋云十一月庚辰】昭王亡也至云梦云梦不知其王也射伤王王走郢【正义走音奏郢音云括地志云安州安陆县城本春秋时郢国城】郢公之弟怀曰平王杀吾父【集解服?曰父曼成然正义成然立平王贪求无厌平王杀之】今我杀其子不亦可乎郢公止之然恐其弑昭王乃与王出奔随【正义括地志云随州城外古随国城随姬姓也又云楚昭王城在随州城北七里左传云吴师入郢王奔随随人处之公宫之北即此城是也】吴王闻昭王往即进击随谓随人曰周之子孙封於江汉之间者楚尽灭之欲杀昭王王从臣子綦乃深匿王自以为王谓随人曰以我予吴随人卜予吴不吉乃谢吴王曰昭王亡不在随吴请入自索之随不聽吴亦罢去昭王之出郢也使申包胥【集解服?曰楚大夫王孙包胥】求救於秦秦以车五百乘救楚楚亦收余散兵与秦击吴十一年六月败吴於稷【集解贾逵曰楚地也】会吴王弟夫概见吴王兵伤败乃亡归自立为王阖闾闻之引兵去楚归击夫概夫概败奔楚楚封之堂谿【正义地理志云堂谿故城在豫州偃城县西八十五里也】号为堂谿氏楚昭王灭唐【集解杜预曰义阳安昌县东南上唐乡正义括地志云上唐乡故城在随州枣阳县东南百五十里古之唐国也世本云唐姬姓之国】九月归入郢十二年吴复伐楚取番【正义片寒反又音婆括地志云饶州鄱阳县春秋时为楚东境秦为番县属九江郡今为鄱阳县也】楚恐去郢北徙都郢【正义音若括地志云楚昭王故城在襄州乐乡县东北三十三里在故都城东五里即楚国故昭王徙都郢城也】十六年孔子相鲁二十年楚灭顿【集解駟案地理志汝南顿县故顿子国正义括地志云陈州南顿县故顿子国应邵云古顿子国姬姓也逼於陈後南徙故曰南顿】灭胡【集解杜预曰汝南县西北胡城正义括地志云故胡城在豫州偃城县界】二十一年吴王阖闾伐越越王勾践射伤吴王遂死吴由此怨越而不西伐楚二十七年春吴伐陈楚昭王救之军城父十月昭王病於军中有赤云如鸟夹日而蜚【集解杜预曰云在楚上唯楚见之】昭王问周太史太史曰是害於楚王然可移於将相将相闻是言乃请自以身祷於神昭王曰将相孤之股肱也今移祸庸去是身乎弗聽卜而河为祟大夫请祷河昭王曰自吾先王受封望不过江汉【集解服?曰谓所受王命祀其国中山川为望正义按江荆州南大江也汉江也二水楚境内也河黄河非楚境也】而河非所获罪也止不许孔子在陈闻是言曰楚昭王通大道矣其不失国宜哉昭王病甚乃召诸公子大夫曰孤不佞再辱楚国之师今乃得以天寿终孤之幸也让其弟公子申为王不可又让次弟公子结亦不可乃又让次弟公子闾五让乃後许为王将战庚寅昭王卒於军中子闾曰王病甚舍其

子让羣臣所以许王以广王意也今君王卒臣岂敢忘君王之意乎乃与子西子綦谋伏师闭涂【集解徐广曰一作璧正义左传云谋潜师闭涂按潜师密发往迎也闭涂防断外寇也为昭王薨於军嗣子未定恐有隣国及诸公子之变故伏师闭涂迎越女之子章立为惠王也】迎越女之子章立之【集解服虔曰闭涂不通外使也越女昭王之妾索隐闭涂即攢涂也故下立惠王後即罢兵归葬服虔说非】是为惠王然後罢兵归葬昭王惠王二年子西召故平王太子建之子胜於吴以为巢大夫号曰白公【集解徐广曰伍子胥传曰使胜守楚之边邑鄢郢案服虔曰白邑名楚邑大夫皆称公杜预曰汝陰褒信县西南有白亭正义巢今庐州居巢县也括地志云白亭在豫州褒信东南三十二里褒信本汉鄢县之地後汉分鄢置褒信县在今褒信县东七十七里】白公好兵而下士欲报仇六年白公请兵令尹子西伐郑初白公父建亡在郑郑杀之白公亡走吴子西复召之故以此怨郑欲伐之子西许而未为发兵八年晋伐郑郑告急於楚楚使子西救郑受赂而去白公胜怒乃遂与勇力死士石乞等袭杀令尹子西子綦於朝因劫惠王置之高府【集解贾逵曰高府府名也杜预曰楚别府】欲弑之惠王从者屈固负王亡走昭王夫人宫【集解服虔曰昭王夫人惠王母越女也】白公自立为王月余会叶公来救楚楚惠王之徒与共攻白公杀之惠王乃复位是岁也【集解徐广曰惠王之十年】灭陈而县之十三年吴王夫差强陵齐晋来伐楚十六年越灭吴【正义表云越灭吴在元王四年】四十二年楚灭蔡【正义周定王二十二年】四十四年楚灭杞【正义周定王二十四年】与秦平是时越已灭吴而不能正江淮北【正义正长也江淮北谓广陵县徐泗等州也】楚东侵广地至泗上五十七年惠王卒子简王中立【正义中音仲】简王元年北伐灭莒【正义括地志云密州莒县故国也言北伐者莒在徐泗之北】八年魏文侯韩武子赵桓子始列为诸侯二十四年简王卒子声王【正义谥法云不生其国曰声也】当立声王六年盗杀声王子悼王熊疑立悼王二年三晋来伐楚至乘丘而还【集解徐广曰年表三年归关于郑正义年表云三晋来伐我至桑丘误也已解在年表中地理志云乘丘故城在兖州瑕丘县西北三十五里是也】四年楚伐周郑杀子阳九年伐韩取负黍十一年三晋伐楚败我大梁榆关【索隐此榆关当在大梁之西】楚厚赂秦与之平二十一年悼王卒子肃王臧立肃王四年蜀伐楚取兹方【正义古今地名云荆州松滋县古鸬兹地即兹方是也】於是楚为扞关以距之【集解駰案李熊说公孙述曰东守巴郡距扞关之口索隐郡国志曰巴郡鱼复县有扞关】十年魏取我鲁阳【集解駰案地理志云南阳有鲁阳县正义括地志云汝州鲁山本汉鲁阳县也古鲁县以古鲁山为名也】十一年肃王卒无子立其弟熊良夫是为宣王宣王六年周天子贺秦献公秦始复强而三晋益大魏惠王齐威王尤强三十年秦封卫鞅於商南侵楚是年宣王卒子威王熊商立威王六年周显王致文武胙於秦惠王七年齐孟尝君父田婴欺楚楚威王伐齐败之於徐州【集解徐广曰时楚已灭越而伐齐齐说越令攻楚故云齐欺楚】而令齐必逐田婴田婴恐张丑伪谓楚王曰王所以战胜於徐州者田盼子不用也【索隐盼子婴同族】盼子者有功於国而百姓为之用婴子弗善而用申纪申纪者大臣不附百姓不为用故王胜之也今王逐婴子婴子逐盼子必用矣复抔其士卒以与王遇【索隐搏音膊亦有作附读战国策作整】必不便於王矣楚王因弗逐也十一年威王卒子怀王熊槐立魏闻楚丧伐楚取我陘山【正义括地志云陘山在郑州新郑县西南三十里】怀王元年张仪始相秦惠王四年秦惠王初称王六年楚使柱国昭阳将兵而攻魏破之於襄陵得八邑【索隐襄陵县名在河东古本作八邑今亦作八城】又移兵而攻齐齐王患之【集解徐广曰怀王六年昭阳移和而攻齐军门曰和】陈轸适为秦使齐齐王曰为之奈何陈

軫曰王勿忧请令罢之即往见昭阳军中曰愿闻楚国之法破军杀将者何以贵之昭阳曰其官为上柱国封上爵执珪陈軫曰其有贵於此者乎昭阳曰令尹陈軫曰今君已为令尹矣此国冠之上【索隐冠音贯令尹尹中最尊故以国为言犹如卿子冠军然】臣请得譬之人有遗其舍人一卮酒者舍人相谓曰数人饮此不足以徧请遂画地为蛇蛇先成者独饮之一人曰吾蛇先成举酒而起曰吾能为之足及其为之足而後成人夺之酒而饮之曰蛇固无足今为之足是非蛇也今君相楚而攻魏破军杀将功莫大焉冠之上不可以加矣【索隐冠音官】今又移兵而攻齐攻齐胜之官爵不加於此攻之不胜身死爵夺有毁於楚此为蛇为足之说也不若引兵而去以德齐此持满之术也昭阳曰善引兵而去燕韩君初称王秦使张仪与楚齐魏相会盟啗桑【正义徐广云在梁与彭城之间】十一年苏秦约从山东六国兵攻秦楚怀王为从长至函谷关秦出兵击六国六国兵皆引而归齐独後十二年齐湣王伐败赵魏军秦亦伐败韩与齐争长十六年秦欲伐齐而楚与齐从亲秦惠王患之乃宣言张仪免相使张仪南见楚王谓楚王曰敝邑之王所甚说者无先大王虽仪之所甚愿为门阑之厮者亦无先大王敝邑之王所甚憎者无先齐王虽仪之所甚憎者亦无先齐王而大王和之【索隐和谓楚与齐相和亲也】是以敝邑之王不得事王而令仪亦不得为门阑之厮也王为仪闭关而絶齐今使使者从仪西取故秦所分楚商於之地方六百里【集解商於之地在今顺阳郡南乡丹水二县有商城在於中故谓之商於索隐地理志丹水及商属弘农今言顺阳者是魏晋始分置顺阳郡商城丹水俱隶之】如是则齐弱矣是北弱齐西德於秦私商於以为富此一计而三利俱至也怀王大悦乃置相玺於张仪日与置酒宣言吾复得吾商於之地羣臣皆贺而陈軫独吊怀王曰何故陈軫对曰秦之所为重王者以王之有齐也今地未可得而齐交先絶是楚孤也夫秦又何重孤国哉必轻楚矣且先出地而後絶齐则秦计不为先絶齐而後责地则必见欺於张仪见欺於张仪则王必怨之怨之是西起秦患北絶齐交西起秦患北絶齐交则两国之兵必至【索隐两国谓韩魏】臣故吊楚王弗聽因使一将军西受封地张仪至秦详醉坠车称病不出三月地不可得楚王曰仪以为絶齐为尚薄邪乃使勇士宋遗北辱齐王齐王大怒折楚符而合於秦秦齐交合张仪乃起朝谓楚将军曰子何不受地从某至某广袤六里楚将军曰臣之所以见命者六百里不闻六里即以归报怀王怀王大怒兴师将伐秦陈軫又曰伐秦非计也不如因赂之一名都与之伐齐是我亡於秦【索隐谓失商於之地】取偿於齐也吾国尚可全今王已絶於齐而责欺於秦是吾合秦齐之交而来天下之兵也国必大伤矣楚王不聽遂絶和於秦发兵西攻秦秦亦发兵击之十七年春与秦战丹阳【索隐此丹阳在汉中】秦大败我军斩甲士八万虏我大将军屈匄裨将军逢侯丑等七十余人遂取汉中之郡楚怀王大怒乃悉国兵复袭秦战於蓝田【正义蓝田在雍州东南八十里从蓝田关入蓝田县】大败楚军韩魏闻楚之困乃南袭楚至於邓楚闻乃引兵归十八年秦使使约复与楚亲分汉中之半以和楚楚王曰愿得张仪不愿得地张仪闻之请之楚秦王曰楚且甘心於子奈何张仪曰臣善其左右靳尚靳尚又能得事於楚王幸姬郑袖袖所言无不从者且仪以前使负楚以商於之约今秦楚大战有恶臣非面自谢楚不解且大王在楚不宜敢取仪诚杀仪以便国臣之愿也仪遂使楚至怀王不见因而囚张仪欲杀之仪私於靳尚靳尚为请怀王曰拘张仪秦王必怒天下见楚无秦必轻王矣又谓夫人郑袖曰秦王甚爱张仪而王欲杀之今将以上庸之地六县赂楚以美人聘楚王以宫中善歌者为之媵楚王重地秦女必贵而夫人必斥矣夫人不若言而出之郑袖卒言张仪於王而出之仪出怀王因善遇仪仪因说楚王以叛从约而与秦合亲约婚姻张仪已去屈原使从齐来谏王曰何不诛张仪怀王

悔使人追仪弗及是岁秦惠王卒二十年齐湣王欲为从长【索隐俗本或作二十六年按下文始言二十四年又更有二十六年则此云二十六年衍字也当是二十年事又徐广推校二十年取武遂二十三年归武遂则此二十年二十一年之事乎】恶楚之与秦合乃使使遗楚王书曰寡人患楚之不察於尊名也今秦惠王死武王立张仪走魏樗里疾公孙衍用而楚事秦夫樗里疾善乎韩而公孙衍善乎魏楚必事秦韩魏恐必因二人求合於秦则燕赵亦宜事秦四国争事秦则楚为郡县矣王何不与寡人并力收韩魏燕赵与为从而尊周室以案兵息民令於天下莫敢不乐聽则王名成矣王率诸侯并伐破秦必矣王取武关蜀汉之地【正义武关在商州东一百八十里商洛县界蜀巴蜀汉汉中郡】私吴越之富而擅江海之利韩魏割上党西薄函谷则楚之强百万也且王欺於张仪亡地汉中兵鏖蓝田天下莫不代王怀怒今乃欲先事秦愿大王孰计之楚王业已欲和於秦见齐王书犹豫不决下其议羣臣羣臣或言和秦或曰聽齐昭雎曰【索隐雎音七余反】王虽东取地於越不足以刷耻必且取地於秦而後足以刷耻於诸侯王不如深善齐韩以重樗里疾如是则王得韩齐之重以求地矣秦破韩宜阳【索隐弘农之县在澠池西南】而韩犹复事秦者以先王墓在平阳【索隐非尧都也】而秦之武遂去之七十里【索隐亦非河间国之县则韩之平阳秦之武遂并当在宜阳左右】以故尤畏秦不然秦攻三川【正义洛州也】赵攻上党楚攻河外韩必亡楚之救韩不能使韩不亡然存韩者楚也韩已得武遂於秦以河山为塞【正义河蒲河西黄河也山韩西境也】所报德莫如楚厚臣以为其事王必疾齐之所信於韩者以韩公子昧为齐相也【正义昧莫葛反後同】韩已得武遂於秦王甚善之使之以齐韩重樗里疾疾得齐韩之重其主弗敢弃疾也今又益之以楚之重樗里子必言秦复与楚之侵地矣於是怀王许之竟不合秦而合齐以善韩【集解徐广曰怀王之二十二年秦拔宜阳取武遂二十三年秦复归韩武遂然则已非二十年事矣】二十四年倍齐而合秦秦昭王初立乃厚赂於楚楚往迎妇二十五年怀王入与秦昭王约於黄棘秦复与楚上庸二十六年齐韩魏为楚负其从亲而合於秦三国共伐楚楚使太子入质於秦而请救秦乃遣客卿通将兵救楚三国引兵去二十七年秦大夫有私与楚太子鬪楚太子杀之而亡归二十八年秦乃与齐韩魏共攻楚杀楚将唐昧取我重丘而去二十九年秦复攻楚大破楚楚军死者二万杀我将军景缺怀王恐乃使太子为质於齐以求平三十年秦复伐楚取八城秦昭王遗楚王书曰始寡人与王约为弟兄盟于黄棘太子为质至驩也太子陵杀寡人之重臣不谢而亡去寡人诚不胜怒使兵侵君王之边今闻君王乃令太子质於齐以求平寡人与楚接境壤界故为婚姻【正义婿父为姻妇父为婚相谓曰婚姻两婿相谓曰娅】所从相亲久矣而今秦楚不驩则无以令诸侯寡人愿与君王会武关面相约结盟而去寡人之愿也敢以闻下执事楚怀王见秦王书患之欲往恐见欺无往恐秦怒昭雎曰王毋行而发兵自守耳秦虎狼不可信有并诸侯之心怀王子子兰劝王行曰奈何絶秦之驩心於是往会秦昭王昭王诈令一将军伏兵武关号为秦王楚王至则闭武关遂与西至咸阳【索隐右扶风渭城县故咸阳城也】朝章台如蕃臣不与亢礼楚怀王大怒悔不用昭子言秦因留楚王要以割巫黔中之郡楚王欲盟秦欲先得地楚王怒曰秦诈我而又强要我以地不复许秦秦因留之楚大臣患之乃相与谋曰吾王在秦不得还要以割地而太子为质於齐齐秦合谋则楚无国矣乃欲立怀王子在国者昭雎曰王与太子俱困於诸侯而今又倍王命而立其庶子不宜乃诈赴於齐齐湣王谓其相曰不若留太子以求楚之淮北相曰不可郢中立王是吾抱空质而行不义於天下也或曰不然郢中立王因与其新王市曰予我下东国吾为王杀太子不然将与三国共立之然则东国必可得矣齐王卒用其相

计而归楚太子太子横至立为王是为顷襄王乃告于秦曰赖社稷神灵国有王矣顷襄王横元年秦要怀王不可得地楚立王以应秦秦昭王怒发兵出武关攻楚大败楚军斩首五万取析十五城而去【集解徐广曰年表云取十六城既取析又并取左右十五城也駟案地理志弘农有析县正义括地志云邓州内乡县城本楚析邑一名丑汉置析县因析水为名也】二年楚怀王亡逃归秦觉之遮楚道怀王恐乃从间道走赵以求归赵主父在代【索隐主字亦作王】其子惠王初立行王事恐不敢入楚王楚王欲走魏秦追至遂与秦使复之秦怀王遂发病顷襄王三年怀王卒于秦秦归其丧於楚楚人皆怜之如悲亲戚诸侯由是不直秦秦楚絶六年秦使白起伐韩於伊阙【正义括地志云伊阙山在洛州南十九里也】大胜斩首二十四万秦乃遗楚王书曰楚倍秦秦且率诸侯伐楚争一旦之命愿王之飭士卒得一乐战楚顷襄王患之乃谋复与秦平七年楚迎妇於秦秦楚复平十一年齐秦各自称为帝月余复归帝为王十四年楚顷襄王与秦昭王好会于宛结和亲十五年楚王与秦三晋燕共伐齐取淮北十六年与秦昭王好会於鄢其秋复与秦王会穰十八年楚人有好以弱弓微缴加归鴈之上者顷襄王闻召而问之对曰小臣之好射騏鴈罗鷯【集解徐广曰吕静曰鷯野鸟也音龙索隐騏音其小鴈也邹诞鷯音卢动反刘氏音龙是小鸟名】小矢之发也何足为大王道也且称楚之大因大王之贤所弋非直此也昔者三王以弋道德五霸以弋战国故秦魏燕赵者騏鴈也齐鲁韩卫者青首也【索隐小鳧有青首者】邹费郯邳者罗鷯也【索隐邹费音驹秘】外其余则不足射者见鸟六双以王何取【索隐以喻下文秦赵等十二国故云六双】王何不以圣人为弓以勇士为缴时张而射之此六双者可得而囊载也其乐非特朝夕之乐也【索隐夕犹昔也】其获非特鳧鴈之实也王朝张弓而射魏之大梁之南加其右臂而径属之於韩则中国之路絶而上蔡之郡坏矣还射圉之东【索隐还音患遼也射音石】解魏左肘【索隐解音纪买反】而外击定陶则魏之东外弃而大宋方与二郡者举矣【正义圉音语城在汴州雍丘县东言王朝张弓射魏大梁汴州之南即加大梁之右臂连韩郯则河北中国之路向东南断絶则韩上蔡之郡自破坏矣复遼射雍兵围城之东便解散魏左肘宋州而外击曹定陶及魏东之外解弃则宋方与两郡并举】且魏断二臂颠越矣膺击郯国大梁可得而有也王綰缴兰台【集解徐广曰綰紫也音争兰一作简正义郑玄云綰屈也江河之间谓之紫收绳索綰也按缴丝绳系弋射鸟也若膺击郯围大梁已了乃收弋缴於兰台兰台桓山之别名也】饮马西河定魏大梁此一发之乐也若王之於弋诚好而不厌则出宝弓濬新缴【集解徐广曰以石傅弋缴曰濬濬音波索隐濬作礮音播傅音附】射罽鸟於东海还盖长城以为防【集解徐广曰罽一作独还音宦盖一作益益县在乐安盖县在泰山济北卢县有长城东至海也索隐罽音画谓大鸟之有钩喙者以比齐也还音患谓遼也盖者覆也言射者环遼盖覆使无飞走之路因以长城为防也徐以盖为益县非也地理志云长城在济南也正义太山郡记云太山西北有长城缘河径太山千余里至琅琊台入海齐记云齐宣王乘山岭之上筑长城东至海西至济州千余里以备楚括地志云长城西北起济州平陰县缘河历太山北冈上经济州淄州即西南兖州博城县北东至密州琅琊台入海蓟代记云齐有长城巨防足以为塞也】朝射东莒【正义括地志云密州莒县故莒子国地理志云周武王封少昊之後嬴姓於莒始都计斤春秋时始居莒也】夕发涿丘【集解徐广曰在清河正义括地志云涿丘丘名也在青州临淄县西北二十五里也】夜加即墨顾据午道【索隐顾反也午道当在齐西界一从一横为午道盖亦未详其处正义刘伯庄云齐西界按盖在博州之西境也】则长城之东收而太山之北举矣【正义言从齐州长城东至海太山之北黄河之南

尽举收於楚】西结境於赵【正义言得齐地约结於赵为境界定从约也】而北达於燕【索隐北一作杜杜者寬大之名言齐晋既复取燕不难也正义北達言四通无所滯碍言燕无山河之限也】三国布?【集解徐广曰音翅一作属索隐三国齐赵燕也?式?反】则从不待约而可成也北游目於燕之辽东而南登望於越之会稽此再发之乐也若夫泗上十二诸侯左萦而右拂之可一旦而尽也今秦破韩以为长忧得列城而不敢守也伐魏而无功击赵顾病【索隐顾犹反也】则秦魏之勇力屈矣楚之故地汉中析郦可得而复有也王出宝弓磬新缴涉鄆塞【集解徐广曰或以为冥今江夏一作龟正义括地志云故郢城在陕州河北县东十里虞邑也杜预云河东太阳有郢城是也徐言江夏亦误也】而待秦之倦也山东河内【正义谓华山之东怀州河内之郡】可得而一也劳民休衆南面称王矣故曰秦为大鸟负海内而处东面而立左臂据赵之西南右臂傅楚鄢郢膺击韩魏【索隐韩魏当秦之前故云膺击俗本作鷹非】垂头中国【索隐垂头犹申头也言欲吞山东】处既形便势有地利奋翼鼓?方三千里则秦未可得独招而夜射也欲以激怒襄王故对以此言襄王因召与语遂言曰夫先王为秦所欺而客死於外怨莫大焉今以匹夫有怨尚有报万乘白公子胥是也今楚之地方五千里带甲百万犹足以踊跃中野也而坐受困臣窃为大王弗取也於是顷襄王遣使於诸侯复为从欲以伐秦秦闻之发兵来伐楚楚欲与齐韩连和伐秦因欲图周周王赧使武公【集解徐广曰定王之曾孙而西周惠公之子】谓楚相昭子曰三国以兵割周郊地以便输而南器以尊楚臣以为不然夫弑共主臣世君【索隐共主世君俱是周自谓也共主言周为天下共所宗主也世君言周室代代君於天下】大国不亲以衆胁寡小国不附大国不亲小国不附不可以致名实名实不得不足以伤民夫有图周之声非所以为号也昭子曰乃图周则无之虽然周何故不可图也对曰军不五不攻城不十不围夫一周为二十晋【正义言周主之国其地虽小诸侯尊之故敌二十晋】公之所知也韩尝以二十万之衆辱於晋之城下鋭士死中士伤而晋不拔公之无百韩以图周此天下之所知也夫怨结於两周以塞邹鲁之心【索隐邹鲁有礼义之国今楚欲结怨两周而夺九鼎是塞邹鲁之心】交絶於齐【正义楚本与齐韩和伐秦因欲图周齐不与图周故齐交絶於楚也】声失天下其为事危矣夫危两周以厚三川【正义三川两周之地韩多有之言厚韩也】方城之外【正义方城之外许州叶县东北也言楚取两周则韩强必弱楚方城之外也】必为韩弱矣何以知其然也西周之地絶长补短不过百里名为天下共主裂其地不足以肥国得其衆不足以劲兵虽无攻之名为弑君然而好事之君喜攻之臣发号用兵未尝不以周为终始是何也见祭器在焉欲器之至而忘弑君之乱今韩以器之在楚臣恐天下以器讎楚也臣请譬之夫虎肉臊其兵利身【索隐谓虎以爪牙为兵而自利於防身也】人犹攻之也若使泽中之麋蒙虎之皮人之攻之必万之於虎【索隐攻易而利大也正义野泽之麋蒙衣虎皮人之攻取必万倍於虎也譬楚伐周收祭器其犹麋蒙虎皮矣】裂楚之地足以肥国讎楚之名足以尊主今子将以欲诛残天下之共主居三代之传器【索隐谓九鼎也】吞三翮六翼以高世主【索隐翮亦作同音历三翮六翼亦谓九鼎也空足曰翮六翼即六耳翼近耳旁事具小尔雅】非贪而何周书曰欲起无先故器南则兵至矣於是楚计辍不行十九年秦伐楚楚军败割上庸汉北地予秦【正义谓割房金均三州及汉水之北与秦】二十年秦将白起拔我西陵【集解徐广曰属江夏正义括地志云西陵故城在黄州黄山西二里】二十一年秦将白起遂拔我郢烧先王墓夷陵【集解徐广曰年表云拔郢烧夷陵索隐夷陵陵名後为县属南郡正义括地志云峡州夷陵县是也在荆州西应劭云夷山在西北】楚襄王兵散遂不复战东北保於陈

城二十二年秦复拔我巫黔中郡二十三年襄王乃收东地兵得十余万复西取秦所拔我江旁十五邑以为郡距秦二十七年使三万人助三晋伐燕复与秦平而入太子为质於秦楚使左徒侍太子於秦三十六年顷襄王病太子亡归秋顷襄王卒太子熊元代立【索隐系本作完】是为考烈王考烈王以左徒为令尹封以吴号春申君考烈王元年纳州于秦以平【集解徐广曰南郡有州陵县】是时楚益弱六年秦围邯郸赵告急楚楚遣将军景阳救赵七年至新中【索隐赵地无其名字误钜鹿有新市中当为市也正义新中相州安阳县也七国时魏宁新中邑秦庄襄王拔之更名安阳也】秦兵去【集解徐广曰年表云六年春申君救赵十年徙於距阳】十二年秦昭王卒楚王使春申君吊祠于秦十六年秦庄襄王卒秦王赵政立二十二年与诸侯共伐秦不利而去楚东徙都壽春【正义壽春在壽州壽春县是也】命曰郢二十五年考烈王卒子幽王悍立李园杀春申君幽王三年秦魏伐楚秦相吕不韦卒九年秦灭韩十年幽王卒同母弟犹代立是为哀王哀王立二月余哀王庶兄负刍之徒袭杀哀王而立负刍为王是岁秦虏赵王迁王负刍元年燕太子丹使荆轲刺秦王二年秦使将军伐楚大败楚军亡十余城三年秦灭魏四年秦将王翦破我军於蕲【索隐机析二音】而杀将军项燕五年秦将王翦蒙武遂破楚国虏楚王负刍灭楚名为楚郡云【集解孙检曰秦虏楚王负刍灭去楚名以楚地为三郡索隐裴注频引孙检不知其人本末盖齐人也】

太史公曰楚灵王方会诸侯於申诛齐庆封作章华台求周九鼎之时志小天下及饿死于申亥之家为天下笑操行之不得悲夫势之於人也可不慎与弃疾以乱立嬖淫秦女甚乎哉几再亡国【索隐几音祁】

【索隐述赞曰鬻熊之嗣周封於楚僻在荆蛮荜路蓝缕及通而霸僭号曰武文既伐申成亦赦许子圉篡嫡商臣杀父天祸未悔凭奸自怙昭困奔亡怀迫囚虏顷襄考烈祚衰南土】

史记卷四十

史记卷四十考证

楚世家卷章生重黎○尚书疏曰按昭二十九左传称少昊氏有子曰重颡颡氏有子曰黎则重黎二人各出一帝而史记并以重黎为楚国之祖吴回为重黎以重黎为官号此乃史记之缪故束皙讥马迁并两人以为一谓此是也困学纪闻曰诗正义曰楚语称颡颡命南正重司天以属神命火正黎司地以属民则黎为火正高阳时也言高辛者以重黎是颡颡命之历及高辛仍为此职故二文不同也黎实祝融重为南正而楚世家同以重黎为祝融谬也世家又云帝尝诛重黎而以其弟吴回为重黎後复居火正为祝融郑语以八姓为黎後者以吴回系黎之後复居黎职故本之黎也左传少皞氏有子曰重颡颡氏有子曰黎史记以重黎为一又言以吴回为重黎皆谬【臣照】按史迁所载信以传信疑以传疑与其过而废之母寧过而存之故往往两存其说非自相矛盾也至此以重黎为一人与左传不同者左传後出太史公或未之见後人据左传以驳之固当然传闻异辞於数千年後断左传之必是而史迁之必非亦何所凭耶惟刘氏为调停之说而小司马信之称以为当则大不然刘氏谓对彼重则单称黎若自言当家则称重黎夫南正重司天北正黎司地重黎者二人之名犹夫周召萧曹

云尔寧有对周对萧而言则单称召单称曹自言当家则称周召称萧曹之理耶名之不可假借犹夫南北天地之不可混而一也寧有对彼南则单称北对彼天则单称地自言当家则称南北称天地之理耶

乃立其长子康为句亶王○大戴礼帝系篇作无康次子叔堪少子季徇○郑语作叔熊季紂

蚡冒弟熊通弑蚡冒子而代立是为楚武王○杜预注左传云蚡冒楚武王父刘炫据楚世家以为蚡冒是兄不得为父孔穎達疏云世家之文多有纒繆与经传异者非是一条杜氏非不见其文但见而不用耳

王室不聽还报○监本作还报楚宋本无楚字今依宋本删

乃自立为武王○顾炎武曰乃自立【句】为武王【句】盖言自立为王後諡为武王耳古文简故连属言之如管蔡世家楚公子围弑其王郢敖而自立为灵王卫世家郑世家皆云楚公子弃疾弑灵王自立为平王司马穰苴传至常曾孙和因自立为齐威王又如韩世家晋作六卿而韩厥在一卿之位号为献子与此文势正同刘炫云号为武武非諡也此说凿矣项梁立楚怀王孙心为楚怀王尉佗自立为南越武帝此後世事尔

十三年卒子熊羆立○【臣世駿】按左传楚文王于鲁庄五年即位至十九年卒在位共十五年世家年表并不同

二十二年伐黄○左传及年表俱在二十三年

三十九年鲁僖公来请兵以伐齐楚使申侯将兵伐齐取谷○春秋经鲁僖二十六年公以楚师伐齐取谷是年为楚成之三十八年

晋果败子玉於城濮○左传晋救宋在楚成三十九年战城濮在四十年

子庄王侶立○春秋经及国语俱作旅谷梁作吕伍举曰愿有进隐曰有鸟在於阜三年不蜚不鸣是何鸟也○困学纪闻曰三年不蜚不鸣楚世家谓伍举进隐于庄王滑稽传谓淳于髡说齐威王此一事而两见然庄王时嬖人伍参见左氏传举其子也新序以为士庆吕氏春秋以为成公贾不言伍举

六年伐宋获五百乘○左传鲁宣二年春郑公子归生受命于楚伐宋宋华元乐吕御之二月壬子战于大棘宋师败绩囚华元获乐吕及甲车四百六十乘俘二百五十人馘百人据年表鲁宣之二年为楚庄之七年

共王审立○楚语作葳

王怒射杀子反○【臣召南】按左氏子反自杀非庄王杀之也惟吕氏春秋有斩子反之语此又作射杀

子康王招立○春秋经及国语俱作昭

於是晋宋鲁卫不往○【臣世骏】按春秋经鲁昭四年夏楚子蔡侯陈侯郑伯许男徐子滕子顿子胡子沈子小邾子宋世子佐淮夷会于申此云宋不往误

七年就章华台○左传楚子成章华之台在鲁昭七年於楚为灵王六年

起子从亡在吴乃劝吴王伐楚○余有丁曰左传观起楚共王杀之子从事蔡大夫朝吴非亡在吴也亦无劝吴伐楚事

王行遇其故鍬人○吴语鍬作涓

遇王饥於厘泽○左传国语皆曰乃求王遇诸棘闾楚乃恐而城郢索隐去年已城郢今又重言据左氏昭二十三年城郢二十四年无重城郢之文是史记误也○【臣照】按是申明上文城郢之故非此复城郢也史原不误索隐正义两家皆失之

太子珍少○左传作太子壬国语及越世家又作轸七年楚使子常伐吴吴大败楚于豫章正义今洪州也○左传鲁定二年秋楚伐吴于豫章是年楚昭之八年也

王从臣子綦○左传国语皆作子期

二十年楚灭顿灭胡○春秋经灭顿在鲁定之十四年灭胡在十五年灭胡之年于楚昭为二十一年年表同此作二十年

二十一年吴王阖闾伐越越王勾践射伤吴王遂死○左传及吴世家吴王伐越而死左鲁定之十四年是年于楚昭为二十年

昭王问周太史○说苑云太史州黎

是?也灭陈而县之集解徐广曰惠王之十年○左传鲁哀十七年秋七月己卯楚公孙朝帅师灭陈是年於楚为惠王之十一年徐广作十年盖据年表

八年魏文侯韩武子赵桓子始列为诸侯○【臣世骏】按楚简王八年三家皆初立尚未列为诸侯也周本纪威烈王二十三年命韩赵魏为诸侯是年於楚为声王五年盖後二十二年

子悼王熊疑立○六国年表及通监俱作类

四年楚伐周郑杀子阳○【臣照】按周本纪无此事六国年表是年败郑师围郑郑人杀子阳疑周字系郑字之讹

嬰子弗而用申纪○国策作申缚

西起秦患北絕齐交则两国之兵必至○顾炎武曰此两国即谓秦齐也索隐以为韩魏非

廼使勇士宋遗北辱齐王○【臣照】按战国策遣勇士从宋遗齐王书折券絕交又张仪传乃使勇士至宋借宋之符北骂齐王则宋遗非人名也疑当作廼使勇士从宋遗书北辱齐王落从字书字

不如因赂之一名都与之伐齐是我亡於秦取偿於齐也索隐谓失商於之地也○徐孚远曰索隐之言非也谓赂以名都故也若商於乃虚约耳不为亡地

赵主父在代索隐主字亦作王○徐孚远曰惠王父武灵王自号主父故史因之索隐误也

二十七年使三万人助三晋伐燕○战国策齐韩魏共攻燕燕使太子请救于楚楚王使景阳将而救之此云助三晋伐燕与楚策异

楚遣将军景阳救赵○六国年表云春申君救赵春申君列传云秦围邯郸邯郸告急于楚楚使春申君将兵往救之此作景阳与彼互异

九年秦灭韩○韩世家正义曰亡在秦始皇帝十七年是年为楚幽之八年

同母弟犹代立是为哀王○六国年表作弟郝立四年秦将王翦破我军於蕲而杀将军项燕五年秦将王翦蒙武遂破楚国虏楚王负刍○秦始皇本纪作二十三年虏荆王二十四年项燕自杀

史记卷四十考证

卷四十一

钦定四库全书

史记卷四十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

越王勾践世家第十一

越王勾践其先禹之苗裔而夏后帝少康之庶子也【正义吴越春秋云禹周行天下还归大越登茅山以朝四方羣臣封有功爵有德崩而葬焉至少康恐禹迹宗庙祭祀之絶乃封其庶子於越号曰无余贺循会稽记云少康其少子号曰於越越国之称始此越絶记云无余都会稽山南故越城是也】封於会稽以奉守禹之祀文身断发披草莱而邑焉後二十余世至於允常【正义輿地志云越侯传国三十余叶历殷至周敬王时有越侯夫谭子曰允常拓土始大称王春秋贬为子号为於越杜注云於语发声也】允常之时与吴王阖庐战而相怨伐允常卒子勾践立是为越王元年吴王阖庐闻允常死乃兴师伐越越王勾践使死士挑战三行至吴陈呼而自刳吴师观之越因袭击吴师吴师败於槯李【集解杜预曰吴郡嘉兴县南有槯李城索隐事在左传鲁定公十四年】射伤吴王阖庐阖庐且死告其子夫差曰必毋忘越三年勾践闻吴王夫差日夜勒兵且以报越越欲先吴未发往伐之范蠡谏曰不可臣闻兵者凶器也战者逆德也争者事之末也陰谋逆德好用凶器试身於所未上帝禁之行者不利越王曰吾已决之矣遂兴师吴王闻之悉发精兵击越败之夫椒【集解杜预曰夫椒在吴郡吴县太湖中椒山是也索隐夫音符椒音焦本又作湫音酒小反贾逵云地名国语云败之五湖则杜预云在椒山为非事具哀公元年】越王乃以余兵五千人保栖於会稽【集解杜预曰上会稽山也索隐邹诞云保山曰栖犹鸟栖於木以避害也故六韜曰军处山之高者则曰栖】吴王追而围之越王谓范蠡曰【正义会稽典录云范蠡字少伯越之上将军也本是楚宛三户人佯狂倜傥负俗文种为宛令遣吏谒奉吏还曰范蠡本国狂人生有此病种笑曰吾闻士有贤俊之姿必有佯狂之讥内怀独见之明外有不知之毁此固非二三子之所知也驾车而往蠡避之後知种之必来谒谓兄嫂曰今日有客愿假衣冠有顷种至抵掌而谈旁人颯者聳聽之矣】以不聽子故至於此为之奈何蠡对曰持满者与天【集解韦昭曰与天法天也天道盈而不溢索隐与天天与也言持满不溢与天同道故天与之】定倾者与人【集解虞翻曰人道尚谦卑以自牧索隐人主有定倾之功故人与之】节事者以地【集解韦昭曰时不至不可强生事不究不可强成索隐国语以作与此以亦与义也言地能财成万物人主宜

节用以法地故地与之韦昭等解恐非】卑辞厚礼以遗之不许而身与之市【集解韦昭曰市利也谓委管龠属国家以身随之正义卑作言辞厚遗珍宝不许平越王身往事之如市贾货易以利此是定倾危之计】勾践曰诺乃令大夫种行成於吴【索隐大夫官种名也一云大夫姓犹司马司空之比非也成者平也求和於吴也正义吴越春秋云大夫种姓文名种字子禽荆平王时为宛令之三户之里范蠡从犬窦蹲而吠之从吏恐文种慙令人引衣而鄣之文种曰无鄣也吾闻犬之所吠者人今吾到此有圣人之气行而求之来至於此且人身而犬吠者谓我是人也乃下车拜蠡不为礼】膝行顿首曰君王亡臣勾践使陪臣种敢告下执事勾践请为臣妻为妾吴王将许之子胥言於吴王曰天以越赐吴勿许也种还以报勾践勾践欲杀妻子燔宝器触战以死种止勾践曰夫吴太宰嚭贪可诱以利请间行言之【索隐间音纪闲反间行犹微行】於是勾践乃以美女宝器令种间献吴太宰嚭【索隐国语云越饰美女二人使大夫种遗太宰嚭】嚭受乃见大夫种於吴王种顿首言曰愿大王赦勾践之罪尽入其宝器不幸不赦勾践将尽杀其妻子燔其宝器悉五千人触战必有当也【索隐言悉五千人触战或有能当吴兵者故国语作耦耦亦相当对之名又下云无乃伤君王所爱乎是有当则伤也】嚭因说吴王曰越以服为臣若将赦之此国之利也吴王将许之子胥进谏曰今不灭越後必悔之勾践贤君种蠡良臣若反国将为乱吴王弗聽卒赦越罢兵而归勾践之困会稽也喟然叹曰吾终於此乎种曰汤系夏台文王囚羑里晋重耳犇翟齐小白犇莒其卒王霸由是观之何遽不为福乎吴既赦越越王勾践反国乃苦身焦思置胆於坐卧即仰胆饮食亦尝胆也曰女忘会稽之耻邪身自耕作夫人自织食不加肉衣不重采折节下贤人厚遇宾客振贫吊死【集解徐广曰吊一作葬】与百姓同其劳欲使范蠡治国政蠡对曰兵甲之事种不如蠡镇抚国家亲附百姓蠡不如种於是举国政属大夫种而使范蠡与大夫柘稽行成为质於吴【索隐越大夫也国语作诸稽郢】二岁而吴归蠡勾践自会稽归七年拊循其士民士民欲用以报吴大夫逢同谏曰【索隐逢姓同名故楚有逢伯者是】国新流亡今乃复殷给缮饰备利吴必惧惧则难必至且鸷鸟之击也必匿其形今夫吴兵加齐晋怨深於楚越名高天下实害周室德少而功多必淫自矜为越计莫若结齐亲楚附晋以厚吴吴之志广必轻战是我连其权三国伐之越承其弊克可也勾践曰善居二年吴王将伐齐子胥谏曰未可臣闻勾践食不重味与百姓同苦乐此人不死必为国患吴有越腹心之疾齐与吴疥?也【索隐疥?音介渺】愿王释齐先越吴王弗聽遂伐齐败之艾陵【索隐在鲁哀十一年】虏齐高国以归【索隐国惠子高昭子】让子胥子胥曰王母喜王怒子胥欲自杀王闻而止之越大夫种曰臣观吴王政骄矣请试尝之贷粟以卜其事请贷吴王欲与子胥谏勿与王遂与之越乃私喜子胥言曰王不聽谏後三年吴其墟乎太宰嚭闻之乃数与子胥争越议因谗子胥曰伍员貌忠而实忍人其父兄不顾安能顾王王前欲伐齐员强谏已而有功用是反怨王王不备伍员员必为乱与逢同共谋谗之王王始不从乃使子胥於齐闻其托子於鲍氏王乃大怒曰伍员果欺寡人役反使人赐子胥属镂劔以自杀子胥大笑曰我令而父霸【索隐而汝也父阖庐也】我又立若若初欲分吴国半予我我不受已今若反以谗诛我嗟乎嗟乎一人固不能独立报使者曰必取吾眼置吴东门以观越兵入也【索隐国语云吴王愠曰孤不使大夫得见乃盛以鸱夷投之于江也】於是吴任嚭政居三年勾践召范蠡曰吴已杀子胥导谗者衆可乎对曰未可至明年春吴王北会诸侯於黄池【索隐在哀十三年】吴国精兵从王惟独老弱与太子留守【索隐按春秋左氏传太子名友】勾践复问范蠡蠡曰可矣乃发习流二千【索隐虞书云流宥五刑按流放之罪人使之习战任为卒伍有二千人也正义谓

先惯习流利战阵死者二千人也】教士四万人【索隐谓常所教练之兵也故孔子曰以不教民战是谓弃之是也】君子六千人【集解韦昭曰君子王所亲近有志行者犹吴所谓贤良齐所谓士也虞翻曰言君养之如子索隐君子谓君所子养有恩惠者又按左氏楚沈尹戌帅都君子以济师杜预曰都君子诸都邑之士有复除者国语云王以私卒君子六千人也】诸御千人伐吴【索隐诸御谓诸理事之官在军有职掌者】吴师败遂杀吴太子吴告急于王王方会诸侯于黄池惧天下闻之乃秘之吴王已盟黄池乃使人厚礼以请成越越自度亦未能灭吴乃与吴平其後四年越复伐吴吴士民罢弊轻锐尽死於齐晋而越大破吴因而留围之三年吴师败越遂复栖吴王於姑苏之山吴王使公孙雄【集解虞翻曰吴大夫】肉袒膝行而前请成越王曰孤臣夫差敢布腹心异日尝得罪於会稽夫差敢逆命得与君王成以归今君王举玉趾而诛孤臣孤臣惟命是听意者亦欲如会稽之赦孤臣之罪乎勾践不忍欲许之范蠡曰会稽之事天以越赐吴吴不取今天以吴赐越越其可逆天乎且夫君王蚤朝晏罢非为吴邪谋之二十二年一旦而弃之可乎且夫天与弗取反受其咎伐柯者其则不远君忘会稽之厄乎勾践曰吾欲听子言吾不忍其使者范蠡乃鼓进兵曰王已属政於执事【集解虞翻曰执事蠡自谓也】使者去不者且得罪【集解虞翻曰我为子得罪索隐虞翻注盖依国语之文今案此文谓使者宜速去不去得罪於越义亦通】吴使者泣而去勾践怜之乃使人谓吴王曰吾置王甬东君百家【集解杜预曰甬东会稽勾章县东海中洲也索隐吴语云与之夫妇三百是也】吴王谢曰吾老矣不能事君王遂自杀乃蔽其面【正义今之面衣是其遗象也越绝云吴王曰闻命矣以三寸帛蒙吾两目使死者有知吾慙见伍子胥公孙圣以为无知吾耻生者越王则解绶以蒙其目遂伏剑而死帛音覓顾野王云大巾覆也】曰吾无面以见子胥也越王乃葬吴王而诛太宰嚭勾践已平吴乃以兵北渡淮与齐晋诸侯会於徐州致贡於周周元王使人赐勾践胙命为伯勾践已去渡淮南以淮上地与楚【集解駰案楚世家曰越灭吴而不能正江淮北楚东侵广地至泗上】归吴所侵宋地於宋与鲁泗东方百里当是时越兵横行於江淮东诸侯毕贺号称霸王【索隐越在蛮夷少康之後地远国小春秋之初未通上国国史既微畧无世系故纪年称为於粤子据此文勾践平吴之後周元王始命为伯後遂僭而称王也】范蠡遂去自齐遗大夫种书曰蜚鸟尽良弓藏狡兔死走狗烹【集解徐广云狡一作郊】越王为人长颈鸟喙可与共患难不可与共乐子何不去种见书称病不朝人或谗种且作乱越王乃赐种剑曰子教寡人伐吴七术【正义越绝云九术一曰尊天事鬼二曰重财币以遗其君三曰贵籒粟藁以空其邦四曰遗之好美以荧其志五曰遗之巧臣使起宫室高台以尽其财以疲其力六曰贵其谀臣使之易伐七曰强其谏臣使之自杀八曰邦家富而备器利九曰坚甲利兵以承其弊】寡人用其三而败吴其四在子子为我从先王试之种遂自杀勾践卒【索隐纪年云晋出公十年十一月於粤子勾践卒是为莸执】子王鼫与立【索隐鼫音石与音余按纪年云於粤子勾践卒次鹿郢立六年卒乐资云越语谓鹿郢为鼫与也】王鼫与卒子王不寿立王不寿卒【索隐纪年云不寿立十年见杀是为盲姑次朱勾立】子王翁立王翁卒【索隐纪年於粤子朱勾三十四年灭滕三十五年灭郯三十七年朱勾卒】子王翳立王翳卒子王之侯立【索隐纪年云翳三十三年迁於吴三十六年七月太子诸咎弑其君翳十月粤杀诸咎粤滑吴人立子错枝为君明年大夫寺区定粤乱立无余之十二年寺区弟思弑其君莽安次无颡立无颡八年薨是为蕘卯故庄子云越人三弑其君子搜患之逃乎丹穴不肯出越人薰之以艾乘以王舆乐资云号曰无颡盖无颡後乃次无强也则王之侯即无余之也】王之侯卒子王无强立【索隐盖无颡之弟也】

音其良反】王无强时越兴师北伐齐西伐楚与中国争强当楚威王之时越北伐齐齐威王使人说越王曰越不伐楚大不王小不伯图越之所为不伐楚者为不得晋也韩魏固不攻楚韩之攻楚覆其军杀其将则叶阳翟危【正义叶式涉反今许州叶县阳翟河南阳翟县也二邑此时属韩与楚犬牙交境韩若伐楚恐二邑为楚所危】魏亦覆其军杀其将则陈上蔡不安【正义陈今陈州也上蔡今豫州上蔡县也二邑此时属魏与楚犬牙交境魏若伐楚恐二国为楚所危也】故二晋之事越也【正义言韩魏与楚隣令越合於二晋而伐楚】不至於覆军杀将马汗之力不效所重【集解徐广曰效犹见也】於得晋者何也【正义从不至已下此是齐使者重难越王】越王曰所求於晋者不至顿刃接兵而况于攻城围邑乎【正义顿刃筑营垒也接兵战也越王言韩魏之事越犹不至顿刃接兵而况更有攻城围邑韩魏始服乎言畏秦齐而故事越也】愿魏以聚大梁之下愿齐之试兵南阳莒地以聚常郟之境【索隐南阳在齐之西界莒之西也常邑名盖田文所封之邑郟故郟国二邑皆齐之南地】则方城之外不南【正义方城山在许州叶县西南十八里外谓许州豫州等言魏兵在大梁之下楚方城之兵不得南伐越也】淮泗之间不东商於析郢宋胡之地【集解徐广曰胡国今之汝阴索隐四邑并属南阳楚之西南是也宋胡作宗胡宗胡邑名胡姓之宗因以名邑杜预云汝阴县北有故胡城是也正义郢音摊括地志云商洛县则古商国城也荆州图副云邓州内乡县东七里於村即於中地也括地志又云邓州内乡县楚邑也故郢县在邓州新城县西北三十里按商於析郢在商邓二州界县邑也】夏路以左【集解徐广曰盖谓江夏之夏索隐徐氏以为江夏非也刘氏云楚适诸夏路出方城人向北行以西为左故云夏路以左其意为得也】不足以备秦【正义括地志云故长城在邓州内乡县东七十五里南入穰县北连翼望山无土之处累石为楚固襄王控霸南土争强中国多筑列城於北方以适华夏号为方城按此说刘氏为得云邑徒衆少不足备秦嶢武二关之道也】江南泗上不足以待越矣【正义江南洪饶等州春秋时为楚东境也泗上徐州春秋时楚北境也二境并与越邻言不足当伐越】则齐秦韩魏得志於楚也是二晋不战而分地不耕而获之不此之为而顿刃於河山之间以为齐秦用所待者如此其失计奈何其以此王也齐使者曰幸也越之不亡也吾不贵其用智之如目见豪毛而不见其睫也今王知晋之失计而不自知越之过是目论也【索隐言越王知晋之失不自觉越之过犹人眼能见豪毛而自不见其睫故谓之目论也】王所待於晋者非其马汗之力也又非可与合军连和也将待之以分楚衆也今楚衆已分何待於晋越王曰奈何曰楚三大夫张九军北围曲沃【集解徐广曰一作北面曲沃正义括地志云曲沃故城在陕县西三十二里於中在邓州内乡县东七里尔时曲沃属魏於中属秦二地相近故楚围之】於中以至无【集解徐广曰无一作西】假之关者三千七百里【正义按无假之关当在江南长沙之西北言从曲沃於中西至汉中邑巫黔中千余里不备秦鲁也】景翠之军北聚鲁齐南阳分有大此者乎【正义鲁兖州也齐密州莒县邑南至泗上也南阳邓州也时属韩也言楚又备此三国也分散有大此者乎】且王之所求者鬪晋楚也晋楚不鬪越兵不起是知二五而不知十也此时不攻楚臣以是知越大不王小不伯复讎【集解徐广曰一作宠】长沙【正义复扶富反言今越北欲鬪晋楚南复讐敌楚之四邑龐长沙竟陵泽也龐长沙出粟之地竟陵泽出材木之地此邑近长沙潭衡之境越若窥兵西通无假之关则西邑不得北上贡於楚之郢都矣战国时永郴衡潭岳鄂江洪饶并是东南境属楚也袁吉?抚歙宣并越西境属越也】楚之粟也竟泽陵楚之材也【索隐刘氏曰复者发语之声非也言发语声者文势然也则是脱况字耳讐当作讎邑名字讹耳则讎龐长沙是三邑也竟

泽陵当为竟陵泽言竟之山泽出材木故楚有七泽盖其一也合上文为四邑也】越窥兵通无【集解徐广曰无一作西】假之关此四邑者不上贡事於郢矣臣闻之图王不王其敝可以伯然而不伯者王道失也故愿大王之转攻楚也於是越遂释齐而伐楚楚威王兴兵而伐之大败越杀王无强尽取故吴地至浙江北破齐於徐州【集解徐广曰周显王之四十六年索隐按纪年粤子无颡薨後十年楚伐徐州无楚败越杀无强之语是无强为无颡之後纪年不得録也】而越以此散诸族子争立或为王或为君滨於江南海上【正义今台州临海县是也】服朝於楚後七世至闽君摇佐诸侯平秦汉高帝复以摇为越王以奉越後东越闽君皆其後也范蠡【集解太史公曰素王妙论曰蠡南阳人列仙传云蠡徐人正义吴越春秋云蠡字少伯乃楚宛三户人也越絶云在越为范蠡在齐为鸱夷子皮在陶为朱公又云居楚曰范伯谓大夫种曰三王则三皇之苗裔也五伯乃五帝之末世也天运历纪千岁一至黄帝之元执辰破已霸王之气见於地户伍子胥以是挟弓矢于吴王於是要大夫种入吴此时冯同相与共戒之伍子胥在自余不能关其辞蠡曰吴越二邦同风共俗地户之位非吴则越乃入越越王常与言尽日方退】事越王勾践既苦身戮力与勾践深谋二十余年竟灭吴报会稽之耻北渡兵於淮以临齐晋号令中国以尊周室勾践以霸而范蠡称上将军还反国范蠡以为大名之下难以久居且勾践为人可与同患难与处安为书辞勾践曰臣闻主忧臣劳主辱臣死昔者君王辱於会稽所以不死为此事也今既以雪耻臣请从会稽之诛勾践曰孤将与子分国而有之不然将加诛于子范蠡曰君行令臣行意乃装其轻宝珠玉自与其私徒属乘舟浮海以行终不反於是勾践表会稽山以为范蠡奉邑【索隐国语云乃环会稽三百里以为范蠡之地奉音扶用反】范蠡浮海出齐变姓名自谓鸱夷子皮【索隐范蠡自谓也以吴王杀子胥而盛以鸱夷今蠡自以有罪故为号也韦昭曰鸱夷革囊也或曰生牛皮也】耕于海畔苦身戮力父子治产居无几何致产数千万齐人闻其贤以为相范蠡喟然叹曰居家则致千金居官则至卿相此布衣之极也久受尊名不祥乃归相印尽散其财以分与知友乡党而怀其重宝间行以去止于陶【集解徐广曰今之济陰定陶正义括地志云陶山在济州平陰县东三十五里止此山之阳也今山南五里犹有朱公冢】以为此天下之中交易有无之路通为生可以致富矣於是自谓陶朱公复约要父子耕畜废居候时转物逐什一之利居无何则致赀累巨万【集解徐广曰万万也】天下独陶朱公朱公居陶生少子少子及壮而朱公中男杀人囚於楚朱公曰杀人而死职也然吾闻千金之子不死於市告其少子往视之乃装黄金千镒置褐器中载以一牛车且遣其少子朱公长男固请欲行朱公不聽长男曰家有长子曰家督今弟有罪大人不遣乃遣少弟是吾不肖欲自杀其母为言曰今遣少子未必能生中子也而先空亡长男奈何朱公不得已而遣长子为一封书遗故所善庄生【索隐据其时代非庄周也然验其行事非子休而谁能信任於楚王乎正义年表周元王四年越灭吴范蠡遂去齐归定陶後遗庄生金庄周与魏惠王周元王同时从周元王四年至齐宣王元年一百三十年此庄生非庄子】曰至则进千金于庄生所聽其所为慎无与争事长男既行亦自私齎数百金至楚庄生家负郭披藜藿到门居甚贫然长男发书进千金如其父言庄生曰可疾去矣慎毋留即弟出勿问所以然长男既去不过庄生而私留以其私齎献遗楚国贵人用事者庄生虽居穷阎然以廉直闻於国自楚王以下皆师尊之及朱公进金非有意受也欲以成事後复归之以为信耳故金至谓其妇曰此朱公之金有如病不宿诫後复归勿动而朱公长男不知其意以为殊无短长也庄生间时入见楚王言某星宿某此则害於楚楚王素信庄生曰今为奈何庄生曰独以德为可以除之楚王曰生休矣寡人将行之王乃使使者封三钱

之府【集解国语曰周景王时将铸大钱贾逵说云虞夏商周金币三等或赤或白或黄黄为上币铜钱为下币韦昭曰钱者金币之名所以贸买物通财用也单穆公云古者有母平子子权母而行然则三品之来古而然矣駟谓楚之三钱贾韦之说近之】楚贵人惊告朱公长男曰王且赦曰何以也曰每王且赦常封三钱之府昨暮王使使封之【集解駟案或曰王且赦常封三钱之府者钱币至重虑人或逆知有赦盗窃之所以封钱府备盗窃也汉灵帝时河内张成能候风角知将有赦教子杀人捕得七日赦出此其类也】朱公长男以为赦弟固当出也重千金虚弃庄生无所为也乃复见庄生庄生惊曰若不去邪长男曰固未也初为事弟弟今议自赦故辞生去庄生知其意欲复得其金曰若自入室取金长男即自入室取金持去独自欢幸庄生羞为儿子所卖乃入见楚王曰臣前言某星事王言欲以修德报之今臣出道路皆言陶之富人朱公之子杀人囚楚其家多持金钱赂王左右故王非能恤楚国而赦乃以朱公子故也楚王大怒曰寡人虽不德耳奈何以朱公之子故而施惠乎令论杀朱公子明日遂下赦令朱公长男竟持其弟丧归至其母及邑人尽哀之唯朱公独笑曰吾固知必杀其弟也彼非不爱其弟顾有所不能忍者也是少与我俱见苦为生难故重弃财至如少弟者生而见我富乘坚驱良逐狡兔岂知财所从来故轻去之非所惜吝前日吾所为欲遣少子固为其能弃财故也而长者不能故卒以杀其弟事之理也无足悲者吾日夜固以望其丧之来也故范蠡三徙成名於天下非苟去而已所止必成名卒老死于陶故世传曰陶朱公【集解张华曰陶朱公冢在南郡华容县西树碑云是越之范蠡也正义盛弘之荆州记云荆州华容县西有陶朱公冢树碑云是越范蠡范蠡本宛三户人与文种俱入越吴亡後自适齐而终陶朱公登仙未闻葬此所由括地志云陶朱公冢也又云济州平陰县东三十里陶山南五里有陶公冢并止於陶山之阳按葬处有三未详其处】

太史公曰禹之功大矣渐九川【集解徐广曰渐者亦引进通导之意也字或宜然】定九州至于今诸夏艾安及苗裔勾践苦身焦思终灭强吴北观兵中国以尊周室号称霸王【集解徐广曰一作主】勾践可不谓贤哉盖有禹之遗烈焉范蠡三迁皆有荣名名垂後世臣主若此欲毋显得乎

【索隐述赞曰越祖少康至于允常其子始霸与吴争强檣李之役阖闾见伤会稽之耻勾践欲当种诱以利蠡悉其良折节下士致胆思尝卒复讐寇遂殄吴疆後不量力灭於无强】

史记卷四十一

史记卷四十一考证

越王勾践世家後二十余世至於允常○允常吴越春秋作元常高氏越史曰夏自少康至桀中十二世按少康元年壬午至周敬王元年壬午凡一千五百六十一年吴之伐越见春秋昭公三十二年敬王十年也至是二千五百七十年矣越之传国至於元常何止二十余世耶

吴师败於檣李○越絶书作就李吴世家作姑苏越王谓范蠡曰正义会稽典录云○典监本讹作兴今改正

乃令大夫种行成於吴正义范蠡从犬窦蹲而吠之○犬监本讹作人今改正

二岁而吴归蠡勾践自会稽归○国语勾践与范蠡入宦於吴三年而吴人遣之越絶书亦作越王入宦於吴三年吴王归之

大夫逢同谏曰○越絶书作冯同吴越春秋作扶同虏齐高国以归○【臣照】按哀十一年左传战于艾陵展如败高子国子败胥门巢王卒助之大败齐师获国书公孙夏闾丘明陈书东郭书革车八百乘甲首三千以献於公是高子败国子见虏也後又云归国子之元想当时歿於陈耳此兼言高子与左传异

乃发习流二千索隐虞书云流宥五刑按流放之罪人使之习战任为卒伍有二千人也正义谓先惯习流利战阵死者二千人也○徐天佑吴越春秋注曰笠泽之战越以三军潜涉盖以舟师胜此所谓习流是即习水战之兵若曰使罪人习战越一小国流放者何至二千人哉

教士四万人○吴越春秋教士作俊士

吴王使公孙雄○吴越春秋作王孙骆国语作王孙雄诛太宰嚭○【臣照】按吴世家越王灭吴诛太宰嚭伍子胥传亦云杀王夫差而诛太宰嚭吴越春秋诛嚭并妻子但越灭吴之後二年是为哀公二十四年左传公如越将妻公而多与之地季孙惧使因太宰嚭而纳赂焉乃止然则吴之亡也嚭遂仕越固无恙也

子教寡人伐吴七术正义四曰遗之好美以荧其志○【臣照】按荧犹惑也作荣者非

子王鼃与立○左传作适郢吴越春秋作兴夷即位一年卒

商於析郢宋胡之地正义郢音摊○郢字无摊音疑攤字之误

尽取故吴地至浙江○【臣照】按两汉刊误补遗曰吴故地在今吴松江太湖北太史公所云岂以吴伐越尝至会稽耶勾践栖于会稽韦昭谓山在今山陰南七里是吴师入越尝絶江而至山陰不止浙江之北而已其实入越与入郢同虽尝深入其国都而不能有其地然则吴地止於松江非浙江也王仲任以为余暨以南属越钱塘以北属吴钱塘之江两国界址又唐人诗有到江吴地尽隔岸越山多之句皆未深考之故

北破齐於徐州集解徐广曰周显王之四十六年○考通监在周显王之三十五年

史记卷四十一考证

卷四十二

钦定四库全书

史记卷四十二

汉太史令司马迁撰宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

郑世家第十二

郑桓公友者周厉王少子而宣王庶弟也【集解徐广曰年表云母弟】宣王立二十二年友初封于郑【索隐郑县名属京兆秦武公十一年初县杜郑是也又糸本云桓公居械林徙拾宋忠云械林与拾皆旧地名是封桓公乃名为郑耳至秦之县郑是郑武公东徙新郑之後其旧郑乃是故都故秦始改为县也出地理志】封三十三岁百姓皆便爱之幽王以为司徒【集解韦昭曰幽王八年为司徒索隐韦昭据国语以为说耳】和集周民周民皆说河雒之间人便思之为司徒一岁幽王以褒后故王室治多邪诸侯或畔之於是桓公问太史伯【集解虞翻曰周大史】曰王室多故予安逃死乎太史伯对曰独雒之东土河济之南可居公曰何以对曰地近虢郛【集解徐广曰虢在成臯郛在密县駙案虞翻曰虢姬姓东虢也郛妘姓正义括地志云洛州汜水县古东虢叔之国东虢君也又云故郛城在郑州新郑县东北三十三里】虢郛之君贪而好利【索隐郑语云虢叔恃势郛仲恃险皆有骄侈又加之以贪冒是也虢叔文王弟郛妘姓之国也】百姓不附今公为司徒民皆爱公公诚请居之虢郛之君见公方用事轻分公地公诚居之虢郛之民皆公之民也公曰吾欲南之江上何如对曰昔祝融为高辛氏火正其功大矣而其於周末有兴者楚其後也周衰楚必兴兴非郑之利也公曰吾欲居西方何如【索隐国语曰公曰谢西之九州何如韦昭曰谢申伯之国谢西有九州二千五百家为州其说盖异此】对曰其民贪而好利难久居公曰周衰何国兴者对曰齐秦晋楚乎夫齐姜姓伯夷之後也伯夷佐尧典礼秦嬴姓伯翳之後也伯翳佐舜怀柔百物及楚之先皆尝有功於天下而周武王克纣後成王封叔虞于唐【集解徐广曰晋世家曰唐叔虞姓姬氏字子干索隐唐者古国尧之後其君曰叔虞何以知然据此系家下文云唐人之季代曰唐叔虞当武王邑姜方动大叔梦天帝命而子曰虞与之唐及生有文在手曰虞遂以名之及武王灭唐而国大叔故因以称唐叔虞杜预亦曰取唐君之名是也】其地阻险以此有德与周衰并亦必兴矣桓公曰善於是卒言王东徙其民雒东而虢郛果献十邑【集解虞翻曰十邑谓虢郛鄢蔽补丹依?历莘也索隐国语云太史伯曰若克二邑鄢蔽补丹依?历莘君之土也虞翻注皆依国语为说】竟国之【集解韦昭曰後武公竟取十邑地而居之今河南新郑也】

二岁犬戎杀幽王於骊山下并杀桓公郑人共立其子掘突【正义上求勿反下户骨反】是为武公【索隐譙周云名突滑皆非也盖古史失其名太史公循旧失而妄记之耳何以知其然者按下文其孙昭公名忽厉公名突岂有孙与祖同名乎当是旧史杂记昭厉忽突之名遂误以掘突为武公之字耳】武公十年娶申侯女【正义括地志云故申城在邓州南阳县北三十里左传云郑武公取於申也】为夫人曰武姜生太子寤生生之难及生夫人弗爱後生少子叔段段生易夫人爱之【集解徐广曰年表云十四年生寤生十七年生太叔段】二十七年武公疾夫人请公欲立段为太子公弗聽是岁武公卒寤生立是为庄公庄公元年封弟段於京【集解贾逵曰京郑都邑杜预曰今荥阳京县】号太叔祭仲曰京大於国非所以封庶也庄公曰武姜欲之我弗敢夺也段至京繕治甲兵与其母武姜谋袭郑二十二年段果袭郑武姜为内应庄公发兵伐段段走伐京京人畔段段出走鄆【集解杜预曰鄆今鄆陵也正义邬音乌古反今新郑县南邬头有村多万家旧作鄆】鄆潰段出奔共【集解贾逵曰共国名也杜预曰今汲郡共县也正义按今卫州共城县是也】於是庄公迁其母武姜於城颍【集解贾逵曰郑地也正义疑许州临颍县是也】誓言曰不至黄泉【集解服虔曰天玄地黄泉在地中故言黄泉】母相见也居岁余已悔思母颍谷之考叔【集解贾逵曰颍谷郑地正义括地志云颍水源出洛州嵩高县东南三十里阳乾山今俗名颍山泉源出山之东谷其侧有古人居处俗名为颍墟故老云是颍考叔故居即酈元注水经所谓颍谷也】有献於公公赐食考叔曰臣有母请君食赐臣母庄公曰我甚思母恶负盟奈何考叔曰穿地至黄泉则相见矣於是遂从之见母二十四年宋繆公卒公子冯奔郑郑侵周地取禾【索隐左传隐二年郑武公庄公为平王卿士王貳于虢及王崩周人将畀虢公政夏四月郑祭足帅师取温之麦秋又取成周之禾】二十五年卫州吁弑其君桓公自立与宋伐郑以冯故也二十七年始朝周桓王桓王怒其取禾弗礼也【索隐杜预曰桓公即位周郑交恶至是始朝故言始也左传又曰周桓公言於王曰我周之东迁晋郑焉依善郑以劝来者犹惧不飭况不礼焉郑不来矣】二十九年庄公怒周弗礼与鲁易祊许田【索隐许田近许之地鲁朝宿之邑祊者郑所受助祭太山之汤沐邑郑以天子不能巡守故以祊易许田各从其近】三十三年宋杀孔父三十七年庄公不朝周周桓王率陈蔡虢卫伐郑庄公与祭仲高渠弥发兵自救【索隐左传称祭仲足盖祭是邑其人名仲字仲足故传云祭封人中足是也此繻葛之战在鲁桓五年弥作昧并音迷】王师大败祝瞻射中王臂【索隐左氏作祝聃】祝瞻请从之郑伯止之曰犯长且难之况敢陵天子乎乃止夜令祭仲问王疾三十八年北戎伐齐齐使求救郑遣太子忽将兵救齐齐厘公欲妻之忽谢曰我小国非齐敌也时祭仲与俱劝使取之曰君多内宠【集解服虔曰言庶子有宠者多】太子无大援将不立三公子皆君也所谓三公子者太子忽其弟突次弟子亹也【索隐此文则数太子忽及突子亹为三而杜预云不数太子以子突子亹子仪为三盖得之】四十三年郑庄公卒初祭仲甚有宠於庄公庄公使为卿公使娶邓女生太子忽故祭仲立之是为昭公庄公又娶宋雍氏女【集解贾逵曰雍氏黄帝之孙姑姓之後为宋大夫】生厉公突雍氏有宠於宋【集解服虔曰为宋正卿故曰有宠】宋庄公闻祭仲之立忽乃使人诱召祭仲而执之曰不立突将死亦执突以求赂焉祭仲许宋与宋盟以突归立之昭公忽闻祭仲以宋要立其弟突九月辛亥忽出奔卫己亥突至郑立是为厉公厉公四年祭仲专国政厉公患之阴使其壻雍纠欲杀祭仲【集解贾逵曰雍纠郑大夫】纠妻祭仲女也知之谓其母曰父与夫孰亲母曰父一而已人尽夫也【集解杜预曰妇人在室则天父出则天夫女以为疑故母以所生为本解之】女乃告祭仲祭仲反杀雍纠戮之於市厉公无奈祭仲何

怒糾曰謀及婦人死固宜哉夏厉公出居边邑栢【集解宋衷曰今颍川阳翟县索隐按栢音厉即郑初得十邑之历也】祭仲迎昭公忽六月乙亥复入郑即位秋郑厉公突因栢人杀其大夫单伯【集解杜预曰郑守栢大夫也索隐依左传作檀伯事在桓十五年此文误为单伯者盖亦有所因也按鲁庄公十四年厉公自栢侵郑事与单伯会齐师伐宋相连故知误耳】遂居之诸侯闻厉公出奔伐郑弗克而去宋颇予厉公兵自守於栢郑以故亦不伐栢昭公二年自昭公为太子时父庄公欲以高渠弥为卿太子忽恶之庄公弗聽卒用渠弥为卿及昭公即位惧其杀已冬十月辛卯渠弥与昭公出猎射杀昭公於野祭仲与渠弥不敢入厉公乃更立昭公弟子亹为君是为子亹也无諡号子亹元年七月齐襄公会诸侯於首止【集解服虔曰首止近郑之地杜预曰首止卫地陈留襄邑县东南有首乡】郑子亹往会高渠弥相从祭仲称疾不行所以然者子亹自齐襄公为公子之时尝会鬬相仇及会诸侯祭仲请子亹无行子亹曰齐强而厉公居栢即不往是率诸侯伐我内厉公我不如往往何遽必辱且又何至是卒行於是祭仲恐齐并杀之故称疾子亹至不谢齐侯齐侯怒遂伏甲而杀子亹高渠弥亡归【索隐左氏云輶高渠弥】归与祭仲谋召子亹弟公子婴於陈而立之是为郑子【索隐左氏以郑子名子仪此云婴盖别有所见】是岁齐襄公使彭生醉拉杀鲁桓公郑子八年齐人管至父等作乱弑其君襄公十二年宋人长万弑其君湣公郑祭仲死十四年故郑亡厉公突在栢者使人诱劫郑大夫甫瑕要以求入【索隐左传作傅瑕此本多假借亦依字读】瑕曰舍我我为君杀郑子而入君厉公与盟乃舍之六月甲子瑕杀郑子及其二子而迎厉公突自栢复入即位初内蛇与外蛇鬬於郑南门中内蛇死居六年厉公果复入入而让其伯父原【索隐左传谓之原繁】曰我亡国外居伯父无意入我亦甚矣原曰事君无二心人臣之职也原知罪矣遂自杀厉公於是谓甫瑕曰子之事君有二心矣遂诛之瑕曰重德不报诚然哉厉公突後元年齐桓公始霸五年燕卫与周惠王弟颓伐王【索隐惠王庄王孙僖王子子颓庄王之妾王姚所生事在庄十九年】王出奔温立弟颓为王六年惠王告急郑厉公发兵击周王子颓弗胜於是与周惠王归王居于栢七年春郑厉公与虢叔袭杀王子颓而入惠王于周秋厉公卒子文公踃立【索隐踃音在接反系本云文公徙郑宋忠云即新郑也】厉公初立四岁亡居栢居栢十七岁复入立七岁与亡凡二十八年文公十七年齐桓公以兵破蔡遂伐楚至召陵二十四年文公之贱妾曰燕姑【集解贾逵曰姑南燕姓】梦天与之兰【集解贾逵曰香名也】曰余为伯儵余尔祖也【集解贾逵曰伯儵南燕祖】以是为而子【集解王肃曰以是兰也为汝子之名】兰有国香以梦告文公文公幸之而予之草兰为符遂生子名曰兰三十六年晋公子重耳过文公弗礼文公弟叔詹曰重耳贤且又同姓穷而过君不可无礼文公曰诸侯亡公子过者多矣安能尽礼之詹曰君如弗礼遂杀之弗杀使即反国为郑忧矣文公弗聽三十七年春晋公子重耳反国立是为文公秋郑入滑滑聽命已而反与卫於是郑伐滑【索隐左传僖二十四年郑公子士泄堵俞弥帅师伐滑】周襄王使伯冏请滑【索隐冏音服左氏王使伯服游孙伯如郑请滑杜预云二子周大大知伯冏即伯服也】郑文公怨惠王之亡在栢而文公父厉公入之而惠王不赐厉公爵禄【索隐此言爵禄与左氏说异左传云郑伯享王王以后之鞶监与之虢公请器王予之爵则爵酒器非爵禄也故曰与左氏说异】又怨襄王之与卫滑故不聽襄王请而囚伯冏王怒与翟人伐郑弗克冬翟攻伐襄王襄王出奔郑郑文公居王于泛三十八年晋文公入襄王成周四十一年助楚击晋自晋文公之过无礼故背晋助楚四十三年晋文公与秦穆公共围郑讨其助楚攻晋者及文公过时之无礼也初郑文公有三夫人宠子五人皆以罪蚤死公怒溉【集解徐广曰一作瑕索隐音既

左传作瑕】逐羣公子子兰奔晋从晋文公围郑时兰事晋文公甚谨爱幸之乃私於晋以求入郑为太子晋於是欲得叔詹为戮郑文公恐不敢谓叔詹言詹闻言於郑君曰臣谓君君不聽臣晋卒为患然晋所以围郑以詹詹死而赦郑国詹之愿也乃自杀郑人以詹尸与晋晋文公曰必欲一见郑君辱之而去郑人患之乃使人私於秦曰破郑益晋非秦之利也秦兵罢晋文公欲入兰为太子以告郑郑大夫石癸曰吾闻姑姓乃后稷之元妃【集解杜预曰姑姓之女为后稷妃】其後当有兴者子兰母其後也且夫人子尽已死余庶子无如兰贤今围急晋以为请利孰大焉遂许晋与盟卒而立子兰为太子晋兵乃罢去四十五年文公卒子兰立是为繆公繆公元年春秦繆公使三将将兵欲袭郑至滑逢郑贾人弦高诈以十二牛劳军故秦兵不至而还晋败之於崤初往年郑文公之卒也郑司城繆贺以郑情卖之秦兵故来三年郑发兵从晋伐秦败秦兵於汪往年【集解徐广曰繆公之二年】楚太子商臣弑其父成王代立二十一年与宋华元伐郑华元杀羊食士不与其御羊斟怒以驰郑郑囚华元宋赎华元元亦亡去晋使赵穿以兵伐郑二十二年郑繆公卒子夷立是为灵公灵公元年春楚献鼃於灵公子家子公将朝灵公【集解贾逵曰二子郑卿也】子公之食指动【集解服虔曰第二子】谓子家曰佗日指动必食异物及入见灵公进鼃羹子公笑曰果然灵公问其笑故具告灵公灵公召之独弗予羹子公怒染其指【集解駰案左传曰染指於鼎】尝之而出公怒欲杀子公子公与子家谋先夏弑灵公郑人欲立灵公弟去疾去疾让曰必以贤则去疾不肖必以顺则公子坚长坚者灵公庶弟【集解徐广曰年表云灵公庶兄】去疾之兄也於是乃立子坚是为襄公襄公立将尽去繆氏繆氏者杀灵公子公之族家也去疾曰必去繆氏我将去之乃止皆以为大夫襄公元年楚怒郑受宋赂纵华元伐郑郑背楚与晋亲五年楚复伐郑晋来救之六年子家卒国人复逐其族以其弑灵公也七年郑与晋盟鄢陵八年楚庄王以郑与晋盟来伐围郑三月郑以城降楚楚王入自皇门郑襄公肉袒擊羊以迎曰孤不能事边邑使君王怀怒以及弊邑孤之罪也敢不惟命是聽君王迁之江南及以赐诸侯亦唯命是聽若君王不忘厉宣王桓武公哀不忍絕其社稷锡不毛之地【集解何休曰境埵不生五谷曰不毛谦不敢求肥饶】使复得改事君王孤之愿也然非所敢望也敢布腹心惟命是聽庄王为却三十里而後舍楚羣臣曰自郢至此士大夫亦久劳矣今得国舍之何如庄王曰所为伐伐不服也今已服尚何求乎卒去晋闻楚之伐郑发兵救郑其来持两端故迟比至河楚兵已去晋将率或欲渡或欲还卒渡河庄王闻还击晋郑反助楚大破晋军於河上十年晋来伐郑以其反晋而亲楚也十一年楚庄王伐宋宋告急于晋晋景公欲发兵救宋伯宗谏晋君曰天方开楚未可伐也乃求壮士得霍人解扬字子虎诳楚令宋毋降过郑郑与楚亲乃执解扬而献楚楚王厚赐与约使反其言令宋趣降三要乃许於是楚登解扬楼车【集解服虔曰楼车所以窺望敌军兵法所谓云梯者杜预曰楼车车上望櫓也】令呼宋遂负楚约而致其晋君命曰晋方悉国兵以救宋宋虽急慎毋降楚晋兵今至矣楚庄王大怒将杀之解扬曰君能制命为义臣能承命为信受吾君命以出有死无陨【集解服虔曰陨坠也】庄王曰若之许我已而背之其信安在解扬曰所以许王欲以成吾君命也将死顾谓楚军曰为人臣毋忘尽忠得死者楚王诸弟皆諫王赦之於是赦解扬使归晋爵之为上卿十八年襄公卒子悼公立【索隐刘音祕邹本一作弗一作沸左传作费音扶味反】悼公元年鄆公【集解徐广曰音许许公灵公也】恶郑於楚悼公使弟踰於楚自讼【索隐踰音公逊反】讼不直楚囚踰於是郑悼公来与晋平遂亲踰私於楚子反子反言归踰於郑二年楚伐郑晋兵来救是岁悼公卒立其弟踰是为成公成公三年楚共王曰郑成公孤有德焉使人来与盟成公私与盟秋成公朝晋晋曰郑私

平於楚執之使栾書伐鄭四年春鄭患晉圍公子如乃立成公庶兄繻為君【索隱繻音須鄒氏云一作繻】其四月晉聞鄭立君乃歸成公鄭人聞成公歸亦殺君繻迎成公晉兵去十年背晉盟盟於楚晉厲公怒發兵伐鄭楚共王救鄭晉楚戰鄢陵楚兵敗晉射傷楚共王目俱罷而去十三年晉悼公伐鄭兵於洧上【集解服虔曰洧水名正義括地志云洧水在鄭州新鄭縣北三里古新鄭城南韓詩外傳云鄭俗二月桃花水出時會於溱洧水上以自祓除按在古城城南與溱水合】鄭城守晉亦去十四年成公卒子慆立是為厘公【索隱慆音紆粉反左傳作髡頑】厘公五年鄭相子驪朝厘公厘公不禮子驪怒使厨人藥殺厘公【集解徐廣曰年表云子驪使賊夜弑厘公】赴諸侯曰厘公暴病卒立厘公子嘉嘉時年五歲是為簡公簡公元年諸公子謀欲誅相子驪子驪覺之反盡誅諸公子二年晉伐鄭鄭與盟晉去冬又與楚盟子驪畏誅故兩親晉楚三年相子驪欲自立為君公子子孔使尉止殺相子驪而代之子孔又欲自立子產曰子驪為不可誅之今又效之是亂無時息也於是子孔從之而相鄭簡公四年晉怒鄭與楚盟伐鄭鄭與盟楚共王救鄭敗晉兵簡公欲與晉平楚又囚鄭使者十二年簡公怒相子孔專國權誅之而以子產為卿十九年簡公如晉請衛君還而封子產以六邑【集解服虔曰四井為邑】子產讓受其三邑二十二年吳使延陵季子於鄭見子產如舊交謂子產曰鄭之執政者侈難將至政將及子子為政必以禮不然鄭將敗子產厚遇季子二十三年諸公子爭寵相殺又欲殺子產公子或諫曰子產仁人鄭所以存者子產也勿殺乃止二十五年鄭使子產於晉問平公疾平公曰卜而曰實沉台骀為祟史官莫知敢問對曰高辛氏有二子長曰閼伯季曰實沉居曠林【集解賈逵曰曠大也】不相能也日操干戈以相征伐后帝弗臧【集解賈逵曰后帝堯也臧善也】遷閼伯于商丘主辰【集解賈逵曰商邱在漳南杜預曰商邱宋地服虔曰辰大火主祀也】商人是因故辰為商星【集解服虔曰商人契之先湯之始祖相土封閼伯之故地因其故國而代之】遷實沉于大夏主參【集解服虔曰大夏在汾澮之間主祀參星杜預曰大夏今晉陽縣】唐人是因服事夏商【集解賈逵曰唐人謂陶唐氏之胤劉累也事夏帝孔甲封於大夏因實沉之國子孫服事夏商也正義括地志云故唐城在絛州翼城縣西二十里徐才宗國都城記云唐國帝堯之裔子所封春秋云夏孔甲時有堯苗胄劉累者以豢龍事孔甲夏后嘉之賜曰御龍氏以更豕韋之後龍一雌死潛醢之以食夏后既而使求之懼而遷於魯縣夏后蓋別封劉累之後於夏之墟為唐侯至周成王時唐人作亂成王滅之而封大叔遷唐子孫於杜謂之杜伯范氏所云在周為唐杜氏也地記云唐氏在大夏之墟屬河東安縣今在絛城西北一百里有唐城者以為唐舊國然則叔虞之封即此地也】其季世曰唐叔虞【集解杜預曰唐人之季世其君曰叔虞】當武王邑姜方娠大叔夢帝謂己【集解賈逵曰帝天也已武王也】余命而子曰虞【集解杜預曰取唐君之名】乃與之唐屬之參而蕃育其子孫及生有文在其掌曰虞遂以命之及成王滅唐而國大叔焉故參為晉星【集解賈逵曰晉主祀參參為晉星】由是觀之則實沉參神也昔金天氏有子曰昧為玄冥師【集解服虔曰金天少皞也玄冥水官也師長也昧為水官之長】生允格台骀【集解服虔曰允格台骀兄弟也】台骀能業其官【集解服虔曰修昧之職】宣汾洮【集解賈逵曰宣猶通也汾洮二水名】障大澤【集解服虔曰陂障其水也】以處太原【集解服虔曰太原汾水名杜預曰太原晉陽也台骀之所居也】帝用嘉之國之汾川【集解服虔曰帝顓頊也】沈姁蓐黃實守其祀【集解賈逵曰四國台骀之後也】今晉主汾川而滅之【集解賈逵曰滅四國】由是觀之則台骀汾洮神也然是二者不害君身山川之神則水旱之菑祭之【集解服虔曰菑為營攢用帀也若有旱則祭祭山川之神以祈福也】日月星辰之神則雪霜風雨

不时禁之若君疾饮食哀乐女色所生也平公及叔向曰善博物君子也厚为之礼於子产二十七年夏郑简公朝晋冬畏楚灵王之强又朝楚子产从二十八年郑君病使子产会诸侯与楚灵王盟於申诛齐庆封三十六年简公卒子定公宁立秋定公朝晋昭公定公元年楚公子弃疾弑其君灵王而自立为平王欲行德诸侯归灵王所侵郑地于郑四年晋昭公卒其六卿强公室卑子产谓韩宣子曰为政必以德毋忘所以立六年郑火公欲禳之子产曰不如修德八年楚太子建来奔十年太子建与晋谋袭郑郑杀建建子胜奔吴十一年定公如晋晋与郑谋诛周乱臣入敬王于周【索隐王避弟子朝之乱出居狄泉在昭二十三年至二十六年晋郑入之经曰天王入于成周是也】十三年定公卒子献公蛰立献公十三年卒子声公胜立当是时晋六卿强侵夺郑郑遂弱声公五年郑相子产卒【正义括地志云子产墓在新郑县西南三十五里酈元注水经云子产墓在潁水上累石为方坟坟东北向郑城杜预曰言不忘本也】郑人皆哭泣悲之如亡亲戚子产者郑成公少子也为人仁爱人事君忠厚孔子尝过郑与子产如兄弟云及闻子产死孔子为泣曰古之遗爱也【集解贾逵云爱惠也杜预云子产见爱有古人遗风也】兄事子产八年晋范中行氏反晋告急於郑郑救之晋伐郑败郑军於铁【集解杜预曰戚城南铁邱正义括地志云铁邱在滑州卫南县东南十五里】十四年宋景公灭曹二十年齐田常弑其君简公而常相於齐二十二年楚惠王灭陈孔子卒二十六年晋知伯伐郑取九邑三十七年声公卒子哀公易立【集解駰案年表云三十八年】哀公八年郑人弑哀公而立声公弟丑是为共公共公三年晋灭知伯三十年共公卒子幽公已立幽公元年韩武子伐郑杀幽公郑人立幽公弟驩是为繻公【集解駰案年表曰郑立幽公子驩繻或作繻】繻公十五年韩景侯伐郑取雍邱郑城京十六年郑伐韩败韩兵於负黍【集解徐广曰在阳城正义括地志云负黍亭在洛州阳城县西南三十五里故周邑也】二十年韩赵魏列为诸侯二十三年郑围韩之阳翟二十五年郑君杀其相子阳二十七年子阳之党共弑繻公驩而立幽公弟乙为君是为郑君【集解徐广曰一本云立幽公弟乙阳为君是为康公六国年表云立幽公子驩又以郑君阳为郑康公乙班固云郑康公乙为韩所灭】郑君乙立二年郑负黍反复归韩十一年韩伐郑取阳城二十一年韩哀侯灭郑并其国

太史公曰语有之以权利合者权利尽而交疎甫瑕是也甫瑕虽以劫杀郑子内厉公厉公终背而杀之此与晋之里克何异守节如荀息身死而不能存奚齐变所从来亦多故矣

【索隐述赞曰厉王之子得封於郑代职司徒緇衣在咏號郃献邑祭足专命庄既犯王厉亦奔命居栢克入梦兰疏庆伯服生囚叔瞻尸聘厘简之後公室不竞负黍虽还韩衰日盛】

史记卷四十二

史记卷四十二考证

郑世家郑桓公友者周厉王少子而宣王庶弟也○【臣照】按春秋之例母弟称弟系兄为尊以异於其余公子僖二十四年左传曰郑有厉宣之亲以厉王之子而兼云宣王明是其母弟也服?杜预皆云母弟此郑世家云宣王庶弟皇甫谧亦云庶弟乃年表又云郑桓公友宣王母弟世家年表同出马迁不宜自乖异岂传闻异辞故两着於管耶

友初封於郑索隐系本云桓公居域林○郑康成诗谱韦昭国语注皆作咸林

於是卒言王东徙其民雒东而虢郃果献十邑○【臣照】按虢郃献十邑事先儒多言其非实毛诗疏云马迁见国语有史伯为桓公谋取十邑之文不知桓身未得故傅会为此说耳外传云皆子男之国虢郃为大则八邑各为其国非虢郃之地无由得献之桓公也又左传疏云按郑语桓公始谋未取之也武公始国非桓公也全灭虢郃非献邑也

又集解十邑谓虢郃鄢蔽补丹依?历莘也○监本讹丹为舟讹莘为华今俱改正

又索隐虞翻注皆依国语为说○说监本讹作记今改正

生太子寤生生之难及生夫人弗爱後生少子叔段段生易夫人爱之○【臣照】按十六国春秋西燕慕容皝妻昼寝而生子左右以告方寤而起其夫曰此儿易生似郑庄公据此则郑庄公生之易也诸儒解左传者并不用马迁之说

颍谷之考叔正义即酈元注水经○元监本讹作云今改正

三十三年宋杀孔父○春秋经宋督杀孔父在鲁桓二年据年表於郑庄为三十四年

九月辛亥忽出奔卫○辛亥左传作丁亥

夏厉公出居边邑栢○春秋经鲁桓十五年五月郑伯突出奔蔡秋九月郑伯突入于栢

秋厉公卒○春秋经鲁庄二十一年夏五月辛酉郑伯突卒此秋字应是夏字之讹

子文公躋立○左传作捷监本讹作躋今改正

冬翟攻伐襄王○考左传事在秋

郑司城繒贺以郑情卖之○余有丁曰左传卖郑者杞子乃秦人之戍郑者

败秦兵於汪○左传秦晋战於彭衙秦师败绩此汪疑彭衙之误

郑与晋盟鄢陵○左传作辰陵

孤之罪也○之监本讹作乏今改正

兵於洧上正义与溱水合○合监本讹作名今改正而国太叔焉○焉监本讹作为今改正

秋定公朝晋昭公○左传事在夏

十三年定公卒○年表十六年卒

子献公蚤立○公羊作囿

声公五年郑相子产卒○【臣照】按左传鲁昭二十年郑子产有疾数月而卒是年当郑定公之八年距声公五年盖相隔二十七年矣应从左传

子产者郑成公少子也○徐孚远曰按传子产公子发之子公孙侨非成公少子也

二十二年楚惠王灭陈○哀十七年左传楚灭陈是年於声公为二十三年

共公三年晋灭知伯○六国年表在共公二年

史记卷四十二考证

<史部,正史类,史记>

卷四十三

钦定四库全书

史记卷四十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

赵世家第十三

赵氏之先与秦共祖至中衍为帝大戊御【正义中音仲】其後世蜚廉有子二人而命其一子曰恶来事纣为周所杀其後为秦恶来弟曰季胜其後为赵季胜生孟增孟增幸於周成王是为宅皐狼【集解徐广曰或云皐狼地名在西河索隐按如此说是名孟增号宅皐狼而徐广云皐狼地名在西河者按地理志皐狼是西河郡之县名盖孟增幸於周成王成王居之於皐狼故云皐狼】皐狼生衡父衡父生造父造父幸於周繆王造父取骥之乘匹【索隐言造父取八骏品其色齐其力使驯调也并四曰乘两曰匹正义乘食证反并四曰乘两曰正取八骏品其力使均驯】与桃林【正义括地志云桃林在陕州桃林县西至潼关皆为桃林塞地山海经云夸父之山北有林焉名曰桃林广阔三百里中多马造父於此得骥騄耳之乘献周穆王也】盗骊骊騄耳献之繆王繆王使造父御西巡狩见西王母乐之忘归【索隐穆天子传曰穆王与西王母觴於瑶池之上作歌是乐而忘归也而谯周不信此事而云余尝闻之代俗以东西陰阳所出入宗其神谓之王父母或曰地名在西域有何据乎】而徐偃王反【正义括地志云大徐城在泗州徐城县北三十里古之徐国也博物志云徐君宫人娠生卵以为不祥弃於水滨孤独母有犬名鹄仓衔所弃卵以归覆煖之遂成小儿生偃王故宫人闻之更收养之及长袭为徐君後鹄仓临死生角而九尾实黄龙也鹄仓或名后仓】繆王日驰千里马攻徐偃王大破之【索隐谯周曰徐偃王与楚文王同时去周穆王远矣且王者行有周卫岂闻乱而独长驱日行千里乎并言此事非实也】乃赐造父以赵城【正义晋州赵城县即造父邑也】由此为赵氏自造父已下六世至奄父曰公仲周宣王时伐戎为御及千亩战【正义括地志云千亩原在晋州岳阳县北九十里也】奄父脱宣王奄父生叔带叔带之时周幽王无道去周如晋事晋文侯始建赵氏于晋国自叔带以下赵宗益兴五世而生赵夙赵夙晋献公之十六年伐霍魏耿而赵夙为将伐霍霍公求犇齐【集解徐广曰求一作来】晋大旱卜之曰霍太山为祟使赵夙召霍君於齐复之以奉霍太山之祀晋复穰晋献公赐赵夙耿【索隐今河东皮氏县耿乡】夙生共孟当鲁闵公之元年也共孟生赵衰字子余【索隐系本云公明生共孟及赵夙夙生成季衰衰生宣孟盾左传云衰赵夙弟而此云共孟生衰

譙周亦以此为误】赵衰卜事晋献公及诸公子莫吉卜事公子重耳吉即事重耳重耳以骊姬之乱亡奔翟赵衰从翟伐廐咎如得二女翟以其少女妻重耳长女妻赵衰而生盾初重耳在晋时赵衰妻亦生赵同赵括赵婴齐赵衰从重耳出亡凡十九年得反国重耳为晋文公赵衰为原大夫居原任国政【索隐系本云成季徙原宋忠云今鴈门原平县也正义括地志云原平故城汉原平县也在代州崞县南三十五里崞音郭按宋忠说非也括地志云故原城在怀州济源县西北二里左传云襄王以原赐晋文公原不服文公伐原以示信原降以赵衰为原大夫即此也原本周畿内邑也】文公所以反国及霸多赵衰计策语在晋事中赵衰既反晋晋之妻固要迎翟妻而以其子盾为适嗣晋妻三子皆下事之晋襄公之六年而赵衰卒諡为成季赵盾代成季任国政二年而晋襄公卒太子夷臯年少盾为国多难欲立襄公弟雍雍时在秦使使迎之太子母日夜啼泣【索隐穆嬴也】顿首谓赵盾曰先君何罪释其适子而更求君赵盾患之恐其宗与大夫袭诛之廼遂立太子是为灵公发兵距所迎襄公弟於秦者灵公既立赵盾益专国政灵公立十四年益骄赵盾骤谏灵公弗聽及食熊蹯膾不熟杀宰人持其尸出赵盾见之灵公由此惧欲杀盾盾素仁爱人尝所食桑下饿人反扞救盾盾以得亡未出境而赵穿弑灵公而立襄公弟黑臀是为成公赵盾复反任国政君子讥盾为正卿亡不出境反不讨贼故太史书曰赵盾弑其君晋景公时【索隐成公之子名据】而赵盾卒諡为宣孟子朔嗣赵朔晋景公之三年朔为晋将下军救郑与楚庄王战河上朔娶晋成公姊为夫人晋景公之三年大夫屠岸贾欲诛赵氏【集解徐广曰按年表救郑及诛灭皆景公三年】初赵盾在时梦见叔带持要而哭甚悲已而笑拊手且歌盾卜之兆絶而後好赵史援占之曰此梦甚恶非君之身乃君之子然亦君之咎至孙赵将世益衰屠岸贾者始有宠於灵公及至於景公而贾为司寇将作难乃治灵公之贼以攻赵盾徧告诸将曰盾虽不知犹为贼首以臣弑君子孙在朝何以惩臯请诛之韩厥曰灵公遇贼赵盾在外吾先君以为无罪故不诛今诸君将诛其後是非先君之意而今妄诛妄诛谓之乱臣有大事而君不闻是无君也屠岸贾不聽韩厥告赵朔趣亡朔不肯曰子必不絶赵祀朔死不恨韩厥许诺称疾不出贾不请而擅与诸将攻赵氏於下宫杀赵朔赵同赵括赵婴齐皆灭其族赵朔妻成公姊有遗腹走公宫匿赵朔客曰公孙杵臼杵臼谓朔友人程婴曰胡不死程婴曰朔之妇有遗腹若幸而男吾奉之即女也吾徐死耳居无何而朔妇免身生男屠岸贾闻之索於宫中夫人置儿絝中祝曰赵宗灭乎若号即不灭若无声及索儿竟无声已脱程婴谓公孙杵臼曰今一索不得後必且复索之奈何公孙杵臼曰立孤与死孰难程婴曰死易立孤难耳公孙杵臼曰赵氏先君遇子厚子强为其难者吾为其易者请先死乃二人谋取他人婴儿负之衣以文葆【集解徐广曰小儿被曰葆】匿山中程婴出谲谓诸将军曰婴不肖不能立赵孤谁能与我千金吾告赵氏孤处诸将皆喜许之发师随程婴攻公孙杵臼杵臼谲曰小人哉程婴昔下宫之难不能死与我谋匿赵氏孤儿今又卖我纵不能立而忍卖之乎抱儿呼曰天乎天乎赵氏孤儿何罪请活之独杀杵臼可也诸将不许遂杀杵臼与孤儿诸将以为赵氏孤儿良已死皆喜然赵氏真孤乃反在程婴卒与俱匿山中居十五年晋景公疾卜之大业之後不遂者为祟景公问韩厥厥知赵孤在乃曰大业之後在晋絶祀者其赵氏乎夫自中衍者皆嬴姓也中衍人面鸟喙降佐殷帝大戊及周天子皆有明德下及幽厉无道而叔带去周适晋事先君文侯至于成公世有立功未尝絶祀今吾君独灭赵宗国人哀之故见龟策唯君图之景公问赵尚有後子孙乎韩厥具以实告於是景公乃与韩厥谋立赵孤儿召而匿之宫中诸将入问疾景公因韩厥之衆以胁诸将而见赵孤赵孤名曰武诸将不得已乃曰昔下宫之难屠岸贾为之矫以君命并命羣臣非

然孰敢作难微君之疾羣臣因且请立赵後今君有命羣臣之愿也於是召赵武程婴徧拜诸将遂反与程婴赵武攻屠岸贾灭其族复与赵武田邑如故【集解徐广曰推次晋复与赵武田邑是景公之十七年也而乃是春秋成公八年经书晋杀其大夫赵同赵括左传於此说立赵武事者注云终说之耳非此年也】及赵武冠为成人程婴乃辞诸大夫谓赵武曰昔下宫之难皆能死我非不能死我思立赵氏之後今赵武既立为成人复故位我将下报赵宣孟与公孙杵臼赵武啼泣顿首固请曰武愿苦筋骨以报子至死而子忍去我死乎程婴曰不可彼以我为能成事故先我死今我不报是以我事为不成遂自杀赵武服齐衰三年为之祭邑春秋祠之世世勿絶【集解駟案新序曰程婴公孙杵臼可谓信友厚士矣婴之自杀下报亦过矣正义今河东赵氏祠先人犹别舒一座祭二士矣】赵氏复位十一年而晋厉公杀其大夫三郤栾书畏及乃遂杀其君厉公更立襄公曾孙周【集解徐广曰年表云襄公孙也索隐晋系家云襄公少子名周】是为悼公晋由此大夫稍强赵武续赵宗二十七年晋平公立平公十二年而赵武为正卿十三年吴延陵季子使於晋曰晋国之政卒归於赵武子韩宣子魏献子之後矣赵武死諡为文子文子生景叔【索隐系本云景叔名成】景叔之时齐景公使晏婴於晋【集解徐广曰平公之十九年】晏婴与晋叔向语婴曰齐之政後卒归田氏叔向亦曰晋国之政将归六卿六卿侈矣而吾君不能恤也赵景叔卒生赵鞅是为简子赵简子在位晋顷公之九年简子将合诸侯戍於周其明年入周敬王于周辟弟子朝之故也晋顷公之十二年六卿以法诛公族祁氏羊舌氏分其邑为十县六卿各令其族为之大夫晋公室由此益弱後十三年鲁贼臣阳虎来奔赵简子受赂厚遇之赵简子疾五日不知人大夫皆惧医扁鹊视之出董安于问【集解章昭曰安于简子家臣】扁鹊曰血脉治也而何怪在昔秦繆公尝如此七日而寤寤之日告公孙支与子舆【索隐二子秦大夫公孙支子桑】曰我之帝所甚乐吾所以久者适有学也帝告我晋国将大乱五世不安其後将霸未老而死霸者之子且令而国男女无别公孙支书而藏之【索隐藏一作籍籍録也谓当时即记录书之於籍也】秦讖於是出矣献公之乱文公之霸而襄公败秦师於殽而归纵淫此子之所闻今主君之疾与之同不出三日疾必间间必有言也居二日半简子寤语大夫曰我之帝所甚乐与百神游於钧天广乐九奏万舞不类三代之乐其声动人心有一熊欲来援我帝命我射之中熊熊死又有一黑来我又射之中黑黑死帝甚喜赐我二笥皆有副吾见儿在帝侧帝属我一翟犬曰及而子之壮也以赐之帝告我晋国且世衰七世而亡【正义谓晋定公出公哀公幽公烈公孝公静公为七世静公二年为三晋所灭据此及年表简子之疾在定公十一年】嬴姓将大败周人於范魁之西【正义嬴赵姓也周人谓卫也晋亡之後赵成侯三年取卫都鄙七十三是也贾逵云川阜曰魁也】而亦不能有也【索隐范魁地名不知所在盖赵地也】今余思虞舜之勲适余将以其胄女孟姚配而七世之孙【索隐即娃嬴吴广之女姚姓孟字也七代孙武灵王也】董安于受言而书藏之以扁鹊言告简子简子赐扁鹊田四万亩他日简子出有人当道辟之不去从者怒将刃之当道者曰吾欲有谒於主君从者以闻简子召之曰諱吾有所见子晰也【索隐简子见当道者乃寤曰嘻是故吾前梦所见者知其名曰子晰也】当道者曰屏左右愿有谒简子屏人当道者曰主君之疾臣在帝侧简子曰然有之子之见我我何为当道者曰帝令主君射熊与黑皆死简子曰是且何也当道者曰晋国且有大难主君首之帝令主君灭二卿夫熊与黑皆其祖也【正义范氏中行氏之祖也】简子曰帝赐我二笥皆有副何也【正义副谓皆子姓也】当道者曰主君之子将克二国於翟皆子姓也【正义谓代及智氏也】简子曰吾见儿在帝侧帝属我一翟犬曰及而子之长以赐之夫几何谓以赐

翟犬当道者曰儿主君之子也翟犬者代之先也主君之子且必有代及主君之後嗣且有革政而胡服【正义谓今时服也废除裘裳也】并二国於翟【正义武灵王畧中山地至宁葭西畧胡地至楼烦榆中是也】简子问其姓而延之以官当道者曰臣野人致帝命耳遂不见简子书藏之府异日姑布子卿见简子【集解司马彪曰姑布姓子卿字】简子徧召诸子相之子卿曰无为将军者简子曰赵氏其灭乎子卿曰吾尝见一子於路殆君之子也简子召子母恤母恤至则子卿起曰此真将军矣简子曰此其母贱翟婢也奚道贵哉子卿曰天所授虽贱必贵自是之後简子尽召诸子与语母恤最贤简子乃告诸子曰吾藏宝符於常山上先得者赏诸子驰之常山上求无所得母恤还曰已得符矣简子曰奏之母恤曰从常山上临代代可取也【正义地道记云恒山在上曲阳县西北百四十里北行四百五十里得恒山岨号飞狐口北则代郡也】简子於是知母恤果贤乃废太子伯鲁而以母恤为太子後二年晋定公之十四年范中行作乱明年春简子谓邯郸大夫午曰归我卫士五百家吾将置之晋阳【集解服虔曰往年赵鞅围卫卫人恐惧故贡五百家鞅置之邯郸又欲更徙於晋阳】午许诺归而其父兄不聽【集解服虔曰午之诸父兄及邯郸中长老】倍言赵鞅捕午囚之晋阳乃告邯郸人曰我私有诛午也诸君欲谁立【集解杜预曰午赵鞅同族别封邯郸故使邯郸人更立午宗亲也】遂杀午赵稷涉宾以邯郸反【集解服虔曰稷午子】晋君使籍秦围邯郸【集解駰案左传曰籍秦此时为上军司马索隐系本籍秦晋大夫籍游之孙籍谈之子】荀寅范吉射与午善【集解駰案左传曰午荀寅之甥荀寅范吉射之姻索隐系本云晋大夫逝遨生桓伯林父林父生宣伯庚庚生献伯偃偃生穆伯吴吴生寅本姓荀自荀偃将中军晋改中军曰中行因氏焉元与智氏同祖逝遨故智氏亦称荀范氏晋大夫隰叔之子士蒍之後蒍生成伯缺缺生武子会会生文叔燮燮生宣叔句句生献子鞅鞅生吉射也】不肯助秦而谋作乱董安于知之十月范中行氏【正义按会食邑於范因为范氏又中行寅本姓荀自荀偃将中军为中行因号中行氏元与智氏因承袭逝遨姓荀氏】伐赵鞅鞅奔晋阳晋人围之范吉射荀寅仇人魏襄等谋逐荀寅以梁婴父代之【集解贾逵曰梁婴父晋大夫也】逐吉射以范臯绎代之【集解服虔曰范氏之侧室子】荀跖言於晋侯曰【集解服虔曰荀跖智文子索隐系本云逝遨生庄子首首生武子罃罃生庄子朔朔生悼子盈盈生文子栢栢生宣子申申生智伯瑤】君命大臣始乱者死今三臣始乱【集解贾逵曰范中行赵也】而独逐鞅用刑不均请皆逐之十一月荀跖韩不佞魏哆奉公命以伐范中行氏【索隐不佞韩简子哆魏简子系本名取也】不克范中行氏反伐公公击之范中行败走丁未二子奔朝歌【索隐范吉射荀寅也】韩魏以赵氏为请【集解服虔曰以其罪轻於荀范也正义按赵鞅被范中行伐乃奔晋阳以其罪轻故韩魏为请晋君而得入绛】十二月辛未赵鞅入绛盟于公宫其明年知伯文子谓赵鞅曰范中行虽信为乱安于发之是安于与谋也晋国有法始乱者死夫二子已伏罪而安于独在赵鞅患之安于曰臣死赵氏定晋国宁吾死晚矣遂自杀赵氏以告知伯然後赵氏宁孔子闻赵简子不请晋君而执邯郸午保晋阳故书春秋曰赵鞅以晋阳畔赵简子有臣曰周舍好直谏周舍死简子每聽朝常不悦大夫请臯简子曰大夫无罪吾闻千羊之皮不如一狐之腋诸大夫朝徒闻唯唯不闻周舍之鄂鄂是以忧也【集解駰案韩诗外传曰周舍立于门下三日三夜简子使问之曰子欲见寡人何事对曰愿为鄂鄂之臣墨笔操牍从君之过而日有记月有成岁有效也】简子由此能附赵邑而怀晋人晋定公十八年赵简子围范中行于朝歌中行文子奔邯郸【索隐荀寅也】明年卫灵公卒简子与阳虎送卫太子蒯聩于卫卫不内居戚【正义括地志云故戚城在相州澶水县东三十里杜预云戚卫邑在顿邱县西

有戚城是也】晋定公二十一年简子拔邯郸中行文子奔栢人简子又围栢人中行文子范昭子遂奔齐【索隐吉射也】赵竟有邯郸栢人范中行余邑入于晋赵名晋卿实专晋权奉邑侔於诸侯晋定公三十年定公与吴王夫差争长於黄池赵简子从晋定公卒长吴定公三十七年卒而简子除三年之丧期而已是岁越王勾践灭吴晋出公十一年知伯伐郑赵简子疾使太子毋恤将而围郑知伯醉以酒灌击毋恤毋恤羣臣请死之母恤曰君所以置毋恤为能忍詢然亦愠知伯知伯归因谓简子使废毋恤简子不聽毋恤由此怨知伯晋出公十七年简子卒【集解张华曰赵简子冢在临水界二冢并上气成楼阁】太子毋恤代立是为襄子赵襄子元年越围吴【正义年表及赵世家云左传越灭吴在简子三十五年已在襄子元年前十五年矣何得更有越围吴之事从此以下至问吴王是三十年事文脱误在此耳】襄子降丧食使楚隆问吴王【正义左哀公二十年传云简子死襄子嗣立以越围吴故降父之祭饌而使楚隆慰问王为哀公十三年简子在黄池之役与吴王质言曰好恶同之故减祭饌及问吴王也而赵世家及六国年表云此年晋定公卒简子除三年之丧服朞而已按简子死及使吴年月皆误与左传文不同】襄子姊前为代王夫人简子既葬未除服北登夏屋【集解徐广曰山在广武正义括地志云夏屋山一名贾屋山今名贾母山在代州鴈门县东北三十五里夏屋与句注山相接盖北方之险亦天下之阻路所以分别内外也】请代王使厨人操铜料【正义音斗合作料其形方有柄取斟水器说文云钩也】以食代王及从者行斟阴令宰人各【集解徐广曰一作雒】以料击杀代王及从官遂兴兵平代地其姊闻之泣而呼天磨笄自杀代人怜之所死地名之为磨笄之山【正义笄今簪也括地志云磨笄山一名磨笄山亦名为山在蔚州飞狐县东北百五十里魏土地记云代郡东南二十五里有马头山赵襄子既杀代王使人迎其姊代王夫人曰以弟慢夫非仁也以夫怨弟非义也磨笄自杀而死使者亦自杀也】遂以代封伯鲁子周为代成君伯鲁者襄子兄故太子太子蚤死故封其子襄子立四年知伯与赵韩魏尽分其范中行故地晋出公怒告齐鲁欲以伐四卿四卿恐遂共攻出公出公奔齐道死知伯乃立昭公曾孙骄是为晋懿公【索隐或作哀公其大父名雍即昭公少子号戴子也】知伯益骄请地韩魏韩魏与之请地赵赵不与以其围郑之辱知伯怒遂率韩魏攻赵赵襄子惧乃奔保晋阳原过从後至於王泽【正义括地志云王泽在绛州正平县南七里也】见三人自带以上可见自带以下不可见与原过竹二节莫通曰为我以是遗赵毋恤原过既至以告襄子襄子齐三日亲自剖竹有朱书曰赵毋恤余霍泰山【集解徐广曰在河东永安县】山阳侯天使也三月丙戌余将使女反灭知氏女亦立我百邑余将赐女林胡之地至于後世且有伉王亦黑龙面而鸟喙鬣麋髭 大膺大胷修下而冯左衽界乘【集解徐广曰修或作随界一作介】奄有河宗【正义穆天子传云河宗之子孙则栢絮按盖在龙门河之上流岚胜二州之地也】至于休溷诸貉【正义音陌自河宗休溷诸貉乃戎狄之地也】南伐晋别【正义赵南伐晋之别邑谓韩魏之邑也】北灭黑姑【正义亦戎国】襄子再拜受三神之令三国攻晋阳岁余引汾水灌其城城不浸者三版【正义何休云八尺曰版】城中悬釜而炊易子而食羣臣皆有外心礼益慢唯高共【集解徐广曰一作赫】不敢失礼襄子惧乃夜使相张孟同私於韩魏【索隐战国策作张孟谈谈者史迁之父名迁例改为同】韩魏与合谋以三月丙戌三国反灭知氏共分其地於是襄子行赏高共为上张孟同曰晋阳之难唯共无功襄子曰方晋阳急羣臣皆懈唯共不敢失人臣礼是以先之於是赵北有代南并知氏强於韩魏遂祠三神於百邑使原过主霍泰山祠祀【正义括地志云三神祀今名原过祠今在霍山侧也】其後娶空同氏【正义括地志云崆峒山在肃州福祿县东

南六十里古西戎地又原州平高县西百里亦有崆峒山即黄帝问广成子道处俱是西戎地未知孰是】生五子襄子为伯鲁之不立也不肯立子且必欲传位与伯鲁子代成君鲁君先死乃取代成君子浣立为太子【索隐代成君名周伯鲁之子系本云代成君子起即襄子之子不云伯鲁非也】襄子立三十三年卒浣立是为献侯献侯少即位治中牟【集解駟案地理志云河南中牟县赵献侯自耿徙此瓚曰中牟在春秋之时是郑之疆内也及三卿分晋则在魏之邦土也赵界自漳水以北不及此春秋传曰卫侯如晋过中牟按中牟非卫适晋之次也汲郡古文曰齐师伐赵东鄙围中牟此中牟不在赵之东也按中牟当漯水之北索隐此赵中牟在河北非郑之中牟正义按五鹿在魏州元城县东十二里邺即相州汤阴县西五十八里有牟山盖中牟邑在此山侧也】襄子弟桓子逐献侯自立於代【索隐系本云襄子子桓子与此不同】一年卒国人云桓子立非襄子意乃共杀其子而复迎立献侯十年中山武公初立【集解徐广曰西周桓公之子桓公者考王弟而定王子索隐中山古鲜虞国姬姓也系本云中山武公居顾桓公徙灵寿为赵武灵王所灭不言谁之子孙徐广云西周桓公之子亦无所据盖未得其实】十三年城平邑【集解駟案地理志云代郡有平邑县】十五年献侯卒子烈侯籍立烈侯元年魏文侯伐中山使太子击守之六年魏韩赵皆相立为诸侯追尊献子为献侯烈侯好音谓相国公仲连曰寡人有爱可以贵之乎公仲曰富之可贵之则否烈侯曰然夫郑歌者枪石二人【索隐枪音七羊反枪与石二人名】吾赐之田人万亩公仲曰诺不与居一月烈侯从代来问歌者田公仲曰求未有可者有顷烈侯复问公仲终不与乃称疾不朝番吾君【集解徐广曰番音盘常山有番吾县正义括地志云番吾故城在恒州房山县东二十里番蒲古今音异耳】自代来谓公仲曰君实好善而未知所持今公仲相赵於今四年亦有进士乎公仲曰未也番吾君曰牛畜荀攸徐越皆可公仲乃进三人及朝烈侯复问歌者田何如公仲曰方使择其善者牛畜侍烈侯以仁义约以王道烈侯迺然【正义迺音由古字与攸同言牛畜以仁义约以王道故止歌者田攸攸气行貌寛缓也】明日荀攸侍以选练举贤任官使能明日徐越侍以节财俭用察度功德所与无不充君说烈侯使使谓相国曰歌者之田且止官牛畜为师荀攸为中尉徐越为内史【正义汉书百官公卿表云少府内史周官秦因之掌治京师】赐相国衣二袭【单复具为一袭】九年烈侯卒弟武公立【索隐譙周云系本及说赵语者并无其事盖别有所据】武公十三年卒赵复立烈侯太子章是为敬侯是岁魏文侯卒敬侯元年武公子朝作乱不克出奔魏赵始都邯鄲二年败齐于灵邱【集解駟案地理志云代郡有灵邱县】三年救魏于廩丘大败齐人四年魏败我兔台筑刚平【正义兔台刚平并在河北】以侵卫五年齐魏为卫攻赵取我刚平六年借兵於楚伐魏取棘蒲【正义今赵州平棘县古棘蒲邑也】八年拔魏黄城【集解杜预曰

留外黄县东有黄城正义括地志云故黄城在州冠氏县南因黄沟为名按陈留外黄城非随所别也】九年伐齐齐伐燕赵救燕十年与中山战于房子【正义赵州房子县是】十一年魏韩赵共灭晋分其地伐中山又战於中人【集解徐广曰中山唐县有中人亭正义括地志云中山故城一名中人亭在定州唐县东北四十一里春秋时鲜虞国之中人邑也】十二年敬侯卒子成侯种立成侯元年公子胜与成侯争立为乱二年六月雨雪三年大戊午为相【集解徐广曰戊一作戌】伐卫取乡邑七十三魏败我蔺【正义地理志云属西河郡也】四年与秦战高安【正义盖在河东】败之五年伐齐于鄆【正义濮州鄆城县是】魏败我怀攻郑败之以与韩韩与我长子【集解駟案地理志云上党有长子县】六年中山筑长城伐魏败涿泽【正义涿音浊徐广云长杜有浊泽非也括地志云浊水源出蒲州解县东北平地

尔时魏都安邑韩赵伐魏岂河南至长杜也解县浊水近於魏都当是也】围魏惠王七年侵齐至长城【正义齐长城西头在济州平陰县太山记云太山西北有长城缘河经太山千余里至琅琊入海括地志云所侵处在密州南三十里也】与韩攻周八年与韩分周以为两【集解徐广曰显王二年周纪无此正义括地志云史记周显王二年西周惠公封少子子班於巩为东周其子武公为秦所灭郭缘生述征记云巩县本周巩伯邑】九年与齐战阿下【集解徐广曰战亦作会也正义阿东阿也今济州东阿县也】十年攻卫取甄十一年秦攻魏赵救之石阿【正义盖在石隰等州界也】十二年秦攻魏少梁【正义少梁故城在同州韩城县南二十二里古少梁国也】赵救之十三年秦献公使庶长国伐魏少梁虏其太子痤魏败我浍取皮牢【集解徐广曰魏年表曰取赵皮牢正义括地志云浍水县在绛州翼城县东南二十五里按皮牢当在浍之侧】成侯与韩昭侯遇上党十四年与韩攻秦十五年助魏攻齐十六年与韩魏分晋封晋君以端氏【集解徐广曰在平阳正义端氏泽州县也】十七年成侯与魏惠王遇葛孽【集解徐广曰在马邱年表曰十八年赵孟如齐】十九年与齐宋会平陆【正义兖州县也平陆城即古厥国也】与燕会阿【正义括地志云故葛城一名依城又名西阿城在瀛州高阳县西北五十里以徐兗二水并过其西又徂经其北曲曰阿以齐有东阿故曰西阿城地理志云瀛州属河间赵分也按燕赵即此地】二十年魏献荣椽因以为檀台【集解徐广曰襄国县有檀台索隐刘氏云荣椽盖地名其中有高处可以为台非也按荣椽是良材可为椽登饰有光荣所以魏献之故赵因用之以为檀台正义郑玄云荣屋翼也说文云椽椽也屋椳之两头起者为荣也括地志云檀台在洺州临洺县北二里】二十一年魏围我邯鄲二十二年魏惠王拔我邯鄲齐亦败魏於桂陵【正义括地志云故桂城在曹州乘氏县东北二十一里故老云此即桂陵也】二十四年魏归我邯鄲与魏盟漳水上秦攻我蔺二十五年成侯卒公子緤【音薛】与太子肃侯争立【索隐系本云肃侯名语】緤败亡奔韩肃侯元年夺晋君端氏徙处屯留【正义括地志云屯留故城在潞州长子县东北三十里本汉屯留县城也】二年与魏惠王遇於阴晋【正义地理志云华阴县魏之陰晋秦惠文王更名宁秦高帝更名华陰今属华州】三年公子范袭邯鄲不胜而死四年朝天子六年攻齐拔高唐七年公子刻攻魏首垣【正义盖在河北也】十一年秦孝公使商君伐魏虏其将公子卬赵伐魏十二年秦孝公卒商君死十五年起壽陵【集解徐广云在常州】魏惠王卒十六年肃侯游大陵【集解徐广曰太原有大陵县亦曰陵正义括地志云大陵城在并州文水县北十三里汉大陵县城】出於鹿门【正义并州孟县西有白鹿泓源出白鹿山南渚盖鹿门在北山水之侧也】大戊午扣马【集解吕忱曰扣牵马】曰耕事方急一日不百日不食肃侯下车谢十七年围魏黄不克【集解駰案地理志云山阳有黄县正义黄城在魏州前拔之却为魏今赵围之矣】筑长城【正义刘伯庄云盖从云中以北至代按赵长城从蔚州北西至嵐州北尽赵界又疑此长城在潭水之北赵南界】十八年齐魏伐我决河水灌之兵去二十二年张仪相秦赵疵与秦战败秦杀疵河西取代蔺离石二十三年韩举【集解徐广曰韩将】与齐魏战死于桑邱【集解駰案地理志云泰山有桑邱县正义括地志云桑邱城在易州遂城县界或云在泰山非也此时齐伐燕桑邱三晋皆来救之不得在泰山有桑邱县此说甚误也】二十四年肃侯卒秦楚燕齐魏出銳师各万人来会葬子武灵王立【索隐名雍】武灵王元年【集解徐广曰年表云魏败我赵护】阳文君赵豹相梁襄王与太子嗣韩宣王与太子仓来朝信宫【正义在洺州临洺县也】武灵王少未能聽政博闻师三人左右司过三人及聽政先问先王贵臣肥义加其秩国三老年八十月致其礼三年城鄣四年与韩

会于区鼠【正义盖在河北】五年娶韩女为夫人八年韩击秦不胜而去五国相王赵独否曰无其实敢处其名乎令国人谓己曰君九年与韩魏共击秦秦败我斩首八万级齐败我观泽【正义括地志云观泽故城在魏州顿邱县东十八里也】十年秦取我西都及中阳【集解徐广曰年表曰秦取中都西阳安邑十一年秦败我将军英太原有中都县西河有中阳县】齐破燕燕相子之为君君反为臣十一年王召公子职於韩立以为燕王【集解徐广曰纪年亦云尔】使乐池送之【集解駰案燕世家子之死後燕人共立太子平是为燕昭王无赵送公子职为燕王之事当是赵闻燕乱遥立职为燕王虽使乐池送之竟不能就索隐燕系家无其事盖是疎也今此云使乐池送之必是凭旧史为说且纪年之书其说又同则裴駰之解得其旨】十三年秦拔我藺虏将军赵庄【正义庄一作茈音疋婢反】楚魏王来过邯鄲十四年赵何攻魏十六年秦惠王卒王游大陵他日王梦见处女鼓琴而歌诗曰美人荧荧兮顔若苕之荣【集解綦母邃曰陵苕之草其华紫正义苕音条毛诗疏云苕饶也幽州谓之翘饶蔓似劳豆而细叶似蒺藜而青其华细緑色可生食味如小豆藿也又本草经曰陵苕生下湿水中七月生华紫草可以染帛煮沐头髮即黑也】命乎命乎曾无我嬴【集解綦母邃曰言有命禄生遇其时人莫知己贵盛盈端也正义按命名也嬴姓嬴也言世衆名共美好曾无我好嬴也重言名呼者以谈说衆也】异日王饮酒乐数言所梦想见其状吴广闻之因夫人而内其女娃嬴【集解方言曰娃美也吴有馆娃之宫】孟姚也【集解徐广曰古史考云内其女曰娃索隐孟姚吴广女舜之後故上文云余思虞舜之勲故命其胄女孟姚以配而七代之孙是也舜後封虞在河东太阳山西有上虞城是亦曰吴城虞吴音相近故舜後亦姓吴非独太伯虞仲之裔】孟姚甚有宠於王是为惠后十七年王出九门【集解徐广曰在常山正义本战国时赵邑战国策云本有宫室而居赵武灵王改为九门】为野台【集解徐广曰野一作望正义括地志云野台一名义台在定州新乐县西南六十三里】以望齐中山之境十八年秦武王与孟说举龙文赤鼎絶膑而死【集解徐广曰一作絶瞋音亡丁反】赵王使代相赵固迎公子稷於燕送归立为秦王是为昭王十九年春正月大朝信宫召肥义与议天下五日而毕王北略中山之地至於房子【正义赵州县也】遂之代北至无穷西至河登黄华之上【正义黄华盖西河侧之山名也】召楼缓谋曰我先王因世之变以长南藩之地属阻漳滏之险立长城又取藺郭狼败林人【正义即林胡也】於荏而功未遂今中山在我腹心北有燕【正义地理志云赵分晋北有信都中山又得涿郡之高阳鄆州乡东有清河河间又得渤海郡东平舒等五县在河以北故言北有燕】东有胡【正义赵东有瀛州之东北营州之境即东胡乌丸之地服云东胡乌丸之先後为鲜卑也】西有林胡楼烦秦韩之边【正义林胡楼烦即嵐胜之北也嵐胜以南石州离石藺等七国时赵邑边也秦隔河也晋洺潞泽等州皆七国时韩地为并赵西境也】而无强兵之救是亡社稷奈何夫有高世之名必有遗俗之累吾欲胡服楼缓曰善羣臣皆不欲於是肥义侍王曰简襄主之烈计胡翟之利为人臣者宠有孝悌长幼顺明之节通有补民益主之业【正义宠贵宠也通達理也凡为人臣有孝悌长幼顺明之节制者得贵宠也有补民益主之功业者为達理也】此两者臣之分也今吾欲继襄王之迹开於胡翟之乡而卒世不见也【正义卒子律反尽也言尽世间不见补民益主之忠臣也】为敌弱【正义我为胡服敌人必困弱也】用力少而功多可以毋尽百姓之劳而序往古之勲【正义序重也往古谓赵简子襄子也】夫有高世之功者负遗俗之累【正义负留也言古周公孔子留衣冠礼义之俗今变为胡服是负留风俗之譴累也】有独智之虑者任羣民之怨【正义言世有独计智之思虑者必任隐逸敖慢之民怨望也】今吾将胡服骑

射以教百姓而世必议寡人奈何肥义曰臣闻疑事无功疑行无名王既定负遗俗之虑殆无顾天下之议矣夫论至德者不和於俗成大功者不谋於衆昔者舜舞有苗禹袒裸国非以养欲而乐志也务以论德而约功也愚者闇成事智者覩未形则王何疑焉王曰吾不疑胡服也吾恐天下笑我也狂夫之乐智者哀焉愚者所笑贤者察焉世有顺我者胡服之功未可知也虽驱世以笑我胡地中山吾必有之於是遂胡服矣使王綰告公子成曰寡人胡服将以朝也亦欲叔服之家聽於亲而国聽於君古今之公行也子不反亲臣不逆君兄弟之通义也【集解徐广曰兄弟一作元夷元始也夷平也】今寡人作教易服而叔不服吾恐天下议之也制国有常利民为本从政有经令行为上明德先论於贱而行政先信於贵今胡服之意非以养欲而乐志也事有所止而功有所出【集解駰案出犹成也正义郑玄云止至也】事成功立然後善也今寡人恐叔之逆从政之经以辅叔之议且寡人闻之事利国者行无邪因贵戚者名不累故愿慕公叔之义以成胡服之功使綰谒之叔【索隐絶句】请服焉公子成再拜稽首曰臣固闻王之胡服也臣不佞寝疾未能趋走以滋进也王命之臣敢对因竭其愚忠曰臣闻中国者盖聪明徇智之所居也【集解徐广曰五帝本纪曰幼而徇齐】万物财用之所聚也贤圣之所教也仁义之所施也诗书礼乐之所用也异敏技能之所试也远方之所观赴也蛮夷之所义行也今王舍此而袭远方之服变古之教易古之道逆人之心而拂学者离中国故臣愿王图之也使臣以报王曰吾固闻叔之疾也我将自往请之王遂往之公子成家因自请之曰夫服者所以使用也礼者所以便事也圣人观乡而顺宜因事而制礼所以利其民而厚其国也夫翦发文身错臂左衽【索隐错臂亦文身谓以丹青错画其臂孔衍作右臂左衽谓右袒其臂也】瓠越之民也【索隐刘氏云今珠崖儋耳谓之瓠人是有瓠越正义按属南越故言瓠越也輿地志云交趾周时为骆越秦时曰西瓠文身断发避龙则西瓠骆又在番吾之西南越及瓠骆皆半姓也世本云越半姓也与楚同祖是也】黑齿雕题【集解刘逵曰以草染齿用白作黑郑玄曰雕文谓刻其肌以青丹涅之】却冠秫绌【集解徐广曰战国策作秫缝绌亦缝紩之别名也鉢者綦鍼也古字多假借故作秫绌耳此盖言其女功鍼缕之麤拙也又一本作鲑冠黎縹也】大吴之国也故礼服莫同其便一也乡异而用变事异而礼易是以圣人果可以利其国不一其用果可以便其事不同其礼儒者一师而俗异中国同礼而教离况於山谷之便乎故去就之变智者不能一远近之服贤圣不能同穷乡多异曲学多辨不知而不疑异於已而不非者公焉而衆求尽善也今叔之所言者俗也吾所言者所以制俗也吾国东有河薄洛之水【集解徐广曰安平经县西有漳水津名薄洛津】与齐中山同之【正义尔时齐与中山相亲中山赵共薄洛水故言与齐中山同之须有舟楫之备】无舟楫之用自常山以至代上党【集解徐广曰一云自常山以下代上党以东】东有燕东胡之境而西有楼烦秦韩之边今无骑射之备故寡人无舟楫之用夹水居之民将何以守河薄洛之水变服骑射以备燕三胡秦韩之边【索隐林胡楼烦东胡是三胡也】且昔者简主不塞晋阳以及上党而襄主并戎取代以攘诸胡此愚知所明也先时中山负齐之强兵侵暴吾地系累吾民引水围鄯微社稷之神灵则鄯几於不守也先王丑之而怨未能报也今骑射之备近可以便上党之形而远可以报中山之怨而叔顺中国之俗以逆简襄之意恶变服之名以忘鄯事之丑非寡人之所望也公子成再拜稽首曰臣愚不達於王之义敢道世俗之闻臣之臯也今王将继简襄之意以顺先王之志臣敢不聽命乎再拜稽首乃赐胡服明日服而朝於是始出胡服令也赵文赵造周绍【集解徐广曰战国策作绍绍音绍】赵俊皆諫止王毋胡服如故法便王曰先王不同俗何古之法帝王不相袭何礼之循慮戏神农教而不诛黄帝尧舜诛

而不怒及至三王随时制法因事制礼法度制令各顺其宜衣服器械各便其用故礼也不必一道而便国不必古圣人之兴也不相袭而王夏殷之衰也不易礼而灭然则复古未可非而循礼未足多也且服奇者志淫则是邹鲁无奇行也【索隐按邹鲁好长纓是奇服也服非其志皆淫辟也而有孔门顔冉之属岂是无奇行哉】俗辟者民易则是吴越无秀士也【索隐言方俗辟处山谷而人皆改易不通大化则是吴越无秀士何得有延州来及大夫种之属哉】且圣人利身谓之服便事谓之礼夫进退之节衣服之制者所以齐常民也非所以论贤者也故齐民与俗流贤者与变俱故谚曰以书御者不尽马之情以古制今者不達事之变循法之功不足以高世法古之学不足以制今子不及也遂胡服招骑射二十年王略中山地至寧葭【索隐一作蔓葭县名在中山也】西略胡地至榆中【正义胜州北河北岸也】林胡王献马归使楼缓之秦仇液之韩王贲之楚富丁之魏赵爵之齐代相赵固主胡致其兵二十一年攻中山赵招为右军许钧为左军公子章为中军王并将之牛翦将车骑赵希并将胡代赵与之陁【集解徐广曰一作陆又作陁或宜言赵与之陁陁者山絕之名常山有井陘中山有苦陘上党有阙与正义与音与陘音荆陘陘山也在并州井陘县东南十八里然赵希并将代赵之兵与诸军向井陘之侧共出定州上曲阳县合军攻取丹邱华阳鵟上之关】合军曲阳【集解徐广曰上曲阳在常山下曲阳在钜鹿正义括地志云上曲阳故城在定州曲阳县西五里按合军曲阳即上曲阳也以在常山郡也】攻取丹邱【正义盖邢州丹邱县也】华阳【正义括地志云北岳有五别名一曰兰台府二曰列女宫三曰华阳台四曰紫台五曰太一宫按北岳恒山在定州恒阳县北百四十里】鵟之塞【正义上昌之反下先代反徐广曰鵟一作鸿上故关今名汝城在定州唐县东北六十里本晋鸿上关城也又有鸿上水源出唐县北葛洪山接北岳恒山与鸿上塞皆在定州然一本作鸣字误也】王军取鄱石邑【集解徐广曰在常山正义括地志云石邑故城在恒州鹿泉县南三十五里六国时旧邑】封龙【正义括地志云封龙山一名飞龙山在恒州鹿泉县南四十五里邑因山为名】东垣中山献四邑请和王许之罢兵二十三年攻中山二十五年惠后卒【索隐谓武灵王之后前太子章之母惠文王之嫡母也惠后卒後吴娃始当正室至孝成二年称惠文后卒是也而下文又云吴娃死後娃子何宠衰故太子欲两王之是误也】使周绍胡服傅王子何二十六年复攻中山攘地北至燕代西至云中九原二十七年五月戊申大朝於东宫传国立王子何以为王王庙见礼毕出临朝大夫悉为臣肥义为相国并傅王是为惠文王惠文王惠后吴娃子也武灵王自号为主父主父欲令子主治国而身胡服将士大夫西北略胡地而欲从云中九原直南袭秦於是诈自为使者入秦秦昭王不知已而怪其状甚伟非人臣之度使人逐之而主父驰已脱关矣审问之乃主父也秦人大惊主父所以入秦者欲自略地形因观秦王之为人也惠文王【集解徐广曰元年以公子胜为相封平原】二年主父行新地遂出代西遇楼烦王於西河而致其兵三年灭中山迁其王於肤施【集解徐广曰在上郡正义今延州肤施县也】起灵壽【集解徐广曰在常山】北地方从代道大通还归行赏大赦置酒酺五日封长子章为代安阳君【正义括地志云东安阳故城在朔州定襄县界地理志云东安阳县属代郡】章素侈心不服其弟所立主父又使田不礼相章也李兑谓肥义曰公子章强壮而志骄党衆而欲大殆有私乎田不礼之为人也忍杀而骄二人相得必有谋陰贼起一出身微幸夫小人有欲轻虑浅谋徒见其利而不顾其害同类相推俱入祸门以吾观之必不久矣子任重而势大乱之所始祸之所集也子必先患仁者爱万物而智者备祸於未形不仁不智何以为国子奚不称疾毋出传政於公子成毋为怨府毋为祸梯肥义曰不可昔者主父以王属义也曰母

变而度母异而虑坚守一心以歿而世义再拜受命而籍之今畏不礼之难而忘吾籍变孰大焉进受严命退而不全负孰甚焉变负之臣不容於刑谚曰死者复生生者不愧【正义肥义报李兑云必尽傳何为王不可惧章及田不礼而生异心使死者复更变生并见在生者并见傳王无变令我不愧之若荀息也】吾言已在前矣吾欲全吾言安得全吾身且夫贞臣也难至而节见忠臣也累至而行明子则有赐而忠我矣虽然吾有语在前者也终不敢失李兑曰诺子勉之矣吾见子已今年耳涕泣而出李兑数见公子成以备田不礼之事异日肥义谓信期曰【索隐即下文高信也正义上音申也】公子与田不礼甚可忧也其於义也声善而实恶此为人也不子不臣吾闻之也奸臣在朝国之残也谗臣在中主之蠹也此人贪而欲大内得主而外为暴矫令为慢以擅一旦之命不难为也祸且逮国今吾忧之夜而忘寐饥而忘食盗贼出入不可不备自今以来若有召王者必见吾面我将先以身当之无故而王乃入信期曰善哉吾得闻此也四年朝羣臣安阳君亦来朝主父令王聽朝而自从旁观窥羣臣宗室之礼见其长子章儼然也反北面为臣诘於其弟心怜之於是乃欲分赵而王章於代计未决而辍主父及王游沙丘异宫【正义在邢州平乡县东北二十里也】公子章即以其徒与田不礼作乱诈以主父令召王肥义先入杀之高信即与王战公子成与李兑自国至乃起四邑之兵入距难杀公子章及田不礼灭其党贼而定王室公子成为相号安平君李兑为司寇公子章之败往走主父主父开之【索隐开谓开门而纳之俗本亦作闻者非也譙周及孔衍皆作闭之闭谓藏也正义谓不责其反叛之罪容其入宫闭藏也】成兑因围主父宫公子章死公子成李兑谋曰以章故围主父即解兵吾属夷矣乃遂围主父令宫中人後出者夷宫中人悉出主父欲出不得又不得食探爵鬲而食之【集解綦母邃曰鬲爵子也索隐生受哺者谓之鬲】三月余而饿死沙丘宫【集解应邵曰武灵王葬代郡灵丘县】主父定死乃发丧赴诸侯是时王少成兑专政畏诛故围主父主父初以长子章为太子後得吴娃爱之为不出者数生子何乃废太子章而立何为王吴娃死爱弛怜故太子欲两王之犹豫未决故乱起以至父子俱死为天下笑岂不痛乎【集解徐广曰或无此十四字】主父死惠文王立立五年与燕郑易【集解徐广曰皆属涿郡鄭音莫】八年城南行唐【集解徐广曰在常山正义行寒庚反括地志云行唐县属冀州为南行唐筑城】九年赵梁将与齐合军攻韩至鲁关下及【正义刘伯庄云盖在南阳鲁阳関按汝州鲁山县古穀阳城】十年秦自置为西帝十一年董叔与魏氏伐宋得河阳於魏秦取梗阳【集解杜预曰太原晋阳县南梗阳城也索隐地理志云太原榆次有梗阳乡与杜预所据小别也正义括地志云梗阳故城在并州清源县南百二十步分晋阳县置本汉榆次县地春秋晋大夫祁氏邑也】十二年赵梁将攻齐十三年韩徐为将攻齐公主死【索隐盖吴娃女惠文王之妹】十四年相国乐毅将赵秦韩魏燕攻齐取灵邱【索隐年表及韩魏等系家五国攻齐在明年然此下文十五年重击齐是此文为得盖此年同伐齐耳正义灵邱蔚州县也】与秦会中阳【正义括地志中阳故城在汾州偃城县南汉中阳县也】十五年燕昭王来见赵与韩魏秦共击齐齐王败走燕独深入取临菑十六年秦复与赵数击齐齐人患之苏厉为齐遗赵王书曰臣闻古之贤君其德行非布於海内也教顺非洽於民人也祭祀时享非数常於鬼神也甘露降时雨至年谷丰熟民不疾疫衆人善之然而贤主图之今足下之贤行功力非数加於秦也怨毒积怒非素深於齐也秦赵与国以强徵兵於韩秦诚爱赵乎其实憎齐乎物之甚者贤主察之秦非爱赵而憎齐也欲亡韩而吞二周故以齐餽天下恐事之不合故出兵以劫魏赵恐天下畏已也故出质以为信恐天下亟反也故徵兵於韩以威之声以德与国而实伐空韩【索隐与国赵也秦赵今为与国秦徵兵於

韩共赵伐齐以威声和赵是以德与国也】臣以秦计为必出於此夫物固有势异而患同者楚久伐而中山亡今齐久伐而韩必亡破齐王与六国分其利也亡韩秦独擅之收二周西取祭器秦独私之赋田计功王之获利孰与秦多说士之计曰韩亡三川【正义河南之地两川之间】魏亡晋国【正义河北之地安邑河内】市朝未变而祸已及矣燕尽齐之北地去沙邱钜鹿歛三百里【正义沙邱邢州也钜鹿冀州也齐北界贝州也歛减也言破齐灭韩之後燕之南界秦之东界相去减三百里赵国在中间也】韩之上党去邯鄲百里燕秦谋王之河山间三百里而通矣秦之上郡【正义鄜延等州也】近挺关至於榆中者千五百里秦以三郡攻王之上党【正义秦上党郡今泽潞仪沁等四州之地兼相州之半韩摠有之至七国时赵得仪沁二州之地韩犹有潞州及泽州之半半属赵魏沁州在羊肠坂之西仪并代三州在勾注山之南秦以三郡攻赵之泽潞则勾注之南赵无地然秦始皇置上党郡此言之者太史公却引前书也他皆仿此】羊肠之西【正义太行山坂道名南属怀州北属泽州】句注之南【正义勾注山在代州西北也】非王有已踰句注斩常山而守之三百里而通於燕代马胡犬不东下【正义言秦踰句注山斩常山而守之西北代马胡犬不东入沙州崑山之玉亦不出至赵矣郭璞云胡地野犬似狐而小】昆山之玉不出此三宝者亦非王有已王久伐齐从强秦攻韩其祸必至於此愿王熟虑之且齐之所以伐者以事王也【正义以赵王为事也而秦必伐之也】天下属行以谋王也【正义上音烛下胡郎反言秦欲令齐称帝与约五国共灭赵三分赵地】燕秦之约成而兵出有日矣五国三分王之地【正义谓秦齐韩魏燕三分赵之地也】齐倍五国之约而殉王之患【正义齐王以身从赵王之患也】西兵以禁强秦秦废帝请服【正义言秦齐相约欲更重称帝故言废帝也】反高平根柔於魏【集解徐广曰纪年云魏襄王四年改河阳曰河雍向曰高平也根柔一作?柔一作平柔正义返还也括地志云高平故城在怀州河阳县西四十里纪年云魏哀王改向日高平也根柔未详两邑魏地也】反豎分【集解徐广曰一作王公豎音胡鼎反】先俞於赵【集解徐广曰尔雅曰西俞鴈门是也正义豎音邢分字误当作山字括地志云句注山一名西陁山在代州鴈门县西北四十里俞音戊郭注云西隄即鴈门山也按西先声相近盖陁山西隄二山之地并在代州鴈门县皆赵地也】齐之事王宜为上佼【索隐佼犹行也】而今乃抵臯【正义谓共秦伐齐也】臣恐天下後事王者之不敢自必也愿王熟计之也今王母与天下攻齐天下必以王为义齐抱社稷而厚事王天下必尽重王义王以天下善秦秦暴王以天下禁之是一世之名宠制於王也於是赵乃辍谢秦不击齐王与燕王遇廉颇将攻齐昔阳【正义括地志云昔阳故城一名阳城在并州乐平县东春秋释地名云昔阳肥国所都也乐平城沾县东昔阳城肥国白狄别种也乐平县城汉沾县城也】取之十七年乐毅将赵师攻魏伯阳【正义括地志云伯阳故城一名邯鄲城在相州邺县西五十五里七国时魏邑汉邯鄲城】而秦怨赵不与已击齐伐赵拔我两城十八年秦拔我石城【正义地理志云右北平有石城县括地志云石城在相州林虑县西南九十里疑相州石城是】王再之卫东阳决河水【正义括地志云东阳故城在贝州历亭县界按东阳先属卫今属赵河历贝州南东北流过河南岸即魏地也故言王再之卫东阳伐魏氏也】伐魏氏大潦漳水出魏冉来相赵十九年秦败我二城赵与魏伯阳赵奢将攻齐麦邱取之二十年廉颇将攻齐王与秦昭王遇西河外【集解徐广曰年表云与秦会澠池】二十一年赵徙漳水武平西【正义括地志云武平亭今名渭城在瀛州文安县北七十二里按二十七年又徙漳水武平南】二十二年大疫置公子丹为太子二十三年楼昌将攻魏几【正义音祈传云伐齐几拔之又战国策云秦败阙与及攻魏几按几邑或

属齐或属魏当在相潞之间也】不能取十二月廉颇将攻几取之二十四年廉颇将攻魏房
子【集解徐广曰属常山】拔之因城而还又攻安阳取之二十五年燕周将攻昌【集解徐
广曰属齐郡索隐燕周赵人为赵将正义括地志云故昌城在淄州淄川县东北四十里也】
城高唐取之与魏共击秦秦将白起破我华阳【正义括地志云故华阳城在郑州管城县南
四十里司马彪云华阳亭在今洛州密县是时魏韩赵聚兵於华阳西攻秦】得一将军二十
六年取东胡【正义今营州也】欧代地【索隐盖东胡叛赵驱畧代地人衆以叛故取之也
】二十七年徙漳水武平南封赵豹为平阳君【集解駰案战国策曰赵豹平阳君惠文王母
弟】河水出大潦二十八年藺相如伐齐至平邑【正义括地志云平邑故城在魏州昌乐县
东北四十里也】罢城北九门大城【正义恒州九门县城】燕将成安君公孙操弑其王【
集解徐广曰年表云是燕武成王元年索隐乐资云其王即惠王】二十九年秦韩相攻而围
阼与【正义上於连反下音预括地志云阼与聚落今名乌苏城在潞州铜鞮县西北二十里
又仪州顺和县城亦云韩阼与邑二所未详又有阼与山在洛州武安县西五十里盖是也】
赵使赵奢将击秦大破秦军阼与下赐号为马服君【正义因马服山为号也虞喜志林云马
兵之首也号曰马服者言能服马也括地志云马服山邯鄲县西北十里也】三十三年惠文
王卒太子丹立是为孝成王孝成王元年【集解徐广曰平原君相也】秦伐我拔三城赵王
新立太后用事秦急攻之赵氏求救於齐齐曰必以长安君【正义长安君者以长安善故名
也】为质兵乃出【索隐孔衍云长安君惠文后之少子也赵亦有长安今其地阙】太后不
肯大臣强谏太后明谓左右曰复言长安君为质者老妇必唾其面左师触龙言愿见太后太
后盛气而胥之入【集解駰案胥犹须也谷梁传曰胥其出也】徐趋而坐自谢曰老臣病足
曾不能疾走不得见久矣窃自恕而恐太后体之有所苦也故愿望见太后太后曰老妇恃
辇而行【索隐束皙云赵惠文王子何者吴广之甥娃嬴之子也如系家计之则武灵王十六年
梦吴娃而纳之至二十七年王薨及惠文王三十二年卒孝成王元年遣长安君质於齐若娃
年二十入王宫至此在六十左侧亦可称老矣而束广微言太后才三十有奇者误也】曰食
得毋衰乎曰恃粥耳曰老臣间者殊不欲食乃强步日三四里少益嗜食和於身也太后曰老
妇不能太后不和之色少解左师公曰老臣贱息舒祺最少不肖而臣衰窃怜爱之愿得补黑
衣之缺以卫王宫昧死以闻太后曰敬诺年几何矣对曰十五岁矣虽少愿及未填沟壑而托
之太后曰丈夫亦爱怜少子乎对曰甚於妇人太后笑曰妇人异甚对曰老臣窃以为媼之爱
燕后贤於长安君太后曰君过矣不若长安君之甚左师公曰父母爱子则为之计深远媼之
送燕后也持其踵为之泣念其远也亦哀之矣已行非不思也祭祀则祝之曰必勿使反岂非
计长久为子孙相继为王也哉太后曰然左师公曰今三世以前至於赵主之子孙为侯者其
继有在者乎曰无有曰微独赵诸侯有在者乎曰老妇不闻也曰此其近者祸及其身远者及
其子孙岂人主之子侯则不善哉位尊而无功奉厚而无劳而挟重器多也今媼尊长安君之
位而封之以膏腴之地多与之重器而不及今令有功於国一旦山陵崩长安君何以自托於
赵老臣以媼为长安君之计短也故以为爱之不若燕后太后曰诺恣君之所使之於是为长
安君约车百乘质於齐齐兵乃出子义闻之【索隐子义赵之贤人】曰人主之子骨肉之亲
也犹不能持无功之尊无劳之奉而守金玉之重也而况於予乎齐安平君【正义括地志云
安平城在青州临淄县东十九里古纪之鄆邑也】田单将赵师而攻燕中阳【正义燕无中
阳括地志云中山故城一名中人亭在定州唐县东北四十一里尔时属燕国也】拔之又攻
韩注人【正义邑名也括地志云注城在汝州梁县西十五里盖是其地也】拔之二年惠文

后卒田单为相四年王梦衣偏褰之衣【正义杜预曰偏左右异色褰在中左右异故曰偏按褰衣背缝也】乘飞龙上天不至而坠见金玉之积如山明日王召筮史敢占之曰梦衣偏褰之衣者残也乘飞龙上天不至而坠者有气而无实也见金玉之积如山者忧也後三日韩氏上党守冯亭使者至曰韩不能守上党入之於秦其吏民皆安为赵不欲为秦有城市邑十七愿再拜入之赵聽王所以赐吏民王大喜召平阳君豹告之曰冯亭入城市邑十七受之何如对曰圣人甚祸无故之利王曰人怀吾德何谓无故乎对曰夫秦蚕食韩氏地中絶不令相通固自以为坐而受上党之地也韩氏所以不入於秦者欲嫁其祸於赵也秦服其劳而赵受其利虽强大不能得之於小弱小弱顾能得之於强大乎岂可谓非无故之利哉且夫秦以牛田之【集解徐广曰一无之字正义秦蚕食韩氏国中断不通夫牛耕田种谷至秋则收之成熟之义也言秦伐韩上党胜有日矣若牛田之必冀其收获矣】水通粮【正义秦从渭水漕粮东入河洛军击韩上党也】蚕食上乘倍战者【正义乘承证反蚕食桑叶渐进必尽也司马法云百亩为夫夫三为屋屋三为井井十为通通十为成成出革车一乘七十二人也上乘天下第一也倍战力攻也韩国四战之地军士惯习倍於余国】裂上国之地其政行不可与为难必勿受也【正义上国秦地也言韩上党之地以列为秦国之地其政已行赵不可与秦作难必莫受冯亭十七邑也】王曰今发百万之军而攻踰年历岁未得一城也今以城市邑十七币吾国此大利也【正义冯亭将十七邑入赵若币帛之见遗此大利也】赵豹出王召平原君与赵禹而告之对曰发百万之军而攻踰岁未得一城今坐受城市邑十七此大利不可失也王曰善乃令赵胜受地告冯亭曰敝国使者臣胜敝国君使胜致命以万户都三封太守【正义尔时未合言太守至汉景帝始加太守此言太衍字也】千户都三封县令皆世世为侯吏民皆益爵三级吏民能相安皆赐之六金冯亭垂涕不见使者曰吾不处三不义也为主守地不能死固不义一矣入之秦不聽主令不义二矣卖主地而食之不义三矣赵遂发兵取上党【集解駰案汉书冯奉世传曰赵封冯亭为华陵君与赵将括距秦战死於长平宗族由是分散或在赵在赵者为官师将官师将子为代相及秦灭六国而冯亭之後冯无择冯去疾冯劫皆为秦将相焉汉兴冯唐即代相之子也上党记云冯亭冢在壶关城西五里】廉颇将军军长平【正义括地志云长平故城在泽州高平县西二十一里即白起败括於长平处】七年廉颇免而赵括代将秦人围赵括赵括以军降卒四十余万皆阬之王悔不聽赵豹之计故有长平之祸焉王还不聽秦秦围邯战【集解徐广曰在九年】武垣令【集解徐广曰河间有武垣县本属涿郡正义括地志云武垣故城今瀛州城是也】傅豹王容苏射率燕衆反燕地【正义武垣此时属赵与燕接境故云率燕衆反燕地也】赵以灵邱【正义括地志云灵邱蔚州理县也】封楚相春申君八年平原君如楚求救还楚来救及魏公子无忌亦来救【正义魏公子传云赵王以鄙为公子汤沐邑年表云九年公子无忌救邯邯围在九年其文错误耳】秦围邯邯乃解十年燕攻昌壮【集解徐广曰一作社正义壮字误当作城括地志云昌城故城在冀州信都县西北五里此时属赵故攻之也】五月拔之赵将乐乘庆舍攻秦信梁军破之【集解徐广曰年表云新中军也索隐信梁秦将也正义信梁盖王齮号也秦本纪云昭襄王五十年王齮从唐拔宁新中寧新中更名安阳今相州理县也年表云韩魏楚救赵新中军秦兵罢是也】太子死【集解徐广曰是年周赧王卒或者太子云天子乎索隐赵太子也史失名】而秦攻西周拔之徙父祺出【索隐徙父赵大夫名祺】十一年城元氏【集解地理志常山有元氏县正义元氏赵州县】县上原武阳君郑安平死【集解徐广曰故秦将降赵也】收其地十二年邯邯廕烧【集解徐广曰廕廕之名音脰也索隐廕积刍藁之

处为火所烧也】十四年平原君赵胜死【索隐年表在十五年】十五年以尉文封相国廉颇为信平君【索隐尉文盖地名或曰尉官文名谓以尉文所食之地以封廉颇也古文质畧文省耳正义尉文盖蔚州地也信平廉颇号也】燕王令丞相栗腹约驩以五百金为赵王酒还归报燕王曰赵氏壮者皆死长平其孤未壮可伐也王召昌国君乐闲而问之对曰赵四战之国也其民习兵伐之不可王曰吾以衆伐寡二而伐一可乎对曰不可王曰吾即以五而伐一可乎对曰不可燕王大怒羣臣皆以为可燕卒起二军车二千乘栗腹将而攻鄲卿秦将而攻代【索隐二人皆燕将姓名】廉颇为赵将破杀栗腹虜卿秦乐闲【正义三人皆燕将姓也】十六年廉颇围燕以乐乘为武襄君【正义襄举也上也言乐乘功最高也】十七年假相大将武襄君攻燕围其国十八年延陵钧【集解徐广曰代郡有延陵县】率师从相国信平君助魏攻燕秦拔我榆次【集解徐广曰在太原】三十七城十九年赵与燕易土【索隐音亦谓与燕换易县也】以龙兑汾门临乐与燕【集解徐广曰龙兑汾门在北新城方城有临乡正义括地志云北新城故城在易州遂城县西南二十里按遂城西南二十五里有龙山邢子励赵记云龙山有四麓各有一穴大如车轮春风出东风出西夏风出南冬风出北不相夺伦按盖谓龙兑也汾门括地志云易州永寿县有徐水出广昌岭三源奇发同泻一涧流至北平县东南历石门中俗谓之龙门水经其间奔激南出触石成井盖汾字误也遂城及永乐北新城地也临乐括地志云临乡故城在幽州同安六十七里】燕以葛武阳平舒与赵【集解徐广曰葛城在高阳平舒在代郡正义括地志云故葛城又名西河城在瀛州高阳县西北五十里平舒故城在蔚州灵邱县北九十三里】二十年秦王政初立秦拔我晋阳二十一年孝成王卒廉颇将攻繁阳取之【集解徐广曰在顿邱正义括地志云繁阳故城在相州内黄县东北二十七里应邵云繁水之北故曰繁阳也】使乐乘代之廉颇攻乐乘乐乘走廉颇亡入魏子偃立是为悼襄王悼襄王元年大备【集解徐广曰一作修正义行大备之礼也】魏欲通平邑中牟之道不成【正义平邑在魏州昌乐县东北三十里相州汤陰县西五十八里有中牟山按中牟山之侧时二邑皆属魏欲渡黄河作道相通遂不成也】二年李牧将攻燕拔武遂方城【集解徐广曰武遂属安平正义括地志云易州遂城战国时武遂城也方城故在幽州固安县南十七里时二邑属燕赵使李牧拔之也】秦召春平君因而留之泄钧【正义人姓名也】为之谓文信侯曰春平君者赵王甚爱之而郎中妬之故相与谋曰春平君入秦秦必留之故相与计而内之秦也今君留之是絶赵而郎中之计中也君不如遣春平君而留平都【正义括地志云平都县在新兴郡与阳周县相近】春平君者言行信於王王必厚割赵而赎平都文信侯曰善因遣之【集解徐广曰年表云太子从质秦归正义按太子即春平君也】城韩臯三年庞煖将攻燕禽其将剧辛四年庞煖将赵楚魏燕之銳师攻秦藪【集解徐广曰在新丰】不拔移攻徐取饶安【集解徐广曰在渤海又云饶属北海安属平原正义饶安沧州县也七国时属齐战国时属赵】五年傅抵【正义上音付下音邱赵将姓名】将居平邑庆舍将东阳【正义属贝州在河北岸】河外师守河梁【正义河外河南岸魏州地也河梁桥也】六年封长安君以饶【正义即饶阳也瀛州饶阳县东二十里饶阳故城汉县也明长安县是号也】魏与赵邺九年赵攻燕取狸阳城【正义按燕无狸阳疑狸字误当作渔阳故城在檀州密云县南十八里燕渔阳郡城也按赵东界至瀛州则檀州在北赵攻燕取渔阳城也】兵未罢秦攻邺拔之【集解徐广曰今饶阳在河间又年表曰拔阙与邺九城】悼襄王卒子幽缪王迁立幽缪王迁元年【集解徐广曰又云湣王世本云孝成王丹生悼襄王偃偃生今王迁年表及史考赵迁皆无諡索隐徐广云王迁无諡今唯此独称幽缪王

者盖秦灭赵之後人臣窃追諡之太史公或别有所见而记也】城柏人二年秦攻武城【集解徐广曰年表云秦败我平阳】扈辄率师救之军败死焉三年秦攻赤丽宜安【正义括地志云宜安故城在恒州橐城县西南二十里也】李牧率师与战肥下却之【正义括地志云肥累故城在恒州橐城县西七里春秋时肥子国白狄别种也】封牧为武安君四年秦攻番吾【正义上音婆又音盘又作蒲括地志云蒲吾城在恒州房山县东二十里也】李牧与之战却之五年代地大动自乐徐以西【集解徐广曰乐徐一作除】北至平阴【正义乐徐在晋州平阴在汾也】台屋墙垣大半坏地坼东西百三十步【正义其坼沟见在亦在晋汾二州界也】六年大饥民譌言曰赵为号秦为笑以为不信视地之生毛七年秦人攻赵赵大将李牧将军司马尚将击之李牧诛司马尚免赵忽及齐将颜聚代之赵忽军破颜聚亡去以王迁降【正义淮南子云赵王迁流於房陵思故乡则为作山木之讴闻之者莫不陨涕括地志云赵王迁墓在房州房陵县西九里也】八年十月邯郸为秦

太史公曰吾闻冯王孙曰赵王迁其母倡也【集解徐广曰列女传曰邯郸之倡】嬖於悼襄王悼襄王废适子嘉而立迁迁素无行信谗故诛其良将李牧用郭开岂不谬哉秦既虏迁赵之亡大夫共立嘉为王王代六岁秦进兵破嘉遂灭赵以为郡

【索隐述赞曰赵氏之世与秦同祖周穆平徐乃封造父带始事晋夙初有土岸贾矫诛韩厥立武宝符临代卒居伯鲁简梦翟犬灵歌处女胡服虽强建立非所颇收不用王迁囚虏】

史记卷四十三

史记卷四十三考证

赵世家见西王母乐之忘归索隐或曰地名在西域有何据乎○【臣照】按尔雅觚竹北户西王母曰下谓之四荒乌得谓无据乎

居原任国政索隐今鴈门原平县也○原平监本作平原考後汉书地理志改正

杀赵朔赵同赵括赵婴齐○容斋随笔曰春秋於鲁成公八年书晋杀赵同赵括於十年书晋景公卒相去二年而史记乃有屠岸贾欲灭赵氏程婴公孙杵臼共匿赵孤十五年景公复立赵氏之说以年世考之则自同括死後景公又卒厉公立八年而弑悼公公立又五年矣其乖妄如是婴杵臼之事乃战国侠士刺客所为春秋时风俗无此也困学纪闻曰左传正义曰栾书将下军则於时朔已死矣不得与同括俱死也晋君明诸臣强无容有屠岸贾辄厠其间如此专恣吕成公云史记失於传闻之差是时晋室正盛而云索庄姬子於宫中晋宫中自有纪纲不容如此赵朔已亡而云与同括同时死以二者考之见其误

赵朔妻成公姊有遗腹○考要曰同括死时已有赵武无遗腹之说又事出庄姬不关岸贾未知史迁何据

更立襄公曾孙周集解徐广曰年表云襄公孙也索隐晋系家云襄公少子名周○晋世家云悼公周者其大父捷襄公少子也与此同与索隐不符年表亦脱曾字与此异

嬴姓将大败周人於范魁之西正义取卫都鄙○监本讹作卫取都鄙今改正

吾有所见子晰也索隐简子见当道者乃寤曰嘻是故吾前梦所见者知其名曰子晰也○徐孚远曰吾见子晰者盖言梦中见子甚明白也不谓其人名晰

简子曰奏之○简监本讹作节今改正

晋定公之十四年范中行作乱○余有丁曰范中行氏囚邯郸午而作乱其说见下此先言之误

陰令宰人各以料击杀代王及从官集解徐广曰一作雒○【臣照】按徐孚远曰本文各字盖言杀代王及其从官各用铜料击之也徐广曰一作雒则以雒为宰人名也今按徐广说是盖以料击杀代王者犹真剑鱼中之类代王既死其从官之被杀固不必问其用何器矣宁有令庖人尽持料以为战具之理耶

唯高共集解徐广曰一作赫○韩非子及淮南人间训作高赫吕氏春秋作高赦

败齐于灵邱集解地理志曰代郡有灵邱县○余有丁曰此灵邱齐地非代郡之灵邱

命乎命乎曾无我嬴○列女传作命兮命兮逢天时而生曾莫我嬴嬴

十八年秦武王与孟说举龙文赤鼎絶膑而死○按年表在十九年

宠有孝悌长幼顺明之节○战国策作穷有辞让之节禹袒裸国○按战国策云禹袒入裸国

王縶○战国策作王孙縶

兄弟之通义也集解徐广曰兄弟一作元夷元始也夷平也○战国策作先王

吾国东有河薄洛之水集解徐广曰安平经县西有漳水津名薄洛津○按秦藩本此下有正义按安平县属定州也共八字

仇液之韩○战国策作仇赫

二十五年惠后卒索隐谓武灵王之后前太子章之母惠文王之嫡母也惠后卒後吴娃始当正室至孝成二年称惠文后卒是也而下文又云吴娃死後娃子何宠衰故太子欲两王之是

误也○卮林曰子长既云是为惠后又云二十七年立王子何为王是为惠文王惠文王惠后吴娃子也又云吴娃死後子何宠衰反覆着明则此二十五年卒者其为孟姚无疑不得以为子章母也若惠文后卒者是惠文之后故称惠文后耳自春秋夫人及历代帝王妃后諡皆从夫或别自易讳未有从其子諡者而独子何之母仍子徽称历考古今未闻斯典

主父死惠文王立○徐孚远曰主父已传位与子此云惠文王立误也

怨毒积怒非素深於齐也○战国策作怨毒积恶非曾深陵於韩也

且齐之所以伐者以事王也正义以赵王为事也而秦必伐之也○徐孚远曰此注不明盖言齐之所以见恶於天下者以其服事赵也故下云齐倍约而殉王之患为齐解於赵语

反高平根柔於魏反至分先俞於赵○战国策作反温轶高平於魏反三公什清於赵

左师触龙言愿见太后○【臣照】按说苑桀臣有左师触龙荀子议兵篇微子开封于宋曹触龙断於军触龙古有是名战国策作触讐并下言字作一字盖误也

老妇恃辇而行索隐束皙云赵惠文王子何者吴广之甥娃嬴之子也如系家计之则武灵王十六年梦吴娃而纳之至二十七年王薨及惠文王三十二年卒孝成王元年遣长安君质於齐若娃年二十入王宫至此在六十左侧亦可称老矣而束广微言太后才三十有奇者误也○卮林曰以惠文后为吴娃则长安君主父之子也至是时已三四十岁矣尚需其母爱怜之乎吴娃以主父十六年入宫子何之生应在十七年则二十七年惠文为王已得龄十一二矣惠文王三十三矣上去东宫时十二年下至孝成元年合得四十六年使王后长于惠文理亦有之即与惠文并岁亦已望五十矣素问女子六七面皆焦发始白七七形坏无子何得不称老妇以此而观广微谓三十有奇果未为得也

有城市邑十七○战国策作七十

七年廉颇免而赵括代将秦人围赵括赵括以军降卒四十余万皆阬之○按年表阬卒在六年

虏卿秦乐间○徐孚远曰乐间以谏燕王不聽自归赵非战败被虏也

秦召春平君○战国策作春平侯

君不如遣春平君而留平都○战国策平都下有侯字吾闻冯王孙曰○冯唐传云唐子遂字王孙与余善

史记卷四十三考证

卷四十四

钦定四库全书

史记卷四十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

魏世家第十四

魏之先毕公高之後也毕公高与周同姓【索隐左传富辰说文王之子十六国有毕原丰郇言毕公是文王之子此云与周同姓似不用左氏之说马融亦云毕毛文王庶子】武王之伐纣而高封於毕【集解杜预曰毕在长安县西北正义按地志云毕原在雍州万年县西南二十八里】於是为毕姓其後絶封为庶人或在中国或在夷狄其苗裔曰毕万事晋献公献公之十六年赵夙为御毕万为右以伐霍耿魏灭之以耿封赵夙以魏封毕万【正义魏城在陕州芮城县北五里郑玄诗谱云魏姬姓之国武王伐纣而封焉】为大夫卜偃曰【索隐晋掌卜大夫郭偃也】毕万之後必大矣万满数也魏大名也以是始赏天开之矣天子曰兆民诸侯曰万民今命之大以从满数其必有衆初毕万卜事晋遇屯之比辛廖占之曰吉屯固比入吉孰大焉其必蕃昌毕万封十一年晋献公卒四子争更立晋乱而毕万之世弥大从其国名为魏氏生武子【索隐左传武子名犝系本云毕万生芒季芒季生武仲州州与犝声相近字因以异代亦不同】魏武子以魏诸子事晋公子重耳晋献公之二十一年武子从重耳出亡十九年反重耳立为晋文公而令魏武子袭魏氏之後封列为大夫治於魏生悼子魏悼子徙治霍【索隐系本云武仲生庄子绛无悼子又系本居篇曰魏武子居魏悼子徙霍宋忠曰霍地名今河东隄县也则是有悼子系本卿大夫代自脱耳然魏今河北魏县是也正义晋州霍邑县汉隄县也後汉改曰永安隋改曰霍邑本春秋时霍伯国也】生魏绛魏绛事晋悼公悼公三年会诸侯悼公弟杨干乱行魏绛戮辱杨干【索隐左传云戮杨干之仆】悼公怒曰合诸侯以为荣今辱吾弟将诛魏绛或说悼公悼公止卒任魏绛政使和戎翟戎翟亲附悼公之十一年曰自吾用魏绛八年之中九合诸侯戎翟和子之力也赐之乐三让然後受之徙治安邑【正义安邑在绛州夏县安邑故城是】魏绛卒諡为昭子【集解徐广曰世本曰庄子索隐系本错也居篇又曰昭子徙安邑亦与此文同】生魏嬴嬴生魏献子【索隐系本云献子名荼荼庄子之子无魏嬴也】献子事晋昭公昭公卒而六卿强公室卑晋顷公之十二年韩宣子老魏献子为国政晋宗室祁氏羊舌氏相恶六卿诛之尽取其邑为十县六卿各令其子为之大夫献子与赵简子中行文子范献子并为晋卿【索隐简子赵鞅文子荀寅献子范吉

射】其後十四岁而孔子相鲁後四岁赵简子以晋阳之乱也而与韩魏共攻范中行氏魏献子生魏侈【索隐侈他本亦作哆盖哆字误而代数错也系本献子生简子取取生襄子侈而左传云魏曼多是也则侈是襄子中间少简子一代】魏侈与赵鞅共攻范中行氏魏侈之孙曰魏桓子【索隐系本云襄子生桓子驹】与韩康子赵襄子共伐灭知伯【索隐康子名虎襄子名无恤智伯知瑶也本姓荀亦曰荀瑶正义知音智括地志云故智城在蒲州虞乡县西北四十里古今地名云解县有智城盖谓此也】分其地桓子之孙曰文侯都【集解徐广曰世本云斯也索隐系本桓子生文侯斯其传云孺子是魏驹之子与此系代亦不同也】魏文侯元年秦灵公之元年也与韩武子赵桓子周威王同时【索隐系本武子名啓章康子之子桓子名嘉襄子之子】六年城少梁十三年使子击围繁龐出其民十六年伐秦筑临晋元里十七年伐中山使子击守之赵仓唐傅之子击逢文侯之师田子方於朝歌引车避下谒田子方不为礼子击因问曰富贵者骄人乎且贫贱者骄人乎子方曰亦贫贱者骄人耳夫诸侯而骄人则失其国大夫而骄人则失其家贫贱者行不合言不用则去之楚越若脱躡然奈何其同之哉子击不恚而去西攻秦至郑而还筑雒阴合阳【正义雒漆沮水也城在水南合阳合水之北括地志云合阳故城在同州河西县南三里雒阴在同州西也】二十二年魏赵韩列为诸侯二十四年秦伐我至阳【正义括地志云阳狐郭在魏州元城县东北三十里也】二十五年子击生子罃【索隐罃音乙耕反擊武侯名】文侯受子夏经艺客段干木过其间未尝不轼也【正义过先卧反文侯轼干木间也皇甫谧高士传云本晋人也守道不仕魏文侯欲见造其门干木踰墙避之文侯以客礼待之出过其间而轼其仆曰君何轼曰段干木贤者也不趋势利怀君子之道隐处穷巷声驰千里吾安得勿轼干木先乎德寡人先乎势干木富乎义寡人富乎财势不若德贵财不若义高又请为相不肯後卑已固请见与语文侯立倦不敢息淮南子云段干木晋之大狙而为文侯师吕氏春秋云魏文侯见段干木立倦而不敢息及见翟璜踞于堂而与之言翟璜不悦文侯曰段干木官之则不肯禄之则不受今汝欲官则相至欲禄则上卿至既受吾赏又责吾礼无乃难乎】秦尝欲伐魏或曰魏君贤人是礼国人称仁上下和合未可图也文侯由此得誉於诸侯任西门豹守邺而河内称治【索隐大河在邺东故名邺为河内正义古帝王之都多在河东河北故呼河北为河内河南为河外又云河从龙门南至华陰东至卫州折东北入海曲绕冀州故言河内云也】魏文侯谓李克曰先生尝教寡人曰家贫则思良妻国乱则思良相今所置非成则璜【集解徐广曰文侯弟名成】二子何如李克对曰臣闻之卑不谋尊不谋戚臣在阙门之外不敢当命文侯曰先生临事勿让李克曰君不察故也居视其所亲富视其所与达视其所举穷视其所不为贫视其所不取五者足以定之矣何待克哉文侯曰先生就舍寡人之相定矣李克趋而出过翟璜之家翟璜曰今者闻君召先生而卜相果谁为之李克曰魏成子为相矣翟璜忿然作色曰以耳目之所覩记臣何负於魏成子西河之守臣之所进也君内以邺为忧臣进西门豹君谋欲伐中山臣进乐羊中山已拔无使守之臣进先生君之子无傅臣进屈侯鲋臣何以负於魏成子李克曰且子之言克於子之君者岂将比周以求大官哉君问而置相非成则璜二子何如克对曰君不察故也居视其所亲富视其所与达视其所举穷视其所不为贫视其所不取五者足以定之矣何待克哉是以知魏成子之为相也且子安得与魏成子比乎魏成子以食禄千鍾什九在外什一在内是以东得卜子夏田子方段干木此三人者君皆师之子之所进五人者君皆臣之子恶得与魏成子比也翟璜逡巡再拜曰璜鄙人也失对愿卒为弟子二十六年虢山崩壅河【集解徐广曰在陕驪案地理志曰弘农陕县故虢国北虢在太阳东虢在荥阳正义

括地志云虢山在陕州陕县西二里临黄河今临河有岗阜似是颍山之余也】三十二年伐郑城酸枣败秦于注【集解司马彪曰河南梁县有注城也正义括地志云注城在汝州梁县西十五里注或作铸也】三十五年齐伐取我襄陵【集解徐广曰今在南平阳县也】三十六年秦侵我阴晋【集解徐广曰今之华阴索隐年表作齐侵阴晋秦本纪云惠王六年魏纳阴晋更名曰寧秦徐氏云今之华阴也】三十八年伐秦败我武下【正义括地志云故武城一名武平城在华州郑县东十三里】得其将识【索隐识将名也武下魏地】是岁文侯卒【索隐纪年云五十年卒】子击立是为武侯魏武侯元年赵敬侯初立【索隐纪年云魏武侯元年当赵烈侯之十四年不同也又系本敬侯名章】公子朔为乱不胜奔魏与魏袭邯鄲魏败而去二年城安邑王垣【索隐纪年十一年城洛阳及安邑王垣徐广曰垣县有王屋山故曰王垣正义括地志云故城汉垣县本魏王垣也在绛州垣县西北二十里】七年伐齐至桑丘【正义年表云齐伐燕取桑丘故魏救燕伐齐至桑丘也括地志云桑丘故城俗名敬城在易州遂城县界】九年翟败我於浹【索隐浹音古外反于浹于浹水之侧正义括地志云浹高山又云浹山在绛州翼城县东北二十五里浹水出此山也】使吴起伐齐至灵丘【正义灵丘蔚州县也时属齐故三晋伐之也】齐威王初立【索隐按纪年齐幽公之十八年而威王立】十一年与韩赵三分晋地灭其後十三年秦献公县栎阳十五年败赵北蔺【正义在石州赵之西北属赵故云赵北蔺也】十六年伐楚取鲁阳【正义今汝州鲁山县也】武侯卒【索隐纪年云武侯二十六年卒】子罃立是为惠王惠王元年初武侯卒也子罃与公中缓【正义中音仲】争为太子公孙颀自宋入赵【索隐颀音祁纪年云武侯元年封公子缓赵侯种韩懿侯伐我取蔡而惠成王伐赵围浊阳七年公子缓如邯鄲以作难是说此事也】自赵入韩谓韩懿侯曰【索隐懿侯哀侯之子】魏罃与公中缓争为太子君亦闻之乎今魏罃得王错【集解徐广曰汲冢纪年惠王二年魏大夫王错出奔韩也】挟上党固半国也因而除之【集解徐广曰除一作倍正义按除除魏罃及王错也】破魏必矣不可失也懿侯说乃与赵成侯合军并兵以伐魏战于浊泽【集解徐广曰长社有浊泽索隐系本云成侯名种】魏氏大败魏君为赵谓韩曰除魏君立公中缓割地而退我且利韩曰不可杀魏君人必曰暴割地而退人必曰贪不如两分之魏分为两不强於宋卫则我终无魏之患矣赵不聽韩不说以其少卒夜去惠王之所以身不死国不分者二家谋不和也若从一家之谋则魏必分矣故曰君终无适子其国可破也【索隐此盖古人之言及俗说故云故曰】二年魏败韩于马陵败赵于怀三年齐败我观【集解徐广曰齐世家云献观以和齐年表曰伐魏取观今卫县也索隐田完系家云败魏於浊津而围惠王惠王请献观以和正义魏州魏城县古之观国国语云观国夏啓子太康第五弟之所封也夏衰灭之】五年与韩会宅阳城【正义括地志云宅阳故城一名北宅在郑州荥阳县东南十七里】武堵为秦所败【集解徐广曰秦年表曰败韩魏洛阳】六年伐取宋仪台【索隐表亦作义台然义台见庄子司马彪亦曰台名郭象云义台灵台也】九年伐败韩于浹与秦战少梁虜我將公孙痤【集解徐广曰年表云虜我太子也】取庞秦献公卒子孝公立十年伐取赵皮牢彗星见十二年星书坠有声十四年与赵会鄆十五年鲁卫宋郑君来朝【索隐纪年鲁恭侯宋桓侯卫成侯郑厘侯来朝皆在十四年郑厘侯者韩昭侯也韩哀侯灭郑而徙都之遂改号曰郑】十六年与秦孝公会社平侵宋黄池宋复取之十七年与秦战元里秦取我少梁围赵邯鄲十八年拔邯鄲赵求救于齐齐使田忌孙臆救赵败魏桂陵十九年诸侯围我襄陵筑长城塞固阳【正义塞先代反括地志云櫛杨县汉旧县也在银州银城县界按魏筑长城自郑滨洛北达银州至胜州固阳县为塞

也固阳有连山东至黄河西南至夏会等州桐音固】二十年归赵邯郸与漳水上【正义邯郸洺州县也漳水名漳水源出洺州武安县三门山也】二十一年与秦会彤赵成侯卒【集解徐广曰年表云二十七年丹封名会丹魏大臣也】二十八年齐威王卒中山君相魏【索隐魏文侯灭中山使子击守之后寻复国至是始令相魏其中山后又为赵所灭】三十年魏伐赵【正义孙臆传云魏与赵攻韩韩告急齐此文误耳魏伐赵赵求救齐齐使孙臆救赵败魏桂陵乃在十八年也】赵告急齐齐宣王用孙子计救赵击魏魏遂大兴师使庞涓将而令太子申为上将军过外黄外黄徐子【集解駰按刘向别录曰徐子外黄人也外黄时属宋正义括地志云故圉城有南北二城在汴州雍丘县界本属外黄即太子申见徐子之地也】谓太子曰臣有百战百胜之术太子曰可得闻乎客曰固愿效之曰太子自将攻齐大胜并莒【正义莒密州县也在齐东南言从西破齐并至莒地则齐土尽矣】则富不过有魏贵不益为王若战不胜齐则万世无魏矣此臣之百战百胜之术也太子曰诺请必从公之言而还矣客曰太子虽欲还不得矣彼劝太子战攻欲啖汁者众【正义啖穿悦反汁之入反冀功勲者众也】太子虽欲还恐不得矣太子因欲还其御曰将出而还与北同太子果与齐人战败于马陵【集解徐广曰在元城索隐按纪年云二十八年与齐田盼战于马陵又上二年魏败韩马陵十八年赵又败魏桂陵桂陵与马陵异处正义虞喜志林云马陵在濮州鄆城县东北六十里有陵涧谷深峻可以置伏按庞涓败即此也徐说马陵在魏州元城县东南一里庞涓败非此地也田完世家云宣王二年魏伐赵赵与韩亲共击魏赵不利战于南梁韩求救于齐齐使田忌田婴将孙子为师救韩赵以击魏大破之马陵按南梁在汝州又此传云太子为上将军过外黄又孙臆传云魏与赵攻韩韩告急齐齐使田忌将而往直走大梁魏将庞涓闻之去韩而归齐军已过而西矣按孙子减灶退军三日行至马陵遂杀庞涓虏太子申大破魏军当如虞喜之说从汴州外黄退至濮州六十里是也然赵韩共击魏战困于南梁韩急求救于齐齐师走大梁败魏马陵岂合更渡河北至魏州元城哉徐说定非也】齐虏魏太子申杀将军涓军遂大破三十一年秦赵齐共伐我【索隐纪年云二十九年五月齐田盼伐我东鄙九月秦卫鞅伐我西鄙十月邯郸伐我北鄙王攻卫鞅我师败绩是也然言二十九年不同】秦将商君诈我将军公子卬而袭夺其军破之秦用商君东地至河而齐赵数破我安邑近秦於是徙治大梁【集解徐广曰今浚仪駰案汲冢纪年曰梁惠成王九年四月甲寅徙都大梁也索隐纪年以为惠王九年盖误也正义陈留风俗传云魏之都也毕万十叶徙大梁按今汴州浚仪也】以公子赫为太子三十三年秦孝公卒商君亡秦归魏魏怒不入三十五年与齐宣王会平阿南【集解駰按地理志沛郡有平阿县也】惠王数败于军旅卑礼厚币以招贤者邹衍淳于髡孟轲皆至梁梁惠王曰寡人不佞兵三折于外太子虏上将死国以空虚以羞先君宗庙社稷寡人甚丑之叟不远千里【集解刘熙曰叟长老之称依皓首之言】辱幸至弊邑之廷将何以利吾国孟轲曰君不可以言利若是夫君欲利则大夫欲利大夫欲利则庶人欲利上下争利国则危矣为人君仁义而已矣何以利为三十六年复与齐王会甄是岁惠王卒【索隐纪年云惠成王三十六年改元称一年未卒也】子襄王立【索隐系本襄王名嗣】襄王元年与诸侯会徐州【集解徐广曰今薛县】相王也追尊父惠王为王【集解徐广曰二年伐赵】五年秦败我龙贾军四万五千于雕阴【集解徐广曰在上郡正义括地志云雕阴故县在鄆州洛交县北三十里雕阴故城是也】围我焦曲沃【正义括地志云故焦城在陕县东北百步古虢城中东北隅周同姓也曲沃有城在陕县西南三十二里按今有曲沃店也】予秦河西之地【正义自华州北至同州并魏河北之地尽入秦也】六年与秦会应【集

解徐广曰颍川父城有应乡也正义应乙陵反括地志云故应城故应乡也在汝州鲁山县东三十里】秦取我汾陰皮氏焦【正义括地志云汾阴故城在蒲州汾陰县北九里皮氏故城在绛州龙门县西一百八十步也】魏伐楚败之陘山【集解徐广曰在密县正义括地志云陘山在郑州新郑县西南三十里】七年魏尽入上郡于秦【正义括地志云上郡故城在绥州上县东南五十里秦魏之上郡地也按丹酈延绥等州北至固阳并上郡地魏筑长城界秦自华州郑县已北滨洛至庆州洛源县白於山即东北至胜州固阳县东至河西上郡之地尽入于秦】秦降我蒲阳【正义在隰州隰州县蒲邑故城是也】八年秦归我焦曲沃十三年楚败我襄陵诸侯执政与秦相张仪会啗桑【集解徐广曰在梁与彭城之间】十三年张仪相魏魏有女子化为丈夫秦取我曲沃【正义绛州桐乡县晋曲沃邑】平周【正义十三州志云古平周县在汾州介休县西五十里也】十六年襄王卒子哀王立张仪复归秦【集解荀勗曰和嶠云纪年起自黄帝终於魏之今王今王者魏惠成王子案太史公书惠成王但言惠王惠王子曰襄王襄王子曰哀王惠王三十六年卒襄王立十六年卒并惠襄为五十二年今案古文惠成王立三十六年改元称一年改元後十七年卒太史公书为误分惠成之世以为二王之年数也世本惠王生襄王而无哀王然则今王者魏襄王也索隐系本襄王生昭王而无哀王盖脱一代耳孔衍叙魏语亦有哀王而纪年说惠成王三十六年又称後元一十七年卒此文分惠王之历以为二王之年又有哀王凡二十三年纪事甚明盖无足疑然则是纪年之作失哀王之代故分襄王之年为惠王後元即以襄王之年包哀王之代耳】哀王元年五国共攻秦【正义韩魏楚赵燕也】不胜而去二年齐败我观津【正义括地志云观津城在冀州枣阳县东南二十五里本赵邑今属魏也】五年秦使樗里子伐取我曲沃【索隐樗里子秦昭王弟名疾居樗里故因号焉】走犀首岸门【集解徐广曰颍陰有岸亭索隐犀首官名即公孙衍刘氏云河东皮氏县有岸头亭也正义括地志云岸门在许州长社县西北十八里今名西武亭】六年秦求立公子政为太子【索隐政魏公子也】与秦会临晋七年攻齐【集解徐广曰年表云击齐虏声子於濮也】与秦伐燕八年伐卫拔列城二【索隐纪年云八年翟章伐卫】卫君患之如耳见卫君【正义如耳魏大夫姓名也】曰请罢魏兵免成陵君可乎卫君曰先生果能孤请世世以卫事先生如耳见成陵君曰昔者魏伐赵断羊肠拔阙与【集解徐广曰在上党正义阙於连反与音预羊肠坂道在太行山上南口怀州北口潞州阙与故城在潞州及仪州若断羊肠拔阙与北连恒州则赵国东西断而为二也】约斩赵赵分而为二所以不亡者魏为从主也今卫已迫亡将西请事於秦与其以秦驪卫不如以魏驪卫【正义驪音释】卫之德魏必终无穷成陵君曰诺如耳见魏王曰臣有谒於卫卫故周室之别也其称小国多宝器今国迫於难而宝器不出者其心以为攻卫驪卫不以王为主故宝器虽出必不入於王也臣窃料之先言驪卫者必受卫者也如耳出成陵君入以其言见魏王魏王聽其说罢其兵免成陵君终身不见九年与秦王会临晋张仪魏章皆归於魏【索隐章为魏将後又相秦】魏相田需死楚害张仪犀首薛公【索隐薛公田文也】楚相昭鱼谓苏代【索隐昭鱼昭奚恤也】曰田需死吾恐张仪犀首薛公有一人相魏者也代曰然相者欲谁而君便之昭鱼曰吾欲太子之自相也【索隐太子即襄王也】代曰请为君北必相之昭鱼曰奈何对曰君其为梁王代请说君昭鱼曰奈何对曰代也从楚来昭鱼甚忧曰田需死吾恐张仪犀首薛公有一人相魏者也代曰梁王长主也必不相张仪张仪相必右秦而左魏犀首相必右韩而左魏薛公相必右齐而左魏梁王长主也必不便也王曰然则寡人孰相代曰莫若太子之自相太子之自相是三人者皆以太子为非常相也皆将务以其国事魏欲得

丞相玺也以魏之强而三万乘之国辅之魏必安矣故曰莫若太子之自相也遂北见梁王以此告之太子果相魏十年张仪死十一年与秦武王会应十二年太子朝於秦秦来伐我皮氏未拔而解十四年秦来归武王后十六年秦拔我蒲阪阳晋封陵【索隐纪年作晋阳封谷正义阳晋当作晋阳也史文误括地志云晋阳故城今名晋城在蒲州虞乡县西三十五里表云魏哀王十六年秦拔我杜阳晋阳即此城也封陵亦在蒲州按阳晋故城在曹州解在苏秦传也】十七年与秦会临晋秦予我蒲阪十八年与秦伐楚【集解徐广曰二十一年与齐王会于韩】二十一年与齐韩共败秦军函谷【集解徐广曰河渭絶一日】二十三年秦复予我河外及封陵为和哀王卒【索隐汲冢纪年终於哀王二十年昭王三年丧毕始称元年也】子昭王立【索隐系本昭王名遨】昭王元年秦拔我襄城二年与秦战我不利三年佐韩攻秦秦将白起败我军伊阙二十四万六年予秦河东地方四百里芒卯以诈重七年秦拔我城大小六十一八年秦昭王为西帝齐湣王为东帝月余皆复称王归帝九年秦拔我新垣曲阳之城【正义年表及括地志云曲阳故城在怀州济源县西十里新垣近曲阳未详端的所之处也】十年齐灭宋宋王死我温十二年与秦赵韩燕共伐齐败之济西湣王出亡燕独入临菑与秦王会西周【正义即王城也今河南郡城也】十三年秦拔我安城【正义括地志云安城故城豫州汝阳县东南七十一里】兵到大梁去十八年秦拔郢楚王徙陈十九年昭王卒子安厘王立【索隐系本安僖王名圉】安厘王元年秦拔我两城二年又拔我三城军大梁下韩来救予秦温以和三年秦拔我四城斩首四万四年秦破我及韩赵杀十五万人走我将芒卯魏将段干子请予秦南阳【集解徐广曰在修武】以和苏代谓魏王曰欲玺者段干子也欲地者秦也今王使欲地者制玺使欲玺者制地魏氏地不尽则不知已且夫以地事秦譬犹抱薪救火薪不尽火不灭王曰是则然也虽然事始已行不可更矣对曰王独不见夫博之所以贵梟者便则食不便则止矣今王曰事始已行不可更是何王之用智不如用梟也【正义博头有刻为梟形者掷得梟合食其子若不便则为余行也】九年秦拔我怀十年秦太子外质於魏死十一年秦拔我鄆丘【集解徐广曰鄆一作廩丘又作邢丘鄆丘今为宋公县索隐鄆七系反又音妻正义鄆七私反又音妻地理志云汝南郡新鄆县应邵曰秦伐魏取鄆丘汉兴为新鄆章帝封殷後更名宋也】秦昭王谓左右曰今时韩魏与始孰强对曰不如始强王曰今时如耳魏齐与孟尝芒卯孰贤对曰不如王曰以孟尝芒卯之贤率强韩魏以攻秦犹无奈寡人何也今以无能之如耳魏齐而率弱韩魏以伐秦其无奈寡人何亦明矣左右皆曰甚然中旗冯琴而对曰【索隐战国策作推琴春秋後语作伏琴而韩子作推瑟说苑作伏瑟五文各不同】王之料天下过矣当晋六卿之时知氏最强灭范中行又率韩魏之兵以围赵襄子於晋阳决晋水以灌晋阳之城【正义括地志云晋水源出并州晋阳县西悬壅山山海经云悬壅之山晋水出焉东南流注汾水昔赵襄子堡晋阳智氏防山以水灌之不没者三版其渎乘高西注入晋阳城以周溉灌东南出城注於汾阳也】不湛者三版知伯行水魏桓子御韩康子为参乘知伯曰吾始不知水之可以亡人之国也乃今知之汾水可以灌安邑【正义安邑在绛州夏县本魏都汾水东北历安邑西南入河也】绛水可以灌平阳【正义平阳晋州本韩都也括地志云绛水一名白水今名沸泉源出绛山飞泉奋涌扬波注县积壑二十许丈望之极为奇观矣按引此灌平阳城也】魏桓子肘韩康子韩康子履魏桓子肘足接於车上而知氏地分身死国亡为天下笑今秦兵虽强不能过知氏韩魏虽弱尚贤其在晋阳之下也此方其用肘足之时也愿王之必勿易也【索隐易音以?反】於是秦王恐齐楚相约而攻魏魏使人求救於秦冠盖相望也而秦救不至魏人有唐睢者年九十余矣谓魏王曰老臣

请西说秦王令兵先臣出魏王再拜遂约车而遣之唐睢到入见秦王秦王曰丈人芒然乃远至此甚苦矣夫魏之来求救数矣寡人知魏之急已唐睢对曰大王已知魏之急而救不发者臣窃以为用策之臣无任矣夫魏一万乘之国也然所以西面而事秦称东藩受冠带祠春秋者以秦之强足以为与也【索隐与谓许与为亲而结和也】今齐楚之兵已合於魏郊矣而秦救不发亦将赖其未急也使之大急彼且割地而约从王尚何救焉必待其急而救之是失一东藩之魏而强二敌之齐楚则王何利焉於是秦昭王遽为发兵救魏魏氏复定赵使人谓魏王曰为我杀范痤吾请献七十里之地魏王曰诺使吏捕之围而未杀痤因上屋骑危【集解危栋上也索隐骑音奇礼云中屋履危盖升屋以避兵也】谓使者曰与其以死痤市不如以生痤市有如痤死赵不予王地则王将奈何故不若与先定割地然後杀痤魏王曰善痤因上书信陵君曰痤故魏之免相也赵以地杀痤而魏王听之有如强秦亦将袭赵之欲则君且奈何信陵君言於王而出之魏王以秦救之故欲亲秦而伐韩以求故地无忌谓魏王曰秦与戎翟同俗有虎狼之心贪戾好利无信不识礼义德行苟有利焉不顾亲戚兄弟若禽兽耳此天下之所识也非有所施厚积德也故太后母也而以忧死穰侯舅也功莫大焉而竟逐之两弟无罪而再夺之国此於亲戚若此而况於仇讐之国乎今王与秦共伐韩而益近秦患臣甚惑之而王不识则不明羣臣莫以闻则不忠今韩氏以一女子奉一弱主内有大乱外交强秦魏之兵王以为不亡乎韩亡秦有郑地与大梁邻【索隐战国策亦作邻俗本或作邴非】王以为安乎王欲得故地今负强秦之亲王以为利乎秦非无事之国也韩亡之後必将更事更事必就易与利就易与利必不伐楚与赵矣是何也夫越山踰河絶韩上党而攻强赵是复阨与之事【索隐复音扶富反谓前年秦韩相攻阨与而赵奢破秦军也】秦必不为也若道河内倍邴朝歌絶漳滏水与赵兵决於邯鄲之郊是知伯之祸也秦又不敢伐楚道涉山谷【索隐道犹行也涉谷是往楚之险路从秦向楚有两道涉谷是西道河外是东道】行三千里【正义刘伯庄云秦兵向楚有两道涉谷是西道河外是东道从褒斜入梁州即东南至申州攻石城山险厄之塞也】而攻冥厄之塞【集解孙检曰楚之险塞也徐广曰或以为今江夏县正义冥音盲括地志云石城山在申州鍾山县东南二十一里魏攻冥厄即此山上有古石城水经注云或言在 指此山也吕氏春秋云九塞此其一也】所行甚远所攻甚难【索隐攻亦作致战国策见作致军言致军粮难也】秦又不为也若道河外倍大梁【正义从河外出函谷关历同州南至郑州东向陈州则背大梁也】右蔡左召陵【集解徐广曰一无左字正义上蔡县在豫州北七十里邵陵故城亦在豫州鄆城县东四十五里并在陈州西从汴州南行向陈州之西郊则上蔡邵陵在南面向东皆身之右定无左字也】与楚兵决於陈郊秦又不敢故曰秦必不伐楚与赵矣又不攻卫与齐矣【正义卫齐皆在韩赵魏之东故秦不伐也】夫韩亡之後兵出之日非魏无攻已秦固有怀茅【集解徐广曰在修武轹县有茅亭正义茅卯包反怀州武陟县西十一里故怀城本周邑後属晋左传云周与郑人苏忿生十二邑其一曰攢茅括地志云在怀州获嘉县东北二十五里也获嘉古修武也】邢丘【集解徐广曰在平臯正义括地志云平臯故城在怀州武德县东南二十里本邢丘邑也以其在河之臯地也】城埵津以临河内【索隐战国策云邢丘安城此少安字埵津在河北埵音九毁反正义埵音诡字误当作延括地志云延津故俗字名临津故城在卫州淇县西南二十六里杜预云汲郡城南有延津是也】河内共汲必危【集解徐广曰汲县属河内索隐汲亦作波波及汲皆县名俱属河内】有郑地【集解徐广曰成臯荥阳亦属郑】得垣雍【集解徐广曰垣雍城在卷县卷属魏也卷县又有长城经阳武到蜜者也正义雍於用反括地志云故城在

郑州原武县西北七里释例地名卷县理或垣城也言韩亡之後秦有郑地得垣雍城从荻泽决沟历雍灌大梁城也【决荻泽水灌大梁大梁必亡王之使者出过而恶安陵氏於秦【集解徐广曰召陵有安陵乡征羌有安陵亭正义括地志云 陵县西北十五里李奇云六国时为安陵也言魏王使者出向秦云共伐韩以成过失而更恶安陵氏於秦今伐之重非也】秦之欲诛之久矣秦叶阳昆阳与武阳邻【正义括地志云叶阳今许州叶县也昆阳故城在叶县北二十五里舞阳故城在叶县东十里此时叶阳昆阳属秦舞阳属魏也】听使者之恶之【索隐听平声使去声】随安陵氏而亡之【正义随犹听也无忌说言使者恶安陵氏亦听秦亡安陵氏然绕舞阳之北以东临许许必危矣秦有许地魏国可无害】绕舞阳之北以东临许南国必危【正义南国今许州许昌县南西四十里许昌故城是也此时属韩在魏之南故言南国括地志云周时为许国武王伐纣所封地理志云颍川许县古许国姜姓四岳之後大叔所封二十四君为楚所灭三卿背晋其地属韩】国无害已夫憎韩不爱安陵氏可也夫不患秦之不爱南国非也异日者秦在河西晋国去梁千里【集解徐广曰魏国之界千里正义河西同州也晋国都绛州魏都安邑皆在河东去大梁有千里也】有河山以阡之有周韩以间之从林乡军【集解徐广曰林乡在宛县索隐刘氏云林地名盖春秋时郑地之棐林在大梁之西北徐广云在宛县非也正义括地志云宛陵故城在郑州新郑县东北三十八里本郑旧县也按刘徐二说是其地也】以至于今秦七攻魏五入圉中【集解徐广曰一作城也索隐圉即圃田圃田郑蕞属魏战国策作国中正义括地志云圃田泽在郑州管城县东三里周礼云豫州蕞曰圃田也】边城尽拔文台堕垂都焚【集解徐广曰一云魏山都焚句阳有垂亭索隐文台台名列士传曰隐陵君施酒文台也垂地名有朝曰都并魏台邑名正义堕许规反括地志云文台在曹州冤句县西北六十五里也】林木伐麋鹿尽而国继以围又长驱梁北东至陶卫之郊【正义陶曹州定陶也卫即宋州楚丘县卫文公都之秦兵历取其郊也】北至平监【集解徐广曰平县属河南】所亡於秦者山南山北【正义山华山也华山之东南七国时邓州属韩汝州属魏华山之北同华银绥并魏地也】河外河内【正义河外谓华州以东至虢陕河内谓蒲州以东至怀卫也】大县数十【集解徐广曰一作百】名都数百【集解徐广曰一作十】秦乃在河西晋去梁千里而祸若是矣又况於使秦无韩有郑地无河山而阡之无周韩而间之去大梁百里祸必由此矣异日者从之不成也【索隐从音足松反】楚魏疑而韩不可得也今韩受兵三年秦挠之以讲识亡不听【索隐挠音苦孝反谓韩被秦之兵挠扰已经三年云欲讲说与韩和识犹知也战国策云韩知亡犹不听也】投质於赵请为天下鴈行顿刃楚赵必集兵皆识秦之欲无穷也非尽亡天下之国而臣海内必不休矣是故臣愿以从事王【索隐从足松反从事谓合从事王也战国策亦然】王速受楚赵之约赵挟韩之质【索隐言韩以质子入赵则赵挟韩质而亲韩也】以存韩而求故地韩必效之【索隐效犹致也谓致故地於赵也】此士民不劳而故地得其功多於与秦共伐韩而又与强秦邻之祸也【正义无忌令魏王速受楚赵之从赵楚挟持韩之质以存韩而魏以求地韩必效之胜於与秦伐韩又与秦邻之祸殃也】夫存韩安魏而利天下此亦王之天时已通韩上党於共甯【集解徐广曰朝歌有甯乡正义共卫州共城县甯怀州修武县本殷之甯邑韩诗外传云武王伐纣勒兵於甯故曰修武今魏开通共甯之道使韩上党得直路而行也】使道安成【正义括地志云故安城在郑州原武县东南二十里时属魏也】出入赋之是魏重质韩以其上党也今有其赋足以富国韩必德魏爱魏重魏畏魏韩必不敢反魏是韩则魏之县也魏得韩以为县卫大梁河外必安矣今不存韩二周安陵必危楚赵大破卫齐甚畏

天下西向而驰秦入朝而为臣不久矣二十年秦围邯郸信陵君无忌矫夺将军晋鄙兵以救赵【正义括地志云魏德故城一名晋鄙城在卫县西北五十里即公子无忌夺晋鄙兵地故名魏德城】赵得全无忌因留赵二十六年秦昭王卒三十年无忌归魏率五国兵攻秦败之河内走蒙骜魏太子增质於秦秦怒欲囚魏太子增或为增谓秦王曰【索隐战国策作苏秦为公子增谓秦王】公孙喜固谓魏相曰【索隐战国策作公孙衍】请以魏疾击秦秦王怒必囚增魏王又怒擊秦秦必伤今王囚增是喜之计中也故不若贵增而合魏以疑之於齐韩秦乃止增三十一年秦王政初立三十四年安厘王卒太子增立是为景湣王【索隐系本安厘王生景愍王午也】信陵君无忌卒景湣王元年秦拔我二十城以为秦东郡二年秦拔我朝歌卫徙野王【集解徐广曰卫从濮阳徙野王】三年秦拔我汲五年秦拔我垣蒲阳衍【集解徐广曰十二年献城於秦正义括地志云故垣地本魏王垣也在绛州垣县西北二十里蒲邑故城在隰州隰川县南四十五里在蒲水之北故曰蒲阳衍地名在郑州】十五年景湣王卒子王假立王假元年燕太子丹使荆轲刺秦王秦王觉之【集解徐广曰二年新郑反】三年秦灌大梁虜王假【集解駰案列女传曰秦杀假】遂灭魏以为郡县

太史公曰吾适故大梁之墟墟中人曰秦之破梁引河沟而灌大梁三月城坏王请降遂灭魏说者皆曰魏以不用信陵君故国削弱至於亡余以为不然天方令秦平海内其业未成魏虽得阿衡之佐曷益乎【索隐譙周云以予所闻所谓国之云亡者有贤者而不用也如用之何有亡哉使纣用三仁周不能王况秦虎狼乎】

【索隐述赞曰毕公之苗因国为姓大名始赏盈数自正胤裔繁昌世载忠正扬干就戮智氏奔命文始建侯武实强盛大梁东徙长安北徙卯既无功印亦外聘王假削弱虜於秦政】

史记卷四十四

史记卷四十四考证

魏世家生武子索隐代亦不同○同监本讹作周今改正

生魏侈索隐魏曼多是也○多监本讹作侈今改正与韩武子赵桓子周威王同时○【臣照】按威字下疑脱烈字

筑雒陰合阳○六国年表雒陰作雒阳纪年作汾陰文侯受子夏经艺客段干木○六国年表在十八年此入二十五年

今所置非成则璜○说苑臣术篇作季成子翟触又作公孙季成翟黄韩诗外传亦作翟黄

居视其所亲富视其所与达视其所举穷视其所不为贫视其所不取○说苑臣术篇作贵视其所举富视其所与贫视其所不取穷视其所不为

臣进屈侯鮒○说苑鮒作附

齐伐取我襄陵○六国年表襄陵作襄阳

公子朔为乱○赵世家六国年表俱作公子朝

战於浊泽○赵世家及年表俱作涿泽

二年魏败韩于马陵败赵于怀○六国年表败怀是元年事败马陵是二年事

虜我将公孙痤○商君传作公叔痤

是岁惠王卒○困学纪闻曰左传後序曰古书纪年篇魏惠王三十六年改元从一年始至十六年而称惠成王卒即惠王也疑史记误分惠成之世以为後王年也朱子曰惠襄哀之年见於竹书明甚史记盖失其实邵子皇极之书乃从史记而不取竹书

五年秦败我龙贾军四万五千於雕陰围我焦曲沃予秦河西之地○秦本纪惠文君七年败龙贾八年魏纳河西地是两年事此并入一年

吾欲太子之自相也索隐太子即襄王也○【臣照】按余有丁曰战国策是哀王时事太子当是昭王索隐解误今按襄王乃哀王之父岂得谓太子即襄王乎当是昭王无疑司马贞未必误至於此乃传写之袭谬也

秦将白起败我军伊阙二十四万○【臣照】按秦纪云左更白起攻韩魏於伊阙斩首二十四万盖合韩魏之兵共斩首二十四万耳魏韩两世家各言二十四万盖失实矣

芒卯以诈重○秦藩本此下有索隐言卯以智诈见重於魏共九字

二年又拔我三城○六国年表作秦拔我两城

苏代谓魏王曰○苏代战国策作孙臣

不湛者三版○湛一本作浸

此亦王之天时已○天时国策作大时

史记卷四十四考证

卷四十五

钦定四库全书

史记卷四十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

韩世家第十五

韩之先与周同姓姓姬氏其後苗裔事晋得封於韩原【正义括地志云韩原在同州韩城县西南八里又韩城在县南十八里故古韩国也】曰韩武子【索隐按左氏传云邾晋应韩武之穆则韩是武王之子然诗称韩侯出祖则是有韩而先灭今据此文云其後裔事晋封於原曰韩武子则武子本是韩侯之後晋又封之於韩原即今之冯翊韩城是也然按系本及左传旧说皆谓韩万是曲沃桓叔之子即是晋之支庶又国语叔向谓韩宣子能修武子之德起再拜谢曰自桓叔以下嘉吾子之赐亦言桓叔是韩之祖也今以韩侯之後别有桓叔非关曲沃之桓叔如此则与太史公之意亦有违耳】武子後三世有韩厥【索隐系本云万生隸伯隸伯生定伯简简生輿輿生献子厥】从封姓为韩氏韩厥晋景公之三年晋司寇屠岸贾将作乱诛灵公之贼赵盾赵盾已死矣欲诛其子赵朔韩厥止贾贾不听厥告赵朔令亡朔曰子必能不絶赵祀死不恨矣韩厥许之及贾诛赵氏厥称疾不出程婴公孙杵臼之藏赵孤赵武也厥知之景公十一年厥与郤克将兵八百乘伐齐败齐顷公於鞍【正义音安括地志云故鞍城今俗名马鞍山在济州平陰县十里】获逢丑父於是晋作六卿而韩厥在一卿之位号为献子晋景公十七年病卜大业之不遂者为?韩厥称赵成季之功今後无祀以感景公景公问曰尚有世乎厥於是言赵武而复与故赵氏田邑续赵氏祀晋悼公之十年韩献子老献子卒子宣子代宣子徙居州【索隐宣子名起州今在河内是也正义括地志云怀州武德县本周司寇苏忿生之州邑也】晋平公十四年吴季札使晋曰晋国之政卒归於韩魏赵矣晋顷公十二年韩宣子与赵魏共分祁氏羊舌氏十县晋定公十五年宣子与赵简子侵伐范中行氏宣子卒子贞子代立贞子徙居平阳【索隐系本作平子名顷宣子子也又云景子居平阳平阳在山西宋忠曰今河东平阳县正义平阳晋州城是】贞子卒子简子代【集解徐广曰史记多无简子庄子而云贞子生康子班氏亦同索隐按系本有简子名不信庄子名庚赵系家亦有简子名不佞也】简子卒子庄子代庄子卒子康子代【索隐康子名虎】康子与赵襄子魏桓子共败知伯分其地地益大大於诸侯康子卒子武子代【索隐武子名啓章】武子二年伐郑杀其君幽公十六年武子卒子景侯立【索隐纪年及世本皆作景子名?】景侯?

元年伐郑取雍丘二年郑败我负黍六年与赵魏俱得列为诸侯九年郑围我阳翟景侯卒子列侯取立【索隐系本作武侯也】列侯三年聂政杀韩相侠累【集解徐广曰六年救鲁也索隐战国策作杀韩傀高诱曰韩傀侠累也】九年秦伐我宜阳取六邑十三年列侯卒子文侯立【索隐纪年无文侯系本无列侯】是岁魏文侯卒文侯二年伐郑取阳城伐宋到彭城执宋君七年伐齐至桑丘郑反晋九年伐齐至灵丘【正义灵丘蔚州县也此时属燕】十年文侯卒子哀侯立哀侯元年与赵魏分晋国二年灭郑因徙都郑【索隐纪年魏武侯二十一年韩灭郑哀侯入于郑二十二年晋桓公邑哀侯於郑是韩既徙都因改号曰郑故战国策谓韩惠王曰郑惠王犹魏徙大梁称梁王然也】六年韩严弑其君哀侯而子懿侯立【索隐年表懿侯作庄侯又纪年云晋桓公邑哀侯于郑韩山坚贼其君哀侯而韩若山立若山即懿侯也则韩严为韩山坚也战国策又有严仲子名遂又恐是韩严】懿侯二年魏败我马陵【正义在魏州元城县东南一里】五年与魏惠王会宅阳【正义在郑州也】九年魏败我浚【集解徐广曰大雨三月也正义浚古外反在绛州浚水之上也】十二年懿侯卒子昭侯立昭侯元年秦败我西山二年宋取我黄池【集解徐广曰在平丘】魏取朱六年伐东周【正义河南巩县】取陵观邢丘八年申不害相韩修术行道国内以治诸侯不来侵伐十年韩姬弑其君悼公【索隐姬亦作圮并音羊之反姬是韩大夫而王邵亦云不知悼公何君也】十一年昭侯如秦二十二年申不害死二十四年秦来拔我宜阳二十五年旱作高门屈宜臼【集解许慎曰屈宜臼楚大夫在魏也】曰昭侯不出此门何也不时吾所谓时者非时日也人固有利不利时昭侯尝利矣不作高门往年秦拔宜阳今年旱昭侯不以此时恤民之急而顾益奢侈此谓时绌举嬴【集解徐广曰时衰耗而作奢侈】二十六年高门成昭侯卒果不出此门子宣惠王立【索隐纪年郑昭侯武薨次威侯立威侯七年与邯鄲围襄陵五月梁惠王会威侯于巫沙十月郑宣王朝梁不见威侯之卒下败韩举在威侯八年而此系家即以为宣惠王之年又上有杀悼公悼公又不知是谁之諡则韩微小国史失代系故此文及系本不同今亦不可考也】宣惠王五年张仪相秦八年魏败我将韩举【索隐按此则举是韩将不疑而纪年云韩举赵将盖举本赵将後入韩又纪年云其败当韩威王八年是不同也】十一年君号为王与赵会区鼠十四年秦伐败我鄢【集解徐广曰颍川鄢陵县音於乾反正义今许州鄢陵县西北十五里有鄢陵故城是也】十六年秦败我修鱼虏得韩将?申差於浊泽【集解徐广曰一云鯁申差长社有浊泽索隐修鱼地名?申差二将名?音瘦亦作鯁正义按浊泽者盖误当作观泽年表云秦惠文王更元八年与韩战斩首八万韩宣惠王十六年秦败我修鱼得将军申差魏哀王二年齐败我观泽赵武灵王九年与韩魏击秦齐湣王七年败魏世家二浊泽定误矣徐广又云浊泽在长社不晓错误之甚括地志云观泽在魏州顿丘县东十八里】韩氏急公仲谓韩王曰【索隐公仲韩相国名侈】与国非可恃也今秦之欲伐楚久矣王不如因张仪为和於秦赂以一名都具甲与之南伐楚此以一易二之计也【索隐一谓名都也二谓使不伐韩而又与之伐楚也】韩王曰善乃警公仲之行【索隐警戒也战国策作傲亦同】将西购於秦【索隐战国策作讲讲亦谋议与购求意通】楚王闻之大恐召陈轸告之陈轸曰秦之欲伐楚久矣今又得韩之名都一而具甲秦韩并兵而伐楚此秦所祷祀而求也今已得之矣楚国必伐矣王听臣为之警四境之内起师言救韩命战车满道路发信臣多其车重其币使信王之救已也纵韩不能听我韩必德王也【索隐言韩王信楚之救虽不能听待楚救至折入於秦犹德於楚也】必不为鴈行以来【索隐言韩以楚必救已己虽随秦来战犹德於王故不为鴈行而来言不同心旅进也】是秦韩不和也兵虽至楚不大病也能为

听我絶和於秦秦必大怒以厚怨韩韩之南交楚必轻秦轻秦其应秦必不敬是因秦韩之兵而免楚国之患也楚王曰善乃警四境之内兴师言救韩命战车满道路发信臣多其车重其币谓韩王曰不谷国虽小已悉发之矣愿大国遂肆志於秦不谷将以楚徇韩【索隐徇从死也言以死助韩】韩王闻之大说乃止公仲之行【索隐止不令西之秦】公仲曰不可夫以实伐我者秦也以虚名救我者楚也王恃楚之虚名而轻絶强秦之敌王必为天下大笑且楚韩非兄弟之国也又非素约而谋伐秦也已有伐形因发兵言救韩此必陈轸之谋也且王已使人报於秦矣今不行是欺秦也夫轻欺强秦而信楚之谋臣恐王必悔之韩王不听遂絶於秦秦因大怒益甲伐韩大战楚救不至韩十九年大破我岸门【集解徐广曰颍阴有岸亭正义括地志云岸门在许州长社县西北十八里今名西武亭矣】太子仓质於秦以和二十一年【集解徐广曰周赧王之三年也】与秦共攻楚【集解徐广曰围景座也】败楚将屈丐斩首八万於丹阳【索隐故楚都在今均州也正义左传例云楚居丹阳今枝江县故城是也】是岁宣惠王卒太子仓立是为襄王【集解徐广曰一云周赧王六年韩襄哀王三年张仪死赧王九年襄哀王六年秦昭王立】襄王四年与秦武王会临晋其秋秦使甘茂攻我宜阳五年秦拔我宜阳【正义括地志云故韩城一名宜阳城在洛州福昌县东十四里韩宜阳城也】斩首六万秦武王卒六年秦复与我武遂九年秦复取我武遂十年太子婴朝秦而归【集解徐广曰与秦会临晋因至咸阳而还】十一年秦伐我取穰【正义穰人羊反邓州县也郭仲产南雍州记云楚之别邑秦初侵楚封公子悝为穰侯後属韩秦昭王取之也】与秦伐楚败楚将唐昧十二年太子婴死公子咎公子虬虱争为太子时虬虱质於楚苏代谓韩咎曰虬虱亡在楚楚王欲内之甚今楚兵十余万在方城之外【索隐方城楚之北境之外谓北境之地也正义括地志云方城山在许州叶县西南十八里左传云楚大夫屈完对齐桓公曰楚国方城以为城杜预曰方城山在南阳叶县南】公何不令楚王筑万室之都雍氏之旁【集解徐广曰在阳翟正义括地志云故雍氏城在洛州阳翟县二十五里故老云黄帝臣雍父作杵臼也】韩必起兵以救之公必将矣公因以韩楚之兵奉虬虱而内之其听公必矣必以楚韩封公也韩咎从其计楚围雍氏【集解徐广曰秦本纪惠王後元十三年周赧王三年楚怀王十七年齐湣王十二年皆云楚围雍氏纪年於此亦说楚景翠围雍氏韩宣王卒秦助韩共败楚屈丐又云齐宋围煮枣皆与史记年表及田完世家符同然则此卷所云襄王十二年韩咎从其计以上是楚後围雍氏赧王之十五年事也又说楚围雍氏以下是楚前围雍氏赧王之三年事】韩求救於秦秦未爲发使公孙昧入韩公仲曰子以秦为且救韩乎对曰秦王之言曰请道南郑蓝田【正义南郑梁州县蓝田雍州县秦王言或出雍州西南至郑或出雍州东南历蓝田出峽关俱绕楚北境以待韩使而东救雍氏如此迟缓近不合於楚矣】出兵於楚以待公殆不合矣【索隐殆不合於南郑】公仲曰子以为果乎对曰秦王必祖张仪之故智【集解徐广曰祖者宗之习之谓也故智谓前时计谋也】楚威王攻梁也张仪谓秦王曰与楚攻魏魏折而入於楚韩固其为国也是孤秦也不如出兵以到之【索隐到欺也犹俗云张到然战国策作劲劲强也】魏楚大战秦取西河之外以归今其状阳言与韩其实陰善楚公待秦而到必轻与楚战楚陰得秦之不用也必易与公相支也【索隐言楚陰知秦不为公用亦必易与公相支拒也】公战而胜楚遂与公乘楚施三川而归【正义施犹设也三川周天子都也言韩战胜楚则秦与韩驾御于楚即於天子之都张设救韩之功行霸王之迹加威诸侯乃归咸阳是也】公战不胜楚楚塞三川守之【正义楚乃塞南河四关守之韩不能救三川】公不能救也窃为公患之司马庚【集解徐广曰一作唐】三反於郢甘茂与昭鱼【

集解徐广曰楚相国索隐战国策谓之昭献也】遇於商於其言收玺实类有约也【索隐刘氏云诈言昭鱼来秦欲得秦官之印玺收即取之义也】公仲恐曰然则奈何曰公必先韩而後秦先身而後张仪公不如亟以国合於齐楚【正义先以身存韩之计而後知张仪为秦到魏之计不如急以国合於齐楚】齐楚必委国於公公之所恶者张仪也其实犹不无秦也【正义恶乌故反公孙昧言公仲所恶者张仪到魏之计虽以国合於齐楚其实犹不轻欺无秦也】於是楚解雍氏围【集解徐广曰甘茂传曰楚怀王以兵围韩雍氏韩使公仲告急於秦秦昭王新立不肯救甘茂为韩言之乃下师於殽以救韩也又云周赧王十五年韩襄王十二年秦击楚斩首二万败楚襄城杀景缺周本纪赧王八年之後云楚围雍氏此当韩襄王十二年魏哀王十九年纪年於此亦说楚入雍氏楚人败然其时张仪已死十年矣正义自此已上十二年并是楚後围雍氏赧王之十五年一段事也前注徐广云楚围雍氏之下是楚前围雍氏赧王三年事徐说非也徐见下文云先身而後张仪及公之所恶者张仪也言张仪尚存楚又两度围雍氏故生此前後之见甚误也然是公孙昧却述张仪时事说韩相公仲耳】苏代又谓秦太后弟芊戎【索隐芊姓戎名秦宣太后弟号新城君】曰公叔伯婴恐秦楚之内虬虱也【索隐战国策公叔伯婴与虬虱及公子咎并是襄王子然伯婴即太子婴前死故咎与虬虱又争立此取战国策说伯婴未立之先亦与虬虱争立故事重而文倒也】公何不为韩求质於楚【索隐令韩求楚更以别人为质以替虬虱也正义为于伪反下同】楚王听入质子於韩【索隐质子虬虱也正义苏代令芊戎为韩求虬虱入於韩楚不听当云楚王不听入质子於韩承前脱不字耳】则公叔伯婴知秦楚之不以虬虱为事必以韩合於秦楚秦楚挟韩以窘魏魏氏不敢合於齐是齐孤也公又为秦求质子於楚【索隐令芊戎教秦於楚索韩所送质子令入之於秦也】楚不听怨结於韩韩挟齐魏以围楚楚必重公【正义言韩合齐魏以围楚楚必尊重芊戎以求秦救矣】公挟秦楚之重以积德於韩公叔伯婴必以国待公於是虬虱竟不得归韩【正义自此已前苏代数计皆不成故韩竟立咎为太子也】韩立咎为太子齐魏王来【正义苏代为韩立计故得齐魏王来】十四年与齐魏王共击秦至函谷而军焉十六年秦与我河外及武遂襄王卒太子咎立是为厘王厘王三年使公孙喜率周魏攻秦秦败我二十四万虜喜伊阙五年秦拔我宛【正义宛於元反宛邓州县也时属韩也】六年与秦武遂地二百里【正义此武遂及上武遂皆宜阳近地】十年秦败我师於夏山十二年与秦昭王会西周而佐秦攻齐齐败湣王出亡十四年与秦会两周间二十一年使暴?【正义音捐韩将姓名】救魏为秦所败?走开封二十三年赵魏攻我华阳【正义司马彪云华阳山名在密县郑州管城县南四十里】韩告急於秦秦不救韩相国谓陈筮【集解徐广曰一作筮索隐战国策作田茶】曰事急愿公虽病为一宿之行陈筮见穰侯穰侯曰事急乎故使公来陈筮曰未急也穰侯怒曰是可以为公之主使乎夫冠盖相望告敝邑甚急公来言未急何也陈筮曰彼韩急则将变而他从以未急故复来尔穰侯曰君无见王请令发兵救韩八日而至败赵魏於华阳之下是岁厘王卒子桓惠王立桓惠王元年伐燕九年秦拔我陘城汾旁【正义陘音刑秦拔陘城於汾水之旁陘故城在绛州曲沃县西北二十里汾水之旁也】十年秦擊我於太行【正义太行山在怀州河内县北二十五里也】我上党郡守以上党郡降赵十四年秦拔赵上党【正义韩上党也从太行山西北泽潞等州是也】杀马服子卒四十余万於长平十七年秦拔我阳城负黍【正义古今地名云负黍在洛州阳城西三十七里也】二十二年秦昭王卒二十四年秦拔我城皐荥阳二十六年秦悉拔我上党二十九年秦拔我十三城三十四年桓惠王卒子王安立王安五年秦攻韩韩急使韩非使秦秦留非因

杀之九年秦虜王安尽入其地为颍川郡韩遂亡【正义亡在秦始皇帝十七年】

太史公曰韩厥之感晋景公绍赵孤之子武以成程婴公孙杵臼之义此天下之阴德也韩氏之功於晋未覩其大者也然与赵魏终为诸侯十余世宜乎哉

【索隐述赞曰韩氏之先实宗周武事微国小春秋无语後裔事晋韩原是处赵孤克立智伯可取既徙平阳又侵负黍景赵据侯惠文僭主秦败修鱼魏会区鼠韩非虽使不禁狼虎】

史记卷四十五

史记卷四十五考证

韩世家曰韩武子索隐国语叔向谓韩宣子能修武子之德○【臣照】按传称叔向谓宣子有栾武子之贫以为能其德矣其云修武子之德者自谓栾怀子耳索隐误

武子後三世有韩厥索隐系本云万生赅伯赅伯生定伯简简生輿輿生献子厥○考左传正义引世本云桓叔生子万万生求伯求伯生子輿子輿生献子厥与此所引不同

韩严弑其君哀侯而子懿侯立○吴师道战国策补注曰策曰东孟之会韩王及相皆在焉聂政刺韩傀兼中哀侯又曰聂政刺相兼中哀侯许异斃哀侯而殪之是故哀侯为君而许异终身相焉夫哀侯既弑其子懿侯即立许异将谁相哉此乃烈侯三年之事但战国策误以为哀侯耳又威烈王五年韩严遂弑哀侯解者引正义云纪年晋桓公邑哀侯於郑韩山坚贼其君哀侯而立韩君山山坚即韩严也君山即懿侯也愚按此事国策误合二事为一司马迁两存而不决故温公与刘道原书苏氏古史皆疑之史记年表世家两书韩严是聂政之事乃严遂而弑哀侯者乃韩严通监书严遂弑哀侯网目书严遂下注哀侯以韩廙为相而忧韩遂二人相害遂刺廙於朝并中哀侯亦仍误也

韩姬弑其君悼公索隐王邵亦云不知悼公何君也○徐孚远曰盖以昭侯首尾二十六年中间特云杀悼公故曰不知悼公何君也盖史误

十一年君号为王○案楚世家及六国年表韩君称王在楚怀之六年是年於韩为十年此作十一年

公子虬虱○战国策作几瑟

请道南郑蓝田出兵於楚以待公殆不合矣○国策云请道于南郑蓝田以入攻楚出兵于三川以待公殆不合兵於南郑矣

司马庚三反於郢集解徐广曰一作唐○战国策作司马康

史记卷四十五考证

<史部,正史类,史记>

卷四十六

钦定四库全书

史记卷四十六

汉太史令司马迁撰

宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

田敬仲完世家第十六

陈完者陈厉公佗之子也【索隐佗音徒何反此系家以佗为厉公而左传厉公名跃陈系家又有利公跃利即厉也是厉公名跃非名佗也盖佗是厉公之兄立未踰年无諡今此云厉公佗非也佗一名五父故经云蔡人杀陈佗传又云蔡人杀五父是也】完生周太史过陈陈厉公使卜完卦得观之否是为观国之光利用宾于王此其代陈有国乎不在此而在异国乎非此其身也在其子孙若在异国必姜姓姜姓四岳之後【集解杜预云姜姓之先为尧四岳也】物莫能两大陈衰此其昌乎【正义陈湣公周敬王四十一年为楚惠王所灭齐简公周敬王三十九年被田常所杀】厉公者陈文公少子也其母蔡女文公卒厉公兄鲍立是为桓公桓公与佗异母及桓公病蔡人为佗杀桓公鲍及太子免而立佗为厉公厉公既立娶蔡女蔡女淫於蔡人数归厉公亦数如蔡桓公之少子林怨厉公杀其父与兄乃令蔡人诱厉公而杀之林自立是为庄公故陈完不得立为陈大夫厉公之杀以淫出国故春秋曰蔡人杀陈佗罪之也庄公卒立弟杵臼是为宣公宣公十一年杀其太子御寇御寇与完相爱恐祸及已完故奔齐齐桓公欲使为卿辞曰羁旅之臣幸得免负担君之惠也不敢当高位桓公使为工正【正义工巧之长若将作大匠】齐懿仲欲妻完卜之占曰是谓凤皇于蜚和鸣锵锵有妣之後将育于姜五世其昌竝於正卿八世之後莫之与京卒妻完完之奔齐齐桓公立十四年矣完卒諡为敬仲仲生穉孟夷【索隐系本作夷孟思盖穉是名孟夷字也】敬仲之如齐以陈字为田氏【集解徐广曰应劭云始食采地由是改姓田氏索隐据史此文敬仲奔齐以陈田二字声相近遂为田氏正义按敬仲既奔齐不欲称本故国号故改陈字为田氏】田穉孟夷生湣孟庄【集解徐广曰一作芷索隐系本作閔孟克芷昌改反】田湣孟庄生文子须无田文子事齐庄公晋之大夫栾逞作乱於晋来奔齐【索隐逞音盈史记多作逞字】齐庄公厚客之晏婴与田文子谏庄公弗听文子卒生桓子无宇田桓子无宇有力事齐庄公甚有宠无宇卒生武子开与厘子【正义厘音僖】乞田厘子乞事齐景公爲大夫其收赋税於民以小斗

受之其粟予民以大斗行阴德於民而景公弗禁由此田氏得齐衆心宗族益强民思田氏晏子数谏景公景公弗听已而使於晋与叔向私语曰齐国之政其卒归於田氏矣晏婴卒後范中行氏反晋晋攻之急范中行请粟於齐田乞欲为乱树党於诸侯乃说景公曰范中行数有德於齐齐不可不救齐使田乞救之而输之粟景公太子死後有宠姬曰芮子生子荼【集解徐广曰一作粥子索隐荼音舒又如字】景公病命其相国惠子与高昭子以子荼为太子【索隐惠子名夏昭子名张】景公卒两相高国立荼是为晏孺子而田乞不说欲立景公佗子阳生阳生素与乞欢晏孺子之立也阳生奔鲁田乞伪事高昭子国惠子者每朝代参乘言曰始诸大夫不欲立孺子孺子既立君相之大夫皆自危谋作乱又给大夫曰高昭子可畏也及未发先之诸大夫从之田乞鲍牧与大夫以兵入公室攻高昭子昭子闻之与国惠子救公公师败田乞之衆追国惠子惠子奔莒遂反杀高昭子晏孺子奔鲁田乞使人之鲁迎阳生阳生至齐匿田乞家请诸大夫曰常之母有鱼菽之祭幸而来会饮会饮田氏田乞盛阳生橐中【索隐橐音托橐中谓皮橐之中】置坐中央发橐出阳生日此乃齐君矣大夫皆伏谒将盟立之田乞诬曰吾与鲍牧谋共立阳生也鲍牧怒曰大夫忘景公之命乎诸大夫欲悔阳生乃顿首曰可则立之不可则已鲍牧恐祸及已乃复曰皆景公之子何为不可遂立阳生於田乞之家是为悼公乃使人迁晏孺子於骀【正义音台又音台贾逵云齐地也】而杀孺子荼悼公既立田乞为相专齐政四年田乞卒子常代立是为田成子鲍牧与齐悼公有郈弑悼公齐人共立其子壬是为简公田常成子与监止【集解駟案监一作闕索隐监如字又苦滥反监姓止名】俱为左右相相简公田常心害监止监止幸於简公权弗能去於是田常复修厘子之政以大斗出贷以小斗收齐人歌之曰姬乎采芑归乎田成子【索隐言姬之采芑菜皆归入于田成子以刺齐国之政将归陈氏也】齐大夫朝御鞅谏简公【索隐御官也鞅名也亦田氏之族】曰田监不可竝也君其择焉君弗听子我者监止之宗人也【索隐齐系家云子我夕贾逵云即监止也寻其文意当是监止今云宗人太史误尔】常与田氏有郈田氏疏族田豹事子我有宠子我曰吾欲尽灭田氏适以豹代田氏宗豹曰臣於田氏疏矣不听已而豹谓田氏曰子我将诛田氏田氏弗先祸及矣子我舍公宫田常兄弟四人乘如公宫欲杀子我子我闭门简公与妇人饮檀台【正义在青州临淄县东北一里】将欲擊田常太史子余曰田常非敢为乱将除害简公乃止田常出闻简公怒恐诛将出亡田子行曰需事之贼也【索隐需音须需者疑也疑必致难故云事之贼也】田常於是擊子我子我率其徒攻田氏不胜出亡田氏之徒追杀子我及监止简公出奔田氏之徒追执简公於徐州【索隐徐音舒徐州齐邑薛县是也非九州之徐正义齐之西北界上地名在渤海郡东平县也】简公曰蚤从御鞅之言不及此难田氏之徒恐简公复立而诛已遂杀简公简公立四年而杀於是田常立简公弟骈是为平公平公即位田常为相田常既杀简公惧诸侯共诛已乃尽归鲁卫侵地西约晋韩魏赵氏南通吴越之使修功行赏亲於百姓以故齐复定田常言於齐平公曰德施人之所欲君其行之刑罚人之所恶臣请行之行之五年齐国之政皆归田常田常於是尽诛鲍晏监止及公族之强者而割齐自安平以东【集解徐广曰安平在北海索隐司马彪郡国志北海东安平六国时曰安平徐广说是正义括地志云安平城在青州临淄县东十九里古纪国之邑青州即北海郡也】至琅邪【正义琅邪沂州也从安平已东莱登沂密等州皆自为田常封邑也】自为封邑封邑大於平公之所食田常乃选齐国中女子长七尺以上为後宫後宫以百数而使宾客舍人出入後宫者不禁及田常卒有七十余男【索隐鲍昱云陈成子有数十妇生男百余人与此亦异然譙允南按春秋陈恒为人虽志大负杀君之名至於行事亦

修整故能自保非苟为禽兽之行夫成事在奸虽子七十祗以长乱事岂然哉言其非实也】田常卒子襄子盘代立【集解徐广曰盘一作墜索隐墜音许既反系本作班】相齐常谥为成子田襄子既相齐宣公三晋杀知伯【集解徐广曰宣公之三年时也】分其地襄子使其兄弟宗人尽为齐都邑大夫与三晋通使且以有齐国襄子卒子庄子白立【索隐系本名伯】田庄子相齐宣公宣公四十三年伐晋毁黄城围阳【正义括地志云故黄城在魏州冠氏县南十里阳狐郭在魏州元城县东北三十二里也】明年伐鲁葛及安陵【正义括地志云故鲁城在许昌县南四十里本鲁朝宿邑长葛故城在许州长葛县北十二里郑之葛邑也陵故城在许州陵县西北十五里李奇云六国时为安陵也】明年取鲁之一城庄子卒子太公和立【索隐纪年齐宣公十五年田庄子卒明年立田悼子悼子卒乃次立田和是庄子後有悼子盖立年无几所以作系本及史记者不得録也而庄周及鬼谷子亦云田成子杀齐君十二代而有齐国今据系本系家自成子至王建之灭祗十代若如纪年则悼子及侯剡即有十二代与庄子鬼谷说同明纪年亦非妄说也】田太公相齐宣公宣公四十八年取鲁之郕【正义音城括地志云故郕城在兖州泗水县西北五十里说文云郕鲁孟邑是也】明年宣公与郑人会西城伐卫取母丘【索隐母音贯古国名卫之邑今作母者字残缺耳正义括地志云故贯城即古贯国故贯今名蒙泽城在曹州济阴县南五十六里也】宣公五十一年卒田会自廩丘反【索隐纪年宣公五十一年公孙会以廩丘叛於赵十二月宣公薨於周正为明年二月】宣公卒子康公贷立【集解徐广曰十一年伐鲁取最索隐贷音土代反最音祖外反】贷立十四年淫於酒妇人不听政太公乃迁康公於海上食一城以奉其先祀明年鲁败齐平陆【集解徐广曰东平平陆正义兖州县也】三年太公与魏文侯会浊泽【集解徐广曰康公之十六年索隐徐广盖依年表为说而不省此上文贷立十四年又云明年会平陆又三年会浊泽是十八年表及此注并误】求为诸侯魏文侯乃使使言周天子及诸侯请立齐相田和为诸侯周天子许之康公之十九年田和立为齐侯列於周室纪元年齐侯太公和立二年和卒【集解徐广曰伐鲁破之】子桓公午立【索隐纪年齐康公五年田侯午生二十二年田侯剡立後十年齐田午弑其君及孺子喜而为公春秋後传亦云田午弑田侯及其孺子喜而兼齐是为桓侯与此系家不同也】桓公午五年秦魏攻韩韩求救於齐齐桓公召大臣而谋【索隐大臣谓驺忌段干朋如战国策威王二十六年邯郸之役有此谋臣尔又南梁之难在宣王二年有驺子田忌孙臃之谋战国策又有张丑其词前後交互是记者所取各异故不同也】曰蚤救之孰与晚救之驺忌曰不若勿救段干朋曰【索隐段干姓朋名也战国策作段干纶】不救则韩且折而入於魏不若救之田臣思曰【索隐战国策作田期思纪年谓之徐州子期盖即田忌也】过矣君之谋也秦魏攻韩楚赵必救之是天以燕予齐也桓公曰善乃陰告韩使者而遣之韩自以为得齐之救因与秦魏战楚赵闻之果起兵而救之齐因起兵袭燕国取桑丘【正义括地志云桑丘故城俗名敬城在易州遂城县尔时齐伐燕桑丘魏赵来救之魏赵世家竝云伐齐至桑丘皆是易州】六年救卫桓公卒【索隐纪年梁惠王十三年当齐桓公十八年後威王始见则桓公十九年而卒与此不同】子威王因齐立是岁故齐康公卒絶无後奉邑皆入田氏齐威王元年三晋因齐丧来伐我灵丘【正义灵丘河东蔚州县案灵丘此时属齐三晋因丧伐之韩魏赵世家云伐齐至灵丘皆是蔚州】三年三晋灭晋後而分其地六年鲁伐我入阳关【集解徐广曰在钜平正义括地志云鲁阳关故城在兖州博城县南二十九里西临汶水也】晋伐我至博陵【正义在济州西界也】七年卫伐我取薛陵九年赵伐我取甄威王初即位以来不治委政卿大夫九年之间诸侯竝伐国

人不治於是威王召即墨大夫而语之曰自子之居即墨也【正义莱州胶水县南六十里即墨故城是也】毁言日至然吾使人视即墨田野辟民人给官无留事东方以寧是子不事吾左右以求誉也封之万家召阿大夫语曰自子之守阿誉言日闻然使使视阿田野不辟民贫苦昔日赵攻甄【正义音绢即濮州甄城县北合在即墨字上也】子弗能救卫取薛陵子弗知是子以币厚吾左右以求誉也是日烹阿大夫及左右尝誉者皆并烹之遂起兵西击赵卫败魏於浊泽而围惠王惠王请献观以和解赵人归我长城於是齐国震惧人人不敢饰非务尽其诚齐国大治诸侯闻之莫敢致兵於齐二十余年驺忌子以鼓琴见威王威王说而舍之右室须臾王鼓琴驺忌子推户入曰善哉鼓琴王勃然不说去琴按劒曰夫子见容未察何以知其善也驺忌子曰夫大弦浊以春温者君也小弦廉折以清者相也【集解琴操曰大弦者君也寬和而温小弦者臣也清廉而不乱索隐春秋後语温字作春春气温义亦相通蔡邕曰凡絃以缓急为清浊琴紧其弦则清缓其弦则浊清浊者言琴之声也】攫之深【集解徐广曰以爪持也攫音已足反】醅之愉者【集解徐广曰一作舒索隐醅音释与下文舍字并同愉音舒】政令也钩谐以鸣大小相益回邪而不相害者四时也吾是以知其善也王曰善语音驺忌子曰何独语音夫治国家而弭人民皆在其中王又勃然不说曰若夫语五音之纪信未有如夫子者也若夫治国家而弭人民又何为乎丝桐之间驺忌子曰夫大弦浊以春温者君也小弦廉折以清者相也攫之深而醅之愉者政令也钩谐以鸣大小相益回邪而不相害者四时也夫复而不乱者所以治昌也连而径者所以存亡也故曰琴音调而天下治夫治国家而弭人民者无若乎五音者王曰善驺忌子见三月而受相印淳于髡见之曰善说哉髡有愚志愿陈诸前驺忌子曰谨受教淳于髡曰得全全昌失全全亡【索隐得全谓人臣事君之礼全具无失故云得全也全昌者谓若无失则身名获昌故云全昌也】驺忌子曰谨受令请谨毋离前【索隐谓佩服此言常无离君故曰谨毋离前】淳于髡曰猋膏棘轴所以为滑也然而不能运方穿【索隐猋膏猪脂也棘轴以棘木为车轮至滑而坚也然而穿孔若方则不能运转言逆理反经也故下忌曰请谨事左右言每事须顺从也】驺忌子曰谨受令请谨事左右淳于髡曰弓胶昔干【集解徐广曰一作乾】所以为合也然而不能傅合疏罅【索隐干音孤悍反昔久旧也干弓干也考工记作析干则析昔音相近言作弓之法以胶被昔干而纳诸槃中是犹以势令人合也傅音附罅音呼嫁反以言胶干可以势暂合而久亦不能常傅合於疎罅隙缝以言人臣自宜弥缝得所岂待拘以礼制法式者故下云请自附於万民也】驺忌子曰谨受令请谨自附於万民淳于髡曰裘虽弊不可补以黄狗之皮驺忌子曰谨受令请谨择君子毋杂小人其间淳于髡曰大车不较不能载其常任琴瑟不较不能成其五音【索隐较者校量也言有常制若车不较则车不能载常任琴瑟不较则琴不能成五音】驺忌子曰谨受令请谨修法律而督奸吏淳于髡说毕趋出至门而面其仆曰是人者吾语之微言五其应我若响之应声是人必封不久矣【集解駟按新序曰齐稷下先生喜议政事驺忌既为齐相稷下先生淳于髡之属七十二人皆轻驺忌以为设以微辞驺忌必不能及乃相与俱往见驺忌淳于髡之徒礼踞驺忌之礼卑淳于髡等称辞驺忌知之如应响淳于髡等辞拙而去驺忌之礼踞淳于髡之礼卑故所以尚干将莫邪者贵其立断也所以尚骐驎者爲其立至也必且历日旷久则丝鼈能挈石弩马亦能致远是以聪明捷敏人之美材也】居朞年封以下邳号曰成侯威王二十三年与赵王会平陆二十四年与魏王会田於郊魏王问曰王亦有宝乎威王曰无有【索隐韩婴诗外传以为齐宣王其说不同所以异也】梁王曰若寡人国小也尚有径寸之珠照车前後各十二乘者十枚奈何以万乘之国而无宝乎威王曰寡人之

所以为宝与王异吾臣有檀子者【索隐檀子齐臣檀姓子男子美称大夫皆称子盼子田盼也黔夫及种首皆臣名事悉具战国策】使守南城则楚人不敢为寇东取泗上十二诸侯皆来朝【索隐邾莒宋鲁之比】吾臣有盼子者使守高唐则赵人不敢东渔於河吾吏有黔夫者使守徐州则燕人祭北门赵人祭西门【集解贾逵曰齐之北门西门也言燕赵之人畏见侵伐故祭以求福】徙而从者七千余家吾臣有种首者使备盗贼则道不拾遗将以照千里岂特十二乘哉梁惠王慙不怩而去二十六年魏惠王围邯鄲赵求救於齐齐威王召大臣而谋曰救赵孰与勿救驺忌子曰不如勿救段干朋曰不救则不义且不利威王曰何也对曰夫魏氏并邯鄲其於齐何利哉且夫救赵而军其郊是赵不伐而魏全也故不如南攻襄陵【正义襄陵故城在兖州邹县也】以弊魏邯鄲拔而乘魏之弊威王从其计其後成侯驺忌与田忌不善公孙阅谓成侯忌曰【索隐战国策作公孙阅】公何不谋伐魏田忌必将战胜有功则公之谋中也战不胜非前死则後北而命在公矣於是成侯言威王使田忌南攻襄陵十月邯鄲拔齐因起兵击魏大败之桂陵【索隐在威王二十六年正义在曹州乘氏县东北二十一里】於是齐最强於诸侯自称为王以令天下三十三年杀其大夫牟辛【集解徐广曰一作夫人索隐牟辛大夫姓字也徐广与年表并作夫人王邵按纪年云齐桓公十一年弑其君母宣王八年杀其王后然则夫人之字或如纪年之说】三十五年公孙阅又谓成侯忌曰公何不令人操十金卜於市曰我田忌之人也吾三战而三胜声威天下欲为大事亦吉乎不吉乎卜者出因令人捕为之卜者验其辞於王之所田忌闻之因遂率其徒袭攻临淄求成侯不胜而犇【索隐按战国策田忌前败魏於马陵因被购不得入齐历十年乃出犇也是时齐都临淄且孟尝列传云田忌袭齐之边邑其言爲得即与系家不同也】三十六年威王卒子宣王辟强立宣王元年秦用商鞅周致伯於秦孝公二年魏伐赵赵与韩亲共擊魏赵不利战於南梁【索隐晋太康地记曰战国谓梁为南梁者别之於大梁少梁也正义括地志云故梁在汝州西南二百步晋太康地记云战国时谓南梁者别之於大梁少梁也古蛮子邑也】宣王召田忌复故位韩氏求救於齐宣王召大臣而谋曰蚤救孰与晚救驺忌子曰不如勿救田忌曰弗救则韩且折而入於魏不如蚤救之【索隐纪年威王十四年田盼伐梁战马陵战国策云南梁之难有张田对云早救之此云邹忌者王邵云此时邹忌死已四年又齐威此时未称王故战国策谓之田侯今此以田侯为宣王又横称邹忌者盖此说皆误尔】孙子曰【索隐孙臆】夫韩魏之兵未弊而救之是吾代韩受魏之兵顾反听命於韩也且魏有破国之志韩见亡必东面而愬於齐矣吾因深结韩之亲而晚承魏之弊则可重利而得尊名也宣王曰善乃陰告韩之使者而遣之韩因恃齐五战不胜而东委国於齐齐因起兵使田忌田婴将【集解徐广曰婴一作盼】孙子爲帅救韩赵以擊魏大败之马陵【索隐在宣王二年】杀其将龐涓虏魏太子申其後三晋之王皆因田婴朝齐王於博望【正义括地志云博望故城在邓州向城县东南四十五里】而去【集解徐广曰表云三年与赵会博望伐魏】七年与魏王会平阿南【正义沛郡平阿县也】明年复会甄魏惠王卒【索隐按纪年梁惠王乃是齐湣王为东帝秦昭王为西帝时此时梁惠王改元称一年未卒也而系家及其後即爲魏襄王之年又以此文当齐宣王时实所不能详考】明年与魏襄王会徐州诸侯相王也十年楚国我徐州十一与魏伐赵赵决河水灌齐魏兵罢十八年秦惠王称王宣王喜文学游说之士自如驺衍淳于髡【正义贅聳齐之稷下先生也】田骈【正义白眠反艺文志云田骈齐人游稷下号天口駢作田子二十五篇也】接予【正义齐人艺文志云接子二篇在道家流】慎到【正义赵人战国时处士艺文志作慎子四十二篇也】环渊【正义楚人孟子传云环渊着

书上下篇也】之徒七十六人皆赐列第为上大夫不治而议论是以齐稷下学士复盛且数百千人【集解駰案刘向别录曰齐有稷门城门也谈说之士期会於稷下也索隐齐地记曰齐城西门侧系水左右有讲室趾往往存焉盖因侧系水故曰稷门古侧稷音相近尔又虞喜曰齐有稷山立馆其下以待游士亦异说也春秋传曰莒子如齐盟於稷门是也】十九年宣王卒子湣王地立【索隐系本名遂】湣王元年秦使张仪与诸侯执政会于啮桑三年封田婴於薛四年迎妇于秦七年与宋攻魏败之观泽十二年攻魏楚围雍氏【集解徐广曰在阳翟属韩】秦败屈丐苏代谓田轅曰臣愿有谒於公其为一事甚完使楚利公成为福不成亦爲福今者臣立於门客有言曰魏王谓韩冯张仪曰【集解徐广曰韩之公仲侈也】煮枣将拔【集解徐广曰在济阴宛胸】齐兵又进子来救寡人则可矣不救寡人寡人弗能拔【索隐能犹胜也言不胜其拔故听齐拔之耳】此特转辞也秦韩之兵毋东旬余则魏氏转韩从秦秦逐张仪【索隐逐谓随逐也】交臂而事齐楚此公之事成也田轅曰奈何使无东对曰韩冯之救魏之辞必不谓韩王曰冯以爲魏必曰冯将以秦韩之兵东却齐宋冯因转【集解徐广曰音专专犹并合制领之谓也索隐转音团谓握领也徐亦通】三国之兵乘屈丐之弊南割於楚故地必尽得之矣张仪救魏之辞必不谓秦王曰仪以爲魏必曰仪且以秦韩之兵东距齐宋仪将?三国之兵乘屈丐之弊【正义屈丐楚将爲秦所败今更欲乘之】南割於楚名存亡国实伐三川而归【索隐三川韩也】此王业也公令楚王与韩氏地【索隐公谓陈轅】使秦制和谓秦王曰请与韩地而王以施三川【正义施张设也言秦王与天子都张设迫胁也】韩氏之兵不用而得地於楚韩冯之东兵之辞且谓秦何曰秦兵不用而得三川伐楚韩以窘魏魏氏不敢东是孤齐也张仪之东兵之辞且谓何曰秦韩欲地而兵有案声威发於魏魏氏之欲不失齐楚者有资矣魏氏转秦韩争事齐楚楚王欲而无与地【集解徐广曰楚王欲得魏来事已而不欲与韩地也】公令秦韩之兵不用而得地有一大德也【正义苏代谓陈轅今秦韩之兵不战伐而得地陈轅於秦韩岂不有大恩德】秦韩之王劫於韩冯张仪而东兵以徇服魏公常执左券以责於秦韩【索隐券要也左不正也言我以右执其左而责之正义左券下右券上也苏代说陈轅以上券令秦韩不用兵得地而以券责秦韩却韩冯张仪以徇服魏故秦韩善陈轅而恶张仪多取矣】此其善於公而恶张子多资矣十三年秦惠王卒二十二年与秦击败楚於重丘【集解徐广曰表曰与秦擊楚使公子将大有功】二十四年秦使泾阳君质於齐二十五年归泾阳君於秦孟尝君薛文入秦即相秦文亡去二十六年【集解徐广曰孟尝君为相】齐与韩魏共攻秦至函谷军焉二十八年秦与韩河外以和兵罢二十九年赵杀其主父齐佐赵灭中山【集解徐广曰三十年田甲劫王相薛文走】三十六年王为东帝秦昭王为西帝苏代自燕来入齐见於章华东门【集解駰按左思齐都赋注曰齐小城北门也而此言东门不知爲是一门非耶正义括地志云齐城章华之东有闾门武鹿门也】齐王曰嘻善子来秦使魏冉致帝子以爲何如对曰王之间臣也卒而患之所从来微愿王受之而勿备称也秦称之天下安之王乃称之无後也且让争帝名无伤也秦称之天下恶之王因勿称以收天下此大资也且天下立两帝王以天下为尊齐乎尊秦乎王曰尊秦曰释帝天下爱齐乎爱秦乎王曰爱齐而憎秦曰两帝立约伐赵孰与伐桀宋之利【集解駰案宋世家云宋王偃诸侯皆曰桀宋也】王曰伐桀宋利对曰夫约钧然与秦为帝而天下独尊秦而轻齐释帝则天下爱齐而憎秦伐赵不如伐桀宋之利故愿王明释帝以收天下倍约宾秦无争重而王以其间举宋夫有宋卫之阳地危【集解駰案阳地濮阳之地正义按卫此时河南独有濮阳也】有济西赵之阿东国危【正义阿东阿也尔时属赵故云东国危】

有淮北楚之东国危【正义淮北徐泗也东国谓下相僮取虑也】有陶平陆梁门不开【正义陶定陶今曹州也平陆兖州县也县在大梁东界】释帝而贷之以伐桀宋之事国重而名尊燕楚所以形服天下莫敢不听此汤武之举也敬秦以为名而後使天下憎之此所谓以卑为尊者也愿王孰虑之於是齐去帝复为王秦亦去帝位三十八年伐宋秦昭王怒曰吾爱宋与爱新城阳晋【正义括地志云新城故城在宋州宋城县界阳晋故城在曹州乘氏县西北三十七里】同韩聂与吾友也而攻吾所爱何也苏代为齐谓秦王曰韩聂之攻宋所以爲王也齐强辅之以宋楚魏必恐恐必西事秦是王不烦一兵不伤一士无事而割安邑也【正义年表云秦昭王二十一年魏纳安邑及河内】此韩聂之所祷於王也秦王曰吾患齐之难知一从一衡其说何也对曰天下国令齐可知乎齐以攻宋其知事秦以万乘之国自辅不西事秦则宋治不安【索隐战国策作宋地不安】中国白头游敖之士皆积智欲离齐秦之交伏式结轶西驰者未有一人言善齐者也【索隐轶音侄轶者车辙也言车辙往还如结战国策作结】伏式结轶东驰者未有一人言善秦者也何则皆不欲齐秦之合也何晋楚之智而齐秦之愚也晋楚合必议齐秦齐秦合必图晋楚请以此决事秦王曰诺於是齐遂伐宋宋王出亡死於温【正义怀州有温城】齐南割楚之淮北西侵三晋欲以并周室为天子泗上诸侯邹鲁之君皆称臣诸侯恐惧三十九年秦来伐拔我列城九四十年燕秦楚三晋合谋各出锐师以伐败我济西【集解徐广曰案其余诸传无楚伐齐事年表云楚取淮北】王解而却燕将乐毅遂入临淄尽取齐之宝藏器潜王出亡之卫卫君辟宫舍之称臣而共具潜王不逊卫人侵之潜王去走邹鲁有?色邹鲁君弗内遂走莒楚使淖齿将兵救齐【索隐淖音女教反】因相齐潜王淖齿遂杀潜王而与燕共分齐之侵地卤器【正义卤掠齐宝器也】潜王之遇杀其子法章变名姓为莒太史敫【集解徐广曰音跃一音皎】家庸太史敫女奇法章状貌以为非恒人怜而常窃衣食之而与私通焉淖齿既以去莒莒中人及齐亡臣相聚求潜王子欲立之法章惧其诛已也久之乃敢自言我潜王子也於是莒人共立法章是为襄王以保莒城而布告齐国中王已立在莒矣襄王既立立太史氏女为王后是为君王后生子建太史敫曰女不取媒因自嫁非吾种也污吾世终身不覩君王后君王后贤不以不覩故失人子之礼襄王在莒五年田单以即墨攻破燕军迎襄王於莒入临菑齐故地尽复属齐齐封田单为安平君【正义安平城在青州临淄县东十九里古纪之鄆邑也】十四年秦击我刚寿十九年襄王卒子建立王建立六年秦攻赵齐楚救之秦计曰齐楚救赵亲则退兵不亲遂攻之赵无食请粟於齐齐不听周子曰【索隐盖齐之谋臣史失名也战国策以周子为苏秦而楚字皆作燕然此时苏秦死已久矣】不如听之以退秦兵不听则秦兵不却是秦之计中而齐楚之计过也且赵之於齐楚扞蔽也【正义此时秦伐赵上党欲克无意伐齐楚故言赵之於齐楚为扞蔽也】犹齿之有唇也唇亡则齿寒今日亡赵明日患及齐楚且救赵之务宜若奉漏瓮沃焦釜也夫救赵高义也却秦兵显名也义救亡国威却强秦之兵不务为此而务爱粟为国计者过矣齐王弗听秦破赵於长平四十余万遂围邯郸十六年秦灭周君王后卒二十三年秦置东郡二十八年王入朝秦秦王政置酒咸阳三十五年秦灭韩三十七年秦灭赵三十八年燕使荆轲刺秦王秦王觉杀轲明年秦破燕燕王亡走辽东明年秦灭魏秦兵次於历下四十二年秦灭楚明年虏代王嘉灭燕王喜四十四年秦兵击齐齐王听相后胜计不战以兵降秦秦虏王建迁之共【集解駰按地理志河内有共县正义今卫州共城县也】遂灭齐为郡天下壹并於秦秦王政立号为皇帝始君王后贤事秦谨与诸侯信齐亦东边海上秦日夜攻三晋燕楚五国各自救於秦以故王建立四十余年不受兵君王后死后胜相齐多受秦间

金多使宾客入秦秦又多予金客皆为反间劝王去从朝秦不修攻战之备不助五国攻秦秦以故得灭五国五国已亡秦兵卒入临淄民莫敢格者王建遂降迁於共故齐人怨王建不蚤与诸侯合从攻秦听奸臣宾客以亡其国歌之曰松耶栢耶住建共者客耶【集解徐广曰战国策曰秦处建於共松柏间也索隐耶音邪谓是建客邪客说建住言遂乃失策令建迁共共今在河内也】疾建用客之不详也【索隐谓不详审用客不知其善否也】

太史公曰盖孔子晚而喜易易之为术幽明远矣非通人達才孰能注意焉故周太史之卦田敬仲完占至十世之後及完犇齐懿仲卜之亦云田乞及常所以比犯二君【索隐比如字又频律反二君即悼公简公也僖子废晏孺子鲍牧以乞故杀悼公而成子又杀简公故云田氏比犯二君也】专齐国之政非必事势之渐然也盖若遵厌兆祥云

【索隐述赞曰田完避难犇于大姜始辞羈旅终焉凤皇物莫两盛代五其昌二君比犯三晋争强和始擅命威遂称王济急燕赵弟列康庄秦假东帝莒立法章王建失国松柏苍苍】

史记卷四十六

史记卷四十六考证

田敬仲完世家敬仲之如齐以陈字为田氏○顾炎武曰此亦太史公之误春秋传未有称田者至战国时始为田耳

子太公和立索隐庄周及鬼谷子亦云田成子杀齐君十二代而有齐国○徐孚远曰庄生在齐宣王时岂得逆数王建以为十二代盖总言田氏擅齐之数

驹忌曰○徐孚远曰驹忌始以鼓琴干成王不宜在桓公已与廷议且其事与下文所载亦相类

段干朋曰○此与下文救赵之事战国策皆作段干纶春秋後语作段干萌

孙子曰○战国策以为田成思之言

孙子为帅○帅一本作师

夫约钧然○【臣照】按战国策补注曰言齐秦俱相约如此一本无然字疑钧字即约字之讹而又重出耳去钧然二字文义自明

燕秦楚三晋合谋各出锐师以伐败我济西集解徐广曰按其余诸传无楚伐齐事年表云楚取淮北○【臣照】按乐毅传燕使乐毅约赵惠文王别使连楚魏令赵啗秦以伐齐之利乐毅并护赵楚韩魏燕之兵以伐齐焉得云无楚伐齐事也

疾建用客之不详也索隐谓不详审用客不知其善否也○【臣照】按古字简少详佯祥三字通为详此详字作祥解

史记卷四十六考证

卷四十七

钦定四库全书

史记卷四十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

孔子世家第十七

【索隐教化之主吾之师也为帝王之仪表示人伦之準的自子思以下代有哲人继世象贤诚可仰同列国前史既定吾无间然又孔子非有诸侯之位而亦称系家者以是圣人为教化之主又代有贤哲故亦称系家焉正义孔子无侯伯之位而称世家者太史公以孔子布衣传十余世学者宗之自天子王侯中国言六艺者宗於夫子可谓至圣故为世家】

孔子生鲁昌平乡陬邑【集解徐广曰陬音驹孔安国曰陬孔子父叔梁纥所治邑索隐陬是邑名昌平乡号孔子居鲁之陬邑昌平乡之阙里也正义括地志云故邹城在兖州泗水县东南六十里昌平山在泗水县南六十里孔子生昌平乡盖乡取山为名故阙里在泗水县南五十里輿地志云邹城西界阙里有尼邱山按今尼邱山在兖州邹城阙里即此也括地志云兖州曲阜县鲁城西南三里有阙里中有孔子宅宅中有庙伍缉之从征记云阙里背洙面泗即此也按夫子生在邹长徙曲阜仍号阙里】其先宋人也曰孔防叔【索隐家语孔子宋微子之後宋襄公生弗父何以让弟厉公弗父何生宋父周周生世子胜胜生正考父考父生孔父嘉五世亲尽别爲公族姓孔氏孔父生子木金父金父生鞅鞅夷鞅夷生防叔畏华氏之逼而奔鲁故孔氏为鲁人】防叔生伯夏伯夏生叔梁纥【正义括地志云叔梁纥庙亦名尼丘山祠在兖州泗水县五十里尼邱山东址地理志云鲁县有尼丘山有叔梁纥庙】纥与颜氏女野合而生孔子【索隐家语云梁纥娶鲁之施氏生九女其妾生孟皮孟皮病足乃求婚於颜氏徵在从父命为婚其文甚明今此云野合者盖谓梁纥老而徵在少非当壮室初之礼故云野合谓不合礼仪故论语云野由也又先进於礼乐野人也皆言野者是不合礼尔正义男八月生齿八岁毁齿二八十六阳道通八八六十四阳道絶女七月生齿七岁毁齿二七十四陰道通七七四十九陰道絶婚姻过此者皆爲野合故家语云梁纥娶鲁施氏女生九女乃求婚爲颜氏颜氏有三女小女徵在据此婚过六十四矣】祷於尼丘得孔子鲁襄公二十二年而孔子生【索隐公羊传襄公二十一年十有一月庚子孔子生今以为二十二年盖以周正十一月属明年故误也後序孔子卒云七十二岁每少一岁也】生而首上圩顶【索隐圩音乌顶

音鼎圩顶言顶上窰也故孔子顶如反宇反宇者若屋宇之反中低而四傍高也正义括地志云女陵山在曲阜县南二十八里干宝三日纪云徵在生孔子空桑之地今名空窰在鲁南山之空窰中无水当祭时洒扫以告辄有清泉自石门出足以周用祭讫泉枯今俗名女陵山】故因名曰丘云字仲尼姓孔氏丘生而叔梁纥死【索隐家语云生三岁而梁纥死】葬於防山【正义括地志云防山在兖州曲阜县东二十五里礼记云孔子母合葬於防也】防山在鲁东由是孔子疑其父墓处母讳之也【索隐谓孔子少孤不知父坟处非谓不知其营地徵在?年适於梁纥无几而老死是少寡盖以为嫌不从送葬故不知坟处遂不告尔非讳之也】孔子为儿嬉戲常陈俎豆【正义俎豆以木为之受四升高尺二寸大夫以上赤云气诸侯加象饰足天子玉饰也】设礼容孔子母死乃殡五父之衢【正义括地志云五父衢在兖州曲阜县西南二里鲁城内衢道也】盖其慎也【集解徐广曰鲁县有阙里孔子所居也又有五父之衢也索隐谓孔子不知父墓乃且殡其母於五父之衢是其谨慎也正义慎谓以紼引棺就殡所也】邠人【正义邠音邹】挽父之母诲孔子父墓然後往合葬於防焉孔子要經季氏飨士孔子与往【正义与音预季氏为饌饮鲁文学之士孔子与迎而往阳虎以孔子少故折之也】阳虎绌曰季氏飨士非敢飨子也【索隐家语孔子之母丧既练而见不非之也今此谓孔子实要經与飨为阳虎所绌亦近诬矣一作要经要经犹带经也故刘氏云嗜学之意是也】孔子由是退孔子年十七鲁大夫孟厘子病且死【索隐昭七左传云孟僖子病不能相礼乃讲学之及其将死召大夫云云按谓病者不能礼为病非疾困之谓也至二十四年僖子卒贾逵云仲尼时年三十五矣是此文误也】诫其嗣懿子曰孔丘圣人之後【集解服?曰圣人谓商汤】灭於宋【集解杜预曰孔子六世祖孔父嘉为宋华督所杀其子奔鲁也】其祖弗父何始有宋而嗣让厉公【集解杜预曰弗父何孔父嘉之高祖宋愍公之长子厉公之兄也何嫡嗣当立以让厉公也】及正考父佐戴武宣公【集解服?曰正考父弗父何之曾孙】三命兹益恭故鼎铭云【集解杜预曰三命上卿也考父庙之鼎】一命而偻再命而伋三命而俯【集解服?曰偻伋俯皆恭敬之貌也】循墙而走【集解杜预曰言不敢安行】亦莫敢余侮【集解杜预曰其恭如是人亦不敢侮慢】饔於是粥於是餼余口【集解杜预曰於是鼎中为饔粥饔粥餼属言至俭也】其恭如是吾闻圣人之後虽不当世必有達者【集解王肃曰谓若弗父何殷汤之後而不继世为宋君也杜预曰圣人之後有明德而不当大位谓正考父】今孔丘年少好礼其達者欤吾即没若必师之及厘子卒懿子与鲁人南宫敬叔往学礼焉【索隐左传及系本敬叔与懿子皆孟僖子之子不应更言鲁人亦太史公之疎尔】是岁季武子卒平子代立孔子贫且贱及长尝为季氏史【索隐有本作委吏按赵岐曰委吏主委积仓库之吏】料量平尝为司职吏而畜蕃息由是为司空已而去鲁斥乎齐逐乎宋卫困於陈蔡之间於是反鲁孔子长九尺有六寸人皆谓之长人而异之鲁复善待由是反鲁鲁南宫敬叔言鲁君曰请与孔子适周【索隐庄子云孔子年五十一南见老聃盖系家亦依此为说而不究其旨遂俱误也何者孔子适周岂访礼之时即在十七耶且孔子见老聃云甚矣道之难行也此非十七之人语也乃既仕之後言尔】鲁君与之一乘车两马一竖子俱适周问礼盖见老子云辞去而老子送之曰吾闻富贵者送人以财【索隐庄周财作轩】仁人者送人以言吾不能富贵窃仁人之号【集解王肃曰谦言窃仁人之名】送子以言曰聪明深察而近於死者好议人者也博辩广大危其身者发人之恶者也为人子者母以有己【集解王肃曰身父母之有索隐家语作无以有己为人子者】为人臣者母以有己【索隐家语作无以恶己为人臣者王肃云言聽则仕不用则去保身全行臣之节也】孔子自周反

于鲁弟子稍益进焉是时也晋平公淫六卿擅权东伐诸侯楚灵王兵强陵轹中国齐大而近於鲁鲁小弱附於楚则晋怒附於晋则楚来伐不备於齐齐师侵鲁鲁昭公之二十年而孔子盖年三十矣齐景公与晏婴来适鲁景公问孔子曰昔秦穆公國小处辟其霸何也对曰秦国虽小其志大处虽辟行中正身举五穀【正义百里奚也】爵之大夫起累继之中【索隐家语无此一句孟子以为不然之言也】与语三日授之以政以此取之虽王可也其霸小矣景公说孔子年三十五而季平子与郈昭伯以鬪鸡故【正义郈音后括地志云鬪鸡台二所相去十五步在兖州曲阜县东南三里鲁城中左传昭二十五年季氏与郈昭伯鬪鸡季氏芥鸡翼郈氏为金距之处】得罪鲁昭公昭公率师击平子平子与孟氏叔孙氏三家共攻昭公昭公师败奔於齐齐处昭公乾侯【正义相州城安县东南三十里斥邱故城本春秋时乾侯之邑】其後顷之鲁乱孔子适齐为高昭子家臣欲以通乎景公与齐太师语乐闻韶音学之三月不知肉味【集解周氏曰孔子在齐闻习韶乐之盛美故忘於肉味也索隐按论语子语鲁太师乐非齐太师也又子在齐闻韶三月不知肉味无学之文今此合论语齐鲁两文而为此言恐失事实】齐人称之景公问政孔子孔子曰君君臣臣父父子子【集解孔安国曰当此之时陈恒制齐君不君臣不臣故以此对也】景公曰善信如君不君臣不臣父不父子不子虽有粟吾岂得而食诸【集解孔安国曰言将危也陈氏果灭齐】他日又复问政於孔子孔子曰政在节财景公说将欲以尼谿田封孔子【索隐此说出晏子及墨子其文微异】晏婴进曰夫儒者滑稽而不可轨法倨傲自顺不可以为下崇丧遂哀破产厚葬不可以为俗游说乞贷不可以为国自大贤之息周室既衰礼乐缺有间【索隐息者生也言上古大贤生则有礼乐至周室微而始缺有间也】今孔子盛容饰繁登降之礼趋详之节累世不能殫其学当年不能究其礼君欲用之以移齐俗非所以先细民也後景公敬见孔子不问其礼异日景公止孔子曰奉子以季氏吾不能以季孟之间待之【集解孔安国曰鲁三卿季氏为正卿取贵孟氏为下卿不用事言待之以二者之间也索隐刘氏奉音扶用反非也今奉音如字谓奉侍孔子如鲁季氏之职故下文云以季孟之间待之也】齐大夫欲害孔子孔子闻之景公曰吾老矣弗能用也孔子遂行反乎鲁孔子年四十二鲁昭公卒於乾侯定公立定公立五年夏季平子卒桓子嗣立季桓子穿井得土缶中若羊【集解韦昭曰羊生羊也故谓之恠也索隐家语云桓子穿井於费得物如土缶其中有羊焉是也】问仲尼云得狗【集解韦昭曰获羊而言狗者以孔子博物测之】仲尼曰以丘所闻羊也丘闻之木石之恠夔罔闾【集解韦昭曰木石谓山也或云夔一足越人谓之山繇也或言独足魍魎山精好学人声而迷惑人也索隐夔音逵罔音两家语作魍魎繇音骚然山繇独一足是山神名故谓之夔夔一足兽状如人也】水之怪龙罔象【集解韦昭曰龙神兽也非常见故曰恠或云罔象食人一名沐肿索隐沐肿音木踵】土之恠坟羊【集解唐固曰坟羊雌雄未成者也】吴伐越堕会稽【集解王肃曰堕毁也索隐会稽山名越之所都隳毁也吴伐越在鲁哀元年】得骨节专车【集解韦昭曰骨一节其长专车专擅也】吴使使问仲尼骨何者取大仲尼曰禹致羣神於会稽山【集解韦昭曰羣神谓主山川之君为羣神之主故谓之神也】防风氏後至禹杀而戮之【集解韦昭曰防风氏违命後至故禹杀之陈尸为戮】其节专车此为大矣吴客曰谁为神仲尼曰山川之神足以纲纪天下其守为神【集解王肃曰守山川之祀者为神谓诸侯也韦昭曰足以纲纪天下谓名山大川能兴云致雨以利天下也】社稷为公侯【集解王肃曰但守社稷无山川之祀者直为公侯而已】皆属於王者客曰防风何守仲尼曰汪罔氏之君守封禺之山【集解韦昭曰封封山禺禺山在吴郡永安县駟案晋太康元年改永安为武康县今属吴

兴郡】为厘姓【索隐厘音僖家语云姓漆盖误系本无漆姓】在虞夏商为汪罔於周为长翟今谓之大人【集解王肃曰周之初及当孔子之时其名异也】客曰人长几何仲尼曰僬侥氏三尺短之至也【集解韦昭曰僬侥西南蛮之别名也案括地志在大秦国北也】长者不过十之数之极也【集解王肃曰十之谓三丈也数极於此也】於是吴客曰善?圣人桓子嬖臣曰仲梁怀与阳虎有隙阳虎欲逐怀公山不狃止之【集解孔安国曰不狃为季氏宰索隐狃音女九反邹氏云一作蹂论语作弗扰】其秋怀益骄阳虎执怀桓子怒阳虎因囚桓子与盟而醢之【正义醢音释】阳虎由此益轻季氏季氏亦僭於公室陪臣执国政是以鲁自大夫以下皆僭离於正道故孔子不仕退而修诗书礼乐弟子弥衆至自远方莫不受业焉定公八年公山不狃不得意於季氏因阳虎为乱欲废三桓之适【正义?音嫡】更立其庶孽阳虎素所善者遂执季桓子桓子诈之得脱定公九年阳虎不胜犇于齐是时孔子年五十公山不狃以费畔季氏使人召孔子孔子循道弥久温温无所试莫能已用曰盖周文武起丰镐而王【索隐检家语及孔氏之书并无此言故桓谭亦以为诬】今费虽小僭庶几乎欲往子路不说止孔子孔子曰夫召我者岂徒哉如用我其为东周乎【集解何晏曰兴周道於东方故曰东周也】然亦卒不行其後定公以孔子为中都宰一年四方皆则之【索隐家语作西方王肃云鲁国近东故西方诸侯皆取法则焉】由中都宰为司空由司空为大司寇定公十年春及齐平【索隐及与也平成也谓与齐和好故云平】夏齐大夫犁鉏言於景公曰鲁用孔丘其势危齐乃使使告鲁为好会会於夹谷【集解徐广曰司马彪云今在祝其县也】鲁定公且以乘车好往孔子摄相事曰臣闻有文事者必有武备有武事者必有文备古者诸侯出疆必具官以从请具左右司马定公曰诺具左右司马会齐侯夹谷为坛位土阶三等以会遇之礼相见【集解王肃曰会遇之礼礼之简略也】揖让而登献酬之礼毕齐有司趋而进曰请奏四方之乐景公曰诺於是旌旄羽祓矛戟劔拔鼓噪而至【索隐家语作莱人以兵鼓噪刼定公祓音弗谓舞者所执故周礼乐有祓舞拨音伐拨谓大楯也】孔子趋而进历阶而登【索隐历阶谓历阶级也故王肃云历阶登阶不聚足】不尽一等举袂而言曰吾两君为好会夷狄之乐何为於此请命有司有司却之不去则左右视晏子与景公景公心作麾而去之有顷齐有司趋而进曰请奏宫中之乐景公曰诺优倡侏儒为戲而前孔子趋而进历阶而登不尽一等曰匹夫而荧惑诸侯者罪当诛【索隐荧惑谓经营而惑乱也家语作荧侮】请命有司有司加法焉手足异处景公惧而动知义不若归而大恐告其羣臣曰鲁以君子之道辅其君而子独以夷狄之道教寡人使得罪於鲁君为之奈何有司进对曰君子有过则谢以质小人有过则谢以文君若悼之则谢以实於是齐侯乃归所侵鲁之郛汶阳龟陰之田以谢过【集解服?曰三田汶阳田也龟山名陰之田得其田不得其山也杜预曰太山博县北有龟山索隐左传郛讙及龟陰之田则三田皆在汶阳也正义郛今郛州郛城县在兗州龚邱县东北五十四里故谢城在龚邱县东七十里齐归侵鲁龟陰之田以谢鲁鲁筑城於此以旌孔子之功因名谢城】定公十三年夏孔子言於定公曰臣无藏甲大夫毋百雉之城【集解王肃曰高丈长丈曰堵三堵曰雉】使仲由为季氏宰将堕三都【集解服?曰三都三家之邑也】於是叔孙氏先堕郈【集解杜预曰东平无塩县东南郈乡亭正义括地志云郈亭在郛州宿城县东三十二里】季氏将堕费公山不狃叔孙辄率费人袭鲁公与三子入于季氏之宫【集解服?曰三子季孙孟孙叔孙也】登武子之台费人攻之弗克入及公侧【集解服?曰人有入及公之台侧】孔子命申句须乐颀下伐之【集解服?曰申句须乐颀鲁大夫】费人北国人追之败诸姑蔑【集解杜预曰鲁国卞县南有姑蔑城正义括地志云姑蔑故城在兗州泗

水县东四十五里按泗水县本汉卞县也】二子犇齐遂堕费将堕成【集解杜预曰泰山鉅平县东南有成城也正义括地志云故郕城在兖州泗水县西北五十里】公歛处父【集解服虔曰成宰也】谓孟孙曰堕成齐人必至于北门且成孟氏之保鄣无成是无孟氏也我将弗堕十二月公围成弗克定公十四年孔子年五十六由大司寇行摄相事有喜色门人曰闻君子祸至不惧福至不喜孔子曰有是言也不曰乐其以贵下人乎於是诛鲁大夫乱政者少正卯与闻国政三月粥羔豚者弗饰贾男女行者别於涂涂不拾遗四方之客至乎邑者不求有司【集解王肃曰有司常供其职客求而有在也】皆予之以归【索隐家语作皆如归】齐人闻而惧曰孔子为政必霸霸则吾地近焉我之为先并矣盍致地焉犁鉏曰请先尝沮之沮之而不可则致地庸迟乎於是选齐国中女子好者八十人皆衣文衣而舞康乐【索隐家语作容玃王肃云舞曲名也】文马三十驷遗鲁君陈女乐文马於鲁城南高门外季桓子微服往观再三将受乃语鲁君为周道游往观终日【索隐谓请鲁君为周徧道路游行因出观齐之女乐】怠於政事子路曰夫子可以行矣孔子曰鲁今且郊如致膾乎大夫【集解王肃曰膾祭肉】则吾犹可以止桓子卒受齐女乐三日不聽政郊又不致膾俎於大夫孔子遂行宿乎屯【集解駰案屯在鲁之南也索隐屯地名】而师已送曰夫子则非罪孔子曰吾歌可夫歌曰彼妇之口可以出走彼妇之谒可以死败【集解王肃曰言妇人之口请谒足以忧使人死败故可以出走也】盖优游维以卒岁【集解王肃曰言仕不遇也故且优游以终岁】师已反桓子曰孔子亦何言师已以实告桓子喟然叹曰夫子罪我以羣婢故也夫孔子遂适卫主於子路妻兄顔浊邹家【索隐孟子曰孔子於卫主顔讎由弥子之妻与子路之妻兄弟也今此云浊邹是子路之妻兄所说不同】卫灵公问孔子居鲁得禄几何对曰奉粟六万卫人亦致粟六万【索隐若六万石似太多当是六万斗亦与汉之秩禄不同正义六万小斗计当今二千石也周之斗升斤两皆用小也】居顷之或譖孔子於卫灵公灵公使公孙余假一出一入【索隐谓以兵仗出入以胁夫子也】孔子恐获罪焉居十月去卫将陈过匡【正义故匡城在滑州匡城县西南十里】顔刻为仆以其策指之曰昔吾入此由彼缺也【索隐谓昔所被攻缺破之处也正义琴操云孔子到匡郭外顔渊举策指匡穿垣曰往与阳货正从此入匡人闻其言告君曰往者阳货今复来乃率衆围孔子数日乃和琴而歌音曲甚哀有暴风擊军士僵仆於是匡人乃知孔子圣人自解也】匡人闻之以为鲁之阳虎阳虎尝暴匡人匡人於是遂止孔子【索隐匡宋邑也家语云匡人简子以甲士围夫子】孔子状类阳虎拘焉五日顔渊後子曰吾以汝为死矣顔渊曰子在回何敢死【集解包氏曰言夫子在已无所致死也】匡人拘孔子益急弟子惧孔子曰文王既没文不在兹乎【集解孔安国曰兹此也言文王虽已没其文见在此此自谓其身也】天之将丧斯文也後死者不得与于斯文也【集解孔安国曰文王既没故孔子自谓後死也言天将丧此文者本不当使我知之今使我知之未欲丧之也】天之未丧斯文也匡人其如予何【集解马融曰如予何犹言奈我何也天未丧此文则我当传之匡人欲奈我何言不能违天以害已】孔子使从者为甯武子臣於卫然後得去【索隐家语子路弹劒而歌孔子和之曲三终匡人解围而去今此取论语文王既没之文及从者臣甯武子然後得去盖夫子再厄匡人或设辞以解围或弹劒而释难今此合论语家语之文以为一事故彼此文交互耳】去即过蒲【集解徐广曰长垣县有匡城蒲乡正义括地志故蒲城在滑州匡城县北十五里匡城本汉长垣县】月余反乎卫主蘧伯玉家灵公夫人有南子者使人谓孔子曰四方之君子不辱欲与寡君为兄弟者必见寡小君寡小君愿见孔子辞谢不得已而见之夫人在絺帷中孔子入门北面稽首夫人自帷中再拜环佩玉

声璆然【正义璆音虬】孔子曰吾乡为弗见见之礼答焉【索隐上见如字下见去声言我不为相见之礼现而答之】子路不说孔子矢之曰予所不者天?之天?之【集解栾肇曰见南子者时不获已犹文王之拘羑里也天?之者言我之否屈乃天命所?也蔡謨曰矢陈也夫子为子路陈天命也】居卫月余灵公与夫人同车宦者雍渠参乘出使孔子为次乘招摇市过之【集解徐广曰招摇翱翔也索隐家语作游过市】孔子曰吾未见好德如好色者也【集解何晏曰疾时薄於德厚於色故发此言也李充曰使好德如好色则弃邪而反正矣】於是丑之去卫过曹是岁鲁定公卒孔子去曹适宋【集解徐广曰年表定公十三年孔子至卫十四年至陈哀公三年孔子过宋】与弟子习礼大树下宋司马桓魋?杀孔子拔其树孔子去弟子曰可以速矣孔子曰天生德於予桓魋其如予何【集解包氏曰天生德者谓授以圣性德合天地吉无不利故曰其如予何】孔子适郑与弟子相失孔子独立郭东门郑人或谓子贡曰【索隐家语姑布子卿谓子贡曰】东门有人其?似尧【索隐家语云河目而隆?其颀似尧】其项类皋陶其肩类子产然自要以下不及禹三寸累累若丧家之狗【集解王肃曰丧家之狗主人哀荒不见饮食故累然而不得意孔子生於乱世道不得行故累然不得志之貌也韩诗外传曰丧家之狗既斂而椁有席而祭顾望无人也】子贡以实告孔子孔子欣然笑曰形状未也而似丧家之狗然哉然哉孔子遂至陈主於司城贞子家岁余吴王夫差伐陈取三邑而去赵鞅伐朝歌楚围蔡蔡迁于吴吴败越王勾践会稽有隼集于陈廷而死楛矢贯之石弩矢长尺有咫【集解韦昭曰隼鸞鸟今之鸞也楛木名弩鏃也以石为之八寸曰咫楛矢贯之坠而死正义隼音笋毛诗义疏鸞齐人谓之击征或谓之题肩或曰省鴈春化为布谷此属数种皆为隼】陈湣公使使问仲尼【索隐家语国语皆作陈惠公非也按惠公以鲁昭元年立定四年卒又按系家湣公十六年孔子适陈十三年亦在陈则此湣公为是】仲尼曰隼来远矣此肃慎之矢也【正义肃慎国记云肃慎其地在夫余国东北河六十日行其弓四尺强劲弩射四百步今之靺鞨国方有此矢】昔武王克商通道九夷百蛮【集解王肃曰九夷东方夷有九种也百蛮夷狄之百种】使各以其方贿来贡【集解王肃曰各以其方面所有之财贿而来贡】使无忘职业於是肃慎贡楛矢石弩长尺有咫先王欲昭其令德以肃慎矢分大姬【集解韦昭曰大姬武王元女也】配虞胡公而封诸陈分同姓以珍玉展亲【集解韦昭曰展重也玉谓若夏后氏之璜】分异姓以远方职使无忘服【集解王肃曰使无忘服从於王也】故分陈以肃慎矢试求之故府果得之【集解韦昭曰故府旧府也】孔子居陈三岁会晋楚争强更伐陈及吴侵陈陈常被寇孔子曰归与归与吾党之小子狂简进取不忘其初於是孔子去陈过蒲会公叔氏以蒲畔蒲人止孔子弟子有公良孺者以私车五乘从孔子其为人长贤有勇力谓曰吾昔从夫子遇难於匡今又遇难於此命也已吾与夫子再罹难宁鬪而死鬪甚疾蒲人惧【索隐家语云宁我鬪死挺劒而合衆将与之战蒲人惧是也】谓孔子曰苟毋适卫吾出子与之盟出孔子东门孔子遂适卫子贡曰盟可负耶孔子曰要盟也神不聽卫灵公闻孔子来喜郊迎问曰蒲可伐乎对曰可灵公曰吾大夫以为不可今蒲卫之所以待晋楚也【正义卫在濮州蒲在滑州在卫西也韩魏及楚从西向东伐先在蒲後及卫】以卫伐之无乃不可乎孔子曰其男子有死之志【集解王肃曰公叔氏欲以蒲适他国而男子欲死之不乐适他】妇人有保西河之志【集解王肃曰妇人恐惧欲保西河无战意也索隐曰此西河在卫地非魏之西河也】吾所伐者不过四五人【集解王肃曰本与公叔同畔者】灵公曰善然不伐蒲灵公老怠於政不用孔子孔子喟然叹曰苟有用我者朞月而已三年有成【集解孔安国曰言诚有用我於政事者朞年而可以行其政教必三年乃有成】

也】孔子行佛肸为中牟宰【集解孔安国曰晋大夫赵简子之邑宰】赵简子攻范中行伐中牟【索隐此河北之中牟盖在汉阳西】佛肸畔使人召孔子孔子欲往子路曰由闻诸夫子其身亲为不善者君子不入也【集解孔安国曰不入其国】今佛肸亲以中牟畔子欲往如之何孔子曰有是言也不曰坚乎磨而不磷不曰白乎涅而不淄【集解孔安国曰磷薄也涅可以染皂者也言至坚者磨之而不薄至白者染之於涅中而不黑君子虽在浊乱不能污也】我岂匏瓜也?焉能系而不食【集解何晏曰言匏瓜得系一处者不食故也吾自食物当东西南北不得如不食之物系滞一处】孔子击磬有荷蓐而过门者曰有心?击磬乎【集解何晏曰蓐草器也有心谓契契然也】硜硜乎莫已知也夫而已矣【集解何晏曰硜硜信已而已言亦无益也】孔子学鼓琴师襄子【索隐家语师襄子曰吾虽以击磬为官然能於琴盖师襄子鲁人论语谓之击磬襄是也】十日不进师襄子曰可以益矣孔子曰丘已习其曲矣未得其数也有间曰已习其数可以益矣孔子曰丘未得其志也有间曰已习其志可以益矣孔子曰丘未得其为人也有间曰有所穆然深思焉有所怡然高望而远志焉曰丘得其为人黯然而黑【集解王肃曰黯黑貌】几然而长【集解徐广曰诗云颀而长兮索隐几与注颀并音祈家语无此四字】眼如望羊【集解王肃曰望羊望羊视也】心如王四国非文王其谁能为此也师襄子辟席再拜曰师盖云文王操也孔子既不得用於卫将西见赵简子至於河而闻竽鸣犊舜华之死也【集解徐广曰或作鸣铎竽犊又作竽鸣犊舜华也索隐家语云闻赵简子杀竽犊鸣犊及舜华国语云鸣铎竽犊则竽犊字鸣犊声转字异或作鸣铎庆华当作舜华诸说皆同】临河而叹曰美?水洋洋乎丘之不济此命也夫子贡趋而进曰敢问何谓也孔子曰竽鸣犊舜华晋国之贤大夫也赵简子未得志之时须此两人而後从政及其已得志杀之乃从政丘闻之也刳胎杀夭则麒麟不至郊竭泽涸渔则蛟龙不合陰阳【索隐有角曰蛟龙龙能兴云致雨调和陰阳之气】覆巢毁卵则凤皇不翔何则君子讳伤其类也夫鸟兽之於不义也尚知辟之而况乎丘?乃还息乎陬乡作为陬操以哀之【集解王肃曰陬操琴曲名也索隐此陬乡非鲁之陬邑家语云作盘操也】而反乎卫入主蘧伯玉家他日灵公问兵陈【集解孔安国曰军陈行列之法】孔子曰俎豆之事则尝闻之军旅之事未之学也【集解郑玄曰万二千人为军五百人为旅军旅末事本未立不可教以末】明日与孔子语见蜚鴈仰视之色不在孔子孔子遂行复如陈夏卫灵公卒【索隐此鲁哀二年也】立孙辄是为卫出公六月赵鞅内太子蒯聩于戚阳虎使太子纁八人衰經伪自卫迎者哭而入遂居焉冬蔡迁于州来是岁鲁哀公三年而孔子年六十矣齐助卫围戚以卫太子蒯聩在故也夏鲁桓厘庙燔南宫敬叔救火孔子在陈闻之曰灾必於桓厘庙乎【集解服虔曰桓厘当毁而鲁事非礼之庙故孔子闻有火灾知其必桓僖也】已而果然秋季桓子病辇而见鲁城喟然叹曰昔此国几兴矣以吾获罪於孔子故不兴也顾谓其嗣康子曰我即死若必相鲁相鲁必召仲尼後数日桓子卒康子代立已葬欲召仲尼公之鱼曰昔吾先君用之不终终为诸侯笑今又用之不能终是再为诸侯笑康子曰则谁召而可曰必召冉求於是使使召冉求冉求将行孔子曰鲁人召求非小用之将大用之也是日孔子曰归乎归乎吾党之小子狂简斐然成章吾不知所以裁之【集解孔安国曰简大也孔子在陈思归欲去曰吾党之小子狂者进取于大道妄穿凿以成章不知所以裁制当归以裁耳索隐此系家再有归与之辞者前辞出孟子此辞出论语盖止是一称归与二书各记之今前後再引亦失之也】子贡知孔子思归送冉求因诫曰即用以孔子为招云冉求既去明年孔子自陈迁于蔡蔡昭公将如吴吴召之也前昭公欺其臣迁州来後将往大夫惧复迁公孙翩射杀昭公【集解徐广曰哀公四年也】楚

侵蔡秋齐景公卒【集解徐广曰哀公五年也】明年孔子自蔡如叶叶公问政孔子曰政在来远附迓他日叶公问孔子於子路子路不对【集解孔安国曰叶公名诸梁楚大夫食采於叶僭称公不对未知所以对也】孔子闻之曰由尔何不对曰其为人也学道不倦诲人不倦发愤忘食乐以忘忧不知老之将至云尔去叶反于蔡长沮桀溺耦而耕孔子以为隐者使子路问津焉【集解郑玄曰耜广五寸二耜为耦津济渡处也正义括地志云黄城山俗名菜山在许州叶县西南二十五里圣贤冢墓记云黄城山即长沮桀溺所耕处下有东流则子路问津处也】长沮曰彼执舆者为谁子路曰为孔丘曰是鲁孔丘与曰然曰是知津矣【集解马融曰言数周流自知津处】桀溺谓子路曰子为谁曰为仲由曰子孔丘之徒与曰然桀溺曰悠悠者天下皆是也而谁以易之【集解孔安国曰悠悠者周流之貌也言当今天下治乱同空舍此适彼故曰谁以易之】且与其从辟人之士岂若从辟世之士【集解何晏曰士有辟人之法有辟世之法长沮桀溺谓孔子为士从辟人之法者也己之为士则从辟世之法也】耰而不辍【集解郑玄曰耰覆种也辍止也覆种不止不以津告者】子路以告孔子孔子怃然曰【集解何晏曰谓其不达己意而非己】鸟兽不可与同羣【集解孔安国曰隐於山林是同羣】天下有道丘不与易也【集解何晏曰凡天下有道者已皆不与易也已大而人小故也】他日子路行遇荷蓀丈人【集解包氏曰丈人老者蓀草器名也】曰子见夫子乎丈人曰四体不勤五谷不分孰为夫子【集解包氏曰丈人云不勤劳四体分植五谷谁为夫子而索也】植其杖而芸【集解孔安国曰植倚也除草曰芸】子路以告孔子曰隐者也复往则亡【集解孔安国曰子路反至其家丈人出行不在】孔子迁于蔡三岁吴伐陈楚救陈【集解徐广曰哀公四年也】军于城父闻孔子在陈蔡之间楚使人聘孔子孔子将往拜礼陈蔡大夫谋曰孔子贤者所刺讥皆中诸侯之疾今者久留陈蔡之间诸大夫所设行皆非仲尼之意今楚大国也来聘孔子孔子用於楚则陈蔡用事大夫危矣於是乃相与发徒役围孔子於野不得行絶粮从者病莫能兴【集解孔安国曰兴起也】孔子讲诵弦歌不衰子路愠见曰君子亦有穷乎孔子曰君子固穷小人穷斯滥矣【集解何晏曰滥溢也君子固亦有穷时但不如小人穷则滥溢为非】子贡色作孔子曰赐尔以予为多学而识之者与曰然【集解孔安国曰然谓多学而识之】非与【集解孔安国曰问今不然也】孔子曰非也予一以贯之【集解何晏曰善有元事有会天下殊涂而同归百虑而一致知其元则衆善举也故不待学以一知之】孔子知弟子有愠心乃召子路而问曰诗云匪兕匪虎率彼旷野【集解王肃曰率循也言非兕虎而循旷野也】吾道非耶吾何为於此子路曰意者吾未仁耶人之不我信也【集解王肃曰言人不信吾岂以未仁乎】意者吾未知耶人之不我行也【集解王肃曰言人不使通行而困穷者岂以吾未智乎】孔子曰有是乎由譬使仁者而必信安有伯夷叔齐【正义言仁者必使四方信之安有伯夷叔齐饿死乎】使智者而必行安有王子比干【正义言智者必使处事通行安有王子比干剖心哉】子路出子贡入见孔子曰赐诗云匪兕匪虎率彼旷野吾道非耶吾何为於此子贡曰夫子之道至大也故天下莫能容夫子夫子盖少贬焉孔子曰赐良农能稼而不能为穡【集解王肃曰种之为稼敛之为穡言良农能善种之未必能敛获之】良工能巧而不能为顺【集解王肃曰言良工能巧而已不能每顺人之意】君子能修其道纲而纪之统而理之而不能为容今尔不修尔道而求为容赐而志不远矣子贡出顔回入见孔子曰回诗云匪兕匪虎率彼旷野吾道非耶吾何为於此顔回曰夫子之道至大故天下莫能容虽然夫子推而行之不容何病不容然後见君子夫道之不修也是吾丑也夫道既已大修而不用是有国者之丑也不容何病不容然後见君子孔子欣然而笑

曰有是?顏氏之子使尔多财吾为尔宰【集解王肃曰宰主财者也为汝主财言志之同也】於是使子贡至楚楚昭王兴师迎孔子然後得免昭王将以书社地七百里封孔子【集解服?曰书籍也索隐古者二十五家为里里则各立社则书社者书其社之人姓名於籍盖以七百里书社之人封孔子也故下冉求云虽累千社而夫子不利是也】楚令尹子西曰王之使使诸侯有如子贡者乎曰无有王之辅相有如顏回者乎曰无有王之将率有如子路者乎曰无有王之官尹有如宰予者乎曰无有且楚之祖封於周号为子男五十里今孔丘述三王之法明周召之业王若用之则楚安得世世堂堂方数千里乎夫文王在丰武王在镐百里之君卒王天下今孔丘得据土壤贤弟子为佐非楚之福也昭王乃止其秋楚昭王卒于城父楚狂接輿歌而过孔子【集解孔安国曰接輿楚人也佯狂而来歌欲以感切夫子也】曰凤兮凤兮何德之衰【集解孔安国曰比孔子於凤鸟待圣君乃见非孔子周行求合故曰衰也】往者不可谏兮【集解孔安国曰已往所行不可复谏止也】来者犹可追也【集解孔安国曰自今已来可追自止避乱隐居】已而已而今之从政者殆而【集解孔安国曰言已而者言世乱已甚不可复治也再言之者伤之深也】孔子下欲与之言趋而去弗得与之言【集解包氏曰下下车也】於是孔子自楚反乎卫是岁也孔子年六十三而鲁哀公六年也其明年吴与鲁会繒徵百牢【索隐此哀七年时也百牢牢具一百也周礼上公九牢侯伯七牢子男五牢今吴徵百牢夷不识礼故子贡对以周礼而後吴亡是徵也正义括地志云故鄆城在沂丞县地理志云繒县属东海郡也】太宰嚭召季康子康子使子贡往然後得已孔子曰鲁卫之政兄弟也【集解包氏曰周公康叔既为兄弟康叔睦於周公其国之政亦如兄弟也】是时卫君辄父不得立在外诸侯数以为让而孔子弟子多仕於卫卫君欲得孔子为政子路曰卫君待子而为政子将奚先【集解包氏曰问往将何所先行】孔子曰必也正名乎【集解马融曰正百事之名也】子路曰有是?子之迂也何其正也【集解包氏曰迂犹远也言孔子之言远於事也】孔子曰野哉由也【集解孔安国曰野不达也】夫名不正则言不顺言不顺则事不成事不成则礼乐不兴礼乐不兴则刑罚不中【集解孔安国曰礼以安上乐以移风二者不行则有淫刑滥罚也】刑罚不中则民无所措手足矣夫君子为之必可名言之必可行【集解王肃曰所名之事必可得名言所言之事必可得遵行者】君子於其言无所苟而已矣其明年冉有为季氏将师与齐战於郎克之【集解徐广曰此哀公十一年也去吴会繒已四年矣年表哀公十年孔子自卫至陈也索隐徐说去会四年是也按左氏及此文孔子是时在卫归鲁不见有在陈之文在陈当哀公之初盖年表误尔正义括地志云郎亭在徐州滕县西五十三里】季康子曰子之於军旅学之乎性之乎冉有曰学之於孔子季康子曰孔子何如人?对曰用之有名播之百姓质诸鬼神而无憾求之至於此道虽累千社夫子不利也【索隐二十五家为社千社即二万五千家】康子曰我欲召之可乎对曰欲召之则毋以小人固之则可矣而卫孔文子【集解服?曰文子卫卿也】将攻太叔【集解駰案左传曰太叔名疾】问策於仲尼仲尼辞不知退而命载而行曰鸟能择木木岂能择鸟乎【集解服?曰鸟喻已木以喻所之之国】文子固止会季康子逐公华公宾公林以币迎孔子孔子归鲁孔子之去鲁凡十四岁而反乎鲁【索隐前文孔子以定公十四年去鲁计至此十三年鲁系家云定公十二年孔子去鲁则首尾计十五年矣】鲁哀公问政对曰政在选臣季康子问政曰举直错诸枉【集解包氏曰错置也举正直之人用之废置邪枉之人索隐论语季康子问政子曰政者正也又哀公问曰何为则人服子曰举直错诸枉则人服今此初论康子问政未合以孔子答哀公使人服盖太史撮畧论语为文而失事实】则枉者直康子患盗孔子曰苟子之不欲

虽赏之不窃【集解孔安国曰欲情慾也言民化於上不从其所令从其所好也】然鲁终不能用孔子孔子亦不求仕孔子之时周室微而礼乐废诗书缺追迹三代之礼序书传上纪唐虞之际下至秦缪编次其事曰夏礼吾能言之杞不足徵也殷礼吾能言之宋不足徵也【集解包氏曰徵成也杞宋二国夏殷之後也夏殷之礼吾能说之杞宋之君不足以成也】足则吾能徵之矣观殷夏所损益曰後虽百世可知也【集解何晏曰物类相召势数相生其变有常故可预知者也】以一文一质周监二代郁郁乎文?吾从周【集解孔安国曰监视也言周文章备於二代当从之也】故书传礼记自孔氏孔子语鲁太师乐其可知也始作翕如【集解何晏曰太师乐官名也五音始奏翕如盛也】纵之纯如【集解何晏曰言五音既发放纵尽其声纯谐和也】皦如【集解何晏曰言其音节明】绎如也以成【集解何晏曰纵之以纯如皦如绎如言乐始於翕如而成於三者也】吾自卫反鲁然後乐正雅颂各得其所【集解郑玄曰反鲁鲁哀公十一年冬是时道衰乐废孔子来还乃正之故雅颂各得其所】古者诗三千余篇及至孔子去其重【正义去邱吕反重逐龙反】取可施於礼义上采契后稷中述殷周之盛至幽厉之缺始於衽席故曰关雎之乱以为风始【正义乱理也诗小序云关雎后妃之德也风之始也所以风天下而正夫妇也毛萇云关关和声雎鸠王雎也鸟势而有别后妃悦乐君子之德无不和谐又不淫色慎固幽深若雎鸠之有别然後可以风化天下夫妇有别则父子亲父子亲则君臣敬君臣敬则朝廷正朝廷正则王化成也按王雎金口鹦也】鹿鸣为小雅始【正义小序云鹿鸣宴羣臣嘉宾也既饮食之又实币帛筐篚以将其厚意然後忠臣嘉宾得尽其心矣毛萇云鹿得苹呦呦鸣而相呼恳诚发乎中以兴嘉乐宾客当有恳诚相招呼以成礼也】文王为大雅始【正义小序云文王文王受命作周郑玄云文王初为西伯有功於民其德着见於天故天命之以为王使君天下】清庙为颂始【正义小序云清庙祀文王也周公既成雒邑朝诸侯率以祀文王焉毛萇云清庙者祭有清明之德者之宫也谓祭文王天德清明文王象焉故祭之而歌此诗也】三百五篇孔子皆弦歌之以求合韶武雅颂之音礼乐自此可得而述以备王道成六艺孔子晚而喜易序【正义序易序卦也夫子作十翼谓上彖下象上象下象上系下系文言序卦说卦襍卦也易正义曰文王既繇六十四卦分为上下篇先後之次其理不易孔子就上下二经各序其相次之义】彖【正义吐乱反上彖卦下辞下象爻卦下辞易正义曰夫子所作统论一卦之义或说其卦德或说其卦义或说其卦名庄氏云彖断也言断定一卦之义也】系【正义如字又音系易正义云系辞者圣人系属此辞於爻卦之下分为上下篇者以简编重大是以分之又言系辞者取纲系之义也】象【正义上象卦辞下象爻辞易正义云万物之体自然各有形象圣人设卦以写万物之象今夫子释此卦之象也】说卦【正义易正义云说卦者陈说八卦德业变化法象所为也】文言【正义易正义云夫子赞明易道申说义理释乾坤二卦经文之言故称文言又杂卦者六十四卦以为义於序卦之外别言圣人之兴因时而作随其事宜不必相因袭当有损益又云杂揉衆卦错综其义或以同相类或以异相明按史不出杂卦故附之】读易韦编三絶曰假我数年若是我於易则彬彬矣孔子以诗书礼乐教弟子盖三千焉身通六艺者七十有二人如顔浊邹之徒【正义浊音卓邹音聚顔浊邹非七十二人数也】颇受业者甚衆孔子以四教文行忠信【集解何晏曰四者有形质可举以教】絶四母意【集解何晏曰以道为度故不任意也】母必【集解何晏曰用之则行舍之则藏故无专必】母固【集解何晏曰无可无不可故无固行也】母我【集解何晏曰述古而不自作处羣萃而不自异唯道是从故不有其身也】所慎齐战疾【集解何晏曰此三者人所不能慎而夫子慎也】子罕言利

与命与仁【集解何晏曰罕者希也利者义之和也命者天之命也仁者行之盛也寡能及之故希言之也】不愤不启举一隅不以三隅反则弗复也【集解郑玄曰孔子与人言必待其人心愤愤口悱悱乃後启发为说之如此则识思之深也说则举一端以诏之其人不思其类则不重教也】其於乡党恂恂似不能言者【集解王肃曰恂恂温恭貌也索隐有本作逡逡音七旬反】其於宗庙朝廷辩辩言唯谨尔【集解郑玄曰推辩而谨敬也索隐论语作便便】朝与上大夫言闇闇如也【集解孔安国曰中正之貌也】与下大夫言侃侃如也【集解孔安国曰和乐貌】入公门鞠躬如也趋进翼如也【集解孔安国曰言端好也】君召使傧【集解郑玄曰有宾客使迎之也】色勃如也【集解孔安国曰必变色】君命召不俟驾行矣【集解郑玄曰急趋君命也既行出而车驾随之】鱼馁肉败割不正不食【集解孔安国曰鱼败曰馁也】席不正不坐食於有丧者之侧未尝饱也是日哭则不歌见齐衰瞽者虽童子必变【集解包氏曰瞽盲】三人行必得我师【集解何晏曰言我三人行本无贤愚择善而从之不善而改之无常师也】德之不修学之不讲闻义不能徙不善不能改是吾忧也【集解孔安国曰夫子常以此四者为忧也】使人歌善则使复之然後和之【集解何晏曰乐其善故使重歌而自和也】子不语怪力乱神【集解王肃曰怪怪异也力谓若弄荡舟鸟获举千钧之属也乱谓臣弑君子弑父也神谓鬼神之事或无益於教化或所不忍言也李充曰力不由理斯怪力也神不由正斯乱神也怪力乱神有与於邪无益於教故不言也】子贡曰夫子之文章可得闻也【集解何晏曰章明文彩形质着见可以耳目修也】夫子言天道与性命弗可得闻也已【集解何晏曰性者人之所受以生也天道者元亨利贞之道深微故不可得而闻之】顔渊喟然叹曰仰之弥高鑽之弥坚【集解何晏曰言不可穷尽】瞻之在前忽焉在後【集解何晏曰言忽恍不可为形象】夫子循循然善诱人【集解何晏曰循循次序貌也诱进也言夫子正以此道进劝人学有次序也】博我以文约我以礼欲罢不能既竭我才如有所立卓尔虽欲从之蔑由也已【集解孔安国曰言夫子既以文章开博我又以礼节节约我使我欲罢不能已竭吾才矣其有所立则卓然不可及言已虽蒙夫子之善诱犹不能及夫子所立也】達巷党人童子曰大哉孔子博学而无所成名【集解郑玄曰達巷者党名五百家为党此党之人美孔子博学道艺不成一名而已】子闻之曰我何执执御乎执射乎我执御矣【集解郑玄曰闻人美之承以谦也吾执御者欲明六艺之卑】牢曰子云不试故艺【集解郑玄曰牢者弟子子牢也试用也言孔子自云我不见用故多伎艺也】鲁哀公十四年春狩大野【集解服?曰大野薳名鲁田圃之常处盖今鉅野是也正义括地志云获麟堆在郅州鉅野县东十二里春秋哀十四年经云西狩获麟宗国都城记鉅野故城东十里泽中有土台广轮四五十步俗云获麟堆去鲁城可三百余里】叔孙氏车子鉏商获兽【集解服?曰车子微者也鉏商名也索隐春秋传及家语并云车子鉏商而服?以子为姓非也今以车子为主军车士微者之人也人微故略其姓则子非姓也】以为不祥仲尼视之曰麟也取之【集解服?曰麟非时所常见故恠之以为不祥也仲尼名之曰麟然後鲁人乃取之也明麟为仲尼至也】曰河不出图雒不出书吾已矣夫【集解孔安国曰圣人受命则河出图今无此瑞吾已矣夫者不得见河图八卦是也】顔渊死孔子曰天丧予【集解何休曰予我也天出顔渊为夫子辅佐死者是天将亡夫子之证者也】及西狩见麟曰吾道穷矣【集解何休曰麟者太平之兽圣人之类也时得而死此天亦告夫子将歿之证故云尔】喟然叹曰莫知我夫子贡曰何为莫知子【集解何晏曰子贡恠夫子言何为莫知己故问之】子曰不怨天不尤人【集解马融曰孔子不用於世而不怨天不知己亦不尤人】下学而上达【集解孔

安国曰下学人事上達天命】知我者其天乎【集解何晏曰圣人与天地合其德故曰唯天知己】不降其志不辱其身伯夷叔齐乎【集解郑玄曰言其直己之心不入庸君之朝】谓柳下惠少连降志辱身矣谓虞仲夷逸隐居放言【集解包氏曰放置也置不复言世务也】行中清废中权【集解马融曰清纯洁也遭世乱自废弃以免患合於权也】我则异於是无可无不可【集解马融曰亦不必进亦不必退唯义所在】子曰弗乎弗乎君子病歿世而名不称焉吾道不行矣吾何以自见於後世哉乃因史记作春秋上至隐公下迄哀公十四年十二公据鲁亲周【索隐言夫子修春秋以鲁为主故云据鲁时周虽微而亲周王者以见天下之有宗主也】故殷运之三代【正义殷中也又中运夏殷周之事也】约其文辞而指博故吴楚之君自称王而春秋贬之曰子踐土之会实召周天子而春秋讳之曰天王狩於河阳推此类以?当世贬损之义後有王者举而开之春秋之义行则天下乱臣贼子惧焉孔子在位听讼文辞有可与人共者弗独有也至於为春秋笔则笔削则削子夏之徒不能赞一辞弟子受春秋孔子曰後世知丘者以春秋而罪丘者亦以春秋【集解刘熙曰知者行尧舜之道者也罪者在王公之位见贬絶者】明岁子路死於卫孔子病子贡请见孔子方负杖逍遥於门曰赐汝来何其晚也孔子因叹歌曰太山坏乎【集解郑玄曰太山衆山所仰】梁柱摧乎哲人萎乎【集解王肃曰萎顿也】因以涕下谓子贡曰天下无道久矣莫能宗予【集解王肃曰伤道之不行也】夏人殡於东阶周人於西阶殷人两柱间昨暮予梦坐奠两柱之间予殆殷人也後七日卒【集解郑玄曰明圣人知命也正义括地志云汉封夫子十二代孙忠为褒城侯生光为丞相封侯平帝封孔霸孙莽二千户为褒城侯後汉封十七代孙志为褒成侯魏封二十二代孙羨为崇圣侯晋封二十三代孙震为奉圣亭侯後魏封二十七代孙为崇圣大夫孝文帝又封三十一代孙珍为崇圣侯高齐改封珍为恭圣侯周武帝改封邹国公隋文帝仍旧封邹国公炀帝改为绍圣侯皇唐给复二千户封孔子裔孙孔德伦为褒圣侯也】孔子年七十三以鲁哀公十六年四月己丑卒【索隐若孔子以鲁襄二十一年生至哀十六年为七十三若襄二十二年生则孔子年七十二经传生年不定使夫子壽数不明】哀公诔之曰旻天不吊不憖遗一老【集解王肃曰吊善也憖且也一老谓孔子也】俾屏余一人以在位??余在疚【集解王肃曰疚病也】呜呼哀?尼父母自律【集解王肃曰父丈夫之显称也律法也言母以自为法也】子贡曰君其不没於鲁乎夫子之言曰礼失则昏名失则愆失志为昏失所为愆【索隐左传及家语文皆同】生不能用死而诔之非礼也称余一人非名也【集解服?曰天子自谓一人非诸侯所当名也】孔子葬鲁城北泗上【集解駰案皇覽曰孔子冢去城一里冢莹百亩冢南北广十步东西十三步高一丈二尺冢前以瓠鬯为祠坛方六尺与地平本无祠堂冢莹中树以百数皆异种鲁人世代无能名其树者民传言孔子弟子异国人各持其方树来种之其树柞粉雒离女贞五味鼈檀之树孔子莹中不生荆棘及刺人草索隐离音藜藜草名也女贞一作安贵香名出西域五味药草名鼈音谗鼈檀檀树之别种也】弟子皆服三年三年心丧毕相诀而去【索隐诀音决别也】则哭各复尽哀或复留唯子贡庐於冢上【索隐家语无上字且礼云适墓不登陇岂合庐於冢上乎盖上者亦边侧之义】凡六年然後去弟子及鲁人往从冢而家者百有余室因命曰孔里鲁世世代代因庙藏孔子衣冠琴车书【索隐谓孔子所居之堂其弟子之中孔子没後後代因庙藏夫子平生衣冠琴书於壽堂中】至于汉二百余年不絶高皇帝过鲁以太牢祠焉诸侯卿相至常先谒然後从政孔子生鲤字伯鱼【索隐家语孔子年十九娶於宋之亓官氏之女一岁而生伯鱼伯鱼之

生也鲁昭公使人遗之鲤鱼夫子荣君之赐因以名其子为鲤也】伯鱼年五十先孔子死【集解駟案皇览曰伯鱼冢在孔子冢东与孔子并大小相望也】伯鱼生汲字子思年六十二尝困於宋子思作中庸【集解駟案皇览曰子思冢在孔子冢南大小相望】子思生白字子上年四十七子上生求字子家年四十五子家生箕字子京年四十六子京生穿字子高年五十一子高生子慎年五十七尝为魏相子慎生鮒年五十七为陈王涉博士死於陈下鮒弟子襄年五十七尝为孝惠皇帝博士迁为长沙太守长九尺六寸子襄生忠年五十七忠生武武生延年及安国安国为今皇帝博士至临淮太守蚤卒安国生印印生驩

太史公曰诗有之高山仰止景行行止虽不能至然心乡往之余读孔氏书想见其为人适鲁观仲尼庙堂车服礼器诸生以时习礼其家余祇回留之不能去云【索隐祇敬也言祇敬遲回不能去之有本亦作低回义亦通】天下君王至于贤人衆矣当时则荣没则已焉孔子布衣传十余世学者宗之自天子王侯中国言六艺者折中於夫子【索隐离骚云明五帝以折中王师叔云折中正也宋均云折断也中当也言欲折断其物而用之与度相中当也】可谓至圣矣【索隐述赞曰孔子之先胄于商国弗父能让正考铭勒防叔来奔聊人倚立尼邱诞生阙里生德七十升堂四方取则行诛两观掇相夹谷叹凤遽衰泣麟何促九流仰镜万古钦跼】

史记卷四十七

史记卷四十七考证

孔子世家齐处昭公乾侯○余有丁曰乾侯晋地晋人以居公者齐处公于郚非乾侯也

为高昭子家臣欲以通乎景公○余有丁曰昭二十年齐世家记景公与晏婴狩鲁界因入鲁问礼於孔子曰此婴与孔子相友善今鲁乱孔子适齐必因婴以通于景公而世家谓为高昭子家臣以通景公或误

吴伐越堕会稽得骨节专车○余有丁曰吴伐越事在哀公元年家语云吴子使聘于鲁问之孔子命使者曰无以吾命也宾既将事及发币于大夫及孔子孔子爵之既彻俎而燕然後客执骨而问今载于定公五年此时吴未堕会稽安得获骨之事

孔子使从者为甯武子臣於卫○致堂管见曰穆公末武子之子相已与孙良夫将兵侵齐武子非老则卒矣穆公卒历定公献公凡三十七年至灵公三十八年而孔子来使有两武子则可若犹俞也其年当百有五六十矣何子长之疎也

孔子学鼓琴师襄子○余有丁曰师襄子即击磬襄孔子用鲁举为司乐之官及孔子去鲁而襄子入于海史记载学琴於去鲁之後殆非也历聘纪年记孔子二十九岁适卫学琴庶几近之

心如王四国○一本无心字

今孔丘述三王之法○【臣照】按东都赋事勤乎三五李善注引史记楚子西曰孔丘述三五之法明周召之业按此则王字乃後來传写之误

吴与鲁会缙正义括地志云故鄆城在沂丞县○【臣照】按沂下疑脱州字唐书地理志丞县属沂州

孔子年七十三以鲁哀公十六年四月己丑卒索隐若孔子以鲁襄二十一年生至哀十六年为七十三若襄二十二年生则孔子年七十二经传生年不定使夫子壽数不明○考年表自襄公二十二年庚戌至哀公十六年壬戌正七十三年若自襄二十一年己酉至壬戌则七十四矣索隐不知如何计算

史记卷四十七考证

卷四十八

钦定四库全书

史记卷四十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

陈涉世家第十八

【索隐胜立数月而死无後亦称系家者以其所遣王侯将相竟灭秦爲首事故也然时因扰攘起自匹夫假托妖祥一朝称楚历年不永勲业蔑如继之齐鲁曾何等级可降爲列传】

陈胜者阳城人也字涉【索隐韦昭云阳城属颍川地理志属汝南不同者按郡县之名随代分割盖阳城旧属汝南史迁云今爲汝阴後又分隶颍川韦昭据以爲说故其不同他皆放此正义即河南阳城县也】吴广者阳夏人也字叔【索隐忧音贾韦昭云淮阳县後属陈正义括地志云陈州太康县本汉阳夏县也】陈涉少时尝与人佣耕【索隐广雅云佣役也谓役力而受雇直也】辍耕之垄上怅恨久之曰苟富贵无相忘佣者笑而应曰若爲佣耕何富贵也陈涉太息曰嗟乎燕雀安知鸿鹄之志哉【索隐尸子云鸿鹄之?羽翼未合而有四海之心是也鸿鹄是一鸟若凤皇然非鸿鴈与黄鹄也鹄音户酷反】二世元年七月发闾左适戍渔阳九百人屯大泽乡【集解徐广曰在沛郡蕲县索隐闾左谓居闾里之左也秦时复除者居闾左今力役凡在闾左者尽发之也又云凡居以富强爲右贫弱爲左秦役戍多富者役尽兼取贫弱者而发之者也适音直革反又音磔故汉书有七科适戍者屯兵而守也地理志渔阳县名在渔阳郡也正义括地志云渔阳故城在檀州密云县南十八里在渔水之阳也】陈胜吴广皆次当行爲屯长会天大雨道不通度已失期失期法皆斩陈胜吴广乃谋曰今亡亦死举大计亦死等死死国可乎【索隐谓欲经营图国假使不成而败犹愈爲戍卒而死也】陈胜曰天下苦秦久矣吾闻二世少子也不当立【索隐姚氏按隐士遗章邯书云李斯爲二世废十七兄而立今王则二世是始皇第十八子也】当立者乃公子扶苏扶苏以数谏故上使外将兵今或闻无罪二世杀之百姓多闻其贤未知其死也【索隐如淳曰扶苏自杀故人不知其死或以爲不知何坐而死故天下冤二世杀之或说爲非今宜依文而解直是扶苏爲二世所杀而百姓未知故欲诈自称也】项燕爲楚将数有功爱士卒楚人怜之或以爲死或以爲亡今诚以吾衆诈自称公子扶苏项燕爲天下唱宜多应者【索隐汉书作倡倡谓先也说文云倡首也】吴广以爲然乃行卜【索隐行者先也一云行往也】卜者知其指意曰足下

事皆成有功然足下卜之鬼乎【集解苏林曰狐鸣祠中则是也瓚曰假托鬼神以威衆也故胜广曰此教我威衆也索隐裴注引苏林臣瓚义亦当矣而李奇又云卜者戒曰所卜事虽成当死爲鬼恶指斥言之而胜失其旨用依鬼神起怪盖亦得其指也】陈胜吴广喜念鬼【索隐念者思也谓思念欲假鬼神之事】曰此教我先威衆耳乃丹书帛曰陈胜王置人所罾鱼腹中【集解駰案汉书音义曰罾音曾文颖曰罾鱼网也】卒买鱼烹食得鱼腹中书固以怪之矣又闲令吴广之次近所旁丛祠中【集解张晏曰戍人所止处也丛鬼所凭焉索隐服虔云间音中间之间郑氏云间谓窃令人行也孔文祥云伺窃间隙不欲令衆知之次师所次舍处也墨子云建国必择木之修茂者以爲丛位高诱注战国策云丛祠神祠丛树也】夜篝火【集解徐广曰或作带也篝者笼也音沟索隐汉书作构火郭璞云篝笼是也】狐鸣呼曰大楚兴陈胜王卒皆夜惊恐旦日卒中往往语皆指目陈胜吴广素爱人士卒多爲用者将尉醉【索隐尉官也汉旧仪大县三人其尉将屯九百人故云将尉也】广故数言欲亡忿恚尉令辱之以激怒其衆尉果笞广尉劔挺【集解徐广曰挺犹脱也索隐按脱即夺也说文云挺拔也案谓尉劔拔而广因夺之故得杀尉】广起夺而杀尉陈胜佐之并杀两尉召令徒属曰公等遇雨皆已失期失期当斩藉第令毋斩【集解服虔曰藉假也第次第也应劭曰藉吏士名藉也今失期当斩就使藉第幸得不斩戍死者固十六七此激怒其衆也苏林曰第且也索隐第一音次第之第小顔云第但也刘氏云藉音子夜反应劭读如字各以意言苏说爲近也】而戍死者固十六七且壮士不死即已死即举大名耳【索隐大名谓大名称也】王侯将相宁有种乎徒属皆曰敬受命乃诈称公子扶苏项燕从民欲也袒右称大楚爲坛而盟祭以尉首陈胜自立爲将军吴广爲都尉攻大泽乡收而攻蕲下【索隐蕲音机又音祈县名属沛郡下者降也谓以兵临蕲而即降也】乃令符离人葛婴将兵徇蕲以东【索隐韦昭云符离属沛郡李奇云徇略也音辞峻反】攻鉦鄆苦柘谿皆下之【集解徐广曰苦柘属陈余皆在沛也】行收兵北至陈【索隐地理志陈县属淮阳】车六七百乘骑千余人攻陈【正义今陈州城也本楚襄王筑古陈国城也】陈守令皆不在【索隐张晏云郡守县令皆不在非也地理志及秦三十六郡并无陈郡则陈止是县今言守令则守非官也与下守丞同也则皆是衍字】独守丞与战谿门中【索隐盖谓陈县之城门一名丽谿故曰谿门中非上谿县之门也谿县守前已下故】弗胜守丞死乃入据陈数日号令召三老豪桀与皆来会计事三老豪桀皆曰将军身被坚执锐伐无道诛暴秦复立楚国之社稷功宜爲王陈涉乃立爲王号爲张楚【索隐李奇云欲张大楚国故称张楚也】当此时诸郡县苦秦吏者皆刑其长吏杀之以应陈涉乃以吴叔爲假王监诸将以西击荥阳令陈人武臣张耳陈余徇赵地令汝阴人邓宗徇九江郡当此时楚兵数千人爲聚者不可胜数葛婴至东城立襄强爲楚王【索隐东城县名地理志属九江正义括地志云东城故城在濠州定远县东南五十里也】婴後闻陈王已立因杀襄强还报至陈陈王诛杀葛婴陈王令魏人周市北徇魏地吴广围荥阳李由爲三川守【索隐三川今洛阳也地有伊洛河故曰三川秦曰三川汉曰河南郡李由李斯子也】守荥阳吴叔弗能下陈王徵国之豪杰与计以上蔡人房君蔡赐爲上柱国【集解駰案汉书音义曰房君官号也姓蔡名赐瓚曰房邑君也索隐房邑也爵之於房号曰房君晋灼按张耳传言相国房君者盖误尔涉初号楚因楚有柱国之官故以官蔡赐盖其时草创亦未置相国之官也正义豫州吴房县本房子国是所封也】周文陈之贤人也【集解文颖曰即周章】尝爲项燕军视日【集解如淳曰视日时吉凶举动之占也司马季主爲日者】事春申君自言习兵陈王与之将军印西击行收兵至关车千乘卒数十万至戏军焉【正义即京东

戏亭也】秦令少府章邯免郿山徙人奴产子【集解服虔曰家人之产奴也索隐小颜云犹今言家产奴也】悉发以击楚大军尽败之周文败走出关止次曹阳二三月【索隐晋灼云亭名也在弘农东十三里小颜云曹水之阳也其水出陕县西南峴头山北流入河魏武帝改爲好阳也正义括地志云曹阳故亭亦名好阳亭在陕州桃林县东南十四里崔浩云曹阳坑名自南出北通於河按魏武帝改曰好阳也】章邯追败之复走次滹池十余日【正义滹池河南府县是也】章邯击大破之周文自刳军遂不战【集解徐广曰十一月也索隐越系家勾践使罪人三行属劒於颈曰不敢逃刑乃自刳郭璞注三苍以爲刳刺也】武臣到邯鄲自立爲赵王陈余爲大将军张耳召骚爲左右丞相陈王怒捕系武臣等家室欲诛之柱国曰秦未亡而诛赵王将相家属此生一秦也不如因而立之陈王乃遣使者贺赵而徙系武臣等家属宫中而封耳子张敖爲成都君【正义成都蜀郡县涉遥封之】趣赵兵亟入关【索隐趣音促谓催促也亟音棘亟急也】赵王将相相与谋曰王王赵非楚意也楚已诛秦必加兵於赵计莫如毋西兵使使北徇燕地以自广也赵南据大河北有燕代楚虽胜秦不敢制赵若楚不胜秦必重赵赵乘秦之弊可以得志於天下赵王以爲然因不西兵而遣故上谷卒使韩广将兵北徇燕地燕故贵人豪杰谓韩广曰楚已立王赵又已立王燕虽小亦万乘之国也愿将军立爲燕王韩广曰广母在赵不可燕人曰赵方西忧秦南忧楚其力不能禁我且以楚之强不敢害赵王将相之家赵独安敢害将军之家韩广以爲然乃自立爲燕王居数月赵奉燕王母及家属归之燕当此之时诸将之徇地者不可胜数周市北徇地至狄【集解徐广曰今之临济】狄人田儋杀狄令自立爲齐王以齐反击周市市军散还至魏地欲立魏後故甯陵君咎爲魏王【集解应劭曰魏诸公子名咎欲立六国後以树党索隐晋灼云甯陵今在梁国按今梁国有宁陵县是字转异尔正义括地志云宋州宁陵县城古甯陵城也】时咎在陈王所不得之魏魏地已定欲相与立周市爲魏王周市不肯使者五反陈王乃立甯陵君咎爲魏王遣之国周市卒爲相将军田臧等相与谋曰周章军已破矣秦兵旦暮至我围荥阳城弗能下秦军至必大败不如少遣兵足以守荥阳【索隐遣作遗遗谓留余也】悉精兵迎秦军今假王骄不知兵权不可与计非诛之事恐败因相与矫王令以诛吴叔献其首於陈王陈王使使赐田臧楚令尹印使爲上将田臧乃使诸将李归等守荥阳城自以精兵西迎秦军於敖仓与战田臧死军破章邯进兵击李归等荥阳下破之李归等死阳城人邓说将兵居郟【索隐地理志云阳城县属颍川说音悦凡人名皆音悦郟音谈小颜云郟东海之县名非也按章邯军此时未至东海此郟别是地名或恐郟当作郑郑是郑鄆之地或者是陕陕字邑或在右见下有东海郟县故误也正义属海州疑郟当作郑音纪洽反郑即春秋时郑地楚郑敖葬之今汝州郑县城是邓悦是阳城人阳城河南府县与郑城县相近又走陈盖郑字误作郟耳】章邯别将击破之邓说军散走陈銍人伍徐【集解徐广曰一作逢索隐地理志銍县名属沛汉书作伍逢】将兵居许【正义括地志云许州许昌县本汉许县地理志云许县故国姜姓四岳之後大叔所封二十四君爲楚所灭汉以爲县魏文帝卽位改许曰许昌也】章邯击破之伍徐军皆散走陈陈王诛邓说陈王初立时陵人秦嘉【集解駉案地理志泗水国有陵县也】銍人董緤符离人朱鸡石取虑人郑布【索隐地理志取虑县名属临淮音秋间二音取又音子與反】徐人丁疾等皆特起将兵围东海【正义今海州也】守庆於郟陈王闻乃使武平君畔爲将军【集解张晏曰畔名也】监郟下军秦嘉不受命嘉自立爲大司马恶属武平君告军吏曰武平君年少不知兵事勿听因矫以王命杀武平君畔章邯已破伍徐击陈柱国房君死章邯又进兵击陈西张贺军陈王出监战军破张贺死膈月【集解张晏曰秦之膈月夏

之九月瓚曰建丑之月也索隐顔游秦云按史记表二世十月诛葛婴十一月周文死十二月陈涉死瓚说是也宗懔荆楚记云腊节在十二月故因是谓之腊月也】陈王之汝陰还至下城父【索隐按旧读以陈王从汝陰还至城父县因降下之故云还至下城父又顾氏按郡国志山桑县有下城父聚在城父县东下读如字其说爲得之】其御庄贾杀以降秦陈胜葬碭【正义音唐今宋州碭山县是】谥曰隐王陈王故涓人将军吕臣【集解应劭曰涓人知谒者将军姓吕名臣也晋灼曰吕氏春秋荆柱国庄伯令谒者驾令涓人取冠索隐涓音公玄反服反云给通如今谒者】爲仓头军起新阳【集解徐广曰在汝南也索隐韦昭云军皆着青故曰仓头正义括地志云新阳故城在豫州眞阳县西南四十二里汉新阳县城应劭云在新水之阳也】攻陈下之杀庄贾复以陈爲楚【索隐爲如字读谓以陈地爲楚国】初陈王至陈令銍人宋留将兵定南阳入武关留已徇南阳闻陈王死南阳复爲秦宋留不能入武关乃东至新蔡遇秦军宋留以军降秦秦传留至咸阳车裂留以徇秦嘉等闻陈王军破出走乃立景驹爲楚王【集解徐广曰正月嘉爲上将军】引兵之方与【正义房预二音方与兖州县也】欲击秦军定陶下【正义今曹州也】使公孙庆使齐王欲与并力俱进齐王曰闻陈王战败不知其死生楚安得不请而立王公孙庆曰齐不请楚而立王楚何故请齐而立王且楚首事当令於天下田儋诛杀公孙庆秦左右校【索隐即左右校尉军也】复攻陈下之吕将军走收兵复聚鄱盗【集解駰案鄱音婆英布居江中爲羣盗陈胜之起布归番君吴芮故谓之鄱盗者也】当阳君黥布之兵相收复击秦左右校破之青波【集解駰案汉书音义曰地名也】复以陈爲楚会项梁立怀王孙心爲楚王陈胜王凡六月已爲王王陈其故人尝与佣耕者闻之陈扣宫门曰吾欲见涉宫门令欲缚之自辨数乃置【集解晋灼曰数音朋友数斯疏矣索隐数音主反谓自辨说数与涉有故旧事验也又音朔数谓自辨往数与涉有故也】不肯爲通陈王出遮道而呼涉陈王闻之乃召见载与俱归入宫见殿屋帷帐客曰夥颐涉之爲王沈沈者【集解应劭曰沈沈宫室深邃之貌也沈音长含反含一作金索隐服虔云楚人谓多爲夥又言颐者助声之辞也谓涉爲王宫殿帷帐其物夥多惊而伟之故称夥颐也刘伯庄以沈沈犹谈谈谓故人呼爲沈沈犹俗云谈谈深也】楚人谓多爲夥故天下传之夥涉爲王由陈涉始客出入愈益发舒言陈王故情或说陈王曰客愚无知颉妄言轻威陈王斩之诸陈王故人皆自引去由是无亲陈王者【索隐顾氏引孔丛子云陈胜爲王妻之父兄往焉胜以衆宾待之妻父怒云怙号而仿长者不能久焉不辞而去是其事类也】陈王以朱房爲中正胡武爲司过主司羣臣诸将徇地至令之不是者系而罪之以苛察爲忠其所不善者弗下吏辄自治之【索隐谓朱房胡武等以素所不善者即自验问不往下吏也】陈王信用之诸将以其故不亲附此其所以败也陈胜虽已死其所置遣侯王将相竟亡秦由涉首事也高祖时爲陈涉置守冢三十家碭至今血食

褚先生曰【集解徐广曰一作太史公駰案班固奏事云太史迁取贾谊遇秦上下篇以爲秦始皇本纪陈涉世家下赞文然则言褚先生者非也索隐徐广裴駰据所见别本及班彪奏事皆云合作太史公今据此是褚先生述史记加此赞首地形险阻数句然後始称贾生之言因即改太史公之目而自题已位号也已下义并见始皇本纪】地形险阻所以爲固也兵革刑法所以爲治也犹未足恃也夫先王以仁义爲本而以固塞文法爲枝叶岂不然哉吾闻贾生之称曰秦孝公据殽函之固【集解韦昭曰殽谓二殽函函谷开也】拥雍州之地君臣固守以窥周室有席卷天下包举宇内囊括四海之意并吞八荒之心当是时也商君佐之内立法

度务耕织修守战之备外连衡而鬪诸侯於是秦人拱手而取西河之外孝公既没惠文王武王昭王蒙故业因遗策南取汉中西举巴蜀东割膏腴之地收要害之郡诸侯恐惧会盟而谋弱秦不爱珍器重宝肥饶之地以致天下之士合从缔交相与爲一当此之时齐有孟尝赵有平原楚有春申魏有信陵此四君者皆明知而忠信寬厚而爱人尊贤而重士约从连衡兼韩魏燕赵宋卫中山之衆於是六国之士有甯越徐尚苏秦杜赫之属爲之谋齐明周最【正义音聚】陈轸邵滑【正义邵作昭】楼缓翟景苏厉乐毅之徒通其意吴起孙臏带他儿良王廖田忌廉颇赵奢之伦制其兵尝以什倍之地百万之师仰关而攻秦【索隐仰字亦作印并音仰谓秦地形高故并仰向关门而攻秦有作叩字非也】秦人开关而延敌九国之师遁逃而不敢进【索隐九国者谓六国之外更有宋卫中山】秦无亡矢遗鏃之费而天下固已困矣於是从散约败争割地而赂秦秦有余力而制其弊迫亡逐北伏尸百万流血漂橈【索隐说文云橈大楫也】因利乘便宰割天下分裂山河强国请服弱国入朝施及孝文王庄襄王享国之日浅国家无事及至始皇奋六世之余烈振长策而御宇内吞二周而亡诸侯履至尊而制六合执敲朴以鞭笞天下【索隐臣瓚云短曰敲长曰朴】威振四海南取百越之地以爲桂林象郡百越之君俛首系颈委命下吏乃使蒙恬北筑长城而守藩篱却匈奴七百余里胡人不敢南下而牧马士亦不敢贯弓而报怨【索隐贯音乌还反又如字贯谓上弦也】於是废先王之道燔百家之言以愚黔首堕名城杀豪俊收天下之兵聚之咸阳销锋鋌【集解徐广曰一作镝】铸以爲金人十二【索隐各重千石坐高二丈号曰翁仲】以弱天下之民然後践华爲城因河爲池据亿丈之城临不测之谿以爲固良将劲弩守要害之处信臣精卒陈利兵而谁何【索隐犹今巡更问何谁也】天下已定始皇之心自以爲关中之固金城千里子孙帝王万世之业也始皇既没余威振於殊俗然而陈涉瓮牖绳枢之子甿隶之人【集解徐广曰田民曰甿音亡更反】而迁徙之徒也材能不及中人非有仲尼墨翟之贤陶朱猗顿之富也蹑足行伍之间俛仰仟佰之中【索隐仟佰谓千人百人之长也汉书作仟佰如淳云时皆僻屈在阡陌之中陌音貉】率罢散之卒将数百之衆而转攻秦斩木爲兵揭竿爲旗天下云会响应羸粮而景从山东豪俊遂并起而亡秦族矣且天下非小弱也雍州之地殽函之固自若也陈涉之位非尊於齐楚燕赵韩魏宋卫中山之君也鉏耰棘矜非銛於句戟长铙也【索隐鉏耰谓鉏木也论语曰耰而不辍是也棘戟也矜戟柄音勤】适戍之衆非俦於九国之师也深谋远虑行军用兵之道非及乡时之士也【索隐乡音香亮反乡时犹往时也盖谓孟尝信陵苏秦陈轸之比也】然而成败异变功业相反也尝试使山东之国与陈涉度长絜大【索隐絜音下结反谓如结束知其大小也】比权量力则不可同年而语矣然而秦以区区之地致万乘之权抑八州而朝同列【索隐谓秦强而抑八州使朝已也汉书作招八州亦通】百有余年矣然後以六合爲家殽函爲宫一夫作难而七庙堕身死人手爲天下笑者何也仁义不施而攻守之势异也【索隐施音式?反言秦虎狼之国其仁心不施及於天下故亡也】

【索隐述赞曰天下匈匈海内乏主猗鹿争捷瞻乌爰处陈胜首事厥号张楚鬼怪是凭鸿鹄自许万婴东下周文西拒始亲朱房又任胡武夥颺见杀腹心不与庄贾何人反噬城父】

史记卷四十八考证

陈涉世家高祖时爲陈涉置守冢三十家○高祖纪作十家

史记卷四十八考证

卷四十九

钦定四库全书卷

史记卷四十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

外戚世家第十九

【索隐外戚纪后妃也后族亦代有封爵故也汉书则编之列传中王隐则谓之纪而在列传之首】

自古受命帝王及继体守文之君【索隐继体谓非创业之主而是嫡子继先帝之正体而立者也守文者犹法也谓非受命创制之君但守先帝法度爲之主尔】非独内德茂也盖亦有外戚之助焉【索隐谓非独君德於内茂盛亦有贤后妃外戚之亲以助教化也】夏之兴也以涂山【索隐韦昭云涂山国名禹所娶在今九江应劭曰九江当涂有禹墟大戴礼云禹娶涂山氏之女嫫生启】而桀之放也以末喜【索隐国语桀伐有施有施人以末喜女焉集解韦昭曰有施喜姓之国末喜其女也】殷之兴也以有娥【索隐有娥国名其女简狄吞燕卵而生契故诗云天命玄鸟降而生商是也】纣之杀也嬖妲己【索隐国语殷辛伐有苏有苏氏以妲己女焉按有苏国也己姓也妲字也包恺云妲音丁達反】周之兴也以姜原及大任【索隐系本云帝喾上妃有邠女之女曰姜原郑玄笺诗云姜姓嫫名履大人迹生后稷大任文王之母故诗云摯仲氏任毛诗云摯国任姓之中女也】而幽王之禽也淫於褒姒【索隐国语曰幽王伐有褒有褒人以褒姒女焉按褒是国名姒是其姓即龙漈之子褒人育而以女於幽王也然此文自夏之兴至褒姒皆是史苏之词见国语及列女传】故易基乾坤诗始关雎书美厘降春秋讥不亲迎【索隐公羊纪裂繻来逆女传曰外逆女不书此何以书讥何讥尔始不亲迎也】夫妇之际人道之大伦也礼之用唯婚姻爲兢兢夫乐调而四时和陰阳之变万物之统也【索隐以言若乐声调能令四时和而陰阳变陰阳变则能生万物是陰阳即夫妇也夫妇道和而能化生万物万物人爲之本故云万物之统也】可不慎与人能弘道无如命何甚哉妃匹之爱【索隐妃音配又如字】君不能得之於臣【索隐以言夫妇亲爱之情虽君父之尊而不夺臣子所好爱使移其本意是不能得也故曰匹夫不可夺志也】父不能得之於子况卑下乎既驩合矣或不能成子姓【索隐郑玄注礼记云姓者子姓谓衆孙也即赵飞鸞等是也】能成子姓矣或不能要其终【索隐按谓有始不能要其终也以言虽有

子姓而意不能要终如栗姬卫后等是也】岂非命也哉孔子罕称命盖难言之也非通幽明之变恶能识乎性命哉【索隐恶音鸟犹於何也】太史公曰秦以前尚略矣其详靡得而记焉汉兴吕娥姁【集解徐广曰姁音况羽反吕后姊字长姁索隐娥姁吕后字按汉书小颜云吕后名雉字娥姁】爲高祖正后男爲太子及晚节色衰爱弛而戚夫人有宠【索隐汉书云得定陶戚姬】其子如意几代太子者数矣及高祖崩吕氏夷戚氏诛赵王而高祖後宫唯独无宠疎远者得无恙【索隐尔雅云恙忧也一说古者野居露宿恙噬人虫也故人相恤云得无恙乎】吕后长女爲宣平侯张敖妻敖女爲孝惠皇后【索隐皇甫谧云名嫣】吕太后以重亲故欲其生子万方终无子诈取後宫人子爲子及孝惠帝崩天下初定未久继嗣不明於是贵外家王诸吕以爲辅而以吕禄女爲少帝后欲连固根本牢甚然无益也高后崩合葬长陵【集解駰案关中记云高祖陵在西吕后陵在东汉帝后同茔则爲合葬不合陵也诸陵皆如此】禄产等惧诛谋作乱大臣征之天诱其统【集解徐广曰一作衷】卒灭吕氏唯独置孝惠皇后居北宫【索隐在未央北故曰北宫正义括地志云北宫在雍州长安县西北十三里与桂宫相近在长安故城中】迎立代王是爲孝文帝奉汉宗庙此岂非天耶非天命孰能当之

薄太后父吴人姓薄氏秦时与故魏王宗家女魏媼通【索隐媼音乌老反然媼是妇人之老者通号故赵太后自称媼及刘媼卫媼之属是也】生薄姬而薄父死山陰因葬焉【索隐顾氏按冢墓记薄父冢在会稽县西北山上今犹有兆域音庄治反正义括地志云檝山在越州会稽县西北三里一名稷山檝音庄洽反】及诸侯畔秦魏豹立爲魏王而魏媼内其女於魏宫媼之许负所相相薄姬云当生天子是时项羽方与汉王相距荥阳天下未有所定豹初与汉击楚及闻许负言心独喜因背汉而畔中立更与楚连和汉使曹参等击虜魏王豹以其国爲郡而薄姬输织室豹已死汉王入织室见薄姬有色诏内後宫岁余不得幸始姬少时与管夫人赵子儿相爱约曰先贵无相忘已而管夫人赵子儿先幸汉王汉王坐河南宫成臯台【索隐按是河南宫之成臯台汉书作成臯灵台西征记云武牢城内有高祖殿西南有武库也正义括地志云洛州泛水县古东虢州故郑之制邑汉之成臯县也】此两美人相与笑薄姬初时约汉王闻之问其故两人具以实告汉王汉王心惨然怜薄姬是日召而幸之薄姬曰昨暮夜妾梦苍龙据吾腹高帝曰此贵徵也吾爲女遂成之一幸生男是爲代王其後薄姬希见高祖高祖崩诸御幸姬戚夫人之属吕太后怒皆幽之不得出宫而薄姬以希见故得出从子之代爲代王太后太后弟薄昭从如代代王立十七年高后崩大臣议立後疾外家吕氏强皆称薄氏仁善故迎代王立爲孝文皇帝而太后改号曰皇太后弟薄昭封爲轹侯【索隐地理志云轹县在河内恐地远非其封案长安东有轹道亭或当是所封也】薄太后母亦前死葬栢阳北於是乃追尊薄父爲灵文侯会稽郡置园邑三百家长丞已下吏奉守冢寢庙上食祠如法而栢阳北亦置灵文侯夫人园如灵文侯园仪薄太后以爲母家魏王後早失父母其奉薄太后诸魏有力者於是召复魏氏及尊赏赐各以亲疏受之薄氏侯者凡一人薄太后後文帝二年以孝景帝前二年崩葬南陵【索隐按庙记云在霸陵南十里故谓之南陵按今在长安东滻水东原上名曰少陰在霸陵西南故曰东望吾子西望吾夫是也正义括地志云南陵故县在雍州万年县东南二十四里汉南陵县本薄太后陵邑陵在东北去县六里】以吕后会葬长陵故特自起陵近孝文皇帝霸陵【集解徐广曰霸陵县有轹道亭】窦太后【索隐皇甫谧云名猗房】赵之清河观津人也【正义在冀州枣强县东北二十五里】吕太

后时窦姬以良家子入宫侍太后太后出宫人以赐诸王各五人窦姬与在行中窦姬家在清河欲如赵近家请其主遣宦者吏【正义谓宦者爲吏主发遣宫人也】必置我籍赵之伍中宦者忘之误置其籍代伍中籍奏诏可当行窦姬涕泣怨其宦者不欲往相强乃肯行至代代王独幸窦姬生女嫫【索隐嫫音疋消反】後生两男而代王王后生四男先代王未入立爲帝而王后卒後代王立爲帝而王后所生四男更病死孝文帝立数月公卿请立太子而窦姬长男最长立爲太子立窦姬爲皇后女嫫爲长公主其明年立少子武爲代王已而又徙梁是爲梁孝王窦皇后亲早卒葬观津【索隐摯虞注决录云窦太后父少遭秦乱隐身渔钓坠泉而死景帝立太后遣使者填父所坠渊起大坟於观津城南人闲号爲窦氏青山正义括地志云窦少君墓在冀州武邑县东南二十七里】於是薄太后乃诏有司追尊窦后父爲安成侯母曰安成夫人令清河置园邑二百家长丞奉守比灵文园法窦皇后兄窦长君【索隐决录云建字长君】弟曰窦广国字少君少君年四五岁时家贫爲人所略卖其家不知其处传十余家至宜阳爲其主入山作炭寒卧岸下百余人岸崩尽压杀卧者少君独得脱不死自卜数日当爲侯从其家之长安【索隐谓从逐其宜阳之主人家而皆往长安爲居也】闻窦皇后新立家在观津姓窦氏广国去时虽小识其县名及姓又长与其姊采桑墮用爲符信上书自陈窦皇后言之於文帝召见问之具言其故果是又复问他何以爲验对曰姊去我西时与我决於传舍中【索隐决别也传音转传舍谓邮亭传置之舍盖窦后初入宫时别其弟於传舍之中也】丐沐沐我【索隐丐音盖丐者乞也沐米潘也谓乞潘爲弟沐也】请食饭我乃去於是窦后持之而泣泣涕交横下侍御左右皆伏地泣助皇后悲哀乃厚赐田宅金钱封公昆弟家於长安【索隐公亦祖也谓皇后同祖之昆弟如窦婴即皇后从昆弟子之比亦得家於长安故刘氏云公昆弟谓广国等也】绛侯灌将军等曰吾属不死命乃且县此两人两人所出微不可不爲择师傅宾客又复效吕氏大事也於是乃选长者士之有节行者与居窦长君少君由此爲退让君子不敢以尊贵骄人窦皇后病失明文帝幸邯鄲慎夫人尹姬皆母子孝文帝崩孝景帝立乃封广国爲章武侯【索隐地理志县名属勃海正义括地志云沧州鲁城县】长君前死封其子彭祖爲南皮侯【索隐地理志县名属勃海正义括地志云故南皮城在沧州南皮县北四里汉南皮县也】吴楚反时窦太后从昆弟子窦婴任侠自喜将兵以军功爲魏其侯【索隐地理志县名属琅邪】窦氏凡三人爲侯窦太后好黄帝老子言帝及太子诸窦不得不读黄帝老子尊其术窦太后後孝景帝六岁建元六年崩【索隐当武帝建元六年此文是也而汉书作元光误也】合葬霸陵遗诏尽以东宫金钱财物赐长公主嫫

王太后槐里人【索隐皇甫谧云后名姁音志地理志右扶风槐里本名废丘正义括地志云犬丘故城一名槐里亦曰废丘城在雍州始平县东南十里也】母曰臧儿臧儿者故燕王臧荼孙也臧儿嫁爲槐里王仲妻生男曰信与两女【索隐即后及儿姁也】而仲死臧儿更嫁长陵田氏生男蚡胜臧儿长女嫁爲金王孙妇生一女矣而臧儿卜筮之曰两女皆当贵因欲奇两女【索隐奇者异之也汉书作倚倚依也】乃夺金氏金氏怒不肯予决乃内之太子宫太子幸爱之生三女一男男方在身时王美人梦日入其怀以告太子太子曰此贵徵也未生而孝文帝崩孝景帝即位王夫人生男【索隐即武帝也汉武故事云帝以乙酉年七月七日生於猗兰殿也】先是臧儿又入其少女儿姁【索隐姁音况羽反】儿姁生四男【索隐谓广川王越胶东王寄清河王舜常山王宪也】景帝爲太子时薄太后以薄氏女爲妃及景帝立立妃曰薄皇后皇后母子母宠薄太后崩废薄皇后景帝长男荣其母栗姬栗姬齐人也立

荣爲太子长公主嫖有女欲予爲妃栗姬妬而景帝诸美人皆因长公主见景帝得贵幸皆过栗姬【索隐过音戈谓踰之】栗姬日怨怒谢长公主不许长公主欲予王夫人王夫人许之长公主怒而日谗栗姬短於景帝曰栗姬与诸贵夫人幸姬会常使侍者祝唾其背挟邪媚道景帝以故望之【索隐望犹责望谓恨之也】景帝尝体不安心不乐属诸子爲王者於栗姬曰百岁後善视之栗姬怒不肯应言不逊景帝恚心嗾之而未发也【索隐嗾音衙汉书作卫衙犹恨也】长公主日誉王夫人男之美景帝亦贤之又有曩者所梦日符计未有所定王夫人知帝望栗姬因怒未解陰使人趣大臣立栗姬爲皇后大行奏事毕【索隐大行礼官行音衡】日子以母贵母以子贵【索隐此皆公羊传之文也】今太子母无号宜立爲皇后景帝怒曰是而所言邪遂案诛大行而废太子爲临江王栗姬愈恚恨不得见以忧死卒立王夫人爲皇后其男爲太子封皇后兄信爲盖侯【索隐地理志县名属太山】景帝崩太子袭号爲皇帝尊皇太后母臧儿爲平原君【正义德州县也】封田蚡爲武安侯【索隐地理志县名属魏郡正义括地志云武安故城在洺州武安县西南七里六国时赵邑汉武安县城也】胜爲周阳侯【索隐地理志县名属工郡正义括地志云周阳故城在绛州闻喜县东二十九里也】景帝十三男一男爲帝十二男皆爲王而儿姁早卒其四子皆爲王王太后长女号曰平阳公主【正义括地志云平阳故城即晋州城西面今平阳故城东面也城记云尧筑也】次爲南宫公主【正义南宫冀州县也】次爲林虑公主【索隐林虑县名属河内本名隆虑避殇帝讳改名林虑虑音庐正义林虑相州县也】盖侯信好酒田蚡胜贪巧於文辞王仲早死葬槐里追尊爲共侯置园邑二百家及平原君卒从田氏葬长陵置园比共侯园而王太后後孝景帝十六岁以元朔四年崩合葬阳陵【正义括地志云阳陵在雍州咸阳县东四十里】王太后家凡三人爲侯

卫皇后字子夫生微矣盖其家号曰卫氏【正义卫青传云父郑季爲吏给事平阳侯家与侯妾卫媼通生青故冒卫氏】出平阳侯邑【集解徐广曰平阳侯曹寿尚平阳公主】子夫爲平阳主讴者武帝初即位岁无子平阳主求诸良家子女十余人饰置家武帝祓【集解徐广曰三月上巳临水祓除谓之禊吕后本纪亦云三月祓还过轺道盖与游字相似故或定之也索隐小顔祓音废今亦音拂谓祓禊之游临水自洁故云祓除也】霸上还因过平阳主主见所侍美人上弗说既饮讴者进上望见独说卫子夫是日武帝起更衣子夫侍尚衣轩中得幸【正义尚主也於主衣车中得幸也】上还坐驪甚赐平阳主金千斤主因奏子夫奉送入宫子夫上车平阳主拊其背曰行矣强饭勉之即贵无相忘入宫岁余竟不复幸武帝择宫人不中用者斥出归之卫子夫得见涕泣请出上怜之复幸遂有身尊宠日隆召其兄卫长君弟青爲侍中而子夫後大幸有宠凡生三女一男【索隐三女谓诸邑石邑及卫长公主後封爲当利公主也】男名据【索隐即戾太子】初上爲太子时娶长公主女爲妃立爲帝妃立爲皇后姓陈氏【索隐汉武故事云后名阿娇即长公主嫖女也曾祖父婴堂邑侯传至午尚长公主生后也】无子上之得爲嗣大长公主有力焉【集解徐广曰即景帝姊嫖也】以故陈皇后骄贵闻卫子夫大幸恚几死者数矣上愈怒陈皇后挟妇人媚道其事颇觉於是废陈皇后【索隐汉书云女子楚服等坐爲皇后呪诅大逆无道相连诛者三百余人乃废后居长门宫故司马相如赋云陈皇后别在长门宫愁闷悲思奉黄金百斤爲相如取酒乃爲作颂以奏皇后复亲幸作颂信工也复亲幸之恐非实也】而立卫子夫爲皇后陈皇后母大长公主景帝姊也数让武帝姊平阳公主曰帝非我不得立已而弃捐吾女壹何不自喜而倍本乎平阳

公主曰用无子故废耳陈皇后求子与医钱凡九千万然竟无子卫子夫已立爲皇后先是卫长君死乃以卫青爲将军击胡有功封爲长平侯【索隐地理志县名属汝南】青三子在襁褓中皆封爲列侯及卫皇后所谓姊卫少儿少儿生子霍去病以军功封冠军侯【索隐地理志冠军属河阳】号骠骑将军青号大将军立卫皇后子据爲太子卫氏枝属以军功起家五人爲侯及卫后色衰赵之王夫人幸有子爲齐王【索隐名閔】王夫人早卒而中山李夫人有宠有男一人爲昌邑王【索隐名膊正义名贺】李夫人早卒【索隐李延年之女弟汉书云帝悼之李少翁致其形帝爲作赋】其兄李延年以音幸号协律协律者故倡也兄弟皆坐奸族是时其长兄广利爲二师将军伐大宛不及诛还而上既夷李氏後怜其家乃封爲海西侯【正义汉武帝令李广利征大宛国近西海故号海西侯也】他姬子二人爲燕王广陵王【索隐汉书云李姬生广陵王胥燕王旦也】其母无宠以忧死及李夫人卒则有尹婕妤之属更有宠然皆以倡见非王侯有土之女士不可以配人主也

褚先生曰【正义疑此元成之间褚少孙续之也】臣爲郎时问习汉家故事者锺离生曰王太后在民间时所生子女者【集解徐广曰名俗正义按後封修成君者】父爲金王孙王孙已死景帝崩後武帝已立王太后独在而韩王孙名嫣素得幸武帝承间白言太后有女在长陵也武帝曰何不早言乃使使往先视之在其家武帝乃自往迎取之辟道先驱旄骑出横城门【集解如淳曰横音光三辅黄图云北面西头门正义括地志云渭桥本名横桥架渭水上在雍州咸阳县东南二十二里按此桥对门也】乘輿驰至长陵当小市西入里里门闭暴开门乘輿直入此里通至金氏门外止使武骑围其宅爲其亡走身自往取不得也即使左右羣臣入呼求之家人惊恐女亡匿内中牀下扶持出门令拜谒武帝下车泣曰噉【索隐乌百反盖恹之辞尔正义噉责失声惊愕貌也】大姊何藏之深也诏副车载之回车驰还而直入长乐宫行诏门着引籍【正义武帝道上诏令通名状於门使引入至太后所】通到谒太后太后曰帝倦矣何从来帝曰今者至长陵得臣姊与俱来顾曰谒太后太后曰女某邪曰是也太后爲下泣女亦伏地泣武帝奉酒前爲寿奉钱千万奴婢三百人公田百顷甲第以赐姊太后谢曰爲帝费焉於是召平阳主南宫主林虑主三人俱来谒见姊因号曰修成君有子男一人女一人男号爲修成子仲【索隐金氏之甥修成君之子也而名仲者与帝外祖王氏同字恐非也】女爲诸侯王王后【集解徐广曰嫁爲淮南王安太子妃也】此二子非刘氏以故太后怜之修成子仲骄恣陵折吏民皆患苦之

卫子夫立爲皇后后弟卫青字仲卿以大将军封爲长平侯四子长子伉爲侯世子侯世子常侍中贵幸其三弟皆封爲侯各千三百户一曰陰安侯【索隐名不疑地理志陰安县名属魏郡正义括地志云陰安故城在魏州顿丘县北六十里也】二曰发干侯【索隐名登地理志发干县名属东郡正义括地志云发干故城在博州堂邑县西南二十三里】三曰宜春侯【索隐名伉地理志宜春县名属汝南正义括地志云宜春故城在豫州汝阳县西六十七里】贵震天下天下歌之曰生男无喜生女无怒独不见卫子夫霸天下是时平阳主寡居当用列侯尚主主与左右议长安中列侯可爲夫者皆言大将军可主笑曰此出吾家常使令骑从我出入尔柰何用爲夫乎左右侍御者曰今大将军姊爲皇后三子爲侯富贵振动天下主何以易之乎於是主乃许之言之皇后令白之武帝乃诏卫将军尚平阳公主焉褚先生曰丈夫龙变传曰蛇化爲龙不变其文家化爲国不变其姓丈夫当时富贵百恶灭除光耀荣华贫贱之

时何足累之哉

武帝时幸夫人尹婕妤【索隐韦昭云婕承好助也一云美好也声类云幸也字亦从女汉旧仪云皇后爲婕妤下輿礼比丞相】邢夫人号姁娥衆人谓之姁何【索隐服虔云姁音近妍徐广音五耕反邹诞生音莖字林音五经反说文解字云姁长也好也许慎云秦晋之间谓好爲姁又方言云美貌谓之姁娥汉旧仪云姁娥秩比将军御史大夫】姁何秩比中二千石【索隐崔浩云中犹满也汉制九卿以上秩一岁满二千斛又汉官仪云中二千石俸月百八十斛】容华秩比二千石【索隐二千石是郡守之秩汉官仪云其俸月百二十斛又有眞二千石者如淳云诸侯王相在郡守上秩眞二千石汉律眞二千石俸月二万按是二万?则二万斗亦是二千石也崔浩云列卿以上秩石皆正二千石则是眞二千石也其云中二千石亦不满二千盖千八九百尔此崔氏说今兼引而解之】婕妤秩比列侯常从婕妤迁爲皇后尹夫人与邢夫人同时并幸有诏不得相见尹夫人自请武帝愿望见邢夫人帝许之即令他夫人饰从御者数十人爲邢夫人来前尹夫人前见之曰此非邢夫人身也帝曰何以言之对曰视其身貌形状不足以当人主矣於是帝乃诏使邢夫人衣故衣独身来前尹夫人望见之曰此真是也於是乃低头俛而泣自痛其不如也谚曰美女入室恶女之仇

褚先生曰浴不必江海要之去垢马不必麒麟要之善走士不必贤世要之知道女不必贵种要之贞好传曰女无美恶入室见妬士无贤不肖入朝见嫉美女者恶女之仇岂不然哉

钩弋夫人姓赵氏河间人也【索隐汉书云武帝过河间望气者言此有奇女天子亟使使召之女两手皆拳上自披之手即伸由是得幸号曰拳夫人後居钩弋宫号曰钩弋夫人列僊传云发手得一玉钩故号焉黄图云钩弋宫在城外汉武故事云宫在直门南庙记云宫有千门万户不可记其名也昭帝即位追尊太后父赵父爲顺成侯正义括地志云钩弋宫在长安城中门名尧母门也】得幸武帝生子一人昭帝是也武帝年七十乃生昭帝昭帝立时年五岁尔【集解徐广曰武帝崩年正七十昭帝年八岁尔索隐此褚先生之误汉书云元始三年生昭帝又误按元始当作太始也】卫太子废後未复立太子而燕王旦上书愿归国入宿卫武帝怒立斩其使者於北阙上居甘泉宫召画工图画周公负成王也於是左右羣臣知武帝意欲立少子也後数日帝谴责钩弋夫人夫人脱簪珥叩头帝曰引持去送掖庭狱夫人还顾帝曰趣行女不得活夫人死云阳宫【索隐三辅故事云葬甘泉宫南後昭帝起云陵邑三千户汉武故事云既殡香闻十里上疑非常人发棺无尸衣履存焉正义括地志云云阳宫秦之甘泉宫在雍州云阳县西北八十里秦始皇作甘泉宫去长安三百里黄帝以来祭圜丘处也】时暴风扬尘百姓感伤使者夜持棺往葬之【正义括地志云云阳陵汉钩弋夫人陵也在云阳县西北五十八里孝武帝钩弋赵婕妤昭帝之母齐人姓赵少好清静六年卧病右手卷饮食少望气者云东北有贵人推而得之召到姿色甚佳武帝持其手伸之得玉钩後生昭帝武帝末年弑夫人殡之而尸香一日昭帝更葬之棺但存丝履也宫记云武帝思之爲起通灵台於甘泉常有一青鸟集台上往来至宣帝时乃止】封识其处其後帝闲居问左右曰人言云何左右对曰人言且立其子何去其母乎帝曰然是非儿曹愚人所知也往古国家所以乱也由主少母壮也女主独居骄蹇淫乱自恣莫能禁也女不闻吕后邪故诸爲武帝生子者无男女其母无不谴死岂可谓非贤圣哉昭然远见爲後世计虑固非浅闻愚儒之所及也諡爲武

岂虚哉

【索隐述赞曰礼贵夫妇易叙乾坤配阳成化比月居尊河洲降淑天曜垂轩德着任姒庆流娥嫫建我炎历斯道克存吕权大宝寔善玄言自兹已降立嬖以恩内无常主後嗣不繁】

史记卷四十九

史记卷四十九考证

外戚世家於是废陈皇后索隐废后居长门宫故司马相如赋云陈皇后别在长门宫愁闷悲思奉黄金百斤为相如取酒乃为作颂以奏皇后复亲幸作颂信工也复亲幸之恐非实也○【臣照】按复幸之说不虚但不复其位耳观下文求子云云非复幸於帝亦何求之有

而中山李夫人有宠有男一人为昌邑王索隐名膊正义名贺○【臣照】按昌邑哀王髡李夫人子也贺乃髡子入立而复废者正义误

而上既夷李氏後怜其家乃封为海西侯○余有丁曰匈奴大宛传广利封时李氏未诛後以将军伐匈奴闻其家用巫蛊族乃降匈奴此文误

褚先生曰○【臣照】按正义文则是张守节时尚无褚先生曰四字故有此注此四字後人所加

卫青四子长子伉为侯世子其三弟皆封为侯○【臣照】按卫将军传青三子伉为宜春侯不疑为陰安侯登为发干侯伉坐法失侯青卒乃嗣长平侯此云四子者但见一门四侯则伉居长自当嗣侯余三侯自各为一弟而不知伉之一封一爵也此褚先生之误索隐亦只注三侯而於四子三弟之说略不置辨

史记卷四十九考证

卷五十

钦定四库全书卷

史记卷五十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

楚元王世家第二十

楚元王刘交者高祖之同母少弟也字游【正义年表云都彭城集解徐广曰一作父索隐汉书作同父言同父以明异母也】高祖兄弟四人长兄伯伯蚤卒始高祖微时尝辟事时时与宾客过巨嫂食【集解徐广曰汉书云丘嫂也索隐刘氏云巨一作丘应劭云丘姓也孟康云丘空也兄亡空有嫂也今此作巨巨大也谓长嫂也】嫂厌叔叔与客来嫂详为羹尽栝釜【索隐栝音历谓以杓历釜旁使为声汉书作轘音劳】宾客以故去已而视釜中尚有羹高祖由此怨其嫂及高祖为帝封昆弟而伯子独不得封太上皇以为言高祖曰某非忘封之也为其母不长者耳於是乃封其子信为羹颺侯【集解徐广曰羹颺侯以高祖七年封封十三年高后元年有罪削爵一级为閼内侯索隐羹颺爵号非县名以其栝釜故也正义括地志云羹颺山在妫州怀戎县东南十五里按高祖取其山名为侯号者怨故也】而王次兄仲於代【集解徐广曰次兄名喜字仲以六年立为代王其年罢卒諡顷王有子曰濞】高祖六年已禽楚王韩信於陈乃以弟交为楚王都彭城【索隐汉书云楚王王薛郡东海彭城三十六县也】即位二十三年卒子夷王郢立【索隐汉书名郢客也】夷王四年卒子王戊立王戊立二十年冬坐为薄太后服私奸削东海郡【索隐汉书云私奸服舍中姚察云奸於服舍非必宫中又按集注服?云私奸中人以罪重故至削郡也】春戊与吴王合谋反其相张尚太傅赵夷吾谏不听戊则杀尚夷吾起兵与吴西攻梁破棘壁【正义括地志云大棘故城在宋州宁陵县西七十里州即梁棘壁】至昌邑南【正义括地志云有梁丘故城在曹州成武县东北三十二里也】与汉将周亚夫战汉絶吴楚粮道士卒饥吴王走楚王戊自杀军遂降汉汉已平吴楚孝景帝欲以德侯子续吴【集解徐广曰德侯名广吴王濞之弟也其父曰仲】以元王子礼续楚竇太后曰吴王老人也宜为宗室顺善今乃首率七国纷乱天下奈何续其後不许吴许立楚後是时礼为汉宗正乃拜礼为楚王奉元王宗庙是为楚文王文王立三年卒子安王道立安王二十二年卒子襄王经立襄王立十四年卒子王纯代立王纯立地节二年中人上书告楚王谋反王自杀国除入汉为彭城郡【集解徐广曰纯立十七年卒諡节三子延壽立十九年死索隐太史公唯记王纯为国人告反国除盖延壽後更封至十九年又谋反诛死

故不同也正义汉书云王纯嗣十六年子延壽嗣与赵何齐谋反延壽自杀立三十二年国除与此不同地节是宣帝年号去天汉四年二十九年仍隔昭帝世言到地节二年以下者盖褚先生误也】赵王刘遂者其父高祖中子【正义年表云都邯鄲】名友字曰幽幽王以忧死故为幽高后王吕禄於赵一岁而高后崩大臣诛诸吕吕禄等乃立幽王子遂为赵王孝文帝即位二年立遂弟辟疆【索隐音壁疆又音辟疆】取赵之河间郡为河间王以为文王【正义河间今瀛州也】立十三年卒子哀王福立一年卒无子絶後国除入於汉遂既王赵二十六年孝景帝时坐晁错以适削赵王常山之郡吴楚反赵王遂与合谋起兵其相建德内史王悍諫不听【索隐建德其相名史先失姓也】遂烧杀建德王悍发兵屯其西界欲待吴与俱西北使匈奴与连和攻汉汉使曲周侯酈寄击之赵王遂还城守邯鄲相距七月吴楚败於梁不能西匈奴闻之亦止不肯入汉边栻布自破齐还乃并兵引水灌赵城赵城坏赵王自杀邯鄲遂降【正义邯鄲洺州县也】赵幽王絶後

太史公曰国之将兴必有祯祥君子用而小人退国之将亡贤人隐乱臣贵使楚王戊毋刑申公遵其言【索隐汉书申公名培王戊胥靡之】赵任防与先生【集解駟案赵尧传曰赵人防与公也索隐此及汉书虽不见赵不用防与公盖当时犹知事迹或别有所见故太史公明引以结其赞】岂有篡杀之谋为天下戮哉贤人乎贤人乎非质有其内恶能用之哉甚矣安危在出令存亡在所任诚哉是言也

【索隐述赞曰汉封同姓楚有令名既?韩信王失彭城穆生致醴韦孟作程王戊弃德与吴连兵太后命礼为楚罪轻文襄继立世挺才英如何赵遂代殒厥声兴亡之兆所任宜明】

史记卷五十

史记卷五十考证

楚元王世家嫂详为羹尽栢釜索隐谓以杓历釜旁使为声○杓历釜监本讹作枸历蚤今改正

戊则杀尚夷吾○徐孚远曰则杀疑贼杀也

取赵之河间郡为河间王以为文王立十三年卒○【臣照】按文义似当云取赵之河间郡以为河间王文王立十三年卒

史记卷五十考证

<史部,正史类,史记>

卷五十一

钦定四库全书

史记卷五十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

荆燕世家第二十一

荆王刘贾诸刘者不知其何属【集解駰案年表云都吴也汉书贾高帝从父兄索隐注引汉书则班固或别有所见也】初起时汉王元年还定三秦刘贾为将军定塞地【索隐即桃林之塞】从东击项籍汉四年汉王之败成臯北渡河得张耳韩信军军修武深沟高垒使刘贾将二万人骑数百渡白马津入楚地【正义括地志云黎阳一名白马津在滑州白马县北三十里按贾从此津南过入楚地也】烧其积聚以破其业无以给项王军食已而楚兵击刘贾贾辄壁不肯与战而与彭越相保汉五年汉王追项籍至固陵【集解徐广曰在阳夏正义括地志云固陵陵名在陈州宛丘县西北四十二里】使刘贾南渡淮围寿春【正义今寿州寿春县是也】还至使人间招楚大司马周殷周殷反楚佐刘贾举九江迎武王黥布兵皆会垓下共击项籍汉王因使刘贾将九江兵与太尉卢绾西南击临江王共敖【索隐共敖之子】共敖已死以临江为南郡【正义今荆州也】汉六年春会诸侯於陈【正义今陈州也】废楚王信囚之分其地为二国当是时也高祖子幼昆弟少又不贤欲王同姓以镇天下乃诏曰将军刘贾有功及择子弟可以为王者羣臣皆曰立刘贾为荆王王淮东五十二城【索隐表云刘贾都吴又汉书以东阳郡封贾东阳即临淮故云王淮东正义括地志云西北四十里盖此县是也】高祖弟交为楚王王淮西三十六城【正义淮以西徐泗濠等州也】因立子肥为齐王始王昆弟刘氏也高祖十一年秋淮南王黥布反东击荆荆王贾与战不胜走富陵【索隐地理志县名属临淮正义括地志云富陵故城在楚州盱眙县东北六十里】为布军所杀高祖自击破布十二年立沛侯刘濞为吴王王故荆地

燕王刘泽者诸刘远属也【集解駰案汉书泽高祖从祖昆弟索隐楚汉春秋田子春说张卿云刘泽宗家也按言宗家似远矣然则班固言从祖昆弟当别有所见】高帝三年泽为郎中高帝十一年泽以将军击陈豨得王黄为营陵侯【索隐地理志县名在北海正义括地志云营陵故城在青州北海县南三十里】高后时齐人田生游之资以画干营陵侯泽【集解晋灼曰楚汉春秋田子春服?曰以计画干之也文颖曰以工画得宠也索隐两家之义并通】泽

大说之用金二百斤为田生壽田生已得金即归齐二年泽使人谓田生曰弗与矣【集解孟康曰与党与言不复与我为与也文颖曰不得与汝相知】田生如长安不见泽而假大宅令其子求事吕后所幸大谒者张子卿【集解徐广曰名泽駟案如淳曰阍人也】居数月田生子请张卿临亲修具张卿许往田生盛帷帐共具譬如列侯张卿惊酒酣乃屏人说张卿曰臣观诸侯王邸第百余皆高祖一切功臣【索隐此一切犹一例同时也非如他一切训权时也】今吕氏雅故本推轂高帝就天下【集解如淳曰吕公知高祖相贵以女妻之推轂使为长者瓚曰谓诸吕共推轂高祖征伐成帝业雅正意也索隐雅训素也谓吕氏素心奉推高祖取天下若人推轂欲前进涂然也推音昌谁反】功至大又亲戚太后之重太后春秋长诸吕弱太后欲立吕产为吕王王代太后又重发之【集解文颖曰欲发之恐大臣不听邓展曰重难发事】恐太臣不听今卿最幸大臣所敬何不风大臣以闻太后太后必喜诸吕已王万户侯亦卿之有【正义高后纪云封张卿为建陵侯】太后心欲之而卿为内臣不急发恐祸及身矣张卿大然之乃风大臣语太后太后朝因问大臣大臣请立吕产为吕王太后赐张卿千斤金张卿以其半与田生田生弗受因说之曰吕产王也诸大臣未大服今营陵侯泽诸刘为大将军独此尚缺望【索隐缺音决又音窥睡反】今卿言太后列十余县王之彼得王喜去诸吕王益固矣张卿入言太后然之乃以营陵侯刘泽为琅邪王琅邪王乃与田生之国田生劝泽急行毋留出关太后果使人追止之已出即还及太后崩琅邪王泽乃曰帝少诸吕用事刘氏孤弱乃引兵与齐王合谋西【集解駟案汉书音义曰泽至齐为齐王所刼不得去乃说王求诣京师齐具车送之不为本与齐合谋也索隐汉书齐王传云使祝午刼琅邪王至齐因留琅邪王不得反国泽乃说求入关齐乃送之与此文不同者刘氏以为燕齐两史各言其主立功之迹太史公间疑遂各记之则所谓实录】欲诛诸吕至梁闻汉遣灌将军屯荥阳泽还兵备西界遂跳驱至长安【集解駟案汉书音义曰跳驱驰至长安也索隐跳他雕反脱独去也又音条谓疾去也】代王亦从代至诸将相与琅邪王共立代王为天子天子乃徙泽为燕王乃复以琅邪予齐复故地【集解李奇曰本齐地分以王泽今复与齐也】泽王燕二年薨諡为敬王传子嘉为康王至孙定国与父康王姬姁生子男一人夺弟妻爲姬与子女三人姁定国有所欲诛杀臣肥如令郢人【集解如淳曰定国自欲有所杀余臣肥如令郢人以告之索隐如淳意以肥如亦臣名令郢人以告定国也小顔以为定国欲有所诛杀余臣而肥如令郢人乃告定国也按地理志肥如在辽西】郢人等告定国定国使谒者以他法劾捕格杀郢人以灭口至元朔元年郢人昆弟复上书具言定国陰事以此发觉诏下公卿皆议曰定国禽兽行乱人伦逆天当诛上许之定国自杀国除为郡

太史公曰荆王王也由汉初定天下未集故刘贾虽属然以策为王填淮江之间刘泽之王权激吕氏【索隐谓田子春欲王刘泽先使张卿说封吕产乃恐以大臣缺望泽卒得王故为权激诸吕也】然刘泽卒南面称孤者三世事发相重岂不为伟乎【集解晋灼曰泽以金与田生以事张卿张卿言之吕后而刘泽得王故曰事发相重或曰事起於相重也索隐谓先发吕氏令重而我亦得其功是事发相重也伟盛也盖盛其能激发也】

【索隐述赞曰刘贾初从首定三秦既渡白马遂围壽春始迎黥布絶间周殷赏功胙土与楚为隣营陵始爵勲由击陈田生游说受赐千斤权激诸吕事发荣身徙封传嗣亡於郢人】

史记卷五十一

史记卷五十一考证

荆燕世家使刘贾将二万人骑数百渡白马津入楚地烧其积聚○按高纪此事在汉三年项羽本纪与此俱作汉四年

汉五年汉王追项籍至固陵使刘贾南渡淮围壽春○高纪在四年

以画干营陵侯泽集解文颖曰以工画得宠也○黄氏日抄曰田生所干刘泽之画即明年所施於张子卿之计曰弗与云者弗与我施行所画促之之辞尔泽刘氏也而王诸吕乃出其计其罪大矣故太史公之赞曰刘泽之王权徼吕氏而释之者弗察谓画为工画谓与为党与夫於干刘泽不言其所画而於干张子卿言之文法之相为先後如此而释之者弗能察故夫史迁之文深远矣

史记卷五十一考证

卷五十二

钦定四库全书

史记卷五十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

齐悼惠王世家第二十二

齐悼惠王刘肥者高祖长庶男也【正义年表云都临淄】其母外妇也曰曹氏高祖六年立肥为齐王食七十城诸民能齐言者皆予齐王【索隐谓其语音及名物异於楚魏孟康云此时人多流亡故使齐言者皆还齐王】齐王孝惠帝兄也孝惠帝二年齐王入朝惠帝与齐王燕饮亢礼如家人【索隐谓齐王是兄不为君臣礼而乃自亢敌如家人行兄弟之礼故太后怒】吕太后怒且诛齐王齐王惧不得脱乃用其内史黡计献城阳郡以为鲁元公主汤沐邑【正义括地志云濮州雷泽县本汉城阳县按後为郡也】吕太后喜乃得辞就国悼惠王即位十三年以惠帝六年卒子襄立是为哀王哀王元年孝惠帝崩吕太后称制天下事皆决於高后二年高后立其兄子酈侯吕台为吕王【集解徐广曰酈一作酈索隐二字皆音孚酈县名在冯翊酈县在南阳台音眙吕后兄子正义按酈音呈益反括地志云故酈城在登州新城县西北四十里盖此县是也】割齐之济南郡为吕王奉邑【正义括地志云济南故城在淄州长山县西北三十五里】哀王三年其弟章入宿卫於汉吕太后封为朱虚侯【索隐地理志县名属琅邪】以吕禄女妻之後四年封章弟兴居为东牟侯【索隐地理志县名属东莱】皆宿卫长安中哀王八年高后割齐琅邪郡【正义今沂州也】立营陵侯刘泽为琅邪王其明年赵王友入朝幽死于邸三赵王皆废高后立诸吕为三王【集解徐广曰燕赵梁】擅权用事朱虚侯年二十有气力忿刘氏不得职尝入侍高后燕饮高后令朱虚侯刘章为酒吏章自请曰臣将种也请得以军法行酒高后曰可酒酣章进饮歌舞已而曰请为太后言耕田歌高后儿子畜之笑曰顾而父知田耳若生而为王子安知田乎【索隐顾犹念也而及若皆训汝】章曰臣知之太后曰试为我言田章曰深耕概种立苗欲疏非其种者锄而去之吕后默然顷之诸吕有一人醉亡酒章追拔劔斩之而还报曰有亡酒一人臣谨行法斩之太后左右皆大惊业已许其军法无以罪也因罢自是之後诸吕惮朱虚侯虽大臣皆依朱虚侯刘氏为益强其明年高后崩赵王吕禄为上将军吕王产为相国皆居长安中聚兵以威大臣欲为乱朱虚侯章以吕禄女为妇知其谋乃使人陰出告其兄齐王欲令发兵西朱虚侯东牟侯为内应以诛诸吕因立齐王为帝齐王既闻此计乃与其舅父驷钧郎中令祝午中尉魏勃陰谋

发兵【索隐舅谓舅父犹姨称姨母】齐相召平闻之【索隐广陵人召平与东陵侯召平及此召平皆似别人也功臣表平子奴以父功封黎侯也】乃发卒卫王宫魏勃给召平曰王欲发兵非有汉虎符验也而相君围王固善勃请为君将兵卫王召平信之乃使魏勃将兵围王宫勃既将兵使围相府召平曰嗟乎道家之言当断不断反受其乱乃是也遂自杀於是齐王以驺钧为相魏勃为将军祝午为内史悉发国中兵使祝午东诈琅邪王曰吕氏作乱齐王发兵欲西诛之齐王自以儿子年少不习兵革之事愿举国委大王大王自高帝将也习战事齐王不敢离兵【索隐服?云不敢离其兵而到琅邪】使臣请大王幸之临菑见齐王计事并将齐兵以西平关中之乱琅邪王信之以为然西驰见齐王齐王与魏勃等因留琅邪王而使祝午尽发琅邪国而并将其兵琅邪王刘泽既见欺不得反国乃说齐王曰齐悼惠王高皇帝长子推本言之而大王高皇帝适长孙也当立今诸大臣狐疑未有所定而泽於刘氏最为长年大臣固待泽决计今大王留臣无为也不如使我入关计事齐王以为然乃益具车送琅邪王琅邪王既行齐遂举兵西攻吕国之济南於是齐哀王遗诸侯王书曰高帝平定天下王诸子弟悼惠王於齐悼惠王薨惠帝使留侯张良立臣为齐王惠帝崩高后用事春秋高听诸吕擅废高帝所立又杀三赵王【正义隐王如意幽王友梁王恢徙燕赵并高祖子也】灭梁燕赵【正义梁王恢燕王建梁王恢徙赵分灭无後也】以王诸吕分齐国为四【索隐谓济南琅邪城阳并齐为四也正义琅邪郡封刘泽济南郡以为吕王奉邑城阳为鲁元公主汤沐邑也】忠臣进谏上惑乱不听今高后崩皇帝春秋富【索隐小顔云年幼也比之於才方未匱竭故谓之富也】未能治天下固恃大臣诸将今诸吕又擅自尊官聚兵严威劫列侯忠臣矫制以令天下宗庙所以危今寡人率兵入诛不当为王者汉闻齐发兵而西相国吕产乃遣大将军灌婴东击之灌婴至荥阳乃谋曰诸吕将兵居关中欲危刘氏而自立我今破齐还报是益吕氏资也乃留兵屯荥阳使使喻齐王及诸侯与连和以待吕氏之变而共诛之齐王闻之乃西取其故济南郡亦屯兵於齐西界以待约吕禄吕产欲作乱关中朱虚侯与太尉勃丞相平等诛之朱虚侯首先斩吕产於是太尉勃等乃得尽诛诸吕而琅邪王亦从齐至长安大臣议欲立齐王而琅邪王及大臣曰齐王母家驺钧恶戾虎而冠者也【集解张晏曰言钧恶戾如虎而着冠】方以吕氏故几乱天下今又立齐王是欲复为吕氏也代王母家薄氏君子长者且代王又亲高帝子於今见在且最为长以子则顺以善人则大臣安於是大臣乃谋迎立代王而遣朱虚侯以诛吕氏事告齐王令罢兵灌婴在荥阳闻魏勃本教齐王反既诛吕氏罢齐兵使使召责问魏勃勃曰失火之家岂暇先言大人而後救火乎【索隐此盖旧俗之言谓救火之急不暇先啓家长也亦犹国家有难不暇待诏命也】因退立股战而栗恐不能言者终无他语灌将军熟视笑曰人谓魏勃勇妄庸人耳【索隐妄庸言凡妄庸劣之人】何能为乎乃罢魏勃【索隐罢谓不罪而放遣之】魏勃父以善鼓琴见秦皇帝及魏勃少时欲求见齐相曹参家贫无以自通乃常独早夜扫齐相舍人门外相舍人恠之以为物而伺之【索隐姚氏云物恠物】得勃勃曰愿见相君无因故为子扫欲以求见於是舍人见勃曹参因以为舍人一为参御言事参以为贤言之齐悼惠王悼惠王召见则拜为内史始悼惠王得自置二千石及悼惠王卒而哀王立勃用事重於齐相王既罢兵归而代王来立是为孝文帝孝文帝元年尽以高后时所割齐之城阳琅邪济南郡复与齐而徙琅邪王王燕益封朱虚侯东牟侯各二千户是岁齐哀王卒太子侧立是为文王齐文王元年汉以齐之城阳郡立朱虚侯为城阳王以齐济北郡【正义今济州济北王所都】立东牟侯为济北王二年济北王反汉诛杀之地入于汉後二年孝文帝尽封齐悼惠王子罢军等七人皆为列侯【正义罢音疲】齐文

王立十四年卒无子国除地入于汉後一岁孝文帝以所封悼惠王子分齐为王齐孝王将闾以悼惠王子扬虚侯为齐王故齐别郡尽以王悼惠王子子志为济北王子辟光为济南王子贤为菑川王子卬为胶西王子雄渠为胶东王与城阳齐凡七王【索隐谓将闾为齐王志为济北王卬胶西王辟光济南王贤菑川王章城阳王雄渠为胶东王】齐孝王十一年吴王濞楚王戊反兴兵西告诸侯曰将诛汉贼臣鼂错以安宗庙胶西胶东菑川济南皆擅发兵应吴楚欲与齐齐孝王狐疑城守不听三国兵共围齐【集解张晏曰胶西菑川济南也】齐王使路中大夫告於天子【集解张晏曰姓路为中大夫索隐史失名故言姓及官顾氏按路氏谱中大夫名卬也卬五刚反】天子复令路中大夫还告齐王善坚守吾兵今破吴楚矣路中大夫至三国兵围临菑数重无从入三国将刼与路中大夫盟曰若反言汉已破矣齐趣下三国不且见屠路中大夫既许之至城下望见齐王曰汉已发兵百万使太尉周亚夫击破吴楚方引兵救齐齐必坚守无下三国将诛路中大夫齐初围急陰与三国通谋约未定会闻路中大夫从汉来喜及其大臣乃复劝王毋下三国居无何汉将栾布平阳侯等兵至齐【索隐平阳侯按表是简侯曹奇】击破三国兵解齐围已而复闻齐初与三国有谋将欲移兵伐齐齐孝王惧乃饮药自杀景帝闻之以为齐首善以迫刼有谋非其罪也乃立孝王太子寿为齐王是为懿王续齐後而胶西胶东济南菑川王咸诛灭地入于汉徙济北王王菑川齐懿王立二十二年卒子次景立是为厉王齐厉王其母曰纪太后太后取其弟纪氏女为厉王后王不爱纪氏女太后欲其家重宠【索隐重直龙反谓欲世宠贵於王宫】令其长女纪翁主入王宫【索隐如淳云诸王女云翁主称其母姓故谓之纪翁主】正其後宫毋令得近王欲令爱纪氏女王因与其姊翁主姁齐有宦者徐甲入事汉皇太后【索隐谓王太后武帝母也】皇太后有爱女曰修成君修成君非刘氏【集解张晏曰王太后前嫁金氏所生】太后怜之修成君有女名娥太后欲嫁之於诸侯宦者甲乃请使齐必令王上书请娥皇太后喜使甲之齐是时齐人主父偃知甲之使齐以取后事亦因谓甲即事成幸言偃女愿得充王後宫甲既至齐风以此事纪太后大怒曰王有后後宫具备且甲齐贫人急【集解徐广曰一作及】乃为宦者入事汉无补益乃欲乱吾王家且主父偃何为者乃欲以女充後宫徐甲大穷还报皇太后曰王已愿尚娥然有一害恐如燕王燕王者与其子昆弟奸新坐以死亡国故以燕感太后太后曰无复言嫁女齐事事浸得不得闻於天子主父偃由此亦与齐有郤主父偃方幸於天子用事因言齐临菑十万户市租千金【索隐市租谓所卖之物出租日得千金言齐人衆而且富也】人衆殷富巨於长安此非天子亲弟爱子不得王此今齐王於亲属益疎乃从容言吕太后时齐欲反吴楚时孝王几为乱今闻齐王与其姊乱於是天子乃拜主父偃为齐相且正其事主父偃既至齐乃急治王後宫宦者为王通於姊翁主所者令其辞证皆引王王年少惧大罪为吏所执诛乃饮药自杀絶无後是时赵王惧主父偃一出废齐恐其渐疎骨肉乃上书言偃受金及轻重之短【索隐谓偃挟齐不娶女之恨因言齐之短为轻重之辞盖言临菑富及吴楚孝王时事是也】天子亦既囚偃公孙弘言齐王以忧死母後国入汉非诛偃无以塞天下之望遂诛偃齐厉王立五年死母後国入于汉齐悼惠王後尚有二国城阳及菑川菑川地比齐天子怜齐为悼惠王冢园在郡割临菑东环悼惠王冢园邑尽以予菑川以奉悼惠王祭祀城阳景王章齐悼惠王子【正义年表云都莒也】以朱虚侯与大臣共诛诸吕而章身首先斩相国吕王产於未央宫孝文帝既立益封章二千户赐金千斤孝文二年以齐之城阳郡立章为城阳王立二年卒子喜立是为共王共王八年徙王淮南【索隐当孝文帝之十二年也正义年表云都陈也】四年复还王城阳凡三十三年卒子建延立是为顷王顷王二十八

年卒子义立是为敬王敬王九年卒子武立是为惠王惠王十一年卒子顺立是为荒王荒王四十六年卒子恢立是为戴王【集解徐广曰甘露二年】戴王八年卒子景立至建始三年十五岁卒【正义建始成帝年号从建始四年上至天汉四年六十七矣盖褚先生次之】济北王兴居齐悼惠王子【正义都济州也】以东牟侯助大臣诛诸吕功少及文帝从代来兴居曰请与太仆婴入清宫废少帝共与大臣尊立孝文帝孝文帝二年以齐之济北郡立兴居为济北王与城阳王俱立立二年反始大臣诛吕氏时朱虚侯功尤大许尽以赵地王朱虚侯尽以梁地王东牟侯及孝文帝立闻朱虚东牟之初欲立齐王故绌其功及二年王诸子乃割齐二郡以王章兴居章兴居自以失职夺功章死而兴居闻匈奴大入汉汉多发兵使丞相灌婴击之文帝亲幸太原以为天子自击胡遂发兵反於济北天子闻之罢丞相及行兵皆归长安使棘蒲侯柴将军击破虏济北王【集解张晏曰柴武】王自杀地入于汉为郡後十二年文帝十六年复以齐悼惠王子安都侯志为济北王【索隐地理志安都阨正义安都故城在瀛州高阳县西南三十九里】十一年吴楚反时志坚守不与诸侯合谋吴楚已平徙志王菑川王济南王辟光齐悼惠王子【正义辟音璧都济南郡】以勒侯孝文十六年为济南王【索隐勒汉书作枋皆音力地理志县名属平原也】十一年与吴楚反汉击破杀辟光以济南为郡地入于汉菑川王贤齐悼惠王子【正义年表云菑川王都剧故城在青州寿光县西三十一里】以武城侯文帝十六年为菑川王【索隐按地里志县名属平原也正义贝州县】十一年与吴楚反汉击破杀贤天子因徙济北王志王菑川志亦齐悼惠王子以安都侯王济北菑川王反母後乃徙济北王王菑川凡立三十五年卒諡为懿王子建代立是为靖王二十年卒子遗代立是为顷王三十六年卒子终古立是为思王二十八年卒子尚立是为孝王五年卒子横立至建始三年十一岁卒【正义亦褚少孙次之】胶西王卬齐悼惠王子【正义卬五郎反年表云都高苑括地志云高苑故城在淄州长山县北四里】以昌平侯文帝十六年为胶西王【正义括地志云昌平故城在幽州东南六十里也】十一年与吴楚反汉击破杀卬地入于汉为胶西郡胶东王雄渠齐悼惠王子【正义年表云都即墨按即墨故城在莱州胶东县南六十里】以白石侯文帝十六年为胶东王【索隐地理志县名属金城正义白石古城在德州安德县北二十里】十一年与吴楚反汉击破杀雄渠地入于汉为胶东郡

太史公曰诸侯大国无过齐悼惠王以海内初定子弟少激秦之无尺土封故大封同姓以填万民之心及後分裂固其理也

【索隐述赞曰汉矫秦制树屏自强表海大国悉封齐王吕后肆怒乃献城阳哀王嗣立其力不量朱虚仕汉功大策长东牟受赏称乱貽殃胶东济北雄渠辟光齐虽七国忠孝者昌】

史记卷五十二

史记卷五十二考证

齐悼惠王世家懿王子次景立是为厉王○年表作次昌

修成君有女名娥太后欲嫁之於诸侯○【臣照】按褚先生补外戚世家云修成君女一人

徐广以为嫁淮南者也年表齐厉王以元朔二年薨徐甲谋请娥事自在是年以前而淮南传谢归修成君女在元朔三五间盖娥嫁齐不售嫁淮南又离絶也

史记卷五十二考证

卷五十三

钦定四库全书

史记卷五十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

萧相国世家第二十三

【索隐萧相国曹相国留侯绛侯五宗三王六篇可合为一篇】

萧相国何者沛丰人也【索隐春秋纬萧何感昴精而生典狱制律】以文无害为沛主吏掾【集解駰案汉书音义曰文无害有文无所枉害也律有无害都吏如今言公平吏一曰无害者如言无比陈留间语也索隐裴注已列数家今更引二说应劭云虽为吏而不刻害韦昭云为有文理无伤害也汉书云何为主吏主吏功曹也又云何为沛掾是何为功曹掾】高祖为布衣时何数以吏事护高祖【索隐说文云护救视也】高祖为亭长常左右之高祖以吏繇咸阳吏皆送奉钱三何独以五【集解李奇曰或三百或五百也索隐奉音扶用反谓资俸之如字读谓奉送之也刘氏云时钱有重者一当百故有送钱三者】秦御史监郡者与从事常辨之【集解张晏曰何与共事修辨明何素有方畧也苏林曰辟何与从事也秦时无刺史以御史监郡索隐何与御史从事常辨明言称职也】何乃给泗水卒史【集解徐广曰沛县有泗水亭秦以沛为泗水郡駰案文颖曰何为泗水郡卒史索隐如淳按律郡卒史书佐各十人也卒祖忽反】事第一【索隐谓课最居第一】秦御史欲入言徵何何固请得毋行及高祖起为沛公何常为丞督事【索隐谓高祖起沛令何为丞常监督庶事也】沛公至咸阳诸将皆争走金帛财物之府分之【索隐走音奏奏者趋向之也】何独先人收秦丞相御史律令图书藏之沛公为汉王以何为丞相项王与诸侯屠烧咸阳而去汉王所以具知天下厄塞户口多少强弱之处民所疾苦者以何具得秦图书也何进言韩信汉王以信为大将军语在淮陰侯事中汉王引兵东定三秦何以丞相留收巴蜀填抚谕告使给军食汉二年汉王与诸侯击楚何守关中侍太子治栎阳为法令约束立宗庙社稷宫室县邑辄奏上可许以从事即不及奏上辄以便宜施行上来以闻【集解应劭曰上来还乃以所为闻之】关中事计户口转漕给军【索隐转刘氏音张恋反漕水运也】汉王数失军遁去何常兴关中卒辄补缺上以此专属任何关中事汉三年汉王与项羽相距京索之间上数使使劳苦丞相鲍生谓丞相曰王暴衣露盖数使使劳苦君者有疑君心也为君计莫若遣君子孙昆弟能胜兵者悉诣军所

上必益信君於是何从其计汉王大说汉五年既杀项羽定天下论功行封羣臣争功岁余功不决高祖以萧何功最盛封为酈侯【集解文颖曰音赞瓚曰今南阳酈县也孙检曰有二县音字多乱其属沛郡者音嵯属南阳者音讚按茂陵书萧何国在南阳宜呼讚今多呼嵯嵯旧字作?今皆作酈所由乱也索隐瓚云今南阳酈县顾氏云南阳郡名也太康地理志云魏武帝建安中分南阳立南乡郡晋武帝改曰顺阳郡是也】所食邑多功臣皆曰臣等身被坚执銳多者百余战少者数十合攻城略地大小各有差今萧何未尝有汗马之劳徒持文墨议论不战顾反居臣等上何也高帝曰诸君知猎乎曰知之知猎狗乎曰知之高帝曰夫猎追杀兽兔者狗也而发踪指示兽处者人也今诸君徒能得走兽耳功狗也至如萧何发踪指示功人也且诸君独以身随我多者两三人今萧何举宗数十人皆随我功不可忘也羣臣皆莫敢言列侯毕已受封及奏位次皆曰平阳侯曹参身被七十创攻城略地功最多宜第一上已挠功臣多封萧何【集解应劭曰挠屈也索隐音女教反】至位次未有以复难之然心欲何第一关内侯鄂君进曰【索隐功臣表鄂千秋封安平侯】羣臣议皆误夫曹参虽有野战畧地之功此特一时之事夫上与楚相距五岁常失军亡衆逃身遁者数矣然萧何常从关中遣军补其处非上所诏令召而数万衆会上之之絶者数矣夫汉与楚相守荥阳数年军无见粮萧何转漕关中给食不之陛下虽数亡山东萧何常全关中以待陛下此万世之功也今虽亡曹参等百数何缺於汉汉得之不必待以全奈何欲以一旦之功而加万世之功哉萧何第一曹参次之高祖曰善於是乃令萧何赐带剑履上殿入朝不趋上曰吾闻进贤受上赏萧何功虽高得鄂君乃益明於是因鄂君故所食关内侯邑封为安平侯【集解徐广曰以谒者从定诸侯有功秩举萧何功故因侯二千户封九年卒至玄孙但坐与淮南王安通弃市国除正义括地志云泽州安平县本汉安平县】是日悉封何父子兄弟十余人皆有食邑乃益封何二千户以帝尝繇咸阳时何送我独赢奉钱二也【索隐谓人皆三何独五所以为赢二也音盈】汉十一年陈豨反高祖自将至邯鄲未罢淮阴侯谋反关中吕后用萧何计诛淮阴侯语在淮阴事中上已闻淮阴侯诛使使拜丞相何为相国益封五千户令卒五百人一都尉为相国卫诸君皆贺召平独吊召平者故秦东陵侯秦破为布衣贫种瓜於长安城东瓜美故世俗谓之东陵瓜从召平以为名也召平谓相国曰祸自此始矣上暴露於外而君守於中非被矢石之事而益君封置卫者以今者淮阴侯新反於中疑君心矣夫置卫卫君非以宠君也愿君让封勿受悉以家私财佐军则上心说相国从其计高帝乃大喜汉十二年秋黥布反上自将击之数使使问相国何为相国为上在军乃拊循勉力百姓悉以所有佐军如陈豨时客有说相国曰君灭族不久矣夫君位为相国功第一可复加哉然君初入关中得百姓心十余年矣皆附君常复孳孳得民和上所为数问君者畏君倾动关中今君胡不多买田地贱贖贷以自污【正义贖音世又食夜反賒也贷天待反】上心乃安於是相国从其计上乃大说上罢布军归民道遮行上书言相国贱强买民田宅数千万上至相国谒上笑曰夫相国乃利民【索隐谓相国取入田宅以为己利故云乃利人也所以令相国自谢之】民所上书皆以与相国曰君自谢民相国因为民请曰长安地狭上林中多空地弃愿令民得入田毋收彙为禽兽食【索隐苗子还种田人留彙入官】上大怒曰相国多受贾人财物乃为请吾苑乃下相国廷尉械系之数日王卫尉侍【集解如淳曰百官公卿表卫尉王氏无名字】前问曰相国何大罪陛下系之暴也上曰吾闻李斯相秦皇帝有善归主有恶自与今相国多受贾竖金而为民请吾苑以自媚於民故系治之王卫尉曰夫职事苟有便於民而请之真宰相事陛下奈何乃疑相国受贾人钱乎且陛下距楚数岁陈豨黥布反陛下自将而往当是时相国守关中摇足则关以西

非陛下有也相国不以此时为利今乃利贾人之金乎且秦以不闻其过亡天下李斯之分过又何足法哉【索隐李斯归恶而自予是分过也】陛下何疑宰相之浅也【集解韦昭曰用意浅】高帝不怪是日使使持节赦出相国相国年老素恭谨入徒跣谢高帝曰相国休矣相国为民请苑吾不许我不过为桀纣主而相国为贤相吾故系相国欲令百姓闻吾过也何素不与曹参相能及何病孝惠自临视相国病因问曰君即百岁後谁可代君者对曰知臣莫如主孝惠曰曹参何如何顿首曰帝得之矣臣死不恨矣何置田宅必居穷处为家不治垣屋曰後世贤师吾俭不贤母为势家所夺孝惠二年相国何卒【集解駰案东观汉记云萧何墓在长陵东司马门道北百步正义括地志云萧何墓在雍州咸阳县东北三十七里】谥为文终侯【集解徐广曰功臣表萧何以客初起从也】後嗣以罪失侯者四世絶天子辄复求何後封续鄼侯功臣莫得比焉太史公曰萧相国何於秦时为刀笔吏录录未有奇节【索隐录音禄】及汉兴依日月之末光何谨守管龠因民之疾奉法顺流与之更始淮阴黥布等皆以诛灭而何之勲烂焉位冠羣臣声施後世与閔夭散宜生等争烈矣【索隐述赞曰萧何为吏文而无害及佐兴王举宗从沛关中既守转输是赖汉军屡疲秦兵必会约法可久收图可大指兽发踪其功实最政称画一居乃非泰继絶宠勤式旌砺带】

史记卷五十三

史记卷五十三考证

萧相国世家吏皆送奉钱三何独以五○【臣照】按李奇曰或三百或五百索隐则谓时有当百钱疑皆非也文明曰奉钱则是就其本奉十之三为赠而何独以奉十之五耳

何独先人收秦丞相御史律令图书藏之○人一本作入

封为鄼侯集解文穎曰音赞瓚曰今南阳鄼县也孙检曰有二县音字多乱其属沛郡者音嵯属南阳者音讚按茂陵书萧何国在南阳宜呼讚今多呼嵯嵯旧字作?今皆作鄼所由乱也索隐瓚云今南阳鄼县顾氏云南阳郡名也太康地理志云魏武帝建安中分南阳立南乡郡晋武帝改曰顺阳郡是也○资暇录曰汉相萧何封为鄼侯举代呼为嵯有呼赞者则反掩口而啞深可讶也邹氏分明云属沛郡者音嵯属南阳者音赞又茂陵书云萧何国在南阳合二家之说音赞不音嵯明矣司马贞诚知音赞不能痛为指挥将来而但云字当音赞今多呼为嵯遂使後学见今呼为嵯字咸曰且宜从衆是误也

史记卷五十三考证

卷五十四

钦定四库全书

史记卷五十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

曹相国世家第二十四

平阳侯曹参者【正义晋州城即平阳故城也】沛人也【集解张华曰曹参字敬伯索隐地理志云平阳县属河东春秋纬及博物志并云曹参字敬伯正义按沛今徐州县也】秦时为沛狱掾而萧何为主吏居县为豪吏矣高祖为沛公而初起也参以中涓从【集解駰案汉书音义曰中涓如中谒者索隐涓音古玄反】将击胡陵【正义县名在方与南】方与【索隐地理志二县皆属山阳正义胡陵县名在方与之南方音房与音预兖州县也】攻秦监公军【集解駰案汉书音义曰监御史监郡者公名秦一郡置守尉监三人索隐本纪泗川监名平则平是名公为相尊之称】大破之东下薛击泗水守军薛郭西复攻胡陵取之徙守方与方与反为魏击之【正义曹参击方与】丰反为魏攻之【索隐时雍齿守丰为魏反沛公】赐爵七大夫击秦司马尼【正义音夷】军碭东破之取碭狐父【集解徐广曰伍被曰吴濞败於狐父索隐地理志碭属梁国狐父地名在梁碭之间徐氏引伍被云吴濞败於狐父是吴与梁相拒而败处正义括地志云狐父亭在宋州碭山县东南三十里】祁善置【集解文颖曰善置置名也晋灼曰祁音坻孙检曰汉谓驿曰置善名也索隐司马彪郡国志谷熟有祁亭刘氏音迟又如字善置置名汉为驿置馆正义括地志云故祁城在宋州下邑县东北四十九里汉祁城县也言取碭狐父及祁县之善置】又攻下邑以西至虞【索隐地理志下邑虞皆属梁国正义宋州下邑县在州东百一十里汉下邑城今碭山县是虞城县在州北五十里古虞国商均所封】击章邯车骑攻爰戚及亢父【集解徐广曰宣帝时有爰戚侯索隐苏林云爰戚县名属山阳功臣表爰戚侯赵成地理志云亢父县名属东平正义戚音寂刘音七历反今在兖州南近亢父县括地志亢父故城在兖州任城县南五十一里】先登迁为五大夫北救东阿【索隐时章邯围田荣於东阿正义今济州东阿也】击章邯军?陈追至濮阳攻定陶取临济【正义淄州高苑县西北二里北狄故城安帝改曰临济】南救雍丘击李由军破之杀李由虜秦侯一人秦将章邯破杀项梁也沛公与项羽引而东楚怀王以沛公为碭郡长将碭郡兵於是乃封参为执帛【集解张晏曰孤卿也或曰楚官名】号曰建成君【索隐地理志建成县属沛郡】迁为戚公【索隐迁参为戚令正义即爰戚县也是时属沛郡】属碭郡其

後从攻东郡尉军破之成武南【索隐地理志成武县属山阳】击王离军成阳南【索隐地理志县名在济阴成地名周武王封弟季戴於成其後代迁於成之阳故曰成阳正义成阳故城濮州雷泽县是】复攻之杠里大破之追北西至开封击赵贲军破之【索隐贲音奔】围赵贲开封城中西击秦将杨熊军於曲遇破之【集解徐广曰在中牟索隐曲丘羽反遇牛凶反正义司马彪郡国志云中牟有曲遇聚按中牟郑州县也】虏秦司马及御史各一人迁为执珪【集解张晏曰侯伯执珪以朝位比之如淳曰吕氏春秋得伍员者位执珪古爵名】从攻阳武【正义括地志云阳武故城在郑州阳武县东北十八里汉阳武县城也】下轘辕缙氏【索隐地理志阳武缙氏二县属河南轘辕道名在缙氏南正义缙氏洛州县也括地志云轘辕故关在洛州缙氏县东南四十里十三州志云轘辕道凡十二曲险道也】絶河津【正义津济渡处括地志云平阴故津在洛州洛阳县东北五十里】还击赵贲军尸北破之【集解徐广曰尸在偃师孟康曰尸乡北正义破赵贲军於尸乡之北也括地志云尸乡亭在洛州偃师县在洛州东南也】从南攻颍与南阳守齮战阳城郭东?陈【集解徐广曰阳城在南阳应劭云今堵阳索隐堵阳是南阳之县正义?南阳守於阳城郭东也】取宛虏齮尽定南阳郡从西攻武关嶢关取之【正义括地志云故武关在商州商洛县东九十里蓝田关在雍州蓝田县东南九十里即秦嶢关也】前攻秦军蓝田南【正义雍州蓝田县在州东南八十里因蓝田山为名】又夜击其北秦军大破遂至咸阳灭秦项羽至以沛公为汉王汉王封参为建成侯从至汉中【正义梁州本汉中郡】迁为将军从还定三秦初攻下辩故道【索隐辩音皮菟反正义括地志云成州同谷县本汉下辩道又云凤州两当县本汉故道县在州西五十里】雍櫜【索隐地理志云县名正义属右扶风櫜音胎一作郃音胎括地志云故雍县南七里故櫜城一名武功县西南二十二里古郃国也】擊章平军於好畤南破之【正义括地志云好畤城在雍州好畤县东南十三里】围好畤取壤乡【集解文穎曰地名】击三秦军壤东及高栎破之【索隐栎音历按文穎云壤乡高栎皆地名在右扶风今其地阙正义皆村邑名壤乡今在雍州武功县东南二十余里高壤坊是高栎近壤乡也】复围章平章平出好畤走因击赵贲内史保军破之东取咸阳更命曰新城【索隐汉书高帝元年咸阳名新城武帝改名曰渭城】参将兵守景陵【集解駰案汉书音义曰县名也】二十日三秦使章平等攻参参出击大破之赐食邑於宁秦【集解苏林曰今华阴】参以将军引兵围章邯於废丘【正义周曰犬丘秦更名废丘汉更名槐里今故城在雍州始平县东南十里】以中尉从汉王出临晋关【正义即蒲津关也在临晋县故言临晋关今在同州也】至河内下修武【正义今怀州获嘉县古修武也】渡围津【集解徐广曰东郡白马有围津索隐顾氏按水经注白马津有韦乡韦津城围与韦同古今字变尔正义括地志云黎阳津一名白马津在滑州白马县北三十里帝王世纪云白马县南有韦城故豕韦国也续汉书郡国志云白马县有韦城】东击龙且项他定陶破之东取碭萧彭城【正义徐州二县】击项籍军汉军大败走参以中尉围取雍丘王武反於黄【集解徐广曰内黄县有黄泽】程处反於燕【集解徐广曰东郡燕县駰案汉书音义曰皆汉将】往擊尽破之柱天侯反於衍氏【索隐柱天侯不知其谁封衍氏魏邑地理志云柱天在庐江潜县】又进破取衍氏擊羽嬰於昆阳追至叶还攻武强【集解瓚曰武强城在阳武正义括地志云武强故城在郑州管城县东北三十一里】因至荥阳参自汉中为将军中尉从【索隐才用反】擊诸侯及项羽败还至荥阳凡二岁高祖三年拜为假左丞相入屯兵关中月余魏王豹反以假左丞相别与韩信东攻魏将军孙遨军东张大破之【集解徐广曰张者地名功臣表有张侯毛泽之駰案苏林曰属河东索隐遨音速正

义括地志云张阳故城一名东张城在蒲州虞乡县西北四十里】因攻安邑得魏将王襄击魏王於曲阳【正义括地志云上曲阳定州恒阳县是下曲阳在定州鼓城县西五里】追至武垣【集解徐广曰河东有垣县正义括地志云武垣县今瀛州城是地理志云武垣县属涿郡也】生得魏王豹取平阳【正义晋州城是】得魏王母妻子尽定魏地凡五十二城赐食邑平阳因从韩信击赵相国夏说军於鄆东大破之斩夏说【集解徐广曰鄆县在太原音乌古反】韩信与故常山王张耳引兵下井陘击成安君而令参还围赵别将戚将军於鄆城中戚将军出走追斩之乃引兵诣敖仓汉王之所韩信已破赵为相国东击齐参以右丞相属韩信攻破齐历下军遂取临菑还定济北郡攻着漯阴平原鬲卢【索隐地理志着县属济南卢县属泰山漯阴平原鬲三县属平原漯音吐荅反正义括地志云平原故城在德州平原县东南十里故鬲城在德州安德县西北十五里卢县今济州理县是也】已而从韩信击龙且军於上假密【集解文颖曰或以为高密索隐汉书亦作假密按下定齐七十县则上假密非高密亦是齐地今阙】大破之斩龙且虏其将军周兰定齐凡得七十余县得故齐王田广相田光其守相许章及故齐胶东将军田既韩信为齐王引兵诣陈与汉王共破项羽而参留平齐未服者项籍已死天下定汉王为皇帝韩信徙为楚王齐为郡参归汉相印高帝以长子肥为齐王而以参为齐相国以高祖六年赐爵列侯与诸侯剖符世世勿絶食邑平阳万六百三十户号曰平阳侯除前所食邑以齐相国击陈豨将张敖军破之黥布反参以齐相国从悼惠王将兵车骑十二万人与高祖会击黥布军大破之南至蕲还定竹邑相萧留【索隐地理志蕲竹邑相萧四县属沛韦昭云留今属彭城则汉初亦属沛也正义括地志云徐州符离县城汉竹邑城也李奇云今竹邑也故相城在符离县西北九十里輿地志云宋共公自睢阳徙相子城又还睢阳萧徐州古萧叔国城也故留城在徐州沛县东南五十里张良所封】参功凡下二国县一百二十二得王二人相三人将军六人大莫敖【集解駰案汉书音义曰楚之卿号】郡守司马候御史各一人孝惠帝元年除诸侯相国法更以参为齐丞相参之相齐七十城天下初定悼惠王富於春秋参尽召长老诸生问所以安集百姓如齐故俗诸儒以百数言人人殊参未知所定闻胶西有盖公善治黄老言使人厚币请之既见盖公盖公为言治道贵清静而民自定推此类具言之参於是避正堂舍盖公焉其治要用黄老术故相齐九年齐国安集大称贤相惠帝二年萧何卒参闻之告舍人趣治行吾将入相居无何使者果召参参去属其後相曰以齐狱市为寄慎勿扰也後相曰治无大於此者乎参曰不然夫狱市者所以并容也今君扰之奸人安所容也吾是以先之【集解駰案汉书音义曰夫狱市兼受善恶若穷极奸人无所容甯奸人无所容甯久且为乱秦人极刑而天下畔孝武峻法而狱繁此其效也老子曰我无为而民自化我好静而民自正参欲以道化其本不欲扰其末】参始微时与萧何善及为将相有郤至何且死所推贤唯参参代何为汉相国举事无所变更一遵萧何约束择郡国吏木诘於文辞重厚长者即召除为丞相史吏之言文刻深欲务声名者辄斥去之日夜饮醇酒卿大夫已下吏及宾客见参不事事【集解如淳曰不事丞相之事】来者皆欲有言至者参辄饮以醇酒间之欲有所言复饮之醉而後去终莫得开说以为常【集解如淳曰开谓有所启白】相舍後园近吏舍吏舍日饮歌呼从吏恶之无如之何乃请参游园中闻吏醉歌呼从吏幸相国召按之乃反取酒张坐饮亦歌呼与相应和参见人之有细过专掩匿覆盖之府中无事参子窋【索隐音张律反】为中大夫惠帝恠相国不治事以为岂少朕与【索隐少者不足之词故胡亥亦云丞相岂少我哉盖帝以丞相岂不是嫌少於我哉小顔以为我年少非也】乃谓窋曰若归试私从容问而父曰高帝新弃羣臣帝富於春秋君谓相日饮

无所请事何以忧天下乎然无言吾告若也【索隐谓惠帝语窑无得言我告汝令谏汝父当自云是己意也】窑既洗沐归间侍自从其所谏参怒而答窑二百曰趣入侍天下事非若所当言也至朝时惠帝让参曰与窑胡治乎【集解如淳曰犹言用窑为治索隐胡何也言语参何为治窑也】乃者我使谏君也参免冠谢曰陛下自察圣武孰与高帝上曰朕乃安敢望先帝乎曰陛下观臣能孰与萧何贤上曰君似不及也参曰陛下言之是也且高帝与萧何定天下法令既明今陛下垂拱参等守职遵而勿失不亦可乎惠帝曰善君休矣参为汉相国出入三年卒谥懿侯子窑代侯百姓歌之曰萧何为法顗若画一【集解徐广曰顗音古项反一音较索隐汉书顗作讲画训直又训明言法明直若画一也讲亦作覲小颜云覲和也画一言其法整齐也】曹参代之守而勿失载其清静民以宁一平阳侯窑高后时为御史大夫孝文帝立免为侯立二十九年卒谥为静侯子奇代侯立七年卒谥为简侯子时代侯时尚平阳公主生子襄时病瘵归国立二十三年卒谥夷侯子襄代侯襄尚卫长公主生子宗立十六年卒谥为共侯子宗代侯征和二年中宗坐太子死国除

太史公曰曹相国参攻城野战之功所以能多若此者以与淮阴侯俱及信已灭而列侯成功唯独参擅其名参为汉相国清静极言合道然百姓离秦之酷後参与休息无为故天下俱称其美矣

【索隐述赞曰曹参初起为沛豪吏始从中涓先图善置执圭执帛攻城畧地衍氏既诛昆阳失位北禽夏说东讨田既剖符定封功无与二市狱勿扰清静不事尚主平阳代享其利】

史记卷五十四

史记卷五十四考证

曹相国世家王武反於黄集解徐广曰内黄县有黄泽○【臣照】按汉书作王武反於外黄以樊哙传参看似黄字上脱一外字

柱天侯反於衍氏索隐柱天侯不知其谁封衍氏魏邑地理志云柱天在庐江潜县○庾林曰柱天侯亦犹建成侯奉春君之类假以徽称不必指其食邑且汉书地理志庐江灊县天柱山在南复非柱天也是时王武反外黄程处反燕柱天侯反衍氏服?云皆汉将则汉王所封也汉元年庐江属楚又安得以楚地封其将军哉

擊魏王於曲阳正义括地志云上曲阳定州恒阳县是下曲阳在定州鼓城县西五里○余有丁曰此必魏自有曲阳定州之曲阳时属赵

斩龙且虏其将军周兰○【臣照】按灌婴传云从韩信攻龙且於高密身生得亚将周兰盖是时参婴并隶於信故叙功畧同而其实擒兰者婴也婴传於降彭城之後又云攻苦谿复得亚将周兰盖前此逸去婴终得之

征和二年中宗坐太子死国除○【臣照】按征和出天汉之限岂又褚先生所续乎年表亦同

史记卷五十四考证

卷五十五

钦定四库全书

史记卷五十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

留侯世家第二十五

留侯张良者【正义括地志云故留城在徐州沛县东南五十五里今城内有张良庙也】其先韩人也【索隐韦昭云留今属彭城按良求封留以始见高祖於留故也汉书云良字子房按王符皇甫谧并以良为韩之公族姬姓也秦索贼急乃改姓名而韩先有张去疾及张譴恐非良之先代也良既历代相韩故知其先韩人顾氏按後汉书云张良出於城父城父县属颍川也正义括地志云城父在汝州郟城县东三十里韩里也】大父开地相韩昭侯宣惠王襄哀王【集解应劭曰大父祖父开地名】父平相厘王悼惠王【索隐韩世家及系本并作桓惠王】悼惠王二十三年平卒卒二十岁秦灭韩良年少未宦事韩韩破良家僮三百人弟死不葬悉以家财求客刺秦王为韩报仇以大父父五世相韩故【索隐谓大父及父相韩五王故云五世】良尝学礼淮阳【正义今陈州也】东见仓海君【集解如淳曰秦郡县无仓海或曰东夷君长索隐姚察以武帝时东夷濊君降为仓海郡或因以名盖得其近耳正义汉书武帝纪云元朔元年东夷濊君南闾等降为仓海郡今濊国得之太史公修史时已降为郡自书之括地志云濊貂在高丽南新罗北东至大海西】得力士为铁椎重百二十斤秦皇帝东游良与客狙【集解服虔曰狙伺候也应劭曰狙七预反伺也徐广曰伺候也音千怒反索隐应劭曰狙伺也一云狙伏伺也谓狙之伺物必伏而候之故今云狙猴是也】击秦皇帝博浪沙中【索隐服虔曰地在阳武南按今浚仪西北四十里有博浪城正义晋地理记云郑阳武县有博浪沙按今当官道也】误中副车【索隐汉官仪天子属车三十六乘属车即副车而奉车浪御而从後】秦皇帝大怒大索天下求贼甚急为张良故也良乃更名姓亡匿下邳良尝闲从容步游下邳圯上【集解徐广曰圯桥也东楚谓之圯音怡索隐尝训经也闲闲字也从容闲暇也从容谓从任其容止不矜庄也邳披眉反按地理志下邳县属东海又云邳在薛後徙此有上邳故此云下邳李奇云上下邳人谓桥为圯文颖云汜水上桥也应邵云圯水之上也姚察见史记本有作土旁者乃引今会稽东湖大桥名为灵圯圯亦音夷理或然也】有一老父衣褐至良所直堕其履圯下【索隐崔浩云直犹故也亦恐不然直言正也谓至良所正堕其履也】顾谓良曰孺子下取履良愕然欲殴之【集解徐广曰一云良怒欲骂之索隐殴

乌后反】为其老强忍下取履父曰履我良业为取履因长跪履之【索隐业犹本先也谓良心先已为取故遂跪而履之】父以足受笑而去良殊大惊随目之父去里所复还【集解徐广曰一云为其老强忍下取履因进之父以足受笑而去良殊大惊父去里所复还】曰孺子可教矣後五日平明与我会此良因恠之跪曰诺五日平明良往父已先在怒曰与老人期後何也去曰後五日早会五日鷄鸣良往父又先在复怒曰後何也去曰後五日复早来五日良夜未半往有顷父亦来喜曰当如是出一编书【集解徐广曰编一作篇】曰读此则为王者师矣後十年兴十三年孺子见我济北谷城山下黄石即我矣【正义括地志云谷城山一名黄山在济州东阿县东济州故济北郡孔文祥云黄石公须眉皆白状杖丹黎履赤舄】遂去无他言不复见旦日视其书乃太公兵法也【正义七录云太公兵法一袭三卷太公姜子牙周文王师封齐侯也】良因异之常习诵读之居下邳为任侠项伯尝杀人从良匿後十年陈涉等起兵良亦聚少年百余人景驹自立为楚假王在留良欲往从之道遇沛公沛公将数千人略地下邳西遂属焉沛公拜良为廐将【集解駰案汉书音义曰官名】良数以太公兵法说沛公沛公善之常用其策良为他人言皆不省良曰沛公殆天授【索隐殆训近也】故遂从之不去见景驹及沛公之薛见项梁项梁立楚怀王良乃说项梁曰君已立楚後而韩诸公子横阳君成贤可立为王益树党项梁使良求韩成立以为韩王以良为韩申徒【集解徐广曰即司徒耳但语音讹转故字亦随改】与韩王将千余人西略韩地得数城秦辄复取之往来为游兵颍川沛公之从雒阳南出轘辕良引兵从沛公下韩十余城击破杨熊军沛公乃令韩王成留守阳翟与良俱南攻下宛西入武关沛公欲以兵二万人击秦嶢下军【集解徐广曰嶢音尧】良说曰秦兵尚强未可轻臣闻其将屠者子贾竖易动以利愿沛公且留壁使人先行为五万人具食【集解徐广曰五一作百】益为张旗帜诸山上为疑兵【索隐旗帜音其试】令郾食其持重宝秦将秦将果畔欲连和俱西袭咸阳沛公欲听之良曰此独其将欲叛耳恐士卒不从不从必危不如因其解击之【索隐谓卒将离心而懈怠】沛公乃引兵击秦军大破之遂北至蓝田再战秦兵竟败遂至咸阳秦王子婴降沛公沛公入秦宫宫室帷帐狗马重宝妇女以千数意欲留居之樊哙谏沛公出舍沛公不听【集解徐广曰一本哙谏曰沛公欲有天下耶将欲为富家翁邪沛公曰吾欲有天下哙曰今臣从入秦宫所观宫室帷帐珠玉重宝钟鼓之饰奇物不可胜极入其後宫美人妇女以千数此皆秦所以亡天下也愿沛公急还霸上无留宫中沛公不听】良曰夫秦为无道故沛公得至此夫为天下除残贼宜缟素为资【集解晋灼曰资藉也欲沛公反秦奢泰服俭素以为藉也】今始入秦即安其乐此所谓助桀为虐且忠言逆耳利於行毒药苦口利於病【索隐见孔子家语】愿沛公听樊哙言沛公乃还军霸上项羽至鸿门下欲擊沛公项伯乃夜驰入沛公军私见张良欲与俱去良曰臣为韩王送沛公今事有急亡去不义乃具以语沛公沛公大惊曰为将奈何良曰沛公诚欲倍项羽邪沛公曰鯁生【索隐鯁谓小鱼也音趋勾反臣瓚按楚汉春秋鯁生本姓解】教我距关无内诸侯秦地可尽王故听之良曰沛公自度能却项羽乎沛公默然良久曰固不能也今为奈何良乃固要项伯项伯见沛公沛公与饮为寿结宾婚令项伯具言沛公不敢倍项羽所以距关者备他盗也及见项羽後解语在项羽事中汉元年正月沛公为汉王王巴蜀汉王赐良金百鎰珠二斗良具以献项伯汉王亦因令良厚遗项伯使请汉中地【集解如淳曰本但与巴蜀故请汉中地】项王乃许之遂得汉中地汉王之国良送至褒中【正义括地志云褒谷在梁州褒城县北五十里南中山昔秦欲伐蜀路无由入乃刻石为牛五头置金於後伪言此牛能屎金以遗蜀侯贪信之乃令五丁共引牛塹山堙谷致之成都秦遂寻道伐之

因号曰石牛道蜀赋以石门在汉中之西褒中之北是又云斜水源出褒城县西北衙岭山与褒水同源而流泝汉书沟洫志云褒水通沔斜水通渭皆以行船】遣良归韩良因说汉王曰王何不烧绝所过栈道示天下无还心以固项王意乃使良还行烧绝栈道良至韩王成以良从汉王故项王不遣成之国从与俱东良说项王曰汉王烧绝栈道无还心矣乃以齐王田荣反书告项王项王以此无西忧汉心而发兵北击齐项王竟不肯遣韩王乃以为侯又杀之彭越良亡间行归汉王汉王亦已还定三秦矣复以良为成信侯从东击楚至彭城汉败而还至下邳汉王下马踞鞍而问曰吾欲捐关以东等弃之谁可与共功者良进曰九江王黥布楚枭将与项王有郗彭越与齐王田荣反梁地此两人可急使而汉王之将独韩信可属大事当一面即欲捐之捐之此三人则楚可破也汉王乃遣随何说九江王布而使人连彭越及魏王豹反使韩信将兵击之因举燕代齐赵然卒破楚者此三人力也张良多病未尝特将也常为画策臣时时从汉王汉三年项羽急围汉王荥阳汉王恐忧与酈食其谋烧楚权食其曰昔汤伐桀封其後於杞武王伐纣封其後於宋今秦失德弃义侵伐诸侯社稷灭六国之後使无立锥之地陛下诚能复立六国後世毕已受印此其君臣百姓必皆戴陛下之德莫不乡风慕义愿为臣妾德义已行陛下南乡称霸楚必敛衽而朝汉王曰善趣刻印先生因行佩之矣食其未行张良从外来谒汉王方食曰子房前客有为我计烧楚权者具以酈生语告於子房曰何如良曰谁为陛下画此计者陛下事去矣汉王曰何哉张良对曰臣请藉前箸为大王筹之【集解张晏曰求借所食之箸用指画也或曰前世汤武着明之事以筹度今时之不若也】曰昔者汤伐桀而封其後於杞者度能制桀之死命也今陛下能制项籍之死命乎曰未能也其不可一也武王伐纣封其後於宋者度能得纣之头也今陛下能得项籍之头乎曰未能也其不可二也武王入殷表商容之间【索隐崔浩云表者标榜其里门商容纣时贤人也韩诗外传曰商容执羽翥冯於马徒欲以化纣而不能遂去伏於太行山武王欲以为三公固辞而不受余解在商纪】释箕子之拘【集解徐广曰释一作式拘一作囚】封比干之墓今陛下能封圣人之墓表贤者之间式智者之门乎曰未能也其不可三也发钜桥之粟散鹿台之钱以赐贫穷今陛下能散府库以赐贫穷乎曰未能也其不可四矣殷事已毕偃革为轩【集解如淳曰革者革车也轩者赤轂乘轩也偃武备而治礼乐也索隐苏林云革者兵车也轩者朱轩皮轩也谓废兵车而用乘车也说文云轩曲周屏车】倒置干戈覆以虎皮以示天下不复用兵今陛下能偃武行文不复用兵乎曰未能也其不可五矣休马华山之阳示以无所为今陛下能休马无所用乎曰未能也其不可六矣放牛桃林之阴【索隐晋灼云在弘农南门乡谷中应劭十三州记弘农有桃丘聚古桃林也山海经云夸父之山北有桃林广三百里】以示不复输积今陛下能放牛不复输积乎曰未能也其不可七矣且天下游士离其亲戚弃坟墓去故旧从陛下游者徒欲日夜望咫尺之地今复六国立韩魏燕赵齐楚之後天下游士各归事其主从其亲戚反其故旧坟墓陛下与谁取天下乎其不可八矣且夫楚唯无强六国立者复烧而从之【集解酈案汉书音义曰唯当使楚无强强则六国弱从之索隐荀悦汉纪此事云独可使楚无强强则六国屈烧而从之又韦昭云今无强楚者若六国立必复屈烧从楚是二说之意同】陛下焉得而臣之诚用客之谋陛下事去矣汉王辍食吐哺骂曰竖儒几败而公事【索隐高祖骂酈生为竖儒谓此儒生竖子耳几音祈几殆近也而公高祖自谓也汉书作乃公】令趣销印汉四年韩信破齐而欲自立为齐王汉王怒张良说汉王汉王使良授齐王信印语在淮陰事中其秋汉王追楚至阳夏南战不利而壁固陵诸侯期不至良说汉王汉王用其计诸侯皆至语在项籍事中汉六年正月封功臣良未尝有战鬪功高帝曰运筹策帷

帳中決勝千里外子房功也自擇齊三萬戶良曰始臣起下邳與上會留此天以臣授陛下陛下用臣計幸而時中臣愿封留足矣不敢當三萬戶乃封張良為留侯與蕭何等俱封六年上已封大功臣二十餘人其餘日夜爭功不決未得行封上在雒陽南宮從復道【集解如淳曰復音復上下有道故謂之復道韋昭云閣道】望見諸將往往相與坐沙中語上曰此何語留侯曰陛下不知乎此謀反耳上曰天下屬安定何故反乎留侯曰陛下起布衣以此屬取天下今陛下為天子而所封皆蕭曹故人所親愛而所誅者皆生平所仇怨今軍吏計功以天下不足徧封此屬畏陛下不能盡封恐又見疑平生過失【集解徐廣曰多作生平】及誅故即相聚謀反耳上乃憂曰為之奈何留侯曰上平生所憎羣臣所共知誰最甚者上曰雍齒與我故【集解駢案漢書音義曰未起時有故怨】數嘗窘辱我我欲殺之為其功多故不忍留侯曰今急先封雍齒以示羣臣羣臣見雍齒封則人人自堅矣於是上乃置酒封雍齒為什方侯【索隱縣名屬廣漢正義括地志云雍齒城在益州什邡縣南四十步漢什邡縣漢初封雍齒為侯國】而急趣丞相御史定功行封羣臣罷酒皆喜曰雍齒尚為侯我屬無患矣劉敬說高帝曰都關中上疑之左右大臣皆山東人多勸上都雒陽雒陽東有城皋西有穀崑倍河向伊雒其固亦足恃留侯曰雒陽雖有此固其中小不過數百里田地薄四面受敵此非用武之國也夫關中左殽函【正義殽三殽山也在洛州永寧縣西北二十八里函谷關在陝州桃林縣西南十二里】右隴蜀【正義隴山南連蜀之嶠山故云右隴蜀也】沃野千里南有巴蜀之饒北有胡苑之利【索隱崔浩云苑馬牧外接胡地馬生於胡故云胡苑之利正義博物志云北有胡苑之塞按上郡北地之北與胡接可以牧養禽獸又多致胡馬故謂胡苑之利也】阻三面而守獨以一面专制諸侯諸侯安定河渭漕挽天下西給京師諸侯有變順流而下足以委輸此所謂金城千里天府之國也【索隱此言謂者蓋是依凭古語金城言秦有四塞之國如金城也蘇秦說秦惠王云秦地勢形便所謂天府是所凭也】劉敬說是也於是高帝即日駕西都關中【索隱周禮三曰詢國遷乃為大事高祖即日西遷者蓋謂其日即定計非即日遂行也】留侯從入關留侯性多病即道引不食谷【集解駢案漢書音義曰服辟谷之藥而靜居行氣】杜門不出歲余上欲廢太子立戚夫人子趙王如意大臣多諫爭未能得堅決者也呂后恐不知所為人或謂呂后曰留侯善畫計策上信用之呂后乃使建成侯呂澤勸留侯曰君常為上謀臣今上欲易太子君安得高枕而卧乎留侯曰始上數在困急之中幸用臣策今天下安定以愛欲易太子骨肉之間雖臣等百餘人何益呂澤強要曰為我畫計留侯曰此難以口舌爭也願上有不能致者天下有四人【索隱四人四皓也謂東園公綺里季夏黃公甬里先生按陳留志云園公姓唐字宣明居園中因以為號夏黃公姓崔名廣字少通齊人隱居夏里修道故號曰夏黃公甬里先生河內軹人太伯之後姓周名術字元道京師號曰霸上先生一曰甬里先生孔父秘記作祿里皆王劭據崔氏周氏世譜及陶潛四八目而為此說】四人者年老矣皆以為上慢侮人故逃匿山中義不為漢臣然上高此四人今公誠能無愛金玉璧帛令太子為書卑辭安車因使辯士固請宜來來以為客時時從入朝令上見之則必異而問之問之上知此四人賢則一助也於是呂后令呂澤使人奉太子書卑辭厚禮迎此四人四人至客建成侯所漢十一年黥布反上病欲使太子將往擊之四人相謂曰凡來者將以存太子太子將兵事危矣乃說建成侯曰太子將兵有功則位不益太子无功還則從此受禍矣且太子所與俱諸將皆嘗與上定天下梟將也今使太子將之此无异使羊將狼也皆不肯為尽力其无功必矣臣聞母愛者子抱【索隱此語出韓子】今戚夫人日夜侍御趙王如意常抱居前上曰終不使不肖子居愛子之上明乎其代太子位必矣君何不急請呂后承間為上泣

言黥布天下猛将也善用兵今诸将皆陛下故等夷【集解徐广曰夷犹侪也索隐如淳曰等夷言等辈】乃令太子将此属无异使羊将狼莫肯为用且使布闻之则鼓行而西耳【集解晋灼曰鼓行而西言无所畏也】上虽病强载辎车卧而护之诸将不敢不尽力上虽苦为妻子自强於是吕泽立夜见吕后吕后承间为上泣涕而言如四人意上曰吾惟竖子固不足遣而公自行耳於是上自将兵而东羣臣居守皆送至霸上留侯病自强起至曲邮【集解司马彪曰长安县东有曲邮聚索隐邮音尤按司马彪汉书郡国志长安有曲邮聚今在新丰西俗谓之邮头汉书旧仪云五里一邮邮人居间相去二里半按邮乃今之侯】见上曰臣宜从病甚楚人剽疾愿上无与楚人争锋因说上曰令太子为将军监关中兵上曰子房虽病强卧而傅太子是时叔孙通为太傅留侯行少傅事汉十二年上从擊破布军归疾益甚愈欲易太子留侯谏不聽因疾不视事叔孙太傅称说引古今以死争太子上下许之犹欲易之及燕置酒太子侍四人从太子年皆八十有余须眉皓白衣冠甚伟上恠之问曰彼何为者四人前对各言名姓曰东园公角里先生绮里季夏黄公上乃大惊曰吾求公数岁公辟逃我今公何自从吾儿游乎四人皆曰陛下轻士善骂臣等义不受辱故恐而亡匿窃闻太子为人仁孝恭敬爱士天下莫不延颈欲为太子死者故臣等来耳上曰烦公幸卒调护太子【集解如淳曰调护犹营护也】四人为寿已毕趋去上目送之召戚夫人指示四人者曰我欲易之彼四人辅之羽翼已成难动矣吕后真而主矣戚夫人泣上曰为我楚舞吾为若楚歌歌曰鸿鴈高飞一举千里羽翮已就横绝四海横绝四海当可奈何虽有矰缴【集解韦昭曰缴弋射也其矢曰矰索隐马融注周礼云矰者缴系短矢谓之矰一说云矰一弦可以仰射高者故云矰也】尚安所施歌数阕【索隐音曲亢反谓曲终也说文云阕事也】戚夫人嘘唏流涕上起去罢酒竟不易太子者留侯本招此四人之力也留侯从上擊代出奇计马邑下【集解徐广曰一云出奇计下马邑】及立萧何相国【集解駰案汉书音义曰何时未为相国劝高祖立之】所与上从容言天下事甚衆非天下所以存亡故不着留侯乃称曰家世相韩及韩灭不爱万金之资为韩报讐强秦天下振动今以三寸舌为帝者师【索隐春秋纬云舌在口长三寸象斗玉衡】封万户位列侯此布衣之极於良足矣愿弃人间事欲从赤松子游耳【索隐赤松子神农时雨师能入火自烧崑仑山上随风雨上下也】乃学辟谷道引轻身【集解徐广曰一云乃学道引欲轻举也索隐辟音宾亦反】会高帝崩吕后德留侯乃强食之曰人生一世间如白驹过隙何至自苦如此乎留侯不得已强听而食後八年卒谥为文成侯子不疑代侯【集解徐广曰文成侯立十六年卒子不疑代立十年坐与门大夫吉谋杀故楚内史当死赎为城旦国除】子房始所见下邳圯上老父与太公书者後十三年从高帝过济北果见谷城山下黄石取而葆祠之【集解徐广曰史记珍宝字皆作葆】留侯死并葬黄石冢【正义括地志云汉张良墓在徐州沛县东六十五里与留城相近也】每上冢伏腊祠黄石留侯不疑孝文帝五年坐不敬国除

太史公曰学者多言无鬼神然言有物【索隐物谓精恠及药物也】至如留侯所见老父予书亦可恠矣【索隐诗纬云风后黄帝师又化为老子以书授张良父後化为黄石亦异说耳】高祖离困者数矣而留侯常有功力焉岂可谓非天乎上曰夫运筹策帷帐之中决胜千里外吾不如子房余以为其人计魁梧奇伟【集解应劭曰魁梧丘虚壮大之意索隐苏林云梧音梧萧该云今读为吾非也小颜云言其可警悟於人】至见其图状貌如妇人好女盖孔子曰以貌取人失之子羽【索隐子羽澹台灭明字也仲尼弟子传云状貌甚恶又家语云子羽

有君子之容而行不称其貌与史记文同也】留侯亦云

【索隐述赞曰留侯倜傥志怀愤惋五代相韩一朝归汉进履宜假运筹神算横阳既立申徒作扞灞上扶危固陵静乱人称三杰辩推八难赤松愿游白驹难绊嗟彼雄畧曾非魁岸】

史记卷五十五

史记卷五十五考证

留侯世家留侯张良者其先韩人也索隐按王符皇甫谧并以良为韩之公族姬姓也秦索贼急乃改姓名而韩先有张去疾及张譴恐非良之先代也○困学纪闻曰张良张仲三十代孙张老十七代孙张氏谱云仲见诗老见春秋礼记

孺子见我济北谷城山下黄石即我矣正义孔文祥云黄石公须眉皆白状杖丹藜履赤舄○【臣照】按状字疑衍因下杖字而误

沛公曰鯁生○一本此下有集解徐广曰吕静曰鯁鱼也音此垢反共十三字

放牛桃林之陰索隐应劭十三州记弘农有桃丘聚古桃林也○【臣照】按十三州记乃阚駰所作见水经注及隋唐志索隐云应劭疑误否则应劭下有一曰字

於是上廼置酒封雍齿为什方侯○【臣照】按王世贞云功臣年表曹参至陈平九人皆以十二月甲申封张良至陈豨十三人以正月丙午封周竈以丁未封丁复以戊申封吕青以壬子封雍齿始与郭蒙以戊午封而诸将陈武等以三月丙申庚子等日继封然则曹参诸公远者先三十四日而沙中偶语之辈仅陈武辈二十余人耳此曹非有大功何敢偶语意者归美留侯之謐谈未必实也臣窃谓世贞之言过矣夫良岂与沙中偶语者共谋而知之如是晰乎亦审乎天下之大机大势而知其必有是耳匹夫匹妇一能胜予况陈武辈二十余人陈豨且反世贞又何以能保陈武辈不反且论功行赏自有次第岂尽裂土而封之不封而受赏者又岂止陈武辈二十余人且良所谓谋反者甚言之耳心所不向即为反萌良岂告人反以图己功哉书生妄疑古人所为好事之过也

天下有四人索隐四人四皓也云云○【臣照】按汉书王贡传序曰汉兴有园公绮里季夏黄公角里先生顔师古注曰四皓称号本起於此更无姓名可称盖隐居之人匿迹远害不自標显秘其氏族故史传无得而详至于後代皇甫谧之徒及诸地里书说竟为四人施安姓氏自相错互语又不经班氏不载於书诸家皆臆说今并弃略一无取焉臣谓师古之见卓矣索隐所引陈留志有姓名者又止三人无绮里季名字盖有脱文而今陈留志无其书莫可考也或云姓朱名晖字文季恐皆臆说绮里季或云当连夏字读作绮里季夏其黄公则黄为姓顾皇甫谧高士传已作夏黄公陶潜圣贤羣辅录亦然莫定其孰是也陶潜四八目即圣贤羣辅录别名四八目盖所载如四佐四凶八元八恺之类四与八居多後人遂呼之为四八目耳

史记卷五十五考证

卷五十六

钦定四库全书

史记卷五十六

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

陈丞相世家第二十六

陈丞相平者阳武户牖乡人也【集解徐广曰阳武属魏地户牖今为东昏县属陈留索隐徐广云阳武属魏而地理志属河南郡盖後阳武分属梁国耳徐又云户牖今为东昏县属陈留与汉书地理志同按是秦时户牖乡属阳武至汉以户牖为东昏县隶陈留郡也正义陈留风俗传云东昏县卫地故阳武之户牖乡也括地志云东昏故城在汴州陈留县东北九十里】少时家贫好读书有田三十亩独与兄伯居伯常耕田纵平使游学平人长美色人或谓陈平曰贫何食而肥若是其嫂嫉平之不视家生产曰亦食糠核耳【集解徐广曰核音核駰案孟康曰麦糠中不破者也晋灼曰核音纆京师谓麤屑为纆头】有叔如此不如无有伯闻之逐其妇而弃之及平长可娶妻富人莫肯与者贫者平亦耻之久之户牖富人有张负【索隐按负是妇人老宿之称犹武负之类也然此张负既称富人或恐是丈夫尔】张负女孙五嫁而夫辄死人莫敢娶平欲得之邑中有丧平贫侍丧以先往後罢为助张负既见之丧所独视伟平平亦以故後去负随平至其家家乃负郭穷巷【索隐高诱注战国策云负背郭居也】以弊席为门然门外多有长者车辙【索隐一作轨按言长者所乘安车与载运之车轨辙或别】张负归谓其子仲曰吾欲以女孙予陈平张仲曰平贫不事事一县中尽笑其所为独奈何予女乎负曰人固有好美如陈平而长贫贱者乎卒与女为平贫乃假贷币以聘予酒肉之资以内妇负诫其孙曰毋以贫故事人不谨事兄伯如事父事嫂如母【集解駰案兄伯已逐其妇此嫂疑後娶也】平既娶张氏女齎用益饶游道日广里中社平为宰【索隐其里名库上里社者据蔡邕陈留东昏库上里社碑云惟斯库里古阳武之牖乡陈平由此社宰遂相高祖也】分肉食甚均父老曰善陈孺子之为宰平曰嗟乎使平得宰天下亦如是肉矣陈涉起而王陈使周市略定魏地立魏咎为魏王与秦军相攻於临济陈平固已前谢其兄伯【集解駰案汉书音义曰谢语其兄往事魏】从少年往事魏王咎於临济魏王以为太仆说魏王不聽人或谗之陈平亡去久之项羽畧地至河上陈平往归之从入破秦赐平爵卿【集解张晏曰礼秩如卿不治事】项羽之东王彭城也汉王还定三秦而东殷王反楚项羽乃以平为信武君将魏王咎客在楚者以往击降殷王而还项王使项悍拜平为都尉赐金二十镒居无何汉

王攻下殷王项王怒将诛定殷者将吏陈平惧诛乃封其金与印使使归项王而平身间行杖劔亡渡河舩人见其美丈夫独行疑其亡将要中当有金玉宝器目之欲杀平平恐乃解衣裸而佐刺舩舩人知其无有乃止平遂至修武降汉【集解徐广曰汉二年】因魏无知求见汉王【索隐汉书张敞与朱邑书云陈平须魏倩而後进孟康云即无知也】汉王召入是时万石君奋为汉王中涓【集解徐广曰亦曰涓人】受平谒入见平平等七人俱进赐食王曰罢就舍矣平曰臣为事来所言不可以过今日於是汉王与语而说之问曰子之居楚何官曰为都尉是日乃拜平为都尉使为参乘典护军诸将尽讙【索隐讙譁也音讙又音喧汉书作皆怨】曰大王一日得楚之亡卒未知其高下而即与同载反使监护军长者汉王闻之愈益幸平遂与东伐项王至彭城为楚所败引而还收散兵至荥阳以平为亚将属於韩王信军广武绛侯灌婴等咸谗陈平曰平虽美丈夫如冠玉耳其中未必有也【集解駰案汉书音义曰饰冠以玉光好外见中非所有】臣闻平居家时盗其嫂事魏不容亡归楚归楚不中又亡归汉今日大王尊官之令护军臣闻平受诸将金金多者得善处金少者得恶处平反覆乱臣也愿王察之汉王疑之召让魏无知无知曰臣所言者能也陛下所问者行也今有尾生孝己之行【集解如淳曰孝己高宗之子有孝行】而无益於胜负之数陛下何暇用之乎楚汉相距臣进奇谋之士顾其计诚足以利国家不耳且盗嫂受金又何足疑乎汉王召让平曰先生事魏不中遂事楚而去今又从吾游信者固多心乎平曰臣事魏王魏王不能用臣说故去事项王项王不能信人其所任爱非诸项即妻之昆弟虽有奇士不能用平乃去楚闻汉王之能用平故归大王臣裸身来不受金无以为资诚臣计画有可采者顾大王用之使无可采者金具在请封输官得请骸骨汉王乃谢厚赐拜为护军中尉尽护诸将诸将乃不敢复言其後楚急攻絶汉甬道围汉王於荥阳城久之汉王患之请割荥阳以西以和项王不聽汉王谓陈平曰天下纷纷何时定乎陈平曰项王为人恭敬爱人士之廉节好礼者多归之至於行功爵邑重之士亦以此不附今大王慢而少礼士廉节者不来然大王能饶人以爵邑士之顽钝嗜利无耻者【集解如淳曰犹无廉隅】亦多归汉诚各去其两短袭其两长天下指麾则定矣然大王恣侮人不能得廉节之士顾楚有可乱者彼项王骨鯁之臣亚父鍾离昧龙且周殷之属不过数人耳大王诚能出捐数万斤金行反间间其君臣以疑其心项王为人意忌信谗必内相诛汉因举兵而攻之破楚必矣汉王以为然乃出黄金四万斤与陈平恣所为不问其出入陈平既多以金纵反间於楚军宣言诸将鍾离昧等为项王将功多矣然而终不得裂地而王欲与汉为一以灭项氏而分王其地项羽果意不信鍾离昧等项王既疑之使使至汉汉王为太牢具举进见楚使即详惊曰吾以为亚父使乃项王使复持去更以恶草具进楚使【集解駰案汉书音义曰草粗也索隐战国策云食冯煖以草具如淳云藁草麓恶之具也】楚使归具以报项王项王果大疑亚父亚父欲急攻下荥阳城项王不信不肯聽亚父闻项王疑之乃怒曰天下事大定矣君王自为之愿请骸骨归归未至彭城疽发背而死陈平乃夜出女子二千人荥阳城东门楚因击之陈平乃与汉王从城西门夜出去遂入关收散兵复东其明年淮陰侯破齐自立为齐王使使言之汉王汉王大怒而骂陈平蹶汉王【集解駰案汉书音义曰蹶谓蹶汉王足】汉王亦悟乃厚遇齐使使张敖卒立信为齐王封平以户牖乡用其奇计策卒灭楚常以护军中尉从定燕王臧荼汉六年人有上书告楚王韩信反高帝问诸将诸将曰亟发兵坑竖子耳高帝默然问陈平平固辞谢曰诸将云何上具告之陈平曰人之上书言信反有知之者乎曰未有曰信知之乎曰不知陈平曰陛下精兵孰与楚上曰不能过平曰陛下将用兵有能过韩信者乎上曰莫及也平曰今兵不如楚精而将不能及而举兵攻之是趣之战

也窃为陛下危之上曰为之奈何平曰古者天子巡狩会诸侯南方有云梦陛下第出伪游云梦【索隐苏林云第且也小颜云但也】会诸侯於陈陈楚之西界【正义陈今陈州也韩信都彭城号楚王故陈州为楚西界也】信闻天子以好出游其势必无事而郊迎谒谒而陛下因禽之此特一力士之事耳高帝以为然乃发使告诸侯会陈吾将南游云梦上因随以行行未至陈楚王信果郊迎道中高帝豫具武士见信至即执缚之载後车信呼曰天下已定我固当烹高帝顾谓信曰若毋声而反明矣武士反接之【集解駢案汉书音义曰反缚两手】遂会诸侯于陈尽定楚地还至雒阳赦信以为淮陰侯而与功臣剖符定封於是与平剖符世世勿絶为户牖侯平辞曰此非臣之功也上曰吾用先生谋计战胜剋敌非功而何平曰非魏无知臣安得进上曰若子可谓不背本矣乃复赏魏无知其明年以护军中尉从攻反者韩王信於代卒至平城为匈奴所围七日不得食高帝用陈平奇计使单于阼氏【集解苏林曰阼氏音焉支如汉皇后】围以得开高帝既出其计秘世莫得闻【集解駢案桓谭新论或云陈平为高帝解平城之围则言其事秘世莫得而闻也此以工妙踔善故藏隐不传焉子能权知斯事否吾应之曰此策乃反薄陋拙恶故隐而不泄高帝见围七日而陈平往说阼氏阼氏言于单于而出之以是知其所用说之事矣彼陈平必言汉有好丽美女爲道其容貌天下无有今困急已驰使归迎取欲进与单于单于见此人必大好爱之爱之则阼氏日以远踈不如及其未到令汉得脱去去亦不持女来矣阼氏妇女有妬媚之性必增恶而剋去之此说简而要及得其用则欲使神怪故隐匿不泄也刘子骏闻吾言乃立称善焉按汉书音义应劭说此事大旨与桓论畧同不知是应全取桓论或别有所闻乎今观桓论似本无说】高帝南过曲逆【集解駢案地理志县属中山也索隐章帝丑其名改云蒲阴也】上其城望见其屋室甚大曰壮哉县吾行天下独见洛阳与是耳顾问御史曰曲逆户口几何对曰始秦时三万余户间者兵数起多亡匿今见五千户於是乃诏御史更以陈平为曲逆侯尽食之除前所食户牖其後常以护军中尉从攻陈豨及黥布凡六出奇计辄益邑凡六益封奇计或颇秘世莫能闻也高帝从破布军还病创徐行至长安燕王卢绾反上使樊噲以相国将兵攻之既行人有短恶噲者高帝怒曰噲见吾病乃冀我死也用陈平谋而召绾侯周勃受诏牀下曰陈平亟驰传载勃代噲将平至军中即斩噲头二人既受诏驰传未至军行计之曰樊噲帝之故人也功多且又乃吕后弟吕嬃之夫有亲且贵帝以忿怒故欲斩之则恐後悔宁囚而致上上自诛之未至军为坛以节召樊噲噲受诏即反接载檻车使诣长安而令绾侯勃代将兵定燕反县平行闻高帝崩平恐吕太后及吕嬃谗怒乃驰传先去逢使者诏平与灌婴屯於荥阳平受诏立复驰至宫哭甚哀因奏事丧前吕太后哀之曰君劳出休矣平畏谗之就因固请得宿卫中太后乃以为郎中令曰傳教孝惠【集解如淳曰傳相之傳也】是後吕嬃谗乃不得行樊噲至则赦复爵邑孝惠帝六年相国曹参卒以安国侯王陵为右丞相【集解徐广曰王陵以客从起丰以廐将别守丰上东因从战不利奉孝惠鲁元出睢水中封为雍侯高祖八年定食安国二十二年卒谥武侯至玄孙坐酎金国除】陈平为左丞相王陵者故沛人始为县豪高祖微时兄事陵陵少文任气好直言及高祖起沛入至咸阳陵亦自聚党数千人居南阳不肯从沛公及汉王之还攻项籍陵乃以兵属汉项羽取陵母置军中陵使至则东乡坐陵母欲以招陵陵母既私送使者泣曰为老妾语陵谨事汉王汉王长者也无以老妾故持二心妾以死送使者遂伏劍而死项王怒烹陵母陵卒从汉王定天下以善雍齿雍齿高帝之仇而陵本无意从高帝以故晚封为安国侯安国侯既为右丞相二岁孝惠帝崩高后欲立诸吕为王问王陵王陵曰不可问陈平陈平曰可吕太后怒乃详迁陵为帝太傅实不用陵陵怒谢疾免杜门竟不朝请

七年而卒陵之免丞相吕太后乃徙平为右丞相以辟阳侯审食其为左丞相左丞相不治常给事於中【集解孟康曰不在治处便止宫中也】食其亦沛人汉王之败彭城西楚取太上皇吕后为质食其以舍人侍吕后其後从破项籍为侯幸於吕太后及为相居中百官皆因决事吕嬃常以前陈平为高帝谋执樊哙数谗曰陈平为相非治事日饮醇酒戏妇女陈平闻日益甚吕太后闻之私独喜面质吕嬃於陈平曰鄙语曰儿妇人口不可用顾君与我何如耳无畏吕嬃之谗也吕太后立诸吕为王陈平伪聽之及吕太后崩平与太尉勃合谋卒诛诸吕立孝文皇帝陈平本谋也审食其免相【集解徐广曰审食其初以舍人起侍吕后孝惠帝於沛又从在楚封二十五年文帝三年死子平代代二十二年景帝三年坐谋反国除一本云食其免後三岁为淮南王所杀文帝令其子平嗣侯菑川王反辟阳近菑川平降之国除】孝文帝立以为太尉勃亲以兵诛吕氏功多陈平欲让勃尊位乃病谢孝文帝初立恠平病问之平曰高祖时勃功不如臣平及诛诸吕臣功亦不如勃愿以右丞相让勃於是孝文帝乃以绛侯勃为右丞相位次第一平徙为左丞相位次第二赐平金千斤益封三千户居顷之孝文皇帝既益明习国家事朝而问右丞相勃曰天下一岁决狱几何勃谢曰不知问天下一岁钱谷出入几何勃又谢不知汗出沾背愧不能对於是上亦问左丞相平平曰有主者上曰主者谓谁平曰陛下即问决狱责廷尉问钱谷责治粟内史上曰苟各有主者而君所主者何事也平谢曰主臣【集解张晏曰若今人谢曰惶恐也马融龙虎赋曰勇怯见之莫不主臣孟康曰主臣主羣臣也若今言人主也韦昭曰言主臣道不敢欺也索隐苏林与孟康同既古人所未了故并存两解】陛下不知其弩下使待罪宰相宰相者上佐天子理阴阳顺四时下育万物之宜外镇抚四夷诸侯内亲附百姓使卿大夫各得任其职焉孝文帝乃称善右丞相大慙出而让陈平曰君独不素教我陈平笑曰君居其位不知其任邪且陛下即问长安中盗贼数【集解駰案汉书音义曰头数也】君欲强对邪於是绛侯自知其能不如平远矣居顷之绛侯谢病请免相陈平专为一丞相孝文帝二年丞相陈平卒谥为献侯子共侯买代侯二年卒子简侯恢代侯二十三年卒子何代侯三十三年何坐略人妻弃市国除始陈平曰我多阴谋是道家之所禁吾世即废亦已矣终不能复起以吾多阴祸也然其後曾孙陈掌以卫氏亲贵戚愿得续封陈氏然终不得【集解徐广曰陈掌者卫青之子壻】太史公曰陈丞相平少时本好黄帝老子之术方其割肉俎上之时其意固已远矣倾侧扰攘楚魏之间卒归高帝常出奇计救纷纭之难振国家之患及吕后时事多故矣然平竟自脱定宗庙以荣名终称贤相岂不善始善终哉非知谋孰能当此者乎

【索隐述赞曰曲逆穷巷门多长者宰肉先均佐丧後罢魏楚更用腹心难假弃印封金刺船露髀间行归汉委质麾下荥阳计全平城围解推陵让勃哀多益寡应变合权克定宗社】

史记卷五十六

史记卷五十六考证

陈丞相世家事嫂如母集解駰案兄伯已逐其妇此嫂疑後娶也○【臣照】按司马迁特载陈平兄伯逐妇事专为下文盗嫂语明其诬耳至事兄伯如父事嫂如母固是训辞连类而及不必有嫂乃云然裴駰必求其嫂以实之亦凿矣

平谢曰主臣集解张晏曰若今人谢曰惶恐也马融龙虎赋曰勇怯见之莫不主臣孟康曰主臣主羣臣也若今言人主也韦昭曰言主臣道不敢欺也索隐苏林与孟康同既古人所未了故并存两解○【臣照】按如孟韦之说于冯唐传之主臣更通不去自应从张晏作惶恐解索隐於此依违其说不若冯唐传注之详确也

曾孙陈掌以卫氏亲贵戚集解徐广曰陈掌者卫青之子壻○按卫将军传但云青姊少儿与掌通徐注或有错误

史记卷五十六考证

卷五十七

钦定四库全书

史记卷五十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

绛侯周勃世家第二十七

绛侯周勃者沛人也其先卷人【集解徐广曰卷县在荥阳索隐韦昭云属河南地理志亦然然则後置荥阳郡而卷隶焉音丘玄反字林音丘权反正义括地志云故卷城在郑州原武县西北七里释例地名云卷县所理垣雍城也】徙沛勃以织薄曲为生【集解苏林曰薄一名曲月令曰具曲植索隐谓勃本以织蚕薄为生业也韦昭云北方谓薄为曲许慎注淮南云曲苇薄也郭璞注方言云植悬曲柱也音直吏反】常为人吹箫给丧事【集解如淳曰以乐丧家若俳优瓚曰吹箫以乐丧殡若乐人也索隐左传歌虞殡犹今挽歌类也歌者或有箫管】材官引强【集解駰案汉书音义曰能引强弓官如今挽强司马也索隐晋灼云申屠嘉为材官蹶张】高祖之为沛公初起勃以中?从攻胡陵下方与方与反与战却适【集解駰案适汉书作敌】攻丰击秦军砀东还军留及萧复攻砀破之下下邑先登赐爵五大夫攻蒙虞取之【索隐二县名地理志属梁国】击章邯车骑殿【集解服?曰畧得殿兵也如淳曰殿不进也瓚曰在军後曰殿孙检曰一说上功曰最下功曰殿战功曰多周勃事中有此三品与诸将俱计功则曰殿最独捷则曰多多义见周礼故此云击章邯车骑殿又云先至城下为多又云攻槐里好时最是也】定魏地攻爰戚东缙【集解徐广曰属山阳索隐小颜音昏非也地理志山阳有东缙县音旻然则户牖之为东缙音昏是属陈留者音昏属山阳者音旻也正义缙眉贫反括地志云东缙故城汉县也在兖州金乡县界】以往至栗取之【正义括地志云栗属沛郡也】攻啗桑先登【索隐徐氏云在梁彭城间】击秦军阿下破之【索隐谓东阿之下】追至濮阳下甄城攻都关【索隐地理志县名属山阳】定陶袭取宛朐【正义冤劬二音今曹州县在州西四十七里】得单父令【正义善甫二音宋州县也】夜袭取临济攻张【集解駰案汉书音义曰攻壽张索隐地理志东郡寿良县光武改曰壽张】以前至卷破之击李由军雍丘下攻开封先至城下为多【集解文颖曰勃士卒至者多如淳曰周礼战功曰多】後章邯破杀项梁沛公与项羽引兵东如砀自初起沛还至砀一岁二月【索隐谓初起沛及还至砀得一岁又更二月也】楚怀王封沛公号安武侯为砀郡长沛公拜勃为虎贲令【集解徐广曰一云句盾令索隐汉书云襄贲令贲音肥县名属东海徐广又云句盾令所见本

各别也】以令从沛公定魏地攻东郡尉於城武破之击王离军破之攻长社先登攻颍阳缙氏【正义缙音勾洛州县】絶河津【正义即古平陰津在洛州洛阳县东北五十里】击赵贲军尸北【索隐贲音肥人姓名也尸即尸乡今偃师也北谓尸乡之北】南攻南阳守齮破武关峽关破秦军於蓝田至咸阳灭秦项羽至以沛公为汉王汉王赐勃爵为威武侯【索隐或是封号未必县名也】从入汉中拜为将军还定三秦至秦赐食邑怀德【正义括地志云怀德故城在同州朝邑县西南四十三里】攻槐里好畤最【集解如淳曰於将率之中功为最索隐地理志二县属右扶风】击赵贲内史保於咸阳最北攻漆【索隐地理志漆县在右扶风正义今豳州新平县古漆县也】击章平姚卬军【索隐卬音五郎反平下将】西定汧【正义口肩反今陇州汧源县本汉汧县地也】还下郿频阳【正义郿音眉括地志云郿县故城在岐州郿县东北十五里频阳故城在宜州土门县南三里今土门县并入同官县属雍州宜州废也索隐地理志郿属右扶风频阳属左冯翊也】围章邯废丘【索隐地理志槐里周曰犬丘懿王都之秦更名废丘高祖三年更名槐里而此云槐里者槐里据後而书之又云废丘者以章邯本都废丘而亡亦据旧书之】破西丞【集解徐广曰天水有西县正义括地志云西县故城在秦州上邽县西南九十里本汉西县地破西县丞】击盗巴军破之【集解如淳曰章邯将】攻上邽【正义音圭秦州县也】东守峽关转击项籍攻曲逆最还守敖仓追项籍籍已死因东定楚地泗川东海郡凡得二十二县还守雒阳栎阳赐与颍阳侯共食鍾离【索隐地理志县名属九江古鍾离子国正义括地志云颍阳故城在陈州南顿县西北鍾离故城在濠州鍾离县东北五里】以将军从高帝击反者燕王臧荼破之易下【索隐荼如字读易水名因以为县在涿郡谓破荼军於易水之下言近水也正义括地志云易县故城在幽州归义县东南十五里燕桓侯所徙都临易是也】所将卒当驰道为多【索隐小顏以当高祖所行之道或以驰道为秦之驰道故贾山传云秦为驰道东穷燕齐也】赐爵列侯剖符世世勿絶食绌八千一百八十户号绌侯【正义括地志云绌邑城汉绌县在绌州曲沃县南二里或以为秦之旧驰道也】以将军从高帝击反韩王信於代降下霍人【索隐萧该云左传以偃阳子归纳诸霍人杜预云晋邑也或作霍正义霍音琐又音苏寡反顏师古云音山寡反按霍字当作倭地理志云倭人县属太原郡括地志云倭人故城在代州繁畤县界汉倭人县也按樊哙列传作霍人其音亦同】以前至武泉【集解徐广曰属云中正义括地志云武泉故城在朔州北二百二十里】击胡骑破之武泉北转攻韩信军铜鞮破之【正义括地志云铜鞮故城在潞州铜鞮县东十五里州西六十五里在并州东南也】还降太原六城【正义并州县从铜鞮还并降六城也】击韩信胡骑晋阳下破之下晋阳後击韩信军於砮石破之【集解应劭曰砮音沙或曰地名索隐晋灼音赤座反正义按在楼烦县西北】追北八十里还攻楼烦三城【正义地理志云在鴈门郡括地志云在并州崞县界】因击胡骑平城下【正义地理志云在鴈门郡括地志云朔州定襄本汉平城县也】所将卒当驰道为多勃迁为太尉击陈豨屠马邑所将卒斩豨将军乘马絺【集解徐广曰姓乘马索隐絺名也乘音始证反】擊韩信陈豨赵利军於楼烦破之得豨将宋最鴈门守圉【索隐圉守之名音胡困反】因转攻得云中守遼【索隐音速正义括地志云云中故城在胜州榆林县东北四十里秦云中郡】丞相箕肆将勲【集解徐广曰箕一作夔勲一作专一作转索隐刘氏肆音如字包恺音以四反汉书勲亦作博字并误耳】定鴈门郡十七县云中郡十二县因复擊豨灵丘破之【索隐地理志县名属代郡正义括地志云灵丘故城在蔚州灵丘县东十里汉县也】斩豨得豨丞相程纵将军陈武都尉高肆定代郡九县燕王卢绾反勃以相国代樊哙将擊下蓟

得綰大将抵丞相偃守陞【集解张晏曰卢綰郡守陞其名】太尉弱御史大夫施屠浑都【集解徐广曰在上谷索隐施名也屠灭之也地理志浑都县属上谷一云御史大夫姓施屠名浑都正义括地志云幽州昌平县本汉浑都县】破綰军上兰【正义括地志云妫州怀戎县东北有马兰溪水恐是】复击破綰军沮阳【集解徐广曰在上谷駟案服?曰沮音阻索隐按地理志沮阳县属上谷正义括地志云上谷郡故城在妫州怀戎县东北百一十里燕上谷秦因不改汉为沮阳县】追至长城【正义即马邑长城亦名燕长城在妫州北今是】定上谷十一县右北平十六县辽西辽东二十九县渔阳二十二县最从高帝【索隐最都几也谓总举其从高祖攻战克获之数也】得相国一人丞相二人将军二千石各三人别破军二下城三定郡五县七十九得丞相大将各一人勃为人木强敦厚高帝以为可属大事勃不好文学每召诸生说士东乡坐而责之【集解如淳曰勃自东乡坐责诸生说士不以宾主之礼】趣为我语其椎少文如此【集解瓚曰令直言勿称经书也韦昭曰椎不挠曲直至如椎索隐大顔云俗谓愚为钝椎音直追反今按椎如字读之谓勃召说士东向而坐责之云趣为我语其质朴之性以斯推之其少文皆如此】勃既定燕而归高祖已崩矣以列侯事孝惠帝孝惠帝六年置太尉官【集解徐广曰功臣表及将相表皆高后四年始置太尉正义下云以勃为太尉十岁高后崩按孝惠六年高后八年崩是十年耳而功臣表及将相表云高后四年置太尉官未详】以勃为太尉十岁高后崩吕禄以赵王为汉上将军吕产以吕王为汉相国秉汉权欲危刘氏勃为太尉不得入军门陈平为丞相不得任事於是勃与平谋卒诛诸吕而立孝文皇帝其语在吕后孝文事中文帝既立以勃为右丞相赐金五千斤食邑万户居月余人或说勃曰君既诛诸吕立代王威震天下而君受厚赏处尊位以宠久之即祸及身矣勃惧亦自危乃谢请归相印上许之岁余丞相平卒上复以勃为丞相十余月上曰前日吾诏列侯就国或未能行丞相吾所重其率先之乃免相就国岁余每河东守尉行县至絳侯勃自畏恐诛常被甲令家人持兵以见之其後人有上书告勃欲反【集解徐广曰文帝四年时】下廷尉廷尉下其事长安逮捕勃治之勃恐不知置辞吏稍侵辱之勃以千金与狱吏狱吏乃书牒背示之【集解李奇曰吏所执簿索隐簿即牒也故魏志秦宓以簿击颊则亦简牒之类也】曰以公主为证公主者孝文帝女也勃太子胜之尚之【集解韦昭曰尚奉也不敢言娶】故狱吏教引为证勃之益封受赐尽以予薄昭及系急薄昭为言薄太后太后亦以为无反事文帝朝太后以冒絮提文帝【集解徐广曰提音弟駟案应劭曰陌额絮也如淳曰太后恚怒遭得左右物提之也晋灼曰巴蜀异物志谓头上巾为冒絮索隐服虔云纶絮也提音弟又音啼非也萧该音底提者擲也萧音为得患者嗔也遭者逢也谓太后嗔乃逢冒絮因以提帝陌音蛮陌之陌入声方言云幪巾南楚之间云陌额也】曰絳侯綰皇帝璽【集解应劭曰言勃诛诸吕废少帝手贯玺时尚不反况今更有异乎】将兵於北军不以此时反今居一小县顾欲反邪文帝既见絳侯狱辞乃谢曰吏事方验而出之於是使使持节赦絳侯复爵邑絳侯既出曰吾尝将百万军然安知狱吏之贵乎絳侯复就国孝文帝十一年卒谥为武侯子胜之代侯六岁尚公主不相中【集解如淳曰犹言不相合当也】坐杀人国除絶一岁文帝乃择絳侯勃子贤者河内守亚夫封为条侯【集解徐广曰表皆作蔣字駟案服?曰蔣音条索隐地理志修县属渤海郡正义括地志云故蔣城俗名南条城在德州蔣县南十二里汉县】续絳侯後条侯亚夫自未侯为河内守时许负相之【索隐应劭云河内温人老嫗也姚氏按楚汉春秋高祖封负为鸣雌亭侯是知妇人亦有封邑】曰君後三岁而侯侯八岁为将相持国秉【索隐音柄】贵重矣於人臣无两其後九岁而君饿死亚夫笑曰臣之兄已代父侯矣有如卒子当代

亚夫何说侯乎然既已贵如负言又何说饿死指示我许负指其口曰有从理入口【索隐从音子容反从理横理】此饿死法也居三岁其兄绛侯胜之有罪孝文帝择绛侯子贤者皆推亚夫乃封亚夫为条侯续绛侯後文帝之後六年匈奴大入边乃以宗正刘礼为将军军霸上【正义庙记云霸陵即霸上按霸陵城在雍州万年县东北二十五里】祝兹侯徐厉为将军军棘门【正义孟康云秦时宫也括地志云棘门在渭北十余里秦王门名也】以河内守亚夫为将军军细柳【正义括地志云细柳仓在雍州咸阳县西南二十里也】以备胡上自劳军至霸上及棘门军直驰入将以下骑送迎已而之细柳军军士吏被甲锐兵刃彀弓弩持满【索隐彀者张也】天子先驱至不得入先驱曰天子且至军门都尉曰将军令曰军中闻将军令不闻天子之诏【索隐六韬云军中之事不闻君命】居无何上至又不得入於是上乃使使持节诏将军吾欲入劳军亚夫乃传言开壁门壁门士吏谓从属车骑曰将军约军中不得驱驰於是天子乃按辔徐行至营将军亚夫持兵揖曰介胄之士不拜请以军礼见【集解应劭曰礼介者不拜索隐应劭云左传晋郤克三肃使者而退杜预注肃若今撻郑衆注周礼肃拜云但俯下手今时撻是】天子为动改容式车【索隐轼者车前横木若上有敬则俯身而凭之】使人称谢皇帝敬劳将军成礼而去既出军门羣臣皆惊文帝曰嗟乎此真将军矣曩者霸上棘门军若儿戏耳其将固可袭而虏也至於亚夫可得而犯邪称善者久之月余三军皆罢乃拜亚父为中尉【正义汉书百官表云中尉秦官掌徼巡京师武帝太初元年更名执金吾应劭云吾者御也掌执金吾以御非常顔师古云金吾鸟名主辟不祥天子出行职主先导以备非常故执此鸟之象因以名官也】孝文且崩时诫太子曰即有缓急周亚夫真可任将兵文帝崩拜亚夫为车骑将军孝景三年吴楚反亚父以中尉为太尉【正义汉书百官表云太尉秦官掌武元狩四年置大将司马即今十二卫大将军及兵部尚书也】军东击吴楚因自请上曰楚兵剽轻【索隐汉书亚夫至淮阳问邓都尉为画此司亚夫从之今此云自请者盖此亦闻疑而传疑汉史得其实也剽音七妙反轻读从去声】难与争锋愿以梁委之【索隐谓以梁委之於吴使吴兵不得过也亦有作餽音亦通】絶其粮道乃可制上许之太尉既会兵荥阳吴方攻梁梁急请救太尉引兵东北走昌邑深壁而守梁曰使使请太尉太尉守便宜不肯往梁上书言景帝景帝使使诏救梁太尉不奉诏坚壁不出而使轻骑兵弓高侯等【索隐韩颓当也正义弓高沧州县也】絶吴楚兵後食道吴兵乏粮饥数欲挑战终不出夜军中惊内相攻击扰乱至於太尉帐下太尉终卧不起顷之复定後吴奔壁东南陬【集解如淳曰陬隅也索隐音邹又音子侯反】太尉使备西北已而其精兵果奔西北不得入吴兵既饿乃引而去太尉出精兵追击大破之吴王濞奔其军而与壮士数千人亡走保於江南丹徒【索隐地理志县属会稽正义括地志云丹徒故城在润州丹徒县东南十八里汉丹徒县也晋太康地志云吴王濞反走丹徒越人杀之於此城南徐州记云秦使赭衣凿其地因谓之丹徒凿处今在故县西北六里丹徒岨东南连亘盘纡屈曲有象龙形故秦凿絶顶濶百余步又夹坑龙首以毁其形坑之所在即今龙月二湖悉成田也】汉兵因乘胜遂尽虏之降其兵购吴王千金月余越人斩吴王头以告凡相攻守三月而吴楚破平【正义越人即丹徒人越灭吴丹徒地属楚秦灭楚後置三十六郡丹徒县属会稽郡故以丹徒为越人也】於是诸将乃以太尉计谋为是由此梁孝王与太尉有郤归复置太尉官五岁迁为丞相景帝甚重之景帝废栗太子丞相固争之不得景帝由此疏之而梁孝王每朝常与太后言条侯之短窦太后曰皇后兄王信可侯也景帝让曰始南皮章武侯【集解瓚曰南皮窦彭祖太后兄子章武侯太后弟广国】先帝不侯及臣即位乃侯之信未得封也窦太后曰人主各以时行耳【索

隐谓人主各当其时而行事不必一一相法也正义人主作人生】自窦长君在时竟不得侯死後乃封其子彭祖顾得侯【索隐许慎注淮南子云顾反也】吾甚恨之帝趣侯信也景帝曰请得与丞相议之丞相议之亚夫曰高皇帝约非刘氏不得王非有功不得侯不如约天下共击之今信虽皇后兄无功侯之非约也景帝默然而止其後匈奴王徐卢等五人降景帝欲侯之以劝後丞相亚夫曰彼背其主降陛下陛下侯之则何以责人臣不守节者乎景帝曰丞相议不可用乃悉封徐卢等为列侯【索隐功臣表唯徐卢封容城侯】亚夫因谢病景帝中三年以病免相顷之景帝居禁中召条侯赐食独置大胾【集解韦昭曰胾大胾也音侧吏反索隐胾音李转反谓肉胾也】无切肉又不置櫡条侯心不平顾谓尚席取櫡【集解应劭曰尚席主席者索隐顾氏按舆服杂事云尚席掌武帐帷幔也櫡音筋汉书作箸箸者食所用也留侯云借前箸以筹之礼曰羹之有菜者用桡桡亦箸之类故郑玄云今人谓箸为桡是也】景帝视而笑曰此非不足君所乎【集解孟康曰设胾无筋者此非不足满於君所乎嫌恨之如淳曰非故不足君之食具也偶失之索隐言不设箸者此盖非我意於君有不足乎故如淳云非故不足君之食具偶失之耳盖当然也所以帝视而笑也若本不为足当别有辞未必为之笑也孟康晋灼虽探古人之情亦未必能得其实顾氏亦同孟氏之说又引魏武赐荀彧虚器各记异说也】条侯免冠谢上起条侯因趋出景帝以目送之曰此怏怏者非少主臣也居无何条侯子为父买工官尚方【集解徐广曰一作西索隐工官即尚方之工所作物属尚方故云工官尚方】甲楯五百被【集解徐广曰音披駟案如淳曰工官官名也张晏曰被具也五百具甲楯】可以葬者取庸苦之不予钱庸知其盗买县官器【索隐县官谓天子也所以谓国家为县官者夏官王畿内县即国都也王者官天下故曰县官也】怒而上变告子事连污条侯【索隐污音鸟故反】书既闻上上下下吏吏簿责条侯【集解如淳曰簿问责其情】条侯不对景帝骂之曰吾不用也【集解孟康曰不用汝对欲杀之也如淳曰恐狱吏畏其复用事不敢折辱索隐孟康如淳已备两解大顔以孟说为得而姚察又别一解云帝责此吏不得亚父直辞以为不足任用故召亚夫别诣廷尉使责问】召诣廷尉【正义景帝见条侯不对簿因责骂之曰吾不任用汝也故召诣廷尉使重推劾耳余说皆非也】廷尉责曰君侯欲反邪亚夫曰臣所买器乃葬器也何谓反邪吏曰君侯纵不反地上即欲反地下耳吏侵之益急初吏捕条侯条侯欲自杀夫人止之以故不得死遂入廷尉因不食五日呕血而死国除絶一岁景帝乃更封绛侯勃他子坚为平曲侯续绛侯後十九年卒谥为共侯子建德代侯十三年为太子太傅坐酎金不善元鼎五年有罪国除【集解徐广曰诸列侯坐酎金失侯者皆在元鼎五年但此辞句如有颠倒索隐纪云坐酎金不善复云元鼎五年有罪国除似重有罪故云颠倒而汉书云为太子太傅坐酎金免官後有罪国除其文又错也按表坐免官至元鼎五年坐酎金又失侯所以二史记之各有不同也】条侯果饿死死後景帝乃封王信为盖侯

太史公曰绛侯周勃始为布衣时鄙朴人也才能不过凡庸及从高祖定天下在将相位诸吕欲作乱勃匡国家难复之乎正虽伊尹周公何以加哉亚夫之用兵持威重执坚忍穰苴曷有加焉足已而不学【索隐亚夫自以己之智谋足而虚己不学古人所以不体权变而动有违忤】守节不逊【索隐守节谓争栗太子不封王信徐卢等不逊谓顾尚席取箸不对制狱是也】终以穷困悲夫

【索隐述赞曰绛侯佐汉质厚敦笃始击殢东亦围尸北所攻必取所讨咸克陈豨伏诛臧荼

破国事居送往推功伏德列侯就第太尉下狱继相条侯绍封平曲惜哉贤将父子代辱】

史记卷五十七

史记卷五十七考证

绛侯周勃世家击反者燕王臧荼○【臣照】案马迁书反者燕王臧荼及韩王信皆以明韩信辈之不反至本传则从国史所书俾两不相揜

亚父东击吴楚因自请上曰索隐汉书亚夫至淮阳问邓都尉为画此计亚夫从之今此云自请者盖此亦闻疑而传疑汉史得其实也○【臣照】按邓都尉画计见吴王濞传马迁固已两存其说矣况从人之画?须自请索隐之说赘

坐酎金不善元鼎五年有罪国除○顾炎武曰当云元鼎五年坐酎金不善国除衍有罪二字

史记卷五十七考证

<史部,正史类,史记>

卷五十八

钦定四库全书

史记卷五十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

梁孝王世家第二十八

梁孝王武者孝文皇帝子也而与孝景帝同母母窦太后也孝文帝凡四男长子曰太子是为孝景帝次子武次子参次子胜【正义汉书胜作揖又云诸姬生代孝王参梁怀王揖言诸姬者衆妾卑贱史不书姓故云诸姬也】孝文帝即位二年以武为代王【集解徐广曰都中都正义括地志云中都故城在汾州平遥县西十二里】以参为太原王【集解徐广曰都晋阳正义括地志云并州太原地名大明城即古晋阳城智伯与韩魏攻赵襄子於晋阳即此城是也】以胜为梁王【集解徐广曰都睢阳索隐汉书梁王名揖盖是矣按景帝子中山靖王名胜是史记误耳正义括地志云宋州宋城县在州南二里外城中本汉之睢阳县也汉文帝封子武於大梁以其卑湿徙睢阳故改曰梁也】二岁徙代王为淮阳王【集解徐广曰都陈正义即古陈国城也】以代尽与太原王号曰代王参立十七年孝文後二年卒谥为孝王子登嗣立是为代共王立二十九年元光二年卒子义立是为代王十九年汉广关以常山为限而徙代王王清河【集解徐广曰都清阳正义括地志云清阳故城在贝州清阳县西北八里也】清河王徙以元鼎三年也初武为淮阳王十年而梁王胜卒谥为梁怀王怀王最少子爱幸异於他子其明年徙淮阳王武为梁王梁王之初王梁孝文帝之十二年也梁王自初王通历已十一年矣【索隐谓自文帝二年初封代後徙淮阳又徙梁通数文帝二年至十二年徙梁为十一年也】梁王十四年入朝十七年十八年比年入朝留其明年乃之国二十一年入朝二十二年孝文帝崩二十四年入朝二十五年复入朝是时上未置太子也上与梁王燕饮尝从容言曰千秋万岁後传於王王辞谢虽知非至言然心内喜太后亦然其春吴楚齐赵七国反吴楚先击梁棘壁【集解文颖曰地名索隐按左氏传宣公二年宋华元战于大棘杜预云在襄邑东南盖即棘壁是也正义括地志云大棘故城在宋州寧陵县西南七十里】杀数万人梁孝王城守睢阳而使韩安国张敖等为大将军以距吴楚吴楚以梁为限不敢过而西与太尉亚夫等相距三月吴楚破而梁所破杀虏略与汉中分【集解駰案汉书音义曰梁所虏吴楚之捷略与汉等】明年汉立太子其後梁最亲有功又为大国居天下膏腴地地北界泰山西至高阳【集解徐广曰在陈留圉县駰案司马彪曰圉有高阳亭也索隐圉县属陈留高

阳乡名也注引司马彪者出续汉书郡国志也】四十余城皆多大县孝王窦太后少子也爱之赏赐不可胜道於是孝王筑东苑【索隐筑谓建也白虎通云苑所以东者何盖以东方生物故也】方三百余里【索隐盖言其奢非实辞或者梁国封域之方正义括地志云苑园在宋州宋城县东南十里葛洪西京杂记云梁孝王苑中有落猿岩栖龙岫鴈池鹤洲鳧岛诸宫观相连奇果佳树瑰禽异兽靡不毕备俗人言梁孝王竹园也】广睢阳城七十里【索隐苏林云广其径也太康地理记云城方十三里梁孝王筑之鼓倡节杵而後下和之者称睢阳曲今踵以为故所以乐家有睢阳曲盖采其遗音也】大治宫室为复道自宫连属於平台五十余里【集解徐广曰睢阳有平台里駟案如淳曰在梁东北离宫所在也晋灼曰或说在城中东北角索隐如淳曰在梁东北离宫所在也按今城东二十里临新河有故台址不甚高俗云平台又名修竹院西京杂记云有落猿岩鳧洲鴈渚连亘七十余里是也】得赐天子旌旗出从千乘万骑【索隐汉官仪云天子法驾三十六乘大驾八十一乘皆备千乘万骑而出也】东西驰猎拟於天子出言?入言警【索隐汉旧仪云皇帝辇动称警出殿则传蹕止人清道言出入者互文耳入亦有蹕】招延四方豪杰自山以东游说之士莫不毕至齐人羊胜公孙诡邹阳之属公孙诡多奇邪计【索隐周礼有奇衰之人郑玄云奇衰譎恠非常也奇音纪宜反衰音斜也】初见王赐千金官至中尉梁号之曰公孙将军梁多作兵器弩弓矛数十万而府库金钱且百巨万【索隐如淳云巨亦大与大百万同也韦昭云大百万今万万】珠玉宝器多於京师二十九年十月梁孝王入朝景帝使使持节乘輿驷马迎梁王於阙下【集解邓展曰但将驷马往辎曰称乘輿驷马则车马皆往言不驾六马耳天子副车驾驷马】既朝上疏因留以太后亲故王入则侍景帝同辇出则同车游猎射禽兽上林中梁之侍中郎谒者着籍引出入天子殿门与汉宦官无异【正义着竹畧反籍谓名簿也若今通引出入门也】十一月上废栗太子窦太后心欲以孝王为後嗣大臣及袁盎等有所关说於景帝【索隐袁盎云汉家法周道立子是有所关涉之说於帝也一云关者隔也引事而关隔其说不得行也】窦太后议格【集解如淳曰歧阁不得下索隐张晏云格止也服?云格谓格阁不行苏林音阁周成杂字歧阁也通俗文云高置立歧棚云歧阁字林音纪又音诡也】亦遂不复言以梁王为嗣事由此以事秘世莫知乃辞归国其夏四月上立胶东王为太子梁王怨袁盎及议臣乃与羊胜公孙诡之属陰使人刺杀袁盎及他议臣十余人逐其贼未得也於是天子意梁王【索隐谓意疑梁刺之】逐贼果梁使之乃遣使冠盖相望於道覆按梁捕公孙诡羊胜公孙诡羊胜匿王後宫使者责二千石急梁相轩邱豹及内史韩安国进谏王【正义姓轩邱名豹也】王乃命胜诡皆自杀出之上由此怨望於梁王梁王恐乃使韩安国因长公主谢罪太后然後得释上怒稍解因上书请朝既至关茅兰说王【集解駟案汉书音义曰茅兰孝王臣】使乘布车【集解张晏曰布车降服自比丧人】从两骑入匿於长公主园汉使使迎王王已入关车骑尽居外不知王处太后泣曰帝杀吾子景帝忧恐於是梁王伏斧质於阙下谢罪然後太后景帝大喜相泣复如故悉召王从官入关然景帝益疏王不同车辇矣三十五年冬复朝上疏欲留上弗许归国意忽忽不乐北猎良山【索隐汉书作梁山述征记云良山际清水今壽张县南有良山服?云是此山也正义括地志云梁山在郚州寿张县南三十五里即猎处也】有献牛足出背上【索隐张晏云足当处下所以辅身也今出背上象孝王背朝以干上也北者陰也又在梁山明为梁也牛者丑之畜冲在六月北方数六故六月六日薨也】孝王恶之六月中病热六日卒谥曰孝王【索隐述征记碣有梁孝王之冢】孝王慈孝每闻太后病口不能食居不安寝常欲留长安侍太后太后亦爱之及闻梁王薨窦太后哭极哀不食曰帝

果杀吾子景帝哀惧不知所为与长公主计之乃分梁为五国【索隐长子买梁共王子明济川王子彭离济东王子定山阳王子不识济陰王】尽立孝王男五人为王女五人皆食汤沐邑於是奏之太后太后乃说为帝加壹浚梁孝王长子买为梁王是为共王子明为济川王子彭离为济东王子定为山阳王子不识为济陰王孝王未死时财以巨万计不可胜数及死藏府余黄金尚四十余万斤他财物称是梁共王三年景帝崩共王立七年卒子襄立是为平王

梁平王襄【索隐汉书作让】十四年母曰陈太后共王母曰李太后李太后亲平王之大母也而平王之后姓任曰任王后任王后甚有宠於平王襄初孝王在时有罍樽直千金【集解郑德曰上盖刻为云雷象索隐应劭曰诗云酌彼金罍罍有画云雷之象以金饰之】孝王诚後世善保罍樽无得以与人任王后闻而欲得罍樽平王太母李太后曰先王有命无得以罍樽与人他物虽百巨万犹自恣也任王后絶欲得之平王襄直使人开府取罍樽赐任王后李太后大怒汉使者来欲自言平王襄及任王后遮止闭门李太后与争门措指【集解晋灼曰许慎措置措以为桡索隐措音迕侧格反汉书王陵传迕前队皆作此字说文云迕桡也谓为门扉所桡】遂不得见汉使者李太后亦私与食官长及郎中尹霸等士通乱【正义张先生旧本有士字先生疑是衍字又不敢除故以朱大点其字中心今按食官长及郎中尹霸等是士人太后与通乱其义亦通也】而王与任王后以此使人风止李太后李太后内有淫行亦已後病薨病时任后未尝请病薨又不持丧元朔中睢阳人樊噲反者【索隐韦昭云樊音岸按樊反人姓名也反字或作友】人有辱其父而与淮阳太守客出同车太守客出下车樊噲反杀其仇於车上而去淮阳太守怒以让梁二千石二千石以下求反甚急执反亲戚反知国陰事乃上变事具告知王与大母争樽状时丞相以下具知之欲以伤梁长吏其书闻天子天子下吏验问有之公卿请废襄为庶人天子曰李太后有淫行而梁王襄无良师傅故陷不义乃削梁八城梟任王后首于市梁余尚有十城襄立三十九年卒谥为平王子无伤立为梁王也

济川王明者梁孝王子以桓邑侯【索隐地理志桓邑阙】孝景中六年为济川王七岁坐射杀其中尉汉有司请诛天子弗忍诛废明为庶人迁房陵地入于汉为郡

济东王彭离者梁孝王子以孝景中六年为济东王二十九年彭离骄悍无人君礼昏暮私与其奴亡命少年数十人行剽杀人取财物以为好【集解如淳曰以是为好喜之事】所杀发觉者百余人国皆知之莫敢夜行所杀者子上书言汉有司请诛上不忍废以为庶人迁上庸地入于汉为大河郡

山阳哀王定者梁孝王子以孝景中六年为山阳王九年卒无子国除地入于汉为山阳郡

济陰哀王不识者梁孝王子以孝景中六年为济陰王一岁卒无子国除地入于汉为济陰郡

太史公曰梁孝王虽以亲爱之故王膏腴之地然会汉家隆盛百姓殷富故能植其财货广宫室车服拟於天子然亦僭矣

褚先生曰臣为郎时闻之於宫殿中老郎吏好事者称道之也窃以为令梁孝王怨望欲为不善者事从中生今太后女主也以爱少子故欲令梁王为太子大臣不时正言其不可状阿意治小私说意以受赏赐非忠臣也齐如魏其侯窦婴之正言也【索隐窦婴袁盎皆言如周家立子不合立弟】何以有後祸景帝与王燕见侍太后饮景帝曰千秋万岁之後传王太后喜说窦婴在前据地言曰汉法之约传子适孙今帝何以得传弟擅乱高帝约乎於是景帝默然无声太后意不说故成王与小弱弟立树下取一桐叶以与之曰吾用封汝周公闻之进见曰天王封弟甚善成王曰吾直与戏耳周公曰人主无过举不当有戏言言之必行之於是乃封小弟以应县【索隐此说与晋世家不同事与封叔虞同彼云封唐此云封应应亦成王之弟或别有所见故不同正义括地志云故应城故应乡也在汝州鲁山县东四十里吕氏春秋云成王戏削桐叶为圭以封叔虞非应侯也又汲冢古文云殷时已有应国非成王所造也】是後成王没齿不敢有戏言言必行之孝经曰非法不言非道不行此圣人之法言也今主上不宜出好言於梁王梁王上有太后之重骄蹇日久数闻景帝好言千秋万世之後传王而实不行又诸侯王朝见天子汉法凡当四见耳始到入小见到正月朔旦奉皮荐璧玉贺正月法见後三日为王置酒赐金钱财物後二日复入小见辞去凡留长安不过二十日小见者燕见於禁门内饮於省中非士人所得入也今梁王西朝因留且半岁入与人主同辇出与同车示风以大言而实不与令出怨言谋畔逆乃随而忧之不亦远乎非大贤人不知退让今汉之仪法朝见贺正月者常一王与四侯俱朝见十余岁一至今梁王常比年入朝见久留鄙语曰骄子不孝非恶言也故诸侯王当为置良师傅相忠言之士如汲黯韩长孺等敢直言极谏安得有患害盖闻梁王西入朝谒窦太后燕见与景帝俱侍坐於太后前语言私说太后谓帝曰吾闻殷道亲亲周道尊尊其义一也【索隐殷人尚质亲亲谓亲其弟而授之周人尚文尊尊谓尊祖之正体故立其子尊其祖也】安车大驾用梁孝王为寄景帝跪席举身曰诺罢酒出帝召袁盎诸大臣通经术者曰太后言如是何谓也皆对曰太后意欲立梁王为帝太子帝问其状袁盎等曰殷道亲亲者立弟周道尊尊者立子殷道质质者法天亲其所亲故立弟周道文文者法地尊者敬也敬其本始故立长子周道太子死立适孙殷道太子死立其弟帝曰於公何如皆对曰方今汉家法周周道不得立弟当立子故春秋所以非宋宣公宋宣公死不立子而与弟弟受国死复反之与兄之子弟之子争之以为我当代父後即刺杀兄子以故国乱祸不絶故春秋曰君子大居正宋之祸宣公为之臣请见太后白之袁盎等入见太后太后言欲立梁王梁王即终欲谁立太后曰吾复立帝子袁盎等以宋宣公不立正生祸祸乱後五世不絶小不忍害大义状报太后太后乃解说即使梁王归就国而梁王闻其议出於袁盎诸大臣所怨望使人来杀袁盎袁盎顾之曰我所谓袁将军者也公得毋误乎刺者曰是矣刺之置其剑剑着身视其剑新治问长安中削厉工工曰梁郎某子来治此剑【索隐谓梁国之郎是孝王官属某子史失其姓名也】以此知而发觉之发使者捕逐之独梁王所欲杀大臣十余人文吏穷本之谋反端颇见太后不食日夜泣不止景帝甚忧之问公卿大臣大臣以为遣经术吏往治之乃可解於是遣田叔吕季主往治之此二人皆通经术知大礼来还至霸昌廐【正义括地志云汉霸昌廐在雍州万年县东北三十八里】取火悉烧梁之反辞但空手来对景帝景帝曰何如对曰言梁王不知也造为之者独其幸臣羊胜公孙诡之属为之耳谨以伏诛死梁王无恙也景帝喜说曰急趋谒太后太后闻之立起坐食气平复故曰不通经术知古今之大礼不可以为三公及左右近臣少见之人如从管中闚天也

【索隐述赞曰文帝少子徙封於梁太后鍾愛廣筑睢陽旌旗警蹕勢擬天王功扞吳楚計丑孫羊竇嬰正議袁盎劫傷漢窮梁獄冠蓋相望禍成驕子致此猖狂雖分五國卒亦不昌】

史记卷五十八

史记卷五十八考证

梁孝王世家乃使韩安国因长公主谢罪太后○归有光曰安国传因长公主谢太后事在前非为胜诡事

使乘布车集解张晏曰布车降服自比丧人○顾炎武曰乘布车谓微服而行使人不知耳无降服自比丧人之意

史记卷五十八考证

卷五十九

钦定四库全书

史记卷五十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

五宗世家第二十九

【索隐景帝子十四人一武帝余十三人为王汉书谓之景十三王此名五宗者十三人为王其母五人同母者为宗也】

孝景皇帝子凡十三人为王而母五人同母者为宗栗姬子曰荣德闾于【索隐闾音遏汉书无于字】程姬子曰余非端贾夫人子曰彭祖胜唐姬子曰发王夫人儿姁子曰越寄乘舜【索隐姁音况羽反儿姁夫人名王皇后之妹也】

河间献王德以孝景帝前二年用皇子为河间王【索隐汉书云大行令奏谥法曰聪明睿智曰献】好儒学被服造次必於儒者山东诸儒多从之游二十六年卒【集解駰案汉名臣奏杜业奏曰河间献王经术通明积德累行天下雄俊衆儒皆归之孝武帝时献王朝被服造次必於仁义问以五策献王辄对无穷孝武帝翫然难之谓献王曰汤以七十里文王百里王其勉之王知其意归即纵酒听乐因以终索隐问以五策按汉书诏策问三十余事被服造次按小顔云被服言常居处其中造次谓所向所行皆法於儒者】子共王不害立四年卒子刚王基代立十二年卒子顷王授代立【索隐汉书云授谥顷音倾】

临江哀王闾于以孝景帝前二年用皇子为临江王三年卒无後国除为郡

临江闵王荣以孝景前四年为皇太子四岁废用故太子为临江王四年坐侵庙壝垣为宫【索隐服?云宫外之余地顾野王云墙外行马内田音人椽反又音软又音奴乱反壝垣墙外之短垣也】上徵荣荣行祖於江陵北门【索隐祖者行神行而祭之故曰祖也风俗通云共工氏之子曰修好远游故祀为祖神又崔浩云黄帝之子嫫祖好远游而死於道因以为行神亦不知其何据盖见其谓之祖因以为嫫祖非也据帝系及本纪皆言嫫祖黄帝妃无为行神之由也又聘礼云出祖释軺祭脯酒而已按今祭礼以軺壤土为坛於道则用黄羝或用狗以其

羝血衅左轮正义荆州图副云汉临江闵王荣始都江陵城坐侵庙壝地为宫被徵出城北门而车轴折父老共流涕曰吾王不反矣既而为郢都所讯惧而缢死自此後北门存而不啓盖为荣不以道终也】既已上车轴折车废江陵父老流涕窃言曰吾王不反矣荣至诣中尉府簿中尉郢都责讯王王恐自杀葬蓝田燕数万衔土置冢上百姓怜之荣最长死【正义顔师古云荣实最长而传居二王後者以其从太子废後乃为王也】无後国除地入于汉为南郡

右三国本王皆栗姬之子也

鲁共王余以孝景前二年用皇子为淮阳王二年吴楚反破後以孝景前三年徙为鲁王好治宫室苑囿狗马季年好音不喜辞辨为人吃二十六年卒子光代为王初好音輿马晚节啬【正义晚节犹言末年时啬贪恠也】惟恐不足於财江都易王非以孝景前二年用皇子为汝南王【索隐谥法好更故旧曰易】吴楚反时非年十五有材力上书愿击吴景帝赐非将军印击吴吴已破二岁徙为江都王治吴故国以军功赐天子旌旗元光五年匈奴大入汉为贼非上书愿击匈奴上不许非好气力治宫观招四方豪杰骄奢甚立二十六年卒子建立为王七年自杀淮南衡山谋反时建颇闻其谋自以为国近淮南恐一日发为所并即陰作兵器而时佩其父所赐将军印载天子旗以出易王死未葬建有所说易王宠美人淖姬【集解苏林曰淖音泥淖正义女孝反】夜使人迎与姦服舍中【索隐淖音女教反淖姓也齐有淖齿是也汉书云建召易王所爱淖姬等十人与奸服舍中也】及淮南事发治党与颇及江都王建建恐因使人多持金钱事絶其狱而又信巫祝使人祷祠妄言建又尽与其姊弟奸【索隐汉书云建女弟徵臣为盖侯子妇以易王丧来归建复与奸也】事既闻汉公卿请捕治建天子不忍使大臣即讯王王服所犯遂自杀国除地入于汉为广陵郡胶西于王端以孝景前三年吴楚七国反破後端用皇子为胶西王【索隐按逸周书谥法云能优其德曰于】端为人贼戾又阴痿【正义委危反不能御妇人】一近妇人病之数月而有爱幸少年为郎为郎者顷之与後宫乱端禽灭之及杀其子母数犯上法汉公卿数请诛端天子为兄弟之故不忍而端所为滋甚有司再请削其国去大半端心愠遂为无訾省【集解苏林曰为无所訾録无所省録正义顔师古云訾财也省视也言不能视録资财】府库坏漏尽腐财物以巨万计终不得收徙令吏毋得收租赋端皆去卫【索隐谓不置宿卫人】封其宫门从一门出游数变名姓为布衣之他郡国相二千石往者奉汉法以治端辄求其罪告之无罪者诈药杀之所以设诈究变【索隐究穷也故郭璞云究谓穷】尽强足以拒谏智足以饰非相二千石从王治则汉绳以法故胶西小国而所杀伤二千石甚衆立四十七年卒竟无男代後国除地入于汉为胶西郡

右三国本王皆程姬之子也

赵王彭祖以孝景前二年用皇子为广川王赵王遂反破後彭祖王广川四年徙为赵王十五年孝景帝崩彭祖为人巧佞卑諂足恭而心刻深【索隐刻害深无仁恩】好法律持诡辩以中人【索隐谓诡诞之辩以伤中人】彭祖多内宠姬及子孙相二千石欲奉汉法以治则害於王家是以每相二千石至彭祖衣皂布衣自行迎除二千石舍【索隐谓彭祖自为二千石扫除其舍以迎之也】多设疑事以作动之得二千石失言中忌讳辄书之二千石欲治者则

以此迫劫不听乃上书告及污以奸利事彭祖立五十余年相二千石无能满二岁辄以罪去大者死小者刑以故二千石莫敢治而赵王擅权使使即县为贾人榷会【集解韦昭曰平会两家买卖之贾也榷者禁他家独王家得为之索隐榷音角独言榷谓酤榷也会音侏古外反谓为贾人专权买卖之贾侏以取利若今之知市矣韦昭则训榷为平其注解亦得】入多於国经租税【索隐经常也谓王家入多於国家常纳之租税】以是赵王家多金钱然所赐姬诸子亦尽之矣彭祖取故江都易王宠姬王建所盗与奸淖姬者为姬甚爱之彭祖不好治宫室襍祥【集解服虔曰求福也索隐按埤苍云襍祲祥也列子云荆人鬼越人襍谓楚信鬼神越信襍祥者也】好为吏事上书愿督国中盗贼常夜从走卒行徼【索隐上下孟反下工吊反徼是郊外路谓巡徼而伺察境界】邯鄲中诸使过客以彭祖险陂莫敢留邯鄲其太子丹与其女及同产姊奸与其客江充有郤充告丹丹以故废赵更立太子

中山靖王胜以孝景前三年用皇子为中山王十四年孝景帝崩胜为人乐酒【正义乐五教反】好内有子枝属百二十余人常与兄赵王相非曰兄为王专代吏治事王者当日听音声色赵王亦非之曰中山王徒日淫不佐天子拊循百姓何以称为藩臣立四十二年卒【索隐汉书建元三年济川中山王等来朝闻乐而泣天子问其故对以大臣内谗肺腑日踈其言甚雄壮词切而理文天子加亲亲之好可谓汉之英藩矣】子哀王昌立一年卒子昆侈代为中山王【索隐汉书昆侈谥康王子顷王辅嗣至孙国除也】

右二国本王皆贾夫人之子也

长沙定王发之母唐姬故程姬侍者景帝召程姬程姬有所辟不愿进【索隐姚氏按释名云天子诸侯羣妾以次进御有月事者止不御更不口说故以丹注面目的为识令女史见之王察神女赋以为脱桂裳免簪笄施玄的结羽钗的即释名所云也说文云姘女污也汉律云见姘变不得侍祠姘音半】而饰侍者唐儿使夜进上醉不知以为程姬而幸之遂有身已乃觉非程姬也及生子因命曰发以孝景前二年用皇子为长沙王以其母微无宠故王卑湿贫国【集解应劭曰景帝後二年诸王来朝有诏更前称壽歌舞定王但张袖小举手左右笑其拙上恠问之对曰臣国小地狭不足回旋帝以武陵零陵桂阳属焉】立二十七年卒子康王庸立二十八年卒子鲋鮪立【集解服虔曰鮪音拘】为长沙王

右一国本王唐姬之子也

广川惠王越以孝景中二年用皇子为广川王十二年卒子齐立为王【索隐汉书齐谥缪王谥法伤人蔽贤曰缪】齐有幸臣桑距已而有罪欲诛距距亡王因禽其宗族距怨王乃上书告王齐与同产奸自是之後王齐数上书告言汉公卿及幸臣所忠等【索隐汉书告中尉秦彭祖子去嗣坐暴虐勃乱国除也正义所忠姓名】胶东康王寄以孝景中二年用皇子为胶东王二十八年卒淮南王谋反时寄微闻其事私作楼车镞矢战守备候淮南之起【集解应劭曰楼车所以窥看敌国营垒之虚实也索隐左传云登楼车以窥宋人谓看敌国营垒之虚实也李巡注尔雅金矢以金为箭镞镞字林音子木反】及吏治淮南之事辞出之【集解如淳曰穷治其辞出此事】寄於上最亲【集解徐广曰其母武帝母妹正义寄母王夫人即王

皇后之妹於上为从母故寄於诸兄弟最为亲爱也】意伤之发病而死不敢置後於是上问寄有长子者名贤母无宠少子名庆母爱幸寄常欲立之为不次因有过遂无言上怜之乃以贤为胶东王奉康王嗣而封庆於故衡山地为六安王胶东王贤立十四年卒谥为哀王子庆为王【集解徐广曰他本亦作庆字惟一本作建不宜得与叔父同名相承之误】六安王庆以元狩二年用胶东康王子为六安王

清河哀王乘以孝景中三年用皇子为清河王十二年卒无後国除地入于汉为清河郡

常山宪王舜以孝景中五年用皇子为常山王舜最亲景帝少子骄怠多淫数犯禁上常宽释之立三十二年卒太子勃代立为王初宪王舜有所不爱姬生长男梲【集解苏林曰音夺索隐邹氏音之悦反许慎说文解字云他活反字从木】梲以母无宠故亦不得幸於王王后修生太子勃王内多所幸姬生子平子商王王后希得幸及宪王病甚诸幸姬常侍病故王后亦以妒媚不常侍病【索隐媚音亡报反邹氏作媚郭璞注三苍云媚丈夫妒也又云妒女为媚】辄归舍医进药太子勃不自尝药又不宿留侍病及王薨王后太子乃至宪王雅不以长子梲为人数及薨又不分与财物郎或说太子王后令诸子与长子梲共分财物太子王后不听太子代立又不收恤梲梲怨王后太子汉使者视宪王丧梲自言宪王病时王后太子不侍及薨六日出舍【集解如淳曰服舍也】太子勃私奸饮酒博戏击筑与女子载驰环城过市入牢视囚天子遣大行骞【索隐按是张骞】验王后及问王勃请逮勃所与奸诸证左王又匿之吏求捕勃大急使人致击笞掠擅出汉所疑囚者有司请诛宪王后修及王勃上以修素无行使梲之罪勃无良师傅不忍诛有司请废王后修徙王勃以家属处房陵上许之勃王数月迁于房陵国绝月余天子为最亲乃诏有司曰常山宪王蚤夭后妾不和适孽诬争陷于不义以灭国朕甚闵焉其封宪王子平三万户为真定王封子商三万户为泗水王【正义泗水海州】

真定王平元鼎四年用常山宪王子为真定王泗水思王商以元鼎四年用常山宪王子为泗水王十一年卒子哀王安世立十一年卒无子於是上怜泗水王绝乃立安世弟贺为泗水王

右四国本王皆王夫人儿姁子也其後汉益封其支子为六安王泗水王二国凡儿姁子孙於今为六王

太史公曰高祖时诸侯皆赋【集解徐广曰国所出有皆入於王也】得自除内史以下汉独为置丞相黄金印诸侯自除御史廷尉正博士拟於天子自吴楚反後五宗王世汉为置二千石去丞相曰相银印诸侯独得食租税夺之权其後诸侯贫者或乘牛车也

【索隐述赞曰景十三子五宗亲睦栗姬既废临江折轴阏于早薨河间儒服余好宫苑端事驰逐江都有才中山褊福长沙地小胶东造讎仁贤者代悖乱者族儿姁四王分封为六】

史记卷五十九

史记卷五十九考证

五宗世家入多於国经租税索隐经常也谓王家入多於国家常纳之祖税○徐孚远曰索隐不明谓王专权会之利故市租之入反多於田租也

史记卷五十九考证

卷六十

钦定四库全书

史记卷六十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

三王世家第三十

大司马臣去病【索隐姓霍】昧死再拜上疏皇帝陛下陛下过听使臣去病待罪行间宜专边塞之思虑暴骸中野无以报乃敢惟他议以干用事者诚见陛下忧劳天下哀怜百姓以自忘亏膳贬乐损郎员皇子赖天能胜衣趋拜至今无号位师傅官陛下恭让不恤羣臣私望不敢越职而言臣窃不胜犬马心昧死愿陛下诏有司因盛夏吉时定皇子位【索隐明堂月令云季夏月可以封诸侯立大官是也】唯陛下幸察臣去病昧死再拜以闻皇帝陛下三月乙亥御史臣光守尚书令奏未央宫制曰下御史六年三月戊申朔乙亥御史臣光守尚书令丞非【索隐奏状有尚书令官位而史阙其名耳丞非者或尚书左右丞非其名也】下御史书到言丞相臣青翟【索隐庄青翟也】御史大夫臣汤【索隐张汤】太常臣充【索隐赵充】大行令臣息【索隐李息】太子少傅臣安【索隐任安也】行宗正事昧死上言大司马去病上疏曰陛下过听使臣去病待罪行间宜专边塞之思虑暴骸中野无以报乃敢惟他议以干用事者诚见陛下忧劳天下哀怜百姓以自忘亏膳贬乐损郎员皇子赖天能胜衣趋拜至今无号位师傅官陛下恭让不恤羣臣私望不敢越职而言臣窃不胜犬马心昧死愿陛下诏有司因盛夏吉时定皇子位唯愿陛下幸察制曰下御史臣谨与中二千石二千石臣贺等议【正义公孙贺】古者裂地立国并建诸侯以承天子所以尊宗庙重社稷也今臣去病上疏不忘其职因以宣恩乃道天子卑让自贬以劳天下虑皇子未有号位臣青翟臣汤等宜奉义遵职愚懂而不逮事方今盛夏吉时臣青翟臣汤等昧死请立皇子臣闳【集解徐广曰一作关】臣旦臣胥为诸侯王昧死请所立国名制曰盖闻周封八百姬姓并列或子男附庸礼支子不祭云并建诸侯所以重社稷朕无闻焉且天非为君生民也【索隐传曰天生蒸民立君以司牧之是言生人为立君长司牧之耳非天为君而生人也】朕之不德海内未洽乃以未教成者强君连城即股肱何劝【集解徐广曰一作敦一作聶一作观也索隐谓皇子等并未习教义也皇子未习教义而强使为诸侯王君以连城之人则大臣何有所劝】其更议以列侯家之三月丙子奏未央宫丞相臣青翟御史大夫臣汤昧死言臣谨与列侯臣婴齐中二千石二千石臣贺谏大夫博士臣安等议曰伏闻周封八百姬姓并列奉承天子康叔以祖考

显而伯禽以周公立咸为建国诸侯以相传为辅百官奉宪各遵其职而国统备矣窃以为并建诸侯所以重社稷者四海诸侯各以其职奉贡祭支子不得奉祭宗祖礼也封建使守藩国帝王所以扶德施化陛下奉承天统明开圣绪尊贤显功兴灭继絶续萧文终之後於鄴【索隐萧何谥文终也萧何初封沛之鄴音赞後其子续封南阳之鄴音嗟也】褒厉羣臣平津侯等【索隐公孙弘之封平津侯也平津高成之鄉名正义公孙弘所封平津乡在沧州盐山南四十一里也】昭六亲之序明天施之属使诸侯王封君得推私恩分子弟户邑锡号尊建百有余国【索隐武帝广推恩之诏分王诸侯王子弟故有百余国】而家皇子为列侯则尊卑相踰【索隐谓诸侯王子已为列侯而今又家皇子为列侯是尊卑相踰越矣】列位失序不可以垂统於万世臣请立臣閼【索隐齐王也王夫人子】臣旦【索隐燕王也汉书云李姬之子】臣胥【索隐广陵王也】为诸侯王三月丙子奏未央官制曰康叔亲属有十而独尊者褒有德也周公祭天命郊故鲁有白牡駢刚之牲【集解駢案公羊传曰鲁祭周公牲用白牡鲁公用駢刚何休曰白牡殷牲也駢刚赤脊周牲也】羣公不毛【集解何休曰不毛不纯色也】贤不肖差也高山仰止景行向之朕甚慕焉所以抑未成家以列侯可四月戊寅奏未央宫丞相臣青翟御史大夫臣汤昧死言臣青翟等与列侯吏二千石谏大夫博士臣庆等议昧死奏请立皇子为诸侯王制曰康叔亲属有十而独尊者褒有德也周公祭天命郊故鲁有白牡駢刚之牲羣公不毛贤不肖差也高山仰之景行向之朕甚慕焉所以抑未成家以列侯可臣青翟臣汤博士臣将行等伏

闻康叔亲属有十武王继体周公辅成王其八人皆以祖考之尊建为大国康叔之年幼周公在三公之位而伯禽据国於鲁盖爵命之时未至成人康叔後扞禄父之难伯禽殄淮夷之乱昔五帝异制周爵五等春秋三等【集解郑玄曰春秋变周之文从殷之质合伯子男以为一则殷爵三?者公侯伯也】皆因时而序尊卑高皇帝拨乱世反诸正【索隐春秋公羊传文】昭至德定海内封建诸侯爵位二等【索隐谓王与列侯也】皇子或在絪縕而立为诸侯王奉承天子为万世法则不可易陛下躬亲仁义体行圣德表里文武显慈孝之行广贤能之路内褒有德外讨强暴极临北海【正义匈奴传云霍去病伐匈奴北临翰海】西湊月氏【正义湊音臻氏音支至月氏月氏西戎国名在葱岭之西也】匈奴西域举国奉师輿械之费不赋於民虚御府之藏以赏元戎【集解駢案诗云元戎十乘以先啓行韩婴章句曰元戎大戎谓兵车也车有大戎十乘谓车幔轮马被甲衡扼之上尽有剑戟名曰?军之车所以冒突先啓敌家之行伍也毛传云夏后氏曰钩车先正也殷曰寅车先疾也周曰元戎先良也】开禁仓以賑贫穷减戎卒之半百蛮之君靡不鄉风承流称意远方殊俗重译而朝泽及方外故珍兽至嘉谷兴天应甚彰今诸侯支子封至诸侯王而家皇子为列侯【索隐谓立胶东王子庆为六安王常山王子平为真定王商为泗水王是也】臣青翟臣汤等窃伏熟计之皆以为尊卑失序使天下失望不可臣请立臣閼臣旦臣胥为诸侯王四月癸未奏未央宫留中不下丞相臣青翟太仆臣贺行御史大夫事太常臣充太子太傅臣安行宗正事昧死言臣青翟等前奏大司马臣去病上疏言皇子未有号位臣谨与御史大夫臣汤中二千石二千石谏大夫博士臣庆等昧死请立皇子臣閼等为诸侯王陛下让文武躬自切及皇子未教羣臣之议儒者称其术或諄其心陛下固辞弗许家皇子为列侯臣青翟等窃与列侯臣壽成等二十七人议【集解徐广曰萧何之玄孙鄴侯壽成後为太常也】皆曰以为尊卑失序高皇帝建天下为汉太祖王子孙广支辅先帝法则弗改所以宣至尊也臣请令史官择吉日具礼仪上御史奏輿

地图【索隐谓地为舆者天地有覆载之德故谓天为盖谓地为舆故地图称舆地图疑自古有此名非始汉也】他皆如前故事制曰可四月丙申奏未央宫太仆臣贺行御史大夫事昧死言太常臣充言卜入四月二十八日乙巳可立诸侯王臣昧死奏舆地图请所立国名礼仪别奏臣昧死请制曰立皇子闾为齐王旦为燕王胥为广陵王四月丁酉奏未央宫六年【集解徐广曰一云元狩】四月戊寅朔癸卯御史大夫汤下丞相丞相下中二千石二千石下郡太守诸侯相丞书从事下当用者如律令维六年四月乙巳皇帝使御史大夫汤庙立子闾为齐王曰於戏小子闾【索隐此封齐王策文也按武帝策此三王皆自手制於戏如言呜呼戏音稀】受兹青社【集解张晏曰王者以五色土为太社封四方诸侯各以其方色土与之苴以白茅归以立社索隐蔡邕独断云皇子封为王受天子太社之土若封东方诸侯则割青土藉以白茅授之以立社谓之茅土齐在东方故云青社】朕承祖考维稽古建尔国家封于东土世为汉藩辅於戏念哉恭朕之诏惟命不于常人之好德克明显光义之不图俾君子怠【索隐谓若不图於义则君子懈怠无归附心】悉尔心允执其中天禄永终厥有????不臧乃凶于而国害于尔躬於戏保国艾民可不敬与王其戒之【集解徐广曰立八年无後絶】

右齐王策

维六年四月乙巳皇帝使御史大夫汤庙立子旦为燕王曰於戏小子旦受兹玄社朕承祖考维稽古【索隐褚先生解云维者度也稽者当也言当顺古道也魏高贵乡公云稽同也古天也谓尧能同天】建尔国家封于北土世为汉藩辅於戏葷粥氏虐老兽心【索隐按匈奴传其国贵壮贱老壮者食肥美老者食其余也是虐老也】侵犯寇盗加以奸巧边萌【索隐萌一作毗韦昭云毗民也三苍云边人云毗也】於戏朕命将率徂征厥罪万夫长千夫长三十有二君皆来【集解张晏曰时所获三十二帅也】降旗奔师【集解如淳曰偃其旗鼓而来降索隐汉书君作帅期作旗而服?云以三十二军中之将下旗去之也如淳云即昆邪王偃旗鼓降时也若如此意则三十二军非军将盖戎狄酋帅有三十二君来降也】葷粥徙域【集解张晏曰匈奴徙东也】北州以绥【集解臣瓚曰绥安也】悉尔心毋作怨毋侮德【集解徐广曰侮一作菲索隐苏林云菲废也本亦作侮侮败也孔文祥云菲薄也汉书作裴正义裴音符味反】毋乃废备【索隐褚先生解云言无乏武备常备匈奴也】非教士不得从徵【集解张晏曰士不素习不应召索隐韦昭云士非素教习不得从军徵发故孔子曰不教而战是谓弃之正谓此也褚先生解云非习礼义不得在於侧也】於戏保国艾民可不敬与王其戒之【集解徐广曰立三十年自杀国除】

右燕王策

维六年四月乙巳皇帝使御史大夫汤庙立子胥为广陵王曰於戏小子胥受兹赤社朕承祖考维稽古建尔国家封于南土世为汉藩辅古人有言曰大江之南【正义谓荆口南至荆州以南也】五湖之间【索隐五湖者具区洮滈彭蠡青草洞庭或曰太湖五百里故曰五湖也】其人轻心扬州保强【集解徐广曰一作疆駟案李奇曰保恃也】三代要服不及以政於戏悉尔心战战兢兢乃惠乃顺毋侗好佚毋迓宵人【集解应劭曰无好逸游之事迓近小人张晏曰侗音同索隐褚先生解曰无好佚乐驰骋弋猎邹氏宵音谗谗亦小人也或作佞人】

维法维则书云臣不作威不作福靡有後羞於戏保国艾民可不敬与王其戒之【集解徐广曰立六十四年自杀】

右广陵王策

太史公曰古人有言曰爱之欲其富亲之欲其贵故王者疆土建国封立子弟所以褒亲亲序骨肉尊先祖贵支体广同姓於天下也是以形執强而王室安自古至今所由来久矣非有异也故弗论着也燕齐之事无足采者然封立三王天子恭让羣臣守义文辞烂然甚可观也是以附之世家

【索隐述赞曰三王封世旧史烂然褚氏後补册书存焉去病建议青翟上宣天子冲挹志在急贤太常具礼请立齐燕閔国负海旦社惟玄宵人不迹荤粥远边明哉监戒式防厥愆】

褚先生曰臣幸得以文学为侍郎好览观太史公之列传列传中称三王世家文辞可观求其世家终不能得窃从长老好故事者取其封策书编列其事而传之令後世得观贤主之指意盖闻孝武帝之时同日而俱拜三子为王封一子於齐一子於广陵一子於燕各因子才力智能及土地之刚柔人民之轻重为作策以申戒之谓王世为汉藩辅保国治民可不敬与王其戒之夫贤主所作固非浅闻者所能知非博闻强记君子者所不能究竟其意至其次序分絶文字之上下简之参差长短皆有意人莫之能知谨论次其真草诏书编於左方令览者自通其意而解说之

王夫人者赵人也与卫夫人并幸武帝而生子閔閔且立为王时其母病武帝自临问之曰子当为王欲安所置之王夫人曰陛下在妾又何等可言者帝曰虽然意所欲欲於何所王之王夫人曰愿置之雒阳武帝曰雒阳有武库敖仓天下冲扼汉国之大都也先帝以来无子王於雒阳者去雒阳余尽可王夫人不应武帝曰关东之国无大於齐者齐东负海而城郭大古时独临菑中十万户天下膏腴地莫盛於齐者矣王夫人以手击头谢曰幸甚王夫人死而帝痛之使使者拜之曰皇帝谨使使太中大夫明奉璧一赐夫人为齐王太后子閔王齐年少无有子立不幸早死国絶为郡天下称齐不宜王云所谓受此土者诸侯王始封者必受土於天子之社归立之以为国社以岁时祠之春秋大传曰天子之国有泰社东方青南方赤西方白北方黑上方黄故将封於东方者取青土封於南方者取赤土封於西方者取白土封於北方者取黑土封於上方者取黄土各取其色物里以白茅封以为社此始受封於天子者也此之为主土主土者立社而奉之也朕承祖考祖者先也考者父也维稽古维者度也念也稽者当也当顺古之道也齐地多变诈不习於礼义故戒之曰恭朕之诏唯命不可为常人之好德能明显光不图於义使君子怠慢悉若心信执其中天禄长终有过不善乃凶于而国而害于若身齐王之国左右维持以礼义不幸中年早夭然全身无过如其策意传曰青采出於蓝而质青於蓝者教使然也远哉贤主昭然独见诫齐王以慎内诫燕王以无作怨无傴德诫广陵王以慎外无作威与福夫广陵在吴越之地其民精而轻故诫之曰江湖之间其人轻心扬州保强三代之时迫要使从中国俗服不大及以政教以意御之而已无侗好佚无迹宵人维法是则无长好佚乐驰骋弋猎淫康而近小人常念法度则无羞辱矣三江五湖有鱼盐之利铜山之

富天下所仰故誡之曰臣不作福者勿使行财币厚赏赐以立声誉为四方所归也又曰臣不作威者勿使因轻以倍义也会孝武帝崩孝昭帝初立先朝广陵王胥厚赏赐金钱财币直三千余万益地百里邑万户会昭帝崩宣帝初立缘恩行义以本始元年中裂汉地尽以封广陵王胥四子一子为朝阳侯【正义括地志云朝阳故城在邓州穰县南八十里应劭云在朝水之阳也】一子为平曲侯【正义地理志云平曲县属东海郡又云在瀛州文安县北七十里】一子为南利侯【正义括地志云南利故城在豫州上蔡县东八十五里】最爱少子弘立以为高密王【正义括地志云高密故城在密州高密县西南四十里】其後胥果作威福通楚王使者楚王宣言曰我先元王高帝少弟也封三十二城今地邑益少我欲与广陵王共发兵云立广陵王为上我复王楚三十二城如元王时事发觉公卿有司请行罚诛天子以骨肉之故不忍致法於胥下诏书无治广陵王独诛首恶楚王传曰蓬生麻中不扶自直【索隐已下并见荀卿子】白沙在泥中与之皆黑者土地教化使之然也其後胥复祝诅谋反自杀国除燕土境塉北迫匈奴其人民勇而少虑故誡之曰葦粥氏无有孝行而禽兽心以窃盗侵犯边民朕诏将军往征其罪万夫长千夫长三十有二君皆来降旗奔师葦粥徙域远处北州以安矣悉若心无作怨者勿使从俗以怨望也无悝德者勿使上背德也无废备者无乏武备常备匈奴也非教士不得从徵者言非习礼义不得在於侧也会武帝年老长而太子不幸薨未有所立而且使来上书请身入宿卫於长安孝武见其书击地怒曰生子当置之齐鲁礼义之乡乃置之燕赵果有争心不让之端见矣於是使使即斩其使者於阙下会武帝崩昭帝初立旦果作怨而望大臣自以长子当立与齐王子刘泽等谋为叛逆出言曰我安得弟在者【索隐案昭帝钩弋夫人所生武帝崩时年才七八岁耳胥旦早封在外实合有疑然武帝春秋高惑于内宠诛太子而立童孺能不使胥旦疑怨亦由权臣辅政贪立幼主之利遂得钩弋子当阳斯实父德不弘遂令子道不顺然犬各吠非其主太中宗正人臣之职亦当使燕喻之】今立者乃大将军子也欲发兵事发觉当诛昭帝缘恩宽忍?案不扬公卿使大臣请遣宗正与太中大夫公户满意御史二人偕往使燕风喻之【索隐宗正官名必以宗室有德者为之不知时何人公户姓满意名为太中大夫是使二人又有侍御史二人皆往使治燕王也】到燕各异日更见责王宗正者主宗室诸刘属籍先见王为列陈道昭帝实武帝子状侍御史乃复见王责之以正法问王欲发兵罪名明白当坐之汉家有正法王犯纖介小罪过即行法直断耳安能宽王惊动以文法王意益下心恐公户满意习於经术最後见王称引古今通义国家大礼文章尔雅【索隐尔近也雅正也其书於正字义训为近故云尔雅相承云周公作以教成王又云子夏作之以解诗书】谓王曰古者天子必内有异姓大夫所以正骨肉也外有同姓大夫所以正异姓也【索隐内云有异姓大夫以正骨肉盖错也内合言同姓宗正是也外合言异姓太中大夫是也】周公辅成王诛其两弟故治武帝在时尚能宽王今昭帝始立年幼富於春秋未临政委任大臣古者诛罚不阿亲戚故天下治方今大臣辅政奉法直行无敢所阿恐不能宽王王可自谨无自令身死国灭为天下笑於是燕王旦乃恐惧服罪叩头谢过大臣欲和合骨肉难伤之以法其後旦复与左将军上官桀等谋反宣言曰我次太子太子不在我当立大臣共抑我云云大将军光辅政与公卿大臣议曰燕王旦不改过悔正行恶不变於是修法直断行罚诛旦自杀国除如其策指有司请诛旦妻子孝昭以骨肉之亲不忍致法宽赦旦妻子免为庶人传曰兰根与白芷渐之滫中【集解徐广曰滫者渐米汁也音先纠反索隐白芷香草也音止又音昌改反渐渍也滫如礼滫澼之滫谓洗也音思酒反正义言虽香草以米汁渍之无复香气君子不欲附近庶人不服者为渐渍然也以旦谋叛君子庶人皆不附

近】君子不近庶人不服者所以渐然也宣帝初立推恩宣德以本始元年中尽复封燕王旦两子一子为安定侯【正义汉表在钜鹿郡】立燕故太子建为广阳王以奉燕王祭祀【正义括地志云广阳故城今在幽州良乡县东北三十七里】史记卷六十

史记卷六十考证

三王世家○柯维骥曰太史公书原缺三王世家独其赞语尚存故褚先生取廷臣之议及封策书补之

续萧文终之後於酈索隐萧何初封沛之酈音赞後其子续封南阳之赞音嵯也○【臣照】按年表酈废而绍以筑阳筑阳废而绍以武阳武阳废而绍以酈索隐于年表及萧相国世家俱只辨音赞之非音嵯并无续封南阳应音嵯之酈之说此处所云不知何本且绍封筑阳改武阳亦俱并注明

传曰蓬生麻中不扶自直索隐已下并见荀卿子○【臣照】按蓬生麻中二语见荀劝学篇下文今本荀子所无

偕往使燕风喻之索隐皆往使治燕王也○燕王监本讹作广陵今改正

传曰兰根与白芷渐之澹中○荀中劝学篇作兰槐之根是为芷其渐之澹

史记卷六十考证

卷六十一

钦定四库全书

史记卷六十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

伯夷列传第一

【索隐列传者谓叙列人臣事迹令可传於後世故曰列传正义其人行迹可序列故曰列传】

夫学者载籍极博犹考信於六艺诗书虽缺然虞夏之文可知也【索隐孔子系家称古诗三千余篇孔子删三百五篇为诗今亡五篇又书纬称孔子求得黄帝玄孙帝魁之书迄秦穆公凡三千三百三十篇乃删以一百篇为尚书十八篇为中候今百篇之内见亡四十二篇是诗书又有缺亡者也尚书有尧典舜典大禹谟备言虞夏禅让之事故云虞夏之文可知也】尧将逊位让於虞舜舜禹之间岳牧咸荐乃试之於位典职数十年【正义舜禹皆典职事二十余年然後践帝位】功用既兴然後授政示天下重器【索隐言天下者是王者之重器故庄子云天下之大器是也则大器亦谓之重器】王者大统传天下若斯之难也而说者曰尧让天下於许由【正义皇甫谧高士传云许由字武仲尧闻致天下而让焉乃退而遁於中岳颍水之阳箕山之下隐尧又召为九州长由不欲闻之洗耳於颍水滨时有巢父牵犊欲饮之见由洗耳问其故对曰尧欲召我为九州长恶闻其声是故洗耳巢父曰子若处高岸深谷人道不通谁能见子子故浮游欲闻求其名誉污吾犊口牵犊上流饮之许由歿葬此山亦名许由山在洛州阳城县南十三里】许由不受耻之逃隐及夏之时有所随务光者此何以称焉【索隐说者谓诸子杂记也然尧让於许由及夏时有卞随务光等殷汤让之天下并不受而逃事具庄周让王篇正义经史唯称伯夷叔齐不及许由卞随务光者不少槩见何以哉故言何以称焉为不称说之也】太史公曰余登箕山【索隐盖杨惲东方朔见其文称余而加太史公曰也】其上盖有许由冢云孔子序列古之仁圣贤人如吴太伯伯夷之伦详矣余以所闻由光义至高【索隐谓太史公闻庄周说许由务光等也庄子尧让天下於许由由遂逃箕山洗耳於颍水卞随自投於桐水务光负石自沉於卢水是义至高】其文辞不少槩见何哉【索隐按槩是梗槩谓略也盖以由光义至高而诗书之文辞遂不少梗槩载见何以如此哉是太史公疑於说者之言或非实也正义槩古代反】孔子曰伯夷叔齐不念旧恶怨是用希求

仁得仁又何怨乎余悲伯夷之意睹轶诗可异焉【索隐谓悲其兄弟相让又义不食周粟而饿死睹音覩轶音逸谓见逸诗之文即下采薇之诗是也不编入三百篇故云逸诗也可异焉者按论语云求仁得仁又何怨乎今其诗云我安适归矣于嗟徂兮命之衰矣是怨词也故云可异焉】其传曰伯夷叔齐孤竹君之二子也【索隐其传盖韩诗外传及吕氏春秋也其传云孤竹君是殷汤三月丙寅日所封相传至夷齐之父名初字子朝伯夷名允字公信叔齐名智字公逵解者云夷齐谥也伯仲又其长少之字地理志孤竹城在辽西令支县应劭云盖伯夷之国君姓墨胎氏正义本前注丙寅作殷汤正月三日丙寅括地志云孤竹古城在卢龙县南十二里殷时诸侯孤竹国也】父欲立叔齐及父卒叔齐让伯夷伯夷曰父命也遂逃去叔齐亦不肯立而逃之国人立其中子於是伯夷叔齐闻西伯昌善养老盍往归焉【索隐刘氏云盍者疑词盖谓其年老归就西伯也】及至西伯卒武王载木主号为文王东伐纣伯夷叔齐叩马而谏曰父死不葬爰及干戈可谓孝乎以臣弑君可谓仁乎左右欲兵之太公曰此义人也扶而去之武王已平殷乱天下宗周而伯夷叔齐耻之义不食周粟隐於首阳山采薇而食之【集解马融曰首阳山在河东蒲坂华山之北河曲之中索隐薇蕨也尔雅云蕨蓂也正义陆玕毛诗草木疏云薇山菜也茎叶皆似小豆蔓生其味亦如小豆藿可作羹亦可生食也】及饿且死作歌其辞曰登彼西山兮采其薇矣【索隐西山即首阳山】以暴易暴兮不知其非矣【索隐以武王之暴臣易殷纣之暴主而不自知其非矣】神农虞夏忽焉没兮我安适归矣【索隐羲农虞夏敦朴禅让之道超忽久矣终没矣今逢此君臣争夺故我安适归】于嗟徂兮命之衰矣【索隐吁嗟嗟叹之辞也徂者往也死也言已今日饿死亦是命运之衰薄不遇大道之时至忧而饿死】遂饿死於首阳山由此观之怨邪非邪【索隐太史公言已观此诗之情似是有怨邪又疑其云非是怨邪正义曹大家注幽通赋云夷齐饿於首阳山在陇西首又戴延之西征记云洛阳东北首阳山有夷齐祠今在偃师县西北又孟子云夷齐避纣居北海之滨首阳山说文云首阳山在辽西史传及诸书夷齐饿於首阳凡五所各有案据先後不详庄子云伯夷叔齐西至岐阳见周武王伐殷曰吾闻古之士遭治世不避其任遇乱世不为苟存今天下乱周德衰其并乎周以涂吾身也不若避之以絜吾行二子北至於首阳之山遂饥饿而死又下诗登彼西山是今清源县首阳山在岐阳西北明即夷齐饿死处也】或曰天道无亲常与善人若伯夷叔齐可谓善人者非耶【索隐又白起论云若夷齐之行如此可谓善人者耶又非善人者耶亦疑也】积仁絜行如此而饿死且七十子之徒仲尼独荐顔渊为好学然回也屡空糟糠不厌【索隐厌言饫也谓不饫饱也糟糠贫者之所食也故曰糟糠之妻是也然顔子一簞食瓢饮未见有糟糠之文】而卒蚤夭天之报施善人其何如哉盗跖日杀不辜【索隐跖与跖同并音之石反盗跖柳下惠弟见庄子为篇名正义按跖者黄帝时大盗之名以柳下惠弟为天下大盗故世放古号之盗跖】肝人之肉【索隐刘氏云谓取人肉为生肝非也庄子云跖方休卒太山之阳脍人肝而舖之】暴戾恣睢【索隐暴戾谓凶暴而恶戾也邹诞生恣音资睢音千余反刘氏恣音如字睢音休季反恣睢谓恣行为睢恶之貌也正义睢仰白目怒貌也言盗跖凶暴恶戾恣性怒白目也】聚党数千人横行天下竟以壽终【集解駟案皇覽曰盗跖冢在河东大阳临河曲直弘农华陰山潼乡按盗跖即柳下惠弟也索隐直音如字直者当也或音值非也潼音同按潼水名因为乡今之潼津关是亦为县正义括地志云盗跖冢在陕州河北县西二十里河北县本汉大阳县也又今齐州平陵县有盗跖冢未详也】是遵何德哉【索隐言盗跖无道横行天下竟以壽终是其人遵行何德而致此哉】此其尤大彰明较着者也【索隐较明也言伯夷有德而饿死盗跖暴戾而壽终

是贤不遇而恶道长尤大着明之证】若至近世操行不轨专犯忌讳而终身逸乐富厚累世不絕【索隐谓若鲁桓楚灵晋献齐襄之比皆是】或择地而蹈之【索隐谓不仕暗君不饮盗泉裹足高山之顶窜迹沧洲之滨是也】正义谓北郭骆鲍焦等是也】时然後出言【索隐论语夫子时然後言】行不由径【索隐澹台灭明之行】非公正不发愤而遇祸灾者不可胜数也【索隐谓人臣之节非公正之事不感激发愤或出忠言或致身命而卒遇祸灾者不可胜数谓龙逢比干屈平伍胥之比】余甚惑焉佺所谓天道是邪非邪【索隐太史公惑於不轨而逸乐公正而遇害为天道之非而又是邪深感之也盖天道玄远聪听暂遗或穷通数会不由行事所以行善未之福行恶未之祸故先达皆犹昧之也】正义佺音他荡反佺未定之词也为天道不敢的言是非故云佺也】子曰道不同不相为谋亦各从其志也【正义太史公引孔子之言证前事也言天道人道不同一任其运遇亦各从其志意也】故曰富贵如可求虽执鞭之士吾亦为之【集解郑玄曰富贵不可求而得之当修德以得之若於道可求而得之者虽执鞭贱职我亦为之】如不可求从吾所好【集解孔安国曰所好者古人之道】岁寒然後知松栢之後凋【集解何晏曰大寒之後衆木皆死然後松栢少凋伤平岁衆木亦有不死者故须岁寒然後别之喻凡人处治世亦能自修整与君子同在浊世然後知君子之正不苟容也】举世混浊清士乃见【索隐老子曰国家昏乱有忠臣是举代混浊则士之清洁者乃彰见故上文岁寒然後知松栢之後凋先为此言张本也】正义言天下混乱清洁之士不挠不苟合於盗跖也】岂以其重若彼其轻若此哉【索隐谓伯夷让德之重若彼采薇而饿死之轻若此又一解云操行不轨富厚累代是其重若彼公正发愤而遇祸灾是其轻若此也】正义重谓盗跖等也轻谓夷齐由光等也】君子疾没世而名不称焉【索隐自此以下虽论伯夷得夫子而名彰顔回附驥尾而行着盖亦欲微见已之着撰不已亦是疾没世而名不称焉故引贾子贪夫徇财烈士徇名是也又引同明相照同类相求云从龙凤从虎者言物各从类以相求太史公言已亦是操行廉直而不用於代卒?非罪与伯夷相类故寄此而发论正义君子疾没世後惧名湮没而不称若夷齐顔回洁行立名後代称述亦太史公欲渐见已立名著述之美也】贾子曰【索隐贾?也作鵬鸟赋云然故太史公引而称之也】贪夫徇财【正义徇才迅反徇求也瓚云已身从物曰徇】烈士徇名夸者死权【索隐言贪权势以矜夸者至死不休故云死权也】衆庶冯生【索隐冯者恃也音凭言衆庶之情盖冯恃矜其生也邹诞生作每生每者冒也冒即贪之义正义太史公引贾子譬作史记若贪夫徇财烈士徇名夸者死权衆庶冯生乃成其史记】同明相照【索隐已下并系辞文】同类相求【正义天欲雨而柱础润谓同德者相应】云从龙凤从虎【集解王肃曰龙举而景云属虎啸而谷风兴张璠曰犹言云从龙凤从虎也】圣人作而万物覩【集解马融曰作起也索隐又引此句者谓圣人起而居位则万物之情皆得覩见故已今日又得着书言世情之轻重也】正义此有识也圣人有养生之德万物有长养之情故相感应也此以上至同明相照是周易乾象辞也太史公引此等相感者欲见述作之意合万物有覩也孔子歿後五百岁而已当之故作史记使万物见覩之也太史公序传云先人有言自周公卒五百岁而有孔子孔子卒後至於今五百岁有能绍明世正易传继春秋本诗书礼乐之际意在斯乎小子何敢让焉作述六经云易着天地陰阳四时五行故长於变礼经纪人伦故长於行书记先王之事故长於政诗记山川谿谷禽兽草木牝牡雌雄故长於风乐乐所以立故长於和春秋辨是非故长於治人是故礼以节人乐以发和书以道事诗以達意易以道化春秋以道义拨乱世反之正莫近於春秋按述作而万物睹见】伯夷叔齐虽贤得夫子而名益彰【正义伯夷叔齐虽有贤行得夫子称

扬而名益彰着万物虽有生养之性得太史公作述而世事益覩见】顏淵虽笃学附驥尾而行益显【索隱蒼蠅附驥尾而致千里以喻顏回因孔子而名彰】岩穴之士趋舍有时若此类名堙灭而不称悲夫【正义趋音趋舍音舍趋向也舍废也言隱处之士时有附驥尾而名晓達若堙灭不称数者亦可悲痛】閭巷之人欲砥行立名者【正义砥音旨砥行修德在乡閭者若不托贵大之士何得封侯爵赏而名留後代也】非附青云之士恶能施於後世哉

【索隱述贊曰天道平分与善徒云贤而饿死盜且聚羣吉凶倚伏报施纠纷子罕言命得自前闻嗟彼素士不附青云】

史记卷六十一

史记卷六十一考证

伯夷列传○監本有小注云索隱本伯夷传第一老子庄子韩非同传第三索隱云二人教迹全乖不宜同传先贤已有成说今则不可依循宜令老子尹喜庄周同为传其韩非可居商君传末正义本老子庄子伯夷居列传之首正义曰老子庄子开元二十三年奉勅并为列传首处夷齐上然汉武帝之时佛教未兴道教已设道则禁恶咸致正理制御邪人未有佛教可导故列老庄於申韩之上今既佛道齐妙兴法乖流理居列传之首也盖唐崇老教谬取老子居列传首而与伯夷合为一卷甚为无谓夫奔义激世莫先伯夷而老庄法意流为申韩太史公叙述自有深意岂宜妄为轩輊今以伯夷传居首为一卷次以管晏为一卷次以老庄申韩为一卷以复太史公之旧云【臣照】按升老子于伯夷之上诚为开元时谬见而张守节黷之良可嗤笑明監本改依太史公之旧是矣但不着改之者之名不知语出何人今若仍刊卷首後人读之转生迷惑是以删去其小司马妄议史公老子韩非同传欲加改窜殊属无谓亦并删焉而着之于此

太史公曰余登箕山索隱盖杨恽东方朔见其文称余而加太史公曰也○【臣照】按史家所为史贊者自东汉後渐有其称马迁之时恶有是哉其作伯夷管晏列传全以议论行文与别传迥别何独致疑于太史公曰四字也登箕山而见许由冢者盖司马谈迁盖述父语云尔

岂以其重若彼其轻若此哉索隱谓伯夷让德之重若彼采薇而饿死之轻若此又一解云操行不轨富厚累代是其重若彼公正发愤而遇祸灾是其轻若此也正义重谓盜跖等也轻谓夷齐由光等也○顾炎武曰其重若彼谓人之重富贵也其轻若此谓清士之轻富贵也

史记卷六十一考证

卷六十二

钦定四库全书

史记卷六十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

管晏列传第二

管仲夷吾者颍上人也【索隐颍水名地理志颍水出阳城汉有颍阳临颍二县今有颍上县正义韦昭云管仲姬姓之後管严之子敬仲也】少时常与鲍叔牙游鲍叔知其贤管仲贫困常欺鲍叔【索隐吕氏春秋管仲与鲍叔同贾南阳及分财利而管仲常欺鲍叔多自取鲍叔知其有母不以为贪】鲍叔终善遇之不以为言已而鲍叔事齐公子小白管仲事公子纠及小白立为桓公公子纠死管仲囚焉鲍叔遂进管仲【正义齐世家云鲍叔牙曰君将治齐则高傒与叔牙足矣君且欲霸王非管夷吾不可夷吾所居国重不可失也於是桓公从之韦昭云鲍叔齐大夫姒姓之後鲍叔之子叔牙也】管仲既用任政於齐齐桓公以霸九合诸侯一匡天下管仲之谋也【正义管子云相齐以九惠之教一曰老二曰慈三曰孤四曰疾五曰独六曰病七曰通八曰赈九曰絶也】管仲曰吾始困时尝与鲍叔贾分财利【正义贾音古】多自与鲍叔不以我为贪知我贫也吾尝为鲍叔谋事而更穷困鲍叔不以我为愚知时有利不利也吾尝三仕三见逐於君鲍叔不以我为不肖知我不遭时也吾尝三战三走鲍叔不以我为怯知我有老母也公子纠败召忽死之吾幽囚受辱鲍叔不以我为无耻知我不羞小节而耻功名不显於天下也生我者父母知我者鲍子也鲍叔既进管仲以身下之子孙世禄於齐有封邑者十余世【索隐世本云庄仲山产敬仲夷吾夷吾产武子鸣鸣产桓子启方启方产成子孺孺产庄子卢卢产悼子其夷其夷产襄子武武产景子耐涉耐涉产微凡十代世谱同】常为名大夫天下不多管仲之贤而多鲍叔能知人也【正义国语云齐桓公使鲍叔为相辞曰臣之不若夷吾者五寛和惠民不若也治国家不失其柄不若也忠惠可结於百姓不若也制礼义可法於四方不若也执枹鼓立於军门使百姓皆加勇猛不若也】管仲既任政相齐以区区之齐在海滨【正义齐国东滨海也】通货积财富国强兵与俗同好恶故其称曰【索隐是夷吾着书所称管子者其书有此言今举其大畧也】仓廩实而知礼节衣食足而知荣辱上服度则六亲固【正义上之服御物有制度则六亲坚固也六亲谓外祖父母一父母二姊妹三妻兄弟之子四从母之子五女之子六也王弼云父母兄弟妻子也】四维不张国乃灭亡【集解管子曰四维者礼义廉耻也】下令如流水之原令顺民心故论卑而

易行【正义言为政令卑下鲜少而百姓易作行也】俗之所欲因而予之俗之所否因而去之其为政也善因祸而为福转败而为功贵轻重慎权衡【索隐轻重谓钱也管子有轻重篇正义轻重谓耻辱也权衡谓得失也有耻辱甚贵重之有得失甚戒慎之】桓公实怒少姬【索隐谓怒荡舟归而未绝蔡人嫁之】南袭蔡管仲因而伐楚责包茅不入贡於周室桓公实北征山戎而管仲因而令燕修召公之政於柯之会【正义今济州东阿也】桓公欲背曹沫之约【索隐沫音妹左传作曹刖正义沫莫葛反】管仲因而信之【正义以劫许之归鲁侵地】诸侯由是归齐故曰知与之为取政之宝也【索隐老子曰将欲取之必固与之是知此为政之所宝也】管仲富拟於公室有三归反坫【正义三归三姓女也妇人谓嫁曰归】齐人不以为侈管仲卒齐国遵其政常强於诸侯【正义括地志云管仲冢在青州临淄县南二十一里牛山之阿说苑云齐桓公使管仲治国管仲对曰贱不能临贵桓公以为上卿而国不治曰何故管仲对曰贫不能使富桓公赐之齐市租而国不治桓公曰何故对曰疏不能制近桓公立以为仲父齐国大安而遂霸天下孔子曰管仲之贤而不得此三权者亦不能使其君南面而称伯】後百余年而有晏子焉

晏平仲婴者莱之夷维人也【集解駢案刘向别录曰莱者今东莱地也索隐名婴平谥仲字父桓子名弱也正义晏子齐记云齐城三百里有夷安即晏平仲之邑汉为夷安县属高密国应劭云故莱夷维邑】事齐灵公庄公景公【索隐世本及系本灵公名环庄公名光景公名杵臼】以节俭力行重於齐既相齐食不重肉妾不衣帛其在朝君语及之即危言【正义谓已谦让非云功能】语不及之即危行【正义行下孟反谓君不知已增修业行畏责及也】国有道即顺命无道即衡命【正义衡秤也谓国无道则制秤量之可行即行】以此三世显名於诸侯越石父贤在縲紲中【正义縲音力迫反縲黑索也紲系也晏子春秋云晏子之晋至中牟覩弊冠反裘负薪息於途侧晏子问曰何者对曰我石父也苟免饥冻为人臣仆晏子解左骖赎之载与俱归案与此文小异】晏子出遭之途解左骖赎之载归弗谢入闺久之越石父请绝晏子懼然【正义懼牀缚反皇览云晏子冢在临淄城南菑水南桓公冢西北括地志云齐桓公墓在青州临淄县东南二十三里鼎足上又云齐晏婴冢在齐子城北门外晏子云吾生近市死岂易吾志乃葬故宅後人名曰清节里按恐皇览误乃管仲冢也】摄衣冠谢曰婴虽不仁免于厄何子求绝之速也石父曰不然吾闻君子诘於不知己而信於知己者【索隐信读曰申周礼皆然申於知己谓以彼知我而我志获申】方吾在縲紲中彼不知我也夫子既以感寤而赎我是知己知己而无礼固不如在縲紲之中晏子於是延入为上客晏子为齐相出其御之妻从门间而闚其夫其夫为相御拥大盖策驷马意气扬扬甚自得也既而归其妻请去夫问其故妻曰晏子长不满六尺身相齐国名显诸侯今者妾观其出志念深矣常有以自下者今子长八尺乃为人仆御然子之意自以为足妾是以求去也其後夫自抑损晏子怪而问之御以实对晏子荐以为大夫

太史公曰吾读管氏牧民山高乘马轻重九府【集解駢案刘向别录曰九府书民间无有山高一名形势索隐皆管仲着书篇名九府盖钱之府藏其书论铸钱之轻重故云轻重九府余如别录之说正义七畧云管子十八篇在法家】及晏子春秋【索隐婴所着书名晏子春秋今其书有七十篇故下云其书世多有也正义七畧云晏子春秋七篇在儒家】详哉其言之也既见其着书欲观其行事故次其传至其书世有之是以不论论其轶事【正义轶音逸】

管仲世所谓贤臣然孔子小之岂以为周道衰微桓公既贤而不勉之至王乃称霸哉【正义言管仲世所谓贤臣孔子所以小之者盖以为周道衰桓公贤主管仲何不劝勉辅弼至於帝王乃自称霸主哉故孔子小之云盖为前疑夫子小管仲为此】语曰将顺其美匡救其恶故上下能相亲也岂管仲之谓乎【正义言管仲相齐顺百姓之美匡救国家之恶令君臣百姓相亲者是管之能也】方晏子伏庄公尸哭之成礼然後去岂所谓见义不为无勇者邪【索隐左传崔杼弑庄公晏婴入枕庄公尸股而哭之成礼而出崔杼欲杀之是也】至其谏说犯君之颜此所谓进思尽忠退思补过者哉假令晏子而在余虽为之执鞭所忻慕焉【索隐太史公之羡慕仰企平仲之行假令晏生在世已虽与之为仆隶为之执鞭亦所忻慕其好贤乐善如此贤哉良史可以示人臣之炯戒也】

【索隐述赞曰夷吾成霸平仲称贤粟乃实廩豆不掩肩转祸为福危言获全孔赖左衽史忻执鞭成礼而去人望存焉】

史记卷六十二

史记卷六十二考证

管晏列传鲍叔既进管仲以身下之子孙世禄於齐有封邑者十余世索隐世本云庄仲山产敬仲夷吾夷吾产武子鸣鸣产桓子启方启方产成子孺孺产庄子卢卢产悼子其夷其夷产襄子武武产景子耐涉耐涉产微凡十代世谱同○王鏊曰此十余世是言鲍叔而索隐所注似言管氏不知何故

常为名大夫天下不多管仲之贤而多鲍叔能知人也正义执枹鼓立於军门使百姓皆加勇猛不若也○国语无猛字

慎权衡正义权衡谓得失也○徐孚远曰权衡钩石之类盖与民取平之意正义非也

晏子嚟然正义皇览云晏子冢在临淄城南菑水南桓公冢西北括地志云齐桓公墓在青州临淄县东南二十三里鼎足上又云齐晏婴冢在齐子城北门外晏子云吾生近市死岂易吾志乃葬故宅後人名曰清节里按恐皇览误乃管仲冢也○徐孚远曰此注杂在越石父事中为不伦也

史记卷六十二考证

卷六十三

钦定四库全书

史记卷六十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

老庄申韩列传第三

老子者【正义朱韬玉札及神仙传云老子楚国苦县濂乡曲仁里人也姓李名耳字伯阳一名重耳外字聃身长八尺八寸黄色美眉长耳大目广额踈齿方口厚唇额有三五达理日月悬鼻有双柱耳有三门足蹈二五手把十文周时人李母八十一年而生又玄妙内篇云李母怀胎八十一载逍遥李树下迺割左腋而生又云玄妙玉女梦流星入口而有娠七十二一年而生老子又上元经云李母昼夜见五色珠大如弹丸自天下因吞之即有娠张君相云老子者是号非名老考也子孳也考教衆理达成圣孳乃孳生万物善化济物无遗也】楚苦县厉乡曲仁里人也【集解駰案地理志曰苦县属陈国索隐地理志误也苦县本属陈春秋时楚灭陈而苦又属楚故云楚苦县至高帝十一年立淮阳国陈县苦县皆属焉裴氏所引不明见苦县在陈县下因云苦属陈今检地理志苦县实属淮阳郡苦音怙正义按年表云淮阳国景帝三年废至天汉修史之时楚节王纯都彭城相近疑苦此时属楚国故太史公书之括地志云苦县在亳州谷阳县界有老子宅及庙庙中有九井尚存在今亳州真源县厉音赖晋太康地记云苦县城东有濂乡祠老子所生地也】姓李氏名耳字伯阳谥曰聃【索隐按葛玄云李氏女所生因母姓也又云生而指李树因以为姓许慎云聃耳漫也故名耳字聃今作字伯阳非正也然老子号伯阳父此传不称正义聃耳漫无轮也神仙传云外字曰聃按字号也疑老子耳漫无轮故世号曰聃】周守藏室之史也【索隐按藏室史乃周藏书室之史也又张汤传老子为柱下史即藏室之柱下因以为官名正义云藏在浪反】孔子适周将问礼於老子【索隐大戴记亦云然】老子曰子所言者其人与骨皆已朽矣独其言在耳且君子得其时则驾不得其时则蓬累而行【索隐刘氏云蓬累犹扶持也累音六水反说者云头戴物两手扶之而行谓之蓬累也蓬盖也累随也以言若得明君则驾车服冕不遭时则自覆盖相携随而去也正义蓬沙磧上转蓬也累转行貌也言君子得明主则驾车而事不遭时则若蓬转流移而行可止则止也蓬其状若幡蒿细叶蔓生於沙漠中风吹则根断随风转移也幡蒿江东呼为斜蒿云】吾闻之良贾深藏若虚君子盛德容貌若愚【索隐良贾谓善货卖之人贾音古深藏谓隐其宝货不令人见故云若虚而君子之人身有盛德其容貌谦退有若愚鲁之

人然嵇康高士传亦载此语文则小异云良贾深藏外形若虚君子盛德容貌若不足也】去子之骄气与多欲态色与淫志【正义姿态之容色与淫慾之志皆无益於夫子须去除也】是皆无益於子之身吾所以告子若是而已孔子去谓弟子曰鸟吾知其能飞鱼吾知其能游兽吾知其能走走者可以为罔游者可以为纶飞者可以为矰至於龙吾不能知其乘风云而上天吾今日见老子其犹龙邪老子修道德其学以自隐无名为务居周久之见周之衰迺遂去至关关令尹喜曰子将隐矣强为我着书【索隐李尤函谷关铭云尹喜要老子留作二篇而崔浩以尹喜又为散关令是也正义抱朴子云老子西游遇关令尹喜於散关为喜着道德经一卷谓之老子或以为函谷关括地志云散关在岐州陈仓县东南五十二里函谷关在陕州桃林县西南十二里强其两反为于伪反】於是老子迺着书上下篇言道德之意五千余言而去莫知其所终【集解駰案列仙传曰关令尹喜者周大夫也善内学星宿服精华隐德行仁时人莫知老子西游喜先见其气知真人当过候物色而迹之果得老子老子亦知其奇为着书与老子俱之流沙之西服具胜实莫知其所终亦着书九篇名关令子索隐列仙传是刘向所记物色而迹谓视其气物有异色而寻迹之又按列异传老子西游关令尹喜望见其有紫气浮关而老子果乘青牛而过】或曰老莱子亦楚人也【正义太史公疑老子或是老莱子故书之列仙传云老莱子楚人当时世乱逃世耕於蒙山之阳莞葭为墙蓬蒿为室杖木为牀蓍艾为席菹芰为食垦山播种五谷楚王至门迎之遂去至於江南而止曰鸟兽之毛可绩而衣其遗粗足食也】着书十五篇言道家之用与孔子同时云盖老子百有六十余岁或言二百余岁【索隐此前古好事者据外传以老子生年至孔子时故百六十岁或言二百余岁者即以周太史儋为老子故二百余岁正义盖或皆疑辞也世不的知故言盖及或也玉清云老子以周平王时见衰於是去孔子世家云孔子问礼於老子在周景王时孔子盖年二十也去平王十二王此传云儋即老子也秦献公与烈王同时去平王二十一王说者不一不可知也故葛仙公序云老子体於自然生乎大始之先起乎无因经历天地终始不可称载也】以其修道而养寿也自孔子死之後百二十九年【集解徐广曰实百一十九年】而史记周太史儋见秦献公曰始秦与周合而离离五百岁而复合合七十岁而霸王者出焉【索隐周秦二本纪并云始周与秦国合合而别别五百载又合合七十岁而霸王者出然与此传离合相反寻其意义亦并不违】或曰儋即老子或曰非也世莫知其然否老子隐君子也老子之子名宗宗为魏将封於段干【集解駰案此云封於段干段干应是魏邑名也而魏世家有段干木段干子田完世家有段干朋疑此三人是姓段干也本盖因邑为姓左传所谓邑亦如是也风俗通氏姓注云姓段名干木恐或失之矣天下自别有段姓何必段干木邪】宗子注【索隐音铸正义之树反】注子宫宫玄孙假【索隐音古雅反正义作瑕音霞】假仕於汉孝文帝而假之子解为胶西王卬太傅因家於齐焉世之学老子者则绌儒学【索隐绌音黜黜退而後之也】儒学亦绌老子道不同不相为谋岂谓是邪李耳无为自化清静自正【索隐太史公因其行事於当篇之末结以此言亦是赞也又云此是昔人所评老聃之德故太史公引以记之正义此都结老子之教也言无所造为而自化清静不挠而民自归正也】

庄子者蒙人也【集解駰案地理志蒙县属梁国索隐刘向别录云宋之蒙人也正义郭缘生述征记云蒙县庄周之本邑也】名周周尝为蒙漆园吏【正义括地志云漆园故城在曹州冤句县北十七里此云庄周为漆园吏即此按其城古属蒙县】与梁惠王齐宣王同时其学无所不闢然其要本归於老子之言故其着书十余万言大抵率寓言也【索隐大抵犹言大

署其书十余万言率皆立主客使之相对语故云偶言又音寓寓寄也故别録云又作人姓名使相与语是寄辞於其人故庄子有寓言篇正义率音律寓音遇率犹类也寓寄也】作渔父盗跖胠箠【索隐胠箠犹言开箠胠音祛亦有音去箠音去刼反正义胠音丘鱼反箠音苦頰反胠开也箠箱类也此庄子三篇名皆诬毁自古圣君贤臣孔子之徒营求名誉咸以丧身非抱素任真之道也】以诋訾孔子之徒【索隐诋音邸訾音訾谓诋訾毁訾孔子也】以明老子之术畏累虚亢桑子之属皆空语无事实【索隐按庄子畏累虚篇名也即老聃弟子畏累邹氏畏音於鬼反累音垒刘氏畏音乌罪反累路罪反郭象云今东莱也亢音庚亢桑子王劭本作庚桑司马彪云庚桑楚人姓名正义庄子云庚桑楚者老子弟子北居畏累之山成云山在鲁亦云在深州此篇寄庚桑楚以明至人之德卫生之经若槁木无情死灰无心祸福不至恶有人灾然庄子杂篇庚桑楚以下皆空设言语无有实事也】然善属书离辞【正义属音烛离辞犹力折其辞句】指事类情用剽剥儒墨【正义剽正妙反剽犹攻击也】虽当世宿学不能自解免也其言洸洋自恣以适己【索隐洸洋音汪羊又音晃养又作痒正义洋音翔已音纪】故自王公大人不能器之楚威王闻庄周贤【正义威王当周显王三十年】使使厚币迎之许以为相庄周笑谓楚使者曰千金重利卿相尊位也子独不见郊祭之牺牛乎养食之数岁衣以文绣以入太庙当是之时虽欲为孤豚岂可得乎【索隐孤小也特也愿为小豚不可得正义不羣也豚小猪临宰时愿为孤小豚不可得也】子亟去【索隐音棘犹急也】无污我【索隐污乌故反】我宁游戯污渎之中自快【索隐污渎音乌读潢污之小渠也】无为有国者所羈终身不仕以快吾志焉【正义庄子云庄子钓於濮水之上楚王使大夫往曰愿以境内累庄子持竿不顾曰吾闻楚有神龟死二千岁矣巾笥藏之庙堂之上此龟宁死为留骨而贵乎宁生曳尾泥中乎大夫曰宁曳尾涂中庄子曰往矣吾将曳尾於涂中与此传不同】

申不害者京人也【索隐申子名不害按别録云京今河南京县正义括地志云京县故城在郑州荥阳县东南二十里郑之京邑也】故郑之贱臣学术以干韩昭侯【索隐术即刑名法术】昭侯用为相内修政教外应诸侯十五年终申子之身国治兵强无侵韩者【索隐王劭按纪年韩昭侯之世兵寇屡交异乎此言】申子之学本於黄老而主刑名著书二篇号曰申子【集解駰案刘向别録曰今民间所有上书二篇中书六篇皆合二篇已过太史公所记也正义阮孝绪七畧云申子三卷也】韩非者韩之诸公子也【正义阮孝绪七畧云韩子二十卷韩世家云王安五年非使秦九年虜王安韩遂亡】喜刑名法术之学【集解駰案新序曰申子之书言人主当执术无刑因循以督责臣下其责深刻故号曰术商鞅所为书号曰法皆曰刑名故号曰刑名法术之书索隐着书三十余篇号曰韩子】而其归本於黄老【索隐刘氏云黄老之法不尚繁华清简无为君臣自正韩非之论诋駁浮淫法制无私而名实相称故曰归於黄老斯未为得其本旨今按韩子书有解老喻老二篇是大抵亦崇黄老之学也】非为人口吃【正义音讫】不能道说而善着书与李斯俱事荀卿【正义孙卿子二十二卷名况赵人楚兰陵令避汉宣帝讳改姓孙也】斯自以为不如非非见韩之削弱数以书谏韩王【索隐韩王安也】韩王不能用於是韩非疾治国不务修明其法制执势以御其臣下富国强兵而以求人任贤反举浮淫之蠹而加之於功实之上以为儒者用文乱法而侠者以武犯禁寬则宠名誉之人急则用介冑之士【正义介甲也冑兜鍪也】今者所养非所用【索隐言非疾时君以禄养其臣者乃皆安禄养交之臣非勇悍忠梗及折冲御侮之人也】所用非

所养【索隐言人主临事任用并非常所禄养之士故难可尽其死力也】悲廉直不容於邪枉之臣【索隐又非奸邪谄谀之臣不容廉直之士】观往者得失之变【正义韩非见王安不用忠良令国削弱故观往古有国之君则得失之变异而作韩子二十卷】故作孤愤五蠹内外储说林说难十余万言【索隐此皆非所着书篇名也孤愤愤孤直不容於时也五蠹蠹政之事有五也内外储按韩子有内外储说篇内储言明君执术以制臣下利之在己故曰内也外储言明君观聽臣下之言行以断其赏罚赏罚在彼故曰外也储蓄二事所谓明君也说林者广说诸事其多若林故曰说林也今韩子有说林上下二篇说难者说前人行事与已不同而诘难之故其书有说难篇】然韩非知说之难为说难书甚具终死於秦不能自脱【索隐说音税难音奴干反言游说之道为难故曰说难其书词甚高故特载之然此篇亦与韩子微异烦省小不同刘伯庄亦申其意粗释其微文幽旨故有刘说也】说难曰凡说之难非吾知之有以说之难也【正义凡说难识情理不当人主之心恐犯逆鳞说之难知故言非吾知之有以说之乃为难】又非吾辩之难能明吾意之难也【正义能分明吾意以说之亦又未为难也尚非甚难】又非吾敢横失能尽之难也【索隐韩子横失作横佚刘氏云吾之所言无横无失陈辞发策能尽说情此虽是难尚非难也正义横扩孟反又非吾敢有横失词理能尽说己之情此虽是难尚非极难】凡说之难在知所说之心可以吾说当之【索隐刘氏云关说之难正在於此也按说之心者谓人君之心也言以人臣?未射尊重之意贵贱隔絕旨趣难知自非高识莫近几会故曰说之难也乃须申明人主之意必以说合其情故云吾说当之也正义前者三说并未为难凡说之难者正在於此言深辩知前人意可以吾说当之闇与前人心会说则行乃是难矣】所说出於为名高者也而说之以厚利则见下节而遇卑贱必弃远矣【索隐谓所说之王中心本出欲立高名者也说臣乃陈厚利是其见下节也既不会高情故遇卑贱必弃远矣刘氏云稽古羲皇祖述尧舜是为名高也】所说出於厚利者也而说之以名高则见无心而远事情必不收矣【索隐亦谓所说之君出意本规厚利而说臣乃陈名高之节则是说者无心远於我之事情必不收用也故刘氏曰若秦孝公志於强国而商鞅说以帝王故怒而不用也】所说实为厚利而显为名高者也【索隐韩子实字作陰显者阳也谓其君实为厚利而诈作欲为名高之节也正义前人必欲厚利诈慕名高则阳收其说实疎远之】而说之以名高则阳收其身而实疏之若说之以厚利则陰用其言而显弃其身【索隐谓若下文云郑武公陰欲伐胡而关其思极论深计虽知说当终遭显戮也正义前人好利厚诈慕名高说之以厚利则陰用说者之言而显不收其身说士不可不察】此之不可不知也夫事以密成而以泄败未必其身泄之也而语及其所匿之事如是者身危【正义事多相类语言或说其相类之前人觉悟便成漏泄故身危也】贵人有过端而说者明言善议以推其恶者则身危【正义人主有过失之端绪而引美善之议以推人主之恶则身危】周泽未渥也而语极知说行而有功则德亡【正义渥沾濡也人臣事君未滿周至之恩泽而说事当理事行有功君不以为恩德故德亡】说不行而有败则见疑如是者身危【索隐谓人臣事上其道未合至周之恩未沾渥於下而辄吐诚极知其道说有功则其德亦亡亡无也韩子作则见忘然见志胜於德亡也又若说不行而有败则见疑如是者身危是恩意未深辄评时政不为所信更致嫌疑若下文所云邻父以墙坏有盗却为见疑即其类也正义说事不行或行有败怀则必致危殆若此者身危也】夫贵人得计而欲自以为功说者与知焉则身危【正义与音预人主先得其计已功说者知前发其踪迹身必危亡】彼显有所出事迺自以为也故说者与知焉则身危【索隐谓人主明有所出事乃自以为功而说者与知是则以为

间故身危正义人主明所出事乃以有所营为说者预知其计而说者身亡危】强之以其所必不为【索隐刘氏云若项羽必欲衣锦东归而说者强述关中违旨忤情自招诛灭也】止之以其所不能已者身危【索隐刘氏云若汉景帝决废栗太子而周亚夫强欲止之竟不从其言後遂下狱也正义强其两反人主必不欲有为而说者强令为之人主已营为而说者强止之者身危】故曰与之论大人则以为间已【正义间音纪苋反说彼大人之短以为窃己之事情乃为刺讥间之】与之论细人则以为鬻权【索隐韩子鬻权作卖重谓荐彼细微之人言堪大用则疑其挟诈而卖我之权正义鬻音育刘伯庄云论则疑其挟诈卖己之权】论其所爱则以为借资【正义说人主爱行人主以为借己之资籍也】论其所憎则以为尝已【正义论说人主所憎恶人主则以为尝试於己也】径省其辞则不知而屈之【索隐谓人主意在文华而说者但径捷省畧其辞则以说者为无知而见屈辱也正义省山景反】泛滥博文则多而久之【索隐谓人主志在简要而说者务於浮辞泛滥博涉文华则君上嫌其多迂诞文而无当正义泛滥浮辞也博文广言句也言浮说广陈必多词理时乃永久人主疲倦】顺事陈意则曰怯懦而不尽【正义懦音乃乱反说者陈言顺人主之意则或怯懦而不尽事情也】虑事广肆则曰草野而倨侮【正义草野犹鄙陋也广陈言词多有鄙陋乃成倨傲侮慢】此说之难不可不知也凡说之务在知饰所说之所敬而灭其所丑【索隐所说谓所说之主也饰其所敬者说士当知人主之所敬而时以文饰之灭其所丑谓人主有所避讳而丑之游说者当灭其事端而不言也】彼自知其计则无以其失穷之【正义前人自知其失误说士无以失误穷极之乃为讪上也】自勇其断则无以其敌怒之【索隐谓人主自勇其断说士无以己意而攻间之是以卑下之谋自敌於上以致遭怒也正义断音端乱反刘伯庄云贵人断甲为是说者以乙破之乙之理难同怒以下敌上也】自多其力则无以其难概之【索隐概犹格也刘氏云秦昭王决欲攻赵白起苦说其难遂已之心拒格君上故致杜邮之戮正义概古代反】规异事与同计誉异人与同行者则以饰之无伤也【正义刘伯庄云贵人与甲同计与乙同行者说士陈言无伤甲乙也】有与同失者则明饰其无失也【索隐按上文言人主规事誉人与人同计同行今说者之词不得伤於同计同行之人仍可文饰其类也又若人主与同失者而说者则可明饰其无失也正义人主与甲同失说者文饰甲之无失】大忠无所拂辞【索隐拂音佛大忠之人志在匡君於善君初不从则且退止待君之悦而又几谏即不拂悟於君也】悟言无所击排【索隐谓大忠说谏之词本欲归於安人兴化亦无别有所击射排摈按韩子作击摩】迺後申其辩知焉此所以亲近不疑【正义拂悟当为拂忤古字假借耳拂违也忤逆也言大忠之事拟安民兴化事在匡弼君初亦不击排乃後周泽沾濡君臣道合乃敢辩智说焉此所以亲近而不见疑是知尽之难】知尽之难也【集解徐广曰知一作得难一作辞索隐谓人臣尽知事上之道难也韩子作得尽之辞正义言说士知谈说之难也能为尽此谈说之道得当人主之心君臣相合乃是知尽之难也】得旷日弥久而周泽既渥【索隐谓君臣道合旷日已久诚着於君也君之渥泽周浹於臣鱼水相须盐梅相和也】深计而不疑交争而不罪迺明计利害以致其功直指是非以饰其身以此相持此说之成也【正义夫知尽之难则君臣道合故得旷日弥久而周泽既渥深计而君不疑与君交争而不罪而得明计国之利害以致其功直指是非任爵禄於身以此君臣相执持此说之成也】伊尹为庖【正义殷本纪云乃为有莘氏媵臣负鼎俎以滋味说汤致王道是也】百里奚为虏【正义晋世家云袭灭虞公及大夫百里以媵秦穆姬也】皆所由于其上也故此二子者皆圣人也犹不能无役身而涉世如此其污也【正义污音乌故反庖房是污】则

非能仕之所设也【索隐韩子作能士之所耻也】宋有富人天雨墙坏其子曰不筑且有盗其邻人之父亦云暮而果大亡其财其家甚知其子而疑邻人之父【正义其子邻父说皆当矣而切见疑非处知则难乎】昔者郑武公欲伐胡【正义世本云胡归姓也括地志云胡城在豫州鄆城县界】廼以其子妻之因问羣臣曰吾欲用兵谁可伐者关其思曰胡可伐廼戮关其思曰胡兄弟之国也子言伐之何也胡君闻之以郑为亲己而不备郑人袭胡取之此二说者其知皆当矣【正义当浪反】然而甚者为戮薄者见疑非知之难也处知则难矣昔者弥子瑕见爱於卫君卫君之法窃驾君车者罪至刖既而弥子之母病人闻往夜告之弥子矫驾君车而出君闻之而贤之曰孝哉为母之故而犯刖罪与君游果园弥子食桃而甘不尽而奉君君曰爱我哉忘其口而念我及弥子色衰而爱弛得罪於君君曰是尝矫驾吾车又尝食我以其余桃故弥子之行未变於初也前见贤而後获罪者爱憎之至变也故有爱於主则知当而加亲见憎於主则罪当而加疏故谏说之士不可不察爱憎之主而後说之矣夫龙之为虫也【正义龙虫类也故言龙之为虫】可扰狎而骑也然其喉下有逆鳞径尺人有婴之则必杀人主亦有逆鳞说之者能无婴人主之逆鳞则几矣【索隐几庶也谓庶几於善谏说正义说者能不犯人主逆鳞则庶几矣】人或传其书至秦秦王见孤愤五蠹之书曰嗟乎寡人得见此人与之游死不恨矣李斯曰此韩非之所着书也秦因急攻韩韩王始不用非及急廼遣非使秦秦王悦之未信用李斯姚贾害之毁之曰韩非韩之诸公子也今王欲并诸侯非终为韩不为秦此人之情也今王不用久留而归之此自遗患也不如以过法诛之秦王以为然下吏治非李斯使人遗非药使自杀韩非欲自陈不得见秦王後悔之使人赦之非已死矣【集解駟案战国策曰秦王封姚贾千户以为上卿韩非短之曰贾梁监门子盗於梁臣於赵而逐取世监门子梁大盗赵逐臣与同社稷之计非所以励羣臣也王召贾问之贾答云云廼诛韩非也】申子韩子皆着书传於後世学者多有余独悲韩子为说难而不能自脱耳

太史公曰老子所贵道虚无因应变化於无为故着书辞称微妙难识庄子散道德放论要亦归之自然申子卑卑【集解駟案自勉励之意也】施之於名实韩子引墨切事情明是非其极惨礪【集解駟案胡革反用法惨急而鞫礪深刻】少恩皆原於道德之意而老子深远矣

【索隐述赞曰伯阳立教清净无为道尊东鲁迹窜西垂庄蒙栩栩申害卑卑刑名有术说难极知悲彼周防终亡李斯】

史记卷六十三

史记卷六十三考证

老庄申韩列传老子者正义朱韬玉札及神仙传云○【臣照】按汉武惑於神仙方士并宗老子故司马迁作老子传着其乡里详考其子孙以明老子者亦人耳非所谓乘云气御飞龙不可方物者故一则曰老子隐君子也再则曰老子隐君子也良史心苦矣正义翻引神仙荒唐谬悠之论以为史注夏虫不可语冰有如是

合七十岁而霸王者出焉○周本纪封禅书云合十七岁秦本纪云七十七岁

史记卷六十三考证

卷六十四

钦定四库全书

史记卷六十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

司马穰苴列传第四

司马穰苴者田完之苗裔也【索隐穰苴田氏之族为大司马故曰司马穰苴也正义穰音若羊反苴音子徐反田穰苴为司马官主兵】齐景公时晋伐阿甄而燕侵河上【索隐阿甄皆齐邑晋太康地记曰阿即东阿也地理志云甄城县属济阴正义河上黄河南岸地即沧德二州北界】齐师败绩景公患之晏婴乃荐田穰苴曰穰苴虽田氏庶孽然其人文能附众武能威敌愿君试之景公召穰苴与语兵事大说之以为将军【索隐谓命之为将以将军也将音即匠反遂以将军为官名故尸子曰十万之师无将军则乱六国时有此官】将兵扞燕晋之师穰苴曰臣素卑贱君擢之闾伍之中加之大夫之上士卒未附百姓不信人微权轻愿得君之宠臣国之所尊以监军乃可於是景公许之使庄贾往穰苴既辞与庄贾约曰旦日日中会於军门【索隐按旦日谓明日日中时期会於军门】穰苴先驰至军立表下漏待贾【索隐立表谓立木为表以视日景下漏谓下滴漏以知刻数也】贾素骄贵以为将已之军而已为监不甚急【正义已音纪监甲暂反】亲戚左右送之留饮日中而贾不至穰苴则仆表决漏【索隐仆音赴仆者卧其表也决漏谓决去壶中漏水以贾失期过日中故也】入行军勒兵申明约束约束既定夕时庄贾乃至穰苴曰何後期为贾谢曰不佞大夫亲戚送之故留穰苴曰将受命之日则忘其家临军约束则忘其亲援枹鼓之急则忘其身【索隐援音袁枹音浮正义援作操枹音孚谓鼓挺也】今敌国深侵邦内骚动士卒暴露於境君寝不安席食不甘味百姓之命皆悬於君何谓相送乎召军正问曰军法期而後至者云何对曰当斩庄贾惧使人驰报景公求救既往未及反於是遂斩庄贾以徇三军三军之士皆振栗久之景公遣使者持节赦贾驰入军中穰苴曰将在军君令有所不受【集解魏武帝曰苟便於事不拘君命】问军正曰军中不驰今使者驰云何正曰当斩使者大惧穰苴曰君之使不可杀之乃斩其仆车之左驸马之左骖以徇三军【索隐谓斩其使者仆车之左驸又斩马之左骖以御马在左故也正义驸音附刘伯庄云驸者箱外之立木承重校者徇行示也】遣使者还报然後行士卒次舍井竈饮食问疾医药身自拊循之悉取将军之资粮享士卒身与士卒平分粮食最比【正义比作卑必耳反】其羸弱者三日而後勒兵病者皆求行争奋出为之赴战晋师闻之

为罢去燕师闻之度水而解【正义度黄河水北去而解】於是追击之遂取所亡封内故境而引兵归未至国释兵旅解约束誓盟而後入邑景公与诸大夫郊迎劳师成礼然後反归寝既见穰苴尊为大司马田氏日以益尊於齐已而大夫鲍氏高国之属害之潜於景公景公退穰苴苴发疾而死田乞田豹之徒由此怨高国等【索隐田乞田僖子豹亦僖子之族也】其後及田常杀简公尽灭高子国子之族至常曾孙和因自立为齐威王【索隐此文误也当云田和自立至其孙因号为齐威王故世家云田和自立号太公其孙号威王也】用兵行威大放穰苴之法【正义放方往反】而诸侯朝齐齐威王使大夫追论古者司马兵法而附穰苴於其中因号曰司马穰苴兵法太史公曰余读司马兵法闕廓深远虽三代征伐未能竟其义如其文也亦少褒矣【索隐谓司马法说行兵揖让有三代之法而齐区区小国又当战国之时故云少褒】若夫穰苴区区为小国行师何暇及司马兵法之揖让乎世既多司马兵法以故不论着穰苴之列传焉

【索隐述赞曰燕侵河上齐师败绩婴荐穰苴武能威敌斩贾以徇三军惊惕我卒既强彼寇退壁法行司马实赖宗戚】

史记卷六十四

史记卷六十四考证

司马穰苴列传齐景公时晋伐阿甄而燕侵河上○古史曰太史公为司马穰苴传言齐景公拔以为将遂以成功归为大司马大夫高国害之潜而杀之其言甚美世皆信之予以春秋左氏考之未有燕晋伐齐者也而战国策称司马穰苴执政者也湣王杀之故大臣不附意者穰苴湣王之臣尝为湣王却燕晋而战国杂说遂以为景公时耶习学记言曰左氏前後载齐事甚详使有穰苴暴起立功不应遗落也况伐阿鄆侵河上皆景公时所无大司马亦非齐官迁故称田乞田豹由此怨高国若不考信於左氏者盖作书之人夸大其词而迁信之尔

史记卷六十四考证

<史部,正史类,史记>

卷六十五

钦定四库全书

史记卷六十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

孙子吴起列传第五

孙子武者齐人也【正义魏武帝云孙子者齐人事於吴王阖闾为吴将作兵法十三篇】以兵法见於吴王阖闾阖闾曰子之十三篇【正义七録云孙子兵法三卷案十三篇为上卷又有中下二卷】吾尽观之矣可以小试勒兵乎对曰可阖闾曰可试以妇人乎曰可於是许之出宫中美女得百八十人孙子分为二队以王之宠姬二人各为队长【索隐队徒对反长竹两反】皆令持戟令之曰汝知而心与左右手背乎妇人曰知之孙子曰前则视心左视左手右视右手後即视背妇人曰诺约束既布乃设鈇钺即三令五申之於是鼓之右妇人大笑孙子曰约束不明申令不熟将之罪也复三令五申而鼓之左妇人复大笑孙子曰约束不明申令不熟将之罪也既已明而不如法者吏士之罪也乃欲斩左右队长吴王从台上观见且斩爱姬大骇趣使使下令【索隐趣音促急也使音色吏反】曰寡人已知将军能用兵矣寡人非此二姬食不甘味愿勿斩也孙子曰臣既已受命为将将在军君命有所不受遂斩队长二人以徇用其次为队长於是复鼓之妇人左右前後跪起皆中规矩?墨无敢出声於是孙子使使报王曰兵既整齐王可试下观之唯王所欲用之虽赴水火犹可也吴王曰将军罢休就舍寡人不愿下观孙子曰王徒好其言不能用其实於是阖闾知孙子能用兵卒以为将西破强楚入郢北威齐晋显名诸侯孙子与有力焉孙武既死【集解駰案越絶书曰吴县巫门外大冢孙武冢也去县十里索隐越絶书子贡所着恐非也其书多记吴越絶後土地或後人所録正义七録云越絶十六卷或云伍子胥撰】後百余岁有孙臆臆生阿鄆之间臆亦孙武之後世子孙也孙臆尝与庞涓俱学兵法【索隐臆频忍反龐皮江反涓古玄反】庞涓既事魏得为惠王将军而自以为能不及孙臆乃陰使召孙臆臆至庞涓恐其贤於己疾之则以法刑断其两足而黥之欲隐勿见齐使者如梁【正义今汴州】孙臆以刑徒陰见说齐使齐使以为奇窃载与之齐齐将田忌善而客待之忌数与齐诸公子驰逐重射孙子见其马足不甚相远马有上中下辈於是孙子谓田忌曰君弟重射【索隐弟且也重射好射也】臣能令君胜田忌信然之与王及诸公子逐射千金【正义射音石随逐而射睹千金】及临质【索隐质犹对也将欲对射之时也一云质谓棚非也】孙子曰今以君之下驷与彼上驷取君上驷与彼

中驷取君中驷与彼下驷既驰三辈毕而田忌一不胜而再胜卒得王千金於是忌进孙子於威王威王问兵法遂以为师其後魏伐赵赵急求救於齐齐威王欲将孙臆臆辞谢曰刑余之人不可於是乃以田忌为将而孙子为师居辎车中坐为计谋田忌欲引兵之赵孙子曰夫解杂乱纷纠者不控卷【索隐谓事之杂乱纷纠也解杂乱纷纠者当善以手解之不可控卷而击之卷即拳也刘氏云控总卷缩非也】救鬪者不?截【索隐音搏戟谓救鬪者当善撝解之无以手助相搏截则其怒益炽矣按截谓以手持戟刺人也】批亢搗虚【索隐批音白结反亢音苦浪反按批者相排批也音白灭反言敌人相亢拒也搗者擊也冲也虚者空也按谓前人相亢必须批之彼兵若虚则冲搗之欲令击梁之虚也此当是旧语故孙子以言之也】形格势禁则自为解耳【索隐谓若批其相亢击搗彼虚则是事形相格而其势自禁止则彼自为解兵也】今梁赵相攻轻兵锐卒必竭於外老弱罢於内君不若引兵疾走大梁据其街路冲其方虚彼必释赵而自救是我一举解赵之围而收弊於魏也【索隐谓齐今引兵据大梁之冲是冲其方虚之时梁必释赵而自救是一举释赵而弊魏】田忌从之魏果去邯郸与齐战於桂陵大破梁军後十五年【索隐王劭按纪年梁惠王十七年齐田忌败梁桂陵至二十七年十二月齐田盼败梁马陵计相去无十五岁也】魏与赵攻韩韩告急於齐齐使田忌将而往直走大梁魏将龐涓闻之去韩而归齐军既已过而西矣孙子谓田忌曰彼三晋之兵素悍勇而轻齐齐号为怯善战者因其势而利导之兵法百里而趣利者蹶上将【集解魏武帝曰蹶犹挫也索隐蹶音巨月反刘氏云蹶犹毙】五十里而趣利者军半至使齐军入魏地为十万竈明日为五万竈又明日为三万竈庞涓行三日大喜曰我固知齐军怯入吾地三日士卒亡者过半矣乃弃其步军与其轻锐倍日并行逐之孙子度其行暮当至马陵马陵道狭而旁多阻隘可伏兵乃斫大树白而书之曰庞涓死於此树之下於是令齐军善射者万弩夹道而伏期曰暮见火举而俱发庞涓果夜至斫木下见白书乃鑽火烛之读其书未毕齐军万弩俱发魏军大乱相失庞涓自知智穷兵败乃自刭曰遂成竖子之名【索隐竖子谓臆】齐因乘胜尽破其军虏魏太子申以归孙臆以此名显天下世传其兵法

吴起者卫人也好用兵尝学於曾子事鲁君齐人攻鲁鲁欲将吴起吴起取齐女为妻而鲁疑之吴起於是欲就名遂杀其妻以明不与齐也鲁卒以为将将而攻齐大破之鲁人或恶吴起曰起之为人猜忍人也其少时家累千金游仕不遂遂破其家乡党笑之吴起杀其谤己者三十余人而东出卫郭门与其母诀啗臂而盟曰起不为卿相不复入卫遂事曾子居顷之其母死起终不归曾子薄之而与起絶起乃之鲁学兵法以事鲁君鲁君疑之起杀妻以求将夫鲁小国而有战胜之名则诸侯图鲁矣且鲁卫兄弟之国也而君用起则是弃卫鲁君疑之谢吴起吴起於是闻魏文侯贤欲事之文侯问李克曰吴起何如人哉李克曰起贪而好色【索隐王劭云此李克言吴起贪下文云魏文侯知起廉尽能得士心又公叔之仆称起为人节廉岂前贪而後廉何言之相反也今李克言起贪者起本家累千金破产求仕非实贪也盖言贪者是贪荣名耳故母死不赴杀妻将鲁是也或者起未委质於魏犹有贪迹及其见用则尽廉能亦何异乎陈平之为人也】然用兵司马穰苴不能过也於是魏文侯以为将击秦拔五城起之为将与士卒最下者同衣食卧不设席行不骑乘亲裹赢粮与士卒分劳苦卒有病疽者起为吮之【索隐吮音弋软反又才软反】卒母闻而哭之人曰子卒也而将军自吮其疽何哭为母曰非然也往年吴公吮其父其父战不旋踵遂死於敌吴公今又吮其子妾不知其死所矣是以哭之文侯以吴起善用兵廉平尽能得士心乃以为西河守以拒秦韩魏文侯既卒起

事其子武侯武侯浮西河而下中流顾而谓吴起曰美哉乎山河之固此魏国之宝也起对曰在德不在险昔三苗氏左洞庭右彭蠡德义不修禹灭之夏桀之居左河济右泰华伊阙在其南羊肠在其北【集解瓚曰今河南城为直之皇甫谧曰壶关有羊肠阪在太原晋阳西北九十里】修政不仁汤放之殷纣之国左孟门【索隐刘氏按纣都朝歌今孟山在其西今言左则东边别有孟门也】右太行常山在其北大河经其南修政不德武王杀之由此观之在德不在险若君不修德舟中之人尽为敌国也【集解駰案扬子法言曰美哉言乎使起之用兵每若斯则太公何以加诸】武侯曰善即封吴起为西河守甚有声誉魏置相相田文【索隐吕氏春秋作商文】吴起不悦谓田文曰请与子论功可乎田文曰可起曰将三军使士卒乐死敌国不敢谋子孰与起文曰不如子起曰治百官亲万民实府库子孰与起文曰不如子起曰守西河而秦兵不敢东乡韩赵宾从子孰与起文曰不如子起曰此子三者皆出吾下而位加吾上何也文曰主少国疑大臣未附百姓不信方是之时属之於子乎属之於我乎起默然良久曰属之子矣文曰此乃吾所以居子之上也吴起乃自知弗如田文田文既死公叔为相【索隐韩之公族】尚魏公主而害吴起公叔之仆曰起易去也公叔曰柰何其仆曰吴起为人节廉而自喜名也君因先与武侯言曰夫吴起贤人也而侯之国小又与强秦壤界臣窃恐起之无留心也武侯即曰柰何君因谓武侯曰试延以公主起有留心则必受之无留心则必辞矣以此卜之君因召吴起而与归即令公主怒而轻君吴起见公主之贱君也则必辞於是吴起见公主之贱魏相果辞魏武侯武侯疑之而弗信也吴起惧得罪遂去即之楚楚悼王素闻起贤至则相楚明法审令捐不急之官废公族疏远者以抚养战鬪之士要在强兵破驰说之言从横者於是南平百越北并陈蔡却三晋西伐秦诸侯患楚之强故楚之贵戚尽欲害吴起及悼王死宗室大臣作乱而攻吴起吴起走之王尸而伏之击起之徒因射刺吴起并中悼王【索隐楚系家悼王名疑】悼王既葬太子立【索隐肃王?也】乃使令尹尽诛射吴起而并中王尸者坐射起而夷宗死者七十余家太史公曰世俗所称师旅皆道孙子十三篇吴起兵法世多有故弗论论其行事所施設者语曰能行之者未必能言能言之者未必能行孙子筹策庞涓明矣然不能蚤救患於被刑吴起说武侯以形势不如德然行之於楚以刻暴少恩忘其軀悲夫

【索隐述赞曰孙子兵法一十三篇美人既斩良将得焉刖孙臆脚筹策庞涓吴起相魏西河称贤惨礪事楚死後留权】

史记卷六十五

史记卷六十五考证

孙子吴起列传君第重射索隐重射好射也○徐孚远曰重射者再射也索隐非

救鬪者不搏擻索隐按擻谓以手持擻刺人也○余有丁曰擻义当为击非矛戟也

批亢搗虚索隐按批者相排批也言敌人相亢拒也搗者击也冲也虚者空也按谓前人相亢必须批之彼兵若虚则冲搗之欲令击梁之虚也此当是旧语故孙子以言之也○顾炎武曰

索隐非也此与刘敬传搯其肮之肮同张晏曰喉咙也下文所谓据其街路是也以敌人所不及备故之虚

即封吴起为西河守○徐孚远曰前既为西河守矣此又云盖杂引而未删正【臣照】按徐说非也武侯曰善即封吴起盖加以封耳下乃云为西河守甚有声名而不得为相今并作一句读遂疑此句重出

公叔为相索隐韩之公族○【臣照】按战国策公叔疑为魏公叔痤非韩公族也公叔痤为魏将而与韩赵战浹北禽乐祚赏田百万禄之反走再拜而辞以让吴起之後则非害起者也此与国策参差不同

史记卷六十五考证

卷六十六

钦定四库全书

史记卷六十六

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

伍子胥列传第六

伍子胥者楚人也名员员父曰伍奢员兄曰伍尚其先曰伍举以直谏事楚庄王【索隐举直谏见左氏楚世家】有显故其後世有名於楚楚平王有太子名曰建使伍奢为太傅费无忌为少傅【索隐左氏作费无极】无忌不忠於太子建平王使无忌为太子取妇於秦秦女好无忌驰归报平王曰秦女絶美王可自取而更为太子取妇平王遂自取秦女而絶爱幸之生子轸更为太子取妇无忌既以秦女自媚於平王因去太子而事平王恐一旦平王卒而太子立杀己乃因谗太子建建母蔡女也无宠於平王平王稍益疏建使建守城父【集解駰案地理志颍川有城父县索隐城父本陈邑楚伐陈而有之】备边兵顷之无忌又日夜言太子短於王曰太子以秦女之故不能无怨望愿王少自备也自太子居城父将兵外交诸侯且欲入为乱矣平王乃召其太傅伍奢考问之伍奢知无忌谗太子於平王因曰王独奈何以谗贼小臣疏骨肉之亲乎无忌曰王今不制其事成矣王且见禽於是平王怒囚伍奢而使城父司马奋扬往杀太子【索隐奋扬城父司马之姓名也】行未至奋扬使人先告太子太子急去不然将诛太子建亡奔宋无忌言於平王曰伍奢有二子皆贤不诛且为楚忧可以其父质而召之不然且为楚患王使使谓伍奢曰能致汝二子则生不能则死伍奢曰尚为人仁呼必来员为人刚戾忍讟【集解駰案音犬诟反索隐邹氏作诟骂也音逅】能成大事彼见来之并擒其势必不来王不聽使人召二子曰来吾生汝父不来今杀奢也伍尚欲往员曰楚之召我兄弟非欲以生我父也恐有脱者後生患故以父为质诈召二子二子去则父子俱死何益父之死往而令讐不得报耳不如奔他国借力以雪父之耻俱灭无为也伍尚曰我知往终不能全父命然恨父召我以求生而不往後不能雪耻终为天下笑耳谓员可去矣汝能报杀父之讐我将归死尚既就执使者捕伍胥伍胥贯【集解駰案乌还反】弓执矢向使者【索隐刘氏贯音弯又音古患反谓满张弓】使者不敢进伍胥遂亡闻太子建之在宋往从之奢闻子胥之亡也曰楚国君臣且苦兵矣伍尚至楚楚并杀奢与尚也伍胥既至宋宋有华氏之乱【索隐春秋昭二十年宋华亥向宁华定与君争而出奔是也】乃与太子建俱奔於郑郑人甚善之太子建又适晋晋顷公曰太子既善郑郑信太子太子能为我内应而我攻其外灭郑必矣

灭郑而封太子太子乃还郑事未会会自私欲杀其从者从者知其谋乃告之於郑郑定公与子产诛杀太子建建有子名胜伍胥惧乃与胜俱奔吴到昭关【索隐其关在西江乃吴楚之境】昭关欲执之伍胥遂与胜独身步走几不得脱追者在後至江江上有一渔父乘船知伍胥之急乃渡伍胥伍胥既渡解其劔曰此劔直百金以与父父曰楚国之法得伍胥者赐粟伍万石爵执珪岂徒百金劔邪不受伍胥未至吴而疾止中道乞食【集解张勃曰子胥乞食处在丹阳溧阳县索隐张勃晋人吴鸿胪俨之子作吴録故裴氏注引之溧音栗水名也】至於吴吴王僚方用事公子光为将伍胥乃因公子光以求见吴王久之楚平王以其边邑锺离与吴边邑卑梁氏俱蚕两女子争桑相攻乃大怒至於两国举兵相伐吴使公子光伐楚拔其锺离居巢而归【索隐二邑楚县也锺离在六安古锺离子之国世本谓之终犁羸姓之国居巢亦国也桀奔南巢其国盖远尚书序巢伯来朝盖因居之於淮南楚地】伍子胥说吴王僚曰楚可破也愿复遣公子光公子光谓吴王曰彼伍胥父兄为戮於楚而劝王伐楚者欲以自报其讐耳伐楚未可破也伍胥知公子光有内志欲杀王而自立未可说以外事乃进专诸於公子光【索隐左传谓专设诸】退而与太子建之子胜耕於野五年而楚平王卒初平王所夺太子建秦女生子轸及平王卒轸竟立为後是为昭王吴王僚因楚丧使二公子将兵往袭楚楚发兵絶吴兵之後不得归吴国内空而公子光乃令专诸袭刺吴王僚而自立是为吴王阖庐阖庐既立得志乃召伍员以为行人而与谋国事楚诛其大臣郤宛伯州犁伯州犁之孙伯嚭亡奔吴【集解徐广曰伯州犁者晋伯宗之子也伯州犁之子曰郤宛郤宛之子曰伯嚭宛亦姓伯又别氏郤楚世家云杀郤宛宛之宗姓伯氏子曰嚭吴世家云楚诛伯州犁其孙伯嚭奔吴也】吴亦以嚭为大夫前王僚所遣二公子将兵伐楚者道絶不得归【索隐公子烛庸及盖余也】後闻阖庐杀王僚自立遂以其兵降楚楚封之於舒阖庐立三年乃兴师与伍胥伯嚭伐楚拔舒遂禽故吴反二将军因欲至郢将军孙武曰民劳未可且待之乃归四年吴伐楚取六与潜【集解駰案六古国皐陶之後所封潜县有天柱山】五年伐越败之六年楚昭王使公子囊瓦【集解駰案左传楚公子贞字子囊其孙名瓦字子常此言公子又兼称囊瓦误也】将兵伐吴吴使伍员迎击大破楚军於豫章【集解駰案豫章在江南索隐按杜预云昔豫章在江北盖後徙之於江南】取楚之居巢九年吴王阖庐谓子胥孙武曰始子言郢未可入今果何如二子对曰楚将囊瓦贪而唐蔡皆怨之王必欲大伐之必先得唐蔡乃可阖庐听之悉兴师与唐蔡伐楚与楚夹汉水而陈吴王之弟夫概将兵请从【索隐概音古赓反】王不听遂以其属五千人击楚将子常【集解駰案子常公孙瓦】子常败走奔郑於是吴乘胜而前五战遂至郢【集解駰案郢楚都索隐郢音以正反又以井反】己卯楚昭王出奔庚辰吴王入郢昭王出亡入云梦盗击王王走郢【集解駰案音云国名索隐走音奏走向也郢古之郢国】郢公弟怀曰平王杀我父我杀其子不亦可乎郢公恐其弟杀王与王奔随【正义今有楚昭王故城昭王奔随之处宫之北城即是】吴兵围随谓随人曰周之子孙在汉川者楚尽灭之随人欲杀王王子綦匿王己自为王以当之随人卜与王於吴不吉乃谢吴不与王始伍员与申包胥为交员之亡也谓包胥曰我必覆楚包胥曰我必存之及吴兵入郢伍子胥求昭王既不得乃掘楚平王墓出其尸鞭之三百然後己申包胥亡於山中使人谓子胥曰子之报讐其以甚乎吾闻之人衆者胜天天定亦能破人【正义申包胥言闻人衆者虽一时凶暴胜天及天降其凶亦破於疆暴之人】今子故平王之臣亲北面而事之今至於戮死人此岂其无天道之极乎伍子胥曰为我谢申包胥曰吾日暮涂远吾故倒行而逆施之【索隐倒音丁老反施如字子胥言志在复讐常恐且死不遂本心今幸而报岂论道理乎譬如人行

前途尚远而日势已暮故其在颠倒疾行逆理施事何得责吾顺理乎】於是申包胥走秦告急求救於秦秦不许包胥立於秦廷昼夜哭七日七夜不絕其声秦哀公怜之曰楚虽无道有臣若是可无存乎乃遣车五百乘救楚擊吳六月敗吳兵於稷【集解駟案稷丘地名在郊外索隱左傳作稷丘】會吳王久留楚求昭王而闔廬弟夫概乃亡归自立为王闔廬聞之乃釋楚而归擊其弟夫概夫概敗走遂奔楚楚昭王見吳有内乱乃复入郢封夫概於堂谿【集解徐廣曰在慎縣駟案地理志汝南有吳房縣應劭曰夫概奔楚封於堂谿本房子國以封吳故曰吳房然則不得在慎縣也正義案今豫州吳房縣在州西北九十里】為堂谿氏楚复与吳战敗吳吳王乃归後二歲闔廬使太子夫差將兵伐楚取番【集解音普寒反又音婆索隱盖鄱陽也】楚惧吳复大來乃去郢徙於郢【集解楚地音若索隱今闕】當是時吳以伍子胥孫武之謀西破強楚北威齊晉南服越人其後四年孔子相魯後五年伐越越王勾踐迎擊敗吳於姑蘇傷闔廬指【正義姑蘇當作?李乃文誤也左傳戰?李傷將指卒於陜是也解在吳世家】軍郤闔廬病創【集解駟案楚良反】將死謂太子夫差曰爾忘勾踐杀尔父乎夫差對曰不敢忘是夕闔廬死夫差既立为王以伯嚭為太宰習戰射二年後伐越敗越於夫湫【集解駟案音椒索隱又如字正義太湖中椒山也解在吳世家】越王勾踐乃以余兵五千人栖於會稽之上【正義土地名在越州會稽縣東南十二里】使大夫種厚幣遺吳太宰嚭以請和【索隱劉氏云大夫姓種名非也按今吳南有文種墟則種姓文為大夫官也正義高誘云大夫姓文氏字子禽楚郢人】求委國為臣妾吳王將許之伍子胥諫曰越王為人能辛苦今王不滅後必悔之吳王不聽用太宰嚭計与越平其後五年而吳王聞齊景公死而大臣爭寵新君弱乃興師北伐齊伍子胥諫曰勾踐食不重味吊死問疾且欲有所用之也此人不死必為吳患今吳之有越猶人之有腹心疾也而王不先越而乃務齊不亦謬乎吳王不聽伐齊大敗齊師於艾陵【正義括地志云艾山在兗州博城縣南百六十里本齊博邑】遂滅鄒魯之君以归【正義鄒君居兗州鄒縣魯曲阜縣】益疏子胥之謀其後四年吳王將北伐齊越王勾踐用子貢之謀乃率其衆以助吳而重寶以獻遺太宰嚭太宰嚭既數受越賂其愛信越殊甚日夜為言於吳王吳王信用嚭之計伍子胥諫曰夫越腹心之病今信其浮辭詐偽而貪齊破齊譬猶石田無所用之且盤庚之誥曰有顛越不恭剿殄滅之俾無遺育無使易種於茲邑此商之所以興愿王釋齊而先越若不然後將悔之無及而吳王不聽使子胥於齊子胥臨行謂其子曰吾數諫王王不用吾今見吳之亡矣汝与吳俱亡無益也乃属其子於齊鮑牧而還報吳吳太宰嚭既与子胥有隙因谗曰子胥為人剛暴少恩猜賊其怨望恐為深禍也前日王欲伐齊子胥以為不可王卒伐之而有大功子胥耻其計謀不用乃反怨望而今王又复伐齊子胥专懷疆諫【索隱懷皮逼反】沮毀用事【集解駟案沮自呂反】徒幸吳之敗以自勝其計謀耳今王自行悉國中武力以伐齊而子胥諫不用因輟謝詳病不行王不可不备此起禍不难且嚭使人微伺之其使於齊也乃属其子於齊之鮑氏夫為人臣内不得意外倚諸侯自以為先王之謀臣今不見用常鞅鞅怨望愿王早圖之吳王曰微子之言吾亦疑之乃使使賜伍子胥属鏹之劍【集解駟案鏹錄於反】曰子以此死伍子胥仰天叹曰嗟乎諛臣嚭為乱矣王乃反诛我我令若父霸自若未立時諸公子爭立我以死爭之於先王几不得立【正義几音祈】若既得立欲分吳國予我我顧不敢望也然今若听諛臣言以杀長者乃告其舍人曰必樹吾墓上以梓令可以為器【正義器謂棺也以吳必亡也左傳云樹吾墓檟檟可材也吳其亡乎】而抉吾眼縣吳东门之上【索隱抉音烏穴反抉亦決也正義东门?門謂?門也今名葑門?音普姑反?音覆浮反越軍開示浦子胥濤蕩羅城開此門有??隨濤入故以

名门顾野王云?鱼一名江豚欲风则涌之也】以观越寇之入灭吴也乃自刭死吴王闻之大怒乃取子胥尸盛以鸱夷革【集解应劭曰取马革为鸱夷鸱夷榼形正义盛音成榼音古曷反】浮之江中【集解徐广曰鲁哀公十一年正义案年表云吴王夫差十一年也】吴人怜之为立祠於江上【正义吴地记曰越军於苏州东南三十里三江口又向下三里临江北岸立坛杀白马祭子胥杯动酒尽後因立庙於此江上今其侧有浦名上坛浦至晋会稽太守麋豹移庙吴郭东门内道南今庙见在】因命曰胥山【集解张晏曰胥山在太湖边去江不远百里故云江上正义吴地记云胥山太湖边胥湖东岸山西临胥湖山有古葬胥二王庙按其庙不干子胥事太史误矣张注又非】吴王既诛伍子胥遂伐齐齐鲍氏杀其君悼公而立阳生吴王欲讨其贼不胜而去其後二年吴王召鲁卫之君会之橐皋【索隐音拓皋杜预云地名在淮南逖迤县东南正义橐皋故县在庐州巢县西北五十六里】其明年因北大会诸侯於黄池【正义在汴州封丘县南七里】以令周室越王勾践袭杀吴太子【索隐左传太子名友】破吴兵吴王闻之乃归使使厚币与越平後九年越王勾践遂灭吴杀王夫差而诛太宰嚭以不忠於其君而外受重赂与己比周也【正义纪鼻二音】伍子胥初所与俱亡故楚太子建之子胜者在於吴吴王夫差之时楚惠王欲召胜归楚叶公谏曰【正义叶式涉反杜预云子高沈诸梁】胜好勇而陰求死士殆有私乎惠王不听遂召胜使居楚之边邑鄢【集解徐广曰颍川鄢陵是正义鄢音偃括地志云故鄢城在豫州鄢城县南五里与褒信白亭相近】号为白公【集解徐广曰汝南褒信县有白亭正义括地志云白亭在豫州褒信南四十二里又有白公故城又许州扶沟县北四十五里北又有白亭也】白公归楚三年而吴诛子胥白公胜既归楚怨郑之杀其父乃陰养死士求报郑归楚五年请伐郑楚令尹子西许之兵未发而晋伐郑郑求救於楚楚使子西往救与盟而还白公胜怒曰非郑之仇乃子西也胜自砺劔人问曰【索隐左传作子期之子平见曰王孙何自砺也】何以为胜曰欲以杀子西子西闻之笑曰胜如卵耳何能为也其後四岁白公胜与石乞袭杀楚令尹子西司马子綦於朝【索隐左传作子期也】石乞曰不杀王不可乃劫之王如高府【索隐杜预云楚之别府】石乞从者屈固【集解徐广曰一作惠王从者屈固楚世家亦云王从者索隐盖此本为得而左传云石乞尹门圉公阳穴宫负王以如昭夫人之宫则公阳是楚之大夫王之从者也】负楚惠王亡走昭夫人之宫【索隐昭王夫人即惠王母乃越女是也】叶公闻白公为乱率其国人攻白公白公之徒败亡走山中自杀【正义左传云白公奔而縊】而虏石乞而问白公尸处不言将亨石乞曰事成爲卿不成而亨固其职也终不肯告其尸处遂亨石乞而求惠王复立之

太史公曰怨毒之於人甚矣哉王者尚不能行之於臣下况同列乎向令伍子胥从奢俱死何异蝼蚁弃小义雪大耻名垂於後世悲夫方子胥窘於江上【索隐窘音求殒反】道乞食志岂尝须臾忘郢都故隐忍就功名非烈丈夫孰能致此哉白公如不自立爲君者其功謀亦不可勝道者哉

【索隐述赞曰谗人罔极交乱四国嗟彼伍氏被兹凶慝员独忍诟志复冤毒霸吴起师伐楚逐北鞭尸雪耻抉眼弃德】

史记卷六十六考证

伍子胥列传其先曰伍举以直谏事楚庄王索隐举直谏见左氏楚世家○【臣照】按举直谏见楚世家左氏无之左氏载直谏者伍参也

遂灭邹鲁之君以归○【臣照】按此与左传及鲁世家俱不符且与下文召鲁卫之君会之橐臯句相刺谬疑文有误

史记卷六十六考证

卷六十七

钦定四库全书

史记卷六十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

仲尼弟子列传第七

孔子曰受业身通者七十有七人【索隐孔子家语亦有七十七人唯文翁孔庙图作七十二人】皆异能之士也德行颜渊闵子騫冉伯牛仲弓政事冉有季路言语宰我子贡【索隐论语一曰德行二曰言语三曰政事四曰文学今此文政事在言语上是其记有异也】文学子游子夏师也僻【集解马融曰子张才过人失於邪僻文过】参也鲁【集解孔安国曰鲁钝也曾子迟钝】柴也愚【集解何晏曰愚直之愚】由也喭【集解郑玄曰子路之行失於喭索隐论语先言柴次参次师次由今传序之亦与论语不同不得辄言其悞也正义 音畔又音岸】回也屡空赐不受命而货殖焉亿则屡中【集解何晏曰言回庶几於圣道虽数空匮而乐在其中赐不受教命唯财货是殖亿度是非盖美回所以励赐也一曰屡犹每也空犹虚中也以圣人之善道教数子之庶几犹不至於知道者各内有此害也其於庶几每能虚中者唯回怀道深远不虚心不能知道子贡无数子之病然亦不知道者虽不穷理而幸中虽非天命而偶富亦所以不?心也】孔子之所严事於周则老子於卫蘧伯玉【集解大戴礼外宽而内直自设於隐括之中直已而不直人汲汲於仁以善自终盖蘧伯玉之行】於齐晏平仲於楚老莱子於郑子产【集解大戴礼君择臣而使之臣择君而事之有道顺命无道衡命盖晏平仲之行也索隐大戴记云蹈忠而行信终日言不在尤之内国无道处贱不闷贫而能乐盖老莱子之行】於鲁孟公绰数称臧文仲柳下惠【集解大戴礼孝恭慈仁允德图义约货去怨盖柳下惠之行】铜鞮伯华介山子然孔子皆後之并不并世【集解駰案大戴礼曰孔子云国家有道其言足以兴国家无道其默足以容盖铜鞮伯华之所行观於四方不忘其亲苟思其亲不尽其乐盖介山子然之行也说苑曰孔子叹曰铜鞮伯华无死天下有定矣晋太康地记云铜鞮晋大夫羊舌赤之邑世号赤曰铜鞮伯华索隐自□文仲已下孔子皆後之并不并世其所严事自老子及公绰已上皆孔子同时人也按戴德撰礼号曰大戴礼合八十五篇其四十七篇亡见今存者有三十八篇今裴氏所引在卫将军篇孔子称祁奚对晋平公之辞唯举铜鞮介山二人之行也家语又云不克不忌不念旧怨盖伯夷叔齐之行思天而敬人服义而行信盖赵文子之行事君不爱其死谋身不遗其友盖随武子之行地里志铜鞮县名属上

党正义鞮丁奚反按铜鞮潞州县】顏回者鲁人也字子渊少孔子三十岁【正义少成妙反】顏渊问仁孔子曰克己复礼天下归仁焉【集解马融曰克己约身也孔安国曰复反也身能反礼则为仁矣】孔子曰贤哉回也【集解卫瓘曰非大贤乐道不能若此故以称之索隐卫瓘字伯玉晋太保亦注论语故裴引之】一簞食一瓢饮【集解孔安国曰簞笥也】在陋巷人不堪其忧回也不改其乐【集解孔安国曰顏回乐道虽簞食在陋巷不改其所乐也】回也如愚【集解孔安国曰於孔子之言默而识之如愚也】退而省其私亦足以发回也不愚【集解孔安国曰察其退还与二三子说释道义发明大体知其不愚】用之则行舍之则藏唯我与尔有是夫【集解孔安国曰言可行则行可止则止唯我与顏回同也栾肇曰用已而後行不假隐以自高不屈道以要名时人无知其实者唯我与尔有是行正义肇字永高平人晋尚书郎作论语疑释十卷论语駁二卷】回年二十九发尽白蚤死【索隐家语亦云年二十九而发白三十二而死王肃云此久远之书年数错误未可详也校其年则顏回死时孔子年六十一然则伯鱼年五十先孔子卒卒时孔子且七十也今此为顏回先伯鱼死而论语曰顏回死顏路请子之车子曰鲤也死有棺而无槨或为设事之辞按顏回死在伯鱼之前故知论语为设词】孔子哭之恸曰自吾有回门人益亲【集解王肃曰顏回为孔子胥附之友能使门人日亲孔子】鲁哀公问弟子孰为好学孔子对曰有顏回者好学不迁怒不贰过不幸短命死矣今也则亡【集解何晏曰凡人任情喜怒违理顏回任道怒不过分迁者移也怒当其理不移易也不贰过者有不善未尝复行】闵损字子骞【集解郑玄曰孔子弟子目錄曰鲁人】少孔子十五岁孔子曰孝哉闵子骞人不间於其父母昆弟之言【集解陈羣曰言子骞上事父母下顺兄弟动静尽善故人不得有非间之言】不仕大夫不食污君之禄【索隐论语季氏使闵子骞为费宰子骞曰善为我辞焉是不仕大夫不食污君之禄也】如有复我者【集解孔安国曰复我者重来召我】必在汶上矣【集解孔安国曰去之汶水上欲北如齐】冉耕字伯牛【集解郑玄曰鲁人】孔子以为有德行伯牛有恶疾孔子往问之自牖执其手【集解包氏曰牛有恶病不欲见人孔子从牖执其手】曰命也夫斯人也而有斯疾命也夫【集解包氏曰再言之者痛之甚也】冉雍字仲弓【集解郑玄曰鲁人索隐家语云伯牛之宗族少孔子二十九岁】仲弓问政孔子曰出门如见大宾使民如承大祭【集解孔安国曰莫尚乎敬】在邦无怨在家无怨【集解包氏曰在邦为诸侯在家为卿大夫】孔子以仲弓为有德行曰雍也可使南面【集解包氏曰可使南面言任诸侯之治】仲弓父贱人孔子曰犁牛之子騂且角虽欲勿用山川其舍诸【集解何晏曰犁杂文騂赤色也角者角周正中牺牲虽欲以其所生犁而不用山川宁肯舍之乎言父虽不善不害於子之美】

冉求字子有【集解郑玄曰鲁人】少孔子二十九岁为季

康子问孔子曰冉求仁乎曰千室之邑百乘之家【集解孔安国曰千室卿大夫之邑卿大夫称家诸侯千乘大夫故曰百乘】求也可使治其赋仁则吾不知也【集解孔安国曰赋兵赋也仁道至大不可全名也】复问子路仁乎孔子对曰如求求问曰闻斯行诸【集解包氏曰賑穷救乏之事也】子曰行之子路问闻斯行诸子曰有父兄在如之何其闻斯行之【集解孔安国曰当白父兄不可自专】子华怪之敢问问同而答异孔子曰求也退故进之由也兼人故退之【集解郑玄曰言冉有性谦退子路务在胜尚人各因其人之失而正之】

仲由字子路卞人也【集解徐广曰尸子曰子路卞之野人索隐家语仲由一字季路亦云是卞人也】少孔子九岁子路性鄙好勇力志抗直冠雄鸡佩玃豚【集解駰案冠以雄鸡佩以玃豚二物皆勇士路好勇故冠带之】陵暴孔子孔子设礼稍诱子路子路後儒服委质【索隐服?注左氏云古者始事必先书其名於策委死之质於君然後为臣示必死节於其君也】因门人请为弟子子路问政孔子曰先之劳之【集解孔安国曰先导之以德使民信之然後劳之易曰悦以使民民忘其劳】请益曰无倦【集解孔安国曰子路嫌其少故请益曰无倦者行此二事无倦则可】子路问君子尚勇乎孔子曰义之为上君子好勇而无义则乱小人好勇而无义则盗【集解李充曰既称君子不职为乱阶也若君亲失道国家昏乱其於赴患致命而不知正顾义者则亦?乎为乱而受不义之责也索隐充字弘度晋中书侍郎亦作论语解】子路有闻未之能行唯恐有闻【集解孔安国曰前所闻未及行故恐复有闻不得并行】孔子曰片言可以折狱者其由也与【集解孔安国曰片犹偏也听讼必须两辞以定是非偏信一言折狱者唯子路可也】由也好勇过我无所取材【集解栾肇曰适用曰材好勇过我故云无所取索隐肇字求初晋尚书郎作论语义也】若由也不得其死然【集解孔安国曰不得以壽终也】衣敝緼袍【集解孔安国曰緼臬着也】与衣狐貉者立而不耻者其由也与由也升堂矣未入於室也【集解马融曰升我堂矣未入於室耳】季康子问仲由仁乎孔子曰千乘之国可使治其赋不知其仁子路喜从游遇长沮桀溺荷蓑丈人子路为季氏宰季孙问曰子路可谓大臣与孔子曰可谓具臣矣【集解孔安国曰言备臣数而已】子路为蒲大夫【索隐蒲卫邑子路为之宰】辞孔子孔子曰蒲多壮士又难治然吾语汝恭以敬可以执勇【集解駰案言恭谨谦敬勇猛不能害故曰执也】寬以正可以比衆【集解駰案音鼻言寬大清正衆必归近之】恭正以静可以报上初卫灵公有宠姬曰南子灵公太子蒍聩得过南子惧诛出奔及灵公卒而夫人欲立公子郢郢不肯曰亡人太子之子辄在於是卫立辄为君是为出公出公立十二年其父蒍聩居外不得入子路为卫大夫孔悝之邑宰【索隐服?云为孔悝之邑宰】蒍聩乃与孔悝作乱【索隐左传蒍聩入孔悝家悝母伯姬劫悝於厠强与之盟而立蒍聩非悝本心自作乱也】谋入孔悝家遂与其徒袭攻出公出公奔鲁而蒍聩入立是为庄公方孔悝作乱子路在外闻之而驰往遇子羔出卫城门谓子路曰出公去矣而门已闭子可还矣毋空受其祸子路曰食其食者不避其难子羔卒去有使者入城城门开子路随而入造蒍聩蒍聩与孔悝登台子路曰君焉用孔悝请得而杀之蒍聩勿聽於是子路欲燔台蒍聩惧乃下石乞壺黶攻子路击断子路之纓子路曰君子死而冠不免遂结纓而死孔子闻卫乱曰嗟乎由死矣已而果死故孔子曰自吾得由恶言不闻於耳【集解王肃曰子路为孔子侍卫故侮慢之人不敢有恶言是以恶言不闻於孔子耳】是时子贡为鲁使於齐【索隐左传子贡为鲁使齐在哀十五年盖此文错误也聊亦记之】

宰予字子我【集解郑玄曰鲁人】利口辩辞既受业问三年之丧不已久乎君子三年不为礼礼必坏三年不为乐乐必崩旧谷既没新谷既升鑽燧改火期可已矣【集解马融曰周书月令有更火之文春取榆柳之火夏取枣杏之火季夏取桑柘之火秋取柞櫟之火冬取槐檀之火一年之中鑽火各异木故曰改火】子曰於汝安乎曰安汝安则为之君子居丧食旨不甘闻乐不乐故弗为也【集解孔安国曰旨美也责其无仁於亲故言汝安则为之】宰我出子曰予之不仁也子生三年然後免於父母之怀【集解马融曰生未三岁为父母所怀抱也】夫三年之丧天下之通义也【集解孔安国曰自天子達於庶人】宰我昼寝子曰朽木不

可雕也【集解包氏曰朽腐也雕雕琢刻画】粪土之墙不可圯也【集解王肃曰圯墁也二者喻虽施功犹不成也】宰我问五帝之德子曰予非其人也【集解王肃曰言不足以明五帝之德也】宰我为临菑大夫【索隐谓仕齐齐都临菑故云为临菑大夫】与田常作乱以夷其族孔子耻之【索隐左氏无宰我与田常作乱之文然有阨止字子我而田阨争宠子我为陈恒所杀恐字与宰予相涉因误云然】

端木赐卫人字子贡少孔子三十一岁子贡利口巧辞孔子常黜其辩问曰汝与回也孰愈【集解孔安国曰愈犹胜也】对曰赐也何敢望回回也闻一以知十赐也闻一以知二子贡既已受业问曰赐何人也孔子曰汝器也【集解孔安国曰言汝器用之人】曰何器也曰瑚璉也【集解包氏曰瑚璉黍稷器夏曰瑚殷曰璉周曰簠簋宗庙之贵器】陈子禽问子贡曰仲尼焉学子贡曰文武之道未坠於地在地人贤者识其大者不贤者识其小者莫不有文武之道夫子焉不学【集解孔安国曰文武之道未坠落於地贤与不贤各有所识夫子无所不从学】而亦何常师之有【集解孔安国曰无所不从学故无常师】又问曰孔子适是国必闻其政求之与抑与之与【集解郑玄曰怪孔子所至之邦必与闻国政求而得之邪抑人君自愿与之与为治】子贡曰夫子温良恭俭让以得之夫子之求之也其诸异乎人之求之也【集解郑玄曰言夫子行此五德而得之与人求之异明人君自与之】子贡问曰富而无骄贫而无谄何如孔子曰可也【集解孔安国曰未足多也】不如贫而乐道富而好礼【集解郑玄曰乐谓志於道不以贫为忧苦也】田常欲作乱於齐惮高国鲍晏故移其兵欲以伐鲁孔子闻之谓门弟子曰夫鲁坟墓所处父母之国国危如此二三子何为莫出子路请出孔子止之子张子石【索隐公孙龙也】请行孔子弗许子贡请行孔子许之遂行至齐说田常曰君之伐鲁过矣夫鲁难伐之国其城薄以卑其地狭以泄【索隐越絶书其泄字作浅】其君愚而不仁大臣伪而无用其士民又恶甲兵之事此不可与战君不如伐吴夫吴城高以厚地广以深甲坚以新士选以饱重器精兵尽在其中又使明大夫守之此易伐也田常忿然作色曰子之所难人之所易子之所易人之所难而以教常何也子贡曰臣闻之忧在内者攻强忧在外者攻弱今君忧在内吾闻君三封而三不成者大臣有不聽者也今君破鲁以广齐战胜以骄主破国以尊臣【集解王肃曰鲍晏等帅师若破国则臣尊矣】而君之功不与焉则交日踈於主是君上骄主心下怨羣臣求以成大事难矣夫上骄则怨臣骄则争是君上与主有却下与大臣交争也如此则君之立於齐危矣故曰不如伐吴伐吴不胜民人外死大臣内空是君上无强臣之敌下无民人之过孤主制齐者唯君也田常曰善虽然吾兵业已加鲁矣去而之吴大臣疑我奈何子贡曰君按兵无伐臣请往使吴王令之救鲁而伐齐君因以兵迎之田常许之使子贡南见吴王说曰臣闻之王者不絶世霸者无强敌千钧之重加铢两而移今以万乘之齐而私千乘之鲁与吴争强窃为王危之且夫救鲁显名也伐齐大利也以抚泗上诸侯诛暴齐以服强晋利莫大焉名存亡鲁实困强齐智者不疑也吴王曰善虽然吾尝与越战栖之会稽越王苦身养士有报我心子待我伐越而聽子子贡曰越之劲不过鲁吴之强不过齐王置齐而伐越则齐已平鲁矣且王方以存仁继絶为名夫伐小越而畏强齐非勇也夫勇者不避难仁者不穷约智者不失时王者不絶世以立其义今存越示诸侯以仁救鲁伐齐威加晋国诸侯必相率而朝吴霸业成矣且王必恶越【索隐恶犹畏也】臣请东见越王令出兵以从此实空越名从诸侯以伐也吴王大说乃使子贡之越越王除道郊迎身御至舍而问曰此蛮夷之国大夫何以俨然辱而临之子贡曰今者吾说吴王以救鲁伐齐其志欲之而畏越曰

待我伐越乃可如此破越必矣且夫无报人之志而令人疑之拙也有报人之意使人知之殆也事未发而先闻危也三者举事之大患勾践顿首再拜曰孤尝不料力乃与吴战困於会稽痛入於骨髓日夜焦唇乾舌徒欲与吴王接踵而死孤之愿也遂问子贡子贡曰吴王为人猛暴羣臣不堪国家敝於数战士卒弗忍百姓怨上大臣内变子胥以谏死【索隐王劭按家语越絶书并无此五字是时子胥未死】太宰嚭用事顺君之过以安其私是残国之治也今王诚发士卒佐之以徼其志【集解駟案徼结尧反王肃曰激射其志】重宝以说其心卑辞以尊其礼其伐齐必也彼战不胜王之福矣战胜必以兵临晋臣请北见晋君令共攻之弱吴必矣其锐兵尽於齐重甲困於晋而王制其敝此灭吴必矣越王大说许诺送子贡金百镒劔一良矛二子贡不受遂行报吴王曰臣敬以大王之言告越王越王大恐曰孤不幸少失先人内不自量抵罪於吴军败身辱栖于会稽国为虚莽【集解駟案虚音墟莽音莫朗反索隐有本作棘恐误也】赖大王之赐使得奉俎豆而修祭祀死不敢忘何谋之敢虑後五日越使大夫种顿首言於吴王曰东海役臣孤勾践使者臣种敢修下吏问於左右今窃闻大王将兴大义诛强救弱困暴齐而抚周室请悉起境内士卒三千人孤请自被坚执锐以先受矢石因越贱臣种奉先人藏器甲二十领缺屈卢之矛【索隐缺音跌谓斧也刘氏云一本无此屈卢矛名】步光之劔以贺军吏吴王大说以告子贡曰越王欲身从寡人伐齐可乎子贡曰不可夫空人之国悉人之衆又从其君不义君受其币许其师而辞其君吴王许诺乃谢越王於是吴王乃遂发九郡兵伐齐子贡因去之晋谓晋君曰臣闻之虑不先定不可以应卒【索隐卒谓急卒也言计虑不先定不可以应卒有非常之事】兵不先辨不可以胜敌今夫齐与吴将战彼战而不胜越乱之必矣与齐战而胜必以其兵临晋晋君大恐曰为之奈何子贡曰修兵休卒以待之晋君许诺子贡去而之鲁吴王果与齐人战於艾陵【索隐左传哀公十一年】大破齐师获七将军之兵而不归果以兵临晋与晋人相遇黄池之上【索隐左传黄池之会在哀公十三年越入吴吴与越平也】吴晋争强晋人击大败吴师越王闻之涉江袭吴去城七里而军吴王闻之去晋而归与越战於五湖三战不胜城门不守越遂围王宫杀夫差而戮其相【索隐左传越灭吴在哀公二十二年则事并悬隔数年盖此文欲终说其事故其辞相连也】破吴三年东向而霸故子贡一出存鲁乱齐破吴强晋而霸越子贡一使使势相破十年之中五国各有变【索隐按左传谓鲁齐晋吴越也故云子贡一出存鲁乱齐破吴强晋而霸越】子贡好废举与时转货货【集解駟案废举谓停贮也与时谓逐时也夫物贱则买而停贮值贵即逐时转易货卖取货利也索隐家语货作化王肃云废举谓买贱卖贵也转化谓随时转货以殖其资也刘氏云废谓物贵而卖之举谓物贱而买之转货谓转贵收贱也】喜扬人之美不能匿人之过常相鲁卫家累千金卒终于齐

言偃吴人【索隐家语云鲁人按偃仕鲁为武城宰耳今吴郡有言偃冢盖吴郡人为是】字子游少孔子四十五岁子游既已受业为武城宰【正义括地志云在兖州即南城也輿地志云南武城县鲁武邑城子游为宰者也在奉山郡】孔子过闻弦歌之声孔子莞尔而笑【集解何晏曰莞尔小笑貌】曰割鸡焉用牛刀【集解孔安国曰言治小何须用大道】子游曰昔者偃闻诸夫子曰君子学道则爱人小人学道则易使【集解孔安国曰道谓礼乐也乐以和人人人和则易使】孔子曰二三子【集解孔安国曰从行者】偃之言是也前言戏之耳【集解孔安国曰戏以治小而用大】孔子以为子游习於文学

卜商字子夏【集解駰案家语云卫人郑玄曰温国卜商索隐温国今河内温县元属卫故】少孔子四十四岁子夏问巧笑倩兮美目盼兮素以为绚兮何谓也【集解马融曰倩笑貌盼动目貌绚文貌此上二句在卫风硕人之二章其下一句逸诗】子曰绘事後素【集解郑玄曰绘画文也凡画绘先布衆色然後以素分布其间以成其文喻美女虽有倩盼美质亦须礼以成也】曰礼後乎【集解何晏曰孔言绘事後素子夏闻而解知以素喻礼故曰礼後乎】孔子曰商始可与言诗已矣【集解包氏曰能发明我意可与言诗矣】子贡问师与商孰贤子曰师也过商也不及【集解孔安国曰言俱不得中】然则师愈与曰过犹不及子谓子夏曰汝为君子儒无为小人儒【集解何晏曰君子之儒将以明道小人为儒则矜其名】孔子既没子夏居西河教授【索隐在河东郡之西界盖近龙门刘氏云今同州河西县有子夏石室学堂在也正义河西郡今汾州也尔雅云两河间曰冀州礼记云自东河至於河河东北故号龙门河为西河汉因为西河郡汾州也子夏所教处括地志云竭泉山一名隐泉山在汾州隰城县北四十里注水经云其山崖壁五崖半有一石室去地五十丈项上平地十许顷随国集记云此为子夏石室退老西河居此有卜商神祠今见在】为魏文侯师【索隐子夏文学着於四科序诗传易又孔子以春秋属商又传礼着在礼志而此史并不论空记论语小事亦其疎也正义文侯都安邑孔子卒後子夏教於西河之上文侯师事之咨问国政焉】其子死哭之失明

顓孙师陈人【索隐郑玄目錄阳城人阳城县名亦属陈郡也】字子张少孔子四十八岁子张问干禄【集解郑玄曰干求也禄禄位也】孔子曰多闻阙疑慎言其余则寡尤【集解包氏曰尤过也疑则阙之其余不疑犹慎言之则少过】多见阙殆慎行其余则寡悔【集解包氏曰殆危也所见危者阙而不行则少悔】言寡尤行寡悔禄在其中矣【集解郑玄曰言行如此虽不得禄得禄之道】他日从在陈蔡间困问行孔子曰言忠信行笃敬虽蛮貊之国行也言不忠信行不笃敬虽州里行乎哉【集解郑玄曰二千五百家为州五家为邻五邻为里行乎哉言不可行】立则见其参於前也在舆则见其倚於衡夫然後行【集解包氏曰衡轭也言思念忠信立则常想见参然在前在舆则若倚於车轭】子张书诸绅【集解孔安国曰绅大带也】子张问士何如斯可谓之達矣孔子曰何哉尔所谓達者子张对曰在国必闻在家必闻【集解郑玄曰言士之所在皆能有名誉】孔子曰是闻也非達也夫達者质直而好义察言而观色虑以下人【集解马融曰常有谦退之志察言语观顔色知其所欲其念虑常欲下於人】在国及家必達【集解马融曰谦尊而光卑而不可踰】夫闻也者色取仁而行违居之不疑【集解马融曰此言佞人也佞人假仁者之色行之则违安居其伪而不自疑】在国及家必闻【集解马融曰佞人党多】

曾参南武城人【索隐武城属鲁当时鲁更有北武城故言南也正义括地志云南武城在兖州子游为宰者地里志云定襄有武城清河有武城故此云南武城也】字子舆少孔子四十六岁孔子以为能通孝道【正义韩诗外传云曾子曰吾尝仕为吏禄不过鍾釜尚犹欣欣而喜者非以为多也乐道养亲也亲没之後吾尝南游於楚得尊官堂高九仞榱桷三尺穀百乘然犹北向而泣者非为贱也悲不见吾亲也】故授之业作孝经死於鲁

澹台灭明【集解包氏曰澹台姓灭明名正义括地志云延津在滑州灵昌县东七里注水经

云黄河水至此谓之延津昔澹台子羽齎千金璧渡河阳侯波起两蛟夹舟子羽曰吾可以义求不可以威劫操劒斩蛟蛟死乃投璧於河三投而辄跃乃毁璧而去亦无怪意即此津也】武城人【正义括地志云在兖州】字子羽少孔子三十九岁状貌甚恶欲事孔子孔子以为材薄既已受业而退修行行不由径非公事不见卿大夫【集解包氏曰言其公且方】南游至江【索隐今吴国东南有澹台湖即其遗迹所在也】从弟子三百人设取予去就名施乎诸侯孔子闻之曰吾以言取人失之宰予以貌取人失之子羽【索隐家语子羽有君子之容而行不胜其貌宰我有文雅之辞而智不充其辩孔子曰以容取人则失之子羽以言取人则失之宰予今云灭明状貌甚恶则以子羽形陋也正与家语相反正义按澹子羽墓在兖州邹城县是也】

宓不齐字子贱【集解孔安国曰鲁人正义颜氏家训云兖州永昌郡城旧单父县地也东有子贱碑世所立乃云济南伏生即子贱之後是慮之与伏古来通字误为宓较可明矣慮字从音呼宓从音绵下俱为必世传写误也】少孔子四十九岁【索隐家语少孔子三十岁此云四十九不同】孔子谓子贱君子哉鲁无君子斯焉取斯【集解包氏曰如鲁无君子子贱安得此行而学】子贱为单父宰【正义宋州县也说苑云宓子贱理单父弹琴身不下堂单父理巫马期以星出以星入而单父亦理巫马期问其故宓子贱曰我之谓任人子之谓任力任力者劳任人者逸】反命於孔子曰此国有贤不齐者五人【索隐家语云不齐所父事者三人所兄事者五人所友者十一人与此不同】教不齐所以治者孔子曰惜哉不齐所治者小所治者大则庶几矣

原宪字子思【集解郑玄曰鲁人索隐家语云宋人所记不同少孔子三十六岁】子思问耻孔子曰国有道谷国无道谷耻也【集解孔安国曰谷禄也邦有道当食禄君无道而在其朝食其禄是耻辱也】子思曰克伐怨欲不行焉可以为仁乎【集解马融曰克好胜人也伐自伐其功怨忌也欲贪欲也】孔子曰可以为难矣仁则吾弗知也【集解包氏曰四者行之难未足以为仁】孔子卒原宪亡在草泽中【索隐家语云隐居卫】子贡相卫而结驷连骑排藜藿入穷阎过谢原宪宪摄敝衣冠见子贡子贡耻之曰夫子岂病乎原宪曰吾闻之无财者谓之贫学道而不能行者谓之病若宪贫也非病也子贡慙不怩而去终身耻其言之过也

公冶长齐人字子长【索隐家语鲁人名苕范甯云字子芝】孔子曰长可妻也虽在累继之中【集解孔安国曰累黑索也继拏也所以拘罪人】非其罪也以其子妻之【集解张华曰公冶长墓在城阳姑幕城东南五里所墓极高】

南宫括字子容【集解孔安国曰容鲁人索隐家语作南宫绛按其人是孟僖子之子仲孙阅也盖居南宫因姓焉】问孔子曰羿善射奡荡舟【集解孔安国曰羿有穷之君篡夏后位其徒寒浞杀之因其室而生奡多力能陆地行舟为夏后少康所杀正义羿音诣荡大浪反】俱不得其死然禹稷躬稼而有天下孔子弗答【集解马融曰禹尽力於沟洫稷播百谷故曰躬稼也禹及其身稷及後世皆王括意欲以禹稷比孔子孔子谦故不答】容出孔子曰君子哉若人上德哉若人【集解孔安国曰贱不义而贵德故曰君子】国有道不废【集解孔安国曰不废言见用】国无道免於刑戮三复白珪之玷【集解孔安国曰诗云白珪之玷尚可

磨也斯言之玷不可为也南容读诗至此三反之是其心敬慎於言】以其兄之子妻之

公皙哀字季次【集解駰案孔子家语云齐人索隐家语作公皙克】孔子曰天下无行多为家臣仕於都唯季次未尝仕【索隐家语云未尝屈节为人臣故子特赏叹之亦见游侠传】

曾蒧字皙【集解駰案蒧音点孔安国曰皙曾参父】侍孔子孔子曰言尔志蒧曰春服既成冠者五六人童子六七人浴乎沂风乎舞雩咏而归【集解徐广曰一作饋駰案包氏曰莫春者季春三月也春服既成衣单袷之时我欲得冠者五六人童子六七人浴於沂水之上风凉於舞雩之下歌咏先王之道归於夫子之门】孔子喟尔叹曰吾与蒧也【集解周氏曰善蒧之独知时也】

顏无繇【集解駰案音遥正义繇音由】字路路者顏回父【索隐家语顏由字路回之父也孔子始教於阙里而受学焉少孔子六岁故此传云父子异时事孔子故易称顏氏之子也】父子尝各异时事孔子顏回死顏路贫请孔子车以葬【集解孔安国曰卖以作椁】孔子曰材不材亦各言其子也鲤也死有棺而无椁吾不徒行以为之椁以吾从大夫之後不可以徒行【集解孔安国曰鲤孔子子伯鱼孔子时为大夫言从大夫之後不可徒行谦辞也】

商瞿【正义具俱反】鲁人字子木少孔子二十九岁孔子传易於瞿瞿传楚人馯【集解徐广曰音寒】臂子弘【正义馯音汗顏师古云馯姓也汉书及荀卿子皆云字子弓此作弘盖误也应劭云子弓子夏门人】弘传江东人矫子庸疵【集解駰案矫音桥疵自移反正义汉书作桥庇云鲁人顏师古云桥庇字子庸】疵传燕人周子家竖【正义竖音时与反周竖字子家汉书作周丑也】竖传淳于人光子乘羽【正义光羽字子乘括地志云淳于国在密州安丘县东三十里古之州国周武王封淳于国】羽传齐人田子庄何【正义儒林传云田何字子庄】何传东武人【集解徐广曰属琅邪】王子中同【正义括地志云东武县今密州诸城县是也汉作王同字子仲】同传菑州人杨何【正义汉书云字叔元按商瞿至杨何凡八代】何元朔中以治易为汉中大夫高柴字子羔【集解郑玄曰卫人正义家语云齐人】少孔子三十岁子羔长不盈五尺受业孔子孔子以为愚子路使子羔为费宰【正义括地志云郛州宿县二十三里邱亭】孔子曰贼夫人之子【集解包氏曰子羔学未熟习而使为政所以贼害人】子路曰有民人焉有社稷焉何必读书然後为学【集解孔安国曰言治人事神於是而习亦学也】孔子曰是故恶夫佞者【集解孔安国曰疾其以给应遂已非而不知穷也】

漆雕开字子开【集解郑玄曰鲁人也正义家语云蔡人字子若少孔子十一岁习尚书不乐仕】孔子使开仕对曰吾斯之未能信【集解孔安国曰仕进之道未能信者未能究习】孔子说【集解郑玄曰善其志道深】

公伯僚字子周【集解马融曰鲁人正义家语有申僚子周古史考云疑公伯僚是谗愬之人孔子不责而云命非弟子之流也】周愬子路於季孙子服景伯以告孔子曰夫子固有惑志僚也【集解孔安国曰季孙信譖恚子路也】吾力犹能肆诸市朝【集解郑玄曰吾势犹能

辨子路之无罪於季孙使人诛僚而肆之也有罪既刑陈其尸曰肆】孔子曰道之将行命也道之将废命也公伯僚其如命何

司马耕字子牛【集解孔安国曰宋人】牛多言而躁问仁於孔子孔子曰仁者其言也訥【集解孔安国曰訥难也】曰其言也訥斯可谓之仁乎子曰为之难言之得无訥乎【集解孔安国曰行仁难言仁亦不得难也】问君子子曰君子不忧不惧【集解孔安国曰牛兄桓魋将为乱牛自宋来学常忧惧故孔子解之也】曰不忧不惧斯可谓之君子乎曰内省不疚夫何忧何惧【集解包氏曰疾病自省无罪恶无可忧惧】

樊须字子迟【集解郑玄曰齐人正义家语云鲁人】少孔子三十六岁樊迟请学稼孔子曰吾不如老农请学圃曰吾不如老圃【集解马融曰树五谷曰稼树菜蔬曰圃】樊迟出孔子曰小人哉樊须也上好礼则民莫敢不敬上好义则民莫敢不服上好信则民莫敢不用情【集解孔安国曰情实也言民化上各以实应】夫如是则四方之民襁负其子而至矣焉用稼【集解包氏曰礼义与信足以成德何用学稼以教民乎负子之器曰襁】樊迟问仁子曰爱人问智曰知人

有若【集解郑玄曰鲁人正义家语云鲁人字有少孔子三十三岁不同】少孔子十三岁有若曰礼之用和为贵先王之道斯为美小大由之有所不行知和而和不以礼节之亦不可行也【集解马融曰人知礼贵和而每事从和而不以礼为节亦不可以行也】信近於义言可复也【集解何晏曰复犹覆也义不必信信非义也以其言可覆故曰近义】恭近於礼远耻辱也【集解何晏曰恭不合礼非礼也以其能远耻辱故曰近礼】因不失其亲亦可宗也【集解孔安国曰因亲也言所亲不失其亲亦可宗敬】孔子既没弟子思慕有若状似孔子弟子相与共立为师师之如夫子时也他日弟子进问曰昔夫子当行使弟子持雨具已而果雨弟子问曰夫子何以知之夫子曰诗不云乎月离于毕俾滂沱矣【集解駰案毛传曰毕嚙也月离陰星则雨】昨暮月不宿毕乎他日月宿毕竟不雨商瞿年长无子其母为取室【正义家语云瞿年三十八无子母欲更娶室孔子曰瞿年过四十当有五丈夫子果然中备云鲁人商瞿使向齐国瞿年四十今後使行远路畏虑恐絶无子夫子正月与瞿母筮告曰後有五丈夫子子贡曰何以知子曰卦遇大畜艮之二世九二甲寅木为世立五景行水为应世生外象生象来爻生互内象艮别子应有五子一子短命顔回云何以知之内象是本子一艮变为二丑三阳爻五於是五子一子短命何以知短命他以故也】孔子使之齐瞿母请之孔子曰无忧瞿年四十後当有五丈夫子【集解駰案五男也】已而果然敢问夫子何以知此有若默然无以应弟子起曰有子避之此非子之座也

公西赤字子华【集解郑玄曰鲁人】少孔子四十二岁子华使於齐冉有为其母请粟孔子曰与之釜【集解马融曰六斗四升曰釜】请益曰与之庾【集解包氏曰十六斗曰庾】冉子与之粟五秉【集解马融曰十六斛曰秉五秉合八十斛】孔子曰赤之适齐也乘肥马衣轻裘吾闻君子周急不继富【集解郑玄曰非冉有与之太多】

巫马施字子旗【集解郑玄曰鲁人正义音其】少孔子三十岁陈司败【集解孔安国曰司

败官名陈大夫也】问孔子曰鲁昭公知礼乎孔子曰知礼退而揖巫马旗曰吾闻君子不党君子亦党乎鲁君娶吴女为夫人命之为孟子孟子姓姬讳称同姓故谓之孟子鲁君而知礼孰不知礼【集解孔安国曰相助匿非曰党礼同姓不婚而君娶之当称吴姬讳曰孟子】施以告孔子孔子曰丘也幸苟有过人必知之臣不可言君亲之恶为讳者礼也【集解孔安国曰以司败之言告也讳国恶礼也圣人之道弘故受之为过也】

梁鱣字叔鱼少孔子二十九岁【集解駰案鱣一作鲤孔子家语曰齐人】顏幸字子柳少孔子四十六岁【集解郑玄曰鲁人】

冉孺字子鲁少孔子五十岁【集解駰案鲁一作曾家语曰鲁人】

曹恤字子循少孔子五十岁

伯?字子析少孔子五十岁【正义家语云子皙】

公孙龙字子石少孔子五十三岁【集解郑玄曰楚人正义家语云卫人孟子云赵人庄子云坚白之谈也】自子石已右三十五人颇有年名及受业闻见于书传其四十有二人无年及不见书传者纪于左【索隐家语此例唯有三十七人其公良孺秦商顏亥叔仲会四人家语有事迹史记阙然自公伯寮秦冉鄒单三人家语不载而别有琴牢陈亢县亶当此三人数皆互有也如文翁图所记又有林放蘧伯玉申枨申堂俱是後人以所见增益今殆不可考】

冉季字子产【集解郑玄曰鲁人正义家语云冉季字子产】

公祖句兹字子之【正义句音钩】

秦祖字子南【集解郑玄曰秦人】

漆雕哆字子敛【集解駰案哆赤者反郑玄曰鲁人】

顏高字子骄【正义孔子在卫南子招夫子为次乘过市顏高为御】

漆雕徒父

壤驪赤字子徒【集解郑玄曰秦人】

商泽【集解駰案家语曰字子季】

石作蜀字子明

任不齐字选【集解郑玄曰楚人】

公良孺字子正【集解郑玄曰陈人贤而有勇正义孔子周游常以家车五乘从孔子孔子世家亦云语在三十五人中今在三十二人数恐太史公误也】

后处字子里【集解郑玄曰齐人】

秦冉字开【正义家语云无此人王肃家语此等惟三十七人其公良孺秦商顔亥仲叔会四人家语有事迹而史记阙公伯寮秦冉鄫单家语不载而别有琴牢陈亢县亶三人】

公夏首字乘【集解郑玄曰鲁人】

奚容蒧字子皙【正义卫人】

公坚定字子中【集解郑玄曰鲁人或曰晋人】

顔祖字襄【正义鲁人】

鄫单字子家【集解駉案鄫苦尧反单音善徐广曰一云鄫单钜鹿有鄫县太原有鄫县】句井强【集解郑玄曰卫人正义句作鈎】

罕父黑字子索【集解駉案家语曰罕父黑字索】

秦商字子丕【集解郑玄曰楚人正义家语云鲁人字丕兹】

申党字周【正义鲁人】

顔之仆字叔【集解郑玄曰鲁人】

荣旗字子祺

县成字子祺【集解郑玄曰鲁人正义县音玄】

左人郢字行【集解郑玄曰鲁人】

燕汲字思

郑国字子徒【正义家语云薛邦字徒史记作国者避高祖讳薛字与郑字误耳】

秦非字子之【集解郑玄曰鲁人】

施之常字子恒

顏恉字子声【集解郑玄曰鲁人】

步叔乘字子车【集解郑玄曰齐人】

原亢籍【集解駰案家语曰名亢字籍正义亢作冗仁勇反】

乐欬字子声【正义鲁人】

廉絜字庸【集解郑玄曰卫人】

叔仲会字子期【集解郑玄曰鲁人索隐家语鲁人少孔子五十四岁与孔璇年相比二孺子俱执笔迭侍於夫子孟武伯见而访之】

顏何字冉【集解郑玄曰鲁人索隐家语字称】

狄黑字皙【索隐家语载本各异】

邾巽字子斂【集解郑玄曰鲁人索隐家语作选字子斂文翁图作国选盖亦避汉讳改之刘氏作邾巽邾音圭所见各异】

孔忠【集解駰案家语云忠字子蔑孔子兄之子】

公西輿如字子上【索隐家语载亦同此】

公西葳字子上【集解郑玄曰鲁人索隐家语作子尚也】

太史公曰学者多称七十子之徒誉者或过其实毁者或损其真钩之未覩厥容貌则论言弟子籍出孔氏古文近是余以弟子名姓文字悉取论语弟子问并次为篇疑者阙焉

【索隐述赞曰教兴阙里道在陬乡异能就列秀士升堂依仁游艺合志同方将师宫尹俎豆琳琅惜哉不霸空臣素王】

史记卷六十七

史记卷六十七考证

仲尼弟子列传宰我为临菑大夫与田常作乱以夷其族孔子耻之○容斋续笔曰史记称宰我为齐临菑大夫与田常作难以夷其族孔子耻之苏子由作古史精为辩之以为子我者阨止也与田常争齐政为常所杀以其字亦曰子我故战国之书误以为宰予此论既出圣门高弟得免非义之谤东坡又引李斯谏书田常陰取齐国杀宰予於庭是其不从田常故为所杀也予又考之子路之死孔子曰由也死矣又曰天祝予哭於中庭使人覆醢其悲之如是不应宰我遇祸略无一言孟子所载三子论圣人贤于尧舜等语疑是夫子没後所谈不然师在而各出意见议之无复质正恐非也然则宰我不死於田常更可证矣而淮南子又有一说云将相摄威擅势私门成党而使道不行故使陈成田常鸩夷子皮得成其难使吕氏絶祀子皮谓范蠡也蠡浮海变姓名游齐时简公之难已十余年矣说苑亦云田常与宰我争宰我将攻之鸩夷子皮告田常遂残宰我此说尤为无稽是以蠡为助田氏为齐祸其不分贤逆如此

孔子既没子夏居西河教授为魏文侯师○容斋续笔曰按史记所书子夏少孔子四十四岁孔子卒时子夏年二十八矣是时周敬王四十一年後一年元王立历贞定王考王至威烈王二十三年魏始为侯去孔子卒时七十五年文侯为大夫二十二年而为侯又六年而卒姑以始侯之岁计之则子夏已百三岁矣方为诸侯师岂其然乎

孔子以为能通孝道正义堂高九仞榱桷三尺 穀百乘○ 韩诗外传作转

司马耕○家语耕上有黎字

樊须字子迟少孔子三十六岁○家语作四十六岁梁鱣字叔鱼少孔子二十九岁○家语作三十九岁伯?○?家语作处

公孙龙字子石少孔子五十三岁○顧炎武曰按汉书注公孙龙赵人为坚白异同之说者与平原君同时去夫子近二百年殆非也且云少孔子五十三岁则当田常伐鲁之年仅十三四岁尔而曰子张子石请行岂甘罗外黄舍人儿之比乎

漆雕徒父○家语名从

公坚定○坚家语作肩

苒旗字子祺○家语旗作祈祺作顏

步叔乘○朱彝尊云应劭风俗通云凡氏于字伯仲叔季是也氏有太叔仲叔则有少叔无足异者子车之姓家语史记诸书皆作步而广韵注云孔子弟子有少叔乘系复姓

原亢籍○亢家语作忼或作桃

乐欬○欬家语作欣

叔仲会字子期索隐家语鲁人少孔子五十四岁○朱彝尊云鲁峻石壁画像云少孔子五十岁

史记卷六十七考证

<史部,正史类,史记>

卷六十八

钦定四库全书

史记卷六十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

商君列传第八

商君者【正义秦封於商故号商君】卫之诸庶孽公子也名鞅姓公孙氏其祖本姬姓也鞅少好刑名之学事魏相公叔痤【索隐公叔氏痤名也痤音在戈反】为中庶子【索隐官名也魏已置之非自秦也周礼夏官谓之诸子礼记文王世子谓之庶子掌公族也】公叔痤知其贤未及进会痤病魏惠王亲往问病【索隐即魏侯之子名罃後徙大梁而称梁也】曰公叔病有如不可讳将奈社稷何公叔曰痤之中庶子【索隐战国策云卫庶子也】公孙鞅年虽少有奇才愿王举国而聽之王嘿然王且去痤屏人言曰王即不聽用鞅必杀之无令出境王许诺而去公叔痤召鞅谢曰今者王问可以为相者我言若王色不许我我方先君後臣因谓王即弗用鞅当杀之王许我汝可疾去矣且见禽鞅曰彼王不能用君之言任臣又安能用君之言杀臣乎卒不去惠王既去而谓左右曰公叔病甚悲乎欲令寡人以国聽公孙鞅也岂不悖哉【索隐疾重而悖乱也正义悖音背】公叔既死公孙鞅闻秦孝公下令国中求贤者将修繆公之业东复侵地迺遂西入秦因孝公宠臣景监以求见孝公【索隐景姓楚之族也监音甲多去声平声并通】孝公既见卫鞅语事良久孝公时时睡弗聽罢而孝公怒景监曰子之客妄人耳安足用邪景监以让卫鞅卫鞅曰吾说公以帝道其志不开悟矣後五日复求见鞅鞅复见孝公益愈然而未中旨罢而孝公复让景监景监亦让鞅鞅曰吾说公以王道而未入也请复见鞅鞅复见孝公孝公善之而未用也罢而去孝公谓景监曰汝客善可与语矣鞅曰吾说公以霸道其意欲用之矣诚复见我我知之矣卫鞅复见孝公公与语不自知之前於席也语数日不厌景监曰子何以中吾君吾君之驩甚也鞅曰吾说君以帝王之道比三代【正义比必寐反说君以五帝三王之事比至孝公以三代帝王之道方兴孝公曰太久远吾不能】而君曰久远吾不能待且贤君者各及其身显名天下安能邑邑待数十百年以成帝王乎故吾以强国之术说君【索隐音税】君大说之耳【索隐音悦】然亦难以比德於殷周矣孝公既用卫鞅鞅欲变法恐天下议已卫鞅曰疑行无名疑事无功且夫有高人之行者固见非於世【索隐商君书非作负】有独知之虑者必见敖於民【索隐商君书作必见訾於人也正义敖五到反】愚者闇於成事知者见於未萌民不可与虑始而可与乐成论至德

者不和於俗成大功者不謀於衆是以圣人苟可以强国不法其故【索隱言救弊為政之術所為苟可以强国則不必要須法於故事也】苟可以利民不循其禮孝公曰善甘龍曰【索隱孝公之臣甘姓名龍也甘氏出春秋時甘昭公子帶之後】不然圣人不易民而教知者不變法而治因民而教不勞而成功緣法而治者吏習而民安之衛鞅曰龍之所言世俗之言也常人安於故俗學者溺於所聞以此兩者居官守法可也非所與論於法之外也三代不同禮而王五伯不同法而霸智者作法愚者制焉賢者更禮不肖者拘焉【索隱言賢智之人作法更禮而愚不肖者不明變通而輒拘制不使之行斯亦信然矣】杜摯曰利不百不變法功不十不易器法古無過循禮無邪衛鞅曰治世不一道便國不法古故湯武不循古而王【索隱商君書作修古】夏殷不易禮而亡【索隱指殷紂夏桀也】反古者不可非而循禮者不足多孝公曰善以衛鞅為左庶長卒定變法之令令民為什伍【索隱劉氏云五家為保十家相連也正義或為十保或為五保】而相收司連坐【索隱收司謂相糾發也一家有罪而九家連舉發若不糾舉則什家連坐恐變令不行故設重禁】不告奸者腰斬告奸者與斬敵首同賞【索隱謂告奸一人則得爵一級故云與斬敵首同賞也】匿奸者與降敵同罰【索隱律降敵者誅其身沒其家今匿奸者言當與之同罰也】民有二男以上不分異者倍其賦【正義民有二男不別為活者一人出兩課】有軍功者各以率【集解駟案音律】受上爵為私鬪者各以輕重被刑大小戮力本業耕織致粟帛多者復其身事未利及怠而貧者舉以為收孥【索隱未利謂工商也蓋農桑為本故上云本業耕織也怠者懈也周禮謂之疲民以言解怠不事事之人而貧者即糾舉而收錄其妻子沒為官奴婢蓋其法特又重於古制也孥音奴】宗室非有軍功論不得為屬籍【索隱謂宗室若無軍功則不得入屬籍謂除其籍則雖無功不及爵秩也】明尊卑爵秩級各以差次名田宅臣妾衣服以家次【索隱謂各隨其家爵秩之班次亦不使僭侈踰?】有功者顯榮無功者雖富無所芬華令既具未布恐民之不信已乃立三丈之木於國都市南門募民有能徙置北門者予十金民怪之莫敢徙復曰能徙者予五十金有一人徙之輒予五十金以明不欺卒下令令行於民其年秦民之國都言初令之不便者以千數【索隱謂鞅新變之法令為初令也】於是太子犯法衛鞅曰法之不行自上犯之將法太子太子嗣君也不可施刑刑其傅公子?黥其師公孫賈明日秦人皆趨令【索隱趨音七踰反趨者向也附也】行之十年秦民大說道不拾遺山無盜賊家給人足民勇於公戰怯於私鬪鄉邑大治秦民初言令不便者有來言令便者衛鞅曰此皆亂化之民也盡遷之於邊城其後民莫敢議令於是以鞅為大良造【索隱即大上造也秦之第十六爵名也今云良造者?後變其名耳】將兵圍魏安邑降之居三年作為筑冀闕宮庭於咸陽【索隱冀闕即魏闕也冀記也記列教令當於此門闕】秦自雍徙都之而令民父子兄弟同室內息者為禁而集小都鄉邑聚為縣置令丞凡三十一縣為田開阡陌封疆【正義南北曰阡東西曰陌按謂驛塍也疆音疆封聚土也疆界也謂界上封記也】而賦稅平平斗桶【集解鄭玄曰音勇今之斛也索隱音統量器名也】權衡丈尺行之四年公子?復犯約劓之居五年秦人富彊天子致胙【正義音左故反】於孝公諸侯皆賀其明年齊敗魏兵於馬陵虜其太子申殺將軍龐涓其明年衛鞅說孝公曰秦之與魏譬若人之有腹心疾非魏并秦秦即并魏何者魏居崤阨之西都安邑【索隱蓋安邑之東山崤險阨之地即今蒲州之中條已東連汾晉之嶮嶺是也阨阻也】與秦界河而獨擅山東之利利則西侵秦病則東收地今以君之賢聖國賴以盛而魏往年大破於齊諸侯畔之可因此時伐魏魏不支秦必東徙東徙秦據河山之固東鄉以制諸侯此帝王之業也孝公以為然使衛鞅將而伐魏魏使公子卬將而擊之軍既相距衛鞅遺

魏将公子印书曰吾始与公子驩今俱为两国将不忍相攻可与公子面相见盟乐饮而罢兵以安秦魏魏公子印以为然会盟已饮而卫鞅伏甲士而袭虜魏公子印因攻其军尽破之以归秦魏惠王兵数破於齐秦国内空日以削恐乃使使割河西之地献於秦以和而魏遂去安邑徙都大梁【索隐纪年曰梁惠王二十九年秦卫鞅伐梁西鄙则徙大梁在惠王之二十九年也正义从蒲州安邑徙汴州浚仪也】梁惠王曰寡人恨不用公叔痤之言也卫鞅既破魏还秦封之於商十五邑号为商君【集解徐广曰弘农商县也索隐於商二县名在弘农纪年云秦封商鞅在惠王三十年与此文亦同正义於商在邓州内乡县东七里古於邑也商洛县在商州东八十九里本商邑周之商国按十五邑近此三邑】商君相秦十年【索隐战国策云孝公行商君法十八年而死於此文不同者按此直云相秦十年耳而战国策乃云行商君法十八年盖连其未作相之年说也】宗室贵戚多怨望者赵良见商君商君曰鞅之得见也从孟兰臯【索隐孟兰臯人姓名也言鞅前因兰臯得与赵良相见也】今鞅请得交可乎赵良曰仆弗敢愿也孔丘有言曰推贤而戴者进聚不肖而王者退仆不肖故不敢受命仆闻之曰非其位而居之曰贪位非其名而有之曰贪名仆聽君之义则恐仆贪位贪名也故不敢闻命商君曰子不说吾治秦与【索隐说音悦与音予】赵良曰反聽之谓聰内视之谓明自胜之谓强【索隐谓守谦敬人目伏非是为自胜若是者乃为强若争名得胜此非强之道】虞舜有言曰自卑也尚矣君不若道虞舜之道无为问仆矣商君曰始秦戎翟之教父子无别同室而居今我更制其教而为其男女之别大筑冀阙营如鲁卫矣子观我视秦也孰与五羖大夫贤赵良曰千羊之皮不如一狐之腋千人之诺诺不如一士之谔谔武王谔谔以昌殷纣墨墨以亡【正义以殷纣比商君】君若不非武王乎则仆请终日正言而无诛可乎商君曰语有之矣貌言华也至言实也苦言药也甘言疾也夫子果肯终日正言鞅之药也鞅将事子子又何辞焉赵良曰夫五羖大夫荆之鄙人也【正义百里奚南阳宛人属楚故云荆】闻秦繆公之贤而愿望见行而无资自粥於秦客被褐食牛期年繆公知之举之牛口之下而加之百姓之上秦国莫敢望焉相秦六七年而东伐郑三置晋国之君【索隐谓立晋惠公怀公文公也】一救荆国之祸【索隐十二诸侯年表穆公二十八年会晋救楚朝周此云救荆未详】发教封内而巴人致贡施德诸侯而八戎来服由余闻之欵关请见【集解韦昭曰欵叩也】五羖大夫之相秦也劳不坐乘暑不张盖行於国中不从车乘不操干戈功名藏於府库德行施於後世五羖大夫死秦国男女流涕【正义音体】童子不歌謡舂者不相杵【集解郑玄曰相谓送杵声以音声自劝也】此五羖大夫之德也今君之见秦王也因嬖人景监以为主非所以为名也相秦不以百姓为事而大筑冀阙非所以为功也刑黥太子之师傅残伤民以峻刑是积怨畜祸也教之化民也深於命【索隐刘氏云教谓商鞅之令也命谓秦君之命也言人畏鞅甚於秦君】民之効上也捷於令【索隐上谓商鞅之处分令谓秦君之教令】今君又左建外易非所以为教也【索隐左建谓以左道建立威权也外易谓在外革易君命也】君又南面而称寡人日绳秦之贵公子诗曰相鼠有体人而无礼人而无礼何不遄死以诗观之非所以为壽也公子?杜门不出已八年矣君又杀祝懽而黥公孙贾诗曰得人者兴失人者崩此数事者非所以得人也君之出也後车十数从车载甲多力而骈脇者为骖秉持矛而操闔【集解駟案所及反】戟者【集解徐广曰一作祭屈卢之劲矛干将之雄戟索隐闔亦作鉞同所及反邹诞音吐膈反祭音辽屈音九勿反按屈卢干将并古良匠造矛戟者名正义顾野王云鉞也方言云矛吴扬江淮南楚五湖之间谓之鉞其柄谓之矜释名云戟格也旁有格】旁车而趋此一物不具君固不出书曰恃德者昌恃力者亡【索隐此是周书之言孔子

所删之余】君之危若朝露尚将欲延年益壽乎则何不归十五都【索隐卫鞅所封商於二县以为国其中凡有十五都故赵良劝令归之正义公孙鞅封商於十五邑故云十五都】灌园於鄙劝秦王显岩穴之士养老存孤敬父兄序有功尊有德可以少安君尚将贪商於之富宠秦国之教畜百姓之怨秦王一旦捐宾客而不立朝秦国之所以收君者岂其微哉【索隐谓鞅於秦无仁恩故秦国之所以将收録鞅者其效甚明故云岂其微哉】亡可翹足而待商君弗从後五月而秦孝公卒太子立公子?之徒告商君欲反发吏捕商君商君亡至关下欲舍客舍客人不知其是商君也曰商君之法舍人无验者坐之商君喟然叹曰嗟乎为法之敝一至此哉去之魏魏人怨其欺公子?而破魏师弗受商君欲之他国魏人曰商君秦之贼秦强而贼入魏弗归不可遂内秦商君既复入秦走商邑【索隐走音奏走向也】与其徒属发邑兵北出击郑【集解徐广曰京兆郑县也索隐地理志京兆有郑县秦本纪云初县杜郑按其地是郑桓公友之所封】秦发兵攻商君杀之於郑黽池【集解徐广曰黽或作彭索隐郑黽池者时澠池属郑故也而徐广云黽或作彭按盐铁论云商君困於彭池故也黽音亡忍反正义黽池去郑三百里盖秦兵至郑破商邑兵而商君东走至黽乃擒杀之】秦惠王车裂商君以徇曰莫如商鞅反者遂灭商君之家

太史公曰商君其天资刻薄人也【索隐谓天资其人为刻薄之行刻谓用刑深刻薄谓弃仁义不恤诚也】迹其欲干孝公以帝王术挟持浮说非其质矣【索隐说音如字浮说即虚说也谓鞅得用刑政深刻又欺魏将是其天资自有狙诈则初为孝公论帝王之术是浮说耳非本性也】且所因由嬖臣及得用刑公子?欺魏将?不师赵良之言亦足发明商君之少恩矣余尝读商君开塞耕战书与其人行事相类【索隐按商君书开谓刑严峻则政化开塞谓布恩赏则政化塞其意本於严刑少恩又为田开阡陌及言斩敌首赐爵是耕战书也】卒受恶名於秦有以也夫【集解駰案新序论曰秦孝公保崤函之固以广雍州之地东并河西北收上郡国富兵强长雄诸侯周室归藉四方来贺为战国霸君秦遂以强六世而并诸侯亦皆商君之谋也夫商君极身无二虑尽公不顾私使民内急耕织之业以富国外重战伐之赏以劝戎士法令必行内不私贵宠外不偏疏远是以令行而禁止法出而奸息故虽书云无偏无党诗云周道如砥其直如矢司马法之励戎士周后稷之劝农业无以易此此所以并诸侯也故孙卿曰四世有胜非幸也数也然无信诸侯畏而不亲夫霸君若齐桓晋文者桓不倍柯之盟文不负原之期而诸侯畏其强而亲信之存亡继絶四方归之此管仲舅犯之谋也今商君倍公子?之旧恩弃交魏之明信诈聚三军之衆故诸侯畏其强而不亲信也藉使孝公遇齐桓晋文得诸侯之统将合诸侯之君驱天下之兵以伐秦秦则亡矣天下无桓文之君故秦得以兼诸侯卫鞅始自以为知霸王之德原其事不谕也昔周召施善政及其死也後世思之蔽芾甘棠之诗是也尝舍於树下後世思其德不忍伐其树况害其身乎管仲夺伯氏邑三百户无怨言今卫鞅内刻刀锯之刑外深鈇钺之诛步过六尺者有罚弃灰於道者被刑一日临渭而论囚七百余入渭水尽赤号哭之声动於天地畜怨积讐比於邱山所逃莫之隐所归莫之容身死车裂灭族无姓其去霸王之佐亦远矣然惠王杀之亦非也可辅而用也使卫鞅施寛平之法加之以恩申之以信庶几霸者之佐哉索隐新序是刘歆所撰其中论商君故裴氏引之藉音胙字合作胙误为藉耳按本纪周归文武胙於孝公者是也说苑云秦法弃灰於道者刑是其事也索隐述赞曰卫鞅入秦景监是因王道不用霸术见亲政必改革礼岂因循既欺魏将亦怨秦人如何作法逆旅不宾】

史记卷六十八

史记卷六十八考证

商君列传於是鞅为大良造将兵围魏安邑降之○顧炎武曰此必安邑字误其下文曰魏惠王使使割河西之地献於秦以和而魏遂去安邑徙都大梁乃是自安邑徙都之事耳安邑魏都其王在焉岂得围而便降秦本纪昭王二十一年魏献安邑若已降于五十年之前何烦再献乎

作为筑冀阙宫庭於咸阳○董份曰既云作为又云筑何也恐有衍字

余尝读商君开塞耕战书索隐按商君书开谓刑严峻则政化开塞谓布恩赏则政化塞其意本於严刑少恩又为田开阡陌及言斩敌首赐爵是耕战书也○焦竑曰司马贞盖未见鞅书臆为之说耳开塞乃其第七篇谓道塞久矣今欲开之必刑九而赏一刑用於将过则大邪不生赏施於告奸则细过不失大邪不生细过不失则国治矣

史记卷六十八考证

卷六十九

钦定四库全书

史记卷六十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

苏秦列传第九

苏秦者东周雒阳人也【索隐苏秦字季子盖苏忿生之後已姓也譙周云秦兄弟五人秦最少兄代代弟厉及辟鹄并为游说之士此下云秦弟代代弟厉未详正义战国策云苏秦雒阳乘轩里人也艺文志云苏子三十一篇在纵横流敬王以子朝之乱从王城东迁雒阳故城乃号东周以王城为西周】东事师於齐而习之於鬼谷先生【集解徐广曰颍川阳成有鬼谷盖是其所居因为号駰案风俗通议曰鬼谷先生六国时纵横家索隐鬼谷地名也扶风池阳颍川阳城并有鬼谷墟盖是其所居因为号又乐台注鬼谷子书云苏秦欲神秘其道故假名鬼谷】出游数岁大困而归【索隐战国策此语在说秦王之後】兄弟嫂妹妻妾窃皆笑之曰周人之俗治产业力工商逐什二以为务今子释本而事口舌困不亦宜乎苏秦闻之而慙自伤乃闭室不出出其书遍观之【索隐音遍观谓尽观览其书】曰夫士业已屈首受书【索隐谓士之立操业者素也本也言本已屈首低头受书於师也】而不能以取尊荣虽多亦奚以为於是得周书陰符伏而读之期年以出揣摩曰此可以说当世之君矣【集解駰案战国策曰乃发书陈箴数十得太公陰符之谋伏而读之简练以为揣摩读书欲睡引锥自刺其股血流至踵曰安有说人主不能出其金玉锦绣取卿相之尊者乎期年揣摩成鬼谷子有揣摩篇也索隐战国策云得太公陰符之谋则陰符是太公兵法揣音初委反摩音姥何反邹诞本作揣摩靡读亦为摩王劭云揣情摩意是鬼谷之二章名非为一篇也高诱曰揣定也摩合也定诸侯使觝其术以成六国之从也江邃曰揣人主之情摩而近之其意当矣】求说周显王显王左右素习知苏秦皆少之【索隐谓王之左右素惯习知秦浮说多不中当世以为秦智说浅故少之刘氏云少谓轻之】弗信乃西至秦秦孝公卒说惠王曰秦四塞之国【正义东有黄河有函谷蒲津龙门合河等关南有南山及武关峽关西有大陇山及陇山关大震乌兰?关北有黄河南塞是四塞之国也】被山带渭东有关河【正义又为地界里江谓岷江从渭州陇山之西南流入蜀东至荆扬入海河谓黄河从同州小积石山东北流至胜州南流至华州又东北流经魏沧?州入海各是万里已下】西有汉中南有巴蜀北有代马【索隐谓代郡马邑也地理志代郡又有马城县一云代马谓代郡兼有胡马之利】此天府也【索

隐周礼春官有天府郑玄曰府物所藏言尊此所藏若天府然】以秦士民之衆兵法之教可以吞天下称帝而治秦王曰毛羽未成不可以高蜚文理未明不可以并兼方诛商鞅疾辩士弗用乃东之赵赵肃侯令其弟成为相号奉阳君奉阳君弗说之去游燕岁余而後得见说燕文侯【索隐说音税燕文侯史失名】曰燕东有朝鲜辽东【索隐朝鲜音潮仙二水名】北有林胡楼烦【索隐地理志楼烦属鴈门郡正义林胡国名朔岚已北】西有云中九原【索隐地理志云中九原二郡名秦曰九原汉武帝改曰五原郡正义二郡并在胜州也云中郡城在榆林县东北四十里九原郡在榆林县西界】南有噤沱易水【集解駟案周礼曰正北曰并州其州噤沱郑玄曰噤沱出鹵城索隐噤沱水名并州之川也音呼沱地理志鹵城县名属代郡噤沱河自县东至参合又东至文安入海也正义呼沱出代州繁峙县东南流经五台山北东南流过定州流入海易水出易州县东流过幽州归义县东与呼沱河合也】地方二千余里带甲数十万车六百乘骑六千匹粟支数年【索隐战国策车七百乘粟支十年】南有碣石鴈门之饶【索隐战国策碣石山在常山九门县地理志大碣石山在右北平骊城县西南是也正义鴈门山在代燕西门】北有枣栗之利民虽不佃作而足於枣栗矣此所谓天府者也夫安乐无事不见覆军杀将无过燕者大王知其所以然乎夫燕之所以不犯寇被甲兵者以赵之为蔽其南也秦赵五战秦再胜而赵三胜秦赵相毙而王以全燕制其後此燕之所以不犯寇也且夫秦之攻燕也踰云中九原过代上谷弥地数千里虽得燕城秦计固不能守也秦之不能害燕亦明矣今赵之攻燕也发号出令不至十日而数十万之军军於东垣矣【索隐地理志高帝改曰真?正义赵之东邑在恒州真?县南八里故常山城是也】渡噤沱涉易水不至四五日而距国都矣故曰秦之攻燕也战於千里之外赵之攻燕也战於百里之内夫不忧百里之患而重千里之外计无过於此者是故愿大王与赵从亲天下为一则燕国必无患矣文侯曰子言则可然吾國小西迫强赵【正义贝冀深赵四州七国时属赵即燕西界】南近齐【正义河北博沧德三州齐地北境与燕相接隔黄河】齐赵强国也子必欲合从以安燕寡人请以国从於是资苏秦车马金帛以至赵而奉阳君已死即因说赵肃侯【索隐世本云肃侯名言】曰天下卿相人臣及布衣之士皆高贤君之行义皆愿奉教陈忠於前之日久矣【正义奉符用反】虽然奉阳君妬君而不任事是以宾客游士莫敢自尽於前者今奉阳君捐馆舍君乃今复与士民相亲也臣故敢进其愚虑窃为君计者莫若安民无事且无庸有事於民也安民之本在於择交择交而得则民安择交而不得则民终身不安请言外患齐秦为两敌而民不得安倚秦攻齐而民不得安倚齐攻秦而民不得安故夫谋人之主伐人之国常苦出辞断絶人之交也愿君慎勿出於口请别白黑所以异陰阳而已矣【索隐战国策云请屏左右白言所以异陰阳其说异此然则别白黑者苏秦言已今论楚国之利必使分明有如白黑分别陰阳殊异也】君诚能聽臣燕必致旃裘狗马之地齐必致鱼盐之海楚必致橘柚之园韩魏中山皆可使致汤沐之奉而贵戚父兄皆可以受封侯夫割地包利五伯之所以覆军禽将而求也封侯贵戚汤武之所以放弑而争也今君高拱而两有之此臣之所以为君愿也今大王与秦则秦必弱韩魏与齐则齐必弱楚魏【正义楚东淮泗之上与齐接境】魏弱则割河外韩弱则効宜阳宜阳効则上郡絶【正义宜阳即韩城也在洛州西韩大都也上郡在同州西北言韩弱与秦宜阳城则上郡路絶矣】河外割则道不通【正义河外同华等地也言魏弱与秦河外地则道路不通上郡矣华山记云此山分秦晋之境晋之西鄙则曰陰晋秦之东邑则曰寧秦】楚弱则无援此三策者不可不孰计也夫秦下軹道则南阳危【正义軹音止故亭在雍州万年县东北十六里苑中南阳怀州河南也七国时属韩言秦兵

下軹道从东渭桥历北道过蒲津攻韩即南阳危矣】劫韩包周则赵氏自操兵【正义周都洛阳秦若劫取韩南阳是包裹周都也赵邯鄲危故须起兵自守索隐操兵战国策作销铄】据卫取淇卷则齐必入朝秦【集解駟案卷丘权反索隐地理志云卷县属河南战国策云据卫取淇无卷字正义卫地濮阳也卷城在郑州武原县西北七里言秦守卫得卷则齐必来朝秦】秦欲已得乎山东则必举兵而向赵矣秦甲渡河踰漳据番吾则兵必战於邯鄲之下矣【集解徐广曰常山有蒲吾县索隐徐氏所引据地理志而知也正义番音婆又音蒲又音盘疑古番吾公邑也括地志云蒲吾故城在镇州常山县东二十里漳水在潞州言秦兵渡河历南阳入羊肠经泽潞渡漳水守蒲吾城则与赵战於都城下矣】此臣之所为君患也当今之时山东之建国莫强於赵赵地方二千余里带甲数十万车千乘骑万匹粟支数年西有常山【正义在镇州西】南有河漳【正义河字一作清即漳河也在潞州地理志浊漳出长子鹿谷山东至邺入清漳】东有清河【正义清河今贝州】北有燕国【正义三家分晋赵得晋阳襄子又代戎取代既云西有常山者赵都邯鄲近北燕也】燕固弱国不足畏也秦之所害於天下者莫如赵然而秦不敢举兵伐赵者何也畏韩魏之议其後也然则韩魏赵之南蔽也秦之攻韩魏也无有名山大川之限稍蚕食之傅【集解駟案音附】国都而止韩魏不能支秦必入臣於秦秦无韩魏之规则祸必中於赵矣此臣之所为君患也臣闻尧无三夫之分舜无咫尺之地以有天下禹无百人之聚以王诸侯汤武之士不过三千车不过三百乘卒不过三万立为天子诚得其道也是故明主外料其敌之强弱内度其士卒贤不肖不待两军相当而胜败存亡之机固已形於胸中矣岂掩於衆人之言而以冥冥决事哉臣窃以天下之地图案之诸侯之地五倍於秦料度诸侯之卒十倍於秦六国为一并力西乡而攻秦秦必破矣今西面而事之见臣於秦夫破人之与见破於人也【正义破人谓破前敌也破於人为被前敌破】臣人之与见臣於人也【索隐臣人谓已为彼臣也臣於人者谓我为主使彼臣已也正义臣人谓已得人为臣臣於人谓已事他人】岂可同日而论哉夫衡人者【正义衡音横谓为秦人】皆欲割诸侯之地以予秦【索隐案衡人即游说从横之士也东西为横南北为从秦地形东西横长故张仪相秦为秦连横】秦成则高台榭美宫室聽竽瑟之音前有楼阙轩轅【索隐战国策云前有轩轅又史记俗本有作轩冕者非本文也】後有长姣美人【索隐姣音绞说文云姣美也】国被秦患而不与其忧是故夫衡人日夜务以秦权恐喝诸侯【集解駟案喝音呼曷反索隐恐音起拱反喝音许曷反谓相恐胁也邹氏喝音憇义疎】以求割地故愿大王孰计之也臣闻明主絶疑去谗屏流言之迹塞朋党之门故尊主广地强兵之计臣得陈忠於前矣故窃为大王计莫如一韩魏齐楚燕赵以从亲以畔秦令天下之将相会於洹水之上【集解徐广曰洹水出汲郡林虑县】通质刳白马而盟【索隐质如字又音蹶以言通其交质之情也】要约曰秦攻楚齐魏各出锐师以佐之韩絶其粮道【索隐谓拥兵於嶢关之外又守宜阳也】赵涉河漳【索隐谓赵亦涉河漳而西欲与韩相援以阻秦军】燕守常山之北秦攻韩魏【正义谓道蒲津之东攻之】则楚絶其後【索隐谓出兵武关以絶秦兵之後】齐出锐师而佐之赵涉河漳燕守云中秦攻齐则楚絶其後韩守成臯【正义在洛州汜水县】魏塞其道【索隐其道即河内之道战国策其作午】赵涉河博阙【集解徐广曰齐威王六年晋伐齐到博陵东郡有博平县】燕出锐师以佐之秦攻燕则赵守常山楚军武关齐涉勃海【正义齐从沧州渡河至瀛州】韩魏皆出锐师以佐之秦攻赵则韩军宜阳楚军武关魏军河外【索隐河外谓陕及曲沃处也正义谓同华州】齐涉清河【正义齐从贝州过河而西】燕出锐师以佐之诸侯有不如约者以五国之兵共伐之六国从亲以宾

秦【索隐谓六国之军共为合从相亲独以秦为宾而共伐之】则秦甲必不敢出於函谷以害山东矣如此则霸王之业成矣赵王曰寡人年少立国日浅未尝得闻社稷之长计也今上客有意存天下安诸侯寡人敬以国从乃饰车百乘黄金千镒白璧百双锦绣千纯【集解駟案纯匹端名周礼曰纯帛不过五两索隐接一镒一金也郑玄曰一镒二十四分之一其说各异纯音淳高诱注战国策音屯屯束也又礼乡射云某贤於某若干纯纯数也音旋】以约诸侯是时周天子致文武之胙於秦惠王惠王使犀首攻魏禽将龙贾取魏之雕陰且欲东兵【索隐魏地也刘氏云在龙门河之西北按地理志雕陰县属上郡正义在鄜州洛交县北三十四里】苏秦恐秦兵之至赵也乃激怒张仪入之于秦於是说韩宣惠王【索隐世本韩宣王昭侯之子也】曰韩北有巩洛成臯之固【索隐二邑本属东周後为韩邑地理志二县并属河南】西有宜阳商阪之塞【集解徐广曰商一作常索隐刘氏云商阪之塞盖在商洛之间适秦楚之险塞也正义宜阳在洛州福昌县东十四里商阪即商山也在商洛县南一里亦曰楚山武关在焉】东有宛穰洧水【集解駟案宛於袁反洧于鬼反索隐地理志宛穰二县名并属南阳洧水名出南方正义在新郑东南流入颍】南有陁山【集解徐广曰召陵有陁亭密县有陁山正义在新郑西南三十里】地方九百余里带甲数十万天下之强弓劲弩皆从韩出谿子【集解駟案许慎云南方谿子蛮夷柘弩皆善材索隐许慎注淮南子以为南方蛮出柘弩及竹弩】少府时力距来者【集解韩有谿子弩又有少府所造二种之弩案时力者谓作之得时力倍於常故名时力也距来者谓弩势劲利足以距来敌也索隐韩又有少府所造时力距来二种之弩其名并具淮南子】皆射六百步之外韩卒超足而射百发不暇止【索隐超足谓超腾用势盖起足蹋之而射也故下云跬劲弩是也正义超足齐足也夫欲放弩皆坐举足踏弩两手揜机然後发之】远者括蔽洞胸近者镝弇心韩卒之劒戟皆出於冥山【集解徐广曰庄子曰南行至郢北面而不见冥山駟案司马彪曰冥山在朔州北索隐郭象云冥山在乎太极李轨云在韩国】棠谿【集解徐广曰汝南吴房有棠谿亭正义故城在豫州偃城县西八十里盐铁论云有棠谿之劒是】墨阳【集解駟案淮南子曰墨阳之莫邪也】合膊【集解駟案音附徐广曰一作伯索隐战国策作合伯春秋後语作合相】邓师宛冯【集解徐广曰荥阳有冯池索隐邓国有工铸劒因名邓师宛人於冯池铸劒故号宛冯】龙渊太阿【集解駟案吴越春秋曰楚王召风胡子而告之曰寡人闻吴有干将越有欧冶寡人欲因子请此二人作劒可乎风胡子曰可乃往见二人作劒一曰龙渊二曰太阿索隐案晋太康地理记曰汝南西平有龙泉水可以淬刀劒特坚利故曰龙泉水之劒楚之宝劒也以特坚利故有坚白之论云黄所以为坚也白所以为利也齐辨之曰白所以为不坚黄所以为不利也故天下之宝劒韩为衆一曰棠谿二曰墨阳三曰合膊四曰邓师五曰宛冯六曰龙渊七曰太阿八曰莫邪九曰干将也然干将莫邪匠名也其劒皆出西平县今有铁官令别领户是古铸劒之地】皆陆断牛马水截鹄鴈当敌则斩坚甲铁幕【集解徐广曰阳城出铁索隐战国策云当敌则斩坚甲盾鞬鍪铁幕邹诞云莫一作 刘氏云谓以铁为臂胫之衣言其劒皆能斩之】革抉【集解徐广曰一作决索隐谓以革为射决决射鞬也】?芮【集解駟案?音伐索隐?与戣同谓楯也芮音如字谓繫楯之纷纆也正义方言云盾自关东谓之?关西谓之盾】无不毕具以韩卒之勇被坚甲跬劲弩带利劒一人当百不足言也夫以韩之劲与大王之贤乃西面事秦交臂而服羞社稷而为天下笑无大於此者矣是故愿大王孰计之大王事秦秦必求宜阳成臯今兹効之明年又复求割地【索隐郑玄注礼云效犹呈见也】与则无地以给之不与则弃前功而受後祸且大王之地有尽而秦之求无已以有尽之地而逆无已之

求此所谓市怨结祸者也不战而地已削矣臣闻鄙谚曰寧为鸡口无为牛後【索隐战国策云宁为鸡尸不为牛从延笃注云尸鸡中主也从谓牛子也言宁为鸡中之主不为牛子之从後也正义鸡口虽小犹进食牛後虽大乃出粪也】今西面交臂而臣事秦何异於牛後乎夫以大王之贤挟强韩之兵而有牛後之名臣窃为大王羞之於是韩王勃然作色攘臂瞋目按劒仰天太息曰【索隐太息谓久蓄气而大呼也】寡人虽不肖必不能事秦今主君诏以赵王之教敬奉社稷以从【索隐主君指苏秦也礼卿大夫称主今嘉苏子合从诸侯褒而美之故称曰主君】又说魏襄王【索隐世本惠王子名嗣】曰大王之地南有鸿沟【集解徐广曰在荥阳】陈汝南许鄆【集解徐广曰在颍川於幘切索隐音偃又於建反战国策作鄆地理志颍川有许鄆二县又有鄆陵县鄆鄆不同必有一误鄆音焉正义陈汝南今汝州豫州县也】昆阳召陵舞阳新都新鄴【集解駰案地理志云颍川有昆阳舞阳县汝南有新鄴县南阳有新都县索隐地理志昆阳舞阳属颍川召陵新鄴属汝南按新鄴即栖邱章帝建初四年徙封殷後宋公於此更名宋新都属南阳战国策直云新鄴无新都二字正义召陵在豫州舞阳在许州】东有淮颍【正义淮阳颍川二郡】煮枣【集解徐广曰在宛句正义在宛胸按宛胸曹州县也】无胥【索隐按其地阙】西有长城之界北有河外【正义谓河南也】卷衍酸枣【集解徐广曰荥阳卷县有长城经阳武到密衍地名索隐徐广曰荥阳卷县有长城盖据地险为说正义卷在郑州原武县北七里酸枣在滑州衍徐云地名】地方千里地名虽小然而田舍庐庑之数曾无所刍牧人民之衆车马之多日夜行不絶鞣鞣殷殷【正义鞣摩宏反殷音隐】若有三军之衆臣窃量大王之國不下楚然衡人怵王交强虎狼之秦以侵天下【正义衡音横怵音恤】卒有秦患【正义卒音恩忽反】不顾其祸夫挟强秦之势以内劫其主罪无过此者魏天下之强国也王天下之贤王也今乃有意西面而事秦称东藩筑帝宫【索隐谓为秦筑宫备其巡狩而舍之故谓之帝宫】受冠带祠春秋【索隐谓冠带制度皆受秦之法春秋贡奉以助秦祭祀】臣窃为大王耻之臣闻越王勾践战敝卒三千人禽夫差於干遂【索隐干遂地名不知所在然干是水旁之高地故有江干河干是也又左思吴都赋云长干延属是干为江旁之地遂者道也於江干有遂道因为名也正义在苏州吴县西北四十余里万安山前遂西南山太湖夫差败於姑苏禽於干遂相去四十余里】武王卒三千人革车三百乘制纣於牧野【正义今卫州城是也周武王伐纣於牧野筑之】岂其士卒衆哉诚能奋其威也今窃闻大王之卒武士二十万【集解駰案汉书刑法志曰魏士武卒衣三属之甲操十二石之弩负矢五十置戈其上冠胄带劒赢三日之粮日中而趋百里中试则复其户利其田宅索隐衣音意属音烛三属谓甲衣也覆膊一也甲裳二也胫衣三也甲之有裳见左传赢音盈谓糒粮中音竹仲反谓其筋力能负重所以得中试复音福中试之人国家当优复赐之上田宅故云利其田宅也】苍头二十万【索隐谓以青巾裹头以异於衆荀卿子魏有苍头二十万是也】奋击二十万厮徒十万【索隐厮音斯谓厮养之卒厮养马之贱者今起之为卒正义厮音斯谓炊烹供养杂役】车六百乘骑五千匹此其过越王勾践武王远矣今乃聽於羣臣之说而欲臣事秦夫事秦必割地以効实【索隐谓割地献秦以効己之诚实】故兵未用而国已亏矣凡羣臣之言事秦者皆奸人非忠臣也夫为人臣割其主之地以求外交偷取一时之功而不顾其後破公家而成私门外挟强秦之势以内劫其主以求割地愿大王孰察之周书曰縣縣不絶蔓蔓奈何毫厘不伐将用斧柯前虑不定後有大患将奈之何大王诚能聽臣六国从亲专心并力壹志则必无强秦之患故敝邑赵王使臣効愚计【索隐此効犹呈见也】奉明约在大王之诏诏之魏王曰寡人不肖未尝得闻明教今主君以

赵王之诏诏之敬以国从因东说齐宣王【索隐世本名辟强威王之子也】曰齐南有泰山东有琅邪西有清河【正义即贝州】北有勃海此所谓四塞之国也齐地方二千余里带甲数十万粟如邱山三军之良五家之兵【索隐高诱注战国策云五家即五国也】进如锋矢【索隐战国策作疾如锥矢高诱曰锥小矢喻径疾也吕氏春秋曰所贵锥矢者为其应声而至正义齐君之进若锋芒之刃良弓之矢用之有进而无退】战如雷霆解如风雨即有军役未尝倍泰山絶清河涉勃海也【正义言临菑自足也絶涉皆度也勃海沧州也齐有军役不用度河取二部】临菑之中七万户臣窃度之不下户三男子三七二十一万不待发於远县而临菑之卒固已二十一万矣临菑甚富而实其民无不吹竽鼓瑟弹琴击筑【正义筑似琴而大头圆五弦击之不鼓】鬪鸡走狗六博蹋鞠者【集解駰案刘向别录曰蹇鞠者传言黄帝所作或曰起战国之时蹋鞠兵势也所以练武士知有材也皆因嬉戏而讲练之蹋徒猎反鞠求六反索隐王逸注楚词云博着也行六碁故云六博别录云蹇鞠者蹇亦蹋也促六反崔豹云起黄帝时习兵之势也】临菑之涂车毂击人肩摩连衽成帷举袂成幕挥汗成雨家殷人足志高气扬夫以大王之贤与齐之强天下莫能当今乃西面而事秦臣窃为王羞之且夫韩魏之所以重畏秦者为与秦接境壤界也兵出而相当不出十日而战胜存亡之机决矣韩魏战而胜秦则兵半折四境不守战而不胜则国以危亡随其後是故韩魏之所以重与秦战而轻为之臣也今秦之攻齐则不然倍韩魏之地过卫阳晋之道【集解徐广曰魏哀王十六年秦拔魏蒲坂阳晋封陵索隐阳晋魏邑也刘氏云阳晋地名盖适齐之道在卫国之西南也正义言秦伐齐背韩魏地而与齐战徐说阳晋非也乃是晋阳耳卫地曹濮等州也杜预云曹卫下邑也阳晋故城在曹州乘氏县西北三十七里】径乎亢父之险【索隐亢音刚又苦浪反地理志县名属梁国正义故县在兖州任城县南五十一里】车不得方轨【正义言不得两车并行】骑不得比行百人守险千人不敢过也秦虽欲深入则狼顾【正义狼性怯走常还顾】恐韩魏之议其後也是故恫疑虚喝【集解駰案呼葛反索隐恫音通恫恐惧之心也喝本亦作猺并呼合反高诱曰虚猺喘息惧貌也刘氏云秦自疑惧不敢进兵虚作恐喝之词以胁韩魏也】骄矜而不敢进【正义言秦虽至亢父犹恐惧狼顾虚作喝骂骄溢矜夸不敢进伐齐明矣】则秦之不能害齐亦明矣夫不深料秦之无奈齐何而欲西面而事之是羣臣之计过也今无臣事秦之名而有强国之实臣是故愿大王少留意计之齐王曰寡人不敏僻远守海穷道东境之国也未尝得闻余教今足下以赵王诏诏之敬以国从乃西南说楚威王【索隐威王名商宣王之子】曰楚天下之强国也王天下之贤王也西有黔中【集解徐广曰今之武陵地正义今朗州楚黔中郡其故城在辰州西二十里皆盘瓠後也】巫郡【集解徐广曰巫郡者南郡之西界正义巫郡夔州巫山县是】东有夏州海阳【集解徐广曰楚考烈王元年秦取夏州駰案左传楚庄王伐陈乡取一人焉以归谓之夏州而注者不说夏州所在车胤撰桓温集云夏口城上数里有洲名夏州东有夏州谓此也索隐裴駰据左传及车胤说夏州其文甚明而刘伯庄以为夏州州侯之本国亦未之为得地理志海阳地阙刘氏云楚之东境也正义大江中州也夏水口在荆州江陵县东南二十五里】南有洞庭苍梧【索隐今青草湖是也在岳州界苍梧地名地理志有苍梧郡正义苍梧山在道州南】北有陁塞郢阳【集解徐广曰春秋曰遂戎楚次于陁楚威王十一年魏败楚陁山析县有钧水?者郢阳今之顺阳乎一本北有汾陁之塞也索隐陁山在楚北境郢音荀郢阳地当在汝南颍川之界检地理志及太康地记北境并无郢邑郢邑在河东晋地计郢阳当是新阳声相近字变耳汝南有新阳县应劭云在新水之阳犹幽邑变为枸邑圉陁变为圉陁尔郢亦当然也徐氏云郢

阳当是顺阳盖疎正义陞山在郑州新郑县西南三十里顺阳故城在郑州穰县西百四十里】地方五千余里带甲百万车千乘骑万匹粟支十年此霸王之资也夫以楚之强与王之贤天下莫能当也今乃欲西面而事秦则诸侯莫不西面而朝於章台之下矣秦之所害莫如楚楚强则秦弱秦强则楚弱其势不两立故为大王计莫如从亲以孤秦大王不从秦必起两军一军出武关一军下黔中则鄢郢动矣【集解徐广曰今南郡宜城正义鄢乡故城在襄州率道县南九里安郢城在荆州江陵县东北六里秦兵出武关则临鄢矣兵下黔中则临郢矣】臣闻治之其未乱也为之其未有也患至而後忧之则无及已故愿大王早孰计之大王诚能聽臣臣请令山东之国奉四时之献以承大王之明诏委社稷奉宗庙练士厉兵在大王之所用之大王诚能用臣之愚计则韩魏齐燕赵卫之妙音美人必充後宫燕代橐驼良马必实外廐故从合则楚王衡成则秦帝今释霸王之业而有事人之名臣窃为大王不取也夫秦虎狼之国也有吞天下之心秦天下之仇讐也衡人皆欲割诸侯之地以事秦此所谓养仇而奉讐者也夫为人臣割其主之地以外交强虎狼之秦以侵天下卒有秦患不顧其祸夫外挟强秦之威以内劫其主以求割地大逆不忠无过此者故从亲则诸侯割地以事楚衡合则楚割地以事秦此两策者相去远矣二者大王何居焉故敝邑赵王使臣効愚计奉明约在大王诏之楚王曰寡人之国西与秦接境秦有举巴蜀并汉中之心秦虎狼之国不可亲也而韩魏迫於秦患不可与深谋与深谋恐反人以入於秦故谋未发而国已危矣寡人自料以楚当秦不见胜也内与羣臣谋不足恃也寡人卧不安席食不甘味心摇摇然如县旌而无所终薄【集解駰案白洛反】今主君欲一天下收诸侯存危国寡人谨奉社稷以从於是六国从合而并力焉苏秦为从约长并相六国北报赵王乃行过雒阳车骑輜重诸侯各发使送之甚衆疑於王者【索隐疑作拟读】周显王闻之恐惧除道使人郊劳【集解駰案仪礼曰宾至近郊君使卿朝服用束帛劳】苏秦之昆弟妻嫂侧目不敢仰视俯伏侍取食苏秦笑谓其嫂曰何前倨而後恭也嫂委蛇蒲服以面掩地而谢【索隐委蛇谓面掩地而进若蛇行也蒲服即匍匐并音蒲仆】曰见季子位高金多也【集解譙周曰苏秦字季子索隐按其嫂呼小叔为季子耳未必即其字允南即以为字未之得也】苏秦喟然叹曰此一人之身富贵则亲戚畏惧之贫贱则轻易之况衆人乎且使我有雒阳负郭田二顷【索隐负背也枕也近城之地沃润流泽最为膏腴故曰负郭】吾岂能佩六国相印乎於是散千金以赐宗族朋友初苏秦之燕贷百钱为资及得富贵以百金偿之徧报诸所尝见德者其从者有一人独未得报乃前自言苏秦曰我非忘子子之与我至燕再三欲去我易水之上方是时我困故望子深是以後子子今亦得矣苏秦既约六国从亲归赵赵肃侯封为武安君乃投从约书於秦【索隐投当作设今本并作投言设者谓宣布其从约六国之事以告於秦若作投甚为易解】秦兵不敢闚函谷关十五年其後秦使犀首欺齐魏与共伐赵欲败从约齐魏伐赵赵王让苏秦苏秦恐请使燕必报齐苏秦去赵【集解徐广曰自初说燕至此三年】而从约皆解秦惠王以其女为燕太子妇是岁文侯卒太子立是为燕易王易王初立齐宣王因燕丧伐燕取十城易王谓苏秦曰往日先生至燕而先王资先生见赵遂约六国从今齐先伐赵次至燕以先生之故为天下笑先生能为燕得侵地乎苏秦大慙曰请为王取之苏秦见齐王再拜俯而庆仰而吊【索隐刘氏云当时庆吊应有其词但史家不録耳】齐王曰是何庆吊相随之速也苏秦曰臣闻饥人所以饥而不食乌喙者【集解本草经曰乌头一名乌喙索隐音卓又许穆反今之毒药乌头是正义广雅云苏奥毒附子也一岁为乌喙三岁为附子四岁为乌头五岁为天雄】为其愈充腹而与饿死同患也【索隐刘氏以愈犹暂非也按谓饥人食乌头则愈益充腹少时毒发而

毙亦与饥死同患也【毙音弊】今燕虽弱小即秦王之少壻也大王利其十城而长与强秦为仇今使弱燕为鴈行而强秦敝其後以招天下之精兵是食乌喙之类也齐王愀然变色【索隐愀音自酋反又七小反】曰然则奈何苏秦曰臣闻古之善制事者转祸为福因败为功大王诚能聽臣计即归燕之十城燕无故而得十城必喜秦王知以己之故而归燕之十城亦必喜此所谓弃仇讐而得石交者也夫燕秦俱事齐则大王号令天下莫敢不聽是王以虚辞附秦以十城取天下此霸王之业也王曰善於是乃归燕之十城人有毁苏秦者曰左右卖国反覆之臣也将作乱苏秦恐得罪归而燕王不复官也苏秦见燕王曰臣东周之鄙人也无有分寸之功而王亲拜之於庙而礼之於廷今臣为王却齐之兵而攻得十城宜以益亲今来而王不官臣者人必有以不信伤臣於王者臣之不信王之福也臣闻忠信者所以自为也进取者所以为人也且臣之说齐王曾非欺之也臣弃老母於东周固去自为而行进取也今有孝如曾参廉如伯夷信如尾生得此三人者以事大王何若王曰足矣苏秦曰孝如曾参义不离其亲一宿於外王又安能使之步行千里而事弱燕之危王哉廉如伯夷义不为孤竹君之嗣不肯为武王臣不受封侯而饿死首阳山下有廉如此王又安能使之步行千里而行进取於齐哉信如尾生与女子期於梁下女子不来水至不去抱柱而死有信如此王又安能使之步行千里却齐之强兵哉臣所谓以忠信得罪於上者也燕王曰若不忠信耳岂有以忠信而得罪者乎苏秦曰不然臣闻客有远为吏而其妻私於人者其夫将来其私者忧之妻曰勿忧吾已作药酒待之矣居三日其夫果至妻使妾举药酒进之妾欲言酒之有药则恐其逐主母也欲勿言乎则恐其杀主父也於是乎详僵而弃酒【索隐详音佯详诈也僵仆也音姜】主父大怒笞之五十故妾一僵而覆酒上存主父下存主母然而不免於笞恶在乎忠信之无罪也夫臣之过不幸而类是乎燕王曰先生复就故官益厚遇之易王母文侯夫人也与苏秦私通燕王知之而事之加厚苏秦恐诛乃说燕王曰臣居燕不能使燕重而在齐则燕必重燕王曰唯先生之所为於是苏秦详为得罪於燕而亡走齐齐宣王以为客卿【集解徐广曰燕易王之十年时】齐宣王卒湣王即位说湣王厚葬以明孝高宫室大苑囿以明得意欲破敝齐而为燕燕易王卒【集解徐广曰易王十二年卒】燕哙立为王其後齐大夫多与苏秦争宠者而使人刺苏秦不死殊而走【集解駰案风俗通义称汉令蛮夷戎狄有罪当殊殊者死也与诛同指而此云不死殊而走者苏秦时虽不即死然是死创故云殊】齐王使人求贼不得苏秦且死乃谓齐王曰臣即死车裂臣以徇於市曰苏秦为燕作乱於齐如此则臣之贼必得矣於是如其言而杀苏秦者果自出齐王因而诛之燕闻之曰甚矣齐之为苏生报仇也【集解徐广曰生一作先】苏秦既死其事大泄齐後闻之乃恨怒燕燕甚恐苏秦之弟曰代代弟苏厉见兄遂亦皆学及苏秦死代乃求见燕王欲袭故事曰臣东周之鄙人也窃闻大王义甚高鄙人不敏释鉏耨而干大王至於邯鄲所见者絀於所闻於东周臣窃负其志及至燕廷观王之羣臣下吏王天下之明王也燕王曰子所谓明王者何如也对曰臣闻明王务闻其过不欲闻其善臣请谒王之过夫齐赵者燕之仇讐也韩魏者燕之援国也今王奉仇讐以伐援国非所以利燕也王自虑之此则计过无以闻者非忠臣也王曰夫齐者固寡人之讐所欲伐也直患国敝力不足也子能以燕伐齐则寡人举国委子对曰凡天下战国七燕处弱焉独战则不能有所附则无不重南附楚楚重西附秦秦重中附韩魏韩魏重且苟所附之国重此必使王重矣【正义言附诸国诸国重燕而燕尊重】今夫齐长主而自用也【索隐谓齐王年长也或作齐强故言长主】南攻楚五年畜聚竭西困秦三年士卒罢敝北与燕人战覆三军得二将【集解徐广曰齐覆三军而燕失二将索隐战国策云获二将亦谓燕之二将是燕之失也】

然而以其余兵南面举五千乘之大宋【正义齐表云齐湣王三十八年灭宋乃当赧王二十九年此说乃燕哱之时当周慎王之时齐宋在前三十余年恐文误矣】而包十二诸侯此其君欲得其民力竭恶足取乎且臣闻之数战则民劳久师则兵敝矣燕王曰吾闻齐有清济浊河【正义济漯二水上承黄河并淄青之北流入海黄河又一源从洛魏二州界北流入海亦齐西北界】可以为固长城钜防【集解徐广曰济北卢县有防门又有长城东至海正义长城西头在济州平陰县界竹书纪年云梁惠王二十年齐闵王筑防以为长城太山记云太山西有长城缘河经太山余一千里至琅邪台入海】足以为塞诚有之乎对曰天时不与虽有清济浊河恶足以为固民力罢敝虽有长城钜防恶足以为塞且异日济西不师【正义济州以西也】所以备赵也河北不师【正义谓沧博二州在漯河之北】所以备燕也今济西河北尽已役矣封内敝矣夫骄君必好利而亡国之臣必贪於财王诚能无羞宠子母弟以为质【正义音致】宝珠玉帛以事左右彼将有德燕而轻亡宋则齐可亡矣燕王曰吾终以子受命於天矣燕乃使一子质於齐而苏厉因燕质子而求见齐王齐王怨苏秦欲囚苏厉燕质子为谢已遂委质为齐臣【正义质栗寘反】燕相子之与苏代婚而欲得燕权乃使苏代侍质子於齐齐使代报燕燕王哱问曰齐王其霸乎曰不能曰何也曰不信其臣於是燕王专任子之已而让位燕大乱齐伐燕杀王哱子之【集解徐广曰是周赧王之元年时也】燕立昭王而苏代苏厉遂不敢入燕皆终归齐齐善待之苏代过魏魏为燕执代齐使人谓魏王曰齐请以宋地封泾阳君【正义泾阳君秦王弟名悝也泾阳雍州县也齐苏子告秦共伐宋以封泾阳君然齐假设此策以救苏代】秦必不受秦非不利有齐而得宋地也【正义齐言秦相亲共伐宋秦得宋地又得齐事秦然秦不信齐及苏代恐为不成也】不信齐王与苏子也今齐魏不和如此其甚则齐不欺秦秦信齐齐秦合泾阳君有宋地非魏之利也故王不如东苏子秦必疑齐而不信苏子矣齐秦不合天下无变伐齐之形成矣於是出苏代之宋宋善待之齐伐宋宋急苏代乃遗燕昭王书曰【正义此书为宋说燕令莫助齐梁】夫列在万乘而寄质於齐【正义燕前有一子质於齐】名卑而权轻奉万乘助齐伐宋民劳而实费夫破宋残楚淮北肥大【正义更以淮北之地加於齐都是强万乘之国而齐总并之是益一齐】齐讐强而国害此三者皆国之大败也然且王行之者将以取信於齐也齐加不信於王而忌燕愈甚是王之计过矣夫以宋加之淮北强万乘之国也而齐并之是益一齐也北夷方七百里【索隐谓山戎北狄附齐者正义齐桓公伐山戎令支斩孤竹而南归海滨诸侯莫不来服】加以鲁卫强万乘之国也而齐并之是益二齐也夫一齐之强燕犹狼顾而不能支今以三齐临燕其祸必大矣虽然智者举事因祸为福转败为功齐紫败素也【集解徐广曰取败素染以为紫正义齐君好紫故齐俗尚之取恶素帛染为紫其价十倍贵於余喻齐虽有大名而国中以困弊也韩子云齐桓公好服紫一国尽服紫当时十素不得一紫公患之管仲曰君欲正之何不试勿衣紫也公谓左右曰恶紫曷公语三日境内莫有衣紫者】而贾十倍【索隐谓紫色价贵於帛十倍而本是败素以喻齐虽有大名而其国中困弊也】越王勾践栖於会稽复残强吴而霸天下此皆因祸为福转败为功者也今王若欲因祸为福转败为功则莫若挑霸齐而尊之【正义挑田鸟反执持也】使使盟於周室焚秦符曰【正义符徵兆也】其大上计破秦其次必长宾之【索隐长如字宾音摈正义大好上计策破秦次计长摈弃关西】秦挟宾以待破秦王必患之秦五世伐诸侯今为齐下秦王之志苟得穷齐不憚以国为功然则王何不使辩士以此言说秦王曰燕赵破宋肥齐尊之为之下者燕赵非利之也燕赵不利而势为之者以不信秦王也然则王何不使可信者接收燕赵令泾阳君高陵君【集解徐广曰

冯翊高陵县索隐二人秦王母弟也高陵君名显泾阳君名悝】先於燕赵秦有变因以为质则燕赵信秦秦为西帝燕为北帝赵为中帝立三帝以令於天下韩魏不聽则秦伐之齐不聽则燕赵伐之天下孰敢不聽天下服聽因驱韩魏以伐齐曰必反宋地归楚淮北反宋地归楚淮北燕赵之所利也并立三帝燕赵之所愿也夫实得所利尊得所愿燕赵弃齐如脱躡矣今不收燕赵齐霸必成诸侯赞齐而王不从是国伐也诸侯赞齐而王从之是名卑也今收燕赵国安而名尊不收燕赵国危而名卑夫去尊安而取危卑智者不为也秦王闻若说必若刺心然则王何不使辩士以此苦言说秦秦必取齐必伐矣夫取秦厚交也伐齐正利也尊厚交务正利圣王之事也燕昭王善其书曰先人尝有德苏氏子之之乱而苏氏去燕燕欲报仇於齐非苏氏莫可乃召苏代复善待之与谋伐齐竟破齐湣王出走久之秦召燕王燕王欲往苏代约燕王曰楚得枳【集解徐广曰巴郡有枳县正义枳支是反今涪州城在秦枳县在江南】而国亡【集解徐广曰燕昭王三十三年秦拔楚鄢西陵正义按西陵在黄州】齐得宋而国亡【正义年表云齐湣王三十八年灭宋四十年五国共击湣王王走莒】齐楚不得以有枳宋而事秦者何也则有功者秦之深讐也秦取天下非行义也暴也秦之行暴正告天下【索隐正告谓显然而告天下】告楚曰蜀地之甲乘船浮於汶【集解駰案眉贫反索隐即江所出之岷山】乘夏水而下江【索隐夏音暇谓夏潦之水盛涨时也】五日而至郢汉中之甲乘船出於巴【索隐巴水名与汉水相近正义巴岭山在梁州南一百九十里周地志云南渡老子水登巴岭山南回记大江此南是古巴国因以名山】乘夏水而下汉四日而至五渚【集解駰案战国策曰秦与荆人战大破荆袭郢取洞庭五渚然则五渚在洞庭索隐五渚五处洲也刘氏以为五渚宛邓之间临汉水不得在洞庭或说五渚即五湖与刘氏说各不同】寡人积甲宛东下随【索隐宛县之东而下随邑】智者不及谋勇士不及怒寡人如射隼矣【索隐易曰射隼於高墉之上获之无不利秦王言我今伐楚必当捷获也正义隼若今之鹞也】王乃欲待天下之攻函谷不亦远乎楚王为是故十七年事秦秦正告韩曰我起乎少曲【索隐地名近宜阳也正义在怀州河阳县西北解在范睢传】一日而断太行【正义太行山羊肠坂道北过韩上党也】我起乎宜阳而触平阳【正义宜阳平阳皆韩大都也隔河也】二日而莫不尽繇【索隐音摇摇动也】我离两周而触郑【正义离历也历两周而东触新郑州韩国都拔矣】五日而国举【索隐离如字谓屯兵以离两周也而乃触击於郑故五日国举举犹拔也】韩氏以为然故事秦秦正告魏曰我举安邑塞女戟韩氏太原卷【义卷帆免反刘伯庄云原当为太行卷犹断絶】我下轵道南阳封冀【集解徐广曰霸陵有轵道亭河东皮氏有冀亭也索隐女戟地名在太行山之西刘氏卷音帆免反非也又音邱权反按举安邑塞女戟及至韩氏韩国宜阳也太原县名魏地不至太原亦无别名大衍字原当为京京及卷皆属荥阳是魏之境轵是河内轵县言道者亦衍字徐广引霸陵有轵道亭非魏之境盖误南阳即河内也封封陵也冀冀邑也皆在魏境故徐广引河东皮氏有冀亭是也】包两周【集解徐广曰张仪云下河东取成臯也正义两周王城及巩】乘夏水浮轻舟强弩在前铍戈在後【集解徐广曰铍由冉反正义刘伯庄云音四廉反利也】决荥口魏无大梁【索隐荥泽之口与今汴河口通其水深可以灌大梁故云无大梁也】决白马之口魏无外黄济阳【索隐白马河津在东郡决其流以灌外黄济阳也正义故黄城在曹州考城县东二十四里济阳故城在曹州冤胸县西南三十五里】决宿胥之口【集解徐广曰纪年曰魏救山寨集胥口正义淇水出卫州淇县界之淇水东至黎阳入河魏志云武帝於清淇口东因宿胥故渎开白沟道清淇二水入焉索隐纪年作胥盖亦津名今其地不知所在】魏无虚顿邱【集解

徐广曰秦始皇五年取魏酸枣燕虚长平索隐虚顿邱地名与酸枣相近正义虚谓殷墟今相州所理是顿邱故城在魏州顿邱县东北二十里括地志云二国地时属魏】陆攻则击河内水攻则灭大梁魏氏以为然故事秦秦欲攻安邑恐齐救之则以宋委於齐曰宋王无道为木人以写寡人射其面寡人地絶兵远不能攻也王苟能破宋有之寡人如自得之已得安邑塞女戟因以破宋为齐罪【索隐秦令齐灭宋仍以破宋为齐之罪名】秦欲攻韩恐天下救之则以齐委於天下曰齐王四与寡人约四欺寡人必率天下以攻寡人者三有齐无秦有秦无齐必伐之必亡之已得宜阳少曲致藺石因以破齐为天下罪秦欲攻魏重楚【索隐重犹附也尊也正义畏楚救魏】则以南阳委於楚曰【正义南阳邓州地本韩地也韩先事秦今楚取南阳故言与韩且絶矣】寡人固与韩且絶矣残均陵塞 厄【集解徐广曰 江夏 县均一作灼 音盲索隐均陵在南阳今之均州鄆县名在江夏正义均州故城在随州西南五十里盖均陵也又申州罗山县本汉鄆县申州有平清关盖古鄆县之厄塞】苟利於楚寡人如自有之魏弃与国而合於秦因以塞 厄为楚罪兵困於林中【集解徐广曰河南苑陵有林乡】重燕赵以胶东委於燕以济西委於赵赵得讲於魏至公子延因犀首属行而攻赵【索隐讲和也解也秦与魏和也至当为质谓以公子延为质也犀首者公孙衍也本魏将因之以属军行行音胡郎反谓车兵相续也】兵伤於譙石遇败於阳马【索隐譙石阳马并赵之地名非县邑也】而重魏则以叶蔡委於魏已得讲於赵则劫魏不为割困则使太后弟穰侯为和瀛则兼欺舅与母【索隐嬴犹胜也舅穰侯魏冉也母太后也】适燕者曰以胶东【索隐适音宅适者责也下同】适赵者曰以济西适魏者曰以叶蔡适楚者曰以塞 厄适齐者曰以宋此必令言如循环用兵如刺蜚母不能制舅不能约龙贾之战【集解駰案魏襄王五年秦败我龙贾军】岸门之战【集解駰案韩宣惠王十九年秦大败我岸门】封陵之战【集解駰案魏哀王十六年秦败我封陵】高商之战【集解駰案此战事不见】赵庄之战【集解駰案赵肃侯二十二年赵庄与秦战败秦杀赵庄河西】秦之所杀三晋之民数百万今其生者皆死秦之孤也西河之外上雒之地三川晋国之祸三晋之半秦祸如此其大也【索隐以言西河之外上雒之地及三川晋国皆是秦与魏战之处秦兵祸败我三晋之半是秦祸如此其大者】而燕赵之秦者皆以争事秦说其主【索隐燕赵之人往秦者谓游说之士】此臣之所大患也燕昭王不行苏代复重於燕燕使约诸侯从亲如苏秦时?从或不而天下由此宗苏氏之从约代厉皆以壽死名显诸侯

太史公曰苏秦兄弟三人皆游说诸侯以显名【索隐譙允南以为苏氏兄弟五人更有苏辟苏鹄典略亦同其说盖按苏氏谱云然也】其术长於权变而苏秦被反间以死天下共笑之讳学其术然世言苏秦多异异时事有类之者皆附之苏秦夫苏秦起闾阎连六国从亲此其智有过人者吾故列其行事次其时序毋令独蒙恶声焉

【索隐述赞曰季子周人师事鬼谷揣摩既就陰符伏读合从离衡佩印者六天王除道家人扶服贤哉代厉继党族】

史记卷六十九

史记卷六十九考证

苏秦列传前有楼阙轩辕○顾炎武曰当作轩县周礼小胥正乐县之位王宫县诸侯轩县注谓轩县者阙其南面

六国从亲以宾秦索隐谓六国之军共为合从相亲独以秦为宾而共伐之也○【臣照】按宾字国策原作摎若索隐之意则竟以为主宾之宾既以为宾未闻伐宾之义

铁幕索隐刘氏云谓以铁为臂胫之衣言其劔皆能斩之○徐孚远曰铁幕疑是障面刘言臂胫之衣是重言甲恐非也

五家之兵索隐高诱注战国策云五家即五国也○王维祯曰五家之兵管子之制也高诱注欠明

骄矜而不敢进○骄矜国策作高跃

苏秦去赵集解徐广曰自初说燕至此三年○徐孚远曰正文云秦兵不出十五年而徐云自初说至此三年二说悬殊

而燕王不复官也○国策作不复馆

齐伐宋宋急○余有丁曰按传中前言举宋此复言宋急者何也据齐表此段是前段必误

齐紫败素也而贾十倍索隐以喻齐虽有大名而其国中困弊也○董份曰齐紫本败素而价十倍此正转败为功之意非言齐国困弊也

则莫若挑霸齐而尊之○国策挑作遥

焚秦符正义符徵兆也○【臣照】按符者节信也张仪传云借宋之符焚秦符者絶之也楚世家云齐折楚符而合于秦解作徵兆非

乘夏水而下江索隐谓夏?之水盛涨时也○【臣照】按宜为夏水之口夏水通汉亦通江似不得以夏潦之水为解也

兵伤於譙石遇败於阳马○国策作离石马陵

史记卷六十九考证

<史部,正史类,史记>

卷七十

钦定四库全书

史记卷七十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

张仪列传第十

张仪者魏人也【集解駰案吕氏春秋曰仪魏氏余子索隐晋有大夫张老又河东有西张城张氏为魏人必也而吕览以为魏氏余子则盖魏之支庶也又书畧说以余子谓之季子也正义左传晋有公族余子公行杜预云皆官卿之嫡为公族大夫余子嫡子之母弟也公行庶子掌公戎行也艺文志云张子十篇在纵横流】始尝与苏秦俱事鬼谷先生学术苏秦自以不及张仪张仪已学而游说诸侯【索隐说音税】尝从楚相饮已而楚相亡璧门下意张仪曰仪贫无行必此盗相君之璧共执张仪掠笞数百不服醢之【集解駰案醢音释索隐古释字】其妻曰嘻【索隐嘻音僖郑元曰嘻悲恨之声】子母读书游说安得此辱乎张仪谓其妻曰视吾舌尚在不其妻笑曰舌在也仪曰足矣苏秦已说赵王而得相约从亲【索隐从音足容反】然恐秦之攻诸侯败约後负念莫可使用於秦者乃使人微感张仪曰子始与苏秦善今秦已当路子何不往游以求通子之愿张仪於是之赵上谒求见苏秦苏秦乃诫门下人不为通又使不得去者数日已而见之坐之堂下赐仆妾之食因而数让之【索隐按谓数设词而让之让亦责也数音朔】曰以子之材能乃自令困辱至此吾宁不能言而富贵子子不足收也谢去之张仪之来也自以为故人求益反见辱怒念诸侯莫可事独秦能苦赵乃遂入秦苏秦已而告其舍人曰张仪天下贤士吾殆弗如也今吾幸先用而能用秦柄者独张仪可耳然贫无因以进吾恐其乐小利而不遂故召辱之以激其意子为我阴奉之乃言赵王发金币车马使人微随张仪与同宿舍稍稍近就之奉以车马金钱所欲用为取给而弗告张仪遂得以见秦惠王惠王以为客卿与谋伐诸侯苏秦之舍人乃辞去张仪曰赖子得显方且报德何故去也舍人曰臣非知君知君乃苏君苏君忧秦伐赵败从约以为非君莫能得秦柄故感怒君使臣阴奉给君资尽苏君之计谋今君已用请归报张仪曰嗟乎此吾在术中而不悟吾不及苏君明矣吾又新用安能谋赵乎为吾谢苏君苏君之时仪何敢言且苏君在仪宁渠能乎【集解駰案渠音讎索隐古字少假借耳】张仪既相秦为文檄【集解徐广曰一作咫尺之檄索隐王劭按春秋後语云丈二尺檄许慎云檄二尺书也为檄即传檄尔】告楚相曰始吾从若饮【索隐若汝也下文而亦训汝】我不盗而璧若笞我若善守汝国我顾且盗而城苴

蜀相攻击【集解徐广曰譙周曰益州天苴读为芭黎之芭音与巴相近以为今之巴郡索隐苴音巴谓巴蜀之夷自相攻击也今作苴者按巴苴草名今论巴遂误作苴也或巴人巴郡木因芭苴得名所以其字遂以苴为巴也注引天苴即巴苴也譙周蜀人也知天苴之音读为巴犁之芭按芭犁即织木茸所以为苇篱也今江南亦谓苇篱曰芭篱正义华阳国志云昔蜀王封其弟于汉中号曰苴侯因命之邑曰葭萌苴侯与巴王为好巴与蜀为讐故蜀王怒伐苴苴奔巴求救於秦秦遣张仪从子午道伐蜀王自葭萌御之败绩走至武阳为秦军所害秦遂灭蜀因灭巴蜀二郡括地志云苴侯都葭萌今利州益昌县五十里葭萌故城是蜀侯都益州巴子城在合州石镜县南五里故垫江县也巴子都江州在都之北又峡州界也】各来告急于秦秦惠王欲发兵以伐蜀以为道险狭难至而韩又来侵秦秦惠王欲先伐韩後伐蜀恐不利欲先伐蜀恐韩袭秦之敝犹豫未能决司马错与张仪争论於惠王之前【索隐错音七各反又音七故反】司马错欲伐蜀张仪曰不如伐韩王曰请问其说仪曰亲魏善楚下兵三川塞斜谷之口【集解徐广曰一作寻成臯巩县有寻口索隐寻斜声相近故其名惑也战国策作轘轹缙氏之口亦其地相近也斜谷地名正义括地志云温泉水即寻源出洛州巩县西南四十里注水经云鄠城水出北山鄠溪又有故鄠城在巩县西南五十八里按洛州缙氏县东南四十里与鄠溪相近之地】当屯留之道【正义屯留潞州县也道即太行羊肠阪道也】魏絶南阳【正义南阳怀州也是当屯留之道令魏絶断坏羊肠韩上党之路也】楚临南郑【正义是塞斜谷之口也令楚兵临郑南塞轘轹斜口断韩南阳之兵也】秦攻新城宜阳【索隐新城当在河南伊阙之左右正义洛州福昌县也】以临二周之郊诛周王之罪侵楚魏之地周自知不能救九鼎宝器必出据九鼎案图籍挟天子以令於天下天下莫敢不聽此王业也今夫蜀西僻之国而戎翟之伦也敝兵劳衆不足以成名得其地不足以为利臣闻争名者於朝争利者於市今三川周室天下之朝市也而王不争焉顾争於戎翟去王业远矣司马错曰不然臣闻之欲富国者务广其地欲强兵者务富其民欲王者务博其德三资者备而王随之矣今王地小民贫故臣愿先从事於易夫蜀西僻之国也而戎翟之长也有桀纣之乱以秦攻之讐如使豺狼逐羣羊得其地足以广国取其财足以富民【索隐战国策取作得】缮兵不伤衆而彼已服焉【正义缮音膳同饕具食也】拔一国而天下不以为暴利尽西海而天下不以为贪【索隐西海为蜀川也海者珍藏所聚生犹谓秦中为陆海然也其实西亦有海所以云西海正义海之言晦也西夷晦昧无知故言海也言利尽西方羌戎】是我一举而名实附也【索隐名谓博其德也实谓得土地财宝也】而又有禁暴止乱之名今攻韩劫天子恶名也而未必利也又有不义之名而攻天下所不欲危矣臣请论其故【索隐论者告也陈也故谓陈不宜伐之端由也】周天下之宗室也齐韩之与国也周自知失九鼎韩自知亡三川【正义韩自知亡二周故与周并力合谋也】将二国并力合谋以因乎齐赵而求解乎楚魏以鼎与楚以地与魏王弗能止也此臣之所谓危也不如伐蜀完惠王曰善寡人请聽子卒起兵伐蜀十月取之【索隐六国年表在惠王二十二年十月也正义表云秦惠王後元年十月击灭之】遂定蜀贬蜀王更号为侯而使陈庄相蜀蜀既属秦秦以益强富厚轻诸侯秦惠王十年使公子华【集解徐广曰一作革】与张仪围蒲阳【索隐魏之邑名正义在隰州隰川县蒲邑故城是也】降之仪因言秦复与魏而使公子繇质於魏仪因说魏王曰秦王之遇魏甚厚魏不可以无礼魏因入上郡少梁谢秦惠王惠王乃以张仪为相更名少梁曰夏阳【集解徐广曰夏阳在梁山龙门索隐夏音下山名亦曰大夏禹所都正义少梁城同州韩城县南二十三里夏阳城在县南二十里梁山在县东南十九里龙门山在县北五十里】仪相秦

四岁立惠王为王【正义表云惠王之十三年周显王之三十四年也】居一岁为秦将取陕筑上郡塞其後二年使与齐楚之相会啖桑东还而免相相魏以为秦欲令魏先事秦而诸侯效之魏王不肯聽仪秦王怒伐取魏之曲沃平周复陰厚张仪益甚张仪慙无以归报留魏四岁而魏襄王卒哀王立张仪复说哀王哀王不聽於是张仪陰令秦伐魏魏与秦战败明年齐又来败魏於观津【集解駟案观音贯】秦复欲攻魏先败韩申差军斩首八万诸侯震恐而张仪复说魏王曰魏地方不至千里卒不过三十万地四平诸侯四通辐凑无名山大川之限从郑至梁二百余里车驰人走不待力而至梁南与楚境西与韩境北与赵境东与齐境卒戍四方守亭鄣者不下十万梁之地势固战場也梁南与楚而不与齐则齐攻其东东与齐而不与赵则赵攻其北不合於韩则韩攻其西不亲於楚则楚攻其南此所谓四分五裂之道也且夫诸侯之为从者将以安社稷尊主强兵显名也今从者一天下约为昆弟刑白马以盟洹【集解駟案音桓】水之上以相坚也而亲昆弟同父母尚有争钱财而欲恃诈伪反覆苏秦之余谋其不可成亦明矣大王不事秦秦下兵攻河外【索隐河之西即曲沃平周之邑也正义河外即卷衍燕酸枣】据卷衍酸枣【集解駟案卷丘权反衍以善反索隐卷在河南衍地名正义卷衍属郑州燕滑州胙城县酸枣属滑州皆黄河南岸地】劫卫取阳晋【正义故城在曹州乘氏县西北三十七里】则赵不南赵不南而梁不北梁不北则从道絶从道絶则大王之国欲毋危不可得也秦折韩而攻梁【索隐战国策折作挟也】韩怯於秦秦韩为一梁之亡可立而须也此臣之所为大王患也为大王计莫如事秦事秦则楚韩必不敢动无楚韩之患则大王高枕而卧【正义枕针鸩反】国必无忧矣且夫秦之所欲弱者莫如楚而能弱楚者莫如梁楚虽有富大之名而实空虚其卒虽多然而轻走易北不能坚战悉梁之兵南面而伐楚胜之必矣割楚而益梁亏楚而适秦嫁祸安国此善事也大王不聽臣秦下甲士而东伐虽欲事秦不可得矣且夫从人多奋辞而少可信说一诸侯而成封侯是故天下之游谈士莫不日夜搢腕瞋目切齿以言从之便以说人主人主贤其辩而牵其说岂得无眩哉臣闻之积羽沉舟羣轻折轴衆口铄金积毁销骨故愿大王审定计议且赐骸骨辟魏哀王於是乃倍从约而因仪请成於秦张仪归复相秦三岁而魏复背秦为从秦攻魏取曲沃明年魏复事秦秦欲伐齐齐楚从亲於是张仪往相楚楚怀王闻张仪来虚上舍而自馆之曰此僻陋之国子何以教之仪说楚王曰大王诚能聽臣闭关絶约於齐臣请献商於之地六百里【索隐刘氏云商今之商州有古商城其西二百余里有古於城】使秦女得为大王箕箒之妾秦楚娶妇嫁女长为兄弟之国此北弱齐而西益秦也计无便此者楚王大说而许之羣臣皆贺陈轸独吊之楚王怒曰寡人不兴师发兵得六百里地羣臣皆贺子独吊何也陈轸对曰不然以臣观之商於之地不可得而齐秦合齐秦合则患必至矣楚王曰有说乎陈轸对曰夫秦之所以重楚者以其有齐也今闭关絶约於齐则楚孤秦奚贪夫孤国而与之商於之地六百里张仪至秦必负王是北絶齐交西生患於秦也而两国之兵必俱至善为王计者不若陰合而阳絶於齐使人随张仪苟与吾地絶齐未晚也不与吾地陰合谋计也楚王曰愿陈子闭口毋复言以待寡人得地乃以相印授张仪厚赂之於是遂闭关絶约於齐使一将军随张仪张仪至秦详失綏堕车不朝三月【正义详音羊】楚王闻之曰仪以寡人絶齐未甚邪乃使勇士至宋借宋之符北骂齐王齐王大怒折节而下秦秦齐之交合张仪乃朝谓楚使者曰臣有奉邑六里愿以献大王左右楚使者曰臣受令於王以商於之地六百里不闻六里还报楚王楚王大怒发兵而攻秦陈轸曰轸可发口言乎攻之不如割地反以赂秦与之并兵而攻齐是我出地於秦取偿於齐也王国尚可存楚王不聽卒发兵而使将军屈匄击秦秦齐共攻楚斩首八万杀屈

句遂取丹阳【集解徐广曰在枝江】汉中之地【正义今梁州也在汉水北】楚又复益发兵而袭秦至蓝田大战楚大败於是楚割两城以与秦平秦要楚欲得黔中地【正义要音腰】欲以武关外易之【正义即商於之地】楚王曰不愿易地愿得张仪而献黔中地秦王欲遣之口弗忍言张仪乃请行惠王曰彼楚王怒子之负以商於之地是且甘心於子张仪曰秦强楚弱臣善靳尚尚得事楚夫人郑袖袖所言皆从且臣奉王之节使楚楚何敢加诛假令诛臣而为秦得黔中之地臣之上愿遂使楚楚怀王至则囚张仪将杀之靳尚谓郑袖曰子亦知子之贱於王乎郑袖曰何也靳尚曰秦王甚爱张仪而不欲出之【索隐不字当作必时张仪为楚所囚故必欲出之也正义秦王不欲出张仪使楚若欲自行今秦欲以上庸地及美人贖仪】今将以上庸之地六县【正义今房州也】赂楚以美人聘楚以宫中善歌讴者为媵楚王重地尊秦秦女必贵而夫人斥矣不若为言而出之於是郑袖日夜言怀王曰人臣各为其主用今地未入秦秦使张仪来至重王王未有礼而杀张仪秦必大怒攻楚妾请子母俱迁江南毋为秦所鱼肉也怀王後悔赦张仪厚礼之如故张仪既出未去闻苏秦死【索隐此时当秦惠王之後元十四年】乃说楚王曰秦地半天下兵敌四国被险带河四塞以为固虎贲之士百余万车千乘骑万匹积粟如丘山法令既明士卒安难乐死主明以严将智以武虽无出甲席卷常山之险必折天下之脊【索隐常山於天下在北有若人之背脊也正义古之帝王多都河北河东故也】天下有後服者先亡且夫为从者无以异於驱羣羊而攻猛虎虎之与羊不格明矣今王不与猛虎而与羣羊臣窃以为大王之计过也凡天下强国非秦而楚非楚而秦两国交争其势不两立大王不与秦秦下甲据宜阳韩之上地不通下河东取成臯韩必入臣梁则从风而动秦攻楚之西韩梁攻其北社稷安得毋危且夫从者聚羣弱而攻至强不料敌而轻战国贫而数举兵危亡之术也臣闻之兵不如者勿与挑战【正义挑田鸟反】粟不如者勿与持久夫从人饰辩虚辞高主之节言其利不言其害卒有秦祸【正义卒忽勿反】无及为已是故愿大王之孰计之秦西有巴蜀大船积粟起於汶山【正义汶音泯】浮江以下至楚三千余里舫船载卒【索隐舫音方谓并两船也】一舫载五十人与三月之食下水而浮一日行三百余里里数虽多然而不费牛马之力不至十日而距扞关【集解徐广曰巴郡鱼复有扞水扞关索隐扞关在楚之西界复音伏地理志巴郡有鱼复县正义在硤州巴山县界】扞关惊则从境以东尽城守矣黔中巫郡非王之有秦举甲出武关南面而伐则北地絶【正义楚之北境断絶】秦兵之攻楚也危难在三月之内而楚待诸侯之救在半岁之外此其势不相及也夫待弱国之救忘强秦之祸此臣以为大王患也大王尝与吴人战五战而三胜阵卒尽矣偏守新城存民苦矣【索隐偏音匹连反此之新城当在吴楚之间也正义新攻得之城未详所在】臣闻功大者易危而民敝者怨上夫守易危之功而逆强秦之心臣窃为大王危之且夫秦之所以不出兵函谷十五年以攻齐赵者陰谋有合【集解徐广曰一作吞】天下之心楚尝与秦构难战於汉中【索隐其地在秦之山南楚之西北汉水南之地名曰汉中也】楚人不胜列侯执珪死者七十余人遂亡汉中楚王大怒兴兵袭秦战於蓝田此所谓两虎相搏者也【集解徐广曰搏或音戟】夫秦楚相敝而韩魏以全制其後计无危於此者矣愿大王孰计之秦下甲攻卫阳晋必大关天下之匈【集解徐广曰关一作开索隐以常山为天下脊则此卫及阳晋当天下胷盖其地是秦晋齐楚之交道也以言秦兵据阳晋是大关天下胷则他国不得动也】大王悉起兵以攻宋不至数月而宋可举举宋而东指则泗上十二诸侯尽王之有也【索隐边近泗水之侧当战国之时有十二诸侯宋鲁邾莒之比也】凡天下而以信约从亲相坚者苏秦封武安君相燕即陰与燕王谋伐破齐而分其地

乃详有罪出走入齐齐王因受而相之居二年而觉齐王大怒车裂苏秦於市夫以一诈伪之苏秦而欲经营天下混壹诸侯【索隐混本一作棍同胡本反】其不可成亦明矣今秦与楚接境壤界固形亲之国也大王诚能聽臣臣请使秦太子入质於楚楚太子入质於秦请以秦女为大王箕箒之妾效万室之都以为汤沐之邑长为昆弟之国终身无相攻伐臣以为计无便於此者於是楚王已得张仪而重出黔中地与秦欲许之屈原曰前大王见欺於张仪张仪至臣以为大王烹之今纵弗忍杀之又聽其邪说不可怀王曰许仪而得黔中美利也後而倍之不可故卒许张仪与秦亲张仪去楚因遂之韩说韩王曰韩地险恶山居五谷所生非菽而麦民之食大抵饭菽藿羹一岁不收民不餍糟糠地不过九百里无二岁之食料大王之卒悉之不过三十万而厮徒负养在其中矣【索隐厮徒谓杂役之贱者负养谓负担以给养公家亦贱人也】除守徼亭鄣塞见卒不过二十万而已矣秦带甲百余万车千乘骑万匹虎贲之士跼蹐科头【集解駟案跼蹐音徒俱跳跃也又云偏举一足曰跼蹐科头谓不着兜鍪入敌索隐跼又音劬战国策作虎摯之士】贯颐奋戟者至不可胜计【集解駟案言执戟奋怒而入陈也正义两手捧颐而直入敌言其勇也又有执戟者奋怒而趋入阵也】秦马之良戎兵之衆探前踈後蹄间三寻【索隐谓马前足探向前後足踈於後踈音乌穴反踈谓後足抉地言马之走势疾也七尺曰寻言马走之疾前後蹄间一掷而过三寻也】腾者不可胜数山东之士被甲蒙胄以会战秦人捐甲徒裼以趋敌【索隐徒跣也裼袒也谓袒而见肉也】左挈人头右挟生虏夫秦卒与山东之卒犹孟贲之与怯夫以重力相压犹乌获之与婴儿夫战孟贲乌获之士以攻不服之弱国无异垂千钧之重於鸟卵之上必无幸矣夫羣臣诸侯不料地之寡而聽从人之甘言好辞比周以相饰也皆奋曰聽吾计可以强霸天下夫不顾社稷之长利而聽须臾之说诳误人主无过此者大王不事秦秦下甲据宜阳断韩之上地东取成臯荥阳则鸿台之宫桑林之苑【集解徐广曰桑一作栗索隐此皆韩之宫苑亦见战国策】非王之有也夫塞成臯絶上地则王之国分矣先事秦则安不事秦则危夫造祸而求其福报计浅而怨深逆秦而顺楚虽欲毋亡不可得也故为大王计莫如为【集解駟案于伪反】秦秦之所欲莫如弱楚而能弱楚者莫如韩非以韩能强於楚也其地势然也今王西面而事秦以攻楚秦王必喜夫攻楚以利其地转祸而说秦计无便於此者韩王聽仪计张仪归报秦惠王封仪五邑号曰武信君使张仪东说齐湣王曰天下强国无过齐者大臣父兄殷衆富乐然而为大王计者皆为一时之说不顾百世之利从人说大王者必曰齐西有强赵南有韩与梁齐负海之国也地广民衆兵强士勇虽有百秦将无奈齐何大王贤其说而不计其实夫从人朋党比周莫不以从为可臣闻之齐与鲁三战而鲁三胜国以危亡随其从虽有战胜之名而有亡国之实是何也齐大而鲁小也今秦之与齐也犹齐之与鲁也秦赵战於河漳之上再战而赵再胜秦战於番吾之下再战又胜秦【索隐番音盘又音婆赵之邑也】四战之後赵之亡卒数十万邯鄲仅存虽有战胜之名而国已破矣是何也秦强而赵弱今秦楚嫁女娶妇为昆弟之国韩献宜阳梁效河外【索隐河外河之南邑若曲沃平周等也正义谓同华州地也】赵入朝澠【集解駟案绵善反】池割河间以事秦【索隐河漳之间邑割以事秦耳正义河间瀛州县】大王不事秦秦驱韩梁攻齐之南地悉赵兵渡清河指博关【正义博关在博州赵兵从贝州度黄河指博关则漯河南临淄即墨危矣】临菑即墨非王之有也国一日见攻虽欲事秦不可得也是故愿大王孰计之也齐王曰齐僻陋隐居东海之上未尝闻社稷之长利也乃许张仪张仪去西说赵王曰敝邑秦王使使臣効愚计於大王大王收率天下以宾秦秦兵不敢出函谷关十五年大王之威行於山东敝邑恐惧慑伏繕甲厉兵饰车骑【正义饰音

勅】习驰射力田积粟守四封之内愁居慑处不敢动摇唯大王有意督过之也【索隐督者正其事而责之督过是深责其过也】今以大王之力举巴蜀并汉中包两周迁九鼎守白马之津秦虽僻远然而心忿含怒之日久矣今秦有敝甲凋兵军於渑池愿渡河踰漳据番吾会邯鄲之下愿以甲子合战以正殷纣之事敬使使臣先闻左右凡大王之所信为从者恃苏秦苏秦荧惑诸侯以是为非以非为是欲反齐国而自令车裂於市夫天下之不可一亦明矣今楚与秦为昆弟之国而韩梁称为东藩之臣齐献鱼盐之地此断赵之右臂也夫断右臂而与人鬪失其党而孤居求欲毋危岂可得乎今秦发三将军其一军塞午道【索隐此午道当在赵之东齐之西也午道地名也郑玄云一纵一横为午谓交道也】告齐使兴师渡清河军於邯鄲之东一军军成臯驱韩梁军於河外【正义河外谓郑滑州北临河】一军军於渑池约四国为一以攻赵赵服必四分其地是故不敢匿意隐情先以闻於左右臣窃为大王计莫如与秦王遇於渑池面相见而口相结请案兵无攻愿大王之定计赵王曰先王之时奉阳君专权擅势蔽欺先王独擅綰事寡人居属师傅不与国谋计先王弃羣臣寡人年幼奉祀之日新心固窃疑焉以为一从不事秦非国之长利也乃且愿变心易虑割地谢前过以事秦方将约车趋行【正义趋音趣】适闻使者之明诏赵王许张仪张仪乃去北之燕说燕昭王曰大王之所亲莫如赵昔赵襄子尝以其姊为代王妻欲并代约与代王遇於句注之塞【正义句注山在代州也上音勾】乃令工人作为金斗长其尾【索隐斗音主凡方者为斗若安长柄则名为杼音主尾即斗之柄其形若刀者是也】令可以击人与代王饮陰告厨人曰即酒酣乐进热啜【索隐音昌悦反谓热而啜之是羹也下云厨人进斟斟谓羹汁故名汁曰斟左氏传公羊传云羊羹不斟是也】反斗以击之【正义反斗即倒柄击也】於是酒酣乐进热啜厨人进斟因反斗以击代王杀之王脑涂地其姊闻之因摩笄以自刺故至今有摩笄之山【集解駟案笄妇人之首饰如今象牙搔正义笄今簪也摩笄山在蔚州飞狐县东北百五十里】代王之亡天下莫不闻夫赵王之狼戾无亲大王之所明见且以赵王为可亲乎赵兴兵攻燕再围燕都而劫大大王割十城以谢今赵王已入朝渑池効河间以事秦今大王不事秦秦下甲云中九原驱赵而攻燕则易水长城【正义并在易州界】非大王之有也且今时赵之於秦犹郡县也不敢妄举师以攻伐今王事秦秦王必喜赵不敢妄动是西有强秦之援而南无齐赵之患是故愿大王孰计之燕王曰寡人蛮夷僻处虽大男子裁【集解駟案音在】如婴儿言不足以采正计今上客幸教之请西面而事秦献恒山之尾五城【索隐尾犹未也谓献恒山之末五城以与秦】燕王聽仪仪归报未至咸阳而秦惠王卒武王立武王自为太子时不说张仪及即位羣臣多谗张仪曰无信左右卖国以取容秦必复用之恐为天下笑诸侯闻张仪有郤武王皆畔衡复合从秦武王元年羣臣日夜恶张仪未已而齐让又至张仪惧诛乃因谓秦武王曰仪有愚计愿効之王曰奈何对曰为秦社稷计者东方有大变然後王可以多割得地也今闻齐王甚憎仪仪之所在必兴师伐之故仪愿乞其不肖之身之梁齐必兴师而伐梁梁齐之兵连於城下而不能相去王以其间伐韩入三川出兵函谷而毋伐以临周祭器必出【索隐凡王者大祭祀必陈设文物轩车彝器等因谓此为祭器也】挟天子按图籍此王业也秦王以为然乃具革车三十乘入仪之梁齐果兴师伐之梁哀王恐张仪曰王勿患也请令罢齐兵乃使其舍人冯喜之楚【索隐此与战国策同旧本作烹误也】借使之齐谓齐王曰王甚憎张仪虽然亦厚矣王之托仪於秦也齐王曰寡人憎仪仪之所在必兴师伐之何以托仪对曰是乃王之托仪也夫仪之出也固与秦王约曰为王计者东方有大变然後王可以多割得地今齐王甚憎仪仪之所在必兴师伐之故仪愿乞其不肖之身之梁齐必兴师

伐之齐梁之兵连於城下而不能相去王以其间伐韩入三川出兵函谷而无伐以临周祭器必出挟天子案图籍此王业也秦王以为然故具革车三十乘而入之梁也今仪入梁王果伐之是王内罢国而外伐与国【索隐谓齐之伐梁也梁之与齐先相许与约从为邻故云与国也】广邻敌以内自临而信仪於秦王也此臣之所谓托仪也齐王曰善乃使解兵张仪相魏一岁卒於魏也【索隐年表云张仪以安王十年卒纪年云梁哀王九年五月卒】

陈轸者游说之士与张仪俱事秦惠王皆贵重争宠张仪恶陈轸於秦王曰轸重币轻使秦楚之间将为国交也今楚不加善於秦而善轸者轸自为厚而为王薄也且轸欲去秦而之楚王胡不聽乎王谓陈轸曰吾闻子欲去秦之楚有之乎轸曰然王曰仪之言果信矣轸曰非独仪知之也行道之士尽知之矣昔子胥忠於其君而天子争以为臣曾参孝於其亲而天下愿以为子故卖仆妾不出闾巷而售者良仆妾也出妇嫁於乡曲者良妇也今轸不忠其君楚亦何以轸为忠乎忠且见弃轸不之楚何归乎王以其言为然遂善待之居秦期年秦惠王终相张仪而陈轸奔楚楚未之重也而使陈轸使於秦过梁欲见犀首犀首谢弗见轸曰吾为事来公不见轸轸将行不得待【索隐轸语犀首言我故来欲有教汝之事何不相见】异日犀首见之陈轸曰公何好饮也犀首曰无事也曰吾请令公餮事可乎【索隐餮一艷反餮者饱也谓欲令其多事】曰奈何曰田需约诸侯从亲【索隐需时为魏相】楚王疑之未信也公谓於王曰臣与燕赵之王有故数使人来曰无事何不相见愿谒行於王王虽许公公请毋多车以车三十乘可陈之於庭明言之燕赵燕赵客闻之驰车告其王使人迎犀首楚王闻之大怒曰田需与寡人约而犀首之燕赵是欺我也怒而不聽其事齐闻犀首之北使人以事委焉犀首遂行三国相事皆断於犀首轸遂至秦韩魏相攻葦年不解秦惠王欲救之问於左右左右或曰救之便或曰勿救便惠王未能为之决陈轸适至秦惠王曰子去寡人之楚亦思寡人不陈轸对曰王闻夫越人庄舄乎王曰不闻曰越人庄舄仕楚执珪有顷而病楚王曰舄故越之鄙细人也今仕楚执珪贵富矣亦思越不中谢【索隐谓侍御之官也】对曰凡人之思故在其病也彼思越则越声不思越则楚声使人往聽之犹尚越声也今臣虽弃逐之楚岂能无秦声哉惠王曰善今韩魏相攻葦年不解或谓寡人救之便或曰勿救便【索隐此张仪等计策】寡人不能决愿子为子主计之【索隐子指陈轸也子主谓楚王也】余为寡人计之陈轸对曰亦尝有以夫卞庄子刺虎闻於王者乎【索隐战国策作馆庄子馆谓逆旅舍其人字庄子或作卞庄子】庄子欲刺虎馆竖子止之曰两虎方且食牛食甘必争争则必鬪鬪则大者伤小者死从伤而刺之一举必有双虎之名卞庄子以为然立须之有顷两虎果鬪大者伤小者死庄子从伤者而刺之一举果有双虎之功今韩魏相攻葦年不解是必大国伤小国亡从伤而伐之一举必有两实此犹庄子刺虎之类也臣主与王何异也【索隐臣主谓轸之主楚王也王秦惠王以言我主与王俱宜待韩魏之毙而击之亦无以异也】惠王曰善卒弗救大国果伤小国亡秦兴兵而伐大剋之此陈轸之计也

犀首者魏之陰晋人也【集解司马彪曰犀首魏官名若今虎牙将军】名衍姓公孙氏与张仪不善张仪为秦之魏魏王相张仪犀首弗利故令人谓韩公叔曰张仪已合秦魏矣其言曰【正义此张仪合秦魏之辞】魏攻南阳秦攻三川魏王所以贵张子者欲得韩地也且韩之南阳已举矣子何不少委焉以为衍功则秦魏之交可错矣【索隐错音措错停止也】然则魏必图秦而弃仪收韩而相衍公叔以为便因委之犀首以为功果相魏张仪去【集解徐广

曰复相秦】义渠君朝於魏犀首闻张仪复相秦害之犀首乃谓义渠君曰道远不得复过【索隐音戈言义渠道远今日已後不复得更过相见也】请谒事情【索隐谓欲以秦之缓急告语之也】曰中国无事【索隐谓山东诸侯齐魏之六国正义中国谓关东六国无事不共攻秦】秦得烧掇焚杆【集解徐广曰一孤切索隐掇音都活反谓焚烧而侵掠也焚杆音烦乌谓焚蹂而牵掣也战国策云且烧炳获君之国是说其事也】君之国有事【索隐谓山东诸国共伐秦也】秦将轻使重币事君之国【索隐谓秦求亲义渠君也正义有事谓六国攻秦秦苦被攻伐则必轻使重币事义渠国欲令相助犀首此言者令义渠君勿援秦也】其後五国伐秦【索隐按表秦惠王後元七年楚魏齐韩赵五国共攻秦是其事也】会陈轸谓秦王曰义渠君者蛮夷之贤君也不如赂之以抚其志秦王曰善乃以文绣千纯【索隐凡丝绵布帛等一段谓一纯音屯】妇女百人遗义渠君义渠君致羣臣而谋曰此公孙衍所谓邪【索隐谓上文犀首云君之国有事秦将轻使重币事君之国故云公孙衍之所谓因起兵袭秦以伤张仪也】乃起兵袭秦大败秦人李伯之下【索隐谓义渠破秦军於李伯之下则李伯人名或邑号战国策伯作帛】张仪已卒之後犀首入相秦尝佩五国之相印为约长【索隐犀首後相五国或从或横常为约长】

太史公曰三晋多权变之士夫言从衡强秦者大抵皆三晋之人也夫张仪之行事甚於苏秦然世恶苏秦者以其先死而仪振暴其短以扶其说【索隐暴音步卜反振谓振扬而暴露其短扶谓说彼之非成我之是扶会己之说辞也】成其衡道【索隐张仪说六国使连衡而事秦故云成其衡道然山东地形从长苏秦相六国令从亲而宾秦也关西地形衡长张仪相六国令破其从而连秦之衡故苏为合从张为连衡也】要之此两人真倾危之士哉

【索隐述赞曰仪未遭时频被困辱及相秦惠先韩後蜀连衡齐魏倾危诳惑陈轸挟权犀首骋欲如何三晋继有斯德】

史记卷七十

史记卷七十考证

张仪列传从郑至梁二百余里○【臣照】按战国策云从郑至梁不过百里从陈至梁二百余里通监地理通释曰按九域志郑州至东京一百四十里陈州至东京二百四十五里当以国策为正

则从境以东○战国策作从竟陵以东

五战而三胜○徐孚远曰越灭吴楚灭越怀王时吴之属楚久矣安得与吴人五战此言误也

且夫秦之所以不出兵函谷十五年以攻齐赵者○战国策补注云按此前二年五年六年皆有攻赵之事而攻齐则无之若云不攻齐则犹可通也

楚王大怒○徐孚远曰当言大王今言楚王亦误也热啜索隐谓热而啜之也下云厨人进斟斟谓羹汁故名汁曰斟左氏传公羊传云羊羹不斟是也○【臣照】按左传云羊羹不偏羊斟是华元之御此误引之公羊传又无此语

梁哀王恐○春秋後语作魏襄王

馆竖子止之○国策作管与止之

臣主与王何异也索隐臣主谓軫之主楚王也王秦惠王以言我主与王俱宜待韩魏之毙而击之亦无以异也○徐孚远曰軫言己之为秦王计不後于楚王也索隐言秦楚俱宜待二国之弊此说非也

其後五国伐秦○战国策补注曰按秦纪书韩赵魏燕齐帅匈奴伐秦年表韩魏赵楚燕五国伐秦不胜楚世家书苏秦约从六国共攻秦楚怀王为从长至函谷关秦击之六国皆引归齐独後互有不同

史记卷七十考证

卷七十一

钦定四库全书

史记卷七十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

樗里子甘茂列传第十一

樗里子者名疾秦惠王之弟也【索隐樗木名也音摠高诱曰其里有樗树故曰樗里然疾居渭南陰乡之樗里故号曰樗里子又纪年则谓之褚里疾】与惠王异母母韩女也樗里子滑稽多智【索隐滑音骨稽音鸡邹诞解云滑乱也稽同也谓辩捷之人言非若是言是若非谓能乱同异也一云滑稽酒器可转注吐酒不已以言俳优之人出口成章词不穷竭如滑稽之吐酒不已也正义滑读为渥水流自出稽计也言其智计宣吐如泉流出无尽故扬雄酒赋云鸱夷滑稽腹大如壶是也颜师古曰滑稽转利之称也滑乱也稽疑也其变无留也一说稽考也言其滑乱不可考较】秦人号曰智囊秦惠王八年爵樗里子右更【索隐右更秦第十四爵名】使将而伐曲沃【正义故城在陕州县西南三十二里】尽出其人【索隐年表云十一年拔魏曲沃归其人秦本纪惠文王後元八年五国共围秦使庶长疾与战修鱼斩首八万十一年樗里疾攻魏焦降之则焦与曲沃同在十一年拔明矣而传云八年拔之不同王劭按本纪年表及此传三处记秦伐国并不同又与纪年不合今殆不可参考也】取其城地入秦秦惠王二十五年使樗里子为将伐赵虏赵将军庄豹拔藺【正义藺县在石州】明年助魏章攻楚败楚将屈丐取汉中地秦封樗里子号为严君【索隐按严君是爵邑之号当是封之严道也】秦惠王卒太子武王立逐张仪魏章而以樗里子甘茂为左右丞相秦使甘茂攻韩拔宜阳使樗里子以车百乘入周周以卒迎之意甚敬楚王怒让周以其重秦客游腾为周说楚王曰【索隐游姓腾名】智伯之伐仇犹【集解许慎曰仇犹夷狄之国索隐高诱注战国策以仇酋为公由韩子作仇由地理志临淮有仇酋县也正义括地志云并州孟县外城俗名原仇山亦名仇犹夷狄之国也韩子云智伯欲伐仇犹国道险难不通乃铸大锺遗之载以广车仇犹大悦除涂内之赤章蔓支諫曰不可此小所以事大而今大以遗小卒必随不可不聽遂内之蔓支因断穀而驰至十九日而仇犹亡也】遗之广车【集解駰案战国策曰智伯欲伐仇犹遗之大锺载以广车周礼曰广车之萃郑玄曰广车横陈之车】因随之以兵仇犹遂亡何则无备故也齐桓公伐蔡号曰诛楚其实袭蔡今秦虎狼之国使樗里子以车百乘入周周以仇犹蔡观焉故使长戟居前强弩在後名曰卫疾【正义防卫樗里子】而实囚之且夫

周岂能无忧其社稷哉恐一旦亡国以忧大王楚王乃悦秦武王卒昭王立樗里子又益尊重昭王元年樗里子将伐蒲【索隐纪年云褚里疾围蒲不克而秦惠王薨事与此合正义蒲故城在滑州匡城县北十五里即子路作宰地】蒲守恐请胡衍【索隐胡衍人姓名也】胡衍为蒲谓樗里子曰公之攻蒲为秦乎为魏乎为魏则善矣为秦则不为赖矣【集解駟案赖利也】夫卫之所以为卫者以蒲也【正义蒲是卫国之鄣卫】今伐蒲入於魏卫必折而从之【索隐战国策云今蒲入於秦卫必折而入於魏与此文相反】魏亡西河之外【正义谓同华等州】而无以取者兵弱也今并卫於魏魏必强魏强之日西河之外必危矣且秦王将观公之事害秦而利魏王必罪公樗里子曰奈何胡衍曰公释蒲勿攻臣试为公入言之以德卫君樗里子曰善胡衍入蒲谓其守曰樗里子知蒲之病矣其言曰必拔蒲衍能令释蒲勿攻蒲守恐因再拜曰愿以请因效金三百斤曰秦兵苟退请必言子於卫君使子为南面故胡衍受金於蒲以自贵於卫於是遂解蒲而去还击皮氏【正义故城在绛州龙门县西百四十步魏邑】皮氏未降又去昭王七年樗里子卒葬於渭南章台之东【索隐按黄图在汉长安故城西】曰後百岁是当有天子之宫夹我墓樗里子疾室在於昭王庙西渭南陰乡樗里故俗谓之樗里子至汉兴长乐宫在其东未央宫在其西【正义汉长乐宫在长安县西北十五里未央在县西北十四里皆在长安故城中也】武库正直其墓【索隐直如字读直犹当也】秦人谚曰力则任鄙智则樗里甘茂者下蔡人也【索隐地理志下蔡县属汝南也正义今颍州县即州来国】事下蔡史举先生【索隐战国策及韩子皆云史举上蔡监门者】学百家之说因张仪樗里子而求见秦惠王王见而说之使将而佐魏章畧定汉中地惠王卒武王立张仪魏章去东之魏蜀侯煇相壮反【索隐煇音晖又音胡昆反秦之公子封蜀也华阳国志作晖壮音侧状反姓陈也】秦使甘茂定蜀还而以甘茂为左丞相以樗里子为右丞相秦武王三年谓甘茂曰寡人欲容车通三川以窥周室而寡人死不朽矣甘茂曰请之魏约以伐韩而令向壽辅行【正义向受二音人姓名】甘茂至谓向壽曰子归言之於王曰魏聽臣矣然愿王勿伐事成尽以为子功向壽归以告王王迎甘茂於息壤【索隐山海经启筮云昔伯鯀窃帝之息壤以堙洪水或是此也正义秦邑】甘茂至王问其故对曰宜阳大县也上党南阳积之久矣【索隐上党南阳并积贮日久正义韩之北三郡积贮在河南宜阳县之日久矣】名曰县其实郡也今王倍数险行千里攻之难【正义谓函谷及三崤五谷】昔曾参之处费鲁人有与曾参同姓名者杀人人告其母曰曾参杀人其母织自若也顷之一人又告之曰曾参杀人其母尚织自若也顷又一人告之曰曾参杀人其母投杼下机踰牆而走夫以曾参之贤与其母信之也三人疑之其母惧焉今臣之贤不若曾参王之信臣又不如曾参之母信曾参也疑臣者非特三人臣恐大王之投杼也始张仪西并巴蜀之地北开西河之外南取上庸天下不以多张子而以贤先王魏文侯令乐羊将而伐中山三年而拔之乐羊返而论功文侯示之谤书一篋乐羊再拜稽首曰此非臣之功也主君之力也今臣羈旅之臣也樗里子公孙奭【索隐战国策作公孙衍正义音释】二人者挟韩而议之王必聽之是王欺魏王而臣受公仲侈【集解徐广曰一作冯】之怨也王曰寡人不聽也请与子盟卒使丞相甘茂将兵伐宜阳五月而不拔樗里子公孙奭果争之武王召甘茂欲罢兵甘茂曰息壤在彼【正义甘茂归至息壤与秦王盟恐後樗里子公孙奭伐韩今二子果争之武王召茂欲罢兵故甘茂云息壤在彼邑也】王曰有之因大悉起兵使甘茂击之斩首六万遂拔宜阳韩襄王使公仲侈入谢与秦平武王竟至周而卒於周其弟立为昭王【索隐赵系家昭王名稷系本云名侧】王母宣太后楚女也楚怀王怨前秦败楚於丹阳而韩不救乃以兵围韩雍氏【索隐秦惠王二十

六年楚围雍氏至昭王七年又围雍氏韩求救於秦是再围也刘氏云此是前围雍氏当赧王之七年战国策及纪年与此并不同正义故域在洛州洛阳县东北二十里】韩使公仲侈告急於秦秦昭王新立太后楚人不肯救公仲因甘茂茂为韩言於秦昭王曰公仲方有得秦救故敢扞楚也今雍氏围秦师不下穀公仲且仰首而不朝公叔且以国南合於楚楚韩为一魏氏不敢不聽然则伐秦之形成矣不若坐而待伐孰与伐人之利秦王曰善乃下师於穀以救韩楚兵去秦使向壽平宜阳而使樗里子甘茂伐魏皮氏向壽者宣太后外族也而与昭王少相长故任用向壽如楚【集解徐广曰如一作和】楚闻秦之贵向壽而厚事向壽向壽为秦守宜阳将以伐韩韩公仲使苏代谓向壽曰禽困覆车【集解駰案譬禽兽得困急犹能抵触倾覆人车】公破韩辱公仲公仲收国复事秦自以为必可以封【正义公仲自以为必可得秦封】今公与楚解口地【索隐解口秦地名近韩今将与楚也正义上纪买反公向壽也解口犹开口得言向壽於秦开口则楚人必得封地也】封小令尹以杜阳【索隐又封楚之小令尹以杜阳杜阳秦之地今以封楚令尹是秦楚相合也】秦楚合复攻韩韩必亡韩亡公仲且躬率其私徒以阨【集解駰案乌合反】於秦【正义公仲恐韩亡欲将私徒往宜阳阨向壽也】愿公熟虑之也向壽曰吾合秦楚非以当韩也子为壽谒之公仲【正义子苏代也向壽恐令苏代谒报公仲云秦韩交可合】曰秦韩之交可合也苏代对曰愿有谒於公【正义公向壽也言向壽亦党於楚与公孙奭甘茂党韩魏同也】人曰贵其所以贵者贵王之爱习公也不如公孙奭其智能公也不如甘茂今二人者皆不得亲於秦事而公独与王主断於国者何彼有以失之也【索隐彼言公孙奭及甘茂也有以失之谓不见委任情有所失正义言秦王虽爱习公孙奭甘茂秦事不亲委者谓党韩魏也今国事独与向壽主断者不知壽党於楚以事秦王有以失之也】公孙奭党於韩而甘茂党於魏故王不信也今秦楚争强而公党於楚是与公孙奭甘茂同道也公何以异之【正义苏氏云向壽与公孙奭甘茂皆有党言无异也一云改异党楚之意】人皆言楚之善变也而公必亡之是自为责也【正义楚善变改不可信若变改向壽必亡败是自为责】公不如与王谋其变也善韩以备楚如此则无患矣【正义令秦亲韩而备楚之变改则向壽无患矣】韩氏必先以国从公孙奭而後委国於甘茂韩公之讐也【正义韩氏必先委二人故韩为向壽之讐】今公言善韩以备楚是外举不辟讐也向壽曰然吾甚欲韩合对曰甘茂许公仲以武遂【集解徐广曰秦昭王元年予韩武遂】反宜阳之民【正义武遂宜阳本韩邑也秦伐取之今欲还韩令其民得反归居之】今公徒收之甚难【正义苏代言甘茂许公仲以武遂又归宜阳之民今向壽徒拟收之甚难事也】向壽曰然则奈何武遂终不可得也对曰公奚不以秦为韩求颍川於楚【正义颍川许州也楚侵韩颍川苏代令向壽以秦威重为韩就楚求索颍川是亲向壽】此韩之寄地也公求而得之是令行於楚而以其地德韩也公求而不得是韩楚之怨不解【集解駰案已买反】而交走秦也【索隐韩楚怨不解二国交走向秦也】秦楚争强而公徐过楚以收韩此利於秦【集解徐广曰过一作适正义若二国皆事秦公则渐说楚之过失以收韩此利於秦也】向壽曰奈何对曰此善事也甘茂欲以魏取齐公孙奭欲以韩取齐今公取宜阳以为功收楚韩以安之而诛齐魏之罪【正义言公孙奭甘茂皆欲以秦挟韩魏而取齐今向壽取宜阳为功收楚韩安以事秦而责齐魏之罪是公孙奭甘茂不得同合韩魏於秦以伐齐也】是以公孙奭甘茂无事也甘茂竟言秦昭王以武遂复归之韩【正义年表云秦昭王元年予韩武遂也】向壽公孙奭争之不能得向壽公孙奭由此怨谗甘茂茂惧辍伐魏蒲阪亡去【集解徐广曰昭王元年击魏皮氏未拔去】樗里子与魏讲罢兵【索隐邹氏云讲读曰媾媾犹和

】甘茂之亡秦奔齐逢苏代代为齐使於秦甘茂曰臣得罪於秦惧而遯逃无所容迹臣闻贫人女与富人女会绩贫人女曰我无以买烛而子之烛光幸有余子可分我余光无损子明而得一斯便焉今臣困而君方使秦而当路矣茂之妻子在焉愿君以余光振之苏代许诺遂致使於秦已因说秦王曰甘茂非常士也其居於秦累世重矣自殽塞及至鬼谷【集解徐广曰在阳城索隐鬼谷在关内云阳是也正义三殽在洛州永宁县西北】其地形险易皆明知之彼以齐约韩魏反以图秦非秦之利也秦王曰然则奈何苏代曰王不若重其厚其禄以迎之使彼来则置之鬼谷【正义刘伯庄云此鬼谷关内云阳非阳城者也按阳城鬼谷时属韩秦不得言置之】终身勿出秦王曰善即赐之上卿以相印迎之於齐甘茂不往苏代谓齐湣王曰夫甘茂贤人也今秦赐之上卿以相印迎之甘茂德王之赐好为王臣故辞而不往今王何以礼之齐王曰善即位之上卿而处之【索隐处犹留也】秦因复甘茂之家【正义复音福】以市於齐齐使甘茂於楚楚怀王新与秦合而驩【集解徐广曰昭王二年时迎妇於楚】而秦闻甘茂在楚使人谓楚王曰愿送甘茂於秦楚王问於范蠡【集解徐广曰一作蠡索隐休缘反又音休软反战国策一作蠡字】曰寡人欲置相於秦孰可对曰臣不足以识之楚王曰寡人欲相甘茂可乎对曰不可夫史举下蔡之监门也大不为事君小不为家室以苟贱不廉闻於世甘茂事之顺焉故惠王之明武王之察张仪之辩而甘茂事之取十官而无罪茂诚贤者也然不可相於秦夫秦之有贤相非楚国之利也且王前尝用召滑於越【集解徐广曰滑一作涓】而内行章义之难【索隐召滑内心猜诈外则佯章恩义而卒包藏祸心构难於楚战国策云内句章昧之难也】越国乱故楚南塞厉门【集解徐广曰一作濞胡正义刘伯庄云厉门度岭南之要路】而郡江东【正义吴越之城皆为楚之都邑】计王之功所以能如此者越国乱而楚治也今王知用诸越而忘用诸秦臣以王为钜过矣然则王若欲置相於秦则莫若向壽者可夫向壽之於秦王亲也少与之同衣长与之同车以聽事王必相向壽於秦则楚国之利也於是使使请秦相向壽於秦秦卒相向壽而甘茂竟不得复入秦卒於魏甘茂有孙曰甘罗

甘罗者甘茂孙也茂既死後甘罗年十二事秦相文信侯吕不韦【索隐战国策甘罗事吕不韦为庶子】秦始皇帝使刚成君蔡泽於燕三年而燕王喜使太子丹入质於秦秦使张唐往相燕欲与燕共伐赵以广河间之地张唐谓文信侯曰臣尝为秦昭王伐赵赵怨臣曰得唐者与百里之地今之燕必经赵臣不可以行文信侯不快未有以强也甘罗曰君侯何不快之甚也文信侯曰吾令刚成君蔡泽事燕三年燕太子丹已入质矣吾自请张卿相燕而不肯行【索隐即张唐也卿字也】甘罗曰臣请行之文信侯叱曰去我身自请之而不肯女焉能行之【正义女音汝焉乙连反】甘罗曰夫项橐生七岁为孔子师【索隐橐音托尊其道故云项橐】今臣生十二岁於兹矣君其试臣何遽叱乎於是甘罗见张卿曰卿之功孰与武安君卿曰武安君南挫强楚北威燕赵战胜攻取破城堕邑不知其数臣之功不如也甘罗曰应侯之用於秦也孰与文信侯专【索隐应侯范雎也】张卿曰应侯不如文信侯专甘罗曰卿明知其不如文信侯专与曰知之甘罗曰应侯欲攻赵武安君难之去咸阳七里而立死於杜邮今文信侯自请卿相燕而不肯行臣不知卿所死处矣张唐曰请因孺子行令装治行行有日甘罗谓文信侯曰借臣车五乘请为张唐先报赵文信侯乃入言之於始皇曰昔甘茂之孙甘罗年少耳然名家之子孙诸侯皆闻之今者张唐欲称疾不肯行甘罗说而行之今愿先报赵请许遣之始皇召见使甘罗於赵赵襄王郊迎甘罗甘罗说赵王曰王闻燕太子丹入质秦欤曰

闻之曰闻张唐相燕欤曰闻之燕太子丹入秦者燕不欺秦也张唐相燕者秦不欺燕也燕秦不相欺者伐赵危矣燕秦不相欺无异故欲攻赵而广河间王不如齎臣五城以广河间【索隐齎音侧奚反一音賁并谓割五城与臣也】请归燕太子与强赵攻弱燕赵王立自割五城以广河间秦归燕太子赵攻燕得上谷三十城【索隐战国策云得三十六县正义上谷今妫州也在幽州西北】令秦有十一【索隐谓以十一城与秦也】甘罗还报秦乃封甘罗为上卿复以始甘茂田宅赐之

太史公曰樗里子以骨肉重固其理而秦人称其智故颇采焉甘茂起下蔡闻阎显名诸侯重强齐楚【集解徐广曰恐或疑此当云见重强齐误脱一字正义甘茂为强齐楚所重】甘罗年少然出一奇计声称後世虽非笃行之君子然亦战国之策士也方秦之强时天下尤趋谋诈哉

【索隐述赞曰严君名疾厥号智囊既亲且重称兵外攘甘茂并相初佐魏章始推向壽乃攻宜阳甘罗妙岁卒起张唐】

史记卷七十一

史记卷七十一考证

樗里子甘茂列传虜赵将军庄豹○秦本纪作虜赵将庄

今伐蒲入於魏卫必折而从之○顾炎武曰此文误当依索隐所引战国策文为正

蜀侯煇相壮反○【臣照】按华阳国志秦灭蜀封公子通为蜀侯以陈壮为相壮反杀蜀侯通秦诛壮封子煇为蜀侯煇为後母所譖自杀与此异

不如公孙奭○奭战国策作郝

则置之鬼谷○【臣照】按战国策作槐谷补注曰春秋後语注槐里之谷今京兆始平之地与此异

史记卷七十一考证

卷七十二

钦定四库全书

史记卷七十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

穰侯列传第十二

穰侯魏冉者秦昭王母宣太后弟也【索隐宣太后之异父长弟也姓魏名冉封之穰地理志穰县在南阳宣太后者惠王之妃姓芈氏曰芈八子也】其先楚人姓芈氏【正义芈亡尔反】秦武王卒无子立其弟为昭王昭王母故号为芈八子及昭王即位芈八子号为宣太后宣太后非武王母武王母号曰惠文后先武王死【索隐秦本纪云昭王二年庶长壮与大臣公子为逆皆诛及惠文后皆不得良死又按纪年云秦内乱杀其太后及公子雍公子壮是也】宣太后二弟其异父长弟曰穰侯姓魏氏名冉同父弟曰芈戎为华阳君【索隐华阳韩地後属秦芈戎後又号新城君正义司马彪云华阳亭名在洛州密县又故华城在郑州管城县南三十里即此】而昭王同母弟曰高陵君【索隐名显】泾阳君【索隐名悝】而魏冉取贤自惠王武王时任职用事武王卒诸弟争立唯魏冉力为能立昭王昭王即位以冉为将军卫咸阳诛季君之乱【集解徐广曰年表曰季君为乱诛本纪曰庶长壮与大臣公子谋反伏诛索隐按季君即公子壮僭立而号曰季君穰侯力能立昭王为将军卫咸阳诛季君及惠文后故本纪言伏诛又云及惠文后皆不得良死盖谓惠文后时党公子壮欲立之及壮诛而太后忧死故云不得良死亦史讳之也又逐武王后出之魏亦事势然耳】而逐武王后出之魏昭王诸兄弟不善者皆灭之威振秦国昭王少宣太后自治任魏冉为政昭王七年樗里子死而使泾阳君质於齐赵人楼缓来相秦赵不利乃使仇液之秦【索隐战国策作仇郝盖是一人而记别也正义音亦姓名】请以魏冉为秦相仇液将行其客宋公【索隐战国策作宋交】谓液曰秦不聽公楼缓必怨公公不若谓楼缓曰请为公母急秦秦王见赵请相魏冉之不急且不聽公公言而事不成以德楼子事成魏冉故德公矣於是仇液从之而秦果免楼缓而魏冉相秦欲诛吕礼礼出奔齐昭王十四年魏冉举白起使代向壽将而攻韩魏败之伊阙斩首二十四万虜魏将公孙喜明年又取楚之宛叶魏冉谢病免相以客卿壽烛为相其明年烛免复相冉乃封魏冉於穰复益封陶【集解徐广曰一作陰索隐陶即定陶也徐广云作陰陶陰字本易惑也王劭案定陶见有魏冉冢作陰误也】号曰穰侯穰侯封四岁为秦将攻魏魏献河东方四百里拔魏之河内取城大小六十余昭王十九年秦称西帝齐称东帝月余吕礼来

而齐秦各复归帝为王魏冉复相秦六岁而免免二岁复相秦四岁而使白起拔楚之郢秦置南郡乃封白起为武安君白起者穰侯之所任举也相善於是穰侯之富富於王室昭王三十二年穰侯为相国将兵攻魏走芒卯【集解駰案上莫卯反下陌饱反】入北宅【集解徐广曰魏惠王五年与韩会宅阳正义竹书云宅阳一名北宅括地志云宅阳故城在郑州荥阳县西南十七里】遂围大梁梁大夫须贾说穰侯曰臣闻魏之长吏谓魏王曰昔梁惠王伐赵战胜三梁【集解徐广曰田完世家云魏伐赵赵不利战於南梁索隐三梁即南梁也】拔邯鄲赵氏不割而邯鄲复归齐人攻卫拔故国杀子良【索隐卫之故国盖楚丘也下文故地亦同谓楚丘也战国策卫字皆作燕子良作子之恐非也】卫人不割而故地复反卫赵之所以国全兵劲而地不并於诸侯者以其能忍难而重出地也宋中山数伐割地而国随以亡臣以为卫赵可法而宋中山可为戒也秦贪戾之国也而母亲蚕食魏氏又尽晋国【索隐河西河东河内并是魏地即故晋国今言秦蚕食魏氏尽晋国之地也】战胜暴子【集解徐广曰韩将暴鸢】割八县地未毕入兵复出矣夫秦何馱之有哉今又走芒卯入北宅此非敢攻梁也且劫王以求多割地王必勿聽也今王背楚赵而讲秦【索隐讲和也】楚赵怒而去王与王争事秦秦必受之秦挟楚赵之兵以复攻梁则国求无亡不可得也愿王之必无讲也王若欲讲少割而有质不然必见欺【索隐谓与秦欲讲少割地而求秦质子恐不然必被秦欺也】此臣之所闻於魏也【索隐须贾说穰侯言魏人谓梁王若少割而求质必是欺我即闻魏见欺於秦也】愿君王之以是虑事也周书曰惟命不于常此言幸之不可数也夫战胜暴子割八县此非兵力之精也又非计之工也天幸为多矣今又走芒卯入北宅以攻大梁是以天幸自为常也智者不然臣闻魏氏悉其百县胜甲以上戍大梁臣以为不下三十万以三十万之衆守梁七仞之城【集解駰案小尔雅曰四足谓之仞倍仞谓之寻】臣以为汤武复生不易攻也夫轻背楚赵之兵陵七仞之城战三十万之衆而志必举之臣以为自天地始分以至于今未尝有者也攻而不拔秦兵必罢陶邑必亡【索隐陶一作魏言秦前攻得魏之城邑秦罢则亡而还於魏也正义定陶近大梁穰侯攻梁兵疲定陶必为魏伐】则前功必弃矣今魏氏方疑可以少割收也【索隐贾引魏人之说不许王讲於秦是言魏氏方疑可以少割地而收魏也】愿君逮楚赵之兵未至於梁亟以少割收魏魏方疑而得以少割为利必欲之则君得所欲矣楚赵怒於魏之先已也必争事秦从以此散【索隐楚赵怒魏之与秦讲皆争事秦是东方从国於是解散也正义从足松反】而君後择焉且君之得地岂必以兵哉割晋国秦兵不攻而魏必效绛安邑又为陶开两道【索隐穰侯封陶魏效绛与安邑是得河东地言从秦适陶开河西河东之两道正义穰故封定陶故宋及单父是陶之南道也魏之安邑及绛是陶北道】几尽故宋【索隐几音祈此时宋已灭是秦将尽得宋地也】卫必效单父秦兵可全而君制之何索而不得何为而不成愿君熟虑之而无行危【索隐言莫行围梁之危事】穰侯曰善乃罢梁围【正义表云魏安厘王二年秦军大梁城韩来救与秦温以和也】明年魏背秦与齐从亲秦使穰侯伐魏斩首四万走魏将暴鸢得魏三县穰侯益封明年穰侯与白起客卿胡伤复攻赵韩魏破芒卯於华阳下斩首十万取魏之卷【集解駰案丘权反】蔡阳长社赵氏观津且与赵观津益赵以兵伐齐【索隐既得观津仍令赵伐齐而秦又以兵益助赵也】齐襄王惧使苏代为齐陰遗穰侯书曰臣闻往来者言曰秦将益赵甲四万以伐齐臣窃必之弊邑之王曰【索隐告齐王言秦必定不益兵以助赵正义臣苏代也必知秦与赵甲四万以伐齐王谓齐王也】秦王明而熟於计穰侯智而习於事必不益赵甲四万以伐齐是何也夫三晋之相与也秦之深讐也百相背也百相欺也不为不信不为无行今破齐以肥赵赵秦

之深讐不利於秦此一也秦之謀者必曰破齊弊晉楚【正義今晉楚伐齊晉楚之國亦弊敗】而後制晉楚之勝夫齊罷國也以天下攻齊如以千鈞之弩決潰癰也必死安能弊晉楚此二也秦少出兵則晉楚不信也多出兵則晉楚為制於秦齊恐不走秦必走晉楚此三也秦割齊以啖晉楚晉楚案之以兵秦反受敵此四也是晉楚以秦謀齊以齊謀秦也何晉楚之智而秦齊之愚此五也故得安邑以善事之亦必無患矣秦有安邑韓氏必無上黨矣取天下之腸胃與出兵而懼其不反也孰利臣故曰秦王明而熟於計穰侯智而習於事必不益趙甲四萬以伐齊矣於是穰侯不行引兵而歸昭王三十六年相國穰侯言客卿竈欲伐齊取剛壽【集解徐廣曰濟北有剛縣正義故剛城在兗州糞丘縣界壽張鄆州縣也】以廣其陶邑於是魏人范雎自謂張祿先生讐穰侯之伐齊乃越三晉以攻齊也以此時奸說秦昭王昭王於是用范雎范雎言宣太后專制穰侯擅權於諸侯涇陽君高陵君之屬太侈富於王室於是秦昭王悟乃免相國令涇陽之屬皆出關就封邑穰侯出關輜車千乘有余穰侯卒於陶而因葬焉秦復收陶為郡太史公曰穰侯昭王親舅也而秦所以東益地弱諸侯嘗稱帝於天下天下皆西鄉稽首者穰侯之功也及其貴極富溢一夫開說身折勢奪而以憂死況於羈旅之臣乎

【索隱述贊曰穰侯智識應變無方內倚太后外輔昭王四登相位再列封疆摧齊撓楚破魏圍梁一夫開說憂憤而亡】

史記卷七十二

史記卷七十二考證

穰侯列傳戰勝暴子○戰國策作鞏子

此臣之所聞於魏也索隱須賈說穰侯言魏人謂梁王若少割而求質必是欺我即聞魏見欺於秦也○董份曰自臣聞至不然必見欺皆須賈述衛人之言故結之曰此臣之所聞于魏也言其所聞于魏之言如此也詞意極明索隱解謬

穰侯與白起客卿胡傷復攻趙韓魏破芒卯於華陽下○戰國策校注曰大事記華陽之役秦救韓而击趙魏年表列傳或云得三晉將或云攻趙韓魏皆記者之誤

斬首十萬○秦本紀作十五萬

史記卷七十二考證

卷七十三

钦定四库全书

史记卷七十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

白起王翦列传第十三

白起者郿人也【正义郿音眉岐州县】善用兵事秦昭王昭王十三年而白起为左庶长将而擊韩之新城【索隐在河南也正义今洛州伊阙】是岁穰侯相秦举任鄙以为汉中守其明年白起为左更攻韩魏於伊阙【正义今洛城南十九里伊阙山号曰龙门是也】斩首二十四万又虏其将公孙喜拔五城起迁为国尉【正义言太尉】涉河取韩安邑以东到乾河【集解徐广曰音干駰案郭璞曰今河东闻喜县东北有乾河口因名乾河里但有故沟处无复水也索隐魏以安邑入秦然安邑以东至乾河皆韩故地故云取韩安邑】明年白起为大良造攻魏拔之取城小大六十一明年起与客卿错攻垣城拔之【集解徐广曰河东垣县】後五年白起攻赵拔光狼城【索隐地理志不载光狼城盖属赵国正义光狼故城在泽州高平县西二十五里也】後七年白起攻楚拔鄢邓五城【集解徐广曰昭王二十八年正义鄢邓二邑在襄州】其明年攻楚拔郢烧夷陵【正义夷陵今硤州郭下县】遂东至竟陵【正义故城在郢州长寿县南百五十里今复州亦是其地也】楚王亡去郢东走徙陈秦以郢为南郡白起迁为武安君武安君因取楚定巫黔中郡昭王三十四年白起攻魏拔华阳走芒卯而虏三晋将斩首十三万与赵将贾偃战沉其卒二万人於河中昭王四十三年白起攻韩陉城【正义陉城故城在曲沃县西北二十里在绛州东北三十五里也】拔五城斩首五万四十四年白起攻南阳太行道絶之【集解徐广曰此南阳河内修武是也正义案南阳属韩秦攻之则韩太行羊肠道絶矣】四十五年伐韩之野王【索隐地理志野王县属河内在太行东南孟康曰古邢国也】野王降秦上党道絶其守冯亭与民谋曰郑道已絶【集解徐广曰河南新郑韩之国都也索隐郑国即韩之都在河南秦伐野王是上党归韩之道絶也】韩必不可得为民秦兵日进韩不能应不如以上党归赵赵若受我秦怒必攻赵赵被兵必亲韩韩赵为一则可以当秦因使人报赵赵孝成王与平原君平原君计之【索隐平原君未详何人】平原君曰不如勿受受之祸大於所得平原君曰无故得一郡受之便赵受之因封冯亭为华阳君【正义常山一名华阳解在赵世家】四十六年秦攻韩缙氏蔺【集解徐广曰属颍川索隐今其地阙西河别有蔺县也正义按检诸地记颍川无蔺括地志云洛州嵩县本夏之

纶国也在缙氏东南六十里地理志云纶氏属潞川郡按既攻缙氏蒯二邑合相近恐纶蒯声相似字随音而转作蒯】拔之四十七年秦使左庶长王齕【集解駟案音紇】攻韩取上党上党民走赵赵军长平【集解徐广曰在兹氏索隐地理志兹氏今在上党郡也正义长平故城在泽州高平县西北一里也】以按据上党民【索隐谓屯兵长平以据援上党】四月齕因攻赵赵使廉颇将赵军士卒犯秦斥兵【索隐谓犯秦之斥兵也】秦斥兵斩赵裨将茄【索隐音加裨将名】六月陷赵军取二鄣四尉【索隐鄣堡城尉官也正义括地志云赵鄣故城一名都尉城今名赵东城在泽州高平县西二十五里又有故谷城此二城即二鄣也】七月赵军筑垒壁而守之秦又攻其垒取二尉败其阵【集解徐广曰一作乘】夺西垒壁【正义赵西垒在泽州高平县北六里是也即廉颇坚壁以待秦王齕夺赵西垒壁者】廉颇坚壁以待秦秦数挑战【正义数音朔挑田鸟反】赵兵不出赵王数以为让而秦相应侯又使人行千金於赵为反间【正义纪菟反】曰秦之所恶独畏马服子赵括将耳廉颇易与且降矣赵王既怒廉颇军多失利军数败又反坚壁不敢战而又闻秦反间之言因使赵括代廉颇将以击秦秦闻马服子将乃阴使武安君白起为上将军而王齕为尉裨将令军中有敢泄武安君将者斩赵括至则出兵击秦军秦军详败而走【正义详音羊】张二奇兵以劫之赵军逐胜追造秦壁【正义秦壁一名秦垒今亦名秦长垒】壁坚拒不得入而秦奇兵二万五千人绝赵军后又一军五千骑绝赵壁间赵军分而为二粮道绝而秦出轻兵击之赵战不利因筑壁坚守【正义赵壁今名赵东垒亦名赵东长垒在泽州高平县北五里即赵括筑壁自败处】以待救至秦王闻赵食道绝王自之河内赐民爵各一级发年十五以上悉诣长平【索隐时已属秦故发其兵】遮绝赵救及粮食至九月赵卒不得食四十六日皆内阴相杀食来攻秦垒欲出为四队四五复之不能出其将军赵括出锐卒自搏战秦军射杀赵括括军败卒四十万人降武安君武安君计曰前秦已拔上党上党民不乐为秦而归赵赵卒反覆非尽杀之恐为乱乃挟诈而尽阬杀之遗其小者二百四十人归赵前后斩首虏四十五万人赵人大震四十八年十月秦复定上党郡【索隐秦前攻赵已破上党今回兵复定其郡其余城犹属赵】秦分军为二王齕攻皮牢拔之【正义故城在绛州龙门县西一里】司马梗定大原【正义太原赵地秦定取也】韩赵恐使苏代厚币说秦相应侯曰武安君禽马服子乎曰然又曰即围邯郸乎曰然赵亡则秦王王矣武安君为三公武安君所为秦战胜攻取者七十余城南定鄢郢汉中【正义鄢在襄州夷道县南九里郢在荆州江陵县东六里汉中今梁州之地】北禽赵括之军虽周召吕望之功不益於此矣今赵亡秦王王则武安君必为三公君能为之下乎虽无欲为之下固不得已矣秦尝攻韩围邢丘【集解徐广曰平皋有邢丘正义邢丘今怀州武陵县东南二十里平皋县城是也】困上党上党之民皆反为赵天下不乐为秦民之日久矣今亡赵北地入燕东地入齐南地入韩魏则君之所得民亡几何人【集解徐广曰亡音无也】故不如因而割之【正义因白起之攻割取韩赵之地】无以为武安君功也於是应侯言於秦王曰秦兵劳请许韩赵之割地以和且休士卒王听之割韩垣雍赵六城以和【集解徐广曰卷县有垣雍城正义释地名云卷县所理垣雍城按今在郑州原武县西北七里也】正月皆罢兵武安君闻之由是与应侯有隙其九月秦复发兵使五大夫王陵攻赵邯郸是时武安君病不任行【正义任入针反堪也】四十九年正月陵攻邯郸少利秦益发兵佐陵兵亡五校武安君病愈秦王欲使武安君代陵将武安君言曰邯郸实未易攻也且诸侯救日至彼诸侯怨秦之日久矣今秦虽破长平军而秦卒死者过半国内空远绝河山而争人国都赵应其内诸侯攻其外破秦军必矣不可秦王自命不行乃使应侯请之武安君终辞

不肯行遂称病秦王使王齕代陵将八九月围邯郸不能拔楚使春申君及魏公子将兵数十万攻秦军秦军多死亡武安君言曰秦不聽臣计今如何矣秦王闻之怒强起武安君【正义强其两反】武安君遂称病笃应侯请之不起於是免武安君为士伍迁之陰密【集解徐广曰属安定正义故城在涇州鹑觚县城西即古陰密国密康公国也】武安君病未能行居三月诸侯攻秦军急秦军数却使者日至秦王乃使人遣白起不得留咸阳中武安君既行出咸阳西门十里至杜邮【索隐按故咸阳城在渭北杜邮今在咸阳城中正义说文云邮境上行舍道路所经过今咸阳县城本秦之邮也在雍州西北三十五里】秦昭王与应侯羣臣议曰白起之迁其意尚怏怏不服有余言秦王乃使使者赐之劔自裁武安君引劔将自刭曰我何罪于天而至此哉良久曰我固当死长平之战赵卒降者数十万人我诈而尽阬之是足以死遂自杀武安君之死也以秦昭王五十年十一月死而非其罪秦人怜之乡邑皆祭祀焉【集解何晏曰白起之降赵卒诈而阬其四十万岂徒酷暴之谓乎後亦难以重得志矣向使衆人皆豫知降之必死则张虚卷犹可畏也况於四十万被坚执銳哉天下见降秦之将头颅似山归秦之衆骸积成丘则後日之战死当死耳何衆肯服何城肯下乎是为虽能裁四十万之命而适足以强天下之战欲以要一朝之功而乃更坚诸侯之守故兵进而自伐其势军胜而还丧其计何者设使赵衆复合马服更生则後日之战必非前日之对也况今皆使天下为後日乎其所以终不敢复加兵於邯郸者非但忧平原之补袒患诸侯之掾至也徒讳之而不言耳若不悟而不讳则母所以远智也可谓善战而拙胜长平之事秦民之十五以上者皆荷戟而向赵矣秦王又亲自赐民爵於河内夫以秦强而十五以上死伤过半者此为破赵之功小伤秦之败大又何以称奇哉若後之役戍不豫其论者则秦衆多矣降者可致也必不可致者本自当战杀不当受降诈也战杀虽难降杀虽易然降杀之为害祸大於剧战也索隐卷音拳袒音浊菟反字亦作綻掾音救】

王翦者频阳东乡人也【索隐地理志频阳县属左冯翊应劭曰在频水之阳也正义故城在雍州东同官县界也】少而好兵事秦始皇始皇十一年翦将攻赵阙与【正义与音预】破之拔九城十八年翦将攻赵岁余遂拔赵赵王降尽定赵地为郡明年燕使荆轲为贼於秦秦王使王翦攻燕燕王喜走辽东翦遂定燕蓟而还【正义蓟音计】秦使翦子王贲击荆【集解徐广曰秦讳楚故云荆也索隐贲音奔】荆兵败还击魏魏王降遂定魏地秦始皇既灭三晋走燕王而数破荆师秦将李信者年少壮勇尝以兵数千逐燕太子丹至於衍水中卒破得丹始皇以为贤勇於是始皇问李信吾欲攻取荆於将军度用几何人而足李信曰不过用二十万人始皇问王翦王翦曰非六十万人不可始皇曰王将军老矣何怯也李将军果势壮勇【集解徐广曰势一作新】其言是也遂使李信及蒙恬将二十万南伐荆王翦言不用因谢病归老於频阳李信攻平与【集解駰案音余正义在预东北五十四里】蒙恬攻寝【集解徐广曰今固始寝丘索隐固始县属淮阳寝丘地名也】大破荆军信又攻鄢郢破之於是引兵而西与蒙恬会城父【索隐在汝南即应乡正义言引兵而会城父则是汝州郟城县东父城者也括地志云汝州郟城县东四十里有父城故城即服?云城父楚北境者也又许州叶县东北四十五里亦有父城故城即杜预云襄城城父县者也此二城父城之名耳服?城父是误也左传及注水经云楚大城城父使太子建居之十三州志云太子建所居城父谓今亳州城父是也此三家之说是城父之名地理志云颍川父城县沛郡城父县据县属郡其名自分古先儒多惑故使其名错乱】荆人因随之三日三夜不顿舍大破李信军入两壁杀七都尉秦

军走始皇闻之大怒自驰如频阳见谢王翦曰寡人以不用将军计李信果辱秦军今闻荆兵日进而西将军虽病独忍弃寡人乎王翦谢曰老臣罢病悖乱【正义罢音皮悖音背】唯大王更择贤将始皇谢曰已矣将军勿复言王翦曰大王必不得已用臣非六十万人不可始皇曰为听将军计耳於是王翦将兵六十万人始皇自送至灞上王翦行请美田宅园池甚衆始皇曰将军行矣何忧贫乎王翦曰为王大将将有功终不得封侯故及大王之向臣臣亦及时以请园池为子孙业耳始皇大笑王翦既至关使使还请善田者五辈【集解徐广曰善一作菑索隐谓使者五度请也】或曰将军之乞贷亦已甚矣王翦曰不然夫秦王怛【集解駰案音麓】而不信人【集解徐广曰怛一作粗】今空秦国甲士而专委於我【集解徐广曰专亦作抔又作掬】我不多请田宅为子孙业以自坚顾令秦王坐而疑我邪王翦东代李信击荆荆闻王翦益军而来乃悉国中兵以拒秦王翦至坚壁而守之不肯战荆兵数出挑战终不出王翦日休士洗沐而善饮食抚循之亲与士卒同食久之王翦使人问军中戏乎对曰方投石超距【集解徐广曰超一作拔駰案汉书云甘延壽投石拔距絶於等伦张晏曰范蠡兵法飞石重十二斤为机发行三百步延壽有力能以手投之拔距超距也索隐超距犹跳跃也】於是王翦曰士卒可用矣荆数挑战而秦不出乃引而东翦因举兵追之令壮士击大破荆军至蕲南【正义徐州县也】杀其将军项燕荆兵遂败走秦因乘胜畧定荆地城邑岁余虏荆王负刍竟平荆地为郡县因南征百越之君而王翦子王贲与李信破定燕齐地秦始皇二十六年尽并天下王氏蒙氏功为多名施於後世秦二世之时王翦及其子贲皆已死而又灭蒙氏陈胜之反秦秦使王翦之孙王离击赵围赵王及张耳钜鹿城【正义今邢州平乡县城本秦钜鹿郡城也】或曰王离秦之名将也今将强秦之兵攻新造之赵举之必矣客曰不然夫为将三世者必败必败者何也以其所杀伐多矣其後受其不祥今王离已三世将矣居无何项羽救赵击秦军果虏王离王离军遂降诸侯

太史公曰鄙语云尺有所短寸有所长白起料敌合变出奇无穷声震天下然不能救患於应侯王翦为秦将夷六国当是时翦为宿将始皇师之然不能辅秦建德固其根本偷合取容以至殒身【集解徐广曰殒音没】及孙王离为项羽所虏不亦宜乎彼各有所短也

【索隐述赞曰白起王翦俱善用兵递为秦将拔齐破荆赵任马服长平遂阬楚陷李信霸上卒行贲离继出三代无名】

史记卷七十三

史记卷七十三考证

白起王翦列传昭王十三年而白起为左庶长○秦本纪昭王十三年起为左更

明年白起为大良造攻魏拔之取城小大六十一明年起与客卿错攻垣城拔之○【臣照】按此与秦本纪魏世家六国表所载互异纪云十五年大良造白起攻魏取垣复予之十六年左更错取軹及邓魏世家云秦拔我城大小六十一则当在昭王十七年此传却在昭王十五年六国表昭王十八年客卿错击魏至軹取城大小六十一年分不同事亦不一

武安君因取楚定巫黔中郡○秦本纪蜀守若伐取巫郡及江南为黔中郡非起所取与此互异

而虜三晋将斩首十三万○秦本纪及六国表皆作十五万五讹为三或传写之误穰侯传又作十万

昭王四十三年白起攻韩陁城拔五城○秦本纪云拔九城韩世家及六国表云秦拔我陁城汾城

赵孝成王与平阳君平原君计之索隐平阳君未详何人○【臣照】按平阳君赵豹赵世家注云战国策曰惠文王母弟也

其九月秦复发兵使五大夫王陵攻赵邯郸○秦本纪作十月

迁之陰密正义即古陰密国○秦本纪正义云即古密须国

以秦昭王五十年十一月死○秦本纪作十二月

史记卷七十三考证

卷七十四

钦定四库全书

史记卷七十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

孟子荀卿列传第十四

【索隐按序传孟尝君第十四而此传为第十五盖後人差降之矣】

太史公曰余读孟子书至梁惠王问何以利吾国未尝不废书而叹也曰嗟乎利诚乱之始也夫子罕言利者常防其原也故曰放於利而行多怨自天子至於庶人好利之弊何以异哉

孟轲邹人也【索隐轲音苦何反又苦贺反邹鲁地名又云本邾人徙邹故也正义轲字子舆为齐卿邹兖州县】受业子思之门人【索隐王劭以人为衍字则以轲亲受业孔汲之门也今言门人者乃受业於子思之弟子也】道既通游事齐宣王宣王不能用适梁梁惠王不果所言则见以为迂远而濶於事情当是之时秦用商君富国强兵楚魏用吴起战胜弱敌齐威王宣王用孙子田忌之徒而诸侯东面朝齐天下方务於合从连衡以攻伐为贤而孟轲乃述唐虞三代之德是以所如者不合退而与万章之徒【索隐孟子有万章公明高等盖并轲之门人也万姓章名】序诗书述仲尼之意作孟子七篇其後有驺子之属齐有三驺子其前邹忌以鼓琴干威王因及国政封为成侯而受相印先孟子其次驺衍後孟子驺衍睹有国者益淫侈不能尚德若大雅整之於身施及黎庶矣乃深观陰阳消息而作怪迂之变终始大圣之篇十余万言其语闳大不经必先验小物推而大之至於无垠先序今以上至黄帝学者所共术大并世盛衰【集解駰案并蒲浪反索隐言其并大体随代盛衰观时而说事】因载其襍祥度制推而远之至天地未生窈冥不可考而原也先列中国名山大川通谷禽兽水土所殖物类所珍因而推之及海外人之所不能睹称引天地剖判以来五德转移治各有宜而符应若兹以为儒者所谓中国者於天下乃八十一分居其一分耳【索隐桓寬王充并以衍之所言迂怪虚妄荧惑六国之君因纳其异说所谓匹夫而荧惑诸侯也】中国名曰赤县神州赤县神州内自有九州禹之序九州是也不得为州数中国外如赤县神州者九乃所谓九州也於是有裨海环之【索隐裨音脾裨海小海也九州之外更有大瀛海故知此裨是小海也且将有裨将裨是小义也】人民禽兽莫能相通者如一区中者乃为一州如此者九乃有大瀛

海环其外天地之际焉其术皆此类也然要其归必止乎仁义节俭君臣上下六亲之施始也滥耳【索隐滥即滥觞是江源之初始故此文意以滥为初也谓衍之术言君臣上下六亲之际行事之所施所治皆可以为後代之本故云滥耳】王公大人初见其术惧然顾化【索隐惧音劬谓衍之术皆动人心见者莫不惧然驻想又内心留顾而已化之欲从其术也化者是易常闻而贵异术也】其後不能行之是以驹子重於齐适梁梁惠王郊迎执宾主之礼适赵平原君侧行楸席【索隐按字林云楸音正结反韦昭音敷蔑反张揖三苍训诂云楸拂也谓侧行而衣楸席为敬不敢正坐当宾主之礼也】如燕昭王拥彗先驱【索隐彗帚也谓为之扫地以衣袂拥帚而却行恐尘埃之及长者所以为敬也】请列弟子之座而受业筑碣石宫【正义碣石宫在幽州蓟县西三十里寧台之东】身亲往师之作主运【索隐刘向别录云邹子书有主运篇】其游诸侯见尊礼如此岂与仲尼菜色陈蔡孟轲困於齐梁同乎哉【索隐仲尼孟子法先王之道行仁义之化且菜色困穷而邹衍执诡怪荧惑诸侯其见礼重如此可为长太息哉】故武王以仁义伐纣而王伯夷饿不食周粟卫灵公问陈而孔子不答梁惠王谋欲攻赵孟轲称太王去邠【索隐孟子太王去邠是轲对滕文公语今云梁惠王谋攻赵与孟子不同】此岂有意阿世俗苟合而已哉持方枘欲内圆凿其能入乎【索隐方枘是笋也圆凿是孔也谓工人斲木以方笋而内之圆孔不可入也故楚词云以方枘而纳圆凿者吾知其齟齬而不入也谓战国时仲尼孟轲以仁义干世主犹方枘圆凿然也】或曰伊尹负鼎而勉汤以王百里奚饭牛车下而繆公用霸作先合然後引之大道驹衍其言虽不轨倪亦有牛鼎之意乎【索隐吕氏春秋云涵牛之鼎不可以烹鸡是其有牛鼎也言衍之术迂大倪若大用之是有牛鼎之意而譙周亦云观太史公此论是爱奇之甚矣】自驹衍与齐之稷下先生如淳于髡慎到环渊接子田骈驹爽之徒【索隐按稷齐之城门也或云稷山名谓齐之学士集于稷门之下也环渊接子古着书人之称号也骈音步坚反又步经反正义慎子十卷在法家则战国时处士接子二篇田子二十五篇齐人游稷下号天口接田二人道家驹爽十二篇陰阳家】各着书言治乱之事以干世主岂可胜道哉

淳于髡齐人也博闻强记学无所主其陈说慕晏婴之为人也然而承意观色为务客有见髡於梁惠王惠王屏左右独坐而再见之终无言也惠王怪之以让客曰子之称淳于先生管晏不及及见寡人寡人未有得也岂寡人不足为言邪何故哉客以谓髡曰固也吾前见王王志在驱逐後复见王王志在音声吾是以默然客具以报王王大骇曰嗟乎淳于先生诚圣人也前淳于先生之来人有献善马者寡人未及视会先生至後先生之来人有献讴者未及试亦会先生来寡人虽屏人然私心在彼有之【索隐谓私心实在彼马与讴也有之谓我实有此二事也】後淳于髡见壹语连三日三夜无倦惠王欲以卿相位待之髡因谢去於是送以安车驾驷束帛加璧黄金百鎰终身不仕

慎到赵人田骈接子齐人环渊楚人皆学黄老道德之术因发明序其指意故慎到着十二论【集解徐广曰今慎子刘向所定有四十一篇】环渊着上下篇而田骈接子皆有所论焉驹爽者齐诸驹子亦颇采驹衍之术以纪文於是齐王嘉之自如淳于髡以下皆命曰列大夫为开第康庄之衢【集解駟案尔雅曰四达谓之衢五达谓之康六达谓之庄】高门大屋尊宠之览天下诸侯宾客言齐能致天下贤士也

荀卿赵人【索隐名况卿者时人相尊而号为卿也仕齐为祭酒仕楚为兰陵令後亦谓之孙卿子者避汉宣帝讳也】年五十始来游学於齐驺衍之术迂大而閎辩爽也文具难施淳于髡久与处时有得善言故齐人颂曰谈天衍雕龙奭炙毂【集解徐广曰一作乱調】过髡【集解駉案刘向别录曰驺衍之所言五德终始天地广大书言天事故曰谈天驺奭修衍之文饰若雕镂龙文故曰雕龙别录曰过字作輶輶者车之盛膏器也炙之虽尽犹有余流者言淳于髡智不尽如炙輶也左思齐都赋注曰言其多智难尽如脂膏过之有润泽也索隐刘氏云毂衍字也今按文称炙毂过过则是器名音如字谓盛脂之器名过与锅字相近盖即指器也毂即车毂过为润毂之物则毂非衍字明矣】田骈之属皆已死齐襄王时【索隐襄王名法章湣王子莒人所立者】而荀卿最为老师齐尚修列大夫之缺而荀卿三为祭酒焉【索隐礼食必祭先饮酒亦然必以席中之尊者一人当祭耳後因以为官名故吴王濞为刘氏祭酒是也而卿三为祭酒者谓荀卿出入前後三度处列大夫康庄之位而皆为其所尊故云三为祭酒】齐人或谗荀卿荀卿乃适楚而春申君以为兰陵令【正义兰陵县属东海郡今沂州承县有兰陵山】春申君死而荀卿废因家兰陵李斯尝为弟子已而相秦荀卿嫉浊世之政亡国乱君相属不遂大道而营於巫祝信禨祥鄙儒小拘如庄周等又滑稽乱俗於是推儒墨道德之行事兴坏序列着数万言而卒因葬兰陵而赵亦有公孙龙为坚白异同之辩【集解駉案晋太康地记云汝南西平县有龙渊水可用淬刀劔特坚利故者坚白之论云黄所以为坚也白所以为利也或辩之曰白所以为不坚黄所以为不利索隐龙即仲尼弟子也此云赵人弟子传作卫人郑玄云楚人各不能知其真又下文云并孔子同时或云在其後所以知非别人也正义艺文志公孙龙子十四篇颜师古云即为坚白之辩按平原君传邹衍同时括地志云西平县豫州西北百四十里有龙渊水也】剧子之言【集解徐广曰按应劭氏姓注直云处子也索隐着书之人姓剧氏而称子也前史不记其名故赵有剧孟及剧辛也】魏有李悝尽地力之教【正义艺文志李子三十二篇李悝相魏文侯富国强兵】楚有尸子长卢【集解駉案刘向别录曰楚有尸子疑谓其在蜀今案尸子书晋人也名佼秦相卫鞅客也卫鞅商君谋事画计立法理民未尝不与佼规也商君被刑佼恐并诛乃亡逃入蜀自为造此二十篇书凡六万余言卒因葬蜀索隐尸子名佼音绞长卢未详正义长卢九篇楚人】阿之吁子焉【集解徐广曰阿者今之东阿索隐吁音芋别录作卬子今吁亦如字正义按东阿济州县也艺文志云卬子十八篇名婴齐人七十子之後颜师古云音弭按是齐人阿又属齐恐颜公误也】自如孟子至于吁子世多有其书故不论其传云盖墨翟宋之大夫善守御为节用【集解駉案墨子曰公输般为云梯之械成将以攻宋墨子闻之至于郢见公输般墨子解带为城以牒为械公输般九设攻城之机变墨子九距之公输般之攻械尽墨子之守固有余公输般诎而言曰吾知所以距子矣吾不言墨子亦曰吾知子之所以距我者吾不言楚王问其故墨子曰公输子之意不过欲杀臣杀臣宋莫能守可攻也然臣之弟子禽滑厘等三百人已持臣守国之器在宋城上而待楚寇矣虽杀臣不能絶也楚王曰善哉吾请无攻宋城矣索隐公输为云梯之械者按梯构木瞰高也云者言其升高入云故曰云梯械者器也谓攻城之楼橹也与器械同墨子解带为城者谓墨子所术解身上革带以为城也以牒为械者牒小木札也械者楼橹公输般之攻械尽者刘氏云械谓飞梯撞车飞石车弩之具也诎音屈谓般技已尽墨守有余滑厘者墨子弟子之字也厘音狸】或曰并孔子时或曰在其後【索隐按别录云墨子书有文子文子子夏之弟子问於墨子如此则墨子者在七十子後也】

【索隐述赞曰六国之末战胜相雄轲游齐魏其说不通退而着述称吾道穷兰陵事楚邹衍谈空康庄虽列莫见收功】

史记卷七十四

史记卷七十四考证

孟子荀卿列传始也滥耳索隐滥即滥觞是江源之初始故此文意以滥为初也○顾炎武曰滥者泛而无节之谓犹庄子之洸洋自恣也注引滥觞之义以为初者非

倪亦有牛鼎之意乎索隐吕氏春秋云函牛之鼎不可以烹鷄是其有牛鼎也言衍之述迂大倪若大用之是有牛鼎之意而譙周亦云观太史公此论是爱奇之甚矣○詹惟修曰牛鼎之说不必他求即上文伊尹负鼎百里奚饭牛也索隐举吕氏春秋及譙周之说意窃不然太史公言孔孟不合于当时者始进不能投时好如尹与奚也今衍以不轨之说见尊於诸侯是尹鼎奚牛之意岂若孔孟哉二子求奇太过是遗近而求远

春申君死而荀卿废○【臣照】按战国策及韩诗外传春申君因客之说使人谢孙子孙子去之赵赵以为上卿又因客之说使人请於赵孙子伪喜谢之以书因为赋遗之中有谗夫将将以瞽为明以聋为聪之语是春申未死而荀卿已去兰陵矣荀子赋篇可证也马迁之说与诸家异

史记卷七十四考证

卷七十五

钦定四库全书

史记卷七十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

孟尝君列传第十五

孟尝君名文姓田氏文之父曰靖郭君田婴田婴者齐威王少子而齐宣王庶弟也【索隐战国策及诸书并无此言盖诸田之别子也故战国策每称婴子盼子高诱注云田盼田婴也王劭又按战国策云齐貌辨谓宣王曰王方为太子时辨谓靖郭君不若废太子更立郊师靖郭君不忍宣王大息曰寡人少殊不知以此言之婴非宣王弟明也】田婴自威王时任职用事与成侯邹忌及田忌将而救韩伐魏成侯与田忌争宠成侯卖田忌田忌惧袭齐之边邑不胜亡走会威王卒宣王立知成侯卖田忌乃复召田忌以为将宣王二年田忌与孙臆田婴俱伐魏败之马陵虏魏太子申而杀魏将庞涓【索隐纪年当梁惠王二十八年至三十一年改为後元年】宣王七年田婴使於韩魏韩魏服於齐婴与韩昭侯魏惠王会齐宣王东阿南【正义东阿济州县也】盟而去【索隐纪年当惠王之後元十一年作平阿又云十三年会齐威王于甄与此明年齐宣王与梁惠王会甄文同但齐之威宣二王文舛互不同也】明年复与梁惠王会甄【集解駰案音绢】是岁梁惠王卒宣王九年田婴相齐齐宣王与魏襄王会徐州而相王也【正义纪年云梁惠王三十年下邳迁于薛改名徐州】楚威王闻之怒田婴明年楚伐败齐师於徐州而使人逐田婴田婴使张丑说楚威王威王乃止田婴相齐十一年宣王卒湣王即位即位三年而封田婴於薛【索隐纪年以为梁惠王後元十三年四月齐威王封田婴于薛十月齐城薛十四年薛子婴来朝十五年齐威王薨婴初封彭城皆与此文异正义薛故城在今徐州滕县南四十四里也】初田婴有子四十余人其贱妾有子名文文以五月五日生婴告其母曰勿举也其母窃举生之【索隐上举谓初诞而举之下举谓浴而乳之生谓长养之也】及长其母因兄弟而见其子文於田婴田婴怒其母曰吾令若去此子而敢生之何也文顿首因曰君所以不举五月子者何故婴曰五月子者长与户齐将不利其父母【索隐风俗通云俗说五月五日生子男害父女害母也】文曰人生受命於天乎将受命於户邪婴默然文曰必受命於天君何忧焉必受命於户则高其户耳谁能至者婴曰子休矣久之文承间问其父婴曰子之子为何曰为孙孙之孙为何曰为玄孙玄孙之孙为何曰不能知也【索隐尔雅云玄孙之子为来来孙之子为昆昆孙之子为仍仍孙之子为云又有耳孙亦

是玄孙之子不同也】文曰君用事相齐至今三王矣齐不加广而君私家富累万金门下不见一贤者文闻将门必有将相门必有相今君後宫蹈绮縠而士不得短褐【索隐短音竖竖褐谓褐衣而竖裁之以其省而便事也】仆妾余粱肉而士不厌糟糠今君又尚厚积余藏欲以遗所不知何人【索隐遗音唯季反犹言不知欲遗与何人也】而忘公家之事日损文窃怪之於是嬰乃礼文使主家待宾客宾客日进名声闻於诸侯诸侯皆使人请薛公田嬰以文为太子嬰许之嬰卒諡为靖郭君【集解駟案皇览曰靖郭君冢在鲁国薛城中东南陬索隐諡为靖郭君者谓死後别号之曰靖郭耳则靖郭或封邑号故汉齐王舅父驷钧封靖郭侯是也陬音邹亦音緇陬者城隅也】而文果代立於薛是为孟尝君孟尝君在薛招致诸侯宾客及亡人有罪者皆归孟尝君孟尝君舍业厚遇之【索隐舍业者舍弃其家产业而厚事宾客也刘氏云舍音赦谓为之筑舍立居业也】以故倾天下之士食客数千人无贵贱一与文等孟尝君待客坐语而屏风後常有侍史主记君所与客语问亲戚居处客去孟尝君已使使存问献遗其亲戚孟尝君曾待客夜食有一人蔽火光客怒以饭不等辍食辞去孟尝君起自持其饭比之客慙自到士以此多归孟尝君孟尝君客无所择皆善遇之人人各自以为孟尝君亲已秦昭王闻其贤乃先使泾阳君为质於齐以求见孟尝君孟尝君将入秦宾客莫欲其行諫不听苏代谓曰今旦代从外来见木偶人与土偶人相与语【索隐偶音遇谓以土木为之偶类於人也苏代以土偶比泾阳君木偶比孟尝君】木偶人曰天雨子将败矣土偶人曰我生於土败则归土今天雨流行而行未知所止息也今秦虎狼之国也而君欲往如有不得还君得无为土偶人所笑乎孟尝君乃止齐湣王二十五年复卒使孟尝君入秦昭王即以孟尝君为秦相人或说秦昭王曰孟尝君贤而又齐族也今相秦必先齐而後秦秦其危矣於是秦昭王乃止囚孟尝君谋欲杀之孟尝君使人抵昭王幸姬求解【索隐抵音丁礼反按抵谓触冒而求之也】幸姬曰妾愿得君狐白裘【集解韦昭曰以狐之白毛为裘谓集狐腋之毛言美而难得者】此时孟尝君有一狐白裘直千金天下无双入秦献之昭王更无他裘孟尝君患之徧问客莫能对最下坐有能为狗盗者曰臣能得狐白裘乃夜为狗以入秦宫藏中【正义藏在浪反】取所献狐白裘至以献秦王幸姬幸姬为言昭王昭王释孟尝君孟尝君得出即驰去更封传变名姓以出关【索隐更改也改前封传而易姓名不言是孟尝君封传今之驿券也】夜半至函谷关【正义关在陕州桃林县西南十三里】秦昭王後悔出孟尝君求之已去即使人驰传逐之孟尝君至关关法鸡鸣而出客孟尝君恐追至客之居下坐者有能为鸡鸣而鸡尽鸣遂发传出如食顷秦追果至关已後孟尝君出乃还始孟尝君列此二人於宾客宾客尽羞之及孟尝君有秦难卒此二人拔之自是之後客皆服孟尝君过赵赵平原君客之赵人闻孟尝君贤出观之皆笑曰始以薛公为魁然也今视之乃眇小丈夫耳孟尝君闻之怒客与俱者下斫击杀数百人遂灭一县以去齐湣王不自得以其遣孟尝君【索隐得一作德是湣王遣孟尝君自言已无德故也】孟尝君至则以为齐相任政孟尝君怨秦将以齐为韩魏攻楚因与韩魏攻秦【集解徐广曰年表曰韩魏齐共击秦军於函谷】而借兵食於西周苏代为西周谓曰【索隐战国策作韩庆为西周谓薛公也】君以齐为韩魏攻楚九年取宛叶以北以强韩魏【正义宛在邓州叶在许州二县以北旧属楚二国共没以入韩魏】今复攻秦以益之韩魏南无楚忧西无秦患则齐危矣韩魏必轻齐畏秦臣为君危之君不如令弊邑深合於秦而君无攻又无借兵食君临函谷而无攻令弊邑以君之情谓秦昭王曰薛公必不破秦以强韩魏其攻秦也欲王之令楚王割东国以与齐【正义东国齐徐夷】而秦出楚怀王以为和君令弊邑以此惠秦秦得无破而以东国自免也秦必欲之楚王得出必

德齐齐得东国益强而薛世世无患矣秦不大弱而处三晋之西三晋必重齐薛公曰善因令韩魏贺秦使三国无攻而不借兵食於西周矣是时楚怀王入秦秦留之故欲必出之秦不果出楚怀王孟尝君相齐其舍人魏子为孟尝君收邑入【索隐舍人官微记姓而署其名故云魏子收谓收其国之租税】三反而不致一入孟尝君问之对曰有贤者窃假与之以故不致入孟尝君怒而退魏子居数年人或毁孟尝君於齐湣王曰孟尝君将为乱及田甲劫湣王湣王意疑孟尝君孟尝君乃奔【集解徐广曰湣王三十四年田甲劫王薛文走】魏子所与粟贤者闻之乃上书言孟尝君不作乱请以身为盟遂自刭宫门以明孟尝君湣王乃惊而踪迹验问孟尝君果无反谋乃复召孟尝君孟尝君因谢病归老於薛湣王许之其後秦亡将吕礼相齐欲困苏代代乃谓孟尝君曰周最於齐至厚也【正义周最周之公子】而齐王逐之而听亲弗【集解駰案亲弗人姓名索隐战国策作祝弗盖祝为得之】相吕礼者欲取秦也齐秦合则亲弗与吕礼重矣有用齐秦必轻君君不如急北兵趋赵以和秦魏收周最以厚行且反齐王之信【索隐周最本厚於齐今欲逐之而相秦之亡将苏代谓孟尝令齐收周最以自厚其行又且得反齐王之有信以不逐周最也】又禁天下之变【索隐变谓齐秦合则亲弗吕礼用用则秦齐轻孟尝也】齐无秦则天下集齐亲弗必走则齐王孰与为其国也於是孟尝君从其计而吕礼嫉害於孟尝君孟尝君惧乃遗秦相穰侯魏冉书曰吾闻秦欲以吕礼收齐齐天下之强国也子必轻矣齐秦相取以临三晋吕礼必并相矣是子通齐以重吕礼也若齐免於天下之兵其讐子必深矣子不如劝秦王伐齐齐破吾请以所得封子齐破秦畏晋之强秦必重子以取晋晋国弊於齐而畏秦晋必重子以取秦是子破齐以为功挟晋以为重是子破齐定封秦晋交重子若齐不破吕礼复用子必大穷於是穰侯言於秦昭王伐齐而吕礼亡後齐湣王灭宋益骄欲去孟尝君孟尝君恐乃如魏魏昭王以为相西合於秦赵与燕共伐破齐齐湣王亡在莒遂死焉齐襄王立而孟尝君中立於诸侯无所属齐襄王新立畏孟尝君与连和复亲薛公文卒諡为孟尝君【集解駰案皇览曰孟尝君冢在鲁国薛城中向门东向门出北边门也诗云居常与许郑玄曰常或作尝在薛之南孟尝邑于薛城索隐孟尝袭父封薛而号曰孟尝君此云諡非也孟字尝邑名尝邑在薛之旁正义括地志云孟尝君墓在徐州滕县五十二里卒在齐襄王之时也】诸子争立而齐魏共灭薛孟尝絶嗣无後也初冯驩【集解駰案音欢复作煖音许袁反】闻孟尝君好客蹑屣而见之【索隐屣音脚字亦作蹻又作侨】孟尝君曰先生远辱何以教文也冯驩曰闻君好士以贫身归於君孟尝君置传舍十日【索隐传音逐缘反按传舍幸舍及代舍并当上中下三等之客所舍之名耳】孟尝君问传舍长曰客何所为答曰冯先生甚贫犹有一劔耳又蒯【集解駰案苦怪反茅之类可为绳言其劔把无物可装以小绳纒之也】缞【集解駰案音侯亦作候谓把劔之处索隐蒯草名音蒯聃之蒯缞谓把劔之物言其劔无物可装但以蒯绳纒之故云蒯缞也】弹其劔而歌曰长铗归来乎食无鱼孟尝君迁之幸舍食有鱼矣五日又问传舍长答曰客复弹劔而歌曰长铗归来乎出无舆孟尝君迁之代舍出入乘舆车矣五日孟尝君复问传舍长舍长答曰先生又尝弹劔而歌曰长铗归来乎无以为家孟尝君不悦居暮年冯驩无所言孟尝君时相齐封万户於薛其食客三千人邑入不足以奉客【正义奉符用反】使人出钱於薛岁余不入贷钱者多不能与其息【索隐与犹还也息犹利也】客奉将不给孟尝君忧之问左右何人可使收债於薛者传舍长曰代舍客冯公形容状貌甚辩长者无他伎能【集解駰案伎亦作技】宜可令收债孟尝君乃进冯驩而请之曰宾客不知文不肖幸临文者三千余人邑入不足以奉宾客故贷息钱於薛薛岁不入民颇不与其息今客食恐不给愿先生责之冯驩曰诺辞

行至薛召取孟尝君钱者皆会得息钱十万乃多酿酒买肥牛召诸取钱者能与息者皆来不能与息者亦来皆持取钱之券书合之齐为会日杀牛置酒酒酣乃持券如前合之能与息者与为期贫不能与息者取其券而烧之曰孟尝君所以贷钱者为民之无者以为本业也所以求息者为无以奉客也令富给者以要期贫穷者燔券书以捐之诸君强饮食有君如此岂可负哉坐者皆起再拜孟尝君闻冯驩烧券书怒而使使召驩驩至孟尝君曰文食客三千人故贷钱於薛文奉邑少【索隐言文之奉邑少故令出息于薛也】而民尚多不以时与其息客食恐不足故请先生收责之闻先生得钱即以多具牛酒而烧券书何冯驩曰然不多具牛酒即不能毕会无以知其有余不足有余者为要期不足者虽守而责之十年息愈多急即以逃亡自捐之若急终无以偿上则为君好利不爱士民下则有离上抵负之名非所以厉士民彰君声也焚无用虚债之券捐不可得之虚计令薛民亲君而彰君之善声也君有何疑焉孟尝君乃拊手而谢之齐王惑於秦楚之毁以为孟尝君名高其主而擅齐国之权遂废孟尝君诸客见孟尝君废皆去冯驩曰借臣车一乘可以入秦者必令君重於国而奉邑益广可乎孟尝君乃约车币而遣之冯驩乃西说秦王曰天下之游士凭轼结鞶西入秦者无不欲强秦而弱齐凭轼结鞶东入齐者无不欲强齐而弱秦此雄雌之国也势不两立为雄雄者得天下矣秦王跽而问之曰何以使秦无为雌而可冯驩曰王亦知齐之废孟尝君乎秦王曰闻之冯驩曰使齐重於天下者孟尝君也今齐王以毁废之其心怨必背齐背齐入秦则齐国之情人事之诚尽委之秦齐地可得也岂直为雄也君急使使载币陰迎孟尝君不可失时也如有齐觉悟复用孟尝君则雌雄之所在未可知也秦王大悦乃遣车十乘黄金百镒以迎孟尝君冯驩辞以先行至齐说齐王曰天下之游士凭轼结鞶东入齐者无不欲强齐而弱秦者凭轼结鞶西入秦者无不欲强秦而弱齐者夫秦齐雄雌之国秦强则齐弱矣此势不两雄今臣窃闻秦遣使车十乘载黄金百镒以迎孟尝君孟尝君不西则已西入相秦则天下归之秦为雄而齐为雌雌则临淄即墨危矣王何不先秦使之未到复孟尝君而益与之邑以谢之孟尝君必喜而受之秦虽强国岂可以请人相而迎之哉折秦之谋而絕其霸强之畧齐王曰善乃使人至境候秦使秦使车适入齐境使还驰告之王召孟尝君而复其相位而与其故邑之地又益以千户秦之使者闻孟尝君复相齐还车而去矣自齐王毁废孟尝君诸客皆去後召而复之冯驩迎之未到孟尝君太息叹曰文常好客遇客无所敢失食客三千有余人先生所知也客见文一日废皆背文而去莫顾文者今赖先生得复其位客亦有何面目复见文乎如复见文者必唾其面而大辱之冯驩结轡下拜孟尝君下车接之曰先生为客谢乎冯驩曰非为客谢也为君之言失夫物有必至事有固然君知之乎孟尝君曰愚不知所谓也曰生者必有死物之必至也富贵多士贫贱寡友事之固然也君独不见夫朝趋市者乎【索隐趋音娶趋向也又音趋】明旦侧肩争门而入日暮之後过市朝者掉臂而不顾【索隐过光卧反朝音潮言市之行列有如朝位因言市朝云耳】非好朝而恶暮所期物忘其中【索隐期物谓入市心中所期之物利人平明侧肩争门而入至日暮所期忘其中忘者无也其中市朝之中言日暮物尽故掉臂不顾也】今君失位宾客皆去不足以怨士而徒絕宾客之路愿君遇客如故孟尝君拜曰敬从命矣闻先生之言敢不奉教焉

太史公曰吾尝过薛其俗间里率多暴桀子弟与邹鲁殊问其故曰孟尝君招致天下任侠奸人入薛中盖六万余家矣世之传孟尝君好客自喜名不虚矣

【索隱述贊曰靖郭之子威王之孫既強其國實高其門好客喜士見重平原雞鳴狗盜魏子馮驩如何承睫薛縣徒存】

史记卷七十五

史记卷七十五考证

孟尝君列傳即位三年而封田嬰於薛索隱紀年以為梁惠王後元十三年四月齊威王封田嬰於薛十月齊城薛十四年薛子嬰來朝十五年齊威王薨嬰初封彭城皆與此文異○戰國策校注曰史以田嬰之封在湣王三年從通監則在宣王二十二年按嬰自威王時任職用事而文之言曰君用事相齊至今三王矣三王者威宣閔也故大事記以嬰卒文立附見於閔王元年策曰受薛於先王先王之廟在薛則是威王之世嬰已受封史亦不合索隱引紀年云云考之史梁惠王後元十三年在今封嬰前一年不得為威王之世亦皆不合惟梁惠前十三年則正當威王時疑此處有差互而嬰之封薛則實威王之世也

欲以遺所不知何人索隱遺音唯季反猶言不知欲遺與何人也○董份曰遺所不知何人因前問玄孫之孫為何曰不能知也故此言遺之不能知之子孫耳

見木偶人與土偶人相與語索隱蘇代以土偶比涇陽君木偶比孟嘗君○徐孚遠曰索隱非也涇陽君亦質於他國安得比土偶

齊湣王不自得以其遣孟嘗君索隱得一作德是湣王遣孟嘗君自言已無德故也○董份曰不自得者言已遣之几為秦害故不自安耳索隱謬

九年取宛葉以北○鮑彪戰國策注曰九字誤當云六或五又曰按楚記三國攻楚秦救之引去與此言取宛葉小駁

其舍人魏子為孟嘗君收邑入○唐順之曰魏子馮驩豈一事而傳聞異耶【臣照】按晏子北郭騷事與此亦大同小異蓋戰國時習尚如此則流言亦如此舉不足信也

收周最以厚行○戰國策作以為後行

初馮驩聞孟嘗君好客○習學記言曰馮驩事與戰國策馮煖稍殊史記蓋別有所本其義為勝也

孟嘗君不悅○凌稚隆曰按國策無以為家下云左右皆惡之以為貪而不知足孟嘗君問馮公有親乎對曰有老母孟嘗君使人給其食用無使乏於是馮驩不復歌史記以左右惡之為孟嘗君不悅似誤

冯驩乃西说秦王○国策作冯煖西游梁

冯驩曰非为客谢也为君之言失夫物有必至事有固然君知之乎○【臣照】按此本国策谭拾子语自冯驩至此疑亦褚先生续为之与史文不类

史记卷七十五考证

<史部,正史类,史记>

卷七十六

钦定四库全书

史记卷七十六

汉太史令司马迁撰宋中郎外兵参军裴駰集解

唐国子博士弘文馆学士司马贞索隐

唐诸王侍读率府长史张守节正义

平原君虞卿列传第十六

平原君赵胜者赵之诸公子也【集解徐广曰魏公子传曰赵惠文王弟正义胜式证反】诸子中胜最贤喜宾客宾客盖至者数千人平原君相赵惠文王及孝成王三去相三复位封於东武城【集解徐广曰属清河正义今贝州武城县也】平原君家楼临民家民家有蹇者盘散行汲【集解駰案散亦作跚索隐蹇音壁散音先寒反亦作珊音同正义蹇跛也】平原君美人居楼上临见大笑之明日蹇者至平原君门请曰臣闻君之喜士士不远千里而至者以君能贵士而贱妾也臣不幸有罢癃之病【集解徐广曰癃音隆病也索隐罢音皮癃音吕宫反罢癃背疾言腰曲而背隆高也】而君之後宫临而笑臣臣愿得笑臣者头平原君笑应曰诺蹇者去平原君笑曰观此竖子乃欲以一笑之故杀吾美人不亦甚乎终不杀居岁余宾客门下同稍稍引去者过半平原君怪之曰胜所以待诸君者未尝敢失礼而去者何多也门下一人前对曰以君之不杀笑蹇者以君为爱色而贱士士即去耳於是平原君乃斩笑蹇者美人头自造门进蹇者因谢焉其後门下同稍稍来是时齐有孟尝魏有信陵楚有春申故争相倾以待士【集解徐广曰待一作得】秦之围邯郸【正义赵惠文王九年秦昭王十五年】赵使平原君求救合从於楚约与食客门下有勇力文武备具者二十人偕平原君曰使文能取胜则善矣文不能取胜则歃血於华屋之下必得定从而还士不外索取於食客门下足矣得十九人余无可取者无以满二十人门下有毛遂者前自荐於平原君曰遂闻君将合从於楚约与食客门下二十人偕不外索今少一人愿君即以遂备员而行矣平原君曰先生处胜之门下几年於此矣毛遂曰三年於此矣平原君曰夫贤士之处世也譬若锥之处囊中其末立见今先生处胜之门下三年於此矣左右未有所称诵胜未有所闻是先生无所有也先生不能先生留毛遂曰臣乃今日请处囊中耳使遂蚤得处囊中乃颖脱而出【索隐环郑玄曰颖也脱吐活反】非特其末见而已平原君竟与毛遂偕十九人相与目笑之而未发也【索隐发一作废郑玄云皆目视而轻笑之未能即废弃之也】毛遂比至楚与十九人论议十九人皆服平原君与楚合从言其利害日出而言之日中不决十九人谓毛遂曰先生上毛遂按劒历阶而上谓平原君曰从之利害两言而决耳日出而言从日中不决何也楚王谓

平原君曰客何为者也平原君曰是胜之舍人也楚王叱曰胡不下吾乃与而君言汝何为者也毛遂按劍而前曰王之所以叱遂者以楚国之衆也今十步之内王不得恃楚国之衆也王之命悬於遂手吾君在前叱者何也且遂闻汤以七十里之地王天下文王以百里之壤而臣诸侯岂其士卒衆多哉诚能据其势而奋其威今楚地方五千里持戟百万此霸王之资也以楚之强天下弗能当白起小竖子耳率数万之衆兴师以与楚战一战而举鄢郢再战而烧夷陵三战而辱王之先人此百世之怨而赵之所羞而王弗知恶焉【正义恶乌故反】合从者为楚非为赵也吾君在前叱者何也楚王曰唯唯诚若先生之言谨奉社稷而以从毛遂曰从定乎楚王曰定矣毛遂谓楚王之左右曰取鸡狗马之血来【索隐盟之所用牲贵贱不同天子用牛及马诸侯以犬及豕大夫已下用鸡今此总言盟之用血故云取鸡狗马之血来耳】毛遂奉铜盘【索隐奉音捧若周礼则用珠盘也】而跪进之楚王曰王当歃血而定从次者吾君次者遂遂定从於殿上毛遂左手持盘血而右手招十九人曰公相与歃此血於堂下【索隐歃音所甲反】公等碌碌【集解駟案音禄索隐音六王邵云录借字耳又说文云录录随从之貌也】所谓因人成事者也平原君已定从而归归至於赵曰胜不敢复相士胜相士多者千人寡者百数自以为不失天下之士今乃於毛先生而失之也毛先生一至楚而使赵重於九鼎大吕【索隐九鼎大吕国之宝器言毛遂至楚使赵重於九鼎大吕谓天子所重也正义大吕周庙大钟】毛先生以三寸之舌强於百万之师胜不敢复相士遂以为上客平原君既返赵楚使春申君将兵赴救赵魏信陵君亦矫夺晋鄙军往救赵皆未至秦急围邯鄲邯鄲急且降平原君甚患之邯鄲传舍吏子李同【正义名谈太史公讳改也】说平原君曰君不忧赵亡邪平原君曰赵亡则胜为虏何不为不忧乎李同曰邯鄲之民炊骨易子而食可谓急矣而君之後宫有百数婢妾被绮縠余粱肉而民褐衣不完糟糠不厌民困兵尽或剡木为矛矢而君器物钟磬自若使秦破赵君安得有此使赵得全君何患无有今君诚能令夫人以下编於士卒之间分功而作家之所有尽散以飧士士方其危苦之时易德耳【正义言士方危苦之时易有恩德】於是平原君从之得敢死之士三千人李同遂与三千人赴秦军秦军为之却三十里亦会楚魏救至秦兵遂罢邯鄲复存李同战死封其父为李侯【集解徐广曰河内成臯有李城正义怀州温县本李城也李同父所封隋炀帝从故温城移县於此】虞卿欲以信陵君之存邯鄲为平原君请封公孙龙闻之夜驾见平原君曰龙闻虞卿欲以信陵君之存邯鄲为君请封有之乎平原君曰然龙曰此甚不可且王举君而相赵者非以君之智能为赵国无有也割东武城而封君者非以君为有功也而以国人无勲乃以君为亲戚故也君受相印不辞无能割地不言无功者亦自以为亲戚故也今信陵君存邯鄲而请封是亲戚受城而国人计功也【集解徐广曰一本是亲戚受城而以国许人】此甚不可且虞卿操其两权事成操右券以责【索隐言虞卿论平原君取封事成则操其右券以责其报德也】事不成以虚名德君君必勿听也平原君遂不听虞卿平原君以赵孝成王十五年卒【索隐六国年表及世家并云十四年卒与此不同】子孙代後竟与赵俱亡平原君厚待公孙龙公孙龙善为坚白之辩及邹衍过赵【索隐过音戈】言至道乃绌公孙龙【集解刘向别录曰齐使邹衍过赵平原君见公孙龙及其徒綦母子之属论白马非马之辩以问邹子邹子曰不可彼天下之辩有五胜三至而辞正为下辩者别殊类使不相害序异端使不相乱抒意通指明其所谓使人与知焉不务相迷也故胜者不失其所守不胜者得其所求若是故辩可为也及至烦文以相假饰辞以相悖巧譬以相移引人声使不得及其意如此害大道夫缴纷争言而竟後息不能无害君子坐皆称善索隐抒音墅抒者舒也缴音纠谓缴绕纷乱争言而竟後息不能

无害也】

虞卿者游说之士也蹻蹻担簦【集解徐广曰蹻草履也簦长柄笠音登笠有柄者谓之簦索隐蹻音脚】说赵孝成王一见赐黄金百镒白璧一双再见为赵上卿故号为虞卿【集解譙周曰食邑於虞索隐赵之虞属河东太阳县今之虞乡县是也】秦赵战於长平赵不胜亡一都尉赵王召楼昌与虞卿曰军战不胜尉复死【集解徐广曰复一作系】寡人使束甲而趋之何如楼昌曰无益也不如发重使为媾【集解古后反求和曰购索隐按媾亦讲讲亦和也】虞卿曰昌言媾者以为不媾军必破也而制媾者在秦且王之论秦也欲破赵之军乎不邪王曰秦不遗余力矣必且欲破赵军虞卿曰王听臣发使出重宝以附楚魏楚魏欲得王之重宝必内吾使赵使入楚魏秦必疑天下之合从且必恐如此则媾乃可为也赵王不听与平阳君为媾发郑朱入秦秦内之赵王召虞卿曰寡人使平阳君为媾於秦秦已内郑朱矣卿以为奚如虞卿对曰王不得媾军必破矣天下贺战胜者皆在秦矣郑朱贵人也入秦秦王与应侯必显重以示天下楚魏以赵为媾必不救王秦知天下不救王则媾不可得成也应侯果显郑朱以示天下贺战胜者终不肯媾长平大败遂围邯郸为天下笑秦既解邯郸围而赵王入朝使赵郝【集解駰案郝音释徐广曰一作赦】约事於秦割六县而媾虞卿谓赵王曰秦之攻王也倦而归乎王以其力尚能进爱王而弗攻乎王曰秦之攻我也不遗余力矣必以倦而归也虞卿曰秦以其力攻其所不能取倦而归王又以其力之所不能取以送之是助秦自攻也来年秦复攻王王无救矣王以虞卿之言告赵郝赵郝曰虞卿诚能尽秦力之所至乎诚知秦力之所不能进此弹丸之地弗予令秦来年复攻王王得无割其内而媾乎王曰请听子割矣子能必使来年秦之不复攻我乎赵郝对曰此非臣之所敢任也他日三晋之交於秦相善也今秦善韩魏而攻王王之所以事秦必不如韩魏也今臣为足下解负亲之攻【索隐为足下解其负担而亲自攻之也】开关通币齐交韩魏至来年而王独取攻於秦此王之所以事秦必在韩魏之後也此非臣之所敢任也王以告虞卿虞卿对曰郝言不媾来年秦复攻王王得无割其内而媾乎今媾郝又以不能必秦之不复攻也今虽割六城何益来年复攻又割其力之所不能取而媾此自尽之术也不如无媾秦虽善攻不能取六县赵虽不能守终不失六城秦倦而归兵必罢我?六城收天下以攻罢秦是我失之於天下而取偿於秦也吾国尚利孰与坐而割地自弱以强秦哉今郝曰秦善韩魏而攻赵者必以为韩魏不救赵也而王之军必孤又以王之事秦不如韩魏也是使王岁以六城事秦也即坐而城尽来年秦复求割地王将与之乎弗与是弃前功而挑秦祸也与之则无地而给之语曰强者善攻弱者不能守今坐而听秦秦兵不弊而多得地是强秦而弱赵也以益强之秦而割愈弱之赵其计故不止矣且王之地有尽而秦之求无已以有尽之地而给无已之求其势必无赵矣赵王计未定楼缓从秦来赵王与楼缓计之曰予秦地何如毋予孰吉缓辞让曰此非臣之所能知也王曰虽然试言公之私【索隐按私谓私心也】楼缓对曰王亦闻夫公甫文伯母乎【正义季康子从祖母文伯名歆康子从父昆弟】公甫文伯仕於鲁病死女子为自杀於房中者二人其母闻之弗哭也其相室曰【正义谓傅姆之类也】焉有子死而弗哭者乎其母曰孔子贤人也逐於鲁而是人不随也今死而妇人为之自杀者二人若是者必其於长者薄而於妇人厚也故从母言之是为贤母从妻言之是必不免为妬妻故其言一也言者异则人心变矣今臣新从秦来而言勿予则非计也言予之恐王以臣为为秦也故不敢对使臣得为大王计不如予之王曰诺虞卿闻之入见王曰此饰说也王脊勿予【集解徐广曰脊音慎】楼缓闻之往见王王又以

虞卿之言告楼缓楼缓对曰不然虞卿得其一不得其二夫秦赵构难而天下皆说何也曰吾且因强而乘弱矣今赵兵困於秦天下之贺战胜者则必尽在於秦矣故不如亟割地为和以疑天下而慰秦之心不然天下将因秦之强怒乘赵之弊瓜分之赵且亡何秦之图乎故曰虞卿得其一不得其二愿王以此决之勿复计也虞卿闻之往见王曰危哉楼子之所以为秦者是愈疑天下而何慰秦之心哉独不言其示天下弱乎且臣言勿予者非固勿予而已也秦索六城於王而王以六城赂齐齐秦之深讐也得王之六城并力西击秦齐之听王不待辞之毕也则是王失之於齐而取偿於秦也而齐赵之深讐可以报矣而示天下有能为也王以此发声兵未窥於境臣见秦之重赂至赵而反媾於王也从秦为媾韩魏闻之必尽重王重王必出重宝以先於王则是王一举而结三国之亲而与秦易道也【正义前取秦攻今得赂是易道也易音亦】赵王曰善则使虞卿东见齐王与之谋秦虞卿未返秦使者已在赵矣楼缓闻之亡去赵於是封虞卿以一城居顷之而魏请为从赵孝成王召虞卿谋过平原君【索隐过音戈】平原君曰愿卿之论从也虞卿入见王王曰魏请为从对曰魏过【集解駟案光卧反】王曰寡人固未之许对曰王过王曰魏请从卿曰魏过寡人未之许又曰寡人过然则从终不可乎对曰臣闻小国之与大国从事也有利则大国受其福有败则小国受其祸今魏以小国请其祸而王以大国辞其福臣故曰王过魏亦过窃以为从便王曰善乃合魏为从虞卿既以魏齐之故不重万户侯卿相之印与魏齐间行卒去赵困於梁魏齐已死不得意乃着书【索隐魏齐魏相与应侯有仇秦求之急乃抵虞卿卿弃相印乃与齐间行亡归梁以托信陵君信陵君疑未决齐自杀故虞卿失相乃穷愁而着书也】上采春秋下观近世曰节义称号揣摩政谋凡八篇以刺讥国家得失世传之曰虞氏春秋【正义艺文志云十五篇】

太史公曰平原君翩翩浊世之佳公子也然未睹大体鄙语曰利令智昏平原君贪冯亭邪说使赵陷长平兵四十余万衆邯鄲几亡【集解譙周曰长平之陷乃赵王信间易将之咎何怨平原受冯亭哉】虞卿料事揣情为赵画策何其工也及不忍魏齐卒困於大梁庸夫且知其不可况贤人乎然虞卿非穷愁亦不能着书以自见於後世云

【索隐述赞曰翩翩公子天下奇器笑姬从戮义士增气兵解李同盟定毛遂虞卿蹶蹶受赏料事乃困魏齐着书见意】

史记第七十六

史记卷七十六考证

平原君虞卿列传秦之围邯鄲正义赵惠文王九年秦昭王十五年○【臣照】按六国年表邯鄲之围在赵孝成王九年秦昭王五十年若赵惠文王九年则秦昭王十七年正义有误字

非以君为有功也而以国人无勲○顾炎武曰当作一句读言非国人无功而不封君独有功而封也

赵王召楼昌○顾炎武曰楼昌楼缓恐是一人虞卿进说亦是一事记者或以为赵王不听或

以为听之太史公两收之而不觉其重尔

王以虞卿之言告赵郝○战国策作楼缓新序同

史记卷七十六考证

卷七十七

钦定四库全书

史记卷七十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

信陵君列传第十七

魏公子无忌者魏昭王少子而魏安厘王异母弟也昭王薨安厘王即位封公子为信陵君【索隐地理志无信陵或曰是乡邑名】是时范雎亡魏相秦以怨魏齐故秦兵围大梁破魏华阳下军走芒卯魏王及公子患之公子为人仁而下士士无贤不肖皆谦而礼交之不敢以其富贵骄士士以此方数千里争往归之致食客三千人当是时诸侯以公子贤多客不敢加兵谋魏十余年公子与魏王博而北境传举烽言赵寇至且入界【集解文颖曰作高木櫓櫓上作桔槔头兜零以薪置其中谓之烽常眠之有寇即火然举之以相告】魏王释博欲召大臣谋公子止王曰赵王田猎耳非为寇也【正义为于伪反】复博如故王恐心不在博居顷复从北方来传言曰赵王猎耳非为寇也魏王大惊曰公子何以知之公子曰臣之客有能探得赵王阴事者赵王所为客辄以报臣臣以此知之是後魏王畏公子之贤能不敢任公子以国政魏有隐士曰侯嬴【索隐音盈又曹植音羸瘦之羸】年七十家贫为大梁夷门监者公子闻之往请欲厚遗之不肯受曰臣修身洁行数十年终不以监门困故而受公子财公子於是乃置酒大会宾客坐定公子从车骑虚左自迎夷门侯生侯生摄弊衣冠直上载公子上坐不让欲以观公子公子执辔愈恭侯生又谓公子曰臣有客在市屠中愿枉车骑过之公子引车入市侯生下见其客朱亥俾倪【索隐俾音浦计反倪音五计反邹诞生俾音正未反倪音五弟反正义不正视也】故久立与其客语微察公子公子颜色愈和当是时魏将相宗室宾客满堂待公子举酒市人皆观公子执辔从骑皆窃骂侯生侯生视公子色终不变乃谢客就车至家公子引侯生坐上坐偏赞宾客【索隐徧音遍赞告也谓以侯生徧告宾客】宾客皆惊酒酣公子起为寿侯生前侯生因谓公子曰今日嬴之为公子亦足矣【集解徐广曰为一作羞】嬴乃夷门抱关者也而公子亲枉车骑自迎嬴於衆人广坐之中不宜有所过今公子故过之然嬴欲就公子之名故久立公子车骑市中过客以观公子公子愈恭市人皆以嬴为小人而以公子为长者能下士也於是罢酒侯生遂为上客侯生谓公子曰臣所过屠者朱亥此子贤者世莫能知故隐屠间耳公子往数请之朱亥故不复谢公子怪之魏安厘王二十年秦昭王已破赵长平军又进兵围邯郸公子姊为赵惠文王弟平原君夫人数遗魏王及公子书

求救於魏魏王使将军晋鄙【索隐魏将姓名】将十万衆救赵秦王使使者告魏王曰吾攻赵旦暮且下而诸侯敢救者已拔赵必移兵先击之魏王恐使人止晋鄙留军壁邲名为救赵实持两端以观望平原君使者冠盖相属於魏让魏公子曰胜所以自附为婚姻者以公子之高义为能急人之困今邯郸旦暮降秦而魏救不至安在公子能急人之困也且公子纵轻胜弃之降秦独不怜公子姊邪公子患之数请魏王及宾客辩士说王万端魏王畏秦终不听公子公子自度终不能得之於王计不独生而令赵亡乃请宾客约车骑百余乘欲以客往赴秦军与赵俱死行过夷门见侯生具告所以欲死秦军状辞决而行侯生曰公子勉之矣老臣不能从公子行数里心不快曰吾所以待侯生者备矣天下莫不闻今吾且死而侯生曾无一言半辞送我我岂有所失哉复引车还问侯生侯生笑曰臣固知公子之还也曰公子喜士名闻天下今有难无他端而欲赴秦军譬若以肉投馁虎何功之有哉尚安事客然公子遇臣厚公子往而臣不送以是知公子恨之复返也公子再拜因问侯生乃屏人间语【索隐间音闲谓静语也】曰嬴闻晋鄙之兵符常在王卧内而如姬最幸出入王卧内力能窃之嬴闻如姬父为人所杀如姬资之三年【索隐旧解资之三年谓服齐衰也今按资者畜也谓欲为父报仇之资畜於心已得三年也】自王以下欲求报其父仇莫能得如姬为公子泣公子使客斩其仇头敬进如姬如姬之欲为公子死无所辞顾未有路耳公子诚一开口请如姬如姬必许诺则得虎符夺晋鄙军北救赵而西却秦此五霸之伐也公子从其计请如姬如姬果盗晋鄙兵符与公子公子行侯生曰将在外主令有所不受以便国家公子即合符而晋鄙不授公子兵而复请之事必危矣臣客屠者朱亥可与俱此人力士晋鄙听大善不聽可使击之於是公子泣侯生曰公子畏死邪何泣也公子曰晋鄙嚄唶【集解駟案上音乌百反下音庄白反索隐嚄唶谓多词句也正义声类云嚄大笑唶大呼】宿将往恐不听必当杀之是?泣耳岂畏死哉於是公子请朱亥朱亥笑曰臣乃市井鼓刀屠者而公子亲数存之所以不报谢者以为小礼无所用今公子有急此乃臣效命之秋也遂与公子俱公子过谢侯生侯生曰臣宜从老不能请数公子行日以至晋鄙军之日北乡自刭以送公子公子遂行至邲矫魏王令代晋鄙晋鄙合符疑之举手视公子曰今吾拥十万之衆屯於境上国之重任今单车来代之何如哉欲无听朱亥袖四十斤铁椎椎杀晋鄙公子遂将晋鄙军勒兵下令军中曰父子俱在军中父归兄弟俱在军中兄归独子无兄弟归养得选兵八万人进兵击秦军秦军解去遂救邯郸存赵赵王及平原君自迎公子於界平原君负鞬矢【集解吕忱曰鞬盛弩矢索隐鞬音兰谓以盛矢如今之胡麓而短也吕姓忱名作字林者】为公子先引赵王再拜曰自古贤人未有及公子者也当此之时平原君不敢自比於人公子与侯生决至军侯生果北乡自刭魏王怒公子之盗其兵符矫杀晋鄙公子亦自知也已却秦存赵使将将其军归魏而公子独与客留赵赵孝成王德公子之矫夺晋鄙兵而存赵乃与平原君计?五城封公子公子闻之意骄矜而有自功之色客有说公子曰物有不可忌或有不可不忘夫人有德於公子公子不可忘也公子有德於人愿公子忘之也且矫魏王令夺晋鄙兵以救赵於赵则有功矣於魏则未为忠臣也公子乃自骄而功之窃为公子不取也於是公子立自责似若无所容者赵王埽除自迎执主人之礼引公子就西阶公子侧行辞让从东阶上【集解駟案礼记曰主人就东阶客就西阶客若降等则就主人之阶】自言臯过以负於魏【索隐负音佩】无功於赵赵王侍酒至暮口不忍献五城以公子退让也公子竟留赵赵王以鄯为公子汤沐邑【索隐鄯音霍赵邑名属常山】魏亦复以信陵奉公子公子留赵公子闻赵有处士毛公藏於博徒薛公藏於卖浆家【集解徐广曰浆或作醪索隐徐案别録云也】公子欲见两人两人自匿不肯见公子公子闻

所在乃间步往从此两人游甚欢平原君闻之谓其夫人曰始吾闻夫人弟公子天下无双今吾闻之乃妄从博徒卖浆者游公子妄人耳夫人以告公子公子乃谢夫人去曰始吾闻平原君贤故负魏王而救赵以称平原君平原君之游徒豪举耳【索隐谓豪者举之举亦音据也】不求士也无忌自在大梁时常闻此两人贤至赵恐不得见以无忌从之游尚恐其不我欲也今平原君乃以为羞其不足从游乃装为去夫人具以语平原君平原君乃免冠谢固留公子平原君门下闻之半去平原君归公子天下士复往归公子公子倾平原君客公子留赵十年不归秦闻公子在赵日夜出兵东伐魏魏王患之使使往请公子公子恐其怒之乃诫门下有敢为魏王使通者死宾客皆背魏之赵莫敢劝公子归毛公薛公两人【索隐史失其名】往见公子曰公子所以重於赵名闻诸侯者徒以有魏也今秦攻魏魏急而公子不恤使秦破大梁而夷先王之宗庙公子当何面目立天下乎语未及卒公子立变色告车趣驾归救魏魏王见公子相与泣而以上将军印授公子公子遂将魏安厘王三十年公子使使遍告诸侯诸侯闻公子将各遣将兵救魏公子率五国之兵破秦军於河外走蒙骃遂乘胜逐秦军至函谷关抑秦兵【索隐抑音忆谓以兵蹙之】秦兵不敢出当是时公子威振天下诸侯之客进兵法公子皆名之故世俗称魏公子兵法【集解駟案刘歆七畧有魏公子兵法二十一篇图七卷索隐公子所得进兵法而必称其名以言其恕也】秦王患之乃行金万斤於魏求晋鄙客令毁公子於魏王曰公子亡在外十年矣今为魏将诸侯将皆属诸侯徒闻魏公子不闻魏王公子亦欲因此时定南面而王诸侯畏公子之威方欲共立之秦数使反间伪贺公子得立为魏王未也魏王日闻其毁不能不信後果使人代公子将公子自知再以毁废乃谢病不朝与宾客为长夜饮饮醇酒多近妇女日夜为乐饮者四岁竟病酒而卒其岁魏安厘王亦薨秦闻公子死使蒙骃攻魏拔二十城初置东郡其後秦稍蚕食魏十八岁而虏魏王屠大梁【索隐魏王名假】高祖始微少时数闻公子贤及即天子位每过大梁常祠公子高祖十二年从击黥布还为公子置守冢五家世世岁以四时奉祠公子

太史公曰吾过大梁之墟求问其所谓夷门夷门者城之东门也天下诸公子亦有喜士者矣然信陵君之接岩穴隐者不耻下交有以也名冠诸侯不虚耳高祖每过之而令民奉祠不絶也

【索隐述赞曰信陵下士邻国相倾以公子故不敢加兵颇知朱亥尽礼侯嬴逐却晋鄙终辞赵城毛薛见重万古希声】

史记卷七十七

史记卷七十七考证

信陵君列传徒豪举耳索隐谓豪者举之举亦音据也○顾炎武曰谓特貌为豪杰举动非直欲求有用之士也

公子使使徧告诸侯○唐顺之曰信陵君书不载之本传中在魏世家

诸侯之客进兵法公子皆名之索隐公子所得进兵法而必称其名以言其恕也○董份曰客进兵书而总名于公子故世称魏公子兵法索隐与本文正相反

史记卷七十七考证

卷七十八

钦定四库全书

史记卷七十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

春申君列传第十八

春申君者楚人也名歇姓黄氏游学博闻事楚顷襄王【索隐名横考烈王完之父】顷襄王以歇为辩使於秦秦昭王使白起攻韩魏败之於华阳禽魏将芒卯韩魏服而事秦秦昭王方令白起与韩魏共伐楚未行而楚使黄歇适至於秦闻秦之计当是之时秦已前使白起攻楚取巫黔中之郡拔郢郢东至竟陵【正义竟陵属江夏郡也】楚顷襄王东徙治於陈县【正义今陈州也】黄歇见楚怀王之为秦所诱而入朝遂见欺留死於秦顷襄王其子也秦轻之恐壹举兵而灭楚歇乃上书说秦昭王曰天下莫强於秦楚今闻大王欲伐楚此犹两虎相与鬪两虎相与鬪而弩犬受其弊【索隐谓两虎鬪乃受弊於弩犬刘氏云受犹承也】不如善楚臣请言其说臣闻物至则反冬夏是也【正义至极也极则反也冬至陰之极夏至阳之极】致至则危【集解徐广曰致或作安】累棊是也今大国之地徧天下有其二垂【正义言极东西】此从生民已来万乘之地未尝有也先帝文王庄王之身三世不忘接地於齐以絶从亲之要【索隐音腰以言山东从韩魏是其腰】今王使盛桥守事於韩【索隐秦使盛桥守事於韩亦如楚使召滑相赵然也并内行章义之难】盛桥以其地入秦是王不用甲不信威【索隐信音申】而得百里之地王可谓能矣王又举甲而攻魏杜大梁之门举河内拔燕酸枣虚【集解徐广曰秦始皇五年取酸枣燕虚苏代曰决宿胥之口魏无虚顿邱】桃【集解徐广曰燕县有桃城】入邢【集解徐广曰平臯有邢邱正义邢邱在怀州武德县东南二十里】魏之兵云翔而不敢掇王之功亦多矣王休甲息衆三年而後复之又并蒲衍首垣【集解徐广曰苏秦云北有河外卷衍长垣县有蒲乡索隐此蒲在卫之长垣蒲乡也衍在河南与卷近首盖牛首垣即长垣非河东之垣也垣音圆】以临仁平邱【集解徐广曰属陈留索隐仁及平邱二县名谓以兵临此二县则黄及济阳等自嬰城而守也地理志平邱县属陈留仁阙】黄济阳嬰城【集解徐广曰苏代云决白马之口魏无黄济阳正义故黄城在曹州考城县东济阳故城在曹州宛句县西南嬰城未详】而魏氏服王又割濮磨之北【集解徐广曰濮水北於钜野入济索隐地名近濮】注齐秦之要絶楚赵之脊【正义刘伯庄云言秦得魏地楚赵之絶从】天下五合六聚而不敢救王之威亦单矣【集解徐广曰单亦作殫索隐

按单音丹单尽也言王之威尽行也】王若能持功守威绌攻取之心而肥仁义之地使无後患三王不足四五伯不足六也王若负人徒之衆仗兵革之强乘毀魏之威而欲以力臣天下之主臣恐其有後患也诗曰靡不有初鲜克有终易曰狐涉水濡其尾【正义言狐惜其尾每涉水举尾不令湿比至极困则濡之譬不可力臣之也】此言始之易终之难也何以知其然也昔智氏见伐赵之利而不知榆次之祸【索隐智伯败於榆次也地理志属太原有梗阳乡是也正义榆次并州县也注水经云榆次县南洞涡水侧有凿台】吴见伐齐之便而不知干隧之败【索隐干隧吴之败处地名干水边也隧道路也正义干隧吴地名也出万安山西南一里太湖即吴王夫差自剄处在苏州西北四十里】此二国者非无大功也没利於前而易患於後也【索隐谓智伯及吴王没伐赵及伐齐之利於前而自易其患於後後即榆次干隧之难也】吴之信越也从而伐齐【索隐从音絶用反刘氏云从犹领也】既胜齐人於艾陵【正义艾山在兖州博县南六十里也】还为越王禽三渚之浦【集解駟案战国策曰三江之浦正义吴俗传云越军得子胥梦从东入伐吴越王即从三江北岸立坛杀白马祭子胥杯动酒尽乃开渠由三浦入破吴王於姑苏败干隧也】智氏之信韩魏也从而伐赵攻晋阳城【正义并州城】胜有日矣韩魏叛之杀智伯瑤於凿台之下【集解徐广曰凿台在榆次】今王妒楚之不毀也而忘毀楚之强韩魏也臣为王虑而不取也诗曰大武远宅而不涉【正义言大军不远跋涉攻伐】从此观之楚国援也邻国敌也诗云趯趯毚兔遇犬获之【集解駟案韩婴章句曰趯趯往来貌获得也言趯趯之毚兔谓狡兔数往来逃匿其迹有时遇犬得之毛传曰毚兔狡兔也郑玄曰遇犬犬之驯者谓田犬索隐趯音天历反毚音谗】他人有心予忖度之今王中道而信韩魏之善王也此正吴之信越也臣闻之敌不可假时不可失臣恐韩魏卑辞除患而实欲欺大国也【索隐大国谓秦也】何则王无重世之德於韩魏而有累世之怨焉【索隐重世犹再世也】夫韩魏父子兄弟接踵而死於秦者将十世矣本国残社稷坏宗庙毀剝腹絶肠折颈摺颐【集解徐广曰一作顛索隐摺音拉颐音夷】首身分离暴骸骨於草泽头颅僵仆相望於境父子老弱系脰束手为羣虏者相及於路鬼神孤伤无所血食人民不聊生族类离散流亡为仆妾者盈满海内矣故韩魏之不亡秦社稷之忧也今王资之与攻楚不亦过乎且王攻楚将恶出兵【正义恶音乌】王将借路於仇讐之韩魏乎兵出之日而王忧其不返也是王以兵资於仇讐之韩魏也王若不借路於仇讐之韩魏必攻随水右壤随水右壤此皆广川大水山林谿谷不食之地也【索隐楚都陈随水之右壤盖在随之西今邓州之西其地多山林者是也】王虽有之不为得地是王有毀楚之名而无得地之实也且王攻楚之日四国必悉起兵以应王秦楚之兵构而不离魏氏将出而攻留方与銓湖陵殫萧相故宋必尽【正义徐州西宋州东兖州南并故宋地】齐人南面攻楚泗上必举【正义此时徐泗属齐也】此皆平原四达膏腴之地而使独攻【索隐若秦楚构兵不休则魏尽故宋齐取泗上是使齐魏独攻伐而得其利者也】王破楚以肥韩魏於中国而劲齐韩魏之强足以校於秦【索隐校音教谓足以与秦为敌也一云校者报也言力为报秦】齐南以泗水为境东负海北倚河而无後患天下之国莫强於齐魏齐魏得地葆利而详事下吏一年之後为帝未能其於禁王之为帝有余矣【索隐言齐一年之後未即能为帝而能禁秦为帝有余力矣以禁字作楚者误也】夫以王壤土之博人徒之衆兵革之强壹举事而树怨於楚迟令韩魏归帝重於齐是王失计也【集解徐广曰迟一作还索隐迟音值值犹乃也令音力呈反韩魏重齐令归帝号此秦之失计也】臣为王计莫若善楚秦楚合而为一以临韩韩必斂手王施以东山之险带以曲河之利韩必为关内之侯若是而王以十万戍郑梁氏寒心许鄢

陵嬰城而上蔡召陵不往来也如此而魏亦关内侯矣王壹善楚而关内两万乘之主注地於齐【索隐注谓以兵裁之】齐右壤可拱手而取也【正义右壤谓济州之南北也】王之地一经两海【索隐西海至东海皆是秦地正义广言横度中国东西也】要约天下是燕赵无齐楚齐楚无燕赵也然後危动燕赵直摇齐楚此四国者不待痛而服矣昭王曰善於是乃止白起而谢韩魏发使赂楚约为与国黄歇受约归楚楚使歇与太子完入质於秦秦留之数年楚顷襄王病太子不得归而楚太子与秦相应侯善於是黄歇乃说应侯曰相国诚善楚太子乎应侯曰然歇曰今楚王恐不起疾秦不如归其太子太子得立其事秦必重而德相国无穷是亲与国而得储万乘也若不归则咸阳一布衣耳楚更立太子必不事秦夫失与国而絶万乘之和非计也愿相国孰虑之应侯以闻秦王秦王曰令楚太子之傅先往问楚王之疾返而後图之黄歇为楚太子计曰秦之留太子也欲以求利也今太子力未能有以利秦也歇忧之甚而阳文君子二人在中王若卒大命太子不在阳文君子必立为後太子不得奉宗庙矣不如亡秦与使者俱出臣请止以死当之楚太子因变衣服为楚使者御以出关而黄歇守舍常为谢病度太子已远秦不能追歇乃自言秦昭王曰楚太子已归出远矣歇当死愿赐死昭王大怒欲听其自杀也应侯曰歇为人臣出身以徇其主太子立必用歇故不如无罪而归之以亲楚秦因遣黄歇歇至楚三月楚顷襄王卒【集解徐广曰三十六年】太子完立是为考烈王考烈王元年以黄歇为相封为春申君【正义然四君封邑检皆不获唯平原有地又非赵境并盖号諡而孟尝是諡】赐淮北地十二县後十五岁黄歇言之楚王曰淮北地边齐其事急请以为郡便因并献淮北十二县请封於江东考烈王许之春申君因城故吴墟【正义墟音虚闾閭今苏州也於城内小城西北别筑城居之今圯毁也又大内北渚四从五横至今犹存又攻破楚门为闾门】以自为都邑春申君既相楚是时齐有孟尝君赵有平原君魏有信陵君方争下士招致宾客以相倾夺辅国持权春申君为楚相四年秦破赵之长平军四十余万五年围邯鄲邯鄲告急於楚楚使春申君将兵往救之秦兵亦去春申君归春申君相楚八年为楚北伐灭鲁【索隐年表云八年取鲁封鲁君於莒十四年灭也】以荀卿为兰陵令当是时楚复强赵平原君使人於春申君春申君舍之於上舍赵使欲夸楚为瑋琕簪刀劔室以珠玉饰之请命春申君客春申君客三千余人其上客皆蹑珠履以见赵使赵使大慙春申君相十四年秦庄襄王立以吕不韦为相封为文信侯取东周春申君相二十二年诸侯患秦攻伐无已时乃相与合从西伐秦【集解徐广曰始皇六年】而楚王为从长春申君用事至函谷关秦出兵攻诸侯兵皆败走楚考烈王以咎春申君春申君以此益?客有观津人朱英【正义观音馆今魏州观城县也】谓春申君曰人皆以楚为强而君用之弱其於英不然先君时善秦二十年而不攻楚何也秦踰崑崙之塞【正义崑崙之塞在申州崑音盲也】而攻楚不便假道於两周背韩魏而攻楚不可今则不然魏旦暮亡不能爱许鄢陵其许魏割以与秦秦兵去陈百六十里【集解徐广曰在许东南】臣之所观者见秦楚之日鬪也楚於是去陈徙壽春而秦徙卫野王作置东郡【正义濮滑州兼河北置东郡濮州本卫都而徙野王也】春申君由此就封於吴行相事楚考烈王无子春申君患之求妇人宜子者进之甚衆卒无子赵人李园持其女弟欲进之楚王闻其不宜子恐久母宠李园求事春申君为舍人已而谒归故失期还谒春申君问之状对曰齐王使使求臣之女弟与其使者饮故失期春申君曰娉入乎对曰未也春申君曰可得见乎曰可於是李园乃进其女弟即幸於春申君知其有身李园乃与其女弟谋园女弟承间以说春申君曰楚王之贵幸君虽兄弟不如也今君相楚二十余年而王无子即百岁後将更立兄弟则楚更立君後亦各贵其故所亲君又安得长有宠乎非徒

然也君贵用事久多失礼於王兄弟兄弟诚立祸且及身何以保相印江东之封乎今妾自知有身矣而人莫知妾幸君未久诚以君之重而进妾於楚王王必幸妾妾赖天有子男则是君之子为王也楚国尽可得孰与身临不测之罪乎春申君大然之乃出李园女弟谨舍而言之楚王楚王召入幸之遂生子男立为太子以李园女弟为王后楚王贵李园园用事李园既入其女弟立为王后子为太子恐春申君语泄而益骄陰养死士欲杀春申君以灭口而国人颇有知之者春申君相二十五年楚考烈王病朱英谓春申君曰世有毋望之福【正义无望犹不望而忽至也】又有毋望之祸【索隐周易有无妄卦其义殊也】今君处毋望之世【正义谓生死无常】事毋望之王【正义谓喜怒不节】安可以无毋望之人乎【正义谓吉凶忽为】春申君曰何谓毋望之福曰君相楚二十余年矣虽名相国实楚王也今楚王病旦暮且卒卒而君相少主因而代立当国如伊尹周公王长而反政不即遂南面称孤而有楚国此所谓毋望之福也春申君曰何谓毋望之祸曰李园不治国而君之仇也【索隐言园是春申之仇也战国策作君之舅谓为王舅与此异】不为兵而养死士之日久矣楚王卒李园必先入据权而杀君以灭口此所谓毋望之祸也春申君曰何谓毋望之人对曰君置臣郎中楚王卒李园必先入臣为君杀李园此所谓毋望之人也春申君曰足下置之李园弱人也仆又善之且又何至此朱英知言不用恐祸及身乃亡去後十七日楚考烈王卒李园果先入伏死士於棘门之内【正义壽州城门】春申君入棘门园死士侠刺春申君斩其头投之棘门外【正义楚考烈王二十五年秦始皇九年】於是遂使吏尽灭春申君之家而李园女弟初幸春申君有身而入之王所生子者遂立是为楚幽王【索隐按楚悍有母弟犹有庶兄负刍及昌平君是楚君完非无子而上文云考烈王无子误也】是岁也秦始皇帝立九年矣嫪毐亦为乱於秦觉夷其三族而吕不韦废

太史公曰吾适楚观春申君故城宫室盛矣哉初春申君之说秦昭王及出身遣太子归何其智之明也後制於李园旄矣【集解徐广曰旄音耄】语曰当断不断反受其乱春申君失朱英之谓邪

【索隐述赞曰黄歇辩智权畧秦楚太子获归身作宰辅珠炫赵客邑开吴土烈王寡胤李园献女无妄成灾朱英徒语】

史记卷七十八

史记卷七十八考证

春申君列传徧天下有其二垂正义言极东西○【臣照】按秦尽有西方之地而又克蜀凡楚之上流攻取殆尽则所谓二垂者指西南两面耳正义之说未合夫东界韩魏至齐而极秦地固绌于东也

先帝文王庄王之身○国策作文王武王之身

今王使盛桥守事於韩○战国策作成桥补注曰刘伯庄云桥音矫

黄济阳婴城正义婴城未详○鲍彪战国策注曰婴犹縈也盖二邑环兵自守

王又割濮磨之北○战国策补注曰江汉南之濮乃书所谓彭濮之濮沮水磨城远不相涉下文北属之燕可见濮即卫之濮上水出东郡濮阳南入钜野者也索隐云磨地近濮按史表有磨侯程黑索隐云表作历历县在信都地邑并无磨愚按此字作磨与历通犹乐毅书磨室之类新序正作濮历则其字甚明

王之威亦单矣○战国策单作憚新序作单董份曰诗云单及鬼方单延也又云俾尔单厚单大也盖言王之威延被诸国而大也【臣照】按单尽也言竭尽而无余也

而肥仁义之地○战国策地作诚新序作地

鬼神孤伤○战国策作狐祥新序作潢洋

迟令韩魏归帝徐广曰迟一作还○徐孚远曰于义还字为长当是误书也

春申君为楚相四年秦破赵之长平军四十余万五年围邯郸邯郸告急於楚楚使春申君将兵往救之○考烈王元年春申君为相六年救赵世家年表皆同此作五年

史记卷七十八考证

卷七十九

钦定四库全书

史记卷七十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

范雎蔡泽列传第十九

范雎者魏人也字叔游说诸侯欲事魏王家贫无以自资乃先事魏中大夫须贾【索隐汉书百官表中大夫秦官此魏有中大夫盖古官也姓须名贾盖密须氏之後】须贾为魏昭王使於齐【索隐世本昭王名邀襄王之子】范雎从留数月未得报齐襄王闻雎辩口【索隐襄王名法章】乃使人赐雎金十斤及牛酒雎辞谢不敢受须贾知之大怒以为雎持魏国阴事告齐故得此馈令雎受其牛酒还其金既归心怒雎以告魏相魏相魏之诸公子曰魏齐魏齐大怒使舍人笞击雎折脇摺齿【索隐摺音力答反谓打折其胁而又拉折其齿也】雎佯死即卷以箒【索隐箒谓苇荻之薄也用之以裹其屍也】置厕中宾客饮者醉更溺雎【索隐更音羹溺即溲也溺音年吊反溲音所留反正义溺古尿字】故戮辱以惩後令无妄言者雎从箒中谓守者曰公能出我我必厚谢公守者乃请出弃箒中死人魏齐醉曰可矣范雎得出後魏齐悔复召求之魏人郑安平闻之乃遂操范雎亡伏匿更名姓曰张禄当此时秦昭王使谒者王稽於魏郑安平诈为卒侍王稽【正义卒祖律反】王稽问魏有贤人可与俱西游者乎郑安平曰臣里中有张禄先生欲见君言天下事其人有仇不敢昼见王稽曰夜与俱来郑安平夜与张禄见王稽语未究王稽知范雎贤谓曰先生待我於三亭之南【索隐三亭亭名在魏境之边道亭也今无其处一云魏之郊境总有三亭皆祖饯之处如今与期三亭之南盖送饯已毕无人之处所也正义括地志云三亭冈在汴州尉氏县西南三十七里按三亭冈在山部中名也盖冈字误为南】与私约而去王稽辞魏去过载范雎入秦至湖关【索隐地理志京兆有湖县本名胡武帝更名湖即今湖城也正义今虢州湖城县也】望见车骑从西来范雎曰彼来者为谁王稽曰秦相穰侯东行县邑范雎曰吾闻穰侯专秦权恶内诸侯客【索隐内音纳亦如字内犹入也】此恐辱我我宁且匿车中有顷穰侯果至劳王稽因立车而语曰关东有何变曰无有又谓王稽曰谒君得无与诸侯客子俱来乎无益徒乱人国耳王稽曰不敢即别去范雎曰吾闻穰侯智士也其见事迟乡者疑车中有人忘索之【索隐索搜也先格反】於是范雎下车走曰此必悔之行十余里果使骑还索车中无客乃已王稽遂与范雎入咸阳已报使因言曰魏有张禄先生天下辩士也曰秦王之国危於累卵【正义按说苑云

晋灵公造九层之台费用千金谓左右曰敢有谏者斩荀息闻之上书求见灵公张弩持矢见之曰臣不敢谏也臣能累十二博棊加九鸡子其上公曰子为寡人作之荀息正颜色定志意以棊子置下加九鸡子其上左右惧憚息灵公气息不续公曰危哉危哉荀息曰不危也复有危於此者公曰愿见之荀息曰九层之台三年不成男不耕女不织国用空虚隣国谋议将兴社稷亡灭君欲何望灵公曰寡人之过也乃至於此即坏九层台也】得臣则安然不可以书传也臣故载来秦王弗信使舍食草具【索隐谓亦舍之而食以下客之具然草具谓簋食草菜之饌具也】待命岁余当是时昭王已立三十六年南拔楚之鄢郢楚怀王幽死於秦秦东破齐湣王常称帝後去之数困三晋馱天下辯士无所信穰侯华阳君【集解徐广曰华一作叶索隐穰侯谓冉宣太后之异父弟穰县在南阳华阳?戎宣太后之同父弟亦号为新城君是也】昭王母宣太后之弟也而涇阳君高陵君皆昭王同母弟也穰侯相三人者更将有封邑以太后故私家富重於王室及穰侯为秦将且欲越韩魏而伐齐纲壽欲以广其陶封范雎乃上书曰臣闻明主立政【索隐战国策立作泣】有功者不得不赏有能者不得不官劳大者其禄厚功多者其爵尊能治衆者其官大故无能者不敢当职焉有能者亦不得蔽隐使以臣之言为可愿行而益利其道以臣之言为不可久留臣无为也语曰庸主赏所爱而罚所恶明主则不然赏必加於有功而刑必断於有罪今臣之胷不足以当樞质【索隐樞音陟林反樞者莖樞也质剡刀也谓腰斩者为樞质也】而要不足以待斧钺岂敢以疑事尝试於王哉虽以臣为贱人而轻辱独不重任臣者之无反复於王邪且臣闻周有砥礪宋有结绿梁有县黎【集解薛综曰县黎一曰美玉】楚有和璞【正义县音玄刘伯庄云珎玉璞也】此四宝者土之所生良工之所失也而为天下名器然则圣王之所弃者独不足以厚国家乎臣闻善厚家者取之於国善厚国者取之於诸侯天下有明主则诸侯不得擅厚者何也为其割荣也【索隐割荣即上之擅厚谓擅权也】良医知病人之死生而圣主明於成败之事利则行之害则舍之疑则少尝之虽舜禹复生弗能改已语之至者臣不敢载之於书其浅者又不足聽也意者臣愚而不概於王心邪【集解徐广曰一作漑音同索隐战国策概作关谓关涉於王心也徐作音同非也】亡其言臣者贱而不可用乎【索隐亡犹轻蔑也】自非然者臣愿得少赐游观之间望见顔色一语无效请伏斧质於是秦昭王大说乃谢王稽使以传车召范雎【集解徐广曰一云使持车索隐徐按战国策文也】於是范雎乃得见於离宫【正义长安故城本秦离宫在雍州长安北十三里也】详为不知永巷而入其中【正义永巷宫中狱也】王来而宦者怒逐之曰王至范雎繆为曰秦安得王秦独有太后穰侯耳欲以感怒昭王昭王至闻其与宦者争言遂延迎谢曰寡人宜以身受命久矣会义渠之事急寡人旦暮自请太后今义渠之事已寡人乃得受命窃闵然不敏【索隐邹诞生本作惛然音昏或又作闵音敏闵犹昏闇也】敬执宾主之礼范雎辞让是日观范雎之见者羣臣莫不洒然变色易容者【集解徐广曰洒先典反索隐郑玄云洒然敬肃之貌】秦王屏左右宫中虚无人秦王跽而请【索隐跽其纪反跽者长跽两膝被地】曰先生何以幸教寡人范雎曰唯唯有间秦王复跽而请曰先生何以幸教寡人范雎曰唯唯若是者三秦王跽曰先生卒不幸教寡人邪范雎曰非敢然也臣闻昔者吕尚之遇文王也身为渔父而钓於渭滨耳若是者交疎也已说而立为太师载与俱归者其言深也故文王遂收功於吕尚而卒王天下乡使文王疎吕尚而不与深言是周无天子之德而文武无与成其王业也今臣羈旅之臣也交疎於王而所愿陈者皆匡君之事处人骨肉之间愿効愚忠而未知王之心也此所以王三问而不敢对者也臣非有畏而不敢言也臣知今日言之於前而明日伏诛於後然臣不敢避也大王信行臣之言死不足以

为臣患亡不足以为臣忧漆身为厉【索隐厉音赖?病也言漆涂身生疮如病癩】被髮为狂不足以为臣耻且以五帝之圣焉而死三王之仁焉而死五伯之贤焉而死乌获任鄙之力焉而死成荆【集解徐广曰一作羌】孟贲【集解许慎曰成荆古勇士孟贲卫人】王庆忌【集解駰案吴越春秋曰吴王僚子庆忌】夏育之勇焉而死【集解駰案汉书音义曰或云夏育卫人力举千钧】死者人之所必不免也处必然之势可以少补於秦此臣之所大愿也臣又何患哉伍子胥橐载而出昭关夜行昼伏至於陵水无以餬其口【索隐刘氏云陵水即栗水也陵栗声相近故惑也】膝行蒲伏稽首肉袒鼓腹吹箎【集解徐广曰一作箫】乞食於吴市卒兴吴国阖闾为伯使臣得尽谋如伍子胥加之以幽囚终身不复见是臣之说行也臣又何忧箕子接舆漆身为厉被髮为狂无益於主假使臣得同行於箕子可以有补所贤之主是臣之大荣也臣有何耻臣之所恐者独恐臣死之後天下见臣之尽忠而身死因以是杜口裹足莫肯乡秦耳足下上畏太后之严下惑於奸臣之态【索隐态谓奸臣諂诈之态也】居深宫之中不离阿保之手终身迷惑无与昭奸【正义昭明也无与明其奸恶】大者宗庙灭覆小者身以孤危此臣之所恐耳若夫穷辱之事死亡之患臣不敢畏也臣死而秦治是臣死贤於生秦王跽曰先生是何言也夫秦国辟远寡人愚不肖先生乃幸辱至於此是天以寡人愬先生【集解徐广曰乱先生也音溷索隐二字并音胡困反愬犹汩乱之意】而存先王之宗庙也寡人得受命於先生是天所以幸先王而不弃其孤也先生奈何有言若是事无小大上及太后下至大臣愿先生悉以教寡人无疑寡人也范雎拜秦王亦拜范雎曰大王之国四塞以为固北有甘泉谷口【正义括地志云甘泉山一名鼓原俗名磨石岭在雍州云阳县西北九十里关中记云甘泉宫在甘泉山上年代永久无复甘泉之名失其实也宫北云有连山土人为磨石岭郊祀志公孙卿言黄帝得仙寒门寒门者谷口也按九嶷山西谓之谷口即古寒门也在雍州醴泉县东北四十里】南带泾渭右陇蜀左关阪奋撃百万战车千乘利则出攻不利则入守此王者之地也民怯於私鬪而勇於公战此王者之民也王并此二者而有之夫以秦卒之勇车骑之衆以治诸侯譬若驰韩卢而搏蹇兔也【索隐战国策云韩卢者天下之壮犬也是韩卢为犬谓驰韩卢而搏蹇兔以喻秦强言取诸侯之易也】霸王之业可致也而羣臣莫当其位至今闭关十五年不敢窥兵於山东者是穰侯为秦谋不忠而大王之计有所失也秦王跽曰寡人愿闻失计然左右多窃聽者范雎恐未敢言内先言外事以观秦王之俯仰因进曰夫穰侯越韩魏而攻齐纲罽非计也少出师则不足以伤齐多出师则害於秦臣意王之计欲少出师而悉韩魏之兵也则不义矣今见与国之不亲也越人之国而攻可乎其於计疏矣且昔齐湣王南攻楚破军杀将再辟地千里【正义辟尺亦反】而齐尺寸之地无得焉者岂不欲得地哉形势不能有也诸侯见齐之罢弊君臣之不和也兴兵而伐齐大破之士辱兵顿皆咎其王曰谁为此计者乎王曰文子为之【索隐谓田文孟尝君也犹战国策谓田盼田嬰为盼子嬰子也】大臣作乱文子出奔故齐所以大破者以其伐楚而肥韩魏也此所谓借贼兵賣盜粮者也【索隐借音子夜反一作籍亦音同賣音侧奚反言为盜賣粮也】王不如远交而近攻得寸则王之寸也得尺亦王之尺也今释此而远攻不亦繆乎且昔者中山之国地方五百里赵独吞之功成名立而利附焉天下莫之能害也今夫韩魏中国之处而天下之枢也王其欲霸必亲中国以为天下枢以威楚楚强则附赵赵强则附楚楚赵皆附齐必惧矣齐惧必卑辞重币以事秦齐附而韩魏因可虏也昭王曰吾欲亲魏久矣而魏多变之国也寡人不能亲请问亲魏奈何对曰王卑词重币以事之不可则割地而赂之不可因举兵而伐之王曰寡人敬闻命矣乃拜范雎为客卿谋兵事卒聽范雎谋使五大夫绾伐魏拔怀

【集解徐广曰昭王三十九年】後二岁拔邢邱客卿范雎复说昭王曰秦韩之地形相错如绣秦之有韩也譬如木之有蠹也人之有心腹之病也天下无变则已天下有变其为秦患者孰大於韩乎王不如收韩昭王曰吾固欲收韩韩不聽为之奈何对曰韩安得无聽乎王下兵而攻荥阳则巩成臯之道不通【正义言宜阳陕虢之师不得下相救】北守太行之道则上党之师不下【正义言泽潞之师不得下太行相救】王一兴兵而攻荥阳则其国断而为三【正义新郑已南一宜阳令二泽潞三】夫韩见必亡安得不聽乎若韩聽而霸事因可虑矣王曰善且欲发使於韩范雎日益亲复说用数年矣因请间说曰【正义间音闲】臣居山东时闻齐之有田文不闻其有王也闻秦之有太后穰侯华阳高陵泾阳不闻其有王也夫擅国之谓王能利害之谓王制杀生之威之谓王今太后擅行不顾穰侯出使不报华阳泾阳等擊断无諱【集解駟案諱畏也】高陵进退不请四贵备而国不危者未之有也为此四贵者下乃所谓无王也然则权安得不倾令安得从王出乎臣闻善治国者乃内固其威而外重其权穰侯使者操王之重决制於诸侯剖符於天下政适【集解徐广政适音征敌】伐国莫敢不聽战胜攻取则利归於陶国弊御於诸侯【索隐弊者断也御者制也言穰侯执权以制御主断於诸侯也】战败则结怨於百姓而祸归於社稷诗曰木实繁者披其枝【正义披音片被反】披其枝者伤其心大其都者危其国尊其臣者卑其主崔杼淖齿管齐【索隐淖姓也音尼教反汉有淖姬是也高诱曰管典也言二人典齐权而行弑逆也正义淖齿楚人齐湣王臣】射王股擢王筋【索隐言射王股误也按崔杼射庄公之股淖齿缩湣王之筋是说二君事】县之於庙梁宿昔而死李兑管赵囚主父於沙邱【正义沙邱台在邢州平乡县东北三十里】百日而饿死今臣闻秦太后穰侯用事高陵华阳泾阳佐之卒无秦王此亦淖齿李兑之类也且夫三代所以亡国者君专授政纵酒驰骋弋猎不聽政事其所授者妬贤嫉能御下蔽上以成其私不为主计而主不觉悟故失其国今自有秩以上至诸大吏下及王左右无非相国之人者见王独立於朝臣窃为王恐万世之後有秦国者非王子孙也昭王闻之大惧曰善於是废太后逐穰侯高陵华阳泾阳君於关外秦王乃拜范雎为相收穰侯之印使归陶因使县官给车牛以徙千乘有余到关关閤其宝器宝器珍怪多於王室秦封范雎以应号为应侯【索隐刘氏云河东临晋有应亭则秦地有应也又按本纪以应为太后养地解者云在颍川之应乡未知孰是正义括地志云故应城古应乡在汝州鲁山县东四十里也】当是时秦昭王四十一年也范雎既相秦秦号曰张禄而魏不知以为范雎已死久矣魏闻秦且东伐韩魏使须贾於秦范雎闻之为微行敝衣间步之邸【正义刘云诸国客館】见须贾须贾见之而惊曰范叔固无恙乎范雎曰然须贾笑曰范叔有说於秦邪曰不也雎前日得過於魏相故亡逃至此安敢说乎须贾曰今叔何事范雎曰臣为人庸赁须贾意哀之留与坐饮食曰范叔一寒如此哉乃取其一綈袍以赐之【索隐綈厚繒也音啼盖今之絁也正义今之麤袍】须贾因问曰秦相张君公知之乎吾闻幸於王天下之事皆决於相君今者事之去留在张君孺子岂有客习於相君者哉【索隐刘氏云孺子盖谓雎为小子】范雎曰主人翁习知之唯雎亦得谒雎请为君见於张君须贾曰吾马病车轴折非大车驷马吾固不出范雎曰愿为君借大车驷马於主人翁范雎归取大车驷马为须贾御之入秦相府府中望见有识者皆避匿须贾怪之至相舍门谓须贾曰待我我为君先入通於相君须贾待门下持车良久问门下曰范叔不出何也门下曰无范叔须贾曰乡者与我载而入者门下曰乃吾相张君也须贾大惊自知见卖乃肉袒膝行因门下人谢罪於是范雎盛帷帐侍者甚衆见之须贾顿首言死罪曰贾不意君能自致於青云之上贾不敢复读天下之书不敢复与天下之事贾有汤镬之罪请自

屏於胡貉之地唯君死生之范雎曰汝罪有几曰擢贾之髮以续贾之罪尚未足范雎曰汝罪有三耳昔者楚昭王时而申包胥为楚郤吴军楚王封之以荆五千户包胥辞不受为邱墓之寄於荆也今雎之先人邱墓亦在魏公前以雎为有外心於齐而恶雎於魏齐公之罪一也当魏齐辱我於厕中公不止罪二也更醉而溺我公其何忍乎罪三矣然公之所以得无死者以绋袍恋恋有故人之意故释公乃谢罢入言之昭王罢归须贾须贾辞於范雎范雎大供具尽请诸侯使与坐堂上食饮甚设而坐须贾於堂下置莖豆其前令两黥徒夹而马食之数曰为我告魏王急持魏齐头来不然者我且屠大梁须贾归以告魏齐魏齐恐亡走赵匿平原君所范雎既相王稽谓范雎曰事有不可知者三有不可奈何者亦三宫车一日晏驾【集解应劭曰天子当晨起早作如方崩殒故称晏驾韦昭曰凡初崩为晏驾者臣子之心犹谓宫车当驾而晚出】是事之不可知者一也君卒然捐馆舍是事之不可知者二也使臣卒然填沟壑是事之不可知者三也宫车一日晏驾君虽恨於臣无可奈何君卒然捐馆舍君虽恨於臣亦无可奈何使臣卒然填沟壑君虽恨於臣亦无可奈何范雎不怩乃入言於王曰非王稽之忠莫能内臣於函谷关非大王之贤圣莫能贵臣今臣官至於相爵在列侯王稽之官尚止於谒者非其内臣之意也昭王召王稽拜为河东守三岁不上计【集解司马彪曰凡郡国治民进贤劝功决讼检奸常以春行所至县劝民农桑振救乏絶秋冬遣无害吏案讯问诸囚平其罪法论课殿最岁尽遣吏上计】又任郑安平昭王以为将军范雎於是散家财物尽以报所尝困辱者一饭之德必偿睚眦之怨必报【索隐睚音崖卖反眦音士资反睚眦谓相嗔怒而见齿也】范雎相秦二年秦昭王之四十二年东伐韩少曲【集解徐广曰苏代曰起少曲一日而断太行索隐刘氏以为盖在太行西南】高平拔之【正义括地志云南韩王故城在怀州河阳县西北四十里俗谓之韩王城非也春秋时周桓王以与郑纪年云郑侯使辰归晋阳向更名高平拔之则少曲当与高平相近】秦昭王闻魏齐在平原君所欲为范雎必报其讎乃详为好书遗平原君曰寡人闻君之高义愿与君为布衣之友君幸过寡人寡人愿与君为十日之饮平原君畏秦且以为然而入秦见昭王昭王与平原君饮数日昭王谓平原君曰昔周文王得吕尚以为太公齐桓公得管夷吾以为仲父今范君亦寡人之叔父也范君之仇在君之家愿使人归取其头来不然吾不出君於关平原君曰贵而为友者为贱也富而为交者为贫也【索隐上为如字下为音于伪反以言富贵而结交情深者为有贫贱之时不可忘之也】夫魏齐者胜之友也在固不出也今又不在臣所昭王乃遗赵王书曰王之弟在秦范君之仇魏齐在平原君之家王使人疾持其头来不然吾举兵而伐赵又不出王之弟於关赵孝成王乃发卒围平原君家急魏齐夜亡出见赵相虞卿虞卿度赵王终不可说乃解其相印与魏齐亡间行念诸侯莫可以急抵者乃复走大梁欲因信陵君以走楚信陵君闻之畏秦犹豫未肯见曰虞卿何如人也时侯嬴在旁曰人固未易知知人亦未易也夫虞卿蹑屣担簦一见赵王赐白璧一双黄金百镒再见拜为上卿三见卒受相印封万户侯当此之时天下争知之夫魏齐穷困过虞卿虞卿不敢重爵禄之尊解相印捐万户侯而间行急士之穷而归公子公子曰何如人人固不易知知人亦未易也信陵君大慙驾如野迎之魏齐闻信陵君之初难见之怒而自刭赵王闻之卒取其头予秦秦昭王乃出平原君归赵昭王四十三年秦攻韩汾陜拔之【索隐陜音邢陜盖在韩之西界与汾相近也正义按陜庭故城在绛州曲沃县西北二十里汾水之阳】因城河上广武【索隐刘氏云此河上盖近河北之地本属韩今秦得而城】後五年昭王用应侯谋纵反间卖赵赵以其故令马服子代廉颇将【索隐马服子赵括之号也虞喜志林云马兵之首也号曰马服者言能服马也邹氏颇音疋波反】秦大破赵於长平遂

围邯鄲已而与武安君白起有隙言而杀之【集解徐广曰在五十年索隐徐据秦本纪及表而知也】任郑安平使将擊赵郑安平为赵所围急以兵二万人降赵应侯席藁请罪秦之法任人而所任不善者各以其罪罪之於是应侯罪当收三族秦昭王恐伤应侯之意乃下令国中有敢言郑安平事者以其罪罪之而加赐相国应侯食物日益厚以顺适其意後二岁王稽为河东守与诸侯通坐法诛【集解徐广曰五十二年】而应侯日益以不怩昭王临朝叹息应侯进曰臣闻主忧臣辱主辱臣死今大王中朝而忧臣敢请其罪昭王曰吾闻楚之铁劔利而倡优拙【正义论士能善卒不战】夫铁劔利则士勇倡优拙则思虑远夫以远思虑而御勇士吾恐楚之图秦也夫物不素具不可以应卒今武安君既死而郑安平等畔内无良将而外多敌国吾是以忧欲以激励应侯【索隐激音擊】应侯惧不知所出蔡泽闻之往入秦也

蔡泽者燕人也游学干诸侯小大甚衆不遇而从唐举相【集解駢案荀卿曰梁有唐举索隐荀卿书作唐莒】曰吾闻先生相李兑曰百日之内持国秉政有之乎【索隐按左传云国子实执齐秉服?曰秉权柄也】曰有之曰若臣者何如唐举孰视而笑曰先生曷鼻巨肩【集解徐广曰曷一作仰巨一作渠索隐曷鼻谓鼻如蝎虫也巨肩肩巨於项也盖项低而肩竖也曷其例反】魑顔蹙齧膝挛【集解駢案挛两膝曲也徐广曰一作率索隐魑音徒回反魑顔谓顔貌魑回若魑梧然也齧音乌曷反蹙齧谓鼻蹙眉膝挛谓膝又挛曲也】吾闻圣人不相殆先生乎蔡泽知唐举戏之乃曰富贵吾所自有吾所不知者壽也愿闻之唐举曰先生之壽从今以往者四十三岁蔡泽笑谢而去谓其御者曰吾持梁刺齿肥【集解駢案持梁作饭也刺齿二字当作啮又作齧也索隐持梁谓作梁米饭而持其器以食也刺齿肥当为啮肥谓食肥肉也】跃马疾驱怀黄金之印结紫綬於要揖让人主之前食肉富贵四十三年足矣去之赵见逐入韩魏遇夺釜鬲於涂【集解駢案尔雅曰欵足者谓之鬲郭璞曰鼎曲脚索隐釜音父鬲音历欵者空也言其足中空也而郭氏云鼎曲脚者以欵训曲故云曲脚也】闻应侯任郑安平王稽皆负重罪於秦应侯内慙蔡泽乃西入秦将见昭王使人宣言以感怒应侯曰燕客蔡泽天下雄俊弘辯智士也彼一见秦王秦王必困君而夺君之位应侯闻曰五帝三代之事百家之说吾既知之衆口之辯吾皆摧之是恶能困我而夺我位乎使人召蔡泽蔡泽入则揖应侯应侯固不快及见之又倨应侯因让之曰子常宣言欲代我相秦寧有之乎对曰然应侯曰请闻其说蔡泽曰吁君何见之晚也夫四时之序成功者去夫人生百体坚强手足便利耳目聪明而心圣智岂非士之愿与应侯曰然蔡泽曰质仁秉义行道施德得志於天下天下怀乐敬爱而尊慕之皆愿以为君王岂不辯智之期与应侯曰然蔡泽复曰富贵显荣成理万物使各得其所性命壽长终其天年而不夭伤天下继其统守其业传之无穷名实纯粹泽流千里【集解徐广曰一本无此字】世世称之而无絶与天地终始岂道德之符而圣人所谓吉祥善事者与应侯曰然蔡泽曰若夫秦之商君楚之吴起越之大夫种其卒然亦可愿与应侯知蔡泽之欲困己以说【集解駢案式拙反】复谬曰何为不可夫公孙鞅之事孝公也极身无貳虑尽公而不顾私设刀锯以禁奸邪信赏罚以致治披腹心示情素蒙怨咎欺旧友夺魏公子印安秦社稷利百姓卒为秦禽将破敌攘地千里吴起之事悼王也使私不得害公谗不得蔽忠言不取苟合行不取苟容不为危易行行义不辟难【集解徐广曰一云不困毀訾】然为霸主强国不辞祸凶大夫种之事越王也主虽困辱悉忠而不解主虽絶亡尽能而弗离成功而弗矜贵富而不骄怠若此三子者固义之至也忠之节也是故君子以义死难视死如归生而辱不如死而荣士固有杀身以成名唯义之所在虽死无所恨何为不可哉蔡泽曰主

圣臣贤天下之盛福也君明臣直国之福也父慈子孝夫信妻贞家之福也故比干忠而不能存殷子胥智而不能完吴申生孝而晋国乱是皆有忠臣孝子而国家灭乱者何也无明君贤父以聽之故天下以其君父为戮辱而怜其臣子【索隐言以比干子胥申生皆至忠孝而见诛放故今天下言为其君父之所戮辱而怜其臣子也】今商君吴起大夫种之为人臣是也其君非也故世称三子致功而不见德岂慕不遇世死乎夫待死而後可以立忠成名是微子不足仁孔子不足圣管仲不足大也夫人之立功岂不期於成全邪身与名俱全者上也名可法而身死者其次也名在戮辱而身全者下也於是应侯称善蔡泽少得闲因曰夫商君吴起大夫种其为人臣尽忠致功则可愿矣閔天事文王周公辅成王也岂不亦忠圣乎以君臣论之商君吴起大夫种其可愿孰与閔夭周公哉应侯曰商君吴起大夫种弗若也蔡泽曰然则君之主慈仁任忠惇厚旧故其贤智与有道之士为胶漆义不倍功臣孰与秦孝公楚悼王越王乎应侯曰未知何如也蔡泽曰今王亲忠臣不过秦孝公楚悼王越王君之设智能为主安危修政治乱强兵批患折难【索隐批音白结反又音丰鸡反批患谓擊而却之折音之列反】广地殖谷富国足家强主尊社稷显宗庙天下莫敢欺犯其主主之威盖震海内功彰万里之外声名光辉传於千世君孰与商君吴起大夫种应侯曰不若蔡泽曰今主之亲忠臣不忘旧故不若孝公悼王句踐而君之功绩爱信亲幸又不若商君吴起大夫种然而君之禄位贵盛私家之富过於三子而身不退者恐患之甚於三子窃为君危之语曰日中则移月满则亏物盛则衰天地之常数也进退盈缩与时变化圣人之常道也故国有道则仕国无道则隐圣人曰飞龙在天利见大人不义而富且贵於我如浮云今君之怨已仇而德已报意欲至矣而无变计窃为君不取也且夫翠鹄犀象其处势非不远死也而所以死者惑於饵也苏秦智伯之智非不足以辟辱远死也而所以死者惑於贪利不止也是以圣人制礼节欲取於民有度使之以时用之有止故志不溢行不骄常与道俱而不失故天下承而不絕昔者齐桓公九合诸侯一匡天下至於葵邱之会有骄矜之志畔者九国吴王夫差兵无敌於天下勇强以轻诸侯陵齐晋故遂以杀身亡国夏育太史噉叱呼骇三军【集解徐广曰呼一作暗索隐二人勇者夏育贲育也噉音皎正义呼大故反】然而身死於庸夫【索隐高诱云夏育为田?所杀然太史噉未知谁之所杀恐非齐襄王时太史也】此皆乘至盛而不返道理不居卑退处俭约之患也夫商君为秦孝公明法令禁奸本尊爵必赏有罪必罚平权衡正度量调轻重决裂阡陌以静生民之业而一其俗劝民耕农利土一室无二事力田穡积习战陈之事是以兵动而地广兵休而国富故秦无敌於天下立威诸侯成秦国之业功已成矣而遂以车裂楚地方数千里持戟百万白起率数万之师以与楚战一战举鄢郢以烧夷陵再战南并蜀汉又越韩魏而攻强赵北坑马服诛屠四十余万之衆尽之于长平之下流血成川沸声若雷遂入围邯鄲使秦有帝业楚赵天下之强国而秦之仇敌也自是之後楚赵皆慑伏不敢攻秦者白起之势也身所服者七十余城功已成矣而遂赐劔死於杜邮吴起为楚悼王立法卑减大臣之威重罢无能废无用损不急之官塞私门之请一楚国之俗禁游客之民精耕战之士南收扬越北并陈蔡破横散从使驰说之士无所开其口禁朋党以厉百姓定楚国之政兵震天下威服诸侯功已成矣而卒枝解大夫种为越王深谋远计免会稽之危以亡为存因辱为荣垦草入邑【索隐刘氏云入犹充也谓招携离散充满城邑也】辟地殖谷率四方之士专上下之力辅句踐之贤报夫差之仇卒擒劲吴令越成霸功已彰而信矣句踐终负而杀之此四子者功成不去祸至於身此所谓信而不能诎往而不能返者也【索隐信音申诎音屈谓已志展而不退】范蠡知之超然辟世长为陶朱公君独不观夫博者乎或欲大投或欲分功【集解班固

奕旨曰博县於投不必在行駟谓投投琼也索隐言夫博奕或欲大投其琼以致胜或观其势弱则大投地分而分功以远救事具小尔雅方言云所以投博谓之秤枰局也】此皆君之所明知也今君相秦计不下席谋不出廊庙坐制诸侯利施三川以实宜阳【正义施犹展也言伐得三川之地以实宜阳言展开三川实宜阳】决羊肠之险塞太行之道又斩范中行之涂六国不得合从栈道千里通於蜀汉使天下皆畏秦秦之欲得矣君之功极矣此亦秦之分功之时也如是而不退则商君白公【集解徐广曰白起】吴起大夫种是也吾闻之鉴於水者见面之容鉴於人者知吉与凶书曰成功之下不可久处四子之祸君何居焉君何不以此时归相印让贤者而授之退而岩居川观必有伯夷之廉长为应侯世世称孤而有许由延陵季子之让乔松之壽孰与以祸终哉即君何居焉忍不能自离疑不能自决必有四子之祸矣易曰亢龙有悔此言上而不能下信而不能拙往而不能自返者也愿君孰计之应侯曰善吾闻欲而不知止失其所以欲有而不知足失其所以有先生幸教唯敬受命於是乃延入坐为上客後数日入朝言於秦昭王曰客新有从山东来昔曰蔡泽其人辩士明於三王之事五伯之业世俗之变足以寄秦国之政臣之见人甚衆莫及臣不如也臣敢以闻秦昭王召见与语大说之拜为客卿应侯因谢病请归相印昭王强起应侯应侯遂称病笃范雎免相昭王新说蔡泽计画遂拜为秦相东收周室蔡泽相秦数月人或恶之惧诛乃谢病归相印号为纲成君居秦十余年事昭王孝文王庄襄王卒事始皇帝为秦使於燕三年而燕使太子丹入质於秦

太史公曰韩子称长?善舞多钱善贾信哉是言也范雎蔡泽世所谓一切辩士然游说诸侯至白首无所遇者非计策之拙所为说力少也及二人羈旅入秦继踵取卿相垂功於天下者固强弱之势异也然士亦有偶合贤者多如此二子不得尽意岂可胜道哉然二子不困厄恶能激乎【索隐二子范雎蔡泽也雎厄於齐折胁摺齿泽困於赵被逐弃鬲是也恶音乌激音擊】

【索隐述赞曰应侯始困橐载而西说行计立贵平宠稽倚秦市赵卒报魏齐纲成辩智范雎招携势利倾夺一言成蹊】

史记卷七十九

史记卷七十九考证

范雎蔡泽列传亡其言臣者贱而不可用乎索隐亡犹轻蔑也○余有丁曰亡字转语犹言无乃也索隐解轻蔑非是

闻齐之有田文○战国策作田单鲍彪注曰史云田文非也文去齐至是已一十余年不得近舍单远论文也

令马服子代廉颇将索隐马服子赵括之号也○凌稚隆曰马服君之子故曰马服子索隐非

郑安平为赵所围急○围字监本讹作困字今改正岂道德之符○顾炎武曰岂下当有非字

岂不亦忠圣乎○一本无圣字

史记卷七十九考证

卷八十

钦定四库全书

史记卷八十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

乐毅列传第二十

乐毅者其先祖曰乐羊乐羊为魏文侯将伐取中山【正义今定州】魏文侯封乐羊以灵寿【集解徐广曰属常山索隐地理志常山有灵寿县中山桓公所都之地正义今镇州灵寿】乐羊死葬於灵寿其後子孙因家焉中山复国至赵武灵王时复灭中山而乐氏後有乐毅乐毅贤好兵赵人举之及武灵王有沙邱之乱【集解徐广曰赵有沙邱宫近钜鹿】乃去赵适魏闻燕昭王以子之之乱而齐大败燕燕昭王怨齐未尝一日而忘报齐也燕国小辟远力不能制於是屈身下士先礼郭隗【正义说苑云燕昭王问於隗曰寡人地狭民寡齐人取蓟八城匈奴驰驱楼烦之下以孤之不肖得承宗庙恐社稷危存之有道乎隗曰帝者之臣其名臣其实师王者之臣其名臣其实友霸者之臣其名臣其实仆危困国之臣其名臣其实虏今王将自东面目指气使以求臣则厮役之才至矣南而聽朝不失揖让之理以求臣则人臣之才至矣北面等礼不乘之以势以求臣则朋友之才至矣西面逡巡以求臣则师傅之才至矣诚欲与霸王同道隗请为天下之士开路於是常置隗为上客】以招贤者乐毅於是為魏昭王使於燕燕王以客礼待之乐毅辞让遂委质为臣燕昭王以为亚卿久之当是时齐湣王强南败楚相唐昧於重邱【索隐昧音莫葛反地理志重邱县名属平原正义在冀州城武县界】西摧三晋於观津【索隐地理志观津县名属信都汉初属清河也正义在冀州武邑县东南二十五里】遂与三晋擊秦助赵灭中山破宋广地千余里与秦昭王争重为帝已而复归之诸侯皆欲背秦而服於齐湣王自矜百姓弗堪於是燕昭王问伐齐之事乐毅对曰齐霸国之余业也地大人衆未易独攻也王必欲伐之莫如与赵及楚魏於是使乐毅约赵惠文王别使连楚魏令赵嚙秦以伐齐之利【集解徐广曰嚙进说之意索隐嚙音田濫反字与啗同】诸侯害齐湣王之骄暴皆争合从与燕伐齐乐毅还报燕昭王悉起兵使乐毅为上将军赵惠文王以相国印授乐毅乐毅於是并护赵楚韩魏燕之兵以伐齐【索隐护谓总领之也】破之济西诸侯兵罢归而燕军乐毅独追至於临菑齐湣王之败济西亡走保於莒乐毅独留徇齐齐皆城守乐毅攻入临菑尽取齐宝财物祭器输之燕燕昭王大说亲至济上劳军行赏飨士封乐毅於昌国【集解徐广曰属齐索隐地理志县名属齐郡正义故昌城在淄州淄川县东

北四十里也】号为昌国君於是燕昭王收齐卤获以归而使乐毅复以兵平齐城之不下者乐毅留徇齐五岁下齐七十余城皆为郡县以属燕唯独莒即墨未服【正义即墨今莱州】会燕昭王死子立为燕惠王惠王自为太子时尝不快於乐毅及即位齐之田单闻之乃纵反闲於燕曰齐城不下者两城耳然所以不早拔者闻乐毅与燕新王有隙欲连兵且留齐南面而王齐之所患唯恐他将之来於是燕惠王固已疑乐毅得齐反间乃使骑劫代将而召乐毅【索隐骑劫燕将姓名】乐毅知燕惠王之不善代之畏诛遂西降赵赵封乐毅於观津号曰望诸君【索隐望诸泽名在齐盖赵有之故号焉战国策望作蓝也】尊宠乐毅以警动於燕齐田单後与骑劫战果设诈诳燕军遂破骑劫於即墨下而转战逐燕北至河上【正义沧德二州之北河也】尽复得齐城而迎襄王於莒入於临菑燕惠王後悔使骑劫代乐毅以故破军亡将失齐又怨乐毅之降赵恐赵用乐毅而乘燕之弊以伐燕燕惠王乃使人让乐毅且谢之曰先王举国而委将军将军为燕破齐报先王之仇天下莫不震动寡人岂敢一日而忘将军之功哉会先王弃羣臣寡人新即位左右误寡人寡人之使骑劫代将军为将军久暴露於外故召将军休且计事将军过聽以与寡人有隙遂捐燕归赵将军自为计则可矣而亦何以报先王之所以遇将军之意乎乐毅报遗燕惠王书曰臣不佞不能奉承王命以顺左右之心恐伤先王之明有害足下之义故遁逃走赵今足下使人数之以罪臣恐侍御者不察先王之所以畜幸臣之理又不白臣之所以事先王之心故敢以书对臣闻贤圣之君不以禄私亲其功多者赏之其能当者处之故察能而授官者成功之君也论行而结交者立名之士也臣窃观先王之举也见有高世主之心【正义乐毅见燕昭王有自高尊世上人主之心故假魏节使燕】故假节於魏以身得察於燕先王过举厕之宾客之中立之羣臣之上不谋父兄以为亚卿【正义杜预云父兄同姓羣臣也】臣窃不自知自以为奉令承教可幸无罪故受令而不辞先王命之曰我有积怨深怒於齐不量轻重而欲以齐为事臣曰夫齐霸国之余业而最胜之遗事也练於兵甲习於战攻王若欲伐之必与天下图之与天下图之莫若结於赵且又淮北宋地楚魏之所欲也赵若许而约四国攻之齐可大破也先王以为然具符节南使臣於赵顾反命起兵擊齐以天之道先王之灵河北之地随先王而举之济上【正义济上在济水之上】济上之军受命擊齐大败齐人轻卒銳兵长驱至国齐王遁而走莒仅以身免珠玉财宝车甲珍器尽收入於燕齐器设於宁台【索隐燕台也正义括地志云按元英磨室二宫皆燕宫在幽州蓟县西四里宁台之下】大吕陈於元英【索隐大吕齐鍾名元英燕宫殿名也】故鼎反乎磨室【集解徐广曰磨历也索隐燕鼎前输於齐今反入於磨室磨室亦宫名战国策作历室也正义括地志云历室燕宫名也高诱云燕吟乱齐伐燕杀吟得鼎今反归燕故鼎】蓟邱之植植於汶篁【集解徐广曰竹田曰篁谓燕之疆界移於齐之汶水索隐蓟邱燕所都之地言燕之蓟邱所植植齐土汶上之竹徐注非也正义幽州蓟地西北隅有蓟邱又汶水源出兖州博城县东北原山西南入洸】自五伯已来功未有及先王者也先王以为慊於志【索隐慊音苦簞反亦作嗛嗛音常慊然而不愜其志也】故裂地而封之使得此小国诸侯臣窃不自知自以为奉命承教可幸无罪是以受命不辞臣闻贤圣之君功立而不废故着於春秋蚤知之土名成而不毁故称於後世若先王之报怨雪耻夷万乘之强国收八百岁之蓄积及至弃羣臣之日余教未衰执政任事之臣修法令慎庶孽施及乎萌隶皆可以教後世臣闻之善作者不必善成善始者不必善终昔伍子胥说聽於阖闾而吴王远迹至郢夫差弗是也赐之鸱夷而浮之江吴王不寤先论之可以立功故沈子胥而不悔子胥不蚤见主之不同量是以至於入江而不化【索隐言子胥怨恨故虽投江而神不化犹为波涛之神也】

夫免身立功以明先王之迹臣之上计也离毁辱之诽谤【索隐诽音方味反】堕先王之名【索隐堕音许规反】臣之所大恐也临不测之罪以幸为利义之所不敢出也【索隐谓既临不测之罪以幸免为利今我仍义先王之恩虽身托外国而心亦不敢出也】臣闻古之君子交絶不出恶声【正义言君子之人交絶不说己长而谈彼短】忠臣去国不絜其名【索隐言忠臣去离本国不自洁其名云已无罪故礼曰大夫去其国不说人以无罪是也正义言不絜己名行而咎於君若箕子不忍言殷恶是也】臣虽不佞【索隐不佞犹不才也】数奉教於君子矣【索隐数音朔言我以数经奉教令於君子君子即识礼之人谓已在外犹云已罪不说王之有非故下云不察疎远之行斯亦忠臣之节】恐侍御者之亲左右之说不察疎远之行故敢献书以闻唯君王之留意焉【集解駟案夏侯玄曰观乐生遗燕惠王书其殆庶乎知机合道以礼始终者与又其喻昭王曰伊尹放太甲而不疑太甲受放而不怨是存大业於至公而以天下为心者也夫欲极道德之量务以天下为心者必致其主於盛隆合其趣於先王苟君臣同符则大业定矣於斯时也乐生之志千载一遇夫千载一遇之世亦将行千载一隆之道岂其局迹当时止於兼并而已哉夫兼并者非乐生之所屑强燕而废道又非乐生之所求不屑苟利心无近事不求小成斯意兼天下者也则举齐之事所以运其机而动四海也夫讨齐以明燕主之义此兵不兴於为利矣围城而害不加於百姓此仁心着於遐迩矣举国不谋其功除暴不以威力此至德全於天下矣迈全德以率列国则几於汤武之事矣乐生方恢大纲以纵二城收民明信以待其弊将使即墨莒人顾仇其上愿释干戈赖我犹亲善守之智无所施之然则求仁得仁即墨大夫之义仕穷则从微子适周之道开弥广之路以待田单之徒长容善之风以申齐士之志使夫忠者遂节勇者义着昭之东海属之华裔我泽如春民应如草道光宇宙贤智托心邻国倾慕四海延颈思戴燕主仰望风声二城必从则王业隆矣虽淹留於两邑乃致速於天下也不幸之变世所不图败於垂成时运固然若乃逼之以威劫之以兵攻取之事求欲速之功使燕齐之士流血於二城之下杀伤之残以示四海之人是纵暴易乱以成其私隣国望之其犹豺虎既大堕称兵之义而丧济溺之仁且亏齐士之节废廉善之风掩宏通之度弃王德之隆虽二城几於可拔霸王之事逝其远矣然则燕虽兼齐其与世主何以殊哉其与隣国何以相倾乐生岂不知拔二城之速了哉顾城拔而业乖也岂不虑不速之致变哉顾业乖与变同繇是观之乐生之不屠二城未可量者也】於是燕王复以乐毅子乐闲为昌国君【索隐闲音纪闲反】而乐毅往来复通燕燕赵以为客卿乐毅卒於赵【集解张华曰望诸君冢在邯鄲西数里】乐闲居燕三十余年燕王喜用其相栗腹之计【索隐栗姓腹名汉有栗姬】欲攻赵而问昌国君乐闲乐闲曰赵四战之国也【索隐言赵数距四方之敌故云四战之国正义东隣燕齐西边秦楼烦南界韩魏北迫匈奴】其民习兵伐之不可燕王不聽遂伐赵赵使廉颇擊之大破栗腹之军於鄱禽栗腹乐乘乐乘者乐闲之宗也於是乐闲奔赵赵遂围燕燕重割地以与赵和赵乃解而去燕王恨不用乐闲乐闲既在赵乃遗乐闲书曰紂之时箕子不用犯諫不怠以冀其聽商容不達身祇辱焉以冀其变及民志不入狱囚自出【索隐民志不入谓国乱而人离心向外故云不入又狱囚自出是政乱而士师不为之守法也】然後二子退隐故紂负桀暴之累二子不失忠圣之名何者其忧患之尽矣今寡人虽愚不若紂之暴也燕民虽乱不若殷民之甚也室有语不相尽以告隣里【正义言家室有忿争不决必告隣里今故以书相告也】二者寡人不为君取也【正义二者谓燕君未如紂燕民未如殷民复相告子反燕以疑君民之恶是寡人不为君取之】乐闲乐乘怨燕不聽其计二人卒留赵赵封乐乘为武襄君【索隐乐乘乐毅之宗人也】其明年乐

乘廉颇为赵围燕燕重礼以和乃解後五岁赵孝成王卒襄王使乐乘代廉颇廉颇攻乐乘乐乘走廉颇亡入魏其後十六年而秦灭赵其後二十余年高帝过赵问乐毅有後世乎对曰有乐叔高帝封之乐乡【集解徐广曰在北新城正义地理志云信都有乐乡县】号曰华成君华成君乐毅之孙也而乐氏之族有乐瑕公乐臣公【集解駰案一作巨公】赵且为秦所灭亡之齐高密乐臣公善修黄帝老子之言显闻於齐称贤师

太史公曰始齐之蒯通及主父偃读乐毅之报燕王书未尝不废书而泣也乐臣公学黄帝老子其本师号曰河上丈人不知其所出河上丈人教安期生安期生教毛翕公毛翕公教乐瑕公乐瑕公教乐臣公【索隐本亦作巨公】乐臣公教盖公【索隐盖音古闔反盖公史不记名】盖公教於齐高密胶西为曹相国师

【索隐述赞曰昌国忠谏人臣所无连兵五国济西为墟燕王将受空闻报书义士慷慨明君轼间闲乘继将芳规不渝】

史记卷八十

史记卷八十考证

乐毅列传以幸为利义之所不敢出也索隐谓既临不测之罪以幸免为利今我仍义先王之恩虽身托外国而心亦不敢出也○余有丁曰为利即所为乘燕之敝者索隐解未明

故敢献书以闻集解駰案夏侯元曰○【臣照】按集解所引与今所传王羲之帖小有异同互有长短至其殆庶乎知机合道句帖作庶乎几合乎道者是庶乎几义见易繫辞

乃遗乐闲书○顾炎武曰燕王遗乐闲书恐即乐毅事而传者误以为其子

室有语不相尽以告隣里正义言家室有忿争不决必告隣里今故以书相告也○顾炎武曰谓一室之中有不和之语乃不自相规劝而告之隣里此为情之薄矣正义谓必告者非

乐闲乐乘怨燕不聽其计○战国策补注曰新序以此为燕惠王遗乐毅书考之毅答惠王书云今足下使人数之以罪而史所载惠王让毅无数罪之语前燕王使人让毅云云当是此章之首盖错简也且末云乐闲乐乘怨不用其计於乘何与史赵世家孝成王十五年廉颇破杀栗腹虜庆秦乐间则是间为将而被虜燕世家则云奔赵又赵孝成王十六年廉颇围燕以乐乘为武襄君二十一年孝成王卒廉颇将攻繁阳取之使乐乘代之颇攻乘乘走据策史所记多舛故知此书非乐闲事而新序之语为是云

乐瑕公教乐臣公○【臣照】按田叔传学黄老术於乐巨公所臣与巨二者必有一误

史记卷八十考证

卷八十一

钦定四库全书

史记卷八十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

廉颇蔺相如列传第二十一

廉颇者赵之良将也赵惠文王十六年廉颇为赵将伐齐大破之取阳晋【索隐阳晋卫地後属齐今赵取之司马彪郡国志曰今卫国阳晋城是也有本作晋阳非也晋阳在太原虽亦赵地非齐所取也正义故城在曹州乘氏县西北四十七里】拜为上卿以勇气闻於诸侯蔺相如者赵人也为赵宦者令缪贤舍人赵惠文王时得楚和氏璧秦昭王闻之使人遗赵王书愿以十五城请易璧赵王与大将军廉颇诸大臣谋欲予秦秦城恐不可得徒见欺欲勿予即患秦兵之来计未定求人可使报秦者未得宦者令缪贤曰臣舍人蔺相如可使王问何以知之对曰臣尝有罪窃计欲亡走燕臣舍人相如止臣曰君何以知燕王臣语曰臣尝从大王与燕王会境上燕王私握臣手曰愿结友以此知之故欲往相如谓臣曰夫赵强而燕弱而君幸於赵王故燕王欲结於君今君乃亡赵走燕燕畏赵其势必不敢留君而束君归赵矣君不如肉袒伏斧质请罪则幸得脱矣臣从其计大王亦幸赦臣臣窃以为其人勇士有智谋宜可使於是王召见问蔺相如曰秦王以十五城请易寡人之璧可予不相如曰秦强而赵弱不可不许王曰取吾璧不予我城奈何相如曰秦以城求璧而赵不许曲在赵赵予璧而秦不予赵城曲在秦均之二策宁许以负秦曲王曰谁可使者相如曰王必无人臣愿奉璧往使城入赵而璧留秦城不入臣请完璧归赵赵王於是遂遣相如奉璧西入秦秦王坐章台见相如相如奉璧奏秦王秦王大喜传以示美人及左右左右皆呼万岁相如视秦王无意偿赵城乃前曰璧有瑕请指示王王授璧相如因持璧却立倚柱怒髮上冲冠谓秦王曰大王欲得璧使人发书至赵王赵王悉召羣臣议皆曰秦贪负其强以空言求璧偿城恐不可得议不欲予秦璧臣以为布衣之交尚不相欺况大国乎且以一璧之故逆强秦之驩不可於是赵王乃斋戒五日使臣奉璧拜送书於庭何者严大国之威以修敬也今臣至大王见臣列观礼节甚倨得璧传之美人以戏弄臣臣观大王无意偿赵王城邑故臣复取璧大王必欲急臣臣头今与璧俱碎於柱矣相如持其璧睨柱欲以擊柱秦王恐其破璧乃辞谢固请召有司案图指从此以往十五都予赵相如度秦王特以诈佯为予赵城实不可得乃谓秦王曰和氏璧天下所共传宝也赵王恐不敢不献赵王送璧时斋戒五日今大王亦宜斋戒五日设九宾於廷【集解韦昭曰九宾

则周礼九仪索隐周礼大行人别九宾谓九服之宾客也列士传云设九牢也正义刘伯庄云九宾者周王备之礼天子临轩九服同会秦赵何得九宾但亦陈设车辂文物耳】臣乃敢上璧秦王度之终不可强夺遂许斋五日舍相如广成传舍【索隐广成是传舍之名传音张恋反】相如度秦王虽斋决负约不偿城乃使其从者衣褐怀其璧从径道亡归璧于赵秦王斋五日後乃设九宾礼於庭引赵使者藺相如相如至谓秦王曰秦自繆公以来二十余君未尝有坚明约束者也臣诚恐见欺於王而负赵故令人持璧归间至赵矣且秦强而赵弱大王遣一介之使至赵赵立奉璧来今以秦之强而先割十五都予赵赵岂敢留璧而得罪於大王乎臣知欺大王之罪当诛臣请就汤镬唯大王与羣臣熟计议之秦王与羣臣相视而嘻【索隐音希嘻乃惊而怒之辞也】左右或欲引相如去秦王因曰今杀相如终不能得璧也而絕秦赵之驩不如因而厚遇之使归赵赵王岂以一璧之故欺秦邪卒廷见相如毕礼而归之相如既归赵王以为贤大夫使不辱於诸侯拜相如为上大夫秦亦不以城予赵赵亦终不予秦璧其後秦伐赵拔石城【集解徐广曰惠文王十八年索隐刘氏云盖谓石邑也正义故石城在相州林虑县南九十里也】明年复攻赵杀二万人秦王使使者告赵王欲与王为好会於西河外渰池【索隐在西河之南故云外按表在赵惠文王二十年】赵王畏秦欲毋行廉颇藺相如计曰王不行示赵弱且怯也赵王遂行相如从廉颇送至境与王诀曰王行度道里会遇之礼毕还不过三十日三十日不还则请立太子为王以絕秦望王许之遂与秦王会渰池【集解徐广曰二十年】秦王饮酒酣曰寡人窃闻赵王好音请奏瑟赵王鼓瑟秦御史前书曰某年月日秦王与赵王会饮令赵王鼓瑟藺相如前曰赵王窃闻秦王善为秦声请奉盆缶秦王以相娱乐【集解駉案风俗通义曰缶者瓦器所以盛酒浆秦人鼓之以节歌也索隐缶音缶正义缶音饼】秦王怒不许於是相如前进缶因跪请秦王秦王不肯擊缶相如曰五步之内相如请得以颈血溅大王矣【正义溅音赞】左右欲刃相如相如张目叱之左右皆靡於是秦王不怿为一擊缶相如顾召赵御史书曰某年月日秦王为赵王擊缶秦之羣臣曰请以赵十五城为秦王壽藺相如亦曰请以秦之咸阳为赵王壽秦王竟酒终不能加胜於赵赵亦盛设兵以待秦秦不敢动既罢归国以相如功大拜为上卿位在廉颇之右【索隐王劭按董勋答礼曰职高者名录在上於人为右职卑者名录在下於人为左是以谓下迁为左正义秦汉以前用右为上】廉颇曰我为赵将有攻城野战之大功而藺相如徒以口舌为劳而位居我上且相如素贱人吾羞不忍为之下宣言曰我见相如必辱之相如闻不肯与会相如每朝时常称病不欲与廉颇争列已而相如出望见廉颇相如引车避匿於是舍人相与谏曰臣所以去亲戚而事君者徒慕君之高义也今君与廉颇同列廉君宣恶言而君畏匿之恐惧殊甚且庸人尚羞之况於将相乎臣等不肖请辞去藺相如固止之曰公之视廉将军孰与秦王曰不若也相如曰夫以秦王之威而相如廷叱之辱其羣臣相如虽弩独畏廉将军哉顾吾念之强秦之所以不敢加兵於赵者徒以吾两人在也今两虎共鬪其势不俱生吾所以为此者以先国家之急而後私讎也廉颇闻之肉袒负荆【索隐肉袒者谓袒衣而露肉也负荆者荆楚也可以为鞭也】因宾客至藺相如门谢罪曰鄙贱之人不知将军寬之至此也卒相与驩为刎颈之交【索隐崔浩云要齐生死而刎颈无悔也】是岁廉颇东攻齐破其一军居二年廉颇复伐齐几拔之【集解徐广曰几邑名也案赵世家惠文王二十三年颇将攻魏之几邑取之而齐世家及年表无伐齐几拔之事疑几是邑名而或属齐或属魏耳田单在齐不得至於拔也索隐世家与此列传合而战国策云秦败闕与反攻魏几是几亦属魏故裴駉云或属齐属魏也正义几音祈在相潞之间】後三年廉颇攻魏之防陵【集解徐广曰一作房子索隐

按防陵在楚之西属汉中郡魏有房子盖陵字误也正义城在相州安阳县南二十里因防水为名】安阳拔之後四年藺相如将而攻齐至平邑而罢【正义故城在魏州昌乐县东北三十里】其明年赵奢破秦军阨与下

赵奢者赵之田部吏也收租税而平原君家不肯出赵奢以法治之杀平原君用事者九人平原君怒将杀奢奢因说曰君於赵为贵公子今纵君家而不奉公则法削法削则国弱国弱则诸侯加兵诸侯加兵是无赵也君安得有此富乎以君之贵奉公如法则上下平上下平则国强国强则赵固而君为贵戚岂轻於天下邪平原君以为贤言之於王王用之治国赋国赋大平民富而府库实秦伐韩军於阨与王召廉颇而问曰可救不对曰道远险狭难救又召乐乘而问焉乐乘对如廉颇言又召问赵奢奢对曰其道远险狭譬之犹两鼠鬪於穴中将勇者胜王乃令赵奢将救之兵去邯鄲三十里而令军中曰有以军事谏者死秦军军武安西【集解徐广曰属魏郡在邯鄲西】秦军鼓噪勒兵武安屋瓦尽振军中候有一人言急救武安赵奢立斩之坚壁留二十八日不行复益增垒秦闲来入赵奢善食而遣之闲以报秦将秦将大喜曰夫去国三十里【正义国谓邯鄲赵之都也】而军不行乃增垒阨与非赵地也赵奢既已遣秦闲乃卷甲而趋之二日一夜至令善射者去阨与五十里而军军垒成秦人闻之悉甲而至军士许历请以军事谏赵奢曰内之许历曰秦人不意赵师至此其来气盛将军必厚集其阵以待之不然必败赵奢曰请受令许历曰请就鈇质之诛赵奢曰胥後令【索隐按胥须古人通用今者胥後令谓胥为须须待也待後令谓许历之言更不拟诛之故更待後令也正义胥犹须也军去城都三十里而不行未有计过险狭恐人谏令急救武安乃出此令今垂战须得谋策不用前令故云须後令云耳】邯鄲许历复请谏【索隐邯鄲二字当为欲战谓临战之时许历复谏也王粲诗云许历为完士一言犹败秦是言赵奢用其计遂破秦军也江遂曰汉令称完而不髡曰耐是完士未免从军也】曰先据北山上者胜【正义阨与山在洛州武安县西南五十里赵奢拒秦军於阨与即此山也按括地志云言拒秦军在此山疑其太近洛州既去邯鄲三十里而军又云趋之二日一夜至阨与五十里而军垒成据今洛州去潞州三百里间而隔相州恐潞州阨与聚城是所拒据处】後至者败赵奢许诺即发万人趋之秦兵後至争山不得上赵奢纵兵擊之大破秦军秦军解而走遂解阨与之围而归赵惠文王赐奢号为马服君以许历为国尉赵奢於是与廉颇藺相如同位後四年赵惠文王卒子孝成王立七年秦与赵兵相距长平时赵奢已死【集解张华曰赵奢冢在邯鄲界西山上谓之马服山】而藺相如病笃赵使廉颇将攻秦秦数败赵军赵军固壁不战秦数挑战廉颇不肯赵王信秦之闲秦之闲言曰秦之所恶独畏马服君赵奢之子赵括为将耳赵王因以括为将代廉颇藺相如曰王以名使括若胶柱而鼓瑟耳括徒能读其父书传不知合变也赵王不聽遂将之赵括自少时学兵法言兵事以天下莫能当尝与其父奢言兵事奢不能难然不谓善括母问奢其故奢曰兵死地也而括易言之使赵不将括即已若必将之破赵军者必括也及括将行其母上书言於王曰括不可使将王曰何以对曰始妾事其父时为将身所奉饭饮而进食者以十数【正义奉音捧】所友者以百数大王及宗室所赏赐者尽以予军吏士大夫受命之日不问家事今括一旦为将东向而朝军吏无敢仰视之者王所赐金帛归藏於家而日视便利田宅可买者买之王以为何如其父父子异心愿王勿遣王曰母置之吾已决矣括母因曰王终遣之即有如不称妾得无随坐乎王许诺赵括既代廉颇悉更约束易置军吏秦将白起闻之纵奇兵佯败走而絕其粮道分断其军为二士卒离心四十余日军饿赵括出銳卒自搏

战秦军射杀赵括括军败数十万之衆遂降秦秦悉阬之赵前後所亡凡四十五万明年秦兵遂围邯鄲岁余几不得脱赖楚魏诸侯来救乃得解邯鄲之围赵王亦以括母先言竟不诛也自邯鄲围解五年而燕用栗腹之谋曰赵壮者尽於长平其孤未壮举兵击赵赵使廉颇将撃大破燕军於鄲杀栗腹遂围燕燕割五城请和乃聽之赵以尉文封廉颇为信平君【集解徐广曰尉文邑名按汉书表有尉文节侯云在南郡盖尉官也文名也谓取尉文所食之邑复以封颇而号为信平君也索隐信平号也】为假相国廉颇之免长平归也失势之时故客尽去及复用为将客又复至廉颇曰客退矣客曰吁君何见之晚也夫天下以市道交君有势我则从君君无势则去此固其理也有何怨乎居六年赵使廉颇伐魏之繁阳【集解徐广曰属魏郡正义在相州内黄县东北也】拔之赵孝成王卒子悼襄王立使乐乘代廉颇廉颇怒攻乐乘乐乘走廉颇遂奔魏之大梁其明年赵乃以李牧为将而攻燕拔武遂方城【索隐地理志武遂属河闲国方城属广阳也正义武遂易州遂地也方城幽州固安县南十里】廉颇居梁久之魏不能信用赵以数困於秦兵赵王思复得廉颇廉颇亦思复用於赵赵王使使者视廉颇尚可用否廉颇之仇郭开多与使者金令毀之赵使者既见廉颇廉颇为之一饭斗米肉十斤被甲上马以示尚可用赵使还报王曰廉将军虽老尚善饭然与臣坐顷之三遗矢矣【索隐谓数起便也矢一作屎】赵王以为老遂不召楚闻廉颇在魏陰使人迎之廉颇一为楚将无功曰我思用赵人廉颇卒死于壽春【正义廉颇墓在壽州壽春县北四里藺相如墓在邯鄲西南六里】李牧者赵之北边良将也常居代鴈门备匈奴【正义今鴈门县在代地故云代鴈门也】以便宜置吏市租皆输入莫府【集解如淳曰将军征行无常处所在为治故言莫府莫大也索隐如淳解莫为大非也崔浩云古者出征为将帅军还则罢理无常处以幕帟为府署故曰幕府则莫当作幕字之误也】为士卒费日撃数牛飧士习射骑谨烽火多闲谍【索隐上纪见反下音牒】厚遇战士为约曰匈奴即入盗急入收保有敢捕虏者斩匈奴每入烽火谨辄入收保不敢战如是数岁亦不亡失然匈奴以李牧为怯虽赵边兵亦以为吾将怯赵王让李牧李牧如故赵王怒召之使他人代将岁余匈奴每来出战出战数不利死亡多边不得田畜【正义许六反】复请李牧牧杜门不出固称疾赵王乃复强起使将兵牧曰王必用臣臣如前乃敢奉令王许之李牧至如故约匈奴数岁无所得终以为怯边士日得赏赐而不用皆愿一战於是乃具选车得千三百乘选骑得万三千匹百金之士五万人【集解駰案管子曰能破敌擒将者赏百金】穀者十万人【索隐穀音古候反穀谓能射也】悉勒习战大纵畜牧人民满野匈奴小入佯北不胜以数千人委之【索隐委谓弃之恣其杀畧也】单于闻之大率衆来入李牧多为奇陈张左右翼撃之大破杀匈奴十余万骑灭?襜【集解駰案?都甘反襜路谈反徐广曰一作临駰又案如淳曰胡名也在代北】破东胡降林胡单于奔走其後十余岁匈奴不敢近赵边城赵悼襄王元年廉颇既亡入魏赵使李牧攻燕拔武遂方城居二年龐煖破燕军杀剧辛【索隐煖即冯煖也龐音皮江反煖音况远反又音喧剧辛本赵人仕燕】後七年秦破赵杀将扈辄於武遂城【索隐扈氏辄名汉张耳时别有扈辄也刘氏云武遂本韩地在赵西恐非地理志河间武遂也】斩首十万赵乃以李牧为大将军撃秦军於宜安【正义在桓州橐城县西南二十里】大破秦军走秦将?齮【索隐齮音蚁】封李牧为武安君居三年秦攻番吾【索隐县名地理志在常山音婆又音盘正义在相州房山县东二十里也】李牧击破秦军南距韩魏赵王迁七年秦使王翦攻赵赵使李牧司马尚御之秦多与赵王宠臣郭开金为反闲言李牧司马尚欲反赵王乃使赵葱及齐将顔聚代李牧李牧不受命赵使人微捕得李牧斩之废司马尚後三月王翦因急击赵大破杀赵葱虏赵王迁

及其将顏聚遂灭赵太史公曰知死必勇非死者难也处死者难方蔺相如引璧睨柱及叱秦王左右势不过诛然士或怯懦【集解徐广曰一作愜懦】而不敢发相如一奋其气威信敌国【索隐信音申】退而让颇名重太山其处智勇可谓兼之矣

【索隐述赞曰清飈凛凛壮气熊熊各竭诚义逴为雌雄和璧聘返渑池好通负荆知惧屈节推工安边定策颇牧之功】

史记卷八十一

史记卷八十一考证

廉颇蔺相如列传龐煖破燕军杀剧辛索隐煖即冯煖也○【臣照】按燕世家云剧辛故居赵与龐煖善战国策云齐人有冯煖者史记作冯驩似冯煖即冯驩不言其归赵也虞般佑高士传鷖冠子楚人冯煖尝师事之煖後显於赵鷖冠子惧其荐已乃与煖絶索隐谓龐煖即冯煖不知何据

秦多与赵王宠臣郭开金为反间○【臣照】按战国策秦王资顿弱以金北游燕赵而杀李牧史记称秦多与赵王宠臣郭开金为反间而杀牧廉颇传称颇之仇郭开与使者金使毀颇张释之传云赵用李牧几霸会赵王迁立其母倡也迁用郭开谗卒诛李牧列女传云赵悼后者邯鄲倡女前嫁乱一宗族既寡悼襄王以其美而娶之李牧諫不聽後生子迁立为幽闵王后通於春平侯多受秦赂而使王诛其良将李牧赵亡後大夫怨倡后之譖太子喜杀李牧乃杀倡后灭其家诸说大同小异今并着之

史记卷八十一考证

<史部,正史类,史记>

卷八十二

钦定四库全书

史记卷八十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

田单列传第二十二

田单者齐诸田疏属也【索隐单音丹】湣王时单为临菑市掾不见知及燕使乐毅伐破齐湣王出奔已而保莒城燕师长驱平齐而田单走安平【集解徐广曰今之东安平也在青州临菑县东十九里古纪之鄆邑齐改为安平秦灭齐改为东安平属齐郡以定州有安平故加东字索隐地理志东安平属淄川国】令其宗人尽断其车轴末而傅铁笼【集解徐广曰傅音附索隐断音都缓反断其轴恐长相拨也以铁裹轴头坚而易进也傅者截其轴与毂齐以铁鑠附轴末施辖於铁中以制毂也又方言曰车轳齐谓之笼郭璞云车轴也】已而燕军攻安平城坏齐人走争涂以轳折车败【集解徐广曰轳车轴头也音卫】为燕所虏唯田单宗人以铁笼故得脱东保即墨燕既尽降齐城唯独莒即墨不下燕军闻齐王在莒并兵攻之淖齿【集解徐广曰多作悼齿也】既杀湣王於莒因坚守距燕军数年不下燕引兵东围即墨即墨大夫出与战败死城中相与推田单曰安平之战田单宗人以铁笼得全习兵立以为将军以即墨距燕顷之燕昭王卒惠王立与乐毅有隙田单闻之乃纵反间於燕宣言曰齐王已死城之不拔者二耳乐毅畏诛而不敢归以伐齐为名实欲连兵南面而王齐齐人未附故且缓攻即墨以待其事齐人所惧唯恐他将之来即墨残矣燕王以为然使骑劫代乐毅乐毅因归赵燕人士卒忿而田单乃令城中人食必祭其先祖於庭飞鸟悉翔舞城中下食燕人怪之田单因宣言曰神来下教我乃令城中人曰当有神人为我师有一卒曰臣可以为师乎因反走田单乃起引还东乡坐师事之卒曰臣欺君诚无能也田单曰子勿言也因师之每出约束必称神师乃宣言曰吾唯惧燕军之剽所得齐卒置之前行【正义故郎反】与我战即墨败矣燕人闻之如其言城中人见齐诸降者尽剽皆怒坚守唯恐见得单又纵反间曰吾惧燕人掘吾城外冢墓戮先人可为寒心燕军尽掘垄墓烧死人即墨人从城上望见皆涕泣共欲出战怒自十倍田单知士卒之可用乃身操版插【索隐操音七高反插音初洽反正义古之军行常负版插也】与士卒分功妻妾编於行伍之间尽散饮食飧士令甲卒皆伏使老弱女子乘城遣使约降於燕燕军皆呼万岁田单又收民金得千镒令即墨富豪遗燕将曰即墨即降愿无虏掠吾族家妻妾令安堵燕将大喜许之燕军由此益懈田单乃收城中得千余牛

为绦繒衣画以五彩龙文束兵刃於其角而灌脂束苇於尾烧其端凿城数十穴夜纵牛壮士五千人随其後牛尾热怒而奔燕军燕军夜大惊牛尾炬火光明炫耀燕军视之皆龙文所触尽死伤五千人因衔枚击之而城中鼓噪从之老弱皆击铜器为声声动天地燕军大骇败走齐人遂夷杀其将骑劫燕军扰乱奔走齐人追亡逐北所过城邑皆畔燕而归田单兵日益多乘胜燕日败亡卒至河上【索隐齐之北界近河东盖齐旧地也】而齐七十余城皆复为齐乃迎襄王於莒入临菑而聽政襄王封田单号曰安平君【索隐以单初起安平故以为号】

太史公曰兵以正合以奇胜【集解駰案魏武帝曰先出合战为正後出为奇也正者当敌奇兵击不备索隐奇谓权诈也引魏武盖亦军令也】善之者出奇无穷【索隐兵不厌诈故云善之出奇无穷谓权变多也】奇正还相生【正义犹当合也言正兵当阵张左右翼掩其不备则奇正合败敌也】如环之无端【索隐言用兵之术或用奇计使前敌不可测量如寻环中不知端际也】夫始如处女适人开户【集解徐广曰适音敌索隐言兵始如处女之软弱则敌人轻侮开户不为备正义敌人谓燕军也言燕军被田单反间易将及剽卒烧垄墓而令齐卒甚怒是敌人为单开门户也】後如脱兔适不及距【集解駰案魏武帝曰如女示弱脱兔往疾也索隐克捷之後卷甲而趋有如兔之得脱而疾走也敌不及距者若脱兔忽过而敌忘其所距也】其田单之谓邪初淖齿之杀湣王也莒人求湣王子法章得之太史嬖之家【正义嬖音皎】为人灌园嬖女怜而善遇之後法章私以情告女女遂与通及莒人共立法章为齐王以莒距燕而太史氏女遂为后所谓君王后也燕之初入齐闻画邑人王蠋贤【集解刘熙曰齐西南近邑画音获索隐画音胡卦反蠋音触亦音歎正义括地志云戟里城在临淄西北三十里春秋时棘邑又云濳邑蠋所居即此邑因濳水为名也】令军中曰环画邑三十里无入以王蠋之故已而使人谓蠋曰齐人多高子之义吾以子为将封子万家蠋固谢燕人曰子不聽吾引三军而屠画邑王蠋曰忠臣不事二君贞女不更二夫齐王不聽吾谏故退而耕於野国既破亡吾不能存今又劫之以兵为君将是助桀为暴也与其生而无义固不如烹遂经其颈於树枝自奋絶脰而死【索隐经犹系也何休云脰颈齐语也音豆】齐亡大夫闻之曰王蠋布衣也义不北面於燕况在位食禄者乎乃相聚如莒求诸子立为襄王

【索隐述赞曰军法以正实尚奇兵断轴自免反间先行羣鸟惑衆五牛扬旌卒破骑劫皆复齐城襄王嗣位乃封安平】

史记卷八十二

史记卷八十二考证

田单列传乃纵反间於燕宣言曰○言监本讹作王今改正

夫始如处女适人开户後如脱兔适不及距○语出孙子九地篇

索隐述赞曰五牛扬旌○监本误刻於其田单之谓邪句下今移正【臣照】按庾林曰宋书臧质传柳元景檄书八銮摇响五牛舒旆又谢晦传尚书符荊州曰警蹕前驱五牛整旆梁书

王僧辨表云解五牛於冀州秣六马於譙郡魏收魏书外国序云五牛一指六师骋路又太昌三年诏曰五牛警旆七萃按郡皆六朝丽语而小司马效之顾考晋舆服志五牛旗平吴後所造以五牛建旗车设五牛青赤在左黄在中白黑在右元帝後但以五色木牛象五时车竖旗於牛背使人輿之旗常纏而不舒旆所谓德车结旌者也惟天子亲戎五旗舒旆所谓武车绥旌者也故十六国春秋刘曜攻陈仓南阳王保将杨曼王连谋曰有五牛旗建多言故主自来遂尽衆背城而阵为曜所败今田单火牛岂仪卫耶赞乃云五牛何也且单出诡袭之计未尝建旗鼓接兵刃也而云扬旌不亦诬乎索隐之陋往往如是姑举其一以例诸余

史记卷八十二考证

卷八十三

钦定四库全书

史记卷八十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

鲁仲连邹阳列传第二十三

【索隐鲁连屈原当六国之时贾谊邹阳在文景之日事迹虽复相类年代甚为乖絕其邹阳不可上同鲁连贾生亦不可下同屈原宜抽鲁连同田单为传其屈原与宋玉等为一传其邹阳与枚乘贾生等同传】

鲁仲连者齐人也好奇伟倜傥之画策【索隐广雅云倜傥卓异也正义倜天历反鲁连子云齐辩士田巴服狙邱议稷下毀五帝罪三王服五伯离坚白合同异一日服千人有徐劫者其弟子曰鲁仲连年十二号千里驹往请田巴曰臣闻堂上不奋郊草不芸白刃交前不救流矢急不暇缓也今楚军南阳赵伐高唐燕人十万聊城不去国亡在旦夕先生奈之何若不能者先生之言有似梟鸣出城而人恶之愿先生勿复言田巴曰谨闻命矣巴谓徐劫曰先生乃飞兔也岂直千里驹巴终身不谈】而不肯仕官任职好持高节游於赵赵孝成王时而秦王使白起破赵长平之军前後四十余万秦兵遂东围邯鄲赵王恐诸侯之救兵莫敢击秦军魏安厘王使将军晋鄙救赵畏秦止於荡陰不进【集解駰案地理志河内有荡陰县正义荡天郎反相州县】魏王使客将军新垣衍间入邯鄲【索隐新垣姓衍名也为梁将故汉有新垣平】因平原君谓赵王曰秦所为急围赵者前与齐湣王争强为帝已而复归帝今齐湣王已益弱方今唯秦雄天下此非必贪邯鄲其意欲复求为帝赵诚发使尊秦昭王为帝秦必喜罢兵去平原君犹预未有所决此时鲁仲连适游赵会秦围赵闻魏将欲令赵尊秦为帝乃见平原君曰事将奈何平原君曰胜也何敢言事前亡四十万之衆於外今又内围邯鄲而不能去魏王使客将军新垣衍令赵帝秦【索隐新垣衍欲令赵尊秦为帝】今其人在是胜也何敢言事鲁仲连曰吾始以君为天下之贤公子也吾乃今然後知君非天下之贤公子也梁客新垣衍安在吾请为君责而归之平原君曰胜请为介绍【集解郭璞曰介绍相佑助者也索隐介绍犹媒也凡礼宾至必因介以传辞绍者继也介不一人故礼云介绍而传命】而见之於先生平原君遂见新垣衍曰东国有鲁仲连先生者今其人在此胜请为介绍交之於将军新垣衍曰吾闻鲁仲连先生齐国之高士也衍人臣也使事有职吾不愿见鲁仲连先生平原君曰

胜既已泄之矣新垣衍许诺鲁仲连见新垣衍而无言新垣衍曰吾视居此围城之中者皆有求於平原君者也今吾观先生之玉貌非有求於平原君者也曷为久居此围城之中而不去鲁仲连曰世以鲍焦为无从颂而死者皆非也【集解駰案鲍焦周之介士见庄子索隐从颂音从容言世人见鲍焦之死皆以为不能自寛容而取死此言非也正义韩诗外传云姓鲍名焦周时隐者也饰行非世廉洁而守荷担采樵拾橡充食故无子?不臣天子不友诸侯子贡遇之谓之曰吾闻非其政者不履其地污其君者不受其利今子履其地食其利可乎鲍焦曰吾闻廉士重进而轻退贤人易愧而轻死遂抱木立枯焉按鲁仲连留赵不去者非为一身】衆人不知则为一身【索隐言衆人不识鲍焦之意焦以耻居浊世而避之非是自为一身而忧死】彼秦者弃礼义而上首功之国也【集解譙周曰秦用卫鞅计制爵二十等以战获首级者计而受爵是以秦人每战胜老弱妇人皆死计功赏至万数天下谓之上首功之国皆以恶之也索隐秦法斩首多为上功谓斩一人首赐爵一级故谓秦为首功之国也】权使其士虏使其民【索隐言秦人以权诈使其战士以奴隶使其人民言无恩以恤下】彼即肆然而为帝过而为政於天下【索隐谓以过恶而为政也正义至过字为絶句肆然其志意也言秦得肆志为帝恐有烹醢纳筦徧行天子之礼过失也若赵魏帝秦得行政教於天下鲁连蹈东海而溺死不忍为秦百姓】则连有蹈东海而死耳吾不忍为之民也所为见将军者欲以助赵也新垣衍曰先生助之将奈何鲁连曰吾将使梁及燕助之齐楚则固助之矣新垣衍曰燕则吾请以从矣若乃梁者则吾乃梁人也先生恶能使梁助之鲁连曰梁未睹秦称帝之害故耳使梁睹秦称帝之害则必助赵矣新垣衍曰秦称帝之害何如鲁连曰昔者齐威王尝为仁义矣率天下诸侯而朝周周贫且微诸侯莫朝而齐独朝之居岁余周烈王崩【集解徐广曰烈王七年崩威王之十年正义周本纪及年表云烈王七年崩齐威王之十年也与徐不同】齐後往周怒赴於齐【正义郑玄云赴告也今文赴作讞】曰天崩地坼天子下席【索隐谓烈王太子安王骄也下席言其寝苦居庐也】东藩之臣因齐後至则斲【集解駰案公羊传曰欺三军者其法斲何休曰斲斩也】齐威王勃然怒曰叱嗟而母婢也【正义骂烈王后也】卒为天下笑故生则朝周死则叱之诚不忍其求也彼天子固然其无足怪新垣衍曰先生独不见夫仆乎十人而从一人者宁力不胜而智不若邪畏之也【索隐言仆夫十人而从一人者宁是力不胜亦非智不如正是畏惧其主耳】鲁仲连曰呜呼梁之比於秦若仆邪新垣衍曰然鲁仲连曰吾将使秦王烹醢梁王新垣衍怏然不悦曰【正义怏於尚反】噫嘻【索隐上音依噫者不平之声下音希嘻者惊恨之叹也】亦太甚矣先生之言也先生又恶能使秦王烹醢梁王鲁仲连曰固也吾将言之昔者九侯鄂侯【集解徐广曰邲县有九侯城九一作鬼鄂一作?正义九侯城在相州滏阳县西南五十里】文王纣之三公也九侯有子而好献之於纣纣以为恶醢九侯鄂侯争之强辩之疾故脯鄂侯文王闻之喟然而叹故拘之羑里之库百日【正义相州荡陰县北九里有羑城】欲令之死曷为与人俱称王卒就脯醢之地齐湣王将之鲁夷维子为执策而从【索隐维东莱之邑其居夷也号夷维子故晏子为莱之夷维人是也正义密州高密县古夷安城应劭云故莱夷维邑也盖因邑为姓子者男子之美号又云子爵也】谓鲁人曰子将何以待吾君鲁人曰吾将以十太牢待子之君夷维子曰子安取礼而来吾君彼吾君者天子也天子巡狩诸侯辟舍【索隐辟舍避正寝案礼天子适诸侯必舍於祖庙】纳莞綈【索隐音管药】摄衽抱机【索隐机音纪正义衽音而甚反】视膳於堂下天子已食乃退而聽朝也鲁人投其綈不果纳【索隐谓闭外门不入齐君正义綈即钥匙也投钥匙於地】不得入於鲁将之薛【正义薛侯故城在徐州滕县界也】假途於邹当

是时邹君死湣王欲入吊夷维子谓邹之孤曰天子吊主人必将倍殡棺设北面於南方然後天子南面吊也【索隐倍音佩谓主人不在殡东将偕其殡棺立西阶上北面哭是倍也天子乃於阼阶上南面而吊之】邹之羣臣曰必若此吾将伏劔而死固不敢入於邹邹鲁之臣生则不得事养死则不得赙襚【正义衣服曰襚货财曰赙皆助生送死之礼】然且欲行天子之礼於邹鲁邹鲁之臣不果纳【索隐谓时君弱臣强故邹鲁君生时臣并不得尽事养死亦不得行赙襚之礼然齐欲行天子礼於邹鲁邹鲁之臣皆不果纳之是犹秉礼而存大体也】今秦万乘之国也梁亦万乘之国也俱据万乘之国各有称王之名睹其一战而胜欲从而帝之是使三晋之大臣不如邹鲁之仆妾也且秦无已而帝则且变易诸侯之大臣彼将夺其所不肖而与其所贤夺其所憎而与其所爱彼又将使其子女谗妾为诸侯妃姬处梁之宫梁王安得晏然而已乎而将军又何以得故宠乎於是新垣衍起再拜谢曰始以先生为庸人吾乃今日知先生为天下之士也吾请出不敢复言帝秦秦将闻之为却军五十里适会魏公子无忌夺晋鄙军以救赵击秦军秦军遂引而去於是平原君欲封鲁连鲁连辞让使者三终不肯受平原君乃置酒酒酣起前以千金为鲁连寿鲁连笑曰所谓贵於天下之士者为人排患释难解纷乱而无取也即有取者是商贾之事也而连不忍为也遂辞平原君而去终身不复见其後二十余年燕将攻下聊城【索隐徐广云年表以田单攻聊城在长平後十余年耳二十余年误也正义今博州县也】聊城人或谗之燕燕将惧诛因保守聊城不敢归齐田单攻聊城岁余【集解徐广曰案年表田单攻聊城在长平後十余年也】士卒多死而聊城不下鲁连乃为书约之矢以射城中遗燕将书曰吾闻之智者不倍时而弃利勇士不怯死而灭名【索隐怯死犹避死也】忠臣不先身而後君今公行一朝之忿不顾燕王之无臣非忠也杀身亡聊城而威不信於齐非勇也功败名灭後世无称焉非智也三者世主不臣说士不载故智者不再计勇士不怯死今死生荣辱贵贱尊卑此时不再至愿公详计而无与俗同且楚攻齐之南阳【索隐即齐之淮北泗上之地】魏攻平陆【索隐平陆邑名在西界正义兖州县也】而齐无南面之心以为亡南阳之害小不如得济北之利大【索隐即聊城之地也正义言齐无南面攻楚魏之心以为南阳平陆之害小不如聊城之利大言必攻之也】故定计审处之今秦人下兵魏不敢东面衡秦之势成【索隐此时秦与齐和故云衡秦之势成也】楚国形危齐弃南阳断右壤定济北【索隐谓弃楚所攻之泗上也又断絶魏之所攻齐右壤之地平陆是也言右壤断弃而不能救志在攻聊城而定济北也】计犹且为之也且夫齐之必决於聊城公勿再计今楚魏交退於齐而燕救不至【索隐交者俱也前时楚攻南阳魏攻平陆今二国之兵俱退而燕救又不至是势危也】以全齐之兵无天下之规与聊城共据期年之敝则臣见公之不能得也且燕国大乱君臣失计上下迷惑栗腹以十万之衆五折於外【集解徐广曰此事去长平十年】以万乘之国被围於赵壤削主困为天下戮笑国敝而祸多民无所归心今公又以敝聊之民距全齐之兵是墨翟之守也【正义如墨翟守宋却楚军】食人炊骨士无反外之心是孙臆之兵也【正义言孙臆能抚士卒士卒无二心也】能见于天下虽然为公计者不如全车甲以报於燕车甲全而归燕燕王必喜身全而归於国士民如见父母交游攘臂而议於世功业可明上辅孤主以制羣臣下养百姓以资说士【索隐言既养百姓又资说士终拟强国也刘氏云读说士为銳士意虽便不如依字】矫国更俗【索隐欲令燕将归燕矫正国事改更弊俗也】功名可立也亡意亦捐燕弃世东游於齐乎【索隐亡音无言若必无还燕意则捐燕而东游於齐乎】裂地定封富比乎陶卫【索隐延笃注战国策云陶陶朱公也卫卫公子荆非也王劭云魏冉封陶商君姓卫富比陶卫谓此云尔】世

世称孤与齐久存又一计也此两计者显名厚实也愿公详计而审处一焉且吾闻之规小节者不能成荣名恶小耻者不能立大功昔者管夷吾射桓公中其钩篡也遗公子纠不能死怯也【索隐遗弃也谓弃子纠事小白也正义管仲傅子纠而鲁杀之不能随子纠死是怯懦畏死】束缚桎梏辱也若此三行者世主不臣而乡里不通乡使管子幽囚而不出身死而不反於齐则亦名不免为辱人贱行矣臧获且羞与之同名矣【集解駟案方言曰荆淮海岱燕齐之间骂奴曰臧骂婢曰获】况世俗乎故管子不耻身在縲紲之中而耻天下之不治不耻不死公子纠而耻威之不信於诸侯故兼三行之过而为五霸首【正义按齐桓最初得周襄王赐文武胙彤弓矢大辂故为五伯首也】名高天下而光烛隣国曹子为鲁将【索隐曹沫也】三战三北而亡地五百里乡使曹子计不反顾议不还踵刎颈而死则亦名不免为败军禽将矣曹子弃三北之耻而退与鲁君计桓公朝天下会诸侯曹子以一劒之任枝桓公之心於坛坫之上【索隐枝犹拟也】顔色不变辞气不悖三战之所亡一朝而复之天下震动诸侯惊骇威加吴越若此二士者非不能成小廉而行小节也以为杀身亡軀絶世灭後功名不立非智也故去忿忿之怨立终身之名弃忿恚之节【正义忿敷粉反恚於缘反】定累世之功是以业与三王争流而名与天壤相弊也愿公择一而行之燕将见鲁连书泣三日犹预不能自决欲归燕已有隙恐诛欲降齐所杀虜於齐甚衆恐已降而後见辱喟然叹曰与人刃我宁自刃乃自杀聊城乱田单遂屠聊城归而言鲁连欲爵之鲁连逃隐於海上曰吾与富贵而诟於人宁贫贱而轻世肆志焉【索隐肆放纵也】

邹阳者齐人也游於梁与故吴人庄忌夫子淮陰枚生之徒交上书【索隐忌会稽人姓庄氏字夫子後避汉明帝讳改姓曰严枚生名乘字叔其子臯汉书并有传盖以衔枚氏而得姓也】而介於羊胜公孙诡之间【索隐言邹阳上书自達而游於二人之间或往彼或往此介者言有隔於其间故杜预曰介犹间也】胜等嫉邹阳恶之梁孝王孝王怒下之吏将欲杀之邹阳客游以谗见禽恐死而负累【正义诸不以罪死为累】乃从狱中上书曰臣闻忠无不报信不见疑臣常以为然徒虚语耳昔者荆轲慕燕丹之义白虹贯日太子畏之【集解应劭曰燕太子丹质於秦始皇遇之无礼丹亡去故厚养荆轲令西刺秦王精诚感天白虹为之贯日也如淳曰白虹兵象日为君列士传曰荆轲发後太子自相气见虹贯日不彻曰吾事不成矣後闻轲死事不立曰吾知其然也索隐王劭又云轲将入秦待其客未发太子丹疑其畏惧故曰畏之其解不如见虹贯日不彻也战国策云聂政刺韩傀亦曰白虹贯日是也】卫先生为秦画长平之事太白蚀昴而昭王疑之【集解苏林曰白起为秦伐赵破长平军欲遂灭赵遣卫先生说昭王益兵粮乃为应侯所害事用不成其精诚上达於天故太白为之蚀昴昴赵分也将有兵故太白食昴食干历之也如淳曰太白乃天之将军也索隐如淳云太自主西方秦在西败赵之兆也又王充云夫言白虹贯日太白食昴实也言荆轲之谋卫先生之策感动皇天而贯日食昴虚也】夫精变天地而信不喻两主岂不哀哉今臣尽忠竭诚毕议愿知【集解张晏曰尽其计议愿王知之也】左右不明【索隐言左右之不明不欲斥王】卒从吏讯为世所疑是使荆轲卫先生复起而燕秦不悟也愿大王孰察之昔卞和献宝楚王刖之【集解应劭曰卞和得玉璞献之武王武王示玉人玉人曰石也刖右足武王没复献文王玉人复曰石也刖其左足至成王时卞和抱璞哭於郊乃使王尹攻之果得宝玉索隐楚人卞和得玉璞事见国语及吕氏春秋案世家楚武王名熊通文王名赧成王名悼】李斯竭忠胡亥极刑是以箕子佯狂【索隐佯音阳谓诈为狂司马彪曰箕子名曰胥余】接輿辟世【集解张晏

曰楚贤人佯狂避世也索隐案高士传曰楚人陆通字接舆是也】恐遭此患也愿大王孰察卞和李斯之意而後楚王胡亥之聽【索隐谓以楚王胡亥之聽为谬故後之而不用後犹下也】无使臣为箕子接舆所笑臣闻比干剖心子胥鴟夷【索隐韦昭云以皮作鴟鸟形名曰鴟夷鴟夷皮槥也服?云用马革作囊以裹尸投之於江】臣始不信乃今知之愿大王孰察少加怜焉谚曰有白头如新倾盖如故【集解駰案桓谭新论言内有以相知与否不在新故也索隐服?云人不相知才能交至白头犹如新也倾盖如故如吴札郑侨也家语孔子遇程子於途倾盖而语又志林云倾盖者道行相遇駟车对话两盖相切小欹之义故云倾盖也】何则知与不知也故昔樊於期逃秦之燕藉荆轲首以奉丹之事【索隐藉音子夜反韦昭云谓於期逃秦之燕以头与轲使持入秦以示信也】王奢去齐之魏临城自刭以却齐而存魏【集解駰案汉书音义曰王奢齐人也亡至魏其後齐伐魏奢登城谓齐将曰今君之来不过以奢之故也夫义不苟生以为魏累遂自刭也】夫王奢樊於期非新於齐秦而故於燕魏也所以去二国死两君者行合於志而慕义无穷也是以苏秦不信於天下而为燕尾生【索隐服?云苏秦於秦不出其信於燕则出尾生之信韦昭云尾生守信而死者案言苏秦於燕独守信如尾生故云为燕之尾生也】白圭战亡六城为魏取中山【集解张晏曰白圭为中山将亡六城君欲杀之亡入魏文侯厚遇之还拔中山索隐事见战国策及吕氏春秋也】何则诚有以相知也苏秦相燕燕人恶之於王王按劍而怒食以駮騊【集解駰案汉书音义曰駮騊骏马也生七日而超其母敬重苏秦虽有谗谤而更膳以珍奇之味索隐字林云马父羸子北狄之良马也正义食音寺駮騊音决蹄北狄良马也】白圭显於中山中山人恶之魏文侯文侯投之以夜光之璧何则两主二臣剖心析肝相信岂移於浮辞哉故女无美恶入宫见妒士无贤不肖入朝见嫉昔者司马喜髡脚於宋卒相中山【集解晋灼曰司马喜三相中山苏林曰六国时人被此刑也索隐事见战国策及吕氏春秋】范雎摺胁折齿於魏卒为应侯【索隐应侯传作折胁摺齿是也说文云拉摧也音力荅反】此二人者皆信必然之画捐朋党之私挟孤独之位故不能自免於嫉妒之人也是以申徒狄自沈於河【集解駰案汉书音义曰殷之末世人索隐庄子申徒狄谏而不用负石自投於河韦昭云六国时人汉书云自沈於雍河服?云雍州之河也又新序作抱瓮自沈於河不同也】徐衍负石入海【集解駰案列士传曰周之末世人】不容於世义不苟取比周於朝以移主上之心故百里奚乞食於路繆公委之以政甯戚饭牛车下而桓公任之以国【集解应劭曰齐桓公夜出迎客而甯戚疾击其牛角商歌曰南山矸白石烂生不遭尧与舜禅短布单衣适至骭从昏饭牛薄夜半长夜曼曼何时旦公召与语说之以为大夫索隐事见吕氏春秋商歌者谓为商声而歌也或云商旅人歌也二说并通矸音公禅反矸者白净貌也顾野王音岸禅音善如字读协韵失之也埤苍云骭胫也字林音下谏反】此二人者岂借宦於朝假誉於左右然後二主用之哉感於心合於行亲於胶漆昆弟不能离岂惑於衆口哉故偏聽生奸独任成乱昔者鲁聽季孙之说而逐孔子【索隐论语齐人归女乐季桓子受之三日不朝孔子行也】宋信子罕之计而囚墨翟【索隐左氏司城子罕姓乐名喜乃宋之贤臣也汉书作子冉不知子冉是何人文穎曰子冉子罕也荀卿传云墨翟孔子时人或云在孔子後又襄二十九年左传宋饥子罕请出粟时孔子适八岁则墨翟与子罕不得相辈或以子冉为是不知何如也】夫以孔墨之辩不能自免於谗谀而二国以危何则衆口铄金【索隐国语云衆心成城衆口铄金贾逵云铄消也衆口所恶虽金亦为之消亡又风俗通云或说有美金於此衆人或共诋訛言其不纯金卖者欲其必售因取鍛烧以见其真是爲衆口铄金也】积毁销骨也【索隐大顔云谗人积久潛毀則父兄自相

诛戮骨肉为之消灭也】是以秦用戎人由余而霸中国齐用越人蒙而强威宣【索隐越人蒙未见所出汉书作子臧又张晏云子臧或是越人蒙字也】此二国岂拘於俗牵於世系阿偏之辞哉公聽并观垂名当世【索隐小顏云公聽言不私并观谓所见同也】故意合则胡越为昆弟由余越人蒙是矣不合则骨肉出逐不收朱象管蔡是矣今人主诚能用齐秦之义後宋鲁之聽则五伯不足称三王易为也是以圣王觉寤捐子之之心【集解徐广曰燕王让国於其大臣子之也】而能不说於田常之贤【集解应劭曰田常事齐简公简公说之而杀简公使人君去此心则国家安全也】封比干之後修孕妇之墓【集解应劭曰纣刳妊者观其胎产也索隐案封比干之後後谓子也不见其文尚书作封比干之墓又唯云刳剔孕妇则武王虽反商政亦未必修孕妇之墓也】故功业复就於天下何则欲善无厌也夫晋文公亲其讎强霸诸侯齐桓公用其仇而一匡天下【集解駰案谓晋寺人勃鞞齐管仲也】何则慈仁殷勤诚加於心不可以虚辞借也至夫秦用商鞅之法东弱韩魏兵强天下而卒车裂之越用大夫种之谋禽劲吴霸中国而卒诛其身是以孙叔敖三去相而不悔【索隐三得相不喜知其才之自得也三去相不悔知非已之罪也】於陵子仲辞三公为人灌园【集解駰案列士传曰楚於陵子仲楚王欲以为相而不许为人灌园索隐孟子云陈仲子齐陈氏之族兄为齐卿仲子以为不义乃适楚居于於陵自谓於陵子仲楚王聘以为相子仲遂夫妻相与逃为人灌园列士传字子终者是也】今人主诚能去骄傲之心怀可报之意披心腹见情素堕肝胆施德厚终与之穷達无爱於士则桀之狗可使吠尧【集解韦昭曰言恩厚无不使也】而跖之客可使刺由【集解应劭曰跖之客为其人使刺由由许由跖盗跖也索隐并见战国策】况因万乘之权假圣王之资乎然则荆轲之湛七族要离之烧妻子【集解应劭曰荆轲为燕刺秦始皇不成而死其族坐之湛没吴王阖闾欲杀王子庆忌要离诈以罪亡令吴王燔其妻子要离走见庆忌以劒刺之张晏曰七族上至曾祖下至曾孙索隐湛音沈七族父之姓一也姑之子二也姊妹之子三也女之子四也母之姓五也从子六也及妻父母凡七族也要离事见吕氏春秋】岂足道哉臣闻明月之珠夜光之璧以闇投人於道路人无不按劒相眄者何则无因而至前也蟠木根柢轮囷离诡【集解张晏曰根柢下本也轮囷离诡委曲盘戾也索隐孟康云蟠结之木也晋灼云盘檀木根也】而为万乘器者何则以左右先为之容也【索隐左右先加雕刻是为之容饰也】故无因至前虽出随侯之珠夜光之璧犹结怨而不见德故有人先谈则以枯木朽株树功而不忘今夫天下布衣穷居之士身在贫贱虽包尧舜之术【索隐言蒙被尧舜之道也】挟伊管之辩怀龙逢比干之意欲尽忠当世之君而素无根柢之容虽竭精思欲开忠信辅人主之治则人主必有按劒相眄之迹是使布衣不得为枯木朽株之资也是以圣王制世御俗独化於陶钧之上【集解駰案汉书音义曰陶家名模下圆转者为钧以其能制器为大小比之于天索隐张晏云陶冶钧范也作器下所转者名钧韦昭曰陶烧瓦之竈钧木长七尺有弦所以调为器具也崔浩云以钧制器万殊故如造化之运转裁成也】而不牵於卑乱之语不夺於衆多之口故秦皇帝任中庶子蒙嘉之言以信荆轲之说而七首窃发【索隐通俗文云其头类七故曰七首短而使用也】周文王猎泾渭载吕尚而归以王天下故秦信左右而杀周用乌集而王【集解駰案汉书音义曰太公望涂覬卒遇共成王功若乌鸟之暴集也索隐韦昭云吕尚适周如乌之集也】何则以其能越牵拘之语驰域外之议独观於昭旷之道也今人主沈於諂谀之辞牵於帷裳之制【集解駰案汉书音义曰言为左右便辟侍帷裳臣妾所见牵制】使不羈之士与牛骥同皁【集解駰案汉书音义曰食牛马器以木作如槽也索隐言骏足不可羈绊以比喻逸才之人应劭云皁枥也韦昭

云阜养马之官下士也养马之官其衣阜也又郭璞云阜养马之器也正义顔云不羈言才识高远不可羈系早在早反方言云梁宋齐楚燕之间谓枳曰阜】此鲍焦所以忿於世而不留富贵之乐也【集解如淳曰庄子云鲍焦饰行非世抱木而死索隐晋灼云列士传鲍焦怨世不用已采蔬於道子贡难曰非其世而采其蔬此焦之有哉弃其蔬乃立枯洛水之上案此事见庄子及说苑韩诗外传小有不同】臣闻盛饰入朝者不以利污义砥砺名号者不以欲伤行故县名胜母【集解駰案汉书云里名胜母也正义盐铁论皆云里名尸子及此传云县名未详也】而曾子不入【索隐淮南子及盐铁论云里名胜母曾子不入盖以名不顺也尸子以为孔子至胜母县暮而不宿其说不同】邑号朝歌而墨子回车【集解晋灼曰朝歌者不时也正义朝歌今卫州县也】今欲使天下寥廓之士摄於威重之权主於位势之贵故回面污行以事谄谀之人【索隐杜预云回邪也】而求亲近於左右则士伏死堀穴岩岩之中耳【集解駰案诗云节彼南山维石岩岩】安肯有尽忠信而趋阙下者哉书奏梁孝王孝王使人出之卒为上客

太史公曰鲁连其指意虽不合大义然余多其在布衣之位荡然肆志不诎於诸侯谈说於当世折卿相之权邹阳辞虽不逊然其比物连类有足悲者亦可谓抗直不挠矣吾是以附之列传焉

【索隐述赞曰鲁连達士高才远致释难解纷辞禄肆志齐将挫辩燕军沮气邹子遇谗见诋狱吏慷慨献说时王所器】

史记卷八十三

史记卷八十三考证

鲁仲连邹阳列传今齐湣王已益弱○鲍彪战国策注曰衍湣王字今乃襄王尔史亦误

过而为政於天下索隐谓以过恶而为政也正义至过字为絶句言秦得肆志为帝恐有烹醢纳筦徧行天子之礼过失也○徐孚远曰此解非也言秦未能并灭六国若尊之太过使得称帝则为政於天下矣

天崩地坼天子下席索隐谓烈王太子安王骄也○考烈王太子宜为显王

东藩之臣因齐○战国策作婴齐

齐湣王将之鲁○徐孚远曰前言齐湣王已益弱据此则在出亡以後恐前误也

邹鲁之臣生则不得事养死则不得赙襚索隐谓时君弱臣强故邹鲁君生时臣并不得尽事养死亦不得赙襚之礼○徐孚远曰此解非也言邹鲁国小而贫不能备生死之礼

且楚攻齐之南阳索隐即济之淮北泗上之地也○顾炎武曰南阳者泰山之阳孟子一战胜齐遂有南阳【臣人龙】按济应作齐盖传写之误

栗腹以十万之衆五折於外○鲍彪战国策注曰此章引栗腹之事说聊城之将盖好事者闻约矢之说惜其书不存拟为之以补亡而其人意气横溢肆笔而成不暇检校其细处太史公亦爱其千里而略其牝牡骊黄至於今二千岁莫有知其非者也又按燕昭二十八年书齐之不下者唯聊莒即墨聊即聊城也徐广注此栗腹事去长平十年而不论其在聊城事後苏氏古史亦因之疏矣吴师道补注曰鲁仲连说燕将下聊城史不着年其事引栗腹之败此事在其後故通监大事记载於秦孝文元年当燕王喜五年齐王建十五年自赧王三十一年燕率五国伐齐闵王死襄王立三十六年燕昭王卒明年惠王立越武成王孝王而至王喜凡三十四年此盖二事误乱为一自燕攻齐至杀骑劫二十五字或他策脱简而初燕将至谗之十一字亦他本所无也且单由即墨起七十余城即复为齐不闻聊城尚为燕守以齐之事势岂有舍之三十余年而不攻单之兵力三十余年而不能下与今日攻之岁余不下可见为此时燕将守聊城事也史称毅破齐不下者独莒即墨单纵反间亦言二城而燕世家书聊莒即墨策亦有三城不下之言果一时事则聊城亦为齐守而非燕将为燕守者此语因聊城不下而引与莒即墨乱也考之单传自复齐之後无可书之事齐襄王十九年当赵孝成王元年赵割地求单为将次年遂相赵必不复返齐矣距聊城之役凡十六年单岂得复为齐将哉此因岁余不下之言聊莒即墨之混而误指以为单也夫仲连之言正谓栗腹败燕国乱聊城孤守齐方并攻势将必拔其言初不涉湣襄昭惠之际所谓楚攻南阳魏攻平陆闵王时楚取淮北单复齐後盖已服之不闻楚魏交攻之事二事必在後也燕将被谗惧诛连书亦无此意此因乐毅而讹也史又称燕将得书自杀单遂屠聊城尤非事实齐所杀燕将惟骑劫耳不闻其他此因骑劫而讹也连之大意在於罢兵息民而其料事之明劝以归燕降齐亦度其计之必可者排难解纷又素所蓄积也迫之於穷而置之於死岂其心哉夫其劝之正将以全聊城之民而忍坐视屠之哉燕将死聊城屠连何功美之称而齐欲爵之哉策所云解兵而去者当得其实而史不可信也故论此事者一考之仲连之书则史策之舛讹彀混者皆可得而明矣鲍不此之察见其不通遂谓好事者闻约矢之讹惜其书不存拟之以补亡二千余年莫有觉者何其谬哉史误因策通监大事记称田单误因史真文忠公反据鲍氏为断而谓鲁仲连之说不可为训皆失考也

史记卷八十三考证

卷八十四

钦定四库全书

史记卷八十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

屈原贾生列传第二十四

屈原者名平楚之同姓也【正义屈景昭皆楚之族王逸云楚王始都是生子瑕受屈为卿因以为氏】为楚怀王左徒【正义盖今在左右拾遗之类】博闻强志明於治乱嫺於辞令【集解駰案嫺音闲】入则与王图议国事以出号令出则接遇宾客应对诸侯王甚任之上官大夫与之同列争宠而心害其能怀王使屈原造为宪令屈平属草藁【索隐属音烛草藁谓创制宪令之本汉书作草具崔浩谓发始造端也】未定上官大夫见而欲夺之【正义王逸云上官靳尚】屈平不与因谗之曰王使屈平为令衆莫不知每一令出平伐其功曰以为非我莫能为也王怒而疏屈平屈平疾王听之不聪也谗諂之蔽明也邪曲之害公也方正之不容也故忧愁幽思而作离骚【索隐应劭曰离遭也骚忧也又离骚序云离别也骚愁也骚音素刀反又一音萧】离骚者犹离忧也夫天者人之始也父母者人之本也人穷则反本故劳苦倦极未尝不呼天也疾痛惨怛【正义上七感反下丁达反惨毒也怛痛也】未尝不呼父母也屈平正道直行【正义塞孟反】竭忠尽智以事其君谗人间之可谓穷矣信而见疑忠而被谤能无怨乎屈平之作离骚盖自怨生也国风好色而不淫小雅怨诽而不乱【正义诽音方畏反】若离骚者可谓兼之矣上称帝喾下道齐桓中述汤武以刺世事明道德之广崇治乱之条贯靡不毕见其文约其辞微其志洁其行廉其称文小而其指极大举类迳而见义远其志洁故其称物芳其行廉故死而不容自疏濯淖污泥之中【索隐濯音浊淖音闇污音乌故反泥音奴计反】蝉蜕於浊秽【正义蜕音税去皮也又他卧反】以浮游尘埃之外不获世之滋垢皜然泥而不滓者也【集解徐广曰皜疎静之貌索隐皜音自若反泥音涅滓音淄又并如字】推此志也虽与日月争光可也【正义言屈平之仕浊世去其污垢在尘埃之外推此志意虽与日月争其光明斯亦可矣】屈平既绌其後秦欲伐齐齐与楚从亲【正义从足松反】惠王患之乃令张仪详去秦厚币委质事楚曰秦甚憎齐齐与楚从亲楚诚能絶齐秦愿献商於之地六百里楚怀王贪而信张仪遂絶齐使使如秦受地张仪诈之曰仪与王约六里不闻六百里楚使怒去归告怀王怀王怒大兴师伐秦秦发兵击之大破楚师於丹淅斩首八万【索隐丹淅二水名也谓於丹水之北淅水之南皆为县名在弘农所谓丹阳淅是

也正义丹阳今枝江故城】虜楚將屈匄【索隱屈姓匄名音蓋】遂取楚之漢中地【集解徐廣曰楚懷王十六年張儀來相十七年秦敗屈匄正義梁州】懷王乃悉發國中兵以深入擊秦戰於藍田魏聞之襲楚至鄧【索隱鄧在漢水北故鄧侯城】楚兵懼自秦歸而齊竟怒不救楚楚大困明年秦割漢中地與楚以和楚王曰不願得地願得張儀而甘心焉張儀聞乃曰以一儀而當漢中地臣請往如楚如楚又因厚幣用事者臣靳尚而設詭辯於懷王之寵姬鄭袖懷王竟聽鄭袖復釋去張儀是時屈平既疏不復在位使於齊顧反諫懷王曰何不殺張儀懷王悔追張儀不及【索隱張儀傳無此語】其後諸侯共擊楚大破之殺其將唐昧【集解徐廣曰二十八年敗唐昧也正義昧莫暮反】時秦昭王與楚欲與懷王會懷王欲行屈平曰秦虎狼之國不可信不如無行【索隱楚世家昭王有此言蓋二人同諫王故彼此各隨錄之也】懷王稚子子蘭勸王行奈何絕秦歡懷王卒行入武關秦伏兵絕其後因留懷王【集解徐廣曰三十年入秦】以求割地懷王怒不聽亡走趙趙不內復之秦竟死於秦而歸葬長子頃襄王立【索隱名橫】以其弟子蘭為令尹楚人既咎子蘭以勸懷王入秦而不反也屈平既嫉之雖放流睠顧楚國系心懷王不忘欲反冀幸君之一悟俗之一改也其存君興國而欲反覆之一篇之中三致意焉然終無可奈何故不可以反卒以此見懷王之終不悟也人君無愚智賢不肖【索隱此已下太史公傷楚懷王之不任賢信諛而不能反國之論也】莫不欲求忠以自為舉賢以自佐然亡國破家相隨屬而聖君治國累世而不見者其所謂忠者不忠而所謂賢者不賢也懷王以不知忠臣之分故內惑於鄭袖外欺於張儀疏屈平而信上官大夫令尹子蘭兵挫地削亡其六郡身客死於秦為天下笑此不知人之禍也易曰井渫不食【集解向秀曰渫者浚治去泥濁也索隱向秀字子期晉人注周易】為我心恻【集解張璠曰可為惻然傷道未行也索隱張璠亦晉人注周易】可以汲王明並受其福【集解駰案易象曰求王明受福也索隱京房易章句言我之道可汲而用上有明主汲我道而用之天下並受其福故曰王明並受其福也】王之不明豈足福哉【集解徐廣曰一云不足福正義言楚王不明忠臣豈足受福故屈原懷沙自沉】令尹子蘭聞之大怒卒使上官大夫短屈原於頃襄王頃襄王怒而遷之屈原至於江濱被發行吟澤畔顏色憔悴形容枯槁漁父見而問之曰【索隱父音甫】子非三閭大夫歟【集解駰案離騷序曰三閭之職掌王族三姓曰昭屈景原序其譜屬率其賢良以厲國士】何故而至此屈原曰舉世混濁而我獨清衆人皆醉而我獨醒是以見放漁父曰夫聖人者不凝滯於物而能與世推移舉世混濁何不隨其流而揚其波【索隱楚詞隨其流作搢其泥也】衆人皆醉何不餽其糟而啜其醢何故懷瑾握瑜而自令見放為【索隱楚詞懷瑾握瑜作深思高舉也】屈原曰吾聞之新沐者必彈冠新浴者必振衣人又誰能以身之察察【集解王逸曰已淨潔】受物之汶汶者乎【集解王逸曰蒙垢敝索隱汶汶音門門猶昏暗不明也】寧赴常流而葬乎江魚腹中耳【索隱常流猶長流也】又安能以皓皓之白而蒙世之溫蠖乎【索隱蠖音烏廓反溫蠖猶慍憤楚詞作蒙世之尘埃哉】乃作懷沙之賦【索隱楚詞九懷曰懷沙砾以沉此其義也】其辭曰陶陶孟夏兮草木莽莽【集解王逸曰陶陶盛陽貌莽莽盛茂貌索隱莽音姥正義莫古反】傷懷求哀兮汨徂南土【集解王逸曰汨行貌索隱方言曰汨謂疾行也】眴兮窈窕【集解徐廣曰眴眩也索隱眴音瞬窈窕音烏鳥反】孔靜幽墨【集解王逸曰孔甚也墨無聲也正義言江南山高澤深視之眴野甚清淨嘆無人聲】冤結紆軫兮離愍之長鞠【集解王逸曰鞠窮紆屈也軫痛也愍病也】撫情効志兮俛拙以自抑刊方以為圓兮常度未替【集解王逸曰刊削度法替廢也言人刊削方木欲以為圓其常法度尚未廢也索隱刊音五官反】易初本由兮君子所

鄙【集解王逸曰由道也正义本常也鄙耻也言人遭世不道变易初行违离常道君子所鄙】章画职墨兮前度未改【集解王逸曰章明也度法也言上明於所画念其绳墨修前人之法不易其道则曲木直而恶木好索隐画计画也楚词职作志志念也余如注所解】内直质重兮大人所盛【集解王逸曰言人质性敦厚心志正直行无过失则大人君子所盛美也】巧匠不斲兮孰察其揆正玄文幽处兮蒙谓之章【集解王逸曰玄黑也蒙盲者也诗云蒙眛奏公章明也】离娄微睇兮瞽以为无明【集解王逸曰离娄古明视者也瞽盲也正义睇田帝反盼也】变白而为黑兮倒上以为下【索隐下音户】凤凰在笱兮鸡雉翔舞【集解徐广曰笱一作郊駟案王逸曰笱笼落也索隐笱音奴又音女加反笱落谓藤萝之相笼络也楚词雉作鸞正义瑞应图云黄帝问天老曰凤鸟何如天老曰鸿前而鳞後蛇颈而鱼尾龙文而龟身燕颌而鸡喙首戴德颈揭义背负仁心入信翼俟顺足履正尾系武小音金大音鼓延颈奋翼五色备举】同糅玉石兮一槩而相量【集解王逸曰忠佞不异】夫党人之鄙妬兮羌不知吾所臧【集解王逸曰莫昭我之善意索隐按王叔师云羌楚人语辞言卿何为也正义羌音强】任重载盛兮滞而不济【集解王逸曰言已才力盛壮可任用重载而身没沉滞不得成其本志也】怀瑾握瑜兮穷不得余所示【集解王逸曰示语也】邑犬羣吠兮吠所怪也诽俊疑桀兮固庸态也【集解王逸曰千人才为俊一国高为桀庸厮贱之人也索隐尹文子云千人才曰俊万人曰桀今乃诽俊疑桀固是庸人之态也】文质疎内兮衆不知吾之异采【集解徐广曰异一作奥駟案王逸曰采文采也】材朴委积兮莫知余之所有重仁袭义兮谨厚以为丰【集解王逸曰重累也袭及也】重华不可悟兮孰知余之从容【集解王逸曰悟逢也索隐楚词悟作遇并吾故反】古固有不同兮岂知其故也【索隐楚词作莫知其何故】汤禹久远兮邈不可慕也惩违改忿兮抑心而自强离潜而不迁兮愿志之有象【集解王逸曰象法也】进路北次兮【正义北次将就】日昧昧其将暮含忧虞哀兮限之以大故【集解王逸曰娱乐也大故谓死亡也索隐楚词含忧虞哀作舒忧娱哀娱音虞娱者乐也】乱曰【索隐王叔师云乱者理也所以发理辞指总撮其要而重理前意也】浩浩沅湘兮【索隐二水名地理志湘水出零陵海阳山北入江沅即湘之後流也正义说文云沅水出牂牁东北流入江湘水出零陵县海阳山北入江按二水皆经岳州而入大江也】分流汨兮【集解王逸曰汨流也】修路幽拂兮【索隐楚词作幽蔽也】道远忽兮曾唼恒悲兮永叹慨兮世既莫吾知兮人心不可谓兮【集解王逸曰谓犹说也索隐楚词无曾唼已下二十一字】怀清抱质兮独无匹兮伯乐既歿兮驥将焉程兮【集解王逸曰程量也】人生有命兮各有所错兮【集解王逸曰错安也】定心广志余何畏惧兮【索隐楚词余并作余】曾伤爰哀永叹喟兮【集解王逸曰喟息也】世溷不吾知心不可谓兮知死不可让兮愿勿爱兮明以告君子兮吾将以为类兮【集解王逸曰类法也正义按类例也以为忠臣不事乱君之例】於是怀石遂自投汨罗以死【集解应劭曰汨水在罗故曰汨罗也索隐地理志长沙有罗县罗子之所徙荆州记罗县北带汨水音覓正义故罗县城在岳州相阳县东北六十里春秋时罗子国秦置长沙郡而为县也按县北有汨水及屈原庙续齐谐记云屈原以五月五日投汨罗而死楚人哀之每於此日以竹筒贮米投水祭之汉建武中长沙区回白日忽见一人自称三闾大夫谓回曰闻君常见祭甚善但常年所遗并为蛟龙所窃今若有惠可以练楮叶塞上以五色丝转缚之此物蛟龙所惮回依其言世人五月五日作糉并带五色丝及练叶皆汨罗之遗风】屈原既死之後楚有宋玉唐勒景差之徒者【集解徐广曰差或作庆索隐扬子法言及汉书古今人表皆是景差今作差是字省耳以徐裴邹三家皆无音是如字读也】

】皆好辞而以赋见称然皆祖屈原之从容辞令终莫敢直谏其後楚日以削数十年竟为秦所灭自屈原沈汨罗後百有余年汉有贾生为长沙王太傅过湘水投书以吊屈原

贾生名谊雒阳人也年十八以能诵诗属书闻於郡中吴廷尉为河南守闻其秀才【正义顔云秀美也应劭云避光武讳改茂才也】召置门下甚幸爱孝文皇帝初立闻河南守吴公【索隐吴姓史失名故称公】治平为天下第一故与李斯同邑而常学事焉乃徵为廷尉廷尉乃言贾生年少颇通诸子百家之书文帝召以为博士是时贾生年二十余最为少每诏令议下诸老先生不能言贾生尽为之对人人各如其意所欲出诸生於是乃以为能不及也孝文帝说之超迁一岁中至大中大夫贾生以为汉兴至孝文二十余年天下和洽而固当改正朔易服色法制度定官名兴礼乐乃悉草具其事仪法色尚黄数用五【正义汉文帝时黄龙见成纪故改为土也】为官名悉更秦之法孝文帝初即位谦让未遑也诸律令所更定及列侯悉就国其说皆自贾生发之於是天子议以为贾生任公卿之位绌灌东阳侯冯敬之属尽害之【正义绌灌周勃灌婴也东阳侯张敖冯敬时为御史大夫】乃短贾生曰雒阳之人年少初学专欲擅权纷乱诸事於是天子後亦疏之不用其议乃以贾生为长沙王太傅【索隐谊为傅是吴芮之玄孙差袭长沙王之时也非景帝之子长沙王发也荆州记长沙城西北隅有贾谊祠及谊坐石床在】贾生既辞往行闻长沙卑湿自以寿不得长又以适去【集解徐广曰适竹革反韦昭曰谪遣也索隐字林云适音丈厄反】意不自得及度湘水为赋以吊屈原其辞曰共承嘉惠兮【集解张晏曰共敬也】俟罪长沙侧闻屈原兮自沉汨罗造托湘流兮敬吊先生【索隐造音七到反】遭世罔极兮乃陨厥身呜呼哀哉逢时不祥鸾凤伏窜兮鸱梟翱翔【索隐窜音七外反】闾茸尊显兮谗谀得志【索隐闾音天虂反茸音而陇反胡广云闾茸不才之人无六翮翱翔之用而反尊显字林云闾茸不肖之人也】贤圣逆曳兮方正倒植【索隐胡广云逆曳不得顺而行也倒植贤不肖颠倒而易位也】世谓伯夷贪兮谓盗跖廉【索隐汉书作随夷溷兮跖蹠廉一句皆兼两人随卞随夷伯夷跖盗跖蹠庄蹠也】莫邪为顿兮【集解駉案莫邪吴大夫也作宝剑因以名璚曰许慎曰莫邪大戟也索隐吴越春秋曰吴王使干将造剑二枚一曰干将一曰莫邪莫邪干将剑名也顿读为钝】鋌刀为鋌【集解徐广曰思廉反駉案汉书音义曰鋌谓利索隐鋌者锡也鋌利也音纤言其暗惑也】于嗟嚟兮生之无故【集解应劭曰嚟嚟不自得意璚曰生谓屈原也】斡弃周鼎兮而宝康瓠【集解如淳曰斡转也尔雅曰康瓠谓之甗大瓠也应劭曰康容也斡音筦筦转也一曰康空也索隐斡音乌活反甗音五列反李巡云康谓大瓠瓢也】腾驾罢牛兮骖蹇驴【正义罢音皮】骥垂两耳兮服盐车【索隐战国策曰夫骥服盐车上太山中坂迁延负辕不能上伯乐下车哭之也】章甫荐屨兮【集解应劭曰章甫殷冠也】渐不可久【集解駉案刘向别录曰因以自谕自恨也】嗟苦先生兮独离此咎【集解应劭曰嗟咨嗟苦劳苦言屈原遇此难也】讯曰【集解李奇曰讯告也张晏曰讯离骚下章乱辞也索隐讯音信刘伯庄音素对反讯犹宣也重宣其意周成解诂音碎也】已矣国其莫我知独堙郁兮【索隐汉书作壹鬱亦通】其谁语凤飘飘其高逝兮【索隐逝音逝】夫固自缩而远去袭九渊之神龙兮【集解邓展曰袭重也或曰袭覆也犹言察也索隐庄子曰千金之珠必在九重之渊而骊龙颌下故云九渊之神龙也】沕深潜?自珍【集解徐广曰沕潜藏也亡笔反】弥融爚【集解徐广曰一云偃螭獭正义顾野王云弥远也融明也爚光也没深藏以自珍弥远明光以隐处也】以隐处兮【集解徐广曰一本云弥蜎爚以隐处也索隐案徐所注盖三本总不同也苏林

云偁音面应劭云偁背也螻蛄水虫害鱼者以言背恶从善也郭璞注尔雅云似鳬江东谓之鱼鰕【夫岂从螻与蛭蟥】集解駰案汉书螻字作虾韦昭曰虾虾蟥也蛭水虫蟥邱蟥也索隐螻音蚁汉书作虾言偁然絶於螻蛄况从虾与蛭蟥也蛭音质蟥音引正义言宁投水合神龙岂陆葬从螻与蛭蟥】所贵圣人之神德兮远浊世而自藏使骐驎可得系羈兮岂云异夫犬羊【正义使骐驎可得系缚羈絆则与犬羊无异责屈原不去浊世以藏隐其文也驎千里马】般纷纷其离此尤兮【集解苏林曰般音盘孟康曰般音班或曰般桓不去纷纷构谗音也索隐尤谓怨咎也】亦夫子之辜也【索隐汉书辜作故夫子谓屈原也李奇曰亦夫子不如麟凤翔逝之故罹此咎也】睠九州而相君兮【索隐睠音丑知反谓历观也汉书作历九州】何必怀此都也凤皇翔于千仞之上兮览德辉而下之【索隐言凤凰翔见人君有德乃下故礼曰德辉动乎内是也】见细德之险微兮摇增翮【集解徐广曰一云遥增擊也】逝而去之【正义摇动也增加也言见细德之人又有险难微起则合加动羽翮远逝而去之】彼寻常之污渌兮【集解应劭曰八尺曰寻倍寻曰常索隐污潢也渌小渠也】岂能容吞舟之鱼横江湖之鱣鰪兮【集解如淳曰大鱼也瓚曰鱣鱼无鳞口近腹下】固将制於蝼蚁【索隐庄子云庚桑楚谓弟子曰吞舟之鱼荡而失水则蝼蚁能苦之战国策齐人说靖郭君亦同案以喻小国暗主不容忠臣而为谗贼小臣之所见害也】贾生为长沙王太傅【正义汉文帝年表云吴芮之玄孙差袭长沙王也傅为长沙靖王差之二年也括地志云吴芮故城在潭州长沙县东南三百里贾谊宅在县南三十步湘水记云谊宅中有一井谊所穿极小而深上斂下大其状如壶傍有一扁脚石床容一人坐形流古制相承云谊所坐】三年有鵩飞入贾生舍上於坐隅楚人命鵩曰服【集解晋灼曰异物志有山鵩体有文色土俗因形名之曰服不能远飞行不出域索隐邓展云似鵩而大荆州记云巫县有鸟如雌鸡其雄为鵩楚人谓之服吴录云服黑色也鸣自呼其名】贾生既以适居长沙长沙卑湿自以为寿不得长伤悼之乃为赋以自广【索隐姚氏云广犹寬也】其辞曰单阏之岁兮【集解徐广曰岁在卯曰单阏文帝六年岁在丁卯索隐单阏起也阳气推万物而起故曰单阏孙炎作蟬蟬犹伸也正义阏乌葛反】四月孟夏庚子日施兮服集予舍【集解徐广曰施亦作斜索隐施音矢移反犹西斜也汉书作斜】止于坐隅貌甚闲暇异物来集兮私怪其故发书占之兮策言其度【索隐汉书作讖说文云讖验言也此作策盖讖策之辞正义发策数之书占其度验】曰野鸟入处兮主人将去请问于服兮【索隐于於也汉书作予服小颜云予加美之辞】予去何之吉乎告我凶言其菑淹数之度兮语予其期【集解徐广曰数速也】服乃叹息举首奋翼口不能言请对以臆【正义协韵音忆】万物变化兮固无休息斡流而迁兮或推而还【索隐斡音乌活反斡转也】形气转续兮化变而嬗【集解服?曰嬗音如蟬反变蛻也或曰蟬蔓相连也索隐韦昭云而如也如蟬之蛻化也苏林云嬗音婫谓其相传之也】沕穆无穷兮胡可胜言【索隐汉书无穷作无间沕音密又音昧沕穆深微貌以言其理深微不可尽言也正义沕音勿】祸兮福所倚【正义倚於牺反依也】福兮祸所伏【索隐此老子之言然祸字古作𠂔案倚者立也伏下身也以言祸福递来犹如伏立也】忧喜聚门兮吉凶同域【正义言祸福相因吉凶不定】彼吴强大兮夫差?败越栖会稽兮句践霸世斯游遂成兮卒被五刑【集解韦昭曰斯李斯也】傅说胥靡兮【集解徐广曰腐刑也索隐晋灼云胥相也靡随也古者相随坐轻刑之名墨子云傅说衣褐带索佣筑於傅岩在河东太阳县又夏靖书云猗氏十里河西岸吴坂下便得隐穴是说所潜身处也】乃相武丁夫祸之与福兮何异纠纆【集解应劭曰祸福相为表里如纠纆绳索相附会也瓚曰纠绞也纆索也索隐韦昭云纆徽也又通

俗文云合繩曰糾字林云纏三合繩也音墨糾音九】命不可說兮孰知其極水激則旱兮矢激則遠【索隱此淮南子及鵠冠子文也彼作水激則旱而呂氏春秋作疾以言水激則去疾不能浸潤矢激疾則去遠也說文云旱與悍同音言水矢流飛本以無碍為通利今遇有物觸之則激怒更勁疾而遠悍猶人或因禍致福倚伏而無常也】萬物回薄兮振蕩相轉云蒸雨降兮錯繆相紛大專盤物兮【集解駢案漢書專字作鈞如淳曰陶者作器於鈞上此以造化為大鈞索隱漢書云大鈞播物此專讀曰鈞盤猶轉也與播義同虞喜志林云大鈞造化之神鈞陶萬物品授羣形者也案上鄒陽傳注云陶家名模下圓轉者為鈞言其能制器大小以之比天】塊軋無垠【集解應劭曰其氣塊軋非有限齊也塊音若央軋音若乙索隱案無垠謂無有齊畔也說文云垠圻也郭璞注方言云塊軋者不利也王逸注楚詞云塊軋霧氣味也正義塊烏郎反軋於黠反】天不可與慮兮【索隱與音預】道不可與謀遲數有命兮惡識其時且夫天地為爐兮造化為工【索隱此莊子文】陰陽為炭兮萬物為銅【索隱既以陶冶喻造化故以陰陽為炭萬物為銅也】合散消息兮安有常則【索隱莊子云人之生也氣之聚也聚則為生散則為死】千變萬化兮未始有極【索隱莊子云人者萬化而未始有極】忽然為人兮何足控抐【集解如淳曰控引也控搏玩弄愛生之意也索隱搏音徒端反又本作控揣揣音初委反又音丁果反揣者量也故晉灼云或然為人言此生甚輕耳何足引物量度已年命之長短而愛惜之也】化為異物兮又何足患【索隱謂死而形化為鬼是為異物也患協韻音環】小知自私兮賤彼貴我【索隱莊子云以物觀之自貴而相賤也】通人大觀兮物無不可【索隱莊子物固有所然物固有所可無物不然無物不可】貪夫徇財兮烈士徇名【集解應劭曰殉營也瓚曰以身從物曰殉索隱此語亦出莊子】夸者死權兮【集解應劭曰夸毗也好榮死於權利瓚曰夸泰也莊子曰權勢不尤則夸者不悲也索隱言好夸毗者死於權利是言貪勢以自矜夸者至死不休也尤甚也言勢不甚用則夸毗者可悲也】品庶馮生【集解孟康曰馮貪也索隱漢書作每生音謀在反服?云每念生也鄒誕本亦作每言唯念生而已今此作馮馮亦持念之意也然案方言每字合从手旁音謀改反正義馮音凭】怵迫之徒兮或趨西東【集解孟康曰怵為利所誘怵也迫迫貧賤東西趨利也索隱漢書亦有作私東應劭曰仕諸侯為私時天子居長安諸王悉在關東小人怵然內迫私家樂仕諸侯故云怵迫私東也李奇曰私多作西者言東西趨利也怵音黜又怵者誘也】大人不曲兮億變齊同【索隱張機云德無不包靈府弘曠故名大人】拘士系俗兮攔如囚拘【集解徐廣曰攔音華板反又音皖索隱說文云攔大木柵也漢書作儋音去隕反】至人遺物兮獨與道俱【索隱莊子云古之至人先存諸已後存諸人張機云體盡於聖德美之極謂之至人】衆人或或兮好惡積意【集解李奇曰或或東西也所好所惡積之萬億也瓚曰言衆懷抱好惡積之於心意也正義按意合韻音憶】真人恬漠兮獨與道息【索隱莊子云古之真人不知悅生不知惡死不以心捐道不以人助天呂氏春秋曰精氣日新斜氣盡去反其天年謂之真人也】釋知遺形兮超然自喪【集解服?曰絕聖棄知而忘其身也索隱遺形者形故可使如槁木也自喪者心若死灰也莊周云今者吾喪我汝知之乎】寥廓忽荒兮與道翱翔乘流則逝兮得坻則止【集解徐廣曰坻一作坎駢案張晏曰坻水中小洲也索隱漢書坻作坎周易坎九二坎有險言君子見險則止】縱軀委命兮不私與已其生若浮兮其死若休【索隱莊子云勞我以生休我以死也】澹乎若深淵之靜汜兮若不系之舟【索隱出莊子】不以生故自寶兮養空而游【集解駢案漢書音義曰如舟之空也索隱鄧展云自寶自貴也養空而游言體道之人但養空性而心若浮舟也】德人無累兮知命不憂【索隱德人謂上德之

人心中无物累是得道之士也】细故蕞薶兮何足以疑【集解韦昭曰蕞音士介反索隐薶音介汉书作芥张揖云蕞介鳃刺也以言细微事不足蕞介我心故於此云何足以疑之者也正义蕞忍迈反薶如迈反】後岁余贾生徵见孝文帝方受厘【集解徐广曰祭祀福胙也駟案如淳曰汉唯祭天地五時皇帝不自行祠还致福厘音僖】坐宣室【集解苏林曰未央前正室索隐三辅故事云宣室在未央殿北应劭云厘祭余肉也】上因感鬼神事而问鬼神之本贾生因具道所以然之状至夜半文帝前席既罢曰吾久不见贾生自以为过之今不及也居顷之拜贾生为梁怀王大傅【索隐梁怀王名揖文帝子】梁怀王文帝之少子爱而好书故令贾生傅之文帝复封淮南厉王子四人皆为列侯贾生諫以为患之兴自此起矣贾生数上疏言诸侯或连数郡非古之制可稍削之文帝不听居数年怀王骑堕马而死【集解徐广曰文帝十一年】无後贾生自伤为傅无状哭泣岁余亦死贾生之死时年三十三矣及孝文崩孝武皇帝立举贾生之孙二人至郡守而贾嘉最好学世其家与余通书至孝昭时列为九卿

太史公曰余读离骚天问招魂哀郢悲其志适长沙观屈原所自沈渊【索隐荆州记云长沙罗县北带汨水去县四十里是原自沈处北岸有庙也】未尝不垂涕想见其为人及见贾生吊之又怪屈原以彼其材游诸侯何国不容而自令若是读服鸟赋同生死轻去就又爽然自失矣【集解徐广曰爽一本作爽】

【索隐述赞曰屈平行正以事怀王瑾瑜比洁日月争光忠而见放谗者益章赋骚见志怀沙自伤百年之後空悲吊湘】

史记卷八十四

史记卷八十四考证

屈原贾生列传斡流而迁兮○顾炎武曰贾生传斡弃周鼎兮而宝康瓠应劭曰斡音筦筦转也斡流而迁兮或推而还索隐曰斡音乌活反斡转也义同而音异今说文云斡蠡柄也从斗𠂔声扬雄杜林说皆以为轺车轮斡乌括切按𠂔字古案切说文既云𠂔声则不得为乌括切矣顔师古匡谬正俗云声类字林并音管贾谊服鸟赋云斡流而迁张华励志诗云大仪斡运皆为转也楚辞云筦维焉系此义与斡同字即为筦故知斡筦二音不殊近代流俗音乌括切非也汉书食货志浮食奇民欲擅斡山海之货师古曰斡谓主领也读与筦同

及孝文崩孝武皇帝立举贾生之孙二人至郡守而贾嘉最好学世其家与余通书至孝昭时列为九卿○凌稚隆曰按马迁卒於汉武末年此言贾嘉至孝昭时列为九卿此句盖後人所增

史记卷八十四考证

<史部,正史类,史记>

卷八十五

钦定四库全书

史记卷八十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

吕不韦列传第二十五

吕不韦者阳翟大贾人也【索隐翟音狄俗又音宅地理志县名属颍川战国策以不韦为濮阳人又记其事迹亦多与此传不同班固虽云太史公据战国策然为此传当别有所闻见故不全依彼说或者刘向定战国策时以已异闻改易彼书遂令不与史迁记合也贾音古郑玄注周礼曰行曰商处曰贾正义阳翟今河南府县】往来贩贱卖贵【集解徐广曰一本云阳翟大贾也往来贱买贵卖索隐王劭卖作鬻音育案鬻卖义同今如字读】家累千金秦昭王四十年太子死其四十二年以其次子安国君为太子【索隐名柱後立是为孝文王也】安国君有子二十余人安国君有所甚爱姬立以为正夫人号曰华阳夫人华阳夫人无子安国君中男名子楚【索隐即庄襄王也战国策曰本名异人後从赵还不韦使以楚服见王后悦之曰吾楚人也而子字之乃变其名曰子楚】子楚母曰夏姬母爱子楚为秦质子於赵【索隐质旧音致今读依此谷梁传曰交质子不及二伯左传曰信不由中质无益也】秦数攻赵赵不甚礼子楚子楚秦诸庶孽孙【索隐韩王信传亦云韩信襄王之孽孙张晏曰孺子曰孽子何休注公羊孽子贱子也非嫡正之子曰孽】质於诸侯车乘进用不饶【索隐下文又云以五百金为进用宜依小顔读为賁音才刃反进者财也古字假借之也】居处困不得意吕不韦贾邯邯见而怜之曰此奇货可居【集解駰案以子楚方财货也正义战国策云濮阳人吕不韦贾邯邯见秦质子异人谓其父曰耕田之利几倍曰十倍珠玉之赢几倍曰百倍立主定国之赢几倍曰无数不韦曰今力田疾作不得煖衣饱食今定国立君泽可遗後世愿往事之秦子异人质於赵处於?城故往说之乃说秦王后弟阳泉君曰君之罪至死君知之乎君门下无不居高官尊位太子门下无贵者而骏马盈外廐美女充後庭王之春秋高矣一日山陵太子用事君危於累卵而不壽於朝生今有计可以使君富千万宁於太山必无危亡之患矣阳泉曰请闻其说不韦曰王年高矣王后无子子傒有承国之业士仓又辅之王一日山陵子傒立士仓用事王后之门必生蓬蒿子楚异人贤材也弃在於赵无母引领西望欲一得归王后诚请而立之是异人无国有国王后无子有子阳泉曰诺入说王后乃为请於赵而归之】乃往见子楚说曰吾能大子之门子楚笑曰且自大君之门而乃大吾门吕不韦曰子不知也

吾门待子门而太子楚心知所谓乃引与坐深语【索隐既解不韦所言之意遂与密谋深语也】吕不韦曰秦王老矣安国君得为太子窃闻安国君爱幸华阳夫人华阳夫人无子能立适嗣者【正义适音嫡】独华阳夫人耳今子兄弟二十余人子又居中不甚见幸久质诸侯即大王薨安国君立为王则子无几得与长子及诸子旦暮在前者争为太子矣【索隐几音冀几望也战国策曰子傒承国之业又有母在中高诱注云子傒秦太子异人之异母兄弟也正义言子楚无望得为太子】子楚曰然为之柰何吕不韦曰子贫客於此非有以奉献於亲及结宾客也不韦虽贫请以千金为子西游事安国君及华阳夫人立子为适嗣子楚乃顿首曰必如君策请得分秦国与君共之吕不韦乃以五百金与子楚为进用结宾客而复以五百金买奇物玩好自奉而西游秦求见华阳夫人姊而皆以其物献华阳夫人因言子楚贤智结诸侯宾客徧天下常曰楚也以夫人为天日夜泣思太子及夫人夫人大喜不韦因使其姊说夫人【索隐战国策作说秦王后弟阳泉君也】曰吾闻之以色事人者色衰而爱弛今夫人事太子甚爱而无子不以此时蚤自结於诸子中贤孝者举立以为适而子之【索隐以此为一句子谓养之为子也然欲分立以为适作上句而子之夫在则尊重作下句意亦通】夫在则尊重夫百岁之後所子者为王终不失势此所谓一言而万世之利也不以繁华时树本即色衰爱弛後虽欲开一言尚可得乎今子楚贤而自知中男也次不得为适其母又不得幸自附夫人夫人诚以此时拔以为适夫人则竟世有宠於秦矣华阳夫人以为然承太子间从容言子楚质於赵者絶贤【索隐间音闲从音七恭反】来往者皆称誉之乃因涕泣曰妾幸得充後宫不幸无子愿得子楚立以为适嗣以托妾身安国君许之乃与夫人刻玉符约以为适嗣安国君及夫人因厚馈遗子楚而请吕不韦傅之子楚以此名誉益盛於诸侯吕不韦取邯鄲诸姬絶好善舞者与居【索隐言其姿容絶美而又善舞也】知有身子楚从不韦饮见而说之因起为寿请之吕不韦怒念业已破家为子楚欲以钓奇【索隐钓者以取鱼喻也奇即上云此奇货可居也】乃遂献其姬姬自匿有身至大期时【集解徐广曰期十二月也索隐譙周云人十月生此过二月故云大期盖当然也既云自匿有娠则生政固当踰常期也】生子政子楚遂立姬为夫人秦昭王五十年使王齮围邯鄲急赵欲杀子楚子楚与吕不韦谋行金六百斤予守者吏得脱亡赴秦军遂以得归赵欲杀子楚妻子子楚夫人赵豪家女也得匿以故母子竟得活秦昭王五十六年薨太子安国君立为王华阳夫人为王后子楚为太子赵亦奉子楚夫人及子政归秦秦王立一年薨諡为孝文王太子子楚代立是为庄襄王庄襄王所养母华阳后为华阳太后真母夏姬尊以为夏太后庄襄王元年以吕不韦为丞相封为文信侯【索隐下文尊为相国案百官表云皆秦官金印紫绶掌承天子助理万机秦署左右高帝署一後又更名相国哀帝时更名大司徒】食河南洛阳十万户【索隐战国策曰食蓝田十二县而秦本纪庄襄王元年初置三川郡地理志高祖更名河南此秦代而曰河南者史记後作据汉郡而言之耳】庄襄王即位三年薨太子政立为王【集解徐广曰时年十三】尊吕不韦为相国号称仲父【正义仲中也次父也盖效齐桓公以管仲为仲父】秦王年少太后时时窃私通吕不韦不韦家僮万人当是时魏有信陵君【正义年表云秦昭王五十六年平原君卒始皇四年信陵君死始皇九年李园杀春申君孟尝君当秦昭王二十四年已後而卒最早】楚有春申君赵有平原君齐有孟尝君【正义王劭云孟尝春申死已久据表及传孟尝平原死稍在前信陵将五国兵攻秦河外正当在庄襄王时不韦已为相又春申与不韦并时各相向十余年不得言死之久矣】皆下士喜宾客以相倾吕不韦以秦之强羞不如亦招致士厚遇之至食客三千人是时诸侯多辩士如荀卿之徒着书布天下吕不韦乃使其客

人人着所闻集论以为八览六论十二纪二十余万言【索隐八览者有始孝行慎大先识审分审应离俗恃君也六论者开春慎行贵直不苟似顺士容也十二纪者记十二月也其书有孟春等纪二十余万言三十余卷也】以为备天地万物古今之事号曰吕氏春秋布咸阳市门【索隐地理志右扶风渭城县故咸阳高帝更名新城武帝更名渭城案咸训皆其地在渭水之北北阪之南水北曰阳山南亦曰阳皆在二者之阳也】悬千金其上延诸侯游士宾客有能增损一字者予千金始皇帝益壮太后淫不止吕不韦恐觉祸及己乃私求大阴人嫪毐以为舍人时纵倡乐使嫪毐以其阴关桐轮而行【正义以桐木为小车轮】令太后闻之以啗太后太后闻果欲私得之吕不韦乃进嫪毐诈令人以腐罪告之【正义上音辅谓宫刑胥靡也】不韦又阴谓太后曰可事诈腐则得给事中太后乃阴厚赐主腐者吏诈论之拔其须眉为宦者遂得侍太后太后私与通絶爱之有身太后恐人知之诈卜当避时徙宫居雍【正义雍故城在岐雍县南七里有秦都大郑宫】嫪毐常从赏赐甚厚事皆决於嫪毐嫪毐家僮数千人诸客求宦为嫪毐舍人千余人始皇七年庄襄王母夏太后薨孝文王后曰华阳太后与孝文王会葬寿陵【正义秦孝文王陵在雍州万年县东北二十五里】夏太后子庄襄王葬芷阳【索隐芷音止地理志云京兆霸陵县故芷阳案在长安东也正义秦庄襄陵在雍州新丰县西南三十五里始皇在北故俗亦谓之见子陵】故夏太后独别葬杜东【索隐杜原之东也正义夏太后陵在万年县东南三十五里】曰东望吾子西望吾夫後百年旁当有万家邑【索隐宣帝元康元年起杜陵汉旧仪武昭宣三陵皆三万户计去此一百六十余年】始皇九年有告嫪毐实非宦者常与太后私乱生子二人皆匿之与太后谋曰王即薨以子为後【集解駰案说苑曰嫪与侍中左右贵臣博饮酒醉争言而鬪瞋目大叱曰吾乃皇帝假父也嫪人子何敢乃与我亢所与鬪者走行白始皇索隐刘氏嫪音其矩反今俗本多作屡字盖相承错耳不近词义说苑作嫪子言轻诸侍中以为穷嫪家之子也】於是秦王下吏治具得情实事连相国吕不韦九月夷嫪毐三族杀太后所生两子而遂迁太后於雍【索隐说苑云迁太后咸阳宫地理志雍县有咸阳宫秦昭王所起也】诸嫪毐舍人皆没其家而迁之蜀【索隐家谓家生资物并没於官人口则迁之蜀也】王欲诛相国为其奉先王功大及宾客辩士为游说者衆王不忍致法秦王十年十月免相国吕不韦及齐人茅焦说秦王秦王乃迎太后於雍归复咸阳【集解徐广曰入南宫】而出文信侯就国河南岁余诸侯宾客使者相望於道请文信侯秦王恐其为变乃赐文信侯书曰君何功於秦秦封君河南食十万户君何亲於秦号称仲父其与家属徙处蜀吕不韦自度稍侵恐诛乃饮酖而死【集解徐广曰十二年駰案皇览曰不韦冢在河南洛阳北邙道西大冢是也民传言吕母冢不韦妻先葬故其冢名吕母也】秦王所加怒吕不韦嫪毐皆已死乃皆复归嫪毐舍人迁蜀者始皇十九年太后薨谥为帝太后【索隐王劭云秦不用諡法此盖号耳其义亦当然也始皇称皇帝之後故有母号为帝太后岂谓諫列生时之行乎】与庄襄王会葬芷阳【集解徐广曰一作芷阳】

太史公曰不韦及嫪毐贵封号文信侯【索隐文信侯不韦封也嫪毐封长信侯上文已言不韦封此赞中言嫪毐得宠贵由不韦耳合作长信侯】人之告嫪毐嫪闻之秦王验左右未发上之雍郊嫪恐祸起乃与党谋矫太后玺发卒以反斡年宫【正义斡年宫在岐州城西故城内】发吏攻嫪毐败亡走追斩之好畤遂灭其宗【索隐地理志扶风有好畤县】而吕不韦由此绌矣孔子之所谓闻者其吕子乎【集解駰案论语曰夫闻也者色取仁而行违居之不疑在邦必闻在家必闻马融曰此言佞人也】

【索隐述赞曰不韦钓奇委质子楚华阳立嗣邯郸献女及封河南乃号仲父徙蜀惩谤悬金作语筹策既成富贵斯取】

史记卷八十五

史记卷八十五考证

吕不韦列传至大期时徐广曰期十二月也○【臣照】按大期犹诗言诞弥厥月也史以此明始皇之的为不韦子言及大期而非期乃子楚犹不悟也若如徐广言期十二月则又何以信其为不韦子耶

亡赴秦军遂以得归○战国策子楚归在孝文王立後与此不同

吕不韦乃使其客人人着所闻集论以为八览六论十二纪二十余万言○高诱序云凡十七万三千五十四言

史记卷八十五考证

卷八十六

钦定四库全书

史记卷八十六

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

刺客列传第二十六

曹沫者鲁人也【索隐沫音亡葛反左氏谷梁并作曹刿然则沫宜音刿沫刿声相近而字异耳】以勇力事鲁庄公庄公好力曹沫为鲁将与齐战三败北鲁庄公惧乃献遂邑之地以和【索隐左传齐人灭遂杜预云遂国在济北蛇邱县东北也正义故城在兖州龚邱县西北七十六里】犹复以为将齐桓公许与鲁会于柯而盟【索隐杜预云济北东阿齐之柯邑犹祝柯今为祝阿也】桓公与庄公既盟於坛上曹沫执匕首劫齐桓公【索隐匕音比刘氏云短剑也盐铁论以为长尺八寸其头类匕故云匕首也此事约公羊为说然彼无其名直云曹子而已且左传鲁庄十年战长勺用曹刿谋败齐而无劫桓公之事十三年盟于柯公羊始论曹子谷梁此年惟云曹刿之盟信齐侯也又不记其行事之时也】桓公左右莫敢动而问曰子将何欲【索隐公羊传云管子进曰君何求何休注云桓公卒不能应管仲进为言之也】曹沫曰齐强鲁弱而大国侵鲁亦以甚矣今鲁城坏即压齐境【索隐齐鲁隣接今齐数侵鲁鲁之城坏即压近齐之境也】君其图之桓公乃许尽归鲁之侵地既已言曹沫投其匕首下坛北面就羣臣之位颜色不变辞令如故桓公怒欲倍其约【索隐倍音佩】管仲曰不可夫贪小利以自快弃信於诸侯失天下之援不如与之於是桓公乃遂割鲁侵地曹沫三战所亡地尽复予鲁其後百六十有七年而吴有专诸之事

专诸者吴堂邑人也【索隐专字亦作剗音同左传作鱄设诸地理志临淮有堂邑县也】伍子胥之亡楚而如吴也知专诸之能伍子胥既见吴王僚说以伐楚之利吴公子光曰彼伍员父兄皆死於楚而员言伐楚欲自为报私讎也非能为吴吴王乃止伍子胥知公子光之欲杀吴王僚乃曰彼光将有内志未可说以外事【索隐言其将有内难弑君之志且对外事生文吴世家作知光有他志也】乃进专诸於公子光光之父曰吴王诸樊诸樊弟三人次曰余祭【索隐祭音侧界反】次曰夷昧【索隐昧音亡曷反公羊作余末】次曰季子札诸樊知季子札贤而不立太子以次传三弟欲卒致国于季子札诸樊既死传余祭余祭死传夷昧夷昧死当传季子札季子札逃不肯立吴人乃立夷昧之子僚为王公子光曰使以兄弟次邪季子

当立必以子乎则光真适嗣当立故尝陰养谋臣以求立光既得专诸善客待之九年而楚平王死【索隐春秋昭二十六年楚子居卒是也吴世家云十二年此云九年并误据表及左传合在僚之十一年也】春吴王僚欲因楚丧使其二弟公子盖余属庸将兵围楚之潜【索隐属音烛二子僚之弟也左传作掩余烛庸掩盖义同属烛字相乱耳事在鲁昭二十七年地理志庐江有潜县天柱山在南杜预左传注云潜楚邑在庐江六县西南正义潜故城在壽州霍山县东二百步】使延陵季子於晋以观诸侯之变楚发兵絶吴将盖余属庸路吴兵不得还於是公子光谓专诸曰此时不可失不求何获且光真王嗣当立季子虽来不吾废也专诸曰王僚可杀也母老子弱而两弟将兵伐楚楚絶其後方今吴外困於楚而内空无骨鯁之臣是无如我何【索隐左传直云王可杀也母老子弱是无若我何则是专设诸度僚可杀言其少援助故云无奈我何太史公采其意且据上文因复加以两弟将兵外困之辞而服?杜预见左氏下文云我尔身也以其子为卿遂强解是无如我何犹言我无若是谓专诸欲以老弱托光义非允惬王肃之说亦依史记也】公子光顿首曰光之身子之身也四月丙子光伏甲士於窟室中而具酒请王僚【集解徐广曰窟一作空索隐僚之十二年夏也吴系家以为十三年非也左氏经传虽言夏四月公羊谷梁无其文此与吴系家皆称丙子当有所据不知出何书左传云伏甲士於窟室杜预谓掘地为室也所以下文云出其伏甲以攻王】王僚使兵陈自宫至光之家门户阶陞左右皆王僚之亲戚也夹立侍皆持长铍【集解駰案音披索隐兵器也刘逵吴都赋注铍两刃小刀】酒既酣公子光详为足疾入窟室中【索隐详音阳为如字左传曰光伪足疾此之详即伪也或读为音伪非也岂详伪重言耶】使专诸置匕首鱼炙之腹中而进之【集解徐广曰炙一作炮正义炙者夜反】既至王前专诸擘鱼因以匕首刺王僚【索隐刺音七赐反】王僚立死左右亦杀专诸王人扰乱公子光出其伏甲以攻王僚之徒尽灭之遂自立为王是为阖闾阖闾乃封专诸之子以为上卿其後七十余年而晋有豫让之事【集解徐广曰阖闾元年至三晋灭智伯六十二年让作襄】豫让者晋人也【索隐案此传所说皆约战国策文】故尝事范中行氏而无所知名【索隐案左传范氏谓昭子吉射也自士会食邑於范因为范氏中行氏中行文子荀寅也自荀林父将中行後因以官为氏】去而事智伯【索隐案智伯襄子荀瑶也襄子林父弟荀首之後范中行智伯事已具赵系家】智伯甚尊宠之及智伯伐赵襄子赵襄子与韩魏合谋灭智伯灭智伯之後而三分其地赵襄子最怨智伯【索隐谓初以酒灌後又率韩魏水灌晋阳城不没者三版故怨深也】漆其头以为饮器【索隐案大宛传曰匈奴破月支王以其头为饮器裴氏注彼引韦昭云饮器棊也晋灼曰饮器虎子也皆非棊所以盛酒耳非用饮者晋氏以为?器者以韩子吕氏春秋并云襄子漆智伯头为溲杯故也正义刘云酒器也每宾会设之示恨深也按诸先儒说恐非】豫让遁逃山中曰嗟乎士为知己者死女为说己者容今智伯知我我必为报讎而死以报智伯则吾魂魄不愧矣乃变名姓为刑人入宫涂厕中挟匕首欲以刺襄子襄子如厕心动执问涂厕之刑人则豫让内持刀兵曰欲为智伯报讎左右欲诛之襄子曰彼义人也吾谨避之耳且智伯亡无後而其臣欲为报讎此天下之贤人也卒释去之【索隐卒音足律反】居顷之豫让又漆身为厉【集解駰案音赖索隐癞恶疮病也凡漆有毒近之多患疮肿若癞病然故豫让以漆涂身令其若癞耳然厉癞声相近古多假厉为癞今之癞字从疒故楚有赖乡亦作厉字战国策亦作厉】吞炭为哑【索隐哑字鸟雅反谓瘖病战国策云漆身为厉灭须去眉以变其容为乞食人其妻曰状貌不似吾夫何其音之甚相类也让遂吞炭以变其音也】使形状不可知行乞於市其妻不识也行见其友其友识之曰汝非豫让邪曰我是也其友为

泣曰以子之才委质而臣事襄子襄子必近幸子近幸子乃为所欲顾不易邪【索隐欲谓因得杀襄子顾反也邪不定之辞反不易邪言其易也】何必残身苦形欲以求报襄子不亦难乎豫让曰既已委质臣事人而求杀之是怀二心以事其君也且吾所为者极难耳【索隐刘氏云谓今为厉哑也】然所以为此者将以愧天下後世之为人臣怀二心以事其君者也【索隐言宁为厉而自刑不可求事襄子而行杀则恐伤人臣之义而近贼非忠也】既去顷之襄子当出豫让伏於所当过之桥下【正义汾桥下架水在并州晋阳县东一里】襄子至桥马惊襄子曰此必是豫让也使人问之果豫让也於是襄子乃数豫让曰子不尝事范中行氏乎智伯尽灭之而子不为报讎而反委质臣於智伯智伯亦已死矣而子独何以为之报讎之深也豫让曰臣事范中行氏范中行氏皆衆人遇我我故衆人报之至於智伯国土遇我我故国土报之襄子喟然叹息而泣曰嗟乎豫子子之为智伯名既成矣而寡人赦子亦已足矣子其自为计寡人不复释子使兵围之豫让曰臣闻明主不掩人之美而忠臣有死名之义前君已寬赦臣天下莫不称君之贤今日之事臣固伏诛然愿请君之衣而击之焉以致报讎之意则虽死不恨非所敢望也敢布腹心於是襄子大义之乃使使持衣与豫让豫让拔剑三跃而击之【索隐战国策云衣尽出血襄子回车车轮未周而亡此不言衣出血者太史公恐涉怪妄故畧之耳】曰吾可以下报智伯矣遂伏剑自杀死之日赵国志士闻之皆为涕泣其後四十余年而辄有聂政之事【集解駟案自三晋灭智伯至杀侠累五十七年】聂政者轵深井里人也【索隐地理志河内有轵县深井轵县之里名也正义在怀州济源县南三十里】杀人避仇与母姊如齐以屠为事久之濮阳严仲子事韩哀侯【索隐高诱曰严遂字仲子案表聂政杀侠累在列侯三年列侯生文侯文侯生哀侯凡更三代哀侯六年为韩严所杀今言仲子事哀侯恐非其实且太史公闻疑传疑闻信传信事难的据欲使两存故表传各异也】与韩相侠累有郤【索隐侠音古挟反累音力迫反案战国策侠累名傀也傀相韩严遂重於君二人相害也严遂举韩傀之过韩傀叱之於朝严遂拔剑趋之以救解是有郤之由也】严仲子恐诛亡去游求人可以报侠累者至齐齐人或言聂政勇敢士也避仇隱於屠者之间严仲子至门请数反然後具酒自畅【集解徐广曰一作赐索隐案战国策作觴近为得也正义数色吏反】聂政母前酒酣严仲子奉黄金百鎰前为聂政母寿聂政惊怪其厚固谢严仲子严仲子固进而聂政谢曰臣幸有老母家贫客游以为狗屠可以旦夕得甘毳【集解駟案此芮反索隐邹氏音脆二义相通也】以养亲亲供养备不敢当仲子之赐严仲子辟人因为聂政言曰臣有仇而行游诸侯衆矣然至齐窃闻足下义甚高故进百金者将用为大人羸粝之费【正义粝衍羸米也脱粟也韦昭云古者名男子为丈夫尊父妯为大人汉书宣元王传王遇大人益解为大人乞骸去按大人宪王外祖母古诗云三日断五疋大人故言迟是也】得以交足下之驩岂敢以有求望邪聂政曰臣所以降志辱身居市井屠者徒幸以养老母老母在政身未敢以许人也【索隐礼记云父母存不许友以死】严仲子固让聂政竟不肯受也然严仲子卒备宾主之礼而去久之聂政母死既已葬除服聂政曰嗟乎政乃市井之人【正义古者相聚汲水有物便卖因成市故云市井】鼓刀以屠而严仲子乃诸侯之卿相也不远千里枉车骑而交臣臣之所以待之至浅鲜矣未有大功可以称者而严仲子奉百金为亲寿我虽不受然是者徒深知政也夫贤者以感忿睚眦之意而亲信穷僻之人而政独安得嘿然而已乎且前日要政政徒以老母老母今以天年终政将为知己者用乃遂西至濮阳见严仲子曰前日所以不许仲子者徒以亲在今不幸而母以天年终仲子所欲报仇者为谁请得从事焉严仲子具告曰臣之仇韩相侠累侠累又韩君之季父也宗族盛多居处兵卫甚设臣欲使

人刺之衆终莫能就今足下幸而不弃请益其车骑壮士可为足下辅翼者聂政曰韩之与卫相去中间不甚远【索隐高诱曰韩都颍川阳翟卫都东郡濮阳故曰相去不甚远也】今杀人之相相又国君之亲此其势不可以多人多人不能无生得失【索隐战国策作无生情言所将人多或生异情故语泄也此云生得言将人多往杀侠累後有被生擒而事泄亦两俱通也】生得失则语泄语泄是韩举国而与仲子为讎【集解徐广曰一作难索隐战国策谯周亦同】岂不殆哉遂谢车骑人徒聂政乃辞独行仗剑至韩韩相侠累方坐府上持兵戟而卫侍者甚衆聂政直入上阶刺杀侠累【集解徐广曰韩列侯三年三月盗杀韩相侠累侠累名傀战国策曰有东孟之会又云聂政刺韩傀兼中哀侯索隐战国策云政直入上阶刺韩傀傀走而抱哀侯聂政刺之兼中哀侯高诱云东孟地名也】左右大乱聂政大呼所击杀者数十人因自皮面决眼【索隐皮面谓以刀刺其面皮欲令人不识决眼谓出其眼睛战国策作抉眼此决亦通音乌穴反】自屠出肠遂以死韩取聂政屍暴於市【正义暴蒲酷反】购问莫知谁子於是韩购县之有能言杀相侠累者予千金久之莫知也政姊荣【集解駰案一作嫪索隐荣其姊名也战国策无荣字】闻人有刺杀韩相者贼不得国不知其名姓暴其屍而县之千金乃於邑曰【索隐刘氏云烦冤愁苦也】其是吾弟与嗟乎严仲子知吾弟立起如韩之市而死者果政也伏屍哭极哀曰是轶深井里所谓聂政者也市行者诸衆人皆曰此人暴虐吾国相王县购其名姓千金夫人不闻与何敢来识之也荣应之曰闻之然政所以蒙污辱自弃於市贩之间者为老母幸无恙【索隐尔雅云恙忧也楚辞云还及吾君之无恙风俗通云恙病也凡人相见及通书皆云无恙又易传云上古之时草居露宿恙啮也善食人心俗悉患之故相劳云无恙恙非病也】妾未嫁也亲既以天年下世妾已嫁夫严仲子乃察举吾弟困污之中而交之泽厚矣可奈何士固为知己者死今乃以妾尚在之故重自刑以絶从【集解徐广曰恐其姊从坐而死索隐重音持用反重犹复也为人报讎死乃自以妾故复自刑其身令人不识也从音踪古字少假借故无足旁而徐氏以为从坐非也刘氏亦音足松反正义重直龙反自刑作刊说文云刊剗也按重犹忧惜也本为严仲子报仇讎爱惜其事不令漏泄以絶其踪迹其姊妄云云为己隐误矣】妾其奈何畏殁身之诛终灭贤弟之名大惊韩市人乃大呼天者三卒於邑悲哀而死政之旁晋楚齐卫闻之皆曰非独政能也乃其姊亦烈女也乡使政诚知其姊无濡忍之志不重暴骸之难【索隐濡润也人性湿润则能含忍故云濡忍若勇躁则必轻死也重难并如字重犹惜也言不惜暴骸之为难也】必絶险千里以列其名姊弟俱戮於韩市者亦未必敢以身许严仲子也严仲子亦可谓知人能得士矣其後二百二十余年秦有荆轲之事【集解徐广曰聂政至荆轲百七十年尔索隐徐氏据六国年表而言则谓此传率畧而言二百余年亦当时为不能细也正义按年表从始皇二十三年至韩景侯三百七十年若至哀侯六年六百四十三年】

荆轲者卫人也【索隐案赞论称公孙季功董生为余道之此传虽约战国策而亦别记异闻】其先乃齐人徙於卫卫人谓之庆卿【索隐轲先齐人齐有庆氏则或本姓庆春秋庆封其後改姓贺此亦至卫而改姓庆尔荆庆声相近故随在国而异其号也卿者时人尊重之号犹如相尊美而称子然也】而之燕燕人谓之荆卿荆卿好读书擊剑【集解駰案吕氏剑技云持短入长倏忽纵横】以术说卫元君卫元君不用其後秦伐魏置东郡徙卫元君之支属於野王【正义怀州河内县】荆轲尝游过榆次【正义并州县也】与盖聂论剑【索隐盖音古腊反盖姓聂名】盖聂怒而目之荆轲出人或言复召荆卿盖聂曰曩者吾与论剑有不称

者吾目之试往是宜去不敢留使使往之主人荆卿则已驾而去榆次矣使者还报盖聂曰固去也吾曩者目摄之【索隐摄犹整也谓不称己意因怒视以摄整之也正义摄犹视也】荆轲游於邯鄲鲁句践与荆轲博争道【索隐鲁姓句践名也与越王同或有意义俗本践作贱非也】鲁句践怒而叱之荆轲嘿而逃去遂不复会荆轲既至燕爱燕之狗屠及善击筑者高渐离【索隐筑似琴有弦用竹击之取以为名渐音如字正义音子廉反】荆轲嗜酒日与狗屠及高渐离饮於燕市酒酣以往高渐离击筑荆轲和而歌於市中相乐也已而相泣旁若无人者荆轲虽游於酒人乎【集解徐广曰饮酒之人】然其为人沈深好书其所游诸侯尽与其贤豪长者相结其之燕燕之处士田光先生亦善待之知其非庸人也居顷之会燕太子丹质秦亡归燕燕太子丹者故尝质於赵而秦王政生於赵其少时与丹驩及政立为秦王而丹质於秦秦王之遇燕太子丹不善故丹怨而亡归归而求为报秦王者国小力不能其後秦日出兵山东以伐齐楚三晋稍蚕食诸侯且至於燕燕君臣皆恐祸之至太子丹患之问其傅鞠武【索隐鞠音麴又如字人姓名也】武对曰秦地徧天下威胁韩魏赵氏北有甘泉谷口之固南有泾渭之沃擅巴汉之饶右陇蜀之山左关穀之险民衆而士厉兵革有余意有所出则长城之南易水以北【正义谓燕国也】未有所定也奈何以见陵之怨欲批其逆鳞哉【集解駟案批音白结反索隐批谓触击之】丹曰然则何由对曰请入图之居有闲秦将樊於期得罪於秦王亡之燕太子受而舍之鞠武谏曰不可夫以秦王之暴而积怒於燕足为寒心【索隐凡人寒甚则心战恐惧亦战今以惧譬寒言可为心战】又况闻樊将军之所在乎是谓委肉当饿虎之蹊也祸必不振矣【索隐振救也言祸大而不可救也】虽有管晏不能为之谋也愿太子疾遣樊将军入匈奴以灭口请西约三晋南连齐楚北购於单于【索隐战国策购作讲和也今读购与为燕媾同媾合也汉史媾讲两字常杂今言欲北与匈奴连和也陈轸传亦曰西购於秦也】其後迺可图也太子曰太傅之计旷日弥久心惛然【正义惛音昏】恐不能须臾且非独於此也夫樊将军穷困於天下归身於丹丹终不以迫於强秦而弃所哀怜之交置之匈奴是固丹命卒之时也愿太傅更虑之鞠武曰夫行危欲求安造祸而求福计浅而怨深连结一人之厚交不顾国家之大害此谓资怨而助祸矣夫以鸿毛燎於炉炭之上必无事矣且以鵬鷃之秦行怨暴之怒岂足道哉燕有田光先生其为人智深而勇沈可与谋太子曰愿因太傅而得交於田先生可乎鞠武曰敬诺出见田先生道太子愿图国事於先生也田光曰敬奉教乃造焉太子逢迎却行为导跪而櫛席【集解徐广曰櫛一作拨一作捄索隐櫛音足结反櫛犹拂也】田光坐定左右无人太子避席而请曰燕秦不两立愿先生留意也田光曰臣闻骐驎盛壮之时一日而驰千里至其衰老弩马先之今太子闻光盛壮之时不知臣精已消亡矣虽然光不敢以图国事所善荆卿可使也【正义燕太子篇云田光荅曰窃观太子客无可使用者夏扶血勇之人怒而面赤宋意脉勇之人怒而面青武阳骨勇之人怒而面白光所知荆轲神勇之人怒而色不变】太子曰愿因先生得结交於荆卿可乎田光曰敬诺即起趋出太子送至门戒曰丹所报先生所言者国之大事也愿先生勿泄也田光俛而笑曰诺【正义俛音俯】俛行见荆卿曰光与子相善燕莫不知今太子闻光壮盛之时不知吾形已不逮也幸而教之曰燕秦不两立愿先生留意也光窃不自外言足下於太子也愿足下过太子於宫荆轲曰谨奉教田光曰吾闻之长者行不使人疑之今太子告光曰所言者国之大事也愿先生勿泄是太子疑光也夫为行而使人疑之非节侠也欲自杀以激荆卿曰愿足下急过太子言光已死明不言也因遂自刎而死荆轲遂见太子言田光已死致光之言太子再拜而跪膝行流涕有顷而後言曰丹所以诫田先生毋言者欲以成大事之谋也今田先

生以死明不言豈丹之心哉荆軻坐定太子避席頓首曰田先生不知丹之不肖使得至前敢有所道此天之所以哀燕而不弃其孤也【索隱案无父称孤时燕王尚在而丹称孤者或记者失辞或诸侯嫡子时亦僭称孤也又刘向云丹燕王喜之太子】今秦有贪利之心而欲不可足也非尽天下之地臣海内之王者其意不厌今秦已虏韩王尽纳其地又举兵南伐楚北临赵王翦将数十万之衆距漳邺而李信出太原云中赵不能支秦必入臣入臣则祸至燕燕小弱数困於兵今计举国不足以当秦诸侯服秦莫敢合从丹之私计愚以为诚得天下之勇士使於秦闕以重利【索隱闕視也言以利誘之也】秦王贪【索隱絕句】其势必得所愿矣诚得劫秦王使悉反诸侯侵地若曹沫之与齐桓公则大善矣则不可因而刺杀之彼秦大将擅兵於外而内有乱则君臣相疑以其间诸侯得合从其破秦必矣此丹之上愿而不知所委命唯荆卿留意焉久之荆軻曰此国之大事也臣弩下恐不足任使太子前頓首固请毋让然後许诺於是尊荆卿为上卿舍上舍太子日造门下供太牢具异物闲进车骑美女恣荆軻所欲以顺适其意【索隱燕太子篇曰軻与太子游东宫池軻拾瓦投龟太子捧金丸进之又共乘千里马軻曰马肝美即杀马进肝太子与樊将军置酒於华阳台出美人能鼓琴軻曰好手也断以玉盘盛之軻曰太子遇軻甚厚是也】久之荆軻未有行意秦将王翦破赵虏赵王尽收入其地进兵北畧地至燕南界太子丹恐惧乃请荆軻曰秦兵旦暮渡易水则虽欲长侍足下岂可得哉荆軻曰微太子言臣愿谒之今行而毋信则秦未可亲也夫樊将军秦王购之金千斤邑万家诚得樊将军首与燕督亢之地图【集解徐广曰方城县有督亢亭駟案刘向别録曰督亢膏腴之地索隱地理志广阳国有蓟县司马彪郡国志曰蓟县方城有督亢亭徐说是也正义督亢坡在幽州范阳县东南十里今固安县南有督亢陌幽州南界】奉献秦王秦王必说见臣臣乃得有以报太子曰樊将军穷困来归丹丹不忍以己之私而伤长者之意愿足下更虑之荆軻知太子不忍乃遂私见樊於期曰秦之遇将军可谓深矣父母宗族皆为戮没今闻购将军首金千斤邑万家将奈何於期仰天太息流涕曰於期每念之常痛於骨髓顾计不知所出耳荆軻曰今有一言可以解燕国之患报将军之仇者何如於期乃前曰为之奈何荆軻曰愿得将军之首以献秦王秦王必喜而见臣臣左手把其袖右手提其胷【集解徐广曰提音张鸩切一作抗索隱提谓以剑刺其胷也抗音古浪反言抗拒也其义非】然则将军之仇报而燕见陵之愧除矣将军岂有意樊於期偏袒搢腕而进【集解徐广曰挽一作搢索隱搢音乌革反腕音乌乱反字书作 掌後曰腕勇者奋厉必先以左手扼右腕也】曰此臣之日夜切齿腐心也【索隱切齿齿相磨切也尔雅曰治骨曰切腐音辅腐亦烂也犹今人事不可忍云腐烂然皆奋怒之意】乃今得闻教遂自到太子闻之驰往伏屍而哭极哀既已不可奈何乃遂盛樊於期首函封之於是太子豫求天下之利匕首得赵人徐夫人匕首【集解徐广曰徐一作陈索隱徐姓夫人名谓男子也】取之百金使工以药淬之【索隱淬染也音忽潰反谓以毒药染剑鏑也】以试人血濡缕人无不立死者【集解駟案言以匕首试人人血出足以沾濡丝缕便立死也】乃装为遣荆卿燕国有勇士秦舞阳年十三杀人人不敢忤视【索隱忤者逆也音五故反不敢逆视言人畏之甚也】乃令秦舞阳为副荆軻有所待欲与俱其人居远未来而为治行顷之未发太子迟之疑其改悔乃复请曰日已尽矣荆卿岂有意哉丹请得先遣秦舞阳荆軻怒叱太子曰何太子之遣往而不反者竖子也且提一匕首入不测之强秦仆所以留者待吾客与俱今太子迟之请辞决矣遂发太子及宾客知其事者皆白衣冠以送之至易水之上既祖取道【正义易州在幽州归义县界】高渐离擊筑荆軻和而歌为变徵之声【正义徵知雉反】士皆垂泪涕泣又前而歌曰风萧萧兮易水寒壮

士一去兮不复还复为羽声慷慨士皆瞋目发尽上指冠於是荆轲就车而去终已不顾遂至秦持千金之资物厚遗秦王宠臣中庶子蒙嘉嘉为先言於秦王曰燕王诚振怖大王之威不敢举兵以逆军吏愿举国为内臣比诸侯之列给贡职如郡县而得奉守先王之宗庙恐惧不敢自陈谨斩樊於期之头及献燕督亢之地图函封燕王拜送于庭使使以闻大王唯大王命之秦王闻之大喜乃朝服设九宾【正义刘云设文物大备即谓九宾不得以周礼九宾义为释】见燕使者咸阳宫【正义三辅黄图云秦始兼天下都咸阳因北陵营宫殿制紫宫象帝居渭水贯都以象天汉横桥南度以法牵牛】荆轲奉樊於期头函而秦舞阳奉地图匣以次进【索隐匣音户甲反匣亦函也】至陛秦舞阳色变振恐羣臣怪之荆轲顾笑舞阳前谢曰北蕃蛮夷之鄙人未尝见天子故振慄愿大王少假借之使得毕使於前秦王谓轲曰取舞阳所持地图轲既取图奏之秦王发图图穷而匕首见因左手把秦王之袖而右手持匕首搥之未至身秦王惊自引而起袖絶拔剑剑长操其室【索隐室谓鞘也正义燕太子篇云左手搥其胷秦王曰今日之事从子计耳乞聽琴而死召姬人鼓琴琴声曰罗縠单衣可裂而絶八尺屏风可超而越鹿卢之剑可负而拔王於是奋袖超屏风走之】时惶急剑坚故不可立拔荆轲逐秦王秦王环柱而走羣臣皆愕卒起不意尽失其度而秦法羣臣侍殿上者不得持尺寸之兵诸郎中执兵皆陈殿下【索隐诸郎中若今宿卫之官】非有诏召不得上方急时不及召下兵以故荆轲乃逐秦王而卒惶急无以擊轲而以手共搏之是时侍医夏无且【索隐且音即余反】以其所奉药囊提荆轲也【正义提侄帝反】秦王方环柱走卒惶急不知所为左右乃曰王负剑【索隐王劭曰古者带剑上长拔之不出室欲王推之於背令前短易拔故云王负剑】负剑遂拔以擊荆轲断其左股荆轲废乃引其匕首以擣秦王【索隐擣与擲同古字耳音持益反】不中中铜柱【正义燕太子篇云荆轲拔匕首擲秦王决耳入铜柱火出】秦王复擊轲轲被八创轲自知事不就倚柱而笑箕踞以骂曰事所以不成者以欲生劫之必得约契以报太子也【集解駟案汉盐铁论曰荆轲怀数年之谋而事不就者尺八匕首不足恃也秦王操於不意列断赍育者介七尺之利也】於是左右既前杀轲秦王不怡者良久已而论功赏羣臣及当坐者各有差而赐夏无且黄金二百鎰曰无且爱我乃以药囊提荆轲也於是秦王大怒益发兵诣赵诏王翦军以伐燕十月而拔蓟城燕王喜太子丹等尽率其精兵东保於辽东秦将李信追击燕王急代王嘉乃遗燕王喜书曰秦所以尤追燕急者以太子丹故也今王诚杀丹献之秦王秦王必解而社稷幸得血食其後李信追丹丹匿衍水中【索隐水名在辽东】燕王乃使使斩太子丹欲献之秦秦复进兵攻之後五年秦卒灭燕虏燕王喜其明年秦并天下立号为皇帝於是秦逐太子丹荆轲之客皆亡高渐离变名姓为人庸保匿作於宋子【集解徐广曰县名也今属钜鹿索隐栾布传曰卖庸於齐为酒家人汉书作酒家保案谓庸作於酒家言可保信故曰庸保鵠冠子曰伊尹酒保也徐注云宋子县名属钜鹿者据地理志而知也正义宋子故城在邢州平乡县北三十里】久之作苦闻其家堂上客擊筑傍徨不能去每出言曰彼有善有不善从者以告其主【索隐谓主人家之左右也】曰彼庸乃知音窃言是非家大人召使前擊筑【索隐刘氏云谓主人翁也又韦昭云古名男子为丈夫尊父嫗为大人故汉书宣元六王传所云大人谓淮阳宪王外王母即张博母也故古诗云三日断五疋大人故言迟是也】一坐称善赐酒而高渐离念久隐畏约无穷时【索隐约谓贫贱俭约既为庸保常畏人故云畏约所以论语云不可与久处约也】乃退出其装匣中筑与其善衣更容貌而前举坐客皆惊下与抗礼以为上客使擊筑而歌客无不流涕而去者宋子传客之【集解徐广曰互以为客】闻於秦始皇秦始皇召见人有识者乃曰高渐离

也秦皇帝惜其善擊筑重赦之乃矐其目【集解駟案矐音海各反索隱一音角說者云以馬屎燻令失明】使擊筑未嘗不稱善稍益近之高漸離乃以鉛置筑中【索隱案劉氏云以鉛為挺着筑中令重以擊人】復進得近舉筑扑秦皇帝【索隱扑音普卜反扑擊也】不中於是遂誅高漸離終身不復近諸侯之人魯勾踐已聞荊軻之刺秦王私曰嗟乎惜哉其不講於刺劍之術也【索隱案不講謂不論習之】甚矣吾不知人也曩者吾叱之彼乃以我為非人也

太史公曰世言荊軻其稱太子丹之命天雨粟馬生角也【索隱燕丹求歸秦王曰烏頭白馬生角乃許耳丹乃仰天嘆烏頭即白馬亦生角風俗通及論衡皆有此說仍云廐門木烏生肉足也】大過又言荊軻傷秦王皆非也始公孫季功董生與夏無且游具知其事為余道之如是自曹沫至荊軻五人此其義或成或不成然其立意較然【索隱較明也】不欺其志名垂後世豈妄也哉

【索隱述贊曰曹沫盟柯返魯侵地專諸進炙定吳篡位彰弟哭市報主塗廁刎頸申冤操袖行事暴秦奪魄懦夫增氣】

史記卷八十六

史記卷八十六考證

刺客列傳曹沫者魯人也索隱沫音亡葛反左氏谷梁并作曹剌然則沫宜音剌沫剌聲相近而字異耳○【臣照】按沫剌聲近而字異猶申包胥之為棼冒勃蘇耳必音沫為剌反涉牽混三傳不一其說傳疑可也蘇子古史據左傳問戰事謂沫蓋知義者安肯身為刺客則直以剌為沫未免武斷呂氏春秋曰柯之會莊公與曹剌皆懷劍至於壇上莊公左搏桓公右抽劍以自承管仲鮑叔進曹剌按劍當兩陞之間曰二君將改圖毋或進者桓公許之封於汶南乃盟而歸按此則以沫為剌之證而字又小異韓非子曹剌匹夫之士一怒而劫桓公萬乘之主反魯侵地亦以為曹剌

光伏甲士於窟室中○窟左傳作堀吳越春秋作窟闔閭乃封專諸之子以為上卿○吳越春秋作拜為客卿

豫讓拔劍三躍而擊之索隱戰國策云衣盡出血襄子回车車輪未周而亡○國策無此文國策補注曰或以其怪而刪之歟

濮陽嚴仲子事韓哀侯○【臣照】按韓世家列侯三年聶政殺韓相俠累十三年列侯卒子文侯立十年卒子哀侯立六年韓嚴弑其君哀侯聶政之刺俠累與哀侯之殺相去遠矣而聶政傳乃謂嚴仲子事哀侯與韓相俠累有郤使政刺累與世家不合蓋其氏偶同故刺客傳誤以為哀侯之時

臣所以降志辱身○秦藩本此下有索隐言其心志与身本应高洁今乃卑下其志屈辱其身
论语孔子谓柳下惠降志辱身是也共三十四字

多人不能无生得失索隐战国策作无生情言所将人多或生异情故语泄也○战国策补注
曰今本无此文

严仲子乃察举吾弟困污之中○秦藩本此下有索隐案察谓观察有志行乃举之刘氏云察
犹选也共十八字

晋楚齐卫闻之○列女传云晋赵楚卫闻之

其後二百二十余年秦有荆轲之事正义按年表从始皇二十三年至韩景侯三百七十年若
至哀侯六年六百四十三年○【臣照】按年表自韩景侯元年癸酉至秦始皇二十年甲戌
共一百八十二年自列侯三年甲申盗杀侠累至始皇甲戌荆轲刺王共一百七十一年自哀
侯六年庚戌韩严弑其君至始皇甲戌共一百四十五年正义不知如何计算盖传写讹谬多
矣

连结一人之後交○【臣照】按後疑应作厚夫与国家之大患相较固不当论交之先後也
况丹与樊於期交必旧矣何以云後也且是後非厚则晋唐以来必有注释今皆无之可知为
厚字之讹也

跪而蔽席徐广曰蔽一作拨一作球○蔽疑作襍音蹇孟荀列传平原君侧行襍席

为人庸保索隐栾布传曰卖庸於齐为酒家人汉书作酒家保○栾布传云赁佣於齐为酒人
保索隐所据或有别本耶

史记卷八十六考证

卷八十七

钦定四库全书

史记卷八十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

李斯列传第二十七

李斯者楚上蔡人也【索隐地理志汝南有上蔡县云古蔡国周武王弟叔度所封至十八代平侯徙新蔡二蔡皆属汝南後二代至昭侯徙下蔡属沛六国时为楚地故曰楚上蔡也】年少时为郡小吏【索隐郡一作乡刘氏云掌乡内文书】见吏舍厕中鼠食不洁近人犬数惊恐之斯入仓观仓中鼠食积粟居大庑之下不见人犬之忧於是李斯乃叹曰人之贤不肖譬如鼠矣在所自处耳乃从荀卿学帝王之术学已成度楚王不足事而六国皆弱无可为建功者欲西入秦辞於荀卿曰斯闻得时无怠今万乘方争时游者主事【索隐言万乘争雄之时游说者可以立功成名当得典主事务也刘氏云游历诸侯当覓强主以事之於文紆回非也】今秦王欲吞天下称帝而治此布衣驰骛之时而游说者之秋也【正义言秋时万物成熟今争强时亦说士成熟时】处卑贱之位而计不为者此禽鹿视肉人面而能强行者耳【索隐禽鹿犹禽兽也言禽兽但知视肉而食之庄子及苏子曰人而不学譬之视肉而食扬子法言曰人而不学如禽何言不假游说取荣贵即如禽兽徒有人面而能强行也】故诟莫大於卑贱【正义诟呼后反耻辱也】而悲莫甚於穷困久处卑贱之位困苦之地非世而恶利自托於无为此非士之情也【索隐非者讥也所谓处士横议之时也正义言讥世富贵恶其荣利自托於无为者非士人之情实力不能致此也】故斯将西说秦王矣至秦会庄襄王卒李斯乃求为秦相文信侯吕不韦舍人不韦贤之任以为郎李斯因以得说说秦王曰胥人者去其几也【索隐胥人犹胥吏小人也去犹失也几者动之微以言君子见几而作不俟终日小人不识动微之会故每失时也刘氏解几为强非也正义胥相也几谓察也言关东六国与秦相敌者君臣机密并有瑕衅可成大功而遂忍之也】成大功者在因瑕衅而遂忍之【索隐言因诸侯有瑕衅则忍心而翦除故我将说秦以并天下也】昔者秦穆公之霸终不东并六国者何也诸侯尚衆周德未衰故五伯迭兴更尊周室自秦孝公以来周室卑微诸侯相兼关东为六国秦之乘胜役诸侯盖六世矣【正义秦孝公惠文王武王昭王孝文王庄襄王】今诸侯服秦譬若郡县夫以秦之强大王之贤由竈上骚除【集解徐广曰骚音扫索隐言秦欲并天下若炊妇扫除竈上之不淨不足为难也】足以灭诸侯成帝业为天下一统此万世之

一时也今怠而不急就诸侯复强相聚约从虽有黄帝之贤不能并也秦王乃拜斯为长史听其计阴遣谋士齎持金玉以游说诸侯诸侯名士可下以财者厚遗结之不肯者利劔刺之离其君臣之计秦王乃使其良将随其後秦王拜斯为客卿会韩人郑国来间秦以作注溉渠【正义郑国渠首起雍州云阳县西南二十五里自中山西邸瓠口为渠傍北山东注洛三百余里以溉田又曰韩苦秦兵而使水工郑国间秦作注溉渠令费人工不东伐也】已而觉秦宗室大臣皆言秦王曰诸侯人来事秦者大抵为其主游间於秦耳请一切逐客【索隐一切犹一例言尽逐之也言切者譬若利刀之割一运斤无不断者解汉书者以一切为权时义亦未为得也】李斯议亦在逐中斯乃上书曰【正义在始皇十年】臣闻吏议逐客窃以为过矣昔缪公求士西取由余於戎东得百里奚於宛【索隐秦本纪云晋献公以百里奚为秦穆公夫人媵於秦奚亡走宛楚鄙人执之是也正义新序云百里奚楚宛人仕於虞虞亡入秦号五羖大夫也】迎蹇叔於宋【索隐秦纪又云百里奚谓穆公曰臣不如臣友蹇叔蹇叔贤而世莫知穆公厚币迎之以为上大夫今云於宋未详所出正义括地志云蹇叔岐州人时游宋故迎之於宋】求丕豹公孙支於晋【索隐丕豹自晋奔秦左氏传有明文公孙支所谓子桑也是秦大夫而云自晋以来亦未见其所出正义括地志云公孙支岐州人游晋後归秦】此五子者不产於秦而缪公用之并国二十遂霸西戎【索隐秦本纪穆公用由余谋伐戎王益国二十开地千里遂霸西戎此都言五子之功故云并国二十或易为十二误也】孝文用商鞅之法移风易俗民以殷盛国以富强百姓乐用诸侯亲服获楚魏之师举地千里至今治强惠王用张仪之计拔三川之地西并巴蜀【索隐案惠王时张仪为相请伐韩下兵三川以临二周司马错请伐蜀惠王从之果灭蜀仪死後武王欲通车三川令甘茂拔宜阳今并云张仪者以仪为秦相虽错灭蜀甘茂通三川皆归功於相又三川是仪先请伐故也】北收上郡【正义惠王十年魏纳上郡十五县】南取汉中【正义惠王十三年攻楚汉中取地六百里】包九夷制鄢郢【索隐九夷即属楚之夷也地理志南郡江陵县云故楚郢都又宜城县云故鄢也正义夷谓并巴蜀收上郡取汉中伐义渠丹犁是也九夷本东夷九种此言者文体然也】东据成臯之险【正义河南府汜水县也】割膏腴之壤遂散六国之从使之西面事秦功施到今昭王得范雎废穰侯逐华阳【集解徐广曰华一作叶】强公室杜私门蚕食诸侯使秦成帝业此四君者皆以客之功由此观之客何负於秦哉向使四君却客而不内疏士而不用是使国无富利之实而秦无强大之名也今陛下致昆山之玉【正义昆冈在于阗国东北四百里其冈出玉】有随和之宝【正义括地志云濮山一名崑山一名断蛇丘在随州随县北二十五里说苑云昔随侯行遇大蛇中断疑其灵使人以药封之蛇乃能去因号其处为断蛇丘岁余蛇衔明珠径寸絶白而有光因号随珠卞和璧始皇以为传国玺也】垂明月之珠服太阿之劔【集解駰案见苏秦传】乘纤离之马【集解徐广曰纤离蒲稍皆骏马名索隐徐氏据孙卿子而为说】建翠凤之旗树灵鼉之鼓【集解郑玄注月令云鼉皮可以冒鼓】此数宝者秦不生一焉而陛下说之何也必秦国之所生然後可则是夜光之璧不饰朝廷犀象之器不为玩好郑卫之女不充後宫而骏良馱騊不实外廐【索隐馱音决騊音提周书曰正北以馱騊为献广雅曰马属也郭景纯注上林赋云生三日而超其母也】江南金锡不为用西蜀丹青不为采所以饰後宫充下陈【索隐下陈犹後列也晏子曰有二女愿得入身於下陈是也】娛心意说耳目者必出於秦然後可则是宛珠之簪傅玑之珥【索隐宛音於阮反傅音附即随珠也宛者谓以珠宛转而装其簪傅者谓以玑附着於珥珥者璫也玑是珠之不圆者或云宛珠宛地之珠也随在汉水之南宛亦近汉故曰宛珠玑者女饰也言女傅之珥以

玃为之并非秦所有物也】阿缟之衣锦绣之饰【集解徐广曰齐之东阿县缁帛所出】不进於前而随俗雅化【集解徐广曰随俗一作修使索隐谓闲雅变化而能随俗也】佳冶窈窕赵女不立於侧也夫击瓮叩缶弹箏搏髀而歌呼呜呜快耳目者真秦之声也【索隐说文云瓮汲甌也音於贡反缶瓦器也秦人鼓之以节乐甌音甫有反】郑卫桑间昭虞武象者【索隐昭一作韶】异国之乐也今弃击瓮叩缶而就郑卫退弹箏而取昭虞若是者何也快意当前适观而已矣今取人则不然不问可否不论曲直非秦者去为客者逐然则是所重者在乎色乐珠玉而所轻者在乎人民也此非所以跨海内制诸侯之术也臣闻地广者粟多国大者人衆兵强则士勇是以太山不让土壤故能成其大海不择细流故能就其深王者不却衆庶故能明其德【索隐管子云海不辞水故能成其大泰山不辞土石故能成其高文子曰圣人不让负薪之言以广其名也】是以地无四方民无异国四时充美鬼神降福此五帝三王之所以无敌也今乃弃黔首以资敌国【索隐资犹给也】却宾客以业诸侯使天下之士退而不敢西向裹足不入秦此所谓藉寇兵而齎盗粮者也【索隐藉音积夜反齎音子奚反说文曰齎持遗也齎或为资义亦通】夫物不产於秦可宝者多土不产於秦而愿忠者衆今逐客以资敌国损民以益雠内自虚而外树怨於诸侯求国无危不可得也秦王乃除逐客之令复李斯官【集解駢案新序曰斯在逐中道上上谏书达始皇始皇使人逐至骊邑得还】卒用其计谋官至廷尉二十余年竟并天下尊王为皇帝以斯为丞相夷郡县城销其兵刃示不复用使秦无尺土之封不立子弟为王功臣为诸侯者使後无战攻之患始皇三十四年置酒咸阳宫博士仆射周青臣等颂称始皇威德齐人淳于越进谏曰臣闻之殷周之王千余岁封子弟功臣自为支辅今陛下有海内而子弟为匹夫卒有田常六卿之患臣无辅弼何以相救哉事不师古而能长久者非所闻也今青臣等又面谀以重陛下过非忠臣也【索隐重音逐用反重者再也】始皇下其议丞相丞相谬其说绌其辞乃上书曰古者天下散乱莫能相一是以诸侯并作语皆道古以害今饰虚言以乱实人善其所私学以非上所建立今陛下并有天下辩白黑而定一尊【索隐刘氏云前时国异政家殊俗人造私语莫辨其真今乃分别白黑也秦始皇并六国定天下海内共尊立一帝故云定一尊】而私学乃相与非法教之制闻令下即各以其私学议之入则心非出则巷议非主以为名异趣以为高率羣下以造谤如此不禁则主势降乎上党与成乎下禁之便臣请诸有文学诗书百家语者蠲除去之令到满三十日弗去黥为城旦所不去者医药卜筮种树之书若有欲学者以吏为师始皇可其议收去诗书百家之语以愚百姓使天下无以古非今明法度定律令皆以始皇起同文书【正义六国制令不同今令同之】治离宫别馆周徧天下明年又巡狩外攘四夷斯皆有力焉斯长男由为三川守诸男皆尚秦公主女悉嫁秦诸公子三川守李由告归咸阳李斯置酒於家百官长皆前为寿门廷车骑以千数李斯喟然而叹曰嗟乎吾闻之荀卿曰物禁太盛夫斯乃上蔡布衣闾巷之黔首上不知其弩下遂擢至此当今人臣之位无居臣上者可谓富贵极矣物极则衰吾未知所税驾也【索隐税驾犹解驾言休息也李斯言己今日富贵已极然未知向後吉凶止泊在何处也】始皇三十七年十月行出游会稽并海上北抵琅邪【正义今沂州】丞相斯中车府令赵高兼行符玺令事皆从始皇有二十余子长子扶苏以数直谏上上使监兵上郡【正义上郡故城在绥州上县东南五十里】蒙恬为将少子胡亥爱请从上许之余子莫从【集解駢案辨士隐姓名遗秦将章郎书曰李斯为秦王死废十七兄而立今王也然则二世是秦始皇第十八子此书在善文中】其年七月始皇帝至沙丘【正义沙丘台在邢州】病甚令赵高为书赐公子扶苏曰以兵属蒙恬与丧会咸阳而葬书已封未授使者始

皇崩书及玺皆在赵高所独子胡亥丞相李斯赵高及幸宦者五六人知始皇崩余羣臣皆莫知也李斯以为上在外崩无真太子故秘之置始皇居輜輳车中【集解徐广曰一作輜车】百官奏事上食如故宦者辄从輜輳车中可诸奏事【集解文颖曰輜輳车如今丧輜车也孟康曰如衣车有牕牖闭之则温开之则凉故名之輜輳车也如淳曰輜輳车其形广大有羽饰也】赵高因留所赐扶苏玺书而谓公子胡亥曰上崩无诏封王诸子而独赐长子书长子至即立为皇帝而子无尺寸之地为之奈何胡亥曰固也吾闻之明君知臣明父知子父捐命不封诸子何可言者赵高曰不然方今天下之权存亡在子与高及丞相耳愿子图之且夫臣人与见臣於人制人与见制於人岂可同日道哉胡亥曰废兄而立弟是不义也不奉父诏而畏死是不孝也能薄而材讞【集解駟案史记音隐宰显反索隐刘氏音将浅反则讞亦浅义古人语自有重轻所以文字有异】强因人之功是不能也三者逆德天下不服身殆倾危社稷不血食高曰臣闻汤武弑其主天下称义焉不为不忠卫君弑其父而卫国载其德孔子着之不为不孝夫大行不小谨盛德不辞让乡曲各有宜而百官不同功故顾小而忘大後必有害狐疑犹豫後必有悔断而敢行鬼神避之後有成功愿子遂之胡亥喟然叹曰今大行未发丧礼未终岂宜以此事干丞相哉赵高曰时乎时乎间不及谋羸粮跃马唯恐後时胡亥既然高之言高曰不与丞相谋恐事不能成臣请为子与丞相谋之高乃谓丞相斯曰上崩赐长子书与丧会咸阳而立为嗣书未行今上崩未有知者也所赐长子书及符玺皆在胡亥所定太子在君侯与高之口耳事将何如斯曰安得亡国之言此非人臣所当议也高曰君侯自料能孰与蒙恬功高孰与蒙恬谋远不失孰与蒙恬无怨於天下孰与蒙恬长子旧而信之孰与蒙恬斯曰此五者皆不及蒙恬而君责之何深也高曰高固内官之厮役也幸得以刀笔之文进入秦宫管事二十余年未尝见秦免罢丞相功臣有封及二世者也卒皆以诛亡皇帝二十余子皆君之所知长子刚毅而武勇信人而奋士即位必用蒙恬为丞相君侯终不怀通侯之印归於乡里明矣高受诏教习胡亥使学以法事数年矣未尝见过失慈仁笃厚轻财重士辩於心而拙於口尽礼敬士秦之诸子未有及此者可以为嗣君计而定之斯曰君其反位斯奉主之诏听天之命何虑之可定也高曰安可危也危可安也安危不定何以贵圣斯曰斯上蔡间巷布衣也上幸擢为丞相封为通侯子孙皆至尊位重禄者故将以存亡安危属臣也岂可负哉夫忠臣不避死而庶几【索隐斯言忠臣之节本不避死言己今日亦庶几尽忠不避死】孝子不勤劳而见危人臣各守其职而已矣君其勿复言将令斯得罪高曰盖闻圣人迁徙无常就变而从时见未而知本观指而覩归物固有之安得常法哉方今天下之权命悬於胡亥高能得志焉且夫从外制中谓之惑从下制上谓之贼故秋霜降者草花落水摇动者万物作【索隐水摇者谓水泮而水动也是春时而万物皆生也】此必然之效也君何见之晚斯曰吾闻晋易太子【正义谓废申生立奚齐也】三世不安齐桓兄弟争位【正义谓小白与公子纠】身死为戮纣杀亲戚【正义谓杀比干囚箕子】不听谏者国为邱墟遂危社稷三者逆天宗庙不血食斯其犹人哉安足为谋【索隐言我今日犹是人人道守顺岂能为逆谋故曰安足为谋也】高曰上下合同可以长久中外若一事无表里君听臣之计即长有封侯世世称孤必有乔松之寿孔墨之智今释此而不从祸及子孙足以为寒心善者因祸为福君何处焉斯乃仰天而叹垂泪太息曰嗟乎独遭乱世既以不能死安托命哉於是斯乃听高高乃报胡亥曰臣请奉太子之明命以报丞相丞相斯敢不奉令於是乃相与谋诈为受始皇诏丞相立子胡亥为太子更为书赐长子扶苏曰朕巡天下祷祠名山诸神以延寿命今扶苏与将军蒙恬将师数十万以屯边十有余年矣不能进而前士卒多耗无尺寸之功乃反数上书直言

诽谤我所为以不得罢归为太子日夜怨望扶苏为人子不孝其赐劔以自裁将军恬与扶苏居外不匡正宜知其谋为人臣不忠其赐死以兵属裨将王离封其书以皇帝玺遣胡亥客奉书赐扶苏於上郡使者至发书扶苏泣入内舍欲自杀蒙恬止扶苏曰陛下居外未立太子使臣将三十万衆守边公子为监此天下重任也今一使者来即自杀安知其非诈请复请复请而後死未暮也使者数趣之扶苏为人仁谓蒙恬曰父而赐子死尚安复请即自杀蒙恬不肯死使者即以属吏系於阳周【集解徐广曰属上郡正义阳周宁州罗川县之邑也】使者还报胡亥斯高大喜至咸阳发丧太子立为二世皇帝以赵高为郎中令常侍中用事二世燕居乃召高与谋事谓曰夫人生居世间也譬犹骋六驥过决隙也吾既已临天下矣欲悉耳目之所好穷心志之所乐以安宗庙而乐万姓长有天下终吾年寿其道可乎高曰此贤主之所能行也而昏乱主之所禁也臣请言之不敢避斧钺之诛愿陛下少留意焉夫沙丘之谋诸公子及大臣皆疑焉而诸公子尽帝兄大臣又先帝之所置也今陛下初立此其属意怏怏皆不服恐为变且蒙恬已死蒙毅将兵居外臣战战栗栗唯恐不终且陛下安得为此乐乎二世曰为之奈何赵高曰严法而刻刑令有罪者相坐诛至收族灭大臣而远骨肉贫者富之贱者贵之尽除去先帝之故臣更置陛下之所亲信者近之此则阴德归陛下害除而奸谋塞羣臣莫不被润泽蒙厚德陛下则高枕肆志宠乐矣计莫出於此二世然高之言乃更为法律於是羣臣诸公子有罪辄下高令鞠治之杀大臣蒙毅等公子十二人戮死咸阳市十公主砒死於杜【集解駰案史记音义砒音贮格反索隐吒音宅与磔同古今字异耳磔谓裂其肢体而杀之】财物入於县官相连坐者不可胜数公子高欲奔恐收族乃上书曰先帝无恙时臣入则赐食出则乘舆御府之衣臣得赐之中廐之宝马臣得赐之臣当从死而不能为人子不孝为人臣不忠不忠者无名以立於世臣请从死愿葬郿山之足唯上幸哀怜之书上胡亥大悦召赵高而示之曰此可为急乎赵高曰人臣当忧死而不暇何变之得谋胡亥可其书赐钱十万以葬法令诛罚日益刻深羣臣人人自危欲畔者衆又作阿房之宫治直驰道赋歛愈重戍徭无已於是楚戍卒陈胜吴广等乃作乱起於山东杰俊相立自置为侯王叛秦兵至鸿门而却李斯数欲请间諫二世不许而二世责问李斯曰吾有私议而有所闻於韩子也曰尧之有天下也堂高三尺采椽不斲【集解徐广曰采一名栌一作柞索隐采木名即今之栌木也】茅茨不翦虽逆旅之宿不勤於此矣冬日鹿裘夏日葛衣粢粝之食【索隐粢音资粝音郎葛反粢者稷也粝者麤粟饭也】藜藿之羹饭土匭【集解徐广曰一作溜】啜土鉶【集解駰案音刑】虽监门之养不穀於此矣【集解徐广曰穀音营穀一作穀推也索隐尔雅云穀尽也言监门下人饭犹不尽此若徐氏云一作穀则字宜作较邹氏音角】禹凿龙门通大夏疏九河曲九防【正义谓河之九曲别为堤防】决滹水致之海【集解徐广曰致一作放】而股无胈【集解駰案胈肤毳皮】胫无毛手足胼胝面目黎黑遂以死于外葬於会稽臣虏之劳不烈於此矣然则夫所贵於有天下者岂欲苦形劳神身处逆旅之宿口食监门之养手持臣虏之作哉此不肖人之所勉也非贤者之所务也彼贤人之有天下也专用天下适己而已矣此所以贵於有天下也夫所谓贤人者必能安天下而治万民今身且不能利将恶能治天下哉故吾愿肆志广欲长享天下而无害为之奈何李斯子由为三川守羣盗吴广等西略地过去弗能禁章邯已破逐广等兵使者覆案三川相属诘让斯居三公位如何令盗如此李斯恐惧重爵禄不知所出乃阿二世意欲求容以书对曰夫贤主者必且能全道而行督责之术者也【索隐督者察也察其罪责之以刑罚也】督责之则臣不敢不竭能以徇其主矣此臣主之分定上下之义明则天下贤不肖莫敢不尽力竭任以徇其君矣是故主独制於天下而无所制

也能穷乐之极矣贤明之主也可不察焉故申子曰有天下而不恣睢【索隐恣音资二反睢音呼季反恣睢犹放纵也谓肆情纵恣也】命之曰以天下为桎梏者【正义言有天下不能自纵恣督责乃劳身於天下若尧禹即以天下为桎梏於身也】无他焉不能督责而顾以其身劳於天下之民若尧禹然故谓之桎梏也夫不能修申韩之明术行督责之道专以天下自适也而徒务苦形劳神以身徇百姓则是黔首之役非畜天下者也何足贵哉夫以人徇己则己贵而人贱以己徇人则己贱而人贵故徇人者贱而人所徇者贵自古及今未有不然者也凡古之所为尊贤者为其贵也而所为恶不肖者为其贱也而尧禹以身徇天下者也因随而尊之则亦失所为尊贤之心矣夫可谓大缪矣谓之为桎梏不亦宜乎不能督责之过也故韩子曰慈母有败子而严家无格虏者何也【索隐格强悍也虏奴隶也言严整之家本无格悍奴仆也】则能罚之加焉必也故商君之法刑弃灰於道者【正义弃灰於道者黥也韩子云殷之法弃灰於衢者刑子贡以为重问之仲尼曰灰弃於衢必燔人必怒怒则鬪鬪则一族虽刑之可也】夫弃灰薄罪也而被刑重罚也彼唯明主为能深督轻罪夫罪轻且督深而况有重罪乎故民不敢犯也是故韩子曰布帛寻常庸人不释【索隐寻常以言其少也庸人弗释者谓庸人见则取之不释以其罪轻也故下云罚不必行则庸人弗释寻常是也】铄金百镒盗跖不搏者【索隐尔雅云铄美也言百镒之美金在於地虽有盗跖之行亦不取者为其财多而罪重也故下云搏必随手刑盗跖不搏也搏犹攫也取也凡鸟翼击物必转足取攫故人取物亦云搏也】非庸人之心重寻常之利深而盗跖之欲浅也又不以盗跖之行为轻百镒之重也搏必随手刑则盗跖不搏百镒而罚不必行也则庸人不释寻常是故城高五丈而楼季不轻犯也【集解许慎曰楼季魏文侯之弟王孙子曰楼季之兄也】泰山之高百仞而跛?牧其上【集解駉案诗云?羊羴首毛传曰牝曰?】夫楼季也而难五丈之限岂跛?也而易百仞之高哉峭壑之势异也【索隐峭峻也高也音七笑反壑音渐以言峭峻则难登故楼季难五丈之限平壑则易涉故跛?牧於泰山也】明主圣王之所以能久处尊位长执重势而独擅天下之利者非有异道也能独断而审督责必深罚故天下不敢犯也今不务所以不犯而事慈母之所以败子也则亦不察於圣人之论矣夫不能行圣人之术则舍为天下役何事哉可不哀邪【索隐舍犹废也止也言为人主不能行圣人督责之术则已废止何为勤身苦心为天下所役是何哉可不哀邪言其非也】且夫俭节仁义之人立於朝则荒肆之乐辍矣谏说论理之臣开於侧则流漫之志诎矣烈士死节之行显於世则淫康之虞废矣故明主能外此三者而独操主术以制听从之臣而修其明法故身尊而势重也凡贤主者必将能拂世摩俗而废其所恶立其所欲【索隐拂音扶弗反摩音莫何反拂世言与世情乖戾摩俗言磨砺於俗使从己也】故生则有尊重之势死则有贤明之諡也是以明君独断故权不在臣也然後能灭仁义之涂掩驰说之口困烈士之行塞聪揜明内独视听故外不可倾以仁义烈士之行而内不可夺以谏说忿争之辩故能率然独行恣睢之心而莫之敢逆若此然後可谓能明申韩之术而修商君之法法修术明而天下乱者未之闻也故曰王道约而易操也唯明主为能行之若此则谓督责之诚则臣无邪臣无邪则天下安天下安则主严尊主严尊则督责必督责必则所求得所求得则国家富国家富则君乐丰故督责之术设则所欲无不得矣羣臣百姓救过不给何变之敢图若此则帝道备而可谓能明君臣之术矣虽申韩复生不能加也书奏二世悦於是行督责益严税民深者为明吏二世曰若此则可谓能督责矣刑者相半於道而死人日成积於市杀人衆者为忠臣二世曰若此则可谓能督责矣初赵高为郎中令所杀及报私怨衆多恐大臣入朝奏事毁恶之乃说二世曰天子所以贵者但以闻声羣臣莫得见

其面故号曰朕且陛下富於春秋未必尽通诸事【集解徐广曰通或宜作照】今坐朝廷譴举有不当者则见短於大臣非所以示神明於天下也且陛下深拱禁中与臣及侍中习法者待事事来有以揆之如此【集解徐广曰揆一作拨也】则大臣不敢奏疑事天下称圣主矣二世用其计乃不坐朝廷见大臣居禁中赵高常侍中用事事皆决於赵高高闻李斯以为言乃见丞相曰关东羣盗多今上急发繇治阿房宫【索隐房音旁一如字】聚狗马无用之物臣欲谏为位贱此真君侯之事君何不谏李斯曰固也吾欲言之久矣今时上不坐朝廷上居深宫吾有所言者不可传也欲见无间赵高谓曰君诚能谏请为君候上间语君於是赵高待二世方燕乐妇女居前使人告丞相上方间可奏事丞相至宫门上谒如此者三二世怒曰吾尝多间日丞相不来吾方燕私丞相辄来请事丞相岂少我哉且固我哉【索隐谓以我幼故轻我也一云固我者以我为短小且固陋也於义为疎】赵高因曰如此殆矣夫沙丘之谋丞相与焉今陛下已立为帝而丞相贵不益此其意亦望裂地而王矣且陛下不问臣臣不敢言丞相长男李由为三川守楚盗陈胜等皆丞相傍县之子以故楚盗公行【集解徐广曰公一作讼音松】过三川城守不肯击高闻其文书相往来未得其审故未敢以闻且丞相居外权重於陛下二世以为然欲案丞相恐其不审乃使人案验三川守与盗通状李斯闻之是时二世在甘泉方作觳抵优俳之观【集解应劭曰战国之时稍增武之礼以为戏乐用相夸示而秦更名曰角抵角者角材也抵者相抵触也文颖曰案秦名此乐为角抵两两相当角力角伎艺射御故曰角抵也駟案觳抵即角抵】李斯不得见因上书言赵高之短曰臣闻之臣疑其君无不危国妾疑其夫无不危家今有大臣於陛下擅利擅害与陛下无异此甚不便昔者司城子罕相宋身行刑罚以威行之朞年遂劫其君田常为简公臣爵列无敌於国私家之富与公家均布惠施德下得百姓上得羣臣阴取齐国杀宰予於庭即弑简公於朝遂有齐国此天下所明知也今高有邪佚之志危反之行如子罕相宋也私家之富若田氏之於齐也兼行田常子罕之逆道而劫陛下之威信其志若韩玘为韩安相也【索隐玘亦作起并音怡韩大夫弑其君悼公者然韩无悼公或郑之嗣君案表韩玘事昭侯昭侯已下四代至王安其说非也】陛下不图臣恐其为变也二世曰何哉夫高故宦人也然不为安肆志不以危易心洁行修善自使至此以忠得进以信守位朕实贤之而君疑之何也且朕少失先人无所识知不习治民而君又老恐与天下絶矣朕非属赵君当谁任哉且赵君为人精廉强力下知人情上能适朕君其勿疑李斯曰不然夫高故贱人也无识於理贪欲无厌求利不止列势次主求欲无穷臣故曰殆二世已前信赵高恐李斯杀之乃私告赵高高曰丞相所患者独高高已死丞相即欲为田常所为於是二世曰其以李斯属郎中令赵高案治李斯李斯拘执束缚居圜圜中仰天而叹曰嗟乎悲夫不道之君何可为计哉昔者桀杀关龙逢纣杀王子比干吴王夫差杀伍子胥此三臣者岂不忠哉然而不免於死身死而所忠者非也今吾智不及三子而二世之无道过於桀纣夫差吾以忠死宜矣且二世之治岂不乱哉日者夷其兄弟而自立也杀忠臣而贵贱人作为阿房之宫赋歛天下吾非不谏也而不吾听也凡古圣王饮食有节车器有数宫室有度出令造事加费而无益於民利者禁故能长久治安今行逆於昆弟不顾其咎侵杀忠臣不思其殃大为宫室厚赋天下不爱其费三者已行天下不听今反者已有天下之半矣而心尚未寤也而以赵高为佐吾必见寇至咸阳麋鹿游於朝也於是二世乃使高案丞相狱治罪责斯与子由谋反状皆收捕宗族宾客赵高治斯榜掠千余不胜痛自诬服斯所以不死者自负其辩有功实无反心幸得上书自陈幸二世之寤而赦之李斯乃从狱中上书曰臣为丞相治民三十余年矣逮秦地之狭隘先王之时秦地不过千里兵数十万臣尽薄材谨奉法令

阴行谋臣资之金玉使游说诸侯阴修甲兵饰政教官鬬士尊功臣盛其爵禄故终以胁韩弱魏破燕赵夷齐楚卒兼六国虏其王立秦为天子罪一矣地非不广又北逐胡貉南定百越以见秦之强罪二矣尊大臣盛其爵位以固其亲罪三矣立社稷修宗庙以明主之贤罪四矣更剋画平斗斛度量文章布之天下以树秦之名罪五矣治驰道兴游观以见主之得意罪六矣缓刑罚薄赋歛以遂主得衆之心万民戴主死而不忘罪七矣若斯之为臣者罪足以死固久矣上幸尽其能力乃得至今愿陛下察之书上赵高使吏弃去不奏曰囚安得上书赵高使其客十余辈诈为御史谒者侍中更往覆讯斯斯更以其实对辄使人复榜之後二世使人验斯斯以为如前终不敢更言辞服奏当上二世喜曰微赵君几为丞相所卖及二世所使案三川之守至则项梁已击杀之使者来会丞相下吏赵高皆妄为反辞二世二年七月具斯五刑论腰斩咸阳市斯出狱与其中子俱执顾谓其中子曰吾欲与若复牵黄犬俱出上蔡东门逐狡兔岂可得乎遂父子相哭而夷三族李斯已死二世拜赵高为中丞相事无大小辄决於高高自知权重乃献鹿谓之马二世问左右此乃鹿也左右皆曰马也二世惊自以为惑乃召太卜令卦之太卜曰陛下春秋郊祀奉宗庙鬼神斋戒不明故至于此可依盛德而明斋戒於是乃入上林斋戒日游弋猎有行人入上林中二世自射杀之赵高教其女嫪咸阳令阎乐劾不知何人贼杀人移上林高乃谏二世曰天子无故贼杀不辜人此上帝之禁也鬼神不享天且降殃当远避宫以禳之二世乃出居望夷之宫留三日赵高诈诏卫士令士皆素服持兵内乡入告二世曰山东羣盗兵大至二世上观而见之恐惧高即因劫令自杀引玺而佩之左右百官莫从上殿殿欲坏者三高自知天弗与羣臣弗许乃召始皇弟授之玺【集解徐广曰一本曰召始皇弟子婴授之玺秦本纪云子婴者二世之兄子也索隐刘氏云弟子误当为孙子婴也】子婴即位患之乃称疾不听事与宦者韩谈及其子谋杀高高上谒请病因召入令韩谈刺杀之夷其三族子婴立三月沛公兵从武关入至咸阳羣臣百官皆畔不适【集解徐广曰适音敌】子婴与妻子自系其颈以组降轂道旁【正义轂道在万年县东北十六里】沛公因以属吏项王至而斩之遂以亡天下太史公曰李斯以閭閻历诸侯入事秦因以瑕衅以辅始皇卒成帝业斯为三公可谓尊用矣斯知六艺之归不务明政以补主上之缺持爵禄之重阿顺苟合严威酷刑听高邪说废适立庶诸侯已畔斯乃欲谏争不亦末乎人皆以斯极忠而被五刑死察其本乃与俗议之异不然斯之功且与周召列矣

【索隐述赞曰鼠在所居人固择地斯效智力功立名遂置酒咸阳人臣极位一夫诳惑变易神器国丧身诛本同末异】

史记卷八十七

史记卷八十七考证

李斯列传此所谓藉寇兵而齎盗粮者也○【臣照】按此必当时习语故范睢用之李斯再用之荀子亦曰非其人而教之齎盗粮借寇兵也

夫忠臣不避死而庶几索隐斯言忠臣之节本不避死言己今日亦庶几尽忠不避死也○董份曰庶几者有他望也言忠臣不避死而几他望也古几字与冀同索隐缪甚

而二世责问李斯曰吾有私议而有所闻於韩子也○董份曰二世纪亦载此文而辞不同

铄金百镒索隐尔雅云铄美也○徐孚远曰铄训美非也铄金谓熔金於冶热不可举也故下文搏必随手刑

与宦者韩谈○徐孚远曰史记谈皆作同此仍谈後人所改也

史记卷八十七考证

<史部,正史类,史记>

卷八十八

钦定四库全书

史记卷八十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

蒙恬列传第二十八

蒙恬者其先齐人也恬大父蒙骜【索隐骜音遨又邹氏音五到反】自齐事秦昭王官至上卿秦庄襄王元年蒙惊为秦将伐韩取成臯荥阳作置三川郡二年蒙骜攻赵取三十七城始皇三年蒙骜攻韩取十三城五年蒙骜攻魏取二十城作置东郡始皇七年蒙骜卒骜子曰武武子曰恬恬尝书狱典文学【索隐谓恬尝学狱法遂作狱官文学】始皇二十三年蒙武为秦裨将军与王翦攻楚大破之杀项燕二十四年蒙武攻楚虏楚王蒙恬弟毅始皇二十六年蒙恬因家世得为秦将攻齐大破之拜为内史秦已并天下乃使蒙恬将三十万衆北逐戎狄收河南【正义谓灵胜等州】筑长城因地形用险制塞起临洮【集解徐广曰属陇西】至辽东【正义辽东郡在辽水东始皇长城东至辽水西南至海之上】延袤万余里於是渡河据阳山【集解徐广曰五原西安阳县北有阴山阴山在河南阳山在河北】透蛇而北暴师於外十余年居上郡是时蒙恬威振匈奴始皇甚尊宠蒙氏信任贤之而亲近蒙毅位至上卿出则参乘入则御前恬任外事而毅常为内谋名为忠信故虽诸将相莫敢与之争焉赵高者诸赵疏远属也赵高昆弟数人皆生隐宫【集解徐广曰为宦者索隐刘氏云盖其父犯宫刑妻子没为奴婢妻後野合所生子皆承赵姓并宫之故云兄弟生於隐宫也】其母被刑戮世世卑贱秦王闻高强力通於狱法举以为中车府令高即私事公子胡亥喻之决狱高有大罪秦王令蒙毅法治之毅不敢阿法当高罪死除其官籍帝以高之敦於事也【集解徐广曰敦一作敏】赦之复其官爵始皇欲游天下道九原【正义九原郡今胜州连谷县是】直抵甘泉【正义宫在雍州】乃使蒙恬通道自九原抵甘泉壘山堙谷千八百里道未就始皇三十七年冬行出游会稽并【索隐并音白浪反】海上北走琅邪【索隐走音奏走犹向也邹氏音趋趋亦向义於字则乖】道病使蒙毅还祷山川未反始皇至沙邱崩秘之羣臣莫知是时丞相李斯少子胡亥中车府令赵高常从高雅得幸於胡亥欲立之又怨蒙毅法治之而不为己也因有贼心乃与丞相李斯少子胡亥阴谋立胡亥为太子太子已立遣使者以罪赐公子扶苏蒙恬死扶苏已死蒙恬疑而复请之使者以蒙恬属吏更置胡亥以李斯舍人为护军使者还报胡亥已闻扶苏死即欲释蒙恬赵高恐蒙氏复贵而用事怨之毅还至赵高因为胡亥

忠计欲以灭蒙氏乃言曰臣闻先帝欲举贤立太子久矣而毅谏曰不可若知贤而愈不立则是不忠而惑主也【索隐愈一作俞俞即踰也音與谓知太子贤而踰久不立是不忠也】以臣愚意不若诛之胡亥听而系蒙毅於代【正义今代州也因祷山川至代而系之】前已囚蒙恬於阳周丧至咸阳已葬太子立为二世皇帝而赵高亲日夜毁恶蒙氏求其罪过举劾之子婴进谏曰臣闻故赵王迁杀其良臣李牧而用顔聚燕王喜阴用荆轲之谋而倍秦之约齐王建杀其故世忠臣而用后胜之议此三君者皆各以变古者失其国而殃及其身今蒙氏秦之大臣谋士也而主欲一旦弃去之臣窃以为不可臣闻轻虑者不可以治国独智者不可以存君【集解徐广曰一无此字】诛杀忠臣而立无节行之人是内使羣臣不相信而外使鬪士之意离也臣窃以为不可胡亥不聽而遣御史曲宫乘传之代【索隐曲姓宫名】令蒙毅曰先主欲立太子而卿难之今丞相以卿为不忠罪及其宗朕不忍乃赐卿死亦甚幸矣卿其图之毅对曰以臣不能得先主之意则臣少宦顺幸没世可谓知意矣【索隐蒙毅言己少事始皇顺旨蒙恩幸至始皇没世可谓知上意也】以臣不知太子之能则太子独从周旋天下去诸公子絶远臣无所疑矣夫先主之举用太子数年之积也臣乃何言之敢谏何虑之敢谋非敢饰辞以避死也为羞累先主之名愿大夫为虑焉使臣得死情实且夫顺成全者道之所贵也刑杀者道之所卒也昔者秦穆公杀三良而死罪百里奚而非其罪也故立号曰繆昭襄王杀武安君白起楚平王杀伍奢吴王夫差杀伍子胥此四君者皆为大失而天下非之以其君为不明以是籍於诸侯【索隐言其恶声狼籍布於诸国而刘氏云诸侯皆记其恶於史籍非也】故曰用道治者不杀无罪而罚不加於无辜唯大夫留心使者知胡亥之意不聽蒙毅之言遂杀之二世又遣使者之阳周令蒙恬曰君之过多矣而卿弟毅有大罪法及内史恬曰自吾先人及至子孙积功信於秦三世矣今臣将兵三十余万身虽囚系其足以倍畔自知必死而守义者不敢辱先人之教以不忘先主也昔周成王初立未离襁褓周公旦王以朝卒定天下及成王有病甚殆公且自揃其爪以沈於河曰王未有识是旦执事有罪殃旦受其不祥乃书而藏之记府可谓信矣及王能治国有贼臣言周公旦欲为乱久矣王若不备必有大事王乃大怒周公旦走而奔於楚成王观於记府得周公旦沈书乃流涕曰孰谓周公旦欲为乱乎杀言之者而反周公旦故周书曰必参而伍之【索隐参谓三卿伍即五大夫欲参伍更议】今恬之宗世无二心而事卒如此是必孽臣逆乱【集解徐广曰一作辞】内陵之道也夫成王失而复振则卒昌桀杀关龙逢纣杀王子比干而不悔则身死国亡臣故曰过可振而谏可觉也【索隐此故曰者必先志有此言蒙恬引之以成说也今不知出何书耳振者救也然语亦倒以言前人受谏可觉则其过乃可救】察於参伍上圣之法也凡臣之言非以求免於咎也将以谏而死愿陛下为万民思从道也使者曰臣受诏行法於将军不敢以将军言闻於上也蒙恬喟然太息曰我何罪於天无过而死乎良久徐曰恬罪固当死矣起临洮属之辽东城塹万余里此其中不能无絶地脉哉此乃恬之罪也乃吞药自杀

太史公曰吾适北边自直道归行观蒙恬所为秦筑长城亭障塹山堙谷通直道固轻百姓力矣夫秦之初灭诸侯天下之心未定痍伤者未瘳而恬为名将不以此时强谏振百姓之急养老存孤务修衆庶之和而阿意兴功此其兄弟遇诛不亦宜乎何乃罪地脉哉

【索隐述赞曰蒙氏秦将内史忠贤长城首筑万里安边赵高矫制扶苏死焉絶地何罪劳人是???呼天欲诉三代良然】

史记卷八十八

史记卷八十八考证

蒙恬列传始皇二十三年蒙武为秦裨将军与王翦攻楚大破之杀项燕二十四年蒙武攻楚虏楚王○【臣照】按此与年表同与本纪不合本纪二十三年虏荆王二十四年项燕自杀

始皇二十六年蒙恬因家世得为秦将攻齐大破之○【臣照】按本纪及年表攻齐者将军王贲皆不言有蒙恬或恬此时亦从军非大将

史记卷八十八考证

卷八十九

钦定四库全书

史记卷八十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

张耳陈余列传第二十九

【索隐张耳吴芮势侔楚汉位埒齐韩俱怀从沛之心咸享誓河之业爵在列侯之上家传累代之基长沙既曰令终赵王亦谓善始并可列同世家焉】

张耳者大梁人也【索隐臣瓚云今陈留大梁城是也】其少时及魏公子毋忌为客张耳尝亡命游外黄【索隐晋灼曰命者名也谓脱名籍而逃崔浩曰亡无也命名也逃匿则削除名籍故以逃为亡命地理志外黄属陈留】外黄富人女甚美嫁庸奴亡其夫去抵父客【集解如淳曰父时故宾客抵归也音丁礼反】父客素知张耳乃谓女曰必欲求贤夫从张耳女听乃卒为请决嫁之张耳【索隐谓女请父客为决绝其夫而改嫁张耳】张耳是时脱身游女家厚奉给张耳张耳以故致千里客乃宦魏为外黄令名由此益贤

陈余者亦大梁人也好儒术数游赵苦陞【集解张晏曰苦陞汉章帝改曰汉昌索隐地理志属中山正义音邢邢州唐昌县】富人公乘氏以其女妻之亦知陈余非庸人也余年少父事张耳两人相与为刎颈交【索隐崔浩云言要齐生死断颈无悔】秦之灭大梁也张耳家外黄高祖为布衣时尝数从张耳游客数月秦灭魏数岁已闻此两人魏之名士也购求有得张耳千金陈余五百金张耳陈余乃变名姓俱之陈为里监门以自食【集解张晏曰监门里正卫也】两人相对里吏尝有过笞陈余陈余欲起张耳蹶之【集解徐广曰一作掇】使受笞吏去张耳乃引陈余之桑下而数之曰始吾与公言何如今见小辱而欲死一吏乎陈余然之秦诏书购求两人两人亦反用门者以令里中【索隐案门者即余耳也自以其名而号令里中诈更别求也】陈涉起薪至入陈兵数万张耳陈余上谒陈涉涉及左右生平数闻张耳陈余贤未尝见见即大喜陈中豪杰父老乃谓陈涉曰将军身被坚执锐率士卒以诛暴秦复立楚社稷存亡继绝功德宜为王且夫监临天下诸将不为王不可愿将军立为楚王也陈涉问此两人两人对曰夫秦为无道破人国家灭人社稷绝人后世罢百姓之力尽百姓之财将军瞋目张胆出万死不顾一生之计为天下除残也今始至陈而王之示天下私愿将军毋王急引

兵而西遣人立六国後自为树党为秦益敌也敌多则力分与衆则兵强如此野无交兵县无守城诛暴秦据咸阳以令诸侯诸侯亡而得立以德服之如此则帝业成矣今独王陈恐天下解也【正义解纪卖反言天下诸侯见陈胜称王王陈皆解堕不相从也】陈涉不听遂立为王陈余乃复说陈王曰大王举梁楚而西务在入关未及收河北也臣尝游赵知其豪杰及地形愿请奇兵北畧赵地於是陈王以故所善陈人武臣为将军邵骚为护军以张耳陈余为左右校尉予卒三千人北畧赵地武臣等从白马渡河【索隐案酈食其云白马之津则白马津是渡处其地与黎阳对岸】至诸县说其豪杰曰【集解邓展曰至河北县说之】秦为乱政虐刑以残贼天下数十年矣北有长城之役南有五岭之戍【集解駰案汉书音义曰岭有五因以为名在交址界中也索隐裴氏广州记云大庾始安临贺桂阳揭阳斯五岭】外内骚动百姓罢敝头会箕歛【集解駰案汉书音义曰家家人头数出谷以箕歛之】以供军费财力尽民不聊生重之以苛法峻刑使天下父子不相安陈王奋臂为天下倡始王楚之地方二千里莫不响应家自为怒人自为鬪各报其怨而攻其讐县杀其令丞郡杀其守尉今已张大楚王陈使吴广周文将卒百万西击秦於此时而不成封侯之业者非人豪也诸君试相与计之夫天下同心而苦秦久矣因天下之力而攻无道之君报父兄之怨而成割地有土之业此士之一时也豪杰皆然其言乃行收兵得数万人号武臣为武信君下赵十城余皆城守莫肯下乃引兵东北击范阳范阳人蒯通说范阳令曰【集解駰案汉书曰范阳令徐公】窃闻公之将死故吊虽然贺公得通而生范阳令曰何以吊之对曰秦法重足下为范阳令十年矣杀人之父孤人之子断人之足黥人之首不可胜数然而慈父孝子莫敢傳刃公之腹中者【集解徐广曰傳音戡李奇曰东方人以物插地皆为傳】畏秦法耳今天下大乱秦法不施然则慈父孝子且傳刃公之腹中以成其名此臣之所以吊公也今诸侯畔秦矣武信君兵且至而君坚守范阳少年皆争杀君下武信君君急遣臣见武信君可转祸为福在今矣范阳令乃使蒯通见武信君曰足下必将战胜然後畧地攻得然後下城臣窃以为过矣诚听臣之计可不攻而降城不战而畧地传檄而千里定可乎武信君曰何谓也蒯通曰今范阳令宜整顿其士卒以守战者也怯而畏死贪而重富贵故欲先天下降畏君以为秦所置吏诛杀如前十城也然今范阳少年亦方杀其令自以城距君君何不齎臣侯印拜范阳令范阳令则以城下君少年亦不敢杀其令令范阳令乘朱轮华毂使驱驰燕赵郊燕赵郊见之皆曰此范阳令先下者也即喜矣燕赵城可毋战而降也此臣之所谓传檄而千里定者也武信君从其计因使蒯通赐范阳令侯印赵地闻之不战以城下者三十余城至邯鄲张耳陈余闻周章军入关至戏却【集解苏林曰戏地名却兵退也正义戏音羲出骊山】又闻诸将为陈王徇地多以谗毁得罪诛怨陈王不用其策不以为将而以为校尉乃说武臣曰陈王起蕲至陈而王非必立六国後将军今以三千人下赵数十城独介居河北【集解晋灼曰介音戛瓚曰方言云介特也】不王无以填之且陈王听谗还报恐不脱於祸又不如立其兄弟不即立赵後将军毋失时时间不容息【索隐以言举事不可失时时机之迅速其间不容一喘息顷也】武臣乃听之遂立为赵王以陈余为大将军张耳为右丞相邵骚为左丞相使人报陈王陈王大怒欲尽族武臣等家而发兵击赵陈王相国房君諫曰秦未亡而诛武臣等家此又生一秦也不如因而贺之使急引兵西击秦陈王然之从其计徙系武臣等家宫中封张耳子敖为成都君陈王使使者贺赵令趣发兵西入关张耳陈余说武臣曰王王赵非楚意特以计贺王楚已灭秦必加兵於赵愿王毋西兵北徇燕代南收河内以自广赵南据大河北有燕代楚虽胜秦必不敢制赵赵王以为然因不西兵而使韩广畧燕李良畧常山张黡畧上党韩广至燕燕人因立广为燕

王【集解徐广曰九月也】赵王乃与张耳陈余北畧地燕界赵王间出为燕军所得燕将囚之欲与分赵地半乃归王使者往燕辄杀之以求地张耳陈余患之有厮养卒谢其舍中曰【集解如淳曰厮贱者也公羊传曰厮役扈养韦昭曰析薪为厮炊烹为养晋灼曰以辞相告曰谢也索隐谓其同舍中之人也汉书作舍人】吾为公说燕与赵王载归舍中皆笑曰使者往十余辈辄死若何以能得王乃走燕壁燕将见之问燕将曰知臣何欲燕将曰若欲得赵王耳曰君知张耳陈余何如人也燕将曰贤人也曰知其志何欲曰欲得其王耳赵养卒乃笑曰君未知此两人所欲也夫武臣张耳陈余杖马箠下赵数十城【集解张晏曰言其不用兵革驱策而已也索隐杖音丈箠音之委反】此亦各欲南面而王岂欲为卿相终已邪夫臣与主岂可同日而道哉顾其势初定未敢参分而王且以少长先立武臣为王以持赵心今赵地已服此两人亦欲分赵而王时未可耳今君乃囚赵王此两人名为求赵王实欲燕杀之此两人分赵自立夫以一赵尚易燕况以两贤王左提右挈而责杀王之罪【集解徐广曰平原君传曰事成执右券以责也券契义同耳】灭燕易矣燕将以为然乃归赵王养卒为御而归李良已定常山还报赵王复使良畧太原至石邑【索隐地理志属常山】秦兵塞井陘未能前秦将诈称二世使人遗李良书不封【集解张晏曰欲其漏泄君臣相疑】曰良尝事我得显幸良诚能反赵为秦赦良罪贵良良得书疑不信乃还之邯鄲益请兵未至道逢赵王姊出饮从百余骑李良望见以为王伏谒道旁王姊醉不知其将使骑谢李良李良素贵起慙其从官从官有一人曰天下畔秦能者先立且赵王素出将军下今女儿乃不为将军下车请追杀之李良已得秦书固欲反赵未决因此怒遣人追杀王姊道中乃遂将其兵袭邯鄲邯鄲不知竟杀武臣邵骚赵人多为张耳陈余耳目者以故得脱出收其兵得数万人客有说张耳曰两君羈旅而欲附赵难独立立赵後扶以义可就功【索隐案羈旅势弱难以立功也独有立六国赵王之後可以成功】乃求得赵歇【集解徐广曰正月也音乌辖反駟案张晏曰赵之苗裔】立为赵王居信都【集解徐广曰後项羽改曰襄国】李良进兵击陈余陈余败李良李良走归章邯章邯引兵至邯鄲皆徙其民河内夷其城郭张耳与赵王歇走入钜鹿城王离围之陈余北收常山兵得数万人军钜鹿北章邯军钜鹿南棘原筑甬道属河饷王离王离兵食多急攻钜鹿钜鹿城中食尽兵少张耳数使人召前陈余陈余自度兵少不敌秦不敢前数月张耳大怒怨陈余使张黡陈泽【正义音释】往让陈余曰始吾与公为刎颈交今王与耳旦暮且死而公拥兵数万不肯相救安在其相为死苟必信胡不赴秦军俱死且有十一二相全【正义十中冀一两胜秦】陈余曰吾度前终不能救赵徒尽亡军且余所以不俱死欲为赵王张君报秦今必俱死如以肉委饿虎何益张黡陈泽曰事已急要以俱死立信安知後虑陈余曰吾死顾以为无益必如公言乃使五千人令张黡陈泽先尝秦军【索隐崔浩云尝犹试】至皆没当是时燕齐楚闻赵急皆来救张敖亦北收代兵得万余人来皆壁余旁未敢擊秦项羽兵数絶章邯甬道王离军乏食项羽悉引兵渡河遂破章邯【集解徐广曰三年十二月也】章邯引兵解诸侯军乃敢擊围钜鹿秦军遂虏王离涉间自杀卒存钜鹿者楚力也於是赵王歇张耳乃得出钜鹿谢诸侯张耳与陈余相见责让陈余以不肯救赵及问张黡陈泽所在陈余怒曰张黡陈泽以必死责臣臣使将五千人先尝秦军皆没不出张耳不信以为杀之数问陈余陈余怒曰不意君之望臣深也【索隐望怨责也】岂以臣为重去将哉【索隐案重训难也或云重惜也】乃脱解印绶推予张耳张耳亦愕不受陈余起如厕客有说张耳曰臣闻天与不取反受其咎【索隐此辞出国语】今陈将军与君印君不受反天不祥急取之张耳乃佩其印收其麾下而陈余还亦望张耳不让【正义言陈余如厕还亦怨望张耳不让其印】

遂趋出张耳遂收其兵陈余独与麾下所善数百人之河上泽中渔猎由此陈余张耳遂有郤赵王歇复居信都张耳从项羽诸侯入关汉元年二月项羽立诸侯王张耳雅游【集解韦昭曰雅素也索隐郑氏云雅故也韦昭云雅素然素亦故也雅游言惯游从故多为人所称誉】人多为之言项羽亦素数闻张耳贤乃分赵立张耳

为常山王治信都信都更名襄国陈余客【多】说项羽曰陈余张耳一体有功於赵项羽以陈余不从入关闻其在南皮【索隐地理志属勃海正义故城在沧州南皮县北四里也】即以南皮旁三县以封之而徙赵王歇王代【集解徐广曰都代县】张耳之国陈余愈益怒曰张耳与余功等也今张耳王余独侯此项羽不平及齐王田荣畔楚陈余乃使夏说说田荣曰【正义上说音悦下音式銳反】项羽为天下宰不平尽王诸将善地徙故王王恶地今赵王乃居代愿王假臣兵请以南皮为扞蔽田荣欲树党於赵以反楚乃遣兵从陈余陈余因悉三县兵袭常山王张耳张耳败走念诸侯无可归者曰汉王与我有旧故【集解张晏曰汉王为布衣时尝从张耳游】而项羽又强立我我欲之楚【集解张晏曰羽既强盛又为所立是以狐疑莫知所往也】甘公曰【集解文颖曰善说星者甘氏也索隐天官书云齐甘公艺文志云楚有甘公齐楚不同未知孰是刘歆七略云公一名德】汉王之入关五星聚东井东井者秦分也先至必霸楚虽强後必属汉故耳走汉【集解徐广曰二年十月也】汉王亦还定三秦方围章邯废邱张耳谒汉王汉王厚遇之陈余已败张耳皆复收赵地迎赵王於代复为赵王赵王德陈余立以为代王陈余为赵王弱国初定不之国留傅赵王而使夏说以相国守代汉二年东击楚使使告赵欲与俱陈余曰汉杀张耳乃从於是汉王求人类张耳者斩之持其头遗陈余陈余乃遣兵助汉汉之败於彭城西陈余亦复觉张耳不死即背汉汉三年韩信已定魏地遣张耳与韩信击破赵井陘【集解徐广曰三年十月】斩陈余泚水上【集解徐广曰在常山音迟一音丁礼反索隐苏林音祗晋灼音邸今俗呼此水则然案地理志音脂则苏音为得郭景纯注山海经云泚水出常山中邱县正义在赵州赞皇县界】追杀赵王歇襄国汉立张耳为赵王【集解徐广曰四年十一月駟案汉书四年夏】汉五年张耳薨谥为景王子敖嗣立为赵王高祖长女鲁元公主为赵王敖后汉七年高祖从平城过赵赵王朝夕袒裼蔽自上食【集解徐广曰裼者臂扞也】礼甚卑有子壻礼高祖箕倨詈甚慢易之【索隐崔浩云屈膝坐其形如箕】赵相贯高赵午等年六十余【集解徐广曰田叔传云赵相赵午等数十人皆怒然则或宜言六十余人】故张耳客也生平为气乃怒曰吾王孱王也【集解孟康曰音如潺湲之潺冀州人谓懦弱为孱韦昭曰仁谨貌索隐案服?音鉏闲反弱小貌也小顔音仕连反】说王曰夫天下豪杰并起能者先立今王事高祖甚恭而高祖无礼请为王杀之张敖啗其指出血【索隐小顔云啗指以表至诚为其约誓】曰君何言之误且先人亡国赖高祖得复国德流子孙秋毫皆高祖力也愿君无复出口贯高赵午等十余人皆相谓曰乃吾等非也吾王长者不倍德且吾等义不辱今怨高祖辱我王故欲杀之何乃洿王为乎【索隐汉书作污萧该音一故反说文云污秽也】令事成归王事败独身坐耳汉八年上从东垣还过赵贯高等乃壁人柏人【索隐谓於柏人县馆舍壁中着人欲为变也正义柏人故城在邢州柏人县西北十二里即高祖宿处】要之置【集解韦昭曰为供置也索隐文颖云置人於厠壁中以伺高祖也张晏云凿壁空之令人止中也今按云置厠者置人於复壁中谓之置厠厠者隐厠之处因以为言也亦音恻】上过欲宿心动问曰县名为何曰柏人柏人者迫於人也不宿而去汉九年贯高怨家知其谋乃上变告之於是上皆并逮捕赵王贯高等十余人皆

争自刭贯高独怒骂曰谁令公为之今王实无谋而并捕王公等皆死谁白王不反者乃轪车胶致【正义谓其车上着板四周如檻形胶密不得开送致京师也】与王诣长安治张敖之罪上乃诏赵羣臣宾客有敢从王皆族贯高与客孟舒等十余人皆自髡钳为王家奴从来贯高至对狱曰独吾属为之王实不知吏治榜笞数千刺劓【集解徐广曰丁劣反索隐案掇亦刺也汉书作刺熬张晏云熬灼也说文云烧也应劓云以铁刺之】身无可击者终不复言吕后数言张王以鲁元公主故不宜有此上怒曰使张敖据天下岂少而女乎不听廷尉以贯高事辞闻上曰壮士谁知者以私问之【集解瓚曰以私情相问】中大夫泄公曰【正义泄姓也史有泄私】臣之邑子素知之此固赵国立名义不侵为然诺者也上使泄公持节问之篋輿前【集解徐广曰篋音鞭輿案韦昭曰輿如今輿牀人輿以行索隐服?云音编编竹木如今峻可以粪除也何休注公羊笄音峻笄者竹篋一名编齐鲁已北名为笄郭璞三苍注云篋輿土器】仰视曰泄公邪泄公劳苦如生平驩与语问张王果有计谋不高曰人情宁不各爱其父母妻子乎今吾三族皆以论死岂以王易吾亲哉顾为王实不反独吾等为之具道本指所以为者王不知状於是泄公入具以报上乃赦赵王上贤贯高为人能立然诺使泄公具告之曰张王已出因赦贯高贯高喜曰吾王审出乎泄公曰然泄公曰上多足下故赦足下贯高曰所以不死一身无余者白张王不反也今王已出吾责已塞死不恨矣且人臣有篡杀之名何面目复事上哉纵上不杀我我不愧於心乎乃仰绝吭遂死【集解韦昭曰吭咽也索隐苏林云吭颈大脉也俗所谓胡脉音户郎反萧该或音下浪反】当此之时名闻天下张敖已出以尚鲁元故封为宣平侯【索隐韦昭曰尚奉也不敢言取崔浩云奉事公主小顔云尚配也易得尚於中行王弼亦以尚为配恐非其义】於是上贤张王诸客以钳奴从张王入关无不为诸侯相郡守者及孝惠高后文帝孝景时张王客子孙皆得为二千石张敖高后六年薨【集解駰案关中记曰张敖冢在安陵东正义鲁元公主墓在咸阳县西北二十五里次东有张敖冢与公主同域又张耳墓在咸阳县东三十三里】子偃为鲁元王以母吕后女故吕后封为鲁元王【索隐案谓偃以其母号而封也】元王弱兄弟少乃封张敖他姬子二人壽为乐昌侯【集解徐广曰汉纪张酺传曰张敖之子壽封乐昌侯食细阳之池阳乡也】侈为信都侯高后崩诸吕无道大臣诛之而废鲁元王及乐昌侯信都侯孝文帝即位复封故鲁元王偃为南宫侯续张氏【集解駰案张敖谥武侯张偃之孙有罪絶信都侯名侈乐昌侯名壽】太史公曰张耳陈余世传所称贤者其宾客厮役莫非天下俊杰所居国无不取卿相者然张耳陈余始居约时【集解駰案汉书音义曰在贫贱时也】相然信以死岂顾问哉【索隐葛洪要用字苑云然犹尔也谓相和同诺者信也谓然诺相信虽死不顾也】及据国争权卒相灭亡何乡者相慕用之诚後相倍之戾也岂非以利哉【索隐有本作私利交汉书作势利交故廉颇传云天下以市道交君有势则从君无势则去此固其理也】名誉虽高宾客虽盛所由殆与太伯延陵季子异矣

【索隐述赞曰张耳陈余天下豪俊忘年羈旅刎颈相信耳围钜鹿余兵不进张既望深陈乃去印势利倾夺隙末成衅】

史记卷八十九

史记卷八十九考证

张耳陈余列传乃卒为请决嫁之张耳索隐谓女请父客为决絶其夫而改嫁张耳○余有丁曰卒为请决乃父客为之注误李光縉曰去抵父客云者妇人谓嫁曰归则视归宁为客也下父客客字疑衍必若注所云则方丧其夫遽去抵父之宾客何说且是女之择贤夫必与凡女不同卒为请决云者父为请之张耳如吕公请之沛公愿为季箕帚妾者是也【臣照】按乱世何事不有史明曰逃去其夫去抵父客父客为之请决去其夫而嫁张耳亦何用致疑别生支节哉

恐天下解也正义解纪卖反言天下诸侯见陈胜称王王陈皆懈惰不相从也○凌稚隆曰按汉书注解谓离散其心也

头会箕歛集解駟按汉书音义曰家家人头数出谷以箕歛之○此段集解明有脱落汉书注服?曰吏到其家人人头数出谷以箕歛之

况以两贤王左提右挈而责杀王之罪徐广曰平原君传曰事成执右券以责也券契义同耳○【臣照】按左提右挈谓彼此扶助犹云相救若左右手也徐广以挈为契未详何本

要之置○【臣照】按观索隐语则置下有一厕字汉书亦有厕字

史记卷八十九考证

卷九十

钦定四库全书

史记卷九十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

魏豹彭越列传第三十

魏豹者故魏诸公子也其兄魏咎故魏时封为甯陵君【索隐案彭越传云魏豹魏王咎从弟真魏後也晋灼云甯陵梁国县也即今宁陵是】秦灭魏迁咎为家人陈胜之起王也【正义王于放反】咎往从之陈王使魏人周市徇魏地魏地已下欲相与立周市为魏王周市曰天下昏乱忠臣乃见【索隐老子曰国家昏乱有忠臣此取以为说也】今天下共畔秦其义必立魏王後乃可齐赵使车各五十乘立周市为魏王市辞不受迎魏咎於陈五反陈王乃遣立咎为魏王【集解徐广曰元年十二月也】章邯已破陈王乃进兵击魏王於临济【正义故城在淄州高苑县北二里本汉县】魏王乃使周市出求救於齐楚齐楚遣项它田巴将兵随市救魏【索隐案项它楚将田巴齐将也正义它徒多反】章邯遂击破杀周市等军围临济咎为其民约降约定咎自烧杀魏豹亡走楚【集解徐广曰二年六月】楚怀王予魏豹数千人复徇魏地项羽已破秦降章邯豹下魏二十余城立豹为魏王豹引精兵从项羽入关汉元年项羽封诸侯欲有梁地乃徙魏王豹於河东都平阳【正义今晋州】为西魏王汉王还定三秦渡临晋【正义临晋在同州朝邑县界】魏王豹以国属焉遂从击楚於彭城汉败还至荥阳豹请归视亲病至国即絶河津畔汉王闻魏豹反方东忧楚未及击谓酈生日缓颊往说魏豹能下之吾以万户封若酈生说豹豹谢曰人生一世间如白驹过隙耳【索隐庄子云无异骐驎之驰过隙则谓马也小颜云白驹谓日影也隙壁隙也以言速疾若日影过壁隙也】今汉王慢而侮人骂詈诸侯羣臣如骂奴耳非有上下礼节也吾不忍复见也於是汉王遣韩信击虏豹於河东【集解徐广曰二年九月也】传诣荥阳以豹国为郡【集解駰案高祖本纪曰置三郡河东太原上党】汉王令豹守荥阳楚围之急周苛遂杀魏豹彭越者昌邑人也字仲【正义汉武更山阳为昌邑国有梁丘乡梁丘故城在曹州城武县东北三十三里】常渔钜野泽中为羣盗陈胜项梁之起少年或谓越曰诸豪杰相立畔秦仲可以来亦效之彭越曰两龙方鬪且待之居岁余泽间少年相聚百余人往从彭越曰请仲为长越谢曰臣不愿与诸君少年强请乃许与期旦日日出会後期者斩【索隐旦日谓明日之朝日出时也】旦日日出十余人後後者至日中於是越谢曰臣老诸君强以为长今期而多後不可尽诛诛最

後者一人令校长斩之皆笑曰何至是请後不敢於是越乃引一人斩之设坛祭乃令徒属徒属皆大惊畏越莫敢仰视乃行畧地收诸侯散卒得千余人沛公之从砀北击昌邑【正义砀唐朗反宋州砀山县】彭越助之昌邑未下沛公引兵西彭越亦将其衆居钜野中收魏散卒项籍入关王诸侯还归彭越衆万余人母所属汉元年秋齐王田荣畔项王汉乃使人赐彭越将军印使下济陰以击楚楚命萧公角【正义萧县令楚县令称公角名】将兵击越越大破楚军汉王二年春与魏王豹及诸侯东击楚彭越将其兵三万余人归汉於外黄汉王曰彭将军收魏地得十余城欲急立魏後今西魏王豹亦魏王咎从弟也真魏後乃拜彭越为魏相国擅将其兵畧定梁地【索隐擅犹专也】汉王之败彭城解而西也彭越皆复亡其所下城独将其兵北居河上【正义滑州河上】汉王三年彭越常往来为汉游兵击楚絶其後粮於梁地汉四年冬项王与汉王相距荥阳彭越攻下睢阳外黄十七城【正义睢阳宋州宋城也外黄在汴州雍丘县东也】项王闻之乃使曹咎守成皐【正义河南府汜水是】自东收彭越所下城邑皆复为楚【正义为于伪反】越将其兵北走谷城【正义在齐州东阿县东二十六里是】汉五年秋项王之南走阳夏【正义夏古雅反陈州太康县也】彭越复下昌邑旁二十余城得谷十余万斛以给汉王食汉王败使使召彭越并力击楚越曰魏地初定尚畏楚未可去汉王追楚为项籍所败固陵【正义固陵地名在陈州宛丘县西北三十二里】乃谓留侯曰诸侯兵不从为之奈何留侯曰齐王信之立非君王之意信亦不自坚彭越本定梁地功多始君王以魏豹故拜彭越为魏相国今豹死母後且越亦欲王而君王不蚤定与此两国约即胜楚睢阳以北至谷城皆以王彭相国【正义从宋州已北至郢州以西曹濮汴滑并与彭越】从陈以东傅海【集解駟案傅音附正义从陈潁州北以东亳泗徐淮北之地东至海并淮南淮陰之邑尽与韩信韩信又先有故齐旧地】与齐王信齐王信家在楚此其意欲复得故邑君王能出捐此地许二人二人今可致即不能事未可知也於是汉王乃发使使彭越如留侯策使者至彭越乃悉引兵会垓下【正义在亳州也】遂破楚五年项籍已死春立彭越为梁王都定陶【正义曹州】六年朝陈九年十年皆来朝长安十年秋陈豨反代地高帝自往击至邯鄲徵兵梁王梁王称病使将将兵诣邯鄲高帝怒使人让梁王梁王恐欲自往谢其将扈辄曰王始不往见让而往往则为禽矣不如遂发兵反梁王不听称病梁王怒其太仆欲斩之太仆亡走汉告梁王与扈辄谋反於是上使使掩梁王梁王不觉捕梁王囚之雒阳有司治反形已具【集解张晏曰扈辄劝越反不听而云反形已具有司非也瓚曰扈辄劝越反而越不诛辄自反形已具】请论如法上赦以为庶人传处蜀青衣【集解文潁曰青衣县名在蜀瓚曰今汉嘉是也索隐苏林云县名今为临邛瓚说为是】西至郑【索隐地理志郑属京兆正义华州】逢吕后从长安来欲之雒阳道见彭王彭王为吕后泣涕自言无罪愿处故昌邑吕后许诺与俱东至雒阳吕后白上曰彭王壮士今徙之蜀此自遗患【正义遗唯季反】不如遂诛之妾谨与俱来於是吕后乃令其舍人告彭越复谋反廷尉王恬关奏请族之上乃可遂夷越宗族国除

太史公曰魏豹彭越虽故贱然已席卷千里【正义言魏地濶千里如席卷舒】南面称孤喋血乘胜日有闻矣【集解徐广曰一作喋韩传亦有喋血语也索隐音喋喋犹践也杀敌践血而行孝文纪喋血京师是也】怀畔逆之意及败不死而虏囚身被刑戮何哉中材已上且羞其行况王者乎彼无异故智畧絶人独患无身耳得摄尺寸之柄其云蒸龙变欲有所会其度以故幽囚而不辞云

【索隐述赞曰魏咎兄弟因时而王豹後属楚其国遂亡仲起昌邑归汉外黄往来声援再续军粮徵兵不往菹醢何伤】

史记卷九十

史记卷九十考证

魏豹彭越列传封为甯陵君晋灼云甯陵梁国县也即今宁陵是○【臣照】按汉地理志陈留郡有宁陵县孟康曰故葛伯国今葛乡是後汉郡国志梁国宁陵故属陈留晋地理志梁国宁陵故葛伯国水经注汧水又东迳寧陵县之沙阳亭北故沙随国矣春秋左传成公十六年秋会於沙随谋伐郑也杜预释地曰在梁国宁陵县北沙阳亭是也世以为堂城非也又曰汧水又东迳葛城北故葛伯之国也葛於六国属魏魏襄王以封公子无咎号信陵君其地葛乡即是城也在宁陵县西十里今按魏咎之封不见於战国策水经注所云公子无咎者疑即魏咎信陵或宁陵之误也

史记卷九十考证

卷九十一

钦定四库全书

史记卷九十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

黥布列传第三十一

黥布者六人也姓英氏【索隐地理志庐江有六县苏林曰今为六安也布本姓英英国名也咎繇之後布以少时有人相云当刑而王故汉杂事云布改姓黥以厌当之也正义故六城在壽州安丰县西南百三十三里按黥布封淮南王都六即此城又春秋传六与蓼咎繇之後或封於英六盖英後改为蓼也】秦时为布衣少年有客相之曰当刑而王及壮坐法黥布欣然笑曰人相我当刑而王几是乎【集解徐广曰几一作岂駰谓几近也索隐臣瓚音机楚汉春秋作岂是乎故徐广云一作岂刘氏音祈祈者语辞也义亦通】人有闻者共俳笑之【索隐谓衆共以俳优辈笑之】布已论输丽山【正义言布论决受黥竟丽山作陵也时会稽郡输身徒】丽山之徒数十万人布皆与其徒长豪杰交通迺率其曹偶亡之江中为羣盗【索隐曹辈也偶类也谓徒之辈类】陈胜之起也布迺见番君与其衆叛秦聚兵数千人番君以其女妻之章邯之灭陈胜破吕臣军布乃引兵北击秦左右校破之清波引兵而东闻项梁定江东会稽【正义时会稽郡所理在吴阖闾城中】涉江而西陈婴以项氏世为楚将迺以兵属项梁渡淮南英布蒲将军亦以兵属项梁项梁涉淮而西击景驹秦嘉等布常冠军项梁至薛【正义薛古城在徐州滕县界也】闻陈王定死迺立楚怀王项梁号为武信君英布为当阳君【正义南郡当阳县也】项梁败死定陶怀王徙都彭城诸将英布亦皆保聚彭城当是时秦急围赵赵数使人求救怀王使宋义为上将范增为末将项籍为次将英布蒲将军皆为将军悉属宋义北救赵及项籍杀宋义於河上怀王因立籍为上将军诸将皆属项籍项籍使布先涉渡河击秦布数有利籍迺悉引兵涉河从之遂破秦军降章邯等楚兵常胜功冠诸侯诸侯兵皆以服属楚者以布数以少败衆也项籍之引兵西至新安【正义新安故城在河南府浍池县东二十二里】又使布等夜击坑章邯秦卒二十余万人至关不得入又使布等先从间道破关下军【索隐邹氏云间音闲闲谓私也今间音纪菟反间道即他道也犹若反间之义】遂得入至咸阳布常为军锋【索隐案汉书作楚军前簿簿者卤簿】项王封诸将立布为九江王都六汉元年四月诸侯皆罢戏下各就国项氏立怀王为义帝徙都长沙迺陰令九江王布等行击之其八月布使将击义帝追杀之郴县【正义郴丑林反今郴州有义帝冢及

祠】汉二年齐王田荣畔楚项王往击齐徵兵九江九江王布称病不往遣将将数千人行汉之败楚彭城布又称病不佐楚项王由此怨布数使使者诮让召布【集解駰案汉书音义诮责也】布愈恐不敢往项王方北忧齐赵西患汉所与者独九江王又多布材欲亲用之以故未击汉三年汉王击楚大战彭城不利出梁地至虞【正义今宋州虞城也】谓左右曰【索隐案谓随何】如彼等者无足与计天下事谒者随何进曰不审陛下所谓汉王曰孰能为我使淮南令之发兵倍楚留项王於齐数月我之取天下可以百全随何曰臣请使之廼与二十人俱使淮南至因太宰主之【集解駰案汉书音义曰淮南太宰作内主也韦昭曰主舍也索隐太宰掌膳食之官】三日不得见随何因说太宰曰王之不见何必以楚为强以汉为弱此臣之所以为使使何得见言之而是邪是大王所欲闻也言之而非邪使何等二十人伏斧质淮南市以明王倍汉而与楚也太宰廼言之王王见之随何曰汉王使臣敬进书大王御者窃怪大王与楚何亲也淮南王曰寡人北乡而臣事之随何曰大王与项王俱列为诸侯北乡而臣事之必以楚为强可以托国也项王伐齐身负板筑【集解李奇曰板墙板也筑杵也】以为士卒先大王宜悉淮南之衆身自将之为楚军前锋今廼发四千人以助楚夫北面而臣事人者固若是乎夫汉王战於彭城项王未出齐也大王宜骚淮南之兵【集解駰案骚音扫】渡淮日夜会战彭城下大王抚万人之衆无一人渡淮者垂拱而观其孰胜夫托国於人者固若是乎大王提空名以乡楚而欲厚自托臣窃为大王不取也然而大王不背楚者以汉为弱也夫楚兵虽强天下负之不义之名【索隐负犹被也以不义被其身】以其背盟约而杀义帝也然而楚王恃战胜自强汉王收诸侯还守成臯荥阳下蜀汉之粟深沟壁垒分卒守徼乘塞【索隐徼谓边境亭鄣以徼绕边陲常守之也乘者登也登塞垣而守之】楚人还兵间以梁地深入敌国八九百里【集解张晏曰羽从齐还当经梁地八九百里廼得羽地索隐案服虔曰梁在楚汉之中央】欲战则不得攻城则力不能老弱转粮千里之外楚兵至荥阳成臯汉坚守而不动进则不得攻退则不能解故曰楚兵不足恃也【集解徐广曰恃一作罢言其已困不足复苦也索隐案汉书作罢音皮】使楚胜汉则诸侯自危惧而相救夫楚之强适足以致天下之兵耳故楚不如汉其势易见也今大王不与万全之汉而自托於危亡之楚臣窃为大王惑之臣非以淮南之兵足以亡楚也夫大王发兵而倍楚项王必留数月汉之取天下可以万全臣请与大王提劔而归汉汉王必裂地而封大王又况淮南淮南必大王有也故汉王敬使使臣进愚计愿大王之留意也淮南王曰请奉命陰许畔楚与汉未敢泄也楚使者在【集解文穎曰在淮南王所】方急责英布发兵舍传舍随何直入坐楚使者上坐曰九江王已归汉楚何以得发兵布愕然楚使者起何因说布曰事以构【索隐构成也】可遂杀楚使者无使归而疾走汉并力【索隐走音奏向也】布曰如使者教因起兵而击之耳於是杀使者因起兵而攻楚楚使项声龙且攻淮南项王留而攻下邑【正义宋州碭山县】数月龙且击淮南破布军布欲引兵走汉恐楚王杀之故间行与何俱归汉淮南王至【集解徐广曰三年十二月】上方踞牀洗召布入见布甚大怒悔来欲自杀出就舍帐御饮食从官如汉王居布又大喜过望【正义高祖以布先分为王恐其自尊大故峻礼令布折服已而美其帷帐厚其饮食多其从官以悦其心权道也】於是廼使人入九江楚已使项伯收九江兵尽杀布妻子布使者颇得故人幸臣将衆数千人归汉汉益分布兵而与俱北收兵至成臯四年七月立布为淮南王与击项籍汉五年布使人入九江得数县六年布与刘贾入九江诱大司马周殷周殷反楚遂举九江兵与汉击楚破之垓下项籍死天下定上置酒上折随何之功谓何为腐儒为天下安用腐儒【索隐腐音辅谓之腐儒言如腐败之物不任用也】随何跪曰夫陛

下引兵攻彭城楚王未去齐也陛下发步卒五万人骑五千能以取淮南乎上曰不能随何曰陛下使何与二十人使淮南至如陛下之意是何之功贤於步卒五万人骑五千也然而陛下谓何腐儒为天下安用腐儒何也上曰吾方图子之功迺以随何为护军中尉布遂剖符为淮南王都六九江庐江衡山豫章郡皆属布七年朝陈八年朝雒阳九年朝长安十一年高后诛淮陰侯布因心恐夏汉诛梁王彭越醢之盛其醢徧赐诸侯至淮南淮南王方猎见醢因大恐陰令人部聚兵伺旁郡警急【集解张晏曰欲有所会】布所幸姬疾请就医医家与衆大夫贲赫对门【集解徐广曰贲音肥索隐人姓名也】姬数如医家贲赫自以为侍中迺厚馈遗从姬饮医家姬侍王从容语次誉赫长者王怒曰汝安从知之具说状王疑其与乱赫恐称病王愈怒欲捕赫赫言变事乘传诣长安布使人追不及赫至上变言布谋反有端可先未发诛也上读其书语萧相国相国曰布不宜有此恐仇怨妄诬之请系赫使人微【集解駰案一作徵】验淮南王淮南王布见赫以罪亡上变固已疑其言国陰事汉使又来颇有所验遂族赫家发兵反反书闻上迺赦贲赫以为将军上召诸将问曰布反为之奈何皆曰发兵击之坑竖子耳何能为乎汝淮陰侯滕公召故楚令尹问之令尹曰是固当反滕公曰上裂地而王之疏爵而贵之【集解駰案汉书音义曰疏分也禹决河疏河是也索隐尚书曰列爵惟五分土惟三按裂地是对文故知疏即分也】南面而立万乘之主其反何也令尹曰往年杀彭越前年杀韩信【集解駰案往年前年同耳使文相避也】言此三人者同功一体之人也自疑祸及身故反耳滕公言之上曰臣客故楚令尹薛公者其人有筹策之计可问上迺召见问薛公薛公对曰布反不足怪也使布出於上计山东非汉之有也出於中计胜败之数未可知也出於下计陛下安枕而卧矣上曰何谓上计令尹对曰东取吴【正义荆王刘贾都吴苏州阖闾城也】西取楚【正义楚王刘交都徐州下邳】并齐取鲁传檄燕赵固守其所山东非汉之有也何谓中计东取吴西取楚并韩取魏据敖仓之粟【索隐案太康地记云秦建敖仓於成臯又立庾故亦云敖庾也】塞成臯之口胜败之数未可知也何谓下计东取吴西取下蔡【正义古州来国】归重於越身归长沙【正义今潭州】陛下安枕而卧汉无事矣【集解駰案桓谭新论曰世有围碁之戏或言是兵法之类也及为之上者远碁疏张置以会围因而成多得道之胜中者则务相絶遮要以争便求利故胜负狐疑须计数而定下者则守边隅趋作罽以自生於小地然亦必不如察薛公之言上计云取吴楚并齐鲁及燕赵者此广道地之谓中计云取吴楚并韩魏塞成臯据敖仓此趋遮要争利者也下计云取吴下蔡据长沙以临越此守边隅趋作罽者也索隐罽音乌卦反】上曰是计将安出令尹对曰出下计上曰何谓废上中计而出下计令尹曰布故丽山之徒也自致万乘之主此皆为身不顾後为百姓万世虑者也故曰出下计上曰善封薛公千户【索隐刘氏云薛公得封千户盖关内侯也】迺立皇子长为淮南王上遂发兵自将东击布布之初反谓其将曰上老矣厌兵必不能来使诸将诸将独患淮陰彭越今皆已死余不足畏也故遂反果如薛公筹之东击荆荆王刘贾走死富陵【正义故城在楚州盱眙县东北六十里】尽劫其兵渡淮击楚楚发兵与战徐僮间【集解如淳曰地名也索隐案地理志临淮有徐县僮县正义杜预云徐在下邳僮县东括地志云大徐城在泗州徐城县北四十里古徐国也】为三军欲以相救为奇或说楚将曰布善用兵民素畏之且兵法诸侯战其地为散地【集解駰案汉书音义曰谓散灭之地正义魏武帝注孙子曰卒恋土地道近而易散败】今别为三彼败吾一军余皆走安能相救不听布果破其一军其二军散走遂西与上兵遇蕲西会甄【索隐上古外反下持瑞反韦昭云蕲之乡名汉书作□应劭音保非也正义蕲音机沛郡蕲城也甄遂瑞反】布兵精甚上迺壁庸城【集解邓

展曰地名也】望布军置陈如项籍军上恶之与布相望见遥谓布曰何苦而反布曰欲为帝耳上怒骂之遂大战布军败走渡淮数止战不利与百余人走江南布故与番君婚以故长沙哀王【集解徐广曰表云成王臣吴芮之子也駟案晋灼曰芮之孙固或曰是成王非哀王也传误也】使人给布伪与亡诱走越故信而随之番阳【索隐番阳鄱县之乡】番阳人杀布兹乡民田舍【正义英布冢在饶州鄱阳县北百五十二里十三步】遂灭黥布立皇子长为淮南王封贲赫为期思侯【正义期思故城在光州固始县界】诸将率多以功封者【集解汉书曰将封者六人】

太史公曰英布者其先岂春秋所见楚灭英六皐陶之後哉身被刑法何其拔兴之暴也【索隐拔音白曷反疾也】项氏之所坑杀人以千万数而布常为首虐功冠诸侯用此得王亦不免於身为世大戮祸之兴自爱姬殖妒媚生患竟以灭国【集解駟案媚音冒?亦妒也索隐汉书外戚传亦云成结宠妾妒媚之诛又论衡云妬夫媚妇则媚是妬之别名今原英布之诛为疑贲赫与其姬妃有乱故至灭国所以不得言妬媚是媚也一云男妬曰媚】

【索隐述赞曰九江初筮当刑而王既免徒中聚盗江上再雄楚卒频破秦将病为羽疑归受汉杖贲赫见毁卒致无妄】

史记卷九十一

史记卷九十一考证

黥布列传共俳笑之索隐谓衆共以俳优辈笑之○【臣照】按急就章云倡优俳笑观倚庭顔师古注曰俳谓优之?狎者也言相与谐谑而非笑之非以俳优辈相目也

聚兵数千人○监本脱人字今添

淮南王曰○顾炎武曰随何说英布当书九江王不当书淮南王归汉之後始立为淮南王也盖采之诸书其称未一

言此三人者同功一体之人也○【臣照】按言字疑衍盖从上信字讹写也

史记卷九十一考证

卷九十二

钦定四库全书

史记卷九十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

淮陰侯列传第三十二

淮陰侯韩信者淮陰人也【正义楚州淮陰县也】始为布衣时贫无行不得推择为吏【集解李奇曰无善行可推举选择】又不能治生商贾常从人寄食饮人多厌之者常数从其下乡南昌亭长寄食【集解张晏曰下乡县属淮陰也索隐案楚汉春秋南昌作新昌亭长者主亭之吏也】数月亭长妻患之乃晨炊蓐食【集解张晏曰未起而牀蓐中食】食时信往不为具食信亦知其意怒竟絶去信钓於城下【正义淮陰城北临淮水】诸母漂【集解韦昭曰以水击絮为漂故曰漂母】有一母见信饥饭信竟漂数十日信喜谓漂母曰吾必有以重报母母怒曰大丈夫不能自食吾哀王孙而进食【集解苏林曰如言公子也索隐刘德曰秦末多失国言王孙公子尊之也张晏曰字王孙非也】岂望报乎淮陰屠中少年有侮信者曰若虽长大好带刀劒中情怯耳衆辱之曰信能死刺我不能死出我袴下【集解徐广曰袴一作胯胯股也音同又云汉书作跨同耳索隐胯音枯化反然寻此文作袴欲依字读何为不通袴下即胯下也何必须要作胯下】於是信孰视之俛出袴下蒲伏【正义俛音俯伏蒲北反】一市人皆笑信以为怯及项梁渡淮信仗劒从之居戲下【集解徐广曰戏一作麾】无知名项梁败又属项羽羽以为郎中数以策干项羽羽不用汉王之入蜀信亡楚归汉未得知名为连敖【集解徐广曰典客也索隐李奇云楚官名张晏曰司马也】坐法当斩其辈十三人皆已斩次至信信乃仰视适见滕公曰上不欲就天下乎何为斩壮士滕公奇其言壮其貌释而不斩与语大悦之言於上上拜以为治粟都尉上未之奇也信数与萧何语何奇之至南郑诸将行道亡者数十人信度何等已数言上上不我用即亡何闻信亡不及以闻自追之人有言上曰丞相何亡上大怒如失左右手居一二日何来谒上上且怒且喜骂何曰若亡何也何曰臣不敢亡也臣追亡者上曰若所追者谁何曰韩信也上复骂曰诸将亡者以十数公无所追追信诈也何曰诸将易得耳至如信者国士无双王必欲长王汉中无所事信【集解文穎曰事犹业也张晏曰无事用信】必欲争天下非信无所与计事者顾王策安所决耳王曰吾亦欲东耳安能郁郁久居此乎何曰王计必欲东能用信信即留不能用信终亡耳王曰吾为公以为将何曰虽为将信必不留王曰以为大将何曰幸甚於是王欲召信拜之何曰王素

慢无礼今拜大将如呼小儿耳此乃信所以去也王必欲拜之择良日斋戒设坛塲具礼乃可耳王许之诸将皆喜人人各自以为得大将至拜大将乃信也一军皆惊信拜礼毕上坐王曰丞相数言将军将军何以教寡人计策信谢因问王曰今东乡争权天下岂非项王邪汉王曰然曰大王自料勇悍仁强孰与项王汉王默然良久曰不如也信再拜贺曰惟信亦以为大王不如也然臣尝事之请言项王之为人也项王暗恶叱咤千人皆废【集解晋灼曰废不收也索隐暗於鸩反恶乌路反叱昌栗反咤卓嫁反或作吒暗恶怀怒气叱咤发怒声孟康曰废伏也张晏曰废偃也】然不能任属贤将此特匹夫之勇耳项王见人恭敬慈爱言语呕呕【集解駰案音匈于反索隐呕音吁汉书作姁姁邓展曰姁姁和好貌】人有疾病涕泣分食饮至使人有功当封爵者印刳弊忍不能予【集解駰案汉书音义曰不忍授】此所谓妇人之仁也项王虽霸天下而臣诸侯不居关中而都彭城有背义帝之约而以亲爱王诸侯不平诸侯之见项王迁逐义帝置江南亦皆归逐其主而自王善地项王所过无不残灭者天下多怨百姓不亲附特劫於威强耳名虽为霸实失天下心故曰其强易弱今大王诚能反其道任天下武勇何所不诛以天下城邑封功臣何所不服以义兵从思东归之士何所不散【索隐刘氏云用东归之兵击东方之敌此敌无不散败也】且三秦王为秦将将秦子弟数岁矣所杀亡不可胜计又欺其衆降诸侯至新安项王诈坑秦降卒二十余万唯独邯欣翳得脱秦父兄怨此三人痛入骨髓今楚强以威王此三人秦民莫爱也大王之入武关秋毫无所害【索隐案秋毫秋乃成王逸注楚词云鋭毛为毫夏落秋生也】除秦苛法与秦民约法三章耳秦民无不欲得大王王秦者於诸侯之约大王当王关中关中民咸知之大王失职入汉中秦民无不恨者今大王举而东三秦可传檄而定也【索隐案说文云檄二尺书也此云传檄谓为檄书以责所伐者】於是汉王大喜自以为得信晚遂听信计部署诸将所击八月汉王举兵东出陈仓【正义汉王从关北出岐州陈仓县】定三秦汉二年出关【正义出函谷关】收魏河南韩殷王皆降合齐赵共击楚四月至彭城汉兵败散而还信复收兵与汉王会荥阳复击破楚京索之间以故楚兵卒不能西汉之败郤彭城【正义兵败散彭城而却退】塞王欣翟王翳亡汉降楚齐赵欲反汉与楚和六月魏王豹谒归视亲疾至国即絶河关【索隐今蒲津关】反汉与楚约和汉王使酈生说豹不下其八月以信为左丞相击魏魏王盛兵蒲坂塞临晋【索隐塞音先得反临晋县名在河东之东岸对旧关也】信乃益为疑兵【集解駰案汉书音义曰益张旌旗以疑敌者】陈船欲渡临晋【索隐刘氏云陈船地名在旧关之西今之朝邑非也案京兆有船司空县不名陈船陈船者陈列船艘欲渡河也】而伏兵从夏阳以木罌罌渡军【集解徐广曰罌一作缶服?曰以木押缚罌罌以渡韦昭曰以木为器如罌罌以渡军无船且尚密也正义按韩信诈陈列船艘於临晋欲渡河即此从夏阳木押罌罌度军袭安邑临晋同州东朝邑界夏阳在同州北渭城界】袭安邑【正义安邑故城在绛州夏县东北十五里】魏王豹惊引兵迎信信遂虏豹【索隐刘氏云夏阳旧无船豹不备之而防临晋耳今安邑被袭故豹遂降也】定魏为河东郡【正义今安邑县故城】汉王遣张耳与信俱引兵东北击赵代後九月破代兵禽夏说阼与【集解徐广曰音余駰案李奇曰夏说代相也索隐司马彪郡国志上党沾县有关与聚阼音曷又音鄢与音余又音预沾音他庶反正义阼与聚城在潞州铜鞮县西北二十里】信之下魏破代汉辄使人收其精兵诣荥阳以距楚信与张耳以兵数万欲东下井陘击赵【索隐案地理志常山石邑县井陘山在西又穆天子传云至于陉山之隧升于三道之磴是也】赵王成安君陈余闻汉且袭之也聚兵井陘口【正义井陘故关在并州石艾县东十八里即井陘口】号称二十万广武君李左车说成安君曰闻汉

将韩信涉西河虜魏王禽夏说新喋血阙与【索隐喋旧音?非也案陈汤传喋血万里之外也如淳云杀人血流滂沱也韦昭音徒协反】今乃辅以张耳议欲下赵此乘胜而去国远鬪其锋不可当臣闻千里馈粮士有饥色樵苏後?【集解駟案汉书音义曰樵取薪也苏取草也】师不宿饱今井陘之道车不得方轨骑不得成列行数百里其势粮食必在其後愿足下假臣奇兵三万人从间路絶其辎重足下深沟高垒坚营勿与战彼前不得鬪退不得还吾奇兵絶其後使野无所掠不至十日而两将之头可致於戏下愿君留意臣之计否必为二子所禽矣成安君儒者也常称义兵不用诈谋奇计曰吾闻兵法十则围之倍则战之今韩信兵号数万其实不过数千能千里而袭我亦以罢极今如此避而不击後有大者何以加之则诸侯谓吾怯而轻我【集解駟案轻我伐我一本作轻来伐我】伐我不听广武君策广武君策不用韩信使人间视知其不用还报则大喜乃敢引兵遂下【正义引兵入井陘狭道出赵】未至井陘口三十里止舍夜半传发【集解駟案汉书音义曰传令军中使发】选轻骑二千人持一赤帜从间道蓐山而望赵军【集解如淳曰蓐音蔽依山自覆蔽索隐案谓令从间道小路向前望见陈余军即住仍须隐山自蔽勿令赵军知也蔽者盖覆也楚汉春秋作卑山汉书作算山说文云算蔽也从竹卑声】诫曰赵见我走必空壁逐我若疾入赵壁拔赵帜立汉赤帜令其裨将传飧曰今日破赵会食【集解如淳曰小饭曰飧言破赵後乃当共饱食也】诸将皆莫信详应曰诺谓军吏曰赵已先据便地为壁且彼未见吾大将旗鼓未肯击前行恐吾至阻险而还信乃使万人先行出背水阵【正义绵蔓水一名阜将一名回星自并州流入井陘界即信背水阵?之死地即此水也】赵军望见而大笑平旦信建大将之旗鼓鼓行出井陘口赵开壁击之【正义恒州鹿泉县即六国时赵壁也】大战良久於是信张耳详弃鼓旗走水上军水上军开入之复疾战赵果空壁争汉鼓旗逐韩信张耳韩信张耳已入水上军军皆殊死战不可败信所出奇兵二千骑共一赵空壁逐利则驰入赵壁皆拔赵旗立汉赤帜二千赵军已不胜不能得信等欲还归壁壁皆汉赤帜而大惊以为汉皆已得赵王将矣兵遂乱遁走赵将虽斩之不能禁也於是汉兵夹击大破虜赵军斩成安君泚水上禽赵王歇信乃令军中毋杀广武君有能生得者购千金於是有缚广武君而致戏下者信乃解其缚东乡坐西乡对师事之诸将效首虜休毕贺【索隐如淳云效致也晋灼曰效数也郑玄注礼效犹呈见也】因问信曰兵法右倍山陵前左水泽今者将军令臣等反背水阵曰破赵会食臣等不服然竟以胜此何术也信曰此在兵法顾诸君不察耳兵法不曰?之死地而後生置之亡地而後存且信非得素拊循士大夫也此所谓驱市人而战之其势非置之死地使人人自为战今予之生地皆走宁尚可得而用之乎诸将皆服曰善非臣所及也於是信问广武君曰仆欲北攻燕东伐齐何若而有功广武君辞谢曰臣闻败军之将不可以言勇亡国之大将不可以图存今臣败亡之虜何足以权大事乎信曰仆闻之百里奚居虞而虞亡在秦而秦霸非愚於虞而智於秦也用与不用听与不听也诚令成安君听足下计若信者亦已为禽矣以不用足下故信得侍耳因固问曰仆委心归计愿足下勿辞广武君曰臣闻智者千虑必有一失愚者千虑必有一得故曰狂夫之言圣人择焉顾恐臣计未必足用愿效愚忠夫成安君有百战百胜之计一旦而失之军败鄙下【集解李奇曰鄙音隲今高邑是】身死泚上今将军涉西河【索隐此西河当冯翊也正义即同州龙门河从夏阳度者】虜魏王禽夏说阙与一举而下井陘不终朝破赵二十万衆诛成安君名闻海内威震天下农夫莫不辍耕释耒蓡衣甘食【索隐蓡邹氏音蓡美也恐灭亡不久故废止作业而事美衣甘食一曰蓡苟且也虑不图久故也汉书作美衣蓡食】倾耳以待命者【集解如淳曰恐灭亡不久故也】若此将军之所长也然而衆

劳卒罢其实难用今将军欲举倦罢之兵顿之燕坚城之下欲战恐久力不能拔情见势屈旷日粮竭而弱燕不服齐必距境以自强也燕齐相持而不下则刘项之权未有所分也若此者将军所短也臣愚窃以为亦过矣故善用兵者不以短击长而以长击短韩信曰然则何由广武君对曰方今为将军计莫如案甲休兵镇赵抚其孤百里之内牛酒日至以飨士大夫驩兵【集解駰案魏都赋曰肴驩顺时刘逵曰驩酒也索隐刘氏依刘逵作驩酒谓以酒食养兵士也案史记古释字皆如此岂亦谓以酒食驩兵士故字从酉乎】北首燕路【正义首音狩向也】而後遣辩士奉咫尺之书【正义咫八寸言其简牍或长尺也】暴其所长於燕【正义暴音仆】燕必不敢不听从燕已从使諠言者东告齐齐必从风而服虽有智者亦不知为齐计矣如是则天下事皆可图也兵固有先声而後实者此之谓也韩信曰善从其策发使使燕燕从风而靡乃遣使报汉因请立张耳为赵王以镇抚其国汉王许之乃立张耳为赵王楚数使奇兵渡河击赵赵王耳韩信往来救赵因行定赵城邑发兵诣汉楚方急围汉王於荥阳汉王南出之宛叶间【正义宛在邓州叶在许州】得黥布走入成皐楚又复急围之六月汉王出成皐东渡河独与滕公俱从张耳军修武至宿传舍晨自称汉使驰入赵壁张耳韩信未起即其卧内上夺其印符以麾召诸将易置之信耳起乃知汉王来大惊汉王夺两人军即令张耳备守赵地拜韩信为相国收赵兵未发者击齐【集解文颖曰谓赵人未尝见发者】信引兵东未渡平原【正义怀州有平原津】闻汉王使酈食其已说下齐韩信欲止范阳辩士蒯通说信曰将军受诏击齐而汉独发间使下齐宁有诏止将军乎何以得毋行也且酈生一士伏轼【集解韦昭曰轼今小车中隆起者】掉三寸之舌下齐七十余城将军将数万衆岁余乃下赵五十余城为将数岁反不如一竖儒之功乎於是信然之从其计遂渡河齐已听酈生即留纵酒罢备汉守御信因袭齐历下军【集解徐广曰济南历城县】遂至临菑齐王田广以酈生卖已乃亨之而走高密使使之楚求救韩信已定临菑遂东追广至高密西楚亦使龙且将号称二十万救齐齐王广龙且并军与信战未合人或说龙且曰汉兵远鬪穷战其锋不可当齐楚自居其地战兵易败散【正义近其室家怀顾望也】不如深壁令齐王使其信臣招所亡城亡城闻其王在楚来救必反汉汉兵二千里客居齐城皆反之其势无所得食可无战而降也龙且曰吾平生知韩信为人易与耳且夫救齐不战而降之吾何功今战而胜之齐之半可得何为止遂战与信夹潍水陈【集解徐广曰出东莞而东北流至北海都昌县入海索隐潍音维地理志潍水出琅邪箕县东北至都昌入海徐所引盖据水经与此小不同】韩信乃夜令人为万余囊满盛沙壅水上流引军半渡击龙且佯不胜还走龙且果喜曰固知信怯也遂追信渡水信使人决壅囊水大至龙且军大半不得渡即急击杀龙且龙且水东军散走齐王广亡去信遂追北至城阳【正义城阳雷泽县是在濮州东南九十一里】皆虏楚卒汉四年遂皆降平齐使人言汉王曰齐伪诈多变反覆之国也南边楚不为假王以镇之其势不定愿为假王便当是时楚方急围汉王於荥阳韩信使者至发书【集解张晏曰发信使者所齎书】汉王大怒骂曰吾困於此旦暮望若来佐我乃欲自立为王张良陈平蹶汉王足因附耳语曰汉方不利寧能禁信之王乎不如因而立善遇之使自为守不然变生汉王亦悟因复骂曰大丈夫定诸侯即为真王耳何以假为乃遣张良往立信为齐王【集解徐广曰四年二月】徵其兵击楚楚已亡龙且项王恐使盱眙人武涉往说齐王信【集解张华曰武涉墓在盱眙城东十五里】曰天下共若秦久矣相与戮力击秦秦已破计功割地分土而王之以休士卒今汉王复兴兵而东侵人之分夺人之地已破三秦引兵出关收诸侯之兵以东击楚其意非尽吞天下者不休其不知厌足如是甚也且汉王不可必身居项王掌握中数矣【正

义数色庾反】项王怜而活之然得脱辄倍约复击项王其不可亲信如此今足下虽自以与汉王为厚交为之尽力用兵终为之所禽矣足下所以得须臾至今者以项王尚存也当今二王之事权在足下足下右投则汉王胜左投则项王胜项王今日亡则次取足下足下与项王有故何不反汉与楚连和三分天下王之今释此时而自必於汉以击楚且为智者固若此乎韩信谢曰臣事项王官不过郎中位不过执戟【集解张晏曰郎中宿卫执戟之人也】言不听画不用故倍楚而归汉汉王授我上将军印予我数万衆解衣衣我推食食我言听计用故吾得以至於此夫人深亲信我我倍之不祥虽死不易幸为信谢项王武涉已去齐人蒯通知天下权在韩信欲为奇策而感动之以相人说韩信曰仆尝受相人之术韩信曰先生相人何如对曰贵贱在於骨法忧喜在於容色成败在於决断以此参之万不失一韩信曰善先生相寡人何如对曰愿少间信曰左右去矣通曰相君之面不过封侯又危不安相君之背贵乃不可言【集解张晏曰背畔则大贵】韩信曰何谓也蒯通曰天下初发难也俊雄豪杰连号一呼天下之士云合雾集鱼鳞杂遝燿至风起当此之时忧在亡秦而已今楚汉分争使天下无罪之人肝胆涂地父子暴骸骨於中野不可胜数楚人起彭城转鬪逐北至於荥阳乘利席卷威震天下然兵困於京索之间迫西山而不能进者三年於此矣汉王将数十万之衆距巩雒阻山河之险一日数战无尺寸之功折北不救【集解张晏曰折衄败也北奔北】败荥阳伤成臯【集解张晏曰於成臯伤臂也臣瓚曰谓君折伤】遂走宛叶之间此所谓智勇俱困者也夫鋭气挫於阻塞而粮食竭於内府百姓罢极怨望容无所倚以臣料之其势非天下之贤圣固不能息天下之祸当今两主之命县於足下足下为汉则汉胜与楚则楚胜臣愿披腹心输肝胆效愚计恐足下不能用也诚能听臣之计莫若两利而俱存之三分天下鼎足而居其势莫敢先动夫以足下之贤圣有甲兵之衆据强齐从燕赵出空虚之地而制其後因民之欲西乡【正义乡音向齐国在东故曰西向也】为百姓请命【正义止楚汉之战鬪士卒亡故故云请命】则天下风走而响应矣孰敢不听割大弱强以立诸侯诸侯已立天下服听而归德於齐案齐之故有胶泗之地怀诸侯之德深拱揖让则天下之君王相率而朝於齐矣盖闻天与弗取反受其咎时至不行反受其殃愿足下熟虑之韩信曰汉王遇我甚厚载我以其车衣我以其衣食我以其食吾闻之乘人之车者载人之患衣人之衣者怀人之忧食人之食者死人之事吾岂可以乡利倍义乎蒯生曰足下自以为善汉王欲建万世之业臣窃以为误矣始常山王成安君为布衣时相与为刎颈之交後争张黡陈泽之事二人相怨常山王背项王奉项婴头而窜逃归於汉王汉王借兵而东下杀成安君泚水之南头足异处卒为天下笑此二人相与天下至驩也然而卒相禽者何也患生於多欲而人心难测也今足下欲行忠信以交於汉王必不能固於二君之相与也而事多大於张黡陈泽故臣以为足下必汉王之不危已亦误矣大夫种范蠡存亡越霸句践立功成名而身死亡野兽已尽而猎狗亨夫以交友言之则不如张耳之与成安君者也以忠信言之则不过大夫种范蠡之於句践也此二人者足以观矣愿足下深虑之且臣闻勇畧震主者身危而功盖天下者不赏臣请言大王功畧足下涉西河虏魏王禽夏说引兵下井陘诛成安君徇赵胁燕定齐南摧楚人之兵二十万东杀龙且西乡以报此所谓功无二於天下而畧不世出者也今足下戴震主之威挟不赏之功归楚楚人不信归汉汉人震恐足下欲持是安归乎夫势在人臣之位而有震主之威名高天下窃为足下危之韩信谢曰先生且休矣吾将念之後数日蒯通复说曰夫听者事之 也计者事之机也听过计失而能久安者鲜矣听不失一二者不可乱以言计不失本末者不可纷以辞夫随厮养之役者失万乘之权守儋石之禄者【集解晋灼曰扬雄方言海岱之间名器为

儋石石斗也苏林曰齐人名小罍为儋石如今受鲐鱼石罍不过一二石耳一说一儋与一斛之余索隐儋音都滥反石斗也苏林解为得之鲐音胎】阙卿相之位故知者决之断也疑者事之害也审毫厘之小计遗天下之大数智诚知之决弗敢行者百事之祸也故曰猛虎之犹豫不若蜂蛰之致螫【正义音适】骐驎之局蹐【集解徐广曰局一作蹐也】不如弩马之安步孟贲之狐疑不如庸夫之必至也虽有舜禹之智吟而不言不如瘖聋之指麾也【索隐邹氏吟音巨?反又音琴】此言贵能行之夫功者难成而易败时者难得而易失也时乎时不再来愿足下详察之韩信犹豫不忍倍汉又自以为功多汉终不夺我齐遂谢蒯通蒯通说不听已详狂为巫【集解徐广曰一本遂不用蒯通蒯通曰夫迫於细苛不可与图大事拘於臣虏者固无君王之意说不听因去佯狂也索隐案汉书及战国策皆有此文】汉王之困固陵用张良计召齐王信遂将兵会垓下项羽已破高祖袭夺齐王军【集解徐广曰以齐为平原千乘东莱齐郡】汉五年正月徙齐王信为楚王都下邳信至国召所从食漂母赐千金【集解张华曰漂母冢在泗口南岸】及下乡南昌亭长赐百钱曰公小人也为德不卒召辱已之少年令出袴下者以为楚中尉告诸将相曰此壮士也方辱我时我宁不能杀之邪杀之无名故忍而就於此项王亡将鍾离昧家在伊庐【集解徐广曰东海朐县有伊庐乡駟案韦昭曰今中庐县索隐徐注出司马彪郡国志正义括地志云中庐在义清县北二十里本春秋时庐戎之国也秦谓之伊庐汉为中庐县项羽之将鍾离昧冢在焉】素与信善项王死後亡归信汉王怨昧闻其在楚诏楚捕昧信初之国行县邑陈兵出入汉六年人有上书告楚王信反高帝以陈平计天子巡狩会诸侯南方有云梦发使告诸侯会陈吾将游云梦实欲袭信信弗知高祖且至楚信欲发兵反自度无罪欲谒上恐见禽人或说信曰斩昧谒上上必喜无患信见昧计事昧曰汉所以不击取楚以昧在公所若欲捕我以自媚於汉吾今日死公亦随手亡矣乃骂信曰公非长者卒自剄信持其首谒高祖於陈上令武士缚信载後车信曰果若人言狡兔死良狗亨【集解张晏曰狡犹猾索隐吴越春秋作郊兔战国策曰东郭逵海内狡兔也】高鸟尽良弓藏敌国破谋臣亡天下已定我固当亨上曰人告公反遂械系信至雒阳赦信罪以为淮陰侯信知汉王畏恶其能常称病不朝从信由此日怨望居常鞅鞅羞与绛灌等列信常过樊将军吟吟跪拜送迎言称臣曰大王乃肯临臣信出门笑曰生乃与吟等为伍上常从容与信言诸将能不各有差上问曰如我能将几何信曰陛下不过能将十万上曰於君何如曰臣多多而益善耳上笑曰多多益善何为为我禽信曰陛下不能将兵而善将将此乃信之所以为陛下禽也且陛下所谓天授非人力也陈豨拜为钜鹿守【集解徐广曰表云为赵相国将兵守代也】辞於淮陰侯淮陰侯挈其手辟左右与之步於庭仰天叹曰子可与言乎欲与子有言也豨曰唯将军令之淮陰侯曰公所居天下精兵处也而公陛下之信幸臣也人言公之畔陛下必不信再至陛下乃疑矣三至必怒而自将吾为公从中起天下可图也陈豨素知其能也信之曰谨奉教汉十一年陈豨果反上自将而往信病不从陰使人至豨所曰弟举兵吾从此助公信乃谋与家臣夜诈诏赦诸官徒奴欲发以袭吕后太子部署已定待豨报其舍人得罪於信【索隐案晋灼曰楚汉春秋云谢公也姚氏案功臣表云悼阳侯乐说淮陰舍人告信反者未知孰是】信囚欲杀之舍人弟上变告信欲反状於吕后吕后欲召恐其党不就乃与萧相国谋诈舍人从上来言豨已得死列侯羣臣皆贺相国给信曰虽疾强入贺信入吕后使武士缚信斩之长乐鍾室【正义长乐宫悬鍾之室】信方斩曰吾悔不听蒯通之计乃为儿女子所诈岂非天哉遂夷信三族高祖已从豨军来至见信死且喜且怜之问信死亦何言吕后曰信言恨不用蒯通计高祖曰是齐辩士也乃诏齐捕蒯通蒯通至上曰若教淮

陰侯反乎对曰然臣固教之竖子不用臣之策故令自夷於此如彼竖子用臣之计陛下安得而夷之乎上怒曰亨之通曰嗟乎冤哉亨也上曰若教韩信反何冤对曰秦之纲絶而维弛山东大扰异姓并起英俊乌集秦失其鹿天下共逐之【集解张晏曰以鹿喻帝位也】於是高材疾足者先得焉跖之狗吠尧尧非不仁狗固吠非其主当是时臣唯独知韩信非知陛下也且天下锐精持锋欲为陛下所为者甚衆顾力不能耳又可尽亨之邪高帝曰置之乃释通之罪

太史公曰吾如淮陰淮陰人为余言韩信虽为布衣时其志与衆异其母死贫无以葬然乃行营高敞地令其旁可置万家余视其母冢良然假令韩信学道谦让不伐已功不矜其能则庶几哉於汉家勲可以比周召太公之徒後世血食矣不务出此而天下已集乃谋畔逆夷灭宗族不亦宜乎

【索隐述赞曰君臣一体自古所难相国深荐策拜登坛沉沙决水拔帜传殄与汉汉重归楚楚安三分不议伪游可叹】

史记卷九十二

史记卷九十二考证

淮陰侯列传楚数使奇兵渡河击赵○【臣照】按风后握奇经四正四奇其余握奇说者曰握奇即下文所云游兵也此奇兵亦是此类犹言余兵非奇正之奇乃奇偶之奇耳

齐人蒯通○顾炎武曰先云范阳辨士蒯通後云齐人蒯通一传互异

容容无所倚○顾炎武曰容容即顛顛字

遂谢蒯通索隐按汉书及战国策皆有此文○【臣照】按战国策安得有韩信蒯通之事索隐误

史记卷九十二考证

卷九十三

钦定四库全书

史记卷九十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

韩王信卢绾列传第三十三

韩王信者【集解徐广曰一云信都索隐楚汉春秋云韩王信都恐谬也诸书不言有韩信都案韩王信初为韩司徒後讹云申徒因误以为韩王名耳】故韩襄王孽孙也【集解张晏曰孺子为孽索隐何休注公羊以为孽贱子犹树之有孽生也汉书晁错云孽子悼惠王是也】长八尺五寸及项梁之立楚後怀王也燕齐赵魏皆已前王唯韩无有後故立韩诸公子横阳君成为韩王【集解徐广曰二年六月也都阳翟正义故横城在宋州宋城县西南三十里】欲以抚定韩故地项梁败死定陶成犇怀王沛公引兵击阳城【正义河南县也】使张良以韩司徒降下韩故地【集解徐广曰他本多作申徒申与司声相近字由此杂乱耳今有申徒云是司徒之後言司声转为申】得信以为韩将将其兵从沛公入武关沛公立为汉王韩信从入汉中迺说汉王曰项王王诸将近地而王独远居此此左迁也士卒皆山东人跂而望归及其锋东向【集解文颖曰锋锐欲东向索隐跂起踵也郑氏云锋军中将士气锋韦昭曰其气锋锐欲东也正义跂音岐】可以争天下汉王还定三秦迺许信为韩王先拜信为韩太尉将兵畧韩地项籍之封诸王皆就国韩王成以不从无功不遣就国更以为列侯【集解徐广曰元年十一月诛成駰案汉书曰封为穰侯】及闻汉遣韩信畧韩地迺令故项籍游吴时吴令郑昌为韩王以距汉【正义项籍在吴时昌为吴县令】汉二年韩信畧定韩十余城汉王至河南韩信急击韩王昌阳城昌降汉王迺立韩信为韩王【集解徐广曰二年十一月】常将韩兵从三年汉王出荥阳韩王信周苛等守荥阳及楚败荥阳信降楚已而得亡复归汉汉复立以为韩王竟从击破项籍天下定五年春遂与剖符为韩王王颍川明年春【集解徐广曰即五年之二月駰案汉书曰六年春】上以韩信材武所王北近巩洛南迫宛叶东有淮阳皆天下劲兵处迺诏徙韩王信王太原以北备御胡都晋阳信上书曰国被边【集解李奇曰被音被马反】匈奴数入晋阳【正义并州】去塞远请治马邑【正义朔州】上许之信乃徙泊马邑秋匈奴冒顿大围信【索隐冒音墨又音莫报反】信数使使胡求和解汉发兵救之疑信数间使有二心使人责让信信恐诛因与匈奴约共攻汉反以马邑降胡击太原七年冬上自往击破信军铜鞮【正义潞州县】斩其将王喜信亡走匈奴与其将白土人【集解

张晏曰白土县名属上郡】丘臣王黄等立赵苗裔赵利为王复收信败散兵而与信及冒顿谋攻汉匈奴使左右贤王将万余骑与王黄等屯广武以南【正义广武故城在代州鴈门县界也】至晋阳与汉兵战汉大破之追至于离石【正义石州县】後复破之匈奴复聚兵楼烦【正义鴈门郡楼烦县】西北汉令车骑击破匈奴匈奴常败走汉乘胜追北闻冒顿居代上谷【正义今妫州】高皇帝居晋阳使人视冒顿还报曰可击上遂至平城【正义朔州定襄县是也】上出白登【集解服虔曰白登台名去平城七里如淳曰平城旁之高地若丘陵也索隐姚氏案北疆记桑乾河北有白登山冒顿围汉高之所今犹有垒壁】匈奴骑围上上乃使人厚遗阼氏【正义阼於连反又音燕氏音支单于嫡妻号若皇后】阼氏乃说冒顿曰今得汉地犹不能居且两主不相厄居七日胡骑稍引去时天大雾汉使人往来胡不觉护军中尉陈平言上曰胡者全兵【集解駰案汉书音义曰言唯弓矛无杂杖也】请令强弩傅两矢外向【索隐傅音附】徐行出围入平城汉救兵亦到胡骑遂解去汉亦罢兵归韩信为匈奴将兵往来击边汉十年信令王黄等说误陈豨十一年春故韩王信复与胡骑入居参合【集解苏林曰代地也正义故城在朔州定襄县北】距汉汉使柴将军击之【集解邓展曰柴奇也索隐应劭曰柴武邓展云柴奇晋灼云奇武之子应劭说为得此时奇未为将】遗信书曰陛下宽仁诸侯虽有畔亡而复归辄复故位号不诛也大王所知今王以败亡走胡非有大罪急自归韩王信报曰陛下擢仆起闾巷南面称孤此仆之幸也荥阳之事仆不能死囚於项籍此一罪也及寇攻马邑仆不能坚守以城降之此二罪也今反为寇将兵与将军争一旦之命此三罪也夫种蠡无一罪身死亡【集解文颖曰大夫种范蠡也】今仆有三罪於陛下而欲求活於世此伍子胥所以僨於吴也【索隐苏林曰僨音奋张晏曰僨僵仆也正义信知归汉必死故引子胥以为辞】今仆亡匿山谷间旦暮乞贷蛮夷仆之思归如痿人不忘起【索隐痿音耳谁反旧音耳睡反於义为疎张揖云痿不能行袁纪云帝即位痿痺是也】盲者不忘视也势不可耳遂战柴将军屠参合斩韩王信信之入匈奴与太子俱及至颓当城【集解駰案汉书音义曰县名韦昭曰在匈奴地】生子因名曰颓当韩太子亦生子命曰婴至孝文十四年颓当及婴率其衆降汉汉封颓当为弓高侯【集解駰案地理志河间有弓高县也索隐汉书功臣表属荣陵正义沧州市】婴为襄城侯【索隐案服虔云县名功臣表属魏都】吴楚军时弓高侯功冠诸将【集解徐广曰谥曰壮】传子至孙孙无子失侯婴孙以不敬失侯【集解徐广曰表云婴子泽之元朔四年不敬国除】颓当孽孙韩嫣【集解駰案汉书音义曰音鄢陵之鄢索隐音偃又一言反又休延反并通】贵幸名富显於当世其弟说再封数称将军卒为案道侯子代【集解徐广曰名长君】岁余坐法死後岁余说孙曾【集解徐广曰长君之子也索隐案博物志字季君也】拜为龙额侯续说後【索隐额五格反又作额音洛龙额县名正义史记表卫青传及汉书表云韩说元朔五年从大将军有功封龙额侯以酎金坐免元封元年击东越有功封按道侯征和二年孙子曾复封为龙额侯汉书功臣表云武後元年说孙曾绍封龙额侯汉表是也】

卢绾者丰人也与高祖同里卢绾亲与高祖太上皇相爱【集解如淳曰亲谓父也】及生男高祖卢绾同日生里中持羊酒贺两家及高祖卢绾壮俱学书又相爱也里中嘉两家亲相爱生子同日壮又相爱复贺两家羊酒高祖为布衣时有吏事辟匿卢绾常随出入上下及高祖初起沛卢绾以客从入汉中为将军常侍中从东击项籍以太尉常从出入卧内衣被饮食赏赐羣臣莫敢望虽萧曹等特以事见礼至其亲幸莫及卢绾绾封为长安侯长安故咸陽也【

正义秦咸阳在渭北长安在渭南萧何起未央宫处也】汉五年冬以破项籍迺使卢绾别将与刘贾击临江王共敖破之【集解李奇曰共敖子】七月还从击燕王臧荼臧荼降高祖已定天下诸侯非刘氏而王者七人欲王卢绾为羣臣觖望【集解如淳曰觖音辞别之诀望犹怨也瓚曰觖谓相挟而怨望也韦昭曰觖犹冀也索隐解望犹怨望也又音企韦昭音冀】及虏臧荼迺下诏诸将相列侯择羣臣有功者以为燕王羣臣知上欲王卢绾皆言曰太尉长安侯卢绾常从平定天下功最多可王燕诏许之汉五年八月迺立卢绾为燕王诸侯王得幸莫如燕王汉十一年秋陈豨反代地高祖如邯郸击豨兵燕王绾亦击其东北当是时陈豨使王黄求救匈奴燕王绾亦使其臣张胜於匈奴言豨等军破张胜至胡故燕王臧荼子衍出亡在胡见张胜曰公所以重於燕者以习胡事也燕所以久存者以诸侯数反兵连不决也今公为燕欲急灭豨等已尽次亦至燕公等亦且为虏矣公何不令燕且缓陈豨而与胡和事竟得长王燕即有汉急可以安国张胜以为然迺私令匈奴助豨等击燕燕王绾疑张胜与胡反上书请族张胜胜还具道所以为者燕王寤迺诈论他人脱胜家属使得为匈奴间而陰使范齐之陈豨所欲令久亡【集解晋灼曰使陈豨久亡畔】连兵勿决汉十二年东击黥布豨常将兵居代汉使樊噲击斩豨其裨将降言燕王绾使范齐通计谋於豨所高祖使使召卢绾绾称病上又使辟阳侯审食其御史大夫赵尧往迎燕王因验问左右绾愈恐闭匿谓其幸臣曰非刘氏而王独我与长沙耳往年春汉族淮陰夏诛彭越皆吕后计今上病属任吕后吕后妇人专欲以事诛异姓王者及大功臣迺遂称病不行其左右皆亡匿语颇泄辟阳侯闻之归具报上上益怒又得匈奴降者降者言张胜亡在匈奴为燕使於是上曰卢绾果反矣使樊噲击燕燕王绾悉将其宫人家属骑数千居长城下伺幸上病愈自入谢四月高祖崩卢绾遂将其衆亡入匈奴匈奴以为东胡卢王绾为蛮夷所侵夺常思复归居岁余死胡中高后时卢绾妻子亡降汉会高后病不能见舍燕邸为欲置酒见之高后竟崩不得见卢绾妻亦病死孝景中六年卢绾孙他之【正义他徒何反】以东胡王降【集解如淳曰为东胡王来降也汉纪东胡乌丸也】封为亚谷侯【集解徐广曰亚一作恶也正义汉表在河内】

陈豨者宛朐人也【索隐地理志属济陰下又云梁人是褚先生之说异也正义宛朐曹州县也太史公云豨梁人按宛朐六国时属梁】不知始所以得从及高祖七年冬韩王信反入匈奴上至平城还迺封豨为列侯【集解徐广曰功臣表曰陈豨以特将将卒五百人前元年从起宛朐至霸上为侯以游击将军别定代已破臧荼封豨为阳夏侯】以赵相国将监赵代边兵边兵皆属焉豨常告归过赵赵相周昌见豨宾客随之者千余乘邯郸官舍皆满豨所以待宾客如布衣交皆出客下【正义言屈已礼之不以富贵自尊大】豨还之代周昌迺求入见上具言豨宾客盛甚擅兵於外数岁恐有变上乃令人覆案豨客居代者财物诸不法事多连引豨豨恐陰令客通使王黄丘臣所【正义二人韩王信将】及高祖十年七月太上皇崩使人召豨豨称病甚九月遂与王黄等反自立为大王劫略赵代上闻迺赦赵代吏人为豨所诖误劫略者皆赦之上自往至邯郸喜曰豨不南据漳水北守邯郸知其无能为也赵相奏斩常山守尉曰常山二十五城豨反亡其二十城上问曰守尉反乎对曰不反上曰是力不足也赦之复以为常山守尉上问周昌曰赵亦有壮士可令将者乎对曰有四人四人谒上慢骂曰竖子能为将乎四人慙伏上封之各千户以为将左右谏曰从入蜀汉伐楚功未徧行今此何功而封上曰非若所知陈豨反邯郸以北皆豨有吾以羽檄徵天下兵【集解魏武帝奏事曰令边有小警辄露檄插羽飞羽檄之意也駟案推此言则以鸟羽插檄书谓之羽檄取其急速

若飞鸟也】未有至者今惟独邯郸中兵耳吾胡爱四千户封四人以尉赵子弟皆曰善於是上曰陈豨将谁曰王黄?丘臣皆故贾人上曰吾知之矣迺各以千金购黄臣等十一年冬汉兵击斩陈豨将侯敞王黄於曲逆下【正义定州北平县东南十五里蒲陰故城是也】破豨将张春于聊城【正义博州县】斩首万余太尉勃入定太原代地十二月上自击东垣东垣不下卒骂上东垣降卒骂者斩之不骂者黥之更命东垣为真定王黄?丘臣其麾下受购赏之皆生得以故陈豨军遂败上还至洛阳上曰代居常山北赵迺从山南有之远迺立子恒为代王【集解徐广曰十一年正月】都中都【正义中都故城在汾州平遥县西南十二里】代鴈门皆属代高祖十二年冬樊噲军卒追斩豨於灵丘【正义蔚州是】

太史公曰韩信卢绾非素积德累善之世徼一时权变以诈力成功遭汉初定故得列地南面称孤内见疑强大外倚蛮貊以为援是以日疏自危事穷智困卒赴匈奴岂不哀哉陈豨梁人其少时数称慕魏公子及将军守边招致宾客而下士名声过实周昌疑之疵瑕颇起惧祸及身邪人进说遂陷无道於戏悲夫夫计之生孰成败於人也深矣

【索隐述赞曰韩襄遗孽始从汉中部符南面徙邑北通颍当归国龙頔有功卢绾亲爱羣臣莫同旧燕是王东胡计穷】

史记卷九十三

史记卷九十三考证

韩王信卢绾列传韩王信者集解徐广曰一云信都索隐楚汉春秋云韩王信都恐谬也诸书不言有韩信都按韩王信初为韩司徒後讹云申徒因误以为韩王名耳○罗璧识遗曰司马迁班固汉史韩信传赞中皆称两韩信据其说韩王信古韩国之後项羽杀成复立信为韩王都晋阳与淮陰侯不同刘知几史通辟迁固之缪曰韩王名信都古韩国後姓姬则名信都者非姓韩亦不单名信二史不别姬韩两姓且去韩王名下都字遂与淮陰侯韩信无辨余考班马误姬为韩诚如刘说但谓韩王名信都刘说亦差按王充潜夫姓氏论云沛公起张良属焉沛公使韩信略定韩地立横阳君为韩王而拜良为信都又曰信都者司徒也或为胜徒汉功臣表云张良以廐将从起下邳以韩申都下韩楚汉春秋作信都信音申史记亦作韩申徒良传直作韩司徒盖信都胜徒皆司徒之声转然则信都乃张良官名即非韩王名知几之说亦未免缪尚何班马责乎

韩信从入汉中迺说汉王曰○顾炎武曰韩王信说汉王语乃淮陰侯韩信语也以同姓名而误

及高祖十年七月太上皇崩使人召豨○【臣照】按高纪十年七月太上皇崩八月陈豨反韩信传亦云汉十年信令王黄等说误陈豨至淮陰传则作十一年是时高祖固在邯郸诛豨等未毕也马迁误耶抑别有意也田叔传亦云陈豨反代汉十年高祖往诛之

自立为大王○陈子龙曰本代王讹为大者北音相误也

不骂者黥之○高纪云不骂者原之

史记卷九十三考证

卷九十四

钦定四库全书

史记卷九十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

田儼列传第三十四

田儼者狄人也【集解徐广曰今乐安临济县也正义淄州高苑县西北狄故县城】故齐王田氏族也儼从弟田荣荣弟田横皆豪宗强能得人【索隐儼子市从弟荣荣子广荣弟横各递为王荣并王三齐】陈涉之初起王楚也使周市略定魏地北至狄狄城守田儼详为缚其奴从少年之廷欲谒杀奴【集解服虔曰古杀奴婢皆当告官儼欲杀令故诈缚奴而以谒也】见狄令因击杀令而召豪吏子弟曰诸侯皆反秦自立齐古之建国儼田氏当王遂自立为齐王【集解徐广曰二世元年九月也】发兵以击周市周市军还去田儼因率兵东略定齐地秦将章邯围魏王咎於临济急魏王求救於齐齐王田儼将兵救魏【集解徐广曰二年六月】章邯夜衔枚击大破魏军杀田儼於临济下儼弟田荣收儼余兵走东阿齐人闻王田儼死廼立故齐王建之弟田假为齐王田角为相田间为将以距诸侯田荣之走东阿章邯追围之项梁闻田荣之急廼引兵击破章邯军东阿下章邯走而西项梁因追之而田荣怒齐之立假廼引兵归击逐齐王假假亡走楚齐相角亡走赵角弟田间前求救赵因留不敢归田荣乃立田儼子市为齐王【集解徐广曰二年八月】荣相之田横为将平齐地项梁既追章邯章邯兵益盛项梁使使告赵齐发兵共击章邯田荣曰使楚杀田假赵杀田角田间廼肯出兵楚怀王曰田假与国之王穷而归我杀之不义赵亦不杀田角田间以市於齐齐曰蝮螫手则斩手螫足则斩足何者为害於身也【集解应劭曰蝮一名虺螫人手足则割去其肉不然则致死索隐蝮音芳伏反螫音臠又音释正义按蝮毒蛇长二三丈岭南北有之虺长一二尺头腹皆一说文云虺博三寸首大如擘擘手大指也音步历反】今田假田角田间於楚赵非直手足戚也【集解文穎曰言将亡身非手足忧也瓚曰於楚赵非手足之亲】何故不杀且秦复得志於天下则齟齬用事者坟墓矣【集解如淳曰齟齬犹齟齬索隐齟音蚁齬音纆齟侧齿齬也正义按秦重得志非但辱身坟墓亦发掘矣若子胥鞭荆平王墓一云坟墓言死也】楚赵不听齐亦怒终不肯出兵章邯果败杀项梁破楚兵楚兵东走而章邯渡河围赵於钜鹿项羽往救赵由此怨田荣项羽既存赵降章邯等西屠咸阳灭秦而立侯王也廼徙齐王田市更王胶东治即墨齐将田都从共救赵因入关故立都为齐王治临淄故齐王建孙田安项羽方

渡河救赵田安下济北数城引兵降项羽项羽立田安为济北王治博阳田荣以负项梁不肯出兵助楚赵攻秦故不得王赵将陈余亦失职不得王二人俱怨项王项王既归诸侯各就国田荣使人将兵助陈余令反赵地而荣亦发兵以距击田都田都亡走楚田荣留齐王市无令之胶东市之左右曰项王强暴而王当之胶东不就国必危市惧迺亡就国田荣怒追击杀齐王市於即墨还攻杀济北王安於是田荣迺自立为齐王尽并三齐之地【索隐田市王胶东田都王齐田安王济北】项王闻之大怒迺北伐齐齐王田荣兵败走平原【集解徐广曰三年正月正义平原德州也】平原人杀荣项王遂烧夷齐城郭所过者尽屠之【集解徐广曰立故王田假也】齐人相聚畔之荣弟横收齐散兵得数万人反击项羽於城阳【集解徐广曰假走楚楚杀之正义城阳濮州雷泽是】而汉王率诸侯败楚入彭城项羽闻之迺释齐而归击汉於彭城因连与汉战相距荥阳以故田横复得收齐城邑【集解徐广曰四月】立田荣子广为齐王而横相之专国政政无巨细皆断於相横定齐三年汉王使酈生往说下齐王广及其相国横横以为然解其历下军汉将韩信引兵且东击齐齐初使华无伤田解军於历下以距汉汉使至乃罢守战备纵酒且遣使与汉平汉将韩信已平赵燕用蒯通计度平原袭破齐历下军因入临淄齐王广相横怒以酈生卖已而亨酈生齐王广东走高密【集解徐广曰高一作假】相横走博阳守相田光走城阳将军田既军於胶东楚龙且救齐齐王与合军高密汉将韩信与曹参破杀龙且【集解徐广曰四年十一月】虏齐王广汉将灌婴追得齐守相田光至博阳而横闻齐王死自立为齐王还击婴婴败横之军於嬴下【集解晋灼曰泰山嬴县也正义故嬴城在兖州博城县东北百里】田横亡走梁归彭越彭越是时居梁地中立且为汉且为楚韩信已杀龙且因令曹参进兵破杀田既於胶东使灌婴破杀齐将田吸於千乘【正义千乘故城在淄州高苑县北二十五里】韩信遂平齐乞自立为齐假王【集解徐广曰二月也】汉因而立之後岁余汉灭项籍汉王立为皇帝以彭越为梁王田横惧诛而与其徒属五百余人入海居岛中【集解韦昭曰海中山曰岛正义按海州东海县有岛山去岸八十里】高帝闻之以为田横兄弟本定齐齐人贤者多附焉今在海中不收後恐为乱迺使使赦田横罪而召之田横因谢曰臣亨陛下之使酈生今闻其弟酈商为汉将而贤臣恐惧不敢奉诏请为庶人守海岛中使还报高皇帝迺诏卫尉酈商曰齐王田横即至人马从者敢动摇者致族夷迺复使使持节具告以诏商状曰田横来大者王小者迺侯耳不来且举兵加诛焉田横迺与其客二人乘传诣雒阳【集解如淳曰四马下足为乘传】未至三十里至尸乡廐置【集解应诏曰尸乡在偃师瓚曰廐置置马以传驿也】横谢使者曰人臣见天子当洗沐止留谓其客曰横始与汉王俱南面称孤今汉王为天子而横迺为亡虏而北面事之其耻固已甚矣且吾亨人之兄与其弟并肩而事其主纵彼畏天子之诏不敢动我我独不媿於心乎且陛下所以欲见我者不过欲一见吾面貌耳今陛下在洛阳今斩吾头驰三十里间形容尚未能败犹可观也遂自刭令客奉其头【正义奉音捧】从使者驰奏之高帝高帝曰嗟乎有以也夫起自布衣兄弟三人更王岂不贤乎哉为之流涕而拜其二客为都尉发卒二千人以王者礼葬田横【正义齐田横墓在偃师西十五里崔豹古今注云薤露蒿里送哀歌也出田横门人横自杀门人伤之而作悲歌言人命如薤上露易曦灭至李延年乃分为二曲薤露送王公贵人蒿里送士大夫庶人使挽逝者歌之俗呼为挽歌】既葬二客穿其冢旁孔皆自到下从之高帝闻之迺大惊以田横之客皆贤吾闻其余尚五百人在海中使使召之至则闻田横死亦皆自杀於是迺知田横兄弟能得士也

太史公曰甚矣蒯通之谋乱齐骄淮陰其卒亡此两人【集解駟案韩信田橫】蒯通者善为长短说【索隐言欲令此事长则长说之短则短说之故战国策亦名曰短长书是也】论战国之权变为八十一首【集解駟案汉书曰号为隗永永一作求索隐书名也隗音松兗反】通善齐人安期生安期生尝干项羽项羽不能用其策已而项羽欲封此两人两人终不肯受亡去田橫之高节宾客慕义而从橫死岂非至贤余因而列焉无不善画者莫能图何哉【索隐言天下非无善画之人而不知图画田橫及其党慕义死节之事何故哉叹画人不知画此也】

【索隐述赞曰秦项之际天下交兵六国树党自置豪英田儋殒寇立市相荣楚封王假齐破酈生兄弟更王海岛传声】

史记卷九十四考证

田儋列传非直手足戚也何故不杀且秦复得志於天下则齟齬用事者坟墓矣正义按秦重得志非但辱身坟墓亦发掘矣若子胥鞭荆平王墓一云坟墓言死也○董份曰斩手足则戚甚矣今三田於楚赵无亲非特斩手足之戚也而使秦得志则坟墓齟齬非但蝮螫之害身也故曰何为不杀注全谬

反击项羽於城阳正义城阳濮州雷泽是○顾炎武曰正义以为濮州雷泽县非也汉书城阳郡治莒史记吕后纪言齐王乃上城阳之郡孝文纪言以齐剧郡立朱虚侯章为城阳王而淮陰侯传言击杀龙且於潍水上齐王广亡去信遂追北至城阳皆此地按战国策貂勃对襄王曰昔王不能守王之社稷走而之城阳之山中安平君以敝卒七千禽敌反千里之齐当是时阖城阳而王天下莫之能止然为栈道本阁而迎王与后於城阳之山中王乃复反子临百姓则古齐时已名城阳矣

史记卷九十四考证

<史部,正史类,史记>

卷九十五

钦定四库全书

史记卷九十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

樊郤滕灌列传第三十五

舞阳侯樊哙者沛人也【正义舞阳在许州叶县东十里哙音快又吉外反沛徐州县】以屠狗为事【正义时人食狗亦与羊豕同故哙专屠以卖之】与高祖俱隐初从高祖起丰攻下沛高祖为沛公以哙为舍人从攻胡陵方与【正义房预二音】还守丰击泗水监丰下【索隐案监者秦时御史监都也丰下丰县之下也正义泗水郡名】破之复东定沛破泗水守薛西【索隐谓破其守於薛县之西也】与司马卬战殽东【集解张晏曰秦司马正义秦将章邯司马卬又殽宋州县也】郤敌斩首十五级赐爵国大夫【集解文颖曰即官大夫也正义爵第六级也】常从沛公击章邯军濮阳攻城先登斩首二十三级赐爵列大夫【集解文颖曰即公大夫爵第七】复常从从攻城阳【集解徐广曰年表二年七月破秦军濮阳东屠城阳也正义按城阳近濮阳而汉书作阳城大错悞】先登下户牖【正义户牖汴州东陈留县东北九十一里东昏故城是】破李由军斩首十六级赐上间爵【集解孟康曰不在二十爵中如执圭执帛比也如淳曰间或作闻吕氏春秋曰魏文侯东胜齐於长城天子赏文侯以上间爵索隐张晏云得径上闻晋灼曰名通於天子也如淳引吕氏春秋证上间音中间之间】从攻围东郡守尉於成武【正义曹州县】郤敌斩首十四级捕虏十一人赐爵五大夫从击秦军出亳南【索隐案亳汤所都今河南偃师有汤亳是正义亳故城在宋州谷熟县西南四十里】河间守军於杠里【正义地名近城阳】破之击破赵贲军开封【正义汴州县】北以郤敌先登斩一人首六十八级捕虏二十七人赐爵卿从攻破杨熊军於曲遇【索隐音龠颍邑名也正义曲丘羽反遇牛恭反郑州中牟县有曲遇聚】攻宛陵【索隐地理志属河南正义宛陵故城在郑州新郑县东北三十八里】先登斩首八级捕虏四十四人赐爵封号贤成君【集解徐广曰时赐爵有执帛执圭又有赐爵封而加美名以为号也又有功则赐封列侯駰案张晏曰食禄比封君而无邑瓚曰秦制列侯乃有封爵也索隐小颜云楚汉之际权设宠荣假其位号或得邑地或空受爵此例多矣约以秦制於义不通】从攻长社轘辕【正义许州理县也轘辕关在缙氏县东南三十里】絶河津【正义古平陰津在河南府东北五十里也】东攻秦军於尸南【正义在偃师南】攻秦军於犇【正义在汝州鲁山县东南】

破南阳守齯於阳城东攻宛城先登西至郾【正义郾音擲在邓州新城县西北四十里】以郤敌斩首二十四级捕虏四十人赐重封【集解张晏曰益禄也如淳曰正爵名也瓚曰增封也索隐张晏臣瓚义亦近是如淳非也小顔以为重封者兼二号盖为得也】攻武关至霸上斩都尉一人首十级捕虏百四十六人降卒二千九百人项羽在戏下欲攻沛公沛公从百余骑因项伯面见项羽谢无有闭关事项羽既飧军士中酒【集解张晏曰酒酣也】亚父谋欲杀沛公令项庄拔劔舞坐中欲击沛公项伯常肩蔽之时独沛公与张良得入坐樊哙在营外闻事急乃持铁盾入到营营卫止哙哙直撞入【集解駰案汉书音义曰音撞钟正义撞直江反】立帐下【集解徐广曰一本作立帷下瞋目而视眦皆血出】项羽目之问为谁张良曰沛公参乘樊哙项羽曰壮士赐之卮酒彘肩哙既饮酒拔劔切肉食尽之项羽曰能复饮乎哙曰臣死且不辞岂特卮酒乎且沛公先入定咸阳暴师霸上以待大王【正义时羽未为王史追书】大王今日至听小人之言与沛公有隙臣恐天下解【正义纪卖反至此为絶句】心疑大王也项羽默然沛公如厕麾樊哙去既出沛公留车骑独骑一马与樊哙等四人步从从间道山下归走霸上军而使张良谢项羽项羽亦因遂已无诛沛公之心矣是日微樊哙犇入营诘让项羽沛公事几殆【索隐诘责也亦或作譙正义几音祈】明日项羽入屠咸阳立沛公为汉王汉王赐哙爵为列侯号临武侯【正义桂阳临武县】迁为郎中从入汉中还定三秦别击西丞白水北【集解徐广曰陇西有西县白水在武都駰案如淳曰皆地名也晋灼曰白水今广魏县也地理志无西丞似秦将名索隐案西谓陇西之西县白水水名出武都经西县东南流言哙击西县之丞在白水之北耳徐广等说皆非也正义括地志云白马水源出文州曲水县西南流经孙山下】雍轻车骑於雍南破之【正义上雍於拱反】从攻雍釐城先登击章平军好畤【集解駰案釐音胎索隐案雍即扶风雍县釐音台即后稷所封今之武功故釐城是章平即章邯子也】攻城先登陷阵斩县令丞各一人首十一级虏二十人迁郎中骑将从击秦军骑壤东【索隐小顔亦以为今之地名正义壤乡在武功县东南二十里】郤敌迁为将军攻赵贲下郿【正义岐州县】槐里柳中咸阳灌废丘最【集解李奇曰以水灌废丘也张晏曰最功第一也晋灼曰京辅治华陰灌北也索隐案柳中即细柳也在长安西也灌谓以水灌废丘城陷其功最上也李奇曰废丘即槐里也上有槐里此又言者疑此是小槐里非也案文云攻赵贲下郿槐里柳中咸阳总言所攻陷之邑别言以水灌废丘其功特最也何者初言槐里称其新名後言功最是重举不欲再见其文故因旧称废丘也】至栎阳【正义雍州县】赐食邑杜之樊乡【索隐案杜陵有樊乡三秦记曰长安正南山名秦岭谷名子午一名樊川一名御宿樊乡即樊川也】从攻项籍屠煮枣【索隐晋灼云检地理志无煮枣功臣表则有煮枣侯清河有煮枣城小顔以为攻项籍屠煮枣合在河南非清河之城明矣今案续汉书郡国志在济陰宛胸也正义按其时项羽未度河北冀州信都县东北五十里煮枣非矣】击破王武程处军於外黄攻邹鲁瑕丘薛【正义邹兖州县在州东南六十二里鲁兖州曲阜县瑕丘兖州县薛在徐州滕县界】项羽败汉王於彭城尽复取鲁梁地哙还至荥阳益食平陰二千户【正义平陰故城在济阳东北五里】以将军守广武一岁项羽引而东从高祖击项籍下阳夏【正义夏音假陈州太康县】虏楚周将军卒四千人围项籍於陈【正义陈州】大破之屠胡陵【正义在兖州南】项籍既死汉王为帝以哙坚守战有功益食八百户从高帝攻反燕王臧荼虏荼定燕地楚王韩信反哙从至陈取信定楚【正义徐州】更赐爵列侯与诸侯剖符世世勿絶食舞阳号为舞阳侯除前所食以将军从高祖攻反韩王信於代自霍人以往【正义先累反又苏果反又山寡反杜预云霍人晋邑也霍人当作倭地理

志云蓀人县属太原郡括地志云蓀人故城在代州繁峙县界也】至云中【正义云中郡县今朔州善阳县北三百八十里定襄故城是也】与绛侯等共定之益食千五百户因击陈豨与曼丘臣军【集解徐广曰曼一作甯字】战襄国【正义邢州城】破栢人【正义邢州县】先登降定清河常山凡二十七县残【集解张晏曰残有所毁也瓚曰残谓多所杀伤也孟子曰害义谓之残】东垣迁为左丞相破得綦母卬尹潘军於无终广昌【正义在蔚州飞狐县北七里】破豨别将胡人王黄军於代南因击韩信军於叁合【正义在朔州定襄县界】军所将卒斩韩信破豨胡骑横谷【正义谷音欲盖在代】斩将军赵既虏代丞相冯梁守孙奋大将王黄将军太卜太仆解福【正义人姓名】等十人与诸将共定代乡邑七十三其後燕王卢绾反唵以相国击卢绾破其丞相抵蓟南【索隐抵音丁礼反抵训至一云抵者丞相之名】定燕地凡县十八乡邑五十一益食邑千三百户定食舞阳五千四百户从斩首百七十六级虏二百八十八人别破军七下城五定郡六县五十二得丞相一人将军十二人二千石以下至三百石十一人唵以吕后女弟吕须为妇生子伉故其比诸将最亲先黥布反时高祖尝病甚恶见人卧禁中诏户者无得入羣臣羣臣绌灌等莫敢入十余日唵乃排闥直入【正义宫中小门】大臣随之上独枕一宦者卧唵等见上流涕曰始陛下与臣等起丰沛定天下何其壮也今天下已定又何惫也且陛下病甚大臣震恐不见臣等计事顾独与一宦者絶乎且陛下独不见赵高之事乎高帝笑而起其後卢绾反高帝使唵以相国击燕是时高帝病甚人有恶唵党於吕氏即上一日宫车晏驾则唵欲以兵尽诛灭戚氏赵王如意之属高帝闻之大怒乃使陈平载绛侯代将而即军中斩唵陈平畏吕后执唵诣长安至则高祖已崩吕后释唵使复爵邑孝惠六年樊唵卒谥为武侯子伉代侯而伉母吕须亦为临光侯高后时用事专权大臣尽畏之伉代侯九岁高后崩大臣诛诸吕吕须嫖属【索隐嫖音眷】因诛伉舞阳侯中绝数月孝文帝既立乃复封唵他庶子市人为舞阳侯复故爵邑市人立二十九岁卒谥为荒侯子他广代侯六岁侯家舍人得罪他广怨之乃上书曰荒侯市人病不能为人【正义言不能行人道】令其夫人与其弟乱而生他广他广实非荒侯子不当代後诏下吏孝景中六年他广夺侯为庶人国除【索隐案汉书平帝元始二年封唵玄孙之子章为舞阳侯邑千户】

曲周侯【正义故城在洛州曲周西南十五里】酈商者高阳人【索隐酈音历高阳聚名属陈留正义雍州西南聚邑人也】陈胜起时商聚少年东西略人得数千沛公略地至陈留六月余【集解徐广曰月表曰二世元年九月沛公起兵二世三年二月袭陈留用酈食其策起兵至此十九月矣食其传曰既说高帝已乃言其弟商使从沛公也索隐事与酈生传及年表小不同盖史官意异也正义徐注非也言商先东西略得数千人及沛公略地至陈留商起兵乃六月余得四千人以将军从高祖也】商以将卒四千人属沛公於岐【索隐此地名阙盖在河南陈郑之界正义高纪云酈食其说沛公袭陈留乃以食其为广野君酈商为将将陈留兵与偕攻开封酈生传云沛公引兵随之乃下陈留为广阳君言其弟酈商使将数千人从沛公西南略地此传云属沛公於岐从攻长社案纪传此说岐当与陈留高阳相近也】从攻长社先登赐爵封信成君从沛公攻缙氏絶河津破秦军洛阳东从攻下宛穰定十七县别将攻旬关【集解酈案汉书音义曰汉中旬阳县音询索隐案在汉中旬阳县旬水上之关】定汉中项羽灭秦立沛公为汉王汉王赐商爵信成君以将军为陇西都尉别将定北地【正义宁州】上郡【正义酈州】破雍将军乌氏【索隐乌音於然反氏音支县名属安定汉书云破

章邯别将也正义县在泾州安定县东四十里】周类军枸邑【索隐枸邑在豳州地理志属右扶风枸音苟】苏驂军於泥阳【集解徐广曰驂一作駟索隐北地县名驂者龙马也正义故城在宁州罗川县北三十一里泥谷水源出罗川县东北泥阳源侧有泉於泥中潜流二十余步而流入泥谷又有泥阳湫在县东北四十里】赐食邑武成六千户【正义县在华州郑县东十三里】以陇西都尉从击项籍军五月出钜野与鍾离昧战疾鬪受梁相国印益食邑四千户以梁相国将从击项羽二岁三月攻胡陵项羽既已死汉王为帝其秋燕王臧荼反商以将军从击荼战龙脱【集解徐广曰在燕赵之界駟案汉书音义曰地名索隐其地阙】先登陷阵破荼军易下【正义易州易县】郤哿迁为右丞相赐爵列侯与诸侯剖符世世勿绝食邑涿五千户【正义涿幽州】号曰涿侯以右丞相别定上谷【正义妫州】因攻代受赵相国印以右丞相赵相国别与绛侯等定代鴈门得代丞相程纵守相郭同将军已下至六百石十九人还以将军为太上皇卫一岁七月以右丞相击陈豨残东垣又以右丞相从高帝击黥布攻其前拒【集解徐广曰一作和駟谓拒方陈拒音矩索隐拒音巨邹氏引左传有左拒右拒徐云一作和和军门也汉书作前垣小顔以为攻其壁垒之垣也李奇以为前锋坚蔽若垣墙非也】陷两陈得以破布军更食曲周五千一百户除前所食凡别破军三降定郡六县七十三得丞相守相大将各一人小将二人二千石已下至六百石十九人商事考惠高后时商病不治【集解文颖曰不能治官事】其子寄字况【索隐酈寄字也邹氏本作兄亦音况】与吕禄善及高后崩大臣欲诛诸吕吕禄为将军军於北军太尉勃不得入北军於是乃使人劫酈商令其子况给吕禄【索隐给欺也诈也音待】吕禄信之故与出游而太尉勃乃得入据北军遂诛诸吕是岁商卒谥为景侯子寄代侯天下称酈况卖交也【集解班固曰夫卖交者谓见利而忘义也若寄父为功臣而又执劫虽摧吕禄以安社稷谊存君亲可也】孝景前三年吴楚齐赵反上以寄为将军围赵城十月不能下得俞侯栾布【集解駟案俞音舒索隐俞音歛县名又音输在河东】自平齐来乃下赵城灭赵王自杀除国孝景中二年寄欲取平原君为夫人【集解苏林曰景帝王皇后母臧儿也】景帝怒下寄吏有罪夺侯景帝乃以商他子坚封为繆侯【集解徐广曰繆者更封邑名谥曰靖索隐繆音穆邑也汉书无谥】续酈氏後繆靖侯卒子康侯遂成立遂成卒子怀侯世宗立【集解徐广曰世一作他】世宗卒子侯终根立为太常坐法国除

汝陰侯【正义汝陰即今阳城】夏侯婴沛人也为沛廐司御【索隐案楚汉春秋云滕公为御也】每送使客还过沛泗上亭与高祖语未尝不移日也婴已而试补县吏与高祖相爱高祖戏而伤婴人有告高祖【集解韦昭曰告白也白高祖伤人】高祖时为亭长重坐伤人【集解如淳曰为吏伤人其罪重也】告故不伤婴【集解邓展曰律有故乞鞫高祖自告不伤人索隐案晋灼云狱结竟呼囚鞫语罪状囚若称枉欲乞鞫者许之也】婴证之後狱覆【索隐案韦昭曰高帝自言不伤婴婴证之是狱辞翻覆也】婴坐高祖系岁余掠笞数百终以是脱高祖高祖之初与徒属欲攻沛也婴时以县令史为高祖使上降沛一日【正义上为于伪反使所吏反又曰谓父老开城门迎高祖】高祖为沛公赐婴爵七大夫以为太仆从攻胡陵婴与萧何降泗水监平【集解张晏曰胡陵平所止县何尝给之故与降也】平以胡陵降赐婴爵五大夫从击秦军碭东攻济阳下户牖破李由军雍丘下以兵车趣攻战疾赐爵执帛常以太仆奉车从击章邯军东阿濮阳下以兵车趣攻战疾破之赐爵执珪复常奉车从击赵贲军开封杨熊军曲遇婴从捕虏六十八人降卒八百五十人得印一匱【索隐案说文云匱匣

也谓得其时自相部署之印】因复常奉车从击秦军雒阳东以兵车趣攻战疾赐爵封转为滕公【集解徐广曰令也駟案邓展曰今沛郡公丘汉书曰婴为滕令奉车故号滕公正义滕即公丘故城是在徐州滕县西南十五里】因复奉车从攻南阳战於蓝田芷阳【索隐芷音止地名今霸陵也在京兆县】以兵车趣攻战疾至霸上项羽至灭秦立沛公为汉王汉王赐婴爵列侯号昭平侯复为太仆从入蜀汉还定三秦从击项籍至彭城项羽大破汉军汉王败不利驰去见孝惠鲁元载之汉王急马罢虜在後常蹶两儿欲弃之【索隐蹶音厥又巨月反一音居卫反汉书作躓音拨】婴常收竟载之徐行面雍树乃驰【集解服虔曰高帝欲斩之故婴围树走也面向树也应劭曰古者皆立乘婴恐坠小儿各置一面雍持之树立也苏林曰南阳人谓抱小兒为雍树面者大人以面首向临之小儿抱大人颈似悬树也索隐苏林与晋灼皆同今则无其言或当时有此说其应服之说盖疎也】汉王怒行欲斩婴者十余卒得脱而致孝惠鲁元於丰汉王既至荥阳收散兵复振赐婴食析阳【集解徐广曰析一作沂索隐盖乡名也汉书作沂楚无其县】复常奉车从击项籍追至陈卒定楚至鲁益食兹氏【索隐县名也地理志属太原】汉王立为帝其秋燕王臧荼反婴以太仆从击荼明年从至陈取楚王信更食汝陰剖符世世勿絶以太仆从击代至武泉云中【索隐地理志武泉属云中正义二县在朔州善阳县界】益食千户因从击韩信军胡骑晋阳旁大破之追北至平城为胡所围七日不得通高帝使使厚遗阼氏冒顿开围一角高帝出欲驰婴固徐行弩皆持满外向卒得脱益食婴细阳千户【索隐地理志属汝南】复以太仆从击胡骑句注北大破之以太仆击胡骑平城南三陷陈功为多赐所夺邑五百户【集解駟案汉书音义曰时有罪过夺邑者以赐之】以太仆击陈豨黥布军陷阵郤敌益食千户定食汝陰六千九百户除前所食婴自上初起沛常为太仆竟高祖崩以太仆事孝惠孝惠帝及高后德婴之脱孝惠鲁元於下邑之间也【正义宋州砀山县】乃赐婴县北第第一曰近我以尊异之孝惠帝崩以太仆事高后高后崩代王之来婴以太仆与东牟侯入清宫废少帝以天子法驾迎代王代邸与大臣共立为孝文皇帝复为太仆八岁卒谥为文侯【索隐案姚氏云三辅故事曰滕文公墓在饮马桥东大道南俗谓之马冢博物志曰公卿送婴葬至东都门外马不行掎地悲鸣得石椁有铭曰佳城鬱郁三千年见白日吁嗟滕公居此室乃葬之】子夷侯竈立七年卒子共侯赐立三十一年卒子侯颇尚平阳公主立十九岁元鼎二年坐与父御婢奸罪自杀国除

颍陰侯灌婴者睢阳贩繒者也【正义今陈州南颍县西北十三里颍陰故城是也睢阳宋州宋城县】高祖之为沛公略地至雍丘下章邯败杀项梁而沛公还军於砀婴初以中?从击破东郡尉於成武及秦军於扛里疾鬪赐爵七大夫从攻秦军亳南开封曲遇战疾力【集解服虔曰疾攻之】赐爵执帛号宣陵君从攻阳武以西至雒阳破秦军尸北北絶河津南破南阳守齮阳城东遂定南阳郡西入武关战於蓝田疾力至霸上赐爵执圭号昌文君【索隐亦称宣陵君皆非爵土加美号耳】沛公立为汉王拜婴为郎中从入汉中十月拜为中谒者从还定三秦下栎阳降塞王还围章邯於废丘未拔从东出临晋关击降殷王定其地击项羽将龙且魏相项他军定陶南疾战破之赐婴爵列侯号昌文侯食杜平乡【索隐谓食杜县之平乡】复以中谒者从降下砀以至彭城项羽击大破汉王汉王遁而西婴从还军於雍丘王武魏公申徒反【集解张晏曰秦将降为公今反】从击破之攻下黄【正义故城在曹州考城县东二十四里】西收兵军於荥阳楚骑来衆汉王乃择军中可为车骑将者皆推故秦骑士重泉人【集解徐广曰重泉属冯翊正义故城在同州蒲城县东南四十五里】李必骆甲习骑兵

今为校尉可为骑将【索隐必甲二人名也姚氏案汉纪桓帝延熹三年追录高祖功臣李必後黄门丞李遂为晋阳关内侯也】汉王欲拜之必甲曰臣故秦民恐军不信臣臣愿得大王左右善骑者傅之【集解如淳曰傅音附犹言随从者】灌婴虽少然数力战乃拜灌婴为中大夫令李必骆甲为左右校尉将郎中骑兵击楚骑於荥阳东大破之受诏别击楚军後絶其饷道起阳武至襄邑击项羽之将项冠於鲁下破之所将卒斩右司马骑将各一人【集解张晏曰主右方之马左亦如之】击破柘公王武军於燕西【集解徐广曰柘属陈索隐案武柘县令也正义柘属淮阳国按滑州胙城本南燕国也】所将卒斩楼烦将五人【集解李奇曰楼烦县名其人善骑射故以名射士为楼烦取其美称未必楼烦人也张晏曰楼烦胡国名】连尹一人【集解张晏曰大夫楚官索隐案左传莫敖连尹宫廐尹是】击王武别将桓婴白马下破之所将卒斩都尉一人以骑渡河南送汉王到雒阳使北迎相国韩信军於邯郸还至敖仓婴迁为御史大夫三年以列侯食邑杜平乡以御史大夫受诏将郎中骑兵东属相国韩信击破齐军於历下所将卒虏车骑将军华毋伤及将吏四十六人降下临菑得齐守相田光追齐相田横至赢博破其骑所将卒斩骑将一人生得骑将四人攻下赢博破齐将军田吸於千乘所将卒斩吸东从韩信攻龙且留公旋高密【索隐留县令称公旋其名高密县名在北海汉书作假密假密地名不知所在未知孰是耳正义留县在沛郡公其令】卒斩龙且【集解文颖曰所将卒】生得右司马连尹各一人楼烦将十人身生得亚将周兰齐地已定韩信自立为齐王使婴别将击楚将公杲於鲁北破之转南破薛郡长身虏骑将一人攻博阳前至下相以东南僮取虑徐【索隐取音秋虑音闻取又音趣僮徐是二县取虑是一县名】度淮尽降其城邑至广陵【集解駰案汉书音义曰住广陵以御敌正义谓从下相以东南尽降城邑乃至广陵皆平定也】项羽使项声薛公郯公复定淮北婴渡淮北击破项声郯公下邳【正义郯音谈东海县】斩薛公下下邳击破楚骑於平阳【索隐小颜云此平阳在东郡地理志太山有东平阳县正义南平阳县城今兖州邹县也在兖州东南六十二里按邹县去徐州滕县界四十余里也】遂降彭城虏柱国项佗降留薛沛酈萧相攻苦谿【正义户焦二音】复得亚将周兰与汉王会颍乡【集解徐广曰苦县有颍乡索隐音以之反】从击项籍军於陈下破之所将卒斩楼烦将二人虏骑将八人赐益食邑二千五百户项籍败垓下去也婴以御史大夫受诏将车骑别追项籍至东城【正义县在濠州定远县东南五十五里】破之所将卒五人共斩项籍皆赐爵列侯降左右司马各一人卒万二千人尽得其军将吏下东城历阳【正义和州历阳县即今州城是也】渡江破吴郡长吴下【集解如淳曰雄长之长也索隐下有郡守此长即令也如淳以为雄长非也正义今苏州也案如说非也吴郡即吴郡守也一破吴郡长兵於吴城下而得吴郡守身也】得吴守遂定吴豫章会稽郡还定淮北凡五十二县汉王立为皇帝赐益婴邑三千户其秋以车骑将军从击破燕王臧荼明年从至陈取楚王信还剖符世世勿絶食颍阴二千五百户号曰颍阴侯以车骑将军从击反韩王信於代至马邑受诏别降楼烦以北六县斩代左相破胡骑於武泉北【正义县名在朔州北一百二十里】复从击韩信胡骑晋阳下所将卒斩胡白题将一人【集解服虔曰胡名也】受诏并将燕赵齐梁楚车骑击破胡骑於滹石【集解服虔曰滹音沙索隐刘氏音千卧反】至平城为胡所围从还军东垣从击陈豨受诏别攻豨丞相侯敞军曲逆下破之卒斩敞及特将五人【集解文颖曰特一之特也】降曲逆卢奴上曲阳安平【正义卢奴定州安喜县是曲阳定州曲阳县是安平定州安平县是】攻下东垣黥布反以车骑将军先出攻布别将於相破之斩亚将楼烦将三人又进击破布上柱国军及大司马军又进破布别将肥诛【集解徐广曰一

作铢索隐案汉书作肥铢】婴身生得左司马一人所将卒斩其小将十人追北至淮上益食二千五百户布已破高帝归定令婴食颍阴五千户除前所食邑凡从得二千石二人别破军十六降城四十六定国一郡二县五十二得将军二人柱国相国各一人二千石十人婴自破布归高帝崩婴以列侯事孝惠帝及吕太后太后崩吕禄等以赵王自置为将军军长安为乱齐哀王闻之举兵西且入诛不当为王者上将军吕禄等闻之乃遣婴为大将将军往击之婴行至荥阳乃与绛侯等谋因屯兵荥阳风齐王以诛吕氏事【正义风方凤反】齐兵止不前绛侯等既诛诸吕齐王罢兵归婴亦罢兵自荥阳归与绛侯陈平共立代王为孝文皇帝孝文皇帝於是益封婴三千户赐黄金千斤拜为太尉三岁绛侯勃免相就国婴为丞相罢太尉官是岁匈奴大入北地上郡令丞相婴将骑八万五千往击匈奴匈奴去济北王反诏乃罢婴之兵後岁余婴以丞相卒谥曰懿侯子平侯阿代侯二十八年卒子强代侯十二年强有罪絶二岁元光三年天子封灌婴孙贤为临汝侯续灌氏後八岁坐行赇有罪国除

太史公曰吾适丰沛问其遗老观故萧曹樊哙滕公之家及其素异哉所闻方其鼓刀屠狗卖繒之时岂自知附骥之尾垂名汉庭德流子孙哉余与他广通为言高祖功臣之兴时若此云【索隐案他广樊哙之孙後失封盖尝讶太史公序萧曹樊滕之功委具则从他广而得其事故备也】

【索隐述赞曰圣贤影响云蒸龙变屠狗贩繒攻城野战扶义西上受封南面酈况卖交舞阳内援滕灌更王奕叶繁衍】

史记卷九十五

史记卷九十五考证

樊酈滕灌列传从攻围东郡守尉於成武○凌稚隆曰按汉书从攻围作从攻圉注圉地名

以待大王正义时羽未为王史追书○【臣照】按此等称谓非追书也直是当时尊奉之辞观亚夫谓项庄君王为人不忍可见时羽虽未为王然已擅命立雍王矣称以大王若固有之耳

击章平军好時正义章平即章邯子也○【臣照】按高祖纪明云雍王弟章平正义何所据而以为邯子也疑弟字之误

从击秦车骑壤东○凌稚隆曰一本车作军

定食舞阳五千四百户○功臣表作五千户汉表同苏 军於泥阳索隐北地县名 者龙马也○杨慎丹铅总录曰 从马从旦音亶无龙马之训

更食曲周五千一百户○功臣表云四千八百户汉表同

赵王自杀除国○徐孚远曰赵除国於酈寄传无涉盖删截旧文未净者

寄欲取平原君为夫人○孝武帝即位始尊皇太后母臧儿为平原君此乃追书之

子康侯遂成立○功臣表无成字汉表有之

子怀侯世宗立○功臣表无世字汉表有之

子侯终根立为太常坐法国除○功臣表云坐祝诅诛国除汉表云嗣二十九年後二年祝诅上要斩

後狱覆索隐案韦昭曰高帝自言不伤婴婴证之是狱辞翻覆也○陈沂曰证之已证其不伤矣後又有翻覆故婴坐系且受掠也

婴与萧何降泗水监平张晏曰胡陵平所止县何尝给之故与降也○杨慎曰降降之也婴与何或用兵或招降之也张说非是

面雍树○余有丁曰按杨慎云服说是愚谓依此则不应下文才说欲斩婴者十余疑苏说近之盖初载徐行雍抱之乃疾驰也

赐所夺邑五百户汉书音义曰时有罪过夺邑者以赐之○刘辰翁曰赐所夺邑恐是婴以他故夺邑至是复赐之耳汉书注亦有是说

子侯颇尚平阳公主○【臣照】按传与表叙颇尚主年岁不明不知此平阳主何人也若即是武帝姊则曹壽之前不闻先有所适而元光二年戊申曹壽未死元鼎二年丙寅以前主归卫氏且十年青又未死不应复有他适卫青传正义引汉书云平阳侯曹壽有恶疾就国乃诏青尚平阳公主则曹卫之间更无其人武帝时又不闻有两平阳公主

坐行赇有罪国除○汉表元朔五年坐子伤人首匿免千户

史记卷九十五考证

卷九十六

钦定四库全书

史记卷九十六

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

张丞相列传第三十六

张丞相苍者阳武人也【索隐案县名属陈留正义郑州阳武县也】好书律历秦时为御史主柱下方书【集解如淳曰方版也谓书事在版上者也秦以上置柱下史苍为御史主其事或曰四方文书索隐周秦皆有柱下史为御史也所掌及侍立恒在殿柱之下故老聃为周柱下史今苍在秦代亦居斯职方书者方板谓小事书於板也或曰主四方文书也姚氏以为下云明习天下图书计籍主郡上计则方为四方文书者是也】有罪亡归及沛公略地过阳武苍以客从攻南阳苍坐法当斩解衣伏质【索隐小颜云质鍤也】身长大肥白如瓠时王陵见而怪其美士乃言沛公赦勿斩遂从西入武关至咸阳沛公立为汉王入汉中还定三秦陈余击走常山王张耳耳归汉汉乃以张苍为常山守从淮陰侯击赵苍得陈余赵地已平汉王以苍为代相备边寇已而徙为赵相相赵王耳耳卒相赵王敖复徙相代王燕王臧荼反高祖往击之苍以代相从攻臧荼有功以六年中封为北平侯食邑千二百户迁为计相【集解文颖曰能计故号曰计相】一月更以列侯为主计四岁【集解张晏曰以列侯典校郡国簿书如淳曰以其所主因以为官号与计相同时所卒立非久施也索隐谓改计相之名更名主计也此盖权时立号也】是时萧何为相国而张苍乃自秦时为柱下史明习天下图书计籍苍又善用算律历故令苍以列侯居相府领主郡国上计者黥布反亡汉立皇子长为淮南王而张苍相之十四年迁为御史大夫周昌者沛人也其从兄曰周苛秦时皆为泗水卒史及高祖起沛击破泗水守监於是周昌周苛自卒史从沛公沛公以周昌为职志【集解徐广曰主旗帜之属索隐官名也职主也志旗帜也谓掌旗帜之官也音昌志反】周苛为客【集解张晏曰为帐下宾客不掌官】从入关破秦沛公立为汉王以周苛为御史大夫周昌为中尉汉王四年楚围汉王荥阳急汉王遁出去而使周苛守荥阳城楚破荥阳城欲令周苛将苛骂曰若趣降汉王不然今为虏矣项羽怒亨周苛【集解徐广曰四年三月也】於是乃拜周昌为御史大夫常从击破项籍以六年中与萧曹等俱封封周昌为汾陰侯周苛子周成以父死事封为高景侯【集解徐广曰九年封封三十九年文帝後元四年谋反死国除】昌为人强力敢直言自萧曹等皆卑下之昌尝燕时入奏事【集解駰案汉书音义曰以上燕时入奏事】高

帝方拥戚姬昌还走高帝逐得骑周昌项问曰我何如主也昌仰曰陛下即桀纣之主也於是上笑之然尤憚周昌及帝欲废太子而立戚姬子如意为太子大臣固争之莫能得上以留侯策即止而周昌廷争之强上问其说昌为人吃又盛怒曰臣口不能言然臣期期知其不可【正义期以口吃每语故重言期期也】陛下虽欲废太子臣期期不奉诏上欣然而笑既罢吕后侧耳於东厢听【集解韦昭曰殿东堂也索隐小颜云正寝之东西室皆号曰箱言似箱篋之形】见周昌为跪谢曰微君太子几废【索隐几钜依反】是後戚姬子如意为赵王年十岁高祖忧即万岁之後不全也赵尧年少为符玺御史赵人方与公【集解孟康曰方与县名公其号瓚曰方与县令也】谓御史大夫周昌曰君之史赵尧年虽少然奇才也君必异之是且代君之位周昌笑曰尧年少刀笔吏耳【正义古用简牍书有错谬以刀削之故号曰刀笔吏】何能至是乎居顷之赵尧侍高祖高祖独心不乐悲歌羣臣不知上之所以然赵尧进请问曰陛下所为不乐非为赵王年少而戚夫人与吕后有郤邪备万岁之後而赵王不能自全乎高祖曰然吾私忧之不知所出【索隐谓不知其计所出也】尧曰陛下独宜为赵王置贵强相及吕后太子羣臣素所敬憚乃可高祖曰然吾念之欲如是而羣臣谁可者尧曰御史大夫周昌其人有坚忍质直且自吕后太子及大臣皆素敬憚之独昌可高祖曰善於是乃召周昌谓曰吾欲固烦公公强为我相赵王【正义桓谭世论云使周相赵不如使取吕后家女为妃令戚夫人善事吕后则如意无毙也】周昌泣曰臣初起从陛下陛下独奈何中道而弃之於诸侯乎高祖曰吾极知其左迁【索隐诸侯王表有左官之律韦昭以为左犹下也禁不得下仕於诸王也然地道尊右右贵左贱故谓贬秩为左迁他皆此类】然吾私忧赵王念非公无可者公不得已强行於是徙御史大夫周昌为赵相既行久之高祖持御史大夫印弄之曰谁可以为御史大夫者孰视赵尧曰无以易尧遂拜赵尧为御史大夫【集解徐广曰十年也】尧亦前有军功食邑及以御史大夫从击陈豨有功封为江邑侯【集解徐广曰十一年封】高祖崩吕太后使使召赵王其相周昌令王称疾不行使者三反周昌固为不遣赵王於是高后患之乃使使召周昌周昌至谒高后高后怒而骂周昌曰尔不知我之怨戚氏乎而不遣赵王何昌既徵高后使使召赵王赵王果来至长安月余饮药而死周昌因谢病不朝见三岁而死【集解徐广曰諡悼也索隐汉书列传及表咸言周昌諡悼韦昭云或諡惠非也汉书又曰传子至孙意有罪国除景帝复封昌孙左军为安阳侯有罪国除也】後五岁【正义高后之年】高后闻御史大夫江邑侯赵尧高祖时定赵王如意之画乃抵尧罪【集解徐广曰吕后元年国除】以广阿侯任敖为御史大夫

任敖者故沛狱吏高祖尝辟吏【正义辟音避】吏系吕后遇之不慎任敖素善高祖怒击伤主吕后吏及高祖初起敖以客从为御史守丰二岁高祖立为汉王东击项籍敖迁为上党守陈豨反时敖坚守封为广阿侯食千八百户高后时为御史大夫三岁免【集解徐广曰文帝二年任敖卒諡懿侯曾孙越人元鼎二年为太常坐酒酸国除駟案汉书任敖孝文元年薨徐误也索隐此徐氏据汉书为记而误云二年裴駟又引任安书证为得其实正义按史记书表云孝文二年卒汉表又云封十九年卒计高祖十一年封到文帝二年则十九年矣而汉书误裴氏不考乃云徐误何其貳过也】以平阳侯曹窋为御史大夫高后崩不与大臣共诛吕禄等免以淮南相张敖为御史大夫敖与绛侯等尊立代王为孝文皇帝四年丞相灌婴卒张敖为丞相自汉兴至孝文二十余年会天下初定将相公卿皆军吏张敖为计相时绪正律历【集解文颖曰绪寻也或曰绪业也】以高祖十月始至霸上因故秦时本以十月为岁首弗革

推五德之运以为汉当水德之时尚黑如故【正义姚察云苍是秦人犹用推五胜之法以周赤乌为火汉胜火以水也】吹律调乐人之音声及以比定律令【集解如淳曰比谓五音清浊各有所比也以定十二月律之法令於乐官使长行之瓚曰谓以比故取类以定法律与条令也正义比音鼻或音必履反谓比方也】若百工天下作程品【集解如淳曰若顺也百工为器物皆有尺寸斤两皆使得宜此之谓顺晋灼曰若预及之辞索隐晋灼说为得】至於为丞相卒就之故汉家言律历者本之张苍苍本好书无所不观无所不通而尤善律历【集解駰案汉书曰着书十八篇言陰阳律历事】张苍德王陵王陵者安国侯也及苍贵常父事王陵陵死後苍为丞相洗沐常先朝陵夫人上食然後敢归家苍为丞相十余年鲁人公孙臣上书言汉土德时其符有黄龙当见诏下其议张苍张苍以为非是罢之其後黄龙见成纪於是文帝召公孙臣以为博士草土德之历制度更元年张丞相由此自绌谢病称老苍任人为中候【集解张晏曰所选保任者也瓚曰中候官名】大为奸利上以让苍苍遂病免苍为丞相十五岁而免孝景前五年苍卒谥为文侯子康代侯八年卒子类【集解徐广曰一作□音瞢】代为侯八年坐临诸侯丧後就位不敬国除【索隐案汉书云传子至孙类有罪国除今此文康代八年卒子□代侯则□即类与汉书略同也】初张苍父长不满五尺及生苍苍长八尺余为侯丞相苍子复长【集解駰案汉书云长八尺】及孙赖长六尺余坐法失侯苍之免相後老口中无齿食乳女子为乳母妻妾以百数尝孕者不复幸苍年百有余岁而卒

申屠丞相嘉者梁人以材官蹶张【集解徐广曰勇健有材力开张駰案如淳曰材官之多力能脚蹋强弩张之故曰蹶张律有蹶张士索隐孟康云言张强弩蹶其月反汉令曰蹶张士百人也】从高帝击项籍迁为队率【索隐所类反】从击黥布军为都尉孝惠时为淮阳守孝文帝元年举故吏士二千石从高皇帝者悉以为关内侯食邑二十四人而申屠嘉食邑五百户张苍已为丞相嘉迁为御史大夫张苍免相【集解徐广曰後二年八月】孝文帝欲用皇后弟窦广国为丞相曰恐天下以吾私广国广国贤有行故欲相之念久之不可而高帝时大臣又皆多死余见无可者乃以御史大夫嘉为丞相因故邑封为故安侯【正义今易州界武阳城中东南隅故城是也】嘉为人廉直门不受私谒是时太中大夫邓通方隆爱幸赏赐累巨万文帝尝燕饮通家其宠如是是时丞相入朝而通居上傍有怠慢之礼丞相奏事毕因言曰陛下爱幸臣则富贵之至於朝廷之礼不可以不肃上曰君勿言吾私之罢朝坐府中嘉为檄召邓通诣丞相府不来且斩通通恐入言文帝文帝曰汝第往吾今使人召若通至丞相府免冠徒跣顿首谢嘉坐自如故不为礼责曰夫朝廷者高皇帝之朝廷也通小臣戏殿上大不敬当斩吏今行斩之【集解如淳曰嘉语其吏曰今便行斩之】通顿首首尽出血不解文帝度丞相已困通使使者持节召通而谢丞相曰此吾弄臣君释之邓通既至为文帝泣曰丞相几杀臣嘉为丞相五岁孝文帝崩孝景帝即位二年鼂错为内史贵幸用事诸法令多所请变更议以谪罚侵削诸侯而丞相嘉自绌所言不用疾错错为内史门东出不便更穿一门南出南出者太上皇庙堧垣【集解服虔曰宫外垣也如淳曰慊音畏慊之慊索隐慊音乃唤反韦昭音而缘反又音软】嘉闻之欲因此以法错擅穿宗庙垣为门奏请诛错错客有语错错恐夜入宫上谒自归景帝【正义自归帝首露】至朝丞相奏请诛内史错景帝曰错所穿非真庙垣乃外堧垣故他官居其中【索隐汉书作冗官谓散官】且又我使为之错无罪罢朝嘉谓长史曰吾悔不先斩错乃先请之为错所卖至舍因欧血而死谥为节侯子共侯蔑代三年卒子侯去病代三十一年卒【集解徐广曰一本无侯去病而云共侯蔑三十三年子與改封靖

安侯】子侯與代六岁坐为九江太守受故官送有罪国除自申屠嘉死之後景帝时开封侯陶青桃侯刘舍为丞相【集解徐广曰陶青高祖功臣陶舍之子也諡夷刘舍本项氏亲也赐姓刘氏父襄佐高祖有功舍諡哀侯】及今上时栢至侯许昌【集解徐广曰高祖功臣许温之孙諡哀侯】平棘侯薛泽【集解徐广曰高祖功臣广平侯薛欧之孙平棘节侯薛泽】武强侯庄青翟【集解徐广曰高祖功臣庄不识之孙】高陵侯赵周【集解徐广曰周父夷吾为楚王戊太傅諫争而死】等为丞相皆以列侯继嗣娵娵【集解徐广曰娵音七角反一作断一作 索隐娵音侧角反小顔云持整之貌汉书作 音初角反一作断音都乱反义如尚书断断猗无他技】廉谨为丞相备员而已无所能发明功名有着於当世者

太史公曰张苍文学律历为汉名相而绌贾生公孙臣等言正朔服色事而不遵明用秦之顓頊历何哉【集解张晏曰不考经典专用顓頊历何哉】周昌木强人也【正义言其质直掘强如木石焉】任敖以旧德用【集解张晏曰谓伤辱吕后吏】申屠嘉可谓刚毅守节矣然无术学殆与萧曹陈平异矣

孝武时丞相多甚不记莫录其行起居状略且纪征和以来有车丞相长陵人也【集解駰案名千秋】卒而有韦丞相代【索隐自车千秋以下皆褚先生等所记然丞相传都省略汉书则备】

韦丞相贤者鲁人也以读书术为吏至大鸿胪有相工相之当至丞相有男四人使相工相之至第二子其名玄成相工曰此子贵当封韦丞相言曰我即为丞相有长子是安从得之後竟为丞相病死而长子有罪论不得嗣而立玄成玄成时佯狂不肯立竟立之有让国之名後坐骑至庙不敬有诏夺爵一级为关内侯失列侯得食其故国邑韦丞相卒有魏丞相代

魏丞相相者济陰人也以文吏至丞相其人好武皆令诸吏带劔带劔前奏事或有不带劔者当入奏事至乃借劔而敢入奏事其时京兆尹赵君【集解駰案名广汉】丞相奏以免罪使人执魏丞相欲求脱罪而不听复使人胁恐魏丞相以夫人贼杀侍婢事而私独奏请验之发吏卒至丞相舍捕奴婢答击问之实不以兵刃杀也而丞相司直繁君【索隐繁姓也音婆】奏京兆尹赵君迫胁丞相诬以夫人贼杀婢发吏卒围捕丞相舍不道又得擅屏骑士事赵京兆坐要斩又有使掾陈平等劾中尚书疑以独擅劫事而坐之大不敬长史以下皆坐死或下蚕室而魏丞相竟以丞相病死子嗣後坐骑至庙不敬有诏夺爵一级为关内侯失列侯得食其故国邑魏丞相卒以御史大夫邴吉代邴丞相吉者鲁国人也以读书好法令至御史大夫孝宣帝时以有旧故封为列侯而因为丞相明於事有大智後世称之以丞相病死子显嗣後坐骑至庙不敬有诏夺爵一级失列侯得食故国邑显为吏至太仆坐官耗乱身及子男有奸赃免为庶人邴丞相卒黄丞相代长安中有善相工田文者与韦丞相魏丞相邴丞相微贱时会於客家田文言曰今此三君者皆丞相也其後三人竟更相代为丞相何见之明也

黄丞相霸者淮阳人也以读书为吏至颍川太守治颍川以礼义条教喻告化之犯法者风晓令自杀化大行名声闻孝宣帝下制曰颍川太守霸以宣布诏令治民道不拾遗男女异路狱中无重囚锡爵关内侯黄金百斤徵为京兆尹而至丞相复以礼义为治以丞相病死子嗣後

为列侯黄丞相卒以御史大夫于定国代于丞相已有廷尉传在张廷尉语中于丞相去御史大夫韦玄成代

韦丞相玄成者即前韦丞相子也代父後失列侯其人少时好读书明於诗论语为吏至卫尉徙为太子太傅御史大夫薛君免【集解駟案名广德也】为御史大夫于丞相乞骸骨免而为丞相因封故邑为扶阳侯数年病死孝元帝亲临丧赐赏甚厚子嗣後其治容容随世俗浮沉而见谓谄巧而相工本谓之当为侯代父而後失之复自游宦而起至丞相父子俱为丞相世间美之岂不命哉相工其先知之韦丞相卒御史大夫匡衡代

丞相匡衡者东海人也好读书从博士受诗家贫衡佣作以给食饮才下数射策不中至九乃中丙科其经以不中科故明习补平原文学卒史数年郡不尊敬御史徵之以补百石属荐为郎而补博士拜为太子少傅而事孝元帝孝元好诗而迁为光禄勳居殿中为师授教左右而县官坐其旁听甚善之日以尊贵御史大夫郑弘坐事免而匡君为御史大夫岁余韦丞相死匡君代为丞相封乐安侯以十年之间不出长安城门而至丞相岂非遇时而命也哉深惟士之游宦所以至封侯者微甚【集解徐广曰微一作徵】然多至御史大夫即去者诸为大夫而丞相次也其心冀幸丞相物故也【集解駟案高堂隆答魏朝访曰物无也故事也言无复所能於事】或乃陰私相毁害欲代之然守之日久不得或为之日少而得之至于封侯真命也夫御史大夫郑君守之数年不得匡君居之未岁而韦丞相死即代之矣岂可以智巧得哉多有贤圣之才困阨不得者衆甚也【索隐案此论匡衡已来事则後人所述也或亦称太史公其序述浅陋一何诬也】

【索隐述赞曰张苍主计天下作程孙臣始绌秦历尚行御史亚相相国阿衡申屠面折周子廷争其他妮妮无所发明】

史记卷九十六

史记卷九十六考证

张丞相列传封为高景侯集解徐广曰九年封○九监本作元【臣照】按以长历考之高祖元年至文帝後元四年中间不止三十九年且高祖元年尚是沛公周苛固未死其误必也依长历计之一本作九年者是今从之

谓御大夫周昌曰○【臣照】按御大夫明脱史字各本皆同今仍之

高后崩不与大臣共诛吕禄等免○归有光曰汉书云高后崩与大臣共诛诸吕後坐事免考吕后纪汉书为是

张苍为计相时绪正律历○杨慎曰时字连计相读为是故後言至於为丞相卒就之

子侯去病代三十一年卒徐广曰一本无此去病而云共侯蔑三十三年子與改封靖安侯○
【臣照】按徐广所云盖?年表然汉表作侯共嗣二十二年与徐又异

复使人胁恐魏丞相以夫人贼杀侍婢事○赵广汉传云使中郎赵奉壽

而丞相司直繁君○赵广汉传司直萧望之也繁君名延壽见望之传时丙吉为丞相褚先生
误

于丞相已有廷尉传在张廷尉语中○张廷尉传并无于廷尉语

史记卷九十六考证

卷九十七

钦定四库全书

史记卷九十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

酈生陆贾列传第三十七

酈生食其者【正义历异几三音也】陈留高阳人也【集解徐广曰今在圉县索隐案高阳属陈留圉县高阳乡名也故耆旧传云食其圉高阳乡人正义陈留风俗传云高阳在雍丘西南括地志云圉城在汴州雍丘县西南食其墓在雍丘西南二十八里盖谓此也】好读书家贫落魄无以为衣食业【集解应劭曰落魄志行衰恶之貌也晋灼曰落薄落托义同索隐案郑氏云魄音薄】为里监门吏【正义监音甲衫反战国策云齐宣谓颜斶曰夫监门闾里士之贱也】然县中贤豪不敢役县中皆谓之狂生及陈胜项梁等起诸将徇地【正义徇畧也】过高阳者数十人酈生问其将皆握齮【集解应劭曰握齮急促之貌索隐应劭云齮音若促邹氏音鹿角反韦昭云握齮小节也】好苛礼【索隐案苛亦作荷贾逵云苛烦也小颜云细也】自用不能听大度之言酈生乃深自藏匿後闻沛公将兵畧地陈留郊沛公麾下骑士适酈生里中子也【集解服虔曰食其里中子适作沛公骑士索隐适音释服虔苏林皆云沛公骑士适是食其里中人案言适近作骑士也】沛公时时问邑中贤士豪俊骑士归酈生见谓之曰吾闻沛公慢而易人多大畧此真吾所愿从游莫为我先【索隐先谓先容言无人人为我作介绍也正义为于伪反】若见沛公谓曰臣里中有酈生年六十余长八尺人皆谓之狂生生自谓我非狂生骑士曰沛公不好儒诸客冠儒冠来者沛公辄解其冠溲溺其中【索隐溲所由反溺乃吊反亦如字溲即溺义也】与人言常大骂未可以儒生说也酈生曰弟言之骑士从容言如酈生所诫者沛公至高阳传舍【集解徐广曰二世三年二月】使人召酈生酈生至入谒沛公方倨牀使两女子洗足【索隐案乐彦云边牀曰倨】而见酈生酈生入则长揖不拜曰足下欲助秦攻诸侯乎且欲率诸侯破秦也沛公骂曰竖儒【索隐案竖者僮仆之称沛公轻之以比奴竖故曰竖儒】夫天下同苦秦久矣故诸侯相率而攻秦何谓助秦攻诸侯乎酈生曰必聚徒合义兵诛无道秦不宜倨见长者於是沛公辍洗起摄衣【正义摄犹言歛着也】延酈生上坐谢之酈生因言六国从横时沛公喜赐酈生食问曰计将安出酈生曰足下起纠合之衆【集解駰案一作乌合一作瓦合】收散乱之兵不满万人欲以径入强秦此所谓探虎口者也夫陈留天下之冲四通五達之郊也【集解如淳曰四面中央凡五達也】

瓚曰四通五達言无险阻也】今其城又多积粟臣善其令【正义言食其与陈留县令相善也】请得使之令下足下【正义令力征反下谓降之也】即不听足下举兵攻之臣为内应於是遣酈生行沛公引兵随之遂下陈留号酈食其为广野君酈生言其弟酈商使将数千人从沛公西南畧地酈生常为说客驰使诸侯汉三年秋项羽击汉拔荥阳汉兵遁保巩洛楚人闻淮阴侯破赵彭越数反梁地【索隐数音朔】则分兵救之淮阴方东击齐汉王数困荥阳成臯计欲捐成臯以东屯巩洛以拒楚酈生因曰臣闻知天之天者王事可成不知天之天者王事不可成王者以民人为天而民人以食为天【索隐管子云王者以民为天民以食为天能知天之天者斯可矣】夫敖仓天下转输久矣臣闻其下廩有藏粟甚多楚人拔荥阳不坚守敖仓廩引而东令适卒分守成臯【索隐适音直革反案通俗文云罚罪云云即所谓谪戍也又音陟革反卒音租忽反】此乃天所以资汉也方今楚易取而汉反却自夺其便【索隐以言不取敖仓之粟是汉自夺其便利也】臣窃以为过矣且两雄不俱立楚汉久相持不决百姓骚动海内摇荡农夫释耒工女下机【索隐案谓女工是工巧也汉书作红音工】天下之心未有所定也愿足下急复进兵收取荥阳据敖仓之粟【正义敖仓在郑州荥阳县四十五里石门之东北临汴水南带三皇山秦始皇时置仓於敖山上故名敖仓】塞成臯之险【正义即泛水县山】杜大行之道【集解韦昭曰在河内野王北】距蜚狐之口【集解如淳曰上党壶关也案蜚狐在代郡西南正义按蔚州飞狐县北五十里有秦汉故郡城西南有山谷号为飞狐口也】守白马之津以示诸侯劾实形制之势则天下知所归矣方今燕赵已定唯齐未下今田广据千里之齐田间将二十万之衆军於历下诸田宗强负海阻河济南近楚人多变诈足下虽遣数十万师未可以岁月破也臣请得奉明诏说齐王使为汉而称东藩上曰善廩从其画复守敖仓而使酈生说齐王曰王知天下之所归乎王曰不知也曰王知天下之所归则齐国可得而有也若不知天下之所归即齐国未可得保也齐王曰天下无所归曰归汉曰先生何以言之曰汉王与项王戮力西面击秦约先入咸阳者王之汉王先入咸阳项王负约不与而王之汉中项王迁杀义帝汉王闻之起蜀汉之兵击三秦出关而责义帝之处收天下之兵立诸侯之後降城即以侯其将得赂即以分其士与天下同其利豪英贤才皆乐为之用诸侯之兵四面而至蜀汉之粟方船而下【索隐案方船谓并舟也战国策云方船积粟循江而下也】项王有倍约之名杀义帝之负於人之功无所记於人之罪无所忘战胜而不得其赏拔城而不得其封非项氏莫得用事为人刻印劓而不能授【集解孟康曰劓断无复廉锷也瓚曰项羽吝於爵赏玩惜侯印不能以封於人也索隐劓音五官反案郭象注庄子云立法而劓断无圭角汉书作玩言玩惜不忍授人】攻城得赂积而不能赏天下畔之贤才怨之而莫为之用故天下之士归於汉王可坐而策也夫汉王发蜀汉定三秦涉西河之外援上党之兵【正义援音爰】下井陘诛成安君破北魏举三十二城【索隐北魏谓魏豹豹在河此故也亦谓之西魏以大梁在河南故也】此蚩尤之兵也非人之力量也天之福也今已据敖仓之粟塞成臯之险守白马之津杜太行之阪距蜚狐之口天下後服者先亡矣王疾先下汉王齐国社稷可得而保也不下汉王危亡可立而待也田广以为然廩听酈生罢历下兵守战备与酈生日纵酒淮阴侯闻酈生伏轼下齐七十余城廩夜度兵平原袭齐齐王田广闻汉兵至以为酈生卖已廩曰汝能止汉军我活汝不然我将亨汝酈生曰举大事不细谨盛德不辞让而公不为若更言齐王遂烹酈生引兵东走汉十二年曲周侯酈商以丞相将兵击黥布有功高祖举列侯功臣思酈食其酈食其子酈疥数将兵功未当侯上以其父故封疥为高梁侯後更食武遂嗣三世【索隐疥音界地理志武遂属河间案汉书作武阳子遂衍字误也】

元狩元年中武遂侯平【正义年表云卒子敌嗣卒子平嗣元年有罪国除而汉书云更食武阳子遂嗣恐汉书误也】坐诈诏衡山王取百斤金当弃市病死国除也

陆贾者楚人也【索隐案陈留风俗传云陆氏春秋时陆浑国之後晋侯伐之故陆浑子奔楚贾其後又陆氏谱云齐宣公友子逵食采於陆乡号曰陆侯逵生发发生皐适楚贾其孙也】以客从高祖定天下名为有口辩士居左右常使诸侯及高祖时中国初定尉他平南越因王之【索隐赵他为南越尉故曰尉他他音駝】高祖使陆贾赐尉他印为南越王陆生至尉他魑结【集解服虔曰魑音椎今兵士椎头结索隐魑直追反结音计谓为髻一撮以推而结之故字从结且案魑结二字依字读之亦通谓夷人本被髮左衽今他同其风俗但魑其髮而结之也】箕踞见陆生陆生因进说他曰足下中国人亲戚昆弟坟墓在真定【索隐赵地也本名东垣属常山】今足下反天性弃冠带欲以区区之越与天子抗衡为敌国【索隐案崔浩云抗对也衡车轭上横木抗衡言两衡相对拒率不相避下也】祸且及身矣且夫秦失其政诸侯豪杰并起唯汉王先入关据咸阳项羽倍约自立为西楚霸王诸侯皆属可谓至强然汉王起巴蜀鞭笞天下刳畧诸侯遂诛项羽灭之五年之间海内平定此非人力天之所建也天子闻君王王南越不助天下诛暴逆将相欲移兵而诛王天子怜百姓新劳苦故且休之遣臣授君王印剖符通使君王宜郊迎北面称臣迺欲以新造未集之越屈强於此汉诚闻之掘烧王先人冢夷灭宗族使一偏将将十万衆临越则越杀王降汉如反覆手耳於是尉他迺蹶然起坐【索隐苏林音厥礼记子夏蹶然而起埤仓云蹶起也】谢陆生曰居蛮夷中久殊失礼义因问陆生曰我孰与萧何曹参韩信贤陆生曰王似贤复曰我孰与皇帝贤陆生曰皇帝起丰沛讨暴秦诛强楚为天下兴利除害继五帝三皇之业统理中国中国之人以亿计地方万里居天下之膏腴人衆车輦万物殷富政由一家自天地剖泮未始有也今王衆不过数十万皆蛮夷崎岖山海间譬若汉一郡王何迺比於汉尉他大笑曰吾不起中国故王此使我居中国何渠不若汉【集解駟案渠音讎索隐汉书作遽字小顔以为有何迫促而不如汉也】迺大说陆生留与饮数月曰越中无足与语至生来令我日闻所不闻赐陆生橐中装直千金【集解张晏曰珠玉之宝也装裹也索隐橐音托案如淳云以为明月珠之属又案诗传大曰橐小曰囊埤仓云有底曰囊无底曰索谓以宝物装裹以入囊橐也】他送亦千金【集解苏林曰非橐中物故曰他送也】陆生卒拜尉他为越王令称臣奉汉约归报高祖大悦拜贾为太中大夫陆生时时前说称诗书高帝骂之曰迺公居马上而得之安事诗书陆生曰居马上得之宁可以马上治之乎且汤武逆取而以顺守之文武并用长久之术也昔者吴王夫差智伯极武而亡秦任刑法不变卒灭赵氏【集解駟案赵氏秦姓也索隐案韦昭云秦伯翳後与赵同出蜚廉造父有功周缪王封之赵由此一姓赵氏】乡使秦已并天下行仁义法先圣陛下安得而有之高帝不悻而有慙色迺谓陆生曰试为我着秦所以失天下吾所以得之者何及古成败之国陆生迺粗述存亡之徵凡着十二篇每奏一篇高帝未尝不称善左右呼万岁号其书曰新语【正义七録云新语二卷陆贾撰也】孝惠帝时吕太后用事欲王诸吕畏大臣有口者陆生自度不能争之迺病免家居以好畲田地善【正义畲音止雍州县也】可以家焉有五男迺出所使越得橐中装卖千金【正义汉制一金直千贯】分其子子二百金令为生产陆生常安车驷马从歌舞鼓琴瑟侍者十人宝劔直百金谓其子曰与汝约【集解徐广曰汝一作公】过汝汝给吾人马酒食极欲十日而更所死家得宝劔车骑侍从者一岁中往来过他客率不过再三过【索隐率音律过音戈其下过字音光卧反】数见不鲜【索隐音朔

现数见谓时时来见汝也不鲜言必令鲜美作食莫令见不鲜之物也汉书作数击鲜如淳云新杀曰鲜】无久恩公为也【集解韦昭曰恩污辱索隐恩患也公贾自谓也言汝诸子无久厌患公也】吕太后时王诸吕诸吕擅权欲劫少主危刘氏右丞相陈平患之力不能争恐祸及已常燕居深念陆生往请【集解駰案汉书音义曰靖若问起居】直入坐而陈丞相方深念不时见陆生【索隐深念深思之也】陆生曰何念之深也陈平曰生揣我何念【集解孟康曰揣度也韦昭曰揣音初委反】陆生曰足下位为上相食三万户侯【索隐案陈平传食户五千以曲逆秦时有三万户恐复业至此故称也】可谓极富贵无欲矣然有忧念不过患诸吕少主耳陈平曰然为之奈何陆生曰天下安注意相天下危注意将将相和调则士务附士务附【集解徐广曰务一作豫】天下虽有变即权不分为社稷计在两君掌握耳臣常欲谓太尉绦侯绦侯与我戏易吾言君何不交驩太尉深相结为陈平画吕氏数事陈平用其计廼以五百金为绦侯寿厚具乐饮太尉亦报如之此两人深相结则吕氏谋益衰陈平廼以奴婢百人车马五十乘钱五百万遗陆生为饮食费陆生以此游汉廷公卿间名声籍盛【集解駰案汉书音义曰言狼籍甚盛】及诛诸吕立孝文帝陆生颇有力焉孝文帝即位欲使人之南越陈丞相等乃言陆生为太中大夫往使尉他令尉他去黄屋称制令比诸侯皆如意旨语在南越语中陆生竟以寿终

平原君朱建者楚人也故尝为淮南王黥布相有臯去後复事黥布布欲反时间平原君平原君止之布不听而听梁父侯遂反【索隐梁父侯史失名如淳注汉书云遂布臣非也臣瓚曰布不用梁父侯计遂反耳其说是也】汉已诛布闻平原君谏不与谋【正义与音预】得不诛语在黥布语中【集解駰案黥布列传无此语】平原君为人辩有口刻廉刚直家於长安行不苟合义不取容辟阳侯行不正得幸吕太后时辟阳侯欲知平原君平原君不肯见及平原君母死陆生素与平原君善过之平原君家贫未有以发丧【索隐案刘氏云谓欲葬时须啓发殡宫故云发丧也】方假贷服具陆生令平原君发丧陆生往见辟阳侯贺曰平原君母死辟阳侯曰平原君母死何乃贺我乎陆贾曰前日君侯欲知平原君平原君义不知君以其母故【集解张晏曰相知当同恤灾危母在故义不知君索隐案崔浩云建以母在义不以身许人也】今其母死君诚厚送丧则彼为君死矣辟阳侯乃奉百金往税【集解韦昭云衣服曰税税当为襚索隐案说文税赠终服也襚音式芮反亦音遂】列侯贵人以辟阳侯故往税凡五百金辟阳侯幸吕太后人或毁辟阳侯於孝惠帝孝惠帝大怒下吏欲诛之吕太后慙不可以言大臣多害辟阳侯行欲遂诛之辟阳侯急因使人欲见平原君平原君辞曰狱急不敢见君廼求见孝惠幸臣閼籍孺【索隐按佞幸传云高祖时有籍孺孝惠时有閼孺今总言閼籍孺误也】说之曰君所以得幸帝天下莫不闻今辟阳侯幸太后而下吏道路皆言君谗欲杀之今日辟阳侯诛旦日太后含怒亦诛君何不肉袒为辟阳侯言於帝帝听君出辟阳侯太后大驩两主共幸君君贵富益倍矣於是閼籍孺大恐从其计言帝果出辟阳侯辟阳侯之囚欲见平原君平原君不见辟阳侯辟阳侯以为倍已大怒及其成功出之廼大惊吕太后崩大臣诛诸吕辟阳侯於诸吕至深【集解如淳曰辟阳侯与诸吕相亲信也为罪宜诛者至深索隐如淳之说非也案小颜云直言辟阳侯与诸吕相知情义至深重得其理也】而卒不诛计画所以全者皆陆生平原君之力也孝文帝时淮南厉王杀辟阳侯以诸吕故文帝闻其客平原君为计策使吏捕欲治闻吏至门平原君欲自杀诸子及吏皆曰事未可知何早自杀为平原君曰我死祸絶不及而身矣遂自刭孝文帝闻而惜之曰吾无意杀之廼召其子拜为中大夫

夫【索隐案下文所谓与太史公善者】使匈奴单于无礼迺骂单于遂死匈奴中初沛公引兵过陈留酈生踵军门上谒曰高阳贱民酈食其窃闻沛公暴露将兵助楚讨不义敬劳从者愿得望见口画天下便事使者入通沛公方洗问使者曰何如人也使者对曰状貌类大儒衣儒衣冠侧注【集解徐广曰侧注冠一名高山冠齐王所服以赐谒者】沛公曰为我谢之言我方以天下为事未暇见儒人也使者出谢曰沛公敬谢先生方以天下为事未暇见儒人也酈生瞋目案劒叱使者曰走复入言沛公吾高阳酒徒也【集解徐广曰一本言而公高阳酒徒】非儒人也使者惧而失谒跪拾谒还走复入报曰客天下壮士也叱臣臣恐至失谒曰走复入言而公高阳酒徒也沛公遽雪足杖矛曰延客入酈生入揖沛公曰足下甚苦暴衣露冠将兵助楚讨不义足下何不自喜也臣愿以事见而曰吾方以天下为事未暇见儒人也夫足下欲兴天下之大事而成天下之大功而以目皮相恐失天下之能士且吾度足下之智不如吾勇又不如吾若欲就天下而不相见窃为足下失之沛公谢曰乡者闻先生之容今见先生之意矣迺延而坐之问所以取天下者酈生曰夫足下欲成大功不如止陈留陈留者天下之据冲也兵之会地也积粟数千万石城守甚坚臣素善其令愿为足下说之不听臣臣请为足下杀之而下陈留足下将陈留之衆据陈留之城而食其积粟招天下之从兵从兵已成足下横行天下莫能有害足下者矣沛公曰敬闻命矣於是酈生迺夜见陈留令说之曰夫秦为无道而天下畔之今足下与天下从则可以成大功今独为亡秦婴城而坚守臣窃为足下危之陈留令曰秦法至重也不可以妄言妄言者无类吾不可以应先生所以教臣者非臣之意也愿勿复道酈生留宿卧夜半时斩陈留令首踰城而下报沛公沛公引兵攻城县令首於长竿以示城上人曰趣下而令头已断矣今後下者必先斩之於是陈留人见令已死遂相率而下沛公沛公舍陈留南城门上因其库兵食积粟留出入三月从兵以万数遂入破秦

太史公曰世之传酈生书多曰汉王已拔三秦东击项籍而引军於巩洛之间酈生被儒衣往说汉王迺非也自沛公未入关与项羽别而至高阳得酈生兄弟余读陆生新语书十二篇固当世之辩士至平原君子与余善是以得具论之

【索隐述赞曰广野大度始冠侧注踵门长揖深器重遇说齐历下趣鼎何惧陆贾使越尉他慑怖相说国安书成主悟】

史记卷九十七

史记卷九十七考证

酈生陆贾列传何渠不若汉索隐汉书作遽字小顔以为有何迫促而不如汉也○董份曰渠字即如汉书作遽字遽与遂通言何遂不如汉耳

布不听而听梁父侯遂反索隐梁父侯史失名如淳注汉书云遂布臣非也臣瓚曰布不用梁父侯计遂反耳其说是也○徐孚远曰瓚说与本文正相反也当依传说梁父侯导黥布反耳【臣照】按瓚说非与本文相反乃传写之讹多一不字耳

初沛公引兵过陈留酈生踵军门上谒○茅坤曰当入前酈生传而今乃以复出附平原君传後盖太史公初本世所传酈生书由高帝距羽於巩洛之间而以衣儒衣见及与平原君之子善乃得酈生本由高帝过高阳时见云云遂草次如此盖其未定稿也误见於此耳【臣照】按史记事两见而小异者甚多盖史家法信以传信疑以传疑不臆断也子曰吾犹及史之阙文此其遗意欤

史记卷九十七考证

卷九十八

钦定四库全书

史记卷九十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

傅靳蒯成列传第三十八

阳陵侯傅寬【集解駰案地理志云冯翊阳陵县】以魏五大夫骑将从为舍人起横阳【索隐按横阳邑名在韩韩公子成初封横阳君张良立为韩王也正义括地志云故横城在宋州宋城县西南三十里按盖横阳也】从攻安阳【正义後魏地形志云已氏有安阳城隋改已氏为楚丘今宋州楚丘县西十里安阳故城是也】杠里击赵贲军於开封及击杨熊曲遇【正义曲丘羽反遇牛恭反司马彪郡国志云中牟有曲遇聚按郑州中牟县也】阳武【正义郑州县也】斩首十二级赐爵卿从至霸上沛公立为汉王汉王赐寬封号共德君【索隐谓美号尔非地邑共音恭】从入汉中迁为右骑将从定三秦赐食邑雕陰【集解徐广曰属上郡索隐按孟康云县名也正义鄜州洛交县三十里雕陰故城是也】从击项籍待怀【集解服虔曰待高帝於怀索隐小顏按地理志怀属河内今怀州也】赐爵通德侯从击项冠周兰龙且所将卒斩骑将一人敖下【集解徐广曰敖仓之下】益食邑属淮陰【索隐张晏云信时为将云淮陰者终言之也】击破齐历下军击田解属相国参残博【索隐博太山县也顾秘监云属曹参以残破博县也】益食邑因定齐地剖符世世勿絶封为阳陵侯二千六百户除前所食为齐右丞相备齐【集解张晏曰时田横未降故设屯备正义按为齐王韩信相】五岁为齐相国【正义为齐悼惠王刘肥相五岁也】四月击陈豨属太尉勃以相国代丞相哙击豨一月徙为代相国将屯【集解如淳曰既为相国有警则将卒而屯守也案律谓勒兵而守曰屯索隐如淳云汉初诸王官属如汉朝故代有丞相案孔文祥云边境有屯兵寬为代相国兼领屯後因置将屯将军也】二岁为代丞相将屯孝惠五年卒谥为景侯子顷侯精立二十四年卒子共侯则立十二年卒子侯偃立二十一年坐与淮南王谋反死国除信武侯靳歙【索隐歙音翕】以中?从起宛朐【正义上於元反下求俱反曹州县也】攻济阳【正义曹州宛朐县西南三十五里济阳故城】破李由军击秦军亳南开封东北斩骑十人将一人【集解徐广曰将一作候】首五十七级捕虏七十三人赐爵封号临平君又战蓝田北斩车司马二人【集解张晏曰主官车】骑长一人【集解张晏曰骑之长】首二十八级捕虏五十七人至霸上沛公立为汉王赐歙爵建武侯迁为骑都尉从定三秦别西击章平军於陇西破

之定陇西六县所将卒斩车司马候各四人骑长十二人从东击楚至彭城汉军败还保雍丘去击反者王武等略梁地别将击邢说军【集解张晏曰特起兵者说音悦索隐邢姓说名】也菑南【集解徐广曰今日考城索隐菑音灾今为考城属济阴也】破之身得说都尉二人司马候十二人降吏卒四千六百八十人破楚军荥阳东三年赐食邑四千二百户别之河内击赵将贲郝【集解駰案上音肥下音释索隐汉书作赵贲军案此在河北非曹参樊哙之所击也】军朝歌破之所将卒得骑将二人车马二百五十匹从攻安阳以东至棘蒲下七县别攻破赵军得其将司马二人候四人降吏卒二千四百人从攻下邯鄲别下平阳【集解徐广曰邺有平阳城正义括地志云平阳故城在相州临漳县西二十五里】身斩守相所将卒斩兵守各一人【集解孟康曰将兵郡守】降邺从攻朝歌邯鄲及别击破赵军降邯鄲郡六县【集解徐广曰邯鄲高帝改曰赵国】还军敖仓破项籍军成皋南击绝楚饗道起荥阳至襄邑破项冠军鲁下【正义鲁城之下今兖州曲阜县也】略地东至缙郟下邳【索隐案地理志缙属东海正义今缙城在沂州丞县下邳泗水县郟县属海州】南至蕲竹邑【索隐二邑名蕲在沛音机竹即竹邑】击项悍济阳下还击项籍陈下破之别定江陵降江陵柱国大司马以下八人身得江陵王【索隐案孔文祥云共敖子共尉】生致之雒阳因定南郡从至陈取楚王信剖符世世勿绝定食四千六百户号信武侯以骑都尉从击代攻韩信平城下还军东垣有功迁为车骑将军并将梁赵齐燕楚车骑别击陈豨丞相敞破之【索隐小颜云侯敞也】因降曲逆从击黥布有功益封定食五千三百户凡斩首九十级虏百三十二人别破军十四降城五十九定郡国各一县二十三得王柱国各一人二千石以下至五百石【集解徐广曰一本无此五字】三十九人高后五年歿卒谥为肃侯子亭代侯二十一年坐事国人遇律【索隐案刘氏云事役使也谓使人违律数多也】孝文後三年夺侯国除

蒯成侯縡者【集解服虔曰蒯音营蒯之蒯索隐姓周名縡音薛蒯者乡名案三苍云蒯乡在城父县音裴汉书作?从崩从邑今书本并作营蒯音非也苏林音簿催反晋灼案功臣表属长沙崔浩音簿坏反楚汉春秋作凭成侯则裴凭声相近此得其实也正义括地志云蒯亭在河南西十四里苑中輿地志云蒯成县故陈仓县之故乡聚名也周縡所封也晋武帝咸寧四年分陈仓立蒯成县属始平郡也】沛人也姓周氏常为高祖参乘以舍人从起沛至霸上西入蜀汉还定三秦食邑池阳【正义雍州泾阳县西北三里池阳故城是也】东绝甬道从出度平阴遇淮陰侯兵襄国军乍利乍不利终无离上心【集解徐广曰蒯成侯表云遇淮陰侯军襄国楚汉约分鸿沟以縡为信武侯战不利不敢离上】以縡为信武侯食邑三千三百户高祖十二年以縡为蒯成侯除前所食邑上欲自击陈豨蒯成侯泣曰始秦攻破天下未尝自行今上常自行是为无人可使者乎上以为爱我赐入殿门不趋杀人不死至孝文五年縡以壽终谥为贞侯【正义谥为尊侯一作卓】子昌代侯有罪国除至孝景中二年封縡子居代侯【集解徐广曰表云孝景中元年封縡子应为鄆侯谥康中二年侯居立沛郡有鄆县鄆一作鄆索隐鄆苏林音多属陈国地理志云沛郡有鄆县案此文云子居表云子应不同也】至元鼎三年居为太常有罪国除

太史公曰阳陵侯傅寬信武侯靳歙皆高爵【集解徐广曰一无高字又一本皆从高祖】从高祖起山东攻项籍诛杀名将破军降城以十数未尝困辱此亦天授也蒯成侯周縡操心坚正【索隐操音仓高反】身不见疑上欲有所之未尝不垂涕此有伤心者【集解徐广曰此

一作比】然可谓笃厚君子矣

【索隐述赞曰阳陵信武结发从汉动协人谋功实天赞定齐破项我军常冠蒯成委质夷险不乱主上称忠人臣扼腕】

史记卷九十八

史记卷九十八考证

傅靳蒯成列传阳陵侯傅寛地理志云冯翊阳陵县○【臣照】按汉地理志阳陵故弋阳景帝更置高帝时不容先有此名年表索隐云楚汉春秋作陰陵

从攻安阳以东至棘蒲○【臣召南】按棘蒲地不可考左传哀公元年师及齐师卫师鲜虞人伐晋取棘蒲则是晋邑而杜不言所在是其地在赵魏之间

身得江陵王索隐按孔文祥云共敖子共尉○【臣照】按共尉嗣临江王此乃因其所都而以江陵王称之

居为太常有罪国除○汉表云坐为太常收赤侧钱不收完为城旦

史记卷九十八考证

卷九十九

钦定四库全书

史记卷九十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

刘敬叔孙通列传第三十九

刘敬者齐人也【索隐敬本姓娄汉书作娄敬】汉五年戍陇西过洛阳高帝在焉娄敬脱挽辂【集?苏林曰一木横鹿车前一人推之孟康曰辂音胡格反挽音晚索隐晚者牵也辂者鹿车前横木二人前挽一人後推之】衣其羊裘见齐人虞将军曰臣愿见上言便事虞将军欲与之鲜衣【索隐鲜音仙鲜衣美服也】娄敬曰臣衣帛衣帛见衣褐衣褐见终不敢易衣於是虞将军入言上上召入见赐食已而问娄敬娄敬说曰陛下都洛阳岂欲与周室比隆哉上曰然娄敬曰陛下取天下与周室异周之先自后稷尧封之郃【正义郃音胎雍州武功县西南二十三里故釐城是也说文云郃炎帝之後姜姓所封国弃外家也毛萇云郃姜嫄国尧见天因郃而生后稷故因封於郃也】积德累善十有余世公刘避桀居大王以狄伐故去杖马箠居岐【集解张晏曰言马箠示约】国人争随之及文王为西伯断虞芮之讼始受命吕望伯夷自海滨来归之【正义吕望宅及庙在苏州海塩县西也伯夷狐竹国在平州皆滨东海也】武王伐纣不期而会孟津之上八百诸侯皆曰纣可伐矣遂灭殷成王即位周公之属傅相焉廼营成周洛邑【正义括地志云故王城一名河南城本郑鄆周公所筑在洛州河南县北九里苑中东北隅帝王纪云武王伐纣营洛邑而定鼎焉按此即营都城也书云乃营成周括地志云洛阳故城在洛州洛阳城东二十六里周公所筑即成周城也尚书曰成周既成迁殷顽民帝王世纪云居?鄆之衆按刘敬说周之美岂言居顽民之所以此而论汉书非也】以此为天下之中也诸侯四方纳贡职道里均矣有德则易以王无德则易以亡凡居此者欲令周务以德致人不欲依阻险令後世骄奢以虐民也及周之盛时天下和洽四夷乡风慕义怀德附离而并事天子【集解駰案庄子曰附离不以胶漆也索隐案谓使离者相附也】不屯一卒不战一士八夷大国之民莫不宾服效其贡职及周之衰也分而为两【正义公羊传云东周者何成周也西周者何王城也按周自平王东迁以下十二王皆都王城至敬王乃迁都成周王赧又居王城也】天下莫朝周不能制也非其德薄也而形势弱也今陛下起丰沛收卒三千人以之径往而卷蜀汉定三秦与项羽战荥阳争成臯之口大战七十小战四十使天下之民肝脑涂地父子暴骨中野不可胜数哭泣之声未絶伤痍者未起而欲比隆於

成康之时臣窃以为不侔也且夫秦地被山带河四塞以为固卒然有急百万之衆可具也因秦之故资甚美膏腴之地此所谓天府者也【索隐案战国策苏秦说惠王曰大王之国地势形便此所谓天府高诱注云府聚也】陛下入关而都之山东虽乱秦之故地可全而有也夫与人鬪不搯其吭【集解张晏曰吭喉咙也索隐搯音厄吭音胡浪反一音胡刚反苏林以为吭颈大脉俗所谓胡脉也】拊其背未能全其胜也今陛下入关而都案秦之故地此亦搯天下之吭而附其背也高帝问羣臣羣臣皆山东人争言周王数百年秦二世即亡不如都周上疑未能决及留侯明言入关便即日车驾西都关中【索隐案谓即日西都之计定也】於是上曰本言都秦地者委敬委者乃刘也赐姓刘氏拜为郎中号为奉春君【索隐按张晏云春为岁之始以其首谋都关中故号奉春君】汉七年韩王信反高帝自往击之至晋阳闻信与匈奴欲共击汉上大怒使人使匈奴匈奴匿其壮士肥牛马但见老弱及羸畜【正义上力为反下许又反】使者十辈来皆言匈奴可击上使刘敬复往使匈奴还报曰两国相击此宜夸矜见所长【集解韦昭曰夸张矜大也】今臣往徒见羸瘠老弱【索隐羸力为反瘠音稷瘠瘦也汉书作觜音渍觜肉也恐非】此必欲见短伏奇兵以争利愚以为匈奴不可击也是时汉兵已踰句注【正义句注山在代州鴈门县西北三十里】二十余万兵已业行上怒骂刘敬曰齐虏以口舌得官今廼妄言沮吾军【索隐沮音才叙反诗传曰沮止也坏也】械系敬广武【索隐地理志县名属鴈门正义广武故县在句注山南也】遂往至平城匈奴果出奇兵围高帝白登七日然後得解高帝至广武赦敬曰吾不用公言以困平城吾皆以斩前使十辈言可击者矣廼封敬二千户为关内侯号为建信侯高帝罢平城归韩王信亡入胡当是时冒顿为单于兵强控弦三十万【集解应劭曰控引也】数苦北边上患之问刘敬刘敬曰天下初定士卒罢於兵未可以武服也冒顿杀父代立妻羣母以力为威未可以仁义说也独可以计久远子孙为臣耳然恐陛下不能为上曰诚可何为不能顾为奈何刘敬对曰陛下诚能以适长公主妻之厚奉遗之彼知汉适女送厚蛮夷必慕以为阼氏生子必为太子代单于何者贪汉重币陛下以岁时汉所余彼所鲜数问遗因使辩士风谕以礼节冒顿在固为子壻死则外孙为单于岂尝闻外孙敢与大父抗礼者哉兵可无战以渐臣也若陛下不能遗长公主而令宗室及後宫诈称公主彼亦知不肯贵近无益也高帝曰善欲遣长公主吕后日夜泣曰妾唯太子一女奈何弃之匈奴上竟不能遣长公主而取家人子名为长公主妻单于使刘敬往结和亲约刘敬从匈奴来因言匈奴河南白羊楼烦王【集解张晏曰白羊匈奴国名索隐案张晏云白羊国名二者并在河南河南者案在朔方之河南旧并匈奴地也今亦谓之新秦中】去长安近者七百里轻骑一日一夜可以至秦中秦中新破少民地肥饶可益实夫诸侯初起时非齐诸田楚昭屈景莫能兴今陛下虽都关中实少人北近胡寇东有六国之族宗强一日有变陛下亦未得高枕而卧也臣愿陛下徙齐诸田楚昭屈景燕赵韩魏後及豪杰名家居关中无事可以备胡诸侯有变亦足率以东伐此强本弱末之术也上曰善廼使刘敬徙所言关中十余万口【索隐案小顔云今高陵栌阳诸田华陰好畤诸景及三辅诸屈诸怀尚多皆此时所徙】

叔孙通者薛人也【集解晋灼曰楚汉春秋名何索隐薛县名属鲁国】秦时以文学徵待诏博士数岁陈胜起山东使者以闻二世名博士诸儒生问曰楚戍卒攻蕲入陈於公如何博士诸生三十余人前曰人臣无将将即反罪死无赦【集解瓚曰将谓逆乱也公羊传曰君亲无将将而必诛】愿陛下急发兵击之二世怒作色叔孙通前曰诸生言皆非也夫天下合为一

家毁郡县城铄其兵示天下不复用且明主在其上法令具於下使人人奉职四方辐辏安敢有反者此特羣盜鼠窃狗盗耳何足置之齿牙间郡守尉今捕论何足忧二世喜曰善尽问诸生诸生或言反或言盜於是二世令御史案诸生言反者下吏非所宜言诸言盜者皆罢之廼赐叔孙通帛二十匹衣一袭【索隐案国语谓之一称贾逵案礼记袍必有表不单衣必有裳谓之一称杜预云衣单复具云称也】拜为博士叔孙通已出宫反舍诸生曰先生何言之谀也通曰公不知也我几不脱於虎口【正义几音祈】廼亡去之薛薛已降楚矣及项梁之薛叔孙通从之败於定陶从怀王怀王为义帝徙长沙叔孙通留事项王汉二年汉王从五诸侯入彭城叔孙通降汉王汉王败而西因竟从汉叔孙通儒服汉王憎之廼变其服短衣楚制【索隐案孔文祥云短衣便事非儒者衣服高祖楚人故从其俗裁制】汉王喜叔孙通之降汉从儒生弟子百余人然通无所言进专言诸故羣盜壮士进之弟子皆窃骂曰事先生数岁幸得从降汉今不能进臣等专言大猾何也【索隐案类集云大猾狡猾也音滑】叔孙通闻之廼谓曰汉王方蒙矢石争天下【集解駰案汉书音义曰谓发石以投人】诸生宁能鬪乎故先言斩将搃旗之士【集解张晏曰搃卷也瓚曰拔取曰搃楚辞曰朝搃阨之木兰索隐搃音起焉反又已勉反案方言曰南方取物云搃许慎云搃取也王逸云阨山名又案埤苍云山在楚音毗】诸生且待我我不忘矣汉王拜叔孙通为博士号稷嗣君【集解徐广曰盖言其德业足以继踪齐稷下之风流也駰案汉书音义曰稷嗣邑名】汉五年已并天下诸侯共尊汉王为皇帝於定陶叔孙通就其仪号高帝悉去秦苛仪法为简易羣臣饮酒争功醉或妄呼拔劔击柱高帝患之叔孙通知上益厌之也说上曰夫儒者难与进取可与守成臣愿徵鲁诸生与臣弟子共起朝仪高帝曰得无难乎叔孙通曰五帝异乐三王不同礼礼者因时世人情为之节文者也故夏殷周之礼所因损益可知者谓不相复也臣愿颇采古礼与秦仪杂就之上曰可试为之令易知度吾所能行为之於是叔孙通使徵鲁诸生三十余人鲁有两生不肯行曰公所事者且十主皆面谀以得亲贵今天下初定死者未葬伤者未起又欲起礼乐礼乐所由起积德百年而後可兴也吾不忍为公所为公所为不合古吾不行公往矣无污我叔孙通笑曰若真鄙儒也不知时变遂与所徵三十人西及上左右为学者与其弟子百余人绵葛【集解徐广曰表位标准音子外反駰案如淳曰置设绵索为习肄处葛谓以茅剪树地为纂位春秋传曰置茅蒨也索隐韦昭云引绳为绵立表为纂音兹会反贾逵云束茅以表位为蒨又纂文云蒨今之纂字包恺音即悦反又音纂】野外习之月余叔孙通曰上可试观上即观使行礼曰吾能为此廼令羣臣习肄【索隐肄亦习也音异】会十月汉七县长乐宫成诸侯羣臣皆朝十月【索隐小颜云汉以十月为正故行朝岁之礼史家追书十月也案诸书并云十月为岁首不言以十月为正月古今注亦云羣臣始朝十月也】仪先平明谒者治礼引以次入殿门廷中陈车骑步卒卫宫设兵张旗志【集解徐广口一作帜】传言趋【索隐案小颜传声教入者皆令趋疾行致敬也】殿下郎中侠陛陛数百人功臣列侯诸将军军吏以次陈西方东乡文官丞相以下陈东方西乡大行设九宾肅句传【集解駰案汉书音义曰传从上下为肅索隐苏林云上传语告下为肅下传语告上为句肅犹行者矣韦昭云大行掌宾客之礼今谓之鸿肅也九宾则周礼九仪也谓公侯伯子男孤卿大夫士也汉依此以为肅传以次传令上也向秀注庄子云从上语下为肅音间句音九注反】於是皇帝辇出房百官执职传警【集解徐广曰一作帜索隐案輿服志云殷周以辇载军器职载辇至秦始去其轮而輿为尊也职音帜传警者汉仪云帝辇动则左右侍帟幄者称警是也】引诸侯王以下至吏六百石以次奉贺自诸侯王以下莫不振恐肃敬至礼毕复置法酒【集解文颖曰作酒令

法也苏林曰常会须天子中起更衣然後入置酒矣索隐姚氏云进止有礼也古人饮酒不过三爵君臣百拜终日宴不为乱也】诸侍坐殿上皆伏抑首【集解如淳曰抑屈也】以尊卑次起上壽觴九行谒者言罢酒御史执法举不如仪者辄引去竟朝置酒无敢譴譁失礼者於是高帝曰吾廼今日知为皇帝之贵也廼拜叔孙通为太常赐金五百斤叔孙通因进曰诸弟子儒生随臣久矣与臣共为仪愿陛下官之高帝悉以为郎叔孙通出皆以五百斤金赐诸生诸生廼皆喜曰叔孙生诚圣人也知当世之要务汉九年高帝徙叔孙通为太子太傅汉十二年高祖欲以赵王如意易太子叔孙通谏上曰昔者晋献公以骊姬之故废太子立奚齐晋国乱者数十年为天下笑秦以不早定扶苏令赵高得以诈立胡亥自使灭祀此陛下所亲见今太子仁孝天下皆闻之吕后与陛下攻苦食啖【集解徐广曰攻犹今人言击也啖一作淡駟案如淳曰食无菜茹为啖索隐案孔文祥云与帝共攻冒苦难俱食淡也案说文淡薄味也音唐敢反】其可背哉陛下必欲废适而立少臣愿先伏诛以颈血污地【索隐楚汉春秋叔孙何云臣三谏不从请以身当之抚劒将自杀上离席云吾聽子计不易太子】高帝曰公罢矣吾直戏耳叔孙通曰太子天下本本一摇天下振动奈何以天下为戏高帝曰吾听公言及上置酒见留侯所招客从太子入见上廼遂无易太子志矣高帝崩孝惠即位廼谓叔孙生曰先帝园陵寝庙羣臣莫能习徙为太常定宗庙仪法及稍定汉诸仪法皆叔孙生为太常所论着也孝惠帝为东朝长乐宫【集解駟案关中记曰长乐宫本秦之兴乐宫也汉太后常居之】及间往来数蹕烦人【索隐韦昭云蹕止人行也长乐未央宫东相去稍远间往谓非时也中间往来清道烦人也】廼作复道方筑武库南【集解韦昭曰阁道也如淳曰作复道方始筑武库南】叔孙生奏事因请间曰陛下何自筑复道高寝衣冠月出游高庙高庙汉太祖奈何令後世子孙乘宗庙道上行哉【集解应劭曰月出高帝衣冠备法驾名曰游衣冠如淳曰三辅皇图高寝在高庙西高祖衣冠藏在高寝月出游於高庙其道值所作复道故言乘宗庙道上行】孝惠帝大惧曰急坏之叔孙生曰人主无过举【索隐案谓举动有过也左传云君举必书】今已作百姓皆知之今坏此则示有过举愿陛下为原庙渭北衣冠月出游之益广多宗庙大孝之本也上廼诏有司立原庙原庙起以复道故孝惠帝曾春出游离宫叔孙生曰古者有春尝果方今樱桃孰可献【索隐案吕氏春秋仲春羞以含桃先荐寝庙高诱云进含桃也鸛鸟所含故曰含桃今之朱樱即是也】愿陛下出因取樱桃献宗庙上廼许之诸果献由此兴太史公曰语曰千金之裘非一狐之腋也台榭之榱非一木之枝也三代之际非一士之智也信哉夫高祖起微细定海内谋计用兵可谓尽之矣然而刘敬脱挽辂一说建万世之安智岂可专耶叔孙通希世度务制礼进退与时变化卒为汉家儒宗大直若诎【索隐音屈】道固委蛇【索隐音移】盖谓是乎

【索隐述赞曰厦藉衆干裘非一狐委辂献说縣蕝陈书皇帝始贵车驾西都既安太子又和匈奴奉春稷嗣其功可图】

史记卷九十九

史记卷九十九考证

刘敬叔孙通列传号稷嗣君集解徐广曰盖言其德业足以继踪齐稷下之风流也駟案汉书

音义曰稷嗣邑名○徐孚远曰是时功臣多有名号侯者叔孙通军功安得封邑徐叔为长

史记卷九十九考证

<史部,正史类,史记>

卷一百

钦定四库全书

史记卷一百

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

季布栾布列传第四十

季布者楚人也为气任侠【集解孟康曰信交道曰任如淳曰相与信为任同是非为侠所谓权行州里力折公侯者也或曰任气力也侠粵也索隐任而禁反侠音协如淳说为近粵音普名反其义难喻】有名於楚项籍使将兵数窘汉王【集解如淳曰窘困也】及项羽灭高祖购求布千金敢有舍匿罪及三族季布匿濮阳周氏周氏曰汉购将军急迹且至臣家将军能听臣臣敢献计即不能愿先自颈季布许之廼髡钳季布衣褐衣置广柳车中【集解服虔曰东郡谓广轍车为柳邓展曰皆棺饰也载以丧车欲人不知也李奇曰大牛车也车上覆为柳瓚曰茂陵书中有广柳车每县数百乘是今运转大车是也索隐案服虔臣瓚所据则是大车任载运者名广柳车然则柳为车通名邓展所说事义相协最为通允故礼曰设柳翼为使人勿恶也郑玄注周礼云柳聚也诸饰所聚则是丧车称柳故後人通谓车为柳也】并与其家僮数十人之鲁朱家所卖之朱家心知是季布廼买而置之田诫其子曰田事听此奴必与同食朱家廼乘轺车之洛阳【集解徐广曰马车也索隐案谓轻车一马车也】见汝陰侯滕公滕公留朱家饮数日因谓滕公曰季布何大罪而上求之急也滕公曰布数为项羽窘上上怨之故必欲得之朱家曰君视季布何如人也曰贤者也朱家曰臣各为其主用季布为项籍用职耳项氏臣可尽诛耶今上始得天下独以己之私怨求一人何示天下之不广也且以季布之贤而汉求之急如此此不北走胡即南走越耳夫忌壮士以资敌国此伍子胥所以鞭荆平王之墓也君何不从容为上言邪汝陰侯滕公心知朱家大侠意季布匿其所廼许曰诺待闲果言如朱家指上廼赦季布当是时诸公皆多季布能摧刚为柔朱家亦以此名闻当世季布召见谢上拜为郎中孝惠时为中郎将单于尝为书嫚吕后不逊吕后大怒召诸将议之上将军樊噲曰臣愿得十万衆横行匈奴中诸将皆阿吕后意曰然季布曰樊噲可斩也夫高帝将兵四十余万衆困於平城今噲奈何以十万衆横行匈奴中面欺且秦以事於胡陈胜等起于今创痍未瘳噲又面谀欲摇动天下是时殿上皆恐太后罢朝遂不复议击匈奴事季布为河东守孝文时人有言其贤者孝文召欲以为御史大夫复有言其勇使酒难近【索隐使音如字近音其靳反因酒纵性谓之使酒即酗酒也】至留邸一月见罢季布因进曰臣无功窃宠待罪

河东【索隐季布言己无功能窃承恩宠得待罪河东其词典省而文之也】陛下无故召臣此人必有以臣欺陛下者今臣至无所受事罢去此人必有以毁臣者夫陛下以一人之誉而召臣一人之毁而去臣臣恐天下有识闻之有以闚陛下也【集解韦昭曰闚见陛下深浅也】上默然惭良久曰河东吾股肱郡故特召君耳布辞之官楚人曹邱生辩士数招权顾金钱【集解孟康曰招来也以金钱事权贵而求得其形势以自炫耀也文颖曰事权贵也与通势以其所有辜较请托金钱以自顾索隐义如孟康文颖所说辜较音姑角正义言曹邱生倚倚贵人用权势属请数求他人顾钱赏金钱也】事贵人赵同等【集解徐广曰汉书作赵谈司马迁以父名谈故改之】与窦长君善季布闻之寄书谏窦长君曰吾闻曹邱生非长者勿与通及曹邱生归欲得书请季布【集解张晏曰欲使窦君为介於布请见】窦长君曰季将军不说足下足下无往固请书遂使人先发书季布果大怒待曹邱曹邱至即揖季布曰楚人谚曰得黄金百斤不如得季布一诺足下何以得此声於梁楚间哉且仆楚人足下亦楚人也仆游扬足下之名於天下顾不重邪何足下距仆之深也季布迺大悦引入留数月为上客厚送之季布名所以益闻者曹邱扬之也季布弟季心【集解徐广曰一作子】气盖关中遇人恭谨为任侠方数千里士皆争为之死尝杀人亡之吴从袁丝匿【索隐盎字丝】长事袁丝弟畜灌夫籍福之属尝为中司马【集解如淳曰中尉之司马索隐汉书作中尉司马】中尉郅都都不敢不加礼少年多时时窃籍其名以行【索隐籍音子亦反】当是时季心以勇布以诺着闻关中季布母弟丁公为楚将【集解晋灼曰楚汉春秋云薛人名固】丁公为项羽逐窘高祖彭城西短兵接高祖急顾丁公曰两贤岂相厄哉於是丁公引兵而还汉王遂解去及项王灭丁公谒见高祖高祖以丁公徇军中丁公为项王臣不忠使项王失天下者迺丁公也遂斩丁公曰使後世为人臣者无效丁公

栾布者梁人也始梁王彭越为家人时尝与布游【索隐谓居家之人无官职也】穷困赁佣於齐为酒人保【集解駉案汉书音义曰酒家作保佣也可保信故谓之保】数岁彭越去之巨野中为盗而布为人所略卖为奴於燕为其家主报仇燕将臧荼举以为都尉臧荼後为燕王以布为将及臧荼反汉击燕虏布梁王彭越闻之迺言上请赎布以为梁大夫使於齐未还汉召彭越责以谋反夷三族已而梟彭越头於雒阳下诏曰有敢收视者辄捕之布从齐还奏事彭越头下祠而哭之吏捕布以闻上召布骂曰若与彭越反邪吾禁人勿收若独祠而哭之与越反明矣趣亨之【索隐趣音促亨音普盲反谓疾令赴镬也】方提趣汤【集解徐广曰趣一作走索隐提音啼趣音娶徐广云一作走走亦趣向之也】布顾曰愿一言而死上曰何言布曰方上之困於彭城败荥阳成臯间项王所以遂不能西徙以彭王居梁地与汉合从苦楚也当是之时彭王一顾与楚则汉破与汉而楚破且垓下之会微彭王项氏不亡天下已定彭王剖符受封亦欲传之万世今陛下一徵兵於梁彭王病不行而陛下疑以为反反形未见以苛小案诛灭之【集解徐广曰小一作峭】臣恐功臣人人自危也今彭王已死臣生不如死请就亨於是上迺释布罪拜为都尉孝文时为燕相至将军布迺称曰穷困不能辱身下志非人也富贵不能快意非贤也於是尝有德者厚报之有怨者必以法灭之吴军反时以军功封俞侯【集解徐广曰击齐有功也】复为燕相燕齐之间皆为栾布立社号曰栾公社景帝中五年薨子贲嗣为太常牺牲不如令国除

太史公曰以项羽之气而季布以勇显於楚身屡典军【集解徐广曰屡一作屢一曰覆駉案

孟康曰屢屢蹈之也瓚曰屢數也索隱案徐氏云一作覆而下云搴旗則覆軍為是愈於屢之與屢者也】搴旗者數矣可謂壯士然被刑戮為人奴而不死何其下也彼必自負其材故受辱而不羞欲有所用其未足也故終為漢名將賢者誠重其死夫婢妾賤人感慨而自殺者【集解徐廣曰或作概字音義同】非能勇也其計畫無復之耳【集解徐廣曰復一作冀】栻布哭彭越趣湯如歸者彼誠知所處【集解如淳曰非死者難處死者難】不自重其死雖往古烈士何以加哉

【索隱述贊曰季布季心有名梁楚百金然諾十萬致距出守河東股肱是與栻布哭越犯禁見虜赴鼎非冤誠知所處】

史記卷一百

史記卷一百考證

季布栻布列傳上將軍樊噲曰○漢書匈奴傳云陳豨反於代漢兵三十二萬噲為上將軍與此同本傳不載

史記卷一百考證

卷一百一

钦定四库全书

史记卷一百一

汉太史令司马迁撰宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

袁盎鼂错列传第四十一

袁盎者楚人也【索隐盎音如周礼盎齐乌浪反】字丝父故为羣盗徙处安陵高后时盎尝为吕禄舍人及孝文帝即位盎兄𨾏任盎为中郎【集解如淳曰盎为兄所保任故得为中郎】绛侯为丞【目相】朝罢趋出意得甚上礼之恭常自送之【集解徐广曰自一作目】袁盎进曰陛下以丞相何如人上曰社稷臣盎曰绛侯所谓功臣非社稷臣社稷臣主在与在【集解如淳曰人主在时与共治在时之事】主亡与亡【集解如淳曰不以主亡而不行其政令索隐如淳说为得】方吕后时诸吕用事擅相王刘氏不绝如带是时绛侯为太尉主兵柄弗能正吕后崩大臣相与共畔诸吕太尉主兵适会其成功所谓功臣非社稷臣丞相如有骄主色陛下谦让臣主失礼窃为陛下不取也後朝上益庄【索隐庄严也】丞相益畏已而绛侯望袁盎曰【正义望怨也】吾与而兄善今儿廷毁我盎遂不谢及绛侯免相之国国人上书告以为反徵系请室【集解駙案汉书作请室应劭曰请室请罪之室若今钟下也如淳曰请室狱也若古刑於甸师氏也】宗室诸公莫敢为言唯袁盎明绛侯无罪绛侯得释盎颇有力绛侯乃大与盎结交淮南厉王朝杀辟阳侯居处骄甚袁盎谏曰诸侯大骄必生患可适削地上弗用淮南王益横及棘蒲侯柴武太子谋反事觉治连淮南王淮南王徵上因迁之蜀轝车传送袁盎时为中郎将乃谏曰陛下素骄淮南王弗稍禁以至此今又暴摧折之淮南王为人刚如有遇雾露行道死陛下竟为以天下之大弗能容有杀弟之名奈何上弗听遂行之淮南王至雍病死闻上辍食哭甚哀盎入顿首请罪上曰以不用公言至此盎曰上自寛此往事岂可悔哉且陛下有高世之行者三此不足以毁名上曰吾高世行三者何事盎曰陛下居代时太后尝病三年陛下不交睫不解衣汤药弗陛下口所尝弗进夫曾参以布衣犹难之今陛下亲以王者修之过曾参孝远矣夫诸吕用事大臣专制然陛下从代乘六乘传驰不测之渊【集解瓚曰大臣共诛诸吕祸福尚未可知故曰不测也】虽贲育之勇不及陛下【集解孟康曰孟贲夏育皆古勇者也索隐尸子云孟贲水行不避蛟龙陆行不避虎兕战国策云夏育叱呼骇三军身死庸夫高诱曰育卫人为申繻所杀贲音奔】陛下至代邸西向让天子位者再南面让天子位者三夫许由一让而陛下五以天下让过许由四矣且陛下迁淮南王欲以

苦其志使改过有司卫不谨故病死於是上乃解曰将奈何盎曰淮南王有三子唯在陛下耳於是文帝立其三子皆为王盎由此名重朝廷袁盎常引大体忼慨宦者赵同【集解徐广曰汉书作谈字】以数幸常害袁盎袁盎患之盎兄子种为常侍骑持节夹乘【索隐案汉书旧仪云持节夹乘輿骑从者则云常侍骑也】说盎曰【集解徐广曰说一作谋】君与鬬廷辱之使其毁不用孝文帝出赵同参乘袁盎伏车前曰臣闻天子所与共六尺輿者皆天下豪英今汉虽乏人陛下独奈何与刀锯余人载於是上笑下赵同赵同泣下车文帝从霸陵上欲西驰下峻阪袁盎骑并车攀轡上曰将军怯邪盎曰臣闻千金之子坐不垂堂【索隐案张揖云恐檐瓦堕中人或云临堂边垂恐堕坠也】百金之子不骑衡【集解徐广曰一作行駟案服虔曰自惜身不骑衡如淳曰骑倚也衡楼殿边栏楯也韦昭曰衡车衡索隐衡木行马也如淳云骑音於岐反韦昭曰骑音奇案诸家说如淳为长如云栏楯者案纂要云宫殿四面栏纵者云栏横者云楯是也】圣主不乘危而徼幸今陛下骋六驂【集解如淳曰六马之疾若飞】驰下峻山如有马惊车败陛下纵自轻柰高庙太后何上乃止上幸上林皇后慎夫人从其在禁中常同席坐及坐郎署长布席【正义苏林云郎署上林中直卫之署】袁盎引郤慎夫人坐【集解如淳曰盎时为中郎将天子幸署豫设供待之故得郤慎夫人坐】慎夫人怒不肯坐上亦怒起入禁中盎因前说曰臣闻尊卑有序则上下和今陛下既已立后慎夫人乃妾妾主岂可与同坐哉且陛下幸之即厚赐之陛下所以为慎夫人适所以祸之陛下独不见人彘乎【集解张晏曰戚夫人】於是上乃说召语慎夫人慎夫人赐盎金五十斤然袁盎亦以数直諫不得久居中调为陇西都尉【集解如淳曰调选】仁爱士卒士卒皆争为死迁为齐相徙为吴相辞行种谓盎曰吴王骄日久国多奸今苟欲劾治彼不上书告君即利劒刺君矣南方卑湿君能日饮毋苛时说王曰母反而已如此幸得脱盎用种之计吴王厚遇盎盎告归道逢丞相申屠嘉下车拜谒丞相从车上谢袁盎袁盎还愧其吏乃之丞相舍上谒求见丞相丞相良久而见之盎因跪曰愿请闲丞相曰使君所言公事之曹与长史掾议吾且奏之即私邪吾不受私语袁盎即跪说曰君为丞相自度孰与陈平绛侯丞相曰吾不如袁盎曰善君即自谓不如夫陈平绛侯辅翼高帝定天下为将相而诛诸吕存刘氏君乃为材官蹶张迁为队率积功至淮阳守非有奇计攻城野战之功且陛下从代来每朝郎官上书疏未尝不止辇受其言言不可用置之言可受采之未尝不称善何也则欲以致天下贤士大夫上日闻所不闻明所不知日益圣智君今自闭钳天下之口而日益愚夫以圣主责愚相君受祸不久矣丞相乃再拜曰嘉鄙野人乃不知将军幸教引入与坐为上客盎素不好鼂错鼂错所居坐盎去盎坐错亦去两人未尝同堂语及孝文帝崩孝景帝即位鼂错为御史大夫使吏案袁盎受吴王财物抵罪诏赦以为庶人吴楚反闻鼂错谓丞史曰【集解如淳曰百官表御史大夫有两丞丞史丞相史也】夫袁盎多受吴王金钱专为蔽匿言不反今果反欲请治盎宜知计谋丞史曰事未发治之有绝【集解如淳曰事未发之时治之乃有所絶索隐案谓有绝吴反心也】今兵西乡治之何益且袁盎不宜有谋【集解如淳曰盎大臣不宜有奸谋】鼂错犹与未决人有告袁盎者袁盎恐夜见窦婴为言吴所以反者愿至上前口对状窦婴入言上上乃召袁盎入见鼂错在前及盎请辟人赐间错去固恨甚袁盎具言吴所以反状以错故独急斩错以谢吴吴兵乃可罢其语具在吴事中使袁盎为太常窦婴为大将军两人素相与善逮吴反诸陵长者长安中贤大夫争附两人车随者日数百乘及鼂错已诛袁盎以太常使吴吴王欲使将不肯欲杀之使一都尉以五百人围守盎军中袁盎自其为吴相时尝有从史从史尝盗爱盎侍儿【集解文颖曰婢也】盎知之弗泄遇之如故人有告从史言君知尔与侍者通乃亡归袁

盎驱自追之遂以侍者赐之复为从史及袁盎使吴见守从史适为守盎校尉司马乃悉以其装齎置二石醇醪会天寒士卒饥渴饮酒醉西南陬卒皆卧司马夜引袁盎起曰君可以去矣吴王期旦日斩君盎弗信曰公何为者司马曰臣故为从史盗君侍儿者盎乃惊谢曰公幸有亲【集解文颖曰言汝有亲老】吾不可以累公司马曰君第去臣亦且亡避吾亲【集解如淳曰藏匿吾亲不使遇害也索隐案张晏云辟隐也言自隐辟我亲不拟遇祸也】君何患乃以刀决张道【集解如淳曰决开当所从亡者之道张音帐索隐案帐军幕也决之以出也】从醉卒直隧出司马与分背袁盎解节毛怀之【集解如淳曰不欲令人见也】杖步行七八里明见梁骑骑驰去【集解又颖曰梁骑击吴楚者也或曰得梁马驰去也】遂归报吴楚已破上更以王元子平陆侯礼为楚王袁盎为楚相尝上书有所言不用袁盎病免居家与闾里浮沈相随行鬪鸡走狗雒阳剧孟尝过袁盎盎善待之安陵富人有谓盎曰吾闻剧孟博徒【集解如淳曰博荡之徒或曰博戏之徒】将军何自通之盎曰剧孟虽博徒然母死客送葬车千余乘此亦有过人者且缓急人所有夫一旦有急叩门不以亲为解【集解张晏曰不语云亲不听也瓚曰凡人之於赴难济危多以有父母为解而孟兼行之索隐案谓不以亲为辞也今此云解者亦谓不以亲在而自解】不以存亡为辞天下所望者独季心剧孟耳今公常从数骑【集解徐广曰常一作详】一旦有缓急宁足恃乎骂富人弗与通诸公闻之皆多袁盎袁盎虽家居景帝时时使人问筹策梁王欲求为嗣袁盎进说其後语塞【索隐邹氏云塞当作露非也案以盎言不宜立弟之义其後立梁王之语塞絶也】梁王以此怨盎曾使人刺盎刺者至关中问袁盎诸君誉之皆不容口乃见袁盎曰臣受梁王金来刺君君长者不忍刺君然後刺君十余曹【集解如淳曰曹辈】备之袁盎心不乐家又多怪乃之掾生所问占【集解徐广曰掾一作服驩案文颖曰掾音陪秦时贤士善术者索隐韦昭云掾姓也】还梁刺客後曹辈果遮刺杀盎安陵郭门外

鼂错者颍川人也【索隐鼂音朝错音厝一如字读案鼂氏出南阳今西鄂鼂氏自谓子鼂之後也】学申商刑名於轹张恢先所【集解徐广曰先即先生索隐轹县人张恢先生所学申商之法】与雒阳宋孟及刘礼同师以文学为太常掌故【集解应劭曰掌故百石吏主故事索隐服?云百石卒吏汉旧仪云太常博士弟子试射策中甲科补郎中乙科补掌故也】错为人峭直刻深【集解韦昭曰术岸高曰峭瓚曰峭峻索隐按韦昭注本无术字或云术道路也隋音七笑反】孝文帝时天下无治尚书者独闻济南伏生故秦博士治尚书年九十余老不可徵乃诏太常使人往受之太常遣错受尚书伏生所【正义卫宏诏定古文尚书序云徵之老不能行遣太常掌故鼂错往读之年九十余不能正言言不可晓使其女传言教错齐人语多与颍川异错所不知者几十二三畧以其意属读而已也】还因上便宜事以书称说诏以为太子舍人门大夫家令【集解服?曰太子称家瓚曰茂陵书太子家令秩八百石】以其辩得幸太子太子家号曰智囊数上书孝文时言削诸侯事及法令可更定者书数十上孝文不听然奇其材迁为中大夫当是时太子善错计策袁盎诸大功臣多不好错景帝即位以错为内史错常数请闲言事辄听宠幸倾九卿【集解徐广曰九一作公】法令多所更定丞相申屠嘉心弗便力未有以伤内史府居太上庙墼中门东出不便错乃穿两门南出凿庙墼垣【索隐墼音乃乱反谓墙外之短垣也又音而缘反】丞相嘉闻大怒欲因此过为奏请诛错错闻之即夜请闲具为上言之丞相奏事因言错擅凿庙垣为门请下廷尉诛上曰此非庙垣乃墼中垣【正义上人缘反石墼者庙内垣外游地也】不致於法丞相谢罢朝怒谓长史曰吾

当先斩以闻乃先请为儿所卖固误丞相遂发病死错以此愈贵迁为御史大夫请诸侯之罪过削其地【集解徐广曰一云言景帝曰诸侯或连数郡非古之制非久长策不便请削之上令公卿云云】收其枝郡奏上上令公卿列侯宗室集议莫敢难独窦婴争之由此与错有郤错所更令三十章诸侯皆誼譁疾鼂错错父闻之从颍川来谓错曰上初即位公为政用事侵削诸侯别疏人骨肉人口议多怨公者【集解徐广曰议一作謹】何也鼂错曰固也不如此天子不尊宗庙不安错父曰刘氏安矣而鼂氏危矣吾去公归矣遂饮药死曰吾不忍见祸及吾身死十余日吴楚七国果反以诛错为名及窦婴袁盎进说上令鼂错衣朝衣斩东市鼂错已死谒者仆射邓公【正义汉书作邓先孔文祥云名先】为校尉击吴楚军为将还上书言军事谒见上上问曰道军所来【集解如淳曰道路从吴军所来也瓚曰道由也】闻鼂错死吴楚罢不邓公曰吴王为反数十年矣发怒削地以诛错为名其意非在错也且臣恐天下之士噤口不敢复言也【索隐禁音其锦反又音其禁反】上曰何哉邓公曰夫鼂错患诸侯强大不可制故请削地以尊京师万世之利也计画始行卒受大戮内杜忠臣之口外为诸侯报仇臣窃为陛下不取也於是景帝默然良久曰公言善吾亦恨之乃拜邓公为城阳中尉邓公成固人也【正义梁州成固县也括地志曰成固故城在梁州成固县东六里汉成固城也】多奇计建元中上招贤良公卿言邓公时邓公免起家为九卿一年复谢病免归其子章以修黄老言显於诸公间

太史公曰袁盎虽不好学亦善傅会仁心为质引义忼?遭孝文初立资适逢世【集解张晏曰资才也适值其世得骋其才】时以变易【集解张晏曰谓景帝立】及吴楚一说说虽行哉然复不遂好声矜贤竟以名败鼂错为家令时数言事不用後擅权多所变更诸侯发难不急匡救欲报私讐反以亡躯语曰变古乱常不死则亡岂错等谓邪

【索隐述赞曰袁盎公直亦多附会揽辔见重却席翳赖鼂错建策屡陈利害尊主卑臣家危国泰悲彼二子名立身败】

史记卷一百一

史记卷一百一考证

袁盎鼂错列传主亡与亡集解如淳曰不以主亡而不行其政令索隐如淳说为得○徐孚远曰主亡与亡言尽节致命也如说甚疎索隐亦失之

百金之子不骑衡○水经注作立不倚衡

调为陇西都尉集解如淳曰调选○顾炎武曰此今日调官字所本调有更易之意犹琴瑟之更张乃调也如淳训为选未尽

袁盎即跪说曰○余有丁曰按汉书作起说是今史本多作跪其义难通【臣照】按古人席地坐故起即跪余说非是

错所更令三十章○汉艺文志法家鼂错三十一篇

史记卷一百一考证

卷一百二

钦定四库全书

史记卷一百二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

张释之冯唐列传第四十二

张廷尉释之者堵阳人也【索隐韦昭堵音赭又音如字地名属南阳正义应劭曰哀帝改为顺阳水东南入蔡括地志云顺阳故城在邓州穰县西三十里楚之郇邑也及苏秦传云楚北有郇阳并谓此也】字季有兄仲同居以訾为骑郎【集解苏林曰雇钱若出谷也如淳曰汉仪注訾五百万得为常侍郎索隐訾音子移反字苑云訾积财也】事孝文帝十岁不得调无所知名释之曰久宦减仲之产不遂欲自免归中郎将袁盎知其贤惜其去乃请徙释之补谒者【正义百官表云谒者掌宾赞受事员十七人秩比六百石也】释之既朝毕因前言便宜事文帝曰卑之母甚高论令今可施行也【索隐案卑下也欲令卑下其志无甚高谈论且但令依今时事语无说古远也】於是释之言秦汉之闲事秦所以失而汉所以兴者久之文帝称善乃拜释之为谒者仆射释之从行登虎圈【正义求远反】上问上林尉诸禽兽簿【索隐汉书表上林有八丞十二尉百官志云尉秩三百石】十余问尉左右视尽不能对虎圈啬夫【正义掌虎圈百官表有乡啬夫此其类也】从旁代尉对上所问禽兽簿甚悉欲以观其能口对响应无穷者文帝曰吏不当若是耶尉无赖【集解张娄曰才无可恃】乃诏释之拜啬夫为上林令释之之前曰陛下以绹侯周勃何如人也上曰长者也又复问东阳侯张敖如何如人也上复曰长者释之曰夫绹侯东阳侯称为长者此两人言事曾不能出口岂敦此啬夫喋喋【集解晋灼曰音牒索隐汉书作喋喋喋喋多言也】利口捷给哉且秦以任刀笔之吏吏争以亟疾苛察相高然其敝徒文具耳【索隐案谓空具其文而无其实】无惻隐之实以故不闻其过陵迟而至於二世天下土崩今陛下以啬夫口辩而超迁之臣恐天下随风靡靡争为口辩而无其实且下之化上疾於景响举错不可不审也文帝曰善乃止不拜啬夫上就车召释之参乘徐行问释之秦之敝具以质言【集解如淳曰质诚也】至宫上拜释之为公车令顷之太子与梁王共车入朝不下司马门【集解如淳曰宫卫令诸出入殿门公车司马门乘轺传者皆下不如令罚金四两】於是释之追止太子梁王无得入殿门遂劾不下公门不敬奏之薄太后闻之文帝免冠谢曰教儿子不谨薄太后乃使使承诏赦太子梁王然後得入文帝由是奇释之拜为中大夫顷之至中郎将从行至霸陵居北临厕【集解李奇曰

霸陵北头厠近霸水帝登其上以远望也如淳曰居高临垂边曰厠也苏林曰厠边侧也韦昭曰高岸夹水为厠索隐刘氏厠音初吏反包恺音侧义亦两通】是时慎夫人从上指示慎夫人新丰道曰此走邯郸道也【集解张晏曰慎夫人邯郸人也如淳曰走音奏趋也索隐案走犹向也】使慎夫人鼓瑟上自倚瑟而歌【集解駰案汉书音义曰声气依倚瑟也书曰声依永索隐倚於绮反案谓歌声合於瑟声相依倚也】意惨凄悲怀顾谓羣臣曰嗟乎以北山石为椁【正义顔师古云美石出京师北山今宜州石是】用紵絮斲陈蔡漆其间【集解徐广曰斲一作错駰案汉书音义曰斲絮以漆着其间也索隐紵音竹吕反絮音息虑反斲音侧畧反蔡音女居反案斲陈蔡以漆着其间也】岂可动哉左右皆曰善释之前进曰使其中有可欲者虽锢南山犹有郄【集解张晏曰锢铸也帝北向故云北山回顾南向故云南山索隐案大顔云北山青石肌理细密堪为椁至今犹然故秦本纪云作阿房作酈山发北山石椁乃写是也故帝欲北山之石为椁取其精牢释之荅言但使薄葬冢中无可贪虽无石椁有何忧焉若使厚葬冢中有物虽并锢南山犹为人所发掘也言南山者取其高厚之意张晏殊失其旨也】使其中无可欲者虽无石椁又何戚焉文帝称善其後拜释之为廷尉顷之上行出中渭桥【集解张晏曰在渭桥中路瓚曰中渭桥两岸之中索隐张晏臣瓚之说皆非也案今渭桥有三所一所在城西北咸阳路曰西渭桥一所在东北高陵路曰东渭桥其中渭桥在故城之北也】有一人从桥下走出乘舆马惊於是使骑捕属之廷尉释之治问曰县人来【集解如淳曰长安县人】闻蹕匿桥下久之以为行已过即出见乘舆车骑即走耳廷尉奏当一人犯蹕当罚金【集解如淳曰乙令蹕先至而犯者罚金四两蹕止行人索隐崔浩云当谓处其罪也案百官志云廷尉掌平刑罚奏当所应郡国讞疑罪皆处当以报之也】文帝怒曰此人亲惊吾马吾马赖柔和令他马固不败伤我乎而廷尉乃当之罚金释之曰法者天子所与天下公共也【索隐小顔云公谓不私也】今法如此而更重之是法不信於民也且方其时上使立诛之则已今既下廷尉廷尉天下之平也一倾而天下用法皆为轻重民安所错其手足唯陛下察之良久上曰廷尉当是也其後有人盗高庙坐前玉环捕得文帝怒下廷尉廷尉治释之案律盗宗庙服御物者为奏奏当弃市上大怒曰人之无道乃盗先帝庙器吾属廷尉者欲致族之而君以法奏之【索隐案以法者谓依律以断也】非吾所以共承宗庙意也释之免冠顿首谢曰法如是足也【集解徐广曰足一作止也】且罪等【集解如淳曰俱死罪也盗玉环不若盗长陵土之逆也】然以逆顺为差今盗宗庙器而族之有如万分之一假令愚民取长陵一抔土【集解张晏曰不欲指言故以取土譬也索隐杯音步侯反案礼运云污尊而抔饮郑氏云抔手掬之字从手字本或作盃言一勺一抔两音并通又音普回反坯者埽之未烧之名也张晏云不欲指言故以取土譬者盖不欲言盗开长陵及侵柩恐伤迫切先帝故也】陛下何以加其法乎久之文帝与太后言之乃许廷尉当是时中尉条侯周亚夫与梁相山都侯王恬开【集解徐广曰一作闲汉书作啓啓者景帝讳也故或为开】见释之持议平乃结为亲友张廷尉由此天下称之後文帝崩景帝立释之恐【索隐景帝为太子时与梁王入朝不下司马门释之曾奏劾故恐也】称病欲免去惧大诛至欲见谢则未知何如用王生计卒见谢景帝不过也王生者善为黄老言处士也尝召居廷中三公九卿尽会立王生老人曰吾鞶解【正义上万越反下闲买反】顾谓张廷尉为我结鞶【索隐结音如字又音计】释之跪而结之既已人或谓王生曰独奈何廷辱张廷尉使跪结鞶王生曰吾老且贱自度终无益於张廷尉张廷尉方今天下名臣吾故聊辱廷尉使跪结鞶欲以重之诸公闻之贤王生而重张廷尉张廷尉事景帝岁余为淮南王相犹尚以前过也久之释之卒其子曰张挚字长

公官至大夫免以不能取容当世故终身不仕【索隐谓性公直不能曲屈见容於当世故至免官不仕也】

冯唐者其大父赵人父徙代汉兴徙安陵唐以孝着为中郎署长【集解应劭曰此云孝子郎也或曰以至孝闻索隐案谓为郎署之长也】事文帝文帝辇过【索隐过音戈谓文帝乘辇过郎署也】问唐曰父老何自为郎【索隐案崔浩云自从也帝询唐何从为郎又小颜云年老矣何乃自为郎怪之也】家安在唐具以实对文帝曰吾居代时吾尚食监高祛数为我言赵将李齐之贤战於钜鹿下今吾每饭意未尝不在钜鹿也【集解张晏曰每食念监所说李齐在钜鹿时】父知之乎唐对曰尚不如廉颇李牧之为将也上曰何以唐曰臣大父在赵时为官卒将【集解徐广曰一云官士将駟案晋灼曰百人为彻行亦皆师将也索隐案国语闾阎卒百人为彻行行头皆官师贾逵云百人为一队也官师队大夫也】善李牧臣父故为代相善赵将李齐知其为人也上既闻廉颇李牧为人良【集解如淳曰良善也】说而搏髀曰嗟乎吾独不得廉颇李牧时为吾将吾岂忧匈奴哉唐曰主臣【索隐案乐彦云人臣进对前称主臣犹上书前云昧死案志林云冯唐面折万乘何言不惧主臣为惊怖其言益着也又魏武谓陈琳云卿为本初檄何乃上及父祖琳谢曰主臣益明主臣是惊怖也解已见前篇】陛下虽得廉颇李牧弗能用也上怒起入禁中良久召唐让曰公柰何衆辱我独无闲处乎唐谢曰鄙人不知忌讳当是之时匈奴新大入朝那【索隐上音朝遥反下音乃何反县名属河西安定正义在原州百泉县西北十里汉朝那县是也】杀北地都尉昂【正义北地郡今宁州也索隐案都尉姓孙】上以胡寇为意乃卒复问唐曰公何以知吾不能用廉颇李牧也唐对曰臣闻上古王者之遣将也跪而推轂曰阃以内者【集解韦昭曰此郭门之阃也门中櫪曰阃索隐櫪音其月反正义阃音苦本反谓门限也】寡人制之阃以外者将军制之军功爵赏皆决於外归而奏之此非虚言也臣大父言李牧为赵将居边军市之租皆自用飧士【索隐案谓军中立市市有税税即租也】赏赐决於外不从中扰也委任而责成功故李牧乃得尽其智能遣选车千三百乘【索隐案六韬书云有选车之法十】穀骑万三千【索隐如淳云穀音构穀骑张弓之骑也】百金之士十万【集解服虔曰良士直百金也或曰直百金言重索隐晋灼云百金言其贵重也注云或者服晋之说也刘氏云其功可赏百金者事见管子及小尔雅】是以北逐单于破东胡灭澹林【集解徐广曰澹一作檐索隐崔浩云东胡乌丸之先也国在匈奴东故云东胡澹音丁甘反一本作襜】西抑强秦南友韩魏当是之时赵几霸【索隐几音祈】其後会赵王迁立其母倡也【索隐案列女传云邯鄲之倡也正义赵幽王母乐家之女也】王迁立乃用郭开谗卒诛李牧【索隐案开是赵王宠臣战国策云秦多与开金使为反间】令顔聚代之【索隐聚音似喻反汉书作最本齐将】是以兵破土北为秦所禽灭今臣窃闻魏尚为云中守【集解駟案汉书曰尚槐里人也正义云中郡故城在胜州榆林县东北三十里】其军市租尽以飧士卒私养钱【集解服虔曰私廩假钱索隐案汉书市肆租税之入为私奉养服虔云私廩假钱是也或云官所别廩给也】五日一椎牛飧宾客军吏舍人【索隐椎音直追反击也】是以匈奴远避不近云中之塞虏曾一入尚率车骑击之所杀甚衆夫士卒尽家人子【索隐案谓庶人之家子也】起田中从军安知尺籍伍符【集解如淳曰汉军法曰吏卒斩首以尺籍书下县移郡令人故行不行夺劳二岁伍符亦什五之符约节度也或曰以尺简书故曰尺籍也索隐案尺籍者谓书其斩首之功於一尺之板伍符者命军人伍伍相保不容奸诈也故行不行谓故命人行而身不自行夺劳一岁也故与雇同】

终日力战斩首捕虏上功莫府【索隐案莫训大也又崔浩云古者出征为将治无常处以幕为府舍故云莫府莫当为幕古字少耳】一言不相应【索隐应音乙陵反谓数不同也】文吏以法绳之其赏不行而吏奉法必用臣愚以为陛下法太明赏太轻罚太重且云中守魏尚坐上功首虏差六级陛下下之吏削其爵罚作之由此言之陛下虽得廉颇李牧弗能用也【集解駮案班固称扬子曰孝文帝亲诎帝尊以信亚夫之军曷为不能用颇牧彼将有激】臣诚愚触忌讳死罪死罪文帝说是日令冯唐持节赦魏尚复以为云中守而拜唐为车骑都尉主中尉及郡国车士【集解服虔曰车战之士】七年景帝立以唐为楚相免武帝立求贤良举冯唐唐时年九十余不能复为官乃以唐子冯遂为郎遂字王孙亦奇士与余善

太史公曰张季之言长者守法不阿意冯公之论将率有味哉有味哉语曰不知其人视其友二君之所称诵可着廊庙书曰不偏不党王道荡荡不党不偏王道便便【集解徐广曰一作辨】张季冯公近之矣

【索隐述赞曰张季未偶见识袁盎太子惧法嗇夫无状惊马罚金盗环悟上冯公白首味哉论将因对李齐收功魏尚】

史记卷一百二

史记卷一百二考证

张释之冯唐列传用紵絮斲陈藁漆其间○藁集韵音柳黏着也汉书水经注皆去此字

下廷尉廷尉治○凌稚隆曰一本无重廷尉字

假令愚民取长陵一抔土索隐郑氏云抔手掬之字从手字本或作盃言一勺一抔两音并通又音普回反抔者塿之未烧之名也○师古汉书注云其字从手今学者读抔为杯勺之杯非也抔非应盛土之物也其意盖讥郑氏又音普回反则字当从土坏与抔不通

王迁立乃用郭开谗○【臣照】按上文云其後会赵王迁立其母倡也然则此句立字乃衍文

主中尉及郡国车士○车疑骑字之误

史记卷一百二考证

卷一百三

钦定四库全书

史记卷一百三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

万石张叔列传第四十三

万石君【正义以父及四子皆二千石故号奋为万石君】名奋其父赵人也【正义洛州邯鄲本赵国都】姓石氏赵亡徙居温【正义故温城在怀州温县三十里汉县在也】高祖东击项籍过河内时奋年十五为小吏侍高祖高祖与语爱其恭敬问曰若何有对曰奋独有母不幸失明家贫有姊能鼓琴高祖曰若能从我乎曰愿尽力於是高祖召其姊为美人以奋为中涓【正义顔师古云中涓官名居中而涓洁也如淳曰主通书谒出入命也】受书谒徙其家长安中戚里【索隐小顔云於上有姻戚者皆居之故名其里为戚里长安记戚里在城内】以姊为美人故也其官至孝文时积功劳至大中大夫无文学恭谨无与比文帝时东阳侯张敖为太子太傅免选可为傅者皆推奋奋为太子太傅及孝景即位以为九卿迫近惮之【集解张晏曰以其恭敬履度故难之】徙奋为诸侯相奋长子建次子甲次子乙【集解徐广曰一作仁正义顔师古云史失其名故云甲乙耳非其名也】次子庆皆以驯行孝谨【集解徐广曰驯一作训索隐驯音巡】官皆至二千石於是景帝曰石君及四子皆二千石人臣尊宠乃集其门号奋为万石君孝景帝季年万石君以上大夫禄归老于家以岁时为朝臣过宫门阙万石君必下车趋见路马必式焉子孙为小吏来归谒万石君必朝服见之不名子孙有过失不谯让为便坐对案不食【索隐谯音才笑反谯让责让也为音于伪反便音婢绵反盖谓为之不处正室别坐他处故曰便坐坐音如座便坐非正坐处也故王者所居有便殿便房义亦然也又音婢见反亦通】然後诸子相责因长老肉袒固谢罪改之乃许子孙胜冠者在侧虽燕居必冠申申如也僮仆欣欣如也【集解晋灼曰欣许慎曰古欣字韦昭曰声和貌也】唯谨上时赐食於家必稽首俯伏而食之如在上前其执丧哀戚甚悼子孙遵教亦如之万石君家以孝谨闻乎郡国虽齐鲁诸儒质行皆自以为不及也建元二年郎中令王臧以文学获罪【正义百官表云郎中令秦官掌居宫殿门户武帝太初元年更名光禄勳也】皇太后以为儒者文多质少今万石君家不言而躬行乃以长子建为郎中令少子庆为内史【正义百官表云内史周官秦因之掌治京师景帝分置左内史武帝太初元年更名京兆尹左内史名左冯翊也】建老白首万石君尚无恙建为郎中令每五日洗沐归谒亲【集解文穎曰

郎五日一下正义孔文祥云建为郎中令即光禄勳九卿之职也直五日一下也按五日一下直洗沐】入子舍【索隐案刘氏谓小房内非正堂也小顔以为诸子之舍若今诸房也】窃问侍者取亲中裙厕牖身自浣涤【集解徐广曰牖筑垣短板也音住厕牖谓厕溷垣墙建隐於其侧浣涤也一读牖为窋窋音豆言建又自洗荡侧窋侧窋泻除秽恶之穴也吕静曰械窋褻器也音威豆駟案苏林曰牖音投贾逵解周官械虎子也窋行清也孟康曰厕行清窋行中受粪者也东南人谓凿木空中如曹谓之窋晋灼曰今世谓反闭小袖衫为侯窋厕此最厕近身之衣也索隐案亲谓父也中裙近身衣也徐广云牖短板以筑厕墙未知其义何从恐非也】复与侍者不敢令万石君知以为常建为郎中令事有可言屏人恣言极切至廷见如不能言者是以上乃亲尊礼之万石君徙居陵里【集解徐广曰陵一作邻索隐小顔云陵里里名在茂陵非长安之戚里也正义茂陵邑中里也茂陵故城汉茂陵县也在雍州始平县东北二十里】内史庆醉归入外门不下车万石君闻之不食庆恐肉袒请罪不许举宗及兄建肉袒万石君让曰内史贵人入闾里里中长老皆走匿而内史坐车中自如固当乃谢罢庆庆及诸子弟入里门趋至家万石君以元朔五年中卒长子郎中令建哭泣哀思扶杖乃能行岁余建亦死诸子孙咸孝然建最甚甚於万石君建为郎中令书奏事事下建读之曰误书马字与尾当五今乃四不足一【集解服虔曰作马字下曲而五建时上事误作四正义顔师古云马字下曲者尾并四点为四足凡五】上谴死矣甚惶恐其为谨慎虽他皆如是万石君少子庆为太仆御出上问车中几马庆以策数马毕举手曰六马庆於诸子中最为简易矣【正义汉书庆为太仆御出上问车中几马庆以策数马毕举手曰六马按庆於兄弟最为简易矣然犹如此也】然犹如此为齐相举齐国皆慕其家行不言而齐国大治为立石相祠元狩元年上立太子选羣臣可为傅者庆自沛守为太子太傅七岁迁为御史大夫元鼎五年秋丞相有罪罢【集解駟案赵周坐酎金免索隐案汉书而知也】制诏御史万石君先帝尊之子孙孝其以御史大夫庆为丞相封为牧邱侯是时汉方南诛两越东击朝鲜北逐匈奴西伐大宛中国多事天子巡狩海内修上古神祠封禅兴礼乐公家用少桑弘羊等致利王温舒之属峻法儿寛等推文学至九卿更进用事事不关决於丞相丞相醇谨而已在位九岁无能有所匡言尝欲请治上近臣所忠九卿减宣罪【集解服虔曰音减损之减】不能服反受其过赎罪元封四年中关东流民二百万口无名数者四十万【索隐案小顔云无名数若今之无户籍】公卿议欲请徙流民於边以适之上以为丞相老谨不能与其议乃赐丞相告归而案御史大夫以下议为请者丞相慙不任职乃上书曰庆幸得待罪丞相罢弩无以辅治城郭仓库空虚民多流亡罪当伏斧质上不忍致法愿归丞相侯印乞骸骨归避贤者路天子曰仓廩既空民食流亡而君欲请徙之摇荡不安动危之而辞位君欲安归难乎【索隐难音乃弹反言欲归于何人】以书让庆庆甚慙遂复视事庆文深审谨然无他大略为百姓言後三岁余太初二年中丞相庆卒谥为恬侯庆中子德庆爱用之上以德为嗣代侯後为太常坐法当死赎免为庶人庆方为丞相诸子孙为吏更至二千石者十三人及庆死後稍以罪去孝谨益衰矣

建陵侯卫绾者代大陵人也【正义括地志云汉建陵县故城在沂州丞县界也索隐按地里志大陵县名正义括地志云大陵县城在并州文水县北十三里按代王是时都中都大陵属马故言代大陵人也】绾以戏车为郎【集解应劭曰能左右超乘也如淳曰栢机轳之类索隐案今亦有弄车之戏是也栢音历谓超踰之也轳音卫谓车轴头也】事文帝功次迁为中郎将醇谨无他孝景为太子时召上左右饮而绾称病不行【集解张晏曰恐文帝谓豫有二

心以事太子】文帝且崩时属孝景曰绾长者善遇之及文帝崩景帝立岁余不谯呵绾【索隐谯呵音谁何犹借访也一日谯呵者责让也不谯呵者言不嗔责卫绾也】绾日以谨力景帝幸上林诏中郎将参乘还而问曰君知所以得参乘乎绾曰臣从车士幸得以功次迁为中郎将不自知也上问曰吾为太子时召君君不肯来何也对曰死罪实病上赐之劔绾曰先帝赐臣劔凡六劔不敢奉诏上曰劔人之所施易独至今乎【集解如淳曰施读曰移言劔者人之所好故多数移易贸换之也索隐施音移易音亦】绾曰具在上使取六劔劔尚盛未尝服也郎官有谴常蒙其罪不与他将争有功常让他将上以为廉忠实无他肠【索隐案小颜云心肠之内无他恶也】乃拜绾为河间王太傅吴楚反诏绾为将将河间兵击吴楚有功拜为中尉三岁以军功孝景前六年中封绾为建陵侯其明年上废太子诛栗卿之属【集解苏林曰栗太子舅也如淳曰栗氏亲属也卿其名也索隐栗姬之族也正义颜师古云太子废为临江王故诛其外家亲属也】上以为绾长者不忍乃赐绾告归而使郅都治捕栗氏既已上立胶东王为太子召绾拜为太子太傅久之迁为御史大夫五岁代桃侯舍为丞相【正义故桃城在渭州胙城县东三十里刘舍所封】朝奏事如职所奏【索隐以言但守职分而已不别有所奏议也】然自初官以至丞相终无可言天子以为敦厚可相少主尊宠之赏赐甚多为丞相三岁景帝崩武帝立建元年中丞相以景帝疾时诸官囚多坐不辜者而君不任职免之其後绾卒子信代坐酎金失侯

塞侯直不疑者南阳人也【索隐案塞国名今桃林之塞也直姓也不疑名也与隼不疑同字正义塞音先代反古塞国今陕州桃林县以西至潼关皆桃林塞地也】为郎事文帝其同舍有告归误持同舍郎金去已而金主觉妄意不疑【索隐谓妄疑其盗取将也】不疑谢有之买金偿而告归者来而归金而前郎亡金者大慙以此称为长者文帝称举稍迁至大中大夫【集解徐广曰汉书云称为长者稍迁至大中大夫无文帝称举四字】朝廷见人或毁之曰不疑状貌甚美然独无奈其善盗嫂何也【索隐案小颜云盗谓私之】不疑闻曰我乃无兄然终不自明也吴楚反时不疑以二千石将兵击之景帝後元年拜为御史大夫天子修吴楚时功乃封不疑为塞侯武帝建元年中与丞相绾俱以过免不疑学老子言其所临为官如故唯恐人知其为吏迹也不好立名称称为长者不疑卒子相如代孙望坐酎金失侯【索隐汉书作彭祖坐酎金国除】

郎中令周文者名仁其先故任城人也【正义任城兖州县也】以医见景帝为太子时拜为舍人积功稍迁孝文帝时至大中大夫景帝初即位拜仁为郎中令仁为人陰重不泄常衣敝补衣溺袴【集解服?曰质重不泄人之陰谋也张晏曰陰重不泄下湿故溺袴是以得比宦者得入後宫仁有子孙先未得此病时所生韦昭曰陰重如今带下病泄利索隐案其解二亦各有理小颜云阴密也为性密重不泄人言也霍去病少言不泄亦其类也其人又常衣弊补衣及溺袴故为不洁清之服是以得幸入卧内也二者未知谁得其实】期为不絜清【索隐谓心中常期不絜之服则期是故之意也小颜亦同正义清清净期犹常也言为不絜淨下湿故得入卧内後宫比宦者】以是得幸景帝入卧内於後宫秘戏【正义谓後宫中戏剧宜可秘也】仁常在旁至景帝崩仁尚为郎中令终无所言上时问人【正义颜师古云问以他人之善恶也】仁曰上自察之然亦无所毁以此景帝再自幸其家家徙阳陵上所赐甚多然常让不敢受也诸侯羣臣赂遗终无所受武帝立以为先帝臣重之仁乃病免以二千石禄归老子

孙咸至大官矣

御史大夫张叔者名欧【集解駰案史记音隐曰欧於友反索隐欧音鸟後反汉书作欧孟康音駟也】安邱侯说之庶子也【集解徐广曰张说起於方与县从高祖以入汉也索隐说音悦】孝文时以治刑名言【集解韦昭曰有刑名之书欲令名实相副也索隐案刘向别錄云申子学号曰刑名者循名以责实其尊君卑臣崇上抑下合於六家也说者云刑名家即太史公所说六家之二也】事太子然欧虽治刑名家【正义刑刑家也名名家也言治刑法及名实也】其人长者景帝时尊重常为九卿至武帝元朔四年韩安国免诏拜欧为御史大夫自欧为吏未尝言案人专以诚长者处官官属以为长者亦不敢大欺上具狱事有可郤郤之不可者不得已为涕泣面对而封之其爱人如此老病笃请免於是天子亦策罢以上大夫禄归老于家家於阳陵子孙咸至大官矣

太史公曰仲尼有言君子欲讷於言而敏於行【集解徐广曰讷字多作讷音同耳古字假借】其万石建陵张叔之谓邪是以前教不肃而成不严而治塞侯微巧【正义不疑学老子所临官恐人知其为吏迹不好立名称为长者是微巧也】而周文处譌【索隐案直不疑以吴楚反时为二千石将景帝封之微巧也周文处譌者谓为郎中令陰重得幸出入卧内也故班固曰石建之澣衣周仁之垢污君子讥之是也正义上时问人仁曰上自察之上所赐常不受又诸侯羣臣赂遗终无受此为处譌故君子讥此二人为其近於佞也】君子讥之为其近於佞也然斯可谓笃行君子矣【索隐述赞曰万石孝谨自家形国郎中数马内史匍匐无他肠塞有陰德刑名张欧垂涕恤狱敏行讷言俱嗣芳躅】

史记卷一百三

史记卷一百三考证

万石张叔列传万石君少子庆为太仆御出○汉百官公卿表庆未尝为太仆与传异

史记卷一百三考证

卷一百四

钦定四库全书

史记卷一百四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

田叔列传第四十四

田叔者赵陞城人也【索隐案下文字少卿陞音刑县名属中山】其先齐田氏苗裔也叔喜劒学黄老术於乐巨公所【索隐木燕人乐毅之後正义乐姓巨公名】叔为人刻廉自喜喜游诸公【正义喜许记反诸公谓丈人行也】赵人举之赵相赵午午言之赵王张敖所赵王以为郎中数岁切直廉平赵王贤之未及迁会陈豨反代【集解徐广曰七年韩王信反高帝征之十年代相陈豨反】汉七年高祖往诛之过赵赵王张敖自持案进食礼恭甚高祖箕踞骂之是时赵相赵午等数十人皆怒谓张王曰王事上礼备矣今遇王如是臣等请为乱赵王啗指出血曰先人失国微陛下臣等当虫出【索隐案谓死而虫出也左传齐桓死未葬虫流於户外是也】公等奈何言若是毋复出口矣於是贯高等曰王长者不倍德卒私相与谋弑上会事发觉【集解徐广曰九年十二月捕贯高等也】汉下诏捕赵王及羣臣反者於是赵午等皆自杀唯贯高就繫是时汉下诏书赵有敢随王者梟三族唯孟舒田叔等十余人赭衣自髡钳称王家奴随赵王敖至长安贯高事明白赵王敖得出废为宣平侯乃进言田叔等十余人上尽召见与语汉廷臣无能出其右者上说尽拜为郡守诸侯相叔为汉中守十余年会高后崩诸吕作乱大臣诛之立孝文帝孝文帝既立召田叔问之曰公知天下长者乎对曰臣何足以知之上曰公长者也宜知之叔顿首曰故云中守孟舒长者也是时孟舒坐虏大入塞盗劫云中尤甚免上曰先帝置孟舒云中十余年矣虏曾一入孟舒不能坚守毋故士卒战死者数百人长者固杀人乎公何以言孟舒为长者也叔叩头对曰是乃孟舒所以为长者也夫贯高等谋反上下明诏赵有敢随张王罪三族然孟舒自髡钳随张王敖之所在欲以身死之岂自知为云中守哉汉与楚相距士卒罢敝匈奴冒顿新服北夷来为边害孟舒知士卒罢敝不忍出言士争临城死敌如子为父弟为兄以故死者数百人孟舒岂故驱战之哉是乃孟舒所以为长者也於是上曰贤哉孟舒复召孟舒以为云中守後数岁叔坐法失官梁孝王使人杀故吴相袁盎景帝召田叔案梁具得其事还报景帝曰梁有之乎叔对曰死罪有之上曰其事安在田叔曰上毋以梁事为也上曰何也曰今梁王不伏诛是汉法不行也如其伏法而太后食不甘味卧不安席此忧在陛下也景帝大贤之以为鲁相鲁相初到民自言相讼王取其

财物百余人田叔取其渠率二十人各答五十余各搏二十【索隐搏音博】怒之曰王非若主邪何自敢言若主鲁王闻之大慙发中府钱【正义王财物所藏也】使相偿之相曰王自夺之使相偿之是王为恶而相为善也相母与偿之於是王乃尽偿之鲁王好猎【正义鲁共王景帝子都兖州曲阜县故鲁城中】相常从入苑中【正义括地志云矍相圃在兖州曲阜县南三十里礼记云孔子射於矍相之圃观者如堵堵墙也】王辄休相就馆舍相出常暴坐【索隐暴音步卜反】待王苑外王数使人请相休终不休曰我王暴露苑中我独何为就舍鲁王以故不大出游数年叔以官卒鲁以百金祠少子仁不受也曰不以百金伤先人名仁以壮健为卫将军舍人【集解张晏曰卫青也】数从擊匈奴卫将军进言仁仁为郎中数岁为二千石丞相长史失官其後使刺举三河【正义百官表云监御史秦官掌监郡汉省丞相遣御史分刺州不常置也案三河河南河东河内】上东巡仁奏事有辞上说拜为京辅都尉【正义百官表云右扶风左冯翊京兆尹是为三辅鼎四年置三辅都尉服云皆治长安城中】月余上迁拜为司直【正义百官表云武帝元狩五年初置司直秩比二千石掌佐丞相举不法也】数岁坐太子事【正义谓戾太子】时左丞相自将兵【集解徐广曰刘屈氂时为丞相也】令司直田仁主闭守城门坐纵太子下吏诛死仁发兵长陵令车千秋上变仁仁族死陜城今在中山国【集解徐广曰陜城县名也正义今定州也】

太史公曰孔子称曰居是国必闻其政田叔之谓乎义不忘贤明主之美以救过仁与余善余故并论之【索隐述赞曰田叔长者重义轻生张王既雪汉中是荣孟舒见废抗说相明案梁以礼相鲁得情子仁坐事刺举有声】

褚先生曰臣为郎时闻之曰田仁故与任安相善任安荥阳人也少孤贫困为人将车之长安【索隐将车犹御车也】留求事为小吏未有因缘也因占着名数家於武功【索隐言卜日而自占着家口名数於武功犹今附籍然也占音之艳反】武功扶风西界小邑也谷口蜀剡道近山【正义括地志云汉武功县在渭水南今盩厔县西界也骆谷间在雍州之盩厔县西南二十里开骆谷道以通梁州也按行谷有剡道也】安以为武功小邑无豪易高也【索隐易音以豉反言邑小无豪易得高名也】安留代人为求盗亭父【集解郭璞曰亭卒也正义安留武功替人为求盗亭父也应劭云旧时亭有两卒其一为亭父掌关闭扫除一为求盗掌逐捕盗贼也】後为亭长【正义百官表云十里一亭亭有长也】邑中人民俱出猎任安常为人分麋鹿雉兔部署老小当壮剧易处衆人皆喜曰无伤也任少卿【正义少卿安字】分别平有智略明日复合会会者数百人任少卿曰某子甲何为不来乎诸人皆怪其见之疾也其後除为三老【正义百官表云十亭一乡乡有三老一人掌教化也】举为亲民出为三百石长【正义百官表云万户已上为令秩千石至六百石减万户为长秩五百石至三百石皆有丞尉也】治民坐上行出游共帐不办斥免乃为卫将军舍人与田仁会俱为舍人居门下同心相爱此二人家贫无钱用以事将军家监家监使养恶啮马两人同牀卧仁窃言曰不知人哉家监也任安曰将军尚不知人何乃家监也卫将军【正义卫青也】从此两人过平阳主家令两人与骑奴同席而食此二子拔刀列断席别坐主家皆怪而恶之莫敢呵其後有诏募择卫将军舍人以为郎将军取舍人中富给者令具鞍马绛衣玉贝劔欲入奏之会贤大夫少府赵禹来过卫将军将军呼所举舍人以示赵禹赵禹以次问之十余人无一人习事有智略者赵禹曰吾闻之将门之下必有将类传曰不知其君视其所使不知其子视其所友今

有诏举将军舍人者欲以观将军而能得贤者文武之士也今徒取富人子上之又无智略如木偶人衣之绮绣耳将奈之何於是赵禹悉召卫将军舍人百余人以次问之得田仁任安曰独此两人可耳余无可使用者卫将军见此两人贫意不平赵禹去谓两人曰各自具鞍马新绛衣两人对曰家贫无用具也将军怒曰今两君家自为贫何为出此言鞅鞍如有移德於我者何也【集解徐广曰移犹施也】将军不得已上籍以闻有诏召见卫将军舍人此二人前见诏问能略相推第也田仁对曰提桴鼓立军门使上大夫乐死战鬪仁不及任安任安对曰夫决嫌疑定是非辩治官使百姓无怨心安不及仁也武帝大笑曰善使任安护北军使田仁护边田谷於河上此两人立名天下其後用任安为益州刺史【正义地理志云武帝改曰梁州百官表云元封五年初置部刺史掌奉诏条察州秩六百石员十三按若今采访按察六条也】以田仁为丞相长史【正义百官表云丞相有两长史秩千石】田仁至书言天下郡太守多为奸利三河尤甚臣请先刺举三河三河太守皆内倚中贵人与三公有亲属无所畏惮宜先正三河以警天下奸吏是时河南河内太守皆御史大夫杜父兄子弟也【集解駟案杜杜周也】河东太守石丞相子孙也【正义谓石庆】是时石氏九人为二千石方盛贵田仁数上书言之杜大夫及石氏使人谢谓田少卿曰吾非敢有语言也愿少卿无相诬污也仁已刺三河三河太守皆下吏诛死仁还奏事武帝说以仁为能不畏强御拜仁为丞相司直威振天下其後逢太子有兵事丞相自将兵使司直主城门司直以为太子骨肉之亲父子之间不甚欲近去之诸陵过是时武帝在甘泉使御史大夫暴君【集解徐广曰暴胜之为御史大夫】下责丞相何为纵太子丞相对言使司直部守城门而开太子上书以闻请捕繫司直司直下吏诛死是时任安为北军使者护军太子立车北军南门外召任安与节令发兵安拜受节入闭门不出武帝闻之以为任安为佯邪【集解徐广曰佯或作详也索隐详音羊邪弋奢反佯谓诈受节不发兵不傅会太子者也】不傅事何也【索隐傅音附谓不附会也】任安笞辱北军钱官小吏小吏上书言之以为受太子节言幸与我其鲜好者【索隐鲜音仙谓太子请其鲜好之兵甲也】书上闻武帝曰是老吏也见兵事起欲坐观成败见胜者欲合从之有两心安有当死之罪甚衆吾常活之今怀诈有不忠之心下安吏诛死

夫月满则亏物盛则衰天地之常也知进而不知退久乘富贵祸积为崇故范蠡之去越辞不受官位名传後世万岁不忘岂可及哉後进者慎戒之

史记卷一百四

史记卷一百四考证

田叔列传会陈豨反代集解徐广曰七年韩王信反高帝征之十年代相陈豨反○余有丁曰此是七年高帝征韩王信曰豨反史误

复召孟舒以为云中守○容斋随笔曰孟舒魏尚皆以文帝时为云中守皆坐匈奴入寇获罪皆得士死力皆用他人言复故官事切相类疑其只一事云

相常从入苑中正义括地志云矍相圃在兖州曲阜县南礼记云孔子射於矍相之圃观者如

堵○徐孚远曰疑苑中即矍相圃旧地正义引其说而未竟

上迁拜为司直○【臣照】按迁字疑还字之讹盖言武帝东巡还乃拜为司直

仁发兵长陵令车千秋上变仁仁族死○【臣照】按此三句中必有讹脱既以坐纵太子诛岂又以车千秋讼太子冤而更族诛乎况文亦不类

因占着名数家於武功索隐言卜日而自占着家口名数?於武功犹今附籍然也占音之艳反○【臣照】按平準书云各以其物自占索隐曰郭璞云占自隐度也占字正宜用此解不宜解作卜字

是时河南河内太守皆御史大夫杜父兄子弟也○容斋随笔曰班史言霍去病既贵卫青故人门下多去事之唯任安不肯去又言卫将军进言任为郎中与褚先生所书不同杜周传云两子夹河为郡守治皆酷暴亦不书其所终也

史记卷一百四考证

卷一百五

钦定四库全书

史记卷一百五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

扁鹊仓公列传第四十五

【索隐王劭云璽方宜与日者龟策相接不合列於此後人误之也正义此传是医方合与龟策日者相次以淳于意孝文帝时医奉诏问之又爲齐太仓令故太史公以次述之扁鹊乃春秋时良医不可别序故引爲传首太仓公次之也】

扁鹊者【正义黄帝八十一难序云秦越人与轩辕时扁鹊相类仍号之爲扁鹊又家於卢国因命之曰卢医也】勃海郡郑人也【集解徐广曰郑当爲鄭鄭县名今属河间索隐案勃海无郑县徐说是也】姓秦氏名越人少时爲人舍长【索隐刘氏云守客馆之师故号云舍长也正义长音丁丈反】舍客长桑君过【索隐隐者盖神人也正义过音戈】扁鹊独奇之常谨遇之长桑君亦知扁鹊非常人也出入十余年乃呼扁鹊私坐间与语曰【正义间音闲】我有禁方年老欲传与公公母泄扁鹊曰敬诺乃出其怀中药予扁鹊饮是以上池之水三十日当知物矣【索隐案旧说云上池水谓水未至地盖承取露及竹木上水取之以和药服之三十日当见鬼物也】乃悉取其禁方书尽与扁鹊忽然不见殆非人也扁鹊以其言饮药三十日视见垣一方人【索隐方犹边也言能隔墙见彼边之人则眼通神也】以此视病尽见五藏症结【正义五藏谓心肺脾肝肾也六腑谓大肠胃胆膀胱三焦也王叔和脉经云左手脉横症在左右手脉横症在右脉头大者在上头小者在下两手脉结上部者濡结中部者缓结三里者豆起阳邪来见浮洪陰邪来见沈细水谷来见坚实】特以诊脉爲名耳【索隐诊邹氏音丈忍反刘氏音陈忍反司马彪云诊占也】爲医或在齐【正义号卢医今济州卢县】或在赵在赵者名扁鹊当晋昭公时【索隐案左氏简子专国在定顷二公之时非当昭公之世且赵系家叙此事亦在定公之初】诸大夫强而公族弱赵简子爲大夫专国事简子疾五日不知人【索隐案韩子云十日不知人所记异也】大夫皆惧於是召扁鹊扁鹊入视病出董安于问扁鹊扁鹊曰血脉治也【正义下云色废脉乱故形静如死状也】而何怪昔秦穆公尝如此七日而寤寤之日告公孙支与子舆【索隐案二子皆秦大夫公孙支子桑也子舆未详】曰我之帝所甚乐吾所以久者适有所学也【索隐适音释言我适来有所受教命

故云学也】帝告我晋国且大乱五世不安其後将霸未老而死霸者之子且令而国男女无别公孙支书而藏之秦策於是出夫献公之乱文公之霸而襄公败秦师於殽而归纵淫此子之所闻今主君之病与之同不出三日必间间必有言也居二日半简子寤语诸大夫曰我之帝所甚乐与百神游於钧天广乐九奏万舞不类三代之乐其声动心有一熊欲援我帝命我射之中熊熊死有黑来我又射之中黑黑死帝甚喜赐我二笥皆有副吾见儿在帝侧帝属我一翟犬曰及而子之壮也以赐之帝告我晋国且世衰七世而亡【正义晋定公出公哀公幽公烈公孝公静公爲七世静公二年爲三晋所灭据此及赵世家简子疾在定公之十一年】嬴姓将大败周人於范魁之西【索隐范魁地名未详正义嬴赵氏本姓也周人谓爲卫也晋亡之後赵成侯三年伐卫取乡邑七十三是也贾逵云月阜日魁也】而亦不能有也董安于受言书而藏之以扁鹊言告简子简子赐扁鹊田四万亩其後扁鹊过虢【正义陕州城古虢国又陕州河北县东北下阳故城古虢即晋献公灭者又洛州汜水县古东虢国而未知扁鹊过何者盖虢至此并灭也】虢太子死【索隐案傳玄云虢是晋献所灭先此百二十余年此时焉得有虢则此云虢太子非也然案虢後改称郭春秋有郭公盖郭之太子也】扁鹊至虢宫门下问中庶子喜方者【索隐喜音许既反喜好也爱也方方伎之人也正义中庶子古官号也喜方好方术不书姓名也】曰太子何病国中治穰過於衆事中庶子曰太子病血气不时交错而不得泄暴发於外则爲中害精神不能止邪气邪气积蓄而不得泄是以阳缓而陰急故暴蹶而死【索隐蹶音厥正义释名云蹶气从下蹶起上行外及心胁也】扁鹊曰其死何如时曰鸡鸣至今日收乎曰未也【集解駰案收谓棺斂】其死未能半日也言臣齐勃海秦越人也家在於郑未尝得望精光侍謁於前也闻太子不幸而死臣能生之中庶子曰先生得无诞之乎何以言太子可生也臣闻上古之时医有俞跗【索隐音與附下又音跌正义與附二音应劭云黄帝时将也】治病不以汤液醴酒【正义上音礼下山解反】鑱石挢引案杭毒熨【索隐鑱音仕咸反谓石针也挢音九兆反谓爲按摩之法夭挢引身如熊顾鸟伸也杭音玩亦谓按摩而玩弄身体使调也毒熨谓毒病之处以药物熨帖也】一拨见病之应因五藏之输【索隐音束注反正义八十一难云肺之原出於太渊心之原出於太陵肝之原出於太冲脾之原出於太白肾之原出於太谿少陰之原出於兑骨胆之原出於邱虚胃之原出於冲阳三焦之原出於阳池膀胱之原出於京骨大肠之原出於全谷小肠之原出於腕骨十二经皆以输爲原也按此五藏六府之输也】乃割皮解肌诀脉结筋搦髓脑揲荒【集解徐广曰揲音舌索隐搦音女角反揲荒膏荒也】爪幕【正义以爪决其阑幕也】湔浣【正义上子钱反下胡管反】肠胃漱涤五藏练精易形先生之方能若是则太子可生也不能若是而欲生之曾不可以告咳婴之儿终日扁鹊仰天叹曰夫子之爲方也若以管窥天以郄视文越人之爲方也不待切脉【正义黄帝素问云待切脉而知病寸口六脉三陰三阳皆随春夏秋冬夏观其脉之变则知病之逆顺也杨玄操云切按也】望色【正义素问云面色青脉当弦急面色赤脉当浮而短面色黑脉当沈浮而滑也】听声【正义素问云好哭者肺病好歌者脾病好妄言者心病好呻吟者肾病好叫呼者肝病也】写形【正义素问云欲得温而不欲见人者藏家病欲得寒而见人者府家病也】言病之所在闻病之阳论得其陰闻病之陰论得其阳【正义八十一难云陰病行阳阳病行陰故令募在陰俞在阳杨玄操云肠爲陰五藏募皆在腹故云募皆在陰背爲阳五藏俞皆在背故云俞皆在阳内藏有病则出行於阳阳俞在背也外体有病则入行於陰陰募在腹也针法云从阳引陰从陰引阳也】病应见於大表不出千里决者至衆不可曲止也【索隐止语助也不可委曲具言正义言病皆有应见不可

曲言病之止住所在也】子以吾言爲不诚试入诊太子当闻其耳鸣而鼻张【正义音涨】循其两股以至於陰当尚温也中庶子闻扁鹊言目眩然而不瞋舌桥然而不下乃以扁鹊言入报虢君虢君闻之大惊出见扁鹊於中阙曰窃闻高义之日久矣然未尝得拜谒於前也先生过小国幸而举之偏国寡臣幸甚【索隐谓虢君自谦云已是偏远之国寡小之臣也】有先生则活无先生则弃捐填沟壑长终而不得反言未卒因嘘唏服臆【索隐上音皮力反下音亿】魂精泄横流涕长潜【集解徐广曰一云言未卒因涕泣交流嘘唏不能自止也索隐潜音山长潜者谓长垂泪也】忽忽承?【索隐音接?即睫也承?言泪恒垂以承於睫也】悲不能自止容貌变更扁鹊曰若太子病所谓尸蹙者也夫以阳入陰中动胃【正义八十一难云脉居陰部反阳脉见者爲阳入陰中是阳乘陰也脉虽时浮濇而短此谓阳中伏陰也脉居阳部而陰脉见者是陰乘阳也脉虽时浮滑而长此谓陰中伏阳也胃水谷之海也】續缘【正义上音直延反續缘谓脉纏绕胃也素问云延缘落络脉也恐非此义也】中经维络【集解徐广曰维一作结正义八十一难云十二经脉十五络脉阳维陰维之脉也】别下於三焦膀胱【正义八十一难云三焦者水谷之道路气之所终始也上焦在心下下膈在胃上口也中焦在胃中脘不上不下也下焦在脐下当膀胱上口也膀胱者津液之府也溺九升九合也言经络下於三焦及膀胱也】是以阳脉下遂【集解徐广曰一作队】陰脉上争【正义遂音直类反素问云阳脉下遂难反陰脉上争如弦也】会气闭而不通【正义八十一难云府会太仓藏会季脇筋会阳陵泉髓会絶骨血会鬲俞骨会大杼脉会大渊气会三焦此谓八会也】陰上而阳内行下内鼓而不起上外絶而不爲使上有絶阳之络下有破陰之纽【正义纽女九反素问云纽赤脉也】破陰絶阳之色已废【集解徐广曰一作发】脉乱故形静如死状太子未死也夫以阳入陰支兰藏者生【正义素问云支者顺节兰者横节陰支兰胆藏也】以陰入阳支兰藏者死凡此数事皆五藏蹙中之时暴作也良工取之【正义八十一难云知一爲下工知二爲中工知三爲上工上工者十全九中工者十全八下工者十全六吕广云五藏一病辄有五解一藏爲下工解三藏爲中工解五藏爲上工也】拙者疑殆扁鹊乃使弟子子阳厉鍼砥石以取外三阳五会【索隐阳扁鹊之弟子也鍼音针厉谓磨也砥音脂正义素问云手足各有三陰三阳太陰少陰厥陰太陽少阳阳明也五会谓百会胷会听会气会膻会也】有间太子苏乃使子豹爲五分之熨以八減之齐和煮之以更【正义格彭反】熨两脇下【索隐案言五分之熨者谓熨之令温暖之气入五分也八減之齐者谓药之齐和所減有八并越人当时有此方也】太子起坐更适陰阳但服汤二旬而复故故天下尽以扁鹊爲能生死人扁鹊曰越人非能生死人也此自当生者越人能使之起耳【集解傅玄曰虢自晋献公时先是百二十余年灭矣是时焉得有虢】扁鹊过齐齐桓侯客之【索隐案傅玄曰是时齐无桓侯裴駰云谓是齐侯田和之子桓公午也盖与赵简子颇亦相当】入朝见曰君有疾在腠理【正义腠音湊谓皮肤】不治将深桓侯曰寡人无疾扁鹊出桓侯谓左右曰医之好利也欲以不疾者爲功後五日扁鹊复见曰君有疾在血脉不治恐深桓侯曰寡人无疾扁鹊出桓侯不悦後五日扁鹊复见曰君有疾在肠胃间不治将深桓侯不应扁鹊出桓侯不悦後五日扁鹊复见望见桓侯而退走桓侯使人问其故扁鹊曰疾之居腠理也汤熨之所及也在血脉鍼石之所及也其在肠胃酒醪之所及也其在骨髓虽司命无奈之何今在骨髓臣是以无请也後五日桓侯体病使人召扁鹊扁鹊已逃去桓侯遂死使圣人预知微能使良医得蚤从事则疾可已身可活也人之所病病疾多【正义病厌患多也言人厌患疾病多甚】而医之所病病道少【集解徐广曰所病犹疗病也】故病有六不治骄恣不论於理一不治

也轻身重财二不治也衣食不能适三不治也陰阳并藏气不定四不治也形羸不能服药五不治也信巫不信医六不治也有此一者则重难治也扁鹊名闻天下过邯鄲闻贵妇人即爲带下医过雒阳闻周人爱老人即爲耳目痹医【索隐痹音必二反】来入咸阳闻秦人爱小儿即爲小儿医随俗爲变秦太医令李?自知伎不如扁鹊也使人刺杀之至今天下言脉者由扁鹊也太仓公者齐太仓长临菑人也姓淳于氏名意【正义括地志云淳于国城在密州安邱县东北三十里古之斟灌国春秋州公如曹传云冬淳于公如曹水经注云淳于县故夏后氏之斟灌国也周武王以封淳于公号淳于国也】少而喜医方术高后八年更受师同郡元里公乘阳庆【正义百官表云公乘第八爵也顔师古云言其待乘公之车也】庆年七十余无子使意尽去其故方更悉以禁方予之传黄帝扁鹊之脉书五色诊病【正义八十一难云五藏有色皆见於面亦当与寸口尺内相应也其面色与相应已见前也】知人死生决嫌疑定可治及药论甚精受之三年爲人治病决死生多验然左右行游诸侯不以家爲家或不爲人治病病家多怨之者文帝四年中人上书言意以刑罪当传西之长安【索隐传音竹恋反传乘传送之】意有五女随而泣意怒骂曰生子不生男缓急无可使者於是少女缇紫伤父之言【索隐缇音啼紫音紆营反】乃随父西上书曰妾父爲吏齐中称其廉平今坐法当刑妾切痛死者不可复生而刑者不可复续【集解徐广曰一作赎】虽欲改过自新其道莫由终不可得妾愿入身爲官婢以赎父刑罪使得改行自新也书闻上悲其意此岁中亦除肉刑法【集解徐广曰案年表孝文十二年除肉刑正义汉书刑法志云孝文帝即位十三年除肉刑三孟康云黥劓二左右趾一凡三班固诗曰三王德弥薄惟後用肉刑太仓令有罪就递长安城自恨身无子困急独煢煢小女痛父言死者不可生上书诣阙下思古歌鸡鸣忧心摧折裂晨风扬激声圣汉孝文帝惻然感至情百男何愤愤不如一缇紫】意家居诏召问所爲治病死生验者几何人主名爲谁诏问故太仓长臣意方伎所长及所能治病者【集解徐广曰一作爲爲亦治】有其书无有皆安受学受学几何岁尝有所验何县里人也何病医药已其病之状皆何如具悉而对臣意对曰自意少时喜医药医药方试之多不验者至高后八年【集解徐广曰意年二十六】得见师临菑元里公乘阳庆庆年七十余意得见事之谓意曰尽去而方书非是也庆有古先道遗传黄帝扁鹊之脉书五色诊病知人生死决嫌疑定可治及药论书甚精我家给富心爱公欲尽以我禁方书悉教公臣意即曰幸甚非意之所敢望也臣意即避席再拜谒受其脉书上下经五色诊奇咳【集解駢案奇音羈咳音该正义八十一难云奇经八脉者有阳维有陰维有阳蹻有陰蹻有冲有督有任有带之脉凡此八者皆不拘於经故云奇经八脉也顾野王云咳当寅也又云肱指毛皮也艺文志有五音奇肱用兵二十六卷许慎云肱军中约也】术揆度陰阳外变药论石神接陰阳禁书受读解验之可一年所明岁即验之有验然尚未精也要事之三年所即尝已爲人治诊病决死生有验精良今庆已死十年所臣意年尽三年年三十九岁也齐侍御史成自言病头痛臣意诊其脉告曰君之病恶不可言也即出独告成弟昌曰此病疽【集解駢案七如反】也内发於肠胃之间後五日当肿【正义上於恭反下之勇反】後八日呕脓【正义女东反】死成之病得之饮酒且内成即如期死所以知成之病者臣意切其脉得肝气肝气浊【集解徐广曰一作黽】而静【集解徐广曰一作清】此内关之病也【正义八十一难云关遂入尺爲内关吕广云脉从关至尺泽名内关也】脉法曰脉长而弦不得代四时者【正义王叔和脉经云来数而中止不能自还因而复动者名曰代代者死素问云病在心愈在夏甚於冬病在脾愈在秋甚於春病在肺愈在冬甚於夏病在肾愈在春甚於夏病在肝愈在夏甚於秋也】其病主在於肝和即经

主病也【正义王叔和脉经云脉长而弦病於肝也素问云得病於筋肝之和也】代则络脉有过【正义素问云脉有不及有太过有经有络和即经主病大则络有过也八十一难云关之前者阳之动也脉当见九分而浮过者法曰太过减者法曰不及遂上鱼爲溢爲外关内格此陰乘之脉也关以後者陰之动也脉当见一寸而沉过者法曰太过 减者法曰不及遂入尺爲覆爲内关外格此阳乘之脉也故曰覆溢是其真藏之脉人不病而死也吕广云过九分出一寸各名太过也不及九分至二分或四分五分此太过不满一寸见八分或五分六分此不及】经主病和者其病得之筋髓里其代絶而脉贲者病得之酒且内所以知其後五日而?肿八日呕脓死者切其脉时少阳初代代者经病去人则去络脉主病当其时少阳初关一分故中热而脓未发也及五分则至少阳之界【集解徐广曰一作分下章曰肝与心相去五分故曰五日尽也正义王叔和脉经云分别三门境界脉 所主云从鱼际至高骨却行一寸其中名曰寸口其骨自高从寸至尺名曰尺泽故曰尺寸後尺前名曰关阳出陰入以关爲界阳出三分故曰三陰三阳阳生於尺动於寸陰生於寸动於尺寸主射上焦出头及皮毛竟手关主射中焦腹及於腰尺主射下焦少腹至足也】及八日则呕脓死故上二分而脓发至界而?肿尽泄而死热上则熏阳明烂流络流络动则脉结发脉结发则烂解故络交热气已上行至头而动故头痛

齐王中子诸婴儿小子病召臣意诊切其脉告曰气鬲病使人烦懣食不下时呕沫病得之少忧数忤食饮【索隐忤音疑乞反忤者风痺忤然不得动也】臣意即爲之作下气汤以饮之一日气下二日能食三日即病愈所以知小子之病者诊其脉心气也浊【集解徐广曰一作鼃又作猛】躁而经也此络阳病也脉法曰脉来数疾去难而不一者病主在心周身热脉盛者爲重阳【索隐重音直陇反】重阳者鬲心主【集解徐广曰鬲音唐鬲者荡也谓病荡心者犹刺其心索隐鬲依字读正义八十一难云手心主中宫在中部杨玄操云手心主胞络也自脐已上至带鬲爲中焦也】故烦懣食不下则络脉有过络脉有过则血上出血上出者死此悲心所生也病得之忧也齐郎中令循病衆医皆以爲蹶人中而刺之臣意诊之曰涌疝也【索隐上音勇下音讎所谏反邹诞生云疝音仙字】令人不得前後洩【索隐洩音所留反前洩谓小便後洩大便也】循曰不得前後洩三日矣臣意饮【正义於禁反】以火齐汤一饮得前洩再饮大洩三饮而疾愈病得之内所以知循病者切其脉时右口气急【集解徐广曰右一作有正义王叔和脉经云右手寸口乃气口也】脉无五藏气右口【正义谓右手寸口也】脉大而数数者中下热而涌左爲下右爲上皆无五藏应故曰涌疝中热故溺赤也【正义溺徒吊反】

齐中御府长信病臣意入诊其脉告曰热病气也然暑汗脉少衰不死曰此病得之当浴流水而寒甚已则热信曰唯然【正义唯惟癸反】往冬时爲王使於楚至莒县【正义莒密州县】阳周水而莒桥梁颇坏信则攀【正义音牵】车辕未欲渡也马惊即堕信身入水中几死吏即来救信出之水中衣尽濡有间而身寒已热如火至今不可以见寒臣意即爲之液汤火齐逐热一饮汗尽再饮热去三饮病已即使服药出入二十日身无病者所以知信之病者切其脉时并陰脉法曰热病陰阳交者死切之不交并陰并陰者脉顺清而愈其热虽未尽犹活也肾气有时间浊【集解徐广曰一作鼃】在太陰脉口而希是水气也肾固主水故以此知之失治一时即转爲寒热

齐王太后病召臣意入诊脉曰风痺客𦵿【索隐痺病也音直𦵿音普交反字或作胞正义痺音单旱也𦵿亦作胞膀胱也言风痺之病客居在膀胱】难於大小溲溺赤臣意饮以火齐汤一饮即前後溲再饮病已溺如故病得之流汗出潃【索隐刘氏音巡】潃者去衣而汗曦也所以知齐王太后病者臣意诊其脉切其太陰之口湿然风气也脉法曰沉之而大坚【正义沉一作深王叔和脉经云脉大而坚病出於肾也】浮之而大紧者【正义紧音吉忍反素问云脉短实而数有似切绳名曰紧也】病主在肾肾切之而相反也脉大而躁大者膀胱气也躁者中有热而溺赤

齐章武里曹山跗病【索隐跗方符反】臣意诊其脉曰肺消痺也加以寒热即告其人曰死不治适其共养此不当医【索隐适音释共音恭案谓山跗家适近所持财物共养我我不敢当以言其人不堪疗也】治法曰後三日而当狂妄起行欲走後五日死即如期死山跗病得之盛怒而以接内所以知山跗之病者臣意切其脉肺气热也脉法曰不平不鼓形弊【正义王叔和脉经云平谓春肝木王其脉细而长夏心火王其脉洪大而散六月脾土王其脉大阿阿而缓秋肺金王其脉浮濇而短冬肾水王其脉沉而滑名平脉也】此五藏高之远数以经病也故切之时不平而代【正义素问云血气易处曰不平脉 动不定曰代】不平者血不居其处代者时参击并至乍躁乍大也此两络脉絶故死不治所以加寒热者言其人尸夺尸夺者形弊形弊者不当关灸鑱石及饮毒药也臣意未往诊时齐太医先诊山跗病灸其足少阳脉口而饮之半夏丸病者即泄注腹中虚又灸其少陰脉是坏肝刚絶深如是重捐病者气以故加寒热所以後三日而当狂者肝一络连属结絶乳下阳明【正义素问云乳下阳明白胃络也】故络絶开阳明脉阳明脉伤即当狂走後五日死者肝与心相去五分故曰五日尽尽即死矣

齐中尉潘满如病少腹痛【正义少音式妙反王叔和脉经云脉急疝瘕少腹痛也】臣意诊其脉曰遗积瘕也【索隐刘氏音加雅反旧音遐邹氏音嫁正义龙鱼河图云犬狗鱼鸟不熟食之成瘕痛】臣意即谓齐太仆臣饶内史臣繇曰中尉不复自止於内则三十日死後二十余日溲血死病得之酒且内所以知潘满如病者臣意切其脉深小弱其卒然合【集解徐广曰一云来然合】合也是脾气也【正义卒音葱忽反卒一本作来素问云疾病之生生於五藏五藏之合合於六府肝合气於胆心合气於小肠脾合气於胃肺合气於大肠肾合气於膀胱三焦内主劳】右脉口气至紧小【正义紧音结忍反】见瘕气也以次相乘故三十日死三陰俱搏者【正义如淳云音徒端反素问云左脉口曰少陰少陰之前名厥陰右脉口曰太陰此三陰之脉】如法不俱搏者决在急期一搏一代者近也故其三陰搏溲血如前止【集解徐广曰前一作筋也】阳虚侯相赵章病召臣意衆医皆以爲寒中臣意诊其脉曰迴风【集解駰案迴音洞言洞彻入四肢索隐下云饮食下噎辄出之是风疾洞彻五藏故曰迴风也】迴风者饮食下噎【集解駰案音益谓喉下也】而辄出不留法曰五日死而後十日乃死病得之酒所以知赵章之病者臣意切其脉脉来滑是内风气也饮食下噎而辄出不留者法五日死皆爲前分界法【正义分扶问反】後十日乃死所以过期者其人嗜粥故中藏实中藏实故过期师言曰安谷者过期不安谷者不及期

济北王病召臣意诊其脉曰风蹶胷满即爲药酒尽三石病已得之汗出伏地所以知济北王

病者臣意切其脉时风气也心脉浊【集解徐广曰一作黽】病法过入其阳阳气尽而阴气入阴气入张则寒气上而热气下故胃满汗出伏地者切其脉气阴阴气者病必入中出及溺水也【索隐溺音上咸反正义顾野王云手足液身体沟音常灼反】

齐北宫司空命妇出於病【集解徐广曰一作奴奴盖女奴正义命妇名也】衆医皆以爲风入中病主在肺【集解徐广曰一作肝】刺其足少阴脉臣意诊其脉曰病气疝客於膀胱难於前後溲而溺赤病见寒气则遗溺使人腹肿出於病得之欲溺不得因以接内所以知出於病者切其脉大而实其来难是蹶阴之动也【正义邹厥阴之脉也】脉来难者疝气之客於膀胱也腹之所以肿者言蹶阴之络结小腹也蹶阴有过则脉结动动则腹肿臣意即灸其足蹶阴之脉左右各一所即不遗溺而溲清小腹痛止即更爲火齐汤以饮之三日而疝气散即愈

故济北王阿母【集解徐广曰济一作齐王索隐案是王之你母也正义服?云乳母也郑慈已者】自言足热而漰臣意告曰热蹶也则刺其足心各三所案之无出血病旋已【索隐言寻即已止也正义谓旋转之间病则已止也】病得之饮酒大醉济北王召意诊脉诸女子侍者至女子竖竖无病臣意告永巷长曰竖伤脾不可劳法当春呕血死臣意言王曰才人女子竖何能王曰是好爲方多伎能爲所是案法新【集解徐广曰所一作取索隐谓於旧方技能生新意也】往年市之民所四百七十万曹偶四人【索隐案当今之四千七百贯也曹偶犹等辈也】王曰得毋有病乎臣意对曰竖病重在死法中王召视之其顔色不变以爲不然不卖诸侯所至春竖奉劔从王之厕王去竖後王令人召之即仆於厕呕血死【索隐仆音赴又音步北反】病得之流汗流汗者同法病内重毛发而色泽脉不衰此亦关内之病也

齐中大夫病龋齿【正义龋邱羽反释名云龋朽也虫啮之缺朽也】臣意灸其左太阳明脉即爲苦参汤日嗽三升出入五六日病已得之风及卧开口食而不嗽

菑川王美人怀子而不乳【索隐乳音人喻反乳生也】来召臣意臣意往饮以莢【正义浪宕二音】药一撮以酒饮之旋乳【索隐旋乳者言回旋即生也】臣意复诊其脉而脉躁躁者有余病即饮以消石一剂出血血如豆比五六枚【索隐比音必利反】

齐丞相舍人奴从朝入宫臣意见之食闺门外望其色有病气臣意即告宦者平平好爲脉学臣意所臣意即示之舍人奴病告之曰此伤脾气也当至春鬲塞不通不能食饮法至夏泄血死宦者平即往告相曰君之舍人奴有病病重死期有日相君曰卿何以知之曰君朝时入宫君之舍人奴尽食闺门外平与仓公立即示平曰病如是者死相即召舍人奴而谓之曰公奴有病不舍人曰奴无病身无痛者至春果病至四月泄血死所以知奴病者脾气周乘五藏伤部而交故伤脾之色也望之杀然黄【集解徐广曰杀音苏葛反正义杀苏亥反】察之如死青之兹衆医不知以爲大虫【索隐即蛭虫也】不知伤脾所以至春死病者胃气黄黄者土气也土不胜木故至春死所以至夏死者脉法曰病重而脉顺清者曰内关内关之病人不知其所痛心急然无苦若加以一病死中春一愈顺及一时其所以四月死者诊其人时愈顺愈顺者人尚肥也奴之病得之流汗数出灸於火而以出见大风也菑川王病召臣意诊脉曰蹶

上【正义时掌反蹶逆气上也】爲重头痛身热使人烦懣【正义亡本反非但有烦也】臣意即以寒水拊其头【索隐拊音附又音抚】刺足阳明脉左右各三所病旋已病得之沐发未乾而卧诊如前所以蹶头热至肩

齐王黄姬兄黄长卿家有酒召客召臣意诸客坐未上食臣意望见王后弟宋建告曰君有病往四五日君要胁痛不可俛仰【正义俛音免】又不得小溲不亟治病即入濡肾及其未舍五藏急治之病方今客肾濡【正义濡溺也病方客在肾欲溺肾也】此所谓肾痹也宋建曰然建故有要脊痛往四五日天雨黄氏诸倩【集解徐广曰倩者女婿也駟案方言曰东齐之间婿谓之倩郭璞曰言可假倩也正义倩音七姓反】见建家京下方石【集解徐广曰京者仓廩之属也】即弄之建亦欲効之効之不能起即复置之暮要脊痛不得溺至今不愈建病得之好持重所以知建病者臣意见其色太阳色乾肾部上及界要以下者枯四分所故以往四五日知其发也臣意即爲柔汤使服之十八日所而病愈

济北王侍者韩女病要背痛寒热衆医皆以爲寒热也臣意诊脉曰内寒月事不下也即甯以药【索隐谓以燠燠之故云甯音七乱反】旋下病已病得之欲男子而不可得也所以知韩女之病者诊其脉时切之肾脉也嗇而不属嗇而不属者其来难坚故曰月不下肝脉弦出左口故曰欲男子不可得也

临菑泛里女子薄吾病甚【索隐泛音凡】衆医皆以爲寒热笃当死不治臣意诊其脉曰蛲瘕【集解徐广曰蛲音饶索隐音饶檣旧音遶遐正义人腹中短虫】蛲瘕爲病腹大上肤黄羸循之戚戚然臣意饮以芫华一撮即出蛲可数升病已三十日如故病蛲得之於寒湿寒湿气宛【集解駟案音鬱索隐又如字】笃不发化爲虫臣意所以知寒薄吾病者切其脉循其尺【正义王叔和云寸关尺寸谓三分尺谓八分寸口在关上尺在关下寸关尺共有一寸九分也】其尺索刺羸而毛美奉发【集解徐广曰奉一作奏又作秦索隐循音巡案谓手循其尺索也刺音七赐反羸音七胡反言循其尺索刺人手而羸是妇人之病也徐氏云奉一作奏非其义也又云一作秦秦谓螭首言发如蛲螭事盖近也】是虫气也其色泽者中藏无邪气及重病

齐淳于司马病臣意切其脉告曰当病迴风迴风之状饮食下噎辄後之【集解徐广曰如厕】病得之饱食而疾走淳于司马曰我之王家食马肝食饱甚见酒来即走去驱疾至舍即泄数十出臣意告曰爲火齐米汁饮之七八日而当愈时医秦信在旁臣意去信谓左右阁都尉曰【索隐案阁者姓也爲都尉一云阁即宫阁都尉掌之故曰阁都尉也】意以淳于司马病爲何曰以爲迴风可治信即笑曰是不知也淳于司马病法当後九日死即後九日不死其家复召臣意臣意往问之尽如意臣意即爲三火齐米汁使服之七八日病已所以知之者诊其脉时切之尽如法其病顺故不死齐中郎破石病臣意诊其脉告曰肺伤不治当後十日丁亥溲血死即後十一日溲血而死破石之病得之堕马僵石上所以知破石之病者切其脉得肺陰气其来散数道至而不一也色又乘之所以知其堕马者切之得番陰脉【索隐番音芳远反】番陰脉入虚里乘肺脉肺脉散者固色变也乘之所以不中期死者师言曰病者安谷即过期不安谷则不及期其人嗜黍黍主肺故过期所以溲血者诊脉法曰病养喜陰处者顺死

喜养阳处者逆死其人喜自静不躁又久安坐伏几而寐故血下泄齐王侍医遂病自练五石服之臣意往过之遂谓意曰不肖有病幸诊遂也臣意即诊之告曰公病中热论曰中热不洩者不可服五石石之爲药精悍公服之不得数洩亟勿服色将发臄遂曰扁鹊曰陰石以治陰病阳石以治阳病夫药石者有陰阳水火之齐故中热即爲陰石柔齐治之中寒即爲阳石刚齐治之臣意曰公所论远矣扁鹊虽言若是然必审诊起度量立规矩称权衡合色脉【集解徐广曰合一作占】表里有余不足顺逆之法参其人动静与息相应乃可以论论曰阳疾处内陰形应外者不加悍药及鑱石夫悍药入中则邪气辟矣【索隐辟音必亦反犹聚也】而宛气愈深【索隐愈音庾】诊法曰二陰应外一阳接内者不可以刚药刚药入则动阳陰病益衰阳病益着邪气流行爲重困於俞【集解徐广曰音始喻反】忿发爲疽意告之後百余日果爲疽发乳上入缺盆死【索隐按缺盆人乳房上骨名也】此谓论之大体也必有经纪拙工有一不习文理陰阳失矣齐王故爲阳虚侯时病甚【集解徐广曰齐悼惠王子也名将庐以文帝十六年爲齐王即位十一年卒諡孝王】衆医皆以爲蹶臣意诊脉以爲痹根在右胁下大如覆杯令人喘逆气不能食臣意即以火齐粥且饮六日气下即令更服丸药出入六日病已病得之内诊之时不能识其经解大识其病所在臣意常诊安阳武都里成开方开方自言以爲不病臣意谓之病苦沓风【索隐沓音徒合反风病之名也】三岁四支不能自用使人瘖【集解徐广曰一作脊音才亦反索隐瘖者失音也读如音又作厝厝者置也言使人运置其手足也】瘖即死今闻其四支不能用瘖而未死也病得之数饮酒以见大风气所以知成开方病者诊之其脉法奇咳言曰藏气相反者死【集解徐广曰反一作及】切之得肾反肺【集解徐广曰反一作及】法曰三岁死也

安陵阪里公乘项处病【索隐案公乘官名也项姓处名故上云仓公之师元里公乘阳庆亦然也】臣意诊脉曰牡疝【索隐上音母下音色谏反】牡疝在鬲下上连肺病得之内臣意谓之慎毋爲劳力事爲劳力事则必呕血死处後蹴踒【集解徐广曰一作躄正义上千六反下九六反谓打球也】要蹶寒汗出多即呕血臣意复诊之曰当旦日日夕死【索隐案旦日明日也言明日之夕死也】即死病得之内所以知项处病者切其脉得番阳【索隐脉病之名曰番阳者以言阳脉之翻入虚里也】番阳入虚里处旦日死一番一络者【集解徐广曰络一作结】牡疝也臣意曰他所诊期决死生及所治已病衆多久颇忘之不能尽识不敢以对

问臣意所诊治病病名多同而诊异或死或不死何也对曰病名多相类不可知故古圣人爲之脉法以起度量立规矩县权衡案绳墨调陰阳别人之脉各名之与天地相应参合於人故乃别百病以异之有数者皆异之【索隐数音色住反谓术数之人乃可异其状也】无数者同之然脉法不可胜验诊疾人以度异之乃可别同名命病主在所居今臣意所诊者皆有诊籍所以别之者臣意所受师方适成师死以故表籍所诊期决死生观所失所得者合脉法以故至今知之

问臣意曰所期病决死生或不应期何故对曰此皆饮食喜怒不节或不当饮药或不当针灸以故不中期死也

问臣意意方能知病死生论药用所宜诸侯王大臣有尝问意者不及文王病时【集解徐广曰齐文王也以文帝十五年卒】不求意诊治何故对曰赵王胶西王济南王吴王皆使人来召臣意臣意不敢往文王病时臣意家贫欲为人治病诚恐吏以除拘臣意也【集解徐广曰时诸侯得自拜除吏】故移名数左右【正义以名籍属左右】不修家生出行游国中问善为方数者【索隐数音术数之数】事之久矣见事数师悉受其要事尽其方书意及解论之身居阳虚侯国因事侯侯入朝臣意从之长安以故得诊安陵项处等病也

问臣意知文王所以得病不起之状臣意对曰不见文王病然窃闻文王病喘头痛目不明臣意心论之以为非病也以肥而蓄精身体不得摇骨肉不相任故喘不当医治脉法曰年二十脉气当趋年三十当疾步年四十当安坐年五十当安卧年六十已上气当大董【集解徐广曰董谓深藏之一作董索隐董音谨】文王年未二十方脉气之趋也而徐之不应天道四时後闻医灸之即笃此论病之过也臣意论之以神气争而邪气入非年少所能复之也以故死所谓气者当调饮食择晏日车步广志以适筋骨肉血脉以泻气故年二十是谓易贸【集解徐广曰一作贺又作质】法不当砭灸砭灸至气逐

问臣意师庆安受之闻於齐诸侯不对曰不知庆所师受庆家富善为医不肯为人治病当以此故不闻庆又告臣意曰慎毋令我子孙知若学我方也

问臣意师庆何见於意而爱意欲悉教意方对曰臣意不闻师庆为方善也意所以知庆者意少时好诸方事臣意试其方皆多验精良臣意闻菑川唐里公孙光善为古传方【索隐谓好能传得古方也正义谓全传写得古人之方书】臣意即往谒之得见事之受方化阴阳及传语法【集解徐广曰法一作五】臣意悉受书之臣意欲尽受他精方公孙光曰吾方尽矣不为爱公所【索隐言於意所不爱惜方术也】吾身已衰无所复事之是吾年少所受妙方也悉与公毋以教人臣意曰得见事侍公前悉得禁方幸甚意死不敢妄传人居有间公孙光闲处【正义上音闲下昌汝反】臣意深论方见言百世为之精也师光喜曰公必为国工吾有所善者皆疏同产处临菑善为方吾不若其方甚奇非世之所闻也吾年中时尝欲受其方【索隐案年中谓中年时也中年亦壮年也古人语自尔】杨中倩不肯【索隐倩音七见反人姓名也】曰若非其人也胥与公往见之【集解徐广曰胥犹言须也】当知公喜方也其人亦老矣其家给富时者未往会庆子男殷来献马因师光奏马王所意以故得与殷善光又属意於殷曰意好数【索隐数色句反谓好术数也】公必谨遇之其人圣儒【索隐言意儒德慕圣人之道故云圣儒也】即为书以意属阳庆以故知庆臣意事庆谨以故爱意也

问臣意曰吏民尝有事学意方及毕尽得意方不何县里人对曰临菑人宋邑【集解徐广曰一作昆】邑学臣意教以五诊【正义谓诊五藏之脉】岁余济北王遣太医高期王禹【集解徐广曰一作龠】学臣意教以经脉高下及奇络结【正义素问云奇经八脉往来舒时一止而复来名之曰结也】当论俞【正义式喻反】所居及气当上下出入邪逆顺以宜鑱石定砭灸处岁余菑川王时遣太仓马长冯信正方臣意教以案法逆顺论药法定五味及和齐汤法高永侯家杜信喜脉来学臣意教以上下经脉五诊二岁余临菑召里唐安来学臣意教以五诊上下经脉可咳四时应阴阳重未成除为齐王侍医

问臣意诊病决死生能全无失乎臣意对曰意治病人必先切其脉乃治之败逆者不可治其顺者乃治之心不精脉所期死生视可治时时失之臣意不能全也太史公曰女无美恶居宫见妬士无贤不肖入朝见疑故扁鹊以其伎见殃仓公乃匿迹自隐而当刑缢紫通尺牍父得以後宁故老子曰美好者不祥之器岂谓扁鹊等邪若仓公者可谓近之矣

【正义胃大一尺五寸径五寸长二尺六寸横尺受水谷三斗五升其中常留谷二斗水一斗五升凡人食入於口而聚於胃中谷熟传入小肠也小肠大二寸半径八分分之少半长三丈二尺受谷二斗四升水六升三合合之太半小肠谓受谷而传入於大肠也回肠大四寸径一寸半长二丈二尺受谷一斗水七升半广肠大八寸径二寸半长二尺八寸受谷九升三合八寸半之一故肠胃凡长五丈八尺四寸合受水谷八斗七升六合八分合之一此肠胃长短受水谷之数也甲乙经肠胃凡长丈六尺四寸四分从口至肠而数之此径从胃至肠而数之故短也肝重四斤四两左三叶右四叶凡七叶主藏魂肝者干也於五行爲木其体状有枝干也肝之神七人老子名曰明堂宫兰台府从官三千六百人又云肝神六童子三女子三心重十二两中有七孔三毛盛精汁三合主藏神心纖也所识纖微也其神九太尉公名曰绛宫太始南极老人员光之身其从官三千六百人又爲帝王身之王也脾重二斤三两扁广三寸长五寸有散膏半斤主里血温五藏主藏意脾裨也在助气主化谷其神云光玉女子母其从官三千六百人也肺重三斤三两六叶两耳凡八叶主藏魂魄肺李也言其气李故短也鬱也其神八人太和君名曰玉堂宫尚书府其从官三千六百人又云肺神十四童子七女子七也肾有两枚重一斤一两主藏志肾引也肾属水主引水气灌注诸脉也其神六人司徒司空司命司録司隶校尉尉卿也胆在肝之短叶间重三两三铢盛精汁三合胆敢也言人有胆气而能果敢也其神五人太一道君居紫房宫中其从官三千六百人也胃重二斤十四两纡曲屈伸长二尺六寸大一尺五寸径五寸盛谷二斗水一斗五升胃围也言围受食物也其神十二人五元之气谏议大夫也小肠重二斤十四两长三丈二尺广二寸半径八分分之少半回积十六曲盛谷二斗四升水六升三合合之太半肠畅也言通畅胃气牵去秽也其神二人元梁使者也大肠重三斤十二两长二丈一尺广四寸径一寸半当齐右回十六曲盛谷一斗水七升半大肠即回肠也其回曲因以名之其神二人元梁使者也膀胱重九两二铢纵广九寸盛溺九升九合膀胱横也胱广也体短而又名胞胞虚空也主以虚承水液口广二寸半唇至齿长九分齿已後至会厌深三寸半大容五合也舌重十两长七寸广二寸半舌泄也言可舒泄言语也咽门重十两广二寸半至胃长一尺六寸咽咽也言咽物也又谓之咽主地气胃爲土故云主地气也喉咙重十二两广二寸长一尺二寸九节喉咙空虚也言其中空虚可以通气息焉心肺之系也呼吸之道路喉咙与咽并行其实两异而人多惑也肛门重十二两大八寸径二寸太半长二尺八寸受谷九升三合八分合之一肛釭也言其处似车釭故曰釭门即广肠之门又名瞋也手三阳之脉从手至头长五尺五六合三丈一手有三阳两手爲六阳故云五六三丈手三陰之脉从手至胷中长三尺五寸三六一丈八尺五六三尺合二丈一尺两手各有三陰合爲六陰故云三六一丈八尺也足三阳之脉从足至头长八尺六八合四丈八尺两足各有三阳故曰六八四丈八尺也足三陰之脉从足至胷长六尺五寸六六三丈六尺五六三尺合三丈九尺两足各有陰故云六六三丈六尺也按足太陰少陰皆至舌下厥陰至於项上今言至胷中者盖据其相接之次者也人两足躄脉从足至目长七尺五寸二七一丈四尺二五一尺合一丈五尺督脉各长四尺五寸二四八尺二五一尺合九尺凡脉长一十六丈二尺也

此所谓十二经脉长短之数也督脉起於?头上於面至口齿缝计此不止长四尺五寸当取其上极於风府而言之也手足各十二脉爲二十四并督任两蹻四脉都合二十八脉以应二十八宿凡长十六丈二尺营卫行周此数则一度也寸口脉之大会手太陰之动也太陰者脉之会也肺诸藏主盖主通陰阳故十二经皆手太陰所以决吉凶者十二经有病皆寸口知其何经之动浮沉滑濇逆顺知其死生之兆也人一呼脉行三寸一吸脉行三寸呼吸定息脉行六寸十二经十五络二十七气皆候於寸口随呼吸上下呼脉上行三寸吸脉下行三寸二十七气皆逐上下行无有息时人一日一夜凡一万三千五百息脉行五十周於身漏水下百刻营卫行阳二十五度行陰二十五度爲一周故五十度复会於手太陰寸口者五藏六府之所终始故法於寸口也人一息行六寸百息六丈千息六十丈一万三千五百息合爲八百一十丈阳脉出行二十五度陰脉入行二十五度陰阳出入行二十五度陰阳呼吸覆行周毕度数也脉行身毕即水下百刻亦毕谓一日一夜刻尽天明日出东方脉还得寸口当更始也故寸口者五藏六府之所终始也肺气通於鼻鼻和则知臭香矣肝气通於目目和则知白黑矣脾气通於口口和则知谷味矣心气通於舌舌和则知五味矣肾气通於耳耳和则闻五音矣五藏不和则九窍不通六府不和则留爲痼也】

【索隐述赞曰上池秘术长桑所传始候赵简知梦钧天言占虢嗣尸蹙起焉仓公赎罪阳庆推贤効验多状我具于篇】

史记卷一百五

史记卷一百五考证

扁鹊仓公列传虢太子死○说苑辨物篇作赵太子死国中治穰过於衆事○韩诗外传作吾闻国中卒有壤土之事得无有急乎

扁鹊乃使弟子子阳厉鍼砥石以取外三阳五会○韩诗外传曰扁鹊入砥鍼厉石取三阳五输爲先轩之竈八拭之阳【说苑作轩光之竈八成之汤】子同药子明炙阳【说苑作子容抔药子明吹耳】子游按摩子仪反神子越扶形於是世子复生周礼疏曰按刘向云扁鹊治赵太子暴疾尸蹙之病使子明炊汤子仪脉神子术按摩

而医之所病病道少集解徐广曰所病犹疗病也○董份曰医之所病盖借前一病字而言言医之所短也此甚易晓者而注繆可咲又曰病道少言治病之道少也

更受师同郡元里公乘阳庆正义百官表云公乘第八爵也顔师古云言其待乘公之车也○【臣照】按公乘盖以爵爲氏如壶关三老公乘兴是也公乘爲阳庆之氏非爵也

庆有古先道遗传黄帝扁鹊之脉书五色诊病知人生死决嫌疑定可治○史通曰仓公传称其传黄帝扁鹊之脉书五色诊病知死生决嫌疑定可治召问其所长对曰传黄帝扁鹊之脉书以下它文尽同上说夫上既有其事下又载其言言事虽殊委曲何别按迁之所述多有此

类而刘扬服其善叙事也何哉

臣意年尽三年年三十九岁也○顾炎武曰按徐广注高后八年意年二十六当作年尽十三年年三十九岁也脱十字孝文本纪十三年除肉刑

适其共养此不当医索隐案谓山跗家适近所持财物共养我我不敢当以言其人不堪疗也○董份曰适其共养者言当适病者之供养以俟其死耳此不当复医也索隐大缪

故济北王阿母正义服?云乳母也郑慈已者○【臣照】按正义文疑有讹脱字

史记卷一百五考证

<史部,正史类,史记>

卷一百六

钦定四库全书

史记卷一百六

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

吴王濞列传卷四十六

【索隐五宗之国俱享大邦虽复逆乱萌心取污朝典岂可谓非青社之国哉然淮南犹有後不絕衡山亦其罪盖轻比三卿之分晋方暴秦之灭周可不优乎安得出其王国不上同五宗三王列於世家其吴濞请与楚元王同爲一篇淮南宜与齐悼惠王爲一篇】

吴王濞者【索隐案澎濞字也音披位反】高帝兄刘仲之子也【集解徐广曰仲名喜】高帝已定天下七年立刘仲爲代王而匈奴攻代刘仲不能坚守弃国亡间行走雒阳【索隐谓独行从他道逃走间音纪闲反】自归天子天子爲骨肉故不忍致法废以爲合阳侯【索隐地理志冯翊县名在合水之阳音合正义合阳故城在同州河西县南三十里】高帝十一年秋淮南王英布反东并荆地劫其国兵西度淮击楚高帝自将往诛之刘仲子沛侯濞年二十有气力以骑将从破布军蕲西会甄【索隐地名也在蕲县之西会音古兑反甄音锤】布走荆王刘贾爲布所杀无後上患吴会稽轻悍无壮王以填之【索隐填音鎮】诸子少乃立濞於沛爲吴王【集解徐广曰是十二年十月辛丑】王三郡五十三城已拜受印高祖召濞相之谓曰若状有反相心独悔业已拜因拊其背【索隐拊音抚】告曰汉後五十年东南有乱者岂若邪【集解徐广曰汉元年至景帝三年反五十有三年駰案应劭曰克期五十占者所知若秦始皇东巡以厌气後刘项起东南疑当如此耳如淳曰度其贮积足用爲难又吴楚世不宾服索隐案应氏之意以後五十年东南有乱本是占气者所说高祖素闻此说自以前难未弭恐後灾更生故说此言更以戒濞如淳之说亦合事理】然天下同姓爲一家也慎无反濞顿首曰不敢会孝惠高后时天下初定郡国诸侯各务自拊循其民吴有豫章郡铜山【集解韦昭曰今故章索隐案鄣郡後改曰故章或称豫章爲衍字也正义括地志云秦兼天下以爲鄣郡今湖州长城县西南八十里故章城是也铜山今宣州及润州句容县有并属章也】濞则招致天下亡命者益铸钱煮海水爲盐以故无赋【集解如淳曰铸钱煮盐收其利以足国用故无赋於民正义按既盗铸钱何以收其利足国之用吴国之民又何得无赋如说非也言吴国山既出铜民多盗铸钱及煮海水爲盐以山海之利不赋之故言无赋也其民无赋国

用乃富饶也】国用富饶孝文时吴太子入见【索隐姚氏案楚汉春秋云吴太子名贤字德明】得侍皇太子饮博吴太子师傅皆楚人轻悍又素骄博争道不恭皇太子引博局提吴太子杀之【索隐提音啼又音底又音弟】於是遣其丧归葬至吴吴王愠曰【正义愠於问反怨也】天下同宗死长安即葬长安何必来葬爲复遣丧之长安葬吴王由此稍失藩臣之礼称病不朝京师知其以子故称病不朝验问实不病诸吴使来辄系责治之吴王恐爲谋滋甚及後使人爲秋请【集解应劭曰冬当断狱秋先请择其轻重也孟康曰律春曰朝秋曰请如古诸侯朝聘也如淳曰凵不得行使人代已致请礼也索隐音净孟说是也应劭所云断狱先请不知何凭如淳云代已致请亦是臆说且文云使人爲秋请谓使人爲此秋请之礼也】上复责问吴使者使者对曰王实不病汉系治使者数辈以故遂称病且夫察见渊中鱼不祥【集解张晏曰喻人君不当见尽下之私索隐案此语见韩子及文子韦昭曰知臣下陰私使忧患生变爲不祥故当赦宥使自新也】今王始诈病及觉见责急愈益闭恐上诛之计乃无聊唯上弃之而与更始於是天子乃赦吴使者归之而赐吴王几杖老不朝吴得释其罪谋亦益解然其居国以铜盐故百姓无赋【索隐案吴国有铸钱煮盐之利故百姓不别徭赋也】卒践更辄与平贾【集解駰案汉书音义曰以当爲更卒出钱三百文谓之过更自行爲卒谓之践更吴王欲得民心爲卒雇者其庸随时月与平贾如汉桓灵时有所兴作以少府钱借民比也索隐案汉律卒更有三践更居更过更也此言践更辄与平贾者谓爲践更合自出钱今王欲得人心乃与平贾官讎之也正义践更若今唱更行更者也言民自着卒更有三品有卒更有践更有过更古者正卒无常人皆当送之是爲卒更贫者欲雇更钱者次直者出钱雇之月二千是爲践更天下人皆直戍边三月亦各爲更律所谓繇戍也虽丞相子亦在戍边之调不可人人自行三月戍又行者出钱三百入官官给戍者是爲过更此汉初因秦法而行之後改爲繇乃戍边一岁】岁时存问茂材赏赐间里佗郡国吏欲来捕亡人者讼共禁弗予【集解徐广曰讼音松駰按如淳曰讼公也正义讼音容言其相容禁止不与也】如此者四十余年【正义言四十余年者太史公尽言吴王一代行事也汉书作三十余年而班固见其语在孝文之代乃减十年是班固不晓其理也】以故能使其衆鼂错爲太子家令得幸太子数从容言吴过可削数上书说孝文帝文帝寬不忍罚以此吴日益横及孝景帝即位错爲御史大夫说上曰昔高帝初定天下昆弟少诸子弱大封同姓故王孽子悼惠王王齐七十余城庶弟元王王楚四十余城兄子濞王吴五十余城封三庶孽分天下半今吴王前有太子之郤诈称病不朝於古法当诛文帝弗忍因赐几杖德至厚当改过自新乃益骄溢即山铸钱【索隐案即山山名又即者就也】煮海水爲盐诱天下亡人谋作乱今削之亦反不削之亦反削之其反亟祸小不削反迟祸大三年冬楚王朝鼂错因言楚王戊往年爲薄太后服私奸服舍【集解服?曰服舍在丧次而私奸宫中也】请诛之诏赦罚削东海郡因削吴之豫章郡会稽郡及前二年赵王有罪削其河间郡【索隐案汉书作常山郡也】胶西王卬以卖爵有奸削其六县汉廷臣方议削吴吴王濞恐削地无已因以此发谋欲举事念诸侯无足与计谋者闻胶西王勇好气喜兵诸齐皆惮畏【集解韦昭曰故爲齐分爲国者胶东济北之属】於是乃使中大夫应高誂胶西王【索隐誂音徒鸟反】无文书口报曰吴王不肖有宿夕之忧不敢自外使喻其驩心王曰何以教之高曰今者主上兴於奸饰於邪臣好小善听谗贼擅变更律令侵夺诸侯之地徵求滋多诛罚良善日以益甚里语有之舐糠及米【索隐案言舐糠尽则至米谓削土尽则至灭国也】吴与胶西知名诸侯也一时见察恐不得安肆矣吴王身有内病不能朝请二十余年尝患见疑无以自白今胁肩累足犹惧不见释窃闻大王以爵事有适【正义

张革反】所闻诸侯削地罪不至此此恐不得削地而已王曰然有之子将奈何高曰同恶相助同好相留同情相成同欲相趋同利相死今吴王自以爲与大王同忧愿因时循理弃躯以除患害於天下意亦可乎王瞿然骇曰【索隐刘氏瞿音九具反说文瞿远视貌音九缚反】寡人何敢如是今主上虽急固有死耳安得不戴高曰御史大夫鼂错荧惑天子侵夺诸侯蔽忠塞贤朝廷疾怨诸侯皆有倍畔之意人事极矣彗星出蝗虫数起此万世一时而愁劳圣人之所以起也【索隐案所谓殷忧以啓明圣也】故吴王欲内以鼂错爲讨外随大王後车彷徨天下所乡者降所指者下天下莫敢不服大王诚幸而许之一言则吴王率楚王略函谷关守荥阳敖仓之粟距汉兵治次舍须大王大王有幸而临之则天下可并两主分割不亦可乎王曰善高归报吴王吴王犹恐其不与乃身自爲使使於胶西面结之胶西羣臣或闻王谋諫曰承一帝至乐也今大王与吴西乡弟令事成两主分争患乃始结诸侯之地不足爲汉郡什二而爲畔逆以忧太后非长策也【集解文穎曰王之太后也】王弗听遂发使约齐菑川胶东济南济北皆许诺而曰城阳景王有义攻诸吕勿与事定分之耳【集解徐广曰尔时城阳恭王喜景王之子】诸侯既新削罚振恐多怨鼂错及削吴会稽豫章郡书至则吴王先起兵胶西正月丙午诛汉吏二千石以下胶东菑川济南楚赵亦然遂发兵西齐王後悔饮药自杀畔约济北王城坏未完其郎中令劫守其王不得发兵胶西爲渠率胶东菑川济南共攻围临菑赵王遂亦反陰使匈奴与连兵七国之发也吴王悉其士卒下令国中曰寡人年六十二【集解徐广曰吴王封吴四十二年矣】身自将少子年十四亦爲士卒先诸年上与寡人比下与少子等者皆发发二十余万人南使闽越东越东越亦发兵从孝景帝三年正月甲子初起兵於广陵【集解徐广曰荆王刘贾都吴吴王移广陵也】西涉淮因并楚兵发使遗诸侯书曰吴王刘濞敬问胶西王胶东王菑川王济南王赵王楚王淮南王衡山王庐江王故长沙王子【集解徐广曰吴芮之玄孙靖王着以文帝七年卒无嗣国除駟案如淳曰吴芮後四世无子国除庶子二人爲列侯不得嗣王志将不满故诱与之反也】幸教寡人以汉有贼臣无功天下侵夺诸侯地使吏劾系讯治以戮辱之爲故【集解駟案汉书音义曰故事也正义按专以戮辱诸侯爲事】不以诸侯人君礼遇刘氏骨肉絶先帝功臣进任奸宄乱天下【正义诘音挂】欲危社稷陛下多病志失不能省察欲举兵诛之谨闻教敝国虽狭地方三千里人虽少精兵可具五十万寡人素事南越三十余年其王君皆不辞分其卒以随寡人又可得三十余万寡人虽不肖愿以身从诸王越直【集解駟案音值】长沙者【索隐谓其境相接也】因王子定长沙以北【集解如淳曰南越直长沙者因王子定也索隐案谓南越之地与长沙地相接值者因长沙王子以定长沙以北也】西走蜀汉中【正义走音奏向也王子长沙王子也南越之地对长沙之南者其民因王子率而镇定长沙以北西向蜀及汉中咸委王子定矣】告越【集解如淳曰告东越使定之】楚王淮南三王与寡人西面【正义越东越也又告东越楚淮南三王与吴王共西面击之三王谓淮南衡山庐江也】齐诸王与赵王定河间河内或入临晋关【正义今蒲津关】或与寡人会雒阳燕王赵王固与胡王有约燕王北定代云中抟胡衆【索隐抟音专谓专统领胡兵】入萧关【正义今名陇山关在原州平凉县界】走长安匡正天子以安高庙愿王勉之楚元王子淮南三王或不沐洗十余年怨入骨髓欲一有所出之久矣寡人未得诸王之意未敢听今诸王苟能存亡继絶振弱伐暴以安刘氏社稷之所愿也敝国虽贫寡人节衣食之用积金钱修兵革聚谷食夜以继日三十余年矣凡爲此愿诸王勉用之能斩捕大将者赐金五千斤封万户列将三千斤封五千户裨将二千斤封二千户二千石千斤封千户千石五百斤封五百户皆爲列侯其以军若城邑降者卒万

人邑万户如得大将人户五千如得列将人户三千如得裨将人户千如得二千石其小吏皆以差次受爵金佗封赐皆倍常法【集解服虔曰封赐倍汉之常法】其有故爵邑者更益勿因愿诸王明以令士大夫弗敢欺也寡人金钱在天下者往往而有非必取於吴诸王日夜用之弗能尽有当赐者告寡人寡人且往遗之敬以闻七国反书闻天子天子乃遣太尉条侯周亚夫将三十六将军往击吴楚遣曲周侯郿寄击赵将军栾布击齐大将军窦婴屯荥阳监齐赵兵吴楚反书闻兵未发窦婴未行言故吴相袁盎盎时家居诏召入见上方与鼂错调兵竿军食上问袁盎曰君尝爲吴相知吴臣田禄伯爲人乎今吴楚反於公何如曰不足忧也今破矣上曰吴王即山铸钱煮海水爲盐诱天下豪桀白头举事若此其计不百全岂发乎何以言其无能爲也袁盎对曰吴有铜盐利则有之安得豪桀而诱之诚令吴得豪桀亦且辅王爲义不反矣吴所诱皆无赖子弟亡命铸钱奸人故相率以反鼂错曰袁盎策之善上问曰计安出盎对曰愿屏左右上屏人独错在盎曰臣所言人臣不得知也乃屏错错趋避东厢恨甚上卒问盎盎对曰吴楚相遗书曰高帝王子弟各有分地今贼臣鼂错擅适过诸侯【索隐适音直革反又音宅】削夺之地故以反爲名西共诛鼂错复故地而罢方今计独斩鼂错发使赦吴楚七国复其故削地则兵可无血刃而俱罢於是上嘿然良久曰顾诚何如吾不爱一人以谢天下盎曰臣愚计无出此愿上熟计之乃拜盎爲太常【正义令盎爲太常以示奉宗庙之指意】吴王弟子德侯爲宗正【集解徐广曰名通其父名广駟按汉书曰吴王弟子德侯广爲宗正也】盎装治行後十余日上使中尉召错给载行东市错衣朝衣斩东市则遣袁盎奉宗庙宗正辅亲戚【正义以亲戚之意辅汉训谕】使告吴如盎策至吴吴楚兵已攻梁壁矣宗正以亲故先入见谕吴王使拜受诏吴王闻袁盎来亦知其欲说已笑而应曰我已爲东帝尚何谁拜不肯见盎而留之军中欲劫使将盎不肯使人围守且杀之盎得夜出步亡去走梁军遂归报条侯将乘六乘传【正义上音乘下竹恋反】会兵荥阳至雒阳见剧孟喜曰七国反吾乘传至此不自意全【正义言不自意洛阳得全及见剧孟】又以爲诸侯已得剧孟剧孟今无动吾据荥阳荥阳以东无足忧者至淮阳问父绛侯故客邓都尉曰策安出客曰吴兵锐甚难与争锋楚兵轻【正义轻正反】不能久方今爲将军计莫若引兵东北壁昌邑以梁委吴吴必尽锐攻之将军深沟高垒使轻兵絶淮泗口塞吴饗道彼吴梁相敝而粮食竭乃以全强制其罢极破吴必矣条侯曰善从其策遂坚壁昌邑南【正义在曹州城武县东北四十二里也】轻兵絶吴饗道吴王之初发也吴臣田禄伯爲大将军田禄伯曰兵屯聚而西无佗奇道难以就功臣愿得五万人别循江淮而上收淮南长沙入武关与大王会此亦一奇也吴王太子諫曰王以反爲名此兵难以藉人藉人亦且反王奈何且擅兵而别多佗利害未可知也【集解苏林曰禄伯悦将兵降汉自爲已利於吴爲生患也】徒自损耳吴王即不许田禄伯吴少将桓将军说王曰吴多步兵步兵利险汉多车骑车骑利平地愿大王所过城邑不下直弃去疾西据雒阳武库敖仓粟阻山河之险以令诸侯虽毋入关天下固已定矣即大王徐行留下城邑汉军车骑至驰入梁楚之郊事败矣吴王问诸老将老将曰此少年推锋之计可耳安知大虑乎於是王不用桓将军计吴王专并将其兵未度淮诸宾客皆得爲将校尉候司马独周丘不得用周丘者下邳人亡命吴酤酒无行吴王薄之弗任周丘上谒说王曰臣以无能不得待罪行间臣非敢求有所将愿得王一汉节必有以报王王乃予之周丘得节夜驰入下邳下邳时闻吴反皆城守至传舍召令令入户使从者以罪斩令遂召昆弟所善豪吏告曰吴反兵且至至屠下邳不过食顷今先下家室必完能者封侯矣出乃相告下邳皆下周丘一夜得三万人使人报吴王遂将其兵北略城邑比至咸阳【正义地理志云城阳国故齐汉文

帝二年别为国属兖州】兵十余万破城阳中尉军闻吴王败走自度无与共成功即引兵归下邳未至疽发背死二月中吴王兵既破败走於是天子制诏将军曰盖闻爲善者天报之以福爲非者天报之以殃高皇帝亲表功德建立诸侯幽王悼惠王絶无後孝文皇帝哀怜加惠王幽王子遂悼惠王子卬等令奉其先王宗庙爲汉藩国德配天地明并日月吴王濞倍德反义诱受天下亡命皐人乱天下币【集解如淳曰币钱也以私钱淆乱天下钱也】称病不朝二十余年有司数请濞罪孝文皇帝寬之欲其改行爲善今乃与楚王戊赵王遂胶西王卬济南王辟光菑川王贤胶东王雄渠约从反爲逆无道起兵以危宗庙贼杀大臣及汉使者迫劫万民夭杀无罪烧残民家掘其丘冢甚爲暴虐今卬等又重逆无道烧宗庙卤御物【集解如淳曰卤抄掠也宗庙在郡县之物皆爲御物正义顔师古曰御物宗庙之服器也】朕甚痛之朕素服避正殿将军其劝士大夫击反虏击反虏者深入多杀爲功斩首捕虏比三百石以上者皆杀之无有所置【正义置放释也】敢有议诏及不如诏者皆要斩初吴王之度淮与楚王遂西败棘壁【正义在宋州宁陵县西南七十里】乘胜前锐甚梁孝王恐遣六将军击吴又败梁两将士卒皆还走梁梁数使使报条侯求救条侯不许又使使恶条侯於上上使人告条侯救梁复守便宜不行梁使韩安国及楚死事相弟张羽爲将军【集解徐广曰楚相张尚諫王而死正义按羽尚弟也】乃得颇败吴兵吴兵欲西梁城守坚不敢西即走条侯军会下邳【集解徐广曰属梁国正义宋州碭山县本汉下邳县】欲战条侯壁不肯战吴粮絶卒饥数挑战遂夜犇条侯壁惊东南条侯使备西北果从西北入吴大败士卒多饥死乃畔散於是吴王乃与其麾下壮士数千人夜亡去度江走丹徒保东越【正义东越传云独东甌受汉之购杀吴王丹徒润州也东甌即东越也东越将兵从吴在丹徒也】东越兵可万余人乃使人收聚亡卒汉使人以利啗东越【集解韦昭曰啗音徒览反】东越即给吴王吴王出劳军即使人縱杀吴王【集解孟康曰方言戟谓之縱索隐縱音七江反谓以戈刺杀之邹氏又音春亦音从容之从谓撞杀之也正义括地志云汉吴王濞冢在润州丹徒县东练陂聚北今入于江吴録云丹徒有吴王冢在县北其处名爲相唐】盛其头驰传以闻【集解駰案吴地记曰吴王濞葬武进县南地名相唐索隐张勃云吴王濞葬丹徒县南其地名相唐今云武进县恐错也】吴王子子华子驹亡走闽越吴王之弃其军亡也军遂溃往往稍降太尉梁军楚王戊军败自杀三王之围齐临菑也三月不能下汉兵至胶西胶东菑川王各引兵归胶西王乃袒跣席棗饮水谢太后王太子德曰汉兵远臣观之已罢可袭愿收大王余兵击之击之不胜乃逃入海未晚也王曰吾士卒皆已坏不可发用弗听汉将弓高侯颍当【集解徐广曰姓韩】遗王书曰奉诏诛不义降者赦其罪复故不降者灭之王何处须以从事王肉袒叩头汉军壁谒曰臣卬奉法不谨惊骇百姓乃苦将军远道至於穷国敢请菹醢之罪弓高侯执金鼓见之曰王苦军事愿闻王发兵状王顿首膝行对曰今者鼂错天子用事臣变更高皇帝法令侵夺诸侯地卬等以爲不义恐其败乱天下七国发兵且以诛错今闻错已诛卬等谨以罢兵归将军曰王苟以错不善何不以闻及未有诏虎符擅发兵击义国以此观之意非欲诛错也乃出诏书爲王读之读之讫曰王其自图王曰如卬等死有余罪遂自杀太后太子皆死胶东菑川济南王皆死【集解徐广曰一云自杀】国除纳于汉酈将军围赵十月而下之赵王自杀济北王以劫故得不诛徙王菑川初吴王首反并将楚兵连齐赵正月起兵三月皆破独赵後下复置元王少子平陆侯礼爲楚王续元王後徙汝南王非王吴故地爲江都王

太史公曰吴王之王由父省也【集解駰案言濞之王吴由父代王被省封合阳侯省音所幸

反索隱省音所景反省者減也謂父仲从代王省封合陽侯也】能薄賦歛使其衆以擅山海利逆亂之萌自其子興爭技發難【索隱謂與太子爭博是爭技也】卒亡其本親越謀宗竟以夷隕鼂錯爲國遠慮禍反近身袁盎權說初寵後辱故古者諸侯地不過百里山海不以封母弟夷狄以疏其屬蓋謂吳邪母爲權首反受其咎豈盎錯邪

【索隱述贊曰吳楚輕悍王濞倍德富因采山畔成提局驕矜携貳連結七國嬰命廣陵錯誅未塞天之悔禍卒取奔北】

史記卷一百六

史記卷一百六考證

吳王濞列傳以故無賦集解如淳曰鑄錢煮鹽收其利以足國用故無賦於民正義按既盜鑄錢何以收其利足國之用吳國之民又何得無賦如說非也言吳國山既出銅民多盜鑄錢及煮海水爲鹽以山海之利不賦之故言無賦也其言無賦國用乃富饒也○徐孚遠曰吳王既擅山海之利豈得聽民盜出鹽錢耶其言無賦如說得之矣

即使人縱殺吳王○越絕曰東甌越王弟夷烏將軍殺濞

史記卷一百六考證

卷一百七

钦定四库全书

史记卷一百七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

魏其武安侯列传第四十七

魏其侯窦婴者孝文后从兄子也父世观津人【索隐案地理志观津县属信都以言其累叶在观津故云父世也正义观津城在冀州武邑县东南二十五里】喜宾客孝文时婴爲吴相病免孝景初即位爲詹事【正义百官表云詹事秦官掌皇后太子家也】梁孝王者孝景弟也其母窦太后爱之梁孝王朝因昆弟燕饮是时上未立太子酒酣从容言曰千秋之後传梁王太后驩窦婴引卮酒进上曰天下者高祖天下父子相传此汉之约也上何以得擅传梁王太后由此憎窦婴窦婴亦薄其官因病免太后除窦婴门籍不得入朝请【集解駰案律诸侯春朝天子曰朝秋曰请正义请才性反】孝景三年吴楚反上察宗室诸窦【索隐案谓宗室之中及诸窦之宗室也又姚氏案酷吏传周阳由其父赵兼以淮南王舅侯周阳故因改氏由以宗室任爲郎则似是与国有亲戚属籍者亦得呼爲宗室也】母如窦婴贤乃召婴入见固辞谢病不足任太后亦慙於是上曰天下方有急王孙寧可以让邪【集解駰案汉书曰窦婴字王孙】乃拜婴爲大将军赐金千斤窦婴乃言袁盎栾布诸名将贤士在家者进之所赐金陈之廊庑下军吏过辄令财取爲用【集解苏林曰自令裁度取爲用也】金无入家者窦婴守荥阳监齐赵兵【正义监音甲衫反吴王濞传云窦婴屯荥阳监齐赵兵也】七国兵已尽破封婴爲魏其侯诸游士宾客争归魏其侯孝景时每朝议大事条侯魏其侯诸列侯莫敢与亢礼孝景四年立栗太子【正义栗姬之子後废之故书母姓】使魏其侯爲太子傅孝景七年栗太子废魏其数争不能得魏其谢病屏居蓝田南山之下数月诸宾客辩士说之莫能来梁人高遂乃说魏其曰能富贵将军者上也能亲将军者太后也今将军傅太子太子废而不能争争不能得又弗能死自引谢病拥赵女屏闲处【正义间音闲处音昌女反】而不朝相提而论【集解徐广曰提音徒抵反索隐提音弟又音啼相提犹相抵也论音路顿反】是自明扬主上之过有如两宫螫将军【集解张晏曰两宫太后景帝也螫怒也毒虫怒必螫人又火各反索隐螫音释谓怒也汉书作爽爽卽螫也正义两宫太子景帝也】则妻子母类矣【索隐谓见诛灭无遗类】魏其侯然之乃遂起朝请如故桃侯免相【集解服虔曰刘舍也】窦太后数言魏其侯孝景帝曰太后岂以爲臣有爱不相魏其【索隐爱犹惜也】魏其者沾

沾自喜耳多易【集解徐广曰沾一作怙又昌兼反又当牒反张晏曰沾沾言自整顿也多易多轻易之行也或曰沾音檐也索隐小颜云沾音他兼反檐音尺占反】难以爲相持重遂不用用建陵侯卫綰爲丞相

武安侯田蚡者孝景后同母弟也【索隐蚡音扶粉反又如蚡鼠之蚡音坟】生长陵魏其已爲大将军後方盛蚡爲诸郎【集解徐广曰一云诸卿时人相号长老者爲诸公年少者爲诸卿如今人相号爲士大夫也】未贵往来侍酒魏其跪起如子侄及孝景晚节【索隐案谓晚年也】蚡益贵幸爲大中大夫蚡辩有口学盘盂诸书【集解应劭曰黄帝使孔甲所作铭也凡二十六篇书盘盂中所爲法戒诸书诸子文画也孟康曰孔甲盘盂二十六篇杂家书兼儒墨名法】王太后贤之【集解徐广曰卽蚡同母姊者】孝景崩卽日太子立称制所鎮抚多有田蚡宾客计策蚡弟田胜皆以太后弟孝景後三年【集解徐广曰孝景後三年卽是孝武初嗣位之年也】封蚡爲武安侯胜爲周阳侯【正义绛州闻喜县东二十里周阳故城也】武安侯新欲用事爲相卑下宾客进名士家居者贵之欲以倾魏其诸将相建元元年丞相綰病免上议置丞相太尉籍福说武安侯曰魏其贵久矣天下士素归之今将军初兴未如魏其卽上以将军爲丞相必让魏其魏其爲丞相将军必爲太尉太尉丞相尊等耳又有让贤名武安侯乃微言太后风上於是乃以魏其侯爲丞相武安侯爲太尉籍福贺魏其侯因吊曰君侯资性喜善疾恶方今善人誉君侯故至丞相然君侯且疾恶恶人衆亦且毁君侯君侯能兼容则幸久不能今以毁去矣魏其不听魏其武安俱好儒术推轂赵綰爲御史大夫【索隐案推轂谓自卑下之如爲之推车轂也】王臧爲郎中令迎鲁申公欲设明堂令列侯就国除关【索隐谓除关门之税也】以礼爲服制【索隐案其时礼度踰侈多不依古令吉凶服制皆法於礼也】以兴太平举适诸窦【索隐适音直革反】宗室毋节行者除其属籍时诸外家爲列侯列侯多尚公主皆不欲就国以故毁日至窦太后太后好黄老之言而魏其武安赵綰王臧等务隆推儒术贬道家言是以窦太后滋不说魏其等及建元二年御史大夫赵綰请无奏事东宫【集解韦昭曰欲夺其政也】窦太后大怒乃罢逐赵綰王臧等而免丞相太尉以栢至侯许昌爲丞相武强侯庄青翟爲御史大夫魏其武安由此以侯家居武安侯虽不任职以王太后故亲幸数言事多效天下吏士趋势利者皆去魏其归武安武安日益横建元六年窦太后崩丞相昌御史大夫青翟坐丧事不办免以武安侯蚡爲丞相以大司农韩安国爲御史大夫天下士郡国诸侯愈益附武安【索隐按谓仕诸郡及仕诸侯王国者犹言仕郡国也】武安者貌侵【集解韦昭曰侵音寢短小也又云丑恶也刻确也音核】生贵甚【索隐小颜云生贵谓自尊高示贵宠其说疎也按生谓蚡自生尊贵之势特甚故下云又以诸侯王多长年蚡以肺腑爲相非痛折节以礼屈之则天下不肃者也】又以爲诸侯王多长【集解张晏曰多长年】上初卽位富於春秋蚡以肺腑爲京师相【正义顔师古曰旧解云肺腑如肝肺之相附着也一说肺碎木札也喻其轻薄附着大材按顔此说并是疎谬又改腑爲附就其义重谬矣八十一难云寸口者脉之大会手太陰之动脉也吕广曰太陰者肺之脉也肺爲诸藏之主通陰阳故十二经脉皆会乎太阴所以决吉凶者十二经有病皆寸口知其何经之动浮沉瀦滑春秋逆顺知其死生顾野王云肺腑腹心也案说田蚡爲相若人之肺知陰阳逆顺又爲之腹心亲戚也】非痛折节以礼诎之天下不肃【索隐案痛甚也欲令士折节屈下於已不然天下不肃或解以爲蚡欲折节下士非也案下文不与其兄盖侯知或说爲非也】当是时丞相入奏事坐语移日所言皆听荐人或起家至二千石权移主上上乃曰君除吏已尽未

吾亦欲除吏尝请考工地益宅【集解駰案汉书百官表曰少府有考工室如淳曰官名也】上怒曰君何不遂取武库是後乃退尝召客饮坐其兄盖侯【集解徐广曰王后兄王信也泰山有盖县乐安有益县也】南乡自坐东乡以爲汉相尊不可以兄故私桡武安由此滋骄治宅甲诸第【集解徐广曰爲诸第之上也】田园极膏腴而市买郡县器物相属於道前堂罗钟鼓立曲旃【集解如淳曰旌旗之名通帛曰旃曲旃僭也苏林曰礼大夫立曲旃曲柄上曲也索隐说文曲旃者所以招士也】後房妇女以百数诸侯奉金玉狗马玩好不可胜数魏其失竄太后益疏不用无势诸客稍稍自引而怠傲唯灌将军独不失故魏其曰默默不得志而独厚遇灌将军

灌将军夫者颍陰人也夫父张孟尝爲颍陰侯嬰舍人得幸因进之至二千石故蒙灌氏姓爲灌孟吴楚反时颍陰侯灌何爲将军【索隐案何是嬰子汉书作嬰誤】属太尉请灌孟爲校尉夫以千人与父俱【集解駰案汉书音义曰官主千人如候司马】灌孟年老颍陰侯强请之郁郁不得意故战常陷坚遂死吴军中军法父子俱从军有死事得与丧归灌夫不肯随丧归奋曰【集解张晏曰自奋励也】愿取吴王若将军头以报父之仇於是灌夫被甲持戟募军中壮士所善愿从者数十人及出壁门莫敢前独二人及从奴十数骑驰入吴军至吴将麾下【正义谓大将之旗】所杀伤数十人不得前复驰还走入汉壁皆亡其奴独与一骑归夫身中大创十余适有万金良药故得无死夫创少瘳又复请将军曰吾益知吴壁中曲折请复往将军壮义之恐亡夫乃言太尉太尉乃固止之吴已破灌夫以此名闻天下颍陰侯言之上上以夫爲中郎将数月坐法去後家居长安长安中诸公莫弗称之孝景时至代相孝景崩今上初即位以爲淮阳天下交劲兵处故徙夫爲淮阳太守建元元年入爲太仆二年与长乐卫尉窦甫饮轻重不得【集解晋灼曰饮酒轻重不得其平也】夫醉搏甫【索隐搏音博谓擊之】甫竄太后昆弟也上恐太后诛夫徙爲燕相数岁坐法去官家居长安灌夫爲人刚直使酒不好面谀贵戚诸有势在已之右不欲加礼必陵之诸士在已之左愈贫贱尤益敬与钧稠人广衆荐宠下辈士亦以此多之夫不喜文学好任侠已然诺【索隐已音以谓已许诺必使副其前言也】诸所与交通无非豪桀大猾家累数千万食客日数十百人陂池田园宗族宾客爲权利横於颍川颍川儿乃歌之曰颍水清灌氏寧颍水浊灌氏族灌夫家居虽富然失势卿相侍中宾客益衰及魏其侯失势亦欲倚灌夫引绳批根生平慕之後弃之者【集解苏林曰二人相倚引绳直之意批根宾客也弃之者不与交通孟康曰根根括引绳以持弹索隐案刘氏云二人相倚事如合绳共相依引也批音步结反批者排也汉书作排根小颜根音痕括音汨谓人生平慕嬰夫後见其失职而颇弛慢如此者共排退之不复与交也譬如相对挽绳而根括之也持弹案汉书本作抨弹音普耕反】灌夫亦倚魏其而通列侯宗室爲名高两人相爲引重【集解张晏曰相荐達爲声势】其游如父子然相得驩甚无厌恨相知晚也灌夫有服过丞相丞相从容曰吾欲与仲孺过魏其侯【集解駰案汉书曰灌夫字仲孺】会仲孺有服【索隐案服谓期功之服也故应璩书曰仲孺不辞同生之服也】灌夫曰将军乃肯幸临况魏其侯夫安敢以服爲解请语魏其侯帐具将军旦日蚤临武安许诺灌夫具语魏其侯如所谓武安侯魏其与其夫人益市牛酒夜洒扫早帐具至旦平明令门下候伺至日中丞相不来魏其谓灌夫曰丞相岂忘之哉灌夫不怩曰夫以服请宜往【集解徐广曰一云以服请不宜往索隐案徐广云以服请不宜往其说非也正言灌夫请不以服爲解蚡不宜忘故驾自往迎也】乃驾自往迎丞相丞相特前戏许灌夫殊无意往及夫至门丞相尚卧於是夫入见

曰将军昨日幸许过魏其魏其夫妻治具自旦至今未尝敢食武安鄂【集解徐广曰一作悟】谢曰吾昨日醉忽忘与仲孺言乃驾往又徐行灌夫愈益怒及饮酒酣夫起舞属丞相【索隐属音之欲反属犹委也付也小颜云若今人舞讌相劝也】丞相不起夫从坐上语侵之魏其乃扶灌夫去谢丞相丞相卒饮至夜极驩而去丞相尝使籍福请魏其城南田魏其大望曰老仆虽弃将军虽贵宁可以势夺乎不许灌夫闻怒骂籍福籍福恶两人有郤乃谩自好谢丞相曰魏其老且死易忍且待之已而武安闻魏其灌夫实怒不予田亦怒曰魏其子尝杀人蚡活之蚡事魏其无所不可何爱数顷田且灌夫何与也吾不敢复求田武安由此大怨灌夫魏其元光四年春【集解徐广曰疑此当是三年也其说在後】丞相言灌夫家在颍川横甚民苦之请案上曰此丞相事何请灌夫亦持丞相阴事爲奸利受淮南王金与语言宾客居间遂止俱解夏丞相取燕王女爲夫人【索隐案蚡娶燕王刘泽子康王嘉之女也】有太后诏召列侯宗室皆往贺魏其侯过灌夫欲与俱夫谢曰夫数以酒失得过丞相丞相今者又与夫有郤魏其曰事已解强与俱饮酒酣武安起爲寿【集解如淳曰上酒爲称壽非大行酒】坐皆避席伏已魏其侯爲寿独故人避席耳余半膝席【集解苏林曰下席而膝半在席上如淳曰以膝跪席上也】灌夫不悦起行酒至武安武安膝席曰不能满觴夫怒因嘻笑曰将军贵人也属之【集解徐广曰属一作毕索隐案汉书作毕毕尽也】时武安不肯行酒次至临汝侯【集解徐广曰灌婴孙名贤也索隐案汉书云临汝侯灌贤则贤是婴之孙临汝是改封也】临汝侯方与程不识耳语又不避席夫无所发怒乃骂临汝侯曰生平毁程不识不直一钱今日长者爲寿乃效女儿咕嗫耳语【集解韦昭曰咕嗫附耳小语声索隐女儿犹云儿女也汉书作女曹儿曹辈也犹言儿女辈咕邹氏音蚩辄反嗫音汝辄反】武安谓灌夫曰程李俱东西宫卫尉【集解駰案汉书音义曰李广爲东宫程不识爲西宫】今衆辱程将军仲孺独不爲李将军地乎【集解如淳曰李将军李广也犹今人言爲除地索隐案小颜云言今既毁程令李何地自安处也】灌夫曰今日斩头陷胷【索隐韦昭云言不避死亡也汉书作亢胷】何知程李乎坐乃起更衣稍稍去魏其侯去麾灌夫出武安遂怒曰此吾骄灌夫罪乃令骑留灌夫灌夫欲出不得籍福起爲谢案灌夫项令谢夫愈怒不肯谢武安乃麾骑缚夫置传舍召长史曰今日召宗室有诏劾灌夫骂坐不敬繫居室【集解如淳曰百官表居室爲保宫今守宫也】遂案其前事遣吏分曹逐捕诸灌氏支属皆得弃市罪魏其侯大媿爲资使宾客请莫能解【集解如淳曰爲出资费使人爲夫言】武安吏皆爲耳目诸灌氏皆亡匿夫系遂不得告言武安陰事魏其銳身爲救灌夫夫人諫魏其曰灌将军得罪丞相与太后家忤宁可救耶魏其侯曰侯自我得之自我捐之无所恨且终不令灌仲孺独死嬰独生乃匿其家【集解晋灼曰恐其夫人复諫止也】窃出上书立召入具言灌夫醉饱事不足诛上然之赐魏其食曰东朝廷辩之【集解如淳曰东朝太后朝】魏其之东朝盛推灌夫之善言其醉饱得过乃丞相以他事诬罪之武安又盛毁灌夫所爲横恣罪逆不道魏其度不可奈何因言丞相短武安曰天下幸而安乐无事蚡得爲肺腑所好音乐狗马田宅蚡所爱倡优巧匠之属不如魏其灌夫日夜招聚天下豪桀壮士与论议腹诽而心谤不仰视天而俯画地【集解张晏曰视天占三光也画地知分野所在也画地谕欲作反事】辟倪两宫闲【集解徐广曰辟芳细反倪音诣张晏曰占太后与帝吉凶之期索隐辟普系反倪五系反埤苍云睥睨谓邪视也】幸天下有变而欲有大功【集解张晏曰幸爲反者当得爲大将立功也瓚曰天下有变谓天子崩因变难之际得立大功】臣乃不知魏其等所爲於是上问朝臣两人孰是御史大夫韩安国曰魏其言灌夫父死事身荷戟驰入不测之吴军身被数十创名冠三军此天下壮士非有大恶

争杯酒不足引他过以诛也魏其言是也丞相亦言灌夫通奸猾侵细民家累巨万横恣颍川凌轹宗室侵犯骨肉此所谓枝大於本胫大於股不折必披【索隐案包恺披音疋彼反正义铺被反披分析也】丞相言亦是唯明主裁之主爵都尉汲黯是魏其内史郑当时是魏其後不敢坚对余皆莫敢对上怒内史曰公平生数言魏其武安长短今日廷论局趣效辕下驹【集解张晏曰俛头於车辕下随母而已瓚曰小马在辕下正义应劭曰驹马加着辕局趣纤小之貌按应说爲长也】吾并斩若属矣即罢起入上食太后太后亦已使人候伺具以告太后太后怒不食曰今我在也而人皆藉吾弟【索隐案晋灼云藉蹈也以言蹂藉也】令我百岁後皆鱼肉之矣且帝宁能爲石人邪【集解谓帝不如石人得长存也正义顔师古云言徒有人耳不知好恶按今俗云人不辨事骂云机机若木人也】此特帝在即录录设百岁後是属宁有可信者乎【索隐案设者脱也】上谢曰俱宗室外家【正义嬰景帝从舅蚡太后同母弟】故廷辨之不然此一狱吏所决耳是时郎中令石建爲上分别言两人事武安已罢朝出止车门召韩御史大夫载怒曰与长孺共一老秃翁何爲首鼠两端【集解駰案汉书音义曰秃老翁言嬰无官位扳援也首鼠一前一卻也索隐案谓共治一老秃翁指竇嬰也】韩御史良久谓丞相曰君何不自喜【集解苏林曰何不自解释爲喜乐邪索隐案小顔云何不自谦逊爲可喜之事音许既反】夫魏其毁君君当免冠解印绶归曰臣以肺腑幸得待罪固非其任魏其言皆是如此上必多君有让不废君魏其必内愧杜门齟舌自杀【索隐案说文云齟啮也土白反】今人毁君君亦毁之譬如贾竖女子争言何其无大体也武安谢罪曰争时急不知出此於是上使御史簿责魏其所言灌夫颇不讐【正义讐音市周反对也言簿责魏其所言灌夫实颍川事故魏其不对爲欺谩者也】欺谩劾繫都司空【索隐案百官表云宗正属官主诏狱也正义如淳云律司空主水及罪人】孝景时魏其常受遗诏曰事有不便以便宜论上及系灌夫罪至族事日急诸公莫敢复明言於上魏其乃使昆弟子上书言之幸得复召见书奏上而案尚书大行无遗诏【集解如淳曰大行主诸侯官也索隐案尚书无此景帝崩时大行遗诏乃魏其家臣印封之如淳说非也正义天子崩曰大行也按尚书之中景帝崩时无遗诏赐魏其也百官表云诸受尚书事也】诏书独藏魏其家家丞封【集解駰案汉书音义曰以家臣印封遗诏】乃劾魏其矫先帝诏罪当弃市五年十月【集解徐广曰疑非五年亦非十月索隐徐氏云疑非者案武帝四年三月蚡薨竇嬰死在前今云五年故疑非也正义汉书云元光四年冬魏其侯嬰有罪弃市春三月乙卯丞相蚡薨按五年者误也】悉论灌夫及家属魏其良久乃闻闻即患病瘵【索隐瘵音肥又音扶味反风病也】不食欲死或闻上无意杀魏其魏其复食治病议定不死矣乃有蜚语爲恶言闻上【集解张晏曰蚡僞作飞扬诽谤之语】故以十二月晦【集解徐广曰疑非十二月也駰案张晏日月晦者春垂至也索隐着日月者见春垂至恐遇赦赎也】论弃市渭城【正义故咸阳】其春武安侯病【正义其春即四年春也元光四年十月灌夫弃市十二月魏其弃市至三月乙卯田蚡薨则三人死同在一年明矣汉以十月爲岁首故也秦楚之际表云十一月十二月端月二月三月至九爲终周建子爲正月十一月爲正月十二月爲二月正月爲三月二月爲四月至十月爲岁终汉初至武帝太初以前并依秦法以後改用夏正月至今不改】专呼服谢罪【集解駰案汉书音义曰言蚡号呼谢服罪也】使巫视鬼者视之见魏其灌夫共守欲杀之竟死子恬嗣【集解徐广曰蚡疾见魏其灌夫鬼杀之则其死共在一春内邪武帝本纪四年三月乙卯田蚡薨嬰死在蚡薨之前何复云五年十二月邪疑十二月当爲二月也案侯表蚡事武帝九年而卒元光四年侯恬之元年建元元年元光三年而九年大臣表蚡以元光四年卒亦云嬰四

年弃市未详此正安在然蚡薨在嬰死後分明】元朔三年武安侯坐衣襜褕【正义尔雅云今蔽前谓之?郭璞云蔽膝也说文字林并谓之短衣】入宫不敬【集解徐广曰表云坐衣不敬国除索隐襜尺占反褕音踰谓非正朝衣若妇人服也】淮南王安谋反觉治王前朝【集解徐广曰建元二年】武安侯爲太尉时迎王至霸上谓王曰上未有太子大王最贤高祖孙即宫车晏驾非大王立当谁哉淮南王大喜厚遗金财物上自魏其时不直武安特爲太后故耳【索隐案武帝以魏其灌夫事爲枉於武安侯爲不直特爲太后故耳】及闻淮南王金事上曰使武安侯在者族矣

太史公曰魏其武安皆以外戚重灌夫用一时决策而名显魏其之举以吴楚武安之贵在日月之际然魏其诚不知时变灌夫无术而不逊两人相翼乃成祸乱武安负贵而好权杯酒责望陷彼两贤呜呼哀哉迁怒及人命亦不延衆庶不载竟被恶言呜呼哀哉祸所从来矣

【索隐述赞曰窦婴田蚡势利相雄咸倚外戚或恃军功灌夫自喜引重其中意气杯酒辟倪两宫事竟不直冤哉二公】

史记卷一百七

史记卷一百七考证

魏其武安侯列传魏其已爲大将军後方盛蚡爲诸郎集解徐广曰一云诸卿时人相号长老者爲诸公年少者爲诸卿如今人相号爲士大夫也○【臣照】按诸郎即百官表所谓议郎中郎侍郎郎中是也汉书作诸曹郎

除关索隐谓除关门之税也○徐孚远曰索隐非也汉立关以稽诸侯出入至此罢之示天下一家之义也

天下士郡国诸侯愈益附武安索隐按谓仕诸郡及仕诸侯王国者犹言仕郡国也○徐孚远曰索隐说小曲天下士士人也郡国诸侯列侯也言此两种皆附武安

生贵甚索隐生谓蚡自生尊贵之势特甚○【臣照】按生贵甚言蚡生而爲太后弟贵甚言其不学无术也

不好面腴○【臣照】按面腴盖面谀也或古字通或传写之讹或谓面腴以喜悦亲附意着於顔面非口谀也若然则诸家必有注解今无之故知非也

及魏其侯失势亦欲倚灌夫引绳批根生平慕之後弃之者集解苏林曰二人相倚引绳直之意批根宾客也弃之者不与交通○此条集解多之意及也三字

与长孺共一老秃翁索隐案谓共治一老秃翁指窦婴也○顾炎武曰谓尔我皆垂暮之年无

所顾惜当直言以决此事也索隐非

君何不自喜集解苏林曰何不自解释爲喜乐邪索隐案小顔云何不自谦逊爲可喜之事音
许既反○【臣照】按不自喜犹言不自爱下文所谓无大体是也注未合

史记卷一百七考证

卷一百八

钦定四库全书

史记卷一百八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

韩长孺列传第四十八

御史大夫韩安国者梁城安人也【集解徐广曰在汝颍之间索隐汉书地理志云县名属陈留正义括地志云城安故城在汝州梁县东二十三里地理志云成安属颍川郡陈留郡又有城安县亦属梁未知孰是也】後徙睢阳【正义今宋州宋城】尝受韩子杂家说於驸田生所【索隐案谓安国学韩子及杂家说於驸县田生之所】事梁孝王爲中大夫吴楚反时孝王使安国及张羽爲将扞吴兵於东界【索隐将音醬扞音汗】张羽力战安国持重以故吴不能过梁吴楚已破安国张羽名由此显梁孝王景帝母弟窦太后爱之令得自请置相二千石出入游戏僭於天子天子闻之心弗善也太后知帝不善乃怒梁使者弗见案责王所爲韩安国爲梁使见大长公主【集解徐广曰景帝姊索隐案即馆陶公主正义如淳云景帝妹也】而泣曰何梁王爲人子之孝爲人臣之忠而太后曾弗省也【索隐省音仙井反省者察也】夫前日吴楚齐赵七国反时自关以东皆合从西乡惟梁最亲爲艰难梁王念太后帝在中【正义谓关中也又云京师在天下之中】而诸侯扰乱一言泣数行下跪送臣等六人将兵擊郤吴楚吴楚以故兵不敢西而卒破亡梁王之力也今太后以小节苛礼责望梁王【索隐案谓苛细小礼以责之】梁王父兄皆帝王所见者大故出称蹕入言警车旗皆帝所赐也即欲以侏鄙县【集解徐广曰侏一作紆也駰案侏音丑亚反夸也索隐汉书作嫪音火亚反紆音寒孟反】驱驰国中以夸诸侯令天下尽知太后帝爱之也今梁使来辄案责之梁王恐日夜涕泣思慕不知所爲何梁王之爲子孝爲臣忠而太后弗恤也大长公主具以告太后太后喜曰爲言之帝言之帝心乃解而免冠谢太后曰兄弟不能相教乃爲太后遗忧悉见梁使厚赐之其後梁王益亲驩太后长公主更赐安国可直千余金名由此显结於汉其後安国坐法抵罪蒙【索隐抵音丁礼反蒙县名属梁国也】狱吏田甲辱安国安国曰死灰独不复然乎田甲曰然即溺之居无何梁内史缺汉使使者拜安国爲梁内史起徙中爲二千石田甲亡走安国曰甲不就官我灭而宗甲因肉袒谢安国笑曰可溺矣公等足与治乎【索隐案谓不足与绳持之治音持也】卒善遇之梁内史之缺也孝王新得齐人公孙诡说之欲请以爲内史窦太后闻乃诏王以安国爲内史公孙诡羊胜说孝王求爲帝太子及益地事恐汉大臣不听

乃陰使人刺汉用事谋臣及杀故吴相袁盎景帝遂闻诡胜等计画乃遣使捕诡胜必得汉使十辈至梁相以下举国大索月余不得内史安国闻诡胜匿孝王所安国入见王而泣曰主辱臣死大王无良臣故事纷纷至此今诡胜不得请辞赐死王曰何至此安国泣数行下曰大王自度於皇帝孰与太上皇之与高皇帝及皇帝之与临江王亲孝王曰弗如也安国曰夫太上临江亲父子之间然而高帝曰提三尺劍取天下者朕也故太上皇终不得制事居於栢阳临江王适长太子也以一言过废王临江【集解如淳曰景帝尝属诸姬太子母栗姬言不逊由是废太子栗姬忧死】用宫垣事卒自杀中尉府何者治天下终不以私乱公语曰虽有亲父安知其不爲虎虽有亲兄安知其不爲狼今大王列在诸侯悦一邪臣浮说【索隐悦汉书作怵说文云怵诱也】犯上禁桡明法天子以太后故不忍致法於王太后日夜涕泣幸大王自改而大王终不觉寤有如太后宫车即晏驾大王尚谁攀乎语未卒孝王泣数行下谢安国曰吾今出诡胜诡胜自杀汉使还报梁事皆得释安国之力也於是景帝太后益重安国孝王卒共王即位安国坐法失官居家建元中武安侯田蚡爲汉太尉亲贵用事安国以五百金物遗蚡蚡言安国太后天子亦素闻其贤即召以爲北地都尉迁爲大司农闽越东越相攻安国及大行王恢将兵未至越越杀其王降汉兵亦罢建安六年武安侯爲丞相安国爲御史大夫匈奴来请和亲天子下议大行王恢燕人也数爲边吏习知胡事议曰汉与匈奴和亲率不过数岁即复倍约不如勿许兴兵擊之安国曰千里而战兵不获利今匈奴负戎马之足怀禽兽之心迁徙鸟举难得而制也得其地不足以爲广有其衆不足以爲强自古不属爲人【索隐案晋灼云不内属於汉爲人】汉数千里争利则人马罢虜以全制其敝且强弩之极矢不能穿鲁縞【集解许慎曰鲁之縞尤薄】冲风之末力不能漂鸿毛非初不劲末力衰也击之不便不如和亲羣臣议者多附安国於是上许和亲其明年则元光元年鴈门马邑豪聂翁壹【集解张晏曰豪犹帅也索隐聂姓也翁壹名也汉书云聂壹】因大行王恢言上曰匈奴初和亲亲信边可诱以利陰使聂翁壹爲闲亡入匈奴谓单于曰吾能斩马邑令丞吏以城降财物可尽得单于爱信之以爲然许聂翁壹聂翁壹乃还诈斩死罪囚县其头马邑城示单于使者爲信曰马邑长吏已死可急来於是单于穿塞将十余万骑入武州塞【集解徐广曰在鴈门索隐崔浩云今平城直西百里有武州城是也】当是时汉伏兵车骑材官三十余万匿马邑旁谷中卫尉李广爲骁骑将军【集解駰案汉书曰北貉燕人来致骁骑应劭曰骁健也张晏曰骁勇也若六博之梟矣】太仆公孙贺爲轻车将军【正义司马续汉书云轻车古战车】大行王恢爲将屯将军【正义李奇云监主诸屯】太中大夫李息爲材官将军【正义臣瓚云材官骑射之官】御史大夫韩安国爲护军将军诸将皆属护军约单于入马邑而汉兵纵发王恢李息李广别从代主击其辎重【正义释名云辎厠也所载衣服杂厠其中】於是单于入汉长城武州塞未至马邑百余里行掠卤徒见畜牧於野不见一人单于怪之攻燧燧得武州尉史欲刺问尉史尉史曰汉兵数十万伏马邑下单于顾谓左右曰几爲汉所卖【正义几音祈】乃引兵还出塞曰吾得尉史乃天也命尉史爲天王塞下传言单于已引去汉兵追至塞度弗及即罢王恢等兵三万闻单于不与汉合度往擊辎重必与单于精兵战汉兵势必败则以便罢兵皆无功天子怒王恢不出擊单于辎重擅引兵罢也恢曰始约虜入马邑城兵与单于接而臣擊其辎重可得利今单于闻不至而还臣以三万人衆不敌提取辱耳【集解徐广曰提一作祗也】臣固知还而斩然得完陛下士三万人於是下恢廷尉廷尉当恢逗桡当斩【集解駰案汉书音义曰逗曲行避敌也桡顾望军法语也索隐案如淳云军法行而逗留畏桡者要斩逗音豆又音住逗留也桡屈弱也】恢私行千金丞相蚡蚡不敢言上而言

於太后曰王恢首造马邑事今不成而诛恢是爲匈奴报仇也上朝太后太后以丞相言告上上曰首爲马邑事者恢也故发天下兵数十万从其言爲此且纵单于不可得恢所部击其辎重犹颇可以慰士大夫心今不诛恢无以谢天下於是恢闻之乃自杀安国爲人多略智足以当世取舍而出於忠厚焉【索解案出者去也言安国爲人无忠厚之行】贪嗜於财然所推举皆廉士贤於已者也於梁举壶遂臧固郅他皆天下名士【索隐郅音质他徒河反谓三人姓名也壶遂也臧固也郅他也若汉书则云至他言至於他处亦举名士也】士亦以此称慕之唯天子以爲国器安国爲御史大夫四岁余丞相田蚡死安国行丞相事奉引堕车蹇【集解如淳曰爲天子导引而堕车跛足】天子议置相欲用安国使使视之蹇甚乃更以平棘侯薛泽爲丞相安国病免数月蹇愈上复以安国爲中尉岁余徙爲卫尉车骑将军卫青撃匈奴【集解徐广曰元光六年也】出上谷破胡朮城【集解駟案朮音龙】将军李广爲匈奴所得复失之公孙敖大亡卒皆当斩赎爲庶人明年匈奴大入边杀辽西太守及入鴈门所杀略数千人车骑将军卫青撃之出鴈门卫尉安国爲材官将军屯於渔阳【正义幽州县】安国捕生虏言匈奴远去即上书言方田作时请且罢军屯罢军屯月余匈奴大入上谷渔阳安国壁乃有七百余入出与战不胜复入壁匈奴虏略千余人及畜产而去天子闻之怒使使责让安国徙安国益东屯右北平【正义幽州渔阳县东南七十七里北平城即汉右北平也】是时匈奴虏言当入东方安国始爲御史大夫及护军後稍斥疏下迁而新幸壮将军卫青等有功益贵安国既疏远默默也将屯又爲匈奴所欺死亡多甚自愧幸得罢归乃益东徙屯意忽忽不乐数月病欧血死安国以元朔二年中卒

太史公曰余与壶遂定律历观韩长孺之义壶遂之深中隐厚【集解徐广曰一云廉正忠厚】世之言梁多长者不虚哉壶遂官至詹事天子方倚以爲汉相会遂卒不然壶遂之内廉行修斯鞠躬君子也

【索隐述赞曰安国忠厚初爲梁将因事坐法免徒起相死灰更然生虏失访推贤见重贿金貽谤雪泣悟主臣节可亮】

史记卷一百八

史记卷一百八考证

韩长孺列传公孙诡羊胜说孝王求爲帝太子及益地事恐汉大臣不聽乃陰使人刺汉用事谋臣及杀故吴相袁盎○刘奉世曰刺汉谋臣在汉已立太子之後此云求爲太子恐大臣不聽故刺之与诸传不同当是此传误

因大行王恢言上○【臣照】按此下有天子诏问公卿安国与王恢辨难之语见新序汉书用之

智足以当世取舍而出於忠厚焉索隐按出者去也言安国爲人无忠厚之行○董份曰知当世取舍者智也智者宜或失於薄而安国乃又忠厚贪嗜於财宜其所举皆污墨而安国又举

廉士太史所以称之也读其文自见索隐繆徐孚远曰出於忠厚言意本忠厚也索隐解出爲去言无忠厚之行非也观赞语自得之

史记卷一百八考证

卷一百九

钦定四库全书

史记卷一百九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

李将军列传第四十九

李将军广者陇西成纪人也【正义成纪秦州县】其先曰李信秦时为将逐得燕太子丹者也故槐里徙成纪广家世世受射【索隐案小颜云世受射法】孝文帝十四年匈奴大入萧关而广以良家子从军击胡【索隐案如淳云非医巫商贾百工也】用善骑射杀首虏多为汉中郎广从弟李蔡亦为郎皆为武骑常侍【索隐谓为郎而补武骑常侍也】秩八百石尝从行有所冲折关及格猛兽而文帝曰惜乎子不遇时如令子当高帝时万户侯岂足道哉及孝景初立广为陇西都尉徙为骑郎将【集解张晏曰为武骑郎将索隐小颜云为骑郎将谓主骑郎也】吴楚军时广为骁骑都尉从太尉亚夫击吴楚军取旗显功名昌邑下以梁王授广将军印还赏不行【集解文颖曰广为汉将私受梁印故不以赏也】徙为上谷太守匈奴日以合战典属国公孙昆邪【集解駰案昆音?索隐案典属国官名公孙姓昆邪名服?云中国人也】为上泣曰李广才气天下无双自负其能数与虏敌战恐亡之於是乃徙为上郡太守後广转为边郡太守徙上郡尝为陇西北地鴈门代郡云中太守皆以力战为名匈奴大入上郡天子使中贵人从广【集解駰案汉书音义曰内官之幸贵者索隐案董巴舆服志云黄门丞主密近使听察天下天下谓之中贵人使者崔浩云在中而贵幸非德望故云中贵也】勒习兵击匈奴中贵人将骑数十纵【集解徐广曰放纵驰骋】见匈奴三人与战三人还射【正义射音石还谓转也】伤中贵人杀其骑且尽中贵人走广广曰是必射雕者也【集解文颖曰雕鸟也故使善射者射也索隐案服?云雕大鸷鸟也一名鸷黑色多子可以其毛作矢羽韦昭云雕一名鸷也】广乃遂从百骑往驰三人三人亡马步行行数十里广令其骑张左右翼而广身自射彼三人者杀其二人得一人果匈奴射雕者也已缚之上马望匈奴有数千骑见广以为诱骑皆惊上山陈广之百骑皆大恐欲驰还走广曰吾去大军数十里今如此以百骑走匈奴追射我立尽今我留匈奴必以我为大军诱之必不敢击我广令诸骑曰前前未到匈奴陈二里所止令曰皆下马解鞍其骑曰虏多且近即有急奈何广曰彼虏以我为走今皆解鞍以示不走用坚其意於是胡骑遂不敢击有白马将出护其兵【正义其将乘白马而出监护也】李广上马与十余骑犇射杀胡白马将而复还至其骑中解鞍令士皆纵马卧

是时会暮胡兵终怪之不敢击夜半时胡兵亦以为汉有伏军於旁欲夜取之胡皆引兵而去平旦李广乃归其大军大军不知广所之故弗从居久之孝景崩武帝立左右以为广名将也於是广以上郡太守为未央卫尉而程不识亦为长乐卫尉程不识故与李广俱以边太守将军屯及出击胡而广行无部伍行阵【索隐案百官志云将军领军皆有部曲大将军营五部部校尉一人部有曲曲有军一人也】就善水草屯舍止人人自便【索隐便音频面反】不击刁斗以自卫【集解孟康曰以铜作鐃器受一斗昼炊饭食夜击持行名曰刁斗索隐刁音貂案荀悦云刁斗小铃如宫中传夜铃也苏林曰形如鍬以铜作之无缘受一斗故云刁斗鍬即铃也埤苍云鐃温器有柄斗似铍无缘音譙】莫府省约文书籍事【索隐案小颜云凡将军谓之莫府者盖兵门合施帷帐故称莫府古字通用遂作莫耳小尔雅训莫为大非也】然亦远斥未尝遇害【索隐案许慎注淮南云斥度也视也望也】程不识正部曲行伍营陈击刁斗士吏治军簿至明军不得休息然亦未尝遇害不识曰李广军极简易然虏卒犯之无以禁也而其士卒亦佚乐咸乐为之死我军虽烦扰然虏亦不得犯我是时汉边郡李广程不识皆为名将然匈奴畏李广之畧士卒亦多乐从李广而苦程不识程不识孝景时以数直谏为大中大夫为人廉谨於文法後汉以马邑城诱单于使大军伏马邑旁谷而广为骁骑将军领属护军将军是时单于觉之去汉军皆无功其後四岁广以卫尉为将军出鴈门击匈奴匈奴兵多破败广军生得广单于素闻广贤令曰得李广必生致之胡骑得广广时伤病置广两马间络而盛卧广行十余里广佯死睨其旁有一胡儿骑善马广暂腾而上胡儿马因推堕儿【集解徐广曰一云抱儿鞭马南驰也】取其弓鞭马南驰数十里复得其余军因引而入塞匈奴捕者骑数百追之广行取胡儿弓射杀追骑以故得脱於是至汉汉下广吏吏当广所失亡多为虏所生得当斩赎为庶人顷之家居数岁广家与故颍阴侯孙【集解驷案孙灌婴之孙名强】屏野居蓝田南山中射猎尝夜从一骑出从人田间饮还至霸陵亭霸陵尉醉【索隐案百官志云尉大县二人主盗贼凡有贼发则推索寻案之也】呵止广广骑曰故李将军尉曰今将军尚不得夜行何乃故也止广宿亭下居无何匈奴入杀辽西太守败韩将军韩将军後徙右北平【集解苏林曰韩安国】於是天子乃召拜广为右北平太守广即请霸陵尉与俱至军而斩之广居右北平匈奴闻之号曰汉之飞将军避之数岁不敢入右北平广出猎见草中石以为虎而射之中石没镞【集解徐广曰一作没羽】视之石也因复更射之终不能复入石矣广所居郡闻有虎尝自射之及居右北平射虎虎腾伤广广亦竟射杀之广廉得赏赐辄分其麾下饮食与士共之终广之身为二千石四十余年家无余财终不言家产事广为人长猿臂【集解如淳曰臂如猿通肩】其善射亦天性也虽其子孙他人学者莫能及广广讷口少言与人居则画地为军陈射阔狭以饮【集解如淳曰射戏求疏密持酒以饮不胜者正义饮音於禁反】专以射为戏竟死【索隐谓终竟广身至死以为恒也】广之将兵乏絶之处见水土卒不尽饮广不近水土卒不尽食广不尝食宽缓不苛士以此爱乐为用其射见敌急非在数十步之内度不中不发发即应弦而倒用此其将兵数困辱其射猛兽亦为所伤云居顷之石建卒於是上召广代建为郎中令元朔六年广复为後将军从大将军军出定襄击匈奴诸将多中首虏率以功为侯者【集解如淳曰中犹充也本秦法得首若干封侯】而广军无功後三岁广以郎中令将四千骑出右北平博望侯张骞将万骑与广俱异道行可数百里匈奴左贤王将四万骑围广广军士皆恐广乃使其子敢往驰之敢独与数十骑驰直贯胡骑出其左右而还告广曰胡虏易与耳军士乃安广为圜陈外向胡急击之矢下如雨汉兵死者过半汉矢且尽广乃令士持满毋发而广身自以大黄射其裨将【集解徐广曰

南都赋曰黄间机张善弩之名駟案郑德曰黄肩弩渊中黄朱之孟康曰太公六韬曰?坚败强敌用大黄连弩韦昭曰角弩色黄而体大也索隐大黄黄闲弩名韦昭说是也】杀数人胡虏益解会日暮吏士皆无人色而广意气自如益治军军中自是服其勇也明日复力战而博望侯军亦至匈奴军乃解去汉军罢弗能追是时广军几没罢归汉法博望侯留迟後期当死赎为庶人广军功自如无赏初广之从弟李蔡与广俱事孝文帝景帝时蔡积功劳至二千石孝武帝时至代相以元朔五年为轻车将军从大将军击右贤王有功中率封为乐安侯【索隐中音丁仲反率音律亦音双笔反小顔云率谓军功封赏之科着在法令故云中率】元狩二年中代公孙弘为丞相蔡为人在下中【索隐案以九品而论在下之中当第八】名声出广下甚远然广不得爵邑官不过九卿而蔡为列侯位至三公诸广之军吏及士卒或取封侯广尝与望气王朔燕语曰自汉击匈奴而广未尝不在其中而诸部校尉以下才能不及中人然以击胡军功取侯者数十人而广不为後人【索隐谓不在人後也】然无尺寸之功以得封邑者何也岂吾相不当侯邪且固命也朔曰将军自念岂尝有所恨乎广曰吾尝为陇西守羌尝反吾诱而降降者八百余人吾诈而同日杀之至今大恨独此耳朔曰祸莫大於杀已降此乃将军所以不得侯者也後二岁大将军骠骑将军大出击匈奴广数自请行天子以为老弗许良久乃许之以为前将军是岁元狩四年也广既从大将军青击匈奴既出塞青捕虏知单于所居乃自以精兵走之而令广并於右将军军【集解徐广曰主爵赵食其为右将军】出东道东道少回远而大军行水草少其势不屯行【集解张晏曰以水草少不可羣辈】广自请曰臣部为前将军今大将军乃徙令臣出东道且臣结发而与匈奴战今乃一得当单于【索隐案广言自少时结发而与匈奴战唯今者得与单于相当遇也】臣愿居前先死单于大将军青亦陰受上诫以为李广老数奇【集解如淳曰数为匈奴所败奇为不偶也索隐案服?云作事数不偶也音朔小顔音所具反奇萧该音居宜反】毋令当单于恐不得所欲而是时公孙敖新失侯为中将军从大将军大将军亦欲使敖与俱当单于故徙前将军广广时知之固自辞於大将军大将军不听令长史封书与广之莫府曰急诣部如书【正义令广如其文牒急引兵徙东道也】广不谢大将军而起行意甚愠怒而就部引兵与右将军食其合军出东道【索隐食其音异基案赵将军名也或亦依字读】军亡导或失道【索隐谓无人导引军故失道也】後大将军与单于接战单于遁走弗能得而还南絶幕【正义絶度也南归度沙幕】遇前将军右将军广已见大将军还入军大将军使长史持糒醪遗广因问广食其失道状青欲上书报天子军曲折【正义言委曲而行回折使军後大将军也】广未对大将军使长史急责广之幕府对簿广曰诸校尉无罪乃我自失道吾今自上簿至莫府广谓其麾下曰广结发与匈奴大小七十余战今幸从大将军出接单于兵而大将军又徙广部行回远而又迷失道岂非天哉且广年六十余矣终不能复对刀笔之吏遂引刀自刭广军士大夫一军皆哭百姓闻之知与不知无老壮皆为垂涕而右将军独下吏当死赎为庶人广子三人曰当户椒敢为郎天子与韩嫣戏【索隐嫣或音偃又音许乾反】嫣少不逊当户击嫣嫣走於是天子以为勇当户早死拜椒为代郡太守皆先广死当户有遗腹子名陵广死军时敢从骠骑将军广死明年李蔡以丞相坐侵孝景园墺地【索隐墺音人绢反又音乃煨反又音而宣反案墺地神道之地也黄图云阳陵阙门西出神道四通茂陵神道广四十三丈也正义汉书云诏赐冢地阳陵当得二十亩蔡盗取三顷颇卖得四十余万又盗取神道外墺地一亩葬其中当下狱自杀】当下吏治蔡亦自杀不对狱国除李敢以校尉从骠骑将军击胡左贤王力战夺左贤王鼓旗斩首多赐爵关内侯食邑二百户代广为郎中令顷之怨大将军青之

恨其父【索隐小顔云令其父恨而死】乃击伤大将军大将军匿讳之居无何敢从上雍【索隐刘氏音尚大顔云雍地形高故云上】至甘泉宫猎骠骑将军去病与青有亲射杀敢去病时方贵幸上讳云鹿触杀之居岁余去病死【集解徐广曰元狩六年】而敢有女为太子中人爱幸敢男禹有宠於太子然好利李氏陵迟衰微矣李陵既壮选为建章监监诸骑善射爱士卒天子以为李氏世将而使将八百骑尝深入匈奴二千余里过居延【集解徐广曰属张掖正义括地志云居延海在甘州张掖县东北六十四里地理志云居延泽古文以为流沙甘州在京西北二千四百六十里】视地形无所见虏而还拜为骑都尉将丹阳楚人五千人教射酒泉张掖以屯卫胡数岁天汉二年秋贰师将军李广利将三万骑击匈奴右贤王於祁连天山【集解徐广曰出炖煌至天山索隐案晋灼云在西域近蒲类又西河旧事云白山冬夏有雪匈奴谓之天山正义括地志云祁连山在甘州张掖县西南二百里天山一名白山今名初罗漫山也在伊吾县北百二十里伊州在京西北四千四百一十六里】而使陵将其射士步兵五千人出居延北可千余里欲以分匈奴兵毋令专走贰师也陵既至期还而单于以兵八万围击陵军陵军五千人兵矢既尽士死者过半而所杀伤匈奴亦万余人且引且战连鬪八日还未到居延百余里匈奴遮狭絶道陵食乏而救兵不到虏急击招降陵陵曰无面目报陛下遂降匈奴其兵尽没余亡散得归汉者四百余人单于既得陵素闻其家声及战又壮乃以其女妻陵而贵之汉闻族陵母妻子自是之後李氏名败而陇西之士居门下者皆用为耻焉

太史公曰传曰其身正不令而行其身不正虽令不从其李将军之谓也余睹李将军悛悛如鄙人【索隐悛音七旬反汉书作恂恂音询】口不能道辞及死之日天下知与不知皆为尽哀彼其忠实心诚信於士大夫也谚曰桃李不言下自成蹊【索隐案姚氏云桃李本不能言但以华实感物故人不期而往其下自成蹊径也以喻广虽不能道辞能有所感而忠心信物故也】此言虽小可以论大也

【索隐述赞曰猿臂善射实负其庸解鞍却敌圆阵摧锋边郡屡守大军再从失道见斥数奇不封惜哉名将天下无双】

史记卷一百九

史记卷一百九考证

李将军列传广以良家子从军撃胡索隐案如淳云非医巫高贾百工也○徐孚远曰良家子从军盖自以才力从大将军取功名非卒伍也如说不分明

而是时公孙敖新失侯为中将军从大将军○刘奉世刊误曰按青去病传是岁出塞无中将军而敖传是岁以校尉从大将军此传误也

贰师将军李广利将三万骑击匈奴右贤王於祁连天山○凌稚隆曰一本王下无於字

史记卷一百九考证

<史部,正史类,史记>

卷一百十

钦定四库全书

史记卷一百十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节

匈奴列传第五十

【正义此卷或有本次平津侯後第五十二今第五十者先生旧本如此刘伯庄云亦然若先诸传而次四夷则司马汲郑不合在後也】

匈奴其先祖夏后氏之苗裔也曰淳维【集解駰案汉书音义曰匈奴始祖名索隐张晏曰淳维以殷时奔北边又乐彦括地谱云夏桀无道汤放之鸣条三年而死其子獯粥妻桀之衆妾避居北野随畜移徙中国谓之匈奴其言夏后苗裔或当然也故应劭风俗通曰殷时曰獯粥改曰匈奴又晋灼云尧时曰荤粥周曰玃狁秦曰匈奴韦昭云汉曰匈奴荤粥其别名则淳维是其始祖盖与獯粥是一也】唐虞以上有山戎【正义左传庄三十年齐人伐山戎杜预云山戎北戎无终三名也括地志云幽州渔阳县本北戎无终子国】玃狁荤粥【集解晋灼曰尧时曰荤粥周曰玃狁秦曰匈奴】居于北蛮随畜牧而转移其畜之所多则马牛羊其奇畜则橐駝【索隐韦昭曰背肉似橐故云橐包恺音托佗正义畜许六反】驴羸【索隐按古今注云驴特马牝生羸正义羸音力戈反】馱騊【集解徐广曰北狄骏马索隐说文云馱騊马父羸子也广志音决蹄也发蒙记刳其母腹而生列女传云生七日超其母】騊駼【集解徐广曰似马而青索隐按郭璞注尔雅云騊駼马青色音淘涂又字林云野马山海经云北海内有兽其状如马其名騊駼也】騊駼【集解徐广曰音颠巨虚之属索隐说文云野马属一云青骊騊駼又如騊鱼邹诞生本騊字作奚】逐水草迁徙毋城郭常处耕田之业然亦各有分地【索隐分音扶羹反】毋文书以言语为约束儿能骑羊引弓射鸟鼠少长则射狐兔用为食【索隐少音式绍反长陟两反少长谓年稍长】士力能弯弓【索隐弯音乌还反】尽为甲骑其俗寛则随畜因射猎禽兽为生业急则人习战攻以侵伐其天性也其长兵则弓矢短兵则刀鋌【集解韦昭曰鋌形似矛铁柄音时年反索隐音蟬埤苍云鋌小矛铁矜古今字诂云矜矛?也】利则进不利则退不羞遁走苟利所在不知礼义自君王以下咸食畜肉衣其皮革被旃裘壮者食肥美老者食其余贵壮健贱老弱父死妻其後母兄弟死皆取其妻妻之其俗有名不讳而无姓字【集解駰案汉书曰单于姓挛鞮氏索隐挛音六缘反鞮音丁啼反】

夏道衰而公刘失其稷官【集解徐广曰后稷之曾孙正义周本纪云不窋失其官此云公刘未详也】变于西戎邑于豳其後三百有余岁戎狄攻大王亶父【集解徐广曰公刘九世孙】亶父亡走岐下而豳人悉从亶父而邑焉作周【索隐按谓始作周国也】其後百有余岁周西伯昌伐畎夷氏【索隐韦昭云春秋以为犬戎按畎音犬小顔云即昆夷也山海经云黄帝生苗龙苗龙生融吾融吾生弄明弄明生白犬白犬有牝牡是为犬戎说文云赤狄本犬种字从犬又山海经云有人面兽身名犬夷贾逵云犬夷戎之别种也】後十有余年武王伐纣而营雒邑复居于酆鄩放逐戎夷泾洛之北【索隐晋灼曰洛水在冯翊怀德县东南入渭又案水经云出上郡雕阴泰昌山过华阴入渭即漆沮水也】以时入贡命曰荒服其後二百有余年周道衰【索隐案周纪云懿王时王室衰诗人作怨刺之诗不能复雅也】而穆王伐犬戎得四白狼四白鹿以归自是之後荒服不至於是周遂作甫刑之辟穆王之後二百有余年周幽王用宠姬褒姒之故与申侯有郤【正义故申城在邓州南阳县北三十里周宣王舅所封】申侯怒而与犬戎共攻杀周幽王于骊山之下【集解韦昭曰戎後來居此山故号曰骊戎】遂取周之焦获【正义括地志云焦获亦名瓠口亦曰瓠中在雍州泾阳县城北十数里周有焦获也】而居于泾渭之间侵暴中国秦襄公救周於是周平王去酆鄩而东徙雒邑当是之时秦襄公伐戎至岐【正义今岐州高诱云秦襄公救周有功受周故地酆鄩列为诸侯也】始列为诸侯是後六十有五年而山戎越燕而伐齐【索隐服虔云山戎盖今鲜卑胡广云鲜卑东胡别种又案应奉云秦筑长城徙士亡出塞外依鲜卑山因为号】齐厘公与战于齐郊【索隐厘音僖名诸儿也】其後四十四年而山戎伐燕燕告急于齐齐桓公北伐山戎山戎走其後二十有余年而戎狄至洛邑伐周襄王襄王奔于郑之泛邑【索隐苏林泛音凡今颍川襄城是】初周襄王欲伐郑故娶戎狄女为后与戎狄兵共伐郑已而黜狄后狄后怨而襄王後母曰惠后有子子带欲立之於是惠后与狄后子带为内应开戎狄戎狄以故得入破逐周襄王而立子带为天子於是戎狄或居于陆渾【集解徐广曰一为陆邑索隐春秋左氏秦晋迁陆渾之戎于伊川杜预以为允姓之戎居陆渾在秦晋之间二国诱而徙之伊川遂从戎号今陆渾县是也】东至於卫侵盗暴虐中国中国疾之故诗人歌之曰戎狄是膺薄伐玁狁至于太原【集解駉案毛诗传曰言逐出之而已】出與彭彭城彼朔方【集解駉案毛诗传曰彭彭四马貌朔方北方正义言玁狁既去北方安静乃筑城守之也】周襄王既居外四年乃使使告急于晋晋文公初立欲修霸业乃兴师伐逐戎翟诛子带迎内周襄王居于雒邑当是之时秦晋为强国晋文公攘戎翟居于河内圉洛之闲【集解徐广曰圉在西河音银洛在上郡冯翊闲索隐三苍圉作圉地理志云圉水出上郡白土县西东流入河韦昭云圉当为圉续郡国志及太康地理志并作圉字也正义括地志云白土故城在盐州白池东北三百九十里又云近延州绥州银州本春秋时白狄所居七国属魏後入秦秦置三十六郡洛漆沮也】号曰赤翟白翟【索隐案左传云晋师灭赤狄潞氏杜氏以潞赤翟之别种也今上党潞县又春秋地名云今日赤涉胡又晋师败翟于箕郟缺获白翟子杜氏以为白翟之别种故西河郡有白部胡又国语云桓公西征攘白翟之地遂至于西河正义括地志云潞州本赤狄地延银绥三州白翟地按文言圉洛之间号赤狄未详】秦穆公得由余西戎八国服於秦故自陇以西有緄诸【正义括地志云緄诸城秦州秦岭县北五十六里汉緄诸道属天水郡】緄戎【正义緄音昆字当作混顔师古云混夷也韦昭云春秋以为犬戎】翟之戎【集解徐广曰在天水音丸索隐地理志天水有绵诸道道应劭以戎邑音桓正义括地志云道故城在渭州襄武县东南三十七里古之戎邑汉道属天水郡】岐梁山泾漆之北有义渠【正义括

地志云寧州庆州西戎即刘拘邑城时为义渠戎国秦为北地郡也】大荔【集解徐广曰後更名临晋在冯翊索隐韦昭云义渠本西戎国有王秦灭之今在北地郡秦本纪厉共公伐大荔取其王城後更名临晋故地理志云临晋故大荔国也正义括地志云同州冯翊县及朝邑县本汉临晋县地古大荔戎国今朝邑县东三十步故王城即大荔王城荔力计反】乌氏【集解徐广曰在安定正义氏音支括地志云乌氏故城在泾州安定县东三十里周之故地後入戎秦惠王取之置乌氏县也】胸衍之戎【集解徐广曰在北地胸音项于反索隐案地理志胸衍县名在北地郑氏音吁正义括地志云盐州古戎狄居之即胸衍戎之地秦北地郡也】而晋北有林胡【集解如淳曰林胡即儋林为李牧所灭正义括地志云朔州春秋时北地也】楼烦之戎【索隐地理志楼烦县名属鴈门应劭云故楼烦胡也正义括地志云嵐州楼烦胡地也风俗通云故楼烦胡地也】燕北有东胡山戎【集解駰案汉书音义曰乌丸或云鲜卑索隐服?云东胡乌丸之先後为鲜卑在匈奴东故曰东胡案续汉书曰汉初匈奴冒顿灭其国余类保乌桓山以为号俗随水草居无常处恒以父之名字为姓父子男女悉髡头为轻便也】各分散居谿谷自有君长往往而聚者百有余戎然莫能相一自是之後百有余年晋悼公使魏绛和戎翟戎翟朝晋後百有余年赵襄子踰句注【集解駰案音鈎山名在鴈门索隐服?云句音拘韦昭云山名在陰馆】而破并代以临胡貉【索隐案貉即濊也音亡格反】其後既与韩魏共灭智伯分晋地而有之则赵有代句注之北魏有河西上郡以与戎界边其後义渠之戎筑城郭以自守而秦稍蚕食至於惠王遂拔义渠二十五城惠王击魏魏尽入西河及上郡于秦秦昭王时义渠戎王与宣太后乱【集解駰案昭王母也】有二子宣太后诈而杀义渠戎王於甘泉遂起兵伐残义渠於是秦有陇西北地上郡筑长城以拒胡而赵武灵王亦变俗胡服习骑射北破林胡楼烦筑长城【正义括地志云赵武灵王长城在朔州善阳县北案水经云百道长城北山上有长垣若颓毁焉沿溪亘岭东西无极盖赵灵王所筑也】自代并【集解駰案音傍白浪反】陰山【索隐徐广云西安阳县北有陰山陰山在河南阳山北也正义括地志云陰山在朔州北塞外突厥界】下至高阙为塞【集解徐广曰在朔方正义地理志云朔方临戎县北有连山险於长城其山中断两峯俱峻土俗名为高阙也】而置云中鴈门代郡其後燕有贤将秦开为质於胡胡甚信之归而袭破走东胡东胡郤千余里与荆轲刺秦王秦舞阳者开之孙也燕亦筑长城自造阳【集解韦昭曰地名在上谷正义按上谷郡今妫州】至襄平【索隐韦昭云今辽东所理也】置上谷渔阳右北平辽西辽东郡以拒胡当是之时冠带战国七而三国边於匈奴【索隐案三国燕赵秦也】其後赵将李牧时匈奴不敢入赵边後秦灭六国而始皇帝使蒙恬将十万之衆北击胡悉收河南地因河为塞【索隐案太康地记秦塞自五原北九里谓之造阳东行终利贲山南汉阳西是也】筑四十四县城临河徙适戍以充之【集解駰案适音丁革反】而通直道【索隐苏林云去长安八千里正南北相直道也】自九原至云阳【索隐韦昭云九原县属五原正义括地志云胜州连谷县本秦九原郡汉武帝更名五原云阳雍县秦之林光宫即汉之甘泉宫在焉又云秦故道在庆州华池县西四十五里子午山上自九原至云阳千八百里】因边山险湍谿谷可缮者治之起临洮至辽东万余里【索隐韦昭曰临洮陇西县正义括地志云秦陇西郡临洮县即今岷州城本秦长城首起岷州西十二里延袤万余里东入辽水】又度河据阳山北假中【集解駰案北假北方田官主以田假与贫人故云北假索隐应劭云北假在北地阳山北韦昭云北假地名正义括地志云汉五原郡河目县故城在北假中北假在河北今属胜州银城县汉书王莽传云五原北假膏壤殖谷】当是之时东胡强而月氏盛【正义氏音支括地

志云凉甘肃延沙等州地本月氏国】匈奴单于【集解駰案汉书音义曰单于者广大之貌言其象天单于然索隐按单于姓挛鞮氏其国称之曰 黎孤涂单于匈奴谓天为 黎谓子为孤涂单于者广大之貌言其象天故曰 黎孤涂单于又玄晏春秋云士安读汉书不详此言有胡奴在侧言之曰此胡所谓天子与古书所说符会也】曰头曼【集解韦昭曰曼音瞞索隐曼音莫官反】头曼不胜秦北徙十余年而蒙恬死诸侯畔秦中国扰乱诸秦所徙适戍边者皆复去於是匈奴得寛复稍度河南与中国界於故塞单于有太子名冒顿【索隐冒音墨又如字】後有所爱阏氏【索隐阏氏旧音曷氏匈奴皇后号也习凿齿与燕王书云山下有红蓝足下先知不北方人采取其花染绯黄按其上英鲜者作烟支妇人采将用为顔色吾少时再三过见烟支今日始亲红蓝後当足致其种匈奴名妻作阏氏今可音烟支想足下先亦不作此读汉书也】生少子而单于欲废冒顿而立少子乃使冒顿质於月氏冒顿既质於月氏而头曼急击月氏月氏欲杀冒顿冒顿盗其善马骑之亡归头曼以为壮令将万骑冒顿乃作为鸣镝【集解駰案汉书音义曰镝箭也如今鸣射也韦昭曰矢镝飞则鸣索隐应劭云髀箭也】习勒其骑射令曰鸣镝所射而不悉射者斩之行猎鸟兽有不射鸣镝所射者辄斩之已而冒顿以鸣镝自射其善马左右或不敢射者冒顿立斩不射善马者居顷之复以鸣镝自射其爱妻左右或颇恐不敢射冒顿又复斩之居顷之冒顿出猎以鸣镝射单于善马左右皆射之於是冒顿知其左右皆可用从其父单于头曼猎以鸣镝射头曼其左右亦皆随鸣镝而射杀单于头曼遂尽诛其後母与弟及大臣不听从者冒顿自立为单于冒顿既立【集解徐广曰秦二世元年壬辰岁立】是时东胡强盛闻冒顿杀父自立乃使使谓冒顿欲得头曼时有千里马冒顿问羣臣羣臣皆曰千里马匈奴宝马也勿与冒顿曰奈何与人邻国而爱一马乎遂与之千里马居顷之东胡以为冒顿畏之乃使使谓冒顿欲得单于一阏氏冒顿复问左右左右皆怒曰东胡无道乃求阏氏请撃之冒顿曰奈何与人邻国爱一女子乎遂取所爱阏氏予东胡东胡王愈益骄西侵与匈奴间中有弃地莫居千余里各居其边为瓠脱【集解韦昭曰界上屯守处索隐服?云作土室以伺汉人又纂文曰瓠脱土穴也又云是地名故下云生得瓠脱王瓠音一侯反脱音同活反正义按境上斥堠之室为瓠脱也】东胡使使谓冒顿曰匈奴所与我界瓠脱外弃地匈奴非能至也吾欲有之冒顿问羣臣羣臣或曰此弃地予之亦可勿与亦可於是冒顿大怒曰地者国之本也奈何予之诸言予之者皆斩之冒顿上马令国中有後者斩遂东袭击东胡东胡初轻冒顿不为备及冒顿以兵至击大破灭东胡王而虏其民人及畜产既归西击走月氏南并楼烦白羊河南王【索隐如淳曰白羊王居河南】侵燕代悉复收秦所使蒙恬所夺匈奴地者与汉关故河南塞至朝那肤施【集解徐广曰在上郡正义汉朝那故城在原州百泉县西七十里属安定郡肤施县秦因不改今延州肤施县是也】遂侵燕代是时汉兵与项羽相距中国罢於兵革以故冒顿得自强控弦之士三十余万自淳维以至头曼千有余岁时大时小别散分离尚矣其世传不可得而次云然至冒顿而匈奴最强大尽服从北夷而南与中国为敌国其世传国官号乃可得而记云置左右贤王左右谷蠡王【集解服?曰谷音鹿蠡音离索隐蠡又音黎】左右大将左右大都尉左右大当户左右骨都侯【集解駰案骨都异姓大臣索隐裴氏所引据後汉书下呼衍注亦然】匈奴谓贤曰屠耆【集解徐广曰屠一作诸】故常以太子为左屠耆王自如左右贤以下至当户大者万骑小者数千凡二十四长立号曰万骑诸大臣皆世官呼衍氏兰氏【正义顔师古云呼衍即今鲜卑姓呼延者也兰姓今亦有之】其後有须卜氏【集解駰案须卜氏主狱讼正义後汉书云呼衍氏须卜氏常与单于婚姻】此三姓其贵种也诸左方王将居东方直上谷【

索隱案姚氏云古字例以直为值值者当也正义上谷郡今妫州也言匈奴东方南出直当妫州也【以往者东接秽貉朝鲜右方王将居西方直上郡【正义上郡故城在涇州上县东南五十里言匈奴西方南直当绥州也】以西接月氏氏羌【索隱案风俗通云氏本西南夷种地理志武都有白马氏又鱼豢魏畧云汉置武都郡排其种人分窜山谷或号青氏或号白氏纂文云氏亦羊称说文云羌西方牧羊人续汉书云羌三苗蒺姓之别舜徙于三危今河关之西南羌是也】而单于之庭直代云中【索隱案谓匈奴所都处为庭乐彦云单于无城郭不知何以国之穹庐前地若庭故云庭正义代郡城北狄代国秦汉代县城也在蔚州羌胡县北百五十里云中故城赵云中城秦云中郡在胜州榆林县东北四十里言匈奴之南直当代云中也】各有分地逐水草移徙而左右贤王左右谷蠡王最为大国左右骨都侯辅政诸二十四长亦各自置千长百长什长【索隱案续汉书郡国志云里有魁又有什伍里魁掌一里百家什主十家伍主伍家以相檢察故贾谊过秦论以为俛起什百之中是也】裨小王相封【集解徐广曰一作将】都尉当一尸且渠之属【正义且子余反顏师古云今之沮渠姓盖本因此官】岁正月诸长小会单于庭祠五月大会茏城【索隱汉书作龙城亦茏字崔浩云西方胡皆事龙神故名大会处为龙城後汉书云匈奴俗岁有三龙祠祭天神】祭其先天地鬼神秋马肥大会蹕林【集解駰案汉书音义曰匈奴秋社八月中皆会祭处蹕音带索隱郑氏云蹕林地名也晋灼曰李陵与苏武书云相竞趋蹕林则服?说是也又韦昭音多蓝反姚氏案李牧传大破匈奴灭?濫此字与韦昭音颇同然林濫声相近或以林为濫也正义顏师古云蹕者遶林木而祭也鲜卑之俗自古相传秋祭无林木者尚豎柳枝衆骑驰遶三周乃止此其遗法也】课校人畜【正义许六反】计其法拔刃尺者死坐盗者没入其家有罪小者軋【集解駰案汉书音义曰刃刻其面索隱軋音乌八反邓展云軋历也如淳云橈杖也三苍云軋輶也说文云輶輶也正义顏师古云軋者谓輶輶其骨节若今之厌蹠者也】大者死狱久者不过十日一国之囚不过数人而单于朝出营拜日之始生夕拜月其坐长左而北乡【正义其座北向长者在左以左为尊也】日上戊巳其送死有棺槨金银衣裘而无封树丧服【集解张华曰匈奴名冢曰逗落】近幸臣妾从死者多至数千百人【正义汉书作数十百人顏师古云或数十人或百人】举事而候星月月盛壮则攻战月亏则退兵其攻战斩首虏赐一卮酒而所得卤获因以予之得人以为奴婢故其战人人自为趣利善为诱兵以冒敌故其见敌则逐利如鸟之集其困败则瓦解云散矣战而扶輿死者尽得死者家财後北服浑庾屈射丁零【索隱魏畧云丁零在康居北去匈奴庭接习水七千里又云匈奴北有浑窳国射音亦又音石】鬲昆薪犁之国【正义已上五国在匈奴北】於是匈奴贵人大臣皆服以冒顿单于为贤是时汉初定中国徙韩王信於代都马邑匈奴大攻围马邑韩王信降匈奴匈奴得信因引兵南踰句注攻太原至晋阳下高帝自将兵往擊之会冬大寒雨雪卒之堕指者十二三於是冒顿详败走诱汉兵汉兵逐击冒顿冒顿匿其精兵见其羸弱於是汉悉兵多步兵三十二万北逐之高帝先至平城【集解徐广曰在鴈门】步兵未尽到冒顿纵精兵四十万骑围高帝於白登【正义白登台在白登山朔州定襄县东三十里定襄县汉平城县也】七日汉兵中外不得相救餉匈奴骑其西方尽白马东方尽青驪马【索隱驪音武江反案青驪青色马也正义郑元云驪不纯也说文云驪面頰皆白尔雅云黑马面白也】北方尽乌骊马【索隱说文云骊黑色】南方尽騂马【索隱诗传曰赤黄曰騂】高帝乃使使间厚遗閼氏閼氏乃谓冒顿曰两主不相困今得汉地而单于终非能居之也且汉王亦有神单于察之冒顿与韩王信之将王黄赵利期而黄利兵又不来疑其与汉有谋亦取閼氏之言乃解围之一角於

是高帝令士皆持满傅矢外乡【索隐傅音附乡音向】从解角直出竟与大军合而冒顿遂引兵而去汉亦引兵而罢使刘敬结和亲之约是後韩王信为匈奴将及赵利王黄等数倍约侵盗代云中居无几何陈豨反又与韩信合谋击代汉使樊噲往击之复拔代鴈门云中郡县不出塞是时匈奴以汉将衆往降故冒顿常往来侵盗代地於是汉患之高帝乃使刘敬奉宗室女公主为单于阼氏岁奉匈奴絮缯酒米食物各有数约为昆弟以和亲冒顿乃少止後燕王卢绾反率其党数千人降匈奴往来苦上谷以东高祖崩孝惠吕太后时汉初定故匈奴以骄冒顿乃为书遗高后妄言高后欲击之【索隐案汉书云高后时冒顿寢骄乃使使遗高后书曰孤僨之君生於沮泽之中长於平野牛马之域数至边境愿游中国陛下独立孤僨独居两主不乐无以自娱愿以所有易其所无高后怒欲擊之】诸将曰以高帝贤武然尚困於平城於是高后乃止【索隐案汉书季布諫高后乃止】复与匈奴和亲至孝文帝初立复修和亲之事其三年五月匈奴右贤王入居河南地侵盗上郡葆塞蛮夷杀略人民於是孝文帝诏丞相灌婴发车骑八万五千诣高奴【正义延州城本汉高奴县旧都】击右贤王右贤王走出塞文帝幸太原是时济北王反文帝归罢丞相击胡之兵其明年单于遗汉书曰天所立匈奴大单于敬问皇帝无恙前时皇帝言和亲事称书意合欢汉边吏侵侮右贤王右贤王不请听後义卢侯难氏【集解徐广曰音支索隐匈奴将名也】等计与汉吏相距絶二主之约离兄弟之亲皇帝让书再至发使以书报不来汉使不至汉以其故不和邻国不附今以小吏之败约故罚右贤王使之西求月氏擊之以天之福吏卒良马强力以夷灭月氏尽斩杀降下之定楼兰【集解徐广曰一云楼湟正义汉书云鄯善国名楼兰去长安一千六百里】乌孙呼揭【集解駰案音桀索隐又音丘列反正义揭音犁又其列反二国皆在瓜州西北乌孙战国时居瓜州】及其旁二十六国皆以为匈奴【索隐谓皆已入匈奴国也】诸引弓之民并为一家人北州已定愿寝兵休士卒养马除前事复故约以安边民以应始古使少者得成其长老者安其处世世平乐未得皇帝之志也故使郎中系雫浅奉书【集解駰案雫音火胡反索隐系胡计反雫汉书作虐】请献橐駝一匹骑马二匹驾二驷【正义顔师古云驾可驾车也驷八匹马也】皇帝即不欲匈奴近塞则且诏吏民远舍使者至即遣之以六月中来至薪望之地【集解駰案汉书音义曰塞下地名索隐服云汉界上塞下之地今匈奴使至於此也】书至汉议擊与和亲孰便公卿皆曰单于新破月氏乘胜不可擊且得匈奴地泽卤【正义泽音息】非可居也和亲甚便汉许之孝文皇帝前六年汉遗匈奴书曰皇帝敬问匈奴大单于无恙使郎中系雫浅遗朕书曰右贤王不请听後义卢侯难氏等计絶二主之约离兄弟之亲汉以故不和邻国不附今以小吏败约故罚右贤王使西击月氏尽定之愿寝兵休士卒养马除前事复故约以安边民使少者得成其长老者安其处世世平乐朕甚嘉之此古圣主之意也汉与匈奴约为兄弟所以遗单于甚厚倍约离兄弟之亲者常在匈奴然右贤王事已在赦前单于勿深诛单于若称书意明告诸吏使无负约有信敬如单于书使者言单于自将伐国有功甚苦兵事服绣袷绮衣绣袷长襦【集解徐广曰一本无袷字索隐案小顔云服者言天子自所服也以绣为表绮为里以赐冒顿字林云袷衣无絮也音公洽反】锦袷袍各一比余一【集解徐广曰或作疏比也索隐案汉书作比疎一比音鼻小顔云髣髴发之饰也以金为之广雅云比栲也苍颉篇云靡者为比髣者为梳苏林云今亦谓之梳】黄金饰具带一【集解駰案汉书音义曰要中大带】黄金胥鞬一【集解徐广曰或作犀毗而无一字索隐汉书见作犀毗此作胥者胥犀声相近或误张晏云鲜卑郭落带瑞兽名也东胡好服之战国策云赵武灵王赐周绍具带黄金师比延笃云胡革带鈎也则此带鈎亦名师比则胥犀与师并相近而

说各异耳班固与窋宪牋云赐犀比金头带是也】绣十匹锦三十匹赤绋【正义绋音啼】缘绋各四十匹【索隐案说文云绋厚绋也】使中大夫意谒者令肩遗单于後顷之冒顿死子稽粥立【索隐稽音鸡粥音育】号曰老上单于老上稽粥单于初立【集解徐广曰一云稽粥第二单于自後皆以第别之】孝文皇帝复遣宗室女公主为单于阏氏使宦者燕人中行说【正义行音胡郎反中行姓说名也】傅公主说不欲行汉强使之说曰必我行也为汉患者中行说既至因降单于单于甚亲幸之初匈奴好汉缯絮食物中行说曰匈奴人衆不能当汉之一郡然所以强者以衣食异无仰於汉也今单于变俗好汉物汉物不过什二则匈奴尽归於汉矣【集解韦昭曰言汉物什中之二入匈奴匈奴则动心归汉矣】其得汉缯絮以驰草棘中衣袴皆裂敝以示不如旃裘之完善也得汉食物皆去之以示不如湏酪之便美也【集解駰案湏乳汁也音都奉反索隐字林云湏音竹用反穆天子传云牛马之湏臣苑人所具也】於是说教单于左右疏记以计课其人衆畜物【正义畜许六反】汉遗单于书牋以尺一寸辞曰皇帝敬问匈奴大单于无恙所遗物及言语云云中行说令单于遗汉书以尺二寸牋及印封皆令广大长倨傲其辞曰天地所生日月所置匈奴大单于敬问汉皇帝无恙所以遗物言语亦云云汉使或言曰匈奴俗贱老中行说穷汉使曰而汉俗屯戍从军当发者其老亲岂有不自脱温厚肥美以齎送饮食行戍乎汉使曰然中行说曰匈奴明以战攻为事其老弱不能鬪故以其肥美饮食壮健者盖以自为守卫如此父子各得久相保何以言匈奴轻老也汉使曰匈奴父子乃同穹庐而卧【集解駰案汉书音义曰穹庐旃帐】父死妻其後母兄弟死尽取其妻妻之无冠带之饰阙庭之礼中行说曰匈奴之俗人食畜肉饮其汁衣其皮畜食草饮水随时转移故其急则人习骑射寛则人乐无事其约束轻易行也君臣简易一国之政犹一身也父子兄弟死取其妻妻之恶种姓之失也故匈奴虽乱必立宗种今中国虽详不取【索隐详汉书作阳此亦音羊】其父兄之妻亲属益疎则相杀至乃易姓皆从此类且礼义之敝上下交怨望而室屋之极生力必屈【索隐以言栋宇室屋之作人尽极其力以营其生至於气力屈竭也屈音其物反】夫力耕桑以求衣食筑城郭以自备故其民急则不习战功缓则罢於作业嗟土室之人顾无多辞令喋喋【集解駰案音谍利口也】而占占【集解駰案昌占反衣裳貌】冠固何当【集解駰案言虽复着冠固何益所当索隐邓展曰占啜耳语服?曰口舌为喋如淳曰汝汉人多口居室中固自宜着冠且不足贵也小顔云言汉人且当思念无为喋喋占占耳虽自谓着冠何所当益也】自是之後汉使欲辩论者中行说辄曰汉使无多言顾汉所输匈奴缯絮米穀令其量中必善美而已矣何以为言乎且所给备善则已不备苦恶【集解韦昭曰苦麤也音若靡鹽之鹽】则候秋孰以骑驰蹂而稼穡耳【集解徐广曰蹂音而九反】日夜教单于候利害处汉孝文皇帝十四年匈奴单于十四万骑入朝那萧关杀北地都尉卬【集解徐广曰姓孙其子单封为餅侯白丁反索隐卬音五郎反】虏人民畜产甚多遂至彭阳【集解徐广曰在安定正义城字误也括地志云彭城故城在泾州临城县东二十里案彭城在妨州与北地郡甚远明非彭城也】使奇兵入烧回中宫【索隐服?云回中在北地武帝作宫始皇本纪三十七年巡鸡头山过回中武帝元封四年通回中道正义括地志云秦回中宫在岐州雍县西四十里即匈奴所烧者也】候骑至雍甘泉【索隐崔浩云候逻骑正义括地志云云阳也秦之林光宫汉之甘泉在雍州云阳西北八十里秦始皇作甘泉宫去长安三百里望见长安始皇帝以来祭天团兵处】於是文帝以中尉周舍郎中令张武为将军发车千乘骑十万军长安旁以备胡寇而拜昌侯卢卿为上郡将军【索隐案表卢作旅古今字异耳】甯侯魏遯为北地将军隆虑侯周竈为陇西将军东阳侯张相如

为大将军成侯董赤【正义音赫】为前将军大发车骑往击胡【集解徐广曰内史栾布亦为将军】单于留塞内月余乃去汉逐出塞即还不能有所杀匈奴日已骄岁入边杀略人民畜产甚多云中辽东最甚至代郡万余人汉患之乃使使遗匈奴书单于亦使当户报谢复言和亲事孝文帝後二年使使遗匈奴书曰皇帝敬问匈奴大单于无恙使当户且居雕渠难【索隐汉书作且渠匈奴官号乐彦云当户且渠各自一官雕渠难为此官也正义雕渠难者其姓名也且子余反】郎中韩辽遗朕马二匹已至敬受先帝制长城以北引弓之国受命单于长城以内冠带之室朕亦制之使万民耕织射猎衣食父子无离臣主相安俱无暴逆今闻漂恶民贪降其进取之利倍义絶约忘万民之命离两主之驩然其事已在前矣书曰二国已和亲两主驩说寝兵休卒养马世世昌乐闾然更始【集解徐广曰闾音?安定意也】朕甚嘉之圣人者日新改作更始使老者得息幼者得长各保其首领而终其天命朕与单于俱由此道顺天恤民世世相传施之无穷天下莫不咸便汉与匈奴邻敌之国匈奴处北地寒杀气早降故诏吏遗单于秣金帛丝絮佗物岁有数今天下大安万民熙熙朕与单于为之父母朕追念前事薄物细故谋臣计失皆不足以离兄弟之驩朕闻天不颇覆地不偏载朕与单于皆捐往细故俱蹈大道堕坏前恶以图长久使两国之民若一家子元元万民下及鱼鼈上及飞鸟跂行喙息蠕动之类【索隐案跂音岐又音企言虫鸟之类或以踵而行或以喙而息皆得其安也三苍云蠕蠕动貌音软淮南云昆虫蠕动也】莫不就安利而辟危殆故来者不止天之道也俱去前事朕释逃虏民单于无言章尼等【索隐案文帝云我今日并释放彼国逃亡虏遣之归本国汝单于无得更以言词诉於章尼等责其违逃也】朕闻古之帝王约分明而无食言单于留志天下大安和亲之後汉过不先单于其察之单于既约和亲於是制诏御史曰匈奴大单于遗朕书言和亲已定亡人不足以益衆广地匈奴无入塞汉无出塞犯令约者杀之可以久亲後无咎俱便朕已许之其布告天下使明知之後四岁老上稽粥单于死子军臣立为单于既立【集解徐广曰後元三年立】孝文皇帝复与匈奴和亲而中行说复事之军臣单于立四岁【集解徐广曰孝文後元七年崩而二年答单于书其间五年而此云後四年又立四岁数不容尔也孝文後六年冬匈奴入上郡云中也】匈奴复絶和亲大入上郡云中各三万骑所杀略甚衆而去於是汉使三将军军屯北地代屯句注赵屯飞狐口缘边亦各坚守以备胡寇又置三将军军长安西细柳渭北棘门霸上以备胡胡骑入代句注边烽火通於甘泉长安数月汉兵至边匈奴亦去远塞汉兵亦罢後岁余孝文帝崩孝景帝立而赵王遂乃陰使人於匈奴吴楚反欲与赵合谋入边汉围破赵匈奴亦止自是之後孝景帝复与匈奴和亲通关市给遗匈奴遣公主如故约终孝景时时小入盗边无大寇今帝即位明和亲约束厚遇通关市饶给之匈奴自单于以下皆亲汉往来长城下汉使马邑下人聂翁壹【索隐卫青传唯称聂壹故顾氏云壹名也老故称翁义或然也】奸兰【集解駰案奸音干干兰犯禁私出物也】出物与匈奴交【集解駰案汉书音义曰私出塞与匈奴交市】详为卖马邑城以诱单于单于信之而贪马邑财物乃以十万骑入武州塞【索隐苏林云在鴈门也】汉伏兵三十余万马邑旁御史大夫韩安国为护军护四将军以伏单于单于既入汉塞未至马邑百余里见畜布野而无人牧者怪之乃攻亭是时鴈门尉史行徼【索隐如淳云近塞郡皆置尉百里一人士史尉史各二人也】见寇葆此亭知汉兵谋单于得欲杀之【集解徐广曰一云乃下具告单于】尉史乃告单于汉兵所居单于大惊曰吾固疑之乃引兵还出曰吾得尉史天也天使若言以尉史为天王汉兵约单于入马邑而纵单于不至以故汉兵无所得汉将军王恢部出代击胡辚重闻单于还兵多不敢出汉以恢本造兵谋而不进斩恢【集解駰案韩

长孺传曰恢自杀】自是之後匈奴絶和亲攻当路塞【索隐苏林云直当道之塞】往往入盜於汉边不可胜数然匈奴贪尚乐关市嗜汉财物汉亦尚关市不絶以中之【正义如淳云以利中伤之】自马邑军後五年之秋汉使四将军各万骑击胡关市下将军卫青出上谷至茈城得胡首虏七百人公孙敖出云中无所得公孙敖出代郡为胡所败七千余人李广出鴈门为胡所败而匈奴生得广广後得亡归汉囚敖广敖广赎为庶人其冬匈奴数入盜边渔阳尤甚汉使将军韩安国屯渔阳备胡其明年秋匈奴二万骑入汉杀辽西太守略二千余人胡又入败渔阳太守军千余人围汉将军安国安国时千余骑亦且尽会燕救至匈奴乃去匈奴又入鴈门杀略千余人於是汉使将军卫青将三万骑出鴈门李息出代郡击胡得首虏数千人其明年卫青复出云中以西至陇西击胡之楼烦白羊王於河南得胡首虏数千牛羊百余万於是汉遂取河南地筑朔方复缮故秦时蒙恬所为塞因河为固汉亦弃上谷之什【集解駰案音斗】辟县造阳地以予胡【集解駰案汉书音义曰言县斗辟西近胡索隐辟音僻造阳即斗辟县中地正义曲幽辟县入匈奴界者造阳地弃与胡也】是岁汉之元朔二年也其後冬匈奴军臣单于死军臣单于弟左谷蠡王伊稚斜自立为单于【索隐稚音持利反斜音士嗟反邹诞生音直牙反盖稚斜胡人语近得其实】攻破军臣单于太子於单【索隐单音丹】於单亡降汉汉封於单为涉安侯数月而死伊稚斜单于既立其夏匈奴数万骑入杀代郡太守恭及略千余人其秋匈奴又入鴈门杀略千余人其明年匈奴又复入代郡定襄【正义括地志云定襄故城在朔州善阳县北三百八十里地理志云定襄郡高帝置也】上郡各三万骑杀略数千人匈奴右贤王怨汉夺之河南地而筑朔方数为寇盜边及入河南侵扰朔方杀略吏民甚衆其明年春汉以卫青为大将军将六将军十余万人出朔方高阙击胡右贤王以为汉兵不能至饮酒醉汉兵出塞六七百里夜围右贤王右贤王大惊脱身逃走诸精骑往往隨後去汉得右贤王衆男女万五千人裨小王十余人其秋匈奴万骑入杀代郡都尉朱英略千余人其明年春汉复遣大将军卫青将六将军兵十余万骑乃再出定襄数百里击匈奴得首虏前後凡万九千余级而汉亦亡两将军军三千余骑【集解徐广曰合有三千耳】右将军建【正义苏武父也】得以身脱而前将军翕侯赵信兵不利降匈奴赵信者故胡小王降汉汉封为翕侯以前将军与右将军并军分行【正义与大军别行也】独遇单于兵故尽没单于既得翕侯以为自次王【正义自次者尊重次於单于】用其姊妻之与谋汉信教单于益北絶幕【集解应劭曰幕沙幕匈奴之南界瓚曰沙土曰幕直度曰絶】以诱罢汉兵徼极而取之【索隐罢音疲徼要也谓要其疲极而取之正义徼音古尧反】无近塞【正义无近塞居止】单于从其计其明年胡骑万人入上谷杀数百人其明年春汉使骠骑将军去病将万骑出陇西过焉支山【正义焉音烟括地志云焉支山一名删丹山在甘州删丹县东南五十里西河故事云匈奴失祁连焉支二山乃歌曰亡我祁连山使我六畜不蕃息失我焉支山使我妇女无顔色其慙惜乃如此】千余里击匈奴得胡首虏骑万八千余级破得休屠王祭天金人【集解駰案汉书音义曰匈奴祭天处本在云阳甘泉山下秦夺其地後徙之休屠王右地故休屠有祭天金人象祭天主也索隐韦昭云作金人以为祭天主崔浩云胡祭以金人为主今浮图金人是也孟说恐不然案得浮图金人後置之於甘泉也正义括地志云径路祠神在雍州云阳县西北九十里甘泉山下本匈奴祭天处秦夺其地後徙休屠右地按金人即金佛像是其遗法立以为祭天主也】其夏骠骑将军复与合骑侯数万骑出陇西北地二千里击匈奴过居延【索隐韦昭曰张掖县】攻祁连山【索隐西河旧事云山在张掖酒泉二界上东西二百里南北百里有松柏五木美水草冬温夏凉宜畜牧匈奴失二山乃歌曰

失我祁连山使我六畜不蕃息失我焉支山使我嫁妇无颜色祁连一名天山亦曰白山也】得胡首虏三万余人裨小王以下七十余人是时匈奴亦来入代郡鴈门杀略数百人汉使博望侯及李将军广出右北平击匈奴左贤王左贤王围李将军卒可四千人且尽杀虏亦过当会博望侯军救至李将军得脱汉亡数千人合骑侯後骠骑将军期及与博望侯皆当死赎为庶人其秋单于怒浑耶王休屠王居西方为汉所杀虏数万人欲召诛之浑耶王与休屠王恐谋降汉【集解徐广曰元狩二年也】汉使骠骑将军往迎之浑耶王杀休屠王并将其衆降汉凡四万余人号十万於是汉已得浑耶王则陇西北地河西益少胡寇徙关东贫民处所夺匈奴河南新秦中以实之【集解如淳云在长安以北朔方以南駟案汉书食货志云徙贫民充朔方以南新秦中是也正义服?云地名在北地广六七百里长安北朔方南史记以为秦始皇遣蒙恬斥逐北故得肥饶之地七百里徙内郡人民皆往充实之号曰新秦中也】而减北地以西戍卒半其明年匈奴入右北平定襄各数万骑杀略千余人而去其明年春汉谋曰翕侯信为单于计居幕北以为汉兵不能至乃粟马发十万骑负私从马凡十四万匹【正义谓负担衣粮私募从者凡十四万匹】粮重不与焉令大将军青骠骑将军去病中分军大将军出定襄骠骑将军出代咸约絶幕击匈奴匈奴单于闻之远其辎重以精兵待於幕北与汉大将军接战一日会暮大风起汉兵纵左右翼围单于单于自度战不能如汉兵单于遂独身与壮骑数百溃汉围西北遁走汉兵夜追不得行斩捕匈奴首虏万九千级北至阾顔山赵信城而还【集解如淳曰信前降匈奴匈奴筑城居之】单于之遁走其兵往往与汉兵相乱而随单于单于久不与其大衆相得其右谷蠡王以为单于死乃自立为单于真单于复得其衆而右谷蠡王乃去其单于号复为右谷蠡王汉骠骑将军之出代二千余里与左贤王接战汉兵得胡首虏凡七万余级左贤王将皆遁走骠骑封於狼居胥山禅姑衍临翰海而还【集解如淳曰翰海北海名正义按翰海自一大海名羣鸟解羽伏乳於此因名也】是後匈奴远遁而幕南无王庭汉度河自朔方以西至令居【集解徐广曰在金城索隐地理志云张掖令居县姚氏令音连小顔音零】往往通渠置田官吏卒五六万人稍蚕食地接匈奴以北【正义匈奴旧以幕为王庭今远徙幕北更蚕食之汉境连接匈奴旧地以北也】初汉两将军大出围单于所杀虏八九万而汉士卒物故亦数万【索隐案释名云汉以来谓死为物故就朽故也又魏台访议高堂崇对曰闻之先师物无也故事也言无复所能於事者也】汉马死者十余万匈奴虽病远去而汉亦马少无以复往匈奴用赵信之计遣使於汉好辞请和亲天子下其议或言和亲或言遂臣之丞相长史任敞曰匈奴新破困宜可使为外臣朝请於边汉使任敞於单于单于闻敞计大怒留之不遣先是汉亦有所降匈奴使者单于亦辄留汉使相当汉方复收士马会骠骑将军去病死於是汉久不北击胡数岁伊稚斜单于立十三年死子乌维立为单于是岁汉元鼎三年也乌维单于立而汉天子始出巡郡县其後汉方南诛两越【正义南越东越】不击匈奴匈奴亦不侵入边乌维单于立三年汉已灭南越遣故太仆贺将万五千骑出九原二千余里至浮苴井而还【索隐苴音子余反臣瓚云去九原二千里见汉輿地图】不见匈奴一人汉又遣故从骠侯赵破奴万余骑出令居数千里至匈奴河水而还【索隐臣瓚云河水名去令居千里】亦不见匈奴一人是时天子巡边至朔方勒兵十八万骑以见武节而使郭吉风告单于郭吉既至匈奴匈奴主客【集解韦昭曰主使来客官也正义官名若鸿胪卿】问所使郭吉礼卑言好曰吾见单于而口言单于见吉吉曰南越王头已悬於汉北阙今单于能即前与汉战天子自将兵待边单于即不能即南面而臣於汉何徒远走亡匿於幕北寒苦无水草之地毋为也语卒而单于大怒立斩主客见者而留郭吉不归迁之

北海上【正义北海即上海苏武亦迁也】而单于终不肯为寇於汉边休养息士马习射猎数使使於汉好辞甘言求请和亲汉使王乌等窥匈奴匈奴法汉使非去节而以墨黥其面者不得入穹庐王乌北地人习胡俗去其节黥面得入穹庐单于爱之详许甘言为遣其太子入汉为质【正义音致】以求和亲汉使杨信於匈奴是时汉东拔秽貉朝鲜以为郡【正义即玄菟乐浪二郡】而西置酒泉郡【正义今肃州】以隔絶胡与羌通之路汉又西通月氏大夏【正义汉书西域传云大月氏国去长安城万一千六百里本居炖煌祁连间冒顿单于破月氏而老上单于杀月氏王以头为饮器月氏乃远去过大宛西击大夏而臣之都犂水北为王庭也】又以公主妻乌孙王以分匈奴西方之援国又北益广田至胘雷为塞【集解駟案汉书音义曰胘雷地名在乌孙北】而匈奴终不敢以为言是岁翁侯信死汉用事者以匈奴为已弱可臣从也杨信为人刚直屈强素非贵臣单于不亲单于欲召入不肯去节单于乃坐穹庐外见杨信杨信既见单于说曰即欲和亲以单于太子为质於汉单于曰非故约故约汉常遣公主给繒絮食物有品以和亲而匈奴亦不扰边今乃欲反古令吾太子为质无几矣【正义几音纪言反古无所冀望也】匈奴俗见汉使非中贵人其儒先【集解駟案先先生也汉书作儒生】以为欲说折其辩其少年以为欲刺折其气每汉使入匈奴匈奴辄报偿汉留匈奴使匈奴亦留汉使必得当乃肯止杨信既归汉使王乌而单于复繒以甘言欲多得汉财物给谓王乌曰吾欲入汉见天子面相约为兄弟王乌归报汉汉为单于筑邸于长安匈奴曰非得汉贵人使吾不与诚语匈奴使其贵人至汉病汉予药欲愈之不幸而死而汉使路充国佩二千石印绶往使因送其丧厚葬直数千金曰此汉贵人也单于以为汉杀吾贵使者乃留路充国不归诸所言者单于特空给王乌殊无意入汉及遣太子来质於是匈奴数使奇兵侵犯边汉乃拜郭昌为拔胡将军及浞野侯【集解徐广曰赵破奴】屯朔方以东备胡路充国留匈奴三岁单于死乌维单于立十岁而死子乌师庐【集解徐广曰乌一作詹】立为单于年少号为儿单于是岁元封六年也自此之後单于益西北左方兵直云中右方直酒泉炖煌郡【正义括地志云铁勒国匈奴冒顿之後在突厥国北乐胜州经秦长城太羹长路正北经砂磧十三日行至其国】儿单于立汉使两使者一吊单于一吊右贤王欲以乖其国使者入匈奴匈奴悉将致单于单于怒而尽留汉使汉使留匈奴者前後十余辈而匈奴使来汉亦辄留相当是岁汉使贰师将军广利西伐大宛而令因杆【正义音于】将军敷筑受降城其冬匈奴大雨雪畜多饥寒死儿单于年少好杀伐国人多不安左大都尉欲杀单于使人间告汉曰我欲杀单于降汉汉远即兵来迎我我即发初汉闻此言故筑受降城犹以为远其明年春汉使浞野侯破奴将二万余骑出朔方西北二千余里期至浚稽山而还【索隐应劭云在武威县北】浞野侯既至期而还左大都尉欲发而觉单于诛之发左方兵击浞野浞野侯行捕首虏数千人还未至受降城四百里匈奴兵八万骑围之浞野侯夜自出求水匈奴间捕生得浞野侯因急击其军军中郭纵为护维王为渠【正义为渠帅也】相与谋曰及诸校尉畏亡将军而诛之莫相劝归军遂没於匈奴匈奴儿单于大喜遂遣奇兵攻受降城不能下乃寇入边而去其明年单于欲自攻受降城未至病死儿单于立三岁而死子年少匈奴乃立其季父乌维单于弟右贤王响【集解駟案音鈞又音吁】犁湖为单于是岁太初三年也响犁湖单于立汉使光禄徐自为出五原塞【正义即五原郡榆林塞也在胜州榆林县四十里也】数百里远者千余里筑城鄣列亭【正义顾?云鄣山中小城亭候望所居也】至庐朐【集解音衢服?云庐匈奴地名也张晏云山名也正义地理志云五原郡稠阳县北出石门鄣得光禄城又西北得支就城又西北得头曼城又西北得虏河城又西北得宿虏城按即筑城鄣列亭至

庐胸也】而使游击将军韩说长平侯卫伉屯其傍使强弩都尉路博德筑居延泽上【正义括地志汉居延县故城在甘州张掖县东北千五百三十里有汉遮虏鄣强弩尉路博德之所筑李陵败与士衆期至遮虏鄣即此也长老传云鄣北百八十里直居延之西北是李陵战地也】其秋匈奴大入定襄云中杀略数千人败数二千石而去行破坏光禄所筑城列亭鄣又使右贤王入酒泉张掖略数千人会任文击救【集解駟案汉书音义曰汉将也】尽复失所得而去是岁贰师将军破大宛斩其王而还匈奴欲遮之不能至其冬欲攻受降城会单于病死响犁湖单于立一岁死匈奴乃立其弟左大都尉且鞮侯为单于【索隐且音子余反鞮音低】汉既诛大宛威震外国天子意欲遂困胡乃下诏曰高皇帝遗朕平城之忧高后时单于书絶悖逆昔齐襄公复百世之讎春秋大之【集解駟案公羊传曰九世犹可以复讎乎虽百世可知也】是岁太初四年也且鞮侯单于既立尽归汉使之不降者路充国等得归单于初立恐汉袭之乃自谓我儿子安敢望汉天子汉天子我丈人行也【正义胡郎反】汉遣中郎将苏武厚币赂遗单于单于益骄礼甚倨非汉所望也其明年浞野侯破奴得亡归汉其明年汉使贰师将军广利以三万骑出酒泉击右贤王於天山【正义在伊川】得胡首虏万余级而还匈奴大围贰师将军几不脱汉兵物故什六七汉复使因杆将军敷出西河与强弩都尉会涿涂山【集解徐广曰涂音邪索隐涿音卓涂音以奢反正义匈奴中山也】毋所得又使骑都尉李陵将步骑五千人出居延北千余里与单于会合战陵所杀伤万余人兵及食尽欲解归匈奴围陵降匈奴其兵遂没得还者四百人单于乃贵陵以其女妻之後二岁复使贰师将军将六万骑步兵十万出朔方强弩都尉路博德将万余人与贰师会游击将军说将步骑三万人出五原因杆将军敷将万骑步兵三万人出鴈门匈奴闻悉远其累重於余吾水北【集解徐广曰余一作斜音邪索隐山海经云北鲜之山鲜水出焉北流注余吾正义累力为反重文用反】而单于以十万骑待水南与贰师将军接战贰师乃解而引归与单于连战十余日贰师闻其家以巫蛊族灭因并衆降匈奴【集解徐广曰案史记将相年表及汉书征和二年巫蛊始起三年广利与商丘成出击胡军败乃降】得来还千人一两人耳【正义自此以下上至贰师闻其家非天汉四年事似错悞人所知】游击说无所得因杆与左贤王战不利引归是岁【集解徐广曰天汉四年】汉兵之出击匈奴者不得言功多少功不得御【正义御音语其功不得相御当也】有诏捕太医令随但言贰师将军家室族灭使广利得降匈奴【索隐汉书云明年且鞮死长子狐鹿姑单于立张晏云自狐鹿姑单于已下皆刘向褚先生所录班彪又撰而次之所以汉书匈奴传有上下两卷】

太史公曰孔氏着春秋隐桓之间则章至定哀之际则微【索隐案韩国要礼云仲尼仕於定哀故其着春秋不切论当世而微其词也】为其切当世之文而罔褒忌讳之辞也【索隐案罔者无也谓其无实而褒之是也忌讳当代故也】世俗之言匈奴者患其微一时之权【集解徐广曰微音皎索隐微音工尧反言求一时权宠也刘伯庄音叫徐音皎皆非也】而务譌纳其说【索隐说音税】以便偏指不参【索隐案谓说者谋匈奴皆患其直微求一时权幸但务譌进其说以自便其偏指不参详终始利害也】彼己将率【诗云彼己之子索隐彼己者犹诗人讥词云彼己之子是也将率则指樊哙卫霍等也】席中国广大气奋人主因以决策是以建功不深尧虽贤兴事业不成得禹而九州宁【正义言尧虽贤圣不能独理得禹而九州安宁以刺武帝不能择贤将相而务譌纳小人浮说多伐匈奴故坏齐民故太史公引禹圣成其太平以攻当代之罪】且欲兴圣统唯在择任将相哉唯在择任将相哉

【索隐述赞曰猱猱羣粥居于北边既称夏裔式憬周篇颇随畜牧屡扰尘烟爰自冒顿尤聚控弦虽空帑藏未尽中权】

史记卷一百十

史记卷一百十考证

匈奴列传○顾炎武曰因匈奴犯塞而有卫霍之功故序匈奴於卫将军骠骑传之前

其後三百有余岁戎狄攻大王亶父○困学纪闻曰王氏述曰自后稷三传而得公刘自亶父三传而武王灭商则公刘在夏之中衰而亶父宜在商之季世不啻五六百年而曰三百岁未知何所?

燕北有东胡山戎索隐案续汉书曰汉初匈奴冒顿灭其国余类保乌桓山以为号俗随水草居无常处桓以之名乌号为姓父子男女悉髡头为轻便也○【臣照】按索隐引续汉书盖有讹脱字今?後汉乌桓传云乌桓者本东胡也汉初匈奴冒顿灭其国余类保乌桓山因以为号焉随水草放牧居无常处又曰父子男女相对踞蹲以髡头为轻便

自是之後百有余年晋悼公使魏绛和戎翟○困学纪闻曰以左氏考之鲁文公三年秦始霸西戎襄公四年晋魏绛和戎裁五十余岁阎若璩曰魏绛和者北戎非西戎也

而始皇帝使蒙恬将十万之衆北击胡○蒙恬传作三十万衆

筑四十四县城○秦始皇本纪作三十四县

十余年而蒙恬死○恬以始皇三十四年击胡以二世初即位死首尾实四年

汉使马邑下人聂翁壹索隐卫青传唯称聂壹故顾氏云壹名也老故称翁义或然也○【臣照】按老固称翁但索隐於韩安国传既云聂姓翁壹名何於此复有异说也

汉亦尚关市不絶以中之正义如淳云以利中伤之○徐孚远曰如淳之说非也谓中其欲使不至时入塞

匈奴数万骑入杀代郡太守恭及畧千余人○汉书恭及作共友师古曰太守姓名也卫青传作代郡太守友则及为友无疑

昔齐襄公复百世之讎春秋大之○【臣照】按此下疑有阙文然汉亦仍之无所增益则当时所传亦如此

世俗之言匈奴者患其徼一时之权而务譌纳其说以便偏指不参彼己将率席中国广大气
奋人主因以决策○【臣照】按索隐读作以便偏指不参【句】彼己将率【句】席中国
广大【句】气奋人主【句】因以决策【句】误也应作以便偏指【句】不参彼己【句】
将率席中国广大气奋【句】人主因以决策【句】盖谓言匈奴者务譌纳其说以便申
其一偏之见而不以彼己利害短长参之其将率则席中国盛势以奋其气人主就此辈决策
是以无功也

史记卷一百十考证

卷一百十一

钦定四库全书

史记卷一百十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

卫将军骠骑列传第五十一

大将军卫青者平阳人也其父郑季为吏给事平阳侯家与侯妾卫媼通【索隐卫姓也媼妇人老少通称汉书曰与主家僮卫媼通案既云家僮故知非老或者媼是年老之称後追呼耳然外戚传云薄姬父与魏王宗女魏媼通则少亦称媼也而小顔云卫者举其夫家姓也然案此云侯妾卫媼则似无夫下云同母兄卫长子及姊卫子夫皆冒卫氏又似有夫耳其所冒之姓为父与母皆未明也】生青青同母兄卫长子而姊卫子夫自平阳公主家得幸天子【集解徐广曰曹参曾孙平阳夷侯时尚武帝姊平阳公主生子襄索隐案如淳云本阳信长公主为平阳侯所尚故称平阳公主世家及功臣表时或作畴汉书作壽竝文字残缺故不同也】故冒姓为卫氏字仲卿长子更字长君长君母号为卫媼媼长女卫孺【索隐汉书云君孺】次女少儿次女即子夫後子夫男弟步广【集解徐广曰步一作少】皆冒卫氏青为侯家人少时归其父其父使牧羊先母之子【集解服虔曰先母适妻也青之适於】母民【索隐汉书作民母顾氏云郑季本妻编户之间故曰民母今本亦或作民母也】皆奴畜之不以为兄弟数【索隐音去声】青尝从入至甘泉居室【正义按居室署名武帝改曰保宫灌夫系居室是也】有一钳徒【集解张晏曰甘泉中徒所居也】相青曰贵人也官至封侯青笑曰人奴之生得母笞骂即足矣安得封侯事乎青壮为侯家骑从平阳主建元二年春青姊子夫得入宫幸上皇后堂邑大长公主女也【集解徐广曰堂邑安侯陈婴之孙夷侯午尚景帝姊长公主生子季须元鼎元年季须坐奸自杀正义文颖云陈皇后武帝姑女也】无子妬大长公主闻卫子夫幸有身妬之乃使人捕青青时给事建章未知名【索隐案晋灼云建章上林中宫名也】大长公主执四青欲杀之其友骑郎公孙敖与壮士篡取之以故得不死【索隐篡犹劫也夺也】上闻乃召青为建章监侍中及同母昆弟贵赏赐数日间累千金孺为太仆公孙贺妻少儿故与陈掌通【集解徐广曰陈平曾孙名掌也】上召贵掌公孙敖由此益贵子夫为夫人青为太中大夫元光五年青为车骑将军击匈奴出上谷太仆公孙贺为轻车将军出云中太中大夫公孙敖为骑将军出代郡卫尉李广为骁骑将军出鴈门军各万骑青至茏城斩首虏数百骑将军敖亡七千骑卫尉李广为虏所得得脱归皆当斩赎为庶人贺亦无功元

朔元年春卫夫人有男【索隐即卫太子据也】立为皇后其秋青为车骑将军出鴈门三万骑击匈奴斩首虏数千人明年匈奴入杀辽西太守虏略渔阳二千余人败韩将军军汉令将军李息击之出代令车骑将军青出云中以西至高阙【索隐高阙山名小颜云一曰塞名在朔方之北也】遂略河南地至于陇西捕首虏数千畜数十万走白羊楼烦王遂以河南地为朔方郡【正义今夏州也】以三千八百户封青为长平侯青校尉苏建有功以千一百户封建为平陵侯使建筑朔方城【正义括地志云夏州朔方县北什赍故城是按苏建筑什赍之号盖出蕃语也】青校尉张次公有功封为岸头侯【索隐案晋灼云河东皮氏县之亭名也正义服虔云乡名也】天子曰匈奴逆天理乱人伦暴长虐老以盗窃为务行诈诸蛮夷造谋籍兵数为边害【集解张晏曰从蛮夷借兵钞边也】故兴师遣将以征厥罪诗不云乎薄伐玁狁至于太原【索隐此小雅六月诗美宣王北伐也薄伐者言逐出之也】出车彭彭城彼朔方【索隐小雅出车之诗也】今车骑将军青度西河【正义即云中郡之西河今胜州东河也】至高阙获首虏二千三百级车辎畜产毕收为卤已封为列侯遂西定河南地按榆谿旧塞【集解如淳曰按行也榆谿旧塞名或曰按寻也索隐案水经云上郡之北有诸次山诸次水出焉东经榆林塞为榆谿是榆谿旧塞也】绝梓领梁北河【集解如淳曰绝度也为北河作桥梁正义括地志云梁北河在灵州界】讨蒲泥破符离【集解晋灼曰二王号索隐崔浩云北塞名】斩轻锐之卒捕服听者三千七十一级【集解张晏曰伏於隐处听军虚实】执讯获丑【正义讯问也丑衆言执其生口问之知虏处获得衆类也】驱马牛羊百有余万全甲兵而还益封青三千户其明年匈奴入杀代郡太守友【集解徐广曰友者太守名也姓共也】入略鴈门千余人其明年匈奴大入代定襄上郡杀略汉数千人其明年元朔之五年春汉令车骑将军青将三万骑出高阙卫尉苏建为游击将军左内史李沮【集解文颖曰音俎】为强弩将军太仆公孙贺为骑将军代相李蔡为轻车将军皆领属车骑将军俱出朔方大行李息岸头侯张次公为将军出右北平咸击匈奴匈奴右贤王当卫青等兵以为汉兵不能至此饮醉汉兵夜至围右贤王右贤王惊夜逃独与其爱妾一人壮骑数百驰溃围北去汉轻骑校尉郭成等逐数百里不及得右贤裨王十余人【索隐贾逵云裨益也小颜云裨王小王也若裨将然音频移反】衆男女万五千余人畜数千百万於是引兵而还至塞天子使使者持大将军印即军中拜车骑将军青为大将军诸将皆以兵属大将军大将军立号而归【索隐案谓立大将军之号令而归也】天子曰大将军青躬率戎士师大捷获匈奴王十有余人益封青六千户而封青子伉【正义口浪反】为宜春侯青子不疑为阴安侯青子登为发干侯青固谢曰臣幸得待罪行间赖陛下神灵军大捷皆诸校尉力战之功也陛下幸已益封臣青臣青子在襁褓中【正义襁长尺二寸阔八寸以约小儿於背褓小儿被也】未有勤劳上幸列地封为三侯非臣待罪行间所以劝士力战之意也伉等三人何敢受封天子曰我非忘诸校尉功也今固且图之乃诏御史曰护军都尉公孙敖三从大将军击匈奴常护军傅校获王【索隐顾秘监云傅领也五百人谓之校小颜云傅音附言敖总护诸军每附部校以致克捷而获王也】以千五百户封敖为合骑侯【索隐案非邑地因战功为号谓军合骠骑故云合骑若冠军从骠然也】都尉韩说从大将军出窳浑【集解徐广曰窳浑在朔方音庾索隐服虔云窳浑塞名汉书作寘浑寘音田】至匈奴右贤王庭为麾下搏战获王【索隐搏音博搏擊也小颜同今史记汉书本多作传传犹转也】以千三百户封说为龙额侯骑将军公孙贺从大将军获王以千三百户封贺为南窳侯【集解徐广曰窳宜作侏音匹孝反索隐韦昭云县名或作窖字林云大下卯与穴下卯竝音匹孝反】轻车将军李蔡再从大将军获王以千

六百户封蔡为乐安侯校尉李朔校尉赵不虞校尉公孙戎奴各三从大将军获王以千三百户封朔为涉轺侯以千三百户封不虞为随成侯以千三百户封戎奴为从平侯将军李沮李息及校尉豆如意有功赐爵关内侯食邑各三百户其秋匈奴入代杀都尉朱英其明年春大将军青出定襄合骑侯敖为中将军太仆贺为左将军翕侯赵信为前将军卫尉苏建为右将军郎中令李广为後将军左内史李沮为强弩将军咸属大将军斩首数千级而还月余悉复出定襄击匈奴斩首虏万余人右将军建前将军信并军三千余骑独逢单于兵与战一日余汉兵且尽前将军故胡人降为翕侯见急匈奴诱之遂将其余骑可八百犇降单于右将军苏建尽亡其军独以身得亡去自归大将军大将军问其罪正閼【集解张晏曰正军正也閼名也】长史安【正义律都军官史一人也】议郎周霸等【集解徐广曰儒生索隐案郊祀志议封禅有周霸故知儒生也】建当云何霸曰自大将军出未尝斩裨将今建弃军可斩以明将军之威閼安曰不然兵法小敌之坚大敌之禽也今建以数千当单于数万力战一日余士尽不敢有二心自归自归而斩之是示後无反意也不当斩大将军曰青幸得以肺腑待罪行间不患无威而霸说我以明威甚失臣意且使臣职虽当斩将以臣之尊宠而不敢擅专诛於境外而具归天子天子自裁之於是以见为人臣不敢专权不亦可乎军吏皆曰善遂囚建诣行在所【集解蔡邕曰天子自谓所居曰行在所言今虽在京师行所至耳巡狩天下所奏事处皆为宫在长安则曰奏长安宫在泰山则曰奉高宫唯当时所在】入塞罢兵是岁也大将军姊子霍去病【集解徐广曰姊即少儿也】年十八幸为天子侍中善骑射再从大将军大将军受诏与壮士为剽姚校尉【索隐服?音瓢摇大顔案荀悦汉纪作票鹞票鹞劲疾之貌也票音频妙反鹞音弋召反】与轻勇骑八百直弃大军数百里赴利斩捕首虏过当【索隐案小顔云计其所将之人数则捕首虏为多过於所当也一云汉军亡失者少而杀获匈奴数多故曰过当也】於是天子曰剽姚校尉去病斩首虏二千二十八级及相国当户斩单于大父行籍若侯产【集解张晏曰籍若胡侯索隐行音胡浪反谓籍若侯是匈奴祖之行第产即大父之名】生捕季父罗姑比【索隐案顾氏云罗姑比单于季父名小顔云比频也案下既云再无容更言频也】再冠军以千六百户封去病为冠军侯上谷太守郝贤四从大将军捕斩首虏二千余人以千一百户封贤为衆利侯是岁失两将军军亡翕侯军功不多故大将军不益封右将军建至天子不诛赦其罪赎为庶人大将军既还赐千金是时王夫人方幸於上甯乘说大将军曰将军所以功未甚多身食万户三子皆为侯者徒以皇后故也今王夫人幸而宗族未富贵愿将军奉所赐千金为王夫人亲壽大将军乃以五百金为壽天子闻之问大将军大将军以实言上乃拜甯乘为东海都尉张骞从大将军以尝使大夏【正义今案大夏国在大宛之西】留匈奴中久导军知善水草处军得以无饥渴因前使絶国功封骞博望侯冠军侯去病既侯三岁元狩二年春以冠军侯去病为骠骑将军【集解徐广曰骠一亦作剽正义汉书云霍去病征匈奴有絶幕之勲始置骠骑将军位在三司品秩同大将军说文云骠骑黄马鬣白色一曰髦尾】将万骑出陇西有功天子曰骠骑将军率戎士踰乌盭【集解駰案汉书音义曰音戾山名也】讨遼濮【索隐遼音速濮音卜崔浩云匈奴部落名案下有遼濮王则是国名也】涉狐奴【集解晋灼曰水名也】历五王国輜重人衆慑懼者弗取【集解文穎曰恐惧也索隐案说文云慑懼失气也刘氏云慑式涉反懼之涉反】冀获单于子【集解徐广曰一作与】转战六日过焉支山千有余里合短兵杀折兰王斩卢胡王【集解张晏曰折兰卢胡国名也杀者杀之而已斩者获其首正义顔师古云折兰匈奴中姓也今鲜卑有其兰姓者即其种】诛全甲【集解徐广曰全一作金正义全甲谓具足不失落也】执浑

邪王子及相国都尉首虏八千余级收休屠祭天金人【集解如淳曰祭天为主索隐案张晏云佛徒祠金人也屠音储】益封去病二千户其夏骠骑将军与合骑侯敖俱出北地异道博望侯张骞郎中令李广俱出右北平异道皆击匈奴郎中令将四千骑先至博望侯将万骑在後至匈奴左贤王将数万骑围郎中令郎中令与战二日死者过半所杀亦过当博望侯至匈奴兵引去博望侯坐行留当斩赎为庶人而骠骑将军出北地已遂深入与合骑侯失道不相得骠骑将军踰居延至祁连山捕首虏甚多天子曰骠骑将军踰居延【集解张晏曰水名也】遂过小月氏【索隐韦昭氏音支西域传大月氏本居敦煌祁连间余衆保南山遂号小月氏】攻祁连山【索隐小顔云即天山也匈奴谓天为祁连案西河旧事谓白山即天山祈连恐非也】得酋涂王【集解张晏曰胡王也索隐酋音才由反涂音徒汉书云扬武乎𦍋得单于单桓酋涂王此文省也】以衆降者二千五百人斩首虏三万二百级获五王五王母单于阏氏王子五十九人相国将军当户都尉六十三人师大率【正义音律也】减什三【索隐案汉书作减什七小顔云破匈奴之师十减其七一云汉兵亡失之数下皆类此案一说为是也】益封去病五千户赐校尉从至小月氏爵左庶长鹰击司马破奴再从骠骑将军斩遼濮王【正义速卜二音】捕稽且王【索隐且音子余反】千骑将得王王母各一人【索隐汉书作右千骑将王然则此云千骑将是汉之将属赵破奴得匈奴王及王母也或云右千骑将即匈奴王号也】王子以下四十一人捕虏三千三百三十人前行捕虏千四百人以千五百户封破奴为从骠侯【集解张晏曰从骠骑将军有功因以为号】校尉句王高不识【集解徐广曰句音勾匈奴以为号索隐案二人竝匈奴人也】从骠骑将军捕呼于屠王【索隐案三字共为王号】王子以下十一人捕虏千七百六十八人以千一百户封不识为宜冠侯【正义孔文祥云从冠军将军战故宜冠从骠之类者也】校尉仆多有功封为煇渠侯【索隐案汉表作仆朋疑多是误煇音晖也】合骑侯敖坐行留不与骠骑会当斩赎为庶人诸宿将所将士马兵亦不如骠骑骠骑所将常选【索隐选音宣变反谓骠骑常选择取精兵】然亦敢深入常与壮骑先其大将军军亦有天幸未尝困絶也然而诸宿将常坐留落不遇【索隐案谓迟留零落不遇合也】由此骠骑日以亲贵比大将军其秋单于怒浑邪王居西方数为汉所破亡数万人以骠骑之兵也单于怒欲召诛浑邪王浑邪王与休屠王等谋欲降汉使人先遣使向边境要遮汉人【索隐案谓先於边境要侯汉人言其欲降】令报天子要边是时大行李息将城河上得浑邪王使即驰传以闻天子闻之於是恐其以诈降而袭边乃令骠骑将军将兵往迎之骠骑既渡河与浑邪王衆相望浑邪王裨将见汉军而多欲不降者颇遁去骠骑乃驰入与浑邪王相见斩其欲亡者八千人遂独遣浑邪王乘传先诣行在所尽将其衆渡河降者数万号称十万既至长安天子所以赏赐者数十巨万封浑邪王万户为漯陰侯【索隐漯音他合反案地理志县名在平原】封其裨王呼毒尼【集解文穎曰胡王名】为下摩侯鹰庇为煇渠侯【集解徐广曰一云篇訾索隐汉书鷹作雁庇音必二反又音正履反案汉书功臣表元狩二年以煇渠封仆朋至三年又封鷹庇其地俱属鲁阳未详所以正义煇渠表作顺梁】禽梨为河綦侯【集解徐广曰禽一作鸟索隐案表作鸟梨】大当户铜离【集解徐广曰一作稠离也索隐徐注与汉书功臣表同此文云铜汉书云调字又异也】为常乐侯於是天子嘉骠骑之功曰骠骑将军去病率师攻匈奴西域王浑邪王及厥衆萌咸相犇率以军粮接食并将控弦万有余人诛獐狝【集解晋灼曰獐音欺譙反索隐说文獐作𧈧行疾貌悍音胡旦反】获首虏八千余级降异国之王三十二人战士不离伤十万之衆咸怀集服仍与之劳爰及河塞【正义言匈奴右地浑邪王降而塞外竝河诸郡之民无忧患也】庶

几无患幸既永绥矣以千七百户益封骠骑将军减陇西北平上郡戍卒之半以宽天下之繇居顷之乃分徙降者边五郡故塞外【正义五郡谓陇西北地上郡朔方云中竝是故塞外又在北海西南】而皆在河南因其故俗为属国【正义以降来之民分置五郡各依本国之俗而属於汉故言属国也】其明年匈奴入右北平定襄杀略汉千余人其明年天子与诸将议曰翕侯赵信为单于画计常以为汉兵不能度幕轻留【索隐案幕即沙幕古字少耳轻留者谓匈奴以汉军不能至故轻易留而不去也】今大发士卒其势必得所欲是岁元狩四年也元狩四年春上令大将军青骠骑将军去病将各五万骑步兵转者踵军数十万【正义言转军之士及步兵接後又数十万人】而敢力战深入之士皆属骠骑骠骑始为出定襄当单于捕虏言单于东乃更令骠骑出代郡令大将军出定襄郎中令为前将军大仆为左将军主爵赵食其为右将军平阳侯襄为後将军皆属大将军兵即度幕人马凡五万骑与骠骑等咸击匈奴单于赵信为单于谋曰汉兵既度幕人马罢匈奴可坐收虏耳乃悉远北其辎重皆以精兵待幕北而适值大将军军出塞千余里见单于兵陈而待於是大将军令武刚车【集解駰案孙吴兵法曰有巾有盖谓之武刚车也】自环为营而纵五千骑往当匈奴匈奴亦纵可万骑会日且入大风起砂砾击面两军不相见汉益纵左右翼绕单于单于视汉兵多而士马尚强战而匈奴不利薄暮单于遂乘六羸壮骑可数百直冒汉围西北驰去时已昏汉匈奴相纷拏【正义三苍解诂云纷拏相牵也】杀伤大当【索隐以言所杀伤大略相当】汉军左校捕虏言单于未昏而去汉军因发轻骑夜追之大将军军因随其後匈奴兵亦散走迟明【正义迟音值】行二百余里【集解徐广曰迟一作黎索隐迟音值迟者待也待天欲明也汉书作会明诸本多作黎明邹氏云黎迟也然黎黑也候天将明而犹黑也】不得单于颇捕斩首虏万余级遂至寘颜山赵信城【集解徐广曰寘音田】得匈奴积粟食军军留一日而还悉烧其城余粟以归大将军之与单于会也而前将军广右将军食其军别从东道或失道後击单于大将军引还过幕南乃得前将军右将军大将军欲使使归报令长史簿责前将军广广自杀右将军至下吏赎为庶人大将军军入塞凡斩捕首虏万九千级是时匈奴衆失单于十余日右谷蠡王闻之自立为单于【索隐谷音禄蠡音黎又音离】单于後得其衆右王乃去单于之号骠骑将军亦将五万骑车重与大将军军等而无裨将悉以李敢等为大校当裨将出代右北平千余里直左方兵所斩捕功已多大将军军既还天子曰骠骑将军去病率师躬将所获荤粥之士【集解徐广曰粥一作允駰案应劭曰所降士有材力者】约轻齎絶大幕涉获章渠【集解徐广曰获一作护索隐小颜云涉谓涉水也章渠单于之近臣谓涉水而破获之汉书云涉获单于章渠也】以诛比车耆【集解晋灼曰王号也索隐比音必耳反】转击左大将【索隐案汉书名双也】斩获旗鼓历涉离侯【索隐汉书作度离侯小颜云山名历度也】济弓闾【集解晋灼曰水名也索隐包恺弓音穹亦如字读】获屯头王【集解駰案汉书音义曰胡王号也】韩王等三人【集解徐广曰王一作藉索隐李奇云皆匈奴王号】将军相国当户都尉八十三人封狼居胥山禪於姑衍【正义积土为坛於山上封以祭天也祭地曰禪】登临翰海【集解张晏曰登海边山以望海也索隐案崔浩云北海名羣鸟之所解羽故云翰海广志在沙漠北】执卤获丑七万有四百四十三级师率减什三取食於敌逴行殊远而粮不絶【索隐逴与卓同卓远也】以五千八百户益封骠骑将军右北平太守路博德属骠骑将军会与城【正义与音余】不失期从至橐余山【索隐橐余音桃徒】斩首捕虏二千七百级以千六百户封博德为符离侯北地都尉邢山【集解徐广曰一作卫山】从骠骑将军获王以千二百户封山为义阳侯故归义因淳王复陆支楼专王伊即軒皆从

骠骑将军有功【索隐刘氏复音伏小顔音芳福反汉书专作剡竝音专小顔音之充反軒音居言反】以千三百户封复陆支为壮侯以千八百户封伊即軒为衆利侯从骠侯破奴昌武侯安稽【集解徐广曰姓赵故匈奴王】从骠骑有功益封各三百户校尉敢得旗鼓为关内侯食邑二百户【索隐敢李广子也】校尉自为爵大庶长【索隐案徐自为也】军吏卒为官赏赐甚多而大将军不得益封军吏卒皆无封侯者两军之出塞塞閼官及私马凡十四万匹而复入塞者不满三万匹乃益置大司马位大将军骠骑将军皆为大司马【集解如淳曰大将军骠骑将军皆有大司马之号也索隐案如淳云本无大司马今新置耳案前谓太尉其官又省今武帝始置此位卫将军霍骠骑皆加此官】定令令骠骑将军秩禄与大将军等自是之後大将军青日退而骠骑日益贵举大将军故人门下多去事骠骑辄得官爵唯任安不肯骠骑将军为人少言不泄【索隐案孔文祥云谓质重少言胆气在中也周仁陰重不泄其行亦同也】有气敢任【索隐谓果敢任气也】天子尝欲教之孙吴兵法对曰顾方略何如耳不至学古兵法天子为治第令骠骑视之对曰匈奴未灭无以家为也由此上益重爱之然少而侍中贵不省士其从军天子为遣太官齎数十乘既还重车余弃粱肉而士有饥者其在塞外卒乏粮或不能自振而骠骑尚穿域蹋鞠【集解徐广曰穿地为营域索隐鞠戏以皮为之中实以毛蹙蹋为戏也刘向别录云蹋鞠兵势所以陈武事知有材也三苍云鞠毛可蹋以毛为戏故云鞠戏鞠音巨六反正义按蹙鞠书有域说篇即今之打球也黄帝所作起战国时程武士知其材力也若讲武】事多此类大将军为人仁善退让以和柔自媚於上然天下未有称也骠骑将军自四年军後三年元狩六年而卒天子悼之发属国玄甲【正义属国即上分置边五郡者也玄甲铁甲也】军陈自长安至茂陵为冢像祁连山【索隐案崔浩云去病破昆邪於此山故令为冢象之以旌功也姚氏案冢在茂陵东北与卫青冢竝西者是青东者是去病冢上有豎石前有石马相对又有石人也】諡之并武与广地曰景桓侯【集解苏林曰景武諡也桓广地諡也张晏曰諡法布义行刚曰景辟土服远曰桓索隐案景桓两諡也布义行刚是武諡也辟土服远是广地之諡也以去病平生有武艺及广边地之功故云諡之并武与广地曰景桓也】子嬪代侯【索隐嬪音市战反】嬪少字子侯上爱之幸其壮而将之居六岁元封元年嬪卒諡哀侯无子絶国除自骠骑将军死後大将军长子宜春侯伉坐法失侯後五岁伉弟二人陰安侯不疑及发干侯登皆坐酎金失侯失侯後二岁冠军侯国除其後四年大将军青卒【集解徐广曰元封五年】諡为烈侯子伉代为长平侯自大军围单于之後十四年而卒竟不复击匈奴者以汉马少而方南诛两越东伐朝鲜擊羌西南夷以故久不伐胡大将军以其得尚平阳公主【正义案汉书云平阳侯曹壽有恶疾就国乃诏青尚平阳公主如淳云本阳信长公主为平阳侯所尚故称平阳公主云】故长平侯伉代侯六岁坐法失侯

左右两大将军及诸裨将名最【索隐谓凡计也】大将军青凡七出击匈奴斩捕首虏五万余级一与单于战收河南地遂置朔方郡再益封凡万一千八百户封三子为侯侯千三百户并之万五千七百户其校尉裨将以从大将军侯者九人其裨将及校尉已为将者十四人【索隐案汉书云为特将者十五人盖通李广也此李广一人自有传者汉书则七人自有传八人附见七人谓李广张骞公孙贺李蔡曹襄韩说苏建也】为裨将者曰李广自有传无传者曰将军公孙贺贺义渠人【正义今庆州本义渠戎国也地理志云北义渠道也】其先胡种贺父浑邪景帝时为平曲侯【集解徐广曰为陇西太守】坐法失侯贺武帝为太子时舍人

武帝立八岁以太仆为轻车将军军马邑後四岁以轻车将军出云中後五岁以骑将军从大将军有功封为南郿侯後一岁以左将军再从大将军出定襄无功後四岁以坐酎金失侯後八岁【集解徐广曰元鼎六年】以浮沮将军出五原【索隐沮音子余反】二千余里无功後八岁【集解徐广曰太初二年】以太仆为丞相封葛绎侯贺七为将军出击匈奴无大功而再侯为丞相坐子敬声与阳石公主奸【集解徐广曰阳石一云德邑】为巫蛊族灭无後将军李息郁郅人【集解服虔曰郅音室索隐小顔音质案北地县名也正义之栗反今庆州弘化县是】事景帝至武帝立八岁为材官将军军马邑後六岁为将军出代後三岁为将军从大将军出朔方皆无功凡三为将军其後常为大行

将军公孙敖义渠人以郎事武帝武帝立十二岁为骠骑将军出代亡卒七千人当斩赎为庶人後五岁以校尉从大将军有功封为合骑侯後一岁以中将军从大将军再出定襄无功後二岁以将军出北地後骠骑期当斩赎为庶人後二岁以校尉从大将军无功後十四岁以因杆将军筑受降城【索隐杆音于】七岁复以因杆将军再出击匈奴至余吾【索隐余音余又音徐案水名在朔方】亡士卒多下吏当斩诈死亡居民间五六岁後发觉复系坐妻为巫蛊族凡四为将军出击匈奴一侯

将军李沮【索隐音俎豆之俎】云中人【正义今岚胜州也】事景帝武帝立十七岁以内史为强弩将军後一岁复为强弩将军将军李蔡成纪人也【正义秦州县也】事孝文帝景帝武帝以轻车将军从大将军有功封为乐安侯已为丞相坐法死将军张次公河东人以校尉从卫将军青有功封为岸头侯其後太后崩为将军军北军後一岁为将军从大将军再为将军坐法失侯次公父隆轻车武射也以善射景帝幸近之也

将军苏建杜陵人以校尉从卫将军青有功为平陵侯以将军筑朔方後四岁为游击将军从大将军出朔方後一岁以右将军再从大将军出定襄亡翕侯失军当斩赎为庶人其後为代郡太守卒家在大犹乡

将军赵信以匈奴相国降为翕侯武帝立十七岁为前将军与单于战败降匈奴

将军张骞以使通大夏还为校尉从大将军有功封为博望侯三岁为将军出右北平失期当斩赎为庶人其後使通乌孙为大行而卒家在汉中

将军赵食其祲人也【索隐县名在马翊祲音都活反又音丁外反祲音诩正义祲都海反雍州同官县本汉祲祲县也】武帝立二十二岁以主爵为右将军从大将军出定襄迷失道当斩赎为庶人

将军曹襄以平阳侯为後将军从大将军出定襄襄曹参孙也

将军韩说弓高侯庶孙也以校尉从大将军有功为龙?侯坐酎金失侯元鼎六年以待诏为横海将军击东越有功为按道侯以太初三年为游击将军屯於五原外列城为光禄勳掘蛊太

子宫卫太子杀之

将军郭昌云中人也以校尉从大将军元封四年以太中大夫为拔胡将军屯朔方还击昆明无功夺印将军荀彘太原广武人以御见【正义以善御求见也】侍中为校尉数从大将军以元封三年为左将军击朝鲜无功以捕楼船将军坐法死

最驃?将军去病凡六出击匈奴其四出以将军【集解徐广曰再出以剽姚校尉也】斩捕虏首十一万余级及浑邪王以衆降数万遂开河西酒泉之地【正义河谓陇右兰州之西河也谓凉肃等州汉书西域传云驃骑将军击破匈奴右地置酒泉郡後分置武威张掖炖煌等郡】西方益少胡寇四益封凡万五千一百户其校吏有功为侯者凡六人而後为将军二人

将军路博德平州人【正义汉书云西河平州按西河郡今汾州】以右北平太守从驃骑将军有功为符离侯驃骑死後博德以卫尉为伏波将军伐破南越益封其後坐法失侯为强弩都尉屯居延卒

将军赵破奴故九原人【正义今胜州】尝亡入匈奴已而归汉为驃骑将军司马出北地时有功封为从驃侯坐酎金失侯後一岁为匈河将军攻胡至匈河水无功後二岁【集解徐广曰元封二年】击虏楼兰王复封为浞野侯後六岁【集解徐广曰太初二年】为浚稽将军将二万骑击匈奴左贤王左贤王与战兵八万骑围破奴破奴生为虏所得遂没其军居匈奴中十岁复与其太子安国亡入汉【集解徐广曰以太初二年入匈奴天汉元年亡归涉四年】後坐巫蛊族

自卫氏兴大将军青首封其後枝属为五侯凡二十四岁而五侯尽夺卫氏无为侯者

太史公曰苏建语余曰吾尝责大将军至尊重而天下之贤大夫母称焉【索隐谓不为贤士大夫所称誉】愿将军观古名将所招选择贤者勉之哉大将军谢曰自魏其武安之厚宾客天子常切齿彼亲附士大夫招贤绌不肖者人主之柄也人臣奉法遵职而已何与招士【索隐与昔预】驃骑亦放此意其为将如此

【索隐述赞曰君子豹变贵贱何常青本奴虏忽总戎行姊配皇极身尚平阳宠荣斯僭取乱彝章剽姚继踵再静边方】

史记卷一百十一

史记卷一百一十一考证

卫将军驃骑列传人奴之生得无笞骂即足矣○【臣照】按费衮曰人奴之为一句生得无笞骂即足矣为一句生读如生乃与吟等为伍之生其说亦可通

以千一百户封建为平陵侯○汉表作一千户

斩轻锐之卒捕服听者三千七十一级○汉书作三千一十七级

益封青三千户○汉书作三千八百户

以千三百户封戎奴为从平侯○汉表从平一千一百户

议郎周霸等索隐案郊祀志议封禅有周霸故知儒生也○周霸议封禅见封禅书又儒林传云鲁周霸至胶西内史申公弟子也

诛全甲○凌稚隆曰按汉书霍去病合短兵鏖皋兰下杀折兰王斩卢胡王锐悍者诛全甲获丑执浑邪王子师古注全甲谓军中之甲不丧失也今史记於短兵下无鏖皋兰下一句於斩卢胡王下却言诛全甲殊不可解盖传写之误也徐广注曰全一作金因其误而注之耳

师大率减什三索隐案汉书作减什七小颜云破匈奴之师十减其七一云汉兵亡失之数下皆类此案一说为是也○茅瓚曰若如一说则是方叙骠骑之功而又计其损失之数也当依小颜所云

校尉仆多有功索隐案汉表作仆朋疑多是误○【臣照】按仆朋祇一见於汉表耳史汉骠骑传及建元以来侯者年表皆作仆多三人占从二人之言则是仆朋为误非仆多误也

常与壮骑先其大将军军亦有天幸未尝困绝也○按董份曰尝与壮骑先其大将军为句军亦有天幸承上文皆言骠骑也王右丞诗卫青不败由天幸则是以大将军别起为句矣不知太史公此传专右大将军而贬骠骑谓骠骑受上宠又有天幸所以不困绝而成功也右丞尚误况其他乎史记诚不易读也

仍与之劳○凌稚隆曰按仍与汉书作仍兴注重兴军旅之劳也

遑行殊远○【臣照】按遑汉书作卓隶辨曰祝睦後碑懿德遑优按卓古通遑楚辞哀时命处卓卓而日远兮卓一作遑

元封元年嬪卒○封禅书奉车子侯暴病一日死武帝立十二岁为骠骑将军○【臣照】按骠骑将军武帝特立此名以宠去病者本传元光五年公孙敖为骑将军此骠字盖衍

家在汉中○程一枝曰苏建家在大犹乡张骞家在汉中二家字一本作冢

遂开河西酒泉之地正义河谓陇右兰州之西河也谓凉肃等州○【臣照】按正义谓凉肃等州句谓字上疑脱酒泉二字

史记卷一百一十一考证

卷一百十二

钦定四库全书

史记卷一百十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

平津侯主父列传第五十二

丞相公孙弘者齐菑川国薛县人也【索隐案薛县本属鲁汉置菑川国後割入齐也正义表云菑川国文帝分齐置都剧括地志云故剧城在青州壽光县南三十一里故薛城在徐州滕县界地理志云薛县属鲁国按薛与剧隔兗州及太山未详公孙弘墓又在青州北鲁县西二十里也】字季少时为薛狱吏有臯免家贫牧豕海上年四十余乃学春秋杂说养後母孝谨建元元年天子初即位招贤良文学之士是时弘年六十徵以贤良为博士使匈奴还报不合上意上怒以为不能弘廼病免归元光五年有诏徵文学菑川国复推上公孙弘弘让谢国人曰臣已尝西应命以不能罢归愿更推选国人固推弘弘至太常太常令所徵儒士各对策百余人弘第居下策奏天子擢弘对为第一召入见状貌甚丽拜为博士是时通西南夷道置郡巴蜀民苦之诏使弘视之还奏事盛毁西南夷无所用上不聽弘为人恢奇多闻常称以为人主病不广大人臣病不俭节弘为布被食不重肉後母死服丧三年每朝会议开陈其端令人主自择不肯面折庭争於是天子察其行敦厚辩论有余习文法吏事而又缘饰以儒术上大说之【索隐谓以儒术饰文法如衣服之有领缘以为饰也】二岁中【集解徐广曰一云一岁】至左内史弘奏事有不可不庭辩之尝与主爵都尉汲黯请间汲黯先发之弘推其後天子常说所言皆听以此日益亲贵常与公卿约议至上前皆倍其约以顺上旨汲黯庭诘弘曰齐人多诈而无情实始与臣等建此议今皆倍之不忠上问弘弘谢曰夫知臣者以臣为忠不知臣者以臣为不忠上然弘言左右幸臣每毁弘上益厚遇之元朔三年张敖免以弘为御史大夫是时通西南夷东置沧海北筑朔方之郡弘数諫以为罢敝中国以奉无用之地愿罢之於是天子乃使朱买臣等难弘置朔方之便发十策弘不得一【集解韦昭曰以弘之才非不能得一也以为不可不敢逆上耳正义顔师古曰言其利害十条弘无以应】弘廼谢曰山东鄙人不知其便若是愿罢西南夷沧海而专奉朔方上乃许之汲黯曰弘位在三公奉禄甚多然为布被此诈也上问弘弘谢曰有之夫九卿与臣善者无过黯然今日庭诘弘诚中弘之病夫以三公为布被诚饰诈欲以钓名且臣闻管仲相齐有三归侈拟於君桓公以霸亦上僭於君晏婴相景公食不重肉妾不衣丝齐国亦治此下比於民【索隐比音鼻比者近也小顔音

比方之比】今臣弘位为御史大夫而为布被自九卿以下至於小吏无差诚如汲黯言且无汲黯忠陛下安得闻此言天子以为谦让愈益厚之卒以弘为丞相封平津侯【集解徐广曰大臣表曰元朔五年十一月乙丑公孙弘为丞相功臣表曰元朔三年十一月乙丑封平津侯駟案汉书高成之平津乡也索隐案汉书曰汉兴皆以列侯为丞相弘本无爵乃诏封弘高成之平津乡六百五十户为平津侯丞相封侯自弘始也】弘为人意忌外宽内深【索隐谓弘外宽内深意多有忌害也】诸尝与弘有郤者虽详与善阴报其祸杀主父偃徙董仲舒於胶西皆弘之力也食一肉脱粟之饭【索隐案一肉言不兼味也脱粟才脱谷而已言不精凿也】故人所善宾客仰衣食弘奉禄皆以给之家无所余士亦以此贤之淮南衡山谋反治党与方急弘病甚自以为无功而封位至丞相宜佐明主填抚国家使人由臣子之道今诸侯有畔逆之计此皆宰相奉职不称恐窃病死无以塞责【索隐案人臣委质於君死生由君臣若一朝病死是窃死也】乃上书曰臣闻天下之通道五所以行之者三【索隐案此语出子思子今见礼中庸篇】曰君臣父子兄弟夫妇长幼之序此五者天下之通道也智仁勇此三者天下之通德所以行之者也故曰力行近乎仁好问近乎智知耻近乎勇知此三者则知所以自治知所以自治然後知所以治人天下未有不能自治而能治人者也此百世不易之道也今陛下躬行大孝鉴三王建周道兼文武厉贤予禄【集解徐广曰厉一作广也】量能授官今臣弘罢弩之质无汗马之劳陛下过意擢臣弘卒伍之中封为列侯致位三公臣弘行能不足以称素有负薪之疾恐先狗马填沟壑终无以报德塞责愿归侯印乞骸骨避贤者路天子报曰古者赏有功褒有德守成尚文遭遇右武【索隐小颜云右亦上也言遭遇乱时则上武也】未有易此者也朕宿昔庶几获承尊位惧不能宁惟所与共为治者君宜知之盖君子善善恶恶君宜知之君若谨行常在朕躬君不幸罹霜露之病何恙不已【集解駟案汉书音义曰何恙喻小疾不以时愈索隐恙忧也以言罹霜露寒凉之疾轻何忧於病不止礼曰疾止复初也】廼上书归侯乞骸骨是章朕之不德也今事少间君其省思虑一精神辅以医药因赐告牛酒杂帛居数月病有瘳视事元狩二年弘病竟以丞相终【集解駟案汉书曰年八十索隐案弘凡为御史丞相六岁年八十终】子度嗣为平津侯度为山阳太守十余岁坐法失侯【索隐汉书云坐不遣钜野令史成诣公车论为城旦元始中诏复弘後为关内侯也】

主父偃者齐临菑人也学长短纵横之术晚乃学易春秋百家言游齐诸生间莫能厚遇也齐诸儒生相与排摈不容於齐家贫假贷无所得廼北游燕赵中山皆莫能厚遇为客甚困孝武元光元年中以为诸侯莫足游者乃西入关见卫将军卫将军数言上上不召资用乏留久诸公宾客多厌之乃上书阙下朝奏暮召入见所言九事其八事为律令一事谏伐匈奴其辞曰臣闻明主不恶切谏以博观忠臣不敢避重诛以直谏是故事无遗策而功流万世今臣不敢隐忠避死以效愚计愿陛下幸赦而少察之司马法曰国虽大好战必亡天下虽平忘战必危天下既平天子大凯【集解应劭曰大凯周礼还师振旅之乐】春蒐秋猕诸侯春振旅秋治兵所以不忘战也【集解宋均曰春秋少阳少阴气弱未全须人功而後用土庶法之教而後成宗仁本义天子诸侯必春秋讲武简阅车徒以顺时气不忘战也】且夫怒者逆德也兵者凶器也争者末节也古之人君一怒必伏尸流血故圣王重行之夫务战胜穷武事者未有不悔者也昔秦皇帝任战胜之威蚕食天下并吞战国海内为一功齐三代务胜不休欲攻匈奴李斯谏曰不可夫匈奴无城郭之居委积之守迁徙鸟举难得而制也轻兵深入粮食必绝踵粮以行重不及事得其地不足以为利也遇其民不可役而守也胜必杀之非民父母也靡敝

中国快心匈奴非长策也【索隐靡音靡敝犹凋敝也】秦皇帝不听遂使蒙恬将兵攻胡辟地千里以河为境地固泽【集解徐广曰一作斥】咸卤【集解瓚曰其地多水泽又有卤】不生五谷然後发天下丁男以守北河暴兵露师十有余年死者不可胜数终不能踰河而北是岂人衆不足兵草不备哉其势不可也又使天下蜚刍挽粟【集解文颖曰转刍谷就战是也】起於东睡【集解徐广曰睡在东莱音缁索隐睡音逐瑞反注音缁其音同也】琅邪负海之郡转输北河率三十鍾而致一石男子疾耕不足於粮饷女子纺绩不足於帷幕百姓靡敝孤寡老弱不能相养道路死者相望盖天下始畔秦也及至高皇帝定天下略地於边闻匈奴聚於代谷之外而欲擊之御史成进谏曰不可夫匈奴之性兽聚而鸟散从之如搏影今以陛下盛德攻匈奴臣窃危之高帝不听遂北至於代谷果有平城之围高皇帝盖悔之甚乃使刘敬往结和亲之约然後天下忘干戈之事故兵法曰兴师十万日费千金夫秦常积衆暴兵数十万人虽有覆军杀将系虏单于之功亦适足以结怨深讎不足以偿天下之费夫上虚府库下敝百姓甘心於外国非完事也夫匈奴难得而制非一世也行盗侵驱所以为业也天性固然上及虞夏殷周固弗程督禽兽畜之不属为人夫上不观虞夏殷周之统而下修近世之失此臣之所大忧百姓之所疾苦也且夫兵久则变生事苦则虑易乃使边境之民靡敝愁苦而有离心将吏相疑而外市【集解张晏曰与外国交求利己若章邯之比】故尉佗章邯得以成其私也夫秦政之所以不行者权分乎二子此得失之效也故周书曰安危在出令存亡在所用愿陛下详察之少加意而熟虑焉是时赵人徐乐齐人严安俱上书言世务各一事【索隐乐音岳严本姓庄明帝讳後并改姓严也安及徐乐并拜郎中乐後为中大夫】徐乐曰臣闻天下之患在於土崩不在於瓦解古今一也何谓土崩秦之末世是也陈涉无千乘之尊尺土之地身非王公大人名族之後无乡曲之誉非有孔墨曾子之贤陶朱猗顿之富也然起穷巷奋棘矜【集解駟案务音勤】偏袒大呼而天下从风此其故何也由民困而主不恤下怨而上不知也俗已乱而政不修此三者陈涉之所以为资也是之谓土崩故曰天下之患在於土崩何谓瓦解吴楚齐赵之兵是也七国谋为大逆号皆称万乘之君带甲数十万威足以严其境内财足以劝其士民然不能西攘尺寸之地而身为禽於中原者此其故何也非权轻於匹夫而兵弱於陈涉也当是之时先帝之德泽未衰而安土乐俗之民衆故诸侯无境外之助此之谓瓦解故曰天下之患不在瓦解由是观之天下诚有土崩之势虽布衣穷处之士或首恶而危海内陈涉是也况三晋之君或存乎天下虽未有大治也诚能无土崩之势虽有强国劲兵不得旋踵而身为禽矣吴楚齐赵是也况羣臣百姓能为乱乎哉此二体者安危之明要也贤主所留意而深察也间者关东五谷不登年岁未复民多穷困重之以边境之事推数循理而观之则民且有不安其处者矣不安故易动易动者土崩之势也故贤主独观万化之原明於安危之机修之庙堂之上而销未形之患其要期使天下无土崩之势而已矣故虽有强国劲兵陛下逐走兽射蜚鸟弘游燕之囿淫纵恣之观极驰骋之乐自若也金石竹之声不絶於耳帷帐之私俳优侏儒之笑不乏於前而天下无宿忧名何必汤武俗何必成康虽然臣窃以为陛下天然之圣寬仁之资而诚以天下为务则汤武之名不难侔而成康之俗可复兴也此二体者立然後处尊安之实扬名广誉於当世亲天下而服四夷余恩遗德为数世隆南面负宸摄袂而揖王公此陛下之所服也臣闻图王不成其敝足以安安则陛下何求而不得何为而不成何征而不服乎哉严安上书曰臣闻周有天下其治三百余岁成康其隆也刑错四十余年而不用及其衰也亦三百余岁故五伯更起五伯者常佐天子兴利除害诛暴禁邪匡正海内以尊天子五伯既没贤圣莫续天子孤弱号令不行诸侯恣行强陵弱衆暴寡田常

篡齐六卿分晋并为战国此民之始苦也於是强国务攻弱国备守合从连横驰车击毂介胄生虬蝨民无所告愬及至秦王蚕食天下并吞战国称号曰皇帝一海内之政坏诸侯之城销其兵铸以为锺虡【索隐虡音巨邹氏本作鑠音同】示不复用元元黎民得免於战国逢明天子人人自以为更生向使秦缓其刑罚薄赋歛省繇役贵仁义贱权利上笃厚下智巧【索隐上犹尚也贵也下谓以智巧为下也】变风易俗化於海内则世世必安矣秦不行是风而修其故俗为智巧权利者进笃厚忠信者退法严政峻谄谀者衆日闻其美意广心轶欲肆威海外乃使蒙恬将兵以北攻胡辟地进境戍於北河蜚刍挽粟以随其後又使尉佗屠睢【索隐案尉官也佗赵佗也音徒何反屠睢人姓名睢音虽】将楼船之士南攻百越使监禄【集解韦昭曰监御史名禄也】凿渠运粮深入越越人遁逃旷日持久粮食絶乏越人击之秦兵大败秦乃使尉佗将卒以戍越当是时秦祸北构於胡南桂於越宿兵无用之地进而不得退行十余年丁男被甲丁女转输苦不聊生自经於道树死者相望及秦皇帝崩天下大叛陈胜吴广举陈【索隐谓胜广举兵据陈举音如字或音据恐疎也下同】武臣张耳举赵项梁举吴田儋举齐景驹举郢周市举魏韩广举燕穷山通谷豪士并起不可胜载也然皆非公侯之後非长官之吏也无尺寸之势起闾巷杖棘矜应时而皆动不谋而俱起不约而同会壤长地进【集解张晏曰壤地进益也】至於霸王时教使然也秦贵为天子富有天下灭世絶祀者穷兵之祸也故周失之弱秦失之强不变之患也今欲招南夷朝夜郎降羌僰略濊州【集解如淳曰东夷也索隐僰音白北反又皮逼反濊州地名即古濊陌国也音紆废反】建城邑深入匈奴燔其茏城【索隐匈奴城名音龙燔音烦燔烧也】议者美之此人臣之利也非天下之长策也今中国无狗吠之惊而外累於远方之备靡敝国家非所以子民也行无穷之欲甘心快意结怨於匈奴非所以安边也祸结而不解兵休而复起近者愁苦远者惊骇非所以持久也今天下鍛甲砥劔桥箭累弦转输运粮未见休时此天下之所共忧也夫兵久而变起事烦而虑生今外郡之地或几千里列城数十形束壤制【集解服虔曰言所束在郡守土壤足以专民制苏林曰言其土地形势足以束制其民也索隐案谓地形及土壤皆束制在诸侯也】旁胁诸侯非公室之利也上观齐晋之所以亡者公室卑削六卿大盛也下观秦之所以灭者严法刻深欲大无穷也今郡守之权非特六卿之重也地几千里非特闾巷之资也甲兵器械非特棘矜之用也以遭万世之变则不可称讳也书奏天子天子召见三人谓曰公等皆安在何相见之晚也【集解徐广曰佗史记本皆不见严安此旁所纂者皆取汉书耳然汉书不宜乃容大异或写史记相承阙脱也索隐纂音撰】於是上乃拜主父偃徐乐严安为郎中数见上疏言事诏拜偃为谒者迁乐为中大夫一岁中四迁偃偃说上曰古者诸侯不过百里强弱之形易制今诸侯或连城数十地方千里缓则骄奢易为淫乱急则阻其强而合从以逆京师今以法割削之则逆节萌起前日黠错是也今诸侯子弟或十数而适嗣代立余虽骨肉无尺寸地封则仁孝之道不宣愿陛下令诸侯得推恩分子弟以地侯之彼人人喜得所愿上以德施实分其国不削而稍弱矣於是上从其计【集解徐广曰元朔二年始令诸侯王分封子弟也】又说上曰茂陵初立天下豪杰并兼之家乱衆之民皆可徙茂陵内实京师外销奸猾此所谓不诛而害除上又从其计尊立卫皇后及发燕王定国陰事偃有功焉大臣皆畏其口赂遗累千金人或说偃曰太横矣主父曰臣结发游学四十余年身不得遂亲不以为子昆弟不收宾客弃我我厄日久矣且丈夫生不五鼎食死即五鼎烹耳吾日暮途远故倒行暴施之【索隐按偃言吾日暮涂远恐赴前途不跌故须倒行而逆施乃可及耳今此本作暴暴者言已困久得申当须急暴行事以快意也暴者卒也急也】偃盛言朔方地肥饶外阻河蒙恬城之

以逐匈奴内省转输戍漕广中国灭胡之本也上览其说下公卿议皆言不便公孙弘曰秦时常发三十万衆筑北河终不可就已而弃之主父偃盛言其便上竟用主父计立朔方郡元朔二年主父言齐王内淫佚行僻上拜主父为齐相至齐遍召昆弟宾客散五百金予之数之曰始吾贫时昆弟不我衣食宾客不我内门今吾相齐诸君迎我或千里吾与诸君絶矣毋复入偃之门乃使人以王与姊姁事动王王以为终不得脱罪恐效燕王论死乃自杀有司以闻主父始为布衣时尝游燕赵及其贵发燕事赵王恐其为国患欲上书言其陰事为偃居中不敢发及为齐相出关即使人上书告言主父偃受诸侯金以故诸侯子弟多以得封者及齐王自杀上闻大怒以为主父劫其王令自杀乃徵下吏治主父服受诸侯金实不劫王令自杀上欲勿诛是时公孙弘为御史大夫乃言曰齐王自杀无後国除为郡入汉主父偃本首恶陛下不诛主父偃无以谢天下乃遂族主父偃主父偃方贵幸时宾客以千数及其族死无一人收者唯独涑孔车【集解徐广曰孔车涑人也沛有涑县索隐涑户交反车尺奢反】收葬之天子後闻之以为孔车长者也太史公曰公孙弘行义虽修然亦遇时汉兴八十余年矣【集解徐广曰汉初至元朔二年八十年也】上方鄉文学招俊乂以广儒墨弘为举首主父偃当路诸公皆誉之及名败身诛士争言其恶悲夫

太皇太后诏大司徒大司空【集解徐广曰此诏是平帝元始中王元后诏後人写此及班固所称以续卷後索隐案广所云则又非褚先生所录也】盖闻治国之道富民为始富民之要在於节俭孝经曰安上治民莫善於礼礼与奢也宁俭昔者管仲相齐桓霸诸侯有九合一匡之功而仲尼谓之不知礼以其奢泰侈拟於君故也夏禹卑宫室恶衣服後圣不循由此言之始之盛也德优矣莫高於俭俭化俗民则尊卑之序得而骨肉之恩亲争讼之原息斯乃家给人足刑错之本也欤可不务哉夫三公者百寮之率万民之表也未有树直表而得曲影者也孔子不云乎子率以正孰敢不正举善而教不能则劝维汉兴以来股肱宰臣身行俭约轻财重义较然着明【索隐较音角较明也】未有若故丞相平津侯公孙弘者也位在丞相而为布被脱粟之饭不过一肉故人所善宾客皆分奉禄以给之无有所余诚内自克约而外从制汲黯诘之乃闻于朝此可谓减於制度【集解应劭曰礼贵有常尊衣服有常品】而可施行者也德优则行否则止与内奢泰而外为诡服以钓虚誉者殊科以病乞骸骨孝武皇帝即制曰赏有功褒有德善善恶恶君宜知之其省思虑存精神辅以医药赐告治病牛酒杂帛居数月有瘳视事至元狩二年竟以善终于相位夫知臣莫若君此其效也弘子度嗣爵後为山阳太守坐法失侯夫表德章义所以率俗厉化圣王之制不易之道也其赐弘後子孙之次当为後者爵关内侯食邑三百户徵诣公车上名尚书朕亲临拜焉

班固称曰公孙弘卜式儿寛皆以鸿渐之翼困於燕雀【集解李奇曰渐进也鸿一举而进千里者羽翼之材也弘等皆以大材初为俗所薄若燕雀不知鸿鹄之志也索隐案谓公孙等未遇为时所轻若飞鸿之未渐受困於燕雀也】远迹羊豕之间【集解韦昭曰远迹谓耕牧在於远方索隐案公孙牧豕卜式牧羊也】非遇其时焉能致此位乎是时汉兴六十余载海内乂安【索隐乂理也】府库充实而四夷未宾制度多阙上方欲用文武求之如弗及始以蒲轮迎枚生【索隐案谓枚乘也汉始诏申公亦以蒲轮谓以蒲裹车轮恐伤草木也且蒲是草之美者故礼有蒲璧盖或画绩以为荣饰也】见主父而叹息【索隐案上文严安等上书上曰公等安在何相见之晚者是也】羣臣慕向异人并出卜式试於刍牧弘羊擢於贾豎卫青

奮於奴仆日磧出於降虜斯亦曩時版筑飯牛之朋矣漢之得人於茲為盛儒雅則公孫弘董仲舒兒寬篤行則石建石慶質直則汲黯卜式推賢則韓安國鄭當時定令則趙禹張湯文章則司馬遷相如滑稽則東方朔枚臯應對則嚴助朱買臣歷數則唐都落下閤協律則李延年運籌則桑弘羊奉使則張騫蘇武將帥則衛青霍去病受遺則霍光金日磧其餘不可勝紀是以興造功業制度遺文後世莫及孝宣承統纂修洪業亦講論六藝招選茂異而蕭望之梁丘賀夏侯勝韋玄成嚴彭祖尹更始以儒術進劉向王褒以文章顯將相則張安世趙充國魏相邴吉于定國杜延年治民則黃霸王成龚遂鄭弘邵信臣韓延壽尹翁歸趙廣漢之屬皆有功迹見述於後累其名臣亦其次也【索隱述贊曰平津巨儒晚年始遇外示寬儉內懷嫉妬寵備榮爵身受肺腑主父推恩觀時設度生食五鼎死非時蠹】

史記卷一百十二

史記卷一百一十二考證

平津侯主父列傳二歲中至左內史集解徐廣曰一云一歲○【臣浩】按一歲中為是弘以五年對策即於是年為左內史見漢書百官公卿表

是時趙人徐樂齊人嚴安俱上書言世務各一事索隱嚴本姓莊漢明帝諱後并改姓嚴也○顧炎武曰鄧伯羔謂安自姓嚴然漢書藝文志曰主父偃二十八篇徐樂一篇莊安一篇是安本姓莊非嚴也漢書之稱莊安班氏所未改也史記之稱嚴安後人所追改也

又使尉佗屠睢將樓船之士南攻百越○【臣照】按淮南子人間訓曰秦皇利越之犀角象齒翡翠珠玕乃使尉屠睢發卒五十萬為五軍則此佗字疑衍

弘為舉首○王若虛辨惑曰舉首下意似不足豈有闕文乎

後聖不循○董份曰後聖聖字恐當是世字言禹聖德後世不能循也

始之盛也○凌稚隆曰一本始作治

始以蒲輪迎枚生索隱謂以蒲裹車輪恐傷草木也○徐孚遠曰封泰山用蒲輪恐傷草木也迎賢人用蒲輪欲令車安也索隱非是

史記卷一百一十二考證

卷一百十三

钦定四库全书

史记卷一百十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

南越尉佗列传第五十三

南越王【正义都广州南海县】尉佗者真定人也【索隐尉官也佗名也姓赵佗音徒河反又十三州记云大郡曰守小郡曰尉韦昭云真定故郡名後更为县在常山也】姓赵氏秦时已并天下略定扬越【集解张晏曰扬州之南越也索隐案战国策云吴起为楚收扬越正义夏禹九州本属扬州故云扬越】置桂林南海象郡【索隐地理志武帝更名桂林曰郁林秦本纪始皇三十三年略陆梁地以为南海桂林象郡地理志云武帝更名曰南】以谪徙民【索隐谪音陟草反】与越杂处十三岁【集解徐广曰秦并天下至二世元年十三年并天下八岁乃平越地至二世元年六年耳】佗秦时用为南海龙川令【索隐地理志云龙川属南海也正义顔师古云龙川南海县也即今之循州也裴氏广州记云本博罗县之东乡有龙穿地而出即穴流泉因以为号也】至二世时南海尉任嚣病且死【集解徐广曰尔时未言都尉也索隐嚣音五刀反】召龙川令赵佗语曰闻陈胜等作乱秦为无道天下苦之项羽刘季陈胜吴广等州郡各共兴军聚衆虎争天下中国扰乱未知所安豪杰畔秦相立南海僻远吾恐盗兵侵地至此吾欲兴兵絶新道【索隐案苏林云秦所通越道】自修待诸侯变会病甚且番禺负山险阻南海东西数千里颇有中国人相辅此亦一州之主也可以立国郡中长吏无足与言者故召公告之即被佗书【集解韦昭曰被之以书音光被之被索隐被音皮义反】行南海尉事【索隐服?云嚣诈诏书使为南海尉】嚣死佗即移檄告横浦阳山湟谿关曰【集解徐广曰在桂阳通四会也索隐案南康记云南野大庾岭三十里至横浦有秦时关其下谓为塞上姚氏案地理志云桂阳有阳山县今此县上流百余里有骑田岭当是阳山关邹氏刘氏本湟并作湟音年结反汉书作湟谿音皇又卫青传云出桂阳下湟水是而姚察云史记作湟今本有湟湟及湟不同盖由随见辄改故也水经云含湟县南有湟浦关朱知孰是然邹诞作湟汉书作湟盖近於古】盗兵且至急絶道聚兵自守因稍以法诛秦所置长吏以其党为假守【索隐案谓佗立其所党为郡县之职或假守也】秦已破灭佗即击并桂林象郡自立为南越武王【集解韦昭曰生以武为号不稽於古也】高帝已定天下为中国劳苦故释佗弗诛汉十一年遣陆贾因立佗为南越王与剖符通使和集百越毋为南边患害与长沙

接境高后时有司请禁南越关市铁器佗曰高帝立我通使物今高后听谗臣别异蛮夷隔绝器物此必长沙王计也欲倚中国击灭南越而并王之自为功也於是佗乃自尊号为南越武帝发兵攻长沙边邑败数县而去焉高后遣将军隆虑侯竇往击之【索隐韦昭云竇姓周隆虑县名属河内音林间】会暑湿士卒大疫兵不能踰岭【索隐案即阳山岭也】岁余高后崩即罢兵佗因此以兵威边财物赂遗闽越西瓯骆役属焉【集解駰案汉书音义曰骆越也索隐姚氏案广州记云交趾有骆田仰潮水上下人食其田名为骆侯诸县自名为骆将铜印青绶即今之令後蜀王子将兵讨骆侯自称为安阳王治封谿县後南越王尉佗攻破安阳王令二使典主交趾九真二郡即瓯骆也】东西万余里廼乘黄屋左纁称制与中国侔及孝文帝元年初镇抚天下使告诸侯四夷从代来即位意喻盛德焉乃为佗亲冢在真定置守邑岁时奉祀召其从昆弟尊官厚赐宠之诏丞相陈平等举可使南越者平言好时陆贾先帝时习使南越乃召贾以为太中大夫往使因让佗自立为帝曾无一介之使报者陆贾至南越王甚恐为书谢称曰蛮夷大长老夫臣佗前日高后隔异南越窃疑长沙王谗臣又遥闻高后尽诛佗宗族掘烧先人冢以故自弃犯长沙边境且南方卑湿蛮夷中间其东闽越千人衆号称王其西瓯骆裸国亦称王【索隐裸音和寡反裸露形也】老臣妄窃帝号聊以自娱岂敢以闻天王哉乃顿首谢愿长为藩臣奉贡职於是乃下令国中曰吾闻两雄不俱立两贤不并世皇帝贤天子也自今以後去帝制黄屋左纁陆贾还报孝文帝大说遂至孝景时称臣使人朝请然南越其居国窃如故号名其使天子称王朝命如诸侯至建元四年卒佗孙胡为南越王【集解徐广曰皇甫谧曰越王赵佗以建元四年卒尔时汉兴七十年佗盖百岁矣】此时闽越王郢兴兵击南越边邑胡使人上书曰两越俱为藩臣毋得擅兴兵相攻击今闽越兴兵侵臣臣不敢兴兵唯天子诏之於是天子多南越义守职约为兴师遣两将军往讨闽越【索隐王恢韩安国】兵未踰岭闽越王弟余善杀郢以降於是罢兵天子使庄助往谕意南越王胡顿首曰天子乃为臣兴兵讨闽越死无以报德遣太子婴齐入宿卫谓助曰国新被寇使者行矣胡方日夜装入见天子助去後其大臣谏胡曰汉兴兵诛郢亦行以惊动南越且先王昔言事天子期无失礼要之不可以说好语入见【索隐汉书悦作怵韦昭云诱怵好语】入见则不得复归亡国之势也於是胡称病竟不入见後十余岁胡实病甚太子婴齐请归胡薨諡为文王婴齐代立即藏其先武帝玺【索隐李合云藏其僭号之玺也】婴齐其入宿卫在长安时取邯郸樛氏女生子兴【集解徐广曰一作典索隐樛音纪虬反樛姓出邯郸】及即位上书请立樛氏女为后兴为嗣汉数使使者风谕婴齐婴齐尚乐擅杀生自恣惧入见要用汉法比内诸侯固称病遂不入见遣子次公入宿卫婴齐薨諡为明王太子兴代立其母为太后太后自未为婴齐姬时常与霸陵人安国少季通【索隐安国姓也少季名也】及婴齐薨後元鼎四年汉使安国少季往谕王王太后以入朝比内诸侯令辩士谏大夫终军等宣其辞勇士魏臣等辅其缺【集解徐广曰一作决】卫尉路博德将兵屯桂阳待使者王年少太后中国人也尝与安国少季通其使复私焉国人颇知之多不附太后太后恐乱起亦欲倚汉威数劝王及羣臣求内属即因使者上书请比内诸侯三岁一朝除边关於是天子许之赐其丞相吕嘉银印及内史中尉太傅印余得自置除其故黥劓刑用汉法比内诸侯使者皆留填抚之王王太后饬治行装重赍为入朝具其相吕嘉年长矣相三王宗族官仕为长吏者七十余人男尽尚王女女尽嫁王子兄弟宗室及苍梧秦王有连【集解駰案汉书音义曰苍梧越中王自名为秦王连亲婚也索隐案苍梧秦王即下赵光是也有连者连姻也赵与秦同姓故称秦王】其居国中甚重越人信之多耳目者得衆心愈於王王之上书数谏止王王弗听有畔心数

称病不见汉使者使者皆注意嘉势未能诛王王太后亦恐嘉等先事发乃置酒介汉使者权【集解韦昭曰侍使者为介胄也索隐志林云介者因也欲因使者权诛吕嘉也韦昭以介为侍介者闲也以言间侍汉使之权意即得矣然云恃为介胄则非也虞喜以介为因亦有所由案介者宾主所由也】谋诛嘉等使者皆东乡太后南乡王北乡相嘉大臣皆西乡侍坐饮嘉弟为将将卒居宫外酒行太后谓嘉曰南越内属国之利也而相君苦不便者何也以激怒使者使者狐疑相杖遂莫敢发嘉见耳目非是即起而出太后怒欲鏹嘉以矛【集解韦昭曰鏹撞也索隐案字林鏹音七凶反又吴王濞传鏹杀吴王与此同】王止太后嘉遂出分其弟兵就舍【索隐案谓分取其兵也汉书作介介被也恃也】称病不肯见王及使者乃阴与大臣作乱王素无意诛嘉嘉知之以故数月不发太后有淫行国人不附欲独诛嘉等力又不能天子闻嘉不听王王太后弱孤不能制使者怯无决又以为王王太后已附汉独吕嘉为乱不足以兴兵欲使庄参以二千人往使参曰以好往数人足矣以武往二千人无足以为也辞不可天子罢参也郾壮士【集解徐广曰县属颍川音古洽反正义今汝州郾城县】故济北相韩千秋奋曰以区区之越又有王太后应独相吕嘉为害愿得勇士二百人必斩嘉以报於是天子遣千秋【集解徐广曰为校尉】与王太后弟繆乐将二千人往入越境吕嘉等乃遂反下令国中曰王年少太后中国人也又与使者乱专欲内属尽持先王宝器入献天子以自媚多从人行至长安虏卖以为僮仆取自脱一时之利无顾赵氏社稷为万世虑计之意乃与其弟将卒攻杀王太后及汉使者遣人告苍梧秦王及其诸郡县立明王长男越妻子术阳侯建德为王【集解徐广曰元鼎四年以南越王兄越封高昌侯索隐案功臣表术阳属下邳】而韩千秋兵入破数小邑其後越直开道给食未至番禺四十里越以兵击千秋等遂灭之使人函封汉使者节置塞上【索隐案南康记以为大庾岭名塞上也】好为谩辞谢罪发兵守要害处於是天子曰韩千秋虽无成功亦军锋之冠封其子延年为成安侯【索隐案功臣表成安属郾】繆乐其姊为王太后首愿属汉封其子广德为龙亢侯【索隐案龙亢属譙国汉书作侯服?作叩晋灼云?古龙字】乃下赦曰天子微诸侯力政讥臣不讨贼今吕嘉建德等反自立晏如令罪人及江淮以南【集解徐广曰淮一作滙也】楼船十万师【集解应劭曰时欲击越非水不至故作大船船上施楼故号曰楼船也】往讨之元鼎五年秋卫尉路博德为伏波将军出桂阳下滙水【集解徐广曰一作湟駟案地理志曰桂阳有滙水通四会或作淮字索隐刘氏云滙当作湟汉书云下湟水也】主爵都尉杨仆为楼船将军出豫章下横浦故归义越侯二人【集解张晏曰故越人降为侯】为戈船下厉将军【集解徐广曰厉一作瀨駟案张晏曰越人於水中负人船又有蛟龙之害故置戈於船下因以为名也应劭曰瀨水流涉上也瓚曰伍子胥书有戈船以载干戈因谓之戈船也】出零陵或下离水【集解徐广曰在零陵通广信正义地理志云零陵县有离水东至广信入郁林九百八十里】或抵苍梧使驰义侯【集解徐广曰越人也名遗】因巴蜀罪人发夜郎兵【正义曲州协州以南是夜郎国】下牂牁江【正义江出南徼外东通四会至番禺入海也】咸会番禺元鼎六年冬楼船将军将精卒先?寻陝破石门【索隐姚氏云寻陝在始兴西三百里近连口也广州记石门在番禺县北二十里昔吕嘉拒汉积石於江名曰石门又俗云石门水名贪泉饮之则令人变故吴隐之至石门酌水饮乃为歌也】得越船粟因推而前挫越锋以数万人待伏波伏波将军将罪人道远会期後与楼船会乃有千余人遂俱进楼船居前至番禺建德嘉皆城守楼船自择便处居东南面伏波居西北面会暮楼船攻败越人纵火烧城越素闻伏波名日暮不知其兵多少伏波乃为营遣使者招降者赐印复纵令相招楼船力攻烧敌反驱而入伏波营中犂旦

城中皆降伏波【集解徐广曰吕静曰犁结也音力奚反结犹连及逮至也汉书犁旦为迟旦谓待明也索隐邹氏云犁一作比比音必至反然犁即比义不烦更释又解犁黑也天未明而尚黑也汉书史记亦作迟明迟音稚迟待也亦犁之义】吕嘉建德已夜与其属数百人亡入海以船西去伏波又因问所得降者贵人以知吕嘉所之遣人追之以其故校尉司马苏弘得建德封为海常侯【集解徐广曰在东莱】越郎【集解徐广曰南越之郎官】都稽【集解徐广曰表曰孙都】得嘉封为临蔡侯【索隐案表属河内】

苍梧王赵光者越王同姓闻汉兵至及越揭阳令定【集解韦昭曰揭音其逝反索隐地理志揭阳县属南海揭音桀刘氏音求例反定者令之名也案汉功臣表云定揭阳令意又别】自定属汉越桂林监居翁【集解駰案汉书音义曰桂林郡中监姓居名翁也】谕瓠骆属汉【索隐案汉书瓠骆三十余万口降汉】皆得为侯【索隐案汉书云光闻汉兵至降封为桃侯揭阳令为安道侯越将毕取为牂侯桂林监居翁为湘城侯韦昭云湘城属堵阳桃安道牂三县皆属南阳牂音辽】戈船下厉将军兵及驰义侯所发夜郎兵未下南越已平矣遂为九郡【集解徐广曰儋耳珠崖南海苍梧九真郁林日南合浦交趾索隐徐广皆据汉书为说】伏波将军益封楼船将军兵以?坚为将梁侯自尉佗初王後五世九十三岁而国亡焉太史公曰尉佗之王本由任嚣遭汉初定列为诸侯隆虑离湿疫佗得以益骄瓠骆相攻南越动摇汉兵临境婴齐入朝其後亡国徵自繆女吕嘉小忠令佗无後楼船从欲怠傲失惑伏波困穷智虑愈殖因祸为福成败之转譬若纠墨

【索隐述赞曰中原鹿走羣雄莫制汉事西驱越推南裔陆贾聘说尉佗去帝繆后内朝吕嘉狼戾君臣不协卒从剿弃】

史记卷一百十三

史记卷一百一十三考证

南越尉佗列传封其子广德为龙亢侯索隐按龙亢属谯国○【臣照】按年表索隐曰龙鲁邑萧该云广德所封止是龙有亢者误也此处索隐注自相矛盾

史记卷一百一十三考证

卷一百十四

钦定四库全书

史记卷一百十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

东越列传第五十四

闽越王无诸【集解韦昭曰闽音武巾反东越之别名索隐按说文云闽东越蛇种也故字从虫门声音旻】及越东海王摇者其先皆越王句践之後也姓驺氏【集解徐广曰驺一作骆索隐徐广说是上云瓠貉此别云闽不姓驺也】秦已并天下皆废为君长以其地为闽中郡【集解徐广曰今建安侯官是索隐小颜以为即今之泉州建安也正义今闽州又改为福也】及诸侯畔秦无诸摇率越归鄱阳令吴芮所谓鄱君者也从诸侯灭秦当是之时项籍主命弗王【集解駰案汉书音义曰主号令诸侯不王无诸摇等】以故不附楚汉击项籍无诸摇率越人佐汉汉五年复立无诸为闽越王王闽中故地都东冶孝惠三年举高帝时越功曰闽君摇功多其民便附乃立摇为东海王【集解应劭曰在吴郡东南滨海云】都东瓠【集解徐广曰今之永宁也索隐姚氏云瓠水名永嘉记水出永宁山行三十余里去郡城五里入江昔有东瓠王都城有亭积石为道今犹在也】世俗号为东瓠王後数世至孝景三年吴王濞反欲从闽越闽越未肯行独东瓠从吴及吴破东瓠受汉购杀吴王丹徒以故皆得不诛归国吴王子驹亡走闽越怨东瓠杀其父常劝闽越击东瓠至建元三年闽越发兵围东瓠东瓠食尽困且降乃使人告急天子天子问太尉田蚡蚡对曰越人相攻击固其常又数反覆不足以烦中国往救也自秦时弃弗属於是中大夫庄助诘蚡曰特患力弗能救德弗能覆诚能何故弃之且秦举咸阳而弃之何乃越也今小国以穷困来告急天子天子弗振当安所告愬又何以子万国乎上曰太尉未足与计吾初即位不欲出虎符发兵郡国乃遣庄助以节发兵会稽会稽太守欲距不为发兵助乃斩一司马谕意指遂发兵浮海救东瓠未至闽越引兵而去东瓠请举国徙中国乃悉举衆来处江淮之间【集解徐广曰年表曰东瓠王广武侯望率其衆四万余人来降家庐江郡索隐徐广据年表而为说】至建元六年闽越击南越南越守天子约不敢擅发兵击而以闻上遣大行王恢出豫章大农韩安国出会稽皆为将军兵未踰岭闽越王郢发兵距险其弟余善乃与相宗族谋曰王以擅发兵击南越不请故天子兵来诛今汉兵衆强今即幸胜之後来益多终灭国而止今杀王以谢天子天子听罢兵固一国完不听乃力战不胜即亡入海皆曰善即鏹杀王【索隐刘氏鏹音窻鏹撞也】使使奉其头致大行

大行曰所为来者诛王今王头至谢罪不战而耘【集解徐广曰汉书作殒耘义当取耘除或言耘音于粉反此楚人声重耳陨耘当同音但字有假借声有轻重】利莫大焉乃以便宜案兵告大农军而使使奉王头驰报天子诏罢两将兵曰郢等首恶独无诸孙繇君丑不与谋焉【索隐繇音摇繇者邑号丑名也】乃使郎中将立丑为越繇王奉闽越先祭祀余善已杀郢威行於国国民多属窃自立为王繇王不能矫其衆持正天子闻之为余善不足复兴师曰余善数与郢谋乱而後首诛郢师得不劳因立余善为东越王与繇王并处至元鼎五年南越反东越王余善上书请以卒八千人从楼船将军擊吕嘉等兵至揭阳以海风波为解不行持两端陰使南越及汉破番禺不至是时楼船将军杨仆使使上书愿便引兵擊东越上曰士卒劳倦不许罢兵令诸校屯豫章梅岭待命【集解徐广曰在会稽界索隐徐说非也案今豫章三十里有梅岭在洪崖山当古驿道此文云豫章梅岭知非会稽也正义括地志云梅岭在?化县东北百二十八里?州汉亦属豫章郡二所未详】元鼎六年秋余善闻楼船请诛之汉兵临境且往乃遂反发兵距汉道号将军驺力等为吞汉将军入白沙武林【集解徐广曰在豫章界索隐案今豫章北二百里接鄱阳界地名白沙有小水入湖名曰白沙沙东南八十里有武阳亭亭东南三十里地名武林此白沙武林今当闽越之京道】梅岭杀汉三校尉是时汉使大农张成故山州侯齿【集解徐广曰城阳共王子】将屯弗敢擊却就便处皆坐畏懦诛余善刻武帝玺自立诈其民为妄言天子遣横海将军韩说出句章【索隐郑氏句音钩会稽县也正义句章故城在越州鄞县西一百里汉县】浮海从东方往楼船将军杨仆出武林中尉王温舒出梅岭越侯为戈船下濑将军出若邪白沙【索隐案姚氏云若邪地名今阙正义越州有若耶山若耶溪若如一预州有白沙山盖从如此邪白沙东故闽州】元封元年冬咸入东越东越素发兵距险使徇北将军守武林败楼船军数校尉杀长吏楼船将军率钱塘辕终古【正义钱塘杭州县辕姓终古名】斩徇北将军为御儿侯【集解駰案汉书音义曰今吴南亭是也正义御字今作语语儿乡在苏州嘉兴县南七十里临官道也】自兵未往故越衍侯吴阳前在汉汉使归谕余善余善弗听及横海将军先至越衍侯吴阳以其邑七百人反攻越军於汉阳从建成侯敖【集解徐广曰敖东越臣】与其率从繇王居股谋曰余善首恶劫守吾属今汉兵至衆强计杀余善自归诸将侥幸得脱乃遂俱杀余善以其衆降横海将军故封繇王居股为东成侯万【索隐韦昭户云在九江】封建成侯敖为开陵侯【索隐徐广云敖东越臣韦昭云开陵属临淮】封越衍侯吴阳为北石侯封横海将军说为按道侯封横海校尉福为缭嫪侯【集解駰案汉书音义曰音辽索隐缭嫪县名服?曰嫪音莹刘伯庄音纒索反】福者城阳共王子故为海常侯坐法失侯旧从军无功以宗室故侯诸将皆无成功莫封东越将多军【集解駰案汉书音义曰多军名也索隐韦昭云多姓军名也】汉兵至弃其军降封为无锡侯於是天子曰东越狭多阻闽越悍数反覆诏军吏皆将其民徙处江淮间东越地遂虚

太史公曰越虽蛮夷其先岂尝有大功德於民哉何其久也历数代常为君王句践一称伯然余善至大逆灭国迁衆其先苗裔繇王居股等犹尚封为万户侯由此知越世世为公侯矣盖禹之余烈也

【索隐述赞曰句践之裔是曰无诸既席汉宠实因秦余驺骆为姓闽中是居王摇之立爰处东隅後嗣不道自相诛锄】

史记卷一百十四

史记卷一百一十四考证

东越列传秦已并天下皆废为君长○【臣照】按越为楚灭子孙分散臣服於楚越世家虽有或为王或为君之言其实自相称署而不得比於宋卫中山之数者也秦兼天下罢侯置守六国之後尚不得尺土寸地矧区区江南海上之越别奉以君长之号乎疑无诸与摇皆已废为庶人陈项兵起乃始纠合义旅闽越之民尚思旧德相率景从耳

史记卷一百一十四考证

卷一百十五

钦定四库全书

史记卷一百十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

朝鲜列传第五十五

【集解张晏曰朝鲜有湿水洌水汕水三水合为洌水疑乐浪朝鲜取名於此也索隐案朝音潮直骄反鲜音仙以有汕水故名也汕一音讎】

朝鲜【正义潮仙二音括地志云高骊都平壤城本汉乐浪郡王险城又古云朝鲜地也】王满者故燕人也【索隐案汉书满燕人姓卫击破朝鲜王而自王之】自始全燕时尝略属真番【集解徐广曰一作莫辽东有番汗县番音普寒反索隐始全燕时谓六国燕方全盛之时常略二国以属已也应劭云元菟本真番国徐氏云辽东有番汗县者据地理志而知也】朝鲜为置吏筑鄣塞秦灭燕属辽东外徼汉兴为其远难守复修辽东故塞至浞水为界【集解駰案汉书音义曰浞音傍沛反正义地理志云浞水出辽东塞外西南至乐浪县西入海浞音大反】属燕燕王卢绾反入匈奴满亡命【正义命谓教令】聚党千余人魑结蛮夷服而东走出塞渡浞水居秦故空地上下鄣【索隐案地理志乐浪有云鄣】稍役属真番朝鲜蛮夷及故燕齐亡命者王之都王险【集解徐广曰昌黎有险洺县也索隐韦昭云古邑名应劭注地理志云辽东有险洺县朝鲜王旧都瓚云王险城在乐浪郡浞水之东也】会孝惠高后时天下初定辽东太守即约满为外臣保塞外蛮夷无使盗边诸蛮夷君长欲入见天子勿得禁止以闻上许之以故满得兵威财物侵降其旁小邑真番临屯皆来服属【索隐东方小国後以为郡】方数千里【正义括地志云朝鲜高丽貊东沃沮五国之地国东西千三百里南北二千里在京师东东至大海四百里北至营州界九百二十里南至新罗国六百里北至靺鞨国千四百里】传子至孙右渠【正义其孙名也】所诱汉亡人滋多又未尝入见真番旁衆国欲上书见天子又拥阏不通元封二年汉使涉何诱谕右渠【索隐诱一作譙说文云譙让也谕晓也譙音才笑反】终不肯奉诏何去至界上临浞水使御刺杀送何者【索隐即送何之御也】朝鲜裨王长【正义顔师古云长者裨王名也送何至浞水何因刺杀也按裨王乃将士长恐顔非也】即渡驰入塞【正义入平州榆林关也】遂归报天子曰杀朝鲜将上为其名美即不诘【索隐有杀将之美名】拜何为辽东东部都尉【正义地理志云辽东郡武

次县东部都尉所理也】朝鲜怨何发兵袭攻杀何天子募罪人擊朝鲜其秋遣楼船将军杨仆从齐浮渤海兵五万人左将军荀彘出辽东讨右渠右渠发兵距险左将军卒正多率辽东兵先纵败散多还走坐法斩楼船将军将齐兵七千人先至王险右渠城守窥知楼船军少即出城擊楼船楼船军败散走将军杨仆失其衆遁山中十余日稍求收散卒复聚左将军擊朝鲜沮水西军未能破自前天子为两将未有利乃使卫山因兵威往谕右渠右渠见使者顿首谢愿降恐两将诈杀臣今见信节请服降遣太子入谢献马五千匹及馈军粮人衆万余持兵方渡沮水使者及左将军疑其为变谓太子已服降宜命人毋持兵太子亦疑使者左将军诈杀之遂不渡沮水复引归山还报天子天子诛山左将军破沮水上军乃前至城下围其西北楼船亦往会居城南右渠遂坚守城数月未能下左将军素侍中幸将燕代卒悍乘胜军多骄楼船将齐卒入海固已多败亡其先与右渠战困辱亡卒卒皆恐将心慙其围右渠尝持和节左将军急擊之朝鲜大臣乃陰间使人私约降楼船往来言尚未肯决左将军数与楼船期战楼船欲急就其约不会左将军亦使人求间卻降下朝鲜朝鲜不肯心附楼船以故两将不相能左将军心意楼船前有失军罪今与朝鲜私善而又不降疑其有反计未敢发天子曰将率不能前及使卫山谕降右渠右渠遣太子山使不能割决与左将军计相误卒沮约今两将围城又乖异以故久不决使济南太守公孙遂往征之有便宜得以从事遂至左将军曰朝鲜当下久矣不下者有状言楼船数期不会具以素所意告遂曰今如此不取恐为大害非独楼船又且与朝鲜共灭吾军遂亦以为然而以节召楼船将军入左将军营计事即命左将军麾下执捕楼船将军并其军以报天子天子诛遂左将军已并两军即急擊朝鲜朝鲜相路人相韩陰尼谿相参将军王峽【集解駟案汉书音义曰凡五人也戎狄不知官纪故皆称相峽音颊索隐路人渔阳县人如淳云相其国相路人名也峽一音协】相与谋曰始欲降楼船楼船今执独左将军并将战益急恐不能与战王又不肯降陰峽路人皆亡降汉路人道死元封三年夏尼谿相参乃使人杀朝鲜王右渠来降王险城未下故右渠之大臣成已又反复攻更左将军使右渠子长【集解徐广曰表云长?汉书表云长?音各索隐?音姑落反】降相路人之子最【索隐最名路人之子也】告谕其民诛成已以故遂定朝鲜为四郡【集解駟案真番临屯乐浪玄菟也】封参为濊清侯【集解韦昭曰属齐索隐顾氏濊音获】陰为菽苴侯【集解韦昭曰属渤海索隐菽音秋苴音子余反】峽为平州侯【集解韦昭曰属梁父】长为几侯【集解韦昭曰属河东索隐几县名】最以父死颇有功为温阳侯【集解韦昭曰属齐】左将军徵至坐争功相嫉乖计弃市楼船将军亦坐兵至列口当待左将军擅先纵死亡多当诛赎为庶人【索隐苏林云列口县名度海先得之】

太史公曰右渠负固国以絶祀涉何诬功为兵发首楼船将峽【集解徐广曰言其所将卒狭少】及难离咎悔失番禺乃反见疑荀彘争劳与遂皆诛两军俱辱将率莫侯矣

【索隐述赞曰卫满燕人朝鲜是王王险置都路人作相右渠首羌涉何調上兆祸自斯狐疑二将山遂伏法纷纭无状】

史记卷一百十五

史记卷一百一十五考证

朝鲜列传朝鲜相路人相韩陰尼谿相参将军王峽集解汉书音义曰凡五人也○凌稚隆曰按师古云相路人一相韩陰二尼谿相参三将军王峽四应氏云五人误也

史记卷一百一十五考证

<史部,正史类,史记>

卷一百十六

钦定四库全书

史记卷一百十六

汉太史令司马迁撰宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

西南夷列传第五十六

西南夷君长【正义在蜀之南】以什数夜郎最大【索隐刘氏数音所具反邹氏音所主反荀悦云夜郎犍为属国也韦昭云汉为县属牂牁案後汉书云夜郎东接交趾其地在胡南其君长本出於竹以竹而为姓也正义今泸州南大江南岸协州曲州本夜郎国】其西靡莫之属【正义在蜀南以下及西也靡非在姚州北去京西南四千九百三十五里即靡莫之夷】以什数滇最大【集解如淳曰滇音颠滇马出该国也索隐靡莫夷邑名滇与同姓也崔浩云滇後为县属越嶲太守所理也正义昆州郎州等本滇国去京西五千三百七十里也】自滇以北君长以什数邛都最大此皆魑结耕田有邑聚【索隐魑汉书作椎音直追反结音计】其外西自同师以东【集解韦昭曰邑名也索隐汉书作桐师】北至牂榆【集解韦昭曰在益州牂音叶正义上音牂牁泽在靡北百余里汉牂榆县在泽西益都靡非本桑榆王属国也】名为僇昆明【集解徐广曰永昌有僇唐县索隐崔浩云僇昆明二国名韦昭云益州县正义僇音髓今澧州也昆明僇州县盖南接昆明之地因名也】皆编发随蕃迁徙【正义编步典反蕃许六反皆僇昆明之俗也】毋常处毋君长地方可数千里自僇以东北君长以什数徙笮都最大【集解徐广曰徙在汉嘉笮音昨在越嶲索隐服?云徙笮二国名韦昭云徙县在蜀笮县在越嶲正义徙音斯括地志云笮州本西蜀徼外白猫羌僇地理志云徙县也华阳国志雅州邛崃山本名邛笮山故邛人笮人界】自笮以东北君长以什数冉駹最大【索隐案应劭云汶江郡本冉駹音亡江反正义括地志云蜀西徼外羌茂州冉州本冉駹国地也後汉书云冉駹其山有六夷七羌九氐各有部落也】其俗或土着或移徙在蜀之西自冉駹以东北君长以什数白马最大【索隐案夷邑名即白马氐也正义括地志曰陇右成州武州皆白马氐其豪族杨氏居成州仇池山上】皆氐类也此皆巴蜀西南外蛮夷也始楚威王时使将军庄蹻【正义蹻其畧反郎州昆州即庄蹻所王】将兵循江上畧巴蜀黔中以西庄蹻者故楚庄王苗裔也【索隐蹻音矩灼反楚庄王弟为盗者】蹻至滇池地方三百里【索隐地理志益州滇池县泽在西北後汉书云其池水源深广而更浅狭有似倒流故谓滇池正义括地志云滇泽在昆州晋宁县西南三十里其水源广而更浅狭有似倒流故谓滇池】旁平地肥

饶数千里以兵威定属楚欲归报会秦擊夺楚巴黔中郡道塞不通因还以其衆王滇变服从其俗以长之秦时常頌【集解駟案音案】畧通五尺道【索隐谓栈道广五尺正义括地志云五尺道在郎州顔师古云其处险厄故道才广五尺如淳云道广五尺也】诸此国颇置吏焉十余岁秦灭及汉兴皆弃此国而开蜀故徼巴蜀民或窃出商货取其筏马僊僊【正义今益州南戎州北临大江古僊国】髦牛以此巴蜀殷富【索隐韦昭云僊属犍为音蒲北反服?曰旧京师有僊婢】建元六年大行王恢擊东越东越杀王郢以报恢因兵威使番阳令【正义番音婆】唐蒙风指晓南越南越食蒙蜀枸酱【集解徐广曰枸一作蒟音窆駟案汉书音义曰枸木似穀树其叶似桑叶用其叶作酱酢美蜀人以为珍味索隐案晋灼枸音矩刘德云枸树如桑其椹长二三寸味酢取其实以为酱美小顔云枸者缘木而生非树也今蜀土家出枸实不长二三寸味辛似姜不酢刘说非也广志云枸色黑味辛下气消谷窆音求羽反】蒙问所从来曰道西北牂牁【正义崔浩云牂牁繫船牒也常氏华阳国志云楚顷襄王时遣庄躑伐夜郎军至且兰?船於岸而步战既灭夜郎以且兰有?船牒处乃改其名为牂牁】牂牁江广数里出番禺城下蒙归至长安问蜀贾人贾人曰独蜀出枸酱多持窃出市夜郎夜郎者临牂牁江江广百余步足以行船南越以财物役属夜郎西至同师然亦不能臣使也蒙乃上书说上曰南越王黄屋左纛地东西万余里名为外臣实一州主也今以长沙豫章往水道多絶难行窃闻夜郎所有精兵可得十余万浮船牂牁江出其不意此制越一奇也诚以汉之强巴蜀之饶通夜郎道为置吏易甚上许之乃拜蒙为郎中中将千人食重万余人【索隐案食粮及輜重车也音持用反】从巴蜀筏关入遂见夜郎侯多同蒙厚赐喻以威德约为置吏使其子为令夜郎旁小邑皆贪汉缯帛以为汉道险终不能有也乃且听蒙约还报乃以为犍为郡发巴蜀卒治道自犍道指牂牁江【索隐崔浩云牂牁繫船牒以为地名道犹从也地理志夜郎又有豚水东至南海四会入海此牂牁江也】蜀人司马相如亦言西夷邛笮可置郡使相如以郎中将往喻皆如南夷为置一都尉十余县属蜀当是时巴蜀四郡【集解徐广曰汉中巴郡广汉蜀郡】通西南夷道戍转相饟数岁道不通士罢饿离湿死者甚衆西南夷又数反发兵兴击耗费无功上患之使公孙弘往视问焉还对言其不便及弘为御史大夫是时方筑朔方以据河逐胡弘因数言西南夷害可且罢专力事匈奴上罢西夷独置南夷夜郎两县一都尉【集解徐广曰元光六年南夷始置邮亭】稍令犍为自葆就【正义令犍为自葆守而渐修成其郡县也】及元狩元年博望侯张骞使大夏来言居大夏时见蜀布邛竹杖【集解韦昭曰邛县之竹属蜀瓚曰邛山名此竹节高实中可作杖】使问所从来曰从东南身毒国【集解徐广曰字或作竺汉书直云身毒史记一本作乾毒駟案汉书音义曰一名天竺则浮屠胡是也索隐身音捐毒音?小顔亦曰捐?也】可数千里得蜀贾人市或闻邛西可二千里有身毒国骞因盛言大夏在汉西南慕中国患匈奴隔其道诚通蜀身毒国道便近有利无害於是天子乃令王然于栢始昌吕越人等使间出西夷西指求身毒国至滇滇王尝羌【集解徐广曰尝一作赏】乃留为求道西十余辈岁余皆闭昆明【集解如淳曰为昆明所闭道正义昆明在今嵩州南昆县是也】莫能通身毒国滇王与汉使者言曰汉孰与我大及夜郎侯亦然以道不通故各自以为一州主不知汉广大使者还因盛言滇大国足事亲附天子注意焉及至南越反上使驰义侯因犍为发南夷兵且兰君恐远行旁国虏其老弱【索隐且音子余反小国名也後为县属牂牁】乃与其衆反杀使者及犍为太守汉乃发巴蜀罪人尝击南越者八校尉擊破之会越已破汉八校尉不下即引兵还行诛头兰【索隐即且兰也】头兰常隔滇道者也已平头兰遂平南夷为牂牁郡夜郎侯始倚南越南越已灭会还诛反者夜

郎遂入朝上以为夜郎王南越破後及汉诛且兰邛君并杀笮侯冉駹皆振恐请臣置吏乃以邛都为越嶲郡笮都为沈犁郡冉駹为汶山郡【集解应劭曰今蜀郡岷江】广汉西白马为武都郡上使王然于以越破及诛南夷兵威风喻滇王入朝滇王者其衆数万人其旁东北有劳 靡莫皆同姓相扶未肯听劳 靡莫数侵犯使者吏卒元封二年天子发巴蜀兵击灭劳 靡莫【索隐二国与滇王同姓】以兵临滇滇王始首善以故弗诛滇王离难西南夷举国降请置吏入朝於是以为益州郡赐滇王王印复长其民西南夷君长以百数独夜郎滇受王印滇小邑最宠焉

太史公曰楚之先岂有天禄哉在周为文王师封楚及周之衰地称五千里秦灭诸侯唯楚苗裔尚有滇王汉诛西南夷国多灭矣唯滇复为宠王然南夷之端见枸酱番禺大夏杖邛竹西夷後擗剽分二方【集解駰案汉书音义曰擗音翦索隐擗谓被分割也剽音匹妙反言西夷後被擗割遂剽居西南二方各属郡县剽亦分义】卒为七郡【集解徐广曰犍为牂牁越嶲益州武都沈犁汶山地也】

【索隐述赞曰西南外徼庄蹻首通汉因大夏乃命唐蒙劳 靡莫异俗殊风夜郎最大邛笮称雄及置郡县万代推功】

史记卷一百十六

史记卷一百一十六考证

西南夷列传自嶲以东北君长以什数徙笮都最大集解徐广曰徙在汉嘉笮音昨在越嶲○【臣照】按华阳国志曰汶山曰夷南中曰昆明汉嘉越嶲曰笮蜀曰邛与徐所说不同

乃拜蒙为郎中将军○华阳国志作中郎将

史记卷一百一十六考证

卷一百十七

钦定四库全书

史记卷一百十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

司马相如列传第五十七

【索隐右不宜在西南夷之下】

司马相如者蜀郡成都人也字长卿少时好读书学击剑【索隐吕氏春秋剑伎云持短入长倏忽纵横之术也魏文典论云余好击剑以短乘长是也】故其亲名之曰犬子【索隐孟康云爱而字之也】相如既学【索隐案秦宓云文翁遣相如受七经】慕蔭相如之为人更名相如以贗为郎事孝景帝为武骑常侍【索隐张揖曰秩六百石常侍从格猛兽】非其好也会景帝不好辞赋是时梁孝王来朝从游说之士齐人邹阳淮陰枚乘吴庄忌夫子之徒【集解徐广曰名忌字夫子索隐案邹阳传云枚先生严夫子则此夫子是美称时人以为号尔而徐广云字为非汉书作严忌者案忌本姓庄避明帝讳庄改姓严也】相如见而说之因病免客游梁梁孝王令与诸生同舍相如得与诸生游士居数岁乃着子虚之赋会梁孝王卒相如归而家贫无以自业素与临邛令王吉相善吉曰长卿久宦游不遂而来过我於是相如往舍都亭【索隐案临邛郭下之亭也】临邛令缪为恭敬日往朝相如相如初尚见之後称病使从者谢吉吉愈益谨肃临邛中多富人而卓王孙家僮八百人程郑亦数百人二人乃相谓曰令有贵客为具召之并召令令既至卓氏客以百数至日中谒司马长卿长卿谢病不能往临邛令不敢尝食自往迎相如相如不得已强往一坐尽倾酒酣临邛令前奏琴曰窃闻长卿好之愿以自娱相如辞谢为鼓一再行【索隐案古乐府长歌行短歌行皆曲引也此言鼓一再行谓一两曲】是时卓王孙有女文君新寡好音故相如缪与令相重而以琴心挑之【集解郭璞曰以琴中音挑动之索隐张揖云挑饶也以琴中饶之挑音徒了反饶音如了反其诗曰凤兮凤兮归故乡游遨四海求其皇有一艳女在此堂室还人遐毒我肠何由交接为鸳鸯又曰凤兮凤兮从皇栖得托子尾永为妃交情通体必和谐中夜相从别有谁】相如之临邛从车骑雍容闲雅甚都【集解韦昭曰闲读曰闲甚得都邑之容也郭璞曰都犹姣也诗曰洵美且都】及饮卓氏弄琴文君窃从户窥之心悦而好之恐不得当也既罢相如乃使人重赐文君侍者通殷勤文君夜亡奔相如【索隐郭璞云婚不以礼为节也】相如乃与驰归家居徒

四壁立【集解郭璞曰言贫穷也索隐案孔文祥云徒空也家空无资储但有四壁而已言就此中以安立也】卓王孙大怒曰女至不材我不忍杀不分一钱也人或谓王孙王孙终不听文君久之不乐曰长卿第俱如临邛【索隐文颖云第且也郭璞云第发语之急耳如往也】从昆弟假贷犹足为生何至自苦如此相如与俱之临邛尽卖其车骑买一酒舍酤酒而令文君当鑪【集解韦昭曰鑪酒肆也以土为墮边高似鑪】相如身自着犢鼻褌【集解韦昭曰今三尺布作形如犢鼻称此者言其无耻也今铜印言犢纽此其类矣】与保庸杂作【集解駉案方言保庸谓之甬南方奴婢贱称也】涤器於市中【集解韦昭曰瓦器也每食必涤溉者】卓王孙闻而耻之为杜门不出昆弟诸公【集解郭璞曰诸公父行也】更谓王孙曰有一男两女所不足者非财也今文君已失身於司马长卿长卿故倦游【集解郭璞曰厌游宦也】虽贫其人材足依也且又令客独奈何相辱如此卓王孙不得已分予文君僮百人钱百万及其嫁时衣被财物文君乃与相如归成都买田宅为富人居久之蜀人杨得意为狗监侍上【集解郭璞曰主猎犬也】上读子虚赋而善之曰朕独不得与此人同时哉得意曰臣邑人司马相如自言为此赋上惊乃召问相如相如曰有是然此乃诸侯之事未足观也请为天子游猎赋赋成奏之上许令尚书给笔札相如以子虚虚言也为楚称【集解郭璞曰称述楚之美】乌有先生者【集解徐广曰乌一作恶】乌有此事也为齐难【集解郭璞曰诘难楚事也】无是公者无是人也明天子之义【集解郭璞曰以为折中之谈也】故空藉此三人为辞【索隐藉音假假与积同音】以推天子诸侯之苑囿其卒章归之於节俭因以风谏奏之天子天子大说其辞曰楚使子虚使於齐齐王悉发境内之士备车骑之衆与使者出田田罢子虚过诧乌有先生【集解郭璞曰诧夸也音托夏反索隐过音戈诧音勅亚反】而无是公在焉坐定乌有先生问曰今日田乐乎子虚曰乐获多乎曰少然则何乐曰仆乐齐王之欲夸仆以车骑之衆而仆对以云梦之事也曰可得闻乎子虚曰可王驾车千乘选徒万骑田於海滨列卒满泽罟罔弥山【集解郭璞曰罟置也音浮正义说文云罟兔罟也今幡车罟也弥竟也】揜兔獐鹿射麋脚麟【集解徐广曰獐音吝駉案郭璞曰脚犄足獐车轆索隐韦昭云脚谓持一脚也司马彪曰脚犄也说文云犄偏引一脚也】骛於盐浦割鲜染轮【集解郭璞曰盐浦海边地多盐卤鲜生肉也染濡也音而沿反又音而悦反濡之於轮盐而食之骛驰也音务索隐染或为淬与下文將割轮淬意同也】射中获多矜而自功顾谓仆曰楚亦有平原广泽游猎之地饶乐若此者乎楚王之猎何与寡人【集解郭璞曰与犹如也】仆下车对曰臣楚国之鄙人也幸得宿卫十有余年时从出游游於後园览於有无然犹未能徧覩也又恶足以言其外泽者乎齐王曰虽然畧以子之所闻见而言之仆对曰唯唯臣闻楚有七泽尝见其一未覩其余也臣之所见盖特其小小者耳【索隐郭璞云特独也】名曰云梦【索隐褚詮音亡栋反又音莫风反裴駉云孙叔敖激沮水作此泽张揖云楚薺也在南郡华容县郭璞曰江夏安陆有云梦城南郡枝江亦有云梦城华容县又有巴邱湖俗云即古云梦泽也则张揖云在华容者指此湖也今案安陆东见有云梦城云梦县而枝江亦有者盖县名远取此泽故有城也】云梦者方九百里其中有山焉其山则盘纡茝郁隆崇律岑岑岩参差日月蔽亏【集解駉案汉书音义曰高山壅蔽日月亏缺半见索隐案汉书注此卷多不题注者姓名解者云是张揖亦兼有余人也】交错纠纷上干青云罢池陂陀下属江河其土则丹黄赭垺【集解徐广曰一作瑕索隐张揖云赭赤土出少室山垺白垺本草云一名白塿也】雌黄白垺【集解徐广曰音符駉案汉书音义曰白苻白石英也索隐白垺出鲁阳山苏林音附正义药对曰雌黄出武都山谷与雄黄同山】锡碧金银【正义顔云锡青金也碧谓玉之青白色者

也】衆色炫燿照烂龙鳞【集解郭璞曰如龙之鳞采】其石则赤玉玫瑰【集解郭璞曰赤瑾也见楚辞玫瑰石珠也】琳琅琨珷【集解駉案汉书音义曰琳球也珷石次玉者琨珷山名也出善金尸子曰昆吾之金者索隐司马彪曰琨珷石之次玉也河图云流州多积石名琨珷石链之成铁以作剑光明如水精案字或作昆吾也】瑊玕玄厉【集解徐广曰瑊音古咸反玕音勒皆次玉者駉案汉书音义曰玄厉黑石可用磨者】瑊石武夫【集解徐广曰石似玉駉案汉书音义曰瑊石出鴈门武夫出长沙也】其东则有蕙圃衡兰芷若射干穹穷菖蒲【集解駉案汉书音义曰衡杜衡也其状若葵其臭如麝芜芷白芷若杜若也索隐司马彪云蕙香草也本草云薰草一名蕙广志云蕙草缘叶紫茎魏武帝以此烧香今东下田有草茎叶似麻其华正紫也张揖云衡杜衡东下田有草生天帝之山案山海经云叶如葵臭如麝芜可以走马博物志云一名土杏味乱细辛叶似葵故药对亦以为似细辛也兰秋兰本草云芷一名茝埤苍云齐茝一曰葍字林曰茝音昌亥反又音昌里反葍音火高反本草又曰杜若一名杜衡今杜若叶似姜而有文理茎叶皆有长毛古今名号不同故其所呼别也广雅云乌蓬射干本草名乌扇也司马彪云芎藭似藁本郭璞云今历阳呼为江离淮南子云夫乱人者若芎藭之与藁本也】江离麝芜诸蔗獐且【集解徐广曰獐音匹沃反駉案汉书音义曰江离香草麝芜蕝芷也似蛇床而香诸蔗甘柘也獐且藁荷也索隐吴录曰临海县海水中生江离正青似乱髮即离骚所云者是也广志云赤叶红花则与张勃所说又别案今芎藭苗曰江离绿叶白华又不同樊光曰藁本一名藁芜根名蕝芷药对以为藁芜一名江离芎藭苗也则芎藭藁本江离藁芜并相似备是一物也獐音普各反且音子余反汉书作巴且文颖云巴蕉也郭璞以为藁荷属未知孰是】其南则有平原广泽登降陲靡【集解駉案音移靡】案衍坛曼【索隐司马彪云案衍窳下坛曼平博也衍音弋单反坛音徒旦反】缘以大江限以巫山【集解郭璞曰巫山今在建平巫县也】其高燥则生葳蕤苞荔【集解徐广曰葳音针马蓝也或曰草生水中华可食荔音力诣反草似蒲駉案汉书音义曰苞蕤也索隐?音斯郭璞云葳酸酱江东名乌葳析汉书作斯孟康云斯禾似燕麦广志云凉州地生析草皆如中国燕麦是也】薛莎青蘋【集解徐广曰薛音先结反駉案汉书音义曰薛赖蒿也莎镐侯也青蘋似莎而大也音烦】其卑湿则生藏蓂兼葭东蔷雕胡【集解徐广曰乌桓国有蔷似蓬草实如葵子十月熟駉案汉书音义曰藏似藪而叶大蓂蓂尾草也兼藁也葭芦也索隐卑音婢卑下也郭璞云蓂尾似茅兼葭音兼加孟康云兼葭似芦也郭璞云兼蔽也似?而细小江东人呼为兼蒿又云葭芦也似苇而细小江东人呼为乌葭藪音五患反蔽音敌广志云东蔷子色青黑河西记云贷我东蔷偿我白粱也雕胡谓菰米】莲藕菰芦【集解徐广曰生水中索隐郭璞云菰蔣也芦苇也】庵?轩芋【集解駉案汉书音义曰庵?蒿也轩芋荪草也索隐郭璞云庵?子可疗病也轩芋生水中今扬州有也】衆物居之不可胜图【集解郭璞曰图画也】其西则有涌泉清池激水推移外发芙蓉菱华内隐钜石白沙其中则有神龟蛟鼉【正义郭注山海经云蛟似蛇而四脚小细头有白婴大者数十围卵生子如一二斛瓮吞人鼉似蜥蜴而大身有甲皮可以冒鼓】瑇瑁【正义似觜觿甲有文出南海可以饰器物也】鼈鼉其北则有陰林巨树梗枏豫章【集解郭璞曰梗杞也似梓枏叶似桑豫章大木也生七年乃可知也正义按温活人云豫今之枕木也章今之樟木也二木生至七年枕樟乃可分别】桂椒【正义郭云桂似枇杷叶而大白花花而不着子藂生岩岭间无杂木冬夏常青按今诸寺有桂树叶若枇杷而小光静冬夏常青其皮不中食盖二色桂树】木兰【正义广雅云似桂皮辛可食叶冬夏常似冬其实如小甘辛美南人以为梅也】蘼离朱杨【集解徐广曰蘼音扶戾反駉案郭

璞曰木兰树皮辛香可食汉书音义曰离山梨朱杨赤杨也索隐郭璞云朱杨赤茎柳生水边尔雅云桤河柳是也】栌栌栲栗橘柚芬芳【集解徐广曰栲音郢駟案汉书音义曰栲栲枣也正义小曰橘大曰柚树有刺冬不凋叶青花白子黄亦二树相似非橙也】其上则有赤猿蠼螋【集解徐广曰音劬柔正义蠼音劬螋音柔皆猿猴类】鵷雏孔鸾腾远射干【集解郭璞曰鵷雏凤属也孔孔雀鸾鸾鸟也駟案汉书音义曰腾远鸟名射干似狐能缘木索隐孟康云腾远鸟名非也司马彪云腾远蛇也郭璞云腾蛇龙属能兴云雾】其下则有白虎元豹螭虬豸【集解郭璞曰螭大兽长百寻虬似狸而大駟案汉书音义曰豸胡地野犬似狐而小也索隐应劭云豸音顔韦昭一音岸邹诞生音苦奸反协音是】兕象野犀【正义兕状如水牛象大兽长鼻牙长一丈俗呼为江獬犀头似獬一角在额汉书并无此句】穷奇猨狽於是乃使专诸之伦手格此兽楚王乃驾驯驳之驷【集解駟案汉书音义曰驯扰也驳如马白身黑尾一角锯牙食虎豹驾之以当驷马也】乘雕玉之舆靡鱼须之桡旃【集解郭璞曰以海鱼须为旒旌言桡弱也通帛为旃也】曳明月之珠旗【集解駟案汉书音义曰以明月珠缀饰旗】建干将之雄戟【集解駟案汉书音义曰干将韩王剑师雄戟胡中有?干将所造也索隐应劭曰干将吴善冶者姓如淳曰干将铁所出晋灼曰阖闾铸干将剑应劭说是方言云戟中小子刺者所谓雄戟也周处风土记云戟为五兵雄也?音巨案周礼冶氏为戈胡三之注云胡其子也又周礼图谓戟支曲下为胡也】左乌号之雕弓【索隐张揖云黄帝乘龙上仙小臣不得上挽持龙髯髯拔堕黄帝弓羣臣抱弓而号故名乌号见封禅书及郊祀志文又韩诗外传云弓工之妻曰此弓是太山南乌号之柘桑淮南子云乌号柘桑其材坚劲乌栖其上将飞枝劲复起摽呼其上伐取其材为弓因曰乌号古史考风俗通皆同此说也】右夏服之劲箭【集解徐广曰韦昭云夏夏羿也矢室名曰服吕静曰步义谓之服也索隐案夏羿善射者又服箭之室故云夏服又夏后氏有良弓名繁弱其矢亦良即繁弱箭服也】阳子骀乘纖阿为御【集解駟案汉书音义曰阳子仙人阳陵子纖阿月御也韦昭曰阳子古贤也索隐张揖云阳子伯乐也孙阳字伯乐秦穆公臣善御者也或曰纖阿美女姣好貌又乐彦曰纖阿山名有女子处其岩月历数度跃入月中因为月御也郭璞云纖阿古之善御者】案节未舒【索隐郭璞云言顿轡也司马彪云案轡而行得节故曰案节马足未展故曰未舒亦为得也】即陵狡兽犛犛距虚【集解郭璞曰犛犛似马而色青距虚即犛犛变文互言之穆天子传曰犛犛距虚日走五百里也】軼野马而?騊駼【集解徐广曰?音锐駟案郭璞曰野马如马而小騊駼似马?车轴头索隐?音卫谓轴头?而杀之騊音陶駼音涂】乘遗风而射游騏【集解駟案汉书音义曰遗风千里马尔雅曰騏如马一角不角者騏也索隐吕氏春秋云遗风之乘古今注曰秦始皇马名韦昭曰騏如马无角非麒麟之騏騏音攜】儵眴淩淩【集解徐广曰淩音七见反淩音力诣反駟案汉书音义曰皆疾貌】雷动燁至星流霆擊弓不虚发中必决皆【集解韦昭曰在目所指中必决於眼眦也】洞胷达腋絶乎心繫获若雨兽揜草蔽地於是楚王乃弭节裴回【集解郭璞曰或云节今之所杖信节也索隐司马彪云弭犹低也】翱翔容与【索隐郭璞曰言自得】览乎陰林观壮士之暴怒与猛兽之恐惧徼 受诘【集解徐广曰 音剧駟案郭璞曰 疲极也诘尽也言兽有倦游者则徼而取之索解司马彪云徼遮也 倦也谓遮其倦者 音剧诘音屈说文云 劳也燕人谓劳为 徼音古尧反】殚睹衆物之变态於是郑女曼姬【集解郭璞曰曼姬谓邓曼姬妇人之总称正义文颖云郑国出好女曼者其色理?泽也如淳云郑女夏姬也?姬楚武王夫人邓】被阿锡【集解駟案汉书音义曰阿细缯也锡布也正义按东阿出缯也】揄紵縞【集解徐广曰揄音與正义揄

曳也韦云紵之色若縞也顔云紵织紵也縞鲜支也】杂織罗垂雾縠【集解郭璞曰言细如雾垂以覆头】褰积褰纒纒徐委曲郁纒谿谷【集解駉案汉书音义曰褰积简𪔐也褰缩也纒裁也其纒中文理茆郁回曲有似於谿谷也索隐小顔云此说非也褰积今之帛摄古谓之皮弁素积是也苏林曰褰纒缩蹙之也纒音侧救反𪔐音助草反裁音在代反曲字林音邱欲反】粉粉褰褰【索隐郭璞曰衣长貌正义上芳云反下方非反】扬施恤削【集解徐广曰施音迤衣袖也駉案汉书音义曰恤削裁制貌也索隐张揖云扬举也恤削刻除貌也】蜚織垂髻【集解徐广曰織音芟駉案郭璞曰織挂衣饰髻髻髻也】扶輿猗靡【集解郭璞曰淮南所谓曾折摩地扶輿猗委也正义輿音余猗於绮反谓郑女曼姬侍从王者扶其车輿而猗靡】噏呷萃蔡【集解駉案汉书音义曰噏呷衣裳张起也萃蔡衣声也索隐韦昭云呷音呼甲反郭璞云萃蔡犹璀璨也正义呷火甲反萃音翠蔡千贿反】下摩兰蕙上拂羽盖错翡翠之威蕤【集解徐广曰错音措或作错纷翠蕤】缪绕玉绥【集解郭璞曰绥所执以登车正义顔云下摩兰蕙谓垂髻也上拂羽盖谓飞織也玉绥以玉饰绥也言飞織垂髻错杂翡翠之旌旛或绕玉绥也张揖云翡翠大小一如雀雄赤曰翡雌青曰翠博物志云翡身通黑唯曾前背上翼後有赤毛翠身通青黄唯六翮上毛长寸余青其飞则羽鸣翠翡翠翡然因以为名也】缥乎忽忽若神仙之彷彿【正义佛言似神仙也战国策云郑之美女粉白黛黑而立於衢不知者谓之神仙】於是乃相与獠於蕙圃【集解郭璞曰獠猎也音辽索隐尔雅云宵猎曰獠】嫫媿勃率上金堤【索隐嫫媿匍匐上下也率音素忽反】揜翡翠射鵀【集解駉案汉书音义曰鵀?鸟似凤也索隐司马彪曰鵀?山鵀也许慎云鷖鸟也郭璞曰似凤有光彩音浚宜李彤云鵀?神鸟飞光竟天也】微矰出織繳施【集解徐广曰繳音斫】弋白鹄连鴛鵒【集解郭璞曰野鵒也鴛音加索隐尔雅云舒鴈鵒也正义鹄水鸟也鴛鵒连谓兼获也抱朴子云千岁之鹄纯白能登於木】双鵒下玄鹄加【集解郭璞曰诗云弋言加之是也正义司马彪云鵒似鴈而黑亦呼为鵒括韩诗外传云胎生也相鹤经云鹤壽二百六十岁则色絶黑按弋双鵒既下又加玄鸟之上也】怠而後发游於清池浮文鵒【集解駉案汉书音义曰鵒水鸟也尽其象於船首淮南子曰龙舟鵒首天子之乘也】扬桂棹【集解徐广曰音曳駉案韦昭曰棹楫也】张翠帷建羽盖罔璫玕钩紫贝【集解郭璞曰紫质黑文也正义毛诗虫鱼疏云贝水之介虫大者蚌音下郎反小者为贝其白质如玉紫点为文皆成行列当大者径一尺小者七八寸今九真交趾为杯盘实物也货殖传云贝宝龟是也】攄金鼓吹鸣籥【集解駉案汉书音义曰攄撞也籥箫也】榜人歌【集解郭璞曰唱櫓歌也榜船也音谤】声流喝【集解徐广曰乌迈反】水虫骇波鸿沸涌泉起奔扬会 石相擊硠硠??若雷霆之声闻乎数百里之外将息獠者擊灵鼓【集解郭璞曰灵鼓六面也】起烽燧车案行骑就队纒乎淫淫班乎裔裔【集解郭璞曰皆羣行貌也】於是楚王乃登阳云之台【集解徐广曰宋玉云楚王游於阳云之台駉案郭璞曰在云梦之中】泊乎无为澹乎自持勺药之和具而後御之【集解郭璞曰勺药五味也】不若大王终日驰骋而不下輿將割轮淬自以为娱【集解徐广曰淬千内反駉案郭璞曰將膊淬染也將音裔也】臣窃观之齐殆不如於是王默然无以应仆也乌有先生曰是何言之过也足下不远千里来况齐国【集解郭璞曰言有惠况也】王悉发境内之士而备车骑之衆以出田乃欲戮力致获以娱左右也何名为夸哉问楚地之有无者愿闻大国之风烈先生之余论也今足下不称楚王之德厚而盛推云梦以为高奢言淫乐而显侈靡窃为足下不取也必若所言固非楚国之美也有而言之是章君之恶无而言之是害足下之信章君之恶而伤私义二者无一可而先生行之必且轻於齐而累於楚矣且齐

东有巨海【索隐有作渚苏林云渚音渚小洲曰渚谓东有大海之渚也】南有琅邪【集解郭璞曰山名在琅邪县界正义山名在密州东南百三十里琅邪台在山上】观乎成山【集解徐广曰在东莱不夜县索隐张揖云观阙也於山上筑宫阙郭璞言在卜游观音古唤反正义封禅书云成山斗入海言上山观也括地志云成山在莱州文登县东北百八十里也】射乎之罘【集解駰案汉书音义曰之罘山在牟平县射猎其上也正义括地志云罘山在莱州文登县西北百九十里言射猎其上也罘音浮】浮渤澥【集解駰案汉书音义曰海别枝名也索隐案齐都赋云海旁曰勃断水曰澥也】游孟诸【集解郭璞曰宋之藪泽名正义周礼职方氏青州藪曰望诸郑玄云望诸孟诸也】邪与肃慎为邻【正义邪谓东北接之括地志云靺鞨国古肃慎也亦曰挹娄在京东北八千四百里南去扶余千五百里东及北各抵大海也】右以汤谷为界【正义言右者北向天子也海外经云汤谷在黑齿北上有扶桑木水中十日所浴张揖云日所出也许慎云热如汤】爍田乎青邱傍徨乎海外【正义服虔云青邱国在海东三百里郭云青邱山名上有田亦有国出九尾狐在海外】吞若云梦者八九其於曾中曾不蒂芥【索隐张揖云蒂芥刺鲠也郭璞云言不觉有也】若乃俶傺瑰伟异方殊类珍怪鸟兽万端鳞萃充仞其中者不可胜记禹不能名契不能计【正义禹为尧司空辨九州土地山川草木禽兽契为司徒敷五教主四方会计言二人犹不能名计其数】然在诸侯之位不敢言游戏之乐苑囿之大先生又见客【索隐先生指子虚也如淳曰见宾客礼待故也李善曰言见先生是宾客之也】是以王辞而不能复【索隐郭璞曰复答也】何为无用应哉无是公听然而笑【集解郭璞曰听笑貌也索隐听音斷又音牛隐反】曰楚则失矣齐亦未为得也夫使诸侯纳贡者非为财币所以述职也封疆画界者非为守御所以禁淫也今齐列为东藩而外私肃慎捐国踰限越海而田其於义故未可也且二君之论不务明君臣之义而正诸侯之礼徒事争游猎之乐苑囿之大欲以奢侈相胜荒淫相越此不可以扬名发誉而适足以贬君自损也且夫齐楚之事又焉足道邪君未睹夫巨丽也独不闻天子之上林乎左苍梧右西极【集解郭璞曰西极国也正义文颖云苍梧郡属交州在长安东南故言左尔雅云西至於豳国为极在长安西故言右】丹水更其南【集解駰案汉书音义曰丹水出上洛冢领山】紫渊径其北【集解郭璞曰紫渊所未详正义山海经云紫渊水出根耆之山西流注河文颖云西河谷罗县有紫泽其水紫色注亦紫在县北於长安为北】终始霸澹出入泾渭【索隐张揖云霸出蓝田西北而入渭澹亦出蓝田谷北至霸陵入霸霸澹二水尽於苑中不出故云终始也泾渭二水从苑外来又出苑去也泾水出安定泾阳县笄头山东至阳陵入渭渭水出陇西首阳县鸟鼠山东北至华陰入河】酆鄠潦潏【集解郭璞曰皆水流貌音决索隐张揖曰丰水出酆县南山丰谷北入泾渭镐水在昆明池北郭璞云镐水丰水下流也应劭云潦流也潏涌出声也案张揖云潏水出南山姚氏云潦或作滂潏水出酆县北注渭潏水出杜陵今名沔水自南山皇子陂西北流注昆明池入渭案此下文八川分流则从泾渭霸澹丰镐潦潏为八晋灼则云计从丹水以下至潏除潦为行潦凡九从霸澹以下为数凡七案今潏既是水名除丹水紫渊自霸以下通数适足八川是经营乎其内也又潘岳关中记曰泾渭霸澹丰镐潏潏上林赋所谓八川分流也】紆余委蛇经营乎其内荡荡兮八川分流相背而异态【集解郭璞曰八川名在上】东西南北驰骛往来出乎椒邱之阙行乎洲淤之浦【集解郭璞曰椒邱邱名言有岩阙也见楚辞淤亦洲名蜀人云见方言索隐服虔云邱名也案两山俱起象双阙故云椒邱之阙楚词曰驰椒邱且焉止息是也如淳云邱多椒也】径乎桂林之中【集解郭璞曰桂林林名也见南海经也】过乎泂莽之野【集解駰案汉书音义曰山海

经所谓大荒之野】汨乎浑流顺阿而下【集解郭璞曰阿大陵】赴隘陝之口触穹石激堆埼【集解郭璞曰穹隆大石貌堆沙堆埼曲岸头音祈】沸乎暴怒汹涌滂?【集解駉案汹音许勇反涌音勇滂昔浦横反?音浦拜反索隐司马彪曰汹涌跳起貌澎?波相振也涌或作容澎或作滂】渾漳滌汨【索隐司马彪云渾沸盛貌滌汨去疾也正义毕渤密三音汨于笔反】湍测泌□【焦解郭璞曰逼侧笔栲四音索隐司马彪曰湍测相迫也泌□相楔也】横流逆折转腾激洌【索隐苏林曰流轻疾也】澎湃沆瀣【索隐瀣亦作漑司马彪云滂溲水声沆漑徐流也郭璞云鼓怒郁鲠之貌也正义澎湃彭反溲普秘反沆胡朗反漑胡代反】穹隆云挠【索隐服虔云水急旋回如云屈曲也郭璞云水陇起回窳也】蜿瀾胶戾【索隐司马彪云蜿瀾展转也胶戾邪曲也音宛善交戾四音正义蜿音婉瀾音喜】踰波趋浥【集解徐广曰乌狹反索隐司马彪云踰波後陵前也趋浥输於深泉也】莅莅下瀨【索隐司马彪云莅莅声也音利】批岩冲壅【正义批白结反礧岩司马彪云批反击也壅曲隈也】犇扬滯沛【索隐郭璞云滯沛水洒散貌滯音丑制反】临坻注壑【正义坻音迟坻水中沙微起出水者也尔雅曰水沚曰坻壑墟也】□灕灕坠【索隐□音士湛反灕音士卓反说文云水之小也正义灕音隕坠直类反】湛湛【集解徐广曰湛音沈】隐隐砰磅訇?【正义砰披萌反磅蒲黄反訇呼宏反?苦盖反皆水流鼓怒之声也】潏潏淢淢淢淢鼎沸【集解郭璞曰淢音敕立反淢音緝索隐郭璞云皆水微转细涌貌潏淢音决骨广雅云淢淢决流貌周成杂字云淢淢水沸之貌也】驰波跳沫【集解徐广曰一云吸呬】汨?漂疾【索隐晋灼云?音华给反郭璞云许立反汨?急转貌也】悠远长怀【正义放散貌也】寂漻无声肆乎永归然後灏灏潢潢【正义晃养二音郭云皆水无涯际也】安翔徐徊翯乎漈漈【索隐翯音鸛漈音缙诗曰白鸟翯翯郭璞云水白光貌翯音晶漈音昊也】东注太湖【正义太湖在苏州西南】衍溢陂池於是乎蛟龙赤螭【正义螭丑知反文颖云龙子为螭张揖曰雌龙也二说皆非广雅云有角曰虬无角曰螭按此皆龙类而非龙】?□蜥离【集解徐广曰蜥音斩駉案郭璞曰?□鮪也音亘□蜥离未闻正义?古邓反□末邓反李奇云周洛曰鮪蜀曰?□出巩山穴中三月遡河上能度龙门之限则为龙矣】鰕鰕鰕鰕【集解徐广曰鰕音娱皮有文出乐浪鰕音虔鰕音托哆口鱼駉案郭璞曰鰕似鲢而黑汉书音义曰鰕似鲤而大也】禺禺鰕鰕【集解徐广曰禺禺鱼牛也鰕一作魮音榻鰕音纳一作鰕駉案汉书音义曰魮比目鱼也鰕鰕鱼】捷鳍擢尾振鳞奋翼潜处于深岩鱼鼈謹声万物衆夥明月珠子玃璿江靡【集解郭璞曰靡崖也索隐应劭云明月珠子生於江中其光耀乃照於江边也正义捷音乾鳍音祁捷举也鳍者鱼背上鬣也】蜀石黄磬【集解郭璞曰磬石黄色也】水玉磊砢【集解郭璞曰水玉水精也】磷磷烂烂采色滢盱丛积乎其中鸿鹄鸛鹄?鸛鵒【集解郭璞曰鸛鸛鸛鸛鵒似鸭而大长颈赤目紫绀色也索隐鸛音保郭璞云鸛似鴈而无後指毛诗鸟兽疏云鸛似鴈而虎文也正义鸛鵒烛玉二音郭云似鸭而大长颈赤目紫绀色辟水毒生子在深谷涧中若时有雨鸭?者生子善鬪江东呼为烛玉】??目【集解徐广曰?音环索隐郭璞云?目未详小顔云荆郢间有水鸟大如鹭而短尾色红白深目目旁毛皆长而旋此其是乎?音旋汉书亦作旋目正义郭云交青似鳬而脚高有毛冠辟火灾】烦鸛鸛【集解徐广曰烦鸛一作番?鸛音容駉案汉书音义曰烦鸛鳬也鸛似鸛灰色而鸡足索隐郭璞云烦鸛鸭属鸛一名章渠也】?鵒鵒【集解徐广曰?音斟水鸟也?音斯鵒音火交反駉案汉书音义曰?苍黑色郭璞曰鵒鱼鵒也脚近尾鵒鵒鵒也索隐张揖曰?似鱼虎而苍黑邹诞本作鵒?也】羣浮乎其上下泛淫泛滥【索隐郭璞云皆鸟任风波自纵漂貌泛音冯泛音芳剑反广雅云泛泛

泛泛羣浮也】随风澹淡与波摇荡掩薄草渚【正义掩覆也薄依也言或依草渚而游戏也】
【唼喋菁藻】【集解郭璞曰菁水草吕氏春秋曰太湖之菁也索隐左传云苹蘩蒹藻蒹聚也
正义唼疏甲反喋文甲反鸟食之声也】咀嚼菱藕於是乎崇山巃嵒崔巍嵒嵒【正义巃力
孔反嵒子孔反崔在回反巍五回反郭云皆峻貌】深林钜木嶄岩?嵒【正义嶄音咸又仕衔
反?音楚林反嵒楚宜反顔云嶄岩尖锐貌嵒不齐也】九巖巖嶂南山嵒嵒【集解駉案汉
书音义曰九巖山在左冯翊谷口县西巖嶂山在池阳县北正义巖子公反巖才切反嶂五结
反】岩陀【集解駉案音迟】巖錡摧峩嶕嶭【集解郭璞曰陀崖际巖音鱼晚反錡音蚁摧
音作罪反索隐陀音豸皆隆屈衆折貌嶕音倚嶭音掘】振谿通谷【索隐张揖云振拔也水
注川曰谿注溪曰谷郭璞云振犹洒之也】蹇产沟渎【集解駉案汉书音义曰蹇产屈折也
】谿呀谿閭【集解郭璞曰皆涧谷之形容也谿音呼含反呀音呼加反閭音呼下反索隐司
马彪云谿呀大貌谿閭空虚也】陵别岛【正义高平曰陆大陆曰阜大阜曰陵水中山曰
岛】崑崙崑崙【正义崑於鬼反崑鱼鬼反崑乌罪反崑胡罪反皆高峻貌】邱墟崑【正
义虚音墟崑口忽反又口罪反 力罪反皆堆垄不平貌】隐鳞郁【正义 音律郭云皆
其形势也】登降施靡【正义郭璞云施靡犹连延】陂池𦍋𦍋【集解郭璞曰𦍋音衣被𦍋
音虫𦍋也索隐郭璞云陂池旁颓貌陂音皮𦍋音被】沅溶淫鬻【索隐郭璞云游激淖衍貌
正义溶音容鬻音育张云水流谿谷之间】散涣夷陆【索隐司马彪云夷平也广平曰陆】
亭臯千里靡不被筑【集解郭璞曰言为亭候於臯隰皆筑地令平贾山所谓隐以金椎也】
掩以绿蕙【正义张云绿王刍也蕙薰草也顔云绿蕙言蕙草色绿耳非王刍也尔雅云葍一
名王刍】被以江离糅以蘼芜【正义糅女又反】杂以流夷【集解駉案汉书音义曰流夷
新夷也】專结缕【集解徐广曰專古布字一作怖駉案汉书音义曰结缕似白茅蔓联而生
布种之者也】攢戾莎【集解徐广曰草可染紫】揭车衡兰橐本射干【集解徐广曰揭音
桀駉案郭璞曰揭车一名乞與橐本橐本射干十月生皆香草索隐案桐君药录橐本苗似穹
蒦】茝姜蕤荷【索隐张揖云茝姜子姜也案四民月令生姜谓之茝姜音紫正义蕤人羊反
柯根旁生笋若芙蓉可以为菹又治蛊毒也】葳橙若荪【集解郭璞曰葳未详橙柚若荪香
草也索隐姚氏以为此前後皆草非橙柚也汉书作葳持小顔云葳寒浆也持当为符字之误
尔符鬼目也案今读者亦呼为登谓登草也姚氏云荪草似菖蒲而无脊也生溪涧中荪音孙
】鲜枝黄砾【集解郭璞云皆未详索隐张揖云皆草也司马彪云鲜支即今支子或云鲜枝
亦香草也小顔云黄砾者黄屑木恐非也】蔣茅青蘋【集解徐广曰茅音仁駉案汉书音义
曰蔣菰也茅三棱索隐蘋音烦】布濩閭泽延蔓太原丽靡广衍应风披靡吐芳扬烈【集解
郭璞曰香酷烈也】郁郁斐斐衆香发越𦍋𦍋布写?暖苾勃【正义?暖奄爱二音皆芳香之
盛也诗云苾苾芬芬气也】於是乎周览泛观瞋盼轧沕【集解徐广曰瞋音田人反盼一作
睥駉案郭璞曰皆不可分貌】芒芒恍忽视之无端察之无崖日出东沼入於西陂【索隐张
揖曰日朝出苑之东池暮入於苑西陂中也】其南则隆冬生长踊水跃波兽则 旄獬犁【
集解徐广曰 音容兽类也犁音狸一音茅駉案郭璞曰旄旄牛獬似熊庠脚锐头犁牛黑色
出西南徼外也索隐郭璞云 牛领有肉堆即今之犁牛也张揖云旄旄牛其状如牛而四
节生毛獬白豹也似熊庠脚锐髻骨无髓食铜铁音陌犁音狸又音茅或以为猫牛毛可为𦍋
是也】沈牛麀麀【集解駉案汉书音义曰沈牛水牛也正义麀似鹿而大按麀似水牛】赤
首圜题【集解郭璞曰题额也所未详】穷奇象犀【集解駉案汉书音义曰穷奇状如牛而
蝟毛其音如嗥狗食人也索隐郭璞云象大兽长鼻牙长一丈犀头似猪庠脚一角在头也】

其北则盛夏含冻裂地涉冰揭河【集解郭璞曰言水漫冻不解地拆裂也揭褰衣】兽则麒麟角?【集解郭璞曰角?音端似猪角在鼻上堪作弓李陵尝以此弓十张遗苏武也索隐张揖曰雄曰麒麟雌曰麟其状麋身牛尾狼蹄一角郭璞云麒麟似麟而无角毛诗疏云麟黄色角端有肉京房传云麟有五彩腹下有黄色也张揖云角端似牛角可以为弓】麕駼橐駼蛩蛩驪騮騊駼驴骡【正义麕駼桃徒二音橐音托驼徒河反蛩音其恭反驪騮音颠奚騊駼音决啼】於是乎离宫别馆弥山跨谷【正义弥满也跨犹骑也言宫馆满山又跨谿谷也】高廊四注重坐曲阁【集解郭璞曰重坐重轩也曲阁阁道曲也】华榱壁璫【索隐韦昭曰裁玉为璫以当榱头司马彪曰以璫为瓦之当也】辇道纚属步櫚周流长途中宿【集解郭璞曰途楼阁间陛道中宿言长远也】夷嶁筑堂累台增成岩突洞房【集解郭璞曰嶁山名平之以安堂其上成亦重也周礼曰为坛三成在岩穴底为室潜通台上者索隐服?曰平嶁山以为堂也张揖云重累而成之故曰增成突音一吊反释名以为突幽也楚词云冬有突厦室寒王逸以为复室也】俛杳眇而无见仰攀橑而扞天奔星更於闐阓宛虹拖於楯轩【集解徐广曰楯音食尹反正义拖音徒我反顔云宛虹屈曲之虹拖谓中加於上也楯轩之阑板也言室宇之高故星虹得经加之】青蚪蚴蟺於东箱【正义蚪一紉反蟺力紉反】象舆婉蟬於西清【集解駉案汉书音义曰山出象舆瑞应车也郭璞曰西清西箱清静地也正义婉蟬宛善二音顔云蚴蟺婉蟬皆行动之貌也】灵圉燕於间观【集解郭璞曰灵圉淳圉仙人名也索隐张揖云灵圉衆仙号淮南子云骑飞龙从淳圉是也】偃佺之伦暴於南荣【集解駉案汉书音义曰偃佺仙人名也索隐韦昭云古仙人姓偃列仙传云槐里采药父也食松形体生毛数寸方眼能行速走马也应劭曰南荣屋檐两头如翼也故郑玄云荣屋翼也高诱云飞荣似鸟舒是也暴偃卧日中也】醴泉涌於清室通川过乎中庭盘石振崖【集解徐广曰振音唇索隐如淳曰振音振振盛也李奇云振整也整顿池外之厓音之忍反】欽岩倚倾蹉峩磔磔【集解徐广曰蹉一作池磔音杂磔音五合反索隐埤苍云磔磔高貌磔音士切反磔音五楫反又字林音磔才匝反磔五匝反】刻削峥嵘【正义郭云言自然若雕刻也】玫瑰碧琳珊瑚丛生【正义郭璞曰珊瑚生水底石边大者树高三尺余枝格交错无有叶者也】璿玉旁唐【索隐郭璞云旁唐言盘薄】璿文鳞【集解徐广曰璿音彬璿音班】赤瑕驳荦【索隐说文云瑕玉之小赤色张揖曰赤玉也司马彪云驳荦采点也荦音洛角反】杂沓其间【集解徐广曰杂一云插沓一云逖】垂绥琬琰和氏出焉【集解徐广曰垂绥一作朝采駉案郭璞曰汲冢竹书曰桀伐岷山得女二人曰琬曰琰桀爱二女斷其名於苕华之玉苕是琬华是琰也】於是乎卢橘夏孰【集解郭璞曰今蜀中有给客橙似橘而非若柚而芬香冬夏华实相继或如弹丸或如拳通岁食之即卢橘也索隐应劭云伊尹书曰果之美者箕山之东青马之所有卢橘夏熟晋灼曰此虽赋上林博引异方珍奇不系於一也案广州记云卢橘皮厚大小如甘酢多九月结实正赤明年二月更青黑夏熟吴录云建安有橘冬月树上覆裹明年夏色变青黑其味甚甘美卢即黑色是也】黄甘橙棖【集解徐广曰音凑橘属】枇杷燃柿【集解徐广曰燃音而善反果也索隐张揖云燃燃支香草也韦昭曰燃音汝萧反郭璞云燃支木也燃音烟此说为近说文曰燃酸小枣也淮南子云伐燃枣以为矜音勤】梔?厚朴【集解徐广曰梔音亭山梨索隐司马彪曰上党谓之梔?齐都赋云梔?熟也厚朴药名也】栲枣杨梅【集解徐广曰栲音弋井反栲枣似柿索隐张揖曰杨梅实似谷子而有核其味酢出江南荆扬异物志其实外内着核熟时正赤味甘酸也】櫻桃蒲陶【集解郭璞曰蒲陶似燕薊可作酒也索隐张揖云櫻桃一名含桃吕氏春秋云鸛鸟所含故曰含桃尔雅谓之荆桃也】隐

夫郁棣栳 荔枝【集解徐广曰郁一作奠栳音荅駟案郭璞曰郁车下李也棣实似樱桃栳似李棣音逮 音?隐夫未闻索隐晋灼曰荔枝大如鷄子皮麤剥去皮肌如鸡子中黄其味甘多酢少广志云树高五六丈如桂树綠叶冬夏青茂有华朱色荔字或作离音力致反】罗乎後宫列乎北园?邱陵【集解郭璞曰?犹延也音施】下平原扬翠叶机紫茎【集解郭璞曰机摇也】发红华秀朱荣煌煌扈扈照曜钜野沙棠栳楮【集解駟案汉书音义曰沙棠似棠黄华赤实其味如李吕氏春秋曰果之美者沙棠之实栳果名楮似樨叶冬不落也】华汜櫛栳【集解徐广曰汜一作枫駟案汉书音义曰华木皮可以为索也索隐古今字林云栳合栳也郭璞云枫似白杨素圆而岐有脂而香榧为舍人曰枫为树厚叶弱茎大风则鸣故曰摄櫛摄櫛平仲木也亦云火蕤木一云玉精食其子得为神仙也】留落胥余仁频并间【集解徐广曰频一作宾駟案郭璞曰落櫛也胥余似并间并间櫛也皮可作索余未详索隐晋灼曰留阙未详司马彪云胥邪树高十寻叶在其末异物志实大如瓠繫在颠若挂物实外有皮中有核如胡桃核里有肤厚半寸如猪膏里有汁斗余清如水味美於蜜也孟康曰仁频櫛也姚氏云?一名櫛即仁频也林邑记云树叶似甘蕉频音宾】櫛檀木兰豫章女贞【集解駟案汉书音义曰櫛檀檀别名也女贞木叶冬不落索隐櫛音谗皇览云孔子墓後有櫛檀树也荆州记宜都有乔木丛生名为女贞】长千仞大连抱夸条直畅实叶蓂茂攢立丛倚连卷累佹崔错癸骖【集解駟案古委字】阬衡閭砢【集解徐广曰癸音拔駟案郭璞曰骖音委閭音恶可反砢音鲁可反索隐郭璞云崔错癸骖者蟠戾相樛也阬衡閭砢者揭孽倾敌貌也】垂条扶於落英幡纚【集解郭璞曰扶於犹扶疎也幡纚偏幡也音洒索隐皆飞扬貌也纚音所绮反】纷容萧蓂旖旎从风【索隐张揖云旖旎犹阿那也】浏莅轔吸【集解徐广曰莅音栗索隐郭璞云皆林木鼓动之声浏音留莅如字轔古卉字吸音翕】盖象金石之声【正义金钟石磬】管龠之音【正义广雅云象簾长一尺围寸有六孔无底龠谓之笛有七孔说文云龠三孔籥也】柴池茈虬【集解徐广曰柴音差虬音多索隐张揖云柴池参差也茈虬不齐也茈音差虬音侧氏反】旋环後宫杂遯累辑【集解徐广曰杂一作插】被山缘谷循阪下隰视之无端?之无穷於是玄猿素雌雌獬飞鸛【集解徐广曰雌音于季反駟案汉书音义曰雌似猕猴仰鼻而长尾獬似猕猴而大飞鸛飞鼠也其状如兔而鼠首以其?飞也索隐郭璞曰鸛鼯鼠也紫毛赤色飞且生一名飞生雌音赠遗之遗鸛音谏玄猿猿之雄者黑色也素雌猿之雌者素色也獬音古约反雌今狢尾端为两岐天雨便以尾插鼻两孔郭璞曰獬色苍黑能攫?人故云獬也】蛭蝮蠃蝓【集解徐广曰蛭音质駟案汉书音义曰山海经曰不咸之山有飞蛭四翼郭璞曰蠃蝓似猕猴而黄蛭未闻索隐张揖云蛭虬也蝮蟬也蠃獬猕猴也顾氏云?音涂卓反山海经云鼻涂山下有兽似鹿马足人首四角名为蠃?獬即此也字或作蠃郭璞云蠃非也上已有雌蠃此不应重见又神异经云西方深山有兽毛色如猴能缘高木其名为蝮字林云蠃音狄蛭蝮二兽名】蜥胡穀蜺【集解徐广曰蜥音在廉反似猿黑身穀音呼谷反蜺音诡駟案汉书音义曰穀白狐子也索隐张揖云蜥胡似猕猴头上有髮腰以後黑郭璞曰穀似鼯而大腰以後黄一名黄腰食猕猴蜺未闻姚氏案山经云即山有兽状如龟白身赤首其名曰蜺又说文云蜥胡黑身白腰若带手有长白毛似掘板也】栖息乎其间长啸哀鸣翩幡互经【正义郭云互经互相经过】夭蟦枝格偃蹇杪颠【正义夭音妖蟦音矫杪音弭沼反郭云皆猿猴在树共戏恣恣也夭蟦频申也】於是乎隄絕梁【正义张云絕梁断桥也郭云梁厚石絕水也】騰殊榛【正义榛仕斤反尔雅云木藂生为榛也殊异也】捷垂条【正义捷音才业反张云捷特悬垂之条】踔稀间【集解郭璞曰踔县蹠也托钓反】牢落陆离

烂曼远迁【正义郭云奔走崩腾状也顔云言其聚散不常杂乱移徙】若此辈者数千百处嬉游往来宫宿馆客庖厨不徙後宫不移【正义说文云庖厨屋郑玄注周礼云庖言苞也苞裹肉曰苞苴也後宫内人也言宫馆各自有】百官备具於是乎背秋涉冬天子校猎乘镂象六玉虬【集解徐广曰以玉为饰駟案郭璞曰镂象山所出輿言有雕镂虬龙属也韩子曰黄帝驾象车六交龙是也】拖蜺旌【正义拖音徒可反张云析毛羽染以五彩缀以缕为旌有似虹蜺气】靡云旗【正义张云画熊虎於旌似云气也】前皮轩後道游【集解郭璞曰皮轩革车也或曰即曲礼前有士师则载虎皮者也道道车游游车皆见周礼也】孙叔奉轡卫公骖乘【集解駟案汉书音义曰孙叔者太仆公孙贺也卫公者卫青也太仆御大将军骖乘也】扈从横行出乎四校之中【集解郭璞曰言跋扈从恣不安卤簿矣索隐晋灼云扈大也文颖曰凡五校今言四者一随天子乘輿也】鼓严簿纵獠者【集解駟案汉书音义曰鼓严严鼓也簿卤簿也駟谓鼓严於林簿之中然後纵獠也】江河为陆泰山为櫓【集解郭璞曰櫓望楼也因山谷遮禽兽为陆音去车反】车骑蠲起隐天动地先後陆离离散别追淫淫裔裔缘陵流泽云布雨施生貔豹【集解郭璞曰貔执夷虎属也音毗】搏豺狼【正义搏擊也杜林云豺似貂白色说文云狼爪】手熊羆【正义张云熊犬身人足黑色羆大於熊黄白色皆能攀沿上高树冬至入穴而蛰沿春而出也】足野羊【集解郭璞曰野羊如羊千斤手足谓拍躡杀之】蒙鹙苏【集解徐广曰苏尾也索隐孟康云鹙鹙尾也苏析羽也张揖云鹙似雉鸡鬪死不却案蒙谓覆而取之鹙以苏为奇故特言之以成文耳鹙音曷决疑注云鸟尾为苏也】縿白虎【集解徐广曰縿音袴駟案郭璞曰縿谓绊络之索隐张揖云着白虎之縿也】被豳文【集解郭璞曰着斑衣索隐輿服志云虎贲骑鹙冠武文单衣即此斑文也】跨野马【索隐跨乘之也】陵三嵎之危【集解駟案汉书音义曰三嵎三成之山】下磧历之坻【集解郭璞曰磧历坂名也正义坻音迟磧历浅水中沙石也坻水中高处言猎人下此也】徑陵赴险越壑厉水推蜚廉【集解郭璞曰飞廉龙雀也鸟身鹿头者】弄解豸【集解駟案汉书音义曰解豸似鹿而一角人君刑罚得中则生於朝廷主触不直者可得而弄也索隐解音蟹豸音文你反】格虾蛤鋌猛氏【集解駟案汉书音义曰虾蛤猛氏皆兽名索隐晋灼曰虾蛤闕郭璞曰今蜀中有兽状如熊而小毛浅有光泽名猛氏说文鋌小矛也音蟬】冒驪褭射封豕【集解郭璞曰驪褭神马日行万里两音窈嫋封豕大猪】箭不苟害解脰?脑【索隐张揖云脰项也?音苦念反亦依字读也】弓不虚发应声而倒於是乎乘輿弥节裴回翱翔往来睨部曲之进退览将率之变态然後浸潭促节【索隐浸潭犹渐冉也汉书作浸淫或作乘輿案节也】儵复远去【集解郭璞曰儵音诘盛反】流离轻禽蹙履狡兽鞞白鹿捷狡兔【集解徐广曰鞞音锐一作惠也正义鞞音卫抱朴子云白鹿壽千岁满五百岁色纯白也晋徵祥记云白鹿色若霜不与他鹿为羣】軼赤电遗光耀【集解徐广曰超陵赤电电光不及言去速也】追怪物出宇宙【正义怪物谓游臬飞虞也张云天地四方曰宇往古来今日宙许慎云宙舟輿所极也按许说宙是也】弯繁弱【正义上乌繁反文颖云弯牵也繁弱夏后氏良弓名左传云分鲁公以夏后之璜封父之繁弱】满白羽【正义文颖云引弓尽箭镞为满以白羽羽箭故云白羽也】射游臬栢蜚虞【集解郭璞曰臬臬羊也似人长唇反踵被髮食人飞虞鹿头龙身神兽栢梢也】择肉後发先中命处弦矢分艺殪仆【集解徐广曰射準的曰艺仆音赴】然後扬节而上浮陵惊风厉骇飈【正义飈音必遥反尔雅云谓暴风从下升上故曰飈】乘虚与神俱【正义张云虚无寥廓与元通灵言其所乘气之高故能出飞鸟之上而与神俱也】麟玄鹤乱昆鸡【集解徐广曰麟音躡正义麟音????鹤二百六十岁则浅

黑色也】遁孔鸾促駿驤拂鷺鸟捎凤皇【集解駟案汉书音义曰遁秦由反鷺鸟鸡反张云山海经云九疑之山有五彩之鸟名曰鷺鸟也正义捎山交反京房易传云凤皇鴈前麟後鸡喙燕颌蛇颈龟背鱼尾骈翼高丈二尺东山经云其状如鹤五采而首文曰经翼文曰顺背文曰义膺文曰仁股文曰信是鸟自歌自舞雄曰凤雌曰皇】捷驾维掩焦明【集解駟案鷓明似凤索隐张揖云鷓明西方之鸟也乐汁图徵曰鷓明状似凤皇宋衷曰水鸟也正义按长喙踈翼覓尾非幽闲不集非珍物不食】道尽涂殫回车而还招摇乎襄羊【索隐郭璞曰襄羊犹仿佯】降集乎北紘【集解郭璞曰紘维也北方之紘曰委羽】率乎直指闇乎反乡蹙石阙历封峦过鵠鹄望露寒【集解徐广曰鵠音支駟案汉书音义曰皆甘泉宫左右观名也】下棠梨【集解駟案汉书音义曰宫名也在云阳县东南三十里】息宜春【正义括地志云宜春宫在雍州万年县西南三十里】西驰宣曲濯鵠牛首【集解駟案汉书音义曰宣曲宫名在昆明池西牛首池名在上林苑西头】登龙台【集解駟案汉书音义曰观名在丰水西北近渭】掩细柳【正义郭曰观名在昆明南柳市】观士大夫之勤略钩獠者之所得获【集解徐广曰钩一作诊也】观徒车之所辘轳【正义辘轳也辘轳也】乘骑之所蹂若【集解徐广曰蹂音人久反】人民之所蹈□与其穷极倦【集解徐广曰音剧】惊憚懼伏不被创刃而死者佗佗籍籍填坑满谷揜平弥泽於是乎游戏懈怠置酒乎昊天之上【索隐张揖曰台高上干昊天也】张乐乎轆轳之宇【集解徐广曰轆音葛索隐郭璞云言旷远深貌也】撞千石之钟立万石之钜建翠华之旗树灵鼉之鼓【集解郭璞曰木贯鼓中加羽葆其上所谓树鼓】奏陶唐氏之舞听葛天氏之歌【集解駟案汉书音义曰葛天氏古帝王号也吕氏春秋曰葛天氏之乐三人操牛尾投足以歌索隐张揖曰葛天氏三皇时君号也吕氏春秋云其乐三人持牛尾投足以歌八阙一曰戴民二曰玄身三曰遂草木四曰奋五谷五曰敬天常六曰建帝功七曰依地德八曰总禽兽之极】千人唱万人和山陵为之震动【集解徐广曰一作勲】川谷为之荡波巴俞宋蔡淮南于遮【集解郭璞曰巴西阆中有渝水獠人居其上皆刚勇好舞汉高募此以定三秦後使乐府习之因名巴渝舞也駟案汉书音义曰于遮歌曲名索隐张揖曰礼乐记云宋音宴女溺志蔡人讴员三人楚词云吴謡蔡讴淮南鼓员四人于遮曲是其意也】文成顛歌【集解郭璞曰未闻也索隐文颖曰文成辽西县名其县人善歌颠益州颠县其人能作西南夷歌颠即滇字】族举逌奏【集解徐广曰举一作居】金鼓迭起鏗枪钲洞心骇耳【集解郭璞曰钲?鼓音】荆吴郑卫之声韶濩武象之乐陰淫案衍之音鄢郢缤纷激楚结风【集解郭璞曰激楚歌曲也列女传曰听激楚之遗风也索隐激楚急风也结风回风亦急风也楚地风气既自漂疾然歌乐者犹复依激结之急风以为节其乐促迅哀切也】俳优侏儒狄鞮之倡【集解徐广曰韦昭云狄鞮地名在河内出善倡者】所以娱耳目而乐心意者丽靡烂漫於前【索隐郭璞云言恣其观也列女传曰桀造烂漫之乐】靡曼美色於後【索隐张揖曰靡细曼泽也韩子曰曼服皓齿也】若夫青琴宓妃之徒【集解駟案汉书音义曰皆古神女名索隐伏俨曰青琴古神女也如淳曰宓妃伏羲女溺死洛水遂为洛水之神宓音伏】絕殊离俗【索隐郭璞曰俗无双也】姣冶嫺都【索隐郭璞云姣好也都雅也诗云姣人僚兮方言云自关而东河济之间凡好或谓之姣音绞说文曰?雅也或作闲汉书本作闲】靚庄刻饬便嬛绰约【集解郭璞曰靚庄粉白黛黑也】柔桡嬛嬛【集解徐广曰音娟索隐柔桡嬛嬛皆骨体柔弱长艷貌也广雅云嬛嬛容也张揖曰嬛嬛犹婉婉也】斌媚娉嫋【集解徐广曰娉音乃冉反嫋音弱索隐埤苍云妩媚悦也通俗文云頰辅谓之妩媚郭璞云娉嫋细弱也小颜云细弱总谓骨体也】曳独茧之褕褕【集解徐广曰

曳音曳檐榆索隐张揖云施袖也郭璞曰独茧茧丝也埤苍云施衣长貌也】眇阎易以戍削【集解徐广曰阎易衣长貌戍削言如刻画作之】嫵姁微?【集解郭璞曰衣服婆娑貌正义嫵白服反姁音先微音白结反?音屑】与世殊服芬香沕郁酷烈淑郁皓齿粲烂宜笑的砾【索隐郭璞曰鲜明貌也楚词曰美人皓齿以姁又曰蛾眉笑以的砾音砾也】长眉连娟微睇絳藐【索隐郭璞曰连娟眉曲细也绵藐视远貌也娟音一全反睇音大计反藐音邈】色授魂与心愉於侧【索隐张揖曰彼色来授我我魂往与接也愉音踰往也悦也二义并通】於是酒中乐酣天子芒然而思似若有亡曰嗟乎此泰奢侈朕以览听余间无事弃日顺天道以杀伐时休息於此恐後世靡丽遂往而不反非所以为继嗣创业垂统也於是乃解酒罢猎而命有司曰地可以垦辟悉为农郊以赡萌隶隳墙填?使山泽之民得至焉实陂池而勿禁【正义实满也言人满陂池任采捕所取也】虚宫观而勿仞【正义仞音刃亦满也言离宫别馆勿令人居上并废罢也】发仓廩以振贫穷补不足恤鰥寡存孤独出德号省刑罚改制度易服色更正朔与天下为始於是历吉日以齐戒袭朝衣乘法驾建华旗鸣玉鸾游乎六艺之囿【正义六艺云言田猎讠则遍游六艺而疾驱於仁义之道也】鹜乎仁义之涂览观春秋之林【集解郭璞曰春秋所以观成败明善恶也】射狸首兼驹虞【集解駰案礼射义曰天子以驹虞为节诸侯以狸首为节驹虞者乐官备也狸首者乐会时也】弋玄鹤建干戚载云?揜羣雅【集解駰案汉书音义曰大雅小雅也索隐张揖曰?车也前有九旒云?之车说者以云?为旌旗皆非也且案中朝卤簿图云云?驾驷不兼言九旒?车与九旒车别也揜捕也张揖曰诗小雅之材七十四人大雅之材三十一人故曰羣雅也】悲伐檀【索隐张揖曰其诗刺贤者不遇明主】乐乐胥【索隐毛诗桑扈云君子乐胥受天之祜言王者乐得贤材之人使在位故天与之福禄也胥音先吕反乐音洛】修容乎礼园【正义礼所以自修饰整威仪也】翱翔乎书圃【正义尚书所以明帝王君臣之道也】述易道【正义易所以絜静微妙上辨二仪陰阳中知人事下明地理也言田猎乃射讠又历涉六经之要也】放怪兽【正义张云苑中奇怪之兽不复猎也】登明堂坐清庙【正义明堂有五帝庙故言清庙王者朝诸侯之处】恣羣臣奏得失四海之内靡不受获【正义言天下之人无不受恩惠】於斯之时天下大说向风而听随流而化喟然兴道而迁义【索隐汉书作崐然犹欬然也音许贵反】刑错而不用德隆乎三皇功美於五帝【索隐司马彪云美溢也音怡战反】若此故猎乃可喜也若夫终日暴露驰骋劳神苦形罢车马之用抗士卒之精【索隐抗音五官反】费府库之财而无德厚之恩务在独乐不顾衆庶忘国家之政而贪雉兔之获则仁者不由也从此观之齐楚之事岂不哀哉地方不过千里而囿居九百是草木不得垦辟而民无所食也夫以诸侯之细而乐万乘之所侈仆恐百姓之被其尤也於是二子愀然改容【索隐郭璞云愀变色貌音作酉反】超若自失逡巡辟席曰鄙人固陋不知忌讳乃今日见教谨闻命矣赋奏天子以为郎无是公言天子上林广大山谷水泉万物及子虚言楚云梦所有甚衆侈靡过其实且非义理所尚故删取其要归正道而论之【索隐大顔云不取其夸奢靡丽之论唯取终篇归於正道耳小顔云删取非谓削除其词而说者谓此赋已经史家刊剟失其意也】相如为郎数岁会唐蒙使略通夜郎西僰中【集解徐广曰羌之别种也音扶逼反索隐张揖云蒙故鄱阳令为郎中使行略取之文穎曰夜郎僰中皆西南夷後以为?犛犛为二郡僰音步北反】发巴蜀吏卒千人【索隐案巴蜀二都名】郡又多为发转漕万余人用兴法【集解駰案汉书曰用军兴法也】诛其渠帅巴蜀民大惊恐上闻之乃使相如责唐蒙因喻告巴蜀民以非上意檄曰告巴蜀太守蛮夷自擅不讨之日久矣时侵犯边境劳士大夫陛下即位存抚天下辑安中

国然後兴师出兵北征匈奴单于怖骇交臂受事诎膝请和康居西域重译请朝稽首来享移师东指闽越相诛右吊番禺太子入朝【索隐文颖曰番禺南海郡理也吊至也东伐闽越後至番禺故言右至非也案姚氏吊读如字小颜云两国相伐汉发兵救之南越蒙天子德惠故遣太子入朝所以云吊尔非训至也】南夷之君西僊之长常效贡职不敢怠堕延颈举踵喁喁然【正义喁五恭反口向上也】皆争归义欲为臣妾道里辽远山川阻深不能自致夫不顺者已诛而为善者未赏故遣中郎将往宾之【索隐贾逵云宾伏也】发巴蜀士民各五百人以奉币帛卫使者不然靡有兵革之事战鬪之患今闻其乃发军兴制惊惧子弟忧患长老【索隐张揖云发军谓发三军之衆兴制谓起军法诛渠帅也案唐蒙为使而用军兴法制故惊惧蜀人也】郡又擅为转粟运输皆非陛下之意也当行者或亡逃自贼杀亦非人臣之节也夫边郡之士闻烽举燧燔【集解駰案汉书音义曰烽如覆米?县着桔槔头有寇则举之燧积薪有寇则燔然之索隐字林云?漉米藪也音一六反纂要云?浙箕也烽见敌则举燧有难则焚烽主昼燧主夜】皆摄弓而驰【索隐摄音女頰反】荷兵而走流汗相属唯恐居後触白刃冒流矢义无反顾计不旋踵人怀怒心如报私讎彼岂乐死恶生非编列之民而与巴蜀异主哉计深虑远急国家之难而乐尽人臣之道也故有剖符之封析珪而爵【索隐如淳曰析中分也白藏天子青在诸侯也】位为通侯居列东第【索隐列甲第在帝城东故云东第也】终则遗显号於後世传土地於子孙行事甚忠敬居位甚安佚名声施於无穷功烈着而不灭是以贤人君子肝脑涂中原膏液润野草而不辞也今奉币役至南夷即自贼杀或亡逃抵诛身死无名谥为至愚耻及父母为天下笑人之度量相越岂不远哉然此非独行者之罪也父兄之教不先子弟之率不谨也寡廉鲜耻而俗不长厚也其被刑戮不亦宜乎陛下患使者有司之若彼悼不肖愚民之如此故遣信使晓谕百姓以发卒之事因数之以不忠死亡之罪让三老孝弟以不教诲之过方今田时重烦百姓【索隐重犹难也】已亲见近县恐远所谿谷山泽之民不徧闻檄到亟下县道【集解駰案汉书百官表曰县有蛮夷曰道索隐亟音纪力反亟急也】使咸知陛下之意唯毋忽也相如还报唐蒙已略通夜郎因通西南夷道发巴蜀广汉卒作者数万人治道二岁道不成士卒多物故费以巨万计【索隐案巨万犹万万也数有大小二法张揖曰算法万万为亿是小数也】蜀民及汉用事者多言其不便【索隐案谓公卿所言也】是时邛笮之君长【索隐文颖曰邛者今为邛都县笮者今为定笮县皆属越嶲郡也】闻南夷与汉通得赏赐多多欲愿为内臣妾请吏比南夷【索隐谓请置汉吏与南夷为比例也】天子问相如相如曰邛笮冉駹者近蜀道亦易通秦时尝通为郡县至汉兴而罢今诚复通为置郡县愈於南夷【索隐张揖曰愈差也又云愈犹胜也晋灼曰南夷谓犍为?柯也西南谓越嶲益州也】天子以为然乃拜相如为中郎将【索隐四百石五岁迁补大县令】建节往使副使王然于壶充国【索隐案汉书公卿表太初元年为大鸿胪卿也】吕越人驰四乘之传因巴蜀吏币物以赂西夷至蜀蜀太守以下郊迎县令负弩矢先驱【索隐案亭吏名亭长弩矢合是亭长负之今县令自负矢则亭长当负弩也且负弩是守宰无定或随时轻重耳按霍去病出撃匈奴河东太守郊迎负弩又魏公子救赵撃秦秦军解去平原君负?矢迎公子於界上是也】蜀人以为宠【索隐华阳国志云蜀大城北十里有昇僊桥送客观相如初入长安题其门云不乘赤车驷马不过汝下也】於是卓王孙临邛诸公皆因门下献牛酒以交驩卓王孙喟然而叹自以得使女尚司马长卿晚【索隐小颜云尚犹配也本或作当盖後人改尔】而厚分与其女财与男等同司马长卿便略定西夷邛笮冉駹斯榆之君皆请为内臣【索隐郑氏斯音曳张揖云斯俞才俞国也案今斯读如字益部耆旧传谓之

斯叟华阳国志云邛都县有四部斯叟一也】除边关关益斥【索隐张揖曰斥广也】西至沫若水【索隐张揖曰沫水出蜀广平徼外与青衣水合也若水出旄牛徼外至犍道入江华阳国志汉嘉县有沫水音妹又音末】南至?柯为徼【索隐张揖云徼塞也以木栅水为蛮夷界】通零关道【集解徐广曰越嶲有零关县】桥孙水【集解韦昭曰为孙水作桥】以通邛都【索隐案华阳国志云相如卒开犍道通南中置越嶲郡韩说开益州唐蒙开?柯斩笮王首置?柯郡也】还报天子天子大悦相如使时蜀长老多言通西南夷不为用唯大臣亦以为然相如欲谏业已建之不敢【索隐案业者本也本由相如立此事故不敢更谏】乃着书籍以蜀父老为辞而已诘难之以风天子且因宣其使指令百姓知天子之意其辞曰汉兴七十有八载【集解徐广曰元光六年也】德茂存乎六世【正义高祖惠帝高后孝文孝景孝武】威武纷纭湛恩汪濊【索隐韦昭云湛音沈】羣生澍濡洋溢乎方外於是乃命使西征随流而攘【索隐攘却也音女羊反】风之所被罔不披靡因朝冉从駟定笮存邛略斯榆举苞满【索隐服?云夷种也满字或作蒲也】结轨还辕【索隐张揖云结屈也轨车迹也】东乡将报至于蜀都耆老大夫荐绅先生之徒二十有七人俨然造焉辞毕因进曰盖闻天子之於夷狄也其义羈縻勿絶而已【索隐案羈马络头也縻牛紉也汉官仪云马云羈牛云縻言制四夷如牛马之受羈縻也】今罢三郡之士通夜郎之涂三年於兹而功不竟士卒劳倦万民不赡今又接以西夷百姓力屈恐不能卒业此亦使者之累也窃为左右患之且夫邛笮西犍之与中国并也历年兹多不可记已仁者不以德来强者不以力并意者其殆不可乎今割齐民以附夷狄弊所恃以事无用鄙人固陋不识所谓使者曰乌谓此耶必若所云则是蜀不变服而巴不化俗也余尚恶闻若说【索隐张揖云恶闻若曹之言也包恺音一故反又音乌乌者安也】然斯事体大固非观者之所覩也余之行急其详不可得闻已请为大夫粗陈其略盖世必有非常之人然後有非常之事有非常之事然後有非常之功非常者固常之所异也【索隐案常人见之以为异也】故曰非常之原黎民惧焉【索隐张揖云非常之事其本难知衆人惧也】及臻厥成天下晏然也昔者鸿水淳出泛滥衍溢民人登降移徙阽?而不安夏后氏戚之乃堙鸿水决流疏河漉沈澹菑【集解徐广曰漉一作洒索隐漉音鹿菑音灾汉书作洒沉澹灾解者云洒分也音所宜反澹安也沉深也澹音徒暂反】东归之於海而天下永宁当斯之勤岂惟民哉【索隐案谓非独人勤禹亦亲其劳也】心烦於虑而身亲其劳躬胝无胝肤不生毛【集解徐广曰胝音竹移反胝种也一作腠音湊肤理也胝音魃索隐张揖曰腠一作戚躬体也戚湊理也韦昭曰胝戚中小毛也胝音真尸反庄子云禹胝无胝胫不生毛李颐云胝白肉也音蒲未反】故休烈显乎无穷声称决乎来兹且夫贤君之践位也岂特委琐握龔【索隐孔文祥云委琐细碎握龔局促也】拘文牵俗循诵习传当世取说云尔哉必将崇论閎议创业垂统为万世规故驰骛乎兼容并包而勤思乎参天贰地【索隐案天子比德於地是二地也地与己并天为三是参天也故礼曰天子与天地参是也】且诗不云乎普天之下莫非王土率土之滨莫非王臣【集解駟案毛诗传曰滨涯也】是以六合之内八方之外浸浥衍溢【索隐案浸浥犹渐浸也】怀生之物有不浸润於泽者贤君耻之今封疆之内冠带之伦咸获嘉祉靡有阙遗矣而夷狄殊俗之国辽絶异党之地舟輿不通人迹罕至政教未和流风犹微内之则犯义侵礼於边境外之则邪行横作放弑其上君臣易位尊卑失序父兄不辜幼孤为奴系累号泣内向而怨曰盖闻中国有至仁焉德洋而恩普物靡不得其所今独曷为遗已举踵思慕若枯旱之望雨盍夫为之垂涕【集解徐广曰盍音戾索隐张揖曰狼戾之夫也字或作戾盍古戾字】况乎上圣又恶能已故北出师以讨强胡南驰使以诘劾

越四面风德二方之君鳞集仰流【索隐二方谓西夷邛僰南夷?柯夜郎也】愿得受号者以亿计故乃关沫若【集解駰案汉书音义曰以沫若水为关】徼?柯镂零山梁孙原创道德之涂垂仁义之统将博恩广施远抚长驾使疏逖不闭【索隐逖远言其疏远者不被闭絶也】阻深闇昧得耀乎光明【索隐阻深汉书作晁爽三苍云晁爽早朝也晁音妹案字林又音忽也】以偃甲兵於此而息诛伐於彼遐迩一体中外提福【集解徐广曰提作禔音支索隐说文云禔安也音市支反】不亦康乎夫拯民於沈溺奉至尊之休德反衰世之陵迟继周氏之絶业斯乃天子之急务也百姓虽劳又恶可以已哉且夫王事固未有不始於忧勤而終於佚乐者也然则受命之符合在於此矣【索隐张揖云合在於忧勤佚乐之中也】方将增泰山之封加梁父之事鸣和鸾扬乐颂上咸五下登三【集解徐广曰咸一作函駰案韦昭曰咸同於五帝登三王之上索隐李奇云五帝之德汉比为减三王之德汉出其上故云减五登三此说非也虞喜志林云相如欲减五帝之一以汉盈之然以汉为五帝之数自然是登於三王之上也今本减或作咸是与韦昭之说符也】观者未覩指听者未闻音犹鷖明已翔乎寥廓而罗者犹视乎薮泽悲夫於是诸大夫芒然丧其所怀来而失厥所以进喟然并称曰允哉汉德此鄙人之所愿闻也百姓虽怠请以身先之敞罔靡徙因迁延而辞避【索隐案敞罔失容也靡徙失正也】其後人有上书言相如使时受金失官居岁余复召为郎相如口吃而善著书常有消渴疾与卓氏婚饶於财其进仕宦未尝有与公卿国家之事称病闲居不慕官爵常从上至长杨猎【正义括地志云秦长杨宫在雍州盩厔县东南三里上起以官内有长杨树以为名】是时天子方好自擊熊彘驰逐野兽相如上疏谏之其辞曰臣闻物有同类而殊能者故力称乌获【索隐张揖曰秦武王力士举龙文鼎者也】捷言庆忌【索隐张揖曰吴王僚之子】勇期贲育【正义贲音奔孟贲古之勇士水行不避蛟龙陆行不避豺狼发怒吐气声音动天夏育亦古之猛士也】臣之愚窃以为人诚有之兽亦宜然今陛下好陵阻险射猛兽卒然遇铤材之兽【索隐广雅云卒暴也音仓没反】骇不存之地【索隐谓所不虑而猛兽骇发也】犯属车之清尘【集解蔡邕曰古者诸侯贰车九乘秦灭九国兼其车服故大驾属车八十一乘】輿不及还辕人不暇施巧虽有乌获逢蒙之伎力不得用【集解駰案吴越春秋曰羿传射於逢蒙索隐孟子云逢蒙学射於羿尽羿之道是也】枯木朽株尽为害矣是胡越起於轂下而羌夷接轡也岂不殆哉虽万全无患然本非天子之所宜近也且夫清道而後行中路而後驰犹时有銜橛之变【集解徐广曰橛音巨月反钩逆者谓之橛矣索隐张揖曰銜马勒銜也橛騑马口长銜也周迂輿服志云钩逆上者为橛橛在銜中以铁为之大如鸡子盐铁论云无銜橛而御扞马是也】而况涉乎蓬蒿驰乎丘坟前有利兽之乐而内无存变之意其为祸也不亦难矣夫轻万乘之重不以为安而乐出於万有一危之涂以为娱臣窃为陛下不取也盖明者远见於未萌而智者避危於无形祸固多藏於隐微而发於人之所忽者也故鄙谚曰家累千金坐不垂堂【索隐张揖曰畏檐瓦堕中人乐彦云垂边也近堂边恐其堕坠也非谓畏檐瓦】此言虽小可以喻大臣愿陛下之留意幸察上善之还过宜春宫【正义括地志云秦宜春宫在雍州万年县西南三十里宜春苑在宫之东杜之南始皇本纪云葬二世杜南宜春苑中按今宜春宫见二世陵故作赋以哀也】相如奏赋以哀二世行失也其辞曰登陂陀之长阪兮【索隐陂普何反陀徒何反】坳入曾宫之嵯峨【集解駰案汉书音义曰坳并也索隐坳步寸反】临曲江之隄州兮【集解駰案汉书音义曰隄长也苑中有曲江之象泉中有长洲也索隐隄音祈隄即碣字谓曲岸头也有宫阁路今犹谓之曲江在杜陵西北五里又三辅旧事云乐游原在西北是也】望南山之参差岩岩深山之涇涇兮【集解徐

广曰箠音力工反索隐箠古江反晋灼曰箠音箠古籀字萧该云箠或作籀长大貌】通谷?兮
箠 【索隐箠音呼含反 音呼加反】汨減喻习以永逝兮【索隐汨于笔反汨減疾貌也
喻音许及反汉书作鞞鞞然轻举意也】注平臯之广衍观衆树之塙蓼兮【索隐蓼音爱谓
隐也】览竹林之榛榛东驰土山兮北揭石瀨【索隐说文云瀨水流沙上也】弥节容与兮
【索隐容与游戏貌也】历吊二世持身不谨兮亡国失势信谗不寤兮宗庙灭絶呜呼哀哉
操行之不得兮坟墓芜秽而不修兮魂无归而不食复邈絶而不齐兮弥久远而愈休精罔闕
而飞扬兮拾九天而永逝【正义太玄经云九天谓一为中天二为美天三为从天四为更天
五为晬天六为廓天七为减天八为沈天九为成天】呜呼哀哉相如拜为孝文园令【索隐
百官志云陵园令六百石掌按行扫除也】天子既美子虚之事相如见上好僊道因曰上林
之事未足美也尚有靡者臣尝为大人赋【索隐张揖曰大人喻天子向秀云圣人在位谓之
大人张华云相如作远游之体以大人赋之也】未就请具而奏之相如以为列?之传居山泽
间【索隐案传者谓相传以列仙居山泽间音持全反小顔及刘氏并作儒读云儒柔术士之
称非也】形容甚臞【集解徐广曰臞瘦也索隐韦昭曰臞瘠也文子云尧臞瘦音巨俱反】
此非帝王之?意也乃遂就大人赋其辞曰世有大人兮在于中州宅弥万里兮曾不足以少留
悲世俗之迫隘兮竭轻举而远游【索隐如淳曰武帝云诚得如黄帝去妻子如脱屣是悲世
俗迫隘也】垂绛幡之素蜺兮载云气而上浮建格泽之长竿兮总光耀之采旄【集解駉案
汉书音义曰格泽之气如炎火状黄白色起地上至天以此气为竿旄葆也总系也系光耀之
气於长竿以为葆者】垂旬始以为?兮曳彗星而为髻【集解駉案汉书音义曰旬始气如雄
鸡县於葆下以为旒也髻燕尾也曳彗星缀着旒以为燕尾】掉指桥以偃蹇兮又旖旎以招
摇【集解駉案汉书音义曰指桥随风指靡索隐掉音徒吊反桥音居天反偃蹇高貌】揽揜
抢以为旌兮【正义天官书云天揜长四丈末锐天抢长数丈两头锐其形类彗也】靡屈虹
而为綯【集解駉案汉书音义曰綯韬也以断虹为旌杠之綯索隐应劭云旌旗屈挠之貌綯
音直留反或音韬屈虹断虹也】红杳渺以眩湑兮焱风涌而云浮【集解駉案汉书音义曰
旬始屈虹气色红杳渺眩湑闇冥无光也索隐苏林曰眩音炫湑音麁晋灼云红赤色貌杳渺
深远眩湑混合也红或作虹】驾应龙象舆之螭略透丽兮骖赤螭青虬之 螭蜿蜒低卬夭
蟠据以骄骜兮拙折隆穷【索隐张揖曰据直须也骄骜纵恣也据音据骄音居召反骜音五
到反】螭以连卷【索隐韦昭曰螭龙之形貌也音起碧反连卷音辇卷】沛艾赳螭仡以佺
儼兮【集解駉案汉书音义曰赳螭申颈低卬也儼不前也索隐张揖曰赳螭牙跳也赳音居
幼反螭音许救反仡举头也仡音鱼乞反佺音勅吏反儼音鱼吏反】放散畔岸骧以孱顔【
索隐服?曰马仰头其口开正孱顔也韦昭曰顔音吾板反诗云两服上骧注云骧马是也】踉
蹌躡辂容以委丽兮绸缪偃蹇怵?以梁倚【集解徐广曰踉蹌乍前乍却也蛭音丑栗反蹌音
勅略反躡乌葛反辂音曷绸一作雕?音他畧反駉案汉书音义曰怵?走也梁倚相着也索隐
张揖曰踉蹌疾行互前却也躡辂摇目吐舌也蹌音褚栗反蹌音褚略反躡音遏辂音曷绸音
徒吊反张揖曰偃蹇却器也广雅曰偃蹇夭矫也韦昭曰?音答略也相如传云修?远去?袂也
】纠蓼叫昇蹋以躑路兮【集解徐广曰躑音介至也索隐蓼音了昇音五到反小顔云叫昇
高举貌踏音徒荅反躑音屈三仓云踏着地孙炎云躑古界字也】蔑蒙踊跃腾而狂飀【集
解駉案汉书音义曰蔑蒙飞扬也飀走】莅飒卉翥燁至电过兮焕然雾除霍然云消邪絶少
阳而登大陰兮与真人乎相求【集解駉案汉书音义曰少阳东极太陰北极邪度东极而升
北极者也】互折窈窕以右转兮横厉飞泉以正东【正义厉渡也张云飞泉谷也在崑仑山

西南】悉徵灵圉而选之兮部乘衆神於瑶光【集解駰案汉书音义曰瑶光北斗杓头第一星】使五帝先导兮【正义导引也五帝五时帝太皓之属也】反太一而从陵阳【集解駰案汉书音义曰僊人陵阳子明也正义天官书云中宫天极星其一明者太一常居也列僊传云子明於沛銓县旋溪钓得白龙放之後白龙来迎子明去止陵阳山上百余年遂得仙也】左玄冥而右含羈兮【集解駰案汉书音义曰含羈黔羸也天上造化神名也或曰水神】前陆离而後漓湟【集解駰案汉书音义曰皆神名】厮征北侨【集解徐广曰燕人也形解而征也索隐应劭曰厮役也张揖曰王子乔也汉书郊祀志作正伯侨此当是别人恐非王子乔也】而役美门兮【正义张云美门碣石山上仙人美门高也】属岐伯使尚方【集解徐广曰岐伯黄帝臣駰案汉书音义曰尚主也岐伯黄帝太医属使主方药】祝融警而蹕御兮【正义张云祝融南方炎帝之佐也兽身人面乘两龙应火正也火正祝融警蹕清氛气也】清氛气而後行屯余车其万乘兮綵云盖而树华旗【索隐綵音祖内反如淳曰盖有五彩也】使勾芒其将行兮【正义张云勾芒东方青帝之佐也鸟身人面乘两龙顔云将行领从者也】吾欲往乎南嬉历唐尧於崇山兮过虞舜於九疑【正义张云崇山狄山也海外经云狄山帝尧葬其阳九疑山零陵营道县舜所葬处】纷湛湛其差错兮【索隐湛音徒感反】杂遘胶葛以方驰【索隐广雅云胶葛驱驰也】骚扰 苾其相纷拏兮【索隐 音昌勇反苾音息冗反】滂溥泱泱洒以林离鑽罗列丛以茏茸兮衍蔓流烂坛以陆离【集解徐广曰坛音坦】径入羈室之砢磷郁律兮洞出鬼谷之崑崙嵬【集解駰案汉书音义曰鬼谷在北辰下衆鬼之所聚也楚辞曰贅鬼谷於北辰正义崑口骨反疊力罪反嵬乌回反?音回张云崑崙嵬?不平也】徧览八紘而观四荒夸竭渡九江而越五河【正义顔云五色之河也仙云紫碧绦青黄之河也】经营炎火而浮弱水兮【正义姚丞云大荒西经云崑仑之岳其外有炎火之山投物辄然括地志云弱水有二源俱出女国北阿僊达山南流会于国北又南历国北东去一里深丈余阔六十步非乘舟不可济流入海阿僊达山一名崑仑山在雍州西南一万五千三百七十里又云弱水在甘州张掖县南山下】杭絶浮渚而涉流沙【集解駰案汉书音义曰杭船也絶渡也浮渚流沙中渚也】奄息总极泛滥水嬉兮【集解駰案汉书音义曰总极葱岭山也在西域中】使灵媧鼓瑟而舞冯夷【集解徐广曰媧一作贻駰案汉书音义曰灵媧女媧也冯夷河伯字淮南子曰冯夷得道以潜大川正义姓冯名夷以庚日溺死河常以庚日好溺死人】时若蓂蓂将混浊兮召屏翳【正义应云屏翳天神使也韦云雷师也】诛风伯【正义张云风伯字飞廉】而刑雨师【正义沙州有雨师祠】西望崑仑之轧【正义张云海内经云崑仑去中国五万里天帝之下都也其山广袤百里高八万仞增城九重面九井以玉为檻旁有五门开明兽守之括地志云在崑仑肃州酒泉县南八十里十六国春秋魏昭成帝建国十年凉张骏酒泉太守马岌上言酒泉南山即崑仑之体周穆王见西王母乐而忘归即谓此山有石室王母堂珠玑镂饰焕若神宫又删丹西河名云弱水禹贡崑仑在临羌之西即此明矣括地志云又阿僊达山亦名建末达山亦名崑仑山恒河出其南吐师子口经天竺入达山妨水今名为浒海出於崑仑西北隅吐马口经安息大夏国入西海黄河出东北隅吐牛口东北流经滥泽潜出大积石山至华山北东入海其三河去山入海各三万里此谓大崑仑肃州谓小崑仑也禹本纪云河出崑仑二千五百余里日月所相隐避为光明也】沕沕忽兮直径驰乎三危【集解駰案三危山名也正义括地志云三危山在沙州东南三十里】排闥闥而入帝宫兮【正义韦昭云闥闥天门也淮南子曰西方曰西极之山闥闥之门】载玉女而与之归【正义张云玉女青要乘弋等也】舒闥风而摇集兮【正义张云闥风

在崑仑閼闔之中楚辞云登閼风而縹马也【集解駟案汉书音义曰亢然高飞如鸟之腾也】低回陰山翔以紆曲兮【正义张云陰山在大崑仑西二千七百里】吾乃今日睹西王母曜然白首【集解徐广曰曜音下沃反索隐曜音鶴正义张云西王母其状如人豹尾虎齿蓬髮曜然白首石城金穴居其中】戴胜而穴处兮【集解郭璞曰胜玉胜也正义顔云胜妇人首饰也汉代谓之华胜】亦幸有三足乌为之使【正义张云三足乌青鸟也主为西王母取食在崑仑之北】必长生若此而不死兮虽济万世不足以喜回车竭来兮絶道不周【集解駟案汉书音义曰不周山在崑仑东南】会食幽都呼吸沆𠂔飡朝霞兮噍咀芝英兮叽琼华【集解徐广曰叽音祈小食也駟案韦昭曰琼华玉英】嬋侵淥而高纵兮纷鸿涌而上厉【集解徐广曰嬋音?索隐汉书嬋作襟襟仰也音禁嬋音鱼锦反】贯列缺之倒景兮涉丰隆之滂沛【集解駟案汉书音义曰列缺天门也倒景曰在下正义张云丰崇云师也淮南子云季春三月丰崇乃出以将雨按丰崇将云雨故云滂沛】驰游道而修降兮【正义游游车也道道车也修长也降下也】骛遗雾而远逝迫区中之隘狭兮舒节出乎北垠遗屯骑於玄阙兮軼先驱於寒门【集解駟案汉书音义曰玄阙北极之山寒门天北门】下崢嶸而无地兮上寥廓而无天视眩眠而无见兮听惝恍而无闻乘虚无而上假兮超无有而独存【集解徐广曰假音古下反至也】相如既奏大人之颂天子大说飘飘有凌云之气似游天地之间意相如既病免家居茂陵天子曰司马相如病甚可往从悉取其书若不然後失之矣使所忠往【正义姓所名忠也风俗通姓氏云汉书有諫大夫所忠氏】而相如已死家无书问其妻对曰长卿固未尝有书也时时着书人又取去即空居长卿未死时为一卷书曰有使者来求书奏之无他书其遗札书言封禅事奏所忠忠奏其书天子异之其书曰伊上古之初肇自昊穹兮民历撰列辟以迄于秦【集解徐广曰撰一作选索隐文颖曰选数也】率还者踵武【集解徐广曰率循也还近也武迹也循省近世之遗迹索隐言循览近代之事则踵蹈者可知也】逖听者风声【集解徐广曰逖远也听察远古之风声索隐风声风雅之声以言听远古之事则着在风雅之声也】纷纶葳蕤埋灭而不称者不可胜数也【索隐胡广曰纷乱也沦没也葳蕤委顿也张揖曰乱貌】续昭夏崇号谥略可道者七十有二君【集解駟案汉书音义曰昭明也夏大也德明大相继封禅於泰山者七十有二人索隐见韩诗外传及封禅书也】罔若淑而不昌畴逆失而能存【集解徐广曰若顺也駟案韦昭曰畴谁也言顺善必昌逆失必亡】轩辕之前遐哉邈乎其详不可得闻也五三六经载籍之传维见可观也【索隐胡广云五五帝也三三王也案六经诗书礼乐易春秋也】书曰元首明哉股肱良哉因斯以谈君莫盛於唐尧臣莫贤於后稷后稷创业於唐公刘发迹於西戎文王改制爰周郅隆【集解徐广曰郅盖字误皇甫谧曰王季宅程故周书曰维王季宅程孟子称文王生於毕程或者郅字宜为程乎或为胙北地有郁郅县胙大也音质駟案汉书音义曰郅至也索隐爰於及也郅大也盛也樊光云郅可见之大也徐及皇甫之说皆非也以言文王改制及周而大盛也】大行越成【集解駟案汉书音义曰行道也文王始开王业改正朔易服色太平之道於是成矣索隐应劭云大行谓以言道德大行也】而後陵夷衰微千载无声【集解徐广曰周之王四海千载之後声教乃絶駟案韦昭曰无恶声】岂不善始善终哉然无异端慎所由於前谨遗教於後耳故轨迹夷易易遵也湛恩蒙涌易丰也宪度着明易则也垂统理顺易继也是以业隆於緇祿而崇冠於二后【集解駟案汉书音义曰緇祿谓成王也二后谓文武也周公负成王致太平功德冠於文武者道成法易故也】揆厥所元终都攸卒【集解駟案汉书音义曰都於卒终也】未有殊尤絶迹可考于今者也然犹躡梁父登泰山建显号施尊

名大汉之德?涌原泉【集解韦昭曰汉德?涌如泉原也索隐张揖曰逢遇也喻其德盛若遇泉原之流也又作峯读胡广曰自此已下论汉家之德也】沕滂漫衍旁魄四塞云专雾散【集解徐广曰专音布】上畅九垓下泝八埏【集解徐广曰音衍駟案汉书音义曰畅达垓重也泝流也埏若八埏地之际也言其德上达於九重之天下流於地之八际也】怀生之类沾濡浸润协气横流武节飘逝迺陟游原迴阔泳沫【集解駟案汉书音义曰迺近原本也迴远阔广也泳浮也恩德比之於水近者游其原远者浮其沫】首恶湮没闇昧昭皙【集解駟案汉书音义曰始为恶者皆湮灭闇昧喻夷狄皆化】昆虫凯泽回首面内【集解韦昭曰面向也】然後囿驹虞之珍羣徼麋鹿之怪兽【集解駟案汉书音义曰徼遮也麋鹿得其奇怪者谓获白麟也】?一茎六穗於庖【集解徐广曰?瑞禾也駟案汉书音义曰谓嘉禾之米於庖厨以供祭祀索隐郑德云?择也说文嘉禾一名?字林云禾二茎六穗谓之?也】牺双觥共抵之兽【集解徐广曰抵音底駟案汉书音义曰牺牲也觥角也抵本也武帝获白麟两角共一本因以为牲也】获周余珍收龟于岐【集解徐广曰一作放龟駟案汉书音义曰余珍得周鼎也岐水名也】招翠黄乘龙於沼【集解駟案汉书音义曰翠黄乘黄也龙翼马身黄帝乘而登仙言见乘黄而招呼之礼乐志曰訾黄其何不徠下余吾渥洼水中出神马故曰乘龙於沼索隐服?云乘龙四龙也翠黄孟说是也周书云乘黄似狐背上有两角也】鬼神接灵圉宾於闲馆【集解徐广曰言至德与神明通接故灵圉为宾旅於闲馆矣郭璞曰灵圉仙人姓名也】奇物谲诡倂傖穷变钦哉符瑞臻兹犹以为薄不敢道封禅盖周跃鱼陨杭休之以燎【索隐杭舟也胡广云武王渡河白鱼入王舟俯取以燎陨坠之於舟中也】微夫斯之为符也以登介邱不亦慙乎【集解駟案汉书音义曰介太邱山也言周以白鱼为瑞登太山封禅不亦慙乎】进让之道其何爽与【集解徐广曰爽差异也駟案汉书音义曰进周也让汉也言周末可封禅为进汉可封禅而不封禅为让也索隐爽犹差也言汉周进让之道皆差也】於是大司马进曰陛下仁育羣生义征不慙【集解駟案汉书音义曰大司马上公也故先进议慙音惠顺也】诸夏乐贡百蛮执贽德侔往初功无与二休烈浹洽符瑞衆变期应绍至不特创见【集解徐广曰不但初显符瑞而已盖将终以封禅之事索隐文颖云不独一物初创见也胡广云符瑞衆多应期相继而至也】意者泰山梁父设坛场望幸盖号以况荣【集解徐广曰以况受上天之荣为名号索隐案本或作望华盖华盖星名在紫微大帝之上今言望圣帝之临幸也义亦两通而孟康服?注本皆幸下有华字而虞摯流别集则唯云幸幸当是也於义亦通直以後人见幸下有盖字又幸字似华故因疑惑遂定华字使误也文颖云盖合也言考合前代之君揆其荣而相比况以为号也大顔云盖欲也言欲化功立号受天之况赐荣名也於义为慙然其文云盖词义典质又上与幸字连文致令有华盖之谬也】上帝垂恩储祉将以荐成【集解徐广曰以衆瑞物初至封禅处荐之上天告成功也索隐案汉书作庆成义亦通也】陛下谦让而弗发也挈三神之驪【集解徐广曰挈犹言垂也駟案韦昭曰挈缺也三神上帝泰山梁父也索隐徐氏云挈犹垂非也应劭挈作絶李奇韦昭作缺意亦不远三神如淳谓地祇天神山岳也与韦不同】缺王道之仪羣臣慙焉或谓且天为质闇珍符固不可辞【集解駟案汉书音义曰言天道质昧以符瑞见意不可辞让也】若然辞之是泰山靡记而梁父靡几也【集解駟案汉书音义曰太山之上无所表记梁父坛场无所庶几索隐案几音冀】亦各并时而荣咸济世而屈【集解駟案汉书音义曰屈絶之也言古帝王但作一时之荣毕代而絶也】说者尚何称於後【集解徐广曰若无封禅之遗迹则荣尽於当时至於历世之後人何所述】而云七十二君乎【索隐言古封禅之帝王是各并时而荣贵盛有济世

之勲而屈者谓言抑屈摠不封禪使说者尚何称述後代而云七十二君乎】夫修德以锡符奉符以行事不为进越【索隐文颖云越踰也不为苟进踰礼也】故圣王勿替而修礼地祇谒欸天神【集解駰案汉书音义曰欸诚也谒告之报诚也】勒功中岳以彰至尊舒盛德发荣号受厚福以浸黎民也皇皇哉斯事天下之壮观王者之丕业不可贬也愿陛下全之而後因杂荐绅先生之略术使获耀日月之末光絶炎以展采错事【集解徐广曰错音厝駰案汉书音义曰采官也使诸儒记功着业得覩日月末光殊絶之用以展其官职设厝其事业者也】犹兼正列其义校饬厥文作春秋一艺【集解徐广曰校一作袞袞犹拂也音废也駰案汉书音义曰春秋者正天时列人事诸儒既得展事业因兼正天时列人事叙述大义为一经】将袭旧六为七【集解韦昭曰今汉书增一仍旧六为七也】攄之无穷【集解徐广曰攄一作肱肱叙也索隐广雅云攄张舒也】俾万世得激清流扬微波蜚英声腾茂实【索隐胡广曰飞扬英伟之声腾驰茂盛之实也】前圣之所以永保鸿名而常为称首者用此【索隐案谓用此封禪也】宜命掌故悉奏其义而览焉【集解駰案汉书音义曰掌故太史官属主故事也】於是天子沛然改容曰愉乎朕其试哉乃迁思回虑总公卿之议询封禪之事诗大泽之博广符瑞之富【集?駰案汉书音义曰诗歌咏功德也下四章之颂也大泽之博谓自我天覆云之油油广符瑞之富谓斑斑之兽以下三章言符瑞广大富饶也】乃作颂曰自我天覆云之油油【集解駰案汉书音义曰油油云行貌孟子曰油然作云沛然下雨】甘露时雨厥壤可游滋液渗漉何生不育【集解徐广曰渗音色?反索隐案说文云渗漉水下流之貌也】嘉谷六穗我穡曷蓄【集解徐广曰何所蓄耶蓄嘉谷】非唯雨之又润泽之非唯濡之泛专濩之【集解徐广曰古布字作专索隐胡广曰泛普也言雨泽非偏於我普遍布散无所不濩也】万物熙熙怀而慕思名山显位望君之来【集解韦昭曰名山大山也显位封禪也】君乎君乎侯不迈哉【索隐小顏云侯何也迈行也言君何不行封禪】般般之兽乐我君囿【索隐案般般文彩之貌也音班胡广曰谓驹虞也】白质黑章其仪可嘉皎皎睦睦君子之能【集解徐广曰皎音旻和貌也能一作熊駰案汉书音义曰旻和睦敬言和且敬有似君子】盖闻其声今观其来厥涂靡踪天瑞之徵【集解徐广曰其所来路非有迹盖自天降瑞不行而至也】兹亦於舜虞氏以兴【索隐文颖曰舜百兽率舞则驹虞亦在其中也】濯濯之麟游彼灵時【集?駰案汉书音义曰武帝祠五時获白麟故言游灵時索隐诗人云麋鹿濯濯注云濯濯嬉游也】孟冬十月君徂郊祀驰我君舆帝以享祉三代之前盖未尝有宛宛黄龙兴德而升【索隐胡广曰宛宛屈伸也】采色炫燿燿炳輝煌【集解徐广曰燿音晃輝音?】正阳显见觉寤黎烝【索隐文颖云正阳阳明也谓南面受朝也】於传載之云受命所乘【索隐如淳曰书传所載揆其此类以为汉土德黄龙为之应见之於成纪故云受命所乘也】厥之有章不必谆谆【集解徐广曰谆止纯反告之丁宁駰案汉书音义曰天之所命表以符瑞章明其德不必谆谆然有语言也】依类托寓谕以封峦【集解駰案汉书音义曰寓寄也峦山也言依事类托寄以喻封禪也】披艺观之天人之际已交上下相发允答圣王之德兢兢翼翼也故曰兴必虑衰安必思危是以汤武至尊严不失肃祗舜在假典顾省厥遗此之谓也【集解徐广曰假大也】司马相如既卒【集解徐广曰元狩五年也】五岁天子始祭后土八年而遂先礼中岳【正义嵩高也在洛州阳城县西北二十二里】封于太山【正义在兖州博城县西北三十里】至梁父禪肃然【集解徐广曰小山在泰山下趾东北】相如他所着若遗平陵侯书【集解徐广曰苏建也】与五公子相难草木书篇不采采其尤着公卿者云太史公曰春秋推见至隐【集解韦昭曰推见事至於隐讳谓若晋文召天子经言狩河阳

之属索隐李奇曰隐犹微也言其义彰而文微若隐公见弑而经不书讳之也【易本隐之以显】集解韦昭曰易本隐微妙出为人事乃显着也索隐虞喜志林曰春秋以人事通天道是推见至隐也易以天道接人事索隐以之明显也【大雅言王公大人而德逮黎庶】集解韦昭曰先言王公大人之德乃後及衆庶也索隐张揖曰谓文王公刘在位大人之德下及衆民者也【小雅讥小己之得失其流及上】集解韦昭曰小雅云人志狭小先道己之忧苦其流乃及上政之得失者索隐张揖云已诗人自谓也已小有得失不得其所作诗流言以讽其上也故诗纬云小雅讥已得失及之於上也【所以言虽外殊其合德一也相如虽多虚辞滥说然其要归引之节俭此与诗之风谏何异扬雄以为靡丽之赋劝百风一犹驰骋郑卫之声曲终而奏雅不已亏乎余采其语可论者着于篇】

【索隐述赞曰相如纵诞窃赀卓氏其学无方其才足倚子虚过吒上林非侈駟马还邛百金献伎惜哉封禅遗文卓尔】

史记卷一百十七

史记卷一百一十七考证

司马相如列传名曰云梦索隐裴駰云孙叔敖激沮水作此泽○【臣照】按周礼职方荊州其泽薮曰云梦在孙叔敖前有此泽非激沮水明矣

芷若射干○考要曰此赋三用玄鹤三用射干汉书文选芷若下无射干字师古李善并谓俗本误增也其上云鵷雏孔鸾腾远射干乃狐类其云藁本射干乃香草不嫌其复也又如赤猿蠪蛸犀象野牛穷奇獫狁之句汉书文选俱无之不知二书误脱抑亦後人所增乎

梗枏豫章正义案温活人云○【臣世骏】案活人书名即本草也温字疑衍

右以汤谷为界正义言右者北向天子也○陈子龙曰汤谷日出之区应在齐东而云右恐左字之误正义所云北向天子亦无据刘奉世汉书刊误亦云右当为左

秋田乎青邱傍徨乎海外正义服虔云青邱国在海东三百里郭云青邱山名上有田亦有国出九尾狐在海外○今本山海经注无上有田三字亦有国者海外东经又有青丘国也

葳橙若荪○焦氏笔乘曰葳橙李善本作葳持葳音针乃马蓝又作寒将即 蒋善本盖误以将作持也张揖曰葳持缺故详具之

故遣中郎将往宾之索隐贾逵云宾伏也○徐孚远曰贾说非也谓以宾见诸侯之礼接之

其为祸也不亦难矣○顾炎武曰衍亦字

逖听者风声索隐风声风雅之声以言听远古之事则着在风雅之声也○凌稚隆曰言风声见其远也索隐言风雅之声谬

?一茎六穗於庖集解徐广曰?瑞禾也駟案汉书音义曰谓嘉禾之米於庖厨以供祭祀索隐郑德云?择也说文嘉禾一名?字林云禾一茎六穗谓之?也○杨慎曰徐楚金云?字诸解惟郑德得之徐广瑞禾臆说字林亦据此文而傳会之耳

杨雄以为靡丽之赋劝百风一犹驰骋郑卫之声曲终而奏雅不已亏乎○王若虚辨惑曰前汉书全引此语予尝疑之按迁传虽不着其死之岁月然云迁既死後其书稍出宣帝时迁外孙杨恽祖述其书遂宣布焉则其死不过在昭宣之间耳而雄以成帝元延之初始自蜀游京师年七十一卒於王莽天凤五年逆而推之宣帝之二十年雄乃始生迁着书时安得雄之言乎是必孟坚所续而後人误附於史记耳困学纪闻曰江氏棗曰雄後於迁甚久迁得引雄辞何哉盖後人以汉书赞附益之

史记卷一百一十七考证

<史部,正史类,史记>

卷一百十八

钦定四库全书

史记卷一百十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

淮南衡山列传第五十

淮南厉王长者高祖少子也其母故赵王张敖美人高祖八年从东垣过赵【正义赵张耳所都今邢州也】赵王献之美人厉王母得幸焉有身赵王敖弗敢内宫为筑外宫而舍之及贯高等谋反栢人事发觉并逮治王尽收捕王母兄弟美人系之河内厉王母亦系告吏曰得幸上有身吏以闻上上方怒赵王未理厉王母厉王母弟赵兼因辟阳侯言吕后吕后妬弗肯白辟阳侯不强争及厉王母已生厉王恚即自杀吏奉厉王诣上上悔【正义悔不理厉王母】令吕后母之而葬厉王母真定真定厉王母之家在焉父世县也【索隐案汉书作母家县谓父祖代居真定也】高祖十一年十月淮南王黥布反立子长为淮南王王黥布故地凡四郡【集解徐广曰九江庐江衡山豫章也】上自将兵击灭布厉王遂即位厉王蚤失母常附吕后孝惠吕后时以故得幸无患害而常心怨辟阳侯弗敢发及孝文帝初即位淮南王自以为最亲骄蹇数不奉法上以亲故常宽赦之三年入朝甚横从上入苑囿猎与上同车常谓上大兄厉王有材力力能扛鼎乃往请辟阳侯辟阳侯出见之即自袖铁椎椎辟阳侯【索隐汉书作褒金椎椎之案信陵君使朱亥袖四十斤铁鎚】令从者魏敬剄之【正义剄古鼎反到谓刺剄】厉王乃驰走阙下肉袒谢曰臣母不当坐赵事其时辟阳侯力能得之吕后弗争罪一也赵王如意子母无罪吕后杀之辟阳侯弗争罪二也吕后王诸吕欲以危刘氏辟阳侯弗争罪三也臣谨为天下诛贼臣辟阳侯报母之仇谨伏阙下请罪孝文伤其志为亲故弗治赦厉王当是时薄太后及太子诸大臣皆惮厉王厉王以此归国益骄恣不用汉法出入称警蹕称制自为法令拟於天子六年令男子但等七十人与棘蒲侯柴武太子奇谋以輦车四十乘【集解徐广曰大车驾马曰輦音已足反】反谷口【集解駰案汉书音义曰谷口在长安北故县也处多险阻正义括地志云谷口故城在雍州醴泉县东北四十里汉谷口县也】令人使闽越匈奴事觉治之使使召淮南王淮南王至长安丞相臣张苍典客臣冯敬行御史大夫事宗正臣逸廷尉臣贺备盗贼中尉臣福昧死言淮南王长废先帝法不听天子诏居处无度为黄屋盖乘輿出入拟於天子擅为法令不用汉法及所置吏以其郎中春为丞相聚收汉诸侯人及有罪亡者匿与居为治家室赐其财物爵禄田宅爵或至关内侯奉以二千石所不当得

欲以有为【集解如淳曰赐亡畔来者如赐其国二千石也瓚曰奉以二千石之秩禄】大夫但【集解张晏曰大夫姓也上云男子但明其姓大夫也瓚曰官为大夫名但者也索隐张晏云大夫姓非也案上文云男子但此云大夫但及士伍开章则知大夫是官也】士伍开章等七十人【集解如淳曰律有罪失官爵称士伍者也开章名】与棘蒲侯太子谋反【集解徐广曰棘蒲侯柴武以文帝後元年卒谥刚嗣子谋反不得置後国除】欲以危宗庙社稷使开章陰告长与谋使闽越及匈奴发其兵开章之淮南见长长数与坐语饮食为家室娶妇以二千石俸奉之开章使人告但已言之王春使使报但等吏觉知使长安尉奇等往捕开章长匿不予与故中尉蔺忌谋杀以闭口【索隐蔺姓也音奸严助传则作间忌字音亦同正义谋杀开章以闭絶谋反之口也】为棺槨衣衾葬之肥陵邑【正义括地志云肥陵故县在壽州安丰县东六十里在故六城东北百余里】谩吏曰不知安在【索隐谩音慢慢诳也实葬肥陵诳云不知处按肥陵地名在肥水之上】又佯聚土树表其上曰开章死埋此下及长身自贼杀无罪者一人令吏论杀无罪者六人为命弃市罪诈捕命者以除罪【集解晋灼曰亡命者当弃市而王藏之诈捕不命者而言命以脱命者之罪】擅罪人罪人无告劾系治城旦舂以上十四人赦免罪人死罪十八人城旦舂以下五十八人赐人爵关内侯以下九十四人前日长病陛下忧苦之使使者赐书枣脯长不欲受赐不肯见拜使者南海民处庐江界中者反淮南吏卒击之陛下以淮南民贫苦遣使者赐长帛五千匹以赐吏卒劳苦者长不欲受赐谩言曰无劳苦者南海民王织上书献璧皇帝忌擅燔其书不以闻【集解文颖曰忌蔺忌】吏请召治忌长不遣谩言曰忌病舂又请长愿入见长怒曰女欲离我自附汉长当弃市臣请论如法制曰朕不忍致法於王其与列侯二千石议臣苍臣敬臣逸臣福臣贺昧死言臣谨与列侯吏二千石臣婴等四十三人议皆曰长不奉法度不听天子诏乃陰聚徒党及谋反者厚养亡命欲以有为臣等议论如法制曰朕不忍致法於王其赦长死罪废勿王臣苍等昧死言长有大死罪陛下不忍致法幸赦废勿王臣请处蜀郡严道邛郫【集解徐广曰严道有邛犍九折阪又有郫置駟案张晏曰严道蜀郡县索隐县有蛮夷曰道严道有邛来山有郫置故曰严道邛郫】遣其子子母从居【索隐案乐彦云妾媵之有子者从去也】县为筑盖家室皆廩食给薪菜盐豉炊食器席蓐臣等昧死请布告天下制曰计食长给肉日五斤酒二斗令故美人才人得幸者十人从居他可【索隐谓它事可其制也】尽诛所与谋者於是乃遣淮南王载以輜车令县以次传是时袁盎諫上曰上素骄淮南王弗为置严傅相以故至此且淮南王为人刚今暴摧折之臣恐卒逢雾露病死陛下为有杀弟之名奈何上曰吾特苦之耳今复之县传淮南王者皆不敢发车封【集解駟案汉书音义曰檻车有檻封也】淮南王乃谓侍者曰谁谓乃公勇者【索隐乃汝也汝公淮南王自谓也】吾安能勇吾以骄故不闻吾过至此人生一世间安能邑邑如此乃不食死至雍【正义今岐州雍县也】雍令发封以死闻上哭甚悲谓袁盎曰吾不听公言卒亡淮南王盎曰不可奈何愿陛下自寬上曰为之奈何盎曰独斩丞相御史以谢天下乃可【索隐案刘氏云袁盎此言亦太过也】上即令丞相御史遂考诸县传送淮南王不发封馈侍者皆弃市乃以列侯葬淮南王於雍守冢三十户孝文八年上怜淮南王淮南王有子四人皆七八岁乃封子安为阜陵侯子勃为安阳侯子赐为周阳侯子良为东成侯孝文十二年民有作歌歌淮南厉王曰一尺布尚可缝一斗粟尚可舂兄弟二人不能相容【集解駟案汉书音义曰尺布斗粟犹尚不弃况於兄弟而更相逐乎瓚曰一尺布尚可缝而共衣一斗粟尚可舂而共食也况以天下之广而不能相容】上闻之乃叹曰尧舜放逐骨肉【正义帝系云尧黄帝之後舜顓頊之後四凶之内有承黄帝顓頊者而尧舜窜之

故放逐骨肉耳四凶者共工三苗伯鯀及驩兜皆尧舜之同姓故云骨肉也】周公杀管蔡天下称圣何者不以私害公天下岂以我为贪淮南王地邪乃徙城阳王王淮南故地【集解徐广曰景王章之子】而追尊谥淮南王为厉王【正义谥法云暴慢无亲曰厉】置园复如诸侯仪孝文十六年徙淮南王喜复故城阳【索隐故城阳景王章子也】上怜淮南厉王废法不轨自使失国蚤死乃立其三子阜陵侯安为淮南王安阳侯勃为衡山王周阳侯赐为庐江王皆复得厉王时地叁分之东城侯良前薨无後也孝景三年吴楚七国反吴使者至淮南淮南王欲发兵应之其相曰大王必欲发兵应吴臣愿为将王乃属相兵淮南相已将兵因城守不听王而为汉汉亦使曲城侯【集解徐广曰曲城侯姓虫名捷其父名逢高祖功臣】将兵救淮南淮南以故得完吴使者至庐江庐江王弗应而往来使越吴使者至衡山衡山王坚守无二心孝景四年吴楚已破衡山王朝上以为贞信乃劳苦之曰南方卑湿徙衡山王王济北所以褒之及薨遂赐谥为贞王庐江王边越数使使相交故徙为衡山王王江北淮南王如故淮南王安为人好读书鼓琴不喜弋猎狗马驰骋亦欲以行陰德拊循百姓流誉天下时时怨望厉王死时欲畔逆未有因也及建元二年淮南王入朝素善武安侯武安侯时为太尉乃逆王霸上与王语曰方今上无太子大王亲高皇帝孙【正义汉书云武帝以安属为诸侯】行仁义天下莫不闻即宫车一日晏驾非大王当谁立者淮南王大喜厚遗武安侯金财物陰结宾客【索隐淮南要略云养士数千高材者八人苏非李尚左吴田由雷被伍被毛被晋昌号曰八公】拊循百姓为畔逆事建元六年彗星见淮南王心怪之或说王曰先吴军起时彗星出长数尺然尚流血千里今彗星长竟天下兵当大起王心以为上无太子天下有变诸侯并争愈益治器械攻战具积金钱赂遗郡国诸侯游士奇材诸辨士为方畧者妄作妖言諂谀王王喜多赐金钱而谋反滋甚淮南王有女陵慧有口辩王爱陵常多予金钱为中訶长安【集解徐广曰訶伺候采察之名也音空政反安平侯鄂千秋玄孙伯与淮南王女陵通而中絶又遗淮南王书称臣尽力故弃市索隐邓展曰訶捕也孟康曰訶音侦西方人以反间为侦刘氏及包恺并音丑政反服?云侦候之也】约结上左右元朔三年上赐淮南王几杖不朝淮南王王后荼王爱幸之王后生太子迁迁取王皇太后外孙修成君女为妃【集解应劭曰王太后先适金氏女也】王谋为反具畏太子妃知而内泄事乃与太子谋令诈弗爱三月不同席王乃详为怒太子闭太子使与妃同内三月太子终不近妃妃求去王乃上书谢归去之王后荼太子迁及女陵得爱幸王擅国权侵夺民田宅妄致系人【集解徐广曰一云殴击】元朔五年太子学用劔自以为人莫及闻郎中鼂被巧【索隐案巧者谓善用劔也】乃召与戏被一再辞让误中太子【索隐乐彦云初一让王至二让後遂不让故云一再让而误中太子也】太子怒被恐此时有欲从军者辄诣京师被即愿奋击匈奴太子迁数恶被於王王使郎中令斥免欲以禁後【正义言屏斥免郎中令官而令後人不敢效也】被遂亡至长安上书自明诏下其事廷尉河南【正义雷被告章下廷尉及河南共治之】河南治逮淮南太子【正义逮谓追赴河南也】王王后计欲无遣太子遂发兵反计犹豫十余日未定会有诏即讯太子【索隐案乐彦云即就淮南案之不逮诣河南也】当是时淮南相怒壽春丞留太子逮不遣【集解如淳曰丞主刑狱囚徒丞顺王意不遣太子应逮书】劾不敬王以请相相弗听王使人上书告相事下廷尉治踪迹连王王使人候伺汉公卿公卿请逮捕治王王恐事发太子迁谋曰汉使即逮王王令人衣卫士衣持戟居庭中王旁有非是则刺杀之臣亦使人刺杀淮南中尉乃举兵未晚是时上不许公卿请而遣汉中尉宏即讯验王【索隐案百官表云宏姓殷也】王闻汉使来即如太子谋计汉中尉至王视其顔色和讯王以斥鼂被事耳王自度无

何【集解如淳曰无何罪】不发中尉还以闻公卿治者曰淮南王安拥阏奋击匈奴者蠹被等废格明诏当弃市【索隐崔浩云诏画募击匈奴而被壅遏应募者汉律所谓废格案如淳注梁孝王传云谓被阁不行也音各】诏弗许公卿请废勿王诏弗许公卿请削五县诏削二县使中尉宏赦淮南王罪罚以削地中尉入淮南界宣言赦王王初闻汉公卿请诛之未知得削地闻汉使来恐其捕之乃与太子谋刺之如前计及中尉至即贺王王以故不发其後自伤曰吾行仁义见削甚耻之然淮南王削地之後其为反谋益甚诸使道从长安来为妄妖言【索隐如淳曰道犹言路由长安来姚丞云道或作从】言上无男汉不治即喜即言汉廷治有男王怒以为妄言非也王日夜与伍被【集解駰案汉书曰伍被楚人或言其先伍子胥後】左吴等案輿地图【集解苏林云輿犹尽载之意索隐志林云輿地图汉家所画非出远也】部署兵所从入王曰上无太子宫车即晏驾廷臣必徵胶东王不即常山王【集解徐广曰皆景帝子也】诸侯并争吾可以无备乎且吾高祖孙亲行仁义陛下遇我厚吾能忍之万世之後吾寧能北面臣事竖子乎王坐东宫召伍被与谋曰将军上被怅然曰上寬赦大王王复安得此亡国之语乎臣闻子胥諫吴王吴王不用乃曰臣今见麋鹿游姑苏之台也今臣亦见宫中生荆棘露沾衣也王怒系伍被父母囚之三月复召曰将军许寡人乎被曰不直来为王画耳臣闻聪者听於无声明者见於未形故圣人万举万全昔文王一动而功显于千世列为三代此所谓因天心以动作者也故海内不期而随此千岁之可见者夫百年之秦近世之吴楚亦足以喻国家之存亡矣臣不敢避子胥之诛愿大王毋为吴王之听昔秦絕先王之道杀术士燔诗书弃礼义尚诈力任刑罚转负海之粟致之西河当是之时男子疾耕不足於糟糠女子纺绩不足於盖形遣蒙恬筑长城东西数千里暴兵露师常数十万死者不可胜数僵尸千里流血顷亩百姓力竭欲为乱者十家而五又使徐福入海求神异物还为伪辞曰臣见海中大神言曰汝西皇之使邪臣答曰然汝何求曰愿请延年益壽药神曰汝秦王之礼薄得观而不得取即从臣东南至蓬莱山见芝成宫阙有使者铜色而龙形光上照天於是臣再拜问曰宜何资以献海神曰以令名男子若振女【集解徐广曰西京赋曰振子万童駰案薛综曰振子童男女】与百工之事即得之矣秦皇帝大说遣振男女三千人资之五谷种种百工而行徐福得平原广泽止王不来【正义括地志云亶州在东海中秦始皇遣徐福将童男女遂止此州其後复有数洲万家其上人有至会稽市易者阙文】於是百姓悲痛相思欲为乱者十家而六又使尉佗踰五岭攻百越尉佗知中国劳极止王不来使人上书求女无夫家者三万人以为士卒衣补秦皇帝可其万五千人於是百姓离心瓦解欲为乱者十家而七客谓高皇帝曰时可矣高皇帝曰待之圣人当起东南间不一年陈胜吴广发矣高皇始於丰沛一倡天下不期而响应者不可胜数也此所谓蹈瑕候间因秦之亡而动者也百姓愿之若旱之望雨故起於行陈之中而立为天子功高三王德传无穷今大王见高皇帝得天下之易也独不观近世之吴楚乎夫吴王赐号为刘氏祭酒【集解应劭曰礼饮酒必祭示有先也故称祭酒尊也】复不朝王四郡之衆地方数千里内铸消铜以为钱东煮海水以为盐上取江陵木以为船一船之载当中国数十两车国富民衆行珠玉金帛赂诸侯宗室大臣独窦氏不与计定谋成举兵而西破於大梁败於狐父【集解徐广曰在梁碭之间】奔走而东至於丹徒越人禽之身死絶祀为天下笑夫以吴越之衆不能成功者何诚逆天道而不知时也方今大王之兵衆不能十分吴楚之一天下安寧有万倍於吴楚之时愿大王从臣之计大王不从臣之计今见大王事必不成而语先泄也臣闻微子过故国而悲於是作麦秀之歌是痛紂之不用王子比干也故孟子曰紂贵为天子死曾不若匹夫是紂先自絶於天下久矣非死之日而天下

去之今臣亦窃悲大王弃千乘之君必且赐绝命之书为羣臣先死於东宫也【集解如淳曰王时所居也】於是王气怨结而不扬涕满匡而横流即起历阶而去王有孽子不害最长王弗爱王王后太子皆不以为子兄数【集解如淳曰不以为子兄秩数】不害有子建材高有气常怨望太子不省其父【集解服虔曰不省录着兄弟数中】又怨时诸侯皆得分子弟为侯而淮南独二子一为太子建父独不得为侯建陰结交欲告败太子以其父代之太子知之数捕系而榜笞建建具知太子之谋欲杀汉中尉即使所善壽春庄芷【索隐汉书作严正】以元朔六年上书於天子曰毒药苦於口利於病忠言逆於耳利於行今淮南王孙建材能高淮南王王后荼荼子太子迁常疾害建建父不害无罪擅数捕系欲杀之今建在可徵问具知淮南陰事书闻上以其事下廷尉廷尉下河南治是时故辟阳侯孙审卿善丞相公孙弘怨淮南厉王杀其大父乃深购淮南事於弘弘乃疑淮南有畔逆计谋深穷治其狱河南治建辞引淮南太子及党与淮南王患之欲发问伍被曰汉廷治乱伍被曰天下治王意不说谓伍被曰公何以言天下治也被曰被窃观朝廷之政君臣之义父子之亲夫妇之别长幼之序皆得其理上之举错遵古之道风俗纪纲未有所缺也重装富贾周流天下道无不通故交易之道行南越宾服羌僰入献东瓠入降广长榆【集解如淳曰广谓拓大之也长榆塞名王恢所谓树榆为塞】开朔方匈奴折翅伤翼失援不振虽未及古太平之时然犹为治也王怒被谢死罪王又谓被曰山东即有兵汉必使大将军将而制山东公以为大将军何如也被曰被所善者黄义从大将军击匈奴还告被曰大将军遇士大夫有礼於士卒有恩衆皆乐为之用骑上下山若蜚材干絶人被以为材能如此数将习兵未易当也及谒者曹梁使长安来言大将军号令明当敌勇敢常为士卒先休舍穿井未通须士卒尽得水乃敢饮军罢卒尽已渡河乃渡皇太后所赐金帛尽以赐军吏虽古名将弗过也王默然淮南王见建已徵治恐国陰事且觉欲发被又以为难乃复问被曰公以为吴兴兵是邪非也被曰以为非也吴王至富贵也举事不当身死丹徒头足异处子孙无遗类【集解徐广曰一作噍音?笑反】臣闻吴王悔之甚愿王孰虑之无为吴王之所悔王曰男子之所死者一言耳【集解徐广曰一本无此言字駰案张晏曰不成则死二计耳瓚曰或有一言之交以死报之矣】且吴何知反【集解瓚曰言吴王不知举兵反索隐案知犹解也】汉将一曰过成臯者四十余人【集解如淳曰言吴不塞成臯口而令汉将得出之】今我令楼缓【集解駰案汉书直云缓无楼字楼缓乃六国时人疑此後人所益也李奇曰缓似人姓名韦昭曰淮南臣名】先要成臯之口【正义成臯城在河南滎水县东南二里】周被下颍川兵塞轘辕伊阙之道【正义轘辕故关在河南缑氏县南四十里伊关故关在河南县南十九里】陈定发南阳兵守武关【正义故武关在商州商洛县东九十里春秋时阙文】河南太守独有雒阳耳何足忧然此北尚有临晋关河东上党与河内赵国人言曰绝成臯之口天下不通据三川之险【正义即成臯关也】招山东之兵举事如此公以为何如被曰臣见其祸未见其福也王曰左吴赵贤朱骄如皆以为有福什事九成公独以为有祸无福何也被曰大王之羣臣近幸素能使衆者皆前系诏狱余无可使用者王曰陈胜吴广无立锥之地千人之聚起於大泽奋臂大呼而天下响应西至於戏而兵百二十万今吾国虽小然而胜兵者可得十余万非直适戍之衆鑠凿棘矜也【集解徐广曰大?谓之剗音五哀反或是鑠乎索隐刘氏鑠音吾里反凿音自各反又鑠邹音机?音廉】公何以言有祸无福被曰往者秦为无道残贼天下兴万乘之驾作阿房之宫收太半之赋发闾左之戍【正义闾左边不役之民秦则役之也】父不寧子兄不便弟政苛刑峻天下熬然若焦【索隐即消反】民皆引领而望倾耳而听悲号仰天叩心而怨上故陈胜大呼天下响应当今陛下

临制天下一齐海内泛爱蒸庶布德施惠口虽未言声疾雷霆令虽未出化驰如神心有所怀威动万里下之应上犹影响也而大将军材能不特章邯杨熊也大王以陈胜吴广谕之被以为过矣王曰苟如公言不可徼幸邪被曰被有愚计王曰奈何被曰当今诸侯无异心百姓无怨气朔方之郡田地广水草美民徙者不足以实其地臣之愚计可伪为丞相御史请书徙郡国豪杰任侠及有耐罪以上【集解应劭曰轻罪不至於髡完其耐鬣故曰耐古耐字与髡髮肤之意苏林以为法度之字皆从寸後改如是耐音若能如淳曰律耐为司寇耐为鬼薪白粲耐犹任也苏林曰一岁为罚作二岁刑已上为耐耐能任其罪】赦令除其罪家产五十万以上者皆徙其家属朔方之郡益发甲卒急其会曰又伪为左右都司空上林中都官诏狱逮书以逮诸侯太子幸臣【集解晋灼曰百官表宗正有左右都司空上林有水司空皆主囚徒官也】如此则民怨诸侯惧即使辩武【集解徐广曰淮南人名士曰武】随而说之徼可徼幸什得一乎王曰此可也虽然吾以为不至若此於是王乃令官奴入宫作皇帝玺丞相御史大将军军吏中二千石都官令丞印及旁近郡太守都尉印汉使节法冠【集解蔡邕曰法冠楚王冠也秦灭楚以其君冠赐御史索隐崔浩云一名獬豸冠也】欲如伍被计使人伪得罪而西事大将军丞相一日发兵【集解如淳曰发淮南兵也索隐崔浩曰一日犹一朝卒然无定时也】使人即刺杀大将军青而说丞相下之如发蒙耳【集解如淳曰以物蒙覆其头而为发去其人欲之耳韦昭曰如蒙中发之甚易】王欲发国中兵恐其相二千石不听王乃与伍被谋先杀相二千石伪失火宫中相二千石救火至即杀之计未决又欲令人衣求盗衣【集解駰案汉书音义曰卒衣也】持羽檄从东方来呼曰南越兵入界欲因以发兵乃使人至庐江会稽为求盗未发王问伍被曰吾举兵西乡诸侯必有应我者即无应奈何被曰南收衡山以击庐江有寻阳之船守下雒之城【集解徐广曰在江夏駰案苏林曰下雒县名索隐雒音全尔反县名在江南】结九江之浦絶豫章之口【正义即彭蠡湖口北流出大江者】强弩临江而守以禁南郡之下东收江都会稽【正义江都扬州也会稽苏州也】南通劲越屈强江淮闲犹可得延岁月之壽王曰善无以易此急则走越耳於是廷尉以王孙建辞连淮南王太子迁闻上遣廷尉监因拜淮南中尉逮捕太子至淮南淮南王闻与太子谋召相二千石欲杀而发兵召相相至内史以出为解中尉曰臣受诏使不得见王王念独杀相而内史中尉不来无益也即罢相王犹豫计未决太子念所坐者谋刺汉中尉所与谋者已死以为口絶乃谓王曰羣臣可用者皆前系今无足与举事者王以非时发恐无功臣愿会逮王亦偷欲休【集解徐广曰偷苟且也】即许太子太子即自刭不殊【集解晋灼曰不殊不死】伍被自诣吏因告与淮南王谋反反踪迹具如此吏因捕太子王后围王宫尽求捕王所与谋反宾客在国中者索得反具以闻上下公卿治所连引与淮南王谋反列侯二千石豪杰数千人皆以罪轻重受诛衡山王赐淮南王弟也当坐收有司请逮捕衡山王天子曰诸侯各以其国为本不当相坐与诸侯王列侯会肄丞相诸侯议【集解徐广曰诣都座就丞相共议也索隐案肄习也音异】赵王彭祖列侯臣让等四十三人议皆曰淮南王安甚大逆无道谋反明白当伏诛胶西王臣端议曰淮南王安废法行邪怀诈伪心以乱天下荧惑百姓倍畔宗庙妄作妖言春秋曰臣无将将而诛安罪重於将谋反形已定臣端所见其书节印图及他逆无道事验明白甚大逆无道当伏其法而论国吏二百石以上及比者【集解徐广曰比吏而非真】宗室近幸臣不在法中者不能相教当皆免削削爵为士伍母得宦为吏其非吏他赎死金二斤八两【集解苏林曰以非吏故曰他】以章臣安之罪使天下明知臣子之道母敢复有邪僻倍畔之意丞相弘廷尉汤等以闻天子使宗正以符节治王未至淮南王安自刭杀【集解徐广曰即

位凡四十二年元狩元年十月死】王后荼太子迁诸所与谋反者皆族天子以伍被雅辞多引汉之美欲勿诛廷尉汤曰被首为王画反谋被罪无赦遂诛被国除为九江郡【集解徐广曰又为六安国以陈县为都】

衡山王赐王后乘舒【正义衡山王后各也】生子三人长男爽为太子次男孝次女无采又姬徐来生子男女四人美人厥姬生子二人衡山王淮南王兄弟相责望礼节间不相能衡山王闻淮南王作为畔逆反具亦心结宾客以应之恐为所并元光六年衡山王入朝其谒者卫庆有方术欲上书事天子王怒故劾庆死罪强榜服之衡山内史以为非是郤其狱王使人上书告内史内史治言王不直王又数侵夺人田坏人冢以为田有司请逮治衡山王天子不许为置吏二百石以上【集解如淳曰汉仪注吏四百石以下自调除国中今王恶天子皆为置之】衡山王以此恚与奚慈张广昌谋求能为兵法候星气者日夜从容王密谋反事【集解徐广曰密豫作计校】王后乘舒死立徐来为王后厥姬俱幸两人相妬厥姬乃恶王后徐来於太子曰徐来使婢蛊道杀太子母太子心怨徐来徐来兄至衡山太子与饮以刃刺伤王后兄王后怨怒数毁恶太子於王太子女弟无采嫁弃归与奴姁又与客姁太子数让无采无采怒不与太子通王后闻之即善遇无采无采及中兄孝少失母附王后王后以计爱之与共毁太子王以故数击笞太子元朔四年中人有贼伤王后假母者【集解駰案汉书音义曰传母属】王疑太子使人伤之笞太子後王病太子时称病不侍孝王后无采恶太子太子实不病自言病有喜色王大怒欲废太子立其弟孝王后知王决废太子又欲并废孝王后有侍者善舞王幸之王后欲令侍者与孝乱以污之欲并废兄弟而立其子广代太子太子爽知之念后数恶已无已时欲与乱以止其口王后饮太子前为寿因据王后股求与王后卧王后怒以告王王乃召欲缚而笞之太子知王常欲废已立其弟孝乃谓王曰孝与王御者姁无采与奴姁王强食请上书即倍王去王使人止之莫能禁乃自驾追捕太子太子妄恶言王械系太子宫中孝日益亲幸王奇孝材能乃佩之王印号曰将军令居外宅多给金钱招致宾客宾客来者微知淮南衡山有逆计日夜从容劝之王乃使孝客江都人救赫陈喜作輶车鏃矢【集解徐广曰輶车战车也音扶萌反索隐救汉书作枚刘向别录云易家有救民之法也】刻天子玺将相军吏印王日夜求壮士如周邱等数称引吴楚反时计画以约束衡山王非敢效淮南王求即天子位畏淮南起并其国以为淮南已西发兵定江淮之间而有之望如是元朔五年秋衡山王当朝六年过淮南淮南王乃昆弟语除前郤约束反具衡山王即上书谢病上赐书不朝元朔六年中衡山使人上书请废太子爽立孝为太子爽闻即使所善白嬴之长安上书【索隐嬴音盈人姓名也】言孝作輶车鏃矢与王御者姁欲以败孝白嬴至长安未及上书吏捕嬴以淮南事系王闻爽使白嬴上书恐言国阴事即上书反告太子爽所为不道弃市罪事事下沛郡治元朔七年冬有司公卿下沛郡求捕所与淮南谋反者未得得陈喜於衡山王子孝家吏劾孝首匿喜孝以为陈喜雅数与王计谋反恐其发之闻律先自告除其罪又疑太子使白嬴上书发其事即先自告告所与谋反者救赫陈喜等廷尉治验公卿请逮捕衡山王治之天子曰勿捕遣中尉安【索隐按汉书表司马安也】大行息【索隐案汉书表李息】即问王王具以情实对吏皆围王宫而守之中尉大行还以闻公卿请遣宗正大行与沛郡杂治王王闻即自刭杀孝先自告反除其罪坐与王御婢姁弃市王后徐来亦坐蛊杀前王后乘舒及太子爽坐告王不孝皆弃市诸与衡山王谋反者皆族国除为衡山郡

太史公曰诗之所谓戎狄是膺荆书是惩信哉是也淮南衡山亲为骨肉疆土千里列为诸侯不务遵蕃臣职以承辅天子而专挟邪僻之计谋为畔逆仍父子再亡国各不终其身为天下笑此非独王过也亦其俗薄臣下渐靡使然也夫荆楚僇勇轻悍好作乱乃自古记之矣

【索隐述赞曰淮南多横举事非正天子宽仁其过不更辚车致祸斗粟成咏王安好学女陵作调兄弟不和倾国殒命】

史记卷一百十八

史记卷一百一十八考证

淮南衡山列传廷尉臣贺○【臣照】按汉百官公卿表张释之以孝文三年为廷尉终文帝世不迁此廷尉贺不知何人疑有讹字

一尺布尚可缝一斗粟尚可舂兄弟二人不能相容○容斋续笔曰高诱作鸿烈解叙及许叔重注文其辞乃云一尺缁好童童一升粟饱蓬蓬兄弟二人不能相容

汉亦使曲城侯集解徐广曰曲城侯姓蛊名捷○功臣表虫作蛊

王使郎中令斥免正义言屏斥免郎中令官而令後人不敢效也○余有丁曰郎中令郎中之长斥免黻被也

以令名男子若振女集解徐广曰西京赋曰振子万童○振西京赋作偃

尉佗知中国劳极止王不来○陈沂曰按任嚣死後赵佗始自为王今乃言尉佗先王陈胜乃反被一时对辞不究其实耳

臣闻微子过故国而悲於是作麦秀之歌○吕氏春秋及宋世家皆以为箕子

今我令楼缓先要成臯之口集解汉书直云缓无楼字楼缓乃六国时人疑此後人所益也李奇曰缓似人姓名韦昭曰淮南臣名○徐孚远曰周被陈定皆着姓名缓不得独去姓楼缓当是与古人姓名同也

陈定发南阳兵守武关正义故武关在商州商洛县东九十里春秋时阨文○阨文疑秦地二字之误

产五十万以上者○一本产上有家字

王安自刭杀集解徐广曰即位凡四十二年元狩元年十月死○【臣照】按年表安在位四

十三年元狩元年自杀徐广殆以夏正十月当属元朔六年故只作四十二年乎否则二字狩字误

信哉是也○一本作信哉是言也

史记卷一百一十八考证

卷一百十九

钦定四库全书

史记卷一百十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

循吏列传第五十九

【索隐谓奉法循理之吏也】

太史公曰法令所以导民也刑罚所以禁奸也文武不备良民惧然身修者官未曾乱也奉职循理亦可以为治何必威严哉

孙叔敖者【正义说苑云孙叔敖为令尹一国吏民皆来贺有一老父衣赭衣冠白冠後來吊曰有身贵而骄人者民亡之位已高而擅权者君恶之禄已厚而不知足者患处之叔敖再拜敬受命愿闻余教父曰位已高而意益下官益大而心益小禄已厚而慎不取君谨守此三者足以治楚】楚之处士也虞丘相进之於楚庄王以自代也三月为楚相施教导民上下和合世俗盛美政缓禁止吏无奸邪盗贼不起秋冬则劝民山采春夏以水【集解徐广曰乘多水时而出材竹】各得其所便民皆乐其生庄王以为币轻更小以为大百姓不便皆去其业市令言之相曰市乱民莫安其处次行不定相曰如此几何顷乎市令曰三月顷相曰罢吾今令之复矣後五日朝相言之王曰前日更币以为轻今市令来言曰市乱民莫安其处次行之不定臣请遂令复如故王许之下令三日而市复如故楚民俗好庖车【索隐庖下也音婢】王以为庖车不便马欲下令使高之相曰令数下民不知所从不可王必欲高车臣请教闾里使高其梱【索隐梱门限也音口本反】乘车者皆君子君子不能数下车王许之居半岁民悉自高其车此不教而民从其化近者视而效之远者四面望而法之故三得相而不喜知其材自得之也三去相而不悔知非已之罪也【集解駰案皇览曰孙叔敖冢在南郡江陵故城中曰土里民传孙叔敖曰葬我庐江陂後当为万户邑去故楚都郢城北二十里所或曰孙叔敖激沮水作云梦大泽之池也】

子产者郑之列大夫也【索隐按有管晏列传其国侨羊舌肸等亦古之贤大夫合着在管晏之下不宜散入循吏之篇】郑昭君之时以所爱徐贲为相【索隐按郑系家云子产郑成公

之少子事简公定公封以六邑子产不事昭君亦无徐贲作相之事抑别有所出太史记异耳】国乱上下不亲父子不和大宫子期言之君以子产为相【索隐子期亦郑之公子也左传国语亦无其说按系家郑相子西子驷之子与子产同时盖亦子期之兄弟也】为相一年竖子不戏狎班白不提挈僮子不犁畔二年市不豫贾【索隐贾音价谓临时评其贵贱不豫定贾】三年门不夜关【集解徐广曰一作闭】道不拾遗四年田器不归五年士无尺籍【正义言士民无一尺方板之籍书什伍什伍相保也】丧期不令而治治郑二十六年而死丁壮号哭老人儿啼曰子产去我死乎民将安归【集解駰案皇覽曰子产冢在河南新郑城外大冢是也索隐按左传及系家云子产死孔子泣曰子产古之遗爱也又韩诗称子产卒郑人耕者辍耒妇人捐其佩玦也】

公仪休者鲁博士也以高弟为鲁相奉法循理无所变更百官自正使食禄者不得与下民争利受大者不得取小客有遗相鱼者相不受客曰闻君嗜鱼遗君鱼何故不受也相曰以嗜鱼故不受也今为相能自给鱼今受鱼而免谁复给我鱼者吾故不受也食茹而美拔其园葵而弃之见其家织布好而疾出其家妇燔其机云欲令农士工女安所讐其货乎

石奢者楚昭王相也坚直廉正无所阿避行县道有杀人者相追之乃其父也纵其父而还自系焉使人言之王曰杀人者臣之父也夫以父立政不孝也废法纵罪非忠也臣罪当死王曰追而不及不当伏罪子其治事矣石奢曰不私其父非孝子也不奉主法非忠臣也王赦其罪上惠也伏诛而死臣职也遂不受令自刎而死李离者晋文公之理也【正义理狱官也】过听杀人自拘当死文公曰官有贵贱罚有轻重下吏有过非子之罪也李离曰臣居官为长不与吏让位受禄为多不与下分利今过听杀人传其罪下吏非所闻也辞不受令文公曰子则自以为有罪寡人亦有罪邪李离曰理有法失刑则刑失死则死公以臣能听微决疑【索隐言能听察微理以决疑狱故周礼司寇以五听察狱词气色耳目也又尚书曰服念五六日至於旬时是也】故使为理今过听杀人罪当死遂不受令伏劓而死

太史公曰孙叔敖出一言郢市复子产病死郑民号哭公仪子见好布而家妇逐石奢纵父而死楚昭名立李离过杀而伏劓晋文以正国法

【索隐述赞曰奉职循理为政之先恤人体国良吏述焉叔孙郑产自昔称贤拔葵一利赦父非愆李离伏劓为法而然】

史记卷一百十九

史记卷一百一十九考证

循吏列传虞丘相进之於楚庄王以自代也○吕氏春秋进孙叔敖者沈尹筮

客曰闻君嗜鱼遗君鱼何故不受也○韩诗外传作其弟谏曰

石奢者楚昭王相也○吕氏春秋作石渚

失刑则刑失死则死○韩诗外传曰法失则刑刑失则死

史记卷一百一十九考证

卷一百二十

钦定四库全书

史记卷一百二十

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

汲郑列传第六十

汲黯字长孺濮阳人也其先有宠於古之卫君【集解文颖曰六国时卫但称君】至黯七世世为卿大夫黯以父任孝景时为太子洗马以庄见惮【索隐庄者严也谓严威也自汉明帝讳庄故已後庄皆云严】孝景帝崩太子即位黯为谒者东越相攻上使黯往视之不至至吴而还报曰越人相攻固其俗然不足以辱天子之使河南失火延烧千余家上使黯往视之还报曰家人失火屋比延烧【索隐比音鼻】不足忧也臣过河南河南贫人伤水旱万余家或父子相食臣谨以便宜持节发河南仓粟以振贫民臣请归节伏矫制之罪上贤而释之迁为荥阳令黯耻为令病归田里上闻乃召拜为中大夫以数切谏不得久留内迁为东海太守黯学黄老之言治官理民好清静择丞史而任之【集解如淳曰律太守都尉诸侯内史史各一人卒吏书佐各十人今摠言丞史或以为择郡丞及史使任之郑当时为大农推官属丞史亦是也】其治责大指而已不苟小黯多病卧闺合内不出岁余东海大治称之上闻召以为主爵都尉列於九卿治务在无为而已弘大体不拘文法黯为人性倨少礼面折不能容人之过合己者善待之不合己者不能忍见士亦以此不附焉然好学游侠任气节内行修絜好直谏数犯主之颜色常慕傅柏袁盎之为人也【集解应邵曰傅柏梁人为孝王将素伉直索隐傅音付人姓柏名】善灌夫郑当时及宗正刘弃【集解徐广曰一云名弃疾索隐汉书见名弃疾】亦以数直谏不得久居位当是时太后弟武安侯蚡为丞相中二千石来拜谒蚡不为礼然黯见蚡未尝拜常揖之天子方招文学儒者上曰吾欲云云【集解张晏曰所言欲施仁义也】黯对曰陛下内多欲而外施仁义奈何欲效唐虞之治乎上默然怒变色而罢朝公卿皆为黯惧上退谓左右曰甚矣汲黯之戆也【索隐戆愚也音陟降反】羣臣或数黯黯曰天子置公卿辅弼之臣宁令从谏承意陷主於不义乎且已在其位纵爱身奈辱朝廷何黯多病病且满三月上常赐告者数【集解如淳曰杜钦所谓病满赐告诏恩也数者非一也或曰赐告得去官归家与告居官不视事索隐数音所角反】终不愈最後病庄助为请告【集解徐广曰最一作其也】上曰汲黯何如人哉助曰使黯任职居官无以踰人【索隐踰音庾案汉书作瘳瘳犹胜也】然至其辅少主守城深坚招之不来麾之不去虽自谓贲育亦不能夺之矣

上曰然古有社稷之臣至如黯近之矣大将军青侍中上踞厕而视之【集解如淳曰厕音侧谓牀边踞牀视之一云溷厕也厕牀边侧】丞相弘燕见上或时不冠至如黯见上不冠不见也上尝坐武帐中【集解应劭曰武帐织成为武士象也孟康曰今御武帐置兵阑五兵於帐中韦昭曰以武名之示威】黯前奏事上不冠望见黯避帐中使人可其奏其见敬礼如此张汤方以更定律令为廷尉黯数质责汤於上前曰公为正卿上不能褒先帝之功业下不能抑天下之邪心安国富民使囹圄空虚二者无一焉非苦就行放析就功何乃取高皇帝约束纷更之为【集解如淳曰纷乱也】公以此无种矣黯时与汤论议汤辩常在文深小苛黯伉厉守高不能屈忿发骂曰天下谓刀笔吏不可以为公卿果然必汤也令天下重足而立侧目而视矣是时汉方征匈奴招怀四夷黯务少事承上间常言与胡和亲无起兵上方向儒术尊公孙弘及事益多吏民巧弄【索隐音路洞反】上分别文法汤等数奏决谏以幸【索隐谏音鱼列反】而黯常毁儒面触弘等徒怀诈饰智以阿人主取容而刀笔吏专深文巧诋【索隐音丁礼反】陷人於罪使不得反其真以胜为功上愈益贵弘汤弘汤深心疾黯唯天子亦不说也欲诛之以事弘为丞相乃言上曰右内史界部中多贵人宗室难治非素重臣不能任请徙黯为右内史为右内史数岁官事不废大将军青既益尊姊为皇后然黯与亢礼人或说黯曰自天子欲羣臣下大将军大将军尊重益贵君不可以不拜黯曰夫以大将军有揖客反不重邪大将军闻愈贤黯数请问国家朝廷所疑遇黯过於平生淮南王谋反惮黯曰好直谏守节死义难惑以非至如说丞相弘如发蒙振落耳天子既数征匈奴有功黯之言益不用始黯列为九卿而公孙弘张汤为小吏及弘汤稍益贵与黯同位黯又非毁弘汤等已而弘至丞相封为侯汤至御史大夫故黯时丞相史皆与黯同列或尊用过之黯褊心不能无少望见上前言曰陛下用羣臣如积薪耳後来者居上上默然有间黯罢上曰人果不可以无学观黯之言也日益甚居无何匈奴浑邪王率衆来降汉发车二万乘县官无钱从民贳马【索隐贳音时夜反贳除也邹氏音势】民或匿马马不具上怒欲斩长安令黯曰长安令无罪独斩黯民乃肯出马且匈奴畔其主而降汉汉徐以县次传之何至令天下骚动罢弊中国而以事夷狄之人乎上默然及浑邪至买人与市者坐当死者五百余人黯请间见高门【集解如淳曰按三辅黄图云未央宫中有高门殿】曰夫匈奴攻当路塞絶和亲中国兴兵诛之死伤者不可胜计而费以巨万百数臣愚以为陛下得胡人皆以为奴婢以赐从军死事者家所卤获因予之以谢天下之苦塞百姓之心今纵不能浑邪率数万之衆来降虚府库赏赐发良民侍养譬若奉骄子愚民安知市买长安中物而文吏绳以为阑出财物于边关乎【集解应劭曰阑妄也律胡市吏民不得持兵器出关虽於京师市买其法一也瓚曰无符传出入为阑】陛下纵不能得匈奴之资以谢天下又以微文杀无知者五百余人是所谓庇其叶而伤其枝者也臣窃为陛下不取也上默然不许曰吾久不闻汲黯之言今又复妄发矣後数月黯坐小法会赦免官於是黯隐於田园居数年会更五铢钱【集解徐广曰元狩五年行五铢钱】民多盗铸钱楚地尤甚上以为淮阳楚地之郊乃召拜黯为淮阳太守黯伏谢不受印诏数强予然後奉诏诏召见黯黯为上泣曰臣自以为填沟壑不复见陛下不意陛下复收用之臣常有狗马病力不能任郡事臣愿为中郎出入禁闕补过拾遗臣之愿也上曰君薄淮阳邪吾今召君矣【索隐今犹即今也谓今日後即召君】顾淮阳吏民不相得吾徒得君之重卧而治之黯既辞行过大行李息曰黯弃居郡不得与朝廷议也然御史大夫张汤智足以拒谏诈足以饰非务巧佞之语辩数之辞非肯正为天下言专阿主意主意所不欲因而毁之主意所欲因而誉之好兴事舞文法【集解如淳曰舞犹弄也】内怀诈以御主心外挟贼吏以为威重公列九卿不

早言之公与之俱受其戮矣息畏汤终不敢言黯居郡如故治淮阳政清後张汤果败上闻黯与息言抵息罪令黯以诸侯相秩居淮阳【集解如淳曰诸侯王相在郡守上秩真二千石律真二千石奉月二万二千石月万六千】七岁而卒【集解徐广曰元鼎五年】卒後上以黯故官其弟汲仁至九卿子汲偃至诸侯相黯姑姊子司马安亦少与黯为太子洗马安文深巧善宦官四至九卿以河南太守卒昆弟以安故同时至二千石者十人濮阳假宏【索隐按汉书作段宏】始事盖侯信【集解徐广曰太后兄王信】信任宏宏亦再至九卿然卫人仕者皆严惮汲黯出其下

郑当时者字庄陈人也其先郑君【集解駰案汉书音义曰当时父】尝为项籍将籍死已而属汉高祖令诸故项籍臣名籍郑君独不奉诏诏尽拜名籍者为大夫而逐郑君郑君死孝文时郑庄以任侠自喜脱张羽於屣【集解服虔曰梁孝王之将楚相之弟】声闻梁楚之间孝景时为太子舍人每五日洗沐常置驿马长安诸郊【集解如淳曰交道四通处也请宾客便瓚曰诸郊谓长安四面郊祀之处闲静可以请宾客索隐置即驿马谓於置着马也】存诸故人请谢宾客夜以继日至其明旦常恐不徧庄好黄老之言其慕长者如恐不见年少官薄然其游知交皆其大父行天下有名之士也武帝立庄稍迁为鲁中尉济南太守江都相至九卿为右内史以武安侯魏其时议贬秩为詹事迁为大农令庄为太史诚门下客至无贵贱无留门者执宾主之礼以其贵下人庄廉又不治其产业仰奉赐以给诸公然其馈遗人不过算器食【集解徐广曰算音先管反竹器索隐算谓竹器以言无铜漆也汉书作具器食】每朝候上之间说未尝不言天下之长者其推轂士及官属丞史诚有味其言之也常引以为贤於已未尝名吏与官属言若恐伤之闻人之善言进之上唯恐後山东士诸公以此翕然称郑庄郑庄使视决河自请治行五日【集解如淳曰治行谓庄严也】上曰吾闻郑庄行千里不齎粮请治行者何也然郑庄在朝常趋和承意不敢甚引当否及晚节汉征匈奴招四夷天下费多财用益匮庄任人宾客为大农僦人【集解徐广曰一作入一云宾客为大农僦人僦人盖兴生财利如今方宜矣駰案晋灼曰当时为大农而任使其宾客辜较任僦也瓚曰任人谓保任见举者索隐僦音即就反辜较音姑角谓当时作大农任宾客僦人取庸直也或者贯物以应官取庸故下云多逋负也辜较字亦作酤榷榷者独也言国家独榷酤也此云辜较亦谓令宾客任人专其利故云辜较也】多逋负司马安为淮阳太守发其事庄以此陷罪赎为庶人顷之守长史【集解如淳曰丞相长史也】上以为老以庄为汝南太守数岁以官卒郑庄汲黯始列为九卿廉内行修絜此两人中废家贫宾客益落【索隐落零落犹散落也】及居郡卒後家无余赀财庄兄弟子孙以庄故至二千石六七人焉

太史公曰夫以汲黯之贤有势则宾客十倍无势则否况衆人乎下邳翟公有言【集解徐广曰邳一作邳索隐邳音圭县名属京兆】始翟公为廷尉宾客阨门及废门外可设雀罗翟公复为廷尉宾客欲往翟公乃大署其门曰一死一生乃知交情一贫一富乃知交态一贵一贱交情乃见汲郑亦云悲夫

【索隐述赞曰河南矫制自古称贤淮南卧理天子伏焉积薪兴叹伉直愈坚郑庄推士天下翕然交道势利翟公怆旃】

史记卷一百二十

史记卷一百二十考证

汲郑列传愚民安知○顾炎武曰愚民安知为一句其先郑君集解汉书音义曰当时父○徐孚远曰景帝时庄犹年少郑君非庄父明矣或其祖也

史记卷一百二十考证

卷一百二十一

钦定四库全书

史记卷一百二十一

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

儒林列传第六十一

【正义姚承云儒谓博士为儒雅之林综理古文宣明旧艺咸劝儒者以成王化者也】

太史公曰余读功令【索隐案谓学者课功着之於令即今之学令是也】至於广厉学官之路未尝不废书而叹也曰嗟乎夫周室衰而关雎作幽厉微而礼乐坏诸侯恣行政由强国故孔子闵王路废而邪道兴於是论次诗书修起礼乐适齐闻韶三月不知肉味自卫返鲁然後乐正雅颂各得其所【正义郑玄云鲁哀公十一年是时道衰乐废孔子还修正之故雅颂各得其所也】世以混浊莫能用是以仲尼干七十余君无所遇【索隐後之记者失辞也案家语等说则孔子历聘诸国莫能用谓周郑齐宋曹卫陈楚杞莒匡等尔纵历小国亦无七十余君也】曰苟有用我者期月而已矣西狩获麟曰吾道穷矣故因史记作春秋以寓王法其辞微而指博後世学者多录焉【集解徐广曰录一作繆】自孔子卒後七十子之徒散游诸侯大者为师傅卿相【索隐案子夏为魏文侯师子贡为齐鲁聘吴越盖亦卿也而宰予亦仕齐为卿余则未闻】小者友教士大夫或隐而不见故子路居卫【集解駰案仲尼弟子列传子路死於卫时孔子尚存也】子张居陈【正义今陈州】澹台子羽居楚【正义今苏州城南五里有澹台湖湖北有澹台】子夏居西河【正义今汾州】子贡终於齐【正义今青州】如田子方段干木吴起禽滑厘之属皆受业於子夏之伦爲王者师是时独魏文侯好学後陵迟以至于始皇天下并争於战国儒术既绌焉然齐鲁之門学者独不废也於威宣之际孟子荀卿之列咸遵夫子之业而润色之以学显於当世及至秦之季世焚诗书阬术士【正义顔云今新丰县温汤之处号愍儒乡温汤西南三里有马谷谷之西岸有阬古相传以为秦阬儒处也卫宏诏定古文尚书序云秦既焚书恐天下不从所改更法而诸生到者拜为郎前後七百人乃密种瓜於骊山陵谷中温处瓜实成诏博士诸生说之人言不同乃令就视为伏机诸生贤儒皆至焉方相难不决因发机从上填之以土皆压终乃无声也】六艺从此缺焉陈涉之王也而鲁诸儒持孔氏之礼器往归陈王於是孔甲爲陈涉博士【集解徐广曰孔子八世孙名鲋字甲也】卒与涉俱死陈涉起匹夫驱瓦合适戍【索隐适音丁革反】旬月以王楚

不满半岁竟灭亡其事至微浅然而缙绅先生之徒负孔子礼器往委质爲臣者何也以秦焚其业积怨而发愤于陈王也及高皇帝诛项籍举兵围鲁鲁中诸儒尚讲诵习礼乐弦歌之音不絶岂非圣人之遗化好礼乐之国哉故孔子在陈曰归与归与吾党之小子狂简斐然成章不知所以裁之夫齐鲁之间於文学自古以来其天性也故汉兴然後诸儒始得修其经艺讲习大射乡饮之礼叔孙通作汉礼仪因为太常诸生弟子共定者咸为选首於是喟然叹兴於学然尚有干戈平定四海【正义顔云陈豨卢绾韩信黥布之徒相次反叛征讨也】亦未暇遑庠序之事也孝惠吕后时公卿皆武力有功之臣孝文时颇徵用【正义言孝文稍用文学之士居位】然孝文帝本好刑名之言及至孝景不任儒者而窦太后又好黄老之术故诸博士具官待问未有进者及今上即位赵绾王臧之属明儒学而上亦乡之於是招方正贤良文学之士自是之後言诗於鲁则申培公【集解徐广曰一作陪韦昭曰培中公名音扶尤反索隐邹氏音普来反】於齐则轅固生【正义申轅姓培固名公生其处号也】於燕则韩太傅【索隐韩婴也为常山王太傅】言尚书自济南伏生【索隐按张华云名胜纪年云字子贱】言礼自鲁高堂生【索隐谢承云秦氏季代有鲁人高堂伯则伯是其字云生者自汉以来儒者皆号生亦先生者省字呼之耳】言易自菑川田生言春秋於齐鲁自胡毋生【索隐母音无胡母姓也字子都】於赵自董仲舒及窦太后崩武安侯田蚡为丞相绌黄老刑名百家之言延文学儒者数百人而公孙弘以春秋白衣为天子三公【集解徐广曰一云自齐为天子三公】封以平津侯天下之学士靡然乡风矣公孙弘为学官悼道之郁滞乃请曰丞相御史言【正义自此以下皆弘奏请之辞】制曰盖闻导民以礼风之以乐?姻者居室之大伦也今礼废乐崩朕甚愍焉故详延天下方正博闻之士咸登诸朝其令礼官劝学讲议洽闻兴礼以为天下先太常议与博士弟子崇乡里之化以广贤材马谨与太常臧【集解駰案汉书百官表孔臧也】博士平等议曰闻三代之道乡里有教夏曰校【正义校教也可教道艺也】殷曰序【正义序舒也言舒礼教】周曰庠【正义庠详也言详审经典】其劝善也显之朝廷其惩恶也加之刑罚故教化之行也建首善自京师始由内及外今陛下昭至德开大明配天地本人伦劝学修礼崇化厉贤以风四方太平之原也古者政教未洽不备其礼请因旧官而兴焉为博士官置弟子五十人复其身太常择民年十八以上仪状端正者补博士弟子郡国县道邑有好文学敬长上肃政教顺乡里出入不悖所闻者令相长丞上属所二千石【索隐上音时两反属音烛属委也所二千石谓於所部之郡守相也】二千石谨察可者当与计偕【索隐计计吏也偕俱也谓令与计吏俱诣太常也】诣太常得受业如弟子一岁皆辄试能通一艺以上补文学掌故缺其高第可以为郎中者太常籍奏即有秀才异等辄以名闻其不事学若下材及不能通一艺辄罢之而请诸不称者罚臣谨案诏书律令下者明天人分际通古今之义文章尔雅训辞深厚【索隐谓诏书文章雅正训辞深厚也】恩施甚美小吏浅闻不能究宣无以明布谕下治礼次治掌故【集解徐广曰一云次治礼乐掌故】以文学礼义为官迁留滞请选择其秩比二百石以上及吏百石通一艺以上补左右内史【正义案左右内史後改为左冯翊右扶风】大行卒史比百石以下补郡太守卒史皆各二人边郡一人先用诵多者若不足乃择掌故补中二千石属文学掌故补郡属【索隐如淳云汉仪弟子射策甲科百人补郎中乙科二百人补太子舍人皆秩比二百石次郡国文学秩百石也】备员请着功令佗如律令制曰可自此以来则公卿大夫士吏斌斌多文学之士矣

申公者鲁人也高祖过鲁申公以弟子从师入见高祖于鲁南宫【索隐案汉书云申公少与

楚元王俱事齐人浮丘伯受诗正义括地志泮宫在兖州曲阜县西南二百里鲁城内宫之内郑云泮之言半也其制半於天子之璧雍】吕太后时申公游学长安与刘郢同师【索隐案汉书云吕太后时浮丘伯在长安申公与元王子郢俱卒学也郢即郢客】已而郢为楚王令申公傅其太子戊【集解徐广曰楚元王刘交以文帝元年薨子夷王郢立四岁薨子戊立郢以吕后二年封上邽侯文帝元年立为楚王】戊不好学疾申公及王郢卒戊立为楚王胥靡申公【集解徐广曰腐刑】申公耻之归鲁退居家教终身不出门复谢絶宾客独王命召之乃往【集解徐广曰鲁恭王也】弟子自远方至受业者百余人申公独以诗经为训以教无传疑者则阙不传【索隐谓申公不作诗传但教授有疑则阙耳】兰陵王臧既受诗以事孝景帝为太子少傅免去今上初即位臧乃上书宿卫上累迁一岁中为郎中令及代赵绾亦尝受诗申公绾为御史大夫绾臧请天子欲立明堂以朝诸侯不能就其事乃言师申公於是天子使使束帛加璧安车驷马迎申公弟子二人乘轺传从【集解徐广曰马车】至见天子天子问治乱之事申公时已八十余老对曰为治者不在多言顾力行何如耳是时天子方好文词见申公对默然然已招致则以为太中大夫舍鲁邸议明堂事太皇窦太后好老子言不说儒术得赵绾王臧之过以让上上因废明堂事尽下赵绾王臧吏後皆自杀申公亦疾免以归数卒弟子为博士者十余人孔安国至临淮太守【集解徐广曰孔鲋之弟子襄为惠帝博士迁为长沙大傅生忠忠生武及安国安国为博士临淮太守】周霸至胶西内史夏寬至城阳内史碭鲁赐至东海太守兰陵繆生至长沙内史【索隐繆音亡救反繆氏出兰陵一音穆所谓穆生为楚元王所礼也】徐偃为胶西中尉邹人阙门庆忌【集解駰案汉书音义曰姓阙门名庆忌】为胶东内史其治官民皆有廉节称其好学学官弟子行虽不备而至於大夫郎中掌故以百数言诗虽殊多本於申公

清河王太傅辕固生者齐人也以治诗孝景时为博士与黄生争论景帝前黄生曰汤武非受命乃弑也辕固生曰不然夫桀纣虐乱天下之心皆归汤武汤武与天下之心而诛桀纣桀纣之民不为之使而归汤武汤武不得已而立非受命为何黄生曰冠虽敝必加於首履虽新必关於足何者上下之分也今桀纣虽失道然君上也汤武虽圣臣下也夫主有失行臣下不能正言匡过以尊天子反因过而诛之代立践南面非弑而何也辕固生曰必若所云是高帝代秦即天子之位非邪於是景帝曰食肉不食马肝【正义论衡云气热而毒盛故食马肝杀人又盛夏马行多渴死杀气为毒也】不为不知味言学者无言汤武受命不为愚遂罢是後学者莫敢明受命放杀者窦太后好老子书召辕固生问老子书固曰此是家人言耳【索隐服?云如家人言也案老子道德篇虽微妙难通然近而观之理国理身而已故言此家人之言也】太后怒曰安得司空城旦书乎【集解徐广曰司空主刑徒之官也駰案汉书音义曰道家以儒法为急比之於律令】乃使固入圈刺豕景帝知太后怒而固直言无罪乃假固利兵下圈刺豕正中其心一刺豕应手而倒太后默然无以复罪罢之居顷之景帝以固为廉直拜为清河王太傅【集解徐广曰哀王乘也】久之病免今上初即位复以贤良徵固诸谀儒多疾毁固曰固老罢归之时固已九十余矣固之徵也薛人公孙弘亦徵【集解徐广曰薛县在菑川】侧目而视固固曰公孙子务正学以言无曲学以阿世自是之後齐言诗皆本辕固生也诸齐人以诗显贵皆固之弟子也

韩生者【集解駰案汉书曰名婴】燕人也孝文帝时为博士景帝时为常山王太傅【集解

徐广曰宪王舜也】韩生推诗之意而为内外传数万言其语颇与齐鲁间殊然其归一也淮南贲生受之【索隐贲音肥】自是之後而燕赵间言诗者由韩生韩生孙商为今上博士

伏生者【集解张晏曰伏生名胜伏氏碑云】济南人也故为秦博士孝文帝时欲求能治尚书者天下无有乃闻伏生能治欲召之是时伏生年九十余老不能行於是乃诏太常使掌故朝错往受之秦时焚书伏生壁藏之其後兵大起流亡汉定伏生求其书亡数十篇独得二十九篇即以教于齐鲁之间学者由是颇能言尚书诸山东大师无不涉尚书以教矣伏生教济南张生及欧阳生【集解駢案汉书曰字和伯千乘人】欧阳生教千乘儿寛儿寛既通尚书以文学应郡举诣博士受业受业孔安国儿寛贫无资用常为弟子都养【索隐谓儿寛家贫为弟子造食也何休注公羊灼烹为养案有厮养卒厮掌马养造食也】及时时间行佣赁以给衣食行常带经止息则诵习之以试第次补廷尉史是时张汤方乡学以为奏讞掾以古法议决疑大狱而爱幸寛寛为人温良有廉智自持而善着书书奏敏於文口不能发明也汤以为长者数称誉之及汤为御史大夫以儿寛为掾荐之天子天子见问说之张汤死後六年儿寛位至御史大夫【集解徐广曰元狩元年】九年而以官卒寛在三公位以和良承意从容得久然无有所匡諫於官官属易之不为尽力张生亦为博士而伏生孙以治尚书徵不能明也自此之後鲁周霸孔安国雒阳贾嘉颇能言尚书事孔氏有古文尚书而安国以今文读之因以起其家逸书得十余篇盖尚书滋多於是矣【索隐案孔臧与安国书云旧书潜於壁室歟尔复出古训复申臧惟闻尚书二十八篇取象二十八宿何图乃有百篇耶知以今文雖古篆隶推科斗以定五十余篇并为之传也艺文志曰安国悉得其书以考二十九篇得多十六篇起者谓起发以出也】诸学者多言礼而鲁高堂生最本礼固自孔子时而其经不具及至秦焚书书散亡益多於今独有士礼高堂生能言之而鲁徐生善为容【索隐汉书作颂亦音容】孝文帝时徐生以容为礼官大夫传子至孙徐延徐襄襄其天姿善为容不能通礼经延颇能未善也襄以容为汉礼官大夫至广陵内史延及徐氏弟子公户满意【索隐公户姓满意名也案邓展云二人姓氏非也】桓生单次【索隐单音善单姓次名】皆常为汉礼官大夫而瑕丘萧奋【集解徐广曰属山阳】以礼为淮阳太守是後能言礼为容者由徐氏焉自鲁商瞿受易孔子【索隐案商姓瞿名字子木瞿音劬】孔子卒商瞿传易六世至齐人田何字子庄【索隐案汉书云商瞿授鲁桥庇子庸子庸授江东馯臂子弓子弓授燕周丑子家子家授东武孙虞子乘子乘授何六传也仲尼弟子传作瞿传馯臂子弘弘传江东人矫子庸疵疵传燕人周子家坚坚传淳于人光子乘羽羽传齐人田子庄何与汉书不同馯音寒庇音必利反疵音自移反】而汉兴田何传东武人王同子仲子仲传菑川人杨何【索隐案田何传东武王同传菑川杨何】何以易元光元年徵官至中大夫齐人即墨成以易至城阳相广川人孟但以易为太子门大夫鲁人周霸莒人衡胡【集解徐广曰莒一作吕】临菑人主父偃皆以易至二千石然要言易者本於杨何之家董仲舒广川人也以治春秋孝景时为博士下帷讲诵弟子传以久次相受业或莫见其面盖三年董仲舒不观於舍园其精如此进退容止非礼不行学者皆师尊之今上即位为江都相【索隐案仲舒事易王王武帝兄】以春秋灾异之变推陰阳所以错行故求雨闭诸阳纵诸陰其止雨反是行之一国未尝不得所欲中废为中大夫居舍着灾异之记是时辽东高庙灾主父偃疾之取其书奏之天子【集解徐广曰建元六年索隐案汉书以为辽东高庙及长陵园殿灾也仲舒为灾异记草而未奏主父偃窃而奏之】天子召诸生示其书有刺讥董仲舒弟子吕步舒【集解徐广曰舒一作荼亦音舒

】不知其师书以为下愚於是下董仲舒吏当死诏赦之於是董仲舒竟不敢复言灾异董仲舒为人廉直是时方外攘四夷公孙弘治春秋不如董仲舒而弘希世用事位至公卿董仲舒以弘为从谀弘疾之乃言上曰独董仲舒可使相胶西王胶西王素闻董仲舒有行亦善待之董仲舒恐久获罪疾免居家至卒终不治产业以修学着书为事故汉兴至于五世之间唯董仲舒名为明於春秋其传公羊氏也

胡毋生【集解駢案汉书曰字子都】齐人也孝景时为博士以老归教授齐之言春秋者多受胡毋生公孙弘亦颇受焉瑕丘江生为谷梁春秋自公孙弘得用尝集比其义卒用董仲舒仲舒弟子遂者兰陵褚大广川殷忠【集解徐广曰殷一作段又作瑕也】温吕步舒褚大至梁相步舒至长史持节使决淮南狱於诸侯擅专断不报以春秋之义正之天子皆以为是弟子通者至於命大夫为郎谒者掌故者以百数而董仲舒子及孙皆以学至大官

【索隐迷赞曰孔氏之衰经书绪乱言诸六学始自炎汉着令立官四方扼腕曲台坏壁书礼之冠传易言诗云蒸雾散兴化致理鸿猷克赞】

史记卷一百二十一

史记卷一百二十一考证

儒林列传胥靡申公集解徐广曰腐刑○杨慎曰列子云胥靡登高不惧胥隶也靡末也胥靡末隶微贱之人腐刑无据

安得司空城旦书乎集解駢案汉书音义曰道家以儒法为急比之於律令○杨慎曰司空城旦书盖太后怒詈辕固之言意欲入以罪条比于城旦駢谓比儒生于律令非也儒家外自有刑名家何得以律令比之

欲求能治尚书者○尚书疏曰尚字乃伏生所加孔氏有古文尚书○【臣照】按顏师古曰家语孔腾藏尚书孝经论语於夫子旧堂壁中汉纪尹敏传云孔鲋所藏二说不同王应麟曰隋志云武帝时鲁共王坏孔子宅得其末孙惠所藏之书皆古文也史通亦以为孔惠所藏则又非师古所引二人者矣书疏云家语序云子襄以秦法峻急壁中藏其家书则又是安国祖藏之

史记卷一百二十一考证

<史部,正史类,史记>

卷一百二十二

钦定四库全书

史记卷一百二十二

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

酷吏列传第六十二

孔子曰导之以政齐之以刑民免而无耻【集解孔安国曰免苟免也】导之以德齐之以礼有耻且格【集解何晏曰格正也】老氏称上德不德是以有德下德不失德是以无德法令滋章盗贼多有太史公曰信哉是言也法令者治之具而非制治清浊之源也昔天下之网尝密矣【索隐案盐铁论云秦法密於凝脂】然奸伪萌起其极也上下相遁至於不振当是之时吏治若救火扬沸【索隐言本弊不除则其末难止也】非武健严酷恶能胜其任而愉快乎言道德者溺其职矣故曰听讼吾犹人也必也使无讼乎下士闻道大笑之非虚言也汉兴破觚而为圜【集解駰案汉书音义曰觚方索隐应劭云觚八棱有隅者高祖反秦之政破觚为圜谓除其严法约三章耳】斲雕而为朴【索隐应劭云削珣为璞也晋灼云凋弊也斲理凋弊之俗使反质朴也】网漏於吞舟之鱼而吏治烝烝不至於奸黎民艾安由是观之在彼不在此【集解韦昭曰在道德不在严酷】高后时酷吏独有侯封刻轹宗室侵辱功臣吕氏已败遂禽侯封之家孝景时?错以刻深颇用术辅其资而七国之乱发怒於错错卒以被戮其後有郅都甯成之属

郅都者杨人也【集解徐广曰属河东索隐郅音质汉书云河东大阳人正义括地志云故杨城本秦时杨国汉杨县城也今晋州洪洞县也至隋为杨唐初改为洪洞以故洪洞镇为名也秦及汉皆属河东郡郅都墓在洪洞县东南二十里汉书云郅都河东大阳人班固失之甚也大阳今陕州河北县是亦属河东郡也】以郎事孝文帝孝景时都为中郎将敢直谏面折大臣於朝尝从入上林贾姬如厕【索隐案姬生赵王彭祖也】野彘卒入厕上目都都不行上欲自持兵救贾姬都伏上前曰亡一姬复一姬进天下所少宁贾姬等乎陛下纵自轻奈宗庙太后何上还彘亦去太后闻之赐都金百斤由此重郅都济南瞿氏【集解駰案汉书音义曰音小儿痼病也索隐荀悦音闲邹氏刘氏音并同】宗人三百余家豪猾二千石莫能制於是景帝乃拜都为济南太守至则族灭瞿氏首恶余皆股栗【集解徐广曰髀脚战摇也】居岁余郡中不拾遗旁十余郡守畏都如太府都为人勇有气力公廉不发私书问遗无所受请寄

无所听常自称曰已倍亲而仕身固当奉职死节官下终不顾妻子矣郅都迁为中尉丞相条侯至贵倨也而都揖丞相是时民朴畏罪自重而都独先严酷致行法不避贵戚列侯宗室见都侧目而视号曰苍鹰临江王徵诣中尉府对簿临江王欲得刀笔为书谢上而都禁吏不予魏其侯使人以间与临江王临江王既为书谢上因自杀窦太后闻之怒以危法中都【索隐案中如字读谓以法中伤之】都免归家孝景帝乃使使持节拜为鴈门太守而便道之官得以便宜从事匈奴素闻郅都节居边为引兵去竟郅都死不近鴈门匈奴至为偶人象郅都【索隐汉书作寓人象案寓即偶也谓刻木偶类人形也一云寄人形於木也】令骑驰射莫能中见惮如此匈奴患之窦太后乃竟中都以汉法景帝曰都忠臣欲释之窦太后曰临江王独非忠臣邪於是遂斩郅都寧成者【集解徐广曰宁一作甯】穰人也【集解徐广曰属南阳】以郎谒者事景帝好气为人小吏必陵其长吏为人上操下如束湿薪【集解徐广曰一无此字駟案韦昭曰言急也索隐操音七刀反操执也】滑贼任威稍迁至济南都尉【正义百官表云都尉秦官掌佐守典武职甲卒秩比二千石有丞秩皆六百石景帝中二年更名都尉若周之司马】而郅都为守始前数都尉【索隐数音所注反】皆步入府因吏谒守如县令其畏郅都如此及成往直陵都出其上都素闻其声於是善遇与结驩久之郅都死後长安左右宗室多暴犯法於是上召宁成为中尉【正义百官表云中尉秦官掌徼循京师武帝太初元年更名执金吾顔云金吾鸟名也主辟不祥天子出行职主失道以御非常故执此鸟之象因以名官】其治效郅都其廉弗如然宗室豪桀皆人人惴恐武帝即位徙为内史外戚多毁成之短抵罪髡钳是时九卿罪死即死少被刑而成极刑自以为不复收於是解脱诈刻传出关【索隐解音纪买反脱音他活反谓脱钳也】归家称曰仕不至二千石贾不至千万安可比人乎乃贯贷买陂田千余顷【索隐贯音食夜反贯賒也又音势贷音天得反】假贫民役使数千家数年会赦致产数千金为任侠持吏长短出从数十骑其使民威重於郡守

周阳由者其父赵兼以淮南王舅父侯周阳故因姓周阳氏【集解徐广曰侯五年孝文六年国除集解周阳故城在绛州闻喜县东二十九里】由以宗家任为郎【索隐案与国家有外戚姻属比於宗室故曰宗家也】事孝文及景帝景帝时由为郡守武帝即位吏治尚循谨甚然由居二千石中最为暴酷骄恣所爱者挠法活之所憎者曲法诛灭之所居郡必夷其豪为守视都尉如令为都尉必陵太守夺之治与汲黯俱为忤【集解駟案汉书音义曰坚忤也】司马安之文恶【集解駟案汉书音义曰以文法伤害人】俱在二千石列同车未尝敢均茵伏【集解徐广曰汉书作冯伏者轼索隐案均等也茵车蓐也言二人与由同载一车上不敢与之均茵轼也谓下之也冯音凭】由後为河东都尉时与其守胜屠公争权相告言罪【索隐风俗通云胜屠即申屠也】胜屠公当抵罪义不受刑自杀而由弃市自宁成周阳由之後事益多民巧法大抵吏之治类多成由等矣

赵禹者潁人【集解徐广曰属扶风音台正义音胎故潁城在雍武功县西南二十二里古郃国后稷所封汉潁县也】以佐史补中都官【正义若京都府史】用廉为令史事太尉亚夫亚夫为丞相禹为丞相史府中皆称其廉平然亚夫弗任曰极知禹无害然文深【集解駟案汉书音义曰禹持文法深刻】不可以居大府今上时禹以刀笔吏积劳稍迁为御史上以为能至太中大夫与张汤论定诸律令【集解徐广曰论一作编】作见知吏传得相监司用法益刻盖自此始张汤者杜人也【集解徐广曰尔时未为陵】其父为长安丞出汤为儿守舍

还而鼠盗肉其父怒笞汤汤掘窟得盗鼠及余肉刻鼠掠治传爰书讯鞠论报【集解苏林曰谓传囚也爰易也以此书易其辞处鞠穷也张晏曰传考证验也爰书自证不如此言反受其罪讯考三日复问之知与前辞同不也鞠一吏为读状论其报行也索隐韦昭云爰换也古者重刑嫌有爱恶故移换狱书使他官考实之故曰传爰书也】并取鼠与肉具狱磔堂下【集解邓展曰罪备具】其父见之视其文辞如老狱吏大惊遂使书狱【集解如淳曰决狱之书谓律令也】父死後汤为长安吏久之周阳侯始为诸卿时【集解徐广曰田胜也武帝母王太后之同母弟也武帝始立而封为周阳侯】尝系长安汤倾身为之【集解韦昭曰为之先後】及出为侯大与汤交偏见汤贵人汤给事内史为宁成掾以汤为无害言大府调为茂陵尉治方中【集解駰案汉书音义曰方中陵上土作方也汤主治之苏林曰天子即位豫作陵讳之故言方中如淳曰大府幕府也茂陵尉主作陵之尉也韦昭曰大府公府】武安侯为丞相徵汤为史时荐言之天子补御史使案事治陈皇后蛊狱深竟党与於是上以为能稍迁至太中大夫与赵禹共定诸律令务在深文拘守职之吏【集解苏林曰拘刻於守职之吏】已而赵禹迁为中尉徙为少府而张汤为廷尉两人交驩而兄事禹禹为人廉倨为吏以来舍母食客公卿相造请禹禹终不报谢务在絶知友宾客之请孤立行一意而已见文法辄取亦不覆案求官属陰罪汤为人多诈舞智以御人【集解韦昭曰制御人】始为小吏乾没【集解徐广曰随势沈浮也駰案服虔曰射成败也索隐如淳曰得利为乾失利为没正义此二说非也按乾没谓无润及之而取他人也又云阳浮慕为乾心内不合为没也】与长安富贾田甲鱼翁叔之属交私【集解徐广曰姓鱼也】及列九卿收接天下名士大夫已心内虽不合然阳浮慕之是时上方乡文学汤决大狱欲傅古义【索隐傅音附】乃请博士弟子治尚书春秋补廷尉史亭疑法【集解李奇曰亭平也索隐使之平疑事也】奏讞疑事必豫先为上分别其原上所是受而着讞决法廷尉絜令扬主之明【集解韦昭曰在板絜正义按谓律令也古以板书之言上所是着之为正狱以廷尉法令决平之扬主之明监也】奏事即譴汤应谢【集解徐广曰应一作权】乡上意所便必引正监掾史贤者曰固为臣议如上责臣臣弗用愚抵於此【集解苏林曰主坐不用诸掾语故至於此正义百官表云廷尉秦官有正左右监皆秩千石也按上即责汤应对谢之如上意必引正监等贤者本为臣建议如上意臣不用愚昧不从至此也】罪当释闻【集解徐广曰诏答闻也如今制曰闻矣駰案瓚曰谓常见原】即奏事上是之曰臣非知为此奏乃正监掾史某为之其欲荐吏扬人之善蔽人之过如此所治即上意所欲罪予监史深祸者即上意所欲释与监史轻平者所治即豪必舞文巧诋即下户羸弱时口言虽文致法上财察【集解李奇曰先见上口言之欲与轻平也】於是往往释汤所言【集解李奇曰汤口所先言皆见原释】汤至於大吏内行修也通宾客饮食於故人子弟为吏及贫昆弟调护之尤厚其造请诸公不避寒暑是以汤虽文深意忌不专平然得此声誉而刻深吏多为爪牙用者依於文学之士丞相弘数称其美及治淮南衡山江都反狱皆穷根本严助及伍被上欲释之汤争曰伍被本画反谋而助亲幸出入禁闥爪牙臣乃交私诸侯如此弗诛後不可治於是上可论之其治狱所排大臣自为功多此类於是汤益尊任迁为御史大夫【集解徐广曰元狩二年】会浑邪等降汉大兴兵伐匈奴山东水旱贫民流徙皆仰给县官县官空虚於是承上指请造白金及五铢钱笼天下盐铁排富商大贾出告缗令【正义缗音岷钱贯也武帝伐四夷国用不足故税民田宅船乘畜产奴婢等皆平作钱数每千钱一算出一等贾人倍之若隐不税有告之半与告人余半入官谓缗出此令用鋤筑豪强兼并富商大贾之家也一算百二十文也】鉏豪强并兼之家舞文巧诋以辅法汤每朝奏事语国

家用日晏天子忘食丞相取充位【集解徐广曰时李蔡庄青翟为丞相】天下事皆决於汤百姓不安其生骚动县官所兴未获其利奸吏并侵渔於是痛绳以罪则自公卿以下至於庶人咸指汤汤尝病天子至自视病其隆贵如此匈奴来请和亲羣臣议上前博士狄山曰和亲便上问其便山曰兵者凶器未易数动高帝欲伐匈奴大困平城乃遂结和亲孝惠高后时天下安乐及孝文帝欲事匈奴北边萧然苦兵矣孝景时吴楚七国反景帝往来两宫间寒心者数月吴楚已破竟景帝不言兵天下富实今自陛下举兵击匈奴中国已空虚边民大困贫由此观之不如和亲上问汤汤曰此愚儒无知狄山曰臣固愚忠若御史大夫汤乃诈忠若汤之治淮南江都以深文痛诋诸侯别疏骨肉使蕃臣不自安臣固知汤之为诈忠於是上作色曰吾使生居一郡能无使虏入盗乎曰不能曰居一县对曰不能复曰居一障间【正义障谓塞上要险之处别筑城置吏士守之以扞寇盗也】山自度辩穷且下吏曰能於是上遣山乘障至月余匈奴斩山头而去自是以後羣臣震懾汤之客田甲虽贾人有贤操始汤为小吏时与钱通【集解徐广曰以利交】及汤为大吏甲所以责汤行义过失亦有烈士风汤为御史大夫七岁败河东人李文尝与汤有郤已而为御史中丞恚数从中文书事有可以伤汤者不能为地汤有所爱史鲁谒居知汤不平使人上蜚变告文奸事事下汤汤治论杀文而汤心知谒居为之上问曰言变事踪迹安起汤详惊曰此殆文故人怨之谒居病卧闾里主人汤自往视疾为谒居摩足赵国以冶铸为业王数讼铁官事汤常排赵王赵王求汤陰事谒居尝案赵王赵王怨之并上书告汤大臣也史谒居有病汤至为摩足疑与为大奸事下廷尉谒居病死事连其弟弟繫导官【集解如淳曰太官之别也主酒】汤亦治他囚导官见谒居弟欲陰为之而详不省谒居弟弗知怨汤使人上书告汤与谒居谋共变告李文事下减宣宣尝与汤有郤及得此事穷竟其事未奏也会人有盗发孝文园瘞钱【集解如淳曰瘞埋钱於园陵以送死】丞相青翟朝与汤约俱谢至前汤念独丞相以四时行园当谢汤无与也不谢丞相谢上使御史案其事汤欲致其文丞相见知【集解张晏曰见知故纵以其罪罪之】丞相患之三长史皆害汤欲?之始长史朱买臣会稽人也【正义朱买臣吴人也此时苏州为会稽郡】读春秋庄助使人言买臣买臣以楚辞与助俱幸侍中为太中大夫用事而汤乃为小吏跪伏使买臣等前已而汤为廷尉治淮南狱排挤庄助买臣固心望及汤为御史大夫买臣以会稽守为主爵都尉列於九卿数年坐法废守长史见汤汤坐牀上丞史遇买臣弗为礼买臣楚士【正义周末越王勾践灭吴楚威王灭越吴之地总属楚故谓朱买臣为楚士】深怨常欲死之王朝齐人也以术至右内史边通学长短【集解駰案汉书音义曰长短术兴於六国时行长入短其语隐谬用相激怒】刚暴强人也官再至济南相故皆居汤右已而失官守长史拙体於汤汤数行丞相事知此三长史素贵常凌折之以故三长史合谋曰始汤约与君谢已而卖君今欲劾君以宗庙事此欲代君耳吾知汤陰事使吏捕案汤左田信等【集解駰案汉书音义曰左证左也正义言汤与田信为左道之交故言左田信等】曰汤且欲奏请信辄先知之居物致富与汤分之及他奸事事辞颇闻上问汤曰吾所为贾人辄先知之益居其物是类有以吾谋告之者汤不谢汤又详惊曰固宜有减宣亦奏谒居等事天子固以汤怀诈面欺使使八辈簿责汤【集解苏林曰簿音主簿之簿悉责也】汤具自道无此不服於是上使赵禹责汤禹至让汤曰君何不知分也君所治夷灭者几何人矣今人言君皆有状天子重致君狱欲令君自为计何多以对簿为汤乃为书谢曰汤无尺寸功起刀笔吏陛下幸致为三公无以塞责然谋?汤罪者三长史也遂自杀汤死家产直不过五百金皆所得奉赐无他业昆弟诸子欲厚葬汤汤母曰汤为天子大臣被污恶言而死何厚葬乎载以牛车有棺无槨天子闻之曰非此

母不能生此子乃尽案诛三长史丞相青翟自杀出田信上惜汤稍迁其子安世赵禹中废已而为廷尉始条侯以为禹贼深弗任及禹为少府比九卿禹酷急至晚节事益多吏务为严峻而禹治加缓而名为平王温舒等後起治酷於禹禹以老徙为燕相数岁乱悖有罪免归後汤十余年以壽卒於家

义纵者河东人也为少年时尝与张次公俱攻剽为羣盜【集解徐广曰剽音扶召反索隐说文云剽刺也一云剽劫人音敷妙反】纵有姊姁【索隐李奇音吁孟康音诩】以医幸王太后王太后问有子兄弟为官者乎姊曰有弟无行不可太后乃告上拜义姁弟纵为中郎【集解駰案汉书音义曰姁音煦纵姊名也】补上党郡中令【索隐案谓补上党郡中之令史失其县名】治敢行少蘊藉【集解駰案汉书音义曰敢行暴政而少蘊藉也索隐蘊音愠藉音才夜反张晏云为人无所避故少所假借也】县无逋事举为第一迁为长陵及长安令直法行治不避贵戚以捕案太后外孙修成君子仲【索隐案王太后之女号修成君其子名仲】上以为能迁为河内都尉至则族灭其豪穰氏之属河内道不拾遗而张次公亦为郎以勇悍从军敢深入有功为岸头侯【集解徐广曰受封五年与淮南王女陵奸及受财物国除】宁成家居上欲以为郡守御史大夫弘曰臣居山东为小吏时宁成为济南都尉其治如狼牧羊成不可使治民上乃拜成为关都尉岁余关东吏隶郡国出入关者【集解駰案汉书音义曰隶闾也】号曰宁见乳虎无值宁成之怒义纵自河内迁为南阳太守闻宁成家居南阳及纵至关宁成侧行送迎然纵气盛弗为礼至郡遂案宁氏尽破碎其家成坐有罪及孔暴之属皆犇亡【集解徐广曰孔暴二姓大族】南阳吏民重足一迹而平氏朱强杜衍杜周为纵爪牙之吏任用迁为廷史军数出定襄定襄吏民乱败於是徙纵为定襄太守纵至掩定襄狱中重罪轻繫二百余人及宾客昆弟私入相视亦二百余人纵一捕鞫曰为死罪解脱【集解駰案汉书音义曰一切皆捕之也律诸囚徒私解脱桎梏钳赭加罪一等为人解脱与同罪纵鞫相贍饷者二百人为解脱死罪尽杀也】是日皆报杀四百余人其後郡中不寒而栗猾民佐吏为治【索隐案谓豪猾之人干预吏政故云佐吏为理也】是时赵禹张汤以深刻为九卿矣然其治尚寬辅法而行而纵以鷹击毛摯为治【集解徐广曰鷩鸟将击必张羽毛也】後会五铢钱白金起民为奸京师尤甚乃以纵为右内史王温舒为中尉温舒至恶其所为不先言纵纵必以气凌之败坏其功其治所诛杀甚多然取为小治奸益不胜直指始出矣吏之治以斩杀缚束为务閤奉以恶用矣纵廉其治放郅都上幸鼎湖病久已而卒起幸甘泉【索隐卒音七忽反】道多不治上怒曰纵以我为不复行此道乎嗾之【集解徐广曰嗾音衔】至冬杨可方受告缗【集解韦昭曰人有告言不出缗者可方受之索隐缗钱贯也汉氏有告缗令杨可主之谓缗钱出等人有不以钱通者令得告之也】纵以为此乱民部吏捕其为可使者【索隐谓求杨可之使】天子闻使杜式治以为废格沮事【集解駰案汉书音义曰武帝使杨可主告缗没入其财物纵捕为可使者此为废格诏书沮已成之事索隐格音閤】弃纵市後一岁张汤亦死

王温舒者阳陵人也【集解徐广曰属冯翊】少时椎埋为奸【集解徐广曰椎杀人而埋之或谓发冢】已而试补县亭长数废为吏以治狱至廷史事张汤迁为御史督盜賊杀伤甚多稍迁至广平都尉择郡中豪敢任吏十余人以为爪牙皆把其陰重罪而纵使督盜賊快其意所欲得此人虽有百罪弗法即有避因其事夷之亦灭宗以其故齐赵之郊盜賊不敢近广平

广平声为道不拾遗上闻迁为河内太守素居广平时皆知河内豪奸之家及往九月而至令郡具私马五十疋为驿自河内至长安部吏如居广平时方略补郡中豪猾郡中豪猾相连坐千余家上书请大者至族小者乃死家尽没入偿贓奏行不过二三日得可事论报至流血十余里河内皆怪其奏以为神速尽十二月郡中毋声毋敢夜行野无犬吠之盜其頗不得失之旁郡国梨求【索隐梨音犁梨比也】会春温舒顿足叹曰嗟乎令冬月益展一月足吾事矣其好杀伐行威不爱人如此天子闻之以为能迁为中尉其治复放河内徙诸名祸猾吏【集解徐广曰有残刻之名索隐按汉书作徒请召猜祸吏服?曰徒但也猜恶也应劭曰猜疑也取吏好猜疑人作祸败者而使之】与从事河内则杨皆麻戊【集解徐广曰一云麻成】关中杨赣成信等义纵为内史惮未敢恣治及纵死张汤败後徙为廷尉而尹齐为中尉

尹齐者东郡茌平人【索隐茌音士疑反】以刀笔稍迁至御史事张汤张汤数称以为廉武使督盜賊所斬伐不

迁为关内都尉声甚於寧成上以为能迁为中尉吏民益凋敝尹齐木强少文豪恶吏伏匿而善吏不能为治以故事多废抵罪上复徙温舒为中尉而杨仆以严酷为王爵都尉

杨仆者宜阳人也以千夫为吏【集解駰案汉书音义曰千夫若五大夫武帝军用不足令民出钱谷为之】河南守案举以为能迁为御史使督盜賊关东治放尹齐以为敢摯行稍迁至主爵都尉列九卿天子以为能南越反拜为楼船将军有功封将梁侯为荀彘所缚【集解徐广曰受封四年征朝鲜还赎为庶人索隐案汉书云与左将军荀彘俱系朝鲜为彘所缚还免为庶人病死】居久之病死而温舒复为中尉为人少文居廷惛惛不辩【索隐惛音昏】至於中尉则心开督盜賊素习关中俗知豪恶吏豪恶吏尽复为用为方畧吏苛察盜賊恶少年投鰐【集解徐广曰音项器名也如今之投书函中索隐鰐受投书之器入不可出三苍音胡江反】购告言奸置伯格长【集解徐广曰一作落古村落字亦作格街陌屯落皆设督长也索隐伯音阡陌格音村落言阡陌村落皆置长也】以牧司奸盜賊温舒为人調善事有势者即无势者视之如奴有势家虽有奸如山弗犯无势者贵戚必侵辱舞文攻诋下户之猾以焄大豪【集解駰案焄音熏索隐案熏犹熏炙之谓下户之中有奸猾之人令案之以熏逐大奸也】其治中尉如此奸猾穷治大抵尽靡烂狱中行论无出者其爪牙吏虎而冠於是中尉部中中猾以下皆伏有势者为游声誉称治治数岁其吏多以权富温舒击东越还【集解徐广曰元鼎六年出会稽破东越】议有不中意者坐小法抵罪免是时天子方欲作通天台【正义汉书元封三年三辅旧事云起甘泉通天台高五十丈】而未有人温舒请覆中尉脱卒得数万人作上说拜为少府徙为右内史治如其故奸邪少禁坐法失官复为右辅行中尉事如故操岁余会宛军发【集解駰案汉书音义曰发兵伐大宛】诏徵豪吏温舒匿其吏华成及人有变告温舒受员骑钱他奸利事罪至族自杀其时两弟及两婚家亦各自坐他罪而族光禄徐自为曰悲夫夫古有三族而王温舒罪至同时而五族乎温舒死家直累千金後数岁尹齐亦以淮阳都尉病死家直不满五十金所诛灭淮阳甚多及死仇家欲烧其尸尸亡去归葬【集解徐广曰尹齐死未及斂恐怨家欲烧之屍亦飞去】自温舒等以恶为治而郡守都尉诸侯二千石欲为治者其治大抵尽放温舒而吏民益轻犯法盜賊滋起南阳有梅免白政楚有殷中【集解徐广曰殷一作假人亦有姓假者也】杜少齐有徐勃燕赵之间有坚卢范生

之属大羣至数千人擅自号攻城邑取库兵释死罪缚辱郡太守都尉杀二千石为檄告县趣具食小羣盗以百数掠卤乡里者不可胜数也於是天子始使御史中丞丞相长史督之犹弗能禁也乃使光禄大夫范昆诸辅都尉及故九卿张德等衣绣衣持节虎符发兵以兴击斩首大部或至万余级及以法诛通饮食坐连诸郡甚者数千人数岁乃颇得其渠率散卒亡复聚党阻山川者往往而羣居无可奈何於是作沈命法【集解駰案汉书音义曰沈藏匿也命亡逃也索隐服云沈匿不发觉之法韦昭曰沈没也】曰羣盗起不发觉发觉而捕弗满品者二千石以下至小吏主者皆死其後小吏畏诛虽有盗不敢发恐不能得坐课累府府亦使其不言故盗贼浸多上下相为匿以文辞避法焉【集解徐广曰诈为虚文言无盗贼也】

臧宣者杨人也以佐史无害给事河东守府卫将军青使买马河东见宣无害言上徵为大厯丞【正义百官表云太仆属官有大厯各五丞一尉也】官事办稍迁至御史及中丞使治主父偃及治淮南反狱所以微文深诋杀者甚衆称为敢决疑数废数起为御史及中丞者几二十岁王温舒免中尉而宣为左内史其治米盐事大小皆关其手自部署县名曹实物官吏令丞不得擅摇痛以重法绳之居官数年一切郡中为小治办然独宣以小致大能因力行之难以为经中废为右扶风坐怨成信【集解駰案汉书曰成信宣吏】信亡藏上林中宣使郡令【正义今岐山岐县北时属右扶风】格杀信吏卒格信时射中上林苑门宣下吏抵罪以为大逆当族自杀而杜周任用

杜周者【正义杜氏谱云字长】南阳杜衍人【索隐地名也】义纵为南阳守以为爪牙举为廷尉史事张汤汤数言其无害至御史使案边失亡【集解文穎曰边卒多亡也或曰郡县主守有所亡失也】所论杀甚衆奏事中上意任用与臧宣相编更为中丞十余岁其治与宣相放然重迟外寛内深次骨【集解李奇曰其用罪深刻至骨索隐次至也】宣为左内史周为廷尉其治大放张汤而善候伺上所欲挤者因而隐之上所欲释者久系待问而微见其冤状客有让周曰君为天子决平不循三尺法【集解駰案汉书音义曰以三尺竹简书法律也】专以人主意指为狱狱者固如是乎周曰三尺安出哉前主所是着为律後主所是疏为令当时为是何古之法乎至周为廷尉诏狱亦益多矣二千石系者新故相因不减百余人郡吏大府举之廷尉【集解如淳曰郡吏郡太守也孟康曰举之廷尉以章劾付廷尉治之】一岁至千余章章大者连逮证案数百小者数十人远者数千近者数百里会狱吏因责如章告劾不服以笞掠定之於是闻有逮皆亡匿狱久者至更数赦【集解张晏曰诏书赦或有不从此令】十有余岁而相告言大抵尽诋以不道【索隐案大抵犹大都也尽诋者尽至也】以上廷尉及中都官诏狱逮至六七万人吏所增加十万余人周中废後为执金吾逐盗捕治桑弘羊卫皇后昆弟子刻深天子以为尽力无私迁为御史大夫【集解徐广曰天汉三年为御史大夫四岁太始三年卒】家两子夹河为守其治暴酷皆甚於王温舒等矣杜周初徵为廷史有一马且不全及身久任事至三公列子孙尊官家訾累数巨万矣

太史公曰自郅都杜周十人者此皆以酷烈为声然郅都伉直引是非争天下大体张汤以知陰阳人主与俱上下时数辩当否国家赖其便赵禹时据法守正杜周从谀以少言为重自张汤死後网密多诋严官事浸以耗废九卿碌碌奉其官救过不贍何暇论绳墨之外乎然此十人中其廉者足以为仪表其污者足以为戒【集解徐广曰一本无此四字】方畧教导禁奸

止邪一切亦皆彬彬质有其文武焉虽惨酷斯称其位矣至若蜀守冯当暴挫广汉李贞擅磔人东郡弥仆锯项天水骆璧推减【集解徐广曰一作成索隐推音直追反减作成是也谓推系之以成狱也】河东褚广妄杀京兆无忌冯翊殷周蝮螫【索隐蝮音蝮蛇属螫音至螫属以言奇酷比之蝮毒焉】水衡阎奉扑击卖请何足数哉何足数哉

【索隐述赞曰太上失德法令滋起破觚为圆禁暴下止奸伪斯炽惨酷爰始乳兽扬威苍鹰侧视舞文巧诋怀生可恃】

史记卷一百二十二

史记卷一百二十二考证

酷吏列传遂使书狱集解如淳曰决狱之书谓律令也○刘奉世曰谓案牒耳非律令也

弟系导官集解如淳曰大官之别也主酒○汉书师古注导择也以主择米故曰导官

使吏捕案汤左田信等○【臣照】按前云汤客田甲贾人始汤与钱通此下云汤欲奏请信辄知之居物致富与汤分之前又云甲有贤操责汤行义过失有烈士风後文云天子案诛三长史出田信岂田信即田甲乎

猾民佐吏为治索隐案谓豪猾之人干豫吏政故云佐吏为理也○【臣照】按猾民畏纵之严反为吏耳目助治公务以自效师古解最得如索隐所云则是今之把持官吏也

失之旁郡国梨求○凌稚隆曰梨求汉书作追求尸亡去归葬集解徐广曰尹齐死未及斂恐怨家欲烧之屍亦飞去○杨慎曰尸亡去者谓齐死而遗命其家潜逃归葬耳徐广之说事涉神怪且不達文义

王温舒免中尉而宣为左内史○归有光曰汉书作王温舒为中尉而宣为左内史按温舒未尝免作为字是张温舒自中尉徙廷尉意即此时

虽惨酷斯称其位矣○【臣照】按迁身被腐刑受酷吏之害又诸酷吏皆武帝意所向故深其文使读者自明非正辞也

史记卷一百二十二考证

卷一百二十三

钦定四库全书

史记卷一百二十三

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

大宛列传第六十三

【索隐案此传合在西南夷下不宜在酷吏游侠之间斯盖并司马公之残阙褚先生补之失也幸不深尤焉】

大宛之迹【正义汉书云大宛国去长安万二千五百五十里东至都护治西南至大月氏南亦至大月氏北至康居括地志云率都沙郎国亦名苏对沙郎国本汉大宛国索隐宛音苑又于袁反】见自张骞张骞汉中人【索隐陈寿益部耆旧传云骞汉中南越人】建元中爲郎是时天子问匈奴降者皆言匈奴破月氏王【正义氏音支按在凉甘肃瓜沙等州本月氏国之地汉书云本居敦煌祁连间是也】以其头爲饮器【集解韦昭曰饮器罍榼也单于以月氏王头爲饮器晋灼曰饮器虎子之属也或曰饮酒器也正义汉书匈奴传云元帝遣车骑都尉韩昌光禄大夫张猛与匈奴盟以老上单于所破月氏王头爲饮器者共饮血盟】月氏遁逃而常怨仇匈奴无与共击之汉方欲事灭胡闻此言因欲通使道必更匈奴中【索隐更经也音羹】乃募能使者骞以郎应募使月氏与堂邑氏故胡奴甘父【集解駰案汉书音义曰堂邑氏姓胡奴甘父字索隐案谓堂邑县人家胡奴名甘父也下云堂邑父者盖後史家徒省唯称堂邑父而畧甘字或甘其姓号也】俱出陇西经匈奴【索隐谓道经匈奴】匈奴得之传诣单于单于留之曰月氏在吾北汉何以得往使吾欲使越汉肯听我乎留骞十余岁与妻有子然骞持汉节不失居匈奴中益宽骞因与其属亡乡月氏西走数十日至大宛大宛闻汉之饶财欲通不得见骞喜问曰若欲何之骞曰爲汉使月氏而爲匈奴所闭道今亡唯王使人导送我诚得至反汉汉之赂遗王财物不可胜言大宛以爲然遣骞【索隐谓大宛发遣骞西也】爲发导驿抵康居【索隐发导谓发驿令人导引而至康居也导音道抵至也居音渠正义抵至也居其尼反括地志云康居国在京西一万六百里其西北可二千里有奄蔡国也】康居传致大月氏【正义此大月氏在大宛西南于媯水北爲王庭汉书云去长安万一千六百里】大月氏王已爲胡所杀立其太子爲王【集解徐广曰一云夫人爲王夷狄亦或女主索隐案汉书张骞传云立其夫人爲王也】既臣大夏而居【索隐居作君谓月氏以大夏爲

臣而爲之作君也正义既尽也大夏国在焉水南】地肥饶少寇志安乐又自以远汉殊无报胡之心骞从月氏至大夏竟不能得月氏要领【集解駟案汉书音义曰要领要契索隐小顔以爲要衣要领衣领凡持衣者必执要与领言骞不能得月氏意趣无以持归于汉刘氏云不得其要害然颇是其意于文字爲疏者也】留岁余还并南山【正义并白浪反南山即连终南山从京南东至华山过河东北连延至海即中条山也从京南连接至葱岭万余里故云并南山也西域传云其南山东出金城与汉南山属焉】欲从羌中归【正义说文云羌西方牧羊人也南方蛮闽从虫北方狄从犬东貉从豸西方羌从羊】复爲匈奴所得留岁余单于死【集解徐广曰元朔三年】左谷蠡王攻其太子自立国内乱骞与胡妻及堂邑父俱亡归汉汉拜骞爲太中大夫堂邑父爲奉使君【索隐堂邑父之官号也】骞爲人强力寛大信人蛮夷爱之堂邑父故胡人善射穷急射禽兽给食初骞行时百余人去十三岁唯二人得还骞身所至者大宛大月氏大夏康居而传闻其旁大国五六具爲天子言之曰大宛在匈奴西南在汉正西去汉可万里其俗土着耕田田稻麦有蒲陶酒多善马【索隐案外国传云外国称天下有三衆中国人衆大秦宝衆月氏马衆】马汗血其先天马子也【集解駟案汉书音义曰大宛国有高山其上有马不可得因取五色母马置其下与交生驹汗血因号曰天马子】有城郭屋室其属邑大小七十余城衆可数十万其兵弓矛骑射其北则康居西则大月氏西南则大夏东北则乌孙东则扞罽于寘【集解徐广曰汉纪曰拘弥国去于寘三百里索隐扞罽国名也音汗弥寘音田又音殿汉纪谓荀悦所说汉纪拘音俱弥即罽也则拘弥与扞罽同是一名也】于寘之西则水皆西流注西海其东水东流注盐泽【索隐盐水也太康地记云河北得水爲河塞外得水爲海也正义汉书云盐泽去玉门关三百余里广袤三四百里其水皆潜行地下南出于积石山爲中国河括地志云蒲昌海一名泐泽一名盐泽一名辅日海亦名穿兰亦名临海在沙州西南玉门关在沙州壽昌县西六里】盐泽潜行地下其南则河源出焉【索隐案汉书西南夷传云河有两源一出葱岭山一出于寘山海经云河出崑仑东北隅郭璞云河出崑仑潜行地下至葱岭山于寘国复分流岐出合而东注泐泽已而复行积石爲中国河泐泽即盐泽也一名蒲昌海西域传云于寘在南山下与郭璞注山海经不同广志云蒲昌海在蒲类海东也】多玉石河注中国而楼兰姑师【正义二国名姑师即车师也】邑有城郭临盐泽盐泽去长安可五千里匈奴右方居盐泽以东至陇西长城南接羌鬲汉道焉

乌孙在大宛东北可二千里行国【集解徐广曰不土着】随畜与匈奴同俗控弦者数万敢战故服匈奴及盛取其羈属不肯往朝会焉

康居在大宛西北可二千里行国与月氏大同俗控弦者八九万人与大宛邻国国小南羈事月氏东羈事匈奴

奄蔡【正义汉书解诂云奄蔡即阖苏也魏畧云西与大秦通东南与康居接其国多貂畜牧水草故时羈属康居也】在康居西北可二千里行国与康居大同俗控弦者十余万临大泽无崖盖乃北海云

大月氏【正义万震南州志云在天竺北可七千里地高燥而远国王称天子国中骑乘常数十万匹城郭宫殿与大秦国同人民赤白色便习弓马土地所出及奇玮珍物被服鲜好天竺

不及也康泰外国传外国称天下有三衆中国爲人衆大秦爲宝衆月氏爲马衆】在大宛西可二千里居媯水北其南则大夏西则安息北则康居行国也随畜移徙与匈奴同俗控弦者可一二十万故时强轻匈奴及冒顿立攻破月氏至匈奴老上单于杀月氏王以其头爲饮器始月氏居敦煌祈连间【正义初月氏居敦煌以东祈连山以西敦煌郡今沙州祁连山在甘州西南】及爲匈奴所败乃远去过宛西击大夏而臣之遂都媯水北爲王庭其余小衆不能去者保南山羌号小月氏

安息【正义地理志云安息国京西万一千二百里自西关西行三千四百里至阿蛮国西行三千六百里至斯宾国南行度河又西南行至干罗国九百六十里安息西界极矣南乘海乃通大秦国汉书云北康居东乌弋山离西条枝国临媯水土着以银爲钱如其王面王死辄更钱効王面焉】在大月氏西可数千里其俗土着耕田田稻麦蒲陶酒城邑如大宛其属小大数百城地方数千里最爲大国临媯水有市民商贾用车及船行旁国或数千里以银爲钱钱如其王面【索隐汉书云文独爲王面幕爲夫人面荀悦云幕音漫无文面也张晏云钱之文面作人乘马钱之幕作人面形韦昭云幕钱背也包恺音幔】王死辄更钱効王面焉画革旁行以爲书记【集解駢案汉书音义曰横行爲书记索隐画音获小顔云革皮之不柔者韦昭云外夷书皆旁行今南方林邑之徒书皆旁行不直下也】其西则条枝北有奄蔡黎轩【正月上力奚反下巨言反又巨连反後汉书云大秦一名黎鞬在西海之西东西南北各数千里有城四百余所土多金银奇宝有夜光璧明月珠骇鸡犀火浣布珊瑚琥珀琉璃琅玕朱丹青碧珍怪之物率出大秦康氏外国传云其国城郭皆青水精爲及五色水晶爲壁人民多巧能化银爲金国土市买皆金银钱万震南州志云大家屋舍以珊瑚爲柱琉璃爲墙壁水精爲础烏海中斯调州上有木冬月往剥取其皮绩以爲布极细手巾齐数匹与麻蕉布无异色小青黑若垢污欲浣之则入火中便更精洁世谓之火浣布秦云定重参间门树皮也括地志云火山国在扶风南东大湖海中其国中山皆火然火中有白鼠皮及树皮绩爲火浣布魏畧云大秦在安息条支大海之西故俗谓之海西从安息界乘船直载海西遇风利时三月到风迟或一二岁其公私宫室爲重屋邮驿亭置如中国从安息绕海北陆到其国人民相属十里一亭三十里一置无盗贼其俗人长大平正似中国人而胡服宋膺异物志云秦之北附庸小邑有羊羔自然生於土中候其欲萌筑墙绕之恐爲兽所食其脐与地连割絶则死击物惊之乃惊鸣脐遂絶则逐水草爲羣又大秦金二枚皆大如瓜掷之滋息无极观之如用则眞金也括地志云小人国在大秦南人才三尺其耕稼之时惧鹤所食大秦卫助之卽焦侥国其人穴居也】

条枝【索隐汉书作犁鞬续汉书一名大秦三国并临西海後汉书云西海环其西惟西北通陆道然汉使自乌弋以还莫有至条枝者】在安息西数千里临西海暑湿耕田田稻有大鸟卵如瓮【正义汉书云条枝出狮子犀牛孔雀大雀其卵如瓮和帝永元十三年安息王满屈献狮子大鸟世谓之安息雀广志云鸟鷄鹰身蹄骆色苍举头八九尺张翅丈余食大麦卵大如瓮】人衆甚多往往有小君长而安息役属之以爲外国国善眩【集解应劭曰眩相诈惑正义顔云今吞刀吐火殖瓜种树屠人截马之术皆是】安息长老传闻条枝有弱水西王母而未尝见【索隐魏畧云弱水在大秦西玄中记云天下之弱者有崑仑之弱水鸿毛不能载也山海经云玉山西王母所居穆天子传云天子觴西王母瑶池之上括地象云崑仑弱水非

乘龙不至有三足神鸟爲王母取食也正义此弱水西王母既是安息长安耆老传闻而未曾见後汉书云桓帝时大秦国王安敦遣使自日南徼外来献或云其国西有弱水流沙近西王母处几於日所入也然先儒多引大荒西经云弱水云有二源俱出女国北阿耨达山南流会於女国东去国一里深丈余阔六十步非毛舟不可济南流入海阿耨达山即崑仑山也与大荒西经合矣然大秦国在西海中岛上从安息西界过海好风用三月乃到弱水又在其国之西崑仑山弱水源在女国北出崑仑山南女国在于寘国南二千七百里于寘去京九千六百七十里计大秦与大崑仑山相去几四五万里非所论及而前贤误矣此皆据汉括地论之犹恐未审然弱水二所说皆有也】大夏在大宛西南二千余里嬌水南其俗土着有城屋与大宛同俗无大王长往往城邑置小长其兵弱畏战善贾市及大月氏西徙攻败之皆臣畜大夏大夏民多可百余万其都曰蓝市城有市贩贾诸物其东南有身毒国【集解徐广曰身或作𪔐又作訖索隐身音乾毒音笃孟康云即天竺也所谓浮图胡也正义一名身毒在月氏东南数千里俗与月氏同而卑湿暑热其国临大水乘象以战其民弱月氏修浮图道不杀伐遂以成俗土有象犀瑇瑁金银铁锡鉛西与大秦通有大秦珍物明帝梦金人长大顶有光明以问羣臣或曰西方有神名曰佛其形长丈六尺而黄金色帝於是遣使天竺问佛道法遂至中国画形像焉万震南州志云地方三万里佛道所出其国王居城郭殿皆雕文刻镂街曲市里各有行列左右诸大国凡十六皆共奉之以天地之中也浮图经云临毘国王生隐屠太子父曰屠头邪母曰莫邪屠身色黄髮如青丝乳有青色爪赤如铜始莫邪梦白象而孕及生从母右脇出生有髮墮地能行七步又云太子生时有二龙王夹左右吐水一龙水暖一龙水冷遂成二池今犹一冷一暖初行七步处琉璃上有太子脚迹见在生处名祇洹精舍在舍卫国南四里是长者须达所起又有阿输迦树是夫人所攀生太子树也括地志云沙祇大国即舍卫国也在月氏南万里即波斯匿王浚处此国共九十种知身後事城有祇树给孤园又云天竺国有东西南北中央天竺国国方三万里去月氏七千里大国隶属凡二十一天竺在崑仑山南大国也治城临恒水又云阿耨达山亦名建末达山亦名崑仑山水出一名拔扈利水一名恒伽阿即经称河者也自崑仑山以南多是平地而下湿土肥良多种稻岁四熟留役駝马米粒亦极大又云佛上忉利天爲母说法九十日波斯匿王思欲见佛即刻牛头旃檀象置精舍内佛坐此像是衆像之始後人所法也佛上天青梯今变爲石没入地唯余十二蹬蹬间二尺余彼耆老言梯入地尽佛法灭又云王舍国胡语曰罪悦祇国其国灵鹫山胡语曰耆闍崛山山是青石石头似鹫鸟名耆闍鹫也崛山石也山周四十里外周围水佛於此坐禅及诸阿难等俱在此坐又云小孤石石上有石室者佛坐其中天帝释以四十二事问佛佛一一以指画石其迹尚存又於山上起塔佛昔将阿难在北上山四望见福田疆畔因制七条衣割截之法於此今袈裟衣是也】騫曰臣在大夏时见邛竹杖蜀布【正义邛都邛山出此竹因名邛竹节高实中或寄生可爲杖布土芦布】问曰安得此大夏国人曰吾国人往市之身毒身毒在大夏东南可数千里其俗土着大与大夏同而卑湿暑热云其人民乘象以战其国临大水焉【正义大水河也】以騫度之大夏去汉万二千里居汉西南今身毒国又居大夏东南数千里有蜀物此其去蜀不远矣今使大夏从羌中险羌人恶之少北则爲匈奴所得从蜀宜径【集解如淳曰径疾也或曰径直】又无寇天子既闻大宛及大夏安息之属皆大国多奇物土着颇与中国同业而兵弱贵汉财物其北有大月氏康居之属兵强可以赂遗设利朝也且诚得而以义属之则广地万里重九译【正义言重重九遍译语而致】致殊俗威德徧於四海天子欣然以騫言爲然乃令騫因蜀犍爲【正义犍其连反犍爲郡今戎州也在益州南一千余

里】发间使四道并出出駟出冉出徙【集解徐广曰属汉嘉索隐李奇云徙音斯蜀郡有徙县正义茂州向州等冉駟之地在戎州西北也】出邛僰【正义僰蒲北反徙在嘉州邛今邛州僰今雅州皆在戎州西南也】皆各行一二千里其北方闭氏笮【集解服虔曰皆夷名汉使见闭於夷也索隐韦昭云笮县属越嶲音昨案南越破後杀笮侯作笮都爲沈黎郡又有定笮县正义氏今成州及武等州也笮白狗羌也皆在戎州西北也】南方闭嶲昆明【正义嶲州及南昆明夷也皆在戎州西南】昆明之属无君长善寇盗辄杀畧汉使终莫得通然闻其西可千余里有乘象国名曰滇越【集解徐广曰一作城正义昆郎等州皆滇国也其西有滇越越嶲则通号越细分而有嶲滇等名也】而蜀贾奸出物者或至焉於是汉以求大夏道始通滇国初汉欲通西南夷费多道不通罢之及张骞言可以通大夏乃复事西南夷骞以校尉从大将军击匈奴知水草处军得以不乏乃封骞爲博望侯【索隐案张骞封号耳非地名小顏云取其能博广瞻望也寻武帝置博望苑亦取斯义也正义地理志南阳博望县】是岁元朔六年也其明年骞爲卫尉与李将军俱出右北平击匈奴匈奴围李将军军失亡多而骞後期当斩赎爲庶人是岁汉遣骠骑破匈奴西城数万人至祁连山其明年浑邪王率其民降汉而金城河西西并南山至盐泽空无匈奴匈奴时有候者到而希矣其後二年汉击走单于於幕北是後天子数问骞大夏之属骞既失侯因言曰臣居匈奴中闻乌孙王好昆莫昆莫之父匈奴西边小国也匈奴攻杀其父【索隐汉书父名难兜靡爲大月氏所杀】而昆莫生弃於野乌嗛肉蜚其上【集解徐广曰读嗛与衔同酷吏传义纵不治道上忿衔之史记亦作嗛字索隐嗛音衔蜚亦飞字】狼往乳之单于怪以爲神而收长之及壮使将兵数有功单于复以其父之民予昆莫令长守於西城昆莫收养其民攻旁小邑控弦数万习攻战单于死昆莫乃率其衆远徙中立不肯朝会匈奴匈奴遣奇兵击不胜以爲神而远之因羈属之不大攻今单于新困於汉而故浑邪地空无人蛮夷俗贪汉财物今诚以此时而厚币赂乌孙招以益东居故浑邪之地与汉结昆弟其势宜听听则是断匈奴右臂也既连乌孙自其西大夏之属皆可招来而爲外臣天子以爲然拜骞爲中郎将将三百人马各二匹牛羊以万数齎金币帛直数千巨万多持节副使道可使使遗之他旁国骞既至乌孙乌孙王昆莫见汉使如单于礼骞大慙知蛮夷贪乃曰天子致赐王不拜则还赐昆莫起拜赐其他如故骞谕使指曰乌孙能东居浑邪地则汉遣翁主爲昆莫夫人乌孙国分王老而远汉未知其大小素服属匈奴日久矣且又近之其大臣皆畏胡不欲移徙王不能专制骞不得其要领昆莫有十余子其中子曰大禄强善将衆将衆别居万余骑大禄兄爲太子太子有子曰岑娶而太子蚤死临死谓其父昆莫曰必以岑娶爲太子无令他人代之昆莫哀而许之卒以岑娶爲太子大禄怒其不得代太子也乃收其诸昆弟将其衆畔谋攻岑娶及昆莫昆莫老常恐大禄杀岑娶予岑娶万余骑别居而昆莫有万余骑自备国衆分爲三而其大總取羈属昆莫昆莫亦以此不敢专约於骞骞因分遣副使使大宛康居大月氏大夏安息身毒于寘扞罽及诸旁国乌孙发导译送骞还骞与乌孙遣使数十人马数十匹报谢因令窥汉知其广大骞还到拜爲大行列於九卿岁余卒乌孙使既见汉人衆富厚归报其国其国乃益重汉其後岁余骞所遣使通大夏之属者皆颇与其人俱来【集解晋灼曰其国人】於是西北国始通於汉矣然张骞凿空【集解苏林曰凿空开通也骞开通西域道索隐案谓西域险阨本无道路今凿空而通之也】其後使往者皆称博望侯以爲质於外国【集解如淳曰质诚信也博望侯有诚信故後使称其意以谕外国李奇曰质信也】外国由此信之自博望侯骞死後匈奴闻汉通乌孙怒欲击之及汉使乌孙若【集解徐广曰汉书作及若意义亦及也】出其南抵大宛大月氏相属乌孙乃恐使使献马

愿得尚汉女翁主爲昆弟天子问羣臣议计皆曰必先纳聘然後乃遣女初天子发书易【集解駰案汉书音义曰发易书以下】云神马当从西北来得乌孙马好名曰天马及得大宛汗血马益壮更名乌孙马曰西极名大宛马曰天马云而汉始筑令居以西【集解徐广曰属金城】初置酒泉郡以通西北国因益发使抵安息奄蔡黎轩条枝身毒国而天子好宛马使者相望於道诸使外国一辈大者数百少者百余人人所齎持大放博望侯时其後益习而衰少焉汉率一岁中使多者十余少者五六辈远者八九岁近者数岁而反是时汉既灭越而蜀西南夷皆震请吏入朝於是置益州越巂犍沈黎汶山郡欲地接以前通大夏【集解李奇曰欲地界相接至大夏】乃遣使柏始昌吕越人等岁十余辈出此初郡【索隐初郡谓越巂汶山等郡也谓之初者後皆叛而并废之】抵大夏皆复闭昆明爲所杀夺币财终莫能通至大夏焉於是汉发三辅罪人因巴蜀士数万人遣两将军郭昌卫广等往击昆明之遮汉使者【集解徐广曰元封二年】斩首虏数万人而去其後遣使昆明复爲寇竟莫能得通而北道酒泉抵大夏使者既多而外国益厌汉币不贵其物自博望侯开外国道以尊贵其後从吏卒皆争上书言外国奇怪利害求使天子爲其絶远非人所乐往听其言予节募吏民毋问所从来爲具备人衆遣之以广其道来还不能毋侵盗币物及使失指天子爲其习之辄覆案致重罪以激怒令赎复求使使端无穷而轻犯法其吏卒亦辄复盛推外国所有言大者予节言小者爲副故妄言无行之徒皆争效之其使皆贫人子私县官齎物欲贱市以私其利外国外国亦厌汉使人人有言轻重【集解服虔曰汉使言於外国人人轻重不实如淳曰外国人人自言数爲汉使所侵易】度汉兵远不能至而禁其食物以苦汉使汉使之絶积怨至相攻击而楼兰姑师小国耳【集解徐广曰即车师】当空道攻劫汉使王恢等尤甚【集解徐广曰恢亦作怪】而匈奴奇兵时时遮击使西国者使者争徧言外国灾害皆有城邑兵弱易击於是天子以故遣从骠侯破奴将属国骑及郡兵数万至匈河水欲以击胡胡皆去其明年击姑师破奴与轻骑七百余先至虏楼兰王遂破姑师因举兵威以困乌孙大宛之属还封破奴爲浞野侯【集解徐广曰元封三年】王恢【集解徐广曰爲中郎将】数使爲楼兰所苦言天子天子发兵令恢佐破奴击破之封恢爲浩侯【集解徐广曰捕得车师王元封四年封浩侯】於是酒泉列亭鄣至玉门矣【集解韦昭曰玉门关在龙勒界索隐韦昭又云玉门县名在酒泉正义括地志云沙州龙勒山在县南百六十五里玉门关在县西北百一十八里】乌孙以千匹马聘汉女汉遣宗室女江都翁主【集解駰案汉书曰江都王建女】往妻乌孙乌孙王昆莫以爲右夫人匈奴亦遣女妻昆莫昆莫以爲左夫人昆莫曰我老乃令其孙岑娶妻翁主乌孙多马其富人至有四五千匹马初汉使至安息安息王令将二万骑迎於东界东界去王都数千里行比至过数十城人民相属甚多汉使还而後发使随汉使来观汉广大以大鸟卵及黎轩善眩人献於汉【索隐韦昭云眩人变化惑人也魏畧云黎轩多奇幻口中吹火自缚自解小顔亦以爲今之吞刀吐火植瓜种树屠人截马之术皆是也】及宛西小国驩潜大益宛东姑师扞采苏薤之属皆随汉使献见天子天子大悦而汉使穷河源河源出于真其山多玉石采来【集解瓚曰汉使采取持将来至汉】天子案古图书名河所出山曰崑仑云是时上方数巡狩海上乃悉从外国客大都多人则过之散财帛以赏赐厚具以饶给之以覽示汉富厚焉於是大觳抵出奇戏诸怪物多聚观者行赏赐酒池肉林令外国客徧观各仓库府藏之积见汉之广大倾骇之及加其眩者之工而觳抵奇戏岁增变甚盛益兴自此始西北外国使更来更去宛以西皆自以远尚骄恣晏然未可诘以礼羈縻而使也自乌孙以西至安息以近匈奴匈奴困月氏也匈奴使持单于一信则国国传送食不敢留苦及至汉使非出币帛不得食不

市畜不得骑用所以然者远汉而汉多财物故必市乃得所欲然以畏匈奴於汉使焉宛左右以蒲陶爲酒富人藏酒至万余石久者数十岁不败俗嗜酒马嗜苜蓿汉使取其实来於是天子始种苜蓿蒲陶肥饶地及天马多外国使来衆则离宫别观旁尽种蒲陶苜蓿极望自大宛以西至安息国虽颇异言然大同俗相知言其人皆深眼多须髯善市贾争分铢俗贵女女子女子所言而丈夫乃决正其地皆无丝漆不知铸钱器【集解徐广曰多作钱字又或作铁字】及汉使亡卒降教铸作他兵器得汉黄白金辄以爲器不用爲币而汉使者往既多其少从率多进熟於天子【集解駰案汉书音义曰少从不如计也或云从行之微者也进熟美语如成熟者也】言曰宛有善马在贰师城匿不肯与汉使天子既好宛马闻之甘心使壮士车令等持千金及金马以请宛王贰师城善马宛国饶汉物相与谋曰汉去我远而盐水中数败【集解服虔曰水名道从外水中如淳曰道絶远无谷草正义孔文祥云盐盐泽也言水广远或致风波而数败也裴矩西域记云在西州高昌县东东南去瓜州一千三百里并沙磧之地水草难行四面危道路不可准记行人唯以人畜骸骨及駝马粪爲标验以其道路恶人畜即不约行曾有人於磧内时闻人唤声不见形亦有歌哭声数失人瞬息之间不知所在由此数有死亡盖魑魅魍魎也】出其北有胡寇出其南乏水草又且往往而絶邑乏食者多汉使数百人爲辈来而常乏食死者过半是安能致大军乎无柰我何且贰师马宛宝马也遂不肯予汉使汉使怒妄言【集解如淳曰骂詈】椎金马而去宛贵人怒曰汉使至轻我遣汉使去令其东边郁成遮攻杀汉使取其财物於是天子大怒诸尝使宛姚定汉等言宛兵弱诚以汉兵不过三千人强弩射之即尽虏破宛矣天子已尝使浞野侯攻楼兰以七百骑先至虏其王以定汉等言爲然而欲侯宠姬李氏拜李广利爲贰师将军发属国六千骑及郡国恶少年数万人以往伐宛期至贰师城取善马故号贰师将军赵始成爲军正故浩侯王恢使导军【集解徐军曰恢先受封一年坐使酒泉矫制国除】而李哆爲校尉制军事【索隐哆音尺奢反又尺者反】是岁太初元年也而关东蝗大起蜚西至敦煌贰师将军军既西过盐水当道小国恐各坚城守不肯给食攻之不能下下者得食不下者数日则去比至郁成士至者不过数千皆饥罢攻郁成郁成大破之所杀伤甚衆贰师将军与哆始成等计至郁成尚不能举况至其王都乎引兵而还往来二岁还至敦煌士不过什一二使使上书言道远多乏食且士卒不患战患饥人少不足以拔宛愿且罢兵益发而复往天子闻之大怒而使使遮玉门曰军有敢入者辄斩之贰师恐因留敦煌其夏汉亡浞野之兵二万余於匈奴【集解徐广曰太初二年赵破奴爲浚稽将军二万骑击匈奴不还也】公卿及议者皆愿罢击宛军专力攻胡天子已业诛宛宛小国而不能下则大夏之属轻汉而宛善马絶不来乌孙仑头易苦汉使矣【集解晋灼曰易轻】爲外国笑乃案言伐宛尤不便者邓光等赦囚徒材官益发恶少年及边骑岁余而出炖煌者六万人负私从者不与牛十万马三万余匹驴骡橐驼以万数多齎粮兵弩甚设天下骚动传相奉伐宛凡五十余校尉宛王城中无井皆汲城外流水於是乃遣水工徙其城下水空以空其城【集解徐广曰空一作穴盖以水荡败其城也言空者令城中渴乏】益发戍甲卒十八万酒泉张掖北置居延休屠以卫酒泉【集解如淳曰立二县以卫边也或曰置二部都尉以卫酒泉】而发天下七科适【正义音谪张晏云吏有罪一亡命二贅壻三贾人四故有市籍五父母有市籍六大父母有籍七凡七科武帝天汉四年发天下七科谪出朔方也】及载糒给贰师转车人徒相连属至炖煌而拜习马者二人爲执驱校尉备破宛择取其善马云於是贰师後复行兵多而所至小国莫不迎出食给军至仑头仑头不下攻数日屠之自此而西平行至宛城汉兵到者三万人宛兵迎击汉兵汉兵射败之宛走入葆乘其城贰师兵欲行

攻郁成恐留行而令宛益生诈乃先至宛决其水源移之则宛固已忧困围其城攻之四十余日其外城坏虏宛贵人勇将煎靡宛大恐走入中城宛贵人相与谋曰汉所爲攻宛以王母寡匿善马而杀汉使今杀王母寡而出善马汉兵宜解即不解乃力战而死未晚也宛贵人皆以爲然共杀其王母寡持其头遣贵人使贰师约曰汉毋攻我我尽出善马恣所取而给汉军食即不听我尽杀善马而康居之救且至至我居内康居居外与汉军战汉军熟计之何从是时康居候视汉兵汉兵尚盛不敢进贰师与赵始成李哆等计闻宛城中新得秦人知穿井而其内食尚多所爲来诛首恶者母寡母寡头已至如此而不许解兵则坚守而康居候汉罢而来救宛破汉军必矣军吏皆以爲然许宛之约宛乃出其善马令汉自择之而多出食食给汉军汉军取其善马数十匹中马以下牡牝三千余匹而立宛贵人之故待遇汉使善者名昧蔡以爲宛王【索隐昧蔡大宛将昧音末蔡先葛反】与盟而罢兵终不得入中城乃罢而引归初贰师起炖煌西以爲人多道上国不能食乃分爲数军从南北道校尉王申生故鸿胪壶充国等千余人别到郁成郁成城守不肯给食其军王申生去大军二百里侦而轻之责郁成郁成食不肯出窥知申生军日少晨用三千人攻戮杀申生等军破数人脱亡走贰师贰师令搜粟都尉上官桀往攻破郁成郁成王亡走康居桀追至康居康居闻汉已破宛乃出郁成王予桀桀令四骑士缚守诣大将军【集解如淳曰时多别将故谓贰师爲大将军】四人相谓曰郁成王汉国所毒今生将去卒失大事欲杀莫敢先击上邽骑士赵弟最少拔劔击之斩郁成王齎头弟桀等逐及大将军初贰师後行天子使使告乌孙大发兵并力击宛乌孙发二千骑往持两端不肯前贰师将军之东诸所过小国闻宛破皆使其子弟从军入献见天子因以爲质焉贰师之伐宛也而军正赵始成力战功最多及上官桀敢深入李哆爲谋计军入玉门者万余人军马千余匹贰师後行军非之食战死不能多而将吏贪多不爱士卒侵牟之以此物故衆天子爲万里而伐宛不录过封广利爲海西侯又封身斩郁成王者骑士赵弟爲新畤侯军正赵始成爲光禄大夫上官桀爲少府李哆爲上党太守军官吏爲九卿者三人诸侯相郡守二千石者百余人千石以下千余人奋行者官过其望【集解駰案汉书音义曰奋迅自乐入行者】以适过行者皆绌其劳【集解徐广曰奋行者及以适行者虽俱有功劳今行赏计其前有罪而减其赐故曰绌其劳也绌抑退也此卒以适行故功劳不足重所以绌降之不得与奋行者齐赏也】士卒赐直四万金伐宛再反凡四岁而得罢焉汉已伐宛立昧蔡爲宛王而去岁余宛贵人以爲昧蔡善谀使我国遇屠乃相与杀昧蔡立母寡昆弟曰蝉封爲宛王而遣其子入质於汉汉因使使赂赐以鎮抚之而汉发使十余辈至宛西诸外国求奇物因风覽以伐宛之威德而炖煌置【集解徐广曰一本无置字】酒泉都尉【集解徐广曰一云置都尉又云炖煌有渊泉县或者酒字当爲渊字也】西至盐水往往有亭而仑头有田卒数百人因置使者护田积粟以给使外国者

太史公曰禹本纪言河出崑仑崑仑其高二千五百余里日月所相避隐爲光明也其上有醴泉瑶池今自张骞使大夏之後也穷河源恶睹本纪所谓崑仑者乎【集解邓展曰汉以穷河源于何见崑仑乎尚书曰导河积石是爲河源出于积石积石在金城河关不言出于崑仑也索隐恶音乌於何也睹见也言张骞穷河源至于大夏于寘于何见河出崑仑乎谓禹本纪及山海经爲虚妄也然案山海经河出崑仑东北隅西域传云南出积石山爲中国河积石本非河之发源犹尚书导洛自熊耳然其实出于冢岭山乃东经熊耳今推此义河亦然矣则河源本崑仑而潜流至于寘又东流至积石始入中国则山海经并禹贡各互举耳】故言九州山

川尚书近之矣至禹本纪山海经所有怪物余不敢言之也【索隐案汉书作所有放哉如淳云放荡迂阔言不可信也余不敢言者亦谓山海经难可即信耳而荀悦作放効失之矣】

【索隐述赞曰大宛之迹元因博望始究河源旋窥海上条枝西入天马内向葱岭无尘盐池息浪旷哉絶域往往亭障】

史记卷一百二十三

史记卷一百二十三考证

大宛列传爲发导驿抵康居○凌稚隆曰按导驿二字观後书乌孙发导译送骞还则此驿亦当作译

既臣大夏而居地肥饶索隐居作君谓月氏以大夏爲臣而爲之作君也○董份曰臣大夏而居者言大夏服属爲臣而月氏因居其地也地肥饶亦言大夏故月氏居而安乐之

其少从率多进熟於天子集解駟案汉书音义曰少从不加计也或云从行之微者也进熟美语如成熟者也○余有丁曰进熟或是进见而熟於天子故得以进言若老成者惮行役不肯言矣注熟美之说未必然也

於是乃遣水工徙其城下水空以空其城集解徐广曰空一作穴盖以水荡败其城也言空者令城中渴乏○【臣照】按两空字或作穴今考其文义盖上空字是穴字耳水穴犹水源观後文甚明荡败之说非是盖欲夺其水非灌以水也灌以水则又何渴乏之有

禹本纪言河出崑仑○困学纪闻曰三礼义宗引禹受地记王逸注离骚引禹大传岂即太史公所谓禹本纪者欤

史记卷一百二十三考证

卷一百二十四

钦定四库全书

史记卷一百二十四

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

游侠列传第六十四

【集解荀悦曰立气齐作威福结私交以立强於世者谓之游侠】

韩子曰儒以文乱法【正义言文之敝小人以僿谓细碎苛法乱政】而侠以武犯禁二者皆讥【正义讥非言也儒敝乱法侠盛犯禁二道皆非而学士多称於世者故太史公引韩子欲陈游侠之美】而学士多称於世云至如以术取宰相卿大夫辅翼其世主功名俱着於春秋【索隐案春秋谓国史也以言人臣有功名则见记於国之史是俱着春秋者也】固无可言者及若季次原宪间巷人也【集解徐广曰仲尼弟子传曰公皙哀字季次未尝仕孔子称之】读书怀独行君子之德【索隐行音下孟反】义不苟合当世当世亦笑之故季次原宪终身空室蓬户【正义庄子云原宪处居环堵之室蓬户不完以桑爲枢而瓮牖上漏下湿独坐而弦歌也】褐衣疏食不厌死而已【索隐厌饱也於艳反】四百余年而弟子志之不倦今游侠其行虽不轨於正义然其言必信其行必果已诺必诚不爱其躯赴士之厄困既已存亡死生矣【索隐厄音厄】而不矜其能羞伐其德盖亦有足多者焉且缓急人之所时有也太史公曰昔者虞舜窘於井廩伊尹负於鼎俎传说匿於傅险吕尚困於棘津【集解徐广曰在广川正义尉繚子云太公望行年七十卖食棘津云古亦谓之石济津故南津】夷吾桎梏百里饭牛仲尼畏匡菜色陈蔡此皆学士所谓有道仁人也犹然遭此菑况以中材而涉乱世之末流乎其遇害何可胜道哉鄙人有言曰何知仁义已向其利者爲有德【索隐已音以向音享受也言已受其利则爲有德何必知仁义也】故伯夷丑周饿死首阳山而文武不以其故贬王跖躋暴戾其徒诵义无穷由此观之窃钩者诛【索隐以言小窃则爲盜而受诛也】窃国者侯侯之门仁义存【索隐言人臣委质於侯王门则须存於仁义若游侠径挺亦何必肯存仁义也】非虚言也今拘学或抱咫尺之义久孤於世岂若卑论侪俗与世沈浮而取荣名哉【索隐言拘学守义之士或抱咫尺纖微之事遂久以当代孤负我志而不若卑论侪俗以取荣宠也】而布衣之徒设取予然诺千里诵义爲死不顾世此亦有所长非苟而已也故士穷窘而得委命此岂非人之所谓贤豪间者邪诚使乡曲之侠与季次原宪比权量力效功於

当世不同日而论矣要以功见言信侠客之义又曷可少哉古布衣之侠靡得而闻已近世延陵【集解徐广曰代郡亦有延陵县駟案韩子云赵襄子召延陵生令车骑先至晋阳襄子时赵已并代何有延陵之号但未详是此人非耳】孟尝春申平原信陵之徒皆因王者亲属藉於有土卿相之富厚招天下贤者显名诸侯不可谓不贤者矣此如顺风而呼声非加疾其势激也至如闾巷之侠修行砥名声施於天下【索隐施音以豉反】莫不称贤是爲难耳然儒墨皆排摈不载自秦以前匹夫之侠湮灭不见余甚恨之以余所闻汉兴有朱家田仲王公剧孟郭解之徒虽时扞当世之文罔【索隐扞即扞也违扞当代之法网谓犯法禁也】然其私义廉洁退让有足称者名不虚立士不虚附至如朋党宗强比周设财役贫豪暴欺凌孤弱恣欲自快游侠亦丑之余悲世俗不察其意而猥以朱家郭解等令与暴豪之徒同类而共笑之也鲁朱家者与高祖同时鲁人皆以儒教而朱家用侠闻所藏活豪士以百数其余庸人不可胜言然终不伐其能歆其德诸所尝施唯恐见之振人不赡先从贫贱始家无余财衣不完采食不重味乘不过鞬牛【集解徐广曰音雒駟案汉书音义曰小牛索隐鞬音古豆反案大牛当轳小为鞬牛】专趋人之急甚已之私既陰脱季布将军之厄及布尊贵终身不见也【索隐案季布为汉所购求朱家以布髡钳爲奴载以广柳车而出之及布尊贵终不见之亦高介至义之士然布竟亦不报朱家之恩】自关以东莫不延颈愿交焉楚田仲以侠闻喜劔父事朱家自以爲行弗及田仲已死而雒阳有剧孟周人以商贾爲资而剧孟以任侠显诸侯吴楚反时条侯爲太尉乘传车将至河南得剧孟喜曰吴楚举大事而不求孟吾知其无能爲已矣天下骚动宰相得之若得一敌国云剧孟行大类朱家而好博【索隐好六博之戏也】多少年之戏然剧孟母死自远方送丧盖千乘及剧孟死家无余十金之财而符离人王孟亦以侠称江淮之间是时济南瞿氏【索隐瞿音间案爲郅都所诛】陈周庸【索隐陈国人姓周名庸】亦以豪闻景帝闻之使使尽诛此属其後代诸白梁韩无辟阳翟薛况陕韩孺纷纷复出焉【集解徐广曰陕疑当作郟字颍川有郟县南越传曰郟壮士韩千秋也索隐代代郡人有白氏豪侠非一故言诸梁梁国人韩姓无辟名辟音避陕当爲郟陕音如冉反郟音纪洽反汉书作寒孺】

郭解軹人也【索隐汉书云河内軹人也】字翁伯善相人者许负外孙也解父以任侠孝文时诛死解爲人短小精悍不饮酒少时陰贼【索隐以内心忍害】不快意身所杀甚衆以躯借交报仇藏命作奸【索隐案谓亡命也】剽攻不休及铸钱掘冢固不可胜数适有天幸窘急常得脱若遇赦及解年长更折节爲俭以德报怨厚施而薄望然其自喜爲侠益甚【索隐苏林云言性喜爲侠也】既已振人之命不矜其功其陰贼着於心卒发於睚眦如故云而少年慕其行亦辄爲报仇不使知也解姊子负解之势【索隐负恃也】与人饮使之嚼【集解徐广曰音子妙反尽酒也】非其任强必灌之人怒拔刀刺杀解姊子亡去解姊怒曰以翁伯之义人杀吾子贼不得弃其尸於道弗葬欲以辱解解使人微知贼处贼窘自归具以实告解解曰公杀之固当吾儿不直遂去其贼【集解徐广曰遣使去】罪其姊子乃收而葬之诸公闻之皆多解之义益附焉解出入人皆避之有一人独箕踞视之解遣人问其名姓客欲杀之解曰居邑屋至不见敬是吾德不修也彼何罪乃陰属尉史曰是人吾所急也【索隐案谓吾心中所急言情切急也汉书作重】至践更时脱之每至践更数过吏弗求【集解如淳曰更有三品有卒更有践更有过更古有正卒无常人皆当迭爲之一月一更是爲卒更也贫者欲得顾更钱者次直者出钱顾之月二千是爲践更也律说卒更践更者居县中五月乃更也後

从尉律卒践更一月休十一月也索隐数音朔数频也谓频免之也又音色主反】怪之问其故乃解使脱之箕倨者乃肉袒谢罪少年闻之愈益慕解之行雒阳人有相仇者邑中贤豪居间者以十数【索隐色具反】终不听客乃见郭解解夜见仇家仇家曲听解【索隐谓屈曲听解也】解乃谓仇家曰吾闻雒阳诸公在此间多不听者今子幸而听解解奈何乃从他县夺人邑中贤大夫权乎乃夜去不使人知曰且无用待我待我去令雒阳豪居其间【索隐汉书作无庸苏林曰且无使用吾言待我去令洛阳豪居其间也】乃听之解执恭敬不敢乘车入其县廷之旁郡国爲人请求事事可出之不可者各厌其意然後乃敢尝酒食诸公以故严重之争爲用邑中少年及旁近县贤豪夜半过门常十余车请得解客舍养之【集解如淳曰解多藏亡命者故喜事年少与解同志者知亡命者多在解故多持车来欲爲解迎亡者而藏之】及徙豪富茂陵也解家贫不中訾【索隐案訾不满三百万已上爲不中】吏恐不敢不徙卫将军爲言郭解家贫不中徙上曰布衣权至使将军爲言此其家不贫解家遂徙诸公送者出千余万钁人杨季主子爲县掾举徙解解兄子断杨掾头由此杨氏与郭氏爲仇解入关关中贤豪知与不知闻其声争交驩解解爲人短小不饮酒出未尝有骑已又杀杨季主杨季主家上书人又杀之阙下上闻乃下吏捕解解亡置其母家室夏阳【集解徐广曰属冯翊正义故城在同州韩城县南二十里汉夏阳也】身至临晋【正义故城在同州冯翊县西南二里】临晋籍少公素不知解解冒因求出关籍少公已出解解转入太原所过辄告主人家吏逐之迹至籍少公少公自杀口絶久之乃得解穷治所犯爲解所杀皆在赦前轍有儒生侍使者坐客誉郭解生曰郭解专以奸犯公法何谓贤解客闻杀此生断其舌吏以此责解解实不知杀者杀者亦竟絶莫知爲谁吏奏解无罪御史大夫公孙弘议曰解布衣爲任侠行权以睚眦杀人解虽弗知此罪甚於解杀之当大逆无道遂族郭解翁伯自是之後爲侠者极衆敖而无足数者【集解徐广曰敖倨也】然关中长安樊仲子槐里赵王孙长陵高公子西河郭公仲太原卤公孺【集解徐广曰鴈门有卤城也索隐汉书作鲁公孺鲁姓也与徐广之说不同】临淮儿长卿东阳田君孺【索隐汉书作陈君孺然陈田声相近亦本同姓也正义其东阳盖贝州历亭县者爲近齐故也】虽爲侠而逡逡有退让君子之风至若北道姚氏【索隐苏林云道犹方也如淳云京师四出道也】西道诸杜南道仇景东道赵他羽公子【索隐旧解以赵他羽公子为二人今案此姓赵名他羽字公子也】南阳赵调之徒此盗跖居民间者耳曷足道哉此乃乡者朱家之羞也太史公曰吾视郭解状貌不及中人言语不足采者然天下无贤与不肖知与不知皆慕其声言侠者皆引以爲名谚曰人貌荣名岂有既乎【集解徐广曰人以顔状爲貌者则貌有衰落矣惟用荣名爲饰表则称誉无极也既尽也】於戏惜哉

【索隐述赞曰游侠豪倨籍籍有声权行州里力折公卿朱家脱季剧孟定倾急人之难免讎於更伟哉翁伯人貌荣名】

史记卷一百二十四

史记卷一百二十四考证

游侠列传○【臣照】按迁意所不满莫若公孙丞相及卫霍观佞幸传之阑入卫霍可见此言儒不如侠其所爲儒即指公孙辈言而班固谓其是非颇谬於圣人亦不达其旨矣

侯之门仁义存索隐言人臣委质於侯王门则须存於仁义若游侠径挺亦何必肯存仁义也
○余有丁曰按此即上文向其利者爲有德意也索隐注未明

近世延陵集解徐广曰代郡亦有延陵县駟案韩子云赵襄子召延陵生令车骑先至晋阳襄子时赵已并代何有延陵之号但未详是此人非耳○杨慎曰延陵吴季札也不必引延陵生太史公作传其不名者必其显着者也或曰季札岂游侠耶余曰太史公作传既重游侠矣必援名人以尊之若货殖传之援子贡也子贡既入货殖季札独不入游侠乎故曰延陵孟尝春申平原信陵之徒皆因王者亲属藉於有土若赵之延陵生不可言王者亲属也

且无用待我待我去○王若虚辨惑曰疑重用待我字然关中长安樊仲子至此乃乡者朱家之羞也○【臣照】按此数行皆後人所续玩前後文义自得之

史记卷一百二十四考证

卷一百二十五

钦定四库全书

史记卷一百二十五

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

佞幸列传第六十五

谚曰力田不如逢年善仕不如遇合【集解徐广曰遇一作偶】固无虚言非独女以色媚而仕宦亦有之昔以色幸者多矣至汉兴高祖至暴抗也【索隐抗音苦浪反言暴猛抗直也】然籍孺以佞幸孝惠时有閼孺【正义籍閼皆名也孺幼小也】此两人非有材能徒以婉佞贵幸与上卧起公卿皆因关说【索隐关通也谓公卿因之而通其词说刘氏云有所言说皆关由之】故孝惠时郎侍中皆冠鵀?贝带【集解駰案汉书音义曰鵀?鸟名以毛羽饰冠以贝饰带索隐许慎云鵀?鸂鶒也淮南子云赵武灵王服贝鵀?汉官仪云秦破赵以其冠赐侍中三苍云鵀?神鸟也飞光映天者也】傅脂粉【索隐傅音附】化閼籍之属也两人徙家安陵【正义惠帝陵邑】孝文时中宠臣士人则邓通宦者则赵同【索隐案汉书作赵谈此云同者避太史公父名也】北宫伯子【正义顔云姓北宫名伯子也按伯子名北宫之宦者也】北宫伯子以爱人长者而赵同以星气幸常爲文帝参乘邓通无伎能邓通蜀郡南安人也【集解徐广曰後属犍爲】以濯船爲黄头郎【集解徐广曰着黄?也駰案汉书音义曰善濯船池中也一说能持櫂行船也土水之母故施黄旂於船头因以名其郎曰黄头郎索隐濯音棹迟教反】孝文帝梦欲上天不能有一黄头郎从後推之上天顾见其衣袷【集解徐广曰一无此字索隐袷音笃袷衫襦之横者】带後穿觉而之渐台【索隐觉音教正义括地志云渐台在长安故城中关中记云未央宫西有苍池池中有渐台王莽死於此台】以梦中陰自求推者郎即见邓通其衣後穿梦中所见也召问其名姓姓邓氏名通文帝说焉【索隐汉书云上曰邓犹登也悦之】尊幸之日异通亦愿谨不好外交虽赐洗沐不欲出於是文帝赏赐通巨万以十数【正义赐通巨万以至於十也】官至上大夫文帝时时如邓通家游戏然邓通无他能不能有所荐士独自谨其身以媚上而已上使善相者相通曰当贫饿死文帝曰能富通者在我也何谓贫乎於是赐邓通蜀严道铜山【正义括地志云雅州荣经县北三里有铜山即邓通得赐铜山铸钱者案荣经即严道】得自铸钱邓氏钱【正义钱谱云文字称两同汉四铢文】布天下其富如此文帝尝病痈邓通常爲帝啖吮之【索隐啖音任格反吮音仕充反】文帝不乐从容问通曰天下谁最爱我者乎通曰宜莫如太子太子入问病文帝使

喑痛喑痛而色难之已而闻邓通常爲帝喑吮之心慙由此怨通矣及文帝崩景帝立邓通免家居居无何人有告邓通盗出徼外铸钱下吏验问颇有之遂竟案尽没入邓通家尚负责数巨万长公主赐邓通【集解韦昭曰景帝姊也索隐案即馆陶公主也】吏辄随没入之【索隐谓长公主别有物赐通吏辄没入充赃也】一簪不得着身於是长公主乃令假衣食【索隐谓公主令人假与衣食】竟不得名一钱【索隐始天下名邓氏钱今皆没入卒竟无一钱名之也】寄死人家孝景帝时中无宠臣然独郎中令周文仁【索隐案汉书称周仁此上称周文今兼文仁恐後人加耳案仁字文】仁宠最过庸不乃甚笃【索隐案庸常也言仁最被恩宠过於常人乃不甚笃如韩嫣也】今天子中宠臣士人则韩王孙嫣【索隐音偃又音於建反】宦者则李延年

嫣者弓高侯孽孙也【集解徐广曰韩王信之子颓当也】今上爲胶东王时嫣与上学书相爱及上爲太子愈益亲嫣嫣善骑射善佞上即位欲事伐匈奴而嫣先习胡兵以故益尊贵官至上大夫赏赐拟於邓通时嫣常与上卧起江都王入朝有诏得从入猎上林中天子车驾辟道未行而先使嫣乘副车从数十百骑骛驰视兽江都王望见以爲天子辟从者伏谒道傍嫣驱不见既过江都王怒爲皇太后泣曰请得归国入宿卫比韩嫣【索隐谓还爵封於天子而请入宿卫】太后由此嗾嫣【集解徐广曰嗾读与衔同汉书作衔字】嫣侍上出入永巷不禁以奸闻皇太后皇太后怒使使赐嫣死上爲谢终不能得嫣遂死而案道侯韩说其弟也亦佞幸【索隐说音悦】李延年中山人也父母及身兄弟及女皆故倡也延年坐法腐给事狗中【集解徐广曰主猎犬也索隐或犬监】而平阳公主言延年女弟善舞上见心说之及入永巷而召贵延年延年善歌爲变新声而上方兴天地祠欲造乐诗歌弦之延年善承意弦次初诗【索隐初诗即新造乐章】其女弟亦幸有子男延年佩二千石印号协声律与上卧起甚贵幸埒如韩嫣也【集解徐广曰埒等也蜀都赋曰卓郑埒名又云埒者畴等之名】久之寢与中人乱【集解徐广曰一云坐弟季与中人乱】出入骄恣及其女弟李夫人卒後爱弛则禽诛延年昆弟也自是之後内宠嬖臣大底外戚之家然不足数也卫青霍去病亦以外戚贵幸然颇用材能自进

太史公曰甚哉爱憎之时弥子瑕之行足以观後人佞幸矣虽百世可知也【索隐弥子瑕卫灵公之臣事见说苑也】

【索隐述赞曰传称令色诗刺巧言冠?入侍傅粉承恩黄头赐蜀宦者同轩新声都尉挟弹王孙泣鱼窃驾着自前论】

史记卷一百二十五

史记卷一百二十五考证

佞幸列传文帝说焉索隐汉书云上曰邓犹登也说之○【臣照】按汉书无上曰二字邓犹登也乃班固疏解之辞索隐臆增之也

文帝崩景帝立○史通曰向若但云景帝立不言文帝崩斯亦可知矣何用兼书其事乎

仁宠最过庸不乃甚笃索隐案庸常也言仁最被恩宠过於常人乃不甚笃於韩嫣也○杨慎曰仁宠最过爲句庸不乃甚笃爲句不否定同索隐句读已非解又可笑

史记卷一百二十五考证

卷一百二十六

钦定四库全书

史记卷一百二十六

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

滑稽列传第六十六

【索隐滑谓乱也稽同也以言辩捷之人言非若是说是若非能乱同异也楚辞云将突梯滑稽如脂如韦崔浩云滑音骨稽流酒器也转注吐酒终日不已言出口成章词不穷竭若滑稽之吐酒故扬雄酒赋云夷滑稽腹大如壶尽日盛酒人复籍沽是也又姚察云滑稽犹俳谐也滑读如字稽音计也以言谐语滑利其知计疾出故云滑稽也】

孔子曰六艺於治一也【正义言六艺之文虽异礼节乐和导民立政天下平定其归一揆至於谈言微中亦以解其纷乱故治一也】礼以节人乐以发和书以道事诗以达意易以神化春秋以道义太史公曰天道恢恢岂不大哉谈言微中亦可以解纷

淳于髡者齐之赘壻也【索隐髡音苦魂反赘壻女之夫也比於子如人疣赘是余剩之物也】长不满七尺滑稽多辩数使诸侯未尝屈辱齐威王之时喜隐【索隐喜音许既反喜好也喜隐谓好隐语】好爲淫乐长夜之饮沈湎不治委政卿大夫百官荒乱诸侯并侵国且危亡在於旦暮左右莫敢谏淳于髡说之以隐曰国中有大鸟止王之庭三年不蜚又不鸣王知此鸟何也王曰此鸟不飞则已一飞冲天不鸣则已一鸣惊人於是乃朝诸县令长七十二人赏一人诛一人奋兵而出诸侯振惊皆还齐侵地威行三十六年语在田完世家中威王八年楚大发兵加齐齐王使淳于髡之赵请救兵齎金百斤车马十驷淳于髡仰天大笑冠缨索绝【索隐案索训尽言冠缨尽绝也孔衍春秋後语亦作冠缨尽绝也】王曰先生少之乎髡曰何敢王曰笑岂有说乎髡曰今者臣从东方来见道傍有穰田者【索隐案谓爲田求福穰】操一豚蹄酒一盂而祝曰瓠落满篝【集解徐广曰篝笼也索隐案瓠落犹杯楼也窴音如娄古字少耳言丰年收掇易可满篝笼也正义窴音楼篝音沟笼也瓠楼谓高地狭小之区得满篝宠也】污邪满车【集解司马彪曰污邪下地田也索隐即下田之中有薪可满车正义污音乌】五谷蕃熟穰穰满家臣见其所持者狭而所欲者奢故笑之於是齐威王乃益齎黄金千镒白璧十双车马百驷髡辞而行至赵赵王与之精兵十万革车千乘楚闻之夜引兵而去威

王大悦置酒後宮召髡賜之酒問曰先生能飲幾何而醉對曰臣飲一斗亦醉一石亦醉威王曰先生飲一斗而醉惡能飲一石哉其說可得聞乎髡曰賜酒大王之前執法在傍御史在後髡恐懼俯伏而飲不過一斗徑醉矣若親有嚴客髡希鞬鞞【集解徐廣曰希收衣襖也襖衿也鞬臂扞也音勾鞞曲也音其紀反又與踞同謂小跪也索隱希音卷紀免反謂收袖也】侍酒於前時賜余酒奉觴上壽數起飲不過二斗徑醉矣若朋友交游久不相見卒然相覩歡然道故私情相語飲可五六斗徑醉矣若乃州閭之會男女雜坐行酒稽留六博投壺相引爲曹握手無罰目眙不禁【集解徐廣曰眙吐飴反直視貌索隱眙音與瞪同謂直視也丑飴反又丑二反】前有墮珥後有遺簪髡竊樂此飲可八斗而醉二參【索隱案上云五六斗徑醉矣則此爲樂亦甚飲可八斗而未徑醉故云竊樂二參言十有二參醉也】日暮酒闌合尊促坐男女同席履舄交錯杯盤狼藉堂上燭滅主人留髡而送客【集解徐廣曰一本云留髡坐起送客】羅襦襟解微聞芴澤當此之時髡心最歡能飲一石故曰酒極則亂樂極則悲萬事盡然言不可極極之而衰以諷諫焉齊王曰善乃罷長夜之飲以髡爲諸侯主客【正義今鴻臚卿也】宗室置酒髡嘗在側其後百余年楚有優孟

優孟者故楚之樂人也【索隱優者倡優也孟者字也優旃亦同旃其字耳優孟在楚旃在秦也】長八尺多辯常以談笑諷諫楚莊王之時有所愛馬衣以文綉置之華屋之下席以露床啗以棗脯馬病肥死使羣臣喪之欲以棺槨大夫禮葬之左右爭之以爲不可王下令曰有敢以馬諫者罪至死優孟聞之入殿門仰天大哭王驚而問其故優孟曰馬者王之所愛也以楚國堂堂之大何求不得而以大夫禮葬之薄請以人君禮葬之王曰何如對曰臣請以雕玉爲棺文梓爲槨楸楓豫章爲題湊【集解蘇林曰以木累棺外木頭皆內向故曰題湊正義楸頻縣反】發甲卒爲穿圜老弱負土齊趙陪位於前韓魏翼衛其後【集解駰案楚莊王時未有趙韓魏三國索隱案此辯說者之詞後人所增飾】廟食太牢奉以萬戶之邑諸侯聞之皆知大王賤人而貴馬也王曰寡人之過一至此乎爲之柰何優孟曰請爲大王六畜葬之以壙竈爲槨【索隱皇覽亦說此事以壙竈爲瘞突也】銅歷爲棺【索隱歷卽釜鬲也】齎以姜枣【索隱古者食肉用姜枣禮內則云實枣於其腹中屑桂與姜以酒諸上而鹽之也】荐以木蘭祭以粳稻衣以火光葬之於人腹腸【索隱皇覽云火送之着端葬之腸中】於是王乃使以馬屬太官無令天下久聞也楚相孫叔敖知其賢人也善待之病且死屬其子曰我死汝必貧困若往見優孟言我孫叔敖之子也居數年其子窮困負薪逢優孟與言曰我孫叔敖之子也父且死時屬我貧困往見優孟優孟曰若無遠有所之【索隱案謂優孟語孫叔敖之子曰汝無遠有所之適他境恐王後求汝不得者也】卽爲孫叔敖衣冠抵掌談語【集解駰案戰國策曰蘇秦說趙王華屋之下抵掌而言張載曰談說之容則也】歲余像孫叔敖楚王左右不能別也莊王置酒優孟前爲壽莊王大喜以爲孫叔敖復生也欲以爲相優孟曰請歸與婦計之三日而爲相莊王許之三日後優孟復來王曰婦言謂何孟曰婦言慎無爲楚相不足爲也如孫叔敖之爲楚相盡忠爲廉以治楚楚王得以霸今死其子無立錫之地貧困負薪以自飲食必如孫叔敖不如自殺因歌曰山居耕田苦難以得食起而爲吏身貪鄙者余財不顧耻辱身死家室富又恐受賕枉法爲奸觸大罪身死而家滅貪吏安可爲也念爲廉吏奉法守職竟死不敢爲非廉吏安可爲也楚相孫叔敖持廉至死方今妻子窮困負薪而食不足爲也於是莊王謝優孟乃召孫叔敖子封之寢丘【集解徐廣曰在固始正義今光州固始縣本寢邱邑也呂氏春秋云楚孫叔敖有功於國疾將死戒其子曰王數欲封我我辭不受我死必封汝

汝无受利地荆楚间有寝邱者其爲地不利而前有妬谷後有戾邱其名恶可长有也其子从之楚功臣封二世而收唯寝邱不夺也】四百户以奉其祀後十世不絕此知可以言时矣其後二百余年秦有优旃

优旃者秦倡侏儒也善爲笑言然合於大道秦始皇时置酒而天雨陛楯者皆沾寒优旃见而哀之谓之曰汝欲休乎陛楯者皆曰幸甚优旃曰我即呼汝汝疾应曰诺居有顷殿上上壽呼万岁优旃临檻【正义御览反】大呼曰陛楯郎郎曰诺优旃曰汝虽长何益幸雨立我虽短也幸休居於是始皇使陛楯者得半相代始皇尝议欲大苑囿东至函谷关西至雍陈仓【正义今岐州雍县及陈仓县也】优旃曰善多纵禽兽於其中寇从东方来令麋鹿触之足矣始皇以故辍止二世立又欲漆其城优旃曰善主上虽无言臣固将请之漆城虽於百姓愁费然佳哉漆城荡荡寇来不能上即欲就之易爲漆耳顾难爲?室於是二世笑之以其故止居无何二世杀死优旃归汉数年而卒

太史公曰淳于髡仰天大笑齐威王横行优孟摇头而歌负薪者以封优旃临檻疾呼陛楯得以半更岂不亦伟哉

褚先生曰臣幸得以经术爲郎而好读外家传语窃不逊让复作故事滑稽之语六章编之左方可以览观扬意以示後世好事者读之以游心骇耳以附益上方太史公之三章武帝时有所幸倡郭舍人者发言陈辞虽不合大道然令人主和说武帝少时东武侯母【索隐案东武县名侯乳母姓也】常养帝【正义高祖功臣表云东武侯郭家高祖六年封子他孝景六年弃市国除盖他母常养武帝】帝壮时号之曰大乳母率一月再朝朝奏入有诏使幸臣马游卿以帛五十匹赐乳母又奉饮糒飧养乳母乳母上书曰某所有公田愿得假倩之帝曰乳母欲得之乎以赐乳母乳母所言未尝不听有诏得令乳母乘车行驰道中当此之时公卿大臣皆敬重乳母乳母家子孙奴从者横暴长安中当道掣顿人车马夺人衣服闻於中不忍致之法有司请徙乳母家室处之於边奏可乳母当入至前面见辞乳母先见郭舍人爲下泣舍人曰即入见辞去疾步数还顾乳母如其言谢去疾步数还顾郭舍人疾言骂之曰咄老女子何不疾行陛下已壮矣寧尚须汝乳而活邪尚何还顾於是人主怜焉悲之乃下诏止无徙乳母罚谪譖之者【索隐谓武帝罚谪譖乳母之人也】

武帝时齐人有东方生名朔【索隐仲长统云迁爲滑稽传叙优旃事不称东方朔非也朔之行事岂直旃孟之比哉而桓谭亦以迁内爲是又非也正义汉书云平原厌次人也輿地志云厌次宜是富平县之乡聚名也括地志云富平故城在仓州阳信县东南四十里汉县也】以好古传书爱经术多所博观外家之语【索隐案东方朔亦多博观外家之语则外家非止经史即传记杂说之书】朔初入长安至公车上书【正义百官表云卫尉属官有公车司马汉仪注云公车司马掌殿司马门夜徼宫天下上事及阙下凡所徵召皆总领之秩六百石】凡用三千奏牍公车令两人共持举其书仅然能胜之人主从上方读之止辄乙其处读之二月乃尽诏拜以爲郎常在侧侍中数召至前谈话人主未尝不说也时诏赐之饭於前饭已尽怀其余肉持去衣尽污数赐缣帛担揭而去徒用所赐钱帛取少妇於长安中好女率取妇一岁所者即弃去更取妇所赐钱财尽索之於女子人主左右诸郎半呼之狂人人主闻之曰令朔

在事无爲是行者若等安能及之哉朔任其子爲郎又爲侍謁者常持节出使朔行殿中郎謂之曰人皆以先生爲狂朔曰如朔等所谓避世於朝廷間者也古之人乃避世於深山中时坐席中酒酣据地歌曰陆沈於俗【索隱司马彪云谓无水而沈之】避世金马门宫殿中可以避世全身何必深山之中蒿庐之下金马门者宦署门也门傍有铜马故谓之曰金马门时会聚宫下博士诸先生与论议共难之【索隱案谓朔设词对之即下文荅客难是也】曰苏秦张仪一当万乘之主而都卿相之位泽及後世今子大夫修先王之术慕圣人之义讽诵诗书百家之言不可胜数着於竹帛自以爲海内无双即可谓博闻辩智矣然悉力尽忠以事圣帝旷日持久积数十年官不过侍郎位不过执戟意者尚有遗行邪其故何也东方生曰是固非子之所能备也彼一时也此一时也岂可同哉夫张仪苏秦之时周室大坏诸侯不朝力政争权相禽以兵并爲十二国未有雌雄得士者强失士者亡故说听行通身处尊位泽及後世子孙长荣今非然也圣帝在上德流天下诸侯宾服威振四夷连四海之外以爲带安於覆盂天下平均合爲一家动发举事犹如运之掌中贤与不肖何以异哉方今以天下之大士民之衆竭精驰说并进辐凑者不可胜数悉力慕义困於衣食或失门户使张仪苏秦与仆并生於今之世会不能得掌故安敢望常侍侍郎乎传曰天下无害菑虽有圣人无所施其才上下和同虽有贤者无所立功故曰时异则事异虽然安可以不务修身乎诗曰鼓钟于宫声闻于外鹤鸣九臯声闻于天苟能修身何患不荣太公躬行仁义七十二年逢文王得行其说封於齐七百岁而不絶此士之所以日夜孜孜修学行道不敢止也今世之处士时虽不用崛然独立块然独处上观许由下察接舆策同范蠡忠合子胥天下和平与义相扶寡偶少徒固其常也子何疑於余哉於是诸先生默然无以应也建章宫【正义在长安县西北二十里长安故城下】後合重栳中有物出焉【索隱重音逐龙反栳音历重栳栏楯之下有重栏处也】其状似麋以闻武帝往临视之问左右羣臣习事通经术者莫能知诏东方朔视之朔曰臣知之愿赐美酒粱饭大飧臣臣乃言诏曰可已飧又曰某所有公田鱼池蒲葦数顷陛下以赐臣臣朔乃言诏曰可於是朔乃肯言曰所谓驺牙者也【索隱驺音邹此朔以意自立名而偶中以有九牙齐等故谓之驺牙犹驺骑然也】远方当来归义而驺牙先见其齿前後若一齐等无牙故谓之驺牙其後一岁所匈奴混邪王果将十万衆来降汉乃复赐东方生钱财甚多至老朔且死时諫曰诗云营营青蝇止于蕃悵悵君子无信谗言谗言罔极交乱四国愿陛下远巧佞退谗言帝曰今顾东方朔多善言怪之居无几何朔果病死传曰鸟之将死其鸣也哀人之将死其言也善此之谓也

武帝时大将军卫青者卫后兄也【集解徐广曰卫青传曰子夫之弟也】封爲长平侯从军击匈奴至余吾水上而还斩首捕虏有功来归诏赐金千斤将军出宫门齐人东郭先生以方士待诏公车当道遮卫将军车拜謁曰愿白事【集解徐广曰卫青传云甯乘说青而拜爲东海都尉】将军止车前东郭先生旁车言曰王夫人新得幸於上家贫今将军得金千斤诚以其半赐王夫人之亲人主闻之必喜此所谓奇策便计也卫将军谢之曰先生幸告之以便计请奉教於是卫将军乃以五百金爲王夫人之亲壽王夫人以闻武帝帝曰大将军不知爲此问之安所受计策对曰受之待诏者东郭先生诏召东郭先生拜以爲郡都尉东郭先生久待诏公车贫困饥寒衣敝履不完行雪中履有上无下足尽践地道中人笑之东郭先生应之曰谁能履行雪中令人视之其上履也其履下处乃似人足者乎及其拜爲二千石佩青綬【集解徐广曰音瓜一音螺青綬】出宫门行谢主人故所以同官待诏者等比祖道於都门外荣

华道路立名当世【集解徐广曰东郭先生也】此所谓衣褐怀宝者也【索隐此指东郭先生也其言身衣褐而怀宝玉也】当其贫困时人莫省视至其贵也乃争附之谚曰相马失之瘦相士失之贫其此之谓邪王夫人病甚人主至自往问之曰子当爲王欲安所置之对曰愿居洛阳人主曰不可洛阳有武库敖仓当关口天下咽喉自先帝以来传不爲置王然关东国莫大於齐可以爲齐王王夫人以手击头呼幸甚王夫人死号曰齐王太后薨昔者齐王使淳于髡献鹄於楚【索隐案韩诗外传齐使人献鹄于楚不言髡又说苑云魏文侯使舍人无择献鹄于齐皆畧同而事异殆相涉乱也】出邑门道飞其鹄徒揭空笼造诈成辞往见楚王曰齐王使臣来献鹄过於水上不忍鹄之渴出而饮之去我飞亡吾欲刺腹绞颈而死恐人之议吾王以鸟兽之故令士自伤杀也鹄毛物多相类者吾欲买而代之是不信而欺吾王也欲赴佗国奔亡痛吾两主使不通故来服过叩头受罪大王楚王曰善齐王有信士若此哉厚赐之财倍鹄在也

武帝时徵北海太守诣行在所【索隐汉画宣帝徵勃海太守龚遂非武帝时此褚先生记谬耳】有文学卒史王先生者自请与太守俱吾有益於君君许之诸府掾功曹白云王先生嗜酒多言少实恐不可与俱太守曰先生意欲行不可逆遂与俱行至宫下待诏宫府门王先生徒怀钱沽酒与卫卒仆射饮日醉不视其太守太守入跪拜王先生谓户郎曰幸爲我呼吾君至门内遥语户郎爲呼太守太守来望见王先生王先生曰天子即问君何以治北海【正义今青州】令无盗贼君对曰何哉对曰选择贤材各任之以其能赏异等罚不肖王先生曰对如是是自誉自伐功不可也愿君对言非臣之力尽陛下神灵威武所变化也太守曰诺召入至于殿下有诏问之曰何以治北海令盗贼不起叩头对言非臣之力尽陛下神灵威武之所变化也武帝大笑曰於呼安得长者之语而称之安所受之对曰受之文学卒史帝曰今安在对曰在宫府门外有诏召拜王先生爲水衡丞以北海太守爲水衡都尉传曰美言可以市尊行可以加人君子相送以言小人相送以财魏文侯时西门豹爲邺令【正义今相州县也】豹往到邺会长老问之民所疾苦长老曰苦爲河伯娶妇【正义河伯华阴潼乡人姓冯氏名夷浴於河中而溺死遂爲河伯娶妇也】以故贫豹问其故对曰邺三老廷掾常岁赋歛百姓收取其钱得数百万用其二三十万爲河伯娶妇与祝巫共分其余钱持归当其时巫行视人家女好者云是当爲河伯妇即娉取洗沐之爲治新缯绮縠衣闲居斋戒爲治斋宫河上张缦绦帷【正义缦他礼反顾野王云黄赤色也又音啼厚缯也】女居其中爲具牛酒饭食行十余日共粉饰之如嫁女床席令女居其上浮之河中始浮行数十里乃没其人家有好女者恐大巫祝爲河伯取之以故多持女远逃亡以故城中益空无人又困贫所从来久远矣民人俗语曰即不爲河伯娶妇水来漂没溺其人民云西门豹曰至爲河伯娶妇时愿三老巫祝父老送女河上【正义亭三老】幸来告语之吾亦往送女皆曰诺至其时西门豹往会之河上三老官属豪长者里父老皆会以人民往观之者三二千人其巫老女子也已年七十从弟子女十人所皆衣缯单衣立大巫後西门豹曰呼河伯妇来视其好丑即将女出帷中来至前豹视之顾谓三老巫祝父老曰是女子不好烦大巫姬爲入报河伯得更求好女後日送之即使吏卒共抱大巫姬投之河中有顷曰巫姬何久也弟子趣之复以弟子一人投河中有顷曰弟子何久也复使一人趣之复投一弟子河中凡投三弟子西门豹曰巫姬弟子是女子也不能白事烦三老爲入白之复投三老河中西门豹簪笔磬折【正义簪笔谓以毛装簪头长五寸插在冠前谓之爲笔言插笔备礼也磬折谓曲体揖之若石磬之形曲折也磬一片黑石凡十二

片树在虞上击之其形皆中曲垂两头言人腰侧似也】向河立待良久长老吏傍观者皆惊恐西门豹顾曰巫妪三老不来还奈之何欲复使廷掾与豪长者一人入趣之皆叩头叩头且破额血流地色如死灰西门豹曰诺且留待之须臾须臾豹曰廷掾起矣状河伯留客之久若皆罢去归矣邺吏民大惊恐从是以後不敢复言爲河伯娶妇西门豹即发民凿十二渠引河水灌民田【正义括地志云按横渠首接漳水盖西门豹史起所凿之渠也沟洫志云魏文侯时西门豹爲邺令有令名至文侯曾孙襄王与羣臣饮酒祝曰令吾臣皆如西门豹之爲人臣也史起进曰魏氏之行田也以百亩邺独二百亩是田恶也漳水在其旁西门不知用是不智知而不兴是不仁仁智豹未之尽何足法也于是史起爲邺令遂引漳水溉邺以富魏之河内左思魏都赋云西门溉其前史起濯其後也】田皆溉当其时民治渠少烦苦不欲也豹曰民可以乐成不可与虑始今父老子弟虽患苦我然百岁後期令父老子孙思我言至今皆得水利民人以给足富十二渠经絶驰道到汉之立而长吏以爲十二渠桥絶驰道相比近不可欲合渠水且至驰道合三渠爲一桥邺民人父老不肯听长吏以爲西门君所爲也贤君之法式不可更也长吏终听置之故西门豹爲邺令名闻天下泽流後世无絶已时几可谓非贤大夫哉传曰子产治郑民不能欺子贱治单父民不忍欺西门豹治邺民不敢欺三子之才能谁最贤哉辩治者当能别之【集解駟案魏文帝问羣臣三不欺於君德孰优太尉鍾繇司徒华歆司空王朗对曰臣以爲君任德则臣感义而不忍欺君任察则臣畏觉而不能欺君任刑则臣畏罪而不敢欺任德感义与夫导德齐礼有耻且格等趋者也任察畏罪与夫导政齐刑免而无耻同归者也孔子曰爲政以德譬如北辰居其所而衆星共之考以斯言论以斯义臣等以爲不忍欺不能欺优劣之县在於权衡非徒低昂之差乃钧铢之觉也且前志称仁者安仁智者利仁畏罪者强仁校其仁者功则无以殊核其爲仁者则不得不异安仁者性善者也利仁者力行者也强仁者不得已者也三仁相比则安仁优矣易称神而化之使民宜之若君化使民然也然则安仁之化与夫强仁之化优劣亦不得不相县絶也然则三臣之不欺虽同所以不欺异矣则纯以恩义崇不欺与以威察成不欺既不可同概而比量又不得错综而易处索隐案此三不欺自古传记先违共所称述今褚先生因记西门豹而称之以成说也循吏传记子产相郑仁而且明故人不能欺之子贱爲政清静唯弹琴三年不下堂而化是人见思故不忍欺之豹以威化御俗故人不欺欺之其德优劣鍾华之评实爲允当也】

【索隐述赞曰滑稽鸢夷如脂如韦敏捷之变学不失词淳于索絶赵国兴师楚优拒相寝兵获祠伟哉方朔三章纪之】

史记卷一百二十六

史记卷一百二十六考证

滑稽列传此鸟不飞则已一飞冲天不鸣则已一鸣惊人○黄氏日抄曰三年不飞不鸣之语楚世家以爲伍举语庄王今滑稽传又以爲淳于髡说齐威果孰是孰非耶

其後百余年楚有优孟○史通曰优孟在春秋楚庄王时淳于髡在战国齐威王时史谓後百余年误矣

乃召孙叔敖子封之寝丘四百户正义吕氏春秋云楚孙叔敖有功於国疾将死戒其子曰王数欲封我我辞不受我死必封汝汝无受利地荆楚间有寝丘者其爲地不利而前有妬谷後有戾丘其名恶可长有也其子从之楚功臣封二世而收唯寝丘不夺也○吕氏春秋异宝篇所言与正义所引大同小异曰孙叔敖疾将死戒其子曰王数封我矣吾不受也爲我死王则封汝必无受利地楚越之间有寝之丘者此其地不利而名甚恶荆人畏鬼而越人信禰可长有者其唯此也孙叔敖死王果以美地封其子而子辞请寝之丘故至今不失

乳母先见郭舍人爲下泣○西京杂记作东方朔齐王太后薨昔者齐王使淳于髡献鹄於楚○凌稚隆曰按此淳于髡事误入於此

有文学卒史王先生者○汉书循吏传作议曹王生

史记卷一百二十六考证

卷一百二十七

钦定四库全书

史记卷一百二十七

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

日者列传第六十七

【集解墨子曰墨子北之齐遇日者日者曰帝以今日杀黑龙于北方而先生之色黑不可以北墨子不听遂北至淄水墨子不遂而反焉日者曰我谓先生不可以北然则古人占候卜筮通谓之曰者墨子亦云非但史记也索隐案名卜筮曰日者以墨所以卜筮占候时日通名曰者故也】

自古受命而王王者之兴何尝不以卜筮决于天命哉其于周尤甚及秦可见代王之入任于卜者太卜之起由汉兴而有【索隐按周礼有太卜之官此云由汉兴者谓汉自文帝卜大横之後其卜官更兴盛焉】

司马季主者楚人也【索隐按云楚人而太史公不序其系盖楚相司马子期子反後姓也季主见列仙传】卜于长安东市宋忠为中大大夫贾谊为博士同日俱出洗沐【正义汉官仪五日一假洗沐也】相从论议诵易先王圣人之道术究徧人情相视而叹贾谊曰吾闻古之圣人不居朝廷必在卜医之中今吾已见三公九卿朝士大夫皆可知矣试之卜数中以观采【索隐卜数犹术数也音所具反刘氏云具数筮之亦通筮必以易易用大衍之数也】二人即同舆而之市游于卜肆中天新雨道少人司马季主闲坐弟子三四人侍方辩天地之道日月之运陰阳吉凶之本二大夫再拜谒司马季主视其状貌如类有知者即礼之使弟子延之坐坐定司马季主复理前语分别天地之终始日月星辰之纪差次仁义之际列吉凶之符语数千言莫不顺理宋忠贾谊瞿然而悟猎缨正襟危坐【索隐猎揽也揽其冠缨而正其衣襟谓变而自饰也危一作免谓俯俛为敬】曰吾望先生之状听先生之辞小子窃观于世未尝见也今何居之卑何行之污【索隐音乌故反】司马季主捧腹大笑曰观大夫类有道术者今何言之陋也何辞之野也今夫子所贤者何也所高者谁也今何以卑污长者二君曰尊官厚禄世之所高也贤才处之今所处非其地故谓之卑言不信行不验取不当故谓之污夫卜筮者世俗之所贱简也世皆言曰夫卜者多言夸严以得人情【索隐谓卜者自矜夸而庄严以

得人情也】虚高人禄命以说人志擅言祸灾以伤人心矫言鬼神以尽人财厚求拜谢以私于己此吾之所耻故谓之卑污也司马季主曰公且安坐公见夫被髮童子乎日月照之则行不照则止问之日月疵瑕吉凶则不能理由是观之能知别贤与不肖者寡矣贤之行也直道以正谏三谏不听则退其誉人也不望其报恶人也不顾其怨以便国家利衆为务故官非其任不处也禄非其功不受也见人不正虽贵不敬也见人有污虽尊不下也得不为喜去不为恨非其罪也虽累辱而不愧也今公所谓贤者皆可为羞矣卑疵而前【索隐疵音贲】趋而言【索隐?音纖?趋犹足恭也】相引以势相导以利比周宾正【集解徐广曰客旅谓之宾人求长官谓之正】以求尊誉以受公奉事私利枉王法猎农民以官为威以法为机求利逆暴譬无异于操白刃劫人者也初试官时倍力为巧诈饰虚功执空文以调主上用居上为右试官不让贤陈功见伪增实以无为有以少为多以求便势尊位食饮驱驰从姬歌儿不顾于亲犯法害民虚公家此夫为盗不操矛弧者也攻而不用弦刃者也欺父母未有罪而弑君未伐者也何以为高贤才乎盗贼发不能禁夷貊不服不能摄奸邪起不能塞官耗乱不能治四时不和不能调岁谷不熟不能适【索隐音释适犹调也】才贤不为是不忠也才不贤而托官位利上奉妨贤者处是窃位也【索隐奉音扶用反】有人者进有财者礼是伪也子独不见鸛泉之与凤皇翔乎兰芷芎藭弃於广野蒿萧成林使君子退而不显衆公等是也述而不作君子义也今夫卜者必法天地象四时顺于仁义分策定卦旋式正棋【集解徐广曰式音拭索隐按式即拭也旋转也拭之形上圆象天下方法地用之则转天纲加地之辰故云旋式棋者筮之状正棋盖谓下以作卦也】然後言天地之利害事之成败昔先王之定国家必先龟策日月而後乃敢代正时日乃後入家产子必先占吉凶後乃有之【索隐谓若卜之不祥则式不收也卜吉而後有故云有之】自伏羲作八卦周文王演三百八十四爻而天下治越王勾践仿文王八卦【索隐仿音方往反】以破敌国霸天下由是言之卜筮有何负哉且夫卜筮者扫除设坐正其冠带然後乃言事此有礼也言而鬼神或以飨忠臣以事其上孝子以养其亲慈父以畜其子此有德者也而以义置数十百钱病者或以愈且死或以生患或以免事或以成嫁子娶妇或以养生此之为德岂直数十百钱哉此夫老子所谓上德不德是以有德今夫卜筮者利大而谢少老子之云岂异于是乎庄子曰君子内无饥寒之患外无劫夺之忧居上而敬居下不为害君子之道也今夫卜筮者之为业也积之无委聚藏之不用府库徙之不用輜车负装之不重止而用之无尽索之时持不尽索之物游于无穷之世虽庄氏之行未能增于是也子何故而云不可卜哉天不足西北星辰西北移地不足东南以海为池日中必移月满必亏先王之道乍存乍亡公责卜者言必信不亦惑乎公见夫谈士辩人乎虑事定计必是人也然不能以一言说人主意故言必称先王语必道上古虑事定计饰先王之成功语其败害以恐喜人主之志以求其欲多言夸严【集解徐广曰一作险】莫大于此矣然欲强国成功尽忠于上非此不立今夫卜者导惑教愚也夫愚惑之人岂能以一言而知之哉言不厌多故骥驥不能与罢驴为驷而凤凰不与燕雀为羣而贤者亦不与不肖者同列故君子处卑隐以辟衆自匿以辟伦微见德顺以除羣害以明天性助上养下多其功利不求尊誉公之等喁喁者也何知长者之道乎宋忠贾谊忽而自失芒乎无色【索隐芒音莫郎反】怅然噤口不能言【索隐怅音畅噤音禁刘氏音其锦反】于是掇衣而起再拜而辞行洋洋也出市门仅能自上车伏轼低头卒不能出气居三日宋忠见贾谊于殿门外乃相引屏语相谓自叹曰道高益安势高益危居赫赫之势失身且有日矣夫卜而有不审不见夺糈【集解徐广曰音所駟案离骚经云怀椒糈而要之王逸云糈精米所以享神】为人主计而不审身无所

处【索隐糈者卜求神之米也言卜之不中乃不见夺其糈米若为人主计不审则身无处也】此相去远矣犹天冠地屨也此老子之所谓无名者万物之始也天地旷旷物之熙熙或安或危莫知居之我与若何足预彼哉彼久而愈安虽曾氏之义【集解徐广曰曾一作庄】未有以异也久之宋忠使匈奴不至而还抵罪而贾谊为梁怀王傅王堕马薨谊不食毒恨而死此务华絶根者也【索隐言宋忠贾谊皆务华而丧其身是絶其根本也】

太史公曰古者卜人所以不载者多不见于篇及至司马季主余志而着之

褚先生曰臣为郎时游观长安中见卜筮之贤大夫观其起居行步坐起自动誓正其衣冠而当乡人也有君子之风见性好解妇来卜对之颜色严振未尝见齿而笑也从古以来贤者避世有居止舞泽者有居民间闭口不言有隐居卜筮间以全身者夫司马季主者楚贤大夫游学长安通易经术黄帝老子博闻远见观其对二大夫贵人之谈言称引古明王圣人道固非浅闻小数之能及卜筮立名声千里者各往往而在传曰富为上贵次之既贵各各学一伎能立其身黄直丈夫也陈君夫夫人也以相马立名天下齐张仲曲成侯以善击刺学用劔立名天下留长孺以相彘立名荥阳褚氏以相牛立名能以伎能立名者甚多皆有高世絶人之风何可胜言故曰非其地树之不生非其意教之不成夫家之教子孙当视其所以好好含苟生活之道因而成之故曰制宅命子足以观士子有处所可谓贤人臣为郎时与太卜待诏为郎者同署言曰孝武帝时聚会占家问之某日可取妇乎五行家曰可堪輿家曰不可建除家曰不吉丛辰家曰大凶历家曰小凶天人家曰小吉太乙家曰大吉辩讼不决以状闻制曰避诸死忌以五行为主人取于五行者也

【索隐述赞曰日者之名有自来矣吉凶占候着于墨子齐楚异法书亡?纪後人斯继季主独美取免暴秦此焉终否】

史记卷一百二十七

史记卷一百二十七考证

日者列传○凌稚隆曰吕东莱考订云此太史公所作刘辰翁云观其辨肆浅深亦岂褚生所能

太卜之起由汉兴而有索隐案周礼有太卜之官此云由汉兴者谓汉自文帝卜大横之後其卜官更兴盛焉○龟策传高祖时因秦太卜官是汉兴即有太卜不因文帝而更兴盛也由汉兴而有者盖言汉兴以来即有之矣索隐说迂

比周宾正集解徐广曰客旅谓之宾人求长官谓之正○徐孚远曰宾正犹宾正也徐说烦曲不明

家产子必先占吉凶後乃有之索隐谓若卜之不祥则或不收也卜吉而後有故云有之○【

臣照】按若卜而後收子则子之不得收者多矣古之人岂伤天理絕人命若是索隐之说谬矣盖言生子必视其时日占其吉凶其後亦俱有应云尔

史记卷一百二十七考证

<史部,正史类,史记>

卷一百二十八

钦定四库全书

史记卷一百二十八

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

龟策列传第六十八

【索隐龟策传有録无书褚先生所补其叙事烦芜陋畧无可取正义史记至元成间十篇有録无书而褚少孙补景武纪将相年表礼书乐书律书三王世家蒯成侯日者龟策列传日者龟策言辞最鄙陋非太史公之本意也】

太史公曰自古圣王将建国受命兴动事业何尝不宝卜筮以助善唐虞以上不可记已自三代之兴各据祯祥涂山之兆从而夏啓世飞燕之卜顺故殷兴百谷之筮吉故周王王者决定诸疑参以卜筮断以蓍龟不易之道也蛮夷氏羌虽无君臣之序亦有决疑之卜或以金石或以草木【集解徐广曰一作革】国不同俗然皆可以战伐攻击推兵求胜各信其神以知来事畧闻夏殷欲卜者乃取蓍龟已则弃去之以为龟藏则不灵蓍久则不神至周室之卜官常宝藏蓍龟又其大小先後各有所尚要其归等耳或以为圣王遭事无不定决疑无不见其设稽神求问之道者以为後世衰微愚不师智人各自安化分为百室道散而无垠故推归之至微要洁于精神也或以为昆虫之所长圣人不能与争其处吉凶别然否多中于人至高祖时因秦太卜官天下始定兵革未息及孝惠享国日少吕后女主孝文孝景因袭掌故未遑讲试虽父子畴官世世相传其精微深妙多所遗失至今上即位博开艺能之路延百端之学通一伎之士咸得自効絶伦超奇者为右无所阿私数年之间太卜大集会上欲击匈奴西攘大宛【集解徐广曰攘一作襄襄除也】南收百越卜筮至预见表象先图其利及猛将推锋执节获胜于彼而蓍龟时日亦有力于此上尤加意赏赐至或数千万如丘子明之属富溢贵宠倾于朝廷至以卜筮射蛊道巫蛊时或颇中素有眦睚不快因公行诛恣意所伤以破族灭门者不可胜数百僚荡恐皆曰龟策能言後事觉奸穷亦诛三族夫蓍策定数【集解徐广曰蓍音逢一作达索隐蓍谓两手执蓍分而仿之故云蓍策】灼龟观兆变化无穷是以择贤而用占焉可谓圣人重事者乎周公卜三龟而武王有瘳纣为暴虐而元龟不占晋文将定襄王之位卜得黄帝之兆【集解駰案左传曰遇黄帝战于阪泉之兆】卒受彤弓之命猷公贪骊姬之色卜而兆有口象其祸竟流五世楚灵将背周室卜而龟逆【集解駰案左传曰灵王卜曰余

尚得天下不吉投龟詢天而呼曰是区区者而不余畀余必自取之索隐詢音火侯反】终被乾溪之败兆应信诚于内而时人明察见之于外可不谓两合者哉君子谓夫轻卜筮无神明者悖背人道【索隐悖音倍背音佩】信祲祥者鬼神不得其正故书建稽疑五谋而卜筮居其二五占从其多明有而不专之道也余至江南观其行事问其长老云龟千岁乃游莲叶之上【集解徐广曰莲一作领声相近或假借字也】蓍百茎共一根【集解徐广曰刘向云龟千岁而灵蓍百年而一本生百茎】又其所生兽无虎狼草无毒螫江傍家人常畜龟饮食之以为能导引致气有益于助衰养老岂不信哉

褚先生曰臣以通经术受业博士治春秋以高第为郎幸得宿卫出入宫殿中十有余年窃好太史公传太史公之传曰三王不同龟四夷各异卜然各以决吉凶畧闕其要故作龟策列传臣往来长安中求龟策列传不能得故之太卜官问掌故文学长老习事者写取龟策卜事编于下方闻古五帝三王发动举事必先决蓍龟传曰【索隐此传即太卜所得古龟之说也】下有伏灵上有兔丝上有捣蓍【索隐捣音逐留反捣蓍即藜蓍捣古稠字】下有神龟所谓伏灵者在兔丝之下状似飞鸟之形新雨已天清静无风以夜捎兔丝去之即以篝烛此地【集解徐广曰篝笼也盖然火而笼其上音篝陈涉世家曰夜篝火也】烛之火灭即记其处以新布四丈环置之明即掘取之入四尺至七尺得矣过七尺不可得伏灵者千岁松根也食之不死闻蓍生满百茎者其下必有神龟守之其上常有青云覆之传曰天下和平王道得而蓍茎长丈其丛生满百茎方今世取蓍者不能中古法度不能得满百茎长丈者取八十茎已上蓍长八尺即难得也人民好用卦者取满六十茎已上长满六尺者即可用矣记曰能得名龟者财物归之家必大富至千万一曰兆斗龟二曰南辰龟三曰五星龟四曰八风龟五曰二十八宿龟六曰日月龟七曰九州龟八曰玉龟凡八名龟龟图各有文在腹下文云云者此某之龟也畧记其大指不写其图取此龟不必满尺二寸民人得长七八寸可宝矣今夫珠玉宝器虽有所深藏必见其光必出其神明其此之谓乎故玉处于山而木润渊生珠而岸不枯者【集解徐广曰一无不字许氏说淮南以为滋润锤于明珠致令岸枯也】润泽之所加也明月之珠出于江海藏于蚌中蚶蜃伏之【集解徐广曰许氏说淮南云蚶蜃龙属也音决索隐蚶当为蛟蜃音龙注音决误也】王者得之长有天下四夷宾服能得百茎蓍并得其下龟以卜者百言百当足以决吉凶神龟出于江水中庐江郡常岁时生龟长尺二寸者二十枚输太卜官因以吉日剔取其腹下甲龟千岁乃满尺二寸王者发军行将必鑽龟庙堂之上以决吉凶今高庙中有龟室藏内以为神宝传曰取前足臄骨穿佩之【集解徐广曰臄音乃毛反臄臂索隐臄音乃高反一音乃导反】取龟置室西北隅悬之以入深山大林中不惑臣为郎时见万毕石朱方传曰有神龟在江南嘉林中【索隐按万毕术中有石朱方方中说嘉林中故云传曰】嘉林者兽无虎狼鸟无鸱枭草无毒螫野火不及斧斤不至是为嘉林龟在其中常巢于芳莲之上左胁文书曰甲子重光【集解徐广曰子一作于】得我者匹夫为人君有土正【集解徐广曰正长也为有土之官长】诸侯得我为帝王求之于白蛇蟠杆【集解徐广曰一孤反】林中者斋戒以待譊然【索隐按林名白蛇蟠杆林龟藏其中杆音乌谓白蛇尝蟠杆此林中也譊音疑言求龟者斋戒以待恒譊然也】状如有人来告之因以醯酒佗髮【集解徐广曰佗一作被索隐佗音徒我反谓被髮也】求之三宿而得由是观之岂不伟哉故龟可不敬欤南方老人用龟支牀足行二十余岁老人死移牀龟尚生不死龟能行气导引问者曰龟至神若此然太卜官得生龟何为辄杀取其甲乎近世江上人有得名龟畜置之家因

大富与人议欲遣去人教杀之勿遣遣之破人家龟见梦曰送我水中无杀吾也其家终杀之杀之後身死家不利人民与君王者异道人民得名龟其状类不宜杀也以往古故事言之古明王圣主皆杀而用之宋元王时得龟亦杀而用之谨连其事于左方令好事者观择其中焉宋元王二年江使神龟使于河至于泉阳鱼者豫且举网得而囚之【索隐且音子余反泉阳人网元龟者】置之笼中夜半龟来见梦于宋元王曰我为江使于河而幕网当吾路泉阳豫且得我我不能去身在患中莫可告语王有德义故来告诉元王惕然而悟乃召博士卫平而问之【索隐宋元君之臣也】曰今寡人梦见一丈夫延颈而长头衣玄绣之衣而乘辎车来见梦于寡人曰我为江使于河而幕网当吾路泉阳豫且得我我不能去身在患中莫可告语王有德义故来告诉是何物也卫平乃援式而起【集解徐广曰式音勅】仰天而视月之光观斗所指定日处乡规矩为辅副以权衡四维已定八卦相望视其吉凶介虫先见乃对元王曰今昔壬子【索隐今昔犹昨夜也以今日言之谓昨夜为今昔】宿在牵牛河水大会鬼神相谋汉正南北【正义汉天河】江河固期南风新至江使先来白云壅汉万物尽留斗柄指日使者当囚玄服而乘辎车其名为龟王急使人问而求之王曰善于是王乃使人驰而往问泉阳令曰渔者几何家名谁为豫且豫且得龟见梦于王王故使我求之泉阳令乃使吏案籍视图水上渔者五十五家上流之庐名为豫且泉阳令曰诺乃与使者驰而问豫且曰今昔汝渔何得豫且曰夜半时举网得龟【集解駰案庄子曰得白龟圆五尺】使者曰今龟安在曰在笼中使者曰王知子得龟故使我求之豫且曰诺即系龟而出之笼中献使者使者载行出于泉阳之门正昼无见风雨晦冥云盖其上五采青黄雷雨并起风将而行入于端门见于东箱身如流水润泽有光望见元王延颈而前三步而止缩颈而却复其故处元王见而恠之问卫平曰龟见寡人延颈而前以何望也缩颈而复是何当也卫平对曰龟在患中而终昔囚王有德义使人活之今延颈而前以当谢也缩颈而却欲亟去也元王曰善哉神至如此乎不可久留趣驾送龟勿令失期卫平对曰龟者是天下之宝也先得此龟者为天子且十言十当十战十胜生於深渊长于黄土知天之道明于上古游三千岁不出其域安平静正动不用力壽蔽天地莫知其极与物变化四时变色居而自匿伏而不食春苍夏黄秋白冬黑明于陰阳审于刑德先知利害察于祸福以言而当以战而胜王能宝之诸侯尽服王勿遣也以安社稷元王曰龟甚神灵降于上天?于深渊在患难中以我为贤德厚而忠信故来告寡人寡人若不遣也是渔者也渔者利其肉寡人贪其力下为不仁上为无德君臣无礼何从有福寡人不忍奈何勿遣卫平对曰不然臣闻盛德不报重寄不归天与不受天夺之宝今龟周流天下还复其所上至苍天下薄泥涂还徧九州未尝愧辱无所稽留今至泉阳渔者辱而囚之王虽遣之江河必怒务求报仇自以为侵因神与谋淫雨不霁水不可治若为枯旱风而扬埃蝗虫暴生百姓失时王行仁义其罚必来此无他故其崇在龟後虽悔之岂有及哉王勿遣也元王慨然而叹曰夫逆人之使絶人之谋是不暴乎取人之有以自为宝是不强乎寡人闻之暴得者必暴亡强取者必後无功桀纣暴强身死国亡今我听子是无仁义之名而有暴强之道江河为汤武我为桀纣未见其利恐离其咎寡人孤疑安事此宝趣驾送龟勿令久留卫平对曰不然王其无患天地之间累石为山高而不坏地得为安故云物或危而顾安或轻而不可迁人或忠信而不如诞谩【集解徐广曰诞一作詵音土和反索隐诞音由烂切谩音漫又并如字】或丑恶而宜大官或美好佳丽而为衆人患非圣人莫能尽言春秋冬夏或暑或寒寒暑不和贼气相奸同岁异节其时使然故令春生夏长秋收冬藏或为仁义或为暴强暴强有乡仁义有时万物尽然不可胜治大王听臣臣请悉言之天出五色以辨白黑地生五谷以知善恶人

民莫知辨也与禽兽相若谷居而穴处不知田作天下祸乱陰阳相错怱怱疾疾【集解徐广曰一作病】通而不相择妖 数见【正义说文衣服譌謡草木之怪谓之妖禽兽虫蝗之怪谓之 】传为单薄圣人别其生使无相获禽兽有牝牡置之山原鸟有雌雄布之林泽有介之虫置之谿谷故牧人民为之城郭内经闾术外为阡陌夫妻男女赋之田宅列其室屋为之图籍别其名族立官置吏劝以爵禄衣以桑麻养以五谷耕之耰之【集解徐广曰音忧正义耰覆种也说文云耰摩田器】鋤之耨之【集解徐广曰耨除草也】口得所嗜目得所美身受其利以是观之非强不至故曰田者不强困仓不盈【正义说文云圆者谓之困方者谓之廩】商贾不强不得其赢妇女不强布帛不精官御不强其势不成大将不强卒不使令侯王不强没世无名故云强者事之始也分之理也物之纪也所求于强无不有也王以为不然王独不闻玉楮只雉【集解徐广曰只一作?】出于昆山明月之珠出于四海镌石拌蚌【集解徐广曰镌音子旋反拌音判索隐拌割也】传卖于市圣人得之以为大宝大宝所在乃为天子今王自以为暴不如拌蚌于海也自以为强不过镌石于昆山也取者无咎宝者无患今龟使来抵网而遭渔者得之见梦自言是国之宝也王何忧焉兀王曰不然寡人闻之谏者福也谀者贼也人主听谀是愚惑也虽然祸不?至福不徒来天地合气以生百财陰阳有分不离四时十有二月日至为期圣人彻焉身乃无灾明王用之人莫敢欺故云福之至也人自生之祸之至也人自成之祸与福同刑与德双圣人察之以知吉凶桀纣之时与天争功拥遏鬼神使不得通是固已无道矣谀臣有衆桀有谀臣名曰赵梁教为无道劝以贪狼系汤夏台杀关龙逢左右恐死偷谀于傍国危于累卵皆曰无伤称乐万岁或曰未央蔽其耳目与之诈狂汤卒伐桀身死国亡听其谀臣身独受殃春秋着之至今不忘纣有谀臣名为左强夸而目巧教为象郎【集解駰案礼记曰目巧之室郑玄曰但用目巧善意作室不由法度许慎曰象牙郎】将至于天又有玉牀犀玉之器象箸而羹【索隐箸音持虑反则箸即筯为与羹连或云箸樽也记曰羹之有菜者用桵桵者筯也】圣人剖其心壮士斩其脰【集解駰案脰音衡脚胫也】箕子恐死被髮佯狂杀周太子历囚文王昌投之石室【索隐按杀周太子历在囚文王昌之上则近是季历季历不被纣诛则其言近妄无容周更别有太子名历也】将以昔至明陰兢活之【集解徐广曰兢一作竞索隐陰姓兢名也】与之俱亡入于周地得太公望兴卒聚兵与纣相攻文王病死载尸以行太子发代将号为武王战于牧野破之华山之阳纣不胜败而还走围之象郎自杀宣室【集解徐广曰天子之居名曰宣室】身死不葬头悬车轎四马曳行寡人念其如此腸如涓汤【集解徐广曰涓音馆一作沸索隐涓沸也】是人皆富有天下而贵至天子然而大傲欲无厌时举事而喜高贪狼而骄不用忠信听其谀臣而为天下笑今寡人之邦居诸侯之间曾不如秋毫举事不当又安亡逃卫平对曰不然河虽神贤不如崑仑之山江之源理不如四海而人尚夺取其宝诸侯争之兵革为起小国见亡大国危殆杀人父兄虏人妻子残国灭庙以争此宝战攻分争是暴强也故云取之以暴强而治以文理无逆四时必亲贤士与陰阳化鬼神为使通于天地与之为友诸侯宾服民衆殷喜邦家安寧与世更始汤武行之乃取天子春秋着之以为经纪王不自称汤武而自比桀纣桀纣为暴强也固以为常桀为瓦室【集解駰案世本曰昆吾作陶张华博物记亦云桀为瓦盖是昆吾为桀作也】纣为象郎徵丝灼之务以费民【索隐灼谓燔也烧丝以当薪务费人也】赋歛无度杀戮无方杀人六畜以韦为囊囊盛其血与人悬而射之与天帝争强逆乱四时先百鬼尝谏者辄死谀者在傍圣人伏匿百姓莫行天数枯旱国多妖祥螟虫岁生五谷不成民不安其处鬼神不享飘风日起正昼晦冥日月并蚀灭息无光列星奔乱皆絶纪纲以是观之安得久长虽

无汤武时固当亡故汤伐桀武王克纣其时使然乃为天子子孙续世终身无咎後世称之至今不已是皆当时而行见事而强乃能成其帝王今龟大宝也为圣人使传之贤士不用手足雷电将之风雨送之流水行之侯王有德乃得当之今王有德而当此宝恐不敢受王若遣之宋必有咎後虽悔之亦无及已元王大悦而喜于是元王向日而谢【索隐盖欲神之以谢天之质向日者天之光明着见者也】再拜而受择日斋戒甲乙最良乃刑白雉及与骊羊以血灌龟于坛中央以刀剥之身全不伤脯酒礼之横其腹腸荆支卜之必制其创【正义音疮】理达於理文相错迎使工占之所言尽当邦福重宝【集解徐广曰福音副藏也】闻于傍乡杀牛取草被郑之桐【集解徐广曰牛草桐为鼓也】草木毕分化为甲兵战胜攻取莫如元王元王之时卫平相宋宋国最强龟之力也故云神至能见梦于元王而不能自出渔者之笼身能十言尽当不能通使于河还报於江贤能令人战胜攻取不能自解于刀锋免剥刺之患圣能先知亟见而不能令卫平无言言事百全至身而挛当时不利又焉事贤贤者有恒常士有适然是故明有所不见听有所不闻人虽贤不能左画方右画圆日月之明而时蔽於浮云羿名善射不如雄渠蠡门【集解駰案新序曰楚雄渠子夜行见伏石当道以为虎而射之应弦没羽淮南子曰射者重以逢门子之巧刘歆七畧有蠡门射法也】禹名为辩智而不能胜鬼神地柱折天故母椽又奈何责人于全孔子闻之曰神龟知吉凶而骨直空枯【正义凡龟其骨空中而枯也直语发声也今河东亦然】日为德而君于天下辱於三足之乌月为刑而相佐见食于虾蟇蝟辱于鹄【集解郭璞曰蝟能制虎见鹄仰地淮南万毕曰鹄令蝟反腹者蝟憎其意而心恶之也】腾蛇之神而殆于即且【集解郭璞曰腾蛇龙属也螭蛆似蝗大腹食蛇脑也正义即津日反且则余反即吴公也状如蚰蜒而大黑色】竹外有节理中直空虚松栢为百木长而守门间日辰不全故有孤虚【集解駰案甲乙谓之日子丑谓之辰六甲孤虚法甲子旬中无戌亥戌亥即为孤辰巳即为虚甲戌旬中无申酉申酉为孤寅卯即为虚甲申旬中无午未午未为孤子丑即为虚甲午旬中无辰巳辰巳为孤戌亥即为虚甲辰旬中无寅卯寅卯为孤申酉即为虚甲寅旬中无子丑子丑为孤午未即为虚刘歆七畧有风后孤虚二十卷正义按岁月日时孤虚并得上法也】黄金有疵白玉有瑕事有所疾亦有所徐物有所拘亦有所据罔有所数亦有所疎人有所贵亦有所不如何可而适乎物安可全乎天尚不全故世为屋不成三瓦而陈之【集解徐广曰一云为屋成欠三瓦而栋之也索隐刘氏云陈犹居也注作栋音都贡反正义言为屋不成欠三瓦以应天犹陈列而居也】以应之天下有阶物不全【正义言万物及日月天地皆不能全喻龟之不全也】乃生也

褚先生曰渔者举网而得神龟龟自见梦宋元王元王召博士卫平告以梦龟状平运式定日月分衡度视吉凶占龟与物色同平谏王留神龟以为国重宝美矣古者筮必称龟者以其令名所从来久矣余述而为传

三月 二月 正月【正义言正月二月三月右转周环终十二月者日月之龟腹下十二黑点为十二月者二十八宿龟也】十二月

十一月【集解駰案中关内高外下正义此等下至首俛大者皆卜兆之状也】四月 首仰【正义谓兆首仰起】足开

胗开【索隐音琴胗谓兆足歛也】首俛大【索隐俛音免兆首伏也】五月 横吉

首俛大【正义谓兆首伏而大】六月 七月 八月 九月 十月

卜禁日子亥戌不可以卜及杀龟日中如食已卜暮昏龟之微也【索隐微音叫谓微绕不明也】不可以卜庚辛可以杀及以钻之常以月旦祓龟【索隐祓音废又音拂拂洗之以水鸡卵摩之而祝】先以清水澡之以卵祓之【正义以常月朝清水洗之以鸡卵摩而祝之】乃持龟而遂之若尝以为祖【集解徐广曰一作视索隐祖法也言以为常法】人若已卜不中皆祓之以卵东向立灼以荆若刚木土【集解徐广曰一作十一索隐按古之灼龟取生荆枝及生坚木烧之斩断以灼龟按土字合依刘氏说当连下句】卵指之者三【正义言卜不中以土为卵三度指之三周绕之用厌不祥也】持龟以卵周环之祝曰今日吉谨以梁卵煇黄【索隐梁米也卵鸡子也煇灼龟木音次第之第言烧荆枝更通而灼故有煇名一音梯言灼之以渐如有阶梯也黄者以黄绢裹梁卵以祓龟也必以黄者中之色主土而信故用鸡也正义煇音题煇焦也言以梁米鸡卵祓去龟之不祥令灼之不焦不黄若色焦及黄卜之不中也】祓去玉灵之不祥玉灵必信以诚知万事之情辩兆皆可占不信不诚则烧玉灵扬其灰以微後龟其卜必北向龟甲必尺二寸卜先以造【集解徐广曰音竈也】灼钻【索隐造谓烧荆之处物若木也】钻中已又灼龟首各三又复灼所钻中曰正身灼首曰正足【集解徐广曰一作止】各三即以造三周龟祝曰假之玉灵夫子【索隐尊神龟而为之作号】夫子玉灵荆灼而心令而先知而上行于天下行于渊诸灵数籊【集解徐广曰音策索隐数音所具反籊音近策或籊是策之别名此卜筮之书其字亦无可核他皆放此】莫如汝信今日良日行一良贞【集解徐广曰行一作身】其欲卜某即得而喜不得而悔即得发乡我身长大手足收人皆上偶不得发乡我身挫折中外不相应手足灭去

灵龟卜祝曰假之灵龟五筮五灵不如神龟之灵知人死知人生某身良贞某欲求某物即得也头见足发内外相应即不得也头仰足胗内外自随可得占卜占病者祝曰今某病困死首上开内外交骸身节折不死首仰足胗卜病者崇曰今病有崇无呈无崇有呈兆有中崇有内外崇有外

卜系者出不出不出横吉安若出足开首仰有外卜求财物其所当得得首仰足开内外相应即不得呈兆首仰足胗

卜有卖若买臣妾马牛得之首仰足开内外相应不得首仰足胗呈兆若横吉安

卜击盗聚若干人在某所今某将卒若干人往击之当胜首仰足开身正内自桥外下不胜足胗首仰身首【集解徐广曰一作简】内下外高

卜求当行不行行首足开不行足胗首仰若横吉安安不行

卜往击盗当见不见见首仰足胗有外不见足开首仰

卜往候盗见不见见首仰足胗胗胜有外不见足开首仰

卜闻盗来不来来外高内下足胗首仰不来足开首仰若横吉安期之自次

卜迁徙去官不去去足开有外首仰不去自去即足外星兆若横吉安

卜居官尚吉不吉呈兆身正若横吉安不吉身节折首仰足开

卜居室家吉不吉吉呈兆身正若横吉安不吉身节折首仰足开

卜岁中禾稼孰不孰孰首仰足开内外自桥外自垂不孰足外首仰有外

卜岁中民疫不疫疫首仰足外身节有强外不疫身正首仰足开

卜岁中有兵无兵无兵呈兆若横吉安有兵首仰足开身作外强情

卜见贵人吉不吉吉足开首仰身正内自桥不吉首仰身节折足外有外若无渔

卜请谒于人得不得得首仰足开内自桥不得首仰足外有外

卜追亡人当得不得得首仰足外内外相应不得首仰足开若横吉安

卜渔猎得不得得首仰足开内外相应不得足外首仰若横吉安

卜行遇盗不遇遇首仰足开身节折外高内下不遇呈兆

卜天雨不雨雨首仰有外外高内下不雨首仰足开若横吉安

卜天雨霁不霁霁呈兆足开首仰不霁横吉命曰横吉安以占病病甚者一日不死不甚者卜曰瘳不死系者重罪不出轻罪环出过一日不出久毋伤也求财物买臣妾马牛一日环得过一日不得不得行者不行来者环至过食时不至不来击盗不行行不遇闻盗不来徙官不徙居官家室皆吉岁稼不孰民疾疫无疾岁中无兵见人行不行不喜请谒人行不得追亡人渔猎不得行不遇盗雨不雨霁不霁命曰呈兆病者不死系者出行者行来者来市买得追亡人得过一日不得问行者不到

命曰柱彻卜病不死系者出行者行来者来而市买不得忧者母忧追亡人不得

命曰首仰足外有内无外占病病甚不死系者解求财物买臣妾马牛不得行者闻言不行来者不来闻盗不来闻言不至徙官闻言不徙居官有忧居家多灾岁稼中孰民疾疫多病岁中有兵闻言不开见贵人吉请谒不行行不得善言追亡人不得渔猎不得行不遇盗雨不雨甚霁故其莫字皆为首?问之曰备者仰也故定以为仰此私记也

命曰首仰足外有内无外占病病甚不死系者不出求财买臣妾不得行者不行来者不来击

盜不見聞盜來內自驚不來徙官不徙居家室吉歲稼不孰民疾疫有病甚歲中無兵見貴人吉請謁追亡人不得亡財物財物不出得漁獵不得行不遇盜雨不雨霽不霽凶

命曰呈兆首仰足肸以占病不死系者未出求財物買臣妾馬牛不得行不行來不來擊盜不相見聞盜來不來徙官不徙居家久多憂居家室不吉歲稼不孰民病疫歲中毋兵見貴人不吉請謁不得漁獵得少行不遇盜雨不雨霽不霽不吉

命曰呈兆首仰足開以占病病篤死系囚出求財物買臣妾馬牛不得行者行來者來擊盜不見盜聞盜來不來徙官徙居家不久居家室不吉歲稼不孰民疾疫有而少歲中無兵見貴人不見吉請謁追亡人漁獵不得行遇盜雨不雨兩霽小吉

命曰首仰足肸以占病不死系者久毋傷也求財物買臣妾馬牛不得行者不行擊盜不行來者來聞盜來徙官聞言不徙居家室不吉歲稼不孰民疾疫少歲中無兵見貴人得見請謁追亡人漁獵不得行遇盜雨不雨霽不霽吉

命曰首仰足開有內以占病者死系者出求財物買臣妾馬牛不得行者行來者來擊盜行不見盜聞盜來不來徙官徙居家不久居家室不吉歲孰民疾疫有而少歲中無兵見貴人不吉請謁追亡人漁獵不得行不遇盜雨霽霽小吉不霽吉

命曰橫吉內外自橋以占病卜曰毋瘳死系者毋罪出求財物買臣妾馬牛得行者行來者來擊盜合交等聞盜來來徙官徙居家室吉歲孰民疫無疾歲中無兵見貴人請謁追亡人漁獵得行遇盜雨霽雨霽大吉

命曰橫吉內外自吉以占病病者死系不出求財物買臣妾馬牛追亡人漁獵不得行者不來擊盜不相見聞盜不來徙官徙居家有憂居家室見貴人請謁不吉歲稼不孰民疾疫歲中無兵行不遇盜雨不雨霽不霽不吉

命曰漁人以占病者病者甚不死系者出求財物買臣妾馬牛擊盜請謁追亡人漁獵得行者行來聞盜來不來徙官不徙居家室吉歲稼不孰民疾疫歲中毋兵見貴人吉行不遇盜雨不雨霽不霽吉

命曰首仰足肸內高外下以占病病者甚不死系者不出求財物買臣妾馬牛追亡人漁獵得行不行來者來擊盜勝徙官不徙居家有憂無傷也居家室多憂病歲大孰民疾疫歲中有兵不至見貴人請謁不吉行遇盜雨不雨霽不霽吉

命曰橫吉上有仰下有柱病久不死系者不出求財物買臣妾馬牛追亡人漁獵不得行不行來不來擊盜不行行不見聞盜來不來徙官不徙居家室見貴人吉歲大孰民疾疫歲中毋兵行不遇盜雨不雨霽不霽大吉

命曰横吉榆仰以占病不死系者不出求财物买臣妾马牛至不得行不行来不来击盗不行行不见闻盗来不来徙官不徙居官家室见贵人吉岁孰岁中有疾疫毋兵请谒追亡人不得渔猎至不得行不得行不遇盗雨霁不霁小吉

命曰横吉下有柱以占病病甚不坏有瘳无死系者出求财物买臣妾马牛请谒追亡人渔猎不得行来不来击盗不合闻盗来来徙官居官吉不久居家室不吉岁不孰民无疾疫岁中毋兵见贵人吉行不遇盗雨不雨霁小吉

命曰载所以占病环有瘳无死系者出求财物买臣妾马牛请谒追亡人渔猎得行者行来者来击盗相见不相合闻盗来来徙官徙居家室忧见贵人吉岁孰民无疾疫岁中无兵行不遇盗雨不雨霁吉命曰根格以占病者不死系久毋伤求财物买臣妾马牛请谒追亡人渔猎不得行不行来不来击盗盗行不合闻盗不来徙官不徙居家室吉岁稼中民疾疫无死见贵人不得见行不遇盗雨不雨大吉命曰首仰足胗外高内下卜有忧无伤也行者不来病久死求财物不得见贵人者吉

命曰外高内下卜病不死有崇而市买不得居官家室不吉行者不行来者不来系者久毋伤吉

命曰头见足发有内外相应以占病者起系者出行者行来者来求财物得吉

命曰呈兆首仰足开以占病病甚死系者出有忧求财物买臣妾马牛请谒追亡人渔猎不得行不行来不来击盗不合闻盗来来徙官居官家室不吉岁恶民疾疫无死岁中毋兵见贵人不吉行不遇盗雨不雨霁不吉

命曰呈兆首仰足开外高内下以占病不死有外崇系者出有忧求财物买臣妾马牛相见不会行行来闻言不来击盗胜闻盗来不来徙官居官家室见贵人不吉岁中民疾疫有兵请谒追亡人渔猎不得闻盗遇盗雨不雨霁凶

命曰首仰足胗身折内外相应以占病病甚不死系者久不出求财物买臣妾马牛渔猎不得行不行来不来击盗有用胜闻盗来来徙官不徙居官家室不吉岁不孰民疾疫岁中有兵不至见贵人喜请谒追亡人不得遇盗凶

命曰内格外垂行者不行来者不来病者死系者不出求财物不得见人不见大吉

命曰横吉内外相应自桥榆仰上柱上柱足足胗以占病病甚不死系久不抵罪求财物买臣妾马牛请谒追亡人渔猎不得行不行来不来居官家室见贵人吉徙官不徙岁不大孰民疾疫有兵有兵不会行遇盗闻言不见雨不雨霁霁大吉

命曰头仰足胗内外自随卜忧病者甚不死居官不得居行者行来者不来求财物不得求人

不得吉命曰横吉下有柱卜来者来卜曰即不至未来卜病者过一日毋瘳死行者不行求财物不得系者出命曰横吉内外自举以占病者久不死系者久不出求财物得而少行者不行来者不来见贵人见吉命曰内高外下疾轻足发求财物不得行者行病者有瘳系者不出来者来见贵人不见吉

命曰外格求财物不得行者不行来者不来系者不出不吉病者死求财物不得见贵人见吉

命曰内自举外来正足发者行来者来求财物得病者久不死系者不出见贵人见吉

此横吉上柱外内内自举足胗以卜有求得病不死系者毋伤未出行不行来不来见人不见百事尽吉此横吉上柱外内自举柱足以作以卜有求得病死环起系留毋伤环出行不行来不来见人不见百事吉可以举兵

此挺诈有外以卜有求不得病不死数起系祸罪闻言毋伤行不行来不来

此挺诈有内以卜有求不得病不死数起留祸罪无伤系出行不行来者不来见人不见

此挺诈内外自举以卜有求得病不死系毋罪行行来来田贾市渔猎尽喜

此狐貉以卜有求不得病死难起系留毋罪难出可居宅可娶妇嫁女行不行来不来见人不见有忧不忧

此狐彻以卜有求不得病者死系留有抵罪行不行来不来见人不见言语定百事尽不吉

此首俯足胗身节折以卜有求不得病者死留系有罪望行者不来行行来不来见人不见

此挺内外自垂以卜有求不晦病不死难起系留毋罪难出行不行来不来见人不见不吉

此横吉榆仰首俯以卜有求难得病难起不死系难出毋伤也可居家室以娶妇嫁女

此横吉上柱载正身节折内外自举以卜病者卜日不死其一日乃死

此横吉上柱足胗内自举外自垂以卜病者卜日不死其一日乃死

为人病首俯足诈有外无内病者占龟未已急死卜轻失大一日不死

首仰足胗以卜有求不得以系有罪人言语恐之毋伤行不行见人不见

大论曰【索隐按褚先生所取太卜杂占卦体及命兆之辞义芜辞重殆无足采凡此六十七

条别是也】外者人也内者自我也外者女也内者男也首俛者忧大者身也卜者枝也大法病者足矜者生足开者死行者足开至足矜者不至行者足矜不行足开行有求足开得足矜者不得系者足矜不出开出其卜病也足开而死者内高而外下也

【索隐述赞曰三王异龟五帝殊卜或长或短若瓦若玉其记已亡其繇後续江使触网见留宋国神能托梦不卫其足】

史记卷一百二十八

史记卷一百二十八考证

龟策列传○史通曰寻列传所编者惟人而已至于龟策异物不类肖形而辄与黔首同科俱谓之传不其恠乎且龟策所记全为志体向若以八书齐列而定以书名庶几物得其朋同声相应者矣

故玉处于山而木润渊生珠而岸不枯者○语本文子及荀子

宋元王时得龟亦杀而用之○事出庄子外物篇褚先生讹元公为元王

鱼者豫且○庄子作余且

教为象郎集解许慎曰象牙郎○陈子龙曰郎之与廊古字通用也象郎似以象饰室之名或作绘象如後世画室之意二义俱通观後围之象郎知定是室也

以韦为囊囊盛其血与人悬而射之与天帝争强○殷本纪作武乙

史记卷一百二十八考证

卷一百二十九

钦定四库全书

史记卷一百二十九

汉太史令司马迁撰宋中郎外兵曹参军裴駰集解

唐国子博士弘文馆学士司马贞索隐

唐诸王侍读率府长史张守节正义

货殖列传第六十九

【索隐论语云赐不受命而货殖焉广雅云殖立也孔安国注尚书云殖生也生资货财利也】

老子曰至治之极邻国相望【正义音亡】鸡狗之声相闻民各甘其食美其服安其俗乐其业至老死不相往来必用此为务挽近世涂民耳目则几无行矣【索隐挽音晚古字通用】太史公曰夫神农以前吾不知已至若诗书所述虞夏以来耳目欲极声色之好口欲穷刍豢之味身安逸乐而心夸矜势能之荣使俗之渐民久矣虽户说以眇论终不能化【索隐眇音妙论如字】故善者因之其次利道之其次教诲之其次整齐之最下者与之争夫山西饶村竹穀纁【集解徐广曰紵属可以为布索隐穀音谷又音雌木名皮可为纸纁山中紵可以为布音卢紵音伫今山间野紵亦作苳】旄玉石山东多鱼盐漆丝声色江南出柁梓【索隐南子二音】姜桂金锡连【集解徐广曰音莲鋈之未链者】丹沙犀瑇瑁珠玕齿革龙门碣石【正义龙门山在徐州龙门县碣石山在平州卢龙县】北多马牛羊旄裘筋角铜铁则千里往往山出碁置【索隐言如置碁子往往有之正义言出铜铁之山方千里如围碁之置也管子云凡天下名山五千二百七十出铜之山四百六十七出铁之山三千六百有九山上赭其下有铁山上有铅其下有银山上有银其下有丹山上有石其下有金也】此其大较也【索隐较音角大较犹大畧也】皆中国人民所喜好謡俗被服饮食奉生送死之具也故待农而食之虞而出之工而成之商而通之此寧有政教发徵期会哉人各任其能竭其力以得所欲故物贱之徵贵【索隐徵言求也谓此处物贱求彼贵卖之】贵之徵贱各劝其业乐其事若水之趋下日夜无休时不召而自来不求而民出之岂非道之所符而自然之验邪【索隐符谓合于道也】周书曰农不出则乏其食工不出则乏其事商不出则三宝絶虞不出则财匱少财匱少而山泽不辟矣【索隐辟音辟辟开也通也】此四者民所衣食之原也原大则饶原小则鲜上则富国下则富家贫富之道莫之夺予【索隐予音与言贫富自由无夺予也】而巧者有余拙者不足故太公望封于营丘地泻卤【集解徐广曰泻音昔泻卤咸地也】

人民寡于是太公劝其女功极技巧通鱼盐则人物归之繙至而辐凑故齐冠带衣履天下海岱之间歛衽而往朝焉【索隐言齐既富饶能冠带天下丰厚被于他邦故海岱之间歛衽而朝齐言超利者也】其後齐中衰管子修之设轻重九府【正义管子云轻重谓钱也夫治民有轻重之法周有大府玉府内府外府泉府天府职内职金职币皆掌财币之官故曰九府也】则桓公以霸九合诸侯一匡天下而管氏亦有三归位在陪臣富于列国之君是以齐富强至于威宣也故曰仓廩实而知礼节衣食足而知荣辱礼生于有而废于无故君子富好行其德小人富以适其力渊深而鱼生之山深而兽往之人富而仁义附焉富者得势益彰失势则客无所之以而不乐夷狄益甚谚曰千金之子不死于市此非空言也故曰天下熙熙皆为利来天下壤壤皆为利往夫千乘之王万家之侯百室之君尚犹患贫而况匹夫编户之民乎

昔者越王勾践困于会稽之上乃用范蠡计然【集解徐广曰计然者范蠡之师也名研故谚曰研桑心筭駟案范子曰计然者葵丘濮上人姓辛氏字文子其先晋国亡公子也尝南游于越范蠡师事之索隐韦昭云计然范蠡师也蔡谟云蠡所着书名计然盖非也吴越春秋谓之计倪汉书古今人表计然列在第四则倪之与研是一人声相近而相乱耳】计然曰知鬪则修?时用则知物【索隐言知时所用之物】二者形则万货之情可得而观已故岁在金穰水毁木饥火旱【索隐五行不说土者土穰也】旱则资舟水则资车【索隐国语大夫种曰贾人旱资舟水资车以待也】物之理也六岁穰六岁旱十二岁一大饥夫桀二十病农九十病末【索隐言米贱则农人病也故云病农若米斗直九十则商贾病故云病末末谓逐末为商贾也】末病则财不出农病则草不辟矣上不过八十下不减三十则农末俱利平桀齐物关市不之治国之道也积着之理【索隐着音张吕反】务完物无息币【索隐久停息货物则无利】以物相贸易腐败而食之货勿留无敢居贵论其有余不足则知贵贱贵上极则反贱贱下极则反贵贵出如粪土贱取如珠玉【索隐夫物极贵必贱极贱必贵贵出如粪土者既极贵後恐其必贱故乘时出之如粪土贱取如珠玉者既极贱後恐其必贵故乘时取之如珠玉此所以为货殖】财币欲其行如流水修之十年国富厚赂战士士赴矢石如渴得饮遂报强吴观兵中国称号五霸范蠡既雪会稽之耻乃喟然而叹曰计然之策七越用其五而得意既已施于国吾欲用之家乃乘扁舟【集解汉书音义曰特舟也索隐扁音篇又音符殄反国语云范蠡乘轻舟】浮于江湖【正义国语云勾践灭吴及至五湖范蠡辞于王曰君王勉之臣不复入国矣遂乘轻舟以入于五湖莫知其所终极】变名易姓适齐为鸱夷子皮【索隐大顔云若盛酒之鸱夷也用之则多所容纳不用则可卷而怀之不忤于物也按韩子云鸱夷子皮事田成子成子去齐之燕子皮乃从之盖范蠡也】之陶【正义括地志云即陶山在齐州平阳县东三十五里陶山之阳也县南五里犹有朱公冢又云曹州济阳县东南三里有陶朱公冢又云在南郡华容县西未详也索隐服?云陶今定陶也】为朱公朱公以为陶天下之中诸侯四通货物所交易也乃治产积居与时逐【集解駟案汉书音义曰逐时而居货索隐韦昭云随时逐利也】而不责于人【索隐按谓择人而与人不负之故云不责于人也】故善治生者能择人而任时十九年之中三致千金再分散与贫交疏昆弟此所谓富好行其德者也後年衰老而听子孙子孙修业而息之遂至巨万【集解徐广曰万万也】故言富者皆称陶朱公

子贡既学于仲尼退而仕于卫废着鬻财于曹鲁之间【集解徐广曰子贡传云废居着犹居

也着读音如贮索隐汉书亦作贮说文云贮积也】七十子之徒赐最为饶益原宪不厌糟糠【索隐厌饱也】匿于穷巷子贡结驷连骑东帛之币以聘享诸侯所至国君无不分庭与之抗礼夫使孔子名布扬于天下者子贡先後之也此所谓得势而益彰者乎

白圭周人也当魏文侯时李克务尽地力【索隐案汉书食货志李悝为魏文侯作尽地力之教国以富强今此及汉书言克皆误也刘向别录则云李悝也】而白圭乐观时变故人弃我取人取我与夫岁孰取谷予之丝漆蠶凶取帛絮与之食【索隐食谓谷也】太陰在卯穰【正义太陰岁後二辰为太陰】明岁衰恶至午旱明岁美至酉穰明岁衰恶至子大旱明岁美有水至卯积着率【正义贮律二音】岁倍欲长钱取下谷长石斗取上种能薄饮食忍嗜欲节衣服与用事僮仆同苦乐趋时若猛兽挚鸟之发故曰吾治生产犹伊尹吕尚之谋孙吴用兵商鞅行法是也是故其智不足与权变勇不足以决断仁不能以取予强不能有所守虽欲学吾术终不告之矣盖天下言治生祖白圭白圭其有所试矣能试有所长非苟而已也

猗顿用鹽盐起【集解孔丛曰猗顿鲁之穷士也耕则常饥桑则常寒闻朱公富往而问术焉朱公告之曰子欲速富当畜五?于是乃适西河大畜牛羊于猗氏之南十年之间其息不可计赀拟王公驰名天下以兴富于猗氏故曰猗顿索隐鹽音古按周礼盐人云共苦盐杜子春以为苦读如鹽谓出盐直用不炼也一说云鹽盐河东大鹽散盐东海煮水为盐也正义按猗氏蒲州县也河东盐池是畦盐作畦若种韭一畦天雨下池中鹹淡得均即畎池中水上畔中深一尺许以日暴之五六日则成盐若白矾石大小如双陆及暮则呼为畦盐或有花盐缘黄河盐池有八九所而盐州有乌池犹出三色盐有井盐畦盐花盐其池中凿井深一二尺去泥即到盐掘取若至一丈则着平石无盐矣其色或白或青黑名曰井盐畦盐若河东者花盐池中有下随而大小成盐其下方微空上头随雨下池中其滴高起若塔子形处曰花盐赤白即成盐焉池中心有泉井水淡所作池人马尽汲此井其盐四分入官一分入百姓也池中又凿得盐块濶一尺余高二尺白色光明洞彻年贡之也】而邯郸郭纵以铁冶成业与王者埒富乌氏倮【集解韦昭曰乌氏县名属安定倮名也索隐汉书作羸乌氏县名音支倮音鲁可反正义县古城在泾州安定县东四十里倮名也】畜牧及衆斥卖求奇物间【集解徐广曰间一作奸不以公正谓之奸也】献遗戎王【索隐谓畜牧及至衆多之时斥而卖之以求奇物也间献犹私献也】戎王什倍其偿与之畜【索隐谓戎王偿之牛羊十倍也】畜至用谷量马牛【集解韦昭曰满谷则具不复数索隐谷音欲】秦始皇帝令倮比封君以时与列臣朝请而巴蜀寡妇清【索隐汉书作巴寡妇清巴寡妇之邑清其名】其先得丹穴【集解徐广曰涪陵出丹正义括地志云寡妇清台山俗名贞女山在涪州永安县东北七十里也】而擅其利数世家亦不訾【正义音子见反言资财衆多不可訾量一云清多以财饷遗四方用卫其业故财亦不多积聚】清寡妇也能守其业用财自卫不见侵犯秦皇帝以为贞妇而客之为筑女怀清台夫倮鄙人牧长清穷乡寡妇礼抗万乘名显天下岂非以富邪汉兴海内为一开关梁弛山泽之禁是以富商大贾周流天下交易之物莫不通得其所欲而徒豪杰诸侯强族于京师关中自汧雍以东至河华膏壤沃野千里自虞夏之贡以为上田而公刘适邠太王王季在岐文王作丰武王治镐故其民犹有先王之遗风好稼穡殖五谷地重【索隐言重于耕稼也】重为邪【索隐重音逐陇反重者难也畏言不敢为奸邪正义重并逐拱反言关中地重厚民亦重难不为邪恶】及秦文孝繆居雍隙【集解徐广曰隙者间孔也地居陇蜀之

间要路故曰隙正义雍岐州雍县也】陇蜀之货物而多贾【索隐贾音古】献孝公徙栎邑【集解徐广曰在冯翊索隐栎音药即栎阳】栎邑北却戎翟东通三晋亦多大贾武昭治咸阳因以汉都长安诸陵四方辐凑并至而会地小人衆故其民益玩巧而事末也南则巴蜀巴蜀亦沃野地饶庀【集解徐广曰音支烟支也紫赤色也】姜丹沙石铜铁【集解徐广曰邛都出铜临邛出铁】竹木之器南御滇僊僊僊西近邛笮笮马旄牛然四塞栈道千里无所不通唯褒斜绾毂其口【集解徐广曰在汉中索隐言褒斜道狭绾其道口有若车毂之凑故云绾毂也】以所多易所鲜【索隐易音亦鲜音渺言以所多易其所少】天水陇西北地上郡与关中同俗然西有羌中之利北有戎翟之畜畜牧为天下饶然地亦穷险唯京师要其道【正义要音腰言要束其路也】故关中之地于天下三分之一而人衆不过什三然量其富什居其六昔唐人都河东【集解徐广曰尧都晋阳也】殷人都河内周人都河南夫三河在天下之中若鼎足王者所更居也建国各数百千岁土地小狭民人衆都国诸侯所聚会故其俗纖俭习事杨平阳陈西贾秦翟【正义贾音古秦関内也翟隰石等州部落稽也延绥银三州皇白翟所居】北贾种代【正义种之勇反种在恒州石邑县北盖蔚州也代今代州】种代石北也【集解徐广曰石邑县也在常山索隐杨平阳二邑名在赵之西陈盖衍字以下有杨平阳陈橡因此衍也言二邑之人皆西贾于秦翟北贾于种代种代在石邑之北也】地边胡数被寇人民矜慎伎【集解晋灼曰慎音慨伎音坚瓚曰慎音慨今北土名强直为慎中也索隐慎音冀伎音真】好气任侠为奸不事农商然迫近北夷师旅亟往中国委输时有奇羨【索隐奇音羁羨音羊战反奇羨谓时有余衍也】其民羯羗不均【集解徐广曰羗音兕一音囚几反皆健羊名索隐羯音已纡反羗音慈纪反言其方人性若羊捷悍而不均也】自全晋之时固已患其僇悍而赵武灵王益厉之其謡俗犹有赵之风也故杨平阳陈橡其间得所欲【索隐橡音逐缘反陈橡犹经营驰逐也】温軹西贾上党【正义泽潞等州也】北贾赵中山【索隐温軹二县名属河内正义洛州及定州】中山地薄人衆犹有沙丘紂淫地余民【集解晋灼曰言地薄人衆犹复有沙丘紂淫地余民通系之于淫风而言之正义沙丘在邢州也】民俗僇急【集解徐广曰僇急也音绢一作僇一作惠音翽也】仰机利而食丈夫相聚游戲悲歌忼慨起则相随椎剽【索隐椎即椎杀人而剽掠之】休则掘冢作巧奸冶【集解徐广曰一作蛊】多美物【集解徐广曰美一作弄一作推】为倡优女子则鼓鸣瑟跕屣【集解徐广曰跕音帖张晏曰舞屣也瓚曰蹶跟为跕也索隐屣音所绮反】游媚贵富入後宫徧诸侯然邯鄲亦漳河之间【正义洛水本名漳水邯鄲在其地】一都会也北通燕涿南有郑卫郑卫俗与赵相类然近梁鲁微重而矜节【集解徐广曰矜一作务】濮上之邑徙野王【集解徐广曰卫君角徙野王正义秦拔卫濮阳徙其君于怀州野王】野王好气任侠卫之风也夫燕亦勃碣之间【正义勃海碣石在西】一都会也南通齐赵东北边胡上谷至辽东地踔远【索隐刘氏踔音卓一音勅教反亦远腾貌也】人民希数被寇大与赵代俗相类而民雕悍少虑【索隐言如雕性之捷悍也】有鱼盐枣栗之饶北邻乌桓夫余【索隐邻一作临临者亦却背之义他并类此】东绾秽貉朝鲜真番之利【索隐绾者绾统其要津则上云临者谓却背之也正义番音潘】洛阳东贾齐鲁南贾梁楚故泰山之阳则鲁其陰则齐齐带山海【集解徐广曰齐世家曰齐自泰山属之琅琊北被于海膏壤二千里其民濶达多匿智】膏壤千里宜桑麻人民多文彩布帛鱼盐临淄亦海岱之间一都会也其俗寛缓濶达而足智好议论地重难动摇怯于衆鬪勇于持刺故多劫人者大国之风也其中具五民【集解服?曰士农工商贾也如淳曰游子乐其俗不复归故有五方之民】而邹鲁滨洙泗犹有周公遗

风俗好儒备于礼故其民龊龊【索隐龊音则角反又音恻断反】颇有桑麻之业无林泽之饶地小人衆俭嗇畏罪远邪及其衰好贾趋利甚于周人夫自鸿沟以东【集解徐广曰在荥阳】芒碭以北【集解徐广曰今为临淮】属巨野【正义郛州钜野县在钜野泽也】此梁宋也【集解徐广曰今陶之浚仪正义鸿沟以东芒碭以北至钜野梁宋二国之地】陶睢阳【正义今曹州睢阳今宋州宋城也】亦一都会也【集解徐广曰今之定陶】昔尧作游成阳【集解如淳曰作起也成阳在定陶】舜渔于雷泽【集解徐广曰在成阳正义泽在雷泽县西北也】汤止于亳【集解徐广曰今梁国薄县正义宋州谷熟县西南四十五里南亳州故城是也】其俗犹有先王遗风重厚多君子好稼穡虽无山川之饶能恶衣食致其畜藏越楚则有三俗【正义越灭吴则有江淮以北楚灭越兼有吴越之地故言越楚也】夫自淮北沛陈汝南南郡此西楚也【正义沛徐州沛县也陈今陈州也汝汝州也南郡今荆州也言从沛郡西至荆州并西楚也】其俗剽轻易发怒地薄寡于积聚江陵故郢都【正义荆州江陵县故为郢楚之都】西通巫巴【正义巫郡巴郡在江陵之西也】东有云梦之饶【集解徐广曰在华容】陈在楚夏之交【正义夏都阳城言陈南则楚西及北则夏故云楚夏之交】通鱼盐之货其民多贾徐僮取虑【集解徐广曰皆在下邳正义取音秋虑音闾徐即徐城故徐国也僮取虑二县并在下邳今泗州】则清刻矜已诺【正义已音纪】彭城以东东海吴广陵此东楚也【正义彭城徐州治县也东海郡今海州也吴苏州也广陵扬州也言从徐州彭城历扬州至苏州并东楚之地】其俗类徐僮胸繒以北俗则齐【正义胸其俱反县在海州故繒县在沂州之丞县言二县之北风俗同于齐】浙江南则越夫吴自阖庐春申王濞三人招致天下之喜游子弟东有海盐之饶章山之铜三江五湖之利亦江东一都会也衡山【集解徐广曰都邾邾县属江夏正义故邾城在潭州东南百二十里】九江【正义九江郡都陰陵陰陵故城在濠州定远县西六十五里】江南【集解徐广曰高帝所置江南者丹阳也秦置为鄣郡武帝改名丹阳正义按徐说非秦置鄣郡在湖州长城县西南八十里鄣郡故城是也汉改为丹阳郡徙郡宛陵今宣州地也上言吴有章山之铜明是东楚之地此言大江之南豫章长沙二郡南楚之地耳徐氏裴氏以为江南丹阳郡属南楚误之甚矣】豫章【正义今洪州也】长沙【正义今潭州也十三州志云有万里沙祠而西自湘州至东莱万里故曰长沙也淮南衡山九江二郡及江南豫章长沙二郡并为楚也】是南楚也其俗大类西楚郢之後徙壽春【正义楚考烈王二十二年自陈徙都壽春号之曰郢故言郢後徙壽春也】亦一都会也而合肥受南北潮【正义合肥县庐州治也言江淮之潮南北俱至庐州也】皮革鲍木输会也与闽中于越杂俗【集解徐广曰在临淮】故南楚好辞巧说少信江南卑湿丈夫早夭多竹木豫章出黄金【集解徐广曰鄱阳有之正义括地志云江州浔阳县有黄金山山出金】长沙出连锡然堇堇【正义音谨】物之所有取之不足以更费【集解应劭曰堇少也更偿也言金少少耳取之不足用故费用也】九疑【集解徐广曰山在营道县南】苍梧以南至儋耳者【正义今儋州在海中广州南去京七千余里言岭南至儋耳之地与江南大同俗而扬州之南越民多焉】与江南大同俗而扬越多焉番禺【正义潘虞二音今广州】亦其一都会也珠玕犀瑇瑁果布之凑【集解韦昭曰果谓龙眼离支之属布葛布】

颍川南阳夏人之居也【集解徐广曰禹居阳翟正义禹居阳城颍川南阳皆夏地也】夏人政尚忠朴犹有先王之遗风颍川敦愿秦末世迁不轨之民于南阳南阳西通武关郢关【集解徐广曰按汉中亦作狗字索隐郢音云正义武关在商州地理志云宛西通武关而无郢关】

盖郾当为狗狗水上有关在金州洵阳县徐按汉中是也狗亦作郾与郾相似也】东南受江淮宛亦一都会也俗杂好事业多贾其任侠交通颍川故至今谓之夏人夫天下物所鲜所多人民謡俗山东食海盐山西食盐卤【正义谓西方咸地也坚且咸即出石盐及池盐】领南沙北【正义谓池汉之北也】固往往出盐大体如此矣总之楚越之地地广人希饭稻羹鱼或火耕而水耨【集解徐广曰乃邁反除草也正义言风草下种苗生大而草生小以水灌之则草死而苗无损也耨除草也】果隋【集解駉案徐广曰地理志作蓊索隐隋音徒火反蓊音郎果反】羸蛤【正义隋今为摇音同上古少字也羸力和反果摇犹摇叠包裹也今楚越之俗尚有裹摇之语楚越水乡足螺鱼蟹民多采捕积聚摇叠包裹煮而食之班固不晓裹摇之方言修太史公书述地志乃故云果蓊羸蛤非太史公意班氏失之也】不待贾而足【正义贾音古言楚越地势饶食不用他贾而自足无饥馑之患】地势饶食无饥馑之患以故眚羸【集解徐广曰音紫眚羸苟且堕嬾之谓也駉案应劭曰眚弱也晋灼曰羸病也索隐羸音庾正义按食螺蛤等物故多羸弱而足病也淮南子云古者民食羸蛛之肉多疹毒之患也】偷生无积聚【正义言江淮以南有水族民多食物朝夕取给以偷生而已不为积聚乃多贫也】而多贫是故江淮以南无冻饿之人亦无千金之家沂泗水以北宜五谷桑麻六畜地小人衆数被水旱之害民好畜藏故秦夏梁鲁好农而重民三河宛陈亦然加以商贾齐赵设智巧仰机利燕代田畜而事蚕由此观之贤人深谋于廊庙论议朝廷守信死节隐居岩穴之士设为名高者安归乎归於富厚也是以廉吏久久更富廉贾归富【集解駉案归者取利而不停货也】富者人之情性所不学而俱欲者也故壮士在军攻城先登?阵却敌斩将搴旗前蒙矢石不避汤火之难者为重赏使也其在闾巷少年攻剽椎埋劫人作奸掘冢铸币任侠并兼借交报仇篡逐幽隐不避法禁走死地如骛【集解徐广曰骛一作流】其实皆为财用耳今夫赵女郑姬设形容揄鸣琴揄长袂蹑利屣【集解徐广曰揄音舆蹑一作跼跼音吐协反屣音山耳反舞屣也】目挑【正义田乌反】心招出不远千里不择老少者奔富厚也游闲公子饰冠劔连车骑亦为富贵容也弋射渔猎犯晨夜冒霜雪驰阮谷不避猛兽之害为得味也博戏驰逐鬪鸡走狗作色相矜必争胜者重失负也医方诸食技术之人焦神极能为重糒也吏士舞文弄法刻章伪书不避刀锯之诛者没于赂遗也农工商贾畜长固求富益货也此有知尽能索耳终不余力而让财矣谚曰百里不贩樵千里不贩粳居之一岁种之以谷十岁树之以木百岁来之以德德者人物之谓也今有无秩禄之奉爵邑之入而乐与之比者命曰素封【索隐谓无爵邑之入禄秩之奉则曰素封素空也正义言不仕之人自有园田收养之给其利抵于封君故曰素封也】封者食租税岁率【正义音律】户二百千户之君则二十万【索隐户率二百故千户二十万】朝覲聘享出其中庶民农工商贾率亦岁万息二千户百万之家则二十万【索隐率二千故百万之家亦二十万】而更徭租赋出其中衣食之欲恣所好美矣故曰陆地牧马二百蹄【集解駉案汉书音义曰五十匹索隐按马有四足二百蹄有五十匹也汉书则云马蹄噉千所记各异】牛蹄角千【集解駉案汉书音义曰百六十七头也马贵而牛贱以此为率】千足羊泽中千足鼃【集解韦昭曰二百五十头】水居千石鱼陂【集解徐广曰鱼以斤两为计也索隐陂音波汉书作波音同正义言陂泽养鱼一岁收得千石鱼卖也】山居千章之林【集解徐广曰一作楸駉案韦昭曰楸木所以为轅音秋索隐汉书作千章之萩服?云章方也故孟康亦云言任方章者千枚谓章大林也乐彦云萩梓木也可以为轅者】安邑千树枣燕秦千树栗蜀汉江陵千树橘淮五常山已南河济之间千树萩陈夏千亩漆齐鲁千亩桑麻渭川千亩竹及名国万家之城带郭千亩亩鍾之田【集解

徐广曰六斛四斗也】若千亩卮茜【集解徐广曰卮音支鲜支也茜音倩一名红蓝其花染缯赤黄也】千畦姜韭【集解徐广曰千畦二十五亩駟案韦昭曰畦犹墦】此其人皆与千户侯等然是富给之资也不窥市井不行异邑坐而待收身有处士之义而取给焉若至家贫亲老妻子软弱岁时无以祭祀进醵饮食【集解徐广曰会聚食索隐醵音渠略反】被服不足以自通如此不惭耻则无所比矣是以无财作力少有鬪智【正义言少有钱财则鬪智巧而求胜也】既饶争时【正义既饶足钱财乃逐时争利也】此其大经也今治生不待危身取给则贤人勉焉是故本富为上末富次之奸富最下无岩处奇士之行而长贫贱好语仁义亦足羞也凡编户之民富相什则卑下之伯则畏憚之千则役万则仆物之理也夫用贫求富衣不如工工不如商刺绣文不如倚市门此言末业贫者之资也通邑大都酤一岁千酿【正义釀千瓮酤醢醋云酒酤】醢醬千?【集解徐广曰长颈罍索隐?音闲江反】醬千甌【集解徐广曰大罍缶索隐音都甘反汉书作儋孟康曰儋石罍石罍受一石故云儋石一音都滥反】屠牛羊彘千皮贩谷棗千鍾【集解徐广曰出谷也棗音掉也】薪橐千车船长千丈【索隐摠积数长千丈】木千章【集解駟案汉书音义曰洪洞方橐章材也旧将作大匠掌材曰章曹掾索隐洪音胡孔反洞音动又并如字】竹竿万个【集解徐广曰古贺反正义释名云竹曰个木曰枚】其辒辌车百乘【集解徐广曰马车也正义辒音遥说文云辒小车也】牛车千两【正义车一乘为一两风俗通云箱輶及轮两两而偶之称两也】木器髹者千枚【集解徐广曰髹音休漆也正义顔云以漆物谓之髹又音许昭反今閩东俗器物一再漆者谓之稍漆即髹声之转耳今关西俗云里髹盘朱两义并通】铜器千钧【集解徐广曰三十斤】素木铁器若卮茜千石【集解徐广曰百二十斤为石駟案汉书音义曰素木素器也】马蹄躐千【集解徐广曰躐苦吊反马八髀音料索隐埤苍云尻骨谓八髀一曰夜蹄小顔云躐口也蹄与口共千则为二百疋若顾胤则云上文马二百蹄与千户侯等此蹄躐千比千乘之家不容亦二百则穷谓九穷通四三而成一马所谓生之徒十有三也】牛千足羊彘千双僮手指千【集解駟案汉书音义曰僮奴婢也古者无空手游日皆有作务作务须手指故曰手指以别马牛蹄角也】筋角丹沙千斤其帛絮细布千钧文采千匹榻布皮革千石【集解徐广曰榻音吐合反駟案汉书音义曰榻布白叠也正义顔师古曰麤?之布也其价贱故与皮革同重耳非白叠也荅者?之貌也按白叠本绵所织非中国有也】漆千斗麩麴盐?千荅【集解徐广曰或作合器名有甗孙叔敖云甗瓦器受斗六升合为甗音贻】鲐魮千斤【集解駟案汉书音义曰音如楚人言荠魮鱼与鲐鱼也正义鲐音台又音贻说文云鲐海鱼也魮音齐礼反刀鱼也】鰕千石鲍千钧【集解徐广曰鰕音辄鰕鱼也正义鰕音族苟反谓杂小鱼也鲍白也然鲐魮以斤论鲍鰕以千钧论乃其九倍多故知鲐是大好者鰕鲍是杂者也徐云鰕膊鱼也膊并各反谓破开中头尾不相离为鲍谓之膊閔者也此亦大鱼为之也】枣栗千石者三之【正义谓三千石也言枣栗三千石乃与上物相等】狐鼯【正义音雕】裘千皮羔羊裘千石旃席千具佗果菜千鍾【正义鍾六斛四斗果菜谓杂果菜于山野采取之】子贷金钱千贯节组会【集解徐广曰组音祖郎反马侏也駟案汉书音义曰会亦是侏也节节物贵贱也谓估侏其余利比千乘之家】贪贾三之廉贾五之【集解駟案汉书音义曰贪贾未当卖而卖未当买而买故得利少而十得三廉贾贵而卖贱乃买故十得五】此亦比千乘之家其大率也【正义率音律】佗杂业不中什二【正义言杂恶业而不在什分中得二分之利者非世之美财也】则非吾财也请略道当世千里之中贤人所以富者令後世得以观择焉

蜀卓氏之先【集解徐广曰卓一作淖】赵人也用铁冶富秦破赵迁卓氏卓氏见虏畧独夫妻推辇行诣迁处诸迁虏少有余财争与吏求近处处葭萌【集解徐广曰属广汉正义葭萌今利州县也】唯卓氏曰此地狭薄吾闻汶山之下沃野下有蹲鸱【集解徐广曰古蹲字作踃駟案汉书音义曰水乡多鸱其山下有沃野灌溉一曰大芋正义汶音珉蹲鸱芋也言邛州临邛县其地肥又沃平野有大芋等也华阳国志云汶山郡安上县有大芋如蹲鸱也】至死不饥民工于市易贾乃求远迁致之临邛大喜即铁山鼓铸运筹策倾滇蜀之民【正义滇一作沮汉书亦作滇也今益州郡有蜀州亦因旧名及汉江为名江在益州南入导江非汉中之汉江也】富至僮千人田池射猎之乐拟于人君

程郑山东迁虏也亦冶铸贾椎髻之民富埒卓氏俱居临邛

宛孔氏之先梁人也用铁冶为业秦伐魏迁孔氏南阳大鼓铸规陂池连车骑游诸侯因通商贾之利有游闲公子之赐与名【集解韦昭曰优游间暇也】然其赢得过当愈于纖啬【正义音色啬吝也言孔氏连车骑游于诸侯以资给之兼通商贾之利乃得游闲公子交名然其通计赢利过于所资给饷遗之当犹有交游公子雍容而胜于慙慙也】家致富数千金故南阳行贾尽法孔氏之雍容鲁人俗俭啬而曹邴氏尤甚以铁冶【集解徐广曰鲁县出铁】起富至巨万然家自父兄子孙约俛有拾仰有取贵贷行贾徧郡国邹鲁以其故多去文学而趋利者以曹邴氏也

齐俗贱奴虏而刁间独爱贵之【正义刁丁遥反姓名】桀黠奴人之所患也唯刁间收取使之逐渔盐商贾之利或连车骑交守相然愈益任之终得其力起富数千万故曰寧爵毋刁【集解駟案汉书音义曰奴自相谓曰寧欲免去作民有爵邪将止为刁氏作奴乎无发声语助】言其能使豪奴自饶而尽其力周人既纖【集解駟案汉书音义曰俭啬也】而师史尤甚【正义师史人姓名】转毂以百数贾郡国无所不至洛阳街居在齐秦楚赵之中【正义洛阳在齐秦楚赵之中其街巷贫人学于富家相矜以久贾诸国皆数历里邑不入其门故前云洛阳东贾齐鲁南贾梁楚是也】贫人学事富家相矜以久贾【集解駟案汉书音义曰谓街巷居民无田地皆相矜久贾在此诸国也】数过邑不入门设任此等故师史能致七千万

宣曲任氏之先【集解徐广曰高祖功臣有宣曲侯索隐上林赋云西驰宣曲当在京辅今阙其地也正义按其地合在关内张揖云宣曲官名在昆池西也】为督道仓吏【集解駟案汉书音义曰若今吏督租谷使上道输在所也韦昭曰督道秦时边县名】秦之败也豪杰皆争取金玉而任氏独窖仓粟【集解徐广曰窖音校穿地以藏也】楚汉相距荥阳也民不得耕种米石至万而豪杰金玉尽归任氏任氏以此起富富人争奢侈而任氏折节为俭力田畜田畜人争取贱贾【索隐晋灼云争取贱贾金玉也正义音价也】任氏独取贵善【索隐谓买物必取贵而善者不争贱价也】富者数世然任公家约非田畜所出弗衣食公事不毕则身不得饮酒食肉以此为闾里率故富而主上重之塞之斥也【正义孟康云边塞主斥侯卒也唯此人能致富若此顔云塞斥者言国斥开边塞更令寛广故桥姚得恣其畜牧也姓桥名姚也】唯桥姚已致马千匹牛倍之羊万头粟以万鍾计【集解駟案汉书音义曰边塞主斥侯卒也唯此人能致富若此索隐孟说非也按斥开也相如传云边塞益斥是也桥姓姚名也言

桥姚因斥塞而致此资风俗通云马称匹者俗说云相马及君子与人相匹故云匹或说马夜行日照前四丈故云一匹或说度马从横适得一匹韩诗外传云孔子与颜回登山望见一匹练前有蓝视之果马光景一匹长也】吴楚七国兵起时长安中列侯封君行从军旅齎贷子钱【索隐齎音子稽反贷假也音吐得反与人物云齎周礼注齎所给与也】子钱家以为侯邑国在关东关东成败未决莫肯与唯无盐氏出捐千金贷【索隐贷音吐代反】其息什之【索隐谓出一得十倍】三月吴楚平一岁之中则无盐氏之息什倍用此富埒关中关中富商大贾大抵尽诸田田亩田兰韦家栗氏安陵杜杜氏【集解徐广曰安陵及杜二县名各有杜姓也宣帝以杜为杜陵】亦巨万此其章章尤异者也【集解徐广曰异一作淑又作较】皆非有爵邑奉禄玩法犯奸而富尽椎埋去就与时俯仰获其赢利以末致财用本守之以武一切用文持之变化有槩故足术也若至力农畜工虞商贾为权利以成富大者倾郡中者倾县下者倾乡里者不可胜数夫織嗇筋力治生之正道也而富者必用奇胜田农拙业【集解徐广曰古拙字亦作掘也】而秦阳以盖一州【索隐汉书作甲一州服?云富为州中之第一】掘冢奸事也而曲叔以起博戏?业也而桓发用之富【索隐汉书桓作稽正义桓发人姓名】行贾丈夫贱行也而雍乐成以饶贩脂【正义说文云载角者脂无角者膏也】辱处也而雍伯千金【集解徐广曰雍一作翁索隐雍音于?反汉书作翁伯也】卖浆小业也而张氏千万洒削薄技也【集解徐广曰洒或作细駟案汉书音义曰冶刀劒名索隐洒音先礼反削刀者名洒削谓摩刀以水洒之又方言云劒削閩东谓之削音肖亦依字读】而郅氏鼎食胃脯简微耳浊氏连骑【索隐晋灼云太官常以十月作沸汤燂羊胃以末椒姜粉之訖暴使燥则谓之脯故易售而致富也正义按胃脯谓和五味而脯美故易售】马医浅方张里击锤此皆诚一之所致由是观之富无经业则货无常主能者辐凑不肖者瓦解千金之家比一都之君巨万者乃与王者同乐岂所谓素封者邪非也

【索隐述赞曰货殖之利工商是营废居善积倚市邪赢白圭富国计然强兵保参朝请女筑怀清素封千户卓郑齐名】

史记卷一百二十九

史记卷一百二十九考证

货殖列传○【臣照】按迁史以货殖传终所以见生王诗书礼乐之泽至汉武之世而荡然无遗盖伤之也末以非也二字作结彰彰可见而後儒犹谓马迁重货殖而薄仁义寧得称知言哉

故物贱之徵贵贵之徵贱索隐徵者求也谓此处物贱求彼贵卖之○董份曰贱之徵贵贱极则人弃之故其徵必贵白圭之术正能明贵贱之徵而弃取之也以徵为求谬

周书曰农不出则乏其食工不出则乏其事商不出则三宝绝虞不出则财匱少○此语汲冢书无之疑在所阙八篇之中

天下壤壤○凌稚隆曰按壤穰通用盐铁论此语作穰穰

计然之策七○越絶书及吴越春秋作九术

之陶○【臣照南】按正义以陶在齐州平阳县又以为曹州济阳县又以为在南郡华容县据水经注云定陶县则曹州近之

子赣既学于仲尼退而仕于卫废着鬻财于曹鲁之间○史通曰昔孔子力可翹关不以力称何则大圣之德具美者衆不可以一介末事持为百行端首也至如达者七十分以四科而太史公述儒林则不取游夏之文学着循吏则不言冉季之政事至于货殖为传独以子贡居先掩恶扬善既忘此义成人之美不其如

夫岁孰取谷予之丝漆蠶凶取帛絮与之食○凶各本并作出程一枝曰蠶字属上句读出字本作凶盖以字形相近而讹也今从程说改正

夫燕亦勃碣之间正义勃海碣石在西○【臣世骏】按西下宜有北字

以故眚羸正义按食螺蛤等物故多羸弱而足病也淮南子云古者民食羸蛛之肉多疹毒之患也○徐孚远曰观下文偷生无积聚则羸弱病足之说非也

是以廉吏久久更富廉贾归富集解归者取利而不停货也○顾炎武曰货殖传廉吏久久更富廉贾归富又曰贪贾三之廉贾五之夫放于利而行多怨廉者知敢知与无求多于人义然後取人不馱其取是以取之虽少而久久更富廉者之所得乃有其五也注非

下有蹲鸱集解徐广曰古蹲字作踰○徐广既有此释则本文蹲字应作踰矣又正义引华阳国志云汶山郡安上县有大芋如蹲鸱安上水经注作江郡

洛阳街居在齐秦楚赵之中○顾炎武曰说文街四通道盐铁论燕之涿蓟赵之邯鄲魏之温轹韩之荥阳齐之临淄楚之宛丘郑之阳翟二周之三川皆为天下名都居五诸侯之衢跨街冲之路

为督道仓吏集解汉书音义曰若今使督租谷吏上道输在所也韦昭曰督道秦时边县名○班马异同曰督道者仓所在地名耳犹後传注汉宫阙疏所称细柳仓也

尽椎埋去就○顾炎武曰椎埋当是推移二字之误

史记卷一百二十九考证

<史部,正史类,史记>

卷一百三十

钦定四库全书

史记卷一百三十

汉太史令司马迁撰宋中郎外兵曹参军裴駙集解

唐国子博士弘文馆学士司马贞索隐

唐诸王侍读率府长史张守节正义

太史公自序第七十

昔在颛顼命南正重以司天北正黎以司地【索隐张晏云南方阳也火水配也水为陰故命南方正重司天火正黎兼地职臣瓚以为重黎氏是司天地之官然司地者宜曰火正古文作北字非也案国语黎为火正以淳曜敦大光照四海又幽通赋云黎淳曜於高辛则火正为是也】唐虞之际绍重黎之後使复典之至于夏商故重黎氏世序天地其在周程伯休甫其後也【集解应劭曰封为程国伯休甫字也索隐重司天而黎司地是代序天地也据左氏重是少昊之子黎乃颛顼之胤二氏二正所出各别而史迁意欲合二氏为一故總云在周程伯休甫其後非也然後按彪之序及千宝皆云司马氏黎之後是也今总称伯休甫是重黎之後者凡言地即举天称黎则兼重自是相对之文其实二官亦通职然休甫则黎之後也亦是太史公欲以史为已任故言先代天官所以兼称重耳正义括地志安陵故城在雍州咸阳东二十一里周之程邑】当周宣王时失其守而为司马氏【正义司马彪序云南正黎後世为司马氏】司马氏世典周史【索隐司马夏官卿不掌国史自是先代兼为史卫宏云司马氏周史佚之後恐或有所据】惠襄之间司马氏去周适晋【集解张晏曰周惠王襄王有子颓叔带之难故司马氏奔晋】晋中军随会奔秦而司马氏入少梁【索隐左氏随会自晋奔秦後乃奔魏自魏还晋故汉书云会奔秦魏也少梁古梁国也秦灭之改曰少梁後名夏阳也正义案春秋随会奔秦其後自秦入魏而还晋也随会为晋中军将少梁古梁国也嬴姓在同州韩城县南二十二里是时属晋】自司马氏去周适晋分散或在卫或在赵【索隐何法盛晋书及司马氏系本名凯】或在秦其在卫者相中山【集解徐广曰名喜也】在赵者【正义何法盛晋书及晋譙王司马无忌司马氏系本皆云名凯】以传劒论显【集解服虔曰世善传劒也苏林曰传手?论而释之晋灼曰史记吴起赞曰非信仁廉勇不能传劒论兵书也索隐服虔云善劒解所以称传也苏林作?言手?论而知名也】蒯聩其後也【正义五怪反如淳云刺客传之蒯聩也】在秦者名错与张仪争论於是惠王使错将伐蜀遂拔因而守之【集解苏林曰郡守也】错孙靳【集解徐广曰一作靳索隐错音七各反靳音纪亶反】事武安君白起而少梁更名曰夏阳靳与武安君阬赵长平军【集解文穎曰赵孝成时】还而与之俱赐死

杜邨【索隐邨音尤李奇曰地名在咸阳西十里三秦记其地後改为李里也】葬於华池【集解晋灼曰地名在鄠县索隐晋灼非也案司马迁碑在夏阳西北四里正义括地志云华池在同州韩城县西南七十里在夏阳故城西北四里】靳孙昌昌为秦主铁官当始皇之时蒯瞶玄孙邛为武信君将【集解徐广曰张耳传云武臣自号武信君索隐按晋谯国司马无忌作司马氏系本云蒯瞶生昭预昭预生宪宪生邛也】而狗朝歌诸侯之相王王邛於殷【索隐汉书云项羽封邛为殷王】汉之伐楚邛归汉以其地为河内郡昌生无泽【索隐汉书作毋恠并音亦】无泽为汉市长无泽生喜喜为五大夫卒皆葬高门【集解苏林曰长安北门也瓚曰长安城无高门索隐苏说非也案迁碑高门在夏阳西北去华池三里正义括地志云高门原俗名马门原在同州韩城县西南十八里汉司马迁墓在韩城县南二十二里夏阳县故城东南有司马迁冢在高门原上也】喜生谈谈为太史公【集解如淳曰汉仪注太史公武帝置位在丞相上天下计书先上太史公副上丞相序事如古春秋迁死後宣帝以其官为今行太史公文书而已瓚曰百官表无太史公茂陵中书司马谈以太史丞为太史令索隐公者迁所着书尊其父云公也迁虽称述其父所作其实亦迁之词而如淳引卫宏仪注称位在丞相上谬矣按百官表又无其官且修史之官国家别有着撰则令郡县所上图书皆先上之後人不晓误以在丞相上耳正义虞喜志林云古者主天官者皆上公自周至汉其职转卑然朝会坐位犹居公上尊天之道其官属仍以旧名尊而称也按下文太史公既掌天官不治民有子曰迁又云卒三岁而迁为太史公又云太史公遭李陵之祸又云汝复太史则续吾祖矣观此文虞喜说为长乃书谈及迁为太史公者皆迁自书之汉旧仪云太史公秩二千石卒史皆秩二百石然瓚及韦昭桓谭之说皆非也以桓谭之说释在武本纪也】太史公学天官於唐都【正义天官书云星则唐都也】受易於杨何【集解徐广曰菑川人】习道论於黄子【集解徐广曰儒林传曰黄生好黄老之术】太史公仕於建元元封之间愍学者之不达其意而师悖【正义布内反顔云悖惑也各习师书惑於所见也】乃论六家之要指曰易大传【正义张晏云谓易繫辞案下二句是繫辞文】天下一致而百虑同归而殊涂夫陰阳儒墨名法道德此务为治者也直所从言之异路有省不省耳【索隐案六家同归於正然所从之道殊涂学或有传习省察或有不省者耳】尝窃观陰阳之术大祥【集解徐广曰一作详駟案李奇曰月令星官是其枝叶也索隐汉书作大详言我观陰阳之术大详今此大祥於义为?正义顾野王云祥善也吉凶之先见也】而衆忌讳使人拘而多所畏【正义言拘束於日时令人有所畏忌也】然其序四时之大顺不可失也儒者博而寡要劳而少功是以其事难尽从然其序君臣父子之礼列夫妇长幼之别不可易也墨者俭而难遵【正义韦云墨翟之术也尚俭後有随巢子传其术也】是以其事不可徧循【索隐徧音遍徧循言难尽用也】然其强本节用不可废也法家严而少恩然其正君臣上下之分不可改矣名家使人俭而善失真【索隐刘向别録云名家流出於礼官古者名位不同礼亦异数孔子曰必也正名乎按名家知礼亦异数是俭也受命不受辞故失其真也】然其正名实不可不察也道家使人精神专一动合无形瞻足万物【索隐瞻音市艳反汉书作澹古今字异也】其为术也因陰阳之大顺采儒墨之善撮名法之要与时迁移应物变化立俗施事无所不宜指约而易操事少而功多儒者则不然以为人主天下之仪表也主倡而臣和主先而臣随如此则主劳而臣逸至於大道之要去健美【集解如淳曰知雄守雌是去健也不见可欲使心不乱是去美也】绀聪明【索隐如淳云不尚贤絶圣弃智也】释此而任术夫神大用则竭形大劳则敝形神骚动欲与天地长久非所闻也夫陰阳四时八位十二度二十四节【集解张晏曰八位八卦位

也十二度十二次也二十四节就中气也各有禁忌谓日月也】各有教令顺之者昌逆之者不死则亡未必然也故曰使人拘而多畏夫春生夏长秋收冬藏此天道之大经也弗顺则无以为天下纲纪故曰四时之大顺不可失也夫儒者以六艺为法六艺经传以千万数累世不能通其学当年不能其礼故曰博而寡要劳而少功若夫列君臣父子之礼序夫妇长幼之别虽百家弗能易也墨者亦尚尧舜道言其德行曰堂高三尺【索隐自此以下韩子之文故称曰也】土阶三等茅茨不剪【正义屈盖曰茨以茅覆屋】采椽不刮【索隐韦昭云采椽栝橈也正义采取为椽不刮削也】食土簋【集解徐广曰一作埶駟按服?曰土簋用土作此器】啜土刑粝粱之食【集解张晏曰一斛粟七斗米为粝瓚曰五斗粟三斗米为粝音刺韦昭曰粝瓚也索隐服?曰粝籼米也三苍云粱好粟也正义顔云簋所以盛飫也刑所以盛羹也土谓烧土为之即瓦器也粝籼米也脱粟也粱粟也谓食脱粟之籼飫也】藜藿之羹【正义藜似藿而表赤藿豆叶也】夏日葛衣冬日鹿裘其送死桐棺三寸【正义以桐木为棺厚三寸也】举音不尽其哀教丧礼必以此为万民之率使天下法若此则尊卑无别也夫世异时移事业不必同故曰俭而难遵要曰强本节用则人给家足之道也此墨子之所长虽百家弗能废也法家不别亲?不殊贵贱一断於法则亲亲尊尊之恩絶矣【索隐按礼亲亲父为首尊尊君为首也】可以行一时之计而不可长用也故曰严而少恩若尊主卑臣明分职不得相踰越虽百家弗能改也名家苛察缴绕【集解服?曰缴音近叫呼谓烦也如淳曰缴绕犹纏绕不通大体也】使人不得反其意专决於名而失人情故曰使人俭而善失真若夫控名主贝实参伍不失【集解晋灼曰引名责实参错交互明知事情】此不可不察也道家无为又曰无不为【正义无为者清静也无不为者生育万物也】其实易行【正义各守其分故易行也】其辞难知【正义幽深微妙故难知也】其术以虚无为本以因循为用【正义任自然也】无成势无常形故能究万物之情不为物先不为物後【集解韦昭曰因物为制】故能为万物主有法无法因时为业【正义因时之物成法为业】有度无度因物与合【正义因其万物之形成度与合也】故曰圣人不朽时变是守【索隐此出鬼谷子迂引之以成其章故称故曰也正义言圣人教迹不朽灭者顺时变化】虚者道之常也因者君之纲也【正义言因百姓之心以教惟执其纲而已】羣臣并至使各自明也其实中其声者谓之端实不中其声者谓之赧【集解徐广曰音款空也駟案李奇曰声别名也索隐款空也申子云款言无成是也声者名也以言实不称名则谓之空空有声也】赧言不听奸乃不生贤不肖自分白黑乃形在所欲用耳何事不成乃合大道混混冥冥【正义混胡本反混混者元气神着之貌也】光耀天下复反无名凡人所生者神也所托者形也神大用则竭形大劳则敝形神离则死者不可复生离者不可复反故圣人重之由是观之神者生之本也形者生之具也【集解韦昭曰声气者神也枝体者形也】不先定其神而曰我有以治天下何由哉太史公既掌天官不治民有子曰迂迂生龙门【集解徐广曰在冯翊夏阳县駟案苏林曰禹所凿龙门也正义括地志云龙门在同州韩城县北五十里其山更黄河夏禹所凿者也龙门山在夏阳县迂即汉夏阳县人也至唐改曰韩城县】耕牧河山之阳【正义河之北山之南也按在龙门山南也】年十岁则诵古文【索隐迂及事伏生是学诵古文尚书刘氏以为左传国语系本等书是亦名之古文也】二十而南游江淮上会稽探禹穴【集解张晏曰禹巡狩至会稽而崩因葬焉上有孔穴民间云禹入此穴索隐越絶书云禹上茅山大会计更名曰会稽张勃吴录云本名苗山一名覆釜禹会诸侯计功改曰会稽正义括地志云石箐山一名玉箐山又名宛委山即会稽山一峰也在会稽县东南十八里吴越春秋云禹案黄帝中经九山东南天柱号

曰宛委赤帝左阙之填承以文玉覆以盘石其书金简青玉为字编以白银皆琢其文禹乃东巡登衡山血白马以祭禹乃登山仰天而笑忽然而卧梦见绣衣男子自称玄夷苍水使者却倚覆釜之山东顾谓禹曰欲得我山神书者齐於黄帝之岳岩岩之下三月季庚登山发石禹乃登宛委之山发石得金简玉字以水泉之脉山中又有一穴深不见底谓之禹穴史迁云上会稽探禹穴即此穴也】闕九疑【索隐山海经云南方苍梧之邱苍梧之泉在营道南其山九峰皆似故曰九疑张晏云九疑舜葬故窺之寻上探禹穴盖以先圣所葬处有古册文故探窺之亦搜采远矣正义九疑山在道州】浮於沅湘【正义沅水出朗州湘水出道州北东北入海】北涉汶泗【正义两水出兖州东北而南历鲁】讲业齐鲁之都观孔子之遗风乡射邹峄【正义邹县名峄山名峄山在邹县北二十二里地近曲阜於此行乡射之礼】扈困鄱薛彭城【集解徐广曰峄音亦县名有山也鄱音皮邹鄱薛三县属鲁索隐鄱本音蕃案白褒鲁记云灵帝末有汝南陈子游为鲁相子游太尉陈蕃子也国人讳而改焉若如其说则蕃改鄱鄱皮声相近後渐讹耳然地理志鲁国蕃县应劭曰邾国也音皮正义括地志云徐州滕县汉蕃县音翻】过梁楚以归於是迁仕为郎中奉使西征巴蜀以南南畧邛笮昆明还报命【集解徐广曰元鼎六年?西南夷以为五郡其明年元封元年是也】是岁天子始建汉家之封而太史公留滞周南【集解徐广曰摯虞曰古之周南今之洛阳索隐张晏云自陕已东皆周南之地也】不得与从事【正义与音预】故发愤且卒而子迁适使反见父於河洛之间太史公执迁手而泣曰余先周室之太史也自上世常显功名於虞夏典天官事後世中衰絶於予乎汝复为太史则续吾祖矣今天子接千岁之统封泰山而余不得从行是命也夫命也夫余死汝必为太史为太史无忘吾所欲论着矣且夫孝始於事亲中於事君終於立身扬名於後世以显父母此孝之大者夫天下称颂周公言其能论歌文武之德宣周召之风達太王王季之思虑爰及公刘以尊后稷也幽厉之後王道缺礼乐衰孔子修旧起废论诗书作春秋则学者至今则之自获麟以来四百有余岁【集解駰案年表鲁哀公十四年获麟至汉元封元年三百七十一年】而诸侯相兼史记放絶今汉兴海内一统明主贤君忠臣死义之士余为太史而弗论载废天下之史文余甚惧焉汝其念哉迁俯首流涕曰小子不敏请悉论先人所次旧闻弗敢阙卒三岁而迁为太史令【索隐博物志太史令茂陵显武里大夫司马年二十八三年六月乙卯除六百石也】紬史记【集解徐广曰紬音抽索隐如淳云抽彻旧书故事而次述之小顔云紬谓缀集之也】石室金匱之书【索隐案石室金匱皆国家藏书之处】五年而当太初元年【集解李奇曰迁为太史後五年适当於武帝大初元年此时述史记正义按迁年四十二岁】十一月甲子朔旦冬至天历始改建於明堂诸神受纪【集解徐广曰封禪序曰封禪则万灵罔不禋祀駰案韦昭曰告於百神与天下更始着纪於是索隐虞喜志林云改历於明堂班之於诸侯诸侯羣神之主故曰诸侯受纪孟康云句芒祝融之属皆受瑞纪也】

太史公曰先人有言【索隐先人谓先代贤人也正义太史公司马迁也先人司马谈也】自周公卒五百岁而有孔子孔子卒後至於今五百岁【索隐案孟子称尧舜至汤五百余岁汤至文王五百余岁文王至孔子五百余岁太史公此言畧取於孟子而扬雄孙盛深所不然所谓多见不知量也以为淳气育才岂有常数五百之期何异一息是以上皇相次或以万龄为间而唐尧舜禹比肩并列降及周室圣贤盈朝孔子之没千载莫嗣安在於千年五百年乎具述作者盖记注之志士耳岂圣人之论哉】有能绍明世正易传继春秋本诗书礼乐之际意

在斯乎意在斯乎小子何敢让焉【索隐汉书让作攘晋灼云此古让字言且当述先人之成业何敢自嫌值五百岁而让之也】上大夫壶遂曰【索隐案遂为詹事秩二千石故位上大夫也】昔孔子何为而作春秋哉太史公曰余闻董生曰【集解服虔曰仲舒也】周道衰废孔子为司寇诸侯害之大夫壅之孔子知言之不用道之不行也是非二百四十二年之中【索隐是非谓褒贬诸侯之得失也】以为天下仪表贬天子退诸侯讨大夫以达王事而已矣子曰我欲载之空言不如见之於行事之深切着明也【索隐案孔子之言见春秋纬太史公引之以成说也空言谓褒贬是非也空立此文而乱臣贼子惧也孔子言我徒欲立空言设褒贬则不如附见於当时所因之事人臣有僭侈篡逆因就此笔削以褒贬深切着明而书之以为将来诫也】夫春秋上明三王之道下辨人事之纪别嫌疑明是非定犹豫善善恶恶【索隐公羊传曰善善及子孙恶恶止其身也】贤贤贱不肖存亡国继絶世补敝起废王道之大者也易着天地陰阳四时五行故长於变礼纪人伦故长於行书记先王之事故长於政诗记山川谿谷禽兽草木牝牡雌雄故长於风乐乐所以立故长於和春秋辩是非故长於治人是故礼以节人乐以发和书以道事诗以达意易以道化春秋以道义拨乱世反之正莫近於春秋春秋文成数万其指数千【集解张晏曰春秋万八千字当言减而云成数字误也駰谓太史公此辞是述董生之言董仲舒自治公羊春秋公羊经传凡有四万四千余字故云文成数万也不得如张议但论经万八千字便谓之误索隐注非也小顏云史迁岂以公羊之传为春秋乎春秋经一万八千亦足称数万非字之误】万物之散聚皆在春秋春秋之中弑君三十六亡国五十二诸侯奔走不得保其社稷者不可胜数察其所以皆失其本已【索隐案弑君亡国及奔走皆是失仁义之道本耳已者语终之辞也】故易曰失之毫厘差以千里【集解徐广曰一云差以毫厘一云繆以千里駰案今易无此语易纬有之】故曰臣弑君子弑父非一旦一夕之故也其渐久矣故有国者不可以不知春秋前有谗而弗见後有贼而不知为人臣者不可以不知春秋守经事而不知其宜遭变事而不知其权为人君父而不通於春秋之义者必蒙首恶之名为人臣子而不通於春秋之义者必?篡弑之诛死罪之名其实皆以为善为之不知其义【正义其心实善为之不知其义理则?於罪咎】被之空言而不敢辞【集解张晏曰赵盾不知讨贼而不敢辞其罪也】夫不通礼义之旨至於君不君臣不臣父不父子不子夫君不君则犯【正义顏云为臣下所干犯也一云违犯礼义】臣不臣则诛父不父则无道子不子则不孝此四行者天下之大过也以天下之大过予之则受而弗敢辞故春秋者礼义之大宗也夫礼禁未然之前法施已然之後法之所为用者易见而礼之所为禁者难知壶遂曰孔子之时上无明君下不得任用故作春秋垂空文以断礼义当一王之法今夫子上遇明天子下得守职万事既具咸各序其宜夫子所论欲以何明太史公曰唯唯否否【集解晋灼曰唯唯谦应也否否不通者也】不然余闻之先人曰伏羲至纯厚作易八卦尧舜之盛尚书载之礼乐作焉汤武之隆诗人歌之春秋采善贬恶推三代之德褒周室非独刺讥而已也汉兴以来至明天子获符瑞建封禅改正朔易服色受命於穆清【集解如淳曰受天命清和之气正义於音鸟顏云於叹辞也穆美也言天子有美德而教化清也】泽流罔极海外殊俗重译款塞【集解应劭曰款叩也皆叩塞门来服从也如淳曰款寬也请除守塞者自保不为寇害正义重译更译其言也】请来献见者不可胜道臣下百官力诵圣德犹不能宣尽其意且士贤能而不用有国者之耻主上明圣而德不布闻有司之过也且余尝掌其官废明圣盛德不载灭功臣世家贤大夫之业不述墮先人所言罪莫大焉余所谓述故事整齐其世传非所谓作也而君比之於春秋谬矣於是论次其文七年【集解徐广曰天汉三年正义案从

太初元年至天汉三年乃七年也】而太史公遭李陵之祸【正义太史公举李陵李陵降也】幽於縲紲乃喟然而叹曰是余之罪也夫是余之罪也夫身毁不用矣退而深惟曰夫诗书隐约者【索隐案谓其义隐微而言约也正义诗书隐微而约省者迂深维欲依其隐约而成其志意也】欲遂其志之思也昔西伯拘羑里【集解徐广曰在汤陰】演周易孔子居陈蔡作春秋屈原放逐着离骚左丘失明厥有国语孙子膑脚而论兵法不韦迁蜀世传吕覽【正义即吕氏春秋也】韩非囚秦说难孤愤诗三百篇大抵圣贤发愤之所为作也此人皆意有所鬱结不得通其道也故述往事思来者於是卒述陶唐以来至于麟止【集解张晏曰武帝获麟迁以为述事之端上纪黄帝下至麟止犹春秋止於获麟也索隐服?云武帝至雍获白麟而铸金作麟足形故云麟止迁作史记止於此犹春秋终於获麟然也史记以黄帝为首而云述陶唐者案五帝本纪赞云五帝尚矣然尚书载尧以来而百家言黄帝其文不雅驯故述黄帝为本纪之首而以尚书雅正故称起於陶唐也】自黄帝始

维昔黄帝法天则地四圣遵序【集解徐广曰颡顓帝啻尧舜】各成法度唐尧逊位虞舜不台【索隐台音怡悦也或音昭非也】厥美帝功万世载之作五帝本纪第一【索隐应劭曰有本则纪有家则代有年则表有名则传】维禹之功九州攸同光唐虞际德流苗裔夏桀淫骄乃放鸣条作夏本纪第二

维契【正义音薛也】作商爰及成汤太甲居桐德盛阿衡武丁得说乃称高宗帝辛湛湎诸侯不享作殷本纪第三维弃作稷德盛西伯武王牧野实抚天下幽厉昏乱既丧酆镐陵遲至赧洛邑不祀作周本纪第四

维秦之先伯翳佐禹穆公思义悼豪之旅【索隐豪即崤之异音旅师旅也正义穆公封崤山军旅之尸】以人为殉诗歌黄鸟昭襄业帝作秦本纪第五

始皇既立并兼六国销锋铸鐻【集解徐广曰严安上书销其兵铸以为锤鐻也索隐鐻音巨鐻锤也】维偃干革尊号称帝矜武任力二世受运子婴降虏作始皇本纪第六

秦失其道豪杰并扰项梁业之子羽接之杀庆救赵【集解徐广曰宋义为上将号庆子冠军】诸侯立之诛婴背怀天下非之作项羽本纪第七

子羽暴虐汉行功德愤发蜀汉还定三秦诛籍业帝天下惟宁改制易俗作高祖本纪第八

惠之早寔【正义音殒】诸吕不台【集解徐广曰无台辅之德也一曰怡怵也不为百姓所说索隐案此赞本韵则怡怵为是也】崇强禄产诸侯谋之杀隐幽友【集解徐广曰赵隐王如意赵幽王友】大臣洞疑【索隐洞是洞達意共所疑】遂及宗祸作吕太后本纪第九

汉既初兴继嗣不明迎王践阼天下归心蠲除肉刑开通关梁广恩博施厥称太宗作孝文本本纪第十

诸侯骄恣吴首为乱京师行诛七国伏辜天下翕然大安殷富作孝景本纪第十一

汉兴五世隆在建元外攘夷狄内修法度建封禅改正朔易服色作今上本纪第十二

维三代尚矣年纪不可考盖取之谱牒旧闻本于兹於是畧推作三代世表第一

幽厉之後周室衰微诸侯专政春秋有所不纪而谱牒经畧五霸更盛衰欲睹周室相先後之意作十二诸侯年表第二

春秋之後陪臣秉政强国相王以至於秦卒并诸夏灭封地擅其号作六国年表第三

秦既暴虐楚人发难项氏遂乱汉乃扶义征伐八年之间天下三擅事繁变衆故详着秦楚之际月表第四汉兴已来至於太初百年诸侯废立分削谱纪不明有司靡踵强弱之原云以世【集解徐广曰一作云已也天汉序曰敞义依霍庶几云已索隐踵继也以当作已世当作也并误之耳云已也皆助语之辞正义言汉兴已来百年诸侯废立分削谱纪不能明其嗣有司无所踵继其後乃云强弱之原云以世相代相不能有所录纪也】作汉兴已来诸侯年表第五

维高祖元功辅臣股肱剖符而爵泽流苗裔忘其昭穆或杀身陨国作高祖功臣侯者年表第六

惠景之间维申功臣宗属爵邑作惠景间侯者年表第七

北讨强胡南诛劲越征伐夷蛮武功爰列作建元以来侯者年表第八

诸侯既强七国为从子弟衆多无爵封邑推恩行义其势销弱德归京师作王子侯者年表第九

国有贤相良将民之师表也维见汉兴以来将相名臣年表贤者记其治不贤者彰其事作汉兴以来将相名臣年表第十

维三代之礼所损益各殊务然要以近情性通王道故礼因人质为之节文畧協古今之变作礼书第一乐者所以移风易俗也自雅颂声兴则已好郑卫之音郑卫之音所从来久矣人情之所感远俗则怀【集解徐广曰乐者所以感和人情人情既感则远方殊俗莫不怀柔向化也】比乐书以述来古【索隐来古即古来也言此乐书以述自古已来乐之兴衰也】作乐书第二

非兵不强【索隐此律书之赞而云非兵不强则此律书即兵书也古者师出以律则凡出军皆聽律声故云闻律效胜负望敌知吉凶也】非德不昌黄帝汤武以兴【索隐黄帝有阪

泉之师汤武有鸣条牧野之战而克桀纣】桀纣二世以崩可不慎欤司马法所从来尚矣【正义古者师出以律凡军出皆吹律聽声律书云六律为万事根本其於兵械尤所重望敌知吉凶闻声效胜负故云司马兵法所从来尚矣乎】太公孙吴王子【集解徐广曰王子成甫】能绍而明之切近世极人变作律书第三

律居陰而治阳历居阳而治陰律历更相治间不容翫忽【索隐案忽者愒文之微也翫者轻也言律历穷陰阳之妙其间不容丝忽也言翫恐衍字耳正义翫匹遥反今音匹沼反字当作秒秒禾芒表也忽一蚕口出丝也言律历相治之间不容此微细之物也】五家之文怫异【索隐怫音悖一音扶物反怫亦悖也案言金木水火土五家之文各相悖异不同也正义五家谓黄帝顓頊夏殷周之历其文相戾乖异不同维太初之元论历律为是故历书自太初之元论之也】维太初之元论作历书第四【集解徐广曰论一作编】

星气之书多杂禋祥不经推其文考其应不殊比集论其行事验于轨度以次作天官书第五

受命而王封禪之符?【集解徐广曰一云答应】用用则万灵罔不禋祀追本诸神名山大川礼作封禪书第六

维禹浚川九州攸宁爰及宣防决渎通沟作河渠书第七

维币之行【索隐币钱也】以通农商其极则玩巧并兼兹【索隐玩音五官反巧音苦孝反】殖争於机利去本趋末作平準书以观事变第八

太伯避历江蛮是适文武攸兴古公王迹阖庐弑僚宾服荆楚夫差克齐子胥鸱夷信嚭亲越吴国既灭嘉伯之让作吴世家第一

申吕肖矣【集解徐广曰肖音瘠瘠犹衰微索隐徐广音训不知从出案肖谓微弱而省少所谓申吕虽衰也正义肖音瘠吕尚之祖封於申申吕後瘠微故尚父微贱也】尚父侧微卒归西伯文武是师功冠羣公繆权于幽【集解徐广曰繆错也犹云纏结也权智潜谋幽昧不显所谓太公陰谋索隐繆谓绸缪也音亡又反谓太公绸缪为权谋於幽昧不明着也正义繆音武彪反言吕尚绸缪於幽权之策谓六韬三畧陰符七术之属也】番番黄髮【集解駰案番音婆毛茌云番番威勇武貌也案黄髮言老人髮白而更黄也】爰飡营丘不背柯盟桓公以昌九合诸侯霸功显彰田阡争宠姜姓解亡【集解徐广曰阡一云监解一作迁】嘉父之谋作齐太公世家第二

依之违之周公綏之愤发文德天下和之辅翼成王诸侯宗周隐桓之际是独何哉三桓争强鲁乃不昌嘉旦金縢作周公世家第三

武王克纣天下未協而崩成王既幼管蔡疑之淮夷叛之於是召公率德安集王室以寧东土燕易之禪乃成祸乱【索隐谓王吟禪其相子之後卒危乱也】嘉甘棠之诗作燕世家第四

管蔡相武庚将宁旧商及旦摄政二叔不飧杀鲜放度【索隐案系家云管叔名鲜蔡叔名度霍叔名处也】周公为盟太任十子周以宗强【索隐太任文王妃十子伯邑考武王管蔡霍鲁卫毛聃曹是也】嘉仲悔过【正义蔡叔度之子蔡仲也】作管蔡世家第五

王後不絶舜禹是说维德休明苗裔蒙烈百世享祀爰周陈杞楚实灭之齐田既起舜何人哉作陈杞世家第六

牧殷余民叔封始邑申以商乱酒材是告及朔之生卫顷不宁南子恶蒯聩子父易名周德卑微战国既强卫以小弱角独後亡嘉彼康诰作卫世家第七

嗟箕子乎嗟箕子乎正言不用乃反为奴武庚既死周封微子襄公伤於泓【正义泓水名公羊传云宋与楚人期战於泓之阳宋师大败君子大其不鼓不成列临大事而不忘礼虽文王之战亦不过此也】君子孰称景公谦德荧惑退行剔成暴虐【集解徐广曰一云偃宋剔成君生偃索隐剔音遏】宋乃灭亡嘉微子问太师作宋世家第八

武王既崩叔虞邑唐君子讥名【正义谓晋穆侯太子名仇少子名成师】卒灭武公骊姬之爰乱者五世重耳不得意乃能成霸六卿专权【正义智伯范中行韩魏赵】晋国以耗嘉文公锡珪鬯作晋世家第九

重黎业之吴回接之殷之季世粥子牒之周用熊绎熊渠是续庄王之贤乃复国陈【正义楚庄王都陈】既赦郑伯班师华元怀王客死兰咎屈原好谗信谗楚并於秦嘉庄王之义作楚世家第十

少康之子实宾南海【正义吴越春秋云启使岁时祭禹於越立宗庙南山之上封少康庶子无余於越使祠禹至勾践迁都山陰立禹庙为始祖庙越亡遂废也案今禹庙在会稽山下】文身断髮鼃鰵与处【索隐鼃音元鰵音鼃】既守封禺【集解徐广曰封禺山在武康县南】奉禹之祀勾践困彼乃用种蠡嘉句践夷蛮能修其德灭强吴以尊周室作越王句践世家第十一

桓公之东太史是庸及侵周禾王人是议祭仲要盟郑久不昌子产之仁绍世称贤三晋侵伐郑纳於韩嘉厉公纳惠王作郑世家第十二

维驥騮耳乃章造父赵夙事献衰续厥绪【正义衰楚为反】佐文尊王卒为晋辅襄子困辱乃禽智伯主父生缚饿死探爵王迁辟淫良将是斥嘉鞅讨周乱作赵世家第十三毕万爵魏卜人知之及绛戮干戎翟和之文侯慕义子夏师之惠王自矜齐秦攻之既疑信陵诸侯罢之卒亡大梁王假廝之嘉武佐晋文申霸道作魏世家第十四韩厥陰德赵武攸兴绍絶立废晋人宗之昭侯显列申子庸之疑非不信秦人袭之嘉厥辅晋匡周天子之赋作韩世家第十五

完子避难适齐为援陰施五世齐人歌之成子得政田和为侯王建动心乃迁于共嘉威宣能

拨浊世而独宗周作田敬仲完世家第十六

周室既衰诸侯恣行仲尼悼礼废乐崩追修经术以達王道匡乱世反之於正见其文辞为天下制仪法垂六艺之统纪於後世作孔子世家第十七

桀纣失其道而汤武作周失其道而春秋作【正义周失其道至秦之时诸侯力事乎争强】秦失其政而陈涉发迹诸侯作难风起云蒸卒亡秦族天下之端自涉发难作陈涉世家第十八成皐之台薄氏始基拙意适代厥崇诸窦栗姬僂贵王氏乃遂陈后太骄卒尊子夫嘉夫德若斯作外戚世家第十九

汉既譎谋禽信於陈越荆剽轻乃封弟交为楚王爰都彭城以强淮泗为汉宗藩戍溺於邪礼复绍之嘉游辅祖【正义游楚王交字也祖高祖也】作楚元王世家第二十

维祖师旅刘贾是与为布所袭丧其荆吴营陵激吕乃王琅邪怵午【正义谓祝午也】信齐往而不归遂西入关遭立孝文获复王燕天下未集贾泽以族为汉藩辅作荆燕世家第二十一

天下已平亲属既寡悼惠先壮实镇东土哀王擅兴发怒诸吕驷钧暴戾京师弗许厉之内淫祸成主父嘉肥股肱作齐悼惠王世家第二十二

楚人围我荥阳相守三年萧何填抚山西【正义谓华山之西也】推计踵兵给粮食不絶使百姓爱汉不乐为楚作萧相国世家第二十三

与信定魏破赵拔齐遂弱楚人续何相国不变不革黎庶攸寧嘉参不伐功矜能作曹相国世家第二十四运筹帷幄之中制胜於无形子房计谋其事无知名无勇功图难於易为大於细作留侯世家第二十五六奇既用诸侯宾从於汉吕氏之事平为本谋终安宗庙定社稷作陈丞相世家第二十六

诸吕为从谋弱京师而勃反经合於权吴楚之兵亚夫驻於昌邑以扞齐赵而出委以梁作绛侯世家第二十七

七国叛逆蕃屏京师唯梁为扞僂爰矜功几获于祸嘉其能距吴楚作梁孝王世家第二十八

五宗既王亲属洽和诸侯大小为藩爰得其宜僭拟之事稍衰贬矣作五宗世家第二十九

三子之王文辞可观作三王世家第三十

末世争利维彼奔义让国饿死天下称之作伯夷列传第一

晏子俭矣夷吾则奢齐桓以霸景公以治作管晏列传第二

李耳无为自化清浄自正韩非揣事情循势理作老子韩非列传第三

自古王者而有司马法穰苴能申明之作司马穰苴列传第四

非信廉仁勇不能传兵论劔与道同符内可以治身外可以应变君子比德焉作孙子吴起列传第五

维建遇谗爰及子奢尚既匡父伍员奔吴作伍子胥列传第六

孔子述文弟子兴业咸为师傅崇仁厉义作仲尼弟子列传第七

鞅去卫适秦能明其术强霸孝公後世遵其法作商君列传第八

天下患衡秦毋寢而苏子能存诸侯约从以抑贪强作苏秦列传第九

六国既从亲而张仪能明其说复散解诸侯作张仪列传第十

秦所以东攘【集解徐广曰一作襄】雄诸侯樗里甘茂之策作樗里甘茂列传第十一

苞河山【集解徐广曰苞一作施】围大梁使诸侯歛手而事秦者魏冉之功作穰侯列传第十二

南拔鄢郢北摧长平遂围邯郸武安为率破荆灭赵王翦之能作白起王翦列传第十三

猎儒墨之遗文明礼义之统纪絶惠王利端列往世兴衰【集解徐广曰一作坏】作孟子荀卿列传第十四

好客喜士士归于薛为齐扞楚魏作孟尝君列传第十五

争冯亭以权【集解徐广曰以一作反太史公讥平原曰利令智昏故云争冯亭以权】如楚以救邯郸之围使其君复称於诸侯作平原君虞卿列传第十六

能以富贵下贫贱贤能拙於不肖唯信陵君为能行之作魏公子列传第十七

以身殉君遂脱强秦使驰说之士南乡走楚者黄歇之义作春申君列传第十八

能忍詢於魏齐【集解徐广曰詢音遁索隐詢音火候反詢辱也】而信威於强秦推贤让位

二子有之作范雎蔡泽列传第十九

率行其谋连五国兵为弱燕报强齐之讐雪其先君之耻作乐毅列传第二十

能信意强秦而屈体廉子用狗其君俱重於诸侯作廉颇蔺相如列传第二十一

湣王既失临淄而奔莒唯田单用即墨破走骑劫遂存齐社稷作田单列传第二十二

能设诡说解患於围城轻爵禄乐肆志作鲁仲连邹阳列传第二十三

作辞以讽谏连类以争义离骚有之作屈原贾生列传第二十四

结子楚亲使诸侯之士斐然争入事秦作吕不韦列传第二十五

曹子匕首鲁获其田齐明其信豫让义不为二心作刺客列传第二十六

能明其画因时推秦遂得意於海内斯为谋首作李斯列传第二十七

为秦开地益衆北靡匈奴据河为塞因山为固建榆中作蒙恬列传第二十八

填赵塞常山以广河内弱楚权明汉王之信於天下作张耳陈余列传第二十九

收西河上党之兵从至彭城越之侵掠梁地以苦项羽作魏豹彭越列传第三十

以淮南叛楚归汉汉用得大司马殷卒破子羽于垓下【集解徐广曰堤塘之名也】作黥布列传第三十一

楚人迫我京索而信拔魏赵定燕齐使汉三分天下有其二以灭项籍作淮陰侯列传三十二

楚汉相距巩洛而韩信为填颍川庐綰絶籍粮饷作韩信卢綰列传第三十三

诸侯畔项王唯齐连子羽城阳汉得以间遂入彭城作田儋列传第三十四

攻城野战获功归报吟商有力焉非独鞭策又与之脱难作樊酈列传第三十五

汉既初定文理未明苍为主计整齐度量序律历作张丞相列传第三十六

结言通使约怀诸侯诸侯咸亲归汉为藩辅作酈生陆贾列传第三十七

欲详知秦楚之事唯周繆常从高祖平定诸侯作傅靳蒯成列传第三十八【索隐蒯音裴其字从崩邑又音浮】

徙强族都关中和约匈奴明朝廷礼次宗庙仪法作刘敬叔孙通列传第三十九

能摧刚作柔卒为列臣栾公不劫於势而倍死作季布栾布列传第四十

敢犯顔色以達主义不顾其身为国家树长画作袁盎朝错列传第四十一

守法不失大理言古贤人增主之明作张释之冯唐列传第四十二

敦厚慈孝讷於言敏於行务在鞠躬君子长者作万石张叔列传第四十三

守节切直义足以言廉行足以厉贤任重权不可以非理挠作田叔列传第四十四

扁鹊言医为方者宗守数精明後世修序弗能易也而仓公可谓近之矣作扁鹊仓公列传第四十五

维仲之省【集解徐广曰吴王之王由父省】厥湍王吴遭汉初定以填抚江淮之间作吴王湍列传第四十六

吴楚为乱宗属唯婴贤而喜士士乡之率师抗山东荥阳作魏其武安列传第四十七

智足以应近世之变寛足用得人作韩长孺列传第四十八

勇於当敌仁爱士卒号令不烦师徒乡之作李将军列传第四十九

自三代以来匈奴常为中国患害欲知强弱之时设备征讨作匈奴列传第五十

直曲塞广河南破祁连通西国靡北胡作卫将军骠骑列传第五十一

大臣宗室以侈靡相高唯弘用节衣食为百吏先作平津侯列传第五十二

汉既平中国而佗能集扬越以保南藩纳贡职作南越列传第五十三

吴之叛逆甌人斩濞【集解徐广曰今之永宁是东甌也】葆守封禺为臣【索隐葆音保言东甌被越攻破之後保封禺之山今在武康县也】作东越列传第五十四

燕丹散乱辽间满收其亡民厥聚海东以集真藩【集解徐广曰一作莫藩音普寒反】葆塞

为外臣作朝鲜列传第五十五唐蒙使畧通夜郎而邛笮之君请为内臣受吏作西南夷列传第五十六

子虚之事大人赋说靡丽多夸然其指风谏归於无为作司马相如列传第五十七

黥布叛逆子长国之以填江淮之南安剽楚庶民作淮南衡山列传第五十八

奉法循理之吏不伐功矜能百姓无称亦无过行作循吏列传第五十九

正衣冠立於朝廷而羣臣莫敢言浮说长孺矜焉好荐人称长者壮有溉【集解徐广曰一作既】作汲郑列传第六十自孔子卒京师莫崇庠序唯建元元狩之间文辞粲如也作儒林列传第六十一

民倍本多巧姦轨弄法善人不能化唯一切严削为能齐之作酷吏列传第六十二

汉既通使大夏而西极远蛮引领内乡欲观中国作大宛列传第六十三

救人於厄振人不赡仁者有乎不既信【集解徐广曰一云不慨信】不倍言义者有取焉作游侠列传第六十四

夫事人君能说主耳目和主顔色而获亲近非独色爱能亦各有所长作佞幸列传第六十五

不流世俗不争势利上下无所凝滞人莫之害以道之用作滑稽列传第六十六

齐楚秦赵为日者各有俗【索隐按日者传亡无以知诸国之俗今褚先生唯记司马季主之事也】所用欲循【集解徐广曰一作总】观其大旨作日者列传第六十七

三王不同龟四夷各异卜【索隐其书既亡无以知其异今褚少孙唯取太卜占龟之杂说词甚烦芜不能剪裁妄加穿凿此篇不才之甚也】然各以决吉凶畧闕其要作龟策列传第六十八

布衣匹夫之人不害於政不妨百姓取与以时而息财富智者有采焉作货殖列传第六十九

维我汉继五帝末流接三代统业周道废秦拨去古文焚灭诗书故明堂石室金匱玉版【集解如淳曰刻玉版以为文字】图籍散乱於是汉兴萧何次律令韩信申军法张苍为章程【集解如淳曰章历数之章术也程者权衡丈尺斛斗之平法也瓚曰茂陵书丞相为工用程数其中言百工用材多少之量及制度之程品者是也】叔孙通定礼仪则文学彬彬稍进诗书往往间出矣自曹参荐盖公言黄老【索隐盖姓也音古盍反】而贾生晁错明申商公孙弘以儒显百年之间天下遗文古事靡不毕集太史公太史公仍父子相续纂其职曰於戏余维

先人尝掌斯事显於唐虞至于周复典之故司马氏世主天官【索隐案此天官非周礼冢宰天官乃广知天文星历之事天官且迁实黎之後而黎氏後亦摠称重黎以重本司天故太史公代掌天官盖天官统太史之职言史是历代之职恐非实事然卫宏以为司马氏周史佚之後故太史谈云余之先人周之太史盖或得其实也】至於余乎钦念哉钦念哉罔罗天下放失旧闻【索隐案旧闻有遗失放逸者网罗而考论之】王迹所兴原始察终见盛观衰论考之行事畧推三代録秦汉上记轩辕下至于兹着十二本纪既科条之矣并时异世年差不明作十表【索隐案并时则年历差殊则亦畧言难以明辨故作表】礼乐损益律历改易兵权山川鬼神【索隐案兵权即兵书也迁没之後亡褚少孙以律书补之今律书亦畧言兵也山川即河渠书也鬼神即封禪书也故云山川鬼神也】天人之际承敝通变作八书二十八宿环北辰三十辐共一轂【集解駰案汉书音义曰象黄帝已下三十世家老子言车三十辐运行无穷以象王者如此也正义顔云此说非也言衆星共绕北辰诸辐咸归车羣臣尊辅天子也】运行无穷辅拂股肱之臣配焉忠信行道以奉主上作三十世家扶义俶傥不令已失时立功名於天下【索隐已音纪言扶义倜傥之士能立功名於当代不後於时也】作七十列传凡百三十篇五十二万六千五百字为太史公书序【索隐桓谭云迁所着书成以示东方朔朔皆畧曰太史公则谓太史公是朔称亦恐其说未实盖迁自尊其父着述称之曰公或云迁外孙杨惲所称事或当尔也】畧以拾遗补艺【集解李奇曰六艺也索隐汉书作补阙此作艺谓补六艺之阙也】成一家之言厥协六经异传【索隐迁言以所撰取协於经异传诸家之说耳谦不敢比经艺也异传者如子夏易传毛公诗及韩婴外传伏生尚书大传之流者也】整齐百家杂语【正义太史公撰史记言其协於六经异文整齐诸子百家杂说之诘谦不敢比经艺也异传谓如丘明春秋外传国语子夏易传毛公诗传韩诗外传伏生尚书大传之流也】藏之名山副在京师【索隐言正本藏之书府副本留京师也穆天子传云天子北征至于羣玉之山河平无险四彻中绳先王所谓策府郭璞云古帝王藏策之府则北谓藏之名山是也】俟後世圣人君子【索隐此语出公羊传言失子制春秋之义以俟後圣君子以君子之为亦有乐乎此也】第七十【集解駰案卫宏汉书旧仪注曰司马迁作景帝本纪极言其短及武帝过武帝怒而削去之後坐举李陵降匈奴故下迁蚕室有怨言下狱死】太史公曰余述历黄帝以来至大初而讫百三十篇【集解駰案汉书音义曰十篇缺有録无书张晏曰迁没之後已景纪武纪礼书乐书兵书汉兴以来将相年表日者列传三王世家龟策列传傳斬蒯成列传元成间褚先生补缺作武帝纪三王世家龟策日者列传言辞鄙陋非迁本意也索隐案景纪取班书补之武纪专取封禪书礼书取荀卿礼论乐书取礼乐记兵书亡不补畧述律而言兵遂分历述以次之三王系家空取其策文以续此篇何率畧且重非当日者不能记诸国之同异而论司马季主龟策直太卜所得占龟兆杂说而无笔削功何茆鄙也】

【索隐述赞曰太史良才实纂先德周游历览东西南北事核词简是称实録报任投书申李下狱惜哉残缺非才莫续】

史记卷一百三十

史记卷一百三十考证

太史公自序其在卫者相中山集解徐广曰名喜也○吕氏春秋司马喜难墨者师於中山王前

以传劔论显集解晋灼曰史记吴起赞曰非信仁廉勇不能传劔论兵书也○序传作不能传兵论劔与晋灼所引互异必有一误

蒯瞶玄孙邛为武信君将集解徐广曰张耳传云武臣自号武信君○刘敞汉书刊误曰此言当始皇时为武信君将则武信君非武臣也项梁亦号为武信君然皆非始皇时

使人俭而善失真○董份曰墨者俭是矣若名家言俭似不可晓盖此乃检字因上有俭字写者遂误耳解曰检者法也又曰检者束也下文苛察繚绕即检束之意也

而太史公遭李陵之祸正义太史公举李陵李陵降也○董份曰李陵之祸谓陵降而太史公救之帝怒下蚕室也

大臣洞疑索隐洞是洞達意共所疑○董份曰洞字恐是恫字盖传写之误耳今索隐释为洞達既洞達矣又何疑乎

间不容翮忽○困学纪闻曰出曾子天圆章阎若璩曰曾子云其间不容髮

申吕肖矣集解徐广曰肖音瘡瘡犹衰微○顾炎武曰肖乃削字脱其旁耳与孟子鲁之削也滋甚义同徐广注以为瘡者非是【臣照】按古时字少或瘡削俱书肖字未可定也

庄王之贤乃复国陈正义楚庄王都陈○余有丁曰楚庄克陈以申叔之功而复之故曰复国陈

壮有溉○凌稚隆曰以上文长孺推之则下壮字疑当作庄此郑名也溉字下又疑有阙文

史记卷一百三十考证

补史记序

钦定四库全书

补史记序

司马贞

太史公古之良史也家承二正之业人当五百之运兼以代为史官亲掌图籍慨春秋之絶笔伤旧典之阙文遂乃错综古今囊括记录本皇王之遗事采人臣之故实爰自黄帝迄於汉武历载悠邈旧章罕补渔猎则穷於百氏笔削乃成於一家父作子述其勤至矣然其叙劝褒贬颇称折衷後之作者咸取则焉夫以首创者难为功因循者易为力自左氏之後未有体制而司马公补立纪传规模别为书表题目莫不本纪十二象岁星之一周八书有八篇法天时之八节十表放刚柔十日三十世家比月有三旬七十列传取悬车之暮齿百三十篇象闰余而成岁其间礼乐刑政君举必书福善祸淫用垂炯诫事广而文局词质而理畅斯亦尽美矣而有未尽善者具如後论虽意出当时而义非经远盖先史之未备成後学之深疑借如本纪叙五帝而阙三皇世家载列国而有外戚邾许春秋次国略而不书张吴敌国蕃王抑而不载并编録有阙窃所未安又列传所着有管晏及老子韩非管晏乃齐之贤卿即如其例则吴之延陵郑之子产晋之叔向卫之史鱼盛德不阙何为盖阙伯阳清虚为教韩子峻刻制法静躁不同德刑斯舛今宜柱史共漆园同传公子与商君并列可不善欤其中远近乖张词义踳驳或篇章倒错或赞论麤?盖由遭逢非罪有所未暇故十篇有録无书是也然其网络古今叙述惩劝异左氏之微婉有南史之典实所以扬雄班固等咸称其有良史之才盖信乎其然也後褚少孙亦颇加补缀然犹未能周备贞业谢颀门人非博古而家传是学颇事讨论思欲续成先志润色旧史辄黜陟升降改定篇目其有不备并采诸典籍以补阙遗其百三十篇之赞记非周悉并更申而述之附于衆篇之末虽曰狂简必有可观其所改更具条于後至如徐广唯略出音训兼记异同未能考核是非解释文句其裴駰实亦後进名家博采羣书专取经传训释以为集解然则时有冗长至於盘根错节残缺纰缪咸拱手而不言斯未可谓通学也今辄按古今仍以裴为本兼自见愚管重为之注号曰小司马史记然前朝顔师古止注汉史今并谓之顔氏汉书贞虽位不逮顔公既补史旧兼下新意亦何让焉

补史记序

补史记

钦定四库全书

补史记

唐国子博士弘文馆学士司马贞补撰并注

三皇本纪

【太史公作史记古今君臣宜应上自开辟下迄当代以为一家之首尾今阙三皇而以五帝为首者正以大戴礼有五帝德篇又帝系皆叙自黄帝以下故因以五帝本纪为首其实三皇已还载籍罕备然君臣之始教化之先既论古史不合全阙近代皇甫谧作帝王世纪徐整作三五历皆论三皇已来事斯亦近古之一证今并采而集之作三皇本纪虽复浅近聊补阙云】

太皞庖牺氏风姓代燧人氏继天而王母曰华胥履大人迹於雷泽而生庖牺於成纪蛇身人首【按伏牺风姓出国语其华胥以下出帝王世纪然雷泽泽名即舜所渔之地在济陰成纪亦地名按天水有成纪县】有圣德仰则观象於天俯则观法於地旁观鸟兽之文与地之宜近取诸身远取诸物始画八卦以通神明之德以类万物之情造书契以代结绳之政於是始制嫁娶以俚皮为礼【按譙周古史考伏牺制嫁娶以俚皮为礼也】结网罟以教佃渔故曰宓牺氏【按事出汉书历志宓音伏】养牺牲以庖厨故曰庖牺有龙瑞以龙纪官号曰龙师作三十五弦之瑟木德王注春令故易称帝出乎震月令孟春其帝太皞是也【按位在东方象日之明故称太皞皞明也】都於陈东封太山立百一十一年崩【按皇甫谧伏牺葬南郡或曰冢在山阳高平之西也】其後裔当春秋时有任宿须句颛臾皆风姓之胤也女媧氏亦风姓蛇身人首有神圣之德代宓牺立号曰女希氏无革造惟作笙簧【按礼明堂位及世本皆云女媧作簧】故易不载不承五运一曰女媧亦木德王盖宓牺之後已经数世金木轮环周而复始特举女媧以其功高而充三皇故频木王也当其末年也诸侯有共工氏任智刑以强霸而不王以水乘木乃与祝融战不胜而怒乃头触不周山崩天柱折地维缺女媧乃鍊五色石以补天断鳌足以立四极聚芦灰以止滔水以济冀州【按其事出淮南子也】於是地平天成不改旧物女媧氏没神农氏作【按三皇记者不同譙周以燧人为皇宋均以祝融为皇而郑玄依春秋纬以女媧为皇承伏牺皇甫谧亦同今依之为说也】炎帝神农氏姜姓母曰女登有媧氏之女为少典妃感神龙而生炎帝人身牛首长於姜水因以为姓【按国语炎帝黄帝皆少典之子其母又皆有媧氏之女据诸子及古史考炎帝之後凡八代五百余年轩辕氏代之岂炎帝黄帝是昆弟而同母氏乎皇甫谧以为少典有媧氏诸侯国号然则姜姬二帝同出少典氏黄帝之母又是神农母氏之後代女所以同是有媧氏之女也】火德王故曰炎帝以火名官斲木为耜揉木为耒耒耨之用以教万人始教耕故号神农氏於是作蜡祭以

赭鞭鞭草木始尝百草始有医药又作五弦之瑟教人日中为市交易而退各得其所遂重八卦为六十四爻初都陈後居曲阜【按今淮阳有神农井又左传鲁有大庭氏之库是也】立一百二十年崩葬长沙神农本起烈山故左氏称烈山氏之子曰柱亦曰厉山氏礼曰厉山氏之有天下是也【按郑玄云厉山神农所起亦曰有烈山皇甫谧曰厉山今随之厉乡也】神农纳奔水氏之女曰听訖为妃生帝哀哀生帝克克生帝榆罔凡八代五百三十年而轩辕氏兴焉【按神农之後凡八代事见帝王世纪及古史考然古典亡矣况谯皇二氏皆前闻君子考按古书而为此说岂至今凿空乎此纪亦据以为说其易称神农氏没即榆罔犹袭神农之号也】其後有州甫甘许戏露齐纪怡向申吕皆姜姓之後并为诸侯或分四岳当周室甫侯申伯为王贤相齐许列为诸侯霸於中国盖圣人德泽广大故其祚胤繁昌久长云一说三皇谓天皇地皇人皇为三皇既是开辟之初君臣之始图纬所载不可全弃故兼序之天地初立有天皇氏十二头澹泊无所施为而俗自化木德王岁起摄提兄弟十二人立各一万八千岁【盖天地初立神人首出行化故其年世长久也然言十二头者非谓一人之身有十二头盖古质比之鸟兽头数故也】地皇十一头火德王姓十一人兴於熊耳龙门等山亦各万八千岁人皇九头乘云车驾六羽出谷口兄弟九人分长九州各立城邑凡一百五十世合四万五千六百年【天皇已下皆出河图及三五历也】自人皇已後有五龙氏【五龙氏兄弟五人并乘龙上下故曰五龙氏也】燧人氏【按其君钻木出火教人熟食在伏羲氏前谯周以为三皇之首也】大庭氏栢皇氏中央氏卷须氏栗陆氏骊连氏赫胥氏尊卢氏浑沌氏昊英氏有巢氏朱襄氏葛天氏陰康氏无怀氏斯盖三皇已来有天下者之号【按皇甫谧以为大庭已下一十五君皆袭庖牺之号事不经见难可依从然按古封太山者首有无怀氏乃在太昊之前岂得如谧所说】但载籍不纪莫知姓王年代所都之处而韩诗以为自古封太山禪梁甫者万有余家仲尼观之不能尽识管子亦曰古封太山七十二家夷吾所识十有二焉首有无怀氏然则无怀之前天皇已後年纪悠邈皇王何昇而告但古书亡矣不可备论岂得谓无帝王耶故春秋纬称自开辟至於获麟凡三百二十七万六千岁分为十纪凡世七万六百年一曰九头纪二曰五龙纪三曰摄提纪四曰合雒纪五曰连通纪六曰序命纪七曰修飞纪八曰圃提纪九曰禪通纪十曰流讫纪盖流讫当黄帝时制九纪之间是以録於此补纪之也

补史记

史记正义论例謚法解列国分野

钦定四库全书

史记正义论例謚法解列国分野

唐诸王侍读率府长史张守节上

论史例

古者帝王右史记言左史记事言为尚书事为春秋太史公兼之故名曰史记并采六家杂说以成一史备论君臣父子夫妻长幼之序天地山川国邑名号殊俗物类之品也太史公作史记起黄帝高阳高辛唐尧虞舜夏殷周秦讫于汉武帝天汉四年合二千四百一十三年作本纪十二象岁十二月也作表十象天之刚柔十日以记封建世代终始也作书八象一岁八节以记天地日月山川礼乐也作世家三十象一月三十日三十辐共一毂以记世祿之家辅弼股肱之臣忠孝得失也作列传七十象一行七十二日言七十者举全数也余二日象闰余也以托王侯将相英贤略立功名於天下可序列也合百三十篇象一岁十二月及闰余也而太史公作此五品废一不可以统理天地劝獎箴戒为後之楷模也

论注例

史记文与古文尚书同者则取孔安国注若与伏生尚书同者则用郑玄王肃马融所释与三传同者取杜元凯服虔何休贾逵范甯等注与三礼论语孝经同者则取郑玄马融王肃之注与韩诗同者则取毛传郑笺等释与周易同者则依王氏之注与诸子诸史杂书及先儒解释善者而裴駟并引为注又徐中散作音训校集诸本异同或义理可通者称一本云又一本云自是别记异文裴氏亦引之为注也

论字例

史汉文字相承已久若悦字作说闲字作闲智字作知汝字作女早字作蚤後字作后既字作漑勅字作飭制字作制此之般流缘古少字通共用之史汉本有此古字者乃为好本程邈变篆为隶楷则有常後代作文随时改易卫宏官书数体吕忱或字多奇鍾王等家以能为法致令楷文改变非复一端咸着秘书传之历代又字体乖日久其黼黻之字法从𠂔【丁履反】今之史本则有从端【音端】秦本纪云天子赐孝公 邹诞生音甫弗而邹氏之前史本已从端矣如此之类并即依行不可更改若其鼃鼃从龟辞从舌觉学从与泰恭从小匱匠从走巢藻从果耕籍从禾席下为带美下为火哀下为衣极下为点析旁着片恶上安西餐侧出头离边作禹此之等类例直是讹字宠【勅勇反】锡为錫【音阳】以支【章侈反】代文

【问分反】将无混无若兹之流便成两失

论音例

史文与传诸书同者刘氏并依旧本为音至如太史公改五帝本纪便章百姓便程东作便程南譌便程西成便在伏物咸依见字读之太史变尚书文者义理特美或训意改其古涩何烦如刘氏依尚书旧音斯例盖多不可具録着在正义随文音之君子宜详其理庶明太史公之達学也然则先儒音字比方为音至魏秘书孙炎始作反音又未甚切今并依孙反音以传後学郑康成云其始书之也仓卒无字或以音类比方假借为之趣於近之而已受之者非一邦之人其乡同言异字同音异於兹遂生轻重讹谬矣然方言差别固自不同河北江南?为钜异或失在浮清或帶於重浊今之取舍冀除兹弊夫质有精麤谓之好恶【并如字】心有爱憎称为好恶【并去声】当体则为名誉【音预】情乖则曰毁誉【音余】自坏【乎怪反】坏彻【上音怪】自断【徒缓反自去离也】刀断【端管反以刀割令相去也】耶【也奢反未审之辞也】也【亦且反助句之语也】复【音伏又扶富反重也】过【古卧反越度也】解【核买反自散也】间【纪菟反隙也】畜【许又反】畜【许六反养也】先【苏前反】仙【屑然反】尤【羽求反】侯【胡沟反】治持【并音直之反】之【止而反】脂砥祗【并音旨夷反】惟维遗唯【并音以位反】怡贻颐诒【并音与之反】夷寅彝嬖【并音以脂反】私【息脂反】绥虽睢菱【并音息遗反】偲司伺丝【并音巨支反】扈枝祗肢【并音章移反】祗歧【并音巨支反】其期旗碁蹠【并音渠之反】祈颀旗几畿【并音渠希反】僖熙嬉嘻【并音许其反】希曦晞稀【并音虚几反】霏妃菲駢【并音芳非反】飞非扉【并音匪肥反尸】屍著【并音式脂反】诗【书之反】巾【居人反】斤筋【举欣反】篇偏【并音芳连反】穿【详连反】里李里【并音良止反】至贄【并音脂利反】志【之吏反】利涖【并音力至反】吏【力置反】寺嗣饲【并音辞吏反】字牴【并音疾置反】自【疾二反】置致蹠鷃【并音陟利反】器【去冀反】气【去既反】亟【去吏反】冀概【几利反】既【居未反】覆【敷救反又敷福反】副【敷救反】富馥【并音府副反】若斯清浊实亦难分博学硕材乃有甄异此例极广不可具言庶後学士幸留意焉

音字例

文或相似音或有异一字单録乃恐致疑两字连文检寻稍易若音上字言上别之所音下字乃复书下有长句在文中须音则题其字

发字例

古书字少假借盖多字或数音观义点发皆依平上去入若发平声每从寅起又一字三四音者同声异唤一处共发恐难辨别故略举四十二字如字初音者皆为正字不须点发

畜【许六反养也又许救反六畜也又他六反聚也】从【讼容反随也又纵容反南北长也

又但容反又子勇反相劝也又从用反侍从也又足用反恣也】数【色具反历数术数也又色五反次第也又色角反频也】传【逐恋反书传也又逐全反相付也又张恋反驿也】卒【子律反卒终也又苍忽反急也尊忽反兵人也字体各别不辨故发之也】辟【君也徵也又频亦反罪也开也疋亦反邪也又疋?反谕也又音避隐也又普覓反辟历也】施【书移反张也又式?反与也又羊?反延也】间【纪闲反隙也又纪菟反间也又菟间反静也】射【蛇夜反射也又成亦反音石】夏【胡马反禹号也又胡嫁反春夏也又格雅反阳夏县也】复【符富反重也又音伏反也又音福除役也】重【直拱反尊也直龙反叠也又直用反累也】适【圣石反寛也之也又丁历反大也又张革反责也又音敌当也】汜【音祀水在成皐又音凡邑名在襄城又孚劒反为水在定陶高帝即位处也又音夷楚人呼土桥为汜】乐【音岳谓音乐也又音洛欢也又音五教反好也情愿也】覆【敷富反盖也又敷福反再也】恐【曲用反疑也又丘拱反惧也】恶【乌各反麤也又乌路反憎也又音乌谓於何也】断【端管反有物割截也又段缓反自相分也又端乱反断疑事也】解【佳买反除结缚也又核买反散也又佳债反怠堕也又核诈反缝解】几【音机庶几也又音祈近也又音记亦冀望字也又音纪录也】过【光卧反度也罪过也又音戈经过也度前也】率【所律反平例也率伏也又音类也又音刷徐广云率即歛也又音色类反将帅也】屈【立勿反曲也又君勿反姓也又羣勿反尽也强也】上【时让反位也元在物之上又时掌反自下而上】王【于方反人主也又于放反霸王也又盛也】长【直良反久也又张丈反长上也】籍【才昔反名籍也又荐籍也又租夜反即借也】培【勃回反补也又蒲内反板也】胜【音升又式证反】难【乃丹反艰也乃旦反危也】使【所里反又所吏反】相【息羊反又息匠反】沈【针甚反又针禁反又直今反又沈禁反厌没也】任【入今反又入禁反】棺【音官又古玩反又古患反歛之也】造【曹早反七到反至也】妻【七低反切帝反】费【非味反用也又音秘邑也扶味反姓也】

諡法解

惟周公旦太公望开嗣王业建功于牧野终将葬乃制諡遂叙諡法諡者行之迹号者功之表【古者有大功则赐之善号以为称也】车服者位之章也是以大行受大名细行受细名行出於已名生於人【名谓号諡】

民无能名曰神【不名一善】

一德不懈曰简【一不委曲】

靖民则法曰皇【靖安】

平易不訾曰简【不信訾毁】

德象天地曰帝【同於天帝】

尊德贵义曰恭【尊事贤人宠贵义士】

仁义所往曰王【民往归之】

敬事供上曰恭【供奉也】

立志及衆曰公【志无私也】

尊贤敬让曰恭【敬有德让有功】

执应八方曰侯【所执行八方应之】

既过能改曰恭【言自知】

赏庆刑威曰君【能行四者】

执事坚固曰恭【守正不移】

从之成羣曰君【民从之】

爱民长弟曰恭【顺长接弟】

扬善赋简曰圣【所称得人所善得实所赋得简】

执礼御宾曰恭【迎待宾也】

敬宾厚礼曰圣【厚於礼】

芘亲之阙曰恭【修德以益之】

照临四方曰明【以明照之】

尊贤让善曰恭【不专己善推於人】

谮诉不行曰明【逆知之故不行】

威仪悉备曰钦【威则可畏仪则可象】

经纬天地曰文【成其道】

大虑静民曰定【思树惠】

道德博闻曰文【无不知】

纯行不爽曰定【行一不伤】

学勤好问曰文【不耻下问】

安民大虑曰定【以虑安民】

慈惠爱民曰文【惠以成政】

安民法古曰定【不失旧意】

愍民惠礼曰文【惠而有礼】

辟地有德曰襄【取之以义】

赐民爵位曰文【与同升】

甲冑有劳曰襄【亟征伐】

绥柔士民曰德【安民以居安土以事】

小心畏忌曰僖【思所当忌】

刚强直理曰武【刚无欲强不屈怀忠恕正曲直】

质渊受谏曰厘【深故能爱】

谏争不威曰德【不以威拒谏】

有罚而还曰厘【知难而退】

威强敌德曰武【与有德者敌】

温柔贤善曰懿【性纯淑】

克定祸乱曰武【以兵往故能定】

心能制义曰度【制事得宜】

刑民克服曰武【法以正民能後服】

聪明叡哲曰献【有通知之聪】

夸志多穷曰武【大志行兵多所穷极】

知质有圣曰献【有所通而无蔽】

安民立政曰成【政以安定】

五宗安之曰孝【五世之宗】

渊源流通曰康【性无忌】

慈惠爱亲曰孝【周爱族亲】

温柔好乐曰康【好丰年勤民事】

秉德不回曰孝【顺於德而不违】

安乐抚民曰康【无四方之虞】

協时肇厚曰孝【協合肇始】

合民安乐曰康【富而教之】

执心克庄曰齐【能自严】

布德执义曰穆【故穆穆】

资辅就共曰齐【资辅佐而共成】

中情见貌曰穆【性公露】

甄心动惧曰顷【甄精】

容仪恭美曰昭【有仪可象行恭可美】

敏以敬慎曰顷【疾於所慎敬】

昭德有劳曰昭【能劳谨】

柔德安衆曰靖【成衆使安】

圣闻周達曰昭【圣圣通合】

恭己鲜言曰靖【恭己正身少言而中】

治而无眚曰平【无灾罪也】

寬乐令终曰靖【性寬乐义以善自终】

执事有制曰平【不任意】

威德刚武曰圉【御乱患】

布纲治纪曰平【施之政事】

弥年壽考曰胡【久也】

由义而济曰景【用义而成】

保民耆艾曰胡【六十曰耆七十曰艾】

耆意大虑曰景【耆强也】

布义行刚曰景【以刚行义】

追补前过曰刚【劝善以补过】

清白守节曰贞【行清白执志固】

猛以刚果曰威【猛则少寬果敢行】

大虑克就曰贞【能大虑非正而何】

猛以强果曰威【强甚於刚】

不隐无屈曰贞【恒然无私】

强义执正曰威【问正言无私】

辟土服远曰桓【以武正定】

治典不杀曰祁【秉常不衰】

克敬动民曰桓【敬以使之】

大虑行节曰孝【言成其节】

辟土兼国曰桓【兼人故启土】

治民克尽曰使【克尽无恩惠】

能思辩衆曰元【别之使各有次】

好和不争曰安【生而少断】

行义说民曰元【民说其义】

道德纯一曰思【道大而德一】

始建国都曰元【非善之长何以始之】

大省兆民曰思【大亲民而不杀】

主义行德曰元【以义为主行德政】

外内思索曰思【言求善】

圣善周闻曰宣【闻谓所闻善事也】

追悔前过曰思【思而能改】

兵甲亟作曰庄【以数征为严】

行见中外曰愬【表里】

叡圉克服曰庄【通边圉使能服】

状古述今曰誉【立言之称】

胜敌志强曰庄【不挠故胜】

昭功寧民曰商【明有功者】

死於原野曰庄【非严何以死难】

克杀秉政曰夷【秉政不任贤】

屡征杀伐曰庄【以严厘之】

安心好静曰夷【不爽政】

武而不遂曰庄【武功不成】

执义扬善曰德【称人之善】

柔质慈民曰惠【知其性】

慈仁短折曰怀【短未六十折未三十】

爱民好与曰惠【与谓施】

述义不克曰丁【不能成义】

夙夜警戒曰敬【敬身急成】

有功安民曰烈【以武立功】

秉德尊业曰烈

合善典法曰敬【非敬何以善之】

刚克为伐曰翼【伐功也】

刚德克就曰肃【成其敬使为终】

思虑深远曰翼【小心翼翼】

执心决断曰肃【言严果】

外内贞复曰白【正而复始终一】

不生其国曰声【生於外家】

不勤成名曰灵【任本性不见贤思齐】

未家短折曰伤【未家未娶】

死而志成曰灵【志事不希命】

爱民好治曰戴【好民治】

死见神能曰灵【有鬼不为厉】

典礼不愆曰戴【无过】

乱而不损曰灵【不能以治损乱】

短折不成曰殤【有知而夭殤】

好祭鬼怪曰灵【渎鬼神不致远】

隐拂不成曰隐【不以隐括改其性】

极知鬼神曰灵【其智能聪彻】

不显尸国曰隐【以问主国】

见美坚长曰隐【美过其令】

杀戮无辜曰厉

官人应实曰知【能官人】

愎佞遂过曰刺【去谏曰愎反是曰佞】

肆行劳祀曰悼【放心劳於淫祀言不修德】

不思忘爱曰刺【忘其爱己者】

年中早夭曰悼【年不志】

蚤孤短折曰哀【蚤未知人事】

恐惧从处曰悼【从处言险圯】

恭仁短折曰哀【体恭质仁功未施】

凶年无谷曰荒【不务耕稼】

好变动民曰躁【数移徙】

外内从乱曰荒【家不治官不治】

不悔前过曰戾【知而不改】

好乐怠政曰荒【淫於声乐怠於政事】

怙威肆行曰丑【肆意行威】

在国遭忧曰愍【仍多大丧】

壅遏不通曰幽【弱损不凌】

在国逢艱曰愍【兵寇之事】

蚤孤铺位曰幽【铺位即位而卒】

祸乱方作曰愍【国无政动长乱】

动祭乱常曰幽【易神之班】

使民悲伤曰愍【苛政贼害】

柔质爱谏曰慧【以虚受人】

贞心大度曰匡【心正而用察少】

名实不爽曰质【不爽言相应】

德正应和曰莫【正其德应其和】

温良好乐曰良【言其人可好可乐】

施勤无私曰类【无私唯义所在】

慈和徧服曰顺【能使人皆服其慈和】

思虑果远曰明【自任多近於专】

博文多能曰宪【虽多能不至於大道】

嗇於赐与曰爱【言贪恡】

满志多穷曰惑【自足者必不惑】

危身奉上曰忠【险不辞难】

思虑不爽曰厚【不差所思而得】

克威捷行曰魏【有威而敏行】

好内远礼曰炀【朋淫於家不奉礼】

克威惠礼曰魏【虽威不逆礼】

去礼远衆曰炀【不率礼不亲长】

教诲不倦曰长【以道教之】

内外宾服曰正【言以正服之】

肇敏行成曰直【始疾行成言不深】

彰义揜过曰坚【明义以盖前过】

疏远继位曰绍【非其第过得之】

华言无实曰夸【恢诞】

好廉自克曰节【自胜其情欲】

逆天虐民曰抗【背尊大而逆之】

好更改旧曰易【变故改常】

名与实爽曰缪【言名美而实伤】

爱民在刑曰克【道之以政齐之以刑】

择善而从曰比【比方善而从之】

除残去虐曰汤

隐哀也景武也施德为文除恶为武辟地为襄服远为桓刚克为僖施而不成为宣惠无内德为平乱而不损为灵由义而济为景余皆象也【以其所为谥象其行事】和会也勤劳也尊修也爽伤也肇始也怙恃也享祀也胡大也秉顺也就是会也锡与也典常也肆放也康虚也叡圣也惠爱也绥安也坚长也耆强也考成也周至也怀思也武法也布施也敏疾也速也载事弥文以前周书谥法周代君王并取作谥故全写一篇以传後学

列国分野

汉书地理志云本秦京师为内史【顔师古云京师天子所居畿内也秦并天下改立郡县而京畿所统时号内史言其在内以别於诸郡守也百官表云内史周官秦因之掌治京师景帝二年分置左内史右内史武帝太初元年更名京兆尹左内史名冯翊主爵中尉秦官掌列侯景帝六年更名都尉武帝太初元年更名右扶风治内史与左冯翊京兆尹是为三辅也】

秦地於天官东井舆鬼之分埜其界自弘农故关以西京兆扶风冯翊北地上郡西河安定天水陇西南有巴蜀广汉犍为武都西有金城武威张掖酒泉敦煌又西南有?牁越嶲益州

魏地觜觿参之分埜其界自高陵以东尽河东河内南有陈留及汝南之召陵?强新汲西华长平颍川之舞阳鄢陵河南之开封中牟阳武酸枣卷【卷去权反】

周地柳七星张之分埜今之河南洛阳谷城平陰偃师巩缙氏

韩地角亢氐之分堊韩分晋得南阳郡及颍川之父城定陵襄城颍阳颍陰长社阳翟郟东接汝南西接弘农得新安宜阳郟今河南之新郑及成臯荥阳颍川之崇高城阳

赵地昂毕之分堊赵分晋得赵国北有信都真定常山又得涿郡之高阳莫州乡东有广平钜鹿清河河间又得渤海郡之东平舒中邑文安东州成平章武河以北也南至浮水繁阳内黄斥丘西有太原定襄云中五原上党

燕地尾箕之分堊召公封於燕後三十六世与六国俱称王东有渔阳右北平辽西辽东西有上谷代郡鴈门南有涿郡之易容城范阳北有新成故安涿县良乡新昌及渤海之安次乐浪玄菟亦宜属焉

齐地虚危之分堊东有菑川东莱琅邪高密胶东南有泰山城阳北有千乘清河以南渤海之高乐高城重合阳信西有济南平原

鲁地奎娄之分堊东至东海南有泗水至淮得临淮之下相睢陵僅取虑

宋地房心之分堊今之沛梁楚山阳济陰东平及东郡之须昌壽张今之睢阳

卫地营室东壁之分堊今之东郡及魏郡之黎阳河内之野王朝歌

楚地翼轸之分堊今之南郡江夏零陵桂阳武陵长沙及汉中汝南郡後陈鲁属焉

吴地斗牛之分堊今之会稽九江丹阳豫章庐江广陵六安临淮郡

粤地牵牛婺女之分堊今苍梧鬱林合浦交址九真南海日南

【以前是战国时诸国界域及相侵伐犬牙深入然亦不能委细故畧记之用知大畧】

史记正义论例列国分野

尚书臣张照谨言司马迁绍春秋作史记後世史家奉为鼻祖焉顾其书前後重复互异甚多读者举矛刺盾往往而是原其所以盖有三焉一曰春秋之义信以传信疑以传疑子曰吾犹及史之阙文夫与其过而弃之无宁过而存之一事而传闻异辞则并举而互见不敢以己之臆横断往古之人迁之慎也一曰迁武帝之臣也则如所称今上本纪者固宜有録无书其他文字叙至迁作史记时而止者其文字似未了而义已了後人不知妄为增益於是金鑰莫辨所为褚先生者固不足以述迁之绪况又未必皆褚先生为之所以血杂乱而无章也一曰迁之为史祖述春秋顾春秋之义微矣迁岂能仿佛万一哉其体例实迁草创其为言述古讽今不专为一代之史与後代史家专叙一代者不同且非易代而为之其所笔削即本朝之事也固不得不以微辞见指而後世或懵焉以为有阙遗而转增益之或失其指趣而妄加非议有

是三者是以读史记之难异於他史我

皇上稽古右文命【臣】等考订前史而重刊之以嘉惠後

学【臣】等学殖荒落何足仰副

明诏谨就所闻诸师友见诸传记者为之考证以附卷

後其间都有侍从燕闲得闻

天语讲论【臣】辄剽窃入书以幸士林其注有三曰集解曰索隐曰正义世固皆无全本就世所传本博考而详校之盖比明监本增什之六然犹未全也其於已刊之後复搜得之者则又见於考证中以补其遗顾三注文字益多舛讹虽据所见闻稍加驳正入於考证然不能无罣漏也要之校明监本则不可同年语矣【臣】照谨识